


Tnúhu ní cáháⁿ yă
ndiŏxí xito cùu uú



New Testament in Mixtec, Peñoles (MX:mil:Mixtec, Peñoles)

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec, Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

SAN MATEO	1
SAN MARCOS	67
SAN LUCAS	107
SAN JUAN	170
LOS HECHOS	213
ROMANOS	270
1 CORINTIOS	296
2 CORINTIOS	323
GÁLATAS	340
EFESIOS	349
FILIPENSES	358
COLOSENSES	364
1 TESALONICENSES	370
2 TESALONICENSES	375
1 TIMOTEO	378
2 TIMOTEO	386
TITO	391
FILEMÓN	394
HEBREOS	396
SANTIAGO	417
1 PEDRO	423
2 PEDRO	430
1 JUAN	435
2 JUAN	441
3 JUAN	442
JUDAS	443
APOCALIPSIS	445

TNÚHU NÍ CHÍDÓ TNÙNÍ TÉ MÀTEÚ

Nchaa cue téé ní xíndecu ndéé sanaha cùtnàhá vátá quíxí-gǎ Xítóhó Jesucristú (Lc. 3:23-38)

¹ Te ñaní tnáhá Xítóhó Jesucristú ní cuu ndíi Dàvíí ndíi ndíi Àbrahám, cue téé ní xíndecu ndéé sanaha vǐhi-gǎ ñuyíú-a. Te duha ndúu cuendá dava-gǎ cue téé ní cuu ñaní tnáhá-gǎ ní xíndecu ndéé sanaha.

² Ndíi Àbrahám ní xóo ìḡ déhe ndíi, te ndíi-án ñí xínani ndíi Isàác. Te déhe ndíi Isàác-án ñí cuu ndíi Jàcób, te déhe ndíi Jàcób-án ñí cuu ndíi Jùdá, te diu-ni ndíi Jàcób-án ñí cuu tǎtá dava-gǎ cue ñaní ndíi Jùdá-án. ³ Te déhe ndíi Jùdá-án ndíi ñadìhí ndíi, ndíi Tàmár ní cuu ndíi Fàrés ndíi ndíi Zàrá. Te déhe ndíi Fàrés-án ñí cuu ndíi Èsróm, te déhe ndíi Èsróm-án ñí cuu ndíi Àrám. ⁴ Te déhe ndíi Àrám-án ñí cuu ndíi Aminàdáb, te déhe ndíi Aminàdáb-án ñí cuu ndíi Nàsón, te déhe ndíi Nàsón-án ñí cuu ndíi Sàlmón. ⁵ Te ñadìhí ndíi Sàlmón-án ñí xínani-aⁿ Ràháb, te ní xóo ìḡ déhe-yu ní xínani-dě Bòóz. Te ñadìhí ndíi Bòóz-án ñí xínani-aⁿ Rùt, te ní xóo ìḡ déhe-yu ní xínani-dě Òbéd, te déhe ndíi Òbéd-án ñí cuu ndíi Isàí. ⁶ Te déhe ndíi Isàí-án ñí cuu ndíi Dàvíí téé ní xíndaha ñàha xii cue ñáyiú isràèl. Te déhe ndíi Dàvíí-án ndíi ñadìhí ndíi ní cuu ndíi Salòmón. Te díhna-gǎ ndíi Ùriás ní cándeca ndíi ñadìhí-án te dǎtnùní ní naqueheⁿ ñàha ndíi Dàvíí-án.

⁷ Te déhe ndíi Salòmón ní cuu ndíi Ròboám, te déhe ndíi Ròboám-án ñí cuu ndíi Àbíás, te déhe ndíi Àbíás-án ñí cuu ndíi Àsá. ⁸ Te déhe ndíi Àsá-án ñí cuu ndíi Josàfát, te déhe ndíi Josàfát-án ñí cuu ndíi Jòrám, te déhe ndíi Jòrám-án ñí cuu ndíi Ùziás. ⁹ Te déhe ndíi Ùziás-án ñí cuu ndíi Jòtám, te déhe ndíi Jòtám-án ñí cuu ndíi Àcáz, te déhe ndíi Àcáz-án ñí cuu ndíi Ezèquiás. ¹⁰ Te déhe ndíi Ezèquiás-án ñí cuu ndíi Manàsés, te déhe ndíi Manàsés-án ñí cuu ndíi Àmón, te déhe ndíi Àmón-án ñí cuu ndíi Jòsiás. ¹¹ Te déhe ndíi Jòsiás-án ñí cuu ndíi Jecòniás. Te diu-ni

ndíi Jòsiás-án ñí cuu tǎtá nchaa dava-gǎ cue ñaní ndíi Jecòniás-án. Te dàvá-án ñí quide yica cuè téé ñuú Babiloniá ndécá-güedě ñáyiú isràèl cuáhán ñuú-güedé cuendá yàcáⁿ cundecú-yu.

¹² Te sátá ñí yáha ducaⁿ ñí cuu, te ndíi Jecòniás ní xóo ìḡ déhe ndíi ndíi ñadìhí ndíi, te téé-án ñí xínani-dě Salàtiél. Te déhe ndíi Salàtiél-án ñí cuu ndíi Zorobàbél. ¹³ Te déhe ndíi Zorobàbél-án ñí cuu ndíi Àbiúð, te déhe ndíi Àbiúð-án ñí cuu ndíi Eliàquím, te déhe ndíi Eliàquím-án ñí cuu ndíi Àzór. ¹⁴ Te déhe ndíi Àzór-án ñí cuu ndíi Sàdóc, te déhe ndíi Sàdóc-án ñí cuu ndíi Àquím, te déhe ndíi Àquím-án ñí cuu ndíi Èliúð. ¹⁵ Te déhe ndíi Èliúð-án ñí cuu ndíi Eleàzár, te déhe ndíi Eleàzár-án ñí cuu ndíi Mátán, te déhe ndíi Mátán-án ñí cuu ndíi Jàcób. ¹⁶ Te déhe ndíi Jàcób-án ñí cuu ndíi Chèé téé ní cuu yḡ tá Màriá xíchí ñí cuu nǎná Jèsús Yaa ní tendaha Dütú Ndiõxí ní quixi ñuyíú-a.

¹⁷ Te sa ní cuu úxúú tnáhá cue téé cùu ñaní tnáhá ndíi Àbrahám ndécú dàvá-án, te dǎtnùní ní cacu ndíi Dàvíí diu-ni ñaní tnáhá ndíi. Te núú tnáhá méé ndíi Àbrahám ndíi ndíi Dàvíí ní cuu úxícúmí tnáhá-güedé. Te ducaⁿ te sa ní xínu úxícúmí-gǎ tucu-güedé ní cacu, te dǎtnùní ní tniḡ ñàha cuè téé ñuú Babiloniá xii ñáyiú isràèl ndécá ñàha-güedé xii-yu cuáhán ñuú-güedé cuendá yàcáⁿ cundecú-yu. Te sátá ñí yáha sá dúcáⁿ ñí cuu, te ní cacu úxúní tucu cue téé ní cuu ñaní tnáhá ndíi Àbrahám ndíi ndíi Dàvíí, te dǎtnùní ní cacu Xítóhó Jesucristú ñuyíú-a. Te núú tnáhá méé-gǎ ní cuu úxícúmí tnáhá-güedé.

Ní cacu Jèsús

(Lc. 2:1-7)

¹⁸ Te duha ní cuu cùtnàhá ní cacu Xítóhó Jesucristú, chí dàvá-án ñí xíndecu ìḡ xíchí cuéchí ñí xínani Màriá. Te xíchí-ǎⁿ sa ní cundáá tnúhu sá tnǎndaha-xi ndíi ìḡ téé nǎni Chèé. Te cùmání-gǎ tnǎndaha-xi ndíi téé-án te Espíritú Yá Ndiõxí ní quide ní ngúhuⁿ déhe-xi. ¹⁹ Te té Chèé téé cuíni cándeca ñàha xii xíchí-ǎⁿ ñí cutnùní iní-dé sá ñúhú déhe-xi. Te cùu-dé ìḡ téé quide ndáá, núu xíáⁿ duuⁿ duuⁿ ní sani iní-dé sá vǎ tnǎndaha-gǎ-dé ndíi-xi, te dícó-ni sá ñà túú ní càháⁿ-dé chí ní cuíni-dé sá vǎ càháⁿ cuèhé càháⁿ duha ñáyiú cuendá-xi. ²⁰ Te sátá dúcáⁿ ñí sani iní-dé te ní ngáva-dé ní

xidí-dé, te núú sàní-dé ní sáháⁿ ìⁿ espíritú xínú cuèchi núú Yă Ndiöxí ní xáhaⁿ-xi xii-dé:

—Yòhó té Chèé téè cùu ñaní tnáhá ndĩ Dàvíí, yúhú càchí tnúhu-í xii-n sã ñà túú nã cani iní-n, tnãndaha nahi-ni-n ndĩhi tá Màriá cuèi ñùhu déhe-xi, chi mee Espíritú Yă Ndiöxí ní quide-xi ducaⁿ nĩ ngúhuⁿ déhe-xi. ²¹ Te na càcu déhe-xi-áⁿ te danàni-n-dé Jèsús. Te ducaⁿ cùnani-dé, chi téé-áⁿ cada-dé cuendá sá vã cúndècu-gá cue ñaní tnáhá-dě ñáyíu isràél ichi cuèhé ichi duha —duha ní xáhaⁿ espíritú-áⁿ xii té Chèé-áⁿ núú sàní-dé.

²² Te ducaⁿ nĩ cuu chi ní quee ndáá-xi nàcuáa ní xáhaⁿ Yă Ndiöxí xii ìⁿ téé ní cáháⁿ tnúhu-gá ndéé sanaha. Te téé-áⁿ nĩ chídó tnùní-dé núú tütú-gá nàcuáa ní xáhaⁿ-gã xii-dé, te duha ní xáhaⁿ-gã:

²³ Cundecu ìⁿ xíchí cuèchí ndéé cuèé-gá.

Te òré ndécú ìí-xi vátá ñihí-gá yì-xi te ngúhuⁿ déhe-xi.

Te òré ná cãcú dèhe-xi te danàni ñahá-yu Emànuél.

Duha ní xáhaⁿ-gã xii téé-áⁿ nĩ chídó tnùní-dé núú tütú-gá. Te tnúhu Emànuél-áⁿ quèé-xí: Yă Ndiöxí ndécú ndĩhi-o. Núu xiãⁿ ducaⁿ nĩ cuu vitna.

²⁴ Te òré ní ndiquíú ìní té Chèé-áⁿ te ní quide-dé nàcuáa ní xáhaⁿ espíritú-áⁿ xii-dé chi ní tnãndaha-dé ndĩhi tá Màriá. ²⁵ Dico ndi díⁿ nĩ xíndecú-yu ndéé ní sáá nduu nĩ cacu déhe-xi. Te òré ní cacu déhe-xi-áⁿ te ní dánání ñaha-dé Jèsús.

2

Cue téé cuángoto ñaha xii Jesús

¹ Te Jèsús ní cacu-gá ìⁿ ñuú nání Bèlén, te ñuú-áⁿ yíndèhu-xi distritú Jùdeá. Te dàvá-áⁿ cùnùu té Hèrodés yíndaha-dé ñáyíu. Te ñuú Jerusalén ní quexìo cue téé véxi ndàa xio nacuáa quène nchíanchii, cue téé túha dàcuaha cuendá nchaa sá ndéé andíu. ² Te ndùcu tnúhu-güedé núú ñáyíu ñuú-áⁿ, te xáhaⁿ-güedé:

—¿Vá cúndèe iní-ndó càchí tnúhu-ndo ndéé ndécú téè quíndaha ñaha xii ñáyíu isràél-áⁿ? Chi ní xiní-ndí ní quene chódíní-dě ndàa xio nacuáa quène nchíanchii, núu xiãⁿ véxi-ndí chi cuíní-ndí quiní-ndí-dé te

chiñuhu-ndí-dé —càchí-güedé xáhaⁿ-güedé xii-yu.

³ Te òré ní níhí téè cùnùu nani Herodés tnúhu sá ndúcú tnúhu cue téé-áⁿ ndéé ndécú téè quíndaha ñaha xii ñáyíu isràél, te ñá túú tnáhí ní cùu váha iní-dé, te diu-ni ducaⁿ ñà túú ní cùu váha iní tnáhá nchaa ñáyíu ñuú-áⁿ. ⁴ Te ní cana-dé cue téè cùu dútú cùnùu, ndĩhi cue téè dàcuaha ñaha xii ñáyíu nchaa tnúhu ní chídó tnùní ndíi Moisés, te ní xicáⁿ tnúhú-dě núú-güedé núu xiní-güedé ndéé cacu Cristú téè tendaha Yă Ndiöxí quixi ñuyíú-a. ⁵ Te ní xáhaⁿ-güedé xii-dé:

—Ìⁿ ñuú yíndèhu distritú Jùdeá cacu-dé, te ñuú-áⁿ nání-xí Bèlén, chi quee ndáá-xi nàcuáa ní xáhaⁿ Yă Ndiöxí xii ìⁿ téé ní xóo cáháⁿ tnúhu-gá ndéé sanaha. Te duha ndùu tnúhu ní chídó tnùní-dé núú tütú-gá:

⁶ Ñuú Bèlén cúú-xí ìⁿ ñuú líhli yíndèhu distritú Jùdeá, te ío-gá cùnùu-xi dacúxí dàva-gá ñuú cùnùu yíndèhu distritú-áⁿ,

chi diu ñuú-áⁿ quee ìⁿ téé ío cùnùu.

Te téè cunuu-áⁿ quíndaha-dě ñáyíu cùu cuendá-í ñáyíu isràél.

Duha ní xáhaⁿ-gã xii téé ní xóo cáháⁿ tnúhu-gá, te ducaⁿ nĩ chídó tnùní-dé núú tütú-gá —càchí-güedé xáhaⁿ-güedé xii té Hèrodés.

⁷ Te sátá dúcáⁿ te té Hèrodés dayuhu nĩ cana-dé cue téè ndùcu tnúhu núu ndéé ní cacu téè quíndaha ñaha xii ñáyíu isràél, te ní xicáⁿ tnúhú-dě núú-güedé ná nduu cùu-xi nduu díhna nuu nĩ xiní-güedé chódíní. ⁸ Te sátá dúcáⁿ te ní xáhaⁿ-dě xii-güedé:

—Chí cuáháⁿ ñuú Bèlén te nducu tnúhu váha-ndo núu ndéé ní cacu téè ducaⁿ quíndaha ñaha xii ñáyíu isràél. Te òré ná náníhí-ndó-dě te quixi-ndo càchí tnúhu-ndo cuendá quíhíⁿ-í tnáhá-í chiñuhu-í-dé —càchí-dé xáhaⁿ-dě xii-güedé.

⁹ Te sátá dúcáⁿ nĩ xáhaⁿ tẽ Hèrodés-áⁿ te ní xica-güedé cuáháⁿ-güedé. Te chódíní nĩ xiní-güedé ní quene ndàa xio nacuáa quène nchíanchii-áⁿ yòdo nuu-di núú-güedé cuáháⁿ. Te ní ngüíñí chódíní-áⁿ, te núú nĩ ngüíñí-di-áⁿ yíndáá núu ndécú Jèsús. ¹⁰ Te òré ní xiní cue téé-áⁿ nĩ ngüíñí chódíní-áⁿ núu yíndáá ndécú-gã, te ní cudíí víhí

iní-güedé. ¹¹ Te ducaⁿ te ní quexìo-güedé ndéé núú cáá vèhe ndecu Jesús. Te òré cuánguihu-güedé xítí vehe te ní xiní-güedé Jèsús ndécú-gă ndihi năná-gă Màriá. Te ní ngüíñí xítí-güedé, te ní ngüíta-güedé ní cachí-güedé sá ïo càhnu cuu Jesús. Te dătnùní ní nacaáⁿ-güedé càjá xĩnehe-güedé, te ní tava-güedé díhúⁿ cuaáⁿ, ndihi dúsa sá ïo váha sàháⁿ tnámí nàni insiensú, ndihi yúcú sá nání mĩrrá ní taxi ndecu-güedé núú Jèsús cuendá cuu-xi ïⁿ táhú sá cúú-xí-gă. ¹² Te Yá Ndiöxí ní cáháⁿ-gă núú sàní-güedé, te xăhaⁿ-gă xii-güedé sá vă nâyăha-gă-güedé cáháⁿ ndihi-güedé té Hèrodés. Núu xĩăⁿ cue téé-áⁿ cuănuhú-güedé ingá ichi, te ñá túú-gă ní nâyăha-güedé núú ndécú tē Hèrodés.

Cuáháⁿ-yu ndihi Jèsús nacióⁿ Ègiptú

¹³ Te sátá ñí yáha cuănuhú cue téé ní sângoto ñaha xii Jesús, te ní quexìo ïⁿ espíritú xínú cuèchi núú Yă Ndiöxí núú sàní té Chèé, te xăhaⁿ-xi xii-dé:

—Véxi-í càchí tnúhu-í xii-n să ndácóo-n, te ndee-n ñúú-a ndihi Jèsús, ndihi năná-gă cunu-ndo quĩhíⁿ-ndó nacióⁿ Ègiptú, chi té Hèrodés tendaha-dé cue téé quixi nanducu ñaha xii Jesús cuendá cahni ñaha-güedé. Te yacáⁿ cundecu-ndo ndéé cachí tnúhu-í xii-n ndúu ndixi-ndo —cachí espíritú-áⁿ xăhaⁿ-xi xii té Chèé núú sàní-dé.

¹⁴ Te té Chèé-áⁿ ñí ndacóo-dé, te niú ní xica-dé ndihi tá Màriá ndécă-yu Jèsús cuáháⁿ nacióⁿ Ègiptú. ¹⁵ Te nacióⁿ Ègiptú-áⁿ ndécú-yu ní xihí té Hèrodés. Te ducaⁿ ñí cuu chi ní quee ndáá-xi năcuáa ní cachí ïⁿ téé ní xóo cáháⁿ tnúhu Yá Ndiöxí ndéé sanaha ñí quide-dé núú-gă ní cáháⁿ-dé yuhu-gă, te duha ní xăhaⁿ-gă ní cáháⁿ-dé: “Nacióⁿ Ègiptú ndécú Dêhe-í ní cùu, te ní xăhaⁿ-í xii-dé sá ndéé-dé ñúú-áⁿ vă cundecu-gă-dé”, duha ní xăhaⁿ-gă xii téé ní cáháⁿ tnúhu-gă ní quide-dé núú-gă.

Té Hèrodés ní táuchúúⁿ-dē cahni-güedé cue landú

¹⁶ Te cue téé ní sângoto ñaha xii Jesús ní dándàhú-güedé té Hèrodés, chi ñá túú ní nâyăha-güedé cúñaha-güedé sá ñí nanihí-güedé Jèsús. Te sátá ñí cutnùní iní té Hèrodés sá ñí dándàhú ñáhă-güedé xii-dé te ní cudééⁿ vihí-dé, te ní tendaha-dé cue téé

cuáháⁿ ñúú Bèlén, ndihi nchaa dava-gă ñúú cáá yàtni xíaⁿ cuendá cahni-güedé mee-ni cuè landú téé. Te ndéé cue landú íchí ñí cacu, ndihi ndéé cue landú sa ní nútnahá úú cuía-xi nchaa-güexi cahni-güedé ní xăhaⁿ-dē. Te ducaⁿ ñí quide-dé chi ní quide cuendá-dé năcuáa ndúu tnúhu ní xăhaⁿ cuè téé ní sângoto ñaha xii Jesús ndúu ñí xiní-güedé chódíní, núu xĩăⁿ ducaⁿ ñí táuchúúⁿ-dē ní quide cue téé-áⁿ. ¹⁷ Te ducaⁿ ñí cuu chi ní quee ndáá-xi năcuáa ní cachí ndí Jeremiás téé ní xóo cáháⁿ tnúhu Yá Ndiöxí ndéé sanaha, te duha ní cachí ndí:

¹⁸ Ní tecú ndàhí vihí ñăyiu ñúú Rámá sá ndihú iní-yu,

te ñăyiu xĩndáhyú-áⁿ cúú-yu ñaní tnáhă tă Ràquél, te ndàhyú-yu cuendá sá ñí xihí déhe-yu.

Te ñăyiu-áⁿ ñà túú ní cuiní-yu dăñă-yu sá ndihú iní-yu cuendá sá ñí xihí déhe-yu.

Duha ní cachí ndí Jeremiás.

¹⁹ Te sátá ñí xihí té Hèrodés te ní sáháⁿ tucu espíritú xínú cuèchi núú Yă Ndiöxí núú sàní té Chèé òré ndécú-dé nacióⁿ Ègiptú, te ní xăhaⁿ-xi xii-dé:

²⁰ —Véxi tucu-í càchí tnúhu-í xii-n să ndácóo-n, te núhú-n ndihi Jesús ndihi năná-gă ñúú cue ñaní tnáhă-n ñăyiu isràél cundecu-ndo, chi sa ní xihí cue téé cuiní cahni ñaha xii Jesús ní cùu —cachí espíritú-áⁿ xăhaⁿ-xi xii té Chèé núú sàní-dé.

²¹ Te té Chèé-áⁿ ñí ndacóo-dé, te ní ndee-dé ndihi Jèsús ndihi năná-gă cuănuhú-yu ñúú cue ñăyiu isràél ñăyiu cùu ñaní tnáhă-yu. ²² Te té Chèé ní níhí-dé tnúhu sá tē Arquèlaú ní nucúnutnîi-dé núú tătá-dé té Hèrodés distrítú Jùdeá yíndàha-dé ñăyiu. Te ní yùhú té Chèé-áⁿ, te ñá túú ní cuiní-dé quĩhíⁿ-dé cundecu-dé distrítú-áⁿ. Te Yá Ndiöxí ní cáháⁿ-gă núú sàní-dé, te ní xăhaⁿ-gă xii-dé sá quĩhíⁿ-dé distrítú Galileá, núu xĩăⁿ yacáⁿ cuáhăⁿ-yu. ²³ Te òré ní quexìo-yu distrítú Galileá, te ní sáhăⁿ-yu ïⁿ ñúú nání Nàzarét ní xíndecú-yu. Te ducaⁿ ñí cuu chi ní quee ndáá-xi năcuáa ní cachí cue téé ní xóo cáháⁿ tnúhu Yá Ndiöxí ndéé sanaha sá Jèsús cuu-gă téé ñúú Nazàrét.

3

Té Juàá tée dàcuandute ñaha xii ñáyiu cãháⁿ-dé tnúhu Yá Ndiõxí xití yucu

(Mr. 1:1-8; Lc. 3:1-9, 15-17; Jn. 1:19-28)

¹ Te ní xica nduu sá dúcáⁿ ñi cuu, te tée ñani Juáá tée dàcuandute ñaha xii ñáyiu ní quexìo-dé yucu distritú Jùdeá cãháⁿ-dé tnúhu Yá Ndiõxí núú ñáyiu xití yucu-áⁿ. ² Te xãháⁿ-dë xii-yu:

—Chí dándixi túu iní sá ñà túú quide váha-ndo ndècu-ndo, te dañá-ndo nchàa ichi cuehé ichi duha, chi sa ní cuyatni nduu ndíhu ndaha ñaha Yá Ndiõxí xii-ndo —càchí-dé xãháⁿ-dë xii-yu.

³ Te ñi cuendá té Juáá-áⁿ ñi chídó tnùnì ndí Chàíá té ní xóo cãháⁿ tnúhu Yá Ndiõxí ndéé sanaha, te duha ndúu tnúhu ní chídó tnùnì ndí cuendá-dé:

Tècú cãháⁿ níhi ñiⁿ tée yíhi xití yucu, te càchí-dé:

“Chí dáñá nchàa ichi cuehé ichi duha ndècu-ndo, te tñi-ndo ichi váha,

Te ducaⁿ càda-ndo cuendá cundecu túha-ndo chí véxi Yaá ío cùnúu”, duha quesaha té-áⁿ.

Duha ndúu tnúhu ní chídó tnùnì ndí Chàíá-áⁿ cuendá té Juáá.

⁴ Te té Juáá-áⁿ ñi xóo cuihnu-dé dóo idi cãméyu, te ñiⁿ ñi ní cuu pãnú xití-dé, te ní xóo caxi-dé tíca làngóstá ndíhi ndudí ñúñú cuéchí. ⁵ Te ñáyiu ñúú Jerusalén, ndíhi ñáyiu nchaa ñúú yíndèhu distritú Jùdeá, ndíhi ñáyiu nchaa ñúú cáa yàtni yúte Jòrdán ní sáháⁿ-yu ní xíndedóho-yu ñacuáa ní cãháⁿ té Juáá. ⁶ Te ní ngúita-yu ní náhmá-yu nchaa cuéchi-yu núú Yá Ndiõxí. Te òré ducaⁿ ñi náhmá-yu te ní dàcuándute ñaha té Juáá xii-yu yúte Jòrdán.

⁷ Te vai cue tée cùu fariséu ndíhi cue tée cùu saducéu cuáháⁿ-güedé núú ndécú tẽ Juáá cuíní-güedé dàcuándute ñaha-dé xii-güedé. Te òré ní quexìo-güedé núú ndécú-dé, te ní xáhaⁿ-dë xii-güedé:

—¡Nchaa nchòhó cúu-ndó dàtná ñiⁿ cóo dëéⁿ chí ío cuihna ínì-ndó! ¿Te nása ní cuu núu tnàhá nchòhó ndúcú-ndó ñacuáa cada-ndo cácu nihnu-ndo núú tnúndòho cahnu vihi ta cuyatni ñaha xii-ndo véxi-í?

⁸ Te chí cáda váha vitna cundecu-ndo cuendá ducaⁿ cùtnuní sá ñi dáñá-ndó nchàa ichi cuehé ichi duha ndècu-ndo. ⁹ Te vá

càchí-ndó sã ío cãhnu cuu-ndo cuendá sá cúu-ndó ñani tnàhá ndí Abrahám. Chi cuéi ndéé yúu te ndacu Yá Ndiõxí ndada-gá ñáyiu te cúu-yu ñani tnàhá ndí Abrahám. ¹⁰ Te caá chí ndècu túha-xi sá quèhndé-xi nchaa yutnu sá dúcáⁿ ñà túú cãváha sávidí-xi-áⁿ, chí nchaa yutnu-áⁿ tẽhndé-xi te cuángèe-xi núú ñùhú càyú-xi. Te duha sãtnàhá-xi ndoho nchaa ñáyiu ñà túú quide váha-áⁿ chí nchaa ñáyiu ñà túú quide váha cùu-yu dàtná nchaa yutnu sá ñà túú cãváha sávidí-xi. ¹¹ Te ña càchí tnúhu ndáá-í xii-ndo sã yúhú dàcuándute-í mee-ni ñáyiu ní dáñá nchàa ichi cuehé ichi duha. Dico nchicúⁿ tucu íngá té véxi, te té-áⁿ taxi-dé Espiritú Yá Ndiõxí cundecu ndíhi-ndo. Te cùu-xi datná ñiⁿ ñuhú, chí ndada ndoo ndada nine-xi ínì-ndó. Te té-áⁿ ío-gá cùnúu-dé dàcúxí yúhú, chí yúhú cùu-í ñiⁿ té duuⁿ duuⁿ ñà túú tàu cuita nehe ni chàu-dé dico quide-í chiuⁿ-dé. ¹² Te té-áⁿ sa véxi túha-dé sá cáda dñiⁿ ñaha-dé xii-o dàtná quidé ñáyiu ndada ndoo triú, chí ñáyiu-áⁿ sa nèhe túha-ná-yu yaxíⁿ-yu òré náñani cuendá ndada ndoo-yu. Te òré ndádá ndòo-yu triú-áⁿ te dàquee dñiⁿ-yu mihi-xi, te tàxúha-yu mee-nã triú-áⁿ te sãhmí-yu mihi-xi-áⁿ. Te dàtná quidé-yu mihi triú-áⁿ ducaⁿ sãtnàhá-xi cada ñaha té-áⁿ xii nchaa ñáyiu ñà túú quide váha, chí daquihíⁿ ñáhá-dë xii-yu núú ñùhú núú càyú, te ñuhú-áⁿ ñà túú tnàhí ndàhvá —càchí-dé xãháⁿ-dë xii-güedé.

Sàndute Jesús

(Mr. 1:9-11; Lc. 3:21-22)

¹³ Te Jèsús ní quee-gá distritú Galiléa cuáháⁿ-gá yúte Jòrdán núú ndécú tẽ Juáá cuendá dàcuándute ñaha-dé xii-gá. ¹⁴ Te òré ní quexìo Jesús núú ndécú tẽ Juáá, te ña cuíní-dé dàcuándute ñaha-dé xii-gá ní cùu, te ní xáhaⁿ-dë xii-gá:

—Yúhú tàu-í sá dàcuándute ñaha-n xii-í, te ñà díú dà yúhú dàcuándute ñaha-í xii-n —càchí-dé xãháⁿ-dë xii-gá.

¹⁵ Te Jèsús ní xáhaⁿ-gã xii-dé:

—Queheⁿ dañá, chí dacuití xini ñuhu-xi ducaⁿ cada-o ñacuáa cundáá-ó núú Yá Ndiõxí —càchí-gá xãháⁿ-gã xii-dé.

Te té Juáá-áⁿ ñi sáháⁿ uuⁿ-dé tnúhu ní xáhaⁿ Jèsús xii-dé. ¹⁶ Te ní dàcuándute-dé

Jèsús. Te òré ní nene-gá xítí ndute te ní xiní-gá nchí andi, te ní quee Espíritú Yá Ndiöxí véxi cuuⁿ-xi ngúndecu ndihí ñaha-xi xii-gá, te dàtná cáá ìⁿ lómá cáá Espíritú-áⁿ véxi cuuⁿ-xi. ¹⁷ Te òré-áⁿ ní tecú ní cáháⁿ Yá Ndiöxí ndéé andi, te xáhaⁿ-gá xii Jèsús:

—Yòhó cúu-n Dèhe-í téé ío cùu iní-í te ío cùdí ìní ñàhà-í xii-n —càchí-gá xáhaⁿ-gá xii Jèsús.

4

Sácuíhná quidé yíca-xi cada Jesús sá ñà túú tàú-gá cada-gá ní cùu
(Mr. 1:12-13; Lc. 4:1-13)

¹ Te Espíritú Yá Ndiöxí ndécá-xí Jèsús cuáháⁿ ìⁿ xítí yucu cuendá yàcáⁿ cundecu tnaa-gá, te yàcáⁿ quexìo sácuíhná coto ndéé ñáhá-xí xii-gá te núu ndisa sá vǎ cádá-gá ìⁿ sá ñà túú tàú-gá cada-gá.

² Te Jèsús ñá ní xèxi-gá údico nduu údico niú, te ducaⁿ te dàtnùní ní xícáⁿ iní-gá caxi-gá. ³ Te sátá dúcáⁿ te ní quexìo sácuíhná quidé yíca-xi cada Jesús ìⁿ sá ñà túú tàú-gá cada-gá, te xáhaⁿ-xi xii-gá:

—Te núu ndisa sá cúu-n Dèhe Yá Ndiöxí te cúñaha xii yúú-a na ndùu-xi paá —càchí-xi xáhaⁿ-xi xii-gá.

⁴ Te Jèsús ní xáhaⁿ-gá xii-xi:

—Núú tütú Yá Ndiöxí càchí-xi: “Ñá díú mèe-ni paá candeca-xi iní ñáyiú ñuyú, chí tñhá nchaa tñúhu càháⁿ Yá Ndiöxí candeca-xi iní-yu”, duha càchí-xi núú tütú-gá —càchí-gá xáhaⁿ-gá xii-xi.

⁵ Te dàtnùní sácuíhná-áⁿ ndécá ñàha-xi xii-gá cuáháⁿ ñuú Jerusálén, te yàcáⁿ ní xáhaⁿ-xi xii-gá cuásaá-gá díquí véñúhu càhnu sá ío cùnuu núú ñáyiú isràél, ⁶ te dàtnùní ní xáhaⁿ tucu-xi xii-gá:

—Te núu ndisa cùu-n Déhe Yá Ndiöxí te cuandèe ndava núú ñúhú cuendá quee ndáá-xi nàcuáa càháⁿ-xi núú tütú-gá núú càchí-xi: “Yá Ndiöxí tendaha-gá cue espíritú xínú cuèchi núú-gá quixi-xi cuendá coto ñaha-xi xii-n, te núú ndáhá-xí càundodo-n cuendá sá vǎ dánicuèhé yúú sáhá-n”, duha càchí-xi núú tütú-gá —càchí sácuíhná-áⁿ xáhaⁿ-xi xii Jèsús.

⁷ Te Jèsús ní xáhaⁿ-gá xii-xi:

—Te càchí tucu-xi núú tütú Yá Ndiöxí: “Vá cání ìní-n còto ndéé-n Dütú Ndiöxí Yáá cúu Ndiöxí-n cuendá-ni sá cuíní-n

sǎ dácăcu nihnu ñaha-gá xii-n ìⁿ sá sání ìní-n càda-n”, duha càchí-xi núú tütú-gá —càchí-gá xáhaⁿ-gá xii-xi.

⁸ Te sácuíhná ndécá tucu-xi Jesús cuáháⁿ ìⁿ núú tìndúú dùcúⁿ, te uuⁿni ní dánèhé núú ñáhá-xí xii-gá nchaandi túhú nacióⁿ cáá ñuyú, ndihí nchaa sá vǎha ío ìⁿ ìⁿ nacióⁿ-áⁿ. ⁹ Te ní xáhaⁿ-xi xii-gá:

—Te núu yòhó ngüñí xítí-n núú-í chiñuhu ñaha-n xii-í ñá, te taxi cuendá-í nchaa sá ní dánèhé ñàhà-í-a cuu cuendá-n —càchí-xi xáhaⁿ-xi xii-gá.

¹⁰ Te Jèsús ní xáhaⁿ-gá xii-xi:

—Xocuñí yòhó sácuíhná núú ndécú-í-a, chí vá cúú càda-í nàcuáa càchí-n, chí núú tütú Yá Ndiöxí càchí-xi: “Chiñuhu-ndo Dütú Ndiöxí Yáá cúu Ndiöxí-ndó, te diu-ni-gá cada-ndo nchàa nacuáa càháⁿ-gá”, duha càchí-xi núú tütú-gá —càchí-gá xáhaⁿ-gá xii-xi.

¹¹ Te dàtnùní sácuíhná ní dáñá-xí Jèsús ní xica-xi cuáháⁿ-xi. Te sátá dúcáⁿ te ní quexìo cue espíritú xínú cuèchi núú Yá Ndiöxí ní xinu cuechi-xi núú Jèsús.

Distritú Galiléa ní chisaha Jèsús chiúⁿ ní táhú Tátá-gá Dütú Ndiöxí cada-gá
(Mr. 1:14-15; Lc. 4:14-15)

¹² Te òré ní níhí Jèsús tñúhu sá ní ngava té Juáá tée dàcuandute ñaha xii ñáyiú vecaá, te ní xica-gá cuáháⁿ-gá distritú Galiléa. ¹³ Te ní ñà túú ní xíndecu-gá ñuú Nazàrét, chí ní yáha-gá cuáháⁿ-gá ndéé ñuú Capèrnaúm yàcáⁿ ní xíndecu-gá, te ñuú-áⁿ cáá yàtni yuhu lagúná, te yatni xíaⁿ cáá ñuhu nani Zabulón, ndihí ñuhu nani Neftalí. ¹⁴ Te ducaⁿ ní cuu chí ní quee ndáá-xi nàcuáa ní chídó tñùní ndí Chàíá téé ní xóo cáháⁿ tñúhu Yá Ndiöxí ndéé sanaha núú tütú-gá núú càchí-xi:

¹⁵ Ñuhu nani Zabulón, ndihí ñuhu nani Neftalí, ñuhu-áⁿ yíndèhu-xi distritú Galiléa,

te xíaⁿ xíndecu cue ñáyiú ñá túú cùu ñáyiú isràél,

te càa-xi yatni yuhu lagúná te ndàa ingá xio yúte Jòrdán cúu-xí.

¹⁶ Te cue ñáyiú-áⁿ ndécú-yu ìⁿ núú néé chí ndécú-yu ichi cuèhé ichi duha,

te sáá nduu te cada iní-ndó sã ñáyiú-án
queé-yu núú ditó chi vá cundècu-gá-yu
ichi cuèhé ichi duha.

Te ñiú-ni ñáyiú-án cúú-yu ñáyiú ta xíta ni-
hnu duuⁿ cuáhán,

dico sáá nduu te vá cuíta nihnu-gá-yu.

Duha ní chídó tnùní ndíi núú tütú-gá.

¹⁷ Te dàvá-án ñi ngúíta Jèsús ní dánèhé-gá
ñáyiú, te ní xáhaⁿ-gá xií-yu:

—Chí dándixi túu iní sá ñà túú quide
váha-ndo ndècu-ndo te dañá-ndo ncháa
ichi cuèhé ichi duha, chi sa ní cuyatni
nduu ndíhu ndaha ñàha Yá Ndiöxí xii-ndo
—cächí-gá xáhaⁿ-gá xií-yu.

*Jèsús càháⁿ-gá cúmi tnàhá cue téé tnèi
cháca*

(Mr. 1:16-20; Lc. 5:1-11)

¹⁸ Te Jèsús ñúhú-gá ichi cuáhán-gá
tá yáha-gá yuhu làgúná Galileá, te ní
xiní-gá úú tnàhá cue téé xídáquèe-güedé
ñunu-güedé xití ndute tnèi-güedé cháca, chi
quití tnàhí-án cúú chiúⁿ-güedé tnèi-güedé-di.
Te ñiⁿ-dé nání-dě Xímú, àdi Pelú chi úú
diú-dé, te ñaní-dé cúú ñngá téé ndíhi-dé te
téé-án nání-dě Ndríxí. ¹⁹ Te Jèsús ní xáhaⁿ-gá
xii-güedé:

—Chí dáñá chiúⁿ quide-ndo-án te
quixi-ndo chitnahá ñáhá-ndó xii-í, te taxi-í
ñngá núú chiúⁿ cada-ndo chi quíhíⁿ-ndó
dàcaháⁿ-ndó ñáyiú cuendá tuha ñàhá-yu
xii-í —cächí-gá xáhaⁿ-gá xii-güedé.

²⁰ Te òré-ni-án ñi dáñá cuè téé-án
ñunu-güedé, te ní tuha-güedé Jèsús.

²¹ Te ní xica tucu Jèsús cuáhán-gá luha-gá,
te ní xiní tucu-gá úú-gá tnàhá cue téé
tnèi cháca. Te ñiⁿ téé-án nání-dě Jàcobó,
te ñaní-dé cúú ñngá téé ndíhi-dé te téé-án
nání-dě Juàá, te ndi ndúú-güedé cúú-güedé
déhe té Zebèdeú. Te xixínucóo-güedé
ndíhi tātá-güedé xití bàrcú xinatícu-güedé
ñunu-güedé, te Jèsús ní cana ñàha-gá
xii-güedé.

²² Te òré-ni-án ñi dándöo-güedé
bàrcú-güedé, ndíhi tātá-güedé, te ní tuha
ñàha-güedé xii-gá.

Jèsús dánèhé-gá cuèhé víhí ñáyiú

(Lc. 6:17-19)

²³ Te Jèsús tá xica ndodo-gá ñihí distritú
Galileá cuáhán tá dānehé-gá ñáyiú tnúhu

váha tnúhu sá sánú ìchi ñàha xií-yu nācuāa
ndíhu ndaha ñàha Yá Ndiöxí xií-yu. Te
ndi tnahá ñiⁿ ñiⁿ ñuú sàá-gá te ducaⁿ
cuānguihu-gá xití veñúhu dānehé-gá ñáyiú
tnúhu-án. Te ndi dííⁿ ndi dííⁿ núú cuèhé
tnàhá ñiⁿ ñiⁿ ñáyiú dico ncháa-ní-yu ta quide
tātna-gá cuáhán. ²⁴ Te ndéé ncháa ñáyiú
yíndehu distritú Síría ní níhí-yu tnúhu
ncháa nācuāa quide Jesús. Te ní queé-yu
ñuú-yu te ndécá-yu ncháa ñáyiú tnàhá ndi
dííⁿ núú cuèhé cuáhán núú ndécú Jèsús.
Te cuèi ñáyiú xiyihí, ndíhi ñáyiú ñá túú-gá
cāndá nihnu, ndíhi ñáyiú yihí ñàha espíritú
cūndihí yucu ñāvāha ndécá-yu cuáhán
núú-gá, te ncháa-yu ní quide tātna ñàha-gá
xií-yu. ²⁵ Te ío vāi ñáyiú ní chinchícúⁿ
ñáhá xii Jesús, chi ní chinchícúⁿ ñáhá ñáyiú
distritú Galileá, ndíhi ñáyiú ncháa ñuú
xindāa Dēcāpolís, ndíhi ñáyiú ñuú Jerusālén,
ndíhi cue ñáyiú ncháa ñuú yíndehu distritú
Júdeá, ndíhi ñáyiú xíndecu yatni yúte Jòrdán
ndāa xio quene nchicanhii.

5

*Jèsús núcöo-gá ñiⁿ núú tìndúú dánèhé-gá
ñáyiú*

¹ Te sātá ñi xiní Jèsús sá cuèhé víhí
ñáyiú nchícúⁿ ñáhá xii-gá, te ní xica-gá
cuāsaá-gá ñiⁿ núú tìndúú te xiáⁿ ñi ngóo-gá,
te cue téé xica cuu ndíhi-gá ní nadúcúⁿ ndéé
ñáhá-güedé xii-gá. ² Te ní ngúíta-gá dánèhé
ñáhá-gá xii-güedé ndíhi cue ñáyiú-án, te
xáhaⁿ-gá:

Cuendá ñáyiú ío váha táhú-xi

(Lc. 6:20-23)

³ —Váha táhú ncháa ñáyiú cùtnuní iní-xi
sá ío-gá cúmāñi-yu cudíú-yu núú Yá Ndiöxí,
chi ñáyiú-án nduu táhú-yu ndíhu ndaha
ñàha-gá xií-yu.

⁴ Váha táhú ncháa ñáyiú ndàhyú sá ndíhú
iní-yu, chi Yá Ndiöxí cuāñàha-gá tnúhu
ndee ñni cundecu ndíhi-yu.

⁵ Váha táhú ncháa ñáyiú ndàhú iní-xi, chi
ñáyiú-án nduu táhú-yu cundecú-yu ñiⁿ xichi
núú cuāñàha Yá Ndiöxí xií-yu.

6 'Váha táhú nchaa ñáyiú ío cuení cada nchaa nàcuáa càháⁿ Yá Ndiöxí, chi ñáyiú-áⁿ ío nduu vétú iní-yu.

7 'Váha táhú nchaa ñáyiú cùndahú iní tnàha ñáyiú-xi, chi ñáyiú-áⁿ ñu-ni ducaⁿ càda ñaha Yá Ndiöxí xií-yu cundàhú iní ñáhá-gã.

8 'Váha táhú nchaa ñáyiú ní nduu ndoo ní nduu nine iní-xi, chi cue ñáyiú-áⁿ nduu táhú-yu cundecú-yu ndihí Yá Ndiöxí.

9 'Váha táhú nchaa ñáyiú càháⁿ dóho tnàha ñáyiú-xi nàcuáa cundecu ndihí váha tnàhá-yu, chi cùtnuní sá ñáyiú-áⁿ cuú-yu déhe Yá Ndiöxí.

10 'Váha táhú nchaa ñáyiú ío ndòho ndecu ñuyíú-a sá cuendá sá quidě-yu nàcuáa càháⁿ Yá Ndiöxí, chi ñáyiú-áⁿ nduu táhú-yu ndihu ndaha ñaha-gá xií-yu.

11 'Te cùu-ndo ñáyiú ío váha táhú-xi te núu na cùcuèhé ñáhá ñáyiú, àdi cada úhú ñáhã-yu xii-ndo, àdi daciaa díquí ñáhã-yu nándi cuéchi neñúú xii-ndo sá cuendá-í.

12 Te òré ducaⁿ na càda ñahá-yu xii-ndo te cudíí víhí-ní iní-ndó cùndecu-ndo, chi ío váha càa sá ndécú àndi nduu táhú-ndó cùndecu ndihí-ndo nduu na saá-ndó yàcáⁿ cundecu-ndo, chi ñu-ni ducaⁿ ní xóo cada ñaha cué ñaní tnáhã-yu xii cue téé ní xóo càháⁿ tnúhu Yá Ndiöxí ní xíndecu ndéé sanaha.

*Cuendá ñíí ndihí cuendá ñuhú
(Mr. 9:50; Lc. 14:34-35)*

13 'Te nchòhó cada iní-ndó sá cúú-ndó dàtná ñíí cuendá ñuyíú-a. Te ñíí chi nándihí-xi dico núu na ndúu víxiⁿ-xi, te ñá túú-gã nándihí-xi chi dǎngoyo-ná-ó, te yáha ñáyiú xènihnú-yu. Te ducaⁿ sǎtnahá-xi cùu nchohó chi cùu-ndo datná ñíí vǎha te núu na càda váha-ndo, te núu vá càdá vǎha-ndo te quee tíhú-ndó.

14 'Te nchòhó cada iní-ndó sá cúú-ndó dàtná ñíí sá dáyèhé ndécú ñuyíú-a, chi sànu ichi-ndo ñáyiú ichi váha. Te nchòhó xíní-ndó sá nùu ñíí ñuú cáá ñíí núú tìndúú te vá cúú càchí-ó sá nguivǎha-xi. 15 Te ñá túú xíní-ó ñíí ñáyiú teñuhú-yu ñíí lìntérná te chiváha-yu xití ñíí càjá, chi tàxi ndecú-yu núú ñíí cuendá cutnùní núú nchàa ñáyiú ndècu vehe. 16 Te ducaⁿ càda nchohó cada váha-ndo dàtná quidé ñíí ñuhú dayèhe-xi

núú ñáyiú, te ducaⁿ quení ñáyiú nàcuáa quide-ndo ndecu-ndo, te tnàhá-yu cachí-yu sá ío càhnu cuu Dútú Ndiöxí Yaá cúú Tǎtá-ndó ndècu andiú chi quení-yu sá quidé vǎha-ndo ndècu-ndo.

Cuendá tnúhu ní chídó tnùní ndíi Moisés

17 'Te vá cání iní-ndó sá yǎhú véxi-í xocàni-í tnúhu ní chídó tnùní ndíi Moisés, te ní vǎ cání iní-ndó sá véxi-í xocàni-í tnúhu ní chídó tnùní cue téé ní xóo càháⁿ tnúhu Yá Ndiöxí ndéé sanaha, chi yǎhú véxi-í sá càdá-í nàcuáa càháⁿ nchaa tnúhu-áⁿ. 18 Te na càchí tnúhu ndáá-í xii-ndo sá tnúhu ní chídó tnùní ndíi Moisés ío ndáá càháⁿ-xi, chi dacuití cùu nchaa nacuáa càháⁿ-xi. Te yáchí-gá naa andiú ndihí ñuyíú dàcúúxí sá quée cáva ñíí tnúhu-áⁿ. 19 Núu xiáⁿ nchaa ñáyiú na càchí sá dává tnúhu ní chídó tnùní ndíi Moisés ñá túú xini ñuhu-xi chi ñá túú cùnuu-xi, te ñáyiú-áⁿ ñu-ni ducaⁿ dǎnehé-yu nchaa dava-gá tnàha ñáyiú-yu, te sá dúcáⁿ quidé-yu te vá cùnùu víhí-yu núú ndécú Yá Ndiöxí táxí tnùní-gá, chi cuú-yu dàtná ñíí ñáyiú nchìcúⁿ cuí-nǎ. Dico nchaa ñáyiú nchìcúⁿ nihnu quide nchaa nacuáa càháⁿ nchaa tnúhu-áⁿ, te ñu-ni ducaⁿ dǎnehé-yu nchaa dava-gá tnàha ñáyiú-yu, te ñáyiú-áⁿ ío cunùú-yu núú ndécú Yá Ndiöxí táxí tnùní-gá. 20 Te na càchí tnúhu-í xii-ndo sá ío xini ñuhu-xi cada-ndo nchaa nacuáa càháⁿ Yá Ndiöxí, te vá càdá-ndó dàtná xiquide cue téé dǎnehé ñáhá xii ñáyiú nchaa tnúhu ní chídó tnùní ndíi Moisés, ndihí dàtná xiquide cue téé cùu fariséú, chi núu na càda-ndo datná xiquide cue téé-áⁿ ñá, te vá ndúú táhú-ndó ndihu ndaha ñaha Yá Ndiöxí xii-ndo.

*Jèsús càháⁿ-gá cuendá ñáyiú cùdééⁿ
(Lc. 12:57-59)*

21 'Te nchòhó sa xíní-ndó sá ncháá ñáyiú ní cuu ñaní tnàhá-ndó ní xíndecu ndéé sanaha ní níhí-yu tnúhu sá vǎ cúú càhni-yu tnàha ñáyiú-yu, chi núu ducaⁿ na càdá-yu te nacháhu-yu cuéchi-yu. 22 Dico vitna na càchí tnúhu-í xii-ndo sá nùu ndédani càa-ndo na cudééⁿ-ndó nùú tnàha ñáyiú-ndo, te nacháhu-ndo sá dúcáⁿ quide-ndo, àdi núu na cùcuèhé-ndó-yu te núú chítú nùú tàcá cundáá cuéchi-ndo te núu ducaⁿ na càda-ndo, àdi núu nà cúu-ndo tnàha ñáyiú-ndo ñíí tnúhu véé víhi,

te cucuéchi vìhi xii-ndo chi quíhíⁿ-ndó núú ùhú núú ndàhú.

²³ Te xíãⁿ núu nchòhó òré ndécú ndìhi-ndo ìⁿ sá cuíní-ndó cuãha-ndo Yã Ndiõxí nduu táhú-gã, te òré cuáháⁿ-ndó cuãñaha-ndo xì-gá, te òré ní quexìo-ndo núú dúcáⁿ cuãñaha-ndo xì-gá sá ndúú táhú-gã, te ní ndacu iní-ndó sá ndécú ñáyiu ñá túú cùu váha iní ñáhá xì-ndo cuendá ìⁿ sá ñí cumání núú tnáhá-ndó. ²⁴ Te dàndóo-ndo sá dúcáⁿ nèhe-ndo cuáháⁿ nduu táhú Yã Ndiõxí, te díhna-gá quíhíⁿ-ndó nàcaháⁿ cáhnú ìní tnáhá-ndó ndìhi ñáyiu ñá túú cùu váha iní ñáhá xì-ndo-áⁿ, te dàtnùní ducaⁿ te quíhíⁿ-ndó cuãha-ndo Yã Ndiõxí sá ndúú táhú-gã.

²⁵ Te núu ió ìⁿ-ndo ñí sáháⁿ ñáyiu núú tée cùchiuⁿ ní sacáⁿ cuéchi-yu cuendá-ndó cuendá ìⁿ sá ñí quide-ndo, te òré ní naníhí tnáhá-ndó ndìhí-yu cuáháⁿ-ndó núú tée cùchiuⁿ-áⁿ, te nacáháⁿ cáhnú ìní tnáhá-ndó ndìhí-yu cuendá sá vã cuãha cuendá ñáhá-gã-yu xii-ndo núú tée cùchiuⁿ, chi núu ducaⁿ na càdá-yu te tée cùchiuⁿ-áⁿ cuãha cuendá ñáhá-dě xii-ndo núú cuè tée cùu poleciá, te cue tée-áⁿ chihi ñaha-güedé vecaá xii-ndo. ²⁶ Te na càchí tnúhu ndáá-í xii-ndo sã vã càcu-ndo te núu na ngàva-ndo vecaá ndéé nacháhu-ndo nchàa sá tàú-ndó.

Cuendá cue ñáyiu ñá túú quide váha

²⁷ Te nchòhó sa xìní-ndó nàcuáa ndùu tnúhu ní cáháⁿ cue tée ní xíndecu ndéé sanaha, te duha ní cachí-güedé: “Nchaa cue tée vá cúú cãháⁿ ndìhi-güedé ñadìhí te núu ñá díú ñadìhí-güedé cúú-yu, te diu-ni ducaⁿ tùcu nchaa cue ñáyiu dìhí vá cúú cãháⁿ ndìhí-yu tée te núu ñá díú yí-yu cùu-güedé”, duha ní cachí-güedé. ²⁸ Dico yúhú càchí tnúhu-í xii-ndo sã nděda-ni càa cue tée na cundehe ìⁿ ñadìhí te núu na càni iní-güedé cundecu díí ìní-güedé ndìhí-yu te cada iní-ndó sã dàtná sá sã ní cáháⁿ ndìhi ñaha-güedé xii-yu sá dúcáⁿ ní sani iní-güedé.

²⁹ Te núu ìⁿ xio tinùu-ndo quide-xi quide-ndo nándi sá cuèhé sá dúhá te tava-ndo, chi váha-gá sá ná cuíta te ñá díú ñihí ní ndúú yíquì cuñú-ndó quíhíⁿ-xi núú ùhú núú ndàhú. ³⁰ Te núu ìⁿ xio ndaha-ndo quide-xi quide-ndo nándi sá cuèhé sá dúhá

te quehndé-ndó, chi váha-gá sá ná cuíta ìⁿ xio ndaha-ndo te ñá díú sá ñihí ní ndúú yíquì cuñú-ndó quíhíⁿ-xi núú ùhú núú ndàhú.

Jèsús càháⁿ-gá cuendá cue ñáyiu dàña tnaha

(Mt. 19:9; Mr. 10:11-12; Lc. 16:18)

³¹ Te nchòhó sa nàha tucu-ndo nacúaa ní cáháⁿ tucu cue tée ní xíndecu ndéé sanaha, te duha ní cachí-güedé: “Te núu ìⁿ tée na dàña tnaha-dé ndìhi ñadìhí-dé, te xìni ñuhu-xi cadúha-dé ìⁿ tutú cuãñaha-dě núú càháⁿ-xi sá ñí dáña ñaha-dé”, duha ní cachí-güedé. ³² Dico yúhú càchí tnúhu-í xii-ndo sã cúú dàña ìⁿ tée ñadìhí-dé, te núu cùtnuní ndáá iní-dé sá càháⁿ ndìhi-aⁿ ingá tée. Dico núu ñá túú dùcaⁿ quide-aⁿ te ñá túú ndùu váha-xi dañá ñaha-dé. Te núu ñá túú dùcaⁿ quide ñadìhí-dé, te cada iní-ó sã mée-dě ní sanu ichi ñaha-dě xii-aⁿ cáháⁿ ndìhi-aⁿ ingá tée te núu na dàña ñaha-dé. Te tée na nàqueheⁿ ñaha xii ñaha ní dáña ñaha yí-xi-áⁿ, te diu-ni ñá túú ní quide váha-dé sá dúcáⁿ ní naqueheⁿ-dè ñaha-áⁿ.

Ñáyiu càcunehe ñaha xii Yã Ndiõxí cuendá cutnùní iní tnaha ñáyiu-yu sá ndáá cadá-yu ìⁿ sá sání iní-yu cadá-yu

³³ Te sa nàha tucu-ndo nacúaa ní cáháⁿ tucu cue tée ní xíndecu ndéé sanaha, chi cue tée-áⁿ ñí cachí-güedé: “Te núu càcunehe-ndo Yã Ndiõxí núú tnaha ñáyiu-ndo nàcuáa cutnùní iní-yu sá ndáa cada-ndo ìⁿ sá sání ìní-ndó càda-ndo, te cada-ndo”, duha ní cáháⁿ dóho tnaha-güedé. ³⁴ Dico yúhú càchí tnúhu-í xii-ndo sã ñà túú ñá càcunehe-ndo sã ndáa cada-ndo ìⁿ sá sání ìní-ndó càda-ndo. Te ñí vã càcú nèhe-ndo andiù chi yàcáⁿ cúú-xí núú núcõo Yã Ndiõxí táxí tnùní-gá. ³⁵ Te ñí vã càcú nèhe-ndo ñuyíú-a, chi tnáhá ñuyíú-a ndècu-gá, te ñí vã càcú nèhe-ndo ñúú Jerusàlén chi ñúú-áⁿ cúú cuendá-gá, te diu-gá cúú-gã Yaá ío cùnuu. ³⁶ Te ñí vã càcú nèhe-ndo díquí-ndó chi nàha-ndo sá ñí ìⁿ idi díquí-ndó ñã ndácú-ndó ndàda cuixíⁿ-ndó àdi ndada tnuu-ndo. ³⁷ Te váha-gá sá núu ìⁿ sá sání ìní-ndó càda-ndo, te cachí-ni-ndo: “Cuu cada-ndí, àdi vá cúú càda-ndí”, cachí-ni-ndo. Chi nchaa dava-gá sá chídó-ndó càháⁿ-ndó òré ducaⁿ

sàni iní-ndó càda-ndo ìⁿ sá cádá-ndó cùu-xi sá dácàhu iní ñáhá yùcu ñávàha.

Cuèndá ñáyiu nàchinaa sá quidé ñaha tnaha ñáyiu-xi
(Lc. 6:29-30)

³⁸ Te sa nàha tucu-ndo nacuáa ní cáháⁿ tucu cue téé ní xíndecu ndéé sanaha, chi cue téé-áⁿ ñí cachí-güedé: “Ñáyiu na càda ñaha tnaha ñáyiu-xi ìⁿ sá ñà túú vâha, te nanchòcáva-yu nachinaá-yu sá ñí quide ñaha tnaha ñáyíu-yu”, duha ní cachí-güedé. ³⁹ Dico yúhú càchí tnúhu-í xii-ndo sá ñà túú nã cada-ndo nchàa cue ñáyiu cuihna iní-xi te núu quide ñahá-yu ìⁿ sá ñà túú vâha xii-ndo. Te núu ní canihá-yu ìⁿ xito te cuini tucú-yu canihá-yu ingá xito te dañá-ndo na canihá-yu. ⁴⁰ Àdi ní sacáⁿ cuéchi-yu núu cuè téé cùchiuⁿ cuendá-ndó, te cuini-yu quendeé-yu dúhnú-ndó te dañá-ndo na canehé-yu quíhíⁿ, te tnàhá-ni dóó ndíxí ndòdo-ndo dañá-ndo na canehé-yu quíhíⁿ. ⁴¹ Te núu quide yicá-yu caca-ndo dàtná úú kilómetrú cuido-ndo ndàchiúⁿ-yu ña, te chido-ndo úú-gá tucu kilómetrú cuido-ndo ndàchiúⁿ-yu. ⁴² Te núu ió ìⁿ sá xicáⁿ-yu núú-ndó te cuañaha-ndo, àdi ió ìⁿ sá sánúú-yu núú-ndó te cuañaha nùu-ndo.

Cuu iní-ó nchàa ñáyiu cùu úhú iní ñáhá xii-o
(Lc. 6:27-28, 32-36)

⁴³ Te sa nàha tucu-ndo nacuáa ní cachí tucu cue téé ní xíndecu ndéé sanaha, chi cue téé-áⁿ ñí cachí-güedé: “Cuu iní-ndó cuè ñáyiu ndècu ndíhi váha-ndo, te cuu úhú iní-ndó cuè ñáyiu cùu úhú iní ñáhá xii-ndo”, duha ní cachí-güedé. ⁴⁴ Dico yúhú càchí tnúhu-í xii-ndo sá cúú ìní-ndó cuè ñáyiu cùu úhú iní ñáhá xii-ndo, te cáháⁿ váha-ndo cuèndá cue ñáyiu càháⁿ úhú ñáhá xii-ndo, te cada-ndo sá vâha sá cúú-xí cuè ñáyiu cùu úhú iní ñáhá xii-ndo, te cáháⁿ ndíhi-ndo Yá Ndiòxí cuèndá cue ñáyiu xícuèhé ñáhá xii-ndo, ndíhi cuèndá cue ñáyiu quide úhú ñáhá xii-ndo. ⁴⁵ Te núu na càda-ndo nchaa nacuáa càháⁿ-í-a, te ducaⁿ te cutnùní sá cúú-ndó dèhe Tātá-ndó Dútú Ndiòxí Yaá ndécú àndiu. Te diu-gá cúú-gá Yaá quidé quène nchíanchii, te diu-ni-gá cúú-gá Yaá dácùuⁿ dáú ñuyíuⁿ-a, te ducaⁿ quide-gá cuèndá cuu-xi sá vâha

sá cúú-xí cuè ñáyiu quide váha, ndíhi sá cúú-xí cuè ñáyiu ñá túú quide váha. ⁴⁶ Te núu nchòhó ná cúú ìní-ndó mèe-ni ñáyiu na cùu iní ñáhá xii-ndo, te vá càchí-ndó sá Yá Ndiòxí taxi-gá sá ndúú tãhú-ndó sá dúcáⁿ quide-ndo, chi cuèi cue téé cuihna iní-xi quide cobrá ñáhá xii cue ñáyiu cuèndá impuèstú ducaⁿ xíquide-güedé. ⁴⁷ Te núu mee-ni ñáyiu ndècu ndíhi váha-ndo ïo váha cáháⁿ ndíhi-ndó-yu, te vá càchí-ndó sá ïo váha quide-ndo sá dúcáⁿ quide-ndo, chi cuèi ndéé nchaa ñáyiu ñá túú xini dana cuèndá Yá Ndiòxí ducaⁿ xíquide-yu. ⁴⁸ Te duha ndúu tnúhu càháⁿ-í cuèndá sá nchòhó cada ndáá-ndó cùndecu-ndo datná quidé ndáá méé Tātá-ndó Dútú Ndiòxí Yaá ndécú àndiu –duha ní dánèhé ñáhá Jèsús xii cue téé xica cuu ndíhi-gá ndíhi nchaa ñáyiu.

6

Jèsús dánèhé-gá ñáyiu nàcuáa cada-yu sá vâha

¹ Te Jèsús ndécú-ni-gã dánèhé-gá cue téé xica cuu ndíhi-gá ndíhi nchaa ñáyiu, te xãháⁿ-gã:

–Te òré quidé-ndó sá vâha te vá cádá-ndó núú ñáyiu cuèndá-ni sá cuini-ndó cáháⁿ váha-yu cuèndá-ndó, chi núu núú ñáyiu ducaⁿ na càda-ndo te Dútú Ndiòxí Yaá cúú Tātá-ndó vâ táxi-gã sá ndúú tãhú-ndó. ² Te xíãⁿ núu nchòhó òré chindèe-ndo ñáyiu ndàhú, te vá cùñaha-ndo xii cue ñáyiu sá chindèe-ndo cue ñáyiu ndàhú-áⁿ dàtná xíquide cue ñáyiu dandahú méé-xí sá quidé ndáá te ñá ndáá sá quidé ndáá-yu, chi ñáyiu-áⁿ ducaⁿ xíquide-yu òré sãháⁿ-yu veñúhu, chi dàtecú tnúhu-yu nchaa ñáyiu òré ducaⁿ chindeé-yu ñáyiu ndàhú. Te diu-ni ducaⁿ quidé-yu xãháⁿ-yu xii cue ñáyiu sá chindèe-yu cue ñáyiu ndàhú-áⁿ nchaa núu xicá cùu-yu, te ducaⁿ xíquide-yu cuèndá cuini-yu cáháⁿ váha ñáyiu cuèndá-yu. Te yúhú na càchí tnúhu ndáá-í xii-ndo sá ñà túú nã nduu tãhú ñáyiu-áⁿ núú Yá Ndiòxí sá dúcáⁿ quidé-yu chi mee-ni núú tnàha ñáyíu-yu cùdiú-yu. ³ Te nchòhó òré chindèe-ndo ñáyiu ndàhú, te cuèi ñáyiu ío-gá váha ndècu ndíhi-ndo dico vá cùñaha-ndo sá dúcáⁿ chindee-ndo cue ñáyiu ndàhú-áⁿ, te ni cuè dava-gá ñáyiu vá cùñaha-ndo. ⁴ Chi váha-gá sá iní

mée-ní-ndó ná cùhuⁿ sá dúcáⁿ chindee-ndo cue ñáyiú ndàhú-áⁿ. Te núu ducaⁿ na càda-ndo ña, te Dútú Ndiöxí Yaá cúú Tātá-ndó tàxi-gá sá ndúú tǎhú-ndó chi ñi-mee-gǎ ndéhé-gǎ nàcuáa quide-ndo ndecu-ndo.

Jesús dánèhé-gá ñáyiú nàcuáa cáháⁿ ndihí-yu Yá Ndiöxí
(Lc. 11:2-4)

⁵ Te nchòhó òré càháⁿ ndihí-ndo Yá Ndiöxí, te vá cáda-ndó dàtná xíquide cue ñáyiú dandahú méé-xí càchí sá quidé ndǎá te ñá ndǎá sá quidé ndǎá-yu, chi ñáyiú-áⁿ tnàhá iní-yu cunutnii-yu càháⁿ ndihí-yu Yá Ndiöxí òré yíhí-yu veñúhu. Te ñi-mee-gǎ ducaⁿ xíquide-yu nchaa núú xícá cùú-yu, te ducaⁿ quidé-yu cuendá sá cuiní-yu quini ñáyiú nàcuáa xíquide-yu. Te na càchí tnúhu ndǎá-í xii-ndo sǎ ñà túú nǎ nduu táhú ñáyiú-áⁿ núú Yá Ndiöxí sá dúcáⁿ quidé-yu chi mee-ni núú tnàhá ñáyiú-yu cùú-yu. ⁶ Te nchòhó òré cuiní-ndó cáháⁿ ndihí-ndo Yá Ndiöxí, te ndíhu ndedí nihnu-ndo xití vehe-ndo, chi ñi-mee-gǎ cúú Tātá-ndó te ndècu ndihí ñaha-gá xii-ndo, te ñi-mee-gǎ ndéhé ñaha-gá xii-ndo nàcuáa quide-ndo, te núu ducaⁿ na càda-ndo te taxi-gá sá ndúú tǎhú-ndó.

⁷ Te òré càháⁿ ndihí-ndo Yá Ndiöxí te vá sùúni cuendá-ni daçáa-ndó tnúhu cáháⁿ ndihí-ndo-gǎ dàtná xíquide cue ñáyiú ñá túú xini tnúhu-gá, chi ñáyiú-áⁿ sání iní-yu sá tédòho ñaha vihi-gá Yá Ndiöxí xii-yu sá dúcáⁿ sùúni dàcaá-yu tnúhu càháⁿ ndihí ñàhá-yu xii-gá dico ñàhá. ⁸ Dico nchòhó, vá cáda-ndó dàtná xíquide cue ñáyiú-áⁿ, chi mee Tātá-ndó Dútú Ndiöxí sa ñaha-gá ná cúú nchàa sá xini ñuhu-ndo cuéi òré vátá càcáⁿ-gá-ndó núú-gǎ. ⁹ Te duha cáháⁿ-ndó òré càháⁿ ndihí-ndo Yá Ndiöxí:

Yòhó Tātá-ndí Dútú Ndiöxí Yaá ndécú àndiú,
nchaa ñáyiú na càháⁿ-yu sá cúú-n Yàá ío yíñúhu.

¹⁰ Te xicáⁿ táhú-ndí núú-n sǎ ná sàá nduu ndíhu ndàhá-n-yu.

Te cada-n dàtná càchí iní-n ñuyíú-a dàtná quidé-n àndiú.

¹¹ Te xicáⁿ táhú-ndí núú-n sǎ táxi-n sǎ cóhó-ndí sá cáxi-ndí ñiⁿ nduu ñiⁿ nduu.

¹² Te cada càhnu iní-n nchàa yícá cuèchi-ndí, chi tnàhá nchúhú quidé càhnu iní-ndí nchaa sá quidé ñàha tnaha ñáyiú-ndí.

¹³ Te vá dáñá-n dàcaháⁿ ñàhá yùcu ñávàha xii-ndí cada-ndí sá ñà túú vǎha, chi coto ñaha-n xii-ndí cuendá sá vá dúcáⁿ càda ñaha-xi.

Te ñi-mee-gǎ ducaⁿ ná ío cùnuu nchaa nduu nchaa quíú, te ío càhnu cuu-n, te ñi-mee-gǎ quindaha ñaha-n xii-ndí ñi caa ñi quíhíⁿ. Te ducaⁿ na cùnduu.

Duha dānehé ñàhá-í xii-ndo cáháⁿ ndihí-ndo Yá Ndiöxí.

¹⁴ Te núu nchòhó quidé càhnu iní-ndó nchàa sá quidé ñàha tnaha ñáyiú-ndo, te ducaⁿ te Tātá-ndó Dútú Ndiöxí Yaá ndécú àndiú cada càhnu iní-gá nchaa sá ñà túú vǎha quide-ndo tucu. ¹⁵ Dico núu nchòhó vá cáda càhnu iní-ndó nchàa sá quidé ñàha tnaha ñáyiú-ndo ña, te ñi Dútú Ndiöxí Yaá cúú Tātá-ndó vá cáda càhnu iní-gá nchaa sá quidé-ndó tucu.

Cuendá ñáyiú ñà túú tnàhí ná xéxí ãma cáháⁿ ndihí-yu Yá Ndiöxí

¹⁶ Te nchòhó, nduu ñà túú tnàhí ná xéxí-ndó càháⁿ ndihí-ndo Yá Ndiöxí, te vá cùndiyí-ndó dàtná xíquide nchaa ñáyiú dandahú méé-xí càchí sá quidé ndǎá te ñá ndǎá sá quidé ndǎá-yu, chi ñáyiú-áⁿ ducaⁿ xíquide-yu cuendá sá cuiní-yu cutnùni iní ñáyiú sá ñà túú tnàhí ná xéxí-yu càháⁿ ndihí-yu Yá Ndiöxí. Te yúhú càchí tnúhu-í xii-ndo sǎ sá dúcáⁿ quidé-yu te ñá túú nǎ chindee ñàha-xi xii-yu cuendá níhí-yu ñiⁿ sá ndúú tǎhú-yu núú Yá Ndiöxí. ¹⁷ Dico nchòhó, nduu ducaⁿ quide-ndo ñà túú tnàhí ná xéxí-ndó càháⁿ ndihí-ndo Yá Ndiöxí, te váha váha naquete-ndo núú-ndó, te váha váha chihi-ndo cùcá ¹⁸ cuendá sá vá cùtnùni iní ñáyiú sá ñà túú nǎ xéxí-ndó nduu ducaⁿ cáháⁿ ndihí-ndo Yá Ndiöxí. Te Dútú Ndiöxí Yaá cúú Tātá-ndó ndècu ndihí-ndo ñi-mee-gǎ ndéhé-gǎ nàcuáa quide-ndo ndecu-ndo, te ñi-mee-gǎ taxi-gá sá ndúú tǎhú-ndó.

Cuendá nchaa sá vǎha nduu táhú-ó
(Lc. 12:33-34)

¹⁹ Te vá cáni iní-ndó cùu-ndo ñáyiú cuica nǎndi sá cùndècu ndihí-ndo ñuyíú-a chi vá

cúdĩ-xi, chi dava quee tíquidi, te dava caxi cudi ñuhu, àdi quíhu ñadúhú vehe-ndo te duhu-güedě. ²⁰ Te váha-gá chí ndúcu nàcuáa cada-ndo cuendá ducaⁿ ngündecu sá ndúú tǎhú-ndó àndiũ, te xǎⁿ cudíi-xi cundecu ndihi-ndo ni caa ni quíhíⁿ, chi yàcáⁿ vá queé-gǎ tíquidi, te ni vǎ cǎxí-gǎ cudi ñuhu, te ni vǎ quíní-gá-ndó ñadúhú duhu-güedě ndachiuⁿ-ndo. ²¹ Te núu cùu-ndo ñáyiũ cuica ndècu ñuyúú-a, te diũ-ni nchaa sá ndécú ndihi-ndo ñuyúú-a ñuhu iní-ndó. Àdi cuu-ndo ñáyiũ quide nacuáa ngündecu sá ndúú tǎhú-ndó àndiũ, te diũ-ni sá ndúú tǎhú-ndó ndècu àndiũ-áⁿ ñúhú iní-ndó.

*Núú-ó cùu-xi datná ñⁿ ñuhú
(Lc. 11:34-36)*

²² Te cada iní-ndó sǎ núú-ndó cùu-xi datná ñⁿ ñuhú. Te núu núú-ndó cǎváha te cùtnuní iní-ndó nǎ cúú sǎ ndécú núú-ndó. ²³ Dico núu cùhú núú-ndó ña túú cùtnuní cundehe-ndo ña, te ña túú cùtnuní iní-ndó nǎ cúú sǎ ndécú núú-ndó. Te sá dúcáⁿ cùhú núú-ndó te cada iní-ndó sǎ ndécú-ndó datná ñⁿ núú néé. Te duha ndùu tnúhu cǎháⁿ-í chi núu sǎni váha iní-ndó cuendá Yǎ Ndiõxí ña, te cùu vii cuu váha iní-ndó ndècu-ndo. Áⁿ te núu ña túú sǎni váha iní-ndó cuendá-gá ña, te ña túú tnàhí cùu váha iní-ndó ndècu-ndo. Te sá dúcáⁿ ña túú sǎni váha iní-ndó cuendá-gá te cada iní-ndó sǎ ndécú-ndó datná ñⁿ núú néé.

*Vá ndácú ñⁿ téé cunu cuechi-dě núú úú pàtróóⁿ
(Lc. 16:13)*

²⁴ Te ni ñⁿ téé xĩnu cuechi vá ndácú-dě cunu cuechi-dě núú úú pàtróóⁿ, chi téé-áⁿ cuu váha iní-dé núú ñⁿ pàtróóⁿ-dě te tnĩ-dé nchaa tnúhu cǎháⁿ pàtróóⁿ téé cùu váha iní-dé núú-xi-áⁿ. Te núú ìngá tucu pàtróóⁿ-dě vá cúú váha iní-dé, te ni vǎ tnĩ-dě tnúhu cǎháⁿ ìngá téé-áⁿ. Te ducaⁿ sǎtnahá-xi cùu nchohó chi vá ndácú-ndó cunu cuechi-ndo núú Yǎ Ndiõxí te cuhuⁿ iní-ndó nchaa sá ió ñuyúú-a.

*Yǎ Ndiõxí xító-gǎ nchaa ñáyiũ cùu déhe-gá
(Lc. 12:22-31)*

²⁵ Te na cǎchí tnúhu-í xii-ndo sǎ vǎ ió caní iní-ndó núu nása níhí-ndó sǎ cóhó sǎ cǎxí-ndó, te ni vǎ ió caní iní-ndó núu nása níhí-ndó dǎo cuihnu-ndo, chi cunu-gá méé-ndó dàcúúxí sǎ nchító-ndó, te ducaⁿ cunu-gá yĩqui cùñú-ndó dàcúúxí

dǎo sácũhnu-ndo. ²⁶ Te chí cǎdá cuendá sá nchǎá quiti ndava ña túú tnàhí ná xítú-güedi, te ni ña túú ndèé cuáháⁿ-güedi nàtahu-güedi, te ni ña túú nǎ nǎtaxúha-güedi, te ni ña túú ndèé cǎá yàcá-güedi, chi mee Tǎtá-ó Dǔtú Ndiõxí Yáa ndécú àndiũ xito ñaha-gá xii-güedi níhí-güedi sá xéxí-güedi. Te núu cue quiti-áⁿ ducaⁿ xito ñaha-gá xii-güedi, jte uuⁿ-gá xító ñaha-gá xii nchòhó, chi nchòhó ío-gá cunu-ndo dàcúúxí cué quiti-áⁿ! ²⁷ Te cuéi nándi sá sání vihi iní-ndó ndècu-ndo, dico ña ndácú-ndó cǎda-ndo nacuáa cuehnu-ndo cuédicó ñⁿ yĩqui-gǎ.

²⁸ Te vá ió caní iní-ndó núu nása níhí-ndó dǎo cuihnu-ndo. Te chí cǎdá cuendá nàcuáa sǎhnu nchaa itá ió yucu, chi nchaa itá-áⁿ ña túú quide chiuⁿ-xi, te ni ña túú quèheⁿ-xi idi. ²⁹ Te na cǎchí tnúhu-í xii-ndo sǎ ndĩ Salómón cuéi ío vii ní xĩnduu dǎo ní xóo cuihnu ndĩ, dico ña túú nǔtnahá-xi nàcuáa cǎa nchaa itá, chi ío-gá vii cǎa nchaa itá. ³⁰ Te nchaa itá ió yucu tnaa-ni cùdíi-xi, te yìchí-xi te sǎhmi ñáyiũ. Te cuéi ducaⁿ dico mee Yǎ Ndiõxí quidé-gǎ ío vii sácũnduu-xi. Te núu nchaa itá-áⁿ ducaⁿ quide-gá xító-gǎ sácũnduu vii-xi, te xǎⁿ cùtnuní sá ío-gá coto ñaha-gǎ xii-ndo, dicó-ni sá ña túú sǎndǎá váha iní-ndó-gǎ. ³¹ Te xǎⁿ núu ña túú xĩni ñuhu vihi-xi caní iní-ndó núu nása níhí-ndó sǎ cóhó sǎ cǎxí-ndó, àdi nása níhí-ndó dǎo cuihnu-ndo. ³² Chi nchaa ñáyiũ ña túú xĩní nàcuáa cǎháⁿ tnúhu Yǎ Ndiõxí mee-ni nchaa xǎⁿ ñúhú iní-yu. Dico nchòhó chi mee Tǎtá-ndó Dǔtú Ndiõxí sa naha-gá ná cúú sǎ xĩní ñuhu-ndo. ³³ Te xǎⁿ núu ío xĩni ñuhu-xi sá cùhúⁿ iní-ndó sǎ Yǎ Ndiõxí yĩndàha ñaha-gá xii-ndo, te ducaⁿ cǎda-ndo nchaa nacuáa cuíní-gá, te ducaⁿ te taxi-gá nchaa sá xĩní ñuhu-ndo. ³⁴ Núu xǎⁿ vá ió caní iní-ndó nása cundecu-ndo ndùu tneé, chi caní iní-ndó nàcuáa cada-ndo cundecu-ndo vitna, chi nduu tnèé-áⁿ te òré-nǎ te cùtnuní núu nása cada-ndo cundecu-ndo. Chi nchòhó sa naha-ndo sá ío titní núú sǎ quidé-xí ñⁿ nduu ñⁿ nduu — duha ní dǎnèhé ñáhá Jèsús xii cue téé xica cuu ndihi-gá ndihi nchaa ñáyiũ.

7

*Vá cǎháⁿ cuèhé-ó cuendá tnàha ñáyiũ-o
(Lc. 6:37-38, 41-42)*

1 Te Jèsús nděcuu-ni-gá dánèhé-gá cue tée xica cuu ndihi-gá ndihi nchaa ñáyi, te xáhaⁿ-gã:

—Vá càháⁿ cuèhé-ndó cuendá tnàha ñáyi-ndo, te ducaⁿ te Yá Ndiöxí ñá túú nã tnúhu cúñaha-gã xii-ndo. 2 Chi núu na càháⁿ cuèhé-ndó cuendá tnàha ñáyi-ndo, te Yá Ndiöxí ío ìⁿ sá cáda ñàha-gá xii-ndo. Te núu nchòhó ná càháⁿ cuèhé víhí-ndó cuendá tnàha ñáyi-ndo te Yá Ndiöxí ío-gá dandòho ñaha-gá xii-ndo. 3 ¿Te ná cuendá ndéhé-ndó ìⁿ sá ñà túú vãha quide tnaha ñáyi-ndo te mee-ndo vihi-gá quidé-ndó-í? Te sá dúcáⁿ quide-ndo te cada iní-ndó sã ndéhé-ndó dàtná ìⁿ mihi líhli ñùhu núú tnàha ñáyi-ndo te mee-ndo ñùhu ìⁿ mihi cahnu-gá núú-ndó te ñá túú quide cuendá-ndó. 4 Te núu na nacanu ichi-ndo tnaha ñáyi-ndo cuendá sá ñà túú quide vãha-yu ndécú-yu, te mee-ndo vihi-gá quidé-ndó ñá, te cada iní-ndó sã xáhaⁿ-ndo xii tnaha ñáyi-ndo sã nátava-ndo mihi líhli ñùhu núú-yu sá dúcáⁿ quide-ndo, te mihi càhnu ñùhu núú méé-ndó ñà túú quide cuendá-ndó. 5 Te sá dúcáⁿ quide-ndo te ío dandahú-ndó mée-ndo sá quidé ndáá-ndó te ñá ndáá sá quidé ndáá-ndó, te xini ñùhu-xi díhna-gá ñàha-ndo nchaa sá ñà túú vãha quide-ndo, te dàtnùní ducaⁿ te cuu nacanu ichi-ndo tnàha ñáyi-ndo cuendá nchaa sá ñà túú vãha quidé-yu.

6 Te nchaa ñáyi ío sàá iní-xi, te vá cáda yica-ndó-yu cundedóho-yu tnúhu Yá Ndiöxí, chi núu na càda yica-ndó-yu te ngóo-yu cuu úhú iní ñáhã-yu xii-ndo. Te ñáyi-áⁿ cúú-yu dàtná iná chi quiⁿ-áⁿ núu na cuñaha-o ìⁿ sá cuñaha-o, te núu ñá túú cùtnuní iní-dì ná cúú xĩáⁿ te tñi ñaha-dì xii-o. Te cùu tucú-yu dàtná cùchí chi quiⁿ-áⁿ núu na chùcu-o núú-dì yúú vãha sã ío vii càa nani pérlá, te dìcò-ni cùnu sáhá-dì chi ñá túú cùtnuní iní-dì sá cúú-xí yúú vãha.

Cácáⁿ-ó núú Yá Ndiöxí núu ná cuiní-ó
(Lc. 11:9-13; 6:31)

7 Te na càchí tnúhu-í xii-ndo sã cãcáⁿ-ndó núú Yá Ndiöxí te núu ná cuiní-ndó te taxi-gá, te vá dáñá ndéé-ndó cãcáⁿ-ndó núú-gã núu ná cuiní-ndó te ducaⁿ te nihí-ndó. Te cada iní-ndó sã ñi quexio-ndo vehe ìⁿ tnaha ñáyi-ndo te ní cáháⁿ-ndó, te ñáyi-áⁿ ñi tedóho ñàhá-yu xii-ndo te ní

nacaáⁿ-yu yuyèhe. Te ducaⁿ càda iní-ndó chi Yá Ndiöxí tedóho ñaha-gã xii-ndo, te taxi-gá sá ná cãcáⁿ-ndó núú-gã. 8 Chi nchaa ñáyi ducaⁿ xĩquide, te Yá Ndiöxí tedóho ñaha-gã xii-yu te nihí-yu sá cuiní-yu. Te diu-ni ducaⁿ tucu nchaa ñáyi na cãcáⁿ núú-gã ìⁿ sá cuiní-yu, chi sãñaha-gã sá xicáⁿ-yu núú-gã. Te diu-ni ducaⁿ tucu nchaa ñáyi ñá túú dàña ndéé xicáⁿ núú Yá Ndiöxí sá cuiní-yu chi nihí-yu.

9 Te nchòhó cue tée cùu tátá, ñá túú cùndee iní-ndó cuñaha-ndo xii cue déhe-ndo ìⁿ yúú caxi-güexi òré xicáⁿ-güexi ìⁿ pàá núú-ndó cãxi-güexi. 10 Te ni ñà túú cùndee iní-ndó cuñaha-ndo ìⁿ cóo caxi-güexi òré xicáⁿ-güexi ìⁿ chácá núú-ndó cãxi-güexi. 11 Te nchòhó cuèi ndéé dau-na sàá iní-ndó dico sãha-ndo cuè déhe-ndo sã vãha xèxi-güexi òré ná cúú sã xicáⁿ-güexi núú-ndó cãxi-güexi. Te núu nchòhó ducaⁿ quide-ndo, jte uuⁿ-gá ducaⁿ quide Tátá-ndó Dütú Ndiöxí Yaá ndécú àndi, chi taxi-gá sã vãha sá cúú-xí-ndó te núu na cãcáⁿ-ndó núú-gã!

12 Te nchaa sá vãha cuiní-ndó càda tnaha ñáyi-ndo, te cada-ndo tnàhá-ndó ndihí-yu, chi ducaⁿ sànu ichi ñaha tnúhu ní chídó tnùní ndí Moisés, te diu-ni ducaⁿ sànu ichi ñaha tucu nchaa tnúhu ní chídó tnùní cue tée ní xóo cáháⁿ tnúhu Yá Ndiöxí ndéé sanaha.

Yuyèhe cuiñi
(Lc. 13:24)

13-14 Te xini ñùhu-xi nducu-ndo nacúaá cada-ndo tñi-ndo ichi Yá Ndiöxí. Te ichi-gá-áⁿ cúú-xí dàtná ìⁿ ichi cuiñi, àdi datná ìⁿ yuyèhe cuiñi. Te duha càháⁿ-í chi ío úhú xínu iní-ndó tñi-ndo ichi Yá Ndiöxí, te sacú-ni nchòhó cue ñáyi ndècu ñuyíú-a tñi-ndo ìchi-gá. Te nchaa ñáyi ndècu ichi cuehé ichi duha ta xíta nihnú-yu cuáháⁿ. Te ichi ndécú-yu-áⁿ cada iní-ndó sã cúú-xí ìⁿ ichi cahnu ichi quehéⁿ, àdi ìⁿ yuyèhe quehéⁿ. Te duha càháⁿ-í chi ío vãi ñáyi ndécú-yu ichi-áⁿ.

Ndi dñiⁿ núú yutnu xini-ó nã yutnu cùu-xi
cuendá sã sãvidí-xi
(Lc. 6:43-44)

15 Te càchí tnúhu-í xii-ndo sã ío quihi iní-ndó cùndecu-ndo cuendá sã vã dandahú ñáhã cuè tée càchí sá càháⁿ tnúhu Yá

Ndiõxí te ñá ndàá sá càháⁿ-güedé tnúhu-gá. Chi cue téé-áⁿ sànuu sá quidé-güedé dàtná quidé mbéé quitì ío váha iní-xi, dico ñá ndàá chi ñá túú ñùhu váha iní-güedé, chi quide-güedé dàtná quidé quitì dééⁿ quitì nàni yíhí. ¹⁶ Te òré quexìo-güedé núú ndécú-ndó te cada cuendá-ndó nàcuáa quide-güedé cuendá ducaⁿ cùtnuní iní-ndó nã ñáyiú cùu-güedé. Te nchòhó xìní-ndó sã ñà túú cùuⁿ ndéhé yoho yàha stilé tnu iñu, te ni ñà túú xìní-ndó cùuⁿ ngúxí ñⁿ tnu iñu. ¹⁷⁻¹⁸ Te xìní tucu-ndo sã ncháá yùtnu váha cùuⁿ sávidí váha, te nchaa yutnu váha-áⁿ ñà túú cùuⁿ sávidí sá ñà túú vãha. Te nchaa yutnu sá ñà túú vãha ñà túú cùuⁿ sávidí váha, chi mee-ni sávidí sá ñà túú vãha cùuⁿ. ¹⁹ Te nchaa yutnu sá ñà túú cùuⁿ sávidí váha xèhndé-güedé, te cuánguee-xi núú ñùhú càyú-xi. Te ducaⁿ sãtnahá-xi yáha nchaa cue téé dándahú ñáhá càchí sá càháⁿ tnúhu Yá Ndiõxí te ñá ndàá sá càháⁿ-güedé tnúhu-gá, chi quihíⁿ-güedé núú ñùhú núú càyú. ²⁰ Te nchòhó cutnùnì iní-ndó nã ñáyiú cùu cue téé-áⁿ cuendá nchaa sá quidé-güedé.

Ñá ncháá ñáyiú ngúndecú-yu núú ndécú Yá Ndiõxí táxi tnùnì-gá (Lc. 13:25-27)

²¹ Te na càchí tnúhu-í xii-ndo sã ìo vài ñáyiú cachí-yu sá yùhú cùu-í Xítohó-yu, dico ñá ncháá-yu nduu táhù-yu cundecú-yu núú ndécú Tãtà-í Dútú Ndiõxí táxi tnùnì-gá, chi mee-ni nchaa ñáyiú na càda nchaa nacuáa càháⁿ-gá ñáyiú-áⁿ nduu táhù-yu cundecú-yu núú ndécú-gã táxi tnùnì-gá. ²² Te na sàá nduu càda ndáá Yá Ndiõxí cuéchi nchaa ñáyiú, te vài-yu cúñahá-yu xii-í: “Yòhó Xítohó Jesucrìstú nchúhú cùu-ndí ñáyiú ní càháⁿ tnúhu-n nàcuáa ní cachí-n, te ñu-ni-n ñí cacunehe-ndí te ní sándáá iní ñáhá nchaa espíritú cùndihí yucu ñávãha xii-ndí ní quee-xi yiqui cùñú ñáyiú, te ñu-ni yòhó ní chindee ñãha-n xii-ndí ní ndacu-ndí ní quide-ndí titní núú sã vã yòo tnàhí ndàcu cada”, duha cúñahá-yu xii-í dàvã-áⁿ. ²³ Dico yùhú cúñaha-í xií-yu: “Ñá túú tnàhí xìnì ñáhà-í xii nchòhó núú ndèé ñáyiú cùu-ndo, te chí xócuñí nchaa nchòhó

ñáyiú quide nchaa sá cuéhé sá dúhá núú ndécú-í-a”, duha cúñaha-í xií-yu.

Ñⁿ vehe ndècu cimientú-xi ndihí ñⁿ vehe ñá túú cimientú-xi (Mr. 1:22; Lc. 6:47-49)

²⁴ Te nchaa ñáyiú sàcúndedóho tnúhu càháⁿ-í te núu na tní-yu, te ñáyiú-áⁿ cùu-yu dàtná ñⁿ téé ío váha cùtnuní iní-xi. Chi téé-áⁿ ñí dácáá-dé ñⁿ vehe, dico díhna-gá ní xete-dé ndéé ní tnahá-dé yúú cáxíⁿ te dàtnùnì ní tava-dé cimientú-xi. ²⁵ Te òré ní cuuⁿ dáú te ní ndee ndute ñuhu, te ní dándáá-xí ndéé núú cáá vèhe-áⁿ, dico ñá túú ní ndàcu-xi cuido-xi. Te ní quene tucu táchí ñíhi dico ñá túú ní ndàcu-xi cuido-xi vehe-áⁿ, te ducaⁿ chi téé ní dácáá vèhe-áⁿ ñí tava-dé cimientú-xi núú yúú cáxíⁿ. Duha sãtnahá-xi cùu nchaa ñáyiú tní tnúhu càháⁿ-í. ²⁶ Dico nchaa ñáyiú sàcúndedóho tnúhu càháⁿ-í te ñá túú cuínì-yu tní-yu, ñáyiú-áⁿ cùu-yu dàtná ñⁿ téé ñá túú tnàhí cùtnuní iní-xi. Chi téé-áⁿ ñí dácáá-dé ñⁿ vehe núú yúú mèe-ni ñuhu cùchí. ²⁷ Te òré ní cuuⁿ dáú te ní ndee ndute ñuhu, te ní dándáá-xí ndéé núú cáá vèhe-áⁿ, te ní quene táchí ñíhi te íí-ni ní xido-xi vehe-áⁿ cuendá sá núú ñuhu cùchí ñí sáá. Duha sãtnahá-xi cùu nchaa ñáyiú sàcúndedóho tnúhu càháⁿ-í te ñá túú cuínì-yu tní-yu —duha ní dánèhé ñáhá Jèsús xii cue téé xica cuu ndihí-gá ndihí nchaa ñáyiú.

²⁸ Te òré ní ndihí Jèsús sá dúcáⁿ ñí càháⁿ-gá, te nchaa ñáyiú ní xíndedóho nchaa tnúhu ní càháⁿ-gá ío ní cuñúhu-yu nàcuáa ní dánèhé ñáhá-gã xií-yu. ²⁹ Chi ní càháⁿ-gá dàtná càháⁿ cue téé cùnuu, te cùnuu ndisa-gá, te ñá túú ní càháⁿ-gá dàtná càháⁿ nchaa cue téé dàcuaha ñaha xii ñáyiú nchaa tnúhu ní chídó tnùnì ndí Moisés.

8

Jèsús quidé tãtna-gá ñⁿ téé tnàhá cuéhé sã dátèhyú nihnu-xi yiqui cùñú-ó (Mr. 1:40-45; Lc. 5:12-16)

¹ Te Jèsús ní xica-gá cuánuu-gá ñíhi tindúú núú dúcáⁿ ñí xíndecu-gá ní dánèhé-gá ñáyiú-áⁿ, te cuéhé víhí ñáyiú nchìcúⁿ ñáhá xii-gá cuánuu. ² Te ní quexìo ñⁿ téé tnàhá cuéhé sã dátèhyú nihnu-xi yiqui cùñú-ó

núú Jèsús, te ní nguñí xítí-dě núú-gă, te xăhaⁿ-dě xii-gă:

—Mèstrú, véxi-í cãháⁿ ndàhú-í núú-n nũu vá cùndèe iní-n càda tátna ñaha-n xii-í, chi cùtnuní iní-í sá ndácú-n —càchí-dé xăhaⁿ-dě xii-gă.

³ Te Jèsús ní dácàá-gă ndaha-gă ní tendaha ñaha-gă xii-dé, te xăhaⁿ-gă:

—Cuu cada tátna ñaha-í xii-n, te vitna ndúha-n —càchí-gă xăhaⁿ-gă xii-dé.

Te òré-ni-áⁿ nĩ xócuñí cuéhé tnàhá-dé.

⁴ Te Jèsús ní xăhaⁿ tùcu-gă xii-dé:

—Te vitna cuanùhú te vá yõ ñⁿ cúñaha-n sã yũhú ní quide tátna ñaha-í xii-n, núú dùtú-ni cuáháⁿ cuendá sá ná quini ñáhá-dě xii-n sã nĩ ndúha-n, te cuáñaha-n sã ndúú táhú Yã Ndiõxí dàtná ní cachí ndíi Moisés. Te ducaⁿ càda-n cuendá cutnùní iní ñáyiú sá nĩ ndúha-n —càchí-gă xăhaⁿ-gă xii té ní quide tátna-gă-áⁿ.

Jèsús quidé tátna-gă ñⁿ té xinu cuechi núú ñⁿ té cùu capitáⁿ
(Lc. 7:1-10)

⁵ Te Jèsús ní xica-gă cuáháⁿ-gă ñuú Capèrnaúm. Te òré cuánguñhu-gă ñuú-áⁿ te ní quexìo ñⁿ té cùu capitáⁿ cãháⁿ ndàhú-dé núú-gă, ⁶ te xăhaⁿ-dě xii-gă:

—Mèstrú, véxi-í cãháⁿ ndàhú-í núú-n nũu vá cùndèe iní-n càda tátna-n ñⁿ té xinu cuechi núú-í, chi cùhú-dé te cãhú víhí tnàhá-dé, te ío ndòho-dé te ní ñã cùndèe-gă-dé candá nihnu-dé —càchí-dé xăhaⁿ-dě xii-gă.

⁷ Te Jèsús ní xăhaⁿ-gă xii-dé:

—Te na quihíⁿ-ó càda tátna-í-dé —càchí-gă xăhaⁿ-gă xii-dé.

⁸ Te té cùu capitáⁿ-áⁿ nĩ xăhaⁿ-dě xii-gă:

—Mèstrú, ñá túú tàú-í sá quñhu-n ndèe xítí vehe-í, chi cùu-í ñⁿ té cùtexínu sá cúú-xí-n, te cãháⁿ-ni sá ndúha té xinu cuechi núú-í te ndúha-dé. ⁹ Chi yúhú ndècu cue té taxi tnuní ñáhá xii-í, te ducaⁿ yũhú tucu ndècu cue sandadú táxi tnùn-í. Te òré xăhaⁿ-í xii ñⁿ-dé quihíⁿ-dé ñⁿ chiuⁿ te cuáháⁿ-dé, te òré xăhaⁿ-í xii ingá-dé quixi-dé te véxi-dé, te òré xăhaⁿ-í xii ñⁿ té xinu cuechi núú-í cada-dé ñⁿ chiuⁿ te quide-dé. Núú xiãⁿ yòhó cãháⁿ-ni sá ndúha té xinu cuechi núú-í te ndúha-dé —càchí-dé xăhaⁿ-dě xii Jèsús.

¹⁰ Te Jèsús ío ní cuñúhu-gă sá dúcáⁿ nĩ cãháⁿ té cùu capitáⁿ-áⁿ, te ní xăhaⁿ-gă xii nchaa ñáyiú nchicúⁿ ñáhá xii-gă:

—Na càchí tnúhu ndáá-í xii-ndo sã vátá quini-gă-í ní ñⁿ ñáyiú isràél, ñáyiú súúni ío váha sàndáá iní ñáhá xii Yã Ndiõxí dàtná sàndáá iní ñáhá té-a xii-gă. ¹¹ Te na càchí tnúhu ndáá tucu-í xii-ndo sã ío cuéhé ñáyiú quixi ndàa xio nacuáa quène nchíanchii, te ñu-ni ducaⁿ ío cuéhé tucu-yu quixi ndàa xio nacuáa quée tucu nchíanchii. Te nchaa ñáyiú-áⁿ naníhí tnáhã-yu ndihí té Àbrahám, ndihí té Isàác, ndihí té Jàcób núú ndécú Yã Ndiõxí táxi tnùn-í-gă te yàcáⁿ cundecu ndihí ñáhá-yu xii-güedé. ¹² Te nchaa ñáyiú tàú nduu táhú cundecu núú ndécú Yã Ndiõxí táxi tnùn-í-gă ní cùu, ñáyiú-áⁿ quee tíhũ-yu, chi quihíⁿ-yu ñⁿ xichi núú néé núú ío ndohó-yu cundecu-yu, te yàcáⁿ ío ndáhí-yu, te dícó rúhñú-nã cuu núhu-yu sá sàtú iní-yu cuendá sá ndóhõ-yu —càchí-gă xăhaⁿ-gă xii-yu.

¹³ Te Jèsús ní xăhaⁿ tùcu-gă xii té cùu capitáⁿ-áⁿ:

—Yòhó té ndècu ndihí té cùhú cuanùhú vehe-n vitna chi ndúha-dé chi ní sàndáá iní-n Yã Ndiõxí —càchí-gă xăhaⁿ-gă xii-dé.

Te ñu-ni òré ducaⁿ nĩ xăhaⁿ Jèsús xii té cùu capitáⁿ-áⁿ nĩ ndúha té xinu cuechi núú-dě.

Jèsús quidé tátna-gă nãná ñadìhí té Pèlú
(Mr. 1:29-31; Lc. 4:38-39)

¹⁴ Te Jèsús ní xica-gă cuáháⁿ-gă vehe té Pèlú, te òré ní quexìo-gă vehe-dé te ní xiní-gă cáá nãná ñadìhí-dé cùhú-aⁿ ñùhu vihi-aⁿ cahni. ¹⁵ Te Jèsús ní tnũ-gă ndaha ñaha cùhú-áⁿ, te òré-ni-áⁿ nĩ nchíco-aⁿ cahni te ní ndacóo-aⁿ ní xinu cuechi-aⁿ núú-güedé ndihí-gă.

Jèsús quidé tátna-gă vãi ñáyiú cùhú
(Mr. 1:32-34; Lc. 4:40-41)

¹⁶ Te òré ní dáhu nchíanchii te ní quexìo ñáyiú núú ndécú Jèsús, te ndécá-yu vãi ñáyiú yìhí ñaha espíritú cùndihí yucu ñávãha ní sáá núú-gă te ndèca tucu-yu vãi ñáyiú tnàhá dava-gă núú cuéhé. Te ñⁿ-ni tnúhu ní cãháⁿ Jèsús ní tenàá-gă nchaa espíritú cùndihí yucu ñávãha yìhí ñaha xii nchaa ñáyiú-áⁿ, te ní quee-xi yiqui cùñú-yu cuáháⁿ-xi. Te tnàhá nchaa dava-gă ñáyiú

cùhú-áⁿ nǐ quide tátna-gá. ¹⁷ Te ducaⁿ nǐ cuu chi ní quee ndáá-xi nàcuáa ní cáháⁿ ndíi Chàíá tée ní xóo cáháⁿ tnúhu Yá Ndiöxí ndéé sanaha, te duha ní cachí ndíi: “Mee-gã cada tátna ñaha-gã xii-o, chi diu-gá xocàni-gá nchaa sá quidé ùhú yiqui cùñú-ó”, duha ní cachí ndíi.

*Ñáyiú cuení tuha ñaha xii Jesús
(Lc. 9:57-62)*

¹⁸ Te òré ní xiní Jèsús sá ïo cuéhé ñáyiú xixúcu núú ndécú-gã, te ní xáhaⁿ-gã xii cue tée xica cuu ndíhi-gá sá quée-gá ndíhi-güedé bàrcú cuendá téhndé-gá ndíhi-güedé ndàa ingá xio yuhu làgúná. ¹⁹ Te mei òré-áⁿ nǐ quexio ìⁿ tée dàcuaha ñaha xii cue ñáyiú nchaa tnúhu ní chídó tnùní ndíi Moisés, te xáhaⁿ-dë xii-gá:

—Mèstrú, cuení-í canchicúⁿ ñáhà-í xii-n ndëni ní cuu na quíhíⁿ-n —càchí-dé xáhaⁿ-dë xii-gá.

²⁰ Te Jèsús ní xáhaⁿ-gã xii-dé:

—Nchaa ñúcuí chi ndècu yaú cúú vèhe-güedi saquíhi-güedi, te nchaa cue quíti ndàva caa tacá-güedi diquí yutnu. Dico yúhú Tée cùu ñaní tnáhá-ndó nchàa-ndo chi ñá túú ndéé cáá vèhe-í ñuyú-a ndetatú-í —càchí-gá xáhaⁿ-gã xii-dé.

²¹ Te ìⁿ tée ní chitnahá ñáhá xii Jesús ní xáhaⁿ-dë xii-gá:

—Jèsús, dañá na nùhú-í cundetú-í cuú tátà-í te chindúxi-í-dé dàtnùní quixi-í chitnahá ñáhá dùcaⁿ-ná-í xii-n —càchí-dé xáhaⁿ-dë xii-gá.

²² Te Jèsús ní xáhaⁿ-gã xii-dé:

—Daña ñáyiú ñá túú sàndáá iní ñáhá xii-í ná chindúxi tnàha meé-yu, chi ñáyiú-áⁿ cúú-yu dàtná ñáyiú ní xíhí cuèi ndècu-ní-yu núú ñuyú-a, te yòhó canchicúⁿ ñáhá-ní xii-í —càchí-gá xáhaⁿ-gã xii-dé.

*Jèsús ngání-gã táchí ndíhi ndute làgúná
(Mr. 4:35-41; Lc. 8:22-25)*

²³ Te sátá dúcáⁿ te Jèsús cuánguee-gá bàrcú ndíhi cue tée xica cuu ndíhi-gá, te ní xica bàrcú-áⁿ cuáháⁿ-xi. ²⁴ Te nini ñùhu bàrcú-áⁿ ichi cuáháⁿ-xi núú ndute ní xídí Jèsús, te ní ngúíta-xi níhi vèhi quene táchí, te ta nàdachitú-xi ndute xití bàrcú cuáháⁿ. ²⁵ Te cue tée xica cuu ndíhi-gá cuáháⁿ-güedé núú cáá-gá xídí-gá, te xáhaⁿ-güedë xii-gá:

—jMèstrú, ndiquíú iní chi dàcácu ñaha-n xii-o chi quée naa-o cuení-xi! —càchí-güedé xáhaⁿ-güedë xii-gá.

²⁶ Te Jèsús ní xáhaⁿ-gã xii-güedé:

—¿Ná cuendá ndéé ducaⁿ ïo yùhú-ndó? ¿Náa ñá túú sàndáá iní ñáhá ndisa-ndo xii-í-áⁿ? —càchí-gá xáhaⁿ-gã xii-güedé.

Te Jèsús ní ndacóo-gá te ní tenáa-gá táchí-áⁿ ndíhi ndute-áⁿ, te ní ngúíñí táchí-áⁿ te ní nucúndecu nahi-nã ndute làgúná-áⁿ.

²⁷ Te nchaa cue tée ñùhu xití bàrcú-áⁿ nǐ cuñúhu-güedé sá dúcáⁿ nǐ quide-gá ní xiní-güedé, te ní xitnàha-güedé:

—¿Te ná tée cùu tée-a núu duha ní cáháⁿ-ni-dé te ní ngúíñí táchí te ní nucúndecu nahi-ni ndute làgúná-a-i? —càchí-güedé xitnàha-güedé.

*Cue tée ñuú Gàdará cue tée yèhi ñaha
espíritú cundíhi yucu ñávàha
(Mr. 5:1-20; Lc. 8:26-39)*

²⁸ Te òré ní quèxio Jesús ndàa ingá xio yuhu làgúná yucu cue tée ñuú Gàdará, te úú tnàhá cue tée quide vehe núú yíndüxi ndíyí ní quee-güedé cuáháⁿ-güedé núú ndécú Jèsús, te ndi ndúú-güedé yíhí ñaha espíritú cundíhi yucu ñávàha xii-güedé, te ïo mãñá-güedé chi vá yòo tnàhí dañá-güedé yáha yatni núú ndécú-güedé. ²⁹ Te cue espíritú yíhí ñaha xii-güedé-áⁿ nǐ quide-xi níhi ní cáháⁿ-güedé, te xáhaⁿ-güedë xii-gá:

—¿Ná cuendá véxi-ö Jèsús Déhe Dútú Ndiöxí chidácá ñáhá-n xii-ndí? ¿Áⁿ sàma véxi-n dàndoho ñaha-n xii-ndí? Te vátá sàá-gá nduu dùcaⁿ cada-n —cachí-güedé xáhaⁿ-güedë xii-gá.

³⁰ Te yatni xíaⁿ xixica cuu vài cuchí xixexi-güedi. ³¹ Te cue espíritú cundíhi yucu ñávàha yèhi ñaha xii cue tée-áⁿ nǐ cáháⁿ ndàhú-xi núú Jèsús, te xáhaⁿ-xi:

—Te núu vá dañá-gã-n quíhi-ndí yiqui cùñú cue tée-a, te cáháⁿ ndàhú-ndí núú-n sã dañá-n na quíhíⁿ-ndí quíhu-ndí yiqui cùñú nchaa cùchí-áⁿ —càchí cue espíritú-áⁿ xáhaⁿ-xi xii-gá.

³² Te Jèsús ní xáhaⁿ-gã xii cue espíritú cundíhi yucu ñávàha-áⁿ:

—Chí táquèe yiqui cuñú cue téé-án te quíhíⁿ-ndó nũu ndèé ichi quíhíⁿ-ndó — cächí-gá xáhaⁿ-gã xii nchaa espíritú-án.

Te cue espíritú cundíhi yucu ñávãha-án nĩ quee-xi yiqui cuñú cue téé-án, te cuáháⁿ-xi cuánguïhu-xi nchaa cùchí-án. Te cue quiti-án nĩ xinu-güedi duha ní queé-güedi ndàa núú dèhvá yuhu làgúná-án, te ní ngau-nihnu-güedi xití ndute, te ní ndíhi-güedi ní cáhá.

³³ Te cue téé xito ñaha xii nchaa cuchí-án nĩ yuhú-güedé te ní xinu-güedé, te ní sáháⁿ-güedé ní caní-güedé cuendú núú cuè ñáyiú ndècu xití ñuú nchaa nàcuáa ní cuu cuendá cue téé ní xíhi ñaha nchàa espíritú cundíhi yucu ñávãha-án. ³⁴ Te nchaa ñáyiú ñuú-án nĩ queé-yu cuáháⁿ-yu núú ndécú Jèsús. Te òré ní quexiò-yu núú ndécú-gã te ní cáháⁿ ndàhú-yu núú-gã sá ná queé-gã yucu ñuú-yu núhú-gã.

9

Jèsús quidé tãtna-gã ìⁿ téé cùhú ñá cúú-gã candá nihnu

(Mr. 2:1-12; Lc. 5:17-26)

¹ Te sátá dúcáⁿ nĩ cuu te Jèsús cuánde-gã bàrcú cuáháⁿ-gã ní natehdé-gã ndàa ingá xio yuhu làgúná. Te xíaⁿ nĩ ndexiò-gã ñuú núú quidé ñuú-gã. ² Te xíaⁿ ndécú-gã ní quexiò cue téé nchido-güedé ìⁿ téé cùhú ñá cúú-gã candá nihnu ñùhu-dé xito, te Jèsús ní cutnùní iní-gã sá sàndáá ndisa iní ñáhá-güedé xii-gã nũu ní xáhaⁿ-gã xii téé cùhú-án:

—Yòhó téé cùhú vá ndíhú-gã iní-n, chi sa ní quide càhnu iní-í nchaa cuéchi-n — cächí-gá xáhaⁿ-gã xii-dé.

³ Te sátá dúcáⁿ nĩ cáháⁿ-gã nũu xíaⁿ cue téé dàcuaha ñaha xii ñáyiú nchaa tnúhu ní chídó tnùní ndíi Moisés ní sani iní-güedé: “Téé-a càháⁿ cuèhé-dé cuendá Yã Ndiòxí”, duha ní sani iní-güedé. ⁴ Te Jèsús ní cutnùní iní-gã nàcuáa sàni iní-güedé nũu ní xáhaⁿ-gã xii-güedé:

—¿Ná cuendá ducaⁿ sàni cuehé sání dùha iní-ndó? ⁵ Te sátá dúhá nĩ xáhaⁿ-í xii téé cùhú-a sá nĩ quide càhnu iní-í nchaa yicá cuéchi-dé, te xíaⁿ nchòhó ñá túú cùtnuní iní-ndó nũu ndáá càháⁿ-í àdi ñá ndàá. Dico núú cúú-í-dé sátá ndácòo-dé te caca-dé, te

cutnùní ndáá iní-ndó nũu ndáá càháⁿ-í àdi ñá ndàá, chi cundehe nũu-ndó nàcuáa cada-í. ⁶ Te vitna na càda-í nàcuáa cutnùní iní-ndó nchàa-ndo sátá yuhú Téé cùu ñaní tnáhá-ndó nchàa-ndo ndecu ndíhi-í tnúhu ndee iní ñuyú-a sátá cádá càhnu iní-í nchaa cuéchi ñáyiú — cächí-gá xáhaⁿ-gã xii-güedé.

Te sátá dúcáⁿ te ní xáhaⁿ-gã xii téé cùhú-án:

—Ndacóo, te ndocani-n xito ñùhu-n véxi-án te núhú-n vehe-n — cachí-gá xáhaⁿ-gã xii-dé.

⁷ Te òré-ni-án nĩ ndúha téé cùhú-án te ní ndacóo-dé te ní ndocani-dé xito ñùhu-dé ní quexiò-án te ní xica-dé cuánuhú-dé vehe-dé. ⁸ Te nchaa ñáyiú xíndecu-án ìo ní cuñúhu-yu sátá dúcáⁿ nĩ quide Jèsús ní xiní-yu, te ní cachí-yu sátá ìo càhnu cuu Yã Ndiòxí cuendá sátá nĩ sáñaha-gã xii Jèsús tnúhu ndee iní cada-gã nchaa sátá vã yòo tnàhí ndàcu cada.

Jèsús càháⁿ-gã ìⁿ téé nàni Mateú chitnahá ñáhá-dé xii-gã

(Mr. 2:13-17; Lc. 5:27-32)

⁹ Te Jèsús ní nucúhuⁿ tucu-gã ichi cuáháⁿ-gã, te ichi ñùhu-gã ní xiní-gã núcòo ìⁿ téé nàni Mateú quidé còbrá-dé ñáyiú chi cobràdór impuèstú cúú-dé, te ní xáhaⁿ-gã xii-dé:

—Màteú, néhé chitnahá ñáhá-n xii-í — cächí-gá xáhaⁿ-gã xii-dé.

Te té Màteú-án nĩ ndacuíñí-dé ní chitnahá ñáhá-dé xii-gã.

¹⁰ Te ìⁿ xito ndècu Jèsús ìⁿ vehe, te yíhi-gã mèsá ndíhi cue téé xica cuu ndíhi-gã xéxi ndíhi ñaha-gã xii-güedé. Te tnàhá cue téé cuihna iní-xi quide cobrá ñáhá xii ñáyiú cuendá impuèstú yíhi ndíhi-gã mèsá, te tnàhá tucu dava-gã cue téé ndècu ichi cuehé ichi duha yíhi ndíhi-gã mèsá. ¹¹ Te sátá nĩ xiní cue téé cùu fariséú xéxi Jèsús ndíhi nchaa cue téé-án, te ní xicáⁿ tnúhú-güedé núú cuè téé xica cuu ndíhi-gã, te xáhaⁿ-güedé:

—¿Ná cuendá ducaⁿ quide téé cùu mestrú-ndó xèxi-dé ndíhi cue téé cuihna iní-xi quide cobrá ñáhá xii ñáyiú cuendá impuèstú, ndíhi nchaa dava-gã cue téé ndècu ichi cuehé ichi duha-i? — cächí-güedé xáhaⁿ-güedé.

12-13 Te Jèsús ní tecú dóho-gá nàcuáa ndùu tnúhu ní xáhaⁿ-güedě xii cue téé xica cuu ndihi-gá, núu ní xáhaⁿ-gã xii-güedé:

—Nchaa ñáyiú ñá túú cùhú chi ñá túú xìni ñuhú-yu ñátátná, dico nchaa ñáyiú cùhú chi xìni ñuhú-yu ñátátná. Te yúhú véxi-í cáháⁿ-í ñáyiú cùtnuní iní-xi sá ndécú cuěchi-xi cuendá dañá-yu nchaa sá cuèhé sá dúhá quidé-yu, te ñá túú vèxi-í cáháⁿ-í ñáyiú càchí sá ñá túú ndècu cuéchi-xi. Te chí cádá cuendá váha nàcuáa càháⁿ Yã Ndiõxí núú tütú-gá núú càchí-xi: “Yúhú cuení-í sá cùndàhú iní-ndó cuè tñaha ñáyiú-ndo, te ñá díú mèe-ni sá cáhni-ndó quiti nduu táhù-í”, duha càchí-gá núú tütú-gá —càchí Jèsús xáhaⁿ-gã xii-güedé.

Cue téé ndùcu tnúhu núú Jèsús cuendá ñáyiú ñá túú tnàhí ná xéxi áma càháⁿ ndihi-yu Yá Ndiõxí

(Mr. 2:18-22; Lc. 5:33-39)

14 Te cue téé xica cuu ndihi té Juáa téé dàcuandute ñaha xii ñáyiú ní sáháⁿ-güedé núú ndécú Jèsús, te xicáⁿ tnúhú-güedé núú-gã, te xáhaⁿ-güedé:

—Cuení-ndí cachí tnúhu-n nã cuendá nchúhú, ndihi cue téé cùu fariséú ñá túú tnàhí ná xéxi-ndí áma càháⁿ ndihi-ndí Yã Ndiõxí, te cue téé xica cuu ndihi-n ñá túú ducaⁿ quide-güedé —càchí-güedé xáhaⁿ-güedé xii-gá.

15 Te Jèsús ní xáhaⁿ-gã xii-güedé:

—Nchòhó xìní-ndó sã vã cúú cũñaha-o xì ñáyiú ñuhu vico tnándaha sã vã cúú cãxi-yu nini ndècu ndihi ñaha téé tnándaha xií-yu, dico sáa nduu vã cùndècu ndihi ñaha-gá téé tnándaha-áⁿ xií-yu, te dàvá-áⁿ te cahni iní-yu vã cãxi-yu cuendá sá ndihú iní-yu.

16 Te ni vã yõ dándée luha dóó sáa ñá dóó sa ní cuu tühú víhí, chí dóó sáa-áⁿ nãndiyi-xi te uuⁿ-gá ndata-xi dóó sã ñi cuu tühú-áⁿ.

17 Te ni vã yõ chihí ndidí sáa xìtí ñi lamba sa ní cuu tühú víhí, chí núu yoo ducaⁿ na càda te ndava lamba sa ní cuu tühú-áⁿ chí ío níhi yócó ndidí-áⁿ, te cuíta-ni ndidí-áⁿ te cuíta-ni lamba-áⁿ te núu ducaⁿ na càdá-yu, núu xiã xìní ñuhu-xi quée ndidí sáa-áⁿ xìtí ñi lamba saa cuendá ducaⁿ ñá túú nã cuu cováha-xi —càchí-gá xáhaⁿ-gã xii-güedé.

Cuendá déhe yoco té Jàirú ndihi cuendá ñi ñaha ní tnándeé dóó Jèsús

(Mr. 5:21-43; Lc. 8:40-56)

18 Te càháⁿ dúcáⁿ-ní Jèsús ní quexìo ñi téé cùnuu núú ndécú-gã, ñi téé tàxi tnuní veñúhu, te ní ngüñí xìtí-dě núú-gã càháⁿ ndàhú-dé, te xáhaⁿ-dě xii-gá:

—Véxi-í càháⁿ ndàhú-í núú-n núu vá cùndèe iní-n quíhíⁿ-ó vehe-í dandòto-n déhe yoco-í chí ní xihí-xi tnávíí, te yúhú cùtnuní iní-í sá núu quíhíⁿ-n tëndaha-n yiqui cuñú-xi te ndoto-xi —càchí-dé xáhaⁿ-dě xii-gá.

19 Te Jèsús ní xica-gá cuáháⁿ-gá ndihi-dé ndihi cue téé xica cuu ndihi-gá. 20 Te ichi ñuhu-gá cuáháⁿ-gá ní sáháⁿ ñi ñadihí ní tnándeé-aⁿ yuhu dõó-gã ndàa sátá-gã, te ñaha-áⁿ sa ní cuu úxúú cuíá sã cùhú-aⁿ ngòyo ñaha níhí xii-aⁿ. 21 Te ducaⁿ ñi quide-aⁿ chí ní sani iní-aⁿ sá núu ndacu-aⁿ tnándeé-aⁿ cuèdicó luha yuhu dõó Jèsús te ndúha-aⁿ ní sani iní-aⁿ. 22 Te Jèsús ní nchócótó-gã ndàa sátá-gã te ní xìní-gá ñadihí-áⁿ, te ní xáhaⁿ-gã:

—Yòhó ñaha cùhú, vá ndihú-gá iní-n vìtna chí sa ní ndúha-n, chí ní sándáá iní ñáhá-n xii-í —càchí-gá xáhaⁿ-gã xii-aⁿ.

Te òré-ni-áⁿ ñi ndúha ñaha cùhú-áⁿ.

23 Te òré ní quexìo Jèsús vehe téé cùnuu taxi tnuní veñúhu-áⁿ, te ní xìní-gá xĩndáhí víhí ñáyiú, te xĩndecu mùsicú. 24 Te ní xáhaⁿ-gã xií-yu:

—Chí táquèe xìtí vehe-a, chí xíchí-a ñá túú ní xihí-xi chí dicó xidí-xi —càchí-gá xáhaⁿ-gã xií-yu.

Te ní sácú ndeé ñáhã-yu xii-gá sá dúcáⁿ ñi cáháⁿ-gá, chí sá cúú-xí mèe-yu te ní xihí ndisa xíchí-áⁿ. 25 Te ñáyiú-áⁿ ñi queé-yu te cuánguihu Jèsús núú cándòdo xíchí ñi xihí-áⁿ, te ní tní-gá ndaha-xi te òré-ni-áⁿ ñi ndacóo-xi. 26 Te nchaa ñuú cáá yàtni xiáⁿ ñi níhí ñáyiú tnúhu nàcuáa ní quide Jèsús.

Jèsús quidé tãtna-gá núú ùú tnàhá cue téé cuáá

27 Te sátá dúcáⁿ ñi cuu te ní xica Jèsús cuánuhú-gá, te ichi ñuhu-gá ní chinchícúⁿ ñáhá ùú tnàhá cue téé cuáá xii-gá, te níhí càháⁿ-güedé, te xáhaⁿ-güedé xii-gá:

—Yòhó Jèsús, téé cùu ñaní tnáhá ndí Dàvíí, cundàhú iní ñáhá xii-ndí —càchí-güedé xáhaⁿ-güedé xii-gá.

²⁸ Te òré ní nasáá Jèsús núú quidé vèhe-gá, te cue téé cuàá-áⁿ ñí quexìo-güedé ndéé núú-gá, te ní xicáⁿ tnúhú-gá núú-güedé, te xáhaⁿ-gá:

—¿Sàndáá iní-ndó sá yùhú ndacu-í cada tátna-í núú-ndó-áⁿ? —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Sàndáá iní-ndí sá díú yòhó Jèsús ndacu-n càda tátna-n núú-ndí —càchí-güedé xáhaⁿ-güedé xii-gá.

²⁹ Te Jèsús ní dácáa-gá ndaha-gá ní tendaha-gá núú-güedé, te ní xáhaⁿ-gá xii-güedé:

—Te vitna, ndúha núú-ndó chi ní sàndáá iní-ndó sá díú yùhú ndacu-í cada tátna-í núú-ndó —càchí-gá xáhaⁿ-gá xii-güedé.

³⁰ Te òré-ni-áⁿ ñí ndúha núú-güedé, te Jèsús ní cáháⁿ víhí-gá dóho-güedé cuendá sá vǎ càháⁿ-güedé nàcuáa ní cuu ní ndúha núú-güedé.

³¹ Te cue téé-áⁿ òré ní ndee-güedé núú ndécú Jèsús, te ní ngüíta-ni-güedé ní caní-güedé cuendú núú ñáyiú nàcuáa ní quide ñaha-gá xii-güedé. Te nchaa dava-gá ñuú cáá yàtni xíáⁿ ñí sáháⁿ-güedé ní caní-güedé cuendú núú ñáyiú nàcuáa ní quide ñaha Jèsús xii-güedé.

Jèsús quidé tátna-gá ñí téé ñíhí

³² Te íchí ñí ndee cue téé ní ndúha núú-xi-áⁿ núú ndécú Jèsús, te ní quexìo ñí uú ñáyiú ndécá-yu ñí téé ñíhí yíhí ñaha espíritú cundíhi yucu ñávǎha. ³³ Te Jèsús ní queñuhu-gá espíritú cundíhi yucu ñávǎha yíhi ñaha xii téé-áⁿ, te òré-ni-áⁿ ñí cuu ní nacáháⁿ-dé. Te nchaa ñáyiú xíndecu-áⁿ ño ní cuñúhu-yu, te ní xítnáhá-yu:

—Ñá túú tnàhí xíní-ó ñí téé duha cada ñuú nchoo cuè ñáyiú isràél ní cùu —cachí-yu xítnáhá-yu.

³⁴ Te cue téé cùu fariséú ní ngüíta-güedé xítnàha-güedé:

—Téé-a chi sácúhná chíndèe ñaha-xi xii-dé queñuhu-dé nchaa espíritú yíhí ñaha xii ñáyiú te diu-ni sácúhná-áⁿ táxi

tnúní-xi nchaa espíritú-áⁿ —càchí-güedé xítnàha-güedé.

Jèsús cundàhú iní-gá ñáyiú

³⁵ Te Jèsús cuáháⁿ-gá nchaa ñuú náhnú ndíhi nchaa ñuú líhli, te ndí tnahá ñí ñí ñuú sàá-gá te ducaⁿ cuànguihu-gá ñí ñí veñúhu càa nchaa ñuú-áⁿ dánèhé-gá ñáyiú tnúhu váha, tnúhu sá sánú ìchi ñaha xii-yu nàcuáa ndíhu ndaha ñaha Yá Ndiöxí xii-yu. Te ducaⁿ-ni ta quide tátna-gá nchaa ñáyiú cùhú cuáháⁿ cuèi ndí dííⁿ ndí dííⁿ núú cuèhé tnàhá-yu ñí ñí-yu. ³⁶ Te sá ñí xíní Jèsús sá ño vǎi ñáyiú nchícúⁿ ñáhá xii-gá, te ní cundàhú iní ñáhá-gá xii-yu chi ío ndíhú iní-yu, te vǎ yó nèhe cuendá ñáhá xii-yu, te cùú-yu dàtná cue mbéé cue quiti ñá túú tòli-xi. ³⁷ Te Jèsús ní xáhaⁿ-gá xii cue téé xica cuu ndíhi-gá:

—Nchòhó xíní-ndó sá òré ná sàá nduu cùu nchaa sá xítú ñáyiú te ío vǎi cuu. Te na càchí tnúhu ndáá-í xii-ndo sá dàtná ío vǎi sá xítú ñáyiú cùu, ducaⁿ ño vǎi ñáyiú cùmání cundedóho tnúhu-í, te ío sacú ñáyiú dàcuaha ñaha xii-yu. ³⁸ Núú xíáⁿ xíní ñúhu-xi cácaⁿ-ndó núú Yá Ndiöxí Yaá cúú Xítohó-ndó ndíhí-yu cuendá sá ná dàcaháⁿ-gá iní-yu cáháⁿ-yu tnúhu-gá núú nchaa dava-gá tnàha ñáyiú-yu cùmání cundedóho tnúhu-gá —càchí-gá xáhaⁿ-gá xii-güedé.

10

Jèsús sǎñaha-gá tnúhu ndee iní xii ndí ùxúú cue téé xica cuu ndíhi-gá

(Mr. 3:13-19; Lc. 6:12-16)

¹ Te Jèsús ní cana-gá ndí ùxúú cue téé xica cuu ndíhi-gá, te ní sǎñaha-gá xii-güedé tnúhu ndee iní cundecu ndíhi-güedé cuendá queñuhu-güedé nchaa espíritú cundíhi yucu ñávǎha yíhi ñaha xii ñáyiú, ndíhi cuendá sá cáda tátna-güedé nchaa dava-gá ñáyiú cùhú cuèi nándi núú cuèhé tnàhá-yu.

² Te duha xínani ndí ùxúú cue téé-áⁿ: téé cùnuu-gá nání-dé Xímú, àdi Pelú chi úú diu-dé, te ñaní-dé cúú tǎ Ndríxí, te tnàhá téé-áⁿ cúú-dé téé xica cuu ndíhi Jesús, ndíhi té Jàcobó ndíhi ñaní té Jàcobó-áⁿ téé nàni Juaá, te ndí ndúú cue téé-áⁿ cúú-güedé déhe té Zebèdeú. ³ Te tnàhá té Lìpé xicá cùu

ndihi-gá, ndihi té Bartolomé, ndihi té Mǎxí, ndihi té Mǎteú té cùu cobradór impuèstú ní cùu, ndihi té Jàcobó déhe té Àlfeú, ndihi té Lèbeú té dǎnani-güedé Tàdeú, ⁴ ndihi té Xímú té ní cundihí cue té canànistá, ndihi té Jùdás Iscàrioté té ní sáá nduu nǐ sáha cuèndá ñáhá xii Jesús núu cuè té cùu úhú iní ñáhá xii-gá.

Jèsús téndàha-gá ndi ùxúú cue té xica cuu ndihi-gá quihín-güedé cáháⁿ-güedé tnúhu-gá núu ñáyiú

(Mr. 6:7-13; Lc. 9:1-6)

⁵⁻⁶ Te Jèsús ní xáhaⁿ-gǎ xii ndi ùxúú cue té xica cuu ndihi-gá sá quihín-güedé cáháⁿ-güedé tnúhu-gá núu ñáyiú, te cùmání-gǎ caca-güedé quihín-güedé, te ní xáhaⁿ-gǎ xii-güedé:

—Na càchí tnúhu-í xii-ndo sǎ méé-ní ñúú núu xǐndecu cue ñáyiú isràél quihín-ndó cáháⁿ-ndó tnúhu-í, te vá quihín-ndó nǐ ñúú ñúú yǐndèhu distritú Sàmariá, te ni vǎ quihín-ndó dàva-gá ñúú núu xǐndecu ñáyiú ñá túú cùu ñáyiú isràél. Te cue ñáyiú isràél-án cúu-yu dàtná cue mbèé cue quiti ní xíta chi ta xíta nihnú-yu cuáhán. ⁷ Te cúñaha-ndo xii-yu sá sà ní cuyatni nduu ndíhu ndaha ñaha Yá Ndiöxí xii-yu. ⁸ Te cada tátna-ndo nchàa ñáyiú cùhú cuèi ñáyiú tnàhá cuéhé sǎ dátèhyú nihnu-xi yiqui cùñú-yu, te queñuhu-ndo nchàa espíritú cundihí yucu ñávàha yihí ñaha xii ñáyiú, te dandòto-ndo cue ñáyiú sa ní xihí, te vá càcáⁿ-ndó yǎhu-ndo núu ñáyiú òré cada-ndo nchàa chiuⁿ-án, chi sa naha-ndo sá dícó ducaⁿ nǐ taxi-í tnúhu ndee iní ndécú ndihi-ndo.

⁹ Te vá cánèhe-ndo díhúⁿ cuu ichi-ndo, ¹⁰ te ni vǎ cánèhe-ndo ñunu cuhuⁿ ndachiuⁿ-ndo, te ni vǎ cánèhe-ndo ingá ichi dóó-ndó nàdáma-ndo, te ni vǎ cánèhe-ndo úú-gá chàú-ndó chi ñiu-ni chàú yíhí-ndó-ǎⁿ xiǎⁿ-ni quihí-ndo, te ni vǎ cánèhe-ndo tatnu, te ducaⁿ càda-ndo chi nchòhó sa naha-ndo sá ncháá ñáyiú quide chiuⁿ te ñiu-ni cuèndá chiúⁿ quidé-yu nihí-yu sá xéxí-yu.

¹¹ Te ndi tnahá ñúú ná quèxio-ndo te nducu-ndo ñáyiú cùtnuní iní-ndó sǎ cúu-yu ñáyiú váha, te vehe ñáyiú-án cundecu-ndo

ndèé sáá nduu ndèe-ndo ñúú-án. ¹² Te òré quexio-ndo vehé-yu te cúñaha-ndo xii-yu: “Yá Ndiöxí chindèe chitúu ñaha-gǎ xii-ndo ndècu-ndo”, duha cúñaha-ndo xii-yu. ¹³ Te núu ní cáháⁿ váha ndihi ñáhá-yu xii-ndo, te cuu-xi sá váha sá cúú-xí-yu cuèndá tnúhu ní xáhaⁿ-ndo-ǎⁿ, dico núu ñá túú ní càháⁿ váha ndihi ñáhá-yu xii-ndo, te cúñaha-ndo xii-yu sá vǎ cúú-xí sǎ váha xii-yu tnúhu ní xáhaⁿ-ndo-ǎⁿ. ¹⁴ Te núu ní sáá-ndó ñúú ñúú àdi ñúú vehe, te núu ñá túú ní càháⁿ ndihi ñaha váha-yu xii-ndo te ni ñà túú ní cuini-yu cundedóho-yu tnúhu càháⁿ-ndó te ndee-ndo ñúú-án àdi vehe-án, te naquidi-ndo tǐcá chúhmá nǐ tnúú sáhá-ndó cuèndá ná cùtnuní iní-yu sá ñà túú quide váha-yu. ¹⁵ Te na càchí tnúhu ndáá-í xii-ndo sǎ sáá nduu te ío-gá dandòho ñaha Yá Ndiöxí xii ñáyiú ducaⁿ na càda ñaha xii-ndo-án dàcúxí ñáyiú ní xǐndecu ñúú Sòdomá ndihi ñúú Gòmorrá.

*Ndoho tnahá-ó cùndecu-o ichi Xítóhó Jesu-
crístú*

¹⁶ Te cada iní-ndó sǎ cúú-ndó dàtná cue mbèé cue quiti cuáhán núu ío yíhí. Te ducaⁿ sǎtnahá-xi cùu-ndo chi yúhú tendaha ñaha-í xii-ndo quihín-ndó núu xǐndecu cue ñáyiú cuihna iní-xi, te ío váha cuáha-ndo cuèndá nàcuáa cada-ndo dàtná quidé cóó, dico cunduu váha iní-ndó ñà túú ná cada-ndo dàtná quidé lómá. ¹⁷ Te quihí iní-ndó chi cue ñáyiú na cùu úhú iní ñáhá xii-ndo, te cuáha cuèndá ñáhá-yu xii-ndo núu cuè té cùchiuⁿ, te caniha-güedé xii-ndo xití veñúhu-güedé. ¹⁸ Te dava tucu ñáyiú cuu úhú iní ñáhá xii-ndo candeca ñahá-yu xii-ndo quihín núu cuè té cùnuu yǐndaha nacióⁿ, àdi núu dàva-gá cue té cùnuu sá cuèndá-í. Te nchòhó nihí-ndó nàcuáa cada-ndo cáháⁿ váha-ndo cuèndá-í núu-güedé ndihi núu cuè ñáyiú ñá túú cùu ñáyiú isràél. ¹⁹⁻²⁰ Dico òré cuáha cuèndá ñáhá-yu xii-ndo núu nchàa cue té-án, te vá cání iní-ndó núu nása cunduu tnúhu cáháⁿ-ndó núu-güedé, chi òré-nǎ te nihí-ndó tnúhu cáháⁿ-ndó. Te ñá díú mèe-ndo cahu iní-ndó tnúhu cáháⁿ-ndó, chi mee Espíritú Yá Ndiöxí Yáa cúu Tátá-ndó dàcáhu iní ñáhá-xí xii-ndo nacuáa cunduu tnúhu cáháⁿ-ndó.

21 'Te dava cue tée cuáha cuendá-güedé ñaní-güedé núú cuè tée cùchiuⁿ cuendá cahni ñaha-güedé, te dava cue tée cùu tátá ñu-ni ducaⁿ càda-güedé déhe-güedé, te ñu-ni ducaⁿ càda ñaha dava cue ñáyiú cùu déhe xii tátá-yu ndihí nãñá-yu, chí cuáha cuendá ñáhã-yu núú cuè tée cùchiuⁿ cuendá cahni ñaha-güedé xii-yu. 22 Te nchòhó chí nchaa ñáyiú ngüíta-yu cuu úhú iní ñáhã-yu xii-ndo sã cuendá-í. Te núu na càda ndee-ni iní-ndó càncicúⁿ nihnu-ni-ndo ìchi-í cuèi nãndi sá ná càda ñahá-yu xii-ndo ndéé ná sãá nduu vã cùndècu-gá-ndó ñùyíú-a ña, te nduu táhú-ndó cùndecu-ndo ni caa ni quíhíⁿ ndihí Yá Ndiòxí. 23 Te núu ñuú ñuú cuiní-güedé tñi ñaha-güedé xii-ndo càda úhú ñáhã-güedé sá cuendá-í, te cunu-ndo núú-güedé quíhíⁿ-ndó ìngá ñuú. Te na càchí tñuhu ndáá-í xii-ndo sã cùmání-gã quíhíⁿ-ndó nchaa dava-gã ñuú núú xíndecu ñáyiú israhél cáháⁿ-ndó tñuhu-í, te sa quixi tucu yúhú, Tée cùu ñaní tñahá-ndó nchaa-ndo ñuyíú-a.

24-25 'Te nchòhó xini-ndó sã ni ñuú tée dàcuaha ñá túú cùnuu-dé dàcúúxí mèstrú-dé, te núu mèstrú tée-áⁿ nãndi yãha-dé ndécú-dé te tàú-dé nduu vétú iní-dé te núu tñahá-dé yãha-dé dàtná yãha mèstrú-dé-áⁿ. Te ñu-ni ducaⁿ sãtnahá tucu-xi cùu ñuú tée xínu cuechi, chí ñá túú cùnuu-dé dàcúúxí pãtróóⁿ-dé, te nchaa sã yãha pãtróóⁿ-dè-áⁿ te tàú-dé nduu vétú iní-dé te núu tñahá-dé yãha-dé dàtná yãha pãtróóⁿ-dè-áⁿ. Te núu yúhú Yáá táxí tñuní ñáhã xii-ndo càchí-yu sá cùu-í sãcuíhã, te uuⁿ-gã ducaⁿ cùñahá-yu xii nchòhó cue tée cùndihí-í.

Vá yùhú-ó cuendá nchaa sá cáda ñaha ñáyiú xii-o

(Lc. 12:2-7)

26 'Te nchòhó vá yùhú-ndó núú ñáyiú. Chí nchaa tñuhu sá cúu yùhu ni cuu vá cúu yùhu-gã, chí nchaa dacuití sã queé tñu-xi núú ñáyiú. 27 Te nchaa tñuhu sá càchí tñuhu-í xii-ndo núú méé núú ñuú-ó, cùu-xi tñuhu sá ndúú yùhu ni cuu datúu-ndo núú cuè ñáyiú cuèi núú chítú núú tàcá. 28 Te xini ñuhu-xi sã vã yùhú-ndó cuè ñáyiú cuèi na càhni ñahá-yu xii-ndo, chí ñu-ni yiqui cùñú-ndó ndácú-yu cahni-yu, dico ñá

túú nãgã ndacú-yu cada ñahá-yu xii-ndo. Te tàú-ndó sã Yã Ndiòxí yùhú-ndó chí Yáá-áⁿ ndacu-gã danãa-gã yiqui cùñú-ndó, te ndacu-gã daquihíⁿ ñáhã-gã xii-ndo núú úhú núú ndàhú.

29 'Te nchòhó xini-ndó sã ndéé úu tñahá tñahá cúyãhu-di núú ñuú-í dñhúⁿ, te ni ñuú-di ñá túú xihí cùtexínu-di chí ndéé núu mee Yã Ndiòxí Yáá cúu Tátá-ndó ná càchí-gã te xihí-di. 30 Dico nchòhó chí ío-gã néhe cuendá ñahá Yã Ndiòxí xii-ndo chí ndéé idi dñu-ndó yíndehu. 31 Núu xihíⁿ càchí-í sã vã yùhú-ndó chí cùnuu-gã-ndó dàcúúxí tñahá cuèi vãi vihi-güedi.

Nchaa ñáyiú datúu núú tñaha ñáyiú-xi sá ndécú ndihí-yu Xitohó Jesucristú

(Lc. 12:8-9)

32 'Te na càchí tñuhu-í xii-ndo sã nchaa ñáyiú na datúu núú tñaha ñáyiú-xi sá ndécú ndihí ñahá-yu xii-í, te ducaⁿ te tñahá yúhú datúu-í núú Tátá-í Dútú Ndiòxí Yáá ndécú àndiu sá ndécú ndihí-í-yu. 33 Dico nchaa ñáyiú na cùñaha xii tñaha ñáyiú-xi sã ñá túú ndécú ndihí ñahá-yu xii-í, te ñu-ni ducaⁿ càda yúhú tucu chí cùñaha-í xii Tátá-í Dútú Ndiòxí Yáá ndécú àndiu sã ñá túú ndécú ndihí-í-yu.

Ñá túú cùu ñuú ñáyiú

(Lc. 12:51-53; 14:26-27)

34 'Te na càchí tñuhu-í xii-ndo sã vã caní iní-ndó sã yúhú véxi-í ñuyíú-a te cuu ñuú-gã ñáyiú cundecú-yu, chí da ngüíta-yu vá cúu ñuú-gã-yu cundecú-yu, te ducaⁿ chí nchaa ñáyiú vá quíndáá iní ñáhã xii-í ñáyiú-áⁿ ngóo-yu cuu úhú iní-yu nchaa ñáyiú quíndáá iní ñáhã xii-í. 35 Te dava cue tée xíndecu tátá-xi te ngóo-güedé cuu úhú iní-güedé tátá-güedé, te ñu-ni ducaⁿ càda cue ñáyiú dñi xíndecu nãñá-xi, chí ngóo-yu cuu úhú iní-yu nãñá-yu, te ñu-ni ducaⁿ càda tucu cue ñáyiú cùu sãnu, chí ngóo-yu cuu úhú iní-yu nãñá yí-yu. 36 Te ndi mèé-yu vehé-yu ngóo-yu vá cúu ñuú-gã-yu cundecú-yu.

37 'Te na càchí tñuhu tucu-í xii-ndo sã nchaa ñáyiú ío-gã ná cùu iní tátá-xi àdi nãñá-xi dàcúúxí yúhú, te ñáyiú-áⁿ ñá túú tàú-yu cundecu ndihí ñahá-yu xii-í, te nchaa ñáyiú ío-gã ná cùu iní déhe ducuⁿ-xi,

àdi déhe yoco-xi dàcúxí yǔhú, te ñi-ndi ducaⁿ ñà túú tàú-yu cundecu ndihi ñàhá-yu xii-í. ³⁸ Te nchaa ñáiyu vá cáncǎcúⁿ ni-hnu ñaha xii-í cuendá sá yùhú-yu ndohó-yu dàtná ndoho-í ñáiyu-áⁿ ñà túú tàú-yu cundecu ndihi ñàhá-yu xii-í. ³⁹ Te cue ñáiyu na yùhú cuú sá cuendá-í te ñáiyu-áⁿ cuíta nihnú-yu, dico nchaa ñáiyu vá yùhú cuú sá cuendá-í, te ñáiyu-áⁿ nduu táhú-yu cundecú-yu ni caa ni quíhⁿ ndihi Yá Ndióxi.

Cuendá sá ndúú táhú-ó
(Mr: 9:41)

⁴⁰ Te nchaa ñáiyu na quèheⁿ cuendá ñàhá xii-ndo te cada iní-yu sá tnàhá yùhú ní queheⁿ cuendá-yu. Te nchaa ñáiyu na quèheⁿ cuendá ñàhá xii-í, te cada iní-yu sá tnàhá Tàtá-í Dútú Ndióxi Yá ní tendaha ñàhá xii-í véxi-í ñuyú-a ní queheⁿ cuendá-yu. ⁴¹ Te nchaa ñáiyu na quèheⁿ cuendá ñà tée càháⁿ tnúhu Yá Ndióxi cuendá sá quidé-dě chùⁿ-gá, te dàtná-ni càa táhú cuáñaha-gã nduu táhú tée ducaⁿ càháⁿ tnúhu-gá-áⁿ, ñi-ndi ducaⁿ cunduú táhú cuáñaha-gã nduu táhú ñáiyu ducaⁿ na quèheⁿ cuendá ñàhá xii-dé. Te nchaa ñáiyu na quèheⁿ cuendá ñà tée quide váha cuendá sá dúcáⁿ quide váha-dé, te dàtná-ni càa táhú nduu táhú tée-áⁿ ñi-ndi ducaⁿ cunduú táhú nduu táhú ñáiyu na quèheⁿ cuendá ñàhá xii-dé. ⁴² Te nchaa ñáiyu na cuáñaha ñà yaxiⁿ ndute coho ñà ñáiyu cùu cuendá-í cuendá sá ní tuha ñàhá-yu xii-í cuéi ñà túú cunuú vihi-yu, te ñáiyu ducaⁿ na cuáñaha ndute-áⁿ ñi-ndi-yu sá ndúú táhú-yu núú Yá Ndióxi — càchí Jèsús xàháⁿ-gã xii-güedé.

11

Jèsús càháⁿ ndihi-gá cue tée xica cuu ndihi té Juàá

(Lc. 7:18-35)

¹ Te sátá ní yáha ducaⁿ ní xàháⁿ Jèsús xii ndi ùxúú cue tée xica cuu ndihi-gá, te ní xica-gá cuáháⁿ-gá nchaa ñuú cáa yàtni xíáⁿ dánèhé-gá ñáiyu tnúhu-gá.

² Te té Juàá yìhi-dé vecaá te ní níhi-dé tnúhu nchaa nàcuáa quide Xítóhó Jesu-crístú. Te sátá dúcáⁿ te ní tendaha-dě ñà úú cue tée xica cuu ndihi-dé cuáháⁿ-güedé núú ndécú Jèsús. ³ Te òré ní quexìo-güedé núú ndécú-gã, te xicáⁿ tnúhú-güedé núú-gã

nàcuáa ní xàháⁿ tē Juàá xii-güedé, te xàháⁿ-güedé xii-gá:

—Véxi-ndí xicáⁿ tnúhú-ndí núú-n núu sá díú-n cùu-n Cristú Yá ní tendaha Yá Ndióxi véxi ñuyú-a, àdi sá cündetu nahi-ni-ndí mei Yàá-áⁿ —càchí-güedé xàháⁿ-güedé xii-gá.

⁴ Te Jèsús ní xàháⁿ-gã xii-güedé:

—Chí cuánùhú te cani-ndo cuendú núú tē Juàá nchaa sá ní xiní-ndó quide-í, ndihi nchaa nàcuáa ndúu tnúhu ní càháⁿ-í ní xindedóho-ndo. ⁵ Te cúñaha-ndo xii-dé sá quidé tátna-í núú cue ñáiyu cuáa, te quide tátna-í cue ñáiyu yacua, ndihi cue ñáiyu tnàhá cuéhé sá dátèhyú ni-hnu-xi yiqui cùñú-yu, ndihi cue ñáiyu doho, nchaa ñáiyu-áⁿ quidé tátna-í, te ndüha-yu, te ndéé tnàhá cue ñáiyu sa ní xíhí dándòto-í cúñaha-ndo. Te cúñaha tùcu-ndo xii-dé sá ndécú-í dánèhé-í nchaa ñáiyu ndàhú, tnúhu sá sánú ìchi ñaha xii-yu nàcuáa naníhí táhú-yu. ⁶ Te cúñaha tùcu-ndo xii-dé sá ìo váha táhú nchaa ñáiyu ñà túú quide sáa iní-xi nchaa tnúhu càháⁿ-í, duha cúñaha-ndo xii-dé —càchí-gã xàháⁿ-gã xii-güedé.

⁷ Te sátá ní yáha-güedé cuánuhú-güedé te ní ngúita Jèsús ní càháⁿ-gã núú ñáiyu cuendá té Juàá, te xàháⁿ-gã xii-yu:

—Nchòhó ní sàháⁿ ndéhé-ndó ñà tée ndécú xití yucu, te tée-áⁿ ñà túú sàni ñà sàni úú iní-dé, chi ñà túú quide-dé dàtná quidé nchaa ité náhnú cuáháⁿ-xi duha cuáháⁿ-xi dàcáⁿ òré quéné tãchí. ⁸ Te ní ñà túú ní sàháⁿ ndéhé-ndó ñà tée ni-hnu dóo váha dóo vii càa. Te nchòhó xiní-ndó sã ncháá ñáiyu ni-hnu dóo váha dóo vii càa xindecú-yu vehe cue tée cunuú yindaha ñáiyu. ⁹ Dico nchòhó chí ní sándéhé-ndó ñà tée càháⁿ tnúhu Yá Ndióxi, te ndáá sá díú ñà tée càháⁿ tnúhu-gá cúú-dě, te cunuú-gá-dé dàcúxí dàva-gá cue tée càháⁿ tnúhu-gá. ¹⁰ Te ñi-ndi cuendá té Juàá-áⁿ càháⁿ-xi núú tütú Yá Ndióxi nàcuáa ní xàháⁿ-gã xii Crístú, te duha ní xàháⁿ-gã: Tendaha-í ñà tée càháⁿ-dé tnúhu-í codonùu-dé núú-n,

cuendá dàtúha-dé ñáiyu cuendá quíndáa iní-yu tnúhu-n.

Duha ní xàháⁿ-gã, te ducaⁿ ní ngódó tnùní núú tütú-gá. ¹¹ Te na càchí tnúhu ndáá-í xii-ndo sã ní ñà cue tée ñuyú-a ñà túú cunuú-güedé dàtná cunuú té Juàá tée

dàcuandute ñaha xii ñáiyu. Te nchaa ñáiyu sa ta ndíhu ndaha ñaha Yá Ndiõxí vitna cuáháⁿ cúnúu-gá-ni tucú-yu dácúúxí tē Juàá cuéi cùu-yu ñáiyu ñá túú cúnúu dácúúxí dāva-gá ñáiyu yìndaha-gá.

12 Te ndéé cùtnàhá ní ngüíta té Juàá tée dàcuandute ñaha xii ñáiyu càháⁿ-dé tnúhu Yá Ndiõxí ñuyíú-a, ndéé dāvá-áⁿ nǐ ngüíta ñáiyu cuíní-yu sá ndíhu ndaha ñaha Yá Ndiõxí xií-yu te ndùcu ndéé-yu quidé-yu nàcuáa ndíhu ndaha ñaha-gá xií-yu. 13 Te nchaa cue tée ní xóo cáháⁿ tnúhu Yá Ndiõxí ndéé sanaha nǐ cáháⁿ-güedé sá díú-gá ndíhu ndaha-gá cue ñáiyu, te ñu-ni ducaⁿ nǐ cáháⁿ tucu ndíi Moisés ní ngódó tnùní núú tütú ndíi. Te ñu-ni ducaⁿ cúnúu nchaa tnúhu-áⁿ càháⁿ-xi nàcuáa ndíhu ndaha Yá Ndiõxí ñáiyu ndéé ní sáá nduu nǐ ngüíta té Juàá càháⁿ-dé tnúhu-gá ñuyíú-a. 14 Te na càchí tnúhu-í xii-ndo sá cáda cuendá-ndó, chí núú tütú Yá Ndiõxí càchí-xi sá ndíxí tē Èliás, te ñu núú tē Èliás-áⁿ nǐ quide té Juàá. 15 Te nchaa nchòhó ñáiyu ndèdóho nchaa tnúhu càháⁿ-í-a te ío váha chí cuáha cuendá.

16 Te na càchí tnúhu tucu-í xii-ndo nàcuáa sãtnahá-xi cùu ñáiyu ndècu vitna. Chí ñáiyu-áⁿ cúú-yu dàtná cue landú sácõo núú yáhu dàdiqui-güexi te níhi càháⁿ-güexi, te xĩtnàha-güexi ndi mee landú-güexi: 17 “Ní tiú-ndí yaá ndíhi vilu te ñá túú ní cuíní-ndó càta-ndo. Te ío yica ìní ní xita yuhu-ndí te ñá túú ní ndáhyú-ndó”, càchí-güexi xĩtnàha-güexi. Te ducaⁿ sãtnahá-xi cùu ñáiyu ndècu vitna, 18 chí té Juàá ío ndàhú ní xóo caxi-dé, te nǐ ñà túú ní xõo coho-dé ndudí ndéhé yoho yàha stilé sá sà ní nduu-xi ndidí, te sá dúcáⁿ nǐ xóo cada-dé te ní cachí-yu sá nǐ xíndecu ndíhi-dé espíritú cùndíhi yucu ñávãha. 19 Te sáta nǐ quexìo yúhú Tée cùu ñaní tnáhá-ndó nchaa-ndo, te xèxi-í xìhi-í quidè-í, te càchí-yu sá yúhú cùu-í ñⁿ tée xèxi vihi te xìhi vihi, te càchí tucú-yu sá cùu-í tée xìca cuu ndíhi cue tée cuìhna ìní-xi quide cobrá ñáhá xii-yu cuendá impuèstú ndíhi nchaa dāva-gá cue tée ndècu ichi cuehé ichi duha, duha càchí-yu. Te ñáiyu ní tnahá tnúhu ndíhi Yá Ndiõxí, ñáiyu-áⁿ quidè-yu sá váha nàcuáa cutnùní sá méé-gá ío ndècu ndíhi-gá sá xìní tnùní-gá —càchí-gá xãhaⁿ-gã xií-yu.

Cuendá ñáiyu dāva ñuú ñá túú sãndáá iní tnúhu Xitohó Jesucristú

(Lc. 10:13-15)

20 Te Jèsús ní ngüíta-gá càháⁿ-gá dóho nchaa ñáiyu ñuú núú ío-gá vǎi núú sã vǎ yõo tnàhí ndàcu cada ní quide-gá, chí nchaa ñáiyu ñuú-áⁿ ñà túú cuíní-yu ndixi túu iní-yu sá ñà túú quide váha-yu ndècú-yu, te xãhaⁿ-gã xií-yu:

21 —¡Ndàhú nchòhó cue ñáiyu ñuú Corazín! ¡Te ndàhú nchòhó cue ñáiyu ñuú Betsaidá! Chí núu dícó ñuú Tírú ndíhi ñuú Sidón ní quide-í nchaa sá vǎ yõo tnàhí ndàcu cada datná ní quide-í ñuú-ndó-á nǐ xìní-ndó ñá, te sá ndéé ama-gá cuihnú-yu dóo ndàhú te cunu cóo-yu núú yáá cuendá sá ndíxí cuèchi iní-yu sá ñà túú quide váha-yu ni cùu. 22 Dico sáá nduu te ío-gá dandóho ñaha Yá Ndiõxí xii-ndo dácúúxí ñáiyu ñuú Tírú ndíhi ñáiyu ñuú Sidón.

23 Te nchòhó cue ñáiyu ñuú Capèrnaúm ío quide cahnu-ndo mee-ndo, te quide iní-ndó sá sã cuánda-ná-ndó àndíu, dico ñáhá chí núú ùhú núú ndàhú nduu táhú-ndó cùndecu-ndo. Te núu dícó ñuú Sòdomá ní quide-í nchaa sá vǎ yõo tnàhí ndàcu cada datná ní quide-í ñuú-ndó nǐ xìní-ndó ñá, te ñáiyu-áⁿ vǎ náá-yu chí cundecu-ní-yu ndéé vitna ni cùu. 24 Te na càchí tnúhu-í xii-ndo sá sáá nduu te ío-gá dandóho ñaha Yá Ndiõxí xii-ndo dácúúxí ñáiyu ñuú Sòdomá —càchí-gá xãhaⁿ-gã xii nchaa ñáiyu ñuú-áⁿ.

Jèsús cuíní-gá sá túhá ñaha ñáiyu xii-gá

(Lc. 10:21-22)

25 Te sáta xãⁿ te Jèsús ní ngüíta-gá càháⁿ ndíhi-gá Tãtã-gã Dútú Ndiõxí, te xãhaⁿ-gã:

—Yòhó Tãtã-í Dútú Ndiõxí, ío chíñuhu ñaha-í xii-n chí ñu-n tãxi tnùní-n àndíu ndíhi ñuyíú-a, te dànehé-n cuè ñáiyu nchaa tnúhu váha, te ñu-ni ñáiyu-áⁿ cúú-yu ñáiyu ñá túú cùtnùní iní-xi nchaa tnúhu càháⁿ cue tée càchí sá ío túha, te nchaa tnúhu váha-áⁿ ñà túú datúu-n núú ñáiyu càchí sá ío túha te ío váha sãá díquí-xi. 26 Chí ducaⁿ cuíní-n cùnduu —cachí-gá xãhaⁿ-gã xii Tãtã-gã.

27 Te xãhaⁿ-gã xii nchaa ñáiyu xĩndecu-áⁿ:

—Mee Tãtã-í Dútú Ndiõxí ní cachí-gá sá cúnúu-í núú nchãandi túhú sá ío. Te vá yõo ñⁿ-gá xìní nàcuáa sãni iní yúhú Déhe Dútú Ndiõxí, chí ñⁿdíi díí-ni mee-gã xìní-gá nàcuáa sãni iní-í, te mee-í xìní-í nàcuáa

sàni iní mée-gă. Te nchaa ñáyiú càchí iní-í sá quíní-yu nàcuáa sàni iní Tătà-í Dútú Ndióxi te xĩtnũhu-í-yu, te vá yõo ñá-gá xini chi ñi-yu ñáyiú ducaⁿ xĩtnũhu-í-áⁿ xini-yu. ²⁸ Te nchaa nchòhó ñáyiú ñá túú ndècu váha, ñáyiú ñá túú ñihí nàcuáa cada cundecu váha iní-xi quixi-ndo tũha ñaha-ndo xii-í nàcuáa ducaⁿ cundecu váha iní-ndó. ²⁹ Te cuu vii cuu váha iní-ndó tñi-ndo nchaa tnũhu càháⁿ-í, te ío dacuàha-ndo, te ducaⁿ càda-ndo chi yúhú ío càhnu iní-í, te ío ndàhú iní-í. Te núu ducaⁿ na càda-ndo te ío váha cuu iní-ndó cundecu-ndo. ³⁰ Te tñi-ndo nchaa tnũhu càháⁿ-í chi ñá túú cùu-xi ñá sá vèe, chi cada iní-ndó sá cùu-xi dàtná ñá chiuⁿ ñamá —càchí-gá xãhaⁿ-gã xii-yu.

12

Cue tée xica cuu ndihí Jesús sàhnú-güedé yoco triú nduu ndetátú ñáyiú

(Mr. 2:23-28; Lc. 6:1-5)

¹ Te ñá nduu cùu-xi nduu ndetátú ñáyiú ñũhu Jesús ichi ndihí cue tée xica cuu ndihí-gá, te ta yãha-gá ndihí-güedé ñá xichi núu cáá triú te xixihí-güedé docó ñũu xĩaⁿ ní ngüita-güedé sàhnú-güedé yoco triú-áⁿ, te ndihí ndaha-güedé quíⁿ-güedé queé triú-áⁿ tá xèxi-güedé cuáháⁿ. ² Te cue tée cùu fariséu ní xini-güedé nàcuáa quide cue tée xica cuu ndihí Jesús, núu ní xãhaⁿ-güedé xii-gá:

—¿Ná cuendá ducaⁿ quide cue tée xica cuu ndihí-n sàhnú-güedé yoco triú, te vitna cùu-xi nduu ndetátú-í? Te ñá túú tàú-güedé ducaⁿ càda-güedé —càchí-güedé xãhaⁿ-güedé xii-gá.

³ Te Jèsús ní xãhaⁿ-gã xii-güedé:

—¿Náa ñá túú dàcuaha-ndo núu tùtú Yã Ndióxi núu càháⁿ-xi nàcuáa ní quide ndí Dávíí cùtnàhá ní xihí ndí docó ndihí cue tée ní xica cuu ndihí ndí-áⁿ? ⁴ Chi ndí-áⁿ ñá quihu ndí vehe Yã Ndióxi ní queheⁿ ndí pãá ní cuu í ndécú-áⁿ ñá xèxi ndí ndihí cue tée ní xica cuu ndihí ndí, te ñá túú tàú ndí sá dúcáⁿ càda ndí ndihí cue tée-áⁿ ní cùu, chi mee-ni cuè dútú tàú-güedé caxi-güedé pãá-áⁿ ní cùu. ⁵ ¿Te náa ñá túú xini-ndó nàcuáa càháⁿ-xi núu tùtú ndí Moisés sá ncháá cuè dútú vã ndetátú-güedé nduu cùu-xi nduu ndetátú-áⁿ? Te ñá díú ñá cuèchi cùu-xi sá dúcáⁿ ñá túú ndetátú-güedé nduu

cùu-xi nduu ndetátú. ⁶ Te na cãchí tnũhu-í xii-ndo sã yũhú cùu-í tée ío-gá cùnũu ndecu ndihí-ndo dacúúxí veñũhu sã ío cùnũu. ⁷ Dico nchòhó chi ñá təcú tnũni-ndó nàcuáa càháⁿ Yã Ndióxi núu tùtú-gá núu cãchí-xi: “Yúhú cuñí-í sá cùndàhú iní-ndó cuè tñaha ñáyiú-ndo te ñá díú mèe-ni sá cãhni-ndó quiti nduu táhú-í”, duha cãchí-gá núu tùtú-gá. Te núu dícó nchòhó təcú tnũni-ndó ñá, te vá càháⁿ cuèhé-ndó cuendá nchaa ñáyiú ñá túú ndècu cuèchi-xi. ⁸ Te yúhú Tée cùu ñani tñhá-ndó nchaa-ndo, tñhá-í ndécú ndihí-í tnũhu ndee iní sá cùu-í nchaa ñáyiú nàcuáa cadá-yu nduu ndetátú-ó-á —cãchí-gá xãhaⁿ-gã xii-güedé.

Ñá tée ní yichí ñá xio ndaha-xi

(Mr. 3:1-6; Lc. 6:6-11)

⁹ Te Jèsús ní xica-gá cuáháⁿ-gá, te cuanguihu-gá xiti ñá veñũhu. ¹⁰ Te xĩaⁿ ndécú ñá tée ní yichí ñá xio ndaha-dé. Te dava cue tée xĩndecu-áⁿ ndúcú-güedé nàcuáa cada-güedé cacáⁿ cuèchi-güedé cuendá-gá núu cuè tée cùnũu, te ní xicáⁿ tnũhú-güedé núu-gã, te xãhaⁿ-güedé:

—Cachí tnũhu xii-ndí ñũu cuu cada tátna-o ñá tée cùhú nduu cùu-xi nduu ndetátú-ó ñá ñãhá —càchí-güedé xãhaⁿ-güedé xii-gá.

¹¹ Te Jèsús ní xãhaⁿ-gã xii-güedé:

—Te nchòhó òré ná ngàunihnu ñá mbéé-ndó ñá déhvã cùnú te nàtava-ndo-di cuèi cùu-xi nduu ndetátú-ó. ¹² Te ñá ñáyiú ío-gá cùnũu-yu dàcúúxí ñá mbéé, núu xĩaⁿ tàú-ó sã cadá-ó sã váha sá cùu-xi-yu cuèi cùu-xi nduu ndetátú-ó —càchí-gá xãhaⁿ-gã xii-güedé.

¹³ Te dàtnũni ní xãhaⁿ-gã xii tée cùhú ndaha-xi-áⁿ:

—Ndacani ndaha-n —càchí-gá xãhaⁿ-gã xii-dé.

Te tée-áⁿ ñá ndacani-dé ndaha-dé, te òré-ni ní ndúha ní nduu-xi dàtná cáá ñngá xio ndaha-dé. ¹⁴ Te cue tée cùu fariséu ní ndee-güedé xiti veñũhu, te ní ngüita-güedé ndátnũhu-güedé ñũu nása cada-güedé cahni-güedé Jèsús.

Nàcuáa sa ndéé tnũni cuendá Jèsús

¹⁵ Te sátá ñá cutnũni iní Jèsús nàcuáa cuñí-güedé cada ñaha-güedé xii-gá te ní xica-gá cuáháⁿ-gá, te ío vai ñáyiú nchícúⁿ

ñáhá xii-gá cuáháⁿ, te tnáhá cue ñáyiú cùhú nchicúⁿ ñáhá xii-gá cuáháⁿ, te ní quide tátna-gá cue ñáyiú-áⁿ. ¹⁶ Te ní xáhaⁿ-gá xii-yu sá vǎ cǎháⁿ-yu yoo cùu-gá. ¹⁷ Te ducaⁿ nǐ cuu chi ní quee ndáá-xi nǎcuáa ní xáhaⁿ Yǎ Ndiǒxí xii ndíi Chàíá téé ní xóo cáháⁿ tnúhu-gá ndéé sanaha nǐ chídó tnùní ndíi núú tütú-gá, te duha ndùu tnúhu ní xáhaⁿ-gǎ:

¹⁸ Téé-a cùu-dé téé ní sani iní-í sá cúnú cuèchi-dé núu-í,

te ío cùu iní-í-dé, te cùdǐ iní-í-dé.

Te yúhú cuǎñaha-í Espíritú-í cundecu ndíi-dé,

te diu-dé cùñaha-dě xii nchaa ñáyiú ñuyúú sǎ yúhú ío ndáá quídè-í.

¹⁹ Te vǎ dǎcǎá-dé tnúhu cáháⁿ-dé ndíi ñáyiú, te ní vǎ cáná sǎa-dé òré cáháⁿ-dé,

te ní vǎ yǒo níhí tnúhu nása cáháⁿ-dé cuhuⁿ-dé ichi.

²⁰ Te ní ñà túú nǎ cada-dé cue ñáyiú cùu datná ìⁿ tnu ndǒó sá cuìní-xi tnáhnú, te diu-ni ñáyiú-áⁿ cúú tucú-yu datná ìⁿ mèchá cǎndíl sǎ ío quène ñúhmá te cuìní-xi ndahvá.

Te ducaⁿ sǎtnahá-xi cùu ñáyiú-áⁿ chi ñá túú níhí ndéè-yu cundecú-yu sá cúú-xi-í, te mee-ni sǎ vǎha cada ñaha-dě xii-yu,

te diu-ni ducaⁿ cǎda-dé ndéé sǎá nduu cùtnuní iní nchaa ñáyiú sǎ ío ndáá quídè-dě.

²¹ Te nchaa ñáyiú níhí ñuyúú ío cundee cùu cahnu iní ñáhǎ-yu xii-dé.

Duha ní xáhaⁿ-gǎ xii ndíi Chàíá ní chídó tnùní ndíi núú tütú-gá.

Càchí-güedé sá ndécú ndíi Jesús espíritú cùndíi yucu ñávǎha

(Mr. 3:20-30; Lc. 11:14-23; 12:10)

²² Te ní quexìo ìⁿ úú cue téé núú ndécú Jèsús, te ndèca-güedé ìⁿ téé ñíhí te cuàá-dé, te yíhi ñaha espíritú cùndíi yucu ñávǎha xii-dé, te Jèsús ní queñuhu-gá espíritú cùndíi yucu ñávǎha yíhi ñaha xii-dé, te òré-ni-áⁿ nǐ cuu ní nacáháⁿ-dé te ní ndúha núú-dě. ²³ Te nchaa ñáyiú xǐndecu-áⁿ ío ní cuñúhu-yu sá dúcáⁿ nǐ quide-gá, te ní xǐtnáhá-yu:

—Váa téé-a cùu-dé ñaní tnáhá ndíi Dávíí téé tendaha Yǎ Ndiǒxí quixi ñuyúú-a — cǎchí-yu xǐtnáhá-yu.

²⁴ Te cue téé cùu fariséú ní tecú dóho-güedé nǎcuáa ndùu tnúhu xǐtnáhá-yu, núu xǐáⁿ ní xǐtnàha-güedé:

—Téé-a ndèñuhu-dé nchaa espíritú cùndíi sácuíhná yíhi ñàha xii ñáyiú, chi diu-ni sácuíhná-ǎⁿ chǐndèe ñaha-xi xii-dé te diu-ni-xi tàxi tnuní-xi nchaa espíritú-áⁿ — duha ní xǐtnàha-güedé.

²⁵ Te Jèsús ní cutnùní iní-gá nǎcuáa ndùu tnúhu ní xǐtnàha-güedé, núu ní xáhaⁿ-gǎ xii-güedé:

—Te nchòhó xìní-ndó sǎ núu ìⁿ téé yǐndaha ìⁿ nacióⁿ vǎ cúú ìⁿnuu-dé ndíi cue téé cùndíi-dé, te vǎ cùdǐ-dé cunuu-dě. Te diu-ni ducaⁿ sǎtnahá tucu-xi cùu tucu cue téé cùchiuⁿ ìⁿ ñuú, chi núu vǎ cúú ìⁿnuu-güedé cundecu-güedé, te vǎ cùdǐ-güedé cundecu-güedé taxi tnùní-güedé. Te diu-ni ducaⁿ sǎtnahá tucu-xi cùu cue ñáyiú xǐndecu ìⁿ-ni vèhe, chi núu vǎ cúú ìⁿnuu-yu cundecú-yu te vǎ cùdǐ-yu cundecu cǎhnú-yu. ²⁶ Te núu sácuíhná ducaⁿ quide-xi queñuhu-xi cue espíritú cùndíi-xi yíhi ñaha xii ñáyiú ña, te ñá túú cùu ìⁿnuu-xi ndecu-xi te núu ducaⁿ, te vǎ cùdǐ sácuíhná-ǎⁿ cundecu-xi taxi tnùní-xi te núu ducaⁿ quide-xi. ²⁷ Te duha cǎháⁿ-í chi nchòhó cǎchí-ndó sǎ chǐndèe ñaha sácuíhná xii-í queñúhu-í nchaa espíritú cùndíi-xi yíhi ñaha xii ñáyiú. Te núu yúhú quídé cuèndá-ndó sǎ sácuíhná chǐndèe ñaha-xi xii-í, te xini ñuhu-xi cada cuèndá-ndó yòo chindee ñaha xii cue téé xǐca cuu ndíi-ndo queñuhu-güedé nchaa espíritú cùndíi yucu ñávǎha yíhi ñaha xii ñáyiú. Te mee-güedé cǎchí-güedé sǎ nchòhó ñá túú cǎháⁿ ndáá-ndó sǎ dúcáⁿ cǎháⁿ-ndó. ²⁸ Dico yúhú chi Espíritú Yǎ Ndiǒxí chǐndèe ñaha-xi xii-í queñúhu-í nchaa espíritú cùndíi sácuíhná yíhi ñàha xii ñáyiú, te sá dúcáⁿ chǐndee ñaha Espíritú-gá xii-í, xǐáⁿ cùtnùní sǎ sǎ ní sǎá nduu cuìní-gá ndíi ndaha ñàha-gá xii-ndo.

²⁹ Te nchòhó xìní-ndó sǎ cuè ñadúhú chi vǎ ndácú-güedé cuèndá-ni quíhu-güedé duhu-güedé vehe ìⁿ téé ío ndee, chi díhna-gá xìní ñúhu-xi tni-güedé téé-áⁿ

dacùtu ñaha-güedé xii-dé dătnùní ducaⁿ te ndacu-güedé duhu-güedé nchaa sá ndécú ndìhi-dé.

³⁰ Te nchaa ñáyiú ñá túú cùndìhi ñaha xii-í, te cùu úhú iní ñáhă-yu. Te nchaa ñáyiú ñá túú chindee ñaha xii-í, te dàquee tíhŭ-yu chiuⁿ quide-í.

³¹ Te na cächí tnúhu-í xii-ndo să ncháá ñáyiú quide nchaa sá cuèhé sá dúhá cuu cada cahnú iní ñáhá Yă Ndiöxí xii-yu, te ñu-ni ducaⁿ cùu cada cahnú iní-gá nchaa tnúhu cuèhé tnúhu duha cahnú-yu. Dico cue ñáyiú na cahnú úhú cuendá Espiritú-gá, te ñáyiú-án vă cadá cahnú iní ñáhá tnáhí-gá xii-yu. ³² Te nchaa ñáyiú na cahnú úhú cuendá yúhú Tée cùu ñaní tnáhă-yu ncháá-yu, te cuu cada cahnú iní ñáhá Yă Ndiöxí xii-yu. Dico cue ñáyiú na cahnú úhú cuendá Espiritú-gá te vă cadá cahnú iní ñáhá tnáhí-gá xii-yu cuèi vitna ndècu vívŭ-yu, te cuèi na cùu-yu.

Ndi dŭñ nŭú yutnu xini-ó nă yutnu cùu-xi cuendá sá sãvidí-xi (Lc. 6:43-45)

³³ Te nchòhó xini-ndó să ndi dŭñ nŭú yutnu xini-ó nă yutnu cùu-xi cuendá sá sãvidí-xi, te xini-ó să ncháá yutnu váha cùuⁿ mee-ni sãvidí váha, dico nchaa yutnu sá ñà túú váha te cùuⁿ mee-ni sãvidí sá ñà túú váha. Te duha cahnú-í cuendá cada cuendá váha-ndo năcuáa ndùu chiuⁿ quide-ndo ññⁿ ññⁿ-ndo cuendá ducaⁿ cùtnuní ná ñáyiú cùu-ndo. ³⁴ Dico nchòhó cúu-ndó dătná ññⁿ cóó dĕéⁿ chi ío cuihna iní-ndó, te vă cání iní-ndó să ndácú-ndó cahnú-ndó ññⁿ tnúhu váha, chi ío cuihna iní-ndó. Te nchòhó xini-ndó să ncháá ñáyiú cahnú-yu nání véxi iní-yu. ³⁵ Te nchaa ñáyiú váha iní-xi cahnú-yu tnúhu váha, chi ñu-ni tnúhu váha-án ñúhú iní-yu. Te nchaa ñáyiú cuihna iní-xi cahnú-yu tnúhu cuèhé tnúhu duha, chi ñu-ni tnúhu cuèhé tnúhu duha-án ñúhú iní-yu. ³⁶ Te na cächí tnúhu-í xii-ndo să ná sáa nduu càda ndáá Yă Ndiöxí cuèchi nchaa nchòhó ñáyiú ndècu ñuyú-a, te nchaa tnúhu cuèhé tnúhu duha cahnú-ndó cahnú-gá sá ñà túú ní quide váha-ndo să dúcáⁿ ññⁿ cahnú-ndó tnúhu-án. ³⁷ Te năcuáa ndùu tnúhu ní cahnú-ndó ññⁿ ññⁿ-ndo, te ducaⁿ cahnú Yă Ndiöxí te núu ndècu cuèchi-ndo àdi ñá túú ndècu cuèchi-ndo. Te núu ñá túú cuèchi-ndo te cácu-ndo, dico núu

ndècu cuèchi-ndo te vă cácu-ndo —cächí-gá xăhaⁿ-gă xii cue tée cùu fariséu-án.

Cue tée cuini sá cadá Jèsús ññⁿ sá vă yŏo tnáhí ndacu cada (Mr. 8:12; Lc. 11:29-32)

³⁸ Te cue tée cùu fariséu, ndihi cue tée dàcuaha ñaha xii ñáyiú nchaa tnúhu ní chídó tnùní ndíi Moisés xăhaⁿ-güedé xii Jèsús:

—Mèstrú, cuini-ndí cada-n ññⁿ sá vă yŏo tnáhí ndacu cada cuendá ducaⁿ cùtnuní iní-ndí sá Yă Ndiöxí chindèe ñaha-gá xii-n —cächí-güedé xăhaⁿ-güedé xii-gá.

³⁹ Te Jèsús ní xăhaⁿ-gă xii-güedé:

—Ñáyiú ndècu ichi cuehé ichi duha ñá túú cuini-yu tní-yu tnúhu cahnú Yă Ndiöxí, te ñáyiú-án cuini-yu cada-í ññⁿ sá vă yŏo tnáhí ndacu cada năcuáa cùtnuní iní-yu núu ndáá sá Yă Ndiöxí chindèe ñaha-gá xii-í. Dico yúhú chi ñá túú năgá cada-í quini-yu, chi sa nihí-yu tnúhu năcuáa ní yáha ndíi Jónás tée ní xóo cahnú tnúhu Yă Ndiöxí ndéé sanaha, te ñu-ni ducaⁿ yăha yúhú tucu. ⁴⁰ Chi ndíi Jónás-án ññⁿ xúhuⁿ ndíi úní nduu úní niú xití ññⁿ chácá cahnú vîhi nani ballená. Te ñu-ni ducaⁿ yăha yúhú Tée cùu ñaní tnáhă-ndó nchaa-ndo, chi úní nduu úní niú cuhuⁿ-í xití ññⁿ hu. ⁴¹ Te na sáa nduu càda ndáá Yă Ndiöxí cuèchi nchaa ñáyiú ndècu ñuyú-a, te dăvâ-án cachí nchaa ñáyiú ñuú Nînivé sá ñà túú ní quide ndáá nchaa ñáyiú ndècu vitna, te ducaⁿ cahnú-yu chi mèe-yu ní dăñă-yu ichi cuèhé ichi duha cùtnáhá ní sáháⁿ ndíi Jónás ñuú-yu ní cahnúⁿ ndíi tnúhu Yă Ndiöxí núu-yu. Dico vitna iha ndècu ndihi ñaha-ndo xii yúhú, te ñu-í ío-gá cùnùu-í dăcúxí ndíi Jónás. ⁴² Te nduu càda ndáá Yă Ndiöxí cuèchi nchaa ñáyiú, te dăvâ-án quini-ndó ññⁿ ñadîhí ñaha ní xîndaha ññⁿ nacióⁿ cáá ndàa xio datni núú quéné nchîcanchii, te ñaha-án ño xica ññⁿ xîndecu-aⁿ te ní sáháⁿ-aⁿ ní xîndedóho-aⁿ nchaa tnúhu ní cahnúⁿ ndíi Salómón, chi ndíi-án ño ní sáa sá xini tnùní ndíi. Te tnáhă ñaha-án cahnú-aⁿ sá ñà túú ní quide ndáá nchaa ñáyiú ndècu vitna. Dico vitna iha ndècu ndihi ñaha-ndo xii yúhú, te ñu-í ío-gá cùnùu-í dăcúxí ndíi Salómón.

Espiritú cùndihi yucu ñávăha sá nănchòcáva xito cùu uú (Lc. 11:24-26)

⁴³ Te òré ná quée ñàha ìⁿ espíritú cùndìhi yucu ñávàha xii ìⁿ ñáyíu, te cuáháⁿ-xi ndùcu-xi ìⁿ xichi núú cùndècu-xi te ñá ñíhí-xi te ní sani iní-xi: ⁴⁴ “Váha-gá núhú tucu-í núú ñí xíndecu-í”, duha ní sani iní-xi. Te cuánuhú-xi, te òré ní nasáá-xi, te ní xiní-xi sá cáá iní ñáyíu-áⁿ dàtná cáá-ná ìⁿ vehe ní natíhú ní nduu vii-ná te vá yòo-gá ndécú. ⁴⁵ Te sátá dúcáⁿ te ní xica-xi cuáháⁿ-xi cuándúcú-xi ùsá tnhá espíritú cùndìhi-xi sá nèhé víhí-gã xíquide. Te òré ní ñíhí-xi cue espíritú-áⁿ te ndèca ñaha-xi cuáháⁿ cuendá ngúndecu ndìhi-xi ñáyíu-áⁿ. Te ñáyíu-áⁿ uuⁿ-gá nándi yáha-yu dàcúxí ndèè díhna. Te òdu-ni ducaⁿ sãtnahá-xi yáha nchaa ñáyíu cuihna iní-xi ndècu ñuyíú-a vitna –càchí-gá xãhaⁿ-gã xii-güedé.

Cue ñaní Jèsús ndìhi nãná-gã
(Mr. 3:31-35; Lc. 8:19-21)

⁴⁶ Te càháⁿ dúcáⁿ-ní Jèsús ní quexìo náná-gã ndìhi cue ñaní-gã cuìní-yu càháⁿ ndìhi ñàhá-yu xii-gá, te ní ngúnu tñí-yu ndàa quehé vehe núú ndécú-gã. ⁴⁷ Te ìⁿ cue ñáyíu xíndecu-áⁿ ñí xáhãⁿ-yu xii-gá:

–Ní quexìo náná-n ndìhi cue ñaní-n xínutñí-yu quehé, te cuìní-yu càháⁿ ndìhi ñàhá-yu xii-n –càchí ñáyíu-áⁿ xáhãⁿ-yu xii-gá.

⁴⁸ Te ní xáhaⁿ-gã xii ñáyíu ducaⁿ xãhaⁿ xì-gá-áⁿ:

–Te cachí tñúhu yóndi-gá ñáyíu cùu datná nãná-í ndìhi dàtná cue ñaní-í –càchí-gá xãhaⁿ-gã xii ñáyíu-áⁿ.

⁴⁹ Te ní dánèhé ñàhá-gã nchaa cue téé xica cuu ndìhi-gá, te ní xáhaⁿ-gã xii ñáyíu-áⁿ:

–Cue téé-a cùu-güedé dàtná nãná-í, ndìhi dàtná cue ñaní-í. ⁵⁰ Te nchaa ñáyíu na càda nchaa nacuaá càháⁿ Tãtà-í Dútú Ndiõxí Yaá ndécú àndiu, te ñáyíu-áⁿ cùú-yu dàtná nãná-í, ndìhi dàtná cue ñaní-í, ndìhi dàtná cue cúha-í –càchí-gá xãhaⁿ-gã xii ñáyíu ducaⁿ ñí dàyãha tñúhu núú-gã-áⁿ.

13

Nàcuáa quide téé cuángacáⁿ triú
(Mr. 4:1-9; Lc. 8:4-8)

¹ Te òdu-ni nduu-ãⁿ ní quee Jèsús vehe núú ndécú-gã, te ní xica-gá cuáháⁿ-gá ní ngóo-gá yuhu làgúná. ² Te ío cuéhé ñáyíu ní tacá núú ndécú-gã. Te sá dúcáⁿ ò

cuéhé ñáyíu núu ní quée-gá xití ìⁿ bàrcú nùtní xití ndute làgúná-áⁿ, te núú xíãⁿ ní ngóo-gá, te nchaa ñáyíu-áⁿ xíxúcu-yu yuhu làgúná-áⁿ. ³ Te Jèsús ní ngúita-gá ní caní-gá tñí cuendú núú-yu nàcuáa tecú tñúni-yu nchaa nàcuáa ndùu tñúhu-gá, te xãhaⁿ-gã xii-yu:

–Ìⁿ téé cuángacáⁿ-dé triú, ⁴ te òré ní ngúita-dé dǎngoyo-dé triú-áⁿ, te dava ní quene ndava ní ngava ndéé ichi, te ní xiní cue tíaá te ní nadatàcá-güedi. ⁵ Te dava ní ngava ñuhu yadi núú yíhí vñi yúú, te ndìhi-ni ní xínu-xi chi ñá túú càvñi ñuhu. ⁶ Dico òré ní nayehé te ñá túú ní cùndee iní-xi chi ní yíhí-xi, chi ñá túú ní ñíhí quíhíⁿ cùnú yóho-xi. ⁷ Te dava ní ngava núú yúcu ndíquíⁿ tnu ññu, te ìⁿnuu-ni ñí xínu-xi ndìhi tnu ññu. Te tnu ññu-áⁿ ñí sahnu-xi te ní dánáá-xí nchaa triú sá ñí xínu-áⁿ. ⁸ Dico dava-gá triú ní ngava núú ndécú ññu cocoⁿ te xíãⁿ ío váha ní cuu, chi núú ìⁿ-ní triú-áⁿ te dava yoco-xi ní nguíhí ócò úxí triú-xi, te dava yoco-xi ní nguíhí únídico triú-xi, te dava yoco-xi ní nguíhí ìⁿ ciendú triú-xi. ⁹ Te vitna nchaa nchòhó ñáyíu ní xíndedóho tñúhu ní càháⁿ-í-a, te ío váha chí cuãha cuendá –càchí-gá xãhaⁿ-gã xii-yu.

Cue téé xica cuu ndìhi Jèsús ndícú tñúhu-güedé núú-gã ná cuendá caní-gã cuendú núú ñáyíu

(Mr. 4:10-12; Lc. 8:9-10)

¹⁰ Te cue téé xica cuu ndìhi Jèsús ní sáhãⁿ-güedé ndéé núú-gã, te xáhaⁿ-güedé xii-gá:

–Ndùcu tñúhu-ndí núú-n nùu ná cuendá ducaⁿ mèe-ni cuendú caní-n núú ñáyíu –càchí-güedé xáhaⁿ-güedé xii-gá.

¹¹ Te ní xáhaⁿ-gã xii-güedé:

–Nchòhó chi sa càchí tñúhu Yá Ndiõxí xii-ndo ìⁿ sá vãtà quíni-gá-ndó, chi càchí tñúhu-gá nàcuáa quide-gá ndíhu ndaha-gã ñáyíu, dico dava-gá ñáyíu chi ñá túú nã xáhaⁿ-gã xii-yu. ¹² Te nchaa ñáyíu sa tècú tñúni te uuⁿ-gá cuita tecú tñúni-yu quíhíⁿ, te nchaa ñáyíu ñá túú tècú tñúni te uuⁿ-gá vá tècú tñúni-yu. ¹³ Te xíãⁿ nùu duha càni-í mee-ni cuendú núú-yu, chí cuèi na quíni-yu nchaa nàcuáa cuu dico

ni vǎ cútnùní iní-yu ná cuendá ducaⁿ cùu, te cuèi na cùndedóho-yu dico ni vǎ tècú tnùnì-yu. ¹⁴ Te ñu cuendá ñáyiu-áⁿ nǐ xáhaⁿ Yá Ndiöxí xii ndíi Chàíá téé ní xóo cáháⁿ tnúhu-gá ndéé sanaha nǐ chídó tnùnì ndíi núú tütú-gá núú càchí-xi:

Nchaa nchòhó cùndedóho-ndo tnúhu càháⁿ-í, dico ni vǎ tècú tnùnì-ndó, te cuèi na quìnì-ndó nchàa nacuaá cada-xi, dico ni vǎ cútnùní iní-ndó nǎ cuendá ducaⁿ quide-xi.

¹⁵ Te ducaⁿ chi cùu-ndo ñáyiu ío sàà iní-xi, te cùu-ndo ñáyiu ñá túú tècú tnùnì tnúhu càháⁿ-í,

te cùu tucu-ndo datná cue ñáyiu cuàá chi ñá túú cuìnì-ndó càda cuendá-ndó tnúhu-í,

te ni ñà túú cuìnì-ndó cùndedóho-ndo,

te ni ñà túú cuìnì-ndó tècú tnùnì-ndó,

te ni ñà túú cuìnì-ndó nàtuha ñaha-ndo xii-í cuendá cada càhnu iní-í nchaa yíca cuèchi-ndo nàcuáa ío váha cuu iní-ndó cùndecu-ndo.

Duha ní xáhaⁿ Yá Ndiöxí xii ndíi Chàíá ní chídó tnùnì ndíi núú tütú-gá.

¹⁶ 'Dico nchòhó chi ío váha táhú-ndó chi cùtnunì iní-ndó nchàa nacuaá quide-í, te cùtnunì tucu iní-ndó nchàa nacuaá ndùu tnúhu càháⁿ-í. ¹⁷ Te na càchí tnúhu ndáá-í xii-ndo sǎ ío vǎi cue téé ní xóo cáháⁿ tnúhu Yá Ndiöxí ndéé sanaha ndíi nchaa ñava-gá ñáyiu váha iní-xi ní cuìnì-yu cundehé-yu nchaa sá ndéhé-ndó vitna quide-í dico ñá túú ní xìnì-yu, te ní cuìnì tucú-yu cùndedóho-yu nchaa tnúhu ndèdóho-ndo vitna cáháⁿ-í te ñá túú ní xíndedóho-yu.

Jèsús càháⁿ-gá nàcuáa quèe-xi cuendá téé cuángacáⁿ triú

(Mr. 4:13-20; Lc. 8:11-15)

¹⁸ Te vitna cùndedóho váha-ndo na càchí tnúhu-í xii-ndo nàcuáa quèe-xi cuendú téé cuángacáⁿ triú ní caní-í núú-ndó. ¹⁹ Te triú sá nǐ quene ndava ní ngava ndéé ichi, xiǎⁿ cúú-xí ñátná ñáyiu ní xíndedóho tnúhu sá càháⁿ nàcuáa ndíhu ndaha ñaha Yá Ndiöxí xii-yu, dico ñá túú ní cuìnì-yu tñí-yu, chi sácuíhná cuǎháⁿ-xi nàdatuhú-xi iní-yu cuendá sá vǎ cǎnchìcúⁿ nihnú-yu nàcuáa càháⁿ tnúhu-áⁿ. ²⁰ Te triú sá nǐ ngava ñuhu yadi núú yíhí vǐhi yúú-ǎⁿ, xiǎⁿ cúú-xí ñátná ñáyiu ní xíndedóho tnúhu Yá

Ndiöxí te ñí iní ní tñí-yu tnúhu-gá, ²¹ dico òré ná ngúita ñáyiu cúcuèhé ñáhǎ-yu xií-yu àdi nándi-gá sá yáha-yu sá cuendá tnúhu-gá, te ñá cùndéé iní-yu chi ñátná-yu tnúhu-gá cuendá sá ñà túú nihí ndéè-yu. ²² Te triú sá nǐ ngava núú yúcu ndíquíⁿ tnu ñnu-áⁿ, xiǎⁿ cúú-xí ñátná ñáyiu ní tecú dóho-xi tnúhu Yá Ndiöxí dico cuèé cuèé ní nacua-naá-yu tnúhu-gá, chi cuendá mee-ni sǎ ío ñuyú-a ñuhu iní-yu, ndíhi cuendá sá ío sàni iní-yu cuu cuicá-yu, te mee-ni nchàa xiǎⁿ ñúhú iní-yu te ñá túú ñuhu iní-yu tnúhu sá nǐ xíndedóho-yu-áⁿ nàcuáa cada váha-yu cundecú-yu. ²³ Dico triú sá nǐ ngava núú ndécú ñuhu cocoⁿ-áⁿ, xiǎⁿ cúú-xí ñátná ñáyiu ní xíndedóho tnúhu Yá Ndiöxí te quide-yu nàcuáa càháⁿ tnúhu-gá. Te cada iní-ndó sǎ ñáyiu-áⁿ cúú-yu ñátná triú sá nǐ ngúhi yoco-xi ócú úxí triú-xi, ndíhi triú sá nǐ ngúhi yoco-xi únídico triú-xi, ndíhi triú sá nǐ ngúhi yoco-xi ñⁿ ciendú triú-xi. Ducaⁿ sǎtnahá-xi cùu-yu chi ío váha quide-yu — càchí-gá xǎhaⁿ-gǎ xii-güedé.

Cuendá nchaa cúhú sǎ ñà túú vǎha xǎnu xití triú

²⁴ Te Jèsús ní caní-gá ñⁿ cuendú núú ñáyiu nàcuáa tecú tnùnì-yu tnúhu-gá, te xǎhaⁿ-gǎ xií-yu:

—Te vitna na càni-í ñⁿ cuendú núú-ndó nàcuáa tecú tnùnì-ndó nàcuáa cada-xi òré ndíhu ndaha ñaha Yá Ndiöxí xii ñáyiu. ñⁿ téé ío váha triú ní sacáⁿ-dé núú ñúhú-dé. ²⁵ Dico xití niú ní sáháⁿ ñⁿ téé cùu úhú iní ñáhá xii-dé, te ní ñángoyo-dé ndíquíⁿ yúcu sǎ ñà túú vǎha núú nǐ sacáⁿ-dé triú-áⁿ. ²⁶ Te òré vitna váha váha ní ngúita-xi quèe yoco nchaa triú-áⁿ, te ní xínu coyo nchaa yúcu sǎ ñà túú vǎha-áⁿ. ²⁷ Te cue téé xínu cuechi núú tǎe ní sacáⁿ triú-áⁿ nǐ xitnúhu ñaha-güedé xii-dé sá ñátná nǐ xínu cúhú sǎ ñà túú vǎha-áⁿ núú triú-dé, te xǎhaⁿ-güedé: “Pátróoⁿ, ¿nása ní cuu núú ní xínu cúhú sǎ ñà túú vǎha núú triú-n, te ío váha càa triú ní sacáⁿ-n ní cùu?”, càchí-güedé xǎhaⁿ-güedé. ²⁸ Te téé cùu patróoⁿ-güedé-áⁿ nǐ xáhaⁿ-dǎ xii-güedé: “Íⁿ téé cùu úhú iní ñáhá ñahi xii-í ducaⁿ nǐ quide-dé ní sáháⁿ-dé ní ñángoyo-dé ndíquíⁿ cùhú sǎ ñà túú vǎha-áⁿ núú triú-í núu ducaⁿ nǐ xínu coyo-xi”, càchí-dé xǎhaⁿ-dǎ xii-güedé. Te cue téé

xìnu cuechi núú-dě ní xáhaⁿ-güedě xii-dé: “Te núu cuíní-n te quíhíⁿ-ndí tnuhu-ndí nchaa cùhú sǎ ñà túú vǎha ní xínu núú triú-n”, cǎchí-güedé xǎhaⁿ-güedé xii-dé. ²⁹ Te tée cùu xítóhó triú-áⁿ ñí xáhaⁿ-dě xii cue tée xínu cuechi núú-dě-áⁿ: “Ñáhá, vá quíhíⁿ-ndó tñuhu-ndo, chi òré tnuhu-ndo te tñahá-ni triú quene chi càa vihi cùhú-ǎⁿ. ³⁰ Váha-gá chí dáñá ná cuíhnu nahi ndéé ná cùu triú, te dàtnùní nducu-í cue tée quíhíⁿ-güedé tnuhu-güedé nchaa cùhú sǎ ñà túú vǎha-áⁿ, te dacùtu nuhní-güedé te cahmi-güedé, te dàtnùní nàquehdé-güedé triú nacani-güedé te nataxúha-güedé xití yacá-í”, cǎchí-dé xǎhaⁿ-dě xii-güedé —duha ní cani Jèsús cuèndú núú-yu.

Cuèndá ndíquíⁿ yutnu nàni mostázá
(Mr. 4:30-32; Lc. 13:18-19)

³¹ Te Jèsús ní cani tucu-gá ingá cuèndú núú ñáyiú nàcuáa tecú tñùní-yu tñuhu-gá, te xǎhaⁿ-gǎ xií-yu:

—Na càni-í ñⁿ cuèndú núú-ndó nàcuáa tecú tñùní-ndó nàcuáa cada-xi òré ndíhu ndaha ñaha Yá Ndióxi xii ñáyiú. ñⁿ tée ní queheⁿ-dé ndíquíⁿ yutnu nàni mostázá te nèhe-dé cuáháⁿ ní sacáⁿ-dé núú ñúhú-dě. ³² Te ndíquíⁿ yutnu-áⁿ ño chàhu, dico òré ná xínu-xi te sàhnu-gá-xi dàcúxí nchàa cùhú, te cue quití ndàva núú tàchí cádùha-güedi tacá-güedi núú dité-xi —cǎchí-gá xǎhaⁿ-gǎ xií-yu.

Nàcuáa quide levadurá
(Lc. 13:20-21)

³³ Te Jèsús ní xáhaⁿ tucu-gá xii ñáyiú:

—Te na cǎchí tñuhu tucu-í xii-ndo nàcuáa cada-xi òré ndíhu ndaha ñaha Yá Ndióxi xii ñáyiú. ñⁿ ñadìhí ní chihi-aⁿ levadurá úní arròbá yuchi triú, te levadurá-áⁿ ñí quide-xi ní ndaa ñihí yusaⁿ-áⁿ —cǎchí-gá xǎhaⁿ-gǎ xií-yu.

Mee-ni cuèndú ní cani Jèsús núú ñáyiú
(Mr. 4:33-34)

³⁴ Te mee-ni cuèndú ní cani Jèsús núú ñáyiú ndí tnahá òré ní dánèhé ñáhá-gǎ xií-yu tñuhu-gá. ³⁵ Te ducaⁿ ñí quide-gá chi ní quee ndáa-xi nàcuáa ní chídó tñùní ñⁿ tée ní xóo cǎháⁿ tñuhu Yá Ndióxi ndéé sanaha núú tütú-gá núú cǎchí-xi:

Mee-ni cuèndú cani-í núú ñáyiú òré dánèhé-í-yu tñuhu-í cuèndá tecú tñùní-yu,

te nchaa tñuhu sá vǎtá yǎo-gá cundedóho dánèhé-í-yu, te nchaa tñuhu-áⁿ ndúú yùhu-xi ndéé cútñahá ní ngáva ñuyíú. Duha ní chídó tñùní téé-áⁿ núú tütú-gá.

Jèsús cǎháⁿ-gá nàcuáa quèe-xi cuèndá cùhú sǎ ñà túú vǎha càa xití triú

³⁶ Te Jèsús ní dándácá-gǎ ñáyiú te cuánuhú-gá vehe, te cue tée xica cuu ndíhí-gá ní xáhaⁿ-güedé xii-gá:

—Cachí tñuhu xii-ndí nása quèe-xi cuèndá cùhú sǎ ñà túú vǎha càa xití triú —cǎchí-güedé xǎhaⁿ-güedé xii-gá.

³⁷ Te Jèsús ní xáhaⁿ-gǎ xii-güedé:

—Tée cǎchí-í ní sacáⁿ triú cǎvǎha-áⁿ cúu yùhú Téé cùu ñaní tñahá-ndó nchàa-ndo.

³⁸ Te nchaa núú ñí sacáⁿ téé-áⁿ triú cúu-xí ñuyíú. Te tatá váha-áⁿ cúu-xí cuè ñáyiú yìndaha ñaha Yá Ndióxi. Te nchaa cùhú sǎ ñà túú vǎha-áⁿ cúu-xí ñáyiú yìndaha ñaha sácuihná. ³⁹ Te tée ní dǎngoyo ndíquíⁿ cùhú sǎ ñà túú vǎha núú triú-áⁿ cúu-dě mee sácuihná. Te nduu nàtehndé-ñǎ triú-áⁿ cúu-xí nduu ndíhí nihnu-ná nchaa sá ño ñuyíú-a. Te nchaa ñáyiú nàquehdé triú-áⁿ cúu-yu mee-ni cuè espíritú xínú cuèchi núú Yá Ndióxi. ⁴⁰ Te dàtná cada cue téé quíhíⁿ tnuhu nchaa cùhú sǎ ñà túú vǎha-áⁿ dacùtu nuhní-güedé te cahmi-güedé, ducaⁿ sǎtnahá-xi yáha nchaa ñáyiú cùndíhí yucu ñávǎha na sàá nduu. ⁴¹ Te yúhú Téé cùu ñaní tñahá-ndó nchàa-ndo tendaha-í nchaa espíritú xínú cuèchi núu-í quíhíⁿ-xi nadatácá-xi nchaa ñáyiú sànu ichi cue tnahá ñáyiú-xi ichi cuèhé ichi duha, ndíhí nchaa dáva-gá ñáyiú ñá túú quide váha, te nchaa ñáyiú-áⁿ xíndecú-yu nchaa núú ndécú cuè ñáyiú yìndaha-í. ⁴² Te cue espíritú-áⁿ daquíhíⁿ-xi cue ñáyiú-áⁿ núú ñúhú núú càyú, te yàcáⁿ ño ndáhyú-yu te dicó rúhñú-ñǎ cuu núhu-yu sá sàtú iní-yu sá ndóhó-yu. ⁴³ Te nchaa ñáyiú quide nchaa nacuáa cuíní Tǎtǎ-yu Dútú Ndióxi, ñáyiú-áⁿ ño cunúú-yu cundecú-yu núú ndécú-gǎ táxi tñùní-gá, chi cuú-yu dàtná nchícanhí dayèhé-yu cundecú-yu núú ndécú-gǎ. Te nchaa nchòhó ñáyiú ndédóho nchaa tñuhu

cáháⁿ-í-a, te ío váha chí cuäha cuëndá — cächí-gá xähaⁿ-gä xii-güedé.

Cuëndá ñⁿ sá ïo ndèyáhu

⁴⁴ Te Jèsús xähaⁿ tucu-gá xii-güedé:

—Na càni tucu-í ingá cuëndú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiöxí xii ñáyi. ñⁿ téé ní naníhí-dě ñⁿ sá ïo ndèyáhu yìndúxi ñⁿ xichi, te ní nachindúxi tucu-dé ðu-ni núú nñ naníhí-dě-áⁿ, te ío ní cudíí ìní-dé sá dúcáⁿ nñ naníhí-dě xíáⁿ. Te ní xica-dé cuánuhú-dé te ní nadico-dě nchaa sá ndécú ndíhi-dé, te ní nacuaaⁿ-dé ñuhu núú dúcáⁿ nñ naníhí-dě xíáⁿ.

Cuëndá ñⁿ sá ïo ndèyáhu nàni pèrlá

⁴⁵ Te na càni tucu-í ingá cuëndú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiöxí xii ñáyi. ñⁿ téé quide ndáhú ndúcú-dě sá nání pèrlá sá ïo ndèyáhu. ⁴⁶ Te ní naníhí-dě ñáyi ndècu ndíhi ñⁿ pèrlá sá ïo-gá ndèyáhu, te ní xica-dé cuánuhú-dé te ní nadico-dě nchaa sá ndécú ndíhi-dé, te ní sáháⁿ-dé ní saaⁿ-dé pèrlá sá ïo-gá ndèyáhu-áⁿ.

Cuëndá ñunu tnè-güedé chácá

⁴⁷ Te na càni tucu-í ingá cuëndú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiöxí xii ñáyi. Cue téé tnè chácá nñ dáquëe-güedé ñunu-güedé xití ndute làmár tnè-güedé chácá, te dàcá nuu dàcá nihnu chácá cuänguee-güedé xití ñunu-áⁿ. ⁴⁸ Te òré ní cutnùní iní-güedé sá nñ chítú ñunu-güedé, te ní natava-güedé ní nene yuhu làmár, te ní ngüíta-güedé nácäxi-güedé nchaa chácá-áⁿ. Te nchaa chácá vâha dàquëe-güedé-di xití tídihi, te nchaa chácá nèhé dängoyo-güedé-di. ⁴⁹ Te dàtná ní quide cue téé-áⁿ ducaⁿ càda cue espíritú xínú cuèchi núú Yá Ndiöxí ná sàá nduu vâ cündècu-gá nchaa sá ío ñuyíú-a, chí cue espíritú-áⁿ daquëe ðiⁿ-xi nchaa ñáyi ní quide váha tnuú nchaa ñáyi ñá túú ní quide váha. ⁵⁰ Te nchaa ñáyi ñá túú ní quide váha-áⁿ daquèhíⁿ ñáhá-xí xii-yu núú ñùhú núú càyú, te yàcáⁿ ío ndáhyú-yu, te dícó rúhñú-nă cuu núhu-yu sá sätú iní-yu cuëndá sá ndóhó-yu —cächí-gá xähaⁿ-gä xii cue téé xica cuu ndíhi-gá.

Cuëndá cue téé ndècu ndíhi sá nñ quee túu dñna ndíhi sá nñ quee túu saa

⁵¹ Te Jèsús ní xicáⁿ tnúhú-gä núú-güedé, te xähaⁿ-gä xii-güedé:

—¿Ní tecú tnùní-ndó nàcuáa ndùu nchaa tnúhu ní cáháⁿ-í-áⁿ? —cächí-gá xähaⁿ-gä xii-güedé.

Te ní xähaⁿ-güedé xii-gá:

—Ní tecú tnùní-ndí —cächí-güedé xähaⁿ-güedé xii-gá.

⁵² Te ní xähaⁿ tucu Jesús xii-güedé:

—Te núu ñⁿ téé dàcuaha ñàha xii ñáyi nchaa tnúhu ní chídó tnùní ndí Moisés ná cùtnuní iní-dé nàcuáa quide Yá Ndiöxí ndíhu ndaha-gä ñáyi, te téé-áⁿ cúú-dě dàtná ñⁿ téé cùu xítóhó vehe. Te téé cùu xítóhó vehe-áⁿ nñ queñuhu-dé nchaa sá nñ quee túu dñna ndècu ndíhi-dé, ndíhi nchaa sá nñ quee túu saa. Te ducaⁿ sätnahá-xi cùu téé-áⁿ te núu na cùtnuní iní-dé nàcuáa quide Yá Ndiöxí ndíhu ndaha-gä ñáyi —cächí-gá xähaⁿ-gä xii-güedé.

Jèsús ndécú-gä ñuú núú nñ sahnú-gá
(Mr. 6:1-6; Lc. 4:16-30)

⁵³ Te sátá nñ yáha ducaⁿ nñ caní Jèsús cuëndú núú-güedé, te ní xica-gá cuánuhú-gá. ⁵⁴ Te ní ndexìo-gá ñuú núú cúú ñùú-gá, te cuànguñhu-gá xití veñúhu càa ñuú-áⁿ te ní ngüíta-gá dánèhé-gá ñáyi. Te nchaa ñáyi ndèdóho nchaa tnúhu cáháⁿ-gá xícuñúhu-yu, te xitnähá-yu:

—¿Nása ní cuu núu ío váha cùtnuní iní téé-a nàcuáa cunduu tnúhu cáháⁿ-dé, te quide-dé nchaa sá vâ yóo tnàhí ndàcu cada-i? ⁵⁵ Te dícó déhe téé cùu carpinterú ndíhi tá Màriá cúú-dě, te ñaní-dé cúú tè Jàcobó, ndíhi té Chèé, ndíhi té Xímú, ndíhi té Jüdás. ⁵⁶ Te cue cúha-dé ndécú ndíhi ñáhá-yu xii-o ñùú-a. ¿Te nása ní quide-dé núu ndéé dàcáⁿ ío váha cùtnuní iní-dé nàcuáa cunduu tnúhu cáháⁿ-dé-i? —cächí-yu xitnähá-yu.

⁵⁷ Te ñá túú ní cuñí-yu cáháⁿ ndíhi váha-yu Jèsús, dico mee-gä ní xähaⁿ-gä xii-yu:

—Te núu ñⁿ téé cáháⁿ tnúhu Yá Ndiöxí ná nàsáá-dé ñuú-dé, te nchaa ñáyi ñuú-dé-áⁿ ndíhi nchaa ñáyi cùu ndimee-dé ñá túú nèhé-yu sá yíñuhu núú-dě, dico cue ñáyi

nchaa dava-gá ñuú chi nèhé-yu sá yíñùhu núú-dě —càchí-gá xăhaⁿ-gă xii-yu.

⁵⁸ Te ñá túú ní quide Jesús títí ní núú sã vă yõ tnàhí ndàcu cada ñuú-áⁿ, chi ñá túú ní cuiní-yu quindáá iní ñáhă-yu xii-gá.

14

Nàcuáa ní cuu ní xihí té Juàá té dâcuandute ñaha xii ñáyiu

(Mr. 6:14-29; Lc. 9:7-9)

¹ Te ñu-ni dàvâ-áⁿ ní níhí tẽ Hèrodés tnúhu nchaa nàcuáa quide Jesús, te té Hèrodés-áⁿ cúú-dě téé tàxi tnuní distritú Galileá. ² Te ní xáhaⁿ-dě xii nchaa cue téé ndècu ndihí-dé:

—Téé dii cuèndú-xi níhí-ó-áⁿ cùu-dé té Juàá té dâcuandute ñaha xii ñáyiu, téé ní xihí ní cùu te ní ndoto-dé nũu dàcáⁿ ndácú-dě quidé-dě nchaa sá vă yõ tnàhí ndàcu cada —cachí-dé xăhaⁿ-dě xii-güedé.

³ Te ducaⁿ ní cáháⁿ té Hèrodés chi mee-dě ní táuchíúⁿ-dě ní tñi ñaha-güedé xii té Juàá, te ní dácútú ñaha-güedé xii-dé, te ní chihi ñaha-güedé vecaá. Te ducaⁿ ní quide té Hèrodés-áⁿ sã cuèndá ñaha nani Herodiás, ñaha ní cándeca ñaní-dé té Lìpé, te ní naqueheⁿ ñaha-dě xii-aⁿ ndèca ñaha-dé.

⁴ Te té Juàá ní xáhaⁿ-dě xii té Hèrodés:

—Ñá túú ní quide váha-n dùha ní naqueheⁿ-n ñaha ní cándeca ñaní-n —duha ní xáhaⁿ tẽ Juàá xii té Hèrodés.

⁵ Te sá dúcáⁿ ní xáhaⁿ tẽ Juàá-áⁿ xii té Hèrodés, te ní cuiní té Hèrodés-áⁿ cahni-dé té Juàá-áⁿ, dico ñá túú ní cùyi-dé chi ní yùhú-dé núú cuè ñáyiu, chi nchaá-yu ní cutnùní iní-yu sá tẽ Juàá cúú-dě ñⁿ téé càháⁿ tnúhu Yá Ndiõxí. ⁶ Te ñⁿ nduu ní quide té Hèrodés vico vehe-dé ní quide càhnu-dé nduu ñ cacu-dé. Te ndècu ñⁿ déhe yoco ñaha nani Herodiás-áⁿ, te xíchí-ăⁿ ñi quíhu-xi xití vehe núú cúú vico-áⁿ ñi xita saha-xi. Te núcóo té Hèrodés ndihí cue téé ní cáháⁿ-dé ndéhe-güedé, te ío ní cudí iní-dé nàcuáa ní xita xíchí-ăⁿ. ⁷ Te té Hèrodés-áⁿ ñi cacunehe-dé ndéé Yá Ndiõxí nàcuáa cutnùní iní xíchí-ăⁿ sã ndàá cuãñaha-dé nũu ná cúú sã ná càcáⁿ-xi núú-dě. ⁸ Te xíchí-ăⁿ ñi dácáhú iní ñáhá ñaná-xi xii-xi ná cúú sã càcáⁿ-xi núú tẽ Hèrodés, núu xiăⁿ ní xáhaⁿ-xi xii-dé:

—Cuiní-í quehndé-n díquí tẽ Juàá té dâcuandute ñaha xii ñáyiu te taxi-n, dico na

cùhuⁿ ñⁿ xití cóhó taxi-n —càchí-xi xăhaⁿ-xi xii-dé.

⁹ Te sá dúcáⁿ ñi xáhaⁿ-xi, te ní cundiyí té Hèrodés, dico ñá túú ní níhí-dě nása cada-dé, chi ndèdóho ñáyiu òré ní cacunehe-dé Yá Ndiõxí sã ndàá cuãñaha-dě ñⁿ sã ná càcáⁿ-xi núú-dě. Te ní quide-dé nàcuáa ní xáhaⁿ-xi. ¹⁰ Chi ní táuchíúⁿ-dě ní sáháⁿ cue téé ní xehndé-güedé díquí té Juàá òré yíhí-dě vecaá. ¹¹ Te ní chihi-güedé díquí-dě ñⁿ xití cóhó te nèhe-güedé cuánuhú ní sãñaha-güedé xii xíchí-ăⁿ, te xíchí-ăⁿ ñi nacuãñaha-xi xii náná-xi.

¹² Te cue téé xica cuu ndihí té Juàá-áⁿ ñi sáháⁿ-güedé ní naqueheⁿ-güedé yíquí cùñú-dé ní chindúxi-güedé, te dâtnùní ní sáháⁿ-güedé ní xáhaⁿ-güedé xii Jèsús nàcuáa ní cuu.

Jèsús dâcâxi-gá úhúⁿ mĩ cue téé te dñⁿ ñáyiu dñí ndihí landú

(Mr. 6:30-44; Lc. 9:10-17; Jn. 6:1-14)

¹³ Te Jèsús ní níhí-gă tnúhu nàcuáa ní cuu ní xihí té Juàá. Te sátá xiăⁿ te cuánguee-gá ñⁿ bàrcú cuáháⁿ-gá ñⁿ xichi núú ñá túú ñáyiu ndècu, dico nchaa ñáyiu xĩndecu nchaa ñuú cáá yàtni xiáⁿ ñi níhí-yu tnúhu sá cuáháⁿ-gá, te ní queé-yu ñuú-yu xica sahá-yu cuáháⁿ núú quidé-yu cuèndá quexìo Jesús. ¹⁴ Te òré ní quexìo Jesús núú cuáháⁿ-gá, te ní quene-gá bàrcú, te ní xiní-gá cuéhé víhí ñáyiu xixúcu-yu xiáⁿ, te ní cundàhú iní ñáhá-gă xii-yu, te ní quide tátna-gá nchaa ñáyiu cùhú ndihí-yu. ¹⁵ Te sátá ñi cuaa te ní sáháⁿ cue téé xica cuu ndihí Jesús núú-gă, te xăhaⁿ-güedé xii-gá:

—Sa ní cuu dandâca-n nchaa ñáyiu-a chi sa ní cuaa, te na quihíⁿ-yu nchaa ñuú cáá yàtni iha cuaáⁿ-yu sá caxí-yu, chi núú ndécú-ó ìha ñá túú tnàhí ná ío —càchí-güedé xăhaⁿ-güedé xii-gá.

¹⁶ Te Jèsús ní xáhaⁿ-gă xii-güedé:

—Ñáhá, vá dândâca-í-yu, váha-gá mee-ndo chí cuãñaha sã ná caxí-yu —càchí-gá xăhaⁿ-gă xii-güedé.

¹⁷ Te ní xáhaⁿ-güedé xii-gá:

—Ñá túú năgá ndécú ndihí-ndí, chi úhúⁿ duha-ná pàà ndihí úú-nă chácá ndécú ndihí-ndí —càchi-güedé xăhaⁿ-güedé xii-gá.

¹⁸ Te Jèsús ní xáhaⁿ-gă xii-güedé:

—Chí cánèhe paá-án ndihi chácá-ǎn táquixi iha —cachí-gá xǎhaⁿ-gǎ xii-güedé.

¹⁹ Te Jèsús ní xáhaⁿ-gǎ xii nchaa ñáyiú sá ná ngõo-yu nchaa-yu núú ité cuíí càa xiáⁿ, te ní queheⁿ-gá ndi ùhúⁿ pàá-án ndihi ndi ndúú chácá-ǎn te ní ndacoto-gá andiú, te ní ndacáⁿ táhú-gǎ núú Yǎ Ndiõxí, te dàtnùní ní táhú cuèchi-gá pàá-án te ní sáñaha-gǎ xii cue téé xica cuu ndihi-gá ní dácǎhñu-güedé cue ñáyiú ní xexí-yu. ²⁰ Te nchaa-yu ní xexí-yu ní ndahá xití-yu. Te sátá ní túhú cóhõ-yu te ní nadatácá-güedé nchaa sá ní quendóo, te ní chítú ùxúú tnàhá tídihi mee-ni sǎ ní quendóo. ²¹ Te nchaa ñáyiú ní xexi-án ní xínu úhúⁿ mǐl mee-ni cuè téé chi mee-ni cuè téé-án ní quiúndehu, te dìiⁿ cue ñáyiú dìhí ndihi cue landú.

Jèsús xicá-gǎ núú ndute
(Mr. 6:45-52; Jn. 6:16-21)

²² Te òré-ni-án ní xáhaⁿ Jèsús xii cue téé xica cuu ndihi-gá sá quèe-güedé bàrcú téhndé-güedé ndàa ingá xio yuhu làgúná, te mee-gǎ quendóo-gǎ cada ndee iní tnàhá-gǎ ndihi cue ñáyiú. ²³ Te sátá ní yáha ní quide ndee iní tnàhá-gǎ ndihi cue ñáyiú, te medii-gá ní xica-gǎ cuásaá-gǎ ñⁿ tǐndúú cáá yàtni xiáⁿ cuèndá cáháⁿ ndihi-gǎ Yǎ Ndiõxí, te ñiú-ni medii-gǎ ndécú xiáⁿ ní cundiquiⁿ. ²⁴ Te bàrcú sá ñúhú cuè téé xica cuu ndihi-gǎ-án sa cuáháⁿ-xi ndéé cuádava xití làgúná-án, te níhi vìhi quene táchí ndàa ichi cuáháⁿ-xi, te dàcandau ndeé-xi ndute nchaa dìñi-xi. ²⁵ Te tàcuíhndá váhi-gǎ tá xica Jèsús núú ndute cuáháⁿ tá cùyatni-gǎ bàrcú-án. ²⁶ Te cue téé xica cuu ndihi-gǎ ní xiní ñáhá-güedé xii-gǎ tá xica-gǎ núú ndute cuáháⁿ, te ní yùhú-güedé te níhi ní cáháⁿ-güedé te xǐtnàha-güedé:

—ñⁿ àlmá! —càchí-güedé xǐtnàha-güedé.

²⁷ Te Jèsús ní cáháⁿ-gǎ, te xǎhaⁿ-gǎ xii-güedé:

—Ñíí cunduu-ndo vǎ yùhú-ndó, chi yúhú cùú-í —càchí-gǎ xǎhaⁿ-gǎ xii-güedé.

²⁸ Te té Pèlú ní xáhaⁿ-dè xii-gǎ:

—Mèstrú, te núú ñiú-n te tauchìuⁿ sá tnàhá-í ná càca-í núú ndute quixi tnàhá ñáhà-í xii-n —càchí-dé xǎhaⁿ-dè xii-gǎ.

²⁹ Te Jèsús ní xáhaⁿ-gǎ xii-dé:

—Taquixi —cachí-gǎ xǎhaⁿ-gǎ xii-dé.

Te té Pèlú ní nuu-dé núú bàrcú, te ní ngüíta-dé tá xica-dé núú ndute cuáháⁿ cuátnahá ñáhá-dè xii-gǎ. ³⁰ Te ní cutnùní iní-dé sá ño níhi xico táchí, te ní ngüíta-dé yùhú-dé. Te òré-ni-án tá quèe naa-dé xití ndute cuáháⁿ ní cùu, te níhi ní cáháⁿ-dè xǎhaⁿ-dè xii Jèsús:

—ñⁿ Mèstrú, vá dáñá-n quèe naa-í xití ndute! —càchí-dé xǎhaⁿ-dè xii-gǎ.

³¹ Te òré-ni-án ní tñi Jèsús ndaha-dé, te ní xáhaⁿ-gǎ xii-dé:

—ñⁿ Ná cuèndá ñá túú sàndáá ndisa iní ñáhá-n xii-í sàni ñⁿ sàni úú iní-n-í? —càchí-gǎ xǎhaⁿ-gǎ xii-dé.

³² Te òré cuánguee Jèsús ndihi té Pèlú xití bàrcú, te òré-ni-án ní ngüíñí táchí. ³³ Te cue téé ñùhu xití bàrcú-án ní ngüíñí xití-güedé núú-gǎ, te xǎhaⁿ-güedé xii-gǎ:

—Sá ndàá sá cuítí sǎ díú yòhó cùú-n Dèhe Dútú Ndiõxí —càchí-güedé xǎhaⁿ-güedé xii-gǎ.

Jèsús quidé tǎtna-gǎ ñáyiú cùhú ñⁿ xichi núú nání Gènesarét
(Mr. 6:53-56)

³⁴ Te ní quexìo Jèsús ndihi cue téé xica cuu ndihi-gǎ ndàa ingá xio yuhu làgúná, te núú ní quexìo-gǎ ndihi-güedé-án nání-xí Gènesarét. ³⁵ Te nchaa ñáyiú xǐndecu xiáⁿ ní cutnùní iní-yu sá díú-gǎ ní quexìo, te ní dátècú tnùhu-yu nchaa dava-gǎ ñáyiú xǐndecu yatni xiáⁿ sǎ ní quexìo-gǎ. Te ndécá-yu nchaa ñáyiú cùhú ndécú ndihí-yu cuáháⁿ núú ndécú Jèsús. ³⁶ Te nchaa ñáyiú cùhú-án ní ngüíta-yu càháⁿ ndàhú-yu núú Jèsús sá ná dàña-gǎ tnándeé-yu cuèdicó luha yuhu dõó-gǎ cuèndá ndúha-yu, te cue ñáyiú cùhú, ñáyiú ní tnándeé yuhu dõó-gǎ ní ndúha-yu.

15

Cuèndá nchaa sá quidé-xí ngündecu cuèchi ñáyiú
(Mr. 7:1-23)

¹ Te sátá dúcáⁿ te ñⁿ úú cue téé cùu fariséú ní quee-güedé ñuú Jerusálén, ndihi cue téé dàcuaha ñaha xii ñáyiú nchaa tnùhu ní chídó tnùní ndi Moisés ní quexìo-güedé núú ndécú Jèsús, te xǎhaⁿ-güedé xii-gǎ:

² —¿Ná cuendá cue tée xica cuu ndihi-n ñá túú nàquete-güedé ndaha-güedé òrè caxi-güedé nàcuáa ní cachí cue ñaní tnáhá-ó nǐ xíndecu ndéé sanaha-i? —càchí-güedé xáhaⁿ-güedé xii-gá.

³ Te Jèsús ní xáhaⁿ-gá xii-güedé:

—Te nchòhó tucu, ¿ná cuendá ñá túú quide-ndo nacuáa ní cachí Yá Ndiöxí cada-ndo, núu da nàcuáa ta quide cue tée ñuyíu-a quide-ndo-i? ⁴ Te Yá Ndiöxí càchí-gá núú tütú-gá: “Canehe-ndo sǎ yíñuhu núú tǎtá-ndó ndihi núú nǎná-ndó”, càchí-gá. Te càchí tucu-gá ingá xichi núú tütú-gá: “Nchaa ñáyiú na càháⁿ úhú tǎtá-xi àdi náná-xi te cahni ñaha-güedé xii-yu”, duha càchí-gá núú tütú-gá. ⁵ Dico nchòhó càchí-ndó sǎ cuè ñáyiú chi cuu cúñahá-yu xii tǎtá-yu àdi náná-yu: “Vá cúú chindee ñaha-ndí xii-n, chi sǎ táxí-ndí xii-n ni cùu, xǎⁿ ní nduu cuendá Yá Ndiöxí”, cuu duha cúñaha ñáyiú xii tǎtá-yu àdi náná-yu càchí-ndó. ⁶ Te càchí-ndó sǎ cuè ñáyiú ducaⁿ na cúñaha xii tǎtá-xi àdi náná-xi te ñá túú-gá tǎu-yu chindéé-yu ni tǎtá-yu ni nǎná-yu. Te ducaⁿ quide-ndo chi ní dáquéé tǐhú-ndó nàcuáa ní cachí Yá Ndiöxí cada-ndo, te mee-ni nàcuáa ta quide cue tée ñuyíu-a véxi nchícúⁿ nihnu-ndo quide-ndo.

⁷ Te nchòhó cúú-ndó ñáyiú ío dándahú méé-xí, chi càchí-ndó sǎ quidé ndǎá-ndó te ñá ndǎá sǎ quidé ndǎá-ndó! Te ní quee ndǎá-xi nàcuáa ní chídó tnùní ndí Chàíá tée ní xóo càháⁿ tnúhu Yá Ndiöxí ndéé sanaha núú tütú-gá núú càháⁿ-xi nàcuáa ní càháⁿ-gá cuendá-ndó, te duha ní cachí-gá:

⁸ Ñáyiú-a càchí-yu sǎ ío càhnu cuu-í dico dícó-ni yuhu càháⁿ-yu,

chi duuⁿ duuⁿ ñá túú ñuhu iní ñáhǎ-yu xii-í.

⁹ Te àúⁿ nǎ cuu chǐñuhu ñahá-yu xii-í chi ñá túú vèdana ndéé nándíhi-xi,

chi cue ñáyiú-a dàcuahá-yu cue tnàha ñáyiú-yu nàcuáa cundecú-yu, dico mee-ni tnúhu sǎ nǐ cahu iní cue ñáyiú ñuyíu-a càháⁿ-yu.

Duha ní chídó tnùní ndí Chàíá núú tütú Yá Ndiöxí nàcuáa ní càháⁿ-gá cuendá-ndó —càchí-gá xáhaⁿ-gá xii-güedé.

¹⁰ Te ní xáhaⁿ-gá xii cue ñáyiú:

—Chí táquixi ndehe iha, te cundedóho váha-ndo tnúhu na càháⁿ-í, te ío váha

cuáha-ndo cuendá. ¹¹ Nchaa sǎ xéxi-ndó chi ñá túú nǎ quidé-xí iní-ndó, dico nchaa sǎ cuèhé sǎ dúhá sàni iní-ndó càháⁿ-ndó nchaa xǎⁿ quidé-xí ndècu cuéchi-ndo —càchí-gá xáhaⁿ-gá xii-yu.

¹² Te cue tée xica cuu ndihi-gá ní sáháⁿ-güedé ndéé núú-gá, te xáhaⁿ-güedé xii-gá:

—Véxi-ndí càchí tnúhu-ndí xii-n sǎ cuè tée cùu fariséu ñá túú cùu váha iní-güedé cuendá tnúhu ní càháⁿ-n —càchí-güedé xáhaⁿ-güedé xii-gá.

¹³ Te ní xáhaⁿ-gá xii-güedé:

—Nchaa ñáyiú ñá túú cùu cuendá Tǎtá-í Dútú Ndiöxí cuíta nihnú-yu, chi ñáyiú-án cúu-yu dàtná nchaa cúhú sǎ ñá túú nándíhi te tnúhu ñáyiú. ¹⁴ Te vá cadá cuendá-ndó nàcuáa càháⁿ cue tée-án, chi cùu-güedé dàtná cue ñáyiú cuàá sácuíta nehe tnàha. Te nchòhó xíní-ndó sǎ núu ìⁿ ñáyiú cuàá ná cuítá nèhe tucú-yu ingá ñáyiú cuàá, te ndí nduú-yu quée-yu déhva —càchí-gá xáhaⁿ-gá xii-güedé.

¹⁵ Te té Pèlú ní xáhaⁿ-dè xii-gá:

—Cachí tnúhu xii-ndí nàcuáa quèe-xi tnúhu ní càháⁿ-n-ǎⁿ —càchí-dé xáhaⁿ-dè xii-gá.

¹⁶ Te Jèsús ní xáhaⁿ-gá:

—¿Náa tnàhá nchòhó ñá túú ní tècú tnùní-ndó nàcuáa ndùu tnúhu ní càháⁿ-í núú ñáyiú-ǎⁿ ñǎ? ¹⁷ Nchaa sǎ xéxi-yu cuánguee-xi xití-yu, te dàtnùní náyàha ñaha-xi xii-yu. ¹⁸ Dico nchaa tnúhu cuèhé tnúhu duha càháⁿ-yu xǎⁿ véxi quene-xi iní-yu, te diu nchaa xǎⁿ quidé-xí ndècu cuéchi-yu. ¹⁹ Te iní-yu-án cǎcú nihnu nchaa sǎ cuèhé sǎ dúhá, chi sàni cuèhé sání dùha iní-yu, te sàhni-yu tnàha ñáyiú-yu, te cue tée càháⁿ ndihi-güedé ñáyiú dǐhí te ñá díú ñàdǐhí-güedé cúu-yu. Te diu-ni ducaⁿ quide cue ñáyiú dǐhí càháⁿ ndíhí-yu cue tée te ñá díú yǐ-yu cùu-güedé, te cuèi tée te cuèi ñadǐhí mee-ni ìchi díí iní cúdíí iní-yu cundecú-yu, te dùhu ndachiuⁿ tnahá-yu, te dàcuandehndé-yu, te càháⁿ cuèhé-yu cuendá tnàha ñáyiú-yu. ²⁰ Te nchaa xǎⁿ quidé-xí ndècu cuéchi-yu, dico ñá díú sǎ ñá túú ndàhá-yu dàtná ní cachí cue tée ndéé sanaha, chi xǎⁿ ñá túú quide-xi cuendá

ngúndecu cuéchi-yu —càchí-gá xǎhaⁿ-gǎ xii-güedé.

*Íⁿ ñadìhí ñaha cùu ñaní tnáhá ñáyi
canàneá ní sándáá iní-aⁿ Jèsús
(Mr. 7:24-30)*

²¹ Te Jèsús ní xica-gá cuáháⁿ-gá ní sáá-gá yucu cue téé ñuú Tírú, ndihí yucu cue téé ñuú Sidón. ²² Te íⁿ ñadìhí ñaha cùu ñaní tnáhá ñáyi canàneá ndécú yàtni-aⁿ xíaⁿ, te níhi ta càháⁿ-aⁿ ní quexìo núú ndécú Jèsús, te xǎhaⁿ-aⁿ xii-gá:

—jMèstrú, ñaní tnáhá ndí Dàvíí, cundàhú iní ñáhá xii-í cada tátna-n dèhe yoco-í! Chi yìhí ñaha espíritú cündìhí yucu ñávǎha xii-xi te ío dándoho ñaha-xi —cachí-aⁿ xǎhaⁿ xii-gá.

²³ Dico Jèsús ñá túú tnáhí ni càháⁿ-gá, te cue téé xica cuu ndihí-gá ní sáháⁿ-güedé núú-gǎ, te xǎhaⁿ-güedé xii-gá:

—Cúñaha xii ñaha-áⁿ ná nùhú-aⁿ, chi ío níhi càháⁿ-aⁿ nchìcúⁿ ñáhá-áⁿ xii-o —cachí-güedé xǎhaⁿ-güedé xii-gá.

²⁴ Te Jèsús ní xáhaⁿ-gǎ xii-güedé:

—Yá Ndiöxí ní tendaha ñàha-gá xii-í véxi-í mee-ni ñuú núú xíndecu cue ñáyi isràél, chi ñáyi-áⁿ cúu-yu dàtná cue mbéé cue quiti ní xíta, chi ta xíta nihnú-yu cuáháⁿ —càchí-gá xǎhaⁿ-gǎ xii-güedé.

²⁵ Te ñadìhí-áⁿ ní sáháⁿ-aⁿ ndéé núú Jèsús ní ngüíñí xítí-áⁿ, te xǎhaⁿ-aⁿ xii-gá:

—jMèstrú, chindee ñàha xii-í! —càchí-aⁿ xǎhaⁿ-aⁿ xii-gá.

²⁶ Te Jèsús ní xáhaⁿ-gǎ xii-aⁿ:

—Vá cúú chindee-í cue ñáyi ñá túú cùu ñáyi isràél, chi íⁿ-ni cùu-xi núu na quèheⁿ-o paá cúú cuèndá cue landú te cuáha-o iná caxi-di —càchí-gá xǎhaⁿ-gǎ xii-aⁿ.

²⁷ Dico ñaha-áⁿ ní xáhaⁿ-aⁿ xii-gá:

—Ndáá càháⁿ-n, dico cue iná chi nàdatacá-güedi sá ngóyó yùhu cóhó xítóhó-güedi —càchí-aⁿ xǎhaⁿ-aⁿ xii-gá.

²⁸ Te Jèsús ní xáhaⁿ-gǎ xii-aⁿ:

—jYòhó ñaha cùhú déhe-xi, ío váha sándáá iní ñáhá-n xii-í! Te na càda-í nàcuáa cuìní-n —càchí-gá xǎhaⁿ-gǎ xii-aⁿ.

Te òré-ni-áⁿ ní ndúha déhe-aⁿ.

Jèsús quidé tátna-gá vài ñáyi cùhú

²⁹ Te sátá dúcáⁿ ní cuu te Jèsús ní xica-gá cuáháⁿ-gá ní yáha-gá yuhu làgúná distritú Galiléa, te cuásaá-gá íⁿ tindúú te xíaⁿ ní

ngóo-gá. ³⁰ Te xíaⁿ núcòo-gá ní quexìo cuéhé víhí ñáyi, te ndécá-yu ñáyi yacua, ndihí ñáyi ní yíchí íⁿ xio ndaha-xi, ndihí ñáyi cuàá, ndihí ñáyi ñìhí, te vài dava-gá cue ñáyi cùhú tnáhá dava-gá núú cuéhé ndécá-yu ní quexìo núú ndécú-gǎ. Te ní taxi ndecu ñáhá-yu núú Jèsús te ní quide tátna ñaha-gǎ xii-yu te ní ndúha-yu. ³¹ Te nchaa ñáyi xíndecu-áⁿ ío ní cuñúhu-yu sátá dúcáⁿ ní xini-yu ní cuu ní nacáháⁿ nchaa ñáyi ñìhí, ndihí cuèndá sátá ní ndúha nchaa cue ñáyi yacua, ndihí cuèndá sátá ní ndúha cue ñáyi ní yíchí íⁿ xio ndaha-xi, ndihí cuèndá sátá ní ndúha núú cuè ñáyi cuàá. Te ncháa-yu ní cachí-yu sátá ío càhnu cuu Yá Ndiöxí Yaá cúú Ndiöxí cue ñáyi isràél.

*Jèsús dácàxi-gá cúmí mìl cue téé te dèíⁿ
ñáyi dèhí ndihí landú
(Mr. 8:1-10)*

³² Te Jèsús ní cana-gá cue téé xica cuu ndihí-gá, te ní xáhaⁿ-gǎ xii-güedé:

—Yúhú cündàhú iní-í nchaa ñáyi-a, chi sa ní cuu úní nduu ndècu ndihí ñáhá-yu xii-o ìha, te ñá túú tnáhí-gá sátá caxí-yu, te ñá túú cuìní-í natendaha-í-yu núhú tnámǎ-yu vehé-yu, chi ná ndéé cuáháⁿ cuneé-yu docó ichi —càchí-gá xǎhaⁿ-gǎ xii-güedé.

³³ Te ní xáhaⁿ-güedé xii-gá:

—¿Te ndéé níhí-ó sǎ cuñaha-o càxi nchaa ñáyi-a, te ío cuéhé-yu te ñá túú ná ío ìha chi cùu-xi xítí yucu-i? —càchí-güedé xǎhaⁿ-güedé xii-gá.

³⁴ Te Jèsús ní xícáⁿ tnúhú-gǎ núú-güedé, te xǎhaⁿ-gǎ:

—¿Ná daha-gá paá ndécú ndihí-ndo-i? —cachí-gá xǎhaⁿ-gǎ xii-güedé.

Te ní xáhaⁿ-güedé xii-gá:

—Ndècu ndihí-ndí úsá-gá tnáhá paá ndihí íⁿ úú-gá chácá —càchí-güedé xǎhaⁿ-güedé xii-gá.

³⁵ Te Jèsús ní xáhaⁿ-gǎ xii nchaa ñáyi sátá ná ngóo-yu ncháa-yu, te ní ngóo-yu.

³⁶ Te ní queheⁿ-gá ndi úsá paá-áⁿ ndi íⁿ úú-gá chácá-áⁿ, te ní ndacáⁿ táhú-gǎ núú Yá Ndiöxí, te dàtnúni ní táhú cuèchi-gá paá-áⁿ ndihí chácá-áⁿ te ní sáñaha-gǎ xii cue téé xica cuu ndihí-gá ní dácǎhñu-güedé nchaa ñáyi-áⁿ. ³⁷ Te ncháa-yu ní xexí-yu ní ndahá xítí-yu. Te sátá ní túhú cóhó-yu te

ní nadatàcá-güedé nchaa sá nǐ quendóo, te ní chítú ùsá tnàhá tídihi mee-ni sǎ nǐ quendóo-án. ³⁸ Te núú ncháá ñáyiú ní xexi te ní xínu cúmí mǐl mee-ni cuè téé chi ðiu-ni cue téé-án nǐ quiúndehu, te ðiíⁿ cue ñáyiú ðiíⁿ ndihi cue landú. ³⁹ Te sátá dúcáⁿ te Jèsús ní dándácá ñàha-gá xii-yu, te cuánguee-gá bàrcú cuáháⁿ-gá yucu cue téé ñúú Màgdalá.

16

Cue téé cùu fariséú ndihi cue téé cùu saducéú xàhaⁿ-güedé xii Jèsús cada-gá ñⁿ sá vǎ yǎo tnàhí ndàcu cada

(Mr. 8:11-13; Lc. 12:54-56)

¹ Te cue téé cùu fariséú ndihi cue téé cùu saducéú ní sáá-güedé núú ndécú Jèsús xító ndèé ñáhá-güedé xii-gá, te xàhaⁿ-güedé sá ná cáda-gǎ ñⁿ sá vǎ yǎo tnàhí ndàcu cada cundehe-güedé nàcuáa cutnùní iní-güedé núú ndáá sá Yǎ Ndiǒxí ní tendaha ñàha-gá xii-gá véxi-gá ñuyíú-a. ² Te Jèsús ní xàhaⁿ-gǎ xii-güedé:

—Nchòhó chi òré tá cuàa cuáháⁿ te ndàcoto-ndo andiú, te cǎchí-ndó: “Ío váha cada-xi tneé chi càa vícò tícuèhé andiú”, duha cǎchí-ndó. ³ Te òré dátneé ndàcòto tucu-ndo andiú, te cǎchí-ndó: “Vá cáda vǎha-xi nduu vitna chi tícuèhé andiú, te càa vícò”, duha cǎchí-ndó. ¡Dico nchòhó cúú-ndó ñáyiú ío dándahú méé-xí sǎ quidé ndáá te ñá ndáá sá quidé ndáá-ndó! Te cùtnuní iní-ndó nàcuáa quíde-xi andiú, dico ñá túú cùtnuní iní-ndó nàcuáa quèe-xi nchaa sá quidé Yǎ Ndiǒxí vitna. ⁴ Dico nchaa nchòhó ñáyiú ndècu ñuyíú vitna ío cuihna iní-ndó, te ñá túú cuíní-ndó càda ndáá-ndó núú Yǎ Ndiǒxí, te cuíní-ndó càda-í ñⁿ sá vǎ yǎo tnàhí ndàcu cada dico ñá túú nǎgá cada-í, chi ðiu-ni nàcuáa ní quíde Yǎ Ndiǒxí ndíi Jónás ðiu-ni ducaⁿ càda tucu-gá vitna —cǎchí-gá xàhaⁿ-gǎ xii-güedé.

Te ducaⁿ te ní xica-gá cuáháⁿ-gá ndihi cue téé xica cuu ndihi-gá.

Cuèndá cue téé cùu fariséú ndihi cuèndá cue téé cùu saducéú

(Mr. 8:14-21)

⁵ Te òré ní quexìo ndihi ñàha-gá xii-güedé ndàa ingá xio yuhu làgúná, te ní ndacu iní-güedé sá nǐ cunaa-güedé canehe-güedé pàa quíhíⁿ caxi-güedé. ⁶ Te Jèsús ní cǎháⁿ-gá dóho-güedé, te xàhaⁿ-gǎ xii-güedé:

—Na cǎchí tnúhu-í xii-ndo sǎ ío quihi iní-ndó cùndecu-ndo, te vá cáda cuèndá tnàhí-ndo lèvadurá cue téé cùu fariséú ndihi cue téé cùu saducéú —cǎchí-gá xàhaⁿ-gǎ xii-güedé.

⁷ Te ní ngüíta-güedé xǐtnàha-güedé:

—Cuèndá sá ñà túú ní cǎnehe-o pàa quixi xǐáⁿ duha cǎháⁿ-gá —cǎchí-güedé xǐtnàha-güedé.

⁸ Te Jèsús ní cutnùní iní-gá nàcuáa ndùu tnúhu xǐtnàha-güedé, núu ní xàhaⁿ-gǎ xii-güedé:

—Nchòhó chi ñá túú sàndáá iní ñáhá vǎha-ndo xii-í núú xǐáⁿ da sá ñà túú ní cǎnehe-ndo pàa quixi cǎháⁿ-ndó. ⁹ ¿Te náa ñá ndácú iní-ndó sǎ núú ùhúⁿ-ni pàa, te ní taxi-í ní dǎcǎhñu-ndo nǐ xexi ùhúⁿ mǐl cue téé, chi ðiu-ni cue téé-án nǐ quiúndehu, te sátá nǐ túhú cóhó-güedé te ní chítú tǐtní tídihi mee-ni sǎ nǐ quendóo-án? Te ñá tècú tnùní-ndó nàcuáa quèe-xi nàcuáa ní quíde-í. ¹⁰ ¿Te náa ñá ndácú tucu iní-ndó sǎ núú ùsá-ni pàa te ní taxi-í ní dǎcǎhñu tucu-ndo nǐ xexi cúmí mǐl cue téé, chi ðiu-ni cue téé-án nǐ quiúndehu, te sátá nǐ túhú cóhó-güedé te ní nadatàcá-ndó nchàa sá nǐ quendóo, te ní chítú tǐtní tídihi mee-ni sǎ nǐ quendóo-án? ¹¹ Dico nchòhó chi ñá túú ní quíde cuèndá-ndó nàcuáa ndùu tnúhu cǎháⁿ-í òré ní cǎchí-í sá vǎ quèhéⁿ cuèndá-ndó lèvadurá cue téé cùu fariséú ndihi cue téé cùu saducéú, chi ñá ðíú cuèndá pàa ní cǎháⁿ-í —cǎchí-gá xàhaⁿ-gǎ xii-güedé.

¹² Te sátá dúcáⁿ nǐ xàhaⁿ Jèsús xii cue téé xica cuu ndihi-gá, te ní tecú tnùní-güedé sá xàhaⁿ-gǎ xii-güedé sá vǎ tníi-güedé tnúhu cǎháⁿ cue téé cùu fariséú ndihi cue téé cùu saducéú, te ñá ðíú cuèndá levadurá sá quíhu yuchi cuàha pàa ní cǎháⁿ-gá.

Té Pèlú xàhaⁿ-dǎ xii Jèsús sá ðíú-gǎ cúú-gǎ Cristú

(Mr. 8:27-30; Lc. 9:18-21)

¹³ Te Jèsús ní quexìo-gá yucu cue téé ñúú Cèsareá Fìlipú, te ní xícáⁿ tnúhú-gǎ núú cuè téé xica cuu ndihi-gá, te xàhaⁿ-gǎ xii-güedé:

—¿Yoo cùu yúhú Téé cùu ñaní tnàhá-ndó nchàa-ndo cǎchí cue ñáyiú-va? —cǎchí-gá xàhaⁿ-gǎ xii-güedé.

¹⁴ Te ní xàhaⁿ-güedé xii-gá:

—Davá-yu cächí-yu sá cúú-n ndïi Juàá téé ní xóo dacuàndute ñaha xii ñáyiú, te davá-yu cächí-yu sá cúú-n tē Èliás, te davá-yu cächí-yu sá cúú-n ndïi Jeremiás téé ní xóo cáháⁿ tnúhu Yá Ndiöxí ndéé sanaha, àdi cuu-n ingá téé ní xóo cáháⁿ tnúhu-gá ndéé sanaha, duha cächí-yu —cächí-güedé xáhaⁿ-güedé xii-gá.

15 Te Jèsús ní xícáⁿ tnúhú tucu-gá núú-güedé, te xáhaⁿ-gá xii-güedé:

—Te nchòhó, ¿yoo sàni iní-ndó cùu-í-i? —cächí-gá xáhaⁿ-gá xii-güedé.

16 Te té Ximú, àdi Pelú chi úú diu-dé, ní xáhaⁿ-dē xii-gá:

—Yòhó cúú-n Crìstú Yaa ní tendaha Yá Ndiöxí véxi ñuyíú-a, te diu Yá Ndiöxí cúú-gá Yaa ndécú nchàa nduu nchaa quiú, te yòhó cúú-n Dēhe-gá —cächí-dé xáhaⁿ-dē xii-gá.

17 Te Jèsús ní xáhaⁿ-gá xii-dé:

—Yòhó té Ximú déhe té Jónás, ío váha táhú-n chi mee Tātá-í Dútú Ndiöxí ní dácáhu iní ñáhá-gá xii-n nàcuáa cunduu tnúhu cáháⁿ-n, te ñá díú ñáyiú ñuyíú-a ducaⁿ ni dācahu iní ñáhá-yu xii-n tnúhu-áⁿ.

18 Te yúhú xáhaⁿ-í Pèlú xii-n, te tnúhu-áⁿ quée-xí yúú, chi quèe ndáá-xi nàcuáa nàni-n, chi cuu-n ñá tée vá cání ñá caní úú iní-xi canu ichi-n cuè ñáyiú nàcuáa cundecu ndihí ñáhá-yu xii-í. Te nchaa ñáyiú cùu cuendá-í vá ndácú yùcu ñávàha dacuíta nihnu ñaha-xi xii-yu. 19 Te yúhú taxi-í tnúhu ndee iní cundecu ndihí-n cuendá cunuu-n núú cuè ñáyiú yìndaha ñaha Yá Ndiöxí, te nchaa sá ná cáháⁿ-n sá cúú-xí sá vaha, te diu-ni ducaⁿ cáháⁿ Yá Ndiöxí, te nchaa sá ná cáháⁿ-n sá ñá túú cùu-xi sá vaha, te diu-ni ducaⁿ cáháⁿ tucu-gá, chi quide-n nàcuáa cuiní-gá —cächí-gá xáhaⁿ-gá xii-dé.

20 Te sátá dúcáⁿ te ní xáhaⁿ Jèsús xii cue tée xica cuu ndihí-gá sá vā yòo cúñaha-güedé sá díú-gá cúú-gá Crìstú Yaa ní tendaha Yá Ndiöxí véxi ñuyíú-a.

Jèsús cáháⁿ-gá sá cáhni ñaha-güedé xii-gá (Mr. 8:31-9:1; Lc. 9:22-27)

21 Te ndéé dàvá-áⁿ ñá ngüíta Jèsús xáhaⁿ-gá xii cue tée xica cuu ndihí-gá:

—Dacuitíí sá quihíⁿ-í ñuú Jerusalén, te yacáⁿ cue tée cùu sacuéhé núú ñáyiú israhél, ndihí cue dútú cùnù, ndihí cue tée dàcuaha

ñaha xii ñáyiú nchaa tnúhu ní chídó tnùnì ndíi Moisés, nchaa cue tée-áⁿ ño dandòho ñaha-güedé xii-í, te cahni ñaha-güedé, dico nduu úní sá cúú-í te ndoto-í —cächí-gá xáhaⁿ-gá xii-güedé.

22 Te té Pèlú ní cana-dé Jèsús ñá xio, te ní ngüíta-dé ténáá ñáhá-dé xii-gá, te xáhaⁿ-dē:

—¡Sá vā cächí Ndiöxí sá dúcáⁿ ndòho-n chi ñá túú tàú-n sá dúcáⁿ ndòho-n! —cachí-dé xáhaⁿ-dē xii-gá.

23 Te ndàa sátá Jèsús nútní té Pèlú òrè ducaⁿ xáhaⁿ-dē xii-gá núu ní nchócuñhu-gá, te xáhaⁿ-gá xii-dé:

—¡Xocuíñí yòhó yucu ñávàha núu-í-a chi dicó quidé tneñu-n! Chi ñá túú sàni iní-ò dàtná sání iní Yá Ndiöxí chi ñá-ni sàni iní-ò ndihí dava-gá cue ñáyiú ndecu ñuyíú-a —cächí-gá xáhaⁿ-gá xii-dé.

24 Te sátá dúcáⁿ te ní xáhaⁿ-gá xii nchaa cue tée xica cuu ndihí-gá:

—Nchaa ñáyiú cuiní chitnahá ñáhá xii-í, te xini ñuhu-xi dañá-yu vá cáda-gá-yu sá sání iní méé-yu, te ío cada ndee iní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í. 25 Te nchaa ñáyiú cuiní sá ñá túú tnàhí ná yáha cundecu ñuyíú-a cuíta nihnú-yu, dico nchaa ñáyiú ñá túú tnàhí yùhú cuèi nándi sá ná yáha-yu cundecu-yu ñuyíú-a sá cuendá-í, te ñáyiú-áⁿ naníhí tàhú-yu. 26 Te cuèi nchaandi túhú sá ío ñuyíú-a na nihí ñáyiú cundecu ndihí-yu, dico núu diu nchaa xíáⁿ ná càda cuíta nihnú-yu te ñá túú vèdana nàndihí-xi sá dúcáⁿ ndecu ndihí-yu nchaa xíáⁿ. Te ni ñá sá ío ñuyíú-a vá chindèe ñaha-xi xii-yu cuendá naníhí tàhú-yu. 27 Te ndáá quée-xí tnúhu cáháⁿ-í, chi na quixi tucu yúhú Tée cùu ñaní tnáhá-yu ncháá-yu, te dàvá-áⁿ quini-yu sá ío càhnu cuu-í dàtná càhnu cuu Tātá-í Dútú Ndiöxí, te quixi-í ndihí cue espíritú xínú cuèchi núú-gá, te dàvá-áⁿ cuáha-í nchaa ñáyiú sá ndúú tãhü-yu nàcuáa ndùu sá ñá quidé-yu ñá ñá-yu. 28 Te na cächí tnúhu ndáá-í xii-ndo sá ío dava nchòhó ñáyiú ndecu iha vitna vá cùu-ni-ndo, chi cundecu-ni-ndo ndéé quini-ndó quixi tucu yúhú Tée cùu ñaní tnáhá-ndó nchàa-ndo taxi tnuní-í nchaa ñáyiú —cächí-gá xáhaⁿ-gá xii-güedé.

17

*Ní nadáma dóo Jèsús ndihi núú-gǎ
(Mr. 9:2-13; Lc. 9:28-36)*

¹ Te núú ìnú nduu sá dúcáⁿ ñí cáháⁿ Jèsús, te ní xica-gǎ cuásaá-gǎ ìⁿ yucu dùcúⁿ, te ndèca-gǎ té Pèlú, ndihi té Jàcobó, ndihi té Juáá ñaní té Jàcobó-áⁿ cuásaá. Te úní tnàhí-ni cue téé-áⁿ ndécá-gǎ cuásaá. ² Te yucu-áⁿ ndécú-gǎ ní nadáma núú-gǎ ndihi dóo-gǎ, te núú-gǎ súúni dàtásaⁿ-xi dàtná quidé-xí núú nchìcanchii, te dóo-gǎ súúni ñí nduu cuìxíⁿ dàtná cáá ñùhú cuìxíⁿ. ³ Te òré-ni-áⁿ ñí xiní-güedé ndíi Moisés ndihi té Èliás nútní-güedé ndihi-gǎ ndátnùhu ndihi ñaha-güedé xii-gǎ. ⁴ Te té Pèlú ní xáhaⁿ-dè xii Jèsús:

—Mèstrú, ñváha ní cuu sá ndécú-ó ìha vitna! Te núú cuìní-n, te na dàcaa-ndí úní tnàhá vehe tnuvixiⁿ, te ìⁿ cuu cuèndá-n, te ìⁿ cuu cuèndá té Moisés, te ìⁿ cuu cuèndá té Èliás —càchí-dé xáhaⁿ-dè xii-gǎ.

⁵ Te ñini dùcaⁿ caháⁿ té Pèlú ní quexìo ìⁿ vícò núú ndécú-güedé ní dádǎhu ñaha-xi xii-güedé te súúni chàhnchí. Te xití vícò-ǎⁿ ñí tecú ní cáháⁿ Yǎ Ndiõxí, te xáhaⁿ-gǎ xii-güedé:

—Tée-a cùu-dé Déhe-í téé ío cùu iní-í, te ío cùdíí iní-í-dé, te cundedóho-ndo nchàa tnúhu cáháⁿ-dé —duha ní xáhaⁿ-gǎ xii-güedé.

⁶ Te sá dúcáⁿ ñí cáháⁿ Yǎ Ndiõxí ní tecú dóho cue téé xica cuu ndihi Jèsús te ío ní yùhú-güedé, te ní ngüíñí xití-güedé te ní nuu núú-güedé ndàa núú ñùhú. ⁷ Te Jèsús cuáháⁿ-gǎ núú xíndecu cue téé xica cuu ndihi-gǎ, te ní tendaha ñaha-gǎ, te xáhaⁿ-gǎ xii-güedé:

—Chí ndácuñí, vá yùhú-ndó —càchí-gǎ xáhaⁿ-gǎ xii-güedé.

⁸ Te òré ní ndanehe núú-güedé, te ñá túú-gǎ ní xiní-güedé cue téé úú-áⁿ chí mee-nǎ Jèsús. ⁹ Te òré cuánuu ndihi ñaha Jèsús xii-güedé tindúú-ǎⁿ, te ní xáhaⁿ-gǎ xii-güedé:

—Vá yõ cùñaha-ndo ñí ìⁿ sá ñí xiní-ndó núú ñí sáá-ó-á, te cuu cáháⁿ-ndó dico ndéé ná yáha ndoto yùhú Tée cùu ñaní tnàhá-ndó nchàa-ndo sá cùú-í —càchí-gǎ xáhaⁿ-gǎ xii-güedé.

¹⁰ Te cue téé xica cuu ndihi-gǎ ní xáhaⁿ-güedé xii-gǎ:

—Cuìní-ndí cachí tnúhu-n nǎ cuèndá cue téé dàcuaha ñaha xii ñáyiu nchaa tnúhu ní chídó tnùní ndíi Moisés càchí-güedé sá dǐhna-gǎ té Èliás quixi, te dàtnùní quixi Yáá tendaha Yǎ Ndiõxí quixi ñuyíú-a —càchí-güedé xáhaⁿ-güedé xii-gǎ.

¹¹ Te Jèsús ní xáhaⁿ-gǎ xii-güedé:

—Ndáá sá códó nùu ìⁿ téé quixi-dé te cada-dé dàtná ní quide té Èliás te téé-áⁿ cada ndáá-dé nchaa nàcuáa cùu. ¹² Te na càchí tnúhu-í xii-ndo vitna sá sá ní quixi téé ní quide dàtná ní xóo cada té Èliás, te cue ñáyiu ñá túú ní cùtnuní iní-yu sá díú-dè, te ní quide ñahá-yu xii-dé nchaa nàcuáa ní quixi iní méè-yu, te diu-ni ducaⁿ càda ñaha tucú-yu xii yùhú Tée cùu ñaní tnàhá-yu ncháa-yu, chí dandòho ñahá-yu xii-í —càchí-gǎ xáhaⁿ-gǎ xii-güedé.

¹³ Te cue téé xica cuu ndihi-gǎ ní cutnùní iní-güedé sá cuèndá ndíi Juáá téé ní xóo dacuàndute ñaha xii ñáyiu ní cáháⁿ-gǎ.

*Jèsús quidé tǎtna-gǎ ìⁿ téé cuechi tnàhá
cuéhé xǐyíhí*

(Mr. 9:14-29; Lc. 9:37-43)

¹⁴ Te Jèsús ní nasáá-gǎ ndihi cue téé ní sáá ndihi-gǎ tindúú-ǎⁿ núú xíndecu vai ñáyiu, te ní quexìo ìⁿ téé núú-gǎ ní ngüíñí xití-dè, te xáhaⁿ-dè xii-gǎ:

¹⁵ —Mèstrú, cundàhú iní déhe-í chí tnàhá-dé cuéhé xǐyíhí, te ío dándoho ñaha-xi xii-dé, te ní cuu vai xito daquée ñaha-xi núú ñùhú xii-dé, te ní cuu vai tucu xito dangauñihu ñaha-xi ndute xii-dé. ¹⁶ Te sa ndèca-í-dé ní quixi núú cuè téé xica cuu ndihi-n dico ñá túú ní ndàcu-güedé cada tǎtna ñaha-güedé xii-dé —càchí-dé xáhaⁿ-dè xii-gǎ.

¹⁷ Te Jèsús ní xáhaⁿ-gǎ xii nchaa ñáyiu xíndecu-áⁿ:

—Nchaa nchòhó ñáyiu ndècu ñuyíú-a, ío sáá iní-ndó chí ñá túú cuìní-ndó quíndáá iní-ndó Yǎ Ndiõxí, te ní cuu vai nduu quide ndee iní-í nchaa sá quidé-ndó. ¿Te ná ndéé ama vá dúcáⁿ-gǎ cada-ndo-i? Te chí cándèca téé cùhú-áⁿ táquixi iha —cachí-gǎ xáhaⁿ-gǎ xii-yu.

18 Te Jèsús ní tenàá-gá espíritú cúndìhi yucu ñávãha yìhi ñaha xii téé-áⁿ, te ní queue ñaha-xi xii-dé, te òré-ni-áⁿ nǐ ndúha-dé.

19 Te sátá dúcáⁿ te òré ndécú mèe Jesús ndìhi cue téé xica cuu ndìhi-gá, te ní xicáⁿ tnúhú-güedé núú-gã, te xãhaⁿ-güedé xii-gá:

—Cachí tnúhu xii-ndí ná cuèndá ñá túú ní ndàcu-ndí queñuhu-ndí espíritú cúndìhi yucu ñávãha yìhi ñaha xii téé-ãⁿ — càchí-güedé xãhaⁿ-güedé xii-gá.

20 Te Jèsús ní xãhaⁿ-gã xii-güedé:

—Te ñá túú ní ndàcu-ndo, chi ñá túú sàndáá ndisa iní-ndó Yã Ndiõxí. Te na càchí tnúhu ndáá-í xii-ndo sã nũu nchòhó quíndáá ndisa iní-ndó Yã Ndiõxí cuèdìcò luha lí dàtná lìhli ndíquíⁿ yutnu nàni mostázá, te ducaⁿ te cuu cúñaha-ndo xii ìⁿ tñdúú xocuíñí-xi núú ndécú-xí te xocuíñí-xi. Te nchaa núú sã vãha ndacu-ndo càda-ndo te núu na quíndáá iní ndisa-ndo Yã Ndiõxí. 21 Te xini ñuhu-xi sã ïo cáháⁿ ndìhi-ndo-gã te ñá túú tnáhí ná caxi-ndo cáháⁿ ndìhi-ndo-gã, te ducaⁿ te ndacu-ndo queñuhu-ndo espíritú cúndìhi yucu ñávãha yìhi ñaha xii ñáyiu, dàtná cúu espíritú sá yíhí ñaha xii téé-ãⁿ ní cùu — cachí-gá xãhaⁿ-gã xii-güedé.

Jèsús càháⁿ tucu-gá sá cáhni ñãha-güedé xii-gá

(Mr. 9:30-32; Lc. 9:43-45)

22 Te nini xica cuu Jesús ndìhi cue téé xica cuu ndìhi-gá distritú Galileá, te ní xãhaⁿ-gã xii-güedé:

—Yúhú Téé cùu ñaní tnáhá-ndó nchaa-ndo sáá ìⁿ nduu te cuáha cuèndá ñáhá-güedé xii-í núú cuè téé cùu úhú iní ñáhá, 23 te cahni ñaha-güedé xii-í dico nduu úní sá cùú-í te ndoto-í —càchí-gá xãhaⁿ-gã xii-güedé.

Te sátá dúcáⁿ nǐ xãhaⁿ-gã xii-güedé, te ïo ní ndíhú iní-güedé.

Díhúⁿ cuèndá veñúhu

24 Te òré ní quexio Jesús ndìhi cue téé xica cuu ndìhi-gá ñuú Capèrnaúm, te cue téé quide cobrá díhúⁿ cuèndá veñúhu ní sáháⁿ-güedé ní cáháⁿ ndìhi-güedé té Pèlú, te xãhaⁿ-güedé:

—¿Chãhu mèstrú-ndó úú díhúⁿ sã nání drãcmá cuèndá veñúhu ãⁿ ñáhá? — càchí-güedé xãhaⁿ-güedé xii-dé.

25 Te té Pèlú ní xãhaⁿ-dë:

—Chãhu-dé —càchí-dé xãhaⁿ-dë xii-güedé.

Te té Pèlú cuánguihu-dé xití vehe núú ndécú Jesús, te díhna-gá ní cáháⁿ-gá, te xãhaⁿ-gã xii-dé:

—Xímú, ¿nása sàni iní-n, ná cúú ñáyiu quide cobrá ñáhá cuè téé yìndaha ñáyiu ndécú ñuyú-a cuèndá nchaa sá ndúú yãhu ñuú-güedé ndìhi cuèndá nchaa díhúⁿ sã ngàutnáha, cue ñáyiu ñuú-güedé ãⁿ cuè ñáyiu véxi xica quide cobrá-güedé? — càchí-gá xãhaⁿ-gã xii-dé.

26 Te té Pèlú ní xãhaⁿ-dë xii-gá:

—Cue ñáyiu véxi xica quide cobrá-güedé — càchí-dé xãhaⁿ-dë xii-gá.

Te Jèsús ní xãhaⁿ-gã xii-dé:

—Te núu ducaⁿ te cue ñáyiu ñuú-güedé ñá túú nã chãhu-yu te núu ducaⁿ. 27 Dico cuèndá sá vã yõo dasátú-ó iní-xi, te cuáháⁿ làgúná te dàquée-n sã tníí-n chácá xití ndute, te chácá díhnanuu na tàva-n te cundehe-n yùhu-di, chi yìhi ìⁿ díhúⁿ cuixíⁿ. Te díhúⁿ-ãⁿ canehe-n quíhíⁿ cháhu-n cuèndá-í ndìhi cuèndá-n, chi díhúⁿ-ãⁿ sa tnahá quéyãhu cuèndá-ó ndí ndúú-ó — càchí-gá xãhaⁿ-gã xii-dé.

18

Cue téé ndùcu tnúhu núú Jèsús yoo ïo-gá cúnùu

(Mr. 9:33-37; Lc. 9:46-48)

1 Te sátá dúcáⁿ te cue téé xica cuu ndìhi Jesús ní sáháⁿ-güedé núú-gã, te xãhaⁿ-güedé xii-gá:

—Cachí tnúhu xii-ndí, yoo ïo-gá cúnùu núú cuè ñáyiu yìndaha ñaha Yã Ndiõxí — càchí-güedé xãhaⁿ-güedé xii-gá.

2 Te Jèsús ní cana-gá ìⁿ té lìhli te ní sanutnìí ñaha-gã xii-dé cuádava tnuú-güedé.

3 Te xãhaⁿ-gã xii-güedé:

—Na càchí tnúhu ndáá-í xii-ndo sã nũu vã dáñá-ndó nchaa sá ñá túú vãha quide-ndo, te nduu ndàhú iní-ndó dàtná ndàhú iní té lìhli-a, te vã ndúú tãhú-ndó ndìhu ndaha ñaha Yã Ndiõxí xii-ndo. 4 Te ñáyiu quide datná quidé tè lìhli-a ndàhú iní-yu, te ñá túú quide cahnú-yu mèé-yu, ñáyiu-ãⁿ ïo cunúú-yu núú ndécú Yã Ndiõxí táxi tnùnì-gá. 5 Te nchaa ñáyiu na quèheⁿ cuèndá ìⁿ landú dàtná té lìhli-a cuèndá sá

cúu iní ñáhă-yu xii-í ñá, te cada iní-yu sá yúhú ní queheⁿ cuendá-yu —càchí-gá xăhaⁿ-gă xii-güedé.

Quihi iní-ó vă cündècu-o ichi cuehé ichi duha

(Mr. 9:42-48; Lc. 17:1-2)

⁶ Te Jèsús xăhaⁿ tùcu-gá xii-güedé:

—Te núu ìⁿ tée na dăcaháⁿ-dé cue ñáyiú sàndáá iní ñáhá xii-í cadá-yu nándi sá cuèhé sá dúhá, te váha-gá sá ná dăcutu ndeé-güedé ìⁿ yúú yódó dúcúⁿ-dě, te dăquée ñaha-güedé xii-dé xití ndute làmár, te ñá díú să cündècu-dé ducaⁿ càda-dé. ⁷ ;Te ndàhú ní cuu nchaa ñáyiú xĩndecu ñuyíú-a, chi coo cue tée dacáháⁿ ñáhá xii-yu cadá-yu nándi sá cuèhé sá dúhá te dacuítí să dúcáⁿ càda-xi! ;Dico ndàhú ní cuu cue tée ducaⁿ na dăcaháⁿ ñáhá xii-yu cadá-yu nándi sá cuèhé sá dúhá!

⁸ 'Te núu ìⁿ xio ndaha-ndo àdi ìⁿ xio sáhá-ndó quide-xi quide-ndo nándi sá cuèhé sá dúhá, te quehndé-ndó ná cuíta, chi váha-gá sá nánihí tàhú-ndó cuèi na cuíta ìⁿ xio ndaha-ndo àdi ìⁿ xio sáhá-ndó, te ñá díú să quihíⁿ-ndó ñihí ní ndúú-ndó núú ñùhú núú càyú. ⁹ Te núu ìⁿ xio tinùu-ndo quide-xi quide-ndo nándi sá cuèhé sá dúhá, te tava-ndo na cuíta-xi, chi váha-gá sá nánihí tàhú-ndó cuèi na cuíta ìⁿ xio tinùu-ndo, te ñá díú să ndi ndúú xio núú-ndó quihíⁿ-ndó núú ñùhú núú càyú.

Cuendá ìⁿ mbéé quiti ní xíta

(Lc. 15:3-7)

¹⁰ 'Te vá dăquée tihú-ndó cuè ñáyiú cùu cuendá-í cuèi cùu-yu ñáyiú ío ndàhú iní-xi. Te na càchí tnúhu-í xii-ndo să cuè espíritú xínú cuèchi núú Yă Ndiöxí, cue espíritú néhé cuendá ñáhá xii-yu ñuyíú-a, nchaa-ni nduu nchaa-ni òré ndécú-xi núú Tătà-í Dútú Ndiöxí Yaá ndécú àndiú. ¹¹ Te ducaⁿ chi yúhú Tée cùu ñani tnáhá-ndó nchaa-ndo véxi-í ñuyíú-a dăcácu nihnu-í ñáyiú núú ùhú núú ndàhú, ñáyiú ta xíta nihnu cuáháⁿ.

¹² '¿Te nása sàni iní-ndó cuendá ìⁿ tée ndècu ìⁿ ciendú mbéé-xi?, chi núu na cuíta ìⁿ-di te dândóo-dé cùmídícó sáhúⁿ cùmí-di cundecu-di ìⁿ yucu te quihíⁿ-dé cúnúndúcú-dé quiti ní xíta-án. ¹³ Te núu na nánihí-dě-di, te nchòhó sa cùtnuní iní-ndó să ío-gá cudí iní-dé cuendá quiti ní xíta-án

òré nánihí-dě-di dăcúúxí cùmídícó sáhúⁿ cùmí quiti ñá túú ní xíta-án. ¹⁴ Te ducaⁿ sătnahá-xi quide Tătá-ó Dútú Ndiöxí Yaá ndécú àndiú, chi cuení-gá sá vă cuíta ni ìⁿ cue ñáyiú cùu cuendá-gá.

Cada càhnu iní-ó să quidé ñaha tnaha ñáyiú-o

(Lc. 17:3)

¹⁵ 'Te núu ìⁿ ñáyiú ndècu ndihí-ndo ní quidé-yu ìⁿ sá ñà túú tàú-yu cadá-yu sá cúu-xi-ndó, te cáháⁿ-ndó dōho-yu núú méé núú ìⁿ-ndó ndihí-yu cuendá sá ná ndixi cuèchi iní-yu sá ñà túú quide váha-yu. Te núu ní tníⁿ-yu tnúhu ní xáhaⁿ-ndo xii-yu, te ní ndacu-ndo ñi nacanu ichi-ndō-yu.

¹⁶ Te núu ñá túú ní cuení-yu tníⁿ-yu tnúhu xăhaⁿ-ndo xii-yu, te nducu-ndo ìⁿ àdi úú tnáhá cue tée canehe núú-güedé cuendá cundedóho-güedé năcuáa ndúu tnúhu ndàtnúhu-ndo ndihí-yu. ¹⁷ Te tnáhá cue tée-án cáháⁿ-güedé dōho-yu, dico núu ni tnúhu cáháⁿ cue tée-án ñà túú ní cuení-yu tníⁿ-yu, te dātúu-ndo núú dăva-gá ñáyiú ndècu ndihí-ndo ichi Xítóhó Jesucrístú cuendá cutnùní iní-yu năcuáa quide ñáyiú-án. Te núu ñáyiú ndècuèchi-án ñà túú ní cuení-yu tníⁿ-yu tnúhu sá ñi xáhaⁿ dăva-gá cue ñáyiú ndècu ichi-gá, te cada-ná iní-ndó să cúu-yu ñáyiú ñà túú ndècu ichi Yă Ndiöxí dātá cue tée cuihna iní-xi quide cobrá ñáhá xii ñáyiú cuendá impuèstú.

¹⁸ 'Te na càchí tnúhu ndáá-í xii-ndo să núu nchòhó ná càchí-ndó să ndécú cuèchi ñáyiú, te diu-ni ducaⁿ cáháⁿ Yă Ndiöxí, àdi cachí-ndó să ñà túú cuèchi-yu te diu-ni ducaⁿ cáháⁿ tucu-gá, te ducaⁿ chi nchòhó quidé-ndó năcuáa cáháⁿ-gá.

¹⁹ 'Te na càchí tnúhu-í xii-ndo să núu úú tnáhá-ndó cùu ìⁿ-nuu-ndo caháⁿ ndihí-ndo Tătà-í Dútú Ndiöxí Yaá ndécú àndiú xicáⁿ-ndó núú-gă núu ná cúú să cuení-ndó, te taxi-gá núu ná cúú să xicáⁿ-ndó núú-gă. ²⁰ Te núu úú tnáhá-ndó àdi úní tnáhá-ndó ñi natacá-ndó ìⁿ xichi cuendá sá ñúhú iní ñáhá-ndó xii-í, te xíaⁿ ndécú ndihí ñaha-í xii-ndo —càchí-gá xăhaⁿ-gă xii-güedé.

²¹ Te té Pèlú ní sáháⁿ ndehe yatni-dé núú Jèsús, te xăhaⁿ-dě xii-gá:

—Mèstrú, cachí tnúhu xii-í ná daha xito cada càhnu iní-í tnàha ñáyiú-í te núu ìⁿ sá

ná càda ñahá-yu xii-í. ¿Cuèdicó úsá xito-ǎn?
—càchí-dé xǎhaⁿ-dë xii-gá.

²² Te Jèsús ní xáhaⁿ-gǎ xii-dé:

—Yúhú càchí-í sá ñà díú-ní úsá xito cada càhnu iní-n-yu, chi únídico úxí xito ndihí úsá ndihí úsá xito cada càhnu iní-n-yu —càchí-gá xǎhaⁿ-gǎ xii-dé.

Cuèndá téé ñá túú quide cahnu iní tnàha ñáyiu-xi

²³ Te xǎhaⁿ tùcu-gá xii-güedé:

—Na càni-í ìⁿ cuèndú núú-ndó nàcuáa tecú tnùní-ndó nàcuáa cada-xi òré ndihú ndaha ñàha Yá Ndióxi xii ñáyiu. ìⁿ téé yìndaha ñaha xii ñáyiu ní sani iní-dé sá cáda ndáá-dé ndihí cue téé xìnu cuechi núú-dë cuèndá nchaá sá tàú-güedé núú-dë. ²⁴ Te òré sa ní ngúndecu túha-dé te ní quexìo ìⁿ téé xìnu cuechi núú-dë. Te téé-ǎn tàú-dé cuéhé víhí díhúⁿ núú-dë, chi tàú-dé úxí mìl díhúⁿ sǎ nání tàlentú. ²⁵ Te téé xìnu cuechi-ǎn ñà túú díhúⁿ ndécú ndihí-dé nacháhu-dé sá tàú-dé núú patróón-dë-ǎn, núu xǎn ní táuchíúⁿ tée cùu patróón-dë-ǎn dico ñàha-güedé xii-dé ndihí ñadìhí-dé ndihí cue déhe-dé ndihí nchaá sá ndécú ndihí-dé cuèndá nchaá-yu cuú-yu ñáyiu ñá túú tnàhí dàñá quee núú chíúⁿ patróón-xi, te ducaⁿ te ndéyǎhu sá tàú-dé núú patróón-dë. ²⁶ Te téé xìnu cuechi-ǎn ñí ngüíñí xítí-dë núú patróón-dë, te xǎhaⁿ-dë: “Patróón, càhán ndàhú-í núú-n sǎ ìo ndee ìo càhnu cada iní-n sǎ dúhá tàú-í núú-n, te ñá túú ñà caní iní-n chi nacháhu-í nchaá sá tàú-í núú-n”, càchí-dé xǎhaⁿ-dë xii patróón-dë. ²⁷ Te téé cùu patróón-dë-ǎn ñí cundàhú iní ñáhá-dë xii-dé, te ní quide càhnu iní ñáhá-dë, te ní dáñá ñàha-dé cuánuhú-dé. ²⁸ Te téé xìnu cuechi-ǎn ñí naníhí-dë ìⁿ téé xìnu cuechi ndihí-dé ichi cuánuhú-dé, te téé ní naníhí-dë-ǎn tàú-dé sacú-ni díhúⁿ núú-dë chi ìⁿ cièndú-ni díhúⁿ denàriú tàú-dé. Te ní tñi-dé téé tàú núú-dë-ǎn dácüèhné ñáhá-dë xii-dé, te xǎhaⁿ-dë: “Nacháhu sá tàú-n núú-í”, càchí-dé xǎhaⁿ-dë. ²⁹ Te téé tàú-ǎn ñí ngüíñí xítí-dë núú tée dii núú-xi tàú-dé-ǎn, te xǎhaⁿ-dë: “Càhán ndàhú-í núú-n sǎ cáda càhnu iní ñáhá-n xii-í sá tàú-í núú-n, te nacháhu cuéé-í nchaá sá tàú-í núú-n”, càchí-dé xǎhaⁿ-dë. ³⁰ Dico téé dii núú-xi tàú-dé-ǎn ñà túú ní cuíní-dé cada ndee ìní-dé cundetü-dé nacháhu cuéé téé-ǎn sǎ tàú-dé, chi ní chihí

ñaha-dë vecaá cuèndá yàcáⁿ quihi-dé ndéé nacháhu-dé nchaá sá tàú-dé. ³¹ Te dava-gá cue téé xìnu cuechi ní xini-güedé nàcuáa ní quide téé-ǎn, te ní cudééⁿ-güedé núú-dë, te ní sáhán-güedé ní xitnùhu-güedé téé cùu patróón-güedé sá dúcáⁿ ñí quide-dé. ³² Te téé cùu patróón-güedé-ǎn ñí cana-dé téé ducaⁿ ñí quide-ǎn, te ní xáhaⁿ-dë: “Yòhó cúú-n ìⁿ téé ìo cuihna iní-xi xìnu cuechi núú-í, chi yúhú ní quide càhnu iní ñáhá-í xii-n cuèndá nchaá sá tàú-n núú-í òré ní càháⁿ ndàhú-n. ³³ Te tnàhá yòhó tàú-n dùcaⁿ cada-n cada càhnu iní-n tée xìnu cuechi ndihí-n núú-í cuèndá nchaá sá tàú-dé núú-n dàtná ní quide ñaha-í xii-n ñí quide càhnu iní-í cuèndá nchaá sá tàú-n”, càchí téé cùu patróón-ǎn xǎhaⁿ-dë xii téé ducaⁿ ñí quide-ǎn. ³⁴ Te téé cùu patróón-ǎn ñí cudééⁿ víhí-dë sá dúcáⁿ ñí quide téé-ǎn, te ní táuchíúⁿ-dë dandòho ñaha-güedé xii-dé ndéé nacháhu-dé nchaá sá tàú-dé —duha ní caní Jèsús cuèndú núú-güedé.

³⁵ Te xǎhaⁿ tùcu-gá xii-güedé:

—Dàtná ní quide téé cùu patróón-ǎn ñí dándóhó-dë téé tàú núú-dë-ǎn ducaⁿ càda ñaha Tátá-í Dútú Ndióxi Yaá ndécú àndiü xii-ndo, te núu vá ní yùhu ñí iní-ndó càda càhnu iní-ndó sǎ quidé ñàha tnaha ñáyiu-ndo xii-ndo —cachí-gá xǎhaⁿ-gǎ xii-güedé.

19

Jèsús càháⁿ-gá cuèndá cue ñáyiu dàña tnaha

(Mr. 10:1-12; Lc. 16:18)

¹ Te sáta ñí yáha ducaⁿ ñí càháⁿ Jèsús, te ní ndee-gá distrítú Galiléa cuáhán-gá ndàa ìngá xio yúte Jòrdán yucu distrítú Jùdeá. ² Te ìo cuéhé ñáyiu nchicúⁿ ñáhá xii-gá cuáhán, te yàcáⁿ ní quide tátna-gá nchaá ñáyiu cùhú.

³ Te ní quexìo ìⁿ úú cue téé cùu fariséú núú ndécú Jèsús xító ndéé ñáhá-güedé xii-gá núu nása cunduu tnúhu càháⁿ-gá, te xǎhaⁿ-güedé xii-gá:

—Véxi-ndí xìcáⁿ tnúhú-ndí núú-n, ¿cuu dàña ìⁿ téé ñadìhí-dé núu ndédani càa ìⁿ sǎ ñà túú cundáá-yu-ǎn? —càchí-güedé xǎhaⁿ-güedé xii-gá.

⁴ Te Jèsús ní xáhaⁿ-gǎ xii-güedé:

—Te nchòhó, ¿náa ñá túú dàcuaha-ndo núú tütú Yá Ndióxi, te diu núú tütú-gá

càháⁿ-xi sá cǔtnàhá ní cadúha-gá ñáyi, te téé ñadìhí ní cadúha-gá-ǎ? ⁵ Te duha cǎchí tucu-xi núú tǔtú Yǎ Ndiǒxí nàcúáa ní càháⁿ-gá: “Cue téé na ñihí ñadìhí-xi te dǐⁿ-ná cada-güedé tǎtá-güedé ndihí nǎná-güedé, chi ñadìhí-nǎ-güedé cuu cuu ndihí-güedé, te cada iní-ndó sǎ ñⁿ-nǎ yiqui cǔñú cuú-yu cundecú-yu”, duha cǎchí Yǎ Ndiǒxí núú tǔtú-gá. ⁶ Te xǎⁿ núu cada iní-ndó sǎ cué ñáyi úú-áⁿ ñⁿ-nǎ yiqui cǔñú cuú-yu, te ñá túú-gǎ ndi dǐⁿ ndi dǐⁿ yiqui cuñú cuú-yu. Núu xǎⁿ ñá túú ndùu váha-xi dañá cué téé ñadìhí-güedé, chi mee Yǎ Ndiǒxí ní cǎchí-gá sá cúú úú-yu cundecú-yu —cǎchí Jèsús xǎhaⁿ-gǎ xii-güedé.

⁷ Te ní xǎhaⁿ-güedé xii Jèsús:

—Te núu ducaⁿ, ¿te ná cuendá ndí Moisés ní cǎchí ndí sá núu ñⁿ téé cuíní-dé dañá-dé ñadìhí-dé, te cuu cadúha-dé ñⁿ tǔtú núú càháⁿ-xi sá ní dañá-dé ñadìhí-dé, te ducaⁿ te cuu dañá ñaha-dé ní cǎchí ndí vǎ? — cǎchí-güedé xǎhaⁿ-güedé xii-gá.

⁸ Te Jèsús ní xǎhaⁿ-gǎ xii-güedé:

—Te ducaⁿ ní cǎchí ndí Moisés sá cúú dañá-ndo ñadìhí-ndó, chi nchòhó ío sǎá iní-ndó, dico ndéé díhna chi ní tecú tnúhu nchaa cue téé sá vǎ dañá-güedé ñadìhí-güedé. ⁹ Dico yúhú cǎchí tnúhu-í xii-ndo sǎ núu ñⁿ téé na dañá-dé ñadìhí-dé te naqueheⁿ-dé ñgá ñadìhí te ío nèhé quidé-dé, te núu ñá díú cuendá sá càháⁿ ndihí-aⁿ ñgá téé ducaⁿ na dañá ñaha-dé. Te sá dúcáⁿ cuendá-ni na dañá ñⁿ téé ñadìhí-dé, te ñⁿ-ni cuéchi cùu-xi ndihí cuéchi quide téé ndéca ñadìhí te càháⁿ ndihí-dé ñgá ñadìhí —cǎchí-gá xǎhaⁿ-gǎ xii-güedé.

¹⁰ Te cue téé xica cuu ndihí-gá ní xǎhaⁿ-güedé xii-gá:

—Te núu ducaⁿ cùu cuendá cue téé ndihí ñadìhí-güedé, te váha-gá sá vǎ cǎndéca cue téé ñadìhí —cǎchí-güedé xǎhaⁿ-güedé xii-gá.

¹¹ Te Jèsús ní xǎhaⁿ-gǎ xii-güedé:

—Ñá ncháá ñáyi ducaⁿ ndùu táhú-yu cundecú-yu, chi mee-ni ñáyi ní cǎchí Yǎ Ndiǒxí sá dúcáⁿ tnàhí nduu táhú cundecu mee. ¹² Te ío cue téé ducaⁿ tnàhí ní nduu táhú-güedé ndéé òré ní cacu-güedé sá vǎ cǎndéca-güedé ñadìhí. Te ío cue

téé ñá ndácú-güedé candéca-güedé ñadìhí cuendá sá ní quide ñaha dàva-gá cue tnàha téé-güedé xii-güedé. Te dava-güedé ñá túú cǎndéca-güedé ñadìhí chi cuíní-güedé sá vǎ dañá ndéé-güedé cunu cuechi-güedé núú Yǎ Ndiǒxí. Te nchaa cue téé ducaⁿ ní nduu táhú núú Yǎ Ndiǒxí cundecu mee, te váha-ni te núu na cundecu mee-güedé — cǎchí-gá xǎhaⁿ-gǎ xii-güedé.

Jèsús xicáⁿ táhú-gǎ núú Yǎ Ndiǒxí cuendá landú

(Mr. 10:13-16; Lc. 18:15-17)

¹³ Te ñⁿ úú ñáyi ndéca-yu landú lǐhli cuáháⁿ núú Jèsús, chi cuíní-yu sá téndàha ñaha-gá xii-güexi, te cǎcáⁿ táhú-gǎ núú Yǎ Ndiǒxí cuendá-güexi. Te cue téé xica cuu ndihí-gá ní ngüita-güedé ténáá ñhá-güedé xii-yu, te xǎhaⁿ-güedé sá vǎ dúcáⁿ cǎdá-yu.

¹⁴ Te Jèsús ní xǎhaⁿ-gǎ xii-güedé:

—Chí dañá ná quixi nahi cue landú lǐhli-áⁿ núú-í-a, te vá cǎdí-ndó ìchi-güexi, chi dàtná cúú váha iní cue landú lǐhli-áⁿ ducaⁿ cùu váha iní cue ñáyi yindaha ñaha Yǎ Ndiǒxí —cǎchí-gá xǎhaⁿ-gǎ xii-güedé.

¹⁵ Te ní tendaha ñaha-gá xii-güexi, te ní xicáⁿ táhú-gǎ núú Yǎ Ndiǒxí cuendá-güexi, te sǎtá dúcáⁿ ní quide-gá te ní xica-gá cuáháⁿ-gá.

Ñⁿ téé cuica càháⁿ ndihí-dé Jèsús

(Mr. 10:17-31; Lc. 18:18-30)

¹⁶ Te ñⁿ téé cuechi ní quexio-dé núú ndécú Jèsús, te xicáⁿ tnúhú-dé núú-gǎ, te xǎhaⁿ-dé xii-gá:

—Yòhó Mèstrú, cùu-n téé ío váha iní-xi, te cuíní-í núu vá cǔndéé iní-n cǎchí tnúhu-ñ nǎ cúú sǎ váha cada-í cuendá nduu táhú-í cundecu-í ndihí Yǎ Ndiǒxí ni caa ni quíhíⁿ —cǎchí-dé xǎhaⁿ-dé xii-gá.

¹⁷ Te Jèsús ní xǎhaⁿ-gǎ xii-dé:

—¿Te cǔtnuní iní-n nàcúáa ndùu tnúhu càháⁿ-n sǎ yúhú váha iní-ǎⁿ?, chi ñⁿndi díí-ni Yǎ Ndiǒxí ío váha iní-gá. Te núu cuíní-n nàníhí táhú-n te tñi-n nchaa tnúhu càháⁿ Yǎ Ndiǒxí, tnúhu sá sánú ìchi ñaha xii ñáyi nàcúáa cǎdá-yu cundecú-yu — cǎchí-gá xǎhaⁿ-gǎ xii-dé.

¹⁸ Te téé cuechi-ǎⁿ ní xǎhaⁿ-dé xii-gá:

—¿Te ndénda cǎa tnúhu càháⁿ Yǎ Ndiǒxí cada-í-i? —cǎchí-dé xǎhaⁿ-dé xii-gá.

Te Jèsús ní xǎhaⁿ-gǎ xii-dé:

—Te duha ní cachí Yă Ndiöxí cada ñáyíu: “Vá cáhni-ndó tnàha ñáyíu-ndo, vá càháⁿ ndihí-ndo ñàdihí te núu ñá díú ñàdihí-ndó cùú-yu, te ducaⁿ-ni nchòhó cue ñáyíu òhí tucu vá càháⁿ ndihí-ndo tée te núu ñá díú yí-ndo cuu-güedé, te vá dúhú-ndó sã ndécú ndihí tnaha ñáyíu-ndo, vá dácàcu-ndo cuéchi neñùú sá cúú-xí tnàha ñáyíu-ndo. 19 Te canehe-ndo sã yíñùhu núu tătă-ndó ndihí núu náná-ndó, te cundàhú iní-ndó tnàha ñáyíu-ndo dàtná cundàhú iní-ndó mée-ndo”, duha ní cachí Yă Ndiöxí cada ñáyíu —càchí-gá xăhaⁿ-gã xii-dé.

20 Te tée cuechi-ãⁿ ní xăhaⁿ-dë xii-gá:

—Nchaa xĩaⁿ ní ngüíta-í quidè-í ndéé cútnàhá cúú làndú-í, ¿te vitna nágá cúmăni cada-í-i? —càchí-dé xăhaⁿ-dë xii-gá.

21 Te Jèsús ní xăhaⁿ-gã xii-dé:

—Te núu cuñí-n cùu-n ñⁿ tée ío váha cada ndáá, te cuáháⁿ dico-n nchàa sá ndécú ndihí-n, te díhúⁿ-n cuăha táhú-n cuè ñáyíu ndàhú, te ducaⁿ te nduu táhú-n ngündecu váha-n núú ndécú Yă Ndiöxí táxí tnùní-gá. Te sátá ná yăha ducaⁿ càda-n te quixi-n chitnahá ñáhá-n xii-í —càchí-gá xăhaⁿ-gã xii-dé.

22 Te sá dúcáⁿ ñí xăhaⁿ Jèsús xii-dé te ío ní cundiyí-dé, chi ío cuica-dë, te ní xica-dé cuáháⁿ-dé.

23 Te Jèsús ní xăhaⁿ-gã xii cue tée xica cuu ndihí-gá:

—Na càchí tnúhu ndáá-í xii-ndo sã ío úhú quíndáá iní ñaha cuè ñáyíu cuica xii Yă Ndiöxí cuèndá ndíhu ndaha ñàha-gá xií-yu. 24 Te na càchí tnúhu tucu-í xii-ndo sã yăchí-gá yăha ñⁿ caméyu yaú ñⁿ yiqui ticú dàcúúxí sã quíndáá iní ñⁿ ñáyíu cuica Yă Ndiöxí cuèndá ndíhu ndaha ñàha-gá xií-yu —càchí-gá xăhaⁿ-gã xii-güedé.

25 Te sá dúcáⁿ ñí cáháⁿ Jèsús, xĩaⁿ ío ní cuñúhu cue tée xica cuu ndihí-gá, te ní ngüíta-güedé xitnàha-güedé:

—¿Yoo naníhí táhú te núu ducaⁿ vàiⁿ? —càchí-güedé xitnàha-güedé.

26 Te Jèsús ní ndacoto-gá núú-güedë, te xăhaⁿ-gã xii-güedé:

—Nchaa ñáyíu ñuyíú-a chi vá ndácü-yu ná cadá-yu nàcuáa ndíhu ndaha ñàha Yă Ndiöxí xií-yu, dico mee-gã chi ndacu-gá

ndíhu ndaha ñàha-gá xií-yu chi nchaandi túhú sá văha ndàcu-gá quidé-gã —càchí-gá xăhaⁿ-gã xii-güedé.

27 Te té Pèlú ní xăhaⁿ-dë xii-gá:

—Nchúhú ní dándö-ndí nchaa sá ndécú ndihí-ndí, te ní tuha ñaha-ndí xii-n, ¿te ná cúú sã ñihí-ndí nduu táhú-ndí sá dúcáⁿ ñí quide-ndí-i? —càchí-dé xăhaⁿ-dë xii-gá.

28 Te Jèsús ní xăhaⁿ-gã xii-güedé:

—Na càchí tnúhu ndáá-í xii-ndo sã ná sáa nduu, nduu saa nchaa sá ío andíu ndihí ñuyíú-a, te dàvá-áⁿ cunucóo yúhú Tée cùu ñaní tnáhá-ndó nchàa-ndo ñⁿ núú xilé váha, te nchaa ñáyíu quini-yu sá ío càhnu cuu-í, te nchòhó cue tée ní tuha ñaha xii-í tnáhá-ndó cunucóo-ndo núú ñⁿ caa xilé váha ndí ùxúú tnáhá-ndó, te xíaⁿ cunucóo-ndo càda ndáá-ndó cuéchi ndí ùxúú xichi cue ñáyíu isràél. 29 Te nchaa ñáyíu na dándöo vehe-xi, àdi ñaní-xi, àdi cúha-xi, àdi tătă-xi, àdi náná-xi, àdi ñadihí-xi, àdi déhe-xi, àdi ñuhu-xi, te núu ducaⁿ na cadá-yu sá cuèndá-í te ío-gá cuéhé sã cuăñaha Yă Ndiöxí cundecu ndihí-yu, te ñá díú-ní xĩaⁿ chi tnáhá nduu táhú-yu cundecú-yu ndihí-gá ñí caa ñí quíhíⁿ. 30 Te dava ñáyíu cùnuu ndecu ichi Yă Ndiöxí vitna, ñáyíu-áⁿ sáa nduu te vá ío-gá cunúú-yu dàtná cunúú-yu vitna, te dava ñáyíu nchícúⁿ ñá túú cùnuu vitna, ñáyíu-áⁿ sáa nduu te ío cunúú-yu —càchí-gá xăhaⁿ-gã xii-güedé.

20

Cuèndá cue tée quide chiuⁿ

1 Te xăhaⁿ tucu Jesús xii cue tée xica cuu ndihí-gá:

—Na càni-í ñⁿ cuèndú núú-ndó cuèndá tecú tnùní-ndó nàcuáa cada-xi òré ndíhu ndaha ñàha Yă Ndiöxí xii ñáyíu. ñⁿ tée ní xitu-dé yoho yàha stilé, te ñⁿ nduu ní quee-dé nehé-ni cuándúcú-dë cue tée cada chiuⁿ núú dúcáⁿ ñí xitu-dé yoho yàha stilé-áⁿ. 2 Te òré ní ñihí-dë cue tée cada chiuⁿ-áⁿ, te ní quide ndáá-dé ndihí-güedé sá chăhu ñaha-dë xii-güedé ñⁿ díhúⁿ denàriú ñⁿ nduu. Te sátá dúcáⁿ te ní tendaha ñàha-dé xii-güedé cuáháⁿ-güedé cada chiuⁿ-güedé núú dúcáⁿ ñí xitu-dé yoho yàha stilé-áⁿ. 3 Te dàtnùní ní xica tucu-dé cuáháⁿ-dë dàtná òré caá ñⁿ dátneé cuándúcú-gã-dé

cue téé cada chiúⁿ núú nǐ xitu-dé yoho yàha stilé-áⁿ, te ní xiní-dé xǐnutnǐi ìⁿ úú cue téé núú yàhu te ñá túú nǎ chiúⁿ xíquide-güedé.

4 Te ní xáhaⁿ-dē xii-güedé: “Ñá túú cùdana cuyáchi-ndó càda-ndo chiúⁿ-í te cháhu ñaha-í xii-ndo nàcuáa tàú-xi cunduu-ǎⁿ”, càchí-dé xáhaⁿ-dē xii-güedé. Te cue téé-áⁿ nǐ sáha-güedé tnúhu cada chiúⁿ-güedé te ní xica-güedé cuáháⁿ-güedé. 5 Te téé ní xitu yoho yàha stilé-áⁿ nǐ xica tucu-dé dàtná òré caúxúú nduu cuándúcú-gǎ-dé cue téé cada chiúⁿ-dé, te ní níhí tucu-dé cue téé cada chiúⁿ. Te ní quee tucu-dé dàtná òré caá úní sacuaa, te diu-ni ducaⁿ nǐ quide tucu-dé. 6 Te ní quee tucu-dé dàtná òré caá úhúⁿ sacuaa cuándúcú-gǎ-dé cue téé cada chiúⁿ-dé, te ní xiní-dé xǐnutnǐi ìⁿ úú cue téé diu-ni núú yàhu-áⁿ te ñá túú nǎ chiúⁿ quide-güedé, te ní xáhaⁿ-dē xii-güedé: “Sànuu sá nchòhó ní cuu nchàca vitna ñá túú nihí-ndó chiúⁿ cada-ndo”, cachí-dé xáhaⁿ-dē xii-güedé. 7 Te cue téé-áⁿ nǐ xáhaⁿ-güedé xii-dé: “Ñá túú nihí-ndí chiúⁿ cada-ndí chi vá yõ ndücu ñaha xii-ndí”, càchí-güedé xáhaⁿ-güedé xii-dé. Te ní xáhaⁿ-dē xii-güedé: “Yúhú taxi-í chiúⁿ cada-ndo, te quíhíⁿ-ndó núú nǐ xitu-í yoho yàha stilé yàcáⁿ cada chiúⁿ-ndo, te cháhu ñaha-í xii-ndo nàcuáa tàú-xi cunduu”, càchí-dé xáhaⁿ-dē xii-güedé. 8 Te sátá nǐ dáhu nchícanchii, te téé dii chiúⁿ-xi-áⁿ nǐ xáhaⁿ-dē xii téé tàxi tnuní ñáhá xii cue téé quide chiúⁿ-áⁿ: “Cúñaha xii nchaa cue téé quide chiúⁿ-áⁿ ná quíxí-güedé te cháhu-n-güedé, te díhna-gá cue téé nchícúⁿ cuíi-nǎ cuánguihu núú chíúⁿ ngüíta-n cháhu-n, te ndéé núú nǐ ndihí-ná cháhu-n cué téé cuánguihu díhna nuu-gǎ núú chíúⁿ”, càchí-dé xáhaⁿ-dē xii téé tàxi tnuní ñáhá xii cue téé quide chiúⁿ-áⁿ. 9 Te díhna-gá cue téé cuánguihu caá úhúⁿ sacuaa ní quexio-güedé cuèndá cháhu ñaha-dē, te ní cháhu ñaha-dē ìⁿ caa díhúⁿ denàriú xii ìⁿ ìⁿ-güedé. 10 Te sátá nǐ cháhu-dé dava-gá cue téé ní quide chiúⁿ. Te ndéé núú nǐ ndihí-ná ní cháhu-dé cue téé cuánguihu díhna nuu-gǎ núú chíúⁿ. Te cue téé-áⁿ nǐ sani iní-güedé sá vái-gǎ cháhu ñaha-dē xii-güedé, dico ñáhá chi ìⁿ caa-ni díhúⁿ denàriú ní cháhu ñaha-dē xii ìⁿ ìⁿ-güedé.

11 Te cue téé-áⁿ nǐ queheⁿ cuèndá-güedé díhúⁿ-güedé dico ñá túú ní quide váha-xi iní-güedé. 12 Te ní xáhaⁿ-güedé xii téé dii chiúⁿ-xi ní quide-güedé: “¿Ná cuèndá cue téé nchícúⁿ cuíi-nǎ cuánguihu núú chíúⁿ ìⁿ-ni nǐ cháhu ñaha-n xii-ndí ndihí-güedé, te ìⁿ dii oré duha ní quide chiúⁿ-güedé? Te nchúhú nchàca nchaa ní sahani iní-ndí ní quide chiúⁿ-ndí, te ní ndoho-ndí cahni, te ìⁿ-ni nǐ cháhu ñaha-n xii-ndí ndihí-güedé”, càchí-güedé xáhaⁿ-güedé xii téé dii chiúⁿ-xi ní quide-güedé. 13 Te téé dii chiúⁿ-xi ní quide-güedé-áⁿ nǐ xáhaⁿ-dē xii ìⁿ téé-áⁿ: “Yòhó, ñá túú quide-í ìⁿ sá ñá túú tàú-í cada-í sá cúú-xí-n, chi ní quide ndáá-ó sǎ díú-ní ìⁿ díhúⁿ denàriú cháhu ñaha-í xii-n ìⁿ nduu. 14 Te vitna queheⁿ díhúⁿ cuèndá nduu-n te núhú-n, chi yúhú cuíi-ní sá ìⁿ-ní cháhu ñaha-í xii-n ndihí cue téé nchícúⁿ cuíi-nǎ cuánguihu núú chíúⁿ. 15 Chi yúhú cuu-ni cada-í nani cuíi-ní ndihí díhúⁿ-í, ¿adi dico ñá túú quide váha-xi iní-n sǎ dúhá cundahú iní-í cue téé-áⁿ ducaⁿ cháhu-í-güedé?”, càchí téé cùu patróoⁿ-áⁿ xáhaⁿ-dē xii téé-áⁿ. Duha nduu cuèndú caní-í núú-ndó. 16 Te duha càháⁿ-í chi dava ñáyiu cunuú ndecu ichi Yá Ndióxi vitna sáá nduu te vá cúnùu vihi-gá-yu dàtná cúnùu-yu vitna, te dava ñáyiu ñá túú cunuú vitna sáá nduu ìo cúnùu-yu. Te ío cuéhé ñáyiu càháⁿ ñáhá Yá Ndióxi xii-yu dico sacú-ni-yu nduu táhü-yu cundecú-yu ndihí-gá —càchí-gá xáhaⁿ-gǎ xii-güedé.

Jesús càháⁿ tucu-gá sá cáhni ñaha-güedé xii-gá

(Mr. 10:32-34; Lc. 18:31-34)

17 Te ñuhu Jesús ichi cuásaá-gá ñuu Jerusálén ndihí cue téé xica cuu ndihí-gá, te ní cana ñaha-gǎ xii-güedé ní naníhí tnáhá-güedé ndihí-gá, te ta ndàtnúhu ndihí ñaha-gǎ xii-güedé cuáháⁿ, te xáhaⁿ-gǎ xii-güedé:

18 —Vitna ñuhu-o ichi cuásaá-ó ñuu Jerusálén, te yàcáⁿ cuáha cuèndá ñáhá-güedé xii yúhú Téé cùu ñani tnáhá-ndó nchàa-ndo núú cué téé cùu dútú cúnùu, ndihí núú cué téé dàcuaha ñaha xii ñáyiu nchaa tnúhu ní chídó tnuní ndíi Moisés. Te diu cue téé-áⁿ cùñaha-güedé xii dava-gá cue téé sá cáhni ñaha-güedé xii-í. 19 Te cuáha cuèndá

ñáhá-güedě xii-í núú cuè téé ñá túú cùu
 cue téé israél, te cue téé-áⁿ cudíquí ndeé
 ñáhá-güedě xii-í, te caniha-güedě ndihi ñii,
 te dàtnùní cata caa ñaha-güedě xii-í núú
 cùrúxí te núú cùrúxí-áⁿ cuú-í, dico nduu
 úní sá cùú-í te ndoto-í —càchí-gá xáhaⁿ-gá
 xii-güedé.

*Nǎná tǝ Jǎcobó ndihi té Juáá cuíní-aⁿ sá
 cùnùu-güedé ndihi Jèsús*

(Mr. 10:35-45)

²⁰ Te cue déhe té Zebèdeú té Jàcobó ndihi
 té Juáá ndécá ñàha náná-güedě xii-güedé
 cuáháⁿ núú ndécú Jèsús, te òré ní quexìo-aⁿ
 ndihi-güedé núú ndécú-gá te ní ngüíñí
 xítí-áⁿ núú-gá cuendá cuíní-aⁿ ndàtnúhu
 ndihi ñaha-aⁿ xii-gá cuendá sá cúú-xí cuè
 déhe-aⁿ. ²¹ Te cùmání-gá cáháⁿ-aⁿ te ní xícáⁿ
 tnúhú Jèsús núú-aⁿ, te xáhaⁿ-gá:

—¿Ná cuíní-n? —càchí-gá xáhaⁿ-gá xii-aⁿ.

Te ní xáhaⁿ-aⁿ xii-gá:

—Véxi-í càháⁿ ndàhú-í núú-n núu vá
 cùndèe iní-n cùnucóo ñⁿ déhe-í-a xio cùha-n,
 te ingá-dé cunucóo-dé xio dàtni-n na saá
 nduu cùnucóo-n núú táxí tnùn-í —càchí-áⁿ
 xáhaⁿ-aⁿ xii-gá.

²² Te Jèsús ní xáhaⁿ-gá xii úú cue téé-áⁿ:

—Nchòhó, ñá túú cùtnuní váha iní-ndó
 nàcuáa ndùu sá xicáⁿ-ndó núú-í. ¿Te náa
 cundee iní-ndó dandoho ñaha ñáyíu xii-ndo
 dàtná dandòho ñahá-yu xii-í, te cundee
 tùcu iní-ndó càhni ñahá-yu xii-ndo dàtná
 cahni ñahá-yu xii-í-áⁿ? —càchí-gá xáhaⁿ-gá
 xii-güedé.

Te ní xáhaⁿ-güedě xii-gá:

—Cundee iní-ndí yáha-ndí nchaa nàcuáa
 càháⁿ-n-áⁿ —càchí-güedé xáhaⁿ-güedé xii-gá.

²³ Te Jèsús ní xáhaⁿ-gá xii-güedé:

—Ndáá sá cùndèe iní-ndó ndòho-ndo
 nchaa nacuaa ndoho-í, dico sá dúcáⁿ
 cuíní-ndó sá ñⁿ-ndó cùnucóo-ndo xio cuhá-í,
 te ñⁿ-ndo cùnucóo-ndo xio datni-í, te xíáⁿ
 chi ñá díú yùhú tàú-í cachí-í núu sá cúú
 cùnucóo-ndo àdi sá vǎ cúú cùnucóo-ndo, chi
 mee Tàtá-í Dútú Ndiòxí cachí-gá te núu ná
 cúú ñáyíu nduu táhú cunucóo diñi-í dàvá-áⁿ
 —càchí-gá xáhaⁿ-gá xii-güedé.

²⁴ Te òré ní níhí ùxí-gá cue téé xica cuu
 ndihi-gá tnúhu nàcuáa ndùu sá cuíní cue téé
 úú-áⁿ, te ní cudééⁿ-güedé núú cuè téé úú-áⁿ.

²⁵ Te Jèsús ní cana-gá nchaa cue téé xica cuu
 ndihi-gá, te ní xáhaⁿ-gá xii-güedé:

—Nchòhó xini-ndó sá cuè téé yindaha
 nacióⁿ quidé-güedé sá ño cùnucóo-güedé, te
 nchaa dáva-gá cue téé cùnucóo ndihi-güedé
 quidé-güedé tnàhá-güedé sá ño cùnucóo-güedé.

²⁶ Dico nchòhó chi vá dúcáⁿ càda-ndo,
 chi núu dáva-ndo cuíní-ndó cùnucóo-ndo, te
 xini ñuhu-xi cunu cuechi núú tnàhá-ndó
 te vá cáda-ndó sá cùnucóo-ndo. ²⁷ Te núu
 dáva-ndo cuíní-ndó quène cáva-ndo, te
 cuu-ndo dàtná cue ñáyíu ñá túú tnàhí dàñá
 quee núú chíúⁿ pàtróoⁿ-xi cunu cuechi núú
 tnàhá-ndó. ²⁸ Te cada-ndo dàtná quidé
 yùhú Téé cùu ñaní tnàhá-ndó nchaa-ndo,
 chi yùhú véxi-í ñuyíú-a dico ñá díú sá
 cùnucóo cuèchi ñáyíu núú-í chi véxi-í sá cùnucóo
 cuèchi-í núú-yu. Te cuú-í ñuyíú-a cuendá
 vǎi-yu cácu nihnú-yu núú ùhú núú ndàhú
 —càchí-gá xáhaⁿ-gá xii-güedé.

*Jèsús quidé tǎtna-gá núú ùú tnàhá cue téé
 cuáá*

(Mr. 10:46-52; Lc. 18:35-43)

²⁹ Te òré ní quee Jèsús ñuú Jericó ndihi
 cue téé xica cuu ndihi-gá, te cuéhé víhí
 ñáyíu nchicúⁿ ñáhá xii-gá cuáháⁿ. ³⁰ Te
 yuhu ìchi cuáháⁿ-gá xìnucóo úú tnàhá cue
 téé cuáá, te cue téé-áⁿ ní cutnùn-í iní-güedé
 sá Jèsús ñúhú-gá ìchi-áⁿ te ní ngüíta-güedé
 níhi càháⁿ-güedé, te xáhaⁿ-güedé xii-gá:

—¿Yòhó Mèstrú, ñaní tnàhá ndí Dàví,
 cundàhú iní ñáhá xii-ndí! —càchí-güedé
 xáhaⁿ-güedé xii-gá.

³¹ Te cue ñáyíu tènáá ñáhá-yu xii-güedé, te
 xáháⁿ-yu sá ná càdí-güedé yuhu-güedé, dico
 uuⁿ-gá níhi ní cáháⁿ-güedé, te xáhaⁿ-güedé
 xii-gá:

—¿Yòhó Mèstrú, ñaní tnàhá ndí Dàví,
 cundàhú iní ñáhá xii-ndí! —càchí-güedé
 xáhaⁿ-güedé xii-gá.

³² Te ní ngüíñí Jèsús te ní cana ñaha-gá
 xii-güedé, te ní xícáⁿ tnúhú-gá núú-güedé, te
 xáhaⁿ-gá:

—¿Ná cuíní-ndó càda ñaha-í xii-ndo-i? —
 càchí-gá xáhaⁿ-gá xii-güedé.

³³ Te ní xáhaⁿ-güedé xii-gá:

—Mèstrú, cuíní-ndí sá cáda tǎtna-n
 núú-ndí cuendá cundehe-ndí —càchí-güedé
 xáhaⁿ-güedé xii-gá.

³⁴ Te Jèsús ní cundàhú iní ñáhá-gă xii-güedé, te ní tendaha-gă núú-güedé. Te òré-ni ní ndúha núú-güedé, te nchìcúⁿ ñáhá-güedé xii-gá cuáháⁿ.

21

Jèsús cuánguihu-gá ñuú Jerusàlén

(Mr. 11:1-11; Lc. 19:28-40; Jn. 12:12-19)

¹ Te òré sa ta cùyatni Jesús ndihi cue téé xica cuu ndihi-gá ñuú Jerusàlén, te ní quexìo-gá ndihi-güedé yatni vii-nă ñuú Bètfaqé, te xiáⁿ cáá yùcu nani Olívú. Te ní ndatnúhu-gá ndihi úú cue téé xica cuu ndihi-gá, ² te ní xáhaⁿ-gă xii-güedé:

—Chí cuáháⁿ ñuú cáá yàtni yacáⁿ, te òré quexìo-ndo yacáⁿ te nanihí-ndó ìⁿ búrru dìhí ndètníi-di ndihi déhe-di, te nandaxi-ndo-güèdì te candeca-ndo-güèdì quixi. ³ Te núú ió ñáyiu dàdahaⁿ ñaha xii-güedì, te cúñaha-ndo xii-yu sá yùhú Yaá xicá cùu ndihi-ndo xini ñuhu-í-güedì, te ndihi-ni natendaha-í-güedì núhú-güedì cúñaha-ndo —càchí-gá xáhaⁿ-gă xii-güedé.

⁴ Te ducaⁿ ñi cuu chí ní quee ndáá-xi nàcuáa ní chídó tnùnì ìⁿ téé ní xóo cáháⁿ tnúhu Yá Ndiòxí ndéé sanaha núú tütú-gá núú càchí-xi:

⁵ Chí cúñaha cuè ñáyiu ñuú Sìón ná cádá cuendá-yu, chí véxi téé yìndaha ñaha xii-yu yòdo-dé ìⁿ búrru líhli déhe ìⁿ búrru quiti sa xido,

te cùu-dé ìⁿ téé ió ndàhú iní-xi. Duha ní chídó tnùnì ìⁿ téé ní xóo cáháⁿ tnúhu Yá Ndiòxí ndéé sanaha núú tütú-gá.

⁶ Te cue téé xica cuu ndihi-gá ní xica-güedé cuáháⁿ-güedé, te ní quide-güedé nàcuáa ní xáhaⁿ-gă xii-güedé cada-güedé.

⁷ Te ní ndexìo-güedé ndécá-güedé ìⁿ búrru dìhí ndihi déhe-di, te ní sacáⁿ ndodo-güedé dóo-güedé sátá-güedì, te dàtnùnì cuásaá Jèsús sátá ìⁿ-dì ní ngódó ñaha-gá xii-di.

⁸ Te ió cuéhé ñáyiu ta sàcáⁿ-yu dóo-yu ichi cuáháⁿ-gá cuendá núú dōo-yu-áⁿ yãha-gá ndihi quiti yòdo-gá. Te davá-yu xèhndé-yu ndaha yùtnu ñúú tá sàcáⁿ-yu cuáháⁿ. ⁹ Te nchaa ñáyiu yòdonuu núú-gă ndihi nchaa ñáyiu nchìcúⁿ ndàa sátá-gă ní ngüíta-yu níhi cáháⁿ-yu, te càchí-yu:

—¡Ío càhnu cuu Yaá cúú ñàní tnáhá ndí Dàvíí! ¡Te Yá Ndiòxí ió na chìndee ñaha-gá

chi cùu-gá Yaá ní tendaha Yă Ndiòxí véxi quide núú-gă! ¡Te ndéé nchaa sá ió andiu na càchí-xi sá ío càhnu cuu-gá! —duha càchí-yu.

¹⁰ Te òré cuánguihu Jèsús ñuú Jerusàlén, te nchaa ñáyiu ñuú-áⁿ ñi ngüíta-yu xicuáa-yu, te davá-yu ní ngüíta-yu xitnàhá-yu:

—¿Yoo cùu téé-ăⁿ? —càchí-yu xitnàhá-yu.

¹¹ Te davá-yu xitnàhá-yu:

—Tée-ăⁿ cúú-dé Jèsús téé cáháⁿ tnúhu Yá Ndiòxí, te cùu-dé téé ñuú Nazàrét ñuú yìndèhu distritú Galileá —càchí-yu xitnàhá-yu.

Jèsús ñá túú tnàhá iní-gá nàcuáa xíquide ñáyiu xití veñúhu

(Mr. 11:15-19; Lc. 19:45-48; Jn. 2:13-22)

¹² Te Jèsús cuánguihu-gá xití veñúhu càhnu sá ío cùnuu, te xití veñúhu-áⁿ xìndecu ñáyiu quide ndáhú nádìcò-yu, ndihi ñáyiu xísaaⁿ, te ncháa-yu ní queñuhu ñaha Jèsús xii-yu quehé, te ní dándüá-gá mèsá nchaa ñáyiu dàma díhúⁿ, ndihi nchaa xilé sácòo nchihì ñáyiu dìco lómá xìndecu xití veñúhu-áⁿ. ¹³ Te ní xáhaⁿ-gă xii-yu:

—Núú tütú Yă Ndiòxí cáháⁿ-xi nàcuáa ní cáháⁿ-gá, te ní cachí-gá: “Vehe-í cúú-xi núú cáháⁿ ndihi ñaha ñáyiu xii-í”, duha ní cáháⁿ-gá càchí-xi núú tütú-gá. Dico nchòhó quidé-ndó vehe-gá vehe ñadúhú —càchí-gá xáhaⁿ-gă xii-yu.

¹⁴ Te xiáⁿ ndécú Jèsús ní quexìo cue téé cuáa ndihi cue téé yacua, te ní quide tátna ñaha-gă xii-güedé te ní ndúha-güedé.

¹⁵ Te cue dütú cùnùu ndihi cue téé dàcuaha ñaha xii ñáyiu nchaa tnúhu ní chídó tnùnì ndí Moisés ní xiní-güedé ní quide Jèsús sá vă yòo tnàhí ndàcu cada, te ndèdóho tucu-güedé níhi xicáháⁿ cue landú xití veñúhu càhnu sá ío cùnuu-áⁿ, te càchí-güexi: “Ío càhnu cuu Yaá cúú ñàní tnáhá ndí Dàvíí”, càchí-güexi. Te ní cudééⁿ-güedé, ¹⁶ te ní xáhaⁿ-güedé xii Jèsús:

—¿Ndèdóho-n nàcuáa cáháⁿ cue landú-ăⁿ ñă? —càchí-güedé xáhaⁿ-güedé xii-gá.

Te Jèsús ní xáhaⁿ-gă xii-güedé:

—Ndèdóho-í, te nchòhó náa ñá túú dàcuaha-ndo núú tütú Yă Ndiòxí núú cáháⁿ-xi cuendá cue landú-ăⁿ, te duha càchí-xi:

Yòhó ní quide-n sã cuè landú vitna sàdi,
ndìhi cue dava-gá landú,
chiñuhu ñaha-güexi xii-n nàcuáa tàú-xi cun-
duu.

Duha cächí-xi núú tütú-gá —cächí-gá
xãhaⁿ-gã xii-güedé.

¹⁷ Te xiáⁿ ñí dándõ ñaha Jèsús xii-güedé,
te ní xica-gá cuáháⁿ-gá ñuú Bètaniá, yacáⁿ ní
xíndecu-gá niú-áⁿ.

*Jèsús xãhaⁿ-gã xii yutnu ngüxí sá vã
cúúⁿ-gã sávidí-xi*

(Mr. 11:12-14, 20-26)

¹⁸ Te nduu tněé-áⁿ nehé-ni cuáháⁿ tucu
Jèsús ñuú Jerusálén, te ichi ñuhu-gá ní
xíhí-gá docó. ¹⁹ Te ní xiní-gá ñí yutnu ngüxí
nútní ñí xio yuhu ichi, te ní xica-gá cuáháⁿ
ndéhé-gã nõu ndèé sávidí-xi, dico ñá túú
nã ndèé chi mee-ni ndàha-xi ndeé. Te ní
xãhaⁿ-gã xii yutnu ngüxí-áⁿ:

—jVitna te vá ñí ndùu-gá cuuⁿ sávidí-n! —
cächí-gá xãhaⁿ-gã xii-xi.

Te òré-ni-áⁿ ñí yíchí yutnu ngüxí-áⁿ. ²⁰ Te
sá dúcáⁿ ñí cuu ní xiní cue téé xica cuu
ndìhi Jesús, te ío ní cuñúhu-güedé, te ní xicáⁿ
tnúhú-güedé núú-gã, te xãhaⁿ-güedé:

—¿Ná cuendá ndéé dàcáⁿ ío ndìhi ní
yíchí yutnu ngüxí-áⁿ-i? —cächí-güedé
xãhaⁿ-güedé xii-gá.

²¹ Te Jèsús ní xãhaⁿ-gã xii-güedé:

—Na cächí tnúhu ndáá-í xii-ndo sã nõu
nchòhó quíndáá ndisa iní-ndó Yã Ndiõxí, te
vá cání ñí caní úú iní-ndó, te ñá díú-ní sã ñí
quide-í-a ní xiní-ndó ndàcu-ndo cada-ndo,
chi ndéé tíndúú-a xocuíñí-xi núú ndécú-xí
te núú cúñaha-ndo sã xocuíñí-xi te quíhíⁿ-xi
quéé-xi xití lámár. Te díu ducaⁿ càda-xi
te núú na quíndáá iní-ndó. ²² Te nchaa
sá ná cãcáⁿ-ndó nõú Yã Ndiõxí òré cãháⁿ
ndìhi-ndo-gã te taxi-gá te núú sàndáá ndisa
iní-ndó sã táxí-gã sã xicáⁿ-ndó nõú-gã —
cächí-gá xãhaⁿ-gã xii-güedé.

*Jèsús ndécú ndìhi-gá tnúhu ndee iní
(Mr. 11:27-33; Lc. 20:1-8)*

²³ Te Jèsús cuánguihu-gá xití veñúhu
cãhnu sá ío cùnuu danehé-gã ñáiyu, te xiáⁿ
ndécú-gã ní quexio cue dütú cùnùu ndìhi
cue téé cùu sacuéhé nõú ñáiyu isràél, te
xãhaⁿ-güedé xii-gá:

—Cuíní-ndí cachí tnúhu-n xii-ndí nása
ndùu tnúhu ndee iní ndécú ndìhi-n nõu
quide-n nándí sá quidé-n, ¿te yoo ducaⁿ ní
taxi tnúhu ndee iní-áⁿ xii-n-i? —cächí-güedé
xãhaⁿ-güedé xii-gá.

²⁴ Te Jèsús ní xãhaⁿ-gã xii-güedé:

—Yúhú tnàhá-í cuíní-í cãcáⁿ tnúhu-í ñí
sá cãcáⁿ tnúhu-í núú-ndó, te nõu na cächí
tnúhu-ndo te cachí tnúhu-í xii-ndo yòo ní
taxi tnúhu ndee iní duha quide-í. ²⁵ Te
chí cächí tnúhu xii-í yoo ní táuchíúⁿ ñí
dàcuándüte ndí Juáá ñáiyu, ¿Yá Ndiõxí ñí
cuè téé ñuyúú-a ní táuchíúⁿ dùcaⁿ ní quide
ndí?, te chí cächí tnúhu —cächí-gá xãhaⁿ-gã
xii-güedé.

Te ní ngüíta-güedé xítnàha-güedé:

—¿Nása cúñaha-o? Chi nõu na cúñaha-o
sã Yã Ndiõxí ní táuchíúⁿ dùcaⁿ ní quide ndí
Juáá ñá, te quesaha-dé: “¿Ná cuendá ñá túú
ní sàndáá iní-ndó tnúhu ní cãháⁿ ndí vãí?”,
quesaha-dé. ²⁶ Te nõu na cúñaha-o sã cuè
ñáiyu ñuyúú-a ní táuchíúⁿ dùcaⁿ ní quide
ndí ña, te cudééⁿ ñáiyu núú-ó, chi ncháá-yu
cächí-yu sá Yã Ndiõxí ní xãhaⁿ-gã xii ndí sá
cãháⁿ ndí tnúhu-gá núú ñáiyu —cächí-güedé
xítnàha-güedé.

²⁷ Te ní xãhaⁿ-güedé xii Jèsús:

—Ñá túú xiní-ndí yoo ní táuchíúⁿ dùcaⁿ
ní dàcuándüte ndí Juáá ñáiyu —cächí-güedé
xãhaⁿ-güedé xii-gá.

Te ní xãhaⁿ-gã xii-güedé:

—Te nõu ducaⁿ te ní yúhú vá cächí tnúhu-í
xii-ndo yòo ní taxi tnúhu ndee iní duha
quide-í —cächí-gá xãhaⁿ-gã xii-güedé.

Cuendá ñí téé ndìhi úú déhe-dé

²⁸ Te Jèsús ní xãhaⁿ tucu-gá xii-güedé:

—Na cãni-í ñí cuendú núú-ndó nàcuáa
tecú tnúni-ndó tnúhu cãháⁿ-í. ñí téé
ndècu úú déhe-dé, te ní xãhaⁿ-dè xii
déhe-dé téé sacuéhé-gã: “Yòhó déhe-í,
véxi-í cãháⁿ ndàhú-í núú-n nõu vá cündèe
iní-n cuánundaha ñaha-n xii-í cada chiúⁿ-o
núú ñí xitu-í yoho yàha stilé”, cächí-dé
xãhaⁿ-dè. ²⁹ Te ní xãhaⁿ dèhe-dé xii-dé: “Vá
quíhíⁿ-í cada chiúⁿ-í núú chíúⁿ-n”, cächí-dé
xãhaⁿ-dè xii tãtá-dè. Dico cuéé ní nacani
iní-dé te ní sãháⁿ-dé ní quide chiúⁿ-dé núú
chíúⁿ tãtá-dè. ³⁰ Te téé-áⁿ ñí sãháⁿ tucu-dé
ní xãhaⁿ-dè xii déhe-dé té líhli-gá nõu vá
cündèe iní-dé cuánundaha ñaha-dé, te ní
xãhaⁿ dèhe-dé-áⁿ xii-dé: “Cuu cuánundaha
ñaha-í xii-n”, cächí-dé xãhaⁿ-dè. Dico ñá

túu ní sǎháⁿ-dé cada chiúⁿ-dé. ³¹ Te vitna chí cǎháⁿ nũu ndédacǎa cue tée úú-áⁿ nĩ quide-güedé sǎ cuini tátá-güedé —cǎchí-gǎ xǎháⁿ-gǎ xii-güedé.

Te ní xǎháⁿ-güedé xii-gǎ:

—Tée cùu sacuéhé-gǎ, tée ní cǎháⁿ ndihí-dé díhna —cǎchí-güedé xǎháⁿ-güedé xii-gǎ.

Te Jèsús ní xǎháⁿ-gǎ xii-güedé:

—Na cǎchí tnúhu ndǎá-í xii-ndo sǎ nchǎá cuè tée cuihna ìní-xi quide cobrá ñáhǎ xii ñáyiú cuendǎ impuèstú, ndihí cue ñáyiú dìhí xĩndecu ichi díí ìní yáchí-gǎ ndíhu ndaha ñàha Yá Ndiõxí xii cue tée-áⁿ ndihí cue ñáyiú dìhí-áⁿ dàcúúxí nchòhó. ³² Chi ndíi Juáá tée ní xóo dacuàndute ñaha xii ñáyiú ní cǎháⁿ ndíi nàcuáa cadá-yu cundecú-yu, dico nchòhó chi ñá túu cuini-ndó quindǎá ìní-ndó nàcuáa ní cǎháⁿ ndíi, dico cue tée cuihna ìní-xi quide cobrá ñáhǎ xii ñáyiú cuendǎ impuèstú, ndihí cue ñáyiú dìhí xĩndecu ichi díí ìní, chi sàndǎá ìní-güedé ndihí-yu tnúhu ní cǎháⁿ ndíi. Te nchòhó cuèi ndèhe-ndo sǎ sàndǎá ìní cue ñáyiú-áⁿ nchaa tnúhu ní cǎháⁿ ndíi, dico ñá túu cuini-ndó ndixi cuèchi ìní-ndó cuendǎ nchaa sǎ cuèhé sǎ dúhá quide-ndo cuendǎ tñi-ndo tnúhu ní cǎháⁿ ndíi —cǎchí-gǎ xǎháⁿ-gǎ xii-güedé.

*Cuendǎ cue tée cuihna ìní-xi
(Mr. 12:1-12; Lc. 20:9-19)*

³³ Te xǎháⁿ tucu Jesús xii-güedé:

—Cundedóho-ndo na cǎni tucu-í ìngǎ cuendú núu-ndó cuendǎ tecú tñini-ndó tnúhu cǎháⁿ-í. Hⁿ tée ní nacúxi-dé mee-ni yòho yaha stilé núu ñúhú-dé, te ní chidoco-dé cuendǎ sǎ vǎ cúu dàñú, te ní cadúha-dé núu quíhni-dé ndéhé yoho yaha stilé-áⁿ òré ná cùu, te ní cadúha-dé Hⁿ xító dùcúⁿ núu cáúndòdo cue tée coto nchaa yoho yaha stilé-áⁿ.

Te ní sǎá Hⁿ nduu quèe-dé quíngaca cuu xica-dé te ní dándõo ndaha-dé sǎ nĩ xitu-dé-áⁿ xii Hⁿ úú cue tée xini tñáhǎ ndihí-dé cuendǎ cada chiúⁿ-güedé, te ní ndatnúhu-güedé sǎ òré ná cúu te cuu cuendǎ dava-güedé, te ducaⁿ te ní quee-dé cuáhǎⁿ-dé. ³⁴ Te sátá nĩ sǎá nduu nĩ cuu ndéhé nchaa yoho yaha stilé sǎ nĩ xitu-dé-áⁿ, te ní xǎháⁿ-dè xii Hⁿ úú cue tée xinu cuechi núu-dé: “Chí cuáhǎⁿ cǎcǎⁿ-ndó

sǎ cúu cuendǎ-í núu cuè tée ní dándõo ndàha-í nchaa yoho yaha stilé sǎ nĩ xitu-í”, cǎchí-dé xǎháⁿ-dè xii-güedé. ³⁵ Te cue tée ní dándõo ndaha-dé nchaa yoho yaha stilé sǎ nĩ xitu-dé-áⁿ nĩ tñi-güedé cue tée xinu cuechi núu-dé-áⁿ, te Hⁿ-dé ní caní-güedé, te Hⁿ-dé ní sahni ñaha-güedé, te ìngǎ-dé ní sǎñaha-güedé yúu. ³⁶ Te tée ní xitu yoho yaha stilé-áⁿ nĩ tendaha-dé titní-gǎ tucu cue tée xinu cuechi núu-dé cuáhǎⁿ-güedé cuángácǎⁿ-güedé sǎ cúu cuendǎ-dé núu cuè tée ní dándõo ndaha-dé sǎ nĩ xitu-dé-áⁿ, dico diu-ni ducaⁿ nĩ quide ñaha cuè tée-áⁿ xii cue tée xinu cuechi núu-dé-áⁿ.

³⁷ Te tée cùu xítóhó nchaa yoho yaha stilé-áⁿ nĩ sani ìní-dé: “Váha-gǎ nũu tendaha-í déhe-í-a núhú-dé, chi òré quini ñáhǎ-güedé xii-dé te canehe-güedé sǎ yíñùhu núu-dé”, duha ní sani ìní-dé. Te ní tendaha-dé déhe-dé cuánuhú-dé. ³⁸ Dico òré ní xini cue tée quide chiuⁿ-áⁿ dèhe tée cùu xítóhó nchaa yoho yaha stilé-áⁿ, te ní xitnàha-güedé: “Tée-áⁿ tée véxi nduu táhú ñuhu-a ndihí nchaa sǎ cáá núu-xi, dico cǎhni-o-dé te mee-o nduu táhú-ó sǎ ndúú táhú-dé”, cǎchí-güedé xitnàha-güedé. ³⁹ Te ní tñi-güedé tée-áⁿ te ndéca ñaha-güedé cuáhǎⁿ Hⁿ xio yuhu ñuhu-áⁿ, te ní sahni ñaha-güedé xii-dé —duha cuáhǎⁿ cuendú ní caní Jèsús núu-güedé.

⁴⁰ Te ní xǎháⁿ tucu Jesús xii-güedé:

—¿Te nchòhó sa cùtnuní ìní-ndó nǎsa cada ñaha xítóhó ñuhu-áⁿ xii cue tée-áⁿ ñǎ? —cǎchí-gǎ xǎháⁿ-gǎ xii-güedé.

⁴¹ Te cue tée-áⁿ nĩ xǎháⁿ-güedé xii-gǎ:

—Tée cùu xítóhó ñuhu-áⁿ núhú-dé, te vǎ cùndáhú ìní-dé cue tée cuihna ìní-xi-áⁿ chí cǎhni ñaha-dé xii-güedé, te dándõo ndaha-dé ñuhu-dé xii cue tée cùtnuní ìní-dé cada ndǎá cuendǎ ndi tñáhǎ cúuⁿ ndéhé nchaa yoho yaha stilé sǎ nĩ xitu-dé-áⁿ te cuáñaha-güedé xii-dé sǎ cúu cuendǎ-dé —cǎchí-güedé xǎháⁿ-güedé xii-gǎ.

⁴² Te Jèsús ní xǎháⁿ-gǎ xii-güedé:

—Te nchòhó, náa ñá túu dàcuaha-ndo núu tütú Yá Ndiõxí núu cǎchí-xi: Yúu sǎ nĩ dáquéé tihú cue tée dàcaa vehe, ní cuu-xi yúu cúnúu vitna.

Chi mee Dütú Ndiõxí ducaⁿ nĩ cǎchí-gǎ cundu, te cùu-xi Hⁿ sǎ ìo cùñùhu-o vitna. Duha cǎchí-xi núu tütú-gǎ. ⁴³ Te duha cǎháⁿ-í chí Yá Ndiõxí cada-gǎ te vǎ nihí-ndó

tn̄hu ndee ìní cundecu ndihì-ndo cuèndá ndíhu ndaha ñàha-gá xii-ndo, chi tn̄hu ndee ìní-áⁿ cundecu ndihì cue ñáyiu cada ndáá cuèndá ndíhu ndaha ñàha Yá Ndiõxí xii-yu. ⁴⁴ Te yúú sá cúnùu-áⁿ cúú-xí yùhú, te nchaa ñáyiu ñá túú tn̄i tn̄hu-í cùú-yu dàtná ìⁿ ñáyiu ndùá núú yùú-ãⁿ te tnàhnú duúⁿ-yu, àdi núu na tàú ñáhá-xí xii-yu, te dacàchi duuⁿ ñaha-xi –cachí-gá xãhaⁿ-gã xii-güedé.

⁴⁵ Te sá dúcáⁿ ndùu cuendú ní cani Jèsús te cue téé cùu dútú cúnùu-áⁿ, ndihì cue téé cùu fariséú ní cutnùní ìní-güedé sá cuèndá-güedé ní cáháⁿ-gá. ⁴⁶ Te ní cuiní-güedé tn̄i ñaha-güedé xii-gá òré-áⁿ dico ñá túú ní cùyii-güedé, chi ní yùhú-güedé cue ñáyiu, chi ní cutnùní ìní-yu sá cúú-gã ìⁿ téé cáháⁿ tn̄hu Yá Ndiõxí.

22

Cuèndá ìⁿ vico tn̄ndaha

¹ Te Jèsús ní ngüita tucu-gá caní-gã ingá cuèndú núú-güedé, te xãhaⁿ-gã:

² –Na càni tucu-í ingá cuèndú núú-ndó cuèndá tecú tn̄ní-ndó nàcuáa cada-xi òré ndíhu ndaha ñàha Yá Ndiõxí xii ñáyiu. ìⁿ téé yìndaha ñaha xii ñáyiu ní quide-dé ìⁿ vico ní dátñandaha-dé déhe ducuⁿ-dé. ³ Te ní tendaha-dé cue téé xìnu cuechi núú-dé cuáháⁿ-güedé cuángana-güedé cue ñáyiu sa ní cáháⁿ-dé cuhuⁿ vico, dico ñáyiu-áⁿ ñà túú ní cuiní-yu quíhíⁿ-yu. ⁴ Te ní xãhaⁿ tucu-dé xii dava-gá cue téé xìnu cuechi núú-dé: “Quíhíⁿ-ndó cñaha-ndo xii cue ñáyiu sa ní cáháⁿ-í cuhuⁿ vico sá sà ní quide túha-í sá cáxi-yu, te sa ní sahni-í ndicutu ndihì nchaa dava-gá quiti ní dánúcuñhu-í, te nchaa sa ní quide túha-í, te na quixí-yu cuhúⁿ-yu vico càchí-í cúñaha-ndo”, càchí-dé xãhaⁿ-dë xii cue téé xìnu cuechi núú-dé-áⁿ. ⁵ Dico ni ìⁿ ñáyiu ní cáháⁿ-dé-áⁿ ñà túú ní cuiní-yu quíhíⁿ-yu cuhúⁿ-yu vico. Chi ìⁿ-yu ní sáháⁿ-yu ní quide chiúⁿ-yu núú ñùhú-yu, te ingá-yu ní sáháⁿ-yu ní nadicó-yu núu nándi cùu ndáhú quidë-yu. ⁶ Te dava-gá-yu ní tn̄i-yu dava cue téé xìnu cuechi núú tée quide vico-áⁿ, te ní canihá-yu ndéé ní sahni ñáhá-yu xii-güedé. ⁷ Te téé yìndaha ñaha xii ñáyiu quide vico-áⁿ n̄i cudééⁿ víhí-dé sá dúcáⁿ n̄i

quidë-yu, te ní tendaha-dé cue sandàdú-dé ní sáháⁿ-güedé ní sahni-güedé cue ñáyiu ducaⁿ n̄i quide-áⁿ, te ní sahmi-güedé nchaa vehe càa ñuú-yu. ⁸ Te sátá dúcáⁿ te ní xãhaⁿ-dë xii dava-gá cue téé xìnu cuechi núú-dé: “Nchaa sa ndècu túha, te cue ñáyiu ní cáháⁿ-í cuhuⁿ vico-a ni cùu ñá túú-gã tàú-yu sá cùhúⁿ-yu. ⁹ Te chí cuáháⁿ ndëni ní cuu te cáháⁿ-ndó nchaa ñáyiu na naníhí-ndó ìchi na quixí-yu cuhúⁿ-yu vico-a”, càchí-dé xãhaⁿ-dë xii-güedé. ¹⁰ Te cue téé xìnu cuechi-áⁿ n̄i quee-güedé cuáháⁿ-güedé, te ní cáháⁿ-güedé nchaa ñáyiu ní naníhí-güedé ìchi, te cuèi ñáyiu váha ìní-xi, te cuèi ñáyiu cuihna ìní-xi, te ní chítú-yu núú cúú vico-áⁿ.

¹¹ Te sátá dúcáⁿ te téé yìndaha ñáyiu quide vico-áⁿ n̄i quíhu-dé xiti vehe ní xindéhé-dé cue ñáyiu ñùhu vico-áⁿ, te ní xiní-dé ìⁿ téé ñùtnahá tnuú-yu te ñá túú càa dóó-dé dàtná cáá dõó níhnú cuè ñáyiu ñùhu vico-áⁿ. ¹² Te ní xãhaⁿ-dë xii téé-áⁿ: “¿Tãta, nása ní cuu cuánguihu-õ iha, te ñá túú càa dóó-n dàtná cáá dõó níhnú cuè ñáyiu ñùhu vico tn̄ndaha-i?”, càchí-dé xãhaⁿ-dë xii téé-áⁿ. Dico téé-áⁿ ñà túú ní níhí-dé tn̄hu cáháⁿ-dé. ¹³ Te téé yìndaha ñáyiu quide vico-áⁿ n̄i xãhaⁿ-dë xii cue ñáyiu xìnu cuechi núú mèsá: “Chí tn̄i tée-áⁿ te dacùtu-ndo-dé, te queñuhu-ndo-dé ná quíhíⁿ-dé cundecu-dé ìⁿ xichi núú néé núú ìo ndoho-dé, te yacáⁿ ìo ndáhyú-dé te dicó rúhñú-nã cuu núhu-dé sá sátú ìní-dé sá ndóhó-dé”, càchí-dé xãhaⁿ-dë xii cue ñáyiu xìnu cuechi núú mèsá-áⁿ. ¹⁴ Te duha ndùu cuendú cáháⁿ-í chi ìo cuéhé ñáyiu cáháⁿ ñáhá Yá Ndiõxí xii-yu, dico sacú-ni-yu nduu táhú-yu cundecú-yu ndihì-gá –càchí-gá xãhaⁿ-gã xii-güedé.

Cuèndá impuèstú

(Mr. 12:13-17; Lc. 20:20-26)

¹⁵ Te cue téé cùu fariséú ní sáháⁿ-güedé ìⁿ xichi ní ndatnúhu-güedé nàcuáa cada-güedé datìcanuu-güedé Jèsús núú tn̄hu cáháⁿ-gá cuèndá ducaⁿ níhí-güedé nàcuáa cada-güedé cacáⁿ cuèchi-güedé cuèndá-gá. ¹⁶ Te ní tendaha-güedé ìⁿ ùú cue téé cùndihì-güedé, ndihì cue téé cùndihì té Hèrodés cuáháⁿ-güedé núú ndécú Jèsús.

Te òré ní quexìo-güedé núú ndécú-gã, te ní xáhaⁿ-güedě xii-gá:

—Mèstrú, ñihí-ndí tnúhu sá ïo ndáá càháⁿ-n, te càháⁿ ndáá-n nàcuáa càháⁿ Yă Ndiöxí cundecu-o ñùyíú-a, te cuëi nděda-ni càa ñáyiu ìⁿ-ni càháⁿ-n ndihí-yu chi ñá túú quide cuendá-n cuëi ná ñáyiu cùú-yu.

17 Te cachí tnúhu xii-ndí, núú váha-ni quide-ndí sá chăhu-ndí té Cèsár tée ío cùnuu cuendá impuèstú áⁿ ñăhá —càchí-güedé xăhaⁿ-güedě xii-gá.

18 Dico Jèsús ní cutnùnì iní-gá sá xító ndèè ñáhá-güedě xii-gá, núú ní xáhaⁿ-gã xii-güedé:

—Nchòhó cue tée dândahú mée-xí sã quidé ndáá te ñá ndáá sã quidé ndáá-ndó, ¿ná cuendá xító ndèè ñáhá-ndó xii-í? 19 Chí dánèhé ñáhá xii-í ìⁿ díhúⁿ sã chăhu-ndo cuendá impuèstú núú nása càa —cachí-gã xăhaⁿ-gã xii-güedé.

Te ní dánèhé ñáhá-güedě xii-gá ìⁿ díhúⁿ sã nání dènariú. 20 Te òré ní xiní-gá díhúⁿ-ăⁿ te ní xícáⁿ tnúhú-gã núú-güedě, te xăhaⁿ-gã:

—Chí càchí tnúhu yoo núú-xi ndèè ndihí yoo ñiú-xi ndéè —càchí-gã xăhaⁿ-gã xii-güedé.

21 Te ní xáhaⁿ-güedě xii-gá:

—Núú tē Cèsár ndèè ndihí ñiú-dé —càchí-güedé xăhaⁿ-güedě xii-gá.

Te Jèsús ní xáhaⁿ-gã xii-güedé:

—Te núú ducaⁿ te chí năcuăha té Cèsár sá cúú cuendá-dé, te sá cúú cuendá mée Yă Ndiöxí te xíăⁿ năcuăha-ndo-gã —càchí-gã xăhaⁿ-gã xii-güedé.

22 Te cue tée-án ïo ní cuñúhu-güedé sá dúcáⁿ ñí cáháⁿ-gá, te ní natnî-güedé ichi cuánuhú-güedé.

Cuendá cue ñáyiu ndoto

(Mr. 12:18-27; Lc. 20:27-40)

23 Te ñiú-ni nduu-ăⁿ ñí quexìo ìⁿ úú cue tée cùu saducéú núú ndécú Jèsús. Te cue tée-án ñá túú sândáá iní-güedé sá ndótó cuè ñáyiu ní xihí, te ní xáhaⁿ-güedě xii-gá:

24 —Mèstrú, ndí Moisés ní cachí ndí sá núu ìⁿ tée ndècu ñadihí-xi cuú-dé te quendóo ñadihí-dé, te núu ñá túú dēhe-dé ní xōo ndihí-aⁿ te tée cùu ñani-dé naqueheⁿ-dé ñaha ní quendóo quèè-áⁿ cuendá coo déhe-dé ndihí-aⁿ cuendá ñani-dé tée ní xihí-áⁿ. 25 Te ñuú-ndí-a ní xindecu úsá

tnàhá cue tée mee-ni ndí ñani-güedé. Te tée díhna ní ñihí ñadihí-dé te ñá túú ní cùdí-dé cundecu-dé chi ní xihí-dé, te ní ìⁿ déhe-dé ñá túú ní xōo ndihí ñadihí-dé-áⁿ. Te tée cùu uú ní nàqueheⁿ-dé ñaha ní quendóo quèè-áⁿ.

26 Dico ní xihí tucu-dé, te ní ìⁿ tucu déhe-dé ñá túú ní xōo ndihí ñaha-áⁿ, te ñiú-ni ducaⁿ ñí yáha tée cùu uní, te ní xínu ndi úsá-güedé ní cándeca ñaha-güedě xii ñaha-áⁿ dico ñiú-ni ducaⁿ ñí xihí-güedé. 27 Te ndéé núú ñí ndihí-ná te ní xihí tnàhá ñadihí-áⁿ. 28 Te na sáa nduu ndòto-güedé ndihí ñaha-áⁿ, ¿te ndèdacàa-güedé ñadihí-güedé cuu-aⁿ-i? Chi ndi úsá-güedé ní cándeca ñaha-güedě xii-aⁿ —càchí-güedé xăhaⁿ-güedě xii-gá.

29 Te Jèsús ní xáhaⁿ-gã xii-güedé:

—Ní xíta nchòhó tnúhu càháⁿ-ndó, chi ñá túú xiní-ndó năcuáa càháⁿ Yă Ndiöxí núú tütú-gá, te ní ñá túú cùtnuní iní-ndó sã díú-gã ndácú-gã quidé-gã nchaandi túhú sá vâha. 30 Te na càchí tnúhu-í xii-ndo sã òré ná sáa nduu ndòto nchaa ñáyiu ní xihí, te dàvá-án vã yōo-gã dasaⁿ dēhe yoco-xi chi vá yōo-gã candeca tnàha, chi cuu-ná-yu dàtná cue espíritú xínú cuèchi núú Yă Ndiöxí. 31 ¿Te náa ñá túú quide cuendá-ndó năcuáa càháⁿ Yă Ndiöxí núú tütú-gá núú càháⁿ-gã cuendá cue ñáyiu ní xihí-ăⁿ? Te duha càchí-gá: 32 “Yúhú cùú-í Ndiöxí tē Àbrahám, ndihí té Isàác, ndihí té Jàcób”, duha càchí-gá núú tütú-gá. Te cue tée-án chi cuëi ní xihí-güedé núú ñùyíú-a, dico sá cúú-xi Yă Ndiöxí chi ndècu vívú-ni-güedé. Chi ñiú-gá cúú-gã Ndiöxí mee-ni cuè ñáyiu xindecu vívú, te ñá túú cùu-gã Ndiöxí cue ñáyiu ñá túú ndècu vívú —càchí-gã xăhaⁿ-gã xii-güedé.

33 Te sá dúcáⁿ ñí cáháⁿ-gá ní xii-gá cue tée-án, te ío ní cuñúhu nchaa ñáyiu cuendá sá ïo váha ndùu tnúhu ní cáháⁿ-gã.

Tnúhu sá ïo-gá cúnùu

(Mr. 12:28-34)

34 Te cue tée cùu fariséú ní xiní-güedé ní sadí Jèsús yuhu cue tée cùu saducéú, chi ñá túú ní ñihí-gã-güedé tnúhu cúñaha-güedě xii-gá, te cue tée cùu fariséú-áⁿ ñí nat-acá-güedé te cuáháⁿ-güedé núú ndécú Jèsús. 35 Te ìⁿ tée cùu fariséú-áⁿ ïo váha cùtnuní iní-dé năcuáa ndùu nchaa tnúhu ní chídó

tnùní ndíi Moisés te xito ndeé-dé Jèsús, te xáhaⁿ-dë xii-gá:

³⁶ —Mèstrú, cachí tnúhu ndëdacàa tnúhu sá nǐ chídó tnùní ndíi Moisés ío-gá cúnùu cada-o —cachí-dé xáhaⁿ-dë xii-gá.

³⁷ Te Jèsús ní xáhaⁿ-gã xii-dé:

—Duha càháⁿ tnúhu sá ío-gá cúnùu: “Cuu iní-ndó Dütú Ndiöxí Yaá cúú Ndiöxí-ndó nì yuhu ní iní-ndó, te caní iní-ndó càda-ndo datná cuìní mée-gã, te mee-ni tnúhu váha caní iní-ndó nàcuáa cuu vii cuu váha-ndo núú-gã”, ³⁸ duha càháⁿ tnúhu sá ío-gá cúnùu. ³⁹ Te duha càháⁿ tucu ingá tnúhu cùu uú sá ío cúnùu, te sa yatni ìⁿ-ni cùu-xi ndihí tnúhu díhna nuu, te càchí-xi: “Cuu iní-ndó tnàha ñáyíu-ndo dàtná cúú iní-ndó mée-ndo”, duha càháⁿ tnúhu cùu uú-áⁿ. ⁴⁰ Te cuèndá úú tnúhu-a ní cáá nchaa tnúhu ní cáháⁿ ndíi Moisés nàcuáa cada ñáyíu, te ñíu-ni cuèndá úú tnúhu-a ní cáá tnúhu ní cáháⁿ nchaa cue téé ní xóo cáháⁿ tnúhu Yá Ndiöxí ndéé sanaha —càchí-gá xáhaⁿ-gã xii-güedé.

Yoo cùu Xítohó Jesucristú

(Mr. 12:35-37; Lc. 20:41-44)

⁴¹ Te ndëcu ducaⁿ-ni cue téé cùu fariséú núú ndécú Jèsús. ⁴² Te ní xicáⁿ tnúhú-gã núú-güedé, te xáhaⁿ-gã:

—Cuìní-í cachí tnúhu-ndo yòo déhe-xi cùu Cristú Yaá tendaha Yá Ndiöxí quixi ñuyíú-a —càchí-gá xáhaⁿ-gã xii-güedé.

Te ní xáhaⁿ-güedé xii-gá:

—Déhe ndíi Dàvíí cúú Yàá-áⁿ —càchí-güedé xáhaⁿ-güedé xii-gá.

⁴³ Te Jèsús ní xáhaⁿ-gã xii-güedé:

—¿Te nása càchí-tu-ndo sã déhe ndíi Dàvíí cúú Cristú Yaá tendaha Yá Ndiöxí quixi ñuyíú-a, te mee ndíi Dàvíí-áⁿ nǐ dácáhu iní ñáhá Espíritú Yá Ndiöxí xii ndíi, te ní cachí ndíi sá Cristú Yaá tendaha Yá Ndiöxí quixi ñuyíú-a cùu-gá Xítohó ndíi? Te duha ní cachí ndíi:

⁴⁴ Dütú Ndiöxí ní xáhaⁿ-gã xii Yaá cúú Xítohó-í:

“Ngóo xio cùha-í, te yúhú cada-í te nchaa sá cúú ùhú iní ñáhá xii-n canehe-xi sá yíñùhu núú-n.”

Duha ní xáhaⁿ Dütú Ndiöxí xii Yaá cúú Xítohó-í, càchí ndíi. ⁴⁵ ¿Te nása cùu Cristú déhe ndíi Dàvíí, te mee ndíi ní cachí ndíi sá cúú-gã Xítohó ndíi? —càchí Jèsús xáhaⁿ-gã xii-güedé.

⁴⁶ Te ní ìⁿ-güedé ñá túú-gã ní nǐhí-güedé tnúhu cúñaha-güedé xii-gá. Te ndéé nduu-áⁿ ñá túú-gã ní cùyíi-güedé ná tnúhu cácaⁿ tnúhú-güedé núú-gã.

23

Jèsús càháⁿ-gá cuèndá cue téé cùu fariséú ndihí cuèndá cue téé dàcuaha ñaha xii ñáyíu (Mr. 12:38-40; Lc. 11:37-54; 20:45-47)

¹ Te Jèsús ní cáháⁿ ndodo-gá núú nchaa ñáyíu, ndihí núú cuè téé xica cuu ndihí-gá, te xáhaⁿ-gã:

² —Cue téé dàcuaha ñaha xii ñáyíu nchaa tnúhu ní chídó tnùní ndíi Moisés, ndihí cue téé cùu fariséú ndécú ndihí-güedé tnúhu ndee iní cáháⁿ-güedé nchaa tnúhu sá nǐ chídó tnùní ndíi Moisés-áⁿ. ³ Te cada-ndo nàcuáa dànehé ñáhá-güedé xii-ndo, dico vá cáda-ndó dàtná xíquide-güedé, chi tucu nduu tnúhu càháⁿ-güedé, te tucu quide-güedé. ⁴ Te quide-güedé dàtná quidé ñáyíu dàcuído ìⁿ tnahá ñáyíu-xi ìⁿ sá ío vée, te mée-yu ní lùha ñá túú cuìní-yu cuidó-yu. Te ducaⁿ sãtnahá-xi cùu-güedé chi dànehé ñáhá-güedé xii-ndo nàcuáa cada-ndo, dico mee-güedé chi ní lùha ñá túú cuìní-güedé cada-güedé nàcuáa dànehé ñáhá-güedé xii-ndo. ⁵ Te mee-ni ndùcu-güedé nàcuáa quide-güedé cuèndá quini ñáyíu sá ío cùu cahnu-güedé. Te ndéé xindá sá ndéé ìⁿ úú tnúhu Yá Ndiöxí tneé-güedé ndihí ndaha-güedé, te tnàhá iní-güedé sá ío-gá cunduu quèhéⁿ xindá-áⁿ dàcúxí xindá dava-gá ñáyíu. Te tnàhá tucu iní-güedé sá ío-gá cunduu nani núú dǒó sácuihnu-güedé dàcúxí dǒó sácuihnu dava-gá-yu. ⁶ Te ndi tnahá òré sácǒo vico, òré quíhu-güedé mèsá caxi-güedé te ío-gá cúdíí iní-güedé cunucóo-güedé núú xilé núú sácǒo cue téé cúnùu-gá, te ñíu-ni ducaⁿ quide tucu-güedé cuèi xití veñùhu. ⁷ Te nchaa núú xicá cùu-güedé cuìní-güedé sá ndihí tnúhu yíñùhu cáháⁿ ndihí ñaha ñáyíu xii-güedé, te cuìní tucu-güedé sá cǔñahá-yu xii-güedé mèstrú.

⁸ Dico nchòhó vá cǔñaha-ndo xii ñáyíu sá cǔñahá-yu mèstrú xii-ndo, chi nchòhó ìⁿ-ni cùu-ndo ndecu-ndo, chi ducaⁿ ìⁿ-dii-ni yúhú Yaá ní tendaha Yá Ndiöxí véxi ñuyíú-a

cùu-í Mèstrú ndécú ndìhi ñaha-í xii-ndo. ⁹ Te ñndìi-ni Dútú Ndiòxí Yaá ndécú àndiù cuu-gá Tátá-ndó, núu xíáⁿ vá càháⁿ-ndó sá dàva cue téé ñuyiú-a cùu-güedé tátá-ndó.

¹⁰ Te ni vǎ cáni ínì-ndó càda-ndo nacuaá cáháⁿ ñáyiú sá cùnùu-ndo, chi ñndìi-ni yúhú Crístú Yaá ní tendaha Yǎ Ndiòxí véxi ñuyiú-a cùnùu-í. ¹¹ Te ñáyiú ío-gá cùnùu ndecu ndìhi-ndo, ñáyiú-áⁿ cúu-yu ñáyiú xínu cuechi núu-ndó. ¹² Te nchaa ñáyiú quide cahnu mee-xi ñáyiú-áⁿ vǎ cúu-yu ñáyiú cùnùu, te nchaa ñáyiú ñá túú quide cahnu mee-xi ñáyiú-áⁿ cùnùu-yu.

¹³ Te nchòhó cue téé dàcuaha ñaha xii ñáyiú nchaa tnúhu ní chídó tnùnì ndíi Moisés, ndìhi nchòhó cue téé cùu fariséu, cùu-ndo cue téé ío dándahú méé-xí sǎ quide ndǎá te ñá ndǎá sá quide ndǎá-ndó, te ndáhú ní cuu-ndo chi sǎdí-ndó ìchi ñáyiú ñá dáñá-ndó ndìhu ndaha ñàha Yá Ndiòxí xií-yu, te ni mèe-ndo ñá túú quide-ndo nacuaá ndìhu ndaha ñàha-gá xii-ndo, te ni dàva-gá cue ñáyiú cuìní sá ndìhu ndaha ñàha-gá xií-yu ñá dáñá-ndó.

¹⁴ Te nchòhó cue téé dàcuaha ñaha xii ñáyiú nchaa tnúhu ní chídó tnùnì ndíi Moisés, ndìhi nchòhó cue téé cùu fariséu, cúu-ndó cuè téé ío dándahú méé-xí sǎ quide ndǎá te ñá ndǎá sá quide ndǎá-ndó, te ndáhú ní cuu-ndo chi quèndeé-ndó vèhe cue ñáyiú quèé, te ío naha càháⁿ ndìhi-ndo Yǎ Ndiòxí cuendá cuìní-ndó sǎ vǎ yǒo cutnùnì ínì-xi nàcuáa quide-ndo. Te sá dúcáⁿ quide-ndo te ío-gá ndoho-ndo núu ùhú núu ndáhú dàcúúxí dàva-gá ñáyiú.

¹⁵ Te nchòhó cue téé dàcuaha ñaha xii ñáyiú nchaa tnúhu ní chídó tnùnì ndíi Moisés, ndìhi nchòhó cue téé cùu fariséu, cúu-ndó cuè téé ío dándahú méé-xí sǎ quide ndǎá te ñá ndǎá sá quide ndǎá-ndó, te ndáhú ní cuu-ndo chi sǎhni ínì-ndó cuáháⁿ-ndó ndèni ní cuu dàcaháⁿ-ndó ñáyiú cuendá cuìní-ndó tnì-yu ìchi ndècu-ndo. Te òré ná xínu ínì-yu tnì-yu ìchi ndècu-ndo-áⁿ te uuⁿ-gá cuíta nihnú-yu dàcúúxí mèe-ndo.

¹⁶ Te nchòhó cúu-ndó datná cue ñáyiú cuáá, chi ñá cutnùnì ínì-ndó nàcuáa canu ìchi-ndo ñáyiú, te ndáhú ní cuu-ndo chi càchí-ndó: “Íñ ñáyiú na càcunehe veñúhu càhnu sá ío cùnùu òré cuìní-yu cutnùnì ínì tnàha ñáyiú-yu sá ndǎá cadá-yu ñⁿ sá sání

ínì-yu cadá-yu, te vá cúu cuèchi xií-yu cuèi vá cadá-yu. Dico núu na càcu nehé-yu díhúⁿ cuááⁿ yíhí xítí veñúhu-áⁿ te cuu cuèchi xií-yu te núu vá cadá-yu sá ñí cachí-yu cadá-yu”, duha càchí-ndó.

¹⁷ ;Nchòhó cúu-ndó cuè téé ío ñí dǐquí-xi, te cùu-ndo datná cue ñáyiú cuáá chi ñá tècú tnùnì-ndó! Te vá càchí-ndó sǎ ío-gá cùnùu díhúⁿ cuááⁿ dàcúúxí veñúhu, chi ñi cuendá veñúhu-áⁿ ñí cuu íí díhúⁿ cuááⁿ-áⁿ.

¹⁸ Te càchí tucu-ndo: “Íñ ñáyiú na càcunehe xító núu sácòdó sǎ ndúú tǎhú Yǎ Ndiòxí òré cuìní-yu cutnùnì ínì tnàha ñáyiú-yu sá ndǎá cadá-yu ñⁿ sá sání ínì-yu cadá-yu, te vá cúu cuèchi xií-yu cuèi vá cadá-yu, dico núu na càcu nehé-yu sá ndúú tǎhú Yǎ Ndiòxí yódó núu xító-áⁿ te cuu cuèchi xií-yu te núu vá cadá-yu sá ñí sani ínì-yu cadá-yu”, duha càchí-ndó. ¹⁹ ;Te cùu-ndo

cue téé ío ñí dǐquí-xi, te cùu-ndo datná cue ñáyiú cuáá chi ñá tècú tnùnì-ndó! Te vá cáni ínì-ndó sǎ ío-gá nándìhi sá ndúú tǎhú Yǎ Ndiòxí sácòdó núu xító núu sácòdó tnàhí sá ndúú tǎhú-gǎ-áⁿ dàcúúxí mèe xító-áⁿ.

²⁰ Chi nchaa ñáyiú ducaⁿ càcunehe xító-áⁿ, te tnàhá-ni sá yódó núu-xi càcu nehé-yu òré ducaⁿ càháⁿ-yu. ²¹ Te nchaa ñáyiú ducaⁿ càcunehe veñúhu càhnu sá ío cùnùu te ñá díú mèe-ni veñúhu càcu nehé-yu òré ducaⁿ càháⁿ-yu, chi tnàhá-ni Yá Ndiòxí Yaá

cúu cuendá veñúhu-áⁿ cácu nehé-yu òré ducaⁿ càháⁿ-yu. ²² Te nchaa ñáyiú càcunehe andiù cuendá cutnùnì ínì tnàha ñáyiú-yu sá ndǎá cadá-yu ñⁿ sá sání ínì-yu cadá-yu, te ñá díú mèe-ni andiù cacu nehé-yu chi tnàhá-ni núu núcòo Yá Ndiòxí táxí tnùnì-gá cácu nehé-yu òré ducaⁿ càháⁿ-yu, te tnàhá mèé-gǎ cácu nehé-yu òré ducaⁿ càháⁿ-yu.

²³ Te nchòhó cue téé dàcuaha ñaha xii ñáyiú nchaa tnúhu ní chídó tnùnì ndíi Moisés, ndìhi nchòhó cue téé cùu fariséu, cúu-ndó cuè téé ío dándahú méé-xí sǎ quide ndǎá te ñá ndǎá sá quide ndǎá-ndó. Te cuèi núu ùxí xichi yúcu mèntá ñhí-ndó, te sǎñaha-ndo ñⁿ xichi xii Yá Ndiòxí, te ñi-ni ducaⁿ quide-ndo yúcu nání ànís, ndìhi yúcu nání còminú, dico ndáhú ní cuu-ndo chi ñá túú quide cuendá-ndó nàcuáa càháⁿ nchaa tnúhu sá ío-gá cùnùu sanu ìchi ñaha xii-ndo, te tnúhu-áⁿ càchí-xi sá ío xínu

ñuhu-xi cada ndáá-ndó cùndecu-ndo, te cundàhú iní-ndó cuè tnahá ñáyi-ndo, te quindáá iní-ndó Yá Ndiõxí, te cada-ndo nchàa nacuáa ndùu tnúhu càháⁿ-ndó, te nchaa tnúhu-áⁿ cúu-xí tnúhu sá ïo cùnùu xini ñuhu-xi cada-ndo nacuáa càháⁿ-xi, dico vá dáñá ndèé-ndó càda-ndo nchaa dava-gá nàcuáa càháⁿ tnúhu sá sánú ìchi ñaha xii-ndo. ²⁴ ;Te nchòhó cúu-ndó dàtná cue ñáyi-ndó cuàá, chi ñá túú cùnùnì iní-ndó nàcuáa canu ichi-ndo ñáyi, chi quide cuendá-ndó mèe-ni nchaa tnúhu sá ñá túú ïo cùnùu, dico nchaa tnúhu sá ïo-gá cùnùu xini ñuhu-xi cada cuendá-ndó ñá túú quide cuendá-ndó!

²⁵ "Te nchòhó cue téè dàcuaha ñaha xii ñáyi-ndó nchaa tnúhu ní chídó tnùnì ndí Moisés, ndihì nchòhó cue téè cùu fariséu, cùu-ndo cue téè ïo dándahú méé-xí sá quidé ndáá te ñá ndáá sá quidé ndáá-ndó. Te ndàhú ní cuu-ndo chí cùu-ndo datná cue ñáyi-ndó nàquete sáta-ni tàsáⁿ ndihì sáta-ni còhó te xití-xi càndehe caduha-ni. Te ducaⁿ sàtnahá-xi cùu-ndo chí mee-ni sá ndécú ndihì tnahá ñáyi-ndo ñuhu iní-ndó, te nándi dándahú-ndó-yu te quèheⁿ-ndo sá ndécú ndihì-yu. ²⁶ Te nchòhó cue téè cùu fariséu, cúu-ndó dàtná cue ñáyi-ndó cuàá, chí ñá túú cùnùnì iní-ndó nàcuáa ndùu sá quidé-ndó. Te ïo xini ñuhu-xi sá cáda-ndó nàcuáa nduu ndoo nduu nine iní-ndó cuendá ndacu-ndo càda-ndo sá vaha, te xiáⁿ nùu chí cáda dàtná xiquide ñáyi-ndó nàquete ndaa xití tàsáⁿ ndihì ndaa xití còhó.

²⁷ "Te nchòhó cue téè dàcuaha ñaha xii ñáyi-ndó nchaa tnúhu ní chídó tnùnì ndí Moisés, ndihì nchòhó cue téè cùu fariséu, cùu-ndo cue téè ïo dándahú méé-xí sá quidé ndáá te ñá ndáá sá quidé ndáá-ndó. Te ndàhú ní cuu-ndo chí cùu-ndo datná núu yíndüxi ndíyì núu ní cuáha vii te ní nacáhyú sá cuixíⁿ, dico xití yaú-áⁿ chí càndehe caduha chí mee-ni yiqui ndíyì ñuhu. ²⁸ Te ducaⁿ sàtnahá-xi cùu-ndo chí sànuu sá cúu-ndó cuè téè váha dico iní-ndó chí mee-ni sá cuèhé sá dúhá ñuhu, te ïo dándahú-ndó mèe-ndo sá quidé ndáá-ndó te ñá ndáá sá quidé ndáá-ndó.

²⁹ "Te nchòhó cue téè dàcuaha ñaha xii ñáyi-ndó nchaa tnúhu ní chídó tnùnì ndí Moisés, ndihì nchòhó cue téè cùu fariséu, cúu-ndó cuè téè ïo dándahú méé-xí sá quidé

ndáá te ñá ndáá sá quidé ndáá-ndó. Te ndàhú ní cuu-ndo chí càduha-ndo nchaa núu ní nguíndüxi cue téè ní xóo cáháⁿ tnúhu Yá Ndiõxí ndéé sanaha, te ïo vii quide-ndo nchaa núu sá ní cuáha núu yíndüxi cue ñáyi-ndó ní quide váha ní xíndecu ñuyú-a. ³⁰ Te càchí-ndó: "Te núu dicó nchoo ní xíndecu-ndo cùtnhá ní xíndecu cue ñaní tnáhá-ó ndéé sanaha, te vá chítnáhá-ó-güedé cahni-ndó cuè téè ní xóo cáháⁿ tnúhu Yá Ndiõxí dàvá-áⁿ ní cùu", duha càchí-ndó. ³¹ Te sá dúcáⁿ càháⁿ-ndó, te xiáⁿ cùtnùnì sá ñí-ní cùu-ndo ndihì cue ñaní tnáhá-ndó cuè téè ní xíndecu ndéé sanaha, cue téè ní sahani ñaha xii cue téè ní cáháⁿ tnúhu Yá Ndiõxí dàvá-áⁿ, ³² Te núu ducaⁿ te chí dáxínu cava chiúⁿ ní tausaha-güedé.

³³ ;Te nchòhó cúu-ndó cuè téè ïo cuihna iní-xi, chí cùu-ndo datná cóo dèéⁿ! Te nchòhó vá nihí-ndó nàcuáa cada-ndo càcu nihnu-ndo nùu ùhú núu ndàhú. ³⁴ Te cuendá xiáⁿ nùu tendaha-í cue téè càháⁿ tnúhu Yá Ndiõxí quixi núu-ndó, ndihì cue téè cùu mestrú danèhé ñáhá xii-ndo tnúhu-gá, ndihì cue téè ïo váha cùnùnì iní-xi cuendá cáháⁿ-güedé tnúhu-gá núu-ndó. Dico nchòhó chí da cùu ùhú iní-ndó-güedé, chí dava-güedé cahni-ndo-güedé, te dava-güedé cata caa-ndo-güedé núu cùrúxí, te dava-güedé cani-ndo-güedé xití veñúhu, te ndi tnahá ñuu ndi tnahá ñuu quihíⁿ-ndó nànducu-ndo-güedé cuendá cada ùhú iní-ndó-güedé. ³⁵ Te sá dúcáⁿ ná càda-ndo, te ndadíquí-ndó cuè téè ní quide ndáá ní xíndecu ní xihí ní sahani ñaha cuè ñaní tnáhá-ndó. Te ndéé ndí Abél téè ïo váha ní quide ndáá ní xíndecu ní sahani-güedé ndadíquí-ndó, ndihì nchaa dava-gá cue téè ní sahani-güedé, ndihì ndéé ndí Zacariá déhe ndí Berèquiás téè ní sahani-güedé ndéé núu ní ndihì-ná ndadíquí-ndó, te ndí-áⁿ ní sahani-güedé mei tnúu veñúhu cànuu sá ïo cùnùu ndihì xito núu sácódó sá ndúú táhú Yá Ndiõxí, te nchaa cue téè-áⁿ ndadíquí-ndó chí dàtná tnúhu mee-ndo ní sahani-ndo cuè téè-áⁿ, chí diu-ni ñaní tnáhá mèe-ndo ducaⁿ ní sahani ñaha xii-güedé. ³⁶ Te na càchí tnúhu ndáá-í xii-ndo sá nchaa cue téè ní quide ndáá ní xíndecu ní sahani-güedé, nchaa cue téè-áⁿ ndadíquí nchaa ñáyi-ndó ndècu vitna — cachí-gá xàhaⁿ-gá xii-güedé.

*Jèsús càháⁿ-gá cuèndá ñáyiú ñuú Jerusàlén
(Lc. 13:34-35)*

³⁷ Te xàhaⁿ Jèsús xii ñáyiú ñuú Jerusàlén:

—Nchòhó ñáyiú ñuú Jerusàlén sàhni-ndo cue téé ní tendaha Yá Ndiòxí véxi càháⁿ tnúhu-gá núú-ndó, te mee-ni ndìhi yúú sáhní-ndó dàva-güedé. ¡Te yúhú titní xito ní cuiní-í coto ñaha-í xii-ndo dàtná quidé nchùxi xito-güedi déhe-güedi sàquíhi-güedi xití ndíxíⁿ-güedi, dico nchòhó ñá túú ní cuiní-ndó, te diu-ni ducaⁿ sàni iní-í ndéé vitna! ³⁸ Te na càchí tnúhu ndáá-í xii-ndo sá sáá nduu te ío ndàhú yáha ñuú-ndó, te vá cùndècu-gá-ndó. ³⁹ Te na càchí tnúhu tucu-í xii-ndo sá vǎ quini ñáhá-gǎ-ndó xii-í, dico sáá nduu quini ñáhá tucu-ndo, te dàvá-áⁿ cachí-ndó: “Ío càhnu cuu Yaá ní tendaha Dütú Ndiòxí véxi”, duha cachí-ndó —càchí-gá xàhaⁿ-gǎ xii-yu.

24

*Jèsús càchí-gá sá ngóyó veñúhu
(Mr. 13:1-2; Lc. 21:5-6)*

¹ Te Jèsús ní quee-gá veñúhu càhnu sá ío cùnuu, te meí òré ní queheⁿ-gá ichi quíhíⁿ-gá ìⁿ xichi, te ní sàndehe yatni cue téé xica cuu ndìhi-gá dìñi-gá, te xàhaⁿ-güedé xii-gá:

—Cundehe veñúhu-a nǎ ío váha ní sáá —càchí-güedé xàhaⁿ-güedé xii-gá.

² Te Jèsús ní xàhaⁿ-gǎ xii-güedé:

—Na càchí tnúhu ndáá-í xii-ndo sǎ ncháá sǎ ndéhe-ndó-á vitna saá nduu te vá cùndùu-gá-xi dàtná cáá-xí vitna, chi ni ìⁿ-gá yúú vǎ códó nchìhi taha-xi chi ndìhi ngoyo —càchí-gá xàhaⁿ-gǎ xii-güedé.

*Nàcuáa cada-xi nduu ta cùyatni naa
ñuyú-a*

(Mr. 13:3-23; Lc. 21:7-24; 17:22-24)

³ Te Jèsús ní sáá-gá ndìhi cue téé xica cuu ndìhi-gá yucu Òlívú, te xiáⁿ nǐ ngóo-gá te núú núcóo-gá-áⁿ nǐ sáháⁿ cue téé xica cuu ndìhi-gá, te dayuhu nǐ xàhaⁿ-güedé xii-gá:

—Cuiní-ndí cachí tnúhu-n nǎ nduu dùcaⁿ cada-xi ngoyo veñúhu càhnu sá ío cùnuu, ndìhi nándi cùu sá cádá-xí òré sa ta cùyatni nduu quixi tucu-n ñuyú-a, ndìhi òré sa ta cùyatni naa-xi —cachí-güedé xàhaⁿ-güedé xii-gá.

⁴ Te Jèsús ní xàhaⁿ-gǎ xii-güedé:

—Ío quíhi iní-ndó cùndecu-ndo cuendá sá vǎ yóo dandàhú ñáhá xii-ndo. ⁵ Chi ío cuéhé cue téé coo ñuyú, te danàni-güedé mée-güedé dàtná nàni-í, te cachí-güedé: “Yúhú cùu-í Crìstú Yaá ní tendaha Yá Ndiòxí véxi ñuyú-a”, duha cachí-güedé. Te sá dúcáⁿ càháⁿ-güedé te ío vǎi ñáyiú dandàhú-güedé. ⁶ Te níhi-ndó tnúhu nàa-güedé ndèni ní cuu, dico vá yúhú-ndó chi dacuítí sǎ dúcáⁿ càda-xi, dico vátá sáa-gá nduu nàa ñuyú òré ducaⁿ càda-xi. ⁷ Chi cue téé ìⁿ nàcióⁿ nàa-güedé ndìhi cue téé ingá nàcióⁿ, te titní ñuú ngüita-güedé nàa-güedé, te titní xichi ñuyú coo tnamá, te titní tucu xichi ñuyú quixi cuéhé, te titní tucu xichi ñuyú ío níhi tnáa. ⁸ Te nchaa xiáⁿ cuu-xi tnúndòho sá vitná vǎha váha quèsaha sá cúu-xí cuè ñáyiú xǐndecu ñuyú.

⁹ Te cue ñáyiú na cùu úhú iní ñáhá xii-ndo cuáha cuèndá ñáhǎ-yu núú cuè téé cùchiuⁿ cuendá caniha-güedé xii-ndo, te dava-ndo càhni ñaha-güedé, te nchaa ñáyiú cuu úhú iní ñáhǎ-yu xii-ndo sǎ cuèndá-í. ¹⁰ Te dàvá-áⁿ ío vǎi ñáyiú dàñá-yu sá sàndáá iní-yu Yá Ndiòxí, te ngóo-yu cuu úhú iní tnáhǎ-yu, te cuáha cuèndá tnáhǎ-yu núú cuè téé cùchiuⁿ. ¹¹ Te ío vǎi cue téé cachí-güedé sá càháⁿ-güedé tnúhu Yá Ndiòxí te ñá ndáá sá càháⁿ-güedé tnúhu-gá, te ducaⁿ ío vǎi ñáyiú dandàhú-güedé. ¹² Te dàvá-áⁿ cunuu mèe-ni nchaa sá cuéhé sá dúhá càdá-yu, te vǎi-yu vá cúu iní-gá-yu tnàha ñáyiú-yu. ¹³ Dico nchaa ñáyiú na càda ndee-ni iní canchicúⁿ nihnu ñaha-ni xii-í, ñáyiú-áⁿ naníhí tǎhú-yu. ¹⁴ Te níhí ñuyú quíhíⁿ ñáyiú cáháⁿ-yu tnúhu váha, tnúhu sá càháⁿ nàcuáa ndíhu ndaha ñàha Yá Ndiòxí xii ñáyiú, te sáta ná níhi nchaa ñáyiú tnúhu-áⁿ te naa ñuyú.

¹⁵ Te ndí Dániél téé ní xóo cáháⁿ tnúhu Yá Ndiòxí ndéé sanaha nǐ chídó tnùní ndí cuèndá ìⁿ sá dáquèe tihú Yá Ndiòxí cundecu ìⁿ xichi núú nǐ cuu íí, te xiáⁿ cada-xi sá vǎ cùndècu-gá ni ìⁿ ñáyiú xiáⁿ. Te cada cuèndá váha-ndo nàcuáa ní cáháⁿ ndí, chi nduu na quini-ndó xiáⁿ cundecu-xi núú dúcáⁿ nǐ cuu íí, ¹⁶ te dàvá-áⁿ nchaa ñáyiú xǐndecu distritú Jùdeá xíní ñùhu-xi cunú-yu quíhíⁿ-yu xití yucu. ¹⁷ Te nchaa ñáyiú ndáa ndódó dǐquí véhé-xí

vã ndïhu-gá-yu vehé-yu quehéⁿ-yu ïⁿ ndachïúⁿ-yu canehé-yu quíhíⁿ. ¹⁸ Te nchaa ñáyiú cuáháⁿ yucu vá nùhú-gá-yu vehé-yu cúnúquehéⁿ-yu dóó-yu. ¹⁹ Te ndàhú ní cuu nchaa ñáyiú ìhí ñúhú dèhe-xi, ndihí cue ñáyiú ìhí xĩndeca déhe vitna sàdi na saá nduu dùcaⁿ cada-xi! ²⁰ Te nchòhó, chí càcáⁿ táhú nùú Yã Ndiöxí cuendá sá vã dúcáⁿ ndòho-ndo yóó quidé vïxiⁿ-xi, te ni vã dúcáⁿ ndòho-ndo nduu cuu-xi nduu ndetatú-ndó. ²¹ Chi dàvá-áⁿ coo tnúndòho cahnu vihi ñuyíú, te vátá ïⁿ ndùu-gá coo tnúndòho cahnu vihi-áⁿ ndèe cútnàhá ní ngáva ñuyíú, chí ñu-ni dàvá-áⁿ coo tnúndòho cahnu vihi-áⁿ, te ni nùú cuáháⁿ nùú vèxi vá cóó-gã tnúndòho-áⁿ. ²² Te Yã Ndiöxí càchí-gá sá vã ïo vãi nduu coo tnúndòho cahnu vihi-áⁿ sã cuendá nchaa ñáyiú ní càháⁿ-gã cundecu ndihí-gá. Chi núu vãi nduu na coo tnúndòho-áⁿ te vá yóo cácu nihnu.

²³ Te núu ìo ñáyiú càchí-yu xii-ndo: “Chí cündèhe iha, chí iha ní quexìo Cristú Yaá ní tendaha Yã Ndiöxí véxi ñuyíú-a”, àdi cachí-yu: “Chí cündèhe yacáⁿ chí yàcáⁿ ndécú-gã”, càchí-yu ña. Te vá quèndáá iní-ndó tnùhu càháⁿ-yu. ²⁴ Chi coo cue tée cachí-güedé sá cúú-güedé Yaá ní tendaha Yã Ndiöxí véxi ñuyíú-a, te dava-güedé cachí-güedé sá cúú-güedé cue tée càháⁿ tnùhu Yã Ndiöxí dico ñá ndàá sá cúú-güedé cue tée càháⁿ tnùhu-gá, te cada-güedé titní núú sã vã yóo tnàhí ndàcu cada cuendá dandàhú-güedé ñáyiú. Te cani iní-güedé dandàhú-güedé ndéé cue ñáyiú ní càháⁿ Yã Ndiöxí cundecu ndihí-gá. ²⁵ Te duha nduu tnùhu càháⁿ-í dátùha ñaha-í xii-ndo. ²⁶ Te núu càchí-yu xii-ndo: “Xití yucu-ãⁿ ní quexìo Yaá ní tendaha Yã Ndiöxí véxi ñuyíú-a”, càchí-yu. Te vá quèndáá iní-ndó quíhíⁿ-ndó, àdi cachí-yu: “Vehe-ãⁿ ndécú Yaá ní tendaha Yã Ndiöxí véxi ñuyíú-a”, càchí-yu. Te vá quèndáá iní-ndó tnùhu càháⁿ-yu. ²⁷ Chi dàtná xìní nchaa ñáyiú quide-xi oré sáá ndúté dàyehé-xi ni càa xico ñuyíú ducaⁿ càda-xi oré quixi tucu yúhú Tée cùu ñaní tnàhá-ndó nchaa-ndo chí ncháa-yu quini ñáhã-yu xii-í. ²⁸ Te nchòhó xìní-ndó sã ncháa nùú yúcú yìqui cuñú ní xihí te yacáⁿ tàcá nchaa ndixíí xéxi-güedi.

Nàcuáa cada-xi òré quixi tucu Tée cùu ñaní tnàhá cuè ñáyiú

(Mr. 13:24-37; Lc. 21:25-33; 17:26-30, 34-36)

²⁹ Te na yãha-ni coo tnúndòho cahnu vihi-áⁿ, te vá dàyehé-gá nchícanhii, te ni vã dàyehé-gá yóó, te ngoyo nchaa chódíní ndèe andïu, te quidi-xi andïu ³⁰ nàcuáa cutnùní iní ñáyiú sá sà véxi yúhú Tée cùu ñaní tnàhá-yu ncháa-yu. Te cue ñáyiú nihí ñuyíú ndähyú-yu sá ndihú iní-yu òré ducaⁿ càda-xi, te ncháa-yu quini ñáhã-yu xii-í quee-í andïu quixi-í ichi xití vécó, te quini-yu sá ïo cahnu cuu-í, te quide-í nchaa sá vãha. ³¹ Te tauchiúⁿ-í cue espíritú xínú cuèchi núu-í níhi tíú-xi cútú nadatàcá-xi nchaa ñáyiú ní càháⁿ-í chitnahá ñáhã xii-í xĩndecu ni càa xico ñuyíú.

³² Te nchòhó sa xìní-ndó nàcuáa quide yutnu ngúxí, chí yutnu-áⁿ ndúú yùte núú dité-xi te nàtáhu ndaha-xi. Te òré ducaⁿ quide-xi te càchí-ndó sã sã ní cuyatni nuu cahni. ³³ Te ñu-ni ducaⁿ sãtnahá-xi cada-xi ñuyíú-a òré ná quini-ndó càda-xi nchaa nàcuáa ní càháⁿ-í, te cutnùní iní-ndó sã sã ní cuyatni vii-nã nduu nàa ñuyíú. ³⁴ Te na càchí tnùhu ndáá-í xii-ndo sã òré vátá cùú-gá nchaa ñáyiú xĩndecu ñuyíú-a vitna, te cada-xi nchaa nàcuáa ní càháⁿ-í. ³⁵ Te andïu ndihí ñuyíú-a chí ndihí nihnu-xi, dico tnùhu-í chí vá ndihí nihnu-xi chí cùu-xi tnùhu ndáá cuití.

³⁶ Dico ñá túú cùtnuní ná nduu quixi tucu-í, te ni ña túú cùtnuní ná òré chí vá yóo xìní, te ni cuè espíritú xínú cuèchi núú Yã Ndiöxí ñá túú xìní-xi ná nduu quixi-í, te ni mèe yúhú Tée cùu Déhe Dútú Ndiöxí ñá túú xìní-í ná nduu quixi tucu-í, chí ïⁿdìi díi-ni mee-gã xìní-gá nùu ná nduu quixi-í.

³⁷ Te nduu na quixi tucu yúhú Tée cùu ñaní tnàhá-ndó nchaa-ndo ñuyíú-a te cada-xi dàtná ní quide-xi cútnàhá ní xĩndecu ndíi Nòé. ³⁸ Chi nchaa ñáyiú ní xĩndecu dàvá-áⁿ òré vátá ndáá-gã ndute ñuyíú, te xèxi-yu xihí-yu quidé-yu, te davá-yu ìo-yu vico tnãndaha, te davá-yu dàsáⁿ-yu déhe yòcò-yu candeca ñaha tèe, te ducaⁿ-ni xĩquidé-yu ndéé ní sáá nduu cuãguee té Nòé xití bàrcú. ³⁹ Te ñá túú ní cùtnuní iní-yu nàcuáa cada-xi ñuyíú ndèé ní sáá nduu ní ngúta-xi ní cuuⁿ dáú ní ndaa

ndute ñuyú nĩ dánáá ñàha-xi xií-yu. Te òu-ni ducaⁿ sàtnahá tucu-xi cada-xi nduu na quixi tucu yúhú Tée cùu ñani tnáhã-yu nchaá-yu ñuyú-a, chi nduu ñà túú nã yíhí ìní-yu te quixi tucu-í. ⁴⁰ Te dàvã-áⁿ nũ úú tnàhá cue tée yíhi-güedé xití yucu, te ìⁿ-dé ndanchita te ìⁿ-dé quendóo. ⁴¹ Àdi úú ñáyiu ðíhí nchícõ-yu ìⁿ-ni vèhe, te ìⁿ-yu ndanchita te ìⁿ-yu quendóo.

⁴² Te duha nduu tnúhu càháⁿ-í cuendá nchòhó cundecu túha-ndo, chi ñã túú xìní-ndó nã òré quixi tucu yúhú Yaá cúu Xítóhó-ndó. ⁴³ Te nchòhó xìní-ndó sã nũ ìⁿ tée cùu xítóhó vehe xìní-dé ná òré cúu-xí niú quíhu ñadúhú vehe-dé duhu-güedé, te quíhi ìní-dé cundecu-dé cuendá sã vã dáñã-dé quíhu ñadúhú-ãⁿ vehe-dé duhu-güedé, dico ñã túú xìní-dé. ⁴⁴ Te duha càháⁿ-í chi nchòhó xìní ñùhu-xi cundecu túha-ndo, chi na cuáhãⁿ òré ñã túú nã yíhí ìní-ndó quèxio yúhú Tée cùu ñani tnáhã-ndó nchãa-ndo.

*Cuendá ìⁿ tée xínu cuechi
(Lc. 12:41-48)*

⁴⁵ Te na càni-í ìⁿ cuendú núú-ndó. ìⁿ tée xínu cuechi núú ìⁿ patróónⁿ cúu-dé ìⁿ tée ío váha tècú tnùní, te quide ndáá-dé ndécú-dé. Te ìⁿ xito ní dándõ ndaha ñaha patróónⁿ-dẽ xii-dé nchaa cue ñáyiu ndècu vehe-dé cuendá coto ñaha-dẽ xií-yu cuãñaha-dẽ sã cáxi-yu òré tàú-xi caxí-yu, te tée cùu patróónⁿ-áⁿ nĩ quee-dé cuáhãⁿ-dé. ⁴⁶ Te váha táhú tõe xínu cuechi-áⁿ te núu ndècuu-dé quidé-dé nchaa nãcuáa ní xáhaⁿ patróónⁿ-dẽ cada-dé mei òré ní nasáá patróónⁿ-dẽ-áⁿ. ⁴⁷ Te na càchí tnúhu ndáá-í xii-ndo sã tõe cùu patróónⁿ-dẽ-áⁿ cũñaha-dẽ xii-dé sã quíndàha-dé nchaa sã ndécú ndíhi-dé. ⁴⁸ Dico núu tée xínu cuechi-áⁿ ní cùu-dé ìⁿ tée cuihna ìní-xi, te ngóo-dé cani ìní-dé sã cùyã patróónⁿ-dẽ vá nasáá ndíhi-dé. ⁴⁹ Te ngúita-dé cani-dé nchaa dava-gá cue ñáyiu xínu cuechi ndíhi-dé, te ngóo-dé caxi-dé coho-dé cada-dé ndíhi nchaa cue tée quíhu. ⁵⁰ Te ìⁿ nduu òré ñã túú yíhi ìní-dé nasáá patróónⁿ-dẽ, ⁵¹ te ío dandõho ñaha patróónⁿ-dẽ xii-dé, chi daquihíⁿ ñáhã-dẽ xii-dé núu xíndecu cue ñáyiu ní cachí sã nĩ quide ndáá te ñã ndáá sã nĩ quide ndáá-yu. Te ducaⁿ sàtnahá-xi dandõho ñaha Yá Ndiõxí xii

ñáyiu, chi daquihíⁿ ñáhã-gã xií-yu ìⁿ xichi núú ío ndohó-yu te yacáⁿ ío ndáhyú-yu, te dicó rúhñú-nã cuu núhu-yu sã sátú ìní-yu sã ndóhõ-yu –càchí-gá xáhaⁿ-gã xii-güedé.

25

Cuendá úxí ñáyiu ðíhí

¹ Te xáhaⁿ tùcu Jesús xii-güedé:

–Na càni-í ìⁿ cuendú núú-ndó nãcuáa tecú tnùní-ndó nãcuáa cada-xi òré ndíhu ndaha ñaha Yá Ndiõxí xii ñáyiu. Te úxí tnàhá ñáyiu ðíhí ñáyiu cuechi nĩ quehéⁿ-yu lintérnã-yu, te cuáhãⁿ-yu ìⁿ xichi núú cóo víco tnándaha cuendá cundetú-yu quexio tée tnándaha. ² Te úhúⁿ ñáyiu cuechi-ãⁿ ío váha cùtnuní ìní-yu, te úhúⁿ-yu ñáhã. ³ Te ndi úhúⁿ ñáyiu cuechi dùcaⁿ ñã túú cùtnuní ìní-xi-áⁿ ñã túú ní cãnehé-yu sã ndẽe lintérnã-yu. ⁴ Dico ndi úhúⁿ ñáyiu cuechi cùtnuní ìní-xi-áⁿ nẽhẽ-yu sã ndẽe lintérnã-yu. ⁵ Te tée tnándaha-áⁿ cùyãa-dé quexio-dé núú ndétú ñáhã-yu-áⁿ, te nini dùcaⁿ cuyaa-dé ní tñi ñaha sàní xií-yu ní xidí-yu. ⁶ Te cùu-xi datná dava niú níhi ní cáháⁿ dava-gá ñáyiu, te càchí-yu: “Sa véxi tée tnándaha, chí táquèe quehé queheⁿ cuendá-ndó-dẽ”, càchí-yu. ⁷ Te ndi úxí ñáyiu cuechi-ãⁿ nĩ ndacóo-yu quide túha-yu lintérnã-yu. ⁸ Te ndi úhúⁿ ñáyiu cuechi ñã túú cùtnuní ìní-xi-áⁿ nĩ xáhãⁿ-yu xii cue ndi úhúⁿ ñáyiu cùtnuní ìní-xi-áⁿ: “Chí táxi núu luha sã ndẽe lintérnã-ndó ná ndẽe lintérnã-ndi chí ñã cuñí-xi cáyú mee-ni ndàhvã”, càchí-yu xáhãⁿ-yu. ⁹ Te cue ñáyiu cuechi cùtnuní ìní-xi-áⁿ nĩ xáhãⁿ-yu: “Vã táxi núu-ndi chí vá tnàhá canehé chiúⁿ mee-ndi, te váha-gá chí cuáhãⁿ cuaaⁿ-ndo núú cue ñáyiu xidíco cuendá sã vã cúmãní xii-ndo, te vá cúmãní xii nchúhú tucu”, càchí-yu xáhãⁿ-yu. ¹⁰ Te nini cuáhãⁿ ndi úhúⁿ ñáyiu ducaⁿ ñã túú cùtnuní ìní-xi-áⁿ cuãnguaáⁿ-yu sã ndẽe lintérnã-yu ní quexio tée tnándaha. Te ndi úhúⁿ ñáyiu cuechi cùtnuní ìní-xi-áⁿ nĩ queheⁿ cuendá ñáhã-yu xii-dé, te cuãnguihu ndíhi ñáhã-yu xii-dé núú cóo víco tnándaha, te sátá dúcãⁿ te ní nandedí yuyèhe. ¹¹ Te òré ní nasáá cue ñáyiu cuechi ñáyiu ní sãnguaaⁿ sã ndẽe lintérnã-xi-áⁿ, te ní ngúita-yu càháⁿ-yu xñutnñi-yu ndàa sátá yuyèhe ndaa quehé, te

xăhăⁿ-yu xii tée tnăndaha-áⁿ: “ĭTăta, nacaáⁿ yuyèhe na quíhu-ndí!”, cächí-yu xăhăⁿ-yu xii-dé. ¹² Te tée tnăndaha-áⁿ nĩ xáhaⁿ-dĕ xii-yu: “Na cächí tnúhu ndáá-í xii-ndo sã nchòhó ñã túú tàú-ndó quíhu-ndo vico-a, chi ñã túú tnàhá tnúhu ndihĩ ñaha-ndo xii-í”, cächí-dé xăhaⁿ-dĕ xii-yu –cächí Jèsús xăhaⁿ-gã xii-güedé.

¹³ Te xăhaⁿ tucu Jèsús xii-güedé:

—Ío quihĩ iní-ndó cūndecu-ndo, chi ñã túú xini-ndó nã nduu, te ni ñã túú xini-ndó nã òré quixi tucu yúhú Tée cū ñani tnàhá-ndó nchăa-ndo –cachí-gá xăhaⁿ-gã xii-güedé.

Cuendá cue tée ní ndóo ndaha dĭhúⁿ
(Lc. 19:11-27)

¹⁴ Te xăhaⁿ tucu Jèsús xii-güedé:

—Na cãni tucu-í ingá cuendú núú-ndó năcuáa tecú tnúni-ndó năcuáa cada-xi òré ndihu ndaha ñaha Yá Ndiõxí xii ñáyiu. ĩⁿ tée sa ñuhu ichi-ná-dé sá cáca-dĕ quingaca cuu xica-dĕ, te ní cana-dé cue tée xinu cuechi núú-dĕ cuendá dândóo ndaha ñaha-dé dĭhúⁿ-dĕ xii-güedé.

¹⁵ Te năcuáa nduu chiuⁿ quide ĩⁿ ĩⁿ-güedé, te ducaⁿ dĭhúⁿ nĩ sãñaha-dĕ xii-güedé, te ĩⁿ-dé ní sãñaha-dĕ úhúⁿ tnàhá dĭhúⁿ sã ĩo yahu nani talentú, te ingá-dé ní sãñaha-dĕ úú tnàhá dĭhúⁿ-ăⁿ, te ingá-dé ní sãñaha-dĕ ĩⁿ dĭhúⁿ-ăⁿ, te dătnúni ní quee-dé cuáhăⁿ-dé. ¹⁶ Te tée ní queheⁿ cuendá úhúⁿ tnàhá dĭhúⁿ sã nání tàlentú ní quide-dé ndáhú ndihĩ-xi te ní níhĩ tucu-dé úhúⁿ-gá tucu tnàhá dĭhúⁿ-ăⁿ. ¹⁷ Te dĭu-ni ducaⁿ nĩ quide tucu tée ní níhĩ úú dĭhúⁿ sã nání tàlentú-áⁿ, chi ní quide-dé ndáhú te ní níhĩ tucu-dé úú-gá tucu tnàhá. ¹⁸ Dico tée ní níhĩ ĩⁿ-ni dĭhúⁿ-ăⁿ chi da ní chiváha-dé dĭhúⁿ patróoⁿ-dĕ, chi ní xete-dé ĩⁿ yaú te ní chindúxi-dé.

¹⁹ Te ní cuu cuéhé nduu sá nĩ quee patróoⁿ-güedé-áⁿ ní sãngaca cuu-dé, te ní nasáa-dé te ní ngũita-dé quidé ndăá-dé ndihĩ-güedé cuendá dĭhúⁿ sã nĩ dândóo ndaha ñaha-dé xii-güedé. ²⁰ Te tée ní quendóo ndaha úhúⁿ tnàhá dĭhúⁿ-ăⁿ nĩ xáhaⁿ-dĕ xii patróoⁿ-dĕ: “Patróoⁿ, náu úhúⁿ tnàhá dĭhúⁿ sã nĩ dândóo ndaha ñaha-n xii-í-a, te ní sáhăⁿ-í ní quide-í ndihĩ-xi ndáhú te ní chídó-xí úhúⁿ-gá tucu tnàhá, te náu-a naqueheⁿ cuendá-n”, cächí-dé xăhaⁿ-dĕ xii patróoⁿ-dĕ. ²¹ Te tée cū

patróoⁿ-dĕ-áⁿ nĩ xáhaⁿ-dĕ xii-dé: “Ío váha ní quide-n, te vitna quide ñaha-í xii-n ĩⁿ tée váha tée quide ndáá, te sá sácú dĭhúⁿ nĩ dândóo ndaha ñaha-ĩ xii-n te ní quide ndáá-n, te sá dúcáⁿ nĩ quide-n te vâi-gá taxi cuendá ñhăhă-í xii-n. Te vitna cuu cundecu-n núú ndécú-í, te ío cudĭĩ iní-ó cūndecu ndihĩ tnaha-o”, cachí tée cū patróoⁿ-dĕ-áⁿ xăhaⁿ-dĕ xii-dé. ²² Te sátá dúcáⁿ te tée ní quendóo ndaha úú tnàhá dĭhúⁿ sã nání tàlentú-áⁿ nĩ xáhaⁿ-dĕ xii patróoⁿ-güedé: “Patróoⁿ, náu úú tnàhá dĭhúⁿ sã nĩ dândóo ndaha ñaha-n-a, te ní sáhăⁿ-í ní quide-í ndihĩ-xi ndáhú, te ní chídó-xí úú-gá tucu tnàhá, te náu-a naqueheⁿ cuendá-n”, cächí-dé xăhaⁿ-dĕ xii patróoⁿ-güedé. ²³ Te ní xáhaⁿ tée cū patróoⁿ-áⁿ xii-dé: “Ío váha ní quide-n, te vitna quide ñaha-í xii-n ĩⁿ tée váha tée quide ndáá, te sá sácú dĭhúⁿ nĩ dândóo ndaha ñaha-ĩ xii-n te ní quide ndáá-n, te sá dúcáⁿ nĩ quide-n te vâi-gá taxi cuendá-í. Te vitna cuu cundecu-n núú ndécú-í, te ío cudĭĩ iní-ó cūndecu ndihĩ tnaha-o”, cachí tée cū patróoⁿ-áⁿ xăhaⁿ-dĕ xii-dé. ²⁴ Te tée ní ndóo ndaha ĩⁿ-ni dĭhúⁿ-ăⁿ nĩ xáhaⁿ-dĕ xii tée cū patróoⁿ-dĕ-áⁿ: “Patróoⁿ, yúhú sa ñaha-í sá yòhó cúú-n ĩⁿ tée ndūcu mee-ni sá cúú-xí mèe-xi te tàhu-n chiuⁿ cuáhăⁿ nchúhú cue tée xinu cuechi núú-n sácáⁿ-ndí triú, te òré ná nătaxi tnaha-ndí, te yòhó dĭcô-nă náqueheⁿ cuendá-n tàxúha-n. ²⁵ Te núu xĭăⁿ ní yúhú-í cada-í ndáhú ndihĩ dĭhúⁿ-n, te ní sáhăⁿ-í ní xete-í ĩⁿ yaú te ní chindúxi-í, te náu dĭhúⁿ-n-áⁿ naqueheⁿ cuendá-n”, cächí-dé xăhaⁿ-dĕ xii tée cū patróoⁿ-áⁿ. ²⁶ Te tée cū patróoⁿ-áⁿ nĩ xáhaⁿ-dĕ: “Yòhó cúú-n ĩⁿ tée cuihna iní-xi xinu cuechi núú-í te cuhndu-n, te núu yòhó sání iní-n sã cúú-í ĩⁿ tée tàuchiuⁿ cuáhăⁿ-ndó sácáⁿ-ndó triú te òré nătaxi tnaha-ndo, te yúhú dĭcô-nă náqueheⁿ cuendá-í nătàxúha-í. ²⁷ Te núu sání iní-n sã dúcáⁿ quide-í, te dasaⁿ nūu-n dĭhúⁿ-í te cúñaha-n chăhu-yu dĭquí-xi ni cū, te òré ndexi-í te sa ngódó lūha-gá dĭquí-xi naqueheⁿ-í ní cū”, cachí-dé xăhaⁿ-dĕ xii tée xinu cuechi-áⁿ. ²⁸ Te tée cū patróoⁿ-áⁿ nĩ xáhaⁿ-dĕ xii dava-gá cue tée ndĕcu ndihĩ-dé: “Chí quéndĕ ĩⁿ dĭhúⁿ sã nání tàlentú néhé tĕe-ăⁿ, te cuáha-ndo tĕe

nèhe úxí tnàhá ðiu-ni díhúⁿ-ǎⁿ. 29 Chi cue tée sa ndècu ndihí te níhí-gǎ-güedé cundecu ndihí-güedé, te ni vǎ níhí-gǎ-güedé ndèe cundecu nchaa sá cündècu ndihí-güedé. Te cue tée ñá túú nǎ ndécú ndihí vai, te nchaa sá ndécú ndihí-güedé vá cündècu ndihí-gǎ-güedé. 30 Te tée xínu cuechi ñá túú vèdana nàndíhí-áⁿ, chí tníⁿ-dè te daquihíⁿ-ndó-dè ìⁿ xichi núú néé núú ïo ndoho-dé, te yàcáⁿ ndáhyú-dé, te ðicó rúhñú-nǎ cuu núhu-dé sá sàtú iní-dé sá ndóhó-dè”, càchí tée cùu patróoⁿ-áⁿ xǎhaⁿ-dè xii-güedé. Duha sǎtnahá-xi ndoho nchaa ñáiyu ñá túú quide váha —càchí-gǎ xǎhaⁿ-gǎ xii-güedé.

Cuèndá cue ñáiyu ní quide váha ndihí cuèndá cue ñáiyu ñá túú ní quide váha

31 Te xǎhaⁿ tucu Jesús xii-güedé:

—Te nduu na quixi tucu yúhú Tée cùu ñaní tnàhá-ndó nchaa-ndo, te quixi-í ndihí nchaa cue espíritú xínú cuèchi núú-í, te nchaa ñáiyu quini-yu sá ïo càhnu cuu-í, te dàvá-áⁿ cunucóo-í núú táxí tnùn-í, te ïo cuñuhu ñáiyu sá ïo càhnu cuu-í. 32 Te dàvá-áⁿ nataká nchaa ñáiyu xíndecu ni càa xico ñuyú cundecu-yu núú-í, te cada-í-yu dàtná quidé ìⁿ toli oré táú ðìⁿ-dé nchaa mbéé ndihí nchaa chivá chi ðìⁿ taxi ndecu-dé nchaa mbéé, te ðìⁿ taxi ndecu-dé nchaa chivá. 33 Te ducaⁿ sǎtnahá-xi cada-í chi nchaa ñáiyu ní quide ndáá núú-í ñáiyu-áⁿ taxi ndecu-í-yu xio cùha-í, te nchaa ñáiyu cuihna iní-xi ñá túú ní cuini cada ndáá núú-í ñáiyu-áⁿ taxi ndecu-í-yu xio dàtni-í. 34 Te ducaⁿ te yúhú tée ïo cùnuu cúñaha-í xii ñáiyu na cündecu xio cuha-í: “Nchaa nchòhó ñáiyu ní quide váha ñaha Tǎtà-í Dútú Ndióxi, chí nèhé chi vitna ní sáá nduu cündecu-ndo núú ndécú-gǎ táxí tnùn-í-gǎ, chí ndéé cútnahá ní ngáva ñuyú sa ndècu túha tnàhí núú ndécú-gǎ-áⁿ sá nchòhó nduu táhú-ndó cündecu-ndo. 35 Te ducaⁿ chí òré xihí-í docó te ní taxi-ndo sǎ ní xexi-í, te òré yichí-í ndute te ní taxi-ndo ndute ní xihí-í, te òré ñùhù-í ichi te ní taxi-ndo vehe ní ndetatú-í. 36 Te òré xíní ñùhu-í dóo cuihnu-í te ní taxi-ndo, te òré ní cuhú-í te ní quixi coto ñaha-ndo xii-í, te òré ní xihí-í vècaá te ní quixi tucu-ndo ní quixi coto ñaha-ndo xii-í”, duha cúñaha-í xii

nchaa ñáiyu-áⁿ. 37 Te nchaa ñáiyu ducaⁿ ní quide ndáá-áⁿ cùñahá-yu xii-í: “Yòhó Yaá cúú Xitohó-ndí, ni ìⁿ xito ñá túú ní tàxi-ndí sá cáxí-n òré xihí-n dòcò, te ni ìⁿ xito ñá túú ní tàxi-ndí ndute coho-n òré yichí-n. 38 Te ni ñá túú ní tàxi-ndí vehe ndetatú-n òré ñùhù-n ìchi, te ni ñá túú ní tàxi-ndí dóo cuihnu-n òré xíní ñùhu-n. 39 Te ni ñá túú ní quixi coto ñaha-ndí xii-n òré ní cuhú-n, te ni ñá túú ní quixi coto ñaha-ndí xii-n òré ní xihí-n vècaá”, duha quesàhá-yu cúñahá-yu xii-í. 40 Te yúhú tée cùnuu cúñaha-í xii-yu: “Na càchí tnùhu ndáá-í xii-ndo sǎ ncháá sǎ váha ní quide-ndo sǎ cúú-xí nchaa ñáiyu xíndecu ichi-í cuèi ïo ndàhú xíndáa-yu, te sá dúcáⁿ ní quide-ndo sǎ váha sá cúú-xí-yu, te cada iní-ndó sǎ mèe-í ducaⁿ ní quide-ndo ní xito ñaha-ndo xii-í”, duha cúñaha-í xii-yu.

41 Te dàtnùn-í cúñaha-í xii ñáiyu na cündecu xio datni-í: “Nchaa nchòhó ñáiyu ní xíta nihnu chí xócuñí núú ndécú-í-a, chí nchòhó ní nduu táhú-ndó cündecu-ndo núú ñùhú núú càyú, ðiu-ni núú ní quide túha-í cundecu sácuíhná ndihí nchaa espíritú cündihí-xi, te yàcáⁿ cundecu-ndo ni caa ni quihíⁿ. 42 Chi yúhú òré xihí-í docó te ñá túú ní tàxi-ndo sá cáxí-í, te ni òré yichí-í ndute te ñá túú ní tàxi-ndo ndute coho-í. 43 Te ni òré ní xùhu-í ichi ñá túú ní tàxi-ndo vehe ndetatú-í, te ni òré xíní ñùhu-í dóo cuihnu-í te ñá túú ní tàxi-ndo, te ni òré ní cuhú-í te ñá túú ní quixi-ndo quixi coto ñaha-ndo xii-í, te ni òré ní xihí-í vècaá te ðiu-ni ducaⁿ ní quide-ndo ñá túú ní quixi-ndo quixi coto ñaha-ndo xii-í”, duha cúñaha-í xii-yu. 44 Te ñáiyu-áⁿ cùñahá-yu xii-í: “Yòhó Yaá cúú Xitohó-ndí ni ìⁿ xito ñá túú ní xíní-ndí òré xihí-n dòcò cuèndá taxi-ndí sá cáxí-n, te ni ìⁿ xito ñá túú ní xíní-ndí òré yichí-n ndute cuèndá taxi-ndí ndute coho-n, te ni ìⁿ xito ñá túú ní xíní-ndí cuhuⁿ-n ìchi cuèndá taxi-ndí vehe ndetatú-n, te ni ìⁿ xito ñá túú ní xíní-ndí òré xíní ñùhu-n dóo cuèndá taxi-ndí dóo cuihnu-n, te ni ìⁿ xito ñá túú ní xíní-ndí òré cuhú-n cuèndá quixi coto ñaha-ndí xii-n, te ni ìⁿ xito ñá túú ní xíní-ndí quihí-n vècaá cuèndá quixi coto ñaha-ndí xii-n”, duha quesàhá-yu cúñahá-yu xii-í. 45 Te yúhú

cúñaha-ĩ xii-yu: “Na càchí tnúhu ndáá-í xii-ndo sã sã cuendá sã ñà túú ní quide-ndo ìñ sã vãha sã cúú-xí cuè ñáyiú ndècu ichi-í cuèi ío ndàhú xindáa-yu, te sã dúcáñ nĩ quide-ndo ñà túú ní quide-ndo sã vãha sã cúú-xí-yu, te cada iní-ndó sã mèe-í ducañ nĩ quide-ndo ñà túú ní quide-ndo sã vãha sã cúú-xí-í”, duha cúñaha-ĩ xii-yu. ⁴⁶ Te nchaa ñáyiú-án quíhíñ-yu núú ùhú núú ndàhú nĩ caa nĩ quíhíñ. Te nchaa ñáyiú ní quide ndáá núú-í ní xíndecu ñuyíú-a, ñáyiú-án nduu táhũ-yu ío vãha cundecú-yu nĩ caa nĩ quíhíñ —càchí-gá xãhañ-gã xii-güedé.

26

Cue tée cùu úhú iní ñáhá xii Jesús ndúcú-güedé nàcuáa cada-güedé tñi ñaha-güedé xii-gá

(Mr. 14:1-2; Lc. 22:1-2; Jn. 11:45-53)

¹ Te sátá nĩ yáha ducañ nĩ cáháñ Jèsús, te ní xáhañ-gã xii cue tée xica cuu ndihí-gá:

² —Nchòhó sa xini-ndó sã cùmání úú-gá nduu te coo vico pàscuá, te càchí tnúhu-í xii-ndo sã yùhú Téé cùu ñaní tnáhá-ndó nchàa-ndo tñi ñaha-güedé xii-í, te cuáha cuendá ñáhá-güedé núú cuè téé cùu úhú iní ñáhá xii-í, te cata caa ñaha-güedé núú cùrúxí te núú cùrúxí-án cuú-í —càchí-gá xãhañ-gã xii-güedé.

³ Te ñiú-ni òré càháñ ndihí Jèsús cue téé xica cuu ndihí-gá ní natacá cue téé cùu dútú cùnùu, ndihí cue téé dàcuaha ñaha xii ñáyiú nchaa tnúhu ní chídó tnùnì ndii Moisés, ndihí cue téé cùu sacuéhé núú ñáyiú is-ràél. Te mei quèhé vehe núú cúú vèchiuñ té Caifás téé cùu dútú ño-gá cùnùu ní nat-acá-güedé. ⁴ Te xíáñ nĩ ndatnúhu-güedé nàcuáa cada-güedé dandàhú-güedé Jèsús cuendá tñi ñaha-güedé xii-gá, te cahni ñaha-güedé. ⁵ Te ní xitnàha-güedé:

—Vãha-gá sã vã tñi-ó Jèsús mei ndùu vico, chi núú ducañ na càda-o te ío dusañ càda ñáyiú —càchí-güedé xitnàha-güedé.

Ìñ ñadìhí chíhí-án àcítí díquí Jèsús
(Mr. 14:3-9; Jn. 12:1-8)

⁶ Te ndècu Jesús ñuú Bètania vehe ìñ téé nàni Xímú, téé ní tnahá cuéhé sã dátèhyú nihnu-xi yiqui cùñú-ó. ⁷ Te xíáñ ndécú-gã ní quexìo ìñ ñadìhí néhé-án ìñ sã nĩ cuáha

yúú vãha nàni alabastrú, te xití xíáñ ñúhú àcítí sàháñ tnámí sã ño ndèyáhu. Te yihí Jesús mèésá xéxí-gã, te ñaha-án nĩ sáháñ-añ ní sódó-añ àcítí ñúhú xití xíáñ díquí-gã. ⁸ Te òré ní xini cue téé xica cuu ndihí Jesús sã dúcáñ nĩ quide ñaha-án te ní cudééñ-güedé, te ní ngüíta-güedé xitnàha-güedé:

—Ñá túú quide vãha ñaha-án dàcáñ quidé-án dacuíta-añ acítí-ñ. ⁹ Chi vãha-gá nùu cuyáhu acítí-ñ ní cùu chi ío ndèyáhu, te díhúñ cuyáhu acítí-ñ cuu cuendá cue ñáyiú ndàhú ní cùu —cachí-güedé xitnàha-güedé.

¹⁰ Te Jèsús ní cutnùnì iní-gá nàcuáa ndùu tnúhu xitnàha-güedé, núú ní xáhañ-gã xii-güedé:

—Vã dásatú-ndó iní ñadìhí-a, chi sã nĩ quide ñaha-añ xii-í cúú-xí ìñ sã vãha. ¹¹ Chi cue ñáyiú ndàhú ducañ-ni cùtnahá ñáyiú-án tnuú-ndó, dico yúhú chi vá ncháá ndùu cundecu ndihí ñaha-í xii-ndo ñuyíú-a. ¹² Te sã dúhá nĩ quide ñaha ñadìhí-a xii-í ní sódó-añ àcítí díquí-í, te xíáñ cada iní-ndó sã sã quide túha-añ yiqui cùñú-í cuendá nguíndüxi-xi. ¹³ Te na càchí tnúhu ndáá-í xii-ndo sã ndèni ní cuu nihí ñuyíú ná càháñ ñáyiú tnúhu-í, te cáháñ-yu tnáhá cuendá ñadìhí-a cuendá quini nchaa ñáyiú nàcuáa ní quide-añ te ducañ vã nàcuánaá-yu —càchí-gá xãhañ-gã xii-güedé.

Té Jüdás ndúcú-dé nàcuáa cada-dé cuáha cuendá-dé Jèsús núú cuè téé cùu úhú iní ñáhá xii-gá

(Mr. 14:10-11; Lc. 22:3-6)

¹⁴ Te sátá dúcáñ te té Jüdás Iscarioté ní sáháñ-dé ní ndatnúhu-dé ndihí cue téé cùu dútú cùnùu. Te núú tnáhá té Jüdás-án cúú ùxúú cue téé xica cuu ndihí Jesús. ¹⁵ Te ní xáhañ-dé xii cue téé cùu dútú cùnùu-án:

—¿Ndédau cháhu ñaha-ndo xii-í te taxi cuendá-í Jèsús xii-ndo-í? —càchí-dé xãhañ-dé xii-güedé.

Te cue dútú-ñ nĩ xáhañ-güedé xii-dé sã cuãñaha-güedé ócò úxí díhúñ cuixíñ, te ñiú-ni ducañ nĩ sãñaha-güedé xii-dé. ¹⁶ Te ndéé òré ní queheñ cuendá té Jüdás-án díhúñ, te ní ngüíta-dé ndúcú-dé nàcuáa cada-dé cuáha cuendá-dé Jèsús núú-güedé.

Cùdini Jesús ndihi cue té xica cuu ndihi-gá (Mr. 14:12-25; Lc. 22:7-23; Jn. 13:21-30; 1 Co. 11:23-26)

17 Te ní sáá nduu nĩ quesaha vico xexi ñáyiú pàá sá ñà túú yìhi levadurá ñu-ni vico pàscuá, te cue té xica cuu ndihi Jesús ní sándehe yatni-güedé ñiñi-gá, te xáhaⁿ-güedé xii-gá:

—Mèstrú, véxi-ndí xicáⁿ tnúhú-ndí núú-n nũ ndéé cuini-n càda túha-ndí cuendá cudini-o sacuaa nduu vico pascuá — càchí-güedé xáhaⁿ-güedé xii-gá.

18 Te Jèsús ní xáhaⁿ-gá xii-güedé:

—Chí cuáháⁿ xití ñuú-áⁿ, te yacáⁿ naníhí-ndó ñⁿ té cùtnuní iní-ndó sá sà xini ñáhá-dé xii-o, te cúñaha-ndo xii-dé: “Yáa cúú Mèstrú càchí-gá sá sà ní cuyatni nduu vã cùndècu-gá ñuyúú-a, te vehe-n cuini-gá cada-gá vico pàscuá ndihi cue té xica cuu ndihi-gá”, duha cúñaha-ndo xii té-áⁿ — càchí-gá xáhaⁿ-gá xii-güedé.

19 Te cue té xica cuu ndihi-gá-áⁿ nĩ xica-güedé cuáháⁿ-güedé, te ní quide-güedé nàcuáa ní xáhaⁿ-gá xii-güedé, te ní quide túha-güedé sá cudini-güedé ndihi-gá sacuaa nduu vico pascuá-áⁿ. 20 Te òré sa ní cundiquiⁿ te cuánguñhu Jèsús ndihi ndi ùxúú cue té xica cuu ndihi-gá mèsá cuendá cudini-gá ndihi-güedé. 21 Te nini xèxi-gá ndihi-güedé ní xáhaⁿ-gá xii-güedé:

—Na càchí tnúhu ndáá-í xii-ndo sá díú ñⁿ nchohó cue té xica cuu ndihi-í cuáha cuendá ñáhá-ndó xii-í núú cuè té cùu úhú iní ñáhá —càchí-gá xáhaⁿ-gá xii-güedé.

22 Te sá dúcáⁿ nĩ xáhaⁿ-gá xii-güedé te nchaa-güedé ní ngüita-güedé cùndiyí-güedé, te da ñⁿ da ñⁿ-güedé ní ngüita-güedé xáhaⁿ-güedé xii-gá:

—Mèstrú, ¿ñá díú yùhú ducaⁿ sàni iní-n càda-í-u? —càchí-güedé xáhaⁿ-güedé xii-gá.

23 Te ní xáhaⁿ-gá xii-güedé:

—Té nacaxi ndihi-í ñⁿ-ni cóhó caxi-ndí, té-áⁿ cuáha cuendá ñáhá-dé xii-í núú cuè té cùu úhú iní ñáhá. 24 Te yùhú Té cùu ñaní tnáhá-ndó nchàa-ndo ñuhu ichi-í cuáháⁿ-í yáha-í nàcuáa càháⁿ-xi núú tütú Yá Ndiöxí, dico ndàhú ní cuu té ducaⁿ na cuáha cuendá ñáhá xii-í núú cuè té cùu úhú

iní ñáhá, chi váha-gá sá vã cacú tée-áⁿ cun-decu-dé ní cùu, te ñá díú sá nĩ cacu-dé te ducaⁿ càda-dé —càchí-gá xáhaⁿ-gá xii-güedé.

25 Te sáta dúcáⁿ te ní cáháⁿ té Jùdás té cuáha cuendá ñáhá xii-gá, te xáhaⁿ-dè:

—Mèstrú, ¿te náa sàni iní-n sá yùhú cuáha cuendá ñáhá-í xii-n núú cuè té cùu úhú iní ñáhá xii-n-áⁿ? —càchí-dé xáhaⁿ-dè xii-gá.

Te Jèsús ní xáhaⁿ-gá xii-dé:

—Ñu-n —càchí-gá xáhaⁿ-gá xii-dé.

26 Te nini cùdini cue té xica cuu ndihi Jesús ní queheⁿ-gá pàá, te ní ndacáⁿ táhú-gá núú Yá Ndiöxí, te dàtnuní ní táhú cuèchi-gá te ní ngüita-gá dácãñhu-gá cue té xica cuu ndihi-gá-áⁿ, te xáhaⁿ-gá xii-güedé:

—Chí quéhéⁿ pàá-a caxi-ndo, te cada iní-ndó sá yiqui cuñú-í cúú-xí —càchí-gá xáhaⁿ-gá xii-güedé.

27 Te ní queheⁿ-gá vàsú ñúhú ndudí ndéhé yoho yàha stilé, te ní ndacáⁿ táhú-gá núú Yá Ndiöxí, te dàtnuní ní ngüita-gá sãñaha-gá xii-güedé cuendá coho-güedé luha luha sá ñúhú xití-xi, te xáhaⁿ-gá xii-güedé:

—Chí cóhó nchàa nchohó ndudí ndéhé yoho yàha stilé ñúhú xití vàsú-a. 28 Te cada iní-ndó sá cúú-xí dàtná ñiñi-í sá catí òré cahni ñaha-güedé xii-í, te sá dúcáⁿ càti ñiñi-í xíáⁿ cutnuni ndáá sá Yá Ndiöxí cada-gá ingá núú sá váha sá cúú-xí vãi ñáyiú dàtná ní cachí-gá cada-gá, te ío vãi ñáyiú cada càhnu iní-gá cuèchi-yu. 29 Te na càchí tnúhu-í xii-ndo sá vítná-ñá duha xihí ndihi ñaha-í xii-ndo ndudí ndéhé yoho yàha stilé-a, te vá cóhó ndihi ñaha-gá-í xii-ndo, dico na sáa nduu nanihí tnáhá-ó núú ndécú Tãtà-í Dútú Ndiöxí táxi tnuní-gá te dàvá-áⁿ cada iní-ndó sá dàtná sá cóhó ndihi ñaha tucu-í xii-ndo chi ío cudí ñiñi-ó —càchí-gá xáhaⁿ-gá xii-güedé.

Té Pèlú cúñaha-dé xii ñáyiú sá ñà túú xini-dé Jèsús

(Mr. 14:26-31; Lc. 22:31-34; Jn. 13:36-38)

30 Te Jèsús ní xita-gá ñⁿ ndudú ndihi cue té xica cuu ndihi-gá, te dàtnuní ní xica-gá cuáháⁿ-gá ndihi-güedé yucu Òlívú. 31 Te yacáⁿ ní xáhaⁿ-gá xii-güedé:

—Na càchí tnúhu-í xii-ndo sá ncháá-ndó dandóo ñaha-ndo xii-í niú vitna, chi quee ndáá-xi nàcuáa càháⁿ-xi núú tütú Yá

Ndiöxí núú cächí-xi: “Yúhú cuáha-í tnúhu cahni-güedé té cùu toli, te nchaa mbéé-dě ndihí-güedi cuténuu”, duha cächí-xi núú tütú-gá. ³² Dico na ndòto-í te codonuu-í núú-ndó quíhíⁿ distritú Galileá —cächí-gá xáhaⁿ-gá xii-güedé.

³³ Te té Pèlú ní xáhaⁿ-dě xii-gá:

—Te cuèi nchaa-güedé ná dándóo ñaha-güedě xii-n, dico yúhú chi vá dándóo ñaha-í xii-n —cächí-dé xáhaⁿ-dě xii-gá.

³⁴ Te Jèsús ní xáhaⁿ-gá xii-dé:

—Na cächí tnúhu ndáá-í xii-n sã nùú vitna cùmání-gá cana ìⁿ líhi, te úní xito cáháⁿ-n nùú ñàyiú sá ñà túú xìní ñáhà-n xii-í —cächí-gá xáhaⁿ-gá xii-dé.

³⁵ Te té Pèlú ní xáhaⁿ-dě xii-gá:

—Cuèi na cùú ndihí ñaha-í xii-n dico vá cáháⁿ-í núú ñàyiú sá ñà túú xìní ñáhà-í xii-n —cächí-dé xáhaⁿ-dě xii-gá.

Te nchaa dava-gá cue téé xica cuu ndihí-gá ñu-ni ducaⁿ ñí xáhaⁿ-güedě xii-gá.

Jèsús cáháⁿ ndihí-gá Yã Ndiöxí ìⁿ xichi núú nání Gètsemaní

(Mr. 14:32-42; Lc. 22:39-46)

³⁶ Te Jèsús ní quexìo-gá ndihí cue téé xica cuu ndihí-gá ìⁿ xichi núú nání Gètsemaní, te xíaⁿ ñí xáhaⁿ-gá xii-güedé:

—Chí cúnúcoo iha cundetú-ndo na quíhíⁿ-í yacáⁿ cáháⁿ ndihí-í Yã Ndiöxí —cächí-gá xáhaⁿ-gá xii-güedé.

³⁷ Te ndèca-gá té Pèlú, ndihí ndi ndùú déhe té Zebèdeú cuáháⁿ, te ní ngüíta-xi súúní ndìhú iní-gá. ³⁸ Te ní xáhaⁿ-gá xii cue téé úní-án:

—Súúní ndìhú iní-í dàtná sá cùú-í, te chí quéndóo nchòhó iha te vá cùdú-ndó chí yúhú vá cùdú-í —cächí-gá xáhaⁿ-gá xii-güedé.

³⁹ Te sa ñunchíí luha ní xica ndehe Jèsús núú ndécú-güedě, te ní ngüíñí xítí-gá te ní nuu núú-gá ndàa núú ñúhú, te ní ngüíta-gá cáháⁿ ndihí-gá Tãtã-gá Dútú Ndiöxí, te xáhaⁿ-gá:

—Yòhó Tãtã mée-í, cáháⁿ ndàhú-í núú-n nùú vá cùndèe iní-n tàunihnu ñaha-n xii-í cuèndá sá vá ndòhò-í ná sàá òré, dico vá cádá-n nàcuáa cächí iní mée-í, chí cada-n nàcuáa cächí iní mée-n —cächí-gá xáhaⁿ-gá xii Tãtã-gá Dútú Ndiöxí.

⁴⁰ Te sãtã ñí yáha ní cáháⁿ ndihí-gá Tãtã-gá Dútú Ndiöxí, te cuánuhú-gá núú ñí

dándóo-gá cue téé úní-án te xixídí-güedé òré ní nasáá-gá, te ní xáhaⁿ-gá xii té Pèlú:

—¿Náa ñã cùndèe iní-ndó vá cùdú-ni-ndo cuèdicó ìⁿ òré nini cáháⁿ ndihí-í Yã Ndiöxí-ãⁿ? ⁴¹ Te chí quéndóo tucu te cuhuⁿ iní-ndó vá cùdú-ndó, te cáháⁿ ndihí-ndo Yã Ndiöxí cuèndá sá vá dácáhãⁿ ñáhã yùcu ñávãha xii-ndo càda-ndo sã ñà túú tàú-ndó càda-ndo. Te xìní ndáá-í sã nchòhó cuíni-ndó càda-ndo nchaa nacúaa cáháⁿ-í dicó-ni sã ñà túú ñihí ndéé-ndó —cächí-gá xáhaⁿ-gá xii-güedé.

⁴² Te xito cùu uú cuáháⁿ tucu Jèsús cáháⁿ ndihí-gá Tãtã-gá Dútú Ndiöxí, te xáhaⁿ-gá:

—Yòhó Tãtã mée-í, te núú vá cùndèe iní-n tàunihnu ñaha-n xii-í cuèndá sá vá ndòhò-í, te cada nàcuáa cächí iní mée-n —cächí-gá xáhaⁿ-gá xii Tãtã-gá Dútú Ndiöxí.

⁴³ Te òré ní yáha ní cáháⁿ ndihí-gá Tãtã-gá Dútú Ndiöxí, te cuánuhú tucu-gá núú xíndecu cue téé úní xicá cùu ndihí-gá-án, te xidí-ni tucu-güedé òré ní nasáá-gá, te ducaⁿ ñí quide-güedé chí súúní ñùhu saní núú-güedé. ⁴⁴ Te ní dándóo ñaha tucu Jesús xii-güedé xíaⁿ, te cuáháⁿ tucu-gá xito cùu úní cáháⁿ ndihí tucu-gá Tãtã-gá Dútú Ndiöxí, te ñu-ni tnúhu sá sã ní xáhaⁿ-gá xii Tãtã-gá Dútú Ndiöxí, ñu-ni tnúhu-án ñí xáhaⁿ tucu-gá. ⁴⁵ Te sãtã ñí yáha ní cáháⁿ ndihí-gá Tãtã-gá Dútú Ndiöxí, te cuánuhú tucu-gá núú ndécú cuè téé xica cuu ndihí-gá-án, te òré ní nasáá-gá, te ní xáhaⁿ-gá xii-güedé:

—¿Te náa xidí-ni tucu-ndo? Te sa ní sáá òré cuáha cuèndá ñáhã-güedě xii-í núú cuè téé ndècu ichi cuehé ichi duha. ⁴⁶ Dico vitna chí ndácóo na quíhíⁿ-ó, chí sa véxi téé cuáha cuèndá ñáhã xii-í núú cuè téé cùu úhú iní ñáhã —cächí-gá xáhaⁿ-gá xii-güedé.

Ní tñi-güedé Jèsús ndécã ñaha-güedé xii-gá cuáháⁿ

(Mr. 14:43-50; Lc. 22:47-53; Jn. 18:2-11)

⁴⁷ Te cáháⁿ dúcãⁿ-ní Jèsús ní quexìo té Jùdás. Te núú tnàhá téé-án cùú ùxúú tnàhá cue téé xica cuu ndihí-gá ní cùu te ducaⁿ ñí quide-dé. Te ndihí-dé vai cue téé ní quexìo te dava-güedé xínehe-güedé machití, te dava-güedé xínehe-güedé carrutí. Te cue téé-án ñí tendaha ñaha cue dútú cùnùu, ndihí cue téé cùu sacuéhé nùú ñàyiú is-ràél. ⁴⁸ Te té Jùdás téé cuáha cuèndá ñáhã

xii-gá-áⁿ sa ní xítñuhu-dé cue téé-áⁿ nàcuáa cada-dé cuáha cuendá-dé Jèsús núú-güedě, te duha ní xáhaⁿ-dě xii-güedě:

—Cundehe-ndo tée na tèyuhu-í te téé-áⁿ tñii-ndo-dě chi téé-áⁿ cúú-dě téé ndèè iní-ndó —duha ní xáhaⁿ-dě xii-güedě.

⁴⁹ Te sátá dúcáⁿ nĩ xáhaⁿ-dě xii-güedě, te ní sándehe yatni-dé núú Jèsús, te ní xáhaⁿ-dě xii-gá:

—¡Ràcióⁿ Mèstrú! —càchí-dé xáhaⁿ-dě xii-gá.

Te ní teyuhu ñàha-dé xii-gá. ⁵⁰ Te Jèsús ní xáhaⁿ-gã xii-dé:

—Yòhó téé ní chitnahá ñáhá xii-í, ¿ná cuíní-n nũu véxi-n nũu-í? —càchí-gá xáhaⁿ-gã xii-dé.

Te òré-ni-áⁿ nĩ tñii ñàha cuè téé ndihi té Jùdás-áⁿ xii Jèsús, te ndèca ñàha-güedě xii-gá cuáháⁿ.

⁵¹ Te ìⁿ cue téé ndihi Jèsús ní tava-dé machití-dé, te ní xehndé-ni-dé ìⁿ xio lóho ìⁿ téé xinu cuechi núú dütú cúnùu te ní quen-deé duuⁿ lóho-dé. ⁵² Te Jèsús ní xáhaⁿ-gã xii téé ducaⁿ nĩ xehndé lóho téé-áⁿ:

—Nachihí machití-n ññi-xi, chi nchaa cue téé na nàa ndihi machití cahni-güedě tñàha ñáyiü-güedě te ñu-ni ndihi machití cuú méé-güedě tucu. ⁵³ Te na càchí tñúhu-í xii-ndo sã nũu yúhú cuíní-í cácu-í te cáháⁿ ndihi-í Tãtà-í Dütú Ndiöxí, te tendaha-gã cuéhé víhí espíritú xínú cuèchi núú-gã quixi-xi dàcácu ñàha-xi xii-í. ⁵⁴ Dico núú ducaⁿ na càda-í te vá quéé ndáá-xi nàcuáa càháⁿ-xi núú tütú Tãtà-í Dütú Ndiöxí núú ndéè tñuní sã dàcuítí xini ñuhu-xi nándi ndoho-í —càchí-gá xáhaⁿ-gã xii-dé.

⁵⁵ Te Jèsús ní xáhaⁿ-gã xii cue téé ducaⁿ nĩ tñii ñàha xii-gá-áⁿ:

—Nchaa-ni nduu ní xiní-ndó nĩ xóo cunucóo-í xití veñúhu càhnu sã ño cúnúu ní xóo danèhé-í ñáyiü, te ñá túú ní tñii ñàha-ndo xii-í, ¿te ná cuendá vitna quide ñàha-ná-ndó xii-í dàtná quidé-ndó ìⁿ ñadúhú, nèhe-ná-ndó màchití nèhe-ná-ndó càrrutí ní quexio ní tñii ñàha-ndo xii-í-í?

⁵⁶ Dico dàcuítí sã dúhá càda-xi nàcuáa quee ndáá-xi nàcuáa ní cáháⁿ cue téé ní xóo cáháⁿ tñúhu Yá Ndiöxí ndéè sanaha nĩ ngódó tñuní núú tütú-gá —càchí-gá xáhaⁿ-gã xii-güedě.

Te nchaa cue téé xica cuu ndihi-gá ní xinu-güedě ní dándõ ñàha-güedě xii-gá.

Jèsús ndécú-gã jündá

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Te cue téé ní tñii ñàha xii Jèsús ndécá ñàha-güedě xii-gá cuáháⁿ núú tẽ Caifás téé cùu dütú cúnùu-gá. Te núú ndécú dütú cúnùu-gá-áⁿ sa ní tacá cue téé dàcuaha ñàha xii ñáyiü nchaa tñúhu ní chídó tñuní ndíi Moisés, ndihi cue téé cùu sacuéhé nũu ñáyiü isràél cuendá cada-güedě jündá. ⁵⁸ Te té Pèlú xica xica-ni nchicúⁿ ñáhá-dě xii-gá cuáháⁿ ní sáá-dé ndéè quehé vehe núú ndécú téé cùu dütú cúnùu-gá-áⁿ, te xíaⁿ nĩ ngóo-dé ndihi cue téé cùu poleciá cuendá cuíní-dé quiní-dé nása cada ñàha-güedě xii Jèsús.

⁵⁹ Te cue téé cùu dütú cúnùu, ndihi cue téé cùu sacuéhé nũu ñáyiü isràél, ndihi nchaa dava-gá cue téé xĩndecu jündá ndúcú-güedě nàcuáa cada-güedě dàcàa-güedě ìⁿ cuèchi díquí Jèsús cuèi cùu-xi ìⁿ sã ñã ndáa cuendá níhí-güedě nàcuáa cada-güedě cahni ñàha-güedě xii-gá. ⁶⁰ Te vãi cue téé ní ngüíta-güedě dàcàa-güedě cuèchi díquí-gã, dico ñá túú ní cundeè tñúhu-güedě chí mee-ni tñúhu ndehnde cùu-xi. Te sátá dúcáⁿ te ní quexio tucu úú tñàhá cue téé dàcuandehnde-güedě, ⁶¹ te xáhaⁿ-güedě xii nchaa cue téé xĩndecu jündá:

—Véxi-ndí càchí tñúhu-ndí xii-ndo sã tée-a càchí-dé sã dängöyo-dé veñúhu càhnu sã ño cúnúu núú chíñúhu-o Yá Ndiöxí, te dandàa-dé ñngá veñúhu saa, ñu-ni núú cáá tñàhí veñúhu-ãⁿ, te xití úní-ni nduu sa nadaxĩnu-dé, duha càchí-dé —càchí-güedě xáhaⁿ-güedě.

⁶² Te téé cùu dütú cúnùu-gá-áⁿ nĩ ndacuíní-dé, te xáhaⁿ-dě xii Jèsús:

—¿Ná cuendá duha ndùu tñúhu càháⁿ cue téé-a cuendá-n? Te cáháⁿ nũu nása cunduu tñúhu cáháⁿ-n —càchí-dé xáhaⁿ-dě xii-gá.

⁶³ Dico Jèsús ñá túú tñàhí ni cáháⁿ-gá. Te téé cùu dütú cúnùu-gá-áⁿ nĩ xáhaⁿ tucu-dé xii-gá:

—Yúhú, cácu nèhe-í Yá Ndiöxí chi cuíní-í sã càchí tñúhu ndáá-n xii-ndí nũu sã díú Crístú Déhe Yá Ndiöxí Yaá ní tendaha-gã

véxi ñuyíú-a cùu-n —cachí-dé xǎhaⁿ-dë xii-gá.

⁶⁴ Te Jèsús ní xáhaⁿ-gǎ xii-dé:

—Díu Yaá-án cùu-í dàtná càchí-n-ǎⁿ, te na càchí tnúhu-í xii-ndo sǎ sàá nduu te quini-ndó yǎhú Tée cùu ñaní tnáhá-ndó nchàa-ndo cunucóo-í xio cùha Dútú Ndiǒxí Yaá ndácú quide nchaandi túhú sá vǎha. Te dàvá-án quini ñáhá-ndó xii-í quee-í andiu quixi-í ichi xití vícò —càchí-gá xǎhaⁿ-gǎ xii-dé.

⁶⁵ Te dútú cùnùu-gá-án ní ndátá-dë dóo níhnú-dë cuendá sá ñà túú ní tnáhá iní-dé nàcuáa ní cáháⁿ Jèsús, te ní xáhaⁿ-dë xii nchaa cue tée xǎndecu jùndá:

—Tée-a càháⁿ úhú-dé cuendá Yǎ Ndiǒxí, te vitna ñá túú-gǎ xini ñùhu-xi cue tée cáháⁿ ndáá nǎu ndáá sá ndècuéchi-dé àdi ñá túú ndècuéchi-dé, chi sa ní tecú dóho-o nàcuáa ndùu tnúhu ní cáháⁿ-dé ní cáháⁿ úhú-dé cuendá Yǎ Ndiǒxí. ⁶⁶ Te nchaa-ndo chí càháⁿ vitna núu nása sàni iní-ndó cùnduu cuendá tée-a —càchí-dé xǎhaⁿ-dë xii nchaa cue tée-án.

Te cue tée-án ní xáhaⁿ-güedë:

—Nchúhú càchí-ndí sá tàù-xi cuú-dé chi ndècuéchi-dé —càchí-güedë xǎhaⁿ-güedë.

⁶⁷ Te ní ngúíta-güedë ní tíu díí ñáhá-güedë xii-gá te ní caniha-güedë, te tnáhá núu-gǎ ní cani-güedë. ⁶⁸ Te ní cudíquí ndeé ñáhá-güedë xii-gá, te xǎhaⁿ-güedë:

—Yòhó Tée càchí sá cúu Crístú Yaá ní tendaha Yǎ Ndiǒxí véxi ñuyíú-a, cáháⁿ ná còto yoo ní caniha xii-n —cachí-güedë xǎhaⁿ-güedë xii-gá.

Té Pèlú xǎhaⁿ-dë xii ñáyíu sá ñà túú xini-dé Jèsús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Te nini nùcòo té Pèlú quehé, te ní sáháⁿ ñⁿ xíchí xínú cuèchi vehe-án núu-dë, te xǎhaⁿ-xi xii-dé:

—Yòhó tnáhá-n cùu-n tée xica cuu ndihi Jèsús tée distrítú Galileá —càchí-xi xǎhaⁿ-xi xii-dé.

⁷⁰ Te té Pèlú ñá túú ní nǎnuu-dé, te ndèdóho nchaa ñáyíu xǎndecu-án ní xáhaⁿ-dë xii xíchí-án:

—Yúhú, ñá túú cùtnuní iní-í nása ndùu tnúhu càháⁿ-n —càchí-dé xǎhaⁿ-dë xii-xi.

⁷¹ Te ní xica té Pèlú cuáháⁿ-dé ndàa nacuáa nchíi yuyèhe vehe-án, te ní xini

ñáhá tùcu ingá xíchí xínú cuèchi vehe-án, te xǎhaⁿ-xi xii nchaa ñáyíu xǎndecu-án:

—Tée-a tnáhá-dé xicá cùu-dé ndihi Jèsús tée ñuú Nazàrét —càchí-xi xǎhaⁿ-xi xii-yu.

⁷² Te té Pèlú ní xáhaⁿ-dë:

—Nchàcuiiti Yá Ndiǒxí sá ñà túú xini-í tée càcunehe-ndo-án —càchí-dé xǎhaⁿ-dë xii-yu.

⁷³ Te tna tnaa-ni ní cuu, te dava ñáyíu xǎndecu xián ní xáhaⁿ tùcú-yu xii té Pèlú:

—Ndáá sá tnáhá-n xica cuu-n ndihi tée ndèca-güedë cuánguihu-án, chí ñáyúhú càháⁿ-n —càchí-yu xǎháⁿ-yu xii-dé.

⁷⁴ Te té Pèlú ní xáhaⁿ-dë xii-yu:

—Nchàcuiiti Yá Ndiǒxí sá yǎhú càháⁿ ndáá-í sá ñà túú xini-í tée càcunehe-ndo-án —càchí-dé xǎhaⁿ-dë xii-yu.

Te òré-ni-án ní cana ñⁿ líhi. ⁷⁵ Te ní ndacu iní té Pèlú nàcuáa ní xáhaⁿ Jèsús xii-dé sá cùmání-gǎ cana ñⁿ líhi te úní xito cáháⁿ-dé sá ñà túú xini ñáhá-dë xii-gá. Te ní quee-dé tnuú ñáyíu-án cuáháⁿ-dé ñⁿ xio ní ndáhyú víhí-dé ní ndixi cuéchi iní-dé.

27

Ndèca-güedë Jèsús cuáháⁿ núu tē Pilatú (Mr. 15:1; Lc. 23:1-2; Jn. 18:28-32)

¹ Te sáta ní túndaá te nchaa cue tée cùu dútú cùnùu, ndihi cue tée cùu sacuéhé núu ñáyíu isràél ní ndatnúhu-güedë nàcuáa cada-güedë cahni-güedë Jèsús. ² Te

ní dácútú ñàha-güedë xii-gá, te ndèca ñàha-güedë cuáháⁿ núu tē Pilatú tée cùu gobiernú.

Ní xíhí té Jùdás

³ Te té Jùdás tée ní sáha cuendá ñáhá xii Jèsús ní cutnùní iní-dé sá cáhni ñàha-güedë xii-gá, te ní ndixi cuéchi iní-dé sá ñà túú ní quide váha-dé sá dúcáⁿ ní quide-dé ní sáha cuendá ñáhá-dë xii-gá núu cuè tée cùu úhú iní ñáhá, te ní xica-dé cuáháⁿ-dé danchòcáva-dé ócò úxí díhúⁿ cuixíⁿ núu cuè dútú cùnùu-án, ndihi núu cuè tée cùu sacuéhé núu ñáyíu isràél, chí díu cue tée-án ní sáñaha-güedë díhúⁿ xii-dé. ⁴ Te òré ní quexìo té Jùdás-án núu ndécú-güedë, te xǎhaⁿ-dë xii-güedë:

—Yúhú, ñá túú ní quide váha-í sá dúcáⁿ ní quide-í ní taxi cuendá-í ñⁿ tée ñá túú tnáhi cuéchi-xi cahni-ndo-dë —càchí-dé xǎhaⁿ-dë xii-güedë.

Te cue tée-án ní xáhaⁿ-güedë xii-dé:

—Nchúhú, ñá túú nǎgá cuèndú cuìní-ndí cáháⁿ ndíhi ñaha-ndí xii-n, te mee-n nàha núu nása sàni iní-n càda-n —cachí-güedé xǎhaⁿ-güedé xii-dé.

5 Te té Jùdás ní dǎngoyo-dé dǐhúⁿ-ǎⁿ xití veñúhu càhnu sá ïo cùnunu, te ní xica-dé cuáháⁿ-dé ní dácüèhné-dé méé-dé.

6 Te cue dútú cùnunu ní naqueheⁿ-güedé dǐhúⁿ-ǎⁿ, te ní xitnáha-güedé:

—Dǐhúⁿ-a ní queyǎhu cuèndá sá cùú ìⁿ ñáyiu, núu xǐǎⁿ vá cúú nàchihi-o xití càjá núú ñúhú sǎ cúú cuèndá Yǎ Ndiǒxí —càchí-güedé xǐtnàha-güedé.

7 Te ní ndatnúhu-güedé te ní cuu ìⁿnuu-güedé cuèndá nacuaaⁿ-güedé ìⁿ xichi núú cáá ñùhu danani-güedé Núú Cuǎha Nchaa Sá Cuǎha Ñuhu, te xǐǎⁿ ñí saaⁿ-güedé cuèndá xǐǎⁿ nguǐndǔxi nchaa ñáyiu véxi xica. 8 Te ní nadáma diù ñuhu-áⁿ, te vitna dānani-güedé Ñuhu Yáhu Niñí, duha dānani-güedé. 9 Te ducaⁿ ñí cuu chi ní quee ndáá-xi nàcuáa ní cáháⁿ ndí Jeremiás téé ní xóo cáháⁿ tnúhu Yá Ndiǒxí ndéé sanaha, te duha ní cachí ndí: “Cue téé israél ní cachí-güedé sá òcò úxí dǐhúⁿ cuìxíⁿ cháhu-güedé cuèndá ìⁿ téé queheⁿ cuèndá-güedé. Te dǐhúⁿ-ǎⁿ nàqueheⁿ-güedé, 10 te cuaaⁿ-güedé ìⁿ xichi núú nání Núú Cuǎha Nchaa Sá Cuǎha Ñuhu, te ducaⁿ càda-xi chi ducaⁿ ñí cachí Yá Ndiǒxí cunduu”, duha ní cachí ndí Jeremiás-áⁿ.

Jèsús ndécú-gǎ núú tǎ Pilatú

(Mr. 15:2-5; Lc. 23:3-5; Jn. 18:33-38)

11 Te Jèsús ndécú-gǎ núú tǎ Pilatú téé cùu gobiernú, te téé-áⁿ ñí xícáⁿ tnúhú-dé núú-gǎ, te xǎhaⁿ-dǎ xii-gá:

—¿Ndáá sá díú-n cùu-n téé yǐndaha ñaha xii ñáyiu israél-ǎⁿ? —càchí-dé xǎhaⁿ-dǎ xii-gá.

Te Jèsús ní xáhaⁿ-gǎ xii-dé:

—Diu-í yǐndaha-í-yu —càchí-gá xǎhaⁿ-gǎ xii-dé.

12 Te cue dútú cùnunu ndíhi cue téé cùu sacuéhé núú ñáyiu israél sàcáⁿ cuéchi-güedé núú tǎ Pilatú cuèndá Jèsús, dico mee-gǎ ní ìⁿ tnúhu ñá túú ní cáháⁿ-gá. 13 Te té Pilatú ní xáhaⁿ-dǎ xii-gá:

—Cáháⁿ, ná cuèndá ñá túú càháⁿ-n, te cundehe nǎ ndéé duha titní cuéchi dàcaa cue téé-a díquí-n —càchí-dé xǎhaⁿ-dǎ xii-gá.

14 Dico Jèsús ñá túú tnàhí ní cáháⁿ-gá, te té Pilatú téé cùu gobiernú-áⁿ ïo ní cuñúhu-dé sá dúcáⁿ ñà túú tnàhí ní cáháⁿ-gá.

Ní quide ndáá-güedé sá cáhni-güedé Jèsús
(Mr. 15:6-20; Lc. 23:13-25; Jn. 18:38-19:16)

15 Te ndí tnahá nduu vico pascuá dácăcu té Pilatú téé cùu gobiernú-áⁿ ìⁿ téé yǐhi ve-caá chi ducaⁿ tnàhí quide-dé, te mee ñáyiu càháⁿ-yu te núu ndédacàa téé yǐhi ve-caá-áⁿ cǎcu-dé te téé-áⁿ dácăcu-dé. 16 Te dàvá-áⁿ yǐhí ìⁿ téé nàni Barrabás ve-caá, te téé-áⁿ ïo cuèndú-dé sá ïo nèhé ní quide-dé. 17 Te ní natacá nchaa ñáyiu, te té Pilatú ní xícáⁿ tnúhú-dé núú-yu, te xǎhaⁿ-dǎ:

—¿Ndédacàa núú ùú cue téé-a cuìní-ndó dácăcu-í-güedé-í? ¿Té Barrabás ǎⁿ Jèsús téé nàni Cristú? —càchí-dé xǎhaⁿ-dǎ xii-yu.

18 Te ducaⁿ ñí cáháⁿ té Pilatú, chi ní cutnùní iní-dé sá dicó sá cuèdú iní-güedé ducaⁿ ñí quide-güedé ní sáha cuèndá ñáhá-güedé xii Jèsús núú-dǎ.

19 Te nini núcóo té Pilatú núú xèhndé-dé cuéchi ní tendaha ñàdǐhí-dé tnúhu cuáháⁿ núú-dǎ, te duha nduu tnúhu ní tendaha-aⁿ: “Vá cání iní-n nǎ cada-n tǎe ní taxi cuèndá ñáhá-güedé xii-n, téé ñá túú tnàhí cuéchi-xi, chi icuini ïo nèhé ní dácótó ñàha saní-í cuèndá-dé”, duha nduu tnúhu ní xáhaⁿ-aⁿ xii té Pilatú.

20 Dico cue téé cùu dútú cùnunu, ndíhi cue téé cùu sacuéhé núú ñáyiu israél ní xáhaⁿ-güedé xii ñáyiu sá ná cuñháⁿ-yu xii té Pilatú dácăcu-dé té Barrabás te cahni-dé Jèsús, te ní quidé-yu nàcuáa ní xáhaⁿ-güedé.

21 Te té Pilatú-áⁿ ñí xáhaⁿ tùcu-dé xií-yu:

—¿Ndédacàa núú ùú cue téé-a cuìní-ndó dácăcu-í? —càchí-dé xǎhaⁿ-dǎ xií-yu.

Te ní xáhǎⁿ-yu xii-dé:

—Té Barrabás dácăcu-n —càchí-yu xáhǎⁿ-yu xii-dé.

22 Te té Pilatú ní xícáⁿ tnúhú-dé núú-yu, te xǎhaⁿ-dǎ:

—¿Te ná cuìní-ndó càda-í Jèsús téé nàni Cristú téé càchí sá Yá Ndiǒxí ní tendaha ñàha xii-dé véxi-dé ñuyú-a-í? —càchí-dé xǎhaⁿ-dǎ xií-yu.

Te ncháⁿ-yu ní cáháⁿ-yu, te xáhǎⁿ-yu:

—Cata caa-dé núú cùrúxí —càchí-yu xǎhǎⁿ-yu xii-dé.

²³ Te té Pilatú ní xáhaⁿ tùcu-dé xií-yu:

—¿Te ná cúú cuèchi ní quide-dé nùu ducaⁿ cuìní-ndó càda-í-dé-i? —càchí-dé xǎhaⁿ-dè xií-yu.

Dico nchaá-yu uuⁿ-gá níhi ní cáháⁿ-yu, te xǎhǎⁿ-yu xii-dé:

—¡Cata caa-dé núú cùrúxí! —càchí-yu xǎhǎⁿ-yu xii-dé.

²⁴ Te té Pilatú ní cutnùnì iní-dé sá vǎ nihí-dé nàcuáa cada-dé, chí uuⁿ-gá ní ngüíta ñáyiú xǐcuáa-yu, te xǎⁿ ní xícáⁿ-dé ndute ní ndáhá-dé núú ncháa ñáyiú, te ní xáhaⁿ-dè xií-yu:

—Tée-a cùu-dé ìⁿ tée ñá túú tnàhí cuèchi-xi, te nchòhó cuìní-ndó sǎ cùu-dé, dico ñiú-ni mee-ndo cuìdo yáhu-ndo-dè chí yúhú vá cuídó yáhu-í-dé —càchí-dé xǎhaⁿ-dè xií-yu.

²⁵ Te nchaá-yu ní xǎhǎⁿ-yu xii-dé:

—¡Ñiú nchúhú ndìhi cue déhe-ndí cuìdo yáhu-ndí-dé! —càchí-yu xǎhǎⁿ-yu.

²⁶ Te sátá dúcáⁿ te té Pilatú ní dácácu-dé té Barrábás, te ní táuchíúⁿ-dè ní caní-güedé Jèsús. Te sátá dúcáⁿ ñi quide ñaha-güedé xii-gá, te ní táuchíúⁿ-dè candeca ñaha-güedé xii-gá quíhíⁿ cata caa ñaha-güedé xii-gá núú cùrúxí.

²⁷ Te cue tée cùu sandadú té Pilatú ndécá-güedé Jèsús cuánguihu xití vehe càhnu cuu cuendá-dé, te cue tée cùu sandadú-áⁿ ñi cana-güedé dava-gá cue sandadú núú dúcáⁿ ndèca-güedé Jèsús cuánguihu-áⁿ. ²⁸ Te xíaⁿ ñi taunuu-güedé dóo-gǎ, te ní dácuihnú ñaha-güedé xii-gá ìⁿ dóo tícuèhé víhí. ²⁹ Te ní cadúha-güedé ìⁿ coróná ñiú ní chíhi-güedé díquí-gǎ, te ní chitnì-güedé ìⁿ carrutí ndaha cùha-gá, te ní ngüíñí xití-güedé núú-gǎ cúdíquí ndeé ñáhá-güedé xii-gá, te xǎhaⁿ-güedé:

—¡Ío càhnu cuu yohó tée yìndaha ñaha xii ñáyiú isràél! —càchí-güedé xǎhaⁿ-güedé xii-gá.

³⁰ Te ní tíú díí ñáhá-güedé xii-gá, te ní queheⁿ-güedé carrutí sá ñi sǎñaha-güedé xii-gá te ní ducuⁿ-güedé díquí-gǎ. ³¹ Te sátá ñi yáha ní cudíquí ndeé ñáhá-güedé xii-gá, te ní nataunuu ñaha-güedé xii-gá

dóo tícuèhé víhí sǎ ñi dácuihnú ñaha-güedé xii-gá, te ní dándíúnuu ñaha-güedé xii-gá dóo méé-gǎ, te dàtnùnì ndécá ñaha-güedé cuáháⁿ núú catá càa ñaha-güedé xii-gá núú cùrúxí.

Sàta caa-güedé Jèsús núú cùrúxí

(Mr. 15:21-32; Lc. 23:26-43; Jn. 19:17-27)

³² Te ñuhu-güedé ndìhi-gá ichi, te ní naníhí-güedé ìⁿ tée ñuú Cìrené nání-dè Xímú, te tée-áⁿ ñi quide yica-güedé ní xido-dé cùrúxí sá nchídó Jèsús.

³³ Te ní sáa-güedé ndìhi-gá ìⁿ xichi núú nání Gólgotá, te tnúhu-áⁿ quée-xí: Núú nání yìquí díquí ndíyi, duha quèe-xi tnúhu-áⁿ.

³⁴ Te xíaⁿ sǎñaha-güedé ndudí úa coho-gá ní cùu, te ñá túú ní xìhi-gá chí dico-ni ní xito ndeé-gǎ.

³⁵ Te ní sata caa ñaha-güedé xii-gá núú cùrúxí, te sátá dúcáⁿ te cue tée cùu sandadú-áⁿ ñi xito ndeé-güedé nùu ndèdacàa-güedé cuu cuendá-güedé dóo-gǎ. Te ducaⁿ ñi cuu chí ní quee ndáa-xi nàcuáa ní cáháⁿ ìⁿ tée ní xóo cáháⁿ tnúhu Yá Ndióxi ndeé sanaha yòdo tnunì núú tütú-gá, te duha càchí-xi: “Ní xito ndeé-güedé nùu ndèdacàa-güedé cuu cuendá-güedé dóo-gǎ”, duha ní cachí tée-áⁿ te ducaⁿ ñi ngódó tnùnì núú tütú-gá. ³⁶ Te sátá dúcáⁿ ñi quide-güedé, te ní ngóo-güedé ndeé ñáhá-güedé xii-gá. ³⁷ Te ní taxi ndecu-güedé ìⁿ sá ndeé lètrá ndàa díquí-gǎ.

Te lètrá-áⁿ càháⁿ-xi ná cuendá ducaⁿ ñi quide ñaha-güedé xii-gá, te duha càháⁿ lètrá-áⁿ: “Tée-a cùu-dé tée yìndaha ñaha xii ñáyiú isràél”, duha càchí-xi. ³⁸ Te tnàhá úu cue tée cùu ñadúhú ñi sata caa-güedé ñiú-ni núú cùrúxí tucu, te ìⁿ-dé ní sata caa-güedé xio cùha-gá, te ingá-dé ní sata caa-güedé xio dàtni-gá. ³⁹ Te ncháa ñáyiú yáha yatni núú tǎcàa-gá-áⁿ, te dàcuicó-yu díquí-yu ndèhe ñáhá-yu xii-gá, te xǐcuèhé ñáhá-yu. ⁴⁰ Te xǎhǎⁿ-yu xii-gá:

—Yòhó càchí-n sǎ dàngoyo-n veñúhu càhnu sá ío cùnuu, te dandàa-n ingá veñúhu saa, te xití únì-ni nduu sa nadaxínu-n, te vitna tanuu núú cùrúxí-áⁿ dácácu-n mèe-n te nùu ndísa sá Dèhe Yá Ndióxi cúu-n —càchí-yu xǎhǎⁿ-yu xii-gá.

⁴¹ Te ñiú-ni ducaⁿ cudíquí ndeé ñáhá cue tée cùu dútú cùnùu xii-gá, ndìhi cue tée

dàcuaha ñaha xii ñáyi nchaa tnúhu ní chídó tnùní ndíi Moisés, ndíhi cue tée cùu fariséu, ndíhi cue tée cùu sacuéhé nùú ñáyi isràél, te xítnàha-güedé:

⁴² —Tée-a ní ndacu-dé ní dácácu-dé dava ñáyi, te mee-dě ñá ndácú-dě dácácu ni-hnu-dé méé-dě. Te núu ndisa sá cúú-dě tée yíndaha ñaha xii ñáyi isràél, te na cùndehe-o nuu-dé núú cùrúxí-a cuendá quíndáá iní-ó-dě. ⁴³ Te càchí-dé sá sàndáá iní-dé Yá Ndiöxí, te mee-gã ná dácácu ñaha-gã xii-dé te núu cùndahú iní ñáhá-gã, chi mee-dě càchí-dé sá Dèhe-gá cúú-dě — càchí-güedé xítnàha-güedé.

⁴⁴ Te ndéé tnàhá cue tée cùu ñadúhú tácaà xio xio diñi-gá xícuèhé ñáhá-güedé xii-gá.

Ní xíhí Jèsús

(Mr. 15:33-41; Lc. 23:44-49; Jn. 19:28-30)

⁴⁵ Te òré ní cuu cuádava nduu te ní cunee nihí ñuyíú, te ducaⁿ-ni càa ní cuu caá úní sacuaa. ⁴⁶ Te òré sa ta cùyatni cuu caá úní sacuaa-áⁿ, te níhi ní cáháⁿ Jèsús, te càchí-gá:

—Èlí, Èlí, ¿láma sabàctaní? —càchí-gá.

Te tnúhu-áⁿ quée-xí: Ndiöxí mée-í, Ndiöxí mée-í, ¿ná cuendá ní dáñá ñàha-n xii-í?, duha quèe-xi tnúhu-áⁿ.

⁴⁷ Te dava cue tée xíndecu yatni núú tácaà-gá-áⁿ ñí tecú dóho-güedé nàcuáa ní cáháⁿ-gá, te ní xítnàha-güedé:

—Tée-a càna-dé té Èliás —càchí-güedé xítnàha-güedé.

⁴⁸ Te òré-ni-áⁿ ñí quene cunu ñⁿ cue tée xíndecu-áⁿ ñí queheⁿ-dé luha cáchí, te ní chindóyo-dé xítí ndudí íá, te ní chinenu-dé díquí ñⁿ yutnu càni te ní ndocani-dé ní chihi-dé yuhu-gá. ⁴⁹ Te dava-güedé ní xáhaⁿ-güedé xii tée-áⁿ:

—Cundeṭu tnaa na cùndehe-o nacoto núu quixi té Èliás dácácu ñaha-dě xii-dé — càchí-güedé xáhaⁿ-güedé xii tée-áⁿ.

⁵⁰ Te Jèsús níhi ní cana saa-gá, te ní xíhí-ni-gá. ⁵¹ Te sáta dúcáⁿ te ní ndátá dǒó cúú còrtiná xítí veñúhu càhnu sá ño cùnuu ní quée dava ndáá, te ndàa núú ñinu ní ngüita-xi ní ndátá, te ní tnáa, te dava cava nàhnu ní táhú. ⁵² Te dava yaú núú yíndüxi ñáyi ní xíhí ní sàndáá iní ñáhá xii Yá Ndiöxí ní nacaáⁿ te ní ndotó-yu. ⁵³ Te sáta ñí yáha ní ndoto Jèsús, te cue ñáyi ní

ndoto-áⁿ cuãnguihú-yu xítí ñuú Jerusalén, te cue ñáyi ñuú-áⁿ ño vai-yu ní xiní-yu cue ñáyi ducaⁿ ñí ndoto-áⁿ.

⁵⁴ Te sá dúcáⁿ nãndi ní guide-xi, ndíhi sá dúcáⁿ ñí tnáa xíáⁿ ío ní yùhú tée cùu capitáⁿ ndíhi nchaa dava-gá cue tée ndècu ndíhi-dé ndèé-güedé yiqui cùñú Jèsús, te ní xítnàha-güedé:

—Sá ndáa ndisa sá díú tée-a cùu-dé Dèhe Yá Ndiöxí ní cùu —càchí-güedé xítnàha-güedé.

⁵⁵ Te xica xínutnii vai ñáyi diñi ndéhè-yu nchaa nàcuáa ní guide ñaha-güedé xii Jèsús, te ñáyi-áⁿ cúú-yu ñáyi ní chindéé-yu Jèsús, te ndéé distritú Galileá ní chinchícúⁿ ñáhá-yu xii-gá. ⁵⁶ Te tnuú ñáyi-áⁿ tnàhá tá Màriá Magdaléná, ndíhi tá Màriá nãná tẽ Jàcobó ndíhi té Chèé, ndíhi nãná cue déhe té Zebèdeú.

Chíndúxi-güedé Jèsús

(Mr. 15:42-47; Lc. 23:50-56; Jn. 19:38-42)

⁵⁷ Te ndècu ñⁿ tée cuica nàni-dé Chèé te cùu-dé tée ñuú Arimateá, te tnàhá-dé ní tnahá tnúhu-dé ndíhi Jèsús. Te òré sa ní cuaa, ⁵⁸ te ní sáháⁿ-dé núú tẽ Pilatú, te xáhaⁿ-dẽ nùu vá cùndèe iní-dé dañá-dẽ chindúxi-dé yiqui cùñú Jèsús. Te té Pilatú-áⁿ ñí sáha-dé tnúhu, te ní táúchíúⁿ-dẽ sá cuãha cuendá-güedé té Chèé-áⁿ yiqui cùñú-gá.

⁵⁹ Te té Chèé-áⁿ ñí queheⁿ cuendá-dé yiqui cùñú-gá, te ní chidúcúⁿ nuu-dé ñⁿ dóó cuixíⁿ dóó cándò. ⁶⁰ Te sa nchii ñⁿ yaú sáa ñí caáⁿ té Chèé-áⁿ ñⁿ yiqui naha càva te xíáⁿ cúú cuendá-dé, te yaú-áⁿ ñí chihi-dé yiqui cùñú Jèsús, te dàtnùní ní sadí-dé ñⁿ yúú cáhnú yúú quèhéⁿ yuhu yaú-áⁿ, te ní xica-dé cuánuhú-dé. ⁶¹ Te tnàhá tá Màriá Magdaléná, ndíhi ingá xíchí nání Màriá ní quexió-yu ní ngóo-yu yatni núú nchii yaú-áⁿ.

Cue tée ndèé yaú núú yíhí yiqui cùñú Jèsús

⁶² Te sáta ñí yáha ní guide túha ñáyi nchaa sá nãndíhi-yu nduu tnéé nduu ndètatú-yu-áⁿ, te diu-ni nduu ndètatú-yu-áⁿ ñí sáháⁿ cue dútú cùnùu, ndíhi cue tée cùu fariséu ní cáháⁿ ndíhi-güedé té Pilatú. ⁶³ Te xáhaⁿ-güedé xii-dé:

—Yòhó tée cùnuu, véxi-ndí càchí tnúhu-ndí sá ñí ndacu iní-ndí sá tẽ ndehnde ñí xíhí-áⁿ

càchí-dé òré ndécú-gă-dé sá ndùu úní sá cùú-dé, te ndoto-dé. ⁶⁴ Te tendaha-n cue téé na quíhíⁿ-güedé cundeé-güedé yuhu yaú núú nǐ chihi-güedé yiqui cùñú-dé, chi na cuáháⁿ quíhíⁿ cue téé ní xica cuu ndíhi-dé duhu-güedé yiqui cùñú-dé, te cúñaha-güedé xii ñáyiú sá nǐ ndoto-dé. Chi núu ducaⁿ na càda-güedé te ío-gá dandàhú-güedé cue ñáyiú dàcúúxí dàtná ní quide mee téé ní xíhí-ǎⁿ —càchí-güedé xăhaⁿ-güedé.

⁶⁵ Te té Pilatú ní xăhaⁿ-dē xii-güedé:

—Náu cue sandàdú-a candeca-ndo-güedé quíhíⁿ, te cadí váha-ndo ndíhi-güedé yuhu yaú-áⁿ nàcuáa tàú-xi cunduu, te na cundeé-güedé nàcuáa sàni iní-ndó cunduu —cachí-dé xăhaⁿ-dē xii-güedé.

⁶⁶ Te cue téé-áⁿ nǐ xica-güedé cuáháⁿ-güedé, te ní tee-güedé ìⁿ sēná yúú ndēdí yèhe yaú-áⁿ, te ní dándõo-güedé cue sandàdú-áⁿ ndēé-güedé yaú-áⁿ, te ducaⁿ nǐ quide-güedé cuendá sá vǎ yõo quíhíⁿ nacaáⁿ yaú-áⁿ.

28

Ní ndoto Jèsús

(Mr. 16:1-8; Lc. 24:1-12; Jn. 20:1-10)

¹ Te sátá nǐ yáha nduu ndètatú ñáyiú, te ndumìngú nehé víhí-ní nǐ xica tá Màriá Magdaléná ndíhi ingá xíchí nání Màriá cuángotó-yu yaú núú nǐ chihi-güedé yiqui cùñú Jèsús. ² Te uuⁿ níhi víhi ní tnáa, te òré ducaⁿ nǐ quide-xi chi ìⁿ espíritú xínú cuèchi núú Yǎ Ndiõxí ní quexìo-xi núú dúcáⁿ nchii yaú núú nǐ chihi-güedé yiqui cùñú Jèsús, te ní xócání espíritú-áⁿ yúú ndēdí yèhe yaú-áⁿ te ní ngóo-xi núú yúú-ǎⁿ. ³ Te dàtná dátăsaⁿ-xi òré sàá ndúté dùcaⁿ datăsaⁿ-xi núú espíritú-áⁿ, te dóo níhnú-xi cuixíⁿ quiyí. ⁴ Te òré ducaⁿ nǐ quide-xi te cue sandàdú ndēé yaú-áⁿ nǐ quidi ñaha-xi xii-güedé sá nǐ yùhú-güedé, te ní nduá-güedé, te ní xíta sá xini tnùnì-güedé. ⁵ Te espíritú-áⁿ nǐ xăhaⁿ-xi xii cue ñáyiú dîhí cuángoto yaú-áⁿ:

—Nchòhó ñáyiú dîhí véxi coto yaú-a, vǎ yùhú-ndó chi yùhú cútnùnì iní-í sá nchòhó véxi-ndo nànducu-ndo yiqui cuñú Jèsús Yaá ní xíhí núú cùrúxí. ⁶ Dico Yaá-áⁿ chí ñá túú-gă ndécú yiqui cuñú-gá iha, chí sa ní ndoto-gá, te dîu ducaⁿ nǐ cachí-gá sá ndótó-gă cútnàhá vátá cùú-gá, te chí

táquixi cundehe-ndo núú nǐ sacáⁿ-güedé yiqui cùñú-gá ní cùu te quini-ndó nǎ ñá túú-gă. ⁷ Te vitna ío ndíhi chí cuáháⁿ núú xǐndecu cue téé ní xica cuu ndíhi-gá, te duha cúñaha-ndo xii-güedé: “Ní ndoto Jèsús Yaá ní xíhí ní cùu, te codonuu-gá núú-ndó quíhíⁿ distritú Galileá te yàcáⁿ quini-ndó-gă”, duha cúñaha-ndo xii-güedé. Duha ndùu tnúhu ní cachí tnúhu-í xii-ndo —càchí espíritú-áⁿ xăhaⁿ-xi xii cue ñáyiú dîhí-áⁿ.

⁸ Te cue ñáyiú dîhí-áⁿ nǐ natnii-yu ichi, te súuní ndíhi cuánuhú-yu núú xǐndecu cue téé ní xica cuu ndíhi Jèsús cuendá nacani tnúhu-yu núú-güedé nàcuáa ní xăhaⁿ espíritú-áⁿ xii-yu, te cuèí ní yùhú-yu dico súuní cùdí iní-yu. ⁹ Te ichi ñùhú-yu cuánuhú-yu, te na iní-yu ní quexìo Jesús núú-yu ní dándácõo váha ñaha-gă xii-yu. Te ñáyiú-áⁿ nǐ ngüíñí xití-yu núú-gă, te ní numi ñàhá-yu xii-gá, te ní chiñuhu ñàhá-yu. ¹⁰ Te ní xăhaⁿ-gă xii-yu:

—Vá yùhú-ndó, chí cuáháⁿ cúñaha-ndo xii cue téé ní xica cuu ndíhi-í sá ná quíhíⁿ-güedé distritú Galileá, te yàcáⁿ quini ñàhá-güedé xii-í —càchí-gá xăhaⁿ-gă xii-yu.

Nàcuáa ndùu tnúhu ní nacani cue sandàdú

¹¹ Te nini ñùhu cue ñáyiú dîhí-áⁿ ichi cuánuhú-yu, te dava cue sandàdú cue téé ndēé yaú-áⁿ ní cùu ní xica-güedé cuánuhú-güedé ñuu cuendá nacani tnúhu-güedé núú cuè téé cùu dútú cùnùu nàcuáa ní cuu. ¹² Te cue téé cùu dútú cùnùu-áⁿ nǐ quide-güedé jündá ndíhi cue téé cùu sacuéhé núú ñáyiú isràél, te ní ndatnúhu-güedé nàcuáa cada-güedé, te ní quide ndáá-güedé ndíhi cue sandàdú-áⁿ sǎ cuáñaha-güedé vǎi díhúⁿ cuendá dacuàndehnde-güedé. ¹³ Te ní xăhaⁿ-güedé xii cue sandàdú-áⁿ:

—Cuíní-ndí sá vǎ càháⁿ ndáá-ndó núú ñáyiú nàcuáa ní cuu, chí cúñaha-ndo xii-yu sá òré xidí-ndó nǐ quixi cue téé ní xica cuu ndíhi-dé ní dúhú-güedé yiqui cùñú-dé nehé-güedé cuáháⁿ, duha cúñaha-ndo xii-yu. ¹⁴ Te núu na nihí té Pilatú téé cùu gobiernú tnúhu nàcuáa cúñaha-ndo xii ñáyiú, te nchúhú cada ndáá-ndí ndíhi-dé cuendá sá ñà túú nǎ cada ñaha-dē

xii-ndo —càchí-güedé xǎhaⁿ-güedě xii cue sandàdú-áⁿ.

¹⁵ Te cue sandàdú-áⁿ ñǎ queheⁿ cuèndá-güedé díhúⁿ, te ní xica-güedé cuáháⁿ-güedé te ní cáháⁿ-güedé nàcuáa ní xáhaⁿ cuè téé-áⁿ cǎháⁿ-güedé. Te nchaa ñáyiú isràél ní níhǐ-yu tnúhu ní cáháⁿ-güedé-áⁿ, te ñiú-ni tnúhu-áⁿ cǎháⁿ-yu ndéé vitna.

Jèsús xǎhaⁿ-gǎ xii cue téé ní xica cuu ndíhi-gá nàcuáa ndiú chiuⁿ cada-güedé

(Mr. 16:14-18; Lc. 24:36-49; Jn. 20:19-23)

¹⁶ Te ndí ùxí ñⁿ cue téé ní xica cuu ndíhi Jèsús ní xica-güedé cuáháⁿ-güedé ñⁿ yucu càa distritú Galileá núú ñǎ xáhaⁿ-gǎ naníhǐ tnáhá-güedě ndíhi-gá. ¹⁷ Te òré ní xiní-güedé Jèsús te ní chiñuhu ñaha-güedě xii-gá, dico dava-güedé sàni ñⁿ saní úú iní-güedé nǔu ñiú-gá àdi ñá díú-gǎ. ¹⁸ Te Jèsús ní sàndehe yatni-gá ndéé núú-güedě, te ní xáhaⁿ-gǎ xii-güedé:

—Yúhú ndécú ndíhi-í tnúhu ndee iní táxí tnùnǐ-í cuèi andiú te cuèi ñuyíú-a. ¹⁹ Te vitna tàuchiuⁿ-í sá quíhǐⁿ-ndó ñíhǐ ñuyíú cáháⁿ-ndó tnǔhu-í núú ñáyiú cuèndá tuha ñàhá-yu xii-í, te dacuàndute-ndó-yu. Te òré ducaⁿ càda-ndo, te cacunehe-ndo tǎtá-ó Dǔtú Ndiǒxǐ ndíhi yúhú Yaá cúú Dèhe-gá ndíhi Espíritú-gá. ²⁰ Te cúñaha-ndo xii-yu sá ná càdá-yu nchaa nàcuáa sa ní dánèhé ñáhà-í xii-ndo càda-ndo. Te ña càchí tnúhu-í sá cùndècu ndíhi ñaha-ñi-í xii-ndo ñuyíú-a ndéé ná sǎá nduu nàa-xǐ —cachí-gá xǎhaⁿ-gǎ xii-güedé. Te ducaⁿ na cùnduu.

TNÚHU NÍ CHÍDÓ TNÙNÍ TÉ MÀCÚ

*Té Juàá té dâcuandute ñaha xii ñáyi
cáháⁿ-dé tnúhu Yá Ndiõxí xití yucu
(Mt. 3:1-12; Lc. 3:1-9, 15-17; Jn. 1:19-28)*

¹ Duha ní quesaha tnúhu sá cáháⁿ nâcuáa naníhí tãhú-ó tnúhu Xítóhó Jesucrístú Déhe Yá Ndiõxí.

² Te ndí Chàiaá té ní xóo cáháⁿ tnúhu Yá Ndiõxí ndéé sanaha ñí chídó tnùní ndí nâcuáa ní xáhaⁿ Yá Ndiõxí xii Déhe-gá, te duha ní xáhaⁿ-gã:

Tendaha-í ñí téé codonùu-dé núu-n,
te dàtúha-dé ñáyi cuendá tñí-yu tnúhu-n.

³ Te téé-áⁿ quihi-dé xití yucu te níhi cáháⁿ-dé cúñaha-dě xii ñáyi:

“Chí dáñá nchàa ichi cuehé ichi duha ndècu-ndo, te tñí-ndo ichi váha, te ducaⁿ càda-ndo cuendá cundecu túha-ndo, chí véxi Yaá ío cùnùu”, duha cúñaha-dě xií-yu.

Duha ndùu tnúhu ní chídó tnùní ndí Chàiaá nâcuáa ní xáhaⁿ Yá Ndiõxí xii Déhe-gá.

⁴ Te téé dii cuendá-xi ní ngódó tnùní-áⁿ naní-dě Juàá, te téé-áⁿ ñí xíhi-dé xití yucu ní cáháⁿ-dé tnúhu Yá Ndiõxí, te ní xóo dâcuandute-dé ñáyi, te duha ní xáhaⁿ-dě xií-yu:

—Chí dándixi túu iní sá ñà túú quide váha-ndo ndècu-ndo, te dañá-ndo nchàa ichi cuehé ichi duha te cuandute-ndo, te ducaⁿ te Yá Ndiõxí cada càhnu iní-gá nchaa yíca cuèchi-ndo —duha ní xáhaⁿ-dě xií-yu.

⁵ Te nchaa ñáyi distritú Jùdeá, ndíhi ñáyi ñuú Jerusàlén ní sáháⁿ-yu ndéé yúte Jòrdán núu ndécú tẽ Juàá ní xíndedóho-yu nchaa tnúhu ní cáháⁿ-dé. Te cue ñáyi ní náhmá nchaa yíca cuèchi-xi te ní dâcuandute ñaha-dé xií-yu.

⁶ Te té Juàá-áⁿ ñí xíhnu-dé dóo idi càméyu, te ñí ñí ní cuu pãñú xití-dé, te ní xóo caxi-dé tíca làngóstá ndíhi ndudí ñúñú cuéchi. ⁷ Te ní xáhaⁿ tùcu-dé xii ñáyi:

—Nchícúⁿ ñí téé véxi, te téé-áⁿ ño-gá cùnùu-dé dàcúxí yúhú, chí yúhú cùu-í ñí téé duuⁿ duuⁿ ñà túú tàú-í ngúnundeyi-í nandaxi cuèdicó ñí nihnu chàú-dé dico

quide-í chiùⁿ-dé. ⁸ Te yúhú dâcuandute ñaha-í xii-ndo, dico mee-dě taxi-dé Espiritú Yá Ndiõxí cundecu ndíhi-ndo —càchí-dé xãhaⁿ-dě xií-yu.

Sàndute Jesús

(Mt. 3:13-17; Lc. 3:21-22)

⁹ Te dàvá-áⁿ ñí quee Jèsús ñuú Nazàrét ñí ñuú yíndèhu distritú Galileá cuáháⁿ-gá yúte Jòrdán. Te yàcáⁿ ní dâcuandute ñaha té Juàá xii-gá. ¹⁰ Te òré ní nene-gá xití ndute, te ní xiní-gá nchí andíu, te ní quee Espiritú Yá Ndiõxí véxi cuuⁿ-xi ngúndecu ndíhi ñaha-xi xii-gá, te dàtná cáá ñí lómá cáá Espiritú-áⁿ véxi cuuⁿ-xi. ¹¹ Te òré-áⁿ ñí tecú ní cáháⁿ Yá Ndiõxí ndéé andíu, te xãhaⁿ-gã xii Jèsús:

—Yòhó cúu-n Déhe-í téé ío cùu iní-í te ío cùdí iní ñáhà-í xii-n —càchí-gá xãhaⁿ-gã.

Sácuíhná quidé yíca-xi cada Jesús sá ñà túú tàú-gá cada-gá dico ñà túú ní quide-gá

(Mt. 4:1-11; Lc. 4:1-13)

¹² Te Espiritú Yá Ndiõxí ndécá-xi Jèsús cuáháⁿ ñí xití yucu. ¹³ Te xití yucu-áⁿ ío víhí quiti dééⁿ, te xiáⁿ ndécú Jèsús ní ngúita sácuíhná quidé yíca-xi cada-gá ñí sá ñà túú tàú-gá cada-gá dico ñà túú ní sàndáá iní-gá. Te cue espíritú xínú cuèchi núu Yá Ndiõxí ní xinú cuechi-xi ñú-gã. Te ní xíndecu-gá údico nduu xití yucu-áⁿ.

Distritú Galileá ní chisaha Jèsús chiùⁿ ní táhú Tátá-gã Dútú Ndiõxí cada-gá

(Mt. 4:12-17; Lc. 4:14-15)

¹⁴ Te sátá ñí ngava té Juàá vecaá, te Jèsús cuáháⁿ-gá distritú Galileá dânehé-gá ñáyi tnúhu váha, tnúhu sá cáháⁿ nâcuáa ndíhu ndaha ñaha Yá Ndiõxí xií-yu. ¹⁵ Te xãhaⁿ-gã xií-yu:

—Vitna sa ní cuyatni nduu ndíhu ndaha ñaha Yá Ndiõxí xii-ndo, te chí dáñá nchàa ichi cuehé ichi duha ndècu-ndo, te quíndáá iní-ndó tnúhu váha, tnúhu sá cáháⁿ nâcuáa naníhí tãhú-ndó —càchí-gá xãhaⁿ-gã xií-yu.

Jèsús cáháⁿ-gá cúmí tnhá cue té tñí chácá

(Mt. 4:18-22; Lc. 5:1-11)

¹⁶ Te Jèsús ñúhú-gã ichi cuáháⁿ-gá tá yãha-gá yuhu làgúná Galileá, te ní xiní-gá té Xímú ndíhi ñaní-dé té Ndríxí xídáquèe-güedé ñunu-güedé xití ndute

tn̄i-güedé chácá, chi quití tnàhí-án cúu chiùn-güedé tn̄i-güedë-di. ¹⁷ Te Jèsús ní xáhaⁿ-gã xii-güedé:

—Chí dáñá chiùn quide-ndo-án, te quixi-ndo chitnahá ñáhá-ndó xii-í te taxi-í ingá núu chiùn cada-ndo chi quihíⁿ-ndó cãháⁿ-ndó ñáyiü cuendá dacuahá-yu tnúhu-í —càchí-gá xãhaⁿ-gã xii-güedé.

¹⁸ Te òré-ni-án ñí dáñá cuè téé-án ñunu-güedé te ní tuha ñaha-güedé xii-gá.

¹⁹ Te cuáháⁿ-gá luha-gá, te ní xini-gá té Jàcobó ndihí ñani-dé té Juáá ñúhú-güedé xití bàrcú-güedé náticu-güedé ñunu-güedé, te ndi ndúu-güedé cúu-güedé déhe té Zebèdeú. ²⁰ Te ní cana ñaha-gã xii-güedé, te ní dándoo-güedé tátá-güedé ndihí cue téé xinu cuechi núu-güedé xití bàrcú, te ní tuha ñaha-güedé xii-gá.

Íⁿ téé yìhi ñaha espíritú cündihí yucu ñávãha

(Lc. 4:31-37)

²¹ Te ní quexio Jesús ndihí cue téé-án ñí ñuú nání Cãpernaúm, te yacáⁿ ndécú-gã ní tnahá nduu ndetatu ñáyiü, te cuánguihu-gá veñúhu ñáyiü isràél dānehé ñáhá-gã xii-yu. ²² Te xicuñúhu vihi-yu nchaa tnúhu cãháⁿ-gá, chi quide-gá sá cúu-gã ñí Yaá táxi tnúni víhi, te ñá túu dàcuaha ñaha-gá xii-yu dàtná dacuaha ñaha cue téé dàcuaha ñaha xii-yu nchaa tnúhu ní chídó tnúni ndíi Moisés. ²³ Te xití veñúhu-án ndécú tnàhá ñí téé yìhi ñaha ñí espíritú cündihí yucu ñávãha, te espíritú-án ñí quide-xi níhi ní cãháⁿ téé-án, te xãhaⁿ-dë xii Jèsús:

²⁴ —¿Te ná cuini yòhó Jèsús téé ñuú Nazàrét cada ñaha-n xii-ndí núu véxi-n núu ndécú-ndí-i? ¿Áⁿ véxi-n dànaa ñaha-n xii-ndí? Chi yúhú xini ñáhà-í xii-n sã cúu-n ñí téé ñá túu tnàhí cuéchi-xi, chi núu Yã Ndiõxí ní quee-n véxi-n ñüyíü-a —càchí-dé xãhaⁿ-dë xii-gá.

²⁵ Dico Jèsús ní tenáá-gá espíritú cündihí yucu ñávãha-án, te xãhaⁿ-gã:

—¿Cadí yuhu-n, te taquèe yiqui cuñú téé-án! —càchí-gá xãhaⁿ-gã xii espíritú-án.

²⁶ Te espíritú cündihí yucu ñávãha-án ñí dácüyihí ñáhá-xí xii téé-án, te ní dácáná sàa ñaha-xi, te ní quee-xi yiqui cuñú-dé

cuáháⁿ-xi. ²⁷ Te nchaa ñáyiü xĩndecu-án ño ní cuñúhu-yu, te ní xitnahá-yu:

—¿Te nása nduu-tu sá quidé téé-a? ¿Ndudú sáá cãháⁿ-tu-dé sánuu? Te quide-dé dàtná quidé ñí téé cūnuu vihi, chi cãháⁿ-ni-dé te sãndáá iní ñáhá nchaa espíritú cündihí yucu ñávãha —càchí-yu xitnahá-yu.

²⁸ Te ío ndihí ní níhi nchaa ñáyiü dava-gá ñuú yíndèhu distritú Galileá tnúhu nchaa nàcuáa cãháⁿ Jèsús ndihí nchaa sá quidé-gã.

Jèsús quidé tátna-gá nãná ñadìhí té Xímú

(Mt. 8:14-15; Lc. 4:38-39)

²⁹ Te òré ní ndee Jèsús veñúhu cue ñáyiü isràél, te cuáháⁿ-gá ndihí té Jàcobó ndihí té Juáá vehe té Xímú ndihí té Ndríxi.

³⁰ Te nãná ñadìhí té Xímú cùhú-aⁿ ñúhu vihi-aⁿ cahni, te ndihí-ni ní xáhaⁿ-güedé xii Jèsús sá cùhú-aⁿ. ³¹ Te ní sáháⁿ-gá núu cáá ñaha cùhú-án te ní tn̄i-gá ndaha-aⁿ ní ndocani ñaha-gã xii-aⁿ. Te òré-ni-án ñí nchíco-aⁿ cahni, te ní ngüíta-aⁿ xinu cuechi-aⁿ núu-güedé ndihí-gã.

Jèsús quidé tátna-gá vãi ñáyiü cùhú

(Mt. 8:16-17; Lc. 4:40-41)

³² Te òré sa cuini-xi cundiquiⁿ te ní quexio ñáyiü núu ndécú Jèsús, te nchaa ñáyiü cùhú ní dátacá-yu ndécá-yu ní sáá núu-gã, te tnàhá cue ñáyiü yìhi ñaha espíritú cündihí yucu ñávãha ndécá-yu ní sáá núu-gã. ³³ Te nchaa ñáyiü ñuú-án ñí chítú níhnü-yu yuyèhe vehe núu ñí quexio Jesús. ³⁴ Te Jèsús ní quide tátna-gá nchaa ñáyiü cùhú cuéi ndi d̄íⁿ ndi d̄íⁿ núu cuéhe tnàhá-yu ñí ñí-yu, te ní queñuhu-gá nchaa espíritú cündihí yucu ñávãha yìhi ñaha xii ñáyiü, te ñá túu ní dàña-gá cãháⁿ cue espíritú cündihí yucu ñávãha-án ñí ñí tnúhu, te ducaⁿ ñí quide-gá chi cue espíritú-án sa xini-xi yoo cùu-gã.

Jèsús cãháⁿ-gá tnúhu Yã Ndiõxí distritú Galileá

(Lc. 4:42-44)

³⁵ Te òré vátá tũndaá váha-gá ní ndacóo Jèsús cuáháⁿ-gá ñí xio yuhu ñuú núu ñá túu ñáyiü ndècu cuendá yacáⁿ cãháⁿ ndihí-gá Yã Ndiõxí. ³⁶ Te té Xímú ndihí cue téé cündihí-dé nándücu ñaha-güedé xii-gá. ³⁷ Te òré ní naníhí ñáhá-güedé xii-gá, te ní xáhaⁿ-güedé:

—Nchaa ñáyiú nànducu ñahá-yu xii-n — càchí-güedé xáhaⁿ-güedé xii-gá.

³⁸ Te ní xáhaⁿ-gá xii-güedé:

—Chí ná quíhíⁿ-ó nchàa ñuú xĩndáa yatni-a, chi danèhé-í ñáyiú tnúhu Yá Ndióxi chí diu chiúⁿ-áⁿ vèxi-í —càchí-gá xáhaⁿ-gá xii-güedé.

³⁹ Te Jèsús tá xica ndodo-gá cuáháⁿ nchaa ñuú yíndèhu distritú Galileá dánèhé-gá ñáyiú, te ndi tnahá ìⁿ ìⁿ ñuú sáá-gá te ducaⁿ cuãnguìhu-gá veñúhu-yu dānehé ñáhá-gá xii-yu tnúhu Yá Ndióxi, te cue ñáyiú yíhi ñaha espíritú cúndihi yucu ñávāha ta quèñuhu-gá nchaa espíritú-áⁿ yiqui cùñú-yu cuáháⁿ.

Jèsús quidé tātna-gá ìⁿ tée tñàhá cuéhé sã dátèhyú nihnu-xi yiqui cùñú-ó
(Mt. 8:1-4; Lc. 5:12-16)

⁴⁰ Te ní quexìo ìⁿ tée tñàhá cuéhé sã dátèhyú nihnu-xi yiqui cùñú-ó núú Jèsús, te ní ngüñí xítí-dé núú-gá càháⁿ ndàhú-dé, te xáhaⁿ-dè xii-gá:

—Véxi-í càháⁿ ndàhú-í núú-n ñuú vá cúndèe iní-n càda tātna ñaha-n xii-í chí cùtnuní iní-í sá ndácú-n —càchí-dé xáhaⁿ-dè xii-gá.

⁴¹ Te Jèsús ní cundàhú iní ñáhá-gá xii-dé te ní dácáá-gá ndaha-gá ní tendaha ñàha-gá xii-dé, te xáhaⁿ-gá:

—Cuu cada tātna ñaha-í xii-n, te vitna ndúha-n —càchí-gá xáhaⁿ-gá xii-dé.

⁴² Te òré-ni-áⁿ ñi xócuñí cuéhé tñàhá-dé.
⁴³⁻⁴⁴ Te Jèsús ní càháⁿ víhí-gá dóho-dé, te xáhaⁿ-gá xii-dé:

—Vitna cuanùhú-na, dico vá yõo ìⁿ cúñaha-n sà ní quide tātna ñaha-í xii-n, te núú dütú-ni cuáháⁿ cuendá sá ná quini ñáhá-dè xii-n sà ní ndúha-n te cuáha-n-dè sá ndúú tãhú Yá Ndióxi dátna ní cachí ndí Moisés cuendá ná quini ñáyiú sá ndáá ní ndúha-n —càchí-gá xáhaⁿ-gá xii-dé.

⁴⁵ Te tée ní cùhú-áⁿ ñi xica-dé cuáháⁿ-dè, te ní ngüita-dé xáhaⁿ-dè xii nchaa ñáyiú ta nàníhí-dè nàcuáa ní quide Jèsús ní quide tātna ñaha-gá xii-dé. Te sá dúcáⁿ ñi xité nuu tée-áⁿ cuendú nàcuáa ní quide ñaha Jèsús xii-dé ní quide tātna ñaha-gá ní ndúha-dé, te xíáⁿ ñuú dayuhu ñi xóo quíhu-gá dava ñuú núú ïo vài ñáyiú ndèhe ñaha xii-gá, te ní xóo cundecu-gá xítí yucu núú ñà túú

ñáyiú ndècu. Te nchaa ñuú ní quee ñáyiú ní sáháⁿ-yu núú ndécú-gá ní càháⁿ ndihi ñahá-yu xii-gá.

2

Jèsús quidé tātna-gá ìⁿ tée cùhú ñá cúú-gá candá nihnu

(Mt. 9:1-8; Lc. 5:17-26)

¹ Te sātá ñi cuu ìⁿ úú nduu sá ñi quee Jèsús ñuú Capèrnaúm te ní nasáa tucu-gá, te cue ñáyiú ní níhí-yu tnúhu sá ñi ndexìo-gá núú quidé vèhe-gá. ² Te ndihi-ni ní tacá cuéhé víhí-yu, te ní chítú víhí-yu ndéé yuyèhe te ñá ní tñàhá-gá-yu. Te ní ngüita-gá ní dánèhé ñáhá-gá xii-yu tnúhu Yá Ndióxi. ³ Te òré-áⁿ ñi quexìo cúmí tñàhá cue tée núú ndécú-gá nchídó-güedé ìⁿ tée cùhú ñá cúú-gá candá nihnu-dé. ⁴ Dico ñá túú ní ndàcu-güedé sáá-güedé ndéé núú-gá chí ío cuéhé ñáyiú ndècu. Te xíáⁿ ñuú ní sáá-güedé díquí véhé núú yíhí-gá-áⁿ ñi caáⁿ-güedé, te ichi ndàa díquí véhé-áⁿ ñi dáquèe-güedé tée cùhú-áⁿ, te ñuhu-dé ìⁿ xító ní dáquèe ñaha-güedé ndéé núú-gá. ⁵ Te Jèsús sa ní cutnùní iní-gá sá sàndáá iní ñáhá-güedé xii-gá ñuú ní xáhaⁿ-gá xii tée cùhú-áⁿ:

—Yòhó tée cùhú, sa ní quide càhnu iní-í nchaa cuéchi-n —càchí-gá xáhaⁿ-gá xii-dé.

⁶ Te xíáⁿ xĩnucóo ìⁿ úú cue tée dàcuaha ñaha xii ñáyiú nchaa tnúhu ní chídó tnùní ndí Moisés, te sá dúcáⁿ ñi càháⁿ Jèsús núú cue tée-áⁿ ñi sani iní-güedé: ⁷ “Tée-a càháⁿ cuéhé-dé cuendá Yá Ndióxi duha càháⁿ-dè, chí vá yõo ìⁿ ndàcu cada cahnu iní nchaa yíca cuéchi ñáyiú chí ìⁿ dñi dí-ñi Yá Ndióxi quidé càhnu iní-gá”, duha ní sani iní-güedé. ⁸ Dico òré-ni-áⁿ ñi cutnùní iní Jèsús nàcuáa sàni iní-güedé, núú ní xáhaⁿ-gá xii-güedé:

—¿Te ná cuendá ducaⁿ sàni iní-ndó-í? ⁹ Te sá dúhá ñi xáhaⁿ-í xii tée cùhú-a sá ñi quide càhnu iní-í nchaa yíca cuéchi-dé, te xíáⁿ nchòhó ñá túú cùtnuní iní-ndó ñuú ndáá càháⁿ-í àdi ñá ndáá. Dico núú cúú-í-dé sá ndácóo-dé, te ndocani-dé xító ñuhu-dé véxi, te caca-dé, te cutnùní ndáá iní-ndó ñuú ndáá càháⁿ-í àdi ñá ndáá chí cundehe núú-ndó nàcuáa cada-í. ¹⁰ Te vitna na càda-í nàcuáa cutnùní iní-ndó nchàa-ndo sá yùhú Tée cùu ñani tñàhá-ndó nchàa-ndo ndecu ndihi-í tnúhu ndee ñi sá cáda càhnu

iní-í nchaa cuéchi ñáyiú ñuyíú-a —càchí-gá xǎhaⁿ-gǎ xii-güedé.

Te sátá dúcáⁿ te ní xáhaⁿ-gǎ xii té cùhú-áⁿ:

11 —Ndacóo te ndocani-n xǐto ñùhu-n véxi-áⁿ, te núhú-n vèhe-n —cachí-gá xǎhaⁿ-gǎ xii-dé.

12 Te òré-ni-áⁿ ñí ndacóo-dé, te ní ndocani-dé xǐto ñùhu-dé ní quexìo-áⁿ, te ndèhe nchaa ñáyiú xǐndecu-áⁿ ñí ndee-dé tnuú-yu cuáháⁿ-dé. Te sá dúcáⁿ ñí quide Jèsús ní quide tátna-gá té-áⁿ, xǐáⁿ ío ní cuñúhu nchaa ñáyiú, te ní xítnahá-yu:

—Càhnu vihi cuu Yá Ndiöxí, chi ñá ñⁿ ndùu quini-ó dùha cuu datná ní cuu vitna —càchí-yu xítnahá-yu.

*Jèsús càháⁿ-gá ñⁿ té nàni Leví
(Mt. 9:9-13; Lc. 5:27-32)*

13 Te Jèsús cuáháⁿ tucu-gá yuhu làgúná, te ío cuéhé ñáyiú ní sátnahá ñáhá xii-gá, te ní dánèhé ñáhá-gǎ xii-yu tnuúhu Yá Ndiöxí.

14 Te òré ní yáha ní dánèhé ñáhá-gǎ xii-yu, te ní naqueheⁿ-gá ichi, te ní yáha yatni-gá ñⁿ xichi núú núcóo ñⁿ té nàni Leví déhe ñⁿ té nàni Alfeú quidé còbrá-dé ñáyiú cuendá impuèstú chi cobràdór cúú-dé. Te òré ní xiní ñáhá-gǎ xii-dé, te ní xáhaⁿ-gǎ:

—Néhe chitnahá ñáhá-n xii-í —càchí-gá xǎhaⁿ-gǎ xii-dé.

Te té Lèví-áⁿ ñí ndacuñí-dé, te ní tuha ñaha-dé xii-gá.

15 Te té Lèví-áⁿ cuáháⁿ-dé ndihí Jèsús vehe-dé. Te yíhi Jesús mèsá xéxi-gǎ ndihí cue té xica cuu ndihí-gá, te tnàhá vài cue té cuihna iní-xi quide cobrá ñáhá xii ñáyiú cuendá impuèstú, ndihí dava-gá cue té ndècu ichi cuehé ichi duha núcóo ndihí ñaha-güedé xii-gá xéxi ndihí ñaha-güedé, te ducaⁿ chi ío vài ñáyiú nchícúⁿ ñáhá xii-gá. 16 Te sá ñí xiní cue té dàcuáha ñaha xii-yu nchaa tnuúhu ní chídó tnùní ndí Moisés, ndihí cue té cùu fariséu xéxi Jèsús ndihí nchaa cue té-áⁿ núu ní xicáⁿ tnuúhú-güedé núu cué té xica cuu ndihí-gá, te xǎhaⁿ-gǎ xii-güedé:

—¿Ná cuendá ducaⁿ quide té cùu mestrú-ndó xéxi-dé ndihí cue té cuihna iní-xi quide cobrá ñáhá xii ñáyiú cuendá impuèstú, ndihí nchaa dava-gá cue té

ndècu ichi cuehé ichi duha-i? —càchí-güedé xǎhaⁿ-güedé.

17 Te Jèsús ní tecú dóho-gá nàcuáa ndùu tnuúhu ní xáhaⁿ-güedé xii cue té xica cuu ndihí-gá, núu ní xáhaⁿ-gǎ xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhú-yu ñátátná. Te yúhú véxi-í càháⁿ-í ñáyiú cùtnuní iní-xi sá ndécú cuèchi-xi te ñá túú véxi-í càháⁿ-í ñáyiú càchí sá ñá túú ndècu cuéchi-xi —càchí-gá xǎhaⁿ-gǎ xii-güedé.

*Cuendá cue ñáyiú ñá túú tnàhí ná xéxi áma càháⁿ ndihí-yu Yá Ndiöxí
(Mt. 9:14-17; Lc. 5:33-39)*

18 Te cue té xica cuu ndihí té Juáá, ndihí cue té xica cuu ndihí cue té cùu fariséu ñá túú tnàhí ná xéxi-güedé áma càháⁿ ndihí-güedé Yá Ndiöxí. Te ñⁿ nduu ducaⁿ xiquide-güedé, te ní sáháⁿ ñáyiú ní xicáⁿ tnuúhú-yu núu Jèsús, te xǎháⁿ-yu xii-gá:

—Cuñí-ndí cachí tnuúhu-n nǎ cuendá cue té xica cuu ndihí té Juáá, ndihí cue té xica cuu ndihí cue té cùu fariséu ñá túú tnàhí ná xéxi-güedé áma càháⁿ ndihí-güedé Yá Ndiöxí, te cue té xica cuu ndihí-n ñá túú dùcaⁿ quide-güedé —càchí-yu xǎháⁿ-yu xii-gá.

19 Te Jèsús ní xáhaⁿ-gǎ xii-yu:

—Nchòhó xiní-ndó sǎ vǎ cúú cùñaha-o xii ñáyiú ñùhu vico tnándaha sá vǎ cúú càxí-yu ñini ndècu ndihí ñaha té tnándaha xii-yu. 20 Dico sáá nduu te vǎ cùndècu ndihí ñaha-gá té tnándaha-áⁿ xii-yu, te dàvá-áⁿ te cahni iní-yu vǎ cáxí-yu cuendá sá ndihí iní-yu.

21 Te vǎ yóo ñⁿ dándée luha dóo sáá ñⁿ dóo sa ní cuu tùhú víhí, chi dóo sáá-áⁿ nàndiyí-xi te uuⁿ-gá ndata-xi dóo sà ní cuu tùhú-áⁿ. 22 Te ñí vǎ yóo ñⁿ chihí ndidí sáá xítí ñⁿ lamba sa ní cuu tùhú víhí, chi núu yoo ducaⁿ na càda te ndava lamba sa ní cuu tùhú-áⁿ, chi ío níhi yócó ndidí-áⁿ, te cuíta-ni ndidí-áⁿ te cuíta-ni lamba-áⁿ te núu ducaⁿ na càdá-yu. Núu xǐáⁿ xiní ñùhu-xi quée ndidí sáá-áⁿ xítí ñⁿ lamba saa —càchí-gá xǎhaⁿ-gǎ xii-yu.

*Cue té xica cuu ndihí Jesús sàhnú-güedé yoco triú nduú ndetátú ñáyiú
(Mt. 12:1-8; Lc. 6:1-5)*

23 Te ìⁿ nduu cùu-xi nduu ndetatú ñáyiú ññhu Jesús ichi ndihí cue téé xica cuu ndihí-gá, te ta yáha-gá ndihí-güedé ìⁿ xichi núú cáá triú, te ní ngüíta-güedé sàhnú-güedé yoco triú-áⁿ. 24 Te cue téé cùu fariséú ní xáhaⁿ-güedé xii-gá:

—¿Ná cuendá ducaⁿ quide cue téé xica cuu ndihí-n sahnú-güedé yoco triú vitna cùu-xi nduu ndetatú-í? Te ñá túú tàú-güedé ducaⁿ càda-güedé —càchí-güedé xáhaⁿ-güedé xii-gá.

25 Te ní xáhaⁿ-gá xii-güedé:

—¿Te náa vátá dácuaⁿhà tnahi-gá-ndó nñú tütú Yá Ndiöxí núú càháⁿ-xi nàcuáa ní quide ndíi Dàvíí cútnàhá ní xihí ndíi docó ndihí cue téé ní xica cuu ndihí ndíi-áⁿ? 26 Te dàvá-áⁿ ñí xindecu ìⁿ téé ní xínani Abiàtár ní cuu-dé dútú cúnù, te ndíi Dàvíí ní quíhu ndíi xití vehe Yá Ndiöxí ní queheⁿ ndíi pàá ní cuu íí ndécú-áⁿ ñí dácáhnñu ndíi cue téé ní xica cuu ndihí ndíi ní xexi ndíi ndihí-güedé, te mee-ni cuè dútú tàú-güedé caxi-güedé pàá-áⁿ ní cùu —cachí-gá xáhaⁿ-gá xii-güedé.

27 Te ní xáhaⁿ tucu Jesús xii-güedé:

—Mee Yá Ndiöxí ní taxi ndecu-gá nduu ndetatú ñáyiú, te ñá túú ní càchí-gá sá meé-yu nándi cani iní-yu cadá-yu canehe ñ-yu nduu ndetatú-yu-áⁿ. 28 Te yúhú Téé cùu ñaní tnàhá-ndó nchàa-ndo, tnàhá-í ndécú ndihí-í tnúhu ndee ñí sá cùu-í nchaa ñáyiú nàcuáa cadá-yu nduu ndetatú-ó-áⁿ —càchí-gá xáhaⁿ-gá xii-güedé.

3

*Ìⁿ téé ní yíchí ìⁿ xio ndaha-xi
(Mt. 12:9-14; Lc. 6:6-11)*

1 Te Jèsús cuánguihu tucu-gá xití veñúhu, te xití veñúhu-áⁿ ndécú ìⁿ téé ní yíchí ìⁿ xio ndaha-dé. 2 Te xíáⁿ ndécú cuè téé xito dayuhu ñaha xii-gá, te núú cada tátna-gá téé cùhú-áⁿ nduu cùu-xi nduu ndetatú-güedé ndihí ñáyiú, cuendá ducaⁿ te níhí-güedé nàcuáa cada-güedé cacáⁿ cuéchi-güedé cuendá-gá. 3 Te ní xáhaⁿ-gá xii téé cùhú ndaha-xi-áⁿ:

—Ndacuíñi te ngúnutñi-n cuádava iha —càchí-gá xáhaⁿ-gá xii-dé.

4 Te ní xicáⁿ tnúhú-gá núú-güedé, te xáhaⁿ-gá:

—Chí càchí tnúhu ná cúú sá cúú càda-o nduu ndetatú-ó. ¿Sá vaha ñá sá cuéhé? ¿Sá

cadá tátna-o ñáyiú cùhú ñá sá cáhni-ó-yu? —càchí-gá xáhaⁿ-gá xii-güedé.

Dico ni ìⁿ-güedé ñá túú tnàhí ní càháⁿ-güedé. 5 Te Jèsús ní xindéhé vaha-gá núú nchàa-güedé te ní cudééⁿ-gá, te ní ndíhú iní-gá chí ío sáa iní-güedé, te ní xáhaⁿ-gá xii téé cùhú ndaha-xi-áⁿ:

—Ndocani ndaha-n —càchí-gá xáhaⁿ-gá xii-dé.

Te ní ndocani-dé ndaha-dé, te òré-ni-áⁿ ñí ndúha. 6 Te cue téé cùu fariséú ní xica-güedé cuáháⁿ-güedé ìⁿ xichi núú ñí naníhí tnàhá-güedé ndihí cue téé cùndihí té Hèrodés cuendá ndatnúhu-güedé nása cada-güedé cahni-güedé Jèsús.

Cuéhé víhí ñáyiú ní quexìo yuhu lagúná

7 Te Jèsús ní xica-gá cuáháⁿ-gá ndihí cue téé xica cuu ndihí-gá yuhu làgúná distritú Galileá, te ío cuéhé ñáyiú distritú-áⁿ nchicúⁿ ñáhá-yu xii-gá cuáháⁿ. 8 Te núú ñí quexìo-gá-áⁿ ñí sáháⁿ ñáyiú distritú Júdeá, ñáyiú ñuú Jerusàlén, ñáyiú distritú Idùmeá, ñáyiú xindecu ndàa ingá xio yúte Jòrdán, ndihí ñáyiú xindecu yatni ñuú Tirú ndihí ñuú Sidón, te ducaⁿ ño vai-yu ní sáháⁿ núú ndécú-gá chí ní níhí-yu tnúhu nchaa nàcuáa quide-gá. 9 Te Jèsús ní xáhaⁿ-gá xii cue téé xica cuu ndihí-gá sá cáda túha-güedé ìⁿ bàrcú cuendá caa-gá núú-xi cuendá sá vã dádèhnde ñahá-yu xii-gá chí ío cuéhé-yu. 10 Te sá dúcáⁿ ñí níhí-yu tnúhu sá quidé tátna-gá ñáyiú cùhú, núú xíáⁿ nchaa dava-gá ñáyiú cùhú súúni dicó ngõnchihi tnàhá-yu cuáháⁿ-yu núú ndécú-gá cuení-yu tnándeé ñáhá-yu xii-gá cuendá sá cuení-yu ndúha-yu. 11 Te cue ñáyiú yìhi ñaha espíritú cùndihí yucu ñávaha ní sanu xití ñaha-xi xii-yu núú Jèsús òré ní xini ñáhá-xi xii-gá, te xíáⁿ ní quide níhi ní cáháⁿ-yu, te xáháⁿ-yu xii Jèsús:

—¿Yòhó cúú-n Dèhe Yá Ndiöxí! —càchí-yu xáháⁿ-yu xii-gá.

12 Te Jèsús ní tenàa-gá nchaa espíritú cùndihí yucu ñávaha-áⁿ, te ní xáhaⁿ-gá xii nchaa ñáyiú ní xihí-xi-áⁿ sã vã càháⁿ-yu núú ñáyiú yoo cùu-gá.

*Jèsús cãxi-gá úxúú tnàhá cue téé dacuàha ñaha xii ñáyiú tnúhu-gá
(Mt. 10:1-4; Lc. 6:12-16)*

13 Te sáta dúcáⁿ nǐ cuu te Jèsús ní sáá-gá ñⁿ yucu, te xíáⁿ ndécú-gǎ ní cana-gá nchaa cue téé cǎchí iní-gá. Te òré ní quexìo nchaa cue téé-áⁿ núú-gǎ, 14 te ní cáxi-gá úxúú tnàhá cue téé caca cuu ndìhi-gá, te ñⁿ ni cue téé-áⁿ tendaha-gǎ quíhíⁿ-güedé cǎháⁿ-güedé tnúhu-gá núú ñǎyiu. 15 Te ní sǎñaha-gǎ xii-güedé tnúhu ndee iní cundecu ndìhi-güedé cuendá cada tátna-güedé ñáyiu cùhú, ndìhi cuendá queñuhu-güedé nchaa espíritú cündìhi yucu ñávǎha yíhi ñaha xii ñáyiu. 16 Te duha xǎnani ndi úxúú cue téé-áⁿ: ñⁿ-dé nání-dě Xímú, te mee-gǎ ní taudìu ñaha-gá xii-dé sá cúnàni-dé Pèlú. 17 Te ingá-dé nání-dě Jàcobó, te ingá-dé nání-dě Juàá, te ñani té Jàcobó-áⁿ cúú tǎ Juàá te ndi ndúú-güedé cúú-güedé déhe té Zebèdeú, te ndi ndúú cue téé-áⁿ nǐ dánání ñaha Jesús xii-güedé Boànergés, te tnúhu-áⁿ queé-xí: Cue téé ío yáchí cúdeéⁿ, duha quee-xi tnúhu-áⁿ. 18 Te duha xǎnani dàva-gá-güedé: Té Ndríxí, té Lìpé, té Bartolómé, té Mǎteú, té Mǎxí, té Jàcobó déhe té Àlfeú, té Tàdeú, té Xímú téé ní cundìhi cue téé canànistá ní cùu, 19 ndìhi té Jüdás Iscàrioté téé ní sáá nduu nǐ sáha cuendá ñáhá xii Jesús núú cuè téé cùu úhú iní ñáhá xii-gá, duha xǎnani cuè téé ní cáxi Jèsús ní xica cuu ndìhi-gá.

Càchí-güedé sá ndécú ndìhi Jesús yucu ñávǎha dico ñá ndàá
(Mt. 12:22-32; Lc. 11:14-23; 12:10)

Te sáta dúcáⁿ te cuáháⁿ-gá ndìhi-güedé núú quidé vèhe-gá. 20 Te ío vǎi ñáyiu ní tacá-ni tucú-yu xíáⁿ, te ní ñǎ ní nǐhí-gǎ nása cada-gá caxi-gá ndìhi cue téé xica cuu ndìhi-gá cuendá sá ío vǎi-yu. 21 Te cue ñáyiu cùu ndi mee Jesús ní nǐhí-yu tnúhu nchaa nàcuáa cùu, te nchaa ñáyiu ñá cùnuni váha iní-xi ní cachí-yu sá nǐ nduu lúcú-gá núu xíáⁿ cuáháⁿ ñáyiu cùu ndi mee Jesús núú ndécú-gǎ cuendá candeca ñáhá-yu xii-gá núhú ní cùu.

22 Te cue téé dàcuaha ñaha xii ñáyiu nchaa tnúhu ní chídó tnùnì ndí Moisés véxi ndéé ñúú Jerusalén ní cǎháⁿ cuèhé-güedé cuendá Jèsús, chi ní xítnàha-güedé:

—Téé-a ndècu ndìhi-dé sácuíhná, te ñⁿ xíáⁿ chíndèe ñaha-xi xii-dé queñuhu-dé nchaa espíritú cündìhi-xi yíhi ñaha xii ñáyiu,

te ñⁿ ni-xi tàxi tnùnì-xi nchaa espíritú-áⁿ —duha ní xítnàha-güedé.

23 Te Jèsús ní cana ñaha-gǎ xii-güedé, te ní cani-gá ñⁿ cuendú núú-güedé nàcuáa tecú tnùnì-güedé tnúhu-gá, te xǎhaⁿ-gǎ xii-güedé:

—¿Te nása cada sácuíhná queñuhu-xi cue espíritú cündìhi-xi yíhi ñaha xii ñáyiu-i?

24 Te nchòhó xínì-ndó sǎ núu ñⁿ téé yíndaha ñⁿ nacióⁿ vá cúú ñⁿnuu-dé ndìhi cue téé cündìhi-dé, te vá cúdí-dé cunuu-dé. 25 Te ñⁿ ni ducaⁿ sǎtnahá-xi cùu tucu ñáyiu xíndecu ñⁿ-ni vèhe, chi núu vá cúú ñⁿnuú-yu, te vá cúdí-yu cundecu cǎhnú-yu. 26 Te núu sácuíhná ñá túú cùu ñⁿnuu-xi ndìhi cue espíritú cündìhi-xi, te vá cúdí-xi cundecu-xi taxi tnùnì-xi te núu ducaⁿ quíde-xi.

27 Te nchòhó xínì-ndó sǎ cuè ñadúhú chi vá ndácú-güedé cuendá-ni quíhu-güedé duhu-güedé vèhe ñⁿ téé ío ndee, chi díhna-gá xínì ñùhu-xi tní-güedé téé-áⁿ dacùtu ñaha-güedé xii-dé dàtnùnì ducaⁿ te ndacu-güedé duhu-güedé nchaa sá ndécú ndìhi-dé.

28 Te na cǎchí tnúhu ndáá-í xii-ndo sǎ ncháá sǎ cuèhé sá dúhá quíde ñáyiu, ndìhi nchaa tnúhu cuèhé tnúhu duha cǎháⁿ-yu cuendá Yǎ Ndióxi cuu cada cǎhnu iní-gá.

29 Dico cue ñáyiu na cǎháⁿ cuèhé cuendá Espíritú Yǎ Ndióxi, ñáyiu-áⁿ vǎ cadá cǎhnu iní ñáhá tnàhí-gá xii-yu, chi cundecu-ni cuéchi-yu núú-gǎ ní caa ní quíhíⁿ —cǎchí-gá xǎhaⁿ-gǎ xii-güedé.

30 Te ducaⁿ nǐ cǎháⁿ-gá chi cǎchí-güedé sá ndécú ndìhi-gá espíritú cündìhi yucu ñávǎha.

Nǎná Jèsús ndìhi cue ñani-gá
(Mt. 12:46-50; Lc. 8:19-21)

31 Te ní quexìo náná Jèsús ndìhi cue ñani-gá núú ndécú-gǎ xínutnǐ-yu quehé, te ní xáhǎⁿ-yu xii ñⁿ ñáyiu xíndecu-áⁿ sǎ dáyaⁿ-yu tnúhu núú-gǎ cuendá quee-gá ndatnúhu ndìhi ñaha-gǎ xii-yu. 32 Te cue ñáyiu xínucóo ní cǎndéé díñi-gá ní xáhǎⁿ-yu xii-gá:

—Nǎná-n ndìhi cue ñani-n ndécú-yu quehé nánducu ñahá-yu xii-n —cǎchí-yu xáhǎⁿ-yu xii-gá.

33 Te Jèsús ní xáhaⁿ-gǎ xii-yu:

—Te cachí tnúhu-ndo yõndi-gá ñáiyu cùu datná nãná-í ndihì datná cue ñaní-í —càchí-gá xãhaⁿ-gã xií-yu.

³⁴ Te dãtnùní ní xíndéhé vãha-gá núu nchaa ñáiyu xínucóo ni càndéé dñi-gá-án, te ní xãhaⁿ-gã xií-yu:

—Nchaa ñáiyu-a cùu-yu datná nãná-í ndihì datná cue ñaní-í. ³⁵ Chi nchaa ñáiyu quide nacuáa càháⁿ Yã Ndiõxí, ñáiyu-án cúu-yu datná cue ñaní-í, ndihì datná cue cúha-í, ndihì datná nãná-í —càchí-gá xãhaⁿ-gã xií-yu.

4

Nàcuáa quide té cuángacáⁿ triú
(Mt. 13:1-9; Lc. 8:4-8)

¹ Te Jèsús ní ngüíta-gá dácuaaha tucu-gá ñáiyu yuhu làgúná. Te cuéhé víhì-yu ní tacá xíáⁿ nõu cuásaá-gá núu ñⁿ bàrcú nùtnñ xití ndute làgúná-án, te núu xãáⁿ ní ngóo-gá te ní ngüíta-gá dánèhé ñáhá-gã xií-yu, te ncháa-yu xixúcu-yu yuhu làgúná-án. ² Te ní ngüíta-gá ní caní-gá tñní cuendú núu-yu nàcuáa tecú tnùnì-yu tnúhu-gá, te xãhaⁿ-gã xií-yu:

³ —Chí cùndedóho váha ñⁿ cuendú ná càni-í-a. ñⁿ té cuángacáⁿ-dé triú. ⁴ Te òré ní ngüíta-dé dãngoyo-dé triú-án, te dava ní quene ndava ní ngava ndéé ichi, te ní xiní cue tílaá te ní nadatàcá-güedi. ⁵ Te dava ní ngava ñuhu yadi nõu yíhì vèhi yúú, te ndihì-ni ní xínu-xi cuendá sá ñà túú càvihi ñuhu. ⁶ Dico òré ní nayehé ñà túú ní cùndee iní-xi chi ní yíchí-xi, chi ñà túú ní ñhí quíhíⁿ cùnú yóho-xi. ⁷ Te dava ní ngava núu yúcu ndíquíⁿ tnu ññu, te ñⁿnuu-ni ní xínu-xi ndihì tnu ññu, te tnu ññu-án ñ sahnu-xi te ní dánáá-xi nchaa triú sá ñ xínu-án. ⁸ Dico dava triú-án ñ ngava-xi núu ndécú ññu cocoⁿ, te xãáⁿ ní xínu-xi te ní sahnu-xi te ío váha ní cuu, chi núu ñⁿ-ní triú-án te dava yoco-xi ní nguíhì ócú úxí triú-xi, te dava yoco-xi ní nguíhì únídico triú-xi, te dava yoco-xi ní nguíhì ñⁿ ciendú triú-xi —càchí-gá xãhaⁿ-gã xií-yu.

⁹ Te xãhaⁿ tucu-gá xií-yu:

—Nchaa nchòhó ñáiyu ní xíndedóho nchaa tnúhu ní càháⁿ-í-a, te ío váha chí cuãha cuendá —càchí-gá xãhaⁿ-gã xií-yu.

Jèsús càháⁿ-gá ná cuendá ducaⁿ càni-gá cuendú

(Mt. 13:10-17; Lc. 8:9-10)

¹⁰ Te sátá ñ ndaca ñáiyu-án te ní quendóo mee-nã Jèsús ndihì cue téé xica cuu ndihì-gá, ndihì ñⁿ ùú-nã ñáiyu. Te ñáiyu-án ndihì cue téé-án ñ xicáⁿ tnúhñ-yu ndihì-güedé núu-gã, núu nása quèe-xi cuendú ní caní-gá núu-yu ndihì-güedé.

¹¹ Te ní xãhaⁿ-gã:

—Nchòhó chí sa càchí tnúhu Yá Ndiõxí xii-ndo ñⁿ sá vátá quini-gá-ndó, chí càchí tnúhu-gá nàcuáa cada-gá ndihu ndaha-gã ñáiyu, dico dava-gá ñáiyu càni-í mee-ni cuendú núu-yu. ¹² Chi cuèi na quini-yu nchaa nàcuáa cuu dico ní vã cútnùní iní-yu ná cuendá ducaⁿ cùu, àdi cuèi na cùndedóho-yu dico ní vã tècú tnùnì-yu. Te ducaⁿ ndòhó-yu cuendá sá vã quindáá iní-yu Yá Ndiõxí, ndihì cuendá sá vã cadá càhnu iní-gá nchaa yicá cuèchi-yu —càchí-gá xãhaⁿ-gã xií-yu ndihì-güedé.

Jèsús càháⁿ-gá nàcuáa quèe-xi cuendá té cuángacáⁿ triú

(Mt. 13:18-23; Lc. 8:11-15)

¹³ Te ní xãhaⁿ tucu Jesús xii cue téé xica cuu ndihì-gá, ndihì cue ñáiyu-án:

—Nchòhó, ñà túú ní tècú tnùnì-ndó cuendú ní caní-í núu-ndó, te núu ducaⁿ, ¿te nása tecú tnùnì-ndó dava-gá cuendú caní-í núu-ndó-í? Te na càchí tnúhu-í xii-ndo nàcuáa quèe-xi cuendú ní caní-í núu-ndó.

¹⁴ Te téé cuángacáⁿ triú-án cúu-dé datná ñⁿ téé cuáháⁿ càháⁿ tnúhu Yá Ndiõxí núu ñáiyu.

¹⁵ Te triú-án cúu-xi datná tnúhu Yá Ndiõxí, te triú sá ñ quene ndava ní ngava ndéé ichi, xãáⁿ cúu-xi datná ñáiyu ní tnahá iní-xi tnúhu Yá Ndiõxí, dico sácúhñá cuáháⁿ-xi xòcani-xi tnúhu-gá iní-yu cuendá sá vã cãchícúⁿ nihnú-yu nàcuáa càháⁿ tnúhu-án. ¹⁶ Te triú sá ñ ngava ñuhu yadi nõu yíhì vèhi yúú, xãáⁿ cúu-xi datná ñáiyu ní xíndedóho tnúhu Yá Ndiõxí te díí iní ní tñí-yu tnúhu-gá. ¹⁷ Dico òré ná ngüíta ñáiyu cúcuèhé ñáhá-yu xií-yu àdi nãndi-gá sá yãha-yu sá cuendá tnúhu-gá, te ñà cùndèe iní-yu chí dàñá-yu tnúhu-gá cuendá sá ñà túú ñhí ndéè-yu. ¹⁸ Te triú sá ñ ngava núu yúcu ndíquíⁿ tnu ññu xãáⁿ cúu-xi datná ñáiyu ní tecú dóho-xi tnúhu Yá Ndiõxí, ¹⁹ dico cuèé cuèé ní nacuanaá-yu

tnúhu-gá, chi cuendá mee-ni sã cúu-xí mèe-yu ñùhu iní-yu, ndihí cuendá sã ïo sàni iní-yu cuu cuicá-yu, ndihí cuendá sã ïo cùdí iní-yu nchaa sã ïo ñuyú-a, te ñá túú ñùhu iní-yu tnúhu sã ñí xíndedóho-yu-án nàcuáa cada váha-yu cundecú-yu. ²⁰ Dico triú sã ñí ngava núú ndécú ñùhu cocoⁿ, xíáⁿ cúu-xí dàtná ñáiyu ní xíndedóho tnúhu Yá Ndiöxí te quidé-yu nchaa nàcuáa càháⁿ tnúhu-án. Te cada iní-ndó sã ñáiyu-án cúu-yu dàtná triú sã ñí nguíhi yoco-xi ócú úxí triú-xi, ndihí triú sã ñí nguíhi yoco-xi únídico triú-xi, ndihí triú sã ñí nguíhi yoco-xi ìⁿ ciendú triú-xi. Te ducaⁿ sãtnahá-xi cùu-yu chi ïo váha quidé-yu —càchí-gá xãhaⁿ-gã xii cue téé xica cuu ndihí-gá ndihí cue ñáiyu-án.

Cuendá iti
(Lc. 8:16-18)

²¹ Te xãhaⁿ-gã xii nchaa ñáiyu:

—Ñá túú ñí ìⁿ ñáiyu tẽñuhú iti te chiváha-yu ìⁿ xití quídí, àdi chiváha-yu ìⁿ caha camá, chi tàxi ndecú-yu ìⁿ núú dùcúⁿ cuendá cutnùní núú nchaa ñáiyu. ²² Te ñí ìⁿ tnúhu sã ñã tècú tnùní ñáiyu vitna cachí-ó sã vã tècú tnùní-yu chi dacuití sã tècú tnùní-yu, te ñí ìⁿ tnúhu sã càchí-ó cùu yuhu vitna vá cúu yùhu chi dacuití sã quée tũu-xi núú ñáiyu. ²³ Te nchòhó cue ñáiyu ní xíndedóho nchaa tnúhu ní càháⁿ-í-a, te ïo váha chí ná cuãha cuendá —càchí-gá xãhaⁿ-gã xií-yu.

²⁴ Te ní xáhaⁿ tùcu-gá:

—Ío váha chí cùndedóho tnúhu na càháⁿ-í-a. Te nàcuáa-ni quide-ndo danehé-ndó ñáiyu tnúhu Yá Ndiöxí, te ñu-ni ducaⁿ càda ñaha-gá xii-ndo, te uuⁿ-gá ducaⁿ càda-gá sã cúu-xí-ndó. ²⁵ Te nchaa nchòhó ñáiyu tècú tnùní tnúhu Yá Ndiöxí, uuⁿ-gá cuita tecú tnùní-ndó tnũhu-gá quíhíⁿ. Te nchaa nchòhó ñáiyu ñá túú tècú tnùní tnúhu-gá, te uuⁿ-gá vá tècú tnùní-ndó —càchí-gá xãhaⁿ-gã xií-yu.

Nàcuáa sãhnu triú

²⁶ Te Jèsús xãhaⁿ tùcu-gá:

—Na càni-í ìⁿ cuendú núú-ndó cuendá tecú tnùní-ndó nàcuáa cada-xi òré ndíhu ndaha ñaha Yá Ndiöxí xii ñáiyu. ìⁿ téé cuángacáⁿ-dé triú. ²⁷⁻²⁸ Te sãtá ñí yãha

ní sacáⁿ-dé triú-án, te cuánuhú-dé vehe-dé ndétátú-dé. Te ducaⁿ-ni ta xica nduu cuáháⁿ te ní xínu triú-án, te nàcuáa ta sãhnu-xi cuáháⁿ te ta quèe ndaha-xi, te ducaⁿ-ni cùu ní sáá nduu ñí quene yoco-xi te ní nguíhi triú-xi, dico téé ní sacáⁿ triú-án ñà túú xíní-dé nása ní sãhnu-xi, chi mee ñùhu ní quide-xi ní sãhnu triú-án. ²⁹ Te òré sa ní ndihí ní cuaaⁿ te ní nguíta téé ní sacáⁿ-án náquèhndé-dé nátaxi tnahá-dé —càchí-gá xãhaⁿ-gã xií-yu.

Cuendá ndíquíⁿ yutnu nàni mostázá
(Mt. 13:31-32; Lc. 13:18-19)

³⁰ Te xãhaⁿ tùcu Jèsús xií-yu:

—Na càni tucu-í ingá cuendú núú-ndó cuendá tecú tnùní-ndó nàcuáa cada-xi òré ndíhu ndaha ñaha Yá Ndiöxí xii ñáiyu.

³¹ ìⁿ yutnu nàni mostázá cúu-xí ìⁿ yutnu sã líhli vìhi-gá ndíquíⁿ-xi dàcúúxí ndíquíⁿ nchaa cúhú, ³² dico òré ná càcáⁿ-güedé núú ñúhú-güedé, te na xínu-xi te sãhnu-gá-xi dàcúúxí nchaa cúhú, te nchaa dité-xi ïo cùu cahnu-xi, te ndéé cue quití ndàva núú tàchí sácõ-güedi nchaa núú dité-xi xínu ndeti-güedi —cachí-gá xãhaⁿ-gã xií-yu.

Ío titní cuendú ní cani Jèsús núú ñáiyu
(Mt. 13:34-35)

³³ Te ío-gá vãi cuendú ní cani Jèsús núú ñáiyu cuendá tecú tnùní-yu tnúhu Yá Ndiöxí, dico dava cuendú ñá túú ní càni-gá núú-yu, chi ní cutnùní iní-gá sã vã tècú tnùní-yu nchaa. ³⁴ Te mee-ni cuendú ní cani Jèsús núú ñáiyu ndi tnahá òré ní dánèhé ñahá-gã xií-yu tnúhu-gá. Te òré ndécú mèe Jèsús ndihí cue téé xica cuu ndihí-gá, te ní xáhaⁿ-gã xii-güedé nàcuáa quèe-xi ìⁿ ìⁿ cuendú ní cani-gá núú ñáiyu.

Jèsús ngání-gã táchí ndihí ndute làgúná
(Mt. 8:23-27; Lc. 8:22-25)

³⁵ Te ñu-ni nduu-ãⁿ òré sa ta cùndiquíⁿ cuáháⁿ ní xáhaⁿ Jèsús xii cue téé xica cuu ndihí-gá:

—Chí ná quíhíⁿ-ó ndàa ingá xio yuhu làgúná —càchí-gá xãhaⁿ-gã xii-güedé.

³⁶ Te ní quide ndee iní-gá nchaa ñáiyu xíxúcu-án, te ñu-ni bàrcú sã ñúhú-gã òré ní dánèhé-gá ñáiyu tnúhu-gá ñu-ni xíáⁿ ní dácacá cue téé xica cuu ndihí-gá ndécá ñaha-güedé xii-gá cuáháⁿ, te tnahá ìⁿ

ũú-gá bàrcú ní xica-xi nchìcúⁿ-xi bàrcú ñùhú-gã-áⁿ cuáháⁿ. ³⁷ Te ñùhu barcú ñùhú-gã-áⁿ ichi cuáháⁿ-xi núú ndute, te ní quexìo ìⁿ táchí ñìhi, te ta nàdachitú-xi ndute xití bàrcú-áⁿ cuáháⁿ, te sa cuìní-nã-xi quée naa bàrcú-áⁿ xití ndute ni cùu. ³⁸ Te Jèsús cáá-gã xidí-gá ìⁿ xichi ndàa sátá bàrcú-áⁿ, te yìnchihi ìⁿ dóo dǐquí-gã. Te sá dúcáⁿ cuìní-xi quée naa bàrcú-áⁿ nũu ní sáháⁿ-güedé ní ndocani ñaha-güedě xii-gá, te xãhaⁿ-güedě:

—jMèstrú, ndiquíú ìní! ¿Náa ñá túú ndìhú ìní-n sã tá quée naa-o cuáháⁿ-ãⁿ? —càchí-güedé xãhaⁿ-güedě xii-gá.

³⁹ Te Jèsús ní ndiquíú ìní-gá te ní ndacóo-gá, te ní tenáá-gá táchí-ãⁿ, te ní xáhaⁿ-gã xii ndute làgúná:

—jTnavíí-nã cuhuⁿ, chi ío dusaⁿ! —càchí-gá xãhaⁿ-gã xii ndute-áⁿ.

Te òré-ni ní ngüíñí táchí-ãⁿ te ní nucúndecu nahi-nã ndute làgúná-áⁿ. ⁴⁰ Te Jèsús ní xáhaⁿ-gã xii-güedé:

—¿Náa cuèndá ndéé dúcáⁿ yùhú-ndó-í? ¿Náa ñá túú sàndáá ìní ñáhá ndìsa-ndo xii-í-ãⁿ? —càchí-gá xãhaⁿ-gã xii-güedé.

⁴¹ Dico mee-güedě chi ío ní yùhú-güedé sá ducaⁿ ñi quide-gá ní xiní-güedé, te ní xitnãha-güedé:

—¿Te náa tée cùu tée-a núu ní cáháⁿ-ni-dé, te ní ngüíñí táchí te ní nucúndecu nahi ndute làgúná-a-í? —càchí-güedé xitnãha-güedé.

5

Íⁿ tée yìhi ñaha espíritú cúndìhi yucu ñávãha
(Mt. 8:28-34; Lc. 8:26-39)

¹ Te ní sáá Jèsús ndìhi cue tée xica cuu ndìhi-gá ndàa ingá xio yuhu làgúná yucu cue tée ñuú Gàdará. ² Te òré ní quene-gá xití bàrcú te ìⁿ tée yìhi ñaha espíritú cúndìhi yucu ñávãha ní quée-dé núú yíndüxi ndíyí cuáháⁿ-dé núú-gã. ³ Te mee-ni nũu yíndüxi ndíyí-áⁿ quidé vèhe-dé, te cuèi dàcutu ñaha-güedé cadená xii-dé dico ñá túú tnàhí ndàcu-güedé núú-dě. ⁴ Te ío titní xito ní dácútú-güedě cadená sáhá-dě ndìhi ndaha-dé dico ní dándává-ni-dě, te ní xóo dacàchi-gá-dé nchaa cadená-áⁿ, te

ñá túú tnàhí ni ndàcu-güedé núú-dě. ⁵ Te cuèi nduu cuèi niú ní xóo cana saa-dé, te váha-ni núu xití yucu ndècu-dé àdi núu yíndüxi ndíyí dico càna saa nahi-ni-dé, te ío ní xóo dánícuèhé-dé méé-dě ndìhi yúú. ⁶ Te òré ní xiní-dé Jèsús te xinu-dé ní sáháⁿ núú-gã, te ní ngüíñí xití-dě, ⁷ te espíritú yìhi ñaha xii-dé-áⁿ ñi quide-xi níhi ní cáháⁿ-dé, te xãhaⁿ-dě xii-gá:

—¿Náa cuèndá véxi yòhó Jèsús Déhe Dútú Ndiõxí sàdí-n ìchi-í? Te càháⁿ ndàhú-í núú Ndiõxí yuhu nũu-n sã vã dándòho ñaha-n xii-í —càchí-dé xãhaⁿ-dě xii-gá.

⁸ Te ducaⁿ ñi cáháⁿ-dé cuèndá sá Jèsús ní xáhaⁿ-gã xii espíritú cúndìhi yucu ñávãha yìhi ñaha xii-dé-áⁿ sã quée ñaha-xi xii-dé.

⁹ Te Jèsús ní xicáⁿ tnùhú-gã núú-dě, te xãhaⁿ-gã:

—¿Náa nàni-n-í? —cachí-gá xãhaⁿ-gã xii-dé.

Te ní xáhaⁿ-dě:
—Vài Sandadú, duha nàni-í chi ío cuèhé-ndí —càchí-dé xãhaⁿ-dě xii-gá.

¹⁰ Te cue espíritú cúndìhi yucu ñávãha-áⁿ ñi cáháⁿ ndàhú-xi núú Jèsús sá vã téndàha ñaha-gá xii-xi quíhíⁿ-xi ingá xichi. ¹¹ Te ñu-ni yatni yucu núú ndécú Jèsús-áⁿ yìhi vãi cuchí xixexi-güedi. ¹² Te nchaa cue espíritú-áⁿ ñi cáháⁿ ndàhú-xi núú-gã, te xãhaⁿ-xi xii-gá:

—Càháⁿ ndàhú-ndí núú-n sã dáñá-n quíhu-ndí yiqui cùñú nchaa cùchí-ãⁿ —càchí-xi xãhaⁿ-xi xii-gá.

¹³ Te Jèsús ní xáhaⁿ-gã sá cúu quíhu-xi yiqui cùñú-güedi, te xinu dàtná úú mǐl-güedi yìhi yucu-áⁿ. Te nchaa espíritú cúndìhi yucu ñávãha yìhi ñaha xii tée-áⁿ ñi quée ñaha-xi xii-dé, te cuánguihu-xi yiqui cùñú nchaa cùchí-áⁿ, te nchaa-güedi ní xinu-güedi duha ní quée-güedi ndàa núú dèhvá yuhu làgúná-áⁿ, te ní ngauni-hnu-güedi xití ndute te ní ndìhi-güedi ní cáhá.

¹⁴ Te òré ní xiní cue tée xito cuchí-áⁿ nàcuáa ní cuu te ní xinu-güedé, te ní sáháⁿ-güedé ní cani-güedé cuèndú núú cuè ñáyiu ndècu xití ñuú, ndìhi núú cuè ñáyiu ndècu xití yucu. Te nchaa ñáyiu ní níhi tnùhu ní xicá-yu cuáháⁿ ndéhě-yu nàcuáa ní

cuu. ¹⁵ Te òré ní quexìó-yu núú ndécú Jèsús te ní xiní-yu téé ní xíhi ñaha cuè espíritú cùndìhi yucu ñávãha-áⁿ núcõo-dé núú sàhá Jèsús, te ñihnu-ná-dé dóó-dé te núcõo-ná-dé dàtná ìⁿ ñáyiu váha, te ní yùhú-yu òré ní xiní ñáhã-yu xii-dé. ¹⁶ Te nchaa ñáyiu ní xiní nàcuáa ní cuu ní ndúha téé yìhi ñaha cue espíritú cùndìhi yucu ñávãha-áⁿ ní cùu ní caní-yu cuèndú núú nchaa ñáyiu ní quexìo-áⁿ nàcuáa ní cuu ní ndúha téé-áⁿ ndìhi nàcuáa ní cuu cuèndá nchaa cùchí-áⁿ. ¹⁷ Te sá dúcáⁿ ní ñíhi ñáyiu-áⁿ tnùhu nàcuáa ní cuu núú nchaa-yu ní ngúita-yu càháⁿ ndàhú-yu núú Jèsús sá ná quèe-gá yucu ñuú-yu núhú-gá.

¹⁸ Te ní xica-gá cuáhã-gá núú ndécú bàrcú, te òré ndée-gá bàrcú-áⁿ nùhú-gá ní ngúita téé ní xíhi ñaha cuè espíritú cùndìhi yucu ñávãha-áⁿ càháⁿ ndàhú-dé núú-gã nùu vá cùndèe iní-gá quíhíⁿ ndìhi ñaha-gã xii-dé.

¹⁹ Dico ñá túú ní sãha-gá tnùhu quíhíⁿ ndìhi ñaha-gã xii-dé, te ní xãhaⁿ-gã xii-dé:

—Cuanùhú vehe-n, te cani-n cuèndú núú cuè ñáyiu sá Yã Ndiõxí ní cundàhú iní ñáhã-gã xii-n, te ío càhnu cuu nchaa sá vãha ní quide-gá sá cúú-xí-n —càchí-gá xãhaⁿ-gã xii-dé.

²⁰ Te téé-áⁿ ní xica-dé cuánuhú-dé, te ní sáhãⁿ-dé ndì ùxí ñuú nání Dècápolís, te ní cani-dé cuèndú núú nchaa ñáyiu sá ío càhnu cuu nchaa sá vãha ní quide ñaha Jèsús xii-dé, te nchaa-yu ío ní cuñùhu-yu.

Cuèndá déhe yoco té Jàirú ndìhi cuèndá ìⁿ ñadìhí ní tnándeé dóó Jèsús

(Mt. 9:18-26; Lc. 8:40-56)

²¹ Te Jèsús cuánde-gá bàrcú, te ní natehdé-gá ndàa ingá xio yuhu làgúná, te ío vãi ñáyiu ní tacá núú ní quexìo-gá-áⁿ, te xíáⁿ ndécú-gã ²² ní quexìo ìⁿ téé tàxi tnuní veñùhu núú-gã, te téé-áⁿ nání-dě Jàirú, te ní ngúíhí xítí-dě núú-gã. ²³ Te ní ngúita-dé càháⁿ ndàhú-dé núú-gã, te xãhaⁿ-dě xii-gã:

—Ío càhú tnàhá déhe yoco-í cùhú-xi, te ndècu-ná-xi sá cùú-xi, te véxi-í càháⁿ ndàhú-í núú-n nùu vá cùndèe iní-n quíhíⁿ-ó vèhe-í tendaha-n-xi cuèndá ndúha-xi, te cundecu-xi —càchí-dé xãhaⁿ-dě xii-gã.

²⁴ Te Jèsús ní xica-gá cuáhã-gá ndìhi téé-áⁿ, te ío vãi ñáyiu nchìcúⁿ ñáhã xii-gã

cuáhãⁿ, te dàdehnde ñaha-ná-yu xii-gã ní cùu. ²⁵ Te tnuú nchaa ñáyiu-áⁿ ñútnàhá ìⁿ ñaha cùhú, te ñaha-áⁿ sa ní cuu úxúú cuía sã cùhú-aⁿ ngòyo ñaha níhí xii-aⁿ. ²⁶ Te ío ta ndòho-aⁿ véxi, te ío cuéhé ñátátná ní cuu ta quide tátna ñaha xii-aⁿ, te sa ní ndìhi nchaa sá ndécú ndìhi-aⁿ ní nadico-aⁿ cuèndá ní níhí-aⁿ díhúⁿ ní queheⁿ nchaa ñáyiu ní quide tátna ñaha xii-aⁿ dico ní ìⁿ-yu ñá túú ní ndàcú-yu ndúha-aⁿ, chi da uuⁿ-gã tá cùu cahú-aⁿ cuáhãⁿ. ²⁷ Te òré ní níhí-aⁿ tnùhu cuèndá Jèsús, te ní xica-aⁿ cuáhãⁿ-aⁿ núú ndécú-gã. Te òré ní quexìo-aⁿ núú ndécú-gã te ní sáhãⁿ ndehe yatni-aⁿ ndàa sátá-gã ní tnándeé-aⁿ dóó-gã. ²⁸ Te ducaⁿ ní quide-aⁿ chi ní sani iní-aⁿ sá nùu ndacu-aⁿ tnándeé-aⁿ cuèdicó luha yuhu dóó Jèsús te ndúha-aⁿ ní sani iní-aⁿ. ²⁹ Te òré ducaⁿ ní quide-aⁿ te ñá túú-gã ní ngòyo ñaha-gã níhí xii-aⁿ, te òré-áⁿ ní cutnùní iní-aⁿ sá ní ndúha-aⁿ cuéhé tnàhá-aⁿ. ³⁰ Te Jèsús ní cutnùní iní-gã sá ìⁿ ñáyiu ní ndúha sá cuèndá-gã, núu ní nchócótó-gã ndàa sátá-gã te ní xicáⁿ tnùhú-gã núú nchaa ñáyiu nchìcúⁿ ñáhã xii-gã, te xãhaⁿ-gã xií-yu:

—¿Ndèdacàa-ndo ní tnándeé ñáhã xii-í? —càchí-gá xãhaⁿ-gã xií-yu.

³¹ Te cue téé xica cuu ndìhi-gã ní xãhaⁿ-güedě xii-gã:

—Mèstrú, ndèhe-n sá vái ñáyiu nchìcúⁿ ñáhã xii-n, te texio texio dàdehnde ñahã-yu xii-n te xicáⁿ tnùhú-gã-n yòo ní tnándeé ñáhã xii-n —cachí-güedé xãhaⁿ-güedě xii-gã.

³² Te Jèsús ní xíndéhé vãha-gã xio xio dñí-gã nùu ndèdacàa ñáyiu ní tnándeé ñáhã xii-gã. ³³ Te sá dúcáⁿ ní cutnùní iní ñadìhí-áⁿ nàcuáa ní cuu, núu yùhú yùhú-aⁿ ní sáhãⁿ-aⁿ ní ngúíhí xítí-áⁿ núú Jèsús, te ní xãhaⁿ ndãá-aⁿ xii-gã nàcuáa ndùu cuèndá-aⁿ. ³⁴ Te Jèsús ní xãhaⁿ-gã xii-aⁿ:

—Yòhó ñaha cùhú ní cùu, ní sándáá iní ñáhã-n xii-í, núu ní ndúha-n, te vitna cuanùhú te vá ndìhú-gã iní-n, chi vá dúcáⁿ-gã ndòho-n —càchí-gã xãhaⁿ-gã xii-aⁿ.

³⁵ Te càháⁿ dúcáⁿ-ní Jèsús ní sáá cue téé xínu cuechi vehe té Jàirú téé tàxi tnuní veñùhu-áⁿ, te xãhaⁿ-güedě xii-dé:

—Sa ní xíhí déhe-n, vá chíchìuⁿ-gá-n Mèstrú —càchí-güedé xáhaⁿ-güedé xii-dé.

³⁶ Dico Jèsús ñá túú ní quide cuendá-gá nàcuáa ndùu tnúhu ní cáháⁿ cue téé-áⁿ, te ní xáhaⁿ-gã xii téé tàxi tnuní veñúhu-áⁿ:

—Ñá túú nã caní iní-n, quindáá iní ñáhá-ní-n xii-í —càchí-gá xáhaⁿ-gã xii-dé.

³⁷ Te Jèsús vá yõo-gá ní cuiní-gá canchicúⁿ ñáhá xii-gá quíhíⁿ, chí té Pèlú-ni, ndihí té Jàcobó-ni, ndihí ñaní-ni-dé té Juáá cuáháⁿ ndihí ñaha-gã xii-güedé. ³⁸ Te òré ní quexìo-gá ndihí-güedé vehe téé tàxi tnuní veñúhu-áⁿ, te ní xiní-gá sá ïo vãi ñáyiu xĩndecu, te súúni dùsaⁿ quidé-yu te níhi xícáháⁿ-yu te xĩndáhí-yu. ³⁹ Te òré cuànguihu-gá xití vehe, te ní xáhaⁿ-gã xii-yu:

—¿Ná cuendá ndéé dúcáⁿ ïo dusaⁿ quide-ndo, te ndàhyú-ndó? Te xíchí-a ñá túú ní xíhí-xi chí dicó xidí-xi —càchí-gá xáhaⁿ-gã xii-yu.

⁴⁰ Te ní sácú ndéé ñáhã-yu xii-gá sá dúcáⁿ ñí cáháⁿ-gá, chí sá cúu-xí mèé-yu chí ní xíhí ndisa xíchí-áⁿ. Te òré-áⁿ ñí queñuhu-gá ncháa-yu quehé, te cuànguihu-gá núú cándòdo yiqui cuñú xíchí ñí xíhí-áⁿ. Te ndèca-gá tãtã xíchí ñí xíhí-áⁿ ndihí ñaná-xi cuànguihu, te tnàhá cue téé úní ndihí-gá-áⁿ cuànguihu ndihí-gá. ⁴¹ Te ní tñi-gá ndaha xíchí ñí xíhí-áⁿ, te ní xáhaⁿ-gã:

—Tàlita, cúmí —càchí-gá xáhaⁿ-gã.

Te tnúhu-áⁿ queé-xí: Yòhó xíchí cuéchí yúhú càchí-í sá ndácòo-n, duha quèe-xi tnúhu-áⁿ.

⁴² Te òré-ni-áⁿ ñí ndoto xíchí cuéchí-áⁿ ñí ndacòo-xi ní nacaca cuu-xi, te ndècu-xi úxúú cuíá-xi. Te ïo ní cuñúhu ncháa ñáyiu sá dúcáⁿ ñí dándótó ñàha Jèsús xii-xi.

⁴³ Te Jèsús ní cáháⁿ víhí-gã dóho tãtã-xi ndihí ñaná-xi sá vã yõo ñíⁿ cúñàhá-yu sá ñí dándótó ñàha-gá xii-xi. Te sátá dúcáⁿ te ní xáhaⁿ-gã xii-yu sá cuñàhá-yu xii-xi sá cáxí-xí.

6

*Jèsús ndécú-gã ñuú Nazàrét
(Mt. 13:53-58; Lc. 4:16-30)*

¹ Te Jèsús ní ndee-gá ñuú núú ñí dándótó-gã xíchí ñí xíhí-áⁿ, te cuánuhú-gá núú cúu ñuú-gá, te tnàhá cue téé xica cuu

ndihí-gá cuánuhú ndihí-gá. ² Te ndècu Jèsús ñuú-gá ní tnàhá nduu ndètatú ñáyiu. Te nduu-áⁿ cuànguihu-gá xití veñúhu dàcuaha ñaha-gá xii-yu. Te vãi ñáyiu ndèdóho ncháa tnúhu càháⁿ-gá, te xicuñúhu vñí-yu, te xitnàhá-yu:

—¿Ndéé ní sáháⁿ dácúháⁿ tõe-a núu ndéé duha váha càháⁿ-dé, nása ní quide-dé núu ndéé duha ïo váha cùtnuní iní-dé, te ndàcu-dé quidé-dé ncháa sá vã yõo tnàhí ndàcu cada-í? ³ Te dicó carpintèrú cúu-dé, dicó déhe tá Màriá cúu-dé, te ñaní-dé cúu té Jàcobó, ndihí té Chèé, ndihí té Judás, ndihí té Ximú, te diu-ni cue cúha-dé cúu ñáyiu ndècu ndihí-o ñuú-a —càchí-yu xitnàhá-yu.

Te ñá túú ní cuiní-gá-yu cáháⁿ ndihí váha ñàhá-yu xii-gá. ⁴ Te Jèsús ní xáhaⁿ-gã xii-yu:

—Te núu ñíⁿ téé càháⁿ tnúhu Yá Ndiõxí ná nàsáá-dé ñuú-dé dacuàha-dé ñáyiu tnúhu-gá, te ncháa ñáyiu ñuú-dé-áⁿ, ndihí ncháa ñáyiu ndècu ndihí-dé vehe-dé, ndihí ncháa ñáyiu cùu ndi mee-dé ñá túú nèhé-yu sá yíñùhu núu-dé, dico cue ñáyiu ncháa dava-gá ñuú chí nèhé-yu sá yíñùhu núu-dé —càchí-gá xáhaⁿ-gã xii-yu.

⁵ Te ñá túú ní quide tátna Jèsús vãi ñáyiu cuendá sá ñà túú ní sàndáá iní ñáhã-yu xii-gá, dico ní quide tátna-gá ñíⁿ úú ñáyiu cùhú ní sàndáá iní ñáhã xii-gá. Te ní tendaha ñàha-ni-gá xii-yu te ní ndúha-yu. ⁶ Te ïo ní cuñúhu-gá sá dúcáⁿ ñà túú ní cuiní-yu quindáá iní ñáhã-yu xii-gá. Te sátá dúcáⁿ te ní xica-gá cuáháⁿ-gá ncháa dava-gá ñuú líhli càa yatni xíáⁿ cuendá dacuàha-gá ñáyiu tnúhu-gá.

Jèsús táuchìuⁿ-gá quíhíⁿ cue téé xica cuu ndihí-gá cáháⁿ-güedé tnúhu Yá Ndiõxí núú ñáyiu

(Mt. 10:5-15; Lc. 9:1-6)

⁷ Te Jèsús ní cana-gá ndi ùxúú cue téé xica cuu ndihí-gá, te ní sãñaha-gã xii-güedé tnúhu ndee iní cundecu ndihí-güedé cuendá queñuhu-güedé ncháa espíritú cùndihí yucu ñávãha yíhí ñaha xii ñáyiu. Te ní xáhaⁿ-gã xii-güedé sá ndi ndúú ndi ndúú-güedé quíhíⁿ-güedé cáháⁿ-güedé tnúhu Yá Ndiõxí núú ñáyiu. ⁸⁻⁹ Te cùmání-gã caca-güedé quíhíⁿ-güedé, te ní xáhaⁿ-gã xii-güedé:

—Vá cánèhe-ndo ñunu cuhuⁿ ndachiuⁿ-ndo, te ni vã cánèhe-ndo sá cáxí-ndó, te ni vã cánèhe-ndo díhúⁿ, chi ñⁿ caa-ni tátnu canehe-ndo, te chàú yíhí-ní-ndó-ãⁿ xiãⁿ-ni quihi-ndo, te vá cánèhe-gá-ndó ìngá ichi dóó-ndó chi ñⁿ diu-ni dóó níhnú-ndó-ãⁿ xiãⁿ tnàhí-ni cuihnu-ndo te ñá túú tnàhí-gá ná canehe-ndo —càchí-gá xãhaⁿ-gã xii-güedé.

10 Te xãhaⁿ tucu-gá:

—Te òré ná sàá-ndó ñⁿ ñuú, te íó ñáyiu cáháⁿ ñáhã-yu xii-ndo vèhé-yu, te xiáⁿ-ni cundecu-ndo ndèé ná sàá nduu ndèe-ndo ñuú-áⁿ. 11 Te núu íó dava ñuú ñá túú cuíní-yu cáháⁿ ndíhi ñaha váha-yu xii-ndo, te ni ñá túú cuíní-yu cundedóho-yu tnúhu càháⁿ-ndó, te ndee-ni-ndo ñuú-áⁿ te naquidi-ndo ticáchúhmá ñⁿ tníi sáhá-ndó cuendá ná cùtnuní iní-yu sá ñà túú quide váha-yu. Te na càchí tnúhu ndáá-í xii-ndo sá ná sàá nduu càda ndáá Yã Ndiõxí cuéchi nchaa ñáyiu, te cue ñáyiu ducaⁿ na càda ñaha xii-ndo-áⁿ ño-gá ndohó-yu dàvá-áⁿ dàcúxí dàtná ndoho cue ñáyiu ñuú Sòdomá ndíhi cue ñáyiu ñuú Gòmorrá —càchí-gá xãhaⁿ-gã xii-güedé.

12 Te cue téé-áⁿ ñⁿ xica-güedé cuáháⁿ-güedé te ní ngüíta-güedé dácuàha-güedé cue ñáyiu tnúhu Yã Ndiõxí, te xãhaⁿ-güedé xii-yu:

—Chí dándìxi túu iní sá ñà túú quide váha-ndo ndècu-ndo, te dañã-ndo nchaa ichi cuehé ichi duha ndècu-ndo. —càchí-güedé xãhaⁿ-güedé xii-yu.

13 Te vãi espíritú cündíhi yucu ñávãha yíhi ñaha xii ñáyiu ta quèñuhu-güedé yiqui cùnú-yu cuáháⁿ, te vãi tucu ñáyiu cùhú tá quide tátna-güedé cuáháⁿ chíhí ñaha-güedé acítí xii-yu te ndúha-yu.

Nàcuáa ní cuu ní xíhí té Juàá téé dàcuandute ñaha xii ñáyiu

(Mt. 14:1-12; Lc. 9:7-9)

14 Te nchaa xichi ní níhí ñáyiu tnúhu nchaa nàcuáa quide Jesús, te tnàhá té Hèrodés téé yìndaha ñaha xii ñáyiu ní níhí-dé tnúhu nchaa nàcuáa quide-gá, te ní cachí-dé:

—Té Juàá téé ní xóo dacuàndute ñaha xii ñáyiu ní ndoto núu dàcáⁿ ndácú-dé quidé-dé nchaa sá vã yõ tnàhí ndàcu cada —duha ní cachí-dé.

15 Te dava ñáyiu càchí-yu sá tẽ Èliás téé ní xóo cáháⁿ tnúhu Yã Ndiõxí ndéé sanaha ní nasáá-dé.

Te davá-yu càchí-yu sá cúú-gã dàtná ñⁿ téé ní xóo cáháⁿ tnúhu Yã Ndiõxí ndéé sanaha. 16 Te té Hèrodés ní níhí-dé tnúhu nchaa nàcuáa càháⁿ-yu, te ní cachí-dé:

—Díu té Juàá téé ní táuchíuⁿ-í ní xehndé-güedé díquí-xi ní ndoto —càchí-dé.

17-18 Te duha ní cuu cùtnàhá ní sahani té Hèrodés té Juàá, chi dàvá-áⁿ ñⁿ naqueheⁿ té Hèrodés-áⁿ ñⁿ ñaha nani Herodiás ndécá-dé, te ñaha-áⁿ sá ní cándeca ñaha ñàní-dé té Lipé. Te té Juàá ní xáhaⁿ-dẽ xii té Hèrodés sá ñà túú ní quide váha-dé sá dúcáⁿ ñⁿ naqueheⁿ-dé ñaha ní cándeca ñaní-dé, núu sá cuendá ñaha-áⁿ ñⁿ táuchíuⁿ tẽ Hèrodés ní tníi-güedé té Juàá ní chíhi ñaha-güedé vecaá, te ní dácútú ñaha-güedé xii-dé, te ducaⁿ ñⁿ quide-dé cuendá sá ndécá ñaha-dé xii-áⁿ.

19 Te ñaha nani Herodiás ndécá tẽ Hèrodés-áⁿ ío ní cuu úhú iní-áⁿ té Juàá, te ní cuíní-áⁿ cahni-áⁿ-dé, dico ñá túú ní níhí-áⁿ nàcuáa cada-áⁿ. 20 Te mee tẽ Hèrodés chí ní cutnùní ndáá iní-dé sá tẽ Juàá cuú-dé ñⁿ téé quide mee-ni sá váha, te quide ndáá-dé núu Yã Ndiõxí, te ní xóo yùhú ñáhã-dé núu xiãⁿ ñá túú ní dàña-dé ná cada ñaha ñaha ndeca-dé-áⁿ xii té Juàá. Te té Hèrodés-áⁿ ío ní cudíí iní-dé ní xíndedóho-dé nchaa tnúhu ní xáhaⁿ tẽ Juàá xii-dé, dico ñá túú ní sàni iní-dé duuⁿ duuⁿ tníi-dé tnúhu-áⁿ.

21 Te ñⁿ nduu ní xóo vico vehe té Hèrodés ní quide càhnu-dé nduu ñⁿ cacu-dé. Te nduu-áⁿ ñⁿ níhí ñaha nani Herodiás-áⁿ nàcuáa cada-áⁿ cuendá cuú té Juàá. Te nduu-áⁿ ní cáháⁿ té Hèrodés nchaa cue téé cùchiuⁿ, ndíhi nchaa cue téé tàxi tnuní ñáhã xii cue sandadú, ndíhi nchaa cue téé cuica ndècu distritú Galileá cuendá cudini ndíhi ñaha-dé xii-güedé nduu-áⁿ. 22 Te ndècu ñⁿ déhe yoco ñaha nani Herodiás-áⁿ, te xíchí-áⁿ ñⁿ quíhu-xi vehe núu cúú vico-áⁿ ñⁿ xita saha-xi mèi oré yíhí tẽ Hèrodés mèsá ndíhi nchaa cue téé ní cáháⁿ-dé, te ío ní cudíí iní-dé ndíhi nchaa cue téé-áⁿ nàcuáa ní xita xíchí-áⁿ. Te té Hèrodés ní xáhaⁿ-dẽ xii-xi:

—Cácaⁿ núu-í núu ná cuíní-n te taxi-í —càchí-dé xãhaⁿ-dẽ xii-xi.

23 Te ní cacunehe-dé ndéé Yã Ndiõxí nàcuáa cutnùní iní xíchí-áⁿ sá ndáá cuãñaha-dẽ núu ná cúú sá ná càcáⁿ-xi núu-dé cuèi ndéé cuádava nchaa sá ndécú

ndihí-dé, te núu na càcáⁿ-xi. ²⁴ Te sá dúcáⁿ nĩ xáhaⁿ-dě xii-xi núu ní quee-xi quehé ní xáhaⁿ-xi xii náná-xi:

—Nǎá, ¿ná cúú sǎ càcáⁿ-í núú tǎ Hèrodés? —càchí-xi xǎhaⁿ-xi xii-aⁿ.

Te nǎná-xi-áⁿ nĩ xáhaⁿ-aⁿ xii-xi:

—Cuàháⁿ cǎcáⁿ-n dǐquí tǎ Juàá tée dàcuandute ñaha xii ñáyiú —càchí-aⁿ xǎhaⁿ-aⁿ.

²⁵ Te ndǐhi-ni cuándihu xíchí-ǎⁿ xití vehe núú yíhí tǎ Hèrodés-áⁿ, te xǎhaⁿ-xi xii-dé:

—Cuíní-í sá mèi nduu vitna quehndé-n dǐquí tǎ Juàá tée dàcuandute ñaha xii ñáyiú te taxi-n, dico na cùhuⁿ ìⁿ xití cóhó taxi-n —càchí-xi xǎhaⁿ-xi xii-dé.

²⁶ Te té Hèrodés ní ngüíta-dé ndihú víhí iní-dé sá dúcáⁿ nĩ xáhaⁿ-xi xii-dé, dico ñá túú ní cùyí-dé cúñaha-dě xii-xi sá vǎ cúú cuǎñaha-dě sá xicáⁿ-xi, chi cuèndá sá núú nchaa ñáyiú ní xáhaⁿ-dě sá cúú cuǎñaha-dě núu ná cúú sǎ ná càcáⁿ-xi, te ní cacunehe-dé ndéé Yǎ Ndiǒxí nàcuáa cutnùní iní-xi sá ndáa cuǎñaha-dě sá ná càcáⁿ-xi núú-dě. ²⁷ Te té Hèrodés-áⁿ ndihí-ni ní xáhaⁿ-dě xii ìⁿ sandàdú sá quihíⁿ-dé quehndé-dé dǐquí tǎ Juàá. ²⁸ Te sandàdú-áⁿ nĩ xica-dé cuáháⁿ-dé vecaá núú yíhí tǎ Juàá-áⁿ, te ní quexìo-dé te ní xehndé-ni-dé dǐquí tǎ Juàá, te ní chihí-dé ìⁿ xití cóhó te nèhe-dé cuánuhú ní sáha-dé xíchí xicáⁿ-áⁿ, te xíchí-ǎⁿ nĩ nacuáha-xi nǎná-xi. ²⁹ Te òré ní nihí nchaa cue tée ní xica cuu ndihí ndí Juàá-áⁿ tnúhu sá dúcáⁿ nĩ sahní ñaha-güedé xii ndí, te ní sáháⁿ-güedé ní ndocani-güedé yiqui cùñú ndí te ní chindúxi-güedé.

Jèsús dácaxi-gá úhúⁿ mǐl cue tée te dǐⁿ ñáyiú dǐhí ndihí landú

(Mt. 14:13-21; Lc. 9:10-17; Jn. 6:1-14)

³⁰ Te nchaa cue tée ní táuchíúⁿ Jèsús cuáháⁿ cáháⁿ tnúhu Yá Ndiǒxí núú ñáyiú ní ndexìo-güedé núú-gǎ te ní ngüíta-güedé nácàni tnúhu-güedé nchaa nàcuáa ní quide-güedé ndihí nchaa nàcuáa ní dánèhé ñáhá-güedé xií-yu. ³¹ Te Jèsús ní xáhaⁿ-gǎ xii-güedé:

—Chí nèhé ná quihíⁿ-ó ìⁿ xichi núú ñà túú ñáyiú ndetatu-ó —càchí-gǎ xǎhaⁿ-gǎ xii-güedé.

Te ducaⁿ nĩ xáhaⁿ-gǎ xii-güedé, chi ío cuéhé ñáyiú cuáháⁿ véxi-yu cùú-yu núú

ndécú-gǎ. Te ní ñǎ nihí-gá nása cada-gǎ caxi-gǎ ndihí cue tée xica cuu ndihí-gǎ. ³² Te Jèsús cuánguee-gǎ bàrcú ndihí mee-ni cuè tée ní táuchíúⁿ-gǎ cáháⁿ tnúhu-gǎ, te cuáháⁿ-gǎ ndihí-güedé ìⁿ xichi núú ñà túú ñáyiú ndècu. ³³ Dico vǎi ñáyiú ní cutnùní iní-yu sá díú-gǎ ñúhú bàrcú-áⁿ cuáháⁿ ndihí cue tée xica cuu ndihí-gǎ, te nchaa ñuú cáa yàtni xiáⁿ nĩ quee ñáyiú xixinú-yu cuáháⁿ núú nĩ quidé-yu cuèndá quexìo Jèsús, te sa ndécú-yu xiáⁿ nĩ quexìo-gǎ. ³⁴ Te òré ní quene Jèsús xití bàrcú, te ní xiní-gǎ cuéhé víhí ñáyiú xixúcu núú nĩ quexìo-gǎ-áⁿ, te ní cundàhú iní ñáhá-gǎ xií-yu chi ndécú-yu dàtná xǐndecu cue mbéé cue quiti ñà túú tòli-xi, te ío vǎi núú sǎ nĩ ngüíta-gǎ ní dácuhá ñaha-gǎ xií-yu. ³⁵ Te sátá tá cuàa cuáháⁿ te ní sáháⁿ cue tée xica cuu ndihí Jèsús núú-gǎ, te xáhaⁿ-güedé xii-gǎ:

—Sa ní cuaa te ñà túú ñáyiú ndècu yatni iha. ³⁶ Váha-gǎ dandàca nchaa ñáyiú-a chi na quihíⁿ-yu nchaa vehe càa xití yucu-a, ndihí nchaa ñuú cáa nchaa yatni iha cuaáⁿ-yu sá cǎxi-yu —càchí-güedé xǎhaⁿ-güedé xii-gǎ.

³⁷ Te Jèsús ní xáhaⁿ-gǎ:

—Mee-ndo chí cuǎñaha sǎ ná cǎxi-yu —càchí-gǎ xǎhaⁿ-gǎ xii-güedé.

Te xáhaⁿ-güedé xii-gǎ:

—¿Te nása cada-ndí, chi xini ñuhu-xi datná úú cièndú díhúⁿ denàriú cuèndá cuaaⁿ-ndí sá cǎxi-yu? —càchí-güedé xǎhaⁿ-güedé xii-gǎ.

³⁸ Te Jèsús ní xáhaⁿ-gǎ xii-güedé:

—Chí cuáháⁿ cundehe-ndo núu ná daha pàa ndécú ndihí-ndo te cachí tnúhu-ndo —càchí-gǎ xǎhaⁿ-gǎ xii-güedé.

Te ní sáháⁿ ndéhé-güedé núu ná daha pàa ndécú, te ní xáhaⁿ-güedé xii-gǎ:

—Úhúⁿ duha-ná pàa ndihí úú-nǎ chácá ndécú —càchí-güedé xǎhaⁿ-güedé xii-gǎ.

³⁹ Te Jèsús ní xáhaⁿ-gǎ xii nchaa ñáyiú sá ná nihí tnáhǎ-yu cuu titní xichí-yu, te ngóo-yu nchaa núú cùhú cuíí càa xiáⁿ.

⁴⁰ Te nchaá-yu ní ngóo-yu, te dava xichí-yu ní ngóo ìⁿ cièndú-yu, te dava xichí-yu ní ngóo údico úxi-yu. ⁴¹ Te sátá nĩ ndihí-yu ní ngóo, te ní queheⁿ Jèsús

ndi ùhúⁿ pàá ndi úú chácá-ǎⁿ, te ní ndacoto-gá andiu te ní ndacáⁿ táhú-gǎ núú Yǎ Ndiǒxí, te dǎtnùní ní táhú cuèchi-gá pàá-áⁿ te ní sǎñaha-gǎ xii cue téé xica cuu ndihi-gá ní dácǎññu-güedé nchaa ñáyiú-áⁿ nǐ xexí-yu. Te ññu-ni ducaⁿ nǐ quide tucu-gá úú chácá-ǎⁿ. ⁴² Te nchaá-yu ní xexí-yu ní ndahá xití-yu. ⁴³ Te sátá nǐ túhú cóhǒ-yu te ní nadatácá-güedé nchaa sá nǐ quendóo, te ní chítú ùxúú tnáhá tídihi mee-ni sǎ nǐ quendóo núú ùhúⁿ-ni pàá, ndihi núú úú-ni chácá. ⁴⁴ Te nchaa ñáyiú ní xexi-áⁿ chi xǐnu ùhúⁿ mǐl mee-ni cuè téé chi ññu-ni cue téé-áⁿ nǐ quíundeñu, te ññu ñáyiú ññu ndihi cue landú.

Jèsús xicá-gǎ núú ndute

(Mt. 14:22-27; Jn. 6:16-21)

⁴⁵ Te òré-ni-áⁿ nǐ xáhaⁿ Jèsús xii cue téé xica cuu ndihi-gá sá quèe-güedé bàrcú codonù-güedé quíhíⁿ-güedé ññu núú nání Bètsaidá cáá ndàa ingá xio yuhu làgúná núú ndécú-güedé-áⁿ, te mee-gǎ quendóo-gá cada ndee iní tnáhá-gǎ ndihi cue ñáyiú. ⁴⁶ Te sátá nǐ yáha ní quide ndee iní tnáhá-gǎ ndihí-yu, te ní xica-gá cuáháⁿ-gá ññu tǐndúú cáá yǎtni xíáⁿ cuendá cáháⁿ ndihi-gá Yǎ Ndiǒxí. ⁴⁷ Te òré sa ní cundiquíⁿ te bàrcú sá ññu cuè téé xica cuu ndihi-gá sa cuáháⁿ-xi ndéé cuádava xití làgúná-áⁿ, te mee-gǎ ndécú-gǎ ññu núú tǐndúú. ⁴⁸ Te túu ndèhe-gá sá sǔúni ndòho-güedé tá dácaca-güedé bàrcú-áⁿ cuáháⁿ, chi cuendá ndàa nacuáa cuáháⁿ-xi-áⁿ duha véxi táchí te nǎtúndaha-xi. Te ingá nduu-ǎⁿ tàcuíhndá-gá sa ní cuyatni vií-nǎ Jèsús bàrcú ññu-güedé-áⁿ, dico núú ndute tá xica-gá cuáháⁿ te luha-ná te yáha ñaha-gǎ xii-güedé ní cùu. ⁴⁹⁻⁵⁰ Te òré ní xini ñáhá cuè téé ññu bàrcú-áⁿ xii-gá te ní yùhú-güedé ní cana saa-güedé, chi ní sani iní-güedé sá ññu almá cúú-gǎ. Te ní xáhaⁿ-gǎ xii-güedé:

—ññu cunduu-ndo, vá yùhú-ndó, chi yùhú cúú-í! —càchí-gá xǎhaⁿ-gǎ xii-güedé.

⁵¹ Te Jèsús cuánguee-gá xití bàrcú ññu-güedé-áⁿ, te sátá cuánguee-gá te òré-ni ní ngúññi táchí, te ní cuñúhu vihi-güedé. ⁵² Te ducaⁿ chi cue téé-áⁿ ñà túú ní cùtnuní iní-güedé nása quide-gá, chi ñà túú ní cùtnuní váha iní-güedé nácuaa ndùu

sá nǐ quide-gá òré ní nadacáyá-gá pàá, chi ññu ññu-güedé.

Jèsús quidé tǎtna-gá ñáyiú cùhú ññu Genesàrét

(Mt. 14:34-36)

⁵³ Te ní yáha-güedé ndihi-gá ndàa ingá xio yuhu làgúná, te ní sáa-güedé ndihi-gá yucu cue téé ññu Genesàrét. Te yàcáⁿ ní dácútú ndèe-güedé bàrcú-güedé yuhu làgúná. ⁵⁴ Te òré ní quene Jèsús ndihi cue téé xica cuu ndihi-gá xití bàrcú, te nchaa ñáyiú xǐndecu-áⁿ nǐ cùtnuní iní-yu sá díú-gǎ. ⁵⁵ Te ñáyiú-áⁿ ndihi-ni ní sáháⁿ-yu nchaa núú xǐndecu cue ñáyiú cùhú, te cue ñáyiú cùhú-áⁿ nǐ quèe-yu xití nchido ñáhá-yu cuáháⁿ ndi tnáhá ññu ññu xichi núú ññu-yu tñuhu quèxio Jèsús. ⁵⁶ Te nchaa ññu náhnú ndihi nchaa ññu ññu núú cuáháⁿ Jèsús, ducaⁿ xǐndecá-yu nchaa ñáyiú cùhú cuáháⁿ xití ññu sácáⁿ ñáhǎ-yu núú-gǎ cuendá cada tǎtna ñaha-gǎ xii-yu. Te ññu-ni ducaⁿ xǐquidé-yu nchaa dava-gá xichi núú cuáháⁿ-gá núú xǐndecu cue ñáyiú, te càháⁿ ndàhú-yu núú-gǎ sá ná dáñá-gǎ tnándeé cue ñáyiú cùhú-áⁿ cuèdìcò luha yuhu dǒó-gǎ cuendá ndúha-yu. Te nchaa ñáyiú cùhú ní tnándeé yuhu dǒó-gǎ ní ndúha-yu.

7

Cuendá nchaa sá quidé-xi ngǔndecu cuèchi ñáyiú

(Mt. 15:1-20)

¹ Te ññu Jerusálén ní quee cue téé dácuaaha ñaha xii ñáyiú nchaa tñuhu ní chídó tñuní ndíi Moisés, te ní quexìo-güedé núú ndécú Jèsús, te tnáhá cue téé cùu fariséu ní quexìo ndihi-güedé. ² Te cue téé-áⁿ nǐ xini-güedé sá dáva cue téé xica cuu ndihi Jèsús ñà túú ndàha-güedé dǎtná ndáhá mée cue téé cùu fariséu-áⁿ òré caxi-güedé. Te xíáⁿ ññu cue téé ní quexìo-áⁿ nǐ càháⁿ cuèhé-güedé cuendá cue téé xica cuu ndihi-gá. ³ Te ducaⁿ chi nchaa cue téé cùu fariséu-áⁿ ndihi nchaa ñáyiú isràèl nchìcúⁿ ññu-yu quidé-yu dǎtná ní xóo cada nchaa cue ññu tnáhǎ-yu ní xǐndecu ndéé sanaha, chi nchaa ñáyiú-áⁿ và cǎxí-yu te núu vá ndáhǎ-yu dǎtná ní xóo ndaha nchaa cue ññu tnáhǎ-yu ní xǐndecu ndéé sanaha-ǎⁿ.

4 Te ñáyi-u-án ndi tnahá òré cuáháⁿ-yu núu yáhu te nàsáá-yu, te ndáhá-yu nàcuáa sàni iní-yu ndùvétú iní Yá Ndiòxí, te núu vá dúcáⁿ càdá-yu te vá caxí-yu. Te tnàhá náquèté-yu vàsú sá sácũhuⁿ sá xihí-yu, ndihí lítu, ndihí cóhó càá, ndihí camá. Te nchaa xéhé náquèté-yu nàcuáa sàni iní-yu ndùvétú iní Yá Ndiòxí. Te ío-gá titní sá nĩ xóo cada nchaa ñáyi-u ní xíndecu ndéé sanaha-ãⁿ nchícúⁿ nihnú-yu quidé-yu. 5 Te cue téé cùu fariséu-án, ndihí cue téé dàcuaha ñaha xii ñáyi-u nchaa tnúhu ní chídó tnùní ndíi Moisés-án nĩ xáhaⁿ-güedě xii Jèsús:

—¿Ná cuendá cue téé xica cuu ndihí-n ñá túú nàquete-güedě ndaha-güedě òré caxi-güedě dàtná ní cachí nchaa cue téé ní xíndecu ndéé sanaha-i? —càchí-güedě xáhaⁿ-güedě xii-gá.

6 Te Jèsús ní xáhaⁿ-gá xii-güedě:

—Nchòhó cúú-ndó cuè téé ío dándahú mée-xí chi càchí-ndó sá ío quide ndáá-ndó te ñá ndáá sá quidé ndáá-ndó. Te ní quee ndáá-xi nàcuáa ní chídó tnùní ndíi Chàíá téé ní xóo cáháⁿ tnúhu Yá Ndiòxí ndéé sanaha núu tütú-gá núu cáháⁿ-xi nàcuáa ní cáháⁿ-gá cuendá-ndó, te duha ní cachí-gá:

Ñáyi-u-a càchí-yu sá ío càhnu cuu-í, dico dícó-ni yuhu càháⁿ-yu, chi ñá túú ñùhu iní ñáhã-yu xii-í.

7 Te àuⁿ nã cuu chĩñuhu ñahá-yu xii-í, chi ñá túú vèdana ndéé nándihí-xi, chi cue ñáyi-u-a dàcuahá-yu cue tnàha ñáyiú-yu nàcuáa cundecú-yu, dico mee-ni tnúhu sá nĩ cahu iní cue ñáyi-u ñuyíú-a càháⁿ-yu.

Duha ní chídó tnùní ndíi Chàíá núu tütú Yá Ndiòxí nàcuáa ní cáháⁿ-gá cuendá-ndó.

8 Te nchòhó ní dáñá-ndó nàcuáa ní cachí Yá Ndiòxí cada-ndo, te nchícúⁿ nihnu-ndo quide-ndo nàcuáa ní cahu iní cue ñáyi-u ñuyíú-a, chi nàquete-ni-ndo lítu, te nàquete-ni-ndo vasú sácũhuⁿ sá xihí-ndó nàtava-ndo nàcuáa ní xóo cada ñáyi-u-án nĩ xóo naqueté-yu nchaa xíãⁿ, te nándi-gá nchaa núu sá quidé-ndó —càchí Jèsús xáhaⁿ-gá xii-güedě.

9 Te ní xáhaⁿ tùcu-gá xii-güedě:

—Te nchòhó, ñá túú cuíní-ndó càda-ndo nàcuáa cuíní Yá Ndiòxí, chi mee-ni nàcuáa ní cachí cue téé ní xíndecu ndéé sanaha nchícúⁿ nihnu-ndo quide-ndo. 10 Te

ndíi Moisés ní cachí ndíi sá ncháá ñáyi-u canehé-yu sá yíñùhu núu tãtã-yu ndihí núu nãñã-yu. Te nchaa ñáyi-u na càháⁿ úhú cuendá tãtã-yu àdi cuendá nãñã-yu te cahni ñaha-güedě xii-yu ní cachí ndíi.

11 Te nchòhó càchí-ndó sá núu ìⁿ téé na cũñaha-dě xii tãtã-dě ndihí nãñã-dě sá sá nĩ sani iní-dé cuãñaha-dě xii-yu cùu-xi Corbán, te ñá túú-gá xíní ñùhu-xi sá cuãñaha-dě xii-yu, te tnúhu Còrbán-án quée-xí: Sá cúú cuendá Yá Ndiòxí. 12 Te sá dúcáⁿ ná càháⁿ ìⁿ téé-án te nchòhó chindèe tnúhu-ndo-dě cuendá sá vá chindèe-gá-dě tãtã-dě ndihí nãñã-dě. 13 Te ducaⁿ quide-ndo chi ní dáquée tĩhú-ndó nàcuáa ní cachí Yá Ndiòxí cada-ndo, te mee-ni nàcuáa ta quide cue téé ñuyíú-a véxi nchícúⁿ nihnu-ndo quide-ndo, te diu-ni ducaⁿ ta sànu ichi tnaha-ndo véxi, te nándi-gá nchaa sá cáhú iní-ndó quide-ndo —cachí-gá xáhaⁿ-gá xii-güedě.

14 Te Jèsús ní xáhaⁿ tùcu-gá xii cue ñáyi-u xíndecu-án:

—Chí táquixi ndehe iha, te cundedóho váha-ndo tnúhu na càháⁿ-í-a te ío váha cuáha-ndo cuendá. 15 Nchaa sá xéxí-ndó chi ñá túú nã quidé-xí iní-ndó, dico nchaa sá cuèhé sá dúhá sàni iní-ndó quide-ndo, nchaa xíãⁿ quidé-xí ndècu cuéchi-ndo.

16 Te nchaa nchòhó ñáyi-u ndèdóho nchaa tnúhu càháⁿ-í-a ío váha chí cuãha cuendá —càchí-gá xáhaⁿ-gá xii-yu.

17 Te Jèsús ní dándõ-gá nchaa ñáyi-u núu xixúcu-yu-án te cuándihu-gá xití vehe. Te cue téé xica cuu ndihí-gá ní xicáⁿ tnúhú-güedě núu-gá núu nása quèe-xi cuendú ní caní-gá núu ñáyi-u-án. 18 Te ní xáhaⁿ-gá xii-güedě:

—¿Te náa tnàhá nchòhó ñá túú ní tècú tnùní-ndó cuendú ní caní-í núu ñáyi-u-ãⁿ? Nchaa sá xéxí-yu cuánguee xití-yu ñá túú quide-xi iní-yu nàcuáa ngúndecu cuéchi-yu.

19 Chi ñá díú iní-yu cuánguee-xi chi cuánguee ndáá-xi xití-yu, te nàyáha ñaha-xi xii-yu —càchí-gá xáhaⁿ-gá xii-güedě.

Te sá dúcáⁿ nĩ cáháⁿ-gá te ní dátũu-gá sá cúú càxi-o nchaa núu sá cúú càxi-o. 20 Te ní xáhaⁿ tùcu-gá xii-güedě:

—Nchaa sá cuèhé sá dúhá quide ñáyi-u xíãⁿ cécú nihnu-xi iní-yu, te nchaa xíãⁿ quidé-xí ndècu cuéchi-yu. 21 Te iní-yu-án

cácú ñihnu nchaa sá cuèhé sá dúhá, chi sàni cuehé sání dùha iní-yu. Te cue téè càháⁿ ndihí-güedé ñadìhí te ñá díú ñadìhí-güedé cúu-yu, te ñu-ni ducaⁿ quide cue ñáyiú dìhí càháⁿ ndihí-yu téè te ñá díú yíi-yu cùu-güedé. Te sàhní-yu cue tñaha ñáyiú-yu, te mee-ni ìchi dǐí ìní cúdǐí ìní-yu cundecú-yu. ²² Te dùhu ndachiuⁿ tnahá-yu, te xihó-yu cundecu ndihí-yu sá ndécú ndihí tnahá ñáyiú-yu, te ío quide úhú ìní-yu sá cúu-xí tñaha ñáyiú-yu, te ío dándahú tnahá-yu, te mee-ni nchaa sá cuèhé sá dúhá cúdǐí ìní-yu quidé-yu, te ío cuédú ìní-yu, te ío yíi yùhú-yu, te ío quide cahnú-yu mèé-yu, te quidé-yu nándi-gá sá ñá túú tàu-yu cadá-yu. ²³ Te nchaa sá cuèhé sá dúhá-áⁿ cácú ñihnu-xí ìní-yu, te nchaa xǐáⁿ quidé-xí ndècu cuéchi-yu, te ñá túú cùu-xí sá vaha sá cúu-xí ìní-yu.

Íⁿ ñadìhí véxi ñuú xícá ñǐ sándáá ìní-aⁿ Jèsús

(Mt. 15:21-28)

²⁴ Te ní xica Jèsús cuáháⁿ-gá ndéé yucu cue téè ñuú Tírú, ndihí yucu cue téè ñuú Sidón. Te òré ní quexìo-gá xǐáⁿ te cuànguìhu-gá ñⁿ vehe te xǐáⁿ cundecu-gá, te cuìní-gá sá vǎ quèní ñáyiú sá xǐáⁿ ndécú-gǎ ní cùu, dico dai ní ñihí-yu tñuhu. ²⁵ Te ñⁿ ñadìhí ndécú ñⁿ déhe yoco-aⁿ, te yìhi ñaha espíritú cundìhí yucu ñávaha xii-xi, te ñaha-áⁿ ío ndìhí ní ñihí-aⁿ tñuhu sá ñǐ quexìo Jèsús xǐáⁿ ñuú ní sáháⁿ-aⁿ núú ndécú-gǎ, te ní ngüíñí xítí-áⁿ núú-gǎ. ²⁶ Te ní ngüíta-aⁿ càháⁿ ndàhú-aⁿ núú-gǎ, te xǎhaⁿ-aⁿ sǎ ñuú vá cundèe ìní-gá queñuhu-gá espíritú cundìhí yucu ñávaha yìhi ñaha xii déhe-aⁿ. Dico ñá díú ñaha israél cúu-áⁿ chi ñaha ñuú Sirofènicía cúu-áⁿ te tñuhu griégú cúu tñuhu-aⁿ. ²⁷ Te xǐáⁿ ñuú ní xáhaⁿ Jèsús xii-aⁿ:

—Daña na càxi tnaa nchaa landú chítú xítí-güexi, te dàtnùnì caxi cue ìná, chi ñá túú ndùu váha-xi queheⁿ-o sǎ xéxí landú te cuáha-o ìná —càchí-gá xǎhaⁿ-gǎ xii-aⁿ.

²⁸ Te ní xáhaⁿ-aⁿ xii-gá:

—Mèstrú, ndáá-ni càháⁿ-n, dico ìná chi nàdatacá-güedi sá ngóyó yùhu cóhó landú —càchí-aⁿ xáhaⁿ-aⁿ xii-gá.

²⁹ Te Jèsús ní xáhaⁿ-gǎ xii-aⁿ:

—Ío váha ní cáháⁿ-n, te cuanùhú te ñá túú-gǎ ná cani ìní-n, chi sa ní quee espíritú cundìhí yucu ñávaha yìhi ñaha xii déhe-n —càchí-gá xǎhaⁿ-gǎ xii-aⁿ.

³⁰ Te ñaha-áⁿ ñǐ nasáá-aⁿ vehe-aⁿ te càa déhe-aⁿ núú càamá, dico ñá túú-gǎ espíritú cundìhí yucu ñávaha yìhi ñaha xii-xi chi sa ní quee ñaha-xi.

Jèsús quidé tátna-gá ñⁿ téè ñá cúu càháⁿ váha te doho-dě

³¹ Te Jèsús ní ndee-gá yucu cue téè ñuú Tírú te ní yáha-gá yucu cue téè ñuú Sidón, ndihí yucu ndi úxí ñuú nání Dècápolís, te ní sáá-gá ndéé yuhu làgúná distritú Galileá. ³² Te xǐáⁿ ndécú-gǎ ní quexìo ñáyiú ndéé núú-gǎ ndécǎ-yu ñⁿ téè ñá cúu cáháⁿ váha-dé te doho-dě. Te càháⁿ ndàhú-yu núú-gǎ sá ná tèndaha ñaha-gá xii-dé cuendá ndúha-dé. ³³ Te Jèsús ní queñuhu ñaha-gǎ xii-dé tnuú-yu, te ndèca ñaha-gá cuáháⁿ ñⁿ xio, te ní dáquìhu-gá díquí ndáhá-gǎ yaú lóho-dé, te ní dácànùu-gá díí-gá díquí ndáhá-gǎ, te ní tendaha-gǎ yàa-dé. ³⁴ Te ní ndacoto-gá andiú te ní sánuu ìní-gá, te ní cáháⁿ-gá tñuhu mee-gǎ, te xǎhaⁿ-gǎ:

—ǐĒfatá! —càchí-gá xǎhaⁿ-gǎ xii-dé.

Te tñuhu-áⁿ queé-xí: Nacaáⁿ yòhó lóho.

³⁵ Te òré-ni-áⁿ ñǐ nacaáⁿ lóho-dé, te ní nduu váha yàa-dé, te ní cuu cáháⁿ váha-dé. ³⁶ Te Jèsús ní cáháⁿ víhí-gǎ dóho ñáyiú ndihí ñaha xii téè ní quide tátna-gá-áⁿ sǎ vǎ yòo ñⁿ cùñahá-yu sá ñǐ quide tátna ñaha-gǎ xii-dé, dico uuⁿ-gá ní quidé-yu ní cáháⁿ-yu núú ñáyiú sá ñǐ quide tátna-gá téè-áⁿ. ³⁷ Te ncháa-yu ío ní cuñuhu-yu, te ní xítñahá-yu:

—Váha víhi quide-dé, chi nchaa-ni ndàcu-dé quidé-dě, chi quide tátna-ni-dé ñáyiú doho, te quide tátna-ni-dé ñáyiú ñihí —càchí-yu xítñahá-yu.

8

Jèsús dácàxi-gá cùmí mǐl ñáyiú
(Mt. 15:32-39)

¹ Te ñⁿ nduu tucu ío cuéhé ñáyiú ní tacá núú ndécú Jèsús, te ñá túú tñahí sá cǎxí-yu. Te ní cana-gá cue téè xica cuu ndihí-gá, te ní xáhaⁿ-gǎ xii-güedé:

² —Yúhú, cùndahú ìní-í nchaa ñáyiú-a chi sa ní cuu únì nduu ndècu ndihí

ñahá-yu xii-o iha, te ñá túú tnàhí ná sá cáxí-yu. ³ Te núu na nàtendaha-í-yu núhú tnámă-yu vehé-yu, te cuneé-yu docó ichi, chi davá-yu ío xica ndècú-yu —càchí-gá xăhaⁿ-gă xii-güedé.

⁴ Te ní xăhaⁿ-güedé xii-gá:

—¿Te ndèé níhí-ó să cuăñaha-o càxi nchaa ñáyi-u-a, te iha ñá túú nă ío chi cùu-xi xití yucu-i? —càchí-güedé xăhaⁿ-güedé xii-gá.

⁵ Te Jèsús ní xícáⁿ tnúhú-gă núú-güedé, te xăhaⁿ-gă:

—¿Ná daha-gá pàá ndécú ndihí-ndo-i? —cachí-gá xăhaⁿ-gă xii-güedé.

Te ní xăhaⁿ-güedé xii-gá:

—Ndècu ndihí-ndí úsá-gá tnàhá —càchí-güedé xăhaⁿ-güedé xii-gá.

⁶ Te Jèsús ní xăhaⁿ-gă xii nchaa ñáyi-u sá ngóo-yu nchaá-yu, te ní ngóo-yu, te ní queheⁿ-gá ndi úsá pàá-áⁿ, te ní ndacáⁿ táhú-gă núú Yă Ndiöxí. Te dătnùní ní táhú cuèchi-gá te ní sáñaha-gă xii cue téé xica cuu ndihí-gá ní dácăhñu-güedé nchaa ñáyi-u-áⁿ.

⁷ Te ndècu ndihí-güedé ìⁿ úú chácá lîhli, te ñi-u-ni ducaⁿ ñi quide-gá ní ndacáⁿ táhú-gă núú Yă Ndiöxí. Te dătnùní ní táúchíúⁿ-gă ní dácăhñu ñaha-güedé xií-yu. ⁸ Te nchaá-yu ní xexí-yu ní ndahá xití-yu. Te sátá ñi túhú cóhō-yu te ní nadatácá-güedé nchaa sá ñi quendóo, te ní chítú úsá tnàhá tídihi mee-ni sá ñi quendóo-áⁿ.

⁹ Te núú ncháá ñáyi-u ní xexi-áⁿ xînu dătná cúmí mîl-yu. Te sátá ñi yáha ní dácáxí ñaha Jesús xii-yu te ní dándácá ñaha-gă. ¹⁰ Te dătnùní cuánguee-gá bàrcú ndihí cue téé xica cuu ndihí-gá cuáháⁿ-gă ndihí-güedé yucu cue téé ñuú Dalmànutá.

Cue téé cùu fariséú xăhaⁿ-güedé xii Jèsús cada-gá ìⁿ sá vă yōo tnàhí ndàcu cada

(Mt. 16:1-4; Lc. 12:54-56)

¹¹ Te núú ñi quexìo Jesús xiáⁿ ñi sáá cue téé cùu fariséú, te ní ngüíta-güedé nándi tnúhu xăhaⁿ-güedé xii-gá xító ndèé ñáhá-güedé. Te xăhaⁿ-güedé sá ná cádá-gă ìⁿ sá vă yōo tnàhí ndàcu cada cundehe-güedé nàcuáa cutnùní iní-güedé núu ndáá sá Yă Ndiöxí ní tendaha ñaha-gă xii-gá véxi-gă ñuyíú-a. ¹² Te ní sánuu iní-gá te ní xăhaⁿ-gă xii-güedé:

—Nchaa nchòhó ñáyi-u ndècu ñuyíú-a cuíní-ndó càda-í ìⁿ sá vă yōo tnàhí ndàcu cada nacuáa cutnùní iní-ndó núu ndáá sá Yă Ndiöxí chíndèe ñaha-gă xii-í. Dico na càchí tnúhu ndáá-í xii-ndo să vă cádá-í sá cuíní-ndó —càchí-gá xăhaⁿ-gă xii-güedé.

¹³ Te ní dándōo-gă ñáyi-u xîndecu-áⁿ, te cuánde-gă bàrcú ndihí cue téé xica cuu ndihí-gă te cuáháⁿ-gă ndihí-güedé ndàa ingá xio yuhu làgúná.

Nàcuáa quide cue téé cùu fariséú

(Mt. 16:5-12)

¹⁴ Te ní cunaa-güedé canehe-güedé sá cáxí-güedé quíhíⁿ, te ìⁿndi-ni pàá ndécú xití bàrcú-áⁿ ñi naníhí-güedé. ¹⁵ Te Jèsús ní cáháⁿ-gă dóho-güedé, te xăhaⁿ-gă xii-güedé:

—Na càchí tnúhu-í xii-ndo să ío quíhí iní-ndó cùndecu-ndo te vă cádá cuendá tnàhí-ndo lèvadurá cue téé cùu fariséú, ndihí levadurá cue téé cùndihí té Hèrodés —càchí-gă xăhaⁿ-gă xii-güedé.

¹⁶ Te ní ngüíta-güedé xîtnàha-güedé:

—Cuendá sá ñà túú ní cãnehe-o pàá quixi núu xiáⁿ duha càháⁿ-gă —càchí-güedé xîtnàha-güedé.

¹⁷ Te Jèsús ní cutnùní iní-gă nàcuáa ndùu tnúhu xîtnàha-güedé, núu ní xăhaⁿ-gă xii-güedé:

—¿Ná cuendá da sá ñà túú ní cãnehe-ndo pàá quixi càháⁿ-ndó? Te ñá díú cuendá pàá-áⁿ ní cãháⁿ-í, te dícó-ni sá méé-ndó ñà túú quide cuendá váha-ndo nàcuáa ndùu tnúhu càháⁿ-í, te ni ñă tècú tnùní-ndó chi ío ñi ñi quíúndehú. ¹⁸ Te cuèi ndèhe-ndo dico ñà túú cùtnùní iní-ndó nă cúú nchàa sá quidè-í, te cuèi ndèdóho-ndo nchàa tnúhu càháⁿ-í dico ñà cùtnùní iní-ndó năsa ndùu-xi, te ni ñă ndácú iní-ndó nchàa sá tá quide-í véxi. ¹⁹ Te chí dándàcu iní cùtnàhá ní táhú cuèchi-í úhúⁿ-ni pàá te ní xexi úhúⁿ mîl mee-ni cuè téé chí ñi-u-ni cue téé-áⁿ ñi quíúndehú. Te chí càchí tnúhu ná daha tídihi ní chítú mee-ni sá ñi quendóo òré ní nadatácá-ndó —càchí-gă xăhaⁿ-gă xii-güedé.

Te ní xăhaⁿ-güedé xii-gá:

—Úxúú tnàhá tídihi ní chítú mee-ni sá ñi quendóo —càchí-güedé xăhaⁿ-güedé xii-gá.

Te ní xăhaⁿ-güedé xii-gá:

—Úxúú tnàhá tídihi ní chítú mee-ni sá ñi quendóo —càchí-güedé xăhaⁿ-güedé xii-gá.

Te xăhaⁿ tucu-gă:

²⁰ —Te cùtnàhá ní táhú cuèchi tucu-í úsá tnàhá pàá ní xexi cúmí mîl ñáyi-u, te chí càchí tnúhu ná daha tucu tídihi ní chítú

mee-ni sã nĩ quendóo —càchí-gá xãhaⁿ-gã xii-güedé.

Te ní xáhaⁿ-güedě xii-gá:

—Úsá tnàhá tídihi ní chítú mee-ni sã nĩ quendóo —càchí-güedé xãhaⁿ-güedě xii-gá.

²¹ Te Jèsús ní xáhaⁿ tùcu-gá xii-güedé:

—Vitna, ¿te sa ní tecú tnùní-ndó tnũhu ní cáháⁿ-í àⁿ ñàhá? —càchí-gá xãhaⁿ-gã xii-güedé.

Jèsús quidé tãtna-gá ìⁿ téé cuàá ñuú Bètsaidá

²² Te Jèsús ní sáá-gá ndihi cue téé xica cuu ndihi-gá ñuú Bètsaidá. Te ñuú-áⁿ ndécú-gã ní quexìo ñáyíu núú-gã tánèhé-yu ìⁿ téé cuàá, te cáháⁿ ndàhú-yu núú-gã ñuú vá cùndèe iní-gá tendaha ñàha-gá xii-dé cuendá ndúha núú-dě. ²³ Te Jèsús ní tñi-gá ndaha téé cuàá-áⁿ, te ní queñuhu ñaha-gã tnuú-yu, te ndèca ñaha-gá cuáháⁿ ìⁿ xio yuhu ñuú. Te yàcáⁿ ní dácánùu-gá díí-gá núú-dě te ní tendaha ñàha-gá xii-dé, te dàtnùní ní xícáⁿ tnúhú-gã núú-dě, te xãhaⁿ-gã:

—¿Cùtnuní núú-n-àⁿ? —càchí-gá xãhaⁿ-gã xii-dé.

²⁴ Te téé cuàá-áⁿ nĩ ndonehe núú-dě, te xãhaⁿ-dě xii-gá:

—Cùtnuní núú-í ndéhè-í nchaa cue téé-àⁿ, dico dà ndáa yutnu cuii ndáa-güedé te xica-güedé —càchí-dé xãhaⁿ-dě xii-gá.

²⁵ Te Jèsús ní tendaha tùcu-gá núú-dě te ní cuu ní ndacoto váha-gá-dé, te òré-áⁿ nĩ ndúha núú-dě. Te nchaandi túhú sá ndéhé-dě ní cutnùní váha núú-dě nándi cùu nchaa xíáⁿ. ²⁶ Te ní xáhaⁿ Jèsús xii-dé:

—Vitna te núhú-n, dico ndáá ichi vehe-n nũhú-n te ñá díú dà xití ñuú quíhíⁿ-n, te vá yõo ìⁿ cúñaha-n sã yũhú ní quide tátna-í núú-n nĩ ndúha —càchí-gá xãhaⁿ-gã xii-dé.

Té Pèlú xãhaⁿ-dě xii Jèsús sá díú-gã cúú-gã Crìstú

(Mt. 16:13-20; Lc. 9:18-21)

²⁷ Te Jèsús ní xica-gá cuáháⁿ-gá ndihi cue téé xica cuu ndihi-gá nchaa ñuú líhli càa ñuú Cèsareá Filipú, te òré ñúhú-gã ndihi-güedé ichi te ní xícáⁿ tnúhú-gã núú-güedě, te xãhaⁿ-gã xii-güedé:

—Chí càchí tnúhu nása càháⁿ ñáyíu cuendá-í. ¿Yoo cùu-í càchí-yu-va? —càchí-gá xãhaⁿ-gã xii-güedé.

²⁸ Te ní xáhaⁿ-güedě xii-gá:

—Davá-yu càchí-yu sá cúú-n ndíi Juàá téé ní xóo dacuàndute ñaha xii ñáyíu, te davá-yu càchí-yu sá cúú-n tẽ Èliás, te dava tucú-yu càchí-yu sá cúú-n ìⁿ téé ní xóo cáháⁿ tnúhu Yá Ndiõxí ndéé sanaha, duha càchí-yu —càchí-güedé xãhaⁿ-güedě xii-gá.

²⁹ Te ní xícáⁿ tnúhú tùcu-gá núú-güedě, te xãhaⁿ-gã xii-güedé:

—Te nchòhó, ¿yoo sàni iní-ndó cùu-í-i? —càchí-gá xãhaⁿ-gã xii-güedé.

Te té Pèlú ní xáhaⁿ-dě xii-gá:

—Yòhó cúú-n Crìstú Yaá ní tendaha Yã Ndiõxí véxi ñuyíú-a —càchí-dé xãhaⁿ-dě xii-gá.

³⁰ Te Jèsús ní cáháⁿ-gá dóho-güedé, te xãhaⁿ-gã:

—Vá yõo ìⁿ cúñaha-ndo yòo cuu-í —càchí-gá xãhaⁿ-gã xii-güedé.

Jèsús càháⁿ-gá sá cáhni ñàha-güedé xii-gá (Mt. 16:21-28; Lc. 9:22-27)

³¹ Te Jèsús ní ngüíta-gá xĩtnũhu-gá cue téé xica cuu ndihi-gá nàcuáa yáha-gá, te xãhaⁿ-gã xii-güedé:

—Yúhú Téé cùu ñaní tnáhá-ndó nchaa-ndo chí ío ndoho-í, chí daquèe tíhú ñáhá nchàa cue téé cùu sacuéhé nũú ñáyíu isràél, ndihi cue dútú cùnùu, ndihi cue téé dàcuaha ñaha xii ñáyíu nchaa tnúhu ní chídó tnùní ní chídó tnùní ndíi Moisés, nchaa cue téé-áⁿ dàquee tíhú ñáhá-güedě xii-í. Te sáa nduu te cahni ñaha-güedě xii-í, dico nduu úní sá cúú-í te ndoto-í —càchí-gá xãhaⁿ-gã xii-güedé.

³² Te ducaⁿ nĩ cáháⁿ Jèsús núú cue téé xica cuu ndihi-gá nàcuáa tecú tnùní váha-güedé tnúhu cáháⁿ-gá. Te té Pèlú ní cana ñaha-dě xii-gá ìⁿ xio, te ní ngüíta-dé ténàá ñáhá-dě xii-gá ní cùu.

³³ Dico Jèsús ndíi-ni ní nchócuĩhnu-gá ní ndàcoto-gá núú nchàa-güedé chí ndàa sátá-gã xĩndecu-güedé, te ní ngüíta-gá ténàá-gá té Pèlú, te xãhaⁿ-gã xii-dé:

—¿Xocuíñí yòhó núú-í-a, chí dàtná càháⁿ yucu ñávàha càháⁿ-n! Chí ñá túú sàni iní-ò dàtná sání iní Yã Ndiõxí, chí ìⁿ-ni sàni iní-ò ndihi dava-gá cue ñáyíu ndècu ñuyíú-a —càchí-gá xãhaⁿ-gã xii-dé.

³⁴ Te Jèsús ní cana-gá nchaa cue téé xica cuu ndihi-gá, ndihi nchaa ñáyiú xíndecu-án, te ní xáhaⁿ-gã:

—Nchaa ñáyiú cuíni chitnahá ñáhá xii-í, te xini ñuhu-xi vá cáda-gã-yu sá sání ìní mée-yu, te ío cada ndee ìní-yu cundecu túha-yu ndohó-yu cuèndá-í, te cuèi na ndòhó-yu dàtná ndoho-í. ³⁵ Te nchaa ñáyiú cuíni sá ñà túú tnàhí ná yáha cundecu ñuyíú-a cuíta nihnú-yu, dico nchaa ñáyiú ñá túú tnàhí yùhú cuèi nándi sá ná yáha-yu cundecú-yu ñuyíú-a sá cuèndá-í, ndihi sá cuèndá tnúhu-í, te ñáyiú-án naníhí tàhú-yu. ³⁶ Te cuèi nchaandi túhú sá ío ñuyíú-a na nihí ñáyiú cundecu ndihí-yu, dico núu ñu nchaa xíáⁿ ná cáda cuíta nihnú-yu te ñá túú vèdana nàndíhí-xi sá dúcáⁿ ndècu ndihí-yu nchaa xíáⁿ. ³⁷ Te ni ìⁿ sá ío ñuyíú-a vá chíndèe-xi ñáyiú cuèndá naníhí tàhú-yu. ³⁸ Te nchaa ñáyiú na cùcahaⁿ núú-xi cáhán váha cuèndá-í, ndihi cuèndá tnúhu-í núu nchaa ñáyiú dàquee tihú ñáhá xii Yá Ndiòxí, ñáyiú xíndecu ichi cuèhé ichi duha, te tnàhá yùhú Téé cùu ñaní tnàhá-yu nchaá-yu cuc-ahaⁿ núú-í núú-yu òré ná quixi tucu-í ndihi cue espíritú xínú cuèchi núú Tàtà-í Dútú Ndiòxí. Te mee-gã cada cutnùni ìní nchaa ñáyiú sá yùhú ío càhnu cuu-í.

9

¹ Te na càchí tnúhu ndáá-í xii-ndo sá ío dava nchòhó ñáyiú xíndecu iha vitna vá cùu-ni-ndo, chi cundecu-ni-ndo ndèé quini-ndó sàá nduu ndihu ndaha ñàha Yá Ndiòxí xii ñáyiú, te dàvá-án quini-ndó sá ndácú-gã quidé-gã nchaandi túhú sá vaha —càchí-gã xáhaⁿ-gã xii cue téé xica cuu ndihi-gá ndihi cue ñáyiú-án.

*Jèsús ní nadama dóo-gã ndihi núú-gã
(Mt. 17:1-13; Lc. 9:28-36)*

² Te núú ìnú nduu sá dúcáⁿ ñí cáhán Jèsús te ní xica-gá cuásaá-gá ìⁿ yucu dùcúⁿ, te ndèca-gá té Pèlú, ndihi té Jàcobó, ndihi té Juáa cuásaá, te úní tnàhí-ni cue téé-án ndécá-gã cuásaá. Te yucu-án ndécú-gã ní nadama núú-gã, ³ te ní nadama dóo-gã. Te dóo-gã-án sùúni ñí nduu cuixíⁿ quiyí te tásaⁿ, te ni ìⁿ ñáyiú ñuyíú-a ñá túú ndàcú-yu naqueté-yu ìⁿ dóo nduu cuixíⁿ dàtná ní nduu dóo-gã. ⁴ Te ní xiní-güedé té

Moisés ndihi té Èliás nútní-güedé ndihi-gá ndátnúhu ndihi ñaha-güedé xii-gá. ⁵ Te té Pèlú ní xáhaⁿ-dè xii Jèsús:

—Mèstrú, ¡váha ní cuu sá ndécú-ó iha vitna! Te na dàcaa-ndí úní tnàhá vehe tnu-vixiⁿ, te ìⁿ cuu cuèndá-n te ìⁿ cuu cuèndá té Moisés te ìⁿ cuu cuèndá té Èliás —càchí-dé xáhaⁿ-dè xii-gá.

⁶ Te ducaⁿ ñí cáhán-dé chi ío ní yùhú-güedé, te cuèndá-ni ní cuu yáchí-dé ní cáhán-dé, te ni mée-dé ñá túú ní cùtnuní ìní-dé nása nduu tnúhu ní cáhán-dé. ⁷ Te òré-án ñí quexio ìⁿ vícò núú ndécú-güedé ndihi Jèsús ní dádáhu ñaha-xi xii-güedé ndihi-gá, te xití vícò-án ñí cáhán Yá Ndiòxí ní tecú dóho-güedé, te xáhaⁿ-gã xii-güedé:

—Téé-a cùu-dé Déhe-í téé ío cùu ìní-í, te cundedóho-ndo nchaa tnúhu càhán-dé —càchí-gã xáhaⁿ-gã xii-güedé.

⁸ Te òré ní quide cuèndá-güedé, te ñá túú-gã ní xiní-güedé cue téé úú-án chi mee-nã Jèsús ndécú.

⁹ Te òré cuánuu ndihi ñaha-gã xii-güedé yucu-án, te ní cáhán-gá dóho-güedé, te xáhaⁿ-gã:

—Vá yóo ìⁿ cùñaha-ndo nchaa sá ñí xiní-ndó núú ñí sáá-ó-á, te cuu cáhán-ndó dico ndèé ná yáha ndoto yùhú Téé cùu ñaní tnàhá-ndó nchaa-ndo sá cùú-í —càchí-gã xáhaⁿ-gã xii-güedé.

¹⁰ Núu xíáⁿ cue téé-án ñí xúhuⁿ nahi-ni ìní-güedé nchaa sá ñí xiní-güedé núú ñí sáhán-güedé ndihi Jèsús te ñá túú tnàhí ñí cáhán-güedé, dico ní ndúcú tnúhu núú tnàhá-güedé ná cuèndá ducaⁿ ñí cáhán-gá sá ndèé ná yáha ndoto-gá sá cùú-gá te dàtnùni cáhán-güedé nàcuáa nduu nchaa sá ñí xiní-güedé. ¹¹ Te ní xícaⁿ tnúhú-güedé núú Jèsús, te xáhaⁿ-güedé xii-gá:

—¿Cuíni-ndí cachí tnúhu-n ñá cuèndá càchí cue téé dàcuaha ñaha xii ñáyiú nchaa tnúhu ní chído tnùni ndí Moisés sá dñhna-gá té Èliás ndixi-dé te dàtnùni quixi Yá tendaha Yá Ndiòxí quixi ñuyíú-a? —càchí-güedé xáhaⁿ-güedé xii-gá.

¹² Te Jèsús ní xáhaⁿ-gã:

—Ndáá sá códo núu ìⁿ téé quixi-dé te cada-dé dàtná ní quide té Èliás, te téé-án cada ndáá-dé nchaa nàcuáa cùu. Dico núú tütú Yá Ndiòxí cáhán-xi cuèndá yùhú Téé cùu ñaní tnàhá-ndó nchaa-ndo sá ío

ndoho-í, te daquèe tihú ñáhá ñáyiú xii-í. ¹³ Te na càchí tnúhu-í xii-ndo vitna sá sà ní quixi ñá tée ní quide dàtná ní xóo cada té Èliás, te cue ñáyiú ñá túú ní cànehé-yu sá yíñùhu núú-dě, te ní quide ñáhá-yu xii-dé nchaa nàcuáa ní quixi iní méè-yu. Te núú tütú Yá Ndiöxí sa ndéé tnuní nchaa nàcuáa yáha-dé, te nchaa xíáⁿ sa ní quide ñaha ñáyiú xii-dé —càchí-gá xáhaⁿ-gã xii-güedé.

Jesús quidé tãtna-gá ñá tée cuechi yíhi ñaha espíritú cündihí yucu ñávãha
(Mt. 17:14-21; Lc. 9:37-43)

¹⁴ Te Jèsús ní ndexìo-gá ndihí cue tée úní-áⁿ núú xíndecu dava-gá cue tée xica cuu ndihí-gá, te vai vihi ñáyiú ndècu núú ndécú-güedé-áⁿ, te tnáhá cue tée dàcuaha ñaha xii-yu nchaa tnúhu ní chídó tnùní ndíi Moisés xíndecu, te cue tée-áⁿ nãndi tnúhu xáhaⁿ-güedé xii cue tée xica cuu ndihí Jesús. ¹⁵ Te òré ní xiní-yu ní ndexìo-gá, te nchaá-yu ío ní cuñúhu-yu, te xinú-yu ní sáháⁿ ní cáháⁿ ndihí ñáhá-yu xii-gá. ¹⁶ Te ní xicáⁿ tnúhú-gã núú cuè tée xica cuu ndihí-gá núu ná tnúhu ndàtnúhu-güedé ndihí cue tée-áⁿ. ¹⁷ Te ñáyiú xíndecu xíáⁿ ñí xáhãⁿ-yu xii-gá:

—Mèstrú, ndèca-í déhe-í véxi nãnducu ñaha-í xii-n, chí yíhi ñaha espíritú cündihí yucu ñávãha xii-dé, te ñá xíáⁿ ní quide ní cuu ñíhí-dé. ¹⁸ Te ío ndòho-dé chí súúni ndèni ní cuu ngótní ñaha-xi xii-dé, te òré ducaⁿ quide ñaha-xi xii-dé te dànduá ñáhá-xí, te quène tíñú yuhu-dé, te cùrúhñú nùhu-dé, te ndàda ruúⁿ ñáhá-xí xii-dé. Te sa ní xáhaⁿ-í xii cue tée xica cuu ndihí-n sá queñùhu-güedé espíritú cündihí yucu ñávãha yíhi ñaha xii-dé dico ñá túú ní ndàcu-güedé queñuhu-güedé-xi —càchí ñáyiú-áⁿ xáhãⁿ-yu xii-gá.

¹⁹ Te Jèsús ní xáhaⁿ-gã:

—¡Nchaa nchòhó ñáyiú ndècu ñuyíú-a ío sàa iní-ndó, chí ñá túú cuíni-ndó quíndáa iní-ndó Yá Ndiöxí, te ní cuu vai nduu quide ndee iní-í nchaa sá quidé-ndó! ¿Te ná ndéé ama vá dúcáⁿ-gã cada-ndo-i? Te chí cándèca tée cùhú-áⁿ táquixi iha —cachí-gá xáhaⁿ-gã xii-yu.

²⁰ Te ñáyiú ndihí ñaha xii tée yíhi ñaha espíritú cündihí yucu ñávãha-áⁿ ndéca

ñáhá-yu xii-dé cuáháⁿ ndéé núú Jèsús, te òré ní xiní ñáhá espíritú cündihí yucu ñávãha-áⁿ xii-gá, te ní ngüíta-ni-xi sàhni yíhi ñáhá tùcu-xi xii-dé, te ní dànduá ñáhá-xí xii-dé, te ní ngüíta-dé xíchí ñùhu-dé, te quène tíñú yuhu-dé. ²¹ Te Jèsús ní xicáⁿ tnúhú-gã núú tãtá-dě, te xáhaⁿ-gã xii-dé:

—¿Ná ndéé ama ní ngüíta-xi duha ndòho déhe-n? —càchí-gá xáhaⁿ-gã xii-dé.

Te tée-áⁿ ñí xáhaⁿ-dě xii-gá:

—Ndéé cútnáhá cúú líhli-dé ní ngüíta espíritú cündihí yucu ñávãha duha quide ñaha-xi xii-dé. ²² Te ní cùtítní xito dàngaunihmu ñaha-xi xii-dé núú ñùhú, te ní cutítní tucu xito dàngaunihnu ñaha-xi xii-dé ndute cuíni-xi cahni ñaha-xi xii-dé. Te ndèca-í-dé véxi núú-n te núu ndacu-n càda tãtna-n-dě, te cundáhú iní ñáhá-n xii-ndí chindee ñaha-n —cachí-dé xáhaⁿ-dě xii-gá.

²³ Te Jèsús ní xáhaⁿ-gã:

—Te ná cuendá càchí-n núu ndacu-í cada tãtna-í déhe-n, chí nchaa ñáyiú na quíndáa iní ñáhá xii-í te ñíhí-yu sá ná càcáⁿ-yu núú-í —càchí-gá xáhaⁿ-gã xii-dé.

²⁴ Te tãtá tée cuechi-áⁿ ñíhi ní cáháⁿ-dé xáhaⁿ-dě xii-gá:

—Sàndáa iní ñáhá-í xii-n, dico chindee ñaha xii-í cuendá ná quíndáa iní ñáhá-gã-í xii-n —càchí-dé xáhaⁿ-dě xii-gá.

²⁵ Te Jèsús ndéhé-gã sá ío vai ñáyiú ta tàcá núú ndécú-gã-áⁿ. Te ní tenáa-gá espíritú cündihí yucu ñávãha-áⁿ, te xáhaⁿ-gã xii-xi:

—Yòhó espíritú cündihí yucu ñávãha, ní quide ñíhí-n ñí quide doho-n tée-a, dico vitna yúhú càchí-í sá quée-n yìqui cuñú-dé te vá ndíhu-gá-n —càchí-gá xáhaⁿ-gã xii espíritú cündihí yucu ñávãha-áⁿ.

²⁶ Te espíritú cündihí yucu ñávãha-áⁿ ñí dácáná sàa ñaha-xi xii tée-áⁿ, te ní sahni yíhi ñáhá tùcu-xi xii-dé, te dàtnùní ní quee ñaha-xi xii-dé cuáháⁿ-xi, dico tée-áⁿ chí dacàa-ni ndíyí càa-dé cãtùu-dé. Te nchaa ñáyiú xíndecu xíáⁿ càchí-yu sá ñí xíhí-dé ní cùu. ²⁷ Te Jèsús ní tñí-gã ndaha-dé ní ndocani ñaha-gã xii-dé, te ní ndacóo-dé ní nucúnutnii-dé.

²⁸ Te Jèsús cuándihu-gá xití vehe ndihí cue tée xica cuu ndihí-gá, te òré ndéhé-güedé

ñá túú-gǎ ñáyiú, te ní xícáⁿ tnúhú-güedě núú-gǎ, te xǎhaⁿ-güedě xii-gǎ:

—Cachí tnúhu xii-ndí ná cuendá ñá túú ní ndàcu-ndí queñuhu-ndí espíritú cündìhi yucu ñávǎha yìhi ñaha xii té-ǎⁿ —càchí-güedě xǎhaⁿ-güedě xii-gǎ.

²⁹ Te Jèsús ní xǎhaⁿ-gǎ xii-güedé:

—Na càchí tnúhu-í xii-ndo sǎ nǔú òré cuení-ndó queñuhu-ndo espíritú cündìhi yucu ñávǎha yìhi ñaha xii ñáyiú dàtná cúú espíritú cündìhi-xi yìhi ñaha xii té-ǎⁿ ní cùú ñá, te xìni ñuhu-xi sǎ ìo cáháⁿ ndìhi-ndo Yǎ Ndiǒxí te ñá túú tnàhí ná caxi-ndo cǎháⁿ ndìhi-ndo-gǎ, te ducaⁿ te ndacu-ndo queñuhu-ndo espíritú cündìhi yucu ñávǎha yìhi ñaha xii ñáyiú —càchí-gǎ xǎhaⁿ-gǎ xii-güedé.

Jèsús càháⁿ tucu-gǎ sǎ cǎhni ñàha-güedé xii-gǎ

(Mt. 17:22-23; Lc. 9:43-45)

³⁰ Te Jèsús ní quee-gǎ núú ndécú-gǎ-ǎⁿ ndìhi cue téé xìca cuu ndìhi-gǎ cuáháⁿ-gǎ ndìhi-güedé distritú Galileá, te cuení-gǎ sǎ vǎ quení ñáyiú ndèé ichi cuáháⁿ-gǎ. ³¹ Te ducaⁿ nǐ sani iní-gǎ, chi mee-gǎ sa nàha-gǎ sǎ ndáá cada-xi nàcuáa xǎhaⁿ-gǎ xii cue téé xìca cuu ndìhi-gǎ, te duha xǎhaⁿ-gǎ xii-güedé:

—Yúhú Téé cùú ñaní tnáhá-ndó nchǎa-ndo sǎá ñⁿ nduu te cuáha cuendá ñáhá-güedé xii-í núú cuè téé cùú úhú iní ñáhá, te cǎhni ñaha-güedě xii-í, dico nduu úní sǎ cùú-í te ndoto-í —càchí-gǎ xǎhaⁿ-gǎ xii-güedé.

³² Dico ñá túú tnàhí ni tècú tnùní-güedé nása ndùú tnúhu ní cáháⁿ-gǎ, te ni ñá túú ní cùyì-güedé cǎcáⁿ tnúhú-güedě núú-gǎ.

Cue téé ndùcu tnúhu núú tnáhá nǔú ndédacàa-güedé ìo-gǎ cúnùú

(Mt. 18:1-5; Lc. 9:46-48)

³³ Te Jèsús ní quexìo-gǎ ndìhi cue téé xìca cuu ndìhi-gǎ ñuú Capèrnaúm, te òré sa ndècu-gǎ ñⁿ vehe te ní xícáⁿ tnúhú-gǎ núú-güedě, te xǎhaⁿ-gǎ xii-güedé:

—¿Nándi cùú tnúhu ta xìtnàha-ndo véxi? —càchí-gǎ xǎhaⁿ-gǎ xii-güedé.

³⁴ Dico ñá túú tnàhí ni cǎháⁿ-güedé cúñaha-güedě xii-gǎ nǔú ná tnúhu xìtnàha-güedé òré ñúhú-güedě ichi. Te

ducaⁿ nǐ quide-güedé chi cuendá tá ndàtnúhu-güedé nǔú ndédacàa-güedé ìo-gǎ cúnùú. ³⁵ Te Jèsús ní ngóo-gǎ, te ní xǎhaⁿ-gǎ xii ndi ùxúú cue téé xìca cuu ndìhi-gǎ:

—Chí táquixi iha te cundedóho-ndo tnúhu na càháⁿ-í-a. Te núú ìo dava-ndo cuení-ndó cùnùú-ndo, te cada-ndo sǎ cúú-ndó ñáyiú nchìcúⁿ cuí-nǎ, te cunu cuechi-ndo nǔú tnàha ñáyiú-ndo —càchí-gǎ xǎhaⁿ-gǎ xii-güedé.

³⁶ Te Jèsús ní sanutnǐ-gǎ ñⁿ té lǐhli cuádava tnuú-güedé, te dàtnùní ní nguídèhé ñáhá-gǎ xii-dé, te xǎhaⁿ-gǎ xii-güedé:

³⁷ —Nchaa ñáyiú na queheⁿ cuendá ñⁿ té lǐhli dàtná té lǐhli-a cuendá sǎ ñúhú iní ñáhǎ-yu xii-í ñá, te cada iní-yu sǎ yúhú ní queheⁿ cuendá-yu. Te nchaa ñáyiú na queheⁿ cuendá ñáhá xii-í te ñá díú-ní mèe-í ní queheⁿ cuendá-yu, chi tnàhá Tǎtà-í Dútú Ndiǒxí Yaá ní tendaha ñàha xii-í véxi-í ñuyúú-a ní queheⁿ cuendá-yu —càchí-gǎ xǎhaⁿ-gǎ xii-güedé.

Nchaa ñáyiú ñá túú cùú úhú iní ñáhá xii-o te cündìhi ñáhá-yu

(Mt. 10:42; Lc. 9:49-50)

³⁸ Te té Juáa diu-ni ñⁿ téé xìca cuu ndìhi-gǎ ní xǎhaⁿ-dě xii-gǎ:

—Mèstrú, ní xiní-ndí ñⁿ téé càcunehe ñaha-dé xii-n, te queñuhu-dé espíritú cündìhi yucu ñávǎha yìhi ñaha xii ñáyiú, te nchúhú ñá túú ní dàña-gǎ-ndí ducaⁿ càda-dé, chi ñá túú xìca cuu ndìhi ñaha-dé xii-o —càchí-dé xǎhaⁿ-dě xii-gǎ.

³⁹ Te Jèsús ní xǎhaⁿ-gǎ xii-güedé:

—Dàña-ndo na càda nahi-dé ní cùú, chi ñá túú nǐ ñⁿ ñáyiú ndìhi ndìhi-ni ndacu cáháⁿ cuèhé cuendá-í te núú càcunehe ñáhá-yu xii-í, te quidé-yu sǎ vǎ yǒo tnàhí ndàcu cada. ⁴⁰ Te nchaa ñáyiú ñá túú cùú úhú iní ñáhá xii-o te cündìhi ñáhá-yu. ⁴¹ Te na càchí tnúhu-í xii-ndo sǎ cuè ñáyiú na tàxi ñⁿ yaxiⁿ ndute coho-ndo cuendá sǎ cúú-ndó cuè téé xìca cuu ndìhi-í, te ñáyiú-ǎⁿ sǎá nduu te dacuèi sǎ nihí-yu sǎ ndúú tǎhǔ-yu —càchí-gǎ xǎhaⁿ-gǎ xii-güedé.

Cada cuendá-ó vǎ cündècu-o ichi cuehé ichi duha

(Mt. 18:6-9; Lc. 17:1-2)

⁴² Te xǎhaⁿ tucu Jèsús xii-güedé:

—Te núu ìⁿ téé na dàcaháⁿ-dé cue ñáyiú sàndáá iní ñáhá xii-í cadá-yu nándi sá cuèhé sá dúhá, te váha-gá sá núu na dàcutu ndeé-güedé ìⁿ yúú yódó dúcúⁿ-dë, te dàquée ñaha-güedë xii-dé xití ndute làmár, te ñá díú sá cündècu-dé ducaⁿ càda-dé. ⁴³ Te núu ìⁿ xio ndaha-ndo quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tãhú-ndó cuèi na cuíta ìⁿ xio ndaha-ndo te ñá díú sá quihíⁿ-ndó nihíi ní ndúú-ndó núú ùhú núú ndàhú núú dícó sàá ndáhá itá ñuhú ni caa ni quihíⁿ. ⁴⁴ Chi yàcáⁿ cúú-xí núú ñà túú tñàhí ndàhvá ñuhú, te ío ndoho-ndo cündecu-ndo xíáⁿ ni caa ni quihíⁿ. ⁴⁵ Te núu ìⁿ xio sáhá-ndó quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tãhú-ndó cuèi na cuíta ìⁿ xio sáhá-ndó, te ñá díú sá quihíⁿ-ndó nihíi ní ndúú-ndó núú ùhú núú ndàhú núú dícó sàá ndáhá itá ñuhú ni caa ni quihíⁿ. ⁴⁶ Chi yàcáⁿ ñá túú tñàhí ndàhvá ñuhú, te ío ndoho-ndo cündecu-ndo xíáⁿ ni caa ni quihíⁿ. ⁴⁷ Te núu ìⁿ xio tinùu-ndo quide-xi quide-ndo nándi sá cuèhé sá dúhá, te tava-ndo cuíta-xi, chi váha-gá sá cündècu-ndo núú ndécú Yá Ndiöxí táxí tñuní-gá cuèi na cuíta ìⁿ xio tinùu-ndo, te ñá díú sá ndi nduú xio núú-ndó quihíⁿ-ndó núú ùhú núú ndàhú. ⁴⁸ Chi yàcáⁿ ñá túú tñàhí ndàhvá ñuhú, te ío ndoho-ndo cündecu-ndo xíáⁿ ni caa ni quihíⁿ.

⁴⁹ Te dàtná quidé-güedë quiti sàhni-güedë chìhi-güedë cuñú-di ñíi te dàquée-güedë núú ñuhú, ducaⁿ sãtnahá-xi ndoho cue ñáyiú chi ío ndohó-yu. ⁵⁰ Te ñíi chi ío váha nándihí-xi, dico núu na ndùu víxiⁿ-xi te ñá túú-gã nándihí-xi te ni ñà túú-gã nása cada-o ndùu úhá tucu-xi. Te ío váha cada cuendá-ndó nãcuáa cündecu-ndo cuendá cuu-ndo ñáyiú váha, te ducaⁿ te cuu-ndo dàtná ñíi sã ñà túú ndùu víxiⁿ, te ío váha cündecu ndihí tñaha-ndo —cachí-gá xãhaⁿ-gã xii-güedë.

10

Jèsús càháⁿ-gá cuendá cue ñáyiú dàña tñaha
(Mt. 19:1-12; Lc. 16:18)

¹ Te Jèsús ní xica-gá cuáháⁿ-gá ní yáha-gá yucu distritú Jùdeá ní téhndé-gá ndàa ingá xio yúte Jòrdán. Te yàcáⁿ ndécú-gã ní tacá tucu cuèhé víhí ñáyiú, te ní ngüita-ni tucu-gá dánèhé ñáhá-gã xii-yu tñuhu-gá chi ducaⁿ tñàhí quide-gá. ² Te ní quèxio ìⁿ úú cue téé cùu fariséú núú ndécú Jèsús xito ndèé ñáhá-güedë xii-gá núu nása cunduu tñuhu càháⁿ-gá, te xãhaⁿ-güedë xii-gá:

—Véxi-ndí xicáⁿ tñuhú-ndí núú-n núu cuu daña ìⁿ téé ñadihí-dé ãⁿ ñáhá —càchí-güedë xãhaⁿ-güedë xii-gá.

³ Te Jèsús ní xãhaⁿ-gã xii-güedë:

—Te nchòhó, ¿nása ní cachí ndíi Moisés cada-ndo-i? —càchí-gá xãhaⁿ-gã xii-güedë.

⁴ Te ní xãhaⁿ-güedë xii-gá:

—Ndi Moisés ní cachí ndíi sá cúú dàña ìⁿ téé ñadihí-dé dícó-ni sá cadúha-dé ìⁿ tutú cuãñaha-dë, te núú tütú-án codo tñuní sá nì dáñá ñaha-dé, te ducaⁿ te cuu daña-dë ñadihí-dé —càchí-güedë xãhaⁿ-güedë xii-gá.

⁵ Te Jèsús ní xãhaⁿ-gã xii-güedë:

—Te ducaⁿ nì chídó tñuní ndíi Moisés cada-ndo cuendá sá ío sàá iní-ndó. ⁶ Dico Yá Ndiöxí cútñahá ní cadúha-gá ñuyúú ndihí nchaa sá ío, chi téé ñadihí ní cadúha-gá. ⁷ Te xíáⁿ núu nchaa cue téé na nihí ñadihí-xi, te dñⁿ-ná cada-güedë tãtã-güedë ndihí nãná-güedë, chi mee-nã ñadihí-güedë cuu cuu ndihí-güedë. ⁸ Te cue ñáyiú úú-án ñà túú-gã ndí dñⁿ ndí dñⁿ yiqui cuñú cúú-yu, chi cada iní-ndó sã ìⁿ-nã yiqui cùñú cúú-yu. ⁹ Te xíáⁿ núu ñá túú ndùu váha-xi daña cuè téé ñadihí-güedë, chi mee Yá Ndiöxí ní cachí-gá sá cúú úú-yu cundécú-yu ndéé naa ndéé cuú-yu —càchí-gá xãhaⁿ-gã xii-güedë.

¹⁰ Te òré yíhí Jèsús ndihí cue téé xica cuu ndihí-gá vehe, te ní xicáⁿ tñuhú-güedë núú-gã nása ndùu tñuhu ní càháⁿ-gá cuendá cue ñáyiú dàña tñaha. ¹¹ Te Jèsús ní xãhaⁿ-gã xii-güedë:

—Te núu ìⁿ téé na dàña-dé ñadihí-dé te naqueheⁿ-dé ingá ñadihí, te ío nèhé quidé-dë, te ìⁿ-ni cuèchi cùu-xi ndihí cuèchi quide téé ndèca ñadihí te càháⁿ ndihí-dé ingá ñadihí. ¹² Te dñⁿ-ni ducaⁿ sãtnahá-xi cùu tucu ñáyiú dñⁿ te núu na dàñá-yu yí-yu te naquehéⁿ-yu ingá téé, chi ìⁿ-ni cuèchi

cùu-xi sá quidě-yu ndihí sá quidé cuè ñáyiú dîhí ndécú yî-xi, te càháⁿ ndihí-yu ingá téé —càchí-gá xăhaⁿ-gă xii-yu.

Jèsús xicáⁿ táhú-gă núú Yă Ndiöxí cuendá landú

(Mt. 19:13-15; Lc. 18:15-17)

¹³ Te ìⁿ ũú ñáyiú ndécá-yu landú lîhli cuáháⁿ núú Jèsús, chi cuíní-yu sá tэндàha ñaha-gá xii-güexi. Te cue téé xica cuu ndihí-gá ní ngüíta-güedé ténáá ñáhá-güedé xii-yu, te xăhaⁿ-güedé sá vă dúcáⁿ càdá-yu.

¹⁴ Te òré ní xini-gá sá dúcáⁿ quide-güedé, te ní cudééⁿ-gă núú-güedé, te xăhaⁿ-gă xii-güedé:

—Chí dáñá ná quixi nahi cue landú lîhli-áⁿ nüú-í-a te vă càdí-ndó ìchi-güexi, chi dàtná cúú vâha iní cue landú lîhli-áⁿ ducaⁿ cùu váha iní cue ñáyiú yindaha Yá Ndiöxí.

¹⁵ Te ña càchí tnúhu ndáá-í xii-ndo sã nüú vă quindáá iní ñáhá-ndó dàtná quidé cuè landú lîhli sàndáá iní ñáhá xii-í, te vă ndîhu ndaha ñàha Yá Ndiöxí xii-ndo —càchí-gá xăhaⁿ-gă xii-güedé.

¹⁶ Te sáta dúcáⁿ ñí xăhaⁿ-gă te ní nguídèhé-gá cue landú-áⁿ te ní tendaha ñàha-gá xii-güexi, te ní xicáⁿ táhú-gă núú Yă Ndiöxí cuendá-güexi.

Ìⁿ téé cuica càháⁿ ndihí-dé Jèsús

(Mt. 19:16-30; Lc. 18:18-30)

¹⁷ Te òré sa ñûhu ichi Jesús caca-gá quíhíⁿ-gá ingá xichi ni cùu ní quexio cunu ìⁿ téé ní ngüíñí xítí-dé núú-gă, te xăhaⁿ-dê xii-gá:

—Yòhó Mèstrú, cùu-n téé ío váha iní-xi, te cuíní-í nüú vă cündèe iní-n càchí tnúhu-n ñă cúú sã càdà-í cuendá nduu táhù-í cundecu-í ndihí Yá Ndiöxí ñi caa ñi quíhíⁿ —càchí-dé xăhaⁿ-dê xii-gá.

¹⁸ Te Jèsús ní xăhaⁿ-gă xii-dé:

—¿Te cùtnuní iní-n năcuáa ndùu tnúhu càháⁿ-n sã yûhú váha iní-àⁿ? Chi ìⁿdîi díi-ni Yá Ndiöxí ío váha iní-gá. ¹⁹ Te yòhó xini-n năcuáa ní cachí Yă Ndiöxí cada ñáyiú, te duha ní cachí-gá: “Nchòhó cue téé vă càháⁿ ndihí-ndo ñàdihí te núú ñá díú ñàdihí-ndó cúú-yu, te ducaⁿ-ni nchòhó cue ñáyiú dîhí tucu vă càháⁿ ndihí-ndo tēe te núú ñá díú yî-ndo cuu-güedé, te vă cáhni-ndó tnàha ñáyiú-ndo, te ni vă dúhú-ndó sã

ndécú ndihí-yu, te ni vă dácàcu-ndo cuéchi neñúú sá cúú-xí tnàha ñáyiú-ndo, te ni vă dăcuàndehnde-ndo, te canehe-ndo sã yîñùhu núú tătá-ndó ndihí núú năná-ndó”, duha ní cachí Yă Ndiöxí cada ñáyiú —càchí-gá xăhaⁿ-gă xii-dé.

²⁰ Te téé-áⁿ ñí xăhaⁿ-dê xii-gá:

—Mèstrú, nchaa xiáⁿ ní ngüíta-í quidè-í ndéé cùtnàhá cúú landú-í —càchí-dé xăhaⁿ-dê xii-gá.

²¹ Te Jèsús ní xindéhé ñàha váha-gá xii-dé, te ní cuu váha iní ñáhá-gă, te ní xăhaⁿ-gă xii-dé:

—Dico cùmání ingá núú sã càdá-n. Vitna te quíhíⁿ-n te dico-n nchaa sá ndécú ndihí-n, te díhúⁿ-n cuăha táhú-n cuè ñáyiú ndàhú. Te ducaⁿ, te nduu táhú-n núcúndecu váha-n núú ndécú Yă Ndiöxí táxí tnùn-í-gá, te sáta ná yăha ducaⁿ càda-n, te quixi-n chitnahá ñáhá-n xii-í cuéi na ndòho-n datná ndòho-í —càchí-gá xăhaⁿ-gă xii-dé.

²² Te sá dúcáⁿ ñí xăhaⁿ Jèsús xii-dé te ío ní cundiýí-dé chi ío cuica-dê, te ní xica-dé cuánuhú-dé.

²³ Te ní ndacoto-gá ñi càndéé dîñi-gá, te ní xăhaⁿ-gă xii cue téé xica cuu ndihí-gá:

—Cue ñáyiú cuica chi ío úhú quindáá iní-yu Yá Ndiöxí cuendá ndîhu ndaha ñàha-gá xii-yu —càchí-gá xăhaⁿ-gă xii-güedé.

²⁴ Te cue téé xica cuu ndihí-gá-áⁿ ío ní cuñúhu-güedé năcuáa ní cáháⁿ-gá, te ní xăhaⁿ tucu-gá xii-güedé:

—Nchòhó cue téé xica cuu ndihí-í càchí tnúhu tucu-í xii-ndo sã ío úhú quindáá iní cue ñáyiú cuica Yă Ndiöxí cuendá ndîhu ndaha ñàha-gá xii-yu, chi sàni iní-yu sá ncháá sã ndécú ndihí-yu dácácu nihnu ñàha-xi xii-yu núú ùhú núú ndàhú. ²⁵ Te yáchí-gá yăha ìⁿ càméyu yaú ìⁿ yiqui ticú dácúxí sã quindáá iní ìⁿ ñáyiú cuica Yă Ndiöxí cuendá ndîhu ndaha ñàha-gá xii-yu —càchí-gá xăhaⁿ-gă xii-güedé.

²⁶ Te cue téé xica cuu ndihí-gá ní cuñúhu vîhi-gá-güedé sá dúcáⁿ ñí cáháⁿ-gá, te ní ngüíta-güedé xitnàha-güedé:

—¿Te yoo sa ndacu naníhí tãhú te núú ducaⁿ vâiⁿ? —càchí-güedé xitnàha-güedé.

27 Te Jèsús ní xíndéhé vǎha ñaha-gǎ xii-güedé, te ní xáhaⁿ-gǎ:

—Nchaa ñáyiú ñuyíú-a chi vá ndácü-yu ná cadá-yu nàcuáa ndíhu ndaha ñàha Yá Ndiöxí xii-yu, dico mee-gǎ chi ndacu-gǎ ndíhu ndaha ñàha-gǎ xii-yu, chi nchaandi túhú sǎ vǎha ndacu-gǎ quidé-gǎ —càchí-gǎ xǎhaⁿ-gǎ xii-güedé.

28 Te té Pèlú ní xáhaⁿ-dǎ xii-gǎ:

—Nchúhú ní dándöo-ndí nchaandi túhú sǎ ndécú ndíhi-ndí te ní tuha ñaha-ndí xii-n —càchí-dé xǎhaⁿ-dǎ xii-gǎ.

29 Te Jèsús ní xáhaⁿ-gǎ xii-dé:

—Na càchí tnúhu ndáá-í xii-ndo sǎ ncháá ñáyiú na dándöo vehe-xi, àdi ñaní-xi, cúha-xi, tǎtá-xi, nǎná-xi, déhe-xi, àdi ñuhu-xi, te núu ducaⁿ na cadá-yu sǎ cuendá-í ndíhi sǎ cuendá tnúhu-í, 30 te ío-gǎ cuéhé sǎ cuǎñaha Yá Ndiöxí cundecu ndíhi-yu, chi níhi-yu vehé-yu, ñuhú-yu, ñaní-yu, cúha-yu, nǎná-yu, déhe-yu, te ñá díú-ní sǎ nchàa xǎⁿ níhi-yu cundecu ndíhi-yu, chi tnàhá nduu táhü-yu cundecu ndíhi ñàhá-yu xii-í ni caa ni quíhíⁿ ná sǎá nduu. Dico díhna-gǎ ndoho tnàhá-yu núu ñuyíú-a sǎ cuendá-í. 31 Te dava ñáyiú cùnnuu ndecu ichi Yá Ndiöxí vitna, ñáyiú-áⁿ sǎá nduu te vá ío-gǎ cunúú-yu dàtná cùnúú-yu vitna, te dava ñáyiú nchícúⁿ ñá túú cùnnuu vitna ñáyiú-áⁿ sǎá nduu te ío cunúú-yu —càchí-gǎ xǎhaⁿ-gǎ xii-güedé.

Jèsús càháⁿ tucu-gǎ sǎ cáhni ñàha-güedé xii-gǎ

(Mt. 20:17-19; Lc. 18:31-34)

32 Te ñuhu Jesús ichi ndíhi cue téé xica cuu ndíhi-gǎ cuásaá ndíhi ñaha-gǎ xii-güedé ñuu Jerusálén, te yòdo nuu-gǎ núu-güedé cuásaá. Te cue téé-áⁿ xícuñúhu-güedé sǎ dúcáⁿ cuǎháⁿ-gǎ ñuu Jerusálén, te dava cue ñáyiú xínchícúⁿ xiyùhú-yu. Te ní taudíⁿ-gǎ ndí ùxúú cue téé xica cuu ndíhi-gǎ, te ní ngúíta-gǎ cání-gǎ cuendú núu-güedé nchaa nàcuáa yáha-gǎ. 33 Te xǎhaⁿ-gǎ xii-güedé:

—Vitna ñuhu-o ichi cuásaá-ó ñuu Jerusálén, te yácaⁿ cuáha cuendá ñàhá-güedé xii yúhú Téé cùu ñaní tnàhá-ndó nchàa-ndo núu cuè téé cùu dútú cùnùu, ndíhi núu cuè téé dàcuaha ñaha xii ñáyiú nchaa tnúhu ní chídó tnùní ndí Moisés. Te díu cue

téé-áⁿ cùñaha-güedé xii dava-gǎ cue téé sǎ cáhni ñàha-güedé xii-í, te cuáha cuendá ñàhá-güedé xii-í núu cuè téé ñá túú cùu cue téé isràél. 34 Te cue téé-áⁿ cudíquí ndéé ñàhá-güedé xii-í, te caniha-güedé ndíhi ñíi, te tíú díi ñàhá-güedé, te cahni ñaha-güedé xii-í dico nduu úní sǎ cùú-í te ndoto-í —càchí-gǎ xǎhaⁿ-gǎ xii-güedé.

Té Jàcobó ndíhi té Juáá càháⁿ ndàhú-güedé núu Jèsús sǎ cadá-gǎ ñⁿ sǎ cuíní-güedé (Mt. 20:20-28)

35 Te cue déhe té Zebèdeú té Jàcobó ndíhi té Juáá ní quexìo-güedé núu Jèsús, te xǎhaⁿ-güedé xii-gǎ:

—Mèstrú, véxi-ndí càháⁿ ndàhú-ndí núu-n núu vá cündèe iní-n càda-n ñⁿ sǎ cuíní-ndí —càchí-güedé xǎhaⁿ-güedé xii-gǎ.

36 Te Jèsús ní xícaⁿ tnúhú-gǎ núu-güedé, te xǎhaⁿ-gǎ:

—¿Ná cúú sǎ cuíní-ndó càda-í-i? —càchí-gǎ xǎhaⁿ-gǎ xii-güedé.

37 Te ní xáhaⁿ-güedé xii-gǎ:

—Cuíní-ndí sǎ òré ná sǎá nduu cundecu-n núu táxi tnùní-n, te ñⁿ-ndí cunucóo-ndí xio cùha-n te ñⁿ-ndí cunucóo-ndí xio dàtni-n —càchí-güedé xǎhaⁿ-güedé xii-gǎ.

38 Te Jèsús ní xáhaⁿ-gǎ xii-güedé:

—Nchòhó, ñá túú cùnuni iní-ndó nàcuáa nduu sǎ xícaⁿ-ndó núu-í. ¿Te náa cundee iní-ndó dándöho ñaha ñáyiú xii-ndo dàtná dándöho ñàhá-yu xii-í, te cundee tùcu iní-ndó càhni ñàhá-yu xii-ndo dàtná cahni ñàhá-yu xii-í-áⁿ? —càchí-gǎ xǎhaⁿ-gǎ xii-güedé.

39 Te ní xáhaⁿ-güedé xii-gǎ:

—Cundee iní-ndí yáha-ndí nchaa nàcuáa càháⁿ-n-áⁿ —càchí-güedé xǎhaⁿ-güedé xii-gǎ.

Te Jèsús ní xáhaⁿ-gǎ xii-güedé:

—Ndáá sǎ cündèe iní-ndó ndòho-ndo nchaa nàcuáa ndòho-í, te cundee tùcu iní-ndó càhni ñàhá-yu xii-ndo, chi yúhú cahni ñàhá-yu xii-í. 40 Dico sǎ dúcáⁿ cuíní-ndó sǎ ñⁿ-ndó cùnucóo-ndo xio cuhá-í te ñⁿ-ndo cùnucóo-ndo xio datni-í, te xǎⁿ chi ñá díú yúhú tàú-í càchí-í te núu sǎ cúú cùnucóo-ndo àdi sǎ vá cúú cùnucóo-ndo, chi mee Tǎtà-í Dútú Ndiöxí càchí-gǎ te núu ná cúú ñáyiú nduu táhú cunucóo díñi-í dàvá-áⁿ —càchí-gǎ xǎhaⁿ-gǎ xii-güedé.

41 Te òré ní níhí ùxí-gá cue téé xica cuu ndihí-gá tnúhu nàcuáa ndùu sá cuíní té Jàcobó ndihí ñaní-dé té Juáá, te ní cudééⁿ-güedé núú cuè téé úú-áⁿ. 42 Te Jèsús ní cana-gá nchaá cue téé xica cuu ndihí-gá-áⁿ, te ní xáhaⁿ-gã xii-güedé:

—Nchòhó xìní-ndó sã cuè téé yìndaha ìⁿ nacióⁿ quide-güedé sá ìo cùnùu-güedé, te nchaá dava-gá cue téé cùndihí-güedé tnàhá-güedé quidé-güedé sá ìo cùnùu-güedé. 43 Dico nchòhó chi vá dúcáⁿ càda-ndo. Chi núu dava-ndo cuíní-ndó cùnùu-ndo te xini ñuhu-xi cunu cuechi núú tnàhá-ndó te vá cáda-ndó sã cùnùu-ndo. 44 Te núu dava-ndo cuíní-ndó quène cáva-ndo, te cuu-ndo dàtná cue ñáyiú ñá túú tnàhí dàñá quee núú chíúⁿ pàtróóⁿ-xi cunu cuechi núú tnàhá-ndó. 45 Te yúhú Téé cùu ñaní tnàhá-ndó nchàa-ndo, chi ñá túú vèxi-í sá cúnú cuèchi ñáyiú núú-í, chi véxi-í sá cúnú cuèchi-í núú-yu. Te cuú-í ñuyíú-a cuèndá vèi-yu cácu nihnu núú ùhú núú ndàhú — càchí-gá xáhaⁿ-gã xii-güedé.

Jèsús quidé tãtna-gá ìⁿ téé cuàá nání-dé Bartimeú
(Mt. 20:29-34; Lc. 18:35-43)

46 Te Jèsús ní quexìo-gá ñuú Jericó ndihí cue téé xica cuu ndihí-gá, te ní yáha-gá ndihí-güedé ichi xití ñuú-áⁿ, te ìo cuéhé ñáyiú nchìcúⁿ ñáhá xii-gá cuáháⁿ te ìⁿ xio yuhu ìchi sá ñí quee xití ñuú-áⁿ núcõo ìⁿ téé cuàá nání-dé Bartimeú, te tãtá-dé nání-dé Tìmeú, te téé-áⁿ núcõo-dé yuhu ìchi-áⁿ xicáⁿ ndàhú-dé. 47 Te téé-áⁿ ñí cutnùnì iní-dé sá Jèsús téé ñuú Nazàrét ñúhú-dé ichi, te ní ngüíta-dé níhi càháⁿ-dé, te xáhaⁿ-dè xii-gá:

—Jèsús, ñaní tnàhá ndí Dàvíí, cundàhú iní ñáhá xii-í! —càchí-dé xáhaⁿ-dè xii-gá.

48 Te vèi ñáyiú tènáá ñáhã-yu xii-dé, te xáhãⁿ-yu sá ná càdí-dé yuhu-dé dico uuⁿ-gá níhi ní cáháⁿ-dé xáhaⁿ-dè xii-gá:

—Jèsús, ñaní tnàhá ndí Dàvíí cundàhú iní ñáhá xii-í! —càchí-dé xáhaⁿ-dè xii-gá.

49 Te Jèsús ní ngüíñí-gá te ní xáhaⁿ-gã xii cue téé ndihí-gá:

—Chí cuãnguaca téé cuàá-ãⁿ can-deca-ndo-dé quixi iha —càchí-gá xáhaⁿ-gã.

Te cue téé-áⁿ ñí xica-güedé cuãnguaca-güedé téé cuàá-áⁿ, te òré ní quexìo-güedé núú-dé te ní xáhaⁿ-güedé xii-dé:

—Ndacuíñí te vá ndihú-gá iní-n, na quihíⁿ-ó chi càna ñaha Jèsús xii-n — càchí-güedé xáhaⁿ-güedé xii-dé.

50 Te téé-áⁿ ñí xócání-dé dóo ndíxí-dé, te ndíhi-ni ní ndacuíñí-dé te ní xica-dé cuáháⁿ-dé núú Jèsús. 51 Te òré ní quexìo-dé te ní xicáⁿ tnúhú-gã núú-dé, te xáhaⁿ-gã xii-dé:

—¿Ná cuíní-n càda ñaha-í xii-n-í? — càchí-gá xáhaⁿ-gã xii-dé.

Te téé cuàá-áⁿ ñí xáhaⁿ-dè xii-gá:

—Mèstrú, cuíní-í cada tãtna-n núú-í cuèndá cundehe-í —càchí-dé xáhaⁿ-dè xii-gá.

52 Te Jèsús ní xáhaⁿ-gã xii-dé:

—Cuanùhú vitna, chi sa ní ndúha núú-n chi ní sándáá iní-n Yã Ndiõxí —càchí-gá xáhaⁿ-gã xii-dé.

Te òré-ni-áⁿ ñí ndúha núú-dé te nchìcúⁿ-dé Jèsús cuáháⁿ.

11

Jèsús cuãnguahu-gá ñuú Jerusàlén

(Mt. 21:1-11; Lc. 19:28-40; Jn. 12:12-19)

1 Te Jèsús ní cuyatni-gá ndihí cue téé xica cuu ndihí-gá ñuú Bètaniá, ndihí ñuú Bètfaqé, te xíáⁿ cáá yùcu nani Olivú, te yatni víí-nã xíáⁿ cáá ñuú Jerusàlén. Te Jèsús ní cana-gá úú-ni tnàhá cue téé xica cuu ndihí-gá. 2 Te ní xáhaⁿ-gã xii-güedé:

—Chí cuáháⁿ ñuú cáá yàtni yacáⁿ, te òré quexìo-ndo yacáⁿ te naníhí-ndó ìⁿ búrru ndètníⁿ-dì, te vátá yõo ìⁿ-gá codo ñàha xii-dì, te nandaxi-ndo-dì te candeca-ndo-dì quixi.

3 Te núu yoo na càcáⁿ tnúhú núú-ndó nã cuèndá nándaxi-ndo-dì, te cúñaha-ndo sã yùhú Yáá xicá cùu ndihí-ndo xini ñuhu-í-dì, te na yàha canehe chiuⁿ-í-dì te ndíhi-ni nã tendaha-í-dì, duha cúñaha-ndo —càchí-gá xáhaⁿ-gã xii-güedé.

4 Te cue téé-áⁿ ñí xica-güedé cuáháⁿ-güedé, te òré ní quexìo-güedé ñuú-áⁿ te ní naníhí-güedé ìⁿ búrru ndètníⁿ-dì ìⁿ yutnu nihnu yatni ìⁿ yuyehe vehe caa yatni yuhu ichi, te ní ngüíta-güedé nándaxi-güedé-dì.

5 Te meì òré nándaxi-güedé-dì ní quexìo

—¿Ná cuèndá nándaxi-ndo búrru-áⁿ-í? — càchí-yu xáhãⁿ-yu xii-güedé.

6 Te cue téé-án nǐ xáhaⁿ-güedě xií-yu nàcuáa ní xáhaⁿ Jèsús cúñaha-güedě. Te sáta dúcáⁿ te ní dáñá-yu ndèca-güedé búrru-án cuáháⁿ núú ndécú Jèsús. 7 Te òré ní quexìo-güedé ndihì-di núú ndécú-gă, te ní sacáⁿ ndodo-güedé dóo-güedé sáta-di, ní ngódó ñaha Jesús xii-di. 8 Te ío cuéhé ñáiyu ta sàcáⁿ-yu dóo-yu ichi cuáháⁿ-gá cuendá núú dǒo-yu-án yáha-gá ndihì quiti yòdo-gá, te davá-yu xèhndé-yu ndaha yùtnu ta sacáⁿ-yu cuáháⁿ.

9 Te nchaá ñáiyu yòdo nuu núú-gă ndihì nchaá ñáiyu nchìcúⁿ ndàa sáta-gă ní ngüita-yu níhi càháⁿ-yu, te càchì-yu:

—Ío càhnu cuu Yaá-a! ¡Te Yá Ndiöxí ná chindee ñaha-gá, chi diu-gá cúú-gă Yaá ní tendaha-gă véxi quide núú-gă! 10 ¡Te diu-ni Yaá-á cúú-gă Yaá véxi quindaha ñaha xii-o datná ní xóo cada ndíi Dàvíl! ¡Te ndéé nchaá sá ío andíu na càchì-xi sá ío càhnu cuu-gă! —duha càchì-yu.

11 Te Jèsús ní quexìo-gă ñuu Jerusàlén, te cuànguihu-gá xití veñúhu càhnu sá ío cùnunu, te ní xíndéhé vâha-gá nchaá sá ndécú xití veñúhu-án. Te sáta dúcáⁿ te ní ndee-gá cuáháⁿ-gá ñuu Bètaniá ndihì ndi ùxúú cue téé xica cuu ndihì-gá chi sa ní cuaa.

*Jèsús xâhaⁿ-gă xii yutnu ngüxí sá vă cúúⁿ-gă sávidí-xi
(Mt. 21:18-19)*

12 Te nduu tnéé-án nǐ quee Jèsús ñuu Bètaniá ndihì cue téé xica cuu ndihì-gá, te ichi ñuhu-gá ní xihí-gá docó. 13 Te xica nǐ xiní-gá nútnǐ ñⁿ yutnu ngüxí, te ní xica-gă cuándéhé-gă ñuu ndéé sávidí-xi te ñá túú nă ndéé, chi mee-ni ndàha-xi ndéé chi ñá díú yóo sácundeé sávidí-xi. 14 Te Jèsús ní xáhaⁿ-gă xii yutnu ngüxí-án:

—Vitna te vá yóo ñⁿ-gá caxi sávidí-n, chi vá cúúⁿ-gă —càchì-gă xâhaⁿ-gă xii yutnu ngüxí-án.

Te cue téé xica cuu ndihì-gá ní tecú dóho-güedé nàcuáa ní xáhaⁿ-gă xii yutnu ngüxí-án.

*Jèsús ñá túú tnàhá iní-gá nàcuáa quide ñáiyu xití veñúhu
(Mt. 21:12-17; Lc. 19:45-48; Jn. 2:13-22)*

15 Te Jèsús ní quexìo tucu-gá ndihì cue téé xica cuu ndihì-gă ñuu Jerusàlén, te

cuànguihu tucu-gá xití veñúhu càhnu sá ío cùnunu, te xití veñúhu-án xíndecu cue ñáiyu quide ndáhú nádìcò-yu, ndihì cue ñáiyu xísaaⁿ. Te nchaá-yu ní queñuhu ñaha Jèsús xií-yu quehé, te ní dándüá-gá mèsá cue ñáiyu dàma díhúⁿ, ndihì nchaá xilé sácóo nchihì cue ñáiyu dico lómá xíndecu xití veñúhu-án. 16 Te ñá túú tnàhí-gá ní dàña-gá yáha cue ñáiyu ndihì nchaá sá nchídö-yu ichi xití veñúhu-án. 17 Te ní xáhaⁿ-gă xií-yu:

—Núú tütú Yă Ndiöxí càháⁿ-xi nàcuáa ní càháⁿ-gá, te ní cachì-gá: “Vehe-í cúú-xi vèhe núú tàcá ñáiyu ñihì ñuyíú càháⁿ ndihì ñàhá-yu xii-í”, duha ní càháⁿ-gá càchì-xi núú tütú-gă. Dico nchòhó quidé-ndó vèhe-gá vehe ñadúhú —càchì-gă xâhaⁿ-gă xií-yu.

18 Te nchaá dütú cùnunu, ndihì nchaá cue téé dàcuaha ñaha xií-yu nchaá tnúhu ní chídó tnùnì ndíi Moisés ní tecú dóho-güedé nàcuáa ní càháⁿ-gá te ní ngüita-güedé ndúcú-güedé nàcuáa cada-güedé cahni ñaha-güedé xii-gă, chi yùhú-güedé sá ío cunuu-gă, te ducaⁿ chi nchaá ñáiyu ío cùñúhu-yu nchaá tnúhu càháⁿ-gă. 19 Te òré sa ní cuaa cuí-nă, te ní quee tucu Jèsús ndihì cue téé xica cuu ndihì-gă ñuu Jerusàlén cuáháⁿ-gá ndihì-güedé ingá xichi.

*Ní yíchí yutnu ngüxí
(Mt. 21:20-22)*

20 Te nduu tnéé nehé-ni ní yáha tucu Jèsús ndihì cue téé xica cuu ndihì-gá núú níhnú yùtnu ngüxí, te ní xiní-güedé sa ní yíchí ñihí ndéé yóho-xi. 21 Te té Pèlú ní ndacu iní-dé nàcuáa ní xáhaⁿ Jèsús xii yutnu ngüxí-án, te ní xáhaⁿ-dě xii-gă:

—Mèstrú, cundehe nă ní yíchí yutnu ngüxí sá nǐ xáhaⁿ-n să vă cúúⁿ-gă sávidí-xi —càchì-dé xâhaⁿ-dě xii-gă.

22 Te Jèsús ní xáhaⁿ-gă xii-güedé:

—Quindáa ndisa iní-ndó Yă Ndiöxí. 23 Te na càchì tnúhu ndáá-í xii-ndo să ñuu nchòhó cúñaha-ndo xii tìndúú-a xocuíñi-xi núú ndécú-xi, te quíhíⁿ-xi quée-xi xití làmár. Te diu ducaⁿ càda-xi te núu nchòhó vá cánì ñⁿ canì úú iní-ndó, te quindáa iní-ndó să dúcáⁿ càda-xi. 24 Te xǎⁿ ñuu càchì tnúhu-í xii-ndo să nchàa sá ná càcáⁿ-ndó ñuu Yă Ndiöxí òré càháⁿ ndihì-ndo-gă, te taxi-gă te núu nchòhó sàndáa ndisa iní-ndó să

táxi-gã sá xicáⁿ-ndó nũú-gã. ²⁵ Te òré càháⁿ ndihí-ndo Yã Ndiõxí te dandacu iní-ndó te núu ndècu ñáiyu ñá túú cùu vaha iní ñáhá xii-ndo, te cada càhnu iní-ndõ-yu cuendá ducaⁿ càda cahnu iní ñáhá Tãtá-ndó Dũtú Ndiõxí Yaá ndécú àndiu xii-ndo cuendá nchaa sá ñà túú vaha quide-ndo. ²⁶ Dico núu nchòhó vá cádá càhnu iní-ndó sã quidé ñàha tnahá ñáiyu-ndo xii-ndo, te ni Tãtá-ndó Dũtú Ndiõxí vá cádá càhnu iní ñáhá-gã xii-ndo cuendá nchaa sá ñà túú vaha quide-ndo —cachí-gã xãhaⁿ-gã xii-güedé.

*Jèsús ndécú ndihí-gã tnúhu ndee iní
(Mt. 21:23-27; Lc. 20:1-8)*

²⁷ Te Jèsús ní ndexìo tucu-gã ñũu Jerusálén ndihí cue tée xica cuu ndihí-gã, te cuánguìhu tucu-gã xití veñúhu càhnu sá ìo cùnũu ndihí-güedé. Te xití veñúhu-án yíhí-gã ní quexìo cue dútú cùnũu ndihí cue tée dàcuaha ñaha xii ñáiyu nchaa tnúhu ní chídó tnùnì ndí Moisés, ndihí cue tée cùu sacuéhé núu ñáiyu isràél. ²⁸ Te xãhaⁿ-güedé xii-gã:

—Cuìní-ndí cachí tnúhu-n xii-ndí nása ndũu tnúhu ndee iní ndécú ndihí-n núu quide-n nándi sá quidé-n, ¿te yoo ducaⁿ ní taxi tnúhu ndee iní-án xii-n-í? —cachí-güedé xãhaⁿ-güedé xii-gã.

²⁹ Te Jèsús ní xãhaⁿ-gã xii-güedé:

—Yúhú tnàhá-í cuìní-í cácaⁿ tnúhu-í ñⁿ sá cácaⁿ tnúhu-í núú-ndó te núu na càchí tnúhu-ndo, te cachí tnúhu-í xii-ndo yòo ní taxi tnúhu ndee iní xii-í duha quide-í. ³⁰ Te chí càchí tnúhu xii-í yoo ní táuchíúⁿ ñí dácúándüte ndí Juáá ñáiyu, ¿Yá Ndiõxí ãⁿ cuè tée ñuyúú-a ní táuchíúⁿ dùcaⁿ ní quide ndí? Te chí càchí tnúhu —cachí-gã xãhaⁿ-gã xii-güedé.

³¹ Te ní ngüíta-güedé xítnàha-güedé:

—¿Nása cúñaha-o? Chi núu na cúñaha-o sã Yã Ndiõxí ní táuchíúⁿ dùcaⁿ ní quide ndí Juáá ñá, te quesaha-dé: “¿Ná cuendá ñá túú ní sàndáá iní-ndó tnúhu ní cáháⁿ ndí vèiⁿ?”; quesaha-dé. ³² Te ni vã cúú cúñaha-o sã cuè ñáiyu ñuyúú-a ní táuchíúⁿ dùcaⁿ ní quide ndí Juáá —cachí-güedé xítnàha-güedé.

Te ducaⁿ ñí xítnàha-güedé chí ñá túú ní cùnũu iní-güedé nása cúñaha-güedé xii-gã, chí xiyúhú-güedé cue ñáiyu chí nchaa ñáiyu-án ñí cutnùnì ndáá iní-yu sá

Yã Ndiõxí ní táuchíúⁿ-gã ducaⁿ ñí quide ndí Juáá. ³³ Te ní xãhaⁿ-güedé xii Jèsús:

—Ñá túú xìnì-ndí yoo ní táuchíúⁿ dùcaⁿ ní dácúándüte ndí Juáá ñáiyu —cachí-güedé xãhaⁿ-güedé xii-gã.

Te Jèsús ní xãhaⁿ-gã xii-güedé:

—Te núu ducaⁿ te ni yúhú vá càchí tnúhu-í xii-ndo yòo ní taxi tnúhu ndee iní duha quide-í —cachí-gã xãhaⁿ-gã xii-güedé.

12

*Cuendá cue tée cuihna iní-xi
(Mt. 21:33-46; Lc. 20:9-19)*

¹ Te Jèsús ní ngüíta-gã cánì-gã ñⁿ cuendú núu ñáiyu nàcuáa tecú tnùnì-yu tnúhu-gã, te xãhaⁿ-gã xii-yu:

—Ñⁿ tée ní nacúxi-dé mee-ni yòho yaha stilé núú ñúhú-dé, te ní chidoco-dé cuendá sá vã cúú dàñú, te ní cadúha-dé núú quíhí-dé ndéhé yoho yaha stilé-án òré ná cùu, te ní cadúha-dé ñⁿ xító dùcúⁿ núú cáúndòdo cue tée coto yoho yaha stilé-án.

“Te ní sáá ñⁿ nduu quèe-dé quíngaca cuu xica-dé vèi nduu, te ní dándòo ndaha-dé sá ñí xitu-dé-án xii ñⁿ úú cue tée càháⁿ ndihí-dé cuendá cada chiⁿ-güedé, te ní ndatnúhu-güedé sá òré ná cúú te cuu cuendá dava-güedé te ducaⁿ te ní quee-dé cuáhán-dé. ² Te sátá ñí sáá nduu ñí cuu ndéhé yoho yaha stilé sá ñí xitu-dé-án, te ní xãhaⁿ-dè xii ñⁿ tée xínu cuechi núú-dé: “Cuáhán cácaⁿ-n sá cúú cuendá-í núú cuè tée ní dándòo ndàha-í nchaa yoho yaha stilé sá ñí xitu-í-án”, càchí-dé xãhaⁿ-dè. Te tée xínu cuechi-án ñí xica-dé cuáhán-dé. ³ Te cue tée-án ñí tñi-güedé tée xínu cuechi-án, te ní caniha-güedé xii-dé, te dàtnùnì ní nacúíⁿ ñáhá-güedé, te ñá túú tnàhí ná ní sãñaha-güedé. ⁴ Te tée cùu xítóhó yoho yaha stilé-án ñí tendaha tùcu-dé íngá tée xínu cuechi núú-dé cuáhán-dé. Te òré ní quexìo tée xínu cuechi-án te cue tée-án ñí sáha ñaha-güedé yúú xii-dé, te ní táhú-güedé díquí-dé, te ní xícuèhé ñáhá-güedé xii-dé. ⁵ Te tée cùu xítóhó nchaa yoho yaha stilé-án ñí tendaha tùcu-dé íngá tée xínu cuechi núú-dé cuáhán-dé núú cuè tée-án, dico tée-án òré ní quexìo-dé te ní sahní ñaha-güedé xii-dé. Te tée cùu xítóhó nchaa yoho yaha stilé-án ñí tendaha-dé vèi-gã cue tée xínu cuechi núú-dé cuáhánⁿ

ngácáⁿ-güedé sá cúú cuendá-dé ní cùu dico diu-ni ducaⁿ ñi quide ñaha tùcu cue té ndèé nchaa yoho yàha stilé-áⁿ xii-güedé, chi dava-güedé ní caniha-güedé te dava-güedé ní sahani ñaha-güedé.

6 Te téé cùu xítóhó nchaa yoho yàha stilé-áⁿ ndécú ñⁿdii-ná téé tendaha-dé quíhíⁿ núú cuè téé ní dándóo ndaha-dé sá ñi xitu-dé-áⁿ, te téé tendaha-dé-áⁿ cúú-dé déhe ducuⁿ-dé, te ío cùu iní ñáhá-dé. Te ní sani iní-dé: “Váha-gá ñúu tendaha-í déhe-í-a núhú-dé, chi òré quini ñáhá-güedé xii-dé te cànehe-güedé sá yíñùhu núú-dé”, duha ní sani iní-dé. Te ducaⁿ te ní xáhaⁿ-dè xii déhe-dé-áⁿ sá núhú-dé, te téé-áⁿ cuñuhú-dé cuáháⁿ ngácáⁿ-dé sá cúú cuendá tátá-dé núú cuè téé-áⁿ. 7 Dico òré ní xini cue téé quide chiuⁿ-áⁿ déhe téé cùu xítóhó nchaa yoho yàha stilé-áⁿ, te ní xítàha-güedé: “Téé-áⁿ téé véxi nduu táhú ñuhu-a ndihi sá cáá núú-xi, dico cahni-o-dé te mee-o ndùu táhú-ó sá ndúú táhú-dé”, duha ní xítàha-güedé. 8 Te ní tñi-güedé téé-áⁿ, te ní sahani ñaha-güedé, te ní dáquéné-güedé yiqui cùñú-dé ñⁿ xio yuhu ñùhu núú cáá yòho yaha stilé-áⁿ — duha cuáháⁿ cuendú ní cani Jèsús núú-yu.

9 Te Jèsús ní xáhaⁿ tùcu-gá xií-yu:

—¿Te nchòhó sa cùtnuní iní-ndó nàcuáa cada xítóhó ñuhu-áⁿ áⁿ? Chi núhú-dé te cahni-dé cue téé-áⁿ te dándóo ndaha-dé ñuhu-dé xii cue téé cùtnuní iní-dé cada ndáá —càchí-gá xàhaⁿ-gá xií-yu.

10 Te xàhaⁿ tùcu-gá xií-yu:

—Te nchòhó, náa ñá túú dàcuaha-ndo núú tütú Yá Ndiòxí núú càchí-xi:

Yúú sá ñi dáquéé tñí cue téé dàcaa vehe, ní cuu-xi yúú cúnùu vitna.

11 Chi mee Yá Ndiòxí ducaⁿ ñi càchí-gá cundu, te cùu-xi ñⁿ sá ío cùñùhu-o vitna. Duha càchí-xi núú tütú-gá —càchí Jèsús xàhaⁿ-gá xií-yu.

12 Te cue téé ní xíndedóho nàcuáa ndùu tñíhu ní cáháⁿ-gá ní cuini-güedé tñi ñaha-güedé xii-gá ní cùu, chi ní cùtnuní iní-güedé sá cuendá-güedé ní cáháⁿ-gá, dico ní yuhú-güedé tñi ñaha-güedé xii-gá cuendá sá ío vai ñáiyu, te ná ío ná cada ñáhá-yu xii-güedé ní sani iní-güedé, te ní xica-güedé cuáháⁿ-güedé.

Cuendá impuèstú

(Mt. 22:15-22; Lc. 20:20-26)

13 Te sátá ñi xica-güedé cuáháⁿ-güedé, te ní tendaha-güedé ñⁿ úú cue téé cùu fariséú, ndihi ñⁿ úú cue téé cùndihi té Hèrodés cuáháⁿ-güedé núú ndécú Jèsús ndúcú-güedé nàcuáa cada-güedé daticánuu ñaha-güedé xii-gá núú tñíhu cáháⁿ-gá. 14 Te cue téé-áⁿ ñi quexio-güedé núú Jèsús, te xàhaⁿ-güedé xii-gá:

—Mèstrú, cùtnuní iní-ndí sá ío ndáá cáháⁿ-n, te ñá túú quide cuendá-n nàcuáa cáháⁿ ñáiyu, te cuèi ndédani cáá-yu ñⁿ-ni cáháⁿ-n ndihí-yu chi ñá túú quide cuendá-n cuèi ná ñáiyu cùú-yu, te cáháⁿ ndáá-n nàcuáa cáháⁿ Yá Ndiòxí cundecu-o ñúyíu-a. Te cachí tñíhu xii-ndí ñúu váha-ni quide-ndí sá chàhu-ndí té Cèsár téé ío cùnuu cuendá impuèstú áⁿ ñáhá —càchí-güedé xàhaⁿ-güedé xii-gá.

15 Dico Jèsús ní cùtnuní iní-gá sá xító ndèé ñáhá-güedé xii-gá, núú ní xáhaⁿ-gá xii-güedé:

—¿Ná cuendá ducaⁿ xító ndèé ñáhá-ndó xii-í? Chí dánèhé ñáhá xii-í ñⁿ díhúⁿ sá chàhu-ndo cuendá impuèstú te núú nása càa —cachí-gá xàhaⁿ-gá xii-güedé.

16 Te cue téé-áⁿ ñi dánèhé ñáhá-güedé xii-gá ñⁿ díhúⁿ sá chàhu-güedé cuendá impuèstú. Te Jèsús ní xáhaⁿ-gá xii-güedé:

—Chí càchí tñíhu xii-í ñúu yoo núú-xi ndèé ndihi yoo diu-xi ndèé —càchí-gá xàhaⁿ-gá xii-güedé.

Te ní xáhaⁿ-güedé xii-gá:

—Núú tñí Cèsár ndèé ndihi diu-dé —càchí-güedé xàhaⁿ-güedé xii-gá.

17 Te Jèsús ní xáhaⁿ-gá xii-güedé:

—Te núu ducaⁿ te chí nàcuáha té Cèsár sá cúú cuendá-dé, te sá cúú cuendá méé Yá Ndiòxí te xíⁿ nàcuáha-ndo-gá —càchí-gá xàhaⁿ-gá xii-güedé.

Te cue téé-áⁿ ío ní cuñùhu-güedé sá dúcáⁿ ñi cáháⁿ-gá.

Cuendá cue ñáiyu ndoto

(Mt. 22:23-33; Lc. 20:27-40)

18 Te sátá dúcáⁿ te ní quexio ñⁿ úú cue téé cùu saducéú núú ndécú Jèsús, te cue téé-áⁿ ñá túú sàndáá iní-güedé sá ndótó cuè ñáiyu ní xihí, te ní xáhaⁿ-güedé xii-gá:

19 —Mèstrú, ndíi Moisés càchí ndíi núú tütú ndíi ndècu vitna sá nñu ìⁿ téé na cùú-dé te quendóo ñadìhí-dé, te núú ñá túú ní xõ déhe-dé ndíhi ñadìhí-dé-áⁿ, te téé cùu ñaní-dé naqueheⁿ-dé ñaha ní quendóo quèé-áⁿ cuendá coo déhe-dé ndíhi-aⁿ cuendá téé ní xíhí-áⁿ. 20 Te ní xíndecu úsá tnàhá cue téé mee-ni ndí ñaní-güedé. Te téé díhna ní níhí ñadìhí-dé, te ñá túú ní cùdí-dé cundecu-dé chi ní xíhí-dé, te ni ìⁿ déhe-dé ñá túú ní xõ ndíhi ñadìhí-dé. 21 Te téé cùu uú ní naqueheⁿ-dé ñaha ní quendóo quèé-áⁿ, dico ní xíhí tucu-dé, te ni ìⁿ tucu déhe-dé ñá túú ní xõ ndíhi ñaha-áⁿ. Te ñu-ni ducaⁿ ñí xíhí téé cùu uní. 22 Te ní xínu ndí úsá-güedé ní cándeca ñaha-güedé xii ñaha-áⁿ, dico ni ìⁿ-güedé ñá túú ní xõ déhe-güedé ndíhi-aⁿ, te ní ndíhi-güedé ní xíhí te ndéé núú ñí ndíhi-ná ní xíhí tnàhá ñadìhí-áⁿ. 23 Te na sáá nduu ndòto-güedé ndíhi ñaha-áⁿ, ¿te ndèdacàa-güedé ñadìhí-güedé cuu-aⁿ-i? Chi ndí úsá-güedé ní cándeca ñaha-güedé xii-aⁿ —càchí-güedé xàhaⁿ-güedé xii-gá.

24 Te Jèsús ní xàhaⁿ-gá xii-güedé:

—Ní xíta nchòhó tnúhu càháⁿ-ndó, chi ñá túú xíní-ndó nàcuáa càháⁿ Yá Ndiòxí núú tütú-gá, te ni ñá túú xíní-ndó sá díú-gá ndácú-gá quidé-gá nchaandi túhú sá vaha. 25 Te na càchí tnúhu-í xii-ndo sá òré ná sáá nduu ndòto nchaa ñáyiú ní xíhí, te dàvá-áⁿ vā yõ-gá dasaⁿ dèhe yoco-xi chi vá yõ-gá candeca tnàha, chi na ndòtó-yu te cuu-ná-yu dàtná cue espíritú xínú cuèchi núú Yá Ndiòxí. 26 Te núú nchòhó cuíní-ndó càháⁿ-ndó cuendá nchaa ñáyiú ndoto, te díhna-gá dacuàha-ndo nacuáa ní chídó tnùní ndíi Moisés núú tütú ndíi ni cùu. Chi ñu núú tütú ndíi càháⁿ-xi nàcuáa ní xàhaⁿ Yá Ndiòxí xii ndíi cútnàhá ní càháⁿ ndíhi ñaha-gá ìⁿ xichi núú níhnú tnùtaú nchìcúⁿ ñuhú. Te duha ní xàhaⁿ-gá xii ndíi: “Yúhú cùú-í Ndiòxí tē Àbrahám, ndíhi té Isàác, ndíhi té Jàcób”, duha ní xàhaⁿ Yá Ndiòxí xii ndíi càchí-xi núú tütú ndíi. 27 Te Yá Ndiòxí ñá túú cùu-gá Ndiòxí cue ñáyiú ní xíhí, chi cùu-gá Ndiòxí cue ñáyiú xíndecu vívú, núú xíáⁿ nchòhó ío xíta-ndo tnúhu càháⁿ-ndó. Te sá dúcáⁿ ñí càháⁿ-gá cuendá cue téé-áⁿ, te xíáⁿ cútnùní sá cuèi ní xíhí-güedé sá cùú-xí tnàha ñáyiú-güedé, dico ndècu vívú-güedé

sá cùú-xí-gá —càchí-gá xàhaⁿ-gá xii-güedé.

Tnúhu sá ño-gá cúnúu

(Mt. 22:34-40)

28 Te tnàhá ìⁿ téé dàcuaha ñaha xii ñáyiú nchaa tnúhu ní chídó tnùní ndíi Moisés ndèdòho-dé nchaa tnúhu càháⁿ Jèsús ndíhi cue téé cùu saducéú-áⁿ, te ndèdòho-dé sá sùúní vaha ñíhí-gá tnúhu nàdanchocáva-gá. Te ní sàndehe yatni-dé núú-gá, te xàhaⁿ-dè xii-gá:

—Cachí tnúhu xii-í ndèdacàa tnúhu sá ñí càháⁿ Yá Ndiòxí ño-gá cúnúu cuu díhna —càchí-dé xàhaⁿ-dè xii-gá.

29 Te Jèsús ní xàhaⁿ-gá xii-dé:

—Duha càháⁿ tnúhu sá ño-gá cúnúu: “Nchòhó ñáyiú isràèl ío vaha chí cùndèdòho tnúhu-a. Ìⁿndí díi-ni Yá Ndiòxí ndécú, te ñu-ni-gá cùú-gá Ndiòxí-ó. 30 Te cuu iní-ndó Dütú Ndiòxí Yaá cùú Ndiòxí-ndó ñí yuhu ñí iní-ndó, te caní iní-ndó càda-ndo dàtná cuíní mée-gá, te mee-ni tnúhu vaha caní iní-ndó cuendá cuu víi cuu vaha-ndo núú-gá, te coo iní-ndó càda-ndo nacuáa cuu vaha iní-gá”, duha càháⁿ tnúhu sá ño-gá cúnúu. 31 Te duha càháⁿ tucu ingá tnúhu cùu uú sá ño cúnúu: “Cuu iní-ndó tnàha ñáyiú-ndo dàtná cùú iní-ndó mée-ndo”, duha càháⁿ tnúhu cùu uú-áⁿ. Te úú duha-ni tnúhu-a cùu-xi tnúhu sá ño-gá cúnúu —cachí-gá xàhaⁿ-gá xii-dé.

32 Te téé dàcuaha ñaha xii ñáyiú nchaa tnúhu ní chídó tnùní ndíi Moisés ní xàhaⁿ-dè xii-gá:

—Mèstrú, vaha-ni càháⁿ-n chi ndáá sá ìⁿndíi-ni Yá Ndiòxí ndécú, te ñá túú-gá ndèé ndécú ñngá ndiòxí. 33 Te dàtná ní cachí-n sá ñí yuhu ñí iní-ó cùu iní-ó Yá Ndiòxí, te caní iní-ó càda-o nacuáa cuu víi cuu vaha iní-gá te ío víi ío vaha cuu iní-ó dàtná cuíní mée-gá, te coo iní-ó càda-o nacuáa cuu vaha iní-gá, te cuu iní-ó cuè tnàha ñáyiú-o dàtná cùú iní-ó mée-o. Te nchaa xíáⁿ ío-gá xíní ñúhu-xi cada-o dacúxí sá cuañaha-o quèti cahni-güedé te cáyú-di nduu táhú ñáhá Yá Ndiòxí, ndíhi dàcúxí nchàa dava-gá sá sãñaha-o nduu táhú-gá —càchí-dé xàhaⁿ-dè xii-gá.

34 Te sá dúcáⁿ ío vaha nduu tnúhu ní càháⁿ téé-áⁿ, núú ní xàhaⁿ Jèsús xii-dé:

—Luha-ná cùmãní xii-n te ndíhu ndaha ñaha Yá Ndiòxí —càchí-gá xàhaⁿ-gá xii-dé.

Te sá dúcáⁿ ñí xáhaⁿ-gã xii téé-áⁿ, núu vá yõo ñⁿ-gá ní cùyi ñágá tnúhu nducu tnúhu-yu núú-gã.

*Yoo cùu Xítóhó Jesucristú
(Mt. 22:41-46; Lc. 20:41-44)*

³⁵ Te Jèsús yíhí-gã xití veñúhu càhnu sá ño cùnunu danehé-gá ñáyíu, te xáhaⁿ-gã xií-yu:

—Cue téé dàcuaha ñaha xii ñáyíu nchaa tnúhu ní chídó tnùní ndíi Moisés cächí-güedé sá Cristú Yaá tendaha Yã Ndiõxí quixi ñuyú-a cùu-gá déhe ndíi Dàvíí, te ndíi-áⁿ ñí cunaha vîhi ní xíhí ndíi. ¿Te ná cuendá ducaⁿ càháⁿ-güedé? ³⁶ Te mee ndíi Dàvíí-áⁿ ñí dácáhu ñí ñáhá Espíritú Yã Ndiõxí xii ndíi nàcuáa cáháⁿ ndíi, te duha ní cachí ndíi:

Dútú Ndiõxí ní xáhaⁿ-gã xii Yaá cùu Xítóhó-í:
“Ngóo xio cùha-í,
te yúhu cada-í te nchaa sá cùu ùhú ñí ñáhá xii-n canehe-xi sá yíñúhu núú-n.”

Duha ní xáhaⁿ Dútú Ndiõxí xii Yaá cùu Xítóhó-í.

Duha ní cachí ndíi. ³⁷ ¿Te nása cùu Cristú déhe ndíi Dàvíí, te mee ndíi ní cachí ndíi sá cùu-gã Xítóhó ndíi? —cächí Jèsús xáhaⁿ-gã xií-yu.

Te ío cuéhé ñáyíu ní xíndedóho nchaa tnúhu ní cáháⁿ-gá, te ío ní cudíí ñí-yu ní xíndedóho ñáhá-yu xii-gá.

Jèsús càháⁿ-gá cuendá cue téé dàcuaha ñaha xii ñáyíu nchaa tnúhu ní chídó tnùní ndíi Moisés

(Mt. 23:1-36; Lc. 11:37-54; 20:45-47)

³⁸ Te òré dánèhé ñáhá Jèsús xii cue ñáyíu, te xáhaⁿ-gã xií-yu:

—Cada cuendá-ndó vã cádá-ndó dàtná quidé cuè téé dàcuaha ñaha xii ñáyíu nchaa tnúhu ní chídó tnùní ndíi Moisés, chi cue téé-áⁿ tnàhá ñí-güedé cuhnu-güedé dóo nání sã sácúhnu cue téé cùnunu-gá te cuíní-güedé sá méé-ní ndíi tnúhu yíñúhu cáháⁿ ndíi ñaha ñáyíu xii-güedé nchaa núu xíca cùu-güedé. ³⁹ Te nàcáxi-güedé xilé sácóo nchíhi cue téé cùnunu-gá xití veñúhu sácóo nchíhi-güedé. Te ducaⁿ-ni quíde-güedé cuèi òré quíhu-güedé mèsá caxi-güedé òré ndécú-güedé ñí vico, chi mee-ni núu sácóo cue téé cùnunu cuíní-güedé coo-güedé. ⁴⁰ Te quèndeé-güedé vehe nchaa

ñáyíu quèé, te ío naha càháⁿ ndíi-güedé Yã Ndiõxí dándahú-güedé méé-güedé sá ño quíde ndáá-güedé cuendá sá cuíní-güedé cáháⁿ váha ñáyíu cuendá-güedé. Te sá dúcáⁿ quíde-güedé te ío-gá ndoho-güedé núu ùhú núu ndàhú dàcúxí dàva-gá ñáyíu —cächí-gá xáhaⁿ-gã xií-yu.

*Díhúⁿ nduu táhú Yã Ndiõxí ní dáquëe ñí ñaha ndàhú ñaha quèé
(Lc. 21:1-4)*

⁴¹ Te núcóo Jèsús xití veñúhu yatni núu ndécú àlcanciá te ndèhe-gá xídáquëe ñáyíu díhúⁿ xití àlcanciá-áⁿ, te tnàhá cue ñáyíu cuica xídáquëe-yu vâi díhúⁿ. ⁴² Te ní quexìo ñí ñaha ndahú ñaha quèé, te ndèhe-gá ní dáquëe-aⁿ úu tnàhá díhúⁿ còbrí xití àlcanciá, te díhúⁿ-áⁿ ño sacú yáhu-xi. ⁴³ Te Jèsús ní cana-gá cue téé xica cuu ndíi-gá, te ní xáhaⁿ-gã xii-güedé:

—Na cächí tnúhu ndáá-í xii-ndo sã ñaha ndahú ñaha quèé-a ío-gá nándíhi díhúⁿ ní dáquëe-aⁿ xití àlcanciá dàcúxí díhúⁿ ñí dáquëe dáva-gá-yu. ⁴⁴ Chi nchaa ñáyíu-áⁿ ñí dáquëe-yu mee-nã díhúⁿ sã ñí quendóo-ná, dico ñaha quèé-a cuèi ndàhú-aⁿ dico ní dáquëe-aⁿ ñíhí díhúⁿ sã cuááⁿ sã caxí-áⁿ ní cùu —cachí-gá xáhaⁿ-gã xii-güedé.

13

*Jèsús cächí-gá sá ngóyó veñúhu
(Mt. 24:1-2; Lc. 21:5-6)*

¹ Te òré ní ndee Jèsús xití veñúhu càhnu sá ño cùnunu, te ñí téé xica cuu ndíi-gá ní xáhaⁿ-dè xii-gá:

—¡Mèstrú, cundehe nã ío víi ní sáá veñúhu-aⁿ ndíi nchaa vehe nèhe tnaha ndíi-xi, te ío víi ndãa nchaa yúu yíhí! —cächí-dé xáhaⁿ-dè xii-gá.

² Te Jèsús ní xáhaⁿ-gã xii-dé:

—Nchaa nàcuáa càa nchaa vehe sá cùñúhu-n-a vîtna sáá nduu te vá cùndùu-gá-xi dàtná cáá-xí vîtna, chi ní ñí-gá yúu vã códó nchíhi tnaha-xi, chi ndíi ngoyo —cächí-gá xáhaⁿ-gã xii-dé.

*Nàcuáa cada-xi nduu ta cùyatni naa ñuyú
(Mt. 24:3-28; Lc. 21:7-24; 17:22-24)*

³ Te Jèsús ní xica-gá ndíi cue téé xica cuu ndíi-gá cuáháⁿ ndíi ñaha-gã xii-güedé yucu nàni Olívú, te yucu Olívú-áⁿ tũu ndáá

núu cáá veñúhu càhnu sá ïo cùnuu. Te Jèsús ní quexìo-gá ndihì-güedé yucu Òlívú-án, te xíán nǐ ngóo-gá te núu núcòo-gá-án nǐ sáhán té Pèlú ndihì té Jàcobó ndihì té Juàá ndihì té Ndríxí, te dayuhu nǐ xáhaⁿ-güedě xii-gá:

4—Cuìní-ndí cachí tñúhu-n nǎ nduu dùcaⁿ cada-xi ngoyo veñúhu càhnu sá ïo cùnuu, àdi nándi cùu sá cáda-xí cuendá cutnùnì iní-ndí sá sà ta cuyatni nduu ducaⁿ cada-xi —cachí-güedé xáhaⁿ-güedě xii-gá.

5 Te Jèsús ní xáhaⁿ-gǎ xii-güedé:

—Ío quihi iní-ndó cùndecu-ndo cuendá sá vǎ yòo dandàhú ñáhá xii-ndo. 6 Chi ío cuéhé cue tée coo ñuyú te danàni-güedé méé-güedě dàtná nánì-í, te cachí-güedé: “Yúhú cùu-í Cristú Yaá ní tendaha Yǎ Ndiòxí véxi ñuyú-a”, duha cachí-güedé. Te sá dúcáⁿ cǎháⁿ-güedé te ío vǎi ñáyi u dandàhú-güedé.

7 Te òré ná nihí-ndó tñúhu sá nàá-güedé nděni ní cuu, te vǎ yùhú-ndó chi dacuítí sǎ dúcáⁿ càda-xi, dico vátá sàá-gǎ nduu nàa ñuyú òré ducaⁿ càda-xi. 8 Chi cue tée ìⁿ nàcióⁿ nàá-güedé ndihì cue tée ingá nàcióⁿ, te titní ñúu ngúíta-güedé nàá-güedé, te titní xichi ñuyú nǐhi vihi tnáa, te titní tucu xichi ñuyú coo tnamá, te ío-gǎ cuéhé sǎ yǎha ñáyi. Te nchaa sá dúcáⁿ càda-xi-án cùu-xí tñúndòho sá vítná vǎha vǎha quèsaha-xi sácúu-xí cuè ñáyi ndècu ñuyú-a.

9 Dico nchòhó ío quihi iní-ndó cùndecu-ndo, chi nchaa ñáyi na cùu úhú iní ñáhá xii-ndo cuáha cuendá ñáhá-yu xii dava-ndo núu cuè tée cùchiuⁿ, te candeca ñaha-güedě xii-ndo quihíⁿ xití veñúhu-güedé, te yàcáⁿ caniha-güedě xii-ndo. Te quihíⁿ-ndó núu cuè tée yèndaha nacióⁿ àdi núu dàva-gǎ cue té cùnuu sá cuendá-í, te nchòhó nihí-ndó nàcuáa càda-ndo cǎháⁿ vǎha-ndo cuendá-í núu-güedé. 10 Te cùmání-gǎ sáa nduu nàa ñuyú-a te sa cuténuu tñúhu-í nǐ càa xico ñuyú-a, te tñúhu-án cǎháⁿ-xi nàcuáa naníhí tǎhú ñáyi. 11 Te òré ná càndeca ñaha ñáyi xii-ndo quihíⁿ núu cuè tée cùchiuⁿ cuáha cuendá ñáhá-yu, te òré vátá sàá-gǎ-ndó núu-güedě te vǎ cánì iní-ndó núu nása cunduu tñúhu cúñaha-ndo xii-güedé. Chi òré-nǎ te Yǎ Ndiòxí dacàhu iní ñáhá-gǎ

xii-ndo nása cunduu tñúhu cúñaha-ndo xii-güedé, te diu-ni tñúhu sá dacàhu iní ñáhá-gǎ-án cùñaha-ndo xii-güedé. Te ñá diú mèe-ndo cǎháⁿ-ndó chi Espiritú Yǎ Ndiòxí cǎháⁿ-xi yuhu-ndo. 12 Te dava cue tée cuáha cuendá-güedé ñaní-güedé núu cuè té cùchiuⁿ cuendá cahni ñaha-güedě. Te dava cue té cùu tátá diu-ni ducaⁿ càda-güedé cuáha cuendá-güedé déhe-güedé núu cuè té cùchiuⁿ. Te dava cue té cùu déhe cuu úhú iní-güedé tátá-güedé ndihì náná-güedé, te cuáha cuendá ñáhá-güedě xií-yu núu cuè té cùchiuⁿ cuendá cahni ñaha-güedě xií-yu. 13 Te ío cuéhé ñáyi cuu úhú iní ñáhá-yu xii-ndo sǎ cuendá-í, dico nchaa nchòhó ñáyi na càda ndee-ni iní canchicúⁿ nihnu ñaha-ni xii-í te naníhí tǎhú-ndó.

14 Te ndí Dániél téé ní xóo cǎháⁿ tñúhu Yǎ Ndiòxí ndéé sanaha nǐ chídó tñùnì ndí núu tütú ndí cuendá ìⁿ sá dáquèe tǐhú Yǎ Ndiòxí cundecu ìⁿ xichi núu ñà túu tǎu-xi cundecu-xi, te xiáⁿ cada-xi sǎ vǎ cùndècu-gǎ nǐ ìⁿ ñáyi xiáⁿ. Te cada cuendá vǎha-ndo nàcuáa ní cǎháⁿ ndí, chi nduu na quèní-ndó xiáⁿ cundecu-xi ìⁿ xichi núu ñà túu tǎu-xi cundecu-xi, te dàvǎ-án nchaa ñáyi xǐndecu distritú Júdeá xínì ñúhu-xi cunú-yu quihíⁿ-yu xití yucu. 15 Te nchaa ñáyi ndáa ndódó dìquí véhé-xí vǎ ndíhu-gǎ-yu vehé-yu quehéⁿ-yu ìⁿ ndachíuⁿ-yu canehé-yu quihíⁿ. 16 Te nchaa ñáyi cuáháⁿ yucu nǐ vǎ nùhú-gǎ-yu vehé-yu cúnúquehéⁿ-yu dóo-yu. 17 Te ndàhú ní cuu nchaa ñáyi dìhí ñúhú dèhe-xi, ndihì cue ñáyi dìhí xǐndeca déhe vitna sàdi na saá nduu dùcaⁿ cada-xi! 18 Te nchòhó ío chí cǎcáⁿ tǎhú núu Yǎ Ndiòxí cuendá sá vǎ dúcáⁿ ndòho-ndo yóo quidé víxiⁿ-xi. 19 Chi dàvǎ-án coo tñúndòho cahnu vihi ñuyú, te vátá ìⁿ nduu-gǎ coo tñúndòho cahnu vihi-án ndéé cùtnáhá ní cadúha Yǎ Ndiòxí ñuyú, chi diu-ni dàvǎ-án coo tñúndòho cahnu vihi-án, te nǐ núu cuáháⁿ núu véxi vǎ cóo-gǎ tñúndòho-án. 20 Te Yǎ Ndiòxí cǎchí-gǎ sá vǎ ïo vǎi nduu coo tñúndòho cahnu vihi-án ñuyú sǎ cuendá nchaa ñáyi ní cǎháⁿ-gǎ cundecu ndihì-gǎ. Te núu vǎi nduu na coo tñúndòho-án, te vǎ yòo cácu nihnu.

21 Te dàvǎ-án cùñaha ñáyi xii-ndo: “Chí cùndèhe iha, chi iha ní quexìo Cristú

Yaá ní tendaha Yă Ndiöxí véxi ñuyíú-a”, duha cúñàhá-yu xii-ndo. Àdi quesahá-yu: “Chí cùndèhe yacáⁿ chi yàcáⁿ ndécú-gă”, quesàhá-yu. Te vá quèndáá iní-ndó tnúhu càháⁿ-yu. ²² Te coo cue tée danàni-güedé méé-güedé dàtná nánì-í te cachí-güedé sá cúú-güedé Yaá ní tendaha Yă Ndiöxí véxi ñuyíú-a. Te dava-güedé cachí-güedé sá cúú-güedé cue tée càháⁿ tnúhu Yă Ndiöxí dico ñá ndáá sá cúú-güedé cue tée càháⁿ tnúhu-gá, te cada-güedé títñí núú sã vã yõ tnàhí ndàcu cada cuendá dandàhú-güedé ñáyíu, te caní iní-güedé dandàhú-güedé ndéé cue ñáyíu ní càháⁿ Yă Ndiöxí cundecu ndíhi-gá. ²³ Te vitna ío váha cuáha-ndo cuendá, te quíhi iní-ndó cundecu-ndo, chi nchaa sa ní dátúha ñaha-í xii-ndo.

Nàcuáa cada-xi òré quixi tucu Tée cùu ñanì tnáhá nchàa ñáyíu

(Mt. 24:29-35,42-44; Lc. 21:25-36)

²⁴ Te nà yáha-ni coo tnúndòho cahnu vihi-áⁿ, te vá dáyèhé-gá nchícanhii te ni vã dáyèhé-gá yóó. ²⁵ Te ngoyo nchaa chódíní ndéé andíu, te quídi-xi andíu. ²⁶ Te dàvá-áⁿ quíní ñáhá nchàa ñáyíu xii yúhú Tée cùu ñanì tnáhá-yu ncháa-yu quee-í andíu quixi-í ichi xití vícò, te quíní-yu sá ío càhnu cuu-í, te quíde-í nchaa sá vãha. ²⁷ Te tendaha-í cue espíritú xínú cuèchi núú-í quíhíⁿ-xi nadatàcá-xi nchaa ñáyíu ní càháⁿ-í chitnahá ñáhá xii-í xíndecu ní càa xico ñuyíú.

²⁸ Te cundehe-ndo nàcuáa quíde yutnu ngúxí, chi yutnu-áⁿ ndúú yùte núú díté-xi te nàtahú ndaha-xi, te òré ducaⁿ quíde-xi te càchí-ndó sã sà ní cuyatni nuu cahni. ²⁹ Te ducaⁿ sãtnahá-xi cada-xi òré ná quíní-ndó càda-xi nchaa nacuáa ní càháⁿ-í, te cutnùnì iní-ndó sã sà ní cuyatni vií-nã nduu nàa ñuyíú. ³⁰ Te na càchí tnúhu ndáá-í xii-ndo sã òré vátá cùú-gá cue ñáyíu xíndecu ñuyíú-a vitna, te cada-xi nchaa nàcuáa ní càháⁿ-í. ³¹ Te andíu ndíhi ñuyíú-a chi ndíhi nihnu-xi, dico tnúhu-í chi vá ndíhí nihnu-xi chi cùu-xi tnúhu ndáá.

³² Dico ñá túú cùtnunì ná nduu quixi tucu-í, te ni ñà túú cùtnunì ná òré chi vá yõ xíní, te ni cuè espíritú xínú cuèchi núú Yă Ndiöxí ñá túú xíní-xi ná nduu quixi-í, te ni mèe yúhú tée cùu Déhe Dútú Ndiöxí

ñá túú xíní-í ná nduu quixi tucu-í, chi ñndì díi-ni mee Tătà-í Dútú Ndiöxí xíní-gá núu ná nduu quixi-í.

³³ Te nchòhó xíní ñùhu-xi sá ío quíhi iní-ndó cundecu-ndo, te càháⁿ ndíhi-ndo Yă Ndiöxí, chi ñá túú xíní-ndó nã nduu quixi tucu-í. ³⁴ Te na càchí tnúhu-í xii-ndo cuendá ñndì tée cùní quíngaca cuu xica. Te tée-áⁿ cùmání-gă quee-dé vehe-dé te ní xáhaⁿ-dë xii cue tée xínu cuechi núú-dë sã ná càdá cuendá-güedé vehe-dé. Te ní sãñaha-dë xii-güedé ndí dííⁿ núú-güedé chiuⁿ cada-güedé. Te ní xáhaⁿ-dë xii tée ndéé yuyèhe sã ná cundecu túha-ni-dé yuyèhe ndéé nàsáá-dé. ³⁵ Te duha nduu tnúhu càháⁿ-í cuendá nchòhó cundecu túha-ndo, chi ñá túú xíní-ndó nã nduu te ni ñà túú xíní-ndó nã òré quixi tucu yúhú Yaá cúú Xitohó-ndó, núu òré sa ní cundíquíⁿ, àdi dava niú, àdi òré sa ní cana uuⁿ líhi, àdi òré sa ta cùditó cuáháⁿ, núu xíãⁿ ío chí cùndecu túha. ³⁶ Te duha càháⁿ-í chi na cuáháⁿ òré ñá túú nã yíhí iní-ndó quèxio-í, te ñá túú ndècu túha-ndo. ³⁷ Te dàtná-ni xáhaⁿ-í xii nchòhó sá cùndecu túha-ndo, te díu-ni ducaⁿ xáhaⁿ-í xii nchaa dava-gá ñáyíu sá cùndecu túha-yu –càchí-gá xáhaⁿ-gă xii-güedé.

14

Ndùcu-güedé nàcuáa cada-güedé cahni-güedé Jèsús

(Mt. 26:1-5; Lc. 22:1-2; Jn. 11:45-53)

¹ Te cùmání úú-gá nduu te quesaha víco pascuá, víco xèxi ñáyíu pàá sá ñà túú yíhi levadurá. Te cue dútú cùnùu, ndíhi cue tée dàcuaha ñaha xii ñáyíu nchaa tnúhu ní chídó tnùnì ndíi Moisés ndúcú-güedé nàcuáa cada-güedé dandàhú-güedé Jèsús cuendá tñi ñaha-güedé xii-gá te cahni ñaha-güedé. ² Te ní xítñaha-güedé:

—Váha-gá sá vã tñí-ó Jèsús mei nduu víco, chi núu ducaⁿ na càda-o te ío dusaⁿ càda ñáyíu –càchí-güedé xítñaha-güedé.

Íⁿ ñadìhí chíhí-áⁿ àcítí díquí Jèsús

(Mt. 26:6-13; Jn. 12:1-8)

³ Te Jèsús ndécú-gă ñuú Bètaniá vehe ñndì tée nàni Xímú, tée ní tnahá cuéhé sã dátèhyú nihnu-xi yíqui cùñú-ó. Te yíhi Jèsús mèsa xéxí-gă ní quexìo ñndì ñadìhí néhé-áⁿ ñndì sá ní cuáha yúú vãha yúú nánì àlabastrú, te xití

xíãñ ñúhú àcítí sàháñ tnámí sã nání nãrdú sá ío ndèyáhu, te ní táhú-án xíãñ te acítí ñúhú xítí-xi-án ñí sódó-añ díquí Jèsús. ⁴ Te ìñ úú cue téé xíndecu-án ñí cudééñ-güedé sá dúcáñ ñí quide-añ, te ní xítñaha-güedé:

—Ñá túú quide váha ñaha-ãñ dàcáñ quidé-án, chí íí ñí dácuíta-añ acítí váha-ãñ. ⁵ Chí váha-gá ñúu cuyáhu acítí-ãñ sá ùní ciendú díhúñ denariú, te díhúñ sã cuyáhu acítí-ãñ cuu cuendá ñáyíu ndàhú ní cùu —cachí-güedé xítñaha-güedé.

Te ní tenàá-güedé ñaha-án sã dúcáñ ñí quide-añ.

⁶ Te Jèsús ní xáhañ-gã xii-güedé:

—Chí dáñá, vá dásátú-ndó ìní ñadìhí-a, chí sá ñí quide ñaha-añ xii-í cúú-xí ìñ sá váha. ⁷ Chí cue ñáyíu ndàhú ducañ-ni cùtnahá ñáyíu-án tnuú-ndó, te nání òré cächí ìní-ndó te chindee-ndó-yu. Dico yúhú chí vá ncháá ndùu cundecu ndihí ñaha-í xii-ndo ñùyíú-a. ⁸ Te ñadìhí-a ní quide-añ ìñ sá váha ndèé není ní ndacu-añ, chí sá dúhá ñí quide ñaha-añ xii-í ní chíhí ñaha-añ àcítí, te xíãñ cada ìní-ndó sã sá quide túha-añ yíquí cùñú-í cuendá quíndúxi-xi. ⁹ Te na cächí tnúhu ndáá-í xii-ndo sã ndèni ní cuu ñihí ñuyíú ná càháñ ñáyíu tnúhu-í, te càháñ-yu tnàhá cuendá ñadìhí-a cuendá quini nchaa ñáyíu nàcuáa ní quide-añ, te ducañ vã nàcuánaa-yu —cachí-gá xáhañ-gã xii-güedé.

Té Jùdás ndúcú-dé nàcuáa cada-dé cuáha cuendá-dé Jèsús núú cuè téé cùu úhú ìní ñáhá xii-gá

(Mt. 26:14-16; Lc. 22:3-6)

¹⁰ Te té Jùdás Iscarioté ní sáhán-dé ní ndatnúhu-dé ndihí cue téé cùu dútú cùnùu sá cuáha cuendá-dé Jèsús núú-güedé, te núú tnàhá té Jùdás-án cúú ùxúú tnàhá cue téé xica cuu ndihí-gá ní cùu. ¹¹ Te òré ducañ ñí ndatnúhu-dé ndihí-güedé, te ío ní cudíí ìní-güedé, te ní xáhañ-güedé xii-dé sá cuáñaha-güedé díhúñ xii-dé. Te té Jùdás-án ñí ngúíta-dé ndúcú-dé nàcuáa cada-dé cuáha cuendá-dé Jèsús núú-güedé.

Cùdini Jèsús ndihí cue téé xica cuu ndihí-gá
(Mt. 26:17-29; Lc. 22:7-23; Jn. 13:21-30;
1 Co. 11:23-26)

¹² Te ní sáá nduu ñí quesaha vico pascuá, vico ñá túú xèxi ñáyíu pàá sá ñà túú yìhí levadurá, te diu-ni nduu-ãñ sáhní-güedé ìñ mbéé líhli xèxi-yu nduu vico pascuá-án. Te cue téé xica cuu ndihí Jèsús ní xicáñ tnúhú-güedé núú-gã, te xáhañ-güedé xii-gá:

—Mèstrú, véxi-ndí xicáñ tnúhú-ndí núú-n ñúu ndèé cáá vèhe cuini-n càda túha-ndí sá cùdini-o sacuaa nduu vico pascuá —cachí-güedé xáhañ-güedé xii-gá.

¹³ Te Jèsús ní xáhañ-gã xii úú-ni tnàhá cue téé xica cuu ndihí-gá:

—Chí cuáháñ xítí ñuú-ãñ, te yacáñ naníhí-ndó ìñ téé tànehe yóo ndute, te téé-án cándèndaha-ndo-dé quíhíñ. ¹⁴ Te núu ndèdacàa vèhe na ndíhu-dé te xíãñ quíhu-ndo. Te cúñaha-ndo xii xítóhó vèhe-án: “Yaá cúú Mèstrú cächí-gá sá ñúu ndèdacàa xichi xítí vèhe-n cuáñaha ñúu-n xii-gá cùdini-gá ndihí cue téé xica cuu ndihí-gá sacuaa nduu pàscuá”, duha cúñaha-ndo. ¹⁵ Te dàtnùní danèhé ñáhá-dé xii-ndo ìñ cuartú cáhnú càa núú ñínu, chí vèhe yòdo tnaha cuu-xi, te sa ní quide túha-dé nchaa sá nándíhí, te nchòhó dícó-nã comidá cada túha-ndo cùdini-o —cachí-gá xáhañ-gã xii-güedé.

¹⁶ Te cue téé-án ñí xica-güedé cuáháñ-güedé xítí ñuú-án, te nchaa-ni nàcuáa ní xáhañ Jèsús ní cuu. Te ní quide túha-güedé sá cùdini-güedé ndihí-gá sacuaa nduu vico pascuá-án.

¹⁷ Te sátá ñí cundíquíñ te ní quexìo Jèsús ndihí ndí ùxúú cue téé xica cuu ndihí-gá.

¹⁸ Te cuánguihu-gá mèsá ndihí-güedé cuendá cùdini ndihí ñaha-gá xii-güedé, te òré yíhí-gã mèsá ndihí-güedé, te xáhañ-gã xii-güedé:

—Na cächí tnúhu ndáá-í xii-ndo sã ìñ nchòhó cue téé xèxi ndihí ñaha xii-í cuáha cuendá ñáhá-ndó núú cuè téé cùu úhú ìní ñáhá xii-í —cachí-gá xáhañ-gã xii-güedé.

¹⁹ Te sá dúcáñ ñí xáhañ-gã xii-güedé, te nchaa-güedé ní ngúíta-güedé cùndiyí-güedé. Te da ìñ da ìñ-güedé ní ngúíta-güedé xicáñ tnúhú-güedé núú-gã, te xáhañ-güedé xii-gá:

—¿Ñá díú yúhú ducañ sàni ìní-n càda-í-u? —cachí-güedé xáhañ-güedé xii-gá.

²⁰ Te Jèsús ní xáhañ-gã xii-güedé:

—Diu-ni ñⁿ nchòhó cue tée úxúú xicá cùu ndihí-í, tée na dàquëndaha còhó òré daquëndaha-í, tée-áⁿ cuáha cuëndá ñáhá-dě xii-í núú cuè tée cùu úhú iní ñáhá. ²¹ Te yúhú Tée cùu ñaní tnáhá-ndó nchàa-ndo ñuhu ichi-í cuáháⁿ-í ndoho-í nàcuáa càháⁿ-xi núú tütú Yă Ndiöxí. Dico ndáhú ní cuu tée ducaⁿ na cuáha cuëndá ñáhá xii-í núú cuè tée cùu úhú iní ñáhá, chi váha-gá sá vâ cáci tée-áⁿ cundecu-dé ní cùu, te ñá díú sã ñí cacu-dé te ducaⁿ càda-dé —càchí-gá xăhaⁿ-gă xii-güedé.

²² Te ñini cùdini cue tée xica cuu ndihí Jesús ní queheⁿ-gá pàá, te ní ndacáⁿ táhú-gă núú Yă Ndiöxí, te dătnúⁿ ní táhú cuèchi-gá, te ní ngüíta-gá dăcăhñu ñaha-gă xii-güedé, te xăhaⁿ-gă:

—Chí quéhéⁿ pàa-a caxi-ndo, te cada iní-ndó sã cúú-xí dătná yiqui cùñú-í —càchí-gá xăhaⁿ-gă xii-güedé.

²³ Te ní queheⁿ-gá văsú ñúhú ndúdí ndéhé yoho yàha stilé, te ní ndacáⁿ táhú-gă núú Yă Ndiöxí, te dătnúⁿ ní ngüíta-gá sãñaha-gă xii-güedé cuëndá coho-güedé luha luha sá ñúhú xití-xi, te nchaa-güedé ní xihí. ²⁴ Te ní xăhaⁿ-gă xii-güedé:

—Ndudí ndéhé yoho yàha stilé-a cada iní-ndó sã cúú-xí dătná ñíñí-í sá cătí òré cahni ñaha-güedé xii-í. Te sá dúcáⁿ cătí ñíñí-í xíáⁿ cutnúní ndáá sá Yă Ndiöxí cada-gá ingá núú sã vâha sá cúú-xí vâi ñáyiu dătná ní cachí-gá cada-gá. ²⁵ Te na càchí tnúhu ndáá-í xii-ndo sã vitná-nă duha xihí-í ndudí ndéhé yoho yàha stilé-a te vâ cóhó-gă-í, dico na sàá nduu cundecu-í núú ndécú Yă Ndiöxí táxí tnúní-gá, te dăvâ-áⁿ cada iní-í sá dătná sá cóhó tucu-í chí ío cudíí iní-í —càchí-gá xăhaⁿ-gă xii-güedé.

Jèsús càháⁿ-gá sá tē Pèlú cúñaha-dě xii ñáyiu sá ñà túú xini ñáhá-dě xii-gá

(Mt. 26:30-35; Lc. 22:31-34; Jn. 13:36-38)

²⁶ Te Jèsús ní xita-gá ñⁿ ndudú ndihí cue tée xica cuu ndihí-gá, te dătnúⁿ ní xica-gá cuáháⁿ-gá ndihí-güedé yucu Òlívú. ²⁷ Te yacáⁿ ní xăhaⁿ-gă xii-güedé:

—Na càchí tnúhu-í xii-ndo sã ncháá-ndó dàña nihnu ñaha-ndo xii-í niú vitna, chi quee ndáá-xi nàcuáa càháⁿ-xi núú tütú Yă Ndiöxí núú càchí-xi: “Yúhú cuáha-í tnúhu cahni-güedé tée cùu toli, te nchaa mbéé-dě ndihí-güedi cuténuu”, duha càchí-xi núú

tütú-gá. ²⁸ Dico na cùú-í te ndoto-í te codonuu-í núú-ndó quíhíⁿ distritú Galileá —càchí-gá xăhaⁿ-gă xii-güedé.

²⁹ Te té Pèlú ní xăhaⁿ-dě xii-gá:

—Te cuèi nchaa-güedé ná dândóo ñaha-güedé xii-n, dico yúhú chí vá dândóo ñaha-í xii-n —càchí-dé xăhaⁿ-dě xii-gá.

³⁰ Te Jèsús ní xăhaⁿ-gă xii-dé:

—Na càchí tnúhu ndáá-í xii-n sã niú vitna cùmání-gă cana líhi úú xito, te úní xito cáháⁿ-n núú ñáyiu sá ñà túú xini ñáhá-n xii-í —càchí-gá xăhaⁿ-gă xii-dé.

³¹ Dico té Pèlú ní cáháⁿ ñíí-dé, te xăhaⁿ-dě xii-gá:

—Cuèi na cùú ndihí ñaha-í xii-n dico vá càháⁿ-í núú ñáyiu sá ñà túú xini ñáhà-í xii-n —càchí-dé xăhaⁿ-dě xii-gá.

Te nchaa dava-gá cue tée xica cuu ndihí-gá diu-ni ducaⁿ ñí xăhaⁿ-güedé xii-gá.

Jèsús càháⁿ ndihí-gá Yă Ndiöxí ñⁿ xichi núú nání Gètsemaní

(Mt. 26:36-46; Lc. 22:39-46)

³² Te Jèsús cuáháⁿ-gá ndihí cue tée xica cuu ndihí-gá ñⁿ xichi núú nání Gètsemaní. Te òré ní quexìo-gá ndihí-güedé xíáⁿ, te ní xăhaⁿ-gă xii-güedé:

—Chí cúnúcóo iha cundetú-ndo na quíhíⁿ-í yacáⁿ cáháⁿ ndihí-í Yă Ndiöxí —càchí-gá xăhaⁿ-gă xii-güedé.

³³ Te ndèca-gá té Pèlú, ndihí té Jàcobó, ndihí té Juàá cuáháⁿ, te ñà túú tnàhí-gá cúú vâha iní-gá te ní ngüíta-xi súúⁿí ndihú iní-gá. ³⁴ Te ní xăhaⁿ-gă xii cue tée úní-áⁿ:

—Súúⁿí ndihú iní-í dătná sá cùú-í, te chí quëndóo iha te vâ cùdú-ndó —càchí-gá xăhaⁿ-gă xii-güedé.

³⁵ Te sa ñùnchií luha ní xica ndehe Jèsús núú ndécú-güedé, te ní ngáundeyi-gá ndéé ñuhu càháⁿ ndihí-gá Tătá-gă Dútú Ndiöxí sá nñu vá cündèe iní-gá taunihnu ñaha-gă xii-gá cuëndá nchaa nàcuáa yáha-gá. ³⁶ Te òré càháⁿ ndihí Jèsús Tătá-gă Dútú Ndiöxí, te xăhaⁿ-gă:

—Yòhó tătá mée-í, nchaandi túhú sá vâha ndàcu-n quide-n, te càháⁿ ndáhú-í núú-n nñu vá cündèe iní-n tàunihnu ñaha-n xii-í cuëndá sá vâ ndòhò-í ná sàá òré, dico vá cádá-n nàcuáa càchí iní mée-í chí cada-n nàcuáa càchí mee-n —càchí-gá xăhaⁿ-gă xii Tătá-gă Dútú Ndiöxí.

37 Te sáta nĩ yáha ní cáháⁿ ndihí-gá Tátá-gã Dútú Ndiöxí, te cuánuhú-gá núú nĩ dándöo-gá cue téé úní-áⁿ, te xixídí-güedé òré ní nasáá-gá, te ní xáhaⁿ-gã xii té Pèlú:

—Ximú, ¿náa sama xidí-n? ¿Náa ñá cündèe tnahi núú-n vã cùdú-ni-n cuèdicó ñⁿ òré-ãⁿ? —càchí-gá xáhaⁿ-gã xii-dé.

Te ní xáhaⁿ tucu-gá xii-güedé:

38 —Te chí quéndöo tucu, te cuhuⁿ iní-ndó vã cùdú-ndó, te cáháⁿ ndihí-ndo Yã Ndiöxí cuendá sá vã dácáháⁿ ñáhá yücu ñávãha xii-ndo càda-ndo sá ñà túú tàú-ndó càda-ndo. Te na càchí tnúhu ndáá-í xii-ndo sã nchòhó cuìní-ndó càda-ndo nchaa nacuaá càháⁿ-í dícó-ni sá ñà túú nihí ndéé-ndó —càchí-gá xáhaⁿ-gã xii-güedé.

39 Te Jèsús ní xica tucu-gá cuáháⁿ-gá cáháⁿ ndihí-gá Tátá-gã Dútú Ndiöxí, te ñu-ni nàcuáa ní xáhaⁿ-gã díhna xáhaⁿ tucu-gá. 40 Te òré ní yáha ní cáháⁿ ndihí-gá Tátá-gã Dútú Ndiöxí, te cuánuhú tucu-gá núú xíndecu cue téé úní xicá cùu ndihí-gá-áⁿ, te xidí-ni tucu-güedé òré ní nasáá-gá, te ducaⁿ nĩ quide-güedé chí súúni ñùhu saní núú-güedé, te ñá ní nihí-güedé tnúhu cúñaha-güedé xii-gá òré ní nasáá-gá. 41 Te ní sáháⁿ tucu-gá xito cùu úní ní cáháⁿ ndihí-gá Tátá-gã Dútú Ndiöxí, te òré ní nasáá tucu-gá núú xíndecu-güedé, te xáhaⁿ-gã xii-güedé:

—¿Te náa xidí-ni tucu-ndo?, te vitna vã cùdú-gá-ndó chí sa ní sáá òré cuáha cuendá ñáhá-güedé xii yúhú Téé cùu ñaní tnáhá-ndó nchaa-ndo núú cuè téé ndècu ichi cuehé ichi duha. 42 Te vitna chí ndácöo na quihíⁿ-ó chí sa véxi téé cuáha cuendá ñáhá xii-í núú cuè téé cùu úhú iní ñáhá —càchí-gá xáhaⁿ-gã xii-güedé.

Ní tñi-güedé Jèsús ndécá ñaha-güedé xii-gá cuáháⁿ

(Mt. 26:47-56; Lc. 22:47-53; Jn. 18:2-11)

43 Te càháⁿ dúcáⁿ-ní Jèsús ní quexìo té Jüdás. Te núú tnàhá téé-áⁿ cúú ùxúú tnàhá cue téé xica cuu ndihí-gá. Te ndihí-dé vãi cue téé ní quexìo, te dava-güedé xínehe-güedé machití te dava-güedé xínehe-güedé carrutí. Te cue téé-áⁿ nĩ tendaha ñaha cue dútú cúnüu ndihí cue téé dàcuaha ñaha xii ñáyiü nchaa tnúhu ní chídó tnùní ndíi Moisés, ndihí cue téé cùu sacuéhé núú ñáyiü isráel. 44 Te té Jüdás téé cuáha cuendá ñáhá xii Jèsús sa ní xítñuhu-dé

cue téé-áⁿ nàcuáa cada-dé cuáha cuendá ñáhá-dé xii Jèsús núú-güedé. Te duha ní xáhaⁿ-dë xii-güedé:

—Cundehe-ndo tée na tøyuhu-í, te téé-áⁿ tñi-ndo-dé chí téé-áⁿ cúú-dé téé ndèé iní-ndó, te ío quihí iní-ndó càndeca-ndo-dé quihíⁿ —duha ní xáhaⁿ-dë xii-güedé.

45 Te òré ní quexìo té Jüdás ndihí cue téé-áⁿ núú ndécú Jèsús, te ní xáhaⁿ-dë xii-gá:

—Mèstrú —càchí-dé xáhaⁿ-dë xii-gá.

Te ní teyuhu ñaha-dé. 46 Te nchaa cue téé ndihí-dé-áⁿ nĩ tñi-güedé Jèsús cuendá càndeca ñaha-güedé xii-gá quihíⁿ. 47 Te ñⁿ cue téé cündihí Jèsús ní tava-dé machití-dé, te ní xehndé-ni-dé ñⁿ xio lóho ñⁿ téé xínu cuechi núú dútú cúnüu, te ní quendeé duuⁿ lóho téé-áⁿ. 48 Te Jèsús ní xáhaⁿ-gã xii cue téé ní tñi ñaha xii-gá-áⁿ:

—Nchòhó, nèhe-ná-ndó màchití, nèhe-ná-ndó càrrutí véxi ní tñi ñaha-ndo xii-í, dàtná quidé-ndó ñⁿ ñadúhú quidé ñaha-ndo xii-í. 49 Te nchaa-ni nduu ní xini-ndó nĩ xíndecu-í xití veñúhu càhnu sá ío cúnüu ní xóo danèhé-í ñáyiü, te ñá túú ní tñi ñaha-ndo xii-í. Dico dàcuítí sã dúhá yáha-í cuendá quee ndáá-xi nàcuáa càháⁿ-xi núú tütú Yã Ndiöxí —càchí-gá xáhaⁿ-gã xii-güedé.

50 Te nchaa cue téé xica cuu ndihí-gá ní xínu-güedé ní dándöo ñaha-güedé xii-gá.

Ñⁿ téé cuechi nĩ xínu-dé

51 Te ñⁿ téé cuechi ndëndaha-dé Jèsús cuáháⁿ, te lavichi-dé, ñⁿ-ni dóó yadí yidúcúⁿ nuu-dé nihí-dé, te ní tñi ñaha-güedé xii-dé, 52 dico ní ndacu-dé ní quenuñi-dé te ní dándöo-dé dóó yidúcúⁿ nuu-dé-áⁿ nĩ xínu-dé.

Jèsús ndécú-gã jündá

(Mt. 26:57-68; Lc. 22:54-55, 63-71; Jn. 18:12-14, 19-24)

53 Te cue téé ní tñi ñaha xii Jèsús ndécá ñaha-güedé xii-gá cuáháⁿ núú tée cùu dútú cúnüu-gá. Te xiáⁿ nĩ tacá nchaa dava-gá cue téé cùu dútú cúnüu, ndihí cue téé cùu sacuéhé núú ñáyiü isráel, ndihí cue téé dàcuaha ñaha xií-yu nchaa tnúhu ní chídó tnùní ndíi Moisés cuendá cada-güedé jündá. 54 Te té Pèlú xica xica-ni nchicúⁿ ñáhá-dé xii-gá cuáháⁿ ní sáá-dé ndéé quehé vehe núú ndécú tée cùu dútú cúnüu-gá-áⁿ, te xiáⁿ

nǐ ngóo teté-dé yuhu nùhú ndihì cue tée cùu poleciá.

⁵⁵ Te cue tée cùu dútú cùnùu ndihì nchaa dava-gá cue tée xǐndecu jùndá ndúcú-güedě ñáyiú dacàa ìⁿ cuéchi díquí Jèsús cuendá ducaⁿ ñhí-güedě nàcuáa cada-güedé cahni ñaha-güedě xii-gá, dico ñá túú ní ndàcu-güedé. ⁵⁶ Te cuèi vai ñáyiú dàcaá-yu cuéchi díquí-gá dico mee-ni sǎ nǐ cahu iní mèe-yu ní cáháⁿ-yu, chi tucu cáháⁿ ìⁿ tucu cáháⁿ ìⁿ-yu. ⁵⁷ Te davá-yu ní ndacuíñí-yu te ní ngüíta-yu dàcaá-yu ìⁿ cuéchi neñúú díquí-gá, te xǎhǎⁿ-yu xii nchaa cue tée cùnùu:

⁵⁸ —Nchúhú ní tecú dóho-ndí càchí-dé sá dǎngöyo-dé veñúhu càhnu sá ìo cùnùu sá nǐ dácáá cuè tée ñuyíú-a, te dandàa tucu-dé ìngá veñúhu saa, ñu-ni núú cáá tñàhí veñúhu-áⁿ te xití úní-ni nduu sa nadaxínu-dé, te vá cúú-gǎ-xi veñúhu sá nǐ dácáá cuè tée ñuyíú-a, duha càchí-dé ní tecú dóho-ndí —càchí-yu xǎhǎⁿ-yu xii-güedé.

⁵⁹ Dico ni dùcaⁿ ñá túú ní cùu ìⁿnuú-yu nchaa tnúhu ní cáháⁿ-yu.

⁶⁰ Te tée cùu dútú cùnùu-gá ní ndacuíñí-dé tnuú nchaa ñáyiú, te xǎhaⁿ-dě xii Jèsús:

—¿Ná cuendá duha ndùu tnúhu cáháⁿ ñáyiú-a cuendá-n? Te cáháⁿ nùu nása ndùu tnúhu cáháⁿ-n —càchí-dé xǎhaⁿ-dě xii-gá.

⁶¹ Dico Jèsús ñá túú tñàhí ni cáháⁿ-gá. Te tée cùu dútú cùnùu-gá-áⁿ nǐ xǎhaⁿ tùcu-dé xii-gá:

—Cuíní-í cachí tnúhu-n xii-ndí nùu sá díú Crístú Déhe Yá Ndiöxí Yaá ní tendaha-gǎ véxi ñuyíú-a cùu-n. Te ñu Yá Ndiöxí cúú-gǎ Yaá quidé càhnu-ndí —càchí-dé xǎhaⁿ-dě xii-gá.

⁶² Te Jèsús ní xǎhaⁿ-gǎ xii-dé:

—Ñu Yaá-áⁿ cúú-í, te na càchí tnúhu-í xii-ndo sǎ sǎa nduu te quini-ndó yùhú Tée cùu ñaní tñàhá-ndó nchàa-ndo cunucóo-í xio cùha Dútú Ndiöxí Yaá ndácú quide nchaandi túhú sá vǎha. Te dàvá-áⁿ quini ñàhá-ndó xii-í quee-í andiú quixi-í ichi xití vícú —càchí-gǎ xǎhaⁿ-gǎ xii-dé.

⁶³ Te dútú cùnùu-gá-áⁿ nǐ ndátá-dě dóo cání nihnu-dé cuendá sǎ ñà túú ní tñàhá iní-dé nàcuáa ní cáháⁿ Jèsús, te ní xǎhaⁿ-dě xii nchaa cue tée xǐndecu jùndá:

—Ñá túú-gǎ xini ñùhu-xi cue tée cáháⁿ nùu ndáá sá ndècuéchi-dé àdi ñá túú ndècuéchi-dé. ⁶⁴ Chi sa ní xǐndedóho-o nàcuáa ndùu tnúhu ní cáháⁿ-dé ní cáháⁿ úhú-dé cuendá Yá Ndiöxí, te nchaa-ndo chí cáháⁿ vitna núu nása sàni iní-ndó cùnduu cuendá tée-a —càchí-dé xǎhaⁿ-dě xii-í-güedé.

Te nchaa-güedé ní cachí-güedé sá ná cùu-dé.

⁶⁵ Te dava-güedé ní ngüíta-güedé ní túú dí ñàhá-güedě xii-gá, te ní dádǎhu-güedé núú-gǎ, te ní ngüíta-güedé cánha-güedé xii-gá, te xǎhaⁿ-güedé:

—¿Cáháⁿ ná cótó nǎ cúú tée ní caniha xii-n! —cachí-güedé xǎhaⁿ-güedé xii-gá.

Te cue tée cùu poleciá ní cani-güedé núú-gǎ.

Té Pèlú cáháⁿ-dé núú ñáyiú sá ñà túú xini-dé Jèsús

(Mt. 26:69-75; Lc. 22:56-62; Jn. 18:15-18, 25-27)

⁶⁶ Te ndéé xití vehe càa núú nǐnu quide-güedé jùndá, chí vehe yòdo tñaha cuu-xi, te té Pèlú núcòo-dé quehé vehe-áⁿ. Te ìⁿ xíchí xínú cuèchi núú dútú cùnùu-áⁿ nǐ quexìo-xi núú núcòo té Pèlú. ⁶⁷ Te òré ní xini ñàhá-xi xii-dé núcòo teté-dé yuhu nùhú, te ní xíndéhé ñàha váha-xi xii-dé, te xǎhaⁿ-xi:

—Yòhó tñàhá-n cùu-n tée xica cuu ndihì Jèsús tée ñuú Nazàrét —càchí-xi xǎhaⁿ-xi xii-dé.

⁶⁸ Te té Pèlú ní xǎhaⁿ-dě xii-xi:

—Yùhú ñá túú xini-í tée-ǎⁿ, te ni ñà túú cùtñuní iní-í nása ndùu tnúhu cáháⁿ-n —càchí-dé xǎhaⁿ-dě xii-xi.

Te té Pèlú ní xica-dé cuáháⁿ-dé ndàa nàcuáa nchìi yuyèhe vehe-áⁿ, te ní cana ìⁿ líhi. ⁶⁹ Te xíchí xínú cuèchi-áⁿ nǐ xini ñàhá tùcu-xi xii-dé, te xǎhaⁿ-xi xii nchaa ñáyiú xǐndecu-áⁿ:

—Ñu tée-ǎⁿ tñàhá-dé xicá cùu-dé ndihì tée ndèca-güedé cuànguihu-a —càchí-xi xǎhaⁿ-xi xii-yu.

⁷⁰ Dico té Pèlú ñá túú ní nùnuu tucu-dé sǎ xicá cùu-dé ndihì Jèsús. Te tna tnaa-ni ní cuu sǎ dúcáⁿ nǐ xǎhaⁿ xíchí-ǎⁿ xii-dé, te ní xǎhaⁿ tùcu dava cue ñáyiú xǐndecu-áⁿ xii-dé:

—Ndáá sǎ tñàhá-n cùu-n tée xica cuu ndihì tée ndèca-güedé cuànguihu-ǎⁿ chí cùu-n tée distritú Galileá, te cáháⁿ-n dàtná cáháⁿ-güedé —càchí-yu xǎhǎⁿ-yu xii-dé.

⁷¹ Te té Pèlú ní xáhaⁿ-dě xií-yu:

—Nchàcuiti Yá Ndiöxí sá yùhú càháⁿ ndáá-í sá ñà túú xìní-í tée càcunehe-ndo-áⁿ —càchí-dé xáhaⁿ-dě xií-yu.

⁷² Te òré-ni-áⁿ nǐ cana tucu lǐhi xito cùu uú, te òré-áⁿ nǐ ndacu iní té Pèlú nàcuáa ní xáhaⁿ Jèsús xii-dé sá cùmání-gǎ cana ìⁿ lǐhi úú xito te úní xito cáháⁿ-dé núú ñǎyiu sá ñà túú xìní ñáhá-dě xii-gá. Te òré ducaⁿ nǐ ndacu iní-dé nàcuáa ní xáhaⁿ Jèsús xii-dé, te ní ndáhyú-dé ní ndixi cuéchi iní-dé.

15

Jèsús ndécú-gǎ núú tǎ Pilatú

(Mt. 27:1-2, 11-14; Lc. 23:1-5; Jn. 18:28-38)

¹ Te sátá nǐ túndaá te cue tée cùu dútú cúnùu, ndihí cue tée cùu sacuéhé nǔú ñǎyiu isràél, ndihí cue tée dàcuaha ñaha xii ñáyiu nchaa tnúhu ní chídó tnùní ndíi Moisés, ndihí nchaa dava-gá cue tée cùnùu ní xíndecu jùndá ní natacá-güedé, te ní dácútú-güedé Jèsús te ndèca ñaha-güedé xii-gá cuáháⁿ núú tǎ Pilatú. ² Te té Pilatú ní xícáⁿ tnúhú-dé núú Jèsús, te xáhaⁿ-dě xii-gá:

—¿Ndáá sá díú-n cùu-n tée yìndaha ñaha xii ñáyiu isràél-áⁿ? —càchí-dé xáhaⁿ-dě xii-gá.

Te Jèsús ní xáhaⁿ-gǎ xii-dé:

—Díu-í yìndaha-í-yu —càchí-gá xáhaⁿ-gǎ xii-dé.

³ Te cue tée cùu dútú cúnùu dacao-güedé vǎi cuéchi díquí-gǎ. ⁴ Te té Pilatú ní xícáⁿ tnúhú tucu-dé núú-gǎ, te xáhaⁿ-dě xii-gá:

—Cáháⁿ, ná cuèndá ñá càháⁿ-n te cundehe nǎ ndéé duha titní cuéchi dàcaa díquí ñáhá cuè tée-a xii-n —càchí-dé xáhaⁿ-dě xii-gá.

⁵ Dico Jèsús ñá túú tnàhí ní càháⁿ-gá te té Pilatú ío ní cuñúhu-dé sá dúcáⁿ ñà túú tnàhí ní càháⁿ-gá.

Cue ñáyiu xǎhǎⁿ-yu xii té Pilatú sá cáhni-dě Jèsús

(Mt. 27:15-31; Lc. 23:13-25; Jn. 18:38-19:16)

⁶ Te ndi tnahá nduu vico pascuá dácacu té Pilatú ìⁿ tée yìhi vecaá chi ducaⁿ tnàhí quide-dé, te mee ñáyiu càháⁿ-yu te núu ndédacàa tée yìhi vecaá-áⁿ cǎcu-dé, te tée-áⁿ dácacu-dé. ⁷ Te yìhi ìⁿ tée nàni Barrabás vecaá ndihí dava-gá cue tée cùndihí-dé. Te

té Barrabás-áⁿ nǐ sanu ichi-dé ñáyiu ñuu ingá ichi, te ní ngüíta-yu ndihí-dé ní cuu úhú iní-yu cue tée cùchiuⁿ, te ní sahani-dé ndíyí núu xiǎⁿ ní chihi ñaha-güedé vecaá xii-dé. ⁸ Te nchaa ñáyiu ní sáháⁿ-yu núú tǎ Pilatú, te càháⁿ ndàhú-yu núú-dé sá ná cádá nàhi-ni-dé dàtná quidé-dé. ⁹ Te té Pilatú ní xáhaⁿ-dě xií-yu:

—¿Cuìní-ndó sǎ dácacu-í tée yìndaha ñaha xii ñáyiu isràél-áⁿ? —càchí-dé xáhaⁿ-dě xií-yu.

¹⁰ Te ducaⁿ nǐ cáháⁿ té Pilatú, chi ní cutnùní iní-dé sá dícó sá cuèdú iní cuè dútú cúnùu núu xiǎⁿ ducaⁿ nǐ quide-güedé ní sáha cuèndá ñáhá-güedé xii Jèsús núú-dé.

¹¹ Te cue dútú cúnùu ní xáhaⁿ-güedé xii nchaa ñáyiu sá ná cùñáhá-yu xii té Pilatú dácacu-dé té Barrabás, te ní quidé-yu nàcuáa ní xáhaⁿ-güedé. ¹² Te té Pilatú ní xícáⁿ tnúhú-dé núú-yu, te xáhaⁿ-dě xií-yu:

—¿Ná cuìní-ndó càda-í tée càchí-ndó yìndaha ñaha xii ñáyiu isràél-i? —càchí-dé xáhaⁿ-dě xií-yu.

¹³ Te ncháá-yu níhi ní cáháⁿ-yu, te xǎhǎⁿ-yu xii-dé:

—¿Cata caa-dé núú cùrúxí! —càchí-yu xǎhǎⁿ-yu xii-dé.

¹⁴ Te té Pilatú ní xáhaⁿ-dě xií-yu:

—¿Te ná cúú cuéchi ní quide-dé te núu ducaⁿ cuìní-ndó càda-í-dé-i? —càchí-dé xáhaⁿ-dě xií-yu.

Dico ncháá-yu uuⁿ-gá níhi ní cáháⁿ-yu, te xǎhǎⁿ-yu xii-dé:

—¿Cata caa-dé núú cùrúxí! —càchí-yu xǎhǎⁿ-yu xii-dé.

¹⁵ Te té Pilatú ní quide-dé nàcuáa ní xáhǎⁿ-yu xii-dé cuèndá sá cúdù-dé núú-yu, te ní dácacu-dé té Barrabás, te ní táuchíúⁿ-dè ní caní-güedé Jèsús ndihí ñíi. Te sátá dúcáⁿ nǐ quide ñaha-güedé xii-gá, te ní táuchíúⁿ-dè candeca ñaha-güedé quíhíⁿ cata caa ñaha-güedé xii-gá núú cùrúxí.

¹⁶ Te cue tée cùu sandadú ndéca ñaha-güedé xii-gá cuáháⁿ vechiúⁿ, te díu-ní xiǎⁿ cúú vèhe tée cùu gobiernú. Te xiǎⁿ nǐ tacá nchaa dava-gá cue tée cùu sandadú.

¹⁷ Te xiǎⁿ nǐ dácúhíⁿ ñaha-güedé xii-gá ìⁿ dóó tǐcuèhé víhí, te ní cadúha-güedé ìⁿ coróná iñu ní chihi-güedé díquí-gǎ. ¹⁸ Te ní

ngüíta-güedé níhi càháⁿ-güedé cúdíquí ndeé ñáhá-güedé xii-gá, te xáhaⁿ-güedé:

—Ío càhnu cuu yohó téé yíndaha ñaha xii ñáyiú isràél! —càchí-güedé xáhaⁿ-güedé xii-gá.

¹⁹ Te càni-güedé díquí-gã ndihi ìⁿ carrutí, te tiú dí ñáhá-güedé xii-gá, te ngüñí xítí-güedé núú-gã quídé-güedé sá néhé-güedé sá yíñùhu núú-gã dico ñá ndàá chi dícó cúdíquí ndeé ñáhá-güedé xii-gá.

²⁰ Te sátá dúcáⁿ ñí cudíquí ndeé ñáhá-güedé xii-gá, te ní nataunuu ñaha-güedé xii-gá dóó tícuèhé víhí sã ñí dácúíhnú ñáha-güedé, te ní dándíunuu ñaha-güedé xii-gá dóó méé-gã. Te dätñuní ndécá ñáha-güedé cuáháⁿ núú cátá cà ñaha-güedé xii-gá núú cùrúxí.

Sàta caa-güedé Jèsús núú cùrúxí

(Mt. 27:32-44; Lc. 23:26-43; Jn. 19:17-27)

²¹ Te ichi cuáháⁿ-güedé ndihi Jèsús ní naníhí-güedé ìⁿ téé ñuú Cìrené nání-dé Xímú, te déhe-dé cúú ìⁿ téé nàni Lijandru, ndihi ingá téé nàni Rúfú. Te té Xímú-áⁿ ñúhú-dé ichi duha cuándixi-dé ní sáháⁿ-dé yucu, te ní quide yica-güedé ní xido-dé cùrúxí sá nchídó Jèsús.

²² Te ndèca-güedé Jèsús cuáháⁿ ìⁿ xichi núú nání Gölgotá, te tnúhu-áⁿ quée-xí: Ìⁿ xichi núú nání yìquí díquí ndíyi, duha quèe-xi tnúhu-áⁿ. ²³ Te ní sáñaha-güedé xii-gá ndudí sá ñí quée yúcu nání mìrrá coho-gá ní cùu dico ñá túú ní xíhi-gá. ²⁴ Te ní sata caa ñaha-güedé xii-gá núú cùrúxí. Te sátá dúcáⁿ te cue téé cùu sandadú-áⁿ ñí xito ndeé-güedé ñuú ndédacàa-güedé cuu cuendá-güedé dóo-gã.

²⁵ Te cùu-xi caá ìⁿ dátneé òré ní sata caa ñaha-güedé xii-gá núú cùrúxí. ²⁶ Te ní taxi ndecu-güedé ìⁿ sá ndèé lètrá núú táca-gá. Te lètrá-áⁿ càháⁿ-xi ná cuendá ducaⁿ ñí quide ñaha-güedé xii-gá. Te duha càháⁿ lètrá-áⁿ: “Téé yíndaha ñaha xii ñáyiú isràél”, duha càchí-xi. ²⁷ Te tnàhá úú cue téé cùu ñadúhú ñí sata caa-güedé ñuú cùrúxí tucu. Te ìⁿ-dé ní sata caa-güedé xio cùha-gá, te ingá-dé ní sata caa-güedé xio dätñi-gá. ²⁸ Te ducaⁿ ñí cuu chi ní quee ndáá-xi nàcuáa càháⁿ-xi núú tütú Yã Ndiöxí núú càchí-xi: “Ìⁿ-ni ñí quide ñaha-güedé

xii-gá ndihi cue téé ndècu cuéchi-xi”, duha càchí-xi núú tütú-gá.

²⁹ Te nchaa ñáyiú yáha yatni núú táca-gá dácúicó-yu díquí-yu te xícuèhé ñáhá-yu xii-gá, te xáháⁿ-yu:

—Te ná cuendá ducaⁿ càa-n tacaa-n xíaⁿ, te càchí-n sã dàngoyo-n veñúhu càhnu sá ìo cùnuu te dandàa-n ingá veñúhu saa, te xítí úní-ni nduu sa nadaxínu-n càchí-n. ³⁰ Te vitna tanuu núú cùrúxí-áⁿ dácácu-n mèe-n —cachí-yu xáháⁿ-yu xii-gá.

³¹ Te ñuú-ducaⁿ ñí quide cue téé cùu dütú cùnùu, ndihi cue téé dàcuaha ñaha xii ñáyiú nchaa tnúhu ní chídó tnùní ndíi Moisés, chi ní cudíquí ndeé ñáhá-güedé xii-gá, te ní xítñaha-güedé:

—Téé-a ní ndacu-dé ní dácácu nihnu-dé ñáyiú, ¿te ná cuendá ñá ndácú-dé dácácu nihnu-dé méé-dé-i? ³² Te núu ndáá sá ñíu-dé cúú-dé Crístú Yáá ní tendaha Yã Ndiöxí véxi ñuyíú-a quíndaha ñaha xii ñáyiú isràél, te na cundehe-o nuu-dé núú cùrúxí, cuendá quíndáá iní-ó-dé —càchí-güedé xítñaha-güedé.

Te ndeé tnàhá cue téé tàcaa xio xio ñíhi-gá xícuèhé ñáhá-güedé xii-gá.

Ní xítí Jèsús

(Mt. 27:45-56; Lc. 23:44-49; Jn. 19:28-30)

³³ Te òré ní cuu cuádava nduu, te ní cunee nihí ñuyíú, te ducaⁿ-ni càa ní cuu ndeé caá úní sacuaa. ³⁴ Te ñuú-ducaⁿ òré caá úní sacuaa-áⁿ ñíhi ní càháⁿ Jèsús, te xáhaⁿ-gã xii Tátá-gã Dütú Ndiöxí:

—Elói, Elói, láma sabàctaní —càchí-gá xáhaⁿ-gã.

Te tnúhu-áⁿ quée-xí: Ndiöxí méé-í, Ndiöxí méé-í, ná cuendá ní dáñá ñaha-n xii-í, duha quèe-xi tnúhu-áⁿ.

³⁵ Te dava cue téé xíndecu yatni núú táca-gá-áⁿ ñí tecú dóho-güedé nàcuáa ní càháⁿ-gá, te ní xítñaha-güedé:

—Chí cündèdóho chi càna-dé té Èliás —càchí-güedé xítñaha-güedé.

³⁶ Te ìⁿ cue téé xíndecu-áⁿ xínú-dé ní sáháⁿ ní chindóyo-dé luha càchí xítí ndudí íá, te ní chinenu-dé díquí ìⁿ yutnu càni te ní ndo-cani-dé chíhí-dé yuhu-gá cuendá coho-gá. Te ní xáhaⁿ cuè téé xíndecu-áⁿ xii téé-áⁿ:

—Cundetü tnaa na cundehe-o nacoto núu quixi té Eliás nunehe ñaha-dě xii-dé núu cùrúxí —càchí-güedé xáhaⁿ-güedě xii-dé.

³⁷ Te Jèsús níhi ní canasaa-gá te ní xihí-ni-gá. ³⁸ Te sátá dúcáⁿ te ní ndátá dǒó cúú còrtiná xití veñúhu càhnu sá ïo cùnunu ní quée dava ndáá, te ndàa núú ñinu ní ngüíta-xi ní ndátá. ³⁹ Te tée cùu capitáⁿ nùtnǎ-dé ndàa núú Jèsús, te ndèhe-dé nàcuáa ní quide-gá òré ní xihí-gá, te ní cachí-dé:

—Sá ndàa ndisa sá díú tǎe-a cùu-dé Déhe Yá Ndiǒxí ní cùu —duha ní cachí-dé.

⁴⁰ Te xica xǎnutnǎ ìⁿ úú ñáyiú ðíhí ndéhě-yu nchaa nàcuáa ní quide ñaha-güedě xii Jèsús, te tnàhá tá Màriá Magdalèná, ndihí tá Salómé, ndihí tá Màriá nǎná tǎ Chèé ndihí té Jàcobó tée càchí-güedé cúú líhli-gá. ⁴¹ Te cue ñáyiú ðíhí-áⁿ ñi xica cuú-yu ndihí Jèsús distrítú Galileá ní xinu cuèchí-yu núú-gǎ. Te cue ñáyiú ðíhí-áⁿ nchícúⁿ ñáhǎ-yu xii-gá ní quexió ndéé ñuú Jerusàlén ndihí dava-gá ñáyiú ðíhí nchícúⁿ ñáhǎ xii-gá cuáháⁿ.

Chindúxi-güedé Jèsús

(Mt. 27:57-61; Lc. 23:50-56; Jn. 19:38-42)

⁴² Te cùu-xi nduu vispré nduu ndètatú ñáyiú. Te nduu-ǎⁿ xǎquide túha-yu sá cúú ìngá nduu nduu ndètatú-yu-áⁿ, te ðiu-ni nduu-ǎ sa ní cuaa vìhi, ⁴³ te ìⁿ tée nàni Cheé tée ñuú Arimàtea ní cuyǎ-dě ní sáháⁿ-dé núú tǎ Pilatú, te ní xáhaⁿ-dě sá ñuú vá cùndèe iní-dé dañá-dě chindúxi-dé yǎquì cùñú Jèsús. Te tnàhá té Chèé-áⁿ cúú-dě ìⁿ tée cùnunu cundihí-dé cue tée quide jundá, te tnàhá-dé ndétú-dě sáá nduu ndíhu ndaha ñaha Yá Ndiǒxí xii-dé ndihí cue ñáyiú. ⁴⁴ Te té Pilatú ïo ní cuñúhu-dé sá dúcáⁿ ïo ndíhi ní xihí Jèsús, te ní cana-dé tée cùu capitáⁿ ní xicáⁿ tnúhú-dě núú-dě ñuú ndisa sá sà ní xihí-gá. ⁴⁵ Te tée cùu capitáⁿ-áⁿ ñi xáhaⁿ-dě xii té Pilatú sá ndàa ní xihí Jèsús, núu xǎⁿ té Pilatú-áⁿ ñi sáha-dé tnúhu chindúxi té Chèé-áⁿ yǎquì cùñú-gá. ⁴⁶ Te té Chèé-áⁿ ñi saaⁿ-dé ìⁿ dóo vǎha, te ní sáháⁿ-dé ní nunehe-dé yǎquì cùñú Jèsús núu cùrúxí, te ní chidúcúⁿnuu-dé yǎquì cùñú-gá dóo vǎha sá ñi saaⁿ-dé-áⁿ, te dàtnùní néhé-dé yǎquì cùñú-gá cuáháⁿ ní chihí-dé ìⁿ yáú nchíi yǎquì naha càva, te ní sadí-dé yuhu

yáú-áⁿ ndihí ìⁿ yáú quèhéⁿ. ⁴⁷ Te tá Màriá Magdalèná, ndihí tá Màriá nǎná tǎ Chèé ní xiní-yu núú ñi chihí-dé yǎquì cùñú Jèsús.

16

Ní ndoto Jèsús

(Mt. 28:1-10; Lc. 24:1-12; Jn. 20:1-10)

¹ Te sátá ñi cundiquìⁿ nduu ndètatú ñáyiú, te tá Màriá Magdalèná, ndihí tá Salómé, ndihí tá Màriá nǎná tǎ Jàcobó ní saaⁿ-yu acití sàháⁿ tnámí cuendá canehé-yu quíhíⁿ chihí-yu yǎquì cùñú Jèsús. ² Te ndumìngú nehé-ni òré vitna vǎha vǎha ní xinu coto núú nchíanchii ní quexió-yu núú nchíi yáú yíhí yǎquì cùñú Jèsús. ³ Te ní xitnàhá-yu:

—Yoo cúñaha-o xòcani yáú ndèdí yuhu yáú-a, chí vá yǒo tnàhí ndècu iha —cachí-yu xitnàhá-yu.

⁴ Te òré ní xindéhé vǎha-yu te ní xiní-yu sá yúú cáhnú ndèdí yuhu yáú-áⁿ ìⁿ xio-ná ndécú. ⁵ Te cuánguìhú-yu xití yáú-áⁿ, te ní xiní-yu nùcúo ìⁿ espíritú xínú cuèchi núú Yá Ndiǒxí ndàa xio cuhá-yu, te càa-xi datná cáá ìⁿ tée cuechi, te ñihnu-xi ìⁿ dóo cuixíⁿ dóo cání, te ní yùhú-yu òré ní xiní-yu espíritú-áⁿ. ⁶ Te espíritú-áⁿ ñi xáhaⁿ-xi xii-yu:

—Vá yùhú-ndó, chí yùhú sa cùtnuní iní-í sá nchòhó véxi-ndo nànducu-ndo yǎquì cùñú Jèsús tée ñuú Nazàrét tée ní sahani-güedé núu cùrúxí, dico ñá túú-gǎ yǎquì cùñú-dé ndécú iha chí sa ní ndoto-dé, te chí cùndèhe núu ñi sacáⁿ-güedé yǎquì cùñú-dé te quini-ndó ñá ñá túú-gǎ-dé. ⁷ Te chí cuáháⁿ núu ndécú tǎ Pèlú ndihí dava-gá cue tée ní xica cuu ndihí-dé, te duha cúñaha-ndo xii-güedé: “Jèsús codonù-gá núu-ndó quíhíⁿ distrítú Galileá, te yàcáⁿ quini-ndó-gǎ dàtná ní cachí-gá xii-ndo”, duha cúñaha-ndo xii-güedé —càchí espíritú-áⁿ xáhaⁿ-xi xii-yu.

⁸ Te cue ñáyiú ðíhí-áⁿ ïo ní yùhú-yu, te ní quene cunú-yu cuánuhú-yu, te quidi ñaha-ná-xi xii-yu sá ïo ní yùhú-yu, te ñá túú tnàhí ná tnúhu ní xǎhǎⁿ-yu xii cue ñáyiú ní naníhí-yu ichi cuendá sá ïo ní yùhú-yu.

Tá Màriá Magdalèná ní xiní-xi Jèsús
(Jn. 20:11-18)

⁹ Te sáta dúcáⁿ ñi ndoto Jèsús ndumìngú nehé-ni-áⁿ, te díhna nuu-gã tá Màriá Magdalèná ní quee túu-gá núú-xi, te ñiu tá Màriá-áⁿ cúu-xí xíchí ñi xíhi ñaha úsá espíritú cúndíhi yucu ñávãha ni cùu, te Jèsús ní queñuhu-gá nchaa espíritú-áⁿ yiqui cùnú-xi. ¹⁰ Te xíchí-áⁿ ñi sáháⁿ-xi ní xítñuhu-xi cue téé ní xica cuu ndíhi Jèsús ñacuáa ní cuu, te xíndáhi-güedé sá ndíhú iní-güedé òré ní quexìo-xi núú ndécú-güedé. ¹¹ Te òré ní xáhaⁿ tá Màriá xii-güedé sá ñi ndoto Jèsús ndíhi sá ñi xiní ñáhá-xí xii-gá, te ñá túú ní sàndáa iní-güedé.

Jèsús ní quee túu-gá núú úú cue téé ní xica cuu ndíhi-gá

(Lc. 24:13-35)

¹² Te úú tñáhá cue téé ní xica cuu ndíhi Jèsús ñúhú-güedé ichi cuáháⁿ-güedé yucu, te uuⁿi ní quee túu-gá núú-güedé, te ní dácótó ñaha-xi xii-güedé sá ñá túú-gã cáá-gã dàtná cáá-gã. ¹³ Te cue téé úú-áⁿ ñi xica-güedé cuáháⁿ-güedé ní xítñuhu-güedé nchaa dava-gá cue téé ní xica cuu ndíhi-gá sá ñi xiní ñáhá-güedé xii-gá, dico ñiu-ni ducaⁿ ñá túú ní sàndáa iní cue téé-áⁿ tñuhu ní cáháⁿ-güedé.

Jèsús xáhaⁿ-gã xii cue téé ní xica cuu ndíhi-gá ñacuáa ndíu chiuⁿ cada-güedé

(Mt. 28:16-20; Lc. 24:36-49; Jn. 20:19-23)

¹⁴ Te ndí ùxí ñiⁿ cue téé ní xica cuu ndíhi Jèsús yíhi-güedé mèsá xéxí-güedé, te ní quee túu-gá núú-güedé te ní tenàa ñáhá-gã xii-güedé cuèndá sá ño sàá iní-güedé ñá túú sàndáa iní ñáhá vãha-güedé xii-gá, chí ñá túú ní cuèní-güedé quíndáa iní-güedé ñacuáa ní xáhaⁿ ñá yiu ní xiní ñáhá xii-gá sáta ñi yáha ní ndoto-gá. ¹⁵ Te ní xáhaⁿ-gã xii-güedé:

—Quíhíⁿ-ndó ñihí ñuyú cáháⁿ-ndó núú nchaa ñá yiu tñuhu váha tñuhu sá cáháⁿ ñacuáa naníhí tãhú-yu. ¹⁶ Te nchaa ñá yiu na quíndáa iní tñuhu-áⁿ te cuanduté-yu, te naníhí tãhú-yu, dico nchaa ñá yiu vá quíndáa iní tñuhu-áⁿ te cuíta nihnú-yu. ¹⁷ Te nchaa ñá yiu na quíndáa iní ñáhá xii-í te cadá-yu sá vã yõ tñáhí ndàcu cada, te cuncenehe ñáhá-yu xii-í, te queñuhú-yu nchaa espíritú cúndíhi yucu ñávãha yíhi ñaha xii

ñá yiu. Te uuⁿi ndacú-yu cáháⁿ-yu ingá núú tñuhu sá vãta dácuàha-gá-yu. ¹⁸ Te cuèi na tñiⁿ-yu cóo dèéⁿ dico ñá túú ñá cada ñaha-ñi xii-yu, te cuèi venènú ná cáxí-yu dico ñá túú ñá tñahá-yu, te tendàhá-yu cue ñá yiu cùhú te ndúha-yu —càchí-gá xáhaⁿ-gã xii-güedé.

Jèsús cuánda-gá andíu

(Lc. 24:50-53)

¹⁹ Te sáta ñi yáha ducaⁿ ñi xáhaⁿ Jèsús xii cue téé ní xica cuu ndíhi-gá, te ní ndanchita-gá cuánda-gá andíu te ní ngóo-gá xio cùha Dútú Ndiõxí. ²⁰ Te cue téé-áⁿ ñi xica-güedé cuáháⁿ-güedé, te ní ngúita-güedé cáháⁿ-güedé tñuhu Xítohó Jesucristú nchaa xichi. Te mee-gã ní chindee ñaha-gã xii-güedé ní quide-güedé nchaa sá vã yõ tñáhí ndàcu cada cuèndá cutnùní iní ñá yiu sá ndàa cáháⁿ-güedé tñuhu-gá. Duha ní cuu dàvá-áⁿ.

TNÚHU NÍ CHÍDÓ TNÙNÍ TÉ LÛCÁ

Nàcuáa ní ngódó tnùní tnúhu Yá Ndiöxí

¹ Te vâi ñáyiú chîdo tnuní-yu nchaa nàcuáa ndùu tnúhu ñihí-yu nàcuáa ní cuu, te nchoo tnàhá-ó sà naha-o nàcuáa ní cuu. ² Te ñáyiú nchaa tnúhu chîdo tnuní-yu-án cúú-xí tnúhu ní cáháⁿ nchaa cue téé ní xini ndáá nàcuáa ní cuu ndéé díhna, cue téé ní cáháⁿ tnúhu Yá Ndiöxí. ³ Te yúhú sa ní cuu nduu quide cuendá-í nchaa nàcuáa ní cuu, núu xíáⁿ ní sani iní-í tee váha-í nchaa tnúhu-a núu tütú sá cúú-xí yòhó té Tëofilú chi ío váha cùu iní-í sá cúú-xí-n, ⁴ te tèe-í cuendá cutnùní iní-n sá sá ndáá cúú-xí nchaa sá ní dánèhé ñáhá-güedé xii-n.

Íⁿ espíritú xínú cuèchi núú Yá Ndiöxí cächí-xi sá cácu íⁿ téé cunani Juáá

⁵ Te cútnàhá ní xíndaha té Hèrodés ñáyiú distritú Jùdeá dàvá-án ní xíndecu íⁿ dútú ní xínani-dé Zacàriá, te ní cundihí-dé cue dútú Àbíás. Te ñadìhí-dé ní xínani-aⁿ Èlisabét, te ñaha-án ní cuu-aⁿ ñani tnàhá ndi Àrón. ⁶ Te ndi ndùú-yu ío ní quide ndáá-yu núu Dütú Ndiöxí, chi ní tní-yu nchaa tnúhu ní cáháⁿ-gá. ⁷ Te ñá túú nì íⁿ déhe-yu, chi ducaⁿ táhú tá Elisabét sá vâ cóó déhe-aⁿ, te ducaⁿ ndi nduú-yu ío ní sahnú-yu.

⁸ Te íⁿ nduu xínu cuechi tucu té Zacàriá ndihí nchaa cue téé cundihí-dé núú Yá Ndiöxí xití veñúhu. ⁹ Te dàvá-án ní xito ndéé-güedé cuendá cutnùní iní-güedé núu ndèdaca-güedé quíhu núu nàá xití veñúhu-án cahmi-güedé sá sàháⁿ tnámí, te ní cutnùní sá tē Zacàriá quíhu-dé. Te ducaⁿ ní quide-güedé, chi ducaⁿ tnàhí ní xóo cada nchaa cue dútú dàvá-án. ¹⁰ Te ñini sàhmi té Zacàriá sá sàháⁿ tnámí núu nàá, te vâi vihi ñáyiú xíndecu quehé veñúhu-án càháⁿ ndihí-yu Yá Ndiöxí. ¹¹ Te ní xini té Zacàriá íⁿ espíritú xínú cuèchi núú Yá Ndiöxí núní-xi xio cùha núu nàá núu càyú sá sàháⁿ tnámí-án. ¹² Te òré ní xini té Zacàriá espíritú-án te ñá ní cutnùní iní-dé nása cada-dé chi ío ní yúhú-dé. ¹³ Te espíritú-án ní xáhaⁿ-xi:

—Zacàriá, vá yúhú-n chi Yá Ndiöxí ní tedóho-gá tnúhu ní cáháⁿ-n, te vitna coo íⁿ déhe ñadìhí-n tá Elisabét te danàni-n-dé Juáá. ¹⁴ Te ío cudíí iní-n, te ducaⁿ ío vâi ñáyiú cudíí iní-yu na càcu-dé. ¹⁵ Te ío cudíu-dé núú Yá Ndiöxí, te ní vâ cóhó-dé ndidí te ní vâ cóhó-dé ndudí sá ní natíu, te sa cundecu ndihí-dé Espíritú Yá Ndiöxí òré cacu-dé. ¹⁶ Te ñáyiú cada te ío vâi ñáyiú isràél natuhá-yu ichi Dütú Ndiöxí Yá cúú Ndiöxí-ó. ¹⁷ Te té Juáá-án codonù-dé núú-gá, te cundecu ndihí-dé Espíritú-gá, te taxi tnùní-dé dàtná ní quide té Èliás. Te nacanu ichi-dé cue téé cùu sacuéhé cuendá cada-güedé sá váha sá cúú-xí cuè téé cuechi, te cuèi cue téé ío sàá iní-xi, te ñáyiú cada te tní-güedé tnúhu váha, tnúhu càháⁿ ñáyiú quide ndáá. Te ducaⁿ càda-dé cada túha-dé ñáyiú cuendá cunu cuèchí-yu núú Dütú Ndiöxí —cächí-xi xáhaⁿ-xi xii-dé.

¹⁸ Te té Zacàriá ní ndúcú tnúhu-dé núu espíritú-án, te xáhaⁿ-dé:

—¿Te nása cutnùní ndáá iní-í tnúhu càháⁿ-n-í? Chi yúhú ío ní sahnú-í ndihí ñadìhí-í —cächí-dé xáhaⁿ-dē xii-xi.

¹⁹ Te espíritú-án ní xáhaⁿ-xi:

—Yúhú cùu-í espíritú nání Gàbriél, te xínu cuechi-í núú Yá Ndiöxí, te mee-gá ní táuchíú-gá náhá-í tnúhu-gá véxi cuendá cutnùní iní-n nàcuáa cada ñaha-gá xii-ndo.

²⁰ Te vitna cuu ñihí-n te vá càháⁿ-gá-n ndéé ná sàá nduu càcu déhe ñadìhí-n, chi ñá túú ní sàndáá-ni iní-n tnúhu ní cáháⁿ-í. Te dacuití sáá nduu càda-xi nàcuáa ní cáháⁿ-í-a —cächí espíritú-án xáhaⁿ-xi xii-dé.

²¹ Te nchaa ñáyiú xíndecu quehé ndétü-yu té Zacàriá, te xícuñúhu-yu sá ío cùyaa-dé xití veñúhu. ²² Te òré ní ndee té Zacàriá, te ñá ní cùu-gá cáháⁿ ndihí ñaha-dé xii-yu, te òré-án ní cutnùní iní-yu sá ní xini-dé íⁿ espíritú xínú cuèchi núú Yá Ndiöxí xití veñúhu. Te mee-nà ndaha-dé ní quide-dé núu-yu chi ñá ní cùu-gá cáháⁿ-dé.

²³ Te ní xínu nduu ní xínu cuechi tē Zacàriá núú Yá Ndiöxí xití veñúhu, te cuánuhú-dé vehe-dé. ²⁴ Te sáta dúcáⁿ ní cuu te ñadìhí-dé tá Elisabét ní ngúhuⁿ déhe-aⁿ, te úhúⁿ yóó ñá túú tnàhí-gá ní quèe-aⁿ caca cuu-aⁿ, te ní cachí-aⁿ: ²⁵ “Mee Dütú Ndiöxí duha ní cundàhú iní ñáhá-gá sá cóó íⁿ

déhe-í cuendá sá vǎ cúu yǐchí iní ñáhá ñǎyiu xii-í”, duha ní cachí-aⁿ.

Iⁿ espíritú xínú cuèchi núú Yǎ Ndiǒxí cǎchí-xi sá cǎcú Jèsús

26-27 Te núú iñú yóó sǎ ñí ngúhuⁿ déhe tá Elisàbét, te ní tendaha tùcu Yá Ndiǒxí espíritú nání Gǎbriél cuáháⁿ-xi ñⁿ ñúú nání Nàzarét cuáháⁿ ngoto-xi ñⁿ xíchí cuéché nàni Mariá. Te ñúú-áⁿ yíndèhu-xi distritú Galileá. Te xíchí-ǎⁿ sa ní cundáá tnúhu sá tnándaha-xi ndihí ñⁿ téé nàni Cheé ñaní tnáhá ndíi Dávíi. 28 Te espíritú-áⁿ ñí quíhu-xi ndéé xití vehe núú ndécú tǎ Màriá, te ní xáhaⁿ-xi:

—ǐCóvǎha-n-aⁿ! Dútú Ndiǒxí ío cùu iní ñáhá-gǎ xii-n te ndècu ndihí ñaha-gǎ, te ío-gǎ xító ñaha-gǎ xii-n dàcúúxí dǎva-gǎ ñáyiu dǐhí —cǎchí espíritú-áⁿ xǎhaⁿ-xi.

29 Dico òré ní xiní tá Màriá espíritú-áⁿ, te ní quiyùhú iní-xi sá dúcáⁿ ñí cǎháⁿ espíritú-áⁿ. Te ní sani iní-xi: “ǐNá cuendá duha cǎháⁿ-tu espíritú-a-i?”, duha ní sani iní-xi. 30 Te espíritú-áⁿ ñí xáhaⁿ-xi:

—Màriá, vá yùhú-n chi ducaⁿ ñí nduu táhú-n ñúu Yá Ndiǒxí. 31 Te vitna ngúhuⁿ déhe-n, te na cǎcu-dé te danàni-n-dé Jèsús. 32 Te ío cunuu-dé, chi Dútú Ndiǒxí Yáá ío cùnuu cachí-gǎ sá Déhe-gǎ cúu-dé, te dǐu-gǎ cada te cuu-dé ñⁿ téé cùnuu núú ñáyiu isràél dàtná ní quide-gǎ ndíi Dávíi. 33 Te taxi tnùní-dé ñáyiu isràél, te ducaⁿ-ni cùnuu-dé ñí caa ñí quíhíⁿ —cǎchí-xi xǎhaⁿ-xi.

34 Te tá Màriá ní xáhaⁿ-xi xii espíritú-áⁿ:

—ǐTe nása cuu tnúhu cǎháⁿ-n te ñá túú yǐi-í-i? —cǎchí-xi xǎhaⁿ-xi.

35 Te ní xáhaⁿ espíritú-áⁿ:

—Espíritú Yǎ Ndiǒxí quixi cundecu ndihí-n, te ducaⁿ Yǎ Ndiǒxí cada-gǎ ñⁿ sá vǎha sá cúu-xí-n ná cǎcu déhe-n. Te Yá Ndiǒxí cǎchí-gǎ sá ío cundecu yíñùhu-dé núú-gǎ, chi Déhe-gǎ cúu-dé. 36 Te tnáhá didí-n tǎ Elisàbét ñúhú dèhe-aⁿ cuèi ío ní sahnú-aⁿ, te dǐu-aⁿ cǎchí-yu sá vǎ cóo dèhe-aⁿ ñí cùu, te vitna sa ní cuu íñú yóó ñúhú dèhe-aⁿ. 37 Chi Yá Ndiǒxí ndácú-gǎ quidé-gǎ nchaá sá vǎ yǒo tnáhí ndàcu cada —cachí-xi xǎhaⁿ-xi.

38 Te tá Màriá ní xáhaⁿ-xi:

—Yúhú ná cúnú cuèchi-í núú Dútú Ndiǒxí, te mee-gǎ ná cǎdá ñaha-gǎ xii-í nàcuáa ñí cachí-n —cǎchí-xi xǎhaⁿ-xi xii espíritú-áⁿ.

Te sátá dúcáⁿ te espíritú-áⁿ ñí xica-xi cuáháⁿ-xi.

Tá Màriá cuáháⁿ ngoto-xi tá Elisàbét

39 Te tá Màriá ío ndihí cuáháⁿ-xi ñⁿ ñúú cǎá xití yucu distritú Júdeá. 40 Te ní sǎá-xi vehe té Zacàriá, te cuánguihu-xi ní dándácóo váha-xi tá Elisàbét. 41 Te òré ní tecú dóho tá Elisàbét ní cǎháⁿ tá Màriá, te ní candá déhe-aⁿ xití-aⁿ, te òré-áⁿ ñí ngúndecu ndihí-aⁿ Espíritú Yǎ Ndiǒxí. 42 Te níhi ní cǎháⁿ-aⁿ, te xǎhaⁿ-aⁿ xii tá Màriá:

—Yá Ndiǒxí ío xító ñaha-gǎ xii-n dàcúúxí dǎva-gǎ tnàha dǐhí-ó, te ducaⁿ-ni xító-gǎ cuèi déhe-n. 43 ǐTe ná cúu yùhú ñúu véxi coto ñaha yòhó náná Yáá cúu Xítóhó-í-i? 44 Chi òré-ni ní tecú dóho-í ní cǎháⁿ-n te ní candá-ni déhe-í xití-í sá cùdǐí iní-dé. 45 Te váha táhú yòhó sá ñí sàndáá iní-n, chi dacuití sǎ cǎdá Dútú Ndiǒxí nàcuáa ñí cǎháⁿ espíritú ní tendaha-gǎ ní quixi ní cachí tnúhu xii-n nàcuáa cada-gǎ —cǎchí-aⁿ xǎhaⁿ-aⁿ xii tá Màriá.

46 Te ní xáhaⁿ tǎ Màriá:

Ío cǎhnu cuu Dútú Ndiǒxí,

47 Ío cùdǐí iní-í chi dǐu-gǎ taunihnu ñaha-gǎ xii-í núú ùhú núú ndàhú.

48 Chi ní ndacu iní ñáhá-gǎ xii yùhú, te dícó ñⁿ xíchí xínú cuèchi núú-gǎ cúu-í,

te vitna te nchaandí túhú ñáyiu cachí-yu sá ío váha táhú-í.

49 Te Yá Ndiǒxí cándòo caa nine iní-gǎ, te ío cǎhnu ñⁿ sá vǎha ní quide-gǎ sá cúu-xi-í.

50 Te cùndahú iní-gǎ nchaá ñáyiu nèhe sá yíñùhu núú-gǎ.

Te ducaⁿ-ni cuèi ñáyiu sa ndècu ñuyíú-a ndihí ñáyiu vitna véxi.

51 Chi ta quide-gǎ nchaá sá vǎ yǒo tnáhí ndàcu cada véxi,

te ta dándóo canúú-gǎ cue ñáyiu quide cahnu mee-xi.

52 Te cue ñáyiu tàxi tnùní ñá túú-gǎ dáñá-gǎ taxi tnùní-yu,

te cue ñáyiu ndàhú ní quide nínu ñaha-gǎ xií-yu.

53 Te cue ñáyiu ndècu ndihí tnúndòho tnúhu ndàhú ní quide váha ñaha-gǎ xií-yu,

te cue ñáyiú cuica ñà túú nă ní ñihí-gă-yu cundecu ndihí-yu.

54 Te chindee-gă ñáyiú israhél, ñáyiú xínu cuechi núú-gă, te ñá túú dàña ni-hnu ñaha-gă xií-yu, chi cundahú iní ñáhá-gă.

55 Chi ducaⁿ ñí xáhaⁿ-gă xii ndíi Àbrahám, ndihí cue ñaní tnáhá ndíi. Duha ní xáhaⁿ tá Màriá xii tá Elisàbét.

56 Te ní xindecu tá Màriá dàtná úní yóó ndihí tá Elisàbét te dàtnúni cuánuhú-xi vehe-xi.

Ní cacu té Juàá té dacuàndute ñaha xii ñáyiú

57 Te ní sáá nduu ñí cacu ñíⁿ déhe téé tá Elisàbét. 58 Te nchaa ñáyiú ndècu yatni ndihí-aⁿ, ndihí nchaa ñaní tnáhá-áⁿ ñí níhí-yu tnúhu nàcuáa ní chindee ñaha Yá Ndiöxí xii-aⁿ. Te ío ní cudíi iní-yu cuendá-aⁿ.

59 Te núú ùná nduu sá ñí cacu déhe-aⁿ, te ní sáháⁿ ñáyiú núú ndécú-áⁿ cuendá cuáhă-yu sèñá ñíⁿ déhe-aⁿ. Te cuini-yu cunani dèhe-áⁿ Zacàriá dàtná nání tătă ní cùu. 60 Te ní xáhaⁿ năná dèhe-áⁿ:

—Ñáhá, chi Juàá cunani-dě —càchí-aⁿ xáhaⁿ-aⁿ xií-yu.

61 Te ní xáhăⁿ-yu:

—¿Te ná cuendá te ñá túú ñí ñaní tnáhá-ndó dùcaⁿ nani-i? —càchí-yu xáhăⁿ-yu.

62 Te ní quidé-yu ndàhá-yu núú tătă dèhe-áⁿ cuendá cuini-yu núú nása cuini méé-dě cunani dèhe-dé. 63 Te ní xicáⁿ-dé ñíⁿ tutú ní chídó tnúni-dé nàcuáa cunani dèhe-dé, te duha ní chídó tnúni-dé: “Juàá cunani-dě”, càchí-xi núú tütú ní tee-dé-áⁿ. Te nchaa ñáyiú xindecu-áⁿ ñí cuñúhu-yu nàcuáa ní cuu. 64 Te òré-áⁿ ñí nacáháⁿ té Zacàriá sá ñí cuu ñihí-dé ní cùu, te ní ngúita-dé ní cachí-dé sá ío càhnu cuu Yá Ndiöxí. 65 Te nchaa ñáyiú xindecu yatni ndihí-dé ní cuñúhu-yu, te nchaa ñáyiú xindecu nihíi xití yucu distritú Jùdeá ní níhí-yu tnúhu nàcuáa ní cuu. 66 Te nchaa ñáyiú-áⁿ ío vâi ní sani iní-yu, te ní xitnàhá-yu:

—¿Ná cúú să cádá tēe-ăⁿ ndéé ìdá-gă ná cuèhnu-dé? —càchí-yu xitnàhá-yu.

Te ducaⁿ ñí xitnàhá-yu chi Dútú Ndiöxí ndécú ndihí ñaha-gă xii-dé.

Té Zacàriá càchí-dé sá ío càhnu cuu Yá Ndiöxí

67 Te té Zacàriá tătă tē lĩhli-áⁿ ñí ngúndecu ndihí-dé Espiritú Yá Ndiöxí te ní cáháⁿ-dé nchaa tnúhu sá ñí dánèhé ñáhá-gă, te ní cachí-dé:

68 Ío càhnu cuu Dútú Ndiöxí nchoo ñáyiú israhél,

chi ní quixi coto ñaha-gă xii-o, te cùu-o ñáyiú cùu cuendá-gă, chi dàcácu ni-hnu ñaha-gă xii-o vitna.

69 Chi ní tendaha-gă ñíⁿ téé véxi-dé dàcácu nihnu ñaha-dě xii-o núú ùhú núú ndàhú.

Te cùu-dé ñaní tnáhá ndíi Dàvíi téé ní xínu cuechi núú-gă ndéé sanaha.

70 Te diu-ni tnúhu ní cáháⁿ Yá Ndiöxí ní cáháⁿ cue téé ní quide ndáá ní xindecu núú-gă ñuyúú-a ndéé sanaha.

71 Te ní cachí-güedé sá táunihnu ñaha-gă xii-o núú nchàa ñáyiú cùu ùhú iní ñáhá, ndihí núú nchàa ñáyiú ñá túú cùu quini ndee ñáhá.

72 Te ní xáhaⁿ-gă sá cundàhú iní ñáhá-gă xii-o, te ducaⁿ càda-gă chi vá nàcuánaa-gă tnúhu ní cáháⁿ-gă ndihí-güedé.

73 Te diu ducaⁿ ndùu tnúhu ní xáhaⁿ-gă xii ndíi Àbrahám sá

74 táunihnu ñaha-gă xii-o núú nchàa ñáyiú cùu ùhú iní ñáhá,

cuendá sá vâ yùhú-ó cùu cuechi-o núú-gă.

75 Te cada ndáá-ó, te cundecu yíñuhu-o núú-gă ndi nchàa nduu cundecu-o ñuyúú-a.

Duha ní cachí té Zacàriá.

76 Te xáhaⁿ-dě xii té lĩhli-áⁿ:

Te yòhó té lĩhli, cáháⁿ ñáyiú cuendá-n să cúú-n ñíⁿ téé cáháⁿ tnúhu Dútú Ndiöxí Yá ío cùnuu,

chi quíhíⁿ-n còdonuu-n núú Yáá cúú Xitohó-ó dàtúha-n ñáyiú cuendá cundecu túha-yu òré quexìo-gă.

77 Te cúñaha-n xii ñáyiú israhél sá cuini-gă cada càhnu iní-gă nchaa cuéchi-yu,

te naníhí tàhú-yu.

78 Te ducaⁿ càda-gă chi ío cùu iní ñáhá-gă xii-o, chi ndéé andíu ñí tendaha-gă ñíⁿ téé véxi

cuuⁿ-dé dandixi túu-dé iní-ó cuendá cutnùni iní-ó nàcuáa ndùu cuendá Yá Ndiöxí.

79 Te ducaⁿ dândixi túu-dé iní nchaa ñáyi ndècu ichi cuehé ichi duha ta xíta nihnu cuáháⁿ cuendá nucúnu ichi-yu ìⁿ ichi váha.

Duha ní xáhaⁿ tẽ Zacàriá xii déhe-dé.

80 Te té lĩhli-áⁿ tá sàhnu-dé, te ta chĩndee chitúu ñaha Yá Ndiõxí xii-dé cuáháⁿ, te ní xĩndecu-dé xití yucu ndéé ní sáá nduu ñi ngũíta-dé ní cáháⁿ-dé núú cuè ñáyi isràèl tnúhu Yá Ndiõxí.

2

Ní cacu Jèsús (Mt. 1:18-25)

1 Te dává-áⁿ ñi táuchíúⁿ tẽ Aùgustú Cèsár nucodó tnúni nchaa ñáyi nacióⁿ yĩndàha-dé. 2 Te xéhé sã dĩhnanuu ñi nucodó tnúni ñáyi, te diu-ni dává-áⁿ ñi cunuu té Cĩreniú distritú Siríá. 3 Te nchaa ñáyi ní nataká-yu ñuu núú ñi cacú-yu cuendá nucodó tnúni-yu. 4 Núú xiáⁿ ní quee té Chèè ñuu Nazàrét ìⁿ ñuu yĩndèhu distritú Galileá, te cuáháⁿ-dé ñuu Bèlén ìⁿ ñuu yĩndèhu distritú Jùdeá, chi xiáⁿ ñi cuu ñuu ndí Dàvíí, te diu-ni ñani tnáhá tẽ Chèè-áⁿ ñi cuu ndí. 5 Núú xiáⁿ cuáháⁿ-dé ndéé ñuu Bèlén nucodó tnúni-dé, te tnáhá tá Màriá xíchí ñi cundáá tnúhu sá tnãndaha ndíhi-dé cuáháⁿ ndíhi ñaha-dé, te sa ñuhu déhe-xi. 6 Te ñini cùyaá-yu ñuu Bèlén-áⁿ ñi sáá òrè cacu déhe-xi. 7 Te ní cacu déhe díhna-xi, te ní chidúcúⁿnuu-xi dóó, te ní sacáⁿ ñáhá-xi ìⁿ vehe núú cúú vèhe quití, chi ñá túú ní ñĩhí-yu vehe coó-yu.

Cue espíritú xínú cuèchi núú Yá Ndiõxí ndíhi cue toli.

8 Te yatni ñuu-áⁿ xĩndecu ìⁿ úú toli ndéé-güedé mbèé-güedé ndécú-güedé majadá niú-áⁿ. 9 Te uuⁿni ní quexìo ìⁿ espíritú xínú cuèchi núú Yá Ndiõxí, te Yá Ndiõxí ní quide-gá ní dáyèhé-xi ní càndéé núú xĩndecu-güedé, te ní yùhú víhí-güedé. 10 Te ní xáhaⁿ espíritú-áⁿ:

—Vá yùhú-ndó, chi nàha-í ìⁿ tnúhu váha véxi sá cúú-xi-ndó, te ío cudí^í ìní-ndó ndíhi nchaa ñáyi. 11 Chi vitna ní cacu ìⁿ tée dàcácu nihnu ñaha xii-ndo núú ùhú núú ndáhú ñuu ndí Dàvíí, te tée-áⁿ cúú-dé Xítóhó Jesucristú. 12 Te dàtná ìⁿ sèñá te naníhí-ndó tẽ lĩhli-áⁿ yídúcúⁿ nuu-dé

dóó cáá-dé ìⁿ vehe quití —càchí-xi xáhaⁿ-xi xii-güedé.

13 Te òrè-áⁿ ñi quexìo cuéhé víhí espíritú véxi cuuⁿ andiu ñi naníhí tnáhá-xi ndíhi espíritú-áⁿ, te ní ngũíta-xi ní chiñuhu-xi Yá Ndiõxí, te càchí-xi:

14 ¡Ío càhnu cuu Yá Ndiõxí Yaá ndécú àndiu, te na cùndecu váha-ni nchaa ñáyi cùu iní mée-gã!

Duha càchí cue espíritú-áⁿ.

15 Te òrè cuánda cue espíritú-áⁿ andiu, te ní ngũíta cue toli-áⁿ xĩtnàha-güedé:

—Na quihíⁿ-ó ñuu Bèlén quini-ó nàcuáa ní cuu, chi Dútú Ndiõxí sa ní cachí tnúhu-gá —càchí-güedé xĩtnàha-güedé.

16 Te ní tñi-güedé ichi súúni ndíhi cuáháⁿ-güedé, te ní naníhí-güedé tá Màriá ndíhi té Chèè, ndíhi té lĩhli-áⁿ cáá-dé xití ìⁿ vehe quití. 17 Te òrè ní xiní ñáhá-güedé te ní xáhaⁿ-güedé xií-yu nàcuáa ní xáhaⁿ espíritú-áⁿ xii-güedé cuendá té lĩhli-áⁿ. 18 Te nchaa ñáyi ní tecú dóho-xi ní cuñuhu-yu nàcuáa ní cáháⁿ-güedé. 19 Dico tá Màriá chi ñuhu nahi-ni iní-xi, te dicó-ni sàni iní-xi cuendá nchaa tnúhu-áⁿ. 20 Te cue toli-áⁿ ñi natñi-güedé ichi, te ta xĩtnàha-güedé cuánuhú sã ío càhnu cuu Yá Ndiõxí cuendá nchaa tnúhu ní xĩndedóho-güedé, ndíhi cuendá nchaa sá ñi xiní-güedé, chi cuendá sá ndáá ní cuu nchaa nàcuáa ní tecú tnúhu-güedé.

Ndècá-yu Jèsús cuáháⁿ veñúhu

21 Te núú ùná nduu sá ñi cacu té lĩhli-áⁿ, te ní sáha-güedé sèñá ñi-dé, te ní dánání ñaha-güedé Jèsús xii-dé, diu-ni nàcuáa ní xáhaⁿ espíritú xínú cuèchi núú Yá Ndiõxí xii tá Màriá ndéé cùtnáhá vátá ngũhuⁿ-gá-dé xití-xi.

22 Te sáta ñi tnáhá nduu, nduu ìhí-yu nàcuáa cáháⁿ nchaa tnúhu ní chídó tnúni ndí Moisés, te ndècá-yu té lĩhli-áⁿ cuáháⁿ ñuu Jerusálén cuendá quee túu-dé núú Dútú Ndiõxí. 23 Te ducaⁿ ñi quide-yu, chi ducaⁿ cáháⁿ-xi núú tütú Yá Ndiõxí sá ncháá làndú tée na càcu díhna quetúu-güexi núú-gã cuendá cùndecu-ná-güexi cuendá-gá. 24 Te ní quide-yu nàcuáa cáháⁿ Yá Ndiõxí núú tütú-gá núú càchí-xi: “Canehe-ndo úú lõmá àdi úú cùcu

quíhíⁿ nduu táhú ñáhá Yă Ndiöxí”, duha cãháⁿ-gá núú tütú-gá.

25 Te dàvá-án ndécú ñⁿ téé nàni Mió ñuú Jerusàlén. Te ío váha iní-dé, te chíñuhu-dé Yă Ndiöxí, te ndètu-dé sáá nduu chindee ñaha Yá Ndiöxí xii ñáyiu isràél. Te ndècu ndihí té Mió-án Espíritú Yă Ndiöxí. 26 Te sa ní xáhaⁿ-xi xii-dé sá vă cùú-ni-dé, chí dacuítí quini-dé Crístú Yaá tendaha Yă Ndiöxí quixi ñuyíú-a. 27 Te téé-án ndécá ñaha Espíritú Yă Ndiöxí xii-dé cuáhán veñúhu cãhnu sá ïo cùnuu. Te cuáhán-yu ndihí Jèsús veñúhu-án cuendá cadá-yu ndihí-gá nàcuáa cãháⁿ tnúhu ní chídó tnùní ndíi Moisés. 28 Te òré ní sáá-yu, te té Mió-án ñí nguídèhé-dé Jèsús, te ní cãháⁿ-dé sá ïo cãhnu cuu Yá Ndiöxí, te ní xáhaⁿ-dè xii-gá:

29 Yòhó Dútú Ndiöxí sa ní cuu daña-n cùú-í vitna,

chi sa ní quide-n nàcuáa ní cachí-n xii yúhú téé xínu cuechi núú-n.

30 Chi sa ní xiní núú-í Yaá dàcácu nihnu ñaha xii ñáyiu núú ùhú núú ndàhú vitna.

31 Te Yaá ní tendaha-n vèxi núú ndécú nchàa ñáyiu ñuyíú-a.

32 Te cùu-gá dàtná ñⁿ ñuhú, chí dandìxi túu-gá iní ñáyiu cuendá cutnùní iní-yu cuendá Yă Ndiöxí cuèi ñá díú ñáyiu isràél cùú-yu.

Te diu-gá cada, te canehe ñáyiu dava-gá ñuú sá yíñuhu núú ñáyiu isràél chí diu ñáyiu isràél cùú-yu ñáyiu cùu cuendá-n.

Duha ní xáhaⁿ té Mió xii Yá Ndiöxí.

33 Te té Chèé ndihí náná Jèsús ní cuñúhu-yu tnúhu ní cãháⁿ té Mió cuendá-gá. 34 Te dàtnùní té Mió ní xicáⁿ táhú-dè núú Yă Ndiöxí cuendá-yu, te xáhaⁿ-dè xii tá Màriá náná Jèsús:

—Cundedóho tnúhu na cãháⁿ-í-a, té lĩhli-a ní nduu táhú-dè nacanu ichi-dé dava ñáyiu isràél ichi Yá Ndiöxí, te davá-yu vá tní-yu tnúhu cãháⁿ-dé, te ñáyiu-án cuíta nihnú-yu, te cada-dé nàcuáa cutnùní iní ñáyiu sá Yă Ndiöxí ní tendaha ñaha-gá xii-dé, dico vá quindáá iní-yu, chí daquèe tíhú ñáhã-yu xii-dé. 35 Te ducaⁿ te cutnùní nàcuáa sàni iní ñⁿ ñáyiu. Dico sá cùú-xi yòhó chí ío cada ndàhú-xi iní-n, chí súúní dàtná sá ní

nícuehé iní-n càda-xi —cachí-dé xáhaⁿ-dè xii tá Màriá.

36 Te xíáⁿ ndécú tnàhá ñⁿ ñaha cãháⁿ tnúhu Yá Ndiöxí nání-án Aná, te tãtá-aⁿ ní xínani-dè Fànuél ñani tnàhá ndíi Àsér. Te ñaha-án sa ní sahnu vèhi-aⁿ, te cuechi-ni-aⁿ ñí tnándaha-aⁿ te úsá-ni cuíá ñí xíndecu-aⁿ ndihí yí-aⁿ, 37 te ní quendóo quèé-aⁿ, te sa ñùhu-aⁿ cùmídícó cùmí cuíá-aⁿ. Te ñá túú ní xòo quee-aⁿ veñúhu cãhnu sá ïo cùnuu, chí nduu níu ní xòo chíñuhu-aⁿ Dútú Ndiöxí, te áma ñá túú tnàhí ná ní xòo caxi-aⁿ ní xòo cãháⁿ ndihí-aⁿ Yá Ndiöxí. 38 Te diu-ni òré ndécú-yu ndihí Jèsús ní quexìo-aⁿ núú-yu, te ní ndacáⁿ táhú-án núú Yă Ndiöxí cuendá sá ñí xiní-aⁿ Jèsús, te dàtnùní ní nguíta-aⁿ cãháⁿ váha-aⁿ cuendá-gá núú nchàa ñáyiu, ñáyiu ndètu quini sáá nduu dàcácu Yá Ndiöxí ñáyiu Jerusàlén núú tnündòho tnúhu ndàhú.

Cuánuhú-yu ñuú Nazàrét

39 Te sátá ñí quidé-yu nchaa nàcuáa cãháⁿ tnúhu Yá Ndiöxí, te cuánuhú-yu ñuú Nazàrét núú ndécú tnàhí-yu, te ñuú-án yíndèhu-xi distritú Galileá. 40 Te té lĩhli nàni Jèsús-án tá sahnu-dé, te ta nihí ndéé-dè cuáhán, te ducaⁿ ïo váha ta sáá sá xini tnùní-dé cuáhán, chí Yá Ndiöxí ndécú ndihí ñaha-gá xii-dé.

Jèsús ndécú-gã veñúhu

41 Te ndí tnàhá cuíá ñí xòo quíhíⁿ té Chèé ndihí náná Jèsús vico pàscuá ñuú Jerusàlén. 42 Te cùtnàhá ní chítú Jèsús úxúú cuíá-gã, te cuáhán-yu ndihí-gá ñuú Jerusàlén vico pàscuá, chí ducaⁿ tnàhí quidé-yu. 43 Te òré ní yáha vico, te ní natní-yu ichi cuánuhú-yu, te ní quendóo-gá ñuú Jerusàlén, te ní náná-gã, te ní té Chèé ñá túú ní xiní ní quendóo-gá. 44 Chí ní sani iní-yu sá ñútnàhá-gá tnuú nchaa ñáyiu ní sáhán vico cuánuhú. Te ní xúhuⁿ-yu ñⁿ nduu ichi ta ndùcu tnúhu-yu-gá núú nchàa ñani tnàhã-yu, ndihí núú nchàa ñáyiu xiní tnàhá ndihí-yu, 45 te ñá túú ní nánihí ñáhã-yu xii-gá. Núu ní nacuicó-yu cuánuhú tucú-yu ñuú Jerusàlén cuendá yacáⁿ nanducu ñáhã-yu xii-gá.

46 Te núú ùní nduu sá ñí dana núú ñáhã-yu xii-gá, te ní naníhí ñáhã-yu núcóo-gá xití veñúhu cãhnu sá ïo cùnuu tnuú

cue tée dàcuaha ñaha xii-yu nchaa tnúhu ní chídó tnùní ndí Moisés, te ndédóho ñaha-gã xii-güedé, te nándi sá ndúcú tnúhu-gá núú-güedé. ⁴⁷ Te nchaa cue tée xíndedóho ñaha xii-gá xícuñúhu-güedé sá ïo váha sàá sá xíní tnùní-gá, te ïo váha ñihí-gá tnúhu nàdanchocáva-gá. ⁴⁸ Te òré ní xíní ñáhá tē Chèé ndihí náná-gã xii-gá, te ïo ní cuñúhu-yu, te ní xáhaⁿ náná-gã xii-gá:

—Yòhó déhe-í, ¿ná cuendá ducaⁿ ñi quide ñaha-n xii-ndí? Te tātá-n ndihí yúhú ndihú iní-ndí xícá nànducu ñaha-ndí xii-n —càchí-xi xãhaⁿ-xi xii-gá.

⁴⁹ Te ní xáhaⁿ Jèsús xii-yu:

—¿Ná cuendá nánducu ñaha-ndo? ¿Náa ñá túú xíní-ndó sã núú chíúⁿ Tātá-í tau-í caca cuu-í-ãⁿ? —càchí-gá xãhaⁿ-gã xii-yu.

⁵⁰ Dico mèe-yu ñá túú ní tècú tnùní-yu nàcuáa ní xáhaⁿ-gã.

⁵¹ Te sátá dúcáⁿ te cuánuhú ndihí ñáhá-yu xii-gá ñuú Nazàrét, te ïo ní sándáá iní ñáhá-gã xii-yu. Te nchaa sá ñi quide-gá-áⁿ ñi xúhuⁿ nahi-ni iní náná-gã. ⁵² Te Jèsús ducaⁿ-ni ta sãhnu-gá cuáháⁿ, te ta sàá-gá sá xíní tnùní-gá cuáháⁿ, te ducaⁿ cùdiu-gá núú Yã Ndiöxí, ndihí núú nchaa ñáyiu.

3

Té Juáá tée dàcuandute ñaha xii ñáyiu càháⁿ-dé tnúhu Yã Ndiöxí xití yucu (Mt. 3:1-12; Mr. 1:1-8; Jn. 1:19-28)

¹ Te ní cuu sáhúⁿ cuía sã yíndàha té Tiberiú cuéhé nacióⁿ, te dàvá-áⁿ ñi cunuu té Pilatú distritú Júdeá, te té Hèrodés ní cunuu-dě distritú Galileá, te ñani-dé té Lìpé ní cunuu-dě distritú Itùreá ndihí ingá distritú nání Tràconité, te té Lisàniás ní cunuu-dě distritú Abiliniá. ² Te té Ànás ndihí té Caifás ní cuu-güedé dútú cùnùu. Te dàvá-áⁿ ñi cáháⁿ ndihí ñaha Yã Ndiöxí xii té Juáá déhe té Zacàriá xití yucu sá quihíⁿ-dé cáháⁿ-dé tnúhu-gá núú ñáyiu. ³ Te té Juáá ní yáha-dé nchaa ñuú cáá yàtni yúte Jòrdán, te xãhaⁿ-dě xii nchaa ñáyiu:

—Chí dándixi túu iní sá ñà túú quide váha-ndo, te dañá-ndo nchaa ichi cuehé ichi duha ndècu-ndo, te cuandute-ndo, te ducaⁿ te cada càhnu iní Yã Ndiöxí nchaa yícá cuèchi-ndo —duha ní xáhaⁿ-dě xii-yu.

⁴ Te ducaⁿ ñi quide-dé chi ní quee ndáá-xi nàcuáa ní chídó tnùní ndí Chàia tée ní xóo cáháⁿ tnúhu Yã Ndiöxí ndéé sanaha núú tütú ndí núú càchí-xi:

Tècú càháⁿ níhi ñⁿ tée yìhi xití yucu, te xãhaⁿ-dě xii ñáyiu:

“Chí dáñá nchaa ichi cuehé ichi duha ndècu-ndo, te tñi-ndo ichi váha, te ducaⁿ càda-ndo cuendá cundecu túha-ndo, chi véxi Yáá ïo cùnùu.

⁵ Te nchaa núú cùnú nachítú,

te nchaa tìndúú ndihí nchaa yucu ngoyo nihnu cuendá nduu ndáá,

te nchaa ichi ñá túú cuáháⁿ ndáá nduu ndáá,

te nchaa ichi ñá túú càváha nduu váha.

⁶ Te nchaa ñáyiu ñuyiú-a níhi-yu tnúhu sá Yã Ndiöxí véxi-gá dàcácu nihnu ñaha-gã xii-yu núú ùhú núú ndàhú.”

Duha ní chídó tnùní ndí Chàia núú tütú ndí.

⁷ Te òré ní xica ñáyiu cuáháⁿ-yu cuendá dacuandute ñaha té Juáá xii-yu, te ní xáhaⁿ-dě:

—¿Nchaa nchòhó cúú-ndó dàtná ñⁿ cóo déeⁿ chi ïo cuihna iní-ndó! ¿Te nása ní cuu núú tnàhá nchòhó ndúcú-ndó nàcuáa cácu nihnu-ndo núú tnùndòho cahnu vihi sá tá cùyatni ñaha xii-ndo véxi-i? ⁸ Te chí cádá váha vitna cuendá ducaⁿ cùtnuní sá ñi dáñá-ndó nchaa ichi cuehé ichi duha ndècu-ndo. Te vá càchí-ndó sã ïo càhnu cuu-ndo cuendá sá cúú-ndó ñani tnáhá ndí Abrahám, chi cuèi ndéé yúú te ndacu Yã Ndiöxí ndada-gá ñáyiu te cuú-yu ñani tnáhá ndí Abrahám. ⁹ Te caá chi ndècu túha-xi sá quèhndé-xi nchaa yutnu sá ñà túú càváha sávidí-xi, chi nchaa yutnu-áⁿ tēhndé-xi te cuánguee-xi núú ñuhú càyú-xi. Te duha sãtnahá-xi ndoho nchaa ñáyiu ñá túú quide váha, chi nchaa ñáyiu ducaⁿ ñà túú quide váha cùú-yu dàtná nchaa yutnu sá ñà túú càváha sávidí-xi. —càchí-dé xãhaⁿ-dě xii-yu.

¹⁰ Te ní xícáⁿ tnúhu-yu núú-dě, te xãhãⁿ-yu:

—¿Te nása cada-ndí váiⁿ? —càchí-yu xãhãⁿ-yu xii-dé.

¹¹ Te xãhaⁿ-dě:

—Te núu ndèdacàa-ndo ndecu ndihí-ndo úú dóo te cuãñaha-ndo ñⁿ xii ñáyiu ñá túú ndècu ndihí, àdi núu ndècu ndihí-ndo sá nchító-ó te cuáha-ndõ-yu na càxí-yu —càchí-dé xãhaⁿ-dě xii-yu.

12 Te ní quexìo ìḡn úú cue tée cuihna iní-xi quide cobrá ñáhá xii ñáyiú cuendá impuèstú cuendá cuàndute-güedé, te ní xicáⁿ tnúhu-güedé núú tē Juàá, te xáhaⁿ-güedé:

—Mèstrú, ¿te nása cada-ndí cuendá cuu váha iní Yă Ndiöxí-i? —càchí-güedé xáhaⁿ-güedé xii-dé.

13 Te tē Juàá ní xáhaⁿ-dē:

—Vá cuídó-ndó càda cobrá-ndó ñáyiú —càchí-dé xáhaⁿ-dē xii-güedé.

14 Te tnàhá ìḡn úú cue tée cùu sandadú xĩndecu-áⁿ ní xicáⁿ tnúhú-güedé núú tē Juàá, te xáhaⁿ-güedé:

—Te nchúhú ¿nása cada-ndí cuendá cuu váha iní Yă Ndiöxí-i? —càchí-güedé xáhaⁿ-güedé xii-dé.

Te ní xáhaⁿ tē Juàá:

—Vá quéndé-ndó sã néhé tnàha ñáyiú-ndo, te ni vã dácàa díquí-ndö-yu ìḡn sã ñà túú nã quidē-yu, te nduu vétú iní-ndó nàcuáa ñùhu yáhu-ndo —càchí-dé xáhaⁿ-dē xii-güedé.

15 Te nchaa ñáyiú xĩndetu sá quixí Crìstú sàni ìḡn sàni úú iní-yu núu sá díú Crìstú Yaá tendaha Yă Ndiöxí quixi ñuyíú-a cùu te Juàá àdi ñáhá. 16 Dico tē Juàá ní cáháⁿ ndodo-dé núú-yu nchaa-yu, te xáhaⁿ-dē:

—Na càchí tnúhu ndáá-í xii-ndo sã yúhú véxi-í sá cuendá-ni dacuàndute ñaha-í xii-ndo dàtná ní cachí Yă Ndiöxí, dico nchícúⁿ ingá tée véxi, te tée-áⁿ taxi-dé Espiritú Yă Ndiöxí cundecu ndihí-ndo, te cùu-xi datná ìḡn ñuhú, chi ndada ndoo ndada nine-xi iní-ndó. Te tée-áⁿ ïo-gá cúnúu-dé dàcúúxí yúhú, chi yúhú cùu-í ìḡn tée duuⁿ duuⁿ ñá túú tàú-í nandaxí-í cuèdicó ñi chàu-dé dico quide-í chiúⁿ-dē.

17 Te tée-áⁿ sa véxi túha-dé sá cadá ðiḡn ñaha-dé xii-o dàtná quidé ñáyiú ndàda ndoo triú, chi ñáyiú-áⁿ sa nèhe túha-ná-yu yaxíⁿ-yu òré náñani cuendá ndada ndoo-yu, te òré ndádá ndòo-yu triú-áⁿ te dàquee díḡn-yu mihi-xi, te tàxúha-yu mee-nã triú-áⁿ, te mihi-xi-áⁿ sáhmí-yu. Te dàtná quidē-yu mihi triú-áⁿ ducaⁿ sãtnahá-xi cada ñaha tée-áⁿ xii nchaa ñáyiú ñá túú quide váha, chi daquihíⁿ ñáhá-dē xií-yu núú ñùhú núú càyú, te ñuhú-áⁿ ñà túú tnàhí ndàhvã —càchí-dé xáhaⁿ-dē xií-yu.

18 Te titní víhí-gã tnúhu váha ní xáhaⁿ tē Juàá xií-yu òré ní dásàhú ñáhá-dē. 19 Te ní cáháⁿ-dē dóho tē Hèrodés cuendá sá ndéca-dē ìḡn ñaha nani Herodiás ñaha ní càndeca ñani-dé tē Lìpé, te ní xáhaⁿ-dē cuendá nchaa dava-gã sá cuèhé sá dúhá quide-dé. 20 Dico tē Hèrodés ñá túú ní quide cuendá-dé tnúhu ní cáháⁿ tē Juàá, chi nèhé-gã tucu ní quide-dé, chi da vecáá ní chihi-dé tē Juàá.

Sàndute Jesús

(Mt. 3:13-17; Mr. 1:9-11)

21 Te òré dàcuàndute tē Juàá nchaa ñáyiú, te tnàhá Jèsús ní dàcuàndute ñaha-dé xii-gã. Te nini càháⁿ ndihí-gã Dútú Ndiöxí ní nacaáⁿ andiú, 22 te ní quee Espiritú Yă Ndiöxí véxi cuuⁿ túu-xi, te càa-xi datná cáá ìḡn lómá, te òré-áⁿ ní tecú ní cáháⁿ Yă Ndiöxí ndéé andiú, te xáhaⁿ-gã xii Jèsús:

—Yòhó cúu-n Dèhe-í tée ío cùu iní-í, te ío cùdí iní ñáhá-í xii-n —càchí-gã xáhaⁿ-gã xii Jèsús.

Cue tée ní xĩndecu díhna-gã ñuyíú-a dàcúúxí Xìtohó Jesucristú

(Mt. 1:1-17)

23 Te ndécu Jesús dàtná ócò úxí cuíá-gã cúnàhá ní chisaha-gã chiúⁿ ní táhú Tãtã-gã Dútú Ndiöxí cada-gã. Te ní cuu-gã déhe tē Chèé chi ducaⁿ sàni iní ñáyiú ñuyíú-a. Te tē Chèé-áⁿ ñi cuu-dé déhe tē Èlí, 24 te tée-áⁿ ñi cuu-dé déhe tē Mátát. Te tē Mátát-áⁿ ñi cuu-dé déhe tē Lèví, te tée-áⁿ ñi cuu-dé déhe tē Mèlquí. Te tē Mèlquí-áⁿ ñi cuu-dé déhe tē Jàná, te tée-áⁿ ñi cuu-dé déhe tē Chèé. 25 Te tē Chèé-áⁿ ñi cuu-dé déhe tē Matàtiás, te tée-áⁿ ñi cuu-dé déhe tē Àmós. Te tē Àmós-áⁿ ñi cuu-dé déhe tē Nàhúm, te tée-áⁿ ñi cuu-dé déhe tē Èslí. Te tē Èslí-áⁿ ñi cuu-dé déhe tē Nagàí, 26 te tée-áⁿ ñi cuu-dé déhe tē Màát. Te tē Màát-áⁿ ñi cuu-dé déhe tē Matàtiás, te tée-áⁿ ñi cuu-dé déhe tē Semèí. Te tē Semèí-áⁿ ñi cuu-dé déhe tē Chèé, te tée-áⁿ ñi cuu-dé déhe tē Jüdá. 27 Te tē Jüdá-áⁿ ñi cuu-dé déhe tē Jòaná, te tée-áⁿ ñi cuu-dé déhe tē Rèsá. Te tē Rèsá-áⁿ ñi cuu-dé déhe tē Zorobàbél, te tée-áⁿ ñi cuu-dé déhe tē Salàtiél. Te tē Salàtiél-áⁿ ñi cuu-dé déhe tē Nèrí, 28 te tée-áⁿ ñi cuu-dé déhe tē Mèlquí. Te tē Mèlquí-áⁿ ñi cuu-dé déhe tē Àdí, te tée-áⁿ ñi cuu-dé déhe tē Còsám. Te tē Còsám-áⁿ ñi cuu-dé déhe tē Elmòdám, te

tée-án nǐ cuu-dé déhe té Ęr. ²⁹ Te té Ęr-án nǐ cuu-dé déhe té Jòsué, te tée-án nǐ cuu-dé déhe té Elièzér. Te té Elièzér-án nǐ cuu-dé déhe té Jòrím, te tée-án nǐ cuu-dé déhe té Mátát. ³⁰ Te té Mátát-án nǐ cuu-dé déhe té Lèví, te tée-án nǐ cuu-dé déhe té Mió. Te té Mió-án nǐ cuu-dé déhe té Jùdá, te tée-án nǐ cuu-dé déhe té Chèé. Te té Chèé-án nǐ cuu-dé déhe té Jònán, te tée-án nǐ cuu-dé déhe té Eliàquím. ³¹ Te té Eliàquím-án nǐ cuu-dé déhe té Mèléá, te tée-án nǐ cuu-dé déhe té Mainán. Te té Mainán-án nǐ cuu-dé déhe té Mátatá, te tée-án nǐ cuu-dé déhe té Nátán. ³² Te té Nátán-án nǐ cuu-dé déhe té Dàvíí, te tée-án nǐ cuu-dé déhe té Isàí. Te té Isàí-án nǐ cuu-dé déhe té Òbéd, te tée-án nǐ cuu-dé déhe té Bòóz. Te té Bòóz-án nǐ cuu-dé déhe té Sàlmón, te tée-án nǐ cuu-dé déhe té Naàson. ³³ Te té Naàson-án nǐ cuu-dé déhe té Aminadáb, te tée-án nǐ cuu-dé déhe té Àrám. Te té Àrám-án nǐ cuu-dé déhe té Èsróm, te tée-án nǐ cuu-dé déhe té Fàrés. Te té Fàrés-án nǐ cuu-dé déhe té Jùdá, ³⁴ te tée-án nǐ cuu-dé déhe té Jàcób. Te té Jàcób-án nǐ cuu-dé déhe té Isàác, te tée-án nǐ cuu-dé déhe té Àbrahám. Te té Àbrahám-án nǐ cuu-dé déhe té Tàré, te tée-án nǐ cuu-dé déhe té Nàcór. ³⁵ Te té Nàcór-án nǐ cuu-dé déhe té Sèrúg, te tée-án nǐ cuu-dé déhe té Ragàú. Te té Ragàú-án nǐ cuu-dé déhe té Pèlég, te tée-án nǐ cuu-dé déhe té Hèbér. Te té Hèbér-án nǐ cuu-dé déhe té Sàlá, ³⁶ te tée-án nǐ cuu-dé déhe té Cainán. Te té Cainán-án nǐ cuu-dé déhe té Arfàxád, te tée-án nǐ cuu-dé déhe té Sëm. Te té Sëm-án nǐ cuu-dé déhe té Nöé, te tée-án nǐ cuu-dé déhe té Làméc. ³⁷ Te té Làméc-án nǐ cuu-dé déhe té Matusalén, te tée-án nǐ cuu-dé déhe té Ènóc. Te té Ènóc-án nǐ cuu-dé déhe té Jàréd, te tée-án nǐ cuu-dé déhe té Mahalàleél. Te té Mahalàleél-án nǐ cuu-dé déhe té Cainán, ³⁸ te tée-án nǐ cuu-dé déhe té Ènós. Te té Ènós-án nǐ cuu-dé déhe té Sèt, te tée-án nǐ cuu-dé déhe té Àdán. Te té Àdán-án chi mee Yá Ndiöxí ní cadúha ndaha ñaha-gá xii-dé.

4

Sácuíhná quidé yica-xi cada Jesús sá ñà túú tàú-gá cada-gá ní cùu

(Mt. 4:1-11; Mr. 1:12-13)

¹ Te Jèsús ní naqueheⁿ-gá ichi yuhu yúte Jòrdán cuánuhú-gá. Te sa ndècu ndihi-gá Espíritú Yá Ndiöxí, te Espíritú-án ndécá ñaha-xi xii-gá cuáhán ìⁿ xití yucu. ² Te

yàcán ní xíndecu-gá údico nduu, te sácuíhná nǐ cuíní-xi coto ndeé ñáhá-xí xii-gá te núu ndisa sá vǎ cádá-gǎ ìⁿ sá ñà túú tàú-gá cada-gá. Te ñà túú tnàhí ná ní xèxi-gá ndi údico nduu-án, te sátá dúcán te ní xícán iní-gá caxi-gá. ³ Te sácuíhná-án nǐ xáhaⁿ-xi xii-gá:

—Te núu ndisa sá cúu-n Dèhe Yá Ndiöxí, te cúñaha xii yúu-a na ndùu-xi paá —càchí-xi xǎhaⁿ-xi xii-gá.

⁴ Te Jèsús ní xáhaⁿ-gǎ xii-xi:

—Núu tütú Yá Ndiöxí càchí-xi: “Ñá díú mèe-ni paá candeca-xi iní ñáyiu, chi tnàhá nchaa tnúhu càhán Yá Ndiöxí candeca-xi iní-yu”, duha càchí-xi núu tütú-gá —càchí-gá xǎhaⁿ-gǎ xii-xi.

⁵ Te dǎtnùní sácuíhná ndécá ñaha-xi xii-gá cuáhán ìⁿ núu tìndúú dùcún, te uuⁿni ní dánèhé núu ñáhá-xí xii-gá nchaandi túhu nacióⁿ cáá ñùyúú. ⁶ Te ní xáhaⁿ-xi xii-gá:

—Yúhú cada-í, te taxi tnùnín nchaa-ndi túhu nacióⁿ-a ndihi nchaa sá vǎha ió diu-ni nchaa nacióⁿ-a, te cachí ñáyiu sá ìo cùnuu-n, chi yúhú cúu cuendá-í nchaa sá ió nchaa nacióⁿ-a, te ndédani càa ñáyiu cùu iní-í te cúñaha-í xii-yu taxi tnùnín-yu. ⁷ Te núu ni yúhu ni iní-n chiñuhu ñaha-n xii-í ñá, te nchaa taxi-í cuu cuendá-n —càchí-xi xǎhaⁿ-xi xii-gá.

⁸ Te Jèsús ní xáhaⁿ-gǎ xii-xi:

—Xocuñí yòhó sácuíhná núu ndécù-í-a, chi vá cúu càda-í nàcuáa càchí-n chi núu tütú Yá Ndiöxí càchí-xi: “Chiñuhu-ndo Dütú Ndiöxí Yá cúu Ndiöxí-ndó, te ìⁿdi díí-ni-gǎ cada-ndo nchaa nacuáa càhán-gá”, duha càchí-xi núu tütú-gá —càchí-gá xǎhaⁿ-gǎ xii-xi.

⁹ Te sácuíhná ndécá ñaha tucu-xi xii-gá cuáhán ñuú Jerusalén, te ní xáhaⁿ-xi xii-gá cuasaá-gá díquí veñuhu càhnu sá ìo cùnuu, te ní xáhaⁿ tucu-xi:

—Te núu ndisa cùu-n Dèhe Yá Ndiöxí te cuandèe ndava ndeé núu ñúhú ¹⁰ cuendá quee ndáá-xi nàcuáa càhán-xi núu tütú Yá Ndiöxí núu càchí-xi:

Yá Ndiöxí tendaha-gǎ cue espíritú xínú cuèchi núu-gǎ quixi-xi coto ñaha-xi xii-n.

¹¹ Te núu ndáhá-xí càundodo-n cuendá sá vǎ dǎncuèhé yúú sǎhá-n, duha càchí-xi núu tütú-gá —càchí sácuíhná xǎhaⁿ-xi xii-gá.

12 Te Jèsús ní xáhaⁿ-gã xii-xi:

—Te cächí tucu-xi núú tütú Yã Ndiöxí: “Vá cání iní-n còto ndeé-n Dütú Ndiöxí Yáa cúú Ndiöxí-n nũu ndisa sá dácäcu nihnu ñaha-gã xii-n cuëndá ìⁿ sá sání iní-n càda-n sá cúú-xí mèe-n”, duha cächí-xi núú tütú-gá —cächí-gá xãhaⁿ-gã xii-xi.

13 Te sátá dúcáⁿ te sácuihná ñà túú-gã ní cùtnuní iní-xi nása cada-xi Jèsús, núu xiáⁿ ní xica-xi cuáháⁿ-xi ní sanaa tnaa-xi.

Distritú Galileá ní chisaha Jèsús chiúⁿ ní táhú Tãtã-gã Dütú Ndiöxí cada-gá (Mt. 4:12-17; Mr. 1:14-15)

14 Te Jèsús cuáháⁿ tucu-gá distritú Galileá, dico sa ndècu ndihí-gá Espíritú Yã Ndiöxí, te ni càa xico xiáⁿ nĩ níhí-yu tnúhu nchaa nàcuáa quide-gá. 15 Te ndi tnahá ñuú cuáháⁿ-gá ducaⁿ cuãnguihu-gá veñúhu-yu dànehé ñáhá-gã xii-yu, te nchaá-yu cächí-yu sá ìo càhnu cuu-gá.

Jèsús ndécú-gã ñuú Nazàrét (Mt. 13:53-58; Mr. 6:1-6)

16 Te Jèsús ní sáháⁿ-gã ñuú Nazàrét ñuú núú nĩ sahnu-gá. Te nduu ndètatú ñáyiu ní quíhu-gá veñúhu, chi ducaⁿ tnàhí quide-gá, te ní ngúnutnĩ-gá dácuaⁿ-gá tutú ndèé tnúhu Yá Ndiöxí. 17 Te ní sãñaha-güedé xii-gá tutú ndèé tnúhu ní cáháⁿ ndí Chàíá téé ní xóo cáháⁿ tnúhu Yá Ndiöxí ndéé sanaha, te òré ní nandicá-gá núú tütú-áⁿ te ní naníhí-gã núú cächí-xi:

18 Espíritú Yã Ndiöxí ndécú ndihí ñaha-xi xii-í, chi ní cachí-gá sá càháⁿ-í tnúhu-gá sá cúú-xí ñáyiu ndàhú, ñáyiu vátá cündèdóho tnàhí-gá.

Te véxi-í cuëndá vá ndìhú-gá iní ñáyiu ñá túú ndècu váha iní-xi, te cue ñáyiu sa nèhe váha ñaha-nã yucu ñávãha dácäcu nihnu-í-yu.

Te cue ñáyiu cuáá nacaáⁿ-í núú-yu, te ñáyiu ndòho dandoho ñaha tnahá ñáyiu-xi taunihnu-í-yu.

19 Te cúñaha-í xii ñáyiu sá sáá nduu càda Yá Ndiöxí ìⁿ sá vãha sá cúú-xí-yu. Duha cächí-xi núú tütú dácuaⁿ-gá.

20 Te Jèsús ní nacadí-gá núú tütú-áⁿ, te ní nacuaⁿ-gá ìⁿ téé xínu cuechi veñúhu-áⁿ, te ní ngóo-gá. Te nchaa ñáyiu yìhi veñúhu

ñá núú nũu-yu ndèhe ñahá-yu xii-gá. 21 Te xãhaⁿ-gã xií-yu:

—Mei vitna ní quee ndáá-xi nàcuáa càháⁿ-xi núú tütú Yã Ndiöxí —cächí-gá xãhaⁿ-gã xií-yu.

22 Te nchaá-yu ní cáháⁿ váha-yu cuëndá-gá, te ní cuñúhu-yu tnúhu váha càháⁿ-gá, te xitnàhá-yu:

—¿Te náa ñá díú tẽe-a cùu-dé déhe té Chèé-ãⁿ? —cächí-yu xitnàhá-yu.

23 Te Jèsús ní xáhaⁿ-gã:

—Na cächí tnúhu ndáá-í xii-ndo sã ñúhú iní-ndó cũñaha-ndo xii-í ìⁿ tnúhu cùtexínu sá cáháⁿ mée-ndó, te quesaha-ndo: “Ñátátná cada tátna mee-n”, duha quesaha-ndo. Te cúñaha tucu-ndo xii-í: “Sa ní níhí-ndí tnúhu nàcuáa ní quide-n ñuú Capernaúm, te cada-n tnàhá ñuú núú nĩ sahnu-n”, duha quesaha-ndo —cächí-gá xãhaⁿ-gã xií-yu.

24 Te ní xáhaⁿ tucu-gá:

—Na cächí tnúhu ndáá-í xii-ndo sã ñi ìⁿ téé cáháⁿ tnúhu Yá Ndiöxí ñá túú tnàhá iní ñáhá ñáyiu ñuú-dé. 25 Te na cächí tnúhu ndáá tucu-í xii-ndo sã ìo vài ñáyiu dìhí ñáyiu quèé ní xíndecu nacióⁿ Isràél cùtnàhá ní xíndecu té Èliás cùtnàhá ñá túú ní cùuⁿ dáú ùní cuiá ðava, te ðavá-áⁿ ìo ní ndoho ñáyiu docó nitùhú nacióⁿ. 26 Dico Yá Ndiöxí ñá túú ní tëndaha-gá té Èliás quíhíⁿ-dé vehe ndèdani càa ñáyiu dìhí-áⁿ, chi vehe ìⁿ ñaha ñuú Sàreptá ní xáhaⁿ-gã ní sáháⁿ-dé, te ñuú-áⁿ cáá yàtni-xi ñuú Sidón. 27 Te ní xíndecu tucu ingá téé ní xóo cáháⁿ tnúhu Yá Ndiöxí ndéé sanaha, te téé-áⁿ nĩ xínani-dé Eliseú, te ðiu-ni ðavá-áⁿ nĩ xíndecu tucu vài ñáyiu cùhú nacióⁿ Isràél, ñáyiu ní tnahá cuéhé sã dátèhyú nihnu-xi yiqui cùñú-yu dico ñá túú ní ndúha-yu, chi ìⁿ dñi-ni té Nàamán téé distritú Siriá ní ndúha-dé —cächí-gá xãhaⁿ-gã xií-yu.

28 Te sá dúcáⁿ nĩ cáháⁿ-gá te xiáⁿ ní cudééⁿ víhí nchaa ñáyiu yìhi veñúhu-ãⁿ núú-gã. 29 Te ní queñuhú-yu Jèsús yuhu dèhvá tìndúú núú cáá ñuú-yu-áⁿ cuëndá yacáⁿ dàquée-yu-gá dèhvá ní cùu. 30 Dico Jèsús vii-ni ní quee-gá tnuú-yu cuáháⁿ-gá.

Ìⁿ téé yìhi ñaha espíritú cündìhi yucu ñávãha (Mr. 1:21-28)

31 Te Jèsús cuáhán-gá ñuu Capèrnaúm, te ñuu-án yíndèhu-xi distritú Galileá. Te yàcán ndécú-gá ní tnahá nduu ndètátú ñáyiú, te ní ngúíta-gá dácuaá-gá ñáyiú. 32 Te xícuñúhu-yu nchaa nàcuáa dànehé ñáhá-gá xii-yu, chi càhá-gá dàtná càhá ñ tée cùnuu, te cùnuu ndisa-gá.

33 Te xití veñúhu yìhi ñ tée yìhi ñaha ñ espíritú cùndìhi yucu ñávãha, te espíritú-án ñ quide-xi níhi ní cáhá tée-án, te xãha-dě xii Jèsús:

34 —¿Te ná cuíní yòhó Jèsús tée ñuu Nazàrét cada ñaha-n xii-ndí nũ véxi-n nũ ndécú-ndí-i? ¿Án vèxi-n dànaa ñaha-n xii-ndí? Chi yúhú xiní ñáhà-í xii-n sã cúu-n ñ tée ñá túú tnahí cuéchi-xi chi núú Yã Ndióxí ní quee-n vèxi-n ñuyíú-a —càchí-dé xãha-dě xii-gá.

35 Te Jèsús ní tenáa-gá espíritú cùndìhi yucu ñávãha-án, te xãha-gá:

—¿Cadí yuhu-n, te taquèe yiqui cuñú tée-án! —càchí-gá xãha-gá.

Te espíritú cùndìhi yucu ñávãha-án ñ dándüá-xi tée-án ndèe ñuhu tnuú ñáyiú xíndecu-án, te ñá túú-gá ná ní quide ñaha-xi, te ní quee ñaha-xi xii-dé. 36 Te nchaa ñáyiú xíndecu-án ñ cuñúhu-yu, te ní xitnãhá-yu:

—¿Te nása nduu-tu tnuúhú càhá tée-án ñá? ¿Te càhá-dé dàtná càhá ñ tée tàxi tnuú vîhí, chi càhá-ni-dé te nchaa espíritú cùndìhi yucu ñávãha quèe-ni-xi yiqui cuñú-yu! —càchí-yu xitnãhá-yu.

37 Te nchaa xichi ní níhi-yu tnuúhú nàcuáa quide Jèsús.

Jèsús quidé tãtna-gá nãná ñadìhí té Xímú
(Mt. 8:14-15; Mr. 1:29-31)

38 Te Jèsús ní ndee-gá xití veñúhu, te cuáhán-gá vehe té Xímú. Te nãná ñadìhí té Xímú-án cùhú-a ñ ñuhu vihi-a cahni, te ní cáhá ndáhú-yu núú Jèsús cuendá-a.

39 Te Jèsús ní sáhán-gá núú ndécú-án, te ní ngúnundeyi-gá te ní xãha-gá xii cahni-án sã ná xòcuñí-xi, te ní xócuñí-ni-xi, te òré-ni-án ñ ndúha ñaha cùhú-án te ní ndacóo-a ní xinu cuechi-a núú-güedé ndìhi-gá.

Jèsús quidé tãtna-gá vai ñáyiú cùhú
(Mt. 8:16-17; Mr. 1:32-34)

40 Te òré ní ngódó tnuú nchíanchii, te nchaa ñáyiú xíndecu ndìhi ñáyiú cùhú vehe-xi ndèca ñáhá-yu cuáhán núú Jèsús. Te Jèsús ní sacán ndodo-gá ndaha-gá díquí ñ ñáyiú cùhú-án, te duca ñ quide-gá te ní ndúha-yu. Te ndi díí núú cuéhé tnahá-yu ñ ñ-yu ni cùu. 41 Te tnahá dava ñáyiú cùhú-án yìhí ñaha espíritú cùndìhi yucu ñávãha xii-yu ni cùu, te òré ní quee ñaha-xi xii-yu, te xíá ní quide-xi níhi ní cáhá-yu, te xãhã-yu xii Jèsús:

—Yòhó cúu-n Dèhe Dútú Ndióxí —càchí-yu xãhã-yu xii-gá.

Dico Jèsús níhi ní cáhá-gá ní tenáa-gá nchaa espíritú cùndìhi yucu ñávãha-án, te xãha-gá sã vã dúcá-gá cada-xi, chi sa xiní-xi sã díú-gá cúu-gá Cristú Yá ní tendaha Yã Ndióxí véxi ñuyíú-a.

Jèsús dánèhé-gá ñáyiú distritú Galileá
(Mr. 1:35-39)

42 Te ñ nduu ní tundaá-ni ní quee Jèsús ñuu núú ndécú-gá-án cuáhán-gá ñ xichi núú ñá túú ñáyiú ndècu. Te cue ñáyiú ní ngúíta-yu nànducu ñáhá-yu xii-gá te ní naníhí ñáhã-yu, te cuíní-yu ngani ñáhã-yu xii-gá cuendá sã ñá túú-gá ndèe quíhí-gá ní cùu. 43 Dico ní xãha-gá xii-yu:

—Dacuití quíhí-í cúñaha-í xii nchaa ñáyiú dava-gá ñuu tnuúhú sã càhá nàcuáa ndíhu ndaha ñaha Yá Ndióxí xii-yu, chi chiu tnahí-án vèxi-í —càchí-gá xãha-gá xii-yu.

44 Te ní xica cuu Jèsús ní dánèhé-gá ñáyiú tnuúhú-gá nchaa xití veñúhu ndaa distritú Galileá.

5

Jèsús ní quide-gá ní níhi-güedé chácá
(Mt. 4:18-22; Mr. 1:16-20)

1 Te ñ xito ndècu Jèsús yuhu làgúná Genesàrét, te ío cuéhé ñáyiú ní sáá, te ta dàdehnde ñaha-ná-yu xii-gá cuáhán sã cuíní-yu cundedóho-yu nchaa tnuúhú càhá-gá. 2 Te Jèsús ní xiní-gá úú bàrcú cue tée tñè chácá xínutnì-xi yatni yuhu làgúná-án, te sa ní quee cue tée ñuhu xití-xi-án xínaquete-güedé ñunu-güedé. 3 Te Jèsús cuásaá-gá núú ñ bàrcú-án, te bàrcú-án

cúu-xí bàrcú té Xímú, te ní xáhaⁿ-gã xii té Xímú-áⁿ sã dánũndehe-dé-xi luha-gá xití ndute. Te dãtnũní ní ngóo-gá núu bàrcú-áⁿ, te xíaⁿ núcõo-gá ní ngũíta-gá dánèhé-gá ñáyiu. ⁴ Te òré ní túhú ní dánèhé ñàhá-gã xii-yu, te ní xáhaⁿ-gã xii té Xímú:

—Daquihíⁿ bàrcú-a xití làgúná mei núu cùnú-gã, te dàquée-ndo ñunu-ndo tñi-ndo chácá —càchí-gã xáhaⁿ-gã xii-dé.

⁵ Te té Xímú ní xáhaⁿ-dë:

—Mèstrú, ni niú ní quide chiuⁿ-ndí te ni ñⁿ chácá ñà túú ní ñhí-ndí, dico vitna cuendá-ni sá yòhó táuchiuⁿ-n te na dàquée-ndí ñunu-ndí váⁿ —càchí-dé xáhaⁿ-dë xii-gã.

⁶ Te òré ní dáquëe-güedé ñunu-güedé te súúni vai chácá ñí ñhí-güedé, te ta ndátá-nã ñunu-güedé cuáháⁿ ní cùu. ⁷ Núu ní quide-güedé ndaha-güedé núu dáva-gá cue té cündihí-güedé xixúhuⁿ ingá bàrcú cuendá quihíⁿ-güedé chindee ñaha-güedé. Te cue té-áⁿ ñí sáháⁿ-güedé ní chindee tñaha-güedé ní dáchitú-güedé ndi ndúu bàrcú mee-ni chácá, te súúni ñí cuu véé núu cuini-na-xi quée naa-güedé ndihí bàrcú ní cùu. ⁸ Te sá dúcáⁿ cuini-xi quée naa bàrcú ní cùu, núu té Xímú, àdi Pelú chi úú diu-dé, ní ngũíñí xití-dë núu Jèsús, te xáhaⁿ-dë:

—Xocuiñí yòhó Jèsús núu ndécú-í-a, chi yúhú cúu-í ñⁿ téé ío ndècu cuéchi-xi —càchí-dé xáhaⁿ-dë xii-gã.

⁹ Te ducaⁿ ñí cáháⁿ-dé chi ní yùhú-dé, te ní cuñúhu-dé ndihí nchaa cue té ndihí-dé-áⁿ cuendá sá ío vai chácá ñí ñhí-güedé. ¹⁰ Te tñahá té Jàcobó ndihí té Juáá cue déhe té Zebèdeú ío ní cuñúhu-güedé, te diu-ni cue té cündihí té Xímú-áⁿ cúu-güedé tñahá-güedé. Te Jèsús ní xáhaⁿ-gã xii té Xímú:

—Vá yùhú-n, chi není vitna quihíⁿ-n dàcáháⁿ-n ñáyiu cuendá tuha ñàhá-yu xii-í —càchí-gã xáhaⁿ-gã xii-dé.

¹¹ Te ní quene-güedé ndihí bàrcú ndéé ñuhu yìchí yuhu làgúná-áⁿ. Te òré-áⁿ ñí dándõo-güedé nchaandi túhú sá ndécú ndihí-güedé, te ní tuha-güedé Jèsús.

Jèsús quidé tãtña-gã ñⁿ téé tñahá cuéhé sã dátèhyú nihnu-xi yiqui cùñú-ó
(Mt. 8:1-4; Mr. 1:40-45)

¹² Te òré ní quexìo Jèsús ñⁿ ñuú, te ní quexìo ñⁿ téé cùhú tñahá-dé cuéhé sã dátèhyú nihnu-xi yiqui cùñú-ó, te òré ní xiní-dé Jèsús te ní sáháⁿ-dé núu ndécú-gã, te ní ngũíñí xití-dë núu-gã te ní nuu núu-dë ndàa núu ñúhú te càháⁿ ndàhú-dé, te xáhaⁿ-dë xii-gã:

—Mèstrú, véxi-í càháⁿ ndàhú-í núu-n núu vá cündèe ini-n càda tátña ñaha-n xii-í, chi cùtnuní ini-í sá ndácú-n —càchí-dé xáhaⁿ-dë xii-gã.

¹³ Te Jèsús ní dácàá-gã ndaha-gã ní tendaha ñaha-gã xii-dé, te xáhaⁿ-gã:

—Cuu cada tátña ñaha-í xii-n, te vitna te ndúha-n —càchí-gã xáhaⁿ-gã xii-dé.

Te òré-ni ní xócuñí cuéhé tñahá-dé. ¹⁴ Te dãtnũní ní xáhaⁿ tucu Jèsús xii-dé:

—Vá yõ ñⁿ cúñaha-n sã ñí quide tátña ñaha-í xii-n, núu dütú-ni cuáháⁿ cuendá sá ná quini ñahá-dë xii-n sã ñí ndúha-n te cuáha-n-dë sá ndúú tãhú Yã Ndiõxí dàtná ní cachí ndí Moisés cuendá ná quini ñáyiu sá ndàa ní ndúha-n —càchí-gã xáhaⁿ-gã xii-dé.

¹⁵ Te ducaⁿ ta xíté nuu-gã tñúhu nchaa nàcuáa quide Jèsús, te ío cuéhé ñáyiu ní xóo tacá nchaa núu ñí xíndecu-gã cuendá sá cuini-yu cundedóho-yu tñúhu càháⁿ-gã, ndihí cuendá sá cuini-yu cada tátña ñaha-gã xií-yu. ¹⁶ Dico Jèsús ní xóo quee nihni-gã tnuú-yu ní xóo quihíⁿ-gã núu ñà túú ñáyiu ndècu ní xóo cáháⁿ ndihí-gã Yã Ndiõxí.

Jèsús quidé tãtña-gã ñⁿ téé cùhú ñá cúu-gã candá nihnu

(Mt. 9:1-8; Mr. 2:1-12)

¹⁷ Te ñⁿ nduu dànehé-gã ñáyiu, te xñucóo ñⁿ úú cue téé cùu fariséú, ndihí cue téé dàcuaha ñaha xii ñáyiu nchaa tñúhu ní chídó tñuní ndí Moisés. Te cue té-áⁿ ñí quee-güedé nchaa ñuú yíndèhu distritú Galileá, ndihí distritú Júdeá, ndihí ñuú Jerusalén, te nchaa ñuú-áⁿ ñí quee-güedé cuáháⁿ-güedé núu ndécú-gã. Te Yá Ndiõxí chíndèe ñaha-gã quidé tãtña-gã ñáyiu cùhú.

¹⁸ Te ñⁿ úú cue téé nchido-güedé ñⁿ téé cùhú ñá cúu-gã candá nihnu ñuhu-dé xító ní quexìo ndihí ñaha-güedé, te cuini-güedé quíhu ndihí ñaha-güedé ndéé xití vehe, sáá-güedé ndéé núu Jèsús ndihí téé cùhú-áⁿ.

¹⁹ Dico ñá túú ní ñhí-güedé ndéé ichi quíhu-güedé, chi cuendá ío cuéhé ñáyiu

ndècu, núu xiáⁿ ní sáá-güedé díquí véhé-áⁿ nĩ caáⁿ-güedé te ndàa díquí véhé-áⁿ nĩ dáquëe-güedé téé cùhú-áⁿ, te ñùhu-ni-dé xító ní dáquëe ñaha-güedé tnuú ñáyiú ní sáá ndéé núú Jèsús. ²⁰ Te Jèsús ní cutnùni iní-gá sá nĩ yuhu nĩ iní-güedé sàndáá iní ñáhá-güedé xii-gá, núu ní xáhaⁿ-gã xii téé cùhú-áⁿ:

—Yòhó téé cùhú, sa ní quide càhnu iní-í nchaa cuéchi-n —càchí-gá xãhaⁿ-gã xii-dé.

²¹ Te cue téé dàcuaha ñaha xii-yu nchaa tnúhu ní chídó tnùnĩ ndíi Moisés ndihĩ cue téé cùu fariséú ní sani iní-güedé: “¿Ná cúú tée-a núu càháⁿ cuèhé-dé cuendá Yá Ndiöxí-i? Te vá yòo ìⁿ ndàcu cada cahnu iní nchaa yíca cuéchi ñáyiú, chi ìⁿ dīi ní Yá Ndiöxí quidé càhnu iní-gá”, duha ní sani iní-güedé.

²² Dico Jèsús sa ní cutnùni iní-gá nàcuáa sàni iní-güedé núu ní xáhaⁿ-gã xii-güedé:

—¿Te ná cuendá ducaⁿ sàni iní-ndó-í? ²³ Te sá dúhá nĩ xáhaⁿ-í xii téé cùhú-a sá cáda càhnu iní-í nchaa yíca cuéchi-dé, te xiáⁿ nchòhó ñá túú cùtnuní iní-ndó núu ndáá càháⁿ-í àdi ñá ndáa. Dico núu cúu-í-dé sá ndáccoo-dé, te caca-dé te cutnùni ndáá iní-ndó núu ndáá càháⁿ-í àdi ñá ndáa, chi cundehe núu-ndó nàcuáa cada-í. ²⁴ Te vitna na càda-í nàcuáa cutnùni iní-ndó nchaa-ndo sá yùhú Téé cùu ñani tnáhá-ndó nchaa-ndo ndecu ndihĩ-í tnúhu ndee iní sá cáda càhnu iní-í nchaa cuéchi ñáyiú ñuyíú-a —càchí-gá xãhaⁿ-gã xii-güedé.

Te sáta dúcáⁿ te ní xáhaⁿ-gã xii téé cùhú-áⁿ:

—Ndacóo, te ndocani-n xító ñùhu-n véxi-áⁿ, te núhú-n vèhe-n —cachí-gá xãhaⁿ-gã xii-dé.

²⁵ Te òré-ni-áⁿ nĩ ndúha téé cùhú-áⁿ te ní ndacóo-dé, te ní ndocani-dé xító ñùhu-dé ní quexio-áⁿ, te ní natnĩ-dé ichi ta càháⁿ-dé cuánuhú sá ïo càhnu cuu Yá Ndiöxí. ²⁶ Te nchaa ñáyiú xíndecu-áⁿ nĩ cuñúhu-yu, te tnáhá-yu ní cachí-yu sá ïo càhnu cuu Yá Ndiöxí, te ducaⁿ ïo ní yùhú-yu, te ní xitnàhá-yu:

—Vitna ní xini-ó ìⁿ sá ñá túú tnàhí xini-ó ní cùu —cachí-yu xitnàhá-yu.

Jèsús cáná-gã té Lèví

(Mt. 9:9-13; Mr. 2:13-17)

²⁷ Te sáta dúcáⁿ nĩ cuu te ní queue Jèsús xiáⁿ, te ní xini-gá ìⁿ téé nàni Leví núccoo-dé

ìⁿ xichi quide cobrá-dé ñáyiú cuendá impuèstú, chi cobradór cúú-dé, te ní xáhaⁿ-gã xii-dé:

—Néhe chitnahá ñáhá-n xii-í —càchí-gá xãhaⁿ-gã xii-dé.

²⁸ Te té Lèví-áⁿ nĩ ndàcuñĩ-dé te ní dándõo-dé nchaa sá ndécú ndihĩ-dé núu núccoo-dé-áⁿ, te ní tuha-dé Jèsús.

²⁹ Te sáta dúcáⁿ te té Lèví-áⁿ nĩ quide-dé ìⁿ vico càhnu vehe-dé sá cúú-xi Jèsús, te ní tacá vai cue téé quide chiuⁿ quide-dé, te nchaa-güedé cuánguihu-güedé mèsá ní ngóo-güedé ndihĩ dava-gá ñáyiú ní quexio cuendá caxi-güedé ndihĩ-yu. ³⁰ Dico cue téé cùu fariséú ndihĩ cue téé dàcuaha ñaha xii-yu nchaa tnúhu ní chídó tnùnĩ ndíi Moisés ní ngüita-güedé xicuehé-güedé cue téé xica cuu ndihĩ-gá, te xáhaⁿ-güedé:

—¿Ná cuendá xéxi-ndó xihĩ-ndo ndihĩ cue téé cuihna iní-xi quide cobrá ñáhá xii ñáyiú cuendá impuèstú, ndihĩ nchaa dava-gá cue téé ndècu ichi cuehé ichi duha-í? —càchí-güedé xãhaⁿ-güedé.

³¹ Te Jèsús ní xáhaⁿ-gã xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhu ñahá-yu. ³² Te yùhú véxi-í càháⁿ-í ñáyiú cùtnuní iní-xi sá ndécú cuéchi-xi cuendá dàñá-yu nchaa sá cuèhé sá dúhá quidé-yu, te ñá túú véxi-í càháⁿ-í ñáyiú càchí sá ñá túú ndècu cuéchi-xi —càchí-gá xãhaⁿ-gã xii-güedé.

Cue téé ndècu tnúhu núú Jèsús cuendá ñáyiú ñá túú tnàhí ná xéxi áma càháⁿ ndihĩ-yu Yá Ndiöxí

(Mt. 9:14-17; Mr. 2:18-22)

³³ Te ní xáhaⁿ-güedé xii Jèsús:

—Te áma ñá túú tnàhí ná xéxi cuè téé xica cuu ndihĩ té Juáá càháⁿ ndihĩ-güedé Yá Ndiöxí, te diu-ni ducaⁿ quide cue téé xica cuu ndihĩ nchúhú cue téé cùu fariséú. ¿Te ná cuendá cue téé xica cuu ndihĩ-n ñá túú dùcaⁿ quide-güedé núu nchaa-ni nduu xèxi-güedé xihĩ-güedé quidé-güedé-í? —cachí-güedé xãhaⁿ-güedé xii-gá.

³⁴ Te Jèsús ní xáhaⁿ-gã xii-güedé:

—Nchòhó xini-ndó sã vã cúú cũñaha-o xii cue ñáyiú ñuhu vico tnándaha sã vã cúú càxi-yu nini ndècu ndihĩ ñaha téé tnándaha-áⁿ xii-yu. ³⁵ Dico sáá nduu te vá cùndècu ndihĩ ñaha-gá téé tnándaha-áⁿ

xii-yu, te dàvá-án te cahni iní-yu vá cáxi-yu sá ndihú iní-yu —càchí-gá xăhaⁿ-gă xii-güedé.

³⁶ Te ní cani-gá ìⁿ cuèndú núú ñăyiu nàcuáa tecú tnùní-yu tnúhu-gá, te xăhaⁿ-gă:

—Vá yôo ìⁿ dândée luha dóó sáá ìⁿ dóó sa ní cuu tühú víhí, chi núu yoo ducaⁿ na càda, te dóó sáá-ăⁿ nàndiyi-xi te uuⁿ-gá ndata-xi dóó sã ñi cuu tühú-án, te luha dóó sáá-ăⁿ ñà túú nàtaú-xi ndée dóó sã ñi cuu tühú-án. ³⁷ Te ní vá yôo ìⁿ chihi ndidí sáá xití ìⁿ lamba sa ní cuu tühú víhí, chi núu yoo ducaⁿ na càda, te ndava lamba sa ní cuu tühú-án chi ío níhi yócó ndidí-án, te cuíta-ni ndidí-án te cuíta-ni lamba-án. ³⁸ Núu xíáⁿ xíní ñùhu-xi quée ndidí sáá-ăⁿ xití ìⁿ lamba saa cuèndá ducaⁿ ñà túú nã cuu cováha-xi. ³⁹ Te ní ìⁿ ñăyiu ñà túú tnàhá iní-yu cohó-yu ndidí sáá, te núu díhna-gá ná còhó-yu ndidí sá ñi quene díhna-gá, chi càchí-yu sá xíhí văha-gá ndidí sá ñi quene díhna-gá-án dâcúxí ndidí sáá —càchí-gá xăhaⁿ-gă xii-yu.

6

Cue tée xica cuu ndihi Jesús sàhnú-güedé yoco triú nduu ndètatú ñăyiu
(Mt. 12:1-8; Mr. 2:23-28)

¹ Te ìⁿ nduu cùu-xi nduu ndetatu ñăyiu ñùhu Jesús ichi ndihi cue tée xica cuu ndihi-gá, te ta yăha-gá ndihi-güedé ìⁿ xichi núú cáá triú, te ní ngüíta-güedé sàhnú-güedé yoco triú-án te ndihi ndaha-güedé quíⁿ-güedé quée triú tá xèxi-güedé cuáháⁿ. ² Te ìⁿ úú cue tée cùu fariséú ní xăhaⁿ-güedé xii cue tée xica cuu ndihi-gá:

—¿Te ná cuèndá ducaⁿ quide nchohó ìⁿ sá ñà túú tau-ó càda-o vitna cuu-xi nduu ndetatu-ó-í? —càchí-güedé xăhaⁿ-güedé.

³ Te Jesús ní xăhaⁿ-gă xii-güedé:

—¿Te náa ñà túú dàcuaha-ndo núú tütú Yă Ndióxi núú càháⁿ-xi nàcuáa ní quide ndii Dâvií cúnàhá ní xíhí ndii docó ndihi cue tée ní xica cuu ndihi ndii-ăⁿ? ⁴ Chi ní quihu ndii vehe Yă Ndióxi, te ní queheⁿ ndii pàá ní cuu íi ndécú-ăⁿ ñi dâcãhñu ndii cue tée xica cuu ndihi ndii ní xexi ndii ndihi-güedé, te ñà túú tau ndii sá dúcáⁿ càda ndii ni cùu, chi mee-ni cuè dútú tau-güedé caxi-güedé pàá-án ní cùu —cachí-gá xăhaⁿ-gă xii-güedé.

⁵ Te ní xăhaⁿ tucu-gá:

—Te yúhú Tée cùu ñani tnàhá-ndo nchàa-ndo, tnàhá-í ndécú ndihi-í tnúhu ndee iní sá cùu-í nchaa ñăyiu nàcuáa cadá-yu nduu ndètatú-ó-á —càchí-gá xăhaⁿ-gă xii-güedé.

Íⁿ tée ní yíchí ìⁿ xio ndaha-xi
(Mt. 12:9-14; Mr. 3:1-6)

⁶ Te ingá nduu diu-ni nduu ndètatú ñăyiu cuánguihu Jèsús xití veñúhu dânehé-gá ñăyiu. Te xíaⁿ ndécú ìⁿ tée cùhú ní yíchí nihnu ìⁿ xio ndaha cùha-dé. ⁷ Te cue tée dàcuaha ñaha xii ñăyiu nchaa tnúhu ní chidó tnùní ndii Moisés, ndihi cue tée cùu fariséú ndéhé-güedé núu cada tátna ñaha Jèsús xii tée cùhú-án nduu ndètatú-güedé-án cuèndá níhí-güedé nàcuáa cada-güedé cacáⁿ cuéchi-güedé cuèndá-gá. ⁸ Dico Jèsús sa ní cutnùní iní-gá nàcuáa sàni iní-güedé, te ní xăhaⁿ-gă xii tée cùhú ndaha-xi-án:

—Ndacuiñí te ngúnutnii-n cuădava tnuú-ndí-a —càchí-gá xăhaⁿ-gă xii-dé.

Te tée-án ñi ndacuiñí-dé te ní ngúnutnii-dé cuădava tnuú-güedé ndihi-gá. ⁹ Te dătnùní Jèsús ní xicáⁿ tnúhú-gă núu cuè ñăyiu xindecu-án, te xăhaⁿ-gă xii-yu:

—Cuini-í cachí tnúhu-ndo nã cúú sã văha cada-o nduu ndetatu-ó. ¿Íⁿ chiunⁿ váha àdi ìⁿ chiunⁿ cuehé, sá cadá tátna-o ñăyiu cùhú àdi sá cáhni-ó-yu? —càchí-gá xăhaⁿ-gă xii-yu.

¹⁰ Te dătnùní ní ndacoto-gá núu-yu ncháa-yu, te ní xăhaⁿ-gă xii tée cùhú ndaha-xi-án:

—Ndocani ndaha-n —càchí-gá xăhaⁿ-gă xii-dé.

Te ní ndocani-dé ndaha-dé, te òré-ni ní ndúha. ¹¹ Te cue tée xindecu-án sùúni ñi cudééⁿ-güedé sá dúcáⁿ ñi quide tátna Jèsús tée cùhú-án, te ní ngüíta-güedé ndátnùhu-güedé núu nása cada ñaha-güedé xii-gá.

Jèsús cãxi-gá úxúú tnàhá cue tée dacuaha ñaha xii ñăyiu tnúhu-gá
(Mt. 10:1-4; Mr. 3:13-19)

¹² Te sátá dúcáⁿ ñi cuu te ní xica Jèsús cuáháⁿ-gá xití yucu cuèndá yacáⁿ cáháⁿ ndihi-gá Tátá-gă Dútú Ndióxi, te ñi niú ní cáháⁿ ndihi ñaha-gă. ¹³ Te sátá ñi túndaá, te ní cana-gá nchaa cue tée xica cuu ndihi-gá,

te ní cáxi-gá úxúú tnàhá-güedé, te cue téé-án nĩ xáhaⁿ-gã sá díú-güedé cuu-güedé cue téé quíhíⁿ cáháⁿ tnúhu-gá núú ñăyiu. ¹⁴ Te duha xĩnani ndi ùxúú cue téé-án. Té Ximú, àdi Pelú chi úú diu-dé, ndihĩ ñaní-dé té Ndrĩxí, ndihĩ té Jàcobó, ndihĩ té Juàá, ndihĩ té Lìpé, ndihĩ té Bartolómé, ¹⁵ ndihĩ té Mâteú, ndihĩ té Măxí, ndihĩ té Jàcobó déhe té Àlfeú, ndihĩ ingá té Ximú téé ní cundihi cue téé cananistá, ¹⁶ ndihĩ té Jùdás ñaní té Jàcobó, ndihĩ té Jùdás Iscarioté téé ní sáá nduu nĩ sáha cuendá ñáhá xii Jesús núú cuè téé cùu úhú iní ñáhá xii-gá, duha xĩnani cuè téé ní cáxi Jèsús ní xica cuu ndihĩ-gá.

Jèsús dánèhé-gá cuéhé víhí ñăyiu
(Mt. 4:23-25)

¹⁷ Te Jèsús cuánuu-gá yucu núú nĩ sáá-gá-án, te ní ngava-gá ìⁿ núú ndàá ndihĩ cue téé xica cuu ndihĩ-gá, te xíaⁿ nĩ ngúnutnĩ-gá. Te xíaⁿ ndécú dàva-gá cue téé xica cuu ndihĩ-gá ndihĩ vai ñăyiu ndètu ñáhá-yu xii-gá, te ñăyiu-án vëxi-yu nchaa ñúú cáá dìstritú Jùdeá, ndihĩ ñúú Jerusálén, te ndècu ñăyiu véxi ndàa yuhu lamár yatni ñúú Tírú, ndihĩ ñúú Sídón. Te nchaa ñăyiu-án nĩ quexió-yu cuiní-yu cundedóho-yu nchaa tnúhu càháⁿ Jèsús, ndihĩ cuendá sá cuiní-yu ndúha-yu nchaa cuéhé tnàhá-yu. ¹⁸ Te tnàhá ñăyiu yìhĩ ñaha espíritu cundihi yucu ñávãha. ¹⁹ Te ncháá-yu cuiní-yu dacáá-yu ndahá-yu tendáhá-yu Jèsús ní cùu cuendá sá nĩ níhĩ-yu tnúhu sá ndècu ndihĩ-gá tnúhu ndee iní quidé tãtna-gá nchaa ñăyiu cùhú.

Cuendá ñăyiu ío váha táhú-xi
(Mt. 5:1-12)

²⁰ Te Jèsús ní ndacoto-gá núú cuè téé xica cuu ndihĩ-gá, te ní xáhaⁿ-gã:

—Váha táhú nchaa nchòhó cue ñăyiu ndàhú, chi nduu táhú-ndó cùndecu-ndo núú táxí tnùnĩ Yã Ndiõxí.

²¹ Váha táhú nchaa nchòhó ñăyiu ío cuiní cundedóho tnúhu Yã Ndiõxí chi ío vii ío váha cuu iní-ndó.

Váha táhú nchaa nchòhó ñăyiu ndàhyú sá ndihú iní-ndó, chi sáá nduu te cudíí iní-ndó nĩ caa nĩ quíhíⁿ.

²² Váha táhú nchaa nchòhó ñăyiu na cùu úhú iní ñáhá tnàha ñăyiu-xi, chi sáá nduu

te vá dáñá-gã-yu quíhu-ndo vèñúhu, te cúcuèhé ñáhã-yu xii-ndo, te cachí-yu sá ñà díú ñăyiu váha cùu-ndo, te ducaⁿ càda ñáhã-yu xii-ndo sã cuendá yúhú Téé cùu ñaní tnàhá-ndó nchàa-ndo. ²³ Te òré ducaⁿ na càda ñáhã-yu xii-ndo te cudíí víhí-ní iní-ndó cùndecu-ndo, chi sáá nduu nduu táhú-ndó sã ío váha càa ndecu andi cu-ndecu ndihĩ-ndo nduu na nasaá-ndó yacáⁿ cundecu-ndo, chi diu-ni ducaⁿ nĩ xóo cada ñaha cuè ñaní tnàhá-yu xii cue téé ní xóo cáháⁿ tnúhu Yã Ndiõxí ní xíndecu ndéé sanaha.

²⁴ Te ndàhú ní cuu nchaa ñăyiu cuica ñà túú sàndáá iní ñáhá xii Yã Ndiõxí, chi vitna ío váha ndècú-yu, dico sáá nduu te nduu ndàhú-yu.

²⁵ Te ndàhú ní cuu tucu nchaa ñăyiu ñá túú tnàhí ná cúmãní xii-xi vitna, chi sáá nduu quiní-yu tnúndòho tnúhu ndàhú.

Te ndàhú ní cuu nchaa ñăyiu cùdíí iní-xi ndècu ichi cuehé ichi duha vitna, chi sáá nduu te ndàhyú-yu sá ndihú iní-yu.

²⁶ Te ndàhú ní cuu nchaa ñăyiu na càháⁿ váha dàva-gá ñăyiu cuendá-xi, chi ducaⁿ nĩ xóo cáháⁿ váha-yu cuendá nchaa cue téé ní xóo dandàhú ñáhá xii ñăyiu ndéé sanaha, chi ní cachí-güedé sá càháⁿ-güedé tnúhu Yã Ndiõxí te ñà ndàá —càchí-gá xáhaⁿ-gã xii-güedé.

Cuu iní-ó nchàa ñăyiu cùu úhú iní ñáhá xii-o
(Mt. 5:38-48; 7:12)

²⁷ Te Jèsús ní xáhaⁿ-gã xii nchaa ñăyiu xíndecu-án:

—Nchaa nchòhó ñăyiu xíndedóho ñaha càchí tnúhu-í xii-ndo sã cúú iní-ndó ñăyiu cùu úhú iní ñáhá xii-ndo, te cada-ndo sã vãha sã cúú-xi-yu cuèi nãndi sã ná cáda ñáhã-yu xii-ndo. ²⁸ Te cácaⁿ táhú-ndó núú Yã Ndiõxí cuendá ñăyiu càháⁿ úhú ñáhá xii-ndo, ndihĩ cuendá ñăyiu tèè ñaha cuéchi neñúú xii-ndo. ²⁹ Te núú ní canihá-yu xii-ndo ìⁿ xito te cuiní tucú-yu canihá-yu, te dañã-ndo na cànihá-yu, àdi núu na quèndéé-yu dóó ndíxí ndòdo-ndo, ndihĩ dúhnú-ndó, te dañã-ndo na cànehé-yu quíhíⁿ. ³⁰ Te núú xicáⁿ-yu ìⁿ sã nãndĩhĩ-yu núú-ndó te cuãñaha-ndo, àdi quèndéé-yu ìⁿ ndachiuⁿ-ndo, te vá nãndacáⁿ-ndó

nũ-yu. ³¹ Te nchaa sá vǎha cuìní-ndó càda tnaħa ñáyiũ-ndo, te cada-ndo tnàhá-ndó ndìhí-yu.

³² Chi núu nchòhó ná cùu iní-ndó mèe-ni ñáyiũ cùu iní ñàhá xii-ndo, te vǎ cǎchí-ndó sǎ ïo váha quide-ndo, chi tnàhá nchaa ñáyiũ ndècu ichi cuehé ichi duħa ducaⁿ xǐquidé-yu. ³³ Àdi mee-ni ñáyiũ quide ñaha sá vǎha xii-ndo quide váha-ndǒ-yu, te vǎ cǎchí-ndó sǎ ïo váha quide-ndo, chi tnàhá nchaa ñáyiũ ndècu ichi cuehé ichi duħa ducaⁿ xǐquidé-yu. ³⁴ Àdi mee-ni ñáyiũ sàni iní-ndó nàcoto ñaha xii-ndo cuáñaha-ndo ñⁿ sá xicáⁿ-yu núu-ndó, te vǎ cǎní iní-ndó sǎ ïo quide váha-ndo, chi tnàhá ñáyiũ ndècu ichi cuehé ichi duħa dǎsaⁿ nuũ-yu ñⁿ sá néhé vǎha-yu, te ndètu cahnu-ná-yu nacoto ñaha ñáyiũ ní sáha núu-yu-áⁿ. ³⁵ Dico nchòhó xíní ñùhu-xi cuu iní-ndó ñáyiũ cùu úhú iní ñàhá xii-ndo, te cada-ndo sǎ vǎha sá cúu-xí-yu, te cuáñaha núu-ndo ñⁿ sá ná ndìhi-yu te núu xicáⁿ-yu núu-ndó, te vǎ cùndètu-ndo nacoto ñahá-yu xii-ndo. Te ducaⁿ te ío-gǎ cuehé ñhí-ndó cùndecu ndìhi-ndo, te cuu ndisa-ndo dèhe Dútú Ndiǒxí, chi ío cǎhnu iní-gǎ sá cúu-xí nchàa ñáyiũ ñá túú ndàcáⁿ táhú nũú-gǎ cuendá nchaa sá vǎha quide-gǎ, ndìhi sá cúu-xí nchàa ñáyiũ ndècu ichi cuehé ichi duħa. ³⁶ Te cundu cǎhnu iní nchòhó tucu dǎtná cǎhnu iní Tǎtá-ó Dútú Ndiǒxí.

Vǎ cǎháⁿ cuèhé-ó cuendá tnàħa ñáyiũ-o
(Mt. 7:1-5)

³⁷ Te vǎ cǎháⁿ cuèhé-ndó cuendá sá quidé tnàħa ñáyiũ-ndo, te ducaⁿ te Yá Ndiǒxí ñá túú nà tnúhu cúñaha-gǎ xii-ndo. Te vǎ cùñaha-ndo xii ñáyiũ sá quihíⁿ-yu ñⁿ xichi núu úhú núu ndàhú ndohó-yu cuendá nchaa sá ñà túú vǎha quidé-yu, te ducaⁿ te Yá Ndiǒxí vǎ cúñaha-gǎ xii-ndo sǎ tnàhá-ndó quihíⁿ-ndó ñⁿ xichi núu úhú núu ndàhú ndohó-ndo. Te chí cǎdá cǎhnu iní nchaa sá quidé-yu, te ducaⁿ te Yá Ndiǒxí cada cǎhnu iní ñàhá-gǎ xii-ndo tùcu. ³⁸ Te chí cuáñaha xii ñáyiũ núu ná cúu sǎ xíní ñùhú-yu, te dǎtná chitu ñⁿ yicá súúní xidó coyo-ná, ducaⁿ tàxi Yá Ndiǒxí xii-ndo. Te nánicuáa na càda-ndo cada váha-ndo sǎ cúu-xí tnàħa ñáyiũ-ndo, te diu-ni ducaⁿ

càda ñaha Yá Ndiǒxí xii-ndo —cǎchí Jèsús xǎhaⁿ-gǎ xií-yu.

³⁹ Te dǎtnúni ní canigǎ ñⁿ cuendú núu-yu nàcuáa tecú tnúni-yu tnúhu-gǎ, te xǎhaⁿ-gǎ:

—Ñⁿ tée cuáa chi ñá ndácú-dě cuita nehe-dé ingǎ tée cuáa, chi núu ducaⁿ na càda-güedé te ndi nduú-güedé ngau-nihnu-güedé déhvǎ. ⁴⁰ Te ni ñⁿ landú yíhí scuèlá ñá túú cùnuu-gǎ-güexi dǎcúúxí mèstrú-güexi, te ndéé núu na cùtúħa váha-güexi, te dǎtnúni nútnahá-güexi té dǎnehé ñàhá xii-güexi.

⁴¹ Te na cǎchí tnúhu-í xii-ndo sǎ nchàa cuèchi quide ñáyiũ cùu-xí dǎtná ñⁿ mihi líhli. ¿Te ná cuendá ndéhé-ndó ñⁿ sá ñà túú vǎha quide tnaħa ñáyiũ-ndo, te mee-ndo vihi-gǎ quidé-ndó-í? Te sá dúcáⁿ quide-ndo te cada iní-ndó sǎ ndéhé-ndó dǎtná ñⁿ mihi líhli ñùhu núu tnàħa ñáyiũ-ndo, te mee-ndo ñùhu ñⁿ mihi cahnu-gǎ núu-ndó. ⁴² Te núu na nàcanu ichi-ndo tnaħa ñáyiũ-ndo cuendá sá ñà túú quide váha-yu ndécú-yu te mee-ndo vihi-gǎ quidé-ndó ñá, te cada iní-ndó sǎ xǎhaⁿ-ndo xii-yu sá nátava-ndo mihi líhli ñùhu núu-yu, te mihi cǎhnu ñuhu núu méé-ndó ñà túú quide cuendá-ndó. ¿Te sá dúcáⁿ quide-ndo te ío dǎndahú-ndó mèe-ndo sá quidé ndǎá-ndó te ñá ndǎá sá quidé ndǎá-ndó! Te xini ñuhu-xi díhna-gǎ dǎña-ndo nchàa sá ñà túú vǎha quide-ndo, te dǎtnúni ducaⁿ te cutnúni váha iní-ndó nàcuáa nacanu ichi-ndo tnàħa ñáyiũ-ndo.

Ndi dǎñⁿ núu yutnu xini-ó nǎ yutnu cùu-xi
cuendá sá sǎvidí-xi
(Mt. 7:17-20; 12:34-35)

⁴³ Te ñá túú ni ñⁿ yutnu váha te quini-ó cùuⁿ sǎvidí sá ñà túú vǎha, te ni ñⁿ yutnu sá ñà túú vǎha, te quini-ó cùuⁿ sǎvidí váha, chi mee-ni sǎvidí sá ñà túú vǎha cùuⁿ. ⁴⁴ Te ndi dǎñⁿ núu yutnu xini-ó nǎ yutnu cùu-xi cuendá sá sǎvidí-xi, chi ñá túú xini-ó cùuⁿ ngúxí ñⁿ tnu iñu, te ni ñà túú xini-ó cùuⁿ ndéhé yoho yàħa stilé díquí ñⁿ yoho yàħa cutexínu. ⁴⁵ Te nchaa ñáyiũ váha iní-xi cǎháⁿ-yu tnúhu váha, chi diu-ni tnúhu váha tnàhí-áⁿ ñùhú iní-yu, te nchaa ñáyiũ ñá túú vǎha iní-xi cǎháⁿ cuèhé-yu, chi diu-ni tnúhu cuèhé tnàhí-áⁿ ñùhú iní-yu, chi nchaa sá ñùhú iní-yu te xǎñⁿ cǎháⁿ-yu.

Jèsús ndècu cimientú-xi ndihi ìn vehe ñá túú cimientú-xi
(Mt. 7:24-27)

⁴⁶ ¿Te ná cuendá cächí-ndó sã yǔhú cùu-í Yaá cùu Xitohó-ndó te ñá túú quide-ndo nchaa nacuaá cãhá-í-i? ⁴⁷ Te na cächí tnúhu-í xii-ndo cuendá ñáyiú tũha ñaha xii-í, chi ñáyiú-án sácũndedóho-yu nchaa tnúhu cãhá-í te tnĩ-yu. ⁴⁸ Te ñáyiú-án cùu-yu dàtná ìn tée ní dácáá ìn vehe, chi tée-án dǐhna-gá ní xete-dé ndéé ní tnahá-dé yúú cáxí te dàtnú ní ní tava-dé cimientú-xi, te òré ní cuu dáú, te ní ndee ndute ñuhu, te ní ndacá-xi ndéé núú cáá vèhe-án, dico ñá túú ní ndacu-xi cuido-xi, te duca chi tée ní dácáá vèhe-án ní tava-dé cimientú-xi núú yúú cáxí. Duha sãtnahá-xi cùu nchaa ñáyiú sácũndedóho tnúhu cãhá-í te tnĩ-yu. ⁴⁹ Te ñáyiú sácũndedóho tnúhu cãhá-í te ñá túú tnĩ-yu, ñáyiú-án cùu-yu dàtná ìn tée ní dácáá ìn vehe, te ñá túú ní tava-dé cimientú-xi, te òré ní cuu dáú, te ní ndee ndute ñuhu, te ní ndacá-xi ndéé núú cáá vèhe-án, te íi-ni ní xido-xi vehe-án cuendá sã ñá túú ní quène cimientú-xi. Duha sãtnahá-xi cùu nchaa ñáyiú sácũndedóho tnúhu-í te ñá túú cuini-yu tnĩ-yu —cächí-gá xãha-gã xii-yu.

7

Jèsús quidé tãtna-gá ìn tée xĩnu cuechi núú ìn tée cùu capitán
(Mt. 8:5-13)

¹ Te sátá ñí yãha ní cáhá Jèsús ndihi ñáyiú, te cuáhã-gã ñuú Capernaúm. ² Te yacã ndécú ìn tée cùu capitán, te cùhú ìn tée xĩnu cuechi núú-dě tée ío-gá cùu iní-dé, te sa ndècu-ná-dé sã cùú-dé. ³ Te òré ní níhí tõe cùu capitán-án tnũhu cuendá Jèsús, te ní tendaha-dě ìn úú cue tée cùu sacuéhé núú ñáyiú isrãél cuáhã-güedé cáhá ndàhú-güedé núú-gã nõu vá cundèe iní-gá quíhĩ-gã cada tátna-gã tée xĩnu cuechi núú-dě-án. ⁴ Te ní quexìo-güedé núú ndécú Jèsús, te ní ngüita-güedé cãhá ndàhú víhĩ-güedé núú-gã, te xãha-güedé:

—Tée cùu capitán ní cachí-dé véxi-ndí nõu vá cundèe iní-n quíhĩ-n càda tátna-n ìn tée xĩnu cuechi núú-dě chi cùhú-dé, te tàú ndisa-n càda-n nacuaá cãhá-

capitán-án, ⁵ chi tée-ã ño cùu iní ñáhã-dě xii nchaa nchúhú ñáyiú isrãél te diu-dé ní táuchíú-dě ní sãá veñúhu-ndí —cächí-güedé xãha-güedé xii-gã.

⁶ Te sátá dúcã te Jèsús ní xica-gã cuáhã-gã ndihi-güedé, te òré tá cùyatni-gã vehe núú ndécú tõe cùhú-án cuáhã, te tée cùu capitán-án ñí xãha-dě xii ìn úú cue tée cãhá ndihi-dé:

—Quíhĩ-ndó cũñaha-ndo xii Yaá cùu Mèstrú sã cächí-í sã ñá túú ñá cani iní-gã, chi ñá túú tàú-í sã quíhu-gã ndéé xití vehe-í, ⁷ chi ñí sã cùnú ndúcú mè-í-gã ñá túú ní cùy-í. Núu xãã cũñaha-ndo xii-gã sã ná cãhá-ni-gã sã ndũha tée xĩnu cuechi núú-í-a te ndũha-dé. ⁸ Chi yúhú ndécú cuè tée tàxi tnuní ñáhã xii-í, te duca yúhú tucu ndècu cue sandadú táxí tnuní-í. Te òré xãha-í xii ìn-dé quíhĩ-dé ìn chiú te cuáhã-dé, te òré xãha-í xii ingã-dé quixi-dé te véxi-dé, te òré xãha-í xii tée xĩnu cuechi núú-í cada-dé ìn chiú te quide-dé. Duha cächí-í cũñaha-ndo xii-gã —cächí-dé xãha-dě xii cue tée cãhá ndihi-dé-án.

⁹ Te sátá dúcã ñí xãha-güedé xii Jèsús, te ní cuñúhu-gã nchaa tnúhu ní cáhá tée cùu capitán-án, te ní nchócótó-gã núú nchãa ñáyiú nchícú ñáhã xii-gã cuáhã, te ní xãha-gã:

—Na cächí tnúhu ndãá-í xii-ndo sã vãtã quini-gã-í ñí ìn ñáyiú isrãél, ñáyiú ío váha sãndãá iní-xi Yá Ndiõxí dàtnã sãndãá iní ñáhã tée-ã xii-gã —cächí-gã xãha-gã xii-yu.

¹⁰ Te òré ní ndexìo cue tée nèhe tnúhu-án ñí sãhá núú Jèsús, te sa ní ndũha tée cùhú-án.

Jèsús dándòto-gã déhe ìn ñaha quèé

¹¹ Te sátá dúcã ñí cuu te ní xica Jèsús cuáhã-gã ìn ñuú nání Nàin, ndihi cue tée xica cuu ndihi-gã, ndihi vãi ñáyiú. ¹² Te òré ní sãá-gã yuhu ñuú-án, te ní xiní-gã nchídó-güedé ìn ndíyí cuáhã chindúxi ñaha-güedé, te ndíyí-án cùú dẽhe ìn ñaha quèé, te ìndí duca-ni déhe-a ndècu ñí cuu te ní xihí-dé. Te ío cuéhé ñáyiú cuáhã chindúxi ñaha. ¹³ Te òré ní xiní ñáhã Jèsús xii-a ndàhyú-a te ní cundàhú iní ñáhã-gã, te ní xãha-gã:

—Vã ndàhyú-n —cächí-gã xãha-gã xii-a.

14 Te ní dáyátní-gã càjá ñúhú ndíyí-án te ní dácàá-gá ndaha-gá te ní tendaha-gã càjá-án, te ní ngüíñí cue téé nchìdo ñaha-án. Te ní xáhaⁿ-gã xii ndíyí-án:

—Tée cuechi, yúhú càchí-í sá ndácõo-n — càchí-gã xáhaⁿ-gã xii ndíyí-án.

15 Te téé ní xihí-án ñí núcúnucóo-dé te ní ngüíta-dé càháⁿ-dé, te Jèsús ní nacuáha cuendá ñáhá-gã xii-dé ndaha ñaná-dě. 16 Te sá dúcáⁿ ñí quide Jèsús ní xiní-yu te ío ní yúhú-yu, te ní xítñahá-yu:

—Ío càhnu cuu Yá Ndiõxí chi ñíⁿ téé càháⁿ tnúhu-gá ní quexìo núú ndécú-ó —càchí-yu xítñahá-yu.

Te ní xítñaha tucú-yu:

—Yá Ndiõxí véxi-gã chindee ñaha-gã xii nchaa nchoo ñáyiú cùu cuendá-gã — càchí-yu xítñahá-yu.

17 Te nchaa ñúú distritú Jùdeá, ndihí dava-gã ñúú ní níhí-yu tnúhu nàcuáa ní quide Jèsús.

Cue téé ní tendaha té Juàá cuáháⁿ núú ndécú Jèsús

(Mt. 11:2-19)

18 Te cue téé xica cuu ndihí té Juàá ní xáhaⁿ-güedě xii-dé nchaa sá ñí quide-gã, núú ní cana-dé úú tñahá-güedé 19 cuendá cúñaha-dě quíhíⁿ-güedé nducu tnúhu-güedé núú Jèsús, te núú sá díú-gã cúú-gã Crístú Yaá ní tendaha Yá Ndiõxí véxi ñuyíú-a àdi sá cùndètu nahi-ni-güedé mei Yàá-án. 20 Te òré ní quexìo cue téé ní tendaha tẽ Juàá núú ndécú Jèsús, te xáhaⁿ-güedě xii-gã:

—Té Juàá tée dàcuandute ñaha xii ñáyiú ní tendaha ñaha-dé xii-ndí véxi-ndí cácaⁿ tnúhú-ndí núú-n, núú sá díú-n cùu Crístú Yaá quixi ñuyíú-a, àdi sá cùndètu-ndí mei Crístú càchí-dé —càchí-güedé xáhaⁿ-güedě xii-gã.

21 Te mei òré ní quexìo-güedé-án ñí quide tátña Jèsús vai ñáyiú cùhú, te davá-yu càhú víhí tñahá-yu, te ndí dííⁿ ndí dííⁿ núú cuèhé tñahá-yu ñíⁿ ñíⁿ-yu, te cue ñáyiú yíhí ñaha espíritú cùndíhí yucu ñávãha ní queñuhu-gã espíritú-án yiqui cùñú-yu, te ío vai ñáyiú cuáá ní nacaáⁿ-gã núú-yu. 22 Te Jèsús ní xáhaⁿ-gã xii-güedé:

—Chí cuánuhú te cani-ndo cuendú núú tẽ Juàá nchaa sá ñí xiní-ndó quide-í, ndihí

nchaa nàcuáa ndùu tnúhu ní cáháⁿ-í ní xíndedóho-ndo. Te cúñaha-ndo xii-dé sá quidé tátña-í núú cue ñáyiú cuáá, te quide tátña-í cue ñáyiú yacua, ndihí cue ñáyiú tñahá cuèhé sã dátèhyú nihnu-xi yiqui cùñú-yu, ndihí cue ñáyiú doho, nchaa ñáyiú-án quide tátña-í te ndúha-yu, te ndéé cue ñáyiú sa ní xihí dándòto-í cúñaha-ndo xii-dé, te cúñaha tucú-ndo xii-dé sá ndécú-í dánèhé-í nchaa ñáyiú ndàhú tnúhu sá sánú ìchi ñaha xii-yu nàcuáa naníhí tãhú-yu. 23 Te cúñaha tucú-ndo xii-dé sá ío váha táhú nchaa ñáyiú ñá túú quide sáá iní nchaa tnúhu càháⁿ-í, duha cúñaha-ndo xii-dé — càchí-gã xáhaⁿ-gã xii-güedé.

24 Te sátá ñí yáha-güedé cuánuhú-güedé, te ní ngüíta Jèsús ní cáháⁿ-gã núú ñáyiú cuendá té Juàá, te xáhaⁿ-gã xii-yu:

—Nchòhó ní sándéhé-ndó ñíⁿ téé ndécú xití yucu, te téé-án ñá túú sàni ñíⁿ sàni úú iní-dé, chi ñá túú quide-dé dàtná quidé nchaa ité náhnú cuáháⁿ-xi duha cuáháⁿ-xi dàcáⁿ òré quéné tãchí. 25 Te ñí ñá túú ní sándéhé-ndó ñíⁿ téé ñihnu dóó vãha dóó vii càa. Te nchòhó xiní-ndó sã ñáyiú sàcúhnu dóó vãha dóó vii càa ñá túú ñá cùmãní xii-yu, te nchaa ñáyiú-án ndécú-yu vehe cue téé cùnuu yíndaha ñaha xii ñáyiú. 26 Dico nchòhó chi ní sándéhé-ndó ñíⁿ téé càháⁿ tnúhu Yá Ndiõxí. Te ndáá sá díú tẽ càháⁿ tnúhu-gã cúú-dě dico cùnuu-gã-dé dàcúxí dàva-gã cue téé càháⁿ tnúhu-gã. 27 Te díu cuendá té Juàá-án càháⁿ-xi núú tütú Yá Ndiõxí nàcuáa ní xáhaⁿ-gã xii Crístú, te duha ní xáhaⁿ-gã:

Tendaha-í ñíⁿ téé cáháⁿ tnúhu-í codonù-dé núú-n cuendá dàtúha-dé ñáyiú cuendá quíndáá iní-yu tnúhu-n.

Duha ní xáhaⁿ-gã, te ducaⁿ ñí ngódó tnùnì núú tütú-gã. 28 Te na càchí tnúhu-í xii-ndo sã ñíⁿ cue téé ñuyíú-a ñá túú cùnuu-güedé dàtná cùnùu té Juàá tée dàcuandute ñaha xii ñáyiú. Te nchaa ñáyiú sa ta ndíhu ndaha ñaha Yá Ndiõxí vitna cuáháⁿ cùnùu-gã-ni tucú-yu dàcúxí tẽ Juàá cuèi cùú-yu ñáyiú ñá túú cùnuu dàcúxí dàva-gã ñáyiú yíndaha-gã —càchí Jèsús xáhaⁿ-gã xii-yu.

29 Te sá dúcáⁿ ñí cáháⁿ Jèsús, núú nchaa ñáyiú ní dàcuandute té Juàá ní càchí-yu sá ío váha quide Yá Ndiõxí, te díu-ni ducaⁿ ñí cáháⁿ cue téé cuihna iní-xi quide cobrá

ñáhá xii ñáyiú cuendá impuèstú, cue tée ní dácuañdute-dé. ³⁰ Dico cue tée cùu fariséú, ndihí cue tée dácuaña ñaha xii ñáyiú nchaa tnúhu ní chídó tnùní ndíi Moisés, cue tée ñá túú ní dácuañdute té Juáá ñá túú ní tnàhá iní-güedé cada-güedé nchaa sá vaha cuení Yá Ndiöxí. ³¹ Te Xítohá Jesucristú ní xáhaⁿ-gã xií-yu:

—Na càchí tnúhu-í xii-ndo nàcuáa sãtnahá-xi cùu ñáyiú ndècu vitna. ³² Chi ñáyiú-áⁿ cúú-yu dàtná cue landú sácõo núu yáhu dàdiqui-güexi te níhi càháⁿ-güexi, te xítñaha-güexi: “Ní tíú-ndí yaá ndihí vïlu te ñá túú ní cuení-ndó càta-ndo. Te ío yica iní ní xita yuhu-ndí te ñá túú ní ndáhyú-ndó”, càchí-güexi xítñaha-güexi. Te ducaⁿ sãtnahá-xi cùu ñáyiú ndècu vitna. ³³ Te té Juáá tée ní xóo dácuañdute ñaha xii ñáyiú ío ndàhú ní xóo caxi-dé, te ni ñà túú ní xõo coho-dé ndudí ndéhé yoho yàha stilé sá sà ní nduu-xi ndidí, te ní càchí-ndó sã ní xíndecu ndihí-dé espíritú cúndihí yucu ñávãha. ³⁴ Te sátá ní quexìo yúhú Tée cùu ñaní tnàhá-ndó nchaa-ndo, te xèxi-í xìhi-í ndécù-í te càchí-ndó sã cúú-í tée xèxi vihi te xìhi vihi-í. Te càchí tucu-ndo sã cúú-í tée xìca cuu ndihí cue tée cuihna iní-xi quide cobrá ñáhá xii ñáyiú cuendá impuèstú, ndihí nchaa dava-gá cue tée ndècu ichi cuehé ichi duha, duha càchí-ndó. ³⁵ Te ñáyiú ní tnahá tnúhu ndihí Yá Ndiöxí, ñáyiú-áⁿ quidè-yu nàcuáa cutnùní sá méé-gã ío ndècu ndihí-gá sá xìní tnùní-gá —càchí-gá xáhaⁿ-gã xií-yu.

Jèsús ndécú-gã vehe ìⁿ tée cùu fariséú tée nàni Xímú

³⁶ Te ìⁿ tée cùu fariséú ní càháⁿ-dé Jèsús vehe-dé caxi-gá, te òré ní quexìo-gá te cuànguihu-gá mèsá. ³⁷ Te xíáⁿ núcõo-gá ní sáá ìⁿ ñadìhí te dïu-ni ñaha ñuú-áⁿ cúú-áⁿ, te ndècu-aⁿ ichi díí iní, te sá ní níhi-aⁿ tnúhu sá cuàngaxi Jèsús vehe tée cùu fariséú-áⁿ, núu nèhe-aⁿ ìⁿ yoó chitu àcítí sàháⁿ tnámí. ³⁸ Te ní ngóo-aⁿ ìⁿ xio dñi Jesús, te ní ngüíta-aⁿ ndàhyú-aⁿ te ndihí ndute núu-aⁿ ní naquete-aⁿ sàhá-gã. Te dàtnùní ní nadayìchí-aⁿ ndihí idi díquí-aⁿ, te ní teyuhu-aⁿ sàhá-gã, te ní chihí ñaha-aⁿ àcítí sàháⁿ tnámí-ãⁿ. ³⁹ Te sá dúcáⁿ ní quide-aⁿ ní xìní tée cùu fariséú tée ní càháⁿ ñáhá xii-gá-áⁿ

núu ní sani iní-dé: “Te núu dícó ndisa tée càháⁿ tnúhu Yá Ndiöxí cúú tée-a ña, te sa cutnùní iní-dé yoo cùu ñaha tnándeé ñáhá xii-dé, àdi ná ñáyiú cùu-aⁿ, te dícó ìⁿ ñaha ndècu ichi díí iní cúú-áⁿ”, duha ní sani iní-dé. ⁴⁰ Te Jèsús ní xáhaⁿ-gã xii-dé:

—Xímú, ndècu ìⁿ tnúhu cachí tnúhu-í xii-n —càchí-gá xáhaⁿ-gã xii-dé.

Te tée cùu fariséú-áⁿ xáhaⁿ-dè xii-gá:

—Cachí tnúhu, Mèstrú —càchí-dé xáhaⁿ-dè xii-gá.

⁴¹ Te Jèsús ní xáhaⁿ-gã:

—Ní xíndecu ìⁿ tée ní xóo dasaⁿ núu díhúⁿ, te ní xítaú úú tnàhá-güedé núu-dè. Te ìⁿ-dè ní sàha-dé úhúⁿ cièndú díhúⁿ denàriú, te ingá-dé ní sàha-dé údico úxí. ⁴² Te ñá ní níhi-güedè nacháhu-güedé núu-dè, te tée ní sánùu ñaha-áⁿ ní quide càhnu iní-dé ndi ndùú-güedé. Te vitna cachí-ò tucu te núu ndèda càa-güedé cúú iní ñáhá-gã-güedé xii-dé —càchí-gá xáhaⁿ-gã xii-dé.

⁴³ Te ní xáhaⁿ tẽ Xímú-áⁿ:

—Sànuu sá tée tàú vài-gá díhúⁿ ìo-gá cúú iní-dé tée ní sánùu ñaha díhúⁿ-ãⁿ —càchí-dé xáhaⁿ-dè xii-gá.

Te ní xáhaⁿ Jèsús:

—Sá ndáá càháⁿ-n —càchí-gá xáhaⁿ-gã xii-dé.

⁴⁴⁻⁴⁶ Te Jèsús ní ndacoto-gá núu ñadìhí-áⁿ, te ní xáhaⁿ-gã xii té Xímú-áⁿ:

—¿Ndèhe-n nàcuáa quide ñadìhí-a ñã? Chi cuànguihu-í vehe-n, dico ñá túú ní tàxi-n ndute ndoo sàhá-í, te ni ñà túú ní tàyuhu ñaha-n, te ni ñà túú ní chihí-n acítí díquí-í, dico ñadìhí-a ní naquete-aⁿ ndihí ndute núu-aⁿ sàhá-í, te ní nadayìchí-aⁿ ndihí idi díquí-aⁿ, te nuu núu teyuhu-aⁿ sàhá-í, te ní chihí-aⁿ acítí sàháⁿ tnámí sàhá-í. ⁴⁷ Te na càchí tnúhu-í xii-n sã ío cùu iní ñáhá-áⁿ xii-í, te núu xíáⁿ cutnùní iní-ó sã cuéi ío vài sá cuéhé sá dúhá ní quide-aⁿ, dico Yá Ndiöxí sa ní quide càhnu iní ñáhá-gã xii-aⁿ. Chi Yá Ndiöxí quidé càhnu iní-gá ñáyiú cuéi vài àdi sacú cuéchi-yu, te núu sacú cuéchi-yu te sacú cúú iní ñáhá-yu xii-í —càchí-gá xáhaⁿ-gã xii-dé.

⁴⁸ Te ní xáhaⁿ-gã xii ñadìhí-áⁿ:

—Sa ní quide càhnu iní-í nchaa cuéchi-n —càchí-gá xáhaⁿ-gã xii-aⁿ.

⁴⁹ Te cue tée xínucóo ndihí-gá xítñaha-güedé:

—¿Ná tée cùu tée-a núu nándi sá quidé-dě, te ndéé nchaa yíca cuěchi ñáyiú quide cahnu iní-dé-i? —càchí-güedé xítñaha-güedé.

⁵⁰ Te Jèsús ní xáhaⁿ tùcu-gá xii ñadhí-áⁿ:

—Sa ní cácu nihnu-n núú ùhú núú ndàhú vitna chi ní sándáá iní ñáhá-n xii-í, te vitna cuanùhú te ñá túú-gă ná cani iní-n —càchí-gá xáhaⁿ-gă xii-aⁿ.

8

Ñáyiú ðihí ní chindee ñàha xii Jesús

¹ Te sátá dúcáⁿ ní cuu te Jèsús ní xica-gá cuáháⁿ-gá titní víhí ñúú náhnú, ndihí ñúú líhli dānehé-gá ñáyiú nācuáa ndihu ndaha ñàha Yá Ndiöxí xii-yu. Te cuáháⁿ ndihí-gá ndi ùxúú tñahá cue tée xica cuu ndihí-gá, ² ndihí ñúú ñáyiú ðihí ní quide tátna-gá ní xíhí ñàha espíritú cündihí yucu ñávàha, ndihí ñáyiú tñahá dava-gá cuéhé ùhú ní cùu. Te xíaⁿ tñahá tucu ñàha nàni Mariá Magdaléná, te ñàha-áⁿ ní xíhí ñàha ùsá espíritú cündihí yucu ñávàha xii-aⁿ ni cùu, te ní quee ñàha-xi. ³ Te tñahá ñàha nàni Juáná ñadhí ñúú tée nàni Chúza tée ní cunuu ní xinu cuechi vèhe té Hèrodés, ndihí ingá ñàha nàni Susaná nchaa ñáyiú-áⁿ ní chindee ñàhá-yu xii-gá ndihí nchaa sá ndécú ndihí-yu, te ðiu-ni ducaⁿ ní quide vāi-gá tucu ñáyiú nchícúⁿ ñàhá xii-gá cuáháⁿ.

Nācuáa quide tée cuāngacáⁿ triú

(Mt. 13:1-9; Mr. 4:1-9)

⁴ Te ío vāi ñáyiú ndaa ñúú ní tacá-yu núú ndécú Jèsús, te ní ngüíta-gá ní cani-gá ñúú cuendú núú-yu cuendá tecú tñuní-yu tñuhu-gá, te xáhaⁿ-gă xii-yu:

⁵ —Íⁿ tée cuāngacáⁿ-dé triú. Te òré ní ngüíta-dé dāngoyo-dé triú-áⁿ te dava ní quene ndava ní ngava ndéé ichi, te ní xénihnu ñáyiú, te ní xiní tiláá te ní nadatácá-güedi. ⁶ Te dava ní ngava ñuhu yadi núú yíhí vīhi yúú, te ní xínu-xi dico núú sácú-ni nduu te ní yíchí-xi, chi ñá túú cōhyo yíhí. ⁷ Te dava ní ngava núú yúcu ndíquíⁿ tnu ñū-áⁿ, te ñúú-ñúú-ni ní xínu-xi ndihí tnu ñū-áⁿ, te tnu ñū-áⁿ ní dánáá-xi nchaa triú sá ní xínu-áⁿ. ⁸ Dico dava triú-áⁿ ní ngava-xi núú ndécú ñuhu cocoⁿ, te xíaⁿ ní xínu-xi te

ní sahnú-xi, te ío vāha ní cuu, chi núú ííⁿ-ní triú te ní ngüihí yoco-xi ñúú ciendú triú-xi —càchí-gá xáhaⁿ-gă xii-yu.

Te níhi ní cáháⁿ-gá ní xáhaⁿ tùcu-gá xii-yu:

—Nchaa nchòhó ñáyiú ní xíndedóho tñuhu ní cáháⁿ-í-a, te ío vāha chí cuāha cuendá —càchí-gá xáhaⁿ-gă xii-yu.

Nācuáa quèe-xi tñuhu ní cáháⁿ Jèsús

(Mt. 13:10-17; Mr. 4:10-12)

⁹ Te cue tée xica cuu ndihí Jesús ní xícáⁿ tñuhú-güedé núú-gă ñúú nása quèe-xi cuendú ní cani-gá núú ñáyiú. ¹⁰ Te ní xáhaⁿ-gă xii-güedé:

—Nchòhó chí sa càchí tñuhu Yá Ndiöxí xii-ndo ñúú sá vātá quini-gá-ndó, chí càchí tñuhu-gá nācuáa cada-gá ndihu ndaha-gă ñáyiú, dico dava-gá ñáyiú cāni-í mee-ni cuendú núú-yu, chí cuéi na quini-yu nchaa nācuáa cuu dico ní vá cūtnūní iní-yu ná cuendá ducaⁿ cùu, àdi cuéi na cūndedóho-yu dico ní vá tēcú tñuní-yu —càchí-gá xáhaⁿ-gă xii-güedé.

Jèsús càháⁿ-gá nācuáa quèe-xi tñuhu cuendá tée cuāngacáⁿ triú

(Mt. 13:18-23; Mr. 4:13-20)

¹¹ Te xáhaⁿ tùcu-gá xii-güedé:

—Duha quèe-xi cuendú ní cani-í núú-ndó, chí triú ní sacáⁿ tée-áⁿ cúú-xí dàtná tñuhu Yá Ndiöxí. ¹² Te triú sá ní quene ndava ní ngava ndéé ichi-áⁿ, xíaⁿ cúú-xí dàtná ñáyiú ní quèe iní-xi tñuhu Yá Ndiöxí, dico sácúíhná cuáháⁿ-xi xòcani-xi tñuhu-gá iní-yu cuendá sá vā quindáá iní-yu, te vá nānihí tàhú-yu. ¹³ Te triú sá ní ngava ñuhu yadi núú yíhí vīhi yúú, xíaⁿ cúú-xí dàtná ñáyiú ní xíndedóho tñuhu Yá Ndiöxí te díí iní ní tñí-yu tñuhu-gá, dico òré ná dàcaháⁿ ñàhá yùcu ñávàha xii-yu nándi cadá-yu, te dàña nihnú-yu tñuhu-gá chí ñá nihí ndéé-yu canchícúⁿ nihnú-yu nācuáa càháⁿ tñuhu-gá. ¹⁴ Te triú sá ní ngava núú yúcu ndíquíⁿ tnu ñū-áⁿ, xíaⁿ cúú-xí dàtná ñáyiú ní tecú dóho-xi tñuhu Yá Ndiöxí, dico cuèé cuèé ní nacuanaá-yu tñuhu-gá, chí cuendá mee-ni sá cúú-xí mèe-yu ñuhu iní-yu, ndihí cuendá sá ío sàni iní-yu cuu cuicá-yu, ndihí cuendá sá ío cùdí iní-yu nchaa sá ío ñuyú-a núú xíaⁿ àúⁿ nā cuu ní xíndedóho-yu tñuhu-gá. ¹⁵ Dico triú sá ní

ngava núú ndécú ñùhu cocoⁿ, xí^ñ cúu-xí dàtná ñáyiú váha iní-xi ní xíndedóho tnúhu Yá Ndiöxí chi ñá túú daña nihnú-yu, te ni yùhu ni iní-yu quidé-yu nchaa nàcuáa càháⁿ tnúhu-gá.

Nàcuáa quidé-yu iti
(Mr. 4:21-25)

¹⁶ Te ñá túú ni ñá ñáyiú tènñuhú-yu ñá iti te dàdáhu-yu, àdi chiváha-yu ñá caha camá, chi tàxi ndecú-yu núú ñnu cuendá cutnùní núú nchaa ñáyiú ndècu vehe. ¹⁷ Te ni ñá tnúhu sá ñá tècú tnùní ñáyiú vitna vá càchí-ó sá vǎ tècú tnùní-yu chi dacuèi sá tècú tnùní-yu, te ni ñá tnúhu sá càchí-ó cùu yuhu vitna vá cúu yùhu chi dacuítí sá quée túu-xi núú ñáyiú.

¹⁸ Te chí cùndedóho váha tnúhu na càháⁿ-í-a. Nchaa ñáyiú sàndáá iní ñáhá xii Yá Ndiöxí ío-gá cuita quindáá-gá iní ñáhá-yu xii-gá quíhíⁿ, te nchaa ñáyiú ñá túú sàndáá iní ñáhá xii-gá uuⁿ-gá cuita cuu sáa-gá iní-yu núú-gǎ quíhíⁿ —càchí-gá xáhaⁿ-gǎ xii-güedé.

Cue ñaní Jèsús ndihi nǎná-gǎ
(Mt. 12:46-50; Mr. 3:31-35)

¹⁹ Te ní quexìo náná Jèsús ndihi cue ñaní-gá vehe núú ndécú-gǎ, te ñá ndácü-yu càháⁿ ndihi ñáhá-yu xii-gá chí ío cuéhé ñáyiú ndècu núú ndécú-gǎ. ²⁰ Te ñá ñáyiú xíndecu-áⁿ ní dáyaⁿha-yu tnúhu núú-gǎ, te xǎháⁿ-yu:

—Ní quexìo náná-n ndihi cue ñaní-n xínutní-yu quehé, te cuíní-yu càháⁿ ndihi ñáhá-yu xii-n —càchí-yu xǎháⁿ-yu xii-gǎ.

²¹ Te ní xáhaⁿ-gǎ:

—Nchaa ñáyiú sàcùndedóho tnúhu Yá Ndiöxí te quidé-yu nchaa nàcuáa càháⁿ tnúhu-gá, ñáyiú-áⁿ cúu-yu dàtná nǎná-í ndihi dàtná cue ñaní-í —càchí-gá xáhaⁿ-gǎ xii ñáyiú ní dáyaⁿha tnúhu núú-gǎ-áⁿ.

Jèsús nganí-gǎ táchí ndihi ndute làgúná
(Mt. 8:23-27; Mr. 4:35-41)

²² Te ñá nduu ní quée Jèsús bàrcú ndihi cue téé xica cuu ndihi-gá, te ní xáhaⁿ-gǎ:

—Chí ná quíhíⁿ-ó ndàa ingá xio yuhu làgúná —càchí-gá xáhaⁿ-gǎ xii-güedé.

Te cuáháⁿ-güedé ndihi-gá. ²³ Te ñá ñá ñùhu bàrcú ichi cuáháⁿ-xí núú ndute ní xídí Jèsús. Te ní ngüíta-xi níhi vìhi quene

táchí te ta nàdachitú-xi ndute xítí bàrcú-áⁿ cuáháⁿ, te sa cuíní-nǎ-xi quée naa bàrcú-áⁿ xítí ndute ni cùu. ²⁴ Te ní sáháⁿ-güedé núú cáá Jèsús xídí-gá, te ní xáhaⁿ-güedé xii-gá:

—¡Mèstrú, ndiquíú iní chí tà quée naa-o cuáháⁿ! —càchí-güedé xáhaⁿ-güedé xii-gá.

Te Jèsús ní ndiquíú iní-gá te ní ndacóo-gá te ní tenàá-gá táchí-áⁿ ndihi ndute làgúná-áⁿ, te ní ngüíñí-ni táchí-áⁿ te ní nucúndecu nahi-nǎ ndute làgúná-áⁿ. ²⁵ Te ní xáhaⁿ-gǎ xii-güedé:

—¿Náa ñá túú sàndáá iní ñáhá ndisa-ndo xii-í áⁿ? —càchí-gá xáhaⁿ-gǎ xii-güedé.

Te ní cuñúhu-güedé sá dúcáⁿ ní quide-gá ní xiní-güedé, te ní yùhú-güedé, te ní xítñaha-güedé:

—¿Te ná téé cùu téé-a núu ní càháⁿ-ni-dé te ní ngüíñí táchí te ní nucúndecu nahi-ni ndute làgúná-a-i? —càchí-güedé xítñaha-güedé.

Tée yíhi ñaha cue espíritú cùndíhi yucu ñávǎha
(Mt. 8:28-34; Mr. 5:1-20)

²⁶ Te ní sáa-gá ndihi-güedé yucu cue téé ñúu Gàdará, te yíhi ndáa-ni ndàa ingá xio làgúná-áⁿ cáá dístítú Galileá. ²⁷ Te òré ní quene Jèsús xítí bàrcú te ní dáyatní ñàha ñá téé ñúu-áⁿ xii-gá, te yíhi ñaha títní espíritú cùndíhi yucu ñávǎha xii-dé. Te ní cunaha ñà túú-gǎ sácüñnu-dé dóo-dě, te ni ñà túú-gǎ sácúndecu-dé vehe-dé, chí da nchaa núú yíndüxi ndíyí quide vehe-dé. ²⁸ Te òré ní xiní-dé Jèsús te ní ngüíñí xítí-dě núú-gǎ, te cue espíritú yíhí ñàha xii-dé-áⁿ ní quide-xi níhi ní càháⁿ-dé, te xǎháⁿ-dě xii-gá:

—¿Ná cuendá véxi-ò Jèsús Déhe Dútú Ndiöxí sàdí-n ìchi-í-i? Te càháⁿ ndàhú-í núu-n sá vǎ dándòho ñaha-n xii-í —càchí-dé xáhaⁿ-dě xii-gá.

²⁹ Te ducaⁿ ní càháⁿ-dé cuendá sá Jèsús ní xáhaⁿ-gǎ xii nchaa espíritú cùndíhi yucu ñávǎha yíhi ñaha sá ná quée ñaha-xi xii-dé. Te nchaa xí^ñ ní xóo dacàháⁿ-xí iní-dé nándi sá ní xóo cada-dé ñúu ní xóo dacùtu ñaha-güedé cadená xii-dé cuendá sá ñà túú-gǎ ná cada-dé, te ní xóo cundé ñáhá-güedé, dico cuèi ducaⁿ dico ní xóo dandáva-ni-dé cadená, te cue espíritú

cúndìhi yucu ñávãha-áⁿ ñí xóo dacùnu ñaha-xi xii-dé ní xóo quíhíⁿ-dé xití yucu. ³⁰ Te Jèsús ní xicáⁿ tnúhú-gã núú-dě, te xáhaⁿ-gã:

—¿Nása nàni-n-í? —cachí-gá xáhaⁿ-gã.

Te ní xáhaⁿ-dě:

—Vài Sandadú nàni-í —càchí-dé xãhaⁿ-dě xii-gá.

Te ducaⁿ ñí xáhaⁿ-dě xii-gá cuèndá sá ïo cuéhé espíritú cúndìhi yucu ñávãha yìhi ñaha xii-dé. ³¹ Te nchaa espíritú-áⁿ ñí cáháⁿ ndàhú-xi núú Jèsús sá vã téndàha ñaha-gá xii-xi quíhíⁿ-xi núú ùhú núú ndàhú. ³² Te ñiu-ni yatni yucu núú ndécú Jèsús-áⁿ yíhí vài cuchí xixexi-güedi, te nchaa espíritú-áⁿ ñí cáháⁿ ndàhú-xi núú-gã sá ná dàña-gá quíhu-xi yiqui cùñú nchaa cùchí-áⁿ, te Jèsús ní xáhaⁿ-gã sá cúú quíhu-xi yiqui cùñú-güedi. ³³ Te ní quee ñaha nchaa espíritú-áⁿ xii téé-áⁿ, te ní quíhu-xi nchaa cùchí-áⁿ, te cùchí-áⁿ ñí xinu-güedi duha ní queé-güedi ndàa núú dèhvã yuhu làgúná-áⁿ, te ní ngaunihnu-güedi xití ndute te ní ndìhi-güedi ní cáhá.

³⁴ Te òré ní xiní cue téé xito cuchí-áⁿ nàcuáa ní cuu te ní yùhú-güedé ní xinu-güedé, te ní sáháⁿ-güedé ní cani-güedé cuèndú núú cuè ñáyiu ndècu xití ñuú, ndìhi núú cuè ñáyiu ndècu xití yucu. ³⁵ Te nchaa ñáyiu ní níhí tnúhu ní queé-yu cuáháⁿ ndéhë-yu nàcuáa ní cuu. Te òré ní quexió-yu núú ndécú Jèsús, te ní xiní-yu téé ní xíhi ñaha cuè espíritú cúndìhi yucu ñávãha-áⁿ núcõo-dé núú sàhá Jèsús, te ñihnu-ná-dé dóó-dě, te núcõo-dé dàtná ñí ñáyiu váha, te ní yùhú-yu òré ní xiní ñáhã-yu xii-dé. ³⁶ Te nchaa ñáyiu ní xiní nàcuáa ní cuu ní ndúha téé yìhi ñaha cue espíritú cúndìhi yucu ñávãha-áⁿ ní cùu ní caní-yu cuèndú núú nchaa ñáyiu ní quexió-áⁿ nàcuáa ní cuu ní ndúha téé-áⁿ ndìhi nàcuáa ní cuu cuèndá nchaa cùchí-áⁿ. ³⁷ Te sá dúcáⁿ ñí níhí-yu tnúhu nàcuáa ní cuu, núu nchaa ñáyiu ñuú Gàdará ío ní yùhú-yu te ní ngüíta-yu càháⁿ ndàhú-yu núú Jèsús sá ná nùhú-gá ñuú ndèé ichi véxi-gá. Te sá dúcáⁿ ñí cáháⁿ-yu núu cuáháⁿ-gá núú ndécú bàrcú. Te òré ndée-gá bàrcú-áⁿ nùhú-gá ³⁸ ní ngüíta téé ní xíhi

ñaha cuè espíritú cúndìhi yucu ñávãha càháⁿ ndàhú-dé núú-gã ñuú vá cúndèe iní-gá quíhíⁿ ndìhi ñaha-gã xii-dé, dico Jèsús ní quide ndee iní ñáhã-ni-gã xii-dé, te ní xáhaⁿ-gã:

³⁹ —Cuanùhú vehe-n, te cani-n cuèndú núú nchaa ñáyiu sá ïo càhnu cuu nchaa sá vãha ní quide ñaha Yã Ndiõxí xii-n —càchí-gá xáhaⁿ-gã xii-dé.

Te téé-áⁿ ñí xica-dé cuánuhú-dé te ní ngüíta-dé ní cani-dé cuèndú núú nchaa ñáyiu xíndecu ñihí ñuú sá ïo càhnu cuu nchaa sá vãha ní quide ñaha Jèsús xii-dé.

Cuèndá déhe yoco tẽ Jàirú, ndìhi cuèndá ñí ñadìhí ní tnándeé dóó Jèsús

(Mt. 9:18-26; Mr. 5:21-43)

⁴⁰ Te òré ní ndexìo Jèsús ndàa ingá xio yuhu làgúná, te ñáyiu xíndecu xíáⁿ sa ndètu cahnu ñaha-ná-yu, te ío váha ní cáháⁿ ndìhi ñáhã-yu xii-gá òré ní nasáá-gá. ⁴¹ Te ñí téé tàxi tnuní veñúhu ní quexió-dé núú ndécú Jèsús, te téé-áⁿ nání-dě Jàirú, te ní ngüíñí xití-dě núú-gã càháⁿ ndàhú-dé, te xáhaⁿ-dě xii-gá:

—Véxi-í càháⁿ ndàhú-í núú-n ñuú vá cúndèe iní-n quíhíⁿ-ó vèhe-í cada tátna-n dèhe yoco-í —càchí-dé xãhaⁿ-dě xii-gá.

⁴² Te ducaⁿ ñí xáhaⁿ-dě chi ndècu ñí dii-ni déhe yoco-dě, te ndècu-xi datná úxúú cuíá-xi, te càhú víhí tnáhã-xi cùhú-xi te cuíní-xi cuú-xi. Te Jèsús ní xica-gá cuáháⁿ-gá ndìhi téé-áⁿ, te ío vài ñáyiu nchìcúⁿ ñáhã xii-gá cuáháⁿ, te dàdehnde ñaha-ná-yu xii-gá ní cùu.

⁴³ Te tnuú nchaa ñáyiu-áⁿ ñútnáhã ñí ñaha cùhú, te ñaha-áⁿ sà ní cuu úxúú cuíá sã cùhú-aⁿ ngòyo ñaha níñí xii-aⁿ, te ío cuéhé dñhúⁿ ñí cuu dãndoñuhu-aⁿ chi ní nadico-aⁿ nchaa sá ndécú ndìhi-aⁿ cuèndá ní níhí-aⁿ dñhúⁿ ñí queheⁿ nchaa ñáyiu ní quide tátna ñaha xii-aⁿ, dico ní ñí-yu ñá túú ní ndàcú-yu ndúha-aⁿ. ⁴⁴ Te ní sáháⁿ ndehe yatni-aⁿ ndàa sátá Jèsús, te ní tnándeé-aⁿ luha yuhu dóó-gã te òré-ni-áⁿ ñí ndúha-aⁿ.

⁴⁵ Te Jèsús ní xicáⁿ tnúhú-gã núú-yu, te xáhaⁿ-gã:

—¿Ndèdacàa-ndo ní tnándeé ñáhã xii-í? —càchí-gá xáhaⁿ-gã xii-yu.

Te nchaá-yu ní xáhãⁿ-yu sá ñⁿ ñⁿ-yu ñá túú ní tnándeé ñáhá xii-gá. Te té Pèlú ndihi cue té cùndihi-dé ní xáhaⁿ-güedé xii-gá:

—Mèstrú, ndèhe-n sá vái ñáyiú nchìcúⁿ ñáhá xii-n, te xio xio dàdehnde ñáhá-yu, te xicáⁿ tnúhú-gã-n yòo ní tnándeé ñáhá xii-n —cachí-güedé xáhaⁿ-güedé xii-gá.

⁴⁶ Dico Jèsús ní xáhaⁿ-gã xii-yu:

—Dico ñu ñⁿ-ndo ñⁿ tnándeé ñáhá xii-í, chi ní cutnùní iní-í sá ñⁿ ñáyiú cùhú ní tnándeé ñáhá xii-í te ní ndúha-yu —càchí-gã xáhaⁿ-gã xii-yu.

⁴⁷ Te sátá ñⁿ xini ñaha-áⁿ sã ñⁿ cutnùní iní Jèsús sá ñⁿ tnándeé ñáhá-áⁿ xii-gá, te yùhú yùhú-aⁿ ní sáhá-aⁿ ní ngüíñí xití-áⁿ núú-gã, te ní náhmá-aⁿ núú-gã, ndihi núú nchaa ñáyiú ná cuendá ducaⁿ ñⁿ quide-aⁿ ní tnándeé-aⁿ-gã, ndihi cuendá sá òré-ni-áⁿ ñⁿ ndúha-aⁿ. ⁴⁸ Te Jèsús ní xáhaⁿ-gã xii-aⁿ:

—Yòhó ñaha cùhú, ní sándáá iní ñáhá-n xii-í núu ní ndúha-n, te cuanùhú vitna te ñá túú-gã ná cani iní-n —càchí-gã xáhaⁿ-gã xii-aⁿ.

⁴⁹ Te càháⁿ dúcáⁿ-ní Jèsús ní sáá ñⁿ tée xinu cuechi vehe té Jàirú tée tàxi tnuní veñúhu, te xáhaⁿ tée xinu cuechi-áⁿ xii-dé:

—Sa ní xihí déhe-n, vá chíchìuⁿ-gã-n Mèstrú —càchí-dé xáhaⁿ-dè.

⁵⁰ Te sá dúcáⁿ xáhaⁿ tée xinu cuechi-áⁿ xii té Jàirú ní tecú dóho Jèsús, núu ní xáhaⁿ-gã xii-dé:

—Vá ndihú iní-n, quindáá iní ñáhá-ni-n xii-í te ndúha déhe-n —càchí-gã xáhaⁿ-gã xii-dé.

⁵¹ Te òré ní sáá-gã vehe té Jàirú te ñá ní dàña-gã quihu ñáyiú cùtexínu, núu té Pèlú-ni ndihi té Jàcobó-ni, ndihi té Juáá-ni, ndihi tãtá ndihi ñaná-ni xíchí ñⁿ xihí-áⁿ cuànguihu ndihi-gã xití vehe. ⁵² Te nchaa ñáyiú sa xindecu vehe-dé-áⁿ xindáhyú-yu sá ndihú iní-yu cuendá sá ñⁿ xihí-xi. Te Jèsús ní xáhaⁿ-gã xii-yu:

—Vá ndàhyú-ndó, chi dicó-ni xidí-xi ñá túú ní xihí-xi —càchí-gã xáhaⁿ-gã xii-yu.

⁵³ Te ní sácú ndeé ñáhã-yu xii-gá, chi sá cúu-xí mèe-yu chi ní xihí ndisa xíchí-áⁿ.

⁵⁴ Te Jèsús ní tñi-gã ndaha xíchí ñⁿ xihí-áⁿ, te níhi ní cáháⁿ-gã, te xáhaⁿ-gã:

—Xíchí cuéchí, ndacóo —càchí-gã xáhaⁿ-gã.

⁵⁵ Te xíchí-áⁿ ñⁿ ndoto-xi, te òré-ni ní ndacóo-xi, te Jèsús ní xáhaⁿ-gã sá ná cuañáhã-yu sá cáxí-xí. ⁵⁶ Te tãtá-xi ndihi ñaná-xi súúni ñⁿ cuñúhu-yu sá dúcáⁿ ñⁿ dándótó ñaha Jesús xii-xi, te ní xáhaⁿ-gã xii-yu sá vã yòo ñⁿ cuñáhã-yu sá dúcáⁿ ñⁿ quide-gã.

9

Jèsús téndaha-gã ndi ùxúú cue tée xica cuu ndihi-gã quihíⁿ-güedé cáháⁿ-güedé tnúhu-gã (Mt. 10:5-15; Mr. 6:7-13)

¹ Te Jèsús ní cana-gã ndi ùxúú cue tée xica cuu ndihi-gã, te ní sãñaha-gã xii-güedé tnúhu ndee ñⁿ cundecu ndihi-güedé cuendá queñuhu-güedé nchaa espíritú cùndihi yucu ñávãha yihí ñaha xii ñáyiú, ndihi cuendá sá cádá tãtna-güedé nchaa ñáyiú cùhú.

² Te ní xáhaⁿ-gã xii-güedé sá quihíⁿ-güedé danèhé-güedé ñáyiú nàcuáa cada Yá Ndiõxí ndihu ndaha ñaha-gã xii-yu, te ducaⁿ cada tãtna-güedé cue ñáyiú cùhú. ³ Te cùmání-gã caca-güedé quihíⁿ-güedé, te ní xáhaⁿ-gã xii-güedé:

—Ñá túú tñáhi ná canehè-ndo cùu ichi-ndo, ni tãtnu, ni ñunu, ni sã cáxí-ndó, ni dñhúⁿ. Te ni vã cánèhe-ndo ñngá ichi dóó-ndó, chi ñu-ni dóó níhnú-ndó-áⁿ xíáⁿ tñáhi-ni. ⁴ Te ndédani cãa vehe na saá-ndó, te xíáⁿ cundecu-ndo ndeé ná sáá nduu ndeè-ndo. ⁵ Te núu ñá túú cuñí-yu queheⁿ cuendá ñáhã-yu xii-ndo, te ndeè-ndo ñúú-áⁿ, te naquidi-ndo tìcá chùhmá ñⁿ tñi sáhá-ndó cuendá sá ná cùtnuní iní-yu sá ñá túú quide váha-yu —càchí-gã xáhaⁿ-gã xii-güedé.

⁶ Te sátá dúcáⁿ ñⁿ xáhaⁿ Jèsús xii-güedé, te ní quee-güedé cuáhãⁿ-güedé nchaa ñúú dácuaⁿ-güedé ñáyiú tnúhu Yá Ndiõxí, tnúhu sá càháⁿ nàcuáa naníhi tãhú-yu, te ducaⁿ ta quide tãtna-güedé nchaa ñáyiú cùhú cuáhãⁿ.

Nàcuáa ní cuu ní xihí té Juáá tée dàcuandute ñaha xii ñáyiú

(Mt. 14:1-12; Mr. 6:14-29)

⁷ Te té Hèrodés tée cùu gobiernú ní níhi-dè tnúhu nchaa nàcuáa quide Jesús, te quiyuhú iní-dé te sàni iní-dé yoo cùu-gã. Te ducaⁿ ñⁿ sani iní-dé chi dava ñáyiú càchí-yu sá tẽ

Juàá téé ní xóo dacuàndute ñaha xii ñáyiú ní ndoto cùu-gá. ⁸ Te davá-yu cächí-yu sá tē Èliás cúu-gá, te davá-yu cächí-yu sá ñí tēé ní xóo cáháⁿ tnúhu Yá Ndiõxí ndéé sanaha vîhi ní ndoto cùu-gá, cächí-yu. ⁹ Dico té Hèrodés ní cachí-dé:

—Yúhú ní táuchíúⁿ-í ní xehndé-güedé díquí tē Juàá. ¿Te yoo cùu tēé dii cuèndú-xi nihí-a sá sùúni cuéhé núú sá quidé-dē váíⁿ? —duha ní cachí-dé.

Te té Hèrodés ndúcú-dē nàcuáa cada-dé cuèndá quini-dé Jèsús.

Jèsús dácàxi-gá úhúⁿ mîl cue tēé te dîⁿ ñáyiú dîhí ndîhi landú

(Mt. 14:13-21; Mr. 6:30-44; Jn. 6:1-14)

¹⁰ Te nchaa cue tēé ní táuchíúⁿ Jèsús cuáháⁿ cáháⁿ tnúhu Yá Ndiõxí núú ñáyiú ní ndexiò-güedé núú-gá te ní ngüíta-güedé nácàni tnúhu-güedé nchaa nàcuáa ní quide-güedé. Te dätñuní ní xica-gá medî-ni-gá ndécá ñaha-gá xii-güedé cuáháⁿ ñí xichi núú ñà túú ñáyiú ndècu, yatni núú cáá ñúú Bètsaidá. ¹¹ Dico òré ní níhí ñáyiú tnúhu sá cuáháⁿ Jèsús, te nchícúⁿ-yu-gá cuáháⁿ, te òré ní quexiò-yu núú-gá, te ní queheⁿ cuèndá ñahá-gá xií-yu, te ní dánèhé ñahá-gá xií-yu nàcuáa ndîhu ndaha ñaha Yá Ndiõxí xií-yu, te ní quide tátna-gá nchaa ñáyiú cùhú.

¹² Te òré sa ní cuaa te ní natacá ndî ùxúú cue tēé xica cuu ndîhi-gá núú-gá, te ní xáhaⁿ-güedé xii-gá:

—Sa ní cuu dandàca-n nchaa ñáyiú-a, chi sa ní cuaa, te na quíhíⁿ-yu nchaa vehe càa yatni iha, ndîhi nchaa xití ñúú cáá yàtni iha cuaáⁿ-yu sá cáxí-yu, te dîu-ni yacáⁿ ndetátú-yu, chi núú ndécú-ó ìha ñá túú tnàhí ná íó —cächí-güedé xáhaⁿ-güedé xii-gá.

¹³ Te Jèsús ní xáhaⁿ-gá xii-güedé:

—Mee-ndo chí cuañaha sá ná caxí-yu —cächí-gá xáhaⁿ-gá xii-güedé.

Te ní xáhaⁿ-güedé xii-gá:

—Ñá túú nágá ndécú ndîhi-ndí, chí úhúⁿ duha-ná pàá, ndîhi úú-ná chácá ndécú ndîhi-ndí, te dîu-ni núú quíhíⁿ-ndí cuaaⁿ-ndí sá cáxí-yu —cächí-güedé xáhaⁿ-güedé xii-gá.

¹⁴ Te xînu dàtná úhúⁿ mîl mee-ni cuè tēé, te dîⁿ ñáyiú dîhí ndîhi landú. Te Jèsús ní xáhaⁿ-gá xii cue tēé xica cuu ndîhi-gá:

—Chí cññaha na ngõo ndî údico úxí ndî údico úxí-yu ñí ñí xichi —cächí-gá xáhaⁿ-gá xii-güedé.

¹⁵ Te ducaⁿ ñí quide-güedé, te ní ngóo-yu nchaá-yu. ¹⁶ Te dätñuní ní queheⁿ-gá ndî úhúⁿ pàá-áⁿ, ndîhi ndî ndúú chácá-áⁿ. Te ní ndacoto-gá andîu, te ní ndacáⁿ táhú-gá núú Yá Ndiõxí, te dätñuní ní táhú cuèchi-gá pàá-áⁿ ndîhi chácá-áⁿ, te ní sáha-gá nchaa cue tēé xica cuu ndîhi-gá ní dácáhñu ñaha-güedé xií-yu. ¹⁷ Te nchaá-yu ní xexí-yu ní ndahá xití-yu. Te sátá ñí túhú cóhõ-yu te ní nadatácá-güedé nchaa sá ñí quendóo, te ní chítú ùxúú tnàhí tídihi mee-ni sá ñí quendóo.

Té Pèlú xáhaⁿ-dē xii Jèsús sá díú-gá cúu-gá Crístú

(Mt. 16:13-19; Mr. 8:27-29)

¹⁸ Te ñí nduu ndècu mee Jesús ndîhi cue tēé xica cuu ndîhi-gá, te cáháⁿ ndîhi-gá Yá Ndiõxí, te sátá ñí yáha ní cáháⁿ ndîhi-gá Yá Ndiõxí, te ní xicáⁿ tnúhú-gá núú-güedé, te xáhaⁿ-gá xii-güedé:

—¿Yoo cùu yúhú cächí ñáyiú-va? —cächí-gá xáhaⁿ-gá xii-güedé.

¹⁹ Te ní xáhaⁿ-güedé xii-gá:

—Davá-yu cächí-yu sá cúu-n ndî Juàá téé ní xóo dacuàndute ñaha xii ñáyiú, te davá-yu cächí-yu sá cúu-n tē Èliás, te davá-yu cächí-yu sá ñí tēé ní xóo cáháⁿ tnúhu Yá Ndiõxí ndéé sanaha ñí ndoto cùu-n, duha cächí-yu —cächí-güedé xáhaⁿ-güedé xii-gá.

²⁰ Te ní xicáⁿ tnúhú tùcu-gá núú-güedé, te xáhaⁿ-gá xii-güedé:

—Te nchòhó, ¿yoo sàni iní-ndó cùu-í-í? —cächí-gá xáhaⁿ-gá xii-güedé.

Te té Pèlú ní xáhaⁿ-dē xii-gá:

—Yòhó cúu-n Crístú Déhe Dútú Ndiõxí —cächí-dé xáhaⁿ-dē xii-gá.

Jèsús cáháⁿ-gá sá cáhni ñaha-güedé xii-gá

(Mt. 16:20-28; Mr. 8:30-9:1)

²¹ Te ní xáhaⁿ-gá xii-güedé sá vã yõo ñí cññaha-güedé yoo cùu-gá. ²² Te ní xáhaⁿ-gá xii-güedé:

—Yúhú Tēé cùu ñani tnàhí-ndó nchàa-ndo ío cuéhé sá ndòhò-í, chí daquèe

tíhú ñáhá cuè téé cùu sacuéhé nùú ñáiyu isràél, ndihí cue dútú cùnùu, ndihí cue téé dàcuaha ñaha xii ñáiyu nchaa tnúhu ní chídó tnùní ndíi Moisés, te sáá nduu te cahni ñaha-güedě xii-í, dico nduu úní sá cùú-í te ndoto-í —càchí-gá xáhaⁿ-gã xii-güedé.

²³ Te dàtnùní ní xáhaⁿ-gã xii nchaa ñáiyu:

—Nchaa ñáiyu cuìní chitnahá ñáhá xii-í, te xìni ñuhu-xi vá cáda-gã-yu sá sání iní méé-yu, te ìⁿ nduu ìⁿ nduu cada ndee iní-yu cundecu túha-yu ndohó-yu cuendá-í, te cuèi na ndohó-yu dàtná ndoho-í. ²⁴ Te nchaa ñáiyu cuìní sá ñà túú tnàhí ná yáha cundecu ñuyú-a cuíta nihnú-yu. Dico nchaa ñáiyu ñá túú yùhú cuèi nándi sá ná yáha-yu cundecú-yu ñuyú-a sá cuendá-í, te ñáiyu-án naníhí tàhú-yu. ²⁵ Te cuèi nchaandi túhú sá ío ñuyú-a na nihí ñáiyu cundecu ndihí-yu, dico núu diu nchaa xiáⁿ ná càda cuíta nihnú-yu te ñá túú vèdana nàndihí-xi sá dúcáⁿ ndècu ndihí-yu nchaa xiáⁿ. ²⁶ Te nchaa ñáiyu na cùcahaⁿ núú-xi cáháⁿ váha cuendá-í ndihí cuendá nchaa tnúhu-í, te tnàhá yùhú Téé cùu ñaní tnàhá-ndó nchaa-ndo cucahaⁿ núú-í núú-yu òré quixi tucu-í ndihí cue espíritú xínú cuèchi núú Tàtá-í Dútú Ndiöxí, te mee-gã cada cutnùní iní nchaa ñáiyu sá ío càhnu cuu-í. ²⁷ Te na càchí tnúhu ndáá-í xii-ndo sã ío dava nchòhó ñáiyu ndècu iha vitna vá cùú-ni-ndo, chi cundecu-ni-ndo ndéé quini-ndó sáá nduu ndíhu ndaha ñaha Yá Ndiöxí xii ñáiyu —càchí-gá xáhaⁿ-gã xií-yu.

Ní nadáma dóo Jèsús ndihí núú-gã

(Mt. 17:1-8; Mr. 9:2-8)

²⁸ Te ní cuu dàtná úná nduu sá dúcáⁿ ñí cáháⁿ Jèsús, te cuásaá-gã ìⁿ yucu cáháⁿ ndihí-gá Yá Ndiöxí, te ndèca-gá té Pèlú, ndihí té Jàcobó, ndihí té Juàá cuásaá. ²⁹ Te ñini cáháⁿ ndihí-gá Yá Ndiöxí ní nadáma núú-gã ndihí dóo-gã, te dóo-gã-án sùúni ñí nduu cuixíⁿ víhí, te sùúni dàtásaⁿ-xi. ³⁰ Te òré-ni-án ñí xiní-güedé úú tnàhá cue téé càháⁿ ndihí-gá, te ìⁿ-dé cùú-dě té Moisés, te ingá-dé cùú-dě té Èliás, ³¹ te sùúni dàtásaⁿ-xi ñí càndéé núú ndécú cuè téé úú-án ndihí-gá, te xindatnúhu-güedé nàcuáa ndoho Jèsús cuú-gã ñuu Jerusàlén dàtná ní cachí méé-gã. ³² Te té Pèlú ndihí

úú-gá-güedé cuìní víhí-güedě cùdú-güedé, dico ní sahani iní-güedé ñá túú ní xidí-güedé, te ní dánèhé núú ñáhá-xi xii-güedé sá sùúni váha càa núú ndécú Jèsús, ndihí úú cue téé càháⁿ ndihí-gá-án. ³³ Te òré sa ndùcu ndee cue téé úú-án caca-güedé núhú-güedé, te ní xáhaⁿ tè Pèlú xii-gá:

—Mèstrú, ¡váha ní cuu sá ndécú-ó iha vitna! Te na dàcaa-ndí úní tnàhá vehe tnuvixíⁿ, ìⁿ cuu cuendá-n, te ìⁿ cuu cuendá té Moisés, te ìⁿ cuu cuendá té Èliás —càchí-dé xáhaⁿ-dě xii-gá.

Dico té Pèlú chi ñí mèe-dé ñá túú ní cùtnuní iní-dé nása ndùu tnúhu ní cáháⁿ-dé. ³⁴ Te ñini cáháⁿ-dé ní quexìo ìⁿ vícò núú ndécú-güedě-án ñí dádähu ñaha-xi xii-güedé, te ní yùhú-güedé sá dúcáⁿ ñí quexìo vícò-án ñí dádähu ñaha-xi. ³⁵ Te xití vícò-án ñí tecú ní cáháⁿ Yá Ndiöxí, te xáhaⁿ-gã xii-güedé:

—Téé-a cùu-dé Déhe-í, téé ío cùu iní-í, te tni-ndo nchaa tnúhu càháⁿ-dé —duha ní xáhaⁿ-gã xii-güedé.

³⁶ Te sátá dúcáⁿ ñí cáháⁿ Yá Ndiöxí, te ní quide cuendá-güedé sá mèdii-ná Jèsús ndécú-gã xiáⁿ. Te vá yòo ìⁿ ñí xáhaⁿ-güedé nàcuáa ndùu nchaa sá ñí xiní-güedé-án.

Jèsús quidé tãtna-gã ìⁿ téé cuechi yìhi ñaha espíritú cùndihí yucu ñávãha

(Mt. 17:14-21; Mr. 9:14-29)

³⁷ Te ingá nduu-án cuãnuu-gá yucu-án ndihí-güedé, te ío cuéhé ñáiyu cuáháⁿ tnàhá ñáhá xii-gá. ³⁸ Te ìⁿ téé ñuhu tnàhá tnuú-yu-án ñí cáháⁿ níhi-dé, te xáhaⁿ-dě xii-gá:

—Mèstrú, ío càháⁿ ndàhú-í núú-n núu vá cùndèe iní-n càda tãtna-n dèhe-í, chi ìⁿ dli duha-dé ndécú, ³⁹ te yìhi ñaha espíritú cùndihí yucu ñávãha xii-dé, te òré ná nãtni ñaha-xi xii-dé, te dàcana saa ñaha-xi, te ndàda ruúⁿ ñáhá-xi xii-dé, te tàva-xi tíñú yuhu-dé. Te ío dándoho ñaha-xi xii-dé, chi ndéé núú ñà cùú-gã, te dàña ñaha tnaa-xi xii-dé. ⁴⁰ Te sa ní cáháⁿ ndàhú-í núú cuè téé xica cuu ndihí-n queñuhu-güedé-xi, dico ñá túú ní ndàcu-güedé —càchí-dé xáhaⁿ-dě xii-gá.

⁴¹ Te Jèsús ní xáhaⁿ-gã xii nchaa ñáiyu:

—¡Nchaa nchòhó ñáiyu ndècu ñuyú-a ío sáá iní-ndó, chi ñá túú cuìní-ndó quindáa iní-ndó Yá Ndiöxí! Te ní cuu vai nduu quide

ndee iní-í nchaa sá quidé-ndó, ¿te ná ndée ama vá dúcáⁿ-gã cada-ndo-i? —càchí-gá xáhaⁿ-gã xií-yu.

Te ní xáhaⁿ-gã xii tée cùhú déhe-xi-áⁿ:

—Taxi déhe-n ìha —cachí-gá xáhaⁿ-gã xii-dé.

⁴² Te òré cuáháⁿ tée cuechi-ãⁿ núú-gã, te espíritú cùndìhi yucu ñávãha-áⁿ ñí dándùá ñáhá-xí xii-dé, te sàhni yìhí ñáhá tùcu-xi xii-dé ní cùu, dico Jèsús níhi ní cáháⁿ-gá ní tenáá-gá espíritú-áⁿ, te ní quee ñaha-xi xii-dé, te ní nacuéha cuèndá ñáhá-gã xii-dé tãtá-dě. ⁴³ Te ncháá-yu ní cuñúhu-yu sá dúcáⁿ ñí cuu, te ní cachí-yu sá ìo càhnu cuu Yá Ndiöxí.

Jèsús càháⁿ tucu-gá sá cùú-gá

(Mt. 17:22-23; Mr. 9:30-32)

Te ñini xícuñúhu-yu nàcuáa ní quide Jèsús, te ní xáhaⁿ-gã xii cue tée xica cuu ndìhi-gá:

⁴⁴ —Nchòhó cundedóho váha-ndo tnúhu na càháⁿ-í-a, te vá ná cuànaa-ndo, chi yúhú Téé cùu ñaní tnáhá-ndó nchàa-ndo sáá ñí nduu te cuáha cuèndá ñáhá-güedě xii-í núú cuè téé cùu úhú iní ñáhá —càchí-gá xáhaⁿ-gã xii-güedě.

⁴⁵ Dico cue téé-áⁿ ñà túú ní tècú tnùnì-güedé nàcuáa ndùu tnúhu ní xáhaⁿ-gã xii-güedě, te ducaⁿ ñí yáha-güedě, chi ducaⁿ tnàhí ní cachí-gá sá vã tècú tnùnì-güedě, te ní yùhú-güedě cácaⁿ tnúhú-güedě núú-gã nása ndùu tnúhu ní xáhaⁿ-gã xii-güedě.

Cue téé ndùcu tnúhu núú tnáhá nũ ndëdacàa-güedě ío-gá cùnùu

(Mt. 18:1-5; Mr. 9:33-37)

⁴⁶ Te cue téé xica cuu ndìhi-gá ní ngüíta-güedě ndátnúhu-güedě nũ ndëdacàa-güedě ío-gá cùnùu, ⁴⁷ dico Jèsús ní cutnùnì iní-gá nàcuáa sàni iní-güedě nũ ní cana-gá ñí té ìhli, te ní sanu tní ñaha-gã ñí xio dñi-gá. ⁴⁸ Te ní xáhaⁿ-gã xii-güedě:

—Nchaa ñáyiu na quèheⁿ cuèndá ñí té ìhli dàtná té ìhli-a cuèndá sá ñúhú iní ñáhã-yu xii-í ñá, te cada iní-yu sá yúhú ní queheⁿ cuèndá-yu, te nchaa ñáyiu na quèheⁿ cuèndá ñáhá xii yúhú, te cada iní-yu sá tnáhá Tãtã-í Dútú Ndiöxí Yaá ní tendaha ñaha xii-í véxi-í ñuyíú-a ní queheⁿ cuèndá-yu. Te nchaa ñáyiu ío ndàhú

iní-xi mee-ni xinu cuechí-yu, ñáyiu-áⁿ ìo-gá cùnùú-yu —càchí-gá xáhaⁿ-gã xii-güedě.

Ñáyiu ñá túú cùu úhú iní ñáhá cùndìhi ñáhã-yu xii-o

(Mr. 9:38-40)

⁴⁹ Te té Juáá diu-ni ñíⁿ téé xica cuu ndìhi-gá ní xáhaⁿ-dě xii-gá:

—Mèstrú, ní xiní-ndí ñíⁿ téé càcunehe ñaha-dé xii-n, te ndèñuhu-dé espíritú cùndìhi yucu ñávãha yìhí ñaha xii ñáyiu, te nchúhú ñá túú ní dàña-gá-ndí ducaⁿ càda-dé, chi ñá túú xica cuu ndìhi ñaha-dé xii-o —càchí-dé xáhaⁿ-dě xii-gá.

⁵⁰ Te Jèsús ní xáhaⁿ-gã xii-dé:

—Dàña-ndo na càda nahi-dé ní cùu, chi ñáyiu ñá túú cùu úhú iní ñáhá xii-o te cùndìhi ñáhã-yu —càchí-gá xáhaⁿ-gã xii-dé.

Jèsús càháⁿ-gá dóho té Jàcobó ndìhi té Juáá

⁵¹ Te òré sa ta cùyatni ndaa Jesús andiu, te ní xica-gá cuáháⁿ-gá ñuú Jerusàlén, chi duuⁿ duuⁿ ní sani iní-gá sá quíhíⁿ-gá.

⁵² Te ní tendaha-gã cue téé yòdo nuu cuáháⁿ, te ní quexìo-güedě ñíⁿ ñuú, te ñuú-áⁿ yíndèhu-xi distritú Sàmariá, te ndùcu-güedě ñíⁿ vehe cada túha-güedě òré quexìo-gá.

⁵³ Dico ñáyiu Sàmariá ñá túú ní cuínì-yu cuáñaha núú-yu vehe, chi cuèndá sá ñí cutnùnì iní-yu sá ìchi yáha-ni-gá quíhíⁿ-gá ñuú Jerusàlén. ⁵⁴ Te sá dúcáⁿ ñí quidé-yu ñá túú ní cuínì-yu cuáñaha núú-yu vehe ndetátú-gá, núu ní xáhaⁿ tè Jàcobó ndìhi té Juáá cue téé xica cuu ndìhi-gá xii-gá:

—Mèstrú, ¿cuínì-n cácaⁿ táhú-ó núú Yá Ndiöxí cuèndá dangàva-gá ñuhú danàa-gá ñáyiu ñuú-a dàtná ní quide té Èliás téé ní xóo cáháⁿ tnúhu Yá Ndiöxí ndée sanaha-ãⁿ? —càchí-güedě xáhaⁿ-güedě xii-gá.

⁵⁵ Te Jèsús ní nchócótó-gã núú-güedě, te níhi ní cáháⁿ-gá dóho-güedě, te xáhaⁿ-gã:

—Nchòhó, chi ñá túú váha iní-ndó te núu ducaⁿ càháⁿ-ndó. ⁵⁶ Chi yúhú Téé cùu ñaní tnáhá-ndó nchàa-ndo véxi-í sá dácãcu ni-hnu-í ñáyiu, te ñá díú véxi-í sá dácüíta ni-hnu-í-yu —càchí-gá xáhaⁿ-gã xii-güedě.

Te sátá dúcáⁿ ñí xáhaⁿ-gã, te ní xica-gá cuáháⁿ-gá ndìhi-güedě ingá ñuú.

Ñáyiu cuínì chitnahá ñáhá xii Jesús ní cùu

(Mt. 8:19-22)

57 Te ñuhu Jesús ichi ndihí-güedé, te ñⁿ téé ní xáhaⁿ-dë xii-gá:

—Mèstrú, cuíní-í canchicúⁿ ñáhà-í xii-n ndëni ní cuu na quíhíⁿ-n —càchí-dé xáhaⁿ-dë xii-gá.

58 Te Jèsús ní xáhaⁿ-gã xii-dé:

—Nchaa ñúcuii chi ndècu yaú cúu vèhe-güedi saquihí-güedi, te nchaa quiti ndàva caa tacá-güedi díquí yutnu, dico yúhú Téé cùu ñaní tnáhá-ndó nchàa-ndo chi ñá túú ndéé cáá vèhe-í ñuyú-a ndetatú-í —càchí-gá xáhaⁿ-gã xii-dé.

59 Te dàtnùní ní xáhaⁿ tùcu-gá xii-íngá-dé:

—Yòhó taquixi chitnahá ñáhá-n xii-í —càchí-gá xáhaⁿ-gã xii-dé.

Dico téé-áⁿ ñí xáhaⁿ-dë xii-gá:

—Mèstrú, dañá na nùhú-í cundetú-í cuú tàtà-í te chindúxi-í-dé, te dàtnùní quixi-í chitnahá ñáhá dùcaⁿ-ná-í xii-n —càchí-dé xáhaⁿ-dë xii-gá.

60 Te Jèsús ní xáhaⁿ-gã xii-dé:

—Daña ñáyiú ñá túú sàndáá iní ñáhá xii-í ná chindúxi tnàha meé-yu, chi ñáyiú-áⁿ cúu-yu dàtná ñáyiú ní xihí cuèi ndècu-ní-yu núú ñuyú-a. Te yòhó taquixi, chi quíhíⁿ-n dànehé-n ñáyiú nàcuáa cada Yá Ndiòxí ndíhu ndaha ñàha-gá xii-yu —càchí-gá xáhaⁿ-gã xii-dé.

61 Te ní xáhaⁿ tùcu íngá-dé xii-gá:

—Mèstrú, cuíní-í chitnahá ñáhà-í xii-n, dico díhna-gá dañá na nùhú-í cada ndee iní-í nchaa ñáyiú ndècu vehe-í, te dàtnùní quixi-í —càchí-dé xáhaⁿ-dë xii-gá.

62 Te Jèsús ní xáhaⁿ-gã:

—Nchaa ñáyiú ní sàndáá iní ñáhá xii-í, te núu vá cànchicúⁿ nihnu ñáhá-yu ñí yùhu ñí iní-yu, te cùu-yu dàtná ñⁿ téé ní tñi ndaha làtú cutu-dé, chi téé-áⁿ núu na ndàcoto-dé ndàa sàtá-dë òré xítú-dë, te vá quíhíⁿ ndáá làtú-dé ducaⁿ sàtnahá-xi cùu-yu. Te cue ñáyiú chi vá cúu ndáá-yu nàcuáa ndíhu ndaha-gá dava-gá ñáyiú—càchí-gá xáhaⁿ-gã xii-dé.

10

Jèsús téndàha-gá únídico úxí cue téé quíhíⁿ cáháⁿ tnúhu-gá núú ñáyiú

1 Te sàtá dúcáⁿ ñí cuu, te ní cáxi tucu Xítohó Jesucristú únídico úxí cue téé

codonùu-güedé quíhíⁿ-güedé cáháⁿ-güedé tnúhu-gá nchaa ñúú, ndihí nchaa dava-gá xichi núú quíhíⁿ-gá, te ndí ndúú ndí ndúú-güedé tendaha ñàha-gá xii-güedé quíhíⁿ-güedé. 2 Te cùmání-gã caca-güedé, te ní xáhaⁿ-gã xii-güedé:

—Nchòhó xìní-ndó sã òré ná sàá yóó cuu nchaa sá xítú ñáyiú, te ío vài cuu. Te na càchí tnúhu ndáá-í xii-ndo sã dàtná vài sá xítú ñáyiú cùu, ducaⁿ ío vài ñáyiú cùmání cundedóho tnúhu Yá Ndiòxí te ío sacú ñáyiú dàcuaha ñàha xii-yu tnúhu-gá, núu xíáⁿ xíní ñuhu-xi cácáⁿ-ndó núú Yá Ndiòxí cuendá sá ná dàcáháⁿ-gá iní ñáyiú cáháⁿ-yu tnúhu-gá núú ñáyiú cùmání cundedóho tnúhu-gá. 3 Te nchòhó cúu-ndó dàtná cue mbéé cue quiti cuáháⁿ núú yíhí cuè quiti dééⁿ. Chi tendaha ñàha-í xii-ndo quíhíⁿ-ndó núú xíndecu nchaa ñáyiú cuihna iní-xi. 4 Te vá cànèhe-ndo ñunu cuhuⁿ ndachiuⁿ-ndo, ni núú cùhúⁿ díhúⁿ-ndó, te ni vã cádá tũha-gá-ndó chàu-ndó chi ñíu-ni chàu yíhí-ndó-áⁿ xíáⁿ-ni quihí-ndo, te vá ío cuyaa-ndo cáháⁿ ndihí-ndo ñáyiú ñuhu ichi.

5 Te òré ná quèxio-ndo ñⁿ vehe, te duha cúñaha-ndo xii ñáyiú dii vèhe-xi-áⁿ: “Yá Ndiòxí chindee ñàha-gá xii-ndo ío váha cuu iní-ndó cùndecu-ndo”, duha cúñaha-ndo xii-yu. 6 Te núu ñáyiú-áⁿ ñí nduu táhú-yu sá cùndècu váha iní-yu núú Yá Ndiòxí, te cuu-xi sá vãha sá cúu-xí-yu tnúhu cúñaha-ndo-áⁿ, dico núu ñá túú ní cáháⁿ váha ndihí ñáhá-yu xii-ndo, te cúñaha-ndo sã vã cúu-xí sã vãha sá cúu-xí-yu. Dico núu ní cáháⁿ váha ndihí ñáhá-yu xii-ndo, 7 te ñíu-ni vehe-áⁿ cada vehe tnaa-ndo, te ñá túú-gã ndéé nducu-ndo vèhe cùndecu-ndo, te caxi-ndo nchàa sá ná tàxí-yu, chi nchaa cue téé quide chiuⁿ dacuití tau-güedé sá nihí-güedé sá cáxí-güedé cuendá nchaa chiuⁿ quide-güedé. 8 Te núu ní sáá-ndó ñⁿ ñúú núú ñí queheⁿ cuendá ñáhá-yu xii-ndo, te caxi-ndo nchàa sá ná tàxí-yu.

9 Te cada tátna-ndo cuè ñáyiú cùhú xíndecu ñúú-áⁿ, te cúñaha-ndo xii-yu sá sà ní sáá nduu ndíhu ndaha ñàha Yá Ndiòxí xii-yu. 10 Dico núu ní sáá-ndó ñⁿ ñúú núú ñá túú ní queheⁿ cuendá ñáhá-yu xii-ndo, te tñi-ndo ìchi cuita cáháⁿ-ndó cuáháⁿ, te cúñaha-ndo xii-yu: 11 “Ndéé tíca chúhmá

11 “Ndéé tíca chúhmá

11 “Ndéé tíca chúhmá

nǐ tñí sáhá-ndí ñuú-ndó nàquidi-ndí, te duha quide-ndí cuendá cutnùnì iní-ndó sǎ ñà túú quide váha-ndo ndècu-ndo. Dico cunaha-ndo sǎ sà ní sáá nduu ndíhu ndaha ñàha Yá Ndiöxí xii-ndo ni cùu”, duha cúñaha-ndo xii-yu. ¹² Te na cächí tñuhu-í xii-ndo sǎ ná sáá nduu càda ndáá Yá Ndiöxí cuéchi nchaa ñáyi, te ñáyi ñuú-án ïo-gá ndohó-yu dàvá-án dàcúxí ñáyi ñuú Sòdomá —cächí-gá xáhaⁿ-gǎ xii-güedé.

Cuendá ñáyi dava ñuú ñà túú sàndáá iní tñuhu Xítoho Jesucristú
(Mt. 11:20-24)

¹³ Te Jèsús xáhaⁿ-gǎ xii ñáyi dava ñuú ñà túú sàndáá iní tñuhu-gá:

—jNdàhú nchòhó cue ñáyi ñuú Coràzín!
jTe ndàhú nchòhó cue ñáyi ñuú Bètsaidá!
Chi núu dícó ñuú Tírú, ndíhi ñuú Sìdón ní quide-í nchaa sá vǎ yõ tñàhí ndàcu cada datná ní quide-í ñuú-ndó-án nǐ xíní-ndó ñá, te sá ndéé ama-gá cuihnú-yu dóo ndàhú, te cunucóo-yu núu yàá cuendá sá ndíxí cuéchi iní-yu sá ñà túú quide váha-yu ni cùu. ¹⁴ Dico sáá nduu te ïo-gá dandòho ñàha Yá Ndiöxí xii-ndo dàcúxí ñáyi ñuú Tírú, ndíhi ñáyi ñuú Sìdón. ¹⁵ Te nchòhó ñáyi ñuú Capèrnaúm quide iní-ndó sǎ sà cuándaa-ndo àndiu, dico ñáhá chi núu ùhú núu ndàhú cundecu-ndo —duha ní xáhaⁿ-gǎ xii nchaa ñáyi ñuú-án.

¹⁶ Te xáhaⁿ tùcu-gá xii cue té tendaha-gǎ quíhíⁿ cáháⁿ tñuhu-gá-án:

—Nchaa ñáyi na cùndedóho nchaa tñuhu cáháⁿ-ndó, te cada iní-yu sá yǔhú càháⁿ-í ndèdóho-yu, te nchaa ñáyi na dàquee tihú ñáhá xii-ndo, te tñàhí yúhú daquèe tihú-yu, te nchaa ñáyi ducaⁿ na dàquee tihú ñáhá xii-í, te tñàhí Tǎtà-í Dútú Ndiöxí Yá ní tendaha ñàha xii-í véxi-í ñuyíú-a dàquee tihú-yu —cächí-gá xáhaⁿ-gǎ xii-güedé.

Te ducaⁿ te ní xica-güedé cuáháⁿ-güedé.

Ní nasáá cue tée únídico úxí ní tendaha Jèsús ní sáháⁿ ní cáháⁿ tñuhu-gá núu ñáyi

¹⁷ Te cue tée únídico úxí-án nǐ nasáá-güedé te súúnì cùdíⁿ iní-güedé, te xáhaⁿ-güedé xii Jèsús:

—Mèstrú, ndéé espíritú cùndíhi yucu ñávàha sàndáá iní ñáhá-xí xii-ndí òrè

cácú nèhe ñàha-ndí xii-n —cächí-güedé xáhaⁿ-güedé xii-gá.

¹⁸ Te Jèsús ní xáhaⁿ-gǎ:

—Ndáá càháⁿ-ndó chi yúhú ní xíní-í cùtnàhá ní xíta nihnu yucu ñávàha, chi datná ní ngava ïⁿ tasaⁿ ní ngava-xi ñuyíú-a.

¹⁹ Te datná quidé-ndó òrè xènihnu-ndo ïⁿ cóó, àdi ïⁿ nchacua ducaⁿ cada-ndo daquee tihú-ndó yucu ñávàha, te ñà túú nǎ cada ñàha-xi xii-ndo, chi ní taxi-í tñuhu ndee iní ndécú ndíhi-ndo. ²⁰ Dico vǎ cùdíⁿ iní-ndó cuendá sá sàndáá iní ñáhá cuè espíritú cùndíhi yucu ñávàha xii-ndo, chi cùdíⁿ iní-ndó cuendá sá sà yodo tñuní-ndó núu tütú Yá Ndiöxí Yá ndécú àndiu —cachí-gá xáhaⁿ-gǎ xii-güedé.

Jèsús cùdíⁿ iní-gá

(Mt. 11:25-27; 13:16-17)

²¹ Te òrè-án súúnì nǐ quide díⁿ iní ñáhá Espíritú Yá Ndiöxí xii Jèsús, te ní xáhaⁿ-gǎ xii Yá Ndiöxí:

—Yòhó Tǎtà-í Dútú Ndiöxí, ío chñuhu ñàha-í xii-n chi diu-n tàxi tñuní-n àndiu ndíhi ñuyíú-a, te dànehé-n cuè ñáyi nchaa tñuhu váha, te diu-ni ñáyi-án cùú-yu ñáyi ñà túú cùtnuní iní-xi nchaa tñuhu càháⁿ cue téé túha, te nchaa tñuhu càháⁿ-n-án ñà túú ní datúu-n núu ñáyi cächí sá ïo túha, te ío váha sáá díquí-xi. Te ducaⁿ quide-n, chi ducaⁿ cuíní-n cùnduu —cachí-gá xáhaⁿ-gǎ xii Yá Ndiöxí.

²² Te xáhaⁿ tùcu-gá xii cue téé ní nasáá-án:

—Mee Tǎtà-í Dútú Ndiöxí ní cachí-gá sá cùnùu-í núu nchàa-ndí túhú sá ío. Te vǎ yõ ïⁿ xíní nàcuáa sàni iní yúhú Déhe Dútú Ndiöxí, chi ïⁿ dǐ dí-ni mee-gǎ xíní-gá nàcuáa sàni iní-í. Te ducaⁿ ïⁿ dii-ni yúhú xíní-í nàcuáa sàni iní méé-gǎ, te nchaa ñáyi cächí iní-í sá quíní-yu nàcuáa sàni iní Tǎtà-í Dútú Ndiöxí te xitnùhu-í-yu, te vǎ yõ ïⁿ-gǎ xíní nàcuáa sàni iní-gá chi diu-ni ñáyi ducaⁿ xitnùhu-í-án xíní-yu —cächí-gá xáhaⁿ-gǎ xii-güedé.

²³ Te ní nchócótó-gǎ núu xǐndecu mee-ni cuè téé xica cuu ndíhi-gá, te ní xáhaⁿ-gǎ xii-güedé:

—Váha táhú nchòhó ndíhi nchaa ñáyi ndèhe nchaa nacuaa quide-í vitna. ²⁴ Chi ío cuéhé cue téé ní xóo cáháⁿ tñuhu Yá Ndiöxí ndéé sanaha, ndíhi cue téé ní

xíndaha ñàha xii ñáyiu ní cuiní-güedé cundehe-güedě nchaa sá ndéhé-ndó quide-í vitna, te ñá túú ní xìní-güedé, te ní cuiní-güedé cundedóho-güedé nchaa tnúhu càháⁿ-í ndédóho-ndo vitna, te ñá túú ní xíndedóho-güedé —càchí-gá xáhaⁿ-gã xii-güedé.

Nàcuáa ní quide ìⁿ téé distritú Sàmariá

²⁵ Te ìⁿ téé dàcuaha ñaha xii ñáyiu nchaa tnúhu ní chídó tnùnì ndíi Moisés ní ndacuíñí-dé xító ndèé-dé Jèsús nùu nása cunduu tnúhu cáháⁿ-gá, te xáhaⁿ-dě xii-gá:

—Mèstrú, ¿ná cúú sá cáda-í cuendá nduu táhù-í cundecu-í ndíi Yá Ndiòxí ní caa ní quíhíⁿ-i? —càchí-dé xáhaⁿ-dě xii-gá.

²⁶ Te Jèsús ní xáhaⁿ-gã xii-dé:

—Cuiní-í cachí tnúhu-n nása càháⁿ-xi núú tütú ndíi Moisés —càchí-gá xáhaⁿ-gã xii-dé.

²⁷ Te xáhaⁿ-dě xii-gá:

—Ndíi Moisés càchí ndíi núú tütú ndíi: “Cuu iní-ndó Dütú Ndiòxí Yaá cúú Ndiòxí-ndó nì yuhu nì iní-ndó, te cani iní-ndó càda-ndo datná cuiní méé-gã, te mee-ni tnúhu váha cani iní-ndó nàcuáa cuu vii cuu váha-ndo nùú-gã, te coo iní-ndó cùu iní-ndó-gã. Te cuu iní-ndó tnàha ñáyiu-ndo dàtná cúú iní-ndó mèe-ndo”, duha càchí ndíi núú tütú ndíi —càchí-dé xáhaⁿ-dě xii-gá.

²⁸ Te Jèsús ní xáhaⁿ-gã:

—Váha-ni càháⁿ-n, te núú cada-n nàcuáa càháⁿ-n àⁿ, te nduu táhù-n cundecu-n ndíi Yá Ndiòxí ní caa ní quíhíⁿ —càchí-gá xáhaⁿ-gã xii-dé.

²⁹ Te sá dúcáⁿ nì xáhaⁿ Jèsús xii-dé nùu ndùcu-dé nàcuáa cada-dé cácu nihnu-dé núú tnúhu ní cáháⁿ-dé, te ní xícáⁿ tnúhú-dé núú-gã, te xáhaⁿ-dě:

—¿Yoo cùu tnaha ñáyiu-í-i? —càchí-dé xáhaⁿ-dě xii-gá.

³⁰ Te Jèsús ní cani-gá ìⁿ cuendú núú-dě nàcuáa tecú tnùnì-dé tnúhu-gá, te xáhaⁿ-gã:

—Ìⁿ téé ní ndee-dé ñúú Jerusalén ñúhú-dě ichi cuánuu-dé cuáháⁿ-dé ñúú Jericó, te ní queue ñadúhú ichi-dé ní dúhú-güedě dóó níhnú-dě, ndíi nchaa sá néhé-dě, te ní caniha vihi-güedé, te nchìto ñu-ná-dé ní dáñá ñàha-güedé te cuáháⁿ-güedé. ³¹ Te mei òré cātùu-dé-áⁿ ñúhú ìⁿ dütú ichi-áⁿ, te òré ní xìní ñáhá dütú-áⁿ xii-dé, te ìⁿ xio-ni ní xócõ ndee-dé

ní yáha-dé. ³² Te ñùhu tucu ìⁿ téé cùu levitá ichi-áⁿ, te òré ní xìní-dé téé-áⁿ cātùu-dé, te ñu-ni ducaⁿ nì quide-dé ìⁿ xio-ni ní xócõ ndee-dé ní yáha-dé. ³³ Dico ìⁿ téé distritú Sàmariá ñúhú tucu-dé ichi-áⁿ te òré ní xìní-dé téé-áⁿ cātùu-dé, te ní cundáhú iní ñáhá-dě. ³⁴ Te ní sáháⁿ-dé núú cātùu téé-áⁿ, te ní quide tátna-dé nchaa núú nì nícuèhé xii téé-áⁿ nì chihi-dé yúcu, te ní dácútù-dě. Te dàtnùnì ní dácáá ñàha-dé sátá quiti-dé, te ndèca ñàha-dé cuáháⁿ ìⁿ vehe núú sácõ cue ñáyiu sácúhuⁿ ichi, te yacáⁿ ní xito ñàha-dě. ³⁵ Te ingá nduu òré ní nucúhuⁿ téé Samaritánú-áⁿ ichi, te ní tava-dé úú díhúⁿ denàriú, te ní sáha-dé téé cùu xitohó vehe-áⁿ, te ní xáhaⁿ-dě: “Coto saú-n tēe-a, te núú ñá ní tnàhá díhúⁿ sã nì taxi-í, te cuèi na dāndoñuhu-gá-n díhúⁿ-n cuendá-dé, te òré ná quixi tucu-í te nacháhu-í”, duha ní xáhaⁿ tēe Samaritánú-áⁿ xii téé dii vehe xíaⁿ. ³⁶ Te vitna cáháⁿ, te núú ndédacáa cue téé úní-áⁿ cúú-güedě téé váha cùu iní-güedé tnàha ñáyiu-güedé —càchí-gá xáhaⁿ-gã xii téé dàcuaha ñaha xii-í ñáyiu-áⁿ nchaa tnúhu ní chídó tnùnì ndíi Moisés.

³⁷ Te téé-áⁿ nì xáhaⁿ-dě xii-gá:

—Téé ní cundáhú iní ñáhá xii téé ní dānicuèhé ñáhá cuè ñadúhú-áⁿ, téé-áⁿ cúú-dé téé cùu iní tnàha ñáyiu-xi —càchí-dé xáhaⁿ-dě xii-gá.

Te Jèsús ní xáhaⁿ-gã:

—Cuáháⁿ te ñu-ni ducaⁿ càda-n tnahá-n —càchí-gá xáhaⁿ-gã xii-dé.

Jèsús ndécú-gã vehe tá Mārta ndíi tá Mārriá

³⁸ Te Jèsús ñúhú-ni-gã ichi cuáháⁿ-gá ndíi cue téé xica cuu ndíi-gá, te ní sáá-gá ìⁿ ñúú líhli, te xíaⁿ nì queue ìⁿ xíchí nání Mārta ní cáháⁿ ñáhá-xi xii-gá vehe-xi. ³⁹ Te tá Mārta ndècu ìⁿ cùhú-xi nani-xi Mariá, te xíchí-áⁿ nì ngóo-xi núú Jèsús ndédóho-xi nchaa tnúhu càháⁿ-gá. ⁴⁰ Te tá Mārta-áⁿ ndíi vihi-ni iní-xi quide-xi chiuⁿ-xi, te ní sáháⁿ-xi núú Jèsús, te ní xáhaⁿ-xi:

—Mèstrú, ¿náa ñá túú tnàhí sàni iní-n sã nì dāndõ ndaha ñàha cùhù-í nchaa chiuⁿ-áⁿ? Cúñaha saú ná quixi-xi chindee ñaha-xi —cachí-xi xáhaⁿ-xi xii-gá.

⁴¹ Dico Jèsús ní xáhaⁿ-gã:

—Yòhó Mārta, ñùhu tneñu vihi-n, te ndíhú iní-n sã ño vai chiuⁿ-n ñuhu, ⁴² dico xìnì ñuhu vihi-gá-xi cundedóho-n tnúhu càháⁿ-í,

chi tá Màriá-a sa ndèdóho-xi tnúhu-í, te vá yõo ñⁿ ndacu xocani tnúhu-í sá ñí ngúndecu ndihí-xi —càchí-gá xáhaⁿ-gã xii-xi.

11

Jèsús dánèhé-gá cue téé xica cuu ndihí-gá nàcuáa cáháⁿ ndihí-güedé Yã Ndiõxí (Mt. 6:9-15, 7:7-11)

¹ Te ñⁿ nduu cáháⁿ ndihí Jèsús Yã Ndiõxí ñⁿ xichi, te sátá ñí yáha ní cáháⁿ ndihí-gá Yã Ndiõxí, te ní xáhaⁿ ñⁿ téé xica cuu ndihí-gá xii-gá:

—Mèstrú, danèhé ñáhá xii-ndí nása cáháⁿ ndihí-ndí Yã Ndiõxí dàtná ní quide ndí Juáá ní dánèhé ndí cue téé ní xica cuu ndihí ndí —càchí-dé xáhaⁿ-dë xii-gá.

² Te Jèsús ní xáhaⁿ-gã:

—Òré cáháⁿ ndihí-ndo Yã Ndiõxí, te cachí-ndó: Yòhó tátá-ndí Dútú Ndiõxí Yaá ndécú àndiu, nchaa ñáyiú na cáháⁿ-yu sá cúu-n Yàá ío yíñùhu.

Te xicáⁿ táhú-ndí núú-n sá ná sàá nduu ndíhu ndàhá-n-yu.

Te cada-n dàtná càchí iní-n ñùyíú-a dàtná quidé-n àndiu.

³ Te xicáⁿ táhú-ndí núú-n sá táxí-n sá cándèca iní-ndí ñⁿ nduu ñⁿ nduu.

⁴ Te cada càhnu iní-n nchaa yíca cuèchi-ndí, chi tnàhá nchúhú quidé càhnu iní-ndí nchaa sá quidé ñàha tnaha ñáyiú-ndí.

Te vá dáñá-n dàcaháⁿ ñáhá yùcu ñávàha xii-ndí cada-ndí sá ñà túú vaha, chi coto ñaha-n xii-ndí cuèndá sá vã dúcáⁿ càda ñaha-xi,

duha cáháⁿ-ndó

—càchí-gá xáhaⁿ-gã xii-güedé.

⁵ Te Jèsús ní xáhaⁿ tùcu-gá:

—Te núu ndèdacàa nchohó ndécú ñⁿ téé tnàha tnúhu ndihí-ndo, te dava niú cuáháⁿ-ndó vèhe-dé, te òré ní quexìo-ndo, te xáhaⁿ-ndo xii-dé: “Véxi-í núu vá cùndèe iní-n tàxi nuu-n úní tnàhá pàá, ⁶ chi ñⁿ téé xini tnàhá ndihí-í ñúhú-dë ichi ní quexìo-dé vehe-í, te ñá túú tnàhí ná cuáñaha-í caxi-dé”, quesaha-ndo cùñaha-ndo. ⁷ Te téé-án cáháⁿ-dé ndéé xití vehe-dé, te cùñaha-dë xii-ndo: “Vá dásatú nihá-n chi ndèdí yuyèhe-í, te càa-í ndihí cue landú-í,

te vá cúu ndàcòo-í taxi-í sá cuini-n”, quesaha-dë cùñaha-dë xii-ndo. ⁸ Te na càchí tnúhu-í xii-ndo sã cuèi cùu-dé téé tnàha tnúhu ndihí-ndo, dico ducaⁿ cùñaha-dë xii-ndo, dico dacuití sã ndácòo-dé taxi-dé sã cuini-ndó cuèndá sá vã dásatú-gá-ndó iní-dé. ⁹ Te yúhú càchí-í xii-ndo sã cáháⁿ-ndó núu ná cuini-ndó núu Yã Ndiõxí te taxi-gá. Te vá dáñá ndéé-ndó cáháⁿ-ndó núu-gã núu ná cuini-ndó, te ducaⁿ te nihí-ndó. Te cada iní-ndó sã ñí quexìo-ndo vehe ñⁿ tnaha ñáyiú-ndo te ní cáháⁿ-ndó, te ñáyiú-án ñí tedóho ñàhá-yu xii-ndo te ní nacaáⁿ-yu yuyèhe. Te ducaⁿ càda iní-ndó chi Yã Ndiõxí tedóho ñaha-gã xii-ndo, te taxi-gá sá ná cáháⁿ-ndó núu-gã. ¹⁰ Chi nchaa ñáyiú ducaⁿ xiquide te Yã Ndiõxí tedóho ñaha-gã xií-yu nihí-yu sá cuini-yu.

Te diu-ni ducaⁿ tùcu nchaa ñáyiú na cáháⁿ núu-gã ñⁿ sá cuini-yu, chi sãñaha-gã sá xicáⁿ-yu núu-gã. Te diu-ni ducaⁿ tùcu nihí nchaa ñáyiú ñá túú dàña ndéé xicáⁿ núu Yã Ndiõxí sá cuini-yu, chi nihí-yu.

¹¹ Te nchòhó cue téé cùu tátá ñá túú cùndee iní-ndó cuáña-ndo cuè déhe-ndo ñⁿ yúú caxi-güexi òré xicáⁿ-güexi ñⁿ pàá núu-ndó càxi-güexi, te ni ñà túú cùndee iní-ndó cuáñaha-ndo ñⁿ cóo caxi-güexi òré xicáⁿ-güexi ñⁿ chácá núu-ndó càxi-güexi.

¹² Te ni ñà túú cùndee iní-ndó cuáñaha-ndo ñⁿ nchacua caxi-güexi òré xicáⁿ-güexi ñⁿ ndíú núu-ndó càxi-güexi. ¹³ Te nchòhó cuèi ndéé dau sàá iní-ndó, dico sãha-ndo cuè déhe-ndo sã vaha xèxi-güexi òré xicáⁿ-güexi núu-ndó. Te núu nchòhó ducaⁿ quide-ndo, ÿte uuⁿ-gá ducaⁿ quide Tátá-ndó Dútú Ndiõxí Yaá ndécú àndiu, chi taxi-gá Espiritú-gá cundecu ndihí-ndo te núu na cáháⁿ-ndó núu-gã!

—càchí-gá xáhaⁿ-gã xii-güedé.

Càchí-güedé sá ndécú ndihí Jesús yucu ñávàha (Mt. 12:22-30; Mr. 3:20-27)

¹⁴ Te Jèsús ndéñùhu-gá espíritú cùndihí yucu ñávàha yíhi ñaha xii ñⁿ téé ní quide ñihí-xi, te òré ní ndee ñaha espíritú-án xii téé-án, te ní nacáháⁿ-dé. Te ío ní cuñúhu ñáyiú sá dúcáⁿ ñí quide-gá. ¹⁵ Te davá-yu ní xitnàhá-yu:

—Tée-a ndèñuhu-dé nchaa espíritú cùndìhi sácúíhná yíhí ñàha xii ñáyiu, chi ñu-ni sácúíhná-ã chindèe ñaha-xi xii-dé, te ñu-ni-xi tàxi tñuní-xi nchaa espíritú-áⁿ — càchí-yu xitnàhá-yu.

¹⁶ Te davá-yu xito ndeé ñáhã-yu xii-gá, te xáhãⁿ-yu sá ná cáda-gã ñⁿ sá vã yõ tñàhí ndàcu cada ñuyíú-a cundèhé-yu nàcuáa cutnùní iní-yu núu ndáá sá Yã Ndiõxí ní tendaha ñàha-gá xii-gá véxi-gá ñuyíú-a. ¹⁷ Dico mee-gã sa ní cutnùní iní-gá nchaa nàcuáa sàni iní-yu, núu ní xáhaⁿ-gã xií-yu:

—Te nchòhó xìní-ndó sã núu ñⁿ tée yìndaha ñⁿ nacióⁿ vá cúú ñⁿnuu-dé ndìhi cue tée cùndìhi-dé, te vá cùdì-dé cunuu-dé. Te ñu-ni ducaⁿ sãtnahá tucu-xi cùu cue ñáyiu xíndecu ñⁿ-ní vehe, chi núu vá cúú ñⁿnuú-yu cundecú-yu, te vá cùdì-yu cundecu càhnú-yu. ¹⁸ Te ducaⁿ sãtnahá-xi cùu sácúíhná, chi núu vá cúú ñⁿnuu-xi ndìhi nchaa espíritú cùndìhi-xi te vá cùdì-xi cundecu-xi taxi tñuní-xi. Te duha càháⁿ-í chi nchòhó càchí-ndó sã sácúíhná chindèe ñaha-xi xii-í queññuhu-í nchaa espíritú cùndìhi-xi yíhi ñàha xii ñáyiu. ¹⁹ Te núu yúhú quidé cuendá-ndó sã sácúíhná chindèe ñaha-xi xii-í, te xini ñuhu-xi cada cuendá-ndó yõ chindèe ñaha xii cue tée xica cuu ndìhi-ndo queññuhu-güedé nchaa espíritú cùndìhi-xi yíhi ñàha xii ñáyiu. Te mee-güedé càchí-güedé sá nchòhó ñá túú càháⁿ ndáá-ndó sã dúcáⁿ càháⁿ-ndó. ²⁰ Te ndáá sá Yã Ndiõxí chindèe ñaha-gá xii-í queññuhu-í nchaa espíritú cùndìhi sácúíhná yíhí ñàha xii ñáyiu, te xíãⁿ cutnùní iní-ndó sã sá ní sáá nduu ndíhu ndaha ñàha Yã Ndiõxí xii-ndo.

²¹ Te núu ñⁿ tée ío ndee, te súúní ñí cáá-dé, te ndeé-dé vehe-dé cuendá sá vã cuíta, te ní quide túha-dé titní sá dèéⁿ, te ío váha nèhe váha-dé nchaa ndachíuⁿ-dé. ²² Dico núu quexíó ingá tée ío-gá ñí cáá te ndee-gã-dé, te ngüíta-dé nàá-dé ndìhi tée ndèe vehe-xi-áⁿ, te cada cànarí ñáhã tée-áⁿ xii tée ndèe vehe-xi-áⁿ, te quen-deé-dé nchaa sá dèéⁿ cùndèe iní-dé, te taxi tñuní-na-dé nchaa xíãⁿ, ndìhi nchaa sá ndécú ndìhi-dé, te dácáhñu-dé nchaa cue tée cùndìhi-dé nchaa sá ná ñihí-dé.

²³ Te nchaa ñáyiu ñá túú cùndìhi ñàha

xii-í, te cùu úhú iní ñáhã-yu, te nchaa ñáyiu ñá túú chindèe ñaha xii-í, te dàquee tíhñu-yu chiúⁿ quide-í.

Espíritú cùndìhi yucu ñávãha sá nánchòcáva xito cùu uú
(Mt. 12:43-45)

²⁴ Te òré ná quèe ñàha ñⁿ espíritú cùndìhi yucu ñávãha xii ñⁿ ñáyiu, te cuáhãⁿ-xi ndùcu-xi ñⁿ xichi núu cùndècu-xi te ñá ñihí-xi, te ní sàni iní-xi: “Váha-gá núhú tucu-í núu ñí xíndecu-í”, duha ní sàni iní-xi. ²⁵ Te cuánuhú-xi, te òré ní nasáá-xi, te ní xini-xi sá cáá ñí ñáyiu-áⁿ dàtná cáá-ñã ñⁿ vehe ní natíhú, chi ní nduu vii-ná, vá yõ-gã ndécú. ²⁶ Te sáta dúcáⁿ te ní xica-xi cuáhãⁿ-xi cuándúcú-xi ùsá tñahá espíritú cùndìhi-xi sá nèhé víhí-gã xíquide, te òré ní ñihí-xi cue espíritú-áⁿ te ndèca ñaha-xi cuáhãⁿ cuendá ngúndecu ndìhi-xi ñáyiu-áⁿ, te ñáyiu-áⁿ uuⁿ-gã nándi yáha-yu dácúúxí ndèe díhna —càchí-gã xáhaⁿ-gã xií-yu.

Cuendá ñáyiu cùu váha ndisa iní-xi

²⁷ Te ñini càháⁿ Jèsús tñuhu-áⁿ núu ñáyiu ní càháⁿ ñihí ñⁿ ñadìhí tnuú-yu, te xáhaⁿ-aⁿ xii Jèsús:

—¡Sá váha táhú ñadìhí ní dácácú ñàha xii-n, te ní dácuéhnú ñàha-aⁿ! —cachí-aⁿ xáhaⁿ-aⁿ xii-gã.

²⁸ Te Jèsús ní xáhaⁿ-gã:

—¡Váha-gá táhú nchaa ñáyiu sàcúndedóho nchaa tñuhu càháⁿ Yã Ndiõxí te sàndáá iní-yu! —càchí-gã xáhaⁿ-gã xii-aⁿ.

Ñáyiu ñá túú sàndáá iní ñáhã xii Jèsús cuíní-yu cada-gã ñⁿ sá vã yõ tñàhí ndàcu cada
(Mt. 12:38-42; Mr. 8:12)

²⁹ Te ta tàcá vãi ñáyiu te dàdehnde tñaha-ná-yu, te ní ngüíta Jèsús xáhaⁿ-gã xií-yu:

—Nchòhó ñáyiu ndècu ñuyíú vitna, chi ío sáá iní-ndó, te cuíní-ndó càda-í ñⁿ sá vã yõ tñàhí ndàcu cada cuendá cuíní-ndó cùtnuní iní-ndó núu ndisa sá Yã Ndiõxí ní tendaha ñàha-gá xii-í véxi-í. Dico ñá túú nãgã cada-í quini-ndó, chi sa ñihí-ndó tñuhu nàcuáa ní yáha ndí Jònás tée ní xóo càháⁿ tñuhu Yã Ndiõxí ndèe sanaha, te ñu-ni ducaⁿ yáha yúhú tucu. ³⁰ Chi nchaa ñáyiu ñuú Ñìnivé ní cutnùní iní-yu sá Yã Ndiõxí ní

tendaha ñàha-gá xii ndíi Jònás ní sáháⁿ ndíi ñuú-yu. Te ducaⁿ sãtnahá-xi cùu yúhú Tée cùu ñani tnáhá-ndó nchàa-ndo, chi sáá nduu te cutnùní iní-ndó sã Yã Ndiöxí ní tendaha ñàha-gá xii-í véxi-í ñuyíú-a. ³¹ Te na sáá nduu càda ndáá Yã Ndiöxí cuéchi nchaa nchòhó ñáyíu ndècu ñuyíú-a, te dàvá-áⁿ quini-ndó ñⁿ ñadihí ñaha ní xíndaha ñⁿ nacióⁿ cáá ndàa xio cuha núú quéné nchícanhii. Te ñaha-áⁿ ïo xica ñí xíndecu-aⁿ, te ní sáháⁿ-aⁿ ní xíndedóho-aⁿ nchaa tnúhu ní cáháⁿ ndíi Salòmón, chi ndíi-áⁿ ïo ní sáá sá xìní tnùní ndíi. Te ñaha-áⁿ cáháⁿ-aⁿ dàvá-áⁿ sã nchòhó ñáyíu ndècu vitna ñá túú ní quide ndáá-ndó. Dico vitna iha ndècu ndíhi ñaha-ndo xii yúhú, te ñíu-í ío-gá cúnúu-í dàcúúxí ndíi Salòmón. ³² Te ñíu-ni nduu càda ndáá Yã Ndiöxí cuéchi nchaa nchòhó ñáyíu ndècu ñuyíú-a vitna, dàvá-áⁿ tnáhá cue ñáyíu ní xíndecu ñuú Ñínivé cundecú-yu núú Yã Ndiöxí, te tnáhá-yu cachí-yu sá ñà túú ní quide ndáá-ndó. Chi ñáyíu ñuú Ñínivé-áⁿ ñí ndixi túu iní-yu sá ñà túú quide váha-yu ndècú-yu te ní natuhá-yu ichi Yã Ndiöxí cùtnáhá ní cáháⁿ ndíhi ñaha ndíi Jònás tnúhu-gá xii-yu. Dico vitna iha ndècu ndíhi ñaha-ndo xii yúhú tée cáháⁿ tucu tnúhu Yã Ndiöxí, te ñíu-í ío-gá cúnúu-í dàcúúxí ndíi Jònás.

*Núú-ó cùu-xi datná ñⁿ ñuhú
(Mt. 5:15; 6:22-23)*

³³ 'Te ñá túú ñí ñⁿ ñáyíu tēñuhú ñⁿ linterná, te taxi ndecú-yu ñⁿ núú yídähu, àdi chiváha-yu xití ñⁿ tídihi, chi tàxi ndecú-yu ñⁿ núú ñíu cuendá nchaa ñáyíu quíhu vehe cutnùní núú-yu. ³⁴ Te núú-ndó cùu-xi datná ñⁿ ñuhú, chi ñⁿ sá ná quini-ndó te ndixi túu iní-ndó ñà cùú xíáⁿ, te núu càváha núú-ndó, te ducaⁿ cùtnuní iní-ndó ñà cùú sã ndécú núú-ndó, áⁿ te núu cùhú, te vá cùtnuní iní-ndó ñà cùú sã ndécú núú-ndó. Te sá dúcáⁿ cùhú núú-ndó te cada iní-ndó sã ndécú-ndó dàtná ñⁿ núú néé. ³⁵ Te ío cada cuendá-ndó vã caní cuéhé iní-ndó cuendá tnúhu Yã Ndiöxí cuendá cutnùní iní-ndó nàcuáa cundecu-ndo, chi núu na càni cuehé iní-ndó cuendá tnúhu-gá, te cùu-ndo datná ñⁿ ñáyíu ñá túú cùtnuní núú-xí. ³⁶ Te núu càndoo canine iní-ndó, te mee-ni sã vãha ñùhu iní-ndó, te cùtnuní váha iní-ndó tnúhu ndáá dàtná cùtnuní váha núú-ndó

òré càyú ñuhú, ducaⁿ cùtnuní iní-ndó — càchí-gá xáhaⁿ-gã xii-yu.

*Jèsús cáháⁿ-gá cuendá cue tée cùu fariséu
ndíhi cue tée dàcuaha ñaha xii-í ñáyíu*

(Mt. 23:1-36; Mr. 12:38-40; Lc. 20:45-47)

³⁷ Te òré ní ndíhi tnúhu ní cáháⁿ Jèsús, te ñⁿ tée cùu fariséu ní cáháⁿ ñáhá-dé xii-gá vehe-dé caxi-gá, te cuánguihu-gá vehe-dé, te ní ngóo-gá mèsá. ³⁸ Te tée cùu fariséu-áⁿ ïo ní cuñúhu-dé, chi Jèsús ñá túú ní ndàha-gá nàcuáa sàni iní-güedé nduu vétú iní Yã Ndiöxí òré ní ngóo-gá caxi-gá dàtná quidé mèe-güedé. ³⁹ Te Jèsús ní xáhaⁿ-gã xii-dé:

—Nchòhó cue tée cùu fariséu xìní-ndó sã ío ñáyíu nàquete sátá-ni tàsáⁿ ndíhi sátá-ni cõhó, te xití-xi càndehe caduha-ni. Te ducaⁿ sãtnahá-xi cùu nchòhó, chi ndaha-ni-ndo nàquete-ndo, te iní-ndó ñà túú nduu ndoo, te nándi dándahú-ndó tnàha ñáyíu-ndo, te quèheⁿ-ndo sá ndécú ndíhi-yu, te nándi-gá nchaa sá cuéhé sá dúhá ñùhu iní-ndó quide-ndo. ⁴⁰ ;Te nchòhó cùú-ndó cuè tée ío ñí iní-xi! ;Te náa ñá túú cùtnuní iní-ndó sã Yã Ndiöxí Yaá ní cadúha yiqui cùñú-ó ñíu-ni-gá ní chihí-gá iní-ó-áⁿ? ⁴¹ Te nchaa sá vãha ndècu ndíhi-ndo cuáha-ndo nchàa ñáyíu xini ñuhu na cundecu ndíhi-yu, te núu ducaⁿ na càda-ndo, te cuu-ndo ñáyíu sa ní nduu ndoo ní nduu nine iní-xi.

⁴² ;Te ndàhú ní cuu nchaa nchòhó cue tée cùu fariséu! Chi sãha-ndo Yã Ndiöxí núú ùxí xichí yúcú nání mენტá, ndíhi yúcú rùdá, ndíhi nchaa dava-gá núú yúcú quèe comidá, dico ñá túú quide ndáá-ndó, te ní ñà túú ñùhu iní-ndó Yã Ndiöxí. Dico tnúhu cáháⁿ-í-a tàú-ndó càda-ndo, te ní vã dáñá ndéé-ndó càda-ndo nchaa dava-gá sá vãha.

⁴³ ;Te ndàhú ní cuu nchòhó cue tée cùu fariséu! Chi cuini-ndó cùnucóo-ndo núú sácõo cue tée ío cùnuu xití veñúhu, te cuini-ndó mèe-ni ndíhi tnúhu yíñùhu cáháⁿ ndíhi ñaha ñáyíu xii-ndo nchàa núú xicá cùu-ndo.

⁴⁴ ;Te ndàhú ní cuu nchòhó cue tée dàcuaha ñaha xii ñáyíu nchaa tnúhu ní chídó tnùní ndíi Moisés, ndíhi nchòhó cue tée cùu fariséu chi ío dándahú-ndó mèe-ndo sá quidé ndáá-ndó te ñà ndáá sá quidé ndáá-ndó! Chi cùu-ndo datná ñⁿ ñáyíu ní xihí te ní nguíndüxi, te ñá túú cùtnuní-gá

ndèe yíndüxi-yu, te cuèi nà yáha ñáiyu dico ñá túú cùtnuní sá yíndüxi ndíyi. Te ducaⁿ sãtnahá-xi cùu nchohó, chi nchaa ñáiyu ndèhe ñaha xii-ndo ñá túú cùtnuní iní-yu nchaa sá cuèhé sá dúhá sàni iní-ndó — càchí-gá xáhaⁿ-gã xii-güedé.

45 Te ní xáhaⁿ ñá tée dàcuaha ñaha xií-yu nchaa tnúhu ní chídó tnùní ndíi Moisés xii-gá:

—Mèstrú, te sá dúcáⁿ càháⁿ-n te tnàhá nchúhú xícuèhé-n ãⁿ —càchí-dé xáhaⁿ-dè xii-gá.

46 Te Jèsús ní xáhaⁿ-gã:

—Ndàhú ní cuu tnàhá nchaa nchòhó cue tée dàcuaha ñaha xii ñáiyu nchaa tnúhu ní chídó tnùní ndíi Moisés! Chi quíde-ndo datná quíde ñáiyu dàcuído ñá taha ñáiyu-xi ñá sá ío véé, te mèé-yu ni lùha ñá túú cuíní-yu cuidó-yu. Te ducaⁿ sãtnahá-xi quíde nchohó chi dànehé-ndó ñáiyu nàcuáa cadá-yu, dico mee-ndo chi ni lùha ñá túú cuíní-ndó càda-ndo nàcuáa dànehé-ndó-yu.

47 'iTe ndàhú ní cuu tucu-ndo! Chi càdúha-ndo núú ñí nguíndüxi cue tée ní xóo càháⁿ tnúhu Yá Ndiöxí ndéé sanaha cuèndá sá cúnàha-ndo núú yíndüxi cue ndíi, te ñu-ni cue ñani tnàhá-ndó ñí sahani-güedé cue ndíi. 48 Te nchòhó sa nàha-ndo nàcuáa ní quíde cue ñani tnàhá-ndó, te càchí-ndó sã ñí quíde váha-güedé sá dúcáⁿ ñí sahani-güedé cue ndíi-án, te vitna càdúha-ndo núú ñí nguíndüxi cue ndíi.

49 'Te Yá Ndiöxí ío sãá nchaa sá xini tnùní-gá, te ní cachí-gá sá dácàháⁿ-gã iní cue tée cuèndá càháⁿ-güedé tnúhu-gã núú ñáiyu, te cada-güedé nchaa nàcuáa cuíní-gã, te dava-güedé cahni ñàhá-yu xii-güedé, te dava-güedé ío dandòho ñàhá-yu xii-güedé duha ní cachí-gã. 50 Te nchaa ñáiyu ñuyíú vitna tnàhá-yu nacháhu-yu núú Yá Ndiöxí cuèndá sá ñí sahani-güedé cue tée ní càháⁿ tnúhu-gã ndéé cùtnàhá ní ngáva ñuyíú. 51 Te ndéé ndíi Àbél tée ní sahani-güedé ndéé díhna nuu, ndíhi ndéé ndíi Zacariá tée ní sahani-güedé ndéé núú ñí ndíhi-ná ndácáⁿ cuèndá ñàhá Yá Ndiöxí núú ñáiyu ndècu ñuyíú vitna, te ñu ndíi-án ñí sahani-güedé mei tnúú veñúhu càhnu sá ío cùnuu, ndíhi xító núú sácòdó sã ndúú tãhú Yá Ndiöxí.

52 'iTe ndàhú ní cuu tucu nchaa nchòhó cue tée dàcuaha ñaha xii ñáiyu nchaa tnúhu

ní chídó tnùní ndíi Moisés! Chi quíde-ndo datná quíde ñá tée tàxi tnuní ñá vehe, chi nacadí-dé te ñá dáñá-dè quíhu ñáiyu te ni mèe-dé ñá túú quíhu-dé. Te ducaⁿ sãtnahá-xi quíde-ndo, chi dàcuaha-ndo tnúhu Yá Ndiöxí te ñá túú cuíní-ndó quíndáá iní-ndó te ni ñá túú dànehé-ndó ñáiyu cuíní tní tnúhu-gã nàcuáa tàú-xi cunduu cuèndá naníhi tãhú-yu —càchí-gã xáhaⁿ-gã xii-dé.

53 Te òré ní ndee Jèsús vehe tée cùu fariséú-án, te cue tée dàcuaha ñaha xii ñáiyu nchaa tnúhu ní chídó tnùní ndíi Moisés, ndíhi cue tée cùu fariséú ní cudééⁿ-güedé núú-gã, te ní nguíta-güedé nándi sá xicáⁿ tnúhú-güedé núú-gã cuèndá cuíní-güedé núú vá cuíta-gã ñá tnúhu càháⁿ-gã 54 cuèndá ducaⁿ ñíhi-güedé nàcuáa cada-güedé cacáⁿ cuéchi-güedé cuèndá-gã.

12

Jèsús càháⁿ-gã cuèndá cue tée dandahú méé-xí

1 Te òré-án ñí tacá titní mìl ñáiyu núú ndécú Jèsús, te súuní dicó ngõnchihi tnàha-ná-yu. Te ndèdòho-yu ní xáhaⁿ Jèsús xii cue tée xica cuu ndíhi-gã:

—Cada cuèndá-ndó vã cãncñicúⁿ ni-hnu-ndo nàcuáa quíde cue tée cùu fariséú, chi cue tée-án ío dandahú-güedé méé-güedé sá quíde ndáá-güedé dico ñá ndáá sá quíde ndáá-güedé. 2 Te nchaa tnúhu sá cúu yùhu ni cuu vá cúu yùhu-gã, chi nchaa dacuítí sã quée tũu-xi núú ñáiyu. 3 Chi nchaa tnúhu càháⁿ dayuhu-ndo quée túu-xi núú chítú núú tàcá, te nchaa tnúhu càháⁿ méé-ndó vèhe-ndo dacuítí sã ñíhi ñáiyu tnúhu.

Yá Ndiöxí xini ñúhu-xi yuhú-ó-gã (Mt. 10:26-31)

4 'Te nchòhó cue tée ío váha tnàhá tnúhu ndíhi-í ná càchí tnúhu-í xii-ndo sã vã yuhú-ndó cuè ñáiyu cuèi na càhni ñàhá-yu xii-ndo, chi ñu-ni yiqui cùñú-ndó ndàcú-yu cahni-yu, te ñá túú nãgã ndacú-yu cada ñàhá-yu xii-ndo. 5 Te na càchí tnúhu-í xii-ndo sã Yá Ndiöxí tàú-ndó yuhú-ndó-gã, chi mee-gã ío cùnuu-gã, te ñu-gã quíde-gã sã vã cùndècu-gã ñáiyu ñuyíú, te daquihíⁿ ñàhá-gã xií-yu núú ùhú

núu ndàhú, núu xiáⁿ càchí tnúhu-í xii-ndo sã Yàá-áⁿ tàú-ndó yùhú-ndó-gã.

⁶ Te nchòhó xìní-ndó sã ndèé úhúⁿ tnàhá tìláá cùyáhu-di núu ùú díhúⁿ, dico Yá Ndiöxí ñá túú cùnaa-gá ni ìⁿ-güedi, chi nèhe cuendá ñáhá-gã xii-güedi. ⁷ Te nchòhó ndéé ìⁿ ìⁿ idi díquí-ndó yindehu, núu xiáⁿ càchí-í sã vã yùhú-ndó, chi cùnuu-gá-ndó dàcúxí tìláá cuèi vãi vihi-güedi.

Ñáyiu na dàtúu núu dàva-gá ñáyiu sã ndécú ndìhi-yu Xítóhó Jesucrìstú (Mt. 10:32-33; 12:32; 10:19-20)

⁸ Te na càchí tnúhu-í xii-ndo sã nùu na dàtúu-ndo nùú dàva-gá ñáyiu sã ndécú ndìhi ñaha-í xii-ndo. Te ducaⁿ te tnàhá yúhú Tée cùu ñaní tnàhá-ndó nchàa-ndo datúu-í núu nchàa cue espíritú xínú cuèchi núu Yá Ndiöxí sã nchòhó ndécú ndìhi ñaha-ndo xii-í. ⁹ Dico núu na cùñaha-ndo xii ñáyiu sã ñà túú ndècu ndìhi ñaha-ndo xii-í, te ñu-ni ducaⁿ càda yúhú Tée cùu ñaní tnàhá-ndó nchàa-ndo, chi cùñaha-í xii cue espíritú xínú cuèchi núu Yá Ndiöxí sã ñà túú ndècu ndìhi ñaha-í xii-ndo.

¹⁰ Te ndèdani càa ñáyiu na càháⁿ cuèhé cuendá yúhú Tée cùu ñaní tnàhá-ndó nchàa-ndo, te cada càhnu iní ñáhá Yá Ndiöxí xii-yu. Dico ñáyiu na càháⁿ cuèhé cuendá Espíritú Yá Ndiöxí, te ñáyiu-áⁿ vã cadá càhnu iní ñáhá-gã xii-yu.

¹¹ Te òré ná càndeca ñaha-güedé xii-ndo quíhíⁿ veñúhu, àdi núu cuè tée cùchiuⁿ, te ni vã cání ìní-ndó nùu nása cunduu tnúhu cùñaha-ndo xii-güedé, te ni vã cání ìní-ndó nùu ná tnúhu nadànchocáva-ndo nùu ná tnúhu na cùñaha-güedé xii-ndo, ¹² chi òré-nã te mee Espíritú Yá Ndiöxí dacàhu iní ñáhá-xí xii-ndo tnúhu cùñaha-ndo xii-güedé —càchí-gá xáhaⁿ-gã xii-güedé.

Cuendá ìⁿ tée cuica

¹³ Te ìⁿ tée ñùhu tnàhá tnuú ñáyiu-áⁿ nì xáhaⁿ-dè xii Jèsús:

—Mèstrú, cùñaha xii ñaní-í sã ná chidava-dé sã nì dándõo tãtã-ndí cuu cuendá-ndí —càchí-dé xáhaⁿ-dè xii-gá.

¹⁴ Te Jèsús ní xáhaⁿ-gã xii-dé:

—¿Te ná cuendá ducaⁿ càháⁿ-n? Te ñá díú chiuⁿ-áⁿ vèxi-í cada-í, chi ñá díú tée cùchiuⁿ cuu-í —càchí-gá xáhaⁿ-gã xii-dé.

¹⁵ Te xáhaⁿ-gã xii nchaa ñáyiu xíndecu-áⁿ:

—Nchaa nchòhó ñáyiu ndèdõho nchaa tnúhu càháⁿ-í ò vaha cada cuendá-ndó, te vã cání ìní-ndó nãndi nducuu-ndo cùndecu ndìhi-ndo, chi cuèi vãi vihi na nihí-ndó cùndecu ndìhi-ndo, dico vã chindèe ñaha-xi cudíi-ndo cùndecu-ndo ñuyíú-a —càchí-gá xáhaⁿ-gã xii-yu.

¹⁶ Te dãtnùní ní ngüita-gá cání-gã ìⁿ cuendú nùu-yu cuendá tecú tnùní-yu tnúhu-gá, te xáhaⁿ-gã:

—Ìⁿ tée cuica sùúni nì cuu nchaa tatá ní xitu-dé núu ñùhú-dè. ¹⁷ Te ní ngüita-dé sání ìní-dé: “¿Te nása cada-í? Te ñá túú ndèé nataxúha-í nchaa sã nì xitu-í”, duha ní sani ìní-dé. ¹⁸ Te dãtnùní ní sáha vaha tucu-dé cuendá nàcuáa cada-dé, te ní cachí-dé: “Duha na cùnduu, dangõyo-í yacá-í, te ndada càhnu-gá-í, te xití-xi nataxúha-í nchaandi túhú sã nì xitu-í, ndìhi nchaa dava-gá sã ndécú ndìhi-í. ¹⁹ Te sátá dúcáⁿ, te cachí-í: Ío vãi sã ndécú ndìhi-í, te cudíi-xi cuéhé cuíá, te vitna ndetatú-í, te coho-í te caxi-í cada-í, te nãndi-gá cada-í cuendá cudíi ìní-í cundecu-í, duha quesaha-í”, càchí-dé. ²⁰ Dico Yá Ndiöxí ní xáhaⁿ-gã xii-dé: “Yòhó, ñá túú nãndíhi sã sání ìní-n, chi yúhú càchí-í sã niú vitna cuú-n, te nchaa sã ndécú ndìhi-n ¿yoo cuu sã vaha xii-aⁿ-í?”, càchí-gá xáhaⁿ-gã xii-dé. ²¹ Duha yáha nchaa ñáyiu nãndi sání ìní-xi cundecu ndìhi-xi ñuyíú-a, dico ñáyiu-áⁿ ò ndàhú-yu chi ñá túú nã nduu táhú-yu núu Yá Ndiöxí cundecu ndìhi-yu —càchí Jèsús xáhaⁿ-gã xii-yu.

Yá Ndiöxí xító-gã nchaa ñáyiu sàndáá iní ñáhá xii-gá

(Mt. 6:25-34)

²² Te ní xáhaⁿ Jèsús xii cue tée xica cuu ndìhi-gá:

—Te na càchí tnúhu-í xii-ndo sã vã ò caní ìní-ndó nùu nása cundecu-ndo, àdi nása nihí-ndó sã caxí-ndó, àdi nása nihí-ndó dõo cuihnu-ndo. ²³ Chi cùnuu-gá mée-ndó dàcúxí sã nchító-ndó, te ducaⁿ yiqui cuñú-ndó cùnuu-gá-xi dàcúxí dõo sácuihnu-ndo. ²⁴ Te chí cuáha cuendá nàcuáa quide cue ticácá, chi ni ñà túú chihí-güedi tatá cuu itú natahu-güedi te ni ñà túú ndèé nùtní yacá-güedi, te nihí-güedi xèxi-güedi, chi Yá Ndiöxí xító

ñaha-gá xii-güedi. ¡Te nchòhó cúnù-gá-ndó dàcúxí nchàa cue quiti ndava! ²⁵ Te cuèi nándi sá sání vñhi iní-ndó ndècu-ndo, dico ñá ndácú-ndó càda-ndo nacuaá cuehnu-ndo cuèdicó ìⁿ yiqui-gã. ²⁶ Te núu ni sã lúhá xĩãⁿ ñá ndácú-ndó càda-ndo, ¿te ná cuendá ío sãni iní-ndó cuendá nchaa sá cuini-ndó nihí-ndó cundecu ndihí-ndo?

²⁷ Te chí cãdá cuendá nãcuáa sãhnu ìⁿ tnu itã, chí ni ñã túú quide chiuⁿ-xi, te ni ñã túú quèheⁿ-xi idi. Te na cãchí tnúhu-í xii-ndo sã ndĩi Salòmón ío vii ní cãa nchaa sã ní xindecu ndihí ndĩi, dico vii-gã tucu cãa nchaa itã dàcúxí nchàa sã ní xindecu ndihí ndĩi. ²⁸ Te cùhú sã ío vitna tnaa-ni cùdí-xi te sãhmi-yu, te cuèi ducaⁿ dico ío vii càdúha Yã Ndiõxí nchaa cùhú-ãⁿ. ¡Te nchòhó ío cúnuu-ndo dacúxí nchàa cùhú-ãⁿ, núu xĩãⁿ ío xito ñaha-gá xii-ndo, te dicó yica cùu iní-ndó sãndãá iní-ndó-gã! ²⁹ Te vá ío canchicúⁿ nihnu-ndo sã cóhó sã cãxí-ndó, te ni vã dándihú-ndó iní-ndó nõu nása cada-ndo nihí-ndó. ³⁰ Chi nchaa ñãyiu ñã túú sãndãá iní ñáhã xii Yã Ndiõxí ducaⁿ mée-ni sã cóhó sã cãxí-yu xica nchicúⁿ nihnú-yu. Dico mee Tãtã-ó Dütú Ndiõxí sa nãha-gá nãndi cùu sã xíní ñuhu-ndo, te taxi-gã. ³¹ Te cada-ndo nchàa nacuaá cãháⁿ Yã Ndiõxí Yã yĩndãha ñaha xii-ndo, te ducaⁿ te taxi-gã nchaa sã xíní ñuhu-ndo.

Cuendá sã vãha nduu táhú-ó nõú Yã Ndiõxí
(Mt. 6:19-21)

³² Te vá yùhú nchòhó cue tée ndècu ndihí-í cuèi ío sacú-ndó, chí Tãtã-ó Dütú Ndiõxí ní cachí-gã sã ndúú táhú-ndó cundecu-ndo núu ndécú-gã taxi tnùní-ndó tnãhá-ndó. ³³ Te chí dicó nchàa sã ndécú ndihí-ndo, te chí cuãha nchaa ñãyiu ndãhú díhúⁿ-ndó ñãyiu xini ñuhu, te cada vãha-ndo cundecu-ndo, te ducaⁿ te nduu táhú-ndó sã ío-gã vãha núu Yã Ndiõxí cundecu ndihí-ndo, te xĩãⁿ vá cúú tũhú tnãhí-gã-xi, te ni vã ndihí nihnu-gã-xi, te ni ñãdúhú vã ndácú-güedẽ duhu-güedẽ, te ni tĩquidi vá quée-dí. ³⁴ Te núu xĩãⁿ cúú cuendã-ndó ñã, te ñũ-ni xĩãⁿ ñũhú iní-ndó, ãⁿ te núu mee-ni sã ndécú ñũyíú-a ndècu ndihí-ndo, te ñũ-ni nchaa xĩãⁿ ñũhú iní-ndó.

Xini ñuhu-xi quihí iní-ó cundecu-o

³⁵⁻³⁶ Te ío quihí iní-ndó cundecu-ndo, te cada-ndo dàtnã quidé dàva cue tée xinu cuechi sacundecu túha-güedẽ cuèi nãni òrẽ-ãⁿ ndétú-güedẽ patróóⁿ-güedẽ ná òrẽ nasãá-dẽ sã cuãháⁿ-dẽ vico tnãndaha. Te núu niú te sa cúu cãyú-ni ñuhú-güedẽ sã cundètu ñaha-güedẽ, chí òrẽ ná nasãá-dẽ dacãsaⁿ-dẽ yuyèhe, te ndĩhi-ni nacaãⁿ-güedẽ ndĩhu-dẽ. ³⁷ Te vãha táhú nchaa cue tée xinu cuechi-ãⁿ, chí ndècu túha-ni-güedẽ ndétú-güedẽ ndéẽ òrẽ ní nasãá patróóⁿ-güedẽ, te na cãchí tnúhu ndãá-í xii-ndo sã òrẽ ná nasãá patróóⁿ-güedẽ-ãⁿ te chihi ñaha-dẽ mèsã xii-güedẽ, te ndacãⁿ ndee-dẽ dóo níhnú-dẽ núu yĩquí-dẽ, te ngüita-dẽ cani-dẽ cóhó-güedẽ cuendã caxi-güedẽ. ³⁸ Te ñũ-ni ducaⁿ càda-dẽ cuèi dava niú, àdi tacuĩndã-gã, te núu ñã túú xidí-güedẽ òrẽ nasãá-dẽ, te cue tée xinu cuechi-ãⁿ ío vãha tnãhá-güedẽ. ³⁹ Te núu dicó ìⁿ tée cùu xitohó ìⁿ vehe xini-dẽ ná òrẽ quihú ñadúhú vehe-dẽ ñã, te quihí iní-dẽ te vá cùdú-dẽ, te vá dãã-dẽ nacaãⁿ-güedẽ yuyèhe-dẽ quihú-güedẽ duhu-güedẽ. ⁴⁰ Te nchòhó tucu nchaa-ni nduu quihí iní-ndó cundecu túha-ndo, chí na cuãháⁿ nduu ñã túú yihí iní-ndó, te quixi tucu yùhú Tée cùu ñãní tnãhá-ndó nchàa-ndo —cachí-gã xãhaⁿ-gã xii-güedẽ.

Cue tée quide ndãá ndihí cue tée ñã túú quide ndãá
(Mt. 24:45-51)

⁴¹ Te té Pèlú ní xicãⁿ tnúhú-dẽ núu Jèsús, te xãhaⁿ-dẽ:

—Mèstrú, ¿te tnúhu ní cãháⁿ-n-ãⁿ cùu-xi mee-ni cuendã nchúhú ãⁿ cuendã nchaa ñãyiu? —cãchí-dẽ xãhaⁿ-dẽ xii-gã.

⁴² Te Jèsús ní xãhaⁿ-gã:

—Cãháⁿ-í cuendã ñãyiu quide vãha dàtnã quidé ìⁿ tée tàxi tnuní ñáhã xii cue ñãyiu xinu cuechi ndecu vehe patróóⁿ-xi, chí tée-ãⁿ ío vãha tècú tnùní-dẽ, te quide-dẽ nchaa nãcuãa cãháⁿ patróóⁿ-dẽ, te dàcaxi-dẽ cue ñãyiu xinu cuechi oré tàú-xi caxí-yu.

⁴³ Te núu ducaⁿ quide vãha tée tàxi tnuní ñáhã xii cue ñãyiu xinu cuechi-ãⁿ ñã, te ío vãha tnãhá-dẽ òrẽ nasãá patróóⁿ-dẽ nõu ndéẽ cuãháⁿ-dẽ. ⁴⁴ Te na cãchí tnúhu ndãá-í xii-ndo sã tée quide ndãá táxi tnùní ñáhã

xii cue ñáyiú xínu cuechi-án cũñaha-nă pàtróón-dě xii-dé sá ncháándì túhú-nă sá ndécú ndìhi-dé quindaha-dě. ⁴⁵ Dico núu tée tàxi tnuní ñáhá xii cue ñáyiú xínu cuechi-án ná càni iní-dé sá cùyàa patróón-dě vá násàá ndìhi-ni-dé ñá, te ngüíta-dé cani-dé nchaa ñáyiú xínu cuechi, cuèi tée cuèi ñadìhí, te ngüíta-dé caxi-dé coho-dé, te dàxíni-dé méé-dě, ⁴⁶ te nduu ñà túú yìhi iní-dé te nasáá pàtróón-dě, te dandòho ñaha patróón-dě-án xii-dé, te daquìhí ñáhá-dě xii-dé núú ndécú ñáyiú ñá túú ní quide ndáá.

⁴⁷ Te dava cue tée xínu cuechi xiní-güedé nàcuáa cuíní pàtróón-güedě cada-güedé te ñá túú quide-güedé, te ni ñà túú cuíní-güedé cundecu túha-güedé cundetu-güedé pàtróón-güedě, te nchaa cue tée ducaⁿ xiquide dandòho ñaha patróón-güedě, chi ñáni vîhi-güedé. ⁴⁸ Te dava cue tée xínu cuechi ñá túú xiní-güedé nàcuáa cuíní pàtróón-güedě cada-güedé, te ní quide-güedé sá neñuú-güedé ñá sá ñà túú tàú-güedé cada-güedé ñá, te cue tée-án sacú-gá dandòho ñaha patróón-güedě, chi sacú-gá ñáni-güedé. Te ñáyiú cùtnuní iní-xi nàcuáa cuíní Yá Ndiöxí cada-yu, te ñu-ni ducaⁿ tàú-yu cada-yu nàcuáa cuíní-gá. Te ñáyiú vai-gá tècú tnùní nàcuáa càháⁿ-gá, te ñu-ni ducaⁿ vai nchaa sá càháⁿ-gá tàú-yu cada-yu.

Ñá túú cùu ñáyiú
(Mt. 10:34-36)

⁴⁹ Te yúhú véxi-í ñuyíú-a cuendá cutnùní iní ñáyiú nàcuáa cada ñaha Yá Ndiöxí xii-yu, jte cuíní-í sá ndìhi-ni cada-gá nàcuáa sàni iní-gá! ⁵⁰ Te yúhú ío vai tnúhu sàni iní-í, jchi sáá nduu te ío ndoho-í, te ñu-ni xíáⁿ cuhuⁿ iní-í ndéé ná sàá nduu dùcaⁿ yáha-í! ⁵¹ Te nchòhó vá cání iní-ndó sá yúhú véxi-í ñuyíú-a te cundecu ndìhi tnàha váha-ni ñáyiú, te ñáhá chi da ngüíta-yu vá cúú ñánuú-yu cundecú-yu. ⁵² Te ndéé není vitna ngüíta ñáyiú vá cúú ñánuú-yu cundecú-yu, te na càda-o cuendá te núu úhúⁿ ñáyiú xñdecu ñá-ni vèhe, te vá cúú ñánuu-gá-yu, chi úní-yu ndatnúhu-yu te nàá-yu ndìhi úú-gá-yu, àdi ñáyiú úú-án ndatnúhu-yu te nàá-yu

ndìhi ñáyiú úní-án. ⁵³ Te dava cue tée cùu tátá vá cúú ñánuu-gá-güedé ndìhi déhe ducuⁿ-güedé, te ni dáva cue ñáyiú cùu náná vá cúú ñánuu-gá-yu ndìhi déhe yòcò-yu, te ni sànu-yu vá cúú ñánuu ndìhi-gá-yu. Te ducaⁿ càdá-yu chi davá-yu quindáá iní ñáhá-yu xii-í, te davá-yu vá quindáá iní ñáhá-yu —càchí-gá xáhaⁿ-gá xii-güedé.

Ñáyiú cùtnuní iní-xi nàcuáa quide-xi ñuyíú ndìhi andìu

(Mt. 16:1-4; Mr. 8:11-13)

⁵⁴ Te Jèsús ní xáhaⁿ-gá xii nchaa ñáyiú xñdecu-án:

—Te nchòhó òré ndéhé-ndó ndànchita vícò ndàa xio quée nchíanchii, te càchí-ndó sá cúúⁿ dàú, te ñu ducaⁿ ndisa quide-xi.

⁵⁵ Te òré ná quène táchí ndàa xio datni nacuáa quène nchíanchii, te càchí-ndó sá ío cada ihni-xi, te ñu ducaⁿ ndisa quide-xi. ⁵⁶ Te nchòhó ío váha cùtnuní iní-ndó nàcuáa quide-xi andìu ndìhi ñuyíú,

¿te ná cuendá quidé-ní-ndó sá ñá tècú tnùní-ndó nàcuáa quide Yá Ndiöxí vitna? Te sá dúcáⁿ quide-ndo-án ío dandahú-ndó mèe-ndo sá ío váha cùtnuní iní-ndó, chi ñá ndáá sá cùtnuní iní-ndó.

Nducu-o nàcuáa nucúndecu ndìhi váha-o ñáyiú cùu úhú iní ñáhá

(Mt. 5:25-26)

⁵⁷ Te nchòhó, ¿ná cuendá ñá túú dandixi túu-ndo iní-ndó càda-ndo mee-ni sá váha sá tàú-ndó càda-ndo-í? ⁵⁸ Te núu ío ñá-ndo ní sacáⁿ cuèchi ñáyiú cuendá-ndó cuendá ñá sá ní quide-ndo, te cuáháⁿ-ndó ndìhí-yu núú tée cùchiuⁿ, te ñini ñùhu-ndo ndìhí-yu ichi, te nducu-ndo nàcuáa càda-ndo nàcáháⁿ cáhnú iní tnáhá-ndó ndìhí-yu cuendá sá vâ cándèca ñaha-gá-yu quíhíⁿ núú tée cùchiuⁿ, chi núu ducaⁿ na càdá-yu te tée cùchiuⁿ-án nachìhi ñaha-dě ndaha cue tée cùu poleciá, te cue tée-án chíhi ñaha-güedě vecaá xii-ndo. ⁵⁹ Te na càchí tnúhu-í xii-ndo sá núu na ngàva-ndo vecaá, te vá cãcu-ndo te núu vá nãchãhu-ndo nchàa sá tàú-ndó —càchí-gá xáhaⁿ-gá xii-yu.

13

Xìni ñuhu-xi natuha-o ichi Yá Ndiöxí

¹ Te ñu-ni òré-án ní ngúnutnì ñá ñáyiú núú Jèsús cání-yu cuendú núu-gá nàcuáa

ní quide ñaha té Pilatú xii cue tée distritú Galileá cue tée ní sahani quiti nduu táhú Yá Ndiöxí, te mei òré ní sahani-güedé cue quiti-án ní táuchíúⁿ të Pilatú cue sandádú-dé ní sahani-güedé cue tée Galileá-án, te ní xica níñi-güedé núú ñúhú ndìhi níñi cue quiti-án, te ní nadacánuu-xi. ² Te Jèsús ní xáhaⁿ-gã xií-yu:

—Te núu nchòhó sání ìní-ndó sã sà dúcáⁿ ñí yáha cue tée distritú Galileá-án te cùu-güedé cue tée ndècu vihi-gá cuèchi-xi dàcúúxí cuè tée ñuú-güedé ñá. ³ Te na càchí tñúhu-í xii-ndo sã ñáhá. Te núu nchòhó vá ndíxí cuèchi ìní-ndó cuèndá nchaa sá cuèhé sá dúhá quide-ndo ndecu-ndo ña, te tñáhá nchaa nchòhó cuíta nihnu-ndo te núu vá nátni-ndo ichi Yá Ndiöxí. ⁴ Te núu nchòhó sání ìní-ndó sã ñáiyu sáhúⁿ úní ní xíhí ní táú ñáhá vèhe ducúⁿ Silòé ío-gá ndécú cuèchi-yu dàcúúxí nchaa ñáiyu xíndecu ñuú Jerusàlén ñá, ⁵ te na càchí tñúhu tucu-í xii-ndo sã ñáhá. Te núu nchòhó vá ndíxí cuèchi ìní-ndó cuèndá nchaa sá cuèhé sá dúhá quide-ndo ndecu-ndo ña, te tñáhá nchaa nchòhó cuíta nihnu-ndo te núu vá nátni-ndo ichi Yá Ndiöxí —càchí-gá xáhaⁿ-gã xií-yu.

Yutnu ngüxí ñá túú cùuⁿ sávidí-xi

⁶ Te Jèsús ní cani tucu-gá ñⁿ cuèndú núu-yu nàcuáa tecú tñúni-yu tñúhu-gá, te xáhaⁿ-gã:

—Ñⁿ tée nùtniⁿ ñⁿ yutnu ngüxí núú ñúhú-dé, te cuáháⁿ ndéhé-dé núu ní cuuⁿ sávidí-xi ní cùu, te ní ñⁿ ñá túú ní cùuⁿ. ⁷ Te ní xáhaⁿ tée-án xii tée ndéé ñuhu-dé: “Ñaha-n sá vitna ní cuu úní cuíá quíxí còto-í yutnu ngüxí-a te ñá túú xini-í ní ñⁿ sávidí-xi. Te quehdé-n vitna, chi àúⁿ nã cuu nùtniⁿ-xi quide tneñu-xi núú ñuhu-án”, càchí-dé xáhaⁿ-dë xii tée ndéé ñuhu-dé-án. ⁸ Te tée ndéé ñuhu-án ní xáhaⁿ-dë: “Pàtróón, dañá na cuñhu-xi cuíá vitna-ná, te na nàdatayá-í ñuhu núú sàhá-xi, te chihi-í sahán. ⁹ Te ducaⁿ te cudana cuuⁿ sávidí-xi, àdi núú ñá túú ní cùuⁿ sávidí-xi ña te téhdé-nã-xi”, càchí-dé xáhaⁿ-dë xii pàtróón-dë —càchí-gá xáhaⁿ-gã xií-yu.

Jèsús quidé tãtña-gá ñⁿ ñadìhí ní nduu cueyi sãtá-xi nduu ndètátú ñáiyu

¹⁰ Te ñⁿ xito cùu-xi nduu ndetátú ñáiyu, te yìhi Jèsús ñⁿ veñúhu dànehé-gá ñáiyu. ¹¹ Te xíaⁿ ndécú ñⁿ ñadìhí ní cuu sáhúⁿ úní cuíá sã cùhú-aⁿ yìhi ñaha espíritú cùndìhi yucu ñávãha xii-aⁿ, te xíaⁿ ní ndada cueyi-xi sãtá-aⁿ, te ñá dáñá-gã-xi nucúnutñiⁿ ndáá-aⁿ. ¹² Te òré ní xiní ñáhá Jèsús xii-aⁿ te ní cana ñaha-gã, te xáhaⁿ-gã:

—Yòhó ñaha cùhú, ndúha-n cuèhé tñáhá-n —càchí-gá xáhaⁿ-gã xii-aⁿ.

¹³ Te ní dácáa-gá ndaha-gá ní tendaha ñaha-gá xii-aⁿ, te òré-ni-án ní ndúha-aⁿ te ní nucúnutñiⁿ ndáá-aⁿ, te ní ngüíta-aⁿ ní càchí-aⁿ sá ío càhnu cuu Yá Ndiöxí. ¹⁴ Dico tée tàxi tñuni veñúhu ní cudééⁿ-dë sá dúcáⁿ ñí quide Jèsús ní quide tãtña-gá ñaha cùhú-án nduu ndètátú-yu, te ní xáhaⁿ-dë xií-yu:

—Ío ñúú nduu tàú-ó càda chiuⁿ-o, te ndëdani càa nduu-án quixi-ndo cùtãtña-ndo, dico ñá díú nduu cuu-xi nduu ndetátú-ó —càchí-dé xáhaⁿ-dë xií-yu.

¹⁵ Te ní xáhaⁿ Jèsús:

—Nchòhó chi ío dàndahú-ndó mèe-ndo sá quidé ndáá-ndó dico ñá ndáá sá quidé ndáá-ndó, ¿náa ñá túú nàndaxi-ndo ndicutu-ndo àdi búrru-ndo dàcoho-ndo-güedé ndute nduu ndetátú-ó ãⁿ? ¹⁶ Te ñadìhí-a cùu-aⁿ ñaní tñáhá ndií Àbrahám, te dicó-ni sá yùcu ñávãha quide duha cùhú-aⁿ ní cuu sáhúⁿ úní cuíá, ¿te náa ñá túú xini ñuhu-xi cùtãtña-aⁿ cuèi cùu-xi nduu ndetátú-ó ãⁿ? —càchí-gá xáhaⁿ-gã xii-dé.

¹⁷ Te sá dúcáⁿ ñí cáhán Jèsús, núu nchaa cue tée cùu úhú ñáhá xii-gá ní cucahaⁿ núu-güedé, dico nchaa dava-gá ñáiyu chi xícudíí ìní-yu xíndéhë-yu nchaa sá vã yòo tñáhí ndàcu cada quide-gá.

Cuèndá ndíquíⁿ yutnu nàni mostázá (Mt. 13:31-32; Mr. 4:30-32)

¹⁸ Te ní xáhaⁿ-gã xií-yu:

—Na càni-í ñⁿ cuèndú núú-ndó nàcuáa tecú tñúni-ndó nàcuáa cada-xi òré ndiíhu ndaha ñaha Yá Ndiöxí xii-ndo. ¹⁹ ñⁿ tée ní queheⁿ-dë ndíquíⁿ yutnu nàni mostázá te nèhe-dé cuáháⁿ ní sacáⁿ-dë núú ñúhú-dé te ní xínu-xi, te ní sahnú-xi ní cuu dúcúⁿ-xi, te cue quiti ndàva núú tàchí cádúha-güedé tacá-güedé núú dité-xi —càchí-gá xáhaⁿ-gã xií-yu.

*Nàcuáa quide levadurá**(Mt. 13:33)*²⁰ Te ní xáhaⁿ tucu Jesús xii-yu:

—Te na càchí tnúhu tucu-í xii-ndo nàcuáa cada tucu Yá Ndiöxí òré ndíhu ndaha ñàha-gá xii-ndo. ²¹ Ìⁿ ñadìhí ní queheⁿ-aⁿ levadurá ní chihi-aⁿ úní arròbá yuchi triù, te levadurá-áⁿ ñí quide-xi ní ndaa ñihí yusaⁿ-áⁿ —càchí-gá xáhaⁿ-gá xii-yu.

*Yuyèhe cuiñi**(Mt. 7:13-14, 21-23)*

²² Te ichi ñuhu Jesús cuáháⁿ-gá ñuu Jerusàlén, te nchaa ñuu náhnú, ndìhi nchaa ñuu lìhli ta yàha-gá ducaⁿ ta dànehé-gá ñáyiu tnúhu-gá cuáháⁿ. ²³ Te ìⁿ ñuu-áⁿ ñí xáhaⁿ ìⁿ téé xii-gá:

—Mèstrú, cuiní-í cacadáⁿ tnúhu-í ìⁿ tnúhu núú-n, ¿ndáá sá ïo sacú ñáyiu nàníhí tàhú-áⁿ? —càchí-dé xáhaⁿ-dè xii-gá.

Te Jèsús ní xáhaⁿ-gá xii-dé ndìhi nchaa ñáyiu:

²⁴ —Cada-ndo sá nánihí tàhú-ndó, te tnì-ndo ichi Yá Ndiöxí, te ichi-gá-áⁿ cúú-xí dàtná ìⁿ yuyèhe cuiñi, te càchí tnúhu-í xii-ndo sá ïo cuéhé ñáyiu cachí iní-yu quíhu-yu yuyèhe cuiñi-áⁿ dico vá ndácü-yu.

²⁵ Te na càni tucu-í ingá cuèndú núú-ndó nàcuáa tecú tnùní-ndó tnúhu càháⁿ-í. Te òré ná ndàcuiñi téé cùu xitohó vehe, te nacadí-dé yuyèhe, te nchaa nchòhó ñáyiu na quèndóo quehé dacàsaⁿ-ndo yuyèhe, te quesaha-ndo cùñaha-ndo xii-dé: “Tátá, nacaáⁿ yuyèhe na quíhu-ndí”, quesaha-ndo cùñaha-ndo xii-dé. Dico téé cùu xitohó vehe-áⁿ cùñaha-dè xii-ndo: “Ñá túú xini-í nchòhó ndèé ñáyiu cùu-ndo”, duha cùñaha-dè xii-ndo. ²⁶ Te dàtnùní ngúita nchòhó cùñaha-ndo xii-dé: “Nchúhú ní xexi ndìhi ñaha-ndí, te ní xihí ndìhi ñaha-ndí xii-n, te nchaa ichi ní xóo dacuàha ñaha-n xii-ndí”, quesaha-ndo cùñaha-ndo xii-dé.

²⁷ Dico cachí tucu téé cùu xitohó vehe-áⁿ cùñaha-dè xii-ndo: “Sa ní cachí-í sá ñà túú xini-í ndèé ñáyiu cùu-ndo. Te chí xócuñi nchòhó ñáyiu ndècu ichi cuehé ichi duha núú ndècu-í”, quesaha-dè cùñaha-dè xii-ndo. ²⁸ Te na sáá nduu dùcaⁿ cada-xi te quiní-ndó tè Àbrahám, ndìhi té Isàác, ndìhi té Jàcób, ndìhi nchaa cue téé ní xóo càháⁿ tnúhu Yá Ndiöxí, te nchaa cue téé-áⁿ

ndécú-güedè núú ndécú-gá táxí tnùní-gá, te nchòhó quee tíhú-ndó núú-gá sá tnúhu ñá túú ní cuiní cada ndáá, te dàvá-áⁿ ndàhyú-ndó te cuu rúhñú-ñá núhu-ndo sá sàtú iní-ndó cuèndá sá ndóhó-ndó. ²⁹ Te dàvá-áⁿ quíhu nchaa ñáyiu ndi cùmí xio ñuyúú núú ndécú Yá Ndiöxí táxí tnùní-gá caxí-yu ndìhi-gá, te cundecú-yu ndìhi-gá. ³⁰ Te dava ñáyiu nchìcúⁿ ñá túú cùnuu ndecu ichi Yá Ndiöxí vitna, ñáyiu-áⁿ sáá nduu te ío cunúú-yu. Te dava ñáyiu cùnuu ndecu ichi-gá vitna, ñáyiu-áⁿ sáá nduu te vá ïo-gá cunúú-yu —càchí-gá xáhaⁿ-gá xii-yu.

*Jèsús ndàhyú-gá cuèndá ñáyiu ñuu Jerusàlén**(Mt. 23:37-39)*

³¹ Te diu-ni nduu-áⁿ ñí quexìo ìⁿ úú cue téé cùu fariséu núú ndécú-gá, te xáhaⁿ-güedè xii-gá:

—Quee-n ìha quíhíⁿ-n núu ndèé quíhíⁿ-n, chí téé cùu Herodés cuiní-dé cahni ñaha-dè xii-n —càchí-güedè xáhaⁿ-güedè xii-gá.

³² Te Jèsús ní xáhaⁿ-gá:

—Chí cuáháⁿ te cùñaha-ndo xii téé nèhe mañá-áⁿ sá càchí-í sá ná cùndedóho váha-dé ìⁿ tnúhu càháⁿ-í, chí cùmání ìⁿ úú-gá nduu cundecu-í xocàni-í nchaa espíritú cùndìhi yucu ñávàha yìhi ñaha xii ñáyiu, te cada tátana-í nchaa dava-gá ñáyiu cùhú, te ducaⁿ te ndìhi chiuⁿ-í, duha cùñaha-ndo xii-dé.

³³ Dico dacuití sá cùhú-í ichi ìⁿ úú-gá nduu, te ducaⁿ te sáá-í núú quíhíⁿ-í, chí vá cúú tnàhí cuú ìⁿ téé càháⁿ tnúhu Yá Ndiöxí ingá ñuu, chí mei ñuu Jerusàlén cuú-güedè —càchí-gá xáhaⁿ-gá xii-güedè.

³⁴ Te ní xáhaⁿ-gá xii ñáyiu ñuu Jerusàlén:

—Nchòhó chí sàhni-ndo nchaa cue téé càháⁿ tnúhu Yá Ndiöxí, cue téé ní tendaha-gá véxi, te mee-ni ndìhi yúú sàhni-ndó-güedè. ¿Te titní xito ní cuiní-í nadatàcá ñàhá-í xii-ndo dàtná nádàtacá ìⁿ nchuxi cuè déhe-di sàquihí-güedè xití ndíxíⁿ-di, dico ñá ní cuiní-ndó, te ducaⁿ-ni sàni iní-í ndèé vitna! ³⁵ Te chí cùndedóho tucu ingá tnúhu na càháⁿ-í-a: Yá Ndiöxí dañá ñàha-gá xii-ndo. Te na càchí tnúhu tucu-í xii-ndo sá vā quiní ñàhá-gá-ndó xii-í, dico sáá nduu te quiní ñàhá tucu-ndo, te nduu-áⁿ cachí-ndó sá ïo càhnu cuu yúhú

Yaá ní tendaha Dütú Ndiöxí véxi ñuyíú-a —càchí-gá xáhaⁿ-gã xií-yu.

14

Jèsús quidé tãtna-gá ìⁿ téé ñùhu cuiñu

¹ Te duha ní cuu ìⁿ nduu, nduu ndètátú ñáyíu chi ìⁿ téé cùu fariséú cùnùu ní cáháⁿ-dé Jèsús vehe-dé caxi-gá, te cue téé ndècu vehe-dé ndéhé-güedé nùu nása cada-gá. ² Te xíáⁿ ndécú tñàhá ìⁿ téé cùhú ñúhú-dé cuiñu. ³ Te Jèsús ní xíáⁿ tñúhú-gã núú cuè téé dàcuaha ñaha xii ñáyíu nchaa tñúhu ní chídó tñùní ndíi Moisés, ndíi núú cuè téé cùu fariséú, te xáhaⁿ-gã:

—¿Cuu cada tãtna-o ìⁿ ñáyíu cùhú nduu ndètátú-ó ãⁿ ñáhá? —càchí-gá xáhaⁿ-gã xii-güedé.

⁴ Dico cue téé-áⁿ ñà túú tñàhí ni cáháⁿ-güedé. Te ní dácàá-gá ndaha-gá ní tendaha-gã téé cùhú-áⁿ ní quide tãtna ñaha-gã xii-dé, te ní xáhaⁿ-gã sá ná nùhú-dé vehe-dé. ⁵ Te ní xíáⁿ tñúhú-gã núú nchaa cue téé-áⁿ, te xáhaⁿ-gã:

—¿Te núu nchòhó ná ngáúñihu ìⁿ búrru-ndo àdi ìⁿ ndicutu-ndo déhvá, te vá ná tàva ndíhi-ni-ndo-di cuèi cùu-xi nduu ndetátú-ndó-ãⁿ? —càchí-gá xáhaⁿ-gã xii-güedé.

⁶ Te ñá túú ní ñíhí-güedé tñúhu na dàncocáva-güedé.

Ñáyíu càháⁿ-yu quíhíⁿ vico tñándaha

⁷ Te ndèhe Jèsús nàcuáa xíquide nchaa ñáyíu ndècu vico sá sùúni ní nacáxi-yu xilé sácõo nchihi cue téé cùnùu-gá conchihí-yu òré cuánguñu-yu mèsá caxí-yu, núu ní xáhaⁿ-gã xií-yu:

⁸ —Òré ná càháⁿ ñáhá ìⁿ ñáyíu xii-ndo ìⁿ vico tñándaha, te vá cóó-ndó nùú xilé sácõo cue téé cùnùu-gá, chí núu ducaⁿ na càda-ndo, te cudana quexio dava-gá ñáyíu cùnùu-gá dàcúxí nchòhó. ⁹ Te ñáyíu ní cáháⁿ ñáhá xii-ndo-áⁿ quixí-yu te cúñàhá-yu xii-ndo: “Chí cuñàhá xilé núcõo nchihi-ndo-ãⁿ ná còncihi ñáyíu ní quexio-a”, quesàhá-yu cúñàhá-yu xii-ndo. Te cuñí-ndó ñáhá cuèi cùcahaⁿ núú-ndó ndàcuñí-ndó quíhíⁿ-ndó ngõo-ndo nùú xilé xñutñí ndéé núú ní ndíhi-ná ndàa sátá-xi. ¹⁰ Te yúhú càchí-í sá òré ná càháⁿ ñáhá-yu

xii-ndo, te ngõo-ndo nùú xilé xñutñí ndéé núú ní ndíhi-ná ndàa sátá-xi chí cuendá òré ná quèxio ñáyíu ní cáháⁿ ñáhá xii-ndo, te cúñàhá-yu xii-ndo: “Nchòhó cue ñáyíu càháⁿ ndíhi-í, chí yãha núú xilé sácõo cue téé cùnùu-gá coo-ndo”, duha cúñàhá-yu xii-ndo. Te ducaⁿ te cada nínu ñaha nchaa ñáyíu yíhi ndíhi-ndo mesá. ¹¹ Te nchaa ñáyíu na càda nínu mee-xi, te ñáyíu-áⁿ ñà túú cùu nínu-yu, te nchaa ñáyíu ñá túú quide nínu mee-xi, ñáyíu-áⁿ cúú ñínu-yu —càchí-gá xáhaⁿ-gã xií-yu.

¹² Te dàtnùni ní xáhaⁿ-gã xii téé ní cáháⁿ ñáhá xii-gá:

—Te yòhó òré cuñí-n càda-n ìⁿ vico, te vá càháⁿ-n mèe-ni cue téé càháⁿ ndíhi-n, ní cuè ñaní-n, ní cuè ñáyíu cùu ñaní tñàhá-n, ní cuè ñáyíu cuica ndècu yatni ndíhi-n, chí ñáyíu-áⁿ ducaⁿ càdá-yu ìⁿ nduu cáháⁿ ñáhá-yu xii-n te ndéyãhu-ni sá ní quidé-n-yu. ¹³ Te ñáhá chí òré ná càda-n ìⁿ vico, te cáháⁿ-n ñáyíu ndàhú, ndíhi ñáyíu ñá cúú càca, ndíhi ñáyíu yacua, ndíhi ñáyíu cuáá. ¹⁴ Te núu ducaⁿ na càda-n, te cuu-xi ìⁿ sá váha xii-n, chí ñáyíu-áⁿ vá ñíhí-yu nacoto ñàhá-yu xii-n, dico na cùú-n te sáá nduu ndòto-n ndíhi nchaa ñáyíu ní quide ndáá ní xíndecu ichi Yá Ndiöxí, te dàvá-áⁿ taxi-gá sá ndúú tàhú-n —càchí-gá xáhaⁿ-gã xii-dé.

Nàcuáa xíquide ñáyíu òré càháⁿ ñáhá ìⁿ téé cada vico

(Mt. 22:1-10)

¹⁵ Te sá dúcáⁿ ní cáháⁿ Jèsús ní tecú dóho cue téé yíhi mesá-áⁿ, núu ní xáhaⁿ ìⁿ-dé xii-gá:

—Ío váha tàhú nchaa ñáyíu na càxi nchaa sá cuãha ñaha Yá Ndiöxí nduu na sàá-yu cundecú-yu núú ndécú-gã táxi tñùní-gá —càchí-dé xáhaⁿ-dè xii-gá.

¹⁶ Te Jèsús ní xáhaⁿ-gã xii-dé:

—Íⁿ téé quide-dé vico, te ní dátécú tñúhu-dé cuéhé víhí ñáyíu quíhíⁿ-yu caxí-yu. ¹⁷ Te òré sa ní cuu-ná sá caxí-yu, te ní xáhaⁿ-dè xii téé xínu cuechi núú-dè sá quíhíⁿ-dè cúñaha-dè quíhíⁿ-yu caxí-yu, chí sa ndècu túha nchaa sá caxí-yu. ¹⁸ Dico ncháá-yu ní xáháⁿ-yu xii-dé sá ná cáda càhnu iní téé càháⁿ ñáhá-ãⁿ, chí ñá túú cùyáchí-yu quíhíⁿ-yu vico-áⁿ. Te téé ní cáháⁿ ndíhi téé xínu cuechi-áⁿ ñíhna ní

xáhaⁿ-dê: “Íchí nĩ saaⁿ-í ìⁿ pedàsú ñuhu, te quíhíⁿ ndéhè-í tnavíí, núu xíáⁿ càháⁿ ndàhú-í núu-n sã cũñaha-n xii téé càháⁿ ñáhá-ãⁿ xii-í sá ná cádá càhnu iní-dé chi ñá tuú cùyáchí-í”, càchí-dé xáhaⁿ-dê. ¹⁹ Te ingá-dé ní xáhaⁿ-dê: “Ní saaⁿ-í úhúⁿ yùndá ndicutu sa xítu, te cue quití-áⁿ quíhíⁿ-í coto ndeé-í-güedi vitna, núu xíáⁿ càháⁿ ndàhú-í núu-n sã cũñaha-n xii téé càháⁿ ñáhá-ãⁿ xii-í sá ná cádá càhnu iní-dé chi ñá tuú cùyáchí-í”, càchí-dé xáhaⁿ-dê. ²⁰ Te ingá tucu-dé ní xáhaⁿ-dê: “Íchí nĩ tnándaha-í nõu xíáⁿ vá cùyáchí-í quíhíⁿ-í”, càchí-dé xáhaⁿ-dê. ²¹ Te òré ní nasáá téé xínu cuechí-áⁿ, te ní nacani tnúhu-dé núu patróóⁿ-dê nchaa nàcuáa ní xáhãⁿ-yu. Te ní cudééⁿ téé cùu patróóⁿ-ãⁿ, te ní xáhaⁿ-dê xii téé xínu cuechí núu-dê-áⁿ: “Yáchí cuáhãⁿ nanducu-n nchaa ñáyíu ndàhú, ndíhi nchaa ñáyíu ñá cúú càca, ndíhi nchaa ñáyíu yacua, ndíhi nchaa ñáyíu cuáá, te ndèni ní cuu na nàníhĩ-n-yu te candècá-n-yu quixi”, càchí-dé xáhaⁿ-dê. ²² Te sátá nĩ nasáá téé xínu cuechí-áⁿ, te ní xáhaⁿ-dê xii patróóⁿ-dê: “Patróóⁿ, sa ní quide-í chiùⁿ ní táhú-n, dico ndècu-gá núu cóo-yu”, càchí-dé xáhaⁿ-dê. ²³ Te téé cùu patróóⁿ-dê-áⁿ nĩ xáhaⁿ-dê: “Cuáhãⁿ tucu ndèni ní cuu te cada yica-n na quixí-yu quíhu-yu cuèndá ná chítú vehe-í. ²⁴ Te na càchí tnúhu-í xii-n sã nĩ ìⁿ ñáyíu ní càháⁿ-í díhna vá cúú-gã caxí-yu sá sã ní quide túha-í caxí-yu ni cùu”, cachí téé-áⁿ xáhaⁿ-dê xii téé xínu cuechí núu-dê —càchí-gá xáhaⁿ-gã xii téé-áⁿ.

Ndoho-o cùndecu-o ichi Xítohó Jesucristú
(Mt. 10:37-38)

²⁵ Te ío cuéhé ñáyíu nchìcúⁿ-yu Jèsús, te ní xáhaⁿ-gã xii-yu:

²⁶ —Te núu dava nchòhó cuìní-ndó chitnahá ñáhá-ndó xii-í, te cuu iní ñáhá ndisa-ndo. Te cuèi na dàndóo-ndo tátá-ndó, ndíhi náná-ndó, ndíhi ñadihí-ndó, ndíhi déhe-ndo, ndíhi ñaní-ndó, ndíhi cúha-ndo, te cani iní-ndó sã cuèi na cùú-ndó sã cuèndá-í, te ducaⁿ te cuu ndisa-ndo cuè ñáyíu tnàhá tnúhu ndíhi-í. ²⁷ Te nchaa ñáyíu vá cãchícúⁿ nihnu ñaha xii-í cuèndá sá yùhú-yu ndohó-yu dàtná ndoho-í, ñáyíu-áⁿ vá cúú-yu ñáyíu tnàhá tnúhu ndíhi-í. ²⁸ Te núu ìⁿ nchòhó ná càni iní-ndó dàcaa-ndo ìⁿ vehe ducúⁿ, çte náa ñá díú díhna-gá cada

cuèndá-ndó nõu ndédau díhúⁿ cuu, ducaⁿ te cutnùní iní-ndó nõu tnàhá díhúⁿ-ndó càa vehe-áⁿ àdi ñáhá? ²⁹ Chi núu vá dúcáⁿ càda-ndo, te na ngüíta-ndo tàusaha-ndo te vá xínu cada-ndo, te nchaa ñáyíu na cùndehe ñaha xii-ndo, te càháⁿ cuéhé-yu cuèndá-ndó. ³⁰ Te cachí-yu: “Tée-ãⁿ ní ngüíta-dé dácàa-dé ìⁿ vehe te ñá ní ndàcu-dé xínu”, cachí-yu. ³¹ Àdi te núu ìⁿ téé yìndaha ñaha xii ñáyíu cuìní-dé nàá-dé ndíhi ingá tucu téé yìndaha ñaha xii ñáyíu, çte náa ñá díú díhna-gá cada cuèndá-dé te núu ndacu-dé ndíhi úxí mĩl cue sandàdú-dé nàá-güedé, ndíhi ócò mĩl cue sandàdú ingá tucu téé yìndaha ñaha xii ñáyíu cùu úhú iní tnàhá ndíhi-dé-ãⁿ? ³² Àdi te núu xìto-dé sã vá ndácú-dé ñá, te òré vátá cùyàtni ñaha-gá téé cùu úhú iní tnàhá ndíhi-dé-áⁿ, te tendaha-dê ìⁿ téé quíhíⁿ-dé quíhu-dé tnúhu ndàhú núu téé-áⁿ cuèndá sã vá nàá-güedé. ³³ Te duha càháⁿ-í chi núu nchòhó vá cádá ndèe iní-ndó dàña-ndo nchaa sã ndécú ndíhi-ndo cuèndá chitnahá ñáhá-ndó xii-í, te vá cúú-ndó cuè ñáyíu tnàhá tnúhu ndíhi-í.

Ñí nĩ nduu víxiⁿ
(Mt. 5:13; Mr. 9:50)

³⁴ Te ñí chi ío váha, dico núu na ndùu víxiⁿ-xi, çte nása-gá cada-o nàndíhi-o te núu ducaⁿ-i? ³⁵ Chi ñá túú-gã nándíhi-xi nĩ sã dàcá ñuhu, te nĩ sã dàcá saháⁿ, chi cuèndá-nã dǎngoyo-o. Te nchaa nchòhó ñáyíu ní xíndedóho tnúhu ní càháⁿ-í-a xini ñuhu-xi ío váha cuáha-ndo cuèndá —càchí-gá xáhaⁿ-gã xii-yu.

15

Cuèndá ìⁿ mbéé quití ní xíta
(Mt. 18:10-14)

¹ Te cue téé cuihna iní-xi quide cobrá ñáhá xii ñáyíu cuèndá impuestú ndíhi cue dava-gá ñáyíu ndècu ichi cuehé ichi duha ní quexió-yu núu ndécú Jèsús cuèndá cund-edóho-yu tnúhu càháⁿ-gá. ² Te ní ngüíta cue téé cùu fariséú, ndíhi cue téé dàcuaha ñaha xii ñáyíu nchaa tnúhu ní chídó tnùnì ndíi Moisés xicáhãⁿ cuéhé-güedé cuèndá-gá, te càchí-güedé:

—Tée-a quèheⁿ cuèndá-dé ñáyíu ndècu ichi cuehé ichi duha, te xèxi ndíhi ñaha-dé xii-yu —càchí-güedé xitnàha-güedé.

3 Te Jèsús ní cani-gá ìḡ cuèndú nàcuáa tecu tñuní-güedé tñuhu-gá, te xáhaⁿ-gá xii-güedé:

4 —ḡḡ tée ndècu ìḡ ciendú mběé-dě, te ní xíta ìḡ-di, te nchòhó sa cùtnuní iní-ndó nàcuáa cada tée-áⁿ, chi dándóo-dé cùmídícó sǎhúⁿ cùmí-di ìḡ yucu, te cúnúndúcú-dě quiti ní xíta xǎⁿ ndéé ndéé naníhí-dě-di.

5 Te òré ní naníhí-dě-di te ní dácáá-dě-di chíó-dě ní docó-dé-di sá cúdḡ iní-dé. 6 Te òré ní nasáá-dé vehe-dé, te ní dátacá-dé nchaa cue tée cǎháⁿ ndihí-dé, ndihí nchaa ñáyiú ndècu yatni ndihí-dé, te ní xáhaⁿ-dě: “Chí ná cùdḡ iní-ó vitna, chi ní naníhí-í mběé-í quiti ní xíta ní cùu”, cachí-dé xǎhaⁿ-dě xii-yu.

7 Te yúhú cǎchí-í sá ìo-gá cúdḡ iní Yǎ Ndiòxí ndihí cue espíritú xínú cuèchi núú-gǎ nūu ìḡ ñáyiú ndècu ichi cuehé ichi duha na ndixi cuèchi iní-yu cuèndá nchaa sá ñà túú vǎha quidé-yu ndécú-yu te tñí-yu ichi-gá, dàcúúxí cùmídícó sǎhúⁿ cùmí ñáyiú sa ní tuha ichi-gá, chi ñà túú-gǎ xíní ñuhu-xi ndixi cuèchi iní-yu chi sa ndécú-yu ichi-gá —cǎchí-gá xáhaⁿ-gá xii-güedé.

Cuèndá díhúⁿ ñí xíta

8 Te ní cani Jèsús ingá cuèndú núú-güedé, te xáhaⁿ-gá:

—ḡḡ ñadìhí ndécú ndihí-aⁿ úxí díhúⁿ cuixíⁿ, te ní dácuita-aⁿ ìḡ te ní teñuhú-aⁿ ití, te ní ngúita-aⁿ nàtihu-aⁿ vehe, te súúní vǎha vǎha ní nanducu-aⁿ ndéé ní naníhí-aⁿ.

9 Te òré ní naníhí-aⁿ, te ní dátacá-aⁿ nchaa ñáyiú díhí cǎháⁿ ndihí-aⁿ ndihí nchaa ñáyiú ndècu yatni ndihí-aⁿ, te ní xáhaⁿ-aⁿ: “Chí ná cùdḡ iní-ó vitna chi ní naníhí-í díhúⁿ-í sá ñí xíta ní cùu”, cachí-aⁿ xǎhaⁿ-aⁿ xii-yu.

10 Te yúhú cǎchí-í sá dúcáⁿ ìo cùdḡ iní nchaa espíritú xínú cuèchi núú Yǎ Ndiòxí, núu ìḡ ñáyiú ndècu ichi cuehé ichi duha na ndixi cuèchi iní-yu cuèndá nchaa sá ñà túú vǎha quidé-yu, te tñí-yu ichi-gá —cǎchí-gá xáhaⁿ-gá xii-güedé.

Cuèndá ìḡ tée ñà túú ní quide vǎha

11 Te ní cani tucu Jèsús ingá cuèndú núú-güedé, te xáhaⁿ-gá:

—ḡḡ tée ndècu úú déhe ducuⁿ-dé, 12 te tée líhli-gá ní xáhaⁿ-dě xii tǎtá-dé: “Táu, taxi-n tǎhú sǎ cúú cuèndá-í”, cǎchí-dé xǎhaⁿ-dě. Te tǎtá-dě-áⁿ ñí sǎñaha-dě ndí díḡ nūú-güedé sá cúú cuèndá-güedé. 13 Te

núú sàcú-ni nduu, te déhe-dé tée líhli-gá-áⁿ ñí nadico-dě nchaa sá ñí sǎñaha tǎtá-dě, te ní xica-dé cuáháⁿ-dé ìḡ ñuú xícá, te yácáⁿ ní tñí-dé ìḡ ichi cuèhé ichi duha, te ní ndihí díhúⁿ-dě ní dándóñuhu-dé ndihí cue tée cǎháⁿ ndihí-dé, ndihí nchaa ñáyiú díhí xǎndecu ichi díḡ iní. 14 Te ní ndihí ndoo díhúⁿ-dě ní dándóñuhu-dé, te núú sàcú-ni nduu ní sáá tnamá ñuú núú ndécú-dě-áⁿ, te ñà ñihí-gá-dé sá cǎxí-dě, te xihí-dé docó.

15 Núu ní xica-dé cuáháⁿ ndúcú chiuⁿ-dé núú ìḡ tée diu-ni ñuú xíaⁿ, te tée-áⁿ ñí sǎha chiuⁿ ñaha-dé ìḡ xichi núú ñuhú-dě coto-dé cùchí. 16 Te súúní xihí-dé docó te cuini-dé caxi-dé nchaa sá sǎha-yu cùchí-áⁿ ní cùu, dico ñà túú ní sǎñahá-yu xii-dé. 17 Te uuⁿni ní sani váha iní-dé, te ní cachí-dé: “Ío cuéhe cue tée xínu cuechi vehe tǎtá-í te ío cuéhe sǎ xéxí-güedé ndécú, te yúhú duha ndòho-í docó iha!

18 Te ndacuñí-í te núhú-í vehe tǎtá-í, te cùñaha-í xii-dé: Táu, ñà túú ní quide váha-í núú Yǎ Ndiòxí te ní ñà túú ní quide váha-í núú-n, 19 te ñà túú-gǎ tàú-í sá cùu-í déhe-n vitna, te cada ñaha-ñá-n xii-í dàtná ìḡ tée xínu cuechi núú-n”, duha ní sani iní-dé cùñaha-dě xii tǎtá-dě. 20 Te sátá dúcáⁿ ñí sani iní-dé, te ní natnḡ-dé ichi cuánuhú-dé vehe tǎtá-dě, te xica-gǎ cuánuhú-dé ní xíní ñáhá tǎtá-dě xii-dé te ní cundáhú iní ñáhá-dě. Te xínu tǎtá-dě-áⁿ ñí sáháⁿ nútnahá ñáhá-dé, te ní numi ñaha-dé, te ío vǎha ní cǎháⁿ ndihí ñaha-dé. 21 Te ní xáhaⁿ déhe-dé-áⁿ xii-dé: “Táu, ñà túú ní quide váha-í núú Yǎ Ndiòxí te ní ñà túú ní quide váha-í núú-n, te ñà túú-gǎ tàú-í sá cùu-í déhe-n vitna”, cachí-dé xǎhaⁿ-dě.

22 Dico tǎtá-dě-áⁿ ñí xáhaⁿ-dě xii cue tée xínu cuechi núú-dé: “Chí queñuhu ndihí-ni dóo vǎha-gá cuáha-ndo déhe-í-a na cuìhnu-dé, ndihí ìḡ dehé ná quíhí díquí ndáhá-dě, ndihí chàú váha na quíhí-dé.

23 Te quíhíⁿ ngueheⁿ-ndo ìḡ ndicutu numa quiti caváha-gá, te cahni-ndo-di, te na càda-o vico, te na cǎxi-o-di. 24 Chi déhe-í-a ní sani iní-í sá ñí xihí-dé ní cùu, te ñáhá chi ndècu vívú-dě, te ní sani tucu iní-í sá ñí xíta-dé ní cùu te ní nasáá méé-dě”, cǎchí-dé xǎhaⁿ-dě xii cue tée xínu cuechi núú-dě-áⁿ. Te ní ngúita-güedé ní quide-güedé vico.

25 Te déhe-dé tée sàcuéhé-gǎ cuáháⁿ-dé yucu, te òré cuándixi-dé tá nduu yatni-dé vehe, te ní tecú dóho-dé ío yaá cúú vico.

26 Te ní cana-dé ìḡn tée xìnu cuechi, te ní xícán tñuhú-dě núú-dě ná cuendá ducaⁿ ío yaá.

27 Te tée xìnu cuechi-án nǐ xáhaⁿ-dě: “Ñaní-ḡn tée cuáhán ní cùu ní nasáá-dé, te tātá-n nǐ táúchíúⁿ-dě ní xíhí ìḡn ndicutu nùma quitì caváha-gá cuendá sá nǐ nasáá váha-dé”, cächí-dé xáhaⁿ-dě.

28 'Dico ñaní-dé tée sàcuéhé-ǎn nǐ cudééⁿ-dě, te ní cachí-dé sá vǎ ndíhu-dé vehe cundecu-dé vico-án ní cùu, dico ní quee tātá-güedé ní cáháⁿ ndàhú-dé núú-dě cuendá ndíhu-dé.

29 Te ní xáhaⁿ-dě xii tātá-dě: “Táu, cundedóho váha saú-n tñuhu na càháⁿ-í-a, yúhú ío cuéhé cuíá nǐ cuu xìnu cuechi-í núú-n, te ni ìḡn xito ñá túú quide sáá iní-í núú-n, te ni ìḡn chivá líhli ñá túú tàxi-n-di caxi díí iní-í-di ndíhi cue tée càháⁿ ndíhi-í.

30 Te vitna ní nasáá déhe-n tée ní sáhán ní dándóñùhu díhúⁿ-n ndíhi nchaa ñáyiú xíndecu ichi díí iní. Te ní sahní-n ìḡn ndicutu numa quitì caváha-gá sá cuendá-dé”, cächí-dé xáhaⁿ-dě xii tātá-dě.

31 Te ní xáhaⁿ tātá-dě xii-dé: “Yòhó déhe-í ducaⁿ-ni ndècu ndíhi ñaha-n xii-í, te nchaa sá ndécú ndíhi-í cúú-xí cuendá-n.

32 Te vitna dacutíí tàú-xi sá cádá-ó vico, te cudíí iní-ó, chi ñaní-n-án nǐ quide-í cuendá sá nǐ xíhí-dé ní cùu, te ñáhá chi ndècu vívú-dě, te sa ní xíta-dé ní cùu, te ní nasáá méé-dě”, cächí-dé xáhaⁿ-dě xii déhe-dé tée sàcuéhé-gǎ-án —duha cuáhán cuendú ní caní Jèsús núú-güedé.

16

Nàcuáa ní quide ìḡn tée tàxi tñuní ñáhá xii cue tée xìnu cuechi

1 Te Jèsús xáhaⁿ-gǎ xii cue tée xìca cuu ndíhi-gá:

—Ní xíndecu ìḡn tée cuica, te ducaⁿ nǐ xíndecu ìḡn tée ní taxi tñuní ñáhá xii cue tée ní xìnu cuechi núú-dě. Te tée-án nǐ xíní ñáhá ñáyiú dùhu-dé díhúⁿ tée cùu patróóⁿ-dě, te cuáhán-dé dándóñùhu-dé, te ní xáhǎⁿ-yu xii tée cùu patróóⁿ-dě sá dúcán quide-dé.

2 Te tée cùu patróóⁿ-dě-án nǐ cana ñaha-dě xii-dé, te ní xáhaⁿ-dě: “¿Ná cuendá duha càháⁿ ñáyiú cuendá-n? Yáchí chi na tàxi cuendá-n nchàa chiuⁿ ní quide-n, chi vitna te vǎ táxí tñuní-gá-n cue tée xìnu cuechi núú-í”, cächí-dé xáhaⁿ-dě.

3 Te tée tàxi tñuní ñáhá xii cue tée xìnu cuechi-án nǐ sani iní-dé: “¿Te nása cada-í

vitna na quèhndé patróóⁿ-í chiuⁿ-í? Chi ñá cündèe-gá-í cada-í chiuⁿ vée, te cùcahaⁿ núú-í cácaⁿ ndàhú-í.

4 Dico duha cada-í cuendá queheⁿ cuendá ñáhá ñáyiú vehé-yu òré ná quèhndé duuⁿ-ná patróóⁿ-í chiuⁿ-í”, duha ní sani iní-dé.

5 Te sátá dúcán te ní cana-dé ìḡn ìḡn cue tée tàú núú patróóⁿ-güedé. Te tée díhna ní xícán tñuhú-dě núú-dě, te xáhaⁿ-dë: “¿Ndèé dau tàú-n núú patróóⁿ-í?”

cächí-dé xáhaⁿ-dë. 6 Te tée-án nǐ xáhaⁿ-dë: “Táu-í ìḡn ciendú barríl acití”, cächí-dé xáhaⁿ-dë.

Te tée tàxi tñuní ñáhá xii cue tée xìnu cuechi-án nǐ xáhaⁿ-dë: “Iha náu reciú-n-á, te ndadúha ingá sá údico úxí taxi-n”, cächí-dé xáhaⁿ-dë.

7 Te dǎtnuní ní xícán tñuhú tucu-dé núú ingá-dé, te xáhaⁿ-dë: “Te yòhó, ¿ndèé dau tàú-n-í?”

cächí-dé xáhaⁿ-dë. Te tée tàú-án nǐ xáhaⁿ-dë: “Ìḡn ciendú ngohnchi triú tàú-í”, cächí-dé xáhaⁿ-dë.

Te tée tàxi tñuní ñáhá xii cue tée xìnu cuechi-án nǐ xáhaⁿ-dë: “Iha náu reciú-n-á, te cadúha ingá sá cùmídícó-nǎ taxi-n”, cächí-dé xáhaⁿ-dë.

8 Te tée cùu patróóⁿ-án nǐ cachí-dé sá ío váha ñuhu díquí tée dùhu-án nàcuáa cada-dé cundecu váha-dé.

Te nchaa ñáyiú xíndecu ichi cuéhé ichi duha, ío-gá váha ñuhu díquí-yu nàcuáa

cadá-yu cundecu váha-yu ndíhi nchaa ñáyiú cündíhi-yu dàcúúxí ñáyiú ndècu ichi Yá Ndiöxí.

9 Te yúhú cächí-í sá cádá-ndó sǎ vǎha ndíhi nchaa sá ndécú ndíhi-ndo ní cuáha ñuyúú yíca cuéchi-a, te ducaⁿ te coo cue tée ío

váha tnahá tñuhu ndíhi-ndo, te òré ná ndíhi nchaa sá ío ñuyúú-a, te Yá Ndiöxí queheⁿ cuendá ñáhá-gǎ xii-ndo, te cundecu-ndo ndíhi-gá ni caa ni quíhíⁿ.

10 Te núu ìḡn tée quide ndáá cuéi ìḡn chiuⁿ líhli na càda-dé, te díu-ni ducaⁿ quide ndáá-dé cuéi ìḡn chiuⁿ cahnu na càda-dé.

Dico tée ñá túú quide ndáá, chi cuéi chiuⁿ líhli àdi chiuⁿ cahnu na càda-dé dico ìḡn-ni quide-dé.

11 Te núu nchòhó vá cádá-ndó sǎ vǎha ndíhi nchaa sá nǐ cuáha ñuyúú yíca cuéchi-a ña, te Yá Ndiöxí vá táxí-gǎ sá vǎha ndècu ndíhi-gá xii-ndo.

12 Te núu vá cádá ndáá-ndó còto-ndo nchaa sá táxí nùu tnahá ñáyiú-ndo, te vǎ yòo taxi sá ndúú tàhú-ndó.

13 Te ni ìḡn tée xìnu cuechi vǎ ndácú-dě cunu cuechi-dě núú úú patróóⁿ, chi tée-án cuu váha iní-dé núú ìḡn patróóⁿ-dë te

tnii-dé nchaa tnúhu càháⁿ pàtróóⁿ tée cùu váha iní-dé núu-xi-áⁿ. Te núu ìngá tucu pàtróóⁿ-dè vá cúu vâha iní-dé, te ni vâ tnii-dè tnúhu càháⁿ pàtróóⁿ-dè-áⁿ. Te ducaⁿ sâtnahá-xi cùu nchohó chi vá ndácú-ndó cùnu cuechi-ndo núu Yâ Ndiôxi te cuhuⁿ iní-ndó nchâa sá ìó ñuyíú-a —câchí-gá xáhaⁿ-gã xii-güedé.

14 Te nchaa cue tée cùu fariséú ìo ñùhu iní-güedé nchaa sá ìó ñuyíú-a, te xîndedóho-güedé nchaa tnúhu càháⁿ Jèsús, te ní cáháⁿ yíchí-güedé cuèndá-gá. 15 Te Jèsús ní xáhaⁿ-gã xii-güedé:

—Nchòhó cúu-ndó cuè tée ìo váha càháⁿ núu ñáyiú cuèndá-ni sá cuíni-ndó cáháⁿ váha-yu cuèndá-ndó, dico Yâ Ndiôxi xini ndáá-gá nâcuáa càa iní-ndó ìⁿ ìⁿ-ndo, te nchaa sá câchí cue ñáyiú ñuyíú-a sá ìo nândíhi, Yâ Ndiôxi dáquèe tíhú-gã.

Cuèndá nchaa tnúhu ní chídó tnùni ndii Moisés

16 Te nchaa tnúhu ní chídó tnùni ndii Moisés cùnù-xi ni cuu, ndii nchaa tnúhu ní chídó tnùni cue tée ní xóo cáháⁿ tnúhu Yâ Ndiôxi ndéé sanaha. Dico cùtnahá ní ngúita té Juáá tée ní xóo dacuândute ñaha xii ñáyiú ní cáháⁿ-dé tnúhu-í, ndéé dâvâ-áⁿ ñà túú-gã ní cùnuu nchaa tnúhu ní chídó tnùni ndii Moisés ndii nchaa tnúhu ní chídó tnùni cue tée ní xóo cáháⁿ tnúhu Yâ Ndiôxi ndéé sanaha. Te ñu-ni ndéé dâvâ-áⁿ ni quesaha ta técú tnùni ñáyiú nâcuáa ndii ndaha ñaha Yâ Ndiôxi xii-yu, te vai ñáyiú ìo sâni iní-yu vitna nâcuáa cadá-yu ndii ndaha ñaha Yâ Ndiôxi xii-yu. 17 Te nchaa tnúhu ní chídó tnùni ndii Moisés ìo ndáá cáháⁿ-xi, te ndii-gá naa andii ndii ñuyíú dâcúúxi sâ ndii ìⁿ ìⁿ tnúhu-áⁿ cada-xi nâcuáa cáháⁿ-xi.

Jèsús càháⁿ-gá cuèndá ñáyiú dàña tnaha (Mt. 19:1-12; Mr. 10:1-12)

18 Te núu ìⁿ tée na dàña tnaha-dé, ndii ñadíhi-dé, te tnândaha tucu-dé ndii ìngá-yu, te nèhé víhí quide-dé te núu ducaⁿ na càda-dé, te tée na tnândaha ndii ñaha ní dáña yii-xi, te ñu-ni ducaⁿ ñà túú cùu-xi sá váha te núu ducaⁿ na càda-yu —câchí-gá xáhaⁿ-gã xii-güedé.

Cuèndá ìⁿ tée nâni Lázarus ndii cuèndá ìⁿ tée cuica

19 Te xáhaⁿ tucu-gá xii-güedé:

—Ní xîndecu ìⁿ tée cuica, te ní xóo cuihnu-dé mee-ni dõó vâha dõó vii càa, te nchaa nduu súúni vâha ní xóo cada-dé vico vehe-dé. 20 Te ní xîndecu tucu ìⁿ tée ndàhú ní xînani-dè Lázarus, te tée-áⁿ ni cuhú-dé ní xîndéé-dé nitùhú-dé ndiihi, te ìⁿ nduu ìⁿ nduu ní xóo taxinucóo ñaha-güedé xii-dé yuyèhe tée cuica-áⁿ. 21 Te tée ndàhú-áⁿ ni xóo cuú-dé docó, te ní xóo cuíni-dé caxi-dé nchaa sá ñà túú-gã ní xõo yâha caxi tée cuica-áⁿ, te ñà túú ní xõo níhí-dè. Te cuèi iná ní xóo quíhíⁿ-di ní xóo nayuu-di nchaa núu ndiihi ndéé-dé-áⁿ. 22 Te ní sáá ìⁿ nduu te ní xíhí tée ndàhú-áⁿ, te cue espíritú xínú cuèchi núu Yâ Ndiôxi ndécá ñaha-xi xii-dé cuándaa núu ndécú té Àbrahám cundecu-dé. Te ní sáá nduu ni xíhí tée cuica-áⁿ tnàhá-dé, te ní chindúxi ñaha-güedé xii-dé. 23 Te ní sáá-dé núu xîndecu nchaa ñáyiú ní xíhí ñà túú ní quide ndáá núu Yâ Ndiôxi te xíáⁿ ìo ndòho-dé ndécú-dè, te ní ndonehe núu-dè te xica ni xini-dé té Àbrahám ndiihi té Lázarus-áⁿ xîndecu-güedé. 24 Te níhi ní cáháⁿ-dé, te xáhaⁿ-dè: “Yòhó tâtá Àbrahám, cundàhú iní ñáhá xii-í, te cùñaha xii té Lázarus ná dândaxiⁿ-dé díquí ndáhá-dè, te na quixi-dé dândaxiⁿ-dé yàa-í, chi ìo ndòho-í ñùhú-í núu ñùhú núu càyú-a”, câchí-dé xáhaⁿ-dè xii té Àbrahám. 25 Dico té Àbrahám ní xáhaⁿ-dè: “Ndàhú yòhó ñani tnàhá-í, dândacu iní sá ìo váha ní xîndecu-n ñuyíú, te té Lázarus ìo ndàhú ní ndòho-dé ní xîndecu-dé. Te vitna ní nucúndecu váha-dé iha, te yòhó ndòhó-n vitna. 26 Te ñà díú-ni sâ xíáⁿ tucu, chi cuádava ndècu ìⁿ déhvá cùnú ñùhú nèhu-xi núu ndécú-ó, te cuèi nchaa ñáyiú xîndecu iha na câchí iní-yu quixi-yu núu ndécú-ndó dico vá ndácú-yu, te ni nchòhó vá ndácú-ndó quixi-ndo núu ndécú-ndí”, câchí-dé xáhaⁿ-dè. 27 Te ní xáhaⁿ tée cuica-áⁿ: “Te núu ducaⁿ te cáháⁿ ndàhú-í núu yòhó tâtá Àbrahám vitna sá téndaha-n té Lázarus ná quíhíⁿ-dé vehe tâtá-í, 28 chi ndècu úhúⁿ-gá ñani-í, te na cùñaha-dè xii-güedé sá vâ cadá-güedé dàtná ní quide-í cuèndá sá vâ quixi-güedé tnàhá-güedé núu ndécú-í ndòhó-í-a”, câchí-dé xáhaⁿ-dè. 29 Te té Àbrahám ní xáhaⁿ-dè: “Mee-güedé ndécú ndiihi-güedé nchaa tnúhu ní chídó tnùni ndii Moisés, ndiihi nchaa tnúhu ní chídó tnùni cue tée

ní xóo cáháⁿ tnúhu Yá Ndiöxí ndéé sanaha, te nchaa tnúhu-áⁿ ná tñi-güedé nàcuáa càháⁿ-xi”, càchí-dé xáhaⁿ-dë xii-dé. ³⁰ Te ní xáhaⁿ tùcu té cuica-ãⁿ: “Tátá Àbrahám, dico vá cáda cuendá-güedé nchaa tnúhu-áⁿ, dico núu ìⁿ ñáyiú ñá túú-gã ndécú ñùyú ìⁿ ñáyiú ndècu ndihí-n quíhíⁿ-yu cáháⁿ ndihí ñàhá-yu xii-güedé nàcuáa ndùu tnúhu váha, te ndixi cuéchi iní-güedé nchaa sá ñà túú quide váha-güedé ndécú-güedë, te cada váha-güedé”, càchí-dé xáhaⁿ-dë xii-dé. ³¹ Dico té Àbrahám ní xáhaⁿ-dë: “Te núu ñá túú cuini-güedé tñi-güedé tnúhu ní cáháⁿ ndíi Moisés, ndihí tnúhu ní cáháⁿ cue té ní xóo cáháⁿ tnúhu Yá Ndiöxí ndéé sanaha ña, te ñu-ni ducaⁿ càda-güedé cuèi ìⁿ ñáyiú ní xíhí ná ndótó-yu cúñàhá-yu nàcuáa ndùu tnúhu váha, chi vá quindáa iní-güedé”, càchí té Àbrahám xáhaⁿ-dë xii té cuica-ãⁿ —càchí Jèsús xáhaⁿ-gã xii cue té cuu fariséu.

17

Quihi iní-ó vã cündècu-o ichi cuehé ichi duha

(Mt. 18:6-7, 21-22; Mr. 9:42)

¹ Te Jèsús ní xáhaⁿ-gã xii cue té xica cuu ndihí-gá:

—Dacuítíi sã cóo cuè tée dacàháⁿ-güedé ñáyiú cada-yu nándi sá cuèhé sá dúhá, j dico ndàhú ní cuu cue tée ducaⁿ na dacàháⁿ ñàhá xii-yu cada-yu nándi sá cuèhé sá dúhá! ² Chi váha-gã sá ñu na dàcutu ndéé ñáyiú ìⁿ yúú yödó dücúⁿ-güedë te dàquée ñàhá-yu xii-güedé xití ndute làmár, te ñá díú sã cündècu-güedé dacàháⁿ-güedé ñáyiú cada-yu nándi sá cuèhé sá dúhá, cuèi ñáyiú ndàhú iní-xi dandàhú-güedé. ³ Te ío quíhí iní-ndó cündècu-ndo.

Te núu ìⁿ ñaní tnàhá-ndó quide-dé ìⁿ sá ñà túú tàú-dé cada-dé sá cúú-xí-ndó te cáháⁿ-ndó dôho-dé, te núu ní ndixi cuéchi iní-dé sá ñà túú ní quide váha-dé, te cada càhnu iní-ndó sã ñi quide-dé. ⁴ Te cuèi úsá xito na càda-dé nándi sá ñà túú tàú-dé cada-dé sá cúú-xí-ndó ìⁿ nduu, te núu na quixi-dé úsá xito núú-ndó, te cachí-dé sá vã dúcáⁿ-gã cada-dé, te xìni ñuhu-xi cada cahnu iní-ndó-dë —càchí-gã xáhaⁿ-gã xii-güedé.

Ñáyiú sàndáa ndisa iní-xi

⁵ Te ní xáhaⁿ cuè té xica cuu ndihí Jèsús xii-gá:

—Chindee ñàha xii-ndí cuendá ducaⁿ te quindáa-gã iní-ndí sá Yá Ndiöxí ndácú-gã quidé-gã nchaa sá váha —càchí-güedé xáhaⁿ-güedë xii-gá.

⁶ Te ní xáhaⁿ Jèsús:

—Te núu nchòhó quindáa ndisa iní-ndó sũúni cuèdicó luha líi dàtná cuini-ndó càa ìⁿ ndíquiⁿ yutnu nàni mostázá, te ducaⁿ te cuu cúñaha-ndo xì ìⁿ yutnu: “Quene-n ìha te quíhíⁿ-n cuìhnu-n xití làmár”, duha cúñaha-ndo. Te ducaⁿ càda-xi te núu na quindáa ndisa iní ñàhá-ndó xì-í —càchí-gã xáhaⁿ-gã xii-güedé.

Nàcuáa tàú ìⁿ té xinu cuechi cada-dé

⁷ Te xáhaⁿ tùcu-gã xii-güedé:

—Te núu ìⁿ nchòhó ndécú ìⁿ té xinu cuechi núú-ndó, te cuáháⁿ-dé yucu cuángada chiúⁿ-dé, àdi cuáháⁿ-dé yucu coto-dé quiti, te òré ní nasáá-dé vehe sá ñi sáháⁿ-dé yucu, te vá cúñaha nchòhó cue té cuu patróoⁿ-dë xii-dé: “Yáchí nehé caxi-n dítá”, vá dúhá cúñaha-ndo. ⁸ Chi nchòhó cue té cuu patróoⁿ-dë cúñaha-ndo xì-dé: “Cundihi iní cada túha sá cùdini-í, te díhna-gã-í caxi-í dítá te dàtnúni caxi-n”, duha cúñaha nchòhó cue té cuu patróoⁿ xii-dé. ⁹ Te òré ná ndíhí chiúⁿ ní táhú nchòhó cue té cuu patróoⁿ cada té xinu cuechi núú-ndó, te ñá túú tàú-ndó ndàcáⁿ táhú-ndó núú tõe xinu cuechi núú-ndó. ¹⁰ Te duha càháⁿ-í chi núu òré ná ndihí nchaa chiúⁿ ní táhú Yá Ndiöxí cada-ndo, te cachí-ndó: “Nchúhú cúú-ndí cue té xinu cuechi núú Yá Ndiöxí, dico ñá túú tàú-gã ndacáⁿ táhú-gã núú-ndí, chi mee-ni chiúⁿ ní táhú-gã ní quide-ndí”, duha cachí-ndó —càchí-gã xáhaⁿ-gã xii-güedé.

Jèsús quidé tãtna-gã úxí cue té tnàhá cuéhé sã dátèhyú nihnu-xi yiqui cùñú ñáyiú

¹¹ Te ñuhu Jèsús ichi cuáháⁿ-gã ñuú Jerusálén, te ní yáha-gã núú ràyá distritú Sãmariá ndihí distritú Galileá. ¹² Te ta cùyatni-gã ìⁿ ñuú líhli cuáháⁿ, te ní sãtnahá ñàhá úxí tnàhá cue té cùhú xii-gã, te tnàhá-güedé cuéhé sã dátèhyú nihnu-xi yiqui cùñú-ó dico xica lùha ní ngúnu

tníi-güedé, ¹³ te níhi ní cáháⁿ-güedé, te xáhaⁿ-güedě xii Jèsús:

—¡Mèstrú, cundàhú iní ñáhá xii-ndí! —
càchí-güedé xáhaⁿ-güedě xii-gá.

¹⁴ Te òrè ní xiní ñáhá Jèsús xii-güedé, te ní xáhaⁿ-gá:

—Chí cuáháⁿ núú dütú ná cundehe ñaha-dé xii-ndo —càchí-gá xáhaⁿ-gá xii-güedé.

Te ní xica-güedé cuáháⁿ-güedé, te ichi-ni ñùhu-güedé cuáháⁿ-güedé ní ndúha-güedé cuéhé tnàhá-güedé. ¹⁵ Te nchaa-güedé ní cutnùní iní-güedé sá ñí ndúha-güedé, dico ñⁿ-ni-dé ní nacuico-dě, te ní ngüíta-dé níhi ní cáháⁿ-dé, te ní cachí-dé sá ño càhnu cuu Yá Ndiöxí. ¹⁶ Te ní ngüíñí xítí-dě núú Jèsús, te ní nuu núú-dě ndàa núú ñúhú ndàcáⁿ táhú-dě núú-gá. Te té-áⁿ cúú-dě téé distritú Sàmariá. ¹⁷ Te Jèsús ní cachí-gá:

—Úxí tnàhá-güedé ní ndúha cuéhé tnàhá-güedé. ¿Te ndèé ndécú dàva-gá-güedé-í?

¹⁸ ¿Te náa ñⁿdii-ni téé ingá ñuú-a ní nacuico-dě ndàcáⁿ táhú-dě núú Yá Ndiöxí, te càchí-dé sá ño càhnu cuu-gá ñá? —
càchí-gá.

¹⁹ Te ní xáhaⁿ-gá xii téé-áⁿ:

—Ndacuíñí te núhú-n, chi sa ní ndúha-n cuéhé tnàhá-n, chi ní sándáá iní-n Yá Ndiöxí —càchí-gá xáhaⁿ-gá xii-dé.

Nàcuáa yìndaha ñaha Yá Ndiöxí

(Mt. 24:23-28, 36-41)

²⁰ Te cue téé cùu fariséú ní xicáⁿ tnúhú-güedé núú Jèsús núu ná ama ngüíta Yá Ndiöxí ndíhu ndaha-gá ñáyiu. Te ní xáhaⁿ-gá:

—Ñá túú ñá cada-xi ñuyíú quini-ndó cuèndá cutnùní iní-ndó sá ndíhu ndaha ñaha Yá Ndiöxí xii-ndo. ²¹ Te ni vā yōo cachí: “Iha ndècu-gá táxí tnùní-gá, àdi yacáⁿ ndécú-gá táxí tnùní-gá”, chi tnuú-ndó sà ndècu-gá ndíhi nchaa ñáyiu yìndaha-gá —
càchí-gá xáhaⁿ-gá xii-güedé.

²² Te ní xáhaⁿ-gá xii cue téé xica cuu ndíhi-gá:

—Te nchòhó chi sáá nduu, te cachí iní-ndó sá sùúni cuèdicó ñⁿ nduu quini ñáhá-ndó xii yúhú Tée cùu ñani tnàhá-ndó nchaa-ndo, dico vá quini ñáhá-gá-ndó xii-í.

²³ Te coo ñáyiu cúñahá-yu xii-ndo: “Iha ndècu-gá, áⁿ yàcáⁿ ndécú-gá”, quesàhá-yu

cúñahá-yu xii-ndo. Dico vá quindáá iní-ndó quíhíⁿ-ndó ndíhi-yu núú càchí-yu, te ni vā cání iní-ndó quíhíⁿ méé-ndó. ²⁴ Chi dàtná cuini-ndó quide-xi oré sáá ndúté àndiu, chi uuⁿi dàyehé-xi nihí ñuyíú, ducaⁿ càda-xi nduu na quixi tucu yúhú Tée cùu ñani tnàhá-ndó nchaa-ndo, te dàvá-áⁿ quini ñáhá nchaa-ndi túhú ñáyiu xii-í.

²⁵ Dico díhna-gá ndoho vihi-í, te daquèe tíhú ñáhá ñáyiu ñuyíú-a xii-í. ²⁶ Te cadá-yu dàtná ní quide ñáyiu ní xindecu cútnàhá ní xindecu té Nòé, te diu-ni ducaⁿ sàtnahá-xi cada nchaa ñáyiu ndècu vitna ndéé sáá nduu quixi tucu yúhú Tée cùu ñani tnàhá-ndó nchaa-ndo. ²⁷ Chi caxi-ní-yu, coho-ní-yu, te caca cuu-ni cue téé xica ndáhú, te tnàndaha-ní-yu, chi ducaⁿ ñí quide-yu dàvá-áⁿ ndéé ní sáá nduu cuànguee té Nòé xítí bàrcú, te ní ngüíta-xi ní cuuⁿ dáú ñí ndaa ndute ñuyíú, te nchaá-yu ní xihí ní cáhá-yu dàvá-áⁿ. ²⁸ Te diu-ni ducaⁿ ñí quide tucu ñáyiu cútnàhá ní xindecu té Löt, chi xèxí-yu xihí-yu, te sááⁿ-yu te nàdicó-yu, te xixitú-yu nándi sá xixitú-yu, te nchaa cue téé xidacáá-güedě vehe. ²⁹ Te òrè ní quee té Löt ñuú Sòdomá, te ní ngoyo ñuhú andiu, te dàcá yúú sùúni dicó ní nduu ñuhú-ñá-xi, te ní xihí nchaandi túhú ñáyiu ñuú-áⁿ. ³⁰ Te diu-ni ducaⁿ sàtnahá-xi cada ñáyiu na sáá nduu quixi tucu yúhú Tée cùu ñani tnàhá-ndó nchaa-ndo ñuyíú-a.

³¹ Te núu ñⁿ ñáyiu càndodó-yu díquí vèhè-yu nduu-áⁿ, te ni vā ndíhu-gá-yu quehéⁿ-yu ñⁿ ndachíuⁿ-yu canehé-yu quíhíⁿ, te ñáyiu cuáháⁿ yucu, te ni vā nùhú-gá-yu vehé-yu. ³² Te chí dándacu iní nàcuáa ní yáha ñadíhí té Löt. ³³ Te nchaa ñáyiu cuini dàcácu nihnu mee-xi ñuyíú-a ña, te cuíta nihnú-yu, te nchaa ñáyiu na cùú sá cuèndá-í, te naníhí tàhú-yu.

³⁴ Te na càchí tnúhu tucu-í xii-ndo sá ndùu-áⁿ, te núu úú-yu càa ñⁿ núú xito, te ñⁿ-yu ndanchitá-yu ndaá-yu andiu, te ñⁿ-yu quendóo. ³⁵ Te núu úú ñáyiu díhí nchícō-yu ñⁿ-ni vèhe, te ñⁿ-yu ndanchitá-yu ndaá-yu andiu, te ñⁿ-yu quendóo. ³⁶ Te núu úú cue téé yìhi-güedé yucu, te ñⁿ-dé ndànchita-dé ndaa-dé andiu, te ñⁿ-dé quendóo —càchí-gá xáhaⁿ-gá xii-güedé.

³⁷ Te sá dúcáⁿ ñí cáháⁿ-gá ñúu ní xícáⁿ tnúhú-güedě núú-gă, te xăháⁿ-güedě xii-gă:

—Mèstrú, ¿te ndéé ducaⁿ càda-xi-i? — cachí-güedě xăháⁿ-güedě xii-gă.

Te ní xáhaⁿ-gă:

—Te nchòhó xìní-ndó să ncháá ñúú yúcu yìqui cuñú ní xíhí, te yàcáⁿ tàcá cue ndíxí xéxí-güedě —cachí-gă xáhaⁿ-gă xii-güedě.

18

Jèsús càháⁿ-gá cuendá ìⁿ juéxí ndihí cuendá ìⁿ ñaha quèé

¹ Te Jèsús ní cani-gă ìⁿ cuendú núú-güedě cuendá sá vă ná tûhú iní-güedě cáháⁿ ndihí-güedě Yă Ndiöxí nchaa-ni òré. ² Te xáhaⁿ-gă:

—Ìⁿ ñúú ndécú ìⁿ juéxí, te ni ñà túú sàndáá iní-dé Yă Ndiöxí, te ni ìⁿ tnúhu xáhaⁿ ñăyiu ñá túú cuiní-dé cada cuendá-dé.

³ Te ñúu-ni ñúú-áⁿ ndécú tùcu ìⁿ ñadihí ñaha quèé, te ní sáháⁿ-aⁿ càháⁿ ndàhú-aⁿ núú juéxí-áⁿ cuendá cada ndáá-dé ìⁿ cuéchi. ⁴ Te titní xito ní cuu sàháⁿ-aⁿ càháⁿ ndàhú-aⁿ núú-dé te ñá túú cuiní-dé cada cuendá-dé tnúhu càháⁿ-aⁿ ni cùu, te ndéé núú ñà cúú-gă te ní sani iní-dé: “Te cuéi ñá túú sàndáá iní-í Yă Ndiöxí, te ni ñà túú quide cuendá-í nchaa tnúhu càháⁿ ñăyiu cada-í, ⁵ dico na càda ndáá-í cuendá ñaha quèé-a ndihí ñăyiu cùu úhú iní tnáhá ndihí-aⁿ, chi vá cùndèe-gă iní-í nuu núu quixi-aⁿ dasàtú iní ñáhá xii-í”, duha ní sani iní téé cùu juéxí-áⁿ —càchí-gă xáhaⁿ-gă xii-güedě.

⁶ Te ní xáhaⁿ tùcu-gă xii-güedě:

—Cada cuendá-ndó nàcuáa ní sani iní juéxí téé cuihna iní-xi-áⁿ. ⁷ Te Yă Ndiöxí ío chindee-gă nchaa ñăyiu ní cáháⁿ-gă cundecu ndihí-gă, chi cuéi nduu cuéi niú càháⁿ ndihí ñáhá-yu xii-gă, te vá cùyàa-gă nachinaa-gă nchaa sá quidé ñàha nchaa ñăyiu cùu úhú iní ñáhá xii-yu. ⁸ Te ío ndihí ducaⁿ càda-gă. Te òré ná quixi yúhú Téé cùu ñani tnáhá-ndó nchaa-ndo, ¿te náa naníhí-gă-í ñăyiu sàndáá ndisa iní Yă Ndiöxí-ăⁿ? —càchí-gă xáhaⁿ-gă xii-güedě.

Nàcuáa quide ìⁿ téé cùu fariséú ndihí ìⁿ téé cùu cobradór

⁹ Te Jèsús ní cáháⁿ-gă núú ñăyiu nàcuáa quide ñăyiu sàni iní sá ío quide ndáá te

dàquee tíhù-yu tnàha ñăyiu-yu, te xáhaⁿ-gă xii-yu:

¹⁰ —Úú cue téé cuáháⁿ-güedé veñúhu càhnu sá ío cùnuu cáháⁿ ndihí-güedé Yă Ndiöxí, te ìⁿ-dé cúú-dé téé cùu fariséú, te ingá-dé cúú-dé téé cuihna iní-xi quide cobrá ñáhá xii ñăyiu cuendá impuèstú. ¹¹ Te téé cùu fariséú-áⁿ nútñi-dé càháⁿ ndihí-dé Yă Ndiöxí, te xáhaⁿ-dē xii-gă: “Yòhó Dútú Ndiöxí ndàcáⁿ táhú-í núú-n, chi ñá túú quide-í dàtná quidé dâva-gă-güedé, chi dùhu-güedé, càháⁿ ndihí-güedé ñadihí te ñá díú ñadihí-güedé cúú-yu, te nândi-gă nchaa sá cuèhé sá dúhá quide-güedé, te ni ñà túú quide-í dàtná quidé téé cuihna iní-xi quide cobrá ñáhá xii ñăyiu cuendá impuèstú ndécú ìha. ¹² Chi yúhú ñá túú tnáhi ná xéxi-í úú nduu xití samàná cuendá sá càháⁿ ndihí ñaha-í xii-n, te nchaa sá ñihí-í te càhu-í úxí xichi, te ìⁿ xichi tàxi-í xii-n”, càchí-dé xáhaⁿ-dē xii Yă Ndiöxí. ¹³ Dico téé cuihna iní-xi quide cobrá ñáhá xii ñăyiu cuendá impuèstú-áⁿ chi xica lùha nutñi-dé, te ni lùha ñá túú cùy-ì-dé ndonehe núú-dé andiu cuendá sá ndíxí cuéchi iní-dé nchaa sá ñà túú vâha quide-dé, te ndèdí ndaha-dé pèchú-dé sá ndihú iní-dé, te xáhaⁿ-dē xii Yă Ndiöxí: “¿Yòhó Dútú Ndiöxí cundàhú iní ñáhá xii-í, chi ío cuèhé să ñà túú vâha quide-í núú-n!”, càchí-dé xáhaⁿ-dē xii Yă Ndiöxí. ¹⁴ Te na càchí tnúhu-í xii-ndo să téé cuihna iní-xi quide cobrá ñáhá xii ñăyiu-áⁿ ñí tedóho Yă Ndiöxí nchaa tnúhu ní cáháⁿ-dē, te ní quide càhnu iní-gă nchaa sá ñà túú vâha ní quide-dé, te cuánuhú-dé vehe-dé. Te téé cùu fariséú-áⁿ ñà túú ní tedóho ñaha Yă Ndiöxí xii-dé. Chi nchaa ñăyiu na càda cahnu mee-xi ñuyú-a te vá cúú-yu ñăyiu cùnuu, te nchaa ñăyiu ñá túú quide cahnu mee-xi, ñăyiu-áⁿ cunúú-yu —càchí Jèsús xáhaⁿ-gă xii-yu.

Jèsús quidé ù-gă landú

(Mt. 19:13-15; Mr. 10:13-16)

¹⁵ Te ìⁿ úú ñăyiu ndècá-yu landú lìhli cuáháⁿ núú Jèsús chi cuiní-yu sá téndàha ñaha-gă xii-güexi, te òré ní xiní cue téé xica cuu ndihí-gă sá ndècá-yu landú-áⁿ cuáháⁿ núú-gă, te ní ngúita-güedé ténàá ñáhá-güedě xii-yu, te xáhaⁿ-güedě sá vă

dúcáⁿ càdá-yu. ¹⁶ Dico Jèsús ní cana ñaha-gã xii-güedé, te ní xáhaⁿ-gã:

—Chí dáñá ná quixi nahi landú lĩhli-áⁿ nõù-í-a, te vá càdí-ndó ìchi-güexi, chi dàtná cúú vãha iní cue landú lĩhli-áⁿ ducaⁿ cùu vãha iní cue ñáyiu yĩndaha ñaha Yá Ndiõxí. ¹⁷ Te ña càchí tnúhu ndáá-í xii-ndo sã nõu vá quĩndáá iní ñáhá-ndó dàtná quídé dãva landú lĩhli sãndáá iní ñáhá xii-í, te vá ndĩhu ndaha ñaha Yá Ndiõxí xii-ndo, te vá ndúú tãhú-ndó cùndecu-ndo ndihí-gã ni caa ni quĩhíⁿ —càchí-gã xáhaⁿ-gã xii-güedé.

*J^hn tée cuica càháⁿ ndihí-dé Jèsús
(Mt. 19:16-30; Mr. 10:17-31)*

¹⁸ Te j^hn tée cùnuu ní xicáⁿ tnúhú-dě núú Jèsús, te xáhaⁿ-dě xii-gã:

—Yòhó Mèstrú, cùu-n tée ío vãha iní-xi, te cuiní-í nõu vá cùndèe iní-n càchí tnúhu-n nã cúú sã vãha cada-í cuendá nduu tãhú-í cundecu-í ndihí Yá Ndiõxí ni caa ni quĩhíⁿ —càchí-dé xáhaⁿ-dě xii-gã.

¹⁹ Te Jèsús ní xáhaⁿ-gã xii-dé:

—¿Te cùtnuní iní-n nãcuáa ndùu tnúhu càháⁿ-n sã yũhú vãha iní-ãⁿ? Chi j^hndĩ díi-ni Yá Ndiõxí vãha iní-gã. ²⁰ Te yòhó xini-n nãcuáa ní cachí Yá Ndiõxí cada ñáyiu, te duha ní cachí-gã: “Nchòhó cue tée vá càháⁿ ndihí-ndo ñàdihí te núu ñá díú ñàdihí-ndó cùu-yu, te ducaⁿ-ni nchòhó cue ñáyiu dìhí tucu vá càháⁿ ndihí-ndo tée te núu ñá díú yĩ-ndo cuu-güedé, te vá cáhni-ndó tnàha ñáyiu-ndo, te ni vã dúhú-ndó sã ndécú ndihí-yu, te ni vã dácacu-ndo cuéchi neñúú sã cúú-xí tnàha ñáyiu-ndo, te canehe-ndo sã yĩñùhu núú tãtã-ndó ndihí núú nãná-ndó”, duha ní cachí Yá Ndiõxí cada ñáyiu —càchí Jèsús xáhaⁿ-gã xii-dé.

²¹ Te tée-áⁿ ní xáhaⁿ-dě xii-gã:

—Nchaa xĩãⁿ ní ngüita-í quídè-í ndéé cùtnàhá cúú lãndú-í —càchí-dé xáhaⁿ-dě xii-gã.

²² Te Jèsús ní xáhaⁿ-gã xii-dé:

—Dico cùmání ìngá núú sã cádá-n, vitna te quĩhíⁿ-n te dico-n nchàa sã ndécú ndihí-n, te díhú-n cuãha tãhú-n cuè ñáyiu ndàhú, te ducaⁿ te nduu tãhú-n cùndecu vãha-n nõu ndécú Yá Ndiõxí táxí tnùní-gã,

te na yãha ducaⁿ càda-n te quixi-n chĩtnahá ñáhá-n xii-í —càchí-gã xáhaⁿ-gã xii-dé.

²³ Te sã dúcáⁿ ní xáhaⁿ Jèsús xii-dé, te ío ní cundiyí-dé, chi ío cuica-dě. ²⁴ Te sã ní xini ñáhá Jèsús xii-dé cùndiyí-dé, núu ní cachí-gã:

—Ío úhú quĩndáá iní ñáyiu cuica Yá Ndiõxí cuendá ndĩhu ndaha ñaha-gã xii-yu! ²⁵ Te yáchí-gã yãha j^hn càméyu yaú j^hn yiqui tìcú dàcúúxí sã quĩndáá iní j^hn ñáyiu cuica Yá Ndiõxí cuendá ndĩhu ndaha ñaha-gã xii-yu —duha ní cachí-gã.

²⁶ Te nchaa ñáyiu ní tecú dóho-xi tnúhu ní càháⁿ-gã ní xáháⁿ-yu xii-gã:

—¿Te yoo naníhí tãhú te núu ducaⁿ vãíⁿ? —càchí-yu xáháⁿ-yu xii-gã.

²⁷ Te Jèsús ní xáhaⁿ-gã xii-yu:

—Cue ñáyiu ñuyíú-a chí vá ndácũ-yu ná cada-yu nãcuáa ndĩhu ndaha ñaha Yá Ndiõxí xii-yu, dico mee-gã chí ndacu-gã ndĩhu ndaha ñaha-gã xii-yu chí nchaa sã vãha ndacu-gã quídé-gã —càchí-gã xáhaⁿ-gã xii-yu.

²⁸ Te té Pèlú ní xáhaⁿ-dě xii-gã:

—Nchúhú ní dándõo-ndí nchaa sã ndécú ndihí-ndí, te ní tuha ñaha-ndí xii-n —càchí-dé xáhaⁿ-dě xii-gã.

²⁹ Te ní xáhaⁿ-gã xii ñáyiu:

—Na càchí tnúhu ndáá-í xii-ndo sã nchãá ñáyiu na dãndóo vehe-xi, àdi tãtã-xi, nãná-xi, ñaní-xi, cúha-xi, ñadĩhí-xi, déhe-xi cuendá sã cuiní-yu ndĩhu ndaha ñaha Yá Ndiõxí xii-yu, ³⁰ te ío-gã cuéhé sã cuãñaha-gã xii-yu cundecu ndihí-yu, te ñá díú-ni xĩãⁿ, chí tnàhá nduu tãhú-yu cundecu ndihí ñáhá-yu xii-í ni caa ni quĩhíⁿ ná sãá nduu —càchí-gã xáhaⁿ-gã xii-yu.

*Jèsús càháⁿ tucu-gã sã cáhni ñaha-güedé
xii-gã*

(Mt. 20:17-19; Mr. 10:32-34)

³¹ Te Jèsús ní taudĩⁿ-gã ndi ùxúú cue tée xica cuu ndihí-gã tnuú ñáyiu, te ní xáhaⁿ-gã xii-güedé:

—Vitna te quĩhíⁿ-ó nõú Jerusalén, chí yacáⁿ cada-xi nchaa nãcuáa sa ní chídó tnùní cue tée ní xóo càháⁿ tnúhu Yá Ndiõxí ndéé sanaha nãcuáa yãha yũhú Tée cùu ñaní tnàhá-ndó nchàa-ndo. ³² Chí cuáha

cuendá ñáhá-güedě xii-í núú cuè téé ñá túú cùu cue téé isràél, te cudíquí ndeé ñáhá-güedě xii-í, te cúcuèhé ñáhá-güedě, te tiú díí ñáhá-güedě xii-í. ³³ Te caniha-güedě ndíhi ñí, te dātñuní cahni ñaha-güedě xii-í, dico nduu úní sá cùú-í te ndoto-í —càchí-gá xáhaⁿ-gã xii-güedě.

³⁴ Dico ní ñíⁿ tnúhu ní cáháⁿ-gá ñá túú ní tècú tnùn-í-güedé, chi ío yídáhu tnúhu ní cáháⁿ-gá nùu xíáⁿ ní ñíⁿ ñá túú ní tècú tnùn-í-güedé.

Jèsús quidé tātna-gá núú ñíⁿ téé cuàá ñúú Jericó

(Mt. 20:29-34; Mr. 10:46-52)

³⁵ Te òré tá cùyatni Jesús ñúú Jericó cuáháⁿ, te yuhu ìchi cuáháⁿ-gá-áⁿ núcõo ñíⁿ téé cuàá xicáⁿ ndàhú-dé. ³⁶ Te òré ní tecú dóho-dé xicáháⁿ vai ñáyíu xiyáha-yu, te ní xicáⁿ tnúhú-dé núú ñáyíu ndècu ndíhi-dé ná cuendá ducaⁿ vai-yu yáha. ³⁷ Te ní xáhãⁿ-yu sá Jèsús téé ñúú Nazàrét ñúhú-dé ichi. ³⁸ Te níhi ní cáháⁿ-dé, te xáhãⁿ-dë xii-gá:

—Jèsús ñaní tnáhá ndíi Dàvíí, cundàhú iní ñáhá xii-í! —càchí-dé xáhaⁿ-dë xii-gá.

³⁹ Te ñáyíu xixódó núú nùú Jèsús ní tenàá ñáhãⁿ-yu xii-dé, te xáhãⁿ-yu sá ná càdí-dé yuhu-dé dico uuⁿ-gá níhi ní cáháⁿ-dë xáhaⁿ-dë xii-gá:

—Yòhó téé cùu ñaní tnáhá ndíi Dàvíí, cundàhú iní ñáhá xii-í! —càchí-dé xáhaⁿ-dë xii-gá.

⁴⁰ Te Jèsús ní ngüíñí-gá, te ní táuchíúⁿ-gã ní sángueheⁿ ñaha cuè téé ndíhi-gá. Te òré ní quexìo-dé núú-gã, te ní xicáⁿ tnúhú-gã núú-dë, te xáhaⁿ-gã:

⁴¹ —¿Ná cuíní-n càda ñaha-í xii-n-í? —càchí-gá xáhaⁿ-gã xii-dé.

Te téé cuàá-áⁿ ñí xáhaⁿ-dë:

—Mèstrú, cuíní-í cada tātna-n nùú-í cuendá cundehe-í —càchí-dé xáhaⁿ-dë xii-gá.

⁴² Te Jèsús ní xáhaⁿ-gã:

—Sa ní ndúha núú-n chi ní sándáá iní-n Yá Ndiõxí —càchí-gá xáhaⁿ-gã xii-dé.

⁴³ Te òré-ni-áⁿ ñí ndúha núú-dë, te ní chinchícúⁿ-dé Jèsús, te ní cachí-dé sá ío càhnu cuu Yá Ndiõxí. Te nchaa ñáyíu ní xiní nàcuáa ní cuu ní ndúha núú-dë tnàhá-yu ní cachí-yu sá ío càhnu cuu Yá Ndiõxí.

19

Jèsús ndíhi ñíⁿ téé nàni Zaqueú

¹ Te Jèsús ní sáá-gá ñúú Jericó, te ta yáha-gá xití ñúú-áⁿ cuáháⁿ. ² Te ñúú-áⁿ ndécú ñíⁿ téé cuica nàni-dé Zaqueú, te cùnno-dé táxí tnùn-í-dé cue téé cùndíhi-dé, cue téé cuihna ìní-xi quide cobrá ñáhá xii ñáyíu cuendá impuèstú. ³ Te téé-áⁿ cuíní-dé quíní-dé Jèsús òré-áⁿ ní cùu te ñá ní ndàcu-dé, chi ío cuéhé ñáyíu, te ñá túú dùcúⁿ-dé. ⁴ Te xínu-dé ní ngódó núú-dë te ní sáá-dé díquí ñíⁿ yutnu sìcómorú nùtní yatni yuhu ìchi núú yáha Jèsús cuendá cuíní-dé quíní ñáhá-dë xii-gá. ⁵ Te òré tá yáha Jèsús xíáⁿ, te ní ndonehe núú-gã díquí yutnu núú càndodo-dé-áⁿ, te ní xáhaⁿ-gã xii-dé:

—Zaqueú, tanùu ndíhi díquí yutnu-áⁿ, chi tnávíí quexìo-í vehe-n ndètátú-í —càchí-gá xáhaⁿ-gã xii-dé.

⁶ Te té Zaqueú-áⁿ ñí nuu ndíhi-dé díquí yutnu-áⁿ, te ío ní cudíí ìní-dé ní queheⁿ cuendá-dé Jèsús vehe-dé. ⁷ Te sá ñí xiní ñáyíu ní quexìo Jesús vehe-dé, te ncháa-yu ní ngüíta-yu càháⁿ cuéhe-yu cuendá-gá, te xitnàhá-yu:

—Téé-a cuánguìhu-dé vehe ñíⁿ téé ndècu ìchi cuehé ichi duha —càchí-yu xitnàhá-yu.

⁸ Te té Zaqueú-áⁿ ñí ndacuíñí-dé tnuú-yu, te xáhaⁿ-dë xii Jèsús:

—Yòhó Mèstrú, na cuáha-í ñáyíu ndàhú cuádava nchaa sá ndécú ndíhi-í. Te núu yoo ní dándàhú-í ní dúhù-í, te codo ùní-gá tnàhá sá ñí dúhù-í-yu nacuáñaha-í xii-yu —càchí-dé xáhaⁿ-dë xii-gá.

⁹ Te Jèsús ní xáhaⁿ-gã xii té Zaqueú:

—Vitna ní naníhí tàhú-n ndíhi nchaa ñáyíu xindecu vehe-n, chi tnàhá-n cùu-n ñaní tnáhá ndíi Àbrahám. ¹⁰ Te yúhú Téé cùu ñaní tnáhá-ndó nchaa-ndo véxi-í nándùcu-í ñáyíu ní xíta nihnu cuendá dàcácu nihnu-í-yu núú ùhú núú ndàhú —càchí-gá xáhaⁿ-gã xii-dé.

Nàcuáa ní quide-güedé ndíhi díhúⁿ cuááⁿ (Mt. 25:14-30)

¹¹ Te nchaa ñáyíu-áⁿ ñí sani ìní-yu sá ndíhi-ni ndíhu ndaha ñàha Yá Ndiõxí xii-yu cuendá sá ñí cuyatni Jèsús ñúú Jerusalén, te xíáⁿ nùu ní ngüíta Jèsús ní cani-gá ñíⁿ

cuèndú núu-yu cuèndá tecú tnùní váha-yu tnúhu-gá. ¹² Te xáhaⁿ-gã xií-yu:

—Ní xíndecu ìⁿ téé cùu ñaní tnáhá ñáyiú cùnuu, te cuáháⁿ-dé ingá ñuú xicá cuèndá yacáⁿ cuáha ñaha-güedé chiúⁿ coo-dé, te dătnùní ndixi-dé quindaha-dé titní ñuú. ¹³ Te cùmání-gã quee-dé quíhíⁿ-dé, te ní cana-dé úxí cue téé xínu cuechi núú-dé, te ní sáñaha-dé ndí dííⁿ núú-güedé ìⁿ caa ìⁿ caa díhúⁿ cuááⁿ, te ní xáhaⁿ-dē: “Chí cádá ndáhú ndihí díhúⁿ-ăⁿ ndèé ná sáá nduu násáá-í”, cächí-dé xăhaⁿ-dē xii-güedé. ¹⁴ Dico nchaa ñáyiú ñuú quindaha-dē-ăⁿ ñá túú tnáhá iní-yu sá quíndaha ñaha-dé, núu ní tendáhá-yu cue téé nèhe tnúhu cuáháⁿ núú cuè téé cuáñaha chiúⁿ coo-dé-ăⁿ, te ní xáhăⁿ-yu sá cüñaha-güedé sá ñá túú tnáhá iní-yu sá tēe-ăⁿ quindaha ñaha-dé xií-yu. ¹⁵ Dico dacutíí sã ñí sáha-güedé téé-ăⁿ chiúⁿ coo-dé sá díú-dē quindaha-dē ñáyiú nchaa ñuú-ăⁿ, te ní nacuíco-dē cuánuhú-dé ñuú-dé. Te òré ní nasáá-dé vehe-dé, te ní tendaha-dē ìⁿ téé ní sánúcana ñaha xii cue téé xínu cuechi núú-dé, cue téé ní dándõ ndaha-dé díhúⁿ cuèndá cãcãⁿ tnúhú-dé núú-güedé ìⁿ ìⁿ-güedé núu ndèé dau ní chídó-xí díquí díhúⁿ sã ñí dándõ ndaha ñaha-dé-ăⁿ. ¹⁶ Te téé ní ndèxio díhna xăhaⁿ-dē: “Pàtróón, ní quide-í ndáhú ndihí díhúⁿ-n sã ñí dándõ ndaha ñaha-n xii-í, te sá ìⁿ ñí taxi-n te ní chídó-xí úxí-gá tnáhá te ná-a naqueheⁿ cuèndá-n”, cächí-dé xăhaⁿ-dē. ¹⁷ Te téé cùu patróón-dē-ăⁿ ñí xáhaⁿ-dē: “Ío váha téé xínu cuechi cuu-n chí ío váha ní quide-n, te sá ñí quide váha-n ndihí sacú díhúⁿ sã ñí dándõ ndaha ñaha-í xii-n, te xíáⁿ núu yúhú cächí-í sá táxí tnùní-n úxí ñuú vitna”, cächí-dé xăhaⁿ-dē. ¹⁸ Te ní ndexio ingá-dé, te ní xáhaⁿ-dē: “Pàtróón, ní quide-í ndáhú ndihí díhúⁿ-n sã ñí dándõ ndaha ñaha-n xii-í, te sá ìⁿ ñí taxi-n te ní chídó-xí úhúⁿ-gá tnáhá te ná-a naqueheⁿ cuèndá-n”, cächí-dé xăhaⁿ-dē. ¹⁹ Te ní xáhaⁿ téé cùu patróón-dē-ăⁿ xii-dé: “Te yòhó taxi tnùní-n úhúⁿ ñuú”, cächí-dé xăhaⁿ-dē xii téé xínu cuechi-ăⁿ. ²⁰ Te dătnùní ní ndexio tucu ingá-dé, te xăhaⁿ-dē: “Pàtróón, náu díhúⁿ-n-á, te naqueheⁿ cuèndá-n chí ní taxúha-í ní chidúcúⁿnuu-í ìⁿ pãnú te ñá túú ní quide-í ndáhú ndihí díhúⁿ-n, ²¹ chí

ní yúhú ñáhà-í xii-n, chí cùu-n ìⁿ téé díí, te nàqueheⁿ-n ìⁿ sá ñá túú ní tàxi ndecu-n, te nàtahu-n ìⁿ xichi núú ñá túú ní chihí-n tatá”, cächí-dé xăhaⁿ-dē xii patróón-dē. ²² Te ní xáhaⁿ patróón-dē xii-dé: “Yòhó cúú-n ìⁿ téé cuihna iní-xi xínu cuechi núú-í, te díu-ni nchaa tnúhu cãháⁿ-n-ăⁿ cächí tnùní-xi năcuáa cuu ndáá cuéchi-n. Te núu sãni iní-n sá cúú-í ìⁿ téé díí, te nàqueheⁿ-í ìⁿ sá ñá túú ní tàxi ndecu-í, te nàtahu-í ìⁿ xichi núú ñá túú ní chihí-í tatá, ²³ te núu ducaⁿ ña, ¿te ná cuèndá ñá túú ní cãhu iní-n dăsaⁿ nuu-n díhúⁿ ñí taxi-í, te cúñaha-n chăhu-yu díquí-xi, te òré ná násáá-í vehe-í, te sa ngódó lùha-gá díquí-xi naqueheⁿ cuèndá-í ní cùu-í?”, cächí-dé xăhaⁿ-dē xii téé xínu cuechi-ăⁿ. ²⁴ Te ní xáhaⁿ tēe cùu patróón-ăⁿ xii cue téé xíndecu xíáⁿ: “Chí quèndèé díhúⁿ cuááⁿ néhé tēe-a, te cuáha-ndo tēe nèhe úxí tucu díhúⁿ cuááⁿ-ăⁿ”, cächí-dé xăhaⁿ-dē xii-güedé. ²⁵ Te ní xáhaⁿ-güedé: “Pàtróón, dico sa nèhe-dé úxí díhúⁿ cuááⁿ”, cächí-güedé xăhaⁿ-güedé. ²⁶ Te ní xáhaⁿ tēe cùu patróón-ăⁿ: “Na cächí tnúhu-í xii-ndo sã cuè ñáyiú ío xii-xi te níhí-gã-yu cundecu ndihí-yu, te cue ñáyiú sacú ndécú ndihí cuita ndihí nihnu nchaa sá ndécú ndihí-yu”, cächí téé cùu patróón-ăⁿ xăhaⁿ-dē xii-güedé. ²⁷ Te xăhaⁿ tucu-dé xii-güedé: “Nchaa ñáyiú cùu úhú iní ñáhá xii-í ñá tnáhá iní-yu quindaha-í-yu, te chí cándecá-yu taquixi iha, te cahni-ndõ-yu núú-í-a”, cächí téé cùu patróón-ăⁿ xăhaⁿ-dē xii-güedé —duha cuáháⁿ cuèndú ní caní Jèsús núú ñáyiú.

Jèsús cuánguihu-gá ñuú Jerusálén

(Mt. 21:1-11; Mr. 11:1-11; Jn. 12:12-19)

²⁸ Te sátá dúcãⁿ ñí cãháⁿ-gá, te ní nucúhuⁿ ichi-gá cuáháⁿ-gá ñuú Jerusálén. ²⁹ Te òré sa ní cuyatni-gá ñuú Bètfaqé, ndihí ñuú Bètaniá te xíáⁿ cáá yùcu nani Olivú, te ní xáhaⁿ-gã xii úú cue téé xica cuu ndihí-gá:

³⁰ —Chí cuáháⁿ ñuú cáá yàtni yacáⁿ, te òré quexìo-ndo yacáⁿ, te naníhí-ndó ìⁿ búrru ndètníi-di, te vátá yõo ìⁿ-gá codo ñaha xii-di, te nandaxi-ndo-di te candeca-ndo-di quixi.

³¹ Te núu yoo na cãcãⁿ tnúhu núú-ndó ñá cuèndá nándaxi-ndo-di, te cúñaha-ndo xii-yu sá yúhú Yaá xicá cùu ndihí-ndo xini ñuhu-í-di —cächí-gá xáhaⁿ-gã xii-güedé.

³² Te cue tée-áⁿ nǐ xica-güedé cuáháⁿ-güedé, te nchaa-ni nàcuáa ní xáhaⁿ Jèsús ducaⁿ nǐ cuu, ³³ chi mei òré nándàxi-güedé búrru-áⁿ nǐ quexìo cue ñáyiú cùu xítóhó-dì xicáⁿ tnúhu-yu núú-güedé, te xǎháⁿ-yu:

—¿Ná cuendá nándàxi-ndo búrru-ndí-i? — càchí-yu xǎháⁿ-yu.

³⁴ Te ní xáhaⁿ-güedé xii-yu:

—Nà ndaxi-ndí-dì chi Yaá xicá cùu ndìhi-ndí xíní ñùhu ñaha-gá xii-dì — càchí-güedé xǎháⁿ-güedé xii-yu.

³⁵ Te ndèca-güedé-dì cuáháⁿ núú ndécú Jèsús, te òré ní quexìo-güedé ndìhi-dì núú ndécú-gǎ te ní sacáⁿ ndodo-güedé dóo-güedé sátá-dì, te ní ngódó ñáhá-gǎ xii-dì. ³⁶ Te ío cuéhé ñáyiú ta sàcáⁿ-yu dóo-yu ichi cuáháⁿ-gá cuendá núú dóo-yu-áⁿ yǎha-gá ndìhi quitì yòdo-gá. ³⁷ Te ní nucuíta nuu-gá ichi tìndúú yucu Òlívú tá cùyatni-gá ñuú Jerusàlén cuáháⁿ, te nchaa ñáyiú sàndáá iní ñáhá xii-gá nchìcúⁿ ñáhǎ-yu te ní ngúita-yu níhi càháⁿ-yu sá cúdǐ iní-yu, te càchí-yu sá ìo càhnu cuu Yá Ndióxi cuendá sá nǐ xíní-yu nchaa sá vǎ yóo tnàhí ndàcu cada ní quide-gá. ³⁸ Te càchí-yu:

—¡Ío càhnu cuu Yaá véxi quindaha ñaha xii-o, te diu-gá cúu-gǎ Yaá ní tendaha Yá Ndióxi véxi quide núú-gǎ! ¡Te ío càhnu cuu mee-gá! ¡Te andiú ñà túú tnàhí ná cúu! — duha càchí-yu.

³⁹ Te ñⁿ úú cue tée cùu fariséú ñúhú tnàhá tnuú ñáyiú-áⁿ nǐ xáhaⁿ-güedé xii Jèsús:

—Mèstrú, cúñaha nchàa ñáyiú ndìhi-n na càdí-yu yuhú-yu —càchí-güedé xǎháⁿ-güedé xii-gá.

⁴⁰ Dico Jèsús ní xáhaⁿ-gǎ xii-güedé:

—Te na càchí tnúhu-í xii-ndo sǎ ñuú ñáyiú-a na càdí-yu yuhú-yu ña, te nchaa yúú càháⁿ níhi-xi dàtná ñⁿ ñáyiú —càchí-gá xáhaⁿ-gǎ xii-güedé.

⁴¹ Te òré ní cuyatni-gá ñuú Jerusàlén te ní xíní-gá, te ní ndáhyú-gá cuendá nchaa ñáyiú dii ñuú-xi-áⁿ sǎ ndìhú iní-gá. ⁴² Te ní xáhaⁿ-gǎ xii cue ñáyiú-áⁿ:

—Ío cuu váha iní-í te núu dícó nchòhó tecú tnùnì-ndó vitna ñⁿ tnúhu sá cadá váha ñaha xii-ndo, chi ñà túú-gǎ ná cuu cundecu-ndo, te núu na tècú tnùnì-ndó. Dico ñà tècú

tnùnì-ndó, chi ío yidáhu tnúhu-a. ⁴³ Te sáá nduu tnündòho tnúhu ndàhú sá cúu-xi-ndó, te nchaa cue tée dava-gá ñuú cúu ùhú iní tnáhá ndìhi-ndo quixi-güedé chidoco ñaha-güedé xii-ndo, te ní càndéé núú ndécú-ndó-áⁿ dacàa-güedé ndóho cuendá xíáⁿ quihi váha-güedé nàá ndìhi ñaha-güedé xii-ndo, te vá dañá-güedé cunu-ndo. ⁴⁴ Te cahni ñaha-güedé xii-ndo, te ndìhi nchaa vehe-ndo dàngoyo-güedé ndéé cimièntú-xi, chi ñà túú ní cuinì-ndó nàcuáha-ndo cuendá òré ní quixi coto ñaha Yá Ndióxi xii-ndo — duha ní xáhaⁿ-gǎ xii ñáyiú ñuú-áⁿ.

Jèsús ñà túú tnàhá iní-gá nàcuáa quidé-yu veñúhu

(Mt. 21:12-17; Mr. 11:15-19; Jn. 2:13-22)

⁴⁵ Te Jèsús cuánguihu-gá xití veñúhu càhnu sá ìo cùnuu, te xití veñúhu-áⁿ xǐndecu cue ñáyiú quide ndáhú ndìhi cue ñáyiú xísaaⁿ. Te ní queñuhu ñaha Jèsús xii-yu quehé. ⁴⁶ Te ní xáhaⁿ-gǎ xii-yu:

—Núú tütú Yá Ndióxi càháⁿ-xi nàcuáa ní càháⁿ-gá, te duha ní cachí-gá: “Vehe-í cúu-xi núú càháⁿ ndìhi ñaha ñáyiú xii-í”, duha ní càháⁿ-gá càchí-xi núú tütú-gá. Dico nchòhó quidé-ndó vehe-gá vehe ñadúhú — càchí-gá xáhaⁿ-gǎ xii-yu.

⁴⁷ Te Jèsús nchaa nduu dànehé-gá ñáyiú xití veñúhu, dico cue tée cùu dútú cùnù, ndìhi cue tée dàcuaha ñaha xii ñáyiú nchaa tnúhu ní chídó tnùnì ndíi Moisés, ndìhi cue tée cùnuu ñuú-áⁿ ndúcú-güedé nàcuáa cada-güedé cahni ñaha-güedé xii-gá. ⁴⁸ Dico ñà nihí-güedé nàcuáa cada-güedé, chi cuendá nchaa ñáyiú ío cùdí iní-yu ndèdòho-yu nchaa tnúhu càháⁿ-gá.

20

Jèsús ndécú ndìhi-gá tnúhu ndee iní

(Mt. 21:23-27; Mr. 11:27-33)

¹ Te ñⁿ nduu yìhi Jèsús xití veñúhu càhnu sá ìo cùnuu danehé-gá ñáyiú tnúhu sá càháⁿ nàcuáa naníhí tàhú-yu. Te ní quexìo cue tée cùu dútú cùnù ndìhi cue tée dàcuaha ñaha xii ñáyiú nchaa tnúhu ní chídó tnùnì ndíi Moisés, ndìhi cue tée cùu sacuéhé núú ñáyiú isràél, ² te ní xáhaⁿ-güedé xii-gá:

—Cuinì-ndí cachí tnúhu-n xii-ndí nása ndùu tnúhu ndee iní ndécú ndìhi-n núu quide-n nándi sá quidé-n. ¿Te yoo ducaⁿ nǐ

taxi tnúhu ndee ìní-áⁿ xii-n? —càchí-güedé xǎhaⁿ-güedě xii-gá.

³ Te Jèsús ní xáhaⁿ-gǎ:

—Yúhú tnàhá-í cuìní-í cǎcáⁿ tnúhu-í ìⁿ sǎ cǎcáⁿ tnúhu-í núú-ndó, te cachí tnúhu-ndo.

⁴ Te chí cǎchí tnúhu xii-í yoo ní táúchíúⁿ ñí dǎcuándùte ndíi Juàá ñáyiu. ¿Yá Ndiǒxí ãⁿ cuè téé ñuyíú-a ní táúchíúⁿ dùcaⁿ ní quide ndíi? —càchí-gá xáhaⁿ-gǎ xii-güedé.

⁵ Te ní nguíta-güedé xǐtnàha-güedé:

—¿Nása cúñaha-o? Chi núu nà cúñaha-o sǎ Yǎ Ndiǒxí ní táúchíúⁿ dùcaⁿ ní quide ndíi Juàá ñá, te quesaha-dě: “¿Ná cuendá ñá túú ní sǎndáá ìní-ndó tnúhu ní cǎháⁿ ndíi vǎiⁿ?”, quesaha-dě. ⁶ Àdi te núu nà cúñaha-o sǎ cuè ñáyiu ñuyíú-a ní táúchíúⁿ dùcaⁿ ní quide ndíi ñá, te nchaa ñáyiu cuáha ñàhá-yu yúú xii-o, te cahni ñàhá-yu, chi cǎchí-yu sǎ ndáá sǎ Yǎ Ndiǒxí ní táúchíúⁿ-gǎ ní cǎháⁿ ndíi Juàá tnúhu-gá núú ñáyiu —càchí-güedé xǐtnàha-güedé.

⁷ Te ní xáhaⁿ-güedé xii-gá sǎ ñà túú xǐní-güedé yoo ní táúchíúⁿ dùcaⁿ ní dǎcuándùte ndíi Juàá ñáyiu. ⁸ Te ní xáhaⁿ Jèsús xii-güedé:

—Te núu ducaⁿ te ni yǔhú vá cǎchí tnúhu-í xii-ndo yòo ní taxi tnúhu ndee ìní duha quide-í —càchí-gá xáhaⁿ-gǎ xii-güedé.

*Cuendá cue téé cuihna ìní-xi
(Mt. 21:33-44; Mr. 12:1-11)*

⁹ Te sǎtá dúcáⁿ te ní nguíta Jèsús ní cani-gá ìⁿ cuendú núú ñáyiu nàcuáa tecú tnùní-yu tnúhu-gá, te xáhaⁿ-gǎ xií-yu:

—Ìⁿ téé ní xitu-dé mee-ni yòho yaha stilé núú ñúhú-dě. Te ní sǎá ìⁿ nduu quǐngaca cuu xica-dě vǎi nduu te ní dǎndóo ndaha-dě sǎ ñí xitu-dé-áⁿ xii ìⁿ úú cue téé cǎháⁿ ndíi-dé cuendá cada chiuⁿ-güedé, te ní ndatnúhu-güedé sǎ òré ná cùu te cuu cuendá dava-güedé te ducaⁿ te ní quee-dé cuáháⁿ-dé. ¹⁰ Te sǎtá ñí sǎá nduu ñí cuu nchaa ndéhé yoho yàha stilé sǎ ñí xitu-dé-áⁿ, te ní xáhaⁿ-dě xii ìⁿ téé xǐnu cuechi núú-dě: “Cuáháⁿ cǎcáⁿ-n sǎ cúú cuendá-í núú cuè téé ní dǎndóo ndàha-í nchaa yoho yàha stilé sǎ ñí xitu-í”, cǎchí-dé xǎhaⁿ-dě. Te téé xǐnu cuechi-áⁿ ñí xica-dé cuáháⁿ-dé, dico cue téé ndéé nchaa yoho yàha stilé-áⁿ ñí tñi-güedé téé xǐnu cuechi-áⁿ te ní caniha-güedé, te ní nacuícúⁿ ñáhá-güedé xii-dé, te ñá túú tnàhí ná ní

sǎñaha-güedé. ¹¹ Te dǎtnùní téé cùu xítóhó nchaa yoho yàha stilé-áⁿ ñí tendaha tùcu-dé ìngá téé xǐnu cuechi núú-dě cuáháⁿ-dé, dico ðiu-ni ducaⁿ ñí quide ñaha-güedé xii-dé, chi ní xícuèhé ñáhá-güedé, te ní caniha-güedé te ní nacuícúⁿ ñáhá-güedé, te ñá túú tnàhí ná ní sǎñaha-güedé. ¹² Te téé cùu xítóhó nchaa yoho yàha stilé-áⁿ ñí tendaha tùcu-dé ìngá-dé cuáháⁿ-dé, te ðiu-ni ducaⁿ ñí quide ñaha tùcu-güedé, chi ní dǎncuèhé ñáhá-güedé, te ní nacuícúⁿ ñáhá-güedé.

¹³ Te téé cùu xítóhó nchaa yoho yàha stilé-áⁿ ñí sani ìní-dé: “¿Nása cada-í vitna? Váha-gá tendaha-í déhe-í téé ío cùu ìní-a núhú-dé, chi cudana te òré quini ñáhá-güedé xii-dé, te canehe-güedé sǎ yǐñùhu núú-dě”, duha ní sani ìní-dé. ¹⁴ Dico òré ní xǐní cue téé quide chiuⁿ-áⁿ déhe xítóhó nchaa yoho yàha stilé-áⁿ, te ní xǐtnàha-güedé: “Téé-áⁿ téé véxi nduu táhú ñuhu-a ndíi nchaa sǎ cáá núú-xi, dico cahni-o-dě te mee-o nduu táhú-ó sǎ ndúú táhú-dě”, cǎchí-güedé xǐtnàha-güedé. ¹⁵ Te ní queñuhu ñaha-güedé ìⁿ xio yuhu ñuhu-áⁿ, te ní sahani ñaha-güedé xii-dé —duha cuáháⁿ cuendú ní cani Jèsús núú-yu.

Te dǎtnùní ní xáhaⁿ tùcu-gá xií-yu:

—¿Te nchòhó sa cùtnuní ìní-ndó nàcuáa cada ñaha xítóhó ñuhu-áⁿ xii cue téé-áⁿ ñá? ¹⁶ Chi núhú-dé te cahni-dé cue téé-áⁿ, te dǎndóo ndaha-dě ñuhu-dé xii cue téé cùtnuní ìní-dé cada ndáá —càchí-gá xáhaⁿ-gǎ xií-yu.

Te sǎ dúcáⁿ ñí cǎháⁿ-gá, núu ní cachí-yu:

—¿Sǎ vǎ cǎchí Ndiǒxí sǎ dúcáⁿ yàha-o! —càchí-yu.

¹⁷ Te Jèsús ní ndacoto-gá núú-yu, te ní xáhaⁿ-gǎ:

—Chí cǎchí tnúhu nása quèe-xi nacuáa cǎháⁿ-xi núú tütú Yǎ Ndiǒxí, núú cǎchí-xi: Yúú sǎ ñí dáquéé tǐhú cue téé dàcaa vehe ní saa-xi cùu-xi yúú cúnùu vitna.

Duha cǎchí-xi núú tütú-gá. ¹⁸ Te nchaa ñáyiu ñá túú cuini tñi tnúhu-í, te ndohó-yu dǎtná ìⁿ ñáyiu tnàhnú duuⁿ òré ndúá-yu núú yúú, àdi núu na tàù ñáhá-xi te dàcachi duuⁿ ñaha-xi —cachí-gá xáhaⁿ-gǎ xií-yu.

Cuendá impuèstú

(Mt. 21:45-46; 22:15-22; Mr. 12:12-17)

19 Te cue tée cùu dútú cùnùu, ndihì cue tée dàcuaha ñaha xii ñáyiù nchaa tnúhu ní chídó tnùnì ndíi Moisés ní cuiní-güedé tñi-güedé Jèsús òré-ni-á ní cùu, chi ní cutnùnì iní-güedé sá cuendá-güedé ní cáháⁿ-gá, dico ní yùhú-güedé cuendá sá ïo vài ñáyiù. 20 Te ní ndúcú-güedé nàcuáa cada-güedé tñi ñaha-güedé xii-gá, te ní tendaha-güedé cue tée cuáháⁿ ngoto dayuhu ñaha xii-gá, te cuáháⁿ-güedé dàtná cue tée váha iní-xi, te ndücu-güedé nàcuáa cada-güedé nùu cáháⁿ-gá ìⁿ tnúhu sá ñà túú tàú-gá cáháⁿ-gá cuendá ducaⁿ te candeca ñaha-güedé xii-gá quíhìⁿ cuáha cuendá ñáhá-güedé núú tée cùnùu. 21 Te ní xáhaⁿ-güedé xii Jèsús:

—Mèstrú, ñihí-ndí tnúhu sá dánèhé-n ñáyiù mee-ni tnúhu váha, te cuèi ndédani caa ñáyiù ìⁿ-ni cáháⁿ-n ndihí-yu, te cáháⁿ ndáá-n nàcuáa cáháⁿ Yá Ndiöxí cundecu-o ñùyíú-a. 22 Te cachí tnúhu xii-ndí nùu váha-ni cháhu-ndí té Cèsár tée ío cùnùu cuendá impuèstú áⁿ ñáhá —càchí-güedé xáhaⁿ-güedé xii-gá.

23 Dico Jèsús ní cutnùnì iní-gá sá xító ndèé ñáhá-güedé xii-gá, núu ní xáhaⁿ-gá xii-güedé:

24 —Chí dánèhé ñáhá xii-í ìⁿ díhún cuèixìⁿ te cachí tnúhu-ndo nùu yoo núú-xi ndèé, ndihì yoo ñu-xi ndèé —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Núú tē Cèsár ndèé ndihì ñu-dé —càchí-güedé xáhaⁿ-güedé xii-gá.

25 Te ní xáhaⁿ tùcu-gá xii-güedé:

—Te núu ducaⁿ te chí nàcuáha té Cèsár sá cúu cuendá-dé, te sá cúu cuendá mée Yá Ndiöxí, te xíáⁿ nacuáha-ndo-gá —càchí-gá xáhaⁿ-gá xii-güedé.

26 Te ñá ní ndàcu tnahí-güedé datìcánuu ñaha-güedé xii-gá núu tnúhu cáháⁿ-gá, chi òré ní cáháⁿ-gá, te da ní cuñúhu-güedé nchaa tnúhu ní cáháⁿ-gá, te váha-gá ní sadí-güedé yuhu-güedé.

Cuendá nchaa ñáyiù ndoto
(Mt. 22:23-33; Mr. 12:18-27)

27 Te sáta dúcáⁿ te ní sáá ìⁿ ùú cue tée cùu saducéu núu ndécú Jèsús. Te cue tée-án ñà túú sàndáá iní-güedé sá ndótó cuè ñáyiù ní xihí, te ní xáhaⁿ-güedé xii-gá:

28 —Mèstrú, ndí Moisés càchí ndíi núú tütú ndècu vitna sá nùu ìⁿ tée na cùu, te quendóo ñadìhí-dé te ñá túú dèhe-dé ní xòo ndihì-aⁿ, te tée cùu ñani-dé naqueheⁿ-dé ñaha ní quendóo quèé-áⁿ cuendá coo dèhe-dé ndihì-aⁿ cuendá ñani-dé tée ní xihí-áⁿ. 29 Te ní xíndecu úsá tñahá cue tée mee-ni ndí ñani-güedé. Te tée díhna ní níhí ñadìhí-dé, dico ñá túú ní cùdí-dé cundecu-dé chi ní xihí-dé, te ní ìⁿ dèhe-dé ñá túú ní xòo ndihì ñadìhí-dé-áⁿ. 30 Te tée cùu úú ní naqueheⁿ-dé ñaha ní quendóo quèé-áⁿ dico ní xihí tucu-dé, te ní ìⁿ tucu dèhe-dé ñá túú ní xòo ndihì ñaha-áⁿ. 31 Te tée cùu uní ní naqueheⁿ tucu-dé ñaha ní quendóo quèé-áⁿ, te ñu-ni ducaⁿ ní xihí-dé, te ní xínu ndí úsá-güedé ní cándeca ñaha-güedé xii ñaha-áⁿ, dico ní ìⁿ-güedé ñá túú ní xòo dèhe-güedé ndihì-aⁿ, te ní ndihì-güedé ní xihí. 32 Te ndéé núú ní ndihì-ná ní xihí tñahá ñadìhí-áⁿ. 33 Te na sáa nduu ndòto-güedé ndihì ñaha-áⁿ ¿Te ndédacàa-güedé ñadìhí-güedé cuu-aⁿ-i? Chi ndí úsá-güedé ní cándeca ñaha-güedé xii-aⁿ —càchí-güedé xáhaⁿ-güedé xii-gá.

34 Te Jèsús ní xáhaⁿ-gá xii-güedé:

—Nchaa ñáyiù ñuyíú-a tñandahá-yu.

35 Dico nchaa ñáyiù ní nduu táhú ndoto díhna nuu ñáyiù-án cundecú-yu ndihì Yá Ndiöxí ni caa ni quíhìⁿ, te yàcáⁿ ñá túú-gá sá cándeca tñahá-yu. 36 Te ní ñà túú-gá tnúhu xihí, chi cuu-ná-yu dàtná cue espíritú xínú cuèchi núú Yá Ndiöxí cuendá sá ní ndotó-yu, chi cúu-yu dèhe-gá. 37 Te ndéé ndíi Moisés ní chídó tnùnì ndíi núú tütú ndíi sá ncháá ñáyiù ní xihí ndotó-yu, te ñu-ni xíáⁿ cáháⁿ-xi cuendá tñatáu nchicúⁿ ñuhú, te ñu-ni xíáⁿ cachí tucu-xi sá Yá Ndiöxí cúu-gá Ndiöxí ndíi Àbrahám, ndíi Isàác, ndihì ndíi Jàcób. 38 Te cue tée-án chi cuèi ní xihí-güedé sá cúu-xi nchòhó, dico sá cúu-xi Yá Ndiöxí chi ndècu vívú-ni-güedé. Chi cùnùnì iní-ó sá Yá Ndiöxí cúu-gá Ndiöxí mee-ni cuè ñáyiù xíndecu vívú, te ñá túú cùu-gá Ndiöxí cue ñáyiù ñá túú ndècu vívú. Te sá cúu-xi mèe-gá chi nchaa ñáyiù ndècu ndihì-gá ndécú vívú-yu cuèi sa ní xihí-yu núú ñuyíú-a —càchí-gá xáhaⁿ-gá xii-güedé.

39 Te ìⁿ tée dàcuaha ñaha xii ñáyiù nchaa tnúhu ní chídó tnùnì ndíi Moisés ní xáhaⁿ-dè

xii Jèsús:

—Mèstrú, váha-ni càháⁿ-n —càchí-dé xáhaⁿ-dè xii-gá. ⁴⁰ Te ñá túú-gá ní cùyii-güedé cacadáⁿ tnúhú-güedé ni ñⁿ tnúhu núú-gá.

Yoo déhe-xi cùu Cristú
(Mt. 22:41-46; Mr. 12:35-37)

⁴¹ Te Jèsús ní xáhaⁿ-gá xii-güedé:

—¿Te nása càchí-tu-yu sá Crìstú Yaá tendaha Yá Ndiöxí quixi ñuyú-a cùu-gá déhe ndíi Dàvíí? ⁴² Te mee ndíi Dàvíí-áⁿ ñí cachí ndíi núú librú Sălmú:

Dútú Ndiöxí ní xáhaⁿ-gá xii Yaá cúu Xítóhó-í:

“Ngóo xio cùha-í,

⁴³ te yúhú cada-í te nchaa sá cúu ùhú iní ñáhá xii-n canehe-xi sá yíñùhu núú-n.”

Duha ní xáhaⁿ Dútú Ndiöxí xii Yaá cúu Xítóhó-í càchí ndíi núú librú Sălmú. ⁴⁴ ¿Te nása cùu Cristú déhe ndíi Dàvíí, te mee ndíi ní cachí ndíi sá cúu-gá Xítóhó ndíi-í? —càchí Jèsús xáhaⁿ-gá xii-güedé.

Jèsús càháⁿ-gá cuendá cue tée dàcuaha ñaha xii ñáyiu nchaa tnúhu ní chídó tnùní ndíi Moisés

(Mt. 23:1-36; Mr. 12:38-40; Lc. 11:37-54)

⁴⁵ Te òré ndátnùhu Jèsús ndíhi cue tée xica cuu ndíhi-gá xíndedóho ñaha ñáyiu, te xáhaⁿ-gá xii-güedé:

⁴⁶ —Cada cuendá-ndó vǎ cadá-ndó nàcuáa quide cue tée dàcuaha ñaha xii ñáyiu nchaa tnúhu ní chídó tnùní ndíi Moisés, chi tnàhá iní-güedé cuihnu-güedé dóo nání sǎ sácuihnu cue tée cùnuu. Te nchaa núú tàcá ñáyiu cuiní-güedé sá ndíhi tnúhu yíñùhu cáháⁿ ndíhi ñáhá-yu xii-güedé, te nàcáxi-güedé xilé sácóo nchíhi cue tée cùnuu-gá xití veñúhu conchíhi-güedé, te ducaⁿ-ni quide-güedé cuèi òré quíhu-güedé mèsá caxi-güedé òré ndécú-güedé ñⁿ vico, chi mee-ni núú sácóo cue tée cùnuu-gá cuiní-güedé coo-güedé. ⁴⁷ Te quèndeé-güedé vehe nchaa ñáyiu dǐhí ñáyiu quèé, te ío naha càháⁿ ndíhi-güedé Yá Ndiöxí cuendá cuiní-güedé cáháⁿ váha-yu cuendá-güedé. Te sá dúcáⁿ quide-güedé te sáá nduu te ío-gá ndoho-güedé núú ùhú núú ndàhú dàcúxí dàva-gá ñáyiu —càchí-gá xáhaⁿ-gá xii-güedé.

21

Dǐhúⁿ nduu táhú Yá Ndiöxí ní dáquèe ñⁿ ñaha ndàhú ñaha quèé

(Mr. 12:41-44)

¹ Te Jèsús ní xiní-gá xití veñúhu xǐdáquèe cue tée cuica dǐhúⁿ nduu táhú Yá Ndiöxí xití alcanciá. ² Te ní xiní-gá tnàhá ñⁿ ñaha ndàhú ñaha quèé ní dáquèe-aⁿ úú dǐhúⁿ còbrí, ³ te ní xáhaⁿ Jèsús xii cue ñáyiu xǐndecu-áⁿ:

—Na càchí tnúhu ndáá-í xii-ndo sǎ ñaha ndahú ñaha quèé-a ío-gá nándǐhi dǐhúⁿ ñí dáquèe-aⁿ xití alcanciá nduu táhú Yá Ndiöxí dàcúxí dǐhúⁿ ñí dáquèe dava-gá-yu. ⁴ Chi nchaa ñáyiu-áⁿ ñí dáquèe-yu mee-nǎ sǎ ñí ndóo-ná, dico ñaha quèé-a cuèi ndàhú-aⁿ dico ní dáquèe-aⁿ ñíhǐ dǐhúⁿ sǎ cuááⁿ-áⁿ sǎ cǎxí-áⁿ ní cùu —cachí-gá xáhaⁿ-gá xii-yu.

Jèsús càchí-gá sá ngóyó veñúhu

(Mt. 24:1-2; Mr. 13:1-2)

⁵ Te ñⁿ úú ñáyiu xǐcáháⁿ-yu cuendá veñúhu càhnu sǎ ìo cùnuu sǎ ìo vii càa nchaa yúu yǐhǐ, ndíhi cuendá nchaa sǎ ñí sǎñaha táhú ñáyiu yǐhǐ xití-xi. Te Jèsús ní xáhaⁿ-gá xii-yu:

⁶ —Sáá nduu te nchaa sǎ cúñùhu-ndo-a vǎ cùndùu-gá-xi dàtná cáá-xí vitna, chi ni ñⁿ-gá yúu vǎ códó nchíhi tnaha-gá-xi chi ndíhi ngoyo —càchí-gá xáhaⁿ-gá xii-yu.

Nàcuáa cada-xi nduu ta cùyatni naa ñuyúú

(Mt. 24:3-28; Mr. 13:3-23)

⁷ Te cue tée xǐndecu-áⁿ ñí xícáⁿ tnúhú-güedé núú Jèsús, te xáhaⁿ-güedé xii-gá:

—Mèstrú, ¿te ná nduu dùcaⁿ cada-xi ngoyo veñúhu, àdi nándǐ cùu sǎ cadá-xí cuendá cutnùní iní-ndí sǎ sǎ ta cuyatni nduu ducaⁿ cada-xi-í? —cachí-güedé xáhaⁿ-güedé xii-gá.

⁸ Te Jèsús ní xáhaⁿ-gá xii-güedé:

—Ío quíhi iní-ndó cùndecu-ndo, te vá dáhá-ndó mè-ndo dandahú ñáhá ñáyiu xii-ndo. Chi ío cuéhé cue tée coo ñuyúú-a, te danàni-güedé méé-güedé dàtná nání-í te cachí-güedé: “Yúhú cùu-í Crìstú Yaá ní tendaha Yá Ndiöxí véxi ñuyúú-a”, duha cachí-güedé. Te cachí tucu-güedé: “Vitna sa ní sáá nduu càda-xi nchaa nacúáa ní cáháⁿ-í”, duha cachí-güedé. Dico vǎ

quindáá iní-ndó, te nì vá túhá-ndó-güedě. ⁹ Te òré ná nihí-ndó tnùhu sá titní nàcióⁿ xìnàá-güedé te dava ñuú xìnàá-güedé ndi mèe-güedé, te vá yùhú-ndó chi dacuití sá dúcáⁿ càda-xi, dico vátá sàá-gá nduu nàa ñuyíú òré ducaⁿ càda-xi —cachí-gá xáhaⁿ-gã xii-güedé.

¹⁰ Te xãhaⁿ tucu-gá xii-güedé:

—Nchaa cue téé ñⁿ nàcióⁿ nàá-güedé ndihi cue téé ingá nàcióⁿ, te titní ñuú ngüíta-güedé nàá-güedé. ¹¹ Te titní xichi ñuyíú ñihi vìhi tnáa, te titní tucu xichi ñuyíú coo tnamá, te titní tucu xichi ñuyíú quixi cuéhé, te titní núú sá cáda-xí àndiú, te yùhú ñáyíu.

¹² Te òré cúmání-gã cada-xi nchaa nàcuáa càháⁿ-í-a, te cue téé cùu úhú iní ñáhá xii-ndo tñi ñaha-güedé, te candeca ñaha-güedě xii-ndo quíhíⁿ xití veñúhu-güedé cada ndáá-güedé cuéchi-ndo, te chihi ñaha-güedě vecaá xii-ndo, te candeca ñaha-güedě quíhíⁿ núú cuè téé cùnūu yindaha nacióⁿ àdi núú dàva-gá cue téé cùnūu sá cuendá-í. ¹³ Te òré ducaⁿ na càda ñaha-güedé xii-ndo, te òré-áⁿ tàú-xi cáháⁿ váha-ndo cuendá-í núú-güedé. ¹⁴ Te vá cání iní-ndó nūu nása cunduu tnúhu cúñaha-ndo xii-güedé cuendá cácu nihnu-ndo. ¹⁵ Chi yùhú dacàhu iní ñáhà-í xii-ndo tnùhu cúñaha-ndo xii-güedé, te taxi-í sá vátá quini tnùnigá-ndó, te ni ñⁿ ñáyíu cùu úhú iní ñáhá xii-ndo vá nihí-gá-yu tnúhu cúñahá-yu xii-ndo. ¹⁶ Te ndéé tātá-ndó, ndihi ñaní-ndó, ndihi cue ñáyíu cùu ñaní tnáhá-ndó, ndihi cue ñáyíu càháⁿ ndihi váha-ndo cuàha cuendá ñáhã-yu xii-ndo núú cuè téé cùchiuⁿ, te dava-ndo càhni ñaha-güedé xii-ndo. ¹⁷ Te ío cuéhé ñáyíu cuu úhú iní ñáhã-yu xii-ndo sã cuendá-í. ¹⁸ Dico Yá Ndiõxí ío coto ñaha-gã xii-ndo chi ndéé idi díquí-ndó còto-gá. ¹⁹ Te núu na càda ndee iní-ndó cànchicúⁿ nihnu ñaha-ndo xii-í, te nduu táhú-ndó cùndecu-ndo ndihi Yá Ndiõxí ni caa ni quíhíⁿ.

²⁰ Te nduu na quini-ndó ñùhu doco sandadú ni càndéé yuhu ñuú Jerusàlén, te sa cutnùní iní-ndó sã sã ní cuyatni nduu dànaa-güedé ñuú-áⁿ. ²¹ Te dàvá-áⁿ nchaa ñáyíu xíndecu distritú Jùdeá xíní

ñùhu-xi cunú-yu quíhíⁿ-yu xití yucu, te nchaa ñáyíu xíndecu ñuú Jerusàlén quee-yu xití ñuú-áⁿ, te ñáyíu ñá túú xíndecu ñuú-áⁿ vã ndíhu-gá-yu. ²² Chi dàvá-áⁿ cuu-xi nduu tnùndòho tnúhu ndàhú, te ducaⁿ càda-xi chi ducaⁿ ndéé tnuní núú tütú Yá Ndiõxí nàcuáa dandòho ñaha-gá xii-yu. ²³ Te ndàhú ní cuu nchaa ñáyíu dñí ñùhú dèhe-xi, ndihi nchaa ñáyíu ndèca déhe vitna sàdi na sáá nduu dùcaⁿ cada-xi! Chi ío cuéhé tnùndòho tnúhu ndàhú coo núú ndécú-yu dàvá-áⁿ, te xíãⁿ cuu-xi ñⁿ tnùndòho tendaha Yá Ndiõxí quixi sá cúu-xi-yu. ²⁴ Te dava cue téé cuú-güedé cahni ñaha-güedě, te dava-güedé tñi ñaha-güedě candeca ñaha-güedě quíhíⁿ nchaa ñuú xícá, te cue téé dava-gá ñuú cunuu-güedě ñuú Jerusàlén, te mee Yá Ndiõxí cachí-gá te núu ná daha nduu cunuu-güedě ñuú-áⁿ.

Nàcuáa cada-xi òré quixi tucu Téé cùu ñaní tnáhá cuè ñáyíu

(Mt. 24:29-35, 42-44; Mr. 13:24-37)

²⁵ Te cada-xi ñⁿ sá vátá quini-gá ñáyíu núú nchicanhii, ndihi núú yóó, ndihi núú nchàa chódíní, te ñuyíú-a coo tnúhu ndíhú iní-xi te vá cutnùní iní-yu nása cada-yu cuendá sá ío dusaⁿ càda ndute lamár òré candaundéé tnáhá-xí. ²⁶ Te nchaa ñáyíu cuneé-yu sá yùhú-yu, ndihi sá ndíhú iní-yu cuendá nchaa sá cáda-xí ñuyíú-a, te quidi-xi andiú. ²⁷ Te sátá dúcáⁿ te quini-ndó yùhú Téé cùu ñaní tnáhá-ndó nchàa-ndo quee-í andiú quixi-í ichi xití vícò, te dàvá-áⁿ quini ñáhá nchàa ñáyíu sá ío cùnūu-í te ndàcu-í quide-í nchaa sá váha. ²⁸ Te òré ná ngüíta-xi ducaⁿ càda-xi, te cuita cundee-gã iní-ndó quíhíⁿ, te quíhí iní-ndó chi sa ní cuyatni víí-nã nduu cácu nihnu-ndo vã cùndecu-gá-ndó núú ñuyíú yícá cuéchi-a —càchí-gá xáhaⁿ-gã xii-güedé.

²⁹ Te ní canigá ñⁿ cuendú núú-güedé nàcuáa tecú tnùní váha-güedé tnúhu-gá, te xáhaⁿ-gã xii-güedé:

—Chí cùndèhe yutnu ngúxí ndihi nchaa dava-gá yutnu. ³⁰ Chi nàtahú ndaha-xi, te òré ducaⁿ quide-xi te càchí-ndó sã sã ní cuyatni nuu cahni. ³¹ Te ñu-ni ducaⁿ sãtnahá-xi cùu òré ná quini-ndó càda-xi

nchaa nacuaa cãháⁿ-í, te sã dúcãⁿ te cutnùni iní-ndó sã sã ní cuyatni nduu ndíhu ndaha ñàha Yá Ndiõxí xii-ndo.

³² Te na cãchí tnúhu ndáá-í xii-ndo sã òré vátã cùú-gã cue ñáyiú xĩndecu ñuyíú-a vitna, te cada-xi nchaa nãcuáa ní cãháⁿ-í.

³³ Te andiú ndíhi ñuyíú-a chi ndíhi nihnu-xi, dico tnúhu-í chi vá ndíhí nihnu-xi, chi cùu-xi tnúhu ndáá.

³⁴ Te quihi iní-ndó vã cùndècu-ndo ichi cuehé ichi duha, te vá cùú-ndó ñáyiú quihu, te vá cùhúⁿ iní-ndó mèe-ni nchaa sã ío ñuyíú-a, chi núu ducaⁿ na càda-ndo te nacuaana-ndo sã sã nduu càda-xi nacuaa ní cãháⁿ-í. Te uuⁿni sãá nduu-ãⁿ, ³⁵ te cada-xi dàtnã cuiní-ndó quide ìⁿ trampã chi uuⁿni ngãva-xi, te ducaⁿ càda-xi nchaa ñáyiú xĩndecu ñuyíú-a, chi uuⁿni sãá nduu-ãⁿ. ³⁶ Te nchòhó cundecu túha-ndo te ío cãháⁿ ndíhi-ndo Yá Ndiõxí cuendã ndacu-ndo yãha-ndo nchãa tnúndòho quixi ñuyíú-a, te ducaⁿ te nasãá-ndó cùndecu-ndo núú ndécú yùhú Tée cùu ñãní tnãhá-ndó nchãa-ndo —cachí-gã xãháⁿ-gã xii-güedé.

³⁷ Te nduu ndùu ní xóo danéhé Jèsús ñáyiú tnúhu-gã xití veñúhu càhnu sã ío cùnuu, te niú niú ní xóo quíhíⁿ ngúdú-gã xití yucu Olívú. ³⁸ Te nehé nehé ní xóo quíhíⁿ nchaa ñáyiú veñúhu-ãⁿ nĩ xóo cund-edóho-yu nchaa tnúhu cãháⁿ-gã.

22

Ndùcu-güedé nãcuáa cada-güedé cahni-güedé Jèsús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Te sa ní cuyatni nduu tnãhá vico pãscuá, te vico-ãⁿ xéxí ñáyiú pãá sã ñã túú yìhi levadurá. ² Te cue tée cùu dútú cùnùu, ndíhi cue tée dàcuaha ñaha xii ñáyiú nchaa tnúhu ní chídó tnùní ndíi Moisés ndúcú-güedé nãcuáa cada-güedé cahni-güedé Jèsús, te dicó-ni sã xiyùhú-güedé ñáyiú.

³ Te yucu ñãvãha ní dácãhú iní ñãhá-xí xii té Jüdás déhe té Iscarioté, te núú tnãhá tée-ãⁿ cùú ùxúú tnãhá cue tée xica cuu ndíhi-gã ní cùu. ⁴ Te té Jüdás-ãⁿ nĩ sãháⁿ-dé ní ndatnúhu-dé ndíhi cue tée cùu dútú cùnùu, ndíhi cue tée tàxi tñuní ñãhá xii cue tée quide cuendã veñúhu nãcuáa cada-dé cuãha cuendã-dé Jèsús núú-güedé. ⁵ Te ío

ní cudíi iní-güedé, te ní xãháⁿ-güedé xii-dé sã cuãhaha-güedé díhúⁿ, ⁶ te ní xãháⁿ-dë sã cùú quèheⁿ-dé díhúⁿ-ãⁿ, te ní ngüita-dé ndúcú-dé nãcuáa cada-dé cuãha cuendã-dé Jèsús núú-güedé òré ñã túú ñáyiú.

Cùdini Jèsús ndíhi cue tée xica cuu ndíhi-gã
(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Te ní sãá nduu nĩ quesaha vico xexí-yu pãá sã ñã túú yìhi levadurá, te diu-ni nduu-ãⁿ sãhni-güedé ìⁿ mbéé líhli xéxí-yu.

⁸ Te Jèsús ní xãháⁿ-gã xii té Pèlú ndíhi té Juãá:

—Chí cuãháⁿ chi cada túha-ndo núú cùdini-o sacuaa nduu vico pãscuá — cãchí-gã xãháⁿ-gã xii-güedé.

⁹ Te ní xicãⁿ tnúhú-güedé núú-gã, te xãháⁿ-güedé xii-gã:

—¿Te ndéé cáá vèhe cuiní-n càda túha-ndí-i? —cãchí-güedé xãháⁿ-güedé xii-gã.

¹⁰ Te ní xãháⁿ Jèsús xii-güedé:

—Chí cùndèdóho na cãchí tnúhu-í xii-ndo nãcuáa cada-ndo. Òré quihu-ndo xití ñuú núú quíhíⁿ-ndó, te naníhí-ndó ìⁿ tée tànehe ìⁿ yoó ndute, te tée-ãⁿ candèndaha-ndo-dë quíhíⁿ, te núu ndèdacãa vehe na ndíhu-dé te xíãⁿ quíhu-ndo. ¹¹ Te cùñaha-ndo xii xitohó vehe-ãⁿ: “Yá cùú Mèstrú cãchí-gã nũu ndèdacãa xichi xití vehe-n cuãhaha nũu-n xii-gã cùdini-gã ndíhi cue tée xica cuu ndíhi-gã sacuaa nduu vico pãscuá”, duha cùñaha-ndo. ¹² Te dàtnùní danéhé ñãhá-dë xii-ndo ìⁿ quartú cãhnú càa núú nĩnu, chi vehe yòdo tnaha cuu-xi, te sa ní quide túha-dé nchaa sã ná ndíhi, te nchòhó dicó-nã sã cùdini-o cada túha-ndo — cãchí-gã xãháⁿ-gã xii-güedé.

¹³ Te ní xica-güedé cuãháⁿ-güedé, te nchaa-ni nãcuáa ní xãháⁿ Jèsús xii-güedé ní cuu, chi nchaa sa ndècu túha, te ní quide túha-güedé sã cùdini-güedé ndíhi-gã sacuaa nduu vico pãscuá-ãⁿ.

¹⁴ Te sãtã nĩ tnãhá òré cùdini Jèsús ndíhi cue tée ní táuchíúⁿ-gã cãháⁿ tnúhu-gã núú ñáyiú, te cuãnguihu ndíhi ñaha-gã xii-güedé mèsã. ¹⁵ Te xãháⁿ-gã xii-güedé:

—¿Ducaⁿ-ni ío sãni iní-í sã cùdini ndíhi ñaha-í xii-ndo sãcuua nduu vico pãscuá òré cùmãní-gã sãá nduu ndòho-í te cuú-í! ¹⁶ Te

na càchí tnúhu-í xii-ndo sã vã dúhá-gã caxi ndihí ñaha-í xii-ndo ndùu vico pascuá, chi ndéé òré ná sàá nduu nàsáá-ndó nũú táxí tnùní Yã Ndiõxí cundecu-o, te òré dává-áⁿ cada iní-ndó sã dàtná sá caxí tucu-o chí ío váha cuu iní-ó cundecu-o —cachí-gá xáhaⁿ-gã xii-güedé.

17 Te ní queheⁿ-gá ìⁿ vãsú ñúhú ndùdí ndéhé yoho yàha stilé, te ní ndacáⁿ táhú-gã núú Yã Ndiõxí, te dàtnùní ní xáhaⁿ-gã xii-güedé:

—Chí quéhéⁿ vãsú ñúhú ndùdí ndéhé yoho yàha stilé-a, te coho-ndo lùha luha nchaa-ndo. 18 Te na càchí tnúhu tucu-í xii-ndo sã vítaná-ñã duha xihí ndihí ñaha-í xii-ndo ndùdí ndéhé yoho yàha stilé-a te vã cóhó ndihí ñaha-gá-í, dico na sàá nduu nàníhí tnáhá-ó núú ndécú Tãtà-í Dútú Ndiõxí táxí tnùní-gã, te òré dává-áⁿ cada iní-ó sã dàtná sá cóhó ndihí ñaha tucu-í xii-ndo, chí ío cudíí iní-ó —cachí-gá xáhaⁿ-gã xii-güedé.

19 Te sáatá nĩ túhú cóhó-güedé ní cudíni-güedé, te ní queheⁿ-gá paá te ní ndacáⁿ táhú tucu-gá núú Yã Ndiõxí, te dàtnùní ní táhú cuèchi-gá, te ní dácãhũ ñaha-gã xii-güedé, te xáhaⁿ-gã:

—Paá-a cùu-xi datná yiqui cùñú-í, chí cahni ñaha-güedé xii-í sá cuendá-ndó, te ducaⁿ-ni càxi-ndo paá-a cuendá ndacu iní ñáhá-ndó xii-í —cachí-gá xáhaⁿ-gã xii-güedé.

20 Te òré du-ndi ducaⁿ nĩ quide-gá ndihí vãsú ñúhú ndùdí ndéhé yoho yàha stilé, chí ní queheⁿ-gá te òré sãñaha-gã xii-güedé coho-güedé, te ní xáhaⁿ-gã:

—Ndudí ñúhú vãsú-a cada iní-ndó sã cúu-xí dàtná níñi-í sá catí òré cahni ñaha-güedé xii-í. Te sá dúcáⁿ càti níñi-í xíãⁿ cutnùní ndáá sá Yã Ndiõxí cada-gá ingá núú sã váha sá cúu-xí-ndó.

21 'Dico vitna chí iha tnáhá téé cuáha cuendá ñáhá xii-í núú cuè téé cùu úhú iní ñáhá yihí-dé mèsá. 22 Te yúhú Téé cùu ñaní tnáhá-ndó nchaa-ndo ñuhú ichi-í cuáháⁿ-í cuú-í dàtná ní cachí Yã Ndiõxí. ¡Dico ndáhú ní cuu téé ducaⁿ na cuáha cuendá ñáhá xii-í núú cuè téé cùu úhú iní ñáhá! —cachí-gá xáhaⁿ-gã xii-güedé.

23 Te ní ngüíta-güedé ndúcú tnúhu núú tnáhá-güedé nũú ndéda càa-güedé ducaⁿ

càda cuáha cuendá ñáhá xii-gá núú cuè téé cùu úhú iní ñáhá.

Xĩndatnúhu-güedé ndédacàa-güedé cunuu-gã

24 Te sáatá dúcáⁿ te ní ngüíta-güedé xĩndatnúhu-güedé nũú ndédacàa-güedé tàu-güedé cunuu-güedé. 25 Dico Jèsús ní xáhaⁿ-gã xii-güedé:

—Nchaa cue téé yĩndaha ñaha xii ñáyiu ío tàxi tnùní-güedé, te mee-güedé cuíní-güedé sá càháⁿ váha ñáyiu cuendá-güedé. 26 Dico nchòhó vá dúcáⁿ càda-ndo, chí núu ìⁿ-ndo cunuu te cada-ni-ndo sã ñã túú cunuu-ndo, àdi cuu-ndo ìⁿ téé tàxi tnùní ñáhá xii cue téé xĩnu cuechi, te cada-ni-ndo sã cúu-ndó ìⁿ téé xĩnu cuechi-áⁿ. 27 Te vã càchí-ó sã téé xĩnu cuechi cunuu-gá-dé, chí téé quĩhu mèsá cùnùu-gá-dé. Dico yúhú ndécú ndihí ñaha-í xii-ndo dàtná ìⁿ téé xĩnu cuechi.

28 'Te nchòhó ducaⁿ-ni ndècu ndihí ñaha-ndo xii-í, te tàyáha ndihí ñaha-ndo xii-í nchaa sá táyáha-í véxi. 29 Te Tãtà-í Dútú Ndiõxí ní cachí-gá sá táxí tnùní-í, te yúhú càchí-í xii-ndo sã sàá nduu te tnáhá-ndó tàxi tnùní-ndó. 30 Te òré dává-áⁿ caxi-o coho-o càda-o núú táxí tnùní-í, te yacáⁿ ngüíta-ndo càda ndáá-ndó cuèchi ndi úxúú xichi ñáyiu isràél —cachí-gá xáhaⁿ-gã xii-güedé.

Jèsús càháⁿ-gá sá tẽ Pèlú cùñaha-dẽ xii ñáyiu sá ñã túú xini ñáhá-dẽ xii-gã

(Mt. 26:31-35; Mr. 14:27-31; Jn. 13:36-38)

31 Te Xítohó Jesucrístú ní xáhaⁿ-gã xii té Xĩmú:

—Yòhó Xĩmú, cundedóho váha ìⁿ tnúhu na càháⁿ-í-a, chí dàtná cuíní-n quide táchí trìú sàcáⁿ-xi duha sàcáⁿ-xi dàcáⁿ, ducaⁿ quèsaha yucu ñávãha cada ñaha-xi xii-ndo. Chí coto ndéé ñáhá-xí xii-ndo te núu ndisa sàndáá iní ñáhá-ndó xii-í. 32 Dico yúhú xicáⁿ táhú-í núú Yã Ndiõxí cuendá-n, cuendá sã vã dáñá ndéé-n quĩndáá iní ñáhá-n xii-í. Te òré ndixi túu iní-n sã ñã túú ní quide váha-n, te quĩhíⁿ-n cuáha-n cuè téé cùndihí-n tnúhu ndee iní cuendá canchicúⁿ nihnu-ni-güedé ichi Yã Ndiõxí —cachí-gá xáhaⁿ-gã xii-dé.

33 Te ní xáhaⁿ-dẽ xii-gá:

—Mèstrú, sa ndècu túha-í sá quĩhíⁿ ndihí ñaha-í xii-n vècaá, àdi cuéi na cùu ndihí ñaha-í xii-n —cachí-dé xáhaⁿ-dẽ xii-gã.

34 Te Jèsús ní xáhaⁿ-gã:

—Pèlú, na càchí tnúhu-í xii-n sã cùmání-gã cana ìñ líhi te úní xito cáháⁿ-n nũú ñãyiu sã ñà túú xíní ñáhá-n xii-í — càchí-gã xáhaⁿ-gã xii-dé.

Sa ní cuyatni ndoho Jèsús

³⁵ Te Jèsús ní xáhaⁿ-gã xii-güedé:

—Te cúnàhá ní tendaha ñaha-í xii-ndo ní sáháⁿ-ndó chiúⁿ-í, chí ñá túú ní cãnehe-ndo ní ìñ sã cúhúⁿ díhúⁿ-ndó, te ní ìñ sã cúhúⁿ ndàchiúⁿ-ndo ñá túú ní cãnehe-ndo. Te chí càchí tnúhu núú ió ìñ sã ní cùmání xii-ndo —càchí-gã xáhaⁿ-gã xii-güedé.

Te ní xáhaⁿ-güedé:

—Ñáhá, chí ní ìñ sã ñà túú ní cùmání xii-ndí —càchí-güedé xáhaⁿ-güedé xii-gã.

³⁶ Te ní xáhaⁿ-gã:

—Te vitna núú ndècu ndihi-ndo sã sácúhuⁿ díhúⁿ-ndó, àdi sã sácúhuⁿ ndachiuⁿ-ndo te canehe-ndo. Te núú ñá túú ndècu ndihi-ndo machití, te nadico-ndo dóó tĩcachi nihnu-ndo te cuaaⁿ-ndo. ³⁷ Te na càchí tnúhu-í xii-ndo sã dàcutíí sã yáha-í nàcuáa cáháⁿ-xi núú tütú Yã Ndiöxí núú càchí-xi: “Íñ-ni ní quide ñaha-güedé xii-gã, ndihi cue téé ndècu cuéchi-xi”, duha càchí-xi núú tütú-gã. Te ñá díú-ní xĩãⁿ yáha-í chí nchaandi túhú nàcuáa cáháⁿ-xi núú tütú-gã yáha-í —càchí-gã xáhaⁿ-gã xii-güedé.

³⁸ Te xáhaⁿ-güedé:

—Mèstrú, iha ndècu úú machití —càchí-güedé xáhaⁿ-güedé xii-gã.

Te ní xáhaⁿ-gã:

—Chí návíí-ñá yuhu-ndo, vá cáháⁿ-gã-ndó —càchí-gã xáhaⁿ-gã xii-güedé.

Jèsús cáháⁿ ndihi-gã Yã Ndiöxí yucu Òlívú (Mt. 26:36-46; Mr. 14:32-42)

³⁹ Te Jèsús ní quee-gã cuáháⁿ-gã yucu Òlívú, chí ducaⁿ tnàhí quide-gã. Te cue téé xica cuu ndihi-gã nchicúⁿ ñáhá-güedé xii-gã cuáháⁿ. ⁴⁰ Te òré ní quexio-gã xiáⁿ, te ní xáhaⁿ-gã xii-güedé:

—Chí cáháⁿ ndihi Yã Ndiöxí cuendá sã vã dácáháⁿ ñáhá yucu ñávãha xii-ndo càda-ndo sã ñà túú tàú-ndó càda-ndo —cachí-gã xáhaⁿ-gã xii-güedé.

⁴¹ Te sátá dúcáⁿ te ní quee dèñ-gã tnuú-güedé cuáháⁿ-gã ìñ xio, te sa ñunchií luha ní xica ndehe-gã núú ndécú-güedé, te

xiáⁿ ní ngüíñí xití-gã cáháⁿ ndihi-gã Tãtá-gã Dútú Ndiöxí. ⁴² Te xáhaⁿ-gã:

—Táu, te núú dícó cachí-n te taunihnu ñaha-n xii-í cuendá sã vã ndóhò-í ná sàá òré, dícó vá cádá-n nàcuáa càchí iní mée-í, chí cada-n nàcuáa càchí iní mée-n —càchí-gã xáhaⁿ-gã xii Tãtá-gã Dútú Ndiöxí.

⁴³ Te sátá dúcáⁿ te ní quexio ìñ espíritu xínú cuèchi núú Yã Ndiöxí ní sãñaha-gã-xi tnúhu ndee iní xii-gã. ⁴⁴ Te òré súúni ndihú iní-gã, te uuⁿ-gã súúni ní yuhu ní iní-gã cáháⁿ ndihi-gã Dútú Ndiöxí, te tnée-gã cáá dàtná cáá ñíñí te ngóyó nũú ñúhú.

⁴⁵ Te sátá ní yáha ní cáháⁿ ndihi-gã Tãtá-gã Dútú Ndiöxí, te ní ndacuíñí-gã cuánuhú-gã núú ní dándõ-gã cue téé-áⁿ, te òré ní nasáá-gã te xixidí-güedé cuendá sã ò cuéhé tnúhu sàni iní-güedé cuendá-gã. ⁴⁶ Te xáhaⁿ-gã xii-güedé:

—¿Ná cuendá xidí-ndó? Chí ndácõ, te cáháⁿ ndihi-ndo Yã Ndiöxí cuendá sã vã dácáháⁿ ñáhá yucu ñávãha xii-ndo càda-ndo sã ñà túú tàú-ndó càda-ndo —cachí-gã xáhaⁿ-gã xii-güedé.

Ní tñi-güedé Jèsús ndécá ñaha-güedé cuáháⁿ

(Mt. 26:47-56; Mr. 14:43-50; Jn. 18:2-11)

⁴⁷ Te cáháⁿ dúcáⁿ-ní Jèsús ní quexio vai cue téé, te ìñ téé xica cuu ndihi-gã nání Jüdás cúnú-dé yódó nùu-dé núú-güedé ní quexio ndéé núú-gã, te ní teyuhu ñaha-dé xii-gã, te núú tnàhá téé-áⁿ cúú ùxúú cue téé xica cuu ndihi-gã. ⁴⁸ Te ní xáhaⁿ Jèsús xii-dé:

—Jüdás, ¿te yòhó cuáha cuendá ñáhá-n xii yúhú Téé cùu ñaní tnàhá-ndó nchaa-ndo núú cuè téé cùu úhú iní ñáhá xii-í cáháⁿ-n nũu duha tàyuhu ñaha-n-áⁿ? —càchí-gã xáhaⁿ-gã xii-dé.

⁴⁹ Te sátá ní xiní nchaa cue téé cùndihi Jèsús nàcuáa cùu cue téé ní quexio-áⁿ, núú ní xicáⁿ tnúhú-güedé núú-gã, te xáhaⁿ-güedé xii-gã:

—Mèstrú, ¿cùu nàá-ndí ndihi-güedé ndihi machití-a ñá? —càchí-güedé xáhaⁿ-güedé xii-gã.

⁵⁰ Te ìñ-dé ní xehndé-ni-dé lóho xio cùha ìñ cue téé ní quexio-áⁿ, te téé-áⁿ xínú cuèchi-dé núú dütú cúnú-gã, te ní quen-deé duuⁿ lóho-dé. ⁵¹ Te Jèsús ní xáhaⁿ-gã xii-güedé:

—Chí dáñá-güedě, vá dúcáⁿ càda-ndo — cachí-gá xáhaⁿ-gã xii-güedé.

Te ní dácàá-gá ndaha-gá ní tendaha-gã núú ní xindeé lóho téé-áⁿ, te ní nduu váha dàtná-ni càa. ⁵² Te nchaa cue téé cùu dútú cùnùu, ndihi cue téé tàxi tnuní nchaa cue téé quide cuendá veñúhu sá ìo cùnùu, ndihi cue téé cùu sacuéhé núú ñàyiú isràél, nchaa cue téé-áⁿ vèxi tñi ñaha-güedě xii-gá, te ní xáhaⁿ-gã xii-güedé:

—Nchòhó, nèhe-ná-ndó màchití, nèhe-ná-ndo càrrutí véxi-ndo núú ndécù-í, dàtná quidé-ndó ìⁿ ñadúhú quidé ñàha-ndo xii-í. ⁵³ Te ducaⁿ-ni ní xini-ndó ní xindecu-í xití veñúhu càhnu sá ìo cùnùu ní xóo danèhé-í ñàyiú, te ní lùha ñá túú ní cùu tnándeé ñáhá-ndó xii-í òré-áⁿ, te vitna ní sáá òré ducaⁿ càda-ndo, te cada sácúíhná nàcuáa cùu iní-xi —càchí-gá xáhaⁿ-gã xii-güedé.

Té Pèlú càháⁿ-dé núú ñàyiú sá ñà túú xini-dé Jèsús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Te ní tñi-güedé Jèsús, te ndèca ñaha-güedé xii-gá cuáháⁿ vehe téé cùu dútú cùnùu-gá, te té Pèlú xica xica-ni nchicúⁿ ñáhá-dé xii-gá cuáháⁿ. ⁵⁵ Te òré ní quexio-güedé xiáⁿ te ní dátñáhá-güedé ñuhú quehé vehe-áⁿ, te ní càndéé yuhu nùhú-áⁿ ní ngóo teté-güedé, chi quide víxiⁿ-xi, te tnàhá té Pèlú ní ngóo teté ndihi ñaha-dé xii-güedé. ⁵⁶ Te xiáⁿ ndécú ìⁿ xíchí xínú cuèchi vehe-áⁿ, te òré ní xini-xi núcóo teté tnàhá té Pèlú, te ní ndacoto-xi núú-dé, te ní xáhaⁿ-xi xii-güedé:

—Tnàhá téé-a xica cuu ndihi-dé téé ndèca-güedé cuánguihu-áⁿ —càchí-xi xáhaⁿ-xi xii-güedé.

⁵⁷ Dico té Pèlú ñá túú ní nñuu-dé, te xáhaⁿ-dè xii-xi:

—Yúhú ñá túú xini-í téé-áⁿ —càchí-dé xáhaⁿ-dè xii-xi.

⁵⁸ Te tna tnaa-ni ní cuu, te ní xini ñáhá tucu ìⁿ-dé, te xáhaⁿ-dè:

—Yòhó tnàhá-n xica cuu ndihi-n téé ndèca-güedé cuánguihu-áⁿ —càchí-dé xáhaⁿ-dè xii-dé.

Dico té Pèlú ní xáhaⁿ-dè:

—Ñáhá, ñá díú yúhú xicá cùu ndihi-í-dé —càchí-dé xáhaⁿ-dè.

⁵⁹ Te sa ní cuu dàtná ìⁿ òré te càchí tucu ingá-dé:

—Ndáá sá tée-a xica cuu ndihi-dé téé ndèca-güedé cuánguihu-áⁿ, chi tnàhá-dé cùu-dé téé distritú Galileá —càchí-dé xáhaⁿ-dè xii-güedé.

⁶⁰ Te té Pèlú ní xáhaⁿ-dè xii téé-áⁿ:

—Yúhú ñá túú cùnùnì iní-í nása ndùu tnúhu càháⁿ-n —càchí-dé xáhaⁿ-dè.

Te ní vátá xinu ducaⁿ-gã tnúhu càháⁿ-dé ní cana-ni ìⁿ líhi. ⁶¹ Te Xítóhó Jesucrístú ní nchócótó-gã núú-dé, te òré-ni-áⁿ ní ndacu iní-dé tnúhu ní xáhaⁿ-gã xii-dé sá cùmání-gã cana ìⁿ líhi, te únì xito càháⁿ-dé sá ñà túú xini ñáhá-dé xii-gá. ⁶² Te té Pèlú ní quee-dé tnuú-güedé cuáháⁿ-dé ìⁿ xio, te ní ndáhyú víhí-dé ní ndixi cuèchi iní-dé.

Cùdiquí ndeé-güedé Jèsús

(Mt. 26:67-68; Mr. 14:65)

⁶³⁻⁶⁴ Te cue téé ndèé ñáhá xii Jèsús ní cudíquí ndeé ñáhá-güedé xii-gá, te ní dádáhu-güedé núú-gã, te ní caniha-güedé xii-gá, te xáhaⁿ-güedé:

—¡Cáháⁿ ná cótó yòo ní caniha xii-n! —cachí-güedé xáhaⁿ-güedé xii-gá.

⁶⁵ Te cuéhé víhí-gã tnúhu cuèhé ní xáhaⁿ-güedé xii-gá.

Jèsús ndécú-gã jündá

(Mt. 26:59-66; Mr. 14:55-64; Jn. 18:19-24)

⁶⁶ Te sáta ní túnadaá, te ní tacá cue téé cùu sacuéhé núú ñàyiú isràél, ndihi cue téé cùu dútú cùnùu, ndihi cue téé dàcuaha ñaha xii-yu nchaa tnúhu ní chídó tnùnì ndii Moisés, te ndèca-güedé Jèsús cuáháⁿ núú cáda-güedé jündá, te òré ní quexio-güedé ndihi-gá núú cáda-güedé jündá-áⁿ, te ní xáhaⁿ-güedé xii-gá:

⁶⁷ —Cuini-ndí cachí tnúhu-n xii-ndí nñu díu-n cùu-n Crístú Yaá ní tendaha Yá Ndiòxí véxi ñuyíú-a —càchí-güedé xáhaⁿ-güedé xii-gá.

Te ní xáhaⁿ-gã xii-güedé:

—Te núu na càchí-í sá díu-í cùu Crístú ñá, te ní vá quindáá iní-ndó, ⁶⁸ àdi te núu ìⁿ sá ná càcáⁿ tnúhu-í núú-ndó, te ní vá càchí tnúhu-ndo, te ní vá dáñá ñàha-ndo. ⁶⁹ Dico vitna ní cuyatni nduu ngóo yúhú Tée cùu ñaní tnàhá-ndó nchaa-ndo xio cuha Dútú Ndiòxí Yaá ío cùnùu —cachí-gá xáhaⁿ-gã xii-güedé.

⁷⁰ Te dàtnùnì nchaa-güedé ní xicáⁿ tnúhú-güedé núú-gã, te xáhaⁿ-güedé xii-gá:

—¿Te yòhó cúú-n Dèhe Yá Ndiõxí te núu ducaⁿ vání? —càchí-güedé xǎhaⁿ-güedé xii-gá.

Te ní xáhaⁿ Jèsús:

—Ndáá sá díú Dèhe-gá cúú-í dàtná càchí méé-ndó-ǎⁿ —càchí-gá xáhaⁿ-gǎ xii-güedé.

⁷¹ Te ní xítñaha-güedé:

—Ñá túú-gǎ xíní ñùhu-xi cue téé cáháⁿ ñùu ndáá sá ndécuéchi-dé àdi ñá túú ndécuéchi-dé chi yuhu mee-dé ní cáháⁿ-dé vitna ní xíndedóho-o —càchí-güedé xítñaha-güedé.

23

Jèsús ndécú-gǎ núú tǎ Pilatú

(Mt. 27:1-2, 11-14; Mr. 15:1-5; Jn. 18:28-38)

¹ Te nchaa-güedé ní ndacuíñí-güedé, te ndèca-güedé Jèsús cuáháⁿ núú té Pilatú, ² te núú tǎe-áⁿ ñí ngüíta-güedé sàcáⁿ cuéchi-güedé cuèndá-gá, te xáhaⁿ-güedé:

—Ní naníhí-ndí téé-a dàndahú-dé ñáyíu ñuú-ó, chi xáhaⁿ-dǎ xii-yu sá vǎ chǎhu-gá-yu impuèstú xii té Cèsár téé ío cùnūu, te càchí-dé sá díú-dǎ cúú-dǎ Crìstú Yáá ní tendaha Yá Ndiõxí véxi ñuyíú-a te yíndaha-dé ñáyíu càchí-dé —càchí-güedé xáhaⁿ-güedé xii-dé.

³ Te té Pilatú ní xícáⁿ tnúhu-dé núú-gǎ, te xáhaⁿ-dǎ xii-gá:

—¿Ndáá sá díú-n cùu-n téé yíndaha ñaha xii ñáyíu isràél-ǎⁿ? —càchí-dé xáhaⁿ-dǎ xii-gá.

Te Jèsús ní xáhaⁿ-gǎ xii-dé:

—Díu-í yíndaha-í-yu —càchí-gá xáhaⁿ-gǎ xii-dé.

⁴ Te té Pilatú ní xáhaⁿ-dǎ xii nchaa ñáyíu, ndíhi cue téé cùu dútú cùnūu:

—Yúhú cútnùní iní-í sá ñà túú ñí ñⁿ cuéchi téé-a —càchí-dé xáhaⁿ-dǎ xii-yu.

⁵ Dico níhi-gá ní cáháⁿ-güedé, te xáhaⁿ-güedé:

—Càchí-ndí sá ío dusaⁿ xíquide ñáyíu cuèndá nchaa sá dánèhé ñáhá-dǎ xii-yu, te ní quesaha-dǎ ndéé distritú Galileá, te ní yáha-dé ñíhí distritú Júdeá dánèhé-dé ñáyíu, te vitna ní sáá-ni-tu-dé ndéé ndíha dánèhé-dé-yu —càchí-güedé xáhaⁿ-güedé xii té Pilatú.

Jèsús ndécú-gǎ núú tǎ Hèrodés

⁶ Te sá dúcáⁿ ñí tecú dóho té Pilatú ní cacu nehé-yu distritú Galileá, núu xǎⁿ ní xícáⁿ tnúhú-dǎ núu-yu núu téé Galileá cúú-gǎ. ⁷ Te ní xáhǎⁿ-yu sá díú tǎe yàcáⁿ cúú-gǎ, núu xǎⁿ ní na dàyáha ñaha-dǎ xii-gá ndaha té Hèrodés téé cùu gobiernú distritú Galileá chi nduu-ǎⁿ ndécú-dǎ tnàhá-dé ñuú Jerusàlén-áⁿ. ⁸ Te òré ní xíní té Hèrodés-áⁿ

Jèsús te ío ní cudíí iní-dé, chi ní cunaha dùcaⁿ-ni cuíní-dé quíní ñáhá-dǎ xii-gá te ñá túú tnàhí xíní ñáhá-dǎ xii-gá ní cùu, chi cuèndá-ni tnúhu ñíhí-dé cuèndá-gá, te ndètu-dé sáá ñⁿ nduu quíní ñáhá-dǎ xii-gá, te cada-gá ñⁿ sá vǎ yóo tnàhí ndàcu cada cundehe-dé ní sani iní-dé. ⁹ Te vǎi sá ñí xícáⁿ tnúhú-dǎ núú Jèsús, dico ní ñⁿ tnúhu ñá túú ní cáháⁿ-gá. ¹⁰ Te xǎⁿ xíndecu tnàhá cue téé cùu dútú cùnūu, ndíhi cue téé dàcuaha ñaha xii ñáyíu nchaa tnúhu ní chídó tnùní ndíi Moisés, te cue téé-áⁿ súúní ío iní-güedé sàcáⁿ cuéchi-güedé cuèndá-gá.

¹¹ Te té Hèrodés ndíhi cue téé cùu sandadú-dé ñá túú ní cùu váha iní-güedé núú Jèsús, te ní cudíquí ndéé ñáhá-güedé xii-gá, te ní dácúhñú ñaha-güedé dóo vǎha xii-gá dàtná cáá dǎo sácúhñu cue téé sàquíndaha ñaha xii ñáyíu. Te dàtnùní té Hèrodés ní dánùhú ñáhá tucu-dé xii-gá ndaha té Pilatú.

¹² Te nduu-ǎⁿ ñí tnàhá tnúhu té Pilatú ndíhi té Hèrodés, chi cùu úhú iní tnàhá-güedé ní cùu.

Càchí-güedé sá cáhñí-güedé Jèsús

(Mt. 27:15-26; Mr. 15:6-15; Jn. 18:39-19:16)

¹³ Te té Pilatú ní nadatàcá-dé nchaa cue téé cùu dútú cùnūu ndíhi dava-gá cue téé cùnūu, ndíhi nchaa ñáyíu ñuú-áⁿ, ¹⁴ te ní xáhaⁿ-dǎ:

—Nchòhó ndécá-ndó tǎe-a véxi ní taxí cuèndá-ndó-dǎ iha, te càchí-ndó sá ío dusaⁿ quide ñáyíu cuèndá nchaa sá dánèhé ñáhá-dǎ xii-yu, te núú-ndó ndùcu tnúhu-í núú-dǎ ñùu ná ní quide-dé. Dico yúhú cútnùní iní-í sá ñà túú ñí ñⁿ cuéchi-dé dàtná cáháⁿ-ndó-ǎⁿ. ¹⁵ Te cuéi té Hèrodés díu-ni ducaⁿ cáháⁿ-dé sá ñà túú cuéchi-dé ñùu ní techíuⁿ ñaha tucu-dé cuándixi-dé iha. Te vitna sa ní cutnùní iní-ó sá ñà túú taú-xi cahni-o-dǎ chi ñá túú cuéchi ní quide-dé.

¹⁶ Te na dàndoho-ni-í-dé te dàcácu-í-dé —càchí-dé xáhaⁿ-dǎ xii-yu.

17 Te ndi tnahá nduu vico pascuá te dacuítí sã dácãcu té Pilatú-án ññ cue tée yìhi vecaá, chi ducaⁿ tnàhí quide-dé. 18 Dico nchaá-yu ní cuáá-yu, te xãhãⁿ-yu xii-dé:

—¡Queñuhu tée nàni Jesús-án, te cahni-n-dě! ¡Te dácãcu-n té Barrábás! — cãchí-yu xãhãⁿ-yu xii-dé.

19 Te té Barrábás-án ññ sanu ichi-dé ñáyiu ñúú ingá ichi, te ní ngüíta-yu ndihí-dé ní cuu úhú iní-yu cue tée cùchiuⁿ, te ní sahani-dé ndíyí núu xíãⁿ ní chihí ñaha-güedé vecaá xii-dé. 20 Te té Pilatú cuñí-dé dácãcu-dé Jesús núu xíãⁿ cãháⁿ ndihí ñaha tucu-dé xii-yu ni cùu, 21 dico uuⁿ-gá níhi ní cuáá-yu, te ní xãhãⁿ-yu xii-dé úú xito:

—¡Cata caá-dé núu cùrúxí! ¡Cata caá-dé núu cùrúxí! —cãchí-yu xãhãⁿ-yu xii-dé.

22 Te xito cuu úní ní xãháⁿ té Pilatú:

—¿Te ná cúú cuèchi ní quide-dé te núu ducaⁿ cuñí-ndó càda-í-dé-í? Te yúhú cútnuní iní-í sã ñà túú cuèchi ní quide-dé núu xíãⁿ ñà túú tàú-xi cahni-o-dě, te na dândoho-ni-í-dé te dácãcu-í-dé —cãchí-dé xãháⁿ-dě xii-yu.

23 Dico níhi-ni cãháⁿ-yu xãhãⁿ-yu sã ná càta caa ñaha-dé xii-gá núu cùrúxí, te ñáyiu-án ndihí nchaa cue tée cùu dútú cùnùu xicãháⁿ níhi-güedé ndihí-yu ndéé ní xínu iní té Pilatú cada-dé nãcuáa cãchí iní-yu. 24 Te ní xãháⁿ-dě xii-yu sã cúú càda-dé nãcuáa xãhãⁿ-yu. 25 Te ducaⁿ te ní dácãcu-dé té Barrábás tée ní sanu ichi ñáyiu ñúú ingá ichi, te ñu-ni-dé ní sahani-dé ndíyí núu xíãⁿ ní xíhi-dé vecaá, te dãtnuní ní táuchíuⁿ-dě cada-güedé Jesús nãcuáa xãhãⁿ-yu.

Sàta caa-güedé Jesús núu cùrúxí

(Mt. 27:32-44; Mr. 15:21-32; Jn. 19:17-27)

26 Te ndèca-güedé Jesús cuáhãⁿ núu catá càa ñaha-güedé xii-gá, te ichi cuáhãⁿ-güedé ndihí-gá ní tñi-güedé ññ tée ñúú Cirené nání-dě Ximú ñúhú-dě ichi duha cuándixi-dé ní sãháⁿ-dé yucu, te ní dácuidó ñaha-güedé xii-dé cùrúxí nchídó Jesús, te ní ngüíta nchicúⁿ-dé sátã-gã.

27 Te ío cuéhé ñáyiu nchicúⁿ ñáhã xii-gá cuáhãⁿ, te vai ñáyiu ñíhí ío níhi ndàhí-yu sã ndihú iní-yu cuendá Jesús. 28 Te Jesús ní nchócótó-gã núu-yu, te ní xãháⁿ-gã:

—Nchòhó ñáyiu ñíhí ñúú Jerusàlén, vá ndàhyú-ndó cuendá-í chí ndàhyú cuendá méé-ndó ndihí cuendá déhe-ndo. 29 Chi sãá nduu quèsaha ñáyiu: “Sã vãha táhú nchaa ñáyiu ñà túú càcu déhe-xi, ndihí nchaa ñáyiu vátã quini-gã cuhuⁿ déhe-xi, chi ni ñà túú xini-yu dacadi-yu”, duha quèsahã-yu. 30 Te dàvá-án cũñaha ñáyiu xii nchaa tindúú ndihí nchaa núu xiquí: “Chí tãcùuⁿ ngónchihí ñaha-ndo xii-ndí”, duha cũñahã-yu. 31 Te núu yúhú tée quide ndáá duha quide ñaha-güedé xii-í vitna, te ndéé-gã cada-güedé nchaa ñáyiu ndècu ichi cuehé ichi duha —cãchí-gã xãháⁿ-gã xii-yu.

32 Te ndèca tucu-güedé úú tnàhã cue tée ndècu ndisa cuèchi-xi cuáhãⁿ cuendá cahni ñaha-güedé xii-güedé ndihí Jesús. 33 Te òré ní quexio-güedé ndihí-gã ññ xichi núu nání Yiquí Díquí Ndíyí, te xíãⁿ ññ sata caa ñaha-güedé xii-gã núu cùrúxí, ndihí úú cue tée ndècu ndisa cuèchi-xi-án, te ññ-dé ní sata caa-güedé xio cùha-gã te ingá-dé ní sata caa-güedé xio dãtni-gã ñu-ni núu cùrúxí tucu. 34 Te ní xãháⁿ-gã xii Tãtã-gã Dútú Ndiõxí:

—Táu, cada cãhnu iní sã quidé-güedé, chi ñà túú cùtnuní iní-güedé ná cúú sã quidé-güedé —cãchí-gã xãháⁿ-gã.

Te cue tée cùu sandadú ní xito ndéé-güedé núu ndèdacãa-güedé cuu cuendã-güedé dóó-gã. 35 Te nchaa ñáyiu xindecu-án ndéhẽ-yu nãcuáa quide-güedé Jesús, te nchaa cue tée cùnùu ní cudíquí ndéé ñáhã-güedé xii-gã, te ní xitnãha-güedé:

—Te dava ñáyiu ní ndacu-dé ní dácãcu nihnu-dé, te vitna na dácãcu nihnu-dé méé-dě, te núu ndisa sã Crístú Yáá ní tendaha Yã Ndiõxí véxi ñuyíú-a cùu-dé —cãchí-güedé xitnãha-güedé.

36 Te tnàhã cue tée cùu sandadú ní cudíquí ndéé ñáhã-güedé xii-gã, chi ní sãndehe yatni-güedé núu tãcãa-gã sãñaha-güedé ndudí íã còho-gã ní cùu, 37 te ní xãháⁿ-güedé xii-gã:

—Te núu yòhó cúú-n tõe yindaha ñaha xii ñáyiu isràél, te dácãcu nihnu mee-n —cãchí-güedé xãháⁿ-güedé xii-gã.

38 Te ní taxi ndècu-güedé ññ sã ndéé lètrã ndàa díquí-gã te ndéé úní núu tnũhu, tnũhu grìégú, ndihí tnũhu làtín, ndihí tnũhu

hèbreú, te duha quèe-xi ndi nuní núu tnũhu-áⁿ “Tée-a cùu-dé tée yìndaha ñaha xii ñáyiú isràél”, duha quèe-xi.

³⁹ Te ìⁿ tée ndècu ndisa cuèchi-xi, tée ní sata caa-güedé diñi-gá xìcuèhé ñáhá-dě xii-gá, te xáhaⁿ-dě:

—Te núu yòhó cúu-n Crìstú Yaá ní tendaha Yá Ndiöxí véxi ñuyíú-a, te dàcácu nihnu mee-n, te dàcácu nihnu ñaha xii nchúhú tnàhá-ndí tucu —càchí-dé xáhaⁿ-dě xii-gá.

⁴⁰ Dico ingá tée cùndihí-dé tée tàcaa ingá xio diñi-gá ní tenàá ñáhá-dě xii-dé, te xáhaⁿ-dě:

—¿Te náa ñá túu ndàcu iní-n Yá Ndiöxí vitna duha cãa-o ndoho-o ndihí tée nani Jesús-a ñá? ⁴¹ Chi nchoo tàú ndisa-o sã dúhá ndòho-o nacháhu-o cuèchi-o, dico Jèsús-a chi ñá túu cuèchi-dé —càchí-dé xáhaⁿ-dě xii tée tàcaa ndihí-dé-áⁿ.

⁴² Te dàtnùní ní xáhaⁿ-dě xii-gá:

—Jèsús, ndacu iní ñáhá-n xii-í òré ná quixi-n taxi tnuní-n ñuyíú-a —càchí-dé xáhaⁿ-dě xii-gá.

⁴³ Te Jèsús ní xáhaⁿ-gã:

—Na càchí tnúhu ndáá-í xii-n sã méi ndùu vitna cundecu ndihí ñaha-í xii-n núu ñí nduu táhù-í cundecu-í —càchí-gá xáhaⁿ-gã xii-dé.

Ní xihí Jèsús

(Mt. 27:45-56; Mr. 15:33-41; Jn. 19:28-30)

⁴⁴ Te òré ní cuu cuádava nduu. Te ní cunee nihí ñuyíú, te ducaⁿ-ni cãa ní cuu ndéé caá úní sacuaa. ⁴⁵ Chi ñá túu-gã ní dàyehé nchíanchii te ní ndátá dõó cúu còrtiná veñúhu càhnu sá ìo cùnuu ní quée dava ndáá. ⁴⁶ Te níhi ní cáháⁿ Jèsús, te xáhaⁿ-gã xii Tãtá-gã Dútú Ndiöxí:

—Táu, naqueheⁿ cuendá-n espíritú-í —càchí-gá xáhaⁿ-gã xii Tãtá-gã.

Te tnúhu-ná-áⁿ ñí cáháⁿ-gá te ní xihí-ni-gá.

⁴⁷ Te òré ní xiní tée cùu capitáⁿ sá dúcáⁿ ñí cuu, te ní ndacu iní-dé Yá Ndiöxí, te ní cachí-dé:

—Sá ndáá ndisa sá tõe-a cùu-dé ìⁿ tée ìo quide ndáá ndécú ñuyíú-a ni cùu —duha ní cachí-dé.

⁴⁸ Te chitu ñáyiú ní tacá xíaⁿ chi cùní-yu cundehé-yu nása cada-güedé Jèsús. Te

sátá ñí yáha ní xiní-yu nàcuáa ní quide ñaha-güedě xii-gá, te ní ndihí-yu ní ndaca ta cãni-yu pèchú-yu cuánuhú sá ndihú iní-yu.

⁴⁹ Dico ndècu tnahá cue ñáyiú xiní tnáhá ndihí Jesús, ndihí ñáyiú diñí ní chinchícúⁿ ñáhá xii-gá ndéé distritú Galileá, te ñáyiú-áⁿ xica-ni xixínutnii-yu xindéhě-yu nchaa nàcuáa ní quide ñaha-güedě xii-gá.

Chìndúxi-güedé Jèsús

(Mt. 27:57-61; Mr. 15:42-47; Jn. 19:38-42)

⁵⁰ Te ndècu ìⁿ tée ñuú Arimàtea nání-dě Chèé, te ñuú-áⁿ yìndèhu-xi distritú Jùdeá, te ìo váha iní-dé te quide ndáá-dé núu Yá Ndiöxí, te tnàhá-dé cúu-dě chiúⁿ te ní xìndecu-dé jùndá cue tée isràél. ⁵¹ Te ñá ní tnàhá tnàhí iní-dé nàcuáa ní cáháⁿ-güedé núu jùndá nàcuáa cada-güedé Jèsús. Te tée-áⁿ ndétú-dě sáa nduu ndihu ndaha ñaha Yá Ndiöxí xii-dé ndihí ñáyiú. ⁵² Te tée-áⁿ ñí sáháⁿ-dé núu té Pilatú te ní xáhaⁿ-dě sá núu vá cùndèe iní-dé dañá-dě chindúxi-dé yiqui cùñú Jèsús. Te té Pilatú-áⁿ ñí sáha-dé tnúhu. ⁵³ Te ní nunehe-dé yiqui cùñú-gá núu cùrúxí, te ní chidúcúⁿ nuu-dé ìⁿ dõó cuixíⁿ, te ní chihi-dé ìⁿ yaú nchí yiqui naha cãva, te vátá yõo ìⁿ-gá nguindúxi yaú-áⁿ. ⁵⁴ Te cùu-xi nduu vispré nduu ndetatú ñáyiú, núu xiquide túha-ná-yu sá cúu ìngá nduu.

⁵⁵ Te nchaa ñáyiú diñí ní chinchícúⁿ ñáhá xii Jesús ndéé distritú Galileá ndèndàhá-yu té Chèé ní sáháⁿ núu nchí yaú-áⁿ, núu ní xiní-yu nàcuáa ní sacáⁿ-dé yiqui cùñú-gá xití yaú-áⁿ. ⁵⁶ Te ducaⁿ te cuánuhú-yu vehé-yu, te ní quide túha-yu acití sáháⁿ tnámí, ndihí pomàdá, te ní ndetatú-yu ìngá nduu-áⁿ ñí quidé-yu nàcuáa càháⁿ tnúhu Yá Ndiöxí.

24

Ní ndoto Jèsús

(Mt. 28:1-10; Mr. 16:1-8; Jn. 20:1-10)

¹ Te ndumìngú nehé víhí-ní cuáháⁿ tucu ñáyiú diñí núu nchí yaú ní chihi-güedé yiqui cùñú Jèsús, te nèhé-yu nchaa sá sáháⁿ tnámí ñí quide túha-yu-áⁿ cuáháⁿ, te tnàhá tucu ìⁿ ùú-gá tnàha diñí-yu nchícúⁿ ñáhá xii-yu cuáháⁿ. ² Te òré ní quexiò-yu

yuhu yàú-án te ní xini-yu sá yúú ndèdí ìḡ xio-ná ndécú, ³ te ní quihu-yu xití yaú-án, dico ñá túú-gã yiqui cùñú Jèsús yíhí. ⁴ Te ñá ní cùtnuní tnàhí iní-yu ndéé ichi cuáhán yiqui cùñú-gá, te ní xini-yu úú espíritú xínú cuèchi núú Yá Ndiòxí xínutnì-xi dìñí-yu te xíxíhnu-xi dóó chàhnhí. ⁵ Te ní yuhú-yu te ñá túú ní cùyí-yu cundehé-yu cue espíritú-án, te cue espíritú-án ñí xáhaⁿ-xi xí-yu:

—¿Ná cuendá nándücu-ndo Jesús Yá ndécú vívú núú yíndüxi ñáyiú ní xíhí-i? ⁶ Te ñá túú-gã yiqui cùñú-gá ndécú ìha chi sa ní ndoto-gá, te chí dándàcu iní nàcuáa ní cáhán-gá cùtnàhá ní xíndecu-ndo ndìhí-gá distritú Galileá, ⁷ chi ní cachí-gá sá méé-gã cúú-gã ñani tnáhá-ndó nchàa-ndo, te dacuítí cuàha cuendá ñáhá-güedě xii-gá núú cuè téé ndècu ichi cuehé ichi duha, te cata caa ñaha-güedě xii-gá núú cùrúxí, te núú cùrúxí-án cuú-gá dico nduu úní sá cùú-gá te ndoto-gá, duha ní cachí-gá xii-ndo.

⁸ Te òré-án ñí ndacu iní-yu tnúhu ní cáhán Jèsús. ⁹ Te sátá dúcáⁿ te ní naquehéⁿ-yu ichi cuánuhú-yu, te ní caní-yu cuendú núú ndì úxí ìḡ cue téé ní táuchíúⁿ Jèsús cáhán tnúhu-gá, ndìhí núú dàva-gá ñáyiú. ¹⁰ Te ñáyiú ducaⁿ nàha tnúhu cuánuhú núú-güedé-án cúú tá Màriá Magdaléná, ndìhí tá Juáná, ndìhí tá Màriá náná tē Jàcobó, ndìhí dava-gá ñáyiú dìhí. ¹¹ Dico cue téé-án ñí sani iní-güedé sá dicó cáhú ìní-yu tnúhu xáhãⁿ-yu xii-güedé nūú ñá túú ní sàndáá iní-güedé nàcuáa ní xáhãⁿ-yu.

¹² Dico té Pèlú ní quee-dé xínú-dě cuáhán cuándéhé-dě yaú núú ñí chihi-güedé yiqui cùñú Jèsús, te ní sáá-dé te ní ngáundeyi-dé xító ñihni-dé xití yaú-án te ní xini-dé sá méé-nã dóó ñí xiducúⁿ nuu-gá yúcu ìḡ xio, te ío ní cuñúhu-dé sá dúcáⁿ ñí cuu, te ní natnì-dé ichi cuánuhú-dé vehe núú xíndecu-güedé.

Ichi ñuú Emàús (Mr. 16:12-13)

¹³ Te ñuú-nduú-ñá ñúhú úú cue téé ní xica cuu ndìhí Jèsús ichi cuáhán-güedé ìḡ ñuú nání Emàús, te sàcúhuⁿ-güedé dàtná úú òré ichi ndéé ñuú Jerusàlén, te ndéé ñuú

Emàús. ¹⁴ Te ta ndàtnúhu-güedé cuáhán nchaa nàcuáa ní cuu, ¹⁵ te ñini dùcaⁿ xicáhán-güedé, te Jèsús ní natnahá ñáhá-gã xii-güedé te ndèca tnaha-gá ndìhí-güedé cuáhán. ¹⁶ Te cuèi ndèhe ñaha-güedé xii-gá dico dàtná ìḡ sá ndèdí núú-güedě, chi ñá ná quini ñáhá-güedě xii-gá ní cuu. ¹⁷ Te Jèsús ní xicáⁿ tnúhú-gã núú-güedě, te xáhaⁿ-gã:

—¿Ná tnúhu xicáhán-ndó ñúhu-ndo ichi núú ducaⁿ ío cùu ndiyí-ndó-í? —càchí-gá xáhaⁿ-gã xii-güedé.

¹⁸ Te ìḡ téé nani Cleofás ní xáhaⁿ-dě xii-gá:

—¿Te ná cuendá nchaa ñáyiú íchí ñí sáá ñuú Jerusàlén xini-yu nchaa nàcuáa ní cuu, te ìḡ dìi-ná yòhó ñá túú xini-n-í? —càchí-dé xáhaⁿ-dě xii-gá.

¹⁹ Te ní xáhaⁿ-gã xii-güedé:

—¿Te ná ní cuu-i? —càchí-gá xáhaⁿ-gã xii-güedé.

Te ní xáhaⁿ-güedě xii-gá:

—Cuendá Jèsús téé ñuú Nazàrét càháⁿ-ndí, chi téé-án cúú-dě ìḡ téé càháⁿ tnúhu Yá Ndiòxí, te ío váha ndúu tnúhu càháⁿ-dé ní cuu, te quide-dé sá vã yòo tnàhí ndàcu cada nacuáa cudíí ìní Yá Ndiòxí ndìhí ñáyiú ní cuu. ²⁰ Te cue téé cùu dútú cùnūu, ndìhí cue téé cùnūu taxi tnuní ñáhá xii-ndí ní sáha cuendá ñáhá-güedě xii-dé núú tē Pilatú te ní sata caa ñaha-güedě te núú cùrúxí-án ñí xíhí-dé. ²¹ Dico vitna sa ní cuu úní nduu sá ñí xíhí-dé, te nchúhú ní sani iní-ndí sá tē-án dàcácu nihnu ñaha-dě xii nchúhú ñáyiú isràél núú nchàa tnúndòho tnúhu ndàhú ndécú-ndí. ²² Dico ío cùñúhu-ndí cúú, chi ìḡ úú ñáyiú dìhí ní tuha ñaha xii-dé ndécú ndìhí-ndí ní sáháⁿ ngotó-yu ndéxuehe tàcuíhndá-gá yaú núú ñí chihi-güedé yiqui cùñú-dé, ²³ te ní nasáá-yu càchí-yu xii-ndí sá ñá túú-gã yiqui cùñú-dé yíhí xití yaú-án. Te ní xini-yu espíritú xínú cuèchi núú Yá Ndiòxí, te ní xáhaⁿ-xi xí-yu sá ndécú vívú-dě. ²⁴ Te sátá dúcáⁿ te ìḡ úú cue téé cùndìhí-ndí ní sáháⁿ ndéhé-güedě yaú-án, te ní xini-güedé sá ndáá cúú-xí nchàa tnúhu ní cáhán ñáyiú dìhí-án, dico ñá túú ní xini-güedé téé-án —càchí-güedé xáhãⁿ-güedě xii-gá.

²⁵ Te Jèsús ní xáhaⁿ-gã xii-güedé:

—Ío cùmání sã xini tnúni-ndó, chi ío cuèé sàndáá iní-ndó tnúhu ní cáhán cue téé ní

xóo cáháⁿ tnúhu Yá Ndiöxí ndéé sanaha!
 26 ¿Te náa ñá túú taú-xi sá ndóhó Crístú
 òré cúmání-gã sáá nduu ndàa-gã andiu
 núú ndécú Dütú Ndiöxí cundecu-gã-ã? —
 càchí-gã xáhaⁿ-gã xii-güedé.

27 Te ní ngüíta-gã xáhaⁿ-gã nàcuáa quèe-xi
 nchaa tnúhu càháⁿ-xi núú tütú Yá Ndiöxí
 cuëndá-gã, te díhna-gã ní cáháⁿ-gã nàcuáa
 ndùu nchaa tnúhu yòdo tnuní núú tütú ndíi
 Moisés, te dàtnuní ní cáháⁿ-gã nàcuáa ndùu
 nchaa tnúhu yòdo tnuní núú tütú nchaa
 cue téé ní xóo cáháⁿ tnúhu Yá Ndiöxí ndéé
 sanaha.

28 Te òré ní quexìo-güedé yuhu ñúú núú
 cuaháⁿ-güedé-ãⁿ, te Jèsús ní quide-ni-gã
 sá yáha-gã quíhíⁿ-gã ingá xichi ni cùu.
 29 Dico ní cáháⁿ ndàhú-güedé núú-gã sá
 quéndöo-gã xíáⁿ ndetatú-gã ndíhi-güedé, te
 xáhaⁿ-güedé xii-gã:

—Quendóo ndíhi ñaha xii-ndí iha nde-
 tatú-n chi sa ní cuaa, te tnavíi cundiⁿ —
 càchí-güedé xáhaⁿ-güedé xii-gã.

Te xíáⁿ cáá ñⁿ vehe cuánguihu-güedé nde-
 tatú-güedé ndíhi-gã. 30 Te òré sa yíhi-güedé
 mèsá ndíhi-gã cùdini ndíhi ñaha-güedé, te
 ní queheⁿ-gã pàá te ní ndacáⁿ táhú-gã
 núú Yá Ndiöxí, te ní táhú cuèchi-gã te
 dàtnuní ní dácãhñu ñaha-gã xii-güedé. 31 Te
 òré-áⁿ ñí naquiní ñáhá-güedé xii-gã ní
 cùu, dico uuⁿ ní ndóñúhú-gã. 32 Te ní
 xítñaha-güedé:

—Te ndáá sá sùúní cùdíí ìní-ó òré tá
 ndàtnúhu-o ndíhi Jesús véxi ichi, te ta
 dànehé ñáhá-gã xii-o nchàa nacuáa quèe-xi
 tnúhu càháⁿ-xi núú tütú Yá Ndiöxí —
 càchí-güedé xítñaha-güedé.

33 Te ñá túú-gã ní xíndetu-güedé chi
 ndíhi-ni ní natnⁿ-güedé ichi cuánuhú-güedé
 ñúú Jerusálén, te ní nasáá-güedé núú
 xíndecu ndí ùxí ñⁿ cue téé ní táuchíúⁿ Jesús
 cáháⁿ tnúhu-gã, ndíhi dava-gã ñáyíu. 34 Te
 cue téé xíndecu-áⁿ xáhaⁿ-güedé:

—Ndáá sá ñí ndoto Yaá cúú Mèstrú,
 chi ní xíní ñáhá tẽ Xímú —càchí-güedé
 xáhaⁿ-güedé.

35 Te cue téé ní nasáá-áⁿ ñí cani-güedé
 cuëndú nàcuáa ní cuu ichi, ndíhi nàcuáa ní
 cuu ní naquiní-güedé Jesús òré ní táhú-gã
 pàá ní dácãhñu ñaha-gã xii-güedé.

*Jèsús ní quexìo-gã núú xíndecu cue téé ní
 xica cuu ndíhi-gã*

(Mt. 28:16-20; Mr. 16:14-18; Jn. 20:19-
 23)

36 Te càháⁿ dúcáⁿ-ní-güedé nàcuáa ní
 cuu ní quexìo Jesús ní ngúnutnⁿ-gã ndéé
 tnuú-güedé, te xáhaⁿ-gã xii-güedé:

—Yá Ndiöxí chíndèe ñaha-gã xii-ndo ïo
 váha cùu ìní-ndó ndècu-ndo —cachí-gã
 xáhaⁿ-gã xii-güedé.

37 Te da ní yùhú-güedé, te ní sani
 ìní-güedé sá dícó ñⁿ espíritú cúú sã
 ndéhé-güedé ní cùu. 38 Dico Jèsús ní
 xáhaⁿ-gã xii-güedé:

—¿Ná cuëndá yùhú-ndó, te sàni ñⁿ sani
 úú ìní-ndó-í? 39 Chí cùndèhe ndaha-í ndíhi
 sáhá-í te quiní-ndó ñá ñu-ni-í. Te chí
 téndàha ñaha xii-í te cundehe-ndo, te núu
 ñⁿ espíritú ndécú yìqui cuñú-xi dàtná ndécú
 ndíhi yùhú —càchí-gã xáhaⁿ-gã xii-güedé.

40 Te sátá dúcáⁿ ñí xáhaⁿ-gã te ní dánèhé
 ñáhá-gã xii-güedé ndaha-gã ndíhi sáhá-gã.

41 Te ío ní cuñúhu-güedé, te ní cudíí
 ìní-güedé sá ndécú-gã tnuú-güedé dico
 sàni ñⁿ sani úú ìní-güedé, te ní xáhaⁿ Jesús
 xii-güedé:

—¿Ndècu ndíhi-ndo luha sá cáxí-ó iha ñá?
 —càchí-gã xáhaⁿ-gã xii-güedé.

42 Te ní sãñaha-güedé xii-gã luha chácá ñí
 chíhó, ndíhi dítá ññú ññú ndúdí, 43 te ní
 queheⁿ-gã te ndèhe-güedé ní xexi-gã. 44 Te
 dàtnuní ní xáhaⁿ-gã:

—Nchaa sá ñí yáha-í-a cùu-xi sá ñí
 cachí tnúhu-í xii-ndo cùtnáhá ndécú ndíhi
 ñaha-gã-í xii-ndo, chi ní cachí-í sá dàcuiíí
 càda-xi nchaa nacuáa càháⁿ-xi núú tütú
 ndíi Moisés, ndíhi núú tütú ndéé tnúhu
 ní cáháⁿ cue téé ní xóo cáháⁿ tnúhu Yá
 Ndiöxí ndéé sanaha, ndíhi núú librú Sãlmú
 —càchí-gã xáhaⁿ-gã xii-güedé.

45 Te òré-áⁿ ñí sãñaha-gã sá xíní
 tnùní-güedé, te ní tecú tnùní-güedé nchaa
 tnúhu càháⁿ-xi núú tütú Yá Ndiöxí. 46 Te ní
 xáhaⁿ-gã xii-güedé:

—Ducáⁿ ndéé tnuní núú tütú Yá Ndiöxí
 sá dàcuiíí sã yùhú Crístú cuú-í, te nduu
 úní ndoto-í. 47 Te ñíhí ñuyíú cùténuu
 tnúhu ní cáháⁿ-í, dico díhna nuu-gã ñúú
 Jerusálén ngüíta-yu cacunehe ñáhá-yu
 xii-í, te cáháⁿ-yu nàcuáa ní dánèhé-í-yu,

te cúñàhá-yu xii cue ñáyiú sá ná dándixi túu-yu iní-yu sá ñà túú quède váha-yu, te dàñá-yu nchaa ichi cuéhé ichi duha ndècú-yu, te natnií-yu ichi Yá Ndiöxí, te ducaⁿ te cada càhnu iní-gá nchaa yíca cuèchi-yu. ⁴⁸ Te vitna nchòhó cuu-ndo cue téè cáháⁿ ndáá nchaa nàcuáa ní cuu chi ní xini núú-ndó. ⁴⁹ Te yúhú tendaha-í Espiritú Yá Ndiöxí quixi cundecu ndihi-ndo, chi ducaⁿ ní cachí-gá. Dico chí cundecu-ni ñuú Jerusàlén-áⁿ ndèé ná quèxio Espiritú Yá Ndiöxí ngúndecu ndihi-ndo cuèndá chindee ñàha-xi xii-ndo cada-ndo nchaa nacuáa ní cáháⁿ-í —càchí-gá xáhaⁿ-gá xii-güedé.

Jèsús cuánda-gá andiu

(Mr. 16:19-20)

⁵⁰ Te Jèsús ní queñuhu ñaha-gá xii-güedé ñuú Jerusàlén ndéca ñaha-gá cuáháⁿ ñuú Bètaniá, te xíaⁿ ní ndonehe-gá ndaha-gá núú ññu, te ní xicáⁿ táhú ñaha-gá xii-güedé núú Yá Ndiöxí. ⁵¹ Te sátá ní xicáⁿ táhú ñaha-gá xii-güedé núú Yá Ndiöxí, te ní quee-gá tnuú-güedé cuánda-gá andiu. ⁵² Te ní ngüita-güedé ní cachí-güedé sá ïo càhnu cuu Jesús, te ní natnií-güedé ichi cuánuhú-güedé ñuú Jerusàlén, te súúni cùdíí iní-güedé ñuhú-güedé ichi. ⁵³ Te nchaa nduu ní xindecu-güedé veñúhu càhnu sá ïo cùnuu ní ndacáⁿ táhú-güedé núú Yá Ndiöxí, te ní cachí-güedé sá ïo càhnu cuu-gá. Duha ní cuu dàvá-áⁿ.

TNÚHU NÍ CHÍDÓ TNÛNÍ TÉ JUÁÁ

Déhe Yá Ndiöxí ní cuu-gá ññá yiu

1 Cùmání-gã ngáva ñuyíú, te sa ndècu ndihí Yá Ndiöxí Déhe-gá. Te ññá-ni xícuu-gá. Te Déhe-gá-áñ ññá cuu-gá dàtná ññá tnúhu, chi ní cachí tnúhu-gá nàcuáa càa Tátá-gã Dútú Ndiöxí. 2 Te sa ndècu-gá ndihí Dútú Ndiöxí te ní ngáva ñuyíú. 3 Te ññá-ni tnúhu mee Dútú Ndiöxí ní cuu ní cadúha Déhe-gá nchaa sá íó ñuyíú. Te núu ñá túú Déhe-gá ñá, te ñá túú ñá coo ñuyíú-a ní cùu. 4 Te ññá-ni Déhe-gá quidé-gã ndécú-ó, te ní dáyèhé-gá iní-ó nàcuáa cundecu-o. 5 Te tnúhu-gá ní xité nuu-xi núú ndécú nchaa ñá yiu ññáhu ichi cuehé ichi duha. Te ñá yiu-áñ cùú-yu dàtná cue ñá yiu ndècu ññá núú néé, te ññá-ni-yu cachí iní-yu xocaní-yu tnúhu-gá dico vá ndácú-yu.

6-7 Te ní xíndecu ññá téé ní xínani-dě Juáá, te téé-áñ ññá táuchíúñ Yá Ndiöxí sá càháñ-dé tnúhu-gá núú ñá yiu. Te ní xáhañ-dě xií-yu sá vèxi Déhe-gá ñuyíú-a, te dandixi túu-gá iní-yu cuendá cutnùní iní-yu nàcuáa ndùu cuendá Yá Ndiöxí cuendá quíndáá iní-yu tnúhu-gá. 8 Te ñá díú mèe té Juáá ní dandixi túu-dé iní-yu cuendá cutnùní iní-yu nàcuáa ndùu cuendá Yá Ndiöxí, chi cuendá-ni ní xica cuu-dé ní càháñ-dé sá Déhe Yá Ndiöxí véxi-gá dandixi túu-gá iní-yu. 9 Te ndáá ndisa sá méé-gã dándixi túu-gá iní ñá yiu ñuyíú-a cuendá cutnùní iní-yu nàcuáa ndùu cuendá Yá Ndiöxí.

10 Te ní xíndecu-gá ñuyíú-a, te ñá yiu ñuyíú-a ñá ní cùtnùní iní-yu yoo cùu-gá, te ññá-ni mee-gã ní cadúha-gá ñuyíú-a ní quide-gá chùuñ ní táhú Dútú Ndiöxí. 11 Te ní quixi-gá ñuyíú ññá cadúha mee-gã, dico cue ñá yiu ñuyíú-a ñá ní cùu váha iní-yu núú-gã. 12 Dico davá-yu ní sándáá iní ñá há yu xii-gá, te ní nduu táhú-yu ní nduu déhe ñá ha Yá Ndiöxí xií-yu. 13 Te ñá túú ní ndùu déhe ñá ha-gã xií-yu sá cùú-yu déhe ñá yiu ñuyíú-a, àdi sá ndécú tátá-yu, ñá ñá-yu chi mee Yá Ndiöxí ducañ ññá cuiní-gá cunduu sá ndúú déhe ñá ha-gã xií-yu.

14 Te Déhe-gá ní quixi túu-gá ñuyíú-a, te ní cuu-gá ññá yiqui cùúú ní xíndecu ndihí ñá ha-gã xii nchoo cuè ñá yiu ní xica cuu túu ndihí-gá. Te ní xíní-ó sá ío càhnu cuu-gá cuendá sá ññá dñi díí-ni-gã cùú-gã Déhe Yá Ndiöxí, te ío cùndahú iní ñá há-gã chíndèe ñá ha-gã xii nchoo ñá yiu ndècu ñuyíú-a, te ío ndáá càháñ-gá. 15 Te duha ní càháñ té Juáá cuendá Déhe Yá Ndiöxí ní xáhañ-dě xii ñá yiu:

—Cuendá téé iha ní càháñ-í ndéé càni-gá ní cachí-í sá quixí ññá téé quixi. Te téé-áñ cùnúu-gá-dé, chi díhna-gá-dé sa ndècu-dé dàcúúxí yùhú —duha ní xáhañ-dě xií-yu.

16 Te ío váha iní Yáá-áñ chi xito ñá ha-gã xii-o nchaa-o ññá nduu ññá nduu. 17 Te ndíi Moisés ní cachí tnúhu ndíi tnúhu Yá Ndiöxí tnúhu sá sánú ñchi ñá ha xii-o nàcuáa cundecu-o, dico Déhe-gá Xítohó Jesucrístú ní cachí-gá sá ío cùu iní ñá há Yá Ndiöxí xii-o. Te ní càháñ-gá nchaa dava-gá tnúhu ndáá. 18 Te ñá ññá ñá yiu xíní túu-yu Yá Ndiöxí. Dico ññá dñi díí-ni Déhe-gá Yáá ndécú ndihí-gá càchí tnúhu-gá nàcuáa càa-gá.

Té Juáá téé dàcuandute ñá ha xii ñá yiu càháñ váha-dé cuendá Xítohó Jesucrístú

(Mt. 3:11-12; Mr. 1:7-8; Lc. 3:15-17)

19 Te cue téé israhél ndécú ññá Jerusalén ní tendaha-güedé cue dútú ndihí cue téé cùu levítá cuháñ-güedé núú ndécú tẽ Juáá ndúcú tnúhu-güedé núú-dě ññá ná téé cùu-dé. 20 Te ní càháñ ndáá-dé ní xáhañ-dě xii-güedé:

—Yùhú, ñá díú Crístú Yáá ní tendaha Yá Ndiöxí véxi ñuyíú-a cùu-í —càchí-dé xáhañ-dě.

21 Te ní xáhañ tucu-güedé:

—¿Te yoo cùu yohó váíñ? ¿Á yohó cùú-n tẽ Èliás? —càchí-güedé xáhañ-güedé xii-dé.

Te ní xáhañ tẽ Juáá:

—Yùhú, ñá díú tẽ Èliás cùu-í —càchí-dé xáhañ-dě.

Te xáhañ tucu-güedé:

—¿Te yohó cùú-n tẽ ní cachí cue téé ndéé sanaha quixi càháñ tnúhu Yá Ndiöxí-áñ? —càchí-güedé xáhañ-güedé xii-dé.

Te ní xáhañ-dě:

—Ní ñá díú tẽ-áñ cùu-í —càchí-dé xáhañ-dě xii-güedé.

22 Te ní xáhañ tucu-güedé:

—¿Te ná tée cùu yohó váiⁿ?, cuèndá ducaⁿ nàcani tnúhu-ndí núú cuè tée ní tendaha ñàha xii-ndí véxi-ndí, te cáháⁿ duuⁿ-n núu ná tée cùu-n —cachí-güedé xàhaⁿ-güedé xii-dé.

²³ Te ní xáhaⁿ tẽ Juàá:

—Yúhú cùu-í tée xica cáháⁿ xití yucu nàcuáa ní cáháⁿ ndí Chàíá, chi ndí-áⁿ ní cachí ndí: “Chí dáñá ìchi cuehé ichi duha ndècu-ndo te tni-ndo ìchi váha, chi véxi Yaá ío cùnuu”, duha ní cachí ndí —càchí té Juàá xàhaⁿ-dẽ xii-güedé.

²⁴ Te cue tée ndècu tnúhu núú tẽ Juàá núu ná tée cùu-dé, cue tée-áⁿ ñí tendaha ñàha cue tée cùu fariséú xii-güedé. ²⁵ Te ní xáhaⁿ tùcu-güedé xii té Juàá:

—¿Ná cuèndá dácuañdute-n ñáyiu te núu ñá díú Crístú cúu-n, te ni ñá díú tẽ Èliás, te ni ñá díú tẽ véxi cáháⁿ tnúhu Yá Ndiõxí cúu-n váiⁿ? —càchí-güedé xàhaⁿ-güedé xii-dé.

²⁶⁻²⁷ Te ní xáhaⁿ tẽ Juàá:

—Yúhú ní ngódó núu-í dácuañdute-í ñáyiu. Dico nchìcúⁿ ñí tée véxi, te tée-áⁿ cùnù-gá-dé dácúxí yùhú, chi yúhú cùu-í ñí tée duuⁿ duuⁿ ñá túú tau nandaxi cuèdicó ñí chàú-dé dico quide-í chùuⁿ-dé. Te tée-áⁿ sa ñùhu tnahá-dé tnuú-ndó dicó-ni sá ñá túú xini-ndó-dẽ —càchí-dé xàhaⁿ-dẽ.

²⁸ Duha ní cuu ñuú Bètábará ñuú cáá ndàa ingá xio yúte Jordán, yacáⁿ ní xindecu té Juàá ní dácuañdute-dé ñáyiu.

Jèsús quidé càhnu iní-gá nchaa yíca cuèchi ñáyiu

²⁹ Te nduu tnèé ní xini té Juàá Jèsús véxi yatni-gá núú ndécú-dẽ ndíhi ñáyiu. Te ní xáhaⁿ-dẽ xii-yu:

—Chí cündèhe tée-áⁿ, chi tée-áⁿ cúu-dẽ Crístú Yaá ní tendaha Yá Ndiõxí véxi ñuyíú-a, te véxi-dé cada càhnu iní-dé nchaa yíca cuèchi ñáyiu ñuyíú. Te cùu-dé dàtná ñí mbéé quití ío váha iní-xi. ³⁰ Te ñu tée-áⁿ ní cachí-í sá cànchícúⁿ-dé quixi. Te cùnuu-gá-dé dácúxí yùhú, chi díhna-gá-dé sa ndècu ní cachí-í xii-ndo. ³¹ Te ni yùhú ñá túú xini-í-dé ní cùu, dico xica cuu-í dácuañdute-í ñáyiu cuèndá nchaa ñáyiu israél quini ñáhà-yu xii-dé —càchí-dé xàhaⁿ-dẽ xii-yu.

³² Te ní xáhaⁿ tùcu-dé:

—Ní xini-í Espiritú Yá Ndiõxí ní quee-xi andíu véxi cuuⁿ-xi ngúndecu ndíhi ñàha-xi

xii-dé, te dàtná cáá lõmá cáá Espiritú-áⁿ véxi cuuⁿ-xi. ³³ Te yúhú ñá túú xini-í-dé ní cùu, dico Yá Ndiõxí Yaá ní tendaha ñàha xii-í xicá cùu-í dácuañdute-í ñáyiu, Yaá-áⁿ ní cachí tnúhu-gá sá tée na quini-í ngúndecu ndíhi Espiritú-gá sá véxi cuuⁿ andíu, te tée-áⁿ taxi-dé Espiritú-gá cundecu ndíhi-o. ³⁴ Te yúhú ní xini-í-dé te xini ndáá-í sá Dèhe Dútú Ndiõxí cúu-dẽ. Te xiáⁿ càchí tnúhu-í xii-ndo —càchí té Juàá xàhaⁿ-dẽ xii-yu.

Cue tée díhna nuu xica cuu ndíhi Jèsús

³⁵ Te nduu tnèé-áⁿ ñu-ni xiáⁿ ndécú tẽ Juàá ndíhi úú cue tée xica cuu ndíhi-dé.

³⁶ Te ní xini-dé Jèsús ñúhú-gá ichi, te ní xáhaⁿ-dẽ xii cue tée xica cuu ndíhi-dé-áⁿ:

—Chí cündèhe tée-áⁿ, chi tée-áⁿ cúu-dẽ Crístú Yaá ní tendaha Yá Ndiõxí véxi ñuyíú-a. Te cùu-dé dàtná ñí mbéé quití ío váha iní-xi —càchí-dé xàhaⁿ-dẽ.

³⁷ Te sá dúcáⁿ ñí cáháⁿ té Juàá núú cuè tée úú ndíhi-dé-áⁿ núu ní chinchícúⁿ-güedé Jèsús. ³⁸ Te ní nchócótó-gá ndàa sátá-gá, te ní xini-gá sá nchícúⁿ ñáhà-güedé xii-gá. Te ní xáhaⁿ-gá xii-güedé:

—¿Ná nánducu-ndo? —cachí-gá xáhaⁿ-gá xii-güedé.

Te ní xáhaⁿ-güedé:

—¿Ndèé ndécú-n, Ràbí? —càchí-güedé xàhaⁿ-güedé xii-gá.

Te Ràbí-áⁿ quée-xí Mèstrú tnúhu mee-güedé. ³⁹ Te ní xáhaⁿ Jèsús xii-güedé:

—Chí nèhé te quini-ndó —càchí-gá xáhaⁿ-gá.

Te ní xica-güedé cuáhà-güedé, te ní quexio-güedé núú quidé vèhe-gá. Te ndècu-ni-güedé ndíhi-gá ní cuaa, chi dàtná òré caa cùmí sacuaa ní sáa-güedé.

⁴⁰ Te úú cue tée-áⁿ ñí tni-güedé tnúhu ní cáháⁿ té Juàá, te ní chinchícúⁿ-güedé Jèsús. Te núú úú cue tée-áⁿ, ñí-dé nani-dẽ Ndríxí, te ñani-dé cúu tẽ Xímú, àdi Pelú chi úú ñu-dé. ⁴¹ Te té Ndríxí-áⁿ ñí nanducu-ni-dẽ ñani-dé te ní xáhaⁿ-dẽ:

—Ní naníhi-ndí tée cùu Mesiás —càchí-dé xàhaⁿ-dẽ.

Te Mesiás-áⁿ quée-xí Crístú tnúhu mee-güedé, Yaá ní tendaha Yá Ndiõxí véxi ñuyíú-a. ⁴² Te ndèca té Ndríxí ñani-dé cuáhà-núú ndécú Jèsús. Te òré ní xini ñáhà Jèsús xii té Xímú, te ní xáhaⁿ-gá:

—Yòhó cúú-n tē Xǐmú déhe té Jònás, te vitna danàni ñaha-í Céfás xii-n —càchí-gá xáhaⁿ-gǎ.

Te Céfás-ǎⁿ quée-xí Pèlú tnúhu mee-güedě.

Jèsús ní cáháⁿ-gá té Lìpé ndihí té Natanàél

⁴³ Te nduu tnée ní sani iní-gá quihíⁿ-gá distritú Galileá. Te ní naníhí-gǎ ñⁿ tée nàni Lìpé, te ní xáhaⁿ-gǎ xii-dé:

—Néhe ná quihíⁿ-ó nūú quihíⁿ-í-a —càchí-gá xáhaⁿ-gǎ.

⁴⁴ Te té Lìpé-án cúú-dě tée ñuú Bètsaidá. Te diu-ni ñuú yàcáⁿ cúú ñuú té Ndríxí ndihí té Pèlú. ⁴⁵ Te té Lìpé ní naníhí tnáhá-dě ndihí té Natanàél, te ní xáhaⁿ-dě:

—Ní naníhí-ndí tée dii cuendú-xi ní chídó tnùní ndíi Moisés ndihí dava-gá cue tée ní xóo cáháⁿ tnúhu Yá Ndiöxí ndée sanaha. Te tée-án nání-dě Jèsús déhe té Chée, tée ñuú Nazàrét —càchí-dé xáhaⁿ-dě.

⁴⁶ Te ní xáhaⁿ tē Natanàél xii té Lìpé:

—¿Te náa ío váha càa ñuú Nazàrét nūu da yàcáⁿ quee tée cáháⁿ tnúhu Yá Ndiöxí? —càchí-dé xáhaⁿ-dě.

Te ní xáhaⁿ tē Lìpé:

—Néhe ná quihíⁿ-ó te quiní-n —càchí-dé xáhaⁿ-dě.

⁴⁷ Te òré ní xiní Jèsús té Natanàél tá cùyatni-dé cuáháⁿ, te ní cáháⁿ-gá cuendá-dé te ní cachí-gá:

—Tée véxi-ǎⁿ cúú-dě mei tēe isràél, te ñá ñⁿ ndūu dandahú-dé ñáyiú —càchí-gá xáhaⁿ-gǎ.

⁴⁸ Te ní xáhaⁿ tē Natanàél xii Jèsús:

—¿Te nása náquiní ñáhá-n? —càchí-dé xáhaⁿ-dě.

Te ní xáhaⁿ Jèsús:

—Yúhú sa ní xiní ñáhà-í xii-n òré ndécú-gǎ-n càha yutnu ngúxí-ǎⁿ te ní tē Lìpé vátá cáná ñàha-gá-dé xii-n òré-án —càchí-gá xáhaⁿ-gǎ xii-dé.

⁴⁹ Te sá dúcáⁿ ñí cáháⁿ-gá, núu ní xáhaⁿ tē Natanàél xii-gá:

—Mèstrú, yòhó cúú-n Dēhe Dútú Ndiöxí yíndàha-n ñáyiú isràél —càchí-dé xáhaⁿ-dě xii-gá.

⁵⁰ Te Jèsús ní xáhaⁿ-gǎ:

—Cuendá sá ñí xiní ñáhà-í xii-n càha yutnu ngúxí xíǎⁿ iní ñáhá-n, dico cuéhé-gǎ núu sǎ quiní-n —càchí-gá xáhaⁿ-gǎ xii-dé.

⁵¹ Te ní xáhaⁿ tùcu-gá:

—Na càchí tnúhu ndáá-í sá sàá nduu, te quiní-ndó nàcaáⁿ andiu. Te quiní-ndó cuè espíritú xínú cuèchi núú Yá Ndiöxí sá ndàa nuu-xi quide-xi núú cündècu yúhú Tée cùu ñaní tnáhá-ndó nchàa-ndo —cachí-gá xáhaⁿ-gǎ xii-güedé.

2

Vico tnǎndaha ío ñuú Cànaá

¹ Te nduu úní sá dúcáⁿ ñí cuu te ní xóo ñⁿ vico tnǎndaha ñuú Cànaá, ñⁿ ñuú yíndèhu distritú Galileá. Te yàcáⁿ ní xíndecu nǎná Jèsús. ² Te tnáhá Jèsús ndihí cue tée xíca cuu ndihí-gá ní cáháⁿ-yu cuáháⁿ-gá ndihí-güedé vico-án. ³ Te òré ní ndihí vínú, te ní xáhaⁿ nǎná Jèsús xii-gá:

—Ñá túú-gǎ vínú ndécú ndihí-yu —càchí-aⁿ xáhaⁿ-aⁿ.

⁴ Te ní xáhaⁿ Jèsús xii-aⁿ:

—Náá, ñá túú xìni ñuhu-xi da yúhú cúñaha-n cuendá vínú-án, chi vátá tnáhá-gá òré quiní-yu yoo cùu yúhú —càchí-gá xáhaⁿ-gǎ xii-aⁿ.

⁵ Te ní xáhaⁿ-aⁿ xì ñáyiú xìnu cuechi:

—Cada-ndo nchàa nacuáa na càháⁿ Jèsús —càchí-aⁿ xáhaⁿ-aⁿ.

⁶ Te yàcáⁿ nútñí íñú quídí yúú te quée dàtná ñⁿ ciendú lítrú ndute ñⁿ ñⁿ quídí-án. Te ndute-án nándíhi ñáyiú isràél ndáhá-yu te nàqueté-yu cóhó-yu chi ducaⁿ tnáhí quidé-yu nacuáa sàndáá iní-yu Yá Ndiöxí. ⁷ Te ní xáhaⁿ Jèsús xii nchaa cue tée xìnu cuechi:

—Nadachítú-ndó ndüte ndí nchaa quídí-án —càchí-gá xáhaⁿ-gǎ xii-güedé.

Te ní nadachítú-güedé. ⁸ Te ní xáhaⁿ-gǎ:

—Vitna te tava-ndo lùha, te canehe-ndo quihíⁿ cuáha-ndo tēe quide vico —cachí-gá xáhaⁿ-gǎ xii-güedé.

Te ducaⁿ ñí quide-güedé ní tava-güedé luha nèhe-güedé cuáháⁿ ní sáha-güedé tēe quide vico. ⁹ Te ní xito ndée tēe quide vico-án, te sa ní nduu-xi vínú, te ñá túú ní xíní-dé ndée véxi-xi, dico mee cuè tēe xìnu cuechi sa naha-güedé núú ñí tava-güedé. Ducaⁿ te tēe quide vico-án ñí cana-dé tēe tnǎndaha. ¹⁰ Te ní xáhaⁿ-dě:

—Nchaa ñáyiú quide vico queñuhú-yu díhna-gá vínú váha. Te sa vài vínú váha xihí-yu, te dàtnùní queñuhú-yu vínú ndàhú. Te yòhó díhna-gá vínú ndàhú ní

queñuhu-n, te ndéé núú nǐ ndihi-ná ní queñuhu-n vǐnú váha —càchí téé quide vico-áⁿ xáhaⁿ-dě xii téé tnǎndaha-áⁿ.

11 Te sá nǐ nadatiù Jesús ndute-áⁿ nǐ nduu-xi vǐnú cúú-xí ìⁿ chiuⁿ díhna nuu sǎ vǎ yǒo tnàhí ndàcu cada ní quide-gá ñuú Cànaá, ìⁿ ñuú yǐndèhu distritú Galileá, te chiùⁿ ní quide-gá-áⁿ cúú-xí ìⁿ chiuⁿ cahnu vihi, núu xiǎⁿ nǐ cutnùní iní-yu sá ìo càhnu cuu-gá, te ní sándáá iní ñáhá nchaa cue téé xìca cuu ndihi-gá.

12 Te sátá nǐ yáha vico, te ní xica Jèsús ndihi nǎná-gǎ, ndihi cue ñaní-gá, ndihi nchaa cue téé xìca cuu ndihi-gá cuáháⁿ-yu ñuú Capèrnaúm. Te yàcáⁿ ní xíndecú-yu ìⁿ ùú nduu ndihi-gá.

Jèsús ñá túú tnàhá iní-gá nàcuáa quide ñáyiu xití veñúhu
(Mt. 21:12-13; Mr. 11:15-18; Lc. 19:45-46)

13 Te ta cùyatni cada ñáyiu isràél vico pàscuá, te ní xica Jèsús cuáháⁿ-gá ñuú Jerusàlén. 14 Te sátá nǐ sáa-gá yàcáⁿ, te ní xica-gá cuáháⁿ-gá veñúhu càhnu sá ìo cùnunu, te xití veñúhu-áⁿ nǐ xiní-gá ndécú ñáyiu dìcò-yu ndicutu, mbéé ndihi lõmá, te tnàhá ñáyiu dàma díhúⁿ núcòo-yu ní xiní-gá. 15 Te ní queheⁿ-gá ìⁿ ùú yoho, te ní cáunuu tnàha-gá, te ní dáyùhu-gá ñáyiu ní queé-yu quehé veñúhu, ndihi ndicutú-yu ndihi mbéé-yu. Te cue ñáyiu dàma díhúⁿ-ǎⁿ ní dǎngòyo-gá díhúⁿ-yu, te ní dándùá-gá mèsá-yu. 16 Te ní xáhaⁿ-gǎ xii cue ñáyiu dìcò lõmá:

—¿Queñuhu-ndo nchàa quitì-a xití veñúhu-a! ¿Vá cáda-ndó vèhe núú yǎhu núú cúú vèhe Tàtá-í Dútú Ndiòxí! —càchí-gá xáhaⁿ-gǎ xií-yu.

17 Te xiǎⁿ ní ndacu iní cue téé xìca cuu ndihi-gá sá dúcáⁿ yòdo tnuní núú tütú-gá, te càchí-xi: “Ìo cùyica iní-í chi ñá cuìní-yu canehe ì-yu vehe Tàtá-í”, duha càchí-xi núú tütú-gá.

18 Te ní xáhaⁿ cuè téé isràél xii-gá:

—¿Ná cúú sǎ vǎ yǒo tnàhí ndàcu cada, cada-n cuèndá cutnùní iní-ndí sá cúú dùha taxi tnuní ñáhá-n xii-ndí-i? —càchí-güedé xáhaⁿ-güedé xii-gá.

19 Te ní xáhaⁿ Jèsús:

—Chí dǎngòyo veñúhu-a, te není xití úní nduu te sa nadàxínu-í —càchí-gá xáhaⁿ-gǎ xii-güedé.

20 Te ní xáhaⁿ tucu cue téé isràél:

—Údico ìñú cuíá nǐ xíndecuu-güedé ní sáa veñúhu-a, te yòhó cuìní-n nàdaxínu-n xití úní-ni nduu —càchí-güedé xáhaⁿ-güedé xii-gá.

21 Dico sá nǐ cáháⁿ-gá chi ñá díú cuèndá veñúhu ní cáháⁿ-gá chi cuèndá yiqui cùñú-gá ní cáháⁿ-gá. 22 Núu sátá nǐ xíhí-gá, te ní ndoto-gá, te òré-áⁿ nǐ ndacu iní cue téé ní xica cuu ndihi-gá nàcuáa ní cáháⁿ-gá, núu xiǎⁿ ní sándáá iní-güedé tnúhu yòdo tnuní núú tütú-gá. Te ducaⁿ te ní sándáá iní-güedé tnúhu ní cáháⁿ-gá.

Jèsús xiní-gá nàcuáa càa iní nchaa ñáyiu

23 Te òré ndécú Jèsús vico pàscuá, te ìo vǎi ñáyiu ní sándáá iní ñáhá xii-gá cuèndá ìo tìtní sá vǎ yǒo tnàhí ndàcu cada ní quide-gá ní xiní-yu. 24 Dico Jèsús ñá ní cáháⁿ-gá nchaa tnúhu ñuhu iní-gá, chi sa ní cutnùní iní-gá sá ñà túú cùu váha iní-yu. 25 Te ñá túú xiní ñuhu-gá ìⁿ ñáyiu cúñaha nàcuáa càa iní nchaa tnàha ñáyíu-yu, chi mee-gǎ sa nàha ndáa-gá nàcuáa càa iní-yu ncháa-yu.

3

Jèsús ndihi té Nicòdemú

1 Ní xíndecu ìⁿ téé cùu fariséu ní xínani-dě Nicòdemú, te ní cuu-dé ìⁿ téé cùnunu núú ñáyiu isràél. 2 Te téé-áⁿ nǐ sáháⁿ-dé niú ní cáháⁿ ndihi-dé Jèsús, te ní xáhaⁿ-dè:

—Mèstrú, yúhú ndihi dava-gá-güedé sa nàha-ndí sá Yǎ Ndiòxí ní tendaha ñàha-gá xii-n vèxi-n dǎnehé ñáhá-n xii-ndí, chi núu ñá túú Yǎ Ndiòxí ndécú ndihi-n, te vá ndácú-n càda-n nchaa sá vǎ yǒo tnàhí ndàcu cada quide-n —cachí-dé xáhaⁿ-dè.

3 Te ní xáhaⁿ Jèsús:

—Na càchí tnúhu ndáa-í xii-n sǎ ncháa ñáyiu vá ná càcu saa tucu, te vá ndihu ndaha ñàha Yǎ Ndiòxí xií-yu —càchí-gá xáhaⁿ-gǎ xii-dé.

4 Te ní xáhaⁿ tǎ Nicòdemú:

—¿Te nása cada ìⁿ ñáyiu sa ní yì te cacu-ni tucú-yu? ¿Náa ndihu tucú-yu xití nǎná-yu te cacu tucú-yu xito cùu uú-ǎⁿ? —càchí-dé xáhaⁿ-dè xii-gá.

⁵ Te ní xáhaⁿ Jèsús:

—Na càchí tnúhu ndáá-í xii-n sã nchaa ñáyíu na ndùu ndoo nduu nine iní-xi cuú-yu ñáyíu ní na càcu saa ndíhi ndute ndíhi Espíritú Yã Ndiöxí, ñáyíu-án ndíhu ndaha ñàha-gá xii-yu. ⁶ Te nchaa ñáyíu càcu ñuyíú-a, chi déhe ñáyíu ñuyíú-a cùú-yu. Te ñáyíu ní nduu ndoo ní nduu nine iní-xi, ñáyíu-án ñí nduu táhú-yu Espíritú Yã Ndiöxí te tàxi tnuní ñáhá-nã Espíritú-gá xii-yu. ⁷ Te vá cùñúhu-n tnúhu ní cáháⁿ-í-a, chi nchaa ñáyíu ní sándáá iní ñáhá xii-í ní nduu ndoo ní nduu nine iní-yu, te ñáyíu-án cùú-yu dàtná ñáyíu ní nacacu saa. ⁸ Táchí ndèni xiáⁿ tècú dóho-o xico-xi, dico ñá túú xini-ó ndéé ichi véxi-xi, te ní ñá túú xini-ó ndéé ichi cuáháⁿ-xi. Ducaⁿ sãtnahá-xi cùu Espíritú-gá ndécú ndíhi ñáyíu ní nduu ndoo ní nduu nine iní-xi —càchí-gá xáhaⁿ-gã xii-dé.

⁹ Te dàtnùní ní xicáⁿ tnúhú tùcu té Nicòdemú núú-gã, te xáhaⁿ-dẽ xii-gá:

—¿Te nása ndùu tnúhu càháⁿ-n dùcaⁿ caháⁿ-n? —càchí-dé xáhaⁿ-dẽ xii-gá.

¹⁰ Te ní xáhaⁿ Jèsús:

—Yòhó cúú-n ñí tée cùtnuní iní-xi, chi dàcuaha-n ñáyíu isràél, ¿te ñá tècú tnùní-n tnúhu càháⁿ-í-u? ¹¹ Te na càchí tnúhu ndáá-í xii-n sã nchúhú càháⁿ-ndí ñí sá ñí tecú tnùní-ndí, te càháⁿ ndáá-ndí cuendá ñí sá ñí xini-ndí. Dico nchòhó ñá tècú tnùní-ndó tnúhu càháⁿ-ndí. ¹² Te ñá sándáá iní-ndó tnúhu càháⁿ-í cuendá nchaa nàcuáa cùu ñuyíú-a, te uuⁿ-gá cada-ndo ñuu cáháⁿ-í cuendá nchaa nàcuáa cùu andíu.

¹³ Vá yòo ñí sàá andíu, te caní-xi cuendú nàcuáa càa. Chi ñí dli díi-ni yúhú véxi cuuⁿ-í andíu, te cùu-í ñaní tnáhá-ndó nchaa-ndo. Te diu-ni yàcáⁿ ndaa-í cundecu-í. ¹⁴ Te dàtná ní ndanehe ndíi Moisés cóo ñí sata caa ndíi-di xiti yucu, ducaⁿ càda ñaha-güedé cata caa ñaha-güedé núú cùrúxí xii yúhú Tée cùu ñaní tnáhá-ndó nchaa-ndo ñí nduu, ¹⁵ te ducaⁿ yãha-í cuendá nchaa ñáyíu na quindáá iní ñáhá xii-í te nduu táhú-yu cundecu-yu ndíhi Yã Ndiöxí ni caa ni quíhíⁿ —càchí-gá xáhaⁿ-gã xii-dé.

Yá Ndiöxí ío cùu iní-gá ñáyíu ñuyíú-a

¹⁶ Te Yá Ndiöxí ío cùu iní-gá ñáyíu ñuyíú-a. Te ñí dli-ni Déhe-gá ndécú, te ní tendaha ñàha-gá ní quixi-gá ñuyíú-a, te

núu na quindáá iní ñáhá ñáyíu, te vá cuíta nihnú-yu, chi nduu táhú-yu cundecu-yu ndíhi-gá ni caa ni quíhíⁿ. ¹⁷ Te Yá Ndiöxí ñá túú ní tendaha-gá Déhe-gá quixi-gá ñuyíú-a dacuíta nihnu-gá ñáyíu, chi ní tendaha-gã Déhe-gá ní quixi-gá sá dácãcu nihnu-gá ñáyíu ñuyíú-a núú ùhú núú ndàhú.

¹⁸ Nchaa ñáyíu sándáá iní ñáhá xii Déhe-gá, te vá cuíta nihnú-yu. Te nchaa ñáyíu ñá túú sándáá iní ñáhá xii Déhe-gá ñùhú-yu ichi cuáháⁿ-yu núú ùhú núú ndàhú, chi ñá túú sándáá iní-yu Déhe Dútú Ndiöxí. ¹⁹ Chi ní quixi Déhe-gá ñuyíú-a ní dándíxí túu-gá iní-yu cuendá cutnùní iní-yu nàcuáa ndùu cuendá Yã Ndiöxí te tní-yu ñí ichi váha ni cùu, te ñá ní tnàhá iní-yu, chi ní cudí-gã iní-yu nchaa sá cuèhé sá dúhá dácúxí sã vãha, núu xiáⁿ tá xita nihnú-yu cuáháⁿ. ²⁰ Te nchaa ñáyíu quide nchaa sá cuèhé sá dúhá ñá tnàhá iní-yu cutnùní iní-yu nàcuáa ndùu cuendá Yã Ndiöxí, te ñá tní-yu tnúhu-gá cuendá yùhú-yu nduu tnùní nchaa sá quidè-yu. ²¹ Te nchaa ñáyíu ñùhu ichi ndáá cuíní-yu cutnùní iní-yu nàcuáa ndùu cuendá Yã Ndiöxí, te cùtnuní sá chindèe ñaha-gá xii-yu, chi quide váha-yu.

Té Juàá tée dàcuandute ñaha xii ñáyíu càháⁿ váha tucu-dé cuendá Jèsús

²² Te sátá dúcáⁿ ñí cuu, te ní quee Jèsús cuáháⁿ-gá ndíhi cue tée xica cuu ndíhi-gá distritú Jùdeá. Te yàcáⁿ ní xindecu tnaa-gá ndíhi-güedé ní xóo dacuandute-güedé ñáyíu.

²³ Te ndècu té Juàá ñí xichi núú nání Ènón yatni ñuu Sàlém dacuandute-dé ñáyíu, chi yàcáⁿ ío váha ñùhu ndute, núu xiáⁿ ní xóo quíhíⁿ ñáyíu yàcáⁿ ní xóo cuanduté-yu.

²⁴ Duha ní cuu cùtnàhá vátá ngává-gã té Juàá vecaá.

²⁵ Te ní cacu ñí cuendú ní cáháⁿ cue tée xica cuu ndíhi té Juàá ndíhi ñí ùú cue tée isràél, núu ndèdacàa sá vãha-gá cada ñáyíu cuendá nduu ñí-yu. ²⁶ Te ní sáháⁿ-güedé núú ndécú té Juàá ní xáhaⁿ-güedé:

—Mèstrú, tée ní quixi núú ñí xindecu-n ndaa ingá xio yúte Jòrdán, tée dii cuendú-xi ní cáháⁿ-n, tée-ãⁿ dacuandute-dé tnàhá-dé ñáyíu. Te ío vai ñáyíu ní chinchícúⁿ ñáhá xii-dé —càchí-güedé xáhaⁿ-güedé xii-dé.

27 Te ní xáhaⁿ tẽ Juáa:

—Te vá yõo ìⁿ ndàcu cada ìⁿ chiuⁿ nacuáa cuu váha iní Yá Ndiõxí, te núu ñá túu mée-gá chindèe ñaha-gá xií-yu. 28 Te nchòhó sa ñaha-ndo sá yùhú ní cáháⁿ ndáá-í sá ñà díú Crístú cúu-í, dico mee Yá Ndiõxí ní tendaha ñaha-gá yódó núu-í véxi núú Yáá-áⁿ. 29 Te nchòhó xini-ndó sã ìⁿ tée tnãndaha te xíchi tnãndaha ndihí-ná-dé cundihí-dé. Te tée ní xica ndáhú ìo cùdíí iní-dé ndèdòho-dé nchaa tnúhu cáháⁿ tée tnãndaha-áⁿ. Te ducaⁿ sãtnahá-xi cùu yúhú, chi ío cùdíí iní-í sá vái ñáyíu ta chìnchícúⁿ ñáhá xii Jesús cuáháⁿ. 30 Te uuⁿ-gá cuita cuu vai ñáyíu cutnùní iní-xi sá ìo cùnuu-gá, te yúhú cuita ndóo ndee-í quíhíⁿ —càchí-dé xãhaⁿ-dè xii-güedé.

Crístú véxi cuuⁿ-gá andíu

31 Te ìⁿndí díí-ní Crístú Yáá véxi cuuⁿ andíu cùnuu-gá núú ñuyíú-a. Te nchaa ñáyíu ndècu ñuyíú-a cùú-yu ñáyíu ñuyíú iha, te cáháⁿ-yu sá cúú-xí ñuyíú-a. Dico Crístú Yáá véxi cuuⁿ andíu 32 cáháⁿ-gá ìⁿ sá ní xini-gá, te cáháⁿ-gá ìⁿ sá ní tecú dóho-gá. Te ñá túú cuini-yu quindáá iní-yu tnúhu cáháⁿ-gá. 33 Te nchaa ñáyíu tní tnúhu cáháⁿ Yáá véxi cuuⁿ andíu-áⁿ cáháⁿ-yu sá tnúhu Yá Ndiõxí cúú-xí ìⁿ sá ndáá. 34 Te Déhe-gá Yáá véxi cuuⁿ andíu cáháⁿ-gá mee-ni tnúhu-gá. Te ñá ùhú iní-gá ní sãñaha-gã Espíritú-gá ndécú ndihí Déhe-gá. 35 Te Dútú Ndiõxí ío cùu iní-gá Déhe-gá, núu ní xáhaⁿ-gã sá méé-gã taxi tnùní-gá nchaandi túhú sá ío. 36 Te nchaa ñáyíu na quindáá iní ñáhá xii Déhe-gá, ñáyíu-áⁿ cundecú-yu ndihí-gá ni caa ni quíhíⁿ. Te nchaa ñáyíu vá quindáá iní ñáhá xii Déhe Yá Ndiõxí ío dandòho ñaha-gá xií-yu.

4

Jèsús ndihí ìⁿ ñaha Sàmariá

1 Te ní níhí cue tée cùu fariséú tnúhu sá vai-gá ñáyíu ta chìnchícúⁿ ñáhá xii Jesús. Te ducaⁿ vai-gá-yu ta dàcuandute-gá cuáháⁿ dàcúúxí tẽ Juáa. 2 Te cuèi ñá díú mée-gá dácuandute ñaha-gá xií-yu, dico cue tée xica cuu ndihí-gá dácuandute ñaha-güedé xií-yu. 3 Te ní níhí Jèsús tnúhu nacuáa cáháⁿ cue tée

cùu fariséú, núu ní ndee-gá distritú Jüdea cuánuhú tucu-gá distritú Galiléa.

4 Te ichi ñuhu-gá ní nayáha-gá distritú Sàmariá. 5 Te ní sáá-gá ìⁿ ñuú nání Sicár te ñuú-áⁿ yindèhu-xi distritú Sàmariá. Te xíaⁿ cáá yãtni ñuhu núú ní sáha táhú ndíi Jácób déhe ndíi ndíi Chèé. 6 Te yacáⁿ cáá dòco ní cuu cuendá ndíi Jácób. Te cùu-xi datná cuádava nduu ñuhu Jesús ichi, te ío ní xàú-gá ñuu ní sáá-gá yuhu dòco-áⁿ ní ngóo-gá ndétátú-gá. 7-8 Te ní xica cue tée xica cuu ndihí-gá cuáháⁿ-güedé xití ñuú Sicár cuánguaaⁿ-güedé sá cáxí-güedé. Te yuhu dòco-áⁿ núcõo-gá ní sáá ìⁿ ñadìhí ñaha distritú Sàmariá véxi quèhnu-aⁿ ndute, te ní xáhaⁿ Jèsús:

—Taxi táhú luha ndute na còho-í —càchí-gá xáhaⁿ-gã.

9 Te ní xáhaⁿ ñadìhí-áⁿ:

—¿Ná cuendá da núu-í xicáⁿ-n ndute coho-n? Te yòhó cúú-n tõe isràél, te yúhú cúu-í ñaha Sàmariá —càchí-aⁿ xáhaⁿ-aⁿ xii-gá.

Te ducaⁿ ní xáhaⁿ-aⁿ, chi ñá túú ndècu váha ñáyíu isràél ndihí ñáyíu distritú Sàmariá. 10 Te ní xáhaⁿ Jèsús xii-aⁿ:

—Ñá cútnùní iní-n ñá taxi Yá Ndiõxí xii-n, te ni ñá cútnùní iní-n yòo xicáⁿ ndute núu-n. Te núu dícó xini-n yòo cuu yúhú á, te da mee-n cãcáⁿ-n ndute núu-í coho-n, te yúhú taxi-í ndute cundecu ndihí-n núú cuáháⁿ núú véxi —càchí-gá xáhaⁿ-gã.

11 Te ní xáhaⁿ tucu ñadìhí-áⁿ:

—Tãtá, ni sá quèhnu-n ndute ñá túú nèhe-n, te doco-a cùnú víhí, te ñá túú ndéé quingueheⁿ-n ndute taxi-n coho-í.

12 Ndíi Jácób ñaní tnáhá-ndí ní xindecu ndéé sanaha ní cadúha ndíi doco-a ní tóo ndute ní xihí ndíi, ndihí nchaa déhe ndíi, ndihí nchaa quiti ndíi, te ní ndóo cùu cuendá-ndí. ¿Te násai, te yòhó cùnùu-gá-n dàcúúxí ndíi-ãⁿ? —càchí-aⁿ xáhaⁿ-aⁿ xii-gá.

13 Te ní xáhaⁿ Jèsús:

—Nchaa ñáyíu xihí ndute doco-a, te vá cúú vétú dúcáⁿ iní-yu chi dayichí ñáhá-ní tucu-xi ndute-a. 14 Dico nchaa ñáyíu na còho ndute na cuãñaha-í, te vá ìⁿ ndùu-gá dayichí ñáhá-xí ndute-áⁿ xií-yu, chi ndute cuãñaha-í cúú-xí ndute váha-gá. Te dàtná quée ñihni ndute xití doco-a, nchaa-ni

nduu ñùhu ñá túu yìchí, ducaⁿ sãtnahá-xi cada-xi chi candeca-xi iní-yu ni caa ni quíhíⁿ, te núu na còhó-yu ndute cuáñaha yùhú —càchí-gá xáhaⁿ-gã xii-aⁿ.

15 Te ní xáhaⁿ-aⁿ:

—Tátá, taxi ndute-áⁿ ná còho-í cuendá sá vã dáyìchí ñáhá tnahí-gá-xi ndute. Te vá quíxí-gã-í quixi quéhnu-í ndute doco-a —càchí-aⁿ xãhaⁿ-aⁿ xii-gá.

16 Te ní xáhaⁿ Jèsús:

—Cuaháⁿ cuàngana yì-n, te quixi-ndo ìha —cachí-gá xáhaⁿ-gã xii-aⁿ.

17 Te ní xáhaⁿ-aⁿ:

—Ñá túu yì-í —càchí-aⁿ xãhaⁿ-aⁿ xii-gá.

Te ní xáhaⁿ tùcu Jesús:

—Ndáá càháⁿ-n sã ñà túu yì-n. 18 Dico ní cuu úhúⁿ téé cãndeca-n, te téé ndèca-n vitna chi ñá díú yì-n cuu-dé, te ndáá càháⁿ-n sã ñà túu yì-n —cachí-gá xáhaⁿ-gã xii-aⁿ.

19 Te sá dúcáⁿ ñí xáhaⁿ-gã ñuu ní xáhaⁿ tùcu-aⁿ:

—Tátá, yúhú sání ìní-í sá yòhó cúu-n ìⁿ téé càháⁿ tnúhu Yá Ndiòxí. 20 Te cue ñaní tnahá-ndí ní xíndecu ndéé sanaha ñí xóo cada càhnú-yu Yá Ndiòxí tindúú-a, dico nchòhó ñáyiú israhél càchí-ndó sã ndéé ñuu Jerusálén cada càhnu-o-gá —càchí-aⁿ xãhaⁿ-aⁿ xii-gá.

21 Te ní xáhaⁿ Jèsús xii-aⁿ:

—Ìⁿ tnúhu na càháⁿ-í-a, te quindáá iní-n. Sa ta cùyatni sáá nduu sã ñà díú-gã mee-ni tindúú-a, te ni ñà díú-gã mee-ni ñuu Jerusálén cada càhnu-ndo Tátá-ó Dütú Ndiòxí, chi ndèni ní cuu cada càhnu-ndo-gá.

22 Te nchòhó cue ñáyiú Sãmariá chi ñá cútnuní iní-ndó ñá cúu sã quidé càhnu-ndo, dico nchúhú ñáyiú israhél, chi cùtnuní iní-ndí ná cúu sã quidé càhnu-ndí. Chi ìⁿ téé israhél véxi-dé dàcácu nihnu-dé ñáyiú cuendá vá quíhíⁿ-yu núu ùhú núu ndàhú. 23 Te není vitna ngúita-yu cada càhnu ndisá-yu Tátá-ó Dütú Ndiòxí, te cadá-yu ni yùhu ni iní-yu sá cúu-xí-gã, chi mee-gã ducaⁿ cuìní-gã cadá-yu cada càhnú-yu-gá. 24 Te Yá Ndiòxí chi ìⁿ espíritú cúu-gã. Te nchaa ñáyiú na càda cahnu ñaha, te cadá-yu ni yùhu ni iní-yu sá cúu-xí-gã te cadá-yu dàtná càháⁿ tnúhu-gá —càchí-gá xáhaⁿ-gã xii-aⁿ.

25 Te ní xáhaⁿ ñadhí-áⁿ:

—Xini-í sá quíxí tée cùu Mesiás, téé càchí-güedé nání Crístú. Te téé-ãⁿ ná sàá-dé, te cachí tnúhu ndáá-dé nàcuáa cuu —càchí-aⁿ xãhaⁿ-aⁿ xii-gá.

26 Te ní xáhaⁿ Jèsús:

—Diu téé-áⁿ cúu yùhú téé ndàtnúhu ndihí-n —càchí-gá xáhaⁿ-gã xii-aⁿ.

27 Te òré-áⁿ ñí ndexìo cue téé xica cuu ndihí-gá, te ní cuñúhu-güedé sã ndàtnúhu-gá ndihí ñadhí-áⁿ. Dico ni ìⁿ-güedé ñá ní xicáⁿ tnúhú-güedé núu-gã ñuu ná cuendú ndàtnúhu-gá ndihí ñadhí-áⁿ.

28 Ducaⁿ te ní dándõo ñadhí-áⁿ yoó ndute-aⁿ xíáⁿ, te ní xica-aⁿ cuánuhú-aⁿ ñuu cútnúhu-aⁿ ñáyiú cuendá Jèsús. 29 Te ní xáhaⁿ-aⁿ:

—Chí nèhé ná quíhíⁿ-ó, chi quiní-ndó ñá cúu ìⁿ téé núcóo yuhu dòco-áⁿ ñuu ñá díú Crístú Yaá ní tendaha Yá Ndiòxí véxi ñuyíú-a cùu-dé ñuu ní càháⁿ ndáá-dé nàcuáa cùu ndecu-í —càchí-aⁿ xãhaⁿ-aⁿ xii-yu.

—Chí nèhé ná quíhíⁿ-ó, chi quiní-ndó ñá cúu ìⁿ téé núcóo yuhu dòco-áⁿ ñuu ñá díú Crístú Yaá ní tendaha Yá Ndiòxí véxi ñuyíú-a cùu-dé ñuu ní càháⁿ ndáá-dé nàcuáa cùu ndecu-í —càchí-aⁿ xãhaⁿ-aⁿ xii-yu.

30 Te sá ñí níhí ñáyiú ñuu-áⁿ tnúhu, xíáⁿ ní xicá-yu cuaháⁿ-yu. 31 Te òré vátá sàá-gá-yu xíáⁿ ñí xáhaⁿ cuè téé xica cuu ndihí-gá xii-gá:

—Mèstrú, cudèhñu na cudehñu-o —cachí-güedé xãhaⁿ-güedé xii-gá.

32 Te ní xáhaⁿ-gã:

—Ndècu ìⁿ sá cáxì-í, ìⁿ sá ñà túu xini nchòhó —càchí-gá xáhaⁿ-gã xii-güedé.

33 Te cue téé xica cuu ndihí-gá xitnaha-güedé:

—Váa ió ñáyiú ní quixi nehe sá ñí xexi-gá ñuu duha càháⁿ-gá —càchí-güedé xitnaha-güedé.

34 Te ní xáhaⁿ-gã:

—Dàtná cuìní-ndó cùu vétú iní-ó òré xéxi-ó, ducaⁿ cùu vétú iní-í quidé-í nchaa nàcuáa ní càháⁿ Yá Ndiòxí Yaá ní tendaha ñaha xii-í véxi-í ñuyíú-a, te chiúⁿ-gá ío cùdí ìní-í dandíhí-í. 35 Te nchòhó càchí-ndó sã cùmání cùmí-gã yóo te cuu itú. Dico yúhú càchí-í sá cundehe-ndo ñáyiú-ãⁿ, chi sa ndècu túha-yu, dàtná cúu-ñá itú sá sà ní cuu-ná natahu-o cùu-yu, chi sa ndècu túha-ná-yu cundedóho-yu tnúhu-í.

36 Te dàtná cúu ñáyiú natahu itú chi sa cúhuⁿ yáhu-yu, ducaⁿ sãtnahá-xi cùu ñáyiú na càháⁿ tnúhu-í, chi cuáñaha-í sá ndúú tãhú-yu na sàá nduu. Te nchaa ñáyiú na

tn̄i tnúhu-í te nduu táhũ-yu cundecu-í ndihí-yu ni caa ni quihíⁿ. Te dàtná cúu ñáyiú ní chihi tatá-xi, ndihí ñáyiú ní natahu ítú-xi cùdíi-nã iní-yu. Ducaⁿ sãtnahá-xi cùu ñáyiú na càháⁿ tnúhu-í. ³⁷ Chi ndáá quée-xí nãcuáa cuáháⁿ ìⁿ cuendú sá cãchí-xi: “Tucu téé ní chihi tatá, te tucu téé ní natahu”, duha cuáháⁿ cuendú-áⁿ. ³⁸ Te yúhú tendaha ñaha-í xii-ndo quihíⁿ-ndó cãháⁿ-ndó tnúhu-í núú sà ní yáha-güedé ní cáháⁿ-güedé tnúhu-í. Te nchòhó quihíⁿ-ndó dícó-nã nduu cuendá-ndó chiúⁿ-áⁿ — cãchí-gá xáhaⁿ-gã xii-güedé.

³⁹ Te ío cuéhé ñáyiú ñuú-áⁿ n̄i xíndedóho-yu cuendú ní cani ñadihí-áⁿ nũ-yu sá Jèsús ní xáhaⁿ-gã nchaa nãcuáa quide-aⁿ, te xíãⁿ ío vãi-yu ní sãndáá iní-yu Jèsús. ⁴⁰ Te ní quexió-yu núú ndécú-gã, te ní cáháⁿ ndàhú-yu núú-gã sá quèndõ-gã ñuú-yu, núú xíãⁿ ní xíndecu-gá ndihí-yu úú nduu. ⁴¹ Te ío cuéhé-gã-yu ní sãndáá iní-yu tnúhu ní cáháⁿ mée-gã. ⁴² Te ní xáháⁿ-yu xii ñadihí-áⁿ:

—Vitna te ñá díú mèe-ni tnúhu ní cáháⁿ-n ní sãndáá iní-ndí-gã, chi ní cáháⁿ mée-gã ní xíndedóho-ndí vitna núú ní sãndáá ndisa iní-ndí sá díú-gã cúú-gã Crístú Yaá ní tendaha Yã Ndiõxí véxi ñuyíú-a dàcácu nihnu-gá ñáyiú núú ùhú núú ndàhú — cãchí-yu xáháⁿ-yu xii-aⁿ.

Jèsús quidé tãtna-gá déhe ìⁿ téé ndèé chíúⁿ núú gobiernú

⁴³ Te nduu úní ní nucúhuⁿ Jèsús ichi cuáháⁿ-gã distrítú Galileá. ⁴⁴ Te cuáháⁿ-gã yacáⁿ, chi mee-gã ní cachí-gá sá nũ ìⁿ téé na càháⁿ-dé tnúhu Yá Ndiõxí ñuú núú n̄i cacu-dé, te ñá túú nèhé-yu sá yíñũhu núú-dě. ⁴⁵ Te òré ní sáá-gã distrítú Galileá, te ío váha ní cuu iní ñáhã-yu xii-gã, chi cuendá tnàhá-yu ní xíndecu ndihí-gã vico pascuá ñuú Jerusálén. Te yacáⁿ ní xiní-yu nchaa sá n̄i quide-gã.

⁴⁶ Te ní sáháⁿ tucu-gã ñuú Cànaá ìⁿ ñuú yíndèhu distrítú Galileá, núú n̄i nadatìu-gã ndute ní nduu-xi vínú. Te ñuú Capèrnaúm ndécú ìⁿ téé ndèé chíúⁿ núú téé cùu gobiernú, te téé-áⁿ cùhú ìⁿ déhe-dé. ⁴⁷ Te ní níhí-dě tnúhu sá n̄i ndee Jèsús distrítú Jüdeá ní ndexió-gã distrítú Galileá,

núú ní sáháⁿ-dé núú ndécú-gã, te ní cáháⁿ ndàhú-dé núú-gã sá quihíⁿ-gã cada tátna-gá déhe-dé, chi sa ndècu-na-dé sá cùú-dé. ⁴⁸ Te ní xáhaⁿ Jèsús xii-dé:

—Nchòhó, chi vá quíndáá iní ñáhá-ndó xii-í te núú vá cáda-í ìⁿ sá vã yõo tnàhí ndàcu cada quiní-ndó —cãchí-gá xáhaⁿ-gã xii-dé.

⁴⁹ Te ní xáhaⁿ tucu téé cùhú déhe-xi-áⁿ xii-gã:

—Tátá, cundee iní-n ná quihíⁿ-ni-o càda tátna-n dèhe-í ná cuu-dé, chi càhú vihí tnàhá-dé —cãchí-dé xáhaⁿ-dẽ xii-gã.

⁵⁰ Te ní xáhaⁿ Jèsús:

—Cuanùhú te quiní-n nã ní ndúha déhe-n —cãchí-gá xáhaⁿ-gã xii-dé.

Te ní sãndáá iní-dé tnúhu ní cáháⁿ Jèsús, te cuánuhú-dé. ⁵¹ Te ñũhu-dé ichi cuánuhú-dé ní sánú tnàhá ñáhá cuè téé xínu cuechi núú-dě. Te ní xáhaⁿ-güedé sá sã ta ndúha déhe-dé cuáháⁿ.

⁵² Te ní xicáⁿ tnúhú-dẽ núú-güedé ná òré cúú-xí n̄i ngüíta-xi ta quètaú cuéhé-dě. Te ní xáhaⁿ-güedé:

—Icu dàtná òré caá ìⁿ sacuaa ní nchíco-dé cahni —cãchí-güedé xáhaⁿ-güedé xii-dé.

⁵³ Te tátá téé cùhú-áⁿ n̄i ndacu iní-dé sá díú òré ní quètaú cuéhé-dě ní cáháⁿ ndihí-dé Jèsús ní xáhaⁿ-gã sá ndúha déhe-dé. Te xíãⁿ nũ ndi nchaa téé-áⁿ vehe-dé ní sãndáá iní-yu Jèsús.

⁵⁴ Te sá n̄i quide-gã-áⁿ cúú ùú xito quide-gã sá vã yõo tnàhí ndàcu cada. Te sá n̄i quide-gã xito cùu uú-áⁿ cúú-xí sã n̄i quide-gã cútnàhá ní ndee-gã distrítú Jüdeá cuánuhú-gã distrítú Galileá.

5

Jèsús quidé tãtna-gá ìⁿ téé cùhú ìⁿ xichi núú nání Bètesdá

¹ Te sátá dúcáⁿ n̄i cuu, te ní tnàhá nduu n̄i quide ñáyiú isràél ìⁿ vico. Te ní sáháⁿ Jèsús ñuú Jerusálén. ² Te ni càa xico yuhu ñuú-áⁿ ñúhú dòco, te titní yèhe-xi ndecu. Te ìⁿ yèhe-xi-áⁿ nání Yùyehe Mbéé, te yatni xíáⁿ caá ìⁿ tanquí ndute dàna-ní-yu Bètesdá tnúhu mèe-yu tnúhu hèbreú, te yuhu tànquí-áⁿ caá ùhúⁿ corrèdór. ³ Te xití corrèdór-áⁿ xíndecu cuéhé ñáyiú cùhú, ñáyiú cuáa, ñáyiú yacua, ñáyiú ñá cúú-gã candá nihnu, ndètú-yu candá ndute-áⁿ. ⁴ Chi

nihí-yu tnúhu sá áma nihnu cùuⁿ ìⁿ espíritú xínú cuèchi núú Yă Ndiöxí, te dâcandá-xi ndute ñùhu tanquí-áⁿ. Te ñáyiú díhna nuu nà quée xítí ndute-áⁿ, te òré-ni ndúha-yu. ⁵ Te yàcáⁿ ñútnàhá ìⁿ téé ní cuu ócó sáhúⁿ úní cuíá sã cùhú-dé. ⁶ Te ní xiní Jèsús cáá-dě, te ní cutnùníní iní-gá sá ñí cuu cuéhé cuíá cùhú-dé, te ní xáhaⁿ-gã:

—¿Cuíní-n ndúha-n-ãⁿ? —càchí-gá xáhaⁿ-gã xii-dé.

⁷ Te ní xáhaⁿ tée cùhú-áⁿ:

—Tăta, vá yõo nihí-í dàquée ñaha xii-í xítí tànquí-a òré cándá ndute, chi òré cuíní-í quée-í, te ingá-ni tucú-yu quènduú-yu núu-í cuángueé-yu —càchí-dé xáhaⁿ-dě xii-gá.

⁸ Te ní xáhaⁿ Jèsús:

—Ndacuíñí, te ndaca-ni-n yùu-n, te caca-n —càchí-gá xáhaⁿ-gã xii-dé.

⁹ Te òré-ni-áⁿ ñí ndúha tée cùhú-áⁿ, te ní ndaca-ni-dé yuu-dé, te ní xica-dé cuáháⁿ-dé. Te nduu-ãⁿ cúu-xí nduu ndetátú ñáyiú, ¹⁰ núu ní xáhaⁿ cuè téé isráel xii tée ní cuhú-áⁿ:

—Vitna cùu-xi nduu ndetátú-ó núu vá cúu cuído-n yuu-n —cachí-güedé xáhaⁿ-güedě xii-dé.

¹¹ Te ní xáhaⁿ-dě:

—Mee tée ní quide tátna ñaha xii-í ní cachí-dé sá ndácâni-í yuu-í, te caca-í —càchí-dé xáhaⁿ-dě xii-güedé.

¹² Te ní xáhaⁿ-güedě:

—¿Te ná cúu tée ducaⁿ ñí cachí sá ndácâni-n yuu-n te caca-n-í? —càchí-güedé xáhaⁿ-güedě xii-dé.

¹³ Dico tée ní cuhú-áⁿ ñà túu ní cùtnuní iní-dé ná cúu tée ní quide tátna ñaha xii-dé, chi Jèsús òré-ni ní xica-gá cuáháⁿ-gá tnuú nchaa ñáyiú chitu xíndecu xíaⁿ. ¹⁴ Te sátá dúcáⁿ te ní naníhí tnáhá Jèsús ndihí tée ní quide tátna-gá-áⁿ xítí veñúhu càhnu sá ïo cùnuu, te ní xáhaⁿ-gã xii-dé:

—Ní xiní-n ñà ní ndúha-n-va. Te vitna vá cáda-gã-n nãndi sá cuéhé sá dúhá, chi núu na cáda-ni-n ña, te quixi ingá cuéhé, te vîhi-gá ndoho-n —càchí-gá xáhaⁿ-gã xii-dé.

¹⁵ Ducaⁿ te ní xica tée ní cuhú-áⁿ cuángúñaha-dé xii cue tée isráel sá Jèsús ní quide tátna ñaha-gã xii-dé. ¹⁶ Núu sátá ñí níhí cue tée isráel tnúhu, te ní cuu úhú iní-güedé Jèsús. Te ní cuíní-güedé cahni ñaha-güedě xii-gá cuendá sá dúcáⁿ ñí quide

tátna-gá nduu ndetátú-güedé. ¹⁷ Te ní xáhaⁿ Jèsús xii-güedé:

—Tătà-í Dútú Ndiöxí quidé chiúⁿ-ni-gá núu xíaⁿ quidé chiúⁿ-í tnàhá-í —càchí-gá xáhaⁿ-gã xii-güedé.

¹⁸ Te ní cudééⁿ-güedě sá ñã ní cãnehe íí-gã nduu ndetátú-güedé, te ní cuíní-güedé cahni ñaha-güedě, te uuⁿ-gá ní cuíní-güedé cahni ñaha-güedě xii-gá sá ñí cachí-gá sá Tătá-gã cúu Dútú Ndiöxí, chi ní sani iní-güedé sá cuíní-gá nútnahá-gá Yă Ndiöxí núu xíaⁿ ío ní cudééⁿ-güedě.

Jèsús Déhe Yá Ndiöxí táxi tnùní-gá

¹⁹ Te ní xáhaⁿ tucu Jèsús xii-güedé:

—Na càchí tnúhu ndáá-í xii-ndo sã yùhú chi ni ìⁿ sá ñã ndácù-í cada mee-í núu ñã túu mée Tătà-í dánèhé ñáhá-gã xii-í nàcuáa cada-í, chi nchaa sá quidé Tătà-í quidé-í tnàhá-í. ²⁰ Te Tătà-í ío cùu iní ñáhá-gã xii-í núu dānehé ñáhá-gã nchaa nàcuáa quide-gá. Te vitna ndècu vai-gá chiúⁿ tahu-gá cada-í, chiúⁿ sá vătá quíní-gá-ndó cada-í nàcuáa cuñúhu vîhi-ndo. ²¹ Chi Tătà-í dandòto-gá ñáyiú ní xihí. Te yùhú cada-í te nduu táhú nchaa ñáyiú càchí iní-í cundecu ndihí ñáhá-yu xii-í ñi caa ñi quíhíⁿ. ²² Te na sàá nduu te ñá díú Tătà-í cada ndáá-gá cuèchi ñáyiú, chi ní cachí-gá sá yùhú cada ndáá-í ²³ cuendá nchaa ñáyiú canehé-yu sá yíñùhu núu-í dàtná nehé-yu sá yíñùhu núú Tătà-í Yaá ní tendaha ñaha xii-í véxi-í ñuyíú-a. Te nchaa ñáyiú ñã túu nèhe sá yíñùhu núú yùhú, te ñi núu Tătà-í ñã túu nèhé-yu sá yíñùhu.

²⁴ Te na càchí tnúhu ndáá-í xii-ndo sã nchaa ñáyiú na cùndedóho tnúhu na càháⁿ-í, te núu na quíndáá iní-yu Dútú Ndiöxí Yaá ní tendaha ñaha xii-í véxi-í ñuyíú-a ña, te vá cuíta nihnú-yu chi nduu táhú-yu cundecú-yu ndihí-gá ñi caa ñi quíhíⁿ. ²⁵ Te vitna na càchí tnúhu ndáá-í xii-ndo sã nchaa ñáyiú ndècu ichi cuéhé ichi duha cúu-yu dàtná ìⁿ ñáyiú ní xihí, te vitna ní sàá nduu cùndedóho-yu tnúhu càháⁿ yùhú Déhe Dútú Ndiöxí, te nchaa ñáyiú na quíndáá iní-xi, te naníhí táhú-yu. ²⁶ Te dàtná quidé mée Tătà-í dácăcu nihnu-gá ñáyiú, ducaⁿ ñí cachí-gá cada-í dácăcu nihnu-í-yu. ²⁷ Te ní cachí tucu-gá sá sàá ìⁿ nduu, te cada ndáá-í

cuéchi nchaa ñáiyu ñá túú quide ndáá, chi yúhú táxi tnùn-í, te cùu-í ñaní tnáhá-ndo nchaa-ndo. ²⁸ Te ni vǎ cúññu-ndo tnñhu cǎháⁿ-í, chi sǎá nduu te nchaa ñáiyu ní xíhí tecú dóho-yu tnúhu cǎháⁿ-í. ²⁹ Te ndoto nchaa ñáiyu ní quide váha cundecu ndihí-í-yu ni caa ni quíhíⁿ, te ndoto tnáhá nchaa ñáiyu ní quide cuèhé ní quide duha, te ñáiyu-án quíhíⁿ-yu núú ùhú núú ndàhú.

Yá Ndiöxí chindèe tnúhu-gá Jèsús

³⁰ Te yúhú, chi ni ñⁿ sǎ ñǎ ndácù-í cada mee-í nñu ñá díú mèe Yá Ndiöxí táuchíuⁿ-gá nàcuáa cada-í. Te quide ndáá-í cuéchi ñáiyu nàcuáa tàxi tnuní-gá cada-í, te yúhú ñá túú quide-í sǎ cúú ìní mèe-í chi Tǎtà-í ní táuchíuⁿ-gǎ nàcuáa cada-í. ³¹ Te núu na cǎháⁿ-í sǎ mèe-í táxi tnùn-í, te vá quindáá ìní-ndó. ³² Chi Yá Ndiöxí chindèe tnúhu ñaha-gǎ xii-í, te yúhú xìn-í sǎ tnñhu cǎháⁿ-gǎ cuendá-í cúú-xí ñⁿ sǎ ndáá. ³³ Te nchòhó ní téchíuⁿ-ndó cuè téé ní sǎháⁿ ní ndúcú tnñhu-güedé núú tǎ Juáá nñu ná tnúhu cǎháⁿ-dé cuendá-í, te téé-ǎn ní cǎháⁿ ndáá-dé nàcuáa nduu cuendá-í. ³⁴ Dico yúhú, chi ñá túú xini ññu-í ñⁿ ñáiyu ñuyíu-a chindee tnñhu ñáhá-yu xii-í, dico té Juáá ní cǎháⁿ váha-dé cuendá-í, te xǎⁿ cǎchí tnúhu tucu-í cuendá quindáá ìní-ndó, te naníhí tǎhú-ndó. ³⁵ Te dàtná cuiní-ndó cùu ñⁿ ití ndéñuhú te dàyehé-xi, ducaⁿ sǎtnahá-xi ní cuu té Juáá, chi sacú-ni nduu ío ní cudí ìní-ndó tnñhu ní cǎháⁿ-dé. ³⁶ Te váha-ni ní cǎháⁿ té Juáá, dico yúhú chi ndècu nchaa sǎ tá quide-í véxi nàcuáa ní táuchíuⁿ Yá Ndiöxí cada-í, te nchaa xǎⁿ cúú-xí ñⁿ sǎ cútnùn-í ìní-ndó sǎ mèe Yá Ndiöxí ní tendaha ñaha-gǎ xii-í véxi-í ñuyíu-a. ³⁷ Te ññu-ni-gǎ chindèe tnúhu ñaha-gǎ xii-í, dícó-ni sǎ mèe-ndó ñá túú cuiní-ndó càda cuendá-ndó tnñhu cǎháⁿ-gǎ, te ni ñá túú xìn-í-ndó nàcuáa càa-gǎ. ³⁸ Te ñá túú quèe ìní nchòhó tnúhu cǎháⁿ-gǎ, chi ñá túú sàndáá ìní ñáhá-ndó xii yúhú Déhe-gǎ. ³⁹ Te dàcuaha vihi-ndo tutú ndéè tnúhu-gǎ, chi sàni ìní-ndó sǎ xǎⁿ-ni dacuàha-ndo te naníhí tǎhú-ndó. Te váha-ni quide-ndo, chi ññu tutú-án cǎháⁿ-xi cuendá-í. ⁴⁰ Te nchòhó ñá túú cuiní-ndó quindáá ìní ñáhá-ndó xii-í cuendá naníhí tǎhú-ndó.

⁴¹ Te yúhú, ñá túú xini ññu-í sǎ cǎdá cǎhnu ñaha-ndo xii-í. ⁴² Dico sa xìn-í nàcuáa sàni ìní-ndó chi ñá túú cùu ìní-ndó Yá Ndiöxí. ⁴³ Te yúhú véxi-í ñuyíu-a chi Tǎtà-í ní tendaha ñaha-gǎ, te nchòhó ñá túú cuiní-ndó tnñ-ndo tnúhu cǎháⁿ-í, dico núu quixi ñⁿ téé cǎháⁿ cuendá mèe-xí, chi quindáá ìní-ndó. ⁴⁴ Te ná váha nchòhó ná tnñ-ndó tnñhu cǎháⁿ-í, te xio xio-ni quide cahnu tnaha-ndo, te ñá túú quide cuendá-ndó sǎ tnñhu váha cǎháⁿ Yá Ndiöxí cuu xii-ndo. ⁴⁵ Te vá cǎní ìní-ndó sǎ yúhú ndàcǎⁿ cuéchi-í núú Tǎtà-í nàcuáa quide-ndo, chi ndíi Moisés ní chídó tnùn-í ndíi núú tütú Yá Ndiöxí nàcuáa quide-ndo sǎ ñá túú quide váha-ndo, te mee-ndo sàni ìní-ndó sǎ naníhí tǎhú-ndó cuendá tnúhu ní cǎháⁿ ndíi. ⁴⁶ Chi núu nchòhó sàndáá ndisa ìní-ndó tnñhu ní cǎháⁿ ndíi Moisés ñá, te ducaⁿ te quindáá ìní-ndó yúhú ní cùu, chi ndíi-ǎn ní chídó tnùn-í ndíi nàcuáa cada-í ñuyíu-a vitna. ⁴⁷ Te núu ñá túú sàndáá ìní-ndó tnñhu ní chídó tnùn-í ndíi, te ññu-ni ducaⁿ càda ñaha-ndo xii-í vá quindáá ìní-ndó tnñhu cǎháⁿ-í —cǎchí-gǎ xǎháⁿ-gǎ xii-güedé.

6

Jèsús dǎcǎxi-gǎ úhúⁿ mǐl ñáiyu

(Mt. 14:13-21; Mr. 6:30-44; Lc. 9:10-17)

¹ Te sǎtá dúcǎⁿ ñí cuu, te ní quee Jèsús cuáháⁿ-gǎ ñngǎ xio yuhu làgúná Galileá, àdi Tiberiás chi úú ññu-xi. ² Te ío cuéhé ñáiyu nchícúⁿ ñáhá xii-gǎ cuáháⁿ cuendá sǎ ñí xini-yu nchaa sǎ vá yòo tnáhí ndàcu cada ní quide-gǎ, chi ní quide tátna-gǎ nchaa ñáiyu cùhú. ³ Te ní sǎá Jèsús ndihí cue téé xica cuu ndihí-gǎ ñⁿ núú tìndúú, te xǎⁿ ñí ngóo-gǎ ndihí-güedé. ⁴ Te ta cùyatni coo vico pascuá, vico quide ñáiyu isràél. ⁵ Te ní xini-gǎ sǎ ío vǎi ñáiyu nchícúⁿ ñáhá xii-gǎ cuáháⁿ, te ní xǎháⁿ-gǎ xii té Lìpé:

—¿Ndéè quíhíⁿ-ó quinguaaⁿ-o sǎ cǎxí nchaa ñáiyu-a? —cǎchí-gǎ xǎháⁿ-gǎ xii-dé.

⁶ Te ducaⁿ ñí xǎháⁿ-gǎ xii-dé cuendá sǎ cuiní-gǎ quini-gǎ nása cunduu tnúhu cǎháⁿ-dé, dico mee-gǎ sa xini-gǎ nàcuáa cada-gǎ. ⁷ Te ní xǎháⁿ tǎ Lìpé xii-gǎ:

—Te cuèi úú cièndú díhúⁿ denàriú ná dàndoñuhu-o cuaaⁿ-o paá, te ni vǎ tnáhá

caxí-yu luha luha —càchí-dé xáhaⁿ-dë xii-gá.

⁸ Te té Ndríxí ingá téé xica cuu ndihi-gá, ñaní té Xímú, àdi Pelú chi úú diu-dé, ní xáhaⁿ-dë:

⁹ —Iha ndècu ñⁿ té líhli nèhe-dé úhúⁿ pàá cebadá te úú chácá, dico ndéé tnahá xéhé, te cuéhé víhí ñáyi —càchí-dé xáhaⁿ-dë xii-gá.

¹⁰ Te ní xáhaⁿ Jèsús xii-güedé:

—Chí cùñaha nà ngóo-yu nchaá-yu —càchí-gá xáhaⁿ-gá.

Te ñáyi-áⁿ ñí ngóo-yu, te càa vihi ité núú ñí ngóo-yu-áⁿ, te xínu dàtná úhúⁿ mĩ mee-ni cuè téé, te dèⁿ ñáyi dèⁿ ndihi landú. ¹¹ Te ní queheⁿ Jèsús pàá, te ní ndacáⁿ táhú-gá núú Yá Ndiöxí, te ní sáñaha-gá pàá-áⁿ xii cue téé xica cuu ndihi-gá, te cue téé-áⁿ ñí dácãhñu-güedé ní xexi nchaá ñáyi xixúcu-áⁿ. Te diu-ni ducaⁿ ñí quide-gá chácá, te ní dácãhñu tucu-güedé-di ní xexi ñáyi ní ndahá xití-yu. ¹² Te òré ní túhú cóhó-yu, te ní xáhaⁿ Jèsús xii cue téé xica cuu ndihi-gá sá ná naqueheⁿ-güedé nchaá sá ñí quendóo cuendá sá vã quihíⁿ-xi núú míhí.

¹³ Te cue téé-áⁿ ní naqueheⁿ-güedé nchaá sá ñí quendóo, te ní chítú ùxúú tídihi núú úhúⁿ-ni pàá cebadá. ¹⁴ Te sá ñí xiní-yu ní nadacáyá-gá sá ñí xexí-yu, xíⁿ ní ngúita-yu ní xitnàhá-yu:

—Ndáá sá tée-a sa ió cuendú sá quixí-dë ñuyíú-a cáháⁿ-dé tnúhu Yá Ndiöxí —càchí-yu xitnàhá-yu.

¹⁵ Te ní cutnùní iní Jèsús sá cádá yicá-yu candeca ñàhá-yu xii-gá quihíⁿ cuendá cundecu-gá quindaha ñàha-gá xii-yu ní cùu, núú xíⁿ ní xica tucu-gá cuáháⁿ-gá xití yucu mee dii chícuú-gá.

Jèsús xicá-gá núú ndute

(Mt. 14:22-27; Mr. 6:45-52)

¹⁶ Te òré ní cuu ndiquíⁿ, te cuáháⁿ cue téé xica cuu ndihi-gá yuhu làgúná. ¹⁷ Te ní queé-güedé bàrcú cuáháⁿ-güedé ñuú Capèrnaúm cáá ndàa ingá xio yuhu làgúná, te sa ní cuu ndiquíⁿ, te ñá túú Jèsús quexìo queé-gá bàrcú ñúhú-güedé-áⁿ. ¹⁸ Te ní ngúita-xi quène táchí ñíhi, te níhi dácandau ndéé tnahá ndùte làgúná-áⁿ. ¹⁹ Te sa ní

cuu dàtná úhúⁿ kilómetrú cuáháⁿ-güedé, te ní xiní-güedé Jèsús tá cùyatni-gá bàrcú ñúhú-güedé véxi-gá núú nduté, te ní yùhú-güedé. ²⁰ Te ní xáhaⁿ Jèsús xii-güedé:

—Yúhú véxi-í, vá yùhú-ndó —càchí-gá xáhaⁿ-gá xii-güedé.

²¹ Te ío ní cudíⁿ iní-güedé sá ñí quexìo-gá cuánguee-gá bàrcú, te òré-ni ní quexìo-güedé ndihi-gá ndéé ingá xio yuhu làgúná núú cuáháⁿ-güedé.

Ñáyi nànducu ñaha xii Jèsús

²² Te ingá nduu-áⁿ xíndecu-ni nchaá ñáyi ní quendóo yuhu làgúná. Te ní quide cuendá-yu sá íⁿ dii-ná bàrcú núúñí-áⁿ ní cùu ñá túú-gá, chi cue téé xica cuu ndihi Jèsús ní queé-güedé bàrcú-áⁿ cuáháⁿ-güedé. Te ní níhí-yu tnúhu sá ñà túú ní queé tnahá Jèsús. ²³ Te diu-ni nduu-áⁿ ñí quee ñí úú bàrcú ñuú Tìberías ní sáá-xi yatni núú ñí xexí-yu pàá sá ñí ndacáⁿ táhú Jèsús núú Yá Ndiöxí. ²⁴ Te ní xiní-yu sá ñà túú Jèsús ndihi cue téé xica cuu ndihi-gá, núú ní quee-yu bàrcú-áⁿ cuáháⁿ-yu ñuú Capèrnaúm cuánúndúcú ñàhá-yu xii-gá.

Jèsús cúú-gá dàtná ñí sá nchító-ó

²⁵ Te ní sáá-yu ingá xio yuhu làgúná, xíⁿ ñí naníhí-yu Jèsús, te ní xáháⁿ-yu xii-gá:

—Mèstrú, ¿ná òré ní sáá-n ìha? —cachí-yu xáháⁿ-yu xii-gá.

²⁶ Te ní xáhaⁿ Jèsús:

—Na càchí tnúhu ndáá-í sá nchòhó nánducu ñaha-ndo xii-í cuendá-ni sá ñí xexi-ndo ñí ndahá xití-ndó, dico ñá díú cuendá sá ñí quide-í sá vã yóo tnahí ndàcu cada nanducu ñaha-ndo. ²⁷ Te vá cádá cuendá-ndó sã mée-ní sã caxí-ndó càda chiuⁿ-ndo chi xíⁿ vá cudí-xi. Chi ío-gá xiní ñúhu-xi cada cuendá-ndó tnúhu Yá Ndiöxí te tñí-ndo, te naníhí tãhú-ndó. Te tnúhu-áⁿ cachí tnúhu yúhú Tée cùu ñaní tnahá-ndó nchàa-ndo, te xíⁿ candeca-xi iní-ndó ñí caa ñí quihíⁿ, chi mee Dütú Ndiöxí ní cachí-gá sá dúcáⁿ càda-í —càchí-gá xáhaⁿ-gá xii-yu.

²⁸ Te ní xáháⁿ-yu:

—¿Nása cada-ndí cuendá ngúnu ichi-ndí nàcuáa cuñí Yá Ndiöxí cunduu-i? —càchí-yu xáháⁿ-yu xii-gá.

²⁹ Te ní xáhaⁿ Jèsús xii-yu:

—Yá Ndiöxí cuení-gá sá quíndáá iní ñáhá-ndó xì yúhú, téé ní tendaha-gã véxi ñuyíú-a —càchí-gá xáhaⁿ-gã xií-yu.

³⁰ Te ní xáhaⁿ tùcú-yu xii-gá:

—¿Ná cúú sã vã yõo tnàhí ndàcu cada, cada-n cùndehe-ndí cuèndá quíndáá iní ñáhá-ndí xii-n-i? ¿Àdi nágá cúú sã cáda-n cuèndá cutnùnì iní-ndí sá ndàá càháⁿ-n-í? ³¹ Chi cue ñaní tnáhá-ó ñí xíndecu ndéé sanaha ñí xexí-yu pàá nání mànáá xití yucu dàtná yódó tnùnì núú tùtú Yá Ndiöxí núú càchí-xi: “Yá Ndiöxí ní sáñaha-gã sá ñí xexí-yu, te ní cuuⁿ túu-xi andiù”, duha càchí-xi núú tùtú-gá —càchí-yu xáhãⁿ-yu xii-gá.

³² Te ní xáhaⁿ Jèsús:

—Na càchí tnúhu ndáá-í xii-ndo sã ñã díú ndíi Moisés ní sáñaha ndíi pàá ní cuuⁿ andiù ñí xexí-yu, chi mee Tàtá-í ní sáñaha-gã sá ñí xexí-yu. Te sá táxi-gã vitna cùu-xi ³³ datná pàá véxi cuuⁿ andiù càndeca-xi iní-ndó ñí caa ñí quíhíⁿ —càchí-gá xáhaⁿ-gã xií-yu.

³⁴ Te ní xáhãⁿ-yu xii-gá:

—Tàtá, mee-ñi pàá-áⁿ taxi-n càxi-ndí —càchí-yu xáhãⁿ-yu xii-gá.

³⁵ Te ní xáhaⁿ Jèsús:

—Yúhú cúú-í dàtná ñí sá xexí-ndó cãndeca-xi iní-ndó. Te duha ndúu tnúhu càháⁿ-í, chi nchaa ñáyíu na quíndáá iní ñáhá xii-í, te vã ndóhó-gã-yu docó te vã ndóhó-gã-yu ndute. ³⁶ Dìcò-ñi sá nchòhó ñá túú sàndáá iní ñáhá-ndó cuèi xini ñáhá-ndó xii-í. ³⁷ Te nchaa ñáyíu na càchí Tàtá-í nduu cuèndá-í nasaá-yu núu-í, te ñáyíu-áⁿ vã dáquèe tíhù-í-yu. ³⁸ Te ñã díú yúhú sá véxi cuuⁿ-í andiù te quíde-í nchaa sá cúú iní mée-í, chi véxi cuuⁿ-í sá cáda-í nchaa nàcuáa ní táuchíúⁿ mée Tàtá-í Dútú Ndiöxí Yaá ní tendaha ñàha xii-í véxi-í ñuyíú-a. ³⁹ Te cuení-gá sá ncháá ñáyíu ní cachí-gá nduu cuèndá-í vã dáñà-í-yu cuíta nihnú-yu, te na sáá nduu te diu-ñi-í dandòto-í-yu. ⁴⁰ Chi ducaⁿ ñí cachí Dútú Ndiöxí cunduu sá ncháá ñáyíu na tnèi tnúhu càháⁿ-í, te quíndáá ndisa iní ñáhã-yu xii yúhú Déhe-gá, te nduu táhũ-yu cundecú-yu ndíhi Yá Ndiöxí ñí caa ñí quíhíⁿ, te yúhú dandòto-í-yu na sáá nduu —càchí-gá xáhaⁿ-gã xií-yu.

⁴¹ Te ñá ní tnàhá iní ñáyíu isràél tnúhu ní cáháⁿ Jèsús núu ní ngúita-yu ní cáháⁿ cuèhé-yu cuèndá-gá cuèndá sá ñí xáhaⁿ-gã sá mée-gã cúú-gã dàtná sá xexí-ó véxi cuuⁿ andiù. ⁴² Te ní xitnàhá-yu:

—¿Náa ñá díú tée-a cùu-dé Jèsús déhe té Chèé? Nchoo xini-ó tãtá-dé, te xini-ó nãná-dé, ñá cachí-tu tée-a sá andiù véxi cuuⁿ-dé! —càchí-yu xitnàhá-yu.

⁴³ Te ní xáhaⁿ Jèsús xií-yu:

—Vá càháⁿ cuèhé-gá-ndó cuèndá-í, chí dáñá. ⁴⁴ Vã yõo quíndáá iní ñáhá xii yúhú núu ñã túú mée Tàtá-í táxi cuèndá ñáhá-gã xií-yu. Te diu-gá ní tendaha ñàha-gã xii-í véxi-í, te yúhú dandòto-í-yu na sáá nduu. ⁴⁵ Te núú tùtú cue tée ní xóo cáháⁿ tnúhu Yá Ndiöxí ndéé sanaha càchí-xi: “Yá Ndiöxí danèhé ñáhá-gã xií-yu tnúhu-gá”, duha càchí-xi. Te nchaa ñáyíu na cùndedóho nchaa tnúhu càháⁿ Dútú Ndiöxí, te cutúha-yu nàcuáa càháⁿ-gá, te ñáyíu-áⁿ quíndáá iní ñáhã-yu xii yúhú.

⁴⁶ Te vã yõo xini ñáhá xii Dútú Ndiöxí chí ñí ddi-ñi yúhú xini-í-gá, chí núú ndécú-gã ní quee-í véxi cuuⁿ-í —càchí-gá xáhaⁿ-gã xií-yu.

⁴⁷ Te xáhãⁿ tùcu-gá:

—Na càchí tnúhu ndáá-í xii-ndo sã nchaa ñáyíu na quíndáá iní ñáhá xii-í, te naníhí tàhú-yu. ⁴⁸ Te yúhú cúú-í dàtná ñí sá xexí-ndó cãndeca-xi iní-ndó, te ducaⁿ sãtnahá-xi cùu-í chí yúhú cada-í te nduu táhú-ndó cùndecu-ndo ndíhi Yá Ndiöxí ñí caa ñí quíhíⁿ. ⁴⁹ Te cue ñaní tnáhá-ó ñí xíndecu ndéé sanaha ñí xexí-yu pàá nání mànáá xití yucu, dico ní sáá nduu te dacuítí ñí xihí-yu. ⁵⁰⁻⁵¹ Te yúhú càháⁿ-í cuèndá mée-í, chí véxi cuuⁿ-í andiù. Te cùu-í dàtná ñí sá nchító-ndó, te nchaa ñáyíu na càxi te cãndeca-xi iní-yu ñí caa ñí quíhíⁿ te vã cuíta nihnu-gá-yu. Te sá táxi-í xii-ndo xíãⁿ cúú-xí yiqui cuñú-í, te cùu-xi cuèndá nchaa ñáyíu nihí ñuyíú cuèndá nduu táhũ-yu cundecú-yu ndíhi Yá Ndiöxí ñí caa ñí quíhíⁿ —càchí-gá xáhaⁿ-gã xií-yu.

⁵² Te ní ngúita ñáyíu isràél xitnàhá-yu:

—¿Nása cada-tu tée-a núu càchí-tu-dé sá yiqui cuñú-dé taxi-dé caxi-o-í? —càchí-yu xitnàhá-yu.

⁵³ Te ní xáhaⁿ Jèsús:

—Na càchí tnúhu ndáá-í xii-ndo sã nõu na càda iní-ndó sã dàtná sá cáxí-ndó yiqui cuñú yúhú Tée cùu ñaní tnáhá-ndó nchàa-ndo, te cada tucu iní-ndó sã dàtná sá cóhó-ndó ññí-í ñá, te xiãⁿ queé-xí sã quèndáá iní ñáhá-ndó ñi yuhu ñi iní-ndó te naníhí tàhú-ndó, te nõu ñáhá te cuíta nihnu-ndo. ⁵⁴ Nchaa ñáyi u na càda iní-xi sá dàtná sá cáxí-yu yiqui cuñú-í te cohó-yu ññí-í, ñáyi u-áⁿ naníhí tàhú-yu te yúhú dandòto-í-yu na sàá nduu. ⁵⁵ Chi yiqui cuñú-í ndihí ññí-í cúu-xí mèe-í. ⁵⁶ Te nchaa ñáyi u na càda iní-xi sá dàtná sá cáxí-yu yiqui cuñú-í te cohó-yu ññí-í, te ñáyi u-áⁿ ññí-í cuu-í ndihí-yu chi cundecu ndihí-í-yu. ⁵⁷ Te yúhú nchìto-í chi ducaⁿ nchìto Tàtá-í Yaá ní tendaha ñàha xii-í véxi-í ñuyú-a. Te ñi u-ñi ducaⁿ nchàa ñáyi u na quèndáá iní ñáhá xii-í te cundecu ndihí-í-yu ñi caa ñi quíhíⁿ. ⁵⁸ Te yúhú cúu-í dàtná ññí-í sá nchító-ndó véxi cuuⁿ andi u, dico ñá díu pàá sá nání mànáá ní xèxi cue ñaní tnáhá-ó ñi xindecu ndéé sanaha, chi ní xexí-yu pàá te dacuéi ní xihí-yu. Te nchaa ñáyi u na quèndáá iní ñáhá xii yúhú Yaá véxi cuuⁿ andi u, te cundecu ndihí-í-yu ñi caa ñi quíhíⁿ —càchí-gá xáhaⁿ-gã xii-yu.

⁵⁹ Nchaa tnúhu-a ní cáháⁿ-gá xití veñúhu ñáyi u ñuú Capèrnaúm.

Jèsús càchí tnúhu-gá nàcuáa naníhí tàhú-ó

⁶⁰ Te sá dúcáⁿ ñi cáháⁿ-gá nõu vai ñáyi u nchìcúⁿ ñáhá xii-gá ní xitnàhá-yu:

—Vá tníi cuíti-o tnúhu càháⁿ-dé chi ñá díu tnúhu sá cúu vaha iní-ó càháⁿ-dé —càchí-yu xitnàhá-yu.

⁶¹ Te ní cutnùní iní Jèsús sá ñà túu càháⁿ váha-yu cuèndá tnúhu ní cáháⁿ-gá, nõu ní xáhaⁿ-gã xii-yu:

—¿Náa ñá tnàhá iní-ndó nàcuáa càháⁿ-í-a?

⁶² Te uuⁿ-gá cada nchòhó nõu quini-ndó yúhú Tée cùu ñaní tnáhá-ndó nchàa-ndo ndaa-í núu ñi xindecu-í díhna. ⁶³ Te espíritu ndécú ndihí yiqui cuñú-ó, xiãⁿ ndécá ñàha-xi xii-o, te nõu ñá túu xiãⁿ, te yiqui cuñú-ó ñà túu nandíhí-xi. Dico nõu nchaa tnúhu càháⁿ-í-a queé-xi iní-ndó ñá, te quini-ndó ñá xéhé candeca ñàha-xi xii-ndo núu cuáháⁿ núu véxi. ⁶⁴ Te dava nchòhó chi

ñá túu sàndáá iní-ndó —càchí-gá xáhaⁿ-gã xii-yu.

Te ducaⁿ ñi xáhaⁿ-gã chi sa naha-gá nándi cùu ñáyi u vá quèndáá iní ñáhá xii-gá. Te ducaⁿ sá naha-gá ndédacàa té cuáha cuèndá ñáhá xii-gá núu cuè té cùu úhú iní ñáhá. ⁶⁵ Te ní xáhaⁿ tucu Jèsús xii-yu:

—Te duha càháⁿ-í chi sa ní càchí tnúhu-í xii-ndo sã vá yòo ññí-í cuini tníi tnúhu-í te nõu ñá túu Tàtá-í Dútú Ndiõxí sánú ñi naha-gá xii-yu —càchí-gá xáhaⁿ-gã xii-yu.

⁶⁶ Te òré-áⁿ ño vai ñáyi u nchìcúⁿ ñáhá xii-gá ní xócõo-yu ñá ní xica cuu-gá-yu ndihí-gá. ⁶⁷ Te xiãⁿ ní xáhaⁿ Jèsús xii ndi ùxúú cue té xica cuu ndihí-gá:

—¿Cuini-ndó dandóo ñàha-ndo tnàhá-ndó-ãⁿ? —càchí-gá xáhaⁿ-gã xii-güedé.

⁶⁸ Te ní xáhaⁿ tã Xímú, àdi Pelú chi úu ñi u-dé:

—Mèstrú, ñá túu-gã ndéé quíhíⁿ-ndí, chi nchúhú náhá-ndí sá tnúhu mee-n cùu-xi sá vaha candeca-xi iní-ndí ñi caa ñi quíhíⁿ.

⁶⁹ Chi nchúhú sa ní sàndáá iní ñáhá-ndí xii-n chi naha-ndí sá yòhó cúu-n Cristú Déhe Dútú Ndiõxí yaá ndécú andi u —cachí-dé xáhaⁿ-dè xii-gá.

⁷⁰ Te ní xáhaⁿ Jèsús:

—Nàha-ndo sá yúhú ní cáháⁿ ñáhá-í xii ndi ùxúú-ndó xica cuu ndihí ñàha-í xii-ndo, dico ññí-ndó quíhí ñàha yucu ñávaha xii-ndo —càchí-gá xáhaⁿ-gã xii-güedé.

⁷¹ Duha ní cáháⁿ Jèsús cuèndá té Jüdás déhe té Xímú Iscarioté ññí-í té ñi ñutnahá núu ùxí ññí-í cue té xica cuu ndihí-gá, chi sa naha-gá sá tée-ãⁿ cuáha cuèndá ñáhá-dè xii-gá ññí-í nduu núu cuè té cùu úhú iní ñáhá.

7

Cue ñaní Jèsús ñá túu sàndáá iní-güedé nàcuáa ndi u tnúhu càháⁿ-gá

¹ Te sátá dúcáⁿ ñi cuu, te ní xica cuu Jèsús distritú Galileá, te ñá ní sàháⁿ-gá distritú Jüdeá, chi yacáⁿ cuini cue té israhél cahni ñàha-güedé xii-gá ní cùu. ² Te ní cuyatni nduu càdá-yu vico, vico sá dánaní-yu Vico Vehe Tnuvixiⁿ. ³ Te ní xáhaⁿ cuè ñaní Jèsús xii-gá:

—Vàha-gá quíhíⁿ-n distritú Jüdeá te vá cundecu-n iha, chi yacáⁿ cada-n nchàa sá quidé-n iha cuèndá quini nchaa ñáyi u

cùndihî ñaha xii-n ndecu yacáⁿ. ⁴ Chi núu cuiní-ó quini nchaa ñáyiú ná chiúⁿ cada-o te vá cáda dàyuhu-o. Te yòhó cuéhé núú sá quidé-n, te cada-n na quini nchaa ñáyiú — cächí-güedé xáhaⁿ-güedé xii-gá.

⁵ Ducaⁿ ñí cáháⁿ cue ñaní-gá, chi ni mée-güedé ñá túú sàndáá iní-güedé nàcuáa nduu tnúhu cáháⁿ-gá. ⁶ Te ní xáhaⁿ Jèsús xii-güedé:

—Vátá tnàhá-gá òré quihíⁿ-í dico nchòhó ndédani càa oré cuu quihíⁿ-ndó. ⁷ Chi nchaa ñáyiú ñúhu ichi cuehé ichi duha chi ñá túú cùu úhú iní ñáhã-yu xii nchòhó. Dico yúhú chi cùu úhú iní ñáhã-yu xii-í cuendá sá cáháⁿ-í sá quidè-yu nchaa sá cuéhé sá dúhá. ⁸ Te chí cuáháⁿ nchòhó vico chi yúhú vá quihíⁿ-ni-í chi vátá tnàhá-gá òré quihíⁿ-í —cächí-gá xáhaⁿ-gã xii-güedé.

⁹ Te ducaⁿ ñí xáhaⁿ-gã te ní ndóo-gá Galiléa, te cue téa-áⁿ cuáháⁿ-güedé.

Jèsús ndécú-gã ñí vico chiñuhú-yu Yá Ndiõxí

¹⁰ Dico sátá cuáháⁿ cue ñaní-gá, te ní xica-gá cuáháⁿ-gá tnàhá-gá dicó-ni sá dàyuhu cuáháⁿ-gá. ¹¹ Te ñáyiú israél ñáyiú xñdecu vico nànducú-yu Jèsús, te xñtnàhá-yu:

—¿Ndèé ndécú Jèsús? —cächí-yu xñtnàhá-yu.

¹² Te nchaa ñáyiú xñdecu vico xñdatnúhu-yu cuendá-gá. Te davá-yu xñtnàhá-yu sá ño váha iní-gá, te davá-yu xñtnàhá-yu sá ña díú tée váha cùu-gá, chi dàndahú-gá ñáyiú.

¹³ Dico mee-ni xicáháⁿ náhí-yu, chi xñyùhú-yu cue téa cùnúu núú-yu.

¹⁴ Te ta ngúhuⁿ dava vico, te cuánguihu Jèsús veñúhu cahnú sá ño cùnúu, te ní ngúíta-gá dácuàha-gá ñáyiú. ¹⁵ Te ñáyiú israél ní cuñúhu vñhí-yu sá ño váha cáháⁿ-gá, te ní xñtnàhá-yu:

—¿Ná cuendá ño váha ñúhu-tu díquí tée-a tnúhu cáháⁿ-dé te ña túú ní dàcuaha-dé-í? —cächí-yu xñtnàhá-yu.

¹⁶ Te ní xáhaⁿ Jèsús:

—Ñá díú cuendá mée-í cúu-xí sá dánèhé ñáhã-í xii-ndo, chi cuendá Dútú Ndiõxí Yáa ní tendaha ñaha xii-í véxi-í cúu-xí. ¹⁷ Te núu ño dava-ndo ñi yuhu ñi iní-ndó

cuiní-ndó càda-ndo nacuáa cuiní Yá Ndiõxí cunduu, te cutnúni ndáá iní-ndó sá tnúhu dàcuaha ñaha-í xii-ndo cùu-xi cuendá mée Dútú Ndiõxí, te ña díú cuendá mée-í cúu-xí.

¹⁸ Te téa cuiní sá cáda cahnú ñaha ñáyiú xii-dé, téa-áⁿ cáháⁿ-dé nàcuáa véxi iní mée-dé. Dico yúhú cuiní-í sá cáda cahnú-yu Dútú Ndiõxí Yáa ní tendaha ñaha xii-í véxi-í ñuyú-a, te cáháⁿ ndáá-í te ña túú dàcuandehnde-í.

¹⁹ Te ndí Moisés ní taxi ndí tnúhu sá sánú ichi ñaha xii-ndo nacuáa cundecu-ndo, te ní ducaⁿ ña túú sàndáá iní-ndó nàcuáa cáháⁿ tnúhu-áⁿ. ¿Te ná cuendá cuiní-ndó cahnú ñaha-ndo xii-í? —cächí-gá xáhaⁿ-gã xii-yu.

²⁰ Te ní xáháⁿ-yu xii-gá:

—Yucu ñávaha dàcoto ñaha xii-ó, chi vá yòo ñí cuiní cahnú ñaha xii-n —cächí-yu xáháⁿ-yu xii-gá.

²¹ Te ní xáhaⁿ Jèsús xii-yu:

—Sá ñí quide-í ñí sá vá yòo tnàhí ndàcu cada nduu cuu-xi nduu ndetatú-ó, xíáⁿ ño ní cuñúhu ñaha-ndo xii-í. ²² Te ndí Moisés ní cachí ndí sá cuàha-yu seña ñí cue landú téa, dico ña díú mée ndí ni cahu iní ndí chi ducaⁿ tnàhí ní xóo cada cue ñaní tnàhá-ó dàvá-áⁿ, núu xíáⁿ nchòhó sàha-ndo seña ñí landú téa cuéi cùu-xi nduu ndetatú-ó.

²³ Te ducaⁿ quide-ndo cuendá sá ña túú ña cumání-ndó núú tnúhu sá sánú ichi ñaha xii-ndo ní dàndóo ndí Moisés. ¿Te ná cuendá cúdèéⁿ-ndó núu-í sá ñí quide tátna-í téa cùhú nduu ndetatú-ó-í? ²⁴ Te váha váha cada cuendá-ndó, te vá cuendá-ni cáháⁿ-ndó sá yúhú ndécuechi-í chi ña túú xini-ndó —cächí-gá xáhaⁿ-gã xii-yu.

Jèsús xáhaⁿ-gã xii-yu núú véxi-gá

²⁵ Te dava ñáyiú ñuú Jerusàlén ní ngúíta-yu xñtnàhá-yu:

—¿Náa ña díú tée-áⁿ nánducu-güedé cahnú-güedé?, ²⁶ núu náí-dé nútní núu chítú núú tàcá-áⁿ cáháⁿ-dé, te vá yòo cùyíi cúñaha xii-dé ñí tnúhu. Cudana te cue téa cùchiuⁿ sandáá iní-güedé sá díú-dé cúu-dé Crìstú Yáa ní tendaha Yá Ndiõxí véxi ñuyú-a. ²⁷ Dico nchoo xini-ó ndèé ichi véxi téa-áⁿ, dico Crìstú ná quixi-gá chi vá yòo ñí quini ndèé ichi quixi Yáa-áⁿ —cächí-yu xñtnàhá-yu.

²⁸ Te yñi Jèsús xití veñúhu cahnú sá ño cùnúu danehe-gá ñáyiú, te ní tecú dóho-gá

tnúhu càháⁿ-yu. Te níhi ní cáháⁿ-gá, te xáhaⁿ-gã xií-yu:

—¡Ná quiní-tu nchòhó ndèé ichi véxi yúhú! Yúhú véxi-í dico ñá díú sã cúú iní méè-í, chi Yá Ndiõxí Yaá quidé nchàa-ndi túhú sá vãha ní tendaha ñàha-gá xii-í véxi-í, te nchòhó ñá túú xini-ndó-gá. ²⁹ Te yúhú xini-í-gá chi núú ndécú-gã ní quee-í véxi-í, te ñu mee-gã ní tendaha ñàha-gá véxi-í — càchí-gá xáhaⁿ-gã xií-yu.

³⁰ Te sá dúcáⁿ ñi cáháⁿ-gá, núu cuini-güedé tñi ñaha-güedé xii-gá quihíⁿ-gá vecaá ní cùu, dico vá yõ ñi cùyi tñi ñaha xii-gá chi vátá sàá-gá òré tñi ñaha-güedé. ³¹ Dico vai-yu ní sándáá iní ñáhã-yu xii-gá, te ní xitnãhá-yu:

—¿Nágá cúú sã cáda Cristú ná quixi-gá-i?, te té-a ío cuéhé nũú sã tá quide-dé véxi. Váa ñu té-a cùu-dé Cristú Yaá ní tendaha Yá Ndiõxí véxi ñuyú-a — càchí-yu xitnãhá-yu.

Cue téa cùu fariséu cuini-güedé quihíⁿ Jèsús vecaá

³² Te ní níhi cue téa cùu fariséu tnúhu nàcuáa càháⁿ ñáyiu cuendá Jèsús, núu ní ndatnúhu-güedé ndihí cue dútú cùnùu, te ní techiü-güedé cue téa quide cuendá veñúhu cuáhã-güedé cuatñi ñaha-güedé xii-gá ní cùu. ³³ Te ní xáhaⁿ-gã xii-güedé:

—Sacú duha nduu cundecu ndihí ñaha-í xii-ndo, te núhú tucu-í núú ndécú tãtã-í Yaá ní tendaha ñàha xii-í véxi-í ñuyú-a. ³⁴ Te cuéi na nãnducu ñaha-ndo dico vá ná níhi ñáhã-ndó chi vá sãã-ndó nũú cündecu-í — càchí-gá xáhaⁿ-gã xii-güedé.

³⁵ Te ní ngüita ñáyiu isràel xitnãhá-yu:

—¿Ndèé quihíⁿ-tu téa te vá ná níhi-ó-dé-i? ¿Àdi quihíⁿ-dé na chitnãhá-dé ñáyiu isràel ñáyiu nchiténuu nchaa ñuú xicá cuendá danèhé-dé ñáyiu griégú? ³⁶ ¿Nása càháⁿ-tu-dé duha càháⁿ-dé: “Nanducu ñàha-ndo te vá nãníhi ñáhã-ndó chi vá sãã-ndó nũú cündecu-í”, càchí-tu-dé? — càchí-yu xitnãhá-yu.

Nàcuáa cada Espiritú Yá Ndiõxí iní-ó

³⁷ Te nduu ñi yáha-ná vico cùu-xi nduu cahnu vihi, te nduu-ãⁿ ñi ngúnu tñi Jèsús tnuú ñáyiu, te níhi ní cáháⁿ-gá, te xáhaⁿ-gã xií-yu:

—Núu ío dava-ndo yichí-ndó ndüte, te quixi-ndo nũú-í, te coho-ndo. ³⁸ Duha

càháⁿ-í chi nchaa ñáyiu na quindáá iní ñáhã xii-í, te cada-xi iní-yu dàtná ñi núú xicá ndüte, nchaa-ni nduu xica ñá túú yichí, ducaⁿ càda-xi iní-yu núú cuáhãⁿ núú véxi dàtná càháⁿ-xi núú tütú Yá Ndiõxí — càchí-gá xáhaⁿ-gã xií-yu.

³⁹ Te ducaⁿ ñi cáháⁿ-gá cuendá sá quixí Espiritú Yá Ndiõxí ngündecu ndihí nchaa ñáyiu na quindáá iní ñáhã xii-gá, chi sáa nduu ndãa-gá andiü càda cahnu ñaha Tãtã-gã xii-gá, te dàvã-ãⁿ te quixi Espiritú Yá Ndiõxí cundecu ndihí-yu.

Ñá ní cùu ñi nuú-yu cuendá tnúhu ní cáháⁿ Jèsús

⁴⁰ Te dava ñáyiu ní xindedóho tnúhu ní cáháⁿ Jèsús ní xitnãhá-yu:

—Ndáá sá tãe-a cùu-dé téa càchí-yu quixi cáháⁿ tnúhu Yá Ndiõxí — càchí-yu xitnãhá-yu.

⁴¹ Te dava tucú-yu xitnãhá-yu:

—Tãe-a cùu-dé Cristú Yaá ní tendaha Yá Ndiõxí véxi ñuyú-a — càchí-yu xitnãhá-yu.

Te dava-gá tucú-yu xitnãhá-yu:

—¿Náa ndãa distritú Galileá quixi Cristú Yaá tendaha Yá Ndiõxí quixi ñuyú-a? ⁴² Chi núú tütú Yá Ndiõxí càchí-xi sã Cristú Yaá tendaha Yá Ndiõxí quixi ñuyú-a cuu-gã ñi ñani tñáhã ndi Dãvií, te quee-gã ñuú Belén ñuú méé ndi Dãvií, duha càháⁿ-xi núú tütú Yá Ndiõxí — càchí-yu xitnãhá-yu.

⁴³ Te xiãⁿ nũu ñá ní cùu ñi nuú-yu cuendá Jèsús. ⁴⁴ Te davã-yu cuini-yu tñi-yu Jèsús quihíⁿ-gã vecaá ní cùu, dico ñi ñi-yu ñá túú ní cùyi-yu tñi ñáhã-yu xii-gá.

Cue téa cùchiuⁿ ñá túú sãndáá iní-güedé Jèsús

⁴⁵ Te cue téa cuáhãⁿ tñi ñaha xii Jesús ní cùu ní ndexiü-güedé núú cuè téa cùu fariséu ndihí núú cuè dútú cùnùu. Te xáhaⁿ cuè téa cùnũu-ãⁿ:

—¿Ná cuendá ñá ní cãndeca-ndo tãe-ãⁿ quixi? — càchí-güedé xáhaⁿ-güedé.

⁴⁶ Te cue téa ní sáhãⁿ chiüⁿ ní xáhaⁿ-güedé: —Ni ñi téa ñá túú xini-ndí cáháⁿ dàtná càháⁿ téa-ãⁿ — càchí-güedé xáhaⁿ-güedé.

⁴⁷ Te ní xáhaⁿ cuè téa cùu fariséu:

—¿Náa tñáhã nchòhó ní sãndáá iní-ndó tnúhu ndehnde càháⁿ téa-ãⁿ? ⁴⁸ ¿Náa ñá túú xini-ndó sã ñi ñi cue téa tãxi tñuní nchúhú, te ñi ñi nchúhú cue téa cùu fariséu ñá túú

sàndáá iní-ndí téé-ǎñ ñǎ? ⁴⁹ Nchaa ñáiyu tùha ñaha xii téé-ǎñ ñá túú sàndáá iní-yu nàcuáa càháⁿ tnúhu sá sánú ìchi ñaha xii-o, dico cuíta nihnú-yu sá dúcáⁿ quidé-yu —càchí-güedé xáhaⁿ-güedé xii cue téé-ǎñ.

⁵⁰ Te té Nicòdemú téé ní sáháⁿ niú ní ndatnúhu-dé ndihí Jèsús cúú-dé tnàhá-dé ìⁿ téé fariséú, te ní xáhaⁿ-dē xii-güedé:

⁵¹ —Tnúhu sá sánú ìchi ñaha xii-o nacuaa cundecu-o càchí-xi sá ndéé cundedóho-o nǎsa càháⁿ téé tàú cuéchi cuèndá cutnùní iní-ó nǎ ní quide-dé, te dàtnùní càháⁿ-ó nùu ndisa ndècuéchi-dé àdi ñá túú ndècuéchi-dé —càchí-dé xáhaⁿ-dē.

⁵² Te ní xáhaⁿ-güedé:

—Cùu ní cachí sá tnàhá-ò cúú-n tēe distritú Galileá nùu ducaⁿ càháⁿ-n. Dacuàha tutú yódó tnùní tnúhu Yá Ndiòxí te quiní-n nàcuáa càháⁿ-xi sá nì ìⁿ téé véxi distritú Galileá ñá túú càháⁿ-dē tnúhu Yá Ndiòxí —càchí-güedé xáhaⁿ-güedé.

⁵³ Ducaⁿ te ndi díⁿ cuānuhú-güedé vehe-güedé.

8

Ìⁿ ñadìhí ndécú vîhi cuéchi-xi

¹ Te Jèsús cuáháⁿ-gá yucu Òlívú. ² Te sátá nǎ túndaá nduu tnéé, te cuáháⁿ tucu-gá veñúhu càhnu sá ìo cùnnoo. Te ìo cuéhé ñáiyu ní chítú níhnú-yu núú-gǎ, te ní ngóo-gá ní dánèhé ñáhá-gǎ xii-yu. ³ Te ní quexìo cue téé dàcuaha ñaha xii-yu nchaa tnúhu ní chídó tnùní ndí Moisés, ndihí cue téé cùu fariséú, te ndèca-güedé ìⁿ ñadìhí ní sáá, te ñaha-ǎñ nǎ xini ñáhá-yu càháⁿ ndihí-aⁿ ìⁿ téé dico ñá díú yì-aⁿ cuu-dé, te ní sanutnì ñaha-güedé xii-aⁿ tnuú nchaa ñáiyu xĩndecu núú Jèsús. ⁴ Te ní xáhaⁿ-güedé xii Jèsús:

—Mèstrú, ñadìhí-a ní xini ñáhá ñáiyu xii-aⁿ càháⁿ ndihí-aⁿ ìⁿ téé dico ñá díú yì-aⁿ cuu-dé. ⁵ Te tnúhu ní chídó tnùní ndí Moisés càchí-xi sá yúu cahni-o nchaa ñáiyu dìhí duha quide. Te yòhó, ¿nǎsa càchí-n cùnduu-í? —cachí-güedé xáhaⁿ-güedé xii-gá.

⁶ Duha ní càháⁿ-güedé chi cuèndá sá cuení-güedé coto ndeé ñáhá-güedé xii-gá nùu nǎsa càháⁿ-gá cuèndá núcóo nchihí ñaha-güedé xii-gá ní càháⁿ-güedé. Te ní ngúnu ndeyi-gá te ní ngúita-gá téé-gǎ ndihí díquí ndáhá-gǎ lètrá núú ñúhú. ⁷ Te

xìcáⁿ tnúhú-ní tucu-güedé núú-gǎ nùu ní ndonehe núú-gǎ, te ní xáhaⁿ-gǎ:

—Ndédani càa nchohó te núu ñá túú nǎ cuéchi quide-ndo te díhna nuu-gǎ-ndó chí cuáha-aⁿ yúú —càchí-gá xáhaⁿ-gǎ xii-güedé.

⁸ Te ní ngúnu ndeyi tucu-gá téé tucu-gá lètrá núú ñúhú. ⁹ Te sá dúcáⁿ nǎ xáhaⁿ-gǎ xii-güedé te ní ndixi túu iní-güedé sá ñá túú quide váha mee-güedé tnàhá-güedé, núu da ìⁿ da ìⁿ-güedé ní ndee, te díhna-gá cue téé cùu sacuéhé nǎ ndee te ní ngúita nchicúⁿ dava-gá-güedé. Te sátá nǎ ndihí-güedé ní ndee, te ní quendóo mee-nǎ Jèsús ndihí ñadìhí-ǎñ. ¹⁰ Te ní ndonehe núú Jèsús te ní xini-gá sá nǎ ndihí-güedé cuáháⁿ te mee-nǎ ñadìhí-ǎñ nǎ ndóo-aⁿ, te ní xáhaⁿ-gǎ xii-aⁿ:

—¿Ndèndi cuáháⁿ cue téé càchí sá nǎ quide-n cuéchi? ¿Ni ìⁿ-güedé ñá ní cùndee tnúhu-güedé quíhíⁿ-n càstiú-va? —càchí-gá xáhaⁿ-gǎ xii-aⁿ.

¹¹ Te ní xáhaⁿ-aⁿ xii Jèsús:

—Ñáhá, chi ni ìⁿ-güedé ñá ní ndàcu-güedé —càchí-aⁿ xáhaⁿ-aⁿ.

Te ní xáhaⁿ Jèsús:

—Te ni yúhú vá dáquihíⁿ ñáhà-í castiú xii-n. Te vitna te núhú-n te vá cadá-gǎ-n nǎndi sá cuéhé sá dúhá —càchí-gá xáhaⁿ-gǎ xii-aⁿ.

Jèsús dándixi túu-gá iní-ó

¹² Te ní càháⁿ tucu Jèsús núú ñáiyu, te xáhaⁿ-gǎ xii-yu:

—Yúhú cùú-í dàtná ìⁿ ñuhú dáyèhe-í ñuyú-a, te nchaa ñáiyu na chitnahá ñáhá xii-í, te vá cùndecu-gá-yu ìchi cuéhé ìchi duha, chi yúhú dándixi túu-í iní-yu cuèndá cutnùní iní-yu nàcuáa ndùu cuèndá Yá Ndiòxí, te cundecu-í ndihí-yu ni caa ni quíhíⁿ —càchí-gá xáhaⁿ-gǎ xii-yu.

¹³ Te ní xáhaⁿ cuè téé cùu fariséú xii-gá:

—Medì-n caháⁿ-n sǎ cúú-n tēe váha, te vá yòo ìⁿ-gá chindèe tnúhu ñaha xii-n núu ná téé cùu-n, dico xǎñ ñá túú nàndìhí-xi —càchí-güedé xáhaⁿ-güedé xii-gá.

¹⁴ Te ní xáhaⁿ Jèsús:

—Cuéi càháⁿ-í cuèndá mèe-í dico nàndìhí tnúhu càháⁿ-í. Chi yúhú nàha-í ndeé ìchi véxi-í, te xini-í ndeé ìchi núhú-í, dico nchòhó chi ñá túú xini-ndó ndeé ìchi véxi-í, te ni ñá túú xini-ndó ndeé ìchi quíhíⁿ-í. ¹⁵ Te

nchòhó chi cuèndá-ni càháⁿ-ndó cuèndá ñáyiú núu quide váha-yu àdi ñá túú quide váha-yu. Te yúhú ñá túú càháⁿ-í cuèndá ñáyiú núu quide váha-yu àdi ñá túú quide váha-yu. ¹⁶ Àdi núu càháⁿ-í dico ìⁿ tnúhu ndáá càháⁿ-í chi ñá díú-ní mèe-í càháⁿ, chi tnàhá Tàtà-í Yaá ní tendaha ñàha xii-í véxi-í ñuyíú-a càháⁿ-gá chindèe tnúhu ñàha-gă xii-í. ¹⁷ Te tnúhu sá sánú ìchi ñàha xii-ndo cachí-xi sá núu na cùndecu úú cue tée càháⁿ ndáá-güedé nàcuáa cùu ìⁿ sá cùndáá, te núu ìⁿ-ni tnúhu na càháⁿ-güedé ndi ndúú-güedé te xiáⁿ nándíhi-xi, duha càchí tnúhu-áⁿ. ¹⁸ Te ñu-ni ducaⁿ cùu-xi yúhú chi càháⁿ-í ìⁿ tnúhu ndáá sá cúú-xí mèe-í, te ñu-ni dàtná càháⁿ-í càháⁿ Tàtà-í Yaá ní tendaha ñàha xii-í véxi-í ñuyíú-a —càchí-gá xáhaⁿ-gă xii-güedé.

¹⁹ Te ní xáhaⁿ-güedé xii-gá:

—¿Te ndèe ndécú Tàtà-n-í? —càchí-güedé xáhaⁿ-güedé.

Te ní xáhaⁿ Jèsús:

—Te núu dicó xini-ndó yòo cuu yúhú-á te ducaⁿ te quini-ndó Tàtà-í. Te ni yúhú ñá túú xini-ndó yòo cuu-í núu xiáⁿ ñá túú xini-ndó Tàtà-í —càchí-gá xáhaⁿ-gă xii-güedé.

²⁰ Duha ní càháⁿ Jèsús ñini dàcuaha-gă ñáyiú xití veñúhu núu ndécú àlcaniá díhúⁿ. Te vá yòo ìⁿ ni cùyìⁿ tnì ñàha xii-gá chi vátá sáa-gá òré tnì ñàha-güedé.

Ñáyiú ñá túú sàndáá iní ñáhá xii Jèsús vá ndácú-yu quíhíⁿ-yu núu nùhú-gá cundecu-gá

²¹ Te ní xáhaⁿ tùcu Jèsús xii-güedé:

—Yúhú nùhú-í te nanducu ñàha-ndo te vá nánihí ñáhá-ndó, te cuú-ndó núu yíca cuèchi-ndo, chi vá ndácú-ndó sáa-ndó núu nùhú-í cundecu-í —càchí-gá xáhaⁿ-gă xii-güedé.

²² Te ní xitnàha cue tée isràèl:

—¿Te náa cahni-dé méé-dé núu càchí-dé sá vā ndácú-ó sáa-ó núu quíhíⁿ-dé-áⁿ? —càchí-güedé xitnàha-güedé.

²³ Te ní xáhaⁿ Jèsús xii-güedé:

—Nchòhó chi cue tée ñuyíú-a cùu-ndo, núu ío ñùhu iní-ndó sá ío ñuyíú-a. Te yúhú chi tée núu ñnu cùu-í núu xiáⁿ ñá túú sá ío ñuyíú-a ñùhu iní-í. ²⁴ Te xiáⁿ núu càchí-í sá cúú-ndó núu yíca cuèchi-ndo, chi ñá cuèni-ndó quíndáá iní-ndó sá yúhú véxi cuuⁿ-í andiú, te núu xiáⁿ ñu-ni núu yíca

cuèchi-ndo cúú-ndó —càchí-gá xáhaⁿ-gă xii-güedé.

²⁵ Te ní xicáⁿ tnúhú-güedé núu-gă, te xáhaⁿ-güedé:

—¿Te ná cúú yòhó núu ducaⁿ càháⁿ-n-í? —càchí-güedé xáhaⁿ-güedé xii-gá.

Te ní xáhaⁿ-gă:

—Sa ní cachí tnúhu-í xii-ndo ndéé díhna —càchí-gá xáhaⁿ-gă xii-güedé.

²⁶ Te xáhaⁿ tùcu-gá:

—Ndècu cuéhé tnúhu càháⁿ-í cada ndáá-í cuèndá nchòhó. Te Tàtà-í Yaá ní tendaha ñàha xii-í véxi-í ñuyíú-a càháⁿ-gá tnúhu ndáá, te tnúhu càháⁿ yúhú ñuyíú-a cùu-xi tnúhu ní càháⁿ-gá ní xíndedóho-í —càchí-gá xáhaⁿ-gă xii-güedé.

²⁷ Te mee-güedé ñá túú ní tècú tnùn-í-güedé sá cuèndá Dútú Ndiòxí ní càháⁿ Jèsús. ²⁸ Te ní xáhaⁿ-gă xii-güedé:

—Òré ná catá cà ñàha-ndo xii yúhú Téé cùu ñani tnáhá-ndó nchàa-ndo núu cùrúxí cahni ñàha-ndo, te òré-áⁿ cutnùn-í iní-ndó yòo cuu-í, te ñá túú quide-í sá cúú iní mèe-í, chi yúhú càháⁿ-í nàcuáa ní dánèhé ñáhá Tàtà-í ²⁹ Yaá ní tendaha ñàha xii-í véxi-í. Te ñu-gá ndécú ndìhi ñàha-gă xii-í, te ñá túú dàña nihnu ñàha-gă chi quide-í nchaa nàcuáa cùu iní-gá —càchí-gá xáhaⁿ-gă xii-güedé.

³⁰ Te sá dúcáⁿ ñí càháⁿ-gá núu ío vai ñáyiú ní sàndáá iní ñáhá xii-gá.

Ñáyiú sàndáá iní ñáhá xii Yá Ndiòxí ndìhi ñáyiú ndècu ichi cuéhé ichi duha

³¹ Te ní xáhaⁿ Jèsús xii ñáyiú isràèl ñáyiú ní sàndáá iní ñáhá xii-gá:

—Te núu vá dáñá ndéè-ndó càda-ndo nchaa nacúáa càháⁿ-í, te cuu ndisa-ndo cuè téé tnàhá tnúhu ndìhi-í, ³² te tecú tnùn-í-gá-ndó tnúhu ndáá, te ducaⁿ te cácu nihnu-ndo —càchí-gá xáhaⁿ-gă xií-yu.

³³ Te ní xáháⁿ-yu:

—Nchúhú cúú-ndí cue ñani tnáhá ndìi Àbrahám, te ni ìⁿ nduu ñá túú ndéé sácündedí nihnu-ndí ndoho tnahá-ndí núu cáchí-ò sá dácácu nihnu ñàha-n xii-ndí —càchí-yu xáháⁿ-yu xii-gá.

³⁴ Te ní xáhaⁿ Jèsús xií-yu:

—Na càchí tnúhu ndáá-í xii-ndo sá nchàa ñáyiú quide nchaa sá cuéhé sá dúhá tàxi tnùn-í ñáhá-nă-xi xií-yu. ³⁵ Te cue ñáyiú

xinu cuechi te vá cúú ìⁿ-ná cuú-yu ndihi ñáyiú dii vèhe-xi xinu cuechí-yu, dico cue déhe ñáyiú dii vèhe-xi-áⁿ chi ìⁿ-ni cùu ndihi ñaha-güexi xií-yu. ³⁶ Te núu yúhú Yaá cúú Dèhe Yá Ndiöxí dâcâcu nihnu ñaha-ï xii-ndo núu nchâa yíca cuèchi-ndo, te ndáá sá nchòhó cácu nihnu ndisa-ndo. ³⁷ Te yúhú sa xiní-í sá nchòhó cúú-ndó ñàní tnáhá ndíi Àbrahám, te dìcò-ni sá ñã tnàhá iní-ndó tnùhu càháⁿ-í núu xíãⁿ cuìní-ndó càhni ñaha-ndo. ³⁸ Te yúhú càháⁿ-í nâcuáa ní dánèhé ñáhá Tâtà-í, te nchòhó quidé-ndó nâcuáa càháⁿ tâtá-ndó —câchí-gá xáhaⁿ-gã xií-yu.

³⁹ Te ní xáhãⁿ-yu:

—Ndíi Àbrahám cúú tâtá-ndí —câchí-yu xáhãⁿ-yu xii-gá.

Te ní xáhaⁿ Jèsús:

—Núu ndisa ñàní tnáhá ndíi Àbrahám cúú-ndó, te cada-ndo nâcuáa ní xóo cada ndíi ni cùu. ⁴⁰ Te yúhú cuèi càháⁿ-í ìⁿ tnúhu ndáá nâcuáa càháⁿ Yã Ndiöxí càchí tnúhu-gá xii-í, te cuìní-ndó càhni ñaha-ndo. ¡Dico ndíi Àbrahám chi ñã túú dùcaⁿ ni quide ndíi! ⁴¹ Te nchòhó quidé-ndó nâcuáa quide tâtá-ndó —câchí-gá xáhaⁿ-gã xií-yu.

Te ní xáhãⁿ-yu:

—Nchúhú, ñã túú yàyacáⁿ ndécú tâtá-ndí, chi ìⁿdii Yá Ndiöxí cúú tâtá-ndí —câchí-yu xáhãⁿ-yu xii-gá.

⁴² Te ní xáhaⁿ Jèsús:

—Núu dìcò Yá Ndiöxí ndisa cùu Tâtá-ndó te cuu iní ñáhã-ndó xii-í ní cùu chi yúhú ní quee-í núú ndécú-gã véxi-í ñuyíú-a. Te ñã túú véxi-í sá cúú iní mée-í, chi mee-gã ní tendaha ñaha-gá véxi-í. ⁴³ Te ñã túú tècú tnùní-ndó tnùhu càháⁿ-í chi ñã túú tnàhá iní-ndó. ⁴⁴ Te nchòhó chi tâtá-ndó cùu yucu ñávãha núu cùdìí iní-ndó quide-ndo nchaa nacuáa cùu iní-xi, chi ndéé òré ní ngáva ñuyíú ducaⁿ-ni ndècu-xi dacáhãⁿ-xi iní-ndó sàhni tnaha-ndo. Te ñã ìⁿ ndùu cáháⁿ-xi ìⁿ tnúhu ndáá chi ñã túú xìca-xi ichi ndáá, chi mee-ni ìchi tnúhu ndehnde xìca-xi chi ducaⁿ iní-xi. Te ñu-xi dàcahu-xi iní-ndó dàcuandehnde-ndo. ⁴⁵ Te yúhú càháⁿ-í tnúhu ndáá te ñã túú cuìní-ndó quindáá iní ñáhã-ndó. ⁴⁶ ¿Te ndédacàa nchòhó xiní-ndó sã quidè-í ìⁿ sá cuèhé sá dúhá-í?, te yúhú ñã túú nã quidè-í chi càháⁿ ndáá-í, ¿te ná cuendá ñã túú cuìní-ndó quindáá iní-ndó

tnùhu càháⁿ-í? ⁴⁷ Te nchaa ñáyiú ndècu ichi Yá Ndiöxí, ñáyiú-áⁿ sácúndedóho-yu nchaa tnúhu càháⁿ-gá. Te nchòhó chi ñã díú ìchi Yá Ndiöxí ndécú-ndó núu ñã túú sácúndedóho-ndo tnùhu càháⁿ-gá —câchí-gá xáhaⁿ-gã xií-yu.

Díhna-gá Crístú sa ndècu dacúúxí ndíi Àbrahám

⁴⁸ Te ní xáhaⁿ ñáyiú isràél:

—Váha-ni càháⁿ-ndí sá tée samaritànú cúú-n, te yucu ñávãha ndècu ndihi-n —cachí-yu xáhãⁿ-yu xii-gá.

⁴⁹ Te ní xáhaⁿ Jèsús:

—Yúhú, ñã túú yùcu ñávãha ndècu ndihi-í, chi Tâtà-í quidé càhnu-í, te nchòhó da cùu úhú iní ñáhã-ndó xii-í —câchí-gá xáhaⁿ-gã xií-yu.

⁵⁰ Te xáhaⁿ tùcu-gá:

—Yúhú, ñã túú càchí-í sá cáda càhnu ñaha-ndo, dico Dútú Ndiöxí cuìní-gá sá cáda càhnu ñaha-ndo xii-í. Te mee-gã cáháⁿ-gá núu ndédacàa-ndo quide váha, te ndédacàa-ndo ñã túú quide váha. ⁵¹ Te na càchí tnúhu ndáá-í xii-ndo sã nchâa ñáyiú na tníi tnúhu càháⁿ-í te vá cuíta nihnú-yu —câchí-gá xáhaⁿ-gã xií-yu.

⁵² Te ní xáhaⁿ tùcu ñáyiú isràél:

—Vitna te ní xiní ndáá-ndí sá yùcu ñávãha ndècu ndihi-n, chi ndíi Àbrahám ndihi nchaa cue tée ní xóo cáháⁿ tnúhu Yá Ndiöxí ndéé sanaha ní xihí-güedé, te yòhó càchí-tu-n sã ncháá ñáyiú na tníi tnúhu càháⁿ-n te vá cùú-gá-yu. ⁵³ ¿Náa ío-gá càhnu cuu-ó dàcúúxí ñàní tnáhã-ndí ndíi Àbrahám-ãⁿ? Tée-áⁿ dai ní xihí-dé ndihi cue tée ní xóo cáháⁿ tnúhu Yá Ndiöxí ndéé sanaha. ¿Te yòhó nágá-tu cùu-n te vá cùú-n càháⁿ-n-í? —cachí-yu xáhãⁿ-yu.

⁵⁴ Te ní xáhaⁿ Jèsús:

—Te núu dìcò mée-í quidé càhnu-í mée-í ñã, te ñã túú nândíhi sá quidè-í núu ducaⁿ. Dico Tâtà-í quidé càhnu ñaha-gá xii-í, te ñu-ni Yaá-áⁿ càchí-ndó cùu Ndiöxí-ndó. ⁵⁵ Te nchòhó chi ñã túú xiní-ndó-gã. Te yúhú chi xiní-í-gá. Te núu na càchí-í sá ñã túú xiní-í-gá te dàcuandehnde-í dàtná ndehnde mée-ndo. Te yúhú chi xiní ndisa-í-gá te tníi-í nchaa tnúhu càháⁿ-gá.

⁵⁶ Te ndíi Àbrahám ñàní tnáhã-ndó ñã

xíndecu ndéé sanaha ío ní cudíí ìní ndíi sá quìní ñáhá ndíi xii-í, te ní sáá nduu nǐ xini ñáhá ndíi xii-í nǔu ío ní cudíí ìní ndíi — cǎchí-gá xáhaⁿ-gǎ xii-yu.

⁵⁷ Te ní xáhaⁿ ñǎyiu isràél xii Jèsús:

—Ni vǎtá cúhúⁿ-gǎ-n ùdico úxí cuíá-n te cǎchí-n sǎ nǐ xini-n ndíi Àbrahám, te ní cunaha vǐhi ní xíhí ndíi-áⁿ —cǎchí-yu xǎhǎⁿ-yu xii-gá.

⁵⁸ Te ní xáhaⁿ Jèsús:

—Te na cǎchí tnúhu ndáá-í xii-ndo sǎ cùmání-gǎ cundecu ndíi-áⁿ ñuyíú-a te yúhú sa ndècu-gá-í —cǎchí-gá xáhaⁿ-gǎ xii-yu.

⁵⁹ Te sá dúcáⁿ nǐ cǎháⁿ-gá nǔu xǎáⁿ ní quehéⁿ-yu yúú cuǎha ñáhá-yu xii-gá ní cùu, te ní nguívǎha-gá núú-yu te ní quee-gá xití veñúhu cuáháⁿ-gá.

9

Jèsús quidé tǎtna-gá ìn tée cuàá

¹ Te núú xicá cùu Jèsús ní naníhí-gǎ ìn tée cuàá, te sa ducaⁿ tnàhí cǎa núú-dě ní cacu-dé. ² Te ní xáhaⁿ cuè tée xica cuu ndíhi-gá xii-gá:

—Mèstrú, ¿ná cuendá dàcáⁿ cuàá tée-ǎⁿ ní cacu-dé? ¿Sá cuendá nchaa yicá cuèchi tǎtá-dě, ǎⁿ sǎ cuendá nchaa yicá cuèchi nǎná-dě, ǎⁿ sá cuendá nchaa yicá cuèchi mee-dě dàcáⁿ cáá-dě ní cacu-dé? —cǎchí-güedé xǎhaⁿ-güedé xii-gá.

³ Te ní xáhaⁿ Jèsús:

—Ni ñà díú sǎ cuendá nchaa yicá cuèchi mee-dě, te ni ñà díú sǎ cuendá nchaa yicá cuèchi tǎtá-dě, te ni ñà díú sǎ cuendá nchaa yicá cuèchi nǎná-dě, chí mee Yǎ Ndiǒxí ní cuini-gá sá dúcáⁿ cùnduu-dé sáá-dé ñuyíú-a cuendá sá ñuyíú-a quini ñáyiu nása cada ñaha Yǎ Ndiǒxí xii-dé ndúha núú-dě. ⁴ Te vitna ío-gá nduu cùyica sá cáda-í nchaa chùⁿ ní táhú Yǎa ní tendaha ñàha xii-í véxi-í ñuyíú-a, chí sáá nduu te vá ndácú-gǎ-í cada-í chùⁿ-gá. ⁵ Te nini ndècu-gá-í ñuyíú-a te dǎndixi túu-í iní nchaa ñáyiu cuendá cutnùní iní-yu nǎcuáa ndùu cuendá Yǎ Ndiǒxí —cǎchí-gá xáhaⁿ-gǎ xii-güedé.

⁶ Te sátá dúcáⁿ nǐ cǎháⁿ-gá, te ní sati-gá díí-gá núú ñúhú te ní dácá-gǎ luha ñuhu ní cuáha ndéhyú, te ndéhyú-ǎⁿ nǐ dácánùu-gá ndúú xio núú tée cuàá-áⁿ. ⁷ Te ní xáhaⁿ-gǎ xii-dé:

—Quíhíⁿ-n nàquete-n núú-n ndùte tanquí Silòé —cǎchí-gá xáhaⁿ-gǎ xii-dé. Te Silòé-áⁿ quée-xí tnúhu mèe-yu: Tée xica chiuⁿ.

Te ní sáháⁿ tée cuàá-áⁿ nǐ naquete-dé núú-dě, te òré ní ndexìo-dé te sa ndèhe-dé.

⁸ Te nchaa ñáyiu ndècu yatni núú ndécú-dě ndíhi nchaa ñáyiu xini ñáhá xii-dé núú xicáⁿ ndàhú-dé ní xitnàhá-yu:

—¿Náa ñà díú tée-ǎⁿ ní xóo cǎcáⁿ ndàhú-dé? —cǎchí-yu xitnàhá-yu.

⁹ Te davá-yu cǎchí-yu sá díú-dě, te davá-yu cǎchí-yu sá ñà díú-dě, dico ducaⁿ cǎa-dé, cǎchí-yu xitnàhá-yu.

Dico mee-dě ní xáhaⁿ-dě xii-yu sá díú-dě.

¹⁰ Te ní xicáⁿ tnúhú-yu núú-dě, te xǎhǎⁿ-yu:

—¿Nása ní cuu núu ní ndúha núú-n ndèhe-n vitna? —cǎchí-yu xǎhǎⁿ-yu xii-dé.

¹¹ Te ní xáhaⁿ-dě:

—Tée nani Jèsús-ǎⁿ ní cadúha-dé luha ndéhyú te ní dácánùu-dé núú-í, te ní táuchíúⁿ-dě ní sáháⁿ-í tǎnquí Silòé ní naquete-í núú-í, te òré-áⁿ nǐ cuu cundehe-í —cǎchí-dé xǎhaⁿ-dě xii-yu.

¹² Te ní xicáⁿ tnúhú tucú-yu núú-dě, te xǎhǎⁿ-yu:

—¿Te ndèé ndécú tée-áⁿ? —cǎchí-yu xǎhǎⁿ-yu xii-dé.

Te ní xáhaⁿ-dě:

—Ñá túú xini-í —cǎchí-dé xǎhaⁿ-dě xii-yu.

Cue tée cùu fariséú ndátnúhu-güedé ndíhi tée ní ndúha núú-xi

¹³ Te ndèca-güedé tée ní ndúha núú-xi-áⁿ cuáháⁿ núú cuè tée cùu fariséú. ¹⁴ Te cuendá sá ndùu ndetatú-yu ní cadúha Jèsús ndéhyú nǐ dácánùu-gá núú tée-áⁿ te ní ndúha, ¹⁵ xǎáⁿ nǔu ní xicáⁿ tnúhú cuè tée cùu fariséú núú-dě, te xǎhaⁿ-güedé:

—¿Nása ní cuu ní ndúha núú-n? —cǎchí-güedé xǎhaⁿ-güedé xii-dé.

Te ní xáhaⁿ-dě xii-güedé:

—Íⁿ tée ní dácánùu-dé ndéhyú núú-í te ní sáháⁿ-í ní naquete-í, te ní cuu ndèhe-í vitna —cǎchí-dé xǎhaⁿ-dě xii-güedé.

¹⁶ Te dava cue tée cùu fariséú ní xitnàha-güedé:

—Ñá díú Yǎ Ndiǒxí ní tendaha ñaha-gá xii tée-ǎⁿ véxi-dé nǔu duha quide-dé nchaa sá vǎ yǒo tnàhí ndàcu cada, te ñà túú

sàndáá iní-dé canehe íí-dě nduu ndètatú-ó —càchí-güedé xĩtnàha-güedé.

Te dava-güedé ní xĩtnàha-güedé:

—¿Nása ndacu-dé cada-dé sá vǎ yõo tnàhí ndàcu cada te núu cùu-dé téé yícá cuěchi? —càchí-güedé xĩtnàha-güedé.

Te ñá túú ní cùu ìⁿnuu-güedé tnúhu ní cáháⁿ-güedé. ¹⁷Te ní xícáⁿ tnúhú tùcu-güedé núú tée ní ndúha núu-xi-áⁿ, te xǎhaⁿ-güedé:

—Te yòhó, ¿nása càchí-n cuèndá téé ní quide tátna núu-n te ní ndúha? —càchí-güedé xǎhaⁿ-güedé xii-dé.

Te ní xáhaⁿ-dè:

—Yúhú càchí-í sá ìⁿ tée càháⁿ tnúhu Yá Ndiõxí cúú-dé —càchí-dé xǎhaⁿ-dè xii-güedé.

¹⁸Dico cue téé isràél ñá ní sàndáá iní-güedé sá cuàá-dé ní cùu, chí cuèndá sa ní ndúha núu-dé ní xiní ñáhá-güedé, te xǎⁿ nũu ní cana-güedé tátá-dé ndíhi nǎná-dé, ¹⁹te ní xícáⁿ tnúhú-güedé núu-yu, te xǎhaⁿ-güedé:

—¿Diu téé-a déhe-ndo tée càchí-ndó cuàá-dé ní cacu-dé-ǎⁿ? ¿Te nása ní cuu ní ndúha núu-dé? —càchí-güedé xǎhaⁿ-güedé xii-yu.

²⁰Te ní xáhaⁿ tátá-dé ndíhi nǎná-dé:

—Diu déhe-ndí cúú-dé te sa cuàá ndisa-dé ní cacu-dé, ²¹dico ñá túú xiní-ndí nása ní cuu ní ndúha núu-dé, te ni ñá túú xiní-ndí yoo ní quide tátna. Chí càcáⁿ tnúhú núú méé-dé xǎⁿ nũu sa sàcuéhé-dé, te na càháⁿ-dé nũu nása ní cuu ní ndúha núu-dé —càchí-yu xǎhǎⁿ-yu xii-güedé.

²²Duha ní cáháⁿ tátá-dé ndíhi nǎná-dé ní xǎhǎⁿ-yu xii-güedé cuèndá sá yùhú-yu cue téé cùnūu núú ñáyiū isràél, chí cue téé-ǎⁿ sa ní ndatnúhu-güedé ní cuu ìⁿnuu-güedé sá nũu ndédacàa ñáyiū na càháⁿ sá Jèsús cúú-gǎ Cristú Yá ní tendaha Yá Ndiõxí véxi ñuyíú-a, te vǎ dáñá-gǎ-güedé quíhu-yu veñúhu. ²³Núu xǎⁿ ní xáhaⁿ tátá-dé ndíhi nǎná-dé sá ná càcáⁿ tnúhú-güedé núú méé-dé chí sa sacuéhé-dé.

²⁴Te xǎⁿ nũu ní cana tucu-güedé téé ní ndúha núu-xi-áⁿ, te ní xáhaⁿ-güedé:

—Cáháⁿ-n ìⁿ tnúhu ndáá chí Yá Ndiõxí ndéhé ndí-gǎ nàcuáa ní cuu ní ndúha núu-n, chí nchúhú xiní-ndí sá dìcò ìⁿ tée ndècu yícá cuěchi-xi cùu téé càchí-n ñí quide

tátna núu-n —càchí-güedé xǎhaⁿ-güedé xii-dé.

²⁵Te ní xáhaⁿ-dè:

—Yúhú, ñá túú xiní-í te núu téé ndècu yícá cuěchi-xi cùu-dé àdi ñáhá. Dìcò-ni sá xiní-í sá cuàá-í ní cùu te vitna ní cuu cundehe-í —càchí-dé xǎhaⁿ-dè xii-güedé.

²⁶Te ní xícáⁿ tnúhú tùcu-güedé núu-dé, te xǎhaⁿ-güedé:

—¿Nása ní quide ñaha-dé xii-n te ní ndúha núu-n-í? —càchí-güedé xǎhaⁿ-güedé xii-dé.

²⁷Te ní xáhaⁿ-dè:

—Yúhú sa ní cáháⁿ-í te ñá túú quide cuèndá-ndó. ¿Te ná cuèndá cuìní-ndó càchí tnúhu-ni tucu-í? ¿Á tnáhá-ndó cuìní-ndó quíndáá iní-ndó tnúhu càháⁿ-dé? —càchí-dé xǎhaⁿ-dè xii-güedé.

²⁸Te ní cudééⁿ-güedé núu-dé, te ní xáhaⁿ-güedé xii-dé:

—Te núu yòhó cuìní-n chinchícúⁿ-n tée-ǎⁿ te cuáháⁿ, dico nchúhú chí canchícúⁿ nihnu nahi-ni-ndí nàcuáa ní cáháⁿ ndí Moisés. ²⁹Te nchúhú chí nàha-ndí sá Yá Ndiõxí ní cáháⁿ ndíhi-gǎ ndí Moisés, dico téé càchí-n-ǎⁿ chí ni ñá túú xiní-ndí ndèé téé cùu-dé —càchí-güedé xǎhaⁿ-güedé xii-dé.

³⁰Te ní xáhaⁿ tée ní ndúha núu-xi-áⁿ:

—¿Te náa ñá díú nchòhó càchí-ndó sǎ ìo túha-ndo? Te núu ducaⁿ càháⁿ-ndó sǎ ñá túú xiní-ndó ndèé téé cùu-dé, te diu-dé ní quide tátna-dé núu-í ní ndúha —càchí-dé xǎhaⁿ-dè xii-güedé.

Te xáhaⁿ tùcu-dé:

³¹—Xiní-ó sǎ Yá Ndiõxí ñá túú tédóho-gǎ tnúhu càháⁿ ñáyiū quide nchaa sá cuéhé sá dúhá, chí nchaa ñáyiū quide cahnu ñaha xii-gǎ te quide-yu nchaa nàcuáa cùu iní-gǎ, te ñáyiū-áⁿ tédóho-gǎ tnúhu càháⁿ-yu. ³²Te ñá ìⁿ ndúu cáháⁿ ñáyiū cuèndá ìⁿ tée cada tátna núu ìⁿ ñáyiū cuàá ndéé ní cacu-xi te ndúha. ³³Te núu ñá díú mèe Yá Ndiõxí ní tendaha ñaha-gǎ xii téé-ǎⁿ véxi-dé ñá, te vǎ ndácú-dé cada tátna-dé núu-í ní cùu —cachí-dé xǎhaⁿ-dè xii-güedé.

³⁴Te ní xáhaⁿ-güedé:

—Dico yòhó ndèé yatni vǎi cuéchi sa ta quide-n véxi, ¿te vitna nacanū ichi ñaha-n xii-ndí cáháⁿ-n-ǎⁿ? —càchí-güedé xǎhaⁿ-güedé xii-dé.

Te ní queñuhu ñaha-güedë xii-dé tnuú-güedé ñá túú ní dàña-gá-güedé níhí tnáhá ndìhì ñaha-dé xii-güedé.

Ñáyiu ñá túú ndìxi túú iní cuendá nchaa sá cuèhé sá dúhá quidé-yu

³⁵ Te ní níhí Jèsús tnúhu sá ní queñuhu-güedé téé ní cuhú núú-xi-án tnuú-güedé cuendá sá vǎ tnáhá tnúhu ndìhì ñaha-gǎ-dé xii-güedé, te ní naníhí ñáhá-gǎ xii-dé te ní xáhaⁿ-gǎ:

—¿Sàndáá iní-n Dèhe Yá Ndiõxí-ǎn? — cǎchí-gǎ xáhaⁿ-gǎ.

³⁶ Te ní xáhaⁿ tǎe ní cuhú núú-xi-án:

—Mèstrú, cachí tnúhu núú ndèé ndécú tǎe-án cuendá quíndáá iní-í-dé —cǎchí-dé xǎhaⁿ-dǎ xii-gǎ.

³⁷ Te ní xáhaⁿ Jèsús:

—Sa xíní-n-dǎ chi dǎu-dé cúú yǘhú téé ndàtnúhu ndìhì-n —cǎchí-gǎ xáhaⁿ-gǎ xii-dé.

³⁸ Te ní ngüñí xítí-dǎ núú-gǎ, te ní xáhaⁿ-dǎ:

—Xítóhó Jesucristú, sàndáá iní ñáhà-í xii-n —cǎchí-dé xǎhaⁿ-dǎ xii-gǎ.

³⁹ Te ní xáhaⁿ tùcu Jèsús:

—Yúhú véxi-í ñuyú-a cada ndáá-í cuéchi ñáyiu. Te nchaa ñáyiu ñá túú quide váha cùú-yu dàtná ìⁿ ñáyiu cuàá, dico nchaa ñáyiu cùtnuní iní-xi sá ñà túú quide váha, te núu na quíndáá iní-yu tnúhu cǎháⁿ-í, te cada iní-ndó sǎ dàtná sá ñí nacaáⁿ núú-yu chi tníⁿ-yu tnúhu cǎháⁿ-í. Te ñáyiu cǎchí sá quidé váha vá núu núu-yu cuéchi-yu chi quesáhá-yu sá ío ndáá quidǎ-yu, ñáyiu-án cúú-yu dàtná ìⁿ ñáyiu cuàá, chi vá ndíxí túú iní-yu sá ñà túú quide váha-yu ndécú-yu, te vá tníⁿ-yu tnúhu cǎháⁿ-í —cǎchí-gǎ xáhaⁿ-gǎ xii-dé.

⁴⁰ Te sá dúcáⁿ ñí cǎháⁿ-gǎ, núu ní cǎháⁿ ìⁿ úú cue téé cùu fariséú, te xǎhaⁿ-güedé:

—¿Te náa tnáhá nchúhú cuàá-ndí cǎháⁿ-n-ǎn? —cǎchí-güedé xǎhaⁿ-güedé xii-gǎ.

⁴¹ Te ní xáhaⁿ Jèsús:

—Te núu dicó nchòhó cuàá-ndó ñá, te vá cùndècu cuéchi-ndo ní cùu, dico cǎchí-ndó sǎ ndéhé-ndó ìⁿ sá quidé-ndó te ñá ndáá, núu xǎⁿ ío ndècu cuéchi-ndo.

10

Jèsús cǎháⁿ-gǎ cuendá cùrrálí mbéé

¹ Te na cǎchí tnúhu ndáá-í xii-ndo sǎ ìⁿ téé ñá túú quíhu ndáa yuyehe ìⁿ currálí mbéé, te cùtexínu-ni na cuídó-dé, téé-án cúú-dǎ ñádúhú. ² Dico téé quíhu ichi yèhe currálí-güedi, téé-án cúú-dǎ xítóhó-güedi. ³ Te téé ndèé yèhe currálí-güedi nacaáⁿ-dé te cuánguìhu xítóhó-güedi te ní cǎháⁿ-dé, te ní nucúhuⁿ ndudú ñáhá-güedi xii-dé. Te ní cǎháⁿ díú-dǎ-güedi te ní queñuhu-dé-güedi cùrrálí. ⁴ Te sátá ñí quee-güedi cùrrálí, te ní ngódó núú-dǎ núú-güedi, te ní ngüíta nchicúⁿ ñáhá-güedi xii-dé chi ní nucúhuⁿ ndudú ñáhá-güedi. ⁵ Te ñá túú chinchícúⁿ-güedi ìⁿ téé tàtú, chi núcúhuⁿ ndudú-güedi sá ñà díú xítóhó-güedi cùu-dé, núu xǎⁿ xínú-güedi núú-dǎ —cǎchí-gǎ xáhaⁿ-gǎ xii-güedé.

⁶ Duha ní cǎháⁿ Jèsús cuendá sá cuíní-gǎ dacuàhá-yu tnúhu-gǎ ní cùu, dico ñá ní tècú tnùní-yu nása ndùu tnúhu ní cǎháⁿ-gǎ.

Jèsús cúú-gǎ dàtná ìⁿ toli

⁷ Te ní xáhaⁿ tùcu Jèsús xii-güedé:

—Na cǎchí tnúhu ndáá-í xii-ndo sǎ yǘhú cùu-í dàtná ìⁿ yèhe currálí núú ndìhu cue mbéé. ⁸ Te nchaa cue téé sa yòdo nuu-gǎ ní quixi ní dándàhú-güedé ñáyiu cùu-güedé dàtná ñádúhú dùhu-güedé cue mbéé ní cùu, dico ñá ní quide cuendá ñáhá-güedi xii-güedé, chi ní cùtnùní iní-güedi sá ñà díú xítóhó-güedi cùu-güedé. ⁹ Te yúhú cùu-í dàtná yuyèhe currálí cue mbéé. Te ducaⁿ sǎtnahá-xi cùu-í chi nchaa ñáyiu na tùha ñaha xii-í te naníhí tàhú-yu. Te cùu-yu dàtná cue mbéé quiti xíquee cùrrálí-xi cuáháⁿ-güedi núú cáá ité caxi-güedi, te dàtnùní cuándihu-ná-güedi cùrrálí, ducaⁿ sǎtnahá-xi cùu-yu.

¹⁰ Ñádúhú òré véxi-dé chi dùhu-dé, sǎhni-dé te dànaa-dé mbéé, dico yúhú chi véxi-í cuendá sá naníhí tàhú-ndó te ío cudíí iní-ndó cùnu cuéchi-ndo núú Dùtú Ndiõxí ní caa ní quíhíⁿ. ¹¹ Te yúhú cùu-í dàtná ìⁿ toli téé ío nèhe cuendá mbéé-xi, chi téé-án cuéi na cùu-dé sá cúú-xí mbéé-dǎ cuendá-ñǎ sá ná cǎcu-güedi. ¹² Te núu ìⁿ téé na còto ñaha xii-güedi, te téé-án cuendá-ni sá ñúhú yǎhu-dé xító-dǎ-güedi.

Te núu na quèní-dé sáá ìⁿ quiti dééⁿ te dàña-dé-güedi xìnu-dé, te ndìhi-güedi xité nuu ñaha quiti dééⁿ-àⁿ, chi ñá díú mèi xítóhó-güedi cùu-dé. ¹³ Chi cuendá-ni sá ñúhú yáhu-dé xító-dě-güedi núu ñá túú nã ndìhú iní-dé cuèi na dàndìhi ñaha quiti cuihna. ¹⁴ Te yúhú cùu-í dàtná ìⁿ téé ío váha xító mbéé-xi, chi téé-áⁿ da ìⁿ da ìⁿ-dì xìní-í-dé nàcuáa ndáa-di, te ducaⁿ xìní ñáhá-güedi xii-dé. Te ducaⁿ sãtnahá-xi cùu yúhú ndìhi nchaa ñáyiu sàndáá iní ñáhá xii-í, chi yúhú xìní-í-yu te ducaⁿ mèé-yu xìní ñáhá-yu xii-í.

¹⁵ Te ñá-ni ducaⁿ cùu-í ndìhi Tãtã-í, chi xìní ñáhá-gã xii-í te xìní-í-gá. Te sáá nduu cùu-í cuendá nchaa ñáyiu sàndáá iní ñáhá xii-í. ¹⁶ Te ndècu-gá ñáyiu vátá quindáá iní ñáhá-gã xii-í. Te xìní ñuhu-xi cundedóho-yu tnúhu-í te quindáá iní ñáhá-yu cuendá ìⁿ-nã ichi cuú-yu, te ducaⁿ cùndecu ìⁿ-ná téé coto ñaha xii-yu cuu-dé dàtná ìⁿ tòlí-yu, te téé coto ñaha xii-yu-áⁿ cúu yúhú.

¹⁷ Te Tãtã-í ío cùdíí iní ñáhá-gã xii-í cuendá sá sáá ìⁿ nduu te cuú-í, te cuú-í chi ducaⁿ càchí iní-í, te ñá díú sã cúu iní ñáyiu ñuyíú-a cuú-í, te cuú-í dico ndoto-í. ¹⁸ Te vá yóo ìⁿ te ndacu cahni ñaha xii-í, te núu ñá díú sã cúu iní mèé-í cuú-í. Te dàtná-ni cùu iní-í sá cùu-í te ñá-ni ducaⁿ ndòto-í chi ducaⁿ ñí cachí Tãtã-í Dútú Ndiòxí cunduu —càchí-gá xáhaⁿ-gã xii-güedé.

¹⁹ Te sá dúcáⁿ ñí cáháⁿ-gá te ñá ní cùu ìⁿnuu tucu ñáyiu isràél. ²⁰ Te davá-yu ní xítñahá-yu:

—¿Ná cuendá sàndáá-tu iní-ndó tnúhu càháⁿ téé-àⁿ, te yucu ñávãha ndècu ndìhi-dé, lúcú téé-àⁿ? —càchí-yu xítñahá-yu.

²¹ Te davá-yu ní xítñahá-yu:

—¿Náa xìní-ndó ìⁿ téé ndècu ndìhi yucu ñávãha duha váha càháⁿ-dé? ¿Náa xìní-ndó núu ndàcu yucu ñávãha cada tátna-xi núu ìⁿ téé cuáá te ndúha? —càchí-yu xítñahá-yu.

Ñáyiu isràél dáquèe tíhú-yu Jèsús

²² Te ndi tnahá cuía ndadá càhnú-yu vico veñúhu càhnu sá ío cùnuu ñuú Jerusálén, te mei yóo quidé vixiⁿ-xi quidé-yu vico-áⁿ. ²³ Te corrèdór veñúhu-áⁿ nání-xí Sàlomón, te xíáⁿ xíca cùu Jèsús. ²⁴ Te ní chítú ñíhnú ñáyiu isràél núu-gá, te ní xáháⁿ-yu:

—¿Ná ndéé òré cachí tnúhu ndáá-n, te núu sá Crístú Yáá ní tendaha Yã Ndiòxí véxi ñuyíú-a cùu-n, àdi ná téé cùu-n?, cáháⁿ-ni-n —càchí-yu xáháⁿ-yu xii-gá.

²⁵ Te ní xáhaⁿ Jèsús:

—Sa ní cachí tnúhu-í te ñá sàndáá iní-ndó, te ndèhe-ndo sá vái núu sã quidé-í sá ñí táuchíúⁿ Tãtã-í cada-í, te cùu-xi ìⁿ sá cùtnùni iní-ndó nã téé cùu-í. ²⁶ Dico nchòhó ñá sàndáá iní-ndó, chi ñá túú cùu-ndo ñáyiu ní chitnahá ñáhá xii-í. ²⁷ Chi nchaa ñáyiu ní chitnahá ñáhá xii-í cùu-yu dàtná cue mbéé quiti xíndecu ndìhi xítóhó-xi chi nùcúhuⁿ ndudú-güedi xítóhó-güedi, te ducaⁿ nàquiní ñáhá-ní xítóhó-güedi xii-güedi. Ducaⁿ sãtnahá-xi cùu nchaa ñáyiu ní chitnahá ñáhá xii-í. ²⁸ Te yúhú cada-í te nduu táhú-yu cundecu ndìhi ñáhá-yu xii-í ñí caa ñí quíhíⁿ te vá ìⁿ ndùu-gá cuíta nihnú-yu, te ñí vá yóo ìⁿ ndacu naquendeé ñáhá xii-yu ndaha-í. ²⁹ Chi Tãtã-í ní taxi cuendá ñáhá-gã xii-yu. Te ío cùnuu-gá núu xíáⁿ vá yóo ìⁿ ndacu naquendeé ñáhá xii-yu ndaha-gá. ³⁰ Yúhú ndìhi Tãtã-í Dútú Ndiòxí ìⁿ-ni cùu-ndí —càchí-gá xáhaⁿ-gã xii-yu.

³¹ Te ní queheⁿ tucu ñáyiu isràél yúu cuãha ñáhá-yu xii-gá ní cùu.

³² Te ní xáhaⁿ-gã xii-yu:

—Ío cuéhé sã váha ní quide-í núu-ndó ñí chindee ñaha Tãtã-í Dútú Ndiòxí. ¿Te ndèdacàa sá ñá tñahá iní-ndó núu cuèni-ndó cuãha ñaha-ndo yúu xii-í-í? —càchí-gá xáhaⁿ-gã xii-yu.

³³ Te ní xáhaⁿ ñáyiu isràél:

—Ñá díú cuendá nchaa sá váha ñí quide-n cuini-ndí cuáha ñaha-ndí yúu xii-n, chi ìⁿ dñi-ni sá ío càháⁿ úhú-n cuendá Yã Ndiòxí. Te dñí ìⁿ téé ñuyíú-a cùu-n te càchí-n sã cúu-n Ndiòxí —càchí-yu xáháⁿ-yu xii-gá.

³⁴ Te ní xáhaⁿ Jèsús:

—Núu tütú Yã Ndiòxí sá ndécú ndìhi-ndo cáháⁿ-xi nàcuáa ní cáháⁿ-gá, te duha ní cachí-gá: “Nchòhó quidé-ndó núu-í”, duha ní cachí-gá. ³⁵ Te ñaha-o sá vá cúu quèndé nihnu-o tnúhu yòdo tnuní núu tütú Yã Ndiòxí, chi mee-gã ní cachí-gá sá cáda-yu núu-gã, te vá càchí-ó sã ñá ndáá. ³⁶ Te núu ducaⁿ ñí cáháⁿ-gá sá núu-gã quidé nchaa ñáyiu ní sàndáá iní ñáhá xii-gá ñá, ¿te ná cuendá cùdèéⁿ-ndó núu yúhú sá càchí-í sá

cúu-í Déhe-gá? Te mee Yă Ndiöxí ní tendaha ñaha-gá xii-í véxi-í ñuyú-a sá cáda-í chiú-gá. ³⁷ Te núu ñá túu quide-í nàcuáa ní táuchíúⁿ Tătà-í cada-í ñá, te vá quindáa iní ñáhá-ndó. ³⁸ Te núu quide-í ñá, te cuëi vá quindáa iní ñáhá-ndó xii mee-í dico quindáa iní-ndó nchàa chiuⁿ quide-í. Ducaⁿ te cutnùni ndáa iní-ndó sã Yă Ndiöxí ndécú ndìhi-í te ìⁿ-ni cùu-ndí —càchí-gá xáhaⁿ-gã xií-yu.

³⁹ Te ní cuini-güedé tñi ñaha tùcu-güedé xii-gá quihíⁿ-gá vecaá ní cùu, dico ní xinu núu ñáhá-gã xii-güedé.

⁴⁰ Te ní xica-gá cuáháⁿ-gá ndàa ingá xio yúte Jòrdán núu ñí xóo dacuàndute ndí Juàá ñáyiú ndéé díhna, yàcáⁿ ní xíndecu-gá. ⁴¹ Te yàcáⁿ ío vai ñáyiú ní sáháⁿ ní cáháⁿ ndìhi ñaha xii-gá, te ní xitnàhá-yu:

—Ndí Juàá, cuëi ñá túu ní quide ndí sá vã yóo tñáhi ndàcu cada dico ndáa ní cáháⁿ ndí, chi dàtná-ni ní cáháⁿ ndí quide té-a —càchí-yu xitnàhá-yu.

⁴² Te yàcáⁿ ío vai-yu ní sándáa iní ñáhã-yu xii-gá.

11

Ní xihí té Lăzarú

¹ Ñuú Bètaniá ní xíndecu ìⁿ té ní xínani-dé Lăzarú. Te càhú víhí ñí tñahá-dé ní cuhú-dé, te ní xíndecu ndìhi-dé cue cúha-dé tá Màriá ndìhi tá Màrta chi xiáⁿ ñuú-yu.

² Te tá Màriá-án cúu-xí xíchí ñí sódó àcítí sáháⁿ tñámí sáhá Jèsús, te ní nadayìchí-xi sáhá-gã ndìhi idi díquí-xi. Te cuendá sá cùhú cúha-yu té Lăzarú, ³ núu ní tendàhá-yu ñáyiú ñaha tñúhu cuáháⁿ núu Jèsús, te xáhãⁿ-yu xii-gá:

—Mèstrú, téé ío cùu iní-n ìo càhú tñahá-dé cùhú-dé —càchí-yu xáhãⁿ-yu xii-gá.

⁴ Te sá dúcáⁿ càa tñúhu ní sáá, núu ní xáhaⁿ Jèsús xií-yu:

—Dico cuéhé-ãⁿ chi vá cùu-dé sá cùu dúcáⁿ-dë, chi Yă Ndiöxí cuini-gá sá quini-yu nchaa sá cáda-gã cuendá chiñuhu ñáhã-yu xii-gá, te ñiú-ni ducaⁿ chiñuhu ñáhã-yu xii yúhú Déhe-gá —càchí-gá xáhaⁿ-gã xií-yu.

⁵ Te cuëi ío cùu iní ñáhá Jèsús xii té Lăzarú ndìhi cue cúha-dé ⁶ dico òré ní níhí-gã tñúhu, te ní cuyaa-gã úu-gá nduu

núu ndécú-gã. ⁷ Te ní xáhaⁿ-gã xii cue téé xica cuu ndìhi-gá:

—Na quihíⁿ tucu-o òstrítú Jùdeá —càchí-gá xáhaⁿ-gã xii-güedé.

⁸ Te ní xáhaⁿ cuè téé xica cuu ndìhi-gá xii-gá:

—Mèstrú, vitna-ni cuini cue téé isràél xíndecu yàcáⁿ cuáha ñaha-güedë xii-n yúú ní cùu, ¿te cuini-ni tucu-n quihíⁿ-n-ú? —càchí-güedé xáhaⁿ-güedë xii-gá.

⁹ Te ní xáhaⁿ Jèsús:

—Úxúú òré cúu ìⁿ nduu, te núu nduu na càca cuu-o, te ñá túu ñá candaundeé-ó chi cùtnuní núu-ó chi ditó. ¹⁰ Dico núu niú ná càca cuu-o, te ío ná candaundeé-ó chi vá cùtnuní núu-ó —càchí-gá xáhaⁿ-gã xii-güedé.

¹¹ Te ní xáhaⁿ Jèsús:

—Té Lăzarú téé ío váha tñahá tñúhu ndìhi-o ñí xídí-dé dico quihíⁿ-ó chi ndocani-o-dë —càchí-gá xáhaⁿ-gã xii-güedé.

¹² Te ní xáhaⁿ-güedë xii-gá:

—Mèstrú, te núu xídí-dé te váa sa ta ndúha-dé cuáháⁿ —càchí-güedé xáhaⁿ-güedë xii-gá.

¹³ Duha ní cáháⁿ Jèsús, chi té Lăzarú sa ní xihí-dé te cue téé xica cuu ndìhi-gá ní sani iní-güedé sá ñí xídí ndisa-dé. ¹⁴ Te Jèsús ní xáhaⁿ ndáá-gã xii-güedé:

—Sa ní xihí té Lăzarú. ¹⁵ Váha-gá sá ñá ní sáháⁿ-í quíngoto-í-dé, chi ndëcu ingá chiúⁿ cada-í quini-ndó, te quindáa iní ñáhá-gã-ndó xii-í, te vitna na quihíⁿ-ó núu ndécú yiqui cuñú ndí —càchí-gá xáhaⁿ-gã xii-güedé.

¹⁶ Te té Măxí téé xáhaⁿ-güedë cuächí ní xáhaⁿ-dë xii dava-gã-güedé:

—Na quihíⁿ-ó nchàa-o chi yàcáⁿ cuú-ó ndìhi-dé —càchí-dé xáhaⁿ-dë xii-güedé.

Jèsús càháⁿ-gá sá cuëi na cùu ñáyiú dico ndotó-yu cundécú-yu ndìhi-gá

¹⁷ Te òré ní sáá Jèsús ñuú Bètaniá, te ní xáhãⁿ-yu sá sá ní cuu cúmí nduu ní xihí té Lăzarú. ¹⁸ Te ñuú-án cáá yàtni-ni-gá ñuú Jerusàlén, dàtná cuádava-ná òré cuhúⁿ-o ìchi te saá-ó. ¹⁹ Núu xiáⁿ vai ñáyiú isràél ní sáhãⁿ-yu ní cáháⁿ ndìhi-yu tá Màrta ndìhi cùhú-xi tá Màriá, te ní sáñáhã-yu tñúhu ndee iní sá dúcáⁿ ñí xihí cúha-yu. ²⁰ Te

ní níhí tǎ Mǎrta tnúhu sá ñúhú Jèsús ichi cuáháⁿ-gá núú ndécú-yu núú ní sáháⁿ-xi ní sátnahá-xi-gá, te cùhú-xi tá Mǎriá ní ndóo-xi vehe. ²¹ Te òré ní naníhí tǎ Mǎrta Jèsús, te ní xáhaⁿ-xi xii-gá:

—Mèstrú, te núú dicó ní xǐndecu-n ìha te vǎ cùú cúha-ndí ní cùu. ²² Te cuèi vitna te núú ná sá ná càcáⁿ-n nùú Yǎ Ndiòxí te taxi-gá xii-n —càchí-xi xáhaⁿ-xi xii-gá.

²³ Te ní xáhaⁿ Jèsús:

—Vǎ ndìhú iní-n chi ndoto cúha-n —càchí-gá xáhaⁿ-gǎ xii-xi.

²⁴ Te ní xáhaⁿ tǎ Mǎrta:

—Ndáá chi sa xìní-í sá ndótó-dě ná quǐtnahá nduu ndòto nchaa ñáyiu ní xíhí —càchí-xi xáhaⁿ-xi xii-gá.

²⁵ Te ní xáhaⁿ Jèsús:

—Yúhú dandòto-í-yu cuendá cundecú-yu ni caa ni quíhíⁿ ná sàá nduu. Te nchaa ñáyiu na quìndáá iní ñáhá xii-í, te cuèi na cùú-yu dico ndotó-yu cundecu-í ndihí-yu ni caa ni quíhíⁿ. ²⁶ Te nchaa ñáyiu ndècu vívú ñuyúú-a te núú na quìndáá iní ñáhǎ-yu xii-í, te cundecu ndihí-í-yu ni caa ni quíhíⁿ. ¿Sàndáá iní-n tnúhu-a ñǎ? —càchí-gá xáhaⁿ-gǎ xii tá Mǎrta.

²⁷ Te xáhaⁿ-xi:

—Mèstrú, sàndáá iní-í, te sàndáá tucu iní-í sá díú-n cùu-n Cristú Déhe Yá Ndiòxí, Yaá ní tendaha-gǎ véxi ñuyúú-a —càchí-xi xáhaⁿ-xi xii-gá.

Jèsús ndàhí-gá núú ní nguíndüxi té Lǎzarú

²⁸ Sátá dúcáⁿ ní cáháⁿ-xi te ní sáháⁿ ngana-xi cùhú-xi tá Mǎriá, te dayuhu ní xáhaⁿ-xi:

—Yàcáⁿ ní quexìo Mèstrú, te càna ñaha-dé xii-n —càchí-xi xáhaⁿ-xi.

²⁹ Te sá dúcáⁿ xáhaⁿ cùhú tǎ Mǎriá sá cáná ñaha Jèsús xii-xi, núú ndìhí-ni ní xica-xi cuáháⁿ-xi núú ndécú-gǎ. ³⁰ Te Jèsús vátá quǐhu-gá xití ñúú, chi ndècu-ni-gá núú ní sáháⁿ tnahá ñáhá tǎ Mǎrta. ³¹ Te ñáyiu isràèl ndécú sǎñaha tnúhu ndee ìní xii tá Mǎriá ndihí cùhú-xi ní sani iní-yu sá cuáháⁿ-xi núú yíndüxi cúha-xi ndáhyú-xi ní cáháⁿ-yu, núú nchìcúⁿ-yu-xi cuáháⁿ.

³² Te ní sáá tá Mǎriá núú ndécú Jèsús te ní nguíñí xití-xi nùú-gǎ, te xáhaⁿ-xi xii-gá:

—Mèstrú, te núú dicó ní xǐndecu-n ìha te vǎ cùú cúha-ndí ní cùu —càchí-xi xáhaⁿ-xi xii-gá.

³³ Te sá ní xiní Jèsús ndàhyú tá Mǎriá ndihí ñáyiu isràèl nchìcúⁿ ñáhá cuáháⁿ, xíáⁿ ío ní cuyica ìní-gá. ³⁴ Te ní xáhaⁿ-gǎ xii-yu:

—¿Ndèé ní taxi ndecu-ndo yìqui cuñú-dé-i? —càchí-gá xáhaⁿ-gǎ xii-yu.

Te ní xáháⁿ-yu:

—Mèstrú, néhé ná quíhíⁿ-ó te quiní-n —càchí-yu xáháⁿ-yu xii-gá.

³⁵ Te ní ndáhyú-gá tnahá-gá. ³⁶ Te ní xitnàha ñáyiu isràèl:

—Súúni cùu iní-dé ndíi ni cùu —càchí-yu xitnàhá-yu.

³⁷ Te davá-yu xitnàhá-yu:

—Tée-a ní quide tátna-dé núú tée cuàá te ní ndúha. ¿Te nása ní cuu núú ñá túú ní quide tátna-dé té Lǎzarú cuendá sá vǎ cùú-dé ní cùu-i? —càchí-yu xitnàhá-yu.

Jèsús dándòto-gá té Lǎzarú

³⁸ Te ío ní cuyica tucu iní Jèsús òré ní quexìo-gá yuhu yàú núú ní chihi-güedé yìqui cuñú té Lǎzarú. Te yuhu yàú-áⁿ ndèdí ìñⁿ yúú. ³⁹ Te ní xáhaⁿ Jèsús xii-yu:

—Chí xócàni yúú-áⁿ —càchí-gá xáhaⁿ-gǎ xii-yu.

Te ní xáhaⁿ tǎ Mǎrta cúha tée ní xíhí-áⁿ:

—Mèstrú, sa tucu sáháⁿ-dé chi sa ní cuu cúmí nduu sá ní xíhí-dé —càchí-xi xáhaⁿ-xi xii-gá.

⁴⁰ Te ní xáhaⁿ Jèsús:

—¿Náa ñá díú ní cachí-í sá nùu na quìndáá iní-n, te quiní-n sǎ ìo càhnu cuu Yá Ndiòxí? —càchí-gá xáhaⁿ-gǎ xii-xi.

⁴¹ Te ní xócáñi-yu yúú ndèdí yuhu yàú-áⁿ. Te ní ndacoto-gá andü, te ní xáhaⁿ-gǎ xii Tǎtá-gǎ Dútú Ndiòxí:

—Táu, ndàcáⁿ táhù-í núú-n sǎ ní tédoho-n tnúhu ní cáháⁿ-í. ⁴² Te yúhú sa ñaha-í sá ncháá-ni òré ndèdóho ñaha-n xii-í, dico duha càháⁿ-í cuendá sá ná tècú dóho nchaa ñáyiu ndècu iha cuendá quìndáá iní-yu sá díú-n ní tendaha ñaha-n xii-í véxi-í ñuyúú-a —càchí-gá xáhaⁿ-gǎ xii Dútú Ndiòxí.

⁴³ Te sátá dúcáⁿ ní cáháⁿ-gá ndihí Yá Ndiòxí, te níhí ní cáháⁿ-gá xáhaⁿ-gǎ xii tée ní xíhí-áⁿ:

—¡Lǎzarú, tandèe xíaⁿ! —càchí-gá xáhaⁿ-gǎ xii-dé.

44 Te ní ndee téé ní xíhí-án yaú-án, te ndùtu dóo cuíñí ndàha-dé ndihí sáhá-dě, te dàhu tucu ìⁿ dóo nùú-dě. Te ní xáhaⁿ Jèsús xii-yu: —Chí nándàxi-dé te dañà-ndo-dě ná cáca-dě —càchí-gá xáhaⁿ-gá xii-yu.

Ndùcu-güedé nàcuáa cada-güedé cahni-güedé Jèsús

(Mt. 26:1-5; Mr. 14:1-2; Lc. 22:1-2)

45 Te nchaa ñáyi nchìcúⁿ ñáhá xii tá Màriá cuáhán ío vài-yu ní sándáá iní-yu Jèsús sá ñí xini-yu nàcuáa ní quide-gá. 46 Dico davá-yu ní sáháⁿ-yu núu cuè téé cùu fariséú, te ní caní-yu cuèndú núu-güedé nàcuáa ní quide Jèsús. 47 Te cue téé cùu fariséú ndihí cue dútú cùnùu ní nataká-güedé ní xóo-güedé jündá, te ní xitnàha-güedé:

—¿Nása cada-o?, chi téé-án ío vài sá vǎ yǎo tnahí ndàcu cada quide-dé. 48 Te núu na dàña ío te nchaa ñáyi quindáá iní ñáhá-yu xii-dé, te quixi cue téé ñuú Rómá dangoyo-güedé veñúhu-o te danàa-güedé nchaa ñuú-ó —càchí-güedé xitnàha-güedé.

49 Te ìⁿ cue téé-án nání-dě Caifás, te cùnùu-gá-dé núu dàva-gá cue dútú cuíá-án, te ní xáhaⁿ-dě xii-güedé:

—Nchòhó ni lùha ñá túú cùtnuní iní-ndó. 50 Te ni ñǎ sàha-ndo cuèndá sá vǎha-gá tnahá-ó, te núu na cùú ìⁿ-ni téé cuèndá nchaa ñáyi isràél, te ñá díú sǎ dánàa ñaha-güedé xii-yu —càchí-dé xáhaⁿ-dě xii-güedé.

51 Dico té Caifás chi ñá díú sǎ cúú iní méé-dě ní cáháⁿ-dé, chi cuèndá sá cuíá-án ñí cùnùu-dě núu cuè dútú, núu xíáⁿ Yǎ Ndiǒxí ní dácáhu iní ñáhá-gǎ nàcuáa cáháⁿ-dé sá Jèsús cuú-gá sá cúú-xí nchaa ñáyi isràél.

52 Te ñá díú cuèndá mee-ni ñáyi-án cuú-gá, chi cuú-gá tnahá cuèndá nchaa ñáyi ní sándáá iní ñáhá xii-gá, ñáyi nchiténuu ñihí ñuyíú, te ìⁿ-nǎ cuú-yu ndihí-gá. 53 Núu ndéé nduu-án ñí ndatnúhu cue téé cùnùu núu ñáyi isràél nàcuáa cada-güedé cahni-güedé Jèsús.

54 Te xíáⁿ núu ñá ní xica cuu-gá Jèsús quini ñáhá ñáyi isràél, te ní quee-gá cuáhán-gá ñuú Efraín, ìⁿ ñuú cáá yàtni yucu, yàcán ní ngüíñí-gá ndihí cue téé xica cuu ndihí-gá.

55 Te ta cùyatni nduu cadá-yu vico pásca. Te cuéhé ñáyi ní queé-yu ñuú-yu

cuáhán-yu ñuú Jerusàlén cuèndá sá sà ndihí-yu ncháa-yu nduu íí, te tnahá nduu vico pásca. 56 Te yàcán nándúcú-yu Jèsús ní cùu te ñá túú-gǎ òré-án, te ní naníhí tnahá-yu xití veñúhu, te xitnàhá-yu:

—¿Nása sàni iní-ndó-í? ¿Quixi Jèsús vico án ñáhá? —càchí-yu xitnàhá-yu.

57 Te cue téé cùu fariséú ndihí cue dútú cùnùu sa ní xáhaⁿ-güedé xii ñáyi sá núu ndèda-ni cáa-yu xini-yu núu ndécú Jèsús te na cáháⁿ-ni-yu cuèndá tni ñaha-güedé xii-gá.

12

Ìⁿ ñadìhí chíhí-án Jèsús acití
(Mt. 26:6-13; Mr. 14:3-9)

1 Íñú-gá nduu cùmání tnahá vico pásca, te ní sáhán Jèsús ñuú Bètaniá, ñuú té Lǎzarú téé ní dándótó-gǎ. 2 Te xíáⁿ ñí cadúha-yu sá ñí cudini Jesús. Te tá Màrta ní sani-xi cóhó, te té Lǎzarú yíhí-dě mèsá ndihí Jèsús, ndihí dava-gá-güedé xéxí-güedé. 3 Te tá Màriá néhé-xí cuádava lítrú acití sáhán tnamí sǎ ò ndèyáhu, te acití-án ñí cuáha mee-ni yúcú nǎrdú, te ní sódó-xi sáhá Jèsús, te ní nadayíchí-xi ndihí idi díquí-xi sáhá-gǎ. Te ñihí xití vehe ní xité nuu dicó acití-án. 4 Te té Jüdás déhe té Xímú Iscàrioté diu-ni ìⁿ téé xica cuu ndihí-gá, téé cuáha cuèndá ñáhá xii-gá núu cuè téé cùu úhú iní ñáhá ñí xáhaⁿ-dě xii-gá:

5 —¿Ná cuèndá ñá ní cùyáhu acití-a sá ùní cièndú díhúⁿ denàriú cuu cuèndá ñáyi ndàhú? —càchí-dé xáhaⁿ-dě xii-gá.

6 Dico sá dúcán ñí cáháⁿ té Jüdás chi ñá díú sǎ ndísá ñuhu iní-dé ñáyi ndàhú chi dicó-ni ìⁿ ñádúhú cúú-dě, chi diu-dé néhé cuèndá-dé díhúⁿ-güedé nchaa-güedé te ní xóo duhu ñaha-dé xii-güedé. 7 Te ní xáhaⁿ Jèsús:

—Daña, vá dásatú-n iní xíchí-a na tàxúha nahi-xi acití-a, chi nándihí ndéé òré ná nguindüxi-í. 8 Chi nchòhó chi cuhúⁿ tnahá-ni ñáyi ndàhú tnuú-ndó, dico yúhú chi vá ncháá nduu cundecu ndihí ñaha-í xii-ndo —càchí-gá xáhaⁿ-gǎ xii-dé.

Tnahá té Lǎzarú cuini-güedé cahni ñaha-güedé xii-dé

⁹ Te vai ñáyiú israhél ní níhí-yu tnúhu sá ndécú Jèsús ñuú Bètaniá. Te ní sáháⁿ-yu cuendá quiní-yu-gá, te quiní-yu tnàhá té Lázaruú té ní dándótó-gă. ¹⁰ Te cue dútú cúnú ní ndatnúhu-güedé ní cuu ñⁿnuu-güedé cuendá sá cáhni-güedé tnàhá té Lázaruú ní cùu, ¹¹ chi ñⁿ cuendá té-áⁿ ní cuu cuéhé ñáyiú israhél tá dàña ni-hnú-yu-güedé cuáháⁿ cuendá sá ní sándáá iní-yu Jèsús.

Jèsús cuánguñhu-gá ñuú Jerusàlén

(Mt. 21:1-11; Mr. 11:1-11; Lc. 19:28-40)

¹² Te nduu tnèé-áⁿ vai ñáyiú ní quexiú ñuú Jerusàlén cuendá cundecú-yu vico, te ní níhí-yu tnúhu sá Jèsús sáá-gá tnàhá-gá cundecu-gá vico-áⁿ, ¹³ núu ní xehndé-yu ndaha yùtnu ñuú, te nèhé-yu ní sáháⁿ ní sátnahá ñáhă-yu xii-gá. Te níhi ní cáhăⁿ-yu, te cächí-yu:

—Ío cahnú cuu Yá Ndiöxí! Te ducaⁿ-ni ño cahnú cuu Yaá ní tendaha-gă véxi quindaha ñaha xii-o —duha ní cachí-yu.

¹⁴ Te Jèsús ní níhí-gă ñⁿ búrru, te yòdo-gá-di cuáháⁿ. Te ducaⁿ ní cuu chi ní quee ndáá-xi nàcuáa cáhăⁿ-xi núu tütú Yá Ndiöxí núu cächí-xi:

¹⁵ Vá yuhú nchòhó cue ñáyiú ndècu ñuú Sìón, chi iha véxi té yindaha ñaha xii-ndo yodo-dé ñⁿ búrru.

Duha cächí-xi núu tütú-gá. ¹⁶ Dico cue té xica cuu ndihí Jèsús ñá ní ndàcu iní-güedé nàcuáa cáhăⁿ-xi núu tütú Yá Ndiöxí nàcuáa cada Jèsús. Dico sátá cuándaa-gá andiú cada cahnú ñaha Tátá-gă xii-gá, te ní ndacu iní-güedé sá dúcáⁿ yòdo tnuní nàcuáa cada-gá, te ducaⁿ ní cuu.

¹⁷ Nchaa ñáyiú ní xíndecu ndihí Jèsús òré ní dándótó-gă té Lázaruú, ya yàcáⁿ ní caní-yu cuendú núu ñáyiú nàcuáa ní quide ñaha-gă xii-dé. ¹⁸ Te vai-yu ní sáhăⁿ-yu núu ndécú Jèsús cuendá sá ní níhí-yu tnúhu ní quide-gá sá vă yòo tnàhí ndàcu cada. ¹⁹ Te cue té cùu fariséuú ní xitnàha-güedé:

—Ní xito-ndo nă ñá túú nàndihí sá quidé-ó-vá, chi nchaa ñáyiú ní chinchícúⁿ ñáhă-yu xii-dé —cächí-güedé xitnàha-güedé.

Ñáyiú ñá túú cùu ñáyiú israhél nánducú-yu Jèsús

²⁰ Te tnàhá ñáyiú ñá túú cùu ñáyiú israhél ní sáhăⁿ-yu vico ñuú Jerusàlén ní quide cahnú-yu Yá Ndiöxí. ²¹ Te ñáyiú-áⁿ ní sáhăⁿ-yu núu té Lìpé té ñuú Betsaidá, te ñuú-áⁿ yíndèhu-xi distritú Galileá. Te ní xáhăⁿ-yu xii-dé:

—Tátá, vá cündèe iní-n cächí tnúhu-n ñuú ndèe ndécú Jèsús, chi cuíní-ndí cáhăⁿ ndihí-ndí-gá —cächí-yu xáhăⁿ-yu xii-dé.

²² Te té Lìpé ní naníhí-dé té Ndríxí te ní xáhaⁿ-dè nàcuáa cáhăⁿ-yu, te ndí ndúu-güedé ní sáhăⁿ-güedé ní xáhaⁿ-güedé xii Jèsús nàcuáa cáhăⁿ-yu. ²³ Te ní xáhaⁿ Jèsús xii-güedé:

—Vitna ní cuyatni òré cada cahnú ñaha Tátá-í xii-í, te quiní-yu sá ño cahnú cuu yúhú Té cùu ñaní tnáhă-yu nchaa-yu. ²⁴ Te na cächí tnúhu ndáá-í xii-ndo sá ñuú ñⁿ tatá vá ngává-xí núu ñúhú téhyú-xi ña, te ñⁿ ducaⁿ cùnduu-xi cundecu-xi. Dico ñⁿ tatá ná ngává núu ñúhú xínu déhe-xi, te xíáⁿ nádàcayá tnáhă-xí, te mee-xi téhyú-xi. ²⁵ Te nchaa ñáyiú ño ñúhu iní-xi cundecu ñuyíú-a ñá túú ñúhu iní-yu Yá Ndiöxí, te ñáyiú-áⁿ cuíta nihnú-yu. Te nchaa ñáyiú ño ñúhu iní ñáhă xii Yá Ndiöxí, ñáyiú-áⁿ cundecú-yu ndihí-gá ní caa ní quíhíⁿ. ²⁶ Te nchaa ñáyiú cuíní cunu cuechi ñú-í xini ñuhu-xi natuha ñahă-yu xii-í, te nduu táhú-yu cundecú-yu núu ñúhú-í cundecu-í. Te nchaa ñáyiú na cunu cuechi ñú-í, te cada cahnú ñaha Tátá-í xii-yu —cächí-gá xáhaⁿ-gă xii-güedé.

Jèsús cáhăⁿ-gá sá cáhni ñàha-güedé xii-gá

²⁷ Te ní xáhaⁿ tucu-gá:

—Ío ndihú iní-í. Te cúñaha-í xii Tátá-í taunihnu ñaha-gă ñuú dícó sá cúú, dico vá cúú chi cuendá tnàhí-a véxi-í —cächí-gá xáhaⁿ-gă xii-güedé.

²⁸ Te ní xáhaⁿ-gă xii Tátá-gă Dútú Ndiöxí:

—Táu, cada nàcuáa ní sani iní-n cùnduu cuendá sá ná cádá cahnú ñaha ñáyiú xii-n —cächí-gá xáhaⁿ-gă.

Te ducaⁿ te ní tecú ní cáhăⁿ Yá Ndiöxí ndèe andiú, te cächí-gá:

—Sa ní quide-í nàcuáa cachí ñáyiú sá ño cahnú cuu-í. Te cada tucu-í cuendá cada cahnú ñaha-gá-yu xii-í —cächí Yá Ndiöxí xáhaⁿ-gă xii Déhe-gá.

²⁹ Te nchaa ñáyiú xĩndecu ní tecú dóho-yu ní cáháⁿ-gá, dico ñá túú ní sàni iní-yu sá méé-gă ní cáháⁿ, chi davá-yu ní xĩtnàhá-yu sá ñũhu ní cáháⁿ, te davá-yu ní xĩtnàhá-yu sá ñⁿ espíritú xínú cuèchi núú Yă Ndiõxí ní cáháⁿ. ³⁰ Te ní xáhaⁿ Jèsús xii-yu:

—Ñá díú cuendá yúhú ní cãháⁿ Yă Ndiõxí, chi ní cáháⁿ-gá cuendá sá nchòhó cund-edóho-ndo. ³¹ Te vitna ní sáá nduu càda ndáá Yă Ndiõxí cuèchi nchaa ñáyiú ñuyíú-a, te ducaⁿ te vá cúnùu-gá yucu ñávãha. ³² Te na càta caa ñaha-güedé xii-í núú cùrúxí, te xiáⁿ cuú-í te níhĩ-yu tnúhu ni càa xico ñuyíú, te quindáá iní-yu tnúhu-í —càchí-gá xáhaⁿ-gă xii-yu.

³³ Duha ní cáháⁿ-gá cuendá cutnùnì iní-yu nàcuáa ndoho-gá òré cuú-gá. ³⁴ Te ní xáhãⁿ-yu xii-gá:

—Nihí-ndí tnúhu sá nũú tùtú yódó tnùnì tnúhu Yă Ndiõxí càháⁿ-xi sá Crìstú Yaá tendaha-gă quixi ñuyíú-a cundecu-gá ni caa ni quíhĩⁿ. ¿Te yòhó nása càháⁿ-tu-n sã ñⁿ tée cùu ñani tnáhã nchãa ñáyiú ñuyíú-a cahni ñaha-güedé núú cùrúxí? Te cachí tnúhu-n nã cúú tãe-áⁿ —càchí-yu xáhãⁿ-yu xii-gá.

³⁵ Te ní xáhaⁿ Jèsús:

—Yúhú cúú-í dàtnã ñⁿ ñuhú dáyèhé ñuyíú-a, dico sacú-ni nduu ndècu ndihì ñaha-í xii-ndo. Te caca-ndo ìchi ndáá vitna dáyehé-gá-í núú-ndó chi na cùnee te vá cùtnùnì-gá núú-ndó ndèé ichi quíhĩⁿ-ndó. ³⁶ Quindáá iní ñáhã-ndó xii-í vitna ndècu ndihì ñaha-gá-í xii-ndo dandixi túu-í iní-ndó, cuendá cutnùnì iní-ndó nàcuáa ndùu cuendá Yă Ndiõxí, te cuu-ndo dèhe-í —càchí-gá xáhaⁿ-gă xii-yu.

Te sátá dúcãⁿ ñí cáháⁿ Jèsús, te ní quee-gá cuáhãⁿ-gá ñⁿ núú vã ná nihí ñáhãⁿ-yu xii-gá.

Ñáyiú isràél ñá cuìnì-yu quindáá iní-yu Jèsús

³⁷ Te cuèi ío vãi sá vã yõo tnàhí ndàcu cada ní quide Jèsús ní xinì-yu, dico ni dùcaⁿ ñá túú ní sàndáá iní-yu-gá. ³⁸ Te ducaⁿ ñí quidé-yu chi dacuítí ñí quee ndáá-xi nàcuáa ní chídó tnùnì ndíi Chàíá ndíi ní cáháⁿ tnúhu Yă Ndiõxí ndéé sanaha nũú tùtú-gá núú càchí-xi:

Yòhó Yaá cúú Xĩtohó-í, vá yõo ñⁿ sàndáá iní tnúhu càháⁿ-ndí, Te vá yõo ñⁿ cùtnunì iní-xi sá ño càhnu cuu-n.

Duha ní chídó tnùnì ndíi Chàíá núú tùtú-gá. ³⁹ Te ñá ní sàndáá iní-yu chi ní quee ndáá-xi nàcuáa ní chídó tnùnì tucu ndíi Chàíá núú tùtú Yă Ndiõxí nàcuáa cáháⁿ Jèsús:

⁴⁰ Mee Yă Ndiõxí ní quide-gá sá vã tècú tnùnì-yu,

chi ní dádãhu ndodo iní ñáhã-gă xii-yu, chi ío sáá iní-yu núú ñá ní cuìnì-gá-yu quindáá iní ñáhã-yu xii-gá.

Te ni vã túhá ñáhã-yu xii yúhú cuendá dacãcu nihnu-í-yu.

⁴¹ Duha ní chídó tnùnì ndíi Chàíá nàcuáa cáháⁿ Jèsús chi ní xinì ndíi sá ño càhnu cuu-gá.

⁴² Te cuèi ducaⁿ ñí cuu dico titní cue tée cùnuu núú ñáyiú isràél ní sàndáá iní ñáhã-güedé xii-gá. Dico ñá túú ní xõo cáháⁿ ndáá-güedé chi ní xõo yúhú-güedé sá vã dáñã-gă cue tée cùu fariséú quíhu-güedé veñúhu. ⁴³ Chi ní xõo cudíí-gă iní-güedé sá càháⁿ ñáyiú dàcúúxí tnúhu càháⁿ Yă Ndiõxí.

Ñáyiú ñá túú sàndáá iní tnúhu Jèsús cuíta nihnú-yu

⁴⁴ Jèsús níhi ní cáháⁿ-gá, te càchí-gá:

—Nchaa ñáyiú na quindáá iní ñáhã xii-í, te ñá díú-ní mèe-í quindáá iní-yu, chi tnàhá Tãtà-í Yaá ní tendaha ñaha xii-í véxi-í ñuyíú-a quindáá iní-yu. ⁴⁵ Te ñáyiú xinì ñáhã xii yúhú xinì-yu tnàhá Tãtà-í. ⁴⁶ Te yúhú véxi-í dandixi túu-í iní ñáyiú ñuyíú-a cuendá cutnùnì iní-yu nàcuáa ndùu cuendá Yă Ndiõxí, te nchaa ñáyiú na quindáá iní ñáhã xii-í te vá cùndècu-gá-yu ichi cuèhé ichi duha. ⁴⁷ Te núú òo davá-yu ndèdóho-yu nàcuáa càháⁿ-í te ñá túú tnĩⁿ-yu tnúhu-í, te ñá díú yúhú dàcuíta nihnu-í-yu, chi ñá túú véxi-í ñuyíú-a sá dácũta nihnu-í-yu, chi véxi-í sá dácãcu nihnu-í-yu. ⁴⁸ Te nchaa ñáyiú na cùyíchí iní ñáhã xii-í te ñá túú quide cuendá-yu nàcuáa càháⁿ-í, te ñáyiú-áⁿ ná sáá nduu te cuíta nihnú-yu chi ñá ní tnĩⁿ-yu tnúhu ní cáháⁿ-í. ⁴⁹ Te yúhú ñá túú càháⁿ-í tnúhu véxi iní mèe-í, chi mee Tãtà-í Yaá ní tendaha ñaha xii-í véxi-í ñuyíú-a ní cachí tnúhu-gá nàcuáa cunduu tnúhu cáháⁿ-í danèhé-í ñáyiú. ⁵⁰ Te yúhú xinì-í sá tnúhu ní táuchíúⁿ Tãtà-í cáháⁿ-í cúú-xí ñⁿ sá vãha sá cúú xii-ndo chi nduu táhú-ndó cundecu-ndo ndihì-gá ni caa ni quíhĩⁿ, núu

xíãⁿ càháⁿ-í nchaa nàcuáa ní táuchíuⁿ-gã —
càchí-gá xáhaⁿ-gã xií-yu.

13

Jèsús náquète-gá sáhá cuè téé xica cuu ndihi-gá

¹ Te cùmání-gã tnahá vico pàscuá, te Jèsús sa nàha-gá sá sà ní cuyatni òré dándóo-gá ñuyíú-a, te ndaa-gá núú ndécú Tātá-gã. Te ío ní cuu iní-gá nchaa ñáyiú ní sándáá iní ñáhá xii-gá, te ní quide ndisa-gá sá ñi cuu iní ñáhá-gã xií-yu.

²⁻⁴ Te ní quíhu yucu ñävãha díquí tẽ Jùdás déhe té Xímú Iscarioté, te ní sani iní-dé nàcuáa cada-dé cuáha cuèndá-dé Jèsús núú cuè téé cùu úhú iní ñáhá xii-gá. Te Jèsús sa nàha-gá sá méé Yã Ndióxi Yáa cúu Tātá-gã ní sãñaha-gã tñúhu ndee iní xii-gá sá cáda-gã núú-gã, te nàha-gá sá díú núú Tātá-gã ní quee-gá véxi-gá ñuyíú-a. Te sáá nduu nàsáá tucu-gá núú Tātá-gã. Te cùdini Jèsús ndihi cue téé xica cuu ndihi-gá ní cùu, te ní ndacuñí-gá yuhu mèsá, te ní taunuu-gá ñiⁿ dóo níhnú-gã, te ní queheⁿ-gá ñiⁿ dóo ní dácútú-gã núú yíquí-gã. ⁵ Te ní chihí-gá ndute ñiⁿ tĩná, te xíãⁿ ñiⁿ naquete-gá sáhá cuè téé xica cuu ndihi-gá, te ndihi dóo ndútú núú yíquí-gã-áⁿ ñiⁿ nadayichí-gá sáhá-güedé.

⁶ Te òré naquete-gá sáhá tẽ Xímú, àdi Pelú, ní cùu ní xáhaⁿ-dẽ xii-gá:

—Mèstrú, ¿te yòhó naquete-n sãhà-í-u? —
càchí-dé xáhaⁿ-dẽ xii-gá.

⁷ Te ní xáhaⁿ Jèsús:

—Vitna ñá cùtnùní iní-n sã quidè-í-a dico sáá nduu te cutnùní iní-n —càchí-gá xáhaⁿ-gã xii-dé.

⁸ Te ní xáhaⁿ tẽ Pèlú:

—Yúhú chi vá ñiⁿ ndùu te naquete-n sãhà-í —
càchí-dé xáhaⁿ-dẽ xii-gá.

Te ní xáhaⁿ Jèsús:

—Te núu vá náquète-í sáhá-n áⁿ, te vá cáda-gã-n cuèndá sá ndécú ndihi ñaha-í xii-n —càchí-gá xáhaⁿ-gã xii-dé.

⁹ Te ní xáhaⁿ tẽ Pèlú:

—Te núu ducaⁿ te vá méé-ní sãhà-í naquete-n, chi naquete-n tñáhá ndaha-í ndihi díquí-í —càchí-dé xáhaⁿ-dẽ xii-gá.

¹⁰ Te ní xáhaⁿ Jèsús xii-dé:

—Téé íchí ñiⁿ xichi chi xini ñuhu-xi sá sáhá-na-dẽ ndoo, te ducaⁿ te nduu ndoo-dé ñihí-dé. Te nchòhó sa càndoo-ndo cuéj ñá ncháá-ndó càndoo —cachí-gá xáhaⁿ-gã xii-dé.

¹¹ Te ducaⁿ ñiⁿ cáháⁿ Jèsús chi sa nàha-gá sá ñiⁿ cuè téé-áⁿ cuáha cuèndá ñáhá-güedé xii-gá núú cuè téé cùu úhú iní ñáhá, xiãⁿ núu ní xáhaⁿ-gã sá ñá túú càndoo-güedé nchaa-güedé.

¹² Te sátá ñiⁿ naquete-gá sáhá-güedé, te ní ndécuihnu-gá dóo-gã, te ní nucóo-gá yuhu mèsá, te ní xáhaⁿ-gã xii-güedé:

—¿Te ní cutnùní iní-ndó sã ñiⁿ quide ñaha-í xii-ndo-ãⁿ? ¹³ Te nchòhó váha-ní càháⁿ-ndó sã cùnùu-í, te dãnani ñaha tucu-ndo Mèstrú xii-í, te ndáá càháⁿ-ndó. ¹⁴ Te núu yúhú cúu-í Mèstrú, te cùu tucu-í téé cùnùu te nàquete-í sáhá-ndó, te ñiⁿ ducaⁿ càda nchòhó tucu naquete sáhá tñáhá-ndó. ¹⁵ Yúhú sãnu ichi ñaha-í xii-ndo nàcuáa cada-ndo. ¹⁶ Te na càchí tñúhu ndáá-í xii-ndo sã ñiⁿ téé xinu cuechi ñá túú cùnùu-dé dácúúxí patróoⁿ-dẽ, te ñiⁿ téé xica chiúⁿ ñá túú cùnùu-dé dácúúxí tẽ tendaha ñaha xii-dé cuáháⁿ-dẽ chiúⁿ. Te ducaⁿ sãtnahá-xi cùu yúhú ndihi nchòhó. ¹⁷ Te núu ní cutnùní iní-ndó nàcuáa ní quide ñaha-í xii-ndo ña, te ducaⁿ càda tñaha-ndo te cuu váha iní ñáhá Yã Ndióxi xii-ndo.

¹⁸ 'Yúhú, ñá túú càháⁿ-í cuèndá-ndó nchàa-ndo, chi yúhú sa nàha-í nàcuáa sãni iní ñiⁿ ñiⁿ nchòhó cue téé ní nanducu ñihnu-í tñúu nchaa ñáyiú ñuhu ichi cuehé ichi duha ní càchí-í chitnahá ñáhá-ndó xii-í. Chi dacuití sã quée ndáá-xi nàcuáa càháⁿ-xi núú tütú Yã Ndióxi núú càchí-xi: “Téé xèxi ndihi ñaha xii-í ngóo-dé cuu úhú iní ñáhá-dẽ”, duha càchí-xi núú tütú-gá.

¹⁹ Te cùmání-gã sáá nduu càda ñaha-dé sá sání iní-dé, núu xiãⁿ càchí tñúhu-í xii-ndo nàcuáa cada-dé, chi na sáá nduu-ãⁿ te cutnùní iní-ndó sã yúhú cúu-í Cristú Yáa ní tendaha Yã Ndióxi véxi ñuyíú-a. ²⁰ Te na càchí tñúhu ndáá-í xii-ndo sã nchàa ñáyiú na quèheⁿ cuèndá ñáhá xii cue téé tendaha-í cáháⁿ tñúhu-í, te cada iní-yu sá tñáhá yúhú ní queheⁿ cuèndá-yu. Te nchaa ñáyiú na quèheⁿ cuèndá ñáhá xii-í, te cada iní-yu sá tñáhá Tātá-í Dútú Ndióxi Yáa ní tendaha ñaha xii-í véxi-í ñuyíú-a ní queheⁿ cuèndá-yu —càchí-gá xáhaⁿ-gã xii-güedé.

Jèsús càchí-gá sá tẽ Jùdás cuáha cuendá ñáhá-dẽ xii-gá núú cuè téè cùu úhú iní ñáhá (Mt. 26:20-25; Mr. 14:17-21; Lc. 22:21-23)

²¹ Te sáta dúcáⁿ nĩ cáháⁿ Jèsús te ío ní ndíhú iní-gá, te ní xáhaⁿ-gã xii-güedé:

—Na càchí tñúhu ndáá-í xii-ndo sã díú-ní ìⁿ nchohó cuáha cuendá ñáhá-ndó xii-í núú cuè téè cùu úhú iní ñáhá —càchí-gá xáhaⁿ-gã xii-güedé.

²² Te ní ngüíta cue téè xica cuu ndíhi-gá ndéhé ìⁿ ndehe ìⁿ núú tnáhá-güedé, chi ñá ní cùtnuní iní-güedé ndèdacàa-güedé cuendá-güedé ní cáháⁿ-gá. ²³ Te ìⁿ téé-áⁿ ìo cùdíí iní ñáhá Jèsús, te ndècu yatni-dé dñi-gá cùdini-dé ndíhi-gá. ²⁴ Te té Xímú, àdi Pelú chi úu diu-dé, ní quide-dé seña núú téè ndècu yatni dñi-gá-áⁿ sá càcáⁿ tñúhú-dé núú-gã nũu ndèdacàa-güedé cuendá-güedé ní cáháⁿ-gá. ²⁵ Te téé-áⁿ ní sáháⁿ ndehe yatni-gá-dé dñi Jèsús, te ní xáhaⁿ-dẽ xii-gá:

—Mèstrú, ¿ndèdacàa-ndí cuendá-ndí ní cáháⁿ-n-í? —càchí-dé xáhaⁿ-dẽ xii-gá.

²⁶ Te ní xáhaⁿ Jèsús:

—Na chindóyo-í luha pàá, te téè na cuáha-í te téé-áⁿ cúú-dẽ —càchí-gá xáhaⁿ-gã xii-dé.

Te ní chindóyo-gá luha pàá, te ní sáha-gá té Jùdás déhe té Xímú Iscarioté. ²⁷ Te òré ní queheⁿ-dé pàá, te ní ngúndecu ndíhi ñaha dùuⁿ-ná yucu ñávãha xii-dé. Te ní xáhaⁿ Jèsús:

—Sá nĩ sani iní-n càda-n te cada ndíhi-ni-n —càchí-gá xáhaⁿ-gã xii-dé.

²⁸ Te ní ìⁿ cue téè cùdini ndíhi-gá ñá ní tècú tñúhú-güedé nása ndùu tñúhu ní xáhaⁿ-gã xii té Jùdás. ²⁹ Te dava-güedé ní sani iní-güedé sá sã cuendá sá ndécú ndíhi-dé sá ñúhú dñiⁿ, te vaa ío ìⁿ sá cuááⁿ-dẽ nàndíhi-güedé vico, àdi dñiⁿ cuáha-dé ñáyiu ndàhú xáhaⁿ-gã ní cáháⁿ-güedé. ³⁰ Te sa ní cundiⁿ ní queheⁿ cuendá té Jùdás pàá caxi-dé, te òré ní níhí-dẽ pàá-áⁿ te ní quee-dé cuáháⁿ-dé.

Jèsús càchí tñúhu-gá nàcuáa cada-o

³¹ Te sáta nĩ quee té Jùdás cuáháⁿ-dé, te ní xáhaⁿ Jèsús xii dava-gá-güedé:

—Vitna te quiní-ndó ndíhi nchaa ñáyiu sã ìo càhnu cuu yúhú Téè cùu ñaní tnáhá-ndó

nchaa-ndo, te òré-áⁿ cutnùní iní-ndó sã ìo càhnu cuu tucu mee Yá Ndiõxí. ³² Te núú yúhú quidé càhnu-í Yá Ndiõxí, te diu-ni ducaⁿ càda càhnu ñaha-gá xii yúhú, te ñá túú-gã tñiⁿ nduu te ducaⁿ càda-gá. ³³ Te nchòhó cue déhe-í na càchí tñúhu-í sã sàcú duha-ná nduu ndècu ndíhi ñaha-í xii-ndo. Te nchòhó nanducu ñaha-ndo xii-í dico vá ná nìhí ñáhá-ndó dàtná ní xáhaⁿ-í xii ñáyiu isràél, te diu-ni ducaⁿ càháⁿ-í núú-ndó sã vã ndácú-ndó quíhíⁿ-ndó nũú quíhíⁿ-í. ³⁴ Te duha sànu ichi ñaha tucu-í xii-ndo nàcuáa cada-ndo sã cúú iní tnáhá-ndó ìⁿ ìⁿ-ndo datná yúhú cúú iní ñáhá-í xii-ndo. ³⁵ Te núú na cùu iní tnáhá-ndó ìⁿ ìⁿ-ndo ña, te ducaⁿ te cutnùní iní nchaa ñáyiu sã cúú-ndó cuè téè ní chitnahá ñáhá xii-í —càchí-gá xáhaⁿ-gã xii-güedé.

Jèsús càháⁿ-gá sá tẽ Pèlú vá nũnuu-dé sá xicá cùu ndíhi ñaha-dé xii-gá

(Mt. 26:31-35; Mr. 14:27-31; Lc. 22:31-34)

³⁶ Te ní xáhaⁿ tẽ Xímú, àdi Pelú chi úu diu-dé, xii Jèsús:

—Mèstrú, ¿ndéé quíhíⁿ-n-í? —càchí-dé xáhaⁿ-dẽ xii-gá.

Te ní xáhaⁿ Jèsús:

—Vitna te vá ndácú-n cànchicúⁿ ñáhá-n quíhíⁿ núú quíhíⁿ-í, dico na sàá nduu te dai sáá-n nũú cùndecu-í —càchí-gá xáhaⁿ-gã xii-dé.

³⁷ Te ní xáhaⁿ tẽ Pèlú xii-gá:

—Mèstrú, ¿te ná cuendá nũu vá ndácú-í cànchicúⁿ ñáhá-í xii-n quíhíⁿ vitna-í? Chi yúhú ñá túú tñàhí yùhú-í cuèi na cùú-í sã cuendá-n —càchí-dé xáhaⁿ-dẽ xii-gá.

³⁸ Te ní xáhaⁿ Jèsús:

—¿Te ndáá sã xèhndé iní-n sã cuèi na cùú-n cuendá-í-u? Te na càchí tñúhu ndáá-í xii-n sã cùmání-gã cana líhi, te úní xito cáháⁿ-n sã ñá túú xini ñáhá-n xii-í —càchí-gá xáhaⁿ-gã xii-dé.

14

Jèsús dánèhé ñáhá-gã nàcuáa cada-o nàsáá-ó nũú ndécú Yá Ndiõxí

¹ Te ní xáhaⁿ-gã xii-güedé:

—Te ñá túú nã cani iní-ndó. Quindáá iní-ndó Yá Ndiõxí, te quindáá iní-ndó yúhú. ² Chi núú ndécú Tãtã-í ío nũne núú cùndecu-o, chi núú ñáhá ñá te sa cachí

tnúhu-í xii-ndo ni cùu. Te vitna na nùhú-í te cada túha-í núu cùndècu-ndo. ³ Te dàtnùní quixi tucu-í te candeca ñaha-í xii-ndo quíhíⁿ cuèndá ñⁿ-ni xìchi cundecu-o. ⁴ Te sa nàha-ndo ndéé quíhíⁿ-í te sa xìní-ndó ìchi —cachí-gá xáhaⁿ-gã xii-güedé.

⁵ Te ní xáhaⁿ tẽ Mǎxí xii-gá:

—Mèstrú, ñá túú xìní-ndí ndéé quíhíⁿ-n te da ichi-ná quiní-ndí —càchí-dé xáhaⁿ-dẽ xii-gá.

⁶ Te ní xáhaⁿ Jèsús:

—Yúhú cùu-í dàtná ñⁿ ichi te càháⁿ-í tnúhu ndáá, te yúhú cada-í te naníhí tǎhú-ndó. Te ñⁿ dìi díi-ni yúhú cada-í te sáá-ndó núu Yǎ Ndiöxí cundecu-ndo te núu na quìndáá iní ñáhá-ndó xii-í. ⁷ Te núu dìcò cùtnùní ndisa iní-ndó yòo cuu-í-áⁿ, ducaⁿ te cutnùní iní-ndó yòo cuu Tǎtà-í ní cùu. Dico vitna dàtná sá ñí xìní núu-ndó Dútú Ndiöxí Yáá cùú Tǎtà-í cada iní-ndó, chi ní xìní-ndó yúhú —càchí-gá xáhaⁿ-gã xii-dé.

⁸ Te ní xáhaⁿ tẽ Lìpé xii-gá:

—Mèstrú, danèhé ñáhá xii-ndí Dútú Ndiöxí chi na cùu váha iní-ndí —càchí-dé xáhaⁿ-dẽ xii-gá.

⁹ Te ní xáhaⁿ Jèsús xii-dé:

—Lìpé, ¿te náa ñá túú xìní ñáhá-n xii-í? Te sa ní cuu vǎi nduu ndecu ndihí ñaha-í xii-ndo, chi ñáyiú xìní ñáhá xii-í te xìní-yu tnàhá Tǎtà-í. ¿Te ná cuèndá yòhó càchí-n sǎ dánèhé ñáhá-í xii-ndo Tǎtà-í? ¹⁰ ¿Náa ñá túú sàndáá iní-ndó sǎ yúhú ndécú-í ndihí Tǎtà-í? Te mee-gã ndécú ndihí ñaha-gá xii-í. Te nchaa tnúhu càháⁿ-í núu-ndó ñà túú càháⁿ-í sá véxi iní mée-í, chi Tǎtà-í Yáá ndécú ndihí ñaha xii-í chíndèe ñaha-gá quidè-í chiúⁿ-gá. ¹¹ Te quìndáá iní-ndó sǎ yúhú ndécú-í ndihí Tǎtà-í, te ducaⁿ mée-gá ndécú ndihí ñaha-gá xii-í. Te núu ñá túú sàndáá iní-ndó tnúhu càháⁿ-í-a, te dandacu iní-ndó nchaa chiuⁿ ta quide-í véxi, te quìndáá iní ñáhá-ndó. ¹² Te na càchí tnúhu ndáá-í xii-ndo sǎ nchaa ñáyiú na quìndáá iní ñáhá xii-í, te cadá-yu chiúⁿ quide-í te càhnu-gá chiúⁿ cadá-yu chi yúhú nùhú-í núu ndécú Tǎtà-í cundecu-í nàcuáa níhí ndéé-gã-yu cundecú-yu. ¹³ Te nchaa sá ná càcáⁿ-ndó te taxi-í te núu na quìndáá iní ñáhá-ndó xii-í, te nchaa cada-í cuèndá cutnùní iní ñáyiú sá ïo càhnu cuu Tǎtà-í

Dútú Ndiöxí. ¹⁴ Te yúhú cada-í nchaa sá cuíní-ndó càcáⁿ tǎhú-ndó núu-í, te núu na quìndáá iní ñáhá ndisa-ndo xii-í.

Jèsús càchí-gá sá téndàha-gá Espiritú Yǎ Ndiöxí quixi cundecu ndihí-o

¹⁵ Te núu nchòhó cùú iní ñáhá-ndó xii-í te tní-ndo nchaa tnúhu càháⁿ-í. ¹⁶ Te yúhú càcáⁿ tǎhú-í núu Tǎtà-í sá téndàha-gá Espiritú-gá quixi cundecu ndihí-ndo cànu ichi ñaha-xi xii-ndo nacuáa cundecu-ndo, te chindee ñaha-xi xii-ndo ni caa ni quíhíⁿ. ¹⁷ Te nchaa ñáyiú ndècu ichi cuehé ichi duha ñá túú xìní-yu Espiritú Yǎ Ndiöxí te ni vǎ cùú cùndecu ndihí-yu. Dico nchòhó sa xìní-ndó Espiritú-gá te ndècu ndihí ñaha-xi xii-ndo. Te sáá ñⁿ nduu te cunuu Espiritú-gá iní-ndó. ¹⁸ Te yúhú vá dáñá ñhnu ñaha-í xii-ndo, chi quixi tucu-í cundecu ndihí ñaha-í xii-ndo. ¹⁹ Te sácú duha-ná nduu ndècu-í te vá quiní ñáhá-gã ñáyiú xii-í, dico nchòhó chi quiní ñáhá-ní-ndó xii-í. Te ducaⁿ-ni cùndecu-ndo ichi váha chi cundecu ndihí ñaha-í xii-ndo ni caa ni quíhíⁿ. ²⁰ Te dàvá-áⁿ cutnùní iní-ndó sǎ ndécú-í ndihí Tǎtà-í, te ducaⁿ nchòhó cundecu ndihí ñaha-ní-ndo xii-í. ²¹ Te nchaa ñáyiú dàcuaha tnúhu-í te tní-yu, ñáyiú-áⁿ quidè ndisá-yu sá cùú iní ñáhá-yu xii-í. Te ducaⁿ Tǎtà-í cùú iní ñáhá-gã xií-yu, te ducaⁿ-ni yúhú cùú iní-í-yu tucu, te ducaⁿ te cùtnuní iní-yu sá ndécú ndihí-í-yu —càchí-gá xáhaⁿ-gã xii-dé.

²² Te ní càháⁿ ñⁿ tée nàni Judás dico ñá díú tẽ Jùdás déhe té Xímú Iscarioté ní càháⁿ, chi ingá té Jùdás ní xáhaⁿ-dẽ xii-gá:

—Mèstrú, ¿nása cada-n cuèndá cutnùní iní-ndí sá cùndècu ndihí ñaha-n xii-ndí, te ñáyiú ñuhu ichi cuehé ichi duha vá cùndècu ndihí-n-yu-i? —càchí-dé xáhaⁿ-dẽ xii-gá.

²³ Te ní xáhaⁿ Jèsús xii-güedé:

—Nchaa ñáyiú cùu iní ñáhá xii-í te tní-yu tnúhu càháⁿ-í, te ñáyiú-áⁿ cùú iní ñáhá Tǎtà-í xií-yu, te yúhú ndihí Tǎtà-í ndécú-ndí ndihí-yu. ²⁴ Te nchaa ñáyiú ñá túú cùu iní ñáhá xii-í te ñá túú tní-yu tnúhu càháⁿ-í. Te nchaa tnúhu ní càháⁿ-í ní xíndèdóho-ndo chi Tǎtà-í Yáá ní tendaha ñaha xii-í véxi-í ñuyúú-a ní dácáhu iní ñáhá-gã xii-í, te ñá díú mée-í ní càhu iní-í tnúhu càháⁿ-í.

25 'Duha ndùu tnúhu càháⁿ-í núú-ndó vitna ndecu ndihí ñaha-gá-í xii-ndo. 26 Dico Yá Ndiöxí tendaha-gã Espiritú-gá quixi-xi cada-xi núú-í taxi-xi tnúhu ndee ìní xii-ndo, te ñu-xi chindee ñaha-xi xii-ndo te danèhé ñáhá-xí xii-ndo nchaa sá cúmăní quini-ndó, te ñu-ni-xi dandacu ìní ñáhá-xí xii-ndo nchaa nacuaá ní cáháⁿ-í.

27 'Te yúhú chindee chítuu ñaha-í xii-ndo ïo váha cuu ìní-ndó cùndecu-ndo datná yúhú ïo váha cùu ìní-í ndécù-í, chi sa ta cùyatni nduu núhú-í. Te yúhú càchí tnúhu ndáá-í sá chindèe ñaha-í xii-ndo, te vá cadà-í datná quidé ñáyuu ñuhu ichi cuehé ichi duha. Te ni vã ndihú ìní-ndó, te ni vã yúhú-ndó. 28 Te sa ní xindèdóho-ndo ñí cáháⁿ-í sá nùhú-í, te quixi tucu-í cundecu ndihí ñaha-í xii-ndo. Te núu ndisa cùu ìní ñáhá-ndó xii-í ñá, te òré ní níhí-ndó tnúhu sá nùhú-í núú ndécú Tãtã-í, te cudíí ìní-ndó ní cùu, chi ïo càhnu cuu-gá dàcúxí yúhú. 29 Te sa ní cachí tnúhu-í sá nùhú-í, te na sàá òré nùhú-í núú ndécú Tãtã-í, te quindáá ìní ñáhá-ndó xii-í.

30 'Te ñá túú-gã vãi tnúhu ndatnúhu ndihí ñaha-í xii-ndo chi sa véxi yucu ñávãha sá táxí tnùní ñuyú-a, dico vá táxí tnùní ñáhá-xí xii yúhú. 31 Te cada-í nchaa nàcuáa ní táuchíúⁿ Tãtã-í cuendá cutnùní ìní nchaa ñáyuu ñuyú-a sá yúhú ïo cùu ìní-í-gá. Te vitna chí ndacuíñí ná quihíⁿ-ó -càchí-gá xáhaⁿ-gã xii-güedé.

15

Cuendá yoho yàha stilé ndihí nchaa dité-xi

1 Te ní xáhaⁿ tucu-gá xii-güedé:

-Yúhú cùu-í datná yoho yàha stilé, te Tãtã-í cùu-gã datná ñⁿ téé xito yoho yaha stilé-áⁿ. 2 Te nchaa ñáyuu ní sándáá ìní ñáhá xii-í cùu-yu datná dité nchaa yoho yàha stilé-áⁿ. Te téé xito yoho yaha stilé-áⁿ xèhndé-dé nchaa dité-xi sá ñá cuini-gá-xi cuuⁿ ndéhé-xi, te ndàda ndoo-dé nchaa dité-xi sá cùuⁿ cuendá cuuⁿ-gá. 3 Te ducaⁿ sãtnahá-xi cùu nchohó, chi sa ní xocuíñí nchaa sá cuèhé sá dúhá ndècu ndihí-ndo, chi ní sándáá ìní-ndó tnúhu ní cáháⁿ-í. 4 Te cuu ñⁿnuu-ndo cùndecu ndihí ñaha-ndo xii-í, te núu ducaⁿ na càda-ndo, te cundecu ndihí ñaha-í xii-ndo. Chi núu ñⁿ yutnu vídí ná quèndèe dité-xi, te dité-xi sá ñí quen-deé-áⁿ vã cùuⁿ-gã sãvídí-xi chi duuⁿ duuⁿ

ní xita-xi. Ducaⁿ sãtnahá-xi cùu nchohó chi vá ndácú-ndó càda-ndo chiuⁿ-í, te núu vá cùndecu ndihí ñaha-í xii-ndo.

5 'Chi yúhú cùu-í datná yutnu vídí-áⁿ, te nchòhó cùu-ndó datná nchaa dité-xi. Te nchaa ñáyuu cùu ñⁿnuu ndihí ñaha xii-í, te ndècu ndihí-í-yu, te ndácú-yu quidé-yu chiúⁿ-í. Te núu vá cùu ñⁿnuu ndihí ñahá-yu xii-í, te vá ndácú-yu cadá-yu chiúⁿ-í. 6 Te nchaa ñáyuu vá cùu ñⁿnuu ndihí ñaha xii-í, te yáha-yu datná yãha ñⁿ dité yutnu vídí sá ñá túú cùuⁿ sãvídí-xi, chi xèhndé-güedé yíchí-xi, te sãhmi-güedé.

7 'Cuu ñⁿnuu ndihí ñaha-ndo xii-í, te vá nàcuánaa-ndo nacuaá ní cáháⁿ-í. Te núu ducaⁿ na càda-ndo, te nãní cuini-ndó cãcãⁿ-ndó núu-í te taxi-í. 8 Te núu nchòhó ná cadá vãha-ndo cùndecu-ndo, te ïo cada càhnu-ndo Tãtã-í, te ducaⁿ cùtnuní sá ndísá cùu-ndo cue téé ní chitnahá ñáhá xii-í. 9 Te yúhú ïo cùu ìní ñáhà-í xii-ndo datná cùu ìní ñáhá Yã Ndiöxí xii-í. Te cada-ni-ndo mèe-ni sá vãha cuendá cudíí ìní ñáhá-gã-í xii-ndo. 10 Te núu na quindáá ìní-ndó càda-ndo nchaa nacuaá ní cáháⁿ-í, te ïo cuu ìní ñáhà-í xii-ndo, chi yúhú ducaⁿ ïo sándáá ìní-í Tãtã-í quidè-í nchaa nàcuáa ní cáháⁿ-gá, te xíãⁿ núu ïo cùu ìní ñáhá-gã xii-í.

11 'Duha càháⁿ-í núú-ndó cuendá cudíí ndisa ìní-ndó datná cudíí ìní mèe-í. 12 Te duha ndùu tnúhu càháⁿ-í cuendá sá cùu ìní tnáhá-ndó ñⁿ ñⁿ-ndo datná cùu ìní ñáhà-í xii-ndo. 13 Te núu ní xihó sã cùu-xí ñⁿ téé ïo váha tnáhá tnúhu ndihí-o, te xíãⁿ cutnùní ìní ñáyuu sá ïo cùu ìní-ó-dé. 14 Te nchòhó cuu-ndo cuè téé ïo váha tnáhá tnúhu ndihí-í te núu na càda-ndo nchaa nacuaá càháⁿ-í. 15 Te vá cùñaha-gã-í xii-ndo sã cùu-ndó cuè téé xinu cuechi núu-í, chi ní ñⁿ téé xinu cuechi ñá túú xini-dé ná quidé patróoⁿ-dè. Te yúhú càchí-í xii-ndo sã cùu-ndó cuè téé ïo váha tnáhá tnúhu ndihí-í, chi ní cachí tnúhu-í nchaa nàcuáa ní cáháⁿ Tãtã-í. 16 Te ñá díú nchòhó ní càháⁿ ñáhá-ndó xii yúhú, chi yúhú ní cáháⁿ ñáhà-í xii-ndo. Te yúhú tauchíuⁿ-í quihíⁿ-ndó càda-ndo nchaa nacuaá ní cáháⁿ-í, chi tnúhu-áⁿ vã ndíhí ñihnu-xi. Te ducaⁿ nchaa sá ná cãcãⁿ-ndó núu Tãtã-í Yã Ndiöxí te taxi-gá, te núu na quindáá ìní ñáhá-ndó xii-í. 17 Te yúhú càháⁿ-í dóho-ndo sã cùu ìní tnáhá-ndó ñⁿ ñⁿ-ndo.

Ñáyi ndècu ichi cuehé ichi duha cùu úhú iní-yu Jèsús ndìhi nchaa ñáyi sàndáá iní tnúhu-gá

18 Te nchaa ñáyi ndècu ichi cuehé ichi duha ñá cùu quìní ñáhã-yu xii-ndo, te sa ñaha-ndo sá ñáhã-gá yúhú ní ngüita-yu ducaⁿ ñá cùu quìní ñáhã-yu xii-í. 19 Te núu ñáhã-gá ñáhã-gá ndécú-ndó ichi cuehé ichi duha ñá, te cuu iní ñáhã-yu xii-ndo dàtná cùu iní ñáhã-yu ndi mèe-yu ni cùu. Te yúhú ní nanducu ñáhu ñaha-í xii-ndo tnúu ñáyi ndècu ichi cuehé ichi duha, núu xiáⁿ ío cùu úhú iní ñáhã-yu xii-ndo cuendá sá ñá túu-gã chítnáhã-ndó-yu. 20 Te dandacu iní-ndó ñáhu ní cáháⁿ-í sá ní ñáⁿ téé xínu cuechi ñá túu cùnuu-dé dàcúxí pàtróoⁿ-dè. Te yúhú cùu úhú iní ñáhã-yu, te ñáhu-ndi ducaⁿ cãda ñáhã-yu xii nchòhó. Te núu ñáhã-gá ní ñáhã-yu tnúhu ní cáháⁿ-í ñá, te ñáhu-ndi ducaⁿ ñáhã-yu tnúhu cáháⁿ-ndó ñáhã-yu ni cùu. 21 Te ducaⁿ cãda ñáhã-yu xii-ndo sá cuendá-í, chi ñá xínu-yu Tãtã-í Yáá ní tendaha ñaha xii-í véxi-í ñuyú-a.

22 Te váa vá cùndècu cuéchi-yu ni cùu, te núu ñá túu yúhú ní cáháⁿ-í ñáhã-yu, te vitna vá cùu ñáhã-gá cachí-yu sá ñá túu cuéchi-yu. 23 Chi nchaa ñáyi cùu úhú iní ñáhã xii-í, te cùu úhú iní-yu ñáhã Tãtã-í. 24 Te váa ni ñáhã-gá cuéchi-yu vá cùndècu ni cuu, te núu ñáhã-gá ñá túu ní xínu-yu nchaa sá ñáhã-gá vá yòo ñáhã-gá ndacu cada. Te cuéchi ní xínu-yu dico dai cùu úhú iní ñáhã-yu xii-í ndihi Tãtã-í. 25 Te duha quidè-yu chi dacuítí quèe ndáá-xi ñáhu yòdo tnuní núu tütú Yá Ndiöxí sá dácuahã-yu, chi cachí-xi sá ñá túu ñáhã-gá cuéchi-í te cuu úhú iní ñáhã-yu xii-í.

26 Te Espiritú Tãtã-í Dútú Ndiöxí sá ndécú ñáhã-gã tendaha-í quixi chindee ñaha-xi xii-ndo, te canu ichi ñaha-xi ñáhu cundecu-ndo, te Espiritú-áⁿ cáháⁿ ndáá-xi cuendá cutnùní iní nchaa ñáyi yoo cùu-í. 27 Te nchòhó ñáhã-gã cáháⁿ váha-ndo cuendá-í cuendá cutnùní iní-yu yoo cùu-í, chi ñaha-ndo sá ndéé òré ní ngüita-í quidè-í chiúⁿ Tãtã-í ní chítnáhã ñáhã-ndó xii-í — cachí-gá xáhaⁿ-gã xii-güedé.

16

1 Te ní xáhaⁿ tucu-gã xii-güedé:

—Duha cáháⁿ-í cuendá ná nanchòcáva iní-ndó ñáhã-gã ichi cuehé ichi duha.

2 Chi vá dáñã-gã-güedé quíhu-ndo vèñúhu, te ni vá cùu-gã quini ndéé ñáhã-güedé xii-ndo. Te sáá ñáhã-gã nduu te cahni ñaha-güedé xii-ndo, te xiáⁿ cuu cahaⁿ-güedé sá quidè-güedé chiúⁿ Yá Ndiöxí. 3 Te ducaⁿ cãda-güedé chi ñá túu xínu-güedé Tãtã-í, te ni ñá túu xínu ñáhã-güedé xii yúhú. 4 Te duha nduu tnúhu cáháⁿ-í núu-ndó, chi na sáá òré te ndacu iní-ndó nchaa tnúhu sá sá ní cachí tnúhu-í xii-ndo ñáhu cada ñaha-güedé xii-í.

Nchaa chiúⁿ quide Espiritú Yá Ndiöxí

Te ñá túu ní cachí tnúhu-í xii-ndo ndéé ñáhã-gã chi ndècu ndihi ñaha-í xii-ndo. 5 Dico vitna sa ta cùyatni nduu ñáhã-gã ní núu ndécú Tãtã-í Yáá ní tendaha ñaha xii-í véxi-í ñuyú-a. Te ni ñáhã-gã nchòhó ñá túu xínu-í tnúhu-ndó ñáhã-gã ñáhã-gã ndéé quíhu-í. 6 Chi mee-ni sá ndihi iní-ndó sá dúcáⁿ ní cáháⁿ-í. 7 Te na cachí tnúhu ndáá-í xii-ndo sá váha-gã sá cùu-xi-ndó ñáhã-gã, chi tendaha-í Espiritú Yá Ndiöxí quixi cundecu ndihi-ndo chindee ñaha-xi, chi núu vá ñáhã-gã te vá quixí Espiritú-gã cundecu ndihi-ndo chindee ñaha-xi xii-ndo. 8 Te na quixi Espiritú-gã te dandixi túu-xi iní nchaa ñáyi ndècu ichi cuehé ichi duha sá ñá túu quide váha-yu. Te dacàhu iní ñáhã-gã sá ndécú ñáhã-gã ichi váha ichi ndáá. Te Espiritú-gã-áⁿ cada-xi ñáhu ñáhu cutnùní iní-yu sá Yá Ndiöxí cada ndáá-gã cuéchi-yu. 9 Te ducaⁿ te cutnùní iní-yu sá ndécú cuéchi-yu, chi ñá túu sàndáá iní ñáhã-yu xii-í. 10 Te ducaⁿ te cutnùní iní-yu ñáhu nduu cuendá ichi váha ichi ndáá, chi yúhú ñáhã-gã ndéé Tãtã-í, te nchòhó vá quini ñáhã-gã-ndó. 11 Te ducaⁿ te cutnùní iní-yu sá Yá Ndiöxí cada ndáá-gã cuéchi-yu, chi sa ní cáháⁿ-gã sá yúcu ñávãha sá táxi tnùní ñuyú-a quíhu-xi núu ñáhã-gã ndáhu.

12 Te vái-gã tnúhu ndècu cachí tnúhu-í xii-ndo, dico nchòhó chi vá cùndè iní-ndó cùndèdóho-ndo nchaa vitna. 13 Te na quixi Espiritú Yá Ndiöxí, Espiritú cáháⁿ ndáá cuéchi, te Espiritú-áⁿ danéhé ñáhã-gã nchaa tnúhu váha tnúhu ndáá. Te vá dacàhu iní ñáhã-gã xii-ndo sá véxi iní méé-xi chi dacàhu iní ñáhã-gã nchaa sá cáháⁿ Yá Ndiöxí, te cachí tnúhu-xi nchaa ñáhu cada-xi ndéé núu cuahãⁿ núu véxi-gã. 14 Te Espiritú-gã-áⁿ cada ñáhu ñaha-xi xii

yúhú chi ndècu ndìhi-xi tnúhu-í, te danèhé ñáhá-xí xii-ndo. ¹⁵ Te nchaa sá ndécú ndìhi Tàtá-í ndécú ndìhi-í tnàhá-í, núu xíáⁿ càchí-í sá Espíritú-gá danèhé ñáhá-xí nchaa tnúhu-í xii-ndo.

Nchaa ñáyiú ndìhú iní-xi nduu díí iní-yu na quìxi tucu Jesús

¹⁶ Te ìⁿ úú-nǎ nduu ndècu-í te vá quìní ñáhá-gǎ-ndó xii-í, dico núú sàcú-ni nduu te quìní ñáhá tucu-ndo xii-í, te ducaⁿ chi núhú-í núú ndécú Tàtá-í —càchí-gá xáhaⁿ-gǎ xii-güedé.

¹⁷ Te sá dúcáⁿ ñí cáháⁿ-gá núu ní ngüíta ìⁿ úú cue téé xica cuu ndìhi-gá xitnàha-güedé:

—¿Nása ndùu-tu tnúhu càháⁿ-gá sá càchí-gá sá ìⁿ úú-nǎ nduu ndècu-gá te vá quìní-gá-ó-gǎ, dico núú sàcú-ni nduu te quìní tucu-o-gǎ-í?, chi núhú-gá núú ndécú Tàtá-gǎ —càchí-güedé xitnàha-güedé.

¹⁸ Te xitnàha tucu-güedé:

—¿Nása cuáháⁿ-tu tnúhu-ǎⁿ sá sàcú-ni nduu? Te ñá tècú tnùn-í-ó nása ndùu tnúhu càháⁿ-gá —càchí-güedé xitnàha-güedé.

¹⁹ Te Jèsús ní cutnùn-í iní-gá sá cuìní-güedé cácaⁿ tnúhú-güedé núú-gǎ nása ndùu tnúhu ní cáháⁿ-gá, núu ní xáhaⁿ-gǎ:

—Cuèndá sá ñí cachí-í sá ìⁿ úú-nǎ nduu ndècu-í te vá quìní ñáhá-gǎ-ndó xii-í, dico núú sàcú-ni nduu te quìní ñáhá tucu-ndo xii-í ní cachí-í, ¿xíáⁿ ndécú tnúhu núú tnàhá-ndó-ǎⁿ? —càchí-gá xáhaⁿ-gǎ xii-güedé.

²⁰ Te ní xáhaⁿ tucu-gá:

—Te na càchí tnúhu ndáá-í xii-ndo sǎ nchòhó ndìhú víhí ìní-ndó te ndáhyú-ndó, dico nchaa ñáyiú ndècu ichi cuehé ichi duha chi da cudíí ìní-yu. Dico nchòhó ñáyiú ndáhyú chi sáá nduu te nduu díí ìní-ndó.

²¹ Chi dàtná cuìní-ndó cùu ìⁿ ñadihí ñaha ní tnàhá nduu cacu déhe-xi vǎi sǎni ìní-aⁿ sá quidé úhú ñáhá-xí. Dico na yǎha cacu déhe-aⁿ, te ñá túú-gǎ ndácú ìní-aⁿ sá ñí quide úhú ñáhá-xí xii-aⁿ chi mee-nǎ sá cudíí ìní-aⁿ déhe-aⁿ. ²² Ducaⁿ sǎtnahá-xi cùu nchòhó vitna chi ndìhú ìní-ndó sǎ nùhú-í, dico quixi tucu-í quixi coto ñaha-í xii-ndo, te òré-áⁿ te cudíí ndìsa ìní-ndó, te vá yòo ìⁿ-gá dandìhú ìní ñáhá xii-ndo davá-áⁿ.

²³ Te dàvá-áⁿ ñá túú-gǎ ná nducu tnúhu-ndo núu-í. Te na càchí tnúhu

ndáá-í xii-ndo sǎ Tàtá-í taxi-gá nchaa sá ná cácaⁿ-ndó núu-gǎ núu na quìndáá ìní ñáhá-ndó xii-í. ²⁴ Te ndéé vitna vátá dúcáⁿ-gǎ cada-ndo cácaⁿ-ndó. Dico cácaⁿ-ndó núu-gǎ núu ná cuìní-ndó te taxi-gá cuèndá cudíí ndìsa ìní-ndó —càchí-gá xáhaⁿ-gǎ xii-güedé.

Xitohó Jesucristú ní cunuu tnúhu-gá núu yucu ñávǎha

²⁵ Te xáhaⁿ tucu-gá xii-güedé:

—Mee-ni ñí chidáhu ndodo-í tnúhu ní cáháⁿ-í núu-ndó, dico sáá nduu te vá chidáhu-gá-í tnúhu cáháⁿ-í, chi cáháⁿ ndáá-na-í cuèndá Tàtá-í. ²⁶ Te dàvá-áⁿ cácaⁿ-ndó núu Tàtá-í núu ná cuìní-ndó te taxi-gá, te núu na quìndáá ìní ñáhá-ndó xii yúhú Déhe-gá. Te ñá túú-gǎ xini ñuhu-xi sá yúhú cácaⁿ-í núu-gǎ cuèndá-ndó chi cácaⁿ mée-nǎ-ndó. ²⁷ Chi mee Tàtá-í ío cùu ìní ñáhá-gǎ xii-ndo cuèndá cùu ìní ñáhá-ndó xii-í, te sàndáá ìní-ndó sǎ núu-gǎ ní quee-í véxi-í. ²⁸ Te yúhú ní quee-í núu Tàtá-í véxi-í ñuyú-a, te vitna dándóo-í ñuyú-a te núhú-í núu ndécú-gǎ —càchí-gá xáhaⁿ-gǎ xii-güedé.

²⁹ Te ní xáhaⁿ cuè téé xica cuu ndìhi-gá:

—Vitna chi càháⁿ ndáá-nǎ-n, ñá túú-gǎ chidáhu-n tnúhu càhá-n. ³⁰ Te vitna ní xini-ndí sá ío váha cutnùn-í ìní-n nchaa nacúáa cùu, te cutnùn-í ìní-n nchaa nacúáa sǎni ìní nchaa ñáyiú. Te ñá túú xini ñuhu-xi nágá nducu tnúhu-yu núu-n chi nchaa sa ní dátúu-n núu-yu. Te xíáⁿ núu sàndáá ìní-ndí sá núu Yǎ Ndiöxí ní quee-n véxi-n —càchí-güedé xáhaⁿ-güedé xii-gá.

³¹ Te ní xáhaⁿ Jèsús:

—¿Te vitna sàndáá ìní-ndó-ǎⁿ? ³² Vitna ní sáá nduu ñí sáá òré sá ncháá nchòhó cuténuu-ndo cǎa ìⁿ cǎa úú cuu-ndo, te dándóo mee ñaha-ndo xii-í. Dico ñá díú mee díí-í quendóo chi ndècu ndìhi-í Tàtá-í.

³³ Duha càháⁿ-í cuèndá cuu váha ìní-ndó cùndecu-ndo, chi ñuyú-a cuu úhú ìní ñáhá-yu xii-ndo, dico ni vǎ yúhú-ndó chi yúhú sa ní dáquéé tìhú-í nchaa sá cuèhé sá dúhá ío ñuyú-a —càchí-gá xáhaⁿ-gǎ xii-güedé.

17

Jèsús xicáⁿ táhú-gǎ núu Tàtá-gǎ Dútú Ndiöxí cuèndá cue téé xica cuu ndìhi-gá

1 Te sáta dúcáⁿ ñí cáháⁿ Jèsús te ní ndacoto-gá andiú, te ní xáhaⁿ-gã xii Tãtã-gã Dútú Ndiõxí:

—Táu, vitna ní sáá nduu càda cahnu ñaha-n xii-í cuendá ducaⁿ càda cahnu ñaha-í xii-n. 2 Chi mee-n ñí cachí-n sá táxí tnùn-í nchaa ñáyiú ñuyíú-a, te dácacu nihnu-í nchaa ñáyiú ní cachí-n nàníhí tàhú. 3 Te cundecu ndihí-õ-yu ñí caa ñí quíhíⁿ, chi sándáá iní ñáhã-yu sá ííⁿ dìi díí-ni yòhó cúú-n Ndiõxí ndisa, te ducaⁿ xìní ñáhã-yu xii yúhú Jesucristú téé ní tendaha-n véxi ñuyíú-a.

4 Te yúhú ní chiñuhu ñaha-í xii-n ñuyíú-a, te ní xínu chùⁿ ní cachí-n càda-í. 5 Táu, vitna na nàsáá-í núú-n te cada càhnu ñaha-n xii-í dàtná ní xóo cada càhnu ñaha-n xii-í ndéé cútnáhá vátá ngáva-gã ñuyíú.

6 Te nchaa ñáyiú ní nanducu nihnu-n tnuú nchaa ñáyiú ndècu ichi cuehé ichi duha, ní taxi cuendá-n-yu, te ní xáhaⁿ-í xii-yu yoo cùu-n. Te cuendá-n cùú-yu, te ní taxi cuendá-n-yu, te ní sándáá iní-yu tnúhu-n. 7 Te vitna ní cutnùn-í iní-yu sá ncháá tnúhu ndècu ndihí-í díu-ni mee-n ñí taxi-n. 8 Te ní dánèhé-í-yu nchaa tnúhu sá ñí dánèhé ñáhã-n xii-í, te ní sándáá iní-yu. Te ní cutnùn-í iní-yu sá núú-n ñí quee-í véxi-í, te ní sándáá iní-yu sá yòhó ní tendaha ñaha-n xii-í véxi-í ñuyíú-a.

9 Te yúhú cáháⁿ ndàhú-í núú-n cuendá nchaa ñáyiú ní taxi cuendá-n. Te ñá túú cáháⁿ ndàhú-í núú-n cuendá ñáyiú ndècu ichi cuehé ichi duha, chi cuendá nchaa ñáyiú ní taxi cuendá-n cáháⁿ-í, chi cuendá-n cùú-yu. 10 Te nchaa sá cúú cuendá-í cúú-xí cuendá-n, te nchaa sá cúú cuendá-n cùu-xi cuendá-í tnàhá-í. Te xíquide càhnu ñahá-yu xii-í.

11 Te yúhú vá cùndècu-gá-í ñuyíú-a, dico mèe-yu chi cundecu-ní-yu, te yúhú ndixi-í núú ndécú-n. Táu, yòhó ío yíñuhu ndecu-n, te yúhú cáháⁿ ndàhú-í núú-n sá ní yùhu ñí iní-n còto-n nchaa ñáyiú ní taxi cuendá-n, ñáyiú ní sándáá iní tnúhu-í cuendá sá ííⁿ-ní ichi cuú-yu cundecú-yu dàtná ííⁿ-ni cùu nchoo. 12 Chi òré ndécú-í ndihí-yu ñuyíú-a ní xito-í-yu nàcuáa cùu iní-n, te ní ííⁿ-yu ñá túú ní xíta nihnu, chi ííⁿ-ni té Jùdás ní xíta nihnu tnàhí-dé, te ducaⁿ ñí cuu cuendá

sá ñí quee ndáá-xi nàcuáa yòdo tnuní núú tütú-n.

13 Te vitna sa ndixi-í núú ndécú-n, dico ñíni ndècu-gá-í ñuyíú-a duha cáháⁿ-í cuendá sá cúú ñí iní-yu dàtná cúú ñí iní mèe-í. 14 Te yúhú ní dánèhé-í-yu tnúhu-n, dico nchaa ñáyiú ndècu ichi cuehé ichi duha cùu úhú iní ñáhã-yu xii-yu cuendá sá ñá túú-gã ndécú-yu ichi cuehé ichi duha-áⁿ dàtná yúhú ñá túú ndècu-í ichi-áⁿ. 15 Te ñá túú càhí-í sá xócàní-n-yu ñuyíú-a, dico cáháⁿ ndàhú-í núú-n sá dácacu nihnú-n-yu núú yucu ñávãha. 16 Te yúhú ñá túú ndècu-í ichi cuehé ichi duha, te ducaⁿ mèe-yu ñá túú-gã ndécú-yu ichi cuehé ichi duha. 17 Te ío na cùndecu yíhí ñuhu-gá-yu núú-n dàcuahá-yu tnúhu-n, chi cùu-xi ííⁿ tnúhu ndáá. 18 Te dàtná ní tendaha ñaha-n xii yúhú véxi-í tnuú nchaa ñáyiú ndècu ichi cuehé ichi duha, ducaⁿ càda-í tendaha-í-yu quíhíⁿ-yu cáháⁿ-yu tnúhu-í tnuú nchaa ñáyiú ndècu ichi cuehé ichi duha. 19 Te yúhú ndécú yíñuhu-í núú-n, te cada ñaha-n xii-í nàcuáa cùu iní-n sá cuendá-yu, te ducaⁿ te cundecu yíñuhú-yu núú-n dàcuahá-yu tnúhu-n.

20 Te ñá díú cuendá mee-ni ñáyiú sa ní sándáá iní-xi cáháⁿ ndàhú-í núú-n, chi tnàhá cuendá nchaa ñáyiú na quíndáá iní ñáhã xii-í ndéé ìdá-gã núu na cùndedóho-yu tnúhu cáháⁿ ñáyiú na tendaha-í. 21 Te xicáⁿ táhú-í núú-n sá ncháá-yu ííⁿ-nã ichi na cùú-yu, te ííⁿ-nã caní iní ndihí ñahá-yu xii-o dàtná cúú nchòo ííⁿ-ni cuu-o. Te ducaⁿ ííⁿ-ná cuu-o ndihí-yu cuendá sá ná quíndáá iní nchaa ñáyiú ndècu ichi cuehé ichi duha sá díú-n ñí tendaha ñaha-n xii-í véxi-í ñuyíú-a. 22 Te nchaa sá vãha ní taxi-n ndècu ndihí-í ní dánèhé-í-yu cuendá sá ííⁿ-nã cuú-yu cundecú-yu dàtná ndécú nchòo. 23 Te yúhú cundecu ndihí-í-yu, te yòhó cundecu ndihí ñaha-n xii yúhú cuendá ííⁿ-nã cuu ndisá-yu cundecú-yu. Te ducaⁿ te cutnùn-í iní nchaa ñáyiú ndècu ichi cuehé ichi duha sá díú mèe-n ní tendaha ñaha-n xii-í véxi-í ñuyíú-a, te cùu iní-n-yu dàtná cúú iní ñáhã-n xii yúhú.

24 Táu, mee-n ñí taxi cuendá-n-yu, te cuín-í sá cùndécú-yu núú cùndècu-í cuendá quín-í-yu sá quídé càhnu ñaha-n xii-í chi

ducaⁿ-ni cùu iní ñáhá-n xii yúhú ndée cútnáhá vátá ngáva-gá ñuyíú. ²⁵ Táu, yòhó ío yíñùhu ndecu-n. Te ñáiyu ndecu ichi cuehé ichi duha ñá túú xini ñáhá-yu xii-n, dico yúhú chi xini ñáhá-í xii-n, dico ñáiyu ní sándáá iní ñáhá xii-í sa xini-yu sá díú-n ní tendaha ñàha-n xii-í véxi-í ñuyíú-a. ²⁶ Te sa xáhaⁿ-í xii-yu yoo cùu-n, te díu-ni ducaⁿ càda-í cuendá cuu iní tnáhá-yu dàtná cúú iní ñáhá-n xii-í, te ducaⁿ cùndecu-í ndihí-yu — cächí-gá xáhaⁿ-gá xii Tátá-gá Dútú Ndióxi.

18

Ní tñi-güedé Jèsús ndécá ñàha-güedé cuáháⁿ
(Mt. 26:47-56; Mr. 14:43-50; Lc. 22:47-53)

¹ Te sátá ducáⁿ ní cáháⁿ Jèsús, te ní quee-gá ndihí cue tée xica cuu ndihí-gá cuáháⁿ-güedé ndàa ingá xio yuhu yúu Cèdrón. Te yacáⁿ cáá ñiⁿ lahuertá, te xití lahuertá-án cuánguihu Jèsús ndihí cue tée xica cuu ndihí-gá. ² Te té Jüdás déhe té Xímú Iscarioté té ní sáha cuendá ñáhá xii-gá núú cuè tée cùu úhú iní ñáhá sa xini-dé lahuertá-án chi titní xito ní sáháⁿ Jèsús ndihí-güedé xíaⁿ. ³ Núu ndáá ichi xíaⁿ ní sáá té Jüdás ndihí vai sandadú, ndihí cue tée quide cuendá veñúhu ní techiⁿ ñaha cue dútú cúnúu, ndihí cue tée cùu fariséú. Te xínehe-güedé machití ndihí ñiⁿ úú-gá sá déeⁿ, te yòtnuú-güedé lintérná ndihí iti ní sáá. ⁴ Te Jèsús sa ñaha-gá nchaa nacuáa cada ñaha-güedé xii-gá núu ní sáháⁿ tuha ñaha-gá xii-güedé, te ní xáhaⁿ-gá:

—¿Yoo nànducu-ndo? —cachí-gá xáhaⁿ-gá xii-güedé.

⁵ Te ní xáhaⁿ-güedé:

—Jèsús tée ñuú Nazàrét nánducu-ndí — cächí-güedé xáhaⁿ-güedé xii-gá.

Te ní xáhaⁿ Jèsús:

—Yúhú ducaⁿ nani-í, te náu-í ndécú-á te núu yúhú nánducu-ndo —cachí-gá xáhaⁿ-gá xii-güedé.

Te tnáhá té Jüdás té ní sáha cuendá ñáhá xii-gá ndihí-güedé. ⁶ Te òré ní xáhaⁿ Jèsús sá díú-gá cúú tée nànducu-güedé, te ní nacaca dùma-güedé te ní nduá-güedé ndée ñuhu. ⁷ Te ní xicáⁿ tnúhú tucu Jèsús núu-güedé yoo nànducu-güedé. Te ní xáhaⁿ tucu-güedé sá

Jèsús tée ñuú Nazàrét nánducu-güedé, ⁸ núu ní xáhaⁿ-ná Jèsús:

—Sa ní cáháⁿ-í sá díú yúhú ducaⁿ nani-í, te núu yúhú nánducu-ndo, te dañà-ndo nchaa cue tée iha na nùhú-güedé —cächí-gá xáhaⁿ-gá xii-güedé.

⁹ Duha ní cuu chi ní quee ndáá-xi nacuáa ní cáháⁿ méé Jèsús chi ní cachí-gá sá ncháá ñáiyu ní sáha cuendá ñáhá Yá Ndióxi cundecu ndihí-gá vá cuíta nihnú-yu. ¹⁰ Te té Xímú, àdi Pelú chi úú díu-dé, néhé-dé ñiⁿ machití, te ní tava-dé machití-án ñiⁿ-xi te ní xehndé-dé lóho xio cùha ñiⁿ tée nani Malcú ní quendeé duuⁿ. Te té-án xini cuèchi-dé núú dútú cúnúu-gá. ¹¹ Te ní xáhaⁿ Jèsús xii té Pelú:

—Nataxúha machití-án núu ñúhú-xí, chi dacuití sá ndóhò-í nacuáa ní cachí Tátá-í cunduu —cächí-gá xáhaⁿ-gá xii-dé.

Jèsús ndécú-gá núú dútú cúnúu-gá

(Mt. 26:57-58; Mr. 14:53-54; Lc. 22:54)

¹² Te cue sandadú ndihí cue tée cúnúu-gá núu-güedé, ndihí cue tée quide cuendá veñúhu ní tñi-güedé Jèsús, te ní dácútú ñàha-güedé. ¹³ Te ndèca ñaha-güedé xii-gá cuáháⁿ núú ndécú té Ànás, te té Ànás-án cúú-dé tátá ñadihí té Caifás. Te té Caifás-án ní cuu-dé dútú cúnúu-gá cuíaⁿ. ¹⁴ Te díu-ni té-án ní xáhaⁿ-dè xii ñáiyu israél sá vaha-gá sá ñiⁿ-ní té na cùu-dé sá cuendá-yu nchaa-yu.

Té Pelú càháⁿ-dé núú ñáiyu sá ñà túú xini-dé Jèsús

(Mt. 26:69-70; Mr. 14:66-68; Lc. 22:55-57)

¹⁵ Te té Pelú, àdi Xímú chi úú díu-dé, ndihí ingá tucu-dé nacuáa xica cuu ndihí-güedé Jèsús nchicúⁿ ñáhá-güedé xii-gá cuáháⁿ. Te ñiⁿ té-án xini tnáhá-dé ndihí dútú cúnúu-án núu nchicúⁿ-dé tnáhá-dé Jèsús cuánguihu ndée núú cáá vèhe té cúnúu-án. ¹⁶ Dico té Pelú ní ndóo-dé yuyèhe ndaa quehé, núu ní ndee té ndihí té Pelú-án ní cáháⁿ ndihí-dé ñaha ndée yuyèhe, te ndèca-dé té Pelú cuánguihu. ¹⁷ Te ní xáhaⁿ ñàha ndée yuyèhe-án xii té Pelú:

—¿Náa ñá díú yòhó tnáhá-n xica cuu ndihí-n té ndèca-güedé cuánguihu-a? — cächí-aⁿ xáhaⁿ-aⁿ xii-dé.

Te ní xáhaⁿ té Pelú:

—Ñáhá, ñá túú tēe-ǎⁿ xícá cùu ndihí-ú —
càchí-dé xǎháⁿ-dē xii-aⁿ.

18 Te ío víxiⁿ quide-xi núu cue tēe xínu cuechi, ndihí cue tēe quide cuendá veñúhu ní dátñáhá-güedé ñuhú, te xínutñí teté-güedé ndihí té Pèlú.

Dútú cúnúu nducu tnúhu-dé núú Jèsús

(Mt. 26:59-66; Mr. 14:55-64; Lc. 22:66-71)

19 Te dútú cúnúu ní xícáⁿ tnúhú-dé núú Jèsús núu nándí cùu cue tēe xica cuu ndihí-gá, te nándí sá dánèhé ñáhá-gǎ xii-güedé. 20 Te ní xáhaⁿ-gǎ:

—Yúhú càháⁿ ndodo-í núu nchàa ñáyiu cuéi xití veñúhu càhnu sá ío cúnúu, te cuéi xití nchaa dava-gá veñúhu núu tàcá nchaa ñáyiu isràél ducaⁿ-ni dānehé-í-yu, te ñá túú dàyuhu càháⁿ-í. 21 Núu vá càcáⁿ tnúhú-n nùu-í. Càcáⁿ tnúhú núu nchàa ñáyiu sácúndedóho tnúhu càháⁿ-í, te na càháⁿ-yu núu nása ndùu tnúhu càháⁿ-í chi xíní-yu —càchí-gá xáhaⁿ-gǎ xii-dé.

22 Te sá dúcáⁿ ñí càháⁿ Jèsús núu ìⁿ tēe quide cuendá veñúhu nùtní-dé tnàhá-dé te ní caní-dé ìⁿ déhndé núu-gǎ. Te ní xáhaⁿ-dē:

—¿Ná cuendá ducaⁿ càháⁿ-n núu dútú cúnúu-í? —càchí-dé xǎháⁿ-dē xii-gá.

23 Te ní xáhaⁿ Jèsús xii-dé:

—Te núu nèhé ní càháⁿ-í te càháⁿ-n nása ndùu tnúhu ní càháⁿ-í, te yúhú càháⁿ váha-í te ducaⁿ càniha-n —càchí-gá xáhaⁿ-gǎ xii-dé.

24 Te ndùtu yoho-ni Jesús ní dánùhú ñáhá tē Ànás xii-gá ndaha té Caifás dútú cúnúu-gá.

Té Pèlú càháⁿ tucu-dé núú ñáyiu sá ñà túú xíní-dé Jèsús

(Mt. 26:71-75; Mr. 14:69-72; Lc. 22:58-62)

25 Te té Pèlú nùtní teté-ni-dé, te ní xáhaⁿ-güedé xii-dé:

—¿Náa ñá díú tnàhá yòhó xícá cùu ndihí tēe ndèca-ndí véxi-ǎⁿ? —càchí-güedé xǎháⁿ-güedé xii-dé.

Te ní xáhaⁿ tē Pèlú:

—Ñáhá, ñá túú tēe-ǎⁿ xícá cùu ndihí-ú —càchí-dé xǎháⁿ-dē xii-güedé.

26 Te ìⁿ ñaní tnáhá tēe ní xehndé té Pèlú lóho-xi-ǎⁿ xínú cuèchi-dé tnàhá-dé núu dútú cúnúu. Te tēe-ǎⁿ ñí xáhaⁿ-dē xii té Pèlú:

—¿Náa ñá díú tnàhá-n ndihí-n-dé ní xíní ñáhá-í òré ní tní-ndí-dé xití lahuertá? —càchí-dé xǎháⁿ-dē xii-dé.

27 Te té Pèlú ní xáhaⁿ tucu-dé sá ñà díú-dē, te òré-ǎⁿ ñí cana ìⁿ líhi.

Jèsús ndécú-gǎ núú tē Pìlatú

(Mt. 27:1-2, 11-14; Mr. 15:1-5; Lc. 23:1-5)

28 Te ní ndeñuhu-güedé Jèsús vehe té Caifás, te ndèca ñaha-güedé xii-gá cuáháⁿ vechiⁿ tēe cùu gobiernú. Te sa ta cùditó-ni-gá cuáháⁿ núu ñá ní cuíní cue tēe isràél quíhu-güedé xití vechiⁿ tēe cùu gobiernú-ǎⁿ. Te núu ñí quíhu-güedé vechiⁿ-ǎⁿ ñá, te vá cúú-gǎ quíhu-güedé cudìni-güedé vico pascuá ní cùu chi ducaⁿ tnàhí quide-güedé. 29 Núu té Pìlatú tēe cùu gobiernú ní quee-dé vechiⁿ-dé ní càháⁿ ndihí ñaha-dē xii-güedé, te ní xáhaⁿ-dē:

—¿Ná cuèchi ní quide tēe-a núu ndèca-ndo-dé véxi? —càchí-dé xǎháⁿ-dē xii-güedé.

30 Te ní xáhaⁿ-güedé:

—Te núu dícó ñá túú cuèchi-dé-ǎⁿ te vá cándèca-ndí-dé quixi núu-n ní cùu —càchí-güedé xǎháⁿ-güedé xii-dé.

31 Te ní xáhaⁿ tucu té Pìlatú xii-güedé:

—Chí cándèca-dé cuánùhú, te cada ndáá-ndó cuèchi-dé nàcuáa càa leí méé-ndó —càchí-dé xǎháⁿ-dē xii-güedé.

Te ní xáhaⁿ-güedé:

—Dico nchúhú ñáyiu isràél chi ñá túú dùcaⁿ taxi tnuní leí sá càhní-ndí —càchí-güedé xǎháⁿ-güedé xii-dé.

32 Te ducaⁿ ñí cuu chi dacuití ñí quee ndáá-xi nàcuáa ní càháⁿ méé Jèsús cada-xi cuú-gá. 33 Te cuándihu té Pìlatú vechiⁿ-dé, te ní cana-dé Jèsús ní xícáⁿ tnúhú-dē núu-gǎ, te xáhaⁿ-dē:

—¿Yòhó yíndàha-n ñáyiu isràél-ǎⁿ? —càchí-dé xǎháⁿ-dē xii-gá.

34 Te ní xáhaⁿ Jèsús:

—¿Te xíǎⁿ càháⁿ-n sǎ véxi iní méé-n, àdi ío ìⁿ ñáyiu ní cachí tnúhu xii-n cuendá-í? —càchí-gá xáhaⁿ-gǎ xii-dé.

35 Te ní xáhaⁿ tē Pìlatú xii-gá:

—Ñá díú tēe isràél cùu-í núu ducaⁿ càháⁿ-n, chi cue ñaní tnáhá-n cuè tēe isràél ndihí cue dútú cúnúu ní taxi cuendá ñáhá-güedé xii-n ìha. ¿Te ná ní quide-n? —càchí-dé xǎháⁿ-dē xii-gá.

³⁶ Te ní xáhaⁿ Jèsús:

—Ñá díú tée ñuyíú-a cùu-í te ni ñà túú vèxi-í taxi tnùn-í ñuyíú-a, chi núu dícó iha tàxi tnùn-í áⁿ te cue tée xìca cuu ndih-í nàá-güedé ndih-í cue tée isràél cuendá sá vǎ tñí ñaha-güedé xii-í ní cùu, dico ñá túú vèxi-í sá táxi tnùn-í ñuyíú-a —càchí-gá xáhaⁿ-gǎ xii-dé.

³⁷ Te ní xáhaⁿ tǎ Pilatú:

—¿Te tée yìndaha ñáyiú cùu-ó vání? —càchí-dé xáhaⁿ-dǎ xii-gá.

Te ní xáhaⁿ Jèsús:

—Te dàtná càchí-n-ǎⁿ yìndaha ndisa-í ñáyiú, chi yúhú véxi-í ñuyíú-a te iha ní cacu-í te càháⁿ-í mee-ni tñuhu ndáá. Te nchaa ñáyiú na cùdí ìní-xi tnúhu ndáá, te tedóho-yu nchaa tnúhu càháⁿ-í —càchí-gá xáhaⁿ-gǎ xii-dé.

³⁸ Te ní xáhaⁿ tǎ Pilatú:

—¿Te ná cúu-tu tnúhu ndáá-áiⁿ? —càchí-dé xáhaⁿ-dǎ xii-gá.

Càchí-güedé sá cáhni-güedé Jèsús

(Mt. 27:15-31; Mr. 15:6-20; Lc. 23:13-25)

Te sátá ñí yáha ní xicáⁿ tnúhú tǎ Pilatú núu Jèsús, te ní quee tucu-dé quehé, te xáhaⁿ-dǎ xii cue tée isràél:

—Ñá túú ñá cuèchi tée-a. ³⁹ Te yáha-ni chi ducaⁿ tnàhí quide nchohó sá ndi tnahá nduu vico pascuá cuini-ndó sǎ dácăcu-í ñⁿ tée yìhi vecaá. Te núu cuini-ndó te na dácăcu-í tée yìndaha ñaha xii-ndo —càchí-dé xáhaⁿ-dǎ xii-güedé.

⁴⁰ Te sá dúcáⁿ ñí cáháⁿ-dé, núu nchaa-güedé níhi ní cáháⁿ-güedé, te xáhaⁿ-güedé:

—¡Vá dácăcu-n tǎe-áⁿ, tǎ Barrábás dácăcu-n! —càchí-güedé xáhaⁿ-güedé xii-dé.

Te tǎ Barrábás-áⁿ ñí cuu-dé ñⁿ ñadúhú.

19

¹ Te tǎ Pilatú ní táuchíúⁿ-dǎ ní tñi ñaha cuè sandadú xii Jèsús, te ní caniha-güedé xii-gá ndih-í ñi. ² Te ñi-ni cue tǎe-áⁿ ñí cadúha-güedé ñⁿ coroná ñi ní chihi-güedé díquí-gǎ, te ní dáquǐ nuu ñaha-güedé xii-gá ñⁿ dóo tícuèhé víhí. ³ Te ní sáháⁿ ndehe yatni-gá-güedé núu-gǎ, te ní xáhaⁿ-güedé:

—¡Ío cǎhnu cuu yohó tǎe yìndaha ñaha xii ñáyiú isràél! —càchí-güedé xáhaⁿ-güedé cúdíquí ndeé ñáhá-güedé xii-gá.

Te ní cani-güedé déhndé núu-gǎ.

⁴ Te ní quee tucu tǎ Pilatú quehé te ní xáhaⁿ-dǎ xii nchaa ñáyiú xíndecu quehé:

—Te cundehe-ndo-dǎ ná ndeé ñuhu-í-dé iha, chi yúhú sáha-í cuendá sá ñá túú cuèchi-dé —càchí-dé xáhaⁿ-dǎ xii-yu.

⁵ Te ní ndeñuhu ñaha tǎ Pilatú xii Jèsús xití vechiúⁿ-dé te ñuhu ñⁿ coroná ñi díquí-gǎ, te ñihnu-gá dóo tícuèhé víhí-ǎⁿ. Te ní xáhaⁿ tǎ Pilatú xii-yu:

—¡Nái-dé-a! —càchí-dé xáhaⁿ-dǎ xii-yu.

⁶ Te ní xini ñáhá cuè dútú cùnùu ndih-í cue tǎe quide cuendá veñuhu. Te ní cuáá-güedé, te xáhaⁿ-güedé:

—¡Cata caa-dé! ¡Cata caa-dé núu cùrúxí! —càchí-güedé xáhaⁿ-güedé xii-dé.

Te ní xáhaⁿ tǎ Pilatú:

—Váha-gá núu candeca mee-ndo-dǎ quíhíⁿ cata caa-ndo-dǎ núu cùrúxí, chi yúhú cútnùn-í ñí-í sá ñá túú na cuèchi-dé —càchí-dé xáhaⁿ-dǎ xii-güedé.

⁷ Te ní xáhaⁿ cuè tǎe isràél:

—Léi ndécú ndih-í nchúhú càchí-xi sá dàí cuú-dé, chi càchí-dé sá Dǎhe Yá Ndióxi cúú-dǎ —càchí-güedé xáhaⁿ-güedé xii-dé.

⁸ Te sá dúcáⁿ ñí xáhaⁿ-güedé xii tǎ Pilatú, te vǎa-gá ní yúhú-dé. ⁹ Núu cuándihu tucu-dé vechiúⁿ-dé, te ní xáhaⁿ tucu-dé xii Jèsús:

—¿Te yòhó ndeé tǎe cùu-n-i? —càchí-dé xáhaⁿ-dǎ xii-gá.

Dico Jèsús ñá túú ní cáháⁿ-gá.

¹⁰ Núu ní xáhaⁿ tǎ Pilatú xii-gá:

—¿Te vá càchí tnúhu-n núu ndeé tǎe cùu-n-u? ¡Náa ñá túú xini-n sǎ yúhú táxi tnùn-í, te cuu-ni tauchiúⁿ-í cata caa ñaha-güedé xii-n núu cùrúxí cuú-n, te cuu-ni dácăcu ñaha-í xii-n-ǎⁿ? —càchí-dé xáhaⁿ-dǎ xii-gá.

¹¹ Te ní xáhaⁿ Jèsús:

—Yòhó ñá túú sǎ táxi tnùn-í ñáhá-n xii yúhú ní cùu núu ñá túú Yá Ndióxi ní cuini-gá sá dúcáⁿ cùnduu, te tǎe ní taxi cuendá ñáhá xii-í núu-n tǎe-áⁿ ío-gá ndécúechi-dé dácúxí yòhó —càchí-gá xáhaⁿ-gǎ xii-dé.

¹² Te òré-áⁿ ñí ngúíta tǎ Pilatú ndúcú-dǎ năcuáa cada-dé dácăcu-dé Jèsús ní cùu, dico cue tǎe isràél ní ngúíta-güedé ní cuáá-güedé, te xáhaⁿ-güedé:

—Te núu na dácăcu-n tǎe-áⁿ, te ñá díú tǎe tnàhá tnúhu ndih-í tǎ Cèsár cúu-n. Chi

ndëda-ni cãa tée na cãchí sã cúú-dë tée yíndaha ñaha xii ñáyiú cùú úhú iní-dé té Cèsár. Te té Jèsús-án cãchí-dé sã táxi tnùní-dé —cãchí-güedé xãhaⁿ-güedé xii-dé.

¹³ Te sã dúcãⁿ ñí xãhaⁿ-güedé xii té Pilatú nõu ní quee-dé ndihí Jèsús cuáhãⁿ ndihí ñaha-dë corrèdór núú ñí quee mee-ni yúú vãha núú ñúhú, te xiãⁿ nání-xí Gãbatá tnúhu hëbreú. Te xiãⁿ ndécú xilé sãcõo nchihí té Pilatú xèhndé-dé cuéchi ñáyiú, núú ní nucóo-dé núú xilé-dé òré ní quexio-dé ndihí Jèsús. ¹⁴ Te cùú-xi datná cuádava nduu, nduu vispré vico pãscuá. Te ní xãhaⁿ tã Pilatú xii ñáyiú isrãél:

—¡Nái tée yíndaha ñaha xii-ndo-a! — cachí-dé xãhaⁿ-dë xií-yu.

¹⁵ Te ní cuáá-yu, te xãhãⁿ-yu:

—¡Cahni-dé! ¡Cahni-dé! ¡Cata caa-dé núú cùrúxí! —cãchí-yu xãhãⁿ-yu.

Te ní xãhaⁿ tã Pilatú:

—¿Te yúhú cata caa-í tée yíndaha ñaha xii-ndo-u? —cachí-dé xãhaⁿ-dë xií-yu.

Te cue dútú cúnùú ní xãhaⁿ-güedé:

—Nchúhú ñã túú-gã tée yíndaha ñaha xii-ndí, chi ñndí-ni té Cèsár yíndaha ñaha-dé xii-ndí —cãchí-güedé xãhaⁿ-güedé xii-dé.

¹⁶ Te té Pilatú ní xãhaⁿ-dë ní quehen cuendã-güedé Jèsús ndécã ñaha-güedé cuáhãⁿ cata caa ñaha-güedé núú cùrúxí.

Sãta caa-güedé Jèsús núú cùrúxí

(Mt. 27:32-44; Mr. 15:21-32; Lc. 23:26-43)

¹⁷ Te ní quee Jèsús nchídó-gã cùrúxí cuáhãⁿ ñí xichí núú nání Yìquí Díquí Ndiýi. Te tnúhu hëbreú quée-xí Gõlgotá. ¹⁸ Te yãcãⁿ ní sata caa ñaha-güedé xii-gã núú cùrúxí-án. Te xio xio ñndí-gã ní sata caa-güedé úú cue tée ndècu ndisa cuéchi-xi ñndí-ni núú cùrúxí tucu. ¹⁹ Te ní táuchíúⁿ tã Pilatú ní taxi ndecu-güedé ñí sã ndéé lètrã núú cùrúxí tá cãa-gã, te duha cãchí lètrã-án: “Jèsús tée ñuú Nazàrét, tée yíndaha ñaha xii ñáyiú isrãél”, duha cãchí-xi. ²⁰ Te vãi ñáyiú isrãél ní xiní-yu nãcuãã cãháⁿ lètrã-án, chi yatni-ni yuhu ñuú ní sata caa ñaha-güedé xii-gã núú cùrúxí. Te lètrã-án cãháⁿ-xi tnúhu hëbreú, te cãháⁿ-xi tnúhu griégú, te cãháⁿ-xi tnúhu làtín. ²¹ Te ní xãhaⁿ cué dútú cúnùú xii té Pilatú:

—Vã táuchíúⁿ-n tee-güedé lètrã cãháⁿ-xi “Tée yíndaha ñaha xii ñáyiú isrãél” ní cùú, vãha-gã tauchíúⁿ-n tee-güedé lètrã cãháⁿ-xi “Tée cãchí yíndaha ñaha xii ñáyiú isrãél ní cùú” —cachí-güedé xãhaⁿ-güedé xii-dé.

²² Te ní xãhaⁿ tã Pilatú:

—Nãcuãã ní táuchíúⁿ-í ní tee-güedé te ducaⁿ quèndóo-xi —cãchí-dé xãhaⁿ-dë xii-güedé.

²³ Te sãtã ñí sata caa ñaha cué sandadú xii Jèsús núú cùrúxí, te cúmí xichí ní quide-güedé dóo-gã, te ñí ñí xichí dóo-gã ní cãhñu cue sandadú-án. Te ndècu ñí dóo-gã dóo cãní ñã túú ní tãcu. ²⁴ Te cuendã dóo-ãⁿ ní xítnãha cue sandadú-án:

—Vã ndátã-ó dõo-a, vãha-gã nõu na cõto ndéé-ó cuendã quini-ó ndédacãa-o cuu cuendã-ó —cãchí-güedé xítnãha-güedé.

Te ducaⁿ ñí quide-güedé chi ní quee ndãã-xi nãcuãã cãháⁿ-xi núú tütú Yã Ndiõxí núú cãchí-xi: “Titní xichí ní cãhñu-güedé dóo-í. Te ní xito ndéé-güedé cuendã cutnùní iní-güedé ndédacãa-güedé níhí-güedé dóo-í”, duha cãchí-xi núú tütú-gã. Te sã dúcãⁿ cãháⁿ-xi núú tütú Yã Ndiõxí nõu xiãⁿ ducaⁿ ñí quide cue sandadú-án.

²⁵ Te yatni ñndí curúxí núú tácãa Jèsús nútñí nãná-gã, ndihí cùhú-xi, ndihí tá Màriã ñndíhí té Clèofás, ndihí tá Màriã Magdalèná. ²⁶ Te ní xiní Jèsús nãná-gã nútñí-án ñndí ñí tée ní xica cuu ndihí-gã, tée ío cùú iní-gã, te ní xãhaⁿ-gã xii nãná-gã:

—Nãã, tée nútñí-án nduu-dé dàtnã déhe mee-n —cãchí-gã xãhaⁿ-gã xii-án.

²⁷ Te ní xãhaⁿ-gã xii tée ní xica cuu ndihí-gã-án:

—Ñaha-án nduu-án dàtnã nãná mée-n —cãchí-gã xãhaⁿ-gã xii-dé.

Núú ndéé dàvã-án ñí nduu nãná ñhãhã tãe-án xii nãná-gã.

Ní xíhí Jèsús

(Mt. 27:45-56; Mr. 15:33-41; Lc. 23:44-49)

²⁸ Te ní cutnùní iní Jèsús sã ñí ndihí chiúⁿ ní táhú Tãtã-gã Dútú Ndiõxí ní quide-gã nõu ní cachí-gã:

—Yíhí-í ndute —cãchí-gã.

Te duha ní cãháⁿ-gã chi ní quee ndãã-xi nãcuãã cãháⁿ-xi núú tütú Yã Ndiõxí.

²⁹ Te ndècu ìn lítu ñùhu ndudí íá. Te sá dúcáⁿ ñí cáháⁿ-gá sá yìchí-gá ndute, núu xiáⁿ ní queheⁿ-güedé cáchí te ní chindóyo-güedé xítí ndudí íá-áⁿ, te ní chinenu-güedé díquí ìn díte yutnu nàni hisópó, te ní ndo-cani-güedé ní chihi-güedé yuhu-gá. ³⁰ Te sátá ñí xihí-gá ndudí íá-áⁿ, te càchí-gá:

—Vitna ní dǎxǐnu cava-í nchaa chùuⁿ ní cachí Tàtà-í cada-í —duha ní cachí-gá.

Te ní xócuíta dúcúⁿ-gǎ ndàa núú-gǎ, te ní xihí-ni-gá.

Ìn sandàdú ní caáⁿ-dé yiqui naha Jèsús ndihí ìn pùyá yíhí càá núú-xi

³¹ Te cuendá sá ndùu vispré vico pascuá cúu-xí núu ñá ní cuini cue téé israhél cundecu-ni yiqui cùñú-gá núu cùrúxi ndihí yiqui cùñú cue téé ní sata caa-güedé díñi-gá, chi cuendá nduu tnée-án cúu-xí ndùu ndetatú ñáyiú, te ío quide cahnú-yu nduu-áⁿ, núu ní xáhaⁿ-güedé xii té Pilatú sá táuchùuⁿ-dé quíhíⁿ cue téé cáhnú-güedé díhíⁿ Jèsús ndihí díhíⁿ cue téé tàcaa ndihí-gá, te xocani-güedé yiqui cùñú-gá ndihí yiqui cùñú-güedé yácaⁿ. ³² Te sátá dúcáⁿ te ní sáháⁿ cue sandàdú ní sáhnú-güedé díhíⁿ cue téé tàcaa xio xio díñi Jèsús. ³³ Te òré ní cuyatni-güedé núú-gǎ, te ní xiní-güedé sá sà ní xihí-gá núu ñá ní sáhnú-güedé díhíⁿ-gá.

³⁴ Dico ìn sandàdú-án ní cúxi-dé pùyá néhé-dé ìn xio yiqui naha-gǎ, te yíhí caá núú-xi núu ní caáⁿ-xi yiqui naha-gǎ ní quee níñí ndihí ndute cuí. ³⁵ Te yúhú té Juàá téé ní cadúha tutú-a ní xiní-í nàcuáa ní cuu ní xihí Jèsús, te xiáⁿ núu cáháⁿ ndáá-í cuendá quíndáá iní-ndó. ³⁶ Te ducaⁿ ñí cuu ñá ní sáhnú-güedé díhíⁿ Jèsús, chi ní quee ndáá-xi nàcuáa cáháⁿ-xi núu tütú Yǎ Ndióxi núu càchí-xi: “Vá cahnú-güedé ni ìn yiqui-gá”, duha càchí-xi. ³⁷ Te ducaⁿ ñí quide-güedé Jèsús ní caáⁿ-güedé yiqui naha-gǎ, chi ingá xichi núu tütú Yǎ Ndióxi càchí-xi: “Sáá nduu te quini-güedé ìn téé ní dánicuehé-güedé”, duha càchí-xi.

Chindúxi-güedé Jèsús

(Mt. 27:57-61; Mr. 15:42-47; Lc. 23:50-56)

³⁸ Te sátá dúcáⁿ ñí cuu, te té Chèé téé ñúu Arimateá tnahá-dé ní sándáá iní-dé tnúhu Jèsús dico dayuhu, chi ní xóo

yuhú-dé cue téé cùnuu núu ñáyiú israhél. Te téé-án ñí xáhaⁿ-dè xii té Pilatú núu vá dáhá-dè canehe-dé yiqui cùñú Jèsús quíhíⁿ chindúxi-dé, te té Pilatú ní xáhaⁿ-dè xii-dé sá cúu cānehe-dé yiqui cùñú Jèsús quíhíⁿ, núu ní sáháⁿ-dé ní nuu nehe-dé yiqui cùñú-gá núu cùrúxi nchídó-dé cuáháⁿ.

³⁹ Te té Nicodemú téé ní sáháⁿ niú ní cáháⁿ ndihí-dé Jèsús ndéé díhna, téé-án néhé-dé ócò úxí kílu yuchi ní cuáha mee-ni yúcu sǎ nání mǐrrá ndihí yúcu sǎ nání àloés. Te ío váha tnami saháⁿ. ⁴⁰ Te ní naníhí tnahá-dé ndihí té Chèé, te ní chidúcúⁿ-nuu-güedé yiqui cùñú Jèsús mee-ni dǒó vǎha, te nàcuáa ta dúcúⁿ nuu-güedé yiqui cùñú-gá dóó-áⁿ, te ducaⁿ ta chido-güedé yuchi sáháⁿ tnámí-áⁿ núu dǒó-áⁿ chí ducaⁿ tnahí quide ñáyiú israhél òré chindúxi tnahá-yu. ⁴¹ Te yatni núu ñí sata caa-güedé Jèsús caá ìn lahuertá. Te xítí lahuertá-án nchíí ìn yaú cava duha cuáháⁿ ndáá-xi, te vátá yǒo ìn-gá nguíndúxi xiáⁿ. ⁴² Te cuendá sá ñí cuyatni tnahá nduu ndetatú ñáyiú israhél núu xiáⁿ yaú cava nchíí yatni-ni xiáⁿ ñí chihi-güedé yiqui cùñú Jèsús.

20

Jèsús ní ndoto-gá

(Mt. 28:1-10; Mr. 16:1-8; Lc. 24:1-12)

¹ Te ndumìngú tacuìhndá-gá cuáháⁿ tá Màriá Magdalèná cuáháⁿ ngoto-xi yaú núu ñí chihi-güedé yiqui cùñú Jèsús, te ní sáá-xi ní xiní-xi sá ñá túú-gǎ ndèdí yúú yèhe yaú-án. ² Núu xínu-xi cuánuhú núu ndécú té Xímú, àdi Pelú chí úú diu-dé, ndihí ingá téé ní xica cuu ndihí-gá téé ío cùu iní-gá, te ní xáhaⁿ-xi xii-güedé:

—Nèhe-güedé yiqui cùñú Jèsús cuáháⁿ, te ñá xiní-ó ndéé ní taxi ndecu-güedé —càchí-xi xáhaⁿ-xi xii-güedé.

³ Te ní quee té Pèlú ndihí ingá téé-án cuáháⁿ ndéhé-güedé yaú núu ñí chihi-güedé yiqui cùñú-gá. ⁴ Te ndúu-güedé xinú-güedé cuáháⁿ ní cùu, dico ingá téé-án ñí cuu níhi-gá sáhá-dé cuáháⁿ-dé núu díhna-gá-dé ní sáá-dé yuhu yaú núu ñí chihi-güedé yiqui cùñú Jèsús ní cùu. ⁵ Te ní ngáundeyi-dé xító nihni-dé xítí yaú-án, te ní xiní-dé mee-nǎ dóó vǎha sá ñí xiducúⁿ

nuu-gá yúcu, dico ñá ní quǐhu-dé. ⁶ Te sátá nǐ sáá té Pèlú te cuánguihu-dé xití yaú-án, núu tnahá-dé ní xiní-dé nchaa dóo nǐ xíducúⁿ nuu-gá yúcu-ǎⁿ. ⁷ Te ní xiní-dé sá dǒo nǐ xíndútú díquí-gǎ ñá túú càtuu jundú-xi ndihí dóo nǐ xíducúⁿ nuu-gá chi ní nadúcuⁿnuu-ná càtuu ìⁿ xio. ⁸ Te nchícúⁿ tucu téé ní sáá díhna-gá-án cuánguihu xití yaú-án, te ní xiní-dé sá dǒo-ñá yúcu, te ñá túú-gǎ yiquí cùñú Jèsús nǔu ní sándáá iní-dé sá nǐ ndoto-gá. ⁹ Chi vátá tècú tnùní-gá-güedé nàcuáa càháⁿ-xi núú tùtú Yǎ Ndiǒxí núú cǎchí-xi sá Jèsús ndoto-gá. ¹⁰ Te ní xícó ndì ndúú cue téé ní sángoto yaú núú nǐ chihi-güedé yiquí cùñú Jèsús ní cùu cuánuhú-güedé vehe-güedé.

Jèsús ní naníhí tnahá-gǎ ndihí tá Màriá Magdaléná
(Mr. 16:9-11)

¹¹ Te ní sáá tucu tá Màriá yuhu yàú núú nǐ chihi-güedé yiquí cùñú Jèsús te ní ngúita-xi ndàhyú-xi, te ní ngáundeyi-xi xìto nihni-xi xití yaú-án. ¹² Te xití yaú-án nǐ xiní-xi úú espíritú xínú cuèchi núú Yǎ Ndiǒxí xǐxíhnu-xi mee-ni dóo cuixíⁿ xǐndecu-xi núú nǐ cáa yiquí cùñú-gá. Te ìⁿ-xi nùcúo núú nǐ cáa díquí-gǎ, te ìⁿ-xi nùcúo núú nǐ cáa sáhá-gǎ. ¹³ Te espíritú-án nǐ xáhaⁿ-xi xì tá Màriá:
—¿Ná cuendá ndàhyú-n? —cǎchí-xi xáhaⁿ-xi.

Te ní xáhaⁿ tá Màriá:

—Ndàhyú-í chi nèhe-güedé yiquí cùñú Yaá cúú Xìtohó-í cuáháⁿ, te ñá túú xiní-í ndéé ní taxi ndecu-güedé —cǎchí-xi xáhaⁿ-xi xì cue espíritú-án.

¹⁴ Te tnúhu-ni-án nǐ cáháⁿ-xi te ní nchócótó-xí ìⁿ xio, te ní xiní-xi Jèsús nútnǐ-gá dico ñá túú ní cùtnuní iní-xi sá díú mèe-gá. ¹⁵ Te ní xáhaⁿ Jèsús xii-xi:

—¿Ná cuendá ndàhyú-n? ¿Yoo nànducu-n? —cǎchí-gá xáhaⁿ-gǎ xii-xi.

Te mee-xi nǐ sani iní-xi sá tǎe xìto lahuertá-án cúú tǎe-án, núú ní xáhaⁿ-xi:

—Táta, te núu yòhó néhé-n yiquí cùñú Jèsús cuáháⁿ, te cáháⁿ-n ndéé ní taxi ndecu-n chi cuendá naqueheⁿ-í canehe-í núhú —cǎchí-xi xáhaⁿ-xi.

¹⁶ Te ní cáháⁿ díú ñàha-gá xii-xi, te xáhaⁿ-gǎ:

—¿Màriá! —cǎchí-gá xáhaⁿ-gǎ xii-xi.

Te ní ndacoto-xi núú-gǎ, te ní cáháⁿ-xi tnúhu hèbreú, te xáhaⁿ-xi:

—¿Rabóní! —cǎchí-xi xáhaⁿ-xi. Te tnúhu-án quée-xi Mèstrú.

¹⁷ Te ní xáhaⁿ Jèsús:

—Daña vá ngání ñàha-n chi vátá ndáá-gǎ-í núú ndécú Tǎtà-í. Te núhú-n cùñaha-n xii cue téé ío váha ní tnahá tnúhu ndihí-í sá ndáa-í núú ndécú Tǎtà-í Dútú Ndiǒxí, te díu-gá cúú Tǎtà-ndó nchàa-ndo, te díu-ni-gá cúú Ndiǒxí-ndó —cǎchí-gá xáhaⁿ-gǎ xii-xi.

¹⁸ Te ní natnǐ tá Màriá Magdaléná ichi cuánuhú-xi cúñaha-xi xii cue téé ní xica cuu ndihí-gá sá nǐ xiní-xi Jèsús, te ní xáhaⁿ-xi xii-güedé nchaa nàcuáa ní xáhaⁿ-gǎ xii-xi.

Ní quexìo Jesús núú xǐndecu cue téé ní xica cuu ndihí-gá

(Mt. 28:16-20; Mr. 16:14-18; Lc. 24:36-49)

¹⁹ Te díu-ni ndumìngú sandiquíⁿ ní nat-acá cue téé ní xica cuu ndihí-gá, te xǐndedí nihnu-güedé vehe sá xǐyùhú-güedé cue téé cùnno núú ñǎyiu isràel. Te ní quíhu Jèsús ndéé tnuú-güedé ní ngúnutnǐ-gá, te ní xáhaⁿ-gǎ:

—Yá Ndiǒxí chǐndèe ñàha-gá xii-ndo ìo váha cùu iní-ndó ndècu-ndo —cǎchí-gá xáhaⁿ-gǎ xii-güedé.

²⁰ Te ní dánèhé ñáhá-gǎ ndaha-gá ndihí yiquí naha-gǎ xii-güedé. Te ío ní cudíí iní-güedé sá díú ndisa-gá ní xiní ñáhá-güedé. ²¹ Te ní xáhaⁿ tùcu Jesús xii-güedé:

—Yá Ndiǒxí chǐndèe ñàha-gá xii-ndo ìo váha cùu iní-ndó ndècu-ndo. Te dàtná ní tendaha ñàha Tǎtà-í Dútú Ndiǒxí xii-í véxi-í ñuyú-a, te ducaⁿ tendaha ñàha-í xii-ndo quíhíⁿ-ndó cǎháⁿ-ndó tnúhu-í núú ñǎyiu —cǎchí-gá xáhaⁿ-gǎ xii-güedé.

²² Te ní chiyócó-gǎ núú-güedé, te ní xáhaⁿ-gǎ:

—Chí ndúú tàhú Espíritú Yǎ Ndiǒxí cundecu ndihí-ndo. ²³ Te nchaa ñáyiu na quíndáá iní-xi tnúhu-í te cúñaha-ndo xii-yu sá nǐ quide càhnu iní Yǎ Ndiǒxí nchaa cuéchi-yu. Te nchaa ñáyiu vá quíndáá iní tnúhu-í te cúñaha-ndo xii-yu sá vǎ cáda

càhnu iní-gá cuéchi-yu —càchí-gá xáhaⁿ-gã xii-güedé.

Té Mǎxí càháⁿ ndihí-dé Jèsús

²⁴ Te núú ùxúú cue téé ní xica cuu ndihí-gá, te ìⁿ-dé nání-dě Mǎxí téé ní xóo danàni-güedé Cuächí, te téé-áⁿ ñà túú-dě ndécú ndihí-güedé òré ní sáháⁿ Jèsús. ²⁵ Te dava-gá cue téé ní xica cuu ndihí-gá ní xáhaⁿ-güedě xii-dé:

—Ní xiní-ndí Jèsús —càchí-güedé xǎhaⁿ-güedě.

Te ní xáhaⁿ tǎ Mǎxí:

—Te vá quíndáá iní-í, chi ndéé quíní-í ndaha-gá núú ñí quée nduyú, te dàquíhu-í díquí ndáhà-í núú ñí caáⁿ nduyú-áⁿ, te dàquíhu ndàha-í yíquí naha-gã núú ñí caáⁿ, ducaⁿ te quíndáá iní-í —càchí-dé xǎhaⁿ-dě xii-güedé.

²⁶ Te núú ùná tucu nduu ní nataká tucu cue téé ní xica cuu ndihí Jèsús ìⁿ vehe, te nduu-ǎⁿ tnàhá té Mǎxí ndécú ndihí-güedé. Te cuéi ndèdí nihnu-güedé vehe-áⁿ, te ní quíhu Jèsús ndéé tnuú-güedé, te ní xáhaⁿ-gã:

—Yá Ndióxí chíndèe ñaha-gá xii-ndo ìo váha cùu iní-ndó ndècu-ndo —cachí-gá xáhaⁿ-gã xii-güedé.

²⁷ Te ní xáhaⁿ-gã xii té Mǎxí:

—Cundehe ndàha-í te dàquíhu-n díquí ndáhà-n núú ñí quée nduyú, te dàquíhu-n ndàha-n yíquí naha-í-a cuèndá quíndáá iní-n te vá cání ìⁿ caní úú iní-n —càchí-gá xáhaⁿ-gã xii-dé.

²⁸ Te ní xáhaⁿ tǎ Mǎxí xii-gá:

—Yòhó cúú-n Xítóhó-í! Yòhó cúú-n Ndióxi-í! —càchí-dé xǎhaⁿ-dě xii-gá.

²⁹ Te ní xáhaⁿ Jèsús:

—Mǎxí, ndéé vitna ní sándáá iní-n chi ndéé ní xiní ñáhà-n xii-í te ní sándáá iní-n, dico cùdí-gã iní nchaa ñáyiú ñá túú ní xiní núú ñáhà xii-í, te ní sándáá iní-yu —càchí-gá xáhaⁿ-gã xii-dé.

Quíndáá iní-ó tnũhu yòdo tnuní núú tütú-a

³⁰ Te vâi-gá sá vǎ yòo tnàhí ndàcu cada ñá túú yòdo tnuní núú tütú-a ní quide Jèsús núú cuè téé ní xica cuu ndihí-gá. ³¹ Dico dava-gá ní gódó tnuní núú tütú-a cuèndá

sá quíndáá iní-ndó sǎ Jèsús cúú-gã Crístú Déhe Dútú Ndióxí, te naníhí tǎhú-ndó te núu na quíndáá iní-ndó-gã.

21

Úsá cue téé ní xica cuu ndihí Jèsús ní xiní ñáhà-güedě xii-gá

¹ Te ingá nduu tucu xíndecu cue téé ní xica cuu ndihí Jèsús yuhu làgúná ñuú Tiberiás, te ní sáháⁿ-gá núú xíndecu-güedé-áⁿ. Te duha ní cuu ní xiní ñáhà-güedě xii-gá. ² Te ndècu té Xímú, àdi Pelú chi úú òú-dé, ndihí té Mǎxí téé ní xóo cúñaha-güedě Cuächí, ndihí té Natanàél téé ñuú Cànaá, te ñuú-áⁿ yíndèhu-xi distritú Galileá, te tnàhá ndi ndúú déhe té Zebèdeú, ndihí úú-gá tucu cue téé ní xica cuu ndihí-gá. ³ Te ní xáhaⁿ tǎ Pèlú xii-güedé:

—Quíhíⁿ-í quítní-í chácá —càchí-dé xǎhaⁿ-dě xii-güedé.

Te ní xáhaⁿ-güedé:

—Tnàhá nchúhú canchicúⁿ ñáhà-ndí xii-n quíhíⁿ tucu —càchí-güedé xǎhaⁿ-güedé xii-dé.

Te ní xica-güedé cuáhàⁿ-güedé ní sáá-güedé núú ndécú bàrcú, te ní quée-güedé xití bàrcú-áⁿ cuáhàⁿ-güedé. Te niú-áⁿ ñǎ ní ñhí tnàhí-güedé chácá. ⁴ Te sa ta cùditó-ñǎ cuáhàⁿ ní xiní-güedé Jèsús yuhu làgúná, dico ñá ní cùtnuní iní-güedé sá díú-gã. ⁵ Te ní xáhaⁿ-gã xii-güedé:

—Cue téé cuechi, ¿ní ñhí-ndó chǎcá caxi-o ñǎ? —càchí-gá xáhaⁿ-gã xii-güedé.

Te ní xáhaⁿ-güedé:

—Védana chácá ñà túú ní ñhí-ndí —càchí-güedé xǎhaⁿ-güedé xii-gá.

⁶ Te ní xáhaⁿ Jèsús:

—Chí dáquèe ñunu-ndo ndàa xio cuha barcú chi ñhí-ndó-dí —càchí-gá xáhaⁿ-gã xii-güedé.

Te ducaⁿ ñí quide-güedé, te òré natàva-güedé ñunu xití ndute, te ñá cùndèe-gá-güedé natava-güedé cuèndá sá ñí chítú chǎcá xití-xi. ⁷ Te téé ní xica cuu ndihí-gá téé ío cùu iní-gá ní xáhaⁿ-dě xii té Pèlú:

—Diu Xítóhó Jesucristú! —càchí-dé xǎhaⁿ-dě xii-dé.

Te sá nǐ tecú dóho té Pèlú sá dúcáⁿ càháⁿ-dé nǔu ní ndíúnuu-dé dóó-dě, chi dóó sǎ yímàa-ni-dé níhnú-dě ní cùu. Ducaⁿ te ní nuu ndava-dé bàrcú ní ngaunihnu-dé ndute, te cuáháⁿ-dé núú ndute-áⁿ nǐ quene-dé ndéé ñuhu yìchí. ⁸ Te dava-gá cue té ndihí té Pèlú ñu-ni cue té ní xica cuu ndihí Jèsús ní quendóo-güedé dàtná ñⁿ ciendú-gá mètrú te quene-güedé yuhu ndüte. Te tàñuhu-ni-güedé ñunu-güedé chitu chǎcá nǐ quene-güedé ndéé yuhu ndüte. ⁹ Te òré ní quene-güedé ñuhu yìchí, te ní xiní-güedé càyú ñuhú, te núú ñuhú-áⁿ ñuhú ñⁿ chácá ndihí ñⁿ pàá. ¹⁰ Te ní xáhaⁿ Jèsús xii-güedé:

—Quíhíⁿ ngueheⁿ-ndo ñⁿ úú chácá quití íchí nǐ tñi-ndo —càchí-gá xáhaⁿ-gǎ xii-güedé.

¹¹ Núu té Pèlú ní sáháⁿ-dé núú ndécú bàrcú, te ní quee-dé xití-xi ní cándeé-dé ñunu ñuhu chácá táñuhu-dé ní quene ndéé ñuhu yìchí, te chitu chǎcá náhnú, te ñuhu ñⁿ ciendú údico úxí úní-dí xití ñunu-áⁿ, te cuèi ducaⁿ vài-dí ñuhu dico ñá ní ndátá ñunu-áⁿ. ¹² Te ní xáhaⁿ Jèsús:

—Chí nèhé cadí iní-ndó —càchí-gá xáhaⁿ-gǎ xii-güedé.

Dico ni ñⁿ cue té ní xica cuu ndihí-gá-áⁿ ñǎ ní xicáⁿ tnúhú-güedé núú-gǎ nǔu yoo cùu-gá, chi sa ní cutnùní iní-güedé sá díú Jèsús cúu-gǎ. ¹³ Te Jèsús ní sáháⁿ-gá ní queheⁿ-gá pàá ní sáñaha-gǎ xii-güedé caxi-güedé, te dàtnùní ní queheⁿ tucu-gá chácá nǐ sáñaha-gǎ xii-güedé.

¹⁴ Vitna cùu úní xito sá xiní ñáhá cue té ní xica cuu ndihí-gá sáta nǐ ndoto-gá.

Jèsús càháⁿ ndihí-gá té Pèlú

¹⁵ Te sáta nǐ túhú cóhó-güedé ní sadí iní-güedé te ní xicáⁿ tnúhú Jèsús núú tē Xímú, àdi Pelú chi úú diù-dé, te xáhaⁿ-gǎ:

—Xímú, déhe té Jónás, ¿cùu iní-gá-n yùhú dàcúxí dàva-gá cue té-a ñǎ? —càchí-gá xáhaⁿ-gǎ xii-dé.

Te ní xáhaⁿ tē Pèlú:

—Mèstrú, cùu iní ñáhà-í, yòhó sa nàha-n —cachí-dé xáhaⁿ-dē xii-gá.

Te ní xáhaⁿ Jèsús:

—Te núu ducaⁿ, te dacàxi-n cue mbéé líhli-í —càchí-gá xáhaⁿ-gǎ xii-dé.

Te cue mbéé-áⁿ cúu-güedi ñáyiú cùu cuendá-gá.

¹⁶ Te ní xáhaⁿ tucu-gá xii té Pèlú:

—Xímú, déhe té Jónás, ¿cùu iní ñáhá-n xii-í-u? —càchí-gá xáhaⁿ-gǎ xii-dé.

Te ní xáhaⁿ tucu té Pèlú:

—Mèstrú, cùu iní ñáhà-í, yòhó sa nàha-n —cachí-dé xáhaⁿ-dē xii-gá.

Te ní xáhaⁿ-gǎ:

—Te núu ducaⁿ, te coto-n cuè mbéè-í —càchí-gá xáhaⁿ-gǎ xii-dé.

¹⁷ Te xito cùu úní ní xáhaⁿ tucu-gá xii té Pèlú:

—Xímú, déhe té Jónás, ¿cùu iní ñáhá-n-áⁿ? —càchí-gá xáhaⁿ-gǎ xii-dé.

Te té Pèlú ío ní cundiyí-dé sá dúcáⁿ nǐ cuu úní xito xicáⁿ tnúhú-gǎ núú-dē nǔu ndisa sá cúu iní ñáhá-dē xii-gá, te ní xáhaⁿ-dē:

—Mèstrú, yòhó nchaa sa xiní-n, te sa cùtnuní iní-n sǎ cúu iní ñáhà-í xii-n —càchí-dé xáhaⁿ-dē xii-gá.

Te ní xáhaⁿ Jèsús:

—Te núu ducaⁿ, te dacàxi-n cue mbéè-í.

¹⁸ Te na càchí tnúhu ndáá-í xii-n sǎ cùtnàhá cuechí-gá-n nǐ xóo ndécuihnu mee-n dóó-n, te ní xóo quíhíⁿ-n ndēni ní xóo cachí iní-n, dico na yì-n te dacàá-n ndàha-n, te ingá tée dacuihnu ñaha xii-n dóó-n te cada yica-dē candeca ñaha-dē xii-n quíhíⁿ ñⁿ núú ñà túú tnàhá iní-n —càchí-gá xáhaⁿ-gǎ xii-dé.

¹⁹ Te sá dúcáⁿ nǐ cáháⁿ Jèsús cúu-xí sǎ nǐ dátécú tnúhu ñaha-gǎ xii té Pèlú nàcuáa cada-xi cuú-dé, te ducaⁿ càda cahnu-dé Yá Ndiòxí, te ní xáhaⁿ-gǎ xii-dé:

—¿Canchicúⁿ ñáhá-n xii-í! —càchí-gá xáhaⁿ-gǎ xii-dé.

Téé ío cùu iní-gá

²⁰ Te ní nchócótó tē Pèlú ndàa sáta-dē, te ní xiní-dé sá nchicúⁿ ñáhá ingá téé xica cuu ndihí-gá cuáháⁿ, téé ío cùu iní-gá téé ní xínucóo diñi-gá òré ní cudini ndihí ñaha-gá xii-güedé, te ñu-ni téé-áⁿ nǐ xicáⁿ tnúhú-dē núú-gǎ dàvá-áⁿ nǔu ndēda càa téé cuáha cuendá ñáhá xii-gá núú cuè téé cùu úhú iní ñáhá. ²¹ Te òré ní xiní té Pèlú sá nchicúⁿ ñáhá tē-áⁿ, te ní xicáⁿ tnúhú-dē núú Jèsús, te xáhaⁿ-dē:

—Mèstrú, te téé-áⁿ, ¿ná cúu sǎ yàha-dé-i? —càchí-dé xáhaⁿ-dē xii-gá.

²² Te ní xáhaⁿ Jèsús:

—Te núu yúhú cuìní-í sá cùndècu-ni-dé ndéé ná quìxi tucu-í ñuyíú-a, ¿te yòhó ná cuèndá-n nũu xìcáⁿ tnúhú-n? Yòhó canchicúⁿ ñáhá-ní xì-í —càchí-gá xáhaⁿ-gã xii-dé.

²³ Te ní xinu tnúhu núú nchàa ñáyiú sàndáá iní tnúhu-gá sá tẽe-ãⁿ vã cùú-dé. Dico Jèsús ñá túú dùcaⁿ ní xáhaⁿ-gã sá vã cùú-dé, chi ní xáhaⁿ-gã: “Núu yúhú cuìní-í sá tẽe-ãⁿ cundecu-ni-dé ndéé ná quìxi tucu-í ñuyíú-a, ¿te yòhó ná cuèndá-n?”, duha ní xáhaⁿ-gã xii té Pèlú.

²⁴ Te ñiu-ni yúhú té Juáá tée ní sani iní-yu sá vã cùú càháⁿ ndáá-í nchaa nàcúáa ní cuu, te ducaⁿ ní tee-í núú tütú-a, te cùtnuní iní-ndó sã tnúhu ndáá cùú-xí.

²⁵ Te ndècu vai-gá núú sã ñí quide Jèsús. Te núu dícó ní ngũndee nchaandi túhú ñá, te vaa ni te ñihí ñuyíú te vá tnàhá núú-xi cundecu librú, te núu dícó ní ngũndee nchaa. Te ducaⁿ na cùnduu. Te ío chí cádá ndèe iní-ñã vitna.

NCHAA NÀCUÁA NÍ QUIDE CUE TÉE NÍ TAÚCHÍÚⁿ JÈSÚS DACUÀHA ÑAHA XII ÑÁYIU TNÚHU-GÁ

*Jèsús ní cachí tnúhu ndáa-gá sá quíxi
Espiritú Yă Ndiõxí cundecu ndihí ñáyiu*

¹ Te duha ní cáháⁿ té Lùcá ní xii-dé té Těofilú: Yúhú sa ní chídó tnùn-í núú librú ndéé díhna nchaa sá ní quide Jèsús, ndihí nchaa sá ní dácuahá-gă ñáyiu. Te ní chídó tnùn-í nchaa sá ní quide-gá ndéé nduu ní quesaha-gă quidé chiuⁿ-gá, ² ndihí nchaa sá ní quide-gá ndéé òré cuándaa-gá andiu. Te sa ta cùyatni nduu ndaa-gá andiu, te ní ndatnúhu-gá ndihí cue tée ní cáháⁿ-gá dacuàha ñaha xii ñáyiu tnúhu-gá, te mee Espiritú Yă Ndiõxí ní chindee ñàha-xi xii-gá ní xáhaⁿ-gă nàcuáa cada-güedé. ³ Te sáta ní xihí-gá te ní ndoto-gá, te ní xindecu-gá údico nduu. Te titní xito ní sáháⁿ-gá núú ní xindecu-güedé, te ducaⁿ ní quide-gá cuèndá quini-güedé sá ndáa ní ndoto-gá, te ní xáhaⁿ-gă nàcuáa quide Yá Ndiõxí ndihu ndaha-gă ñáyiu.

⁴ Te ñⁿ nduu ndècu ndihí ñaha-gá xii-güedé, te ní xáhaⁿ-gă:

—Vá quéé-ní-ndó ñúú Jerusàlén, chi cundetú-ndo quíxi Espiritú Yă Ndiõxí cundecu ndihí-ndo, chi sa ní cachí tnúhu-í sá dúcáⁿ ní cáháⁿ Tátá-ó Dütú Ndiõxí Yaá ndécú àndiu nacuáa cunduu. ⁵ Te ndáa sá ndí Juàá ní dácuaándute ñaha ndí xii-ndo, dico vitna ñá túu-gă cuéhé nduu, te quexio Espiritú Yă Ndiõxí cundecu ndihí-ndo —càchí-gá xáhaⁿ-gă xii-güedé.

Jèsús cuándaa-gá andiu

⁶ Te òré ní xindecu-güedé ndihí Jèsús, te ní xáhaⁿ-güedé xii-gá:

—Mèstrú, cuíní-ndí cachí tnúhu-n ñuu sa ta cùyatni nduu chindee-n ñáyiu ñuu Isràél cuèndá taxi tnùn-í tucú-yu ñuu-yu —càchí-güedé xáhaⁿ-güedé xii-gá.

⁷ Te ní xáhaⁿ Jèsús xii-güedé:

—Ñá túu xìni ñuhu-xi cunaha nchóhó xiáⁿ, chi Tátá-ó Dütú Ndiõxí náhá-gă ná

nduu càda-gá nchaa sá ní cáháⁿ-gá. ⁸ Te òré quexio Espiritú Yă Ndiõxí cundecu ndihí-ndo, te cuyí-ndo ní yuhu ní iní-ndó quíhíⁿ-ndó cáháⁿ-ndó tnúhu-í núú ñáyiu ñuu Jerusàlén ndihí núú ñáyiu distritú Júdeá ndihí núú ñáyiu distritú Sàmariá. Te ducaⁿ-ni cáháⁿ-ndó quíhíⁿ-ndó ní caxico ñuyíú —càchí-gá xáhaⁿ-gă xii-güedé.

⁹ Te sáta dúcáⁿ ní cáháⁿ-gá, te ndèhe-güedé ní ndanchita-gá cuándaa-gá andiu cuändihu-gá xití vícò, te ñá túu-gă ní xìní ñáhá-güedé xii-gá. ¹⁰ Te ndèhe vihi-güedé andiu núu ndéé quini ñáhá-güedé xii-gá yòtnúhu, te ní quexio cunu úú cue tée ñihnu dóó cuixíⁿ núu ndécú-güedé. ¹¹ Te xáhaⁿ-güedé:

—Nchòhó cue tée Galileá, ¿ná cuèndá ndéhé-ndó àndiu? Te dàtná-ni càa Jèsús cuándaa-gá andiu vitna, te ducaⁿ-ni cùnduu-gá quixi tucu-gá —càchí cue tée ñihnu dóó cuixíⁿ-áⁿ xáhaⁿ-güedé.

Cuèndá sá ñà túu-gă ndí Júdás ñuu ní nanducu-güedé té Màtiá ní nucúnutní-dé núú ndí

¹² Te ní ndee-güedé yucu Òlívú cuánuhú-güedé ñuu Jerusàlén, te ní xúhuⁿ-güedé cuèdicó cuádava òré ichi.

¹³ Te òré ní ndexio-güedé ñuu-áⁿ, te cuándaa-güedé cuártú ndéé núú ñnu, chi vehe yòdo tnaha ndecu-güedé. Te ní naníhí tnáhá-güedé nchaa-güedé té Pèlú, té Jàcobó, té Juàá, té Ndríxí, té Lìpé, té Mǎxí, té Bartolómé, té Mátèú, té Jàcobó déhe té Àlfèú, ndihí té Xímú tée ní cundihí cue tée canànistá, ndihí té Júdás ñani té Jàcobó. ¹⁴ Te ní naníhí tnáhá-güedé nchaa-güedé yàcáⁿ ndihí tá Màriá náná Jèsús, ndihí cue ñani-gá ndihí dava-gá cue ñáyiu díhí. Te ñⁿ-ni ní cuú-yu ní cáháⁿ ndihí-yu Yá Ndiõxí.

¹⁵ Te ñⁿ nduu ní xindecu dàtná ñⁿ cièndú ócò mee-ni ñáyiu sàndáa iní tnúhu Jèsús, te ní ngúnutní té Pèlú núu-yu, te ní xáhaⁿ-dè xií-yu:

¹⁶⁻¹⁷ —Nchòhó cue ñáyiu ndècu ndihí-í ichi Xítohó Jesucrístú, na càni-í cuèndú núu-ndó nàcuáa ní chídó tnùn-í ndí Dàvíí tée ní xindecu ndéé sanaha nàcuáa ní cáháⁿ Espiritú Yă Ndiõxí cuèndá té Júdás. Te dacuítí ducaⁿ ní cuu, chi tnàhá té Júdás

ní xíndecu ndihí-o, te ní xinu cuechi-o ndihí-dé núú-gǎ sá díhna, te ducaⁿ ní quide-dé ní sáha cuendá-dé Jèsús núú cue téé cùu úhú iní ñáhá xii-gá. ¹⁸ Te ní cháhu ñaha-güedě xii-dé cuendá sá ñí sáha cuendá ñáhá-dě xii-gá. Te ní sáháⁿ-dé ñí xichi ní sata caa-dé méé-dě, te ní ngava-dé, te ní cahndí duuⁿ xití-dé te xíaⁿ ñí xihí-dé. Te ní naqueheⁿ-güedé díhúⁿ sá ñí cháhu-güedé ndíi, te ní nacuaaⁿ-güedé ñuhu núú ñí ngava ndíi-án. ¹⁹ Te nchaa ñáyíu Jerusálén ní ñihí-yu tnúhu, te ní dánání-yu ñuhu-án Acèldamá. Te tnúhu meé-yu quèe-xi: Ñuhu núú ñí sati nííí. ²⁰ Te duha ní cáháⁿ ndíi Dàvíí ní chídó tnúní ndíi núú librú Sǎlmú ní dándóo ndíi: “Nà ndóo nahi vehe-dé, vá yóo ñí quíhíⁿ cundecu”, duha ní cáháⁿ ndíi. Te íngá tucu tnúhu ní cachí ndíi: “Na nànducu-güedé íngá téé nucúnutnǎí núú ndíi”, duha ní cáháⁿ ndíi Dàvíí —càchí té Pèlú xǎhaⁿ-dě xii-yu.

²¹⁻²² Te ní xáhaⁿ tùcu-dé:

—Te ducaⁿ ñí cáháⁿ ndíi Dàvíí, te vitna xini ñuhu-xi nanducu-o ñí téé nucúnutnǎí-dé núú ndíi Jüdás, te xini ñuhu-xi diu-ni ñí téé ní xica cuu ndihí Xítóhó Jesucristú cútnàhá ní xica cuu-o ndihí-gá, ñí téé ní xiní ndéé òré ní dácuándüte ñaha ndíi Juáa xii-gá, te ndéé òré cuándaa-gá andíu. Te téé nanducu-o cùndecu-dé cáháⁿ-dé nàcuáa ní cuu ní ndoto-gá —càchí té Pèlú xǎhaⁿ-dě xii-yu.

²³ Te ní cacunehe-güedé úu tnàhá-güedé nùu ndědacàa-güedé nduu táhú-güedé nucúnutnǎí-güedé núú ndíi. Te ñí-dé nání-dě Chéé Barsábás, àdi Justú chi úu diu-dé, te íngá-dé nání-dě Mátíá. ²⁴ Te ní cáháⁿ ndihí-güedé Yǎ Ndiǒxí, te xǎhaⁿ-güedé xii-gá:

—Yòhó Dútú Ndiǒxí xini-n iní nchaa ñáyíu, te mee-n nàha-n núu nděda càa núú úu cue téé-a tnàhá iní-n ²⁵ cáháⁿ-güedé tnúhu-n nùu ñáyíu, te téé-án nucúnutnǎí-dé núú ndíi Jüdás, chi cuáháⁿ ndíi núú úhú núú ndàhú núú tàú-xi quíhíⁿ ndíi —càchí-güedé xǎhaⁿ-güedě xii-gá.

²⁶ Te ní xito ndéé-güedé, te ní cutnúní sá téé nàni Matíá quendóo-dé ndihí úxí ñí cue téé ní táuchíúⁿ-gǎ dacuàha ñaha xii ñáyíu tnúhu-gá.

2

Ní quexìo Espíritú Yǎ Ndiǒxí cundecu ndihí ñáyíu

¹ Te ní sáa nduu còo vico Pentecostés te xíndecu nchaa ñáyíu ñí-ñí xìchi. ² Te ní tecú dóho-yu uuⁿni ní ñihí andíu, dàtná quidé ñí táchí ñihí vìhi ní quide-xi, te ducaⁿ ñí cuu ndéé xití vehe núú ndécü-yu nchaá-yu. ³ Te ní xiní-yu dàtná cáa itá ñuhú cáa sá ndécú xití vehe, te ní xité nuu-xi ní ngoyo ndodo-xi díquí-yu nchaá-yu. ⁴ Te ducaⁿ ñí quide-xi òré ní quexìo Espíritú Yǎ Ndiǒxí ní ngúndecu ndihí-yu nchaá-yu. Te ní ngúíta-yu ní cáháⁿ-yu tnúhu cue ñáyíu ñá túu cùu ñáyíu isràél, te nchaa xíaⁿ ní quide Espíritú Yǎ Ndiǒxí.

⁵ Te vǎi ñáyíu isràél xíndecu nchaa dava-gá ñuú ní tacá-yu ñuú Jerusálén, te ñáyíu-án ío ndùcu ndeé-yu dàcuahá-yu nchaa ndudú sá dácuàha tnahí-yu. ⁶ Te òré ní tecú dóho-yu ñihí, te ní sáháⁿ-yu ní xíndedóho-yu tnúhu càháⁿ méé-yu ñí ñí ñuú-yu, chi ndí dǎí ndí dǎí tnúhu càháⁿ ñáyíu ndècu-án. ⁷ Te xíaⁿ ío ní cuñúhu ñáyíu véxi dava-gá ñuú, te ní xitnàhá-yu:

—Ñáyíu ducaⁿ xicáháⁿ cúu-yu ñáyíu distritú Galileá. ⁸ ¿Te nása ní quidé-yu ní cutúha-yu nàcuáa càháⁿ-ó ñí ñí-o ndéé líhli-o? ⁹ Te iha véxi ñáyíu dava nàcióⁿ, chi véxi ñáyíu Pàrtiá, véxi ñáyíu Mèdiá, véxi ñáyíu Èlám, véxi ñáyíu Mesopòtamiá, véxi ñáyíu Jùdeá, véxi ñáyíu Capàdociá, véxi ñáyíu Pòntó, véxi ñáyíu Àsiá, ¹⁰ véxi ñáyíu Frìgiá, véxi ñáyíu Pànfilíá, véxi ñáyíu Ègiptú, véxi ñáyíu Áfricá ñáyíu ndècu ndéé núú-gǎ-xi ñuú Cìrené. Te tnàhá ñáyíu ñuú Rómá véxi, te ñáyíu-án chi ñá díú mèe-ni ñáyíu isràél cúu-yu nchaá-yu, dico ñí-ñí cùu sá dácuahá-yu. ¹¹ Te véxi ñáyíu Crétá, véxi ñáyíu Àrabiá. Te nchaa-o sa ndedóho-o càháⁿ-yu nàcuáa cuáháⁿ tnúhu mee-o ñí ñí-o. Te nchaa ñáyíu xicáháⁿ tnúhu-o càháⁿ-yu cuendá nchaa sá vǎ yóo tnàhí ndàcu cada ní quide Yǎ Ndiǒxí —càchí-yu xitnàhá-yu.

¹² Te ní cuñúhu vìhí-yu, te ñá ná sàa iní-yu nása ní cuu, te xitnàhá-yu:

—¿Nása ní cuu duha càháⁿ-yu tnúhu-o? —
càchí-yu xĩtnàhá-yu.

13 Te davá-yu ní sácú ndeé yíchí ñáhă-yu,
te xĩtnàhá-yu:

—Xĩxíni ñáyiu-áⁿ nõu ñá náhá-yu tnúhu
càháⁿ-yu —càchí-yu xĩtnàhá-yu.

Tnúhu ní xáhaⁿ tẽ Pèlú xii cue ñáyiu

14 Te ní ngúnutnĩi té Pèlú ndihĩ úxí ìⁿ cue
tée ní táúchíúⁿ Jèsús dacuàha ñaha xii ñáyiu
tnúhu-gá, te níhi ní cáháⁿ-dé, te xăhaⁿ-dẽ
xii-yu:

—Nchaa nchòhó ñáyiu distritú Jùdeá
ndihĩ nchòhó ñáyiu ñuú Jerusàlén, cund-
edóho váha-ndo tnúhu na càháⁿ-í-a. 15 Ñá
ndàá tnúhu càháⁿ-ndó, chi ñá túú xĩni-ndí te
ducaⁿ càháⁿ-ndó, chi davitna cùu-xi caá ìⁿ
dátneé, vátá tnàhá-gá òré coho ñáyiu ndidí.

16 Te yúhú ná càchí tnúhu-í xii-ndo vitna
nacuáa ní xáhaⁿ Yă Ndiõxí xii ndíi Jòél tée
ní xóo cáháⁿ tnúhu-gá ndeé sanaha nàcuáa
cada ñaha-gă xii ñáyiu, te ndíi-áⁿ ñĩ chídó
tnùnĩ ndíi nàcuáa ní cáháⁿ-gá. 17 Te duha ní
xáhaⁿ-gă xii ndíi:

Cùmání-gă sáa nduu nàa ñuyíú, te cuáñaha-ĩ
Espíritú-í cundecu ndihĩ nchaa ñáyiu
na quìndáa iní ñáhá xii-í.

Te cue déhe-yu cáháⁿ-yu tnúhu-í,
te cue tée cuechi dacòto núú ñáhá-xí
xii-güedé,

te ducaⁿ-ni cuè tée ni sàhnu cáháⁿ
saní-güedé,

te ñu-ni cuendá nchaa sá quidè-í ducaⁿ
dàcoto núú ñáhá-xí xii-güedé.

18 Te nchaa ñáyiu xĩnu cuechi núu-í
cáháⁿ-yu tnúhu-í, te cuáñaha-ĩ
Espíritú-í cundecu ndihĩ-yu.

19 Te ndeé andũ, yàcáⁿ vài sá cadà-í nàcuáa
cuñúhu vñhĩ-yu,

te núú ñuyíú-a cada-í ìⁿ sá vátá quini
tnàhĩ-gá-yu,

te ngoyo níñĩ te ngoyo ñuhú te quene vñhĩ
ñúhmá.

20 Te vá dáyehé-gá nchícanhii,
cuu nee ñuyíú te cuu ticuèhé núú yóo dàtná
ticuèhé níñĩ.

Te davá-áⁿ sáa nduu quixi Yaá cúú
Xĩtohó-yu,

te nduu-ãⁿ cuu-xi ìⁿ nduu càhnu vihi, chi
cada-gá nchaa sá ñá túú xĩní-yu, te
cuñúhu vñhĩ-yu.

21 Te òré xíaⁿ te nchaa ñáyiu càháⁿ ndihĩ
ñaha xii Yaá cúú Xĩtohó-yu-áⁿ naníhĩ
tàhú-yu.

Duha ní xáhaⁿ Yă Ndiõxí xii ndíi Jòél ní
chídó tnùnĩ ndíi.

22 Te nchòhó ñáyiu isràél, cundedóho
váha-ndo tnúhu na càháⁿ-í-a cuendá Jèsús
tée ñuú Nazàrét. Te Jèsús ní quide-gá chiúⁿ
Yă Ndiõxí, chi mee Yă Ndiõxí ní chindee
ñaha-gá ní quide Jèsús ná daha núú chiúⁿ,
núú xíaⁿ ní ndacu-gá ní quide-gá nchaa
sá vă yóo tnàhĩ ndàcu cada, te xíaⁿ ní
cuñúhu vñhĩ-ndo. Te sa nàha-ndo nacuáa
ní quide-gá cùtnàhá ní xica cuu-gá ñuyíú.

23 Te ndíi Jùdás ní taxi cuendá ñáhá ndíi
Jèsús xii nchòhó cue tée ní cuu úhú iní
ñáhá xii-gá, te ní ndúcú-ndó cuè tée úhú
iní-xi ní tñi ñaha-güedé xii-gá te ní sata caa
ñaha-güedé núú cùrúxí, te núú cùrúxí-áⁿ ñĩ
xihĩ-gá. Dico sa ní cutnùnĩ iní Yă Ndiõxí
sá dúcáⁿ càda-ndo Jesús, te mee Yă Ndiõxí
ní cachí-gá sá dúcáⁿ ndòho Jesús. 24 Te
ñu-ni mee Yă Ndiõxí ní dándótó-gă Jèsús,
chi sa ní cáháⁿ-gá sá òré cuú-gá te vá cùú
dúcáⁿ-gă. 25 Te ndíi Dàvií tée ní xĩndaha
ñaha xii cue ñaní tnàhá-ó ñĩ xĩndecu ndeé
sanaha ñĩ chídó tnùnĩ ndíi nàcuáa ní cáháⁿ
Jèsús, te duha ní cáháⁿ-gá:

Cùtnunĩ iní-í sá ncháa nduu ndecu ndihĩ-í
Yă Ndiõxí, te ío chindee ñaha-gá xii-í,
te ñá túú tnàhĩ sá yuhú-í.

26 Te ío ndàcáⁿ táhú-í núú Yă Ndiõxí chi
cùdí iní-í, chi sa nàha-í sá cùú-í dico
ndoto-í,

27 chi vá dáñá-gă quihĩⁿ dúcáⁿ àlmá-í núú
ndécú ñáyiu ní xihĩ,
te vá dáñá-gă téhyú yiqui cùñú-í chi cùu-í
Déhe-gá, te yúhú sa nàha-í sá cúú iní
ñáhá-gă xii-í.

28 Te sa ní cachí tnúhu-gá nàcuáa cada-í
cundecu-í ichi váha, te cuendá sá
ndécú ndihĩ ñaha-gá xii-í nõu ío cùdí
iní-í.

Duha ní cáháⁿ Jèsús, te ducaⁿ ñĩ chídó tnùnĩ
ndíi Dàvií.

29 Te nchòhó cue ñaní tnàhá-í, na càchí
tnúhu ndáa-í xii-ndo cuendá ndíi Dàvií tée
ní xĩndecu ndeé sanaha vñhĩ, chi ní xihĩ-dé,
te ní chindúxi ñaha-güedé, te nàha-o tnaví
núú ñĩ chindúxi ñaha-güedé. 30 Te ndíi Dàvií
ní xóo cáháⁿ ndíi tnúhu Yă Ndiõxí, te sa nàha
ndíi sá Yă Ndiõxí ní cáháⁿ ndáa cuiti-gá

sá díú-ní ìn tnaaha ndíi taxi tnùní-dé ñáyíu israél ndéé cuèé-gá dàtná ní xóo taxi tnùní méé ndíi cùtnàhá ní xíndecu ndíi, te téé taxi tnùní-án cúu Cristú chí cùu-gá ìn tnaaha ndíi.

³¹ Te sa ní cutnùní iní ndíi sá ndótó Cristú, núu xíán ní chídó tnùní ndíi sá vâ dáñá Yá Ndiöxí sá quíhíⁿ dúcáⁿ àlmá-gá cundecu-xi núu ndécú ñáyíu ní xíhí, te vâ dáñá-gă téhyú yiqui cùñú-gá.

³² Te ndáá chí Yá Ndiöxí ní dándótó-gă Jèsús, te nchúhú ní xiní-ndí sá ñí ndoto-gá.

³³ Te ní xáhaⁿ Yá Ndiöxí xii Jèsús sá cùndecu ndíhi ñaha-gá, te taxi tnùní Jèsús ní caa ní quíhíⁿ. Te Yá Ndiöxí ní sáñaha-gă Espíritú-gá ní ngúndecu ndíhi-gá nàcuáa ní xáhaⁿ-gă, te díu Jèsús ní quide-gá nchaa sá ñí xiní-ndó vitna ndíhi nchaa sá ñí xíndedóho-ndo. ³⁴ Te ndíi Dávíí ñá túú ní ndàa túu ndíi andíu ndíhi yiqui cùñú ndíi, te òré ndécú-gă ndíi ñuyíú-a ní cachí ndíi:

Dútú Ndiöxí ní xáhaⁿ-gă xii Yaa cúu Xítohó-í:

“Ngóo xio cùha-í,

³⁵ te yúhú cada-í te nchaa sá cúu ùhú iní ñáhá xii-n canehe-xi sá yíñúhu núu-n.”

Duha ní xáhaⁿ Dútú Ndiöxí xii Yaa cúu Xítohó-í cachí ndíi.

³⁶ Te nchòhó ñáyíu israél cùu-ndo ndí mee-í, te cùní-í cundedóho váha-ndo ìn tnúhu na càháⁿ-í-a. Jèsús ní sata caa-ndo-gă núu cùrúxí, dico Yá Ndiöxí ní cachí-gá sá Jèsús dacăcu nihnu-gá ñáyíu, te vâ cání ìn caní úú iní-ndó, chí díu-gá cùnùu-gá núu nchaa ñáyíu —cachí té Pèlú xáhaⁿ-dë xii-yu.

³⁷ Te ñáyíu ní xíndedóho tnúhu ní cáháⁿ té Pèlú ní ndixi túu iní-yu nàcuáa quidé-yu ndécú-yu, te ní xáháⁿ-yu xii-dé ndíhi dava-gá cue téé ní táuchíúⁿ Jèsús dacuàha ñaha xii-yu tnúhu-gá:

—Nchaa nchòhó cue ñaní tnáhá-ndí, ¿nása cachí-ndó cùnduu, nása cada-ndí vitna? —cachí-yu xáháⁿ-yu xii-güedé.

³⁸ Te ní xáhaⁿ tē Pèlú xii-yu:

—Daña-ndo nchaa sá cuèhé sá dúhá quide-ndo, te cada cahnú iní Yá Ndiöxí nchaa yíca cuèchi-ndo. Te cuandute-ndo cuendá quini-yu sá ñí natuha-ndo ìchi Jesús, te ducaⁿ te taxi Yá Ndiöxí Espíritú-gá cundecu ndíhi-ndo, ³⁹ chí cùní-gă taxi-gă

Espíritú-gá xii mee-ndo ndíhi déhe-ndo, te cuáñaha-gă Espíritú-gá xii nchaa ñáyíu ní càa xico ñuyíú, ñáyíu cáháⁿ-gá cundecu ìchi-gá ndéé ìdá-gá —cachí té Pèlú xáhaⁿ-dë xii-yu.

⁴⁰ Te titní-gá tnúhu ní xáhaⁿ-dë nàcuáa cada-yu, te xáhaⁿ tùcu-dé:

—Daña-ndo nchaa sá cuèhé sá dúhá quide-ndo, vâ cada-ndó sá quidé dâva-gá-yu —cachí-dé xáhaⁿ-dë.

⁴¹ Te nchaa ñáyíu ní sándáá iní-xi tnúhu ní cáháⁿ té Pèlú ní sanduté-yu, te díu-ní nduu-án ñí cuu dàtná úní míl ñáyíu ní sándáá iní-xi ní xíndecu ndíhi ñáyíu xídacuáhá tnúhu Yá Ndiöxí. ⁴² Te ío ní xíndedóho-yu tnúhu ní cáháⁿ cue téé ní táuchíúⁿ Jèsús dacuàha ñaha xii-yu tnúhu-gá, te ío váha ní xíndecú-yu ní xóo ndatnúhu váha-yu. Te ní xóo caxi cahnú-yu cuendá náhá-yu sá dúcáⁿ ñí quide Jèsús cùtnàhá vátá cáhni ñaha-gă-güedé xii-gá, te ní xóo cáháⁿ ndíhi-yu Yá Ndiöxí.

Nàcuáa ní quide nchaa ñáyíu ní sándáá iní tnúhu Jèsús ndéé díhna nuu

⁴³ Te nchaá-yu ní cùñúhu vîhí-yu, chí cue téé ní táuchíúⁿ-gă dacuàha ñaha xii-yu tnúhu-gá ní quide-güedé titní núu sã vâ yóo tnàhí ndàcu cada, te xíán ní cutnùní iní-yu sá méé Yá Ndiöxí chíndèe ñaha-gá xii-güedé.

⁴⁴ Te nchaa ñáyíu sándáá iní tnúhu Jèsús càháⁿ ndíhi tnàha váha-yu, te cuèi-ni nchaa ndachíuⁿ nandíhi-yu ndècu cahnú. ⁴⁵ Te ní dícõ-yu nchaa ndachíuⁿ sá ñà túú xini ñuhú-yu, te ní níhí-yu díhúⁿ te ní sáñahá-yu xii nchaa ñáyíu ñá ñihí. ⁴⁶ Te ìn nduu ìn nduu ní xóo quíhíⁿ ndíhi tnàhá-yu veñúhu cahnú sá ío cùnuu. Te ní xexi ndíhi tnàhá-yu vehé-yu. Te ío ní cudíí iní-yu chí ìn-ní ní cuú-yu nchaá-yu. ⁴⁷ Te ío ní ndacáⁿ táhú-yu núu Yá Ndiöxí, te nchaa dava-gá ñáyíu ní cáháⁿ váha-yu cuendá ñáyíu-án. Te mee Yá Ndiöxí ní quide-gá ní sándáá iní vâi-gá ñáyíu, te ní xíndecú-yu ndíhi dava-gá ñáyíu xídacuáhá tnúhu-gá.

3

Quide tátna-güedé ìn téé yacua

¹ Te ìn nduu òré caá úní sacuaa, òré xícáháⁿ-yu ndíhi Yá Ndiöxí cuáháⁿ té Pèlú

ndihi té Juàá veñúhu càhnu sá ìo cùnunu sácúú-xí ñáyiú isràél. ² Te ndècu ìn tée yacua, te ducaⁿ-ni càa-dé ní cacu-dé. Te sàháⁿ ndihi ñàhá-yu veñúhu càhnu sá ìo cùnunu, te sàcòo-dé ìn xio yuyèhe veñúhu sá nání Yèhe Vii Caa, chi ducaⁿ nàni-xi, te xìcáⁿ ndàhú-dé núú nchàa ñáyiú sàháⁿ veñúhu. ³ Te ní xiní-dé té Pèlú ndihi té Juàá cuànguihu-güedé veñúhu, te xìcáⁿ ndàhú-dé núú-güedé. ⁴ Te ní ndacoto-güedé núú-dé, te ní xáhaⁿ tē Pèlú xii tée yacua-ãⁿ:

—Cundehe ñàha xii-ndí —càchí té Pèlú xáhaⁿ-dē xii-dé.

⁵ Te ní xíndéhé ñàha-dé xii-güedé, chi ní cáháⁿ-dē sá ìo ìn sá cuañaha-güedé. ⁶ Te ní xáhaⁿ tē Pèlú:

—Ñá túú tnàhí díhúⁿ néhè-í dico chindee ñàha-í xii-n, te Xítohó Jesucristú Yaá ní xíndecu ñuú Nazàrét, ndacu-gá cada tátna ñaha-gã xii-n, ndacuíñí te caca-n —càchí-dé xáhaⁿ-dē.

⁷ Te té Pèlú ní tñi-dé ndaha cùha tée yacua-ãⁿ, te ní ngüíta-dé ndácàni ñaha-dé, te òré xíaⁿ ñi naníhí ndéé-dē, te ní ndúha sáhá-dē. ⁸ Te ní ndacuíñí cunu mee-dē te ní xica-dé, te ní cachí-dé sá ìo càhnu cuu Yá Ndiöxí cuendá sá ñi ndúha-dé, te ta sàndava-dé cuànguihu ndihi ñaha-güedé veñúhu. ⁹ Te nchaa ñáyiú xíndecu-áⁿ ñi xiní-yu sá ñi nduu váha-dé, te ndèhé-yu ndàcáⁿ táhú-dē núú Yá Ndiöxí. ¹⁰ Te ní naquiní ñàhá-yu xii-dé sá díú tēe xìcáⁿ ndàhú tēe ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vñí-yu sá ñi ndúha-dé.

Té Pèlú ní cáháⁿ-dé corrèdór sá néhé òu ndí Salòmón

¹¹ Te sáta veñúhu càa corrèdór sá néhé òu ndí Salòmón. Yàcáⁿ ndécú tē Pèlú ndihi té Juàá ndihi tēe ní ndúha sáhá-xi, te ñá cuini tēe ní ndúha sáhá-xi-áⁿ dañá-dē quíhíⁿ-güedé dandóo ñaha-güedé xii-dé. Te chítú-yu ní quexìo coyó-yu núú ndécú-güedé, te ní cuñúhu vñí-yu sá ñi ndúha sáhá tēe cùhú-áⁿ. ¹² Te té Pèlú ní xiní-dé ní quexìo coyó-yu, te ní xáhaⁿ-dē xii-yu:

—Nchòhó ñáyiú isràél, ¿ná cuendá ndéé dúcáⁿ ndèhe ñaha-ndo xii-ndí te cuñúhu-ndo sá ñi ndúha tēe yacua-áiⁿ? Nchòhó cáháⁿ-ndó sá méé-ndí ní quide

tátna-ndí-dé sá ìo váha iní-ndí, dico ñàhá chi ñá díú mèe-ndí ní quide tátna-ndí-dé. ¹³ Chi Yá Ndiöxí ní ndadúha ñaha-gã xii-dé, chi òu-gá cúú Ndiöxí ndí Abrahám ndihi ndí Isàac ndihi ndí Jàcób, te òu-ni cue tēe-áⁿ cúú ñàni tnàhá-ó ñi xíndecu ndéé sanaha vñi. Te òu-ni Ndiöxí-áⁿ ñi xáhaⁿ-gã xii Déhe-gá Jèsús sá táxi tñini-gá nchaa sá ìo andíu ndihi nchaa ñáyiú ndècu ñuyú-a, dico mee-ndo ñi sáha cuendá-ndó Jèsús núú tēe cùchiuⁿ. Te té Pilatú ní cuini-dé dacacu-dé Jèsús ní cùu, te mee-ndo ñi ñi cuini-ndó. ¹⁴ Te Yá Ndiöxí ní cachí-gá sá ìo váha iní Jèsús te ñá túú tnàhí cuéchi-gá. Te mee-ndo ña túú ní cuini-ndó cacu-gá ñuú ní xáhaⁿ-ndo xii té Pilatú sá váha-gá dacacu-dé ìn tēe ndècu vñi cuéchi-xi, te vá dacacu-dé Jèsús. ¹⁵ Te ní xáhaⁿ-ndo sá cáhni-güedé Jèsús Yaá quidé nchìto-o ndecu-o, dico Yá Ndiöxí ní dándótó ñaha-gá, te ní xiní-ndí sá ndáa ní ndoto-gá. ¹⁶ Te nchúhú sa ñaha-ndí sá díú Xítohó Jesucristú ní ndadúha-gá tēe yacua, te ná-dé nútñi-a. Te ducaⁿ ñi quide-gá chi ní sándáa iní ñàhá-dē xii-gá, te vitna ní xiní-ndó sá ndáa ní ndúha-dé.

¹⁷ Te nchòhó ndihi cue tēe cùnunu ní sahani-ndo Xítohó Jesucristú, chi ñá ní cùnuni iní-ndó sá ñi quide-ndo. ¹⁸ Te cue tēe ní xóo cáháⁿ tnúhu Yá Ndiöxí ndéé sanaha ñi chídó tñini-güedé nàcuáa ní xáhaⁿ Yá Ndiöxí xii-güedé sá Crístú quixi-gá ñuyú-a, te ndoho vñi-gá, te xíaⁿ ñuú ducaⁿ ñi cuu ìo ní ndoho-gá. ¹⁹ Te vitna te dañá-ndo nchàa sá cuéhe sá dúhá quide-ndo. Te quindáa iní-ndó Yá Ndiöxí, te ducaⁿ te cada càhnu iní-gá nchaa sá ña túú váha ní quide-ndo ñuyú-a, te canu ichi ñaha-gã xii-ndo ìn ichi váha. ²⁰ Te ní tendaha-gã Crístú ní quixi-gá ñuyú-a, chi mee Yá Ndiöxí ní cachí-gá sá díú Crístú taunihnu ñaha-gã xii-ndo. ²¹ Te dacuití cùndecu-gá andíu ndéé ná sáa nduu nàtaxi ndecu-gá nchaa sá ndécú ñuyú nàcuáa sàni iní méé-gã. Te òu ducaⁿ ñi cáháⁿ Yá Ndiöxí ñuú ducaⁿ ñi chídó tñini cue tēe ní xóo cáháⁿ tnúhu-gá ndéé sanaha. ²² Te ndí Moisés ní xáhaⁿ ndí xii cue ñàni tnàhá-ó ñi xíndecu ndéé sanaha: “Yá Ndiöxí tendaha-gã ìn tēe quixi-dé cáháⁿ-dē tnúhu-gá dàtná cuini-ndó ñi quide ñaha-gã

xii yúhú, te téé-áⁿ cuu-dé ìⁿ ñaní tnáhá-ndó. Te cundedóho váha-ndo nchàa tnúhu cáháⁿ-dé. ²³ Te nchaa ñáyiú vá quíndáá iní tnúhu cáháⁿ-dé, te cuíta nihnú-yu chi vá quíhíⁿ-yu núú quíhíⁿ ñáyiú sàndáá iní tnúhu Yá Ndióxi”, duha ní xáhaⁿ ndíi Moisés xií-yu —càchí té Pèlú xáhaⁿ-dē xií-yu.

²⁴ Te ní xáhaⁿ tùcu té Pèlú xií-yu:

—Ndíi Sàmúel ndíi nchaa cue téé nchìcúⁿ-gá ní xóo cáháⁿ tnúhu Yá Ndióxi ndéé sanaha ñí cáháⁿ-güedé nàcuáa cada-xi vitna. ²⁵ Te Yá Ndióxi ní cáháⁿ-gá ndíi cue téé ní cáháⁿ tnúhu-gá ndéé sanaha. Te ní quide ndáá-gá ndíi nchaa ñaní tnáhá-ó ñí xíndecu ndéé sanaha nàcuáa cada-gá naníhí tàhú-ó. Te duha ní xáhaⁿ-gá xii ndíi Àbrahám: “Ío nduu cacu ìⁿ tnàha-n, te téé-áⁿ cada-dé te naníhí tàhú ñáyiú ñuyíú-a”, duha ní xáhaⁿ-gá xii ndíi Àbrahám. ²⁶ Núu xiáⁿ ní tendaha-gá Déhe-gá ní quixi-gá núú ndécú-ndó cuèndá dañ-ndo nchaa sá cuèhé sá dúhá quide-ndo, te naníhí tàhú-ndó —càchí té Pèlú xáhaⁿ-dē xií-yu.

4

Té Pèlú ndíi té Juàá ndécú-güedé ndaha téé cùchiuⁿ

¹ Te té Pèlú ndíi té Juàá càháⁿ dúcáⁿ-ni-güedé ndíi ñáyiú, ní quexìo cue dútú ndíi téé tàxi tnuní ñáhá xii cue téé quide cuèndá veñúhu càhnu sá ío cùnuu, ndíi cue téé cùu saducéú. ² Te ní cudééⁿ-güedé nchaa-güedé núú tē Pèlú ndíi té Juàá sá xáhaⁿ-güedé xii ñáyiú sá ndótó ñáyiú ní xíhí dàtná ní ndoto Jèsús. ³ Te ní tní ñaha-güedé ní chihi ñaha-güedé vecaá xii-güedé, te ñá ní quide ndáá téé cùchiuⁿ cuèchi-güedé nduu-áⁿ chi sa ní cuaa. ⁴ Te ío vài ñáyiú ní sàndáá iní-yu tnúhu ní cáháⁿ-güedé, te ñáyiú-áⁿ ndíi ñáyiú sa ní sàndáá iní-xi ndéé cãni-gá ní xínu dàtná úhúⁿ mìl mee-ni cuè téé, te dèⁿ ñáyiú dèⁿ ndíi landú.

⁵ Te nduu tnéé-áⁿ dèu-ni ñuú Jerusálén-áⁿ ñí tacá cue téé yíndaha veñúhu, ndíi cue téé cùu sacuéhé núú ñáyiú isràél ndíi cue téé dàcuaha ñaha xií-yu nchaa tnúhu ní chídó tnuní ndíi Moisés. ⁶ Te tnáhá dútú cùnùu-gá téé nàni Anás ndécú ndíi té Caifás, ndíi té Juàá, ndíi té Lijandrú

ndíi dava-gá ñaní tnáhá dútú cùnùu-gá-áⁿ ndécú. ⁷ Te ní xáhaⁿ-güedé xii cue téé xínu cuechi núú-güedé:

—Chí cuàháⁿ queñuhu-ndo tē Pèlú ndíi té Juàá vecaá, te na quixi-güedé iha —càchí-güedé xáhaⁿ-güedé.

Te ní quexìo té Pèlú ndíi té Juàá núú cuè téé cùnuu, te cue téé cùnuu-áⁿ ñí xícáⁿ tnúhú-güedé núú-güedé, te xáhaⁿ-güedé:

—¿Nása ní quide-ndo cuèndá téé yacua-áⁿ? ¿Yoo ní táuchíúⁿ dùcaⁿ cada-ndo? —cachí-güedé xáhaⁿ-güedé.

⁸ Te ndècu ndíi té Pèlú Espiritú Yá Ndióxi, núu xiáⁿ ní xáhaⁿ-dē xii-güedé:

—Nchòhó cue téé cùchiuⁿ ndíi nchòhó cue téé cùu sacuéhé núú ñáyiú isràél, ⁹ te núu cuèní-ndó quíni-ndó nása ní quide-ndí ní ndúha téé yacua-áⁿ, ¹⁰ te cundedóho-ndo ìⁿ tnúhu na càháⁿ-í-a. Xíni ñuhu-xi cund-edóho nchaa ñáyiú isràél cuèndá quíni-yu nàcuáa ní cuu ní ndúha téé-áⁿ. Xítohó Jesucristú Yaá ní xíndecu ñuú Nazàrét ní quide tátna-gá sáhá tē yacua ní ndúha, te dèu-ni-gá ní sata caa-ndo núú cùrúxí te núú cùrúxí-áⁿ ñí xíhí-gá, te ní dándótó ñaha Yá Ndióxi xii-gá. ¹¹ Te núú tütú Yá Ndióxi càchí-xi: “Cristú cúu-gá dàtná ìⁿ yúú ndécú xíquí ìⁿ vehe. Te yúú càchí-yu sá ñà túú nàndíi, te dèu xiáⁿ ní nàndíi-xi ní ngúnutnè-xi xíquí véhé”, duha càchí-xi núú tütú-gá. Te ducaⁿ sãtnahá-xi cùu Jesús, chí càchí-ndó sã ñà túú nàndíi-gá, ¹² dico Yá Ndióxi ñá túú ndéé ní tàxi ndecu-gá ingá téé dàcácu nihnu ñaha xii-o núú ùhú núú ndàhú, chí ìⁿ dèi díi-ni Déhe-gá Xítohó Jesucristú dacácu nihnu ñaha-gá xii-o —càchí té Pèlú xáhaⁿ-dē xii-güedé.

¹³ Te té Pèlú ndíi té Juàá ñá túú tūha-güedé, te cùñúhu cue téé cùchiuⁿ sá ío ñí xíndáa-güedé. Te ní cutnùní iní cue téé cùchiuⁿ-áⁿ sã Jèsús ní xica cuu ndíi-güedé, núu xiáⁿ ñá túú tnàhí yùhú-güedé càháⁿ-güedé. ¹⁴ Te cuèndá ndécú ndíi té Pèlú ndíi té Juàá téé ní ndúha sáhá-xi, núu xiáⁿ ñá ní ñíhí cue téé cùchiuⁿ tnúhu cáháⁿ-güedé. ¹⁵ Te ní xáhaⁿ-güedé xii té Pèlú ndíi té Juàá sá quée-güedé quehé cuèndá ndóo mee-güedé ndatnúhu-güedé. ¹⁶ Te ní xítñaha-güedé:

—¿Nása cada-o ùú cue téé-ǎⁿ?, chi nchaa ñáyiú ñuú Jerusàlén nǎhǎ-yu sá ñi quide tátna-güedé ñⁿ téé yacua, te xǎⁿ xǐcuñúhu vìhi ñáyiú. Te vá cúú cǎchí-ó sǎ ñǎ ndáá, chi vìi ñáyiú ní xiní nàcuáa ní cuu. ¹⁷ Te dayùhú-ó-güedé te cúñaha-o sǎ vǎ cǎháⁿ-gá-güedé tnúhu Jèsús, chi núu ñáhá te quindáá-gá iní-yu —cǎchí-güedé xǐtnàha-güedé.

¹⁸ Te ní cana tucu-güedé té Pèlú ndìhi té Juáá, te xǎhaⁿ-güedé sá vǎ dǎcuàha-gá-güedé ñáyiú tnúhu Jèsús. ¹⁹ Te té Pèlú ndìhi té Juáá ní xǎhaⁿ-güedé:

—Chí cuǎha cuèndá, te núu sá cǎchí nchòhó cada-ndí àdi sá cǎháⁿ Yǎ Ndiòxí cada-ndí. Te cada cǎhnu iní-ndó chi vá cúú cǎda-ndí sá cǎchí-ndó, chi cada nahi-ni-ndí sá cǎchí Yǎ Ndiòxí. ²⁰ Chi dacuití cǎháⁿ-ndí nàcuáa ní cǎháⁿ Jèsús, te cǎháⁿ-ndí nchaa sá ñi xiní-ndí ní quide-gá —cǎchí-güedé xǎhaⁿ-güedé.

²¹ Te cue téé cùchiuⁿ níhi-gá ní cǎháⁿ-güedé xǎhaⁿ-güedé sá cǎdá cǎstiú ñáhá-güedé núu vá dǎñá-güedé sá dǎcuàha-güedé ñáyiú. Te ducaⁿ te ní dǎñá ñàha-güedé cuánuhú-güedé, chi ñá ní níhi-güedé nása cada-güedé cada castiú ñáhá-güedé, chi nchaá-yu ndàcáⁿ táhǔ-yu núu Yǎ Ndiòxí sá ñi ndúha téé yacua. ²² Te téé ní quide tátna-güedé-áⁿ ndécú-dé vìhi-gá údico cuíá-dé, te ío ní cuñúhu-yu sá ñi ndúha-dé.

Ñáyiú sándáá iní tnúhu Jèsús xicáⁿ táhǔ-yu núu-gǎ sá vǎ yùhú-yu cǎháⁿ-yu tnúhu-gá

²³ Te ní ndee té Pèlú ndìhi té Juáá cuánuhú-güedé núu ndécú cuè téé cùndìhi-güedé, te ní nacani tnúhu-güedé nàcuáa ní xǎhaⁿ cuè dútú cùnùu ndìhi cue téé cùu sacuéhé núu ñáyiú isràél. ²⁴ Te sátá ñi xíndedóho-yu tnúhu ní cǎháⁿ-güedé, te ñⁿ-ni tnúhu ní cǎháⁿ-yu nchaá-yu ndìhi Yǎ Ndiòxí, te ní xǎhǎⁿ-yu xii-gá:

—Yòhó Dútú Ndiòxí, ní cadúha-n àndiú, ní cadúha-n ñuyú, ní cadúha-n làmár, ní cadúha-n nchàandi túhú sá ío ñuyú. ²⁵ Te ndí Dàvíí ní sándáá iní ndí tnúhu ní cǎháⁿ-n, te ní chídó tnùní ndí nàcuáa ní xǎhaⁿ-n cǎháⁿ ndí, te ñi-ndí Espiritú-n ñi chindee ñàha-xi xii ndí ní chídó tnùní ndí, te duha ní chídó tnùní ndí:

Ñáyiú ñá túú cùu ñáyiú isràél ío cùdèéⁿ-yu núu Yǎ Ndiòxí,

te cuíní-yu nàá-yu ndìhi-gá, dico vá ndácù-yu chi mee-gǎ cùnùu-gá.

²⁶ Te cue téé yìndaha nacióⁿ ndìhi cue téé cùchiuⁿ tacá-güedé nàá-güedé ndìhi Dútú Ndiòxí ndìhi Crístú Yáá ní quixi ñuyú-a.

Duha ní chídó tnùní ndí Dàvíí nàcuáa ndùu tnúhu ní cǎháⁿ-n —cǎchí-yu xǎhǎⁿ-yu xii Yǎ Ndiòxí.

²⁷ Te xǎhaⁿ tùcú-yu xii-gá:

—Ndáá ní cǎháⁿ ndí Dàvíí chi ñi-ndí ñuú iha ní tacá té Hèrodés ndìhi té Pònciú Pilatú ndìhi ñáyiú ñá túú cùu ñáyiú isràél ndìhi ñáyiú isràél ní cǎháⁿ cuèhé-yu cuèndá Jèsús. Te Yòhó Dútú Ndiòxí, Déhe-n cùu Jesús núu ío váha iní-gá, te ní sáha chiúⁿ-n-gá, te ío úhú ní cuu iní ñáhá ñáyiú xii-gá. ²⁸ Te ní quidé-yu nàcuáa ní sani iní-n cǎdá-yu ndéé sanaha, ndéé cùtnàhá ní ngáva ñuyú. ²⁹ Te Yòhó Dútú Ndiòxí sa nàha-n nása cǎháⁿ cue téé cuíní cada úhú ñáhá xii-ndí. Te quide-ndí chiúⁿ tahu-n, te vitna chindee ñàha-n xii-ndí cuèndá sá vǎ yùhú-ndí cǎháⁿ-ndí tnúhu-n. ³⁰ Te cada tátna-n ñáyiú cùhú, te chindee ñàha-n xii-ndí, te cada-ndí nchaa sá vǎ yò tnàhí ndàcu cada nacuéhé cuñúhu vìhi-yu. Te xiní-ndí sá méé Jèsús chindee ñàha-gá xii-ndí, chi quide-gá chiúⁿ tahu-n —cǎchí-yu xǎhǎⁿ-yu xii Yǎ Ndiòxí.

³¹ Te sátá ñi yáha ní cǎháⁿ-yu ndìhi Yǎ Ndiòxí, te ní quidi-xi vehe núu xíndecú-yu, te òré-áⁿ ñi cutáhú tucú-yu nchaá-yu Espiritú-gá. Te ní cǎháⁿ-yu tnúhu Yǎ Ndiòxí, te ñá túú tnàhí ní yùhú-yu.

Cuèndá nchaa ndachìuⁿ cǎnehe chiúⁿ-yu

³² Te nchaa ñáyiú ní sándáá iní tnúhu Yǎ Ndiòxí ñⁿ-ni tnúhu ní cǎháⁿ-yu nchaá-yu. ñⁿ-ni tnúhu ní sani iní-yu, te ní xóo chindee tnàhá-yu chi ní xóo cuáha táhú tnàhǎ-yu nchaa sá xiní ñùhú-yu, te ní ñⁿ-yu ñá túú ní cǎháⁿ-yu sá ndàchiúⁿ-yu ñⁿ-ni-yu cùu nchaa sá ndécú ndìhi-yu. ³³ Te cue téé ní táuchíuⁿ Jèsús dacuàha ñàha xií-yu tnúhu-gá ío váha ní cǎháⁿ-güedé nàcuáa ní cuu ní ndoho Xítóhó Jesucristú. Te ío ní chindee ñàha Yǎ Ndiòxí ní cǎháⁿ-yu tnúhu-gá, te

ñá túú ní cǎháⁿ cuèhé dava-gá-yu cuèndá ñáiyu dàcuaha tnúhu-gá. ³⁴ Te ñá túú tnàhí ní cùndahú-yu díhúⁿ, chi nchaa ñáiyu ndècu ndihí ñuhu-xi, ndihí nchaa ñáiyu cǎa vehe-xi ní nadìcò-yu, te da ìⁿ da ìⁿ ndachìúⁿ-yu ní nadìcò-yu òré xíní ñùhú-yu díhúⁿ. ³⁵ Te ní sǎñàhá-yu xii cue téé ní táuchíúⁿ Jèsús dacuàha ñaha xií-yu tnúhu-gá, te cue téé-áⁿ ñí dǎcǎhñu-güedé nchaa ñáiyu xìni ñuhu. ³⁶ Te distritú Chìpré ndécú ìⁿ téé nàni-dé Chèè ñani tnáhá ndíi Lèví, te ní xóo cunu cuechi-dě veñúhu ñáiyu isràél. Te cuèndá sǎ sǎñaha-dě tnúhu ndee ìní xií-yu, xǎⁿ nùu ní dánání ñàha-güedé Vèè xii-dé. ³⁷ Te téé-áⁿ ñí nadico-dě luha ñuhu-dé, te nèhe-dé díhúⁿ cuáháⁿ núú cue téé ní táuchíúⁿ-gǎ dacuàha ñaha xií-yu tnúhu-gá.

5

Té Ananiás ndihí tá Sàfirá ñá túú ní quide ndáá-yu

¹ Te ndècu ìⁿ téé nàni Ananiás, te ñadihí-dé nání-áⁿ Sàfirá, te ñáiyu-áⁿ ñí nadìcò-yu luha ñuhú-yu. ² Te ní taxúha-dé sacú díhúⁿ, te sacú-gá néhé-dě cuáháⁿ ní sǎñaha-dě xii cue téé ní táuchíúⁿ Jèsús dacuàha ñaha xii ñáiyu tnúhu-gá, te ní dándahú ñáhá-dě xii-güedé, chi ní xáhaⁿ-dě sǎ ñihí ní sǎñaha-dě, te nàha ñadihí-dé sǎ dúcáⁿ ñí quide-dé. ³ Te ní xáhaⁿ tǎ Pèlú xii-dé:

—Ananiás, ¿ná cuèndá ducaⁿ ñí quide-n ñí dáñá-n ñí quíhu sácúlná ìní-n? Te ní dácúandèhnde-n núú Espiritú Yǎ Ndiòxí, te ní taxúha-n sácú díhúⁿ ñí ñihí-n cuèndá ñuhu-n. ⁴ ¿Te ñuhu-áⁿ cuèndá sǎ ñùhú mèe-n, àdi díhúⁿ-ǎⁿ cuèndá sǎ díhúⁿ mèe-n cùu-xi, te cuu-ni cada-n nàcuáa cǎchí ìní-n cǎhaⁿ-n ñá? ¿Ná cuèndá ducaⁿ ñí quide-n? ¿Ná ní quide-xi ìní-n nùu ní dácúandèhnde-n núú Yǎ Ndiòxí? Chi ñá díú-ní mèe-ni ñáiyu ni dándahú-n —cǎchí té Pèlú xǎhaⁿ-dě xii-dé.

⁵ Te òré ní ndihí tnúhu ní xáhaⁿ tǎ Pèlú, te uuⁿni ní nduá-dé te ní xihí-ni-dé. Te nchaa ñáiyu ní ñihí tnúhu sǎ ñí xihí-dé, te ní yùhú víhí-yu. ⁶ Te ní quixi ìⁿ úú cue téé cuechi, te ní ndanehe ñaha-güedé ní sacáⁿ ñáhá-güedé núú yuu, te ní ducuⁿ nuu ñaha-güedé yuu-áⁿ, te ní

xido ñaha-güedé néhé ñàha-güedé cuáháⁿ chindúxi ñaha-güedé xii-dé.

⁷ Te ní cuu úú uní òré, te ní quexìo ñadihí téé ní xihí-áⁿ, te vátá quíní-gá-aⁿ sǎ ñí xihí yíi-aⁿ. ⁸ Te ní xáhaⁿ tǎ Pèlú xii-aⁿ:

—Cuíní-í cǎchí tnúhu ndáá-n. ¿Ndédau ní dícò-ndó ñùhu, ní dícò-ndó nàcuáa ní cǎchí yíi-n ǎⁿ? —cǎchí té Pèlú xǎhaⁿ-dě xii-aⁿ.

Te ní xáhaⁿ-aⁿ:

—Ndáá sǎ díú-ní dùcaⁿ —cǎchí-aⁿ xǎhaⁿ-aⁿ.

⁹ Te ní xáhaⁿ tǎ Pèlú:

—¿Ná cuèndá ducaⁿ ñí chitnàha tnúhu-ndo dùcaⁿ ní quide-ndo ñí cuíní-ndó dándahú-ndó Espiritú Yǎ Ndiòxí? Quíní-n, chi sa cuándixi cue téé ní sáháⁿ ní chindúxi yíi-n, te yòhó tnáhá-n cǎndeca ñaha tucu-güedé xii-n quíhíⁿ vitna —cǎchí-dé xǎhaⁿ-dě xii-aⁿ.

¹⁰ Te òré-áⁿ ñí nduá-aⁿ núú tǎ Pèlú, te ní xihí-ni-aⁿ. Te cuándihu cue téé cuechi-ǎⁿ xití vehe, te ní xini-güedé sǎ sǎ ñí xihí-aⁿ, núu ní xido ñaha tucu-güedé cuáháⁿ chindúxi-güedé-aⁿ dìñi yíi-aⁿ. ¹¹ Te ní yùhú víhí ñáiyu ní sándáá ìní tnúhu Yǎ Ndiòxí, ndihí dava-gá ñáiyu ní ñihí tnúhu nàcuáa ní cuu.

Ní quide-güedé titní núú sǎ vǎ yòo tnàhí ndàcu cada te ío ní cuñúhu ñáiyu

¹² Te cue téé ní táuchíúⁿ Jèsús dacuàha ñaha xií-yu tnúhu-gá titní víhí sǎ vǎ yòo tnàhí ndàcu cada ní quide-güedé, te ní cuñúhu víhí-yu. Te nchaa ñáiyu ní sándáá ìní-xi tnúhu Jèsús ní xóo tacá-yu corrèdór néhé dìu ndíi Salòmón. ¹³ Te nchaa ñáiyu ñá túú dàcuaha tnúhu-gá ñá ní cùyíi-yu chitnahá-yu ñáiyu ní sándáá ìní-xi tnúhu-gá, dico nchaá-yu ní cǎháⁿ váha-yu cuèndá ñáiyu ní sándáá ìní-xi tnúhu-gá. ¹⁴ Te vǎi téé, vǎi ñadihí ní sándáá ìní-yu tnúhu-gá. ¹⁵ Te cuèndá sǎ ñí ñihí-yu tnúhu sǎ quidé tǎtna cue téé ní xica cuu ndihí Jèsús, núu xǎⁿ ní queñuhú-yu nchaa ñáiyu cùhú ichi, te davá-yu ní quide túha-yu cǎmá te davá-yu ní quide túha-yu yuu, núu núú nchàa xǎⁿ tá sàcáⁿ-yu cue ñáiyu cùhú-áⁿ cuáháⁿ, te xǎⁿ cáa-yu ndètú-yu, chi ní sani ìní-yu sǎ òré yáha té Pèlú te cuèdicó cuándahú-dě yáha ndodo ñaha-xi xií-yu te ndúha-yu. ¹⁶ Te ní quixi ñáiyu ñuú yatni Jerusalén ndécá-yu

ñáyiú cùhú, ndihì ñáyiú yìhi ñaha espíritú cùndihì yucu ñávaha ní quixi, te nchaá-yu ní ndúha.

Ío ní quide úhú-güedé té Pèlú ndihì té Juàá

17-18 Te dútú cùnù-gá ndihì cue té cù saducéú cue té cùndihì-dé ní cudééⁿ-güedé sá ío chítú-yu dàcuaha tnúhu Jèsús, núu xíáⁿ ní tñi-güedé cue té ní táuchíúⁿ Jèsús dacuàha ñaha xii-yu tnúhu-gá ní chihì ñaha-güedé vecaá. 19 Te xití niú-áⁿ ní quexìo ìⁿ espíritú xínú cuèchi núú Yá Ndiöxí ní nacaáⁿ-xi yèhe vecaá ní quee-güedé, te ní xáhaⁿ-xi xii-güedé:

20 —Quíhíⁿ-ndó veñúhu càhnu sá ío cùnùu te cùñaha-ndo xii ñáyiú nàcuáa cadá-yu nanihí tàhú-yu —càchí espíritú-áⁿ xáhaⁿ-xi xii-güedé.

21 Te sá dúcáⁿ ní xáhaⁿ-xi núu sátá ní túndaá, te ní sáháⁿ-güedé veñúhu càhnu sá ío cùnùu sá cúu-xí ñáyiú isràél ní dácuáhá ñaha-güedé xii-yu.

Te dútú cùnù-gá ndihì cue té cùndihì-dé ní nadatàcá tnáhá-güedé ndihì nchaa cue té cùu sacuéhé núu ñáyiú isràél ndihì cue té cùchiuⁿ, te ní tendaha-güedé sandádú cuáháⁿ queñuhu-güedé cue té yìhi vecaá ní cùu. 22 Te ní quexìo-güedé yèhe vecaá, te ní xiní-güedé sá ní ìⁿ-gá cue té dàcuaha ñaha xii ñáyiú tnúhu Jèsús ñá túu-gä-güedé yíhí. Te cuánuhú-güedé 23 ní xítñùhu-güedé cue té cùchiuⁿ, te xáhaⁿ-güedé:

—Ní sáháⁿ-ndí ní sándéhé-ndí vecaá, te ndéé chóo-ni, te xíndecu-ni sandádú cue té xíndéé yèhe vecaá. Te ní nacaáⁿ-ndí vecaá, te vá yóo ìⁿ-gá yíhí —càchí-güedé xáhaⁿ-güedé.

24 Te sá dúcáⁿ ní xáhaⁿ-güedé, te cuáháⁿ iní cue dútú cùnùu ndihì téè tàxi tnuní cue téè xíndéé veñúhu càhnu sá ío cùnùu, te ní xítñàha-güedé:

—¿Nása cada-xi vitna duha càa ní cuu ní xinu cue téè yìhi vecaá-i? —càchí-güedé xítñàha-güedé.

25 Te ní quexìo ìⁿ téè ní xáhaⁿ-dè:

—Cundedóho-ndo na càchí tnúhu-í ìⁿ tnúhu. Cue téè ní chihì-ndo vecaá ndécú-güedé veñúhu càhnu sá ío cùnùu dacuaha-güedé ñáyiú —càchí-dé xáhaⁿ-dè.

26 Te cue téè ndéè veñúhu ndihì téè tàxi tnuní ñáhá xii-güedé cuánguaca ñaha-güedé, te ñá túu ní quide úhú ñáhá-güedé, chi ní yùhú-güedé cuáha yúu ñáhá ñáyiú dii ñùú-xi-áⁿ. 27 Te ní ndexìo ndihì ñaha-güedé núu cuè téè cùu sacuéhé ndihì núu cuè téè cùchiuⁿ. Te dútú cùnù-gá ní ngüita-dé ténàá ñáhá-dé xii-güedé, te xáhaⁿ-dè:

28 —Te náa ñá díú ní cachí-ndí sá vã dácuaaha-gá-ndó ñáyiú tnúhu Jèsús te dàcuaha-ni-ndó-yu, te vitna nchaa ñáyiú ñuú Jerusálén ní níhí-yu tnúhu nàcuáa càháⁿ-ndó. ¿Te ná cuèndá ducaⁿ quide-ndo, te càchí-ndó sã nchùhú ndécuéchi-ndí ní sahani-ndí Jèsús-i? —càchí dútú cùnù-gá xáhaⁿ-dè xii-güedé.

29 Te té Pèlú ndihì dava-gá cue téè ní táuchíúⁿ Jèsús dacuàha ñaha xii-yu ní xáhaⁿ-güedé xii cue téè cùchiuⁿ:

—Nchúhú, Yá Ndiöxí cùnù-gá sandáá iní-ndí tnúhu càháⁿ-gá dàcúxí tnúhu càháⁿ ñáyiú. 30 Te nchòhó ní sata caa-ndo Jèsús núu cùrúxí te núu cùrúxí-áⁿ ní xihí-gá, dico ní dándótó ñaha Yá Ndiöxí xii-gá. Te Yá Ndiöxí ní sandáá iní cue ñani tnáhá-ndí ní xíndecu ndéé sanaha. 31 Te Yá Ndiöxí ní xáhaⁿ-gá sá cùndecu Jesús xio cùha-gá cuèndá taxi tnuní-gá te dacácu nihnu-gá ñáyiú isràél núu ùhú núu ndàhú. Te ducaⁿ-ni dacácu nihnu-gá nchaa ñáyiú na dàña nchaa sá cuèhé sá dúhá, te cada càhnu iní-gá nchaa yíca cuèchi-yu. 32 Te ní xiní-ndí nàcuáa ní quide-gá, núu xíáⁿ caní-ndí cuèndú núu nchàa ñáyiú, te Espíritú Yá Ndiöxí chíndèe ñaha-xi xii-ndí càháⁿ-ndí tnúhu-gá. Te diu-ni Espíritú-gá ní sáñaha-gä xii nchaa ñáyiú ní sandáá iní-xi tnúhu-gá —càchí té Pèlú ndihì dava-gá-güedé xáhaⁿ-güedé xii cue téè cùchiuⁿ.

33 Te sátá dúcáⁿ ní xáhaⁿ-güedé xii cue téè cùchiuⁿ, te ní cudééⁿ-güedé, te ní ndatnúhu-güedé sá cáhni ñaha-güedé.

34 Te ìⁿ téè cùu fariséú tnàha-dé cúu-dé chiúⁿ, te nàni-dé Gamaliél, te cùu-dé mèstrú dácuaaha-dé ñáyiú nàcuáa ní chídó tnuní ndí Moisés, te ío yíñùhu caháⁿ ndihì ñàhá-yu xii-dé. Te ní ngúnutñi-dé, te ní xáhaⁿ-dè sá ná quèe tnaa té Pèlú ndihì dava-gá-güedé quehé. 35 Te ní xáhaⁿ-dè xii cue téè cùchiuⁿ:

—Nchòhó cue téé isràél, xini ñuhu-xi sá cání vâha iní-ndó nâsa cada-ndo ndihî cue téé-âⁿ. ³⁶ Chi ní cunaha ñí xíndecu ñíⁿ téé ní xínani Tèudás, te ní cachí-dé sá cúnù-dé, te ní cundihi-dé dàtná cúmí cièndú cue téé, te ñá ní cuení-güedé cuu ñíⁿ nuu-güedé ndihî cue téé cùchiuⁿ. Te ní sahani ñaha cuè téé cùchiuⁿ-áⁿ xii téé Tèudás, te ní ndihî cue téé ní xica cuu ndihî-dé ní xité nuu-güedé, te ñá túú-gã ní quide-güedé nâcuáa ní sani iní-güedé cada-güedé. ³⁷ Te sátá ñí xihí téé-áⁿ, te ní tnahá nduu núcódó tnùnî ñáyiu. Te dàvá-áⁿ ñí xíndecu ñíⁿ téé distritú Galileá ní xínani-dé Jùdás. Te titní-güedé ní chitnahá ñáhá-güedé xii-dé. Te tnahá-dé ní sahani ñaha tucu cue téé cùchiuⁿ, te nchaa cue téé ní xica cuu ndihî-dé ní xité nuu-güedé. ³⁸ Te na càchí tnúhu-í sá dáñá-ndó cuè téé-áⁿ, te ñí ñà túú nâgá tnúhu cúñaha-ndo xii-güedé, chi núu chiúⁿ mee-güedé quidé-güedé te cuíta-güedé, ³⁹ dico núu chiúⁿ Yá Ndiöxí quidé-güedé, te vá ndínihnu chiuⁿ quide-güedé. Te núu quide-güedé chiúⁿ Yá Ndiöxí, te vá nâá-ndó ndihî-güedé, chi Yá Ndiöxí nâá ndihî-ndo sã dúcáⁿ xíquide-ndo —càchí té Gamaliél xâhaⁿ-dè xii cue téé cùchiuⁿ.

⁴⁰ Te nchaa-güedé ní cáháⁿ sá tnúhu ndáá càháⁿ-dé. Te dàtnùnî ní nacana tucu-güedé té Pèlú ndihî dava-gá-güedé te ní caniha-güedé, te ní cáháⁿ níhi-güedé, te xâhaⁿ-güedé sá vâ càháⁿ-gá-güedé tnúhu Jèsús, te dàtnùnî ní dáñá ñaha-güedé cuánuhú-güedé. ⁴¹ Te ío ní cudíí iní-güedé, chi mee Yá Ndiöxí ní cachí-gá sá dúcáⁿ ndòho-güedé dacuàha-güedé ñáyiu tnúhu Jèsús. ⁴² Te ñíⁿ nduu ñíⁿ nduu ní dacuáhá-güedé ñáyiu xití veñúhu càhnu sá ío cùnuu ndihî nchaa vehé-yu. Te ní xâhaⁿ-güedé xii-yu sá Jèsús cúú-gã Crístú Yáa ní quixi ñuyíú-a.

6

Ní ndúcú-güedé úsá cue téé cundecu dacáhñu sá cáxí ñáyiu

¹ Te diu-ni dàvá-áⁿ ñí sándáá iní vai ñáyiu tnúhu Jèsús. Te cue ñáyiu griégú ní cáháⁿ cuèhé-yu cuèndá ñáyiu isràél, sá ñáyiu dîhî ñáyiu quèé ñáyiu càháⁿ tnúhu griégú ñá túú tnahá sá cáxí-yu, chi ñá túú sãñaha

ñíⁿ nuu-güedé. ² Te cue téé úxúú ní táuchíúⁿ Jèsús dacuàha ñaha xii-yu tnúhu-gá, cue téé-âⁿ ñí cana-güedé nchaa ñáyiu sándáá iní tnúhu Jèsús. Te ní xâhaⁿ-güedé xii-yu:

—Nchúhú chi vá cúú dàcáhñu-ndí sá cáxí-yu, chi mee-ni tnúhu Yá Ndiöxí càháⁿ-ndí. ³ Te nchòhó cue téé ndècu ndihî-ndí ichi Xítohó Jesucristú cáháⁿ ndihî-ndo úsá cue téé xíndecu iha, cue téé càháⁿ ndihî ñáhá-yu mee-ni tnúhu yíñùhu, cue téé ndècu ndihî Espiritú Yá Ndiöxí, mee-ni cuè téé cùtnunî vâha iní-xi. Te cue téé-áⁿ cuàha-ndí-güedé chiúⁿ cada-güedé dacáhñu-güedé sá cáxí-yu. ⁴ Te nchúhú mee-ni Yá Ndiöxí cáháⁿ ndihî-ndí, te mee-ni tnúhu-gá dacuàha-ndí-yu —càchí-güedé xâhaⁿ-güedé xii-yu.

⁵ Te ncháá-yu ní tñí-yu tnúhu ní cáháⁿ-güedé, núu ní ndúcú-yu cue téé cada chiúⁿ-áⁿ. Te ñíⁿ-dé nání-dé Tèvá, te ío vâha sándáá iní-dé Yá Ndiöxí, te ndècu ndihî-dé Espiritú-gá. Te duha ní xínani dàva-gá-güedé: té Lìpé, té Pröcoró, té Nicànor, té Tímón, té Pàrmenás, té Lãxí téé ñuú Antiòquia téé ní sándáá iní-xi sá dacuàha ñáyiu isràél te vitna ní sándáá iní-dé tnúhu Jèsús. ⁶ Te úsá cue téé-áⁿ ñí sáháⁿ-güedé núu cuè téé úxúú ní táuchíúⁿ Jèsús dacuàha ñaha xii-yu tnúhu-gá, te cue téé úxúú-áⁿ ñí cáháⁿ ndihî-güedé Yá Ndiöxí, te ní sacáⁿ ndodo-güedé ndaha-güedé díquí cuè téé úsá-áⁿ.

⁷ Te ñáyiu ní sándáá iní tnúhu Jèsús cuáháⁿ-yu titní xichi càháⁿ-yu tnúhu-gá. Te vai-gá ñáyiu ta sándáá iní-yu tnúhu-gá cuáháⁿ, te ní xíndecú-yu ndihî dava-gá ñáyiu dacuaha tnúhu-gá ñuú Jerusalén. Te titní dútú ñí sándáá iní-güedé tnúhu-gá.

Ní tñí-güedé té Tèvá

⁸ Te té Tèvá ní quide-dé titní núu sã vâ yòo tnahí ndàcu cada, te ní cuñúhu vîhî-yu sá dúcáⁿ ñí quide-dé, te ducaⁿ ñí quide-dé chi ndècu ndihî-dé Yá Ndiöxí chíndèe ñaha-gá.

⁹ Te ní xíndecu cue téé ní xóo cunu cuechi núu ñíⁿ téé tàxi tnunî, te téé tàxi tnunî-áⁿ ñá ní xóo dañá tnahí-dé quee-güedé núu chíúⁿ-dè, te ní xinu-ná-güedé. Te sátá xíãⁿ, te ní dácáá-güedé veñúhu-güedé, te veñúhu-áⁿ sáháⁿ ñáyiu ñuú Cirené, ñáyiu

ñuú Alejandriá, ñáyu ñuú Ciliciá, ndihi ñáyu distritú Asiá. Te nchaa ñáyu-án ní nàá ndihí-yu té Těvá. ¹⁰ Te ñá ní ñihí-yu tnúhu cáháⁿ-yu, chi ío váha ní sáá díquí-dě nàcuáa ní xáhaⁿ-dě xii-yu, chi Espiritú Yá Ndiöxí ní chindee ñàha-xi xii-dé. ¹¹ Te ní cháhu-yu cue téé ní dácuanđehnde tnúhu ní cáháⁿ té Těvá núu-yu. Te ní xáhaⁿ-güedě sá cãháⁿ cuèhé-dé cuendá ndii Moisés ndihi cuendá Yá Ndiöxí. ¹² Te cuendá sá dúcáⁿ ní dácuanđehnde-güedé núu ní sándáa iní-yu, te ní cudéⁿ-yu núú tě Těvá. Te ní cudéⁿ cue téé cùu sacuéhé, te tnáhá cue téé dácuaaha ñaha xii-yu nchaa tnúhu ní chídó tnùní ndii Moisés ní cudéⁿ-güedě. Te ní sáháⁿ-güedé ní tñi-güedé té Těvá ndécá ñàha-güedé cuáháⁿ núú quidé cuè téé cùchiuⁿ jundá, ndihi cue téé cùu sacuéhé. ¹³ Te ndécá-yu cue téé dácuanđehnde cuáháⁿ núú quidé-güedě jundá, te ní quesaha-ni tucu-güedé cãháⁿ cuèhé-güedé, te xãhaⁿ-güedě:

—Tée-a mee-ni cãháⁿ cuèhé-dé cuendá veñúhu sá ío cùnuu, veñúhu ní cuu íi, te cãháⁿ cuèhé-dé cuendá nchaa sá ní chídó tnùní ndii Moisés. ¹⁴ Te ní tecú dóho-ndí cãchí-dé sá Jèsús téé ñuú Nazàrét dangoyo-dé veñúhu càhnu sá ío cùnuu te vá dáña-gã-dé cada-ndí nàcuáa ní cachí ndii Moisés cada-ndí —cãchí-güedé xãhaⁿ-güedě.

¹⁵ Te nchaa cue téé ndècu jundá ní ndacoto váha-güedé núú tě Těvá. Te ní dáyèhé-xi núú-dě dàtná quidé-xi núú espíritú xínú cuèchi núú Yá Ndiöxí.

7

Té Těvá xãhaⁿ-dě sá ñà túu cuèchi-dé

¹ Te ní xáhaⁿ dütú cùnùu-gá xii-dé:

—¿Ndáá tnúhu cãháⁿ-güedé cuendá-n-ã?
—cãchí-dé xãhaⁿ-dě.

² Te té Těvá ní xáhaⁿ-dě xii-güedé:

—Nchòhó cue ñani tnáhà-í ndihi nchòhó cue téé cùu sacuéhé, cundedóho-ndo ñiⁿ tnúhu na cãháⁿ-í-a. Yá Ndiöxí ío cùnuu-gá, te ní cáháⁿ ndihi-gá ndii Àbrahám nacióⁿ Mesopotamiá cútnáhá vátá quihíⁿ-gá ndii cundecu ndii ñuú Hàrán. ³ Te ní xáhaⁿ-gã xii ndii: “Daña-n nchàa ñani tnáhà-n, te daña-n ñuhu-n, te quihíⁿ-n ñiⁿ xichi núú dánèhé ñàhà-í cundecu-n”, duha ní xáhaⁿ

Yá Ndiöxí xii ndii Àbrahám. ⁴ Te sáta dúcáⁿ ní xáhaⁿ Yá Ndiöxí xii ndii Àbrahám, te ní ndee ndii ñuú Cãdeá, te cuáháⁿ ndii cundecu ndii ñuú Hàrán. Te sáta ní xihí tãtã ndii, te ní xáhaⁿ Yá Ndiöxí quixi ndii cundecu ndii núu ndécú-ó vitna. ⁵ Te Yá Ndiöxí ñá túú ní sãñaha-gã ni lùha ñuhu cuu cuendá ndii núu ní xindecu ndii. Te ní xáhaⁿ ndáá Yá Ndiöxí xii ndii sá cuãñaha-gã ñuhu cuu cuendá ndii, te na cùu ndii, te ndóo ndihi nchaa ñani tnáhá ndii cacu túu ndéé cuéé-gá. Te ducaⁿ ní xáhaⁿ-gã cuèi vátá cündecu-gá ni ñiⁿ déhe ndii. ⁶ Te ní xáhaⁿ tucu Yá Ndiöxí xii ndii Àbrahám sá díú-ni ñani tnáhá ndii quihíⁿ-yu núú xicá cündecú-yu cúmi ciendú cuía, te vá dáña-yu queé-yu núú chíuⁿ-yu, te ío dandòho ñaha-güedé núú cündecú-yu. Duha ní xáhaⁿ Yá Ndiöxí xii ndii, te ndáá ducaⁿ ní cuu. ⁷ Te ní xáhaⁿ tucu Yá Ndiöxí xii ndii Àbrahám: “Yúhú dandòho-í nchaa ñáyu na dandòho ñaha xii cue ñani tnáhà-n. Te dàvá-án te ndee cue ñani tnáhà-n núú cündecú-yu, te quixi-yu chiñuhu ñàhá-yu xii-í iha”, duha ní xáhaⁿ Yá Ndiöxí xii ndii Àbrahám, te ndáá ducaⁿ ní cuu. ⁸ Te Yá Ndiöxí ní quide ndáá-gá ndihi ndii Àbrahám, te ní xáhaⁿ-gã xii ndii sá cuãha-güedé seña ñiⁿ nchaa landú téé cuendá cunáhá-yu nàcuáa ndùu sá ní quide ndáá-gá ndihi ndii Àbrahám. Núu xiãⁿ núú ùná nduu sá ní cacu té Isàac déhe ndii Àbrahám, te ní sãha ndii seña ñiⁿ-dé. Te diu-ni ducaⁿ ní quide tucu té Isàac déhe-dé té Jàcób, te diu-ni ducaⁿ ní quide té Jàcób, chi úxúú déhe-dé ní xindecu, te nchaa-güedé ducaⁿ ní quide-dé. Te ndi úxúú cue téé-án ní cuu-güedé ñani tnáhà-ó.

⁹ Te ñiⁿ déhe té Jàcób ní xínani-dě Chèé. Te ñá ní cùu váha iní cue ñani-dé núú-dě, núu ní díco ñàha-güedé ní queheⁿ ñaha cuè téé cuáháⁿ nacióⁿ Egiptú, te Yá Ndiöxí ñá ní dàña ñaha-gã xii-dé cuíta nihnu-dé. ¹⁰ Te ní chindee ñàha-gã xii-dé ní cacu-dé cútnáhá ní ndoho vihi-dé. Te téé yìndaha Egiptú ío ní cudíⁿ iní-dé té Chèé, te ní cutnùní iní-dé sá ío váha túha té Chèé, te ducaⁿ ní cutnùní iní-dé, chi Yá Ndiöxí ní chindee ñàha-gã xii té Chèé. Te ní xáhaⁿ tée yìndaha Egiptú xii té Chèé sá díú tě Chèé coo-dé gobiernú Egiptú, te taxi tnùní-dé nchaa ñáyu xínu

cuechi núú tēe yìndaha Egiptú-án.

11 "Te ní quíhu tnamá nihíi nàcióⁿ Ègiptú ndihí nàcióⁿ Cànaá, te ío ní ndohó-yu. Te nchaa ñaní tnáhá-ó nǐ xíndecu ndéé sanaha ñǎ ní xòo níhí-gǎ-yu sá cáxǐ-yu. 12 Te ní níhí tē Jácób tnúhu sá ío triú Ègiptú, núú ní tendaha-dē cue déhe-dé ní sáháⁿ-güedé ní ságuaaⁿ-güedé triú-án, te dàvá-án nǐ sáháⁿ cue ñaní tnáhá-ó xito díhna nuu nàcióⁿ Ègiptú. 13 Te xito cùu uú cuáháⁿ-güedé, te ní xáhaⁿ tē Chèé sá ñàní-dé cúu-güedé. Te tēe yìndaha Egiptú ní cutnùní iní-dé sá díú-ní ñàní té Chèé cúu-güedé. 14-15 Te ní cana té Chèé tātá-dé té Jácób ndihí nchaa ñaní tnáhá-dé. Te cùu-xi datná únídico sáhúⁿ-yu ndèca té Jácób cuáháⁿ nàcióⁿ Ègiptú núú ndécú tē Chèé, te xíaⁿ nǐ quexió-yu ní ngóo-yu. Te yàcáⁿ ní xihí té Jácób ndihí nchaa déhe-dé cue ñaní tnáhá-ó. 16 Te sátá nǐ cuu titní cuía, te ní natava-güedé yiqui ndíi Jácób ndihí nchaa déhe ndíi nchido-güedé cuáháⁿ ñuú Sìquém. Te ndíi Àbrahám sa ní cuu titní-gá cuía sǎ nǐ nacuaaⁿ ndíi ñuhu núú cuè déhe ndíi Hámór. Te xíaⁿ nchíi yaú ní nachindúxi-güedé yiqui-án.

17 "Te cútnáhá vátá nátava-gá-güedé yiqui cue ndíi, te sa ta tnáhá yatni cada Yá Ndiöxí nàcuáa ní xáhaⁿ-gǎ xii ndíi Àbrahám cada-gá sá cúu-xí ñáiyu isràél ndécú Ègiptú, te ta cǎyá víhí-yu cuáháⁿ. 18 Te dàvá-án chi ingá tēe yìndaha nàcióⁿ Ègiptú, te ñá túú-gǎ ní xíní-dé nása ní xóo cada ndíi Chèé. 19 Te tēe yìndaha Egiptú ñá ní quide ndáá-dé, chi ío ní dándóhó-dē ñaní tnáhá-ó nǐ xíndecu dàvá-án. Te ní táuchíúⁿ-dē sá xócuíñí-yu dándóo-yu déhe yiquiⁿ cuendá ndihí-güexi cuú. 20 Te dàvá-án nǐ cacu té Moisés, te ío ní cudíi iní ñáhá Yá Ndiöxí xii-dé. Te ní xíndecu ndihí ñaha ñáná-dē ndihí tātá-dē úní-ni yóo. 21 Te ndèca ñahá-yu cuáháⁿ ingá xichi, te yàcáⁿ ní dándóo ñáhá-yu xii-dé, te ní naníhí ñáhá dēhe yoco tēe yìndaha Egiptú, te ní xito-xi-dé dàtná xító-xí ñíⁿ déhe mee-xi nǐ xito-xi-dé ndéé ní sahnu-dé. 22 Te ní cutúha-dé nchaa sá xíní cue tēe ègiptú, te ío váha ní sáá díquí-dē tnúhu cáháⁿ-dé ndihí nchaa sá cádá-dē.

23 "Te cútnáhá ndécú-dē údico cuía-dē,

te ní cachí-dé sá quíhíⁿ-dé cáháⁿ ndihí-dé cue ñaní tnáhá-dē ñáiyu isràél. 24 Te ní xíní-dé ní caniha ñíⁿ tēe ègiptú xii ñíⁿ tēe isràél, te ñá ní cùndee iní-dé cundehe-dē nùu ní sáháⁿ-dé ní chindee-dē tēe isràél, te ní sahani-dé tēe ègiptú, 25 chi ní cachí Yá Ndiöxí sá díú-dē dacăcu-dé ñaní tnáhá-dē ñáiyu isràél núú cuè tēe ègiptú. Te ní sani iní-dé sá cùtnùní iní-yu nàcuáa ní xáhaⁿ Yá Ndiöxí xii-dé, dico ñá túú ní cùtnuní iní-yu. 26 Te nduu tnéé ní xíní-dé nàá úú cue tēe isràél, te ñá túú ní tnáhá iní-dé nàá-güedé nùu ní xáhaⁿ-dē xii-güedé: "¿Ná cuendá ducaⁿ xínáá-ndó? ¿Náa ñá díú ndimee-ndo núu ducaⁿ xínáá-ndó?" Duha ní xáhaⁿ tē Moisés xii-güedé. 27 Te tēe ndècuéchi ní sáháⁿ-dé ní chindaha nihnu-dé té Moisés ñíⁿ xio, te ní xáhaⁿ-dē: "¿Ná cúu yòhó nùu véxi-n tàxi tnuní ñáhá-n? 28 Te tnáhá-ni tucu yúhú cahni-n dàtná ní sahani-n tēe ègiptú icu càhaⁿ-n á", duha ní xáhaⁿ-dē xii té Moisés. 29 Te sá dúcáⁿ nǐ cáháⁿ tēe isràél nùu ní yúhú té Moisés ní xinu-dé cuáháⁿ-dé ní sáá-dé nàcióⁿ Medián. Yàcáⁿ ní ngóo-dé, te yàcáⁿ ní tnándaha-dé, te ní cacu úú déhe tēe-dé.

30 "Te sátá nǐ xínu údico cuía, te ní sáháⁿ té Moisés ñíⁿ xio yucu Sinái. Te yàcáⁿ ní xíní-dé ñíⁿ tnutáú nchícúⁿ ñuhú, te xití itá ñuhú-án nǐ xíní-dé yíhí ñíⁿ espíritú xínú cuèchi núú Yá Ndiöxí. 31 Te òré ní xíní-dé sá yíhí-xí xití itá ñuhú-án, te ní cuñúhu vñhi-dé sá nǐ xíní-dé espíritú-án xití itá ñuhú-án, te ní sándehe-gá-dé, te ní xíndéhe vñha-dé. Te ní tecú dóho-dé ní cáháⁿ Yá Ndiöxí, te xáhaⁿ-gǎ xii-dé: 32 "Yúhú cúu-í Ndiöxí ní cáháⁿ ndihí cue ñaní tnáhá-n ndéé sanaha, ndíi Àbrahám ndihí ndíi Isàac ndihí ndíi Jácób, ndihí dava-gá cue ñaní tnáhá-n. Nchaa cue ndíi-án nǐ xóo cáháⁿ ndihí-í." Duha ní xáhaⁿ-gǎ xii té Moisés. Te ní quidi ñaha-xi xii té Moisés sá nǐ yúhú-dé, te ñá ní cùyíi-gá-dé cundehe-dē tnutáú nchícúⁿ ñuhú-án. 33 Te Yá Ndiöxí ní xáhaⁿ-gǎ xii-dé: "Queñuhu chàu-n, chi núú ñuhú nǐ cuu íi nùtníi-n. 34 Te yúhú ndéhè-í sá ío ndòho nchaa ñáiyu cùu cuendá-í, ñáiyu ndècu nàcióⁿ Ègiptú. Te ní tecú dóho-í sá ío ndàhú xícáháⁿ-yu, núu xíáⁿ véxi-í càhí tnúhu-í sá nùhú-n nàcióⁿ Ègiptú cuendá ndeñuhú-n-yu yàcáⁿ." Duha ní xáhaⁿ Yá Ndiöxí xii té Moisés.

35 'Te ñá ní sàndáá iní-yu té Moisés ndéé díhna, chi ní xáhãⁿ-yu: “¿Ná cuendá véxi-n tàxi tnuní ñáhá-n xii-ndí?” Duha ní xáhãⁿ-yu xii té Moisés. Te ñu-ni té Moisés ní tendaha ñaha Yá Ndiöxí ní sáháⁿ-dé dacäcu-dé ñáyiú israhél nacióⁿ Ègiptú cuèi ñá ní sàndáá iní ñáhãⁿ-yu xii-dé. Dico ní taxi tnuní-dé-yu, chi ducaⁿ ñí xáhaⁿ-gã òré ní xiní-dé espíritú xínú cuèchi núú-gã xití tnutàú nchìcúⁿ ñuhú. 36 Te té Moisés ní ngúíta-dé ní quide-dé sá vã yõo tnàhí ndàcu cada, te ní cuñúhu vñhí-yu sá dúcáⁿ ñí quide-dé, te ducaⁿ ñí quide-dé Ègiptú ndihí Lámár Tícuèhé. Te ní ngódó núú-dé núú-yu ní queé-yu Ègiptú cuáháⁿ-yu ñí ichi xití yucu núú vã yõo tnàhí ndècu, te ní xihí-yu údico cuíá xití yucu-áⁿ, te xiáⁿ ñí xóo cada-dé sá vã yõo tnàhí ndàcu cada. 37 Te ñu-ni té Moisés ní xáhaⁿ-dè xii cue ñaní tnáhá-dé dàvá-áⁿ: “Yá Ndiöxí cada-gá te coo ñí ñaní tnáhá-ndó ndéé cuèé-gá, te téé-áⁿ cáháⁿ-dé tnúhu-gá núú-ndó dàtná cuíní-ndó ñí cachí-gá quidé yùhú, te ío xini ñuhu-xi cundedóho-ndo tnúhu cáháⁿ-dé”, duha ní xáhaⁿ tẽ Moisés xií-yu dàvá-áⁿ. 38 Te ñu-ni té Moisés ní xindecu ndihí-dé ñáyiú israhél xití yucu, te ní sáá-dé yucu Sinái, te xiáⁿ ñí quixi ñí espíritú xínú cuèchi núú Yá Ndiöxí ní cáháⁿ ndihí ñaha-xi xii-dé, te yacáⁿ ní dácuáhá ñaha-xi tnúhu-gá, te ñu-ni tnúhu-áⁿ ñí ndóo dàcuaha-o.

39 'Te cue ñaní tnáhá-ó ñí xindecu ndéé sanaha ñá ní sàndáá iní-yu té Moisés, te ñá ní ndéé iní ñáhãⁿ-yu xii-dé, chi ní cuíní-yu nuhú tucú-yu ñuú Ègiptú cundecú-yu. 40 Te òré ndécú tẽ Moisés yucu ní xáhãⁿ-yu xii ñaní-dé té Àrón: “Cadúha-n ñí úú ndiöxí díhúⁿ cuááⁿ codonùu núú-ó cùhuⁿ-o ichi, chi ñá túú cùtnuní iní-ó ndèé ichi cuáháⁿ té Moisés, téé yòdo nuu núú-ó ndùu ní quee-o Ègiptú”, duha ní xií-yu té Àrón. 41 Te dàvá-áⁿ ñí cadúha-güedé ñí chëhlu mee-ni díhúⁿ cuááⁿ, te ní sahani-güedé ñí úú quití nchìto ní quide càhnu-güedé chëhlu-áⁿ. Te ío ní cudíí iní-yu quití-áⁿ, chi ní cachí-yu sá díú-ní ndiöxí cúú-dí. 42 Te sá dúcáⁿ ñí quidé-yu, xiáⁿ ní dáñá ñaha Yá Ndiöxí xií-yu. Te ní dáñá-gã ní xóo cada càhnú-yu nchícanchii, ndihí yóó, ndihí nchaa chódíní. Te duha ní chídó tnuní ñí téé ní xóo cáháⁿ tnúhu Yá

Ndiöxí ndéé sanaha nàcuáa ní xáhaⁿ-gã xii ñáyiú dàvá-áⁿ:

Nchòhó ñáyiú israhél, ní cuu údico cuíá yíhí-ndó yùcu,

te ní sahani-ndo quití-ndo ní quide càhnu ñaha-ndo xii-í cáháⁿ-ndó, dico ñáhá chi ní sahani-ndo-güedé ní quide càhnu-ndo sá ñí cadúha mee-ndo.

43 Te ní cadúha-ndo ñí veñúhu líhli,

te ní sanutñí-ndo Mòlóc sá càchí-ndó cùu ndiöxí-ndó xica nchido-ndo xití yucu,

te ní cadúha-ndo ñí chódíní, te quití-áⁿ càchí-ndó sá cúú-dí ndiöxí Rènfán, te ndí ndúú sá ñí cadúha-ndo-áⁿ ñí quide càhnu-ndo.

Te cuendá sá dúcáⁿ ñí quide-ndo te yúhú queñuhu ñaha-í xii-ndo quíhíⁿ-ndó cundecu-ndo ingá xio nacióⁿ Babiloniá.

Duha ní xáhaⁿ Yá Ndiöxí xií-yu, te ducaⁿ ñí chídó tnuní téé ní xóo cáháⁿ tnúhu-gá.

44 'Te xití yucu-áⁿ ñí dácáá-güedé ñí veñúhu vehe dóó. Te vehe-áⁿ ñí cuu-xi ñí sá cùtnuní iní-yu sá Yá Ndiöxí ndécú ndihí ñaha-gá xií-yu. Te vehe-áⁿ ñí dácáá-güedé nàcuáa ní xáhaⁿ Yá Ndiöxí xii té Moisés, chi ní dánèhé ñáhá-gã xii-dé nàcuáa dacàa-güedé. 45 Te sátá ñí xihí nchaa cue téé-áⁿ, te ní ndóo ndihí nchaa déhe-güedé veñúhu-áⁿ. Te ní xido tucu-güedé veñúhu-güedé cuáháⁿ-güedé, te cuáháⁿ ndihí-güedé té Jòsué núú cündécú-yu. Te sátá ñí quexió-yu, te ní dácúnú-yu ñáyiú dii ñuú-xi-áⁿ chi mee Yá Ndiöxí ní chindee ñaha-gá xií-yu. Te sátá ñí ndihí nchaa ñáyiú ní xica nchido veñúhu dóó-áⁿ ñí xihí, te ní ndóo ndihí dava-gá-yu. Te ducaⁿ-ni ndècu-xi ní cacu té Dávíí, téé ní xindaha ñaha xií-yu. 46 Te Yá Ndiöxí ní cudíí víhí iní-gá té Dávíí. Te ní xicáⁿ tnúhú-dé núú-gã ñuú cuu dacàa-dé veñúhu cuu cuendá-gá, chi ñí Yá Ndiöxí ní xóo cada càhnu té Dávíí ndihí té Jàcób, ñaní tnáhá-ó ñí xindecu ndéé sanaha vñhí-gá. 47 Te Yá Ndiöxí ñá ní dàña-gá dacàa té Dávíí veñúhu-gá dico déhe-dé té Salòmón, chi ní dáñá-gã ní dácáá-dé veñúhu cuu cuendá-gá 48 cuèi ñá túú sàcündecu-gá veñúhu dàcaa cue téé ñuyú-a, chi ndèni xiáⁿ ndécú-gã chi

espíritú cúu-gă. Te duha ní chídó tnùní tée ní xóo cáháⁿ tnúhu Yá Ndiöxí ndéé sanaha nàcuáa ní cáháⁿ-gá:

⁴⁹ Yúhú táxí tnùní-í andiu ndìhi ñuyíú, te xiăⁿ nũu nchòhó vá ndácú-ndó chìhi ñaha-ndo xití veñúhu dàtná quidě-yu sá cächí-yu cùu ndióxí-yu ní cadúha-yu.

Te ñá túú xini ñuhu-í núu ndétátú-í, ⁵⁰ chi yúhú ní cadúha-í nchaa sá ío ñuyíú-a. Duha ní cáháⁿ Yá Ndiöxí, te ñu-ni ducaⁿ ñí chídó tnùní tée ní xóo cáháⁿ tnúhu-gá — duha ndũu nchaa tnúhu ní xáhaⁿ tē Těvá xii-güedé.

⁵¹ Te ní xáhaⁿ tùcu-dé:

—Nchòhó, ío sáa iní-ndó chi quide-ndo datná quidé ñáyiú ñá túú cùu ñáyiú is-ràel chi ñá túú tédòho-ndo tnũhu càháⁿ Yá Ndiöxí, chi ñá cuiní-ndó quindáa iní-ndó tnũhu-gá, mee-ni cùu úhú iní-ndó Espíritú-gá dàtná ní xóo cada cue ñaní tnáhá-ndó ñí xindecu ndéé sanaha. ⁵² Chi cue tée-áⁿ ío ní xóo dandòho-güedé nchaa cue tée ní xóo cáháⁿ tnúhu Yá Ndiöxí ndéé sanaha. Te ní sahani-güedé nchaa cue tée ní cáháⁿ sá quixí Cristú ñuyíú-a, te Yaá-áⁿ ñá túú cuěchi-gá. Te ñu-ni ducaⁿ ñí quide-ndo Cristú cùtnáhá ní quixi-gá ñuyíú-a, chi ní sáha cuendá-ndó-gă núu cué tée ní cuu úhú iní ñáhá xii-gá ní sahani ñaha-güedě. ⁵³ Te ndècu ndìhi-ndo tnúhu ní chídó tnùní ndíi Moisés nàcuáa ní xáhaⁿ espíritú xínú cuěchi núu Yá Ndiöxí xii ndíi, te ñí dùcaⁿ ñá túú sàndáa iní-ndó tnũhu-áⁿ nũu ní sahani-ndo Jèsús. Te ñu-ni tnúhu-áⁿ ndécú ndìhi-ndo ndéé vitna —cächí tē Těvá xáhaⁿ-dě xii-güedé.

Ní sahani-güedé tē Těvá

⁵⁴ Te sá dúcáⁿ ñí xáhaⁿ tē Těvá xii-güedé, te ní cudééⁿ vñí-güedě núu-dě, núu ní quide rúhñú-güedě núhu-güedé sá sätú iní-güedé. ⁵⁵ Te tē Těvá ndécú ndìhi-dé Espíritú Yá Ndiöxí, te ní ndacoto váha-dé andiu, te ní xiní-dé súúní dàtásaⁿ-xi núu ndécú Yá Ndiöxí, te ní xiní-dé Xítóhó Jesucristú nútnñi-gá xio cùha Yá Ndiöxí. ⁵⁶ Te ní xáhaⁿ tē Těvá xii-güedé:

—Chí cundèhe andiu chi yúhú ndéhè-í Xítóhó Jesucristú nútnñi-gá xio cùha Yá Ndiöxí, te ñu-ni gá cúu-gă ñaní tnáhá-ndó nchàa-ndo —cachí-dé xáhaⁿ-dě.

⁵⁷ Te ní sadí-güedé dóho-güedé cuendá sá ñă ní tnáhá iní-güedé cundedòho-güedé tnúhu càháⁿ-dé, te uuⁿ ní cuáa-güedé, te ní taxi ndaha ñaha-güedé xii-dé ⁵⁸ ndécá ñaha-güedé cuáháⁿ ndéé ñⁿ xio yuhu ñúú, te yácáⁿ ní sáñaha-güedě yúú xii-dé. Te ndècu ñⁿ tée cuechi nani-dé Sàulú, te tée-áⁿ ñí quide cuendá-dé dóo-güedě cuendá ní nune ndaha-güedé ní sáñaha-güedě yúú xii tē Těvá. ⁵⁹ Te òré sáñaha-güedě yúú, te ní cáháⁿ ndìhi-dé Xítóhó Jesucristú te xáhaⁿ-dě:

—Yòhó Xítóhó Jesucristú, naqueheⁿ-n iní-í —cächí-dé xáhaⁿ-dě xii-gá.

⁶⁰ Te ní ngüñí xití-dě, te níhi ní cáháⁿ-dé, te xáhaⁿ-dě:

—Yòhó Xítóhó Jesucristú, vá tēcuěchi-n cué tē-a sá dúhá quide ñaha-güedé xii-í —cächí-dé xáhaⁿ-dě xii-gá.

Te xiăⁿ-nă ní cáháⁿ-dé, te ní xihí-dé.

8

Tē Sàulú chíhí-dě ñáyiú sàndáa iní-xi tnúhu Jèsús vecaá

¹ Te tē Sàulú ní nduu vétú iní-dé sá ñí sahani-güedé tē Těvá.

Te ñu-ni nduu-áⁿ ñí cuu níhi cuendá nchaa ñáyiú sàndáa iní-xi tnúhu Jèsús ñúú Jerusálén. Te ní ndìhi-yu ní xité nuu cuáháⁿ-yu distritú Jùdeá ndìhi distritú Sàmariá. Te cue tée ní táuchíúⁿ Jèsús dácuaⁿ ñaha xii-yu tnúhu-gá ní ndóo-güedé ñúú Jerusálén. ² Te nchaa cue tée càháⁿ ndìhi Yá Ndiöxí ní chindúxi-güedé ndíi Těvá. Te ío ní ndáhyú ñáyiú ní sàndáa iní tnúhu Jèsús sá ñí xihí ndíi. ³ Te tē Sàulú ío dandòho-dé-yu, chi ndi vehe ndi vehe cuáháⁿ-dé cuátnñi-dé cuéi tē cuéi ñadìhí ndécá-dě cuáháⁿ vecaá.

Càháⁿ-yu tnúhu Yá Ndiöxí distritú Sàmariá

⁴ Te nchaa ñáyiú ní xité nuu cuáháⁿ-yu càháⁿ-yu tnúhu Jèsús nchaa núu quexió-yu.

⁵ Te tē Lìpé cuáháⁿ-dé distritú Sàmariá càháⁿ-dé tnúhu Xítóhó Jesucristú Yaá ní tendaha Yá Ndiöxí ní quixi ñuyíú-a. ⁶ Te ío vại núu sã vã yòo tnàhí ndàcu cada ní quide-dé, te ní cuñúhu vñí-yu, te ní xindedòho váha-yu nchaa tnúhu ní cáháⁿ-dé.

⁷ Te vại ñáyiú yìhi ñaha espíritú cundìhi yucu ñávaha ní queñuhu-dé nchaa espíritú-áⁿ yiqui cùñú-yu, te ní cana saa-xi òré ní

ndee-xi yiqui cùñú-yu cuáháⁿ-xi, te ní ndúha-yu. Te vai ñáyiú cùhú ñá cúú-gã candá nihnú-yu ndihí ñáyiú yacua ní quide tátna-dé, te ní ndúha-yu. ⁸ Te sá dúcáⁿ ñí cáháⁿ-dé tnúhu Jèsús te ní quide tátna-dé-yu, xiáⁿ ío ní cudíí ñí ñáyiú ñuú-áⁿ.

⁹ Te ñuú-áⁿ ndécú ñí tée nàni Xímú, te tée-áⁿ xiní-dé cada ndúu-dé, te ní cuu naha dùcaⁿ quide-dé, te ní xóo cuñúhu ñáyiú distritú Sàmariá sá dúcáⁿ quide-dé, te ní cachí-dé sá díú-ní-dě cúnú. ¹⁰ Te nchaa ñáyiú cuéi ñáyiú cuica te cuéi ñáyiú ndàhú ío nèhé-yu sá yíñúhu núú-dě, te xitnàhá-yu:

—Tée-áⁿ ío chindee ñaha Yá Ndiöxí xii-dé núu vai núú sá quide-dě —cachí-yu xitnàhá-yu.

¹¹ Te ní sándáá iní-yu nàcuáa ní xóo cada ndúu-dé, te ní xóo cuñúhu vñí-yu, te ní cuu naha dùcaⁿ-ni dandahú ñáhá-dě xii-yu. ¹² Te té Lìpé ní cáháⁿ-dé tnúhu Xítóhó Jesucristú, te ní xáhaⁿ-dě xii-yu sá Yá Ndiöxí cuini-gá ndíhu ndaha ñaha-gá xii-yu. Te cuéi tée cuéi ñadihí ní sándáá iní-yu tnúhu-gá, te ní sanduté-yu. ¹³ Te tnàhá té Xímú ní sándáá iní-dé tnúhu-gá, te ní sandute-dé, te ní xica cuu-dé ndihí té Lìpé, te ní cuñúhu-dé chi titní núú sá vñí yóo tnàhí ndàcu cada ní quide té Lìpé, te ní cuñúhu vñí nchaa ñáyiú.

¹⁴ Te dava-gá cue tée ní táuchíúⁿ Jèsús dacuàha ñaha xii ñáyiú tnúhu-gá ní níhí-güedě tnúhu sá ñáyiú distritú Sàmariá ní sándáá iní-yu tnúhu Yá Ndiöxí. Te ní tendaha-güedě té Pèlú ndihí té Juáa cuáháⁿ-güedě distritú Sàmariá. ¹⁵ Te ní quexìo-güedě, te ní cáháⁿ ndihí-güedě Yá Ndiöxí ní xicáⁿ-güedě Espiritú-gá quixi cundecu ndihí-yu. ¹⁶ Chi ní ñí-yu vátá sàá-gá Espiritú-gá cundecu ndihí-yu, chi òré ní sanduté-yu, te mee-ni Jèsús ní cacunehe-güedě. ¹⁷ Te òré ní sacáⁿ ndodo-güedě ndaha-güedě díqui-yu, te ní quexìo Espiritú-gá ní ngúndecu ndihí-yu.

¹⁸ Te ní xiní té Xímú nàcuáa ní quide-güedě ní quexìo Espiritú-gá ní ngúndecu ndihí-yu, te cuini-dé cuáñaha-dě díhúⁿ xii té Pèlú ndihí té Juáa ní cùu. ¹⁹ Te ní xáhaⁿ-dě:

—Chindee ñaha-ndo cuendá nděda-ni càa-yu cacáⁿ ndodo-í ndaha-í díqui-yu, te níhí-yu Espiritú Yá Ndiöxí cundecu ndihí-yu —cachí-dé xáhaⁿ-dě xii-güedě.

²⁰ Te té Pèlú ní xáhaⁿ-dě xii-dé:

—Yòhó cuíta nihnu-n ndihí díhúⁿ-n, chi cuini-n cuáaⁿ-n sá vñaha quide Yá Ndiöxí.

²¹ Yòhó vá cúú càda-n chiuⁿ quide-ndí, chi ñá túú ndècu váha iní-n núú Yá Ndiöxí.

²² Te vá dúcáⁿ cáháⁿ-n, chi ío nèhé cáháⁿ-n sá dúcáⁿ cáháⁿ-n. Te cáháⁿ ndàhú-n núú Yá Ndiöxí sá ná cáda càhnu iní-gá tnúhu ní cáháⁿ-n. ²³ Te yúhú sa xiní-í sá ío úhú iní-n, chi mee-ni sá cuèhé sá dúhá chido nuu-n quide-n —cachí té Pèlú xáhaⁿ-dě xii té Xímú.

²⁴ Te ní xáhaⁿ tē Xímú xii-güedě:

—Cáháⁿ ndàhú-ndó núú Yá Ndiöxí sá ñá túú ná tnàhá-í sá dúcáⁿ ñí cáháⁿ-í —cachí-dé xáhaⁿ-dě.

²⁵ Te té Pèlú ndihí té Juáa ní cáháⁿ-güedě tnúhu Yá Ndiöxí núú ñáyiú ñuú-áⁿ. Te ní xáhaⁿ-güedě nchaa nàcuáa ní quide Jèsús ní xiní-güedě òré ní xica cuu-gá ñuyíú-a. Te ní tñi-güedě ichi cuánuhú-güedě ñuú Jerusàlén, te ní yáha-güedě titní ñuú yíndèhu distritú Sàmariá, te ní cáháⁿ-güedě tnúhu-gá.

Té Lìpé ndihí ñí tée ñuú Etiòpiá

²⁶ Te ñí espíritú xinú cuèchi núú Yá Ndiöxí ní quexìo-xi ñuú Jerusàlén ní xáhaⁿ-xi xii té Lìpé:

—Cada túha-n chi quée nuu-n ñuú Gázá, dico mee-ni xití yucu cuáháⁿ ichi —cachí-xi xáhaⁿ-xi xii-dé.

²⁷ Te ní xica-dé cuáháⁿ-dé, te ní natnahá-dé ñí tée nacióⁿ Etiòpiá ñuhú-dě ichi. Te cùu-dé tesorèrú xinú cuèchi-dé núú ñí ñadihí ñaha yíndaha nacióⁿ Etiòpiá, te ñaha-áⁿ nání-áⁿ Cándacé. ²⁸ Te tée etiòpiá-áⁿ ní sáháⁿ-dé ñuú Jerusàlén ní cáháⁿ ndihí-dé Yá Ndiöxí, te ñuhu-dé ichi cuánuhú-dé ñuú-dé ñuhú-dě carretà, te dàcuaha-dé tnúhu ní chídó tnùní ndí Chaiá tée ní xóo cáháⁿ tnúhu Yá Ndiöxí ndéé sanaha. ²⁹ Te ní xáhaⁿ Espiritú Yá Ndiöxí xii té Lìpé:

—Quíhíⁿ tuha-n càrretá-áⁿ —cachí Espiritú-gá xáhaⁿ-xi xii-dé.

³⁰ Te té Lìpé ní sátuha-dé carretà-áⁿ, te ní tecú dóho-dé nàcuáa cáháⁿ tée etiòpiá-áⁿ, tée ñuhu carretà-áⁿ dácuaⁿ-dè nàcuáa ní chídó

tnùní ndíi Chàiaá. Te ní xáhaⁿ tē Lìpé xii tée etiòpiá-án:

—¿Tècú tnùní-n nchàa tnúhu dàcuaha-n-án?
—càchí tē Lìpé xáhaⁿ-dē xii-dé.

³¹ Te ní xáhaⁿ tē etiòpiá:

—¿Nása tecú tnùní-í te vá yõ dānehé ñáhá xii-í? Ta quène iha coo-n chi danèhé ñáhá-n
—càchí-dé xáhaⁿ-dē xii tē Lìpé.

Te cuásaá tē Lìpé núu carrètá ní ngóo-dé.

³² Te ndèdóho-dé nācuáa dàcuaha tée etiòpiá-án nācuáa ní chídó tnùní ndíi Chàiaá núu tütú Yá Ndiõxí núu càchí-xi:

Dàtná quidé ñⁿ mbéé cada-dé òré can-deca ñaha-güedē xii-dé quíhíⁿ cahni ñaha-güedē chi ñá túú nā cada-dé,
dàtná cuíní-ndó quide mbéé òré dèté-di ñá túú ndàhí-di ducaⁿ càda-dé òré cahni ñaha-güedē chi ni vá càháⁿ-dē.

³³ Te mee-ni cùdiquí ndeé ñáhá-güedē xii-dé, te ní vá ndúcú tnúhu-güedē núu-dē núu ndáá ndècuéchi-dé.

Te ío cuu nduu cuihna iní cue ñaní tñáhá-dé, chi cahni ñaha-güedē xii-dé ñuyíú-a.

Duha càháⁿ tutú ní dácuáhá tē etiòpiá ní xíndedóho tē Lìpé.

³⁴ Te ní xáhaⁿ tùcu tée Etiòpiá xii tē Lìpé:

—Cundee iní-n càchí tnúhu-n yòo cuncenehe tée ní càháⁿ tnúhu Yá Ndiõxí ndeé sanaha, núu càháⁿ-dē cuendá mée-dē àdi caháⁿ-dē cuendá ingá ñáyiú —càchí tée etiòpiá-án xáhaⁿ-dē xii tē Lìpé.

³⁵ Te tē Lìpé ní cani-dé cuendú núu tē etiòpiá nācuáa ní càháⁿ ndíi Chàiaá nācuáa cada Jèsús òré quixi-gá ñuyíú-a. Te ní xáhaⁿ-dē nācuáa nduu tnúhu Jèsús ndíhi nācuáa ní quide-gá. ³⁶ Te ñuhu-güedē ichi cuáháⁿ-güedē ní naníhí-güedē ñⁿ xichi núu ñuhú ndüte, te ní xáhaⁿ tē etiòpiá:

—Iha ñuhu ndute, ¿te vá cúu cuàndute-í iha-án? —càchí-dé xáhaⁿ-dē xii tē Lìpé.

³⁷ Te xáhaⁿ tē Lìpé:

—Te núu sàndáá ndisa iní-n Jèsús, te cuu cuandute-n —càchí-dé xáhaⁿ-dē.

Te ní xáhaⁿ tē etiòpiá:

—Sàndáá ndisa iní-í sá Dēhe Yá Ndiõxí cúu Xítohó Jesucrístú —càchí-dé xáhaⁿ-dē.

³⁸ Te ní ngani-dé carrètá, te ní nuu-güedē ndi ndúu-güedē, te cuánguee-güedē xití ndute, te ní dácuándüte ñaha tē Lìpé xii-dé.

³⁹ Te òré ní nene-güedē xití ndute, te ndèca

ñaha Espíritú Yá Ndiõxí xii tē Lìpé cuáháⁿ. Te ñá túú ní xini tē ní sandute-án ndeé ichi cuáháⁿ tē Lìpé. Te ío ní cudíi iní-dé sá ñí natuha-dé ichi Yá Ndiõxí, te cuándaa-dé núu carrètá-dé cuánuhú-dé. ⁴⁰ Te ní quexio tē Lìpé ñuu Azotó, te ndi tnahá ñuu ndi tnahá ñuu cuáháⁿ-dē càháⁿ-dē tnúhu Yá Ndiõxí, te ní yáha-dé cuáháⁿ-dē ní quexio-dé ndeé ñuu Cèsareá.

9

Té Sàulú ní tuha-dé ichi Xítohó Jesucrístú (Hch. 22:6-16; 26:12-18)

¹ Te tē Sàulú mee-ni càháⁿ cuèhé-dé cuendá ñáyiú ní sàndáá iní tnúhu Jèsús, te cuíní-dé cahni ñaha-dē xii-yu. Te ní sáháⁿ-dē núu dùtú cùnùu-gá, ² te ní xáhaⁿ-dē sá cādūha dùtú-án ñⁿ tutú canehe-dé quíhíⁿ cuáha-dé cue tē xindeé nchito veñúhu ñuu Dàmascú, chi cuíní-dé tñii-dé nchaa ñáyiú dàcuaha tnúhu Xítohó Jesucrístú candeca ñaha-dē quíhíⁿ ñuu Jerusálén. ³ Te ní xica-dé cuáháⁿ-dē tá cùyatni-dé ñuu Dàmascú, te uuⁿni ní quee ñuhú andiú, te ní dáyèhé-xi ndeé núu nùtnñ-dé. ⁴ Te ní nduá-dé ndeé ñuhu, te ní tecú dóho-dé càháⁿ ñⁿ sá càháⁿ núu ñinu, te xáhaⁿ-xi xii-dé:

—Yòhó Sàulú, ¿ná cuendá cúu ùhú iní ñáhá-n xii-í te dāndoho ñaha-n? —càchí sá càháⁿ-án xáhaⁿ-xi xii-dé.

⁵ Te ní xáhaⁿ-dē:

—¿Ná cúu yòhó sá càháⁿ-án-í? —càchí-dé xáhaⁿ-dē.

Te ní xáhaⁿ sá càháⁿ xii-dé:

—Yúhú cúu-í Jèsús tē cùu úhú iní-n. Te ío dāndoho-n mee-n, chi dàtná quidé ndicutu quide-n, chi quiti-án núu na cùxi-güedē-di puyá te sáha-di patadá núu-xi, te quide úhú-di mee-di. Te ducaⁿ sātñahá-xi cùu yohó chi ñá túú sàndáá iní ñáhá-n xii-í —càchí sá càháⁿ-án xáhaⁿ-xi xii-dé.

⁶ Te tē Sàulú ní quidi ñaha-xi xii-dé sá ñí yùhú-dé, te ní xáhaⁿ-dē:

—Xítohó Jesucrístú, ¿te ná cuíní-n càda-í-í? —càchí-dé xáhaⁿ-dē.

Te Jèsús ní xáhaⁿ-gá xii-dé:

—Ndacóo, te quíhíⁿ-n ñuu-án, te yacáⁿ tecú tnúhu-n nā cúu sá càdá-n —càchí-gá xáhaⁿ-gá xii-dé.

⁷ Te cue tē cuáháⁿ ndíhi tē Sàulú ní tecú dóho-güedē càháⁿ ñⁿ sá càháⁿ, dico vá yòo

tnàhí ni xìní-güedé, te ní yùhú víhí-güedě, te ñá túú tnàhí ni cãháⁿ-güedé. ⁸ Te ní ndacóo té Sàulú, te ñá ní cùu-gá cundehe-dě, chi ní cuaa-dé, te ní tñi-güedé ndaha-dé ndécá ñaha-güedé cuáháⁿ ñuú Dàmascú. ⁹ Te yàcáⁿ ní xíndecu-dé úní nduu, te ñá ní cùu tnahí cundehe-dě, te ñá túú nã ní xèxi-dé, te ñá túú ní xìhi-dé ndute.

¹⁰ Te ndècu té sàndáá iní tnúhu Jèsús ñuú Dàmascú, nání-dě Anàniás, te ní sáháⁿ Jèsús núú sàní-dé, te ní xáhaⁿ-gã xii-dé:

—¡Anàniás! —càchí-gá xáhaⁿ-gã.

Te ní xáhaⁿ-dě:

—¿Yúhú càháⁿ ndìhi-n-ãⁿ? —càchí-dé xáhaⁿ-dě.

¹¹ Te ní xáhaⁿ-gã:

—Ndacuíñí, te quíhíⁿ-n ìⁿ chiuⁿ ichi núú dánàni-güedé Ichi Ndáá, te yàcáⁿ nanducu-n vehe té Jüdás, chi vehe té-áⁿ ndécú ìⁿ té ñuú Tàrsú nání-dě Sàulú, te té-áⁿ sa càháⁿ ndìhi ñaha-dě xii-í. ¹² Te té-áⁿ ní dácótó ñaha-xi sá ní xìní ñáhá-dě xii-n ní quexìo-n núú ndécú-dě, te ní sacáⁿ ndodo-n ndàha-n díquí-dě, te ducaⁿ te ní nacaáⁿ núú-dě ní dácótó ñaha-xi xii-dé —càchí-gá xáhaⁿ-gã.

¹³ Te té Anàniás ní xáhaⁿ-dě:

—Yòhó Xítóhó Jesucristú, càchí tnúhu-í xii-n sã ní níhí-í tnúhu nàcuáa quide-dé sá ïo quide úhú-dé ñáyíu càháⁿ ndìhi-n ñuú Jerusàlén. ¹⁴ Chi nèhe-dé tutú ní sãñaha cuè dútú cúnùu cuendá níhí-dě nàcuáa cada-dé tñi-dé nchaa ñáyíu sàndáá iní ñáhá xii-n —càchí-dé xáhaⁿ-dě xii-gá.

¹⁵ Te Jèsús ní xáhaⁿ-gã xii-dé:

—Quíhíⁿ-n ndàtnúhu-n ndìhi-dé, chi cuíní-í cada-dé chiuⁿ-í, quíhíⁿ-dè càháⁿ-dè tnúhu-í núú cuè ñáyíu isràél, ndìhi núú cuè ñáyíu ñá túú cùu ñáyíu isràél, ndìhi núú cuè té yíndaha ñaha xii-yu. ¹⁶ Te yúhú cùñaha-í xii-dé sá ndóhó vîhi-dé cuendá-í —càchí-gá xáhaⁿ-gã xii té Anàniás.

¹⁷ Te cuáháⁿ té Anàniás vehe núú ndécú tẽ Sàulú te ní sacáⁿ ndodo-dé ndaha-dé díquí tẽ Sàulú, te ní xáhaⁿ-dě:

—Yòhó té Sàulú té ndècu ndìhi-í ichi Xítóhó Jesucristú, ñuú-ni Xítóhó Jesucristú Yaá ní càháⁿ ndìhi ñaha xii-n ichi ní tendaha ñaha-gã véxi-í cuendá cacáⁿ táhú-í núú-gã cuendá-n te ndúha núú-n, te dàtnúú quixi

Espíritú-gá cundecu ndìhi-n —càchí-dé xáhaⁿ-dě.

¹⁸ Te dàtná sá ní xócání-ó ìⁿ sá ndèdí núú-dě ní quide ñaha-xi xii-dé, te ní nacaáⁿ núú-dě, te ní sandute-dé. ¹⁹ Te ní xexi-dé, te ní naníhí ndéé-dě, te títñí nduu ní xíndecu ndìhi-dé ñáyíu ní sàndáá iní tnúhu-gá ñuú Dàmascú.

Té Sàulú dácuàha-dé ñáyíu tnúhu Yá Ndiõxí ñuú Dàmascú

²⁰ Te sáta ní ndúha núú-dě, te ní sáháⁿ-dè veñúhu cue ñáyíu isràél ní xáhaⁿ-dè sá Jèsús cúu-gã Déhe Yá Ndiõxí. ²¹ Te nchaa ñáyíu ní xíndedóho tnúhu ní càháⁿ-dè, te ní cuñúhu víhí-yu, te ní xítñahá-yu:

—Díu té-ãⁿ ní sahani-dé ñáyíu ní xóo chiñuhu ñaha xii Jèsús ñuú Jerusàlén. Te ní quixi-dé iha ní cuíní-dé tñi ñaha-dě xii-yu candeca ñaha-dě quíhíⁿ núú cuè dútú cúnùu ni cuu —cachí-yu xítñahá-yu.

²² Te ïó iní-gá té Sàulú xáhaⁿ-dè xii-yu sá díú Jèsús cúu-gã Cristú Yaá ní tendaha Yá Ndiõxí ní quixi ñuyíu-a, te xíãⁿ ñá ní níhí ñáyíu isràél ndécú ñuú Dàmascú tnúhu càháⁿ-yu, te ní cuñúhu víhí-yu.

Té Sàulú ní dáxió-dè núú ñáyíu isràél

²³ Te sáta ní cuu títñí nduu, te ní ndatnúhu cue té isràél sá càhí-güedě té Sàulú. ²⁴ Te té Sàulú ní níhí-dè tnúhu nàcuáa càháⁿ-güedé cada ñaha-güedě xii-dé, te cuèi nduu cuèi niú néhé cuendá-güedé yuyèhe núú ñúdòco ndóho yuhu ñuú cuendá cuíní-güedé tñi ñaha-güedě xii-dé te cahni ñaha-güedě. ²⁵ Te ìⁿ niú ndécá ñaha cue té ní sàndáá iní-xi tnúhu Jèsús cuáháⁿ ndéé núú ñúdòco ndóho yuhu ñuú. Te ní sáá-güedé núú ndòho, te ní chihí ñaha-güedě xii-dé xití tídihi te ní dándèe ñaha-güedě núú ñúhú, te ní quene-dé cuáháⁿ-dè.

Te Sàulú ndécú-dè ñuú Jerusàlén

²⁶ Te té Sàulú ní nasáá-dè ñuú Jerusàlén, te cuíní-dé chitnahá-dé ñáyíu sàndáá iní tnúhu Jèsús, te ní yùhú-yu chi ní càháⁿ-yu sá dándàhú ñáhá-dè sá sàndáá iní-dé Jèsús.

²⁷ Te té Bèè ndécá-dè té Sàulú cuáháⁿ núú ndécú cuè té ní táuchíuⁿ Jèsús dacuàha ñaha xii-yu tnúhu-gá. Te ní cani té Bèè cuendú núú-güedě nàcuáa ní cuu ní naníhí tnáhá tẽ Sàulú ndìhi Jèsús ichi, te ní càháⁿ

ndihi ñaha-gã xii-dé. Te ní xáhaⁿ tùcu té Bèè nàcuáa ní cáháⁿ té Sàulú tnúhu Jèsús núú ñáyiú Dàmascú, te ñá túú tnàhí ni yùhú-dé ní cáháⁿ-dé, càchí té Bèè xãhaⁿ-dè xii-güedé. ²⁸ Te ní xíndecu té Sàulú ndihi ñáyiú xídacuáhá tnúhu-gá ñuú Jerusàlén. Te ní ndicuu ndicuu-dé ní cáháⁿ-dé tnúhu Jèsús, te ñá túú tnàhí ni yùhú-dé ²⁹ ní cáháⁿ ndihi-dé ñáyiú isràél ñáyiú càháⁿ tnúhu griégú. Te ñáyiú-áⁿ ñi ngüíta-yu ndàtnúhu-yu sá cáhni ñàhá-yu xii-dé. ³⁰ Te ñáyiú sàndáá iní tnúhu-gá ní níhí-yu tnúhu nàcuáa cuini ñáyiú càháⁿ tnúhu griégú cada ñàhá-yu xii té Sàulú, núú ní sàndeca ñàhá-yu xii-dé ñuú Cèsareá, te yàcáⁿ ní tendaha ñàhá-yu cuánuhú-dé ñuú Tàrsú.

³¹ Te sáta xíaⁿ te ní sanaá-yu ñá túú-gã ní xóo cada úhú-yu nchaa ñáyiú sàndáá iní tnúhu Jèsús níhí distritú Júdeá, ndihi distritú Galileá, ndihi distritú Sàmariá. Te ní níhí ndéè-yu ní quidé-yu nàcuáa ní xáhaⁿ Yã Ndiõxí cada-yu, te ío ní xíndecu yíñùhú-yu núú-gã, te Espiritú-gá ní chindee ñàha-xi xií-yu, te vai-gá ñáyiú ní sàndáá iní-yu tnúhu-gá.

Té Pèlú ní quide tátna-dé té Èneás

³² Titní xichi ní sáháⁿ té Pèlú ní cáháⁿ-dé tnúhu Yã Ndiõxí. Te ñⁿ nduu ní sáháⁿ-dé ñuú Lidá ní cáháⁿ ndihi-dé ñáyiú sàndáá iní ñàhá xii Jesús. ³³ Te yàcáⁿ ní naníhí-dé ñⁿ té nàni Eneás, te ní cuu úná cuá cùhú-dé, te ni lùha ñá cúú-gã candá nihnu-dé. ³⁴ Te ní xáhaⁿ té Pèlú xii-dé:

—Èneás, Xítohó Jesucristú cada tátna ñaha-gã xii-n tnáví. Ndacóo te ndocani-n yùu-n —cachí-dé xãhaⁿ-dè.

Te òré-ni ní ndacóo-dé. ³⁵ Te nchaa ñáyiú ñuú Lidá ndihi ñáyiú ñuú Sàrón ní xiní-yu sá ñi ndúha-dé, te ní sàndáá víhí iní-yu Xítohó Jesucristú.

Ní ndoto tá Dòrcás

³⁶ Te ñuú Jòpé ndécú ñⁿ ñadihí sàndáá iní-aⁿ tnúhu Jèsús, te nàni-aⁿ Tabitá, te tnúhu griégú xãháⁿ-yu Dòrcás, te ío váha ní xóo cada-aⁿ chi ío váha iní-aⁿ, te ní xóo chindee-aⁿ ñáyiú ndàhú. ³⁷ Te váha-ni ndècu-aⁿ ni cuu, te ní tñi ñaha cuèhé ñi xíhí-aⁿ, te ní nadacùchi ñàhá-yu, te ní chihi ñàhá-yu ñⁿ cuàrtú ndécú ndéé núú ñnu. ³⁸ Te ñáyiú ní sàndáá iní tnúhu Jèsús ñuú

Jòpé ní níhí-yu tnúhu sá ndécú té Pèlú ñuú Lidá. Te yatni-ni càa ñuú-áⁿ, te ní tendàhá-yu úú cue té cuáháⁿ-güedé núú ndécú-dé cuendá cùñaha-güedé candeca ñaha-güedé xii-dé quíhíⁿ núú ndécú-yu. Te ní xáhaⁿ-güedé xii té Pèlú:

—Yáchí ná quíhíⁿ-ó ñuú-ndí, chi yàcáⁿ caná ñàhá-yu quíhíⁿ-n tnáví —càchí-güedé xãhaⁿ-güedé xii té Pèlú.

³⁹ Te té Pèlú ní xica-dé cuáháⁿ-dé ndihi cue té-áⁿ ñuú Jòpé, te òré ní quexio-güedé ndihi-dé, te cuásaá ndihi ñaha-güedé cuàrtú ndéé núú ñnu. Te nchaa ñáyiú díhí ñáyiú quèé ní tacá ndéé ñàhá xii ndíyi-áⁿ xíndáhyú-yu, te ní dánèhé ñàhá-yu nchaa dóo ñi cadúha ñaha ní xíhí-áⁿ. Chi ní xóo cadúha-aⁿ dícúⁿ, te ní xóo cadúha-aⁿ dío òré ní xíndecu-aⁿ ñuyú-a, te nchaa xíaⁿ ní dánèhé ñàhá-yu xii té Pèlú. ⁴⁰ Te té Pèlú ní xáhaⁿ-dè sá quèè-yu nchaa-yu quehé, te ní queé-yu. Te ní ngüíñí xítí-dé te ní cáháⁿ ndihi-dé Yã Ndiõxí, te dàtnúni ní ndacoto-dé núú cándòdo ndíyi-áⁿ, te ní xáhaⁿ-dè:

—Tàbitá, ndacóo —càchí-dé xãhaⁿ-dè.

Te ní ndacoto-aⁿ núú té Pèlú te ní ndacóo-aⁿ. ⁴¹ Te ní tñi-dé ndaha-aⁿ ní nacanutñi ñaha-dè. Te ní cana-dé nchaa ñáyiú díhí ñáyiú quèé ndihi nchaa ñáyiú sàndáá iní tnúhu Jèsús cuendá quini-yu sá ñi ndoto-aⁿ. ⁴² Te nchaa ñáyiú ñuú Jòpé ní níhí-yu tnúhu nàcuáa ní quide té Pèlú ní ndoto ñaha ní xíhí-áⁿ, te vai-yu ní sàndáá iní-yu Xítohó Jesucristú. ⁴³ Te titní nduu ní xíndecu té Pèlú vehe té Xímú tée dàcuitá ñi.

10

Té Pèlú ndihi té Còrneliú

¹ Te ndècu ñⁿ té nàni-dé Còrneliú ñuú Cèsareá te cùu-dé capitáⁿ, te ndècu ndihi-dé ñⁿ cièndú sandàdú. Te cue té-áⁿ nání-güedé Sandàdú Itàlianú. ² Te té cùu capitáⁿ ío váha iní-dé, te mee-dé ndihi ñadihí-dé ndihi nchaa landú-dé ío nèhé-yu sá yíñùhu núú Yã Ndiõxí, te sáha-dé ñáyiú ndàhú ñáyiú isràél díhúⁿ, te ío càháⁿ ndihi-dé Yã Ndiõxí. ³ Te ñⁿ nduu dàtná òré caá úní sacuaa ní dácótó núú ñàhá-xi xii-dé sá ñi sãháⁿ ñⁿ espíritú xínú cuèchi núú Yã Ndiõxí núú-dé, te ní xáhaⁿ-xi:

—Còrneliú —càchí-xi xãhaⁿ-xi xii-dé.

4 Te ní xiní-dé ndi ndúú xio núú-dě espíritú-án. Te ío ní yuhú-dé. Te ní xáhaⁿ-dě: —¿Ná chíúⁿ vèxi-n? —càchí-dé xăhaⁿ-dě.

Te xăhaⁿ-xi:

—Ío càháⁿ ndihi-n Yă Ndiöxí, te ñáyiú ndàhú sãñaha-n dîhúⁿ-n, te nchaa xiăⁿ sa nàha-gá. 5 Te vitna tendaha-n cuè téé na quihíⁿ-güedé ñuú Jòpé quíngana-güedé ìⁿ téé nani Xímú, àdi Pelú chi úú diú-dé, te candeca ñaha-güedé quixi. 6 Te òré quexio-dé te cachí tñuhu-dé nchaa dava-gá sá cuiní Yă Ndiöxí cada-n. Te ndècu-dé vehe ingá tucu téé nani Xímú téé dàcuitá ñi, te vehe téé-án cáá ìⁿ xio yuhu lamár —càchí-xi xáhaⁿ-xi xii-dé.

7 Te sátá cuáháⁿ espíritú-án, te té Còrneliú ní cana-dé úú tñháⁿ cue téé xínu cuechi núú-dě ndihi ìⁿ sandádú xínú cuèchi tucu núú-dě, te tñháⁿ sandádú-án ío càháⁿ ndihi-dé Yă Ndiöxí. 8 Te té Còrneliú ní cani-dé cuendú núú-güedé nàcuáa ní cáháⁿ espíritú xínú cuèchi núú Yă Ndiöxí. Te ní tendaha ñaha-dé xii-güedé cuáháⁿ-güedé ñuú Jòpé.

9 Te nduu tněé-án ñúhú-ní-güedé ichi cuáháⁿ-güedé, te cùu-xi datná òré caúxúú nduu ta cùyatni-güedé ñuú-án, te òré-án ní sáá té Pelú díquí véhé càháⁿ ndihi-dé Yă Ndiöxí. 10 Te òré-án sa xihí-dé docó cuiní-dé caxi-dé, te nini càdúha-yu sá cáxí-dé ní dácótó núú ñáhá-xí 11 sã ní xiní-dé ìⁿ sá ndécú àndiú, te càa datná cáá ìⁿ dóó cáhnú nchícúⁿ yoho ndi cùmí xíquí-xi véxi cuuⁿ núú ñúhú. 12 Te núú dǒó-án yódó cǒo ndihi quiti ndàva ndihi nchaa núú quiti ndéé cùmí sãhá-xi. 13 Te ní tecú dóho-dé càháⁿ ìⁿ sá càháⁿ, te xăhaⁿ sã càháⁿ-án xii-dé:

—Pelú, ndacuíñi cahni-n nděda-ni càa quiti-a caxi-n-di —cachí sá càháⁿ-án xăhaⁿ-xi xii-dé.

14 Te té Pelú ní xáhaⁿ-dě:

—Vá cáhni-í-di chi càchí tñuhu sá sánú ìchi ñaha xii nchúhú ñáyiú isràél sá vã cúú càxi-ndí nchaa quiti-a chi cuu cuèchi, te vátá cáxí-gã-í-di ni ìⁿ xito —cachí-dé xăhaⁿ-dě.

15 Te ní cáháⁿ tucu sá ní cáháⁿ-án, te xăhaⁿ-xi:

—Vá cúú càchí-n sã vã cúú càxi-n-di, chi mee Yă Ndiöxí ní cachí-gá sá diú nchaa quiti-a cuu caxi-o vitna —cachí sá ní cáháⁿ-án xăhaⁿ-xi xii-dé.

16 Te ducaⁿ ñí cáháⁿ sá ñí cáháⁿ-án ùni xito, te dàtnúni cuándaa tucu dóó-án andiú.

17 Te té Pelú ñá ní cùtnuní iní-dé ná cuendá ducaⁿ ñí dácótó núú ñáhá-xí xii-dé, núu xiăⁿ ío cuéhé ñí sani iní-dé. Te òré-án ñí quexio cue téé ní tendaha té Còrneliú ndéé yuyèhe, chi ndi vehe ndi vehe cuáháⁿ-güedé ndúcú tñuhu-güedé ndéé cáá vèhe té Xímú téé dii vèhe-xi ndecu té Pelú. 18 Te ní cáháⁿ níhi-güedé, te xăhaⁿ-güedé:

—Ñá túú cùdana iha ndecu ìⁿ téé nànducu-ndí nání-dé Xímú, àdi Pelú chi úú diú-dé —càchí-güedé xăhaⁿ-güedé.

19 Te té Pelú vai sani iní-dé sá ñí dácótó núú ñáhá-xí xii-dé. Te òré-án ñí xáhaⁿ Espíritú Yă Ndiöxí xii-dé:

—Cundedóho-n ìⁿ tñuhu na càháⁿ-í-a. Ní quexio úní cue téé nànducu ñaha xii-n.

20 Yáchí, cuandèe chi quihíⁿ-n ndihi-güedé, te vá yuhú-n chi yuhú ní xáhaⁿ-í véxi cuaca ñaha-güedé xii-n —càchí Espíritú-gá xăhaⁿ-xi xii té Pelú.

21 Te ní xica-dé cuánde-dé núú ndécú cuè téé xica nanducu ñaha xii-dé, te xăhaⁿ-dě xii-güedé:

—Yúhú cúú tée nànducu-ndo-án. Náú-í-a núu ná chíúⁿ cuiní ñáhá-ndó —càchí-dé xăhaⁿ-dě xii-güedé.

22 Te xăhaⁿ-güedé:

—Tée cùu capitáⁿ téé nani Corneliú ní tendaha ñaha-dé véxi-ndí, te téé-án ío váha iní-dé, chi ío sandáá iní-dé Yă Ndiöxí, te nchaa ñáyiú isràél ío váha càháⁿ-yu cuendá-dé. Te ìⁿ espíritú xínú cuèchi núú Yă Ndiöxí ní xáhaⁿ-xi xii-dé sá cáná ñaha-dé xii-n quihíⁿ-n vèhe-dé dacuàha-n-dé tñuhu Yă Ndiöxí —càchí cue téé ní tendaha té Còrneliú xăhaⁿ-güedé xii té Pelú.

23 Te ní xáhaⁿ tẽ Pelú sá quihú-güedé vehe-dé, te candeca tñaha-güedé ndihi-dé quihíⁿ ndéé nduu tněé. Te nduu tněé-án ñí xica-güedé ndécá tñaha-güedé ndihi té Pelú cuáháⁿ, te tñháⁿ ìⁿ úú cue téé sandáá iní tñuhu Jèsús ñuú Jòpé cuáháⁿ ndihi ñaha-güedé xii-dé.

24 Te ndéé ingá nduu ní quexio-güedé ñuú Cèsareá. Te té Còrneliú ndétú ñaha-dé xii-güedé vehe-dé te sa ndècu túha-dé ndihi ñadihí-dé ndihi nchaa landú-dé ndihi cue téé ío váha tñháⁿ tñuhu ndihi-dé, chi ní cana ñaha-dé ní nítnáhã-yu ndihi-dé cundetú-yu té Pelú. 25 Te sátá ñí quèxio té Pelú vehe té

Còrneliú, te ní quee-dé quehé, te ní ngüñí xítí-dě núú tē Pèlú chíñùhu ñaha-dé ní cùu. ²⁶ Te té Pèlú ní xáhaⁿ-dē:

—Ndacuíñí vá ngüñí xítí-n nùú-í chi ñá díú Ndiöxí cùu-í, dícó ñⁿ tée ñuyíu-a cùu-í —càchí té Pèlú xáhaⁿ-dē xii-dé.

²⁷ Te ta cáháⁿ té Pèlú ndíhi té Còrneliú cuánguihu-güedé xítí vehe, te chitu ñáyiú xixíhi xítí vehe. ²⁸ Te ní xáhaⁿ tē Pèlú xií-yu:

—Sa nàha-ndo sá càchí tnúhu sá sánú ichi ñaha xii nchúhú ñáyiú isràél sá vā cùú quixi-ndí vehe ni ñⁿ nchohó ñáyiú ñá túú cùu ñáyiú isràél te ni vā cùú tnàhá tnúhu ndíhi ñaha-ndí xii-ndo. Dico Yá Ndiöxí ní cachí-gá sá vā cùú cáháⁿ-í sá vā cùú cáháⁿ ndíhi-í ñáyiú ñá túú cùu ñáyiú isràél, chi cuu cuéchi. ²⁹ Núu xiáⁿ ndíhi-ni véxi-í òré ní quexio tnúhu sá cáná ñaha-ndo. Te cachí tnúhu-ndo nā cuendá cáná ñaha-ndo —cachí té Pèlú xáhaⁿ-dē xii-yu.

³⁰ Te té Còrneliú ní xáhaⁿ-dē:

—Ní cuu cúmí nduu, te ñⁿ ni dàtná òré iha cùu-xi, te yúhú ndècu-í ñⁿ ni vehe-í, te ñá túú tnàhí ná xéxi-í cáháⁿ ndíhi-í Yá Ndiöxí, te òré-áⁿ ní quexio ñⁿ espíritú xínú cuèchi núú-gá níhnu-xí dōó cuixíⁿ dōó chàhnchí. ³¹ Te càchí-xi: “Còrneliú, ní xíndedóho Yá Ndiöxí tnúhu ní cáháⁿ-n ndíhi-gá, te xíní-gá sá sãñaha-n díhúⁿ xii ñáyiú ndàhú. ³² Te ñúú Jòpé ndécú ñⁿ tée nani Xímú, àdi Pelú chi úú ñⁿ dé, te ndècu-dé vehe ñⁿ tée nani tucu Xímú tée dàcuitá ñⁿ, te càa vehe-dé ñⁿ xio yuhu làmár, te cana-n-dē ná quixi-dé ndatnúhu-n ndíhi-dé”, duha ní cáháⁿ espíritú xínú cuèchi núú Yá Ndiöxí. ³³ Núu xiáⁿ ndíhi-ni ní cana ñaha-í xii-n. Te táxáhu xii-n sã véxi-n chi iha ndècu-ndí nchaa-ndí ndétú ñaha-ndí xii-n cùndedóho-ndí tnúhu Yá Ndiöxí, te cuíní-ndí cachí tnúhu-n nchaa tnúhu ní cachí Yá Ndiöxí cáháⁿ-n —càchí té Còrneliú xáhaⁿ-dē.

Té Pèlú ní ndatnúhu-dé ndíhi ñáyiú ní tacá vehe té Còrneliú

³⁴ Te té Pèlú xáhaⁿ-dē xií-yu:

—Vitna ní xíní-í sá Yá Ndiöxí cáháⁿ ndíhi-gá ñáyiú cuèi ndēda-ni càa ñúú, te ñⁿ-ni quide-gá ndíhi nchaa-yu. ³⁵ Te nchaa ñáyiú nèhe sá yíñùhu núú Yá Ndiöxí, te xíquide váha-yu, te nchaa-yu cùu váha iní ñáhá-gá xií-yu. Te ñá túú quide cuendá-gá

cuèi ná ñáyiú ñúú cùu-yu. ³⁶ Te Yá Ndiöxí ní tendaha-gã Xítoho Jesucristú ní sáháⁿ-gá ní xíndecu-gá nacióⁿ Isràél, te ní xáhaⁿ-gá xií-yu ñⁿ tnúhu váha nacuáa cuu váha iní-yu. Te ñⁿ ni mee Jèsús cùnù-gá núú ñáyiú ni càa xico ñuyíu. ³⁷ Te nàha-ndo sá díhna-gá ndí Juàá ní cáháⁿ ndí tnúhu Yá Ndiöxí núú ñáyiú, te ní dácúandute ñaha ndí xií-yu. Te dàtnúni ní ngüita Jèsús ní cáháⁿ-gá tnúhu-gá distritú Galileá, te dàtnúni ní sáháⁿ-gá níhí nacióⁿ Isràél ní cáháⁿ-gá tnúhu-gá núú ñáyiú. ³⁸ Te sa nàha-ndo sá Yá Ndiöxí ní sãñaha-gã Espíritú-gá xii Jèsús tée ñúú Nazàrét ndécú ndíhi-dé chindèe ñaha-xi xii-dé. Te nàha-ndo sá ní xica cuu Jèsús ní quide tátna-gá nchaa ñáyiú yíhi ñaha espíritú cùndíhi yucu ñávãha. Te ío vãi-gá sá váha ní quide ñaha-gã xií-yu, te ducaⁿ ní quide-gá, chi Yá Ndiöxí ní chindee ñaha-gá. ³⁹ Te mee-ndí ní xíní-ndí nacuáa ní quide Jèsús ñúú Jerusalén ndíhi níhí nacióⁿ Isràél. Te ní sata caa ñaha-güedé xii-gá núú cùrúxi te yacáⁿ ní xihí-gá. ⁴⁰ Te núú ùní nduu ní dándótó ñaha Yá Ndiöxí xii-gá. Te ní cuíní-gá sá cùndecu Xítoho Jesucristú titní nduu sátá ní ndoto-gá cuendá cáháⁿ ndíhi ñaha-gã xii-ndí nchaa-ndí nacuáa ní xica cuu-ndí ndíhi-gá. ⁴¹ Te ñá ncháá ñáyiú ni xíní ñáhá xii-gá, chi mee-ni nchúhú cue tée ní cachí-gá sá cáháⁿ ndáá-ndí sá ní ndoto-gá, chi ní xíndecu ndíhi-ndí-gá, te ní xihí ní xexi-ndí ndíhi-gá, núu cáháⁿ ndáá-ndí sá ní ndoto-gá. ⁴² Te ní cachí-gá sá nchúhú quíhíⁿ-ndí cùñaha-ndí xii ñáyiú sá méé Yá Ndiöxí ní táuchíuⁿ-gã sá Jèsús cada ndáá-gá cuèchi nchaa ñáyiú ndècu vívú ndíhi cuèchi nchaa ñáyiú ní xihí. Te ducaⁿ ni xáhaⁿ Yá Ndiöxí xii Jèsús, te ñⁿ ni ducaⁿ ní cachí Jèsús cáháⁿ-ndí. ⁴³ Te cue tée ní cáháⁿ tnúhu Yá Ndiöxí ndéé sanaha ní cáháⁿ-güedé sá quixí Jèsús, te ní cachí-güedé sá ncháá ñáyiú na quíndáá iní ñáhá xii Jèsús, te cada càhnu iní-gá nchaa cuèchi-yu —càchí té Pèlú xáhaⁿ-dē xií-yu.

Ní quexio Espíritú Yá Ndiöxí ní ngúndecu ndíhi cue ñáyiú ñá túú cùu ñáyiú isràél

⁴⁴ Te mei òré cáháⁿ-dē ndédóho-yu ní quexio Espíritú Yá Ndiöxí ní ngúndecu ndíhi

nchaa ñáyiú-án. ⁴⁵ Te cue téé israhél cuáhán ndihí té Pèlú, cue téé ní sándáá iní tnúhu Jèsús ní cuñúhu vñhi-güedé sá ñí quexìo Espiritú Yá Ndiöxí ní ngúndecu ndihí-yu, chi cuendá sá ñà díú ñáyiú israhél cúu-yu núu xíáⁿ ní cuñúhu-güedé. ⁴⁶ Te ní cutnùní sá ñí quexìo Espiritú Yá Ndiöxí ní ngúndecu ndihí-yu, chi ní ngüíta-yu càháⁿ-yu tnúhu sá dácàhu iní ñáhá Espiritú-gá, tnúhu sá ñà túú xìní-yu càháⁿ-yu. Te ní ndacáⁿ táhü-yu núu Yá Ndiöxí cuendá nchaa sá ñí quide-gá.

⁴⁷ Te dättnùní ní xáhaⁿ tē Pèlú:

—Vitna te cuandute ñáyiú ní natuha ichi Xítohó Jesucristú chi sa ndècu ndihí-yu Espiritú Yá Ndiöxí dättná cuiní-ndó ndècu ndihí nchoo, núu xíáⁿ vá cúú càchí dava-gá ñáyiú sá vā cúú cuanduté-yu —càchí-dé xāhaⁿ-dē xii-yu.

⁴⁸ Te dättnùní ní xáhaⁿ-dē xii ñáyiú:

—Vitna te cuandute-ndo, te òré-án te cacunehe-ndo Xítohó Jesucristú —càchí-dé xāhaⁿ-dē xii-yu.

Te dättnùní ní càháⁿ ndàhú-yu núu tē Pèlú cundecu ndihí ñaha-dē xii-yu ñí úú nduu.

11

Té Pèlú ní caní-dé cuèndú núu ñáyiú sándáá iní tnúhu Jèsús ñuú Jerusàlén

¹ Te cue téé ní táuchíúⁿ Jèsús dacuàha ñaha xii ñáyiú tnúhu-gá, ndihí cue ñáyiú ní sándáá iní tnúhu-gá, ñáyiú ndècu dístritú Júdeá ní níhí-yu tnúhu sá ñáyiú ñà túú cùu ñáyiú israhél ní sándáá iní-yu tnúhu Yá Ndiöxí. ² Te òré ní ndexìo té Pèlú ñuú Jerusàlén, te ñáyiú israhél ñáyiú ní cachí sá cáda nchaa nacuáa ní càháⁿ ndí Moisés ní satnuhu ñáhá-yu xii-dé. ³ Te ní xáhāⁿ-yu xii té Pèlú:

—¿Ná cuendá ní sáháⁿ-n ndéé ndiáçāⁿ ní càháⁿ ndihí-n ñáyiú-āⁿ, te ñà túú quidè-yu dättná quidè nchòo-i? Te ní sáháⁿ-n yacáⁿ ní xexi-n ndihí-yu —càchí-yu xāhāⁿ-yu xii-dé.

⁴ Te té Pèlú ní caní-dé cuèndú nacuáa ní cuu núu ñí sáháⁿ-dē, te xāhaⁿ-dē:

⁵ —Ní xíndecu-í ñuú Jòpé. Te òré càháⁿ ndihí-í Yá Ndiöxí, te ní dácótó ñaha-xi xii-í sá vèxi cuuⁿ ñí dóó cáhnú àndiu, te ndütu ndi cumí xíquí-xi, te ní ngava-xi núu ndécú-í.

⁶ Te ní xíndéhé vāha-í, te ní xíní-ínchaa quiti yòdo núu-xi. Te ñí xichi yòdo quiti cúmí

sáhá-xi, te ñí xichi yòdo quiti dééⁿ, te ñí xichi yòdo cóo, te ñí xichi yòdo quiti ndava.

⁷ Te ní tecú dóho-í càháⁿ ñí sá càháⁿ, te càchí-xi: “Pèlú, ndacuíñí cahni-n ndēda-ni càa quiti-a caxi-n-di”, cachí sá ñí càháⁿ-án.

⁸ Te ní xáhaⁿ-í: “Vá cáhni-í-di chi càchí tnúhu sá sánú ichi ñaha xii nchúhú ñáyiú israhél sá vā cúú càxi-ndí nchaa quiti-a”, xāhaⁿ-í.

⁹ Te ní tecú dóho-í càháⁿ-ni tucu núu ñínu, te càchí sá càháⁿ-án: “Vá cúú càchí-n sá vā cúú càxi-n-di, chi mee Yá Ndiöxí ní cachí-gá sá díú nchaa quiti-áⁿ cuu caxi-o”, càchí sá càháⁿ-án. ¹⁰ Te ducaⁿ ñí càháⁿ sá ñí càháⁿ-án ùní xito, te dättnùní cuándaá dóó-āⁿ ndihí nchaa quiti-áⁿ andiu. ¹¹ Te òré-ni ní quexìo úní cue téé vehe núu ndécú-í.

Te cue téé-án ñí tendaha ñaha ñí tē ñuú Cèsareá nándücu ñaha-güedé xii-í. ¹² Te mee Espiritú Yá Ndiöxí ní cachí-xi sá quihíⁿ-í ndihí-güedé, te ní cachí-xi sá ñà túú nā caní iní-í. Te tnàhá ñíu cue téé ndècu iha ní sáháⁿ ndihí ñaha-güedé xii-í, te nchaa-ndí ní sáháⁿ-ndí vehe té Còrneliú ñuú Cèsareá.

¹³ Te ní caní-dé cuèndú nacuáa ní cuu ní sáháⁿ ñí espíritú xínú cuèchi núu Yá Ndiöxí vehe-dé, te ní quihu-xi ndéé xití vehe-dé, te ní xáhaⁿ-xi xii-dé: “Tendaha-n cuè téé na quihíⁿ-güedé ñuú Jòpé quingana-güedé ñí tē nàni Xímú, àdi Pelú chi úú diu-dé. Te candeca ñaha-güedé quixi. ¹⁴ Te téé-án cachí tnúhu-dé nása cada-n nánihí tãhú-n ndihí ñadihí-n, ndihí landú-n, ndihí nchaa ñáyiú xínu cuechi vehe-n”, duha ní xáhaⁿ espíritú-án xii té Còrneliú. ¹⁵ Te òré ní ngüíta-í càháⁿ ndihí-í-yu ní quexìo Espiritú Yá Ndiöxí ní ngúndecu ndihí-yu dättná ní quide-xi cútnáhá ní taxi Yá Ndiöxí Espiritú-gá ndéé díhna ní ngúndecu ndihí nchoo. ¹⁶ Te ní ndacu iní-í nacuáa ní càháⁿ Xítohó Jesucristú, te duha ní cachí-gá: “Té Juáá ní xóo dacuandute-dé ñáyiú, dico yuhú sãñaha-í Espiritú Yá Ndiöxí cundecu ndihí-yu”, duha ní cachí-gá. ¹⁷ Te Yá Ndiöxí ní sãñaha-gã Espiritú-gá cundecu ndihí ñáyiú ñà túú cùu ñáyiú israhél dättná ní quide-gá cútnáhá ní sándáá iní-ó tnúhu Jèsús, núu xíáⁿ vá càchí-í sá vā cúú càda-í ñí sá cuiní Yá Ndiöxí cada-í —càchí té Pèlú xāhaⁿ-dē xii-yu.

¹⁸ Te sátá dúcáⁿ ñí xáhaⁿ tē Pèlú, te ñà túú-gã ná tnúhu ni càháⁿ-yu, te ío ní cudíí

iní-yu nchaa nàcuáa ní quide Yá Ndiöxí, te ní xítnàhá-yu:

—Tnàhá nchaa ñáiyu ñá túú cùu ñáiyu isràél naníhí tàhú-yu núu na dàñá-yu nchaa sá cuèhé sá dúhá quidé-yu, chi ducaⁿ cuìni Yá Ndiöxí cunduu —càchí-yu xítnàhá-yu.

Ñáiyu sàndáa iní tnúhu Jèsús ñuú Antiòquia

¹⁹ Te sáta nǐ sahní-güedé té Tèvá, te ní cuíní-güedé cada úhú-güedé nchaa ñáiyu ní sàndáa iní-xi tnúhu Jèsús, te ní xité nuú-yu ndi tnahá ñⁿ ñⁿ ñuú. Te davá-yu cuáháⁿ-yu ndéé distritú Fènicia ndihí distritú Chìpré ndihí ñuú Antiòquia. Te ní cáháⁿ-yu tnúhu Jèsús núu mee-ni ñáiyu isràél, te ñá ní xítnúhu-yu dava-gá-yu. ²⁰ Te dava-gá ñáiyu distritú Chìpré ndihí ñáiyu ñuú Cìrené ní sáháⁿ-yu ñuú Antiòquia. Te ñá díú mèe-ni ñáiyu isràél ní cáháⁿ ndihí-yu, chi tnàhá ñáiyu ñá túú cùu ñáiyu isràél ní xáháⁿ-yu tnúhu Jèsús. ²¹ Te ní chindee ñàha-gá xii ñáiyu càháⁿ tnúhu-gá, te vài-gá-yu ní sàndáa iní-yu-gá chi ní tuhá-yu ichi-gá.

²² Te ñáiyu ndècu ñuú Jerusalén ñáiyu ní sàndáa iní tnúhu Jèsús ní níhí-yu tnúhu nàcuáa ní cuu, núu xíáⁿ ní tendàhá-yu té Bèé cuáháⁿ-dé ñuú Antiòquia. ²³ Te òré ní quexìo té Bèé, te ní xíní-dé nàcuáa ní quide ñàha-gá xii-yu sá nǐ naníhí tàhú-yu, núu xíáⁿ ío ní cudíí iní-dé. Te ní dácáhu iní ñàhá-dé, te ní xáháⁿ-dè:

—Ío nducu ndèe-ndo cada-ndo nchaa sá càchí Yá Ndiöxí cada-ndo —càchí-dé xàháⁿ-dè xii-yu.

²⁴ Te té Bèé cúú-dé ñⁿ tée váha iní-xi, te ndècu ndihí-dé Espiritú Yá Ndiöxí, te ío sàndáa iní-dé tnúhu Jèsús. Te vài vihi ñáiyu ní tuhá-yu ichi-gá.

²⁵ Te dàtnùní cuáháⁿ té Bèé ñuú Tàrsú cuánúndúcú-dé té Sàulú. ²⁶ Te òré ní naníhí ñàhá-dé, te ndèca ñàha-dé cuáháⁿ ñuú Antiòquia, te yàcáⁿ ní xíndecu-güedé ñⁿ cuía ndihí ñáiyu ní sàndáa iní tnúhu Jèsús, te vài-yu ní dácuáhá ñàha-güedé tnúhu-gá. Te ñⁿ-ni ñuú Antiòquia ní dánání ñàhá-yu Cristiànú xii nchaa ñáiyu sàndáa iní tnúhu Jèsús.

²⁷ Te ndéé dàvá-áⁿ nǐ quee ñⁿ úú cue tée cáháⁿ tnúhu Yá Ndiöxí ñuú Jerusalén cuáháⁿ-güedé ñuú Antiòquia. ²⁸ Te ñⁿ-dé

nání-dè Àgabú, te ní chindee ñàha Espiritú Yá Ndiöxí xii-dé, te ní sáháⁿ-dé núu nchaa ñáiyu sàndáa iní tnúhu-gá, te ní xáháⁿ-dè xii-yu sá quíxí ñⁿ tnamá ñihí ñuyíú. Te ducaⁿ nǐ cuu sáta nǐ ngúnutnǐ té Clàudiú tée yíndaha cuèhé nàcióⁿ. ²⁹ Núu xíáⁿ nchaa ñáiyu sàndáa iní tnúhu Jèsús ñuú Antiòquia ní ndatnúhu-yu sá chíndèé-yu nchaa ñáiyu sàndáa iní tnúhu-gá ndécú distritú Jùdeá cuèndá vá ndóhó vihí-yu docó. Te nàcuáa ní níhí-yu, te ducaⁿ nǐ sacáⁿ tnáhá-yu. ³⁰ Te ní tacá díhúⁿ-áⁿ, te nèhe té Bèé ndihí té Sàulú cuáháⁿ, cuáha-güedé cue tée yíndaha ñáiyu sàndáa iní tnúhu-gá.

12

Sáta nǐ xíhí té Jàcobó, te ní ngava té Pèlú vecaá

¹ Te ndéé dàvá-áⁿ nǐ ngüita té Hèrodés tée yíndaha ñàha xii ñáiyu isràél ní quide úhú-dé ñⁿ úú ñáiyu sàndáa iní tnúhu Yá Ndiöxí. ² Te ní táuchíúⁿ-dè ní tnǐ-güedé té Jàcobó ñaní té Juáa, te ní sahní ñàha-güedé ndihí machití. ³ Te ío ní cudíí iní dava ñáiyu isràél cuèndá sá nǐ sahní ñàha-güedé xii té Jàcobó, núu xíáⁿ ní tendaha tùcu té Hèrodés sandàdú-dé ní sáháⁿ tnǐ tucu-güedé té Pèlú. Te ducaⁿ nǐ quide-dé cútnàhá ní xóo vico ní xexí-yu pàa sá ñà túú yìhí levadurá. ⁴ Te ní naníhí-güedé té Pèlú, te ní tnǐ ñàha-güedé ndécá ñàha-güedé cuáháⁿ vecaá. Te té Hèrodés ní táuchíúⁿ-dè cuáháⁿ sáhúⁿ ñⁿ sandàdú cundeé-güedé té Pèlú. Te ní xáháⁿ-dè:

—Cundeé-ndó ndi cúmí ndi cúmí-ndó tée-áⁿ —càchí-dé xàháⁿ-dè xii-güedé.

Te té Hèrodés ní sani iní-dé queñuhu-dé té Pèlú vecaá òré ná yàha vico cuèndá cahni ñàha-güedé cáháⁿ-dè ní cùu. ⁵ Te ní xíhí-ni té Pèlú vecaá, te ní xíndé cuaa ñàha sandàdú xii-dé. Te cue ñáiyu sàndáa iní tnúhu Yá Ndiöxí ío ní xícaⁿ táhú-yu núu-gá cuèndá sá ñà túú nǐ cada ñàha-güedé xii-dé.

Yá Ndiöxí ní dácăcu-gá té Pèlú vecaá

⁶ ñⁿ niú-gá quihí té Pèlú vecaá ní cùu, te nduu tnèé tauchiúⁿ té Hèrodés quíhíⁿ sandàdú queñuhu ñàha-güedé xii-dé vecaá cuèndá quini nchaa ñáiyu nása cada ñàha-güedé ní cùu. Te té Pèlú cáá-dè xidí-dé

xítí vecaá, te ndi ndùú dúcúⁿ ndáhá-dě ndútú càdená, te xio xio òñi-dé ndécú sàndadú, te dava-gá sandàdú xindeé-güedé yèhe vecaá. ⁷ Te ní quexìo ìⁿ espíritú xínú cuèchi núú Yă Ndiöxí xítí vecaá núú cáá tē Pèlú xidí-dé, te uuⁿni ní dáyèhé-xi xítí vecaá, te ní danguìhi ñaha-xi xii-dé, te xăhaⁿ-xi xii-dé:

—Yáchí, ndàcòo —càchí-xi xăhaⁿ-xi xii-dé.

Te ní ndacòo-dé, te ncha cadèná ndútú dúcúⁿ ndáhá-dě ní nandáxí. ⁸ Te ní xăhaⁿ tùcu espíritú-áⁿ xii-dé:

—Yáchí, nucuíhnu dóo-n, te ndíhu-n chàu-n —càchí-xi xăhaⁿ-xi xii-dé.

Te ní ndíhu nuu-dé dóo-dě, te ní xăhaⁿ tùcu espíritú-áⁿ:

—Candixi dóo-n, te na quèhíⁿ-ó —càchí-xi xăhaⁿ-xi xii-dé.

⁹ Te té Pèlú ní chinchícúⁿ-dé espíritú-áⁿ, te ñá ní cùtnuní iní-dé ñu ndáá ìⁿ espíritú xínú cuèchi núú Yă Ndiöxí ducaⁿ quide àdi ñáhá, te dàcoto ñaha-xi xii-dé ní sani iní-dé. ¹⁰ Te nděndaha-ni-dě espíritú-áⁿ cuáháⁿ ní yáha-dé nàcuáa xĩnutnĩ sandàdú, te ta yăha-gá-dé núú ndécú dàva-gá-güedé. Te ní sáá-dé ndéé yuyèhe núú ndèdí caá nàcuáa ní yáha ichi sá cuáháⁿ ndéé xítí ñuú, te ní nacaáⁿ méé yèhe-áⁿ, te ní quee-dé cuáháⁿ-dé ndihí espíritú-áⁿ. Te ní tnahá-dé ìⁿ tnuú, te yàcáⁿ ní dándõo ñaha espíritú-áⁿ xii-dé. ¹¹ Te dătnùní ní nene váha saní núú-dě, te ní cutnùní iní-dé, te ní cachí-dé:

—Ndáá sá Yă Ndiöxí ní tendaha-gă espíritú-áⁿ ní quixi-xi ní dácăcu ñaha-xi xii-í cuèndá sá và cáhni ñaha té Hèrodés. Te dava ñăyiu isràel ío ní cudí^í iní-yu cuèndá sá ní cuiní té Hèrodés cahni ñaha-dě xii-í —duha ní cachí-dé sá ní cutnùní iní-dé.

¹² Te sá ní cutnùní iní-dé sá ní cácu-dé, te cuáháⁿ-dé vehe ìⁿ ñaha năni Mariá năná tē Juáá, àdi Mácú chi úú òñi-dé, te xíaⁿ ndécú vâi-yu càháⁿ ndihí-yu Yă Ndiöxí. ¹³ Te té Pèlú ní quexìo-dé ndéé yuyèhe ní dácásáⁿ-dě, te ní quixi ìⁿ xíchí nání Ròdé ní quixi ndehe-xi nă cúú ñăyiu dàcasaⁿ. ¹⁴ Te ní nucúhuⁿ ndudú-xi sá díú tē Pèlú, te ní cudí^í víhí iní-xi, dico ñá ní nacaáⁿ-xi yuyèhe. Te ní quene cunu-xi cuáháⁿ ngúñaha-xi xii-yu sá nútnĩ tē Pèlú yuyèhe ndaa quehé. ¹⁵ Te

ñá ní sàndáá iní-yu tnúhu ní cáháⁿ-xi, te xăhăⁿ-yu xii-xi:

—¡Ná tnúhu vîhi cáháⁿ-õⁿ xíchí lùcú! —càchí-yu xăhăⁿ-yu.

Te xăhaⁿ-xi să ndáá nútnĩ-dé, te xăhăⁿ-yu:

—Ñá díú tē Pèlú chi espíritú sá xító ñaha xii-dé cúú să càháⁿ —càchí-yu xăhăⁿ-yu xii-xi.

¹⁶ Te òré ducaⁿ xĩtnáhá-yu, te té Pèlú ní dácásáⁿ tùcu-dé yuyèhe. Te ní sáháⁿ-yu ní nacaáⁿ-yu yuyèhe, te ní xiní-yu sá díú tē Pèlú, te ní cuñúhu vîhí-yu. ¹⁷ Te ní quide-dé ndaha-dé núú-yu cuèndá cadí-yu yuhú-yu. Te ní ngúita-dé ní cani-dé cuèndú nàcuáa ní quide ñaha Yă Ndiöxí xii-dé sá ní dácăcu ñaha ìⁿ espíritú xínú cuèchi núú-gă xii-dé vecaá, te ní xăhaⁿ-dě xií-yu:

—Cúu-ndo tē Jàcobó ndihí dava-gá ñăyiu sàndáá iní tnúhu Jèsús nàcuáa ní quide ñaha Yă Ndiöxí xii-í —càchí-dé xăhaⁿ-dě xií-yu.

Te sá ní dúcáⁿ ñi xăhaⁿ-dě, te ní quee-dé cuáháⁿ-dé ìngá xichi.

¹⁸ Te sá ní túndaá, te ní ngúita ncha sandàdú càháⁿ ìⁿ càháⁿ ìⁿ-güedé, te xĩtnaha-güedé:

—Ñá túú-gă té Pèlú yíhí vècaá, ¿te nása cada-o-í? —càchí-güedé xĩtnaha-güedé.

¹⁹ Te té Hèrodés ní tendaha-dě titnĩ sandàdú cuáháⁿ-güedé cuánúndúcú ñaha-güedé, te ñá ní năníhí ñáhá-güedé xii-dé. Te dătnùní ní cana-dé sandàdú cue tē ní xindeé ñáhá xii tē Pèlú, te ní tenà ñáhá-dě xii-güedé, te ní xăhaⁿ-dě xii dava-gá cue sandàdú-dé:

—Cahni-ndo cuè tē-áⁿ —càchí tē Hèrodés xăhaⁿ-dě.

Te dătnùní ní quee tē Hèrodés distrítú Jùdeá cuáháⁿ-dé ñuú Cèsareá, yàcáⁿ ní ngúndecu-dé.

Ní xihí té Hèrodés

²⁰ Té Hèrodés ní cudééⁿ-dě núú ñăyiu ñuú Tirú ndihí núú ñăyiu ñuú Sidón. Te xíaⁿ ní ndatnúhu-yu ní cuu ìⁿnuu tnúhu-yu, te ní xicá-yu cuáháⁿ-yu cuáháⁿ ndatnúhu ndihí ñáhá-yu xii-dé, te ní ndatnúhu ndihí-yu té Blástú. Te tē-áⁿ cúú-dě chiuⁿ quide-dé núú tē Hèrodés, te ní chindee tnúhu ñaha-dě xií-yu, chi ní cáháⁿ ndáhú-yu núú tē Hèrodés sá và cádá ùhú ñáhá-dě xií-yu. Te

ducaⁿ nĩ quidé-yu cuendá ñuú té Hèrodés-án quée sã xéxi-yu. ²¹ Te ní xáhaⁿ tẽ Hèrodés ná nduu quĩhĩⁿ-yu ndatnúhu ndihĩ ñaha-dẽ xií-yu, te nduu-ãⁿ nĩ quíunuu-dé ñⁿ dóo vãha, ñⁿ sá sácũhnu tée tàxi tnuní. Te ní ngóo-dé núú xilé váha, xilé sá sácõo nchihĩ tée tàxi tnuní, te ní ngũíta-dé ní cáháⁿ sãhú-dé dóho-yu. ²² Te uuⁿni ní cuáá-yu te càchĩ-yu:

—¡Tée-a càháⁿ-dé dico ñá díú tẽe ñuyíú-a cùu-dé chi ndiõxí cúú-dẽ! —càchĩ-yu xĩtnàhá-yu.

²³ Te ñuú-ni òrè-áⁿ nĩ yáha ñⁿ espíritú xínú cuèchi núú Yã Ndiõxí, te ní sãñaha-xi cuèhé xii té Hèrodés. Te ducaⁿ nĩ tnahá-dé chi mee-dẽ ñá ní xáhaⁿ-dẽ sá ñãyiú cùu-dé, te ní cáháⁿ-yu sá ndiõxí cúú-dẽ. Te nchìto-gá-dé ní sanú ñáhá tìndácú xii-dé, te dàtnuní ní xihĩ-dé.

²⁴ Te ío tĩtnĩ xichi ní sáháⁿ ñãyiú sàndáá iní tnúhu Yã Ndiõxí ní cáháⁿ-yu tnúhu-gá, te ío chítú-yu ní sàndáá iní-yu tnúhu-gá.

²⁵ Te té Bèè ndihĩ té Sàulú ní ndihĩ chiùⁿ-güedé, te ní ndee-güedé ñuú Jerusálén cuáháⁿ-güedé ndihĩ té Juáá, àdi Mácú chi úú ñuú-dé.

13

Té Bèè ndihĩ té Sàulú cuáháⁿ-güedé dácuàha-güedé ñãyiú tnúhu Yã Ndiõxí nchaa ñuú xícá

¹ Te ñuú Antiòquia ndécú ñⁿ úú cue tée càháⁿ tnúhu Yã Ndiõxí núú nchaa ñãyiú ní sàndáá iní-xi tnúhu-gá. Te ndècu tucu ñⁿ úú cue tée cùu mestrú dácuàha ñaha-güedé xií-yu tnúhu-gá. ñⁿ-dé nání-dẽ Bèè, te ñⁿ-dé nání-dẽ Xĩmú, te té Xĩmú-áⁿ xáhaⁿ-güedé Nègrú chi tnuu-dẽ. Te ñngá-dé nání-dẽ Lùciú, te tée-áⁿ cúú-dẽ tée ñuú Cirené. Te ñngá-dé nání-dẽ Sàulú, te ñngá tucu-dé nání-dẽ Manàén. Te té Manàén-áⁿ ndihĩ té Hèrodés tée cùu gobiernú Galileá ío váha ní xóo cáháⁿ ndihĩ tñaha-güedé cútnàhá ní cuu lĩhli-güedé. ² Te ñⁿ nduu ñá túú nã ní xèxi ñãyiú ní sàndáá iní tnúhu Yã Ndiõxí cuendá mee-ni-gã ní cáháⁿ ndihĩ-yu, te ní xáhaⁿ Espíritú Yã Ndiõxí xií-yu:

—Tendaha-ndo tẽ Bèè ndihĩ té Sàulú quĩhĩⁿ-güedé dava-gá ñuú cada-güedé chiùⁿ

tahu-í, chi ducaⁿ cuiní-í cunduu —càchĩ Espíritú-gá xáhaⁿ-xi xií-yu.

³ Te ní cáháⁿ ndihĩ tucú-yu Yã Ndiõxí, te ñá túú tñahí ná ní xèxi tucú-yu, te ní sacáⁿ ndodo-güedé ndaha-güedé díquí tẽ Bèè ndihĩ té Sàulú. Te sátá dúcáⁿ nĩ quide-güedé, te ní quide ndee iní ñáhã-yu xii-güedé.

Té Bèè ndihĩ té Sàulú cuáháⁿ-güedé distritú Chìpré cáháⁿ-güedé tnúhu Yã Ndiõxí

⁴ Te té Bèè ndihĩ té Sàulú ní quee-güedé cuáháⁿ-güedé cuendá ducaⁿ cuiní Espíritú Yã Ndiõxí cunduu sá cáca cùu-güedé dava-gá ñuú, te ní quexìo-güedé ñuú Selèuciá, te yàcáⁿ ní quée-güedé bàrcú cuáháⁿ-güedé distritú Chìpré. Te ñuú-áⁿ cáá xití làmár chi ndècu ñuhu yichí xití ndute.

⁵ Te ní quexìo-güedé meí ñuú Salàminá, te ní quene-güedé bàrcú, te ní xica-güedé cuáháⁿ-güedé nchaa veñúhu ñãyiú isràél càháⁿ-güedé tnúhu Yã Ndiõxí. Te cuáháⁿ ndihĩ-güedé té Juáá cuendá chindee ñaha-dé xii-güedé. ⁶ Te ní tñi-güedé ichi cuáháⁿ-güedé ñuú Páfós cáá ndaa ñngá xio Chìpré, te yàcáⁿ ní naníhí tñahá-güedé ndihĩ ñⁿ tée isràél nání-dẽ Barjèsús, te tée-áⁿ xìní-dé cada ndùu-dé, te càchĩ-dé sá càháⁿ-dé tnúhu Yã Ndiõxí dico ñá ndàá.

⁷ Te tée-áⁿ quidé chiùⁿ-dé ndihĩ té Sèrgiú, àdi Páblú chi úú ñuú-dé, te cùu-dé gobiernú Chìpré, te ío túha-dé. Te ní cana-dé té Bèè ndihĩ té Sàulú, chi cuiní-dé cundedóho-dé tnúhu Yã Ndiõxí. ⁸ Te tée quide nduu-áⁿ ñã ní dàña-dé cáháⁿ-güedé tnúhu-gá, chi ñá ní cuiní-dé sá tẽ cùu gobiernú-áⁿ tuha-dé ichi Yã Ndiõxí. Te ducaⁿ nĩ quide té Barjèsús, tée xáhaⁿ-güedé Èlimás. ⁹ Te tñahá tucu té Sàulú ndécú úú ñuú-dé chi xáhaⁿ tucu-güedé Páblú, te ndècu ndihĩ-dé Espíritú Yã Ndiõxí. Te ní xíndéhé ñĩ ñáhã-dé xii tée quide nduu-áⁿ.

¹⁰ Te ní xáhaⁿ-dẽ:

—Yòhó, chi dàtná quidé yùcu ñávãha quide-n chi mee-ni dándahú-n ñãyiú. Yòhó cúú-n dèhe sácũhná, chi nchaa tnúhu váha cuiní Yã Ndiõxí cáháⁿ-yu, te yòhó ñá dàñá-n. ¹¹ Te vitna quiní-n nàcuáa cunduu, chi taxi Yã Ndiõxí ñⁿ castiú xii-n chi vá cútnuní-gá núú-n càca cuu-n ñⁿ úú nduu —càchĩ-dé xáhaⁿ-dẽ xii tée quide nduu-áⁿ.

Te òré ducaⁿ nǐ xáhaⁿ tǐ Pǎblú xii-dé, te òré-ni ní cuaa-dé, te ñá túú ní cùtnuní tnahí-gá núu-dě, te ní xóo nducu-nǎ-dé ñáyiú ní xóo cuita nehe ñaha xii-dé. ¹² Te tée cùu gobiernú ní xiní-dé nàcuáa ní quide té Pǎblú, te ío ní cuñúhu-dé. Te ní tnahá iní-dé tnúhu Jèsús, núu xǎⁿ ní sándáa iní-dé.

Té Pǎblú ndihi té Bèé ndécú-güedě ñuú Antiòquia Pìsidiá

¹³ Te té Pǎblú ndihi dava-gá cue tée xica cuu ndihi-dé ní quee-güedé bàrcú, te ní quee-güedé ñuú Páfós cuáháⁿ-güedé ñuú Pèrgé, te ñuú-áⁿ yíndèhu-xi distritú Pànfilíá. Te té Juàá ní nacuico-dě ní dándóo ñaha-dě xii-güedé cuánuhú-dé ñuú Jerusalén. ¹⁴ Te dava-gá-güedé ní quee-güedé ñuú Pèrgé cuáháⁿ-güedé ñuú Antiòquia, te Pìsidiá yíndàha-xi ñuú-áⁿ. Te nduu xíndetatú-yu, te ní sáháⁿ-güedé veñúhu ñáyiú isràél, te ní ngóo-güedé xití veñúhu. ¹⁵ Te cue tée ndècu veñúhu ní queheⁿ-güedé tutú yódó tnùní nchaa tnúhu sá nǐ chídó tnùní ndíi Moisés ndihi tutú yódó tnùní nchaa tnúhu sá nǐ chídó tnùní dava-gá cue tée ní xóo cáháⁿ tnúhu Yá Ndiòxí ndéé sanaha, te ní dácúhá-güedé ní xíndedóho cue ñáyiú, te dàtnùní cue tée yíndaha veñúhu-áⁿ nǐ xáhaⁿ-güedé xii té Pǎblú ndihi dava-gá-güedé:

—Nchòhó cue tée cùu ñaní tnahá-ndí, te núu cuíní-ndó cáháⁿ-ndó tnúhu Yá Ndiòxí, te cuu cáháⁿ-ndó tnavíí cuendá cutúha-yu —càchí-güedé xǎhaⁿ-güedé.

¹⁶ Te té Pǎblú ní ndacuíñí-dé, te ní ndacani-dé ndaha-dé cuendá cadí-yu yuhú-yu te cundedóho-yu tnúhu cáháⁿ-dé, te ní xáhaⁿ-dě:

—Te nchòhó ñáyiú quide nchaa nacúaa càháⁿ Yá Ndiòxí ndihi nchaa nchòhó ñáyiú isràél, cundedóho-ndo nchàa-ndo ñⁿ tnúhu na càháⁿ-í-a. ¹⁷ Te cuèi ndéé sanduu te cuèi vitna chindee ñaha-ni Yá Ndiòxí xii nchaa ñáyiú isràél, te ní nacáxi ñaha-gǎ xii-yu te ní chindee ñaha-gá cuendá cáyá-yu, chi cuíní-gá sá cúu vǎi-yu, te ducaⁿ nǐ quide-gá cútnahá ní xíndecú-yu nàcióⁿ Ègiptú. Te dàtnùní ní dácăcu ñaha-gǎ xii-yu ñuú-áⁿ, chi mee-gǎ nchaa ndăcu-gǎ quidé-gǎ. ¹⁸ Te ní xíndecú-yu ñⁿ xichi núu ñá túú tnahí sàcúndecu ñáyiú údico

cuía, te xití údico cuía-ǎⁿ nǐ cundee iní-gá nchaa sá nǐ quidé-yu. ¹⁹ Te Yá Ndiòxí ní chindee ñaha-gá xii ñáyiú isràél, te ní dánáa-yu úsá nàcióⁿ, chi cuendá ní cuíní-gá cuu cuendá-yu ñuhú-áⁿ. ²⁰ Te dàtnùní ní cachí Yá Ndiòxí sá díú-ní cuè tée cùchiuⁿ taxi tnuní-güedé nchaa ñáyiú, te ducaⁿ nǐ quide-güedé dàtná cúmí ciendú dava cuía. Te sátá xǎⁿ, te ní xíndecu té Sàmuel tée ní cáháⁿ tnúhu Yá Ndiòxí. ²¹ Te dàvǎ-áⁿ nǐ cuíní ñáyiú isràél sá cündecu ñⁿ tée quíndaha ñaha-dé xii-yu, te Yá Ndiòxí ní cachí-gá sá tǐ Sàúl quíndaha-dě-yu, te tée-áⁿ nǐ cuu-dé déhe té Cís, te té Benjamín tée ní xíndecu ndéé sanaha-gǎ ní cuu ñaní tnahá-dě. Te té Sàúl ní xíndaha-dě ñáyiú údico cuía. ²² Te Yá Ndiòxí ñá ní cuíní-gá cundecu-ni-dé quíndaha-dě ñáyiú, chi ní cuíní-gá sá tǐ Dàvíí ndíhu ndaha-dě cue ñáyiú isràél, te ní cachí-gá: “Ío váha ní tnahá iní-í nàcuáa quide té Dàvíí déhe tée Isàí, te cada-dé nchaa nàcuáa cúñaha-í xii-dé”, duha ní cachí Yá Ndiòxí —càchí té Pǎblú xǎhaⁿ-dě xii-yu.

²³ Te ní xáhaⁿ tucu té Pǎblú:

—Díu-ni ñaní tnahá tǐ Dàvíí cúu Jèsús. Te Yá Ndiòxí ní tendaha-gǎ Jèsús ní quixi-gá ñuyú-a cuendá nchaa ñáyiú isràél ná quíndáa iní ñáhá xii Jesús naníhí tǎhú-yu, chi ducaⁿ nǐ cachí Yá Ndiòxí cunduu. ²⁴ Te cútnahá vátá ngüíta-gá Jèsús cáháⁿ-gá tnúhu Yá Ndiòxí, te ní cáháⁿ té Juàá núu ñáyiú isràél sá xíní ñuhu-xi dañá-yu nchaa sá cuéhé sá dúhá, te cuanduté-yu. ²⁵ Te sa ta cùyatni-ni-gá cuú-dé, te ní xáhaⁿ-dě xii-yu: “Nchòhó càchí-ndó sǎ yǔhú cúu-í Crístú Yáá ndétú-ndó dico ñáhá, chi ñá díú yǔhú cúu-í Crístú, chi davitna quixi Crístú Yáá tendaha Yá Ndiòxí quixi ñuyú-a. Te yúhú cúu-í ñⁿ tée duuⁿ duuⁿ ñá túú tàú nandaxi cuèdicó chàu-gá dico quide-í chiúⁿ-gá”, duha ní cáháⁿ te Juàá —càchí té Pǎblú xǎhaⁿ-dě xii-yu.

²⁶ Te ní xáhaⁿ tucu té Pǎblú:

—Cundedóho tucu-ndo ñngá tnúhu na càháⁿ-í. Nchòhó tnahá-ndó cùu-ndo ñaní tnahá ndíi Abrahám, te xíní-ndó sǎ Yá Ndiòxí cúnú-gá. Te díu-ni-gá cuíní-gá sá ncháa-ndó cundedóho-ndo tnúhu-gá, chi cùu-xi tnúhu sá càháⁿ nàcuáa naníhí tǎhú-ndó. ²⁷ Te nchaa ñáyiú ndècu ñuú

Jerusalén ndihi nchaa cue tée cùnunu ñá ní cùtnuní iní-yu ndihi-güedé sá Yă Ndiöxí ní tendaha-gă Jèsús ní quixi-gă ñuyíú-a. Te ñá ní sãha-yu cuendá sá díú Jèsús ní cacunehe cue tée ní cáháⁿ tnúhu Yă Ndiöxí ndéé sanaha cuëi ní dácuáhă-yu tnúhu-gă veñúhu-yu ndi tnahá úná nduu, nduu ndetàtú-yu. Te ní cachí-yu sá ndècuéchi Jèsús, te ní xáhăⁿ-yu sá cáhni ñàha-güedé xii-gă. Te xiăⁿ sa ñaha cue tée ní xóo cáháⁿ tnúhu-gă ndéé sanaha sá dúcáⁿ càháⁿ-yu. ²⁸ Te cuëi ñá túú nă ní quide-gă te ní xáhăⁿ-yu xii té Pilatú tée cùu gobiernú sá táuchiuⁿ-dé cahni ñaha-güedé xii-gă. ²⁹ Te xiăⁿ núu ní sata caa ñaha-güedé xii-gă núu cùrúxí. Te ní quide-güedé nchaa nàcuáa ní chídó tnùní cue tée ní cáháⁿ tnúhu Yă Ndiöxí ndéé sanaha. Te sátá nì xihí-gă, te ní nunehe ñaha-güedé xii-gă núu cùrúxí, te nchìdo ñaha-güedé cuáhăⁿ, te ní chihi ñaha-güedé ìⁿ xití yaú. ³⁰ Te Yă Ndiöxí ní dándótó-gă Jèsús. ³¹ Te titní xito ní sáhăⁿ Jèsús núu ndécú ñáyiú ní xica cuu ndihi-gă, ñáyiú ní quee distritú Galileá ní sáhăⁿ-yu ndihi-gă ñuú Jerusalén. Te vitna nchaa ñáyiú-áⁿ xáhăⁿ-yu xii dava-gă ñáyiú isràel nàcuáa ní cuu ní ndoto-gă.

³² Te nchúhú càháⁿ-ndí nàcuáa cada-ndo nánihí tãhú-ndó, chi Yă Ndiöxí ní xáhăⁿ-gă xii cue ñani tñáhă-ó nì xindecu ndéé sanaha sá téndaha-gă Déhe-gă Jèsús quixi-gă ñuyíú-a. ³³ Te ní quixi-gă ní xihí-gă, te ní dándótó ñaha Yă Ndiöxí xii-gă, te núu xiăⁿ naníhí tãhú-ó núu na quindáá iní-ó-gă. Te ìⁿ tée ní cáháⁿ tnúhu Yă Ndiöxí ndéé sanaha ní chídó tnùní-dé núu sãlmú cúú úú nàcuáa ní cáháⁿ Yă Ndiöxí ní xáhăⁿ-gă xii Déhe-gă, te duha ní xáhăⁿ-gă: “Yòhó cúú-n Déhe-í, te vitna cutnùní iní ñáyiú sá yùhú cúú-í Tãtá-n”, duha ní xáhăⁿ-gă xii Jèsús. Te ñu-ni ducaⁿ nì chídó tnùní tée ní cáháⁿ tnúhu-gă ndéé sanaha. ³⁴ Te ìngá xichi tucu núu tütú-gă ní chídó tnùní ìⁿ tée ní xindecu ndéé sanaha nàcuáa ní xáhăⁿ-gă xii Déhe-gă, te duha ní xáhăⁿ-gă: “Mee-ni sã vãha cada ñaha-í dàtná ní xii-í té Dávíí”, duha ní xáhăⁿ-gă. Te ducaⁿ nì chídó tnùní tée ní xindecu ndéé sanaha nàcuáa ní cáháⁿ Yă Ndiöxí, chi òré ní xihí Jèsús te ní dándótó ñaha-gă cuendá sá vã tíú yìqui cuñú-gă. ³⁵ Te núu xiăⁿ duha ní chídó tnùní ìⁿ tée

ní xindecu ndéé sanaha núu librú Sãlmú nàcuáa ní xáhăⁿ-dē xii-gă: “Vá dáñá-n sã tíú yìqui cuñú Déhe-n chi ío vãha quide-gă”, duha ní chídó tnùní tée ní xindecu ndéé sanaha —cächí té Pãblú xáhăⁿ-dē xii-yu.

³⁶ Te xáhăⁿ tucu-dé:

—Te té Dávíí ní quide-dé nchaa chiúⁿ ní tãhú Yă Ndiöxí cada-dé, te dàtnùní ní xihí-dé. Te ní chindúxi ñaha-güedé xii-dé yatni nàcuáa yìndúxi cue ñani tñáhă-dē ndéé sanaha-gă, te xiăⁿ nì téhyú yìqui cuñú-dé. ³⁷ Te Jèsús chi ñá ní téhyú yìqui cuñú-gă, chi ní dándótó ñaha Yă Ndiöxí xii-gă. ³⁸ Te cuñí-í cachí tnúhu-í xii-ndo cuendá cutnùní iní-ndo nchaa-ndo sá cadá càhnu iní Yă Ndiöxí nchaa cuéchi-o, chi ní xihí Jèsús cuendá naníhí tãhú-ó. ³⁹ Te nchaa ñáyiú na quindáá iní ñáhă xii Jesús te cada càhnu iní-gă nchaa sá ñà túú vãha ní quidé-yu, chi núu mee-ni tnúhu ní chídó tnùní ndíi Moisés ná quindáá iní-yu te vá naníhí tãhú-yu. ⁴⁰⁻⁴¹ Te ío coto-ndo mēe-ndo cuendá sá vã yãha-ndo dàtná ní cachí Yă Ndiöxí yãha cue ñáyiú ñá túú ní quide vãha ní xindecu ndéé sanaha. Te nàcuáa ní cáháⁿ-gă ní chídó tnùní ìⁿ tée ní cáháⁿ tnúhu-gă ndéé sanaha, te duha ní xáhăⁿ-gă xii-yu dàvá-áⁿ:

Cundedóho nchaa nchòhó ñáyiú cuèhé yuhu-xi na càháⁿ-í ìⁿ tnúhu te quini-ndo nă cuñúhu-ndo, yúhú quidè-í vài núú sã ío vãha vitna ndècu-ndo ñuyíú-a,

te cuëi na còo ñáyiú cachí tnúhu xii-ndo nàcuáa ndúu nchaa sá vãha-áⁿ, dico nchòhó vá quindáá iní-ndó,

te sá dúcáⁿ càda-ndo vá quindáá iní-ndó, te dàcuíta nihnu-ndo mēe-ndo.

Duha ní xáhăⁿ-gă xii-yu te ducaⁿ nì chídó tnùní tée ní cáháⁿ tnúhu-gă ndéé sanaha —cächí té Pãblú xáhăⁿ-dē xii-yu.

⁴² Te òré ní ndee té Pãblú veñúhu ñáyiú isràel ndihi cue tée xica cuu ndihi-dé, te ní cáháⁿ ndàhú ñáyiú yìhi veñúhu núú-dē sá quihíⁿ-dé núú ùná nduu, te ñu-ni tnúhu ní cáháⁿ-dé cáháⁿ tucu-dé òré quexìo-dé.

⁴³ Te sátá nì túhú veñúhu-yu, te vài ñáyiú isràel ndihi ñáyiú ní chitnahá ñáhă xii-yu nchìcúⁿ nihnu quide nàcuáa quidé-yu càháⁿ ndihí-yu Yă Ndiöxí cuáhăⁿ ndihí-yu té Pãblú

ndihi té Bèé. Te ní xáhaⁿ-güedě xií-yu sá vǎ dáñá ndèé-yu canchicúⁿ nihnú-yu tnúhu sá cǎháⁿ nàcuáa quide Yá Ndiöxí sá cúú-xí-yu.

⁴⁴ Te núú ùná nduu, nduu ndètatú-yu ní quexìo vai vihi ñáyiú, chi nihìi ñuú ní quexìo ndedóho-yu tnúhu Yá Ndiöxí. ⁴⁵ Te cuèndá sá ìo vǎi ñáyiú ní quexìo, núú xiǎⁿ ní cuu cuédú ìní ñáhá ñáyiú isràél xii té Pǎblú, te ní xícuèhé ñáhǎ-yu xii-dé. Te ní xáhǎⁿ-yu xii-dé sá dándàhú ñáhá-dě xií-yu ndihi tnúhu cǎháⁿ-dé. ⁴⁶ Te té Pǎblú ndihi té Bèé ñá túú ní yùhú ñáhá-güedě xií-yu. Te ní xáhaⁿ-güedě:

—Xìni ñuhu-xi díhna-gá nchòhó ñáyiú isràél cǎháⁿ ndihi-ndí tnúhu Yá Ndiöxí, te mee-ndo ñǎ cuìní-ndo cùndedóho-ndo. Te sá dúcáⁿ quide-ndo, te vǎ nánihí tàhú-ndo, te ni vǎ cǎháⁿ-gá-ndí tnúhu Yá Ndiöxí núú-ndo, dico cǎháⁿ-ndí núú dàva-gá ñáyiú cuèi ñá díú ñáyiú isràél cúú-yu, ⁴⁷ chi ducaⁿ ñí táuchíúⁿ Yá Ndiöxí cada-ndí. Te ní cachí-gá:

Cuìní-í cundecu-ndo dàtná ìⁿ tée yòtnuú ñuhú cundecu-ndo cǎháⁿ-ndo tnúhu-í núú nchàa ñáyiú ñá túú cùndihi-ndo ñáyiú ndècu nihii ñuyíú, te naníhí tàhú-yu, duha ní cǎháⁿ-gá —cachí té Pǎblú ndihi té Bèé xáhaⁿ-güedě xií-yu.

⁴⁸ Te ñáyiú ñá túú cùu ñáyiú isràél ìo ní cudíi ìní-yu sá dúcáⁿ ñí cǎháⁿ-güedé, te ní xítnáhá-yu sá ìo váha cuáháⁿ tnúhu Yá Ndiöxí. Te mee Yá Ndiöxí sa nàha-gá nándi cùu ñáyiú naníhí tàhú, te ñu-ni ñáyiú-áⁿ ñí sándáá ìní-yu. ⁴⁹ Te nchaa xichi xiǎⁿ ñí sáháⁿ-yu ní cǎháⁿ-yu tnúhu-gá. ⁵⁰ Te cue tée isràél ní ndatnúhu-güedé ndihi cue tée cùnuu, ndihi cue ñáyiú dìhí cùnùu, te ñáyiú dìhí-áⁿ ñá túú tnàhí cùmáñi-yu veñúhu. Te ní xáhaⁿ-güedě sá cadá ùhú-yu té Pǎblú ndihi té Bèé, te dàtnùní cuícúⁿ ñáhǎ-yu xii-güedé, te ducaⁿ ñí quidé-yu. ⁵¹ Te ní casaⁿ ñuhu té Pǎblú ndihi té Bèé sáhá-güedé ní naquidi-güedé tícá chúhmá ñí tníi sáhá-güedé. Te ducaⁿ ñí quide-güedé cuèndá cutnùní ìní-yu sá ñá túú ní quide váha-yu. Te dàtnùní ní quee-güedé cuáháⁿ-güedé ñuú Ìconiú. ⁵² Te ñáyiú ní sándáá ìní-xi tnúhu Jèsús ìo váha

ní cuu ìní-yu cuèndá sá ñí naníhí tàhú-yu, te nchaa-yu sa ndècu ndihí-yu Espíritú Yá Ndiöxí.

14

Té Pǎblú ndihi té Bèé ndécú-güedě ñuú Ìconiú

¹ Te ní quexìo té Pǎblú ndihi té Bèé ñuú Ìconiú. Te ní sáháⁿ-güedé veñúhu ñáyiú isràél, te ìo váha ní cǎháⁿ-güedé tnúhu Yá Ndiöxí, te vǎi ñáyiú isràél ndihi ñáyiú ñá túú cùu ñáyiú isràél ní sándáá ìní-yu tnúhu-gá. ² Te dava ñáyiú isràél ñá ní sándáá ìní-yu, te ní cǎháⁿ cuèhé-yu cuèndá té Pǎblú ndihi té Bèé cuèndá sá vǎ quèndáá ìní ñáyiú ñá túú cùu ñáyiú isràél. ³ Te ní xíndecu-güedé titní nduu, te ñá túú tnàhí ni yùhú-güedé ní dácuáhá-güedé ñáyiú tnúhu Yá Ndiöxí. Te mee-gǎ ní chindee ñàha-gá ní quide-güedé titní núú sǎ vǎ yòo tnàhí ndàcu cada, te ìo ní cuñúhu-yu. Te ducaⁿ ñí quide-gá cuèndá cutnùní ìní-yu sá ndàá cǎháⁿ-güedé sá mée-gǎ ìo cùu ìní ñáhá-gǎ xií-yu, te naníhí tàhú-yu núu na quèndáá ìní-yu tnúhu-gá. ⁴ Te ní quee dava ñáyiú ñuú Ìconiú, davá-yu cùndihí-yu ñáyiú isràél ñáyiú ñá túú sándáá ìní tnúhu Jèsús. Te davá-yu cùndihí-yu cue tée ní táuchíúⁿ Jèsús cǎháⁿ tnúhu-gá. ⁵ Te ñáyiú isràél ndihi dava-gá ñáyiú ñá túú sándáá ìní-xi ní cuu ìⁿnuú-yu ndihi cue tée cùnuu sá cǎñi-yu-güedé, te cuáha yúú ñáhǎ-yu xii-güedé. ⁶ Te té Pǎblú ndihi té Bèé ní níhí-güedé tnúhu sá cuìní-yu canihá-yu, núu xiǎⁿ dayuhu ñí quee-güedé cuáháⁿ-güedé ñuú Lìstrá ndihi ñuú Dèrbé. Te ndi ndùú ñuú-áⁿ yíndèhu-xi Licaoniá. Te ní sáháⁿ-güedé dava-gá ñuú lìhli càa yatni xiǎⁿ. ⁷ Te nchaa ñuú-áⁿ ñí cǎháⁿ-güedé tnúhu Jèsús.

Ñuú Lìstrá ní sáhayúú ñáhǎ-yu xii té Pǎblú

⁸ Te ñuú Lìstrá ndécú ìⁿ tée yacua, mee-ni nùcòo-dé chi ducaⁿ tnàhí càa-dé ní cacu-dé. ⁹ Te ndèdóho-dé tnúhu cǎháⁿ té Pǎblú, te ní cutnùní ìní té Pǎblú sá ìo sándáá ìní tée yacua-áⁿ sǎ Yá Ndiöxí cada tátna ñaha-gǎ xii-dé, núu xiǎⁿ ní xíndéhé ñàha váha té Pǎblú xii-dé. ¹⁰ Te té Pǎblú ní cǎháⁿ níhi-dé, te ní xáhaⁿ-dě:

—Ndacuíñí cunutñí váha-n —càchí-dé xáhaⁿ-dě.

Te ní ndacuíñí cunu-dé te ní xica-ni-dé. **11** Te òré ní xiní-yu sá tē Pāblú ní quide tátna-dé tēe yacua-ǎⁿ, te nchaá-yu ní cáháⁿ-yu tnúhu mēe-yu tnúhu Licàoniá. Te ní cáháⁿ níhi-yu, te xitnàhá-yu:

—Cue tēe-ǎⁿ sànuu sá ñáyiú cùu-güedé dico ñáhá, chi ndiöxí cúu-güedé te ní quexiö-güedé ñuyíú-a —càchí-yu xitnàhá-yu.

12 Te ní cachí-yu sá tē Bèe cúu-dē ndiöxí dánàní-yu Jüpitér, te tē Pāblú cúu-dē ndiöxí dánàní-yu Mèrcuriú, chi cuendá tēe-ǎⁿ cúu-dē tēe cáháⁿ. **13** Te càa ñⁿ veñúhu yuhu ñúú-ǎⁿ núu quide càhnú-yu ndiöxí sá dánàní-yu Jüpitér. Te dútú yíndàha veñúhu-ǎⁿ ndécá-dē ñⁿ úú ndicutu cuáháⁿ quehé veñúhu, te ñúhu itá dúcúⁿ-güedé. Te cue quití-ǎⁿ cahni-dé cada càhnu-dé ndihí-yu tē Bèe ndihí tē Pāblú ní cùu, chi ducaⁿ quidé-yu quide cahnú-yu ndiöxí-yu. **14** Te tē Bèe ndihí tē Pāblú ní níhi-güedé tnúhu nàcuáa sàni iní-yu cadá-yu, te ní ndátá-güedé dóo-güedé cuendá cutnùní iní-yu sá ñā tnàhá iní-güedé nàcuáa sàni iní-yu cadá-yu. Te xìnu-güedé cuánguihu-güedé tnuú-yu, te níhi ní cáháⁿ-güedé, te xáhaⁿ-güedé:

15 —¿Ná cuendá ducaⁿ cuíní-ndó càda-ndo? Te ñi-yu-ni tnàha ñáyiú-ndo cùu-ndí, dicó-ni tnúhu Yá Ndiöxí véxi-ndí dacuàha ñaha-ndí xii-ndo cuendá sá vā cadá-gá-ndó nàcuáa quide-ndo, te quindáá iní-ndó Yá Ndiöxí, chi ñⁿdi-ni Yá Ndiöxí ndécú. Te ñi-yu-gá ní cadúha-gá andíu ndihí ñuyíú-a ndihí lámár ndihí nchaandi túhú sá ío ñuyíú-a. **16** Te ndéé sanaha ñí dáñá Yá Ndiöxí ní quidé-yu nàcuáa cuáháⁿ iní mēe-yu. **17** Te ní xóo cada-gá sá vāha cuendá cutnùní iní-yu sá ío váha iní-gá. Te ñi-yu-gá dácùuⁿ-gá dáú, te tàxi-gá sá nchító-ó chi xító-gá nchaa tatá xítú-ó, te xiǎⁿ cúdíí iní-ó ndècu-o ñuyíú-a —càchí tē Pāblú ndihí tē Bèe xáhaⁿ-güedé xii-yu.

18 Te cuēi ducaⁿ ñí xáhaⁿ-güedé nchaa tnúhu-ǎⁿ, dico ío úhú ní sándáá iní-yu ñā ní sàhní-yu ndicutu-ǎⁿ chi cuendá ducaⁿ tnàhí quidé-yu sàhní-yu ndicutu òré quide càhnú-yu ndiöxí-yu.

19 Te ñuú Antiòquiá ndihí ñuú Ìconiú xíndecu dava ñáyiú isràél, te ní quee-yu cuáháⁿ-yu ñuú Lìstrá núu ndécú tē Pāblú. Te xiǎⁿ ñí quexiö-yu te ní xáhǎⁿ-yu xii ñáyiú dii ñúú xiǎⁿ sá cáhní-yu tē Pāblú. Te ní sáha yúú ñáhǎ-yu xii-dé, te ní cáhǎⁿ-yu sá ñí xihí-dé, te ní tñi ñaha-güedé xii-dé, te tañuhu ñaha-güedé xii-dé cuáháⁿ ñⁿ xio yuhu ñúú ní sá dáquéné ñaha-güedé. **20** Te ní quexiö cue ñáyiú sándáá iní tnúhu Jèsús núu cātùu-dé-ǎⁿ, te ní nadúcúⁿ ndéé ñáhǎ-yu xii-dé, te ñini xínutñi-yu-ǎⁿ ñí ndacóo-dé cuánuhú ndihí ñaha tucu-dé xii-yu xití ñuú. Te nduu tñéé-ǎⁿ ñí ndee-dé ndihí tē Bèe cuáháⁿ-güedé ñuú Dèrbé.

21 Te ní cáháⁿ-güedé tnúhu Yá Ndiöxí ñuú-ǎⁿ, te ío vāi ñáyiú ní sándáá iní-yu tnúhu-gá. Te dàtnùní ní quee-güedé cuáháⁿ tucu-güedé ñuú Lìstrá, ndihí ñuú Ìconiú, ndihí ñuú Antiòquiá. **22** Te ní xáhaⁿ-güedé xii-yu sá vā dáñá ñihnú-yu tnúhu Jèsús. Te sá dúcáⁿ ñí cáháⁿ-güedé, te vñi-gá ní cudíí iní-yu cadá-yu nàcuáa cuíní Yá Ndiöxí cadá-yu, te ní xáhaⁿ-güedé:

—Dacuití cùndecu-o ñuyíú-a ndoho-o, te dàtnùní ducaⁿ te nacuaca ñaha Yá Ndiöxí xii-o —càchí-güedé xáhaⁿ-güedé xii-yu.

23 Te ní sáháⁿ-güedé ndi tnahá ñⁿ ñⁿ xichi núu ndécú ñáyiú dācuaha tnúhu Yá Ndiöxí, te ní taxi ndecu-güedé cue tēe quindaha ñaha xii-yu, te ní cáháⁿ ndihí-güedé Yá Ndiöxí, te ñā túú tnàhí ná ní xèxi-güedé cuendá sá ñí cáháⁿ ndihí-güedé-gá. Te ní xáhaⁿ-güedé sá Yá Ndiöxí coto ñaha-gǎ xii-yu chi ñi-yu-ni-gá ní sándáá iní-yu.

Té Pāblú ndihí tē Bèe cuáháⁿ tucu-güedé ñuú Antiòquiá Siríá

24-25 Te dàtnùní ní quee tē Pāblú ndihí tē Bèe cuáháⁿ-güedé, ní yáha-güedé distritú Pisidiá. Te ní quexiö-güedé ñuú Pèrgé, xiǎⁿ ñí cáháⁿ-güedé tnúhu Jèsús. Te ñuú-ǎⁿ yíndèhu-xi Panfilíá. Te dàtnùní cuáháⁿ-güedé ñuú Àtaliá. **26** Te yacáⁿ ní quee-güedé bàrcú cuánuhú tucu-güedé ñuú Antiòquiá. Te ñuú-ǎⁿ cúu-xí ñuú núu ñí xicáⁿ táhú-yu núu Yá Ndiöxí cuendá sá chíndèe ñaha-gá xii-güedé chiuⁿ quide-güedé. Te cuendá sá ñí ndihí chiuⁿ-güedé nchaa ñuú núu ñí sáháⁿ-güedé,

núu xiǎⁿ cuánuhú-na-güedé. ²⁷ Te ní ndexìo-güedé ñuú-áⁿ, te ní cana-güedé nchaa ñáyiú sàndáá iní tnúhu-gá, te ní cani-güedé cuèndú núu-yu nchaa nàcuáa ní cuu núu ní sáháⁿ-güedé, te xáhaⁿ-güedé: “Yá Ndiöxí ío ní chindee ñàha-gá xii-ndí ní cáháⁿ-ndí tnúhu-gá núu ní sáháⁿ-ndí, te mee-gǎ ní quide sá tnàhá ñáyiú ñá túú cùu ñáyiú isràél ní xíndedóho-yu tnúhu-gá cuèndá quíndáá iní-yu”, càchí-güedé xáhaⁿ-güedé xii-yu. ²⁸ Te vài nduu ní xíndecu-güedé ñuú Antiòquia ndihí nchaa ñáyiú ní sàndáá iní tnúhu Jèsús.

15

Ní nataká ñáyiú sàndáá iní tnúhu Jèsús ñuú Jerusàlén

¹ Te ní quee ñⁿ úú cue téé distritú Jùdeá cuáháⁿ-güedé ñuú Antiòquia, te ní sáá-güedé, te ní xáhaⁿ-güedé xii ñáyiú sàndáá iní tnúhu Jèsús sá ñuu vá cuáha-güedé sèñá ñⁿ nchaa cue téé dàtná ní cachí ndí Moisés, te vá nánihí tàhú-güedé. ² Te sá dúcáⁿ ní cáháⁿ cue téé-áⁿ, te ní ngüíta té Páblú ndihí té Bèé ní tenàá-güedé cue téé-áⁿ, chi dandàhú ñáhá-güedé cuíní-güedé ní cùu. Te nchaa ñáyiú sàndáá iní tnúhu-gá ní cachí-yu sá quíhíⁿ té Páblú ndihí té Bèé ndihí ñⁿ úú-gá-güedé ñuú Jerusàlén. Te yàcáⁿ cada-güedé ñⁿ jùndá ndihí mee-ni cuè téé ní táuchíúⁿ Jèsús cáháⁿ tnúhu-gá, ndihí cue téé yìndaha ñáyiú sàndáá iní tnúhu-gá ñuú-áⁿ, te jùndá-áⁿ cada ndáá-güedé tnúhu ní cáháⁿ cue téé ní sáá ñuú Antiòquia.

³ Te nchaa ñáyiú sàndáá iní tnúhu-gá ní quide ndee iní ñáhá-yu xii-güedé, te ní tñi-güedé ichi cuáháⁿ-güedé. Te ní yáha-güedé distritú Fèniciá ndihí distritú Sàmariá, te yàcáⁿ ní cani-güedé cuèndú nása ní cuu ní tuha ñáyiú ñá túú cùu ñáyiú isràél ichi Yá Ndiöxí, te ní cudíí víhí iní nchaa ñáyiú ní xíndedóho-áⁿ.

⁴ Te té Páblú ndihí té Bèé ní ndexìo-güedé ñuú Jerusàlén, te ío ní cudíí iní-yu sá ní ndexìo váha-güedé. Te ndècu dava-gá cue téé ní táuchíúⁿ Jèsús dácuaⁿ ñaha xii-yu tnúhu-gá, ndihí cue téé yìndaha ñaha xii-yu, ndihí dava-gá ñáyiú sàndáá iní tnúhu-gá, te ní cani-güedé cuèndú núu-yu nàcuáa

ní quide Yá Ndiöxí ní chindee ñàha-gá xii-güedé ní quide-güedé chùⁿ-gá. ⁵ Te ndècu ñⁿ úú cue téé ní tuha ichi Yá Ndiöxí, te cue téé-áⁿ cúu-güedé cue téé fariséú, te ní ndacuíñí-güedé, te ní xáhaⁿ-güedé:

—Dacuití xini ñuhu-xi sá cuáha-güedé sèñá ñⁿ cue téé cùmání cue téé ñá túú cùu ñáyiú isràél, te cùñaha-ndo sá ná cádá-güedé nchaa nàcuáa ní chídó tnùní ndí Moisés —càchí cue téé cùu fariséú-áⁿ xáhaⁿ-güedé xii-güedé.

⁶ Te cue téé ní táuchíúⁿ Jèsús dácuaⁿ ñaha xii ñáyiú tnúhu-gá, ndihí cue téé yìndaha ñáyiú sàndáá iní tnúhu-gá ní quide-güedé jùndá cuèndá ní ndatnúhu-güedé nása cunduu. ⁷ Te vài vihi tnúhu ní cáháⁿ-güedé. Te té Pèlú ní ndacuíñí-dé, te ní xáhaⁿ-dè xii-güedé:

—Nchòhó cue téé ndècu ndihí-í ichi Xítohó Jesucristú, chí cùndedóho ñⁿ tnúhu na càháⁿ-í-a. Sa nàha-ndo sá ní cachí Yá Ndiöxí sá díu-í cáháⁿ-í tnúhu Jèsús núu ñáyiú ñá túú cùu ñáyiú isràél cuèndá sá quíndáá iní-yu, te naníhí tàhú-yu. ⁸ Dico Yá Ndiöxí sa nàha-gá nása càa iní ñⁿ ñáyiú. Te cùtnuní iní-ó sá cúu iní ñáhá-gǎ xii cue ñáyiú ñá túú cùu ñáyiú isràél, chi ní sáñaha-gǎ Espiritú-gá ndécú ndihí-yu dàtná cuíní-ndó ní taxi-gá ndécú ndihí nchoo. ⁹ Chi Yá Ndiöxí ñⁿ nuu-ni cùu iní ñáhá-gǎ xii-o nchàa-o ndihí cue ñáyiú ñá túú cùu ñáyiú isràél, chi tnàhá-yu ní xócání-gǎ nchaa sá cuèhé sá dúhá ní xóo cadá-yu ndéé òré ní sàndáá iní-yu Jèsús. ¹⁰ ¿Te ná cuèndá nchòhó cuíní-ndó càda ñáyiú ní sàndáá iní tnúhu-gá ñⁿ sá ñá tnàhá iní-gá sá cádá-yu? Te cuíní-ndó dàndoho-ndó-yu. Te ní nchòo te ní cue ñaní tnàhá-ó ní xíndecu ndéé sanaha ñá ní ndàcú-yu cadá-yu nchaa xíáⁿ. ¹¹ Te vá dúcáⁿ cáháⁿ-ndó, chi sa nàha-ndo sá Yá Ndiöxí ní cundàhú iní ñáhá-gǎ xii-o, te dío ducaⁿ ní quide-gá sá nánihí tàhú-ó nchàa-o. Te díu-ni ducaⁿ ní quide-gá ñáyiú ñá túú cùu ñáyiú isràél, te ní naníhí tàhú-yu —càchí té Pèlú xáhaⁿ-dè xii-güedé.

¹² Te dàtnùní té Bèé ndihí té Páblú ní ngüíta-güedé ní cáháⁿ-güedé, te ní xíndedóho-yu nchaa tnúhu ní cáháⁿ-güedé. Te ní xáhaⁿ-güedé xii-yu nàcuáa ní chindee

ñaha Yá Ndiõxí xii-güedé, te ní quide-güedé vai núú sã vã yõ tnàhí ndàcu cada, te ducaⁿ te ní cutnùnì iní ñáyiu ñá túú cùu ñáyiu isràél sá ndáá càháⁿ-güedé. ¹³ Te òré ní ndihì cuèndú ní cáháⁿ-güedé, te té Jàcobó ní xáhaⁿ-dë:

—Nchòhó cue tée ndècu ndihì-í ichi Xítohó Jesucristú, chí cùndèdóho ìⁿ tnúhu na càháⁿ-í-a. ¹⁴ Té Xímú, àdi Pelú chí úú òu-dé, ní cani-dé cuèndú nàcuáa ní quide Yá Ndiõxí ndéé díhna ní dáquée díⁿ-gá ñáyiu ñá túú cùu ñáyiu isràél tnuú nchaa ñáyiu ñá túú ndècu ichi-gá, cuèndá cuìní-gá chiñuhu ñàhá-yu xii-gá. ¹⁵ Te dàtnùnì ní cáháⁿ-dé nàcuáa ní cáháⁿ Yá Ndiõxí ndéé sanaha. Te duha ní chídó tnùnì cue tée ní xóo cáháⁿ tnúhu-gá ndéé sanaha nàcuáa ní cáháⁿ-gá, te duha ní cachí-gá:

¹⁶ Dàtná cuìní-ndó cùu ìⁿ vehe ní sáa te ní ngoyo te dàndaa-güedé xito cùu úú, ducaⁿ sàtnahá-xi cada-xi ìⁿ nduu,

chì ñanì tnàhá ndí Dàvíí ní xóo cáháⁿ ndihì ñàhá-yu xii-í ní cùu, te ní dáña ndéé-yu ichi-í,

te na quixi-í te natuha ñaha tùcú-yu.

¹⁷ Te ducaⁿ te vai ñáyiu ñá túú cùu ñáyiu isràél nandúcú-yu ichi-í te cáháⁿ ndihì ñàhá-yu.

¹⁸ Duha ní cáháⁿ Yá Ndiõxí, te ducaⁿ ní chídó tnùnì cue tée ní xóo cáháⁿ tnúhu-gá ndéé sanaha —càchí té Jàcobó xáhaⁿ-dë xii-güedé.

¹⁹ Te xáhaⁿ tùcu-dé:

—Yúhú càchí iní-í sá vã cúú dàsatú-ó iní nchaa ñáyiu ta sàndáa iní-xi tnúhu Yá Ndiõxí, ñáyiu ñá túú cùu ñáyiu isràél, te ìⁿ úú-ni tnúhu cúñaha-o nàcuáa cada-yu. ²⁰ Dico xini ñuhu-xi daquihíⁿ-ó tùtú cúñaha-o sã vã cáxí-gá-yu nchaa sá nchító-ó ndùu táhú nchaa sá càchí-yu cùu ndióxí-yu. Te cúñaha-o sã vã càháⁿ ndihì cue tée ñadhí te núu ñá díú ñadhí-güedé cúu-yu, te ni cuè ñáyiu dhí vá càháⁿ ndihí-yu tée te núu ñá díú yí-yu cùu-güedé, te vá cáxí-yu cuñú quiⁿ cuèhné, te vá cáxí-yu níñí. ²¹ Te ducaⁿ cúñaha-o, chí ndi tnahá ñuú núú ndécü-yu, te xíndecu ñáyiu isràél dácuahá-yu tnúhu ní chídó tnùnì ndí Moisés, te ndi tnahá nduu ndètatú-yu dàcuahá-yu tnúhu ndí veñuhu-yu —càchí té Jàcobó xáhaⁿ-dë xii-güedé.

²² Te dàtnùnì cue tée ní táuchíúⁿ Jèsús dacuàha ñaha xii-yu tnúhu-gá, ndihì cue tée yíndaha ñáyiu sàndáa iní tnúhu-gá ní cachí-güedé sá ndúcú-güedé ìⁿ úú-gá cue tée quihíⁿ ndihì té Páblú ndihì té Bèè ñuú Antiòquiá, te òu-ni ducaⁿ ní cáháⁿ dava-gá ñáyiu ndècu ichi-gá. Te úú cue tée ní ndúcú-güedé, ìⁿ-dé nání-dë Silás, te ìⁿ-dé nání-dë Jùdás, àdi Barsabás chí úú òu-dé, te cùnuu-güedé ndi ndùú-güedé. ²³ Te ní cadúha nchaa cue tée cùnuu tutú canehe-güedé quihíⁿ, te duha càháⁿ-xi:

“Còvaha díí-ndó nchàa-ndo. Nchúhú cue tée ní táuchíúⁿ Jèsús cáháⁿ-ndí tnúhu-gá, ndihì cue tée yíndaha cue ñáyiu sàndáa iní tnúhu-gá quide ndee iní ñàhá-ndí xii nchòhó cue ñáyiu ndècu ndihì-ndí ichi-gá cuèi ñá díú ñáyiu isràél cúú-ndó. Te nchòhó ñáyiu xíndecu ñuú Antiòquiá, ndihì nchòhó ñáyiu ndècu distritú Sìriá, ndihì nchòhó ñáyiu ndècu distritú Ciliciá, càchí tnúhu-ndí xii-ndo sã ²⁴ ní níhí-ndí tnúhu sá ìⁿ úú cue tée ndècu iha ní quixi-güedé núú ndécú-ndó, te ñá túú chiúⁿ ni tahu-ndí quixi-güedé. Te sá ìⁿ tnúhu ní cáháⁿ-güedé ní xáhaⁿ-güedé xii-ndo sã ngündecu sèña ñi-ndo, te canchicúⁿ nihnu-ndo nchàa nàcuáa ní chídó tnùnì ndí Moisés, te xíⁿ ní sani ìⁿ ní sani úú iní-ndó, chí ñá túú xini-ndó núu ndáa tnúhu càháⁿ-güedé àdi ñá ndáa. ²⁵ Te ní ndatnúhu-ndí nàcuáa cundu sá téndaha-ndí úú cue tée quixi-güedé ndihì té Bèè ndihì té Páblú, cue tée ío cùu iní-ndí, te cue tée-áⁿ cáháⁿ-güedé nàcuáa cáháⁿ-ndí-a. ²⁶ Te òu-ni té Bèè ndihì té Páblú ní sáháⁿ-güedé ní cáháⁿ-güedé tnúhu Xítohó Jesucristú nchaa xichi. Te ndi tnahá cuaháⁿ-güedé cuìní-yu cahni ñàhá-yu xii-güedé. ²⁷ Te tendaha-ndí té Jùdás ndihì té Silás quixi-güedé tnàhá-güedé cachí tnúhu váha-güedé nàcuáa cuaháⁿ tnúhu càháⁿ-ndí. ²⁸ Te òu-ni ducaⁿ càháⁿ-ndí càchí tnúhu-ndí nàcuáa càháⁿ Espiritú Yá Ndiõxí cada-ndo, chí nchúhú vá càháⁿ-ndí sá cáda-ndó nchàa sá ní cáháⁿ ndí Moisés cada ñáyiu, chí ío úhú, te vá yõ ndacu cada. Te vitna na càháⁿ-ndí ìⁿ úú-ni tnúhu nàcuáa cada-ndo. ²⁹ Vã cáxí-ndó sã nchító-ó ndùu táhú nchaa sá càchí ñáyiu cùu ndióxí-yu,

te vá cáxí-ndó ñíñí, te vá cáxí-ndó cùñú quití cuèhné, te vá càháⁿ ndihí cue tée ñadihí te núu ñá díú ñadihí-güedé cúu-yu, te ni cuè ñáyiú ñá díú vá càháⁿ ndihí-yu tée te núu ñá díú yí-yu cùu-güedé. Te núu na càda-ndo nchaa nacuaa càháⁿ-ndí-a, te cada váha-ndo. Te vitna ío cada ndee ñí-ndó nchaa-ndo-na.” Duha ní chídó tñuní-güedé núu tütú ní tendaha-güedé cuáháⁿ.

³⁰ Te ní quide ndee ñí-yu cue tée quíhíⁿ ñuú Antiòquiá, te ducaⁿ te ní xica-güedé cuáháⁿ-güedé. Te òré ní quexio-güedé ñuú-áⁿ, te ní cana-güedé nchaa ñáyiú sàndáá ñí tñuhu Jèsús, te ní sáñaha-güedé tutú xii-yu. ³¹ Te ní dácuáhá-yu tutú ní sáñaha-güedé-áⁿ, te ní cudíí víhí ñí-yu chí ío váha càháⁿ tutú-áⁿ. ³² Te té Jüdás ndihí té Silás tñahá-güedé ní nduu táhu-güedé cáháⁿ-güedé tñuhu sá dácàhu ñí ñáhá Yá Ndiòxí. Te ní xáhaⁿ-güedé vai tñuhu nàcuáa cada-yu, te víhi-gá ní cudíí ñí-yu cada-yu nàcuáa càháⁿ Yá Ndiòxí cada-yu. ³³ Te ní xíndecu-güedé ñí úú nduu ndihí-yu, te dātñuní ní quide ndee ñí ñáhá-yu xii-güedé cuendá sá ñuhú-güedé núu vèxi-güedé, te mee-ni tē Jüdás cuánuhú-dé. ³⁴ Te té Silás ní xáhaⁿ-dē sá vā ñuhú-ni-dé. ³⁵ Te té Pāblú ndihí té Bèé ní ndóo-güedé ní cáháⁿ-güedé tñuhu Yá Ndiòxí ñuú Antiòquiá, te vai-gá tucu ñáyiú Antiòquiá ní cáháⁿ-yu tñuhu-gá.

Xito cùu uú cuáháⁿ té Pāblú càháⁿ-dē tñuhu Yá Ndiòxí núu ñáyiú

³⁶ Te sátá ñí cuu cuéhé nduu, te ní xáhaⁿ tē Pāblú xii té Bèé:

—Na quíhíⁿ-ó nchaa ñuú núu ñí sáháⁿ-ó ñí cáháⁿ-ó tñuhu Yá Ndiòxí cáháⁿ ndihí-o nchaa ñáyiú ní tuha ichi-gá cuendá quini-ó núu ndècu váha-yu —càchí-dé xáhaⁿ-dē.

³⁷ Te té Bèé ní xáhaⁿ-dē sá quíhíⁿ ndihí-güedé té Juáá, àdi Mácú chí úú díu-dé.

³⁸ Dico té Pāblú ñá ní dàña-gá-dé quíhíⁿ té Juáá, chí ní dándõ ñaha-dē xii-güedé cútñahá ní xíndecu-güedé Pāñfilíá, te ní nacuico-dē cuánuhú-dé, te ñá túú-gá ní sáháⁿ ndihí ñaha-dē xii-güedé. ³⁹ Xíáⁿ ní cuu ní tenáá tñahá tē Bèé ndihí té Pāblú, te ichi càa ichi caa ní cuu-güedé. Te té Bèé ndihí té Mácú ní quée-güedé bàrcú cuáháⁿ-güedé

Chìpré. ⁴⁰ Te té Pāblú ní xáhaⁿ-dē xii té Silás sá quíhíⁿ ndihí ñaha-dē, te ñáyiú sàndáá ñí-xi tñuhu Jèsús ní cáháⁿ ndihí-yu Yá Ndiòxí sá chíndèe ñaha-gá xii-güedé. ⁴¹ Te ní xica-güedé cuáháⁿ-güedé te ní yáha-güedé ñíhí distritú Siríá ndihí distritú Ciliciá. Te ní cáháⁿ-güedé tñuhu Jèsús núu nchaa ñáyiú ní sàndáá ñí tñuhu-gá, núu xíáⁿ ío-gá ní cudíí ñí-yu cada-yu nàcuáa càháⁿ Yá Ndiòxí.

16

Tñahá té Timùteú cuáháⁿ ndihí-dé té Pāblú ndihí té Silás

¹ Te té Pāblú ndihí té Silás cuáháⁿ-güedé ñuú Dèrbé ndihí ñuú Lìstrá, te ñuú Lìstrá yacáⁿ ndécú ñí tée nàni Timuteú. Te tée-áⁿ sàndáá ñí-dé tñuhu Jèsús, te tñahá ñáná-dē sàndáá ñí-aⁿ tñuhu-gá, te ñaha is-ràél cúu-áⁿ, te tée griégú cúu tātá-dē.

² Te nchaa ñáyiú ní sàndáá ñí tñuhu-gá ñáyiú ndècu ñuú Lìstrá, ndihí ñáyiú ñuú Ìconiú, nchaa ñáyiú-áⁿ cudíí ñí-yu nàcuáa quide-dé. ³ Te ní cuini té Pāblú sá tñahá té Timùteú quíhíⁿ ndihí-dé dava-gá ñuú, núu xíáⁿ díhna-gá seña ní sáha té Pāblú ñí té Timùteú, chí ñá ní tñahá ñí té Pāblú sá càháⁿ cuéhé ñáyiú is-ràél cuendá té Timùteú. Te nchaa ñáyiú is-ràél ndécú ñuú-áⁿ xini-yu sá tē griégú cúu tātá-dē, te ñá díú tē is-ràél cúu-dē, te xíáⁿ ní sáha té Pāblú seña ñí té Timùteú. ⁴ Te ndí tñahá ñuú ndí tñahá ñuú cuáháⁿ-güedé cáháⁿ ndihí-güedé nchaa ñáyiú ní sàndáá ñí tñuhu Jèsús. Te ní xáhaⁿ-güedé nàcuáa càháⁿ tutú ní cadúha cue tée ní táuchíúⁿ Jèsús dacuàha ñaha xii-yu tñuhu-gá, ndihí cue tée yíndaha ñáyiú sàndáá ñí tñuhu-gá ñuú Jerusálén. ⁵ Te cuendá ducaⁿ ñí sáháⁿ-güedé nchaa ñuú núu ndécú ñáyiú sàndáá ñí tñuhu-gá ní dácuáhá ñaha-güedé xii-yu, núu xíáⁿ tá cùu túha-gá-yu tñuhu Yá Ndiòxí, te vai-gá-yu ní tuhá-yu ichi-gá.

Ní dácótó ñaha-xi xii té Pāblú sá ñí xini-dé ñí tē distritú Macèdoniá

⁶ Te ñá ní dàña Espiritú Yá Ndiòxí quíhíⁿ-güedé cáháⁿ-güedé tñuhu-gá distritú Asiá, núu ní sáháⁿ-güedé distritú Frigíá ndihí distritú Galaciá cáháⁿ-güedé

tnúhu-gá. ⁷ Te ní sáá-güedé yuhu distritú Misiá. Te quíhíⁿ-güedé distritú Bìtiniá ní cùu, dico ñá ní dàña Espiritú Yá Ndiöxí quíhíⁿ-güedé yàcáⁿ. ⁸ Te ní yáha-güedé Misiá, te ní quexìo-güedé ñuú Tròás, te yàcáⁿ ní nanítnáhá-ndí ndihí-dé. ⁹ Te ñí niú ní dácótó-xí núú tē Pāblú sá ñí xiní-dé ñí tē distritú Macèdoniá nútñí-dé, te ní xáhaⁿ tē-áⁿ xii té Pāblú: “Cada ndee iní-n quíhíⁿ-n Macedoniá chi dacuàha ñaha-n nchaa sá xiní-n”, cāchí-dé xáhaⁿ-dē, ní dácótó ñaha-xi xii té Pāblú. ¹⁰ Te cuendá sá dúcáⁿ ñí dácótó ñaha-xi xii té Pāblú núu ní ndatnúhu-ndí quíhíⁿ-ndí Macèdoniá, chi ní cutnùníní iní-ndí sá cáná ñaha Yá Ndiöxí quíhíⁿ-ndí cáháⁿ-ndí tnúhu-gá núú ñáyiú yàcáⁿ.

Té Pāblú ndihí té Silás ndécú-güedē ñuú Fìlipú

¹¹ Te ní quée-ndí bàrcú ñuú Tròás, te cuáháⁿ ndáá-ndí ñuú Samòtraciá, te yàcáⁿ ní quexìo-ndí, te ní yáha-ni-ndí cuáháⁿ-ndí. Te nduu tnēé ní quexìo-ndí ñuú Nèápolis. ¹² Te yàcáⁿ ní quene-ndí bàrcú, te xìca-na-ndí cuáháⁿ-ndí ñuú Fìlipú te ñuú-áⁿ yíndèhu-xi distritú Macèdoniá. Te yàcáⁿ ní cudíi-ndí ní xíndecu tnaa-ndí. Te ñuú Fìlipú-áⁿ ño cùnuu-xi, chi ío chitu ñáyiú rómá ní ngóo-yu. ¹³ Te nduu ndetátú-yu ní quee-ndí ñuú cuáháⁿ-ndí ñí xio yuhu yūte, chi yàcáⁿ sàháⁿ-yu càháⁿ ndihí-yu Yá Ndiöxí. Te òré ní quexìo-ndí, te ní naníhí tnáhá-ndí ndihí mee-ni ñáyiú dihí, te ní cáháⁿ-ndí tnúhu Yá Ndiöxí ní xíndedóho-yu. ¹⁴ Te ndècu ñí ñaha naní Lidiá ní xíndedóho-aⁿ nàcuáa ní cáháⁿ-ndí, te ñaha ñuú Tiàtirá cúú-áⁿ, te dīco-aⁿ dóó muradú, te ío càháⁿ ndihí-aⁿ Yá Ndiöxí. Te dīu-ni mee Yá Ndiöxí ní chindee ñaha-gá ní sándáá iní-aⁿ tnúhu ní cáháⁿ té Pāblú. ¹⁵ Te ní sandute-aⁿ ndihí landú-aⁿ, ndihí nchaa ñáyiú xīnu cuechi núú-aⁿ, te ní cachí-aⁿ xii-ndí:

—Te núu ní cutnùníní iní-ndó sá ñí sándáá ndisa iní-í tnúhu Jèsús, te cundecu tnaa-ndo vèhe-í —cāchí-aⁿ xii-ndí.

Te ní quide yica-aⁿ ñí xíndecu-ndí vehe-aⁿ.

¹⁶ Te ñí nduu ñùhu-ndí ichi cuáháⁿ-ndí núu càháⁿ ndihí-yu Yá Ndiöxí, te ní

naníhí-ndí ñí xíchí ñúhú ìchi, te yìhi ñaha espíritú cùndihí yucu ñávàha xii-xi. Te xíáⁿ ní quide ní cáháⁿ-xi nchaa sá vā yōo tnàhí cùtnuní iní-xi núú nchàa ñáyiú ní sángándihí ñaha xii-xi. Te ñáyiú dīi vèhe-xi xīnu cuechi-xi ío vāi dīhúⁿ ñí ñíhí-yu chi ní chāhu nchaa ñáyiú ní sángándihí ñaha xii-xi. ¹⁷ Te xíchí-áⁿ ñí chinchícúⁿ ñáhá-xí xii-ndí ndihí té Pāblú ndēndaha ñaha-xi cuáháⁿ, te ní cáháⁿ ñíhi-xi xāhaⁿ-xi xii dava-gá ñáyiú:

—Cue tēe-a xīnu cuechi-güedé núu Yá Ndiöxí, chi ío càhnu cuu-gá, te cāchí tnúhu-güedé nása cada-ndo naníhí tàhú-ndó —cāchí-xi xāhaⁿ-xi xii-yu.

¹⁸ Te titní xito ní yáha-ndí ducaⁿ-ni ñí cáháⁿ-xi. Te ñá ní cūndee-gá iní té Pāblú sá dúcáⁿ càháⁿ-xi, núu ní nanchocuíhnu-dé núu nútñí-xi, te ní xáhaⁿ-dē xii espíritú cùndihí yucu ñávàha yìhi ñaha xii-xi:

—Ío càhnu cuu Xítohó Jesucristú, núu xíáⁿ cāchí-í sá xócuñíⁿ-n vā quíhí-gā-n yìqui cuñú xíchí-a —cāchí-dé xāhaⁿ-dē.

Te òré-ni ní quee espíritú cùndihí yucu ñávàha-áⁿ yìqui cūñú-xí.

¹⁹⁻²⁰ Te ñáyiú dīi vèhe-xi xīnu cuechi-xi-áⁿ ñí cutnùníní iní-yu sá vā ñíhí-gá-yu dīhúⁿ cuendá tnúhu càháⁿ-xi, núu ní tníⁿ-yu té Pāblú ndihí té Silás ndécá ñáhá-yu cuáháⁿ núu cuè tēe cūchiuⁿ Romá, te xāhāⁿ-yu xii-güedé:

—Cue tēe-a cūu-güedé cue tēe israhél, te ío dusaⁿ xíquide-güedé ñuú-ó. ²¹ Te cuñí-güedé cada-o nàcuáa quide-güedé, te vā cúú dùcaⁿ cada-o chi ñáyiú nàcióⁿ Rómá cúú-ó —cāchí-yu xāhāⁿ-yu xii cue tēe cūchiuⁿ.

²² Te uuⁿ-ni ní cáháⁿ ncháa-yu, te xāhāⁿ-yu sá ñá túú quide váha té Pāblú ndihí té Silás. Te cue tēe cūchiuⁿ ní cāndeé-güedé dóó tē Pāblú ndihí dóó tē Silás ní ndátá-güedē, te ní táuchíúⁿ-güedē caniha-güedē ndihí tnudíi xii-güedé. ²³ Te ní caniha-güedē, te dātñuní ní chihí ñaha-güedē vecaá. Te ní xáhaⁿ-güedē xii tēe ndēnchito vecaá sá cáda cuèdadú víhí-dē cuendá ná canú-güedé vecaá. ²⁴ Te cuendá sá dúcáⁿ ñí cáháⁿ-güedé, núu tēe ndēnchito vecaá ní dáyàha ñaha-dē ingá cuártú ndécú xítí vecaá, te ní chihí-dé sáhá-güedē yaú nduhu, te ní quide tñí-dé.

25 Te dava niú ní cáháⁿ ndihí té Páblú ndihí té Silás Yá Ndiöxí, te ní xita-güedé ndudú ní quide càhnu ñaha-güedé xii-gá. Te dava-gá cue tée yìhi vecaá ní xíndedóho-güedé nàcuáa ní xita-güedé. 26 Te uuⁿni níhi vîhi ní tnáa ní quidi-xi ndéé cimièntú vecaá, te ní nacaáⁿ nchaa yèhe vecaá, te ní ndihí cadèná ndútú cuè tée yìhi vecaá ní nandáxí. 27 Te ní ndiquíú cúnú ìní téé ndénchito vecaá, te ní quide cuèndá-dé nchií nchaa yèhe vecaá. Te ní tava-dé machití-dé cahni-dé méé-dé ní cùu, chi ní cáháⁿ-dè sá ñí ndihí cue tée yìhi vecaá ní xinu ni cùu. 28 Te té Páblú ní cáháⁿ níhi-dé, te xáhaⁿ-dè xii téé ndénchito vecaá:

—Vá dúcáⁿ càda-n cahni-n mee-n, chi nchaa-ni-ndí yíhí —càchí-dé xáhaⁿ-dè xii téé ndénchito vecaá.

29 Te dàtnùní ní xícáⁿ téé ndénchito vecaá ñuhú, te xinu-dé cuánguïhu xití vecaá núu yíhí tē Páblú ndihí té Silás, te quidi ñaha-ná-xi xii-dé ní quexìo-dé ní ngüñí xití-dé núu-güedé. 30 Te dàtnùní ndécá ñaha-dé xii-güedé ní ndee vecaá, te ní xícáⁿ tnúhú-dé núu-güedé, te xáhaⁿ-dè:

—Nchòhó cachí tnúhu-ndo ñasa cada-í naníhí tàhú-í —càchí-dé xáhaⁿ-dè.

31 Te ní xáhaⁿ-güedé:

—Quindáá ìní-n ndihí ñadihí-n, ndihí landú-n, ndihí nchaa ñáyiu xinu cuechi núu-n tnúhu càháⁿ Xítohó Jesucristú, te naníhí tàhú-ndó —càchí-güedé xáhaⁿ-güedé.

32 Te ní dácuáhá ñaha-güedé xii téé ndénchito vecaá ndihí nchaa ñáyiu ndècu vehe-dé tnúhu Yá Ndiöxí. 33 Te diu-ni òré-áⁿ ñí naquete-dé sátá-güedé núu ñí ñáni, te dàtnùní ní sandute-dé ndihí-yu. 34 Te ndèca ñaha-dé cuáháⁿ vehe-dé ní sáñaha-dé sá ñí xexi-güedé, te ní cudíí víhí ìní téé ndénchito vecaá ndihí nchaa-dé vehe-dé sá ñí tuhá-yu ichi Yá Ndiöxí. Te cuándihu tucu té Páblú ndihí té Silás vecaá.

35 Te nduu tnéé ní xáhaⁿ cuè téé cùchiuⁿ xii poleciá cuáháⁿ-güedé cùu-güedé téé ndénchito vecaá queñuhu-dé úu cue téé cuánguïhu ndedí nduu ìcu núhú-güedé. 36 Te téé ndénchito vecaá ní xáhaⁿ-dè xii téé Páblú ndihí té Silás:

—Cue téé cùchiuⁿ ní cachí-güedé sá queé-ndó ñuhú-ndó, chi ñá túú-gá ná cada-güedé, chi sa ní yáha cuèndá-ndó

—càchí téé ndénchito vecaá xáhaⁿ-dè xii-güedé.

37 Te té Páblú ní xáhaⁿ-dè xii cue téé cùu poleciá:

—Tée rò má cùu-ndí, te vá cùu dùcaⁿ-ní cunduu, chi ní caniha-güedé tnudi xii-ndí, te ní xiní-yu nchaá-yu. Te ñá túú tnàhí ní xicáⁿ tnúhú-güedé ñuu ndáá ndècuéchi-ndí àdi ñáhá, chi cuèndá-ni ní chihi ñaha-güedé vecaá xii-ndí. Te vitna cuíni-güedé dacacu ñaha-güedé núhú-ndí cuèndá sá vā yōo quini ñáhá ñuhú-ndí cáháⁿ-güedé, dico vá cùu dùcaⁿ cada ñaha-güedé xii-ndí. Chí cuáháⁿ cùñaha-ndo na quixi mee-güedé queñuhu ñaha-güedé —càchí té Páblú xii-dé cue poleciá.

38 Te cue téé cùu poleciá cuánuhú-güedé núu ndécú cuè téé cùchiuⁿ, te ní xáhaⁿ-güedé nàcuáa ní cáháⁿ té Páblú. Te sá dúcáⁿ ñí xáhaⁿ poleciá sá tēe rò má cùu-güedé, xiáⁿ ní yùhú-güedé. 39 Te ní sáháⁿ cue téé cùchiuⁿ yehe vecaá, te ní xáhaⁿ-güedé sá cadá càhnu ìní-güedé sá ñí chihi ñaha-güedé vecaá, te ní ndèñuhu ñaha-güedé vecaá. Te ní cáháⁿ ndàhú-güedé núu cuè téé ní xíhi vecaá sá ndéé-güedé ñuu-áⁿ ñuhú-güedé. 40 Te ní ndee-güedé vecaá, te cuáháⁿ-güedé vehe tá Lidiá, te ní ndatnúhu-güedé ndihí nchaa ñáyiu ní sándáá ìní-xi tnúhu Jèsús, te ní xáhaⁿ-güedé xii-yu nàcuáa cada-yu, te ío ní cudíí ìní-yu, te ducaⁿ te ní xica-güedé cuáháⁿ-güedé.

17

Ío dusaⁿ quide ñáyiu ñuu Tesalónica

1 Te ní yáha-güedé ñuu Ànfípólís ndihí ñuu Apòloniá, te ní quexìo-güedé ñuu Tesalónica, te yàcáⁿ cáá ñí veñúhu ñáyiu israél. 2 Te ní sáháⁿ té Páblú veñúhu-áⁿ, chi ducaⁿ tnàhí quide-dé, te ndí tnahá nduu ndètatú-yu ní sáháⁿ-dé veñúhu-áⁿ ùní xito. Te ní ndatnúhu ndihí ñaha-dé xii-yu nàcuáa ní chídó tnùnì cue téé ní xóo cáháⁿ tnúhu Yá Ndiöxí ndéé sanaha. 3 Te ní xitnúhu ñaha-dé nàcuáa ní cáháⁿ cue téé-áⁿ sá Cristú Yá tendaha Yá Ndiöxí quixi ñuyúú-a ndoho víhi-gá, te cuú-gá, te ndoto-gá, te xáhaⁿ-dè:

—Te diu Jèsús cùu Crìstú Yáá ní tendaha Yá Ndiöxí ní quixi ñuyúú-a, núu xiáⁿ

càchí tnúhu-í vitna —càchí té Păblú xăhaⁿ-dê xii-yu.

⁴ Te dava ñáyiú isràél ní sándáá iní-yu tnúhu ní cáháⁿ té Păblú, te ní níhí tnáhă-yu ndihî-dé, ndihî té Silás. Te vâi ñáyiú griégú ñáyiú càháⁿ ndihî Yá Ndiöxí ní sándáá iní-yu tnúhu Jèsús. Te ndècu titní ñáyiú dihî ñáyiú cùnûu, te ñáyiú-áⁿ tnáhă-yu ní sándáá iní-yu tnúhu-gá. ⁵ Te dava ñáyiú isràél ñá túú ní cùu váha iní-yu núú tē Păblú ñûu ní ndúcû-yu cue tēe cuihna iní-xi tuhío-güedé cada chiuⁿ-güedé, chi ndi cuihnu ndi cuihnu-ni-güedé, te nchaá-yu ndihî cue tēe-áⁿ ndi coyo ndi coyó-yu xicuáá-yu. Te sátá ñi tecú dóho dava-gá-yu, te ní sáháⁿ tuhá-yu, te ío ní quide dùsáⁿ-yu. Te nísáháⁿ-yu vehe té Jàsón, te ní quide yicá-yu ní quihu-yu vehe-dé nándúcú-yu té Păblú ndihî té Silás cuendá queñuhu ñáhă-yu núú nchàa ñáyiú. ⁶ Te ñá ní nánihî ñáhă-yu xii-güedé, núú xiăⁿ ní tñiⁿ-yu té Jàsón ndihî ñiⁿ úú-gá cue tēe sándáá iní tnúhu Jèsús, te tàñuhu ñáhă-yu xii-güedé cuáháⁿ núú cuè tēe cùchiuⁿ. Te òré ní quexió-yu núú ndécú cuè tēe cùchiuⁿ, te ní ngüita-yu ní cuáá-yu, te xăhăⁿ-yu xii-güedé:

—Ní quexío cue tēe-ăⁿ ñuú-ó, te ío dusaⁿ quide-güedé, te ducaⁿ-ni quide-güedé nchaa ñuú núú xicá cùu-güedé. ⁷ Te té Jàsón-ăⁿ ní xăhaⁿ-dê sá cúú cùndecu-güedé vehe-dé, te ñá túú sándáá iní-güedé nacuáa càháⁿ té Cèsár tēe yindaha cuéhé nacióⁿ, te càchí-güedé sá ndécú ñngá tēe cùnûu-gá tucu nani-dé Jèsús —càchí-yu xăhăⁿ-yu xii cue tēe cùchiuⁿ.

⁸ Te sátá dúcáⁿ ñi cáháⁿ-yu, te ní cudééⁿ víhí cuè tēe cùchiuⁿ ndihî dava-gá ñáyiú ndédóho. ⁹ Te vâi dihúⁿ ñi xicáⁿ cue tēe cùchiuⁿ núú tē Jàsón ndihî dava-gá cue tēe cuáháⁿ ndihî-dé cuendá té Păblú ndihî té Silás, te núu na ndèe-güedé núhú-güedé, te nacuañaha cuè tēe cùchiuⁿ dihúⁿ-güedé.

Té Păblú ndihî té Silás ndécú-güedé ñuú Bèréa

¹⁰ Te òré ní cundiquiⁿ, te ní quide ndee iní ñáhă ñáyiú sándáá iní tnúhu Jèsús xii té Păblú ndihî té Silás, te ní xica-güedé cuáháⁿ-güedé ñuú Bèréa. Te diu-ni nduu ñi sáa-güedé yacáⁿ ní sáháⁿ-güedé veñuhu ñáyiú isràél. ¹¹ Te váha-gá iní ñáyiú ñuú

Bèréa dàcúxí ñáyiú ñuú Tesalónicá, chi ío ní cudíⁿ iní-yu ní xíndedóho-yu tnúhu Jèsús, te ñiⁿ nduu ñiⁿ nduu ní dácuañă-yu tnúhu ní chídó tnùnî cue tēe ní xóo cáháⁿ tnúhu Yá Ndiöxí ndéé sanaha cuendá cuinî-yu quini-yu núu ndáá càháⁿ té Păblú ndihî té Silás. ¹² Te titní ñáyiú isràél ní sándáá iní-yu tnúhu-gá ndihî titní cue tēe griégú ndihî ñáyiú dihî ñáyiú cùnûu ní sándáá iní-yu. ¹³ Te dava ñáyiú isràél ndécû-yu ñuú Tesalónicá, te ñáyiú-áⁿ ñi níhî-yu tnúhu sá ndécú tē Păblú ndihî té Silás ñuú Bèréa càháⁿ-güedé tnúhu Yá Ndiöxí, núu xiăⁿ ní sáháⁿ-yu ñuú Bèréa ní dácuañdèndé-yu núu nchàa ñáyiú vátá dácuañă-gá. Te ñáyiú-áⁿ ñi sándáá iní-yu tnúhu ndehnde te ní cudééⁿ víhî-yu núu-güedé. ¹⁴ Te òré-áⁿ ñi xăhaⁿ ñáyiú sándáá iní tnúhu-gá xii té Păblú sá quihîⁿ-dé yuhu lámár, te ní xica-dé cuáháⁿ-dé, te té Silás ndihî té Timùteú ní quendóo-güedé ñuú Bèréa. ¹⁵ Te ñiⁿ úú-güedé cuáháⁿ ndihî-güedé té Păblú, te ndèca ñaha-güedé cuáháⁿ ndéé ñuú Atenás, te ní xăhaⁿ té Păblú xii-güedé:

—Núu na nùhú-ndó, te cúu-ndo tē Silás ndihî té Timùteú ná quixí ndihî-ni-güedé nanítnáhă-ndi iha —càchí-dé xăhaⁿ-dê.

Te ní xica-güedé cuánuhú-güedé.

Té Păblú ndécú-dé ñuú Atenás

¹⁶ Te ñuú Atenás ndétú tē Păblú quihîⁿ té Silás ndihî té Timùteú. Te yacáⁿ ní xiní-dé sá ío cuéhé sá càchí-yu cùu ndiöxí-yu ndècu te ñá ndáá sá díú ndiöxí cúú-xí, te xiăⁿ ñá túú ní cùu váha iní-dé, chi ñá tnáhă iní-dé nacuáa quidé-yu. ¹⁷ Te ní sáháⁿ-dé veñuhu ní cáháⁿ ndihî-dé ñáyiú isràél ndihî dava-gá ñáyiú càháⁿ ndihî Yá Ndiöxí. Te ñiⁿ nduu ñiⁿ nduu sáháⁿ-dé xití ñuú càháⁿ-dé tnúhu-gá ndihî nchaa ñáyiú xica cuu yacáⁿ. ¹⁸ Te cue tēe cùu epicureú ndihî cue tēe cùu estoicú, cue tēe-áⁿ ñi ndatnúhu-güedé ndihî té Păblú, te dava-güedé xitnàha-güedé:

—¡Ná tnúhu vihi cáháⁿ tēe lùcú-ăⁿ! —càchí-güedé xitnàha-güedé.

Te dava-güedé xitnàha-güedé:

—Sàni iní-ndí sá càháⁿ-dé cuendá ndiöxí sá vátá quini-gá-ó —càchí-güedé xitnàha-güedé.

Te ducaⁿ x̄itnàha-güedé, chi càháⁿ té Păblú tnúhu Jèsús, te ní cáháⁿ-dé nàcuáa ní dándótó ñàha Yá Ndiöxí xii-gá, xiáⁿ nũu ducaⁿ x̄itnàha-güedé. ¹⁹ Te ndèca ñàha-güedé xii té Păblú cuáháⁿ ìⁿ xichi núu nání Àreópagú, te ní xáhaⁿ-güedé xii-dé:

—Cachí tnúhu ndáá-n năsa cuáháⁿ tnúhu càháⁿ-n, chi na cùtnuní ndáá iní-ndí, ²⁰ chi ducaⁿ-ni càháⁿ-n tnúhu sá ñà túú sàcúndèdóho-ndí, te cuìní-ndí cachí tnúhu ndáá-n năsa ndũu tnúhu-áⁿ cuendá cutnùní váha iní-ndí —càchí-güedé x̄àhaⁿ-güedé xii-dé.

²¹ Te nchaá ñáyiu ñuú Àtenás ndihí ñáyiu dava-gá ñuú, mee-ni tnúhu saa cuìní-yu càháⁿ-yu, nchaá sá vátá cùndèdóho-gá-yu cuìní-yu cundèdóho-yu.

²² Te té Păblú ní ngúnutn̄í-dé núu x̄ixúcu-yu nchaá-yu, te x̄àhaⁿ-dè:

—Nchòhó cue ñáyiu ñuú Àtenás, cundèdóho-ndo nchàa tnúhu na càháⁿ-í-a. Ío quide cahnu nchohó sá càchí-ndó cùu ndiöxí-ndó. ²³ Te vitna ní quexì-í ñuú-ndó, te ní xiní-í sá yàyacáⁿ ndécú nchàa sá càchí-ndó cùu ndiöxí-ndó càháⁿ ndihí-ndo. Te ní xiní-í ìⁿ xichi núu ndéé tnuní quide cahnu-ndo Yá Ndiöxí Yaá ñà túú xiní-ndó, te ñu-ni ducaⁿ càháⁿ lètrá ndéé tnuní xiáⁿ, te càchí-xi: “Iha quide cahnu-ndí Ndiöxí sá ñà túú xiní-ndí”, duha càháⁿ lètrá-áⁿ. Te quide cahnu-ndo Yá Ndiöxí càháⁿ-ndó, dico ñà túú xiní-ndó năsa càa-gá, te yúhú xiní ndáá-í nàcuáa càa Yá Ndiöxí, chi ñu-ni Yá Ndiöxí càháⁿ ndihí-í, te ñu tnúhu-gá càháⁿ-í vitna.

²⁴ Te ñu Yá Ndiöxí ní cadúha-gá ñuyíú-a ndihí nchaá sá ío, núu ñu-gá cúu X̄itohó ñuyíú-a ndihí andi. Te ñà túú x̄ini ñuhu-gá vehe dàcaa ñáyiu ñuyíú-a cundecu-gá. ²⁵ Te ñà túú x̄ini ñuhu-gá ñáyiu chindee ñàhá-yu xii-gá, chi mee-gă quidé-gă nchító-ó ndècu-o te tàxi-gá yócó t̄achí-ó ndihí nchaá sá xiní ñuhu-o.

²⁶ Te ndéé sanaha ñà cadúha-gá ìⁿ ñu-ni té, te ñu-ni ñíí-dé cúu ñáyiu ndècu ñicaxico ñuyíú. Te ñu-ni mee Yá Ndiöxí ní xáhaⁿ-gă nchaá núu cùndécú-yu, te mee-gă ní cáháⁿ-gă ná daha cuíá cudíi nchaá nacióⁿ ndihí mèé-yu. ²⁷ Te cuìní-gá sá nchàá ñáyiu nanducu ñàhá-yu càháⁿ ndihí ñàhá-yu

xii-gá, te mee-gă ndécú t̄ha-gá sá càháⁿ ndihí ñàha-gă xií-yu ìⁿ ñu-yu. ²⁸ Te ñu-ni Yá Ndiöxí xitó ñàha-gă xií-yu núu cudíi-yu ndécú-yu te càndá-yu. Te duha ní cáháⁿ ìⁿ ñaní tnàhá-ndó, té ní cutnùní iní-xi ní x̄indecu ndéé sanaha, te ní xáhaⁿ-dè xií-yu: “Nchaá-o cùu-o déhe Yá Ndiöxí”, duha ní xáhaⁿ-dè xií-yu. ²⁹ Te núu déhe Yá Ndiöxí cúu-yu nchaá-yu, te vá cúu càháⁿ-yu sá Yá Ndiöxí cúu sá ñà cadúha-yu ndahá-yu. Te sá ñà cadúha-yu cùu ndiöxí-yu-áⁿ, dava cùu-xi díhúⁿ cuááⁿ, dava cùu-xi díhúⁿ cuixíⁿ, dava cùu-xi yúu. Te mèé-yu ní cahu iní-yu nàcuáa cunduu sá cúu ndiöxí-yu. ³⁰ Te cùtnàhá ñà túú ní cùtnuní iní-yu sá nèhé ní quidé-yu ní cadúha-yu nchaá xiáⁿ, te ñà túú ní quide cuendá Yá Ndiöxí sá dúcáⁿ ñà quidé-yu. Te vitna càchí Yá Ndiöxí sá dáñá nchàa ndi túhú-yu nchaá sá cuèhé sá dúhá quidé-yu. ³¹ Te Yá Ndiöxí nàhá-gă ná nduu cùndecu nchaá ñáyiu núu-gă, te mee-gă sa nàha-gă ndèndida càa ñáyiu ní quide váha, te ndèndida càa ñáyiu ñà túú ní quide váha. Te mee-gă ní xáhaⁿ-gă xii Déhe-gă Yaá nání Jèsús cúñaha-gă xií-yu núu ndèndida càa-yu ní quide váha te ndèndida càa-yu ñà túú ní quide váha. Te mee Jèsús càháⁿ ndáa cuíi-gá, te sa nàha-o sá nchàá xiáⁿ cada Jèsús, chi ñu cuendá-áⁿ ñà dándótó ñàha Yá Ndiöxí xii-gá —càchí té Păblú x̄àhaⁿ-dè xií-yu.

³² Te òré ní cáháⁿ té Păblú sá ñà ndoto Jèsús, te dava ñáyiu ñà ní tnàhá iní-xi tnúhu ní cáháⁿ-dé ní cáháⁿ yíchí-yu. Te davá-yu ní xáháⁿ-yu xii-dé:

—Te ingá xito quixi-n, te càháⁿ tucu-n tnúhu ní cáháⁿ-n vitna —cachí-yu x̄àháⁿ-yu xii-dé.

³³ Te ní xica-dé cuáháⁿ-dé. ³⁴ Te dava ñáyiu ní x̄indedóho tnúhu ní cáháⁿ té Păblú ní sándáá iní-yu Jèsús, te ní chindee tnúhu ñàhá-yu xii-dé. Te ìⁿ té cùchiuⁿ Areópagú nání-dè Nixú ndihí ìⁿ ñadhí nání-áⁿ Dămarís, tnàhá-yu ní sándáá iní-yu tnúhu-gá ndihí dava-gá-yu.

18

Té Păblú ndécú-dè ñuú Còrintú

¹ Te té Păblú ní quee-dé ñuú Àtenás cuáháⁿ-dé ñuú Còrintú. ² Te yàcáⁿ ní naníhí

tnáhá-dě ndihí ìⁿ té isràél nání-dě Àquilú, te té-áⁿ cúú-dě té distritú Pòntó, te ní xíndecu-dé ndihí ñadìhí-dé tá Priscilá ñuú Rómá. Te té Cèsár té yíndaha cuéhé nàcióⁿ, té nàni Claudiú ní xáhaⁿ-dě sá vǎ cúú-gǎ cundecu ñáyiú isràél ñuú Rómá, te xiǎⁿ ñuú ní ndee té Àquilú ndihí ñadìhí-dé cuáháⁿ-yu ñuú Còrintú. Te sácú-ni nduu ní cuu sá ñí quexió-yu ñuú-áⁿ, te ní sáháⁿ té Páblú ní ndatnúhu ndihí ñaha-dě xií-yu vehé-yu. ³ Te ní xáhǎⁿ-yu sá cùndècu-dé cada chiúⁿ ndihí ñahá-yu, chi ìⁿ-ni chiúⁿ quide-dé ndihí-yu, te ní xóo dacáa-yu vehe dóó. Te núu xiǎⁿ ní xíndecu ndihí ñaha-tě Páblú ní quide chiúⁿ ndihí ñaha-dé xií-yu. ⁴ Te núú ùná núú ùná nduu, nduu ndètátú-yu, ní xóo quíhíⁿ-dé veñúhu ñáyiú isràél. Te ní ndatnúhu-dé ndihí ñáyiú isràél ndihí ñáyiú ñá túú cùu ñáyiú isràél, te ní xáhaⁿ-dě sá quíndáá iní-yu tnúhu Jèsús.

⁵ Te té Silás ndihí té Timùteú ní quee-güedé distritú Macèdoniá cuáháⁿ-güedé núú ndécú-tě Páblú. Te òré ní quexió-güedé, te ní cáháⁿ-ni té Páblú tnúhu Yá Ndiòxí núú ñáyiú isràél, te xáhaⁿ-dě xií-yu sá Jèsús cúú-gǎ Crìstú Yáá ní tendaha Yá Ndiòxí ní quixi ñuyúú-a. ⁶ Te sá dúcáⁿ ñí cáháⁿ-dé ñuú ní nǎá ndihí ñahá-yu xii-dé, te ní cáháⁿ cuéhé-yu cuèndá-dé, núu xiǎⁿ ní naquidi-dé dóó-dě. Te ducaⁿ ñí quide-dé cuèndá sá cútnúni iní-yu sá ñǎ ní tnáhá iní-dé nàcuáa ní cáháⁿ-yu, te ní xáhaⁿ-dě xií-yu:

—Yúhú ñá túú cuèchi-í, te núu ní xíta ni-hnu-ndo, xiǎⁿ quèndóo cuèchi mee-nǎ-ndó. Te vitna quíhíⁿ-í cáháⁿ ndihí-í ñáyiú ñá túú cùu ñáyiú isràél, te vǎ nándùcu-gǎ-í nchòhó ñáyiú isràél cáháⁿ ndihí ñaha-í xii-ndo —càchí-dé xáhaⁿ-dě xií-yu.

⁷ Te ní xica-dé cuáháⁿ-dé vehe ìⁿ té nàni Justú, te té-áⁿ ndécú yàtni-dé núú cáá veñúhu, te tnáhá-dé càháⁿ ndihí-dé Yá Ndiòxí. ⁸ Te té Crìspú té yíndaha veñúhu-áⁿ ñí sándáá iní-dé Jèsús ndihí ñadìhí-dé ndihí landú-dé. Te vǎi ñáyiú ñuú Còrintú ní sáháⁿ-yu ní xíndedóho-yu tnúhu-gǎ, te ní sándáá iní ñáhǎ-yu xii-gǎ, te ní sanduté-yu. ⁹ Te ìⁿ níú ní cáháⁿ saní té Páblú sá ñí xáhaⁿ Yá Ndiòxí xii-dé:

—Cáháⁿ-ni-n tnúhu-í, te vǎ yùhú-n nchàa tnúhu cuéhé tnúhu duha càháⁿ ñáyiú, ¹⁰ chi

yúhú chindee ñàha-í xii-n, te vǎ yóo ìⁿ cada úhu ñáhá xii-n, te vǎi-gǎ ñáyiú ñuú-áⁿ quíndáá iní-yu tnúhu-í —càchí-gǎ xáhaⁿ-gǎ núú saní-dé.

¹¹ Te ñuú Còrintú ní xíndecu té Páblú ìⁿ cuía dava, te mee-ni tnúhu Yá Ndiòxí ní xóo dacuàha-dé ñáyiú.

¹² Te ndècu-gǎ-dé ñuú-áⁿ ñí ngóo té Gàlìón chiúⁿ taxi tnuní-dé distritú Acáyá. Te dàvá-áⁿ ñí cudééⁿ ñáyiú isràél núú-tě Páblú, te ní tñi ñahá-yu xii-dé ndécá ñahá-yu cuáháⁿ núú cuè té cùchiúⁿ. ¹³ Te ní xáhǎⁿ-yu xii té Gàlìón té cùu gobiernú:

—Té-a ní quexió-dé ñuú-ó xica cuu-dé te cuini-dé dandàhú ñáhá-dě chitnahá-ndí-dé cada-ndí nàcuáa quide-dé quidé càhnu-dé Ndiòxí-dě, te dañá-ndí vǎ cádá-gǎ-ndí nàcuáa càháⁿ tnúhu sá sánú ìchi ñaha xii-o nàcuáa cundecu-o cuini-dé —càchí-yu xáhǎⁿ-yu xii té cùu gobiernú.

¹⁴ Te té Páblú cuini-dé cani-dé cuèndú ní cùu, te ní ngúita té Gàlìón càháⁿ-dé, te xáhaⁿ-dě xií-yu:

—Nchòhó ñáyiú isràél, cundedóho-ndo tnúhu na càháⁿ-í-a. Te núu ndècu núú ìⁿ cuèchi ní quide-dé àdi ní sahani-dé ìⁿ ndíyi, te cuu cundáá-xi iha, te cáháⁿ-ndó ñuú nándi cùu sá ñí quide-dé, ¹⁵ àdi dico-ni sá ìⁿ tnúhu ní cáháⁿ-dé, te yáchí-gǎ chí cuáháⁿ yàcáⁿ ndatnúhu-ndo núú mée-ndó, chi mee-ni sǎ ñǎ túú quide-dé nàcuáa càháⁿ tnúhu sá sánú ìchi ñaha xii-ndo càháⁿ-ndó, te yúhú ñá túú tnáhá iní-í cada ndáá-í nchaa xiǎⁿ —càchí-dé xáhaⁿ-dě.

¹⁶ Te ní cudééⁿ-dě, te ní ndeñuhu ñaha-dě xií-yu vechùⁿ. ¹⁷ Te ñáyiú ñá túú cùu ñáyiú isràél ní tñi-yu té Sòstenés té yíndaha veñúhu ñáyiú isràél, te ndèhe té Gàlìón té cùu gobiernú ní canihá-yu xii-dé, dico ñá túú tnáhí ná tnúhu ni càháⁿ-dé taunihnu-dé té ní caní-yu-áⁿ.

Té Páblú cuáháⁿ tucu-dé ñuú Antiòquia, te yàcáⁿ ní xica tucu-dé cuáháⁿ-dé dava-gǎ ñuú càháⁿ-dé tnúhu Yá Ndiòxí

¹⁸ Te titní-gǎ nduu ní xíndecu té Páblú ñuú Còrintú, te ní quide ndee iní-dé nchaa ñáyiú ní sándáá iní-xi tnúhu Jèsús, te ní tñi-dé ìchi cuáháⁿ-dé distritú Sìriá ndihí té Àquilú ndihí ñadìhí té Àquilú-áⁿ tá Priscilá, te ní quexió-yu ñuú Cèncreá. Te cùmání-gǎ

tní-yu ichi quíhíⁿ-yu ñuú Éfesú, te ní dèté díquí tē Páblú, chi ducaⁿ ñí xáhaⁿ-dē xii Yá Ndiöxí sá ndéé xínu ñⁿ chiuⁿ ní sani iní-dé cada-dé cuendá-gá, te dātnūnī dèté-dé. Te ní quée-yu bàrcú cuáháⁿ-yu.

¹⁹ Te ní quexió-yu ñuú Éfesú, te yàcáⁿ ní xáhaⁿ tē Páblú sá cūndēcu té Àquilú ndihī ñadìhí-dé, te mee-dē quíhíⁿ-dé dava-gá ñuú. Te cūmání-gā caca-dé quíhíⁿ-dé, te ní sáháⁿ-dé veñúhu ñáyiū isràél ní ndatnúhu ndihī ñaha-dē xii-yu. ²⁰ Te ní xáhāⁿ-yu sá cūndēcu-dé tītní nduu, te ñá ní cuíní-dé cundecu-dé. ²¹ Te ní xáhaⁿ-dē:

—Núhú-í chi dacuítí xini ñuhu-xi cundecu-í vico coo ñuú Jerusalén, te quixi tucu-í te núu Ndiöxí ná cāchí-gá, te vitna chí cadá ndèe iní —cāchí-dé xáhāⁿ-dē xii-yu.

Te ní quée-dé bàrcú cuáháⁿ-dé. ²² Te ní quexió-dé ñuú Cèsareá, te ní quene-dé bàrcú, te ní xica-dé cuánuhú-dé ñuú Jerusalén, te ní ndexió-dé, te ní dāndácōo váha-dé ñáyiū ndēcu ichi Yá Ndiöxí, te dātnūnī ní xica-dé cuáháⁿ-dé ñuú Antióquiá. ²³ Te yàcáⁿ ní xīndecu-dé tītní nduu, te dātnūnī ní tñí-dé ichi cuáháⁿ-dé. Te ní sáháⁿ-dé ñihí distritú Gálaciá ndihī distritú Frigiá. Te ndi tnahá ñuú ní sáháⁿ-dé ní cáháⁿ-dé ndihī ñáyiū sàndáá iní tñúhu Yá Ndiöxí, te ní ndúcú ndéé-gā-yu ní quidé-yu nchaa nācuáa ní xáhaⁿ-dē cadá-yu.

Té Àpolós cāháⁿ-dé tñúhu Yá Ndiöxí ñuú Éfesú

²⁴ Te dàvá-áⁿ ñí quèxio ñⁿ tée isràél ñuú Éfesú, te nāni-dé Àpolós, te cūu-dé tée ñuú Alejándriá, te ío váha túha-dé tñúhu Yá Ndiöxí, te ío váha ñúhu díquí-dē nācuáa cáháⁿ-dé, ²⁵ chi sa xini-dé nācuáa ní xóo cáháⁿ ndíi Juáa cūtnáhá ní xóo dacuándute ndíi ñáyiū. Te ío ní cudí iní-dé ní cáháⁿ-dé nchaa nācuáa ní cuu cuendá Jèsús, dico vátá dācuàha-gá-dé nchaa tñúhu ní cáháⁿ méé Jèsús. ²⁶ Te ní sáháⁿ-dé veñúhu ñáyiū isràél, te yàcáⁿ ní cáháⁿ-dé ñi yùhu ñi iní-dé. Te ndēcu té Àquilú ndihī ñadìhí-dé tá Priscilá ndédóho-yu tñúhu ní cáháⁿ-dé, te ní xáhāⁿ-yu sá quíhíⁿ-dé vehé-yu, te ní sáháⁿ-dé, te ní xitñúhu ñáhá-yu xii-dé dava-gá tñúhu Yá Ndiöxí sá ñá túu xini-dé.

²⁷ Te ní cachí té Àpolós sá quíhíⁿ-dé distritú Acáyá, núu xiáⁿ ní cadúha ñáyiū ñuú Éfesú ñⁿ tutú canehe-dé quíhíⁿ ndaha ñáyiū sàndáá iní tñúhu-gá xīndecu Acáyá. Te xáhāⁿ-yu núu tütú-yu: “Cáháⁿ váha-ndo ndihī té Àpolós núu ní quexió-dé”, cāchí-yu xáhāⁿ-yu núu tütú-yu. Te ní xica-dé cuáháⁿ-dé, te ní quexió-dé Acáyá. Te nchaa ñáyiū sàndáá iní tñúhu-gá yàcáⁿ, diu-ni mee Yá Ndiöxí ní chindee ñaha-gá ní sàndáá iní ñáhā-yu xii-gá. Te té Àpolós ío váha ní cáháⁿ-dé tñúhu Yá Ndiöxí núu-yu, te xiáⁿ ío ní ndúcú ndéé-gā-yu ní quidé-yu chiuⁿ-gá.

²⁸ Te té Àpolós ní ndatnúhu-dé ndihī ñáyiū isràél, te ní xīndedóho dava-gá-yu. Te ío váha ní caní-dé cuendú nchaa nācuáa ní xóo cáháⁿ cue tée ndéé sanaha sá quixí Cristú ñuyú-a. Te ní cáháⁿ ndáá-dé ní xáhaⁿ-dē sá díu-ní Jèsús cúu-gā Cristú Yaá ní tendaha Yá Ndiöxí ní quixi ñuyú-a. Te ñáyiū isràél xīndatnúhu-yu sá ñá ndáa nācuáa cāháⁿ-dé, dico ñá ní ñihí-yu tñúhu cūñáhá-yu xii-dé, chi ío váha ñúhu díquí-dē tñúhu cáháⁿ-dé.

19

Té Páblú ndécú-dē ñuú Éfesú

¹ Te cūtnáhá ndécú-gā té Àpolós ñuú Còrintú, te ní xica té Páblú cuáháⁿ-dé tá yáha-dé mee-ni xití yucu cuáháⁿ, te ní sáá-dé ndéé ñuú Éfesú. Te ñuú-áⁿ ñí naníhí tñáhá-dē ndihī cue tée sàndáá iní tñúhu Jèsús. ² Te ní xicáⁿ tñúhú-dē núu-güedē, te xáhāⁿ-dē:

—¿Sa ní quexio Espíritú Yá Ndiöxí ní ngūndecu ndihī-ndo ndéé òré ní sàndáá iní-ndó Jèsús-áⁿ? —cāchí-dé xáhāⁿ-dē xii-güedé.

Te ní xáhaⁿ-güedé:

—Ñá túu xini-ndí sá ío Espíritú Yá Ndiöxí —cāchí-güedé xáhāⁿ-güedé xii-dé.

³ Te ní xáhaⁿ tūcu-dé:

—¿Nása ní cáháⁿ tée ní dācuándute ñaha xii-ndo-í? —cachí-dé xáhāⁿ-dē xii-güedé.

Te ní xáhaⁿ-güedé:

—Ní cáháⁿ-dé nācuáa ní xóo cáháⁿ ndíi Juáa —cāchí-güedé xáhāⁿ-güedé xii-dé.

⁴ Te ní xáhaⁿ tē Páblú:

—Ndíi Juáa ní dācuándute ñaha ndíi xii ñáyiū, chi ní cuíní-yu sá dáñá-yu nchaa sá cuéhé sá dúhá quidé-yu. Te ní xáhaⁿ ndíi

xií-yu: “Quindáá iní-ndó tn̄hu Jèsús chi dacuítí quixi-gá ñⁿ nduu”, duha ní xáhaⁿ ndíi Juáá xií-yu —càchí té Páblú xáhaⁿ-dē xii-güedé.

⁵ Te sá dúcáⁿ ñí cáháⁿ té Páblú xáhaⁿ-dē xii-güedé, núu xiáⁿ ní sandute-güedé nàcuáa ní dándõo tnúhu Jèsús. ⁶ Te ní sacáⁿ ndodo té Páblú ndahá-dé díquí-güedē, te òré-ni ní quexìo Espiritú Yá Ndiõxí ní ngúndecu ndíhi-güedé, te ní ngüíta-güedé ní cáháⁿ-güedé tnúhu sá dácàhu iní ñáhá Espiritú-gá, tnúhu sá ñà túú xìní-güedé cáháⁿ-güedé, te ní cáháⁿ-güedé tnúhu Yá Ndiõxí nàcuáa ní dácáhú iní ñáhá Espiritú-gá xii-güedé. ⁷ Te cùu datná úxúú tnàhá-güedé.

⁸ Te té Páblú ní sáháⁿ-dé veñúhu ñáyiú isràél ní cáháⁿ ndíhi-dé-yu, te úní yóó ñí xínu ní xica cuu-dé veñúhu-yu. Te ío váha ñúhu díquí-dē tnúhu cáháⁿ-dé, núu xiáⁿ ní cuyi-dē ní cáháⁿ-dé, te ní xáhaⁿ-dē sá quindáá iní-yu tnúhu Jèsús, te ducaⁿ te ndíhu ndaha ñàha Yá Ndiõxí xií-yu. ⁹ Te davá-yu ío sàá iní-yu ñá ní cuini-yu quindáá iní-yu, te ío ní cáháⁿ cuèhé-yu cuendá Jèsús xití veñúhu núú dàva-gá-yu. Te té Páblú ní ndee-dé veñúhu cuáháⁿ-dé ndíhi ñáyiú sàndáá iní tnúhu Jèsús. Te ñⁿ nduu ñⁿ nduu ní sáháⁿ-dé scuèlá té Tiranú ní dácuahá ñàha-dé xií-yu. ¹⁰ Te úú cuía ducaⁿ ñí sáháⁿ-dé scuèlá ní dácuahá-dē ñáyiú. Te nchaa ñáyiú isràél ñáyiú ndècu ñíhi distritú Àsiá ndíhi nchaa ñáyiú ñá túú cùu ñáyiú isràél ní xindedóho-yu tnúhu Jèsús. ¹¹ Te té Páblú ío ní chindee ñàha Yá Ndiõxí xii-dé ní quide-dé vèi núú sã vã yõo tnàhí ndàcu cada. ¹² Te pãñú díquí-dē ndíhi dóo cándèé núú yíquí-dē ní xicáⁿ-yu nèhé-yu ní sáháⁿ núú ndécú ñáyiú cùhú, te xiáⁿ ní tn̄i ñáyiú cùhú ndíhi ñáyiú yìhi ñaha espíritú cündìhi yucu ñávãha, te ní ndúha-yu.

¹³ Te ñuú Isràél véxi cue téé tatna xica cuu-güedé quidé tãtã-güedé ñáyiú yìhi ñaha espíritú cündìhi yucu ñávãha. Te ní ngüíta-güedé ní cacu nèhe-güedé Jèsús cuendá quee espíritú-áⁿ yiqui cùñú-yu, te ní xáhaⁿ-güedé:

—Xocuñí-n, chi càchí Jèsús sá vã cündècu ndíhi-gá-n tēe-a. Te diu-ni Jèsús cacú nèhe té Páblú òré cáháⁿ-dé tnúhu-gá —càchí-güedé xáhaⁿ-güedé xii espíritú-áⁿ.

¹⁴ Te úsá tnàhá-güedé ducaⁿ ñí xóo cada-güedé. Te tãtã-güedé ní xínani-dē Èsevã, te téé-áⁿ ñí cuu-dé dútú cùnùu. ¹⁵ Te sá dúcáⁿ ñí cáháⁿ-güedé, te ní xáhaⁿ espíritú cündìhi yucu ñávãha-áⁿ xii-güedé:

—¿Te ná cúú nchòhó núu dayùhú ñáhá-ndó? Te xìní-í Jèsús, te xìní-í yoo cùu té Páblú, te nchòhó ñá túú xìní ñáhà-í xii-ndo —càchí espíritú-áⁿ xáhaⁿ-xi xii-güedé.

¹⁶ Te téé yìhi ñaha espíritú cündìhi yucu ñávãha-áⁿ ñí ndanchita-dé ní tn̄i-dé cue téé quide tãtã-áⁿ, te ní ndíhi dóo-güedé ní ndátã-dē, te ní dánicuèhé ñáhá-dē xii-güedé, te ní xinu-güedé cuáháⁿ-güedé.

¹⁷ Te nchaa ñáyiú isràél ndécú ñuú Éfesú ndíhi dava-gá ñáyiú ndècu diu-ni ñuú-áⁿ ñí ñíhi-yu tnúhu nàcuáa ní cuu, te ío ní yùhú-yu, te vèi-yu ní cachí sã ío càhnu cuu Xitohó Jesucristú.

¹⁸ Te dava ñáyiú ní sándáá iní-xi tnúhu Jèsús ní sáháⁿ-yu núú ndécú tē Páblú, ndíhi núú ndécú nchaa ñáyiú ní sándáá iní tnúhu-gá ní nãhmã-yu nàcuáa ní xóo cada-yu. ¹⁹ Te titní ñáyiú ñí xóo cada ndùu nehé-yu tutú-yu ní sáháⁿ núú ndécú nchaa ñáyiú sàndáá iní-xi tnúhu-gá, te yacáⁿ ní ndada cuendá-yu sã ío yahu ní sãha-yu tutú-yu, chi ndéé údico úxí m̄l díhúⁿ cuixíⁿ ní sãha-yu núú ncháá. Te ncháá-yu ní sahmí-yu tutú-yu. ²⁰ Te sátã ñí cáyú nchaa tutú-áⁿ, te vèi-gá ñáyiú ní tuhá-yu ichi Yá Ndiõxí, te ní sãha-yu cuendá sã ío xini ñuhu tnúhu Yá Ndiõxí.

²¹ Te ní cachí té Páblú sá quíhíⁿ-dé distritú Macèdoniá ndíhi distritú Acáyá, te dàtnùní núhú-dé ñuú Jerusalén, te ducaⁿ te dàtnùní quíhíⁿ-dé ñuú Rómá. ²² Te ndècu ndíhi-dé té Timùteú ndíhi té Èrastú cue téé chindee ñaha xii-dé. Te té Páblú ní xáhaⁿ-dē xii-güedé sá códo núu-güedé quíhíⁿ Macèdoniá, te ní xica-güedé cuáháⁿ-güedé, te mee-dē ní quendóo-dé.

Ñáyiú Éfesú ío dusaⁿ quidé-yu ñuú-yu

23 Te dàvá-án ïo ní cudéẽn-yu núú nchàa ñáyiu ní tuha ichi Yá Ndiõxí. 24 Te ìn tée ñuú Éfesú nání-dě Demètriú. Te tée-án ñi xóo canehe chiú-dé mee-ni díhú cuixí ní xóo cadúha-dé veñúhu líhli, dàtná cuini-ndó càa veñúhu Diàná sá cuú ndiõxí-yu. Te vãi díhú ñi xóo níhí-dě ndihí cue tée ní xóo cada chiú ndihí-dé. 25 Te ní cana-dé cue tée quide chiú ndihí-dé, ndihí nchaa cue tée quide chiú ndihí díhú cuixí, te ní xáha-dě xii-güedé:

—Nàha-ndo sá ïo váha níhí-ó díhú cuendá chiú quide-o. 26 Te nàha-ndo sá cächí té Páblú sá ña díú ndiõxí cuú sá ñi cadúha ñáyiu ñuyíú-a. Te duca càhá-dé ñuú-ó, te duca-ni càhá-dé níhí distritú Àsiá, te ío-gá vãi ñáyiu sàndáá iní tnúhu càhá-dé. 27 Te ío úhú ñu na cuíta chiú quide-o, vá yõ-gá cuaa sá cadúha-o. Te ngúita-yu càhá-yu sá veñúhu Diàná ña túú cáváha, te vá cáda càhnu-gá-yu sàndú-ó. Te nàha-ndo sá ïo càhnu cuu Dianá, chi nchaa ñáyiu distritú Àsiá quidé càhnu ñahá-yu ndihí ñáyiu xíndecu ní càa xico ñuyíú —cächí té Demètriú xáha-dě xii-güedé.

28 Te sá dúcá ñi càhá té Demètriú, xíã ní cudéẽn-güedé núú tẽ Páblú, te uu-ni ní cuáá-güedé te cächí-güedé:

—¡Ío càhnu cuu Dianá sàndú ñáyiu Éfesú! —cächí-güedé.

29 Te nchaa ñáyiu ñuú Éfesú ndi coyo ndi coyo-yu xicáhá-yu. Te tnàhá úú cue tée distritú Macèdoniá xicá cuu-güedé ndihí té Páblú, ìn-dé nání-dě Gãyú, te ìn-dé nání-dě Arístarcú. Te ní tni-güedé úú cue tée-án, te cuánguñhu coyo ndihí ñaha-güedé vehe núú quidé-güedé jundá. 30 Te té Páblú cuini-dé quíhu-dé tnàhá-dé vehe-án càhá ndihí ñaha-dě ní cuu, te ña ní dàña cue tée ní sàndáá iní tnúhu-gá. 31 Te ìn úú cue tée cùnno distritú Àsiá ní càhá váha-güedé cuendá té Páblú, te ní xáha-güedé xii ìn tée xínu cuechi núú-güedé ní sáhá-dé ní xáha-dě xii té Páblú sá vã quíhu-dé vehe núú quidé-güedé jundá. 32 Te uu-ni ní cuáá-yu ncháá-yu, te ña ìn-ní tnúhu ní càhá-yu, chi ndi díñ tnúhu ní càhá-yu ìn ìn-yu. Te chitu-gã ñáyiu ña ní cùtnuní iní-yu ná cuendá ní dátacá ñahá-güedé xití

vehe-án, chi ña ìn-ní tnúhu ní càhá-yu. 33 Te davá-yu ní càhá-yu sá cuéchi té Lijandrú cúu-xí, chi ní xáha ñáyiu isràél xii-dé sá càhá-dé yuhú-yu chindee tnúhu ñaha-dě xii-yu. Te ní quide-dé ndaha-dé núu-yu sá cùndedóho-yu tnúhu càhá-dé chindee tnúhu ñaha-dě xii-yu yòtnúhu. 34 Te ní cùtnuní iní-yu sá tẽ isràél cúu-dé, te uu-ni ní cuáá tucú-yu, ña ní dàña-yu càhá-dé, te cächí-yu:

—¡Ío cùnno Dianá sàndú ñuú Éfesú! —cächí-yu. Te dàtná úú òrè ìn-ni tnúhu ní càhá-yu.

35 Te tée cùu secretariú-ni-gá ní càhá-dé, te dàtnuní cuéé cuéé ní sadí-yu yuhú-yu. Te ní xáha-dě xii-yu:

—Nchaa-ndo cùndedóho-ndo ìn tnúhu na càhá-í-a. Ío cùnno Dianá, te nchaandi túhu ñáyiu sa nàhá-yu sá ncháá-ó ïo nèhe cuendá-ó veñúhu-ã. Te nàhá-yu sá nehé cuendá-ó sàndú-án, chi véxi cuu-gá andi. 36 Te vá yõ ìn cächí sá ña ndáá. Te coto-ndo mée-ndo, te vá cuídó-ndó càda-ndo, te vá cuídó-ndó càhá-ndó. 37 Te ná cuendá ndécá-ndó cué tée-án véxi, te ña túú ña ní quide-güedé, te ña túú ña ní dùhu-güedé veñúhu, te ña túú càhá cuéhé-güedé cuendá Diàná. 38 Te núu ío yoo nàá ndihí ñaha xii té Demètriú ndihí cue tée quide chiú ndihí-dé, te quíhí-güedé cacá cuéchi-güedé núú cué tée cùchiú. Te cue tée cùchiú na cundoho-güedé ñu quehndé-güedé cuéchi-yu àdi ñahá. 39 Àdi ío-gá ná cuendú ñuhú iní-ndó, te càhá-ndó òrè ná cóo jundá. 40 Te ío úhú ñu na níhí tée tàxi tnuní ñahá xii-o tnúhu sá dúhá ïo quide dusa-o, te cachí-dé sá ndècuéchi-o chi ña túú sàndáá iní-ó-dě quesaha-dě. Te ña túú tnàhí ndùu váha-xi sá dúhá càda-o ni cuu, te vitna duha ní quide-o, te ña cùtnuní iní-ó nãsa cúñaha-o xii tée tàxi tnuní ñahá xii-o núu na càna ñaha-dé —cächí tée cùu secretariú xáha-dě xii-yu.

41 Te ní xáha-dě sá nùhú-yu te ní ndihí-yu cuánuhú.

20

Té Páblú cuáhá-dé distritú Macèdoniá ndihí distritú Grèciá

1 Te òrè ña túú-gã ní quide dusa-yu, te ní cana ñaha tẽ Páblú xii nchaa ñáyiu

sàndáá iní tnúhu Jèsús ní cáháⁿ-dé dóho-yu nàcuáa cadá-yu. Te ní quide ndee iní ñáhá-dě xií-yu, te ní tñi-dé ichi cuáháⁿ-dé distrítú Macèdoniá. ² Te tayâha-dé cuáháⁿ ñi ñi ñuú yíndèhu Macèdoniá. Te càháⁿ-dé dóho nchaa ñáyiú sàndáá iní tnúhu Jèsús nàcuáa cadá-yu, te ní cudí iní-yu cadá-yu nàcuáa càháⁿ Yã Ndiõxí cadá-yu sá dúcáⁿ ñi cáháⁿ-dé dóho-yu. Té ní quexìo-dé distrítú Grèciá. ³ Te xiáⁿ ñi xíndecu-dé úní yóó. Te xiáⁿ quèe-dé bàrcú quíhíⁿ-dé distrítú Siriá ní cùu, te ní níhí-dě tnúhu sá ndétú ñàha ñi úu cue tée isràèl cahni ñàha-güedě xii-dé ní cùu, núu xiáⁿ ní tñi-dé ichi cuáháⁿ-dé ní yáha-dé ichi distrítú Macèdoniá. ⁴ Te cuáháⁿ ndihí-dé té Sopàtér téé ñuú Bèréa, ndihí té Aristarcú, ndihí ñi téé nàni Segundú. Te ndi ndúú cue téé-án cúu-güedě cue téé ñuú Tesalónicá. Te tñàhá té Gâyú téé ñuú Dèrbé, ndihí té Timùteú cuáháⁿ ndihí-dé, te tñàhá té Tìquicú ndihí té Trõfimú cuáháⁿ ndihí-dé, te úu cue téé-án cúu-güedě cue téé distrítú Àsiá. Te nchaa cue téé-án cuáháⁿ ndihí-güedě té Pàblú. ⁵⁻⁶ Te ní quexìo-güedě ñuú Filipú, te yàcáⁿ ní naníhí ñáhá-güedě xii-ndí. Te té Pàblú ní tendaha-dě cue téé ndihí-dé cuáháⁿ-güedě ñuú Tròás, te ní xáhaⁿ-dě sá díú-ní yàcáⁿ cundetú ñàha-güedě xii-ndí. Te ní ndóo-í ndihí-dé, te ní xíndecu-ndí vico xèxí-yu pàá sá ñà túú yìhi levadurá. Te sátá ñi yáha vico, te ní quèe-ndí bàrcú cuáháⁿ-ndí, te ní xúhuⁿ-ndí ichi úhúⁿ nduu, te ní quexìo-ndí ñuú-án. Te yàcáⁿ ní naníhí tñàhá-ndí ndihí cue téé yòdo nuu cuáháⁿ ní xíndecu-ndí úsá nduu.

Té Pàblú cuáháⁿ ngándihí-dé ñáyiú ñuú Tròás

⁷ Te ñi nduu ndumìngú ní naníhí tñàhá-ndí ndihí nchaa ñáyiú ní sàndáá iní-xi tnúhu Jèsús ní xexi-ndí pàá ndihí-yu. Te ducaⁿ ñi quide-ndí, chi ní cachí Jèsús sá dúcáⁿ càda-o cuendá sá vã nácuànaa-o sá ñi xíhí-gá cuendá naníhí tãhú-ó. Te té Pàblú ní ngüíta-dé càháⁿ-dé tnúhu-gá, te càháⁿ-dé ní cuu dava niú, chi cuendá ná tũndaá ingá nduu-án, te caca-dé quíhíⁿ-dé ingá xichi. ⁸ Te ndécú-yu vehe yòdo tñaha, te yìhí-yu

ndéé cuartú cúu ùní núu ñinu, te càyú víhí ñùhú xití cuartú-án. ⁹ Te ñi téé sa ta cùu sacuéhé luha nàni-dé Eùticú núcõo-dé yèhe ventaná, cuini-dé cúdú-dé, chi ní cunaha víhi caháⁿ té Pàblú, te ní tñi ñàha sàní xii-dé ní xídí-dé, te ní ngava-dé ndéé ñuhu. Te ní nuú-yu núu ñùhú cuendá ndacani ñàhá-yu, te sa ní xíhí-dé, chi ío dùcúⁿ ní ngava-dé. ¹⁰ Te tñàhá té Pàblú nchìcúⁿ-dé ní nuu. Te ní quexìo cunu-dé núu cãtùu téé ní xíhí-án, te ní numi ñàha-ni-dě, te ní xáhaⁿ-dě xií-yu:

—Vá ndíhú iní-ndó, chi ní ndoto-dé —
càchí-dé xáhaⁿ-dě xií-yu.

¹¹ Te dàtnùní cuánda ndihí ñàha tucu-dé xií-yu cuartú núu yíhí-yu ní cùu, te yàcáⁿ ní xexi ndihí ñàha-dé xií-yu, dàtnùní ní ngüíta-dé vãi-gá tnúhu ní cáháⁿ-dé, te càháⁿ-ni-dé ní tũndaá, te dàtnùní ní xica-dé cuáháⁿ-dé. ¹² Te téé ní ngava-án ní sánũndeca ñàhá-yu xii-dé ndéé vehe-dé, te ío ní cudí iní-yu sá ñi ndoto-dé.

Ní quee-güedě ñuú Tròás cuáháⁿ-güedě ñuú Miletú

¹³ Te té Pàblú ní cachí-dé sá quíhíⁿ-ndí ndihí bàrcú ndéé ñuú Àsón, te mee-dě caca saha-dě, te yàcáⁿ naníhí tñàhá-ndí ndihí-dé te quèe-dé bàrcú, te ní quèe-ndí bàrcú cuáháⁿ-ndí. ¹⁴ Te ní naníhí tñàhá-ndí ndihí-dé ñuú Àsón, te yàcáⁿ ní quèe-dé bàrcú tñàhá-dé cuáháⁿ-ndí ñuú Mitilené. ¹⁵ Te ní quexìo-ndí ndéé ingá nduu yatni ñuú Quíú, te ndéé nduu tñéé ní quexìo-ndí ñuú Sãmú te yàcáⁿ ní yáha-ndí, te ní quexìo-ndí ñuú Trògiliú. Te ndéé nduu idá ní quexìo-ndí ñuú Miletú. ¹⁶ Te té Pàblú ñà ní cuini-dé yáha-ndí ñuú Éfesú, chi ñà túú ní tñàhá iní-dé cuyaa-dě ichi, chi ío ndíhí iní-dé cuendá cuini-dé quiní-dé ñuú vá ndácú-dě ndexìo-dé ñuú Jerusalén cundecu-dé vico Pentecòstés.

Té Pàblú càháⁿ ndihí-dé cue téé yíndaha ñàha xii ñáyiú sàndáá iní tnúhu Jèsús ñuú Éfesú

¹⁷ Te òré ndécú tã Pàblú ñuú Miletú, te ní cana-dé cue téé yíndaha ñàha xii ñáyiú sàndáá iní tnúhu Jèsús ñuú Éfesú sá quíhíⁿ-güedě núu ndécú-dě. ¹⁸ Te sátá ñi quexìo-güedě, te ní xáhaⁿ-dě xii-güedě:

—Nàha-ndo nacuaáa ní quide-í ndéé cútnàhá ní quexiò-í distritú Àsiá. ¹⁹ Chi ní quide-í nàcuáa ní cáháⁿ Yă Ndiöxí cada-í, ñá túú ní tühío-í, te ñá túú ní quide cahnu-í mée-í, te ío ní ndáhyú-í sá quidé dàvá-yu, chi ío sàá iní-yu. Te sa nàha-ndo sá titní xito ní cuini ñáyiú isràél cahni ñàhá-yu xii-í ní cùu, te ío ní ndoho-í ní cácu-í. ²⁰ Te sa nàha-ndo sá ncháándì tühú sa ní cachí tnúhu-í nàcuáa cada-ndo cuendá sá chindèe ñaha Yă Ndiöxí xii-ndo. Te ní cáháⁿ-í tnúhu-gá núú-ndó ncháa-ndo, te ñu-ni ducaⁿ ñi quixi-í ndi tnahá vehe-ndo ñi cáháⁿ-í tnúhu-gá núú-ndó. ²¹ Te ní xáhaⁿ-í xii ñáyiú isràél ndihí ñáyiú ñá túú cùu ñáyiú isràél sá dáñá-yu nchaá sá cuèhé sá dúhá quidé-yu te quindáá iní-yu tnúhu Xítohó Jesucristú. ²² Te dacuití quihíⁿ-í ñuú Jerusálén, chi Espiritú Yă Ndiöxí ní cachí-xi sá dáí quihíⁿ-í, te ñá túú xini-í nándi cada ñaha-güedé xii-í yacáⁿ te núu na quèxio-í. ²³ Te ñiⁿ ñiⁿ ñuú núú sàháⁿ-í cächí tnúhu Espiritú-gá sá chíhí ñaha-güedé vecaá, te cada úhú ñàhá-güedé. ²⁴ Dico ñá túú tnahí ná cuu cuèi na cahni ñaha-güedé xii-í, dico cuini-í sá díi iní dandihí-í nchaá sá ñi cachí Xítohó Jesucristú cada-í. Te ní cachí Yă Ndiöxí sá cáháⁿ-í núú ñáyiú sá ío cùu iní ñàhá-gă xii-yu, te naníhí tànhú-yu núu na quindáá iní-yu tnúhu-gá.

²⁵ Te sa ní cachí tnúhu-í xii-ndo ncháa-ndo sá núu na quindáá iní-ndó Yă Ndiöxí, te ndíhu ndaha ñàha-gá xii-ndo. Te na cächí tnúhu-í sá ñi ñiⁿ nduu-gá vá quini ñàhá-ndó xii-í ñuyú-a. ²⁶⁻²⁷ Te yúhú ñá túú cuèchi-í núu ío ñáyiú vá naníhí tànhú, chi sa ní cachí tnúhu-í nchaá sá ñi cáháⁿ mée Yă Ndiöxí cada-ndo. ²⁸ Te coto-ndo mée-ndo, te coto-ndo tnahá ñáyiú sàndáá iní tnúhu-gá, chi Espiritú-gá ní cachí-xi sá cùnùu-ndo núu-yu dacuàha-ndó-yu tnúhu-gá. Te cada-ndo cuendá sá dàtná mbéé-ndó cùu-yu, te mee-ndo cùu-ndo datná toli xito-ndó-yu ducaⁿ cada-ndo cuendá, chi nàha-ndo sá Jèsús ní sati níñi-gă, te ní xihí-gá cuendá naníhí tànhú-ó ndihí-yu. ²⁹ Te yúhú sa cùtnuní iní-í sá òré ñá túú-gă-í ndécú, te quixi ñáyiú dandàhú ñàhá xii-ndo cuendá dañá-ndo tnúhu Yă Ndiöxí, te cada ñàhá-yu xii-ndo dàtná

quidé ñàhá òré tñí-dí mbéé. ³⁰ Te ñu-ni ñiⁿ úú cue téé ndècu ndihí-ndo, cue téé-ánⁿ dacuàndehnde-güedé, te cudana davá-yu quindáá iní-yu chítnàhá ñàhá-yu xii-güedé. ³¹ Te xíáⁿ núu cächí tnúhu-í sá ío quihí iní-ndó cùndecu-ndo ndihí nchaá ñáyiú sàndáá iní tnúhu-gá. Te nàha-ndo sá yúhú ní xíndecu-í úní cuíá ñi cáháⁿ-í tnúhu Jèsús núú ñáyiú cuèi nduu cuèi níu. Te áma ní xóo ndáhyú-í, chi ñá ní cuini-yu quindáá iní-yu nchaá-yu tnúhu ní cáháⁿ-í —cächí té Páblú xáhaⁿ-dē xii-güedé.

³² Te xáhaⁿ tùcu-dé:

—Nchòhó cue téé ndècu ndihí-í ichi Xítohó Jesucristú, ío cuini-í sá mée Yă Ndiöxí chindee ñàha-gá xii-ndo. Te mee-gă ñi cáháⁿ-gá sá ío cùdíi iní ñàhá-gă xii-ndo. Te naníhí tànhú-ndó ndihí nchaá ñáyiú cùu cuendá-gá, te chindee ñàha-gá xii-ndo cuendá cada-ndo ncháa sá cáháⁿ-gá. ³³ Te òré ní xíndecu ndihí ñaha-í xii-ndo, te ní díhúⁿ ñi dōó ñà túú ní cùdíi iní-í. ³⁴ Te mee-ndo sá naha-ndo sá yúhú ní quide chiúⁿ-í, te ní níhí-í nchaá sá ñi nandihí-í ndihí cue téé xica cuu ndihí-í. ³⁵ Te sa ní xini-ndó nàcuáa ní quide-í ní quide chiúⁿ-í, te ñu-ni ducaⁿ cada chiúⁿ-ndo cuendá chindee-ndo ncháa ñáyiú ndàhú, chi sa nàha-ndo nacuaáa ní cachí Xítohó Jesucristú, te duha ní cachí-gá: “Cùdíi-gă iní-ó cuàha-ó ñáyiú ndàhú sá xini ñùhú-yu dàcúxí sá táxi-yu xii mee-o”, duha ní cachí-gá —cächí té Páblú xáhaⁿ-dē xii-güedé.

³⁶ Te sátá dúcáⁿ ñi cáháⁿ-dé, te ní ngüñí xítí-dē ndihí dava-gá-güedé, te ní cáháⁿ ndihí-dé Yă Ndiöxí. ³⁷ Te sátá ñi tühú tnúhu ní cáháⁿ-dé ndihí Yă Ndiöxí, te ní ndáhyú víhí-güedé sá quihíⁿ-dé, te ní numi ñaha-güedé, te ní teyuhu ñàha-güedé. ³⁸ Te ní ndíhú víhí iní-güedé, chi ní xáhaⁿ té Páblú sá ñi ñiⁿ nduu-gá vá naníhí tnahá-güedé cáháⁿ ndihí tnahá-güedé. Te cuáháⁿ ndihí ñaha-güedé xii-dé núú ndécú bàrcú.

21

Té Páblú cuáháⁿ-dé ñuú Jerusálén

¹ Te ní quide ndee iní-ndí nchaá cue téé cùnuu. Te ní quée-ndí bàrcú cuáháⁿ ndáá ichi-ndí ñuú Cōs. Te nduu tnéé ní sáháⁿ-ndí

ñuú Ròdás, te ní yáha-ndí cuáháⁿ-ndí ñuú Pàtará. ² Te yàcáⁿ ní naníhí-ndí ñⁿ bàrcú ñúhú ìchi-xi quíhíⁿ-xi distritú Fèniciá, xíàⁿ ní quée-ndí cuáháⁿ-ndí. ³ Te ichi cuáháⁿ-ndí ní xiní-ndí distritú Chìpré cáá cuádava xítí làmár, te ní yáha-ndí, te ní quendóo ñuú-áⁿ xio dàtni-ndí. Te cuáháⁿ-ndí ñuú Tìrú ñⁿ ñuú yíndèhu distritú Siriá cuendá yàcáⁿ tava-güedé nchaa sá nchídó bàrcú. ⁴ Te yàcáⁿ ní naníhí tnáhá-ndí ndihí ñáyiú ní sándáá iní tnúhu Jèsús, te ní xíndecu-ndí úsá nduu ndihí-yu. Te ní xáháⁿ-yu sá vǎ quíhíⁿ té Pǎblú ñuú Jerusàlén, chi Espiritú Yǎ Ndiöxí ní xáhaⁿ-xi xíi-yu sá ndóhó vihi-dé ñuú na quíhíⁿ-dé. ⁵ Te sátá ñí yáha nduu úsá, te ní quee-ndí cuáháⁿ-ndí yuhu làmár. Te ní quee nchaa ñáyiú ní sándáá iní tnúhu-gá, téé, ñàdìhí, nchaa landú, ncháá-yu ní sàndeca ñàhá-yu yuhu làmár, te òré ní quexìo-ndí, te ní ngüíñí xítí-ndí ní cáháⁿ ndihí-ndí Yǎ Ndiöxí. ⁶ Te ní quide ndee ìní tnáhá-ndí ndihí-yu, te dàtnùnì ní quée-ndí bàrcú, te ní naquehéⁿ-yu ichi cuánuhú-yu vehé-yu.

⁷ Te ní xica bàrcú ñúhú-ndí ní quee-xi ñuú Tìrú cuáháⁿ-ndí ndihí-xi ñuú Tolèmaidá. Te xíaⁿ ñí sáá-xi te ní quene-ndí, te ní sáháⁿ-ndí ní cáháⁿ ndihí-ndí nchaa ñáyiú sándáá iní-xi tnúhu Jèsús, te ní xíndecu-ndí ndihí-yu ñⁿ nduu. ⁸ Te nduu tnèé ní ndée tucu-ndí bàrcú cuáháⁿ-ndí ñuú Cèsareá, te yàcáⁿ ní quene tucu-ndí bàrcú, te cuáháⁿ-ndí vehe té Lìpé cundecu-ndí ndihí-dé. Te téé-áⁿ ñí xóo cada chiuⁿ ndihí-dé ñíú-gá cue téé ní chindee ñàha xii ñáyiú sándáá iní tnúhu-gá ñuú Jerusàlén ní xóo cuáñaha-güedé sá ñí xóo caxí-yu. Te dàtnùnì mee-ñǎ tnúhu Yǎ Ndiöxí càháⁿ-dé xicá cùu-dé. ⁹ Te té Lìpé-áⁿ ndècu cúmí dèhe dìhí-dé, te ní ñⁿ-yu vátá ndúcú ñàha-gá téé xii-yu, te ncháá-yu càháⁿ-yu tnúhu Yǎ Ndiöxí tnúhu sá dácàhu iní ñàhá mèe-gá. ¹⁰ Te xíaⁿ ñí cuu titní nduu ndècu-ndí, te ní quexìo ñⁿ téé nàni Agabú ñuú-áⁿ, véxi-dé distritú Jùdeá, te téé-áⁿ tnáhá-dé càháⁿ-dé tnúhu Yǎ Ndiöxí. ¹¹ Te ní níhí-dé tnúhu núú ndécú-ndí ñuú ní quixi-dé ní cáháⁿ

ndihí ñàha-dé xii-ndí. Te ní xicáⁿ-dé cìrchú té Pǎblú, te ní ngóo-dé, te ní ngüíta-dé ní dácútú-dé sáhá-dé ndihí ndaha-dé, te ní cachí-dé xii-ndí:

—Espiritú Yǎ Ndiöxí ní cachí-xi sá tée dii cìrchú-xi-a tñii ñàha cuè téé isràél ñuú Jerusàlén, te duha dácùtu ñàha-güedé xii-dé, te cuáha cuendá ñàhá-güedé xii-dé núú cuè téé ñuú Ròmá. Duha ní cáháⁿ Espiritú-gá —càchí té Agabú.

¹² Te sá dúcáⁿ ñí cáháⁿ-dé, te ní xáhaⁿ-ndí nchaa-ndí sá vǎ quíhíⁿ té Pǎblú ñuú Jerusàlén. ¹³ Te té Pǎblú ní cachí-dé:

—¿Ná cuendá ndée dúcáⁿ ndàhyú-ndó dándihú iní ñàhá-ndó xii-í-i? Te ñá túú ñǎ cuu cuèi na dácùtu ñàha-güedé, àdi cuèi na càhni ñàha-güedé xii-í cuendá sá càháⁿ ndihí-í Jèsús, chi sa ndècu túha-í sá cùú-í —càchí-dé.

¹⁴ Te ñá túú ní sándáá iní-dé sá dúcáⁿ xáhaⁿ-ndí, núú xíàⁿ ñá túú-gǎ ná ní xáhaⁿ-ndí xii-dé sá vǎ quíhíⁿ-dé, te ní xítñàha-ndí:

—Mee-ni-gǎ Yǎ Ndiöxí ná cùnaha-gá nása sàni iní-gá cada-gá —xítñàha-na-ndí.

¹⁵ Te ní queheⁿ-ndí ndàchiuⁿ-ndí, te ní xica-ndí cuáháⁿ-ndí ñuú Jerusàlén. ¹⁶ Te cuáháⁿ ndihí-ndí ñⁿ ùú cue téé Cèsareá, cue téé ní sándáá iní tnúhu Jèsús. Te ndèca ñàha-güedé xii-ndí cuáháⁿ vehe té Mnàson, te téé-áⁿ cùú-dé téé distritú Chìpré, te ndècu-dé ñuú Jerusàlén, te sa ní cuu vǎi nduu ní sándáá iní-dé tnúhu-gá, te vehe téé-áⁿ ñí xíndecu-ndí.

Té Pǎblú ndátnūhu-dé ndihí té Jàcobó

¹⁷ Te òré ní quexìo-ndí ñuú Jerusàlén, te nchaa ñáyiú ní sándáá iní tnúhu Jèsús ní quixí-yu ní dándácóo váha ñàhá-yu, chi ní cudíí víhí iní-yu sá ñí quexìo-ndí. ¹⁸ Te nduu tnèé cuáháⁿ ndihí-ndí té Pǎblú cuendá cáháⁿ ndihí-ndí té Jàcobó, te òré ní quexìo-ndí núú ndécú-dé, te ndècu ndihí-dé nchaa cue téé yíndaha ñàha xii ñáyiú sándáá iní tnúhu Jèsús. ¹⁹ Te té Pǎblú ní dándácóo váha ñàha-dé xii-güedé, te ní xáhaⁿ-dé nàcuáa ní quide Yǎ Ndiöxí ní chindee ñàha-gá xii-dé ní cáháⁿ-dé tnúhu-gá núú ñáyiú ñá túú cùu ñáyiú isràél. ²⁰ Te sátá ñí yáha ní cáháⁿ-dé, te ní ndácáⁿ táhū-yu núú Yǎ

Ndióxí cuendá nchaa sá ñí quide-gá. Te dātnùní ní xáhaⁿ-güedě xii té Pāblú:

—Yòhó sa nàha-n sá ñí cuu titní mīl ñáyiú isràél ní sándáá iní-yu tnúhu Jèsús, te cāchí-yu sá ïo xini ñuhu-xi cadá-yu nchaa nācuáa cāháⁿ tnúhu sá ñí chídó tnùní ndíi Moisés. ²¹ Te ní níhi-yu tnúhu sá dācuàha-n ñáyiú isràél ñáyiú ndècu ñuú xicá cuendá sá vā cadá-gā-yu nācuáa ní cachí ndíi Moisés cadá-yu. Te xāhaⁿ-n xií-yu sá vā cuāha-gā-yu señá ñi landú-yu, te vā cadá-gā-yu dātná ní xóo cada ñáyiú ndéé sanaha, duha dācuaha-n ñáyiú ní níhi-yu tnúhu. ²² Te na nihí-yu tnúhu sá ndécú-n iha, te tnāvíí ngúíta-yu cāháⁿ cuèhé-yu cuendá-n. ²³ Te na cāchí tnúhu-ndí nācuáa cada-n. Ndècu cúmí cue tée vātá cadá-gā-güedé nācuáa ní cāháⁿ méé-güedé sá cadá-güedé cuendá nduu vétú iní Yā Ndióxí. ²⁴ Te quíhiⁿ-n ndíhi-güedé te cada-n nchāa nācuáa ní xóo cada ñáyiú ndéé sanaha cuendá nduu vétú iní Yā Ndióxí. Te tava-n díhúⁿ cuu núú-güedé chāhu-güedé veñúhu, te ducaⁿ te dātnùní ndacu dèté díquí-güedé. Nchaa xiāⁿ cada-n, te quini ñáyiú sá ñā ndāá tnúhu cāháⁿ nchaa ñáyiú cāháⁿ cuèhé cuendá-n. Te na cūtnuní iní-yu sá tnāhá-n quide-n nchaa nācuáa ní chídó tnùní ndíi Moisés cadá-yu. ²⁵ Te sa ní quide ndāá-ndí cuendá nchaa ñáyiú ñuú xicá, nchaa ñáyiú ní tuha ichi Jèsús. Te sa ní cadúha-ndí tutú ní tendaha-ndí cuáhāⁿ ndaha nchaa ñáyiú-áⁿ sá vā cāxi-yu nchaa sá nchító-ó ndúu táhú nchaa sá cāchí-yu cūu ndióxí ní cadúha cue ñáyiú ñuyíú-a. Te ní xáhaⁿ-ndí sá vā cāxi-yu níhi, te vā cāxi-yu cuñú nchaa quiti cuèhné. Te vā cāháⁿ ndíhi cue tée ñadíhi te núu ñā díú ñādíhi-güedé cúu-yu, te ní cuè ñáyiú díhi vā cāháⁿ ndíhi-yu tée te núu ñā díú yíi-yu cūu-güedé. Duha ní tee-ndí núú tūtú cuáhāⁿ —cāchí-güedé xāhaⁿ-güedé xii té Pāblú.

Ní tñi-güedé té Pāblú xiti veñúhu ñáyiú isràél

²⁶ Te nduu tnéé cuáhāⁿ té Pāblú ndíhi cúmí cue tée veñúhu cāhnu sá ïo cūnuu núú ñáyiú isràél cada-güedé nācuáa ní xóo cada ñáyiú ndéé sanaha cuendá nduu vétú iní Yā Ndióxí. Te ní quíhu-dé veñúhu cāhnu

sá ïo cūnuu-áⁿ ní xáhaⁿ-dē ná daha-gá nduu cūmání dandíhi-güedé nācuáa ní xóo cada ñáyiú ndéé sanaha, te dātnùní cānehe-güedé sá ndúú táhú Yā Ndióxí quíhiⁿ veñúhu.

²⁷ Te cūmání-gā cuu úsá nduu sá ñí sáhāⁿ-güedé veñúhu cāhnu sá ïo cūnuu, te sa ndècu tucu té Pāblú veñúhu. Te cue tée isràél véxi distrítú Àsiá ní xiní-güedé té Pāblú yíhi-dē veñúhu, te ní tñi ñaha-güedé xii-dé, te ío ní cāháⁿ cuèhé-güedé cuendá-dé núú dāva-gá ñáyiú yíhi veñúhu cuendá sá cúdēⁿ-yu núú tē Pāblú. ²⁸ Te níhi ní cāháⁿ-güedé, te xāhaⁿ-güedé xií-yu:

—¡Nchòhó ñáyiú isràél, yáchí-ndó chì cuánundaha ñaha-ndo! Chì tée-a yayacáⁿ cuáhāⁿ-dé cāháⁿ-dé sá ñā túú nāndíhi-o, te cāháⁿ-dé sá vā cadá-ó nchāa nācuáa cāháⁿ tnúhu sá ñí chídó tnùní ndíi Moisés, te cāchí-dé sá ñā túú nāndíhi veñúhu-a. Te ñā díú-ní xiāⁿ chì sa ní quíhu-dé veñúhu-a ndíhi cue tée ñā túú cūu ñáyiú isràél, te sá dúcāⁿ ñí quide-dé, te ñā túú-gā ní cānehe íi-dē xiti veñúhu, Te veñúhu-a cūu-xi vehe Yā Ndióxí —cāchí-güedé xāhaⁿ-güedé xií-yu.

²⁹ Te ducaⁿ ñí cāháⁿ-güedé chì ní sani iní-güedé sá ñí quíhu ndíhi-dé té Trōfimú veñúhu-güedé, chì ní xiní-güedé xicá cūu ndíhi ñaha-dé xiti ñuú. Te tée-áⁿ cúu-dē tée ñuú Éfésú, te ñā díú tēe isràél cúu-dē.

³⁰ Te chitu ñáyiú ñuú-áⁿ ñí tacá-yu ní tñi-yu té Pāblú táñùhu ñahā-yu ní ndee veñúhu cāhnu sá ïo cūnuu, te òré-ni ní nacadí-güedé yēhe veñúhu-áⁿ. ³¹ Te sa cahní-yu té Pāblú ní cūu, te ní sáhāⁿ ñiⁿ úú-güedé núú ndécú tēe cūu capitāⁿ cúnú-gā, te ní xáhaⁿ-güedé xii-dé sá nchāá ñáyiú ñuú Jerusàlén xīnāá-yu. ³² Te òré-áⁿ cuáhāⁿ tēe cūu capitāⁿ cúnú-gā ndíhi dāva-gā cue tēe nchícúⁿ-gā ndíhi sandādú-dé. Te òré ní xiní-yu ní quexìo coyo-güedé núú xixúcu-yu, te ní yùhú-yu ñā túú-gā ní cāní-yu té Pāblú. ³³ Te tēe cūu capitāⁿ ní sātuhā-dé té Pāblú, te ní xáhaⁿ-dē xii cue sandādú-dé sá tñi ñaha-güedé dacūtu ñaha-güedé úú cadēnā. Te dātnùní ní xicáⁿ tnúhú-dē núu-yu, te xāhaⁿ-dē:

—¿Nā cúu tēe-a? ¿Nā ní quide-dé? — cāchí-dé xāhaⁿ-dē xií-yu.

34 Te tée cùu capitáⁿ-áⁿ ñã ní cùtnuni iní-dé nũu ná cúú sã ní quide té Pãblú, chi uuⁿi ní cuáá-yu. Te tucu cãháⁿ ìⁿ, tucu cãháⁿ ìⁿ-yu, núu xiãⁿ ní xáhaⁿ-dë cue sandàdú-dé sá cándèca ñaha-güedé xii-dé quíhíⁿ cuàrtél núú ndécú-güedë. 35-36 Te nchìcúⁿ ñãhã-yu cuáhãⁿ ní quexìo ndéé nãcuáa càa nchio cuìní-yu cahni ñàhá-yu xii-dé ni cùu. Te níhi ní cáháⁿ-yu xãhãⁿ-yu sá cáhni ñàha-güedé, te xiãⁿ ní ndacani ñaha-güedé ndécá ñàha-güedé cuásaá nchio-ãⁿ.

Té Pãblú xãhaⁿ-dë xii-güedé sá ñà túú cuëchi-dé

37 Te cuánguìhu-güedé cuàrtél ndihi té Pãblú ní cùu, te ní xáhaⁿ-dë xii tée cùu capitáⁿ cúnùu-gá:

—Cãháⁿ ndàhú-í núú-n cùndetu-n na cúñaha-í ìⁿ úú tnúhu xií-yu —càchí-dé xãhaⁿ-dë.

Te tée tàxi tnuní-áⁿ ñã xáhaⁿ-dë:

—¿Náa tnàhá yòhó cãháⁿ-n tnúhu grìégú?

38 Te ní cáhãⁿ-í sá tée ègiptú cúú-n, chi ñiu-n ní ndúcú-n cuè tée ní nàá ndihi tée cùchiuⁿ Cesár ní cáhãⁿ-í, chi ñiu ìⁿ tée yacáⁿ ní ndúcú-dë cúmí mĩl cue tée ní sahani ndíyi. Te ndèca tnaha-güedé ní sáhãⁿ xití yucu ní xíhi váha-güedé —càchí-dé xãhaⁿ-dë xii té Pãblú.

39 Te té Pãblú ní xáhaⁿ-dë:

—Ñá díú tée ègiptú cúú-í, chi tée isràél cúú-í, chi ñiu-ni tée isràél cúú tãtà-í, te dìcò-ni sá ní cacu-í ñuú Tarsú ñuú cáhni, te ñuú-áⁿ yíndèhu-xi distritú Ciliciá. Te cuìní-í cada ndee ìní-n dàña-n na cáháⁿ ndihi-í-yu —càchí-dé xãhaⁿ-dë.

40 Te ní xáhaⁿ tée cùu capitáⁿ cúnùu-gá sá cúú cãháⁿ té Pãblú, núu ní ngúnutnãⁿ-dë núú nchio, te ní quide-dé ndaha-dé sá cùndedóho-yu. Te ní sadí-yu yuhú-yu, te ní cáháⁿ-dë tnúhu ñáyiú isràél, te xãhaⁿ-dë xií-yu:

22

1 —Chí cáda càhnu iní nchòhó cue tée sa cuéhé ndihi nchòhó cue tée cuechi, na cáháⁿ-í ìⁿ tnúhu cundedóho-ndo sã ñà túú cuëchi-í, chi ñà túú ñã ní quide-í, te ni ñà túú ñã tnúhu cáháⁿ-í —càchí-dé xãhaⁿ-dë xii-güedé.

2 Te cuendá sá dúcãⁿ ñã cáháⁿ-dë tnúhu mèe-yu núu tnáví-ñã ní sadí-yu yuhú-yu ní xíndedóho-yu ní cáháⁿ-dë, te xãhaⁿ-dë:

3 —Yúhú cúú-í tée isràél, te ní cacu-í ñuú Tarsú, te ñuú-áⁿ yíndèhu-xi Ciliciá. Te davitna líhli-í cùtnàhá ní quexìo-í ñuú Jerusàlén ní dácuáhã ñàha té Gamàliél. Te ní dácuáhã-í nchaa tnúhu ní chídó tnùnì nchaa cue tée ndéé sanaha nãcuáa cada ñáyiú. Te yúhú ní cahu iní-í ní quide-í títní núú chiuⁿ nacuáa cuu váha iní Yã Ndiõxí ní cáhãⁿ-í, te ñiu-ni ducaⁿ quide nchohó tucu.

4 Te ní sánú ndúcú-í nchaa ñáyiú sandáá iní-xi tnúhu Jèsús, cuèi tée, cuèi ñáyiú dìhí ní dácútù-í-yu, te ní chihi-í-yu vecaá, te ní níhì-í tnúhu ndee ìní sá cáhni-ndí-yu.

5 Te dútú cúnùu-gá ndihi cue tée cùnùu núú-ndó naha-güedé sá ndàá cáháⁿ-í chi mee-güedé ní taxi-güedé tutú cuãñaha-í xii ñáyiú isràél ñáyiú ndècu ñuú Dãmascú cuendá cutnùnì iní-yu ná chíúⁿ cuáhãⁿ-í ní cùu. Te ñuhu-í ichi cuáhãⁿ-í ñuú-áⁿ cuãnúndúcú-í ñáyiú ní sandáá iní-xi tnúhu Jèsús cuendá dacùtu-í-yu te candeca-í-yu ndixi, te iha cada úhú ñàhá-güedé xií-yu ní cùu.

Té Pãblú xãhaⁿ-dë xii ñáyiú nãcuáa ní cuu ní tuha-dé ichi Jèsús

(Hch. 9:1-19; 26:12-18)

6 Te ta cùyatni-í ñuú Dãmascú cuáhãⁿ-í, te cùu-xi datná òré cauxúú nduu, te uuⁿi ní quee ñuhú andiu, te ní dáyhé-xi ndéé núú nútnãⁿ-í. 7 Te ní quide nee-xi núú-í, xiãⁿ ní nduá-í ndéé ñuhu. Te ní tecú dóho-í cáháⁿ ìⁿ sá cáháⁿ andiu, te càchí-xi: “Yòhó té Sàulú, ¿ná cuendá cúú úhú iní ñàhá-n dãndoho ñaha-n xii-í?”, càchí sá cáháⁿ-áⁿ.

8 Te ní xáhaⁿ-í: “¿Ná cúú yòhó sá cáháⁿ-áⁿ?”, xãhaⁿ-í. Te ní cáháⁿ tucu ingá xito te càchí-xi: “Yúhú cúú-í Jèsús tée ní xíndecu ñuú Nazàrét, te ducaⁿ ño dãndoho ñaha-n xii-í”, càchí sá cáháⁿ-áⁿ. Te xiãⁿ ní cutnùnì iní-í sá díú Jèsús cáháⁿ. 9 Te nchaa cue tée ndihi-í ní xiní-güedé ní dáyhé ñuhú, te ní yuhú-güedé, dico ñà túú ní tècú dóho-güedé òré ní cáháⁿ-gá. 10 Te ní xáhaⁿ-í xii-gá: “Yòhó Xítohó Jesucrístú, ¿ná cuìní-n càda-í?”, xãhaⁿ-í xii-gá. Te ní cachí-gá: “Ndacóo, te quíhíⁿ-n ñuú Dãmascú, yacáⁿ tecú tnúhu-n nchaa nacuáa cuìní Yã Ndiõxí

cada-n”, cächí-gá —cächí té Păblú xăhaⁿ-dë xií-yu.

11 Te ní xáhaⁿ tùcu té Păblú:

—Te cuëndá sá nǐ dăcuáá ñàha ñuhú xii-í nǔu ní tñi cue tée ndihi-í ndaha-í ndécá ñàha-güedé cuáháⁿ ndéé ñuú Dàmascú.

12 Te yàcáⁿ ndécú ñⁿ tée nàni Ananiás, te ío vâi sá nǐ chídó tñuní ndíi Moisés cadá-yu quide-dé. Te nchaa ñáyiu ñuú Dàmascú ío váha cáháⁿ ndihi ñàhá-yu xii-dé. 13 Te ní quexìo-dé núu ndécú-í, te ní cachí-dé: “Yòhó té Sàulú, tée ndècu ndihi-í ichi Xítóhó Jesucristú, ndúha núu-n”, cächí-dé. Te òré-ni ní nacaáⁿ núu-í te ní xiní-í-dé. 14 Te dătnuní ní cachí-dé: “Yá Ndiòxí ní cáháⁿ ndihi-gá ñani tñáhá-ó nǐ xíndecu ndéé sanaha. Te ñu-gá ní cáxi ñaha-gă xii-n cuëndá quini-n nchàa sá vâha cuini-gá cada-n. Te quini-n Jèsús Yaá ñá túu cuèchi-xi, te ñu-ni mee-gă cáháⁿ ndihi ñaha-gă xii-n. 15 Te cáháⁿ-n tñuhu Jèsús núu nchàa ñáyiu, te cáháⁿ-n nchàa sá nǐ xiní-n ndihi nchaa sá nǐ xíndedóho-n. 16 Tnàvíi, te quíhíⁿ-n cuàndute-n, te cáháⁿ ndihi-n Yá Ndiòxí cuëndá cada cãhnu iní-gá nchaa sá cuèhé sá dúhá nǐ quide-n”, duha ní cachí té Ananiás xii-í —cächí té Păblú xăhaⁿ-dë xií-yu.

Té Păblú ní caní-dé cuëndú năcuáa ní xáhaⁿ Jèsús cada-dé quíhíⁿ-dë ñuú núu xíndecu ñáyiu ñá túu cùu ñáyiu isràèl

17 Te ní xáhaⁿ tùcu té Păblú:

—Te ní ndee-í cuândixi-í ñuú Jerusàlén. Te ní sáháⁿ-í veñúhu cãhnu sá ño cùnūu ní cáháⁿ ndihi-í Yá Ndiòxí, te ní dăcótó núu ñáhá-xí sǎ mée Jèsús ní xiní-í xití veñúhu, 18 te ní cachí-gá: “Yáchí, quee-n ñuú Jerusàlén, chi ñáyiu-a vá quindáá iní-yu năcuáa ní cachí-í cùñaha-n xii-yu cuëndá-í”, duha ní cachí-gá xii-í. 19 Te ní xáhaⁿ-í xii-gá: “Yòhó Xítóhó Jesucristú, sa xiní-n sǎ ncháá ñáyiu nàhá-yu sá nǐ sáháⁿ-í ndi tñahá ñⁿ ndi tñahá ñⁿ veñúhu nànducu-í ñáyiu sàndáá iní tñuhu-n, te ní tñi-í-yu, ní chihi-í-yu vecaá, te ní táuchíuⁿ-í ní caniha-güedé xii-yu. 20 Te cútnàhá ní sahani-güedé ndíi Těvá tée ní xóo cáháⁿ tñuhu-n, te tñahá-í ndécú òré-áⁿ te ní xíndee-í dóo cue tée ní sahani ñaha xii ndíi. Te yúhú ní cáháⁿ-í sá nǐ quide váha-güedé sá dúcáⁿ nǐ quide-güedé”, duha ní xáhaⁿ-í xii-gá. 21 Te ní cachí tñuhu-gá xii-í: “Cuáháⁿ

chi cuini-í quíhíⁿ-n nchàa ñuú xícá nǔu xíndecu cue ñáyiu ñá túu cùu ñáyiu isràèl cáháⁿ-n tñuhu-í”, cächí-gá —cächí té Păblú xăhaⁿ-dë xií-yu.

Te Păblú ndihi tée tàxi tñuní ñáhá xii cue sandadú

22 Te sá dúcáⁿ nǐ cáháⁿ-dé, te ñá ní tñahá-gá iní-yu cundedóho-yu tñuhu cáháⁿ-dé. Te ñⁿ-ni ní cuú-yu nchaa-yu, te ní cuáá-yu, te xăháⁿ-yu:

—¡Chí cáhni-dë! ¡Ñá díú sǎ cùndècu-dé ñuyú-a! —cächí-yu xăháⁿ-yu.

23 Te mei òré ducaⁿ nǐ cáháⁿ-yu, te ní ndátă-yu dóo-yu, te ní dáquéně-yu núu ñnu sá sàtú iní-yu. Te ní quèhnu-yu ñuhu, te ní dăcàcòyó-yu núu ñnu sá ño sàtú iní-yu. 24 Te tée cùu capitáⁿ cùnūu-gá ní xáhaⁿ-dë xii cue sandadú-dé:

—Chí dítă-dë ná quíhu-dé ndéé xití vehe, te cani-ndo-dë ñi, chi na quène yuhu-dé ná tñuhu ní cáháⁿ-dé nǔu ndéé dúcáⁿ cùdèěⁿ-yu núu-dë —cächí-dé xăhaⁿ-dë xii-güedé.

25 Te sàtá nǐ dăcútú ñaha-güedé xii té Păblú sá caní ñaha-güedé ní cùu, te ní xáhaⁿ-dë xii tée cùu capitáⁿ ndécú-ăⁿ:

—Te na cächí tñuhu-í sá vǎ cúu cãniha-güedé ñi, chi tée ròmá cùu-í, te vátă quini ndáá-gá-ndó nǔu ndècuèchi-í àdi ñáhá —cächí-dé xăhaⁿ-dë xii tée cùu capitáⁿ.

26 Te sá dúcáⁿ nǐ cáháⁿ-dé, te ní sáháⁿ tée cùu capitáⁿ núu tée cùnūu-gá, te ní xáhaⁿ-dë:

—Vá cúu cãni-o tée-ăⁿ, chi tée ròmá cùu-dë —cächí-dé xăhaⁿ-dë.

27 Te ní sáháⁿ tée cùu capitáⁿ cùnūu-gá ndéé núu té Păblú, te ní xáhaⁿ-dë:

—Cáháⁿ ndáá-n nǔu ndisa tée ròmá cùu-n —cächí-dé xăhaⁿ-dë.

Te ní xáhaⁿ tē Păblú:

—Ndáá sá tē ròmá cùu-í —cächí té Păblú xăhaⁿ-dë xii tée cùnūu-áⁿ.

28 Te ní xáhaⁿ tē cùnūu-áⁿ:

—Yúhú tñahá-í cùu-í tée ròmá, chi vâi díhúⁿ nǐ cháhu-í —cächí-dé xăhaⁿ-dë.

Te té Păblú ní xáhaⁿ-dë:

—Tñahá-í cùu-í tée yàcáⁿ tucu, chi tătă-í cùu-dë tée ròmá —cächí té Păblú xăhaⁿ-dë xii tée cùu capitáⁿ cùnūu-gá.

29 Te uuⁿ-ni ní nacaca sata cuè tée cuáháⁿ caniha xii-dé ní cùu. Te ní yúhú tée tàxi tñuní sá dúcáⁿ nǐ xáhaⁿ tē Păblú sá tē ròmá cùu-dë, chi ní xáhaⁿ-dë ní dăcútú ñaha-güedé xii-dé, núu xíáⁿ ní yuhu-dé.

Té Păblú ní cáháⁿ ndihí-dé cue tée cùnuu oré ní quide-güedë jündá

³⁰ Te tée tàxi tnuní sandàdú ñá ní xìní-dé ná cuéchi ní dácáá ñáyiú isràél díquí tē Păblú, núu xiǎⁿ nduu tnēé ní cana-dé cue dútú cúnùu, ndihí cue tée cùchiuⁿ, ndihí cue tée cùu sacuéhé, te ní xáhaⁿ-dē sá cáda-güedë jündá cuendá nducu tnùhu-güedé núu tē Păblú ná cuéchi ní dácáá-yu díquí-dē. Te ní xáhaⁿ-dē xii cue sandàdú sá nándàxi ñaha-güedé cadená ndútú-dē, te candeca ñaha-güedë quíhíⁿ núu cáda-güedë jündá. Te ní sáháⁿ-güedé ní nandaxi ñaha-güedé xii-dé ndéca ñaha-güedé cuáháⁿ jündá, te ní quexìo-güedé, te ní ngúnutnii-dé núu cuè tée cùchiuⁿ.

23

¹ Te yàcáⁿ ní xíndéhé vǎha té Păblú núu nchàa-güedé, te ní xáhaⁿ-dē:

—Cada càhnu iní nchòhó cue tée cùchiuⁿ, te ducaⁿ nchòhó cue tée cùu sacuéhé, véxi-í càchí tnùhu-í sá ñà túu cuèchi-í, chi mee Yǎ Ndiòxí nánhá-gǎ nása ndècu-í ñuyíú-a, te ñá túu cùcahaⁿ núu-í núu-gǎ —càchí té Păblú xáhaⁿ-dē xii-güedé.

² Te té Ananiás tée cùu dútú cúnùu-gá ní xáhaⁿ-dē xii cue tée nùtnii yatni dìñi té Păblú sá cání-güedë déhndé yuhu-dé. ³ Te té Păblú ní xáhaⁿ-dē xii dútú-ǎⁿ:

—Yòhó, chi úhú tnàhí iní-n, chi ní ndúcú-n tēe ní caniha xii-í, te ñá túu cuèchi-í, dico quiní-n ñà cada ñaha Yǎ Ndiòxí xii-n. Te yòhó ní cana ñaha-n ndùcu tnùhu-n nùu quide-í nchaa nàcuáa càháⁿ tnùhu sá ñi chídó tnùní ndí Moisés cada-o. Te mee-n ñi ndúcú-n tēe ní caniha, te ñá túu dùcaⁿ ní cáháⁿ ndí cada-o —càchí té Păblú xáhaⁿ-dē xii dútú cúnùu-gá-ǎⁿ.

⁴ Te cue tée xínutnii dìñi té Păblú ní xáhaⁿ-güedë xii-dé:

—Nèhé ní quide-n chi ní xícuèhé-n dútú cúnùu-gá tée xínu cuechi núu Yǎ Ndiòxí —càchí-güedé xáhaⁿ-güedë xii té Păblú.

⁵ Te té Păblú ní xáhaⁿ-dē xii-güedé:

—Cada càhnu iní-ndó chi ñá túu xìní-í sá dútú cúnùu-gá cúu-dē, chi núu tütú Yǎ Ndiòxí càchí-xi sá vǎ cúu càháⁿ cuèhé-ó cuendá ñiⁿ té cùnuu ñuú-ó yòtnùhu. Te yúhú ñá túu xìní-í sá tēe cùnuu cuu-dé nùu ní

sácóo-í ní cáháⁿ-í —càchí té Păblú xáhaⁿ-dē xii-güedé.

⁶ Te òré-áⁿ ñi cutnùní iní té Păblú sá dáva-güedë cündihí-güedé cue tée cùu saducéu, te dava-güedé cündihí-güedé cue tée cùu fariséu, te níhi ní cáháⁿ-dē ní xáhaⁿ-dē xii-güedé:

—Yúhú cúu-í tée fariséu, te tnàhá tǎtà-í ndihí xii-í cúu-güedé cue tée fariséu tucu. Te tnàhá yúhú sandáá iní-í sá ndótó nchàa ñáyiú ní xihí, te núu xiǎⁿ cuíní-ndó ndùcu tnùhu-ndo nùu-í cáná ñaha-ndo —cachí-dé xáhaⁿ-dē xii-güedé.

⁷ Te sá dúcáⁿ ñi cáháⁿ-dē xiǎⁿ ní nàa ndihí tnàha cue tée cùu fariséu ndihí cue tée cùu saducéu, chi ñá ñiⁿ-ní tnùhu ní càháⁿ-güedé, chi ní ndi queheⁿ ndi queheⁿ-güedé sá ñi cáháⁿ-güedé. ⁸ Te cue tée cùu saducéu càchí-güedé sá vǎ ndótó cuè ñáyiú ní xihí, te cue tée cùu fariséu càchí-güedé sá ndótó-yu. Te cue tée cùu saducéu càchí-güedé sá ñà túu espíritú xínú cuèchi núu Yǎ Ndiòxí, te cue tée cùu fariséu càchí-güedé sá ió espíritú xínú cuèchi núu-gǎ. ⁹ Te ta cùdéeⁿ-güedë cuáháⁿ, te níhi-gá cúu iní-güedé càháⁿ-güedé, te ñiⁿ úú cue tée cùu fariséu cue tée dàcuaha ñaha xii ñáyiú nchaa tnùhu ní chídó tnùní ndí Moisés ní cáháⁿ níhi-güedé, te xáhaⁿ-güedé:

—Ñá túu cuèchi-dé, te cudana te ní cáháⁿ ndihí-dé ñiⁿ espíritú xínú cuèchi núu Yǎ Ndiòxí te vá ngòo vá cúu vǎha iní-ó nùu-gǎ —càchí cue tée cùu fariséu xáhaⁿ-güedë xii-güedé.

¹⁰ Te cuendá sá ió xínàa-güedé, xiǎⁿ ní yúhú tée cùu capitáⁿ cúnùu-gá sá cáhni-güedé té Păblú, núu xiǎⁿ ní xáhaⁿ-dē sá quíhíⁿ-güedé cúnúcuaca ñaha-güedé candeca ñaha-güedé nùhú cuàrtél.

¹¹ Te ndéé niú cúu úú ní quexìo Xítóhó Jesucristú núu ndécú tē Păblú, te ní xáhaⁿ-gǎ:

—Ñíⁿ cunduu-n, vá yúhú-n, chi nàcuáa ní cáháⁿ-n ñi cacunehe ñaha-n xii-í iha, te ñiⁿ-ni ducaⁿ càháⁿ-n càcunehe ñaha-n xii-í quíhíⁿ-n ñuú Rómá —càchí-gá xáhaⁿ-gǎ xii-dé.

Cahni-güedé té Păblú ní cùu

¹²⁻¹³ Te nduu tnēé ní nataká vñhi-gá údico cue tée isràél ní ndatnúhu-güedé sá cáhni-güedé té Păblú, te ní xítñaha-güedé:

—Ni dítá vǎ cǎxí-ó te ni ndùte vá cóhó-ó ndéé ndacu-o cǎhni-o té Pǎblú, te dǎtnùní caxi-o dítá, te coho-o ndùte, chi sa ní sani iní-ó sǎ cǎdá-ó, te cuu cuéchi xii-o nùu vá cǎdá-ó —cǎchí-güedé xǐtnàha-güedé.

¹⁴ Te ní sǎháⁿ-güedé núú ndécú nchàa dútú cúnùu ndihì nchaa cue tée cùu sacuéhé, te ní xáhaⁿ-güedé:

—Ní cachí-ndí sá ni dítá vǎ cǎxí-ndí ndéé nùu ní ndacu-ndí ní sahani-ndí té Pǎblú, chi sa ní sani iní-ndí sǎ cǎdá-ndí, te cuu cuéchi núu vá cǎdá-ndí. ¹⁵ Te duha cada-ndo ndihì dava-gá cue tée cùnùu, chi cùñaha-ndo xii tée cùu capitáⁿ cúnùu-gá: “Quixi ndihì-n tǎ Pǎblú núú ndécú-ndí cuendá ndatnúhu ndihì-ndí-dé, chi cuíní-ndí nducu tnùhu váha-gá-ndí ná cúú sǎ nǐ quide-dé”, duha cùñaha-ndo xii tée tàxi tnuní sandàdú. Te ducaⁿ-ni cùñaha-ndo dǎndahú-ndó-güedé cuendá quixi ndihì-güedé té Pǎblú, te nchúhú sa cundetú-ndí-güedé ichi, chi quiní té Pǎblú ná cahni-ndí-dé —cǎchí-güedé xǎhaⁿ-güedé xii cue tée cùchiuⁿ.

¹⁶ Te déhe cúha té Pǎblú ní níhí-dě tnúhu nàcuáa cada-güedé ditó-dé. Te ní sǎháⁿ-dé cuártel, te ní xáhaⁿ-dě xii ditó-dé nàcuáa cǎháⁿ-güedé cada ñaha-güedé. ¹⁷ Te ní cana té Pǎblú ⁱⁱn tée cùu capitáⁿ, te ní xáhaⁿ-dě:

—Vá cùndèe iní-n, quíhíⁿ ndihì-n tǎe-a na cǎháⁿ ndihì-dé tée cùnùu-gá, chi ndècu ⁱⁱn cuendú cùñaha-dě cuíní-í —cǎchí té Pǎblú xǎhaⁿ-dě xii tée cùu capitáⁿ.

¹⁸ Te dǎtnùní ní xica tée cùu capitáⁿ ndécá-dě dǎxíⁿ tǎ Pǎblú cuáháⁿ núú ndécú tée cùnùu-gá, te òré ní quexìo-güedé núú-dě, te ní xáhaⁿ tǎe cùu capitáⁿ xii-dé:

—Té Pǎblú tée yìhì vecaá ní cana ñaha-dě xii-í, te ní cachí-dé véxi-í ndihì tǎe-a cuendá cachí tnúhu-dé ⁱⁱn cuendú cuíní-dé —cǎchí-dé xǎhaⁿ-dě xii tée cùnùu-gá.

¹⁹ Te tée cùnùu-áⁿ nǐ tñi-dé ndaha dǎxíⁿ tǎ Pǎblú, te tǎnehe ñaha-dé cuáháⁿ ⁱⁱn xio, te ní xícaⁿ tnúhú-dě núú-dě, te xǎhaⁿ-dě:

—¿Ná cuendú cuíní-n cǎháⁿ-n? —cǎchí-dé xǎhaⁿ-dě xii dǎxíⁿ tǎ Pǎblú.

²⁰ Te ní xáhaⁿ-dě xii tée cùnùu-áⁿ:

—Cue tée isràel ní ndatnúhu ndáá-güedé sǎ quíxí-güedé tneé cǎháⁿ ndàhú-güedé núú-n cǎndeca-n té Pǎblú quíhíⁿ jùndá, te yàcáⁿ cǎcáⁿ tnúhú ndáá-güedé núú-dě ná cúú sǎ nǐ quide-dé, cǎchí-güedé

xǐtnàha-güedé.

²¹ Te vá quíndáa iní-n chi dicó dandàhú ñáhá-güedé, chi vìhi-gá údico-güedé ndátnùhu-güedé cundedí-güedé ichi cahni ñaha-güedé. Te xǐtnàha-güedé sá ni dítá vǎ cǎxí-güedé, te ni ndùte vá cóhó-güedé ndéé nùu ní ndacu-güedé ní sahani ñaha-güedé, te dǎtnùní caxi-güedé dítá, te coho-güedé ndute, chi sa ní sani iní-güedé sǎ cǎdá-güedé, te cuu cuéchi núu vá cǎdá-güedé, cǎchí-güedé xǐtnàha-güedé. Te cundecu túha-ná-güedé cundetú ñaha-güedé tneé, te núu na quíndáa iní-n cǎndeca-n-dé quíhíⁿ jùndá —cǎchí-dé xǎhaⁿ-dě xii tée cùnùu-áⁿ.

²² Te tée cùnùu-áⁿ nǐ xáhaⁿ-dě:

—Cuanùhú, te vá yǒo tñahì cùñaha-n sǎ nǐ quixi-n nǐ cachí tnúhu-n nàcuáa cǎháⁿ-güedé cada-güedé té Pǎblú —cǎchí-dé xǎhaⁿ-dě.

Ndèca-güedé té Pǎblú cuáháⁿ núú tǎ Juélí tée cùu gobiernú

²³ Te tée cùnùu-gá ní cana-dé úú cue tée cùu capitáⁿ, te xǎhaⁿ-dě:

—Tava-ndo ùú ciendú sandàdú cue tée xica saha, ndihì únídico úxí sandàdú cue tée yòdo cuayú, ndihì úú ciendú sandàdú mee-ni cuè tée xǐnehe lànzá. Te cada túha-ndo chi caca-ndo òré caá ⁱⁱn niú quíhíⁿ-ndó ñùú Cèsareá ndihì té Pǎblú. ²⁴ Te nducu-ndo cuèdicó ⁱⁱn ùú cuayú codo-dé ndihì cue tée ndéé ñáhá xii-dé. Te cada cuedàdú-ndó-dě ichi, te candeca-ndo-dě quíhíⁿ quíndeca-ndo-dě núú tǎe cùu gobiernú —cǎchí tée cùnùu-áⁿ xǎhaⁿ-dě xii cue tée cùu capitáⁿ.

²⁵ Te tée cùnùu-áⁿ nǐ cadúha-dé tutú cuendá quíhíⁿ ndaha té Juélí tée cùu gobiernú. Te duha ní chídó tnùní-dé núú tutú cuáháⁿ:

²⁶ “Cóvǎha díi-n, tǎtá gobernàdór. Ío cada cǎhnu iní, yúhú nání-í Claudiú Lìsiás. Yúhú ní tendaha-í ⁱⁱn tutú véxi ndaha-n cuendá quiní tnùní-n nàcuáa ní cuu iha.

²⁷ Cue tée isràel ní tñi-güedé ⁱⁱn tée nàni Pǎblú cuíní-güedé cahni ñaha-güedé ní cùu, te ní níhí-í tnúhu sǎ tǎe ròma cúú-dě nùu ní sǎháⁿ-í ndihì sandàdú-í ní dǎcǎcu-ndí-dé. ²⁸ Te ní cuíní-í quiní-í ná cuendá tée ñaha-güedé cuéchi xii-dé, núu xǎⁿ ndécá-í-dé ní sǎháⁿ núú nǐ quide cue

tée cùchiuⁿ israél jùndá. ²⁹ Te yacáⁿ ní níhì-í tnúhu sá ñà túú nã cuéchi ní quide-dé, chi cuendá-ni sá ñí níhí-güedě tnúhu sá ñà túú sandáá iní-dé cada-dé nchaa sá ñí xóo cada ñáyu ní xíndecu ndéé sanaha nchicúⁿ nihnu-güedé quide-güedé, xíáⁿ ní cudééⁿ-güedě núú-dě. Te ñá túú cuéchi cãhnu ní quide-dé nõu quíhíⁿ-dé vecaá àdi cãhni-í-dé. ³⁰ Te ní níhì-í tnúhu sá cuè tée israél ndúcú-güedě nãcuáa cada-güedé cãhni ñaha-güedě xii-dé, xíáⁿ ní xáhaⁿ-í xii sandádú-í sá cándèca ñaha-güedé quixi xíáⁿ. Te ní xáhaⁿ-í xii cue tée tée ñaha cuéchi sá quixí-güedé ndéé xíáⁿ cãháⁿ-güedé nõu ná cuéchi ní quide-dé. Te cada cãhnu iní-n chi duha-ni ndùu tnúhu cãháⁿ-í, te cundee iní-n quèheⁿ cuendá-n-dě”, duha ní chídó tnúni tée ní cadúha tutú cuáháⁿ ndaha té Juéli.

³¹ Te cue sandádú ní quide-güedé nãcuáa ní xáhaⁿ tée tàxi tnúni ñáhá xii-güedé chi ní xica-güedé ndihi té Pãblú òré caá ñíⁿ niú, te ñiu-ni niú-áⁿ ñí quexìo-güedé ñuú Antipatrís. ³² Te sáta ñí túndaá, te ní nacuico cuè tée xínehe lãnzá ndihi dava-gá sandádú xicá sãha cuánuhú-güedé cuártel, te mee-nã sandádú cue tée yòdo cuayú cuáháⁿ ndihi té Pãblú. ³³ Te òré ní quexìo-güedé ñuú Cèsareá, te ní sãha-güedé tée cùu gobiernú tutú néhé-güedé cuáháⁿ. Te ní queheⁿ cuendá-dé té Pãblú. ³⁴ Te sáta ñí dácuáhá tée cùu gobiernú-áⁿ tutú-áⁿ te ní xicáⁿ tnúhú-dé núú té Pãblú, te xáhaⁿ-dë:

—¿Ndéé tée cùu-n? —cachí-dé xáhaⁿ-dë.

Te ní xáhaⁿ tã Pãblú:

—Tée Cìlicia cùu-í —cãhí-dé xáhaⁿ-dë.

³⁵ Te ní xáhaⁿ tée cùu gobiernú-áⁿ:

—Òré quexìo cue tée tée ñaha cuéchi xii-n, te cãháⁿ-n nãsa ní cuu, chi níhì-í nãcuáa cada ndáá-í cuendá-n —cãhí-dé xáhaⁿ-dë xii té Pãblú.

Te ní xáhaⁿ-dë xii sandádú sá cùndèe-güedé té Pãblú vehe cãhnu té Hèrodés.

24

Té Pãblú xáhaⁿ-dë xii té Juéli sá ñà túú cuéchi-dé

¹ Te sáta ñí cuu úhúⁿ nduu, te té Ananiás dútú cúnúu-gá cuáháⁿ-dé ñuú Cèsareá ndihi cue tée cùu sacuéhé ndihi ñíⁿ tée nãni Tértulú tée cãháⁿ yuhu-güedé. Te cuáháⁿ-güedé núú tã cùu gobiernú cuáháⁿ dácuándèhnde-güedé núú-dë sá ndècuéchi

té Pãblú. ² Te ní sãnguaca-güedé té Pãblú. Te òré ní quexìo-dé núú-güedě, te ní ngüita té Tértulú xáhaⁿ-dë xii té Juéli nãcuáa cãa cuéchi tãe-güedé té Pãblú:

—Ío cãhnu cada iní tãtá gobernádor.

Duha ndùu chiuⁿ ndéé iní ñáhá-ndí xii-n vëxi-ndí, nõu nãsa cachí-n cùnduu. Táxãhu xii-n, chi ío váha ndècu nchaa ñáyu, te ñá túú nãá-yu chi ío váha quide-n. ³ Te ío cùdíⁿ iní-yu chi nchaa-ni nduu xíndecu váha-yu ncháa-yu, te ío táxãhu Ndióxi xii-n sã dúcáⁿ quide-n. ⁴ Te cada cãhnu iní, cùní-í ndatnúhu-o ñíⁿ úú-ni cuendú cuendá sá vã cùyãa-o dacuíta-í chiúⁿ-n.

⁵ Te ñíⁿ tée iha ío dàsatú iní ñáhá-dë, chi ndéni ní cuu cuáháⁿ-dé ndatnúhu-dé ndíhi ñáyu israél dánáa-dé-yu. Te néhé quidé-dé chi cuáháⁿ-dé dácãháⁿ-dé nchaa ñáyu

cuendá quíndáa iní-yu tnúhu tée ní xíndecu ñuú Nazàrét. ⁶ Chi ducaⁿ cãháⁿ cue tée iha sá ñí sáháⁿ-dé veñúhu cãhnu sá ío cúnúu, te cùní-dé daquèe tíhú-dë veñúhu cuendá cùní-dé xocàni-dé sá ñí ndécú, nõu xíáⁿ ní tñí ñaha-güedě ndécá ñaha-güedé cuáháⁿ núú cuè tée cùchiuⁿ cuendá cácaⁿ tnúhú-güedě núú-dë nõu ná cuendá ducaⁿ cùní-dé cada-dé, chi ducaⁿ cãa leí ndécú ndíhi-güedé sá cáda ndáa-güedé nõu ná ñíⁿ sá cùú.

⁷ Te té Lìsiú tée cùu capitáⁿ cúnúu-gá ní quexìo-dé ndihi sandádú, te ní dácúnú-güedě nchaa cue tée nùtníⁿ ndíhi té Pãblú, te dãtnúni ní tñí ñaha-güedě xii-dé ndécá ñaha-güedé cuáháⁿ. ⁸ Te sáta xíáⁿ, te ní xáhaⁿ-dë sá quixí-güedě ndéé ndíha cundáa cuéchi-dé. Te yòhó cundee iní-n cácaⁿ tnúhú-n nõú-dë, te nõu ndáa ducaⁿ ñí quide-dé àdi ñáhá —cãhí té Tértulú xáhaⁿ-dë xii té Juéli tée cùu gobiernú.

⁹ Te dava-gá cue tée israél xínutnii xíáⁿ ñí cáháⁿ-güedé sá ndáa cãháⁿ té Tértulú. ¹⁰ Te tãe cùu gobiernú ní quide-dé ndaha-dé núú tã Pãblú cuendá cáháⁿ-dé, te té Pãblú ní xáhaⁿ-dë:

—Yòhó sa ní cuu tñíⁿ cuiá ndécú-n iha xehndé-n cuéchi nchaa ñáyu xíndá, nõu xíáⁿ ío cùdíⁿ iní-í sá ndíha téhndé cuéchi tãe ñaha-güedé xii-í. Te cundee iní-n cùndedóho-n ña cãni-í cuendú nãcuáa ní cuu. ¹¹ Te nducu tnúhu-n te quini-n ñã cãháⁿ ndáa-í, chi sa ní cuu úxúú nduu sá ñí sáháⁿ-í veñúhu cãhnu sá ío cúnúu ñuú

—Yòhó sa ní cuu tñíⁿ cuiá ndécú-n iha xehndé-n cuéchi nchaa ñáyu xíndá, nõu xíáⁿ ío cùdíⁿ iní-í sá ndíha téhndé cuéchi tãe ñaha-güedé xii-í. Te cundee iní-n cùndedóho-n ña cãni-í cuendú nãcuáa ní cuu. ¹¹ Te nducu tnúhu-n te quini-n ñã cãháⁿ ndáa-í, chi sa ní cuu úxúú nduu sá ñí sáháⁿ-í veñúhu cãhnu sá ío cúnúu ñuú

—Yòhó sa ní cuu tñíⁿ cuiá ndécú-n iha xehndé-n cuéchi nchaa ñáyu xíndá, nõu xíáⁿ ío cùdíⁿ iní-í sá ndíha téhndé cuéchi tãe ñaha-güedé xii-í. Te cundee iní-n cùndedóho-n ña cãni-í cuendú nãcuáa ní cuu. ¹¹ Te nducu tnúhu-n te quini-n ñã cãháⁿ ndáa-í, chi sa ní cuu úxúú nduu sá ñí sáháⁿ-í veñúhu cãhnu sá ío cúnúu ñuú

Jerusalén ní cáháⁿ ndihí-í Yă Ndiöxí. ¹² Te ni ñà túú ní nàá-í ndihí ñáyíu xití veñúhu, te ñá túú ní xáhaⁿ-í nàá-yu ni ìⁿ xichi, te ni ìⁿ veñúhu lìhli ní sáháⁿ-í ñá túú ñá ní xáhaⁿ-í cada-yu. ¹³ Te ni ñà túú quèñuhu-güedé cue téé cáháⁿ ndáá te núu ndáá ducaⁿ ñi quide-í. ¹⁴ Te yúhú cáháⁿ ndáá-í sá cáháⁿ ndihí-í Yă Ndiöxí, chi ñi-ni Yă Ndiöxí ní xóo cáháⁿ ndihí ñáyíu ndéé sanaha, núu xíáⁿ ní tuha-í ichi-gá. Te cue téé-a càchí-güedé sá ñà díú ìⁿ ichi váha ni tuha-í. Te yúhú sàndáá iní-í nchaá sá ñi chídó tñuní ndí Moisés ndihí dava-gá cue téé ní xóo cáháⁿ tñúhu Yă Ndiöxí ndéé sanaha. ¹⁵ Te sàndáá tucu iní-í sá ndótó nchàa ñáyíu ní xíhí, cuèi ñáyíu váha iní-xi, te cuèi ñáyíu úhú iní-xi, dico ndotó-yu. Te ducaⁿ ñi xóo quindáá iní nchaá ñáyíu ní xíndecu ndéé sanaha. ¹⁶ Te yúhú ío ndücu ndee-í quidè-í nchaá sá cáháⁿ Yă Ndiöxí cuendá sá vă cúu cáhaⁿ núu-í núu-gá ndihí núu ñáyíu ñuyú-a.

¹⁷ Te sa ní cuu titní cuía sá ñà túú-gá sáháⁿ-í ñuú Jerusalén, te ní sáháⁿ tucu-í néhè-í díhúⁿ ñi taxi ñáyíu ñuú xíca cuendá cuñaha-í xii ñáyíu ñuú Jerusalén. Te ní ndúcù-í sá cuáha táhù-í Yă Ndiöxí. ¹⁸ Te ní xíndecu-í veñúhu càhnu sá ío cùnuu ní quide-í nchaá nàcuáa ní xóo cada ñáyíu ní xíndecu ndéé sanaha cuendá nduu vétú iní Yă Ndiöxí. Te ñá túú chítú-yu ni sáháⁿ, te ni ñà túú ñá ní cùu, te ní naníhí ñáhá ìⁿ úú cue téé isráel xii-í, cue téé véxi distritú Àsiá. ¹⁹ Te quixi mee-güedé iha cáháⁿ-güedé, te núu sá ndáá ní xini-güedé sá yúhú ndècuéchi-í ní cùu, ²⁰ àdi ñáhá. Dico cachí tñúhu cue téé-áⁿ ñása ní cuu òré ní xíndecu-í jündá-güedé núu ndècuéchi-í àdi ñá túú ndècuéchi-í. ²¹ Dico ñá túú cuèchi-í chi ìⁿ dli-ni tñúhu ní cáháⁿ-í ní xáhaⁿ-í xii-güedé sá sàndáá iní-í sá ndótó nchàa ñáyíu ní xíhí, te ñi-ni núu xíáⁿ càchí-güedé sá ndècuéchi-í —càchí té Păblú xáhaⁿ-dè xii té Juéli.

²² Te té Juéli sa xini váha-dé nàcuáa cuáháⁿ tñúhu Jësús, núu xíáⁿ ñá ní cuiní-gá-dé ndatnúhu-dé ndihí té Păblú, te ní xáhaⁿ-dè:

—Sa ní cuu, cundetu-n na quèxio té Lìsiú téé cùu capitáⁿ cùnù-gá, te òré-áⁿ cundáa cuendá-n —càchí té Juéli xáhaⁿ-dè.

²³ Te ní xáhaⁿ-dè xii téé cùu capitáⁿ:

—Cundeé-n tē Păblú-ăⁿ, te núu nása càchí-dé cada-n, te dañá-n na cáháⁿ ndihí-dé cue téé xini tñáhá ndihí-dé núu cuñaha-güedé nchaá sá xini ññuhu-dé àdi nása cada-güedé —càchí té Juéli xáhaⁿ-dè xii téé cùu capitáⁿ.

²⁴ Te ní cuu titní nduu, te ní sáháⁿ té Juéli vechiúⁿ ndihí ñadihí-dé, te ñaha-áⁿ nání-áⁿ Drusilá, te ñaha isráel cúu-áⁿ. Te ní xáhaⁿ-dè sá quingueñuhu-güedé té Păblú, te òré ní quexio-dé vechiúⁿ, te ní cáháⁿ-dè núu-yu nchaá-yu sá quindáá iní-yu tñúhu Xítóhó Jesucristú. ²⁵ Te ní xáhaⁿ-dè:

—Mee-ni sá vâha cada-ndo. Te coto-ndo mēe-ndo, te vá cáda-ndó ñi ìⁿ sá cuèhé sá dúhá, chi ìⁿ nduu cáháⁿ Yă Ndiöxí ndèdacàa ñáyíu váha iní-xi, te ndèdacàa ñáyíu úhú iní-xi —càchí té Păblú xáhaⁿ-dè.

Te sá dúcáⁿ ñi xáhaⁿ-dè, te ní yùhú té Juéli, te ní xáhaⁿ-dè:

—Vá cáháⁿ-gá-ó tñavíí, cuáháⁿ, te òré cúyächí-í, te cana ñaha-í xii-n —càchí-dé xáhaⁿ-dè.

²⁶ Te té Juéli ní quide-dé cuendá sá cuñaha tē Păblú díhúⁿ te vá ndiñu-gá-dé vecaá ní cùu, núu xíáⁿ titní xito ní cana-dé té Păblú vechiúⁿ ní ndatnúhu ndihí tñaha-güedé, dico ñá túú ní chăhu-dé. ²⁷ Te úú cuía ducaⁿ ñi quide-güedé, te dătnuní ní xinu té Juéli chiúⁿ-dé, te ní ngúnutñi té Pòrsiú Fèstú. Te òré ní xinu té Juéli chiúⁿ-dé, te ní dándõo-dé té Păblú yíhí-ni-dè vecaá. Te ducaⁿ ñi quide-dé cuendá ní cuiní-dé cudü-dé núu cuè téé isráel.

25

Té Păblú cáháⁿ ndihí-dé té Fèstú

¹ Te ní cuu úní nduu sá ñi quexio té Fèstú ñuú Cèsareá ní queheⁿ-dé chiúⁿ, te ní quee-dé cuáháⁿ-dé ñuú Jerusalén. ² Te yacáⁿ ní naníhí tñáhá-dè ndihí nchaá dútú cùnùu ndihí nchaá cue téé tàxi tñuní ñáhá xii ñáyíu isráel, te xáhaⁿ-güedé xii té Fèstú sá ndáá ndècuéchi té Păblú. ³ Te ní cáháⁿ ndàhú-güedé núu-dè sá téndàha-dé sandádú-dé quingueñuhu ñaha-güedé vecaá xii-dé ndéé ñuú Cèsareá te candeca ñaha-güedé quíhíⁿ. Te ducaⁿ ñi cáháⁿ-güedé, chi ní ndatnúhu-güedé sá cáhni ñaha-güedé xii té Păblú ichi ni cùu. ⁴ Te té Fèstú ní xáhaⁿ-dè:

—Vá cúu quìxi-dé ndéé ndíha. Na cùndetu-dé ñúú Cèsareá chi sacú-ni nduu cuyaa-í iha te dătnùní nùhú-í yàcáⁿ.

5 Te yáchí-gá quíhíⁿ ndihí-í cue tée cùnuu-gá, te yàcáⁿ cuu cáháⁿ-ndó nùu ndáá ndècuéchi-dé àdi cáháⁿ mée-dě nùu ndáá ndècuéchi-dé àdi ñáhá, te cutnùní iní-ndó —càchí-dé xăhaⁿ-dě.

6 Te ní xíndecu té Fèstú úná úxí nduu ñúú Jerusàlén, te dătnùní cuánuhú-dé ñúú Cèsareá. Te nduu tněe cuáháⁿ-dé vechi^u, te òré ní quexiò-dé, te ní xăhaⁿ-dě xii cue sandádú xínú cuèchi sá quíhíⁿ-güedé queñuhu-güedé té Păblú vecaá te candeca ñaha-güedě quíhíⁿ vechi^u. 7 Te òré ní quexiò té Păblú vechi^u, te sa ndècu cue tée isràél cue tée ní quee ñúú Jerusàlén, te cuánguihu-güedé ndéé dîñi té Păblú ní ngúnutnîi-güedé, te xăhaⁿ-güedě xii cue tée cùchiuⁿ sá ndècuéchi vîhi-dé, dico ñá túú ní cùndee tnúhu-güedé. 8 Te té Păblú ní xăhaⁿ-dě xii té Fèstú:

—Ñá túú ndècuéchi-í, ñá túú nă ní quide-í, chi ñá túú tnàhá iní-í cada-í ñⁿ sá cächí lèi sá vă cúu cada-o. Te ni xití veñúhu cànno sá ïo cùnuu ñá túú nă quidè-í, te ni té Cèsár tée yîndaha cuéhé nacióⁿ ñá túú cáháⁿ cuèhé-í cuendá-dé —cächí té Păblú xăhaⁿ-dě xii-dé.

9 Te té Fèstú ní cuiní-dé cada-dé năcuáa cudîu-dé núú cuè tée isràél ní cùu, núu xîăⁿ ní xăhaⁿ-dě xii té Păblú:

—¿Cundee iní-n quíhíⁿ-n ñúú Jerusàlén-ăⁿ? Te yàcáⁿ cundáá cuéchi sá sàá díquí-n —cächí té Fèstú xăhaⁿ-dě xii té Păblú.

10 Te xăhaⁿ tē Păblú:

—Dîu-ni ñⁿ vechi^u tée cùchiuⁿ Cesár ndécù-í iha, te dîu-ni iha cada ndáá-n nùu cuiní-n ní cùu. ¿Te ná cuendá candeca ñaha-n quíhíⁿ ingá xichi? Yòhó tnàhá-n xíní-n sá ñá túú nă quidè-í ñáyiu isràél. 11 Chi núu dîcô yúhú ní quide-í ñⁿ cuéchi cànno, te ñá túú nă cada-xi cuèi na cànno ñaha-ndo xii-í ní cùu. Te sa ní cutnùní iní-n sá ñá ndáá, chi mee-ni tnúhu ndehnde xîcáháⁿ-güedé, te ñá túú ndúu váha-xi ducaⁿ cada-n cúñaha-n sá quíhíⁿ-í ndihí-güedé ingá xichi. Te xîăⁿ cuiní-í quíhíⁿ-í núú tē Cèsár tée yîndaha cuéhé nacióⁿ, te yàcáⁿ cáháⁿ mée-dě nùu ndáá ndècuéchi-í —cächí té Păblú xăhaⁿ-dě xii té Fèstú.

12 Te ní ndatnúhu té Fèstú ndihí cue tée chîndee tnúhu ñaha xii-dé, te dătnùní ní xăhaⁿ-dě xii té Păblú:

—Te sa ní cáháⁿ-n sá quíhíⁿ-n quítnahá-n tē Cèsár te dîu-ni quíhíⁿ-n, te quini-n năsa cáháⁿ tée-ăⁿ yàcáⁿ —cächí-dé xăhaⁿ-dě xii té Păblú.

Té Păblú cáháⁿ ndihí-dé té Āgripá tée yîndaha nacióⁿ Isràél

13 Te sáta nî cuu cuéhé nduu, te ní quee té Āgripá tée yîndaha nacióⁿ Isràél cuáháⁿ-dé ñúú Cèsareá ndihí ñadîhí-dé, te ñaha-ăⁿ nání-ăⁿ Berènicé te òré ní quexiò-yu, te ní cáháⁿ ndihí-yu té Fèstú. 14 Te sáta nî cuu titnî nduu, te ní cáháⁿ té Fèstú cuendá té Păblú ní xii-dé té Āgripá:

—Ndècu ñⁿ tée ní dândöo té Juělí vecaá nání-dě Păblú. 15 Te cùtnàhá ní sáháⁿ-í ñúú Jerusàlén ní nanínáhà-í ndihí cue dútú cùnùu ndihí cue tée cùu sacuéhé nùú ñáyiu isràél. Te ní dácáá díquí-güedé té Păblú cuéchi, te ní cächí-güedé sá táuchîuⁿ-í cahni ñaha-güedě xii-dé ní cùu.

16 Te ní xăhaⁿ-í xii-güedé sá vă cúu, chi ñá túú dùcaⁿ quide nchúhú cue tée rómá cùtexínu cada castiú-ndí ñáyiu, chi dîhna-gá ndúcú tnúhu-ndí núú ñáyiu sàá cuéchi díquí-xi cuendá quini-ndí nùu năsa cáháⁿ mée-yu ndihí ñáyiu sàcáⁿ cuéchi cuendá-yu, te òré-ăⁿ cùtnùní iní-ndí nùu ndáá ndècuéchi-yu àdi ñáhá, te ducaⁿ te nihí-ndí năcuáa quide ndáá-ndí cuendá-yu, duha ní xăhaⁿ-í xii-güedé —cächí té Fèstú xăhaⁿ-dě xii té Āgripá.

17 Te ní xăhaⁿ tucu té Fèstú:

—Te sáta nî quexiò-güedé ndéé ndíha, te nduu tněe ní sáháⁿ-ni-ndí vechi^u. Te ní xăhaⁿ-í sá quîngueñuhu-güedé té Păblú candeca ñaha-güedě quixi, te òré ní quexiò-dé, 18 te ní ngüíta-güedé xăhaⁿ-güedé sá ndècuéchi-dé. Te ní sani iní-í sá ñⁿ cuéchi cànno tee ñaha-güedé dico ñáhá, chi dîcô-ni sá ñⁿ tnúhu ní cáháⁿ-dé, xîăⁿ ducaⁿ nî quide-güedé. 19 Te ní tenáá ñáhá-güedé xii-dé, chi cächí-güedé sá ñá túú cáháⁿ váha-dé cuendá ndiöxí-güedé. Te tnàhá-ni cuendá ñⁿ tée nàni Jesús cáháⁿ-dé, chi cächí-dé sá nî xîhí tée-ăⁿ te ní ndoto-dé cächí-dé xăhaⁿ-dě xii-güedé, cächí-güedé.

20 Te ñá ní cùtnuní iní-í nása cúñaha-í xii-güedé cuendá téhndé cuéchi-dé. Te xiáⁿ ní xicáⁿ tnúhu-í núú tē Páblú nūu cundee iní-dé quíhíⁿ-dé ñúú Jerusálén, te ndéé ndíacãⁿ cada ndáá-ndí cuendá-dé, te núu ndáá ndècuéchi-dé nàcuáa càháⁿ-güedé àdi ñáhá ní cùu. 21 Te dättnuní té Páblú ní cachí-dé sá cündècu tnaa-dé vecaá te dättnuní quíhíⁿ-dé núú tē Cèsár, te tée-áⁿ cada ndáá-dé cuendá-dé. Te cuendá sá dúcáⁿ nī cáháⁿ té Páblú, xiáⁿ nūu ní xáhaⁿ-í sá cündèé ñáhá cuè sandadú xii-dé, nini na còto-í nása cada-í quíhíⁿ-dé núú tē Cèsár, duha ní xáhaⁿ-í xii-güedé —càchí té Fèstú xáhaⁿ-dē xii té Àgripá.

22 Te té Àgripá ní xáhaⁿ-dē xii té Fèstú:

—Te tnàhá yúhú ío cudíí iní-í cundedóho-í tnúhu càháⁿ-dé —càchí-dé xáhaⁿ-dē.

Te ní xáhaⁿ tē Fèstú:

—Tneé cana-í-dé te cundedóho-n nása càháⁿ-dé —càchí-dé xáhaⁿ-dē.

23 Te nduu tnéé ní quexìo té Àgripá ndihí ñadìhí-dé tá Berènicé vechiun, te ío ní quide càhnu ñaha-güedé xií-yu. Te cuánguìhú-yu vechiun ndihí cue tée cùu capitán cùnùu-gá ndihí cue tée cùnùu ñúú Cèsareá. Te té Fèstú ní xáhaⁿ-dē sá quingueñuhu-güedé té Páblú vecaá, te òré ní quexìo-dé, 24 te ní xáhaⁿ tē Fèstú xii té Àgripá ndihí nchaa ñáyiu xíndecu-áⁿ:

—Chí cündèhe tée iha chi tée-a càchí cue tée isràèl sá ndècuéchi-dé, te cùtnàhá ní xíndecu-í ñúú Jerusálén ní cachí-güedé sá ndáá ndècuéchi-dé, te diu-ni ducaⁿ càháⁿ-güedé iha. Te nchaa-güedé ní cuáá-güedé te càchí-güedé sá táuchìuⁿ-í cahni ñaha-güedé xii-dé ní cùu. 25 Te sátá nī ndihí cuendú ní cáháⁿ-güedé, te ní cutnùní iní-í sá ñà túú nī ñúú cuéchi càhnu nī quide-dé, núu ñá túú ní tàuchìuⁿ-í cahni ñaha-güedé xii-dé. Te mee-dē ní cachí-dé sá quíhíⁿ-dé núú tē Cèsár tée yìndaha cuéhé nacióⁿ, te ní xáhaⁿ-í sá cúu quíhíⁿ-dé. 26 Te ñá túú ní xìní váha-í nása ní quide-dé, núu xiáⁿ ñá ní ñhì-í nàcuáa cadúha-í tutú quíhíⁿ ndaha té Cèsár, te xiáⁿ ní cana-í-dé véxi-dé iha cuendá nchaa-ndo càháⁿ ndihí-ndo-dē. Te ducaⁿ cànuu cadíhna-gá yòhó tātá Àgripá cácaⁿ tnúhú-n nūú-dē nūu nása cáháⁿ-dé, te òré-áⁿ cutnùní iní-í nása cada-í cadúha-í tutú quíhíⁿ ndaha té Cèsár. 27 Chi sàni iní-í

sá ñà túú ndùu váha-xi sá quíhíⁿ ñúú tée tàú cuéchi te núu vá códó tnùní núú ñúú tutú nàcuáa càa cuéchi tàú-dé —càchí té Fèstú xáhaⁿ-dē xii-güedé.

26

Te Páblú càháⁿ ndihí-dé té Àgripá

1 Te dättnuní ní xáhaⁿ tē Àgripá tée yìndaha nacióⁿ Isràèl xii té Páblú:

—Te vitna cáháⁿ-n nūu nása ní cuu cuendá-n —càchí-dé xáhaⁿ-dē.

Te té Páblú ní ndacani-dé ndaha-dé sá cündedóho-güedé, te ní xáhaⁿ-dē xii té Àgripá tée yìndaha nacióⁿ Isràèl:

2-3 —Tātá Àgripá, ío cudíí iní-í sá nī naníhí tnàhá-ó vitna, chi yòhó ío váha xìní-n nchaa nacuáa quide ñáyiu isràèl quidé càhnú-yu Yá Ndiòxí, te ío váha xìní-n nchaa tnúhu xítnàhá-yu. Te vitna cundee iní-n cündedóho-n ñúú úú tnúhu na càháⁿ-í. Na càchí tnúhu-í sá ñá ndáá ní quide-í nchaa sá càháⁿ cue tée isràèl.

Té Páblú càháⁿ-dé nàcuáa ní quide-dé cùtnàhá vátá túhá-gä-dé ichi Yá Ndiòxí

4 Te sa nàha nchaa cue tée cùnùu núu ñáyiu isràèl nàcuáa ní quide-í ñúú-í ndihí ñúú Jerusálén cùtnàhá ní cuu landú-í. 5 Te mee-güedé náhá-güedé sá ndéé líhli-í ní chitnahá-í cue tée cùu fariséú. Te núu cuíní-güedé cáháⁿ-güedé sá tē fariséú cúu-í àdi ñáhá dico nchaa-güedé sa nàha-güedé sá cuè tē-áⁿ nī chitnahá-í. Te cue tē cùu fariséú-áⁿ ío cuíní-güedé cada-güedé nchaa nàcuáa nchìcúⁿ nihnu ñáyiu quidé-yu. Te yúhú nchaa sá nchìcúⁿ nihnú-yu quidé-yu-áⁿ nī quide-í. 6 Te vitna ndècu-í iha, te cáháⁿ-n nūu váha-ni quide-í àdi ñáhá, chi cue tē-áⁿ tē ñàha-güedé cuéchi xii-í cuendá sá sàndáá iní-í sá ndótó nchaa ñáyiu ní xíhí. Te diu-ni ducaⁿ nī xáhaⁿ Yá Ndiòxí xii nchaa ñaní tnàhá-ó nī xíndecu ndéé sanaha. 7 Te nchaa ñáyiu-áⁿ xíndetú-yu nduu ndòto ñáyiu ní xíhí ní cùu. Te diu-ni ducaⁿ ndètu nchaa ñaní tnàhá-ó ndècu ñuyíú-a ndéé vitna, te xiáⁿ nūu cuéi nduu cuéi níú càháⁿ ndihí-yu Yá Ndiòxí. Te sá sàndáá iní-í nūu xiáⁿ ní cáháⁿ-í, te tē ñaha cue tē isràèl cuéchi xii-í. 8 ¿Te ná cuendá nchòhó cue tē isràèl ñá túú cuíní-ndó quíndáá iní-ndó sá dándòto Yá

Ndiöxí nchaa ñáyiú ní xíhí? —càchí té Păblú xăhaⁿ-dě.

Té Păblú caní-dě cuëndú sá ñí xóo chihi-dé ñáyiú sàndáá iní tnúhu Jèsús vecaá

⁹Te ní xăhaⁿ tucu té Păblú:

—Ndéé dàvá-áⁿ ñí quide úhú-í ñáyiú sàndáá iní-xi tnúhu Jèsús Yaá ní quee ñuú Nazàrét, te ní cáhàⁿ-í sá văha-ni ní quide-í sá dúcáⁿ ñí quide-í. ¹⁰Te ñuú ni ducaⁿ ñí quide-í ñuú Jerusàlén. Te cue dútú cúnú ní taxi-güedé ñí tutú cuëndá tni-í ñáyiú ní sàndáá iní tnúhu Jèsús, te vâi-yu ní chihi-í vecaá. Te òré ní cáhàⁿ-güedé sá cahní-güedé ñáyiú-áⁿ, te tnàhá-í ní cáhàⁿ-í sá cúú cahní ñaha-güedé xií-yu. ¹¹Te titní xito ní sáhàⁿ-í nchaa veñúhu ñáyiú isràél, te ní caní-í-yu te ní xăhaⁿ-í sá dáñă-yu ichi Jèsús. Te cuëndá ío ní cudéèⁿ-í núŷ-yu, xiăⁿ ní sáhàⁿ-í nchaa ñuú xícá ñí sánúndúcù-í dava-gá ñáyiú sàndáá iní tnúhu-gá cuëndá dandôho ñaha-güedé xií-yu.

Té Păblú cáhàⁿ tucu-dé nása ní cuu ní tuha-dé ichi Yá Ndiöxí

(Hch. 9:1-19; 22:6-16)

¹²Te cuëndá xiăⁿ ní xica tucu-í cuáhàⁿ-í ñuú Dâmascú, néhè-í tutú ní taxi cue dútú cúnú cuáhàⁿ, cuëndá sá ndácù-í tni-í nchaa ñáyiú sàndáá iní tnúhu Jèsús ní cùu. ¹³Te òré caúxúú nduu ñuhu-í ichi cuáhàⁿ-í, te uuⁿni ní quee ñuhú andiú ñí dáyèhé-xi ndéé núú nútñí-í ndihí cue té ndèca tnahà ndihí-í, te níhi-gá ñí dáyèhé-xi dàcúúxí nchicanhii. ¹⁴Te nchaa-ndí ní nduá-ndí ndéé ñuhu, te ní tecú dóho-í cáhàⁿ ñí sá cáhàⁿ tnúhu ñáyiú isràél, te càchí-xi: “Yòhó Sàulú, ¿Ná cuëndá cúú úhú iní ñáhà-n xii-í dândôho ñaha-n? Te ío dândôho-n mee-n, chi dàtná cuini-n quide ndicutu quide-n chi quití-áⁿ òré cuxi-güedé-di püyá te sâha-di patadá núú-xi, te sá dúcáⁿ quide-di te quide úhú-di mee-di. Te ducaⁿ sâtnahá-xi cùu yohó chi ñá túú sàndáá iní ñáhà-n xii-í”, càchí sá ñí cáhàⁿ-áⁿ. ¹⁵Te ní xăhaⁿ-í: “¿Ná cúú yòhó sá ñí cáhàⁿ-áiⁿ?”, xăhaⁿ-í. Te càchí sá cáhàⁿ-áⁿ: “Yúhú cùú-í Jèsús Yaá cúú úhú iní-n”, duha ní cachí sá cáhàⁿ-áⁿ. Te xiăⁿ ní cutnùní iní-í sá Jèsús cáhàⁿ. ¹⁶Te ní cachí-gá: “Ndacuíñí-n chi yúhú cáhàⁿ-í chi cuini-í quíhíⁿ-n càda-n chiuⁿ-í, chi quíhíⁿ-n cáhàⁿ-n núú ñáyiú nàcuáa ní cuu ní xiní ñáhà-n xii-í vitna, te quixi tucu-í cáhàⁿ

ndihí ñaha-í xii-n, te cúñaha-n xii-yu nàcuáa cáhàⁿ-í. ¹⁷Chi cuini-í quíhíⁿ-n cáhàⁿ-n tnúhu-í núú ñáyiú isràél ndihí núú ñáyiú ñá túú cùu ñáyiú isràél, te coto ñaha-í xii-n cuëndá vá cahní ñáhà-yu xii-n. ¹⁸Te cuini-í quíhíⁿ-n cùñaha-n xii-yu sá dáñă-yu nchaa ichi cuèhé ichi duha ndècú-yu, te tuhá-yu ichi váha cuëndá vá quindáá iní-yu cadá-yu sá cáhàⁿ yucu ñávăha, te quindáá iní-yu cadá-yu nchaa nàcuáa cáhàⁿ Yă Ndiöxí. Te núu na quindáá iní-yu tnúhu cáhàⁿ-í, te cada cahnú iní-í nchaa cuèchi-yu, te naníhí tãhú-yu ndihí dava-gá ñáyiú sa ní xócuíñí nchaa sá cuèhé sá dúhá ñí xíndecu iní-yu”, duha ní cachí-gá xii-í —càchí té Păblú xăhaⁿ-dě xii té Àgripá té yíndaha nacióⁿ Isràél.

Té Păblú quidé-dě nchaa nàcuáa ní xăhaⁿ Jèsús cada-dé

¹⁹Te ní xăhaⁿ tucu té Păblú xii té Àgripá:

—Ñá túú dàña ndeé-í quidé-í nchaa nàcuáa ní cáhàⁿ Jèsús òré ní cáhàⁿ-gá andiú. ²⁰Te díhna-gá ñáyiú ñuú Dâmascú ní cáhàⁿ-í tnúhu-gá núŷ-yu, te ní xăhaⁿ-í xii-yu sá dáñă-yu nchaa sá cuèhé sá dúhá quidé-yu, te cáhàⁿ ndihí-yu Yá Ndiöxí, te cadá-yu mee-ni sã văha cuëndá cutnùní iní dava-gá-yu sá ñí dáñă-yu nchaa sá ñà túú văha ní xóo cadá-yu. Te ducaⁿ-ni ní xăhaⁿ-í xii ñáyiú ñuú Jerusàlén ndihí ñáyiú ñíhí nacióⁿ Isràél ndihí nchaa ñáyiú ñá túú cùu ñáyiú isràél. ²¹Te cuëndá sá dúcáⁿ ñí cáhàⁿ-í núú ní tni ñaha cuè téé isràél xii-í cùtnàhá ní sáhàⁿ-í veñúhu cahnú sá ío cúnú cahní ñaha-güedé ní cùu. ²²Te ñuú ni mee Yă Ndiöxí ní chindee ñaha-gá xii-í núú ndècu-í iha tnáví cáhàⁿ-í tnúhu-gá, te mee-ni tnúhu-gá cáhàⁿ ndihí-í ncháa-yu, cuèi ñáyiú cuica, te cuèi ñáyiú ndàhú. Te ndí Moisés ndihí dava-gá cue téé ní xóo cáhàⁿ tnúhu Yá Ndiöxí ndéé sanaha ñí cáhàⁿ-güedé nàcuáa cada-xi vitna, te ñuú ni ducaⁿ cáhàⁿ-í nchaa-ni nduu. ²³Te cue téé-áⁿ ñí cachí-güedé sá Cristú Yaá tendaha Yă Ndiöxí quixi ñuyú-a ndoho tnahá-gá, te cuú-gá, te dàtnùní ndoto-gá. Te ducaⁿ càda-xi nchaa ñáyiú ní xíhí ndotó-yu núu na sã nduu chi ducaⁿ càda-xi ní cachí méé Yă Ndiöxí. Te cuëndá sá dúcáⁿ ñí ndoto-gá, xiăⁿ cùtnùní sá cúú naníhí tãhú ñáyiú, cuèi

ñáyiú israhél, te cuèi ñáyiú ñá túú cùu ñáyiú israhél. Te dàtná-ni ndùu tnúhu ní cáháⁿ cue téé ní xóo cáháⁿ tnúhu-gá ndéé sanaha-ãⁿ, te ñiu-ni ducaⁿ cáháⁿ yúhú tucu —càchí té Páblú xáhaⁿ-dë.

Té Páblú xáhaⁿ-dë xii té Àgripá sá quindáá iní-dé tnúhu Jèsús

²⁴ Te sá dúcáⁿ ñí cáháⁿ té Páblú, te ní cáháⁿ níhi té Fèstú, te xáhaⁿ-dë:

—Páblú, jó lúcú cáháⁿ-n! Cuèndá ío vài ní dácuaháⁿ, núu xiãⁿ ndádá lúcú ñáháⁿ-xi xii-n —cachí-dé xáhaⁿ-dë.

²⁵ Te ní xáhaⁿ tē Páblú:

—Ñáhá, vá dúcáⁿ cáháⁿ-n chi ñá díú sá lúcú-í duha cáháⁿ-í, chi tnúhu ndáá cáháⁿ-í.

²⁶ Te té Àgripá-a sa nàha-dé ndihí nchaa ñáyiú israhél nàcuáa ní cuu, chi sa ní níhí-dé tnúhu ndihí dava-gá-yu nàcuáa ní cáháⁿ-í, núu xiãⁿ cúyí-í cáháⁿ ndihí-í-dé —càchí-dé xáhaⁿ-dë xii té Fèstú.

²⁷ Te ní xáhaⁿ-dë xii té Àgripá:

—Yúhú sa xini-í sá sàndáá iní-n tnúhu ní chidó tnùní cue téé ní xóo cáháⁿ tnúhu Yá Ndióxi ndéé sanaha —càchí-dé xáhaⁿ-dë.

²⁸ Te ní xáhaⁿ tē Àgripá:

—¿Quide-n cuendá sá ñíⁿ úú tnúhu ní cáháⁿ-n te quindáá iní-í tnúhu Jèsús cáháⁿ-n-ãⁿ? —càchí-dé xáhaⁿ-dë.

²⁹ Te ní xáhaⁿ tucu té Páblú:

—Cuèi vitna te cuèi ndéé cuèé-gá dico cuini-í sá dàcutíí sá quindáá iní-n tnúhu Jèsús. Te ñiu-ni ducaⁿ xicáⁿ táhú-í núu Yá Ndióxi sá ncháá ñáyiú ndècu ndihí-o iha quindáá iní-yu tnúhu-gá dàtná cuini-n ñí quide yúhú, ducaⁿ càdá-yu. Dìcò-ni sá ñúu vá quihíⁿ-ni-yu vecaá dàtná cuini-n ndòho yúhú —càchí-dé xáhaⁿ-dë xii té Àgripá.

³⁰ Te sátá dúcáⁿ ñí cáháⁿ-dé, te ní ngúnutnii té Àgripá téé yindaha nacióⁿ Israhél, ndihí té Fèstú téé cùu gobiernú, ndihí tá Berènicé ndihí dava-gá ñáyiú xñucóo yatni. ³¹ Te ní tnahá-yu ndèca tnahá-yu cuaháⁿ ñí xio. Te ní xitnàhá-yu:

—Téé-ãⁿ ñá túú nã cuèchi ní quide-dé ñúu chihi ñaha-güedë vecaá àdi cahni ñaha-güedë —càchí-yu xitnàhá-yu.

³² Te té Àgripá ní xáhaⁿ-dë xii té Fèstú:

—Cuèchi mee-dë chi ní cachí-dé sá quitnahá-dé té Cèsár, xiãⁿ ñúu ndíhu tucu-dé vecaá, te núu ñá túú dùcaⁿ ní

cáháⁿ-dé, te cácu-dé ní cùu —cachí-dé xáhaⁿ-dë xii té Fèstú.

27

Té Páblú cuaháⁿ-dé ñúu Rómá

¹⁻² Te ní ndatnúhu-güedé sá quihíⁿ té Páblú ndihí bàrcú nacióⁿ Itàliá, te tnahá yúhú quihíⁿ-í ndihí-dé. Te tnahá ñíⁿ téé nàni Aristarcú cuini-dé quihíⁿ ndihí-ndí-dé, te cùu-dé téé ñúu Tesalónica, te ñúu-áⁿ yindèhu-xi distritú Macèdoniá. Te ní sáha cuendá-güedé té Páblú ndihí ñíⁿ úú-gá cue téé xixíhi vecaá ní queheⁿ cuèndá ñáhá tē Jülüú téé cùu capitáⁿ, téé yindaha nchaa sandadú nání Augustú, te ní quée-ndí nchaa-ndí bàrcú ñúu Adramitiú. Te ní xica bàrcú-áⁿ cuaháⁿ-ndí ndihí-xi te cuita yáha-ndí ñíⁿ úú ñúu yindèhu distritú Asiá quihíⁿ. ³ Te nduu tnéé ní quexiò-ndí ñúu Sidón. Te ío váha ní quide té Jülüú, chi ní dáñá-dé ní quene té Páblú ní sáháⁿ-dé ní cáháⁿ ndihí-dé cue téé ío váha tnahá tnúhu ndihí-dé ñúu cudana cundahú iní ñáhá-güedë cuñaha-güedë nchaa sá xini ñúhu-dé. ⁴ Te dàtnùní ní ndéé tucu-dé bàrcú cuaháⁿ-ndí. Te ío níhi táchí te ñá ní dàña-xi caca ndáá bàrcú, te ní sáháⁿ bàrcú ndéé yatni yuhu distritú Chìpré, te distritú-áⁿ cáá cuádava xití làmár, te xiãⁿ ñá túú cuèhé táchí ní yáha-ndí. ⁵ Te ta yáha-ndí cuaháⁿ, te ní yáha-ndí ñíⁿ xio yuhu distritú Ciliciá ndihí yuhu distritú Pànfiliá, te ní sáá-ndí ndéé ñúu Mírá ñíⁿ ñúu yindèhu distritú Liciá.

⁶ Te ní quene téé cùu capitáⁿ cuándúcú-dë ingá bàrcú, te ní níhí-dé ñíⁿ bàrcú téé ñúu Alejándriá, ñúhú ichi-xi quihíⁿ-xi nacióⁿ Itàliá. Te ní ndicuaca ñaha-dë xii-ndí cuaháⁿ-ndí ní quée-ndí bàrcú-áⁿ, te ní xica-xi cuaháⁿ-xi. ⁷ Te ío cuèé cuaháⁿ bàrcú-áⁿ, cuèhé nduu ní xúhuⁿ-xi ichi, te yica-ni ñí quexiò-ndí yuhu ñúu Nidú, te ñá ní dàña-gá táchí quihíⁿ ndáá bàrcú ñúu ní xicó ndúú-xi. Te ní yáha-ndí ñíⁿ xio yuhu distritú Crètá núu ñá túú quène vihi táchí, te ñiu-ni cuádava tucu làmár cáá distritú-áⁿ. Te ní yáha-ndí yuhu ñúu Salmón, te ñiu-ni Crètá yindaha-xi ñúu-áⁿ. ⁸ Te ní yáha-ndí cuaháⁿ-ndí mee-nã núu ràyá distritú Crètá,

te ío ní ndoho-ndí ní sáá-ndí ìⁿ xichi núú nání Puèrtú Váha, yatni víí-ni-gá ñuu Làseá.

⁹ Te ní cuyaa vihi-ndí ichi, ducaⁿ-ni cùu-ndí ní tnahá yóó cúúⁿ dǎú táchí, te ío úhú yáha bàrcú ñuu na quíhíⁿ-ni-xi. ¹⁰ Te ní xáhaⁿ tē Pǎblú xii-güedé:

—Nchaa-ndo cùndedóho-ndo tnùhu na càháⁿ-í-a. Ío úhú núú na càda yica-o quíhíⁿ-ó ndíhi barcú chi cuíta càrgá te cuíta bàrcú, te cuu-ni iní-xi tnahá-ni mee-o cùú-ó chi càhá-ó ñuu na ngàunihnu-o xití ndute — càchí-dé xáhaⁿ-dē xii-güedé.

¹¹ Te tée cùu capitáⁿ ñá ní sàndáá iní-dé tnùhu ní càháⁿ tē Pǎblú. Dico tnùhu ní càháⁿ tée dàcaca barcú ndíhi xítóhó-xi chi ní sàndáá iní-dé. ¹² Te ñá ní tnahá iní-güedé Puèrtú Váha cuèndá sá ñi tnahá yóó cúúⁿ dǎú táchí, te ñá túú dǎhu váha táchí xǎáⁿ, núu vǎi-güedé ní cuini-güedé yáha-güedé quíhíⁿ-güedé sáá-güedé ndéé ñuu Fènicé ní cùu. Te yàcáⁿ cundecu-güedé yóó cúúⁿ dǎú táchí cuèi ñá túú càváha vihi, chi nchii nàcuáa yáha bàrcú, te yàcáⁿ quíhu táchí, dico dǎhu-gá. Núu xǎáⁿ ndéé ndíácáⁿ nátácá bàrcú yóó cúúⁿ dǎú táchí, te diu-ni Crètá yíndàha-xi ñuu-áⁿ.

Nitùhú làmár cúúⁿ dǎú táchí

¹³ Te duha ní quene nuu luha táchí, xǎáⁿ ní sani iní-güedé sá ndácú-güedé quíhíⁿ-güedé, núu ní natava-güedé caá ndètní ndéé bàrcú, te ní xica-xi cuáháⁿ-xi ní yáha-ndí yatni víí yuhu dìstrítú Crètá. ¹⁴ Te tnaa-ni ní cuu sá ñi xica bàrcú, te duha ní cunuu dǎú táchí ìⁿ xio yuhu ñuu-áⁿ ¹⁵ te nchita ichi cuáháⁿ bàrcú. Te ñá ní ndacu-gá-xi quíhíⁿ ndáá-xi nàcuáa cuáháⁿ-xi ni cùu, núu ní dáñá-ndí cuáháⁿ méé-nǎ bàrcú. ¹⁶ Te ní yáha-ndí ìⁿ ñuu nání Clàudá, te ñuu-áⁿ cáa cuádava xití làmár. Te ìⁿ xio yuhu ñuu núú ñá túú quène vihi táchí ñi yáha-ndí, te bàrcú líhli sá nchícúⁿ sátá bàrcú cáhnú, chi ní ndacu-ndí ní taxúha-ndí xití bàrcú cáhnú. ¹⁷ Te sátá ñi ndacu-ndí ní taxúha-ndí bàrcú líhli, te ní ducuⁿ nuu-güedé yoho bàrcú cáhnú. Te ío ní yùhú-güedé sá yáha bàrcú ndéé núú ñúhú cùchí yuhu ñuu Sirté, núu xǎáⁿ ní ndíhi dóó nchítá díquí bàrcú ní nuu nehe-güedé, chi dóó-áⁿ ío níhi chindaha

táchí, núu xǎáⁿ cuáháⁿ bàrcú ìⁿ xio. Te ní dáñá-güedé ñá túú-gǎ ní dàcaca-güedé, núu cuáháⁿ méé-nǎ-xi ta chindaha táchí cuáháⁿ. ¹⁸ Te ío níhi dǎú táchí, te ñá ní cuini tnahí-xi yáha. Te nduu úú sá dúcáⁿ ñá túú-gǎ ní dàcaca-güedé bàrcú te ní ngüíta-güedé ní dǎngöyo-güedé sá nchídó-xi cuèndá cuini-güedé nduu ñamá-xi. ¹⁹ Te nduu úní ní dǎngoyo-güedé nchaa ndachiuⁿ cánehe chiuⁿ-güedé xití bàrcú. ²⁰ Te cuéhé nduu ñá túú ní xíní-ndí ni chòdíní ni nchícanhii, chi ío níhi ní cuuⁿ dǎú táchí, núu ní càháⁿ-ndí sá vǎ càcu-ndí, chi ndíhi-ndí càhá ní càháⁿ-ndí.

²¹ Te ní cuu titní nduu ñá túú-gǎ xéxí-ndí, núu xǎáⁿ ní ngúnutnii tē Pǎblú núú-güedé, te xáhaⁿ-dē:

—Quindáá iní-ndó tnùhu ní càháⁿ-í, te cundecu nahi-o Crètá ní cùu. Te núu ni tní-ndo tnùhu-í, te vǎ dǎcuíta-o càrgá ndíhi dava-gá ndàchiuⁿ ni cuu. ²² Te vǎ yùhú-ndó chi vǎ cùú ni ìⁿ-ndo dico bàrcú chi cuíta. ²³ Te nàha-ndo sá yùhú càháⁿ ndíhi-í Yǎ Ndiöxí te quide-í nàcuáa càháⁿ-gá. Te diu-ni mee-gǎ ní techiuⁿ-gá ìⁿ espíritú xínú cuèchi núú-gǎ ní quixi, ²⁴ te ní cachí-xi xii-í: “Vǎ yùhú-n chi vǎ cùú-n, dico dacuití quíhíⁿ-n càháⁿ ndíhi-n tē Cèsár. Te ni ìⁿ tée ndíhi-n vǎ cùú, chi ío cùdí iní ñáhá Yǎ Ndiöxí xii-n”, duha ní càháⁿ espíritú xínú cuèchi núú-gǎ ní cachí tnùhu-xi xii-í. ²⁵ Núu xǎáⁿ càchí tnùhu-í sá vǎ yùhú-ndó, chi sa cùtnuní iní-í sá cáda Yǎ Ndiöxí nàcuáa ní càháⁿ espíritú xínú cuèchi núú-gǎ. ²⁶ Te mee táchí chindaha-xi bàrcú daquíhíⁿ-xi ndéé yuhu ndute —cachí tē Pǎblú xáhaⁿ-dē xii-güedé.

²⁷ Te sa ní cuu sáhúⁿ nduu sáhúⁿ niú sá ñi ngüíta-xi cùuⁿ dǎú táchí, te ñá túú-gǎ dǎcaca-güedé bàrcú, chi mee-nǎ táchí tá chindaha-xi barcú cuáháⁿ núú ndute làmár Adriá. Te sátá ñi cuu dava niú, te ní quide cuèndá cue tée dàcaca barcú sá tá cùyatni-güedé ñuhu yìchí. ²⁸ Te ní chicuáhá-güedé ná daha-gá mètrú néhé-xi sǎ cùnú xití ndute cuèndá cùtnuní iní-güedé sá tá cùyatni-xi ndéé yuhu làmár, te nèhe-xi ócò sáhúⁿ ìⁿ-ni-gá mètrú. Te ní xica tucu bàrcú luha-gá, te dǎtnuní ní chicuáhá tucu-güedé, te xǎáⁿ néhé-xi ócò úsá-ni-gá mètrú. ²⁹ Te ní yùhú-güedé sá candaundéé-xi cava, te ní

queheⁿ-güedé cúmí caá náhnú sǎ nchícúⁿ yoho, te ní dáquēe-güedé xití ndute ndàa sátá bàrcú, te dǎtnùnì ní ngüíñí-xi ñá ní xica-gá-xi, te ní cuiní-güedé sá òré-ni túndaá ní cùu. ³⁰ Te cue tée dàcaca barcú ní natava-güedé bàrcú lǐhli dǎndée-güedé núu ndute ni cùu, te ní cachí-güedé sá quíhíⁿ-güedé ndàa núu bàrcú dàquēe-güedé úú-gá caá cuendá cuita candee-xi bàrcú cáhnú cuendá sá vǎ cacá-xí. Te cuiní-güedé dandàhú-güedé dava-gá nchúhú cue tée ñuhu ndihí-güedé bàrcú, chi ní ndatnúhu-güedé sá cúnú-güedé ní cùu. ³¹ Te té Pǎblú ní xáhaⁿ-dǎ xii tée cùu capitáⁿ ndihí dava-gá sandàdú:

—Te núu na dǎndóo ñaha cuè tée dàcaca barcú cunu-güedé, te vǎ cácu-o —cachí-dé xǎhaⁿ-dǎ.

³² Te sá dúcáⁿ ñí xáhaⁿ-dǎ núu ní sáháⁿ sandàdú ní xehndé-güedé yoho nchícúⁿ bàrcú lǐhli dǎngáúnihnu-güedé xití ndute cuáháⁿ-xi.

³³ Te váha váha-ni ta túndaá cuáháⁿ, te ní xáhaⁿ tǎ Pǎblú:

—Sa ní cuu sáhúⁿ nduu ñá túú tnàhí xèxi-ndo sá ndihú iní-ndó. ³⁴ Te vitna yáchí-ndó, chi caxi-ndo cuendá naníhí ndée-ndó, te vǎ yùhú-ndó chi ñá túú nǎ tnahá ni ñⁿ-ndo —cachí-dé xǎhaⁿ-dǎ xii-güedé.

³⁵ Te sátá dúcáⁿ ñí cáháⁿ-dé, te ní queheⁿ-dé ñⁿ pàá, te ní ndacáⁿ táhú-dé núu Yǎ Ndiǒxí, te núu-güedé nchaa-güedé ducaⁿ ñí quide-dé, te dǎtnùnì ní táhú-dé luha ní xexi-dé. ³⁶ Te ducaⁿ te dǎtnùnì ní cuyí-güedé ní xexi-güedé nchaa-güedé.

³⁷ Te úú ciendú únídico sáhúⁿ ñⁿ-ndí ñúhú bàrcú núu tnàhá té Pǎblú, te nchaa-ndí ní xexi ndihí-ndí-dé. ³⁸ Te ní xexi-ndí ní ndahá xití-ndí. Te dǎtnùnì ní ngüíta-güedé ní tava-güedé nchaa ngohnchi triú ní dǎngoyo-güedé xití ndute cuendá nduu ñamá-gá bàrcú.

Ní dáhu bàrcú xití làmár

³⁹ Te sátá ñí túndaá, te ñá ní cùtnuní-gá iní-güedé ndée cúu-xí núu ñí sáá-güedé, te ní xiní-güedé ñⁿ xichi núu ñí xícó ndúu luha yuhu làmár, te vǎi vihi cúchí dándáá-xí yùhu ndute, te xíaⁿ ñá túú dàcandá víhí táchí ndute. Te ní ndatnúhu-güedé sá

ndácú-güedé dàcaca-güedé bàrcú quíhíⁿ-xi ndée núu ñúhú cùchí. ⁴⁰ Te xíaⁿ núu ní sáháⁿ-güedé ní xehndé-güedé nchaa yoho nchícúⁿ caá tácandé bàrcú ní ndóo xití làmár, te ní nadatáyá-güedé vítú sǎ dácucó-xi barcú, te ní nacata caa-güedé ñⁿ dóo díquí bàrcú, te ta chindaha táchí cuáháⁿ yuhu làmár tá cùyatni-xi ñuhu yichí cuáháⁿ. ⁴¹ Te ndècu ñⁿ xichi ní natacá víhí cùchí xití ndute, te xíaⁿ ñí nguíndüxi nihnu bàrcú-güedé, te ní cutí-xi xití cúchí, te ñá ní ñíhí-gǎ-güedé nàcuáa cada-güedé nene-xi. Te ío níhí ní dácandá táchí ndute, te ní chúcú ndée-xi ndàa sátá bàrcú, te ní ndihí ní táhú-xí. ⁴² Te cue sandàdú ní xitnàha-güedé sá cáhní-güedé nchaa cue tée ní xíhi vecaá cuendá sá vǎ quíhíⁿ-güedé núu ndute te cunu-güedé. ⁴³ Te té cùu capitáⁿ ñá ní dàña-dé cahni-güedé cue tée ní xíhi vecaá, chi ñá ní cùndee iní-dé cahni-güedé tnàhá té Pǎblú. Te ní xáhaⁿ-dǎ xii-güedé sá cuè tée xícuu cada quíhíⁿ núu ndute te na yǎha-güedé ndute quene-güedé yuhu làmár. ⁴⁴ Te dava cue tée ñá cúu càda, ní xáhaⁿ-dǎ nanducu-güedé vítú ní àdi vítú ñí táhú sǎ ñí xíhi bàrcú, te núu xíaⁿ caundodo-güedé yáha-güedé ndute quene-güedé ndée yuhu làmár. Núu duha ní cuu ní cácu-ndí nchaa-ndí.

28

Té Pǎblú ndécú-dǎ ñúú Mǎltá cáá cuádava làmár

¹ Te sátá ñí cácu-ndí ní nene-ndí ñuhu yichí, te ní níhí-ndí tnúhu nàcuáa nàni ñúu núu ñí sáá-ndí, te ñúú-áⁿ nání-xí Mǎltá, te càa-xi cuádava làmár. ² Te ío quide víxiⁿ-xi cuendá ío cùuⁿ dáú. Te ñáyíu ñúú-áⁿ ñí cundàhú iní ñáhǎ-yu xii-ndí, ní dátñahá-yu ñuhú te ní cana ñáhǎ-yu ní sáháⁿ-ndí ní nacuídí-ndí. ³ Te té Pǎblú dátacá-dé nducú, te tnàhá-ñí ñⁿ cóo déeⁿ ñí tní nihnu-dé-di, te òré cuáháⁿ ndaha-dé chucu-dé núu ñuhú, te ní ñáni-di cahni, te ní ndee-di xití nducú ní sándúú-di ndaha-dé, te ní xexi-ñaⁿ-di xii-dé. ⁴ Te nchaa ñáyíu ndehé-yu sá tácandé-di ndaha-dé, te ní ngüíta-yu ní xitnàhá-yu:

—Váa ndíyí ní sahani téa-a, te ñá ní xihí-dé làmár, te dacutíí sã cùú-dé vitna, chi sa ñaha Yá Ndiõxí ná ní quide-dé ñuyíú-a — càchí-yu xitnàhá-yu.

⁵ Te té Páblú ní quidi-dé ndaha-dé ní ngaunihnu-di núú ñùhú, te ñá túú tnàhí ná ní cùu núú ñí xexi-di. ⁶ Te ñáyíu ñúú-áⁿ xíndéhè-yu núu daquihíⁿ-xi chùhúⁿ àdi nduá-dé cuú-dé. Te naha ñí xíndéhé ñàhá-yu núu nása cada ñaha-xi xii-dé, te ñá túú tnàhí ná ní quide ñaha-xi, te ní xitnàhá-yu:

—Váa ndiõxí cúú tée-a núu dàcáⁿ ñá túú tnàhí ná ní quide-xi ndaha-dé núú ñí xexi cóó —càchí-yu xitnàhá-yu.

⁷ Te yatni núú dúcáⁿ ñí xexihaⁿ cóó-ãⁿ cáá ñùhu xitu téa nani Publiú, te tée-ãⁿ táxi tnùnì-dé ñihí ñúú cáá cuádava xití làmár núu ndécú-ndí nduu-ãⁿ. Te ío váha iní-dé chi ní cana ñaha-dé ní sáháⁿ-ndí ní xíndecu-ndí úní nduu vehe-dé. ⁸ Te tãtã tẽ Pùbliú-áⁿ cáá-dé cùhú-dé ñùhú-dé cahni, te tnàhá-dé daxi. Te té Páblú ní sáháⁿ-dé núu cáá-dé, te ní cáháⁿ ndihí-dé Yá Ndiõxí, te ní sacáⁿ ndodo-dé ndaha-dé díquí tée cùhú-áⁿ, te ducaⁿ-ni ñí quide-dé, te ní ndúha tée cùhú-áⁿ. ⁹ Te sátá dúcáⁿ ñí quide té Páblú, te ní quixi nchaa ñáyíu cùhú núu ndécú-ndí, te ní quide tátna ñaha tẽ Páblú xii-yu te ní ndúha-yu. ¹⁰ Te òré ndécú-ndí xíáⁿ, te vãi sá ñí taxi táhú-güedé, te òré ní xica-ndí ní taxi tucu-güedé nchaa sá xíní ñùhu-ndí ichi.

Té Páblú ní quexìo-dé ñúú Ròmá

¹¹ Te yàcáⁿ ní xíndecu-ndí úní yóó, te sa ndècu ñíⁿ barcú tée ñúú Alejándriá òré ní quexìo-ndí, te ní xíndecu-xi ñihí yóó cúúⁿ dǎú táchí. Te núú-xi càndodo sandú sá dánàni-güedé Càstór ndihí sandú sá dánàni-güedé Pólux, te xití bàrcú-áⁿ ñí quée-ndí cuáháⁿ-ndí. ¹² Te ní quexìo-ndí ñúú Siràcusá, te yàcáⁿ ní xíndecu-ndí úní nduu. ¹³ Te ní xica tucu bàrcú cuáháⁿ-xi, te ndéé nduu úú ní quexìo-ndí ñúú Pùteolí. ¹⁴ Te yàcáⁿ ní naníhí tnàhá-ndí ndihí ñáyíu sàndáá iní tnúhu Jèsús, te ní cachí-yu sá cùndècu-ndí úná nduu, núu xíãⁿ

ní xíndecu-ndí úná nduu ndihí-yu. Te ní xica tucu bàrcú cuáháⁿ-xi, te ní quexìo-ndí ñúú Ròmá. ¹⁵ Te ñáyíu ròmá ñáyíu sàndáá iní tnúhu Jèsús, ní níhí-yu tnúhu sá cuáháⁿ-ndí, te ní quixí-yu ní quixi tnàhá ñáhã-yu ichi. Te davá-yu ní naníhí-ndí ñúú Fòrú Àpiú, te davá-yu ní naníhí-ndí ñúú Úní Tàbernás. Te òré ní xíní té Páblú nchaa ñáyíu véxi tnàhá ñáhá xii-ndí, te ndee ndèe ní cuu iní-dé, te ní ndacáⁿ táhú-dé núu Yá Ndiõxí sá dúcáⁿ ñí quidé-yu. ¹⁶ Te sátá ñí quexìo-ndí ñúú Ròmá, te cue tée cùchiuⁿ ní xáhaⁿ-güedé xii té Páblú sá cùndècu ñíⁿ-dé, te ní xíndéé ñáhá cuàa sandadú xii-dé.

Té Páblú càháⁿ-dé tnúhu Yá Ndiõxí ñúú Ròmá

¹⁷ Nduu úní sá ñí quexìo té Páblú, te ní cana-dé cue tée cùnuu núu ñáyíu isràél ndécú ñúú Ròmá, te ní sáháⁿ-güedé núu ndécú-dé, te ní xáhaⁿ-dè:

—Nchòhó cue tée isràél, càchí tnúhu-í sá ñà túú ñá ní quide-í ní ñíⁿ ñáyíu cùtnàhá ní xíndecu-í ñúú Jerusàlén. Te ñá túú ní càháⁿ cuèhé-í sá quidè-yu nchaa nàcuáa ní xóo cada cue ñaní tnàhá-ó ñí xíndecu ndéé sanaha, te ñá túú ñá ní quide-í te ní tñí ñaha-güedé ní sáha cuendá ñáhá-güedé xii-í núu cuè tée ròmá, cue tée ndècu yacáⁿ. ¹⁸ Te cue tée-áⁿ ñí ndúcú tnúhu-güedé ñúu ndáá ndècuéchi-í, te ní cutnùnì iní-güedé sá ñá túú ñá ní quide-í, te xíãⁿ cuìní-güedé queñuhu ñaha-güedé xii-í vecaá ní cùu. ¹⁹ Te ñíu-ni cue tée isràél ñá ní dàña-güedé cácu-í, chi cuìní-güedé sá cáhni ñàha cue tée ròmá, cue tée xíndecu yàcáⁿ xii-í ní cùu, te xíãⁿ ñúu ní xáhaⁿ-í sá quixí-í cáháⁿ ndihí-í té Cèsár cuendá iha cada ndáá méé-dé cuendá-í, te vá yóo ñíⁿ tee-í cuéchi. ²⁰ Núu xíãⁿ ní cana ñaha-í xii-ndo cuendá cunaha-ndo nàcuáa ní cuu. Te ní xáhaⁿ-í sá sàndáá iní-í sá ndótó ñáyíu ní xihí, te ñíu-ni ducaⁿ càháⁿ dava-gá ñáyíu isràél, te sá dúcáⁿ ñí cáháⁿ-í, te ní chihi ñaha-güedé vecaá, te xíndéé ñáhá-güedé ndéé vitna —càchí té Páblú xáhaⁿ-dè xii-güedé.

²¹ Te ní xáhaⁿ-güedé xii-dé:

—Ñá túú tnàhí tutú ní tëndaha cue tée distritú Jùdeá quixi cuendá-n. Te ní cuè tée isràél ñá túú ní quixi-güedé cáháⁿ cuèhé-güedé cuendá-n. ²² Te cuìní-ndí

cundedóho-ndí nása cunduu tnúhu cáháⁿ-n, chi sa ní níhí-ndí tnúhu sá ncháá xìchi ío xícáháⁿ cuèhé-yu cuèndá nchaa ñáyiú sàndáá iní tnúhu Jèsús –càchí-güedé xáhaⁿ-güedé xii té Páblú.

²³ Te ní xáhaⁿ-güedé nduu cùyáchí-güedé te quixi-güedé cundedóho-güedé dava-gá cuèndú cáháⁿ té Páblú. Te ní tnahá nduu ní ndatnúhu-güedé quíhíⁿ-güedé núú quidé vèhe-dé, te vái-yu ní sáháⁿ-yu ní xíndedóho-yu tnúhu ní cáháⁿ-dé, te ncháca nchaa ní cáháⁿ ndihí-dé-yu. Te ní xáhaⁿ-dē xii-yu sá ndí Moisés ndihí dava-gá cue té ní xóo cáháⁿ tnúhu Yá Ndiöxí ndéé sanaha ní chídó tnùní-güedé núú tütú-güedé sá díú-gã tendaha-gã Crístú quixi-gá ñuyíú-a. Te ní chídó tnùní-güedé nchaa nàcuáa cada-gá, te díu-ni nàcuáa càháⁿ tutú-güedé cada Crístú, te ducaⁿ ní quide-gá cútnáhá ní xica cuu-gá ñuyíú-a, núú xíáⁿ ní cutnùní sá díú Jèsús cúú-gã Crístú Yaá ní tendaha Yá Ndiöxí ní quixi ñuyíú-a. Te núú quíndáá iní-yu, te ndíhu ndaha ñàha Yá Ndiöxí xii-yu. ²⁴ Te davá-yu ní sàndáá iní-yu tnúhu ní cáháⁿ-dé, te davá-yu ñá túú ní sàndáá iní-yu. ²⁵ Te cuèndá sá ñá ííⁿ-ní tnúhu ní cáháⁿ-yu, núú xíáⁿ cuíní-yu núhú-yu ní cùu. Te ní xáhaⁿ té Páblú sá cündetu tnaá-yu cáháⁿ-dé ingá tnúhu, te xáhaⁿ-dē:

—Ní xáhaⁿ Espíritú Yá Ndiöxí xii ndí Chàíá nàcuáa cáháⁿ ndí núú ncháa ñaní tnáhá-ó ní xíndecu ndéé sanaha. Te ní cáháⁿ Espíritú-gá ííⁿ sá ndáá ní xáhaⁿ-xi xii ndí, te duha ní xáhaⁿ-xi:

²⁶ Quíhíⁿ-n te cúñaha-n xii ñáyiú:

Nchòhó mee-ni cündedóho-ndo tnúhu càháⁿ
Yá Ndiöxí, dico ni vã tècú tnùní-ndó.

Te cada-gá títí núú sã vã yõo tnàhí ndàcu
cada, dico ni vã cútnùní iní-ndó
nàcuáa ndùu sá cáda-gã,

²⁷ chi cuèndá sá ío sàá iní-ndó,
xíáⁿ ducaⁿ ñà túú sãha-ndo cuèndá nása
cuáháⁿ tnúhu càháⁿ-gá,

chi ñá cuíní-ndó cündedóho-ndo, te ni ñá
sàndáá iní-ndó.

Te ni ñá cuíní-ndó dàña-ndo nchaa sá cuèhé
sá dúhá quide-ndo

cuendá xocàni-gá nchaa xíáⁿ iní-ndó,

duha cúñaha-n xii-yu.

Càchí Espíritú-gá xáhaⁿ-xi xii ndí. ²⁸ Te na
càchí tnúhu-í sá quíhíⁿ cue tée càháⁿ tnúhu

Yá Ndiöxí cáháⁿ-güedé tnúhu-gá núú ñáyiú ñá túú cùu ñáyiú isràél, chi ñáyiú isràél ñá túú cuíní-yu cündedóho-yu. Dico ñáyiú ñá túú cùu ñáyiú isràél chi cùdí iní-yu cündedóho-yu, núú xíáⁿ naníhí tàhú-yu –càchí té Páblú xáhaⁿ-dē xii-yu.

²⁹ Te sátá ní ndihí cuèndú ní xáhaⁿ-dē, te ní ndeé-yu cuánuhú-yu ta ndatnúhu-yu cuáháⁿ.

³⁰ Te úú cuía ní xínu ní xíndecu té Páblú ííⁿ vehe ní cháhu-dé. Te ní xóo cáháⁿ váha-dé ndihí nchaa ñáyiú ní xóo quíhíⁿ vehe-dé.

³¹ Te ní xáhaⁿ-dē sá ndíhu ndaha ñàha Yá Ndiöxí xii-yu núú quíndáá iní-yu tnúhu-gá, te vá yõo ííⁿ ni sàdí yuhu-dé. Te mee-ni tnúhu Xítóhó Jesucristú ní cáháⁿ-dé núú-yu.

TUTÚ NÍ CADÚHA TĒ PĀBLÚ QUIHĪⁿ NDAHA ÑÁYIU ÑUÚ RÒMÁ

Té Pāblú cadūha-dé tutú quihĪⁿ ndaha ñáyiū xĭndecu ichi Xítóhó Jesucristú ndécú ñuú Rómá

¹ Yúhú té Pāblú xínú cuèchi-í núú Xítóhó Jesucristú, chi mee Yă Ndiöxí ní cachí-gá sá cúu-í #ⁿ téé cāháⁿ tnúhu-gá núú ñáyiū, te tnúhu-gá cúu-xí tnúhu sá cāháⁿ nācuāa naníhí tǎhú-ó, núu ñu-gá ní tendaha ñàha-gá xii-í xicáⁿ cúu-í cāháⁿ-í tnúhu-gá.

² Te ndéé sanaha ñí cachí Yă Ndiöxí sá dàcuítí sáa nduu ngündecu ndihĪ ñáyiū tnúhu-gá. Te ducaⁿ ñí xáhaⁿ-gă xii cue téé ní cāháⁿ tnúhu-gá dàvá-áⁿ ñí chídó tnùnĪ-güedé núú tütú-gá. ³ Te tnúhu-gá sá cāháⁿ-í-a cāháⁿ-xí ñu-gá cuendá Xítóhó Jesucristú Yaá cúu Déhe-gá. Te Déhe-gá-áⁿ cúu-gă #ⁿ ñáyiū, te cūu-gă ñanĪ tñáhá ndĪ Dàvií. ⁴ Te cūu-gă Yaá ñá túú tñáhí cuèchi-xi. Te ní xihĪ-gá te ní ndoto-gá, te xĭáⁿ cútnùnĪ inĪ-ó sá cúu-gă Déhe Yă Ndiöxí, te ío cāhnu cuu-gă. ⁵ Te ñu-gá Xítóhó Jesucristú ní quide-gá ní nduu tǎhú-í núú Yă Ndiöxí sá cāháⁿ-í tnúhu-gá núú cuè ñáyiū ñuyíú-a cuendá quĭndáá inĪ-yu tnúhu-gá te canchicúⁿ nihnú-yu cadá-yu nchaa nācuāa cāháⁿ-xi, te ducaⁿ ío cuu cāhnu-gă. ⁶ Te tñáhá nchòhó cúu-ndó ñáyiū sa nchĪcúⁿ nihnu quide-ndo nchaa nācuāa cāháⁿ tnúhu-áⁿ, chi ní cachí Yă Ndiöxí sá nchòhó tñáhá tnúhu-ndo ndihĪ Xítóhó Jesucristú. ⁷ Te nchòhó ñáyiū xĭndecu ñuú Rómá, ñáyiū ío cūu inĪ ñáhá Yă Ndiöxí, cadúha-í tutú-a daquixi-í ndaha-ndo. Te ñu-gá nchòhó cúu-ndó cuè ñáyiū ní cachí Yă Ndiöxí cada ndáá cundecu-ndo ñuú-gă. Te xicáⁿ tǎhú-í núú Tǎtá-ó Dütú Ndiöxí ndihĪ núú Xítóhó Jesucristú sá ío na chĭndee chitúu ñaha-gă xii-ndo, te ducaⁿ ndĪ nduú-gă ná càda te ío váha cuu inĪ-ndó cūndecu-ndo.

Té Pāblú cuĭnĪ-dé quihĪⁿ ngoto-dé cue ñáyiū xĭndecu ichi Xítóhó Jesucristú ndécú ñuú Rómá

⁸ Te díhna nuu-gă cāchĪ tnúhu-í xii-ndo sá ío ndácáⁿ tǎhú-í núú Yă Ndiöxí cuendá sá ío sàndáá inĪ-ndó-gă, te nchaa ñáyiū ñihĪ-yu tnúhu sá dúcáⁿ quide-ndo. Te Xítóhó Jesucristú dáyāha-gă nchaa tnúhu cāháⁿ-í núú Yă Ndiöxí. ⁹ Te ndĪ tñáhá òré cāháⁿ ndihĪ-í Yă Ndiöxí ducaⁿ-ñí xicáⁿ tǎhú-í núú-gă cuendá-ndó, te mee-gă náhá-gă sá cāháⁿ ndáá-í, te ñu-gá ní núú-gă xínú cuèchi-í ní yúhu ní inĪ-í, chi cāháⁿ-í nācuāa ní quide Déhe-gá Xítóhó Jesucristú cuendá naníhí tǎhú-ó. ¹⁰ Te xicáⁿ tǎhú-í núú Yă Ndiöxí sá ñuú mee-gă ná cāchĪ te sáá #ⁿ nduu quixi coto ñaha-í xii-ndo. ¹¹ Chi ío cuĭnĪ-í cundecu ndihĪ ñaha-í xii-ndo dānehé ñáhà-í #ⁿ úú tnúhu nācuāa ío-gă chĭndee ñaha Espĭrĭtú Yă Ndiöxí xii-ndo, te ducaⁿ ío-gă cuita nducu ndèe-ndo cada-ndo nchaa nācuāa cuĭnĪ-gă. ¹² Te ío chí ná cuāha tñaha-o tnúhu ndee inĪ cundecu-o ñu-gă, chi nchòhó ndihĪ yúhú ío sàndáá inĪ-ó-gă.

¹³ Te nchòhó ñáyiū ndècu ndihĪ-í ichi Xítóhó Jesucristú na cāchĪ tnúhu-í xii-ndo sá dúcáⁿ-ní ío sàni inĪ-í quixi coto ñaha-í xii-ndo. Te cuĭnĪ-í sá òré quixi coto ñaha-í xii-ndo, te vá cuĭta chĭuⁿ quixi-í dàtná quidè-í òré sǎngoto-í nchaa ñáyiū dāva-gă ñuú ñá túú xĭta chĭuⁿ-í chí ío váha sǎhúuⁿ-yu tnúhu cāháⁿ-í, dico ñá ndácú-í quixi-í quixi coto ñaha-í xii-ndo. ¹⁴ Te yúhú yĭdíquĭ-í cāháⁿ-í tnúhu Xítóhó Jesucristú núú nchāa ñáyiū cāháⁿ tnúhu griégú, ndihĪ núú nchāa ñáyiū cāháⁿ dāva-gă núú tnúhu, ndihĪ núú nchāa ñáyiū túha, ndihĪ núú nchāa ñáyiū ñá túú túha. ¹⁵ Te cuendá sá dúhá yĭdíquĭ-í cāháⁿ-í tnúhu-gă, xĭáⁿ ío cuĭnĪ-í dānehé ñáhà-í xii nchaa nchòhó ñáyiū ñuú Rómá nācuāa ndūu tnúhu sá cāháⁿ nācuāa naníhí tǎhú-ó.

Ío cūnuu tnúhu Xítóhó Jesucristú

¹⁶ Te yúhú ñá túú tñáhí cūcahaⁿ nūu-í cāháⁿ-í tnúhu Xítóhó Jesucristú, chi cūu-xi tnúhu ío cūnuu, chí Yă Ndiöxí ní cachí-gá sá nchāá ñáyiū na quĭndáá inĪ-xi tnúhu-áⁿ te naníhí tǎhú-yu. Te ní cachí-gá sá díhnanuu-gă ñáyiū isráel ngündecu ndihĪ-yu tnúhu-áⁿ te dàtnùnĪ ngündecu ndihĪ ñáyiū ñá túú cūu ñáyiū isráel. ¹⁷ Te tnúhu-áⁿ dānehé ñáhà-xí xĭi-o sá cúu-o núú Yă Ndiöxí te nūu mee-ni sá quĭndáá inĪ-ó-gă

dàtná càháⁿ-xi núú tütú-gá núú càchí-xi: “Nchaa ñáyiú sàndáá iní ñáhá xii Yá Ndiöxí cúdíú-yu núú-gă, te ndècu ndihî ñahá-yu xii-gă”, duha càchí-xi núú tütú-gá.

Nchaa ñáyiú ndècu ñuyúú ndècuéchi-yu

¹⁸ Te ndéé andiu tëndaha Yá Ndiöxí sá ùhú quixi sá cúú-xí nchaa ñáyiú ñá túú quide ndáá núú-gă, ñáyiú quide nchaa sá cuèhé sá dúhá. Te cuèndá nchaa sá quidè-yu-áⁿ xíãⁿ ñá túú cuiní-yu tñí-yu tnúhu ndáá tnúhu Yá Ndiöxí cuèndá cuu-xi ñá sá vâha sá cúú-xí-yu. ¹⁹ Te cuèi ducaⁿ quidè-yu dico cùtnuní ndáá iní-yu nàcuáa ndùu sá sání iní Yá Ndiöxí ndihî nàcuáa ndùu sá quidè-gă dàtná cùtnuní iní nchaa dava-gá-yu, chi ñu-gá dánèhé ñáhá-gă xii-yu. ²⁰ Te ni vâ ndácú-ó quini núú-ó nâsa càa-gá, te ni vâ ndácú-ó quini-ó nâsa càa iní-gá, te ni vâ ndácú-ó quini-ó nâsa quide-gă táxi tnùnigá nchaa nduu nchaa quíú. Te cuèi ducaⁿ dico ndéé cùtnàhá ní ngáva ñuyúú ní ngúita nchaa ñáyiú tècú tnùnigá vâha-yu nàcuáa ndùu sá sání iní-gá ndihî nàcuáa ndùu sá quidè-gă te ducaⁿ tècú tnùnigá-yu cuèndá nchaa sá ñí cadúha-gá ndéhè-yu ío ñuyúú-a, núú xíãⁿ vâ càchí-yu sá ñá túú cuèchi-yu. ²¹ Te cuèi ducaⁿ ní cùtnuní iní-yu cuèndá Yá Ndiöxí dico ñá túú cuiní-yu canehé-yu sá yíñùhu núú-gă nàcuáa tàú-xi cunduu. Te ni ñá túú cuiní-yu ndacáⁿ táhù-yu núú-gă cuèndá nchaa sá vâha quide ñaha-gá xii-yu, chi mee-ni nchaa sá ñá túú vèdana nàndihî ñùhu iní-yu. Te quidè-yu dàtná quidè ñá ñáyiú ñá túú ndècu ndihî nchaa sá xini tnùnigá-xi. Te uuⁿ-gá uuⁿ-gá tá quidè-yu cuáháⁿ. ²² Te càchí-yu sá cúú-yu ñáyiú ío vâha sáá sá xini tnùnigá-xi dico ñá ndáá, chi cùú-yu ñáyiú ío ñí ñíquí-xi. ²³ Te ñá túú cuiní-yu càháⁿ-yu sá ío càhnu cuu Yá Ndiöxí Yaá ndécú nchaa nduu nchaa quíú, chi da nchaa sá ñí cadúha mèe-yu quide cahnú-yu. Te ní cadúha-yu nchaa sá nàhá ñáyiú ñá túú cùdí ndècu ñuyúú-a. Te ní cadúha-yu sá nàhá quiti ndàva, ndihî sá nàhá quiti sàcuíta ñuhu mee-xi, ndihî sá nàhá nchaa dava-gá quiti, nchaa xíãⁿ quidè càhnú-yu.

²⁴ Te xíãⁿ núu ní dáñá Yá Ndiöxí quidè-yu nchaa sá cuèhé sá dúhá sàni iní-yu. Te

xíãⁿ ío quide ndihî tnahá-yu sá cuèhé sá dúhá sàcúú-xí yiqui cuñú-yu. ²⁵ Te ducaⁿ quidè-yu chi ñá túú sàndáá iní-yu tnúhu ndáá tnúhu Yá Ndiöxí. Te mee-ni tnúhu ndehnde sàndáá iní-yu, te nèhé-yu sá yíñùhu núú dàva sá ñí cadúha-gá ío ñuyúú-a ndihî dava sá ndéé andiu te quide cahnú-yu, te ñá túú càchí-yu sá mèe-gă ío càhnu cuu-gá, dico mee-gă xini ñùhu-xi càháⁿ-yu sá ío càhnu cuu-gá ní caa ní quíhíⁿ. Te ndáá ndisa sá ío càhnu cuu-gá.

²⁶ Te sá dúcáⁿ ñá túú quide vâha-yu núu xíãⁿ ní dáñá-ñá Yá Ndiöxí quidè-yu nchaa sá cuèhé sá dúhá sàni iní mèe-yu. Te dava ñáyiú ñíhî càháⁿ ndihî tnahá-yu ndi mèe ñíhî-yu te ñá túú quidè-yu nàcuáa ní nduu táhù-yu cadá-yu. ²⁷ Te ñu-ni ducaⁿ xiquide dava cue tée chi sàni cuehé sání dùha iní-güedé sá cúú-xí yiqui cuñú-güedé ndi mèe tnahá tée-güedé, chi càháⁿ ndihî tnahá ndi mee-güedé te ñá túú quide-güedé nàcuáa ní nduu táhù-güedé cada-güedé, te sá dúcáⁿ quide-güedé te ñá túú tnahí cùu vâha iní-güedé ndécú-güedé, te ducaⁿ tnahí tàú-xi ndoho-güedé cundecu-güedé.

²⁸ Te ñá túú tnahí ñùhu iní-yu Yá Ndiöxí núu xíãⁿ duuⁿ duuⁿ ní dáñá ñíhnu ñaha-gá xii-yu sàni cuehé sání dùha iní-yu, te quidè-yu nchaa sá ñá túú tàú-yu cadá-yu. ²⁹ Te nchaa núú sá cuèhé sá dúhá cùnuu quidè-yu. Te cue tée càháⁿ ndihî-güedé ñáyiú ñíhî te ñá díú ñáñíhî-güedé cúú-yu. Te ñu-ni ducaⁿ xiquide cue ñáyiú ñíhî chi càháⁿ ndihî-yu cue tée te ñá díú yíhî-yu cùu-güedé. Te mee-ni sá ñá túú vâha quidè-yu sá cúú-xí tnahá ñáyiú-yu, te xihó-yu cundecu ndihî-yu sá ndécú ndihî dava-gá tnahá ñáyiú-yu, te ío sàni cuehé sání dùha iní-yu sá cúú-xí tnahá ñáyiú-yu, te ío cuédú iní-yu, te sàhni tnahá-yu, te ío plètú-yu, te dândahú tnahá-yu, te cùu úhú iní-yu cue tnahá ñáyiú-yu, te ío yiti yùhú-yu. ³⁰ Te càháⁿ cuèhé-yu cuèndá nchaa dava-gá tnahá ñáyiú-yu, te cùu úhú iní-yu Yá Ndiöxí, te xio xio cuiní-yu cunuu tnúhu-yu, te mee-ni sàni iní-yu sá ío vâha cunduu-yu, te ío quide cahnú-yu mèe-yu, te ío sàni iní-yu sá cadá úhú-yu tnahá ñáyiú-yu, te ñá túú sàndáá iní-yu ní tãtä-yu ní nãñá-yu. ³¹ Te ñá túú

tècú tnùnì-yu sá vǎha, te ñá túú quidè-yu ñí sá càháⁿ-yu, te ñá túú cùu iní-yu nì ñáyiu cùu ndi meé-yu, te ni dàva-gá tnàha ñáyiu-yu, te ñá túú quidè cahnu iní-yu ñí sá cúmǎní nǔú tnáhǎ-yu, te ni ñà túú cùndahú iní-yu tnàha ñáyiu-yu. ³² Te Yá Ndiõxí ní cachí-gá sá ncháá ñáyiu ducaⁿ xǐquide quíhíⁿ-yu núú ùhú núú ndàhú. Te xìnì-yu sá Yǎ Ndiõxí daquihíⁿ ñáhá-gǎ xií-yu núú ùhú núú ndàhú sá dúcáⁿ quidè-yu, dico uuⁿ-gá quidè-yu chi váha-gá cúú iní-yu cue ñáyiu quidè datná quidè mèe-yu.

2

Yá Ndiõxí cada ndáá-gá cuéchi nchaa ñáyiu ndècu ñuyúú

¹ Te nchòhó ñáyiu càchí sá ïo ndècu cuéchi dava-gá ñáyiu tnàhá-ndó ïo ndècu cuéchi-ndo cuèi nágá ñáyiu cùu-ndo, chi tnàhá-ndó quidè-ni-ndo nchaa nacuaá quidè dava-gá ñáyiu càchí-ndó ndècu cuéchi-xi, te sá dúcáⁿ càháⁿ-ndó sǎ ndécú cuéchi ñáyiu-áⁿ te dàcaa-ndo cuéchi díquí-ndó chi tnàhá-ndó quidè-ndo datná quidè-yu. ² Te nchoo xìnì-ó sǎ Yǎ Ndiõxí ïo váha cùtnuní iní-gá nàcuáa cada ndáá-gá cuéchi ñí ñí nchoo ñáyiu ndècu ñuyúú-a, chi daquihíⁿ-gá nchaa ñáyiu quidè nacuaá ní càháⁿ-í núú ùhú núú ndàhú. ³ Te nchòhó ñáyiu ñí ñí quidè ndihí ñáyiu càchí mèe-ndó sǎ ndécú cuéchi-xi dacuítí sǎ ná chǎhu-ndo nǔú Yǎ Ndiõxí sá dúcáⁿ quidè-ndo. ⁴ Te ñá túú cùu váha iní-ndó sǎ Yǎ Ndiõxí cùndahú iní ñáhá-gǎ xii-ndo, te ni ñà túú cùu váha iní-ndó sǎ ïo cuìní-gá cada càhnu iní-gá nchaa sá ñà túú váha quidè-ndo, te ni ñà túú quidè cuendá-ndó sǎ Yǎ Ndiõxí quidè váha ñaha-gǎ xii-ndo cuendá cuìní-gá sá nchòhó ndixi túu iní-ndó sǎ ñà túú quidè váha-ndo ndècu-ndo. ⁵ Te nchòhó cúú-ndó ñáyiu ïo sǎa iní-xi, chi ñá túú cuìní-ndó ndixi túu iní-ndó sǎ ñà túú quidè váha-ndo ndècu-ndo, te xǎⁿ nǔu ïo-gá tá cùu vai tnúndòho sá cúú-xí-ndó. Te na sǎa nduu tnúhu ndòho tnúhu ndàhú te ïo ndòho-ndo, chi Yá Ndiõxí cada ndáá-gá nàcuáa ndùu cuéchi-ndo. ⁶ Te dàvá-áⁿ cada ndáá Yǎ Ndiõxí nchaa nàcuáa ndùu nchaa sá ñí quidè ñí ñí ñáyiu ndècu ñuyúú-a. ⁷ Te nchaa ñáyiu nchìcúⁿ nihnu-ni quidè mee-ni sá

vǎha, ñáyiu-áⁿ nduu táhǔ-yu cundecú-yu ndihí Yá Ndiõxí ní caa ní quíhíⁿ, te ducaⁿ quidè váha-yu chi cuìní-yu sá Yǎ Ndiõxí cuu váha iní ñáhá-gǎ xií-yu, te cuìní tucú-yu nduu táhǔ-yu núú ïo váha càa ndecu Yá Ndiõxí cundecú-yu ní caa ní quíhíⁿ. ⁸ Te ïo cùdéeⁿ-gǎ núú ncháa ñáyiu ñùhu iní mee-ni sǎ cúú-xí mèe-xi, te ñá túú sàndáá iní-yu tnúhu ndáá chi mee-ni sǎ cuèhé sá dúhá quidè-yu. ⁹ Te nchaa ñáyiu ducaⁿ xǐquide ïo ndíhú iní-yu. Te díhna-gá ñáyiu isràél ngúíta-xi ndohó-yu, te dàtnùnì ngúíta-xi ndoho nchaa ñáyiu ñá túú cùu ñáyiu isràél. ¹⁰ Te nchaa ñáyiu ní quidè váha, te Yá Ndiõxí cada-gá te ngúndecú-yu núú ïo váha càa ndecu-gá, te cachí-gá sá ñí quidè váha-yu, te ïo váha cuu iní-yu cundecú-yu. Te díhna-gá ñáyiu isràél ñáyiu ní quidè váha ducaⁿ càda ñaha-gá xií-yu, te dàtnùnì ducaⁿ càda ñaha-gá xii ñáyiu ñá túú cùu ñáyiu isràél ñáyiu ní quidè váha.

¹¹ Te ñá túú quidè cuendá-gá cuèi náí ñáyiu cùu-yu. ¹² Te nchaa ñáyiu ndècu ndihí nchaa tnúhu ní chídó tnùnì ndí Moisés, Yá Ndiõxí cada ndáá-gá cuéchi-yu nàcuáa càháⁿ nchaa tnúhu-áⁿ. Te nchaa ñáyiu ñá túú ndècu ndihí tnúhu ní chídó tnùnì ndí-áⁿ, Yá Ndiõxí vá cáda ndáá-gá cuéchi-yu nàcuáa càháⁿ nchaa tnúhu-áⁿ. Dico nchaa ñáyiu quidè nándi sá cuèhé sá dúhá dàcuítí cuíta nihnú-yu cuèi ndècu ndihí-yu tnúhu ní chídó tnùnì ndí Moisés àdi ñá túú ndècu ndihí-yu. ¹³ Te nchaa ñáyiu dícó-ni sàcúndedóho nchaa tnúhu ní càháⁿ ndí Moisés te ñá túú tnèi-yu, ñáyiu-áⁿ ñà túú cùdiú-yu núú Yǎ Ndiõxí, dico nchaa ñáyiu tnèi nchaa tnúhu ní càháⁿ ndí, ñáyiu-áⁿ càchí Yǎ Ndiõxí sá cúdiú-yu núú-gǎ, chi ñá túú-gǎ cuéchi-yu ndècu núú-gǎ. ¹⁴ Te nchaa ñáyiu ñá túú ndècu ndihí tnúhu ní chídó tnùnì ndí Moisés, te núu quidè-yu nchaa nàcuáa ní càháⁿ ndí te cùu-xi ñí sá sání tnàhí iní mèe-yu cadá-yu, te sá sání iní-yu-áⁿ cúú-xí ñí tnúhu váha sá sánú ìchi ñaha xií-yu nàcuáa cada váha-yu cundecú-yu. ¹⁵ Te sá dúcáⁿ quidè-yu xǎⁿ cùtnùnì sá sání iní-yu dàtná càháⁿ tnúhu ní chídó tnùnì ndí Moisés cada ñáyiu isràél, te ïo váha cùtnuní iní-yu nchaa nàcuáa

quidé-yu chi ndixi túu iní-yu òré ñá túú quide váha-yu. ¹⁶ Te sáá nduu te Yá Ndióxi cúñaha-gã xii Xítoho Jesucristú cada ndáá-gá nchaa cuéchi ñáiyu, nchaa sá sání iní méě-yu ndùu yuhu, te cada-gá dàtná càháⁿ tnúhu sá sánú ìchi ñaha xii-o nacuaa naníhí tàhú-ó, tnúhu sá dánèhé ñáhà-í xii-ndo.

Cuèndá ñáiyu isràél ndihi cuèndá nchaa tnúhu ní chídó tnùní ndí Moisés

¹⁷ Te nchòhó ñáiyu isràél nchaa-ndo cùu-ndo ndi mee-í, te càchí-ndó sã nchìcúⁿ nihnu-ndo quide-ndo nchaa tnúhu ní cáháⁿ ndí Moisés núu xíáⁿ ndécú vâha-ndo, te càchí-ndó sã ìo càhnu cuu-ndo sá ndécú ndihí-ndo Yá Ndióxi. ¹⁸ Te cùnùní iní-ndó nchàa nacuaa cùní Yá Ndióxi cada-ndo, te sá dúcáⁿ nchìcúⁿ nihnu-ndo quide-ndo nacuaa càháⁿ tnúhu-áⁿ xíáⁿ cùnùní iní-ndó nchàa sá ìo-gá váha xini ñuhu-xi cada-ndo. ¹⁹ Te càchí-ndó sã ìo váha xini-ndó cànuichi-ndo nchaa ñáiyu ñá túú cùnùní iní-xi, te càchí tucu-ndo sã ìo váha xini-ndó nà canu ichi-ndo nchaa ñáiyu ndècu ichi cuehé ichi duha. ²⁰ Te sànu ichi-ndo nchaa ñáiyu ío nì dǐquí-xi, ndihí nchaa ñáiyu vitna ta tècú tnùní nchaa sá vâha, te ducaⁿ quide-ndo chi ndècu ndihí-ndo nchaa tnúhu ní chídó tnùní ndí Moisés, te tnúhu-áⁿ cúu-xí tnúhu ndáá, chi sànu ichi ñaha-xi xii-ndo nacuaa cada-ndo. ²¹ Te nchòhó dàcuaha-ndo ñáiyu nàcuáa cadá-yu, te mee-ndo ñà túú dàcuaha-ndo cada-ndo nchaa nacuaa tàú-xi cunduu, te xâhaⁿ-ndo xii-yu sá vã cúú dùhú-yu te mee-ndo dùhu-ndo. ²² Te dàcuaha-ndó-yu sá cuè téé vá cúú càháⁿ ndihí-güedé ñáiyu dǐhí te núu ñá díú ñàdihí-güedé cúu-yu, te ducaⁿ-ni cuè ñáiyu dǐhí, vá cúú càháⁿ ndihí-yu téé te núu ñá díú yǐ-yu cùu-güedé. Te nchaa sá xâhaⁿ-ndo vã cúú càda ñáiyu te mee-ndo quide-ni-ndo, te xâhaⁿ-ndo xii-yu sá vã cànéhé-yu sá yǐñùhu núu nchàa sá càchí-yu cùu ndióxi-yu, te mee-ndo nèhé-gá quidé-ndó, chi dùhu-ndo nchaa sá ndécú vèñúhu. ²³ Te càchí-ndó sã ìo cùnuu nchaa tnúhu ní chídó tnùní ndí Moisés, te ñá túú quide-ndo nchaa nacuaa ní cáháⁿ ndí, te sá dúcáⁿ quide-ndo-áⁿ te dàquee tíhú-ndó Yá Ndióxi. ²⁴ Te quèe ndáá-xi nàcuáa càháⁿ-xi núu tütú Yá Ndióxi nàcuáa quide-ndo-áⁿ

núu càchí-xi sá ncháá ñáiyu ñá túú cùu ñáiyu isràél càháⁿ cuèhé-yu cuèndá Yá Ndióxi sá cuèndá-ndó.

²⁵ Te nchòhó ñáiyu isràél nchaa-ndo cùu-ndo ndi mee-í, te tnàhá-ndó ndècu ndihí-ndo seña ñii-ndo, te váha-ni sá dúcáⁿ te núu quide-ndo nchaa nacuaa ní cáháⁿ ndí Moisés. Dico núu ñá túú quide-ndo nchaa nacuaa ní cáháⁿ ndí ña, te ñá túú nàndihí-xi sá cúu-ndó ñáiyu isràél cuèi ndècu seña ñii-ndo. ²⁶ Te nchaa ñáiyu ñá túú ndècu ndihí seña ñii-xi, te núu quidé-yu nchaa nàcuáa ní cáháⁿ ndí Moisés, te cùu-yu dàtná cue ñáiyu ndècu ndihí seña ñii-xi, chi quidé-yu nchaa nàcuáa ní cáháⁿ ndí. ²⁷ Te ñáiyu ñá túú ndècu ndihí seña ñii-xi, te núu na cadá-yu nchaa nàcuáa ní cáháⁿ ndí Moisés, te ñáiyu-áⁿ cachí-yu sá ñà túú quide ndáá nchaa nchòhó ñáiyu ndècu ndihí seña ñii-xi, chi ndècu ndihí-ndo nchaa tnúhu ní chídó tnùní ndí te ñá túú quide-ndo nacuaa càháⁿ tnúhu-áⁿ. ²⁸ Te nchòhó ñáiyu isràél, ñáiyu nchìcúⁿ nihnu-ni quide nchaa nacuaa ta quide tnahi-ndo véxi, ñá túú quide-ndo sá cúu-ndó ñáiyu isràél, te mee-ndo ndècu seña ñii-ndo dico ñá túú quide-ndo nacuaa tàú-xi cada nchaa ñáiyu ndècu seña ñii-xi, te mee-ni seña-áⁿ sãha-ndo ñii-ndo te ñá túú quide-ndo nacuaa cùní Yá Ndióxi cada-ndo. ²⁹ Te nchaa ñáiyu sàndáá ndisa iní-xi Yá Ndióxi, ñáiyu-áⁿ cúú ndisá-yu ñáiyu isràél, te sa ní nduu ndoo ní nduu nine iní-yu chi Espiritú Yá Ndióxi ducaⁿ nǐ quide-xi, dico ñá díú sã sãha-yu seña ñii-yu dàtná ní cachí ndí Moisés. Te ñáiyu-áⁿ cúú vâha iní ñáhá Yá Ndióxi xii-yu cuèi ñá túú càháⁿ váha tnàha ñáiyu-yu cuèndá-yu.

3

¹ Te sá dúhá càháⁿ-í te ìo dava ñáiyu quesàhá-yu sá ñii-ní cùu ñáiyu ñá túú cùu ñáiyu isràél ndihí nchoo ñáiyu isràél, te quesaha tùcú-yu sá ñii-ní quide tucu-xi cuèi na cuãha àdi vá cuãha seña ñii-yu. ² Dico yúhú càchí-í sá ncháá ñáiyu isràél ìo-gá cùnùu-yu, chi ìo titní núu sã vâha ní quide ñaha Yá Ndióxi xii-yu, chi ní sãñaha-gã tnúhu-gá ndécú ndihí-yu. ³ Te davá-yu ñá túú cùní-yu cada ndáá-yu, dico

ñá díú sǎ xiǎⁿ te cùyica iní Yǎ Ndiǒxí ñá túú quide ndáá-gá. ⁴ Dico ñáhá chi xini ñuhu-xi sá ncháá ñáyiú cada cuendá-yu sá Yǎ Ndiǒxí cúú-gǎ Yaá quidé ndáá cuiti, te cuëi ncháá-yu na càchí-yu sá ñà túú quide ndáá-gá, dico mee-gǎ chi quide ndáá-ni-gá. Te núú tütú-gá càháⁿ-xi nàcuáa ní xáhaⁿ ñⁿ téé ní xindecu ndéé sanaha xii-gá, te duha ní xáhaⁿ-dë:

Yòhó Dútú Ndiǒxí, cùtnuní iní ñáyiú sá ïo ndáá càháⁿ-n,

te cùnūu nahi-ni tnúhu-n cuëi òré càchí ñáyiú sá ñà túú càháⁿ ndáá-n.

Duha ní xáhaⁿ tée ndéé sanaha-ǎⁿ xii-gá càchí-xi núú tütú-gá.

⁵ Te cuendá nchaa sá cuèhé sá dúhá quide ñáyiú, xiǎⁿ cútnuní iní-yu sá Yǎ Ndiǒxí cúú-gǎ Yaá ío váha quide ndáá, chi mee-gǎ ñá túú ducaⁿ quide-gá. Te cuëi ducaⁿ dico vá caní iní-yu sá Yǎ Ndiǒxí ñá túú quide ndáá-gá sá dándòho ñaha-gá xii-yu na sàa nduu, te núu ducaⁿ na càni iní-yu, te sàni iní-yu dàtná sání iní cue ñáyiú ñá túú ndècu ichi-gá. ⁶ Te vá dúcáⁿ càni iní-yu, chi núu Yǎ Ndiǒxí ñá túú quide ndáá-gá ñá, te vá cúú càda ndáá-gá nchaa cuëchi cue ñáyiú ñuyúú-a te núu ducaⁿ.

⁷ Te núu yúhú ná càni iní-í càháⁿ-í ñⁿ tnúhu ndehnde, te sá tnúhu-áⁿ te caní tucu iní-í sá quidé càhnu-gá-í tnúhu ndáá tnúhu Yǎ Ndiǒxí, te sá dúcáⁿ ná càháⁿ-í te caní tucu iní-í sá vǎ cúú càháⁿ Yǎ Ndiǒxí sá ndécú cuëchi-í. ⁸ Te núu na càni tucu iní-í sá vǎha-gá cada-í nchaa sá cuèhé sá dúhá cuendá Yǎ Ndiǒxí cada-gá sá vǎha, dico ñá ndáá. Te ío ñáyiú càháⁿ cuèhé cuendá-í te càchí-yu sá díú-ní ducaⁿ dacuaha-í ñáyiú dico ñá ndáá sá dúcáⁿ dànehé-í-yu, te ñáyiú-áⁿ nacháhu-yu tnúhu càháⁿ-yu, chi ducaⁿ tàú-xi cunduu.

Nchaa ñáyiú ñuyúú-a ndècuëchi-yu

⁹ Te vitna càchí dava ñáyiú sá ïo-gá cùnūu nchoo cue ñáyiú isràél dàcúúxí dàva-gá ñáyiú, dico yúhú càchí-í sá ñáhá, te sa ní cachí tnúhu ndáá-í xii-ndo sǎ nchàa ñáyiú ndècuëchi-yu cuëi ñáyiú isràél te cuëi ñáyiú ñá túú cùu ñáyiú isràél. ¹⁰ Te núú tütú Yǎ Ndiǒxí càchí-xi:

Vá yǒo ñⁿ quide ndáá,

¹¹ te ni vá yǒo ñⁿ tècú tnùní tnúhu váha, te ni vá yǒo ñⁿ nànducu nihnu Yǎ Ndiǒxí.

¹² Chi ncháá-yu ñá túú nchìcúⁿ nihnú-yu ichi váha, te ncháá-yu cùú-yu ñáyiú xindecu neñúú sá cúú-xí Yǎ Ndiǒxí.

Te ni ñⁿ-yu ñá túú quide-yu ñⁿ sá váha.

¹³ Te cada iní-ndó sǎ yúhú-yu cùu-xi datná cúú ñⁿ yaú núú yíndüxi ndíyi núú ïo ndehe sàháⁿ,

te ducaⁿ sàtnahá-xi cùu yuhú-yu, chi ío càháⁿ cuèhé-yu, te mee-ni dándahú-yu nchaa tnàha ñáyiú-yu.

Te cada iní-ndó sǎ vènenú cóo yíhí yúhú-yu chi mee-ni càháⁿ úhú-yu cuendá tnàha ñáyiú-yu.

¹⁴ Te ío iní-yu càháⁿ úhú tnáhǎ-yu.

¹⁵ Te àúⁿ nǎ cuu àúⁿ nǎ xiǎⁿ xǐsahni tnàhá-yu.

¹⁶ Te nchaa núú xicá cùu-yu quide úhú iní-yu nchaa tnàha ñáyiú-yu nàcuáa ndíhú iní ñáyiú-áⁿ.

¹⁷ Te ñá túú cuiní-yu cundecu ndíhi tnàha váha-yu.

¹⁸ Te ñá túú sàni iní-yu canehé-yu sá yíñùhu núú Yǎ Ndiǒxí.

Duha quidé-yu càchí-xi núú tütú-gá.

¹⁹ Te cùtnuní iní-ó sǎ nchàa tnúhu ní chídó tnùní ndíi Moisés cúú-xí cuendá nchaa ñáyiú nchìcúⁿ nihnu nchaa tnúhu-áⁿ. Te tnúhu-áⁿ cúú-xí cuendá sá vǎ yǒo tnàhí cachí sá ñà túú cuëchi-xi, te ducaⁿ te nchaandi túhú ñáyiú cutnùní iní-yu sá ná chǎhu-yu nchaa sá quidé-yu núú Yǎ Ndiǒxí. ²⁰ Te ducaⁿ càda-xi chi ni ñⁿ ñáyiú vá càchí-ó sǎ vǎ cùndècu cuëchi-yu núú Yǎ Ndiǒxí cuendá-ni sá nchìcúⁿ nihnú-yu nchaa tnúhu sá ní chídó tnùní ndíi Moisés, te tnúhu-áⁿ càchí tnúhu-xi cuendá-ni sá cútnuní iní-ó sǎ ndécú-ó ichi cuehé ichi duha.

Te núu na quèndáá iní-ó Xìtohó Jesucristú te naníhí tàhú-ó

²¹ Te vitna ní cutnùní iní-ó sǎ ñà díú sǎ cadá-ó nchàa nacuáa ní càháⁿ ndíi Moisés cudíu-o núú Yǎ Ndiǒxí, chi mee-gǎ quidé cùdúu-o núú-gǎ. Te núú tütú ndíi Moisés ndíhi núú tütú cue téé ní xóo càháⁿ tnúhu Yǎ Ndiǒxí ndéé sanaha càháⁿ-xi nàcuáa cada ñaha-gǎ xii-o vitna. ²² Te ducaⁿ cùdúu-o núú Yǎ Ndiǒxí te núu na quèndáá iní-ó Xìtohó Jesucristú. Te dñu-ni ducaⁿ cùdúu nchaa ñáyiú ñuyúú te núu na quèndáá iní ñáhǎ-yu xii-gá, chi ñⁿ-ni cùu-o nchaa-o sá cúú-xí Yǎ Ndiǒxí.

23 Chi nchaá-yu ndècu cuéchi-yu, chi ñá ññ-yu quidé-yu nàcuáa cáháⁿ Yá Ndiöxí sá cúu-yu ñáyi quide váha. 24 Dico Yá Ndiöxí ío váha iní-gá chi ní quide ñaha-gã xii-o ññ sá váha, chi dícó-ni ducaⁿ ññ quide-gá nàcuáa vá cùndècu-gá cuéchi-o nùú-gã, chi Xítohó Jesucristú ní sati ññí-gã te ní xíhí-gá, te ducaⁿ ññ yáha-gá cuendá sá vã cùndècu-gá cuéchi-o. 25 Te Yá Ndiöxí ní taxi ndecu-gá Xítohó Jesucristú núú ñáyi ñuyú-a, te ní xíhí-gá sá cuendá nchaa yíca cuéchi-yu, te ducaⁿ ññ cuu cuendá sá nchaá ñáyi na quíndáa iní ñáhá xii-gá te vá náchãhu-yu cuéchi-yu núú Yá Ndiöxí. Te Yá Ndiöxí ní quide ndee iní-gá nchaa sá cuéhé sá dúhá ññ quide cue ñáyi ní xíndecu ndéé sanaha. Te xíãⁿ ní xíhí Xítohó Jesucristú cuendá cutnùní iní-ó sã Yá Ndiöxí cúu-gã Yaá ío váha quide ndáa cuéi ducaⁿ ññ quide ndee iní-gá nchaa sá ññ quide cue ñáyi-áⁿ. 26 Núu xíãⁿ vitna ní cutnùní ndisa iní-ó sã quidé ndáa-gá, te quide-gá sá cue ñáyi vá cùndècu-gá cuéchi-yu núú-gã, te núu na quíndáa iní-yu Xítohó Jesucristú.

27 Te vitna vá càchí-ó sã ío càhnu cuu-o cuendá sá ñà túú-gã cuéchi-o ndècu núú Yá Ndiöxí, te ducaⁿ ñà túú-gã cuéchi-o ndècu núú-gã cuendá sá sàndáa iní-ó Xítohó Jesucristú, te ñá díú sã cuendá nchaa tnúhu ní cáháⁿ ndíi Moisés. 28 Te cùnùní iní-ó sã ndéda-ni cà ñáyi vá cùndècu-gá cuéchi-yu núú Yá Ndiöxí te núu na quíndáa iní-yu Xítohó Jesucristú cuéi ní quidé-yu nchaa nàcuáa ní cáháⁿ ndíi Moisés àdi ñà túú ní quidé-yu.

29 Te cùnùní iní-ó sã Yá Ndiöxí cúu-gã Ndiöxí nchaandi túhú ñáyi, te ñá díú mèe-ni Ndiöxí ñáyi isràél cúu-gã. 30 Te ññ díi-gã cúu-gã Ndiöxí, te nchaa ñáyi sàndáa iní ñáhá xii Xítohó Jesucristú te vá cùndècu-gá cuéchi-yu núú Yá Ndiöxí cuéi cùu-yu ñáyi isràél àdi ñà túú cùu-yu. 31 Te ñá díú sã sàndáa iní-ó Xítohó Jesucristú te cachí-ó sã ñà túú nàndíhi nchaa tnúhu sá sánú ichi ñaha xii-o nacuáa cada-o, te ñáhá chi sá dúhá sàndáa iní-ó-gã te xíãⁿ nchícúⁿ nihnu-o quide-o nacuáa cáháⁿ tnúhu-áⁿ.

Cuendá ndíi Àbrahám

1 Te vitna na càchí tnúhu-í xii-ndo cuendá ndíi Àbrahám téé ní cuu ññ ní tnáhá-ó ññ xíndecu ndéé sanaha. 2 Te ndíi-áⁿ ñà túú ní xíndecu cuéchi ndíi núú Yá Ndiöxí, dico ñá díú cuendá ññ chiuⁿ ní quide ndíi ducaⁿ ñà túú ní xíndecu cuéchi ndíi núú-gã. Chi núu cuendá ññ chiuⁿ ní quide ndíi ducaⁿ ñà túú ní xíndecu cuéchi ndíi núú Yá Ndiöxí ñá, te cada càhnu ndíi mee ndíi ní cùu, dico ñá díú nùú Yá Ndiöxí cada càhnu ndíi mee ndíi te núu ducaⁿ ññ quide ndíi. 3 Te chí dándacu iní nàcuáa cáháⁿ-xi núú tütú Yá Ndiöxí núú càchí-xi: “Té Àbrahám ní sàndáa iní-dé Yá Ndiöxí, te xíãⁿ ní cachí-gá sá cúdu-dé núú-gã”, duha càchí-xi núú tütú-gã. 4 Te sá cúhúⁿ yáhu ññ téé quide chiuⁿ, te vá càchí-ó sã xíãⁿ cúu-xi ññ táhú sã cúu-xi-dé chi yáhu tnàhí-dé cúu-xi. 5 Te vá yõ ññ ndàcu cada ññ chiuⁿ nacuáa cudíu-xi núú Yá Ndiöxí. Te ñá túú ñà chiuⁿ xini ññhu-xi cada ñáyi te cudíu-yu núú-gã, chi xini ññhu-ni-xi sá quíndáa-ni iní-yu-gá. Te díu-gá càchí-gá sá ñáyi ndècu ichi cuéhé ichi duha vá cùndècu-gá cuéchi-yu núú-gã, te núu na quíndáa iní ñáhã-yu xii-gã. 6 Te díu-ni ducaⁿ ññ cáháⁿ ndíi Dàvií, chi ní cachí ndíi sá ío váha táhú nchaa ñáyi ní cachí Yá Ndiöxí cudíu núú-gã, dico ñá díú cuendá ññ chiuⁿ quidé-yu cudíu-yu núú-gã. 7 Te duha ní cachí ndíi:

Váha táhú nchaa ñáyi quide cahnu iní Yá Ndiöxí nchaa cuéchi-xi, te ñá túú-gã quidé cuendá-gá nchaa sá cuéhé sá dúhá ññ quidé-yu.

8 Váha táhú-yu chi Yá Ndiöxí càchí-gá sá ñà túú-gã cuéchi-yu.

Duha ní cachí ndíi Dàvií.

9 Te ñá díú mèe-ni ñáyi ngúndecu sèñá ññ-xi ducaⁿ váha táhú-yu, chi tnáhá ñáyi ñà túú ngúndecu sèñá ññ-xi ducaⁿ váha táhú-yu. Te sa nàha-o sá Yá Ndiöxí ní cachí-gá sá cúdu ndíi Àbrahám núú-gã cuendá sá ní sàndáa iní ñáhá ndíi xii-gã.

10 Te cunaha-ndo sã díhna-gá ní cachí Yá Ndiöxí sá cúdu ndíi Àbrahám núú-gã te dātñùní ngúndecu sèñá ññ ndíi. 11 Te ní ngúndecu sèñá ññ ndíi cuendá xíãⁿ cuu-xi ññ sèñá sá cúdu ndíi núú Yá Ndiöxí. Te ndéé cùnàhá vátá ngúndecu-gá sèñá ññ

ndí, te sa cùdiu ndí núú-gã chi ní sándáá iní ñáhá ndí xii-gá. Te sá dúcáⁿ ñà túú ndècu seña ñi ndí cùtnàhá ní sándáá iní ndí Yá Ndiõxí xiãⁿ ní cuu ndí dàtná iⁿ díhí dütú nchaa ñáyiú sándáá iní ñáhá xii-gá, ñáyiú ñá túú ní ngündecu seña ñi-xi, te cùdiu-yu núú-gã. ¹² Te ndí Àbrahám ní cuu tucu ndí dàtná iⁿ díhí dütú nchaa ñáyiú ní ngündecu seña ñi-xi, dico ñá díú cuendá-ni sá ñi ngündecu seña ñi-yu cùu ndí díhí dütü-yu, chi cuendá sá sándáá iní-yu Yá Ndiõxí nchìcúⁿ nihnú-yu nàcuáa ní quide ndí ní sándáá iní ñáhá ndí xii-gá ndéé cùtnàhá vátá ngündecu-gá seña ñi ndí.

Yá Ndiõxí cada-gá nchaa nàcuáa ní cachí-gá te núu na quindáá iní-ó-gã

¹³ Te Yá Ndiõxí ní xáhaⁿ-gã xii ndí Àbrahám sá ndúú tãhú ndí cunuu ndí ñuyíú, ndíhi cue dèhe ndí, ndíhi nchaa dava-gá cue ñani tnáhá ndí vitna cacu túu. Te ducaⁿ ñi xáhaⁿ Yá Ndiõxí xii ndí ndíhi cue ñani tnáhá ndí, chi ní sándáá iní ñáhá ndí xii-gá núu xiãⁿ ní cudíu ndí núú-gã. Te ducaⁿ ñi xáhaⁿ-gã xii ndí dico ñá díú cuendá sá ñi quide ndí nàcuáa ní xáhaⁿ Yá Ndiõxí xii ndí Moisés cada ñáyiú ndéé cuéé-gá. ¹⁴ Te núu mee-ni ñáyiú nchìcúⁿ nihnu quide nàcuáa ní cáháⁿ ndí Moisés ní ndúu tãhü-yu cunúu-yu ñuyíú-a ni cùu ña, te ñá túú xini ñuhu-xi quindáá iní-ó Yá Ndiõxí, te ñá túú nandíhi tnúhu ní xáhaⁿ Yá Ndiõxí xii ndí Àbrahám ní cùu te núu ducaⁿ. ¹⁵ Te núu iⁿ ñáyiú ñá túú quide nàcuáa cáháⁿ tnúhu sá sánú ìchi ñaha xii-o nàcuáa cada-o te nacháhu-yu sá dúcáⁿ quidé-yu. Te núu ñá túú tnúhu sá sánú ìchi ñaha-xi xii-o nàcuáa cada-o ni cùu ña, te ñá túú cuéchi-o ni cùu.

¹⁶ Te ducaⁿ ñi xáhaⁿ Yá Ndiõxí xii ndí Àbrahám nàcuáa cada-gá, chi cuendá sá ni sándáá iní ñáhá ndí xii-gá. Te ducaⁿ ñi quide-gá chi ío váha iní-gá, dico ñá díú sã iⁿ chiuⁿ ni quide ndí ducaⁿ ñi xáhaⁿ-gã. Te sá dúcáⁿ ñi cuu te cùu-xi iⁿ tnúhu ndáá sá cúu-xi nchaa ñani tnáhá ndí, ñáyiú sándáá iní ñáhá xii-gá dàtná ní sándáá iní ñáhá mèe ndí xii-gá, te ñá díú mèe-ni cuendá nchaa ñani tnáhá ndí nchìcúⁿ nihnu nchaa nàcuáa ní cáháⁿ ndí Moisés, chi ndí Àbrahám-áⁿ ñi cuu ndí dàtná iⁿ

díhí dütú cue ñáyiú sándáá iní ñáhá xii Yá Ndiõxí. ¹⁷ Te núu tütú Yá Ndiõxí cáháⁿ-xi nàcuáa ní xáhaⁿ-gã xii ndí, te duha ní xáhaⁿ-gã: “Yòhó té Àbrahám ní quide ñaha-í xii-n dàtná iⁿ díhí dütú cue ñáyiú xíndecu nihí ñuyíú.” Duha ní xáhaⁿ Yá Ndiõxí xii ndí, cáchi-xi núu tütú-gá. Te Yá Ndiõxí náhá ndáá-gá sá cádá-xi nàcuáa ní xáhaⁿ-gã xii ndí Àbrahám, te diu-ni-gá cúu Yáá ní sándáá iní ndí, te diu-ni-gá dándòto-gá ñáyiú ní xihí, te diu-ni-gá quidé tá ngündecu nchaa sá vátá cùndecu-gá ñuyíú-a.

¹⁸ Te Yá Ndiõxí ní xáhaⁿ-gã xii ndí Àbrahám sá ío cuéhé dèhe ndí coo, te ío ní sándáá iní ndí nàcuáa ní xáhaⁿ-gã dico ñá túú ní cùtnuní iní ndí nása cada-gá, chi ío ní sahnú ndí. Te cuendá sá dúcáⁿ ío ní sándáá iní ndí tnúhu ní xáhaⁿ-gã núu xiãⁿ ní cuu ndí díhí dütú vai ñáyiú xíndecu nihí ñuyíú.

¹⁹ Te ndí Àbrahám ñuhu ndí iⁿ ciendú cuía cùtnàhá ducaⁿ ñi xáhaⁿ Yá Ndiõxí xii ndí, te ní cutnùní iní ndí sá ña túú tãhú ndí sá cóo dèhe ndí ndíhi ñadíhi ndí ndí Sãrá, chi ndí ndúu-yu sa ní sahnú vihí-yu, te cuéi ducaⁿ dico ní sándáá-ni iní ndí nàcuáa ní xáhaⁿ Yá Ndiõxí. ²⁰ Te ñá túú ní sãni iⁿ sãni úú iní ndí nàcuáa ní xáhaⁿ Yá Ndiõxí cada-gá sá cúu-xi ndí, chi da uuⁿ-gá váha ní sándáá iní ndí nàcuáa ní xáhaⁿ-gã, te ní cachí ndí sá ío cáhnu cuu-gá. ²¹ Te ní cutnùní ndáá iní ndí sá Yá Ndiõxí ndácú-gã quidé-gã nchaa sá cáháⁿ-gã. ²² Te sá ni sándáá iní ndí nàcuáa ní cáháⁿ Yá Ndiõxí, núu xiãⁿ ní cachí-gá sá cúu ndí iⁿ téé ñá túú cuéchi-xi núú-gã.

²³ Te ní ngódó tnùní núu tütú Yá Ndiõxí cuendá ndí Àbrahám sá ñi cachí-gá sá ña túú cuéchi ndí núú-gã, te ñá díú-ni cuendá mée ndí ni ngódó tnùní núu tütú-gá. ²⁴ Chi tnàhá cuendá-ó nchaa-o ní ngódó tnùní núu tütú-gá. Te cáchi-gá sá ña túú cuéchi-o núú-gã chi sándáá iní-ó-gã, te diu-gá cúu-gã Yáá ní dándótó ñaha xii Xítohó Jesucristú Yáá cúu Xítohó-ó. ²⁵ Te Yá Ndiõxí ní cachí-gá sá díú Xítohó Jesucristú cuú-gá cuendá nacháhu-gá nchaa cuéchi-o. Te ní xihí-gá te ní ndoto-gá cuendá nchaa-o vã cùndecu-gá cuéchi-o núu Yá Ndiõxí te núu na quindáá iní-ó-gã.

Ío váha tnàhá ñáyiu càchí Yá Ndiöxí sá ñà túú cuéchi-xi

¹ Te vitna, ñá túú-gã cuéchi-o ndècu núú Yá Ndiöxí chi sàndáá iní-ó Xítohó Jesucristú, te ío váha ndècu ndìhi-o Yá Ndiöxí vitna sá cuendá Xítohó Jesucristú. ² Te cuendá sá ni sàndáá iní-ó Xítohó Jesucristú xiáⁿ ñu-gá ní quide ní ngúndecu váha-o núú Yá Ndiöxí, te ducaⁿ-ni cùndecu-o, te ío cùdíí iní-ó chi ndècu ndìhi-o tnúhu ndee iní sá sáá nduu ngúndecu-o núú ío váha càa ndecu Yá Ndiöxí. ³ Te ñá díú-ní sá cuendá sá ndúú tãhú-ó cùndecu-o núú ndécú-gã cùdíí iní-ó, chi cùdíí iní-ó ndòho-o cuendá-gá, chi cùtnuní iní-ó sá núu na ndòho-o cuendá-gá te cunduu càhnu-gá iní-ó, ⁴ te núu cùu-o ñáyiu ta quide cahnu-gá iní-xi te cùtnuní sá cúú-ó ñáyiu quide váha, te núu cùu-o ñáyiu quide váha te uuⁿ-gá tá ngúndecu ndìhi-o tnúhu ndee iní cuáháⁿ sá cádá vãha ñaha Yá Ndiöxí xii-o. ⁵ Te núu ducaⁿ te vá ííⁿ ndúu ndixi cuéchi iní-ó sá ndécú ndìhi-o tnúhu ndee iní ngúndecu váha-o. Te Espíritú sá ní taxi Yá Ndiöxí ndécú ndìhi-o xiáⁿ quidé-xí cùtnuní iní-ó sá ío cùu iní ñáhá Yá Ndiöxí xii-o.

⁶ Te nchoo ñà túú vèdana ná ní ndàcu-o cada-o cuendá dàcácu nihnu-o mèe-o, dico Xítohó Jesucristú ní xihí-gá cuendá-ó, ndìhi cuendá nchaa dava-gá ñáyiu ñá túú tnàhá tnúhu ndìhi Yá Ndiöxí, te ní xihí-gá mei ndúu taú-xi cuú-gá. ⁷ Te cudana-ni núu xihí ííⁿ ñáyiu sá cuendá ííⁿ ñáyiu quide ndáá, te áma xihí tucu ííⁿ-yu sá cuendá ñáyiu quide váha tnàha ñáyiu-xi. ⁸ Te Yá Ndiöxí ní quide-gá sá nchóó cùtnuní iní-ó sá ío cùu iní ñáhá-gã xii-o, chi cùtnàhá ndécú-ó ìchi cuehé ichi duha te ní tendaha-gã Xítohó Jesucristú ní quixi-gá ñuyíú-a ní xihí-gá cuendá-ó. ⁹ Te sá cuendá sá ní xihí Xítohó Jesucristú xiáⁿ ñá túú-gã cuéchi-o ndècu núú Yá Ndiöxí, te vitna ní cùtnuní ndáá iní-ó sá vã dáquihíⁿ ñáhá-gã Yá Ndiöxí xii-o núú ùhú núú ndàhú sá cuendá Xítohó Jesucristú. ¹⁰ Te cùtnàhá ñá túú tnàhá tnúhu-o ndìhi Yá Ndiöxí ní cùu ní xihí Xítohó Jesucristú Yaá cúú Dèhe-gá cuendá cuu váha iní ñáhá-gã xii-o, te ducaⁿ te nduu tãhú-ó cùndecu-o ndìhi-gá ni caa ni quihíⁿ cuendá sá ní ndoto Xítohó Jesucristú. ¹¹ Te ndètu-o sáá nduu ngúndecu-o ndìhi-gá ni caa ni quihíⁿ, te ñá

díú-ní xiáⁿ quidé-ó chi tnàhá cùdíí iní-ó Yá Ndiöxí, chi Xítohó Jesucristú ní quide-gá ducaⁿ cùdíí iní-ó-gã, te ñu-ni Xítohó Jesucristú ní quide-gá ní nucúndecu váha-o ndìhi Yá Ndiöxí.

Nàcuáa ní quide ndíi Àdán ndìhi nàcuáa ní quide Xítohó Jesucristú

¹² Te ndíi Àdán ñá túú ní quide ndáá ndíi núú Yá Ndiöxí núu xiáⁿ ní ngúndecu nchaa sá cuèhé sá dúhá ñuyíú-a, te sá cuendá nchaa sá cuèhé sá dúhá quide ñáyiu xiáⁿ xihí-yu, te nchaá-yu xihí-yu chi nchaá-yu quidé-yu nchaa sá cuèhé sá dúhá. ¹³ Te sa quide-gá-yu nchaa sá cuèhé sá dúhá te dàtnuní ní ngúndecu nchaa tnúhu sá ní chidó tnuní ndíi Moisés nàcuáa ní xáhaⁿ Yá Ndiöxí cada ñáyiu, te nchoo cùtnuní iní-ó sá núu ñá túú tnúhu sá sánú ìchi ñaha xii-o nacuáa cada-o, te ñá túú cuéchi-o sànuu. ¹⁴ Te ndéé cùtnàhá ní xíndecu ndíi Àdán ní quesaha-xi xihí ñáyiu, te ducaⁿ-ni xihí-yu ndéé ní sáá nduu ní xíndecu ndíi Moisés. Te ducaⁿ ní xihí-yu chi ní quidé-yu nchaa sá cuèhé sá dúhá cuèi ñá túú ní quidé-yu nàcuáa ní quide ndíi Àdán, chi ndíi-án ñà túú ní sàndáá iní ndíi nàcuáa ní xáhaⁿ Yá Ndiöxí cada ndíi. Te ndíi Àdán ní cuu ndíi ííⁿ téé cùu cahnu ní xíndecu ñuyíú-a, te sá tá dúcáⁿ te ní quixi Xítohó Jesucristú te Yaá-án ío-gá càhnu cuu-gá.

¹⁵ Te sá ní quide ndíi Àdán te vá càchí-ó sá ííⁿ-ní cùu-xi ndìhi sá ní cachí Yá Ndiöxí nduu tãhú-ó vitna. Te sá ñà túú ní quide ndáá ndíi xiáⁿ nchaa ñáyiu xihí-yu, dico Yá Ndiöxí ío váha iní-gá chi ío váha ní quide-gá sá cúú-xí nchaa nchoo ñáyiu ndècu ñuyíú-a, chi dícó ducaⁿ ní cachí-gá sá nánihí tãhú-ó, te ííⁿ-ni téé tnàhá-dé ío váha ní quide-dé sá cúú-xí-ó, te téé-án cúú-dě Xítohó Jesucristú. ¹⁶ Te sá ní quide ííⁿ-ni ndíi Àdán ñá túú ííⁿ-ni cuu-xi ndìhi sá ní quide Yá Ndiöxí sá cúú-xí-ó, chi ndíi-án ñà túú ní quide ndáá ndíi núú-gã. Te sá dúcáⁿ ní quide ndíi te xiáⁿ ní cuu-xi cuéchi díhna nuu ní quide ndíi, núu xiáⁿ ní cachí Yá Ndiöxí sá cuè ñáyiu quihíⁿ-yu núú ùhú núú ndàhú nacháhu-yu nchaa sá cuèhé sá dúhá quidé-yu. Dico mee-gã ní quide sá cuè ñáyiu naníhí tãhú-yu dícó-ni ducaⁿ, te ducaⁿ te vá cùndècu-gá cuéchi-yu núú-gã cuèi ío

vài cuéchi-yu. ¹⁷ Te sá dúcáⁿ ñà túú ní quide ndáá ñⁿdii-ni ndíi Àdán-áⁿ núú Yá Ndiöxí, xíáⁿ ní quide-xi xihí nchaa ñáyiú. Te sá cuendá sá ñi quide ñⁿdii-ni Xítohó Jesucristú xíáⁿ ío váha ní quide ñaha Yá Ndiöxí xii ñáyiú, chi dícó-ni ducaⁿ ñi nduu táhũ-yu cùdiú-yu núú-gã. Te nchaa ñáyiú ducaⁿ cùdiú núú-gã nduu táhũ-yu cunúú-yu ndihí Xítohó Jesucristú cuendá sá ñi quide-gá sá vâha sá cúú-xí-yu.

¹⁸ Te sá dúcáⁿ ñi quide ndíi Àdán ñá túú ní quide ndíi nâcuáa ní xáhaⁿ Yá Ndiöxí xii ndíi ñⁿ xito, núú xíáⁿ ní cachí-gá sá ncháá ñáyiú tàú-yu nacháhu-yu nchaa cuéchi-yu, dico Xítohó Jesucristú ní quide-gá ñⁿ sá vâha cuendá nchaa ñáyiú vá cündècu-gá cuéchi-yu núú Yá Ndiöxí te núú na quindáá iní ñáhã-yu xii-gá, te ducaⁿ te cundecú-yu ndihí-gá ñi caa ñi quíhíⁿ. ¹⁹ Te sá ñà túú ní sândáá iní ñⁿdii-ni ndíi Àdán nâcuáa ní xáhaⁿ Yá Ndiöxí xii ndíi, xíáⁿ ní nguínchicúⁿ nihnu nchaa ñáyiú quidé-yu nchaa sá cuèhé sá dúhá. Te ducaⁿ ñⁿdii-ni Xítohó Jesucristú ní quide-gá nâcuáa ní xáhaⁿ Yá Ndiöxí cuendá sá Yá Ndiöxí cachí-gá sá cúdiú-yu núú-gã.

²⁰ Te Yá Ndiöxí ní xáhaⁿ-gã xii ndíi Moisés nâcuáa cada ñáyiú, te sá cuendá tnúhu-áⁿ uuⁿ-gá ní nguíta nchaa ñáyiú quidé-yu nchaa sá cuèhé sá dúhá, te Yá Ndiöxí uuⁿ-gá cündàhú iní ñáhã-gã xii-yu tucu. ²¹ Te sá cuendá nchaa cuéchi ñáyiú xíáⁿ xihí-yu, dico Yá Ndiöxí ío váha iní-gá chi diú-gá ní cachí-gá sá ncháá ñáyiú na tnàhá tnúhu ndihí ñaha xii-gá cùdiú-yu núú-gã, te cundecú-yu ndihí-gá ñi caa ñi quíhíⁿ, te ducaⁿ chi Xítohó Jesucristú ní quide-gá sá vâha sá cúú-xí-yu.

6

Ñáyiú ñá túú-gã ndécú ichi cuehé ichi duha ndécú-yu cuendá Xítohó Jesucristú

¹ Te sá dúcáⁿ quide Yá Ndiöxí, te vá cání iní-ó cànchicúⁿ nihnu-ni-o ìchi cuehé ichi duha, chi ñá díú sã cànchicúⁿ nihnu-o ìchi-áⁿ te ngóo càni iní-ó sã ío-gá cundàhú iní ñáhã-gã xii-o. ² Te vá cúú cànchicúⁿ nihnu-o ìchi cuehé ichi duha, chi nchoo cùu-o datná cue ñáyiú sa ní xihí, núú xíáⁿ

vá cúú-gã cànchicúⁿ nihnu-o ìchi-áⁿ. ³ Te sa ñaha-o sá cuendá sá ñi sandute-o quèe-xi sá tnàhá tnúhu-o ndihí Xítohó Jesucristú. Te sá ñi sandute-o quèe tucu-xi sá cúú-ó datná ñáyiú ní xihí ndihí-gá. ⁴ Te ñá díú-ní sá ñi xihí-ó ndihí-gá chi quèe tucu-xi sá ñi nguíndũxi-o ndihí-gá te ní ndoto-o datná ní ndoto mee-gã ní dándótó ñaha Dútú Ndiöxí Yá ío càhnu cuu, te ducaⁿ ñi cuu cuendá sá vâ cündècu-gá-ó datná ní xíndecu-o.

⁵ Te núú ñⁿ-ni cùu-o ndihí Xítohó Jesucristú cuendá sá cúú-ó datná ñáyiú ní xihí ndihí-gá, te ndáá sá cúú-ó datná ñáyiú ní ndoto ní nguíndecu váha datná ní ndoto mee-gã ní nucúndecu váha-gã. ⁶ Te nchoo ñaha-o sá cúú-ó ñáyiú ío ndècu cuéchi-xi ní cùu, dico sátá ñi cuu-o datná ñáyiú ní xihí datná ní xihí Xítohó Jesucristú núú cùrúxí, te ndéé dàvá-áⁿ ñi dáñá-ó ncháa ichi cuehé ichi duha ndècu-o ni cuu, te ñá túú-gã cündècu sá cuèhé sá dúhá iní-ó. ⁷ Chi nchaa ñáyiú ní xihí ñá túú-gã ndécú-yu ichi cuehé ichi duha. ⁸ Te núú cùu-o datná ñáyiú ní xihí datná ní xihí Xítohó Jesucristú ñá, te cùtnuní ndáá iní-ó sã cündècu-o ndihí-gá ñi caa ñi quíhíⁿ. ⁹ Te sa ñaha-o sá Xítohó Jesucristú ní xihí-gá te ní ndoto-gá te vá ñⁿ ndùu ñⁿ quíú-gã te cuú-gá, chi ñá túú nãgá sá cádá cùú-gá. ¹⁰ Te Xítohó Jesucristú ní xihí-gá ñⁿ xito-ni sá cuendá nchaa cuéchi nchoo ñáyiú ñuyú, te vá ñⁿ ndùu-gá cuú-gá, te ndècu-ni-gá sá cúú-xí Yá Ndiöxí. ¹¹ Núú xíáⁿ nchòhó cada iní-ndó sã datná sá ñi xihí-ndó vâ cündècu-gá-ndó sã cúú-xí ìchi cuehé ichi duha, chi ndècu-ná-ndó sã cúú-xí Yá Ndiöxí, chi ní tnàhá tnúhu-ndo ndihí Xítohó Jesucristú Yá cúú Xítohó-ó.

¹² Te núú xíáⁿ vá dáñá-gã-ndó cùnuu ni ñⁿ sá cuèhé sá dúhá iní-ndó cuendá sá vâ cádá-gã-ndó ñi ñⁿ sá cuèhé sá dúhá sàni iní-ndó. ¹³ Te vá dáñá-ndó tàxi tnuní ñáhã ñi ñⁿ sá cuèhé sá dúhá-ãⁿ xii-ndo cuendá sá vâ cádá-gã-ndó, te chí dáñá ná tàxi tnuní ñáhã Yá Ndiöxí xii-ndo, te chí dáñá ná chindee ñaha-gã cada-ndo mèe-ni sá vâha, te ducaⁿ te cada iní-ndó sã cúú-ndó datná ñáyiú ní xihí te ní ndoto ndècu. ¹⁴ Te ducaⁿ càda-ndo chi vá ndácú-gã ñi ñⁿ sá cuèhé sá dúhá tàxi tnuní ñáhã-xí xii-ndo, chi Yá Ndiöxí cündàhú iní ñáhã-gã chíndèe

ñaha-gá xii-ndo. Te ducaⁿ chi ñá túú-gã cúnùu nchaa tnúhu sá ñí chídó tnùní ndí Moisés cada ñáyiú.

Ñáyiú nchicúⁿ nihnu sá vãha

¹⁵ Te ñá díú sã cundàhú iní ñáhá Yã Ndiõxí xii-o chindee ñaha-gá ndihí sá ñá túú-gã cúnùu nchaa tnúhu ní chídó tnùní ndí Moisés, te cachí-ó sã cúú-ní cundecu-o ichi cuehé ichi duha. ¹⁶ Te nchoo xini-ó sã ñùu na cuãha-o tnúhu cunu cuechi-o nùú ñáyiú cuení cunu cuechi-o nùú-xi, te cùu-ná-ó ñáyiú xinu cuechi nùú-yu te quide-o nchaa chiuⁿ tahu-yu. Te ducaⁿ sãtnahá-xi cùu nchaa ñáyiú quide nchaa sá cuehé sá dúhá chi tàxi tnuní ñáhá-nã-xi xii-yu, te diu nchaa xiãⁿ dácuíta nihnu ñaha-xi xii-yu, te diu-ni ducaⁿ sãtnahá-xi cùu nchaa ñáyiú sãndáá iní ñáhá xii Yã Ndiõxí chi tàxi tnuní ñáhá-gã xii-yu, te quidé-yu nchaa sá vãha nãcuáa cuení mée-gã cada-yu. ¹⁷ Te nchòhó ducaⁿ ñí xóo cada-ndo nchaa sá cuehé sá dúhá ní cùu, dico táxahu xii Yã Ndiõxí chi vitna ñí yùhu ñí iní-ndó quide-ndo nchaa nacuáa càháⁿ tnúhu-gá sá ñí ngúndecu ndihí-ndo. ¹⁸ Te vitna ñá túú-gã táxi tnùní ñáhá ñí ñí sá cuehé sá dúhá xii-ndo, te quide-ná-ndó nchaa sá vãha tàchiuⁿ Yã Ndiõxí cada-ndo. ¹⁹ Te duha càháⁿ-í cuendá cue ñáyiú xinu cuechi cuendá sá nchòhó tecú tnùní-ndó nãcuáa ndùu tnúhu càháⁿ-í. Te nchòhó ní dáñá-ndó ñí taxi tnùní ñáhá nchaa sá cuehé sá dúhá xii-ndo, te ñá túú ní quide-ndo nacuáa ní càháⁿ Yã Ndiõxí cada-ndo chi da vñhi-gá ní quide-ndo, te diu-ni ducaⁿ chí dáñá ná tàxi tnuní ñáhá Yã Ndiõxí xii-ndo vitna cuendá cada-ndo mée-ni sá vãha nãcuáa cuení mée-gã cada-ndo, te ducaⁿ te cuu-ndo ñáyiú quide ndáá cundecu núú-gã. ²⁰ Te nchoo cùtnahá ní xóo cada-o nchaa sá cuehé sá dúhá ñá túú ní xóo cada-o ñí ñí sá vãha cuení Yã Ndiõxí cada-o. ²¹ Te dícó sácáⁿ-nùú sãñaha nchaa sá cuehé sá dúhá-ãⁿ te núu na càda-o, te ñí ñí sá vãha vá ñihí-ó te núu na càda-o nchaa xiãⁿ, te diu nchaa xiãⁿ dácuíta nihnu ñaha-xi xii-o. ²² Te vitna ñá túú-gã cúú-ó ñáyiú ndècu ichi cuehé ichi duha, chi cùu-ná-ó ñáyiú quide nchaa nacuáa càháⁿ Yã Ndiõxí. Te sá dúhá quide-o cuu ndisa-xi ñí sá vãha sá cúú-xi-ó, te cùu-o ñáyiú quide ndáá ndécú-ó nùú-gã vitna, te sáá nduu cundecu-o ndihí-gá ñí caa ñí quíhíⁿ. ²³ Te nchaa sá cuehé sá dúhá dícó

dácuíta nihnu ñaha-xi xii-o, dico Yã Ndiõxí ní quide-gá sá dícó-ni ducaⁿ ndùu táhú-ó cundecu-o ndihí-gá ñí caa ñí quíhíⁿ, chi ní tnahá tnúhu-o ndihí Xítóhó Jesucristú Yaa cúú Xítóhó-ó.

7

Cuendá ñáyiú tnãndaha

¹ Te nchaa nchòhó ñáyiú ndècu ndihí-í ichi Xítóhó Jesucristú sa ñaha-ndo nacuáa càháⁿ tnúhu sá dánèhé ñáhá xii-o nacuáa cada-o cundecu-o, chi tnúhu-áⁿ càháⁿ-xi dóho nchaa ñáyiú xñdecu vñvú ñuyíú-a. ² Te nchaa ñáyiú dñhí sa ndècu yñ-xi, te diu tnúhu-áⁿ dánèhé ñáhá-xi xii-yu sá vã dáñá-yu yñ-yu, dico núu na cùú yñ-yu te ñá túú-gã ná càháⁿ tnúhu-áⁿ cuendá-yu. ³ Dico núu vátá cùú-gá yñ-yu te ñá túú ndùu váha-xi naquehéⁿ-yu ingá téé, dico núu na cùú yñ-yu te quendóo mée-yu, te ñá túú nãgá càháⁿ tnúhu sá dánèhé ñáhá xii-yu nãcuáa cada-yu te ducaⁿ te cuu naquehéⁿ-yu ingá téé, te ñá túú cùu-xi ñí cuéchi. ⁴ Te nchòhó cue ñáyiú ndècu ndihí-í ichi Xítóhó Jesucristú cúú-ndó dàtná ñáyiú ní xihí dàtná ní xihí-gá. Te xiãⁿ ñá túú-gã táxi tnùní ñáhá nchaa tnúhu ní chídó tnùní ndí Moisés xii-ndo. Te ducaⁿ ñí cuu cuendá nchòhó ngúndecu-ndo ndihí Xítóhó Jesucristú Yaa ní xihí ní cùu te ní ndoto-gá. Te ducaⁿ ñí cuu cuendá nchaa nchoo ñáyiú ndècu ichi-gá cada-o nchaa nacuáa càháⁿ Yã Ndiõxí. ⁵ Te nchoo ñí xñdecu-o ichi cuehé ichi duha, te tnúhu sá sánú ichi ñaha xii-o nacuáa cada-o cundecu-o cachí-xi sá ñá túú vãha cundecu-o ichi-áⁿ, te nchoo dà uuⁿ-gá ní quide-o nchaa sá cuehé sá dúhá sã dúcáⁿ càháⁿ tnúhu-áⁿ, te sá dúcáⁿ ñí quide-o te ta xita nihnu-o cuãháⁿ ní cùu. ⁶ Te vitna cada iní-ó sã cúú-ó dàtná ñáyiú ní xihí sá cúú-xi tnúhu sá dánèhé ñáhá xii-o nacuáa cada-o cundecu-o, chi ñá túú-gã cúnùu-xi, te vitna mee-nã Espíritú Yã Ndiõxí chindèe ñaha-xi xii-o xinu cuechi-o núú-gã, te ñá díú cuendá nchaa tnúhu sá ñí ngúndeé ndéé dñhna cada ñáyiú xinu cuechi-o núú-gã vitna.

Nchaa sá cuehé sá dúhá ñùhu iní-í

⁷ Te cuéi duha càháⁿ-í dico vá cúú tñahí càháⁿ-ó sã tnúhu sá sánú ichi ñaha xii-o

nacuáa cada-o cùndecu-o ñá díú tnùhu váha cùu-xi. Te yúhú ñá túú cùtnuní iní-í ná cúú nchàa sá cuèhé sá dúhá ní cùu te núu ñá túú tnùhu-án ní cächí tnùhu-xi xii-í, te ni ñá túú cùtnuní tucu iní-í núu váha àdi ñá túú váha sá nchídó ìní-í sá ndécú ndìhi tnaha ñáiyu-o ni cùu te núu ñá túú tnùhu-án ní cächí-xi sá vǎ cúú cùu iní-í sá ndécú ndìhi-yu. ⁸ Te tnùhu-án ñí dánèhé ñáhá-xí xii-í sá vǎ cúú càda-í ni ìñ sá cuèhé sá dúhá, dico sá cuèndá tnùhu-án uuⁿ-gá ducaⁿ ñí sani iní-í ní quide-í. Te núu ñá túú tnùhu sá sánú ìchi ñaha xii-o nacuáa cada-o cùndecu-o ña, te ñá túú cùtnuní iní-í sá quidè-í nándi sá cuèhé sá dúhá ní cùu. ⁹ Te cùtnàhá vátá nihí-gá-í tnùhu-án te ñá túú tnàhí ná sání iní-í ndécú-í ni cùu, dico sá tá ní ñíhí-í tnùhu-án te ní cutnùní iní-í sá ndécú cuèchi-í, te ta xíta nihnu-í cuáhán ní cùu. ¹⁰ Te núu ni quide-í nchaa nàcuáa càhán tnùhu-án te sa ndéé ama-gá naníhí tǎhú-í ní cùu, dico ñá túú ní quide-í núu ní cutnùní iní-í sá tá xíta nihnu-í cuáhán ní cùu. ¹¹ Te sá xii tnùhu-án xiǎⁿ uuⁿ-gá ní cunuu nchaa sá cuèhé sá dúhá ñí dándàhú ñáhá-xí xii-í te ní quide-í, te ta dàcuíta nihnu ñaha-xi xii-í cuáhán ní cùu.

¹² Te tnùhu sá sánú ìchi ñaha xii-o nacuáa cada-o cùndecu-o cuu-xi tnùhu ío yíñùhu ní taxi Yá Ndiöxí, te ìñ ìñ tnùhu-án cúú-xi mèe-ni tnùhu váha, te ni ìñ tnùhu cuèhé tnùhu duha ñá túú ñùhu tnahá. ¹³ Te vǎ cúú cächí-í sá tnùhu váha-án ñí quide-xi ta xíta nihnu-í cuáhán ní cùu, chi nchaa sá cuèhé sá dúhá ñí quide-í, xiǎⁿ tá dàcuíta nihnu ñaha-xi xii-í cuáhán ní cùu, te sá cuèndá tnùhu váha-án ñí cutnùní iní-í sá quidè-í nchaa sá cuèhé sá dúhá, te xiǎⁿ tá xíta nihnu-í cuáhán ní cùu. Te sá cuèndá nchaa nàcuáa càhán tnùhu sá sánú ìchi ñaha xii-o nacuáa cada-o cùndecu-o ní cutnùní iní-í sá xidó ndécú cuèchi-í ní cùu.

¹⁴ Te tnùhu-án ñí taxi Espiritú Yá Ndiöxí ndécú ndìhi-o cachí tnùhu-xi nàcuáa cada váha-o. Te nchoo cùu-o mee-ni ñáiyu yicá cuèchi, te tàxi tnuní ñáhá nchaa sá cuèhé sá dúhá xii-o ni cuu. ¹⁵ Dico nchoo tnàhá iní-ó càda-o nchaa sá vǎha dico ñá túú quide-o, te da nchaa sá ñá túú tnàhá iní-ó càda-o quide-o, te ñá túú cùtnuní iní-ó nǎ cuèndá ducaⁿ quide-o. ¹⁶ Te sá dúcán quide-o nchaa sá ñá túú tnàhá iní-ó, te xiǎⁿ ndíxí tǔu iní-ó sǎ tnùhu sá dúcán sǎnu ìchi ñaha xii-o nacuáa cada-o cùndecu-o cuu-xi tnùhu ío

váha. ¹⁷ Te cùtnuní iní-ó sǎ nchàa sá cuèhé sá dúhá ñùhu iní-ó, xiǎⁿ quidè-xí dùcaⁿ quide-o sá ñá túú váha, te ñá díú sǎ cǎhú ìní mée-ó dùcaⁿ quide-o. ¹⁸ Te cùu-o cue ñáiyu sǎni cuehé sání dùha iní-xi, te cuìní-ó càda-o nchaa sá vǎha dico ñá túú nihí ndéé-ó càda-o. ¹⁹ Te cuìní-ó càda-o nchaa sá vǎha dico ñá ndácú-ó, te ñá túú cuìní-ó càda-o datná quidè nchaa ñáiyu ndècu ìchi cuehé ìchi duha, chi ñáiyu-án mee-ni nchàa sá cuèhé sá dúhá quidè-yu, dico ñu-ni nchaa xiǎⁿ quidè-ó tnàhá-ó. ²⁰ Te sá dúcán quide-o nchaa sá ñá túú tnàhá iní-ó càda-o te ñá díú mèe-o ducaⁿ cahu iní-ó quide-o, chi nchaa sá cuèhé sá dúhá ñùhu iní-ó xiǎⁿ quidè-xí dùcaⁿ quide-o.

²¹ Te ducaⁿ tnàhí yáha-o òré cuìní-ó càda-o sá vǎha, chi da mee-ni nchàa sá cuèhé sá dúhá quide-o. ²² Te ío cùdí ìní-ó càda-o nchaa nacuáa càhán Yá Ndiöxí, ²³ te dicó-ni sá ncháá sǎ cuèhé sá dúhá ñùhu iní-ó, xiǎⁿ quidè-xí ngàni ñaha-xi xii-o ñá túú quide-o sá vǎha sǎni iní-ó càda-o, te ducaⁿ yáha-o chi nchaa sá cuèhé sá dúhá-ǎ cúnùu-xi taxi tnuní ñáhá-xí xii-o.

²⁴ ;Te ndàhú ní cuu nchoo! Chi vá yǒo ìñ ni ndàcu cada nacuáa vá táxi tnuní ñáhá-gǎ nchaa sá cuèhé sá dúhá xii-o sá tá dàcuíta nihnu ñaha xii-o cuáhán ní cùu. ²⁵ Te táxǎhu xii Yá Ndiöxí sá Xítohó Jesucristú ní quide-gá cuèndá sá vǎ táxi tnuní ñáhá-gǎ ni ìñ sá cuèhé sá dúhá xii-o, sá tá dàcuíta nihnu ñaha xii-o cuáhán ní cùu. Te mee-o sǎni iní-ó càda-o nchaa nacuáa càhán Yá Ndiöxí, dico núu nchaa sá cuèhé sá dúhá ná cúnuu-xi taxi tnuní ñáhá-xí xii-o, te ñu-ni nchaa xiǎⁿ cada-o.

8

Ñáiyu quide nchaa nacuáa càhán Espiritú Yá Ndiöxí

¹ Te vitna nchaa nchoo ñáiyu tnàhá tnùhu ndìhi Xítohó Jesucristú vá cuíta nihnu-gá-ó, chi ñá túú-gǎ ndécú-ó ìchi cuehé ìchi duha, chi mee-ná nchaa nàcuáa càhán Espiritú Yá Ndiöxí quidè-ó. ² Te Espiritú Yá Ndiöxí-ǎ táxi tnuní ñáhá-xí xii-o, te ducaⁿ chi ndècu ndìhi-o Xítohó Jesucristú, te sá dúcán tàxi tnuní ñáhá Espiritú-gá xii-o núu xiǎⁿ ñá túú-gǎ táxi tnuní ñáhá ni ìñ sá cuèhé sá dúhá xii-o, te ducaⁿ

quide Espiritú-gá cuendá sá vǎ cuíta ni-
hnu-o, te diu-ni Espiritú-gá quidé-xí cuendá
sá nchóó ndùu táhú-ó cùndecu-o ndihi-gá
ni caa ni quíhíⁿ. ³ Te nchoo ñǎ ní ndàcu-o
cada-o nchaa nacuáa càháⁿ tnúhu sá sánú
ìchi ñaha xii-o nacuáa cada-o cùndecu-o, núu
xiǎⁿ tnúhu-áⁿ ñà túú ní nihí ndéé-xí càda-xi
cuendá sá nchóó vǎ cuíta nihnu-o. Dico Yá
Ndióxi ní tendaha-gǎ Déhe mee-gǎ ní quixi
ñuyíú-a, te Yá-áⁿ cúu-gǎ ìⁿ ñáyiu, te càa-gǎ
dàtná cáá ñáyiu ndècu cuéchi-xi xíndecu
ñuyíú-a, te sá cuendá nchaa cuéchi nchaa
nchoo ñáyiu xíndecu ñuyíú-a ní quixi-gǎ,
te ndéé dǎvá-áⁿ ñí quide-gǎ cuendá sá
vǎ táxi tnùnì ñáhá-gǎ ni ìⁿ sá cuèhé sá
dúhá xì-o. ⁴ Te ducaⁿ ñí quide-gǎ cuendá
nchoo nchìcúⁿ nihnu-o quide-o nacuáa
càháⁿ tnúhu sá sánú ìchi ñaha xii-o nacuáa
cada-o, chi ñà túú-gǎ cùnùu ni ìⁿ sá cuèhé
sá dúhá iní-ó, chi Espiritú Yá Ndióxi-ñǎ táxi
tnùnì ñáhá-xí xì-o.

⁵ Te nchaa ñáyiu cùnùu nchaa sá cuèhé
sá dúhá iní-xi mee-ni xiǎⁿ ñúhú iní-yu te
quidé-yu. Dico nchoo ñáyiu quide nchaa
nacuáa cuiní Espiritú Yá Ndióxi ñúhú
iní-ó mèe-ni nacuáa càháⁿ Espiritú-gǎ-áⁿ te
quide-o. ⁶ Te núu mee-ni nchaa sá cuèhé
sá dúhá cùnùu iní-ó, te cuíta nihnu-o, dico
núu mee-ni nchaa tnúhu càháⁿ Espiritú Yá
Ndióxi cùnùu iní-ó, te ío váha cuu iní-ó
cùndecu-o ndihi-gǎ ni caa ni quíhíⁿ. ⁷ Te
nchaa ñáyiu ñúhu iní mee-ni sá cuèhé sá
dúhá cùu úhú iní-yu Yá Ndióxi, te ñà túú
cuiní-yu cadá-yu nàcuáa càháⁿ-gǎ, te ni ñǎ
ndácú-yu cadá-yu. ⁸ Te nchaa ñáyiu ducaⁿ
cùnùu nchaa sá cuèhé sá dúhá iní-xi-áⁿ ñà
túú cùdiú-yu núu Yá Ndióxi.

⁹ Te nchòhó chi ñà túú-gǎ cùnùu sá cuèhé
sá dúhá iní-ndó, chi mee-ñǎ nàcuáa càháⁿ
Espiritú Yá Ndióxi quidé-ndó, te ducaⁿ
quide-ndo chi ndècu ndihi-ndo Espiritú-gǎ,
te diu-ni Espiritú-gǎ-áⁿ ñí tendaha Xítohó
Jesucristú véxi ndècu ndihi-o, te nchaa
ñáyiu ñà túú ndècu ndihi Espiritú sá ñí ten-
daha Xítohó Jesucristú véxi ndècu ndihi-o
ñà túú ndècu ndihi ñahá-yu xii-gǎ. ¹⁰ Te núu
ndècu ndihi-ndo Xítohó Jesucristú, te cuèi
na cúu yiqui cùñú-ndó sá cuendá nchaa sá
cuèhé sá dúhá ío ñuyíú-a, dico iní-ndó chi
cùndecu ndihi-xi Yá Ndióxi chi ñà túú-gǎ
cuéchi-ndo ndècu núu-gǎ. ¹¹ Te núu ndècu

ndihi-ndo Espiritú Yá Ndióxi Yá ní dándótó
ñaha xii Xítohó Jesucristú, te diu-ni-gǎ cada
te ndoto yiqui cùñú-ndó sǎ tá xíta nihnu
cuáháⁿ núu na cúu-xi, te ducaⁿ chi ndècu
ndihi-ndo Espiritú-gǎ.

¹² Te nchòhó ñáyiu ndècu ndihi-í ichi
Xítohó Jesucristú, ñà túú-gǎ tàú-ndó cùnùu
ni ìⁿ sá cuèhé sá dúhá iní-ndó nàcuáa vǎ
cùndecu-gǎ-ndó ìchi cuèhé ichi duha. ¹³ Chi
núu na cùnùu sá cuèhé sá dúhá iní-ndó te
cuíta nihnu-ndo, chi quíhíⁿ-ndó núu úhú
núu ndáhú. Dico núu dañá-ndo mèe-ndo
chindee ñaha Espiritú Yá Ndióxi xii-ndo
cuendá sá vǎ cùnùu-gǎ sá cuèhé sá dúhá
iní-ndó ñà, te nduu táhú-ndó cùndecu-ndo
ndihi-gǎ ni caa ni quíhíⁿ te núu ducaⁿ na
càda-ndo.

¹⁴ Chi nchaa ñáyiu quide nchaa nacuáa
sànu ichi ñaha Espiritú Yá Ndióxi cúu-yu
déhe-gǎ. ¹⁵ Te Espiritú sá ñí taxi Yá
Ndióxi ndécú ndihi-o ñà túú quide-xi
sá nchóó yùhú-ó cùnùu cuechi-o núu-gǎ,
chi Espiritú-áⁿ quidé-xí sǎ nchóó cùu-o
déhe-gǎ, te diu-ni Espiritú-áⁿ quidé xǎháⁿ-o
xii Yá Ndióxi: “¡Yòhó Dútú Ndióxi cúu-n
Tátá méé-ndí!” duha xǎháⁿ-o xì-gǎ. ¹⁶ Te
diu-ni Espiritú-gǎ-áⁿ tnàhá tnúhu-xi ndihi
iní-ó, te càháⁿ ndáá-xi sá nchóó cùu-o
déhe-gǎ. ¹⁷ Te sá dúcáⁿ cùu-o déhe Yá Ndióxi
xiǎⁿ ní cachí-gǎ sá tnàhá-ó ndùu táhú-ó sǎ ñí
nduu táhú Xítohó Jesucristú, te ducaⁿ ndùu
táhú-ó te núu na càda ndee iní-ó ndòho-o
datná ní ndoho Xítohó Jesucristú, te núu
ducaⁿ te ío cuu càhnu-o ndihi-gǎ ni caa ni
quíhíⁿ.

¹⁸ Te yúhú càchí-í sá ñà túú ñǎ cada-xi
cuèi ndòho-o cuendá-gǎ ndécú-ó ñuyíú-a,
chi ío váha càa núu ndúu táhú-ó cùndecu-o
na saá nduu. ¹⁹ Te nchaandi túhú sá ñí
cadúha Yá Ndióxi ní taxi ndecu-gǎ ñuyíú-a
ndètu cahnu-ná-xi saá nduu càchí-gǎ sá
íò càhnu cuu nchaa déhe-gǎ. ²⁰ Te nchaa
sá ñí cadúha Yá Ndióxi ní taxi ndecu-gǎ
ñuyíú-a ní saá nduu ñà túú-gǎ cúu-xí sǎ
vǎha sá cúu-xí-gǎ. Te ñà díú mèe sá ñí
taxi ndecu Yá Ndióxi ñuyíú-a ducaⁿ ni sàni
iní-xi cunduu, chi mee-gǎ ducaⁿ tnàhí ní
cachí-gǎ cunduu sá saá nduu vǎ cúu-xí sǎ
vǎha sá cúu-xí-gǎ, dico saá tucu nduu te
nchaa xiǎⁿ cuu tucu-xi sá vǎha sá cúu-xí-gǎ.
²¹ Te nchaa sá ñí taxi ndecu-gǎ ñuyíú-a

vá cùndùu-gá-xi dàtná cáá-xí vitna te ni vâ dánàa-gá, chi nduu saa-xi te ngúndecu váha-xi dàtná ngúndecu váha nchaa cue déhe-gá. ²² Te nàha-o sá ncháándì túhú sá nchító nì cadúha Yá Ndiöxí ndécú ñùyíú-a ndòho-xi vitna datná ndóhó ìⁿ ñadihí sa ní tnahá òré cacu déhe-xi. ²³ Te ñá díú-ní nchàa sá dúcáⁿ nì cadúha-gá-ãⁿ ducaⁿ ndòho-xi, chi tnahá nchoo dùcaⁿ ndoho-o ndecu-o ñùyíú-a tucu, te nchoo sà ní nduu táhú-ó Espíritú Yá Ndiöxí Espíritú sá nì cachí méé-gã nduu táhú-ó ðìhnanuu. Te ío ndòho tnahá-ó ndècu-o ñùyíú-a te ndètu cahnu-ná-ó sáá nduu ndàda saa-gá yiqui cùñú-ó, te cáháⁿ-gá sá cúú-ó dèhe-gá. ²⁴ Te Yá Ndiöxí ní quide-gá ní naníhí tàhú-ó nùu xiãⁿ ní ngúndecu ndihi-o tnùhu ndee ìní ndétú-ó sáá nduu càda-gá nàcuáa ní cachí-gá, te núu sa ndècu ndihi-o sá ndúú táhú-ó te vâ cúú cáháⁿ-ó sã cùndètu-o sá ndúú táhú-ó chi sa ndècu ndihi-o. ²⁵ Dico sá ndétú-ó ndùu táhú-ó cùu-xi sá vátá cùndècu ndihi-gá-ó, te xini ñuhu-ni-xi cada ndee-ni iní-ó cùndètu-o ndéé sáá nduu ndùu táhú-ó sã dúcáⁿ nì cachí Yá Ndiöxí nduu táhú-ó.

²⁶ Te Espíritú-gá chindee ñàha-xi xii-o nacuaa níhí ndéé-ó cùndecu-o, te nchoo ñà túú xini-ó cáháⁿ ndihi-o Yá Ndiöxí nàcuáa tàú-xi cunduu dico Espíritú-gá cáháⁿ ndàhú-xi núú-gã cuendá-ó cuèi òré ñá nihí-ó tnùhu cáháⁿ-ó cuendá nchaa sá ìo cuìní-ó cãcáⁿ-ó nùú-gã. ²⁷ Te Yá Ndiöxí sa nàha ndáá-gá nchaa nàcuáa sàni iní-ó, te ducaⁿ sà naha ndáá-gá nchaa nàcuáa sàni iní Espíritú-gá. Te Espíritú-gá cáháⁿ ndàhú-xi núú-gã cuendá nchoo ñáyíu yìndaha-gá, te cáháⁿ ndàhú-xi núú-gã nàcuáa cuìní méé-gã cunduu.

Nchaa sá ná càda ñàha ñáyíu te vâ ndácù-yu nadatùhú-yu iní-ó chi ndacu nahi-ni-o yàha-o nchàa sá ná cádá ñàhá-yu

²⁸ Te sa nàha-o sá Yá Ndiöxí quidé-gã sá ncháá sã yàha-o ndècu-o ñùyíú-a cùu-xi sá vâha sá cúú-xi nchòo cue ñáyíu cùu iní ñàhá xii-gá, chi cùu-o ñáyíu ní cáháⁿ-gá cundecu ndihi-gá dàtná ní cachí iní méé-gã. ²⁹ Te ndéé cùtnàhá vátá ngáva-gá ñùyíú, te Yá Ndiöxí sa nàha-gá nándì cùu ñáyíu cundecu ndihi-gá, te ðiu-ni ndéé dàvá-áⁿ nì cachí-gá sá ñáyíu-áⁿ cunduu váha iní-yu dàtná váha iní Déhe mee-gã, te ducaⁿ nì cachí-gá

cuendá sá Déhe mee-gã-áⁿ cunuu-gã núú nchàa ñáyíu cundecu ndihi-gá. ³⁰ Te nchaa ñáyíu ducaⁿ nì cachí-gá cundecu ndihi-gá ndéé cùtnàhá vátá ngáva-gá ñùyíú cáháⁿ ñàhá-gã xii-yu vitna, te nchaa ñáyíu ducaⁿ cáháⁿ-gá càchí-gá sá ñà túú-gã cuèchi-yu ndècu núú-gã, te ðiu-ni ñáyíu-áⁿ cachí-gá sá ìo càhnu cuú-yu.

³¹ Te vitna ní cutnùnì iní-ó, te ñá túú nãgá cani iní-ó, chi Yá Ndiöxí ndécú ndihi ñàha-gá xii-o, te vâ yòo ìⁿ-gá ndacu quehndé nihnu cuendá sá vâ chindèe ñàha-gá xii-o. ³² Te Yá Ndiöxí ñá túú ní cùdí iní-gá Déhe-gá sá cùú-gá cuendá nchaa nchoo ñáyíu xìndecu ñùyíú-a, te sá dúcáⁿ ndéé Déhe-gá ñá túú ní cùdí iní-gá xiãⁿ cùtnùnì iní-ó sã táxi-gã nchaandì túhú sá xini ñuhu-o. ³³ Te vâ yòo ìⁿ ndacu cacáⁿ cuèchi núú Yá Ndiöxí cuendá nchaa ñáyíu ní cachí-gá cundecu ndihi-gá te núu ná cúú cuèchi-yu ndècu. Chi mee-gã càchí-gá sá ñà túú ndècu cuèchi-yu núú-gã. ³⁴ Te vâ yòo ìⁿ ndacu daquìhíⁿ ñàhá xii-o núú ùhú núú ndàhú, chi Xítóhó Jesucristú ní xihí-gá te ní ndoto-gá, te cuándaa-gá núú ndécú Dütú Ndiöxí núcòo-gá xio cùha-gá, te ducaⁿ ìo cunuu-gá, te yacáⁿ cáháⁿ ndàhú-gá núú Dütú Ndiöxí cuendá-ó. ³⁵ Te vâ yòo ìⁿ ndacu cada ñàha xii-o ìⁿ sá ñà túú vâha cuendá sá vâ cúú iní ñàhá-gã Xítóhó Jesucristú xii-o, te ni tnúndòho tnùhu ndàhú, te ni sá ndihú iní-ó ñã cùtnùnì iní-ó nãsa cada-o cãcu nihnu-o ìⁿ sá ná yàha-o, te ni nchàa sá cádá ñàha ñáyíu sá cuendá-gá, te cuèi-ni sá vâ nihí-ó sã cóhó sã cáxi-ó, te cuèi-ni sá vâ nihí-ó dóo cuihnu-o, te cuèi ndècu-ná-ó sã yàha-o ìⁿ sá yàha-o, te cuèi sa ndècu-ná-ó sã cáhni ñàhá-yu, dico Xítóhó Jesucristú vâ dáñá ndéé-gá sá cúú iní ñàhá-gã xii-o. ³⁶ Te quee ndáá-xi nàcuáa ní cáháⁿ ìⁿ téé ní xóo cáháⁿ tnùhu Yá Ndiöxí ndéé sanaha nì ngódó tnùnì núú tütú-gá núú càchí-xi:

Yòhó Dütú Ndiöxí nchaa-ni nduu nchaa-ni òré cuìní ñáyíu cahni ñàhá-yu xii-ndì sá cuendá-n,

te càchí-yu sá cúú-ndì dàtná cue mbéé cue quitì sa ndècu túha-ná cahni-yu.

Duha ní cachí téé ní xóo cáháⁿ tnùhu-gá-áⁿ, te ducaⁿ nì ngódó tnùnì núú tütú-gá. ³⁷ Te cuèi ducaⁿ nándì sá ná càda ñàhá-yu xii-o,

dico vá ndácũ-yu nadatùhú-yu iní-ó chi ndacu nahi-ni-o yãha-o nchàa sá dúcáⁿ ná càda ñahá-yu xii-o, te ducaⁿ chi Xítóhó Jesucristú Yaá ío cùu iní ñáhá xii-o ndecu ndihí ñaha-gá chindèe ñaha-gá. ³⁸⁻³⁹ Te yúhú cútnùní ndáá iní-í sá ñi ìⁿ sá ío ñuyú-a vá ndácú-xí càda-xi cuendá sá vã cúú ìní ñáhá-gã Yã Ndiõxí xii-o, te ñi sá cùú-ó, te ñi sá cùndècu-o ñuyú-a, te ñi ìⁿ espíritú sá ío cùnũu cundihí yucu ñávãha te ñi ìⁿ dava-gá cue espíritú cùndihí-xi vá ndácú-xí càda-xi cuendá sá vã cúú ìní ñáhá Yã Ndiõxí xii-o. Te ñi sá cúú ñuyú-a vitna, te ñi sá cúú ndéé cuèé-gá, te ñi ìⁿ sá ndécú àndiũ, te ñi ìⁿ sá ndécú ñuyú-a, te ñi ìⁿ sá ñi cadúha mee Yã Ndiõxí, ñi ìⁿ xíãⁿ vá ndácú-xí càda-xi cuendá sá vã cúú ìní ñáhá-gã xii-o chi ndècu ndihí-o Xítóhó Jesucristú Yaá cúú Xítóhó-ó.

9

Yá Ndiõxí ní cachí-gá sá ñáyiu isràél cúú-yu ñáyiu canchicúⁿ ñihnu ñaha xii-gá

¹ Te yúhú càháⁿ ndáá-í chi cùu-í ìⁿ té ndècu ndihí Xítóhó Jesucristú, te ndècu ndihí-í Espíritú Yã Ndiõxí ñũu xíãⁿ cútnùní iní-í sá càháⁿ ndáá-í. ² Te nchaa-ni nduu nchaa-ni òré ío ndihú iní-í, te ducaⁿ-ni ío quide úhú-xi iní-í ³ sá cuendá nchaa ñáyiu cùu ndi mee-í. Te núu dícó cúú-xí ìⁿ sá chindèe ñaha xii-yu nucúndecu váha-yu núu Yã Ndiõxí ñá, te dàña-í méè-í dàcuíta ñihnu ñaha Xítóhó Jesucristú ñũu dícó sá cúú. ⁴ Te nchaa ñáyiu cùu ndi mee-í-áⁿ cúú-yu ñáyiu isràél, te Yá Ndiõxí ní cachí-gá sá cúú-yu déhe-gá, te ní quide-gá nàcuáa ní cutnùní iní-yu sá ío càhnu cuu-gá, te ní càháⁿ ndáá-gá núũ-yu nàcuáa cada ñaha-gã xii-yu, te ní xáhaⁿ-gã xii ndíi Moisés ní chídó tñùní ndíi nàcuáa cadá-yu cundécú-yu. Te ní xáhaⁿ-gã xii-yu nàcuáa cadá-yu cada càhnu ñahá-yu xii-gá, te ní xáhaⁿ tùcu-gá xii-yu nchaa nàcuáa cada-gá ndéé cuèé-gá. ⁵ Te nchaa ñáyiu-áⁿ cúú-yu ñaní tñáhá nchaa cue té ní cunuu ñi xíndecu ndéé sanaha, te diu-ni ñaní tñáhá-yu cùu Xítóhó Jesucristú Yaá ní tendaha Dütú Ndiõxí ní quixi ñuyú-a, te tñáhá-gá cúú-gã Ndiõxí te ío cùnũu-gá, te nchaa nduu nchaa quíú ío càhnu cuu-gá. Te ducaⁿ na cùnduu.

⁶ Te vá càchí-ó sã Yã Ndiõxí ñá túú ní quide-gá nchaa nàcuáa ní cachí-gá cada-gá cuendá sá ñá túú sàndáá iní ñáhá dáva ñáyiu isràél xii-gá. Te sá dúcáⁿ xiquide davá-yu te ñá túú quide-yu nàcuáa tàú-xi cadá-yu sá cúú-yu ñáyiu isràél. Te ñáyiu ducaⁿ xiquide-áⁿ cúú-yu ñáyiu ñá túú cùu cuendá ñáhá Yã Ndiõxí. ⁷ Te cuèi nchaa-yu cùu-yu ñaní tñáhá ndíi Àbrahám dico ñá túú quide-yu nchaa nàcuáa tàú-xi cunduu cadá-yu sá cúú-yu ñaní tñáhá ndíi. Te Yá Ndiõxí ní xáhaⁿ-gã xii ndíi Àbrahám: “Nchaa cue ñaní tñáhá tẽ Isàác téé cùu déhe ducuⁿ-n, mee-ni cuè ñáyiu-áⁿ cuu ñaní tñáhá-n”, duha ní xáhaⁿ-gã xii ndíi Àbrahám. ⁸ Te xíãⁿ cútnùní iní-ó sã ñã ncháá ñáyiu cùu ñaní tñáhá ndíi Àbrahám cúú-yu ñáyiu cùu cuendá Yã Ndiõxí, chi mee-ni ñáyiu sàndáá iní nàcuáa ní càháⁿ-gá cada-gá, ñáyiu-áⁿ cúú cuendá-gá. ⁹ Te duha nduu tñúhu ní xáhaⁿ Yã Ndiõxí xii ndíi Àbrahám: “Sáá nduu te yúhú cada-í te coo ìⁿ déhe-n ndihí ñadihí-n tã Sãrà”, duha ní xáhaⁿ-gã xii ndíi.

¹⁰ Te ñá díú-ni xíãⁿ ní quide Yá Ndiõxí, chi tñáhá ní ndatnúhu-gá ndihí ndíi Rèbecá cútnáhá vitna ñúhu úú déhe ndíi ndihí ndíi Isàác téé ní cuu ñaní tñáhá-ó ñi xíndecu ndéé sanaha. ¹¹⁻¹³ Te cútnáhá vitna ñúhu-gá déhe ndíi Rèbecá, cútnáhá vátá cadá-gã-güexi ñi ìⁿ sá cuèhé sá dúhá, te ñi ìⁿ sá vãha, ní xáhaⁿ Yã Ndiõxí xii ndíi: “Déhe-n tẽe díhna na càcu te téé-áⁿ tñi-dé nchaa tñúhu càháⁿ déhe-n tẽe cùu uú ná càcu”, duha ní xáhaⁿ-gã xii ndíi Rèbecá. Te ní quee ndáá-xi nàcuáa ní càháⁿ Yã Ndiõxí núú tütú-gá núú càchí-xi: “Té Jàcób ní cuu váha iní-í núú-dé, te té Esàú ñá túú ní cùu váha iní-í núú-dé”, duha càchí-gá núú tütú-gá. Te ducaⁿ ñi cuu chi ducaⁿ ñi cachí méé-gã cunduu sá càháⁿ-gã nchaa ñáyiu cuení méé-gã, te ñá díú cuendá ìⁿ chiuⁿ quide-yu càháⁿ ñáhá-gã xii-yu.

¹⁴ Te vá cúú tñáhí càháⁿ-ó sã Yã Ndiõxí ñá túú quide váha-gá sá dúcáⁿ quide-gá chi mee-gã ío ndáá quide-gã! ¹⁵ Te mee-gã ní xáhaⁿ-gã xii ndíi Moisés: “Cundàhú iní-í chindee-í mee-ni cuè ñáyiu càchí iní-í”, duha ní xáhaⁿ-gã xii ndíi. ¹⁶ Te xíãⁿ cútnùní iní-ó sã cùndàhú iní-gá ñáyiu chi ducaⁿ cuení méé-gã cunduu, dico ñá túú

cùndahú iní ñáhá-gã xii-yu cuendá sá dúcáⁿ cuení-yu cada-gá, te ni ñà túú cùndahú iní ñáhá-gã xii-yu cuendá sá ïo ndùcu ndeé-yu quidé-yu ìⁿ sá quídě-yu. ¹⁷ Te núú tütú Yá Ndiöxí càháⁿ-xi nàcuáa ní xáhaⁿ-gã xii téé ní cuu Faràón téé ní xíndaha nàcióⁿ Ègiptú, te duha ní xáhaⁿ-gã: “Yúhú ní quide-í yíndàha-n ñáyiu cuendá cada-í titní núú sã cadà-í núú-n cuendá cutnùní iní-n sã ïo càhnu cuu-í, te ducaⁿ nchàa ñáyiu ñuyú cutnùní iní-yu sá yùhú cù-í Ndiöxí”, duha ní xáhaⁿ-gã xii téé ní cuu Faràón. ¹⁸ Te xiãⁿ cùtnùní iní-ó sã Yá Ndiöxí cùndahú iní-gá mee-ni cuè ñáyiu cächí iní méé-gã, te ducaⁿ ndàda díi-gá iní nchaa ñáyiu cächí iní méé-gã ducaⁿ càda-gá.

¹⁹ Te sá dúhá càháⁿ-í te dava-ndo quèsaha-ndo: “Ná cuendá Yá Ndiöxí dácàa-gá cuéchi díquí ñáyiu núu ni ìⁿ-yu ñá ndácũ-yu quehdé nihnú-yu cuendá sá vã cadá Yá Ndiöxí nàcuáa cuení-gá”, quesaha-ndo. ²⁰ Te chí cuãha cuendá sá dícó ñáyiu ñuyú-a cùu-ndo te ñá túú ndùu váha-xi sá nchòhó càháⁿ-ndó ìⁿ tnúhu sá ñà túú ndùu váha sá cúú-xí Yá Ndiöxí. Te duha na càháⁿ-í núú-ndó nàcuáa tecú tnùní-gá-ndó nàcuáa ndùu tnúhu càháⁿ-í. Te ñá túú xini-ó sã ìⁿ quídi ñuhu cùñaha-xi xii ñáyiu ní cadúha ñaha xii-xi: “Ná cuendá duha ní cadúha ñaha-n xii-í”, cùñaha-xi. ²¹ Chi ñáyiu cadúha nchaa quídi-ánⁿ cuu-ni cadúha-yu ndihi ñuhu cuèi nása na cùnduu quídi cadúha-yu canehe chiúⁿ-yu, chi ìⁿ-ni ñuhu cadúha-yu quídi cánehe chiúⁿ-yu ndi tnahá nduu sàcòo-yu vico ndihi quídi sá cãnehe chiúⁿ-yu nduu cùtexínu.

²² Te diu-ni ducaⁿ quide Yá Ndiöxí, chi cuení-gá dandòho-gá ñáyiu ñá túú quide nchaa nacuáa nduu vétú iní-gá, te cada-gá nàcuáa cutnùní iní-yu sá ïo càhnu cuu-gá. Te sa ndècu túha-ná-yu sá quihíⁿ-yu núú ùhú núú ndàhú, te cuèi ducaⁿ dico ío ta quide cahnu iní-gá cuáháⁿ. ²³ Te ducaⁿ quide-gá cuendá cutnùní iní nchaa ñáyiu ñuyú sã ïo váha quide-gá sá cúú-xí nchàa nchoo ñáyiu cùndahú iní-gá, chi ní cachí-gá sá nchóó cuè ñáyiu cùndahú iní-gá nduu táhú-ó cùndecu-o ndihi-gá núú ïo váha càa ndecu-gá. ²⁴ Te dava nchoo ñáyiu ní càháⁿ Yá Ndiöxí cúú-ó ñáyiu isràél, te dava-o

cùu-o ñáyiu ñá túú cùu ñáyiu isràél. ²⁵ Te ní quee ndáa-xi nàcuáa ní xáhaⁿ Yá Ndiöxí xii ndíi Òseás téé ní xóo càháⁿ tnúhu-gá ndéé sanaha ní chídó tnùní ndíi núú tütú-gá núú cächí-xi:

Ñáyiu ñá túú cùu cuendá-í ní cùu te nduu cuendá-í-yu,
te diu-ni ñáyiu-áⁿ ñà túú cùu váha iní-í núú-yu ni cùu, dico vitna cùu váha iní-í núú-yu.

²⁶ Te diu-ni ñuú núú dúcáⁿ ní cachí-í sá ñà túú ñáyiu cùu cuendá-í diu-ni ñuú-áⁿ coo ñáyiu cuu déhe yúhú Dútú Ndiöxí Yaá ndécú tũu andiu.

Duha ní xáhaⁿ Yá Ndiöxí xii ndíi Òseás ní chídó tnùní ndíi núú tütú-gá. ²⁷ Te ndíi Chàíá téé ní xóo càháⁿ tucu tnúhu Yá Ndiöxí ndéé sanaha ní càháⁿ ndíi cuendá ñáyiu isràél, te duha ní cachí ndíi: “Cuèi cuéhé víhí ñáyiu isràél dàtná cuéhé ñuhu cúchí làmár dico sacú-ni-yu vá quini-yu tnúndòho tnúhu ndàhú. ²⁸ Te Yá Ndiöxí ío ndihi cada-gá nchaa nàcuáa càháⁿ-gá ñuyú”, duha ní cachí ndíi. ²⁹ Te ní càháⁿ tucu ndíi nàcuáa cada-xi ndéé cuéé-gá, te ní cachí ndíi:

Yá Ndiöxí Yaá táxi tnùní nchaandi túhú sá ío andiu ndihi ñuyú ñà túú ní dànaa-gá nchaa ñáyiu isràél, chi núu ni ndihí-yu danàa ñaha-gá,

te nchoo cùu-o datná ní cuu nchaa ñáyiu ní xíndecu ñuú Sòdomá ndihi nchaa ñáyiu ní xíndecu ñuú Gòmorrá, te ndihi-o nàa datná ní naa nchaa ñáyiu-áⁿ ní cùu.

Duha ní cachí ndíi.

Ñáyiu isràél ñá túú sàndáa iní-yu tnúhu Xítóhó Jesucrístú

³⁰ Te sá cuendá xiãⁿ núu vitna cächí tnúhu-í xii-ndo sã cuè ñáyiu ñá túú cùu ñáyiu isràél ñá túú ní nànducu nihnú-yu nàcuáa cadá-yu cudiú-yu núú Yá Ndiöxí, dico vitna cudiú-yu núú-gã chi ní sàndáa iní-yu Xítóhó Jesucrístú. ³¹ Te ñáyiu isràél nchícúⁿ nihnú-yu tnúhu sá dánèhé ñáhá xii-yu nàcuáa cadá-yu cudiú-yu núú Yá Ndiöxí dico ñá túú cudiú-yu núú-gã chi ñá ndácũ-yu cadá-yu nchaa nàcuáa càháⁿ-xi.

³² Te ducaⁿ ñà túú cudiú-yu núú Yá Ndiöxí chi ñá túú sàndáa iní-yu Xítóhó Jesucrístú, te sàni iní-yu sá sã cuendá mee-ni nchàa sá

quidé mèe-yu cudíu-yu núu-gă, te sá dúcáⁿ quidé-yu te cùu-yu dàtná ìⁿ ñáyiu nguñenu ìⁿ yúu te nduá-yu. Te ducaⁿ sãtnahá-xi cùu-yu chi ñá túú cùu váha iní-yu núu Xítóhó Jesucristú. ³³ Te quèe ndáá-xi nàcuáa ní cáháⁿ Yă Ndiõxí ìⁿ xichi núu tütú-gá núu càchí-xi:

Yúhú táxí ndècu-í ìⁿ tée ñuú Sìón, te cuu-dé dàtná ìⁿ yúu, te yúu-ãⁿ nguñenu ñáyiu te nduá-yu,

te nchaa ñáyiu na quindáá iní ñáhá xii-dé, te vá ndíxí cuèchi iní-yu sá dúcáⁿ ñí sándáá iní ñáhã-yu xii-dé.

Duha càchí-gá núu tütú-gá.

10

¹ Te nchòhó ñáyiu ndècu ndìhi-í ichi Xítóhó Jesucristú càchí tnúhu-í xii-ndo sã cáháⁿ ndìhi-í Yă Ndiõxí cuendá ñáyiu isràél, chi ío cuìní-í sá nánihí tàhú-yu. ² Te na cáháⁿ ndáá-í cuendá-yu sá ío ndùcu ndeé-yu xìnu cuechí-yu núu Yă Ndiõxí, te dicó-ni sá ñà túú quidé-yu nàcuáa cuìní mée-gă cadá-yu. ³ Chi ñá túú quide cuendá-yu nàcuáa cuìní Yă Ndiõxí cada ñaha-gă xii-yu nàcuáa cudíu-yu núu-gă, te quide-ni-yu nàcuáa sàni iní mée-yu cudíu-yu núu-gă te ñá túú cuìní-yu tñí-yu tnúhu cáháⁿ-gá nàcuáa cudíu-yu núu-gă. ⁴ Te Xítóhó Jesucristú ní quide-gá cuendá sá vã cúnùu-gá nchaa tnúhu ní chídó tnùnì ndíi Moisés, te nchaa ñáyiu na quindáá iní ñáhá xii-gá te ñu-gá cada te cudíu-yu núu Yă Ndiõxí.

⁵ Te ndíi Moisés cáháⁿ ndíi núu tütú ndíi cuendá ñáyiu cuìní cudíu núu Yă Ndiõxí cuendá sá nchìcúⁿ nihnú-yu nchaa nàcuáa ní cáháⁿ ndíi. Te ní cachí ndíi sá ncháá ñáyiu na càda nchaa nàcuáa ní xáhaⁿ Yă Ndiõxí xii ndíi ní chídó tnùnì ndíi te naníhí tàhú-yu, te núu dicó ndacú-yu cadá-yu nchaa nàcuáa ní cáháⁿ ndíi. ⁶ Dico vitna núu na quindáá iní-ó Xítóhó Jesucristú, te cudíu-o núu Yă Ndiõxí. Te duha càchí tnúhu ní chídó tnùnì ndíi núu tütú-gá: “Vá cánì ìní-ndó sã xínì ñùhu-xi cada-ndo ìⁿ sá vã yõo tnàhí ndàcu cada sá cáá tũu-ndo àndíu te cúñaha-ndo xii Cristú cuuⁿ-ndo ndìhi-gá núu ñùyíú-a. ⁷ Te ní vã cánì tũcu iní-ndó sã quíhíⁿ túu-ndo núu xĩndecu nchaa ñáyiu ní xíhí te cada-ndo

sã Cristú ndoto-gá”, duha càchí tnúhu-áⁿ sã vã dúcáⁿ càni iní-ó. ⁸ Te càchí tucu tnúhu-áⁿ: “Tnúhu Yă Ndiõxí sá ndécú ndìhi ñaha-xi xii-ndo chi sàni iní-ndó cuendá tnúhu-áⁿ te cáháⁿ-ndó”, duha càchí tnúhu-áⁿ. Te tnúhu sá ndécú ndìhi-ndo-áⁿ cúu-xí tnúhu cáháⁿ-ndí núu ñáyiu, te xìni ñuhu-xi sá quindáá iní-yu tnúhu-áⁿ. ⁹ Te núu na nñuu-ndo cáháⁿ-ndó sã Xítóhó Jesucristú cúu-gă Xítóhó-ndó, te quindáá iní-ndó ñí yuhu ní iní-ndó sã Yă Ndiõxí ní dándótó-gă Xítóhó Jesucristú, te naníhí tàhú-ndó te núu ducaⁿ na càda-ndo. ¹⁰ Te nchaa ñáyiu ducaⁿ sándáá iní te cáháⁿ-yu sá Xítóhó Jesucristú cúu-gă Xítóhó-yu, ñáyiu-áⁿ cudíu-yu núu Yă Ndiõxí te naníhí tàhú-yu.

¹¹ Te núu tütú Yă Ndiõxí càchí-xi sá ñí ìⁿ ñáyiu sándáá iní ñáhá xii Xítóhó Jesucristú vá ndíxí cuèchi iní-yu sá dúcáⁿ sándáá iní ñáhã-yu xii-gá. ¹² Te sá cúu-xí Xítóhó Jesucristú chi ìⁿ-ni cùu ñáyiu isràél ndìhi ñáyiu ñá túú cùu ñáyiu isràél, chi ñu-gá cúu-gă Yaá cúnùu taxi tnuní-gá nchaa ñáyiu, te ío váha quide-gá sá cúu-xí ncháa ñáyiu cáháⁿ ndìhi ñaha xii-gá. ¹³ Te quèe ndáá-xi nàcuáa cáháⁿ-xi núu tütú Yă Ndiõxí núu càchí-xi: “Nchaa ñáyiu na cáháⁿ ndàhú núu Xítóhó Jesucristú sá dácacu nihnu ñaha-gă xii-yu, te ñáyiu-áⁿ naníhí tàhú-yu”, duha càchí-xi núu tütú-gá. ¹⁴ Te ñáyiu-áⁿ vã nihí-yu nàcuáa cáháⁿ ndàhú-yu núu-gă te núu ñá túú sándáá iní ñáhã-yu xii-gá, te ní vã nihí-yu nàcuáa cadá-yu quindáá iní ñáhã-yu xii-gá te núu vátá cùndèdóho-gá-yu tnúhu-gá, te ní vã nihí-yu tnúhu-gá te núu vá yõo quíhíⁿ cùtnuhu ñaha xii-yu. ¹⁵ Te ní vã yõo quíhíⁿ ducaⁿ cùtnuhu ñaha xii-yu tnúhu-gá te núu Yă Ndiõxí vá téndàha-gá ñáyiu quíhíⁿ cùtnuhu ñaha xii-yu. Te núu tütú Yă Ndiõxí càchí-xi: “Ío vii ío váha cùu iní-ó vèxi ñáyiu dānehé ñáhá xii-o nàcuáa ndùu tnúhu sá cáháⁿ nàcuáa naníhí tàhú-ó”, duha cáháⁿ-xi núu tütú-gá.

¹⁶ Te ñá ncháã-yu cuìní-yu quindáá iní-yu tnúhu-áⁿ. Te ní quee ndáá-xi nàcuáa ní xáhaⁿ ndíi Chàíá xii Yă Ndiõxí te duha ní xáhaⁿ ndíi xii-gá: “Yòhó Dútú Ndiõxí na nàcani tnúhu-í núu-n sã ío sacú-ni ñáyiu sándáá iní-yu tnúhu cáháⁿ-ndí”, duha ní xáhaⁿ ndíi xii-gá. ¹⁷ Te xìni ñuhu-xi sá

dìhna-gá cunedóho-yu tnúhu-áⁿ cuendá ducaⁿ te quindáá iní-yu, te tnúhu-áⁿ cúu-xí tnúhu Xítóhó Jesucrístú.

18 Te vá cúu cǎháⁿ-ó sǎ ñà túú ní nǐhí ñǎyiu isràél tnúhu-gá, chi nchaá-yu ní nǐhí-yu tnúhu-gá, chi núu tùtú Yǎ Ndiǒxí cǎchí-xi: Cue téé ní cǎháⁿ tnúhu Yá Ndiǒxí ní cǎháⁿ-güedé tnúhu-gá núu ñǎyiu, te tnúhu-áⁿ ní xité nuu-xi nǐhí ñuyúú.

Duha cǎchí-xi núu tùtú-gá. 19 Te ni vǎ cǎháⁿ-ó sǎ ñǎyiu isràél ñá túú ní cùu tnuní iní-yu nàcuáa ndùu tnúhu-gá chi ní tecú tnùní-yu. Te ndéé sanaha nǐ chídó tnùní ndíi Moisés nàcuáa ní xáhaⁿ Yǎ Ndiǒxí xii ñǎyiu isràél, te duha ní xáhaⁿ-gǎ xií-yu:

Yúhú cada váha-í nchaa ñǎyiu ñá túú cùu ñǎyiu isràél, ñǎyiu ñá túú cùtnuní iní-xi nàcuáa cada váha cundecu núu-í,

te nchòhó cudééⁿ-ndó nǔ-yu te cuu cuédú iní-ndǒ-yu.

Duha ní xáhaⁿ Yǎ Ndiǒxí xií-yu te ducaⁿ nǐ chídó tnùní ndíi Moisés. 20 Te ndíi Chàíá ñá túú tnàhí ni yúhú ndíi ní quide ndíi núu Yǎ Ndiǒxí ní cǎháⁿ ndíi tnúhu-gá, te ní cachí ndíi:

Ñǎyiu ñá túú nànducu ñaha xii-í ní cùu ní naníhí ñáhǎ-yu xii-í,

te ni ñà túú ndùcu tnúhu ñàhá-yu xii-í ní cùu te ní xiní ñáhǎ-yu.

Duha ní cachí ndíi Chàíá ní cǎháⁿ ndíi tnúhu Yá Ndiǒxí. 21 Te ní quide tucu ndíi núu Yǎ Ndiǒxí ní cǎháⁿ ndíi tnúhu-gá cuendá ñǎyiu isràél, te ní cachí ndíi: “Nchaa-ni nduu yǐhí-í cǎháⁿ-í ñǎyiu isràél te ñá túú cuení-yu quindáá iní-yu chi ío sàá iní-yu”, duha ní cachí ndíi Chàíá ní cǎháⁿ ndíi tnúhu Yá Ndiǒxí.

11

Cuendá ñǎyiu isràél ñǎyiu naníhí tàhú

1 Te cuéi ducaⁿ dico vá cǎháⁿ-ó sǎ Yǎ Ndiǒxí dáquèe tǐhú-gǎ ñǎyiu isràél chi ñu-ni ñǎyiu-áⁿ cúu cuendá-gá, chi yúhú tnàhá-í cúu-í mei tēe isràél, te ñani tnàhá-í ní cuu ndíi Àbrahám téé ní xindecu ndéé sanaha vǐhi-gá, te ñu-ni ñani tnàhá-í ní cuu tucu ndíi Benjamín. 2 Te ndéé sanaha dùcaⁿ ní cachí Yǎ Ndiǒxí sá nchùhú ñǎyiu isràél cúu-ndí ñǎyiu cùu cuendá-gá, te ñá túú dàquee tǐhú ñáhǎ-gǎ xii-ndí, te nchòhó

sa xiní-ndó nàcuáa cǎháⁿ-xi núu tùtú Yǎ Ndiǒxí núu cǎchí-xi nàcuáa ní quide té Èliás ní ndacáⁿ cuéchi-dé núu-gǎ cuendá ñǎyiu isràél. 3 Te duha ní xáhaⁿ-dē xii-gá: “Yòhó Dútú Ndiǒxí, ná nàcani tnúhu-í núu-n sǎ nǐ sahní-yu cue téé cǎháⁿ tnúhu-n, te ní dátànú-yu núu xihí quiti ndùu táhú-n, te yúhú-nǎ ní cácu-í ndécù-í dico nànducu ñàhá-yu chi tnàhá-í cuení-yu cahni ñàhá-yu xii-í”, duha ní xáhaⁿ-dē xii Yá Ndiǒxí.

4 Te Yá Ndiǒxí ní xáhaⁿ-gǎ xii-dé: “Sa ní dáquée dǐhí-í úsá mǐl cue téé cùu cuendá-í, te ñá túú nèhe-güedé sá yǐñùhu núu Bàál sá cǎchí-yu cùu ndiǒxí-yu te ñá ndàá sá ndiǒxí cúu-xí”, duha ní xáhaⁿ-gǎ xii té Èliás.

5 Te ducaⁿ sǎtnahá-xi cùu vitna chi xindecu ñǎyiu ní cǎháⁿ-gá ní chìtnahá ñáhǎ xii-gá, te ducaⁿ nǐ quide-gá chi ní cundàhú iní ñáhǎ-gǎ xií-yu. 6 Te ducaⁿ nǐ cǎháⁿ ñáhǎ-gǎ xii-yu sá cundàhú iní ñáhǎ-gǎ, te ñá díú cuendá ñⁿ chiuⁿ quidé-yu ducaⁿ nǐ cǎháⁿ ñáhǎ-gǎ xií-yu, chi núu dícó cuendá ñⁿ chiuⁿ quidé-yu ducaⁿ nǐ cǎháⁿ ñáhǎ-gǎ xií-yu ña, te ñá díú-gǎ sá cúu iní méé-gǎ ducaⁿ nǐ cǎháⁿ ñáhǎ-gǎ xií-yu te núu ducaⁿ.

7 Te na cǎchí tnúhu-í xii-ndo nàcuáa cùu vitna sá ñǎyiu isràél cuení-yu cudíu-yu núu Yǎ Ndiǒxí dico ñá ndácù-yu, dico dava ñǎyiu ní cǎháⁿ-gá ñǎyiu-áⁿ cudíu-yu núu-gǎ, te ñǎyiu ducaⁿ ñà túú cudíu núu-gǎ-áⁿ ío ní cuu sàá iní-yu núu-gǎ. 8 Te ní quee ndáá-xi nàcuáa cǎháⁿ-xi núu tùtú Yǎ Ndiǒxí núu cǎchí-xi: “Yá Ndiǒxí ní cachí-gá sá cúu-yu ñǎyiu ío nǐ díquí-xi, chi cuéi ndèhé-yu nàcuáa cǎháⁿ tnúhu-gá dico ñá cùtnuní iní-yu nàcuáa cǎháⁿ-xi, te cuéi ndédóho-yu dico ñá túú quée díquí-yu, te ducaⁿ-ni quidé-yu ndéé vitna”, duha cǎchí-xi núu tùtú-gá. 9 Te ndíi Dàvíí ní cachí ndíi:

Ñǎyiu ío váha ndècu te cudíí iní-yu quidé-yu vico,

dico yáha-yu dàtná yáha ñⁿ quiti ngáva trampá àdi ñⁿ quiti ñá cùtnuní iní-xi quée xití ñunu,

chi cuíta nihnú-yu te nacháhu-yu nchaa sá quidé-yu.

10 Te cúu-yu ñǎyiu ñá túú vèdana tècú tnùní, te cùu tucu-yu dàtná ñⁿ ñǎyiu ío ndòho nchido ñⁿ sá vèe.

Duha ní cachí ndí Dàví.

Ñáyiú ñá túú cùu ñáyiú isràél naníhí tànhú-yu

11 Te cuèi ducaⁿ dico vá cächí-ó sã sã dúcáⁿ ñá túú ní quide ndáá ñáyiú isràél te ní xíta nihnu duúⁿ-yu, te ñáhá chi sá dúcáⁿ ñí quidé-yu te ní ngúndecu ndihí dava-gá ñáyiú tnúhu sá cãháⁿ nãcuáa naníhí tànhú-yu, te ñáyiú isràél quini-yu nãcuáa naníhí tànhú ñáyiú ñá túú cùu ñáyiú isràél, te tnàhá-yu cudíí iní-yu naníhí tànhú-yu. 12 Te sá dúcáⁿ ñí quide sàá iní-yu ñá túú ní quide ndáá-yu núú Yã Ndiöxí, te xíãⁿ ní cuu-xi ñí sá vãha sá cúu-xí ñáyiú nihí ñuyúú, dico sáá nduu te cada ñáyiú isràél nchaa nãcuáa cãháⁿ Yã Ndiöxí, te dává-áⁿ ño-gá váha cuu xii nchaa ñáyiú nihí ñuyúú.

13 Te nchòhó ñáyiú ñá túú cùu ñáyiú isràél cächí tnúhu-í xii-ndo sã Yã Ndiöxí ní cachí-gá sá cãháⁿ-í tnúhu-gá núú-ndó, te yúhú cächí-í sá ño cãhnu cuu chiuⁿ quide-í.

14 Te duha cãháⁿ-í cuendá sá ñuu cudana ió dava ñáyiú cùu ndi mee-í cudíí iní-yu cada váha ñaha Yã Ndiöxí xii-yu dàtná quidé vãha ñaha-gã xii-ndo, te naníhí tànhú-yu.

15 Te sá cuendá sá ñí quee tíhú ñáyiú isràél ní nacáháⁿ cáhnú iní tnáhá ñáyiú nihí ñuyúú ndihí Yã Ndiöxí, dico na sáá nduu núcúndecu váha ñáyiú isràél ndihí Yã Ndiöxí, te ío-gá váha tnáhá ñáyiú nihí ñuyúú, te ñáyiú-áⁿ cada iní-ó sã cúu-yu dàtná ñáyiú ní xíhí, dico dává-áⁿ cada tucu iní-ó sã cúu-yu dàtná ñáyiú ní ndoto chi núcúndecu váha-yu ndihí-gá. 16 Te núu sá lúhá-ní ñí tílúú yusaⁿ cãváha te ñiu-ni ducaⁿ cãváha nihí. Te núu cãváha yóho ñí yutnu te ñiu-ni ducaⁿ cãváha-xi nihí-xi. Te ñiu-ni ducaⁿ sãtnahá-xi cùu ñáyiú isràél, chi ñaní tnáhã-yu ní xíndecu ndéé sanaha ñí cuú-yu ñáyiú ní cuu cuendá ñáhá Yã Ndiöxí, te ñiu-ni ducaⁿ cùu cuendá ñáhã-gã xii mée-yu ndéé vitna.

17 Te ío ñí yutnu váha nani olívú, te dava dité yutnu-áⁿ ñí téhndé te ní nucódó dité yutnu olívú cùtexínu, te mee-ñá yutnu olívú váha-áⁿ ño váha quide-xi nchito dité yutnu olívú cùtexínu-áⁿ. Te dité nchaa yutnu olívú váha-áⁿ cúu-xí dàtná ñáyiú isràél, te nchaa dité-xi sá ñí téhndé-áⁿ cúu-xí ñiu-ni ñáyiú isràél ñáyiú ñá túú tnàhá tnúhu ndihí

Yã Ndiöxí. Te dité yutnu olívú cùtexínu sá ñí nucódó tnáhã-áⁿ cúu-xí dàtná ñáyiú ñá túú cùu ñáyiú isràél tnàhá tnúhu ndihí Yã Ndiöxí. 18 Te vá caní iní-ndó sã sã dúcáⁿ ndècu váha-ndo ndihí Yã Ndiöxí te ío cùnuu-ndo dacúúxí ñáyiú isràél, te vá dúcáⁿ caní iní-ndó chi sá cuendá nchaa ñaní tnáhá ñáyiú isràél ní xíndecu ndéé sanaha ducaⁿ ndècu váha-ndo ndihí Yã Ndiöxí vitna, te ñá díú sã cuendá nchòhó ndécú ndihí váha ñáyiú-áⁿ Yã Ndiöxí vitna.

19 Te cudana sãni iní-ndó te cächí-ndó sã ñáyiú isràél ní quee tíhú-yu cuendá sá nchòhó nucuíñí-ndó ñúu-yu núcúndecu váha-ndo ndihí Yã Ndiöxí. 20 Te ndáá sá ñí quee tíhú-yu chi ñá túú ní sãndáá iní ñáhã-yu xii-gá, te nchòhó ío váha cùu ndecu-ndo ndihí-gá chi ní sãndáá iní-ndó-gã, dico vá cächí-ndó sã ño cãhnu cuu-ndo, te ío váha chí cuãha cuendá nãcuáa cundecu-ndo. 21 Te cue ñáyiú isràél cúu-yu ñáyiú cùu cuendá-gá ní cùu te ní dáquéé tíhú ñáhã-gã xii-yu cuendá sá ñá túú ní sãndáá iní ñáhã-yu xii-gá, te tnàhá nchòhó

daquèe tíhú ñáhã-gã xii-ndo te núu na cãda-ndo datná ní quide ñáyiú-áⁿ. 22 Te chí cáda cuendá sá Yã Ndiöxí ío váha iní-gá, dico cùdééⁿ-gã núu nchaa ñáyiú ñá túú sãndáá iní ñáhã xii-gá, dico sá cúu-xí nchòhó cue ñáyiú sãndáá iní ñáhã xii-gá chi ío váha iní-gá. Te ducaⁿ-ni cùnduu váha iní-gá sá cúu-xí-ndó te núu vá dáñá ndéé-ndó cãda-ndo nacuáa cãháⁿ-gã cuendá sá ño váha iní-gá, te núu ñáhã te tnàhá nchòhó quee tíhú-ndó dàtná ní quee tíhú ñáyiú isràél, ñáyiú ñá túú ní sãndáá iní ñáhã xii-gá. 23 Dico núu ñáyiú isràél ñáyiú ní dáquéé tíhú ñáhã Yã Ndiöxí quíndáá iní ñáhã-yu xii-gá te nduu cuendá ñáhã tucu-gá xii-yu, te ñáyiú-áⁿ cúu-yu dàtná dava dité yutnu olívú sá ñí téhndé te ní nucódó tnáhã tucu. Te ducaⁿ sãtnahá-xi cúu-yu te núu na quíndáá iní ñáhã-yu xii-gá. 24 Te nchòhó cúu-ndó dàtná nchaa dité yutnu olívú cùtexínu, chi ñá díú ñáyiú isràél cúu-ndó, te dité nchaa yutnu olívú cùtexínu-áⁿ ní nucódó-xi núu dité yutnu olívú váha-áⁿ. Te yáchí-gá núcúndecu váha ñáyiú isràél ndihí Yã Ndiöxí, chi cúu-yu dàtná nchaa dité yutnu olívú váha sá ñí téhndé te ní nucódó

tnáhá tùcu. Te ducaⁿ sàtnahá-xi cùú-yu te núu na quíndáá iní ñáhã-yu xii-gá.

Sáa nduu te naníhí tàhú ñáyiu isràél

²⁵ Te nchòhó ñáyiu ndècu ndìhí-í ichi Xítohó Jesucristú, na càchí tnúhu-í xii-ndo ìⁿ tnúhu ndùu yuhu ni cuu, cuèndá sá vã cání iní-ndó sã ìo-gá váha sàá díquí-ndó dàcúúxí ñáyiu isràél, chi dava ñáyiu isràél cùú sàá iní-yu núú Yã Ndiòxí ñini na ndìhí ñáyiu ní cachí Yã Ndiòxí ngúndecu váha ndìhí ñáhã-yu xii-gá, ñáyiu ñá túú cùu ñáyiu isràél. ²⁶ Te nduu na ndìhí ñáyiu-áⁿ ngúndecu váha-yu ndìhí Yã Ndiòxí, te dàvá-áⁿ naníhí tàhú ñáyiu isràél chi quee ndáá-xi nàcuáa càháⁿ Yã Ndiòxí núú tùtú-gá núú càchí-xi:

Ndàa ñuú Sìón quixi Yaá cada naníhí tàhú nchaa ñáyiu,

te ñu-ni Yaá-áⁿ cada-gá cuèndá sá dáñã nchaa ñáyiu isràél ichi cuèhé ichi duha.

²⁷ Te yúhú cada càhnu iní-í nchaa cuéchi ñáyiu isràél, chi cada-í dàtná ní cachí-í ndéé sanaha.

Duha càchí Yã Ndiòxí núú tùtú-gá.

²⁸ Te sá cuèndá tnúhu sá càháⁿ nàcuáa naníhí tàhú-ó xiãⁿ cùú ùhú iní ñáyiu isràél Yã Ndiòxí, te sá dúcáⁿ quidé-yu xiãⁿ nchòhó ní níhí-ndó tnúhu sá càháⁿ nàcuáa naníhí tàhú-ndó. Te ní cachí Yã Ndiòxí sá ñáyiu isràél cuu cuèndá-gá, te cùu iní ñáhã-ní-gã xií-yu, te ducaⁿ quidé-gá chi ducaⁿ ñí xáhaⁿ-gã xii cue ñaní tnáhã-yu ní xíndecu ndéé sanaha. ²⁹ Te Yã Ndiòxí ñá túú ndùu ùhú iní-gá ìⁿ sá táxí-gã, te ñí ñá túú ndìxi cuéchi iní-gá sá càháⁿ ñáhã-gã xii-o.

³⁰ Te nchòhó chi ñá túú sàndáá iní-ndó Yã Ndiòxí ní cùu, dico vitna ñini ñá túú sàndáá iní ñáhã ñáyiu isràél xii-gá, te ní cundàhú iní ñáhã-gã ní dácãcu nihnu ñaha-gã xii-ndo núú ùhú núú ndàhú. ³¹ Te vitna quidé-yu dàtná ní xóo cada nchòhó cútnáhã ñá túú ní xóo quíndáá iní-ndó-gã. Dico sáá nduu te natuha ñáhã-yu xii-gá te dàcãcu nihnu ñaha-gã xií-yu sá cundàhú iní ñáhã-gã dàtná ní quidé ñaha-gã xii nchòhó. ³² Te Yã Ndiòxí ní dáñã-gã sá dúcáⁿ cùnduu saá iní nchaa ñáyiu cuèndá cuíní-gá cundàhú iní ñáhã-gã xií-yu.

³³ Te súúni vãha quíde ñaha Yã Ndiòxí xii-o, te ío váha xíní-gá nchaa cuéi sá ío andiu te cuéi sá ío ñuyíú-a, te ducaⁿ ìo váha sàá nchaa sá xíní tnúni-gá. Te ñá ndácú-ó cùtnuní iní-ó ñá cùú nchaa sá sání iní-gá cada-gá, te ñí ñá ndácú-ó cùtnuní iní-ó nàcuáa ndùu cuèndá nchaa sá quidé-gã.

³⁴ Te núú tùtú-gá càchí-xi: “Vã yõo ìⁿ cùtnuní iní-xi nàcuáa sání iní Yã Ndiòxí, te ñí vã yõo ìⁿ ndàcu dacahu iní ñáhã xii-gá nàcuáa càháⁿ-gã. ³⁵ Te Yã Ndiòxí ñá túú quíde yica iní-gá cada-gá sá vãha sá cùú-xí ñáyiu cuèndá ìⁿ sá sãñáhã-yu xii-gá chi ñá túú dùcaⁿ quidé-gã”, duha càchí-xi núú tùtú-gá. ³⁶ Te ducaⁿ chi mee Yã Ndiòxí ní taxi ndecu-gá nchaandi túhú sá ío ñuyíú, te ñu-ni mee-gã táxí tnúni-gá nchaa sá ñí taxi ndecu-gá, te nchaa cùu-xi cuèndá-gá. Te vitna chí ná càchí-ó sã ìo càhnu cuu-gá ñí caa ñí quíhíⁿ. Te ducaⁿ na cùnduu.

12

Cada-o nàcuáa nduu vétú iní Yã Ndiòxí

¹ Te vitna nchòhó ñáyiu ndècu ndìhí-í ichi Xítohó Jesucristú càchí tnúhu-í xii-ndo sã Yã Ndiòxí cundàhú iní ñáhã-gã xii-o chindee ñaha-gã, núu xiãⁿ càháⁿ ndàhú-í núú-ndó sã dáñã-ndó mèe-ndo núú ndáhã-gã, te cada iní-ndó sã cùú-ndó dàtná ìⁿ táhú sã nchító-ó ñí nduu táhú-gã. Te cuu-ndo ñáyiu váha ñáyiu cada nchaa nàcuáa nduu vétú iní Yã Ndiòxí chi ducaⁿ tàú-ndó càda-ndo sá cùú-xí-gã. ² Te vá cãchicúⁿ nihnu-gã-ndó càda-ndo datná xíquide nchaa ñáyiu ndècu ichi cuehé ichi duha ndècu ñuyíú-a, te vá cùhúⁿ-gã iní-ndó ìchi cuehé ichi duha-áⁿ, chi mee-ñá sá vãha cuhuⁿ iní-ndó, te ducaⁿ te cutnùní iní-ndó nchaa nàcuáa cuíní Yã Ndiòxí cada-ndo, te nchaa sá cuíní-gá cada-ndo cùu-xi mee-ñí sá vãha, sá ìo váha ndùu vétú iní-gá, te cùu-xi nchaa sá xíní ñuhu-xi cada-ndo núú-gã.

³ Te sá cuèndá chiúⁿ ní cundàhú iní ñáhã Yã Ndiòxí ní taxi-gã xii-í xiãⁿ núu na càháⁿ-í dóho-ndo vitna: Vã cání iní-ndó ìⁿ sá ñá túú tàú-ndó càni iní-ndó te cucahaⁿ-ndo sã ìo càhnu cuu-ndo. Te nchòhó ní sàndáá iní-ndó Yã Ndiòxí núu chindee ñaha-gã xii-ndo, te vitna chí cuãha cuèndá núu ná daha núú chiúⁿ-gã ndacu-ndo càda-ndo.

⁴ Te nchoo títní xichi cùu yíqui cuñú-ó,

te ndi dííⁿ ndi dííⁿ chiúⁿ quide-xi ííⁿ ííⁿ-xi.
 5 Te ducaⁿ sãtnhá tucu-xi cùu nchoo ñáyiú ndècu ndihí Xítóhó Jesucristú chi cuèi ná daha tnàhá-ó dico ííⁿ-ni cùu-o ndihí-gá, te ducaⁿ mée-o tucu ííⁿ-ni cùu-o.

6 Te mee Yã Ndiöxí ní cundàhú iní ñáhá-gã xii-o ní taxi-gá chiúⁿ taú-ó càda-o ííⁿ ííⁿ-o te chindee ñaha-gá xii-o, te xini ñuhu-xi cada-o nacuáa ndùu chiuⁿ ní taxi-gá cada-o. Te núu ní nduu táhú-ó nùú-gã sá càháⁿ-ó tnùhu sá dácàhu iní ñáhá mée-gá xii-o te càháⁿ-ó nàcuáa sàndáá iní-ó chindee ñaha-gá xii-o, 7 àdi ní nduu táhú-ó nùú-gã sá ïo váha chindee-o tnàha ñáyiú-o te ñiú-ni ducaⁿ càda-o, àdi ní nduu táhú-ó dānehé-ó ñáyiú tnúhu-gá te ñiú-ni ducaⁿ càda-o, 8 àdi ní nduu táhú-ó nùú-gã sá dácàháⁿ-ó ñáyiú canchicúⁿ nihnú-yu ichi-gá te ñiú-ni ducaⁿ càda-o, àdi ní nduu táhú-ó nùú-gã sá cuãñaha-o xii tnaha ñáyiú-o sã ñihí-ó ndècu ndihí-o te ñiú-ni ducaⁿ càda-o, dico ñi yùhu ñi iní-ó cuãñaha-o xii-yu, àdi ní nduu táhú-ó nùú-gã taxi tnùní-ó te ñiú-ni ducaⁿ càda-o, te ñi yùhu ñi iní-ó càda-o, àdi ní nduu táhú-ó nùú-gã chindee-o cuè ñáyiú ndècu ndihí tnúndòho tnúhu ndàhú te ñiú-ni ducaⁿ càda-o, te ío cudíí iní-ó càda-o chiuⁿ-áⁿ.

Nchaa nàcuáa tàú-xi cada nchaa ñáyiú ndècu ichi Xítóhó Jesucristú

9 Te cuu iní tnáhá ndìsa-ndo ííⁿ ííⁿ-ndo, te dañā-ndo nchāa sá cuèhé sá dúhá te cada-ndo mée-ni sá vāha. 10 Te ío cuu iní tnáhá-ndó, te cada-ndo cuendá sá ííⁿ-ní ñáyiú cùu-ndo, te ííⁿ ííⁿ-ndo càni-gá iní-ndó cànehe yíñuhu núú tnáhá-ndó.

11 Te nducu ndèe-ndo cada-ndo nchaa chiuⁿ tahu Xítóhó Jesucristú vá tühío-ndo, te cada-ndo ñi yuhu ñi iní-ndó sã cúú-xí-gã.

12 Te ío cudíí iní-ndó cùndecu-ndo chi ní ngùndecu ndihí-ndo tnùhu ndee iní sá cùndecu ndihí-ndo Xítóhó Jesucristú, te cada càhnu iní-ndó cuèi nāndi na càda ñaha ñáyiú xii-ndo sã cuendá-gá, te vá dáñā ndèe-ndó càháⁿ ndihí-ndo Yã Ndiöxí.

13 Te chindee tnàha-ndo te núu ío daya nchòhó ñáyiú ndècu ichi-gá ío ííⁿ sá cùmāni xii-ndo, te ío váha cuu iní-ndó còto-ndo ñáyiú véxi vehe-ndo.

14 Te cācāⁿ táhú-ndó nùú Yã Ndiöxí cuendá nchaa ñáyiú nāndi quide ñaha xii-ndo, te cācāⁿ táhú-ndó nùú-gã sá ná

chindee ñaha-gá xii-yu te ñā díú dà cācāⁿ táhú-ndó nùú-gã sá ná dàcuíta nihnu ñaha-gã xii-yu.

15 Te núu ío ñáyiú cùdíí iní-xi te cudíí iní-ndó ndihí-yu, te núu ío ñáyiú ndihú iní-xi te ndihú iní-ndó ndihí-yu.

16 Te cuu ííⁿnuu-ndo cùndecu-ndo, te vá cādā càhnu-ndo mee-ndo, te tnáhā tnúhu-ndo ndihí nchaa ñáyiú ndàhú iní-xi, te vá cāní iní-ndó sã ïo-gá túha-ndo.

17 Te vá nānchòcāva-ndo nāchinaa-ndo ííⁿ sá quidé ñaha ñáyiú xii-ndo, te ío nducu ndèe-ndo cada-ndo mee-ni sá vāha nàcuáa cuu váha iní ñáyiú. 18 Te ío nducu ndèe-ndo cada-ndo sá ndácú-ndó cùndecu váha-ndo ndihí nchaa ñáyiú. 19 Te nchòhó ñáyiú ío cùu iní-í, vá cāní iní-ndó nāchinaa-ndo ííⁿ sá cādā ñaha ñáyiú xii-ndo, chi cundetú-ndo sã mée Yã Ndiöxí ná nāchinaa-gá sá quidé ñáhā-yu xii-ndo, chi quee ndāá-xi nàcuáa càháⁿ Yã Ndiöxí núú tütú-gá núú càchí-xi: “Yúhú dandòho-í-yu chi nachinaa-í nchaa sá quidè-yu”, duha càchí-gá núú tütú-gá.

20 Te xini ñuhu tucu-xi cada-ndo nacuáa càháⁿ tucu-xi ingá xichi núú tütú-gá núú càchí-xi: “Te núu ñáyiú cùu úhú iní ñáhā xii-ndo ñā túú sã còhó sã cāxí-yu te cuãñaha-ndo xii-yu, te núu ducaⁿ na càda-ndo te ío cucahaⁿ núú-yu”, duha càchí-xi núú tütú-gá. 21 Te núu ío ííⁿ sá quidé ñaha tnaha ñáyiú-ndo xii-ndo te vá nānchòcāva-ndo nāchinaa-ndo sá quidé ñáhā-yu xii-ndo, chi cada-ndo sã vāha sá cúú-xí-yu, te ducaⁿ te vá cādā-ndó sã ñā túú tàú-ndó càda-ndo núú Yã Ndiöxí dàtnā quidè-yu.

13

1 Te nchaa ñáyiú tàú-yu quindáá iní-yu nchaa cue tée cùchiuⁿ, chi Yã Ndiöxí ní cachí-gá sá cùndecu tée cùchiuⁿ ñuyíú-a, núu xíáⁿ xíndecu-güedé vitna. 2 Te nchaa ñáyiú ñā túú sàndáá iní ñáhā xii cue tée cùchiuⁿ ñā túú tnàhá iní Yã Ndiöxí sá dúcāⁿ quidé-yu, chi mee-gã ní cachí-gá sá cùndecu-güedé. Te nchaa ñáyiú ducaⁿ ñā túú sàndáá iní ñáhā xii cue tée cùchiuⁿ nacháhu-yu sá dúcāⁿ quidé-yu. 3 Te nchaa ñáyiú quide váha ñā túú yùhú-yu cue tée cùchiuⁿ chi quide váha-yu, dico nchaa ñáyiú ñā túú quide váha chi xíyùhú-yu cue tée cùchiuⁿ. Te

vitna núu nchòhó cuení-ndó sã vã yùhú-ndó cuè téè cùchiuⁿ te chí cádá vãha, te ducaⁿ te cáháⁿ váha-güedé cuendá-ndó. ⁴ Te Yá Ndiõxí ducaⁿ nĩ cachí-gá cundecu-güedé cuendá cada-güedé sá ñà túú nã cuu cundecu-ndo, te núu ñã túú quide váha-ndo ndècu-ndo te quiyùhú iní-ndó nũ-güedě, chí ñã túú àúⁿ nã cuu ndècu ndihí-güedé tnúhu ndee iní dandòho-güedé nchaa ñáyiu ñã túú quide váha, chí Yá Ndiõxí ducaⁿ nĩ cachí-gá cundecu-güedé sá dúcáⁿ càda-güedé dandòho-güedé nchaa ñáyiu ñã túú quide váha. ⁵ Núu xiãⁿ ío xini ñuhu-xi sá quindáá iní-ndó nchàa cue téè cùchiuⁿ, te ñã díú sã yùhú-ndó dandòho ñaha-güedé xii-ndo, chí cada-ndo sã cùtnuní iní-ndó sã cúú-xí ìⁿ sã vãha. ⁶ Chí ñu cuendá xiãⁿ sácáⁿ-ndó díhúⁿ nũ cuè téè cùchiuⁿ, te ducaⁿ chí Yá Ndiõxí ducaⁿ nĩ cachí-gá cundecu-güedé te ñu-ná chiúⁿ ndeé-güedé ñúhú iní-güedé.

⁷ Te nacháhu-ndo nchàa sá tàú-ndó nũ nchàa ñáyiu tàú-ndó nũ-xi, te cuè díhúⁿ tàú-ndó cuendá ñuhu-ndo nũ cuè téè cùchiuⁿ àdi nágá díhúⁿ tàú-ndó nũ-güedě te nacháhu-ndo nũ-güedě. Te ío-gá canehe-ndo sã yíñuhu núu nchàa ñáyiu cùnuu, te cáháⁿ váha-ndo ndihí-yu. ⁸ Te vã dácuidó-ndó ndùu nacháhu-ndo sã tàú-ndó nũ tnàha ñáyiu-ndo, te cuu iní tnáhá-ndó ìⁿ ìⁿ-ndo. Te núu ducaⁿ quide-ndo ndecu-ndo ña, te quide-ndo nchaa nacuaá càháⁿ tnúhu sá sánú ìchi ñaha xii-o nacuaá cada-o cundecu-o. ⁹ Te duha ndùu tnúhu càháⁿ Yá Ndiõxí cuendá nchaa sã vã cúú càda-o: “Nchaa nchòhó cue téè vã càháⁿ ndihí-ndo ñáyiu dìhí te núu ñã díú ñàdihí-ndó cùú-yu, te ducaⁿ-ni nchàa nchohó cue ñáyiu dìhí tucu vã càháⁿ ndihí-ndo tée te núu ñã díú yí-ndo cuu-güedé, te vã cáhni-ndó tnàha ñáyiu-ndo, te vã dúhú-ndó sã ndécú ndihí-yu, te vã dácàcu-ndo cuèchi neñúú, te vã xíhó-ndó sã ndécú ndihí tnaha ñáyiu-ndo”, nchaa xéhé càhí Yá Ndiõxí sã vã cúú càda-o. Te tnúhu-a quide-o ndihí nchaa dava-gá tnúhu sá sánú ìchi ñaha xii-o nacuaá cada-o cundecu-o, te núu quide-o ingá tnúhu sã càhí-xi: “Cuu iní-ndó nchàa tnaha ñáyiu-ndo datná cúú iní-ndó mèe-ndo”, duha càháⁿ tnúhu-áⁿ. Te nchaa

dava-gá quidé-ó te núu quide-o nacuaá càháⁿ tnúhu-a. ¹⁰ Te nchaa ñáyiu cùu iní tnàha ñáyiu-xi te ñã túú quide úhú iní-yu tnàha ñáyiu-yu, te núu ducaⁿ cùu iní-yu tnàha ñáyiu-yu te quidé-yu nacuaá càháⁿ tnúhu sá sánú ìchi ñaha xii-o nacuaá cada-o cundecu-o.

¹¹ Te ducaⁿ xini ñuhu-xi cada-ndo chí sa ní cutnuní iní-ndó nacuaá ta xica nduu cuháⁿ ñuyú-a, te ní sáá nduu sã ío xini ñuhu-xi ndixi túu iní-ó càda-o nchaa nacuaá càháⁿ Yá Ndiõxí, chí vitna sa ní cuyatni-gá nduu nacuaa ñaha Xítohó Jesucristú xii-o dàcúúxí ndeé cùtnáhá ní sándáá iní-ó tnúhu-gá. ¹² Te cada iní-ndó sã datná ìⁿ niú sá sã ta cuyatni túndaá, ducaⁿ sãtnahá-xi cùu ñuyú yíca cuèchi-a chí sa ta cuyatni nduu quixi tucu Xítohó Jesucristú, te núu xiãⁿ xini ñuhu-xi dañ-a-o nchaa sã cuèhé sá dúhá te cada-o mèe-ni sã vãha, te ducaⁿ te ní ìⁿ sã cuèhé sá dúhá vã cùnùu-xi taxi tñuní ñáhá-xí xii-o, te ducaⁿ te vã cúú-gá-ó datná ñáyiu ndècu núu née chí cuu-ná-ó datná ñáyiu ndècu núu ditó. ¹³ Te cada-o nchàa nacuaá tàú-xi cunduu cundecu-o datná tàú-xi cada ñáyiu ndècu ichi Xítohó Jesucristú, te vã quihíⁿ-ó vico cuehé vico duha, te vã cúú-ó ñáyiu quihu, te ni vã càháⁿ ndihí-o ñáyiu dìhí te núu ñã díú ñàdihí-ó cùú-yu, te ducaⁿ-ni cuè ñáyiu dìhí tucu vã càháⁿ ndihí-yu tée te núu ñã díú yí-yu cùu-güedé, te ni vã cùndècu-o ichi díí iní, te ni vã nàá-ó ndihí tnaha ñáyiu-o, te ni vã cúú-ó ñáyiu cuédú iní. ¹⁴ Te vitna nchòhó dañ-a-ndo mèe-ndo sá Xítohó Jesucristú ná chindee ñaha-gá xii-ndo càda váha-ndo cundecu-ndo datná quidé mèe-gá ndécú-gã, te vã cáni-gã iní-ndó càda-ndo datná ní xóo cada-ndo cùtnáhá ní cunuu nchàa sã cuèhé sã dúhá iní-ndó.

14

Vã cuátnùhu tnaha-o nacuaá ndècu-o ichi Xítohó Jesucristú

¹ Te núu ìⁿ ñáyiu ndècu ichi Xítohó Jesucristú ñã túú tècú tñuní váha-yu nacuaá cuení Yá Ndiõxí cadá-yu, te queheⁿ cuendá-ni-ndó-yu te vã ténáá tnáhá-ndó ndihí-yu. ² Chí ío ñáyiu sàni iní sã cúú vãha iní Yá Ndiõxí sã cúú càxí-yu nani nihí-yu, te dava ñáyiu ñã túú cùtnuní váha iní-yu nacuaá càháⁿ Yá Ndiõxí te mee-ni

yǔcú xéxi-yu. ³ Te ñáiyu xèxi nchaa núú sǎ nihí-yu te vá dáquèe tihǔ-yu ñáiyu ñá túú xèxi, te ducaⁿ-ni ñáiyu ducaⁿ ñà túú xèxi-áⁿ vǎ cuátnùhú-yu nchaa ñáiyu ducaⁿ xèxi nchaa núú sǎ nihí-xi-áⁿ, chi tnàhá ñáiyu ducaⁿ xèxi nchaa núú sǎ nihí-xi-áⁿ quéhéⁿ cuèndá ñáhá Yǎ Ndiǒxí xií-yu. ⁴ Te ñá túú ndècu ndihí-o tnúhu ndee ínì cuatnúhu-o ñáiyu xínu cuechi, chi mee ñáiyu cùu patródⁿ-yu tàú-yu cáháⁿ-yu te núu cùndáá ñáiyu xínu cuechi núú-yu àdi ñá túú cùndáá-yu. Te ducaⁿ sǎtnahá-xi cùu ñáiyu xínu cuechi núú Yǎ Ndiǒxí, chi mee-gǎ cáháⁿ-gǎ te núu nása quidé-yu, te ñu-ni mee-gǎ cada te cundáá-yu cundecú-yu núú-gǎ.

⁵ Te na càchí tnúhu tucu-í xii-ndo sǎ ío ñáiyu càchí sǎ ío dava nduu ío càhnu cuu-xi, te ío tucu dava ñáiyu càchí-yu sǎ ñⁿ-ni cuu-xi nchaa-ni nduu, te xini ñuhu-xi sǎ cùtnuní ndáá iní-yu sǎ ndáá cúú-xí nàcuáa càháⁿ-yu ñⁿ ñⁿ-yu. ⁶ Te ñáiyu cánehe íí dava nduu quidé-yu sǎ néhě-yu sǎ yíñùhu núú Yǎ Ndiǒxí, te ñáiyu càchí sǎ ñⁿ-ní cùu-xi nchaa-ni nduu quidé-yu sǎ néhě-yu sǎ yíñùhu núú Yǎ Ndiǒxí tnàhá-yu. Te ñu-ni ducaⁿ sǎtnahá-xi cùu nchaa ñáiyu xèxi nchaa nani nihí-yu, chi quidé-yu sǎ néhě-yu sǎ yíñùhu núú Yǎ Ndiǒxí, chi ndàcáⁿ táhǔ-yu núú-gǎ cuèndá nchaa sǎ nihí-yu. Te ñu-ni ducaⁿ sǎtnahá-xi cùu nchaa ñáiyu ñá túú xèxi nchaa núú sǎ nchító-ó chi quidé-yu sǎ néhě-yu sǎ yíñùhu núú Yǎ Ndiǒxí, te ndàcáⁿ táhǔ-yu núú-gǎ cuèndá nchaa sǎ nihí-yu.

⁷ Te nchoo cuèi vitna ndècu vívú-ó àdi cuèi na cùú-ó dico ñá díú cuèndá méé-ó cùú-ó. ⁸ Chi vitna ndècu vívú-ó te ndècu-o sǎ cúú-xí Xítóhó Jesucristú àdi cuèi na cùú-ó dico cuú-ó ñu-ni sǎ cúú-xí-gǎ, núu xiǎⁿ cuèi vitna ndècu vívú-ó àdi cuèi na cùú-ó dico ñu-ni Xítóhó Jesucristú cúú cuèndá ñáhá-gǎ xii-o. ⁹ Chi Xítóhó Jesucristú ní xihí-gǎ te ní ndoto-gǎ, te vitna cùu-gǎ Xítóhó nchaa ñáiyu, cuèi ñáiyu xíndecu vívú te cuèi ñáiyu ní xihí.

¹⁰ Te nchòhó, ñá túú ndùu váha-xi cuatnúhu tnàha-ndo nacuáa ndècu-ndo ichi Xítóhó Jesucristú, te ní ñà túú ndùu váha-xi daquèe tihú tnàhá-ndó, chi nchaa-o sǎa

nduu cùndecu-o núú Xítóhó Jesucristú, te mee-gǎ cachí-gǎ te núu ní quide ndáá-ó àdi ñá túú ní quide ndáá-ó. ¹¹ Te Yǎ Ndiǒxí càchí-gǎ núú tütú-gǎ:

Yúhú Yǎ Ndiǒxí ndécú-í càchí tnúhu ndáá-í xii-ndo sǎ nchaa ñáiyu ngüñí xiti-yu núu-í,

te ncháa-yu cáháⁿ-yu sǎ yúhú cúu-í Ndiǒxí. Duha càchí Yǎ Ndiǒxí núú tütú-gǎ. ¹² Núu xiǎⁿ nchaa-o ndì dííⁿ nàcani tnúhu-o núú Yǎ Ndiǒxí nchaa sǎ ní quide-o.

Vá dácuíta nihnu tnàha-o

¹³ Núu xiǎⁿ vá cuátnùhu tnàha-gǎ-ndó, te cada yica-ndo càda-ndo mee-ni sǎ vǎha, te vá cáda-ndó ñⁿ sǎ ñà túú tàú-ndó càda-ndo cuèndá sǎ vǎ cuíta nihnu dava ñáiyu ndècu ndihí-ndo ichi Xítóhó Jesucristú. ¹⁴ Te yúhú ndécú ndihí-í Xítóhó Jesucristú te cùtnuní ndáá iní-í sǎ ncháá núú sǎ cúú càxi-o cuu-ni càxi-o te vá cúú cuèchi. Te ñáiyu sàni iní sǎ vǎ cúú càxi-yu te núu na càxi-yu te cuu cuèchi xií-yu. ¹⁵ Te nchòhó, te núu cuèndá sǎ xéxi-ndó nchaa núú sǎ cúú càxi-ndo, cuèndá xiǎⁿ ñá túú-gǎ cúú vǎha iní nchaa ñáiyu ndècu ndihí-ndo ichi Xítóhó Jesucristú, te ñá túú-gǎ quidé-ndó sǎ cúú ínì ndisa-ndó-yu te núu ducaⁿ na càda-ndo, te núu ñⁿ sǎ sání iní-ndó càxi-ndo te cùtnuní iní-ndó sǎ xiǎⁿ cada-xi cuíta nihnu ñáiyu ndècu ndihí-ndo ichi Xítóhó Jesucristú te vá càxi-ndó xiǎⁿ te núu ducaⁿ, chi Xítóhó Jesucristú ní xihí-gǎ cuèndá-yu. ¹⁶ Te núu ñⁿ sǎ quidé-ndó sàni iní-ndó sǎ cúú-xí ñⁿ sǎ vǎha, te ñáiyu càchí-yu sǎ ñà túú vǎha te vá cáda-ndó cuèndá sǎ vǎ càháⁿ cuéhé-yu cuèndá-ndó. ¹⁷ Te sǎ yíndàha ñaha Yǎ Ndiǒxí xii-o xiǎⁿ ío xini ñuhu-xi cada ndáá-ó cùndecu-o, te cundecu váha ndihí tnàha-o, te cudíí iní-ó cùndecu-o chi Espiritú-gǎ ndécú ndihí ñaha-xi xii-o, te nchaa xéhé ío-gǎ cùnùu dacúxí sǎ cóhó sǎ càxi-ó. ¹⁸ Te nchaa ñáiyu ducaⁿ quide nchaa sǎ ío-gǎ xini ñuhu-xi, xinu cuechí-yu núú Xítóhó Jesucristú, te sǎ dúcáⁿ quidé-yu te ndùu vétú iní Yǎ Ndiǒxí, te cùdíu-yu núú ñáiyu.

¹⁹ Te nchoo chí ná ndècu-o nacuáa cada-o cùndecu ndihí váha tnàha-o, te nducu tucu-o nacuáa cada-o chindee tnúhu tnàha-o nacuáa cuita cundáá-gǎ-ó núú Xítóhó Jesucristú quííⁿ. ²⁰ Te ñá díú sǎ

cuendá ìⁿ núú sǎ xéxí-ó, te dàquee tíhú-ó sǎ vǎha ní quide ñaha Yǎ Ndiǒxí xii tnàha ñáyiu-o. Te na cǎchí tnúhu ndáá-í xii-ndo sǎ ncháá-ní núú sǎ cúú cǎxi-o, te dìcó-ni sǎ ñà túú ndúu váha-xi núú sǎ cuendá-ni sǎ cǎxí-ó ìⁿ núú sǎ cúú cǎxi-o cuíta nihnu ìⁿ tnàha ñáyiu-o. ²¹ Te váha-gǎ sǎ vǎ cǎxí-ó cùñú te vá cóhó ndídí, te ni ñà túú nǎgǎ cada-o te núu xito-o sǎ xǎⁿ cada te ngúíta tnàha ñáyiu-o cǎdá-yu sǎ ñà túú vǎha, àdi xito-o sǎ xǎⁿ cada te ngúíta-yu cani ìⁿ cani úú iní-yu cundecú-yu ichi Xítohó Jesucristú, te vá cúndǎá-gǎ-yu núú-gǎ te núu ducaⁿ na cǎda-o. ²² Te núu ìⁿ sǎ vǎha sàni iní-ó cǎda-o, te vá dátúu-o núú ñáyiu chi mee-ni núú Yǎ Ndiǒxí dátúu-o. Te nchoo cùu-o ñáyiu ío váha táhú-xi te núu cùtnuní ndáá iní-ó sǎ quidé ndáá-ó núu nándi cùu sǎ quidé-ó, te cùtnuní iní-ó sǎ ñà díú ìⁿ cuéchi cùu-xi sǎ quidé-ó. ²³ Te núu nchoo sàni iní-ó sǎ quidé vǎha-o àdi ñà túú quide váha-o òré xéxí-ó ìⁿ núú sǎ xéxí-ó, te cuu cuéchi xii-o te núu ducaⁿ na cǎda-o. Te ducaⁿ cùu cuéchi xii-o chi ñà túú ìⁿ-ni sǎ sání iní-ó, chi nchaa núú sǎ quidé-ó sàni ìⁿ sani úú iní-ó núu váha-ni àdi ñà túú vǎha-ni, te cuu cuéchi xii-o sǎ dúcǎⁿ quide-o.

15

Cada-o sǎ vǎha sǎ cúú-xí tnàha ñáyiu-o

¹ Te nchoo ñáyiu ío váha sàndǎá iní ñáhá xii Xítohó Jesucristú, xini ñuhu-xi cuáñaha-o tnúhu ndee iní xii ñáyiu ñà túú ñihí ndéé cundecu ichi-gǎ, te vá cǎdá-ó mèe-ni sǎ cúú-xí mèe-o. ² Te cada-o sǎ vǎha nàcuáa cuu váha iní tnàha ñáyiu-o cuendá cuu-xi sǎ vǎha sǎ cúú-xí-yu, te ducaⁿ cuíta níhí ndéé-gǎ-yu quindǎá iní-yu Xítohó Jesucristú. ³ Te Xítohó Jesucristú ñà túú ní quide-gǎ mee-ni sǎ cúú vǎha iní méé-gǎ, te ní quee ndáá-xi nàcuáa cǎháⁿ-xi núú tütú Yǎ Ndiǒxí nàcuáa ní xáhaⁿ Xítohó Jesucristú xii-gǎ, te cǎchí-xi: “Nchaa ñáyiu cùu úhú iní ñáhá xii-n ní xícuéhé ní xíduha ñáhá-yu xii-í”, duha cǎháⁿ-xi núú tütú Yǎ Ndiǒxí nàcuáa ní xáhaⁿ Xítohó Jesucristú xii-gǎ. ⁴ Te ndéé sanaha ñí ngúndeé nchaa tnúhu Yǎ Ndiǒxí núú tütú-gǎ, te ducaⁿ ñí ngúndeé cuendá dacuàha-o, te tnúhu-áⁿ dánèhé ñáhá-xí cùnduu cahnu iní-ó cuéi nándi nà váha-o cundecu-o ichi-gǎ, te sǎ

xii tnúhu-áⁿ te vá ndìhú-gǎ iní-ó cundecu-o, te díu-ni sǎ xii tnúhu-áⁿ cundecu ndìhi-o tnúhu ndee iní. ⁵ Te Yǎ Ndiǒxí quidé-gǎ ndécú ndìhi-o tnúhu cǎhnu iní, te díu-ni-gǎ quidé-gǎ ñà túú ndìhú iní-ó ndècu-o. Te xicáⁿ táhú-í núú-gǎ sǎ díú-gǎ ná cǎdá te cuu ìⁿnuu-ndo cundecu-ndo datná ní quide mee Xítohó Jesucristú cùtnáhá ní xíndecu-gǎ ñuyú-a. ⁶ Te ducaⁿ ncháa-ndo cuu ìⁿnuu-ndo, te daníhí tnáhá-ndó yǒcǒ tǎchí-ndó te cǎchí-ndó sǎ ìo cǎhnu cuu Yǎ Ndiǒxí Yáá cúú Tǎtá Xítohó Jesucristú.

Ñáyiu ñà túú cùu ñáyiu isràél ní ñihí-yu tnúhu Xítohó Jesucristú

⁷ Te núu xǎⁿ chí quéhéⁿ cuendá tnáhá datná ní quide Xítohó Jesucristú ní queheⁿ cuendá ñáhá-gǎ xii-o, te núu ducaⁿ na cǎda-ndo te ío cuu cǎhnu Yǎ Ndiǒxí. ⁸ Te na cǎchí tnúhu-í xii-ndo sǎ Xítohó Jesucristú ní quixi-gǎ ní quide-gǎ sǎ vǎha sǎ cúú-xí ñáyiu isràél, te sǎ dúcǎⁿ ñí quide-gǎ xǎⁿ cùtnuní ndáá iní-ó sǎ Yǎ Ndiǒxí quidé-gǎ ìⁿ sǎ cǎháⁿ-gǎ, chi Xítohó Jesucristú ní quide-gǎ nchaa nàcuáa ní xáhaⁿ Yǎ Ndiǒxí xii cue ñaní tnáhá-ó ñí xíndecu ndéé sanaha. ⁹ Te ducaⁿ ñí quide Xítohó Jesucristú sǎ vǎha sǎ cúú-xí ñáyiu isràél cuendá nchaa ñáyiu ñà túú cùu ñáyiu isràél cǎchí-yu sǎ ìo cǎhnu cuu Yǎ Ndiǒxí, te ducaⁿ quèsahá-yu chí ío cùndahú iní ñáhá-gǎ chíndèe ñaha-gǎ xií-yu, te quee ndáá-xi nàcuáa cǎháⁿ-xi núú tütú Yǎ Ndiǒxí núú cǎchí-xi:

Yúhú cǎchí-í sǎ ìo cǎhnu cuu-n núú ncháa ñáyiu ñà túú cùu ñáyiu isràél,

te cata-í ndudú chiñuhu ñaha-í xii-n.

Duha cǎchí-xi núú tütú-gǎ ¹⁰ Te cǎchí tucu-xi núú tütú-gǎ:

Te nchòhó ñáyiu ñà túú cùu ñáyiu isràél ío chí cúdǎⁿ iní ndìhi ñáyiu isràél ñáyiu ndècu ndìhi-í.

Duha cǎchí-xi núú tütú-gǎ. ¹¹ Te cǎchí tucu-xi ñgǎ xichi núú tütú-gǎ:

Nchaa nchòhó ñáyiu ñà túú cùu ñáyiu isràél chí cǎháⁿ sǎ ìo cǎhnu cuu Yǎ Ndiǒxí, te nchaa ñáyiu na cǎháⁿ-yu sǎ ìo cǎhnu cuu-gǎ.

Duha cǎchí-xi núú tütú-gǎ. ¹² Te ndíi Chàia cǎchí tucu ndíi núú tütú Yǎ Ndiǒxí:

Coo ìⁿ ñaní tnáhá ndíi Isàì téé ní xíndecu ndéé sanaha,

te téé-áⁿ taxi tnùní-dé cue ñáyiú ñá túú cùu ñáyiú isràél,

te ñáyiú-áⁿ cundee cùu cahnu iní ñáhă-yu xii-dé.

Duha ní cáháⁿ ndíi Chàíá càchí-xi núú tütú-gá.

13 Te xicáⁿ táhù-í núú Yă Ndiöxí Yaá ní taxi tnúhu ndee ìní ndécú ndìhi-o sá méé-gă ná càda ío cudíi ìní-ndó cùndecu-ndo, te ducaⁿ ío váha cundecu ìní-ndó nũú-gă chi sândáá ìní-ndó-gă, te ducaⁿ Espiritú-gá ná càda te uuⁿ-gá uuⁿ-gá cuita ngúndecu ndìhi-ndo tnúhu ndee ìní quíhíⁿ sá cáda vâha ñaha-gă xii-ndo.

14 Te nchòhó ñáyiú ndècu ndìhi-í ichi Xítohó Jesucristú cùtnuní ndáá ìní-í sá nchòhó ío váha ìní-ndó, te ducaⁿ ío váha cùtnuní ìní-ndó nchàa tnúhu váha, te ducaⁿ ío dâsahú tnáhá-ndó nâcuáa cundecu-ndo.

15 Te dava tnúhu ní chídó tnùní-í núú tütú-a cùu-xi tnúhu sá ío cáháⁿ-í dóho-ndo, te ducaⁿ ní tee-í cuendá sá nchòhó dandâcu ìní-ndó tnúhu-áⁿ, te ní tee-í chi Yă Ndiöxí ní cundâhú ìní ñáhă-gă xii-í ní taxi-gă chiuⁿ quide-í 16 xínú cuèchi-í núú Xítohó Jesucristú cáháⁿ-í tnúhu-gá núú ñáyiú ñá túú cùu ñáyiú isràél. Te tnúhu-áⁿ cúu-xí tnúhu sá sánú ìchi ñaha xii-o nacuáa naníhí tàhú-ó, te ducaⁿ dânehé-í ñáyiú ñá túú cùu ñáyiú isràél tnúhu Yă Ndiöxí cuendá cuú-yu dàtná ñⁿ sá ndúú tãhú-gă, te Espiritú-gá quidé-xí cùu-yu ñáyiú cùdîu núú-gă, te cùu váha ìní ñáhă-gă xii-yu.

17 Te ío váha cùu ìní-í cuendá nchaa chiuⁿ quide-í sá cúu-xí Yă Ndiöxí, chi Xítohó Jesucristú ndécú ndìhi ñaha-gă xii-í.

18 Te mee-ni nâcuáa quide Xítohó Jesucristú chindèe ñaha-gă xii-í xíãⁿ-ni cáháⁿ-í, te sá dúcáⁿ quide-gá xíãⁿ ní sândáá ìní cue ñáyiú ñá túú cùu ñáyiú isràél tnúhu-gá. Te ducaⁿ chi ní chindee ñaha-gă xii-í ní cáháⁿ-í tnúhu-gá te ducaⁿ-ni ní chindee ñaha-gă xii-í ní quide-í titní núú sã ní quide-í núu-yu ní xiní-yu. 19 Te Espiritú Yă Ndiöxí ní quide-xi ní quide-í titní núú sã vâ yõ tnàhí ndâcu cada ní xiní-yu te ío ní cuñúhu-yu. Te nchaa ñuú ní sáháⁿ-í ní cáháⁿ-í tnúhu Xítohó Jesucristú núú ñáyiú cuèi ndéé ñuú Jerusálén, te cuèi ndéé distritú Ìliricú, núu nchaa ñuú-áⁿ ní sáháⁿ-í ní cáháⁿ-í núu-yu tnúhu sá cáháⁿ nâcuáa

naníhí tàhú-ó. 20 Te ducaⁿ ío ndècu ndee-í cáháⁿ-í tnúhu sá cáháⁿ nâcuáa naníhí tàhú-ó núú vâta ñihí-gá-yu tnúhu cuendá Xítohó Jesucristú, te ducaⁿ quide-í chi ñá túú cuìní-í quíhíⁿ-í cáháⁿ-í tnúhu-gá núú sá xíndecu ñáyiú cáháⁿ tnúhu-gá. 21 Te quide-í nâcuáa cáháⁿ-xi núú tütú Yă Ndiöxí núú càchí-xi: Ñáyiú vâta ñihí-gá tnúhu cuendá Yaá quixi

ñuyú te ñihí-yu,

te ducaⁿ tècú tnùní-yu tnúhu-gá.

Duha càchí-xi núú tütú-gá.

Té Păblú cuìní-dé quíhíⁿ-dé ñuú Rómá

22 Te sá dúcáⁿ cáháⁿ-í tnúhu-gá núu xíãⁿ ñá túú ní ndâcu-í quixi-í quixi coto ñaha-í xii-ndo cuèi ducaⁿ-ni sàni ìní-í quixi coto ñaha-í. 23 Te ní cuu titní cuía ducaⁿ-ni sàni ìní-í quixi coto ñaha-í xii-ndo, te vitna ní ndìhi-í nchaa iha ní cáháⁿ-í tnúhu Xítohó Jesucristú núú nchaa ñáyiú. 24 Núu xíãⁿ

sání ìní-í sá ndùu na quíhíⁿ-í nâcióⁿ Èspañá te yâha cáháⁿ-í quini-í nása ndècu-ndo, te dàvá-áⁿ ío cudíi ìní-ó cùndecu tnaa-o, te ducaⁿ te òré nucúhuⁿ tucu-í ichi te cada ndee ìní-ndó chindee ñaha-ndo xii-í. 25 Te vitna quíhíⁿ-í ñuú Jerusálén quínehe-í sá ndúú tãhú ñáyiú ndècu ichi Xítohó Jesucristú xíndecu yâcáⁿ.

26 Te ñáyiú xíndecu ichi Xítohó Jesucristú ndécú distritú Macèdoniá, ndìhi distritú Acăyá ní cuu ñⁿnuú-yu ní sacáⁿ tnáhă-yu sá ndúú tãhú ñáyiú ndâhú xíndecu ichi-gá ndécú ñuú Jerusálén. 27 Te ducaⁿ tnàhí ní cudíi ìní-yu cadá-yu, te ducaⁿ tnàhí tàú-yu cadá-yu chindèe-yu ñáyiú xíndecu ñuú Jerusálén. Te ñáyiú Macèdoniá ndìhi ñáyiú Acăyá-áⁿ ñà túú cùu-yu ñáyiú isràél. Te ñáyiú xíndecu ñuú Jerusálén cúu-yu mee-ni ñáyiú isràél, te ducaⁿ tàú-yu cadá-yu chi sá cuendá ñáyiú isràél-áⁿ ní ñihí-yu tnúhu sá cáháⁿ nâcuáa naníhí tàhú-yu, núu xíãⁿ tàú-yu chindee ñahă-yu ndìhi nchaa sá ñihí-yu. 28 Te sátá ná yâha quínguáha cuendá-í-yu sá ndúú tãhú-yu, te ducaⁿ te dàtnuní quee-í quíhíⁿ-í nâcióⁿ Èspañá, te ichi yâha-í yâha cáháⁿ-í núú ndécú-ndó. 29 Te cùtnuní ndáá ìní-í sá òré ná quèxio-í núú ndécú-ndó, te Xítohó Jesucristú ío chindee ñaha-gă xii-í cáháⁿ-í tnúhu-gá núú-ndó nâcuáa ío váha cundecu-ndo ìchi-gá.

30 Te nchòhó ñáyi ndècu ndìhi-í ichi Xítohó Jesucristú cáháⁿ ndàhú-í núú-ndó sã ïo chindee ñaha-ndo xii-í cáháⁿ ndìhi-o Yã Ndiõxí cuendá-í, te ducaⁿ càda-ndo chi ndècu ndìhi-ndo Xítohó Jesucristú. Te Espíritú Yã Ndiõxí quidé-xí cùu iní tnàhá-ó ìⁿ ìⁿ-o. 31 Te ío chí càcáⁿ táhú núú Yã Ndiõxí sá ná còto ñaha-gá xii-í, te ñá túú nã cada ñaha nchàa ñáyi ñá túú sãndáá iní ñáhá xii-gá xĩndecu distritú Jùdeá. Te càcáⁿ táhú tùcu-ndo núú-gã sá ncháá sã cánèhe-í quíhíⁿ nduu táhú ñáyi ndècu ichi-gá ndécú ñúú Jerusalén ío váha cuu iní-yu queheⁿ cuendá-yu. 32 Te ducaⁿ càda-ndo cuendá sá núú Yã Ndiõxí ná càchí-gá te ío cudíí iní-í òré quexio-í núú ndécú-ndó, te ío váha cuu iní-í cundecu ndìhi ñaha tnàa xii-ndo. 33 Te vitna xicáⁿ táhú-í núú Yã Ndiõxí Yaá quidé ïo váha cùu iní-ó ndècu-o sá ná chindee chitúu ñaha-gã xii-ndo nchàa-ndo. Te ducaⁿ na cùnduu.

16

Té Pãblú quidé ndèe iní-dé ñáyi ndècu ñúú Ròmá

1 Te yúhú tendaha-í tá Fèbé quixi-xi núú ndécú-ndó, te tnàhá-xi ndècu-xi ichi Xítohó Jesucristú, te quide-xi chiuⁿ Yã Ndiõxí sá cúú-xí ñáyi ndècu ichi Xítohó Jesucristú xĩndecu ñúú Cèncreá. 2 Te cuíní-í sá ïo váha cuu iní-ndó quèheⁿ cuendá-ndó-xí, chi ndècu ndìhi-xi Xítohó Jesucristú, te cada-ndo nàcuáa tàú-xi cunduu dàtná tàú-xi cada ñáyi ndècu ichi-gá, te ío chindee-ndo-xi te núú ná cúú sã xíní ñùhu-xi, chi tnàhá-xi ío chindee-xi cue ñáyi ndècu ichi Xítohó Jesucristú, te tnàhá yúhú ducaⁿ ïo chindee-xi.

3 Te cúñaha-ndo ïo na càda ndee iní té Àquilú ndìhi ñadìhí-dé tá Priscilá, chi ñáyi-áⁿ nĩ quide chiuⁿ-í ndìhí-yu ní quide-ndí chiuⁿ Xítohó Jesucristú. 4 Chi mèe-yu ní cácu cuú-yu sá cuendá sá nĩ dácácu ñáhá-yu xii-í sá nĩ yáha-í, núú xĩáⁿ ío ndàcáⁿ táhú-í núú-yu, te ñá díú-ní yúhú ducaⁿ ïo ndàcáⁿ táhú-í núú-yu chi tnàhá nchaa ñáyi ñá túú cùu ñáyi isràél xĩndecu ichi-gá xĩndecu nchaa xichí ducaⁿ ïo ndàcáⁿ táhú-yu núú tẽ Àquilú ndìhi núú ñadìhí-dé tá Priscilá. 5 Te cúñaha tùcu-ndo sá ïo na càda ndee iní nchaa ñáyi xĩndecu ichi

Xítohó Jesucristú tàcá vehe té Àquilú ndìhi tá Priscilá dácúahá-yu tnúhu-gá, te cúñaha tùcu-ndo sá ïo na càda ndee iní té Epènetú chi tnàhá-dé ío ñùhu iní-í-dé, chi téé-áⁿ cúú-dè téé díhna nuu nĩ sãndáá iní tnúhu Xítohó Jesucristú distritú Acáyá. 6 Te cúñaha tùcu-ndo sá ïo na càda ndee iní tá Màriá xichí ndécú ndìhi-ndo, xichí ío ndècu ndee xinu cuechi núú Xítohó Jesucristú. 7 Te cúñaha tùcu-ndo sá ïo na càda ndee iní cue téé cùu ndi mee-í té Andrónicú ndìhi té Jùniás, chi tnàhá-güedé ní xihí ndìhi ñaha-güedé xii-í vecaá, te ío cùdú-güedé núú nchaa cue téé ní táúchíúⁿ Jèsús cáháⁿ tnúhu-gá. Te díhna-gá-güedé ní sãndáá iní-güedé tnúhu Xítohó Jesucristú dácúúxí yúhú.

8 Te cúñaha-ndo sã ná càda ndee iní té Àmpliás chi tnàhá-dé ío ñùhu iní-í-dé, te ndècu-dé tnàhá-dé ichi Xítohó Jesucristú. 9 Te cúñaha tùcu-ndo xii té Bãnú téé cùndìhi ñaha xii-o quide-o chiuⁿ Xítohó Jesucristú sá ná càda ndee iní-dé, te cúñaha tùcu-ndo xii té Èstaquis sá ná càda ndee iní-dé chi tnàhá-dé ío ñùhu iní-í-dé. 10 Te cúñaha tùcu-ndo xii té Àpelés sá ïo na càda ndee iní-dé, chi téé-áⁿ ïo váha cùndáá-dé núú Xítohó Jesucristú, te cúñaha tùcu-ndo xii ñáyi xĩndecu vehe té Aristóbulú sá ïo na càda ndee iní-yu. 11 Te cúñaha-ndo xii té Heròdión téé cùu ndi mee-í sá ïo na càda ndee iní-dé, te cúñaha-ndo xii ñáyi ndècu ichi Xítohó Jesucristú xĩndecu vehe té Nàrcisú sá ïo na càda ndee iní-yu. 12 Te cúñaha-ndo xii tnàhá tá Trifená ndìhi tá Trifosá sá ïo na càda ndee iní-yu, chi tnàhá-yu quidé-yu chiuⁿ Xítohó Jesucristú. Te tnàhá tá Pèrsidá xichí ndécú ndìhi-o ichi Xítohó Jesucristú cúñaha-ndo xii-xi sá ïo na càda ndee iní-xi, chi tnàhá-xi ío ndècu ndee-xi quide-xi chiuⁿ Xítohó Jesucristú. 13 Te cúñaha-ndo tnàhá té Rũfú téé ío váha sãndáá iní tnúhu Xítohó Jesucristú sá ïo na càda ndee iní-dé ndìhi nãná-dẽ, chi ñaha-áⁿ quidé iní-í sá cúú-áⁿ dàtná nãná-í. 14 Te cúñaha-ndo sã ïo na càda ndee iní té Àsincritú, ndìhi té Flègonté, ndìhi té Hèrmás, ndìhi té Pàtrobás, ndìhi té Hèrmés, ndìhi nchaa dava-gá cue ñáyi ndècu ndìhi-o ichi Xítohó Jesucristú xĩndecu ndìhi-güedé. 15 Te cúñaha tùcu-ndo sá ïo na càda ndee iní té Filológó, ndìhi tá Jüliá, ndìhi té Nèréú, ndìhi

cúha té Nèréú, ndihi tá Òlimpás, ndihi nchaa dava-gá ñáyiú sàndáá iní tnúhu Xítohó Jesucristú xĩndecu ndihí-yu.

16 Te ío yĩñùhu cada ndee iní tnáhá-ndó ññ ññ-ndo. Te nchaa ñáyiú tàcá nchaa iha dàcuaha tnúhu Xítohó Jesucristú quidé ndèe iní ñáhã-yu xii-ndo.

17 Te nchòhó ñáyiú ndècu ndihí-í ichi Xítohó Jesucristú càháⁿ-í dóho-ndo sã cádá cuèndá-ndó nõu ío ñáyiú quide nacuáa vá cúú ññnuu-ndo cundecu-ndo, chi ñáyiú-án sánú ìchi ñahá-yu ññ ichi ñã túú vãha, chi ñã túú ññ-ni cuu-xi tnúhu càháⁿ-yu ndihi tnúhu sã ñĩ níhí-ndó ndècu ndihí-ndo, te ñáyiú ducaⁿ xĩquide vá nihí tnáhá-gã-ndó ndihí-yu. 18 Chi ñáyiú-án ñã túú quidé-yu chiúⁿ sã cúú-xí Xítohó Jesucristú, chi mee-ni sã cúú-xí mèe-yu quidé-yu, te mee-ni nchàa tnúhu sã ío vii ío váha cuáháⁿ càháⁿ-yu òré cuáháⁿ-yu dándahú-yu nchaa ñáyiú ío yáchí sàndáá iní-xi ññ tnúhu. 19 Te nchaa ñáyiú nihí-yu tnúhu sã nchòhó sàndáá iní-ndó tnúhu Xítohó Jesucristú, nõu xĩãⁿ ío cùdĩ iní-í. Te cuiní-í sã nchòhó ío váha cutnùní iní-ndó nàcuáa cada-ndo mèe-ni sã vãha, te vá cání iní-ndó càda-ndo datná xĩquide nchaa ñáyiú ndècu ichi cuehé ichi duha. 20 Te Yá Ndiõxí Yaa quidé ío váha cùu iní-ó ndècu-o ío ndihí cada-gá cuèndá sã sàcuíhná ñã túú-gã ná cada ñaha-xi xii-ndo, te xìcáⁿ táhù-í nõú Xítohó Jesucristú sã ío na chĩndee chitúu ñaha-gã xii-ndo.

21 Te té Timùteú tée quide ndihí-í chiúⁿ Xítohó Jesucristú iha quide ndee iní ñáhã-dẽ xii-ndo, te tnáhã té Lùciú, ndihi té Jàsón, ndihi té Sosipàtér cue tée cùu ndi mee-í quidé ndèe iní ñáhã-güedẽ xii-ndo.

22 Te tnáhã yúhú té Tèrciú tée càdúha tutú-a cuèndá té Pãblú quidé ndèe iní ñáhã-í xii-ndo, chi ññ-ni cùu-o ndihí Xítohó Jesucristú.

23 Te tnáhã té Gãyú tée dii vèhe-xi ndecu-í quidé ndèe iní ñáhã-dẽ xii-ndo, te diu-dé ní taxi nõu-dé vehe tàcá ñáyiú dàcuahá-yu tnúhu Xítohó Jesucristú. Te tnáhã té Èrastú tée yĩndaha díhúⁿ nõú quidé ndèe iní ñáhã-dẽ xii-ndo, te tnáhã té Cuártú tée ndècu ndihí-o ichi Xítohó Jesucristú quidé ndèe iní ñáhã-dẽ xii-ndo.

24 Te xìcáⁿ táhù-í nõú Xítohó Jesucristú sã ío na chĩndee chitúu ñaha-gã xii-ndo nchàa-ndo. Te ducaⁿ na cùnduu.

Cáhãⁿ-ó sã ío càhnu cuu Yá Ndiõxí

25 Te vitna chí ná càchí-ó sã ío càhnu cuu Yá Ndiõxí, chi mee-gã cada te ío-gã cuita níhí ndéé-gã-ndó cùndecu-ndo ichi Xítohó Jesucristú dàtná càchí tnúhu sã càháⁿ nàcuáa naníhí tàhù-ó, tnúhu sã dánèhé-í ñáyiú cuèndá Xítohó Jesucristú, te nchaa tnúhu-a ññ-ni cùu-xi ndihí nchaa tnúhu sã ñĩ cachí Yá Ndiõxí cuu yuhu ndéé cùtnáhã ní ngáva ñuyíú, te vitna ní quee túu-xi, 26 chi mee Yá Ndiõxí ní dátúu-gã nõú-ó vitna, te càháⁿ-ndí nàcuáa ní chídó tnùní cue tée ní xóo càháⁿ tnúhu Yá Ndiõxí ndéé sanaha. Te ducaⁿ tnúhu sã ndúú yùhu ni cuu ta xíté nuu-xi nihí ñuyíú cuáhãⁿ, chi ducaⁿ ñĩ cachí Yá Ndiõxí Yaa ndécú nchàa nduu nchaa quíú cunduu cuèndá sã quĩndáá iní ñáhã ñáyiú xii-gã, te tnĩ-yu nchaa tnúhu càháⁿ-gã.

27 ¡Te ññ-dii-ni Yá Ndiõxí cúú-gã Yaa ío sàá sã xìní tnùní-xi! ¡Te nchaa-o chí ná càchí-ó sã ío càhnu cuu-gã, chi ndècu ndihí-o Xítohó Jesucristú, te ducaⁿ-ni càda-o ni caa ni quíhí! Te ducaⁿ na cùnduu. Te ío chí cádá ndèe iní-ñã vitna.

TUTÚ DÍHNA NUU NÍ CADÚHA TÉ PÄBLÚ QUIHⁿ NDAHA ÑÁYIU ÑUÚ CÒRINTÚ

Té Päblú cadúha-dé tutú quíhⁿ ndaha ñáyi ndècu ichi Xítoho Jesucristú ndécú ñúú Còrintú

¹ Yúhú té Päblú ní cáháⁿ ñáhá Yă Ndiöxí xii-í cuendá sá cáháⁿ-í tnúhu Xítoho Jesucristú núú ñáyi, chi ducaⁿ ní cachí Yă Ndiöxí cunduu. Te cadúha-í tutú-a ndíhi té Söstenés té ndècu ndíhi-o ichi Xítoho Jesucristú ² cuendá daquixi-í ndaha nchòhó ñáyi ndècu ichi Yă Ndiöxí ndécú ñúú Còrintú, chi nchòhó cúu-ndó ñáyi cùu cuendá Yă Ndiöxí cuendá sá ndécú ndíhi-ndo Xítoho Jesucristú. Te diu-ni-ndo cùu-ndo ñáyi ní cáháⁿ ñáhá Yă Ndiöxí cuendá cundecu yíñuhu-ndo núú-gă, ndíhi nchaa dava-gă ñáyi ndècu nchaa xichi, ñáyi cachí sá ïo càhnu cuu Xítoho Jesucristú. Te Yaá-áⁿ cúu-gă Xítoho-yu, te diu-ni-gă cúu-gă Xítoho nchoo tucu. ³ Te xicáⁿ tãhù-í núú Tãtã-ó Dütú Ndiöxí ndíhi núú Xítoho Jesucristú sá ndi nduú-gă ïo na chindee chitúu ñaha-gă xii-ndo, te ïo váha cuu iní-ndó cundecu-ndo.

Yă Ndiöxí ïo chindee ñaha-gă xii-o cuendá sá ndécú-ó ndíhi Xítoho Jesucristú

⁴ Te ducaⁿ-ni ïo ndácáⁿ tãhù-í núú Yă Ndiöxí cuendá-ndó, chi mee-gă ïo chindee chitúu ñaha-gă xii-ndo sá cuendá Xítoho Jesucristú. ⁵ Te cuendá sá ndécú-ndó ndíhi Xítoho Jesucristú, núú xiãⁿ Yă Ndiöxí ïo chindee ñaha-gă xii-ndo sáá díquí-ndó nàcuáa cáháⁿ-ndó, ndíhi nàcuáa cùtnuní iní-ndó, ⁶ chi tnúhu sá ni ñíhí-ndó cuendá Xítoho Jesucristú ní quée-xi iní-ndó. ⁷ Te xiãⁿ núu nchaa sá váha ñá túu tnàhí cùmání xii-ndo chi Yă Ndiöxí ïo chindee ñaha-gă. Te ducaⁿ quide-gă ñini nchòhó ñi yùhu ñi iní-ndó ndètu-ndo sáá nduu quixi tucu Xítoho Jesucristú. ⁸ Te Yă Ndiöxí ducaⁿ-ni ïo chindee ñaha-gă xii-ndo cuendá sá vă yô teñaha cuèchi nduu na quixi tucu Xítoho Jesucristú. ⁹ Te nchaa sá cáháⁿ Yă Ndiöxí

dacutíi quide-gă, te diu-gă cúu-gă Yaá ní cáháⁿ ñáhá xii-ndo cuendá cuu ñⁿnuu-ndo ndíhi Déhe-gă Xítoho Jesucristú Yaá cúu Xítoho-ó.

Ñá túu cùu ñⁿnuu ñáyi ndècu ichi Xítoho Jesucristú

¹⁰ Te nchòhó ñáyi ndècu ndíhi-í ichi Xítoho Jesucristú cáháⁿ-í dóho-ndo sá vă ndí díⁿ càni iní-ndó, te ïo cuu ñⁿnuu-ndo cundecu-ndo, te ñⁿ-ni càni iní-ndó, te ñⁿ-ni càda-ndo chi ducaⁿ cuini-gă cunduu. ¹¹ Te duha cáháⁿ-í dóho nchòhó ñáyi ndècu ndíhi-í ichi Xítoho Jesucristú, chi cue ñáyi vehe té Clòé ní cachí tnúhu-yu xii-í sá ñá túu cùu ñⁿnuu-ndo ndècu-ndo. ¹² Te duha nduu tnúhu ní ñíhí-í nàcuáa cùu ndècu-ndo, chi dava-ndo cachí-ndó: “Yúhú cúu-í cuendá té Päblú.” Te dava-ndo cachí-ndó: “Yúhú cúu-í cuendá té Àpolós.” Te dava-ndo cachí-ndó: “Yúhú cúu-í cuendá té Pèlú.” Te dava tucu-ndo cachí-ndó: “Yúhú cúu-í cuendá Xítoho Jesucristú”, duha cachí-ndó. ¹³ Te vá dúcáⁿ cáháⁿ-ndó chi ñá túu ñá daha Xítoho Jesucristú ndécú chi ñⁿdíi-ni-gă. Te ñá díú yùhú té Päblú ní xíhí-í núú cùrúxí sá cuendá-ndó, te ñi ñá túu ní sandute-ndo cuendá sá yùhú cuu cuendá ñáhá-í xii-ndo. ¹⁴ Te táxãhu xii Yă Ndiöxí chi ñá díú nchaa-ndo ni dacuandute-í, chi té Crispú-ni ndíhi té Gãyú-ni ní dácúandute-í-güedé. ¹⁵ Te xiãⁿ núu vá cúu tnàhí cáháⁿ-ndó sá ñi sandute-ndo sá cúu cuendá ñáhá-í xii-ndo. ¹⁶ Te ní ndacu tucu iní-í sá tnàhá tucu ñáyi cùu ndi mee té Estéfanas ní dácúandute-í, te diu-ná ñáyi-áⁿ te sànuu sá ñá túu-gă nágá ñáyi ni dácúandute-í. ¹⁷ Te Xítoho Jesucristú ñá túu ní tendaha ñaha-gă xii-í sá dácúandute-í ñáyi, chi ní tendaha ñaha-gă xii-í sá cáháⁿ-í tnúhu-gă núu-yu, tnúhu sá cáháⁿ nàcuáa naníhí tãhú-ó. Te ñá túu cáháⁿ-í dàtná cáháⁿ ñáyi túha. Te ducaⁿ quide-í cuendá sá nchòhó quindáa váha iní-ndó tnúhu sá cáháⁿ nàcuáa ní xíhí Xítoho Jesucristú núú cùrúxí. Chi núu na cáháⁿ-í dàtná cáháⁿ ñáyi túha te nchòhó vá quindáa iní-ndó tnúhu-áⁿ nàcuáa tàú-xi cunduu.

Sá cuendá Xítoho Jesucristú cùtnuní iní-ó sá ïo càhnu cuu Yă Ndiöxí

¹⁸ Te nchaa ñáyi ta xíta ñihnu cuáháⁿ cachí-yu sá ñá túu nandíhi tnúhu sá cáháⁿ

nàcuáa ní xíhí Xítóhó Jesucrístú núú cùrúxí, dico sá cúú-xí nchòo ñáyiú sa ní naníhí tàhú, chi tnúhu-áⁿ cúú-xí ñⁿ tnúhu sá ñí taxi Yá Ndiòxí ndécú ndìhi-o cuendá ndacu-gá cada-gá nchaa nàcuáa cuìní-gá iní-ó, ¹⁹ te quèe ndáá-xi nàcuáa càháⁿ-gá núú tütú-gá núú càchí-xi:

Yúhú cada-í te nchaa ñáyiú túha vá nándíhi-gá nchaa sá xìní tnùní-yu, te nchaa ñáyiú ío váha sàá díquí-xi vá nándíhi-gá nchaa nàcuáa sàni iní-yu. Duha càchí Yá Ndiòxí núú tütú-gá.

²⁰ Te xíáⁿ cútnùní iní-ó sá ncháá ñáyiú sàni iní-xi sá ìo túha ndècu ñuyíú-a, ndìhi nchaa cue téé dàcuaha ñaha xíi-yu nchaa tnúhu ní chídó tnùní ndí Moisés, ndìhi nchaa ñáyiú ío váha sàá díquí-xi càháⁿ cuendá nchaa sá ío ñuyíú-a, te nchaa ñáyiú-áⁿ càchí Yá Ndiòxí sá ñà túú nándíhi nchaa sá xìní tnùní-yu sá cúú-xí-gá. ²¹ Te Yá Ndiòxí ío váha cùtnuní iní-gá nàcuáa quide-gá, chi ñá túú dàña-gá cundecu ndìhi ñáhá-yu xii-gá sá cuendá nchaa sá ñí sáá díquí méé-yu, te ducaⁿ quide-gá chi cuìní-gá sá cùndèdóho-yu tnúhu sá sání iní-yu ñá túú nándíhi. Te sá cuendá tnúhu-áⁿ te naníhí tàhú-yu te núu na quíndáá iní ñáhá-yu xii-gá.

²² Te cue ñáyiú isràél cuìní-yu quini-yu sá vǎ yòo tnàhí ndàcu cada, te cue ñáyiú grìégú nchìcúⁿ nihnú-yu nchaa sá dácuàha ñáyiú ío túha. ²³ Dico nchoo yìhi-o càháⁿ-ó núú ñáyiú sá Xítóhó Jesucrístú ní xíhí-gá núú cùrúxí. Te cue ñáyiú isràél ñá túú tnàhí tnàhá iní-yu cundèdóho-yu tnúhu-áⁿ. Te cue ñáyiú ñá túú cùu ñáyiú isràél càchí-yu sá ñà túú vèdana nándíhi tnúhu-áⁿ. ²⁴ Dico sá cúú-xí nchaa ñáyiú ní càháⁿ ñáhá Yá Ndiòxí chi cuèi cùu-yu ñáyiú isràél àdi ñá túú cùu-yu, dico ñáyiú-áⁿ càchí-yu sá sǎ cuendá Xítóhó Jesucrístú cútnùní iní-yu sá ìo càhnu cuu Yá Ndiòxí te ndècu ndìhi-gá nchaa sá xìní tnùní-gá. ²⁵ Te sá quidé Yá Ndiòxí càchí ñáyiú ñuyíú-a sá ñà túú nándíhi, dico xíáⁿ ío-gá nándíhi dàcúúxí sǎ sání iní méé-yu. Te sá ñí xíhí Xítóhó Jesucrístú núú cùrúxí, xíáⁿ càchí ñáyiú sá ñá túú ní ñíhí ndéé Yá Ndiòxí cada-gá sá ñí sani iní-gá cada-gá. Dico sá dúcáⁿ ñí

quide Yá Ndiòxí, xíáⁿ cúú-xí sǎ ìo-gá ní ñíhí ndéé-gǎ ní quide-gá ñⁿ sá ñí sani iní-gá dàcúúxí sǎ sání iní méé ñáyiú ñuyíú-a. ²⁶ Te nchòhó ñáyiú ndècu ndìhi-í ichi Xítóhó Jesucrístú, chí dándàcu iní nàcuáa ndècu-ndo cútnàhá ní càháⁿ ñáhá Yá Ndiòxí xii-ndo, chí sacú-ni-ndo túha dàcúúxí ñáyiú ñá túú ndècu ichi-gá. Te ducaⁿ sàcú-ni-ndo tàxi tnuní-ndó, te ñu-ni ducaⁿ sàcú-ndó nèhe ñáyiú sá yíñùhu núú-ndó. ²⁷ Te ñáyiú ñá túú ndècu ichi Yá Ndiòxí càchí-yu sá ñà túú tnàhí túha dava-gá tnàha ñáyiú-yu, dico dava ñáyiú ñá túú túha-áⁿ càháⁿ ñáhá Yá Ndiòxí xii-yu cundecu-yu ichi-gá, te cundecu ndìhi ñaha-gǎ xii-yu, te ducaⁿ dándóo canúú-yu nchaa ñáyiú càchí sá ìo túha. Te càháⁿ tucu-gá ñáyiú càchí dava-gá ñáyiú sá ñà túú tnàhí tàú cunuu cundecu-yu ichi-gá, te ducaⁿ cundecu ndìhi ñaha-gá xii-yu, te dándóo canúú-yu nchaa ñáyiú càchí sá táxi tnùní. ²⁸ Te ducaⁿ Yá Ndiòxí càháⁿ-gá ñáyiú ñá túú tnàhí cunuu cundecu ndìhi-gá, ndìhi ñáyiú quèe tìhú núú dàva-gá tnàha ñáyiú-xi, ndìhi ñáyiú càchí-yu sá ñà túú vèdana nándíhi, nchaa ñáyiú-áⁿ càháⁿ-gá cundecu ndìhi-gá, te ducaⁿ quide-gá cuendá dándóo canúú-yu nchaa ñáyiú càchí sá ìo cunuu. ²⁹ Te núu xíáⁿ ní ñⁿ ñáyiú vá cúú càchí-yu sá ìo càhnu cuú-yu núú Yá Ndiòxí. ³⁰ Dico nchòhó chi mee Yá Ndiòxí ní quide-gá ndécú-ndó ndìhi Xítóhó Jesucrístú, te Xítóhó Jesucrístú ní quide-gá ní cutnùní iní-ó sǎ Yá Ndiòxí cúú-gǎ Yaá ndécú ndìhi nchaa sá xìní tnùní-gá. Te ñu-ni Xítóhó Jesucrístú ní quide-gá cuendá sá nchóo vǎ cùndècu-gá cuèchi-o núú Yá Ndiòxí, te ducaⁿ cundecu yíñùhu-o núú-gǎ, te nduu táhú-ó cundecu-o ndìhi-gá ní caa ní quíhíⁿ. ³¹ Te sá dúcáⁿ quide-gá núu xíáⁿ xíní ñùhu-xi cada-o nàcuáa càháⁿ-xi núú tütú Yá Ndiòxí núú càchí-xi: “Vá càchí-ndó sǎ méé-ndó ìo càhnu cuu-ndo, chí cachí-ndó sǎ Yáá cúú Xítóhó-ndó ìo càhnu cuu-gǎ”, duha càchí-xi núú tütú-gá.

2

Tnúhu sá càháⁿ nàcuáa ní cuu ní xíhí Xítóhó Jesucrístú núú cùrúxí

¹ Te nchòhó ñáyiú ndècu ndìhi-í ichi Xítóhó Jesucrístú sa nàha-ndo sá cùtnàhá ní

quixi-í ní cáháⁿ-í tnúhu Yá Ndiöxí núú-ndó, te ñá túú ní cáháⁿ-í dàtná cáháⁿ ñⁿ ñáyiú ío váha sàá díquí-xi, àdi datná cáháⁿ ñⁿ ñáyiú ío túha. ² Chi cútnàhá ní xíndecu ndìhi ñaha-í xii-ndo chi ní sani iní-í sá méé-ní cuèndá Xítohó Jesucristú cáháⁿ-í núú-ndó ndìhi nacuaá ní cuu ní xíhí-gá, te ñu ducaⁿ ñí guide-í. ³ Te cútnàhá ní quexìo-í núú ndécú-ndó te ni ñá cútnuní iní-í nása cada-í ní cùu, te ío ní quíyùhú iní-í ní cáháⁿ-í tnúhu-gá núú-ndó. ⁴ Te cútnàhá ní cáháⁿ-í nàcuáa ndùu tnúhu Xítohó Jesucristú núú-ndó, te nàha-ndo sá Espiritú Yá Ndiöxí ní chindee ñàha-xi xii-í ní cáháⁿ-í tnúhu-gá núú-ndó, te tnúhu-áⁿ ñí quée-xi iní-ndó. Te ñá túú ní cáháⁿ-í ñⁿ tnúhu càhnu núú-ndó tnúhu sá cáháⁿ cue ñáyiú ío váha sàá díquí-xi. ⁵ Te ducaⁿ ñí cuu cuèndá sá nchòhó quíndáá iní-ndó tnúhu Yá Ndiöxí chi ní guide-gá sá vâha sá cúú-xí iní-ndó, te ñá díú sá cuèndá tnúhu sá cáháⁿ ñáyiú càchí sá ío túha ducaⁿ ñí sándáá iní-ndó tnúhu-gá.

Espiritú Yá Ndiöxí quidé-xí cùtnuní iní-ó nàcuáa sàni iní-gá

⁶ Te nchoo cáháⁿ-ó tnúhu càhnu núú ñáyiú sa ní níhí ndéé ndècu ichi Xítohó Jesucristú. Te tnúhu-áⁿ ñá túú cáháⁿ ñáyiú ñá túú ndècu ichi-gá, te ni cuè téé yíndaha ñaha xii-yu ñá túú cáháⁿ-güedé tnúhu-áⁿ chi cue téé-áⁿ naa-güedé. ⁷ Te tnúhu càhnu-áⁿ cúú-xí tnúhu Yá Ndiöxí, te mee-gá ní cachí-gá ndéé cútnàhá vátá ngáva-gá ñuyíú sá ncháá ñáyiú na quíndáá iní tnúhu-áⁿ te nduu táhù-yu cundecú-yu ndìhi-gá núú ío váha càa ndecu-gá ñí caa ñí quíhíⁿ. Te tnúhu-áⁿ ndúú yùhu-xi ni cuu. ⁸ Te ni ñⁿ cue téé yíndaha cue ñáyiú ñuyíú-a ñá túú tècú tnùní-güedé tnúhu-áⁿ, chí núu dícó tècú tnùní-güedé tnúhu-áⁿ te vá cátá càa-güedé Xítohó Jesucristú núú cùrúxí cahni ñaha-güedé xii-gá ní cùu. Te ñu-ni Yaá-áⁿ ío càhnu cuu-gá. ⁹ Dico ducaⁿ ñí cuu chi ní quee ndáá-xi nàcuáa cáháⁿ-xi núú tütú Yá Ndiöxí núú càchí-xi:

Yá Ndiöxí sa ní sani iní-gá nchaa nàcuáa cada-gá sá cúú-xí cuèndá nchaa ñáyiú cùu iní ñáhá xii-gá.

Te sá ñí sani iní-gá cada-gá cúú-xí sá vátá quíni-gá ñáyiú te ni vátá cùndèdóho-gá-yu, te ni ñá túú tnàhí cùtnuní iní-yu nása cada-gá.

Duha càchí-xi núú tütú-gá. ¹⁰ Te mee Yá Ndiöxí ní cachí-gá sá Espiritú-gá cada-xi te nchoo cùtnuní iní-ó nchaa nacuaá sàni iní-gá cada-gá, núu xiáⁿ ducaⁿ tècú tnùní-ó vítna, chí Espiritú-gá xini-xi nchaandi túhú nàcuáa sàni iní-gá cada-gá.

¹¹ Te ñá ñⁿ ñáyiú xini ndáá-yu nàcuáa sàni iní ingá ñáyiú, chí mee ñáyiú-áⁿ xini ndáá-yu nchaa nàcuáa sàni iní-yu. Te ducaⁿ sátnahá-xi cùu Yá Ndiöxí chí medii-ni Espiritú-gá xini-xi nchaa nàcuáa sàni iní-gá. ¹² Te nchoo chí Yá Ndiöxí ní taxi-gá Espiritú-gá ndécú ndìhi-o, te ñá díú ñuyíú-a ducaⁿ ñí quée espiritú ní ngúndecu ndìhi-o. Te ducaⁿ ñí taxi-gá Espiritú-gá ndécú ndìhi-o cuèndá ducaⁿ cùtnuní iní-ó nàcuáa ndùu nchaa sá vâha sá dícó ducaⁿ ñí taxi-gá ndécú ndìhi-o. ¹³ Te cuèndá nchaa sá vâha-áⁿ cáháⁿ-ndí, te cáháⁿ-ndí nàcuáa dàcahu iní ñáhá Espiritú Yá Ndiöxí xii-ndí, te ñá túú cáháⁿ-ndí nàcuáa càhu iní ñáyiú ñuyíú-a cáháⁿ-yu, te ñu-ni nchaa tnúhu dàcahu iní ñáhá Espiritú-gá xii-ndí cáháⁿ-ndí, ñu-ni nchaa xiáⁿ dánèhé-ndí nchaa ñáyiú ndècu ndìhi tucu Espiritú-gá.

¹⁴ Te ñáyiú ñá túú ndècu ndìhi Espiritú Yá Ndiöxí ñá túú tnàhá iní-yu nàcuáa ndùu tnúhu dàcècú tnúhu ñaha Espiritú-gá xii-yu, te ni ñá túú tècú tnùní-yu, te càchí-yu sá ñá túú nàndíhi-xi. Te ducaⁿ chí mee-ni nchaa ñáyiú ndècu ndìhi Espiritú-gá tècú tnùní-yu nàcuáa ndùu tnúhu-áⁿ. ¹⁵ Te cue ñáyiú ducaⁿ ndècu ndìhi Espiritú Yá Ndiöxí cùtnuní ndáá iní-yu ná cúú nchaa sá vâha, te vá yõo ñⁿ xini nchaa nàcuáa sàni iní-yu. ¹⁶ Te núú tütú Yá Ndiöxí càchí-xi: “Vá yõo ñⁿ xini nàcuáa sàni iní Yá Ndiöxí, núu xiáⁿ vá yõo ñⁿ ndacu ná danèhé ñáhá xii-gá”, duha càchí-xi núú tütú-gá. Te nchoo chí ñⁿ-ni sàni iní-ó ndìhi Xítohó Jesucristú.

3

Cue téé xíquide chiùn Yá Ndiöxí

¹ Te nchòhó ñáyiú ndècu ndìhi-í ichi Xítohó Jesucristú càchí tnúhu-í xii-ndo sá

ñã ní ñhì-í nàcuáa cada-í cáháⁿ-í tnúhu-gá núú-ndó dàtná càháⁿ-í núú nchàa ñáyiú quide nchaa nacuáa càháⁿ Espiritú Yá Ndiöxí, chi ní cáháⁿ-í núú-ndó dàtná càháⁿ-í núú nchàa ñáyiú cùnnu nchaa sá cuèhé sá dúhá ìní-xi, te ní quide ñaha-í xii-ndo dàtná cue ñáyiú íchí ñí sándáá ìní tnúhu Xítohó Jesucristú, núú xiãⁿ ducaⁿ ñí cáháⁿ-í núú-ndó. ² Te ní quide ñaha-í xii-ndo dàtná ìⁿ déhe yiquiⁿ vitna sadi camá, te ñá túú ní quide ñaha-í xii-ndo dàtná cue landú sa xèxi díta, chi ní dánèhé ñáhà-í xii-ndo ìⁿ sá ñà túú tnàhí úhú tecú tnùnì-ndó, te ñá túú ní dānehé ñáhà-í xii-ndo ìⁿ sá xítò-í sá vā tècú tnùnì-ndó. Te quide cuendá-í sá díú-ní dùcaⁿ vā tècú tnùnì-ndó ndèé vitna te núu na dānehé ñáhà-í xii-ndo nchàa dava-gá tnúhu. ³ Te ducaⁿ chi quide-ni-ndo nacuáa sàni ìní mée-ndó, chi ndècu-ni-ndo ichi cuédú ìní, te nàá ndihì tnàha-ni-ndo, te ñá túú tnàhí cùu ìⁿnuu-ndo ndècu-ndo. Te xiãⁿ cútnùnì sá mée-ní nchàa nacuáa sàni ìní mée-ndó quide-ndo, te xiquide-ndo dàtná quidé nchàa ñáyiú ñá túú ndècu ichi Xítohó Jesucristú. ⁴ Te dava-ndo càchì-ndó: “Yúhú cùu-í cuendá té Pāblú.” Te dava-ndo càchì-ndó: “Yúhú cùu-í cuendá té Àpolós”, duha càchì-ndó. Te sá dúcáⁿ càháⁿ-ndó xiãⁿ cútnùnì sá quidé-ní-ndó mée-ni nchaa nacuáa sàni ìní mée-ndó.

⁵ Te yúhú té Pāblú càchì tnúhu-í xii-ndo sã ñà túú cùnnu-í, te ní té Àpolós ñá túú cùnnu-dé chi dicó cue téé xínu cuechi núú Yá Ndiöxí cùu-ndí, te ní cáháⁿ-ndí tnúhu-gá núú-ndó, núú xiãⁿ ní sándáá ìní-ndó. Te ndí díⁿ ndí díⁿ ndùu chiuⁿ ní táhú Yá Ndiöxí cada-ndí. ⁶ Te yúhú cùu-í dàtná ìⁿ téé chihì tatá chi dàcaháⁿ ñáhà-í xii-ndo tùha-ndo ichi Yá Ndiöxí. Te té Àpolós cùu-dé dàtná ìⁿ téé nàcuhñu chi téé-áⁿ ndécú-dé dánèhé ñáhà-dé xii-ndo tnúhu-gá. Te Yá Ndiöxí cùu-gã Yaá quidé sàhnu tatá ní chihì-í-áⁿ, te duha càháⁿ-í chi ñiu-gá quidé-gã tá ñihí ndéé-ndó ndècu-ndo ichi-gá. ⁷ Te núú xiãⁿ ní téé chihì tatá te ní téé nàcuhñu ñá túú cùnnu-güedé, dico Yá Ndiöxí ío cùnnu-gá chi ñiu-gá quidé-gã xínu tatá-áⁿ te sàhnu-xi. ⁸ Te ìⁿ-ní cùu téé chihì tatá ndihì téé nàcuhñu. Te ducaⁿ sãtnahá-xi cùu nchúhú cue téé xiquide chiuⁿ Yá Ndiöxí, te nàcuáa ndùu chiuⁿ ní quide-ndí te ducaⁿ cùnduu táhú taxi Yá Ndiöxí nduu táhú-ndí. ⁹ Te nchòhò

cùu-ndó dàtná ìⁿ xichi núú ñí quée tatá, te nchúhú cùu ìⁿnuu-ndí quidé chiuⁿ-ndí xiãⁿ. Te ducaⁿ sãtnahá-xi cùu-ndo chi cùu cuendá ñáhà Yá Ndiöxí xii-ndo, te nchúhú cùu ìⁿnuu-ndí quidé-ndí chiuⁿ-gá.

Te cùu tucu-ndo datná ìⁿ vehe sá vítná sáá, te ducaⁿ sãtnahá-xi cùu-ndo chi Yá Ndiöxí quidé-gã tá sàhnu nihnu-ndo ichi-gá cuáháⁿ. ¹⁰ Te yúhú cùu-í dàtná ìⁿ téé cùnnu dacia vehe te ní tava-í cimièntú-xi, te ñⁿ cue téé véxi dàcaa-güedé ndóho, te ìⁿ ìⁿ cue téé-áⁿ ío xini ñuhu-xi cada cuendá-güedé nàcuáa dacaa-güedé. Núu ducaⁿ sãtnahá-xi cùu yúhú chi Yá Ndiöxí ní taxi-gá chiuⁿ quide-í te chindee ñaha-gá, chi díhna-gá-í ní quixi-í ní cáháⁿ-í tnúhu Xítohó Jesucristú núú-ndó, te ñⁿ cue téé véxi dàcuaha ñaha-ná xii-ndo tnúhu-gá, te ìⁿ ìⁿ cue téé-áⁿ ío xini ñuhu-xi cada cuendá-güedé nàcuáa dacuaha ñaha-güedé xii-ndo tnúhu-gá. ¹¹ Te cimièntú vehe-áⁿ cada ìní-ó sã cùu-xí mée Xítohó Jesucristú, te ducaⁿ chi yúhú ní dánèhé ñáhà-í xii-ndo ñí ngúndecu ndihì-ndo Xítohó Jesucristú, te vā yõ-gá cundecu ndihì-ndo chi ìⁿdií dí-í-gã ndécú. ¹² Te dava cue téé dàcaa-güedé vehe váha te chihì-güedé díhúⁿ cuááⁿ, ndihì díhúⁿ cuixíⁿ, ndihì yúú sã ío vii cãa. Te dava-güedé dácaa-güedé vehe vítú, te dava-güedé dácaa-güedé vehe ité, te dava-güedé dácaa-güedé vehe tnuvixiⁿ. ¹³ Te sáá nduu te nchaa vehe-áⁿ càyú-xi, te vehe vítú-ãⁿ ndihì vehe ité-áⁿ ndihì vehe tnuvixiⁿ-áⁿ ndoo ndoo càyú, te nchaa vehe váha-áⁿ vā càyú-xi cuèi na yãha ñuhú. Te nchaa cue téé ní dácaá vèhe váha-áⁿ cada ìní-ó sã cùu-güedé ñáyiú ío váha quide chiuⁿ Yá Ndiöxí. Te nchaa cue téé ní dácaá vèhe vítú, ndihì cue téé ní dácaá vèhe ité, ndihì cue téé ní dácaá vèhe tnuvixiⁿ cada ìní-ó sã cùu-güedé ñáyiú ñá túú cuíni cada chiuⁿ Yá Ndiöxí nàcuáa tàú-xi cunduu. Te sáá nduu te cutnùnì nàcuáa ndùu chiuⁿ ní quide ìⁿ ìⁿ ñáyiú, chi Yá Ndiöxí cáháⁿ-gá nàcuáa ndùu chiuⁿ ní quide ìⁿ ìⁿ ñáyiú ní quide chiuⁿ-gá. ¹⁴ Te cue ñáyiú ío váha xiquide chiuⁿ Yá Ndiöxí te cùdí chiuⁿ quidé-yu, te ñáyiú-áⁿ ñihí-yu sá ndúú tãhú-yu. ¹⁵ Te cue ñáyiú ñá túú quide chiuⁿ Yá Ndiöxí nàcuáa tàú-xi cunduu, te vā cùdí chiuⁿ ní quidé-yu chi cuíta te ndóo-ná-yu duha, dico mée-yu

chi naníhí tàhú-yu.

¹⁶ Te yúhú càháⁿ-í dóho-ndo dándacu-í iní-ndó sá cúú-ndó dàtná vehe Yá Ndiöxí, chi Espíritú-gá ndécú ndìhì ñaha-xi xii-ndo.

¹⁷ Te núu yoo na dànaa ñaha xii nchohó ñáyiu cùu veñúhu-gá, te Yá Ndiöxí danàa ñaha-gá xii ñáyiu-án, te ducaⁿ càda-gá chi nchòhó cúú-ndó ñáyiu cùu cuendá-gá.

¹⁸ Te vá dándàhú-ndó mèe-ndo sá ïo túha-ndo. Te núu ío dava-ndo sàni iní-ndó sá túha-ndo dàtná sání iní cue ñáyiu ñá túú ndècu ichi Yá Ndiöxí, te cada-ndo sá cúú-ndó dàtná ñáyiu ñá túú tnàhí túha, te ducaⁿ te cuu ndisa-ndo ñáyiu túha sá cúú-xí Yá Ndiöxí.

¹⁹ Te nchaa sá xini tnùnì nchaa ñáyiu càchí sá ïo túha ñá túú ndècu ichi Yá Ndiöxí ñá túú nàndíhì-xi sá cúú-xí-gá. Te càchí-xi núú tütú-gá: “Nchaa ñáyiu càchí sá ïo túha te Yá Ndiöxí dandòo canúú ñáhá-gá xii-yu núú nchaa sá quidè-yu”, duha càchí-xi núú tütú-gá. ²⁰ Te càchí tucu-xi ìngá xichi: “Yá Ndiöxí cùtnùnì iní-gá nchaa nàcuáa sàni iní ñáyiu càchí sá ïo túha. Te nchaa nàcuáa sàni iní-yu-án càchí-gá sá ñà túú vèdana nàndíhì-xi”, duha càchí-xi núú tütú-gá. ²¹ Núu xiáⁿ càháⁿ-í dóho-ndo sá vã càchí-ndó sá nchùhú cue téè dānehé ñáhá xii-ndo tnúhu-gá ío càhnu cuu-ndí. Te nchaa sá ío ñuyíú-a cùu-xi sá vãha sá cúú-xí-ndó. ²² Te cuèi yúhú ndìhì té Àpolós ndìhì té Pèlú ndécú-ndí sá cúú-xí-ndó, te cuèi nchaa sá ío ñuyíú-a te cuèi nchaa nduu ndècu-ndo te cuèi sá cùú-ndó dico nchaa cùu-xi sá vãha sá cúú-xí-ndó. Te cuèi nchaa sá ndécú tnàvìí, te cuèi nchaa sá cóo ndèè cuèé-gá nchaa cùu-xi sá vãha sá cúú-xí-ndó. ²³ Te mee-ndo ndècu-ndo sá cúú-xí Xítóhó Jesucristú, te mee Xítóhó Jesucristú ndécú-gá sá cúú-xí Yá Ndiöxí.

4

Nàcuáa ndùu chiuⁿ quide cue téè ní táuchíúⁿ Xítóhó Jesucristú càháⁿ tnúhu-gá

¹ Te cada cuendá-ndó sá nchùhú dícó-ni cue téè xinu cuechí núú Xítóhó Jesucristú cúú-ndí, te chiúⁿ-án ní taxi Yá Ndiöxí quidé-ndí càháⁿ-ndí tnúhu sá ní cachí-gá yíyùhu ni cuu. ² Te xini ñuhu-xi sá ncháá ñáyiu ducaⁿ ní sáñaha Yá Ndiöxí chiúⁿ quidé-yu cada ndáá-yu cadá-yu chiúⁿ-án.

³ Te yúhú ñá túú quide cuendá-í núu nása ndùu tnúhu càháⁿ-ndó cuendá-í núu cùu-í téè vãha àdi ñá túú cùu-í. Te diu-ni ducaⁿ ñà túú quide cuendá-í núu nása-gá càháⁿ nchaa dava-gá ñáyiu cuendá-í. Te ni mèe-í ñá túú càháⁿ-í núu cùu-í téè vãha àdi ñá túú cùu-í. ⁴ Te sànuu iní-í sá ñà túú nã cúmãní-í núú Yá Ndiöxí, dico ñá díú sá xiãⁿ te cachí-í sá ñá túú cuèchi-í ndécú núú-gá, chi mee-gá náhá ndáá-gá te núu nása quide-í ndécú-í.

⁵ Te nchòhó vá càháⁿ-gá-ndó sá ñà túú cùndáá ñáyiu núú Yá Ndiöxí, chi vátá sàá-gá nduu cùndáá cuèchi-yu. Te na sàá nduu quixi tucu Xítóhó Jesucristú te dàvá-án dàtúu-gá nchaa sá quidè-yu, nchaa sá ñà túú xini-ó quidé-yu vitna, te ducaⁿ dàtúu-gá nchaa nàcuáa sàni iní-yu. Te Yá Ndiöxí càháⁿ vãha-gá cuendá nchaa ñáyiu ní quide vãha.

⁶ Te nchòhó ñáyiu ndècu ndìhì-í ichi Xítóhó Jesucristú, càcunehé-í té Àpolós ndìhì yúhú núú-ndó dānehé ñáhà-í xii-ndo nàcuáa cada-ndo cuendá ducaⁿ cùu-xi ìⁿ sá vãha sá cúú-xí-ndó, ndìhì cuendá sá nchòhó canchicúⁿ nihnu-ndo càda-ndo mee-ni nchaa nàcuáa yòdo tnùnì núú tütú Yá Ndiöxí. Te ducaⁿ te vá càchí-ndó sá ìⁿ téè càháⁿ tnúhu Yá Ndiöxí ío-gá càhnu cuu-dé dàcúxí ìngá-dé. ⁷ Te nchòhó vá càchí-ndó sá ïo-gá cùnùu-ndo dacúxí dàva-gá ñáyiu chi Yá Ndiöxí ní quide-gá ní ngúndecu ndìhì-ndo nchaa sá xini tnùnì-ndó. Te mee-gá ducaⁿ ní quide-gá ¿Te ná cuendá nchòhó ducaⁿ quide cahnu-ndo mee-ndo? Te quide-ndo dàtná tnúhu sá méé-ndó ní quide-ndo dùcaⁿ ní ngúndecu ndìhì-ndo nchaa sá xini tnùnì-ndó.

⁸ Te nchòhó quidé-ndó sá ñà túú tnàhí-gá ná cúmãní-ndó núú Yá Ndiöxí, te quide-ndo sá ní ñíhí-ndó nchaa sá cuínì-ndó núú-gá ndécú ndìhì-ndo, te sànuu sá cúú-nã-ndó dàtná cue téè yìndaha ñáyiu, te nchùhú ñá túú cùu ìⁿnuu ndìhì ñaha-ndí xii-ndo quìndaha ndìhì ñaha-ndí xii-ndo ñáyiu, ìte vãha-ni te núu dícó ndisa sá yìndaha-ndo ñáyiu chi tnàhá nchùhú ní tnahá ndìhì ñaha-ndí xii-ndo quìndaha-ó-yu te núu dícó cúú-xi ìⁿ sá ndáá dico ñáhá! ⁹ Te yúhú quidé cuendá-í sá nchùhú cue téè ní táuchíúⁿ Xítóhó Jesucristú càháⁿ tnúhu-gá núú ñáyiu ní cachí Yá Ndiöxí sá cúú-ndí cue téè ñá túú

nàndíhi sá cúú-xí dàva-gá ñáyiu. Te ní cachí tucu-gá sá cúú-ndí dàtná cue ñáyiu sa ní tnahá òré cuú-xi quíhíⁿ nacháhu cuéchi-xi, te nchaa ñáyiu cùñúhu ñàhá-yu xii-ndí sá dúcáⁿ ndòho-ndí, te tnahá nchaa espíritú cùñúhu ñaha-xi xii-ndí. ¹⁰ Te cuendá sá xínú cuéchi-ndí núú Xítóhó Jesucristú, xiáⁿ cúú-ndí dàtná cue téé ñá túú vèdana nàndíhi sá cúú-xí ñáyiu. Te nchòhó quidé-ndó sá cúú-ndó ñáyiu ío túha ndècu ndíhi Xítóhó Jesucristú. Te ñáyiu cächí-yu sá nchúhú cúú-ndí cue téé ñá túú ndàcu cada ìⁿ sá cádá sá cúú-xí Yá Ndiöxí. Te nchòhó quidé-ndó sá cúú-ndó ñáyiu ío váha ndàcu quide ìⁿ sá sání iní-ndó sá cúú-xí-gá. Te cue ñáyiu dàquee tihú ñáhã-yu xii-ndí, te nchòhó néhë-yu sá yíñúhu núú-ndó. ¹¹ Te nchúhú chi nchaa-ni nduu ío ndòho-ndí, chi xihí-ndí docó, yìchí-ndí ndute, te ñá túú dõó-ndí, te nchaa ñáyiu quide úhú ñáhã-yu xii-ndí, te ni vèhe-ndí ñá túú ndèé cáá cùndecu-ndí. ¹² Te ío ndòho-ndí quidé chiuⁿ-ndí nihí-ndí sá xéxí-ndí. Te cue ñáyiu xícuèhé ñáhã-yu xii-ndí dico xicáⁿ táhú-ndí núú Yá Ndiöxí cuendá-yu, te ñá cúú tnahí quiní ndeé ñáhã-yu xii-ndí dico quide cahnu iní-ndí nchaa sá quidé ñàhá-yu. ¹³ Te mee-ni tñúhu cuèhé tñúhu duha càháⁿ-yu cuendá-ndí dico sàcahnu iní-ndí te dàsahú-ndí-yu mee-ni tñúhu váha. Te cächí-yu sá cúú-ndí dàtná ìⁿ sá ñà túú-gá vèdana nàndíhi, te nchaa-ni nduu ducaⁿ càháⁿ-yu xáhãⁿ-yu xii-ndí.

¹⁴ Te yúhú duha càháⁿ-í núú tütú-a dàsahú ñáhã-í xii-ndo, dico ñá díú tñúhu sá cúú càháⁿ núú-ndó càháⁿ-í. Te duha càháⁿ-í dóho-ndo chi quide iní-í sá sùúní dàtná déhe mee-í cúú-ndó chi ío cùu iní ñáhã-í xii-ndo. ¹⁵ Te nchaa-o ndècu-o ichi Xítóhó Jesucristú vitna, dico yúhú cùu-í téé díhna nuu ñí dánèhé ñáhã xii-ndo nacuaá ndùu tñúhu sá càháⁿ nàcuáa naníhí tàhú-ó, núú xiáⁿ cùu-í dàtná tãtã-ndó. Te cuèi vãi vihi cue téé na quixi-güedé danèhé ñáhã-güedé xii-ndo tñúhu-gá dico ìⁿ dii-ni yúhú cùu-í téé díhna nuu-gã ní dánèhé ñáhã xii-ndo tñúhu-gá. ¹⁶ Núú xiáⁿ càháⁿ-í dóho-ndo sá cànchícúⁿ nihnu-ndo càda-ndo nchaa nacuaá quide-í.

¹⁷ Te xiáⁿ núu sa ní tendaha-í té Timùteú véxi coto ñaha-dé xii-ndo, te téé-áⁿ ío cùu iní-í-dé te quide ndáá-dé, te cùu-dé dàtná déhe-í chi yúhú ní sanu ichi-í-dé ichi Xítóhó Jesucristú, te téé-áⁿ cachí tñúhu-dé xii-ndo nchaa nacuaá quide-í ndécú-í ichi-gá. Te diu-ni nàcuáa na cächí tñúhu-dé-áⁿ diu-ni ducaⁿ quide-í nchaa xichí núú tàcá ñáyiu dàcuaha tñúhu Xítóhó Jesucristú. ¹⁸ Te dava nchòhó ío quide cahnu-ndo mee-ndo chi sání iní-ndó sá vã quixí-gã-í quixi coto ñaha-í xii-ndo. ¹⁹ Dico núu mee Yá Ndiöxí ná cächí-gá te ío ndíhi quixi coto ñaha-í xii-ndo, te dàvá-áⁿ quiní-í te núu nása quide nchaa ñáyiu ducaⁿ ío xíquide càhnu mee-xi-áⁿ ndécú-yu ichi Xítóhó Jesucristú. Te vá cádá cuendá-í tñúhu càháⁿ-yu chi chiuⁿ quidé-yu cada cuendá-í. ²⁰ Te vitna yíndaha ñaha Yá Ndiöxí xii-o, te chindee ñaha-gá xii-o quide-o nchaa sá váha sání iní-ó quide-o te ñá díú mèe-ni sá càháⁿ-ó. ²¹ Te ío chí cání iní núu ndèdacàa sá váha-gá cada-í òré ná quéxió-í núú ndécú-ndó, núu sá ténáá ñáhã-í xii-ndo àdi sá càháⁿ ndíhi ñaha-í xii-ndo ndíhi tñúhu vii tñúhu váha nàcuáa cutnùní iní-ndó sá cúú iní ñáhã-í xii-ndo.

5

Èⁿ cuéchi càhnu vihi

¹ Te yúhú sa ní níhí ndáá-í tñúhu nàcuáa cùu ndecu-ndo, chi ìⁿ téé ndècu ndíhi-ndo ndeca-dé náná chàhá-dé. Te xiáⁿ cúú-xí ìⁿ cuéchi càhnu vihi, chi ndéé nchaa ñáyiu ñá túú ndècu ichi Yá Ndiöxí cächí-yu sá vã cúú tnahí ducaⁿ càda-o. ² ;Te nchòhó ío quide cahnu-ni-ndo mee-ndo xíndecu-ndo! ;Te tàú-ndó sá cùndiyí-ndó ndíxi cuéchi iní-ndó sá dúcáⁿ cùu ndecu-ndo ni cuu! Te téé ducaⁿ quide-áⁿ xíní ñúhu-xi sá vã dáñã-gã-ndó nihí tnahá ndíhi ñaha-dé xii-ndo ni cùu dico ñá túú dùcaⁿ quide-ndo. ³ Te yúhú ñá túú ndècu ndíhi ñaha-í xii-ndo dico dàtná tñúhu sá ndécú ndíhi ñaha-í xii-ndo chi ducaⁿ-ni ío ñúhu iní ñáhã-í xii-ndo. Te yúhú cächí-í sá náchãhu téé-áⁿ cuéchi-dé sá dúcáⁿ quide-dé, te diu-ni ducaⁿ càháⁿ-í núú-ndó te núu dicó ndécú ndíhi ñaha-í xii-ndo. ⁴ Te òré nãtàcã-ndó càháⁿ ndíhi-ndo Yá Ndiöxí te diu-ni Xítóhó Jesucristú ñá túú dàña ndéé-gá chíndèe

ñaha-gá xii-ndo, te òré-áⁿ cada-ndo nàcuáa cuíní Xítóhó Jesucristú cada-ndo, te cada iní-ndó sã tnàhá-í ndécú ndìhi ñaha-í xii-ndo. ⁵ Chi tàú-xi sã tée ducaⁿ quìde-áⁿ daquèe tíhú-ndó-dě, te ducaⁿ te sácúhná dandòho ñaha-xi xii-dé cuèi na cùú-dé, dico na sàá nduu te nduu táhú-dě cundecu-dé ndìhi Xítóhó Jesucristú.

⁶ Te nchòhó ñá túú ndùu váha-xi sã càchí-ndó sã ìo càhnu cuu-ndo. Te xini-ndó sã cuèi luha-ni levadùrá ná quìhu yuchi cuáha pàá dándaa-xi cuèi luha-ni nà quìhu te nihì-ni yuchi sàháⁿ ndoho-xi. Te ducaⁿ sãtnahá-xi cùu nchòhó chi núu ndècu ndìhi-ndo ìⁿ ñáyiú quìde sã ñà túú váha te nchaa-ndo ñà túú-gã cùú váha iní-ndó ndècu-ndo. ⁷ Te xini ñuhu-xi sã cádá-ndó dàtná quìdé cuè ñáyiú quìde vico pascuá, chi ñá túú chihí-yu levadùrá yuchi cuáha pàá xéxi-yu nduu quìdé-yu vico-áⁿ. Te sã quìhu pàá-áⁿ cada iní-ó sã cùú-xí nchaa sã cuèhé sã dúhá nì xóo cada-ndo. Te vá cádá-gã-ndó nì ìⁿ sã cuèhé sã dúhá, te ducaⁿ te cuu-ndo ñáyiú váha chi sa ní nduu ndoo ní nduu nine iní-ndó. Te cue mbéé cue quiti ní xóo cahni-güedé nduu pascuá cue quiti-áⁿ cada iní-ó sã cùú-güedé datná Xítóhó Jesucristú nàcuáa ní xihí-gá núú cùrúxí. ⁸ Te núu xiáⁿ xini ñuhu-xi sã vã cádá-gã-ndó nì ìⁿ sã cuèhé sã dúhá sã nì xóo cada-ndo, te nì vã cùhú-gã iní-ndó te nì vã cádá-gã-ndó, te nì yùhu nì iní-ná-ndó càda-ndo mee-ni sã váha.

⁹ Te tutú sã sà ní dáquixí-í ndaha-ndo nì cachí-í sã vã nihí tnàhá-ndó ndìhi cue ñáyiú ndècu ichi díí ìní. ¹⁰ Te sã dúcáⁿ cãháⁿ-í núú tütú ní dáquixí-í ndaha-ndo te vá cání ìní-ndó sã yùhú càchí-í sã vã cùú-gã tnahá tnúhu-ndo ndìhi cue ñáyiú ndècu ichi cuehé ichi duha, ndìhi ñáyiú ndècu ichi díí ìní, ndìhi ñáyiú xìho nchaa sã ìo ñuyúú, ndìhi ñáyiú dùhu sã ndécú ndìhi tnaha ñáyiú-xi, ndìhi ñáyiú quìde cahnu sã càchí-yu cùu ndiòxí te ñá ndàá sã ndiòxí cùú-xí chi dícó cue tée ñuyúú-a ní cadúha nchaa xiáⁿ, chi núu ducaⁿ na càda-ndo vá tnàhá tnúhu-gã-ndó ndìhi-yu te xini ñuhu-xi sã vã cùndecu-gã-ndó núú ndécú-yu. ¹¹ Te ñá túú dùcaⁿ quee-xi nacuáa cãháⁿ-í núú tütú-í, chi yùhú càchí-í

sã vã cùú tnàhá tnúhu-ndo ndìhi ñáyiú càchí sã ndécú ichi Xítóhó Jesucristú te ñá ndàá sã ndécú-yu ichi-gá. Te núu cùú-yu ñáyiú ndècu ichi díí ìní, àdi cuú-yu ñáyiú xìho nchaa sã ìo ñuyúú-a, àdi cuú-yu ñáyiú quìde cahnu nchaa sã càchí-yu cùu ndiòxí te ñá ndàá chi dícó cue tée ñuyúú-a ní cadúha nchaa xiáⁿ, àdi cuú-yu ñáyiú yiti yùhu-xi, àdi cuú-yu ñáyiú quìhu, àdi cuú-yu ñáyiú dùhu sã ndécú ndìhi tnaha ñáyiú-xi, te nchaa ñáyiú ducaⁿ càchí sã ndécú ichi-gá te ñá ndàá te ducaⁿ xíquidé-yu, te nì vã cùú nihí tnàhá-ndó ndìhi-yu caxi-ndo ndìhi-yu.

¹²⁻¹³ Te ñá díú yùhú cùú-í tée cãháⁿ cuendá nchaa ñáyiú ñá túú ndècu ichi Xítóhó Jesucristú núu quìde ndàá-yu àdi ñá túú quìde ndàá-yu ndécú-yu, chi mee Yã Ndiòxí cãháⁿ-gá te núu nása quìdé-yu ndécú-yu. Dico nchòhó chi tàú-ndó càda cuendá-ndó núu nása quìde cue ñáyiú ndècu ndìhi-ndo ichi Xítóhó Jesucristú. Núu xiáⁿ xini ñuhu-xi daquee tíhú-ndó tée ducaⁿ ñà túú quìde váha ndècu ndìhi-ndo-áⁿ, te vá dáñá-gã-ndó nihí tnàhá ndìhi ñaha-dé xii-ndo.

6

Nàcuáa tàú-xi cada ñáyiú ndècu ichi Xítóhó Jesucristú te núu ñá túú ndècu ndìhi váha tnàhá-yu

¹ Te dava nchòhó òré ñá túú ndècu ndìhi váha tnàha-ndo te cùyì-ndo cuáháⁿ-ndó núú cuè tée cùchiuⁿ ñá túú ndècu ichi Xítóhó Jesucristú sàcáⁿ cuèchi-ndo, te ñá túú dùcaⁿ taú-xi cada-ndo chi núú cuè tée ndècu ichi-gá ducaⁿ tàú-ndó quìhíⁿ-ndó càcáⁿ cuèchi-ndo. ² Te nchòhó sa nàha-ndo sã nchaa ñáyiú cùu cuendá Yã Ndiòxí sáa nduu cãháⁿ-yu te núu ní quìde ndàá nchaa dava-gá ñáyiú àdi ñá túú ní quìde ndàá-yu, te nchòhó tnàhá-ndó cùu-ndo ñáyiú ducaⁿ cãháⁿ, te núu ducaⁿ te cutnùní iní-ndó sã ndácú-ndó càda ndàá-ndó nchaa cuèchi sã ñá túú ùhú cundáá vitna ndècu-ndo ñuyúú-a. ³ Te nchòhó sa nàha-ndo sã nchaa ndéé cue espíritú xínú cuèchi núú Yã Ndiòxí sáa nduu cãháⁿ-ó te núu nása quìde-xi ndecu-xi. ¡Núu xiáⁿ cùtnùní iní-ó sã úúⁿ-gã ndacu-o càda ndàá-ó nchaa cuèchi sã ìo ñuyúú-a! ⁴ Te núu ìo dava-ndo ìo nása cùu ndecu-ndo te xìnàá-ndó, te vá

quihíⁿ-ndó càcáⁿ cuéchi-ndo núú cuè téé ndèhe-ndo sá ñà túú ndècu-güedé ichi Yá Ndiöxí, dico nchòhó chi da núú cuè téé-áⁿ cuáháⁿ-ndó sàcáⁿ cuéchi-ndo. ⁵ Te duha càháⁿ-í cuendá cucahaⁿ núú-ndó chi ñá túú quide váha-ndo sá dúcáⁿ quide-ndo. ¿Te náa dícó-nă ñá túú tnàhí ìⁿ téé cùtnuní iní-xi nàcuáa cada ndáá cuéchi-ndo ndècu ndihí-ndo ichi Xítohó Jesucristú-ăⁿ? ⁶ Te nchòhó, ñá túú quide váha-ndo, chi dava-ndo cuáháⁿ-ndó núú cuè téé ñá túú ndècu ichi Xítohó Jesucristú sàcáⁿ cuéchi-ndo cuendá dava-gá cue ñáyiú ndècu ndihí-ndo ichi-gá.

⁷ Te ñá túú quide váha-ndo sá dúcáⁿ náa ndihí tnàha-ndo te cuáháⁿ-ndó sàcáⁿ cuéchi-ndo, te váha-gá sá cada càhnu iní-ndó cuèi náandi na cada ñaha tnaha ñáyiú-ndo xii-ndo cuèi dùhú-yu sá ndécú ndihí-ndo dico cada càhnu-ni iní-ndó. ⁸ Dico nchòhó chi ñá túú quide cahnu iní-ndó chi da uuⁿ-gá ñá túú quide váha-ndo sàcúú-xí tnàha ñáyiú-ndo, chi cùu úhú iní-ndó-yu, te dùhu-ndó-yu, te ndéé mée-ndó nàcuáa ndècu-ndo ichi Xítohó Jesucristú ducaⁿ quide tnaha-ndo.

⁹ Te nchòhó sa nàha-ndo sá ncháá ñáyiú ndècu ichi cuehé ichi duha vá ndúú tãhú-yu cundecú-yu núú ndécú Yá Ndiöxí táxi tnùní-gá, núu xiăⁿ vá cání iní-ndó sá ñáyiú-áⁿ nduu tãhú-yu cundecú-yu ndihí-gá. Te ni cuè ñáyiú ndècu ichi díí iní, te ni cuè ñáyiú quide cahnu nchaa sá càchí-yu cùu ndiöxí te ñá ndáá chi dícó cue téé ñuyúú-a ní cadúha nchaa xiăⁿ, te ni cuè téé càháⁿ ndihí ñadihí te ñá díú ñadihí-güedé cùú-yu, te ni cuè ñáyiú dihí càháⁿ ndihí téé te ñá díú yí-yu cùu-güedé, te ni cuè téé càháⁿ ndihí tnàha téé-xi, ¹⁰ te ni cuè ñáyiú dùhu, te ni cuè ñáyiú xilho sá ndécú ndihí tnaha ñáyiú-xi, te ni cuè ñáyiú quihu, te ni cuè ñáyiú càháⁿ úhú, te ni cuè ñáyiú dánícuèhé tnàha ñáyiú-xi te dùhu ñahá-yu, te ni ìⁿ cue ñáyiú duha xíquide vá ndúú tãhú-yu cundecú-yu núú ndécú Yá Ndiöxí táxi tnùní-gá. ¹¹ Te dava nchòhó ducaⁿ ní xóo cada-ndo ni cùu, te vitna ní cuu-ndo ñáyiú sa ní nduu ndoo ní nduu nine iní-xi, te ní cuu-ndo ñáyiú cùu cuendá Yá Ndiöxí, te ní cuu tucu-ndo ñáyiú ñá túú-gă cuéchi-xi ndècu núú-gă. Te ducaⁿ

ní quide ñaha Yá Ndiöxí xii-ndo sá vâha sá cuendá Xítohó Jesucristú, te ní ngündecu ndihí-ndo Espiritú Yá Ndiöxí.

Nàcuáa ndùu cuendá yiqui cùñú-ó

¹² Te càchí ñáyiú sá ncháá sá sání iní-ó cuu cada-o, te ndáá càháⁿ-yu dícó-ni sá ñă ncháá cùu-xi sá vâha sá cùú-xí-ó. Te núu cuini nchaa sá sání iní-ó-ăⁿ taxi tnùní ñáhá-xí te vá cada-ó. ¹³ Te nchòhó sa xiní-ndó sá ncháá sá xéxí-ó cuânguee-xi xití-ó, te xití-ó ní cuáha tnàhí-xi sá cùhúⁿ nchàa sá caxí-ó, dico xití-ó ndihí nchaa sá xéxí-ó chi naa-xi. Te Xítohó Jesucristú néhé cuendá-gá yiqui cùñú-ó, te ducaⁿ yiqui cùñú-ó cùu-xi cuendá-gá, te ñá túú ní cuáha yiqui cùñú-ó sá cùndècu-xi ichi díí iní. ¹⁴ Te datná ní quide Yá Ndiöxí ní dándótó-gă Xítohó Jesucristú ducaⁿ càda ñaha-gá xii nchoo tucu chi dandòto ñaha-gá xii-o núu na cùú-ó, chi ndàcu-gá quidé-gă nchaa sá vâha.

¹⁵ Te nchòhó sa nàha-ndo sá yiqui cùñú-ó cùu-xi cuendá Xítohó Jesucristú chi ìⁿ-ni cùu-o ndihí-gá, núu xiăⁿ ñá túú tnàhí ndùu váha-xi càháⁿ ndihí-o ñáyiú ndècu ichi díí iní, chi yiqui cùñú-ó cùu-xi cuendá Xítohó Jesucristú, te núu ducaⁿ na càda-o te cada iní-ó sá cuendá-nă ñáyiú-áⁿ cùú yiqui cùñú-ó, núu xiăⁿ ñá túú tnàhí ndùu váha-xi ducaⁿ càda-o. ¹⁶ Te sa xiní-ndó sá núu ìⁿ téé na càháⁿ ndihí-dé ìⁿ ñadihí ndécú ichi díí iní te cada iní-ó sá ìⁿ-nă yiqui cùñú cùú-yu. Te ducaⁿ càháⁿ-xi núú tütú Yá Ndiöxí núú càchí-xi: “Ìⁿ téé na càháⁿ ndihí-dé ìⁿ ñadihí te ìⁿ-nă yiqui cùñú cùú-yu”, duha càchí-xi. ¹⁷ Te ducaⁿ sãtnahá-xi cùu nchaa ñáyiú tnàhá tnúhu ndihí Xítohó Jesucristú, chi ìⁿ-nă cùú-yu ndihí-gá.

¹⁸ Te núu xiăⁿ càháⁿ-í dóho-ndo sá vă cùndècu-ndo ichi díí iní, chi núu ducaⁿ na càda-ndo te ñá túú tnàhí sá vâha cùu-xi sá cùú-xí yiqui cùñú-ndó chi ío dàcuíta nihnu-xi yiqui cùñú-ndó. Te nchaa dava-gá sá cuehé sá dúhá ñá túú quide-xi yiqui cùñú-ndó datná quidé xiăⁿ. ¹⁹ Te nchòhó sa cùtnuní iní-ndó sá yiqui cùñú-ndó cùu-xi datná ìⁿ vehe núú ndécú Espiritú Yá Ndiöxí. Te ducaⁿ sãtnahá-xi cùu yiqui cùñú-ndó chi ndècu-ndo ndihí Espiritú-gá. Te mee-gă ní

taxi-gá Espiritú-gá ndécú ndìhi-ndo, te ñá díú mèe-ndo cuu cuendá-ndó mèe-ndo chi Yá Ndiõxí cúú cuendá ñáhá-gá xii-ndo. ²⁰ Te ducaⁿ cùu-ndo ñáyiú cùu cuendá Yá Ndiõxí chi Xítóhó Jesucristú ní nacháhu-gá nchaa yíca cuèchi-ndo. Te núu xíáⁿ xíní ñùhu-xi sá ñihí ní ndúú-ndó càda-ndo nacuaá cuu càhnu Yá Ndiõxí, te ducaⁿ tàú-xi cada-ndo chi espíritú-ndó ndìhi yiqui cuñú-ndó cùu-xi cuendá-gá.

7

Sáhu sã cúú-xí ñáyiú ní tnándaha

¹ Te ní quexio tutú sá ñí dáquixí-ndó ndàha-í, te vitna na càchí tnúhu-í xii-ndo cuendá tnúhu càháⁿ-ndó núú tütú-ndó. Te váha cada-xi te núu vá cándèca téé ñadihi, te ducaⁿ-ni váha cada-xi te núu ñáyiú ñihí vá cándècá-yu téé. ² Te dícó-ni sá núu ducaⁿ na càda-ndo te dava-ndo caní iní-ndó cùndecu-ndo ichi díí iní. Núu xíáⁿ xíní ñùhu-xi sá ncháá cuè téé ndí dííⁿ cùndecu ñadihi-güedé, te ducaⁿ-ni tucu nchaa cue ñáyiú ñihí ndí dííⁿ cùndecu yíí-yu. ³ Te càchí tnúhu-í xii-ndo sã ncháá cuè téé vá cúú càchí-güedé sá vã cúú càháⁿ ndihí-güedé ñadihi-güedé, te ñáyiú ducaⁿ cuè ñáyiú ñihí tucu, vá cúú càchí-yu sá vã cúú càháⁿ ndihí-yu yíí-yu. ⁴ Te nchaa cue ñáyiú ñihí chi ñá díú mèe-ní-yu cùu cuendá-yu yiqui cùñú-yu chi tnàhá cúú cuendá yíí-yu, te ducaⁿ-ni nchaa cue téé tucu chi ñá díú-ní mèe-güedé cúú cuendá-güedé yiqui cùñú-güedé chi tnàhá cúú cuendá cue ñadihi-güedé. ⁵ Te cue téé vá cúú càchí-güedé sá vã cúú càháⁿ ndihí-güedé ñadihi-güedé. Te ní cuè ñáyiú ñihí vá cúú càchí-yu sá vã cúú càháⁿ ndihí-yu yíí-yu. Àdi te núu ní ndatnúhu-yu sá vã dúcáⁿ càdá-yu ñí ùú nduu cuendá sá cuñí-yu ío càháⁿ ndihí-yu Yá Ndiõxí, dico ná yáha núu ná daha nduu ducaⁿ ní ndatnúhu-yu sá vã dúcáⁿ càdá-yu te naníhí tnàhá tucú-yu, chi núu ñáhá te cudana te vá cuacàhnu iní-yu te sácuihná dacàháⁿ ñáhá-xí xii-yu cadá-yu sá ñá túú tàú-yu cadá-yu.

⁶ Te tnúhu càháⁿ-í-a quèe-xi sá tée ndihí ñadihi cuu candeca tnàhá-yu dico ñá túú

quède yica-í sá dúcáⁿ càdá-yu. ⁷ Te yúhú sání iní-í sá núu dícó sá cúú te nchaa-ndo cùndecu-ndo datná ndécú-í, dico ñáhá chi mee Yá Ndiõxí ní cachí-gá nàcuáa nduu táhú-ó ñíⁿ ñíⁿ-o cundecu-o, chi dava-o ñí cutáhú-ó núú-gã sá cùndècu ñadihi-ó te dava-o ñáhá. ⁸ Te càchí tnúhu-í xii nchòhó cue téé vátá ñihí-gá ñadihi-xi sá vãha-gá sá núu vá cùndècu ñadihi-ndó datná yúhú. Te ducaⁿ-ni nchòhó cue ñáyiú ñihí ñáyiú vátá ñihí-gá yíí-xi sá vãha-gá sá núu vá cùndècu yíí-ndo. Te ñáyiú ducaⁿ càháⁿ-í sá cúú-xí nchaa nchòhó ñáyiú ñihí ní quendóo quèé sá vãha-gá sá núu vá cándèca-gá-ndó téé. ⁹ Te càchí tnúhu-í xii nchaa-ndo sã núu xito-ndo sã vã cùndècu iní-ndó cùndecu mee-ndo te váha-gá sá núu tnándaha-ndo, te ñá díú sã mèe-ní caní cuehé caní duha iní-ndó cùndecu-ndo.

¹⁰ Te nchaa nchòhó ñáyiú sa ní tnándaha càháⁿ-í dóho-ndo, te ñá díú mèe-í duha càhu iní-í càháⁿ-í dóho-ndo chi Xítóhó Jesucristú ducaⁿ dàcahu iní ñáhá-gá xii-í, chi mee-gã cuñí-gá cada-ndo nàcuáa na càháⁿ-í-a. Te nchaa nchòhó cue ñáyiú ñihí càháⁿ-í dóho-ndo sã vã dáñá-ndó yíí-ndo. ¹¹ Te núu ío dava-ndo sã ní dáñá-ndó yíí-ndo, te xini ñùhu-xi sá vã cándèca-gá-ndó téé, chi cundecu mee-ñá-ndó àdi núu ñáhá te naqueheⁿ tucu-ndo téé ní cuu yíí-ndo. Te nchaa nchòhó cue téé ndècu ñadihi-xi càháⁿ-í dóho-ndo sã vã dáñá-ndó ñáyiú cùu ñadihi-ndó.

¹² Te tnúhu na càháⁿ-í-a cùu-xi sá ñí saní iní mèe-í te ñá díú tnúhu sá ñí cachí Xítóhó Jesucristú càháⁿ-í cúú-xi. Te núu dava nchòhó cue téé ndècu ichi Xítóhó Jesucristú ndécá-ndó ñáyiú ñihí ñáyiú ñá túú ndècu ichi-gá, te vá dáñá-ndó-yu te núu cùu váha iní-yu ndèca ñáhá-yu xii-ndo. ¹³ Te núu dava nchòhó cue ñáyiú ñihí ñáyiú ndècu ichi Xítóhó Jesucristú ndécá-ndó cuè téé ñá túú ndècu ichi-gá te vá dáñá-ndó-güedé te núu cùu váha iní-güedé ndécá ñàha-güedé xii-ndo. ¹⁴ Te núu ñíⁿ téé ñá túú sàndáá iní-dé Xítóhó Jesucristú te ñadihi-dé sàndáá iní ñáhá-áⁿ xii-gá, te téé-áⁿ ñí cuu-dé ñíⁿ téé sa ní cuyatni tnàhá tnúhu ndihí ñàha xii-gá sá cuendá ñadihi-dé. Te ducaⁿ sãtnahá-xi cùu tucu ñadihi ñá túú sàndáá

iní ñáhá xii Xítohó Jesucristú te yii-aⁿ sàndáá iní ñáhá-dě xii-gá, te ñaha-áⁿ sa ní cuyatni tnahá tnúhu-aⁿ ndihí-gá sá cuèndá yii-aⁿ, te ñu-ni ducaⁿ sãtnahá-xi cùu cue landú-yu chi sa ní cuyatni tnahá tnúhu-güexi ndihí-gá. Te núu vá dúcáⁿ cùu te cue landú-yu-áⁿ ño xica cùndecu-güexi núu-gã. ¹⁵ Te núu ñiⁿ tée ñá túú sàndáá iní ñáhá xii Xítohó Jesucristú cuiní-dé ñaha tñaha-dé ndihí ñadihí-dé ñaha sàndáá iní ñáhá xii Xítohó Jesucristú, te ñu-ni na càda-dé nàcuáa sàni iní-dé. Te ñu-ni ducaⁿ tucu te núu ñadihí ñaha ñá túú sàndáá iní ñáhá xii Xítohó Jesucristú cuiní-aⁿ ñaha-aⁿ tée sàndáá iní ñáhá xii-gá, tée cùu yii-aⁿ te ñu-ni na càda-aⁿ nàcuáa sàni iní-aⁿ. Chi tée sàndáá iní ñáhá xii Xítohó Jesucristú ñá túú tàú-dé cada yica-dé ñadihí-dé cundecu ndihí ñaha-aⁿ xii-dé te núu ñá túú cuiní-aⁿ. Te ñu-ni ducaⁿ ñadihí ñaha sàndáá iní ñáhá xii-gá ñá túú tàú-aⁿ cada yica-aⁿ cundecu ndihí ñaha yii-aⁿ xii-aⁿ te núu ñá túú cuiní-dé cundecu ndihí ñaha-dě xii-aⁿ, chi Yá Ndiöxí cuiní-gá sá ncháá nchòo ñáyiu ndècu ichi-gá cundecu váha-o vã nàá-ó. ¹⁶ Chi cue tée sàndáá iní tnúhu Xítohó Jesucristú ñá túú cùtnuní iní-güedé te núu ndacu-güedé canu ichi-güedé ñadihí-güedé ichi-gá àdi ñáhá te núu ñá túú sàndáá iní ñáhã-yu xii-gá, te ducaⁿ-ni cuè ñáyiu ñadihí sàndáá iní tnúhu Xítohó Jesucristú ñá túú cùtnuní iní-yu te núu ndacú-yu canu ichi-yu yíi-yu ichi-gá àdi ñáhá te núu ñá túú sàndáá iní ñáhã-güedé xii-gá.

¹⁷ Te duha na càchí tnúhu-í xii-ndo, nchaa chiuⁿ ní nduu táhú-ndó nũú Yã Ndiöxí quidé-ndó ndéé cùtnahá ní cáháⁿ ñáhã-gã xii-ndo ñi natuha-ndo ìchi-gá te ñu-ni chiuⁿ-áⁿ cada-ndo cùndecu-ndo. Te nchaa xichi núú tàcá ñáyiu dàcuaha tnúhu-gá ñu-ni duha càháⁿ-í dóho-yu. ¹⁸ Te nchaa cue tée ndècu seña ñi-xi dàtná ní cachi ndí Moisés, cue tée ní cáháⁿ Yã Ndiöxí ndécú ìchi-gá, te ñu-ni ducaⁿ cùnduu-güedé cundecu-güedé, te nchaa cue tée ñá túú ndècu seña ñi-xi ní cáháⁿ-gá cundecu ichi-gá, ñu-ni ducaⁿ cùnduu-güedé cundecu-güedé vá cuãha-güedé seña ñi-güedé. ¹⁹ Te ñiⁿ-ni cùu-xi cuèi na cuãha-o seña ñi-o àdi vá cuãha-o. Te sá ño-gá xini ñuhu-xi cada-o xiãⁿ cúu-xí sã cádá-ó ncháa nàcuáa cuiní Yã

Ndiöxí. ²⁰ Chi xini ñuhu-xi sá cùndecu-ni-o datná ndécú-ó cùtnahá ní cáháⁿ ñáhã Yã Ndiöxí xii-o ñi ngùndecu-o ìchi-gá. ²¹ Te núu cùu-ndo ñáyiu ñá túú tñahí dàñá quee núú chíúⁿ pàtróóⁿ-xi cùtnahá ní cáháⁿ ñáhã Yã Ndiöxí xii-ndo, te ñá túú ñã cani iní-ndó, dico núu dàña ñaha patróóⁿ-ndó quee-ndo núú chíúⁿ-ndó te váha-ni quee-ndo nũú chíúⁿ-ndó. ²² Te sáta ní cáháⁿ ñáhã Xítohó Jesucristú xii nchòhó ñáyiu ducaⁿ ñá túú tñahí dàñá quee núú chíúⁿ pàtróóⁿ-xi-áⁿ, te ní cuu-ndo dàtná ñáyiu dàñá quee nũú chíúⁿ pàtróóⁿ-xi sá cúu-xí-gã, te ducaⁿ chi ñá túú-gã ndécú-ndó ìchi cuehé ichi duha. Te nchòhó ñáyiu dàñá quee nũú chíúⁿ pàtróóⁿ-xi cùu-ndo datná ñáyiu ñá túú tñahí dàñá quee núú chíúⁿ pàtróóⁿ-xi sá cúu-xí Xítohó Jesucristú, te ducaⁿ chi xinu cuechi-ná-ndó nũú-gã. ²³ Te Yá Ndiöxí ní nduu cuèndá ñáhã-gã xii-o chi Xítohó Jesucristú ní nacháhu-gã nchaa yícá cuèchi-o sã ndécú nũú Yã Ndiöxí ní cùu, te vá dàñã-ndó sã tñaha ñáyiu-ndo nàdatuhú iní ñáhã-yu xii-ndo vã cùnú cuèchi-ndo núú Xítohó Jesucristú nàcuáa tàú-xi cunduu. ²⁴ Te núu xiãⁿ càchí tnúhu-í xii nchaa nchòhó ñáyiu ndècu ndihí-í ichi Xítohó Jesucristú sá cùndecu-ni-ndo datná-ñi ndècu-ndo ndéé cùtnahá ní cáháⁿ ñáhã-gã xii-ndo, te ñu-ni ducaⁿ cùndecu-ndo ichi-gá.

²⁵ Te càchí tnúhu tucu-í xii-ndo sã Xítohó Jesucristú ñá túú càchí tnúhu-gã xii-í nũu nása cáháⁿ-í cuèndá nchaa ñáyiu vátã tñandaha-gã. Te duha sàni iní-í cáháⁿ-í cuèndá-yu, te nchòhó cuu quíndáá iní-ndó tñuhu càháⁿ-í chi Xítohó Jesucristú chindèe chitúu ñaha-gã xii-í. ²⁶ Te yúhú càchí-í sã sã cuèndá nchaa tñundòho tnúhu ndáhú ió ñuyíú-a vitna, te váha-gã sã ncháá ñáyiu te núu nása xíndecú-yu te ducaⁿ-ni na cùndecú-yu. ²⁷ Te nchaa cue tée ndècu ñadihí-xi te ducaⁿ-ni na cùndecu-güedé ndihí-yu, te nchaa cue tée ñá túú ñadihí-xi te ducaⁿ-ni na cùnduu-güedé vá ndúcú-güedé ñadihí-güedé. ²⁸ Dico nchaa cue tée na ndècu ñadihí-xi te ñá díú ñiⁿ cuèchi cùu-xi sá dúcáⁿ ná ndècu-güedé ñadihí-güedé, te ñu-ni ducaⁿ cùu tucu cue ñáyiu ñadihí te núu na ñihí-yu yíi-yu chi ñá díú ñiⁿ cuèchi cùu-xi sá dúcáⁿ ñihí-yu yíi-yu.

Te núu cue téé na ñihí-güedé ñadihí-güedé te nándi ndohó-yu cundecú-yu ñuyíú-a, te núu xiáⁿ duha càháⁿ-í cuendá sá vǎ ndúcú-güedé ñadihí-güedé cuendá sá vǎ ndóhó-yu.

²⁹ Te nchaa nchòhó ñáiyu ndècu ndihí-í ichi Xítohó Jesucristú na càchí tnúhu-í xii-ndo sǎ ñǎ túú-gǎ vǎi nduu cumání te quixi tucu Xítohó Jesucristú, núu xiáⁿ xíní ñùhu-xi sá ndèé vitna ngúita nchaa cue téé ndècu ñadihí-xi cada-güedé chiúⁿ Xítohó Jesucristú, te cada-güedé dàtná sá ñǎ túú ñadihí-güedé. ³⁰ Te nchaa ñáiyu ndihú iní-xi te na càda-ní-yu sá ñǎ túú ndihú iní-yu cadá-yu chiúⁿ Yá Ndióxi. Te nchaa ñáiyu cùdíí iní-xi te na càda-ní-yu sá ñǎ túú cùdíí iní-yu cadá-yu chiúⁿ-gǎ, te nchaa ñáiyu ndècu ndihí nándi sá ndécú ndihí te na càda-ní-yu sá ñǎ túú ñǎ ndécú ndihí-yu cadá-yu chiúⁿ-gǎ. ³¹ Te nchaa ñáiyu nèhe chiuⁿ nchaa sá ío ñuyíú-a te na càda-ní-yu cuendá sá ñǎ túú ñǎ néhé chiúⁿ-yu cadá-yu chiúⁿ Yá Ndióxi, chi nchaa sá ío ñuyíú-a sa ñùhu-xi ichi cuáháⁿ-xi núú ndihí ñihnu-xi.

³² Te cùníní-í sá vǎ cùhúⁿ iní-ndó nándi sá ío ñuyíú-a, te ni ñǎ túú tnàhí ná cani iní-ndó cùndecu-ndo, chi nchaa cue téé ndècu ichi Xítohó Jesucristú xíndecu mee ío ñùhu iní-güedé cada-güedé chiúⁿ-gǎ nàcuáa cudíu-güedé núú-gǎ. ³³ Te nchaa cue téé sa ndècu ñadihí-xi cue téé ndècu ichi-gǎ ñùhu iní-güedé nàcuáa cada-güedé cundecu-güedé ñuyíú-a cuendá ducaⁿ cùdiu-güedé núú ñadihí-güedé. ³⁴ Te diu-ni ducaⁿ cùu tucu cue ñáiyu dihí chi ñǎ túú ñⁿ-ni cuu ñáiyu sa ndècu yíi-xi ndihí ñáiyu vátá cùndecu-gǎ yíi-xi, chi ñáiyu ndècu ichi Xítohó Jesucristú ñǎ túú ndèca téé ío ñùhu iní-yu cadá-yu chiúⁿ-gǎ nàcuáa ñihí ní ndúú-yu cundecu yíñùhú-yu núú Yá Ndióxi, dico cue ñáiyu dihí ndécá tée ndècu ichi-gǎ ío ñùhu iní-yu nàcuáa cundecú-yu ñuyíú-a cuendá cudíu-yu núú yíi-yu.

³⁵ Te duha càháⁿ-í cuendá cúú-xí ñⁿ sá vǎha xii-ndo, te cudíu núú tnáhá-ndó, te cuu-ndo ñáiyu cada ndáá núú Xítohó Jesucristú, te mee-ni-gǎ cuhuⁿ iní-ndó. Te ñǎ díú sǎ dúhá càháⁿ-í te quide yica-í sá

cádá-ndó nàcuáa càháⁿ-í.

³⁶ Te núu ío dava-ndo sàni iní-ndó sǎ ñǎ túú nduu vǎha-xi sá ío cuu sacuéhé déhe yoco-ndo cundecú-yu ñǎ, te núu sàni iní-ndó sǎ vǎha-gǎ candecá-yu téé te cada-ndo nàcuáa sàni iní-ndó, chi ñǎ díú ñⁿ cuéchi cùu-xi. ³⁷ Te núu dava-ndo ndècu déhe yoco-ndo, te vǎ yòo ñⁿ cada yica ñǎha xii-ndo sá cándecá-yu téé. Te núu mee-ndo sàni vǎha iní-ndó nàcuáa cada-ndo, te núu vǎ dásáⁿ-ndó déhe yoco-ndo càndeca ñǎha téé te quide vǎha-ndo sǎ dúcáⁿ quide-ndo. ³⁸ Te nchaa ñáiyu dàsaⁿ déhe yoco-xi càndeca ñǎha téé te vǎha-ni quidé-yu, te nchaa ñáiyu ñǎ túú dàsaⁿ déhe yoco-xi càndeca ñǎha téé te vǎha-gǎ tucu quidé-yu sá dúcáⁿ quidé-yu.

³⁹ Te nchaa ñáiyu dihí ndécú yíi-xi xini ñùhu-xi sá cùndecu-ní-yu ndihí yíi-yu ñini ndècu vívú-güedé chi ducaⁿ càháⁿ tnúhu sá dánèhé ñáhá xii-o nàcuáa cada-o cùndecu-o, dico núu na cùú-güedé te cuu naquehéⁿ-yu ingá téé candecá-yu dicó-ni sá diu-ni téé ndècu ichi Xítohó Jesucristú. ⁴⁰ Te yúhú sání iní-í sá ío-gǎ vǎha cundecú-yu te núu vǎ nándúcú-yu ingá téé candecá-yu, te duha càháⁿ-í chi Espíritú Yá Ndióxi ducaⁿ dàcahu iní ñáhá-xi xii-í càháⁿ-í.

8

Cuendá nchaa sá nchító-ó sǎñaha ñáiyu nduu táhú nchaa sá càchí-yu cùu ndióxi

¹ Te vitna na càháⁿ-í cuendá nchaa sá nchító-ó sǎñaha ñáiyu nduu táhú nchaa sá càchí-yu cùu ndióxi te ñǎ ndáá chi dicó ndaha cue tee ñuyíú-a ní cuáha nchaa xiáⁿ. Te nchoo sa cùtnuní vǎha iní-ó cuendá nchaa xiáⁿ, dicó-ni sá cuendá nchaa sá cùtnuní vǎha iní-ó xiáⁿ quidé càhnu-o mee-o, dico núu cùu iní-ó tnàha ñáiyu-o te canu ichi-ò-yu ichi vǎha. ² Te núu dava-ndo sàni iní-ndó sǎ tǔha-ndo dico cùu-ndo ñáiyu vátá cùtǔha-gǎ nàcuáa tàú-xi cunduu. ³ Te núu nchòhó cúú iní-ndó Yá Ndióxi te mee-gǎ càháⁿ-gǎ sá cúú-ndó ñáiyu cùu cuendá-gǎ.

⁴ Te vitna na càchí tnúhu-í xii-ndo nàcuáa nduu cuendá nchaa sá nchító-ó sǎñaha ñáiyu nduu táhú nchaa sá càchí-yu cùu ndióxi te ñǎ ndáá chi dicó ndaha cue téé ñuyíú-a ní cuáha nchaa xiáⁿ. Te nchoo cùtnuní iní-ó sǎ ncháá sǎ càchí ñáiyu cùu ndióxi cǎdǔha-yu ñuyíú-a ñǎ túú cùu-xi

ndióxí, chi ìⁿdii díí-ni Yá Ndiöxí ndécú. ⁵ Te cue ñáyíu ñuyíú-a cächí-yu sá cuèi andíu te cuèi ñuyíú-a ndècu titní ndióxí. Te ndáá sá ndèni ní cuu ndècu espíritú sá cächí ñáyíu cùu ndióxí te ñá ndàá sá ndióxí cúú-xí, te nchaa xiáⁿ táxí tnùní ñáhá-xí xii-yu. ⁶ Te nchoo cùtnuní ndáá iní-ó sã ìⁿdii díí-ni Yá Ndiöxí ndécú te ñá ndàá sá ndióxí cúú-gã Tãtã-ó, te nchoo cùu-o ñáyíu cùu cuendá-gá. Te ñá-ni mee-gã ní táuchíúⁿ-gã ní cuáha nchaa sá ió ñuyíú-a, te cùtnuní tucu iní-ó sã ìⁿdii díí-ni Xítóhó Jesucristú ndécú, te Yaá-áⁿ ñí quide-gá nchaa chiúⁿ ní táhú Dütú Ndiöxí ní cadúha-gá nchaandi túhú sá ió ñuyíú. Te ñá-ni mee Xítóhó Jesucristú quidé ndècu-o ichi-gá vitna.

⁷ Te ñá ncháá nchòhó ñáyíu ndècu ichi Xítóhó Jesucristú cùtnuní iní-ndó nàcuáa ndùu tnúhu càháⁿ-í. Chi sa ní cáaⁿ-ndo quide cahnu-ndo nchaa sá cächí-yu cùu ndióxí ní cùu. Te cuendá xiáⁿ nùu nàqueheⁿ-ni-ndo nchaa sá nchító-ó ndùu táhú nchaa sá cächí-yu cùu ndióxí-áⁿ xéxi-ndó, te sàni-ni iní-ndó sã quidé cahnu-ndo nchaa sá cächí-yu cùu ndióxí-áⁿ te ñá ndàá sá ndióxí cúú-xí. Te núu sàni iní-ndó sã ñá túú vãha caxi-ndo sã dúcáⁿ ndùu táhú-xi-áⁿ te xèxi-ndo te xiáⁿ ñá túú cùu vãha iní-ndó cuendá sá dúcáⁿ quide-ndo. ⁸ Te ñá díú nchàa sá xéxi-ó quide-xi cudíu-o núú Yá Ndiöxí, chi ìⁿ-ni quide-xi cuèi na càxi-o àdi vá cáxí-ó chi ni ìⁿ sá cáxí-ó vã chindèe ñaha-xi cudíu-o núú Yá Ndiöxí. Te cuèi vá cáxí-ó dico ñá díú xiáⁿ cada sá vã cudíu-o núú-gã. ⁹ Te cuu-ni caxi-ndo nchàa nãni ñihí-ndó. Te dicó-ni sá càda cuendá-ndó sã ñá díú cuendá sá xéxi-ndó-ãⁿ cuíta nihnu dava ñáyíu ndècu ndihí-ndo ichi Xítóhó Jesucristú cadá-yu nãndi sá cáda-yu nàcuáa vá cúú vãha iní Yá Ndiöxí chi ñáyíu-áⁿ ñá túú cùtnuní iní-yu. ¹⁰ Te nchòhó ñáyíu xini vãha cuendá nchaa sá cächí-yu cùu ndióxí, te núu na quihíⁿ-ndó nùu ndécú nchàa xiáⁿ te ngóo-ndo càxi-ndo nchaa sá ñí cutáhú-xi, te quini ñáyíu ndècu ndihí-ndo ichi Xítóhó Jesucristú, ñáyíu vátá cùtnuní-gá iní-xi nàcuáa ndùu cuendá nchaa sá dúcáⁿ cächí-yu cùu ndióxí-áⁿ, te cuèi sàni iní-yu sá ñá túú quide vãha-ndo sã dúcáⁿ quide-ndo te cudana te cada yicá-yu caxí-yu tnàhá-yu

nchaa sá dúcáⁿ ñí nduu táhú nchaa sá cächí-yu cùu ndióxí-áⁿ te ñá ndàá sá ndióxí cúú-xí. ¹¹ Te núu ducaⁿ cùtnuní iní-ndó nàcuáa ndùu cuendá nchaa xiáⁿ te ducaⁿ quide-ndo, te sá dúcáⁿ quide-ndo-áⁿ te dàcuíta nihnu-ndo dáva-gá ñáyíu ndècu ndihí-ndo ichi Xítóhó Jesucristú, ñáyíu vátá cùtnuní-gá iní-xi nàcuáa ndùu cuendá nchaa xiáⁿ, te ñá cuendá tnàhá ñáyíu-áⁿ ñí xihí Xítóhó Jesucristú. ¹² Te sá dúcáⁿ quide-ndo-áⁿ cúú-xí ìⁿ cuèchi núú Xítóhó Jesucristú, chi quide-ndo nàcuáa xínu iní-yu cadá-yu ìⁿ sá sání iní-yu ñá túú vãha, núu xiáⁿ ñá túú quide vãha-ndo sã cúú-xi-yu. ¹³ Te núu yúhú cùtnuní iní-í sá sã cuendá ìⁿ sá cáxí-í te ngóo ìⁿ ñáyíu ndècu ndihí-í ichi Xítóhó Jesucristú cadá-yu ìⁿ sá vã cúú vãha iní Yá Ndiöxí, te vãha-gá sá vã cáxí-gã-í xiáⁿ cuendá sá vã cáda-yu ìⁿ sá vã cúú vãha iní-gá.

9

Nchaa sá cúú càda cue téé ní táuchíúⁿ Xítóhó Jesucristú càháⁿ tnúhu-gá

¹ Te yúhú chi cuu cada-í nchaa sá sání iní-í, chi tnàhá-í ní táuchíúⁿ Xítóhó Jesucristú càháⁿ-í tnúhu-gá núú ñáyíu. Te yúhú ní xini núu-í Xítóhó Jesucristú Yaá cúú Xítóhó-ó te nchòhó cúú-ndó ñáyíu ní sándáa iní tnúhu-gá sá càháⁿ-í te ducaⁿ chi ndècu ndihí-í-gá. ² Te ió dava ñáyíu ñá túú sándáa iní-yu sá Xítóhó Jesucristú ní táuchíúⁿ-gã càháⁿ-í tnúhu-gá, dico nchòhó chi cùtnuní ndáa iní-ndó sã díú-gã ní tendaha ñaha-gá xii-í xicá cùu-í càháⁿ-í tnúhu-gá, te ducaⁿ chi yúhú ní càháⁿ-í tnúhu-gá núu-ndó te ní sándáa iní-ndó-gã te xiáⁿ cùtnuní sá díú-gã ní tendaha ñaha-gá xii-í xicá cùu-í càháⁿ-í tnúhu-gá núú ñáyíu.

³ Te duha ndùu tnúhu càháⁿ-í cuendá cundedóho nchaa ñáyíu sãtnuhu ñaha xii-í. ⁴ Chi yúhú cuu-ni caxi-í nchaa núú sã cúú càxi-o na taxi ñáyíu. ⁵ Te cuu-ni cundecu ñadhí-í te caca ndeca-í-yu nchaa núú xicá cùu-í càháⁿ-í tnúhu Yá Ndiöxí dàtná quidé dáva-gá cue téé càháⁿ tnúhu-gá, ndihí cue téé cùu ñani Xítóhó Jesucristú, ndihí té Pelú. ⁶ Te tnàhá yúhú ndihí té Bèé cuu dañá-ndí chiúⁿ quide-ndí te cada-ndí dàtná xiquide dáva-gã-güedé càháⁿ-güedé tnúhu Xítóhó

Jesucristú. ⁷ Te nchoo xini-ó sã ncháa cuè sandadú dacuítí sã ñuhú yãhu-güedé xínú cuèchi-güedé, te ñá túú dicó ducaⁿ xínu cuechi-güedé. Te ducaⁿ sãtnahá-xi cùu tucu ñáyiú xítu ñⁿ sá xítú chi dacuítí ñihí-yu ñⁿ sá xítú-yu xèxi-yu, te ñá díú dicó ducaⁿ xítú-yu. Te ducaⁿ cùu tucu cue téé cùu toli chi quihni-güedé dícu quití xító-güedé xihí-güedé te ñá túú dicó ducaⁿ xító-güedé-di. ⁸ Te vá cání ñí-ndó sã sà dúhá càháⁿ-í te càhu ñí mée-í duha càháⁿ-í, chi tnúhu càháⁿ-í-a ñⁿ-ni quèe-xi ndihí tnúhu ní cáháⁿ ndíi Moisés. ⁹ Chi ndíi-áⁿ ñí chídó tnùní ndíi núú tütú ndíi nàcuáa ní xáhaⁿ Yã Ndiõxí xii ndíi, te càchí-xi: “Vá chíhí-ndó ñunu yuhu ndicutu oré danchihí-di triú”, duha càchí-xi núú tütú ndíi. Te ñá díú sã dúcáⁿ ñí cáháⁿ Yã Ndiõxí te càháⁿ-gá mee-ni cuendá ndicutu-áⁿ. ¹⁰ Chi ní cáháⁿ-gá cuendá nchoo cuè ñáyiú ndècu ichi-gá, te ndáá sá díú cuendá-ó dùcaⁿ ní cáháⁿ-gá. Te nchaa cue téé xítu chihi tatá sàni ñí-güedé sá díú tátá chíhí-güedé-áⁿ cuu sá cáxi-güedé, te díu-ni ducaⁿ cùu tucu cue téé xicani triú chi càni-güedé cuendá quee caxi-güedé. ¹¹ Te ducaⁿ sãtnahá-xi cùu nchúhú cue téé càháⁿ tnúhu Xítóhó Jesucristú, chi dānehé ñáhá-ndí xii-ndo cuendá nchaa sá vāha quide ñaha Yã Ndiõxí xii-o, núu xĩáⁿ dai tãu-xi sá nchòhó chindee ñaha-ndo xii-ndí ñuu ná cúú sã xini ñuhu-ndí. ¹² Te núu dava cue téé càháⁿ tnúhu Yã Ndiõxí chindèe-ndo-güedé, te uuⁿ-gá ducaⁿ tãu-ndó chindee-ndo nchúhú cue téé ní sanu ichi ñaha xii-ndo ichi-gá.

Te cuèi tãu ndisa-ndo sã chindèe ñaha-ndo xii-ndí dico ñá túú dùcaⁿ caháⁿ-ndí núú-ndó càda-ndo, te quide cahnu ñí-ndí cuèi nāndi sá tá yāha-ndí véxi. Te ducaⁿ quide-ndí cuendá sá ñá túú ñá cani ñí ñáyiú cuendá-ndí te ducaⁿ cuíta cuténuu-gá tnúhu sá càháⁿ nàcuáa naníhí tãhú-ó quĩhíⁿ. ¹³ Te nchòhó xini-ndó sã ncháa cuè téé xínu cuechi veñúhu díu-ni xíaⁿ ñihí-güedé xèxi-güedé, te díu-ni cue téé-áⁿ xínú cuèchi-güedé núú xihí quití ndúu tãhú Yã Ndiõxí, te díu-ni xíaⁿ ñihí tucu-güedé sá xèxi-güedé. ¹⁴ Te díu-ni ducaⁿ sãtnahá-xi cùu nchúhú cue téé càháⁿ tnúhu sá càháⁿ nàcuáa naníhí tãhú-ó, chi Xítóhó

Jesucristú ní cachí-gá sá díú-ñí cuendá chiúⁿ quide-ndí ñihí-ndí caxi-ndí. ¹⁵ Te ñá ñⁿ ndúu cáháⁿ-í núú-ndó càda-ndo nacuáa tãu-xi cunduu sá cúú-xi-í, te vá cání ñí-ndó sã sà dúhá càháⁿ-í te ñⁿ sá xicáⁿ-í núú-ndó. ¡Chi cuèi na cùú-í sá ndòhò-í te ñá díú sã càháⁿ ñáyiú sá sã cuendá sá càháⁿ-í tnúhu Xítóhó Jesucristú ñihí-í xèxi-í!

¹⁶ Te yúhú ñá túú quide cahnú-í mée-í sá càháⁿ-í tnúhu sá càháⁿ nàcuáa naníhí tãhú-ó, chi tãu tnáhá-í sá càdà-í chi ducaⁿ ñí cachí Yã Ndiõxí cada-í. ¡Te ndáhú ní cuu yúhú te núu vá càháⁿ-í tnúhu-áⁿ! ¹⁷ Te ñá túú càháⁿ-í tnúhu-gá sá cúú ñí mée-í chi mee-gã ní táuchíúⁿ-gã cáháⁿ-í tnúhu-gá. Te núu càháⁿ-í tnúhu-gá sá cúú ñí mée-í te tãu-í ñihí-í sá ndúú tãhú-í ní cùu. ¹⁸ Dico sá sá ní nduu tãhú-í cúú-xi sã ño cùdúⁿ ñí-í sá dicó ducaⁿ càháⁿ-í tnúhu sá càháⁿ nàcuáa naníhí tãhú-ó. Te cuèi tãu-í queheⁿ-í sá táxi-ndó ndúu tãhú-í sá cuendá sá càháⁿ-í tnúhu Xítóhó Jesucristú, dico ñá túú dùcaⁿ quide-í. ¹⁹ Te sá dúcáⁿ dicó ducaⁿ càháⁿ-í tnúhu sá càháⁿ nàcuáa naníhí tãhú-ó, xĩáⁿ ni ñⁿ ñáyiú ñuyíú-a vá cúú càchí-yu sá táxi tnùní ñáhã-yu xii-í, te cuèi ducaⁿ dico mee-í ní sani ñí-í sá cúú-í dàtná ñⁿ téé xínu cuechi núú nchaa ñáyiú cuendá ducaⁿ cuíta cuu vaí-yu tuhá-yu ichi Xítóhó Jesucristú quĩhíⁿ. ²⁰ Te òré ñuhú tnáhí tnuú cue ñáyiú israhél te quide-í sá ñⁿ-ní cùu-í ndihí-yu cuèi ñá túú nchícúⁿ ñihnu-í tnúhu ní cáháⁿ ndíi Moisés, te ducaⁿ quide-í cuendá sá ñáyiú-áⁿ quindáá ñí-yu tnúhu càháⁿ-í te tuhá-yu ichi Xítóhó Jesucristú. ²¹ Te òré ñuhú tnáhí tnuú nchaa ñáyiú ñá túú nchícúⁿ ñihnu tnúhu ní cáháⁿ ndíi Moisés, te quide-ñí-í sá quidè-í dàtná quidè mée-yu cuendá quindáá ñí-yu tnúhu càháⁿ-í, te tuhá-yu ichi Xítóhó Jesucristú. Te cuèi ducaⁿ quide-í dico ñá túú dàña ndeé-í quidè-í nchaa nàcuáa cuini Yã Ndiõxí cada-o, te ducaⁿ chi nchícúⁿ ñihnu-í quidè-í nchaa nàcuáa càháⁿ Xítóhó Jesucristú. ²² Te òré ndécú-í ndihí nchaa ñáyiú ñá túú cùtnuní váha ñí-xi nàcuáa cundecu ichi Xítóhó Jesucristú, te tnáhá-í quidè-í dàtná quidè-yu cuendá sá ná tédòho-yu nchaa tnúhu càháⁿ-í te ducaⁿ cùtnuní-gá ñí-yu nàcuáa cundecú-yu ichi-gá. Te nchaandi tãhú ñáyiú quide-í sá ñⁿ-ni cuu-í

ndihí-yu cuendá ducaⁿ ñihí-í nàcuáa cada-í te cundedóho-yu tnúhu càháⁿ-í te tñí-yu ichi Xítóhó Jesucristú te naníhí tǎhú-yu. ²³ Te duha quide-í cuendá sá cuítá quindáá iní-yu tnúhu sá càháⁿ nàcuáa naníhí tǎhú-ó quíhíⁿ, te ducaⁿ te tñhá yúhú ío váha cundecu-í dàtná càháⁿ tnúhu-áⁿ.

²⁴ Te nchòhó sa xìní-ndó sǎ ncháá cuè té xínu quíhu màrcúhyú nchaa-güedé xínú-güedé, dico ñⁿ-ni-dé cúú tée ndàcu ngodó núú te tée-áⁿ cúú tée ñihí sá ndúú tǎhú-xi, te ducaⁿ xìni ñuhu-xi cada nchóhó tucu chi cada-ndo ncháa nacuáa cuíní Yǎ Ndióxi cada-ndo cuendá ducaⁿ ñihí-ndó sǎ ndúú tǎhú-ndó. ²⁵ Te nchaa cue té xìní dadiqui te váha váha quide cuendá-güedé núu ná cúú sǎ cáda tñèñu te xòcani-güedé cuendá sá ñà díú xiǎⁿ cada te cuíta-güedé òré dadiqui-güedé. Te ducaⁿ quide-güedé cuendá cuíní-güedé ñihí-güedé sá ndúú tǎhú-güedé, te sá ndúú tǎhú-güedé-áⁿ cúú-xí ñⁿ sá ndíhí ñihnu ñuyú-a. Dico nchoo ndècu ndee-o quide-o nacuáa ñihí-ó sǎ ndúú tǎhú-ó, te xiǎⁿ cudí-xi cundecu ndihí-o ñi caa ñi quíhíⁿ. ²⁶ Te yúhú quidè-í dàtná quidé cuè té xínu, chi cue té-áⁿ xìní-güedé núú quéxiò-güedé, te quide tucu-í dàtná xiquide cue té sa ní cutúha naá, te ñá túú quide-í dàtná quidé cuè té vitna dàcuaha naá. Te ducaⁿ chi yúhú quidè-í nchaa nàcuáa cuíní Yǎ Ndióxi cunduu. ²⁷ Te yúhú ñá túú dàña-í taxi tñuní ñáhá ñi ñⁿ sá cuèhé sá dúhá xì-í chi yòtní-í mèè-í. Te ducaⁿ quide-í chi yúhú càháⁿ-í tnúhu Xítóhó Jesucristú núú ñáyi, te cuíní-í sá vǎ cuíta sá ñi cachí Yǎ Ndióxi nduu tǎhú-í.

10

Cuendá nchaa sá ñi cadúha cue té ñuyú-a quide cahnu ñáyi

¹ Te nchòhó ñáyi ndècu ndihí-í ichi Xítóhó Jesucristú na cachí tnúhu-í xii-ndo cuendá nchaa ñaní tñáhá-ndí ñáyi israhél ní xíndecu ndéé sanaha, chi vitna tñáhá nchòhó cúú-ndó dàtná cue ñaní tñáhá ncháa ñáyi-áⁿ chi ndècu-ndo ichi-gá. Te nchaa ñáyi-áⁿ ñi taxi ndecu Yǎ Ndióxi ñⁿ vícò ñi dánèhé ñáhá-xí xii-yu ichi quíhíⁿ-yu, te ní queé dava ndute lámár nání Mǎr

Tícuèhé te ncháa-yu ní yáha-yu. ² Te sá dúcáⁿ ñi cuu te ncháa-yu ñⁿ-ná ní cuú-yu ndihí ndí Moisés, te ní xíhi ndaha ñaha ndí xií-yu. ³ Te ncháa-yu ní xexí-yu sá ñi sǎñaha Yǎ Ndióxi xií-yu. ⁴ Te ducaⁿ ncháa tucu-yu ní xihí-yu ndute sá ñi sǎñaha-gǎ xií-yu, ndute sá ñi quee yiqui ñaha cava. Te cava-áⁿ cada iní-ó sǎ cúú-xí dàtná Xítóhó Jesucristú te ducaⁿ chi ndihí ñaha-gǎ xií-yu ichi cuáháⁿ-yu dàvá-áⁿ. ⁵ Dico ío vai-yu ñá túú ní quidé-yu nàcuáa càháⁿ Yǎ Ndióxi, te xiǎⁿ ñá túú ní cùu váha iní ñáhá-gǎ xií-yu. Te sá dúcáⁿ ñi quidé-yu núu xiǎⁿ òré ñúhú-yu ichi cuáháⁿ-yu xiti yucu ío vai-yu ní xíhi.

⁶ Te ducaⁿ ñi cuu cuendá nchoo vǎ cáncícuⁿ ñihnu-o càda-o nacuáa ní quidé-yu, chi ñáyi-áⁿ mee-ñi ncháa sá cuèhé sá dúhá ñi sani iní-yu ní quidé-yu. Te nchoo xìni ñuhu-xi sá vǎ dúcáⁿ càda-o. ⁷ Te yúhú càháⁿ-í dóho-ndo sǎ vǎ quindáá iní-ndó te ñi vǎ cáda càhnu-ndo ñi ñⁿ sá cáchi-yu cùu ndióxi ní cadúha cue té ñuyú-a dàtná ní quide cue ñaní tñáhá-ndí ní xíndecu ndéé sanaha. Chi ñáyi-áⁿ ñi quidé-yu dàtná càháⁿ-xi núú tütú Yǎ Ndióxi núú cáchi-xi: “Nchaa ñáyi ní xexí-yu ní xihí-yu ní quidé-yu vico, ní quide càhnú-yu sá cáchi-yu cùu ndióxi ní cadúha-yu te ñá ndáa sá ndióxi cúú-xí”, duha cáchi-xi núú tütú-gá. ⁸ Te ñi vǎ cùndecu-ndo ichi díi ñi dàtná ní quide dava ñáyi-áⁿ, chi sá dúcáⁿ ñi quidé-yu te ní xíhi ócò úní mǐl-yu ñⁿ-ni ndúu. ⁹ Te vá cání iní-ndó sǎ sá cáhnú ñi Yǎ Ndióxi te nándi sá cuèhé sá dúhá càda-ndo cuendá cuíní-ndó quíní-ndó núu nása cada ñaha-gǎ xii-ndo, chi ñáyi ní xíndecu ndéé sanaha-áⁿ ducaⁿ ñi xóo cadá-yu, te ní xihí-yu ní xexihaⁿ còó. ¹⁰ Te ñi vǎ càháⁿ cuèhé-ndó cuendá Yǎ Ndióxi, chi dava ñáyi ní xíndecu ndéé sanaha-áⁿ ducaⁿ ñi quidé-yu ní cáháⁿ cuèhé-yu cuendá-gá te ní quixi espíritú xínú cuèchi núú-gá ní sañi ñaha-xi xií-yu.

¹¹ Te ducaⁿ ñi cuu te ducaⁿ ñi ngúndéé núú tütú Yǎ Ndióxi cuendá dacuàha-o vitna ta cuyatni nduu naa ñuyú-a. Te nchaa tnúhu sá ñi ngodó tñuní-áⁿ càháⁿ dóho ñaha-xi xii-o cuendá sá vǎ cáda-ó dàtná ní quide ñáyi-áⁿ. ¹² Te xiǎⁿ núu nchaa nchòhó ñáyi sàni iní sá ío váha cùndáá ndécú

ichi Xítohó Jesucristú cada cuendá-ndó sã dúcáⁿ-ní cundáá-ndó nõú-gã, te vá dáná cuendá-ndó càda-ndo sã ñã túú cùu váha iní Yã Ndiõxí. ¹³ Te ñu-ni ñã dána quidé sãcũhã dácaháⁿ-xi iní nchaa dava-gã ñãyiũ nãndi quidé-yu, te ñu-ni ducaⁿ quide ñãha-xi xii-ndo. Dico mee Yã Ndiõxí cúú-gã Yã quidé ndãá chi quide-gã nchaa sã càháⁿ-gã, te ñã dána-gã sã sũní cuídó sãcũhã coto ndeé ñãhá-xí xii-ndo, chi není-ni nãcuáa cundeé iní-ndó ñãhá-gã ducaⁿ quide ñãha-xi xii-ndo. Te ñu-ni-gã chindeé ñãhá-gã xii-ndo cundeé iní-ndó vá cáda-ndó cuéi nãndi sã ná ñãcahu iní ñãhá-xí xii-ndo.

¹⁴ Te xiãⁿ nõu càháⁿ-í dóho nchõhõ ñãyiũ ío cùu iní-í sã vá quindáá iní-ndó ñã sã càchí-yu cùu ndiõxí te ñã ndãá chi ñãndi ndaha cue tãe ñuyíú-a ní cuáha nchaa xiãⁿ, te ñã vá cáda càhnu-ndo. ¹⁵ Te duha càháⁿ-í chi cùu-ndo ñãyiũ tãcú tñuní, te mee-ndo ío váha cuáha-ndo cuendá te nõu váha-ni càháⁿ-í ñã ñã túú váha-ni. ¹⁶ Te nchoo ndacáⁿ táhú-ó nõú Yã Ndiõxí cuendá ndudí ndéhé yoho yãha stilé sã xihí-ó, te sã dúcáⁿ xihí-ó ndudí ndéhé yoho yãha stilé-áⁿ, te xiãⁿ ndácú iní-ó sã ñã-ní cùu-ndihi Xítohó Jesucristú cuendá sã ñã sãti ñãñi-gã ní xihí-gã nõu cùrúxí, te ñu-ni ducaⁿ sãtnahá tucu-xi cùu paá sã xéxí-ó òré xihí-ó ndudí ndéhé yoho yãha stilé-áⁿ, chi sã dúcáⁿ xéxi-ó paá-áⁿ xiãⁿ ndácú iní-ó sã ñã-ní cùu-ndihi Xítohó Jesucristú sã cuendá yiqui cũñú-gã. ¹⁷ Te cuéi vãi vihi-ndi dico ñãndi-ni paá xéxí-ó, te sã dúcáⁿ ñãndi-ni paá xéxí-ó xiãⁿ ndácú iní-ó sã ñã-ní cùu-ndihi Xítohó Jesucristú.

¹⁸ Te cada cuendá-ndó nãcuáa quide ñãyiũ isràel, chi ñãyiũ-áⁿ xéxi-yu sã ndúú táhú Yã Ndiõxí. Te sã dúcáⁿ quidé-yu-áⁿ cùtnuní iní-ó sã tñahá tñuhu-yu ndihi-gã. ¹⁹ Te vá caní iní-ndó sã sã dúhá càháⁿ-í te cachí-ndó sã cùnuu nchaa sã càchí-yu cùu ndiõxí ní cadúha cue tãe ñuyíú-a chi ñã túú ñã cúú ñã ñã nchaa xiãⁿ. Te ñu-ni ducaⁿ cùu tucu nchaa sã sãñaha ñãyiũ ndúú táhú-xi chi ñã túú cùnuu-xi, chi ñã-ni cùu-xi ndihi nchaa dava-gã sã xéxí-ó. ²⁰ Te yúhú càchí-í sã sã dúcáⁿ quide nchaa ñãyiũ ñã túú tñahá tñuhu ndihi Yã Ndiõxí, te ñãndi nchaa espíritú cundíhi yucu ñãvãha sãñãhá-yu sã ndúú táhú-xi sã dúcáⁿ quidé-yu. Te ñã ñã díú Yã Ndiõxí sãñãhá-yu sã ndúú táhú-gã.

Te yúhú cuení-í sã vá tñahá tñuhu-ndo ndihi cue espíritú cundíhi yucu ñãvãha. ²¹ Te ducaⁿ chi vá cúú tñahá tñuhu-ndihi cue espíritú cundíhi yucu ñãvãha te tñahá tñuhu-ndihi Xítohó Jesucristú, te ñã túú ndúú váha-xi ngóo càxi-ndi coho-ndi sã ndúú táhú cue espíritú cundíhi yucu ñãvãha-áⁿ, te ngóo càda-ndi nacuáa ní dãndõ tñuhu Xítohó Jesucristú coho-ndi ndudí ndéhé yoho yãha stilé, te càxi-ndi paá càda-ndi sã ndácú iní-ó sã ñã xihí-gã nõu cùrúxí. ²² Te vá caní iní-ó ducaⁿ càda-ndi cuendá sã vá cundéⁿ Yã Ndiõxí, chi ñã túú ñã càhnu cuu-ndi nõu càda-ndi ñãni véxi iní mée-ó, chi mee-gã ío càhnu cuu-gã.

Cada-ndi nchaa nacuáa cuu càhnu Yã Ndiõxí

²³ Te ndãá sã nchãá sã cuení-ó càda-ndi cuu càda-ndi dico ñã nchãá cùu-xi sã váha sã cúú-xi-ó, te ñã ñã nchãá-xi chindeé ñãha-xi nacuáa níhi ndeé-gã-ó cundeecu-ndi ichi Xítohó Jesucristú. ²⁴ Te xini ñuhu-xi sã cáda-ó sã váha sã cúú-xi tñaha ñãyiũ-ndi te ñã díú mée-ni sã cúú-xi mée-ndi càda-ndi.

²⁵ Te nchõhõ cuu càxi-ndi nchãa cuñú sã cúyãhu cuñú sã xini càxi-ndi, te vá ndúcú tñuhu-ndo te nõu cùu-xi cuñú sã ñã ndúú táhú sã càchí-yu cùu ndiõxí. Te ñã túú ñã caní iní-ndó càxi-ndi, ²⁶ chi ñuyíú-a ndihi nchaa sã ío cúú-xi cuendá Yã Ndiõxí.

²⁷ Te nõu ñã ñãyiũ ñã túú ndecu ichi Xítohó Jesucristú càháⁿ ñãhá-yu xii-ndo quíhí-ndi càxi-ndi dítã vehé-yu, te nõu sãni iní-ndó sã quíhí-ndi te cuu quíhí-ndi te càxi-ndi cuéi ñãni cùu sã táxi-yu dico vá càcãⁿ tñuhú-ndi nõu-yu nõu ndeé ní ñãni-yu, te ducaⁿ te cuu váha iní-ndó càxi-ndi. ²⁸ Te nõu ñã ñãyiũ càchí-yu sã xiãⁿ cúú-xi sã ñã ndúú táhú sã càchí-yu cùu ndiõxí te vá cáxi-ndi cuendá sã ñãyiũ ducaⁿ càháⁿ-áⁿ cuu váha iní-yu te ñã túú tñahí ñã caní iní-yu. ²⁹ Te yúhú càháⁿ-í cuendá nacuáa sãni iní mée ñãyiũ ducaⁿ càháⁿ-áⁿ te ñã díú sã nacuáa sãni iní mée-ndi quide-ndi.

Te dava-ndi càchí-ndi: “Cuu-ni càda-ndi nchãa nacuáa sãni iní mée-ó cuéi dava-gã ñãyiũ sãni iní-yu sã ñã túú ndúú váha-xi sã dúcáⁿ càda-ndi”, duha càchí-ndi. ³⁰ Te càchí tucu-ndi: “Ñã túú tãu-xi càháⁿ cuéhé ñãyiũ cuendá-ó sã cuendá nchaa sã

xéxí-ó chi ndàcáⁿ táhú-ó nǔú Yá Ndiöxí òré xéxí-ó”, duha càchí-ndó. ³¹ Te cuèi nándi sá xini caxi-ndo nihí-ndó xèxi-ndo àdi quide-ndo, te cada-ndo nàcuáa cáháⁿ vaha ñáyiú cuendá Yá Ndiöxí. ³² Te vá cadá-ndó sã ñà túú tàú-ndó càda-ndo cuendá sá vã cadá ñáyiú ìⁿ sá ñà túú cùu vaha iní Yá Ndiöxí. Te ni sã cúú-xí cuè ñáyiú isràél, te ni sã cúú-xí cuè ñáyiú ñá túú cùu ñáyiú isràél, te ni sã cúú-xí cuè ñáyiú ndècu ichi-gá vá dúcáⁿ càda-ndo sá cúú-xí-yu. ³³ Te yúhú ío ndùcu ndee-í quidè-í nàcuáa cudùu-í núú nchàa ñáyiú, te quide-í sá vaha sá cúú-xí-yu, te ñá túú quide-í mee-ni sã cúú-xí mée-í. Te ducaⁿ quide-í cuendá quindáá iní-yu tnúhu Xítóhó Jesucristú te naníhí tàhú-yu.

11

¹ Te chí cáncàcúⁿ nihnu cada-ndo nchàa nacuáa quide-í nchicúⁿ nihnu-í nchaa nàcuáa quide Xítóhó Jesucristú.

Nàcuáa tàú-xi cada nchaa ñáyiú òré níúú tàcá-yu dàcuahá-yu tnúhu Yá Ndiöxí

² Te nchòhó ñáyiú ndècu ndihí-í ichi Xítóhó Jesucristú càchí tnúhu-í xii-ndo sã ío cùdíí iní-í, chi ndàcu iní ñáhá-ndó xii-í, te quide-ndo nchaa nacuáa ní dánèhé ñáhà-í xii-ndo. ³ Te cuini-í sá nchòhó cutnùní iní-ndó sã ìⁿdii-ni Yá Ndiöxí cúú-gã Yaá cùnùu taxi tnuní ñáhá xii Xítóhó Jesucristú, te ducaⁿ Xítóhó Jesucristú ìⁿdii-ni-gá cùnùu taxi tnuní-gá nchaa cue téé, te nchaa cue téé òré níúú mee-güedé cùnùu-güedé táxí tnùní-güedé ñadìhí-güedé. ⁴ Te núu nchoo cuè téé na dàdàhu-o díquí-ó òré càháⁿ-ó nǔú ñáyiú tnúhu sá dácàhu iní ñáhá Yá Ndiöxí xii-o àdi òré càháⁿ ndihí-o-gã, te ìⁿ sácáⁿnǔú cúú-xí te núu ducaⁿ na càda-o dadàhu-o díquí-ó. ⁵ Dico núu ñáyiú òré càháⁿ ndihí-yu Yá Ndiöxí, àdi òré càháⁿ-yu tnúhu sá dácàhu iní ñáhá-gã xii-yu núú tnàhá ñáyiú-yu, te sácáⁿnǔú cúú-xí te núu vá dadàhu-yu díquí-yu, chi ìⁿ-ni cùu-xi te núu na dèté ndí-yu díquí-yu. ⁶ Te núu ñá túú cuini cue ñáyiú òré níúú dàdàhu-yu díquí-yu te váha-gá sá ná dèté ndí-yu díquí-yu. Te núu cùcahàⁿ núú-yu sá dèté díquí-yu te váha-gá sá ná dàdàhu-yu díquí-yu. ⁷ Te nchoo cuè téé

vá cúú dàdàhu-o díquí-ó òré càháⁿ ndihí-o Yá Ndiöxí ni òré càháⁿ-ó tnúhu sá dácàhu iní ñáhá-gã xii-o nǔú ñáyiú chi díhna-gá-ó ní cadúha ñaha Yá Ndiöxí xii-o, te ní taxi ndecu-gá nchaa sá xini tnùní-ó dàtná ndécú nchàa sá xini tnùní mée-gã. Te ducaⁿ ní quide-gá chi cuini-gá sá nchòó càda-o nacuáa cáháⁿ nchaa dava-gá ñáyiú sá ío càhnu cuu-gá, te cue ñáyiú òré níúú quidè-yu nàcuáa cunuu nchòo cue téé. ⁸ Te Yá Ndiöxí ní cadúha-gá téé, dico ñá díú yìquí naha ñadìhí ní quenehe-gá ní cadúha-gá téé chi yìquí naha téé ní quenehe-gá ní cadúha-gá ñadìhí. ⁹ Te sá cuendá téé ducaⁿ ní cadúha-gá ñadìhí-á te ñá díú sã cuendá ñadìhí ní cadúha-gá téé. ¹⁰ Núu xiiⁿ tàú-xi sá ncháá ñáyiú òré níúú dàdàhu-yu díquí-yu cuendá ducaⁿ cùnùní sá ñà túú cùnùu-yu dàtná cùnùu nchoo cue téé. Te ducaⁿ xini ñuhu-xi cadá-yu sá cuendá nchaa espíritú xini cuèchi núú Yá Ndiöxí. ¹¹ Te vitna nchoo ñáyiú ndècu ichi Xítóhó Jesucristú, vá càchí-ó sã cuè téé ñá túú xini ñuhu-güedé cue ñáyiú òré níúú chindee ñáhá-yu, te ni vá càchí-ó sã cuè ñáyiú òré níúú ñá túú xini ñuhu-yu cue téé chindee ñàha-güedé xii-yu. ¹² Te ìⁿ yìquí naha téé ní queñuhu Yá Ndiöxí ní cadúha-gá ñadìhí, dico vitna chi ñáyiú òré níúú dácàcú-yu téé. Te téé, ñadìhí ní cadúha Yá Ndiöxí, te òré níúú ducaⁿ ní cadúha-gá nchaa dava-gá sá ío.

¹³ Te mee-ndo càda cuendá-ndó te núu ndùu vaha-xi sá vã dadàhu cue ñáyiú òré níúú díquí-yu òré càháⁿ ndihí-yu Yá Ndiöxí àdi ñáhá. ¹⁴ Te nchaa ñáyiú càháⁿ-yu sá ñà túú ndùu vaha-xi sá cuè téé cundu nani idi díquí-güedé, chi ìⁿ sácáⁿnǔú cúú-xí càchí-yu. ¹⁵ Te nchaa ñáyiú òré níúú nani idi díquí-xi càchí ñáyiú sá ìⁿ sá vaha cùu-xi sá cúú-xí-yu sá dúcáⁿ nani idi díquí-yu. Te ducaⁿ chi Yá Ndiöxí ní cachí-gá sá dúcáⁿ cundu-yu cuendá quidàhu-xi díquí-yu. ¹⁶ Te núu ío ñáyiú cuini dacáa cuendú cuendá sá ní càháⁿ-í-a, te na cùnahá-yu sá ncháá nchùhú cue téé càháⁿ tnúhu Xítóhó Jesucristú òré níúú ducaⁿ sàni iní-ndí cada nchaa ñáyiú òré níúú. Te òré níúú ducaⁿ sàni iní nchaa ñáyiú ndècu ichi-gá.

Cuendá ñáyiú ñá túú quide datná ní quide Xítohó Jesucristú cútñahá ní cudini-gá ndihi cue téé ní xica cuu ndihi-gá

17 Te nchòhó ñá túú quide váha-ndo ndècu-ndo núu xiǎⁿ duha na càháⁿ-í dóho-ndo, chi nchòhó òré tàcá-ndó ñá túú quide váha-ndo chi ñá túú chindee tñaha-ndo cada-ndo sá vǎha, chi da nàdatuhú iní tñahá-ndó nàcuáa ndècu-ndo. 18 Te díhna-gá na cǎchí tñúhu-í xii-ndo sá nihí-í tñúhu sá òré tàcá-ndó quide-ndo nacuáa ní cáháⁿ Xítohó Jesucristú, te ñá túú cùu ñⁿnuu-ndo oré ducaⁿ quide-ndo nacuáa ní cáháⁿ-gá. Te dava sá càháⁿ ñáyiú sàndáá iní-í te dava ñáhá. 19 ¡Te ndáá sá dúcáⁿ tñahí cada-xi vá cúú ñⁿnuu-ndo cuendá ducaⁿ cùtnuní nǔu ndèdacàa-ndo sandáá ndisa iní-ndó tñúhu Xítohó Jesucristú te ndèdacàa-ndo ñáhá! 20 Te ndi tñahá òré tàcá-ndó quide-ndo datná ní quide Xítohó Jesucristú cútñahá ní cudini-gá ndihi cue téé ní xica cuu ndihi-gá, te ñá túú quide-ndo nacuáa tàú-xi cunduu chi cùtexínu-ni quide-ndo. 21 Chi òré tàcá-ndó quide-ndo nacuáa ní cachí Xítohó Jesucristú, te dava-ndo ngòdó núú-ndó díhna-gá-ndó xèxi-ndo sá nèhé-ndó te ñá túú sá cùndètu tñaha-ndo, te ñá túú càháⁿ tñahá-ndó nǔu xiǎⁿ dava-ndo ñà túú xèxi-ndo ndahá xití-ndó, te dava-ndo xidó-ndó quide-ndo chi xini-ndo. 22 Te vá dúcáⁿ càda-ndo chi càa vehe-ndo núú dúcáⁿ cǎxi-ndo coho-ndo cada-ndo ndéé ndahá xití-ndó, chi sá dúcáⁿ quide-ndo te dàquee tǐhú-ndó nchàa dava-gá ñáyiú ndècu ndihi-ndo ichi Yá Ndiòxí, te dándóo canúú-ndó nchàa ñáyiú ndàhú sá dúcáⁿ quide-ndo. ¡Núu xiǎⁿ vá cúú cǎchí-í sá cúú-ndó ñáyiú quide váha chi ñá túú quide váha-ndo sá dúcáⁿ quide-ndo ndecu-ndo!

Xítohó Jesucristú ní dándóo tñúhu-gá sá cóhó-ó ndudí ndéhé yoho yàha stilé te caxi-o pàa cuendá ndacu iní-ó sá ñí xihí-gá

(Mt. 26:26-29; Mr. 14:22-25; Lc. 22:14-20)

23 Te dàtná-ni ní dánèhé ñáhá Xítohó Jesucristú xii-í te ñi-ndi ducaⁿ ñí dánèhé ñáhà-í xii-ndo, chi ñi-ndi níú cútñahá ní sáha cuendá ñáhá ndí Jùdás Iscàrioté xii-gá núú cuè téé cùu úhú iní ñáhá ñí queheⁿ-gá pàa, 24 te ní ndacáⁿ táhú-gǎ núú Yá Ndiòxí, te ní táhú cuèchi-gá, te ní xáhaⁿ-gǎ xii cue téé xica

cuu ndihi-gá: “Chí quéhéⁿ pàa-a caxi-ndo te cada iní-ndó sǎ cúú-xí dàtná yiquí cùñú-í, chi yúhú cuú-í sǎcuendá-ndó. Te ducaⁿ-ni càda-ndo cundecu-ndo cuendá ndacu iní ñáhá-ndó xii-í”, cǎchí-gǎ xáhaⁿ-gǎ xii-güedé. 25 Te sǎtá ñí yáha ní xexi-güedé pàa sá ñí sǎñaha-gǎ, te ní queheⁿ-gǎ tǎsǎⁿ ñúhú ndudí ndéhé yoho yàha stilé, te ní ndacáⁿ táhú tucu-gǎ núú Yá Ndiòxí. Te ní xáhaⁿ-gǎ xii cue téé xica cuu ndihi-gá: “Chí cóhó ndudí ndéhé yoho yàha stilé-a, te cada iní-ndó sǎ cúú-xí dàtná níñí-í, te cuendá níñí-í sǎ cǎtí òré cuú-í cutnùní ndáá sǎ Yá Ndiòxí cada-gǎ ingǎ núú sǎ vǎha sǎ cúú-xí ñáyiú. Te ndi tñahá òré coho-ndo ndudí ndéhé yoho yàha stilé-áⁿ te ndacu iní ñáhá-ndó xii-í, te ducaⁿ-ni càda-ndo cundecu-ndo”, cachí-gǎ xáhaⁿ-gǎ xii-güedé. 26 Te ndi tñahá òré xéxi-ndó pàa te xihí-ndo ndudí ndéhé yoho yàha stilé, te xiǎⁿ dátúu-ndo nǔu ñáyiú sǎ Xítohó Jesucristú ní xihí-gǎ cuendá-yu, te ducaⁿ-ni càda-ndo cundecu-ndo ndéé ná sǎa nduu quixi tucu Xítohó Jesucristú.

Nàcuáa cada-o òré caxi-o pàa ndihi òré coho-o ndudí ndéhé yoho yàha stilé dàtná ní cachí Xítohó Jesucristú

27 Te dava-ndo ñà túú quide-ndo nacuáa cuiní Yá Ndiòxí cada-ndo òré xéxi-ndó pàa ndihi òré xihí-ndó ndudí ndéhé yoho yàha stilé, te sǎ dúcáⁿ quide-ndo-áⁿ te cucuéchi xii-ndo chi ñá túú nèhe-ndo sǎ yíñúhu sǎ cúú-xí yiquí cuñú Xítohó Jesucristú, te ni ñà túú nèhe-ndo sǎ yíñúhu sǎ cúú-xí níñí-gǎ. 28 Te ío váha cada cuendá-ndó te núu ndècu váha iní-ndó nǔu Xítohó Jesucristú òré cùmǎní-gǎ caxi-ndo pàa ndihi òré cùmǎní-gǎ coho-ndo ndudí ndéhé yoho yàha stilé. Te núu ndècu váha iní-ndó nǔu-gǎ te caxi-ndo te coho-ndo. 29 Te dava nchòhó ñá túú sàni váha iní-ndó cuendá yiquí cùñú Xítohó Jesucristú te xèxi-ndo pàa te xihí-ndo ndudí ndéhé yoho yàha stilé, te nacháhu-ndo sǎ dúcáⁿ ñà túú sàni váha iní-ndó. 30 Te ñi-ndi sǎ dúcáⁿ quide-ndo núu xiǎⁿ vǎi-ndo cuhú, te ío ndàhú ndécú-ndó, te dava ñáyiú ndècu ndihi-ndo sa ní xihí-yu. 31 Dico núu ío váha sáha-o cuendá nàcuáa ndècu-o núú Yá Ndiòxí, te vá dúcáⁿ dándóo ñaha-gǎ xii-o. 32 Te òré ndéhé Yá Ndiòxí sǎ ñà túú quide

ndáá-ó ndècu-o te dándoho ñaha-gá xii-o. Te ducaⁿ quide-gá cuendá sá vǎ cuíta nihnu-o, chi núu ñáhá te cuíta nihnu-o ndìhi nchaa ñáyiú ndècu ichi cuehé ichi duha.

³³ Te núu xǎⁿ càháⁿ-í dóho nchaa nchòhó ñáyiú ndècu ndìhi-í ichi Xítóhó Jesucristú sá òré tacá-ndó càda-ndo nacuáa ní quide Xítóhó Jesucristú cùtnàhá ní cudìni-gá ndìhi cue téé ní xica cuu ndìhi-gá, te cundetu tnàha-ndo nduu nchaa-ndo te dǎtnùnì ducaⁿ càda-ndo. ³⁴ Te núu dava-ndo xihí-ndó dòcò te caxi duuⁿ-ndo vèhe-ndo te dǎtnùnì natacá-ndó, cuendá òré nat-acá-ndó te vǎ cáda-ndó ìⁿ sá ñà túú tàú-ndó càda-ndo cuendá sá vǎ dándòho ñaha Yǎ Ndiòxí xii-ndo. Te òré quixi coto ñaha-í xii-ndo te dàvǎ-án cachí tnúhu-í xii-ndo nchaa dava-gá sá cúmǎní.

12

Nàcuáa chindee ñaha Espiritú Yǎ Ndiòxí cada-o ìⁿ ìⁿ-o

¹ Te nchòhó ñáyiú ndècu ndìhi-í ichi Xítóhó Jesucristú cuiní-í cachí tnúhu-í xii-ndo nàcuáa chindee ñaha Espiritú Yǎ Ndiòxí xii-o ìⁿ ìⁿ-o cuendá cutnùnì iní-ndó.

² Te nchòhó sa nàha-ndo sá cùtnàhá vátá cùndècu-gá-ndó ichi Xítóhó Jesucristú ní xóo dandàhú ñáhá yùcu ñávǎha xii-ndo, te ní xóo quíndáá iní-ndó nchaa sá ñí cadúha cue ñáyiú ñuyíú-a nchaa sá càchí-yu cùu ndiòxí te ñá ndáá sá ndiòxí cúú-xí, te nchaa xǎⁿ ñá túú càháⁿ-xi. ³ Te cuiní-í sá nchòhó cutnùnì iní-ndó sǎ Espiritú Yǎ Ndiòxí ñá túú chindee-xi ní ìⁿ ñáyiú cuendá sá càháⁿ úhú-yu Xítóhó Jesucristú. Te ní ìⁿ ñáyiú ñá túú càhu iní-yu càháⁿ-yu sá Xítóhó Jesucristú cúú-gǎ Xítóhó-yu te núu ñá túú Espiritú Yǎ Ndiòxí dácàhu iní ñáhá-xí xí-yu.

⁴ Te ndì dǐíⁿ ndì dǐíⁿ ndùu chiuⁿ ní cachí Espiritú Yǎ Ndiòxí cada-o, te diu-ni ìⁿdì-ni Espiritú-gá ndécú. ⁵ Te ndì dǐíⁿ ndùu chiuⁿ quide-o xinu cuechi-o núú ìⁿdì-ni Xítóhó Jesucristú. ⁶ Te ndì dǐíⁿ ndì dǐíⁿ chindee ñaha Yǎ Ndiòxí xii-o nàcuáa cada-o chiuⁿ-gá, te diu-ni ìⁿ dìi-gá ndécú chindee-gá nchaa ñáyiú. ⁷ Te Espiritú Yǎ Ndiòxí quidé-xí sá nchóo càda-o sá vǎha, te ducaⁿ chindee-o cue ñáyiú ndècu ndìhi-o ichi Xítóhó Jesucristú. ⁸ Te dava-o ñí nduu táhú-ó núú

Yǎ Ndiòxí sá Espiritú-gá cada te ndacu-o càháⁿ-ó tnúhu sá ìo càhnu cuu diu-ni tnúhu mee Yǎ Ndiòxí, te dava tucu-o ñí nduu táhú-ó cùtnunì iní-ó nàcuáa càháⁿ tnúhu-gá te càháⁿ-ó nàcuáa cuiní Espiritú-gá. ⁹ Te dava tucu-o ñí nduu táhú-ó sǎ ìo quíndáá iní-ó Xítóhó Jesucristú cuendá cada-gá ìⁿ sá cuiní-ó, te ducaⁿ chi Espiritú Yǎ Ndiòxí chíndèe ñaha-xi xii-o. Te dava tucu-o ñí nduu táhú-ó sǎ càcǎⁿ táhú-ní-ó núú Xítóhó Jesucristú cuendá ñáyiú cùhú te ndúha-yu. ¹⁰ Te dava tucu-o ñí nduu táhú-ó sǎ ndácú-ó càda-o nchaa sá vǎ yóo tnàhí ndàcu cada, te dava tucu-o ñí nduu táhú-ó núú Yǎ Ndiòxí sá càháⁿ-ó tnúhu sá dácàhu iní ñáhá-gǎ xii-o, te dava tucu-o ñí nduu táhú-ó sǎ cùtnùnì iní-ó núú diu Espiritú Yǎ Ndiòxí chíndèe ñaha-xi xii ñáyiú òré càháⁿ-yu tnúhu-gá àdi cue espíritú cùndìhi yucu ñávǎha. Te dava tucu-o ñí nduu táhú-ó càháⁿ-ó tnúhu sá dácàhu iní ñáhá Espiritú Yǎ Ndiòxí xii-o tnúhu sá ñà túú xìní-ó, te dava tucu-o ñí nduu táhú-ó càháⁿ-ó nàcuáa quèe-xi nchaa tnúhu-án. ¹¹ Te ìⁿdì dǐí-ni Espiritú Yǎ Ndiòxí ducaⁿ chindee ñaha-xi, te diu-ni Espiritú-gá dácàhñu ñaha-xi xii-o ndì dǐíⁿ núú chiuⁿ sá cuiní méé-xí càda-o.

Nchaa-o ìⁿ-ni cuu-o ndìhi Xítóhó Jesucristú

¹² Te nchoo ñáyiú ndècu ñuyíú-a tǐtní xichi cùu yiqui cuñú-ó dico ìⁿ-ni cùu-xi, te diu-ni ducaⁿ sǎtnahá-xi cùu-o vitna ndecu-o ichi Xítóhó Jesucristú chí ìⁿ-ni cùu-o ndìhi-gá. ¹³ Te dava-o cùu-o ñáyiú isràél, te dava-o ñà túú cùu-o ñáyiú isràél, te dava-o cùu-o ñáyiú ñá túú tnàhí dàñá quee núú chíúⁿ pàtróóⁿ-xi, te dava-o cùu-o ñáyiú dàñá quee núú chíúⁿ pàtróóⁿ-xi. Te mee Espiritú Yǎ Ndiòxí ní quide-xi sá ncháá-ó ìⁿ-ná cúú-ó ndècu-o ndìhi Xítóhó Jesucristú. Te Yǎ Ndiòxí ní cachí-gá sá ncháá-ó cùndecu ndìhi-o Espiritú-gá.

¹⁴ Te nchòhó xìní-ndó sǎ tǐtní xichi cùu yiqui cuñú-ó te ñá díú ìⁿ-ni xichi cuu-xi. ¹⁵ Te cuèi sáhá-ó ndìhi ndaha-o ñá túú ìⁿ-ni cuu-xi dico vǎ cúú càchí-ó sǎ sáhá-ó ñà túú cùu-xi yiqui cuñú-ó. ¹⁶ Te cuèi lóho-o ndìhi tinuu-o ñá túú ìⁿ-ni cuu-xi dico vǎ càchí-ó sǎ lóho-o ñà túú cùu-xi yiqui cuñú-ó. ¹⁷ Te núu nihí ní ndúú yiqui cuñú-ó ní

xĩndeé mee-ni tĩnuu-o, te ñá túú ndèé cundeé lóho-o cùndedóho ni cùu te núu ducaⁿ, àdi núu ñihí yiqui cùñú-ó ní xĩndeé mee-ni lóho-o te ñá túú ndèé cundeé dítní-ó ní cùu te núu ducaⁿ. ¹⁸ Dico mee Yá Ndiõxí ní taxi ndecu-gá ñⁿ ñⁿ xichi yiqui cùñú-ó nàcuáa ní cachí iní mée-gã. ¹⁹ Te núu ñⁿ-ni sã ní xĩndecu ñihí yiqui cùñú-ó, te vá cùndùu-xi nacuáa tàú-xi cunduu ni cùu te núu ducaⁿ. ²⁰ Dico titní xichi cùu yiqui cùñú-ó, te ñⁿ-ni cùu-xi ñihí-xi.

²¹ Te sa nàha-o sá vã cúú cãchí-ó sã tĩnuu-o ñá túú xini ñuhu-xi ndaha-o, àdi díquí-ó ñà túú xini ñuhu-xi sáhá-ó. ²² Te nchoo sà naha-o sá dává xichi yiqui cùñú-ó sã cãchí-ó sã ñà túú cùnuu ío-gá xini ñuhu-xi. ²³ Te dava xichi yiqui cùñú-ó sã ñà túú quide cuendá cávihí-ó nchaa xiãⁿ sá quidáhu dóó sácũhnu-o, te dava xichi yiqui cùñú-ó ñà cúú cùtúu chi dacuití sã quidáhu. ²⁴ Te nchaa xichi yiqui cùñú-ó sã cúú cùtúu ñá túú xini ñuhu-xi quidáhu. Te Yá Ndiõxí ní taxi ndecu-gá nchaa xichi yiqui cùñú-ó nàcuáa tàú-xi cunduu. Te ní cachí-gá sá dává-gã xichi yiqui cùñú-ó núú vã cúú cùtúu quidáhu. ²⁵ Te ducaⁿ ñi quide-gá cuendá sá ñⁿ-ní cùu yiqui cùñú-ó. Te ducaⁿ ndi tnahá ñⁿ ñⁿ xichi yiqui cùñú-ó chĩndee tnahá-xi. Te ducaⁿ sãtnahá-xi cùu nchoo vitna ndecu-o ichi Xítoho Jesucristú chi chĩndee tnahá-o. ²⁶ Te núu ñⁿ xichi yiqui cùñú-ó ná tnahúhú te ñihí-ó quide úhú-xi, te núu ñⁿ xichi yiqui cùñú-ó ío váha ndècu-xi te ducaⁿ ñihí yiqui cùñú-ó cúú váha-xi. Te ducaⁿ sãtnahá-xi cùu-o vitna ndecu-o ichi Xítoho Jesucristú.

²⁷ Te nchoo ndècu ndihí-o Xítoho Jesucristú, te cùu-o datná yiqui cùñú-gá te ñⁿ ñⁿ-o cùu-o datná ñⁿ ñⁿ xichi yiqui cùñú-gá. ²⁸ Te ducaⁿ sãtnahá-xi cùu-o chi Yá Ndiõxí ní taxi-gá ndi díñⁿ ndi díñⁿ chiúⁿ quide-o sá cúú-xi nchaa ñá yiu ndècu ichi-gá. Te díhna-gá cue téé caca cuu cáháⁿ tnúhu-gá núú ñá yiu ní taxi ndecu-gá, te dátnúni ní taxi ndecu-gá cue téé cáháⁿ tnúhu-gá nàcuáa dàcahu iní ñáhá mèe-gá, te dátnúni ní taxi ndecu-gá cue téé dānehé ñáhá xii ñá yiu tnúhu-gá núú tàcá-yu, te dátnúni ní taxi ndecu tucu-gá cue téé ndàcu quide sá vã yõ tnahí ndàcu cada. Te ní taxi ndecu

tucu-gá cue téé xicáⁿ táhú-ni núú Xítoho Jesucristú cuendá ñá yiu cùhú te ndúha-yu. Te ní taxi ndecu tucu-gá cue téé chĩndee cue ñá yiu ndècu ichi-gá. Te ní taxi ndecu tucu-gá cue téé yĩndaha ñaha xii ñá yiu ndècu ichi-gá, te ní taxi ndecu tucu-gá cue téé cãháⁿ tnúhu sá dácàhu iní ñáhá Espiritú-gá tnúhu sá ñà túú xini-güedé. ²⁹ Te ñá nchaa-ó cùu-o cue téé ní táuchíúⁿ Xítoho Jesucristú cáháⁿ tnúhu-gá núú ñá yiu, te ñá nchaa-ó cùu-o cue téé cãháⁿ tnúhu sá dácàhu iní ñáhá Yá Ndiõxí xii-o. Te ñá nchaa-ó cùu-o cue téé dàcuaha ñaha xii-yu. Te ñá nchaa-ó cùu-o cue téé quide sá vã yõ tnahí ndàcu cada. ³⁰ Te ñá nchaa-ó cùu-o cue téé dícú-ni cácáⁿ táhú-ni núú Xítoho Jesucristú cuendá ñá yiu cùhú te ndúha-yu. Te ñá nchaa-ó cùu-o cue téé cãháⁿ tnúhu sá dácàhu iní ñaha Espiritú Yá Ndiõxí tnúhu sá ñà túú xini-ó, te ñá nchaa-ó cùu-o cue téé cùtnuní iní-xi cáháⁿ nàcuáa ndùu tnúhu-áⁿ. ³¹ Te ío nducu ndèe-ndo cada-ndo nacuáa nduu táhú-ndó núú Yá Ndiõxí nchaa sá ío-gá cùnuu cada-ndo. Te vitna na dānehé ñáhá tucu-í xii-ndo nàcuáa cada-ndo, dico sá dānehé ñáhá-í-a ío-gá cùnuu-xi.

13

Cuu iní-ó tnahá ñá yiu-o

¹ Te núu nchoo xini-ó cáháⁿ-ó tnúhu sá ío vii ío váha cuáháⁿ cãháⁿ ñá yiu ñuyíú-a, àdi xini-ó cáháⁿ-ó tnúhu sá ío vii ío váha cuáháⁿ cãháⁿ cue espíritú xini cuèchi núú Yá Ndiõxí, te núu xini-ó cáháⁿ-ó nchaa tnúhu-áⁿ te ñá túú cùu iní-ó cuè tnahá ñá yiu-o ña, te ñá túú nandíhi-xi sá xini-ó cáháⁿ-ó tnúhu-áⁿ te cùu-o datná dava caá sá ío dusaⁿ quide. ² Te núu cùu-o ñá yiu cãháⁿ tnúhu sá dácàhu iní ñáhá Yá Ndiõxí, àdi cuu-o ñá yiu cùtnuní iní-xi nàcuáa cuáháⁿ nchaa tnúhu ndùu yuhu ni cuu, àdi cuu-o ñá yiu ío váha cùtnuní iní-xi nchaa nàcuáa quide Yá Ndiõxí, àdi cuu-o ñá yiu ío váha sãndáá iní ñáhá xii Yá Ndiõxí nàcuáa ndacu-o cùu-o ñⁿ yucu xocuiñí-xi núú ndécú-xi, te núu nchaa xiãⁿ xini-ó càda-o te ñá túú cùu iní-ó cuè tnahá ñá yiu-o ña, te ñá túú vèdana nandíhi-xi te núu vá cúú iní-ó tnahá ñá yiu-o cuèi na càda-o nchaa xiãⁿ. ³ Te cuèi nchaa sá ndécú ndihí-o na dacáhñu-o, te cuèi na cuãha cuendá-ó mèe-o cáyú-ó sã cúú-xi Yá Ndiõxí, dico ñá túú vèdana chĩndee ñaha-xi xii-o sá

dúcáⁿ càda-o te núu ñá túú cùu iní-ó cuè tnahá ñáyi-u-o.

⁴ Dico núu cùu iní-ó cuè tnahá ñáyi-u-o, te càhnu iní-ó, te quide váha-o, te ñá túú cùu-o ñáyi-u cuédú íní, te ni ñà túú càháⁿ-ó núu cùu cahnu-o, te ni ñà túú sàni iní-ó càda cahnu-o mee-o, ⁵ te ni ñà túú ñùhu cuehé iní-ó, te ni ñà túú ndùcu-o mee-ni sá cúú-xí mèe-o, te ni ñà túú-gã cúdèéⁿ-ó cuendá ñⁿ sá cúú, te ni ñà túú-gã sácũhuⁿ iní-ó sã quidé ñàha tnahá ñáyi-u-o xii-o. ⁶ Te ni ñà túú-gã cúdĩ iní-ó nchàa sá ñà túú vãha quide ñáyi-u, chi mee-nã cuendá nchaa sá vãha cúdĩ iní-ó. ⁷ Te nchaa sá yãha-o sàcahnu iní-ó, te sàni váha iní-ó cuendá nchaa ñáyi-u, te sàni iní-ó sã díú-ní nchàa sá vãha cuu xii nchaa tnahá ñáyi-u-o ndèé cuèé-gã, te ío quide cahnu iní-ó cuèi nãndi sá yãha-o, te nchaa xiãⁿ quidé-ó te núu cùu iní-ó cuè tnahá ñáyi-u-o.

⁸ Te ni caa ni quíhíⁿ duha-ni cuu iní-ó cuè tnahá ñáyi-u-o. Dico sáá nduu te vá cóo-gã ñáyi-u cáháⁿ tnúhu sá dácàhu iní ñáhá Yã Ndiõxí, te ni vã cóo-gã ñáyi-u cáháⁿ tnúhu sá dácàhu iní ñáhá Espíritú Yã Ndiõxí tnúhu sá ñà túú xìní-yu, te ni vã cóo-gã ñáyi-u túha dàtná túha ñáyi-u vitna. ⁹ Te vitna ñá túú cùtnuní iní-ó nchàa nacuáa sàni iní Yã Ndiõxí chi sacú-ni cùtnuní iní-ó, te ducaⁿ sácú-ni càháⁿ-ó nàcuáa ndùu tnúhu-gã, dico càháⁿ-ó tnúhu-gã nàcuáa dácàhu iní ñáhá-gã xii-o. ¹⁰ Te na sàá nduu càda Yã Ndiõxí nchaa nàcuáa tàú-xi cunduu, te dává-áⁿ te nchaa sá càhí-gã ñá túú ndècu-xi nacuáa tàú-xi cunduu vá dúcáⁿ-gã cundecu-xi.

¹¹ Te yúhú cútnàhá ní cuu landú-í ní xóo cada-í sá cùu-í landú, ní xóo cáháⁿ-í, ní xóo caní iní-í, te ní xóo tecú tnùní-í dàtná quidé cuè landú xíndecu vitna, dico sátá ñⁿ cuu-í ñⁿ téé cùu sacuéhé te ñá túú-gã quidè-í dàtná ní xóo cada-í cútnàhá ní cuu landú-í. ¹² Te ducaⁿ sãtnahá-xi cùu-o vitna ndecu-o ichi Xítohó Jesucristú, chi ñá túú cùtnuní váha iní-ó nàcuáa cùu cuendá Yã Ndiõxí, te cùu-o datná ñáyi-u ndèhe ñⁿ núu yútátá sã ñà túú tũu váha núú-xi, te ducaⁿ sãtnahá-xi cùu-o chi ñá túú cùtnuní váha iní-ó nãsa cùu cuendá-gã, dico sáá nduu quíní núú-ó-gã. Te nchoo sácú-ni cùtnuní iní-ó nàcuáa ndùu-gã vitna dico na sàá nduu te quíní ndáá-ó nàcuáa càa nacuáa

ndùu-gã dàtná xìní ñáhá mèe-gã xii-o. ¹³ Te ni caa ni quíhíⁿ ducaⁿ-ni quíndáá iní-ó Yã Ndiõxí, te ducaⁿ-ni cùndecu ndíhi-o tnúhu ndee iní cundecu-o ndíhi-gã, te ducaⁿ-ni ío cuu iní-ó-gã ndíhi tnahá ñáyi-u-o. Te sá cúú iní-ó Yã Ndiõxí ndíhi sá cúú iní-ó tnahá ñáyi-u-o xiãⁿ ío-gã cùnùu-xi dacúúxí dává-gã.

14

Ñáyi-u càháⁿ tnúhu sá dácàhu iní ñáhá Espíritú Yã Ndiõxí

¹ Te vá dáñá ndèé-ndó cùu iní-ndó tnahá ñáyi-u-ndo, te cuhuⁿ iní-ndó sã ndùu táhú-ndó núú Yã Ndiõxí tĩtní núú chiuⁿ cada-ndo nacuáa chindee ñàha Espíritú-gã xii-ndo, te ío cuhuⁿ iní-ndó sã ndúú táhú-ndó cáháⁿ-ndó tnúhu sá dácàhu iní ñáhá Yã Ndiõxí xii-ndo. ² Te cue ñáyi-u càháⁿ tnúhu sá dácàhu iní ñáhá Espíritú Yã Ndiõxí tnúhu sá ñà túú xìní-yu, te tnúhu càháⁿ-yu-áⁿ cúú-xí sã cúú-xí Yã Ndiõxí te ñá díú sã cúú-xí ñáyi-u chi ñá túú tècú tnùní-yu, te mee Espíritú Yã Ndiõxí quidé-xí dùcaⁿ cáháⁿ-yu tnúhu yìyuhu. ³ Te cue ñáyi-u ní nduu táhú núú Yã Ndiõxí cáháⁿ tnúhu sá dácàhu iní ñáhá-gã xií-yu, te ñáyi-u-áⁿ dácàháⁿ-yu ñáyi-u nàcuáa cuita níhí ndèé-gã-yu cundecú-yu ichi-gã, te ducaⁿ cuãñàhá-yu tnúhu ndee iní xií-yu òré ndíhú iní-yu. ⁴ Te ñáyi-u càháⁿ tnúhu sá dácàhu iní ñáhá Espíritú Yã Ndiõxí xií-yu tnúhu sá ñà túú xìní-yu-áⁿ, ñáyi-u-áⁿ mee-ní-yu níhí ndèé-yu ndècú-yu ichi-gã. Dico ñáyi-u càháⁿ tnúhu sá dácàhu iní ñáhá-gã xií-yu, càháⁿ-yu tnúhu-áⁿ nàcuáa níhí ndèé dává-gã ñáyi-u nchícúⁿ nihnu ichi-gã.

⁵ Te yúhú ío cudĩ iní-í te núu nchaa-ndo cáháⁿ-ndó tnúhu sá dácàhu iní ñáhá Espíritú Yã Ndiõxí xii-ndo tnúhu sá ñà túú xìní-ndó. Dico ío-gã cudĩ iní-í te núu nchaa-ndo cáháⁿ-ndó tnúhu sá dácàhu iní ñáhá-gã, chi ío-gã xìní ñùhu-xi sá càháⁿ-ndó tnúhu-áⁿ dacúúxí sã càháⁿ-ndó tnúhu sá dácàhu iní ñáhá Espíritú-gã cáháⁿ-ndó tnúhu sá ñà túú xìní-ndó. Dico ñⁿ-ni nũtnahá-xi quide-ndo te núu nchòhó ñáyi-u càháⁿ tnúhu sá dácàhu iní ñáhá Espíritú-gã cáháⁿ-ndó nàcuáa quèe-xi tnúhu-áⁿ. Te ducaⁿ te nchaa ñáyi-u ndècu ichi Yã Ndiõxí cuita níhí ndèé-gã-yu quíhíⁿ cundecú-yu ichi-gã.

⁶ Te núu yúhú quexìo-í núu ndécú nchòhó ñáyiú ndècu ndìhi-í ichi Xítohó Jesucristú, te ngüíta-í cáháⁿ-í mee-ni tnúhu sá dácàhu iní ñáhá Espíritú Yá Ndiòxí xii-í tnúhu sá ñà túú xìní-í, te ñà túú nã sá vãha cuu-xi sá cúu-xí-ndó. Dico cuu-xi sá vãha xii-ndo te núu na càháⁿ-í núu-ndó nchàa tnúhu sá dánhé ñáhá Yá Ndiòxí xii-í tnúhu sá vátá dácuaⁿ-gá-í, ndìhi nchaa tnúhu sá sà xìní-í, ndìhi nchaa tnúhu sá dácàhu iní ñáhá-gã xii-í cáháⁿ-í, ndìhi nchaa dava-gá tnúhu-gá.

⁷ Te na càda-o cuendá sá núu ìⁿ tée tiú-dé vïlu àdi caní-dé àrpá te núu ñà túú sàhnú-dé ndìhi-xi ìⁿ yaá, te ñà cútñuní iní-ó nã yaá caní-dé àdi ná yaá tiú-dé te núu ducaⁿ na càda-dé. ⁸ Te diu-ni ducaⁿ sãtnahá-xi cùu tucu tée cùu sandadú tiú cútú, chi núu vá tiú váha-dé nàcuáa tàú-xi cunduu òré quíhíⁿ-güedé nàá-güedé, te vá ngündecu túha dava-gá cue sandadú te núu ducaⁿ na càda-dé vá tiú váha-dé. ⁹ Te ducaⁿ sãtnahá-xi cùu nchohó te núu vá càháⁿ-ndó ìⁿ tnúhu nàcuáa tàú-xi cunduu núu ñáyiú te vá tècú tnùní-yu tnúhu càháⁿ-ndó. ¡Chi àúⁿ nã cuu càháⁿ-ndó te núu ducaⁿ na càda-ndo! ¹⁰ Te ío titní núu tnúhu ío ñuyíú, te ìⁿ ìⁿ núu tnúhu-áⁿ cútñuní iní ñáyiú nàcuáa quèe-xi.

¹¹ Te núu nchoo ñã tècú tnùní-ó ìⁿ tnúhu càháⁿ ìⁿ ñáyiú, te quide-ó-yu ñáyiú ñuú xicá chi ñà túú càháⁿ-yu tnúhu càháⁿ-ó, te diu-ni ducaⁿ quide ñahá-yu xii nchoo tucu. ¹² Te xíãⁿ núu càchí tnúhu-í xii nchaa nchòhó ñáyiú ío cuíní nduu táhú núu Yá Ndiòxí sá Espíritú-gá chindee ñaha-xi xii-ndo cada-ndo ná daha núu chiuⁿ, te ío nducu ndèe-ndo cada-ndo chiuⁿ sá ñi nduu táhú-ndó nàcuáa cuita níhí ndéé-gã ñáyiú ndècu ichi-gá quíhíⁿ.

¹³ Te núu càháⁿ-ndó tnúhu sá ñà túú xìní-ndó, tnúhu sá dácàhu iní ñáhá Espíritú Yá Ndiòxí xii-ndo, te xini ñuhu-xi sá càcáⁿ táhú-ndó núu Yá Ndiòxí cuendá sá ñà chindee ñaha-gá xii-ndo càháⁿ-ndó núu ñáyiú núu nása quèe-xi tnúhu-áⁿ. ¹⁴ Chi núu nchoo na càháⁿ ndìhi-o Yá Ndiòxí ndìhi tnúhu sá ñà túú xìní-ó, te ni yùhu ni iní-ó càháⁿ ndìhi-o-gã dícó-ni sá ñà tècú tnùní-ó nàcuáa nduu tnúhu càháⁿ-ó. ¹⁵ Te xíãⁿ núu xini ñuhu-xi càháⁿ ndìhi-o Yá Ndiòxí ni yùhu ni iní-ó nàcuáa chindee ñaha Espíritú-gá xii-o te càháⁿ-ó nàcuáa tecú tnùní-ó, te diu-ni ducaⁿ càda-o òré xítá

yùhu-o chiñuhu-o Yá Ndiòxí, chi ni yùhu ni iní-ó dùcaⁿ cada-o nacuáa chindee ñaha Espíritú-gá xii-o, te cútñuní iní-ó nàcuáa cuáháⁿ nchaa tnúhu càháⁿ-ó xita-o. ¹⁶ Chi núu nchoo na ndácáⁿ táhú-ó núu Yá Ndiòxí ndìhi mee-ni tnúhu sá ñà túú xìní-ó tnúhu sá dácàhu iní ñáhá Espíritú-gá xii-o, te ñáyiú ñà túú ní nduu táhú càháⁿ tnúhu càháⁿ-ó ndèdóho ñahá-yu xii-o, te ñáyiú-áⁿ vã ndácú-yu càháⁿ-yu tnúhu càháⁿ-ó ndácáⁿ táhú-ó ndìhí-yu núu Yá Ndiòxí chi ñà túú tècú tnùní-yu tnúhu càháⁿ-ó. ¹⁷ Te váha-ni quide-o sá dúcáⁿ càháⁿ-ó ndácáⁿ táhú-ó núu Yá Ndiòxí, te dícó-ni sá tnúhu-áⁿ ñà túú chindee-xi ñáyiú nàcuáa cuita níhí ndéé-gã-yu cundecú-yu ichi-gá. ¹⁸ Te yúhú ío ndácáⁿ táhú-í núu Yá Ndiòxí chi càháⁿ-í tnúhu sá ñà túú xìní-í tnúhu sá dácàhu iní ñáhá Espíritú-gá xii-í, te càháⁿ-gá-í dácúúxí nchaa nchohó. ¹⁹ Te òré tàcá ñáyiú ndècu ichi Yá Ndiòxí dácuaⁿ-gá-yu tnúhu-gá, te càháⁿ-í tnúhu-gá núu-yu sá sà ní cútñuní iní mèe-í nàcuáa ducaⁿ cútñuní iní-yu nàcuáa nduu tnúhu càháⁿ-í. Te tnàhá-gá iní-í càháⁿ-í úhúⁿ-ni tnúhu-áⁿ núu-yu dácúúxí sã càháⁿ-í úxí mïl tnúhu sá ñà túú xìní-í, tnúhu sá dácàhu iní ñáhá Espíritú Yá Ndiòxí xii-í càháⁿ-í.

²⁰ Te nchòhó ñáyiú ndècu ndìhi-í ichi Xítohó Jesucristú, vá caní iní-ndó dàtná sání iní cue landú, chi caní iní-ndó dàtná tàú-xi cunduu chi sa sacuéhé-ndó. Dico cuu-ndo dàtná cue landú líhli vá cundècu-ndo ichi cuehé ichi duha, chi cue landú-áⁿ ñà túú ndècu-güexi ichi-áⁿ. ²¹ Te núu tütú Yá Ndiòxí càháⁿ-xi nàcuáa ní càháⁿ-gá, te càchí-xi: “Cue tée ñuú xicá càháⁿ ndi dîⁿ núu tnúhu quíhíⁿ-güedé càháⁿ-güedé tnúhu-í núu ñáyiú isràel cada-güedé núu-í, te cuèi ducaⁿ dico vá quindáá iní-yu tnúhu-í”, duha ní cachí Yá Ndiòxí te ducaⁿ ni ngündeé núu tütú-gá. ²² Te tnúhu sá dácàhu iní ñáhá Espíritú Yá Ndiòxí xii-o tnúhu sá ñà túú xìní-ó, xíãⁿ cúu-xí cuendá sá cútñuní iní cue ñáyiú ñà túú sàndáá iní tnúhu Yá Ndiòxí sá ñà túú cùu váha iní ñáhá-gã xii-yu. Dico sá cúu-xí cue ñáyiú sàndáá iní tnúhu-gá ñà túú nã quidé-xí sã cúu-xí-yu. Te tnúhu sá dácàhu iní ñáhá Yá Ndiòxí xii-o, xíãⁿ cúu-xí cuendá sá cútñuní iní cue ñáyiú sàndáá iní tnúhu-gá sá ndécú ndìhi ñaha-gá xii-yu, dico ñà túú dùcaⁿ sani

iní cue ñáyiú ñá túú sàndáá ínì tnúhu-gá. ²³ Te núú ní tacá nchaa nchòhó ñáyiú ndècu ichi Yá Ndiòxí, te nchaa-ndo ñí ngúíta-ndo càháⁿ-ndó tnúhu sá dácàhu ínì ñáhá Espiritú Yá Ndiòxí xii-ndo tnúhu sá ñà túú xìnì-ndó, te mei òré-áⁿ quexìo cue ñáyiú ñá túú sàndáá ínì tnúhu-gá, ndihì cue ñáyiú vátá quìnì dana-gá tnúhu-gá núú ndécú-ndó, te ñáyiú-áⁿ quesàhá-yu sá lúcú-ndó te núú ducaⁿ càháⁿ-ndó tnúhu sá dácàhu ínì ñáhá Espiritú-gá xii-ndo òré quexìo-yu. ²⁴ Dico núú nchaa-ndo càháⁿ-ndó tnúhu sá dácàhu ínì ñáhá Yá Ndiòxí xii-ndo, te mei òré-áⁿ quexìo cue ñáyiú ducaⁿ ñà túú sàndáá ínì-xi tnúhu-gá, ndihì cue ñáyiú ducaⁿ ñà túú xìnì dana tnúhu-gá-áⁿ, te ñáyiú-áⁿ cutnùnì ínì-yu sá ndécú cuèchi-yu núú-gã, te ngúíta-yu cuáha-yu cuèndá sá ñà túú quidè váha-yu ndécú-yu cuèndá sá càháⁿ-ndó tnúhu-gá ndèdóho-yu. ²⁵ Te nchaa sá cuèhé sá dúhá ñí quidè-yu sàni ínì-yu yìyuhu ndacu ínì-yu, te ngúíta-yu náhmá-yu nchaa sá ñà túú váha ní quidè-yu núú Yá Ndiòxí, te cachí-yu sá ìo càhnu cuu-gá, te cachí tucú-yu sá ndáá ndécú ndihì-ndo-gá.

Cada-o nàcuáa tàú-xi cunduu

²⁶ Te vitna nchòhó ñáyiú ndècu ndihì-í ichi Xítóhó Jesucristú xini ñuhu-xi duha cada-ndo. Òré tàcá-ndó te dava-ndo càta yuhu-ndo chiñuhu-ndo Yá Ndiòxí, te dava-ndo dàsahú-ndó ñáyiú tnúhu-gá, te dava-ndo càháⁿ-ndó nàcuáa dàquixi túu Yá Ndiòxí ínì-ndó, te dava-ndo càháⁿ-ndó tnúhu sá dácàhu ínì ñáhá Espiritú Yá Ndiòxí xii-ndo tnúhu sá ñà túú xìnì-ndó, te dava-ndo càháⁿ-ndó nàcuáa quèe-xi tnúhu-áⁿ. Te nchaa sá quidè-ndó ná cùu-xi nàcuáa chindee-xi ñáyiú nàcuáa cuita níhì ndéé-gã-yu cundecú-yu ichi-gá. ²⁷ Te òré càháⁿ-ndó tnúhu sá dácàhu ínì ñáhá Espiritú Yá Ndiòxí xii-ndo tnúhu sá ñà túú xìnì-ndó, te úú-ni-ndo àdi únì-ni tnàhá-ndó càháⁿ-ndó tnúhu-áⁿ te vá úúⁿ-ní càháⁿ-ndó chí ndéé ndihì ìⁿ-ndo te dàtnùnì ngúíta ingá-ndó càháⁿ-ndó. Te xini ñuhu-xi sá ìⁿ ñáyiú càháⁿ-yu nàcuáa quèe-xi tnúhu càháⁿ-ndó-áⁿ. ²⁸ Te núú ñá túú ñáyiú tècú tnùnì nàcuáa quèe-xi tnúhu càháⁿ-ndó-áⁿ, te núú méé núú ìⁿ-ní-ndó càháⁿ-ndó tnúhu-áⁿ càháⁿ ndihì-ndo Yá Ndiòxí te vá càháⁿ-ndó

núú ñáyiú. ²⁹ Te òré càháⁿ-ndó tnúhu sá dácàhu ínì ñáhá Yá Ndiòxí xii-ndo te úú-ni-ndo àdi únì-ni tucu-ndo càháⁿ, te dava-gá-ndó cùndedóho-ndo tnúhu-áⁿ te càháⁿ-ndó núu váha-ni càháⁿ-güedé àdi ñà túú váha-ni. ³⁰ Te núú ìⁿ-ndo ñí dácáhú ínì ñáhá Yá Ndiòxí xii-ndo ìⁿ tnúhu càháⁿ-ndó, te núú ìⁿ-ndo sà caháⁿ-ndó te ngúíñì-ndó te quíhu tucu ingá-ndó càháⁿ-ndó nàcuáa ní dácáhú ínì ñáhá Yá Ndiòxí xii-ndo. ³¹ Te nchaa nchòhó ñáyiú ní nduu táhú càháⁿ tnúhu sá dácàhu ínì ñáhá Yá Ndiòxí, te vá úúⁿ-ní càháⁿ-ndó chí díhna-gá ìⁿ-ndo càháⁿ te dàtnùnì càháⁿ tucu ingá-ndó. Te ducaⁿ càda-ndo cuendá nchaa-ndo tècú tnùnì-ndó nàcuáa nduu tnúhu càháⁿ ìⁿ ìⁿ-ndo, te ducaⁿ te cudíí-gã ínì-ndó càncicúⁿ nihnu-ndo ìchi-gá. ³² Te nchaa ñáyiú càháⁿ tnúhu Yá Ndiòxí sa nàha-ná mée-yu nàcuáa quidè-yu càháⁿ-yu tnúhu-gá nàcuáa ñà túú quidè cutexínu-yu. ³³ Te Yá Ndiòxí cúú-gã Yaá quidè ìo váha cùu ìⁿ-nuu-ndo ndecu-ndo, te ñà túú dàticá nuu ñaha-gã xii-ndo.

Te na càchí tnúhu-í xii-ndo nàcuáa càháⁿ-í nchaa núú tàcá cue ñáyiú ndècu ndihì-o ichi Xítóhó Jesucristú. ³⁴ Te yúhú càchí-í sá vã cúú càháⁿ cue ñáyiú dìhì òré tàcá-ndó dàcuaha-ndo tnúhu-gá, chí ñà túú dùcaⁿ cuinì-gá cadá-yu, te quíndáá-ni ínì-yu cadá-yu nàcuáa tàú-xi cunduu. ³⁵ Te núú ìⁿ sá cuinì-yu nducu tnúhu-yu te ndéé òré nasáá-yu vehé-yu te nducu tnúhu-yu núú yíí-yu, chí ñà túú nduu váha-xi sá càháⁿ-yu núú tàcá nchaa ñáyiú dàcuáha ndihì-yu tnúhu-gá.

³⁶ Te chí dándàcu ínì sá ñà díú nchòhó cúú-ndó ñáyiú ní ngúndecu ndihì tnúhu Yá Ndiòxí díhna nuu nàcuáa datècú tnúhu-ndo dàva-gá ñáyiú, te ni ñà díú mée-ni nchòhó sa ní ngúndecu ndihì-ndo tnúhu Yá Ndiòxí vitna, núú xíáⁿ vá càchí-ndó sã ìo cùnuu-ndo. ³⁷ Te núú dava nchòhó sánì ínì-ndó sã càháⁿ-ndó nàcuáa dàcahu ínì ñáhá Yá Ndiòxí xii-ndo àdi sani ínì-ndó sã quidè-ndó nàcuáa chindee ñaha Espiritú-gá xii-ndo, te cuáha váha-ndo cuèndá sá ncháá tnúhu càháⁿ-í-a cùu-xi tnúhu sá ñí cachí tnúhu mee Xítóhó Jesucristú cada-o. ³⁸ Te ndéda-ni càa ñáyiú ndècu ndihì-ndo te núú ñà túú sàndáá ínì-yu tnúhu càháⁿ-í, te vá

cadá cuendá-ndó tnúhu cáháⁿ-yu.

³⁹ Te vitna nchòhó ñáyiú ndècu ndihí-í ichi Xítóhó Jesucristú, ío caní iní-ndó cáháⁿ-ndó tnúhu sá dácàhu iní ñáhá Yá Ndiòxí núú ñáyiú, te dañá-ndo na cáháⁿ cue ñáyiú ní nduu táhú núú Yá Ndiòxí sá cáháⁿ-yu tnúhu sá dácàhu iní ñáhá Espíritú-gá xii-yu tnúhu sá ñà túú xìní-yu. ⁴⁰ Te cada-ndo nchàa nacuáa tàú-xi cunduu nacuáa ñá túú nã cuu cundecu-ndo.

15

Ní ndoto Xítóhó Jesucristú

¹ Te vitna nchòhó ñáyiú ndècu ndihí-í ichi Xítóhó Jesucristú cuíní-í sá dándacu iní-ndó nacuáa ní dánèhé ñáhà-í xii-ndo tnúhu sá cáháⁿ nacuáa naníhí táhú-ó, chi ñáyiú tnúhu-án ní sándáa iní-ndó te nchicúⁿ nihnu-ndo. ² Te sá xii tnúhu-án níhnú-ndó ichi cuáháⁿ-ndó núú ndúú táhú-ndó cundecu-ndo ndihí Yá Ndiòxí ní caa ní quíhíⁿ, te ducaⁿ ndúu táhú-ndó núú cundecu-ndo ní caa ní quíhíⁿ ndihí Yá Ndiòxí te núu nchicúⁿ nihnu-ndo nacuáa ní dánèhé ñáhà-í xii-ndo, te núu ñá túú nchicúⁿ nihnu-ndo te ñá túú ní sándáa iní-ndó nacuáa tàú-xi cunduu.

³ Te yúhú sa ní cachí tnúhu-í xii-ndo ñá túú tnúhu sá ío cunuú ní níhí-í, chi ní cachí tnúhu-í xii-ndo sã Xítóhó Jesucristú ní xihí-gá cuendá nchaa yíca cuèchi-o, te ducaⁿ ní cuu chi ducaⁿ cáháⁿ-xi núú tùtú Yá Ndiòxí sá dúcáⁿ yáha-gá. ⁴ Te ní chindúxi ñaha-güedé xii-gá te nduu úní ní dándótó ñaha Yá Ndiòxí xii-gá, te ducaⁿ ní cuu chi ducaⁿ cáháⁿ-xi núú tùtú Yá Ndiòxí. ⁵ Te sátá ní ndoto-gá te ní quee túu-gá núú tã Pèlú, te dàtnùní ní quee túu-gá núú dává-gá cue téé ní táuchíúⁿ-gá cáháⁿ tnúhu-gá. ⁶ Te sátá dúcáⁿ te dàtnùní ní quee túu-gá núú ùhúⁿ cièndú cue ñáyiú ndècu ichi-gá, te vãi-yu xíndecu-ní-yu vitna chi sacú-ni-yu ní xihí. ⁷ Te dàtnùní ní quee túu-gá núú tã Jàcobó, te sátá dúcáⁿ te dàtnùní ní quee túu-gá núú nchaa cue téé ní táuchíúⁿ-gá cáháⁿ tnúhu-gá.

⁸ Te ndéé núú ní ndihí-ná te ní quee túu-gá núú mée-í, te òré ní quee túu-gá núú-í te cùu-í dàtná ñá déhe yiquíⁿ vátá sáa-gá nduu càcu chi cùu-í ñá téé ñá túú sàni váha iní-xi cuendá-gá ní cùu. ⁹ Te yúhú ñá túú cunuú-í dàtná cùnùu cue téé ní táuchíúⁿ

Xítóhó Jesucristú cáháⁿ tnúhu-gá. Te cùu-í ñá téé ní táuchíúⁿ-gá cáháⁿ tnúhu-gá, cuèi ñá túú tàú-í sá cáháⁿ-í tnúhu-gá, chi ní xóo cuu úhú iní-í cue ñáyiú ndècu ichi Yá Ndiòxí. ¹⁰ Dico Yá Ndiòxí ío váha iní-gá chi ní quide ñaha-gã xii-í ñá téé váha, chi ñá túú-gã quidè-í dàtná ní xóo cada-í. Te ío cundahú iní ñáhá-gã chindéè ñaha-gã xii-í dico ñá túú àúⁿ nã cuu chindéè ñaha-gã, chi ío-gá vãi chiuⁿ-gá ní cuu sa ta quide-í cuáháⁿ dàcúúxí dává-gá cue téé ní táuchíúⁿ-gá cáháⁿ tnúhu-gá te ñá díú mée-í ducaⁿ quide-í chi mee Yá Ndiòxí ío cundahú iní ñáhá-gã chindéè ñaha-gã xii-í quidè-í chiuⁿ-gá. ¹¹ Te ñá túú nã cada-xi cuèi dává-gã-güedé sa ní cuu vãi-gá chiuⁿ-gá quide-güedé àdi yúhú, chi ñá ní tnúhu cáháⁿ-ndí te tnúhu-án cúú tnúhu ní sándáa iní-ndó.

Cue ñáyiú ní xihí ndoto-yu

¹² Te nchúhú cue téé cáháⁿ tnúhu Xítóhó Jesucristú cáháⁿ-ndí sá ní xihí-gá te ní ndoto-gá, ¿te ná cuendá dává nchòhó cächí-ndó sã vã ndótó cuè ñáyiú ní xihí? ¹³ Te núu ducaⁿ sàni iní-ndó sã vã ndótó cuè ñáyiú ní xihí te ní Xítóhó Jesucristú ñá túú ní ndòto-gá te núu ducaⁿ. ¹⁴ Te núu dícó Xítóhó Jesucristú ñá túú ní ndòto-gá ñá, te nchaa tnúhu sá dánèhé ñáhá-ndí xii-ndo ñá túú nándíhí-xi te núu ducaⁿ, te àúⁿ nã cuu sándáa iní-ndó-gã te núu ducaⁿ.

¹⁵ Te núu dícó cúu-xí ñá sá ndáa tnúhu sàni iní dává-ndo ña, te dàcuandehnde-ndí sá cáháⁿ-ndí tnúhu Yá Ndiòxí núú-ndó te núu ducaⁿ, te ñá túú cáháⁿ ndáa-ndí núú-ndó sã Yá Ndiòxí ní dándótó-gã Xítóhó Jesucristú, te núu ndáa nacuáa sàni iní dává-ndo sã vã ndótó cuè ñáyiú ní xihí, dico ñá ndáa nacuáa sàni iní-ndó. ¹⁶ Te núu vã ndótó cuè ñáyiú ní xihí te ní Xítóhó Jesucristú ñá túú ní ndòto-gá. ¹⁷ Te núu Xítóhó Jesucristú ñá túú ní ndòto-gá ñá, te àúⁿ nã cuu sándáa iní-ndó-gã te núu ducaⁿ, te ndècu-ni cuèchi-ndo núú Yá Ndiòxí te núu ducaⁿ. ¹⁸ Te núu ndáa nacuáa sàni iní-ndó ñá te cue ñáyiú ní sándáa iní ñáhá xii Xítóhó Jesucristú ñáyiú ní xihí ní xíta nihnú-yu te núu ducaⁿ. ¹⁹ Te núu nchoo ndècu ndihí-o tnúhu ndee iní núú Xítóhó Jesucristú cuendá-ni sá cundècu-o ñuyíú-a

ña, te cùu-o ñáyiú ío-gá duuⁿ duuⁿ ndàhú sá cúú-xí dàva-gá ñáyiú te núu ducaⁿ.

20 Dico ndáá sá Xítohó Jesucristú ní xíhí-gá te ní ndoto-gá núu xíáⁿ cútnùnì iní dava-o sá ndótó cuè ñáyiú ní xíhí ñáyiú ní sándáá iní tnúhu-gá. 21 Te sá cuèchi ñⁿdì-ni téé ní xíndecu ñuyíú-a xíáⁿ xíhí ñáyiú, te sá cuèndá ñⁿdì-ni tucu ingá téé te ndoto cue ñáyiú ní xíhí. 22 Te nchaa ñáyiú xíhí-yu sá cuèchi ñⁿ téé, te téé-áⁿ cúú-dě ndíi Àdán téé díhna nuu ní cuu ñaní tnáhá cuè ñáyiú ñuyíú. Te ñⁿdu-ni ducaⁿ sá cuèndá ñⁿdì-ni téé te ndoto cue ñáyiú ní xíhí, te téé-áⁿ cúú-dě Xítohó Jesucristú chi nchaa ñáyiú ndècu ndíhi-gá ndotó-yu. 23 Te díhna-gá Xítohó Jesucristú ní ndoto-gá xíáⁿ cútnùnì iní dava-o sá ndòu na quixi tucu-gá ñuyíú-a te dāv-áⁿ ndoto nchaa ñáyiú ní xíhí ñáyiú ní sándáá iní tnúhu-gá. 24 Te dàtnùnì ducaⁿ te sáá nduu nàa nchaa sá ío ñuyíú, te Xítohó Jesucristú danàa-gá nchaa ndi túhú sá cùnùu ío ñuyíú-a, chi danàa-gá nchaa ñáyiú ío cùnùu, ndíhi yucu ñávàha, ndíhi nchaa espíritú xínú cuèchi núú-xi. Te ducaⁿ te cúñaha-gá xii Tátá-ó Dütú Ndiòxí taxi tnùnì-gá. 25 Chi Xítohó Jesucristú dacuítí taxi tnùnì-gá ndéé ná sáá nduu dànaa-gá nchaa sá cúú úhú iní ñáhá xii-gá. 26 Te ndéé núú ní ndíhi-ná te danàa-gá sá quidé xíhí ñáyiú. 27 Te ducaⁿ chi càháⁿ-xi núú tütú Yá Ndiòxí sá méé-gá ní nachíhi-gá nchaa sá ío ndaha Xítohó Jesucristú cuèndá sá méé Xítohó Jesucristú taxi tnùnì-gá, te vá yòo ñⁿ taxi tnùnì ñáhá xii Yá Ndiòxí, chi mee Yá Ndiòxí cúú-gá Yaá ní nachíhi-gá nchaa sá ío ndaha Xítohó Jesucristú. 28 Te díhna-gá ní xáhaⁿ Yá Ndiòxí xii Xítohó Jesucristú Yaá cúú Dèhe-gá sá quíndaha-gá nchaa sá ío, te òré ná quíndaha Xítohó Jesucristú nchaa sá ío, te cúñaha-gá xii Yá Ndiòxí taxi tnùnì ñáhá-gá xii-gá, te ducaⁿ te mee-ná Yá Ndiòxí taxi tnùnì-gá nchaandi túhú sá ío.

29 Te núu ñá túú ndáá càháⁿ-í, ¿te ná cuèndá dava ñáyiú sànduté-yu cuèndá ñáyiú ní xíhí núu ñá túú ndáá sá ndótó ñáyiú ní xíhí?

30 Te nchúhú ducaⁿ-ni sàni iní ñáyiú cahni ñàhá-yu xii-ndí, te núu vá ndótó ñáyiú ní xíhí te àúⁿ nà cuu ducaⁿ quíde cahnu iní-ndí

ducaⁿ cuínì-yu cahni ñàhá-yu xii-ndí te núu ducaⁿ. 31 Te nchòhó ñáyiú ndècu ndíhi-í ichi Xítohó Jesucristú ío váha sàni iní-í cuèndá-ndó, chi ndècu-o ichi-gá. Te na càhí tnúhu ndáá-í xii-ndo sá ñⁿ nduu ñⁿ nduu ndeé iní ñáhá ñáyiú cahni ñàhá-yu xii-í. 32 Te núu dícó ndáá sá vā ndótó ñáyiú ní xíhí dàtná càhí dava ñáyiú, te àúⁿ nà cuu ní xíndecu-í ñuú Éfesú ní cuu úhú iní ñáhá ñáyiú xii-í te núu ducaⁿ, chi ñáyiú-áⁿ ní quidé-yu dàtná quidé ñⁿ quiti dééⁿ sá cúú-xi-í. Te núu ndáá sá vā ndótó ñáyiú ní xíhí ñá, te váha-gá núu cachí-ó dàtná càhí ñáyiú: “Vitna na còho-o te na càxi-o chi tneé idá cuú-ó”, duha càhí-yu.

33 Te vá dáñá-ndó mèe-ndo dandahú ñáhá ñáyiú ndècu ichi cuehé ichi duha xii-ndo, te ngüita-ndo càni iní-ndó dàtná sání iní-yu. Chi quèe ndáá-xi nàcuáa càháⁿ tucu dava-gá ñáyiú, chi càhí-yu sá núu ñáyiú quíde váha na nìhí tnáhá-yu ndíhi ñáyiú ndècu ichi cuehé ichi duha, te ngüita ñáyiú quíde váha-áⁿ cadá-yu tnáhá-yu nchaa sá cuèhé sá dúhá dàtná quidé ñáyiú-áⁿ. 34 Te ío váha cuáha-ndo cuèndá nàcuáa cundecu-ndo, te vá cadá-gá-ndó dàtná quidé cuè ñáyiú ndècu ichi cuehé ichi duha. Te dava-ndo quíde-ndo datná quidé cuè ñáyiú ndècu ichi cuehé ichi duha chi ñá túú sándáá iní-ndó Yá Ndiòxí. Te duha càháⁿ-í cuèndá sá cúcàhaⁿ núú-ndó cuèndá nchaa sá ñá túú váha quíde-ndo.

Nàcuáa ndoto ñáyiú ní xíhí

35 Te cudana dava-ndo ndècu tnúhu-ndo núu nása ndoto ñáyiú ní xíhí, te nása cunduu yiqui cùñú-yu òré ndotó-yu. 36 Te nchòhó ñáyiú ducaⁿ càháⁿ cúú-ndó ñáyiú ñá túú tnàhí cùtnùnì iní-xi, te duha na càháⁿ-í nàcuáa tecú tnùnì-ndó. Te núu ñⁿ tatá ná chíhí-ó te tèhyú méé-xí te xínu déhe-xi.

37 Dico ñá díú sá sà ní xínu ta sàhnu cuáháⁿ ní cùxi-o, te ñⁿdu-ni ducaⁿ quíde-o cuéi triú ndíhi nchaa dava-gá tatá xítú-ó. 38 Te Yá Ndiòxí quíde-gá sácùnduu tatá xínu-áⁿ dàtná cuínì méé-gá cunduu. Te ndéda-ni càa tatá te ñⁿdu-ni-gá quíde-gá sácùnduu-xi nàcuáa tàú-xi cunduu. 39 Te ndí dííⁿ ndáa nchaa yiqui cùñú, chi tucu càa yiqui cùñú nchoo cuè ñáyiú, te tucu càa yiqui cùñú nchaa quiti xica núú ñúhú, te tucu càa yiqui cùñú

nchaa quiti ndàva, te tucu càa yiqui cuñú nchaa chácá. ⁴⁰ Te ducaⁿ ñà túú ìⁿ-ni caa nchaa yiqui cuñú sá ío andiu ndihi nchaa yiqui cuñú ñáyiú ío ñuyíú-a, te ducaⁿ ñà túú ìⁿ-ni ndáa vii nchaa sá ío andiu ndihi ñuyíú-a. ⁴¹ Te ducaⁿ cùu tucu-xi nchíanchii chí tucu dàyehé-xi, te tucu dàyehé yóó, te tucu dàyehé nchaa chódíní, te ducaⁿ ñà túú ìⁿ-ni dayehé nchaa chódíní. ⁴² Te ducaⁿ sãtnahá-xi cùu ñáyiú ní xihí te ndoto, chí tucu càa yiqui cuñú-yu sá nguindüxi te tucu cunduu yiqui cùñú-yu òré ndotó-yu, te yiqui cùñú sá ndótó ndihí-yu-áⁿ vã ndihí nihnu-gá-xi. ⁴³ Te yiqui cùñú ñáyiú xihí ñà túú nãndihí-xi, dico yiqui cùñú sá ndótó ndihí-yu te ío váha cunduu. Te nchaa yiqui cùñú ñáyiú xihí ñà túú tnàhí-gá ndee-xi, dico yiqui cùñú ndoto ndihí-yu xíãⁿ ío cunduu ndee-xi. ⁴⁴ Te yiqui cùñú nchaa ñáyiú xihí cúú-xí cuendá ñuyíú-a, dico yiqui cùñú sá ndótó ndihí-yu xíãⁿ cundecu-ná-xi cuendá Espiritú Yã Ndiõxí. Te dàtná ío yiqui cùñú sá cúú-xí cuendá ñuyíú-a, te ducaⁿ ío yiqui cùñú sá cúú-xí cuendá mee-nã Espiritú Yã Ndiõxí.

⁴⁵ Te núú tütú Yã Ndiõxí càchí-xi: “Ndíi Àdán ndíi ní xíndecu ndéé díhna ní chihi Yã Ndiõxí iní ndíi”, duha càchí-xi núú tütú-gá. Te íngá tucu téé cùu-dé dàtná ndíi Àdán te téé-áⁿ cúú-dě Xítóhó Jesucristú, te Yaá-áⁿ quidé-gã sá mée-ná Espiritú Yã Ndiõxí quidé-xí ndècu-o ichi-gá vitna. ⁴⁶ Te díhna-gá yiqui cùñú cuendá ñuyíú-a ní ngúndecu, te dàtnúni ngúndecu yiqui cùñú cundecu ndihi mee-nã Espiritú Yã Ndiõxí. ⁴⁷ Te téé díhna nuu ñí xíndecu ñuyíú-a chí ñuhu ní cadúha ñaha Yã Ndiõxí xii-dé, te téé-áⁿ cúú-dě ndíi Àdán, te íngá tucu téé ní cuuⁿ-dé andiu te téé-áⁿ cúú-dě Xítóhó Jesucristú. ⁴⁸ Te nchaa ñáyiú càa yiqui cuñú-yu dàtná cáa yiqui cuñú téé Àdán téé ducaⁿ ñí cuáha ñuhu-áⁿ, te nchaa ñáyiú ní nduu táhú cundecu ndihi téé ducaⁿ vëxi cuuⁿ andiu-áⁿ, ñáyiú-áⁿ nduu yiqui cùñú-yu dàtná cáa yiqui cuñú ní nduu táhú-dě ndécú ndihí-dé vitna, te téé-áⁿ cúú-dě Xítóhó Jesucristú. ⁴⁹ Te nchaa ñáyiú ñuyíú-a càa-yu dàtná-ni càa datná-ni ndùu téé ducaⁿ ñí cuáha ñuhu-áⁿ. Te nchaa nchoo ñáyiú ní nduu táhú

cundecu ndihi téé ducaⁿ vëxi cuuⁿ andiu-áⁿ nduu-o dàtná-ni càa datná-ni ndùu téé-áⁿ tucu.

⁵⁰ Te nchòhó ñáyiú ndècu ndihí-í ichi Xítóhó Jesucristú càchí tnúhu-í xii-ndo sã ncháá nàcuáa càa yiqui cuñú ñáyiú xíndecu vitna vá sàá-xi cundecu-xi núú ndécú Yã Ndiõxí táxí tnùní-gá, chí ñuyíú-a ndihi nihnu-xi. Dico sá tàú-xi sáá núú ndécú-gã táxí tnùní-gá xìni ñuhu-xi cuu-xi sá cúdii cundecu. ⁵¹ Te na càchí tnúhu-í xii-ndo ìⁿ tnúhu sá yíyùhu ni cuu: Dava-o cùú-ó te dava-o cùndecu-ni-o, dico nchaa-o nãdáma yiqui cuñú-ó. ⁵² Te uuⁿni ducaⁿ nãdáma yiqui cuñú-ó òré cáháⁿ ìⁿ cútú, te cútú-áⁿ cáháⁿ-xi òré sa ta cùyatni naa ñuyíú. Te òré cáháⁿ cútú-áⁿ te ndoto nchaa ñáyiú ní xihí ñáyiú ní xíndecu ichi Xítóhó Jesucristú, te ducaⁿ te vá ìⁿ ndùu ìⁿ quíú-gã cuú-yu. Te nchaa ñáyiú ndècu vívú te nãdáma yiqui cuñú-yu tnàhá-yu. ⁵³ Te nchaa yiqui cùñú ndécú ndihi nchaa ñáyiú ndècu ñuyíú-a vitna ñà túú cùdíi-xi chí xihí-xi, dico yiqui cùñú nduu táhú nchoo ñáyiú ndècu ichi Xítóhó Jesucristú chí cùdíi-xi ní caa ní quíhíⁿ chí vá cùú-gá-xi. ⁵⁴ Te òré ná ndùu táhú-ó yiqui cuñú sá dúcáⁿ cùdíi ní caa ní quíhíⁿ-áⁿ, te vá cùndècu ndihí-gá-ó yiqui cuñú sá ñà túú cùdíi. Te dàvã-áⁿ te quee ndáá-xi nàcuáa cáháⁿ-xi núú tütú Yã Ndiõxí núú càchí-xi: “Vitna ñà túú-gã xihí ñáyiú chí mee-nã Yã Ndiõxí cùnù-gá táxí tnùní ñáhã-gã xii-yu. ⁵⁵ Te ñà túú tnàhí-gá ná ndoho ñáyiú sá cuendá tnúhu xihí, chí vá cóó-gã tnúhu xihí”, duha càchí-xi núú tütú Yã Ndiõxí. ⁵⁶ Te cue ñáyiú ndècu ndihí-yu tnúhu sá sánú ìchi ñaha xii-yu nàcuáa cadá-yu cundecú-yu dico uuⁿ-gã quídě-yu nchaa sá cuèhé sá dúhá. Te sá cuendá nchaa sá cuèhé sá dúhá quidé-yu-áⁿ, te xíãⁿ ní ngúndecu tnúhu xihí dándòho ñaha-xi xii-yu. ⁵⁷ Dico táxãhu xii Yã Ndiõxí chí ní taxi-gã tnúhu ndee iní ndécú ndihí-o sá sàá nduu te vá quíní-gá-ó tnúhu xihí, te ducaⁿ chí ndècu ndihí-o Xítóhó Jesucristú.

⁵⁸ Te xíãⁿ núu cáháⁿ-í dóho nchòhó cue ñáyiú ndècu ndihí-í ichi Xítóhó Jesucristú chí ío cùu iní ñáhã-í xii-ndo, te cáháⁿ-í dóho-ndo sã cáncícúⁿ nihnu-ni-ndo ìchi Xítóhó Jesucristú cuèi nãndi na càda

ñaha ñáyiú xii-ndo sã cuendá-gá, te ío nducu ndèe-ni-ndo cada-ndo chiuⁿ-gá, chi sa nàha-ndo sá ncháá chiuⁿ quide-o cuendá-gá ñá túú àúⁿ nã cuu quide-o.

16

Nàcuáa sàcáⁿ tnáhá ñáyiú díhúⁿ

¹ Te na càchí tnúhu-í xii-ndo cuendá díhúⁿ sã sàcáⁿ tnáhá-ndó sã cúú-xí ñáyiú ñuú Jerusálén, chi diu-ni duha ní dánèhé-í cue ñáyiú xĩndecu ichi Xítohó Jesucristú ndécú ñⁿ ñⁿ xichi distritú Gàlaciá. ² Te duha cada-ndo ndí tnahá nduu ndumìngú, te ñⁿ ñⁿ-ndo dàquee diñⁿ-ndo sacú díhúⁿ nàcuáa chĩndee ñaha Yá Ndiõxí xii-ndo ñihí-ndó cuendá òré quexìo-í te sa cundecu túha díhúⁿ-ãⁿ. ³ Te òré quexìo-í te mee-ndo cãxi-ndõ-yu núu ndèdacàa-yu sàni iní-ndó càda ndáá canehé díhúⁿ-ãⁿ quíhíⁿ ndaha ñáyiú xĩndecu ichi Xítohó Jesucristú ndécú ñuú Jerusálén. Te cadúha-í ñⁿ úú tutú canehé-yu quíhíⁿ cuendá cutnùnì iní ñáyiú ñuú Jerusálén nàcuáa ndùu chiuⁿ cuáháⁿ-yu. ⁴ Te núu xìni ñuhu-xi sá quíhíⁿ-í te candeca-í-yu quíhíⁿ.

Té Pãblú sání iní-dé quíngoto-dé cue ñáyiú ndècu ichi Xítohó Jesucristú

⁵ Te yúhú sání iní-í yáha-í ñⁿ úú ñuú cáá dìstritú Macèdoniá, te dàtnùnì ducaⁿ te sáá-í núu ndécú-ndó. ⁶ Te òré quexìo-í te cudana cundecu ndihí ñaha-í xii-ndo vài nduu, àdi cudana te cundecu ndihí ñaha-í xii-ndo ndèé yáha nchaa yóó quidé vixiⁿ-xi. Te sátá dúcáⁿ te cada ndee iní-ndó chĩndee ñaha-ndo xii-í òré nucúhuⁿ ichi-í te núu ndèé ichi na quíhíⁿ-í. ⁷ Te duha càháⁿ-í chi núu Yá Ndiõxí ná càchí-gá te cundecu ndihí ñaha tnàa-í xii-ndo òré quexìo-í te ñá díú dìcò-ni ichi yáha-í. ⁸ Te cundecu-ni-í ñuú Éfesú-a ndéé tnahá vico Pentecòstés. ⁹ Te ducaⁿ chi iha ío tédóho ñáyiú tnúhu Xítohó Jesucristú sá càháⁿ-í núú-yu. Núu xíãⁿ ío váha quèe cuendá cada-í chiuⁿ-gá cuèi ío vài ñáyiú ñá túú tnáhá iní-yu sá càháⁿ-í tnúhu-gá.

¹⁰ Te núu na quixi coto ñaha té Timùteú xii-ndo, te ío váha cuu iní-ndó cãháⁿ ndihí-ndo-dè cuendá ducaⁿ ñá túú nã cani iní-dé cundecu ndihí ñaha-dè xii-ndo, chi tnáhá-dé cúú-dè téé quide chiuⁿ Xítohó

Jesucristú dàtná quidè-í. ¹¹ Te cuiní-í sá ñⁿ ñⁿ-ndo vá cánì cuèhé iní-ndó cuendá-dé, te chĩndee-ndo-dè nàcuáa cuu váha iní-dé òré quixi-dé quixi coto ñaha-dè xii-í, chi yúhú ndihí dava-gá ñáyiú ndècu ichi Xítohó Jesucristú ndétú-ndí-dé quexìo-dé.

¹² Te ío ní cãháⁿ ndàhú-í núú tè Àpolós téé ndècu ndihí-o ichi Xítohó Jesucristú cuendá quixi-dé ndihí dava-gá cue téé ndècu ndihí-o ichi-gá quixi coto ñaha-güedé xii-ndo dico ñá túú ní cuiní-dé quixi-dé vitna, dico quixi-dé ndéé cuèé-gá.

Tnúhu ndéé núú ñí ndihí-ná

¹³ Te ío quihí iní-ndó cundecu-ndo ichi Xítohó Jesucristú, te vá dáñá ndèé-ndó quĩndáá iní-ndó-gã, te ío yí cunduu iní-ndó cundecu-ndo ichi-gá, te ío nducu ndèe-ndo canchicúⁿ nihnu-ndo ichi-gá. ¹⁴ Te ío váha cuu iní tnáhá-ndó, te ducaⁿ ño váha cada tnàha-ndo te núu nãndi cùu sá váha sàni iní-ndó càda-ndo.

¹⁵ Te nchòhó ñáyiú ndècu ndihí-í ichi Xítohó Jesucristú sa nàha-ndo sá dñhanuu cuè ñáyiú cùu ndi mee té Èstéfanás ndécú dìstritú Acãyá ní sãndáá iní-yu tnúhu Xítohó Jesucristú. Te vitna ñá túú dàña ndeé-yu quidé-yu sá váha sá cúú-xí dàva-gá ñáyiú sãndáá iní tnúhu-gá. ¹⁶ Te càháⁿ ndàhú-í núú-ndó sã quĩndáá iní-ndó nchàa ñáyiú ducaⁿ xĩquide, ndihí nchaa dava-gá ñáyiú ío ndècu ndee quide chiuⁿ ndihí-ndo cuendá Xítohó Jesucristú. ¹⁷ Te ío cùdí iní-í sá ñí quexìo té Èstéfanás, ndihí té Fortunatú, ndihí té Acàicú, chi cue téé-ãⁿ ñí quide-güedé núú-ndó ñí quide-güedé nchaa sá ñá túú ndàcu-ndo cada-ndo cuendá-í ní cùu. ¹⁸ Te ío tàxi-güedé tnúhu ndee iní xii-í, te diu-ni ducaⁿ tàxi-güedé tnúhu ndee iní xii nchòhó tucu, te núu xíãⁿ xínì ñuhu-xi sá cànèhe-ndo sá yíñuhu núu nchàa cue téé duha xĩquide váha.

¹⁹ Te nchaa ñáyiú xĩndecu ichi Xítohó Jesucristú ndécú dìstritú Àsiá quide ndee iní ñáhã-yu xii-ndo, te ío cada ndee iní-ndó càchí té Àquilú ndihí ñadìhí-dé tá Priscilá, te ducaⁿ quide ndee iní ñáhá tucu nchaa ñáyiú tàcá dácuaⁿha tnúhu Yá Ndiõxí vehé-yu xii nchaa nchòhó ñáyiú ndècu ichi-gá. ²⁰ Te cada ndee iní tucu-ndo càchí cue dava-gá ñáyiú ndècu ndihí-o ichi Xítohó

Jesucristú. Te ni yùhu ni iní-ndó càda ndee iní tnáhá-ndó ìⁿ ìⁿ-ndo.

²¹ Te vitna ndaha mee yùhú té Păblú tée-í tnúhu-a guìde ndee iní ñáhà-í xii-ndo.

²² Te ñáyiú ñá túú cùu váha iní-xi núú Xǐtohó Jesucristú te na cuíta nihnú-yu. Te vitna nchaa-o chǐ ná càchí-ó sǎ Xǐtohó Jesucristú quixi tucu-gá.

²³ Te xicáⁿ táhù-í núú Xǐtohó Jesucristú sá ná chìndee chitúu ñaha-gǎ xii-ndo. ²⁴ Te ío cùu iní ñáhà-í xii-ndo nàcuáa ndècu-o ichi Xǐtohó Jesucristú, te ducaⁿ na cùnduu, te ío chí cádá ndèe iní-nǎ vitna.

TUTÚ CÚÚ ÛÚ NÍ CADÚHA TÉ PÄBLÚ QUIHⁿ NDAHA ÑÁYIU ÑUÚ CÒRINTÚ

Té Păblú cādúha-dé tutú quíhⁿ ndaha ñáyiú xĩndecu ichi Xítohó Jesucristú ndécú ñuú Còrintú

¹ Yúhú té Păblú cāháⁿ-í tnúhu Xítohó Jesucristú chi ducaⁿ ñí cachí Yă Ndiöxí cunduu. Te cādúha-í tutú-a ndihí té Timùteú té ndècu ndihí-o ichi-gá cuèndá daquixi-í ndaha nchòhó ñáyiú xĩndecu ichi Yă Ndiöxí ndécú ñuú Còrintú, te tutú-a cuu-xi tnàhá cuèndá nchaa ñáyiú cùu cuendá Yă Ndiöxí xĩndecu nchaa ñuú yĩndèhu distritú Acáyá. ² Te xicáⁿ táhù-í núú Tătá-ó Dútú Ndiöxí ndihí núú Xítohó Jesucristú sá ïo na chĩndee chitúu ñaha-gă xii-ndo, te ñu-ni ndi ndùú-gá ná càda te ïo váha cuu iní-ndó cùndecu-ndo.

Té Păblú cāháⁿ-dé nchaa nàcuáa ndòho-dé

³ Te chí ná cāchí-ó sá ïo váha iní Dútú Ndiöxí Yaá cúú Tătá Xítohó Jesucristú, te ñu-ni Dútú Ndiöxí cúú-gă Yaá ïo cùndahú iní ñáhá xii-o, te ñu-ni-gá cúú-gă Yaá táxi tnúhu ndee iní. ⁴ Te cuèi nándi ndòho-o ndecu-o dico ñu-ni Dútú Ndiöxí táxi-gă tnúhu ndee iní xii-o, te ducaⁿ quide-gá cuèndá sá nchóo cuãñaha-o tnúhu ndee iní xii nchaa ñáyiú nándi ndòho ndecu, te ñu-ni nchaa tnúhu ndee iní táxi-gă xii-o ñu-ni nchaa tnúhu ndee iní-áⁿ cuãñaha-o xii-yu. ⁵ Te Xítohó Jesucristú ïo ní ndòho-gá, te ducaⁿ nchòo tucu ïo ndòho-o, te ducaⁿ ïo vâi tnúhu ndee iní ñihí-ó ndècu ndihí-o chi ndècu-o ndihí Xítohó Jesucristú. ⁶ Te nchúhú nándi ndòho-ndí ndécú-ndí cuèndá sá nchòhó ñihí-ndó tnúhu ndee iní cundecu ndihí-ndo te naníhí tãhú-ndó. Te Yă Ndiöxí táxi-gă tnúhu ndee iní xii-ndí, te ducaⁿ quide-gá cuèndá sá nchòhó tnàhá-ndó ñihí-ndó tnúhu ndee iní-áⁿ te naníhí tãhú-ndó, te ducaⁿ càda ndee cada cahnu iní-ndó ndòho-ndo datná ndóhó nchúhú. ⁷ Te nchúhú ïo váha sàni ndáá iní-ndí cuèndá-ndó chi ndòho-ndo datná ndóhó-ndí, te ducaⁿ tàxi Yă Ndiöxí tnúhu ndee iní xii-ndo dàtná táxi-gă xii-ndí.

⁸ Te nchòhó ñáyiú ndècu ndihí-ndí ichi Xítohó Jesucristú cuiní-ndí cachí tnúhu-ndí xii-ndo nàcuáa ní yáha-ndí cútnàhá ní xĩndecu-ndí distritú Asiá chi dàvá-áⁿ ïo ní ndòho-ndí, te luha-ná te vá cùndèe iní-ndí yáha-ndí nchaa tnúndòho-áⁿ ní cùu chi ní xehndé iní-ndí sá vă cãcu-ndí. ⁹ Chi ní sani iní-ndí sá ndíyi-ná cuu-ndí ní cùu, te ducaⁿ ñí yáha-ndí cuèndá sá ïo-gá quĩndáá iní-ndí Yă Ndiöxí sá díú-gă taunihnu ñaha-gă xii-ndí, te ñá díú mèe-ndí taunihnu-ndí mée-ndí, te ñu-ni-gá cúú-gă Yaá dándòto cuèi ñáyiú sa ní xíhí. ¹⁰ Te ñu-ni-gá ní taunihnu ñaha-gă ñá túú ní sàhni ñaha ñáyiú xii-ndí, te ñu-ni-gá táunihnu ñaha-gá xii-ndí cuèi vitna, te cùtnuní ndáá iní-ndí sá díú-ní-gă taunihnu ñaha-gă xii-ndí núú cuaháⁿ núú vèxi te vá cãhni ñàha ñáyiú. ¹¹ Te nchòhó tnàhá-ndó chĩndee ñaha-ndo xii-ndí chi cāháⁿ ndihí-ndo Yă Ndiöxí cuèndá-ndí, te ïo vâi ñáyiú cāháⁿ ndihí ñàhá-yu xii-gá cuèndá-ndí, te ducaⁿ ïo vâi ñáyiú ndàcáⁿ tãhù-yu núú-gă cuèndá nchaa sá vâha quide ñaha-gá xii-ndí.

Té Păblú cāháⁿ-dé ná cuèndá ñá túú ní náyaha-dé ñuú Còrintú

¹² Te ïo váha cùu iní-ndí chi cùtnuní iní-ndí sá cúú-ndí cue té cùu ndáá dàtná cuiní Yă Ndiöxí cunduu ndècu-ndí ñuyúú-a, te ñu-ni ducaⁿ quide-ndí sá cúú-xi-ndó chi mee-gă cùndahú iní ñáhá-gă xii-ndí chĩndèe ñaha-gá, te ñá túú quide-ndí dàtná sání iní cue ñáyiú ñuyúú-a. ¹³⁻¹⁴ Nchaa nàcuáa ndùu tnúhu chido tnuní-ndí dáquixi-ndí ndaha-ndo cùu-xi mee-ni tnúhu sá ñà túú ùhú tecú tnùní-ndó. Te nchòhó sa cùtnuní luha iní-ndó nàcuáa quide-ndí ndécú-ndí, te cuiní-ndí sá ïo-gá váha tecú tnùní-ndó cuèndá sá òré ná quixi tucu Xítohó Jesucristú, te dàvá-áⁿ ïo cada ñinu ñaha-ndo xii-ndí dàtná cada ñinu ñaha-ndí xii-ndo. ¹⁵ Te cuèndá xíáⁿ núu ní sani iní-í yáha cāháⁿ-í úú xito núú ndécú-ndó cuèndá ïo cudí iní-ndó. ¹⁶ Chi ní sani iní-í sá òré quíhíⁿ-í distritú Macèdoniá te yáha cāháⁿ-í núú ndécú-ndó, te òré ndixi tucu-í te nayáha cāháⁿ tucu-í, te òré nayáha cāháⁿ-í

te taxi-ndo sã cúú ìchi-í cuendá quíhíⁿ-í distrítú Jùdeá, duha ní sani iní-í ní cùu. **17** Te sã dúcáⁿ ñà túú ní quíxi coto ñaha-í xii-ndo te cudana sàni iní-ndó sã yùhú ñá túú ní sãha váha-í cuendá nàcuáa ní sani iní-í cada-í, àdi cudana ñáyiu ndècu ìchi cuehé ìchi duha, chi cue ñáyiu-áⁿ tnaa càchí-yu sã cúú càdá-yu ìⁿ sã sání iní-yu cadá-yu te tnaa càchí-yu sã ñáhá. **18** Dico Yá Ndiòxí Yáá ío váha quíde ndáá nàha ndáá náhá càxi-gá sã nchùhú ñá túú dàma-ndí sã càháⁿ-ndí. **19** Te yùhú ndihí té Silvanú ndihí té Timùteú dánèhé ñáhá-ndí xii-ndo cuendá Xítohó Jesucristú Yáá cúú Dèhe Yá Ndiòxí, te Xítohó Jesucristú cúú-gã Yáá ñá túú dàma-gá tnúhu càháⁿ-gá, chi cùu-gá Yáá càháⁿ mee-ni tnúhu ndáá tnúhu cuíti. **20** Te diu-ni Xítohó Jesucristú cúú-gã Yáá quíde nchàa nacuáa ní cachí Yá Ndiòxí. Te sã cuendá sã dúcáⁿ quíde Xítohó Jesucristú xiáⁿ càchí-ó sã ío càhnu cuu Yá Ndiòxí. Te nchaa-o na càchí-ó sã díú-ní dùcaⁿ na cada-gá. **21** Te mee Yá Ndiòxí quíde-gã ndécú-ní-ó ìchi Xítohó Jesucristú. Te diu-ni mee-gã ní càháⁿ ñáhá-gã xii-o cuendá cunu cuechi-o nùú-gã. **22** Te Yá Ndiòxí ní quíde-gá sã nchóo cùu-o ñáyiu cùu cuendá-gá, te ní taxi-gá Espiritú-gá ní ngúndecu ndihí-o cuendá cutnùní iní-ó sã ndáá cada ñaha-gã xii-o nàcuáa ní cachí-gá cada-gá.

23 Te Yá Ndiòxí náhá-gã sã yùhú càháⁿ ndáá-í ná cuendá vátá quíxí-gã-í quíxi coto ñaha-í xii-ndo, te vátá quíxí-gã-í chi ñá túú cuíní-í dándihú-í iní-ndó. **24** Te nchùhú ñá túú tàú-ndí cada yica ñaha-ndí xii-ndo nàcuáa quíndáá iní-ndó Yá Ndiòxí, chi sa sàndáá váha iní-ndó-gã, chi nchùhú cuíní-ndí chindee tnúhu ñaha-ndí xii-ndo nàcuáa ío-gá cudíⁿ iní-ndó cùndecu-ndo.

2

1 Te ní sani ndáá iní-í sã vã quíxí ndíhi-ni-í quíxi coto ñaha-í xii-ndo cuendá sã vã dándihú-í iní-ndó. **2** Te nchòhó cúú-ndó ñáyiu tàxi tnúhu ndee iní xii-í cudíⁿ iní-í ndécú-í, te xiáⁿ nùu ñá túú cuíní-í dándihú-í iní-ndó, chi núu ducaⁿ na càda-í te vã cùndècu váha-gá iní-ndó nàcuáa taxi-ndo tnúhu ndee iní xii-í. **3** Te

xiáⁿ nùu ní tendaha-í tutú véxi ndaha-ndo cuendá sã òré quíxi coto ñaha-í xii-ndo, te dàvá-áⁿ quíní-í sã quíde-ndó nàcuáa cudíⁿ iní-í te ñá díú dà dándihú-ndó iní-í òré quexìo-í, chi nchòhó tàú-ndó càda-ndo sã yùhú cudíⁿ iní-í. Te cùtnuní ndáá iní-í sã nùu yùhú cudíⁿ iní-í te tnàhá nchòhó cudíⁿ iní-ndó cuendá sã dúcáⁿ cudíⁿ iní-í. **4** Te ndàhyú-í sã ndihú iní-í òré ní cadúha-í tutú ní dáquixì-í ndaha-ndo, chi ío cuehé sã sání iní-í, te ñá túú ní dàquixì-í tutú-áⁿ ndaha-ndo cuendá sã dándihú iní ñáhà-í xii-ndo, chi ní dáquixì-í cuendá sã nchòhó cutnùní iní-ndó sã ío cùu iní ñáhà-í xii-ndo.

Nàcuáa tàú ñáyiu ñúú Còrintú cadá-yu cuendá ìⁿ ñáyiu ñá túú quíde ndáá

5 Te na càchí tnúhu-í xii-ndo cuendá ìⁿ téé ní quíde ìⁿ sã ñà túú tàú-dé cada-dé ndécú ndíhi-ndo, te ní quíde ndàhú-xi luha iní-í cuendá sã ñí quíde-dé-áⁿ dico nchòhó tnàhá-ndó ñí dándihú-dé luha iní-ndó, te duha càchí-í sã lúhá-ní ñí dándihú-dé iní-ndó cuendá sã vã cuidó-gá-í ná tnúhu càháⁿ-í. **6** Te nàcuáa ní ndatnúhu-ndo ñí quíde ndáá-ndó cuèchi téé-áⁿ te sa ndói-gá cuu nàcuáa ní quíde-ndo-dé. **7** Te vitna tàú-ndó càda cahnu iní-ndó sã ñí quíde-dé, te cuáñaha-ndo tnúhu ndee iní xii-dé chi núu ñáhá te vã ñihí ndéé-gã-dé cada-dé sã vãha cuendá sã ndihú iní-dé. **8** Te xiáⁿ nùu càháⁿ ndàhú-í núú-ndó sã càdá tùcu-ndo sã cúú iní-ndó-dé. **9** Te diu-ni cuendá iha càháⁿ-í ìⁿ núú tutú sã sã ní dáquixì-í ndaha-ndo, te ducaⁿ ñí quíde-í xító ndéè ñáhà-í xii-ndo nùu ndisa cuíní-ndó càda-ndo nchaa nacuáa càháⁿ-í. **10** Te ndèda-ni càa ñáyiu na càda cahnu iní-ndó ìⁿ sã quíde-yu, te tnàhá yùhú cada càhnu iní-í sã quíde-yu tucu. Te núu íó ìⁿ sã xíní ñùhu-xi cada cahnu iní-í te quíde cahnu iní-í, te mee Xítohó Jesucristú náhá-gã sã dúcáⁿ quíde-í, te ducaⁿ quíde-í cuendá sã nchòhó cuu-xi sã vãha xii-ndo. **11** Te ducaⁿ te sàcuíhná vã ñihí-xi ná cada ñaha-xi xii-o, chi nchoo sã xíní-ó nàcuáa quíde-xi.

Té Pàblú ndihú iní-dé ndécú-dé ñúú Tròás

12 Te ní xica-í cuáháⁿ-í ñúú Tròás cuendá yàcáⁿ càháⁿ-í tnúhu sã càháⁿ nàcuáa naníhí tàhú-ó tnúhu Xítohó Jesucristú, te òré ní quexìo-í te ní ñihí-í ìⁿ ìchi càhnu càháⁿ-í

tnúhu-gá. ¹³ Dico ñá túú ní cùu váha iní-í chi ñá túú ní nànhì-í té Titú té ndècu ndihì-o ichi Xítóhó Jesucristú, núu xiáⁿ ní quide ndee iní tnáhà-í ndihì cue ñáyiu ñúú-áⁿ, te ní xica-í cuáháⁿ-í distritú Macèdoniá.

Dàquetihú-ó yùcu ñávãha chi ndècu ndihì-o Xítóhó Jesucristú

¹⁴ Te táxãhu xii Yá Ndiöxí chi ducaⁿ-ni sànu ichi ñaha-gá xii-ndí nàcuáa cunuu-ndí núu yucu ñávãha chi ndècu ndihì-ndí Xítóhó Jesucristú, te mee Yá Ndiöxí sáchiuⁿ ñaha-gá xii-ndí càháⁿ-ndí tnúhu-gá. Te cada iní-ó sã tnúhu-gá-áⁿ cúu-xí dàtná ìⁿ yúcu sã ïo váha sãháⁿ te ta xítenuu dicó-xi ndëni ní cuu cuáháⁿ. Te ducaⁿ sãtnahá-xi cùu tnúhu-gá chi nchúhú quidé-ndí nàcuáa ta xítenuu ndëni ní cuu cuáháⁿ. ¹⁵ Te cùu-ndí dàtná dicó ìⁿ yúcu sã ïo váha sãháⁿ, te nàcani cuendá Xítóhó Jesucristú núu Yá Ndiöxí, te dicó yúcu-ãⁿ nchítá cuëi núu xĩndecu cue ñáyiu sa ní naníhí tàhú, te cuëi núu xĩndecu cue ñáyiu ta xíta nihnu cuáháⁿ. ¹⁶ Te sá cúu-xí cuè ñáyiu ta xíta nihnu cuáháⁿ-áⁿ, dicó yúcu-ãⁿ cúu-xí dàtná ìⁿ sá sáhní ñaha xii-yu, dico sá cúu-xí cuè ñáyiu sa ní naníhí tàhú, dicó yúcu-ãⁿ cúu-xí dàtná ìⁿ sá ndécá ìní-yu, ducaⁿ sãtnahá-xi cùu nchúhú. Te vitna chí cuãha cuendá núu ná cúu ñáyiu sàni iní-ndó ndàcu cada nacuáa ndùu tnúhu càháⁿ-í-a. ¹⁷ Chi nchúhú càháⁿ-ndí tnúhu Yá Ndiöxí dico ñá túú ndãhú quidé-ndí ndihì tnúhu-gá dàtná xĩquide dava-gá-güedé, chi quide ndáá-ndí càháⁿ-ndí tnúhu-gá, te mee-gã ní cachí-gá sá dúcáⁿ càda-ndí te ndèhe-gá sá nchúhú quidé-ndí nàcuáa ní cachí-gá, chi ndècu ndihì-ndí Xítóhó Jesucristú.

3

Cuendá ingá núu sã vãha ní cachí Yá Ndiöxí cada-gá ñáyiu

¹ Te cuëi duha càháⁿ-ndí núu-ndó dico ñá túú xini ñuhu-xi sá cũñaha-ndí xii-ndo sã cúu-ndí cue té quide váha, te ni ñá túú xini ñuhu-xi caçanehe-ndí ìⁿ tutú núu càháⁿ-xi sá cúu-ndí cue té váha danèhé ñáhá xii-ndo datná xĩquide dava-gá-güedé, te ni ñá túú xini ñuhu-xi sá nchòhó taxi-ndo ìⁿ tutú núu càháⁿ-ndó sã nchúhú cúu-ndí cue té quide váha. ² Te ñá túú xini

ñuhu-xi ducaⁿ cada-ndí. Te cùtnuní ndáá iní-ndí sá nchòhó cúu-ndó dàtná ìⁿ tutú sá ïo váha càháⁿ cuendá-ndí. Te ducaⁿ sãtnahá-xi cùu-ndo chi nchaa ñáyiu nihí-yu tnúhu nàcuáa quide-ndo ndecu-ndo, te xiáⁿ cùtnuní iní-yu sá nchúhú cúu-ndí cue té quide váha. ³ Te nchòhó cúu-ndó cuendá Xítóhó Jesucristú, te cùu-ndo datná tutú-gá te tutú-áⁿ ñi táuchíuⁿ-gã xii-ndí ní cadúha-ndí, te mee-ni ndihì Espiritú Yá Ndiöxí ní ngúndeé tnúhu-áⁿ te ñá díu ndihì tindá ní ngúndeé. Te ñá díu ìⁿ núu yúu ní ngúndeé chi iní-ndó cùu-xi núu dúcáⁿ ñi ngúndeé tnúhu-áⁿ te ducaⁿ sãtnahá-xi cùu-ndo.

⁴ Te duha càháⁿ-ndí chi cùtnuní ndáá iní-ndí sá Yá Ndiöxí quidé vãha ñaha-gá xii-ndí, chi ndècu ndihì-ndí Xítóhó Jesucristú. ⁵ Te nchúhú chi ndàcu-ndí quidé-ndí sá vãha dico ñá díu mèe-ndí ducaⁿ ndàcu-ndí quidé-ndí, chi mee Yá Ndiöxí chĩndèe ñaha-gá xii-ndí núu ndàcu-ndí quidé-ndí sá vãha. ⁶ Te mee Yá Ndiöxí ní quide-gá sá nchúhú ndacu-ndí cunu cuechi-ndí núu-gã càháⁿ-ndí núu ñáyiu cuendá ingá núu sã vãha ní cachí-gá cada ñaha-gã xii-yu. Te sá vãha ní cachí-gá cada ñaha-gã xii-yu-áⁿ ñá túú ìⁿ-ni cuu-xi ndihì nchaa tnúhu sá ñi xáhaⁿ-gã xii ndí Moisés ní chídó tnùní ndí, te ducaⁿ chi espíritú Yá Ndiöxí néhé chiuⁿ-xi nchaa tnúhu sá càháⁿ cuendá nchaa sã vãha-áⁿ. Te nchaa tnúhu ní chídó tnùní ndí Moisés, dándixi túu-xi iní nchaa ñáyiu ndècu ndihì tnúhu-áⁿ sã cuíta nihnú-yu cuendá nchaa cuëchi-yu, dico cue ñáyiu ndècu ndihì Espiritú Yá Ndiöxí ñáyiu-áⁿ ndécú ndihì-yu tnúhu ndee ìní sá cãcu nihnú-yu.

⁷ Te tnúhu sá ñi càháⁿ Yá Ndiöxí ndéé díhna nàcuáa cada ñáyiu ní ngúndeé-xi ìⁿ núu yúu quèhéⁿ. Te òré ní dátüu ndí Moisés nàcuáa càháⁿ tnúhu sá ñi càháⁿ Yá Ndiöxí ndéé núu yúu-ãⁿ núu cuè ñáyiu isràél, te súuní ñi tásaⁿ núu ndí te ñá túú-gã ní cùu cundehé-yu núu ndí, te ducaⁿ-gã ducaⁿ-gã quidé-xi dátásaⁿ-xi núu ndí ni cùu ñá túú-gã ducaⁿ ni quide-xi. Te tnúhu ndéé núu yúu-ãⁿ dándixi túu-xi iní cue ñáyiu sã cuíta nihnú-yu sá cuendá nchaa cuëchi-yu,

te ío váha ní quide-xi cútnàhá ní ngúndecu ndíhi cue ñáyiú isràél tnúhu-áⁿ. ⁸ Te sá dúcáⁿ ñí quide-xi xíáⁿ cútnùní sá tnúhu càháⁿ Espíritú Yá Ndiòxí vitna uuⁿ-gá ducaⁿ ïo-gá váha quide-xi. ⁹ Te núu ducaⁿ ïo váha ní quide-xi cútnàhá ní ngúndecu ndíhi cue ñáyiú isràél tnúhu sá dándìxi túu iní-yu sá cuíta nihnú-yu sá cuèndá nchaa cuéchi-yu, te uuⁿ-gá ducaⁿ vâha quide-xi vitna ní ngúndecu ndíhi-o tnúhu sá càháⁿ nâcuáa quide Yá Ndiòxí cuèndá sá vâ cúndècu-gá cuéchi ñáyiú núú-gă. ¹⁰ Te vá càchí-ó sã cúttnàhá ní ngúndecu ndíhi cue ñáyiú isràél tnúhu ndéé núú yũú-ăⁿ ïo-gá váha ní quide-xi, te ñáhá chi uuⁿ-gá váha quide-xi vitna cuèndá tnúhu sá càháⁿ nâcuáa quide Yá Ndiòxí. ¹¹ Te núu ducaⁿ ïo váha ní quide-xi cútnàhá ní ngúndecu ndíhi ñáyiú isràél tnúhu sá ñà túú ní cùdíi, te uuⁿ-gá ducaⁿ ïo váha quide-xi vitna ní ngúndecu ndíhi-o tnúhu sá vâ ndíhí nihnu tnahí-gá.

¹² Te cùtnuní iní-ndí sá vâ ndíhí nihnu sá dúcáⁿ ïo váha quide-xi, núu xíáⁿ ío víi ío váha cùu iní-ndí càháⁿ-ndí tnúhu sá ñí ngúndecu ndíhi-o. ¹³ Te ñá túú quide-ndí dàtná ní xóo cada ndíi Moisés, chi ndíi-áⁿ ñí xóo dàdáhu ndíi núú ndíi òré dátâsaⁿ-xi núú ndíi cuèndá sá vâ quíní cue ñáyiú isràél òré ñá túú-gă dátâsaⁿ-xi núú ndíi. ¹⁴ Te cue ñáyiú isràél ñá túú ní tècú tnùní váha-yu nâcuáa ní xóo danèhé ñáhá ndíi Moisés xíi-yu, te cuèi ndéé vitna ñá túú tècú tnùní-yu òré dâcuàhá-yu tnúhu sá ñí càháⁿ Yá Ndiòxí ndéé díhna nâcuáa cada-gá, te cada iní-ó sã dàtná sá ñí xídáhu núú ndíi Moisés yídáhu núú-yu cuèndá sá vâ cútnùní núú-yu cundèhé-yu te tecú tnùní-yu, dico núu tnahá tnúhu-yu ndíhi Xítohó Jesucristú te tecú tnùní-yu. ¹⁵ Te cuèi ndéé vitna òré dâcuàhá-yu nchaa tnúhu sá ñí chídó tnùní ndíi Moisés nchaa núú tùtú ndíi, te cada iní-ó sã dàtná sá ñí xídáhu núú ndíi yídáhu núú-yu chi ñá túú tècú tnùní-yu. ¹⁶ Dico cue ñáyiú na tûha ñaha xii Xítohó Jesucristú te tècú tnùní-yu tnúhu-gá. ¹⁷ Te Xítohó Jesucristú ñí-ní cùu-gá ndíhi Espíritú Yá Ndiòxí, te nchaa ñáyiú ndècu ndíhi Espíritú-gá ñá túú-gă táxí tnùní ñáhá ñí ñí sá ñà túú vâha xii-yu. ¹⁸ Te dàtná cúú ñí yutátá sã dánèhé núú ñáhá-xí xii ñáyiú ñí sá vâha, ducaⁿ

sătnahá-xi cùu-o chi quide-o nâcuáa càháⁿ ñáyiú sá ïo càhnu cuu Xítohó Jesucristú, te ducaⁿ ùuⁿ-gá uuⁿ-gá tá cùndáá-ó ndècu-o ichi-gá dàtná quidé mèe-gá quidé ndáá-gá. Te Espíritú-gá quidé-xí dùcaⁿ ta cundáá-ó núú-gă cuáháⁿ.

4

¹ Te mee Yá Ndiòxí ní cundàhú iní ñáhá-gă xii-ndí ní taxi-gá chiúⁿ quide-ndí càháⁿ-ndí tnúhu-gá, núu xíáⁿ ñá túú tnàhí nàtúhú iní-ndí càháⁿ-ndí tnúhu-gá. ² Te nchúhú dàquee tíhú-ndí nchaandi túhú sá ñà túú vâha quide dayuhu ñáyiú, chi nchaa xíáⁿ cúú-xí ñí sácáⁿ-núú sã cúú-xí-yu, te nchúhú ñá túú sàni iní-ndí dandàhú-ndí ñáyiú te ñí ñá túú sàni iní-ndí dama-ndí nâcuáa càháⁿ tnúhu Yá Ndiòxí, chi càháⁿ ndáá-ndí nâcuáa tàú-xi càháⁿ-ndí, te mee Yá Ndiòxí nâhá-gă nâcuáa ndùu tnúhu càháⁿ-ndí núú ñáyiú, te ñáyiú-áⁿ cútnùní iní-yu sá nchúhú càháⁿ váha-ndí. ³ Te cue ñáyiú ñá túú tècú tnùní nâcuáa ndùu tnúhu sá càháⁿ nâcuáa naníhí tàhú-ó càháⁿ-ndí núú-yu, ñáyiú-áⁿ cúú-yu ñáyiú ta xíta nihnu cuáháⁿ. ⁴ Te cue ñáyiú-áⁿ cúú-yu ñáyiú ío sàá iní-xi chi ñá túú cuíní-yu quíndáá iní-yu tnúhu Xítohó Jesucristú, te xíáⁿ núu sâcuíhna cùnùu-xi núú-yu te ñíhí-xi nâcuáa quide-xi dadáhu ndodo iní ñáhá-xí xii-yu cuèndá sá vâ tècú tnùní-yu tnúhu sá càháⁿ nâcuáa naníhí tàhú-yu, te tnúhu-áⁿ cúú-xí tnúhu sá ïo váha chi càháⁿ-xi sá ïo càhnu cuu Xítohó Jesucristú, te cùu-gá dàtná mèe Tâtá-gă Dútú Ndiòxí. ⁵ Te nchúhú ñá túú càháⁿ-ndí cuèndá sá cúú-xí mèe-ndí núú-ndó chi càháⁿ-ndí cuèndá Xítohó Jesucristú, te càchí-ndí xii-ndo sã díú-gă cúú-gă Yaa ío cùnùu, te càchí-ndí xii-ndo sã mèe-ndí cúú-ndí dícó-ní cue téé xínu cuechi sá cúú-xí-ndó, te ducaⁿ quide-ndí nâcuáa cuu víi cuu váha iní Xítohó Jesucristú. ⁶ Te Yá Ndiòxí Yaa ní dáyèhé ndéé cútnàhá nee ñuyúú ní cùu, Yaa-áⁿ ñí cachí-gá sá Xítohó Jesucristú cada-gá nâcuáa tecú tnùní-ó sã ïo càhnu cuu mee Yá Ndiòxí. Te sá dúcáⁿ ñí quide-gá te cada iní-ó sã dàtná tnúhu sá ñí dáyèhé-gá iní-ó.

Ío quíndáá iní-ó Yá Ndiòxí

⁷ Te nchúhú ndécú ndìhi-ndí tnúhu Xítóhó Jesucristú, te tnúhu-gá cúú-xí dàtná ìⁿ sá ïo váha ñùhu ìⁿ xití quídi ñuhu, te nchúhú cúú-ndí dàtná quídi-áⁿ. Te ducaⁿ sãtnahá-xi cùu-ndí chi tnúhu-gá ïo càhnu cuu-xi te mee-ndí ñáhá, te ducaⁿ cùu nacuáa cutnùní sá méé Yã Ndiõxí quidé-gã nchaa sá váha te ñá díú mèe-ndí. ⁸ Te cuèi ïo ndòho-ndí ndécú-ndí dico ñihí-ndí nàcuáa quide-ndí tá yãha-ndí nchaa tnúndòho-áⁿ cuáháⁿ, cuèi áma sa ndètu vií-nã quehdé iní-ndí sá vã ndácú-ndí yãha-ndí nchaa tnúndòho-áⁿ, dico ndàcu-ndí yãha-ndí. ⁹ Te cuèi nànducu ñaha ñáyiu cuìní-yu ná cada ñàhá-yu xii-ndí dico ñá túú dàña ñaha Yã Ndiõxí xii-ndí, te cuèi cànihá-yu xii-ndí dico cãcu-ndí ñá túú sàhni ñahá-yu. ¹⁰ Te ndèni ní cuu cuáháⁿ-ndí xicá cùu-ndí, te cãcu cãcu cahni ñàhá-yu xii-ndí dàtná ní quidé-yu Xítóhó Jesucristú, te ducaⁿ yãha-ndí cuèndá cutnùní sá ndécú tũu Xítóhó Jesucristú andiu te chindee ñaha-gá xii-ndí. ¹¹ Te nchúhú ñini ndècu-ndí ñuyíú-a te nchaa-ni nduu cãcu cãcu cahni ñaha ñáyiu xii-ndí sá cuèndá Xítóhó Jesucristú, te ducaⁿ yãha-ndí ndécú-ndí cuèndá cutnùní sá Xítóhó Jesucristú ndécú ndìhi ñaha-gá xii-ndí cuèi vá cúdii yiqui cùñú-ndí cundecu-xi. ¹² Te sá dúcáⁿ cãcu cãcu cahni ñaha ñáyiu xii-ndí xiãⁿ nchòhó uuⁿ-gá tá ñihí ndéé-ndó cuáháⁿ ndécú-ndó ìchi Xítóhó Jesucristú.

¹³ Te ìⁿ tée ní xindecu ndéé sanaha ñí chidó tnùní-dé núú tütú Yã Ndiõxí núú càchí-xi: “Yúhú ní sãndáá iní-í Yã Ndiõxí núú xiãⁿ ní cáháⁿ-í”, duha ní cachí tée-áⁿ. Te dàtná-ni ní sani iní tée-áⁿ ñi cáháⁿ-dé te ñu-ni ducaⁿ sãni iní nchúhú tucu núú xiãⁿ càchí-ndí: “Sãndáá iní-ndí Yã Ndiõxí núú xiãⁿ cáháⁿ-ndí”, duha càchí-ndí. ¹⁴ Te cùtnuní iní-ndí sá núu na cùú-ndí te Yã Ndiõxí dandòto ñaha-gá xii-ndí dàtná ní dándótó-gã Xítóhó Jesucristú, te tnàhá nchòhó ducaⁿ càda ñaha-gá xii-ndo, te dàvá-áⁿ candeca ñaha-gã xii-o quíhíⁿ nucúndecu-o núú-gã. ¹⁵ Te nchúhú nãndi cùu sá tá yãha-ndí véxi cuèndá nchòhó ngúndecu váha-ndo, te ducaⁿ cuíta cáyá-gã ñáyiu ngúndecu váha sá xíí Yã Ndiõxí, te

diu-ni ducaⁿ cuíta cuu vai-gã ñáyiu ndacáⁿ táhũ-yu núú-gã te cachí-yu sá ïo càhnu cuu-gã.

¹⁶ Te xiãⁿ núu nchúhú ñá túú tnàhí nàtúhú iní-ndí ndécú-ndí ìchi Xítóhó Jesucristú, te cuèi yiqui cùñú-ndí tá xàú-xi cuáháⁿ dico iní-ndí chi uuⁿ-gá uuⁿ-gá tá ñihí ndéé-xi cuáháⁿ. ¹⁷ Te nchaa sá ndòhó-ndí ñuyíú-a ñá túú càchí-ndí sá cúú-xí ìⁿ tnúndòho cahnu vihi, chi tnaa-ni duha ndòho-ndí, te sá dúhá ndòho-ndí nãndi ndòho-ndí ndécú-ndí ñuyíú-a te Yã Ndiõxí ïo váha cada ñaha-gã xii-ndí nduu na sàá-ndí núú ndécú-gã, te ñu-ni ducaⁿ càda ñaha-gá xii-ndí ñi caa ñi quíhíⁿ. ¹⁸ Te nchúhú ñá túú nchícúⁿ ñihnu-ndí sá tũu ndèhe-ndí ïo ñuyíú-a, chi nchícúⁿ ñihnu-ndí sá vãtá quìní-gá-ndí ndécú àndiu, te ducaⁿ quide-ndí chi nchaa sá tũu ndèhe-ndí ïo ñuyíú-a vá cúdii-xi cundecu-xi, te nchaa sá ñà túú tũu ndècu andiu xiãⁿ cudíi-xi cundecu-xi ñi caa ñi quíhíⁿ.

5

¹ Te yiqui cùñú-ó cùu-xi datná ìⁿ vehe, te vehe-áⁿ ñà túú cudíi-xi, te ducaⁿ sãtnahá-xi cùu yiqui cùñú-ó chi vá cudíi-xi, te na sàá nduu vã cùndecu-gá-ó ndìhi yiqui cùñú-ó, te Yã Ndiõxí taxi-gã ìⁿ yiqui cùñú sáá sá cúú-xí-ó, te xiãⁿ cúú-xí dàtná ìⁿ vehe sá ñà túú ní càdúha cue ñáyiu ñuyíú-a, chi mee Yã Ndiõxí ní cadúha-gã vehe-áⁿ te vehe-áⁿ cudíi-xi cundecu-xi ñi caa ñi quíhíⁿ andiu. Te ducaⁿ sãtnahá-xi cùu yiqui cùñú sá táxi Yã Ndiõxí xii-o chi cudíi-xi cundecu-xi ñi caa ñi quíhíⁿ. ² Te nchúhú ndècu ndìhi-gá-ndí yiqui cùñú-ndí sá ndécú ndìhi-ndí vitna te sama cuìní-ndí sá ïo ndìhi taxi Yã Ndiõxí yiqui cùñú sáá cundecu ndìhi-ndí. ³ Chi mee-gã vá dáña-gã sá dúcáⁿ-ní cùnduu-ndí cundecu-ndí, chi dai taxi-gã yiqui cùñú sáá-ãⁿ xii-ndí. ⁴ Te ñini ndècu-ndí ndìhi yiqui cùñú-ndí vitna ïo sàni iní-ndí te ndìhú iní-ndí, dico ñá díú sã dúhá quide-ndí te ñá túú-gã tnàhá iní-ndí cundecu-ndí ndìhi yiqui cùñú-ndí, chi cuìní-ndí sá Yã Ndiõxí ïo ndìhi taxi-gã yiqui cùñú sáá nduu táhú-ndí, chi xiãⁿ cudíi-xi ñi caa

ni quíhíⁿ te yiqui cùñú-ndí sá tá ndìhi ni-hnu cuáháⁿ-a vá cúdì-xi cundecu-xi. ⁵ Te ducaⁿ tnàhí ní cachí Yă Ndiöxí cunduu sá dúcáⁿ ndùu táhú-ó yiqui cuñú sáá-ăⁿ, te ní taxi-gá Espiritú-gá ní ngúndecu ndìhi-o cuendá cutnùnì iní-ó sã ndáá taxi-gá yiqui cùñú sáá-ăⁿ nduu táhú-ó.

⁶ Te xiăⁿ nũu nchúhú nihí ndéé-ndí ndécú-ndí, te cùtnuní iní-ndí sá nìni ndecu-ndí ndìhi yiqui cùñú-ndí sá ndécú ndìhi-ndí vitna te vátá sáa-gá-ndí cundecu-ndí mei nũú ndécú Xítóhó Jesucristú. ⁷ Te ducaⁿ cùtnuní iní-ndí chi sàndáá iní-ndí Yă Ndiöxí ndécú-ndí ñuyíú-a cuèi ñá túú xìní-ndí-gá. ⁸ Te ío váha cùu iní-ndí ndécú-ndí, te sàni iní-ndí sá vâha-gá sá nũu vá cùndècu-gá-ndí ndìhi yiqui cùñú-ndí sá ndécú ndìhi-ndí vitna. Te ducaⁿ sàni iní-ndí chi váha-gá cundecu-ndí mei nũú ndécú Xítóhó Jesucristú. ⁹ Te ío ndùcu ndee-ndí quidé-ndí nàcuáa cuu vii cuu váha iní Xítóhó Jesucristú vitna ndècu-ndí ñuyíú-a, te diu-ni ducaⁿ càda-ndí cuèi òré vá cùndècu-gá-ndí. ¹⁰ Te dacuítí sã ncháá-ó cùndecu-o núú Xítóhó Jesucristú ìⁿ nduu, te dàvá-áⁿ mee-gã cáháⁿ-gá te núu nása ndùu chiuⁿ ní quide-o ìⁿ ìⁿ-o, núu ní quide váha-o àdi ñá túú ní quide váha-o, te nàcuáa ndùu chiuⁿ ní quide-o ìⁿ ìⁿ-o te ducaⁿ ndùu sá táxi-gã nduu táhú-ó.

Nàcuáa ní cuu ní ngúndecu váha-o ndìhi Yă Ndiöxí

¹¹ Te nchúhú quíyùhú iní-ndí nàcuáa cada Xítóhó Jesucristú, núu xiăⁿ càháⁿ-ndí tnúhu-gá núú ñăyiu cuendá xínu iní-yu tuha ñàhá-yu xii-gá. Te mee Yă Ndiöxí sa nàha-gá nàcuáa quide-ndí ndécú-ndí, te sàni iní-ndí sá nchòhó cutnùnì iní-ndó nàcuáa quide-ndí ndécú-ndí. ¹² Te sá dúhá càháⁿ-ndí te vá cánì iní-ndó sã nchúhú càháⁿ váha-ndí cuendá-ndí nàcuáa nchòhó cuu váha iní ñàhá-gã-ndó xii-ndí te ñàhá, chi duha càháⁿ-ndí cuendá sá nchòhó níhí-ndó tnúhu cáháⁿ váha-gã-ndó cuendá-ndí núú ñăyiu. Te ducaⁿ nihí-ndó tnúhu cùñaha-ndo xii cue ñăyiu quide nínu mee-xi, chi cue ñăyiu-áⁿ ñà túú quide

cuendá-yu nása ndècu iní-yu. ¹³ Te núu nchòhó sání iní-ndó sã lùcú-ndí cuendá nàcuáa quide-ndí ndécú-ndí te cùu-xi cuendá Yă Ndiöxí, àdi núu sàni iní-ndó sã ñà túú lùcú-ndí cuendá nàcuáa quide-ndí ndécú-ndí te cùu-xi sá vâha sá cúu-xí-ndó. ¹⁴ Te quide-ndí nàcuáa cuìní Xítóhó Jesucristú chi cùtnuní iní-ndí sá ìo cùu iní-gá nchaa ñăyiu, te ducaⁿ xìnì ndáá-ndí sá nì xihí-gá cuendá ncháá-yu, te xiăⁿ nũu cada iní-ó sã dàtná tnúhu sá ncháá ñăyiu ní xihí-yu ndìhi-gá. ¹⁵ Te ducaⁿ nì xihí Xítóhó Jesucristú cuendá nchaa ñăyiu chi cuìní-gá sá ncháá-yu cundécú-yu cadá-yu nàcuáa cuìní mée-gã te vá cadã-yu nàcuáa cuìní mée-yu, chi mee-gã ní xihí-gá te ní ndoto-gá cuendá cuu-xi sá vâha sá cúu-xí-yu. ¹⁶ Te xiăⁿ nũu nchúhú ñá túú-gã ná sání iní-ndí cuendá tnàha ñăyiu-ndí nũu nàndíhi-yu àdi ñá túú nàndíhi-yu dàtná ní xóo canì iní-ndí cùtnàhá ní xíndecu-ndí ichi cuèhé ichi duha, te dàvá-áⁿ nì xóo canì iní-ndí cuendá Xítóhó Jesucristú dàtná sání iní cue ñăyiu ndècu ichi cuehé ichi duha vitna. ¹⁷ Te nchaa nchoo ñăyiu ní tnàhá tnúhu ndìhi Xítóhó Jesucristú ní nduu-o dàtná ìⁿ ñăyiu saa, te ducaⁿ chi ñá túú-gã quidé-ó dàtná ní xóo cada-o cùtnàhá ní xíndecu-o ìchi cuehé ichi duha, chi ní ngúita-o quide-o mee-ná sá vâha te nchaa xiăⁿ cúu-xí sã sáá sã cúu-xí-ó chi vátá quìní-gá-ó càda-o.

¹⁸ Te ducaⁿ quide-o ndecu-o chi mee Yă Ndiöxí quidé-gã sá dúcáⁿ càda-o cundecu-o. Te Xítóhó Jesucristú ní quide-gá ní ngúndecu váha-o ndìhi Yă Ndiöxí vitna, te ducaⁿ chi mee Yă Ndiöxí ducaⁿ tnàhí ní cachí-gá cunduu, te diu-ni mee Yă Ndiöxí ní taxi-gá chiuⁿ quide-ndí càháⁿ-ndí tnúhu-gá nàcuáa ngúndecu váha cue ñăyiu ndìhi-gá. ¹⁹ Te ducaⁿ chi mee-gã ní cachí-gá sá Xítóhó Jesucristú cada-gá nàcuáa nucúndecu váha nchaa nchoo cuè ñăyiu ndècu ñuyíú-a ndìhi Yă Ndiöxí. Te nchaa ñăyiu ní tuha ñàha xii-gá ñá túú-gã sání iní-gá sá ñăyiu-áⁿ nacháhu-yu cuèchi-yu núú-gã. Te mee Yă Ndiöxí ní taxi-gá chiuⁿ quide-ndí càháⁿ-ndí tnúhu-gá núú ñăyiu nàcuáa ngúndecu ndìhi ñàha váha-yu xii-gá. ²⁰ Te Xítóhó Jesucristú

ní cachí-gá sá nchùhú cáháⁿ-ndí tnúhu-gá núú ncháa ñáyiú, te sá dúhá quide-ndí cáháⁿ-ndí tnúhu-gá te quide-ndí núú Yá Ndiöxí cáháⁿ-ndí yuhu-gá, te xíáⁿ nùu cáháⁿ ndàhú-ndí núú-ndó sã tnàhá tnúhu-ndo ndìhi Yá Ndiöxí cuèndá cundecu váha-ndo ndìhi-gá, te duha cáháⁿ-ndí chi ducaⁿ càchí Xítóhó Jesucristú cada-ndí. ²¹ Te Xítóhó Jesucristú cúú-gã Yaá ñá túú tnàhí cuéchi-xi, dico Yá Ndiöxí ní quide ñaha-gã xii-gá dàtná ìⁿ ñáyiú ndècu cuéchi-xi, te ducaⁿ chi Xítóhó Jesucristú ní xido-gá cuéchi nchaa nchoo ñáyiú ñuyíú-a, te ducaⁿ ñí xido Xítóhó Jesucristú nchaa cuéchi-o cuèndá sá nùu na tnàhá tnúhu-o ndìhi-gá te cudìu-o núú Yá Ndiöxí, te ducaⁿ ñí cuu chi mee Yá Ndiöxí ducaⁿ ñí cachí-gá cunduu.

6

¹ Te nchoo ìⁿ-ni cùu-o quide chiuⁿ-o cuèndá Yá Ndiöxí nùu xíáⁿ cáháⁿ ndàhú-ndí núú-ndó sã vã dícó-ni ducaⁿ cùndedóho-ndo tnúhu Yá Ndiöxí, chi cada-ndo nàcuáa na chindee ñaha-ni-gá. ² Chi mee-gã càchí-gá ìⁿ xichi núú tütú-gá núú càchí-xi:

Sáá nduu te cundàhú iní ñáhà-í xii-ndo chindee ñaha-í cuèndá naníhí tãhú-ndó,

te ní sáá nduu tàú-xi sá cùndàhú iní ñáhà-í xii-ndo chindee ñaha-í cuèndá naníhí tãhú-ndó, núú xíáⁿ ní xíndedóho-í tnúhu ní cáháⁿ-ndó te ní chindee ñaha-í xii-ndo nàcuáa naníhí tãhú-ndó.

Duha càchí-gá núú tütú-gá. Te vitna cùu-xi nduu cundàhú iní ñáhá Yá Ndiöxí chindee ñaha-gá, te cùu-xi nduu naníhí tãhú-ó.

³ Te nchúhú ñá túú quide-ndí ìⁿ sá ñà túú tàú-ndí cada-ndí sá cúú-xí ñáyiú, chi cuíní-ndí sá vã cáháⁿ cuèhé-yu cuèndá chiúⁿ quide-ndí. ⁴ Te nchaa sá quidé-ndí cúú-xí nàcuáa cutnùní iní cue ñáyiú sá nchùhú xínú cuèchi-ndí núú Yá Ndiöxí, te ío quide cahnu iní-ndí cuèndá nchaa sá ndóhó-ndí, chi nándi quide ñaha ñáyiú xii-ndí, te ducaⁿ-ni ta quide cahnu iní-ndí cuèi nándi-gá nchaa sá tá yãha-ndí véxi. ⁵ Te duha ta yãha-ndí véxi, núú cániha ñáyiú xii-ndí, núú chíhí ñáhá-yu vecaá,

núú cuáá ndeé ñáhá ñáyiú xii-ndí xícuèhé ñáhá-yu, te ío ndòho-ndí quidé-ndí chiúⁿ Yá Ndiöxí, te áma xídí-ndí te áma ñá túú xídí-ndí, te áma ñíhí-ndí sá xéxi-ndí te áma ñá túú ñíhí-ndí. ⁶ Te quide ndáá-ndí ndécú-ndí, te cùtnuní váha iní-ndí nàcuáa cáháⁿ tnúhu Yá Ndiöxí, te quide cahnu iní-ndí cuèi nándi quide ñaha ñáyiú xii-ndí, te cùndahú iní-ndí tnàha ñáyiú-ndí, te quide-ndí nchaa sá váha nàcuáa chindee ñaha Espíritú Yá Ndiöxí xii-ndí, te ío ndisa iní-ndí cúú iní-ndí cue tnàha ñáyiú-ndí. ⁷ Te dànehé-ndí ñáyiú mee-ni tnúhu ndáá, te nchaa chiúⁿ quide-ndí te quide-ndí nàcuáa chindee ñaha Yá Ndiöxí xii-ndí, te cuèndá sá quidé ndáá-ndí ndécú-ndí nùu xíáⁿ ñíhí ndéé-ndí dáquèe tìhú-ndí nchaa sá cuèhé sá dúhá. ⁸ Te dava ñáyiú quide nínu ñáhá-yu xii-ndí, te davá-yu tnúhu cuèhé tnúhu duha cáháⁿ-yu xãhãⁿ-yu xii-ndí, te davá-yu xicáháⁿ váha-yu cuèndá-ndí te davá-yu xicáháⁿ cuèhé-yu, te davá-yu càchí-yu sá dándàhú-ndí ñáyiú dico ñá ndáá chi cáháⁿ ndáá-ndí. ⁹ Te davá-yu càchí-yu sá ñà túú xíní-yu ná ñáyiú cùu-ndí, te davá-yu càchí-yu sá xíní-yu yoo cùu-ndí, te davá-yu cuíní-yu cahni ñáhá-yu xii-ndí dico vátá cáhni ñàha-gá-yu chi ndècu-ni-ndí. Te ío ndòho-ndí ndécú-ndí ichi Yá Ndiöxí, te cuèi ndòho-ndí dico ñá túú cùu-xi sá cùú-ndí. ¹⁰ Te cuèi ndìhú iní-ndí dico ñá túú dàña ndeé-ndí sá cúdí iní-ndí, te cùu-ndí cue téé ndàhú dico sànu ichi-ndí vãi ñáyiú ichi Yá Ndiöxí cuèndá ngúndecu váha-yu sá cuèndá-gá, te cuèi ñá túú ñá ndécú ndìhi-ndí dico ñá túú ñá cúmání xii-ndí.

¹¹ Te nchòhó ñáyiú ndècu ndìhi-í ichi Xítóhó Jesucristú ndécú ñúú Còrintú ío cùu iní ñáhá-ndí xii-ndo, te ñí yùhu ñí iní-ndí cáháⁿ-ndí nchaa tnúhu cáháⁿ-ndí sá cúú-xí-ndó. ¹² Te nchúhú chi ñí yùhu ñí iní-ndí cúú iní ñáhá-ndí xii-ndo, dico nchòhó chi ñá túú dùcaⁿ quide-ndo sá cúú-xí-ndí. ¹³ Te yúhú cáháⁿ ndàhú-í núú-ndó dàtná quidé ìⁿ téé cùu tátá òré cáháⁿ ndìhi-dé cue déhe-dé sá ñí yuhu

ni iní-ndó cùu iní ñáhá-ndó xii-ndí dàtná quidé mèe-ndí cùú iní ñáhá-ndí xii-ndo.

Nchoo cùu-o datná ìñ vehe Yá Ndiöxí

14 Te cue ñáyiú ñá túú sàndáá iní tnúhu Xítohó Jesucrístú, te vá cùú ìñ nuu-ndo ndihí-yu cada-ndo dàtná xiquidé-yu, chi ìñ cuu nchaa sá vǎha te ìñ cuu nchaa sá cuèhé sá dúhá, te ñúmí nchícanchii ndihí niú chi ñá túú ìñ-ni cuu-xi. Te ducaⁿ sǎtnahá-xi cùu nchaa sá vǎha ndihí nchaa sá cuèhé sá dúhá chi ñá túú ìñ-ni cuu-xi. 15 Te ñu-ni ducaⁿ ñá túú ìñ-ni cuu Xítohó Jesucrístú ndihí sácuíhná, te ñu-ni ducaⁿ ñá túú ìñ-ni cuu ñáyiú sàndáá iní ñáhá xii Xítohó Jesucrístú ndihí ñáyiú ñá túú sàndáá iní ñáhá xii-gá. 16 Te ñu-ni ducaⁿ sǎtnahá tucu-xi cùu vehe Yá Ndiöxí ndihí nchaa sá cǎchí ñáyiú cùu ndiöxí ní cadúha cue té ñuyíú-a, chi vá cùú quíhi ni ìñ xǎn xití vehe-gá. Te nchoo cùu-o datná vehe Yá Ndiöxí Yáá ndécú túu andiu, chi mee-gǎ cǎchí-gǎ núú tütú-gǎ núú cǎchí-xi:

Yúhú vá cùmǎní cundecu-í ndihí-yu ndëni ní cuu na cùndecú-yu,

te ñu-ni yúhú cuu-í Ndiöxí-yu,

te mèe-yu cuú-yu ñáyiú cùu cuendá-í.

Duha cǎchí-gǎ núú tütú-gǎ. 17 Te xǎn ñu cǎchí tucu-gǎ ingǎ xichi núú tütú-gǎ núú cǎchí-xi:

Chí tá quèe tnuú nchaa ñáyiú ñá túú sàndáá iní ñáhá xii-í,

te vá cǎní iní-ndó càda-ndo ni ìñ sá cuèhé sá dúhá,

te ducaⁿ te queheⁿ cuendá ñáhà-í xii-ndo,

18 te yúhú cuu-í Tǎtá-ndó,

te nchòhó cuu-ndo cuè déhe ducuⁿ-í, ndihí cue déhe yoco-í,

duha cǎháⁿ yúhú Yáá ío cǎhnu cuu.

Duha cǎchí-gǎ núú tütú-gǎ.

7

1 Te sá dúcáⁿ ío váha cǎháⁿ Yá Ndiöxí sá cùú-xi-ó ñu xǎn cǎháⁿ-í dóho nchòhó ñáyiú ío cùu iní-í sá ñuⁿ duuⁿ daña-o nchaa sá cuèhé sá dúhá, chi nchaa xǎn ñá túú cùu-xi sá vǎha sá cùú-xi iní-ó ndihí yiqui cuñú-ó, te cada-o nǎcuáa tàú-xi cunduu nǎcuáa cundáá-ó núú Yá Ndiöxí, te cada-o sǎ néhé-ó sǎ yíñuhu núú-gǎ.

Cue ñáyiú ñuú Còrintú quidé vǎha-yu

2 Te ni yúhu ni iní-ndó chì cùú iní ñáhá xii-ndí, chi nchúhú vá yóo ìñ quide úhú iní-ndí, te ni vǎ yóo ìñ dàcuíta nihnu-ndí, te ni vǎ yóo ìñ dǎndahú-ndí. 3 Te sá dúhá cǎháⁿ-í te vá cǎní iní-ndó sǎ ìñ cuéchi dàcaa-í díquí-ndó, chi dàtná sa ní cǎchí-í xii-ndo sǎ yúhú ío cùu iní ñáhà-í xii-ndo, te cuéi vitna ndècu-gǎ-ó ñuyíú-a àdi cuéi na cùú-ó dico ñu-ni ducaⁿ cùu iní ñáhà-í xii-ndo. 4 Te yúhú ío váha sǎni iní-í cuendá-ndó, te ducaⁿ ío váha cǎháⁿ-í cuendá-ndó, te ío ndècu ndihí-í tnúhu ndee iní cuendá-ndó, te ío cùdí iní-í sá cuendá-ndó cuéi nǎndí ndòho-í ndihí dava-gǎ-güedé ndécú-ndí.

5 Te nchúhú cùtnahá ní sáháⁿ-ndí distrítú Macèdoniá, te ñá túú tnàhí ni ndetátú-ndí cuendá nchaa sá ñí yáhandí chi ío ní ndòho-ndí cuendá nchaa sá ñí quidé-yu, chi ío ní cuándeé ñáhǎ-yu xii-ndí, te ío ní sǎni iní-ndí ñu nása-gǎ yáha-ndí ní cùu. 6 Dico Yá Ndiöxí ní taxi-gǎ tnúhu ndee iní xii-ndí òré ní quexió té Títú núú ndécú-ndí, te ñu-ni Yáá-án cùú-gǎ Yáá sǎñaha-gǎ tnúhu ndee iní xii cue ñáyiú ndihú iní-xi. 7 Te ducaⁿ ñí taxi Yá Ndiöxí tnúhu ndee iní xii-ndí cuendá sá ñí quexió té Títú núú ndécú-ndí, te ñá díú-ní sǎ cuendá ní quexió-dé chi ní níhí tucu-ndí tnúhu ndee iní cuendá ní caní-dé cuendú núú-ndí sá nchòhó ní sǎñaha-ndo tnúhu ndee iní xii-dé, te ní cǎchí tnúhu-dé xii-ndí sá nchòhó ío cuíni-ndó cǎháⁿ ndihí ñaha-ndo xii-ndí, te ní cǎchí tnúhu tucu-dé xii-ndí sá nchòhó ío ndihú iní-ndó cuendá nǎcuáa cùu ndecu-ndo ni cuu, ndihí cuendá sá ío sǎni iní-ndó cuendá-í, te sá dúcáⁿ nduu cuendú ní caní-dé núú-ndí ñu xǎn ío ní cudí iní-í.

8 Te nchòhó ní ndihú iní-ndó cuendá tnúhu cǎháⁿ-í núú tütú sá ñí dáquíxí-í ndaha-ndo, te òré ní níhí-í tnúhu sá ndihú iní-ndó te tnaa-ni ní ndixi cuéchi iní-í sá dúcáⁿ ñí quide-í te dàtnúni ñá túú-gǎ ní ndixi cuéchi iní-í. 9 Te vitna ní ndihú iní-ndó, te xǎn ní quide-xi ní ndixi cuéchi iní-ndó sǎ ñá túú quide váha-ndo ndècu-ndo ni cuu, te ní cudí iní-í dico ñá díú cuendá sá ni ndihú iní-ndó ñí cudí iní-í chí cuendá sá ñí ndixi cuéchi iní-ndó, te ní ndihú iní-ndó nǎcuáa ní cuu váha iní Yá

Ndiöxí, te xiãⁿ nõu ní cuu-xi ìⁿ sá vãha sá cúú-xí-ndó cuendá tñuhu ní cáháⁿ-í te ñá túú ní cùu-xi ìⁿ sá cuèhé sá cúú-xí-ndó. ¹⁰ Te nchoo nõu na ndìhú iní-ó nàcuáa cuu vãha iní Yã Ndiöxí, te ndìxi cuèchi iní-ó te núu ñá túú quide vãha-o ndècu-o, te sá dúcáⁿ quide-o te nàníhí tãhú-ó, te vá ndìhú iní-ó sá dúcáⁿ ñi quide-o, te dava ñáyiu xĩndecu ichi cuèhé ichi duha ndìhú iní-yu dico ñá túú ndìxi cuèchi iní-yu cuendá nchaa sá ñà túú vãha quidé-yu, te sá dúcáⁿ quidé-yu te cuíta nihnú-yu. ¹¹ Te sá dúcáⁿ ñi ndìhú iní-ndó nàcuáa ní cuu vãha iní Yã Ndiöxí, te xiãⁿ nõu ndùcu ndee-ndo quide-ndo nchaa nacuáa tàú-xi cunduu, te vitna ñi yùhu ñi iní-ndó càháⁿ-ndó sã quidé vãha-ndo, te ío cùdèéⁿ-ndó nõú méé-ndó sã ñà túú quide vãha-ndo ndècu-ndo ñi cuu, te yùhú-ndó ndècu-ndo cuendá sá ñà túú quide vãha-ndo ñi cùu, te ío ní xúhuⁿ iní ñáhá-ndó xii-í, te ní ndúcú ndéé-ndó ñi quide ndáá-ndó cuendá téé ndècuèchi ndècu ndìhi-ndo, te sá dúcáⁿ ñi quide-ndo te xiãⁿ ní cutnùní sá méé-ndó ñà túú cuèchi-ndo. ¹² Te ní cadúha-í tutú ní dáquixì-í ndaha-ndo, te ní quide-ndo nàcuáa ní cáháⁿ-í, te sá dúcáⁿ ñi quide-ndo xiãⁿ ní cutnùní iní-ndó sã ío cùu iní ñáhá-ndó xii-í. Te Yã Ndiöxí náhá-gã sá díú cuendá xiãⁿ ní dáquixì-í tutú ndaha-ndo, te ñá díú-ní cuendá sá sání iní-í cuendá téé ndècuèchi ndècu ndìhi-ndo, te ñi ñà díú-ní cuendá ñáyiu ní dándìhú téé ndècuèchi-áⁿ iní-xi ní cadúha-í tutú ní dáquixì-í ndaha-ndo. ¹³ Te cuendá sá quidé vãha-ndo ndècu-ndo xiãⁿ cúú-xí tñuhu ndee iní ndécú ndìhi-ndí.

Dico ñá díú-ní xiãⁿ chi tñàhá ío cùdíí iní-ndí cuendá sá ío cùdíí iní té Títú, te ducaⁿ cùdíí iní-dé chi nchòhó ní sãñaha-ndo tñuhu ndee iní xii-dé. ¹⁴ Te yúhú ñá túú cùcahaⁿ núú-í sá ñi cáháⁿ vãha-í cuendá-ndó nõú tẽ Títú cùtñàhá vátá quixí-gã-dé núú ndécú-ndó, chi ní cutnùní iní-dé sá ndáa càháⁿ vãha-í nàcuáa quide-ndo datná cúú-xí sã ndáa nchaa tñuhu dàcuaha ñaha-í xii-ndo. ¹⁵ Te vitna ío-gã vãha cùu iní té Títú cuendá-ndó, chi ndàcu iní-dé sá ncháá-ndó ío vãha ní tñi-ndo nchaa tñuhu ní cáháⁿ-dé núú-ndó, te ndàcu tucu iní-dé sá ñi queheⁿ cuendá vãha-ndo-dé, te ní dátũu-ndo nõú-dé sá ío ní quiyùhú

iní-ndó sã vã ndácú-ndó càda-ndo nchaa nacuáa tàú-xi cunduu. ¹⁶ Te ío cùdíí iní-í cuendá-ndó chi cùtnuní ndáa iní-í sá ñà túú dàña ndéé-ndó quide-ndo nchaa nacuáa tàú-xi cunduu.

8

Ío vãha cuu iní-ó chĩndee tñaha-o

¹ Te nchòhó ñáyiu ndècu ndìhi-ndí ichi Xitohó Jesucristú càchí tñuhu-ndí xii-ndo nàcuáa quide ñaha Yã Ndiöxí xii cue ñáyiu xĩndecu ichi-gã ndécú dístítú Macèdoniá, chi ío chĩndee ñaha-gã xii-yu cuendá sá quidé vãha-yu ndécú-yu. ² Te cuèi ndòho vihí-yu ndécú-yu dico ío-ni cùdíí iní-yu, te cuendá xiãⁿ nõu ñi yùhu ñi iní-yu ní sacáⁿ tñáhã-yu díhúⁿ sã cúú-xí tñaha ñáyíu-yu, te ñá túú tñàhí ñi xĩnduu díi-yu cuèi ío ndàhú-yu. ³ Te ñá díú-ní nàcuáa ní sani iní-yu ndacú-yu cacáⁿ tñáhã-yu, chi ní quide yica iní-yu ní sacáⁿ tñáhã-gã-yu, te yúhú càchí tñuhu ndáa-í xii-ndo sã ñi yuhu ñi iní-yu ducaⁿ ñi quidé-yu. ⁴ Te ío ní cáháⁿ ndàhú-yu núú-ndí cuendá sá cuãha-ndí tñuhu sã tñàhá-yu chĩndèé-yu dava-gã cue ñáyiu cùu cuendá Yã Ndiöxí. ⁵ Te ñá díú-ní nàcuáa ní sani iní-ndí ní quidé-yu, chi ní xidó-gã-yu ní quide vãha-yu, te ducaⁿ chi mèé-yu ní sani iní-yu sá cadã-yu nchaa nàcuáa cuñí Yã Ndiöxí, te dàtnùní ducaⁿ te ní cachí-yu sá cúú càdá-yu nchaa nàcuáa na cũñaha-ndí xii-yu. Te ducaⁿ ñi quidé-yu chi ducaⁿ ñi cuñí méé Yã Ndiöxí cunduu. ⁶ Te sá dúcáⁿ ñi quide ñáyiu-áⁿ nõu xiãⁿ càháⁿ ndàhú-ndí núú tẽ Títú sá quixí tucu-dé núú ndécú-ndó cuendá dàxínu cava-dé chiuⁿ sá sã ní ngüita-dé quidé-dé dátacá-dé díhúⁿ sã sã ní ngüita-ndo sàcáⁿ tñáhã-ndó, te ducaⁿ quide-ndo chi cùndahú iní-ndó tñaha ñáyiu-ndo. ⁷ Te nchòhó cúú-ndó ñáyiu ío ngòdónúú quide nchaa sã vãha, te ío vãha sãndáa iní-ndó Xitohó Jesucristú, te ío vãha cùtnuní iní-ndó nàcuáa càháⁿ tñuhu-gã, te ío vãha dàcuaha-ndo ñáyiu tñuhu-gã, te ío ndùcu ndee-ndo quide-ndo mee-ñi sã vãha, te ducaⁿ ío cùu iní ñáhã-ndó xii-ndí, te sá dúcáⁿ quide-ndo núu xiãⁿ càháⁿ ndàhú-í núú-ndó sã ngòdó núú-gã-ndó càda-ndo sá cúú-xí tñaha ñáyiu-ndo.

8 Dico yúhú ñá túú tàuchiúⁿ-í sá dúcáⁿ càda-ndo, chi cuendá-ni sá càchí tnúhu-í xii-ndo nàcuáa quide dava-gá cue ñáyiú ndècu ichi Xítohó Jesucristú, chi cue ñáyiú-áⁿ ni yùhu ni iní-yu quidé-yu sá vâha sá cúu-xí tnàha ñáyiú-yu, te càchí tnúhu-í xii-ndo nàcuáa quidé-yu cuendá cutnùní nũ nása cada-ndo nũ ndisa sá cúu iní-ndó cuè tnaha ñáyiú-ndo. ⁹ Te nchòhó sa xìní-ndó sá Xítohó Jesucristú ío cùndahú iní ñáhá-gã xii-o, te ío váha ndècu-gá ní cùu te ní quixi-gá ñuyíú-a ní quide váha ñaha-gã xii-o, te ñuyíú-a ñá túú ní xĩndecu váha-gá, te ducaⁿ ñi quixi-gá ñuyíú-a cuèi ñá túú ní xĩndecu váha-gá cuendá sá nchóó ngũndecu váha-o nũú ndécú-gã.

¹⁰ Te na càchí tnúhu-í xii-ndo nàcuáa sàni iní-í. Chìuⁿ sá ñi yuhu ni iní-ndó ñi ngũíta-ndo quide-ndo cuíá ñi yáha chi cùu-xi sá váha sá cúu-xí-ndó nũ na dàxínu cava-ndo. ¹¹ Te dàtná-ni ni yùhu ni iní-ndó ñi tausaha-ndo chìuⁿ-áⁿ te ducaⁿ-ni ñi yuhu ni iní-ndó dàxínu cava-ndo, te cacáⁿ tnáhá-ndó sá ndécú ndìhi-ndo nàcuáa xito mee-ndo ndacu-ndo. ¹² Te núu nchòhó ni yùhu ni iní-ndó càcáⁿ tnáhá-ndó sá xító mèe-ndo ndacu-ndo ña, te cùu váha iní Yã Ndiõxí, chi mee-gã sa nàha-gá nása ndècu-o te ndũu vétú-ni iní-gá.

¹³ Te sá dúhá ndũu tnúhu càháⁿ-í te vá cání iní-ndó sá yúhú cuíní-í sá nchòhó ndoho-ndo cùndecu-ndo te dava-gá-yu ngũndecu váha-yu sá cuendá-ndó. ¹⁴ Te vitna ndècu ndee iní-ndó nàcuáa ndacu-ndo chĩndee-ndo cue ñáyiú xini ñuhu, te nduu ñá túú ndècu ndee iní-ndó te cue ñáyiú-áⁿ chĩndee ñáhá-yu xii-ndo te núu ndècu ndee iní-yu, te ducaⁿ te ni nchòhó ñá túú ñá cumání xii-ndo te ni cuè ñáyiú-ãⁿ ñá túú ñá cumání xií-yu. ¹⁵ Te ducaⁿ te quee ndáá-xi nàcuáa càháⁿ-xi núú tütú Yã Ndiõxí núú càchí-xi: “Cue ñáyiú ío vâi sá ñi ñíhí ñá túú ní cùu sobrá xií-yu, te cue ñáyiú sacú ní ñíhí ñá túú ní cùmání xií-yu”, duha càchí-xi núú tütú-gá.

Té Títú ndìhi cue té cùndìhi-dé

¹⁶ Te ndàcáⁿ táhù-í núú Yã Ndiõxí chi mee-gã ní quide sá tè Títú ío ñuhu iní ñáhá-dě xii-ndo dàtná ñúhú iní ñáhà-í xii-ndo. ¹⁷ Te yúhú ní xáhaⁿ-í xii-dé sá quíxí còto ñaha-dé xii-ndo te ní sáha-dé tnúhu, te ñá díú mèe-ni sá dúcáⁿ ñi xáhaⁿ-í xii-dé

quixi coto ñaha-dě xii-ndo, chi mee-dě cùdíí tnàhí iní-dé quixi coto ñaha-dě xii-ndo.

¹⁸ Te tendaha-ndí ìⁿ téé ndècu ndìhi-o ichi Xítohó Jesucristú quixi-dé ndìhi té Títú, te téé quixi ndìhi té Títú-áⁿ cúu-dě ìⁿ téé ío váha càháⁿ cue ñáyiú xĩndecu ichi Xítohó Jesucristú cuendá-dé cuendá sá ío váha quide-dé chìuⁿ Xítohó Jesucristú càháⁿ-dé tnúhu-gá tnúhu sá càháⁿ nàcuáa naníhí tàhú-ó. ¹⁹ Te cue ñáyiú xĩndecu ichi Xítohó Jesucristú ñá díú-ní sá càháⁿ váha-yu cuendá-dé, chi tnàhá ní cáxi ñáhá-yu xii-dé cuendá sá cacá cùu ndìhi ñaha-dé xii-ndí chĩndee ñaha-dé tacá sá cúu-xí ñáyiú ndàhú, te quide-ndí chìuⁿ-a cuendá ío cuu càhnu Yã Ndiõxí, te cue ñáyiú cutnùní iní-yu sá nchòhó ni yùhu ni iní-ndó quide-ndo nchaa sá váha sá cúu-xí cuè tnaha ñáyiú-ndo. ²⁰ Te cuíní-ndí sá vã càháⁿ cuèhé ñáyiú cuendá nàcuáa quide-ndí ndìhi sá ngãutnàha sá cúu-xí cuè tnaha ñáyiú-o, te ío vâi cuu-xi. ²¹ Chi ndècu ndee-ndí quidé-ndí nàcuáa càháⁿ váha Xítohó Jesucristú cuendá-ndí, te quide tucu-ndí nàcuáa càháⁿ váha ñáyiú sá quidé váha-ndí.

²² Te tendaha tucu-ndí ingá tucu téé ndècu ndìhi-o ichi Xítohó Jesucristú quixi-dé ndìhi cue téé úú quixi coto ñaha xii-ndo, te téé quixi ndìhi-güedé-áⁿ ñi cuu vâi xito quide-dé nàcuáa cutnùní iní-ndí sá ío ndècu ndee-dé quidé-dé sá váha, te vitna ío-gá cuíní-dé cada-dé sá váha vitna quixi-dé núú ndécú-ndó, chi cùtnuní ndáá iní-dé sá cúu-ndó cuè ñáyiú quide váha. ²³ Te càchí tnúhu-í xii-ndo sá tè Títú cúu-dě ìⁿ téé cùndìhi-í quidé-ndí chìuⁿ Xítohó Jesucristú, te tnàhá-dé cúu-dě ìⁿ téé xinu cuechi núú-ndó càháⁿ-dé tnúhu-gá. Te càchí tnúhu tucu-í xii-ndo cuendá cue téé úú quixi ndìhi-dé, chi cue téé-áⁿ cúu-güedé cue téé tendaha cuè ñáyiú xĩndecu ichi Xítohó Jesucristú quixi coto ñaha xii-ndo. Te cue téé-áⁿ quidé-güedé nàcuáa cachí ñáyiú sá ío càhnu cuu Xítohó Jesucristú. ²⁴ Te chí cadá sá cúu iní ndisa-ndo-güedé cuendá ducaⁿ na cùtnuní iní nchaa dava-gá ñáyiú xĩndecu ichi Xítohó Jesucristú sá ndáá ndisa ducaⁿ quide-ndo, te ducaⁿ cùtnuní iní-yu sá

ndàá ndisa quèide váha-ndo dàtná càháⁿ-ndí cuendá-ndó sã quidé vãha-ndo.

9

Cuendá sã ngãutnãha sã cúu-xí cuè ñáyíu xĩndecu ichi Xítóhó Jesucristú

¹ Te cuendá sã ngãutnãha sã cúu-xí cuè ñáyíu ndècu ichi Xítóhó Jesucristú ñá túú-gã xíní ñùhu-xi cachí tnúhu-í xii-ndo núú tütú-a nãcuáa cada-ndo, ² chi sa cùtnuní iní-í sã ïo cuíní-ndó chĩndee-ndó-yu. Te ducaⁿ-ni ïo váha càháⁿ-í cuendá-ndó núú ñáyíu xĩndecu ichi Xítóhó Jesucristú ndécú dìstritú Macèdoniá, te xãhaⁿ-í xii-yu sã nchòhó ñáyíu xĩndecu ichi Xítóhó Jesucristú ndécú dìstritú Acáyá sa ní cuu ñⁿ cuíá ducaⁿ cuíní-ndó càcáⁿ tnáhá-ndó sã cúu-xí cuè ñáyíu ndàhú ndécú ichi-gá. Te vai cue ñáyíu dìstritú Macèdoniá cuíní-yu cacáⁿ tnáhã-yu sã cúu-xí cuè ñáyíu ndàhú ndécú ichi Xítóhó Jesucristú cuendá sã ñí ñíhĩ-yu tnúhu sã nchòhó ïo cuíní-ndó dùcaⁿ cada-ndo. ³ Te cuendá sã sání iní-ndó càda-ndo xĩãⁿ tendaha-í cue téé ndècu ndihĩ-o ichi Xítóhó Jesucristú quixi-güedé núú ndécú-ndó cuendá dàtúha ñaha-güedé xii-ndo, cuendá sã vã quée ndèhnde-í núú ñáyíu sã ñí càháⁿ váha-í cuendá-ndó, te ducaⁿ cùndecu túha ndisa-ndo dàtná sa ní càháⁿ-í núú-yu. ⁴ Chi na cuáhãⁿ ndèé quixi-í ndihĩ ñⁿ úú cue ñáyíu dìstritú Macèdoniá núú ndécú-ndó te quini-yu sã ñà túú ndècu túha-ndo, te cucahaⁿ núú-í núú-yu sã ñí càháⁿ váha-í cuendá-ndó te núú ñá túú ndècu túha-ndo, te tnáhã-ndó cùcahaⁿ núú-ndó. ⁵ Te xĩãⁿ núú ní sani iní-í sã vãha-gá codonùu cue téé ndècu ndihĩ-o ichi Xítóhó Jesucristú quixi coto ñaha-güedé xii-ndo cuendá chĩndee ñaha-güedé tacá sã ñí sani iní-ndó càcáⁿ tnáhã-ndó cuendá sã cùndecu túha-xi, te cuu-xi dàtná ñⁿ táhú sã ñí quene cuu iní méé-ndó càcáⁿ tnáhã-ndó sã cúu-xí cuè tnaha ñáyíu-ndo. Te ducaⁿ te vá yõo caní iní-xi quesãhá-yu sã nchũhú ní quide yica-ndí ducaⁿ ñí sacáⁿ tnáhã-ndó.

⁶ Te nchòhó sa xíní-ndó sã ñáyíu na chihĩ vai tatá te vai ñíhĩ-yu cùu, te cue ñáyíu na chihĩ sacú tatá te sacú ñíhĩ-yu cùu. Ducaⁿ sãtnahã-xi cùu ñáyíu sãcáⁿ tnáhã sã cúu-xí tnaha ñáyíu-yu. ⁷ Te ñⁿ ñⁿ-ndo càcáⁿ tnáhã-ndó nãcuáa quene cuu iní méé-ndó,

te ïo váha cuu iní-ndó dùcaⁿ cada-ndo te vá càdã-ndó cuendã-ni sã quidé yica ñaha ñáyíu xii-ndo, chi Yá Ndiõxí cúu vãha iní-gá núú nchãa ñáyíu cùdí ñí sãcáⁿ tnáhã sã cúu-xí cuè tnaha ñáyíu-xi. ⁸ Te Yá Ndiõxí ndacu-gá chĩndee ñaha-gá xii-ndo nãcuáa cundecu váha-ndo, chi ñíu-gá cada te ñíhĩ-ndó nchãa núú sã xíní ñùhu-ndo cundecu ndihĩ-ndo, te ñá túú tnáhĩ-gá ná cumání xii-ndo, te mee-gã chĩndee ñaha-gá xii-ndo ñíhĩ-ndó ïo vai cundecu ndihĩ-ndo cuendã ducaⁿ chĩndee-ndo cue tnaha ñáyíu-ndo. ⁹ Te núú tütú Yá Ndiõxí càchĩ-xi ñⁿ xichĩ:

Ñⁿ ñáyíu ïo vai sã ñí sãñãhá-yu xii ñáyíu ndàhú,

te sã ñí quide ñáyíu-ãⁿ ñí cuu-xi sã vãha sã vã yõo cùnaa.

Duha càchĩ-xi núú tütú-gá. ¹⁰ Te mee Yá Ndiõxí táxĩ-gã nchãa sã cúu tãtã nchãa nchòhó ñáyíu xitu nãndĩ sã xítú cuendã cuu sã cúu nchĩto-ndo, te ñíu-gá cada te ïo vai sã ñíhĩ-ndó cùndecu ndihĩ-ndo, te ducaⁿ ïo-gã vai sã vãha cada-ndo sã cúu-xí cuè tnaha ñáyíu-ndo. ¹¹ Te Yá Ndiõxí taxi-gã vai núú sã cùndecu ndihĩ-ndo cuendã ducaⁿ ñí yuhu ñí iní-ndó vai cuãñaha-ndo sã cúu-xí tnaha ñáyíu-ndo. Te cuendã nchãa sã sãcãⁿ tnáhã-ndó quèheⁿ cuendã-ndí cuu xii tnaha ñáyíu-ndo, te cue ñáyíu-ãⁿ ïo ndacãⁿ táhũ-yu núú Yá Ndiõxí cuendã sã dúcãⁿ sãcãⁿ tnáhã-ndó sã cúu-xĩ-yu. ¹² Te sã dúcãⁿ quide-ndo sacãⁿ tnáhã-ndó sã cúu-xí cuè ñáyíu cùu cuendã Yá Ndiõxí, te ñáyíu-ãⁿ ñà túú-gã ná cumání xii-yu, te ïo ndacãⁿ táhũ-yu núú Yá Ndiõxí sã dúcãⁿ quide-ndo. ¹³ Te ñáyíu-ãⁿ cutnùnĩ iní-yu sã nchòhó quidé-ndó sã sãndãá ndisa iní-ndó tnũhu Xítóhó Jesucristú, te cuendã xĩãⁿ te ñáyíu-ãⁿ chĩñũhũ-yu Yá Ndiõxí, te cuendã sã dúcãⁿ ñí yuhu ñí iní-ndó sãcãⁿ tnáhã-ndó sã cúu-xĩ-yu ndihĩ sã cúu-xí nchãa dava-gã ñáyíu, te cachĩ-yu sã ïo càhnu cuu Yá Ndiõxí. ¹⁴ Te ñáyíu-ãⁿ càháⁿ ndihĩ-yu Yá Ndiõxí cuendã-ndó, te ïo cuu váha iní ñãhá-yu xii-ndo cuendã sã Yá Ndiõxí chĩndee ñaha-gã xii-ndo quide-ndo sã vãha sã cúu-xĩ-yu ndihĩ dava-gã ñáyíu. ¹⁵ Te ïo ndacãⁿ táhũ-ó núú Yá Ndiõxí cuendã sã ñí taxi-gã sã ïo váha ndècu ndihĩ-o, te ñí ñã cùtnùnĩ iní-ó ñãsa cunduu tnũhu càháⁿ-ó cuendã sã vãha ní taxi-gã.

10

Té Păblú ndécú ndîhi-dé tnúhu ndee ìní sá cǎháⁿ-dé tnúhu Xítóhó Jesucristú

1 Te Xítóhó Jesucristú ío cǎhnu ìní-gá, te cùndahú ìní ñáhá-gǎ xii-o chîndee ñaha-gá, núu xiǎⁿ yúhú té Păblú ducaⁿ quide-í cǎháⁿ ndàhú-í núú-ndó nàcuáa cada-ndo. Te dava-ndo cǎchí-ndó sǎ yúhú ío ndàhú ìní-í òré ndécú ndîhi ñaha-í xii-ndo, te òré ñá túú ndècu ndîhi ñaha-í xii-ndo te ío ñîí cǎá-í. 2 Te cǎháⁿ ndàhú-í núú-ndó sǎ cǎdá-ndó nàcuáa vá cǎháⁿ ñîí-í núú-ndó òré quixi-í quixi coto ñaha-í xii-ndo. Te cuìní-í sá ndîhi tnúhu ñîí ìní-xi cǎháⁿ ndîhi-í cue ñáyiú cǎchí sá ñîí-ni cuu-í ndîhi cue ñáyiú ñá túú sàndáá ìní tnúhu Xítóhó Jesucristú. 3 Te nchúhú cùu-ndí cue téé ñuyíú-a, dico ndùcu ndee-ndí quidé-ndí nàcuáa ndàcu-ndí dáquèè tíhú-ndí nchaa sá cuèhé sá dúhá, dico ñá díú mèe-ndí ducaⁿ ndàcu-ndí quidé-ndí, 4 te ni ñîí sá ío ñuyíú-a ñá túú chîndee ñaha-xi, chi mee Yǎ Ndióxi chîndèe ñaha-gá xii-ndí dáquèè tíhú duuⁿ-ndí nchaa núú sǎ cuèhé sá dúhá. 5 Te xiǎⁿ núu ñîí-ndí tnúhu cǎháⁿ-ndí sàdí-ndí yuhu cue ñáyiú cǎháⁿ tnúhu sá ñá túú cùu váha ìní Yǎ Ndióxi, ñáyiú xiquide nínu mee-xi cǎchí sá ñá túú nàndîhi tnúhu-gá. Te quide-ndí sá ñáyiú-áⁿ quindáá ìní-yu tnúhu Xítóhó Jesucristú. 6 Te nchúhú sa ndècu túha-ndí sá dáquèetíhú-ndí cue ñáyiú ñá túú cuìní cada nàcuáa cuìní Xítóhó Jesucristú, dico díhna-gá xíní ñùhu-xi sá ncháá nchòhó ñáyiú cuìní cada nàcuáa cuìní-gá cundáá-ndó.

7 Te nchòhó nàcuáa ndùu sá ndéhé-ndó te ducaⁿ sàni ìní-ndó, dico vá dúcáⁿ cǎni ìní-ndó cuèndá-ndí. Chi núu cùtnuní ndáá ìní-ndó sǎ cúú-ndó cuèndá Xítóhó Jesucristú, te ñu-ni ducaⁿ tàú-ndó cǎni ìní-ndó cuèndá-ndí tucu. 8 Te Xítóhó Jesucristú ní taxi-gá tnúhu ndee ìní ndécú ndîhi-ndí sá dánèhé ñáhá-ndí xii-ndo nàcuáa cuita cuehnu nihnu-ndo ìchi-gá quíhíⁿ, te ñá díú sǎ dánèhé ñáhá-ndí xii-ndo nàcuáa cuita nihnu-ndo, te cuèi na chîdo-gá-í cǎháⁿ-í cada nínu-í mèe-í cuèndá tnúhu ndee ìní ní taxi Xítóhó Jesucristú ndécú ndîhi-ndí, dico vá cúcǎháⁿ núú-í chi cǎháⁿ ndáá-í. 9 Te

ñá túú cuìní-í sá nchòhó cǎni ìní-ndó sǎ yúhú dáyúhú ñáhá-í xii-ndo nàcuáa ndùu tnúhu cǎháⁿ-í núú tütú-í. 10 Te dava-ndo cǎchí-ndó sǎ ténàá ñáhá-í xii-ndo núú tütú-í, te mee-ni tnúhu cǎhnu sá ío cùnuu cuu-xi, te cǎchí tucu-ndo sǎ òré ndécú ndîhi ñaha-í xii-ndo te ñá túú cǎa-í sá cúú-í ñîí téé cùu váha cùu dico ìní-ndó, te cǎchí tucu-ndo sǎ ñá túú tnàhá ìní-ndó nàcuáa quide-í òré dácuàha ñaha-í xii-ndo. 11 Te nchòhó ñáyiú ducaⁿ cǎháⁿ cada cuèndá váha-ndo sǎ dàtná-ni cǎháⁿ-ndí núú tütú-ndí ñu-ni ducaⁿ quide-ndí òré ndécú ndîhi ñaha-ndí xii-ndo.

12 Te nchúhú, vá cúú tnàhí cǎháⁿ-ndí sá ñîí-ni cuu-ndí ndîhi cue ñáyiú cǎháⁿ váha cuèndá mèe-xí, chi ñáyiú-áⁿ sání ìní-yu ná cúú sǎ váha te quidé-yu te xiǎⁿ cǎchí-yu sá ío váha quidé-yu, te cǎchí-yu sá quidé váha-gá-yu dàcúúxí tnàha ñáyiú-yu, te sá dúcáⁿ cǎháⁿ-yu te quidé-yu dàtná quidé cue ñáyiú ñá túú tnàhí cùtnuní ìní-xi. 13 Te dico nchúhú ñá túú xidó-ndí cǎháⁿ váha-ndí cuèndá-ndí, chi cǎháⁿ váha-ndí cuèndá-ndí dico nàcuáa ndùu chiuⁿ ní taxi Yǎ Ndióxi cǎháⁿ-ndí, chi mee-gǎ ní cǎchí-gá ndéé není sáá-ndí cǎháⁿ-ndí tnúhu-gá, te ní sáá-ndí ndéé ñuú-ndó cǎháⁿ-ndí tnúhu-gá. 14 Te vitna ndècu ndîhi-ndí tnúhu ndee ìní sá tnàhá nchòhó cuu cǎháⁿ ndîhi ñaha-ndí xii-ndo, chi díhna-gá nchúhú ní quixi-ndí ní cǎháⁿ-ndí tnúhu Xítóhó Jesucristú ñuú-ndó, tnúhu sá cǎháⁿ nàcuáa naníhí tàhú-ó, 15 Te nchúhú ñá túú quide cǎhnu-ndí mèe-ndí cuèndá chiuⁿ quide dava-gá-güedé quesaha-ndí sá chíúⁿ mèe-ndí cúú-xí. Te cuìní-ndí sá nchòhó cuita quindáá-gá ìní-ndó Xítóhó Jesucristú, te ducaⁿ te níhí-gǎ-ndí nàcuáa cada-ndí chiuⁿ-gá nchaa dava-gá xichi núú ní cǎchí-gá cada-ndí chiuⁿ-gá. 16 Chi cǎháⁿ-ndí tnúhu-gá tnúhu sá cǎháⁿ nàcuáa naníhí tàhú-ó, te yáha-gá-ndí ñuú-ndó quíhíⁿ-ndí nchaa dava-gá xichi cǎháⁿ-ndí, te vá cǎdá cǎhnu-ndí mèe-ndí cuèndá chiuⁿ sá sá ní quide dava-gá-güedé.

17 Te cue ñáyiú cuìní cada cǎhnu mee-xi te vá dúcáⁿ cǎdá-yu, chi mee Xítóhó Jesucristú ná cǎda cǎnú-yu-gá. 18 Te nchaa ñáyiú na cǎháⁿ váha Xítóhó Jesucristú

cuendá-yu, ñáyiú-áⁿ cúdiú-yu núú-gã, te ñá túú cùdiú-yu núú-gã cuendá sá càháⁿ váha-yu cuendá méé-yu.

11

Cuendá té Páblú ndihi cuendá cue téé càchí sá càháⁿ tnúhu Yá Ndiöxí te ñá ndàá

¹ Te cuini-í sá nchòhó cada ndee iní-ndó cùndedóho-ndo tnúhu na càháⁿ-í, chi càháⁿ-í dàtná càháⁿ cue ñáyiú ñá túú cùtnuní iní-xi, te cuèi nása-gá ná cùnduu tnúhu càháⁿ-í dico chí cádá ndèe iní cùndedóho-ndo. ² Chi yúhú ío ñuhu iní ñáhà-í xii-ndo dàtná ñúhú iní ñáhá mèe Yá Ndiöxí xii-o, te ní càháⁿ-í tnúhu Xítohó Jesucristú núú-ndó ñuu xiáⁿ ní tnahá tnúhu-ndo ndihi-gá vitna, te sá dúcáⁿ ñí quide-í te cada iní-ndó sã yúhú cù-í dàtná ñí tée xica ndáhú te nchòhó cúú-ndó dàtná ñí xichí cuéchí, te Xítohó Jesucristú cúú-gã dàtná ñí tée tnándaha ndihi xichí cuéchí-ãⁿ. Te ducaⁿ càda iní-ndó chi na sãá nduu te yúhú na càni cuendá ñáhà-í xii-ndo ñúú Xítohó Jesucristú, te cuu-ndo ñáyiú vá cùndècu tnahí-gá cuèchi-xi. ³ Te yúhú-í sá sàcúhná dandáhú ñáhá-xi xii-ndo vá cání-gã iní-ndó càncicúⁿ nihnu-ndo ñí yuhu ñí iní-ndó ìchi Xítohó Jesucristú dàtná nchicúⁿ nihnu-ndo vitna. Te yúhú-í ná yáha-ndo dàtná ní yáha tá Èvá, chi sàcúhná ñí nduu-xi cóo ñí dándáhú ñáhá-xi xii-xi, chi sàcúhná-ãⁿ ío váha ní xito-xi nàcuáa ní quide-xi ní dándáhú-xi tá Èvá-áⁿ. ⁴ Te nchòhó, quidé ndèe iní-ndó sàcùndedóho-ndo nchàa tnúhu càháⁿ cue téé càháⁿ ingá núú tnúhu cuendá Jèsus tnúhu sá ñá túú dànehé ñáhá-ndí xii-ndo, te quide ndee tucu iní-ndó ndèdóho-ndo dànehé ñáhá-güedé xii-ndo cuendá ingá espíritú, te ñá díú cuendá Espíritú Yá Ndiöxí sá ñí ngúndecu ndihi-ndo dànehé ñáhá-güedé xii-ndo, te quide ndee tucu iní-ndó ndèdóho-ndo dànehé ñáhá-güedé xii-ndo ingá núú tnúhu sá càchí-güedé càháⁿ nàcuáa naníhí tàhú-ndó, te ñá díú nàcuáa nduu tnúhu sá ñí sàndáá iní-ndó cuendá naníhí tàhú-ndó càháⁿ-güedé. ⁵ Te cue téé ducaⁿ càháⁿ-áⁿ càchí-güedé sá Yá Ndiöxí ní tendaha ñàha-gá xii-güedé xicá cùu-güedé càháⁿ-güedé tnúhu-gá te ío cùnuu-güedé, dico ñá ndàá sá càháⁿ-güedé tnúhu-gá. Te yúhú cùtnuní iní-í sá cuè téé-ãⁿ ñá túú

cùnuu-güedé dàtná cùnuu yúhú. ⁶ Te cuèi ñá túú càháⁿ-í dàtná càháⁿ cue téé ío váha sãá díquí-xi dico ío váha cùtnuní iní-í cuendá nchaa sá dácuaⁿhá-í, te yúhú sa quide-í nàcuáa cùtnuní iní-ndó sã ío váha cùtnuní iní-í nàcuáa nduu nchaa tnúhu càháⁿ-í.

⁷ Te cudana te sàni iní-ndó sã yúhú ñá túú ní quide váha-í sá ñí quide-í mèe-í dàtná ñí tée ío ndàhú iní-xi, chi ñá túú ní xicáⁿ-í yáhu-í núú-ndó cuendá sá ñí càháⁿ-í tnúhu Yá Ndiöxí tnúhu sá càháⁿ nàcuáa naníhí tàhú-ó núú-ndó. ⁸ Te ní queheⁿ-í díhúⁿ ñí taxi dava-gá cue ñáyiú ndècu ìchi Xítohó Jesucristú, te díhúⁿ-ãⁿ ñí dándóñuhu-í ní saaⁿ-í nchaa sá ñí xini ñuhu-í cùtnàhá ní càháⁿ-í tnúhu Xítohó Jesucristú núú-ndó. ⁹ Te cùtnàhá ní xíndecu ndihi ñàha-í xii-ndo te áma ní xóo cumání sã xini ñuhu-í, te ñá túú ñá ní xicáⁿ-í núú ñí ñí-ndo. Chi cue ñáyiú xíndecu ìchi Xítohó Jesucristú ndécú distritú Macèdoniá ní quixí-yu ní taxi-yu sá cùmáni xii-í, te ñá túú tnahí ñí dàsatú iní ñáhà-í xii-ndo càcáⁿ-í núú-ndó ñuu ná cúú sã xini ñuhu-í, te diu-ni ducaⁿ càda-í. ¹⁰ Te diu-ni duha càháⁿ váha-í cuendá-í te ñí ñí-ndo cue ñáyiú distritú Acáyá vá ñíhí-yu tnúhu cùñàhá-yu xii-í cuendá cadí-yu yuhu-í. Te mee Xítohó Jesucristú náhá-gã sá ndàá càháⁿ-í dàtná càháⁿ ndàá méé-gã. ¹¹ Te cudana te sàni iní-ndó sã sá dúhá càháⁿ-í te ñá túú cùu iní ñáhà-í xii-ndo, dico ñáhá chi mee Yá Ndiöxí náhá-gã sá yúhú ío cùu iní ñáhà-í xii-ndo.

¹² Te nàcuáa-ni ta quide-í véxi te diu-ni ducaⁿ càda-í cuendá sá cuè téé cuini cada nínu mee-xi càchí sá ñí-ndo cuu ndihi ñàha-güedé xii-í vá ñíhí-güedé tnúhu càháⁿ-güedé cachí-güedé sá ñí-ndo chiuⁿ quide ndihi ñàha-güedé xii-í. ¹³ Te cue téé-áⁿ càchí-güedé sá Yá Ndiöxí ní tendaha ñàha-gá xii-güedé xicá cùu-güedé càháⁿ-güedé tnúhu-gá dico ñá ndàá, chi mee-ñí dándáhú-güedé ñáyiú ndihi tnúhu càháⁿ-güedé, te quide-güedé dàtná quidé cuè téé càháⁿ tnúhu Xítohó Jesucristú dico ñá ndàá sá cúú-güedé cue téé càháⁿ tnúhu-gá. ¹⁴ Te vá cùñuhu-o sã dúcáⁿ quide cue téé-áⁿ, chi mee sàcúhná quidé-xi sã cúú-xi dàtná ñí espíritú xínú cuèchi núú ío váha càa ndecu Yá Ndiöxí dico ñá ndàá sá xínú cuèchi-xi xiáⁿ. ¹⁵ Te xiáⁿ vá cùñuhu-o sã cuè téé xínu cuèchi núú-xi quide-güedé sá

cúu-güedě cue tée quide váha chi ñá ndàá sá quidé vâha-güedé chi dândahú-güedé ñáyiu. Te nâcuáa ndùu nchaa sá quidé-güedé te ducaⁿ nâcháhu-güedé núu Yá Ndiõxí.

Té Păblú ío ndòho-dé cuendá sá cúu-dě tée cãháⁿ tnúhu Xítóhó Jesucristú

16 Te yúhú cãháⁿ tucu-í dóho-ndo sã vã cání iní-ndó sã yúhú cúu-í ìⁿ tée cãháⁿ lùcú cãháⁿ duha, te núu dava-ndo dùcaⁿ sani iní-ndó dico chí cáda ndèe iní cundedóho-ndo tnúhu na cãháⁿ-í cuendá ducaⁿ tnàhá-í cada nínu-í mée-í. 17 Te vitna na cãháⁿ-í dàtná cãháⁿ ìⁿ tée ñá túú cùtnuní iní-xi, chí tnúhu cãháⁿ-í ñá túú ìⁿ-ni cuu-xi ndìhi tnúhu Xítóhó Jesucristú, chí vitna cãháⁿ-í nâcuáa cada nínu-í mée-í. 18 Te ío cuéhé ñáyiu quide nínu mee-xi cuendá nchaa sá ío ñuyú-a te xiãⁿ núu tnàhá-í cuení-í cada nínu-í mée-í. 19 Chi cùtnuní sá nchòhó quidé ndèe iní-ndó sácúndedóho-ndo nchaa tnúhu cãháⁿ cue tée cãháⁿ lùcú cãháⁿ duha, te ducaⁿ quide ndee iní-ndó sácúndedóho-ndo tnúhu cãháⁿ-güedé chí cãhí-ndó sã ío túha-ndo. 20 Te nchòhó, quide ndee iní-ndó tñi-ndo nchaa tnúhu cãháⁿ cue tée quide yica ñaha xii-ndo sá cúnú cuèchi-ndo núu-güedě, te xicáⁿ-güedé nândi sá xicáⁿ-güedé núu-ndó, te tàxi tnuní ñàhá-güedě xii-ndo, te quide-güedé sá ío cùnùu-güedé ndécú ndìhi ñaha-güedé xii-ndo, te cãniha-güedé xii-ndo, te cuèi nchaa xiãⁿ quidé ñàha-güedé xii-ndo dico quide ndee-ni iní-ndó. 21 Te nchòhó cãhí-ndó sã cúu-ndí cue tée ñá túú ní cùyì cada nândi sá cáda, te ndáá chí ñá túú ìⁿ-ni cuu-ndí ndìhi cue tée ducaⁿ xíquide.

Dico núu cue tée-áⁿ cùyì-güedé quidé ñnu-güedé mée-güedě, te tnàhá-í cùyì-í ducaⁿ càda-í. Te sá dúhá cãháⁿ-í te cãháⁿ-í dàtná ìⁿ tée ñá túú cùtnuní iní-xi. 22 Te núu quide cahnu-güedé mée-güedě cuendá sá cãháⁿ-güedé tnúhu hëbreú, te yúhú tucu ñu-ni tée cãháⁿ tnúhu hëbreú cúu-í, àdi quide cahnu-güedé mée-güedě cuendá sá cúu-güedě cue tée isràél, te yúhú tucu tnàhá-í cúu-í tée isràél, àdi quide cahnu-güedé mée-güedě cuendá sá cúu-güedě ñaní tnàhá ndíi Àbrahám, te tnàhá yúhú cúu-í ñaní tnàhá ndíi Àbrahám tucu. 23 Àdi quide cahnu-güedé mée-güedě

cuendá sá sání iní-güedé sá díú núu Xítóhó Jesucristú xínú cuèchi-güedé, dico yúhú ío-gá xínú cuèchi ndisa-í núu-gã. Te sá dúhá quide cahnu-í mée-í te cãháⁿ-í dàtná ìⁿ tée ñá túú cùtnuní iní-xi, te yúhú cúu-í ìⁿ tée ío-gá quidé chiúⁿ-gá dàcúxí cuè tée-áⁿ, te vai xito ní cuu cãniha ñáyiu xii-í, te vai xito ní cuu chìhi ñàhá-yu vecaá xii-í, te vai xito ní cuu cãcu cãcu cahni ñaha ñáyiu xii-í. 24 Te cue ñáyiu isràél ní canihá-yu xii-í úhúⁿ xito, te ndi tnahá ìⁿ ìⁿ xito ní canihá-yu ní dáquë-yu ócò sáhúⁿ cúmí ñi sàtà-í. 25 Te úní xito ní caniha tucu ñáyiu xii-í ndìhi carrutí, te ìⁿ xito ní sáha yúú ñàhá-yu xii-í, te ní cuu úní xito quëe naa bàrcú xití ndute òré sácúhuⁿ-í, te ìⁿ xito ío ní ndòho-í ní xíndecu-í ìⁿ nduu ìⁿ niú núu ndute làmár. 26 Te ío tìtní xichi ní cuu xica cuu-í, te dava xichi ní cãcu cuido ñaha ndute ñuhu xii-í, te dava xichi ní cãcu duhu ñadúhú nchaa ndachìuⁿ-í, te dava xichi ní cãcu cada ñaha cuè ñáyiu cùu ndi mee-í ìⁿ sá cáda ñàhá-yu xii-í, te ñu-ni ducaⁿ ñi cãcu cada ñaha tucu cue ñáyiu ñá túú cùu ndi mee-í ìⁿ sá cáda ñàhá-yu xii-í ní cùu, te cuèi xití ñuú te cuèi xití yucu cãcu cãcu cada ñaha ñáyiu xii-í ìⁿ sá cáda ñàhá-yu, te ñu-ni ducaⁿ cãcu cãcu quini-í tnúndòho oré ñúhù-í bàrcú cuáháⁿ núu ndute làmár. Te cue ñáyiu cãhí sá ndécú ìchi Xítóhó Jesucristú te ñá ndàá cãcu cãcu cada ñàhá-yu xii-í ìⁿ sá cáda ñàhá-yu. 27 Te ío ndòho-í cuendá chiúⁿ quide-í chí ío xàu-í, te ní cuu vai xito ñá túú xidí-í, te tìtní xito ní cuu xihí víhì-í docó, te tìtní xito ní cuu yichí-í ndute, te tìtní xito ní cuu ñá túú tnàhí ná xéxì-í cuendá chiúⁿ quide-í, te tìtní xito ní cuu ndòho-í sá víxiⁿ, te tìtní xito ní cuu ñá túú nihí-í dóó cuihnu-í.

28 Te ñá díú-ní xiãⁿ chí ìⁿ nduu ìⁿ nduu ío sání iní-í cuendá nchaa ñáyiu ndècu ìchi Xítóhó Jesucristú xíndecu nchaa xichi. 29 Te ndèda-ni cãa ñáyiu ñá túú nihí ndéé cùndecu ìchi Xítóhó Jesucristú, te ío cùndahú iní-í chí sãnuu sá tnàhá-í ñá túú nihí ndéé-í cùndecu-í ìchi-gã sá dúcáⁿ quidé-yu. Te núu ìⁿ ñáyiu quidé-yu sá ìⁿ nchòhó ñáyiu ndècu ìchi Xítóhó Jesucristú quidé-ndó ìⁿ sá ñá túú tàú-ndó càda-ndo te vá cúu vâha iní-í chí cudèèⁿ-í. 30 Te núu xini ñuhu-xi sá cáda cahnu-í mée-í, te cuu ducaⁿ càda-í

te cáháⁿ-í mee-ni cuendá nchaa sá quidé nàcuáa ñá túú nihí ndéé yiqui cuñú-í. ³¹ Te Dútú Ndiõxí Yaá cúú Tătă Xĩtohó Jesucristú náhá-gã sá yũhú càháⁿ ndáá-í núú-ndó, te ñu-gá tàú-gá cachí-ó sã ïo càhnu cuu-gá ni caa ni quíhíⁿ. ³² Te cútnàhá ní xĩndecu-í ñuú Dàmascú te tée cùu gobiernú tée cùndihí tée yĩndaha ñáyiu nàni Aretás ní taxi ndecu-dé cue téé ní xĩndedí yuyèhe sá ñũhú dòco ñuú cuendá òré quee-í te tñi ñaha-güedě xii-í ní cùu. ³³ Dico yúhú ní queè-í ìⁿ xití tídihi, te cue ñáyiu cùndihí ñaha xii-í ní queñuhu ñáhá-yu ndàa ventaná nchìi yiqui naha sã ñũhú dòco ñuú-án, te ducaⁿ te ní cácu-í ñá túú ní ndàcu-güedé tñi ñaha-güedě xii-í.

12

Té Păblú càháⁿ-dé sá ïo vii càa sá ñĩ dănèhé núú ñáhá Xĩtohó Jesucristú xii-dé

¹ Te ñá túú ndéé nándihí-xi sá càháⁿ váha-o cuendá méé-ó, dico vitna xini ñuhu-xi ducaⁿ cada-í chi cáháⁿ-í nàcuáa ní quide ñaha Xĩtohó Jesucristú xii-í, chi ní quide-gá sá ñĩ cutnùnì iní-í nàcuáa ndùu tñuhu-gá, te vai núú sã ñĩ dănèhé núú ñáhá-gã xii-í. ² Te yúhú xini-í ìⁿ téé sàndáá iní ñáhá xii Xĩtohó Jesucristú, te sa ní cuu úxícúmì cuíá sã tē-án ñĩ sáá-dé ndéé andiu cùu uní, te ñá túú xini-í te núu ndihí yiqui cùñú-dé ní sáá-dé àdi ñáhá, chi ìⁿdií dít-ni Yá Ndiõxí náhá-gã te núu nása càa-dé ní sáá-dé. ³ Te yúhú càháⁿ ndáá-í cuendá téé-án, dico dàtná ní cachí-í sá ñá túú xini-í te núu ndihí yiqui cùñú-dé ní sáá-dé andiu àdi ñáhá, chi mee Yá Ndiõxí náhá-gã te núu nása càa-dé ní sáá-dé. ⁴ Te téé-án ñĩ sáá-dé ìⁿ xichí núú ïo váha càa andiu, te yàcáⁿ ní xĩndedóho-dé tñuhu mee-ni sã cúú-xi cuendá méé-dě, te tñuhu-án vã cúú tñáhí cáháⁿ-dé núú ñi ìⁿ ñáyiu. ⁵ Te yúhú quidé ñĩnu-í téé-án, dico mee-í ñá túú càháⁿ váha-í cuendá-í cuendá cada nínu-í mée-í, chi càháⁿ-ni mee-ni cuendá nchaa sá quidé nàcuáa ñá túú nihí ndéé yiqui cuñú-í. ⁶ Te núu dicó yúhú cuimí-í te cuu cáháⁿ váha-í cuendá-í cuendá cada nínu-í mée-í, te núu ducaⁿ na càháⁿ-í te ñá túú cùu-xi ìⁿ tñuhu neñúú cáháⁿ-í, chi cùu-xi ìⁿ sã càháⁿ ndáá-í te núu na càháⁿ-í. Dico vá dúcáⁿ càa-í chi cuimí-í sã nchòhó cada cuendá-ndó nàcuáa ndùu tñuhu càháⁿ-í ndihí nàcuáa quide-í,

te ducaⁿ mée-ndo cáháⁿ-ndó te núu ná téé cùu-í, te ñá dít sã yũhú cáháⁿ váha-í cuendá mée-í cuendá nchòhó cachí-ndó sã ïo cùnuu-í.

⁷ Te sá ñĩ dănèhé núú ñáhá Xĩtohó Jesucristú xii-í cúú-xi sã xidó ïo váha, te cuendá sã vã cada càhnu-í mée-í núu xiáⁿ Xĩtohó Jesucristú ní quide-gá duha ndòho yiqui cuñú-í vitna. Te sá dúcáⁿ quide ñaha-gã xii-í te xiáⁿ sácuíhná ñĩ nihí-xi ichi càhnu dandòho ñaha-xi xii-í. ⁸ Te ní cuu uní xito càháⁿ ndàhú-í núú Xĩtohó Jesucristú sá ná cada-gã nàcuáa vá ndòhó-gã yiqui cùñú-í. ⁹ Dico mee-gã càhí-gá xii-í: “Yúhú ïo cùndahú iní ñáhà-í xii-n chĩndee ñaha-í, te ñá túú ná cúmání xii-n, te cùtnunì sá ïo-gá chĩndè-í cue ñáyiu ñá túú nihí ndéé cùndecu”, duha ní cachí-gá xii-í. Te xiáⁿ núu yúhú ïo cùdĩ iní-í sá ñá túú nihí ndèè-í ndécù-í, chi ñu cuendá xiáⁿ Xĩtohó Jesucristú ñá túú dàña nihnu ñaha-gã xii-í chĩndèe ñaha-gã. ¹⁰ Te xiáⁿ núu cùdĩ iní-í sá dúhá ñã túú nihí ndèè-í ndécù-í, te cùdĩ tucu iní-í cuendá nchaa tñuhu cuèhé tñuhu duha càháⁿ ñáyiu cuendá-í, te cùdĩ iní-í cuendá nchaa sá ndòhò-í, te cùdĩ tucu iní-í cuendá sá quidé ñaha ñáyiu xii-í, te cùdĩ tucu iní-í cuendá nchaa dava-gá sá ndòhò-í cuendá Xĩtohó Jesucristú. Te òré ñá túú nihí ndéè-í te Xĩtohó Jesucristú chĩndèe ñaha-gã xii-í nihí ndèè-í.

Té Păblú ïo sàni iní-dé cuendá cue ñáyiu xĩndecu ichi Xĩtohó Jesucristú ndécú ñuú Còrintú

¹¹ Te cùu-í dàtná ìⁿ téé ñá túú cùtnunì iní-xi sá dúhá càháⁿ váha-í cuendá-í, te ducaⁿ quide-í chi mee-ndo quide-ndo sá dúcáⁿ càháⁿ-í, dico mee-ndo tàú-ndó càháⁿ váha-ndo cuendá-í ní cùu. Te dava cue téé ïo quide càhnu-güedé méé-güedé, te càhí-güedé sá Xĩtohó Jesucristú ní táuchíúⁿ-gã sá càháⁿ-güedé tñuhu-gã, dico yúhú cùnuu-gá-í dàcúúxí cuè téé-án cuèi ñá túú vèdana ná cùu-í ndécù-í ñuyúú-a. ¹² Te cútnàhá ní xĩndecu ndihí ñaha-í xii-ndo ïo ní quide càhnu iní-í nándi sá ñĩ yáha-í ní quide-í chiuⁿ Xĩtohó Jesucristú sá cúú-xi-ndó. Te ní chĩndee ñaha-gã xii-í ní quide-í titní núú sã vã yò tñáhí ndàcu cada te ní cuñuhu-ndo, te sá dúcáⁿ ñĩ chĩndee ñaha-gã xii-í ní cutnùnì iní-ndó sã yúhú

cúu ndisa-í ñⁿ téé ní cachí Xítóhó Jesucristú sá cãháⁿ-í tnúhu-gá. ¹³ Te yúhú ñⁿ-ni quide ndìhi ñaha-í xii-ndo ndìhi nchaa dava-gá cue ñáyiú ndècu ichi Xítóhó Jesucristú, te dícó-ni sá yúhú ñá túú ní cuiní-í taxi-ndo sã xíní ñùhu-í dàtná ní quide-í dava-gá-yu. Te núu ñá túú ní quide váha-í sá dúcáⁿ nĩ quide-í ñá túú ní cuiní-í chindee ñaha-ndo te chí cádá cãhnu iní ñáhá xii-í.

¹⁴ Te vitna sa ndècu túha-í sá quixí-í núu ndécú-ndó, te sá quixí còto ñaha tucu-í xii-ndo cùu-xi xito cuu úní sá quixí-í, te cuiní-í sá vã dándihú-ndó iní-ndó ndècu-ndo sá táxí-ndó cùu xii-í, chi ñá díú xǎⁿ ndéé iní-í chi mee-ndo ndéé iní-í quixí-í. Te duha cãháⁿ-í chi nchòhó xíní-ndó sã cuè téé cùu tátá sãñaha-güedé sá cúu-xí cuè déhe-güedé te ñá díú cuè déhe-güedé sãñaha-güedé sá cúu-xí mèe-güedé. ¹⁵ Te yúhú ío váha cùu iní-í dandòñuhu-í sá ndécú ndìhi-í nãcuáa ndacu-í chindee ñaha-í xii-ndo cùndecu váha-ndo sã cúu-xí Yã Ndiõxí chi ío cùdí iní-í, te cuèi na cùu-í sá cuendá-ndó, chi ío cùu iní ñáhà-í xii-ndo, te sãnduú sã nchòhó ñá túú cùu iní ñáhá cãvihi-ndo xii-í.

¹⁶ Te ñaha-ndo sá ñá túú ní dándihú-í iní-ndó nã taxi-ndo cùu xii-í, dico dava-ndo cãchí-ndó sã ío váha ní xito-í nãcuáa ní quide-í nãcuáa ní dándahú ñáhà-í xii-ndo.

¹⁷ Te chí cãháⁿ te núu yúhú ní dándahú ñáhà-í xii-ndo ndìhi cue téé ní tendaha-í ní quixi coto ñaha xii-ndo. ¹⁸ Te ní cãháⁿ ndáhú-í núu tẽ Titú ndìhi núu ìngá tucu téé ndècu ndìhi-o ichi Xítóhó Jesucristú ní quixi coto ñaha-güedé xii-ndo. Te nchòhó cùtnùní iní-ndó sã tẽ Titú ñá túú ní dándahú ñáhá-dé xii-ndo, te ducaⁿ chi ñⁿ-ni sàni iní-ndí te ñⁿ-ni quide-ndí.

¹⁹ Te cudana te sàni iní-ndó sã sã dúhá cãháⁿ-ndí te tàunihnu-ndí mée-ndí, dico ñá díú dùcaⁿ queue-xi tnúhu cãháⁿ-ndí, chi cãháⁿ-ndí nãcuáa tàú-xi cãháⁿ-ndí chi ndècu ndìhi-ndí Xítóhó Jesucristú, te mee Yã Ndiõxí náhá ndáá-gá nãcuáa ndùu tnúhu cãháⁿ-ndí, te nchaa sã cãháⁿ-ndí cúu-xí cuendá nchòhó cue ñáyiú ío cùu iní-ndí, te cãháⁿ-ndí nãcuáa cundecu váha-ndo ichi Xítóhó Jesucristú. ²⁰ Te ío sàni iní-í cuendá-ndó chi na cuáháⁿ te òré

quixi-í quixi coto ñaha-í xii-ndo, te ñá túú quide-ndo nãcuáa cuu váha iní-í, te sá dúcáⁿ te yúhú cãháⁿ-í nãcuáa vá cúu váha iní-ndó, te ducaⁿ ío sàni iní-í cuendá-ndó chi na cuáháⁿ òré quexio-í te nãá-ndó, àdi ndecu-ndo ichi cuédú iní, àdi cudééⁿ núu tnáhá-ndó, àdi ñá túú cùu ñⁿ-nuu-ndo ndecu-ndo, àdi cãháⁿ cuèhé-ndó cuendá tnàha ñáyiú-ndo núu chítú núu tàcá, àdi satnuhu tnaha-ndo, àdi quide cãhnu-ndo mee-ndo, àdi quide dusaⁿ dóho tnàha-ndo. ²¹ Te ío sàni iní-í cuendá-ndó chi na cuáháⁿ òré quixi-í, te Yã Ndiõxí cada-gá te cucahaⁿ núu-í sá cuendá-ndó, te ío ndíhú iní-í cuendá-ndó te núu vátá dáñá-gã-ndó nchaa sã cuèhé sá dúhá nĩ ngüita-ndo quide-ndo ndéé sanduu, te vãi-ndo ní ngüita-ndo dùcaⁿ quide-ndo, chi ndècu-ndo ichi díí iní te nãndi-gá nchaa sã cuèhé sá dúhá quide-ndo, te ducaⁿ ío ndíhú iní-í te núu vátá dáñá-gã-ndó nchaa xǎⁿ.

13

Tnúhu ndéé núu nĩ ndìhi-ná

¹ Te sá quixí-í vitna núu ndécú-ndó cùu-xi xito cuu úní sá quixí còto ñaha-í xii-ndo. Te cãchí tnúhu-í xii-ndo sã òré cundáá cuèchi-ndo te canehe núu úú àdi úní ñáyiú cãháⁿ ndáá nãcuáa ndùu cuèchi-ndo. ² Te yúhú sa ní cãháⁿ-í

dóho-ndo cùtnáhá ní quixi-í ní quixi coto ñaha-í xii-ndo xito cuu úú, te díu-ni ducaⁿ cãháⁿ tucu-í dóho-ndo vitna vátá quixí tucu-gá-í quixi coto ñaha-í xii-ndo. Te nchòhó ñáyiú ní cunduu nĩ ngüita quide nchaa sã cuèhé sá dúhá, tenáá ñáhà-í xii-ndo òré quexio-í te núu vátá dáñá-gã-ndó nchaa sã cuèhé sá dúhá quide-ndo te tnáhá nchaa dava-gá-ndó tãnáá ñáhà-í xii-ndo. ³ Te nchòhó cuiní-ndó quini-ndó núu ndáá sá quide-í núu Xítóhó Jesucristú cãháⁿ-í yuhu-gá, dico dàvá-án cutnùní ndáá iní-ndó. Te Xítóhó Jesucristú quide-gã nãcuáa cutnùní iní-ndó sã ío cãhnu cuu-gá te ñá túú quide-gá dàtná quidé ñⁿ ñáyiú ñá túú nihí ndéé cùndecu. ⁴ Te Xítóhó Jesucristú ní ndoho-gá dàtná ñⁿ ñáyiú ñá túú nihí ndéé cùndecu, chi ní sañhi ñaha-güedé xii-gá núu cùrúxí dico mee Yã Ndiõxí ní quide-gá ní nihí ndéé Xítóhó Jesucristú ní ndoto-gá ndécú-gã

vitna, te tnàhá nchúhú tucu ducaⁿ yãha-ndí ñá túú nihí ndéé-ndí cundecu-ndí, dico mee Yã Ndiõxí chindèe ñaha-gá xii-ndí nihí ndéé-ndí ndécú-ndí cuendá sá ndécú ndihí-ndí Xítohó Jesucristú, te xiãⁿ nõu ndàcu-ndí quidé-ndí nàcuáa tàú-xi cunduu sá cúú-xi-ndó.

⁵ Te chí cáda cuendá váha te núu ndisa sá sàndáa iní-ndó tnúhu Xítohó Jesucristú, te núu ndáa sá ndécú-ndó ìchi-gá te cùtnuní iní-ndó sã ndécú-ndó ndihí-gá. ⁶ Te cuiní-ndí sá nchòhó cutnùní ndáa iní-ndó sã nchúhú ndécú ndihí ndisa-ndí Xítohó Jesucristú. ⁷ Te nchúhú càháⁿ ndihí-ndí Yã Ndiõxí cuendá-ndó cuendá sá vã cáda-ndó nì ìⁿ sá cuèhé sá dúhá, te vã cání ìní-ndó sã sà dúcáⁿ càháⁿ ndihí-ndí-gá cuendá-ndó, te cuiní-ndí sá nchòhó cutnùní iní-ndó sã nchúhú ío ndècu yĩñuhu-ndí núú-gã, te ñáhá chi càháⁿ ndihí-ndí-gá cuendá-ndó chi cuiní-ndí sá nchòhó cada váha-ndo cundecu-ndo cuéi sàni iní-ndó sã nchúhú cúú-ndí cue téé ñá túú ndècu yĩñuhu núú-gã. ⁸ Te nchúhú mee-ni càháⁿ váha-ndí cuendá tnúhu ndáa tnúhu Yã Ndiõxí, te ñá túú càháⁿ-ndí ìⁿ tnúhu sá ñà túú tàú-xi càháⁿ-ndí cuendá tnúhu-áⁿ. ⁹ Te cùdíí ìní-ndí sá ñà túú-gã xíní ñùhu-xi cada-ndí nàcuáa níhí ndéé-ndí tenàa ñáhá-ndí xii-ndo càháⁿ-ndí dóho-ndo, chi nchòhó sa ní níhí ndéé-ndó ndècu-ndo ichi-gá. Te nchúhú càháⁿ ndihí-ndí Yã Ndiõxí cuendá-ndó cuendá sá nchòhó cundáa-ndó cundecu-ndo ñá túú-gã ná cumání-ndó nõú-gã. ¹⁰ Te xiãⁿ nõu duha ndùu nchaa tnúhu tèe-í núú tütú-a daquixi-í ndaha-ndo vitna ñá túú ndècu ndihí ñaha-í xii-ndo, cuendá sá òré ná cundecu ndihí ñaha-í xii-ndo te vã ío níhí càháⁿ-í dóho-ndo nàcuáa ndùu tnúhu ndee iní ní taxi Xítohó Jesucristú ndécú ndihí-í, chi ní taxi-gá tnúhu ndee ìní xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quíhíⁿ, te ñá díú cuendá sá cánúichi ñaha-í xii-ndo cuíta nihnu-ndo.

¹¹ Te vitna nchaa nchòhó ñá yiu ndècu ndihí-ndí ichi Xítohó Jesucristú ío quide ndee iní ñáhá-ndí xii-ndo, te ío chí ndúcú nàcuáa cada-ndo cundáa-ndó nõú Yã Ndiõxí cuendá sá ñà túú tnàhí-gá ná cumání-ndó nõú-gã, te ndee ndèe cada

iní-ndó cundecu-ndo, te chí cúú ìⁿnuu cundecu ndihí tnaha, te ducaⁿ te Yã Ndiõxí cundecu ndihí ñaha-gã xii-ndo chí ío cùu iní ñáhá-gã xii-o, te diu-gá quidé-gã ío váha cùu iní-ó ndècu-o. ¹² Te ndihí tnúhu yĩñuhu chí cáda ndèe iní tnáhá. ¹³ Te nchaa ñá yiu cùu cuendá Yã Ndiõxí ndécú ìha quide ndee iní ñáhá-yu xii-ndo.

¹⁴ Te xicáⁿ táhú-ndí núú Xítohó Jesucristú sá ío na chindèe chitúu ñaha-gã xii-ndo. Te mee Yã Ndiõxí ná cáda-gã nàcuáa cutnùní iní-ndó sã ío cùu iní ñáhá-gã xii-ndo, te Espíritú-gá cundee cùu cahnu iní-ndó cundecu-ndo. Te ducaⁿ na cunduu. Te ío chí cáda ndèe iní-ñá vitna.

TUTÚ NÍ CADÚHA TĒ PĀBLŪ QUIHⁿ NDAHA ÑÁYIU DISTRITÚ GÀLACIÁ

Té Păblú cādŭha-dé tutú quíhⁿ ndaha nchaa ñáyiu sàndáá iní ñáhá xii Xítóhó Jesucristú ndécú dīstritú Gălaciá

¹ Te yúhú té Păblú ní tendaha ñaha Xítóhó Jesucristú, ndihí Dútú Ndiöxí véxi-í cáháⁿ-í tnúhu-gá. Te diu Yá Ndiöxí ní dándótó-gă Xítóhó Jesucristú Yaá ní xihí ní cùu. Te cächí tnúhu-í xii-ndo sã ñà díú ñáyiu ñuyú-a ni tēndaha ñaha xii-í véxi-í, te ni Yá Ndiöxí te ni Xítóhó Jesucristú ñá túú ní xăhaⁿ-gă xii ìⁿ ñáyiu quixí-yu cachí tnúhu-yu năcuáa cada-í. ² Te yúhú té Păblú cādŭha-í tutú-a ndihí nchaa dava-gă ñáyiu ndècu ichi Yá Ndiöxí ndécú ndihí-í iha cuendá daquixi-í ndaha nchòhó ñáyiu sàndáá iní ñáhá xii Xítóhó Jesucristú ndécú dīstritú Gălaciá. ³ Te xicáⁿ tãhù-í núú Dútú Ndiöxí, ndihí núú Xítóhó Jesucristú sá ïo na chindee chitúu ñaha-gă xii-ndo, te ducaⁿ ndi nduú-gă ná cádá te ío váha cuu iní-ndó cūndecu-ndo. ⁴ Te Xítóhó Jesucristú ní xihí-gă sá cuendá nchaa cuéchi nchoo cué ñáyiu ndècu ñuyú-a. Te ducaⁿ ñi quide-gă, chi cuiní-gă sá vã cūndecu-o ichi cuehé ichi duha. Te ducaⁿ ñi cuu, chi Dútú Ndiöxí ducaⁿ ñi cuiní-gă cunduu. ⁵ Te ío chí ná ndácáⁿ tãhú-ó núú Yá Ndiöxí cuendá sá ïo cãhnu cuu-gă, te diu-ni ducaⁿ cãda-o ni caa ni quíhⁿ! Te ducaⁿ na cūnduu.

Mee-ni tnúhu Xítóhó Jesucristú cúu-xi tnúhu sá cáháⁿ năcuáa naníhí tãhú-ó

⁶ Te ío cūñúhu-í cúu chi ío ndihí ní dáñá-ndó ichi Yá Ndiöxí. Te Yaá-áⁿ ñi cáháⁿ ñáhá-gă xii-ndo, chi Xítóhó Jesucristú ío ní cundáhú iní ñáhá-gă ní quide váha ñaha-gă xii-ndo, te vitna dăcuaha tucu-ndo ingá tnúhu, te cächí-ndó sã xăⁿ dăcácu nihnu ñaha-xi xii-ndo núú ùhú núú ndáhú. ⁷ Dico ñáhá, chi ñá túú-gă tnúhu sá dăcăcu nihnu ñaha xii-o núú ùhú núú ndáhú. Te dicó-ni sá ío ñáyiu véxi dăticá nuu ñahá-yu xii-ndo dānehé ñáhă-yu tnúhu sá dăcuíta nihnu ñaha xii-ndo, chi

tnúhu-áⁿ ñà túú cùu-xi tnúhu Xítóhó Jesucristú. ⁸ Te yúhú cáháⁿ-í tnúhu Xítóhó Jesucristú, dico núu ío ñáyiu véxi dānehé ñáhá xii-ndo ingá tnúhu sá ñà túú ní dānehé ñáhà-í xii-ndo, te nchòhó cachí-ndó sã ñáyiu-áⁿ nacháhu-yu núú Yá Ndiöxí sá dúcáⁿ quidé-yu. Te cuéi yúhú, te núu na dàma-í tnúhu danèhé ñáhà-í xii-ndo, te diu-ni ducaⁿ cáháⁿ-ndó sã năchăhu-í núú-gă te núu ducaⁿ na cãda-í. Àdi te núu ìⁿ espíritú xínú cuéchi núú-gă véxi-xi cáháⁿ-xi ingá tnúhu sá ñà túú ní dānehé ñáhà-í xii-ndo năcuáa naníhí tãhú-ndó ñá, te diu-ni ducaⁿ cáháⁿ-ndó sã năchăhu-xi núú Yá Ndiöxí te núu ducaⁿ na cãda-xi. ⁹ Te diu-ni duha sa ní dānehé ñáhà-í xii-ndo sã núu véxi ñáyiu dānehé ñáhá ingá tnúhu sá ñà túú ní dānehé ñáhà-í xii-ndo năcuáa naníhí tãhú-ndó ñá, te cachí-ndó sã ñáyiu-áⁿ nacháhu-yu núú Yá Ndiöxí sá dúcáⁿ quidé-yu, duha ní cachí-í xii-ndo.

¹⁰ Te duha ndùu tnúhu cáháⁿ-í chi nchòhó sa xini-ndó sã yúhú cuiní-í sá Yá Ndiöxí cáháⁿ-gă sá quidé vãha-í ndécù-í, te ñá díú sã ñáyiu ñuyú-a cachí-yu sá quidé vãha-í, àdi sá ïo cūdíí ìnì-yu nchaa năcuáa quide-í ndécù-í. Te núu na cãni iní-í cūdiu-í núú ñáyiu ñuyú-a, te ñá túú cùu-í tēe xinu cuechi núú Xítóhó Jesucristú te núu ducaⁿ na cãda-í.

Năcuáa ní cuu ní ngúita té Păblú cáháⁿ-dé tnúhu Yá Ndiöxí

¹¹⁻¹² Te nchòhó ñáyiu ndècu ndihí-í ichi Xítóhó Jesucristú cächí tnúhu-í xii-ndo sã tnúhu sá dānehé ñáhà-í xii-ndo năcuáa naníhí tãhú-ndó cùu-xi tnúhu sá ñi cachí tnúhu mee Xítóhó Jesucristú xii-í, te ñá díú ìⁿ ñáyiu ñuyú-a ni cãhu iní-yu tnúhu-áⁿ, àdi danèhé ñáhă-yu xii-í, chi mee Xítóhó Jesucristú ní dānehé ñáhá-gă.

¹³ Te nchòhó sa nihí-ndó tnúhu năcuáa ní xóo cada-í cūtnáhá nchìcúⁿ nihnu-í nchaa năcuáa dăcuaha ñáyiu cùu ndi mee-í ñáyiu isràél ní cùu. Te dává-áⁿ ïo ní xóo cuu úhú iní-í nchaa ñáyiu ndècu ichi Yá Ndiöxí, te nãndi sá ñi xóo cada-í-yu, te ní cuiní-í danàa-í-yu ni cùu. ¹⁴ Te yúhú ío-gă ní xóo quene cáva-í ní xóo dăcuàha-í nchaa sá dăcuàha ñáyiu cùu ndi mee-í dăcúxí ñáyiu ìⁿ-ni cuíà-í ndihí-yu ni cùu, te ío-gă

ní xóo cuiní-í cada ndáá-í canchicúⁿ ni-hnu-í nchaa nàcuáa ní dánèhé ñáhá cue ñaní tnáhà-í ní xíndecu ndéé sanaha ni cùu. ¹⁵ Te ndéé cùtnáhá vátá cáciu-gá-í Yá Ndiöxí sa nèhe váha ñaha-gã xii-í cuendá sá cáháⁿ-í tnúhu-gá, núu xíãⁿ ní cáháⁿ ñáhá-gã xii-í quidè-í chiúⁿ-gá vitna, te sá dúcáⁿ nǐ quide-gá te ío váha ní quide ñaha-gã xii-í. ¹⁶ Te òré ní cáháⁿ ñáhá Yá Ndiöxí xii-í te ní cachí tnúhu-gá cuendá Déhe-gá Xítohó Jesucristú. Te ducaⁿ nǐ quide Yá Ndiöxí cuendá sá cuiní-gá sá cùñaha-í xii ñáyiú ñá túú cùu ñáyiú isràèl cuendá Yaá cúú Dèhe-gá. Te cùtnáhá ní cáháⁿ ñáhá Yá Ndiöxí xii-í, te vá yóo ìⁿ dìi núú-xi ni ndùcu tnúhu-í nàcuáa cada-í. ¹⁷ Te nǐ ñà túú ní sáháⁿ-í ñuú Jerusàlén nducu tnúhu-í núú cue téé díhna nuu nǐ tendaha Xítohó Jesucristú cáháⁿ tnúhu-gá nǐ nása cada-í, chi ndǐhi-ni ní sáháⁿ-í distritú Àrabíá ní xíndecu tnaa-í te dàtnùní cuánuhú tucu-í ñuú Dàmascú.

¹⁸ Te núú ùní cuíá sã nǐ cáháⁿ ñáhá Yá Ndiöxí xii-í, te ní sáháⁿ tucu-í ñuú Jerusàlén ní cáháⁿ ndǐhi-í té Pèlú, te ní xíndecu-í ndǐhi-dé sáhúⁿ nduu. ¹⁹ Te tnáhá té Jàcobó ñaní Xítohó Jesucristú ní cáháⁿ ndǐhi-í. Te ñá túú ní xini-í dawa-gá cue téé ní tendaha Xítohó Jesucristú cáháⁿ tnúhu-gá. ²⁰ Te Yá Ndiöxí ndéhé ndǐi ndehe caxi-gá sá ncháá tnúhu tèe-í núú tùtú-a sá cúú-xí-ndó cùu-xi ìⁿ sá ndàá.

²¹ Te sátá nǐ sáháⁿ-í ñuú Jerusàlén, te dàtnùní ní sáháⁿ-í distritú Sìriá, ndǐhi distritú Cìliciá. ²² Te nchaa ñáyiú xíndecu ichi Xítohó Jesucristú ndécú distritú Jùdeá ñá túú xini ñáhã-yu xii-í ní cùu. ²³ Dico ní xóo níhí-yu tnúhu nchaa nàcuáa ní xóo cada-í, te ní cachí-yu: “Téé cùu úhú iní ñáhá xii nchaa nchoo ñáyiú ndècu ichi Xítohó Jesucristú cáháⁿ-dé tnúhu-gá núú ñáyiú cuendá quíndáá iní ñáhã-yu xii-gá, te diu-dé nándi sá quidé ñaha-dé, te cuiní-dé danàa ñaha-dé cuendá sá vã cóo-gã ñáyiú quíndáá iní ñáhá xii-gá ní cùu”, duha ní cachí-yu cuendá-í. ²⁴ Te ní ngúíta-yu ní cachí-yu sá ío cãhnu cuu Yá Ndiöxí cuendá sá ñà túú-gã quidè-í dàtná ní xóo cada-í.

2

Té Pãblú ní níhí tnáhá-dé ndǐhi dawa-gá cue téé cáháⁿ tnúhu Yá Ndiöxí

¹ Te ní nútahá úxícúmí cuíá sã nǐ sáháⁿ-í ñuú Jerusàlén ní cáháⁿ ndǐhi-í té Pèlú, te dàtnùní ndécá-í té Bèé ní sáháⁿ, te tnáhá té Titú ní sáháⁿ ndǐhi-ndí-dé. ² Te ní sáháⁿ-í chi mee Yá Ndiöxí ní cachí-gá sá quíhíⁿ-í. Te yacáⁿ ní tacá mee-ni cue téé cùnuu. Te ní xáhaⁿ-í xii-güedé nàcuáa ndùu tnúhu dènehé-í ñáyiú ñá túú cùu ñáyiú isràèl cuendá naníhí tàhú-yu. Te ducaⁿ nǐ quide-í cuendá cuiní-í quini-güedé nàcuáa ndùu chiúⁿ quide-í, chi nacuaháⁿ cachí-güedé sá ñà túú nándǐhi-xi. ³ Te té Titú téé ndècu ndǐhi-í chi ñá díú téé isràèl cúú-dè, dico ñá túú ní quide yica-güedé cuáha-güedé sèñá ñiⁿ-dé. ⁴ Te ñáyiú cãhí sá ndécú ichi Xítohó Jesucristú te ñá ndàá sá ndécú-yu ichi-gá, ñáyiú-áⁿ nǐ chitnahá ñáhã-yu xii-ndí cuendá cuiní-yu quini-yu nása quide-ndí ndécú-ndí ichi Xítohó Jesucristú. Te ducaⁿ nǐ quidé-yu cuendá sá nchǐhú sa ní cacu nihnu-ndí ñá túú-gã quidé-ndí nchaa nàcuáa ní cáháⁿ ndíi Moisés. Te cuiní-yu sá núcuíta saa tùcu-ndí cada-ndí nchaa nàcuáa ní cáháⁿ ndíi nucúndecu-ndí dàtná ní xíndecu-ndí cùtnáhá vátá cãcu nihnu-gá-ndí núú tnúhu-áⁿ ni cùu. ⁵ Te nchúhú ñá túú tnáhí ni dàña-ndí méé-ndí dandáhú ñáhã-yu xii-ndí. Te ducaⁿ nǐ quide-ndí, chi cuiní-ndí sá ñà túú nãgá tnúhu dácãnuu ndǐhi tnúhu sá cáháⁿ nàcuáa naníhí tàhú-ó ndècu ndǐhi-ndo.

⁶ Te ni ìⁿ tnúhu sá vátá quini-gá-í ñá túú ní cãhí tnúhu cue téé cùnuu núú ñáyiú cada-í. Dico yúhú chi ñá túú ní quide cuendá-í nǐu cùnuu-güedé àdi ñá túú cùnuu-güedé, chi núú Yá Ndiöxí ìⁿ-ni cùu-o nchaa-o. ⁷ Te ní cutnùní iní-güedé sá Yá Ndiöxí ní cachí-gá xii-í sá cáháⁿ-í tnúhu-gá núú ñáyiú ñá túú cùu ñáyiú isràèl dàtná ní quide-gá té Pèlú ní xáhaⁿ-gã cáháⁿ-dé tnúhu-gá núú ñáyiú isràèl. ⁸ Te ducaⁿ nǐ cutnùní iní-güedé, chi diu-ni Yá Ndiöxí Yaá chíndèe ñaha xii té Pèlú cáháⁿ-dé tnúhu-gá núú ñáyiú isràèl, diu-ni Yaá-áⁿ chíndèe ñaha-gá xii-í cáháⁿ-í tnúhu-gá núú ñáyiú ñá túú cùu ñáyiú isràèl.

⁹ Te té Jàcobó, ndǐhi té Pèlú, ndǐhi té Juáá, cue téé ío cùnuu-gá ní cutnùní iní-güedé sá Yá Ndiöxí ío chíndèe ñaha-gá xii-í quidè-í chiúⁿ-gá. Te ío váha ní cáháⁿ

ndihi ñaha-güedë xii-í, ndihi té Bèè, te ní cuu ñnuu-ndí sá nchùhú quíhíⁿ-ndí cáháⁿ-ndí tnúhu Yá Ndiöxí núú nchàa ñáyiú ñá túú cùu ñáyiú isràél, te mee-güedë cáháⁿ-güedë tnúhu-gá núú ñáyiú isràél. ¹⁰ Te ñⁿ-ni tnúhu ní cáháⁿ-güedë dóho-ndí te ní cachí-güedë xii-ndí sá chíndèe-ndí cue ñáyiú ndàhú, te sa ducaⁿ tnàhí sàni iní-ndí cada-ndí.

Té Păblú càháⁿ-dé dóho té Pèlú ñuú Antiòquiá

¹¹ Te cùtnàhá ní sáháⁿ té Pèlú ñuú Antiòquiá yàcáⁿ ní cáháⁿ-í dóho-dé, chi quide-dé ñⁿ sá ñà túú tàú-dé cada-dé ní cùu. ¹² Te quide váha-dé ní cùu chi xèxi-dé ndihi ñáyiú ñá túú cùu ñáyiú isràél, dico òré ní sáá ñⁿ úú ñáyiú cùndihi té Jàcobó, te òré-áⁿ ñà túú-gă ní cuíní-dé caxi-dé ndihi ñáyiú-áⁿ. Te ducaⁿ ñⁿ quide-dé chi ní yùhú-dé cue ñáyiú nchìcúⁿ nihnu quide nchaa nacuaá ní cáháⁿ ndíi Moisés sá vă càháⁿ váha-yu cuendá-dé. ¹³ Te tnàhá dava-gă ñáyiú isràél xíndecu ichi Yá Ndiöxí ñá túú quide váha-yu, chi quidé-yu dàtná quidé tē Pèlú ní cùu, te ndéé tnàhá té Bèè ní ngúita-dé ducaⁿ quide-dé ní cùu. ¹⁴ Te òré ní xini-í sá ñà túú quide-güedë ndihí-yu nàcuáa càháⁿ tnúhu Yá Ndiöxí, te núú nchàa ñáyiú ndècu ichi Yá Ndiöxí ní xáhaⁿ-í xii té Pèlú: “Yòhó cúu-n tēe isràél, te ñá túú quide-n nchaa nacuaá quide ñáyiú isràél, chi quide-ni-n datná quidé nchàa ñáyiú ñá túú cùu ñáyiú isràél. Te núú ducaⁿ quide-n, ¿te ná cuendá dánèhé-n ñáyiú ñá túú cùu ñáyiú isràél sá cádă-yu nchaa nàcuáa quide ñáyiú isràél?”, duha ní xáhaⁿ-í xii té Pèlú.

Ñⁿ-ni nànhí tàhú-ó ndihi ñáyiú isràél nũ na quíndáá iní-ó Xítóhó Jesucristú ndihí-yu

¹⁵ Te yúhú ndihi té Pèlú cúu-ndí ñani tnàhá ñáyiú isràél, te ñá túú ndècu-ndí ichi cuèhé ichi duha dàtná ndécú nchàa ñáyiú ñá túú cùu ñáyiú isràél. ¹⁶ Te xini-ó sá vă cùndècu-gă cuéchi-o nũú Yá Ndiöxí te núú na quíndáá iní-ó Xítóhó Jesucristú, te ñá díú sá cànchicúⁿ nihnu-o càda-o nchaa nacuaá ní cáháⁿ ndíi Moisés. Te tnàhá dava nchúhú ñáyiú isràél sàndáá iní-ndí Xítóhó Jesucristú, te xíáⁿ cùtnùní iní-ndí sá ñà túú-gă cuéchi-ndí ndécú nũú-gă, dico ñá

díú sá ñⁿ cànchicúⁿ nihnu-ndí ní quide-ndí nàcuáa ní cáháⁿ ndíi Moisés, chi cuendá sá sàndáá iní-ndí Xítóhó Jesucristú. Te vă yòo ñⁿ cachí-ó sá ñà túú ndècu cuéchi-xi núú Yá Ndiöxí cuendá sá nchìcúⁿ nihnú-yu nchaa nàcuáa ní cáháⁿ ndíi Moisés.

¹⁷ Te núú cuíní-ó sá vă cùndècu cuéchi-o nũú Yá Ndiöxí cuendá sá sàndáá iní-ó Xítóhó Jesucristú, te xíáⁿ cùtnùní iní-ó sá ñà túú quide váha-o. ¿Te vă cúu tnàhí cani iní-ó sá Xítóhó Jesucristú dánèhé ñáhá-gă xii-o sá vă cádá váha-o cùndecu-o! ¹⁸ Te yúhú cànchí-í sá vă cànchicúⁿ nihnu-gă-ó nchàa nacuaá ní cáháⁿ ndíi Moisés, dico núú vitna cànchí-í sá xini ñùhu-xi cada-o nchaa nacuaá ní cáháⁿ ndíi ña, te ñá túú quide váha-í núú Yá Ndiöxí te núú ducaⁿ na càda-í. ¹⁹ Te yúhú duuⁿ duuⁿ ní cutnùní iní-í sá vă ndácù-í càda-í nchaa nàcuáa ní cáháⁿ ndíi Moisés nũú xíáⁿ ní dáñà-í ñá túú-gă nchìcúⁿ nihnu-í nchaa nàcuáa ní cáháⁿ ndíi cuendá sá cuíní-í cundecu-í sá cúu-xi Yá Ndiöxí. ²⁰ Te Xítóhó Jesucristú ní xihí-gă cuendá-í, dico dàtná tnúhu sá tnàhá-í ní xihí ndihí-gă, chi ñá cúu-gă cada-í nchaa nàcuáa sàni iní mēe-í, chi Xítóhó Jesucristú-nă ndécú ndihi ñaha-gă xii-í táxi tnùní ñáhá-gă. Te vitna ndècu-í ñuyú-a, te ío sàndáá iní-í Xítóhó Jesucristú Déhe Yá Ndiöxí, te chìndee ñaha-gă xii-í. Te díu-ni Xítóhó Jesucristú ío cùu iní ñáhá-gă xii-í nũú ní xihí-gă núú cùrúxí sá cuendá-í. ²¹ Te vitna ñá túú dàquee tíhù-í sá váha ní quide ñaha Yá Ndiöxí xii-í, chi núú ni ndàcu-o vă cùndècu cuéchi-o nũú Yá Ndiöxí cuendá sá nchìcúⁿ nihnu-o quide-o nchaa nacuaá ní cáháⁿ ndíi Moisés ní cùu ña, te àúⁿ nă cuu ní xihí Xítóhó Jesucristú ní cùu te núú ducaⁿ.

3

Vă dáñá ndèé-ó quíndáá iní-ó tnũhu Xítóhó Jesucristú

¹ Te nchòhó ñáyiú distritú Gàlaciá, ñáyiú sa xíndecu ichi Xítóhó Jesucristú, ¿ná cuendá ío ñíí iní-ndó ñà cuíní-ndó tní-ndo nchaa tnúhu càháⁿ-gă?, ¿te yoo ní dádăhu ndodo iní ñáhá xii-ndo núú ducaⁿ quide-ndo? Te nàha-ndo sá ío váha ní dánèhé ñáhá-ndí xii-ndo nàcuáa ní cuu ní xihí Xítóhó Jesucristú. ² Te vitna cáháⁿ-ndó nũú sá nchìcúⁿ nihnu-ndo nchàa nacuaá ní cáháⁿ ndíi Moisés ní níhí-ndó

Espíritú Yá Ndiöxí ndécú ndìhi-ndo, àdi sá ni sàndáá iní-ndó tnùhu Xítóhó Jesucristú sá nǐ dánèhé ñáhá-ndǐ xii-ndo nǐ níhí-ndó Espíritú-gá ndécú ndìhi-ndo. ³ Te nchòhó ío nǐ dǐquí-ndó chi Espíritú Yá Ndiöxí tá quide váha ñaha-xi xii-ndo cuáháⁿ ní cùu. ¿Te náa vitna mee-ná-ndó cuíní-ndó càda-ndo nacuaá ta quide ñaha Espíritú-gá cuáháⁿ xii-ndo ni cùu-áⁿ? ⁴ Te sàni ìⁿ sàni úú iní-í cuendá-ndó sá áúⁿ ná cuu nándi yáha-ndo ndècu-ndo ichi Yá Ndiöxí. ⁵ Te xini-ndó sá Yá Ndiöxí ní taxi-gá Espíritú-gá ní ngúndecu ndìhi-ndo, te ní quide-gá sá vǎ yòo tnàhí ndàcu cada núú-ndó nǐ xini-ndó. Te ducaⁿ nǐ quide-gá, chi ní sàndáá iní-ndó-gá, dico ñá díú cuendá nchaa nàcuáa ní cachí ndí Moisés cada ñáyiú ducaⁿ nǐ quide-gá.

⁶ Te ndí Abrahám ducaⁿ ío ní sàndáá iní ndí Yá Ndiöxí, núú xiáⁿ ní cachí-gá sá nǐ cudíu ndí núú-gǎ sá dúcáⁿ nǐ quide ndí. ⁷ Te càchí tnùhu ndáá-í xii-ndo sǎ ncháá ñáyiú sàndáá iní ñáhá xii Yá Ndiöxí dàtná ní sàndáá iní ñáhá ndí Abrahám xii-gá, ñáyiú-áⁿ ìⁿ-ni cùú-yu ndìhi ndí núú-gǎ. ⁸ Te núú tütú Yá Ndiöxí ní ngódó tnùní tnùhu váha, tnùhu sá nǐ xáhaⁿ Yá Ndiöxí xii ndí Abrahám, te duha ní xáhaⁿ-gǎ xii ndí: “Nchaa ñáyiú nǐhí ñuyíú cada váha-í-yu sá cuendá-n”, duha ní xáhaⁿ-gǎ xii ndí. Te sá dúcáⁿ nǐ ngódó tnùní núú tütú Yá Ndiöxí ndéé dàvá-áⁿ, te xiáⁿ cútnùní sá sàa nduu, te cue ñáyiú ñá túú cùu ñáyiú isràèl vá cùndècu-gá cuéchi-yu núú-gǎ te núu na quíndáá iní ñáhá-yu xii-gá. ⁹ Te xiáⁿ núu nchaa ñáyiú sàndáá iní ñáhá xii Yá Ndiöxí cada váha ñaha-gǎ xií-yu dàtná ní quide váha-gá ndí Abrahám, chi ndí-áⁿ ducaⁿ nǐ sàndáá iní ñáhá ndí xii-gá.

¹⁰ Te nchaa ñáyiú cuíní cada nchaa nàcuáa ní cáháⁿ ndí Moisés cuendá sá cuíní-yu sá vǎ cùndècu-gá cuéchi-yu núú Yá Ndiöxí, ñáyiú-áⁿ dañá nǐhnu ñaha-gá xií-yu, chi vá ndácü-yu cadá-yu nàcuáa sàni iní-yu, te ducaⁿ càda-gá chi quèe ndáá-xi nàcuáa càháⁿ-xi núú tütú-gá núú càchí-xi sá ncháá ñáyiú ñá túú quide nchaandi túhú nàcuáa ní cáháⁿ ndí Moisés te dañá nǐhnu ñaha-gá xií-yu. ¹¹ Te núu na cànchicúⁿ nǐhnu-ni-o càda-o nacuaá ní cáháⁿ ndí Moisés, te ñá túú vèdana chindee ñaha-xi xii-o nacuaá vá cùndècu-gá cuéchi-o núú Yá Ndiöxí. Te

ndáá chi núú tütú-gá càchí-xi sá ncháá ñáyiú sàndáá iní ñáhá xii-gá, ñáyiú ñá túú-gǎ cuéchi-xi ndècu ío váha ndécú-yu núú-gǎ. ¹² Te núu dícó ío ñáyiú quide nchaandi túhú nàcuáa ní cáháⁿ ndí Moisés ñá, te ñá túú xini ñuhu-xi quíndáá iní-yu tnùhu Xítóhó Jesucristú, chi núú tütú Yá Ndiöxí càchí-xi sá núu dícó ío ñáyiú ndacu cada nchaa nàcuáa ní cáháⁿ ndí Moisés ñá, te cundecu váha-yu núú Yá Ndiöxí.

¹³ Te tnùhu ní chídó tnùní ndí Moisés càchí-xi sá ío ndècu cuéchi-o núú Yá Ndiöxí cuendá sá ñá ndácú-ó càda-o nchaa nacuaá ní cáháⁿ ndí, te cuendá xiáⁿ tá dàña nǐhnu ñaha-gá xii-o cuáháⁿ. Dico Xítóhó Jesucristú ní xido-gá nchaa cuéchi-o cuendá sá vǎ dàña nǐhnu ñaha-gá Yá Ndiöxí xii-o. Te càchí-xi núú tütú Yá Ndiöxí: “Íⁿ téé na càta caa-güedé ìⁿ yutnu, te téé-áⁿ cùú-dé téé dàña nǐhnu ñaha Yá Ndiöxí”, duha càchí-xi núú tütú-gá. ¹⁴ Te ducaⁿ nǐ yáha Xítóhó Jesucristú, chi cuíní Yá Ndiöxí sá nduu táhú nchaa ñáyiú ñá túú cùu ñáyiú isràèl cundecu váha-yu dàtná ní nduu táhú ndí Abrahám ndécú váha ndí. Te ducaⁿ nǐ yáha-gá cuendá nchaa nchoo ñáyiú sàndáá iní ñáhá xii-gá ngúndecu ndìhi-o Espíritú Yá Ndiöxí sá nǐ cachí méé-gǎ taxi-gá.

Nàcuáa ní cachí Yá Ndiöxí cada-gá

¹⁵ Te nchòhó cue ñáyiú ndècu ndìhi-í ichi Yá Ndiöxí na càchí tnùhu-í xii-ndo nàcuáa quide cue ñáyiú ñuyíú-a cuendá tecú tnùní-gá-ndó nàcuáa quide Yá Ndiöxí. Chi ñáyiú-áⁿ òré cuíní-yu cadá-yu ìⁿ sá cadá-yu, te díhna-gá ndátnùhu-yu te òré cùú ìⁿnuú-yu, te sáha firmá-yu ìⁿ tutú te tutú-áⁿ vǎ yòo ìⁿ ndacu cáháⁿ sá vǎ nándìhi-gá-xi, te nǐ vǎ yòo-gá ndacu nágá tnùhu chido tnùní núú-xí. ¹⁶ Te ducaⁿ nǐ quide Yá Ndiöxí ndìhi ndí Abrahám, chi ní xáhaⁿ-gǎ xii ndí nàcuáa cada-gá, te tnùhu-áⁿ cùú-xí cuendá méé ndí ndìhi cuendá ìⁿ ñani tnáhá ndí cundecu ñuyíú-a ndéé cuéé-gá. Te núú tütú-gá càchí-xi sá tnùhu-áⁿ cùú-xí cuendá ìⁿ-ni ñani tnáhá ndí te ñá díú cuendá nchaá-yu. Te ñani tnáhá ndí téé cùu cuendá tnùhu-áⁿ cùú Xítóhó Jesucristú. ¹⁷ Te na càchí tnùhu-í xii-ndo sǎ Yá Ndiöxí ní quide ndáá duuⁿ-gá ndìhi ndí Abrahám nàcuáa cada-gá. Te sa ní cuu cúmí cièndú ócú úxí cuía sá dúcáⁿ nǐ xáhaⁿ Yá Ndiöxí xii ndí Abrahám, te dàtnùní

ní xáhaⁿ-gã xii ndíi Moisés chido tnùní ndíi nàcuáa cada ñáyiú, te nchaa tnúhu ní chídó tnùní ndíi Moisés ñá túú dàquee tíhú-xi tnúhu sá ñí xáhaⁿ Yá Ndiöxí xii ndíi Àbrahám nàcuáa cada-gá. ¹⁸ Te núu dìcò cuendá nchaa tnúhu sá ñí chídó tnùní ndíi Moisés ní nàníhí tàhú-ó ñá, te ñá túú-gã xíní ñùhu-xi cada cuendá-ó tnúhu ní xáhaⁿ Yá Ndiöxí xii ndíi Àbrahám cada-gá ní cùu te núu ducaⁿ. Te ndíi-áⁿ ñí nàníhí tàhú ndíi chi ducaⁿ ñí cachí Yá Ndiöxí cada ñaha-gã xii ndíi.

¹⁹ Te nchaa tnúhu ní cáháⁿ ndíi Moisés ní ngódó núú-xí nchicúⁿ nihnu ñáyiú cuendá ducaⁿ cùtnuní iní-yu sá ndécú cuèchi-yu, te nchicúⁿ nihnu-ní-yu ndéé ní sáá nduu ñí quexìo Yaá cúú ñàní tnáhá ndíi Àbrahám, chi Yaá-áⁿ ducaⁿ ñí xáhaⁿ Yá Ndiöxí quixi-gá cada váha-gá nchaa ñáyiú. Te nchaa tnúhu ní chídó tnùní ndíi Moisés, chi Yá Ndiöxí ní tendaha-gã cue espíritú xínú cuèchi núú-gã ní sáháⁿ-xi ní xítnúhu ñaha-xi xii ndíi nàcuáa danèhé ndíi ñáyiú. ²⁰ Te Yá Ndiöxí ñá túú ní cáháⁿ-gá núú méé ñáyiú, chi ndíi Moisés ní cáháⁿ ndíi yuhu-gá núú-yu, dico cùtnáhá ní cáháⁿ ndíi-gá ndíi Àbrahám chi núú méé núú ìⁿ ndíi ndíi-gá ní xáhaⁿ-gã xii ndíi nàcuáa cada-gá.

Nàcuáa ndúu nchaa tnúhu ní chídó tnùní ndíi Moisés

²¹ Te nchaa nàcuáa ní chídó tnùní ndíi Moisés, ndíi nchaa nàcuáa ní xáhaⁿ Yá Ndiöxí xii ndíi Àbrahám cada-gá, ñá túú dàquee tíhú tnáhá-xí. Te núu dìcò nàníhí tàhú ñáyiú nchicúⁿ nihnu nchaa nàcuáa ní cáháⁿ ndíi Moisés ñá te cudíú-yu núú-gã cuendá-ní sá nchicúⁿ nihnú-yu nchaa nàcuáa ní cáháⁿ ndíi ni cùu. ²² Te núu tütú Yá Ndiöxí càchí-xi: “Nchaa nchòhó ñáyiú ndècu ñuyíú ndécú cuèchi-ndo”, duha càchí-xi. Te ducaⁿ càháⁿ-xi cuendá quíndáá iní-ó Xítohó Jesucrístú, te nàníhí tàhú-ó chi ducaⁿ ñí cachí Yá Ndiöxí cada-gá.

²³ Te cùtnáhá vátá cùndècu ndíi-gá-ó tnúhu Xítohó Jesucrístú, te nchicúⁿ nihnu-o nchaa nàcuáa ní cáháⁿ ndíi Moisés, te ní cutnùní iní-ó sã ìo ndècu cuèchi-o ni cùu. Te ducaⁿ-ni nchicúⁿ nihnu-o ndéé ní sáá nduu ñí quexìo Xítohó Jesucrístú ñuyíú-a, te ní sándáá iní-ó-gã. ²⁴ Te nchaa tnúhu sá ñí chídó tnùní ndíi Moisés ní sanu ichi ñaha-xi xii-o nàcuáa cada-o cùndècu-o, te

ducaⁿ-ni sanu ichi ñaha-xi xii-o ndéé ní sáá nduu ní quexìo Xítohó Jesucrístú ñuyíú-a. Te ducaⁿ ñí cuu cuendá quíndáá iní-ó-gã, te vá cùndècu-gá cuèchi-o núú Yá Ndiöxí. ²⁵ Te vitna ní ngúndècu ndíi-o tnúhu Xítohó Jesucrístú, te ñá túú-gã xíní ñùhu-xi canu ichi ñaha nchaa tnúhu ní chídó tnùní ndíi Moisés.

²⁶ Te vitna tnáhá nchaa nchòhó cúú-ndó dèhe Yá Ndiöxí, chi ní sándáá iní-ndó Xítohó Jesucrístú. ²⁷ Te nchòhó ní sandute-ndo dàtná càchí-gá, te ndècu-ndo ndíi-gá, te quide-ndo nchaa nàcuáa ní cáháⁿ-gá ndécú-ndó, te ío ndècu yíñuhu-ndo núú Yá Ndiöxí dàtná ndécú yíñuhu mee Xítohó Jesucrístú. ²⁸ Te vitna ìⁿ-ni cùu-o nchaa-o ndècu-o ndíi Xítohó Jesucrístú cuèi cùu-o ñáyiú isràél àdi ñá túú cùu-o, te cuèi cùu-o ñáyiú ñá túú tnáhí dàñá quee núú chíúⁿ pàtróóⁿ-xi àdi cuu-o ñáyiú dàñá queé núú chíúⁿ pàtróóⁿ-xi, te cuèi téé te cuèi ñadíhí ìⁿ-ni cùu-o nchaa-o ndècu-o ndíi Xítohó Jesucrístú. ²⁹ Te nchòhó ndécú ndíi-ndo Xítohó Jesucrístú, te cùu-ndo dàtná cue ñaní tnáhá ndíi Àbrahám, chi ní nduu táhú-ndó cùndècu váha-ndo núú Yá Ndiöxí dàtná ní nduu táhú ndíi-áⁿ ndécú váha ndíi núú-gã, te ducaⁿ chi mee-gã ducaⁿ ñí cachí-gá cunduu.

4

¹ Te nchòhó xíní-ndó sã ìⁿ té lìhli chi vátá nágá cuañaha tātá-dè cuu cuendá-dé chi lìhli-dé, te ìⁿ-ni cùu-dé ndíi téé xínu cuechi, dico na sáá nduu cuèhnu-dé, te nduu táhú-dé nchaa sá ndécú ndíi tātá-dé.

² Te xitò-yu té lìhli-áⁿ sáhnú-dé ndéé sáá nduu ñí cachí tātá-dé sá cuañaha-dé sá ndúú táhú-dé. ³ Te ducaⁿ sãtnahá-xi cùu nchoo, chi nchicúⁿ nihnu-o nchaa nàcuáa ní cáháⁿ cue téé ní xíndècu ndéé sanaha ni cùu. ⁴ Te ní sáá nduu ñí quide Yá Ndiöxí dàtná ní cachí-gá, te ní tendaha-gã Déhe-gá Xítohó Jesucrístú ní quixi-gá ñuyíú-a, ní dácácú ñaha ìⁿ ñadíhí te ní cuu-gá ñáyiú, te ní quide-gá nchaa nàcuáa ní cáháⁿ ndíi Moisés. ⁵ Te ducaⁿ ñí tendaha Yá Ndiöxí Déhe-gá cuendá sá vá cànchicúⁿ nihnu-gá-ó nchaa nàcuáa ní chídó tnùní ndíi Moisés cuendá ducaⁿ te cuu-o dèhe Yá Ndiöxí.

⁶ Te Yá Ndiöxí ní taxi-gá Espíritú Déhe-gá Xítohó Jesucrístú ndécú ndíi-ndo chi

cùu-ndo déhe-gá, te Espíritú-áⁿ chíndèe ñaha-xi xii-ndo te càchí-ndó: “Yòhó Dútú Ndiöxí cúu-n Tátá méé-ndí”, duha càchí-ndó. ⁷ Te xiáⁿ cútnùní iní-ndó sã cúu-ndó dèhe Yá Ndiöxí vitna, te ñá túú-gã cúu-ndó dàtná cue ñáyiú ñá túú tnàhí dàñá quee núú chíúⁿ pàtróóⁿ-xi. Te sã dúcáⁿ cùu-ndo déhe-gá, te Xítohó Jesucristú taxi-gá nchaa sã vãha ní cachí Yá Ndiöxí nduu táhú-ndó.

Té Pãblú ío sàni iní-dé cuendá nchaa ñáyiú ndècu ichi Xítohó Jesucristú

⁸ Te cútnàhá vátá quìndáá-gá iní-ndó tnúhu Yá Ndiöxí ní xinu cuechi-ndo núú nchaa sã càchí-yu cùu ndiöxí te ñá ndàá sã ndiöxí cúu-xí. ⁹ Te vitna nchòhó càháⁿ ndihí-ndo Yá Ndiöxí, te mee-gã xini ñáhá-gã xii-ndo, te ñá túú ndùu váha-xi nanchòcáva iní-ndó càda tucu-ndo nacúáa ní xóo cada-ndo díhna, chi nchaa xiáⁿ ñá túú vèdana nàndíhí-xi. ¹⁰ Te nchòhó cànehe íi-ni-ndo ndùu cachí-ndó íi, te díu-ni ducaⁿ quide-ndo dava yoó ndihí dava cuíá, te ndí tnahá nduu sàcòo vico díu-ni ducaⁿ quide-ndo cànehe íi-ndó nduu-áⁿ. ¹¹ Te ío sàni iní-í cuendá-ndó, chi na cuáháⁿ àuⁿ ná cuu ní dánèhé ñáhá-í xii-ndo tnúhu Yá Ndiöxí.

¹² Te càháⁿ ndàhú-í núú nchòhó ñáyiú ndècu ndihí-í ichi Xítohó Jesucristú sã cadá-ndó dàtná quidè-í ñá túú nchìcúⁿ nihnu-í nchaa tnúhu ní càháⁿ ndíi Moisés, chi yúhú quidè-í vitna dàtná ní quide nchòhó ñá túú ní cãchicúⁿ nihnu-ndo nàcuáa ní càháⁿ ndíi. Te cútnàhá ní xíndecu ndihí ñaha-í xii-ndo ní quide váha ñaha-ndo xii-í. ¹³ Te sa nàha-ndo sã cútnàhá ní càháⁿ-í tnúhu Xítohó Jesucristú núú-ndó ndèe díhna ní cuhú-í, núú xiáⁿ ní xíndecu ndihí ñaha-í xii-ndo ní càháⁿ-í tnúhu-gá núú-ndó. ¹⁴ Te cuéhé sã ní tnahá-í-áⁿ cúu-xí ñⁿ cuéhé sã vã yóo tnàhí cundee iní-xi cundecu ndihí ñaha xii-í ní cùu, dico nchòhó chi ío váha ní càháⁿ ndihí ñaha-ndo xii-í, te ñá túú ní sàni cuehé ní sàni duha iní-ndó cuendá-í, te ní càháⁿ ndihí ñaha-ndo xii-í dàtná tnúhu sã yúhú cúu-í ñⁿ espíritú xínú cuèchi núú Yá Ndiöxí àdi datná méé Xítohó Jesucristú. ¹⁵ ¿Te ná ní tnahá-ndó núú ñá túú-gã sání vãha iní-ndó cuendá-í dàtná ní xóo cada-ndo ndèe díhna ío váha ní xóo caní iní-ndó cuendá-í? Te na càchí tnúhu ndáá-í xii-ndo sã ío ní cuu iní ñáhá-ndó xii-í

cútnàhá ní xíndecu ndihí ñaha-í xii-ndo, te nándi sã ndécú ndihí-ndo taxi-ndo xii-í ní cùu, te núú dicó sã cúu te ndéé tinùu-ndo tava-ndo te taxi-ndo xii-í ní cùu. ¹⁶ ¿Te náa cùu úhú iní ñáhá-ndó xii-í vitna cuendá sã càháⁿ-í tnúhu ndáá tnúhu Yá Ndiöxí núú-ndó-áⁿ?

¹⁷ Te ío ñáyiú ío váha càháⁿ ndihí ñaha xii-ndo, dico ñáyiú-áⁿ ñúhú cuéhé iní-yu, chi cuíní-yu sã vã cúu-gã càháⁿ ndihí tnàha-o, chi mee-nã-yu cundecu ndihí-ndo cuíní-yu. ¹⁸ Te váha quide ñáyiú càháⁿ ndihí ñaha xii-ndo ndihí tnúhu yíñùhu, te núu cuíní-yu cadá-yu ñⁿ sã váha sã cúu-xí-ndó. Te ducaⁿ-ni na càdá-yu cuèi òré ñá túú ndècu ndihí ñaha-í xii-ndo. ¹⁹ Te nchòhó ñáyiú ní sanu ichi-í ichi Xítohó Jesucristú càchí tnúhu-í xii-ndo sã quidè-xí iní-í dàtná quidè-xí iní ñⁿ ñadíhí ñaha sa ní tnahá òré cacu déhe-xi, te ducaⁿ quide-xi iní-í, chi ío vãi sani iní-í cuendá-ndó dàtná ní xóo cada-í ndéé díhna, te ducaⁿ-ni càdá-í ndéé ná sàá nduu càda-ndo nchaa nacúáa càháⁿ Xítohó Jesucristú. ²⁰ ¿Te ío váha cada-xi te núu dicó tnavíi sa ndècu ndihí ñaha-í xii-ndo cuendá càháⁿ-í núú-ndó nàcuáa cada-ndo, te ñá cútnùní iní-í nása cada-í cuendá-ndó!

Cuendá ndíi Àgár ndihí ndíi Sãrá

²¹ Te nchòhó ñáyiú cuíní canchicúⁿ nihnu nchaa tnúhu ní càháⁿ ndíi Moisés, ¿náa ñá túú tècú tnùní-ndó nàcuáa càháⁿ-xi tnúhu ní chidó tnùní ndíi? ²² Chi càchí tnúhu ní chidó tnùní ndíi-áⁿ sã ndíi Àbrahám ní xíndecu úú déhe ducuⁿ ndíi, te ñⁿ-dé ní cuu déhe ndíi ndihí ñadíhí méé ndíi ndíi Sãrá, te ingá-dé ní cuu-dé déhe ndíi ndihí ñⁿ ndíi ní xinu cuechi núú-yu ní xínani Àgár. ²³ Te sã dúcáⁿ ní cacu déhe ndíi Sãrá, chi mee Yá Ndiöxí ní cundàhú iní ñáhá-gã xii-aⁿ, chi ducaⁿ ní cachí-gá cada-gá. Dico ndíi ní xinu cuechi-áⁿ chi ducaⁿ tnàhí ní nduu táhú ndíi-áⁿ sã cóo déhe ndíi. ²⁴ Te na càchí tnúhu-í xii-ndo nã cúu sã nánèhé ndi ndùú cue ndíi díhí-áⁿ. Te úú xito ní càháⁿ Yá Ndiöxí nàcuáa cada-gá, te ñⁿ ndíi-áⁿ nánèhé ndíi nàcuáa ní càháⁿ Yá Ndiöxí xito díhna nuu, te ingá tucu ndíi-áⁿ nánèhé ndíi nàcuáa ní càháⁿ tucu-gá xito cùu uú. Te ndíi Àgár-áⁿ nánèhé ndíi nàcuáa ní xáhaⁿ Yá Ndiöxí xii ndíi Moisés yucu Sináí cada ñáyiú, te nchaa ñáyiú nchìcúⁿ

nihnu nchaa tnúhu-án cúu-yu dàtná déhe ndíi Àgár téé ní xinu cuechi, chi téé-án ñà túú tnàhí ni dàñá-dé quee-dé núú chíúⁿ pàtróóⁿ-dē, te ducaⁿ sãtnahá-xi cùu-yu chi nchícúⁿ nihnú-yu nchaa nàcuáa ní xáhaⁿ Yã Ndiõxí xii ndíi Moisés. ²⁵ Te tnúhu Àgár queé-xi: Yucu Sinài, te yucu-án yíndèhu-xi nacióⁿ Àrabiá. Te ndíi Àgár-án nánèhé tucu ndíi cue ñáyiu ndècu ñúú Jerusàlén, chi ñáyiu-án ndécú-ní-yu dàtná ní xíndecu ndíi Àgár ndihí déhe ndíi, chi cue ndíi-án ní cuu cue ndíi ñáyiu ñà túú tnàhí ni dàñá quee núú chíúⁿ pàtróóⁿ-xi, te ducaⁿ sãtnahá-xi cùu ñáyiu-án chi nchícúⁿ nihnu-ní-yu nchaa nàcuáa ní cáháⁿ ndíi Moisés. ²⁶ Dico nchoo ní nduu táhú-ó cùndecu-o ñúú Jerusàlén sáa nùú ndécú Yã Ndiõxí, te vitna chi ñà túú-gã nchícúⁿ nihnu-o nchaa nàcuáa ní cáháⁿ ndíi Moisés. ²⁷ Te duha càháⁿ-í, chi núú tütú Yã Ndiõxí càchí-xi:

Yòhó ñaha ní nduu táhú vã cóó dēhe-xi ní cùu, vitna cana saa-n sã cùdè ìní-n cuèi vátá quíní-gá-n nãsa càcu ìⁿ landú.

Te cuèi ní cuu táhú-n sã vã cóó dēhe-n ní cùu dico ío-gá titní déhe-n còo daçúxí xíchí ní cuu táhú tnàhí sã cóó dēhe-xi.

Duha càchí-xi núú tütú-gá. ²⁸ Te nchoo cuè ñáyiu ndècu ichi Xítóhó Jesucristú vitna cùu-o datná ndíi Isàác, chi ndíi-án ní cacu ndíi, chi mee Yã Ndiõxí ní cachí-gá sã cacú ndíi. Te ducaⁿ sãtnahá-xi cùu nchoo chi ní nduu-o dēhe-gá vitna chi ducaⁿ ní cachí tucu-gá cunduu. ²⁹ Te déhe ndíi Àgár ní nduu táhú tnàhí ndíi sã cacú ndíi ñuyíú-a, te ndíi-án ní cuu úhú iní ndíi ndíi Isàác, te ndíi Isàác-án chi Espíritú Yã Ndiõxí ní quide ní cacu ndíi. Te ducaⁿ sãtnahá-xi cùu vitna, chi nchaa nchoo ñáyiu ndècu ndihí Espíritú Yã Ndiõxí cúú úhú iní ñáhá ñáyiu xii-o. ³⁰ Te núú tütú Yã Ndiõxí càchí-xi: “Chí nàcuíçúⁿ xíchí xínú cuèchi ndihí déhe-xi na nùhú-yu, chi déhe xíchí xínú cuèchi-án ñà túú nã níhí-dē nduu táhú-dē, chi mee-ni dēhe ñaha ndècu vehe-xi nduu táhú-dē sã cuãñaha tãtá-dē”, duha càchí-xi núú tütú-gá. ³¹ Te nchoo cuè ñáyiu ndècu ichi Xítóhó Jesucristú ñà túú-gã cúú-ó dàtná cúú dēhe ndíi ní xinu cuechi-án, chi ní cuu-o vitna datná cúú ndíi ní nduu táhú nchaa sã ní sãñaha tãtá-xi-án. Te ducaⁿ ní cuu, chi Yá

Ndiõxí ní dácãcu ñaha-gã xii-o cuendá sã vã cãchícúⁿ nihnu-gá-ó nchaa nàcuáa ní cáháⁿ ndíi Moisés.

5

Canchícúⁿ nihnu-ni-o ichi Xítóhó Jesucristú

¹ Te Xítóhó Jesucristú ní quide-gá nàcuáa vã cání iní-ó sã nánihí tàhú-ó te núu na cãchícúⁿ nihnu-o nàcuáa ní cáháⁿ ndíi Moisés, te ñu-ni ducaⁿ cãni iní-ó cùndecu-o te vã ngõ cãni iní-ó sã nánihí tàhú-ó te núu na cãchícúⁿ nihnu-o càda-o nàcuáa ní cáháⁿ ndíi, chi núu ducaⁿ na càda-o te ío dandòho-o mee-o datná ní xóo ndoho-o cùtnahá vátá cùndecu-gá-ó ichi-a.

² Te yúhú té Pãblú cuíní-í sã cùndedòho-ndo ìⁿ tnúhu na càháⁿ-í-a. Te núu nchòhó cuãha-ndo sèñá ñii-ndo cuendá sã sãndáá iní-ndó nàcuáa ní cachí ndíi Moisés cada-ndo, te núu ducaⁿ na càda-ndo ña, te àúⁿ nã cuu ndècu-ndo ichi Xítóhó Jesucristú te núu ducaⁿ. ³ Te dàtná ní cachí-í xii-ndo, te ñu-ni ducaⁿ càháⁿ tucu-í vitna sã nùu ndèda-ni càa ìⁿ téé na cuãha-dé sèñá ñii-dé, te xini ñuhu-xi sã dàcuítí tàú-dé cada-dé nchaa nàcuáa ní cáháⁿ ndíi Moisés. ⁴ Te nchaa nchòhó ñáyiu sàni iní sã ñà túú-gã cuèchi-xi ndècu núú Yã Ndiõxí cuendá sã nchícúⁿ nihnu-ndo nchaa nàcuáa ní cáháⁿ ndíi Moisés, ñà túú-gã ndécú-ndó ndihí Xítóhó Jesucristú, te ni Yã Ndiõxí ñà túú-gã cùndàhú iní ñáhá-gã xii-ndo càda váha ñaha-gã. ⁵ Dico nchaa nchoo ñáyiu sãndáá iní ñáhá xii-gã cùñu-o núú-gã, chi chindee ñaha Espíritú-gá xii-o, te ndètu cahnu-ná-ó sáa nduu cùñaha nùú Yã Ndiõxí xii-o sã cùñu-o núú-gã. ⁶ Te nchoo cuè ñáyiu ndècu ndihí Xítóhó Jesucristú ìⁿ-ni quide-xi cuèi na cuãha-o sèñá ñii-o àdi vã cuãha-o, chi ñà túú chindee ñaha-xi xii-o nàcuáa cundecu váha-o ndihí-gá. Te ìⁿdìi díi-ni sã xíní ñuhu-xi quindáá iní-ó Xítóhó Jesucristú, te núu ducaⁿ na càda-o te cuu iní-ó cuè tnaha ñáyiu-o.

⁷ Te nchòhó ío váha quide-ndo ndecu-ndo ichi Yá Ndiõxí ní cùu, te vitna cùñúhu-í sã ñà túú-gã sãndáá váha iní-ndó tnúhu-gá, te ducaⁿ quide-ndo chi ndècu ñáyiu sànu ichi ñaha xii-ndo ingá ichi. ⁸ Te ñà díú Yã Ndiõxí Yáá ní cáháⁿ ñáhá xii-ndo ducaⁿ ni cachí-gá cada-ndo sã vã quindáá-gá iní-ndó tnúhu-gá. ⁹ Te nchòhó xíní-ndó

sã nõu luha levadurá ná quihu yuchi te dândaa-xi. Ducaⁿ sãtnahá-xi cùu ñáyi dândahú ñáhá xii-ndo, chi cuini-yu dáciuta nihnu ñáhá-yu xii-ndo nchaa-ndo. ¹⁰ Te yúhú cútnúni ndáá iní-í sá Xítóhó Jesucristú chindee ñaha-gá xii-ndo cuendá sá ñã túú nãgá tñuhu quindáá iní-ndó, dico nchaa ñáyi ducaⁿ dândahú ñáhá xii-ndo nacháhu-yu núú Yã Ndiõxí nchaa sá quidẽ-yu cuẽi ná-gá ñáyi cùu-yu.

¹¹ Te cãchí tñuhu-í xii nchòhó ñáyi ndècu ndihí-í ichi Yã Ndiõxí sá nõu dìcò dãnehé-ní-í ñáyi sá cuãha-yu sèñá ñii-yu dàtná ní cachí ndíi Moisés ñá, te vã yõ cuu úhú iní ñáhá xii-í ní cùu, te ni vã tũu úhú iní-yu cuendá sá ñi xihí Xítóhó Jesucristú núú cùrúxí ní cùu. ¹² Te nchaa ñáyi dàsatú iní ñáhá xii-ndo sã cuãha-ndo sèñá ñii-ndo, te váha-gá sá ná cáda-yu mée-yu ñi tñúndòho, te ñã díú sã dúcáⁿ cãnuichi ñáhá-yu xii-ndo cùndecu-ndo.

¹³ Te nchòhó ñáyi ndècu ndihí-í ichi Xítóhó Jesucristú ñi-gá ní taunihnu ñaha-gã xii-ndo cuendá sá vã cãchicúⁿ nihnu-gá-ndó nchaa nacuáa ní cáháⁿ ndíi Moisés, dico vã cání iní-ndó sã sã dúcáⁿ ñi taunihnu ñaha-gã xii-ndo, te cuu-ni cada-ndo nãndi sá cuèhé sá dúhá vèxi iní-ndó, dico cuu iní tñáhá-ndó ñi ñi-ndo te chindee tñaha-ndo. ¹⁴ Chi ducaⁿ cãháⁿ Yã Ndiõxí sá cúú iní-ó cuè tñaha ñáyi dàtná cúú iní-ó mée-o. Te núu ducaⁿ na cáda-o, te quide-o nchaa nacuáa táu-xi cáda-o dàtná cãháⁿ nchaa tñuhu ní chídó tñúni ndíi Moisés. ¹⁵ Te núu nchòhó cúú úhú iní tñáhá-ndó ndècu-ndo, te ñã túú quide váha-ndo te núu ducaⁿ quide-ndo, dico yúhú cãchí-í sá vã dúcáⁿ-gã cada-ndo cùndecu-ndo cuendá sá vã dáciuta nihnu tñaha-ndo.

Nàcuáa sãni iní ñáyi ndècu ichi cuehé ichi duha ndihí nàcuáa sãni iní ñáyi ndècu ndihí Espiritú Yã Ndiõxí

¹⁶ Te na cãchí tñuhu-í xii-ndo sã cáda-ndó nchaa nacuáa cuini mée Espiritú Yã Ndiõxí cada-ndo, te ducaⁿ te vã cání-gã iní-ndó cáda-ndo nãndi nchaa sá cuèhé sá dúhá sãni iní mée-ndó. ¹⁷ Chi nchaa xiãⁿ ñã túú tñáhá tñuhu-xi ndihí Espiritú Yã Ndiõxí. Te ñi-ni ducaⁿ quide Espiritú Yã Ndiõxí, chi ñã túú tñáhá iní-xi nchaa sá cuèhé sá dúhá sãni iní-ndó. Te sá dúcáⁿ ñã túú tñáhá tñuhu

tñaha-xi xiãⁿ ñã túú nihí ndée-ndó cáda-ndo ñi sá váha sãni iní-ndó cáda-ndo. ¹⁸ Te nõu quide-ndo nchaa nacuáa sãni ichi ñaha Espiritú Yã Ndiõxí, te ñã túú-gã táxi tñúni ñáhá nchaa tñuhu ní chídó tñúni ndíi Moisés xii-ndo.

¹⁹ Te nchaa ñáyi xini-yu nchaa nãcuáa quide ñáyi quide cuehé quidé ñuha. Te ñuha quidé-yu: Cue tée cãháⁿ ndihí-güedé ñáyi ñi te ñã díú ñãndihí-güedé cúu-yu, te ñi-ni ducaⁿ xiquide cue ñáyi ñi, te nãndi-gá nchaa sá cuèhé sá dúhá cuãháⁿ vèxi-yu quidé-yu. ²⁰ Te quide cahnú-yu nchaa sá cãchí-yu cùu ndiõxí te ñã ndáá sá ndiõxí cúu-xí, te quide nduu tñáhá-yu, te cùu úhú iní tñáhá-yu, te nãá-yu, te cùu cuiñú tñáhá-yu, te ío yáchí cúdeẽⁿ-yu, te ndúcú-yu mee-ni sã cúu-xí mée-yu, te ñã túú cùu ñi-nuú-yu cundecú-yu, te quide ñi tñáhá-yu. ²¹ Te cùu cuedú iní-yu nchaa sá ndécú ndihí dava-gá-yu, te sãhni tñáhá-yu, te ío quihú-yu, te ndi cuu ndi cúu-yu quidé-yu nchaa sá cuèhé sá dúhá, te nãndi-gá nchaa sá cuèhé sá dúhá quidé-yu. Te sa cãchí tñuhu-í xii-ndo sã ncháá ñáyi ducaⁿ xiquide vã ndúú tãhú-yu cundecú-yu núú ndécú Yã Ndiõxí táxi tñúni-gã.

²² Dico Espiritú Yã Ndiõxí chindèe ñaha-xi xii-o cuu iní tñáhá-ó, te cùdí iní-ó ndècu-o, te ío váha cùu iní-ó, te cãhnu iní-ó, te váha iní-ó, te cùndahú iní tñáhá-ó, te quide ndáá-ó ndècu-o. ²³ Te ndáhú iní-ó, te quide-o nchaa nacuáa táu-ó cáda-o, te nchaa xiãⁿ chindèe ñaha Espiritú Yã Ndiõxí quidé-ó, te núu ducaⁿ quide-o, te vã yõ ñi-gã cáháⁿ sá ñã túú quide váha-o ndècu-o. ²⁴ Te nchoo cuè ñáyi ndècu ndihí Xítóhó Jesucristú, sa ñaha-o sá ñi xihí-gã núú cùrúxí sá cuendá-ó, núu xiãⁿ duuⁿ duuⁿ ní dáñá-ó nchaa ichi cuehé ichi duha, te ñã túú-gã táxi tñúni ñáhá ñi ñi sá cuèhé sá dúhá sã ñi xóo caní iní-ó ní cùu. ²⁵ Te vitna ní ngùndecu ndihí-o Espiritú Yã Ndiõxí chindèe ñaha-xi, te xini ñuhu-xi sá cáda-ó nãcuáa sãni ichi ñaha Espiritú-gã cáda-o.

²⁶ Te vã cáda cãhnu-o mee-o, te vã ndúcú-ó plètú, te ni vã cúu cuedú iní-ó sã ndécú ndihí tñaha ñáyi-o.

Chindee tnàha-o ìn ìn-o

¹ Te nchòhó ñáyiú ndècu ndihí-í ichi Xítóhó Jesucristú cächí tnúhu-í xii-ndo sã nõu ìn ñáyiú ndècu ndihí-ndo ichi-gá ní quidé-yu ìn sá ñà túú tàú-yu cadá-yu núú-gã, te nchòhó ñáyiú quíde váha ndècu ndihí Espíritú Yã Ndiõxí cáháⁿ-ndó dôho cue ñáyiú ducaⁿ xiquide-áⁿ cuendá nucúnu ichí-yu, te vii vii cáháⁿ ndihí-ndõ-yu, te ío coto-ndo mée-ndo cuendá sá vã cádá-ndó ìn sá ñà túú tàú-ndó càda-ndo núú-gã. ² Te ío chindee tnàha-ndo, te cuáha tnàha-ndo tnúhu ndee ìni cundecu-ndo cuendá nchaa sá yáha-ndo. Te núu ducaⁿ na càda-ndo, te quíde-ndo nchaa nacuaá ní cáháⁿ Xítóhó Jesucristú cada-o.

³ Te núu ío ìn-ndo cächí-ndó sã ìo váha quíde-ndo ndecu-ndo ichi Yã Ndiõxí te ñã ndáá ñã, te dicó dándàhú-ndó mée-ndo sá dúcáⁿ quíde-ndo. ⁴ Te ndi ðíⁿ ndi ðíⁿ càda cuendá-ndó nõu quíde váha-ndo ndècu-ndo àdi ñã túú quíde váha-ndo. Te núu quíde váha-ndo ndècu-ndo ñã, te cudíⁿ ìni-ndó sã cúu-xí mée-ndo, te vá cání ìni-ndó sã quíde váha-gá-ndó dàcúúxí dàva-gá-yu. ⁵ Chi tàú-ó sã ndi ðíⁿ ndi ðíⁿ càda cuendá-ó nacuaá ndècu-o.

⁶ Te nchaa nchòhó ñáyiú dàcuaha tnúhu Yã Ndiõxí chindee-ndo cuè téè dàcuaha ñaha xii-ndo tnúhu-gá cuáñaha-ndo nãndi sá xíni ñùhu-güedé.

⁷ Te vá dándàhú-ndó mée-ndo cundecu-ndo, chi vá cúu cùdiquí ndeé-ó Yã Ndiõxí, chi nchòhó xíni-ndó sã nõu na càda váha-o cundecu-o, te cùu-xí ìn sá vãha sá cúu-xí-ó, dico núu vá cádá vãha-o ñã, te ío ndoho-o te núu ducaⁿ na càda-o. ⁸ Te núu quíde-o nchaa sá cuèhé sá dúhá sàni ìni-ó, te ðiu-ni xíãⁿ dàcuíta nihnu ñaha-xi xii-o, dico núu quíde-o nchaa nacuaá sànu ichi ñaha Espíritú Yã Ndiõxí xii-o, te cundecu ndihí-o Yã Ndiõxí ni caa ni quíhíⁿ. ⁹ Te xíni ñuhu-xi vá dáñã ndèé-ó càda váha-o cundecu-o, te ducaⁿ te sáá nduu càda váha ñaha Yã Ndiõxí xii-o, te núu vá ná tũhú ìni-ó càda váha-o cundecu-o. ¹⁰ Te cada-o sã vãha sá cúu-xí nchaa tnaha ñáyiú-o vitna ndecu-o ñuyúú-a, te ío-gá tàú-ó chindee-o cue ñáyiú ndècu ndihí-o ichi Xítóhó Jesucristú.

Tnúhu ndéé núú ní ndihí-ná

¹¹ Te cundehe-ndo sã ndãa ndãa lètrá téé-í núú tütú-a sá cúu-xí-ndó. ¹² Te nchaa

ñáyiú quíde yicá sá cuãha-ndo sèñã ñi-ndo dàtná ní cachí ndi Moisés, ñáyiú-áⁿ cúu-yu ñáyiú cuíni cudíu núú tnàha ñáyiú-xi. Te ducaⁿ quíde-yu cuendá sá vã ndóhõ-yu cuendá nchaa tnúhu sá dánèhé ñáhã sã ñi xíhí Xítóhó Jesucristú núú cùrúxí. ¹³ Te ni ñáyiú sa ní ngúndecu ndihí sèñã ñi-xi ñã túú quíde-yu nchaa nacuaá ní cáháⁿ ndi Moisés, dico mée-yu cuíni-yu sá cuãha-ndo sèñã ñi-ndo. Te ducaⁿ quíde-yu chi quíde cahnú-yu mée-yu núú nchaa dava-gá ñáyiú. ¹⁴ Te yúhú chi ñã túú quíde cahnu-í mée-í cuendá nchaa sá quíde-í, chi mee-ni sã ìo cùu váha ìni-í sá Xítóhó Jesucristú ní xíhí-gá núú cùrúxí cuendá-ó. Te ðiu cuendá sã ñi xíhí-gá ñã túú-gã ndécú-í ichi cuèhé ichi duha, te ni ñã túú-gã táxi tnùnì ñáhã ñi ìn sá cuèhé sá dúhá xii-í. ¹⁵ Te ñã túú ñã chindèe ñaha-xi xii-o cuéi na cuãha-o sèñã ñi-o àdi vá cuãha-o, chi ndècu ndihí-o Xítóhó Jesucristú, te ní nduu-o dàtná ìn ñáyiú saa, te xíãⁿ cúu-xí sã ìo-gá xíni ñùhu-xi. ¹⁶ Te xicáⁿ táhù-í núú Yã Ndiõxí sá ncháá nchòhó ñáyiú quíde nchaa nacuaá cáháⁿ-í-a cundecu nahi-ndo, nchòhó ñáyiú cùu cuendá Yã Ndiõxí dàtná ñáyiú isràél chi ñáyiú-áⁿ ñi cachí-gá sá cúu cuendá-gá. Te mee-gã ío cundàhú ìni ñáhã-gã xii-ndo chindee ñaha-gá.

¹⁷ Te není vitna cuíni-í sá vã yõo ìn-gá chidacá nihnu ñaha xii-í cuendá chiuⁿ quíde-í, chi yayacáⁿ sa ní nduu tìlòhó ñi-í cuendá sá ndóhõ-í cuendá Xítóhó Jesucristú.

¹⁸ Te nchòhó ñáyiú ndècu ndihí-í ichi Xítóhó Jesucristú xicáⁿ táhù-í núú-gã sã ìo na chindee ñaha-gá xii-ndo nchaa-ndo. Te ducaⁿ na cunduu. Te ío chí cádá ndèe ìni-ñã vitna.

TUTÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ ÉFESÚ

Té Păblú cáduha-dé tutú quíhiⁿ ndaha ñáyiú xĩndecu ichi Xítohó Jesucristú ndécú ñuú Éfesú

¹ Yúhú té Păblú ní tendaha ñaha Yá Ndiöxí cáháⁿ-í tnúhu Xítohó Jesucristú núú ñáyiú, chi ducaⁿ ñí cachí Yá Ndiöxí cunduu, te vitna càduha-í tutú-a cuendá daquixi-í ndaha nchaa nchòhó ñáyiú cùu cuendá Yá Ndiöxí xĩndecu ñuú Éfesú, te diu-ni nchòhó cúu-ndó ñáyiú sàndáá iní ñáhá xii Xítohó Jesucristú.

² Te xicáⁿ táhù-í núú Dütú Ndiöxí Yaá cúú Tátá-ó, ndihi núú Xítohó Jesucristú sá ná chĩndee chitúu ñaha-gă xii-ndo, te ducaⁿ ndè nduú-gă ná cádá te ío váha cuu iní-ndó cundecu-ndo.

Espiritú Yá Ndiöxí chĩndè ñaha-xi xii-o chi ndècu ndihi-o Xítohó Jesucristú

³ Te cachí-ó sá ïo càhnu cuu Yá Ndiöxí Yaá cúú Tátá Xítohó Jesucristú, te ndéé andiú quide Yá Ndiöxí nchaa sá vâha sá cúu-xi-ó cuendá sá ndécú ndihi-o Espiritú-gă, te ducaⁿ quide-gă chi ndècu ndihi-o Xítohó Jesucristú. ⁴ Te ndéé cútnàhá vátá ngăva-gă ñuyíú ñí cachí Yá Ndiöxí sá nchóó cùu-o ñáyiú cùu cuendá-gă, te ducaⁿ ñí cachí-gă sá cuendá Xítohó Jesucristú cuendá sá nchóó cùu-o ñáyiú ñá túú tnàhí ná cumání cundecu núú-gă, te ducaⁿ te vá cundècu cuèchi-o. ⁵ Te Yá Ndiöxí ío cùu iní ñáhá-gă xii-o núu xiáⁿ ducaⁿ ñí cachí-gă ndéé cútnàhá vátá ngăva-gă ñuyíú sá nchóó ndùu-o déhe-gă. Te sá cuendá nchaa sá cádá Xítohó Jesucristú sá cúu-xi-ó, xiáⁿ ducaⁿ ñí cachí Yá Ndiöxí, te ducaⁿ ñí cachí-gă chi ducaⁿ tnàhí ní sani iní-gă cunduu. ⁶ Te xiáⁿ núu xini ñuhu-xi sá nchóó càchí-ó sá ïo càhnu cuu Yá Ndiöxí, chi ío cundahú iní ñáhá-gă chĩndè ñaha-gă xii-o. Te ducaⁿ quide-gă chi ndècu ndihi-o Xítohó Jesucristú Yaá ío cùu iní-gă. ⁷ Te Yá Ndiöxí ío cùu iní ñáhá-gă xii-o núu xiáⁿ Xítohó Jesucristú ní sati níñí-gă te ní

xíhí-gă cuendá dacăcu nihnu ñaha-gă xii-o núú ùhú núú ndàhú, te ducaⁿ càda cahnu iní-gă nchaa yicá cuèchi-o. ⁸ Te Yá Ndiöxí ío cundahú iní ñáhá-gă chĩndè ñaha-gă xii-o, năcuáa ngũndecu ndihi-o nchaa sá xini tnùnì-ó te ducaⁿ te cuu-o ñáyiú tècú tnùnì. ⁹ Te Yá Ndiöxí ní dánèhé ñáhá-gă xii-o nchaa sá ndúú yùhu, nchaa sá ñí sani iní-gă cada-gă. Te ducaⁿ ñí quide-gă chi ducaⁿ ñí sani iní-gă cunduu. ¹⁰ Te sá ñí sani iní-gă cada-gă te dacuitíi sá cádá-gă ná sàá nduu, te na sàá nduu-án te mee-gă cada sá Xítohó Jesucristú quindaha-gă nchaa sá ío andiú, ndihi nchaa sá ío ñuyíú-a.

¹¹ Te nchoo ñí nduu táhù-ó ñí nduu-o ñáyiú cùu cuendá Yá Ndiöxí chi ndècu ndihi-o Xítohó Jesucristú. Te ducaⁿ ñí cuu chi ducaⁿ tnàhí ní sani iní Yá Ndiöxí cunduu. Te nchaandi túhú sá quide-gă, quide-gă năcuáa sàni iní mée-gă cunduu.

¹² Te ducaⁿ ñí cuu cuendá sá nchũhú ñáyiú díhna nuu ñí sàndáá iní tnúhu Xítohó Jesucristú cáháⁿ-ndí sá ïo càhnu cuu mee Yá Ndiöxí cuendá nchaa sá vâha quide-gă.

¹³ Te nchòhó tucu cútnàhá ní xĩndedóho-ndo tnúhu ndáá tnúhu sá cáháⁿ năcuáa naníhí táhù-ó ní cuu ñí nuu-ndo ndihi Xítohó Jesucristú chi ní sàndáá iní-ndó-gă. Te xiáⁿ cútnùnì sá nchòhó ní nduu-ndo ñáyiú cùu cuendá Yá Ndiöxí, chi ní ngũndecu ndihi-ndo Espiritú-gă sá ñí cachí-gă taxi-gă.

¹⁴ Te sá ndécú ndihi-o Espiritú Yá Ndiöxí xiáⁿ cútnùnì sá ndáá nduu táhù-ó cundecu-o ndihi-gă ná sàá nduu năcuaca ñaha-gă xii nchaa nchoo ñáyiú cùu cuendá-gă, te sá dúcáⁿ càda-gă núu xiáⁿ tàù-ó càchí-ó sá ïo càhnu cuu-gă.

Té Păblú xicáⁿ táhù-dè núú Yá Ndiöxí cuendá cue ñáyiú ndècu ichi-gă

¹⁵ Te yúhú nihí-í tnúhu sá nchòhó ío váha sàndáá iní-ndó Xítohó Jesucristú, te nchaa ñáyiú cùu cuendá Yá Ndiöxí ío cùu iní-ndó-yu. ¹⁶ Te xiáⁿ núu ñá túú dàña ndéé-í ndacáⁿ táhù-í núú-gă cuendá-ndó, te ío xicáⁿ táhù-í ¹⁷ núú Yá Ndiöxí Yaá cúú Tátá Xítohó Jesucristú cuendá-ndó. Te diu-ni Yá Ndiöxí cúu-gă Yaá ío càhnu cuu. Te xicáⁿ táhù-í núú Yá Ndiöxí sá mée-gă ná cádá sá Espiritú-gă chĩndee ñaha-xi xii-ndo cuendá cuu-ndo ñáyiú tècú tnùnì, te na

càda-xi sá cùtnùnì iní-ndó nàcuáa sàni iní Yá Ndiöxí. ¹⁸ Te ducaⁿ xicáⁿ táhù-í núú Yá Ndiöxí cuendá-ndó, cuendá sá nchòhó tecú tnùnì-ndó nàcuáa ndùu tnúhu ndee iní ní taxi-gá ní ngúndecu ndìhi-ndo cùtnàhá ní cáháⁿ ñáhá-gă xii-ndo. Te ducaⁿ cùtnuní tucu iní-ndó sã ncháá sã ñí cachí-gá taxi-gá nduu táhú nchoo cuè ñáyiu cùu cuendá-gá cúu-xí mèe cuií-ni sá ïo-gá váha. ¹⁹ Te cùtnuní tucu iní-ndó sã Yá Ndiöxí ío càhnu cuu-gá quidé-gă nchaa núú sã vâha sá cúu-xí nchòo ñáyiu sàndáá iní ñáhá xii-gá, chi quide-gá sá vã yòo tnàhí ndàcu cada sá cúu-xí-ó dàtná ní quide-gá ²⁰ ní dándótó-gă Xítóhó Jesucristú cùtnàhá ní xihí-gá. Te ní taxinucóo-gá Xítóhó Jesucristú xio cùha-gá táxi tnùnì-gá. ²¹ Te Xítóhó Jesucristú ío-gá cùnùu-gá dácúúxí nchàa núú cuè espíritú, ndìhi dácúúxí nchàa cue tée yìndaha ñáyiu, ndìhi dácúúxí nchàa dava-gá cue tée cùnùu. Te cuèi vitna te cuèi ndéé núú cuàháⁿ núú vèxi ducaⁿ-ni ïo cunu-gă taxi tnùnì-gá. ²² Te mee Yá Ndiöxí ní quide-gá sá Xítóhó Jesucristú taxi tnùnì-gá nchaandi túhú sá ío, te ñiu-ni mee Yá Ndiöxí ní cachí-gá sá ncháá ñáyiu cùu cuendá-gá quindaha ñàha Xítóhó Jesucristú. ²³ Te cada iní-ó sã ncháá ñáyiu cùu cuendá Yá Ndiöxí cúu-yu yiqui cúñú Xítóhó Jesucristú, chi ñⁿ-ni cúu-yu ndìhi-gá, te mee-gă táxi tnùnì-gá nchaandi túhú sá ío.

2

Yá Ndiöxí ío cùndahú iní ñáhá-gă xii-o núu xiãⁿ ní dácăcu nihnu ñaha-gă

¹ Te nchòhó cúu-ndó dàtná ñáyiu ní xihí cuendá nchaa sá cuèhé sá dúhá quide-ndo ni cuu, dico vitna cada iní-ndó sã dàtná ní ndoto-ndo chi ní nduu táhú-ndó cùndecu-ndo ndìhi Yá Ndiöxí ní caa ní quíhíⁿ. ² Te ducaⁿ ñí xíndecu-ndo ìchi cuehé ìchi duha, chi ní cáncicúⁿ nihnu-ndo nchàa sá cuèhé sá dúhá ío ñuyíú-a, te ní xóo cada-ndo nchàa nacuáa càháⁿ sácúíhná, te ñiu-ni sácúíhná-ãⁿ táxi tnùnì-xi nchaa dava-gá espíritú cùndìhi-xi, te ñiu-ni-xi ndècu ndìhi-xi nchaa ñáyiu ñã túú cuìní tñi tnúhu càháⁿ Yá Ndiöxí, te dàcáháⁿ ñáhá-xi xii-yu cuendá cundecu-ni-yu ìchi cuehé ìchi duha. ³ Te nchaa-o dùcaⁿ ní xóo cada-o dàtná quidé cuè ñáyiu-áⁿ, chi ní xóo cada-o nchàa sá cuèhé sá dúhá ñí xóo canì iní-ó,

te nándi-gá nchaa sá cuèhé sá dúhá ñí xóo cahu iní-ó ñí xóo cada-o, núu xiãⁿ tàù-ó sã dándòho ñaha Yá Ndiöxí xii-o ni cùu datná tàù-xi dandòho-gá nchaa ñáyiu ducaⁿ ndècu ìchi cuehé ìchi duha-áⁿ. ⁴ Te Yá Ndiöxí ío cùu iní ñáhá-gă xii-o núu xiãⁿ ní cundàhú iní ñáhá-gă xii-o ⁵ cuèi cùu-o datná ñáyiu ní xihí sá cuendá nchaa sá cuèhé sá dúhá quide-o ni cuu. Te ducaⁿ ñí quide-gá ní cundàhú iní ñáhá-gă xii-o cuendá cundecu-o ndìhi Xítóhó Jesucristú vitna, te cuu ñⁿnuu-o ndìhi-gá. Te sá cuendá-ni sá cùndahú iní ñáhá Yá Ndiöxí xii-o xiãⁿ ní quide-gá nàcuáa nchoo nàníhí tàhú-ó. ⁶ Te cada iní-ó sã dàtná ní quide Yá Ndiöxí cùtnàhá ní dándótó-gă Xítóhó Jesucristú cùtnàhá ní xihí-gá ducaⁿ ñí quide ñaha-gă xii-o chi ndècu-o ndìhi-gá vitna. Te Xítóhó Jesucristú sa ndècu-gá andiú núú ndécú Yá Ndiöxí. Te cada iní-ó sã Yá Ndiöxí sa ní quide-gá sá nchóó ñí ngúndecu túu-o ndìhi Xítóhó Jesucristú, chi ío váha ndècu-o vitna. ⁷ Te Yá Ndiöxí quidé vâha ñaha-gă xii-o vitna cuendá sá ná sàá nduu, te ñiu-ni mee-gă cada te cutnùnì iní nchaa ñáyiu sá ïo cùu iní ñáhá-gă xii-o, te ducaⁿ ïo chìndee chitúu ñaha-gă xii-o cuendá sá ndécú ndìhi-o Xítóhó Jesucristú. ⁸ Te Yá Ndiöxí ío cùndahú iní ñáhá-gă xii-ndo núu xiãⁿ ní quide-gá sá nchòhó nàníhí tàhú-ndó. Te ducaⁿ ñí quide-gá chi ní sàndáá iní-ndó-gă. Te ñã díú sã cuendá ñⁿ chiuⁿ ni quide-ndo ducaⁿ ní nàníhí tàhú-ndó, chi mee Yá Ndiöxí ní cuìní-gá sá dícó-ni ducaⁿ nàníhí tàhú-ndó. ⁹ Te mee Yá Ndiöxí ní cachí-gá sá ñã díú cuendá ñⁿ chiuⁿ quide-o nàníhí tàhú-ó, te ducaⁿ ñí cachí-gá cuendá sá vã cádá càhnu-o mee-o. ¹⁰ Te Yá Ndiöxí ní quide ñaha-gă xii-o dàtná ñⁿ ñáyiu saa cuendá sá ñí tnahá tnúhu-o ndìhi Xítóhó Jesucristú, te ducaⁿ ñí quide-gá cuendá sá cádá-ó mèe-ni sá vâha. Te Yá Ndiöxí ducaⁿ tnàhí ní sanì iní-gá cunduu sá nchóó cùu-o ñáyiu cada mee-ni sã vâha.

Xítóhó Jesucristú quidé-gă ío váha cùu iní-ó ndècu-o

¹¹ Te nchòhó chí dándàcu iní nàcuáa ní xíndecu-ndo ni cùu, chi ñã túú cùu-ndo ñáyiu isràél, te ni ñã túú quide-ndo datná quidé ñáyiu-áⁿ, chi ñáyiu-áⁿ sãha-yu señá

ñá-yu, te dàquee tihũ-yu nchaa ñáyu ñá túú ndècu seña ñá-xi. ¹² Te chí dándacu iní nàcuáa ní xíndecu-ndo, chí dàvá-án ñà túú ní xíndecu-ndo ndihí Xítohó Jesucristú, te ni ñà túú ní xõo cuu tnahá tnúhu-ndo ndihí ñáyu israhél, te ni ñà túú ní xini tnùnì-ndó nàcuáa ndùu tnúhu sá ñí cáháⁿ ndáá Yá Ndiõxí nàcuáa cada váha-gá ñáyu, te ni ñà túú ní cuu-ndo ñáyu quindaha-gã, te ni ñà túú ní xõo níhí-ndó tnúhu ndee iní sá cundècu-ndo ndihí-gá. ¹³ Te cuèi ní cuu-ndo ñáyu ñá túú tnàhá tnúhu ndihí Yá Ndiõxí ní cuu, dico vitna ní tnahá tnúhu-ndo ndihí-gá chí cuu ñánuu-ndo ndihí Xítohó Jesucristú, cuendá sá ñí sati níhí-gã te ní xihí-gá te xiãⁿ ducaⁿ tnàhá tnúhu-ndo ndihí Yá Ndiõxí vitna. ¹⁴ Te Xítohó Jesucristú ní quide-gá sá nchóo ïo váha cuu iní-ó cundecu-o, te ñu-ni-gá ní quide cuendá sá vã dáquee tihú ñáhá ñáyu israhél xii ñáyu ñá túú cuu ñáyu israhél, te ducaⁿ ñá-ná cuú-yu cundecú-yu. ¹⁵ Te sá ñí xihí Xítohó Jesucristú, xiãⁿ ñá túú-gã cúnùu nchaa tnúhu sá sánú ìchi ñaha xii ñáyu nàcuáa cada-yu cundecú-yu ni cuu. Te ducaⁿ ñí xihí Xítohó Jesucristú cuendá sá cuè ñáyu israhél ndihí cue ñáyu ñá túú cuu ñáyu israhél ñá-ná cuú-yu cundecú-yu ichi-gá, te ducaⁿ te vã dáquee tihú tnàhá-gã-yu, te ïo váha cundecu ndihí tnàhá-yu. ¹⁶ Te ducaⁿ ñí quide Xítohó Jesucristú ní xihí-gá núú cùrúxí cuendá sá cuè ñáyu cuu ñáyu israhél ndihí cue ñáyu ñá túú cuu ñáyu israhél vã dáquee tihú tnàhá-gã-yu. Te ducaⁿ ñí xihí-gá cuendá ñá-ná cuú-yu tnahá tnúhu-yu ndihí Yá Ndiõxí nàcuáa cuu váha iní ñáhá-gã xií-yu.

¹⁷ Te cuèi cuu-ndo ñáyu ñá túú tnàhí xini ndáá cuendá Yá Ndiõxí ní cuu, dico Xítohó Jesucristú ní quixi-gá ñuyíú-a ní cáháⁿ-gá tnúhu váha nàcuáa ïo váha cuu iní-ndó cundecu-ndo ndihí Yá Ndiõxí. Te ñu-ni ducaⁿ ñí quide-gá sá cúu-xí nchaa ñáyu sa xini cuendá Yá Ndiõxí, ñu-ni ñáyu israhél. ¹⁸ Te cuèi cuu-o ñáyu israhél àdi ñá túú cuu-o dico ñu-ni mee Xítohó Jesucristú ní quide-gá sá ncháá-ó tnàhá tnúhu-o ndihí Dútú Ndiõxí Yaá cúu Tãtá-ó. Te ducaⁿ ñí tnahá tnúhu-o ndihí Yá Ndiõxí chí ní ngúndecu ndihí-o Espiritú-gá. ¹⁹ Te nchòhó ñáyu ñá túú cuu ñáyu israhél ní cuu-ndo

ñáyu ñá túú tnàhá tnúhu ndihí Yá Ndiõxí ní cuu, dico vitna chí ñá-ná ní cuu-ndo ndihí nchaa dáva-gá ñáyu cuu cuendá-gá chí cuu-ndo déhe-gá. ²⁰ Te cada iní-ó sã cuè téé ní táuchíúⁿ Xítohó Jesucristú cáháⁿ tnúhu-gá, ndihí cue téé ní xõo cáháⁿ tnúhu Yá Ndiõxí ndéé sanaha cuu-güedé dàtná cimientú ñá vehe, te nchòhó cúu-ndó dàtná ndóho sá sãá vehe-án, te cada tucu iní-ó sã Xítohó Jesucristú cúu-gã ñá yúú cúnùu cuu cimientú vehe-án. ²¹ Te ducaⁿ ïo váha cuu ñánuu nchaa ndóho-án ndihí yúú cúnùu-án, te ducaⁿ tucu ïo váha ta quèe tnàha nchaa ndóho-án cuãsaá. Te xiãⁿ cada iní-ó sã cúu-xí vehe Yá Ndiõxí, vehe sã ïo ní cuu íí. Te ducaⁿ sãtnahá-xi cuu nchaa ñáyu ndècu ichi Xítohó Jesucristú chí ní tnahá tnúhu-yu ndihí-gá, te ñá nduu ñá nduu ta cuu vii cuu váha-gá-yu núú Yá Ndiõxí cuáhán. ²² Te tnàhá nchòhó ducaⁿ sãtnahá-xi cuu-ndo chí ní ngúndecu ndihí-ndo Xítohó Jesucristú, te ducaⁿ ta cuu vii cuu váha tucu-ndo núú Yá Ndiõxí cuáhán, te cuu-ndo datná vehe Yá Ndiõxí chí ndècu ndihí-ndo Espiritú-gá.

3

Té Pãblú yíhí ñíquí-dè cáháⁿ-dé tnúhu Xítohó Jesucristú núú ñáyu ñá túú cuu ñáyu israhél

¹ Te yúhú té Pãblú yíhí-í veçaá sã cuendá sã cáháⁿ-í tnúhu Xítohó Jesucristú núú nchòhó ñáyu ñá túú cuu ñáyu israhél, núú xiãⁿ ñu cuendá-gá duha yíhí-í veçaá vitna. ² Te nchòhó sa nàha-ndo sã Yá Ndiõxí ní cundàhú iní ñáhá-gã xii-í, te ní cachí-gá sã yúhú quíhí ñíquí-í cáháⁿ-í tnúhu Xítohó Jesucristú núú-ndó, te cuendá sã cáháⁿ-í tnúhu-gá núú-ndó te cuu-xi sã vãha sã cúu-xí-ndó. ³ Te yúhú sa ní cachí tnúhu-í xii-ndo lùha nàcuáa ndùu tnúhu ndùu yuhu ni cuu, sã ñí cachí tnúhu Yá Ndiõxí xii-í. ⁴ Te òré dàcuaha-ndo tnúhu ndùu yuhu-án ní cuu te quini-ndó sã yúhú tècú tnùnì-í nàcuáa ndùu tnúhu-án, te tnúhu-án cáháⁿ-xi cuendá Xítohó Jesucristú. ⁵ Te tnúhu-án cúu-xí tnúhu sã vã yõo tnàhí xini ní cuu, dico cue téé ní táuchíúⁿ Xítohó Jesucristú cáháⁿ tnúhu-gá, ndihí cue téé cáháⁿ nàcuáa dàcahu iní ñáhá Yá Ndiõxí ní níhí-güedé tnúhu ndùu yuhu-án, chí Espiritú Yá Ndiõxí ní xáhaⁿ-xi xì-güedé. ⁶ Te duha cáháⁿ

tnúhu ndùu yuhu-áⁿ ní cùu: “Cuèi ñáyiú ñá túú cùu ñáyiú isràél te cuèi ñáyiú cùu ñáyiú isràél dico ìⁿ-ni ndùu táhù-yu sá vâha núú Yă Ndiöxí, te núu na quindáá iní-yu tnúhu sá càháⁿ nâcuáa naníhí tàhù-yu, te ìⁿ-nă cúŭ-yu cundecú-yu, te ducaⁿ ìⁿ-ni cada váha ñaha Yă Ndiöxí xii-yu te núu na cundecu ndihí-yu Xítóhó Jesucristú”, duha ndùu tnúhu ndùu yuhu-áⁿ ní cùu.

⁷ Te Yă Ndiöxí ní cundàhú iní ñáhá-gă xii-í ní taxi-gă chiúⁿ quide-í càháⁿ-í tnúhu-gă, te mee-gă quidé-gă sá yúhú ndacu-í cáháⁿ-í tnúhu-gă. ⁸ Te nchaa ñáyiú cùu cuendá Yă Ndiöxí cúŭ-yu ñáyiú ío-gă cúnùu cadá-yu chiúⁿ-gă dàcúxí yúhú, te cuèi ducaⁿ dico Yă Ndiöxí ní cundàhú iní ñáhá-gă xii-í ní taxi-gă chiúⁿ quide-í càháⁿ-í tnúhu-gă núu cuè ñáyiú ñá túú cùu ñáyiú isràél. Te tnúhu-gă-áⁿ càháⁿ-xi sá sũúni ío váha cada ñaha Xítóhó Jesucristú xii-o. ⁹ Te ducaⁿ ní cachí Yă Ndiöxí sá càháⁿ-í tnúhu-gă cuendá danèhé-í nchaa ñáyiú. Te sá danèhé-í-yu-áⁿ cúú-xí tnúhu ndùu yuhu sá ní sani iní-gă ndéé sanaha nâcuáa cada váha-gă cue ñáyiú. Te ndéé dàvá-áⁿ ní quesaha ndùu yuhu tnúhu-áⁿ ní cùu. Te ñiú-ni-gă cúú-gă Yaá ní cadúha nchaandí túhú sá ío. ¹⁰ Te ducaⁿ ndùu yuhu tnúhu-áⁿ ní cùu cuendá sá ncháá espíritú cúnùu ndecu andíu quini-xi vitna nâcuáa quide nchaa ñáyiú ní tuha ñaha xii Yă Ndiöxí cuendá ducaⁿ cùtnuní iní-xi sá ío váha cùtnuní iní-gă nâcuáa cada-gă. ¹¹ Te Yă Ndiöxí ní sani iní-gă ndéé sanaha nâcuáa ní cuini-gă cada Xítóhó Jesucristú, te ní sáá nduu ní quide Xítóhó Jesucristú nâcuáa ní cuini Yă Ndiöxí cada-gă. ¹² Te vitna cùyí-o cáháⁿ ndihí-o Yă Ndiöxí cuendá sá ndécú ndihí-o Xítóhó Jesucristú, te sândáá iní-ó-gă. ¹³ Te núu xiáⁿ càháⁿ-í dóho-ndo sá cuèi duha ndòho-í vitna dico vá ná túhú iní-ndó càncicúⁿ nihnu-ndo ìchi Xítóhó Jesucristú. Te sá dúhá ndòho-í te cùu-xi sá váha sá cúú-xí-ndó, chi cuu-ndo ñáyiú cùu cahnu núú Yă Ndiöxí.

Xítóhó Jesucristú ío cùu iní ñáhá-gă xii-o

¹⁴ Te sá cuendá nchaa sá ní sani iní Dútú Ndiöxí quidé-gă xiáⁿ yúhú ngüñí xiti-í núú-gă càháⁿ ndihí-í-gă, te ñiú-ni-gă cúú Yáá cúú Tátá Xítóhó Jesucristú. ¹⁵ Te mee

Yă Ndiöxí ní cachí-gă sá ncháá espíritú ndécú andíu cunduu-xi datná ní cachí mée-gă cunduu-xi. Te ní cachí tucu-gă sá nchóo cùu-o ñáyiú, te cunduu-o datná cuini mée-gă cunduu-o. ¹⁶ Te xicáⁿ táhù-í núú Dútú Ndiöxí sá Espíritú-gă ná cadá nâcuáa cuita níhí ndéé-gă-ndó quíhíⁿ cundecu-ndo ìchi-gă, te ducaⁿ xicáⁿ táhù-í núú-gă cada Espíritú-gă chí ío cahnu cuu-gă. ¹⁷ Te xicáⁿ táhù tucu-í núú Yă Ndiöxí sá Xítóhó Jesucristú ná cundecu ndihí ñaha-ni-gă xii-ndo chí sândáá iní-ndó-gă, te ducaⁿ te vá dáña ndéé-ndó ío cuu iní tnáhá-ndó. ¹⁸ Te xicáⁿ táhù tucu-í núú Yă Ndiöxí cuendá-ndó ndihí cuendá dava-gă ñáyiú cùu cuendá-gă, cuendá sá cùtnuní iní-ndó sá sũúni cùu iní ñáhá Xítóhó Jesucristú xii-o. ¹⁹ Te duha xicáⁿ táhù-í núú Yă Ndiöxí chí cuini-í sá ncháá-ndó tècú tnùn-í-ndó sá ío cùu iní ñáhá Xítóhó Jesucristú xii-o cuèi vá ndácú càva-o quini-ó nâcuáa cùu iní ñáhá-gă xii-o. Te xicáⁿ táhù tucu-í núú Yă Ndiöxí sá ío na cundecu ndihí ñaha-gă xii-ndo, te ducaⁿ càncicúⁿ nihnu-ndo càda-ndo nchaa nacúáa quide mee-gă.

²⁰ Te Yă Ndiöxí ío-gă vâi sá ndácú-gă táxi-gă dàcúxí sá xicáⁿ-ó núú-gă, te cuèi ndéé nchaa sá ñá túú sâni iní-ó níhí-ó te tàxi-gă, te ducaⁿ chí mee-gă ndécú ndihí ñaha-gă xii-o, te ndàcu-gă quidé-gă nândí sá váha sá cúú-xí-ó. ²¹ Te vitna nchaa nchoo ñáyiú ndecu ìchi Xítóhó Jesucristú chí ná càchí-ó sá ío cahnu cuu Yă Ndiöxí, te ducaⁿ-ni càháⁿ-ó sá ío cahnu cuu-gă ní caa ní quíhíⁿ chí ndècu ndihí-o Xítóhó Jesucristú. Te ducaⁿ na cunduu.

4

Espíritú Yă Ndiöxí quidé-xi cùu ìⁿnuu-o ndecu-o

¹ Te yúhú té Păblú yíhí-í vecaá sá cuendá Xítóhó Jesucristú, te càháⁿ ndàhú-í núú-ndó sá cadá váha-ndo cundecu-ndo datná tàú-xi cada cue ñáyiú ní cáháⁿ Yă Ndiöxí cundecu ndihí-gă. Te nchòhó tnáhá-ndó cùu-ndo ñáyiú ní cáháⁿ ñáhá Yă Ndiöxí cundecu ndihí-gă. ² Te vá cadá cahnu-ndo mee-ndo, cunduu váha iní-ndó, cunduu cahnu iní-ndó, te cuu iní tnáhá-ndó nâcuáa ducaⁿ cundee iní-ndó núu ná cúú sá cùmání núú tnáhá-ndó. ³ Te ío nducu ndèe-ndo cuu ìⁿnuu-ndo cundecu-ndo, chí Espíritú Yă

Ndiöxí chindee ñàha-xi xii-ndo, te ducaⁿ ïo váha cuu iní-ndó cùndecu-ndo chi cùu ìⁿnuu-ndo. ⁴ Te nchoo ñàyiu ndècu ichi Xítóhó Jesucristú ìⁿ-ni cùu-o, te ducaⁿ ìⁿ-ni Espíritú Yá Ndiöxí ndécú, te ðiu-ni ducaⁿ ìⁿ-ni tnúhu ndee ìní ní ngúndecu ndihi-o cùtnàhá ní cáháⁿ ñáhá Yá Ndiöxí xii-o. ⁵ Te ìⁿ-ni Xítóhó Jesucristú ndécú tàxi tnuní ñáhá-gã xii-o, te ìⁿ-ni cùu-o sandáá iní-ó tnúhu-gá, te ìⁿ-ni ñí sandute-o. ⁶ Te ìⁿ-ni Dútú Ndiöxí cúú Yáá cúú Tátá-ó nchàa-o, te ðiu-gá cùnùu-gá yíndàha ñaha-gá xii-o nchàa-o. Te Yá Ndiöxí dácàháⁿ-gá iní-ó quide-o chiuⁿ-gá, te ducaⁿ ndècu ndihi ñaha-gá xii-o nchàa-o.

⁷ Te nchoo ndì ðíⁿ ndì ðíⁿ chindee ñaha Yá Ndiöxí xii-o quide-o nacuaá ndùu chiuⁿ ní cachí Xítóhó Jesucristú cada-o. ⁸ Te quèe ndáá-xi nacuaá càháⁿ-xi núú tütú Yá Ndiöxí núú càchí-xi:

Xítóhó Jesucristú cuándaa-gá andiu te ïo cùnùu-gá,

chi nchaa cue espíritú cúú ùhú iní ñáhá xii-gá ñá túú ní ndàcu-xi naá ndihi ñaha-xi xii-gá,

te mee-gã ní cachí-gá nacuaá ndùu chiuⁿ nduu táhú ìⁿ ìⁿ ñáyiu cadá-yu.

Duha càchí-xi núú tütú-gá.

⁹ Te sá dúcáⁿ càháⁿ-xi sá cuándaa-gá andiu xiáⁿ cùtnuní iní-ó sã ñí cuuⁿ-gá ñuyíú-a. ¹⁰ Te Xítóhó Jesucristú ní cuuⁿ-gá ñuyíú-a, te ðiu-ni-gá cuándaa-gá andiu cuendá ïo cunuu-gã taxi tnùní-gá nchaandi túhú sá ïó. ¹¹ Te ní dácãhñu-gá cue tée xínu cuechi núú-gã ìⁿ ìⁿ núú chiúⁿ cada-güedé. Te ní cachí-gá sá dâva-güedé cáháⁿ-güedé tnúhu-gá, te dava-güedé ní cachí-gá sá cáháⁿ-güedé nacuaá dâcahu iní ñáhá Yá Ndiöxí xii-güedé. Te dava-güedé ní cachí-gá sá cúú-güedé cue tée datècú tnúhu cue ñáyiu nacuaá cadá-yu naníhí táhú-yu. Te dava-güedé ní cachí-gá sá cúú-güedé cue tée quindaha ñaha xii ñáyiu dacuaá ñaha-güedé xií-yu tnúhu-gá. ¹² Te ducaⁿ ñí cachí-gá cada cue tée-áⁿ cuendá canu ichi-güedé cue ñáyiu cùu cuendá Yá Ndiöxí cuendá ducaⁿ ñáyiu-áⁿ ñíhí-yu nacuaá cadá-yu chiúⁿ-gá, te ducaⁿ cuíta níhí ndéé-gã-yu cundecú-yu ichi Xítóhó Jesucristú. ¹³ Te ducaⁿ ñí cachí Xítóhó

Jesucristú cunduu ndéé sáá nduu cùu ìⁿnuu-o quindáá iní-ó tnúhu-gá, te ducaⁿ cùu ìⁿnuu-o tecú tnùní-ó nacuaá ndùu cuendá-gá chi ðiu-gá cúú-gã Déhe Yá Ndiöxí, te cuu-o ñáyiu ïo quide ndáá dàtná quidé mée Xítóhó Jesucristú. Te ducaⁿ te ñá túú tnáhí-gá ná cùmání-ó núú Yá Ndiöxí. ¹⁴ Te ducaⁿ te vá cúú-gã-ó dàtná cue landú vátá cùtnuní váha-gã iní-xi, te ni vã cádá-gã-ó dàtná quidé ndùte lamár, chi ndute-áⁿ òré quéné tãchí te cuáháⁿ-xi duha cuáháⁿ-xi dâcáⁿ, te ducaⁿ chi vá quindáá-gá iní-ó tnúhu càháⁿ nchaa ñáyiu dândahú ñáhá xii-o, chi ñáyiu-áⁿ ïo váha xító-yu nacuaá dândahú ñáhã-yu xii-o chi càchí-yu sá cáháⁿ-yu tnúhu Yá Ndiöxí dico ñá ndáá. ¹⁵ Te nchoo ïo cuu iní tnáhá-ó, te vá dândahú tnáhá-ó, chi cáháⁿ-ó mée-ni sá ndáá. Te xini ñuhu-xi sá ìⁿ nduu ìⁿ nduu cuíta cada ndáá-gã-ó quíhíⁿ dàtná quidé ndáá mée-gã, te ðiu-ni-gá cúú-gã Yaá cùnùu cuu díhna tàxi tnuní ñáhá-gã xii-o. ¹⁶ Te ðiu-ni Xítóhó Jesucristú quidé ñaha-gá xii nchaa nchoo ñáyiu ndècu ichi-gá dàtná yiqui cùñú mée-gã, chi ìⁿ yiqui cùñú ïo váha ní quée tnàha ìⁿ ìⁿ xichi, te ducaⁿ yìhí túchi yiqui cùñú-ãⁿ yótnì-xi nchaa nacuaá ní quée tnàha. Te ducaⁿ sãtnahá-xi cùu nchoo chi ìⁿ-ni cùu-o ndecu-o ichi Xítóhó Jesucristú táxi tnùní ñáhá-gã xii-o. Te núu nchoo quide-o nchaa nacuaá tàú-xi cunduu te cùu iní tnáhá-ó, te ducaⁿ ta ñíhí ndéé-gã-ó cuáháⁿ ndécú-ó ìchi-gá.

Vá cádá-gã-ó dàtná ní xóo cada-o cùtnàhá ní xíndecu-o ichi cuehé ichi duha

¹⁷ Te vitna yúhú càháⁿ-í dóho-ndo quide-í núú Xítóhó Jesucristú sá vã cùndecu-gá-ndó dàtná xíndecu ñáyiu ñá túú sàndáá iní ñáhá xii Yá Ndiöxí, chi nchaa ñáyiu-áⁿ ñà túú vèdana nándihi nchaa sá sání iní-yu. ¹⁸ Te ni ñà túú vèdana cùtnuní iní-yu nacuaá ndùu tnúhu ndáá tnúhu Yá Ndiöxí. Te ñáyiu-áⁿ ñà túú ndùu táhú-yu cundecú-yu nacuaá cuíni Yá Ndiöxí, chi ñá túú vèdana tècú tnùní-yu te ducaⁿ chi ïo sáá iní-yu. ¹⁹ Te ñá túú tnáhí-gá ná sání iní-yu ndécú-yu ichi cuehé ichi duha, te ïo cùdìⁿ iní-yu ndécú-yu ichi ðíⁿ ìní, te ñá díú-ní xiáⁿ chi nándi-gá nchaa sá cuehé sá dúhá quidé-yu ndécú-yu. ²⁰ Dico tnúhu Xítóhó Jesucristú sá ñí sàndáá

iní-ndó chi ñá túú dùcaⁿ sanu ichi ñaha-xi xii-ndo cada-ndo. ²¹ Te nchòhó ní cutnùní iní-ndó nàcuáa ndùu cuendá Xítohó Jesucristú, te dàcuaha-ndo tnúhu ndáá ñu-ni tnúhu-gá nàcuáa ndècu-ndo ichi-gá. ²² Te vitna vá cáni-gá iní-ndó càda-ndo datná ní xóo cada-ndo cùtnàhá ní xíndecu-ndo ìchi cuehé ichi duha, chi núu nchaa-ni sá cuèhé sá dúhá-ãⁿ ná cùhuⁿ-ni iní-ndó càda-ndo, te uuⁿ-gá uuⁿ-gá cuita dacuíta nihnu ñaha-xi xii-ndo quíhíⁿ, chi núu nchaa-ni sá cuèhé sá dúhá-ãⁿ ná cùhuⁿ-ni iní-ndó te dàticá nuu ñaha-xi xii-ndo. ²³ Te nchòhó, xini ñuhu-xi sá vá dúcáⁿ-gá cani iní-ndó càda-ndo te tàú-ndó ndùu-ndo datná ñⁿ ñáyiu ní cacu túu saa. ²⁴ Te nduu iní-ndó dàtná cuìní méé Yá Ndiöxí cunduu, chi nduu-xi nàcuáa càa iní méé-gá, te ducaⁿ te cuu-ndo ñáyiu ío váha cada ndáá, te cuu ndisa-ndo ñáyiu ñá túú tnàhí ná cumání cundecu núú-gá.

²⁵ Te cuendá xíãⁿ núu càháⁿ-í dóho-ndo sá nchòhó vá dàcuàndehnde-gá-ndó dàtná ní xóo cada-ndo, te mee-nã sá ndáá càháⁿ ndihí tnàha-ndo, chi ñⁿ-ni cùu-o ndecu-o ichi Xítohó Jesucristú.

²⁶ Te núu cùdéeⁿ-ndó te cada cuendá-ndó sá vá cáda-ndó ñⁿ cuèchi sá dúcáⁿ cùdéeⁿ-ndó, te vá dúcáⁿ-ní cùhuⁿ iní-ndó tnúhu sätú iní-áⁿ. ²⁷ Te vá dáña-ndó mèe-ndo dandahú ñáhá sàcuíhná xii-ndo.

²⁸ Te núu dava-ndo cùu-ndo ñadúhú te vá dúcáⁿ-gá cada-ndo, chi nducu-nã-ndó ñⁿ chiuⁿ váha cada-ndo nàcuáa ducaⁿ ñihí-ndó sá chíndèe-ndo cue ñáyiu ndàhú ñáyiu ñá túú nã ndécú ndihí.

²⁹ Te vá càháⁿ-gá-ndó nì ñⁿ tnúhu cuèhé, chi mee-nã tnúhu vii tnúhu váha càháⁿ-ndó nàcuáa ducaⁿ ngünu ichi cue ñáyiu ndédóho ñaha xii-ndo, te núu ducaⁿ na càda-ndo te cuu-xi sá váha sá cúú-xí ñáyiu ducaⁿ ndédóho ñaha xii-ndo-áⁿ. ³⁰ Te vá cáda-gá-ndó nì ñⁿ sá ñà túú tàú-ndó càda-ndo cuendá sá vá dándihú-ndó ìní Espiritú Yá Ndiöxí, chi ñu Espiritú-gá ndécú ndihí-ndo, te xíãⁿ cutnùní iní-ndó sá sáa nduu nàcuaca ñaha-gá xii-ndo cùndecu-ndo ndihí-gá ni caa ni quíhíⁿ.

³¹ Te vá dásätú-gá-ndó ìní tnàha ñáyiu-ndo, te ni vá cúhúⁿ ìní-ndó tnúhu sätú ìní, te ni vá cùdéeⁿ-gá-ndó, te cuèi núú chítú núú tàcá vá càháⁿ cana-ndo cùcuèhé-ndó tnàha ñáyiu-ndo, te ni vá cuátnùhu-ndo tnàha ñáyiu-ndo, te ni vá cáni cuèhé cani

duha iní-ndó cuendá tnàha ñáyiu-ndo. ³² Te cundàhú iní tnàhá-ndó, te cada tnàha-ndo sá váha, te cada càhnu iní tnàhá-ndó núu ná cúú sá cúmãní núú tnàhá-ndó dàtná ní quide Yá Ndiöxí ní quide càhnu iní-gá nchaa yíca cuèchi-ndo sá cuendá Xítohó Jesucristú.

5

Nàcuáa tàú-xi cundecu nchaa ñáyiu cùu déhe Yá Ndiöxí

¹ Te nchòhó cúú-ndó ñáyiu ío cùu iní ñáhá Yá Ndiöxí, te ñu déhe-gá cúú-ndó núu xíãⁿ xini ñuhu-xi canchicúⁿ nihnu-ndo càda-ndo datná quidé mèe-gá. ² Te ío cuu iní tnàhá-ndó cùndecu-ndo datná cúú ìní ñáhá Xítohó Jesucristú xii-ndo, chi ñu-gá ní cachí-gá sá cúú-gá cuendá nchaa cuèchi-o te ní xihí-gá, te sá dúcáⁿ nì xihí-gá te ní cuu-gá dàtná ñⁿ táhú sá cúú-xí Yá Ndiöxí, te ío váha ní cuu iní Yá Ndiöxí sá dúcáⁿ nì quide-gá.

³ Te sá cuendá sá nchòhó cúú-ndó ñáyiu cùu cuendá Yá Ndiöxí núu xíãⁿ nchaa nchòhó cue téé vá càháⁿ ndihí-ndo ñáyiu ñihí te núu ñá díú ñàdihí-ndó cùú-yu, te ducaⁿ-ni nchàa nchòhó cue ñáyiu ñihí tucu vá càháⁿ ndihí-ndo cue téé te núu ñá díú yí-ndo cuu-güedé, te ni vá cáni tnàhí iní-ndó cùndecu-ndo ichi díú ìní, te ni vá xihó-ndó nì ñⁿ sá ndécú ndihí tnàha ñáyiu-ndo, te ni ñⁿ nchaa xíãⁿ vá cáni ìní-ndó càda-ndo, te ni vá cácu nèhe-ndo.

⁴ Te ni vá càháⁿ-ndó ñⁿ tnúhu sá ni vá cúú cùndedóho ñáyiu, te ni vá càháⁿ-ndó ñⁿ tnúhu cùtexínu, te ni dàva-gá nchaa tnúhu sá ñà túú vèdana nàndihí vá càháⁿ-ndó, chi nchaa tnúhu-áⁿ ñà túú tàú-xi càháⁿ-ndó, te xini ñuhu-xi sá váha-gá sá ndàcáⁿ táhú-ndó núú Yá Ndiöxí cuendá nchaa sá váha quide-gá. ⁵ Te nchòhó sa xini ndáá-ndó sá ncháá cue téé càháⁿ ndihí ñáyiu ñihí te ñá díú ñàdihí-güedé cúú-yu, ndihí cue ñáyiu ñihí càháⁿ ndihí cue téé te ñá díú yí-yu cùu-güedé, nchaa ñáyiu-áⁿ vá ndúú tãhü-yu cundecú-yu núú ndécú Yá Ndiöxí ndihí Xítohó Jesucristú táxi tnùnigá. Te ni cue ñáyiu xíndecu ichi díú ìní, te ni cue ñáyiu xihó nchaa sá ndécú ndihí tnàha ñáyiu-xi vá ndúú tãhü-yu cundecú-yu ndihí-gá núú

ndécú-gã táxi tnùnì-gá. Te tnúhu sá càchí-ó xìho-o nchaa sá ndécú ndìhì tnahà ñáyìu-o, ñⁿ-ni cùu-xi ndìhì tnúhu sá càchí ñáyìu quìde cahnú-yu nchaa sá càchí-yu cùu ndiòxí te ñá ndáá sá ndiòxí cúú-xí. ⁶ Te vá quìndáá iní-ndó nì ñⁿ tnúhu sá ñà túú nàndìhì càháⁿ ñáyìu, chi ñáyìu-áⁿ ïo dandòho ñaha Yá Ndiòxí xii-yu cuèndá nchaa sá cuèhé sá dúhá quìdé-yu chi ñá túú sàndáá iní ñáhã-yu xii-gá. ⁷ Núu xiãⁿ càháⁿ-í dóho-ndo sã vã ñihí tnáhã-ndó ndìhì cue ñáyìu-áⁿ.

⁸ Te nchòhó ní cuu-ndo dàtná cue ñáyìu ní xíndecu núú néé chi ní xíndecu-ndo ìchi cuehé ìchi duha, dico vitna ní ngúndecu-ndo ìchi Xítóhó Jesucristú, te ñá túú-gã ndécú-ndó núú néé dàtná ní xíndecu-ndo nì cùu. Te vitna cada-ndo nchaa nacuaá tàú-xi cunduu chi ndècu-ndo ìchi-gá. ⁹ Te sá cuèndá sá ndécú-ndó ìchi-gá núu xiãⁿ cúú-ndó ñáyìu váha, te quìde ndáá-ndó ndècu-ndo, te ñá túú dàcuandehnde-ndo chi càháⁿ-ndó mèe-ni sá ndáá. ¹⁰ Te ïo váha cada cuèndá-ndó nchaa sá cúú váha iní Xítóhó Jesucristú, te xiãⁿ cada-ndo. ¹¹ Te vá cãncñícúⁿ nihnu-ndo tnáhã-ndó càda-ndo datná quìdé cue ñáyìu ndècu ìchi cuehé ìchi duha, chi nchòhó tàú-ndó càháⁿ-ndó dóho nchaa ñáyìu ducaⁿ ndècu ìchi cuehé ìchi duha-áⁿ cuèndá nchaa sá quìdé-yu. ¹² Te cucahaⁿ núú-ndó vã càháⁿ-ndó cuèndá nì ñⁿ sá cuèhé sá dúhá quìde dayuhu nchaa ñáyìu-áⁿ. ¹³ Dico òré dándixi túu tnúhu Yá Ndiòxí iní-yu nàcuáa quìdé-yu te cùnnumí iní-yu sá ñã túú quìde váha-yu, te ducaⁿ ndixi cuéchi iní-yu cuèndá nchaa sá cuèhé sá dúhá quìdé-yu. ¹⁴ Te núú tütú Yá Ndiòxí càchí-xi:

Nchòhó cúú-ndó dàtná ñáyìu xidí, te vitna ndiquíú iní-ndó,
te cùu tucu-ndo datná ñáyìu ní xíhí, te vitna ndoto-ndo,
te Xítóhó Jesucristú chindee ñaha-gá xii-ndo nàcuáa vá cùndècu-gá-ndó ìchi cuehé ìchi duha.
Duha càháⁿ-xi núú tütú-gá.

¹⁵ Te ïo váha cada cuèndá-ndó nàcuáa cada-ndo cùndecu-ndo, te vá cadá-ndó dàtná xiquide cue ñáyìu ñá túú tècú tnùnì, chi cada-ndo dàtná xiquide ñáyìu ïo váha sàá díquí-xi. ¹⁶ Te ñⁿ nduu ñⁿ nduu cani iní-ndó càda-ndo nchaa nacuaá tàú-xi cunduu, chi

vitna ïo cùnnumí nchaa sá cuèhé sá dúhá. ¹⁷ Te cuu-ndo ñáyìu tècú tnùnì cuèndá ducaⁿ cùnnumí iní-ndó nàcuáa cuèní Yá Ndiòxí cada-ndo, te vá cadá-ndó dàtná xiquide cue ñáyìu ñá túú tnàhí cùnnumí iní-xi nàcuáa cuèní Yá Ndiòxí cadá-yu. ¹⁸ Te vá cúú-ndó ñáyìu quihu chi núu ducaⁿ na càda-ndo te dàcuíta nihnu-ndo mèe-ndo, te dañã-ndo mèe-ndo sá Espiritú Yá Ndiòxí ná tàxi tnùnì ñáhã-xi xii-ndo. ¹⁹ Te càháⁿ-ndó nàcuáa-ni cuáhãⁿ ndudú sá nì xóo cata nchaa cue ñáyìu ndéé sanaha nì xóo chiñuhú-yu Yá Ndiòxí. Te càháⁿ-ndó nàcuáa cuáhãⁿ ndudú sá chiñuhu-ndo Yá Ndiòxí, te cata-ndo. Te cuéi nchaa dava-gá ndudú ñìu-ni ducaⁿ càháⁿ-ndó te cata-ndo. Te nì yùhu nì iní-ndó càta-ndo nchaa ndudú-áⁿ chiñuhu-ndo Yá Ndiòxí. ²⁰ Te vá dañã ndéé-ndó ndacáⁿ táhú-ndó núú Tãtã-ó Dütú Ndiòxí cuéi ndècu váha-ndo àdi ñá túú ndècu váha-ndo. Te ducaⁿ càda-ndo chi ndècu ndìhì-ndo Xítóhó Jesucristú.

Tàú-xi sá quìndáá iní tnáhã cue ñáyìu ndècu ìchi Xítóhó Jesucristú

²¹ Te nchòhó ñáyìu ndècu ìchi Xítóhó Jesucristú tàú-xi sá quìndáá iní tnáhã-ndó, te ducaⁿ càda-ndo chi nèhe-ndo sá yíñuhu núú Yá Ndiòxí.

²² Te nchaa nchòhó ñáyìu ñìhí ndécú yì-xi, xini ñuhu-xi sá quìndáá iní-ndó yì-ndo datná sàndáá iní-ndó Xítóhó Jesucristú. ²³ Chi yì-ndo tàxi tnùnì ñáhã-güedé xii-ndo dàtná quìdé Xítóhó Jesucristú táxi tnùnì ñáhã-gã xii nchoo cue ñáyìu ndècu ìchi-gá. Te ñìu-gá cúú-gã Yaá ní dácãcu nihnu ñaha xii-o núú ùhú núú ndàhú, te cùu-o datná yiqui cùnú-gá. ²⁴ Te dàtná quìdé nchòo ñáyìu ndècu ìchi Xítóhó Jesucristú sàndáá iní-ó tnè-o nchaa tnúhu càháⁿ-gá, ducaⁿ tàú-xi cada nchaa nchòhó ñáyìu ñìhí quìndáá iní-ndó tnè-ndo nchaa tnúhu càháⁿ yì-ndo.

²⁵ Te tnáhã nchaa nchòhó cue tée tucu tàú-xi sá ïo cuu iní-ndó ñàdìhí-ndó dàtná quìdé Xítóhó Jesucristú cúú iní ñáhã-gã xii nchaa nchoo ñáyìu ndècu ìchi-gá, chi mee-gã ní xíhí-gá sá cuèndá-ó sã cúú iní ñáhã-gã xii-o. ²⁶ Te ducaⁿ nì quide-gá cuèndá sá ncháá ñáyìu vitna ngúndecu ìchi-gá cuu yíñuhú-yu núú Yá Ndiòxí, te ducaⁿ ndàda ndoo ndada nine-gá iní-yu sá

cuendá sá quindáá iní-yu tnúhu Yá Ndiöxí, te cuanduté-yu. ²⁷ Te ducaⁿ ñi quide-gá cuendá sá ncháá ñáiyu na ngündecu ichi-gá ío váha cundecú-yu núú-gã, te ducaⁿ vã cündecu-gá ni ñⁿ cuéchi-yu núú-gã, te ni ñⁿ-gá sá ñà túú-gã ná cumání-yu núú-gã chí ío cundecu yíñùhú-yu. ²⁸ Te sá dúcáⁿ quide Xítohó Jesucristú sá cúú-xí cuè ñáiyu ndècu ichi-gá, xiáⁿ tàú-xi sá nchòhó cue téé xíndecu ñadìhí-xi cuu iní-ndó ñadìhí-ndó, te coto-ndó-yu dàtná xító-ndó yìqui cuñú méé-ndó, te cada iní-ndó sã ncháá cuè téé ío cùu iní ñadìhí-xi cùu iní-güedé méé-güedé chí ñⁿ-nã cúú-yu. ²⁹ Te nchoo sã naha-o sá ñi ñⁿ ñáiyu ñã túú dàquee tíhú-yu yìqui cuñú-yu, chí da uuⁿ-gá chindèé-yu te xító-yu. Te ñⁿ-ni ducaⁿ quide Xítohó Jesucristú ndìhi nchaa ñáiyu ndècu ichi-gá, ³⁰ chí cùu-o datná yìqui cuñú méé-gã, te ducaⁿ chí ñⁿ-ni cùu-o ndìhi-gá. ³¹ Te tnúhu Yá Ndiöxí càchí-xi: “Sá cuendá xiáⁿ ñuu nchaa cue téé na ñihí ñadìhí-xi te ñⁿ-ná cada-güedé tátá-güedé ndìhi ñaná-güedé, te ñadìhí-nã-güedé cuu cuu ndìhi-güedé, te ducaⁿ ñⁿ-ná cuu-güedé ndìhi-yu”, duha càchí-xi. ³² Te tnúhu-a cùu-xi ñⁿ tnúhu càhnu vihi, te ducaⁿ sã tñahá-xi cùu Xítohó Jesucristú ndìhi cue ñáiyu ndècu ichi-gá. ³³ Te càhán-ni tucu-í dóho nchaa nchòhó cue téé xíndecu ñadìhí-xi sá ío cuu iní-ndó ñadìhí-ndó te coto-ndó-yu dàtná xító-ndó mèe-ndo, te ducaⁿ-ni nchàa nchohó ñáiyu ñihí tucu canehe-ndo sã yíñùhu núú yí-ndo.

6

¹ Te nchaa nchòhó cue landú, quindáá iní-ndó tátá-ndó ndìhi ñaná-ndó chí ducaⁿ cuíní Yá Ndiöxí cunduu, te ñⁿ-ni ducaⁿ tñahí tàú-xi cada-ndo. ² Te Yá Ndiöxí ní cachí-gá sá canèhe-ndo sá yíñùhu núú tátá-ndó ndìhi núú ñaná-ndó. Te tnúhu-án cúú-xí tnúhu cùnuu ní càhán-gá cada cue ñáiyu cuendá cada váha ñaha-gã xii-yu. ³ Te ní cachí-gá sá ñuu ducaⁿ na càda-ndo te ío váha cundecu-ndo, te ducaⁿ ío naha cùdí-ndo cündecu-ndo ñuyú-a.

⁴ Te nchaa nchòhó cue téé cùu tátá, vá dásatú-ndó ñihí cue déhe-ndo chí canu ichi-ndo-güexi nacuáa tàú-xi cunduu,

te dacuàha-ndo-güexi nchaa tnúhu váha nàcuáa cuíní Yá Ndiöxí cunduu.

⁵ Te nchaa nchòhó cue ñáiyu xínu cuechi, quindáá iní-ndó cuè ñáiyu dii chiúⁿ-xi quide-ndo, te canehe-ndo sã yíñùhu núú-yu, te ío váha cuu iní-ndó càda-ndo chiúⁿ-yu, te ducaⁿ ñi yuhu ñi iní-ndó càda-ndo. Te cada iní-ndó sã dàtná tnúhu sá chíúⁿ Xítohó Jesucristú quidé-ndó.

⁶ Te dava ñáiyu xínu cuechi, mee-ñi òré ndéhe ñáiyu dii chiúⁿ-xi quidé-yu ío ndùcu ndeé-yu quide chiúⁿ váha-yu cuendá cuíní-yu cudíu-yu. Dico nchòhó vá dúcáⁿ càda-ndo, chí cuèi ndècu ñáiyu dii chiúⁿ-xi quide-ndo àdi ñã túú-yu dico cada chiúⁿ váha-ni-ndo, te cada iní-ndó sã dàtná tnúhu sá chíúⁿ Xítohó Jesucristú quidé-ndó, te cada-ndo ñi yuhu ñi iní-ndó nàcuáa cuíní Yá Ndiöxí cunduu. ⁷ Te ío váha cuu iní-ndó càda-ndo chiúⁿ-án, chí cada iní-ndó sã dàtná tnúhu sá chíúⁿ Xítohó Jesucristú quidé-ndó te ñã díu chiúⁿ cue ñáiyu ñuyú-a.

⁸ Te nchòhó sa cùtnuní iní-ndó sã nàcuáa ndùu chiúⁿ váha ní quide-ndo ñⁿ ñⁿ-ndo, te ducaⁿ cünduu sá táxí Xítohó Jesucristú nduu táhú-ndó cuèi cùu-ndo ñáiyu dàñá queé núú chíúⁿ pàtróoⁿ-xi àdi cuu-ndo ñáiyu ñã túú tñahí dàñá quee núú chíúⁿ pàtróoⁿ-xi.

⁹ Te nchaa nchòhó ñáiyu xíndecu ndìhi ñáiyu xínu cuechi, tñahá-ndó tàú-ndó càda váha-ndo sã cúú-xí cuè ñáiyu xínu cuechi núú-ndó, te vá cündùu nínu iní-ndó núú-yu, te chí cuàha cuendá sá díu-ní Xítohó Jesucristú Yaá ndécú àndiⁿ taxi tñuní ñahá-gã xii-ndo ndìhi-yu, te sá cúú-xí mèe-gá chí ñⁿ-ni cùu-ndo núú-gã, te ñⁿ-ni càda ñaha-gã xii-ndo.

Yá Ndiöxí chindèe-gá cue ñáiyu ndècu ichi-gá cuendá sá vã ndácú sàcuíhná nàa ndìhi ñaha-xi xii-yu

¹⁰ Te vitna nchaa nchòhó ñáiyu ndècu ndìhi-í ichi Xítohó Jesucristú càchí tnúhu-í xii-ndo sã ío nducu-ndo nàcuáa cada-ndo ñihí ndéé-ndó cùu ñⁿ-nuu-ndo ndìhi Xítohó Jesucristú, chí mee-gã ío càhnu cuu-gá, te chindee ñaha-gã xii-ndo. ¹¹ Te ñⁿ-ni nchaa sã ñi nduu táhú-ndó núú Yá Ndiöxí ñⁿ-ni nchaa xiáⁿ cuhuⁿ iní-ndó, chí xiáⁿ chindee ñaha-xi xii-ndo níhi ndéé-ndó cündecu-ndo cuendá sá vã dándàhú ñahá sàcuíhná

xii-ndo. ¹² Chi nchoo ñà díú cuè ñáyiú ñuyíú-a nàá ndihí-o, chi ndihí cue espíritú cündihí yucu ñávãha, te ñu-ni nchaa espíritú-án cùnùu-xi cuéi núú ñnu quide-xi nchaa sá cuèhé sá dúhá, te ñu-ni-xi cùnùu-xi ñuyíú-a sànu ichí-xi cue ñáyiú quidé-yu nchaa sá cuèhé sá dúhá. ¹³ Te ío cuhuⁿ iní-ndó nchaa sá ñi nduu táhú-ndó núú Yá Ndiöxí cuendá ducaⁿ ñihí ndéé-ndó cundece-ndo, te vá ndácú yucu ñávãha ná cada ñaha-xi xii-ndo oré cuení-xi coto ndeé ñáhá-xí. Te sátá ná dàquee tíhú-ndó yucu ñávãha te ñihí-ni cunduu-ndo cundece-ndo ichi Yá Ndiöxí. ¹⁴ Te ducaⁿ cundece-ni-ndo ichi Yá Ndiöxí cada-ndo dàtná xiquide cue sandàdú, chi cue téé-án ño ñihí xindáa-güedé. Te cáháⁿ-ndó mée-ni tnúhu ndáá tnúhu Yá Ndiöxí, te cuu-ndo dàtná cue sandàdú cue téé ndàda tíi xití-xi òré quihíⁿ-güedé nàá-güedé. Te ducaⁿ sãtnahá-xi cuu-ndo te núu na cáháⁿ-ndó mée-ni tnúhu ndáá tnúhu Yá Ndiöxí. Te cada ndáá-ndó cundece-ndo ichi-gá, te cuu-ndo dàtná cue sandàdú cue téé xixihnu sá yidãhu ñaha xii-güedé òré nàá-güedé cuendá sá vã ñicuehé-güedé. Te ducaⁿ sãtnahá-xi cuu-ndo te núu na càda ndáá-ndó cundece-ndo ichi-gá. ¹⁵ Te cundece túha-ndo cáháⁿ-ndó tnúhu Xitohó Jesucristú, tnúhu sá cáháⁿ nãcuáa cuu váha iní ñáyiú cundecú-yu, te cuu-ndo dàtná cue sandàdú cue téé ndíhu zapatú-xi quihíⁿ-güedé nàá-güedé. Te ducaⁿ sãtnahá-xi cuu-ndo te núu na cundece túha-ndo cáháⁿ-ndó tnúhu Xitohó Jesucristú núú ñáyiú. ¹⁶ Te càhí tnúhu tucu-í xii-ndo sã ño quindáa iní-ndó Yá Ndiöxí cuendá sá vã ndácú sãcuíhná nã cada ñaha-xi xii-ndo, te ducaⁿ te cuu-ndo dàtná cue sandàdú cue téé xinehe vítú chínè-güedé sãquidãhu ñaha-xi xii-güedé cuendá sá vã cuicúⁿ-güedé sã nchicúⁿ ñuhú téé ñaha cue téé nàá ndihí-güedé. Te ducaⁿ sãtnahá-xi cuu-ndo te núu na quindáa iní-ndó Yá Ndiöxí. ¹⁷ Te ío cuhuⁿ iní-ndó sã ñi naníhí tàhú-ndó, te cuu-ndo dàtná cue sandàdú cue téé ñuhu mbelú cáxíⁿ. Te ducaⁿ sãtnahá-xi cuu-ndo te núu na cuhuⁿ iní-ndó sã ñi naníhí tàhú-ndó. Te ío cuhuⁿ iní-ndó tnúhu Yá Ndiöxí, chi tnúhu-án ñi taxi Espíritú-gá ndécú ndihí-ndo chindee ñaha-xi xii-ndo, te cuu-ndo dàtná cue sandàdú cue téé xinehe machití cuáháⁿ-güedé nàá-güedé.

Te ducaⁿ sãtnahá-xi cuu-ndo te núu na cuhuⁿ iní-ndó tnúhu Yá Ndiöxí. ¹⁸ Te vá dàña ndéé-ndó cáháⁿ ndihí-ndo Yá Ndiöxí nãcuáa chindee ñaha Espíritú-gá xii-ndo, te cácáⁿ táhú-ndó núú-gã ñu ná cuení-ndó, te ío cundece túha-ndo cáháⁿ ndihí-ndo-gã, te vá nátuhú iní-ndó cácáⁿ táhú-ndó núú-gã cuendá nchaa dava-gã cue ñáyiú cùu cuendá-gã. ¹⁹ Te tnáhá cuendá-í cácáⁿ táhú-ndó núú Yá Ndiöxí cuendá sá ná chindee ñaha-gã xii-í ñihí-í tnúhu cáháⁿ-í òré cáháⁿ-í tnúhu-gã, te ducaⁿ vã yuhú-í cáháⁿ-í nãcuáa ndùu tnúhu sá cáháⁿ nãcuáa naníhí tàhú-ó núú ñáyiú tnúhu sá vãtá cündedóho-gã-yu. ²⁰ Te Yá Ndiöxí ní cachí-gã sá yuhú cuu-í ñiⁿ téé cada-í núú-gã cáháⁿ-í tnúhu-gã núú ñáyiú, te ñu cuendá tnúhu-án yihí-í vecaá vitna. Te ío cácáⁿ táhú-ndó núú Yá Ndiöxí cuendá-í cuendá sá yuhú cuyiⁿ-í ñi yuhu ñi iní-í cáháⁿ-í tnúhu-gã núú ñáyiú nãcuáa tàú-xi cunduu.

Tnúhu ndéé núú ñi ndihí-ná

²¹ Te té Tiquicú téé ío cùu iní-í ndécú ndihí-o ichi Xitohó Jesucristú cúu-dé ñiⁿ téé ío váha quide ndáá xínú cuèchi-dé núú Xitohó Jesucristú, téé-án cachí tnúhu-dé xii-ndo nãcuáa cùu ndecu-í ndihí nchaa nãcuáa quide-í cuendá ducaⁿ cùtnuní iní-ndó. ²² Te cuendá xixáⁿ ñu cuení-í tendaha-í-dé quixi-dé núú ndécú-ndó cuendá cachí tnúhu-dé xii-ndo nchaa nãcuáa cùu ndecu-ndí iha, te ducaⁿ tàxi-gã-dé tnúhu ndeé iní cundece ndihí-ndo.

²³ Te xicáⁿ táhú-í núú Tãtã-ó Dütú Ndiöxí ndihí núú Xitohó Jesucristú sã ncháa nchòhó ñáyiú ndècu ndihí-í ichi-gã sã ñu-gã ná cáda te ío váha cuu iní-ndó cundece-ndo, te ducaⁿ ño cuu iní tnáhá-ndó, te ío quindáa iní-ndó-gã. ²⁴ Te nchòhó ío cùu iní-ndó Xitohó Jesucristú, te ñá túú dàña ndeé-ndó cùu iní-ndó-gã. Te mee Yá Ndiöxí ío na chindee chitúu ñaha-gã xii-ndo. Te ducaⁿ na cunduu. Te ío chí cáda ndèe iní-nã vitna.

TUTÚ NÍ CADÚHA TĒ PĀBLÚ QUIHIⁿ NDAHA ÑÁYIU ÑUÚ FÌLIPÚ

Té Pāblú cadūha-dé tutú quíhíⁿ ndaha ñáyiú quide ndáá xĩndecu ichi Xítóhó Jesucristú ndécú ñuú Fìlipú

¹ Yúhú té Pāblú ndihí té Timùteú cúú-ndí cue téé xĩnu cuechi núú Xítóhó Jesucristú, te tēndaha-ndí tutú-a véxi ndaha nchòhó cue téé yĩndaha nchaa ñáyiú ndècu ichi Xítóhó Jesucristú, ndihí cue téé chĩndee ñaha xii-ndo, ndihí nchaa dava-gá ñáyiú xĩquide ndáá ndécú ìchi-gá ñuú Fìlipú. ² Te xicáⁿ táhù-í núú Tátá-ó Dütú Ndiõxí ndihí núú Xítóhó Jesucristú sá ná chĩndee chitúu ñaha-gá xii-ndo, te ducaⁿ ndì nduú-gá ná cádá te ío váha cuu iní-ndó cùndecu-ndo.

Té Pāblú cāháⁿ ndihí-dé Yá Ndiõxí cuendá nchaa ñáyiú ndècu ichi-gá

³ Te ndi tnahá òré ndácú ìní ñáhà-í xii-ndo, te ndácáⁿ táhù-í núú Tátá-ó Dütú Ndiõxí sá ndécú-ndó ìchi-gá. ⁴ Te ndi tnahá òré ducaⁿ quide-í te ío cùdí ìní-í cāháⁿ ndihí-í-gá cuendá-ndó. ⁵ Chi ndéé cútnàhá ní sándáá iní-ndó-gá ní ngüíta-ndo tnàhá-ndó quide váha-ndo ndècu-ndo cuendá sá quĩndáá iní ñáyiú tnúhu Xítóhó Jesucristú. ⁶ Te yúhú sàni ndáá iní-í sá Yá Ndiõxí Yáá ní quesaha chĩndee ñaha xii-ndo quide váha-ndo ndècu-ndo, te ñu-ni-gá chĩndee ñaha-gá xii-ndo càda váha-ndo cùndecu-ndo ndéé ná sàá nduu quixi tucu Xítóhó Jesucristú. ⁷ Te ducaⁿ tnàhí tàú-xi cani iní-í sá cúú-xí-ndó, chi ío cùu iní ñáhà-í xii-ndo. Te tnàhá-ndó ío chĩndee chitúu ñaha Yá Ndiõxí xii-ndo ndècu-ndo, te ñu-ni ducaⁿ chĩndee ñaha-gá xii-ndo tnàhá-ndó cuèi vitna yìhí-í vecaá, te ñu-ni ducaⁿ chĩndee ñaha-gá xii-í cuèi òré cuáhàⁿ-í núú cuè ñáyiú ñá túú tnàhá iní tnúhu-gá, chi ñihí-í tnúhu nādanhocáva-í nūu ná tnúhu cāháⁿ-yu cuendá-gá, te nchaa ñáyiú xāháⁿ-í xii-yu sá tnúhu-gá cúú-xí tnúhu ndáá cuiti. ⁸ Te mee Yá Ndiõxí nāhá ndáá-gá sá yúhú ío cùu iní ñáhà-í xii-ndo dàtná cúú ìní ñáhà mèe Xítóhó Jesucristú xii-o. ⁹ Te xicáⁿ

táhù-í núú Yá Ndiõxí sá díú-gá ná chĩndee ñaha-gá xii-ndo te uuⁿ-gá cuita cuu iní tnàhá-gá-ndó quíhíⁿ, te ducaⁿ ío váha cuita cutnùní iní-ndó nchaa nacuáa sàni iní-gá cada-ndo, te ducaⁿ ío váha cuita cutnùní tucu iní-ndó nācuáa cundecu-ndo. ¹⁰ Te ducaⁿ cùtnuní tucu iní-ndó nchaa sá ío-gá váha xini ñuhu-xi cada-ndo, te ducaⁿ te cuu-ndo ñáyiú cada mee-ni sá váha, te ducaⁿ ñà túú tnàhí ná cùmání-ndó nūú Yá Ndiõxí ndéé ná sàá nduu quixi tucu Xítóhó Jesucristú. ¹¹ Te ñu-ni Xítóhó Jesucristú chĩndee ñaha-gá xii-ndo càda-ni-ndo nchaa núú sá váha nācuáa cuini Yá Ndiõxí. Te sá dúcáⁿ ná càda-ndo te ío cada cāhnu-ndo-gá, te nchaa dava-gá ñáyiú cāháⁿ váha-yu cuendá-gá.

Xítóhó Jesucristú ío cūnuu-gá ndécú ndihí-gá té Pāblú

¹² Te nchaa nchòhó ñáyiú ndècu ndihí-í ichi Xítóhó Jesucristú na càchí tnúhu-í xii-ndo sá úúⁿ-gá tá xité nuu tnúhu-gá vitna yìhí-í vecaá. ¹³ Te nchaa cue téé cùu sandadú xĩndecu vechiⁿ núú ndécú tēe cūnuu xini-güedé sá sá cuendá sá cāháⁿ-í tnúhu Xítóhó Jesucristú duha yìhí-í vecaá, te ñu-ni ducaⁿ sá xini nchaa dava-gá ñáyiú sá sá cāháⁿ-í tnúhu-gá duha yìhí-í vecaá. ¹⁴ Te cuendá sá dúhá yìhí-í vecaá xĩáⁿ ío-gá vai ñáyiú ndècu ichi Yá Ndiõxí ta cùtnuní-gá iní-yu sá cúú-gá ñⁿ Yáá ío quide ndáá, te uuⁿ-gá tá cùyíⁿ-yu cāháⁿ-yu tnúhu-gá, te ñá túú tnàhí-gá yúhú-yu cāháⁿ-yu.

¹⁵ Te na càchí-í tnúhu ndáá-í xii-ndo sá dàva ñáyiú cāháⁿ-yu tnúhu Xítóhó Jesucristú cuendá-ni sá cúú cuèdú ìní ñáhà-yu xii-í sá ío chĩndee ñaha-gá xii-í cāháⁿ-í tnúhu-gá. Te ducaⁿ quidè-yu chi cuini-yu nàá ndihí ñáhà-yu xii-í, dico davá-yu chi ío váha sàni iní-yu cāháⁿ-yu tnúhu-gá. ¹⁶⁻¹⁷ Te ñáyiú-áⁿ cāháⁿ-yu tnúhu-gá chi cùu ìní ñáhà-yu xii-í, te sa nāhá-yu sá sá cuendá sá cāháⁿ váha-í cuendá tnúhu-gá núú ñáyiú ñá túú tnàhá ìní tnúhu-gá, cuendá xĩáⁿ yìhí-í vecaá. Te dava-gá-yu cāháⁿ-yu tnúhu Xítóhó Jesucristú cuendá-ni sá cuini-yu cuu sá váha xii mèe-yu, te ñá díú sá cāháⁿ-yu cuendá sá sání váha iní-yu. Te ducaⁿ quidè-yu chi cuendá cuini-yu sá nāndí-gá

cada ñaha-güedě xii-í. ¹⁸ Dico ío cùdíí ìní-í sá càháⁿ-yu tnúhu Xítohó Jesucristú cuèi cùu váha ìní-yu àdi ñá túú cùu váha ìní-yu càháⁿ-yu.

Te ñu-ni ducaⁿ cùdíí ìní-í núú cuàháⁿ núú vèxi. ¹⁹ Te cùtnuní ìní-í sá sã cuèndá nchaa sá quidé ñaha-güedě xii-í, cuèndá xiãⁿ cada váha ñaha Yã Ndiõxí xii-í, chi nchòhó ío càháⁿ ndihí-ndo-gã cuèndá-í, te Espíritú ní taxi Xítohó Jesucristú ndécú ndihí-o ío chindee ñaha-xi xii-í. ²⁰ Te cuìní-í sá ñã túú tnàhí ná cumàni-í núú Yã Ndiõxí cuèndá sá vã cúú càháⁿ núú-í, te cùtnuní ìní-í sá díú-gã chindee ñaha-gã xii-í. Te cuìní tucu-í sá ïo cuyi-í càháⁿ-í tnúhu-gã vitna dàtná tá quide-í véxi, te ducaⁿ ïo cada nínu-í Xítohó Jesucristú cuèi vitna ñini ndècu-í ñuyíú-a te cuèi na cùú-í ducaⁿ-ni càda nínu-í-gã. ²¹ Te ñini ndècu-í ñuyíú-a te Xítohó Jesucristú ío cùnuu-gã ndécú ndihí ñaha-gã xii-í, te na sàá nduu cùú-í te ío-gã váha tnàhá-í chi nucúndecu-í ndihí-gã. ²² Te núu na cùndecu-gã-í ñuyíú-a te cada-gã-í chiúⁿ sá cúú-xí Yã Ndiõxí, te ñã cùtnuní ìní-í nása cada-í núu sá cùndècu-í àdi sá cùú-í. ²³ Te ío vãi sani ìní-í te cuìní-í cúú-í chi ío-gã váha cundecu-í núú ndécú Xítohó Jesucristú. ²⁴ Dico sá cúú-xí nchòhó chi ío xini ñuhu-xi cundecu-í. ²⁵ Te cùtnuní ndáá ìní-í sá ñi tnúhu ndáá càháⁿ-í, te cùtnuní tucu ìní-í sá cùndècu-ni-í cundecu ndihí ñaha-í xii-ndo nchàa-ndo cuèndá chindee ñaha-í xii-ndo cuíta quindáá-gã ìní-ndó Xítohó Jesucristú quíhíⁿ, te ducaⁿ ïo cudíí ìní-ndó cùndecu-ndo. ²⁶ Te ducaⁿ te uuⁿ-gã cachí-ndó sã ïo càhnu cuu Xítohó Jesucristú cuèndá sá ñi dácãcu ñaha-gã xii-í ndécú ndihí ñaha-í xii-ndo.

²⁷ Te xini ñuhu-xi cada-ndo nchaa nacuaá càháⁿ tnúhu Xítohó Jesucristú. Te núu ní ndacu-í véxi coto ñaha-í xii-ndo, te dàvá-án quiní ndáá-í sá ndécú-ni-ndó ìchi Xítohó Jesucristú. Dico núu ñá túú ní ndacu-í quixi coto ñaha-í xii-ndo ñã, te ñu-ni níhí-í tnúhu sá ndécú-ni-ndó ìchi-gã, te níhí tucu-í tnúhu sá ñi-ni cùu-ndo ndecu-ndo, te níhí tucu-í tnúhu sá ñi-nu nducu ndee-ndo caháⁿ-ndó tnúhu Yã Ndiõxí núú ñáyu, tnúhu sá sàndáá ìní-ndó. ²⁸ Te ñá túú yuhú-ndó nchàa sá quidé ñaha ñáyu cùu úhú ìní ñahá xii-ndo, te sá dúcáⁿ quide-ndo ñá túú yuhú-ndó

nchàa sá quidé ñahá-yu xii-ndo, te ndixi túu ìní-yu sá nchòhó ndécú-ndó ñiⁿ ichi núú nánihí tãhú-ndó, te ñáyu-áⁿ cuíta ñi-hnú-yu, chi ducaⁿ ñi cachí Yã Ndiõxí cunduu. ²⁹ Te mee Yã Ndiõxí ní taxi-gã tnúhu ndee ìní sá quindáá ìní-ó Xítohó Jesucristú, te ñá díú-ni sã quindáá ìní-ó-gã chi tnàhá ndoho-o cuèndá-gã. ³⁰ Te tnàhá nchòhó ndóhó-ndó cuèndá-gã vitna, te nchòhó ní xiní núú-ndó nacuáa ní ndoho-í, te vitna ñihí-ndó tnúhu nchaa nacuaá ndòho tucu-í.

2

Xítohó Jesucristú ñá túú ní quide nínu-gã mée-gã dico Yã Ndiõxí ní quide nínu ñaha xii-gã

¹ Te Xítohó Jesucristú dácàhu ìní ñahá-gã xii-ndo nacuaá cundecu-ndo, te cùu ìní ñahá-gã xii-ndo nacuaá cuu váha ìní-ndó cùndecu-ndo, te ndècu ndihí-ndo Espíritú Yã Ndiõxí, te ío cùndahú ìní tnàhá-ndó. ² Te xiãⁿ núu càháⁿ-í dóho-ndo sã ïo cuu ñi-nu-ni-ndo cùndecu-ndo nacuaá ío-gã cudíí ìní-í, te ñi-ni cùu ìní tnàhá-ndó, te ñi-ni càni ìní-ndó, te ñi-ni càda-ndo. ³ Te vã cáda ñi-nu-ndo mée-ndo nducu-ndo mee-ni sá cúú-xí mée-ndo, chi cunduu ndàhú ìní-ndó, te caní ìní-ndó sã tnàha ñáyu-ndo ïo-gã cùnùu-yu dácúúxí mée-ndo. ⁴ Te ni vã cáni ìní-ndó nducu-ndo mee-ni sá váha sá cúú-xí mée-ndo, chi nducu-ndo sã cúú-xí tnàhá cuèndá tnàha ñáyu-ndo.

⁵ Te ío váha caní ìní-ndó nacuaá cundecu-ndo dàtná quidé mée Xítohó Jesucristú. ⁶ Te ñi-ni cùu Xítohó Jesucristú ndihí Yã Ndiõxí. Te cuèi ducaⁿ dico mee Xítohó Jesucristú ní sani ìní-gã sã ñã túú cùyica cundecu-gã taxi tnùn-í-gã ndihí Yã Ndiõxí. ⁷ Te ní dáñá-gã sá cùnùu-gã andiu te ní quixi-gã ñuyíú-a ní cuu-gã ñi ñáyu, te ní quide-gã dàtná quidé ñi tée xinu cuechi. ⁸ Te ní cuu-gã ñi tée dàtná ndãa cue tée xindecu ñuyíú-a, te ní cuu-gã ñi tée ío ndàhú ìní-xi chi ñá túú ní quide nínu-gã mée-gã, te ní sàndáá ìní-gã ní quide-gã nchaa nacuaá ní xáhaⁿ Yã Ndiõxí xii-gã cùtnàhá ní quixi-gã ñuyíú-a. Te sá dúcáⁿ ñi sàndáá ìní-gã xiãⁿ ní xihí-gã núú cùrúxí. ⁹ Te xiãⁿ ío ní quide nínu ñaha Yã Ndiõxí xii Xítohó Jesucristú cuèndá ío cunuu-gã. Te ní xáhaⁿ Yã Ndiõxí xii Xítohó Jesucristú sá cúú-gã Xítohó nchaa

ñáyiú ndècu ñuyíú-a. ¹⁰ Te ducaⁿ ñi quide Yá Ndiòxí cuendá nchaa Espiritú ndécú àndiú, ndihi nchaa ñáyiú ndècu ñuyíú-a, ndihi nchaa ñáyiú ní xihí ngüñí xití-yu ndihi nchaa espíritú-áⁿ te cachí-yu ndihi-xi sá ïo càhnu cuu Xítohó Jesucristú. ¹¹ Te nchaá-yu cachí-yu sá Xítohó Jesucristú cúú-gã Yaá táxi tñuní. Te sá dúcáⁿ càdá-yu, te quide cahnú-yu Dútú Ndiòxí.

Ñáyiú ndècu ichi Xítohó Jesucristú cúú-yu dàtná ñⁿ ñuhú

¹² Te xiáⁿ ñuu nchaa nchòhó ñáyiú ïo cùu iní-í cuini-í sá quindáá iní ñáhá-ndó xii-í dàtná ní quide-ndo cùtnàhá ní xíndecu ndihi ñaha-í xii-ndo, chi dàvá-áⁿ ñà túú tñahí ni dàña ndeé-ndó ni sándáá iní ñáhá-ndó xii-í. Te cuini-í sá úúⁿ-gã quindáá iní ñáhá-ndó xii-í vitna ñà túú ndècu ndihi ñaha-í xii-ndo. Te ïo nducu ndèe-ndo cada-ndo nchaa nacúáa tàú-xi cunduu ndeé ná sáá nduu ndúu táhú-ndó cùndecu-ndo ndihi Xítohó Jesucristú, te ïo canehe-ndo sá yíñùhu núú-gã. ¹³ Te Yá Ndiòxí ïo váha dàcahu iní ñáhá-gã xii-ndo càda-ndo nchaa nacúáa cuini-í mée-gã, te ñuu-ni mee-gã chíndèe ñaha-gã xii-ndo dùcaⁿ quide-ndo.

¹⁴ Te vá caní iní-ndó ñà tñuhu cáháⁿ-ndó cuendá ñáyiú, te ni ñà túú nãndi tñuhu cùtnàha-ndo ndihí-yu, ¹⁵ te ducaⁿ te cuu-ndo ñáyiú ñà túú cuèchi-xi núú Yá Ndiòxí. Te nchòhó ñáyiú cùu déhe Yá Ndiòxí, ñà túú tñahí-gã ná cumání-ndó núú-gã ñini ndècu-ndo tnuú nchaa ñáyiú ndècu ichi cuehé ichi duha ñuyíú-a, ñáyiú cuihna iní-xi. Te cuu-ndo dàtná chódíní sá dáyèhé niú nee, ¹⁶ te ducaⁿ chi dàcuaha-ndo ñáyiú tñuhu Yá Ndiòxí tñuhu sá cáháⁿ nacúáa naníhí tàhú-yu. Te núu ducaⁿ-ni na càda-ndo te òré ná sáá nduu càda ndáá Xítohó Jesucristú nchaa yíca cuèchi ñáyiú, te dàvá-áⁿ vã cúú càhaⁿ núú-í, chi ñà túú diò ducaⁿ ni sàhni iní-í cada-í nchaa chiúⁿ ní táhú-gã. ¹⁷ Te nchòhó ïo váha quide-ndo ndecu-ndo ichi Yá Ndiòxí chi sándáá iní-ndó-gã, te yúhú cahni ñaha-güedé xii-í cuendá nchaa sá váha quide-ó. Te xiáⁿ ïo cùdíí iní-í te cùdíí tucu iní-í dàtná cùdíí iní-ndó cuendá nchaa sá váha quide-ndo. ¹⁸ Te ñuu-ni ducaⁿ ïo chí cùdíí iní dàtná cùdíí iní mée-í cuendá nchaa sá yãha-í ndécú-í.

Té Timùteú ndihi té Epafròditú

¹⁹ Te núu Xítohó Jesucristú ná càchí-gã te ndíhi-ni tendaha-í té Timùteú quixi-dé quixi coto ñaha-dé xii-ndo nacúáa cudíí iní-ndó. Te òré ndixi-dé canaha-dé tñuhu ndixi núu nása cùu ndecu-ndo, te tñahá yúhú ïo cudíí iní-í tucu. ²⁰ Te núu ncháá cuè téé ndècu ndihi-í te ñⁿdii-ni té Timùteú-a cùu-dé téé ïo váha sàni iní-xi dàtná sání iní-í, chi ñuu tñahí-ni-dé ïo sàni iní-dé ñuu nása ndècu-ndo. ²¹ Chi dava-gã-güedé mee-ni sá cúú-xi mée-güedé ïo sàni iní-güedé, te ñà túú sàni iní-güedé cada-güedé chiúⁿ tahu Xítohó Jesucristú. ²² Te nchòhó sa xini-ndó sã té Timùteú-a cùu-dé ñⁿ téé quide váha chi nãndi sá tá yãha-dé véxi te quide ndee iní-dé. Te cùu-dé dàtná ñⁿ déhe-í ndécú ndihi ñaha-dé xii-í xínú cuèchi-ndí núu Xítohó Jesucristú cáháⁿ-ndí tñuhu-gã núu ñáyiú. ²³ Te òré ná cùtnuní ñuu nása cada ñaha-güedé xii-í te ndíhi-ni tendaha-í-dé quixi coto ñaha-dé xii-ndo. ²⁴ Te sàni iní-í sá Xítohó Jesucristú cada-gã te tñahá mée-í ïo ndíhi quixi coto ñaha-í xii-ndo.

²⁵ Te tñahá sání iní-í sá ïo xini ñuhu-xi tendaha-í té Epafròditú téé ndècu ndihi-o ichi Xítohó Jesucristú ndixi coto ñaha-dé xii-ndo, chi tñahá-dé quidé-dé chiúⁿ-gã te quide ndee iní-dé tñahá-dé nãndi yãha-dé sá cuendá-gã, te ñuu mee-ndo ñi tendaha-ndo-dé véxi-dé cuendá coto ñaha-dé xii-í. ²⁶ Te ducaⁿ cuini-í tendaha-í-dé ndixi-dé chi mee-dé ïo sàni iní-dé ndixi cáháⁿ ndihi ñaha-dé xii-ndo, te ïo ndíhú iní-dé sá ni ñihí-ndó tñuhu sá cùhú-dé ní cùu. ²⁷ Te ndáá sá ñi cùhú-dé chi luha ndiquíⁿ-ná cuú-dé ní cùu, dico Yá Ndiòxí ní cundàhú iní ñáhá-gã xii-dé ní quide tátna ñaha-gã te ní ndúha-dé. Te ñà díú-ni mée-dé ducaⁿ ni cundahú iní ñáhá-gã xii-dé chi tñahá yúhú ïo ní cundàhú iní ñáhá-gã xii-í, chi núu ni xihí-dé te ïo-gã ndíhú iní-í ní cùu. ²⁸ Te xiáⁿ ïo ndíhi cuini-í tendaha-í-dé ndixi-dé cuendá òré nasáá-dé núú-ndó te ïo cudíí iní-ndó, te ducaⁿ yúhú ñà túú-gã ná caní iní-í. ²⁹ Te òré nasáá-dé te ïo cudíí iní-ndó nàqueheⁿ cuendá-ndó-dé, te ducaⁿ ïo ndacáⁿ táhú-ndó núu Xítohó Jesucristú cuendá-dé. Te ïo canehe-ndo sá yíñùhu núu nchaa cue téé quide datná quidé-dé. ³⁰ Chi téé-a sa luha ndiquíⁿ-ná cuú-dé ní cùu sá

xínú cuèchi-dé núú Xítóhó Jesucristú, te ní sani iní-dé sá ñà túú nã cada-xi cuèi na cùú-dé ní quide-dé nchaa chiùⁿ sá cúmãní cada-ndo cuendá-í ní cùu.

3

Ñáyiu cùndáá núú Yã Ndiõxí

¹ Te vitna nchaa nchòhó ñáyiu ndècu ndihí-í ichi Xítóhó Jesucristú càháⁿ ndàhú-í núú-ndó sã ïo cudíí iní-ndó sã yíndàha ñaha-gá xii-ndo. Te yúhú ñá túú cùu dusaⁿ-í tee tucu-í nchaa tnúhu sá sã ní dánèhé ñàhà-í xii-ndo, chi cùu-xi tnúhu sá ïo chindee ñaha-xi xii-ndo. ² Te ïo quíhi iní-ndó vã cáda cuendá-ndó ni ìⁿ tnúhu càháⁿ cue téé ïo cuihna iní-xi ñá túú tnàhí cuiní cada sã vãha, chi cue téé-áⁿ néhé-güedé iní iná chi càchí-güedé sá ncháá cué téé xini ñuhu-xi cuáha-güedé sèñá ñi-güedé cuendá ducaⁿ cùdiu-güedé núú Yã Ndiõxí. ³ Dico nchoo chi cùdiu-o núú Yã Ndiõxí cuèi dava-o sã ní ngündecu sèñá ñi-o te dava-o ñáhá, chi Espiritú-gá chindèe ñaha-xi xii-o quide-o nchaa nacuaa tàú-xi cunduu cuendá cuu càhnu-gá. Te ïo cudíí iní-ó càchí-ó sã ïo càhnu cuu Xítóhó Jesucristú, te ñá túú sàni iní-ó sã sã cuendá nchaa sã vãha quide-o cùdiu-o núú Yã Ndiõxí. ⁴ Te núú dìcò cuendá nchaa sã vãha quide-o cùdiu-o núú Yã Ndiõxí, te yúhú sa ama-gá cùdiu-í núú-gã cuendá nchaa sã ñi quide-í ní cùu te núu dìcò ducaⁿ. Te ïo cue téé càchí-güedé sã cùdiu-güedé núú Yã Ndiõxí cuendá nchaa sã vãha quide-güedé. Te yúhú uuⁿ-gã ducaⁿ càháⁿ-í nũu dìcò sã cúú chi yúhú ní xidó-gã-í ní quide-í dàcúúxí dàva-gã-güedé. ⁵ Te núú ùná-ni nduu sã ñi cacu-í te ní sãha-güedé sèñá ñi-í, te yúhú cúú-í téé isràél, te mei ñàni tnàhá ndíi Benjàmín téé ní xíndecu ndéé sanaha cùu-í. Te càháⁿ-í tnúhu hèbreú tnúhu càháⁿ tãtà-í ndihí nãnà-í, te ní cundihí-í nchaa cue téé cùu fariséú, te ní cãncicúⁿ nihnu-í nchaa nàcuáa ní cáháⁿ ndíi Moisés dàtná xíquide mee-güedé. ⁶ Te yúhú ní sani iní-í sã ìⁿ ichi ndáá ndécù-í ní cùu, te ïo ní cuiní-í cunu cuechi-í núú Yã Ndiõxí, núu xíãⁿ nãndi sã ñi quide-í nchaa ñáyiu ndècu ichi Xítóhó Jesucristú, te vã yõo ìⁿ ni xóo cúñaha ìⁿ tnúhu xii-í cachí-yu sã ñà túú quide-í nàcuáa ní cáháⁿ ndíi Moisés ní cùu. ⁷ Te

nchaa sã sání iní-í sã ïo nãndihí nchicúⁿ nihnu-í ní cùu, ní cutnùní iní-í sã ñà túú tnàhí chindee ñaha-xi nacuaa cundáá-í núú Yã Ndiõxí, núu xíãⁿ duuⁿ duuⁿ ní xehndé iní-í sã vã chindèe ñaha-xi cuendá sã ñi cuiní-í cundecu ndihí-í Xítóhó Jesucristú. ⁸ Te nchaa sã càchí ñáyiu chindee ñaha cundáá-ó núú Yã Ndiõxí ní cutnùní iní-í sã ñà túú chindee ñaha-xi. Te yúhú ní cutnùní iní-í sã ïo-gã vãha tnàhá tnúhu-o ndihí Xítóhó Jesucristú. Te nchaa sã sání iní-í chindèe ñaha xii-í ní cùu, ñá túú-gã sàndáá iní-í sã chindèe ñaha-xi vitna chi ní cutnùní iní-í sã ñà túú nãndihí-xi. Te ducaⁿ quide-í ñá túú-gã sàndáá iní-í nchaa xíãⁿ sã chindèe ñaha-xi, chi cuiní-í sã úúⁿ-gã cuita tnàhá tnúhu-í ndihí Xítóhó Jesucristú quíhíⁿ, ⁹ te cuu ìⁿnuu-í ndihí-gã, te ducaⁿ-ni cundáá-í núú Yã Ndiõxí dàtná cundáá-í vitna, dico ñá díú cuendá sã nchicúⁿ nihnu-í nàcuáa ní cáháⁿ ndíi Moisés ní cùu, chi cuendá sã sàndáá iní-í Xítóhó Jesucristú. Te Yã Ndiõxí ní quide-gã cundáá-í núú-gã, te ducaⁿ chi ní sàndáá iní-í Xítóhó Jesucristú. ¹⁰ Te cuiní-í cutnùní iní-í nchaa nàcuáa sàni iní Xítóhó Jesucristú, te cuiní-í sã ïo chindee ñaha-gã, te diu-ni-gã cúú-gã Yaá ní xihí te ní ndoto-gã, te ducaⁿ cuiní-í cada-gã cuendá cada-í nchaa nàcuáa cuiní-gã. Te cuiní-í tnàhá-í ndoho-í dàtná ní ndoho-gã. Te yúhú cuiní-í sã vã cáda-í ni ìⁿ sã ñà túú tnàhá iní Yã Ndiõxí, chi diu cuendá-áⁿ ni xihí Xítóhó Jesucristú. ¹¹ Te cuiní-í sã Yã Ndiõxí cachí-gã te tnàhá-í ndoto na sàá nduu ndòto nchaa ñáyiu sa ní xihí ní xíndecu ichi-gã.

Cada-o nchaa nacuaa tàú-xi cunduu cuendá níhí-ó sã ndúú tãhú-ó

¹² Te cùmání-gã cada-í nchaa nàcuáa càháⁿ-í-a, te cùmání-gã cada-í nchaa nàcuáa càháⁿ Yã Ndiõxí cuendá sã ñà túú-gã ná cumání-í núú-gã. Te ïo ndùcu ndee-í nchicúⁿ nihnu-í quide-í nàcuáa ducaⁿ ñà túú-gã ná cumání-í núú-gã, chi diu cuendá-áⁿ ni cáháⁿ ñáhá Xítóhó Jesucristú xii-í. ¹³ Te nchaa nchòhó ñáyiu ndècu ndihí-í ichi Xítóhó Jesucristú càchí tnúhu-í xii-ndo sã cùtnuní ndáá iní-í sã vitná cùmání-gã cada-í nchaa nàcuáa ñá túú-gã ná cumání-í núú-gã. Te ní níhí-í ìⁿ sã ïo xini ñuhu-xi cada-í te xíãⁿ quide-í, te

ñá túú-gă quidé cuendá-í nchaa sá ñí xóo cada-í, te ío ndücu ndee-í quidè-í nchaa nàcuáa càháⁿ Yă Ndiöxí. ¹⁴ Te ndücu ndee vihi-í nchicúⁿ nihnu-í quidè-í nchaa nàcuáa càháⁿ-gá, te ñiu-ni ducaⁿ càda-í ndéé ná sàá nduu sáá-í núú ndécú-gă taxi-gá sá ndúú tãhù-í. Te ducaⁿ tnàhí sa ní càháⁿ ñáhá-gă xii-o cùndecu-o ndihi-gá, te ducaⁿ ñí càháⁿ ñáhá-gă xii-o sã cuendá Xítóhó Jesucristú chi tnàhá tnúhu-o ndihi-gá.

¹⁵ Te nchaa nchòhó ñáyiú quide váha ndècu ichi Yă Ndiöxí xini ñuhu-xi cani iní-ndó dàtná sání iní-í-a, àdi núu dava-ndo ñà túú sàni iní-ndó dàtná sání iní-í-a, dico mee Yă Ndiöxí dandixi túu-gá iní-ndó te cutnùní iní-ndó nàcuáa cada-ndo. ¹⁶ Te xini ñuhu-ni-xi cada-o nchaa nacuáa ta quide-o véxi.

¹⁷ Te nchaa nchòhó ñáyiú ndècu ndihi-í ichi Xítóhó Jesucristú càháⁿ-í dóho-ndo sã cãncchícúⁿ nihnu-ndo càda-ndo datná quidè-í. Te cundehe-ndo nàcuáa quide nchaa ñáyiú sa nchicúⁿ nihnu nchaa nàcuáa dãnehé ñáhà-í xii-ndo cuendá ducaⁿ càda-ndo tnahá-ndó. ¹⁸ Te sa ní cuu vai xito cachí tnúhu-í xii-ndo sã ío ñáyiú ñá túú tnàhí cùu váha iní-xi sá ñí xíhí Xítóhó Jesucristú núú cùrúxí cuendá sá nánihí tãhú-ó. Te ndihi ndute núu-í dãndacu iní ñáhà-í xii-ndo cuendá-yu. ¹⁹ Te sáá nduu te nchaa ñáyiú ducaⁿ xiquide-áⁿ cuíta nihnú-yu, chi mee-ni nchàa sá cuèhé sá dúhá ñuhu iní-yu te ñiu-ni nchaa xíãⁿ cúnùu quidé-yu, te cucahaⁿ núu-yu cuendá nchaa sá quidè-yu núu dìcò sá cúú, dico ñáhá chi da quide cahnú-yu mèe-yu cuendá nchaa xíãⁿ. Te mee-ni nchàa sá ío ñuyíú-a ñuhu iní-yu. ²⁰ Dico nchoo chi andiu ndècu núú cúú ñúú-ó, te ndètu cahnu-o sáá nduu quixi tucu Xítóhó Jesucristú nacuaca ñaha-gă xii-o. Te ñiu-ni-gá cúú-gă Yaá ní dácãcu nihnu ñaha xii-o núú ùhú núú ndáhú. ²¹ Te yiqui cùñú-ó chi vá cùdii-xi cundecu-xi dàtná cáá-xí vitna, dico mee Xítóhó Jesucristú nadama-gá yiqui cùñú-ó te ndada-gá dàtná ní nduu yiqui cùñú mèe-gă cùtnàhá ní ndoto-gá. Te ducaⁿ càda-gá chi ndàcu-gá quidé-gă nchaa sá váha càchí iní-gá, te ducaⁿ tàxi tnuní-gá nchaandi túhú sá ío.

4

Ío cudíí iní-ó sã ndécú-ó ichi Xítóhó Jesucristú

¹ Te nchaa nchòhó ñáyiú ío cùu iní-í ndécú ndihi-í ichi Xítóhó Jesucristú ío cuiní-í càháⁿ ndihi ñaha-í xii-ndo. Te ío cudíí iní-í cuendá nchaa sá váha quide-ndo chi ñá túú ní xíta chiuⁿ Yă Ndiöxí ní quide-í sá cúú-xi-ndó, te ñiu-ni nchòhó ñáyiú ío cùu iní-í càháⁿ-í dóho-ndo sã cãncchícúⁿ nihnu-ni-ndo ichi Xítóhó Jesucristú.

² Te yòhó tá Vòdiá ndihi yòhó tá Sıntiqué càháⁿ ndàhú-í núú-ndó sã cúú ñⁿnuu-ndo cundecu-ndo ichi Xítóhó Jesucristú. ³ Te yòhó té cùndihi-í quide ndáá quidé nchàa chiuⁿ quide-í, càháⁿ ndàhú-í núú-n sã chindèe tnúhu-n ùú ñáyiú ñáhá-áⁿ cuendá sá ná cùu ñⁿnuú-yu cundecú-yu, chi cùtnàhá ní xindecu ndihi ñáhá-yu xii-í ío ní chindee ñáhá-yu xii-í, ndihi té Clémenté, ndihi nchaa dava-gá-yu ní quide-ndí chiuⁿ Xítóhó Jesucristú, te nchaa ñáyiú-áⁿ sa yòdo tnuní-yu núú tütú Yă Ndiöxí sá ndúú tãhù-yu cundecú-yu ndihi-gá ñí caa ñí quíhíⁿ.

⁴ Te nchaa-ni nduu ío cudíí iní-ndó sã ndécú-ndó ichi Xítóhó Jesucristú. ¡Te càháⁿ-ni tucu-í dóho-ndo sã cudíí ndisa iní-ndó! ⁵ Te ío váha cuu iní-ndó càháⁿ ndihi-ndo ñáyiú cuendá ná cùtnuní iní-yu sá cúú-ndó ñáyiú váha iní-xi, chi sa ta cùyatni nduu quixi tucu Xítóhó Jesucristú.

⁶ Te ñá túú tnàhí ná cani iní-ndó te núu nása cùu ndecu-ndo, chi càháⁿ ndihi-ndo Yă Ndiöxí cuendá sá ná chindee ñaha-gá xii-ndo. Te ío ndacáⁿ tãhú-ndó núú-gă. ⁷ Te núu ducaⁿ na càda-ndo te Yă Ndiöxí cada-gá te ío váha cuu iní-ndó cùndecu-ndo. Te nchoo ñáyiú ñá túú cùtnuní iní-ó nása quide-gá ndéé ducaⁿ ío váha cùu iní-ó, te ducaⁿ ío váha cùu iní-ó chi cùu ñⁿnuu-o ndihi Xítóhó Jesucristú.

Mee-ni sã váha cuhuⁿ iní-ó

⁸ Te càháⁿ ndàhú tucu-í núú nchàa nchòhó ñáyiú ndècu ndihi-í ichi Xítóhó Jesucristú sá mèe-ní sã váha cuhuⁿ iní-ndó. Te xini ñuhu-xi cuhuⁿ iní-ndó mèe-ni nchaa tnúhu ndáá, ndihi nchaa tnúhu yíñuhu, ndihi nchaa tnúhu sá ío cudíí iní-ó, ndihi nchaa tnúhu sá ío vii ío váha cuáháⁿ, ndihi nchaa tnúhu sá ñà túú ñuhu tnahá tnúhu cuèhé, ndihi nchaa tnúhu sá càchí ñáyiú

váha, ndihi nchaa dava-gá tnúhu sá sání iní méé-ndó sã ò váha te ðiu-ni nchaa xiãⁿ cuhuⁿ iní-ndó.

⁹ Te cútnàhá ní xíndecu ndihi ñaha-í xii-ndo ní dánèhé ñàhá-í nàcuáa cada-ndo te ní sándáá iní-ndó. Te xiãⁿ càháⁿ-í dóho-ndo sã vã dáñá ndèé-ndó càda-ndo, te ðiu-ni ducaⁿ vã dáñá ndèé-ndó càda-ndo nchaa nacuáa ní quide-í ní xiní-ndó. Te núu ducaⁿ na càda-ndo te Yá Ndiõxí Yaá quidé ò váha cùu iní-ó ndècu-o cundecu ndihi ñaha-gá xii-ndo.

Ñáyiú ñuú Filipú ndécú ichi Xítóhó Jesucristú sãñàhá-yu sá ndúú tãhú tẽ Pãblú

¹⁰ Te cùdíí víhí iní-í ndàcáⁿ tãhú-í núú Xítóhó Jesucristú sá ní ndacu iní ñàhá-ndó xii-í, dico ñá díú sã ñà túú ñùhu iní ñàhá-ndó xii-í chi dícó sã ñã ñihí-ndó nàcuáa cada-ndo chindee ñaha-ndo xii-í ní cùu. ¹¹ Te ñá díú sã dúhá càháⁿ-í te cani iní-ndó sã càchí tnúhu-í xii-ndo sã ò ðⁿ sã cùmãní xii-í, chi yúhú cùu váha-ni iní-í núu ò xii-í àdi ñá túú ò. ¹² Te xini-í cunduu ndàhú-í, te xini-í cunduu cuica-í, te xini-í caxi-í ndahá xití-í, te xini-í cuú-í docó, te xini-í nàcuáa quide-xi oré ñá túú vèdana ná ndécú ndihi-o, te xini-í nàcuáa quide-xi oré xidó ndécú ndihi-o. Te ducaⁿ ñí cutúha-í quidè-í cuendá nchaa nàcuáa ta yãha-í véxi. ¹³ Te nchaa ndàcu-í quidè-í chi Xítóhó Jesucristú chindèe ñaha-gá xii-í. ¹⁴ Te nchòhó ò váha ní quide-ndo ñí cundàhú iní ñàhá-ndó xii-í ní chindee ñaha-ndo vitna ndecu ndihi-í tnúndòho.

¹⁵ Te nchòhó cue ñáyiú ñuú Filipú sa nàha-ndo nacuáa ní cuu cútnàhá ní ngúita-í càháⁿ-í tnúhu Xítóhó Jesucristú distritú Macèdoniá, te cútnàhá ní ndee-í distritú-áⁿ te ðiu tnàhí-ni nchòhó ní taxi-ndo sã ndúú tãhú-í, te nchaa ñáyiú ndècu ichi Xítóhó Jesucristú dava-gá xichi ñá túú tnàhí ni chindee ñahá-yu xii-í. ¹⁶ Te cuèi cútnàhá ní xíndecu-í ñuú Tesalónica títñí xito ní tendaha-ndo sã ndúú tãhú-í sá ñí cutnùní iní méé-ndó ñí xini ñùhu-í. ¹⁷ Te vã caní iní-ndó sã sã dúhá càháⁿ-í te cuini-í nãndi-gá taxi tãhú-ndó, te duha càháⁿ-í chi Yá Ndiõxí ò-gá vãi sã váha cada ñaha-gã xii-ndo sã dúcáⁿ quide-ndo. ¹⁸ Te ní xidó vãi nchaa sá xiní ñùhu-í ndécú ndihi-í vitna, te ducaⁿ ò vãi sã ndécú ndihi-í ní cuu chi ní tendaha tucu-ndo sã ndúú tãhú-í véxi ndihi té

Epafròditú. Te tãhú-a cùu-xi datná ðⁿ tãhú sã ñí sãha-ndo mèe Yá Ndiõxí, te cùu vii cuu váha iní-gá sã dúcáⁿ ñí quide-ndo. ¹⁹ Te núu ná cuú sã xiní ñùhu-ndo, te mee Yá Ndiõxí ò vãi taxi-gá chi ò vãi sã ndécú ndihi-gá, te ducaⁿ càda-gá chi ndècu ndihi-o Xítóhó Jesucristú. ²⁰ Te vitna nchaa-o chí ná càchí-ó sã ò càhnu cuu Tátá-ó Dútú Ndiõxí ñí caa ñí quíhíⁿ. Te ducaⁿ na cùnduu.

Tnúhu ndéé núú ñí ndihi-ná

²¹ Te cúñaha-ndo sã ò na càda ndee iní nchaa ñáyiú ndècu ichi Xítóhó Jesucristú, ñáyiú cùu cuendá Yá Ndiõxí. Te tnàhá nchaa ñáyiú xíndecu ichi Xítóhó Jesucristú ndécú ndihi-í quidé ndèe iní ñàhá-yu xii-ndo. ²² Te nchaa ñáyiú cùu cuendá Yá Ndiõxí xinú cuèchi vehe té Cèsár tée yindaha cuéhé nacióⁿ quidé ndèe iní ñàhá-yu xii-ndo, ndihi nchaa dava-gá ñáyiú cùu cuendá-gá.

²³ Te Xítóhó Jesucristú ò na chindee chitúu ñaha-gã xii-ndo nchaa-ndo. Te ducaⁿ na cùnduu. Te ò chí cadá ndèe iní-nã vitna.

TUTÚ NÍ CADÚHA TĒ PĀBLŪ QUIHĪⁿ NDAHA ÑÁYIU ÑUÚ CÒLOSÁ

Té Pāblū cādūha-dé tutú quíhĪⁿ ndaha ñáyiu x̄ndecu ichi Xítohó Jesucristú ndécú ñuú Còlosá

¹ Yúhú té Pāblū ní tendaha ñàha Yá Ndiöxí càháⁿ-í tnúhu Xítohó Jesucristú núú ñáyiu chi ducaⁿ cuení méé Yá Ndiöxí cunduu, te cādúha-í tutú-a ndihĪ té Timúteú ² cuendá daquixi-í ndaha nchòhó ñáyiu ñuú Còlosá, ñáyiu cùu cuendá Yá Ndiöxí, ñáyiu quide ndáá ndécú ichi Xítohó Jesucristú, te xicáⁿ táhù-í núú Tātá-ó Dütú Ndiöxí sá ïo na chindee chitúu ñaha-gá xii-ndo, te ducaⁿ ndi nduú-gá ná cádá te ïo váha cuu iní-ndó cūndecu-ndo.

Té Pāblū càháⁿ ndihĪ-dé Yá Ndiöxí cuendá ñáyiu sàndáá iní ñáhá xii Xítohó Jesucristú

³ Te ducaⁿ-ni càháⁿ ndihĪ-ndí Yá Ndiöxí Yaá cúu Tātá Xítohó Jesucristú ndácáⁿ táhú-ndĪ núú-gá cuendá nchaa nācuáa quide-ndo ndecu-ndo, ⁴ chi nihĪ-ndí tnúhu sá ïo sàndáá iní-ndó Xítohó Jesucristú, te ducaⁿ ïo cùu iní-ndó nchaa ñáyiu cùu cuendá Yá Ndiöxí. ⁵ Te ducaⁿ quide-ndo chi sàndáá iní-ndó sá ndúú táhú-ndó cūndecu-ndo núú ndécú Xítohó Jesucristú, te tnúhu-áⁿ nĪ nihĪ-ndó cūtnàhá ní xīndedóho-ndo tnúhu ndáá tnúhu Xítohó Jesucristú. ⁶ Te tnúhu Xítohó Jesucristú tá xitē nuu-xi nihĪ ñuyúu cuáháⁿ. Te vai ñáyiu ta sàndáá iní-yu cuáháⁿ, te ta quidé-yu mee-ni sá vāha cuáháⁿ ndécū-yu ichi-gá. Te nchòhó chi ndéé cūtnàhá ní tecú dóho-ndo tnúhu-gá ní quesaha-xi ta cùu vai ñáyiu ñuú-ndó tá quide ndáá-yu núú-gá cuáháⁿ. Te dāvā-áⁿ nĪ cutnūnĪ ndáá ndisa iní-ndó sá Yá Ndiöxí ïo chindee chitúu ñaha-gá xii-ndo. ⁷ Te ducaⁿ nĪ dánèhé ñáhá tē Ēpafrás tēe ïo cùu iní-ndí, chi tnàhá-dé ïo quide ndáá-dé xínú cuèchi-dé núú Xítohó Jesucristú quidé-dē núú-ndĪ dācuàha ñaha-dé xii-ndo tnúhu-gá. ⁸ Te cāchĪ tnúhu-dé xii-ndí sá ïo cùu iní ñáhá-ndó xī-ndí, te ducaⁿ

quide-ndo chi Espiritú Yá Ndiöxí chīndēē ñaha-xi xii-ndo.

⁹ Te ndéé cūtnàhá ní nihĪ-ndĪ tnúhu nācuáa quide-ndo ndecu-ndo ndéé dāvā-áⁿ nĪ ngūita-ndĪ ñá túú dàña ndee-ndĪ xicáⁿ táhú-ndĪ núú Yá Ndiöxí cuendá-ndó sá Espiritú-gá ná tàxi-xi nchaa-gá sá cūmānĪ quini tnūnĪ-ndó, te ducaⁿ te cutnūnĪ váha-gá iní-ndó nācuáa cuení Yá Ndiöxí cada-ndo. ¹⁰ Te sá dūcáⁿ te ndacu-ndo cada-ndo mee-ni sá vāha dàtná cuení Xítohó Jesucristú cada nchaa ñáyiu ndēcu ichi-gá. Te ducaⁿ ïo nduu vétú iní-gá te núu na cada-ndo nchaa núú sá vāha. Te ducaⁿ ïo-gá cuita cutnūnĪ iní-ndó nchaa nācuáa cuení Yá Ndiöxí cada-ndo. ¹¹ Te mee-gá cúu-gá Yaá ïo cūnuu, te diu-gá ïo chindee ñaha-gá xii-ndo, te cudĪ iní-ndó cuēi nāndi na cada ñaha ñáyiu xii-ndo sá cuendá-gá, te ducaⁿ ïo cunduu càhnu iní-ndó. ¹² Te ndacáⁿ táhú-ó nūú Dütú Ndiöxí chi ní quide túha ñaha-gá xii-o cuendá nduu táhú-ó cūndecu-o ndihĪ nchaa dava-gá ñáyiu yīndaha-gá x̄ndecu núú cāndōo canine ñá túú tnàhĪ-gá ni ĩⁿ cuèchi ïo. ¹³ Te diu-gá ní quide ní dáñá-ó nchaa ichi cuehé ichi duha núú táxi tnūnĪ yucu ñāvāha, te ní nachihĪ ñaha-gá xii-o ndàha Déhe-gá Yaá ïo cùu iní-gá. ¹⁴ Te Déhe-gá ní xihĪ-gá cuendá sá nchóó cācu nihnu-o nūú ùhú núú ndàhú, te ní quide càhnu iní-gá nchaa sá cuèhé sá dūhá nĪ quide-o.

Ñáyiu cùu ĩⁿnuu ndihĪ Yá Ndiöxí cuendá sá nĪ xihĪ Xítohó Jesucristú

¹⁵ Te Yá Ndiöxí cúu-gá Yaá vá cúu quini-ó dico Xítohó Jesucristú chi ní quixi túu-gá ñuyúu-a, te ní quide-gá nchaa nācuáa sàni iní-gá. Te dàtná-ni sàni iní-gá te ducaⁿ sàni iní Yá Ndiöxí, te Yaá-áⁿ ducaⁿ-ni ndēcu-gá ndéé cūtnàhá vátá ngāva-gá ñuyúu. ¹⁶ Te Xítohó Jesucristú ní quide-gá núú Yá Ndiöxí ní cadúha-gá nchaa sá ïo andiu ndihĪ nchaa sá ïo ñuyúu-a, te ní cadúha-gá nchaa sá cúu quini núú-ó cūndehe-o, ndihĪ nchaa sá vā quini tnàhĪ-o, ndihĪ nchaa espiritú cūnū vihi xinu cuechi núú Yá Ndiöxí, ndihĪ nchaa dava-gá espiritú xínú cuèchi. Te nchaa ní cadúha Xítohó Jesucristú chi ducaⁿ nĪ cachĪ Yá Ndiöxí cunduu. Te ducaⁿ nĪ cachĪ Yá Ndiöxí cunduu cuendá nchaa cuu-xi mee-ni sá vāha sá cúu-xī Xítohó

Jesucristú. ¹⁷ Te Xítoho Jesucristú ducaⁿ-ni ndècu-gá ndéé cútnàhá vátá ngáva-gá ñuyíú-a, te ñuú núú ndáhá-gã cándòdo ñuyíú-a, ndihì andiù, ndihì nchaandi túhú sá ío. ¹⁸ Te ñuú Xítoho Jesucristú cùnùu-gá yíndàha ñaha-gá xii nchaa nchoo ñáyiù ndècu ichi-gá, te ñuú-gá quidé-gã ndécú vaha-o núú-gã. Te núú ncháá ñáyiù ndoto ñuú-gá cúú-gã Yáá ío càhnu cuu sa ní ndoto, te sá dúcáⁿ ní ndoto-gá te xiáⁿ cúú-gã Yáá ío tàxi tnuní nchaandi túhú sá ío ñuyíú-a ndihì andiù. ¹⁹ Te ducaⁿ ío cùnùu-gá táxi tnùní-gá chi ndáá sá ñⁿ-ni cuu-gá ndihì Yá Ndiöxí. ²⁰ Te Xítoho Jesucristú ní xihí-gá núú cùrúxí, chi ducaⁿ ní cuiní Yá Ndiöxí cunduu cuèndá sá vã yõo ñⁿ-gá cuu úhú iní ñáhá xii-gá cuèi ñáyiù xíndecu ñuyíú-a, te cuèi cue espíritu ndécú àndiù. ²¹ Te nchòhó cútnàhá vátá cùndècu-gá-ndó ìchi Xítoho Jesucristú ñá túú tnàhí ní xõ cáháⁿ ndihì-ndo-gã, chi mee-ni ní xõo cuu úhú iní-ndó-gã, te mee-ni nchàa sá cuèhé sá dúhá ní xõo cunuu ní xõo cada-ndo ni cùu, dico Xítoho Jesucristú ní quide-gá ní tnàhá tnúhu-ndo ndihì Yá Ndiöxí vitna. ²² Chi ñuú cuèndá-áⁿ ní xihí Xítoho Jesucristú núú cùrúxí cuèndá sá nchóó ndùu ndoo nduu nine iní-ó ngündecu-o núú Yá Ndiöxí, te ducaⁿ te ñá túú tnàhí-gá ná cumání-ó núú-gã, te vã yõo ñⁿ-gá cachí sá nchóó ndècu cuèchi-o. ²³ Te núú vã dáñá ndèé-ndó quíndáá iní-ndó Xítoho Jesucristú, te cundecu-ni-ndo ìchi-gá, te vã cání iní-ndó dàña-ndo tnúhu ndee iní ní taxi-gá ndécú ndihì-o. Te nchaa tnúhu-gá-áⁿ tá xité nuu-xi nihí ñuyíú cuáháⁿ, te ñuú-ni tnúhu-áⁿ càháⁿ yúhú té Páblú dánèhé-í ñáyiù.

Té Páblú yihí díquí-dé cáháⁿ-dé tnúhu Xítoho Jesucristú núú ñáyiù ndècu ichi-gá

²⁴ Te vitna ío cùdíí iní-í ndóhò-í cuèndá-ndó, chi Xítoho Jesucristú ío ní ndoho-gá cuèndá-ó, te tnàhá yúhú ndóhò-í cuèndá nchaa ñáyiù ndècu ichi-gá, dico vitna cùmání-gã ndoho-í cuèndá-yu. ²⁵ Te Yá Ndiöxí ní cachí-gá sá yúhú quihì díquí ñáhà-í xii nchaa nchòhó ñáyiù ndècu ichi-gá cuèndá danèhé ñáhá vaha-í xii-ndo tnúhu-gá cuèndá cuu-xi sá vaha sá cúú-xí-ndó. ²⁶ Te nchaa tnúhu sá dánèhé

ñáhà-í xii-ndo ñá túú ní tècú dóho nchaa ñáyiù ní xíndecu ndéé sanaha, te mee-gã ní cuiní-gá sá ncháá nchòo ñáyiù yíndaha-gá vitna cundecu ndihì-o tnúhu-áⁿ. ²⁷ Te mee-gã ní cachí-gá sá dátúu-gá nchaa tnúhu sá ío vii ío vaha cuáháⁿ núú nchàa ñáyiù yíndaha-gá. Te tnúhu-áⁿ cúú-xí cuèndá tnàhá nchaa nchòhó ñáyiù ñá túú cùu ñáyiù israél. Te tnúhu-áⁿ dánèhé ñáhá-xi xii-ndo sá Xítoho Jesucristú ndécú ndihì ñaha-gá xii-ndo. Te cuèndá xiáⁿ ní ngündecu ndihì-ndo tnúhu ndee iní cundecu-ndo ndihì-gá ní caa ní quíhíⁿ.

²⁸ Te nchúhú mee-ni cuèndá Xítoho Jesucristú càháⁿ vaha-ndí, te dàsahú-ndí ñáyiù nàcuáa cada-yu. Te vaha vèhi danèhé-ndí nchaa ñáyiù nàcuáa tecú tnùní-yu tnúhu-gá, te ducaⁿ dànèhé-ndí-yu nàcuáa cundáá-yu núú Yá Ndiöxí, te ducaⁿ chi tnàhá tnúhu-yu ndihì Xítoho Jesucristú. ²⁹ Te cuèndá xiáⁿ ío ndùcu ndee-í quidè-í chiùⁿ Xítoho Jesucristú, te mee-gã ío chindee ñaha-gá xii-í núu xiáⁿ ndácù-í quidè-í chiùⁿ-gá.

2

¹ Te cuiní-í sá nchòhó cutnùní iní-ndó sã ío sàni iní-í cuèndá-ndó, ndihì cuèndá nchaa ñáyiù ndècu ñuú Laodiceá, ñáyiù xíndecu ichi Xítoho Jesucristú. Te ducaⁿ-ni ío sàni iní-í cuèndá nchaa ñáyiù vátá quiní ñáhá-gã xii-í. ² Te cuiní-í sá nchòhó ndihì nchaa ñáyiù-áⁿ ío nducu ndèe-ndo canchicúⁿ nihnu-ndo ìchi Xítoho Jesucristú, te ío cuu iní tnàhá-ndó, te ducaⁿ cùu ñⁿ-nuu-ndo cundecu-ndo. Te cuiní-í sá nchòhó ndihì dava-gá ñáyiù-áⁿ ío vaha sáá sá xini tnùní-ndó cuèndá tecú tnùní-ndó nchàa nacuáa ndùu cuèndá Xítoho Jesucristú chi ío ndùu yuhu ni cuu, dico vitna ní dátúu-gá núú-ó. ³ Te Xítoho Jesucristú néhé vaha-gá nchaa tnúhu sá ío xini ñuhu-xi tecú tnùní-ó. ⁴ Te duha càháⁿ-í chi cuiní-í sá vã quíndáá iní-ndó ní ñⁿ tnúhu càháⁿ nchaa ñáyiù cuiní dandáhú ñáhá xii-ndo cuèi ío vaha càháⁿ-yu. ⁵ Te cuèi ñá túú ndècu ndihì ñaha-í xii-ndo dico ducaⁿ-ni ío ñuhu iní ñáhà-í, te ío cùdíí iní-í chi nihí-í tnúhu sá ío cùu ñⁿ-nuu-ndo ndecu-ndo, te ñá túú dàña ndeé-ndó sàndáá iní-ndó Xítoho Jesucristú.

⁶ Te dàtná-ni ní sándáá iní-ndó Xítóhó Jesucristú, te ducaⁿ-ni quindáá iní-ndó-gã canchicúⁿ nihnu-ndo ìchi-gá. ⁷ Te ni yùhu ni iní-ndó cànchicúⁿ nihnu-ndo ìchi-gá, te ducaⁿ cuíta cutnuni-gá iní-ndó nchàa nacuáa càháⁿ-gá quíhíⁿ. Te vá dáñá ndèè tnàhí-ndo quindáá iní-ndó nchàa tnúhu sá ní dánèhé ñáhá cuè téè càháⁿ tnúhu-gá xii-ndo. Te xini ñuhu-xi ndacáⁿ táhú vîhi-ndo núú Yá Ndióxi cuèndá nchaa tnúhu-áⁿ.

Ñáyiú ío váha tnàhá tnúhu ndihi Xítóhó Jesucristú

⁸ Te ío quíhi iní-ndó cùndecu-ndo chi xica cuu ñáyiú cuíni dandàhú ñáhá xii-ndo, te ñáyiú-áⁿ càháⁿ-yu mee-ni nchàa tnúhu ní cahu iní nchaa cue téè ñuyíú-a, te nchaa tnúhu-áⁿ ñá túú vèdana nàndíhi-xi. Te ducaⁿ quidé-yu chi nchicúⁿ nihnu-ni-yu nchaa nacuáa ní xóo cada ñáyiú ní xíndecu ndéè sanaha. Te càháⁿ-yu nacuáa sàni iní yucu ñávàha, te ñá túú càháⁿ-yu nacuáa cuíni méè Xítóhó Jesucristú.

⁹ Te Xítóhó Jesucristú cúú-gã ìⁿ ñáyiú dico ìⁿ-ni cùu-gá ndihi Dútú Ndióxi. ¹⁰ Te nchòhó chi ñá túú tnàhí-gá ná cúmání-ndó núú-gã chi ndècu ndihi-ndo Xítóhó Jesucristú. Te ío cùnūu-gá te tàxi tnuní-gá nchaa núú cuè espíritú cùnūu. ¹¹ Te mee-gã ní ndada ndoo ní ndada nine-gá iní-ndó chi ní ngúndecu ndihi-ndo-gã te ducaⁿ ñà túú-gã ndécú-ndó ìchi cuehé ìchi duha, te cada iní-ndó sã ní ngúndecu ndihi-ndo ìⁿ seña, chi ní ndada ndoo ní ndada nine-gá iní-ndó, dico ñá díú ìⁿ-ni cuu-xi ndihi seña sã sãha cue téè isràél ñi-güedé. ¹² Te nchòhó sa ní sandute-ndo te cada iní-ndó sã dàtná tnúhu sá ní xíhí-ndó ndihi Xítóhó Jesucristú, te ní nguíndüxi-ndo ndihi-gá, te ní ndoto-ndo ndihi-gá, te ducaⁿ càda iní-ndó chi ñá túú-gã ndécú-ndó ìchi cuehé ìchi duha. Te ducaⁿ chi sándáá iní-ndó nchàa nacuáa quide Yá Ndióxi, te ñi-gã ní dándótó-gã Xítóhó Jesucristú. ¹³ Te nchòhó cútnàhá ndécú-ndó ìchi cuehé ìchi duha cùu-ndo datná ñáyiú ní xíhí, chi ñá túú tnàhá tnúhu-ndo ndihi Yá Ndióxi ní cùu, te ni ñá díú ñáyiú isràél cúú-ndó. Te Yá Ndióxi ní cachí-gá sã nchóó ío váha tnàhá tnúhu-ndo ndihi Xítóhó Jesucristú vitna. Te ducaⁿ

ni quide-gá chi sa ní quide càhnu iní-gá nchaa sá cuèhé sá dúhá ni xóo cada-o. ¹⁴ Te vitna duuⁿ duuⁿ ñá túú-gã cuèchi-o ndècu núú-gã. Te nchoo ñà túú cuíni-ó càda-o nacuáa càháⁿ-gá, te cuèndá xíáⁿ ío ndècuèchi-o, te vâi nacháhu-o núú-gã ní cùu. Te vitna ñá túú-gã ni ìⁿ cuèchi-o ndècu núú-gã, chi ñi cuèndá-áⁿ ni xíhí Xítóhó Jesucristú núú cùrúxi. ¹⁵ Te sá dúcáⁿ ni xíhí Xítóhó Jesucristú núú cùrúxi, te duuⁿ duuⁿ ní dáquée tñú-gã sácúhná ndihi nchaa espíritú cùndíhi-xi, te ní quendóo canúú-xi, te mee-gã ío cùnūu-gá táxi tnuní-gá.

Nanducu nihnu-o mee-ni sã váha càchí Xítóhó Jesucristú

¹⁶ Te núu dava ñáyiú xícuèhé ñáhã-yu xii-ndo cuèndá sã ñà túú xèxi-ndo xíhi-ndo datná quidé meè-yu te vá cadá cuèndá-ndó, te ni vã cadá cuèndá-ndó te núu xícuèhé ñáhã-yu xii-ndo cuèndá sã ñà túú cãnehe íi-ndó vico quide meè-yu núú cuíá núú cuíá, ndihi vico quidé-yu ndi tnàhá yóo, ndihi cuèndá sã ñà túú cãnehe íi-ndó ndūu ndetatú-yu. ¹⁷ Te nacuáa quidé-yu ndi tnàhá òré quidè-yu nchaa vico-áⁿ, ndihi nacuáa quidé-yu ndi tnàhá nchaa ndūu cãnehe íi-yu-áⁿ, te cada iní-ó sã sã quidè-yu-áⁿ dánèhé núú ñáhã-xi nacuáa cada Xítóhó Jesucristú núú cuáhãⁿ núú vèxi.

¹⁸ Te vá quindáá iní-ndó ni ìⁿ tnúhu càháⁿ ñáyiú càchí sã cuíta nihnu-ndo cuèndá sã ñá túú tnè-ndo tnúhu càháⁿ-yu, chi càchí-yu sã ío xini ñuhu-xi cada cahnu-o nchaa cue espíritú xínú cuèchi núú Yá Ndióxi, te ni yùhu ni iní-ó cãnehe-o sã yíñùhu núú-xi. Te ñáyiú-áⁿ càchí-yu sã ndàá càháⁿ-yu chi dàcoto ñaha saní-yu nacuáa càháⁿ-yu, te ío quide cahnú-yu meè-yu cuèndá nchaa sã sání ìni meè-yu quidé-yu, te ñá túú vèdana nàndíhi nchaa sã quidè-yu.

¹⁹ Te nchaa ñáyiú ducaⁿ xíquide-áⁿ ñà túú tnàhá tnúhu-yu ndihi Xítóhó Jesucristú. Te mee-gã cúú-gã Yaá cùnūu taxi tnuní ñáhã-gã xii nchaa nchoo ñáyiú ndècu ìchi-gã, te chindee ñaha-gã xii-o ndècu-o ìchi-gã, te mee-gã quidé-gã cúú ìⁿnuu-o ndecu-o, te ta quide-o nchaa nacuáa cuíni Yá Ndióxi cuáhãⁿ.

²⁰ Te nchòhó cúú-ndó dàtná ñáyiú ní xíhí ndihi Xítóhó Jesucristú cuèndá sã vã

cánchicúⁿ nihnu-gá-ndó nàcuáa càháⁿ ñáiyu ñá túú ndècu ichi-gá. Te núu ducaⁿ ña, ¿te ná cuendá tñíⁿ-ní-ndó tñùhu càháⁿ ñáiyu-áⁿ te quide-ni-ndo datná quidè-yu? ²¹ Chi ñáiyu-áⁿ càchí-yu sá íó sá ni vǎ cúú tèe ndaha-o, te dava ni vǎ cúú càxi-o, te dava ni vǎ cúú tñí-o. ²² Te nchaa xǎⁿ, núú néhé chiuⁿ-ni-o ndìhi nihnu-xi. Te nchaa sá dúcáⁿ càháⁿ-yu-áⁿ cúú-xí mèe-ni sá ní cahu iní mèe nchàa ñáiyu ñuyú-a nàcuáa cadá-yu cundecú-yu. ²³ Te nchaa tñùhu càháⁿ-yu-áⁿ sánùu sá cúú-xí ñíⁿ tñùhu càháⁿ ñíⁿ téé ío váha sáa díquí-xi, chi càchí-yu sá cadá càhnu-o Yá Ndióxi nàcuáa véxi iní mèe-ó, te cunduu ndàhú iní-ó dico ñá túú dànehé ñáhǎ-yu nàcuáa tàú-xi cunduu. Te càchí tucú-yu sá cadá ùhú-ó mèe-o, chi ducaⁿ cuíní Yá Ndióxi cada-o càchí-yu. Te nchaa xǎⁿ ñá túú vǎdana chindee ñaha-xi xii-o cuendá sá vǎ táxi tñùní ñáhǎ ní ñíⁿ sá cuèhé sá dúhá sàni iní-ó.

3

¹ Te nchòhó cada iní-ndó sǎ ní xíhí-ndó ndìhi Xítohó Jesucristú te ní ndoto-ndo ndìhi-gá, núu xǎⁿ tàú-ndó càda-ndo nchaa sá váha datná cuíní mèe-gǎ chi mee-gǎ núcòo-gǎ xio cùha Dútú Ndióxi chi tñáhǎ-gǎ ío cùnùu-gǎ. ² Te ío cuhuⁿ iní-ndó nchàa sá váha càchí Xítohó Jesucristú nduu táhú-ndó cundecu ndìhi-ndo, te vǎ cúhúⁿ ìní-ndó mèe-ni nchaa sá íó ñuyú-a. ³ Te ducaⁿ càda-ndo chi cùu-ndo datná ñáiyu ní xíhí ndìhi Xítohó Jesucristú, chi ñá túú-gǎ ndécú-ndó ìchi cuehé ichi duha. Te Yá Ndióxi néhé cuendá ñáhǎ-gǎ xii-ndo chi tñáhǎ tñùhu-ndo ndìhi Xítohó Jesucristú. ⁴ Te Xítohó Jesucristú cúú-gǎ Yaá ndécú ndìhi ñaha xii-o vitna, te sáa nduu quee túu ndìhi ñaha-gǎ xii-o àndiu, te tñáhǎ-ó ío cunuu-o ndìhi-gǎ.

Duuⁿ duuⁿ dañá-o nchàa sá cuèhé sá dúhá ñùhu iní-ó te cada-o mèe-ni sá váha

⁵ Te duuⁿ duuⁿ dañá-ndo nchàa sá cuèhé sá dúhá ñùhu iní-ndó. Te nchaa nchòhó cue téé vǎ càháⁿ ndìhi-ndo ñáiyu dìhí te núu ñá díú ñàdìhí-ndó cùú-yu, te ducaⁿ-ni nchàa nchòhó cue ñáiyu dìhí tucu vǎ càháⁿ ndìhi-ndo cuè téé te núu ñá díú yíi-ndo cuu-güedé, te nchaa-ndo vǎ cání-gǎ iní-ndó

càda-ndo ní ñíⁿ sá cuèhé sá dúhá ndìhi tñaha ñáiyu-ndo. Te vǎ cání cuèhé cani duha-gǎ iní-ndó sǎ cúú-xí-ndó ndìhí-yu, te vǎ cání-gǎ iní-ndó ní ñíⁿ sá cuèhé sá dúhá, te ní vǎ xíhó-ndó ñíⁿ sá ndécú ndìhi tñaha ñáiyu-ndo, chi núu ducaⁿ na càda-ndo xiho-ndo sá ndécú ndìhí-yu te ñíⁿ-ni cùu-ndo ndìhi ñáiyu chìñuhu nchaa sá càchí-yu cùu ndióxí te ñá ndàá sá ndióxí cúú nchàa xǎⁿ. ⁶ Te nchaa ñáiyu ducaⁿ xíquide ío dandòho ñaha Yá Ndióxi xii-yu na sáa nduu tñúndòho tñùhu ndàhú, chi ñá túú sàndáa iní ñáhǎ-yu xii-gǎ. ⁷ Te nchòhó cútnáhǎ ní xíndecu-ndo ìchi cuehé ichi duha, te tñáhǎ-ndó ní xóo cada-ndo datná quidé nchàa ñáiyu-áⁿ. ⁸ Te vitna duuⁿ duuⁿ dañá-ndo nchàa sá ná càchí tñùhu-í-a; Vǎ cúdééⁿ-gǎ-ndó, te ní vǎ cùnduu líhli-gǎ iní-ndó, te ní vǎ cúú ùhú-gǎ iní-ndó tñaha ñáiyu-ndo, te ní vǎ cùcuèhé-gǎ-ndó-yu, te ní ñíⁿ-gǎ tñùhu cuèhé vǎ càháⁿ-ndó. ⁹ Te ní vǎ dácuàndehnde-gǎ-ndó, chi nchòhó sá ní dáñá-ndó nchàa ìchi cuehé ichi duha, te ñá túú-gǎ sání cuèhé sání dùha iní-ndó ñá cada-ndo vitna datná ní xóo cada-ndo. ¹⁰ Te vitna nchòhó ní nduu-ndo ñáiyu váha, te uuⁿ-gǎ tá cùnùní iní-ndó nchàa nàcuáa cuíní Yá Ndióxi cada-ndo, te ducaⁿ ta ndùcu ndee-ndo quide-ndo mee-ni sá váha datná quidé mèe-gǎ. ¹¹ Te vitna ní ngúndecu ndìhi-ndo Xítohó Jesucristú, te vǎ cadá cuendá-gǎ-ndó ñùu cùu-ndo ñáiyu isràél àdi ñá túú cùu-ndo, te ní vǎ cadá cuendá-ndó ñùu cùu-ndo ñáiyu ní ngúndecu sèñǎ ñíⁿ-xi àdi ñáhǎ, te ní vǎ cadá cuendá-ndó ñùu cùu-ndo ñáiyu véxi ñuú xícá, te ní vǎ cadá cuendá-ndó ñùu cùu-ndo ñáiyu cùu neñuú, te ní vǎ cadá cuendá-ndó ñùu cùu-ndo ñáiyu ñá túú tñáhí dàñǎ quee núú chíúⁿ pàtróoⁿ-xi, te ní vǎ cadá cuendá-ndó ñùu cùu-ndo ñáiyu dàñǎ quee núú chíúⁿ pàtróoⁿ-xi, chi Xítohó Jesucristú cùnùu-gǎ ndécú ndìhi ñaha-gǎ xii-o nchàa-o.

¹² Te Yá Ndióxi ní dáquéé dèiⁿ ñaha-gǎ xii-ndo cuendá cundecu-ndo ndìhi-gǎ, te vitna cùu-ndo ñáiyu quide ndàá ndécú ìchi-gǎ. Te mee-gǎ ío cùu iní ñáhǎ-gǎ xii-ndo ñùu xǎⁿ tàú-ndó cùndahú iní tñáhǎ-ndó, te ío váha cuu iní-ndó chindee tñaha-ndo, te cuu-ndo ñáiyu ndàhú iní-xi,

te ío vii ío váha cuu iní-ndó cùndecu ndihí tnaha-ndo, te ío càhnu cunduu iní-ndó cuendá nchaa sá quidé ñàha ñáyiú xii-ndo. ¹³ Te ducaⁿ cànehe-ndo tnúhu càhnu iní núú ndí mèe-ndo nacuaá ndècu-ndo ichi-gá, te cada càhnu tucu iní-ndó núu ná cúú sá cúmání núú tnáhá-ndó. Te dàtná ní quide càhnu iní Xítóhó Jesucristú nchaa sá ñà túú vâha ní xóo cada-ndo ducaⁿ càda-ndo cada cahnu iní-ndó nchaa sá cúmání núú tnáhá-ndó ndècu-ndo. ¹⁴ Te xini ñuhu vihi-xi sá ío cuu iní tnáhá-ndó cùndecu-ndo, chi núu ducaⁿ na càda-ndo, te quide-ndo nchaa dava-gá sá càháⁿ-í, te ñà túú tnàhí-gá ná cúmání-ndó. ¹⁵ Te dañá-ndo sá Yá Ndióxi ná chindee ñaha-gá nacuaá ío váha cuu iní-ndó cùndecu-ndo, chi ñu cuendá-áⁿ ní càháⁿ ñáhá Yá Ndióxi xii-ndo cuendá cuu ñⁿnuu-ndo ndihí nchaa dava-gá ñáyiú ndècu ichi-gá, te ducaⁿ-ni ío ndacáⁿ táhú-ndó núú-gá.

¹⁶ Te ío cuhuⁿ iní-ndó tnúhu Xítóhó Jesucristú, te ío váha cuáha-ndo cuendá nacuaá càháⁿ tnúhu-gá te ducaⁿ dānehé tnáhá-ndó. Te ío càháⁿ dóho tnàha-ndo nacuaá cada-ndo cānchicúⁿ nihnu-ndo càda-ndo nchaa nacuaá càháⁿ tnúhu-gá, te cata-ndo ndúdú ndéé núú tūtú Yá Ndióxi, ndihí nchaa dava-gá ndudú sá xini méé-ndó xita-ndo te nchaa xiáⁿ cata-ndo chĩñuhu-ndo Yá Ndióxi. Te òré xitá-ndó te ñi yùhu ñi iní-ndó ndacáⁿ táhú-ndó núú-gá. ¹⁷ Te cuhuⁿ iní-ndó Xítóhó Jesucristú òré sání iní-ndó càda-ndo ñⁿ chiuⁿ àdi ná tnúhu cuiní-ndó càháⁿ-ndó, te ñu-ñi-gá cuhuⁿ iní-ndó. Te xini ñuhu-xi ndacáⁿ táhú-ndó núú Yá Ndióxi, te ñu-ñi Xítóhó Jesucristú chindee ñàha-gá xii-ndo ndacáⁿ táhú-ndó núú Tátá-ó Dütú Ndióxi.

Nacuáa tàú ñáyiú ndècu ichi Xítóhó Jesucristú cada-yu sá cúú-xi ndí meé-yu

¹⁸ Te nchaa nchòhó ñáyiú ñáyiú ndècu yí-xi quindáá iní-ndó yí-ndo, chi ducaⁿ tàú-xi cada nchaa ñáyiú ñáyiú ndécú ichi Xítóhó Jesucristú. ¹⁹ Te nchaa nchòhó cue téé ndècu ñadihí-xi cuu iní-ndó ñadihí-ndó, te vá cūcuèhé-ndó-yu. ²⁰ Te nchaa nchòhó ñáyiú ndècu tátá-xi ndihí náná-xi quindáá iní-ndó-yu, chi núu ducaⁿ na càda-ndo te ndúu vétú iní Yá Ndióxi. ²¹ Te nchaa nchòhó ñáyiú cūu tátá ndihí náná vá dásátú-ndó ñi cue déhe-ndo, chi núu ducaⁿ na càda-ndo te ñi vâ quixí-gá iní-güexi

cada-güexi sá vâha. ²² Te nchaa nchòhó ñáyiú xinu cuechi quindáá iní-ndó nchaa ñáyiú cūu patróoⁿ-ndó, te ñi yùhu ñi iní-ndó càda-ndo nchaa chiuⁿ tahú-yu cuèi òré ndécú-yu àdi òré ñà túú-yu, te ñà díú òré-ñi ndèhé-yu cada-ndo cuendá-ñi sá cuiní-ndó cūñu-ndo núú-yu, chi cada-ndo sá néhé-ndó sá yíñuhu núú Xítóhó Jesucristú. ²³ Te nchaa chiuⁿ sani iní-ndó càda-ndo te cada-ndo ñi yuhu ñi iní-ndó, te sá dúcáⁿ càda-ndo-áⁿ te cada-ndo cuendá sá xínú cuèchi-ndo núú Xítóhó Jesucristú te ñà díú núú ñáyiú ñuyíú-a xinu cuechi-ndo. ²⁴ Te nchòhó sa ñàha-ndo sá Xítóhó Jesucristú taxi-gá sá ndúú táhú-ndó te núu ducaⁿ na càda-ndo, chi cūu-ndo ñáyiú xinu cuechi núú-gá. ²⁵ Te nchaa ñáyiú quide nchaa sá cuèhé sá dúhá náchahu-yu núú Yá Ndióxi cuendá nchaa sá quidé-yu, te mee-gá vá cadá cuendá-gá cuèi ná ñáyiú cūu-yu, chi nchaá-yu náchahu-yu nchaa sá ñà túú vâha quidé-yu núú-gá.

4

¹ Te nchaa nchòhó ñáyiú cūu patróoⁿ cuu-ndo ñáyiú váha, te cada-ndo nchaa nacuaá tàú-xi cunduu ndihí nchaa ñáyiú xinu cuechi núú-ndó, te cunaha-ndo sá àñdiu ndecu Yaá cúú Xítóhó-ndó taxi tñuní ñáhá-gá xii-ndo.

² Te nchaa nchòhó ñáyiú ndècu ichi Xítóhó Jesucristú, vá dañá ndéé-ndó càháⁿ ndihí-ndo Yá Ndióxi, te ío cuhuⁿ iní-ndó-gá òré càháⁿ ndihí-ndo-gá, te òré-áⁿ ío ndacáⁿ táhú-ndó núú-gá. ³ Te cácaⁿ táhú-ndó tnàhà cuendá-ndí núú-gá cuendá sá díú-gá ná cadá te ndacu-ndí càháⁿ-ndí tnúhu-gá núú nchaa dava-gá ñáyiú, te ducaⁿ càháⁿ-ndí tnúhu Xítóhó Jesucristú sá ñà túú ní xindecu ndihí nchaa ñáyiú ní xindecu ndéé sanaha, te ñu cuendá tnúhu-áⁿ yíhí-í vecaá vitna. ⁴ Te càháⁿ ndihí-ndo Yá Ndióxi cuendá càháⁿ-í nacuaá tàú-xi cunduu te tecú tñuní-yu.

⁵ Te cada-ndo nchaa nacuaá tàú-xi cunduu sá cúú-xi nchaa ñáyiú ñà túú ndècu ichi-gá, te ducaⁿ-ni ío nducu ndèe-ndo cada-ndo nchaa nacuaá tàú-xi cunduu. ⁶ Te cada cuendá-ndó sá ío vii ío váha cunduu tnúhu càháⁿ ndihí-ndó-yu, te càháⁿ-ndó

ñⁿ tnúhu nàcuáa cuu váha iní-yu, te ío váha cundehe-ndo nàcuáa cunduu tnúhu cúñaha-ndo xii ñⁿ íñⁿ-yu.

Tnúhu ndée núú ñ ndihí-ná

⁷ Te té Tiquicú téé ío cùu iní-ó ndècu ndihí-o ichi Xítoho Jesucristú, téé-áⁿ cachí tnúhu-dé nchaa nàcuáa cùu ndecu-í. Te tnàhá-dé xínú cuèchi-dé núú Xítoho Jesucristú te ío váha quíde ndáá-dé. ⁸ Te tendaha-í-dé quixi-dé cachí tnúhu-dé nchaa nàcuáa cùu ndecu-ndí iha, te taxi-dé tnúhu ndee iní cundecu ndihí-ndo. ⁹ Te tnàhá tucu té Onésimú téé ío cùu iní-ó ndècu ndihí-o ichi Xítoho Jesucristú quixi ndihí-dé, te ñu-ñi téé ñuú-ndó cùu-dé te tnàhá-dé ío váha quíde ndáá-dé. Te ndi ndúú-güedé cachí tnúhu-güedé nchaa nàcuáa cùu iha.

¹⁰ Te té Aristarcú téé yíhi ndihí-í vecaá quíde ndèe iní ñáhá-dě xii-ndo ndihí té Mácú ñani prímú tē Bèé. Te sa nàha-ndo nchaa nacuaáa ní cáháⁿ-í cada-ndo quèheⁿ cuendá-ndó tē Mácú, te núu na quixi-dé quixi coto ñaha-dě xii-ndo, te ío váha cuu iní-ndó quèheⁿ cuendá-ndó-dě. ¹¹ Te tnàhá téé nani Jesús, àdi Bustú chi úu ñu-dé, quíde ndèe iní ñáhá-dě xii-ndo. Te cue téé-a cùu-güedé cue téé israhél ní chitnahá ñáhá-güedě xii-í cáháⁿ-ndí núú ñáyiú nàcuáa ndíhu ndaha ñaha Yá Ndiöxí xii-yu, te ni ñⁿ-gá ñáyiú israhél ñá túú quíde datná quíde-güedě. Te ío váha taxi-güedé tnúhu ndee iní xii-í. ¹² Te tnàhá téé ñuú-ndó tē Épafrás quíde ndèe iní ñáhá-dě xii-ndo, te cùu-dé tnàhá-dé téé xínu cuechi núú Xítoho Jesucristú. Te ducaⁿ-ni ñi yuhu ñi iní-dé xicáⁿ táhú-dě núú Yá Ndiöxí cuendá-ndó cuendá sá cáncícúⁿ nihnu-ni-ndo ichi-gá, te ducaⁿ te ío váha tecú tnùn-ndó nchaa nacuaáa cuení Yá Ndiöxí cada-ndo, te ñu-ñi ducaⁿ cáncicúⁿ nihnu-ndo cada-ndo. ¹³ Te yúhú cáhí tnúhu ndáá-í xii-ndo sã sũúni sãni iní-dé sã méé-ní sã vãha cuu xii-ndo cundecu-ndo ndihí nchaa ñáyiú xíndecu ichi Xítoho Jesucristú ndécú ñuú Laodiceá, ndihí nchaa ñáyiú xíndecu tucu ichi-gá ndécú ñuú Hièrapólís. ¹⁴ Te tnàhá tée Lúca téé xini nchaa núú yücú sã quíde tátna quíde ndee iní ñáhá-dě xii-ndo téé ío cùu iní-ó, te tnàhá tucu té Dêmás quíde ndèe iní ñáhá-dě xii-ndo.

¹⁵ Te cúñaha-ndo na càda ndee iní nchaa ñáyiú ndècu ndihí-o ichi Xítoho Jesucristú ndécú ñuú Laodiceá, ndihí tá Mífás, ndihí nchaa ñáyiú ndècu ichi-gá tàcá vehe-xi dàcuahá-yu tnúhu-gá. ¹⁶ Te tutú cadüha-í-a tendaha-í quixi ndaha-ndo, te òré ná ndihí dàcuaha-ndo te tendaha-ndo quíhiⁿ ndaha ñáyiú xíndecu ichi-gá ndécú ñuú Laodiceá cuendá dacuahá-yu tnàhá-yu. Te ñu-ñi ducaⁿ dàcuaha-ndo tutú tendaha-í quíhiⁿ ndaha ñáyiú ñuú Laodiceá òré ná dándixí-yu ndaha-ndo. ¹⁷ Te na cáhí tnúhu-í xii-ndo nàcuáa cúñaha-ndo xii té Arquipú, te duha cúñaha-ndo xii-dé: “Yá Ndiöxí ní taxi-gá chiúⁿ quíde-n, te ío váha cada cuendá-n càda-n nchaa nacuaáa ní cachí-gá”, duha cúñaha-ndo xii-dé.

¹⁸ Te yúhú tée Páblú ndihí ndaha mee-í tée-í ñⁿ úú tnúhu-a quíde ndee iní ñáhá-í xii-ndo, te cunaha-ndo sã yúhú yíhi-í vecaá. Te Yá Ndiöxí ío na chíndee chitúu ñaha-gã xii-ndo. Te ducaⁿ na cunduu. Te ío chí cadá ndèe iní-nã vitna.

TUTÚ DÍHNA NUU NĪ CADÚHA TĒ PĀBLÚ QUIHĪⁿ NDAHA ÑÁYIU ÑUÚ TESALÓNICÁ

*Té Pāblú ndihī cue tée cūndihī-dé
cádúha-güedé tutú quihīⁿ ndaha ñáyiū xīndecu
ichi Xítoho Jesucristú ndécú ñuú Tesalónicá*

¹ Yúhú té Pāblú cādúha-í tutú-a ndihī té Silvanú, ndihī té Timùteú cuendá daquixi-í ndaha nchòhó ñáyiū ndècu ndihī-ndí ichi Xítoho Jesucristú ndécú ñuú Tesalónicá, chi cūu ñnuu-ndo ndihī Tátá-ó Dütú Ndiöxí, ndihī Xítoho Jesucristú. Te xicáⁿ táhú-í núú Dütú Ndiöxí, ndihī núú Xítoho Jesucristú sá ïo na chindee chitúu ñaha-gă xii-ndo, te ducaⁿ ndí nduú-gá ná càda te ïo váha cuu iní-ndó cūndecu-ndo.

*Ñáyiū ñuú Tesalónicá ïo váha sàndáá iní-yu
Yá Ndiöxí*

² Te ndí tnahá òré càháⁿ ndihī-ndí Yá Ndiöxí ndacáⁿ táhú-ndí núú-gá sá ïo quide váha-ndo ndècu-ndo, te ducaⁿ xicáⁿ táhú-ndí núú-gá sá ná còto ñaha-gă xii-ndo. ³ Te ïo ndacáⁿ táhú-ndí núú Tátá-ó Dütú Ndiöxí sá ñi yuhu ñi iní-ndó sàndáá iní-ndó-gă, te xīnu cuechi-ndo núú-gă, te cūu iní tnahá-ndó nàcuáa ndècu-ndo ichi-gá ñuū xīáⁿ ïo xīto tnahá-ndo. Te cūtnuní ndáá iní-ndó sá quixí tūcu Xítoho Jesucristú ñuū xīáⁿ ñá túú dàña ndeé-ndó ndètu-ndo-gá. ⁴ Te nchòhó ñáyiū ndècu ndihī-ndí ichi Xítoho Jesucristú sa ñaha-ndí sá Yá Ndiöxí ïo cūu iní ñáhá-gă xii-ndo, te diu-gá ní cáháⁿ ñáhá-gă xii-ndo cuendá cundecu-ndo ichi-gá. ⁵ Te cūtnáhá ní dánèhé ñáhá-ndí xii-ndo tñūhu-gá, chi ñá díú sá cúú ñí méé-ndí ducaⁿ ñí dānehé ñáhá-ndí xii-ndo, chi mee Espiritú Yá Ndiöxí ní chindee ñàha-xi ní cáháⁿ-ndí ñi yūhu ñi iní-ndí tñūhu-gá núú-ndó. Te ñaha-ndo sá cūtnáhá ní xīndecu ndihī ñaha-ndí xii-ndo ñi quide-ndí nàcuáa càháⁿ Yá Ndiöxí cuendá sá cúú-xí sá váha sá cúú-xí-ndó.

⁶ Te nchòhó nchícúⁿ nihnu-ndo quide-ndo vitna datná quidé-ndí, chi quide váha-ndo datná quidé mèe Xítoho Jesucristú, te díí ñí ní tñū-ndo ìchi-gá cuèi ní ndoho ní tnahá-ndó, chi mee Espiritú-gá ní chindee ñàha-xi xii-ndo. ⁷ Te sá dúcáⁿ quide váha-ndo ñuú Yá Ndiöxí, xīáⁿ yīnchícúⁿ nihnu ñáyiū distritú Macèdoniá, ndihī ñáyiū distritú Acăyá xīquide váha-yu tnahá-yu, ñáyiū xīndecu ichi-gá. ⁸ Te diu-ndo ñi sanu ichi-ndo ñáyiū distritú Macèdoniá, ndihī ñáyiū distritú Acăyá, te ñá díú-ñí ñáyiū nchaa ñuú-áⁿ chi nchaa ñáyiū dava-gá ñuú ñihí-yu tñūhu sá ïo sàndáá iní-ndó Yá Ndiöxí. Te ñá túú-gă ná tñūhu cáháⁿ-ndí cuendá-ndó, chi nchaa-yu sa ñihí-yu tñūhu sá ïo váha quide-ndo ndecu-ndo. ⁹ Te mèe-yu xicáháⁿ váha-yu cuendá-ndó sá ïo váha ní queheⁿ cuendá ñáhá-ndó xii-ndí cūtnáhá ní quixi-ndí díhna nuu. Te ní dáñá-ndó nchàa sá càchí-ndó cūu ndiöxí-ndó chi ñá díú ndiöxí cúú-xí, te ní tñū-ndo ìchi Yá Ndiöxí Yaá ndécú tūu andiū chi diu-gá cúú-gă Ndiöxí ndisa, te xīnu cuechi-ndo núú-gă vitna, ¹⁰ te ndètu-ndo quixi tucu Xítoho Jesucristú Déhe Yá Ndiöxí Yaá ndécú andiū, chi diu-ñi-gá ní quixi-gá ñuyíú-a ní xíhí-gá, te ní ndoto-gá ní dándótó ñàha Yá Ndiöxí xii-gá. Te diu-ñi Xítoho Jesucristú dácăcu nihnu ñaha-gă xii-o ñuú úhú núú ndàhú, chi sàndáá iní-ó-gă.

2

*Nàcuáa ndiū chiuⁿ ní quide té Pāblú ñuú
Tesalónicá*

¹ Te nchòhó ñáyiū ndècu ndihī-ndí ichi Xítoho Jesucristú ñaha-ndo sá ñá díú àúⁿ ñá cuu ñi quixi coto ñaha-ndí xii-ndo, chi ní sàndáá iní-ndó tñūhu Yá Ndiöxí. ² Te ñaha-ndo sá cūtnáhá ní xīndecu-ndí ñuú Filipú ïo ní xūhuⁿ tñūhu cuèhé tñūhu duha núú-ndí, te ní caniha-güedé xii-ndí. Te ní ndee-ndí ní quixi-ndí ñuú-ndó, te ñá túú ní yūhú-ndí ní cáháⁿ-ndí tñūhu Yá Ndiöxí núú-ndó, chi mee-gă ní chindee ñàha-gá xii-ndí cuèi ïo chitu ñáyiū ní cuu úhú iní ñáhá xii-ndí. ³ Te ñá túú ní dāndahú ñáhá-ndí xii-ndo chi mee-ñi tñūhu ndáá ní cáháⁿ-ndí núú-ndó, te ñi ñá túú ní

ɨ̃n̄ tnúhu cuèhé ñúhú ìní-ndí ní cáháⁿ-ndí tnúhu-gá núú-ndó chi sa ní nduu ndoo ní nduu nine iní-ndí. ⁴ Te mee Yă Ndiõxí ní cachí-gá sá cáháⁿ-ndí tnúhu-gá, te cáháⁿ-ndí nàcuáa cùu iní méé-gă, chi sa nàha-gă nàcuáa càa iní-ndí, te ñá túú càháⁿ-ndí nàcuáa cùu iní ñáyiu. ⁵ Te nàha-ndo sá ñà díú ɨ̃n̄ tnúhu cudíí ìní-ndó cùndecu-ndo ichi ñuyúú ní cáháⁿ-ndí núú-ndó cuèndá taxi-ndo dǐhúⁿ. Te Yă Ndiõxí sa nàha-gă sá cáháⁿ ndáá-ndí. ⁶ Te ñá ɨ̃n̄ ndùu ni quide-ndí ɨ̃n̄ sá cádá-ndí cuèndá-ni sá cádá càhnu ñaha-ndo xii-ndí, àdi cada cahnu ñaha dava-gă ñáyiu, te cuèi tàù ndisa-ndí sá cádá càhnu ñaha-ndo xii-ndí ní cùu, chi chiuⁿ Xítóhó Jesucristú quidé-ndí, te dícó-ni sá nchũhú ñá túú ní cuìní-ndí sá dúcáⁿ càda-ndo. ⁷ Te ío vii ío váha ní cáháⁿ-ndí núú-ndó, dàtná quidé ɨ̃n̄ ñaha cuu náná vii vii cáháⁿ ndihí cue déhe-aⁿ dàcuehnu ñaha-aⁿ xii-güexi. ⁸ Te ducaⁿ ío cùu iní ñáhá-ndí xii-ndo, dico ñá díú-ní sá ñí cáháⁿ-ndí tnúhu Yă Ndiõxí núú-ndó, chi ndéé iní-ndí taxi-ndí ní dácótó ñàha-xi, te núu dícó ní cùu-xi sá cúú, cuèndá sá ío cùu iní ñáhá-ndí xii-ndo. ⁹ Te nchòhó ñáyiu ndècu ndihí-ndí ichi Xítóhó Jesucristú nàha-ndo sá ío ní quide chiuⁿ-ndí cuèndá ní níhí-ndí sá ñí xexi-ndí. Te cuèi nduu cuèi niú ní quide chiuⁿ-ndí ní níhí-ndí sá ñí xexi-ndí ní cáháⁿ-ndí tnúhu Yă Ndiõxí núú-ndó cuèndá sá ñà túú ní cuìní-ndí chichiuⁿ ñaha-ndí xii-ndo.

¹⁰ Te nchòhó ñáyiu sàndáá iní tnúhu Yă Ndiõxí xìní ndáá-ndó sá cúú-ndí cue téé váha te ducaⁿ sà naha Yă Ndiõxí tucu, te ní xica-ndí ichi ndáá òré ní cáháⁿ-ndí tnúhu-gá núú-ndó te diu-ni ducaⁿ quide-ndí vitna. Te vá yõo ɨ̃n̄ cáháⁿ sá ñà túú quide ndáá-ndí ndécú-ndí. ¹¹ Te nàha tucu-ndo sá ñí dácáháⁿ ñáhá-ndí xii-ndo, te ní taxi-ndí tnúhu ndee ìní xii-ndo nchàa-ndo, te dàtná quidé ɨ̃n̄ tátá ndihí cue déhe-dé ní quide-ndí. ¹² Te ní cachí-ndí xii-ndo sá cádá ndáá-ndó cùndecu-ndo nacuáa tàù-xi cada nchaa ñáyiu tnàhá tnúhu ndihí Yă Ndiõxí, chi mee-gă ní cáháⁿ ñáhá-gă xii-o cuèndá nduu táhú-ó cùndecu-o ndihí-gá núú ío váha càa ndecu-gá táxí tnùnigá.

¹³ Te xǎⁿ ío ndàcáⁿ táhú-ndí núú Yă Ndiõxí sá nchòhó òré ní tedòho-ndo tnúhu-gá ní cáháⁿ-ndí, te ní sàndáá iní-ndó chi ní cutnùní iní-ndó sǎ díú tnúhu Yă Ndiõxí cúú-xí, te ñá díú tnúhu ñáyiu ñuyúú-a cùu-xi. Te ndáá sá cúú-xí ɨ̃n̄ sá ío váha sá cúú-xí nchòo cue ñáyiu ní sàndáá iní tnúhu-gá. ¹⁴ Te nchòhó ñáyiu ndècu ndihí-í ichi Xítóhó Jesucristú, ío ní ndoho ní tnàhá-ndó sǎ ñí quide ñaha ñáyiu ñuú-ndó. Te nchòhó ní ndoho-ndo dàtná ní ndoho nchaa ñáyiu tàcá dácuaⁿha tnúhu Xítóhó Jesucristú ndécú dístítú Júdeá, chi tnàhá-yu ío ní dándóhó ñàha ñáyiu ñuú-yu. ¹⁵ Te diu-ni ñáyiu dístítú Júdeá-áⁿ ñí sahní-yu cue téé ní xóo cáháⁿ tnúhu Yă Ndiõxí ndéé sanaha. Te diu-ni ñaní tnàhá-yu cùu cue ñáyiu ní sahní ñaha xii Xítóhó Jesucristú, te sátá xǎⁿ te ní ngüíta-yu ní cuu úhú iní ñáhá-yu xii-ndí, núu xǎⁿ ñá túú tnàhá iní Yă Ndiõxí nchaa sá quidé-yu, te ndéé nchaa dava-gă ñaní tnàhá-yu cùu úhú iní-yu. ¹⁶ Te ío chidácá nihnu ñàhá-yu xii-ndí òré cáháⁿ-ndí tnúhu Yă Ndiõxí núú ñáyiu ñá túú cùu ñáyiu isràél, te ducaⁿ quide ñáyiu-áⁿ cuèndá cuìní-yu sá vǎ cáháⁿ-ndí tnúhu-gá, sá cádá cuèndá naníhí tàhú ñáyiu ñá túú cùu ñáyiu isràél-áⁿ, te sá dúcáⁿ quidé-yu te ío ta cùu vai-gă cuéchi-yu cuáháⁿ. Te Yă Ndiõxí ío cùdéeⁿ-gă núú-yu, te tendaha-gă ɨ̃n̄ tnúndòho quixi sá cúú-xí-yu te ío ndohó-yu.

Té Pǎblú cuìní-dé quíngoto-dé ñáyiu xǎndecu ichi Xítóhó Jesucristú ndécú ñuú Tesàlónicá

¹⁷ Te nchòhó ñáyiu ndècu ndihí-ndí ichi Xítóhó Jesucristú ní quee-ndí núú-ndó, te cuèi ní cuxica-ndí dico ducaⁿ-ni ñúhu iní ñáhá-ndí xii-ndo, te ío ñúhu iní-ndí sá quíxí còto ñaha tucu-ndí xii-ndo. ¹⁸ Te yúhú té Pǎblú ducaⁿ-ni ñúhu iní-í sá cuèdicó méé-í quixi-í, quixi coto ñaha-í xii-ndo, dico yucu ñávàha chidácá nihnu ñaha-xi xii-í. ¹⁹ Te nchoo ñáyiu ndècu ichi Xítóhó Jesucristú ndètu-ni-gá-ó quèxio-gá candeca ñaha-gă xii-o ndàa andíu cundecu-o ndihí-gá. Te cùdíí víhí ìní-ndí sá cuèndá-gá chi ní chindee ñàha-gá ní sanu ichi ñaha-ndí xii-ndo ìchi-gá, te ío vai ñáyiu cáháⁿ váha-yu

cuendá-ndí ná sàá nduu quìxi tucu-gá. ²⁰ Te ducaⁿ ìo vài ñáyiu cáháⁿ váha-yu cuendá-ndí cuendá sá ñi sanu ichi ñaha-ndí xii-ndo ìchi-gá, te quide váha-ndo. Te xiáⁿ ío cùdíí ìní-ndí.

3

¹⁻² Te sa ní cunduu ñá túú-gã càháⁿ ndihì tñaha-o, núu xiáⁿ ñá ní cùndee-gá ìní-ndí ní tendaha-ndí té Timùteú ní quixi coto ñaha-dě xii-ndo, te nchúhú ní quendóo-ndí ñuú Àtenás, chi tñahá-dé xínú cuèchi-dé núu Yá Ndiöxí, ndihì núu Xítóhó Jesucristú càháⁿ-dé tñuhu-gá núu ñáyiu. Te ní quixi-dé ní taxi-dé tñuhu ndee ìní xii-ndo cuendá sá ìo quindáá-ni ìní-ndó Xítóhó Jesucristú, te canchicúⁿ nihnu-ni-ndo ñi yuhu ñi ìní-ndó ìchi-gá. ³ Te vá nátùhú ìní-ndó càchicúⁿ nihnu-ndo ìchi-gá sá dúhá cùu úhú ìní ñáhá ñáyiu xii-o, te nchòhó sa nàha-ndo sá dàcuítíí sã ndóhó vèhi-o cuendá-gá. ⁴ Te ndéé cùtnáhá ndécú ndihì ñaha-gá-ndí xii-ndo ñi cachí tñuhu ndáá-ndí sá ìo ndoho-o, te ducaⁿ ndisa quide-xi. ⁵ Te xiáⁿ ñuú ñá ní cùu váha-gá ìní-í chi cuendá ñá túú-gã ní ñihì-í tñuhu nàcuáa cùu ndecu-ndo núu ní tendaha-í té Timùteú ní quixi-dé ní ndúcú tñuhu-dé núu-ndó ñuú ndècu-ni-ndo ichi Xítóhó Jesucristú, chi ní sani ñi ní sani úú ìní-í sá cùú-xí-ndó, chi ná ndéé chidácá nihnu ñaha yùcu ñávàha xii-ndo te cuíta chiúⁿ ní quide-ndí sá cùú-xí-ndó ñi cáháⁿ-í.

⁶ Te ñáhá, chi ní ndexìo té Timùteú sá ñi quixi-dé ñuú-ndó, te nàha-dé tñuhu ní nasáá sá ñi yuhu ñi ìní-ni-ndo sàndáá ìní-ndó Yá Ndiöxí, te cùu ìní-ndó cuè tñaha ñáyiu-ndo. Te càchí-dé sá ìo ñùhu ìní ñáhá-ndó xii-ndí, te ío cuíní-ndó cáháⁿ ndihì ñaha-ndo, te ñuú-ndó ducaⁿ ìo cuíní nchúhú cáháⁿ ndihì ñaha-ndí xii-ndo tucu. ⁷ Te ío ndòho-ndí chi ío cùu úhú ìní ñáhá ñáyiu xii-ndí, dico sá ñi ñihí-ndí tñuhu sá nchòhó ñáyiu ndècu ndihì-ndí ichi Xítóhó Jesucristú ñá túú dàña ndéé-ndó sàndáá ìní-ndó Yá Ndiöxí, te xiáⁿ cùú-xí ñi tñuhu càhnu ìní ní ñihí-ndí chi ní ñanìhí ndéé-ndí. ⁸ Te ní nduu vétú ìní-ndí sá ñi ñihí-ndí tñuhu ndècu-ni-ndo ichi-gá. ⁹ Te òré càháⁿ

ndihì-ndí Yá Ndiöxí, te ío ndàcáⁿ táhú-ndí núu-gã cuendá sá ña túú dàña nihnu-ndo ichi-gá, núu xiáⁿ ío cùdíí ìní-ndí. ¹⁰ Te cuèi nduu cuèi níu xicáⁿ táhú-ndí núu Yá Ndiöxí sá méé-gã ná càda te sáá ñi nduu nànhí tñahá-ó cuendá danèhé ñáhá váha-gá-ndí tñuhu-gá sá cùmání-gã xii-ndo.

¹¹ Te mee Tàtá-ó Dütú Ndiöxí, ndihì Xítóhó Jesucristú chindee ñaha-gá xii-ndí te quixi-ndí quixi coto ñaha-ndí xii-ndo. ¹² Te mee Xítóhó Jesucristú ná chindee ñaha-gá xii-ndo, te ío-gá cuita cuu ìní tñahá-gã-ndó nàcuáa ndècu-ndo ichi-gá ndihì nchaa dava-gá ñáyiu dàtná cùú ìní ñáhá-ndí xii-ndo. ¹³ Te xicáⁿ táhú tucu-ndí núu Tàtá-ó Dütú Ndiöxí sá ñi yuhu ñi ìní-ndó càchicúⁿ nihnu-ni-ndo ìchi-gá, te ducaⁿ te cundáá-ndó núu-gã, te ñá túú-gã ná cumání-ndó òré ná sáá nduu quixi tucu Xítóhó Jesucristú ndihì nchaa ñáyiu sa ndècu ndihì-gá.

4

Nàcuáa cuíní Yá Ndiöxí cada-o

¹ Te nchòhó ñáyiu ndècu ndihì-í ichi Xítóhó Jesucristú càháⁿ ndàhú-í núu-ndó sã cùndèdòho-ndo na càháⁿ-í nàcuáa nduu tñuhu càháⁿ Xítóhó Jesucristú, chi mee-gã cuíní-gá sá cáda-ndó nàcuáa ní dánèhé ñáhá-ndí xii-ndo cuendá cuu váha ìní Yá Ndiöxí núu-ndó, te ducaⁿ-ni càda-ndo ndéé núu cuaháⁿ núu vèxi.

² Te nchòhó sa nàha-ndo nàcuáa ní cáháⁿ-ndí núu-ndó, chi ní cáháⁿ-ndí nàcuáa ní táuchíúⁿ Xítóhó Jesucristú te ní cachí-gá sá ³ Yá Ndiöxí cuíní-gá sá cáda ndáá-ó cùndecu-o ichi-gá. Te nchoo cuè téé vá càháⁿ ndihì-o ñáyiu ñihí te núu ñá díú ñàdihí-ó cùu-yu, te ñi cuè ñáyiu ñihí vá càháⁿ ndihí-yu téé núu ñá díú yí-yu cùu-güedé. ⁴ Te núu xiáⁿ nchaa nchòhó tñaha téé-í ndí ñi cùndecu ñadihí-ndó, te ñuú-ndó ducaⁿ nchòhó cue ñáyiu ñihí tucu ndí ñi cùndecu yí-ndo, te mee-ni tñuhu yíñùhu cáháⁿ ndihì tñaha-ndo. ⁵ Te vá cání cuèhé caní duha ìní-ndó dàtná quidé cuè ñáyiu ñá túú sàndáá ìní tñuhu Yá Ndiöxí. ⁶ Te ñi ñi-ndo vá cání ìní-ndó dándahú-ndó tñaha téé-ndo cáháⁿ ndihì-ndo ñàdihí-güedé. Te ducaⁿ-ni nchòhó cue ñáyiu ñihí tucu vá

cání ìní-ndó dandahú-ndó tnàha dìhí-ndó cǎháⁿ ndìhi-ndo yíi-yu. Chi núu ducaⁿ na càda-ndo, te Yá Ndiòxí ío dandòho ñaha-gá xii-ndo dàtná ní cachí-ndí ndéé díhna. ⁷ Chi Yá Ndiòxí ní cǎháⁿ ñáhá-gǎ xii-o cuendá sá cǎdá-ó mèe-ni sá vǎha, te ñá díú sǎ cuèhé sá dúhá. ⁸ Te nchaa ñáyiu na càda sǎá ìní-xi tnúhu càháⁿ-ndí, te quide sǎá ìní-yu núú Yá Ndiòxí, chi ñá díú tnúhu téé ñuyíú-a cùu-xi, chi tnúhu Yá Ndiòxí, Yaá ní taxi Espíritú-gá ndécú ndìhi-o cuu-xi.

⁹ Te nchòhó ñáyiu ndècu ndìhi-í ichi Xítohó Jesucristú, ñá túú-gǎ xíní ñùhu-xi cachí tnúhu-í xii-ndo sǎ cúú ìní tnáhá-ndó, chi Yá Ndiòxí sa ní dánèhé ñáhá-gǎ xii-ndo nàcuáa cuu ìní tnáhá-ndó, ndìhi nàcuáa cuu ìní-ndó dàva-gǎ tnàha ñáyiu-ndo. ¹⁰ Te ducaⁿ xiquide-ndo ndìhi nchaa ñáyiu ndècu ndìhi-ndo ichi Xítohó Jesucristú ndécú dìstrítú Macèdoniá. Te càháⁿ ndàhú-ndí núú-ndó sǎ cǎdá ndǎá-gǎ-ndó, te cuita cuu ìní-gǎ-ndó cuè tnaha ñáyiu-ndo quíhíⁿ. ¹¹ Te cada ndee ìní-ndó cùndecu ñucaxi ìní-ndó, te cuhuⁿ ìní-ndó chiuⁿ mee-ndo, te xíⁿ cada-ndo dàtná ní dánèhé ñáhá-ndí xii-ndo. ¹² Te ducaⁿ te tnáhá nchaa ñáyiu ñá túú sàndáá ìní tnúhu Yá Ndiòxí cǎháⁿ váha-yu cuendá-ndó, te ducaⁿ te ñá túú tnàhí-gǎ ná cùmání xii-ndo.

Nàcuáa cada-xi òré quixi tucu Xítohó Jesucristú

¹³ Te vitna na càchí tnúhu-ndí xii nchòhó ñáyiu ndècu ndìhi-ndí ichi Xítohó Jesucristú cuendá nchaa ñáyiu sa ní xíhí, ñáyiu ní sàndáá ìní tnúhu Yá Ndiòxí cuendá sá vǎ ndìhú ìní-ndó cuendá-yu dàtná xiquide nchaa ñáyiu ñá túú yíhi ìní-xi sá quíxí tucu Xítohó Jesucristú ñuyíú-a. ¹⁴ Te nchoo sàndáá ìní-ó sǎ ñí xíhí Xítohó Jesucristú te ní ndoto-gǎ ní dándótó ñàha Yá Ndiòxí, te sàndáá tucu ìní-ó sǎ dàtná ní dándótó Yá Ndiòxí Xítohó Jesucristú, ducaⁿ dándoto-gǎ nchaa ñáyiu ní xíhí ñáyiu ní sàndáá ìní ñáhá xii-gǎ.

¹⁵ Te na càchí tnúhu tucu-ndí ìngá tnúhu nàcuáa ní cǎháⁿ Xítohó Jesucristú, chi ní cachí-gǎ sá ná sǎá nduu quixi tucu-gǎ te nchaa ñáyiu sàndáá ìní tnúhu-gǎ ndécú vívú ñuyíú-a vá códó núú-yu núú ñáyiu ní xíhí ndaa andíu, chi jùndú candeca ñaha-gǎ

xii-yu ndaa. ¹⁶ Chi Xítohó Jesucristú quee túu-gǎ andíu, te cana-gǎ nchaa ñáyiu ní sàndáá ìní tnúhu-gǎ, te òré-áⁿ Yá Ndiòxí cada-gǎ te òré-áⁿ, cǎháⁿ ìⁿ cúú te òré-ni-áⁿ ndoto nchaa ñáyiu ní xíhí, ñáyiu ní sàndáá ìní tnúhu-gǎ. ¹⁷ Te dàtnúni nchaa nchoo ñáyiu xíndecu vívú ñuyíú-a naníhí tnáhá-ó ndìhi-yu, te ndanchita-o ndìhu-o xítí vícò naníhí tnáhá-ó ndìhi Xítohó Jesucristú, te candeca ñaha-gǎ xii-o ndaa andíu cundecu ndìhi-o-gǎ ni caa ni quíhíⁿ. ¹⁸ Núu xíⁿ chí cuàha tnàha tnúhu ndee ìní, te vá ndìhú ìní-ndó chi naníhí tǎhú-ndó núú-gǎ.

5

¹ Te nchòhó ñáyiu ndècu ndìhi-í ichi Xítohó Jesucristú ñá túú-gǎ xíní ñùhu-xi sá càchí tnúhu-í xii-ndo sǎ quíxí tucu-gǎ, te ni ñá túú-gǎ xíní ñùhu-xi sá càchí tnúhu-í xii-ndo nǎsa cada-xi òré quixi-gǎ. ² Chi nchòhó sa nàha ndáá-ndó sǎ Xítohó Jesucristú quixi-gǎ nduu ñá túú yíhi ìní-ó, chi dàtná quidé ìⁿ ñadúhú cada-gǎ òré quixi-gǎ, chi nduu ñá túú nǎ yíhí ìní-ó quixi tucu-gǎ. ³ Te sǎá nduu te cachí nchaa ñáyiu ndècu ichi cuehé ichi duha: “Vitna ío váha cùu ìní-ó ndècu-o, te ñá túú-gǎ ná cùmání xii-o”, duha quesàhá-yu. Te ñáyiu-áⁿ òré ñá túú nǎ yíhí ìní-yu, te quèxio tnúndòho tnúhu ndàhú sá cúú-xí-yu. Chi cada-xi dàtná quidé-xí ìⁿ ñáyiu dìhí ní tnahá òré cacu déhe-xi, chi na ìní-yu ní dátñhú ñáhá-xí te vá càcu-yu núú tnúndòhó-yu, te ducaⁿ sǎ tnáhá-xi yáha nchaa ñáyiu ñá túú ndècu ichi-gǎ, chi na ìní-yu quexio tnúndòho sá cúú-xí-yu te vá càcu-yu núú tnúndòho-áⁿ. ⁴ Te nchòhó ñáyiu ndècu ndìhi-í ichi Xítohó Jesucristú, ñá túú-gǎ ndécú-ndó ichi cuehé ichi duha, núu xíⁿ sa yíhi-ná ìní-ndó nduu quixi-gǎ te vá yáha-ndo dàtná yáha nchaa ñáyiu ñá túú ndècu ichi-gǎ, chi ñáyiu-áⁿ ñá túú nǎ yíhí ìní-yu sá quíxí-gǎ. Te na ìní-yu quexio-gǎ dàtná quidé ñadúhú na ìní-ó quíhu-güedé vehe-o dùhu-güedé ducaⁿ càda-gǎ òré quixi-gǎ. ⁵ Te nchoo ñá túú-gǎ ndécú-ó ìchi cuehé ichi duha, te ichi-áⁿ cúú-xí dàtná ìⁿ ichi nee ndècu-o ni cuu, te vitna sa ní ngúndecu-o ìchi váha, te ducaⁿ chi Yá Ndiòxí ní dándíxí tǔu-gǎ

iní-ó cuendá cutnùní iní-ó nàcuáa ndùu cuendá-gá. ⁶ Te xini ñuhu-xi dandixi túu-o iní-ó, te cada váha-o cùndecu-o ichi-gá, te vá cáda-ó dàtná quidé nchàa ñáyiú ñá túú sàndáá iní ñáhá xii-gá, chi ñáyiú-áⁿ ñà túú-gã quidé cuendá-yu te núu quide váha-yu àdi ñá túú quide váha-yu ndècú-yu. ⁷ Te nchaa ñáyiú quide cuehé quidé dùha cuú-yu dàtná ñⁿ ñáyiú xidí àdi xini, chi ñá túú quide cuendá-yu nàcuáa cada-yu ñⁿ sá váha dàtná cuiní Yã Ndiõxí. ⁸ Te nchòhó ñáyiú sa ní cutnùní iní-xi nàcuáa ndùu ichi váha, dandixi túu-ndo iní-ndó cùndecu-ndo, te quindáá ndisa iní-ndó Yã Ndiõxí, te cuu iní-ndó cuè tnaha ñáyiú-ndo te ducaⁿ te vá táxi tnùnì ñáhá nì ñⁿ sá cuèhé sá dúhá xii-ndo. Te ío cuhuⁿ iní-ndó sá cùndecu-ndo ndihí-gá nì caa nì quihíⁿ. ⁹ Chi Yã Ndiõxí ní cachí-gá sá vã quihíⁿ-ó núú ùhú núú ndàhú, chi mee-gã nacuaca ñaha-gã xii-o cùndecu-o ndihí-gá, chi ní sàndáá iní-ó Xítohó Jesucristú. ¹⁰ Te mee Xítohó Jesucristú ní xihí-gá sá cuendá nchaa yícá cuèchi-o, te ní ndoto-gá cuendá nduu táhú-ó cùndecu-o ndihí-gá andiú na sàá nduu cuèi sa ní xihí-ó, àdi vátá cùú-gá-ó. ¹¹ Núu xiãⁿ chí cuãha tnàha tnúhu ndee iní, te chindee tnàha-ndo cundecu-ndo ichi-gá dàtná tá quide-ndo véxi.

Té Pãblú dáquini sàhú-dé ñáyiú ndècu ichi Xítohó Jesucristú

¹² Te nchòhó ñáyiú ndècu ndihí-ndí ichi Xítohó Jesucristú, càháⁿ ndàhú-ndí núú-ndó sá cánèhe-ndo sá yíñùhu núú cuè téè cùnùu xinu cuechi núú Yã Ndiõxí, cue téè dānehé ñáhá xii-ndo nacuáa cundecu-ndo ichi-gá. ¹³ Te cáháⁿ váha-ndo ndihí-güedé, te cuu iní-ndó-güedé, chi nàha-ndo sá chíúⁿ Yã Ndiõxí quidé-güedé. Te cundecu ndihí váha tnàha-ndo nchaa-ndo.

¹⁴ Te càháⁿ ndàhú tucu-ndí núú-ndó sá cáháⁿ-ndó dôho nchaa ñáyiú ñá túú cuiní cada chiúⁿ, te ducaⁿ cuãñaha-ndo tnúhu ndee iní xii nchaa ñáyiú quíyuhu iní-xi canchicúⁿ nihnu ichi-gá, te chindee tucu-ndo nchaa ñáyiú vátá ngũnu ichi váha-gá, te cunduu càhnu iní-ndó núú-yu ncháá-yu.

¹⁵ Te cada ndee iní-ndó te núú ndècu tnaha ñáyiú-ndo cùu úhú iní ñáhã-yu

xii-ndo, te vá tnàhá-ni-ndo cùu úhú iní-ndó-yu. Te mee-ni sã váha cada-ndo sã cùú-xí nchàa tnaha ñáyiú-ndo.

¹⁶ Te nchaa nduu ío cudíí iní-ndó cùndecu-ndo. ¹⁷ Te ñⁿ nduu ñⁿ nduu cáháⁿ ndihí-ndo Yã Ndiõxí. ¹⁸ Te ndacáⁿ táhú-ndó núú-gã te núu nándi cùu sá yãha-ndo ndècu-ndo, chi ducaⁿ cuiní-gá cada-o, te diu ducaⁿ ndùu tnúhu càháⁿ Xítohó Jesucristú.

¹⁹ Te vá quèhndé nihnu-ndo chiúⁿ quide Espiritú Yã Ndiõxí iní-ndó. ²⁰ Te vá cáda sàá iní-ndó núú cuè téè càháⁿ tnúhu Yã Ndiõxí nàcuáa dàcahu iní ñáhá-gã xii-güedé. ²¹ Te cada cuendá váha-ndo nàcuáa càháⁿ-güedé, te tñi-ndo nchàa tnúhu váha càháⁿ-güedé. ²² Te dañã-ndo nchàa ichi cuehé ichi duha.

²³ Te mee Yã Ndiõxí quidé-gã ío váha cùu iní-ó ndècu-o ichi-gá. Te xicáⁿ táhú-í núú-gã sá ná càda íí ñáhá-gã xii-ndo, te na còto ñaha-gã xii-ndo ndihí iní-ndó cuendá sá vã cáda-gã-ndó nì ñⁿ sá cuèhé sá dúhá, te diu-ni ducaⁿ na càda-gá sá cùú-xí-ndó ndéé ná sàá nduu quixi tucu Xítohó Jesucristú ñuyú-a. ²⁴ Chi Yã Ndiõxí Yaá ní cáháⁿ ñáhá xii-o cada-gá nàcuáa ní cáháⁿ-gá, te chindee ñaha-gã xii-ndo.

Té Pãblú quidé ndèe iní-dé ñáyiú xñdecu ichi Xítohó Jesucristú ndècú ñúú Tesalónica

²⁵ Te nchòhó ñáyiú ndècu ndihí-í ichi Xítohó Jesucristú, cácaⁿ táhú-ndó núú Yã Ndiõxí sá ná chindee ñaha-gã xii-ndí.

²⁶ Te cúñaha-ndo xii nchaa ñáyiú ndècu ndihí-o ichi Xítohó Jesucristú sá nì yuhu nì iní-ndí quidé ndèe iní ñáhá-ndí xii-ndo ndihí-yu.

²⁷ Te vitna mee Yã Ndiõxí ndéhé-gã sá càháⁿ ndàhú-í núú-ndó sá dácuaha-ndo tutú-a núú nchàa ñáyiú ndècu ndihí-o ichi-gá.

²⁸ Te Xítohó Jesucristú ío na chindee chitúu ñaha-gã xii-ndo núú cuaháⁿ núú vèxi. Te ducaⁿ na cùnduu. Te ío chí cáda ndèe iní-nã vitna.

TUTÚ CÚÚ ÛÚ NÍ CADÚHA TÉ PÄBLÚ QUIHIⁿ NDAHA ÑÁYIU ÑUÚ TESÀLÓNICÁ

Té Päblú ndihi cue té cùndihi-dé cadúha-güedé tutú quíhíⁿ ndaha ñáyiú xĩndecu ichi Xítóhó Jesucristú ndécú ñúú Tesàlónicá

¹ Yúhú té Päblú cadúha-í tutú-a ndihi té Silvanú, ndihi té Timüteú cuendá daquixi-í ndaha nchòhó ñáyiú ndècu ndihi-ndí ichi Xítóhó Jesucristú ndécú ñúú Tesàlónicá, chi tnàhá tnúhu-ndo ndihi Tátá-ó Dütú Ndiöxí, ndihi Xítóhó Jesucristú. ² Te xicáⁿ táhú-ndí núú Dütú Ndiöxí, ndihi núú Xítóhó Jesucristú sá ná chĩndee chitúú ñaha-gá xii-ndo, te ducaⁿ ndi nduú-gá ná cadá te ío váha cuu iní-ndó cùndecu-ndo.

Yá Ndiöxí cada ndáá-gá cuéchi nchaa ñáyiú ndècu ichi cuehé ichi duha na sàá nduu quixi tucu Xítóhó Jesucristú

³ Te nchòhó ñáyiú ndècu ndihi-ndí ichi Xítóhó Jesucristú, cächí tnúhu-í xii-ndo sá cúnàha-ndo sá ñá túú dàña ndee-ndí ndacáⁿ táhú-ndí núú Yá Ndiöxí cuendá-ndó, chi dacuítí dùcaⁿ taú-xi cunduu chi ío-gá tá sàndáá iní-ndó-gã cuáháⁿ, te ducaⁿ ùuⁿ-gá tá cùu iní tnáhá-ndó nàcuáa ndècu-ndo ichi Yá Ndiöxí. ⁴ Núu xíáⁿ nchúhú ío váha cáháⁿ-ndí cuendá-ndó núú nchaa ñáyiú sàndáá iní tnúhu Yá Ndiöxí nchaa núú tàcá-yu dàcuahá-yu tnúhu-gá, chi ío sàndáá iní-ndó-gã, te ñá túú dàña ndeé-ndó nchìcúⁿ nihnu-ndo ìchi-gá, te quide cahnu-ni iní-ndó cuèi nándi sá yáha-ndo ndècu-ndo ichi-gá. ⁵ Te sá dúcáⁿ quide váha-ndo ndècu-ndo xíáⁿ cùtnùní nàcuáa cada ñaha Yá Ndiöxí xii-ndo na sàá nduu, chi nduu táhú-ndó cùndecu-ndo núú táxí tnùní-gá, te ducaⁿ càda-gá chi cùu-gá Yaá quidé ndáá cuíti. Te vitna ndòho-ndo nacuaa ndíhu ndaha-gã dava-gá ñáyiú.

⁶ Te Yá Ndiöxí ío váha ndáá quidé-gã, chi mee-gã nachinaa-gá nchaa sá quidé ñaha ñáyiú cùu úhú iní ñáhá xii-ndo, ⁷ te nchoo ñáyiú ndòho cuendá Xítóhó Jesucristú nucùndecu váha-o na sàá nduu nùu túu-gá andíu, te tnàhá cue espíritú xínú

cuèchi núú Yá Ndiöxí cuuⁿ ndihi-gá, te cue espíritú-áⁿ quidé-xí nchaa núú chiúⁿ tahu-gá. Te òré nuu túu-gá andíu ndihi cue espíritú-áⁿ, te ío dàtásaⁿ-xi andíu. ⁸ Te dandòho-gá nchaa ñáyiú ñá túú tnàhá tnúhu ndihi Yá Ndiöxí, ñáyiú ñá túú sàndáá iní tnúhu Xítóhó Jesucristú tnúhu sá cáháⁿ nàcuáa naníhí tàhú-yu. ⁹ Te nchaa ñáyiú-áⁿ ìo dandòho ñaha-gá xii-yu, chi ndohó-yu ni caa ni quíhíⁿ, te vá cùndécú-yu núú ìo váha càa ndecu-gá táxí tnùní-gá. ¹⁰ Te ducaⁿ càda ñaha-gá xii-yu na sàá nduu, te dàvá-áⁿ ìo cada càhnu ñaha nchaa ñáyiú sàndáá iní ñáhá xii-gá. Te tnàhá nchaa nchòhó ñáyiú ní sàndáá iní tnúhu ní cáháⁿ-ndí ducaⁿ càda-ndo, te nchaa-o ìo cuñúhu-o-gã dàvá-áⁿ.

¹¹ Te cuendá xíáⁿ núu ío xicáⁿ táhú-ndí núú Dütú Ndiöxí sá ná chĩndee ñaha-gá xii-ndo cùndecu váha-ndo ìchi-gá dàtná cuíní mée-gã cundecu nchaa ñáyiú ní cáháⁿ-gá cundecu ndihi-gá. Te xicáⁿ táhú tùcu-ndí núú-gã sá ìo na chĩndee ñaha-gá xii-ndo càda-ndo nchaa sá váha sàni iní-ndó, ndihi cuendá chiúⁿ quide-ndo cuendá-gá, te ducaⁿ chi sàndáá iní-ndó-gã. ¹² Te núu ducaⁿ na càda-ndo, te cáháⁿ váha ñáyiú cuendá Xítóhó Jesucristú, te tnàhá-ni nchòhó cáháⁿ váha-yu cuendá-ndó, chi mee Yá Ndiöxí ndihi Xítóhó Jesucristú cùndáhú iní ñáhá-gã chĩndee ñaha-gá xii-ndo.

2

Té quixi dandáhú ñáyiú

¹ Te nchòhó ñáyiú ndècu ndihi-ndí ichi Xítóhó Jesucristú cächí tnúhu-ndí xii-ndo nàcuáa cada-xi nduu na quixi tucu-gá, chi quixi-gá nacuaa ñaha-gã xii-o, núu xíáⁿ cáháⁿ-ndí dóho-ndo. ² Te ñá díú sã ííⁿ tnúhu tecú dóho-ndo te nguíta-ndo càni ííⁿ caní úú iní-ndó, te ni vã yúhú-ndó te núu véxi ííⁿ téé cächí-dé sá cáháⁿ-dé tnúhu Yá Ndiöxí, te cächí-dé sá sà véxi Xítóhó Jesucristú, te vá quìndáá iní-ndó tnúhu cáháⁿ-dé chi ñá ndáá, àdi véxi ííⁿ téé nèhe ííⁿ tutú núú-ndó te cächí-dé sá yúhú ní tendaha-í véxi, te núú tütú-áⁿ cáháⁿ-xi sá sà véxi Xítóhó Jesucristú, te díu-ni vá quìndáá iní-ndó nàcuáa cáháⁿ-xi, te ndèda-ni càa ñáyiú cáháⁿ-yu

dàvâ-áⁿ sã sà véxi-gá dico vá quindáá tnàhí iní-ndó. ³ Núu xiãⁿ dátũha ñaha-ĩ xii-ndo cuendá sá vã dáñá tnàhí-ndo mềe-ndo dandahú ñáhá ñáyiú. Chi cùmání-gã sáá nduu quixi tucu Xítohó Jesucristú, te ngũíta nchaa ñáyiú cuu úhú iní-yu Yá Ndiõxí, te dàvâ-áⁿ quini-yu ìⁿ tée xidó quidé nchaa sá cuèhé sá dúhá, te tée-áⁿ quihíⁿ-dé núú ùhú núú ndàhú ni caa ni quihíⁿ. ⁴ Te ñu-ni tée-áⁿ vã nděe iní-dé nchaa sá cãchí ñáyiú cùu ndiõxí-yu ndihí nchaa dava-gá sá quidé cãhnú-yu, te cachí-dé sá ïo cùnũu-dé, te quíhu-dé ndéé xití veñũhu núú ndécú cuè ñáyiú chiñũhu ñaha xii Yá Ndiõxí coo-dé, te cúñaha-dě xii-yu sá cúú-dě Yá Ndiõxí.

⁵ Te dandacu iní-ndó chi nchaa tnũhu-a sa ní cachí tnũhu-í xii-ndo cũtnàhá ní xindecu ndihí ñaha-ĩ. ⁶ Te nchòhó sa cùtnuní iní-ndó nã cúú sã ngání ñaha xii tée-áⁿ núú ñã túú-dě vitna, dico na sáá nduu taú-xi quee-dé caca cuu-dé te dàvâ-áⁿ quini ñáhá nchaa ñáyiú. ⁷ Te ío titní núú sã cuèhé sá dúhá quide yucu ñávãha dicó-ni sá vátá quini-gá ñáyiú, dico ndècu ìⁿ sá ñã dáñá càda-xi nchaandi túhú nãcuáa cãchí iní-xi, dico sáá nduu xòcuñí sá ñã dáñá-ãⁿ te dàvâ-áⁿ càda-xi nchaa nãcuáa cãchí iní-xi. ⁸ Te sáá nduu quini-yu tée quide nchaa sá cuèhé sá dúhá-ãⁿ ñuyiú-a. Te òré ná quixi túu Xítohó Jesucristú, te mee-ni sã dátãsaⁿ-xi, ndihí yócó yuhu-gá cuú tée-áⁿ. ⁹ Te sãcuíhná tendaha-xi tée-áⁿ quixi-dé, te cuãñaha-xi tnũhu ndee ìni càda-dé nãndi sá cáda-dě. Te càda-dé sá ñã túú tnàhí ndacu ni ìⁿ ñáyiú ñuyiú-a càda-yu, dico mee-ni dandahú ñáhá-dě xii-yu caca cuu-dé. ¹⁰ Te nchaa núú sã cuèhé sá dúhá càda-dé dandahú-dé nchaa ñáyiú sa ñũhu ichi cuáháⁿ núú ùhú núú ndàhú, chi ñã túú ní cuini-yu quindáá iní-yu tnũhu ndáá tnũhu Yá Ndiõxí cuendá naníhí tàhú-yu. ¹¹ Te sá dúcáⁿ ñã túú ní cuini-yu quindáá iní-yu tnũhu ndáá, núu xiãⁿ daña Yá Ndiõxí dacáháⁿ yucu ñávãha iní-yu quindáá iní-yu nchaa tnũhu ndehnde ¹² cuendá cuíta ni-hnú-yu, te ducaⁿ yãha-yu chi ñã túú sãndáá iní-yu tnũhu ndáá cãháⁿ Yá Ndiõxí, chi mee-ni nchaa sá cuèhé sá dúhá cùdíⁿ iní-yu quidé-yu, te cuíta nihnú-yu chi ducaⁿ ñi cachí Yá Ndiõxí cunduu.

Ñáyiú ní cachí Yá Ndiõxí naníhí tàhú

¹³ Te nchòhó ñáyiú ndècu ndihí-ndí ichi Xítohó Jesucristú, ñáyiú ío cùu iní-gá cãchí tnũhu-ndí xii-ndo sã ñã túú daña ndee-ndí ndacáⁿ táhú-ndí núú Yá Ndiõxí cuendá-ndó, chi ducaⁿ taú-xi cunduu, chi Yá Ndiõxí ní cachí-gá ndéé cùtnàhá vátá ngãva-gá ñuyiú sã naníhí tàhú-ndó, te ñu Espiritú-gá dacáháⁿ-xi iní-ndó ndècu yíñũhu-ndo núú-gã, te sãndáá iní-ndó tnũhu ndáá cãháⁿ-gá núu xiãⁿ ní naníhí tàhú-ndó. ¹⁴ Chi cuendá tnàhí-a ní cãháⁿ ñáhá Yá Ndiõxí xii-ndo, te ducaⁿ ñi naníhí tàhú-ndó chi ní sãndáá iní-ndó tnũhu Xítohó Jesucristú ní cãháⁿ-ndí núú-ndó, te sáá nduu te cundecu-ndo tnàhá-ndó núú ío váha caa ní nduu táhú Xítohó Jesucristú ndécú-gã.

¹⁵ Núu xiãⁿ nchòhó ñáyiú ndècu ndihí-ndí ichi Xítohó Jesucristú ío cãháⁿ-ndí dóho-ndo sã vã dáñá ñihnu-ndo ichi-gá, te ni vã nãcuánaa-ndo nchaa tnũhu ní cãháⁿ-ndí núú-ndó cũtnàhá ní xindecu ndihí ñaha-ndí xii-ndo, te ñu-ni ducaⁿ càda-ndo nchaa tnũhu tẽndaha-ndí véxi. ¹⁶⁻¹⁷ Te xicáⁿ táhú-ndí núú-gã sá ná dacáháⁿ-gá iní-ndó cundecu-ni-ndo ichi-gá, te ducaⁿ ïo na chĩndee ñaha-gá xii-ndo cãháⁿ-ndó mềe-ni tnũhu váha, te cada váha-ndo cundecu-ndo nacúáa cuu váha iní-gá, chi mee Dũtú Ndiõxí ío cùu iní ñáhá-gã xii-o, te ñu-gá ní taxi-gá tnũhu ndee ìni cundecu ndihí-o ñi caa ni quihíⁿ, te ní cachí tnũhu tucu-gá ñngá tnũhu váha sá cùndetu-o Xítohó Jesucristú.

3

Cãháⁿ ndihí-ndo Yá Ndiõxí cuendá-ndí

¹ Te nchòhó ñáyiú ndècu ndihí-ndí ichi Xítohó Jesucristú, ndéé núú ndihí-ñã cãchí tnũhu-í xii-ndo sã cãháⁿ ndihí-ndo Yá Ndiõxí cuendá-ndí cuendá sã ná chĩndee ñaha-gá xii-ndí, te ducaⁿ ndihí-ni cutẽnuu tnũhu Xítohó Jesucristú nchaa xichi, te cudíⁿ ìni-yu tnũhu-gá dàtná quidé nchòhó. ² Te cãháⁿ ndihí tucu-ndo Yá Ndiõxí cuendá sã ná còto ñaha-gá xii-ndí, te ñã túú nã cada ñaha ñáyiú cuihna ìni-xi ndècu ichi cuèhé ichi duha xii-ndí, chi ñã ncháã-yu sãndáá iní-yu tnũhu-gá. ³ Dico Xítohó Jesucristú quidé-gã nchaa sá cãháⁿ-gá, te ñu-gá cada te nchòhó cundecu-ni-ndo

ìchi-gá, te coto ñaha-gã xii-ndo cuendá sá ñà túú nã cada ñaha yùcu ñávãha. ⁴ Te Xítohó Jesucristú quidé-gã cútnùní iní-ndí sá nchòhó quidé-ndó nchàa nacuaá ní dánèhé ñáhá-ndí xii-ndo, te ñu-ni ducaⁿ càda-ndo cundecu-ndo. ⁵ Te xicáⁿ táhú-ndí núú Yá Ndióxi sá ná chindee ñaha-gã xii-ndo cùu iní-ndó-gã, te ñu-ni-gá ná chindee ñaha-gã xii-ndo cùnduu cahnu iní-ndó, chi Xítohó Jesucristú ducaⁿ ño càhnu iní-gá.

Tàú-ó càda chiuⁿ-o

⁶ Te nchòhó ñáiyu ndècu ndihí-í ichi Xítohó Jesucristú, càháⁿ-í dóho-ndo sá méé-gã cuiní-gá sá vã nihí tnáhá-gã-ndó ndihí ndéda-ni càa ñáiyu càchí sá sàndáá iní tnúhu-gá, ñáiyu ñá túú cuiní cada chiuⁿ, chi ñáiyu ducaⁿ xíquide ñá túú cuiní-yu tníⁿ-yu tnúhu sá ñí dánèhé ñáhá-ndí xii-ndo. ⁷ Te nchòhó sa xini-ndó nàcuáa cada-ndo cundecu-ndo canchicúⁿ nihnu-ndo nàcuáa quide-ndí. Te cútnáhá ní xindecu ndihí ñaha-ndí xii-ndo chi ni ñⁿ nduu ñá túú ní tühío-ndí. ⁸ Te ni ñà túú dicó ducaⁿ ni quèheⁿ-ndí sá ndécú ndihí ñáiyu caxi-ndí àdi canehe-ndí, chi cuèi nduu cuèi niú ío ní quide chiuⁿ-ndí ní nihí-ndí díhúⁿ ñí saaⁿ-ndí nchaa sá ñí nàndíhi-ndí cuendá sá ñà túú ní cuiní-ndí chichiuⁿ ñaha-ndí xii-ndo. ⁹ Te cuèi tàú ndisa-ndí cachí tnúhu-ndí xii-ndo sã chindèe ñaha-ndo xii-ndí ní cùu, dico ní quide chiuⁿ-ndí cuendá ní cuiní-ndí danèhé ñáhá-ndí xii-ndo nàcuáa cada-ndo cundecu-ndo. ¹⁰ Te cútnáhá ní xindecu ndihí ñaha-ndí xii-ndo ñí cachí-ndí sá ncháá ñáiyu ñá túú cuiní cada chiuⁿ te vã cuãha-ndó-yu sá cáxi-yu. ¹¹ Te vitna nihí-ndí tnúhu sá ío dava nchòhó ñá túú tnáhí quide chiuⁿ-ndo, chi àúⁿ nã cuu ndí cuu ndí cuu-ni-ndo núú ndécú dàva-gá tnàha ñáiyu-ndo. ¹² Te yúhú càháⁿ-í dóho nchaa nchòhó ñáiyu ducaⁿ ñà túú cuiní cada chiuⁿ sá cádá chiuⁿ-ndo cuendá nihí-ndó nchàa sá cóhó sã cáxi-ndó, te duha càháⁿ-í dóho-ndo, chi ducaⁿ cuiní Xítohó Jesucristú Yaá táxi tnùní ñáhá xii-o cada-ndo, te òré cada chiuⁿ-ndo te vã ño cada dusaⁿ-ndo.

¹³ Te nchòhó ñáiyu ndècu ndihí-í ichi Xítohó Jesucristú, vã dáña ndèé-ndó càda-ndo mee-ni sá vãha. ¹⁴ Te núu ñⁿ

ñáiyu ndècu ndihí-ndo ñá túú cuiní-yu tníⁿ-yu tnúhu càháⁿ-ndí núú tütú-a, te cundehe-ni-ndo núu ndéda càá-yu, te vã nihí tnáhá-gã-ndó ndihí-yu cuendá sá ná cùcahaⁿ núú-yu, ¹⁵ dico vã cúú ùhú iní-ndó-yu, chi càháⁿ-ndó dóho-yu cada-ndo sã ndécú-ndó ìchi Xítohó Jesucristú ndihí-yu.

Tnúhu ndéé núú ñí ndihí-ná

¹⁶ Te mee Xítohó Jesucristú ío vãha cùu iní-gá ndécú-gã, te xicáⁿ táhú-í núú-gã sá méé-gã ná cádá te ío vãha cuu iní-ndó tnáhá-ndó cundecu-ndo cuèi nása-gá ná cundecu-ndo. Te mee-gã ná cundecu ndihí ñaha-gã xii-ndo nchàa-ndo.

¹⁷ Te vitna yúhú té Páblú tèè-í tnúhu-a quide ndee iní ñáhá-í xii-ndo, te ñu-ni duha càa nchaa letrá-í nchaa núú tütú cáduha-í. ¹⁸ Te xicáⁿ táhú-í núú Xítohó Jesucristú sá ño na chindee chitúu ñaha-gã xii-ndo nchàa-ndo. Te ducaⁿ na cùnduu. Te ío chí cádá ndèe iní-nã vitna.

TUTÚ DÍHNA NUU NÍ CADÚHA TÉ PÄBLÚ QUIHⁿ NDAHA TÉ TIMÛTEÚ

Té Păblú cădũha-dé tutú quĩhⁿ ndaha té Timũteú

¹ Yúhú té Păblú ní tendaha ñaha Yá Ndiõxí cãháⁿ-í tnúhu Xítóhó Jesucristú núú ñáyiú chi ducaⁿ ñí cachí Yá Ndiõxí cunduú, te diu-gá cúú-gã Yaá ní dácăcu ni-hnu ñaha xii-o núú ùhú núú ndàhú. Te tnàhá Xítóhó Jesucristú ducaⁿ ñí cachí-gá sá cãháⁿ-í tnúhu-gá, te diu-gá ní taxi-gá tnúhu ndee ìní xii-o sã cùndecu-o ndihí-gá ñí caa ñí quĩhⁿ. ² Te yòhó té Timũteú cúú-n ñⁿ tée ní sanu ichi ndisa-í ichi Xítóhó Jesucristú chi ío váha ní sándáá ìní-n-gã. Te cãdũha-í ñⁿ tutú daquixi-í ndaha-n. Te xicáⁿ táhù-í núú Tãtá-ó Dũtú Ndiõxí ndihí núú Xítóhó Jesucristú sá ío na chindee chitúu ñaha-gã xii-n, te ducaⁿ ndi nduú-gá ná cádá te ío váha cuu ìní-n cùndecu-n.

Cuendá nchaa ñáyiú dândahú tnàha ñáyiú-xi

³ Te nàha-n nacuáa ní cãháⁿ-í cùtnàhá ní quee-í ñuú Éfesú véxi-í distritú Macèdoniá, chi ní cachí-í sá quéndõo-n ñuú-áⁿ cãháⁿ-n dôho nchaa ñáyiú dândahú ñáhá cãchí sá cãháⁿ tnúhu Yá Ndiõxí te ñá ndáá sá cãháⁿ-yu tnúhu-gá, te diu-ni ducaⁿ cãháⁿ-í vitna cada-n cùndecu-n. ⁴ Te cúñaha-n xii-yu sá vã cádá cuendá-yu nchaa cuendú ñihí-yu nacuáa ní xóo cada ñáyiú ní xindee ndéé sanaha, te nchaa cuendú-áⁿ dicó chináá ñáhá-xi chi ñá túú vèdana nândihí-xi, te ñí ñá túú chindee ñaha-xi cada-o nacuáa cuení Yá Ndiõxí, chi mee-ni sã quindáá ìní-ó-gã quidé-xi quide-o nchaa nacuáa cuení-gã.

⁵ Te duha cãháⁿ-í cúñaha-n xii-yu cuendá sá ná cùu ìní-yu tnàha ñáyiú-yu, te xini ñuhu-xi nduu ndoo nduu nine ìní-yu, te cunduu váha ìní-yu, te quindáá ìní-yu Yá Ndiõxí, te vá cání ñⁿ cani úú ìní-yu, te núu ducaⁿ na cãdá-yu te cuu ìní ndisá-yu nchaa tnàha ñáyiú-yu. ⁶ Chi dava ñáyiú ñá túú-gã quidè-yu nchaa nacuáa cãháⁿ-í-a,

chi mee-nã nchaa cuendá sá ñá túú vèdana nândihí xicãháⁿ-yu. ⁷ Te cuení-yu cãháⁿ-yu nchaa tnúhu ní cãháⁿ ndií Moisés dico ñá ndácũ-yu, chi cuèi ñí yùhu ñí ìní-yu cãháⁿ-yu dico ñá tècú tnùní-yu nacuáa ní cãháⁿ ndií, te ñí tnúhu cãháⁿ mée-yu ñá cùtnùní ìní-yu nacuáa ndùu-xi.

⁸ Te sa nàha-o sá ncháá tnúhu ní cãháⁿ ndií Moisés váha, te núu na tècú tnùní-ó ñá cuendá ducaⁿ ñí ngúndecu nchaa tnúhu-áⁿ.

⁹ Te cùtnuní ìní-ó sã ñá díú sã cúú-xi nchaa ñáyiú quide váha ndècu ñuyiú-a ñí ngúndecu nchaa tnúhu-áⁿ, chi ní ngúndecu-xi sá cúú-xi nchaa ñáyiú ñá túú quide váha, ndihí cuendá nchaa ñáyiú ío sãá ìní-xi, ndihí cuendá nchaa ñáyiú quide cuehé quidé dùha, ndihí cuendá nchaa ñáyiú ío ndècu cuéchi-xi, ndihí cuendá nchaa ñáyiú ñá túú nèhe vèdana sá yíñùhu núú Yá Ndiõxí, ndihí cuendá nchaa ñáyiú ñá túú cãháⁿ váha cuendá ichi Yá Ndiõxí, ndihí cuendá nchaa ñáyiú sàhni tátá-xi ndihí nãná-xi, ndihí cuendá nchaa dava-gã ñáyiú sàhni tnaha, ¹⁰ ndihí cuendá nchaa cue tée cãháⁿ ndihí ñáyiú dñhí te ñá díú ñãdihí-güedé cúú-yu, ndihí cuendá tucu nchaa ñáyiú dñhí cãháⁿ ndihí cue tée te ñá díú yñ-yu cùu-güedé, ndihí cuendá nchaa cue tée cãháⁿ ndihí tnàha ndi mee tée-xi, ndihí cuendá nchaa ñáyiú chiváha tnàha ñáyiú-xi cuendá sá cuení-yu ñihí-yu díhúⁿ, ndihí cuendá nchaa ñáyiú ndehnde, ndihí cuendá nchaa ñáyiú cãcunehe ndéé Yá Ndiõxí cuendá cuení-yu cutnùní ìní tnàha ñáyiú-yu sá cãháⁿ ndáá-yu, te ñá ndáá sá cãháⁿ ndáá-yu, ndihí cuendá nchaa ñáyiú quide nchaa dava-gã sã ñá túú tàuchiuⁿ Yá Ndiõxí cadá-yu. Cuendá nchaa ñáyiú ducaⁿ xiquide ní ngúndecu nchaa tnúhu-áⁿ. ¹¹ Te nchaa tnúhu-áⁿ ñⁿ-ni cùu-xi ndihí nchaa tnúhu sá ñí cachí Yá Ndiõxí cãháⁿ-í, te tnúhu-áⁿ cúú-xi tnúhu váha vñhi, chi mee-gã ío váha ìní-gã.

Té Păblú ndacáⁿ táhú-dè núú Yá Ndiõxí sá ñí cundahú ìní ñáhá-gã xii-dé

¹² Te Xítóhó Jesucristú ní cutnùní ìní-gã sá cádá ndáá-í cada-í nchaa chiúⁿ tahu-gã. Te ndacáⁿ táhù-í núú-gã sá ñí taxi-gã chiúⁿ-gã quidè-í, te ío chindee ñaha-gã xii-í. ¹³ Te ní taxi-gã chiúⁿ-gã quidè-í cuèi ní xóo cãháⁿ

cuèhé-í cuèndá-gá, te cuèi ní xóo cúú cuèhé cúú duha-í nchaa ñáyiú ndècu ichi-gá, te cuèi nándi-gá sá ñí xóo cada-í-yu dico ní cundàhú iní ñáhá Yă Ndiöxí xii-í, chi vátá quíndáá-gá iní-í Xítóhó Jesucristú cútnàhá ducaⁿ ñí xóo cada-í, te ni ñă cútnùní iní-í nchaa sá quídè-í ní cùu, te cuèi ducaⁿ ñí xóo cada-í, ¹⁴ dico Yă Ndiöxí ío ní cundàhú iní ñáhá-gă xii-í te chîndee ñaha-gá. Te mee Xítóhó Jesucristú chíndèe ñaha-gá xii-í sàndáá iní-í-gá, te cùu iní-í nchaa tnàha ñáyiú-í.

¹⁵ Te ñihí-ó tnùhu sá Xítóhó Jesucristú ní quixi-gá ñuyíú-a cuèndá sá dácăcu nihnu-gá nchaa ñáyiú ndècu ichi cuehé ichi duha. Te tnùhu-án cúú-xí ñⁿ tnùhu ndáá, te xîni ñuhu-xi quíndáá iní nchaa nchoo ñáyiú ndècu ñuyíú-a. Te yúhú cùú-í téé ío-gá ndécú cuèchi-xi núú Yă Ndiöxí ní cùu. ¹⁶ Te Yă Ndiöxí ní cundàhú iní ñáhá-gă ní dácăcu nihnu ñaha-gă xii yúhú téé xidó ndécú cuèchi-xi ni cùu, cuèndá cutnùní iní nchaa ñáyiú sá Xítóhó Jesucristú ío càhnu iní-gá. Te sá dúcáⁿ ñí quide ñaha-gă xii-í, te xiăⁿ cutnùní iní-yu sá núu na quíndáá iní ñáhă-yu xii-gá te cundecú-yu ndihí-gá ni caa ni quíhíⁿ. ¹⁷ Te nchaa-o chí ná càchí-ó să ío càhnu cuu Yă Ndiöxí, te canehe-o să yíñuhu núú-gă ni caa ni quíhíⁿ, chi mee-gă cúú-gă Yaá táxí tnùní nchaa nduu nchaa quíú. Te cùu-gá ñⁿ Yaá ñá túú xîní núú-ó, te ñⁿdîi díí-ni-gă ío ndècu ndihí-gá nchaa sá xîní tnùní-gá.

¹⁸ Te yòhó té Timùteú téé cùu datná ñⁿ déhe mee-í sa nàha-n nacuáa ní càháⁿ dava-gá cue téé càháⁿ tnùhu Yă Ndiöxí cuèndá-n, te diu-ni ducaⁿ càháⁿ-ú tucu, te cada-n nchaa nacuáa càháⁿ tnùhu-án chi diu nchaa tnùhu-án canu ichi ñaha-xi xii-n cada-n nchaa nacuáa cuèní Yă Ndiöxí. ¹⁹ Te ío quíndáá iní-n Xítóhó Jesucristú, te cada váha-n cundecu-n nacuáa cundecu váha iní-n, chi dava ñáyiú ñá túú-gă ducaⁿ quídè-yu núu xiăⁿ ñá túú-gă sàndáá iní-yu nàcuáa càháⁿ tnùhu-gá. ²⁰ Te diu-ni ducaⁿ ñí quide té Himèneú ndihí té Lijandru ní dáñá ndèe-güedé ñá túú-gă sàndáá iní-güedé nàcuáa càháⁿ tnùhu Xítóhó Jesucristú, te ní xáhaⁿ-í xii-güedé sá ná cundoho-ná-güedé núu nása cada ñaha sàcuíhná xii-güedé,

te ducaⁿ ñí xáhaⁿ-í cuèndá sá vă càháⁿ cuèhé-gá-güedé cuèndá Yă Ndiöxí.

2

Nàcuáa càháⁿ ndihí-o Yă Ndiöxí

¹ Te na càchí tnùhu-í xii-n nchaa nacuáa cada-n. Te díhna-gá càchí tnùhu-í sá càháⁿ ndihí-n Yă Ndiöxí cuèndá nchaa ñáyiú te núu nása cùu xîndecú-yu, te cácaⁿ táhú-n núú-gă cuèndá-yu, te ducaⁿ ío ndacáⁿ táhú-n núú-gă cuèndá nchaa sá vâha quide ñaha-gă xií-yu. ² Te ducaⁿ càháⁿ ndihí-n Yă Ndiöxí cuèndá nchaa cue téé cùnno ndihí cuèndá nchaa dava-gá cue téé cùchiuⁿ cuèndá cada váha-güedé, te ducaⁿ nchòo ñá túú ná cuu cundecu-o, te ñá túú tnàhí ná cani iní-ó cundecu-o, te ío cundecu yíñuhu-o núú Yă Ndiöxí, te cada-o nchaa nacuáa tàú-xi cunduu. ³ Te núu ducaⁿ na càda-o càháⁿ ndihí-o Yă Ndiöxí cuèndá nchaa ñáyiú te quide váha-o, te ndùu vétú iní Yă Ndiöxí Yaá ní dácăcu nihnu ñaha xii-o núú ùhú núú ndàhú. ⁴ Te mee-gă cuèní-gá sá ncháá ñáyiú tecú tnùní-yu nchaa tnùhu càháⁿ-gá, chi cuèní-gá sá nánihí tàhú-yu. ⁵ Te ñⁿ-ni Dútú Ndiöxí ndécú, te ñⁿ-ni Xítóhó Jesucristú, te medî-ni Xítóhó Jesucristú quídè-gă tnàhá tnùhu-o ndihí Yă Ndiöxí. ⁶ Te Xítóhó Jesucristú ní dáñá-gă méé-gă ní sahní ñaha-güedé xii-gá cuèndá sá cuèní-gá sá căcu nihnu nchaa ñáyiú ndècu ñuyíú núú ùhú núú ndàhú. Te Yă Ndiöxí cuèní-gá sá ncháá ñáyiú ñuyíú ndécú vitna níhí-yu tnùhu nàcuáa ní cuu ní xíhí Xítóhó Jesucristú. ⁷ Te Yă Ndiöxí ní cachí-gá sá càháⁿ-í tnùhu-án ndèni ní cuu núú xîndecu ñáyiú ñá túú cùu ñáyiú isràel, te mee-ni tnùhu ndáá dánèhé-í-yu nàcuáa quíndáá iní ñáhă-yu xii-gá, te yúhú càháⁿ ndáá-í sá Yă Ndiöxí ní cachí-gá sá càháⁿ-í tnùhu-gá chi ndècu ndihí-í Xítóhó Jesucristú, te ñá túú dândahú ñáhà-í xii-n.

⁸ Te yúhú cuèní-í sá ncháá xîchi càháⁿ ndihí cue téé Yă Ndiöxí, te na cunduu ndoo cunduu nine iní-güedé òré ndonehe-güedé ndaha-güedé càháⁿ ndihí ñaha-güedé xii-gá, chi vá cúú cùdèéⁿ-güedé cuèndá nchaa sá quídè ñaha ñáyiú xii-güedé, te ni vă cání iní-güedé cúcuèhé tnàhá-güedé ndihí-yu. ⁹ Te càchí tnùhu-í xii-n să ncháá ñáyiú díhí ná cunduu dío-yu nàcuáa tàú-xi cunduu, te

vá cündüu cuehé cunduu duha dàtná cáá dño nchaa ñáyi ndècu ichi cuehé ichi duha, te na ndàdá-yu díquǐ-yu nàcuáa tàú-xi cunduu, te vá ndáda cuèhé ndada duhá-yu, te vá cání iní-yu cunduu vií-yu ndihí sá ïo ndèyáhu, te ni vǎ cání iní-yu cuihnú-yu dóó sǎ ïo ndèyáhu. ¹⁰ Te mee-ni sǎ vǎha cadá-yu, chi ducaⁿ tàú-xi cada nchaa ñáyi dñí ndécú ichi Yá Ndiöxí. ¹¹ Te òré tàcá-yu núú dácuahá-yu tnúhu Yá Ndiöxí, te cue ñáyi dñí-áⁿ na nàhi dacuahá-yu tnúhu-gá, te cadá-yu nchaa nàcuáa càháⁿ cue té dácuaaha ñaha xii-yu tnúhu-gá. ¹² Te yúhú càchí-í sá vǎ cúú dácuaaha ñáyi dñí cue té, te ni vǎ cúú tàxi tnuní ñáhá-yu xii-güedé chi cunduu tnáví-ni yuhú-yu cundedóho-yu. ¹³ Te ducaⁿ xini ñuhu-xi cadá-yu, chi Yá Ndiöxí ní cadúha-gá díhna-gá té Àdán te dàtnuní ní cadúha-gá tá Èvá. ¹⁴ Te ñá díú mèe té Àdán ní dándahú ñáhá sácuihná xii-dé, chi tá Èvá ní dándahú-xi, te ñá túú ní quide váha-xi núú Yá Ndiöxí sá dúcáⁿ ní sándáá iní-xi tnúhu ní cáháⁿ sácuihná-áⁿ. ¹⁵ Dico ñáyi dñí ní nduu táhǔ-yu sá cóo dèhe-yu, te naníhí tàhú-yu te núú vá dáñá ndé-yu canchicúⁿ nihnú-yu ichi Yá Ndiöxí, te cundecu yíñuhú-yu núú-gǎ, te cuu iní-yu nchaa tnàha ñáyiú-yu, te cadá-yu nchaa nàcuáa tàú-xi cunduu cundecú-yu.

3

Nàcuáa tàú cue té yíndaha ñaha xii ñáyi ndècu ichi Yá Ndiöxí cada-güedé

¹ Te ïo ïⁿ tnúhu càháⁿ ñáyi sá núu ïⁿ té cuini quíndaha ñaha xii ñáyi ndècu ichi Yá Ndiöxí, te ïⁿ sá vǎha cuini-dé cada-dé càchí-yu, te ndáá quée-xí tnúhu càháⁿ-yu. ² Te yúhú càchí-í sá cuè té ducaⁿ na quíndaha ñaha xii ñáyi te xini ñuhu-xi cuu-güedé cue té quide ndáá cuèndá sá vǎ càháⁿ ñáyi cuèndá-güedé sá ñá túú quide ndáá-güedé. Te na cùu-güedé cue té ndèca ïⁿ caa-ni ñadihí, te na cùu-güedé cue té ñá túú quide cutexínu ndècu, te na cùu-güedé cue té quide nchaa nàcuáa tàú-xi cunduu, te na cùu-güedé cue té sǎñaha núu vehe ndetatú nchaa ñáyi ñuhu ichi, te na cùu-güedé cue té dānehé ñáhá

vǎha xii ñáyi tnúhu Yá Ndiöxí. ³ Te vá cúu-güedé cue té quihu, te ni vǎ cúu-güedé cue té ndècu pletú, te ni vǎ cúu-güedé cue té dícó-ni ducaⁿ nihí díhúⁿ, te ni vǎ cúu-güedé cue té sàni iní nàá, te ni vǎ cúu-güedé cue té ñuhu iní mee-ni díhúⁿ. Chi na cùu-güedé cue té váha iní-xi te cunduu càhnu iní-güedé. ⁴ Te na cùu-güedé cue té ïo váha sànu ichi ñadihí-xi ndihí landú-xi, te na cùu-güedé cue té quide nàcuáa sándáá iní ñáhá landú-xi cuèndá canehe-güexi sá yíñuhu núu-güedé. ⁵ Chi núu cùu-güedé cue té ñá ndácú cànuichi ñadihí-xi ndihí landú-xi, te vá ndácú-güedé quíndaha-güedé cue ñáyi ndècu ichi Yá Ndiöxí. ⁶ Te vá cúu-güedé cue té íchí ní sándáá iní-xi tnúhu Yá Ndiöxí, chi na cuáháⁿ te cada nínu-güedé méé-güedé te cuíta nihnu-güedé dàtná ní xíta nihnu sácuihná. ⁷ Te xini ñuhu-xi cuu-güedé cue té càháⁿ váha ñáyi cuèndá-xi, cuèi ñá díú ñáyi ndècu ichi Yá Ndiöxí cuèndá sá vǎ cuátnuhu ñaha ñáyi xii-güedé, chi núu ñáhá te cūdāna te sácuihná quesaha-xi tàxi tnuní ñáhá-xi xii-güedé.

Cue té chindee ñaha xii cue té yíndaha ñaha xii ñáyi ndècu ichi Yá Ndiöxí

⁸ Te tnàhá cue té chindee ñaha xii cue té yíndaha ñaha xii ñáyi ndècu ichi Yá Ndiöxí xini ñuhu-xi cuu-güedé cue té quide nchaa nàcuáa tàú-xi cunduu, te vá cúu-güedé cue té càchí sá càháⁿ ndáá te ñá ndáá, te ni vǎ cúu-güedé cue té quihu, te ni vǎ cúu-güedé cue té sàni iní-xi dícó-ni ducaⁿ nihí díhúⁿ. ⁹ Te xini ñuhu-xi cuu-güedé cue té ñá túú dàña ndé sándáá iní tnúhu Yá Ndiöxí, te na cùu-güedé cue té ïo váha cùu iní-xi cuèndá nchaa sá vǎha quide-güedé. ¹⁰ Te xini ñuhu-xi coto ndé ñáhá xii-güedé te núu cùu-güedé cue té quide váha, te núu cùu-güedé cue té quide váha ña te cuu chindee-güedé cue té yíndaha ñaha xii ñáyi ndècu ichi Yá Ndiöxí. ¹¹ Te tnàhá tucu nchaa ñáyi dñí ná cadá-yu nchaa nàcuáa tàú-xi cunduu, te vá cündüu yití yuhú-yu, te ni vǎ cúu-yu ñáyi quide cutexínu ndècu, te na cùu-yu ñáyi ïo váha quide ndáá. ¹² Te nchaa cue té chindee ñaha xii cue té yíndaha ñaha xii ñáyi ndècu ichi Yá Ndiöxí, xini

ñuhu-xi cuu-güedé cue té ndècu ìⁿ caa-ni ñadihí-xi, te na cùu-güedé cue té sànu ichi váha ñadihí-xi ndihí landú-xi. ¹³ Te núu na càda ndáá-güedé chindee-güedé cue té yìndaha ñaha xii ñáyi ndècu ichi Yá Ndiöxí, te canehé-yu sá yíñuhu núu-güedé, te ducaⁿ te vá cúu càháⁿ núu-güedé càháⁿ-güedé núu ñáyi tñuhu Xítohó Jesucristú sá sàndáá iní-güedé.

Ío càhnu cuu tñuhu càháⁿ Yá Ndiöxí

¹⁴ Te cuiní-í ndihí-ni quixi coto ñaha-í xii-n dico díhna-gá cadúha-í tutú-a daquixi-í ndaha-n ¹⁵ chi na cuáháⁿ cuyaa-í. Te xíaⁿ núu cadúha-í tutú-a daquixi-í ndaha-n cuendá cutnùní iní-n nása cada-n cùndecu-n ndihí nchaa ñáyi ndècu ichi Yá Ndiöxí. Te ñáyi-áⁿ cúu-yu dàtná ìⁿ vehe cùu cuendá Yá Ndiöxí Yaá ndécú nchàa nduu nchaa quíú, chi ndècu ndihí ñaha-gá xii-yu, te cúu-yu ñáyi càháⁿ váha cuendá tñuhu-gá. ¹⁶ Te cùtnùní ndáá iní-ó sá ío càhnu cuu tñuhu càháⁿ Xítohó Jesucristú, tñuhu sá càháⁿ nàcuáa nduu ichi ndecu-o, te duha càháⁿ tñuhu-áⁿ:
Te ní quixi Yá cúu Ndiöxí ñuyú-a ní cuu-gá ìⁿ ñáyi,
te Espíritú Yá Ndiöxí ní càháⁿ ndáá-xi sá cúu-gá ìⁿ Yaá ío váha quide ndáá,
te cue espíritú xínú cuèchi núu Yá Ndiöxí ní xíní ndáá-xi nchaa nàcuáa ní quide Yaá ní quixi ñuyú-a.
Te ní xité nuu tñuhu-gá nihí ñuyú-a,
te ndèni ní cuu ní ngúita-yu sàndáá iní ñáhá-yu xii-gá,
te mee-gá cuánda-gá andiu.
Duha càhí tñuhu-áⁿ.

4

Ñáyi dañu nihnu vá quíndáá-gá iní-yu Yá Ndiöxí

¹ Te Espíritú Yá Ndiöxí càháⁿ ndáá-xi sá sáa nduu dañu nihnu dava ñáyi ndècu ichi-gá vá quíndáá iní ñáhá-gá-yu xii-gá, te ducaⁿ chi cue espíritú cùndihí yucu ñáváha dandáhú ñáhá-xi xii-yu, te mee-ná nchaa tñuhu càháⁿ nchaa ñáyi cùndihí nchaa espíritú-áⁿ cuhuⁿ iní-yu. ² Te nchaa ñáyi ducaⁿ cùndihí cue espíritú cùndihí yucu ñáváha-áⁿ cúu-yu ñáyi ío dandáhú méé-xi

chi càhí-yu sá càháⁿ ndáá-yu te ñá ndáá, te ñá túu tñáhí-gá ná quidé-xi iní-yu cuendá nchaa sá cuèhé sá dúhá quidé-yu. ³ Te ñáyi-áⁿ quesàhá-yu sá vá cúu càndeca tñaha ñáyi, te ni vá cúu càxí-yu dava núu sá xíní-yu caxí-yu, dico Yá Ndiöxí ní cadúha-gá nchaa sá nchító-ó cuendá caxi-o, te cuiní-gá sá ncháá nchòo ñáyi sàndáá iní tñuhu-gá ndacáⁿ táhú-ó núu-gá òré caxi-o. ⁴ Te nchaa sá ní cadúha Yá Ndiöxí cúu-xi sá váha te vá dáquèe tñú-ó, te xini ñuhu-xi ndacáⁿ táhú-ó núu-gá cuendá nchaa xíaⁿ. ⁵ Te Yá Ndiöxí càhí-gá sá méé-gá quidé-gá cúu-xi sá váha sá cúu-xi-ó te núu na ndacáⁿ táhú-ó núu-gá.

Té quide ndáá xínú cuèchi núu Xítohó Jesucristú

⁶ Te núu na dàcuaha-n ñáyi ndècu ndihí-o ichi Xítohó Jesucristú nchaa nàcuáa càháⁿ-í-a ña, te cuu-n ìⁿ té quide ndáá xínú cuèchi núu-gá, te nducu ndè-ni-n dacuaha-n tñuhu Yá Ndiöxí sá sàndáá iní-n, te canchicúⁿ nihnu-ni-n càda-n nchaa nacuáa càháⁿ-gá, te núu ducaⁿ nà cada-n, te níhí ndéé-n cùndecu-n ichi-gá. ⁷ Te vá cáda cuendá-n nchàa cuendú cuèhé cuendú duha càháⁿ ñáyi, ndihí nchaa dava-gá cuendú sá ña túu nándihí cuendá sá ña túu nà cumání-n cùndecu-n núu Yá Ndiöxí. ⁸ Te núu ìⁿ chiuⁿ cada-o te nàcaá luha yiqui-o te nándihí-xi luha, dico ío-gá nándihí-xi te núu cada-o sá cùndecu yíñuhu-o núu Yá Ndiöxí. Te núu ducaⁿ na càda-o te cùu-xi ìⁿ sá váha sá cúu-xi-ó vitna, te ni caa ni quíhí ducaⁿ cùu-xi ìⁿ sá váha sá cúu-xi-ó. ⁹ Te xini ñuhu-xi sá ncháá-ndó quíndáá iní-ndó nchàa tñuhu càháⁿ-í-a chi cùu-xi tñuhu ndáá. ¹⁰ Te vitna ío nducu ndee-o quide-o chiuⁿ Yá Ndiöxí Yaá ndécú nchàa nduu nchaa quíú te quide ndee iní-ó cuendá nchaa sá quidé ñaha ñáyi xii-o, chi sàndáá iní-ó sá díú-gá chindèe ñaha-gá xii-o. Te nchaa ñáyi cùndahú iní ñáhá-gá te chindee ñaha-gá xii-yu, dico ñáyi sàndáá iní ñáhá xii-gá ío-gá cùnùu-yu chindee ñaha-gá xii-yu, chi dàcácu nihnu ñaha-gá núu ùhú núu ndáhú. ¹¹ Te nchaa tñuhu-áⁿ cùñaha-n xii-yu, te càháⁿ-n dõho-yu sá ná cáda-yu nchaa nàcuáa càháⁿ-xi. ¹² Te ío cada váha-n cùndecu-n cuendá sá vá yõo daquèe tñú

ñáhá xii-n cuendá sá cúu-n tēe cuechi, te ío váha cada-n nchàa sá tàu-n càda-n cuendá ducaⁿ càncicúⁿ nihnu nchaa ñáyi ndècu ichi Yá Ndiöxí, te vii vii cáháⁿ ndihí-n-yu, te cuu iní-n-yu, te ío quindáá iní-n Yá Ndiöxí, te mee-ni sã váha cani iní-n, te ducaⁿ càda-n cuendá càncicúⁿ nihnú-yu. ¹³ Te nini cùyaa-í quixi-í, te ío nducu ndèe-n cáháⁿ ndodo-n tnũhu Yá Ndiöxí núu-yu, te dacuahá-n-yu nàcuáa càháⁿ tnũhu-gá, te cáháⁿ-n dõho-yu nàcuáa cuu vii cuu váha iní-yu cundecú-yu ichi Yá Ndiöxí. ¹⁴ Te vá dáñá ndèe-n càda-n nacuáa ndùu táhú nĩ taxi Yá Ndiöxí ní ngũndecu ndihí-n cũtnáhá ní sacáⁿ ndodo cue tēe yĩndaha ñaha xii ñáyi ndècu ichi Yá Ndiöxí ndaha-güedé díquí-n, te ní cachí tnũhu-güedé sá dúcáⁿ ní cuiní Yá Ndiöxí cunduu.

¹⁵ Te ni yũhu ni iní-n càda-n nchaa nacuáa càháⁿ-í-a cuendá sá ná quini ñáyi sá ïo-gá váha ta quide-n cuáháⁿ. ¹⁶ Te ío váha cundehe-n nchàa nacuáa quide-n, ndihí nchaa nàcuáa dānehé-n-yu, te vá dáñá ndèe-n dùcaⁿ cada-n. Te núu ducaⁿ na càda-n te nduu táhú-n cundecu váha-n núu Yá Ndiöxí ni caa ni quihíⁿ ndihí nchaa ñáyi na tēdõho nchaa tnũhu càháⁿ-n.

5

Nàcuáa tàú-xi cada-o cundecu-o ndihí ñáyi sàndáá iní tnũhu Yá Ndiöxí

¹ Te vá tēnāá-n nchàa cue tēe cùu sacuéhé chi vii vii cáháⁿ-n dõho-güedé, te cada iní-n sã dàtná tātá-n cùu-güedé, te ñu-ni ducaⁿ vì vii cáháⁿ-n dõho nchaa cue tēe cuechi, te cada iní-n sã dàtná cue ñani-n cùu-güedé.

² Te ñu-ni ducaⁿ vì vii cáháⁿ tucu-n dõho nchaa ñáyi ñihí ñáyi cùu sacuéhé, te cada iní-n sã dàtná nāná-n cùu-yu, te ñu-ni ducaⁿ vì vii cáháⁿ tucu-n dõho nchaa ñáyi ñihí ñáyi cuechi, te cada iní-n sã dàtná cue cúha-n cùu-yu, te ío cuu váha iní-n òrē ducaⁿ cáháⁿ-n dõho nchaa ñáyi cuechi-ãⁿ.

³ Te canehe-n sã yĩñũhu núu ñáyi ñihí ní quendóo quēe, te chindēe-n-yu núu ndáhú-yu. ⁴ Te núu ñⁿ ñaha quēe ndécú cuē déhe-aⁿ àdi cue déhe ñani-aⁿ, te ío xini ñũhu-xi cada-güexi nchaa nacuáa tàú-xi cunduu núu-aⁿ chi ducaⁿ cuiní Yá Ndiöxí cada-güexi. Te núu ducaⁿ na càda-güexi te nānchocáva-güexi quide-güexi sã váha sá

cúu-xi ñáyi ní dācuéhnú ñaha xii-güexi. Te núu ducaⁿ na càda-güexi te quide váha-güexi te ío nduu vétú iní Yá Ndiöxí. ⁵ Te ñáyi quēe ñáyi ndáhú ndécú ichi Yá Ndiöxí sàndáá iní-yu sá díú-gã chindēe ñaha-gá xii-yu, te cuēi nduu cuēi niú ñá túú dāña ndeé-yu càháⁿ ndihí ñáhá-yu xii-gá. ⁶ Te nchaa ñáyi quēe cúdí iní quide nchàa sá cuéhé sá dúhá cùu-yu dàtná ñáyi ní xihí cuēi ndècu vívũ-yu. ⁷ Te cúñaha-n xii nchaa ñáyi sá ná cádá-yu nchaa tnũhu càháⁿ-í-a cuendá sá ñà túú nã cumānĩ-yu cundecú-yu, te ducaⁿ vã yõo cáháⁿ cuéhé cuendá-yu. ⁸ Te ío xini ñũhu-xi chindee-yu cue tnàha ñáyi-yu, dico ío-gá xini ñũhu-xi chindee-yu cue ñáyi cùu ndi meé-yu ndècu ndihí-yu, te núu vá dúcáⁿ càdá-yu te ñá túú-gã sàndáá iní-yu cadá-yu nàcuáa càháⁿ Yá Ndiöxí. Te sá dúcáⁿ ná càdá-yu te vihi-gá quidē-yu dācúxí ñáyi ndècu ichi cuehé ichi duha.

⁹ Te chido tnùnĩ-n mēe-ni ñáyi quēe ñáyi sa ndècu únídico cuía-xi àdi vihi-gá cuendá ñáyi-áⁿ cadá-yu nchaa nàcuáa cuiní Yá Ndiöxí núu nchàa ñáyi ndècu ichi-gá, te ñáyi-áⁿ xini ñũhu-xi cuú-yu mee-ni ñáyi ní quide ndáá ní xĩndecu ndihí yĩ-xi. ¹⁰ Te na cùu-yu ñáyi quēe quide váha cùu núu nchàa ñáyi, te na cùu-yu ñáyi quēe xini canu ichi váha cue landú-xi, te na cùu-yu ñáyi sãñaha nũu vehe ndetatú cue ñáyi ñũhu ichi, te na cùu-yu ñáyi ndècu túha quide nani chiúⁿ cuendá cue ñáyi ndècu ichi Yá Ndiöxí, te na cùu-yu ñáyi chĩndee nchaa ñáyi ndècu ndihí tnũndõho tnũhu ndáhú, te na cùu-yu ñáyi ñá túú dāña ndeé quide nchàa núu sã váha.

¹¹ Te vá chidó tnùnĩ-n ñáyi quēe ñáyi ñá túú ndècu únídico cuía-xi cada chiúⁿ Yá Ndiöxí, chi núu cuechi-gã-yu ña, te vá cundáá-yu cadá-yu chiúⁿ-gá, chi quesáhá-yu natnāndaha tucú-yu. ¹² Te sá cuendá xĩãⁿ te nacháhu-yu núu Yá Ndiöxí, chi vá cádá-gã-yu nàcuáa ní cuu tnũhu cadá-yu ni cùu. ¹³ Te ngũita-yu cani iní-yu quihíⁿ-yu ndi vehe ndi vehe caca nihní-yu, te nchaa ñáyi ducaⁿ quide ío cùu cuhndú-yu, te cùyiti yuhú-yu, te ndēni ní cuu cuáháⁿ-yu chĩnee díquí-yu vehe tnàha

ñáyíu-yu ndèhé-yu núu nása ndècú-yu, te ñá túú tàú-yu ducaⁿ càdá-yu, te càháⁿ-yu mee-ni tnùhu sá ñà túú nàndíhi. ¹⁴ Núu xíⁿ cuíní-í sá ncháá ñáyíu quèé ñáyíu cuechi na nàtnándaha tucú-yu cuendá cuú-yu náná, te ducaⁿ càdá-yu nchaa sá xíní ñùhu-xi cadá-yu vehé-yu, te núu ducaⁿ na càdá-yu, te nchaa ñáyíu cùu úhú iní ñáhá xì-o vá nìhí-gá-yu tnúhu cáháⁿ cuèhé-yu cuendá tnúhu Yá Ndióxi. ¹⁵ Te dava ñáyíu quèé ndécú ichi Yá Ndióxi ní cùu ní dáñá-yu te ní tñí-yu tnúhu càháⁿ sácúíhná.

¹⁶ Te núu dava ñáyíu ndècu ichi Yá Ndióxi ndécú ndìhí-yu ìⁿ ñaha quèé cúu ndì meé-yu ña, te tàú-yu chindee ñáhá-yu xii-aⁿ cuendá sá vǎ ìo chi chiùⁿ-aⁿ nchaa ñáyíu ndècu ichi Yá Ndióxi, te ducaⁿ te nchaa ñáyíu ndècu ichi-gá-áⁿ ñíhí ndéé-gǎ-yu chindèé-yu dava-gá ñáyíu quèé ñá túú vèdana ndècu ndìhi.

¹⁷ Te nchaa cue téé ìo váha quède yìndaha ñaha xii ñáyíu ndècu ichi Yá Ndióxi ìo xini ñuhu-xi canehe sá yíhí ñùhu núu-güedé, te chindee ñàha xii-güedé. Te uuⁿ-gá tàú ñáyíu ducaⁿ càdá-yu sá cúu-xí ncháa cue téé ni yùhu ni iní càháⁿ tnúhu-gá. ¹⁸ Te núu tütú Yá Ndióxi càchí-xi: “Vá chíhí-ndó ñùnu yuhu ndicutu oré dánchezí-dí triú”, duha càchí-xi. Te càchí tucu-xi ingá xichi: “Ìⁿ téé quède chiuⁿ dacuítí tàú-xi sá cúhúⁿ yǎhu-dé”, duha càchí-xi núu tütú-gá.

¹⁹ Te núu ìo ñáyíu véxi sàcáⁿ cuéchi núu-n cuendá ìⁿ téé yìndaha ñaha xii ñáyíu ndècu ichi Yá Ndióxi ñá, te cada cuendá-n tnùhu càháⁿ-yu te núu véxi-yu ndìhi úú àdi úní ñáyíu càháⁿ ndáá nàcuáa ní cuu, áⁿ nùu ñáhá te vá cadá cuendá-n tnùhu càháⁿ-yu. ²⁰ Te núu cue téé yìndaha ñaha xii ñáyíu-áⁿ ndécú cuèchi-güedé, te cáháⁿ-n dǎho-güedé núu ncháa ñáyíu ndècu ichi-gá cuendá sá dáva-gǎ-yu vá cúyíⁿ-yu ducaⁿ càdá-yu. ²¹ Te Yá Ndióxi ndìhi Xítóhó Jesucristú náhá-gǎ ndìhi cue espíritú xínú cuèchi núu-gǎ sá yǎhú càháⁿ-í dóho-n sǎ cadá-n ncháa nàcuáa càháⁿ-í-a, te ìⁿ-ni cáháⁿ ndìhi-n cuè téé xíní tnáhá ndìhi-n, ndìhi cue téé ñá túú xíní tnáhá ndìhi-n. ²² Te vá ìo cundíhí iní-n tàxi ndecu-n ìⁿ téé quíndaha ñàha xii ñáyíu, chi díhna-gá cada cuendá-n te núu cùu-dé ìⁿ téé quède ndáá,

chi núu cuendá-ni na tàxi ndecu-n-dé te vá cadá ndáá-dé, te yòhó ndaa díquí-n cuendá nchaa sá cuèhé sá dúhá càda-dé, te ìo coto-n mèe-n vá cadá-n nì ìⁿ sá cuèhé sá dúhá.

²³ Te ducaⁿ ìo mee-ni cùhú xítí-n te vá cóhó-n mèe-ni ndute, chi tnáhá luha vínú ndéhé yoho yàha stilé coho-n cuendá cada tátna-xi.

²⁴ Te dava ñáyíu cùtnuní nchaa sá cuèhé sá dúhá quidé-yu, te cùtnuní tucu sá náchǎhu-yu na sáá nduu, te dava tucú-yu chi ñá túú cùtnuní nchaa sá cuèhé sá dúhá quidé-yu, dico na sáá nduu cùndáá cuèchi-yu te dáva-áⁿ cutnùní. ²⁵ Te ducaⁿ sǎtnahá-xi cùu nchaa sá vǎha quède dáva-yu chi cùtnuní, te cuèi ñá túú cùtnuní òré-ni dico dacuítí sǎ sáá nduu cùtnuní.

6

¹ Te nchaa ñáyíu ndècu tnuú quidé chiùⁿ ndìhi ìⁿ patróoⁿ xini ñuhu-xi ìo canehé-yu sá yíñùhu núu-dé cuendá sá vǎ càháⁿ cuèhé ñáyíu cuendá Yá Ndióxi, te ni vǎ càháⁿ cuèhé-yu cuendá tnúhu-gá. ² Te núu patróoⁿ cue ñáyíu xínu cuechi-áⁿ sàndáá iní-dé Yá Ndióxi, te ñá díú sǎ dúcáⁿ sàndáá iní-dé Yá Ndióxi te vá cánèhé-yu sá yíñùhu núu-dé, chi uuⁿ-gá tàú-yu cada váha-yu cunu cuèchí-yu núu-dé, te ducaⁿ na càdá-yu chi xínu cuechí-yu núu tée sàndáá iní ndìhí-yu tnúhu Yá Ndióxi. Te vá dáñá ndèé-n dǎnehé-n-yu nchaa nàcuáa càháⁿ-í-a, te cúñaha-n xii-yu sá ná càdá-yu.

Nduu vétú iní-ó cùndecu-o

³ Te ìo cue téé ñá túú tñí-güedé nàcuáa càháⁿ tnúhu Xítóhó Jesucristú, te cue téé-áⁿ càchí-güedé sá càháⁿ ndáá-güedé dico ñá ndáá, chi ñá túú càháⁿ-güedé nàcuáa cuáháⁿ tnúhu-gá. Te nchaa tnúhu Xítóhó Jesucristú cúu-xí mèe-ni tnúhu ndáá, te chindee ñaha-xi cada ndáá-ó cùndecu-o ichi-gá. ⁴ Te nchaa cue téé ducaⁿ xíquide quède cahnu-güedé méé-güedé dico ñá túú vèdana xíní-güedé, te cue téé-áⁿ ñá túú ndècu váha iní-güedé chi nándi tnúhu sá ñà túú nàndíhi cuíní-güedé cùtnàha-güedé. Te ngüita-güedé cúu cuèdú iní tnáhá-güedé, te nàá ndìhi tnáhá-güedé, te xícuèhé tnáhá-güedé, te ñá túú-gǎ cúu vǎha iní núu tnáhá-güedé. ⁵ Te cue téé-áⁿ mee-ni nàá-güedé chi ñá túú sàni váha iní-güedé, te ni ñà túú xíní-güedé

nàcuáa cuáháⁿ tnúhu ndáá tnúhu Yá Ndiöxí, te cächí-güedé sá ïo váha cundecu-güedé ichi-gá chi sàni iní-güedé sá ïo vâi dîhúⁿ nîhí-güedé cundecu ndîhi-güedé. Te yúhú càháⁿ-í dóho-n sã vã nîhí tnáhá-n ndîhi nchaa cue téé ducaⁿ xîquide. ⁶ Te ndáá sá ïchi Yá Ndiöxí cúu-xí ïⁿ ichi sá ïo váha cundecu-o, dico xîni ñuhu-xi nduu vétú iní-ó nàcuáa ndècu-o ñuyúú-a. ⁷ Te nchoo cuè ñáyiú chi ñá túú vèdana nèhe-o ní quexìo ñuyúú-a, te ñu-ni ducaⁿ ñà túú vèdana canehe-o quîhíⁿ òré ná cúú-ó. ⁸ Te ío xîni ñuhu-xi nduu vétú iní-ó te núu ndècu-ni sá cúnchìto-o ndîhi dóó cuhnu-o. ⁹ Te ío ñáyiú ío cuíní-yu cuu cuicá-yu, te ñáyiú-áⁿ dácàhu iní ñáhá yùcu ñávãha xîi-yu cadá-yu nándi sá cuèhé sá dúhá, te nándi-gá nchaa sá cuèhé sá dúhá càhu iní-yu quidè-yu, te nchaa sá quidè-yu-áⁿ ñà túú vèdana nándîhi-xi chi uuⁿ-gá ndádá ndàhú ñáhá-xi xîi-yu, te dàcuíta nihnu ñaha-xi. ¹⁰ Chi nchaa ñáyiú ñuhu iní mee-ni dîhúⁿ, te xîáⁿ quidè-xí ngüíta-yu sàni iní-yu cadá-yu nándi sá cuèhé sá dúhá. Te ío ñáyiú ndècu ichi Yá Ndiöxí te sá tnúhu ducaⁿ ñuhu iní mee-ni dîhúⁿ ní dáñã-yu ñá túú-gã sàndáá iní ñáhã-yu xii-gã, te vitna ñá túú tnàhí-gã ndécú vãha iní-yu.

Cahni iní-ó càda-o nchaa nacuáa càháⁿ Yá Ndiöxí chi sàndáá iní-ó-gã

¹¹ Te yòhó téé quidè chiuⁿ Yá Ndiöxí xîni ñuhu-xi vá cadá-n dàtná quidè nchaa ñáyiú ní cachí-í sá ñà túú quidè ndáá, te vá dáñã ndéé-n càda ndáá-n cundecu-n, te cada-n nàcuáa nduu vétú iní Yá Ndiöxí, te ío quindáá iní-n-gã, te cuu iní-n nchaa tnaha ñáyiú-n, te cada càhnu iní-n nchaa sá ná yãha-n cundecu-n ichi-gá, te cunduu ndàhú iní-n. ¹² Te cahni iní-n càda-n nchaa nacuáa cuíní Yá Ndiöxí chi sàndáá iní-n-gã, te ío cuhuⁿ iní-n sã cundècu-n ndîhi Yá Ndiöxí ní caa ní quîhíⁿ, chi ñu cuendá tnàhí-áⁿ ní cáháⁿ ñáhã-gã xii-n, te ní cáháⁿ ndáá-n núú vâi ñáyiú sá ïo váha sàndáá iní-n-gã. ¹³ Te Yá Ndiöxí Yaá quidè nchìto nchaandi túhú sá ío ñuyúú naha-gá sá càháⁿ-í dóho-n vitna, te ñu-ni ducaⁿ naha tucu Xítohó Jesucristú Yaá ní cáháⁿ tnúhu ndáá núú tẽ Pilatú ¹⁴ sá quindáá iní-n càda-n nchaa nacuáa càháⁿ Yá Ndiöxí, te nchaa tnúhu càháⁿ-gã cada-n nàcuáa vá dáquèe tíhú ñáhã ñáyiú xii-n, te

ducaⁿ-ni càda-n ndéé ná sàá nduu quixi tucu Xítohó Jesucristú. ¹⁵ Te quixi tucu-gá chi ducaⁿ ní cachí Yá Ndiöxí cunduu, te mee Yá Ndiöxí náhã-gã ná nduu quixi tucu Xítohó Jesucristú. Te Yá Ndiöxí ío váha cùu iní-gá te ïⁿdîi dîi-ni-gã ío-gá cúnùu-gá dàcúxí cuè téé tàxi tnuní ïⁿ ïⁿ nàcióⁿ ndîhi nchaa dava-gá cue téé cùnùu, chi tàxi tnuní ñáhã-gã xii-güedé, te nchaa ñáyiú ndècu ñuyúú-a tàxi tnuní-gá. ¹⁶ Te ñu-gá cúu-gã Yaá ndécú nchaa nduu nchaa quíú, te ío càhnu cuu-gá chi dàtná dáyehé nchìcanchii dáyehé-xi núú ndécú-gã, te vá yòo ïⁿ cùyîi dayatni núú ndécú-gã, te ní ñã túú ní ïⁿ ñáyiú xîní ñáhã xii-gã te ní vã ndácú-yu quíní ñáhã-yu xii-gã. Te ío na cànehe nchaa ñáyiú sá yíñuhu núú-gã ní caa ní quîhíⁿ, te ducaⁿ ïo na tàxi tnuní-gá ní caa ní quîhíⁿ. Te ducaⁿ na cunduu.

¹⁷ Te cáháⁿ-n dóho nchaa ñáyiú cuica ndècu ndîhi nchaa sá ío ñuyúú-a cuendá sá vã cadá càhnu-yu mèè-yu, te duuⁿ duuⁿ vá cundèé iní-yu ní ïⁿ sá ndécú ndîhí-yu chi vá cúdîi-xi, te cáháⁿ-n dóho-yu sá ná cundèé iní-yu Yá Ndiöxí chi ñu-gã cúu-gã Yaá ndécú nchaa nduu nchaa quíú, te chitu núú ndáhã tàxi-gã nchaa sá xîní ñuhu-o, chi cuíní-gá sá ïo cuu váha iní-ó cundecu-o. ¹⁸ Te cáháⁿ tucu-n dóho-yu sá ná cadá-yu mee-ni sã vãha, te cuendá nchaa sá vãha cadá-yu-áⁿ te cuú-yu ïⁿ ñáyiú cuica sá cúu-xí Yá Ndiöxí, te na cundecu túha-yu chindèé-yu cue ñáyiú ndàhú cuáñáhã-yu sá xîní ñuhú-yu. ¹⁹ Te núu ducaⁿ na càda-yu te Yá Ndiöxí cuáñaha-gã sá ndúú tãhú-yu na sàá nduu, te ngúndecu váha-yu ndîhi-gã ní caa ní quîhíⁿ.

Tnúhu ndéé núú ní ndîhi-ná

²⁰ Te yòhó té Timùteú càháⁿ-í dóho-n sã ïo cada cuendá-n vã dãma tnúhu ní taxi Yá Ndiöxí danèhé-n ñáyiú, te vá cadá cuendá-n nchaa cuendú cuèhé cuendú duha ío ñuyúú-a chi ñá túú nándîhi-xi, te ní vã cadá cuendá-n nchaa tnúhu xîtnaha ñáyiú cächí sá xícá naha tnúhu cue téé túha chi ñá dîú ïⁿ tnúhu ndáá cúu-xí. ²¹ Te ío ñáyiú ñá túú-gã sàndáá iní-yu tnúhu Yá Ndiöxí, chi ní quidè cuendá-yu nchaa tnúhu xica naha ñáyiú-áⁿ.

Te Yá Ndiǒxí ná chìndee chitúu ñaha-gǎ
xii-n. Te ducaⁿ na cùnduu. Te ío cada ndee
ìní-nǎ vitna.

TUTÚ CÚÚ ÒÚ NÍ CADÚHA TÉ PÄBLÚ QUIHÍⁿ NDAHA TÉ TIMÛTEÚ

Té Păblú cáduha-dé tutú quíhíⁿ ndaha té Timùteú

¹ Yúhú té Păblú ní tendaha ñàha Yá Ndiöxí càháⁿ-í tnúhu Xítohó Jesucristú núú ñăyiu, chi ducaⁿ ñí cachí Yá Ndiöxí cunduu. Te càháⁿ-í dàtná ní cachí Yá Ndiöxí sá ncháá nchòo ñăyiu ndècu ndihí Xítohó Jesucristú naníhí tǎhú-ó. ² Te yúhú té Păblú cáduha-í tutú-a daquixi-í ndaha yòhó té Timùteú chi ío cùu iní ñàhá-í xii-n, te ðiu-í ní sanu ichi ñaha-í xii-n ichi Xítohó Jesucristú, te xicáⁿ tǎhú-í núú Dütú Ndiöxí ndihí núú Xítohó Jesucristú sá ío na chindee chitúu ñaha-gǎ xii-n, te cundǎhú iní ñàhá-gǎ, te ducaⁿ ndí nduú-gǎ ná cádá te ío váha cuu iní-n cùndecu-n.

Cáháⁿ váha-o cuendá Xítohó Jesucristú

³ Te cuéi nduu cuéi niú ducaⁿ-ni càháⁿ ndihí-í Yá Ndiöxí cuendá-n, te ndàcáⁿ tǎhú-í núú-gǎ, te xínu cuechi-í núú-gǎ dàtná ní quide cue ñaní tnáhà-í ní xíndecu ndéé sanduu, te cùtnuní iní-í sá quidé ndǎá-í núú-gǎ dàtná ní xóo cada-güedé. ⁴ Te ío sàni iní-í naníhí tnáhà-ó cuendá ío cudíⁿ iní-í, chi ndàcu iní-í sá ío ní ndáhyú-n sǎ ndíhú iní-n cùtnáhá ní quide ndee iní-í tnáhà-ó. ⁵ Te ñaha-í sá sàndáá ndisa iní-n Yá Ndiöxí dàtná ní ngúita díhna-gǎ xítná-n tǎ Lòidá ndihí nǎná-n tǎ Eùnicé quídě-yu, te cùtnuní ndǎá iní-í sá díú tnáhà-n ío váha sàndáá iní-n-gǎ.

⁶ Te xǎⁿ dándàcu iní ñàhá-í xii-n cuendá sá ío-gǎ nducu ndée-n cada-n chiuⁿ ní nduu tǎhú-n núú Yá Ndiöxí cada-n, chi ní taxi-gǎ tnúhu ndee iní ní ngúndecu ndihí-n cùtnáhá ní sacáⁿ ndodo-í ndaha-í díquíⁿ sǎ díú chiúⁿ-gǎ cada-n. ⁷ Te Espíritú sá ñí taxi Yá Ndiöxí ndécú ndihí-o ñǎ túú cùu-xi ìⁿ Espíritú sá cádá nàcuáa yùhú-ó, chi cùu-xi ìⁿ Espíritú sá táxí tnúhu ndee iní cada-o chiúⁿ-gǎ, te ðiu-xi quide cuu iní tnáhà-ó ìⁿ ìⁿ-o, te ðiu-ni tucu-xi quide cut-nuní iní-ó nàcuáa cada-o cùndecu-o. ⁸ Te

xǎⁿ núu vá cúcàhaⁿ núú-n cǎháⁿ váha-n cuendá Xítohó Jesucristú, te ni vǎ cúcàhaⁿ núú-n sǎ dúhá yìhi-í vecaá sá cuendá-gǎ, te xini ñuhu-xi sá tnáhà-n ndòho-n sá cuendá tnúhu-gǎ, te cundee iní-n ndòho-n, chi Yá Ndiöxí chindee ñàha-gǎ xii-n. ⁹ Te Yá Ndiöxí ní dácǎcu nihnu ñaha-gǎ xii-o núú ùhú núú ndǎhú, te ní cachí-gǎ sá cádá-ó ncháa nacuáa cuení méé-gǎ cunduu, te ducaⁿ ñí quide-gǎ chi ducaⁿ ñí sani iní méé-gǎ cunduu sá cádá váha ñaha-gǎ xii-o, te ñǎ díú sǎ ío váha quide-o ndecu-o ducaⁿ ni quide-gǎ. Te ndéé cùtnáhá vátá ngáva-gǎ ñuyíú ñí cachí-gǎ sá cádá váha ñaha-gǎ xii nchaa nchoo ñăyiu ní ngúndecu ndihí Xítohó Jesucristú vitna. ¹⁰ Te vitna cùtnuní iní-ó sǎ ío váha quide ñaha-gǎ xii-o, chi ní quixi Xítohó Jesucristú ñuyíú-a ní dácǎcu nihnu ñaha-gǎ xii-o núú ùhú núú ndǎhú, te Yaá-áⁿ ñí quide-gǎ cuendá sá vǎ cùú-gǎ-ó cùú dúcáⁿ-ó, chi ní cachí-gǎ sá cùndecu-o ni caa ni quíhíⁿ te núu na quíndáá iní-ó tnúhu-gǎ.

¹¹ Te ní cachí-gǎ sá càháⁿ-í tnúhu-gǎ núú ñăyiu ñǎ túú cùu ñăyiu isràel te dacuàha váha-í-yu tnúhu-gǎ, te cuéi nděni ní cuu ndécú-yu te quíhíⁿ-í càháⁿ-í tnúhu-gǎ núú-yu chi ducaⁿ ñí cachí-gǎ cunduu. ¹² Te cuendá xǎⁿ nándi sá ndóhò-í vitna cuendá-gǎ, dico ñǎ túú cùcàhaⁿ núú-í chi cùtnuní váha iní-í nàcuáa sàni iní Xítohó Jesucristú Yaá sàndáá iní-í, te yúhú ní dáñà-í méé-í núú ndáhà-gǎ, te cùtnuní ndǎá iní-í sá cótó ñaha-gǎ xii-í ndéé ná sàá nduu nàcuaca ñaha-gǎ.

¹³ Te vá dáñá ndéé-n càda-n nchaa nacuáa càháⁿ tnúhu váha ní dǎnehé ñàhá-í xii-n, te ío quíndáá iní-n Yá Ndiöxí, te nchaa-o nàcuáa ndècu-o ndihí Xítohó Jesucristú ío cuu iní tnáhà-ó ìⁿ ìⁿ-o. ¹⁴ Te cada cuendá váha-n sǎ vǎ dǎma tnúhu Yá Ndiöxí sá ñí taxi-gǎ ndécú ndihí-n, te Espíritú-gǎ sá ñí taxi-gǎ ndécú ndihí-o chindee ñaha-xi xii-n.

¹⁵ Te yòhó sa xini-n sǎ ncháa ñăyiu ndècu distritú Àsiá, ñăyiu ní sàndáá iní tnúhu Xítohó Jesucristú ní dáñá ñàhá-yu xii-í, te tnáhà té Fígeló ndihí té Hèrmógenés ní dáñá ñaha-güedé xii-í. ¹⁶ Te xicáⁿ tǎhú-í núú Xítohó Jesucristú sá ná chindee-gǎ cue ñăyiu cùu ndí mee té Onésiforó, chi ðiu-dé ío vǎi xito ní quixi-dé ní quide cuendá ñàhá-dě

xii-í, te ní taxi-dé tnúhu ndee iní, te ñá túú ní cùcahaⁿ núú-dě sá yíhí-í veacaá. ¹⁷ Te cùtnàhá ní xíndecu-dé ñuú Rómá ducaⁿ-ni ní xóo nanducu ñàha-dé xii-í ndéé ndéé naníhí ñàhá-dě. ¹⁸ Te xìcáⁿ táhú tucu-í núú Xítóhó Jesucristú sá ná cùndahú iní ñàhá-gã xii-dé nduu na sàá cundáá cuéchi nchaa ñáyiu. Te yòhó sa xìní ndáá-n sã ïo ní chindee ñàha-dé xii-o cùtnàhá ní xíndecu-o ñúú Éfesú.

2

Tée quide ndáá xínú cuèchi núú Xítóhó Jesucristú

¹ Te yòhó téé cùu datná ìⁿ déhe mee-í ïo nducu ndèe-n cada-n nacuaá níhí ndéé-gã-n cùndecu-n ichi Xítóhó Jesucristú chi ñu-gá chindee ñàha-gá xii-n. ² Te nchaa tnúhu sá ní dánèhé ñàhá-í xii-n ndìhí nchaa dava-gá ñáyiu, xíáⁿ danèhé-n dàva-gá cue téé quide ndáá cuèndá danèhé-güedé dava-gá ñáyiu.

³ Te cahni iní-n ndòho-n cunu cuechi-n núú Xítóhó Jesucristú dàtná cuini-n ndòho ìⁿ sandadú sàhni iní-dé xínú cuèchi-dé. ⁴ Chi ni ìⁿ sandadú ñá túú nãgá sání iní-dé cada-dé òré xínú cuèchi-dé cuèndá cudùu-dé núú tée taxi tnuñí ñàhá. ⁵ Te ñu-gá ducaⁿ sãtnahá-xi cùu tucu ìⁿ téé dàdiqui, chi núu vá dàdiqui-dé nàcuáa tàú-xi cunduu te vá ñihí-dé sá ndúú táhú-dě. ⁶ Te núu ìⁿ téé xínu cuechi ïo ndùcu ndee-dé quidé chiúⁿ-dé chíhí-dě tatá, te ñu-gá tàú-dé díhna-gá-dé níhí-dě sá cùhúⁿ yãhu-dé. ⁷ Te caní iní-n nchaa tnúhu càháⁿ-í-a, te Xítóhó Jesucristú chindee ñàha-gá xii-n te tecu tnuñí-n nchaa.

⁸ Te ndacu iní-n sã Xítóhó Jesucristú ní cuu-gá ñani tnàhá ndí Dáví, te ní xíhí-gá te ní ndoto-gá, te ñu-gá ducaⁿ nduu tnúhu dànehé-í ñáyiu. ⁹ Te ïo dàndoho ñàha ñáyiu xii-í cuèndá sá càháⁿ-í tnúhu-gá, te quide ñàhá-yu xii-í dàtná quidé-yu ìⁿ téé ní quide ìⁿ cuéchi càhnu, chi ní chihi ñàhá-yu veacaá xii-í, dico tnúhu Yá Ndiõxí chi vá ndácù-yu nganí-yu. ¹⁰ Te xíáⁿ ñu cuèi nándi cùu nchaa sá quidé ñàhá-yu xii-í, dico quide cahnu iní-í cuèndá sá naníhí táhú tnàhá nchaa dava-gá ñáyiu cuini Yá Ndiõxí cundecu ndìhí-gá, chi nchaa ñáyiu na tnàhá tnúhu ndìhí Xítóhó Jesucristú

nduu táhú-yu cundecu-yu ndìhí-gá núú ïo váha càa ndecu-gá ni caa ni quíhíⁿ.

¹¹ Te xéhé cúú-xí ìⁿ tnúhu ndáá cuiti: Nchoo cùu-o datná ñáyiu ní xíhí ndìhí Xítóhó Jesucristú chi ñá túú-gã ndécú-ó ìchi cuehé ichi duha, te xíáⁿ ñu cuèi na sàá nduu cùú-ó ñu-yú-a, dico ñu-ni cundecu-o ndìhí-gá.

¹² Te núu na cùndee iní-ó ndòho-o nándi sá ndóhó-ó sã cuèndá-gá, te sáá nduu te cunuu-o ndìhí-gá.

Te núu na càháⁿ-ó sã ñà túú xìní-ó-gã, te ñu-ni ducaⁿ cùñaha-gã xii-o sã ñà túú xìní ñàhá-gã ná sàá nduu càa ndáá-gá cuéchi nchaa ñáyiu.

¹³ Te núu nchoo ñà túú quide ndáá-ó ndècu-o núú-gã ñá, dico mee-gã chi ïo ndáá quidé-gã, chi Yá Ndiõxí nchaa sá sání iní-gá quidé-gã.

Tée quide nacuaá nduu vétú iní Yá Ndiõxí

¹⁴ Te dandacu iní-n nchaa ñáyiu ndècu ndìhí-o ichi Xítóhó Jesucristú nchaa tnúhu càháⁿ-í-a, te cùñaha-n xii-yu sá Xítóhó Jesucristú cuini-gá sã ñà túú-gã nándi tnúhu cùtnàhá-yu, chi nchaa tnúhu càháⁿ-yu-áⁿ dácuíta nihnu-xi ñáyiu ndèdòho ñàha xii-yu, chi ñá túú vèdana nándìhí nchaa tnúhu-áⁿ. ¹⁵ Te ïo nducu ndèe-n cada ndáá-n cùndecu-n núú Yá Ndiõxí, te cada-n chiúⁿ-gá nàcuáa nduu vétú iní-gá, te càháⁿ ndáá-n tnúhu-gá, cuèndá sá vã cùcàhaⁿ núú-n núú-gã. ¹⁶ Te vá càdá cuèndá-n nchaa tnúhu sã ñà túú vèdana nándìhí càháⁿ ñáyiu cuèndá Yá Ndiõxí, chi nchaa ñáyiu càháⁿ tnúhu-áⁿ ndìhí nchaa ñáyiu sàcùndedòho ñàha xii-yu uuⁿ-gá quidé-yu nchaa sá cuéhé sá dúhá. ¹⁷ Te nchaa tnúhu-áⁿ cùtenuu-xi dàtná quidé ìⁿ cuéhé sã ñani ñàha xii ñáyiu xité nuu-xi nihí yiqui cùñú-yu. Te tnàhá té Himènéu ndìhí té Filetú càháⁿ-güedé tnúhu-áⁿ quidé-güedé dàtná quidé ñáyiu-áⁿ. ¹⁸ Te cue téé-áⁿ ñà túú-gã càháⁿ ndáá-güedé dàtná càháⁿ tnúhu Yá Ndiõxí, chi càhí-güedé sá ncháá nchòo ñáyiu ndècu ichi Yá Ndiõxí cúú-ó dàtná cue ñáyiu sa ní ndoto, dico na cùú ndisa-o te vá ndótó-gã-ó càhí-güedé. Te dava ñáyiu ní dáñá-yu sá sàndáá iní-yu tnúhu Yá Ndiõxí sá dúcáⁿ càháⁿ-güedé. ¹⁹ Te cuèi ducaⁿ quide davá-yu, dico Yá Ndiõxí ní taxi ndecu-gá

cue ñáiyu ni yùhu ni iní ndécú ìchi-gá, te cùtnuní sá ndécú ndìhi ñaha-gá xií-yu, chi ìⁿ xichi núú tütú-gá càchí-xi sá méé-gă xìní-gá cue ñáiyu cùu cuendá-gá. Te ìngá tucu xichi núú tütú-gá càchí-xi sá ncháá ñáiyu sàndáá iní ñáhá xì Xítóhó Jesucrìstú xìní ñùhu-xi sá vă cùndècu-gá-yu ichi cuèhé ichi duha.

²⁰ Te ñáiyu cuica chi ndècu ndìhí-yu vehé-yu cóhó sá ñí cuáha mee-ni dǐhúⁿ cuááⁿ, ndìhi cóhó sá ñí cuáha mee-ni dǐhúⁿ cuixíⁿ, te nchaá cóhó-áⁿ cúú-xí dàtná cue ñáiyu ñá túú ñă cúmăní núú Yă Ndiöxí. Te ndècu ndìhi tucú-yu cóhó sá ñí cuáha mee-ni ñùhu, ndìhi cóhó sá ñí cuáha mee-ni yùtnu, te nchaá cóhó-áⁿ cúú-xí dàtná cue ñáiyu ñá túú quide ndáá núú Yă Ndiöxí.

²¹ Te nchaá ñáiyu ío ndècu yíñuhu núú Yă Ndiöxí cúú-yu ñáiyu ñá túú ñihí tnáhá ndìhi cue ñáiyu ñá túú quide ndáá núú-gă, te cue ñáiyu ndècu yíñuhu núú-gă-áⁿ ñà túú tnàhí quée cáva-yu quidé-yu nchaá chiuⁿ tahu-gá.

²² Te ío cada cuendá-n vă cadá-n nàcuáa quide cue téé cuechi ndècu ichi cuehé ichi duha, te cada-n nàcuáa cundáá-n cùndecu-n ichi Yá Ndiöxí, te quindáá iní-n-gă, te cuu iní-n ncháa tnaha ñáiyu-n, te cundecu nahi-n, chi ducaⁿ tàú-xi cada-n ndìhi nchaá dava-gá ñáiyu sa ní nduu ndoo ní nduu nine iní-xi ñáiyu càháⁿ ndìhi ñaha xì Yá Ndiöxí. ²³ Te vă cadá cuendá-n ñí ìⁿ tnúhu xítnàha ñáiyu chi ñá túú vèdana nàndíhi-xi, chi núu na càda cuendá-ó te dícó dánáá ñáhá-xí. ²⁴ Chi nchaá cue téé xínu cuechi núú Yă Ndiöxí xìní ñùhu-xi càháⁿ váha-güedé ndìhi nchaá ñáiyu, te danèhé ñáhá vâha-güedé tnúhu-gá, te cunduu càhnu iní-güedé te vă nâa-güedé. ²⁵ Te vii vii càháⁿ-güedé dóho nchaá ñáiyu sâá iní-xi, ñáiyu ñá túú tnàhá iní tnúhu ndáá tnúhu Yá Ndiöxí, te ducaⁿ te cudana Yá Ndiöxí cada-gá te ndixi túu iní-yu sá ñà túú quide váha-yu ndécú-yu te quindáá iní-yu tnúhu-gá. ²⁶ Te ducaⁿ te cutnùní iní-yu sá sâcuíhná cùnùu-xi taxi tnuní ñáhá-xí xií-yu, chi dàcahu iní ñáhá-xí xií-yu quidé-yu nchaá nàcuáa cùu iní-xi ni cùu.

3

Nàcuáa cada ñáiyu òré sa ta cùyatni sáá nduu quixi tucu Xítóhó Jesucrìstú

¹ Te càchí tnúhu-í xii-n cuendá cunaha-n nàcuáa cada-xi òré sa ta cùyatni sáá nduu quixi tucu Xítóhó Jesucrìstú, chi dàvá-áⁿ ío cada úhú-xi. ² Chi ngüíta ñáiyu cuhuⁿ iní-yu mee-ni sá cúú-xí mèé-yu, te cuhuⁿ iní-yu mee-ni dǐhúⁿ, te ío cada càhnú-yu mèé-yu, te cunduu yíchí iní-yu, te càháⁿ cuèhé-yu cuendá Yă Ndiöxí, te vă quindáá-gá iní-yu ñí tătă-yu ñí nănă-yu, te ñí vă ndácáⁿ táhú núú tnáhă-yu cuendá nchaá sá vâha cada tnàhá-yu, te cadá-yu mee-ni sá ñà túú tnàhá iní Yă Ndiöxí. ³ Te vă cúú iní tnáhá ndì meé-yu, te nâa-yu te vă cuánâa-yu, te tee tnàhá-yu cuéchi neñùú, te vă cuánâa-yu cadá-yu nchaá sá cuèhé sá dúhá sâni iní-yu, te ío cunduu cuihna iní-yu, te vă tnàhá iní-yu nchaá sá vâha. ⁴ Te dayuhu cuâha cuendá tnáhă-yu núú cuè téé cùchiuⁿ, te ío cunduu yí iní-yu cadá-yu nândi sá ñà túú vâha, te ío cada nínu-yu mèé-yu, te mee-ni ncháa sá cúúⁿ iní-yu cadá-yu, te vă cúúⁿ iní-yu nanducu ñihnú-yu Yá Ndiöxí. ⁵ Te quesâhá-yu sá tnàhá-yu ndécú-yu ichi Yá Ndiöxí dico vă cadă-yu nchaá nàcuáa càháⁿ-gá.

Te yúhú càchí tnúhu-í xii-n sá vă ñihí tnáhá-n ndìhi nchaá ñáiyu ducaⁿ quide. ⁶ Te dava ñáiyu-áⁿ quíhíⁿ-yu dava vehe núú xíndecu ñáiyu, te ngüíta-yu dandâhú-yu ñáiyu dǐhí ñá túú xìní dana cuendá Yă Ndiöxí, te ñáiyu dǐhí-áⁿ cúú-yu ñáiyu ndècu vihi cuéchi-xi, chi ío cùdíⁿ iní-yu quidé-yu nchaá nâni sá cuèhé sá dúhá sâni iní-yu. ⁷ Te cuèi ío dàcuahá-yu, dico ñá túú cùtnuní iní-yu nása cuáháⁿ tnúhu ndáá tnúhu Yá Ndiöxí. ⁸ Te ñáiyu ducaⁿ dândahú ñáhá xì cue ñáiyu dǐhí-áⁿ ñà túú càháⁿ váha-yu cuendá tnúhu Yá Ndiöxí, chi quidé-yu dàtná ní quide ndíi Jănés ndìhi ndíi Jămbrés chi cue ndíi-áⁿ ñà túú ní cùu váha iní cue ndíi núú ndíi Moisés cuendá tnúhu ní càháⁿ ndíi. Te ñáiyu-áⁿ cúú-yu ñáiyu sâni iní mee ñine-ni nchaá sá cuèhé sá dúhá, te cuèi càchí-yu sá sàndáá iní-yu Yá Ndiöxí dico ñá ndâá sá sàndáá iní ñáhă-yu xii-gá. ⁹ Dico vă ndácú-gă-yu dandâhú-yu vâi ñáiyu, chi nchaá ñáiyu cutnùní iní-yu sá ío ñí dǐquíⁿ-yu, te ñá túú càháⁿ ndáá-yu dàtná ní quide cue téé úú ñá túú ní tnàhá iní

tnúhu ní cáháⁿ ndíi Moisés.

Té Păblú dásàhú-dé té Timùteú

¹⁰ Te yòhó quidé-n nchàa nacuáa ní dánèhé ñàhá-í xii-n, te ní xiní-n nchàa nacuáa quide-í ndécù-í, te cùtnuní iní-n nàcuáa sàni iní-í ndécù-í ñuyíú-a, te xiní-n sã ïo sàndáá iní-í Yă Ndiöxí, te ïo càhnu iní-í, te cùu iní-í nchaa ñáyíu, te xiní tucu-n sã ïo quide cahnu iní-í cuèi nándi sá yăha-í ndécù-í dico ñá túú dàña ndeé-í ichi-gá. ¹¹ Te ïo vâi sá quidé ñàha ñáyíu xii-í dándòho ñàhá-yu sá ndécù-í ichi Xítóhó Jesucrìstú, te sa nàha tucu-n datná ní quide ñàhá-yu xii-í cùtnàhá ní xindecu-í ñuú Antiòquiá, ndihí ñuú Ìconiú, ndihí ñuú Lìstrá, chi ïo ní dándóhó ñàhá-yu xii-í sá cuendá-gá. Dico Xítóhó Jesucrìstú ïo ní xito ñàha-gã xii-í te ní chindee ñàha-gá cuèi nándi cùu sá ñi yăha-í. ¹² Te na càchí tnúhu ndáá-í xii-n sã ïo vâi sá ñà túú vâha cada ñàha ñáyíu xii nchaa ñáyíu cuení sá ñà túú ñă cumání nùú Yă Ndiöxí cuendá sá ndécú ndihí-yu Xítóhó Jesucrìstú. ¹³ Dico dava ñáyíu càchí-yu sá càháⁿ-yu tnúhu Yă Ndiöxí te ñá ndàá sá càháⁿ-yu tnúhu-gá, ñáyíu-áⁿ uuⁿ-gá cuita cada-gá-yu nchaa sá cuèhé sá dúhá quíhíⁿ, te ducaⁿ-ni ïo dandàhú tnáhã-yu.

¹⁴ Te yòhó chi ïo váha ní sàndáá iní-n tnúhu Yă Ndiöxí sá dăcuàha-n, te vitna càháⁿ-í dóho-n sã vã dáñá ndeé-n quindáá iní-n tnúhu-áⁿ, te yòhó sa nàha-n ná cúú ñáyíu ní dánèhé ñàhá xii-n tnúhu-gá. ¹⁵ Te yòhó chi ndeé cùtnàhá cúú làndú-n ñi ngüíta-n dăcuàha-n tnúhu ndeé núú tütú Yă Ndiöxí, te ñi-ni nchaa tnúhu-gá canu ichi ñàha-xi xii-n te naníhí tãhú-n, chi sàndáá iní-n Xítóhó Jesucrìstú. ¹⁶ Te nchaa cue téé ní tee tnúhu Yă Ndiöxí, chi ñi-ni mee-gã ní dăcáhu ñi ñàhá-gã xii-güedé năcuáa tee-güedé, te tnúhu-gá ïo váha dăcuàha-o nchaa dava-gá ñáyíu, te càháⁿ-xi dóho-o sã vã cündecu-gá-ó ichi cuehé ichi duha, te núú ñá túú quide ndáá-ó ndecu-o te năcanu ichi ñàha-xi, te dănehé ñàhá-xi năcuáa cada-o cündáá-ó nùú Yă Ndiöxí. ¹⁷ Te ñi-ni tnúhu-gá dátũha ñàha vâha-xi xii nchoo cuè ñáyíu ndecu ndihí-gá cuendá cada-o nchaa núú sã vâha.

4

¹ Te Xítóhó Jesucrìstú quixi-gá taxi tnúni-gá ñuyíú-a, te cada ndáá-gá cuèchi nchaa ñáyíu sa ní xihí, ndihí cuèchi nchaa ñáyíu xindecu vívú. Te mee-gã ndihí Yă Ndiöxí ñàhá-gã sá ïo càháⁿ-í dóho-n vitna ² sá ïo dăcuàha-n ñáyíu tnúhu-gá, te vã dáñá ndeé-n dăcuàhá-n-yu nděda-ni càa oré cuèi ñá túú cuení-yu cundedóho-yu, te nchaa ñáyíu ñá túú cuení cada ndáá cúñaha ndáá-n nchàa nacuáa quidé-yu. Te cúñaha tucu-n xii-yu sá vã dúcáⁿ-gã cadá-yu, te càháⁿ-n dóho-yu cuendá cada ndáá-yu cundecú-yu. Te ïo cunduu càhnu iní-n òré càháⁿ-n dóho-yu, te ïo dăcuàhá-n-yu tnúhu-gá. ³ Chi sáá nduu te vã càchí-gá-yu cundedóho-yu nchaa tnúhu sá sánú ichi ñàha cundecu váha-o nùú Yă Ndiöxí, chi mee-nă nchaa sá cúdí ñi mee-yu cundedóho-yu, te ndúcú-yu cue téé dánèhé ñàhá xii-yu nchaa tnúhu cùu iní-yu-áⁿ. ⁴ Te vã cadá cuendá tnàhí-gá-yu tnúhu ndáá tnúhu Yă Ndiöxí, chi mee-nă tnúhu sá ñà túú nándihí cada cuendá-yu. ⁵ Dico yòhó ïo quihí iní-n cundecu-n, te cahni iní-n cuèi nándi na ndòho-n, te dăcuàha-ni-n ñáyíu tnúhu Yă Ndiöxí, ñáyíu vátá quindáá iní ñàhá-gã xii-gá, te cada-ni-n nchàa chiuⁿ ní tãhú-gã cada-n.

⁶ Te yúhú sa ñũhu ichi-ná-í quíhíⁿ-í núú ndécú Yă Ndiöxí cundecu-í, chi sa ní cuyatni cahni ñàha-güedé xii-í cuendá sá xínú cuèchi-í núú-gã. ⁷ Te ní quide-í nchaa chiuⁿ ní tãhú Yă Ndiöxí cada-í te vitna ní xínu cava nchaa chiuⁿ ní tãhú-gã-áⁿ ní quide-í, te ñá túú ní dàña ndeé-í ní sàndáá iní-í-gá, te ducaⁿ-ni sàndáá iní-í-gá ndeé vitna. ⁸ Te vitna sa ndecu túha-ná sá ndúú tãhú-í cuendá sá quidé ndáá-í núú Yă Ndiöxí, te Xítóhó Jesucrìstú taxi-gá tãhú-ãⁿ nduu tãhú-í ná sáá nduu, chi cùu-gá ñi Yaá quidé ndáá cuiti, te ñá díú-ni yúhú taxi-gá tãhú-ãⁿ cuu cuendá-í, chi tnàhá nchaa ñáyíu ndetu cahnu-ná sáá nduu quixi tucu-gá ñuyíú-a cuãñaha-gã tãhú-ãⁿ nduu tãhú-yu.

Chiuⁿ tahu té Păblú cada té Timùteú

⁹ Te cuení-í sá ïo ndihí quixi-n quixi coto ñàha-n xii-í. ¹⁰ Chi té Dêmás ñá túú-gã quidé cuendá ñàhá-dě xii-í, chi mee-nă nchaa sá ïo ñuyíú-a ïo cùdí ñi-í-dé. Te ní dándòo

ñaha-dě cuáháⁿ-dé ñuú Tesalónicá, te té Crèscénté cuáháⁿ-dé cundecu-dé distritú Gàlaciá, te té Titú cuáháⁿ-dé cundecu-dé distritú Dàlmaciá. ¹¹ Te ìⁿdìi-ná té Lùcá ndécú ndìhi ñaha-dé xii-í, te cúñaha-n xii té Măcú quixi-n ndìhi-dé, chi téé-áⁿ ndacu-dé cada-dé ìⁿ chiⁿ-í. ¹² Te té Tiquicú ní tendaha-í-dé cuáháⁿ-dé ñuú Éfesú. ¹³ Te òré quixi-n te yáha-n vèhe té Cărpú cáá ñuú Tròás canehe-n ìⁿ dóó tìcachi ní dándöo-í vehe-dé quixi, ndìhi nchaa librú-í, te tnàhá nchaa dava-gá tutú-í ndécú vèhe-dé canehe-n quixi chí xíáⁿ ío-gá xíní ñùhu-í. ¹⁴ Te té Lijandrú téé cùu rerú ío vài sá ñà túú văha ní cuu quide ñaha-dé xii-í, dico mee Yă Ndiöxí nánhá-gă nása cada ñaha-gă xii-dé cuëndá sá dúcáⁿ quide-dé. ¹⁵ Te vá nihí tnáhá-n ndìhi-dé chí ío cáháⁿ cuèhé-dé cuëndá nchaa tnúhu cáháⁿ-ó.

¹⁶ Te cútnàhá ndécá ñaha-güedé xii-í ní sáháⁿ núú cuè téé cùchiuⁿ xito díhna nuu, chí mee dìi ní sáháⁿ te ñá túú ní sáháⁿ ni ìⁿ cue téé cùndìhi-í, chí nchaa-güedé ní dándöo ñaha-güedé xii-í, te yúhú xìcáⁿ táhù-í núú Yă Ndiöxí sá vă cáda cuëndá-gá sá dúcáⁿ nì quide-güedé. ¹⁷ Dico Xítóhó Jesucrìstú ní chindee ñaha-gá xii-í, chí ní taxi-gá tnúhu ndee ìní ní cáháⁿ-í tnúhu-gá năcuáa tàú-xi cunduu núú cuè téé-áⁿ ndìhi núú nchaa ñáyiu, dico ñá díú ñáyiu isràél cúú-yu, te díu-gá ní dăcăcu nihnu ñaha-gă xii-í ñá túú ní sàhni ñaha-güedé. ¹⁸ Te mee Xítóhó Jesucrìstú coto ñaha-gă xii-í te ñá túú nă cuu cuèi nándi sá ná cáda ñaha ñáyiu xii-í te díu-ni-gá coto ñaha-gă xii-í ndéé ná sàà nduu sáá-í andíu nùú ndécú-gă táxí tnùnì-gá. Te nchaa-o chí ná cächí-ó să ìo cāhnu cuu-gá ni caa ni quíhíⁿ. Te ducaⁿ na cunduu.

Tnúhu ndéé núú nì ndìhi-ná

¹⁹ Te ío cúñaha-n na càda ndee ìní tá Priscá, ndìhi té Aquilú, ndìhi cue ñáyiu cùu ndi mee té Onèsíforó. ²⁰ Te té Èrastú ní quendóo-dé ñuú Còrintú, te té Tröfimú ní dándöo-í-dé ñuú Miletú chí cùhú-dé. ²¹ Te ío cundìhí ìní-n quixi-n oré vátá sàá-gá yóó quidé vîxiⁿ-xi. Te ío cada ndee ìní-n cächí té Èúbulú, ndìhi té Pudenté, ndìhi té Línú, ndìhi tá Clàudiá, ndìhi nchaa dava-gá ñáyiu sàndáá ìní tnúhu Xítóhó Jesucrìstú.

²² Te xìcáⁿ táhù-í núú Xítóhó Jesucrìstú sá ná cundecu ndìhi ñaha-gá xii-n ndìhi nchaa dava-gá-yu. Te ducaⁿ ío na chindee chitúu ñaha-gă xii-ndo nchàa-ndo. Te ducaⁿ na cunduu. Te ío chí cáda ndèe ìní-nă vitna.

TUTÚ NÍ CADÚHA TÉ PÄBLÚ QUIHIⁿ NDAHA TÉ TÌTÚ

Té Păblú cadŭha-dé tutú quíhíⁿ ndaha té Títú

¹ Yúhú té Păblú xínú cuèchi-í núú Yă Ndiöxí, te diu-gá ní tendaha ñaha-gá xii-í cãháⁿ-í tnúhu Xítohó Jesucristú núú ñáyiú cuendá quíndáá iní nchaa ñáyiú ní cachí Yă Ndiöxí naníhí tàhú, ndihí cuendá sá tècú tnùnì váha-yu tnúhu-gá, te ñáyiú na quíndáá iní tnúhu-gá cada ndáá-yu cundecú-yu ichi-gá. ² Te yúhú dácuaⁿ-í-yu tnúhu-gá cuendá cundecu ndihí-yu tnúhu ndee iní sá cundècu ndihí-yu Yă Ndiöxí ni caa ni quíhíⁿ, chi ndéé cútnàhá vátá ngăva-gá ñuyúú-a ní cachí-gá sá cundècu ndihí ñaha-gá xii-yu, te ñá túú dândahú ñáhá-gă, chi quide-gá #ⁿ sá cãháⁿ-gá. ³ Te ní sáá nduu ñí cachí-gá sá ñihí-yu tnúhu nãcuáa cuáháⁿ tnúhu-gá, te diu-ni tnúhu-áⁿ ñí cachí Yă Ndiöxí Yaá dácăcu nihnu ñaha xii-o núú ùhú núú ndàhú sá dácuaⁿ-í ñáyiú. ⁴ Te tutú-a cadúha-í cuendá daquixi-í ndaha yòhó té Títú, té ní sanu ichi ndisa-í ichi Xítohó Jesucristú, chi #ⁿ-ni tnúhu sàndáá iní-ó. Te xicáⁿ táhù-í núú Tătá-ó Dútú Ndiöxí sá ío na chindee chítúu ñaha-gá xii-n, te diu-ni-gá ná càda te ío váha cuu iní-n cundecu-n. Te xicáⁿ táhú tùcu-í núú Xítohó Jesucristú Yaá dácăcu nihnu ñaha xii-o núú ùhú núú ndàhú sá díú-ní dùcaⁿ na cada ñaha-gá xii-n.

Chìuⁿ quide té Títú distritú Crětá

⁵ Te yúhú ní dándõo ñaha-í xii-n distritú Crětá, chi cuíní-í cada-n nchàa chiuⁿ cumání, te cuíní-í taxi ndecu-n cuè téé quíndaha ñaha xii cue ñáyiú sàndáá iní tnúhu Yă Ndiöxí xíndecu #ⁿ #ⁿ ñuú yíndèhu distritú-áⁿ, te cada-n nãcuáa ní cachí-í cada-n. ⁶ Te cue téé cada chìuⁿ-áⁿ xíní ñùhu-xi cuu-güedé mee-ni cuè téé ío váha quide ndáá nãcuáa vá yõ cáháⁿ dóho-güedé, te na cùu-güedé cue téé ndècu #ⁿ dii-ni ñadihí-xi. Te ducaⁿ nchàa landú-güedé ná cùu-güexi landú sàndáá iní ñáhá xii

Yă Ndiöxí cuendá sá vă yõ cuatnuñaha xii-güexi quesahá-yu sá ío sáá iní-güexi te quide-güexi nándi sá ñà túú tàú-güexi cada-güexi. ⁷ Chi xini ñuhu-xi sá ncháá cuè téé quíndaha ñaha xii ñáyiú sàndáá iní tnúhu Yă Ndiöxí ío cundecu yíñùhu-güedé, chi ducaⁿ tàú-xi cada nchaa cue téé quide chiuⁿ Yă Ndiöxí, te xini ñuhu tucu-xi sá vă cúú-güedé cue téé ñí iní-xi, te ni vă cúú-güedé cue téé lĩhli iní-xi, te ni vă cúú-güedé cue téé quihu, te ni vă cúú-güedé cue téé plètú, te ni vă cúú-güedé cue téé dicó-ni ducaⁿ ñihí díhúⁿ. ⁸ Te xini ñuhu-xi cuu-güedé cue téé sãñaha nùu vehe ndetatú cue ñáyiú ñùhu ichi, cue téé quide váha sá cúú-xi tnàha ñáyiú-xi, cue téé ío váha cùtnuní iní-xi nãcuáa cada cundecu ñuyúú-a, cue téé quide ndáá xíndecu, cue téé quide nchaa nãcuáa ndùu vétú iní Yă Ndiöxí, cue téé xito mee-xi ñá túú quide cutexínu. ⁹ Te na cùu-güedé cue téé ío váha sàndáá iní tnúhu váha tnúhu Yă Ndiöxí sá ñí dánèhé ñáhà-í xii-ndo cuendá ducaⁿ te cue téé-áⁿ ndacu-güedé cáháⁿ-güedé dóho ñáyiú cuendá cadă-yu nchaa nãcuáa cãháⁿ Yă Ndiöxí, te níhí-güedé tnúhu cáháⁿ váha-güedé núú nchàa ñáyiú dàquee tíhú tnúhu Yă Ndiöxí, te mee-ni cuè téé ducaⁿ quide váha taxi ndecu-n quíndaha-güedé ñáyiú sàndáá iní tnúhu-gá.

¹⁰ Te na càchí tnúhu-í xii-n sã vái ñáyiú sáá iní-xi ío, te cãháⁿ-yu mee-ni tnúhu sá ñà túú nándihí, te dândahú-yu tnàhá ñáyiú-yu, te ñáyiú isràél ío-gá vâi-yu ducaⁿ xíquide. ¹¹ Te nchaa ñáyiú ducaⁿ xíquide xini ñuhu-xi nducu-o tnúhu cúñaha-o xii-yu cuendá cadí-yu yuhú-yu, chi dânehé-yu dava-gá ñáyiú #ⁿ sá ñà túú tàú-yu dacuaⁿ-á-yu, te ducaⁿ quide-yu cuendá-ni sá ñihí-yu díhúⁿ, te ío títní xichi ní cuu dândahú-yu nchaa ñáyiú xíndecu #ⁿ-ni vèhe.

¹² Te ní cachí #ⁿ téé ío váha sáá díquí-xi ndècu mei ñuú distritú Crětá sá ncháá ñáyiú ñuú-dé-áⁿ ío ndèhndé-yu, te ío cuihna iní-yu, te ío vâi xexí-yu, te cùhndú-yu. ¹³ Te ndáá ní cáháⁿ-dé chi ducaⁿ quide-yu, te xíáⁿ ío cáháⁿ-n dóho-yu cuendá sá ná quíndáá váha iní-yu tnúhu Yă Ndiöxí. ¹⁴ Te cúñaha-n xii-yu sá vă cadá cuendá-yu nchaa tnúhu ndehnde cãháⁿ ñáyiú isràél, te ni vă cadá

cuendá-yu nchaa tnúhu càháⁿ ñáiyu ñá túú cuení quindáá iní tnúhu Yá Ndiöxí.

¹⁵ Te nchaa sá ñí cadúha Yá Ndiöxí ió ñuyíú-a cùu-xi mee nine-ni sá vâha sá cúu-xí nchaa ñáiyu sa ní nduu ndoo ní nduu nine iní-xi ndècu ichi Yá Ndiöxí. Dico nchaa sá ñí cadúha-gá ñá túú cùu-xi sá vâha sá cúu-xí nchaa ñáiyu ndècu ichi cuehé ichi duha, chi ñá túú sàndáá iní-yu tnúhu-gá, chi mee-ni sá cuèhé sá dúhá ñùhu iní-yu, te ñá túú quide cuendá-yu núu quide váha-yu àdi ñá túú quide váha-yu ndècú-yu. ¹⁶ Te càchí-yu sá sàndáá iní-yu Yá Ndiöxí, dico nchaa sá quidè-yu-áⁿ càchí tnùní-xi sá ñá ndáá. Te Yá Ndiöxí chi duuⁿ duuⁿ ñá túú tnàhá iní-gá nchaa nàcuáa quidè-yu, chi ío sàá iní-yu, te ñá túú quidè-yu ni ñíⁿ sá vâha.

2

Tnúhu váha tnúhu Yá Ndiöxí

¹ Te yòhó òré dánèhé-n ñáiyu, te danèhé-n-yu mee-ni nàcuáa càháⁿ tnúhu váha tnúhu Yá Ndiöxí. ² Te nchaa cue téé cùu sacuéhé ná càda cuendá-güedé vá cáda cùtèxínu-güedé cundecu-güedé, te na cùndecu yíñuhu-güedé, te na cuâha váha-güedé cuendá nàcuáa cada-güedé cundecu-güedé, te na quindáá váha iní-güedé Yá Ndiöxí, te na cùu iní-güedé tnàha ñáiyu-güedé, te na cùnduu cahnu iní-güedé cuèi nándi sá ná yâha-güedé. ³ Te vitna càháⁿ tucu-í sá cúu-xí nchaa ñáiyu dìhí ñáiyu cùu sacuéhé sá ná cùndecu yíñuhú-yu, te vá cúu-yu ñáiyu yiti yùhu-xi, te ni vâ cúu-yu ñáiyu quihu, te na dànèhé-yu nchaa dava-gá ñáiyu cada váha-yu. ⁴ Te na dàsahú-yu nchaa ñáiyu dìhí ñáiyu cuechi cuendá ná cùu iní-yu yíí-yu, ndihí cue landú-yu, ⁵ ndihí cuendá sá ná càni váha iní-yu nàcuáa cundecú-yu, ndihí cuendá sá vâ càní iní-yu cadá-yu ni ñíⁿ sá cuèhé sá dúhá, ndihí cuendá sá ná càda-yu nchaa chiùⁿ ñuhu vehé-yu, ndihí cuendá sá cáda váha-yu nchaa tnàha ñáiyú-yu, ndihí cuendá sá ná cáda-yu nchaa nàcuáa càháⁿ yíí-yu, te ducaⁿ xini ñuhu-xi cadá-yu cuendá sá vâ yòo càháⁿ cuèhé cuendá tnúhu Yá Ndiöxí. Duha cúñaha-n xii cue ñáiyu dìhí

ñáiyu cùu sacuéhé cuendá ducaⁿ dàsahú-yu nchaa ñáiyu dìhí ñáiyu cuechi.

⁶ Te yòhó càháⁿ-n dõho nchaa cue téé cuechi cuendá sá ná càni váha iní-güedé nàcuáa cundecu-güedé, ⁷ te cada-n mèe-ni sá vâha cuendá ducaⁿ càchicúⁿ nihnu-güedé cada-güedé, te òré danèhé-n-güedé te ío váha cuu iní-n dànèhé-n-güedé, te ndihí tnúhu yíñuhu càháⁿ ndihí-n-güedé. ⁸ Te càháⁿ-n mèe-ni tnúhu váha, te ducaⁿ te vá yòo ñíⁿ càháⁿ cuèhé cuendá tnúhu càháⁿ-n, te nchaa ñáiyu cùu úhú iní ñáhá xii-o cucahaⁿ núu-yu, te vá nihí-yu tnúhu càháⁿ cuèhé-yu cuendá-ó.

⁹ Te ío càháⁿ-n dõho nchaa cue téé xinu cuechi sá ná quindáá iní-güedé cada-güedé nchaa chiùⁿ tahu patróoⁿ-güedé nàcuáa cudíu-güedé núu cuè téé-áⁿ, te vá càháⁿ sàá iní-güedé. ¹⁰ Te vá càní iní-güedé duhu-güedé, te cada ndáá-güedé cuendá sá ñá túú ñá caní iní ñáhá cuè patróoⁿ-güedé, te ducaⁿ te cutnùní iní ñáiyu sá tnúhu Yá Ndiöxí ío váha dànèhé ñáhá-xí nàcuáa cada-o cùndecu-o, te diu-gá cúu-gã Yaá dácãcu nihnu ñaha xii-o núu úhú núu ndàhú.

¹¹ Te nchoo ñí cutnùní iní-ó sã Yá Ndiöxí ío cùndahú iní-gá nchaa nchoo ñáiyu ndècu ñuyíú-a, te ní taxi-gá tnúhu ndee iní sá nánihí tàhú nchaandi túhú ñáiyu te núu na quindáá iní ñáhã-yu xii-gá. ¹² Te ní càchí-gá sá dáñá-ó nchaa ichi cuehé ichi duha chi ñá tnàhá iní-gá cundecu-o ìchi-áⁿ, te vá ío cuhuⁿ iní-ó nchaa sá ío ñuyíú-a, te ní càchí tucu-gá sá ío caní iní-ó nàcuáa cundecu-o vitna ndecu-o ñuyíú-a te cada ndáá-ó cùndecu-o cuendá nduu vétú iní-gá. ¹³ Te cundetú-o sàá nduu càhnu vihi, nduu quixi tucu Xitohó Jesucristú Yaá cúu Ndiöxí-ó, te diu-gá ní dácãcu nihnu ñaha-gã xii-o núu úhú núu ndàhú. Te nduu-ãⁿ ío cudíí iní-ó. ¹⁴ Te mee-gã ní xihí-gá chi ducaⁿ ñí cuení-gá cunduu, te ducaⁿ ñí quide-gá cuendá nchoo vâ cùndecu-gá-ó ìchi cuehé ichi duha, te nduu ndoo nduu nine iní-ó, te ducaⁿ te cuu-o cuè ñáiyu quindaha-gã, te ni yùhu ni iní-ó càda-o mee-ni sá vâha.

¹⁵ Te nchaa tnúhu-áⁿ danèhé-n-yu te cúñaha-n xii-yu nàcuáa cadá-yu, te càháⁿ-n dõho-yu te núu ñá túú quide ndáá-yu. Te cada-n sã cúu-n ñíⁿ téé xinu cuechi núu Yá

Ndiöxí, te vá dáñá-n mèe-n daquee tihú ñáhá ñáyiú xii-n.

3

Nchaa sá tàú ñáyiú ndècu ichi Yá Ndiöxí cadá-yu

¹ Te cúñaha-n xii-yu sá ná quíndáá iní-yu cadá-yu nchaa nàcuáa càháⁿ nchaa cue tée cùchiuⁿ, te tàú-yu chindee ñáhá-yu xii-güedé nchaa chiúⁿ váha quíde-güedé.

² Te vá càháⁿ cuèhé-yu cuendá ñáyiú, te vá cündüu pletú-yu, te na cùú-yu ñáyiú ndàhú iní-xi, te na cündahú iní-yu nchaa tnàha ñáyiú-yu.

³ Te tnàhá-ó nǐ xóo cada-o dàtná quidé ñáyiú-áⁿ vitna, chi ío nǐ ñáyiú-ó chi ñá təcú tnùní-ó nàcuáa càháⁿ tnúhu Yá Ndiöxí ní cùu, te ío ní xínduu sáá iní-ó nǐú-gá, te ní xíndecu-o ñⁿ ichi sá ñà túú tàú-ó cündecu-o ni cuu, te nándi sá cuèhé sá dúhá ío ñuyíú-a ní xóo cudíí iní-ó nǐ xóo cada-o chi ní xóo taxi tnùní ñáhá-xi xii-o, te ní xóo cada cuèhé ní xóo cada duha-o ni cùu, te ní xíndecu-o ichi cuedú iní, te cuendá nchaa sá nǐ xóo cada-o-áⁿ xíáⁿ ío ní xóo cuu úhú iní ñáhá ñáyiú xii-o, te ducaⁿ-ni nchòo tucu ní xóo cuu úhú iní-ó-yu. ⁴ Te Yá Ndiöxí Yaá ní dácăcu nihnu ñaha xii-o núú úhú núú ndàhú ní dándíxi túu-gá iní-ó nàcuáa cutnùní iní-ó sǎ ío váha iní-gá, te cùu iní ñáhá-gǎ xii nchaa nchoo ñáyiú ndècu ñuyíú-a. ⁵ Te Yá Ndiöxí ní dácăcu nihnu ñaha-gǎ xii-o núú úhú núú ndàhú, dico ñá díú cuendá ñⁿ sá váha quíde-o ndecu-o ñuyíú-a ducaⁿ nǐ quíde-gá, chi mee-gǎ ducaⁿ tnàhí ní cundàhú iní ñáhá-gǎ xii-o. Te ní nduu ndoo ní nduu nine iní-ó, te ní cuu-o dàtná ñⁿ ñáyiú saa, chi Espíritú Yá Ndiöxí ducaⁿ nǐ quíde ñaha-xi xii-o. ⁶ Te Espíritú-gá ní taxi-gá nǐ yùhu nǐ iní-gá ndécú ndíhi-o, te ducaⁿ nǐ quíde-gá chi ní sándáá iní-ó Xitohó Jesucristú Yaá ní dácăcu nihnu ñaha xii-o núú úhú núú ndàhú. ⁷ Te ío cündahú iní ñáhá-gǎ xii-o nǐ sa ní quíde ndáá-gá cuéchi-o te ní cuu-o dèhe-gá, núú xíáⁿ vitna ndètu-ná-ó sáá nduu ndüu táhú-ó cündecu-o ndíhi-gá nǐ caa nǐ quíhíⁿ.

⁸ Te tnúhu ní cáháⁿ-í-a cùu-xi tnúhu ndáá cuíti, te cuíní-í sá nǐ yuhu nǐ iní-n cáháⁿ-n tnúhu-gá núú-yu cuendá sá ncháá

ñáyiú sándáá iní ñáhá xii Yá Ndiöxí nducu ndée-yu cadá-yu mee-ni sǎ váha, te tnúhu-áⁿ cúú-xi mèe-ni tnúhu váha, te ío váha sá cúú-xi-yu. ⁹ Te vá cadá cuendá-n ncháa tnúhu sá ñà túú nándíhi xítnàha ñáyiú, te vá cadá cuendá-n ñáyiú nándi càháⁿ cuendá nchaa sá nǐ xóo cada cue ñáyiú ní xíndecu ndée sanaha, te vá cadá cuendá-n ncháa tnúhu xítnàha ñáyiú xícuèhé tnàhá cuendá tnúhu ní chídó tnùní ndíi Moisés, chi nchaa tnúhu xítnàhá-yu-áⁿ ñà túú tnàhí nándíhi-xi, te dàcuíta ñaha-xi xii-o.

¹⁰ Te núu ío ñáyiú ní ngüíta-yu nándi tnúhu càháⁿ-yu cuendá sá vǎ cúú ñⁿnuu cue ñáyiú ndècu ichi Yá Ndiöxí ñá, te ñáyiú-áⁿ cáháⁿ sàhú-n dōho-yu ñⁿ úú xito, te núu vá tnǐ-yu tnúhu càháⁿ-n ñá, te vá nǐhí tnàhá-gǎ-n ndíhi-yu. ¹¹ Te ducaⁿ càda-n, chi ñáyiú-áⁿ duuⁿ duuⁿ ñá túú-gǎ cuíní-yu cadá-yu sá váha, chi mee-nǎ sá cuèhé sá dúhá tnàhá iní-yu cadá-yu, te cùtnuní iní mèe-yu sá ñà túú quíde ndáá-yu, te sáá nduu te nacháhu-yu nchaa sá quídè-yu.

Nàcuáa cada té Titú

¹² Te cuíní-í tendaha-í té Artemás quixi-dé núú ndécú-n àdi té Tiquicú, te òré ná quèxio ndéda-ni càa ñⁿ cue téa-a núú ndécú-n, te ío nducu ndèe-n quíhíⁿ-n ñúú Nicópolis núú quíhíⁿ-í cundecu-í, chi yàcáⁿ cuíní-í quíhíⁿ-í cundecu-í yóo quídè vǐxiⁿ-xi. ¹³ Te ío cuáñaha-n ncháa sá xíní ñùhu té Zénás téé ío váha xíní nchaa nàcuáa càháⁿ léi, ndíhi té Àpolós cuendá sá ñà túú nǎ cumání xii-güedé ichi. ¹⁴ Te cuíní-í sá ncháá ñáyiú ndècu ndíhi-o ichi Yá Ndiöxí cada váha-yu, te cuáñàhá-yu ñⁿ sá xíní ñùhu ñáyiú, te ío váha chiúⁿ cadá-yu te núu ducaⁿ na cadá-yu.

Tnúhu ndée núú nǐ ndíhi-ná

¹⁵ Te vitna ío cada ndee iní-n càchí nchaa ñáyiú ndècu ndíhi-í iha, te cúñaha-n sǎ ío na càda ndee iní nchaa ñáyiú cùu iní ñáhá xii-o, ñáyiú sándáá iní ñáhá xii Yá Ndiöxí. Te Yá Ndiöxí ío na chindee chítúu ñaha-gǎ xii-ndo ncháa-ndo. Te ducaⁿ na cünduu. Te ío chí cadá ndèe iní-nǎ vitna.

TUTÚ NÍ CADÚHA TĚ PĀBLŮ QUIHĪⁿ NDAHA TĚ FILEMÓN

*Té Pāblú cādŭha-dé tutú quihĭⁿ ndaha té
Filèmón*

¹ Te yúhú té Pāblú tée yĭhi vecaá sá cuendá Xítohó Jesucrístú cādŭha-í ĩⁿ tutú ndihĭ té Timùteú cuendá daquixi-í ndaha yòhó té Filèmón, te ío cùu iní ñáhà-í xii-n chi tnàhá-n quide-n chiuⁿ Yá Ndiöxí. Te tutú-a tēndaha-í quixi ndaha-n ² ndihĭ ndaha ñaha nàni Apiá ñaha ndècu ndihĭ-o ichi Xítohó Jesucrístú, ndihĭ ndaha té Àrquipú, chi tnàhá-dé quidé-dě chiuⁿ Yá Ndiöxí, ndihĭ ndaha nchaa ñáyiú tàcá vehe-n dàcuahá-yu tnúhu-gá. ³ Te xicáⁿ táhù-í núú Tātá-ó Dŭtú Ndiöxí ndihĭ núú Xítohó Jesucrístú sá ío na chĩndee chitúu ñaha-gă xii-ndo, te ducaⁿ ndĩ nduú-gá ná cādá te ío váha cuu iní-ndó cūndecu-ndo.

*Té Filèmón ío sàndáá iní-dé Xítohó Jesu-
crístú te cùu iní-dé tnàha ñáyiú-dé*

⁴ Te ndi tnàhá òré càháⁿ ndihĭ-í Yá Ndiöxí cuendá-n ndàcáⁿ táhù-í núú-gă. ⁵ Chi nihĭ-í tnúhu sá ío sàndáá iní-n Xítohó Jesucrístú, te cùu iní-n cuè ñáyiú ndècu ichi-gá. ⁶ Te xicáⁿ táhù-í núú Yá Ndiöxí sá dàtná-ni sàndáá iní-n-gă ducaⁿ-ni dānehé-n ñáyiú cuendá ducaⁿ ngũnu ichi-yu tnàhá-yu, te cutnūnĭ iní-yu nācuáa ndūu nchaa sá vāha tàxi Xítohó Jesucrístú xii-o, te tnàhá-yu nduu táhŭ-yu nchaa sá vāha-án. ⁷ Te yòhó té Filèmón cúu-n tēe ndècu ndihĭ-í ichi Xítohó Jesucrístú càchĭ tnúhu-í xii-n sã ío cùdĭí iní-í cuendá sá ío váha quide-n ndecu-n, chi cùu iní-n nchaa ñáyiú ndècu ichi Yá Ndiöxí, te uuⁿ-gá nihĭ ndèe-í sá dúcáⁿ quide-n, te dĭu-n ío sáhă-n-yu tnúhu ndee iní ndécú ndihĭ-yu.

Té Pāblú chĩndèe tnúhu-dé té Ònésimú

⁸ Te yúhú té Pāblú ní taxi Xítohó Jesu- crístú tnúhu ndee iní ndécú ndihĭ-í sá táxi tnūnĭ ñáhà-í xii-n te tahu-ĭ chiuⁿ cada-n, dico vá táxi tnūnĭ ñáhà-í xii-n, ⁹ chi váha-gá sá càháⁿ ndàhú-í núú-n sã cādá-n nchaa nacuáa càháⁿ-í chi ío cùu iní ñáhà-í xii-n.

Chi yúhú sa ta yĭ-í cuáháⁿ, te yĭhi-í vecaá cuendá sá càháⁿ-í tnúhu Xítohó Jesucrístú. ¹⁰ Te càháⁿ ndàhú-í núú-n sã ñà túú nã cani iní-n cuendá té Ònésimú, chi ní cuu-dé vitna dàtná ĩⁿ déhe-í, chi ní sàndáá iní-dé tnúhu Yá Ndiöxí ní xáhaⁿ-ĭ xii-dé vitna yĭhi-í vecaá.

¹¹ Te nàha-n sá cŭtnàhá ní xĩndecu ndihĭ-n-dě ñà túú ní quide ndáá-dé, dico vitna ío váha quide-dé ndécú ndihĭ-í-dé, te dĭu-ni ducaⁿ càda-dé òré cundecu ndihĭ tucu-n-dé. ¹² Te vitna tendaha-í-dé ndixi-dé cundecu tucu-n ndihĭ-dé, te òré queheⁿ cuendá-n-dě, te cada iní-n sã yŭhú ní queheⁿ cuendá-n. ¹³ Te vitna yĭhi-í vecaá sá cuendá tnúhu Xítohó Jesucrístú, te cuinĭ-í ngani-í-dé cunu cuechi-dě núú-í cuendá cada-dé núú-n ní cùu. ¹⁴ Dico ñà túú ní ngani-í-dé, chi vátá ndàtnŭhu ndihĭ ñaha-gă-í xii-n nŭu nása cachĭ-n cūnduu. Te ñà cūndèe iní-í cada yica-ĭ cada-n ĩⁿ sá vāha sá cúu-xì-í, chi cuinĭ-í sá mée-n cāni iní-n nŭu cuu àdĭ sá vã cúú. ¹⁵ Te ní cunduu nĭ quee té Ònésimú vehe-n, te cudana te mee Yá Ndiöxí ducaⁿ nĭ cachĭ-gá cunduu cuendá dacuàha-dé cada váha-dé. Te ndixi tucu-dé cundecu ndihĭ ducaⁿ-nã-n-dé. ¹⁶ Te vá cúu-gă-dé dàtná ĩⁿ tēe xĩnu cuechi chi ní cuu-dé dàtná ĩⁿ ñanĭ-ó chi ní sàndáá iní-dé Yá Ndiöxí, te yúhú ío cùu iní-í-dé, dico yòhó uuⁿ-gá cuu iní-n-dě, chi cùu-dé ĩⁿ tnàha ñáyiú-o, te ndècu-dé ichi Yá Ndiöxí.

¹⁷ Te ĩⁿ-ni cùu-o ndecu-o ichi Yá Ndiöxí nŭu xiãⁿ càháⁿ ndàhú-í núú-n sã quéhéⁿ cuendá-n-dě dàtná quéhéⁿ cuendá-n yŭhú òré quéxió-í vehe-n. ¹⁸ Te núu ío ĩⁿ sá nĭ cumánĭ-dě núú-n ñà túú ní quide ndáá-dé cŭtnàhá ní xĩndecu-n ndihĭ-dé, àdĭ ío ĩⁿ sá tàú-dé te vá ndàcáⁿ cuendá-n nŭú-dě, chi yúhú ndacáⁿ cuendá-n nŭú-í. ¹⁹ Te ndaha mee yŭhú té Pāblú cādŭha-í tutú-a càchĭ tnúhu-í xii-n sã ná chăhu-í nchaa sá nĭ quide-dé. Dico dandàcu saú iní-n sã yŭhú ní sanu ichi ñaha-ĭ xii-n ìchi Xítohó Jesu- crístú. ²⁰ Dico yòhó tēe ndècu ndihĭ-í ichi Xítohó Jesucrístú cada ndee iní-n càda-n tnúhu ndàhú càháⁿ-í núú-n chi ndècu-o ichi-gá. Te ducaⁿ càda-n nacuáa cuu-xi dàtná ĩⁿ tnúhu ndee iní sá cúu-xì-í, chi ndĩ nduú-ó ndècu-o ichi-gá.

²¹ Te cŭtnunĭ iní-í sá cādá-n nchaa nacuáa càháⁿ-í, te cŭtnunĭ tucu iní-í sá ío-gá vāi

sá vǎha cada-n dàcúúxí tnǎhu ndàhú cǎháⁿ-í núú-n, núu xǎⁿtèndaha-í tutú-a véxi ndaha-n. ²² Te vitna cuèní-í cada túha-n ìⁿ vehe cundecu-í, chi sàni iní-í sá quíxí còto ñaha-í xii-ndo, te ndètu-í sáá nduu-ǎⁿ chi nchòhó xìcáⁿ táhú-ndó núú Yǎ Ndiǒxí cuèndá-í.

Tnúhu ndée núú nǎ ndihí-ná

²³ Te ío cada ndee ìní-n cǎchí té Ępafrás té yǎhi ndihí-í vecaá sá cuèndá tnúhu Xítóhó Jesucristú. ²⁴ Te ío cada ndee ìní tucu-n cǎchí té Mǎcú, ndihí té Arístarcú, ndihí té Dēmás, ndihí té Lùcá, chi tnàhá cue té-ǎⁿ quède-güedé chiúⁿ Xítóhó Jesucristú.

²⁵ Te Xítóhó Jesucristú ío na chindee chitúu ñaha-gǎ xii-ndo nchàa-ndo. Te ducaⁿ na cùnduu. Te ío chí cǎdá ndèe iní-nǎ vitna.

TUTÚ QUIHIⁿ NDAHA CUE ÑÁYIU HÈBREÚ

Dútú Ndiöxí ní cachí-gá sá Dēhe-gá cada núú-gă

¹ Te ndéé sanaha, Yá Ndiöxí ní xáhaⁿ-gă xii cue téé ní cachí iní méé-gă cada núú-gă cáháⁿ-güedé tnúhu-gá núú nchàa ñani tnáhá-ó nǐ xíndecu ndéé dāvá-áⁿ te ñu ducaⁿ nǐ quide-güedé. Te tǐtnǐ xito ducaⁿ nǐ xáhaⁿ-gă xii-güedé ní cáháⁿ-güedé tnúhu-gá. Te ndǐ dǐíⁿ ndǐ dǐíⁿ nǐ xítñúhu ñaha-gă xii-güedé nàcuáa cáháⁿ-güedé tnúhu-gá núú-yu. ² Te sátá nǐ cuu vâi nduu ta yâha cuáháⁿ, te ní sáá nduu nǐ cachí Yă Ndiöxí sá Dēhe-gá cada núú-gă cáháⁿ tnúhu-gá núú-ó. Te ñu-ni mee-gă ní táuchíúⁿ nǐ cadúha Dēhe-gá ñuyíú ndǐhi nchaa sá íó, te ní cachí-gá sá ncháá cùu-xi cuendá Dēhe-gá. ³ Te Dēhe Yá Ndiöxí ío càhnu cuu-gá dàtná càhnu cuu mee-gá, te dàtná-ni sàni iní méé-gă ñu-ni ducaⁿ sàni iní Dēhe-gá chi tnáhá-gá cúú-gă Ndiöxí, te sá cuendá tnúhu càháⁿ Dēhe-gá xiǎⁿ ndécú-ní nchàa sá íó ñuyíú, te ducaⁿ chi ío càhnu cuu Dēhe-gá, te ñu-ni Dēhe-gá ní quide nàcuáa vá cùndècu-gá cuèchi-o. Te sátá dúcáⁿ te ní ngóo-gá xio cùha Tátá-gă Dútú Ndiöxí Yáá ío cùnūu ndecu andiu.

Dēhe Dútú Ndiöxí ío-gá cùnūu-gá dàcúúxi cuè espíritú xínú cuèchi núú-gă

⁴ Te Dēhe Yá Ndiöxí ío-gá cùnūu-gá dàcúúxi cuè espíritú xínú cuèchi núú-gă, te ducaⁿ chi ní nduu táhú-gă núú Tátá-gă Dútú Ndiöxí sá ío-gá cùnūu-gă dàcúúxi cuè espíritú-áⁿ. ⁵ Chi Yá Ndiöxí ñá túú ní xáhaⁿ-gă xii ní ñⁿ cue espíritú xínú cuèchi núú-gă dàtná ní xáhaⁿ-gă xii Dēhe-gá, te duha ní xáhaⁿ-gă:
Yòhó cúú-n Dēhe mee-í,
te ducaⁿ-ni cùndecu-n núú ndécú-í.
Duha ní xáhaⁿ-gă. Te ní cachí tucu Yá Ndiöxí:
Yúhú cúú-í Tátá Yáá-áⁿ,
te mee-gă cúú-gă Dēhe-í.

Duha ní cachí-gá. ⁶ Te cútnáhá ní tendaha-gă Dēhe-gá Yáá ío cùnūu ní quixi-gă ñuyíú-a, te ní cachí-gá:

Tàú-xi sá ncháá cuè espíritú xínú cuèchi núú-í chiñuhu-xi Dēhe-í.

Duha ní cachí-gá. ⁷ Te Yá Ndiöxí ní cáháⁿ-gá cuendá cue espíritú xínú cuèchi núú-gă, te ní cachí-gá:

Yúhú quidè-í sá ncháá cuè espíritú xínú cuèchi núú-í cúú-xí dàtná táchí,
te ñu-ni cue espíritú-áⁿ quidè-í sá cúú-xí dàtná itá ñuhú.

Duha càchí-gá. ⁸ Dico Dēhe-gá chi ñá túú dúcáⁿ ní xáhaⁿ-gă, chi duha ní xáhaⁿ-gă:

Yòhó tnáhá-n cùu-n Ndiöxí dàtná cúú yúhú Yáá cúú Tátá-n,

te ducaⁿ-ni tàxi tnuní-n nǐ caa nǐ quíhíⁿ,
te ío váha ndáá quidé-n tàxi tnuní-n.

⁹ Te dàquee tihú-n nchàa sá cuèhé sá dúhá,
te cùu iní-n nchàa sá vâha,
núu xiǎⁿ yúhú Yáá cúú Tátá-n nǐ quide-í sá ío-gá vii ío-gá váha cuu iní-n,
dàcúúxi nchàa dava-gă ñáyiu ndecu ndǐhi-n.

Duha ní xáhaⁿ-gă xii Dēhe-gá. ¹⁰ Te ní xáhaⁿ tucu Yá Ndiöxí xii Dēhe-gá:

Yòhó cúú-n Yáá ío cùnūu, chi ndéé cútnáhá ñá túú vèdana ná íó te ní cadúha-n ñuyíú ndǐhi andiu.

¹¹ Te andiu ndǐhi ñuyíú chi naa-xi, dico yòhó chi cundecu-ni-n nǐ caa nǐ quíhíⁿ.

Te andiu ndǐhi ñuyíú chi ndǐhi-xi dàtná ndǐhí ñⁿ dóó,

¹² te dàtná cùni-n quide ñáyiu ndǐhi ñⁿ dóó òré ndácáⁿ tnáhnú-yu tàxi ndécú-yu ñⁿ xio, ducaⁿ càda-n ñuyíú ndǐhi andiu,

te dàtná nádăma dóó ñáyiu ducaⁿ càda tucu-n ñuyíú ndǐhi andiu.

Te yòhó dàtná-ni càa-n ndecu-n vitna ducaⁿ-ni cùnduu-ñ cundecu-n nǐ caa nǐ quíhíⁿ, chi vá yǐi tnáhí-n.

Duha ní xáhaⁿ Yă Ndiöxí xii Dēhe-gá. ¹³ Te Yá Ndiöxí ñá túú ní xáhaⁿ-gă xii ní ñⁿ cue espíritú xínú cuèchi núú-gă dàtná ní xáhaⁿ-gă xii Dēhe-gá, te duha ní xáhaⁿ tucu-gă:

Ngóo xio cùha-í taxi tnuní-n,

te yúhú cada-í te nchaa sá cúú úhú iní ñáhá xii-n canehe-xi sá yíñuhu núú-n.

Duha ní xáhaⁿ-gã xii Déhe-gá. ¹⁴ Te nchaa espíritú xínú cuèchi núú Yă Ndiöxí mee-ni chiuⁿ-gá quidé-xí, chi tëndaha-gá cue espíritú-áⁿ cuáháⁿ-xi nchaa núú ndécú cuè ñáyiú ní nduu táhú cundecu ndihí-gá chindee ñàha-xi xií-yu.

2

Vá dáñá ndèé-ó tnũhu sá càháⁿ nàcuáa naníhí tãhú-ó

¹ Te sá cuendá sá ïo cùnuu Xítóhó Jesucristú, núu xiáⁿ ío xini ñuhu-xi cada cuendá-ó nchaa tnũhu càháⁿ-gá sá sà ní xíndedóho-o cuendá sá vã dáñá ñihnu-o. ² Te cue espíritú xínú cuèchi núú Yă Ndiöxí ní cáháⁿ-xi tnũhu-gá ndéé sanaha, te tnũhu ní cáháⁿ cue espíritú-áⁿ cúú-xí sã ndáa cuiti. Te nchaa ñáyiú ñá túú ní cuini tñi nchaa tnũhu ní cáháⁿ cue espíritú-áⁿ, te ni ñã túú ní cuini-yu cundedóho-yu, nchaa ñáyiú-áⁿ ñi nacháhu-yu nàcuáa ndùu nchaa cuèchi ní quidé-yu ñi ñi-yu. ³ Te sá dúcáⁿ ñi yáha cue ñáyiú-áⁿ, xiáⁿ cútnùní ndáa iní-ó sã vã cãcu nihnu-o te núu na dàña nihnu-o tnũhu sá càháⁿ nàcuáa naníhí tãhú-ó, tnũhu sá ïo cùnuu, chi nacháhu-o te núu ducaⁿ na càda-o. Te díhna-gá Xítóhó Jesucristú ní cáháⁿ-gá tnũhu-áⁿ te nchaa ñáyiú ní xíndedóho nchaa nàcuáa ndùu tnũhu-áⁿ ñi cáháⁿ ndáa-yu tnũhu-áⁿ núú-ó. ⁴ Te tnàhá Yă Ndiöxí cùndihí-gá nchaa ñáyiú-áⁿ quidé-gã nàcuáa cutnùní iní-ó sã tnũhu-áⁿ cúú-xí tnũhu ndáa, chi quide-gá titní núú sã vã yõ tnàhí ndàcu cada te ío cùñúhu-o. Te Espíritú Yă Ndiöxí quidé-xí nàcuáa nduu táhú-ó ndi dííⁿ núú chiuⁿ cada-o nàcuáa cuini méé-gã. Te sá dúcáⁿ quide Yá Ndiöxí nchaa xiáⁿ, xiáⁿ cútnùní iní-ó sã tnàhá-gá càháⁿ-gá sá tnũhu-áⁿ cúú-xí tnũhu ndáa.

Xítóhó Jesucristú ní xínduu yiqui cùñú-gá dàtná cáa yiqui cuñú nchoo cuè ñáyiú ñuyúú-a

⁵ Te Yá Ndiöxí vã táxi ndècu-gá cue espíritú xínú cuèchi núú-gã taxi tnùní-xi ñuyúú sáa sã vátá quini-gá-ó, te ñi cuendá xiáⁿ càháⁿ-í. ⁶ Te núú tütú Yă Ndiöxí cãchí-xi: Yòhó Dútú Ndiöxí ñá túú ñã cúú cuè ñáyiú ñuyúú ñu ndacu iní-n-yu, àdi chindeé-n-yu.

⁷ Te yòhó ní cachí-n sã nchaa ñáyiú ñuyúú-a vã cùnùú-yu dàtná cùnùu cue espíritú xínú cuèchi núú-n, dico ní cachí-n sã sàa nduu te ío cùnùú-yu tnàhá-yu, te mee-n cãháⁿ-n sã ïo càhnu cuú-yu,

te ní cachí tucu-n sã táxi tnùní-yu nchaa sã ñi cadúha-n.

⁸ Te ducaⁿ nchãandi túhú sá ío quindàhá-yu. Duha cãchí-xi núú tütú-gá. Te sá dúcáⁿ ñi cachí Yă Ndiöxí sá quindàha ñáyiú ñuyúú nchaa sá ío, xiáⁿ cútnùní sá nchãandi túhú sá ío taxi tnùní-yu, dico vátá sãa-gá nduu dùcaⁿ quini-ó càda-xi. ⁹ Te nchoo sa nàha-o sá tnáa-ni ñi quide Yá Ndiöxí cuendá sá vã cùnùu Xítóhó Jesucristú dàtná cùnùu cue espíritú xínú cuèchi núú-gã. Te ducaⁿ ñi quide Yá Ndiöxí chi ní cundàhú iní-gá nchaa ñáyiú ñuyúú-a, chi ní cachí-gá sá Déhe-gá cuú cuendá nchaa-yu, te Xítóhó Jesucristú ío ní ndoho-gá òré ní xihí-gá, núu xiáⁿ ní nduu táhú-gã cùnùu vihi-gá vitna. Te mee Yă Ndiöxí cãchí-gá sá ïo càhnu cuu Déhe-gá.

¹⁰ Te Yá Ndiöxí ní cadúha-gá nchãandi túhú sá ío nàcuáa ní cachí iní méé-gã, te sá dúcáⁿ ñi quide-gá ñu xiáⁿ váha-ni sã ñi cachí-gá sá Xítóhó Jesucristú nãndi ndoho-gá te cuú-gá cuendá ducaⁿ ñã túú tnàhí-gá ná cùmání-gã núú Yă Ndiöxí. Te sá dúcáⁿ ñi cuu núu xiáⁿ ní níhí Yă Ndiöxí nàcuáa cada-gá càndeca-gá nchaa ñáyiú cùu déhe-gá quihíⁿ núú ïo váha càa cundecú-yu ndihí-gá ni caa ni quihíⁿ. Te Xítóhó Jesucristú cúú-gã Yáa ní quide nàcuáa nduu táhú cue ñáyiú cundecú-yu ndihí Yá Ndiöxí.

¹¹ Te Xítóhó Jesucristú cúú-gã Yáa quidé ndècu yihnu ñáyiú núú Yă Ndiöxí ñáyiú sãndáa iní ñáhá xii-gá, te Xítóhó Jesucristú ndihí cue ñáyiú-áⁿ ñi-ni Yáa cúú Tãtã-yu ndihí-gá, núu xiáⁿ Xítóhó Jesucristú Yáa cúú Déhe Dútú Ndiöxí ñá túú cùcahaⁿ núú-gã càháⁿ-gá sá ñani-gá ndihí cùha-gá cúú nchaa ñáyiú-áⁿ. ¹² Te quèe ndáa-xi nàcuáa càháⁿ-xi núú tütú Yă Ndiöxí núú cãchí-xi nàcuáa ní xáhaⁿ Xítóhó Jesucristú xii Tãtã-gã Dútú Ndiöxí, te duha ní xáhaⁿ-gã:

Cáháⁿ váha-í cuendá-n núú nchaa cue tée cùu datná ñani-í ndihí núú nchaa cue

ñáyiú ðíhí cúú ðàtná cúha-í,
te cata-í ndudú chiñuhu ñaha-í xii-n núú
tàcá-yu.

Duha yòdo tnuní núú tùtú-gá nàcuáa ní
xáhaⁿ Dèhe-gá xii-gá. ¹³ Te ingá tucu xi-
chi núú tùtú Yă Ndiöxí càháⁿ-xi nàcuáa ní
cáháⁿ Xítóhó Jesucristú cuendá-gá, te duha
ní cachí-gá:

Yúhú ncha-a-ni nduu quindáá iní-í Tătà-í
Dútú Ndiöxí.

Duha càchí-xi núú tùtú Yă Ndiöxí nàcuáa ní
cáháⁿ Xítóhó Jesucristú. Te ingá tucu xichi
núú tùtú Yă Ndiöxí càháⁿ-xi nàcuáa ní cáháⁿ
tucu Xítóhó Jesucristú, te duha ní cachí-gá:

Iha ndècu ndihí-í ncha-a ñáyiú cùu déhe
Tătà-í Dútú Ndiöxí, te ðiu-ni ñáyiú-áⁿ
ní taxi cuendá Tătà-í cuu cuendá-í.

Duha càchí-xi núú tùtú-gá nàcuáa ní cáháⁿ
Xítóhó Jesucristú.

¹⁴ Te sá cuendá ncha-a ñáyiú cùu déhe Yă
Ndiöxí cúú-yu yiqui cùñú, núu xiáⁿ ducaⁿ
tnàhá Xítóhó Jesucristú ní cuu-gá yiqui
cùñú, te ducaⁿ ní cuu-gá yiqui cùñú cuendá
cuú-gá, te sá dúcáⁿ cùú-gá te ndacu-gá
daquèe tíhú-gă sácuihná, te ðiu sácuihná-áⁿ
quidé-xí xihí ñáyiú. ¹⁵ Te ducaⁿ ní quide-gá
cuendá sá cuè ñáyiú ñuyú-a vá yùhú-gá-yu
sá cùú-yu, chi ncha-a-ni nduu yùhú-yu
sá cùú-yu. ¹⁶ Te na càchí tnúhu ndáá-í
sá Xítóhó Jesucristú ní quixi-gá cuendá
chindee-gă cue ñáyiú cùu ñaní tnàhá ndíi
Abrahám, te ñá ðíú cuendá sá chindèe-gá
cue espíritú xínú cuèchi núú Yă Ndiöxí.
¹⁷ Te cuendá xiáⁿ núu ðai ní xini ñuhu-xi
sá cúú-gá ñáyiú cuendá yăha-gá nándi sá
yăha-gá ðàtná yăha cue ñáyiú cùu ndi
mee-gá cuendá ducaⁿ cùu-gá dútú ïo cùnuu
te cuu ndáá-gá núú Yă Ndiöxí, te cundàhú
iní-gá ncha-a ñáyiú te cuú-gá cuendá sá vă
cúndècu-gá cuèchi-yu núú Yă Ndiöxí. ¹⁸ Te
mei òré ndóhó Xítóhó Jesucristú ní xito
ndéé ñáhá sácuihná xii-gá te núu ndisa sá
vă cáda-gă ni ñⁿ sá ñà túú tàú-gá cada-gá,
te sá dúcáⁿ ní ndoho-gá xiáⁿ núu ndácú-gá
chindèe-gá ncha-a ñáyiú ducaⁿ yăha.

3

*Xítóhó Jesucristú ïo-gá cùnùu-gá dàcúúxi
ndíi Moisés*

¹ Te nchòhó cúú-ndó ñáyiú ndècu ndihí-í
ichi Xítóhó Jesucristú ñáyiú cùu cuendá Yă

Ndiöxí, te tnàhá-ndó cùu-ndo ñáyiú ní cáháⁿ
ñáhá-gă cuendá cundecu-ndo ndihí-gá. Te
yúhú càchí tnúhu-í xii-ndo sá ïo váha cada
cuendá-ndó nàcuáa ndùu cuendá Xítóhó Je-
sucristú, chi ðiu-gá cúú-gă Yaá ní tendaha
ñàha Dútú Ndiöxí ní quixi-gá ñuyú-a, te
ðiu-gá cúú-gă Dútú ïo cùnuu chi quide-gá
núú Yă Ndiöxí. Te ðiu-ni cuendá Xítóhó
Jesucristú càháⁿ tnúhu sá ni sàndáá iní-ó.

² Te mee Yă Ndiöxí ní sáha chiúⁿ-gá Xítóhó
Jesucristú, te ïo ndáá quidé-gă chiúⁿ-áⁿ sá
cúú-xí Yă Ndiöxí, te ðiu-ni ducaⁿ ní quide
ndíi Moisés ní quide ndíi chiúⁿ ní táhú Yă
Ndiöxí, te ïo ndáá ní quide ndíi chiúⁿ-gá sá
cúú-xí nchàa ñáyiú cùu cuendá-gá, te cue
ñáyiú-áⁿ cúú-yu ðàtná vehe mee-gă. ³ Te ñⁿ
tée dàcaa ñⁿ vehe váha ïo càhnu-gá cúú-dé
dàcúúxi vèhe dacao-dé. Te ducaⁿ sàtnahá-xi
cùu Xítóhó Jesucristú chi ïo-gá càhnu cuu-gá
dàcúúxi ndíi Moisés. ⁴ Te nchoo sà naha-o
sá ncháá vèhe dacuítí ndècu cue téé ní
dácáá, dico sa nàha tucu-o sá Yă Ndiöxí
quidé-gă ndécú nchàa sá ïo ñuyú-a. ⁵ Te
ndíi Moisés-áⁿ ïo ndáá ní quide ndíi chiúⁿ
ní táhú Yă Ndiöxí ní quide ndíi sá cúú-xí
nchàa ñáyiú cùu cuendá-gá. Te sá dúcáⁿ
ní quide ndíi xiáⁿ ní cuu ndíi ñⁿ téé ní
xinu cuechi núú Yă Ndiöxí. Te ní xáhaⁿ
ndíi xii ncha-a ñáyiú cùu cuendá-gá nàcuáa
cáháⁿ-gá ndéé cuéé-gá. ⁶ Dico Xítóhó Jesu-
cristú cúú-gă Déhe mee Yă Ndiöxí, te cùu-gá
Yaá ïo quide ndáá yíndàha-gá ncha-a ñáyiú
cùu cuendá Yă Ndiöxí. Te tnàhá-ó cùu-o
ñáyiú cùu cuendá-gá, te ðiu-ni ducaⁿ cùu
cuendá ñáhá-gă xii-o te núu na càncicúⁿ
nihnu-ni-o càni ndáá iní-ó cuendá-gá ndéé
ná sàá nduu ngündecu-o ndihí-gá.

*Cue ñáyiú cùu cuendá Yă Ndiöxí ïo váha
cùu iní-yu ndécú-yu ndihí-gá*

⁷ Te núú tùtú Yă Ndiöxí yódó tnùní nàcuáa
ní cáháⁿ Espíritú-gá, te duha ní cachí-xi:

Te núu nchòhó ndédóho-ndo nchàa tnúhu
cáháⁿ Yă Ndiöxí vitna,

⁸ te vá cúndùu sáá iní-ndó ðàtná ní xínuu
sáá iní ñáyiú ní dàquèé tíhú tnúhu Yă
Ndiöxí, ñáyiú ní xíndecu xití yucu,

chi ñáyiú-áⁿ ní xito ndéé-yu Yă Ndiöxí núu
nása cada ñaha-gă xií-yu.

Duha ní cachí Espíritú-gá. ⁹ Te cächí tucu Espíritú Yă Ndiöxí nàcuáa ní cáháⁿ méé-gă, te duha ní cachí-gá:

Xití yucu ní xito ndéé ñáhá cuè ñani tnáhá-ndó nǐ xíndecu ndéé sanaha xii-í,

te ducaⁿ nǐ quide ñáhá-yu cuèi ní xiní-yu nchaa sá nǐ quide-í ndi ùdico cuía nǐ xíndecú-yu xití yucu-áⁿ.

¹⁰ Te sá dúcáⁿ nǐ quidé-yu núu xiăⁿ ní cudéèⁿ-í núu-yu,

núu xiăⁿ ní cáháⁿ-í cuendá-yu, te ní cachí-í:

“Ñáyiu-a quide-ní-yu nchaa sá ñà túú tâu-yu cadá-yu te ni ñà túú cuini-yu cadá-yu nchaa nàcuáa sàni iní-í,

te ni ñà túú cuini-yu cadá-yu nàcuáa càháⁿ-í”,

duha ní cáháⁿ-í cuendá-yu.

¹¹ Te xiăⁿ núu ní cudéèⁿ-í núu-yu te ní xáhaⁿ ndáá-í xií-yu sá vǎ ndúú tǎhǔ-yu cundecu váha-yu núu ndécú-í.

Duha ní cachí Yă Ndiöxí cächí Espíritú-gá.

¹² Te nchòhó ñáyiu ndècu ndihí-í ichi Xitohó Jesucristú, càháⁿ-í dóho-ndo sǎ ïo cada cuendá-ndó vǎ cáni cuèhé iní-ndó te ngóo-ndo vǎ quíndáá-gá iní-ndó Yă Ndiöxí te dañá-ndo ìchi-gá, te ñiu-gá cúu-gă Yaá ndécú nchaa nduu nchaa quíú. ¹³ Te ñⁿ nduu ñⁿ nduu ío chí cuǎha tnàha tnúhu ndee iní cundecu-ndo ñini ndecu-ndo ñuyíú-a cuendá sá vǎ xínu iní-ndó càda-ndo nándi sá cuèhé sá dúhá, te ducaⁿ te vǎ cúu sàá iní-ndó núu Yă Ndiöxí. ¹⁴ Te vǎ dáñá ndéè-ó càni ndáá iní-ó nàcuáa cada ñaha Yă Ndiöxí xii-o, te dàtná-ni ní sani iní-ó ndéé cútnàhá ní tuha-o ìchi Yă Ndiöxí, te ñiu-ni ducaⁿ càni iní-ó ndéé ná sàá nduu vǎ cündècu-gá-ó ñùyíú-a, te núu ducaⁿ na càda-o te cùu ñⁿnuu-o ndihí Xitohó Jesucristú.

¹⁵ Te duha càháⁿ-xi ñⁿ xichi núu tütú Yă Ndiöxí:

Te núu nchòhó ndédóho-ndo nàcuáa càháⁿ Yă Ndiöxí vitna,

te vǎ cündùu sàá iní-ndó dàtná ní xínduu sàá iní cue ñáyiu ní dáquéé tǎhǔ tnúhu-gá ndéé sanaha.

Duha cächí-xi núu tütú-gá. ¹⁶ Te cue ñáyiu ducaⁿ nǐ xínduu sàá iní-xi cùu-yu ñáyiu ní ndeñuhu ndíi Moisés nàcióⁿ Ègíptú, te ñáyiu-áⁿ nǐ xíndedóho-yu tnúhu ní cáháⁿ Yă Ndiöxí te ní quide sàá iní-yu ní dáquéé

tǎhǔ-yu tnúhu-gá. ¹⁷ Te ndi ùdico cuía nǐ xúhuⁿ-yu ichi ío ní cudéèⁿ Yă Ndiöxí núu-yu cuendá sá nǐ quidé-yu nándi nchaa sá cuèhé sá dúhá, te ñáyiu-áⁿ nǐ xihí-yu xití yucu.

¹⁸ Te nchaa ñáyiu-áⁿ ñà túú ní cuini-yu tní-yu tnúhu ní cáháⁿ Yă Ndiöxí núu xiăⁿ ní cáháⁿ ndáá-gá sá vǎ ndúú tǎhǔ-yu cundecú-yu núu ïo váha càa ndecu-gá. ¹⁹ Te xiăⁿ núu nchoo cùtnuní iní-ó sǎ nchaa ñáyiu-áⁿ ñà túú ní ndùu tǎhǔ-yu cundecu váha-yu núu ndécú-gă, chi ñà túú ní sàndáá iní-yu tnúhu ní cáháⁿ-gá.

4

¹ Te vitna ndècu ndihí-gá-ó tnúhu Yă Ndiöxí tnúhu sá dǎnèhé ñáhá xii-o sá cúu cündecu váha-o núu ndécú-gă, te tǎu-xi quiyùhú iní-ó chí na cuáháⁿ te vǎ ndúú tǎhǔ-ó cündecu váha-o núu ndécú-gă. ² Te tnàhá nchoo nǐ ngündecu ndihí-o tnúhu sá càháⁿ nàcuáa naníhí tǎhǔ-ó dàtná ní xíndecu ndihí cue ñáyiu ndéé sanaha, dico ñáyiu-áⁿ chí ñà túú vèdana ni nándihí-xi cuèi ní xíndedóho-yu tnúhu-áⁿ chí ñà túú ní sàndáá iní ñáhǎ-yu xii-gá. ³ Dico nchoo cùu-o ñáyiu ní sàndáá iní tnúhu Yă Ndiöxí, núu xiăⁿ nduu tǎhǔ-ó cündecu váha-o núu ndécú-gă, te ní quee ndáá-xi nàcuáa càháⁿ-gá núu tütú-gá núu cächí-xi:

Yúhú ní cudéèⁿ-í núu-yu, te ní cáháⁿ ndáá-í sá vǎ ndúú tǎhǔ-yu cundecu váha-yu núu ndécú-í.

Duha ní cachí-gá. Te cuu nduu tǎhǔ-yu cundecu váha-yu núu ndécú Yă Ndiöxí ní cùu, chí sa ní xínu cava nchaa chiúⁿ ní quide-gá sá nǐ cadúha-gá ñuyíú. ⁴ Te núu tütú Yă Ndiöxí càháⁿ-xi nàcuáa ní quide-gá nduu úsá, te duha cächí-xi:

Yă Ndiöxí ní quide chiúⁿ-gá íñú nduu ní quide-gá nchaa chiúⁿ-gá te ní nde-tatú-gá nduu úsá.

Duha cächí-xi núu tütú-gá. ⁵ Te cächí tucu-xi núu tütú Yă Ndiöxí nàcuáa ní cáháⁿ-gá cuendá cue ñáyiu ndéé sanaha, te duha ní cachí-gá:

Cue ñáyiu-a vǎ ndúú tǎhǔ-yu cundecu váha-yu núu ndécú-í ndétátú-í.

Duha ní cachí-gá. ⁶ Te ñáyiu ní xíndedóho tnúhu sá càháⁿ nàcuáa naníhí tǎhǔ-ó ndéé sanaha, ñà túú ní ndùu tǎhǔ-yu cundecu váha-yu núu ndécú Yă Ndiöxí ndétátú-gá,

te ducaⁿ chi ñá túú ní sàndáá iní ñáhă-yu xii-gá, dico íó-gá ñáyiu nduu táhú cundecu váha núú ndécú-gă ndétátú-gá. ⁷ Te ní xica cuéhé nduu sá dúcáⁿ ñà túú ní sàndáá iní ñáhă ñáyiu-áⁿ xii-gá, te dàtnùní ní cáháⁿ ndíi Dàvíi yuhu-gá nàcuáa cada-gá vitna, te diu-ni nàcuáa sa yòdo tnuní diu-ni ducaⁿ chido tnuní tucu-í nàcuáa ní cáháⁿ ndíi yuhu-gá, te duha ní cachí-gá:

Te núu nchòhó ndèdòho-ndo tnũhu càháⁿ-í te vá cádá sàá iní-ndó.

Duha ní cachí-gá. ⁸ Te ndíi Jòsué ní sanu ichi ndíi ñáyiu núú quihíⁿ-yu cundecu váha-yu, dico ñá díú cuendá xíãⁿ ní cáháⁿ Yă Ndiõxí, chi cuendá nàcuáa cada-gá vitna ní cáháⁿ-gá. ⁹ Núu xíãⁿ sáá nduu ndũu táhú nchaa ñáyiu cùu cuendá Yă Ndiõxí ngũndecu váha-yu núú ndécú-gă ndétátú-gá. ¹⁰ Te nchaa ñáyiu ducaⁿ na ndũu táhú cundecu váha núú ndécú Yă Ndiõxí ndétátú-gá, te tnàhá-yu ndetátú-yu cuendá nchaa sá vâha ní quidé-yu dàtná ndétátú méé-gă. ¹¹ Te xini ñuhu-xi sá nchóó ío nducu ndèe-o nducu-o nacuáa cada-o cuendá nduu táhú-ó ngũndecu váha-o núú ndécú Yă Ndiõxí ndétátú-gá, chi na cuáhăⁿ dava-ndo càda-ndo datná ní quide cue ñáyiu ñá túú ní sàndáá iní ñáhă xii-gá, te vá ndúú táhú-ndó cundecu váha-ndo núú ndécú-gă te núu ducaⁿ na càda-ndo.

¹² Te tnũhu Yă Ndiõxí cúu-xí dàtná ìⁿ sá nchító-ó chi quide-xi nândi sá quidé-xí, te cùu-xi datná ìⁿ sá dèéⁿ víhí-gă dàcúúxí ìⁿ yuchí sá ndèé úú xio núu-xi. Te ducaⁿ sãtnahă-xi cùu tnũhu-gá chi quée-xi iní-ó, te dândixi túu-xi nchaandi túhú sá sání iní-ó te núu quide váha-o àdi ñá túú quide váha-o ndècu-o. ¹³ Te ni ìⁿ sá ní cadúha Yă Ndiõxí vá cáni iní-ó sá ndácú-xí nguivâha-xi núú-gă, chi nchaandi túhú sá sání iní-ó ndècu túu-xi núú-gă, te diu núú Yàá-áⁿ na càni cuendá-ó nchaa sá quidé-ó.

Xítóhó Jesucristú cúu-gă Dútú ío cùnũu

¹⁴ Te Xítóhó Jesucristú cúu-gă Dútú ío cùnũu ndecu ndihi-o, te diu-gá cúu-gă Déhe Dútú Ndiõxí, te Yàá-áⁿ cuãndaa-gá andiu ní nucũndecu-gá núú Yă Ndiõxí, núu xíãⁿ tàú-xi sá cáncìcúⁿ nihnu-ni-o quĩndáá iní-ó-gă. ¹⁵ Te mee Yàá-áⁿ ío cùnũu-gá cúu-gă dútú-ó ndècu ndihi-o, te ío na

cũndahú iní ñáhă-gă xii-o cuendá sá ñă ñihí ndéé-ó cundecu-o. Te ducaⁿ càda-gá chi ní yáha-gá dàtná yâha mee-o, chi nchaa sá ní yáha-gá-áⁿ ní cuu-xi sá cádá-gă nândi nchaa sá cuéhé sá dúhá ní cùu dico ni ìⁿ ñá túú ní quide-gá. ¹⁶ Núu xíãⁿ tàú-ó sã nchóó ní yuhu ní iní-ó cáháⁿ ndihi-o Yă Ndiõxí Yáá ío cũndahú iní ñáhă xii-o chindee ñaha-gá, te ducaⁿ càda-o te cũndahú iní ñáhă-gă chindee ñaha-gá xii-o ndèda-ni càa oré xini ñũhu-o-gá.

5

¹ Te nchaa cue dútú cùnũu núú ñáyiu isràél diu-ni ñáyiu cùu-güedé, te ducaⁿ ní ngũndecu-güedé cuendá cada-güedé chiũⁿ sá cúu-xí Yă Ndiõxí cuendá-yu, chi diu cue téé-áⁿ ní xóo nacani cuendá-güedé núú-gă quiti ní xóo cahni-güedé ní xóo nduu táhú-gă, te ducaⁿ ní xóo cada-güedé cuendá sá cádá càhnu iní Yă Ndiõxí cuéchi-yu, te ducaⁿ ní xóo nacani cuendá tucu-güedé núú-gă nchaa dava-gá sá ní xóo níhí-güedé ní xóo nduu táhú-gă. ² Te nchaa cue dútú-ãⁿ ní xóo cundee iní-güedé nchaa sá ní xóo cada nchaa ñáyiu ñá túú ní quide ndáá ñáyiu ñá túú cùtnuní iní-xi, te ducaⁿ ní xóo cada cue dútú-ãⁿ chi tnàhá-güedé ñá túú ní xóo níhí ndéé-güedé cundecu-güedé cuendá nchaa sá ní xóo yáha-güedé. ³ Te sá cuendá sá dúcáⁿ ñà túú ní xóo níhí ndéé-güedé núu xíãⁿ dai ní xini ñuhu-xi sá tnàhá-güedé cuáha-güedé Yă Ndiõxí sá ndúú táhú-gă cuendá méé-güedé dàtná quidé-güedé cuendá ñáyiu.

⁴ Te ni ìⁿ téé vá ndácú-dè cuu-dé dútú cùnũu cuendá-ni sá càchí iní méé-dè te núu ñá díú mèe Yă Ndiõxí ducaⁿ cuini-gá sá cúu-dè dútú cùnũu datná ní quide-gá ndíi Àrón. ⁵ Te cuèi Xítóhó Jesucristú chi ñá díú mèe-gá ní quide-gá méé-gă ìⁿ dútú cùnũu nacuáa cada nínu-gá méé-gă, chi mee Tãtá-gă Dútú Ndiõxí ducaⁿ ní cachí-gá sá cúu-gă Dútú cùnũu, te ducaⁿ chi Yă Ndiõxí ní xáhaⁿ-gă:

Yòhó cúu-n Déhe-í,

te cuini-í sá dúhá-ni cundecu-n núú ndécú-í. Duha ní xáhaⁿ-gă xii Xítóhó Jesucristú. ⁶ Te núú tütú Yă Ndiõxí yódó tnuní nàcuáa ní xáhaⁿ tucu-gá xii Xítóhó Jesucristú, te duha ní xáhaⁿ-gă:

Yòhó cúú-n dütú cundecu ni caa ni quíhíⁿ, te cùu-n datná ní cuu ndí Melquisèdec. Duha ní xáhaⁿ-gã xii Xítohó Jesucristú. ⁷ Te cùtnàhá ní xíndecu Xítohó Jesucristú ñuyíú-a te níhi ní xóo cáháⁿ ndíhi-gã Yá Ndiòxí te ní xóo cáháⁿ ndàhú-gã núú-gã, te ní xóo ndáhyú-gã òré ducaⁿ ñí xóo cáháⁿ ndíhi-gã Yá Ndiòxí, te ducaⁿ ñí quide-gã chi nàha-gã sá Yá Ndiòxí cúú-gã Yaá ndacu dàcácu nihnu ñaha xii-gã cuendá sá vã cùú dúcáⁿ-gã. Te Yá Ndiòxí ní xíndedóho-gã nchaa tnúhu ní cáháⁿ Xítohó Jesucristú cuendá sá ñí quide-gã nchaa nàcuáa ní xáhaⁿ Yá Ndiòxí cada-gã. ⁸ Te sá cuendá nchaa sá ñí ndoho Xítohó Jesucristú xiáⁿ ní cutnùní iní-gã cada-gã nchaa dava-gã sá vãha nàcuáa cuíní méé Yá Ndiòxí cada-gã. Te ducaⁿ ñí cuu cuéi cùu-gã Déhe Yá Ndiòxí. ⁹ Te sá dúcáⁿ ñí quide-gã nchaa nàcuáa cuíní méé Yá Ndiòxí, xiáⁿ nũu vitna cùu-gã Yaá dácácu nihnu nchaa ñáyíu sàndáa iní ñáhá xii-gã núú ùhú núú ndàhú. ¹⁰ Te mee Yá Ndiòxí ní cachí-gã sá Xítohó Jesucristú cúú-gã dütú cùnùu datná ní cunuu ndí Melquisèdec cùtnàhá ní cuu ndí dütú ñuyíú-a.

Cuendá ñáyíu cuíní dañà nihnu ichi Yá Ndiòxí

¹¹ Te vài-gã tnúhu ndècu cáháⁿ-í nàcuáa ndùu cuendá Xítohó Jesucristú, ndíhi ndí Melquisèdec, te dicó-ni sá nchòhó ío cuéé tècú tnùní-ndó, te yúhú ío úhú ñíhí-í nàcuáa cáháⁿ-í nàcuáa tecú tnùní-ndó.

¹² Te nchòhó sa ní cuu cuéhé nduu ndècu-ndo ichi Xítohó Jesucristú, te tàú-ndó dānehé-ndó cué ñáyíu ndècu ichi-gã tnúhu-gã nũu dicó sá cúú, dico xini ñuhu-ni-xi sá cùndècu ñáyíu danèhé ñáhá tnúhu-gã xii-ndo, tnúhu sá ñí dácúhá-ndó ndéé díhna sá ñà túú ùhú tecú tnùní-ndó. Te sá dúcáⁿ quide-ndo núu xiáⁿ cúú-ndó dàtná cue landú vitna sàdi camá, landú vátá cúú-gã caxi dítá. ¹³ Chi nchaa ñáyíu cùu datná landú vitna sàdi, ñáyíu-áⁿ cúú nèñuú-yu ñà túú cùtnuní iní-yu nàcuáa càháⁿ tnúhu sá càháⁿ nàcuáa cada ndáa-yu cundecú-yu. ¹⁴ Te nchaa sá vátá cúú-gã caxi cue landú yíquíⁿ xiáⁿ cúú-xí cuendá cue ñáyíu sacuéhé, te xiáⁿ cúú-xí dàtná tnúhu sá dácúhá ñáyíu sa ní níhí ndéé ndècu ichi-gã,

ñáyíu sa ní cutnùní váha iní-xi nándi cùu nchaa sá cuéhé sá dúhá, ndíhi nándi cùu nchaa sá vãha.

6

¹ Te xiáⁿ nũu vitna xini ñuhu-xi dacuaha-o dava-gã tnúhu Yá Ndiòxí cuendá ducaⁿ te cuu-o ñáyíu tècú tnùní nchaa tnúhu-gã. Te xini ñuhu-xi sá ncháa tnúhu Xítohó Jesucristú sá ñí dácúhá-ó ndéé díhna vá dácúhá-gã-ó dàtná ní dácúhá-ó chi sa tècú tnùní-ó. Te ñà túú-gã xini ñuhu-xi dacuaha-o datná ní dácúhá-ó ndéé díhna nàcuáa cada-o ndixi cuéchi iní-ó cuendá nchaa sá cuéhé sá dúhá quide-o, sá tá dácúíta nihnu ñaha xii-o cuháⁿ ní cùu. Te ducaⁿ vã dácúhá-gã tucu-o dàtná ní dácúhá-ó ndéé díhna nàcuáa cada-o quindáa iní-ó Yá Ndiòxí, ² ndíhi cuendá nàcuáa ní dácúhá-ó nàcuáa cuandute-o, ndíhi cuendá nàcuáa cada-o càcáⁿ ndodo-o ndàha-o díquí ñáyíu ní sàndáa iní ñáhá xii-gã. Te ducaⁿ ñà túú-gã xini ñuhu tucu-xi dacuaha-o datná ní dácúhá-ó ndéé díhna cuendá nàcuáa ndoto cue ñáyíu ní xíhí, ndíhi cuendá nàcuáa ní dácúhá-ó sã Yá Ndiòxí daquíhíⁿ-gã ñáyíu núú ùhú núú ndàhú ni caa ni quíhíⁿ. ³ Te núu Yá Ndiòxí ná cachí-gã, te cuita dacuáha-gã-ó nchaa dava-gã tnúhu sá cùmání quíhíⁿ.

⁴ Te cue ñáyíu sa tècú tnùní tnúhu Yá Ndiòxí, ñáyíu sa xini nchaa nàcuáa ndùu nchaa sá vãha quide ñaha Yá Ndiòxí xii-o ndíhí-yu, ñáyíu sa chindee ñaha Espíritú Yá Ndiòxí, ⁵ ñáyíu sa cùtnuní iní-xi sá ño váha tnúhu Yá Ndiòxí, ñáyíu sa xini nàcuáa ta quide Yá Ndiòxí véxi nchaa sá vã yòo tnàhí ndàcu cada, ⁶ te núu ñáyíu-áⁿ ná ngúíta tucú-yu daquèe tíhú duúⁿ-yu tnúhu Yá Ndiòxí, te vá ndácú-gã-ó nà canu ichi-ó-yu nàcuáa ndixi cuéchi iní-yu te núu ducaⁿ na càdá-yu, te sá dúcáⁿ ná càdá-yu te tnàhá-yu cúú-yu dàtná cue téé ní sahní ñaha xii Xítohó Jesucristú Déhe Yá Ndiòxí núú cùrúxí. Te sá dúcáⁿ ná càdá-yu te ngóo dava-gã ñáyíu cáháⁿ cuéhé-yu cuendá Xítohó Jesucristú. ⁷ Te nchaa ñáyíu cùu-yu dàtná ñuhu, chi ñuhu-áⁿ ndi tnahá òré cúúⁿ dǎú te xíhi-xi ndute, te dava ñuhu váha cùu sá xítú ñáyíu, te sá cúú nũu ñuhu-áⁿ ño nàndíhi-xi, te mee Yá Ndiòxí quidé-gã

cúú sǎ vǎha núú ñúhú-ǎⁿ. ⁸ Dico núú da iñu na ndaa núú ñuhu-áⁿ te ñá túú vǎdana nàndíhi-xi te núú ducaⁿ, te Yá Ndiöxí vá cúú vǎha iní-gá cuendá ñuhu-áⁿ sǎ dúcáⁿ dà iñu ndaa núú-xi, te iñu-áⁿ ndihí-xi cáyú. Te ducaⁿ sǎtnahá-xi cùu ñáyiu dàquee tíhú tnúhu Yá Ndiöxí chi ñá túú cùu vǎha iní-gá núú-yu.

Níhí-ó sǎ ndétú-ó ndiúu táhú-ó

⁹ Te cuèi duha càháⁿ-í dico nchòhó cue ñáyiu ío cùu iní-í, chi cùtnuní ndáá iní-í sǎ vǎ cáda-ndó dàtná xǐquide dava-gá ñáyiu, te mee-ni sǎ vǎha cuu xii-ndo chi cùu-ndo ñáyiu sa ní naníhí tǎhú. ¹⁰ Te ducaⁿ chi Yá Ndiöxí cúú-gǎ Yaá ío vǎha quide ndáá, te vá dáná ndòdo iní-gá nchaa sǎ vǎha quide-ndo, te ni vǎ dáná ndòdo iní-gá nàcuáa quide-ndo cuu iní-ndó-gǎ, te sǎ dúcáⁿ quide-ndo cuu iní-ndó-gǎ xǐáⁿ chindèe-ndo cue ñáyiu ndècu ndihí-ndo ichi Xítohó Jesucristú, te ducaⁿ-ni ta quide-ndo véxi ndéé vitna. ¹¹ Te cuíní-í sǎ ñⁿ ñⁿ-ndo nducu ndee-ndo cada-ndo nacuáa cuíní Yá Ndiöxí dàtná tá quide-ndo véxi, te ñⁿ-ni ducaⁿ càda-ndo ndéé ná sǎá nduu ndiúu táhú-ndó cùndecu-ndo ndihí-gá núú ndécú-gǎ, te ducaⁿ te níhí-ndó nchàandi túhú sǎ ndétú-ndó ndiúu táhú-ndó cùndecu ndihí-ndo ni caa ni quíhíⁿ. ¹² Te yúhú cuíní-í sǎ nchòhó vá túhíó-ndo càda-ndo nchaa nacuáa cuíní Yá Ndiöxí, te cada-ndo dàtná quidé ñáyiu sàndáá iní tnúhu-gá, ñáyiu càhnu iní-xi. Te sǎ dúcáⁿ quidé-yu xǐáⁿ níhí-yu nchaa sǎ ñí cachí Yá Ndiöxí nduu táhú-yu.

¹³ Te cútnahá ní xáhaⁿ Yá Ndiöxí xii ndíi Àbrahám nàcuáa cada-gá, te ní cacunehe-gá méé-gǎ nàcuáa cutnùní iní ndíi sǎ ndáa cada-gá nàcuáa ní xáhaⁿ-gǎ xii ndíi, te vá yóo ñⁿ ni càcunehe-gá cuendá sǎ quíndáá iní ndíi tnúhu ní cáháⁿ-gá. Te ducaⁿ ñí quide-gá chi ñⁿndíi díi-ni mee-gǎ ío cùnuu-gá. ¹⁴ Te duha ní xáhaⁿ-gǎ xii ndíi Àbrahám: “Yòhó té Àbrahám na càchí tnúhu ndáá-í xii-n sǎ ío chindee ñàha-í xii-n, te cáyá cuéhé víhí ñàní tnáhá-n”, duha ní xáhaⁿ-gǎ xii ndíi. ¹⁵ Te ndíi Àbrahám ío ní quide ndee iní ndíi ní xíndetu ndíi, te ducaⁿ te Yá Ndiöxí ní quide-gá nàcuáa ní xáhaⁿ-gǎ cada-gá sǎ cúú-xí ndíi. ¹⁶ Te núú ñⁿ ñáyiu càháⁿ ñⁿ tnúhu ndáá cuíti te càcu nehé-yu Yá

Ndiöxí cuendá quíndáá iní tnàha ñáyiu-yu tnúhu càháⁿ-yu, te òré ducaⁿ na càháⁿ-yu te ñá túú-gǎ sǎ dácáa ñáyiu càháⁿ ndihí-yu cuendú. ¹⁷ Te ducaⁿ ñí quide Yá Ndiöxí ní cáháⁿ ndáá-gá sǎ cáda-gǎ nàcuáa ní cachí-gá, te ducaⁿ ñí cáháⁿ-gá cuendá nchaa ñáyiu ní cachí-gá nduu táhú sǎ cáda-gǎ nàcuáa cutnùní iní-yu sǎ quidé-gǎ ñⁿ sǎ càháⁿ-gá, te ni ñá túú nàdáma-gá ñⁿ sǎ càháⁿ-gá. ¹⁸ Te nchoo ñí natuha-o Yá Ndiöxí cuendá dàcácu nihnu ñaha-gǎ xii-o núú ùhú núú ndàhú, te ní níhí-ó tnúhu ndee iní ndécú ndihí-o cuendá sǎ vǎ dáñá ndèé-ó cùndetu-o sǎá nduu ndiúu táhú-ó cùndecu-o ndihí-gá. Te ducaⁿ ní níhí-ó tnúhu ndee iní chi Yá Ndiöxí ní cáháⁿ ndáá-gá sǎ cáda-gǎ nàcuáa ní cachí-gá, te ñá túú dàndahú ñáhá-gǎ, te ni ñá túú nàdáma-gá ñⁿ sǎ ñí cachí-gá cada-gá. ¹⁹ Te tnúhu ndee iní ndécú ndihí-o xǐáⁿ quidé-xí cùtnuní ndáá iní-ó sǎ ndúú táhú-ó cùndecu-o ndihí Yá Ndiöxí núú ndécú-gǎ, te ducaⁿ cùtnuní ndáá ndisa iní-ó sǎ cuendá Xítohó Jesucristú Yaá ndécú núú Yá Ndiöxí. ²⁰ Te ducaⁿ ñí nucúndecu Xítohó Jesucristú núú Yá Ndiöxí cuendá ducaⁿ càncicúⁿ nihnu-o càda-o, te ducaⁿ ñí nucúndecu-gá núú Yá Ndiöxí chi cùu-gá dútú cùnùu datná ní cunuu ndíi Melquisèdec ñuyíu-a, te ducaⁿ-ni cùu-gá dútú cùnùu ni caa ni quíhíⁿ.

7

Xítohó Jesucristú cúú-gǎ dútú dàtná ní cuu ndíi Melquisèdec

¹ Te ndíi Melquisèdec ní xíndaha ndíi cue ñáyiu ñúú Sàlém, te ní cuu ndíi dútú ñí xinu cuechi ndíi núú Dútú Ndiöxí Yaá ío cùnuu. Te ndíi Melquisèdec-áⁿ ñí xícáⁿ táhú ndíi núú Yá Ndiöxí cuendá ndíi Àbrahám cútnahá ní sáháⁿ ndíi Àbrahám-áⁿ ñí nàá ndíi ndihí cue dava-gá cue téé yíndaha ñáyiu. Te cue téé-áⁿ ñá túú ní ndàcu-güedé nàá-güedé ndihí ndíi Àbrahám-áⁿ chi ní xíta-güedé. ² Te nchaa sǎ ñí níhí ndíi Àbrahám-áⁿ núú ñí nàá ndíi, te ní quide ndíi úxí xichi te ñⁿ xichi núú ùxí-áⁿ ñí sáñaha ndíi xii ndíi Melquisèdec. Te ñⁿ ndíi Melquisèdec-áⁿ quée-xí: Téé ío vǎha quide ndáá yíndaha ñaha xii ñáyiu, duha quèe-xi. Te ní xóo danàni ñahá-yu xii

ndíi Tée yìndaha ñuú Sàlém, duha ní xóo danàni ñahá-yu. Te tnúhu Sàlém-án quée-xi: Ñuú ndécú nàhi, duha quèe-xi tnúhu-án. Núu xíáⁿ quée tucu-xi nacuáa nàni ndíi Tée yìndaha ñuú ndécú nàhi, duha quèe tucu-xi diu ndíi. ³ Te ñá túú tnúhu núu yoo cùu tátá ndíi ndíhi náná ndíi, te ni ñà túú tnúhu núu yoo cùu xíi ndíi ndíhi xítá ndíi, te ni ñà túú tnúhu núu nándi cùu ñáyiú ní cuu ñaní tnáhá ndíi ní xíndecu ndéé sanaha-gă, te ni ñà túú tnúhu núu ná ama ní cacu ndíi, te ni ñà túú tnúhu núu ná ama ní xíhí ndíi. Te ndíi-án ducaⁿ-ni ñi cuu ndíi dútú ñi xíndecu ndíi, te ducaⁿ sàtnahá-xi cùu Xítóhó Jesucristú déhe Yá Ndiöxí chi cuu-gá dútú ñi caa ñi quíhíⁿ.

⁴ Te vitna chí cuáha váha cuendá sá ndíi Melquisédéc ní cuu ndíi ñiⁿ téé ío ní cuu càhnu ní xíndecu ñuyíú-a, chi ndíi Àbrahám téé ní cuu ñaní tnáhá-ó ñi xíndecu ndéé sanaha ñi quide ndíi úxí xichi nchaa sá ñi níhí ndíi núú ñi nàá ndíi. Te ñiⁿ xichi núú ùxí-án ñi sáñaha ndíi xii ndíi Melquisédéc. ⁵ Te ndíi Moisés ní chídó tnùní ndíi nàcuáa cada nchaa dútú, cue téé ní cuu ñaní tnáhá ndíi Lèví sá cuè téé-án queheⁿ-güedé ñiⁿ xichi núú ùxí xichi sá nihí cue ñáyiú isràél ñáyiú cùu ñaní tnáhá-güedé cuu cuendá-güedé. Te ducaⁿ quide-güedé cuèi ñaní tnáhá-güedé ndíhi-yu ní cuu ndíi Àbrahám. ⁶ Te cuèi ñá díú ñaní tnáhá ndíi Melquisédéc cúu ndíi Àbrahám dico ní queheⁿ ndíi Melquisédéc-án ñiⁿ xichi núú ùxí xichi nchaa sá ñi níhí ndíi Àbrahám. Te ndíi Melquisédéc-án ñi xicáⁿ táhú ndíi núú Yá Ndiöxí cuendá ndíi Àbrahám. Te diu-ni ndíi Àbrahám-án ñi xáhaⁿ Yá Ndiöxí xii ndíi sá cáda váha ñaha-gă xii ndíi. ⁷ Te sa cùtnuní iní-ó sá ñuú ñiⁿ téé na càcáⁿ táhú-dé núú Yá Ndiöxí cuendá ñiⁿ ñáyiú, te téé-án cúnù-gá-dé. ⁸ Te cue dútú ñáyiú isràél quéhéⁿ-güedé ñiⁿ xichi núú ùxí xichi nchaa sá nihí-yu cùu cuendá-güedé, te cue téé-án cuú-güedé. Te núú tütú Yá Ndiöxí càchí-xi sá ndíi Melquisédéc ndécú-ní ndíi, te ducaⁿ càháⁿ-xi chí ñá túú tnúhu sá ñi xíhí ndíi. ⁹⁻¹⁰ Te sá dúcáⁿ ñi sáñaha ndíi Àbrahám sá ñi nduu táhú ndíi Melquisédéc, te xíáⁿ cada iní-ó sá sá ndecu ndíhi ndíi Àbrahám cue ñaní tnáhá ndíi Lèví cue téé cùu dútú, cue téé queheⁿ ñiⁿ xichi núú ùxí xichi nchaa sá nihí ñáyiú isràél cuèi vátá cécú-gă-güedé.

Te cada iní-ó sá tnáhá-güedé ní sáha-güedé ndíi Melquisédéc ñiⁿ xichi núú ùxí xichi nchaa sá ñi níhí ndíi Àbrahám núú ñi nàá ndíi. Te ducaⁿ càda iní-ó chí cue téé-án cúu-güedé ñaní tnáhá ndíi Àbrahám cuèi vátá cécú-gă-güedé dàvá-án.

¹¹ Te sá cuendá cue dútú cue téé cùu ñaní tnáhá ndíi Lèví ní ngúndecu ndíhi cue ñáyiú isràél tnúhu sá sánú ìchi ñaha xii-yu nàcuáa cada-yu cundecú-yu. Te ñaní tnáhá ndíi Àrón cúu cuè dútú-án. Te núu dícó cue dútú-án ní ndacu-güedé cada-güedé nàcuáa cudíu ñáyiú isràél núú Yá Ndiöxí, te ñá túú-gă xíni ñuhu-xi ngúndecu ingá dútú dàtná ndíi Melquisédéc ní cùu. Te dútú-án ñà túú ní cùu-dé dàtná ní cuu cue ñaní tnáhá ndíi Àrón. ¹² Te núú cuè dútú cue téé cùu ñaní tnáhá ndíi Lèví-án ñi ngúndecu ingá dútú. Te sá dúcáⁿ ñi ngúndecu ingá dútú xíáⁿ dacuítí ñi xini ñuhu-xi sá dăma nàcuáa nduu tnúhu sá sánú ìchi ñaha xii-yu nàcuáa cada-yu cundecú-yu. ¹³⁻¹⁴ Te diu-ni cuendá dútú-án sa nihí-ó tnúhu, te dútú-án cúu Xítóhó Jesucristú, te ñá díú ñaní tnáhá ndíi Àrón cúu-gă chí ñaní tnáhá ndíi Jùdá cúu-gă. Te nchaa-o tà xini ndáá-ó sá ñaní tnáhá ndíi Jùdá cúu-gă, te ndíi Moisés ñá túú tnáhí ná ní càchí ndíi cuendá cue ñaní tnáhá ndíi Jùdá sá cúu-güedé dútú, chí ñi ñiⁿ-güedé ñá túú ní cùu-güedé dútú ní cùu.

¹⁵ Te vitna cùtnuní ndáá iní-ó nàcuáa ní cuu, chí Xítóhó Jesucristú cúu-gă ingá dútú dàtná ní cuu ndíi Melquisédéc. ¹⁶ Te ñá díú cuendá tnúhu sá sánú ìchi ñaha xii ñáyiú nàcuáa cada-yu cundecú-yu ducaⁿ ní cùu-gá dútú, chí ní cuu-gá dútú cuendá sá cúu-gă Yaá cundecu ñi caa ñi quíhíⁿ chí vá ñiⁿ nduu te ndíhi nihnu-gá. ¹⁷ Te duha ní xáhaⁿ Yá Ndiöxí xii-gá:

Yòhó cúu-n dütú dàtná ní cuu ndíi Melquisédéc,

te cundecu-n nchaa nduu nchaa quíú.

Duha ní xáhaⁿ Yá Ndiöxí xii-gá. ¹⁸ Te xíáⁿ ñuú nchaa tnúhu ndéé díhna, tnúhu sá ñi xíndecu ndíhi cue dútú ñà túú-gă cúnù-xi vitna chí ñá túú-gă xíni ñuhu-xi te ni ñà túú nă chíndèe ñaha-xi. ¹⁹ Te diu-ni tnúhu-án cúu-xí tnúhu sá ñi chídó tnùní ndíi Moisés canu ìchi ñaha xii ñáyiú nàcuáa cada-yu cundecú-yu. Te tnúhu-án ñà túú vèdana ñi quide-xi nacuáa chindee-xi ñáyiú

cuđiú-yu núú Yă Ndiöxí. Dico vitna ní ngúndecu ndihi-o tñuhu ndee iní sá ïo-gá váha dácúúxí tñuhu ndée díhna, chi ndecu ndihi-o Xítohó Jesucristú Yaá cúú dütú-ó. Te Yaá-án quidé-gă tñahá tñuhu-o ndihi Yă Ndiöxí vitna.

²⁰ Te Yă Ndiöxí ní cáháⁿ ndáá cuiti-gá sá Xítohó Jesucristú cuu-gá dütú. ²¹ Dico ñá túú dùcaⁿ ní cáháⁿ-gá cuendá cue ñaní tñahá ndi Lèví cue téé ní cuu dütú, cuéi mei òré ní chisaha-güedé ní cuu-güedé dütú. Te cútnahá ní chisaha Xítohó Jesucristú cúú-gă dütú, te Yă Ndiöxí ní xáhaⁿ ndáá cuiti-gá xii-gă, te duha ní xáhaⁿ-gă:

Yúhú Dütú Ndiöxí cáháⁿ ndáá cuiti-í te vá dāmà-í tñuhu cáháⁿ-í:
 “Yòhó cúú-n dütú dàtná ndi Melquisèdec, te cundecu-n nì caa nì quíhíⁿ.”

Duha ní xáhaⁿ Yă Ndiöxí xii Xítohó Jesucristú. ²² Te Xítohó Jesucristú quidé-gă nàcuáa cutnùnì ndáá iní-ó sá Yă Ndiöxí cada-gá ingá núú sá váha sá cúú-xí-ó dàtná ní cachí-gă, te xíáⁿ cúú-xí sá ïo-gá váha dácúúxí tñuhu ní cáháⁿ-gá ndée díhna. ²³ Te ío cuéhé cue ñaní tñahá ndi Lèví ní cuu-güedé dütú, te ducaⁿ cuendá sá ñà túú ní cùdí-güedé cundecu-güedé chi ní ndihi-güedé ní xíhí. ²⁴ Dico Xítohó Jesucristú chi vá cúú-gă, chi cundecu-gă nì caa nì quíhíⁿ núú xíáⁿ diu-ni-gă cuu-gă dütú, te vá yòo ïⁿ-gă cuu dütú cada núú-gă. ²⁵ Te núú xíáⁿ Xítohó Jesucristú dácăcu ni-hnu ñaha-gă xii nchoo ñăyiu núú ùhú núú ndàhú, nchoo ñăyiu sàndáá iní ñahá xii-gă, te diu-ni nchoo cùu-o ñăyiu tñahá tñuhu ndihi Yă Ndiöxí, te vá ïⁿ ndùu-gă te cuíta nihnu-o. Te ducaⁿ chi Xítohó Jesucristú ñá túú xòcuíñí-gă núú Yă Ndiöxí cáháⁿ ndàhú-gă cuendá-ó.

²⁶ Te Xítohó Jesucristú cúú-gă Yaá cúú dütú cùnùu xini ñuhu-o cundecu ndihi-o, te diu-gă cúú-gă Yaá chindèe chitúu ñaha xii-o, te cùu-gă Yaá ío quide ndáá núú Yă Ndiöxí, te cùu-gă Yaá cándòo canine chi ñá túú tñahí cuéchi-gă. Te ñá túú tñahí quide-gă dàtná quidé nchàa cue ñăyiu ndecu ichi cuehé ichi duha, te cùu-gă Yaá ní nucúndecu andiú núú ndécú Yă Ndiöxí te yàcáⁿ táxí tñùnì-gă. ²⁷ Te ñá túú quide-gă dàtná ní quide cue dütú nì cunuu nì xíndecu, chi cue dütú-ăⁿ ïⁿ nduu ïⁿ

nduu ní xóo cahni-güedé quiti ní xóo nduu táhú Yă Ndiöxí, te díhna-gă cuendá nchaa cuéchi mee-güedé ducaⁿ ní xóo cada-güedé te dàtnùnì ducaⁿ ní xóo cada tucu-güedé cuendá nchaa cuéchi ñăyiu. Dico Xítohó Jesucristú chi ïⁿ xito-ni ní xíhí-gă sá cúú-xí nchàa ñăyiu chi ducaⁿ nì sani iní-gă, te vá ïⁿ ndùu-gă ducaⁿ càda tucu-gă. ²⁸ Te sá cuendá nchaa tñuhu ní chídó tñùnì ndi Moisés xíáⁿ ní xíndecu cue téé ní cuu dütú cùnùu, te cue téé-áⁿ ní cuu-güedé cue téé yíca cuéchi-xi. Te sá tá dúcáⁿ nì chídó tñùnì ndi Moisés nàcuáa cada ñăyiu, te ní xica cuéhé víhí ndùu te dàtnùnì ní cáháⁿ ndáá cuiti Yă Ndiöxí sá Dèhe-gă cuu-gă dütú cùnùu. Te Yaá cúú Dèhe-gă-áⁿ nì quide-gă nchaa nàcuáa tàú-xi cunduu, te diu-ni ducaⁿ càda-gă nì caa nì quíhíⁿ.

8

Xítohó Jesucristú cúú-gă dütú cùnùu

¹ Te Xítohó Jesucristú Yaá cúú dütú cùnùu ndecu ndihi-o cuándaa-gă andiú, te ní ngóo-gă xio cùha Dütú Ndiöxí Yaá ío cùnùu, te tñahá-gă cùnùu-gă. Te diu cuendá-a cùu-xi sá ïo-gă cùnùu ta cáháⁿ-ndí véxi. ² Te núú ndécú Yă Ndiöxí cúú-xí núú ìí víhí. Te cada iní-ó sá cúú-xí ïⁿ vehe te xíáⁿ ndécú Xítohó Jesucristú cúú-gă dütú, te vehe-áⁿ nì dácáá mèe Yă Ndiöxí te ñá díú cuè téé ñuyíú-a. ³ Te sá cuendá nchaa tñuhu ní chídó tñùnì ndi Moisés xíáⁿ ní xíndecu cue dütú cùnùu cuendá sá cáhni-güedé quiti nduu táhú Yă Ndiöxí, te nacani cuendá-güedé núú-gă nchaa dava-gă sá nihí-güedé nduu táhú-gă. Te xíáⁿ núú dai ní xini ñuhu-xi sá tñahá Xítohó Jesucristú cuáñaha-gă ïⁿ sá ndúú táhú Yă Ndiöxí, te táhú-ăⁿ cúú-xí mèe-gă chi ní xíhí-gă ní cuu-gă dàtná ïⁿ táhú sá cúú-xí Yă Ndiöxí. ⁴ Te núú nì xíndecu-ni Xítohó Jesucristú ñuyíú-a te vá cúú-gă dütú ní cùu, chi sa ndecu cue dütú sáñaha nchàa sá ndúú táhú Yă Ndiöxí dàtná cáháⁿ nchaa tñuhu ní chídó tñùnì ndi Moisés. ⁵ Te nchaa sá quide cue dütú ñăyiu isràel nùtnahá-xi luha nchaa sá quidé Xítohó Jesucristú Yaá cúú dütú cùnùu ndecu andiú. Te quèe ndáá-xi nàcuáa ní xáhaⁿ Yă Ndiöxí xii ndi Moisés cútnahá tá cùyatni ngúíta ndi dacàa ndi vehe-gă, te duha ní xáhaⁿ-gă: “Ío váha cada

cuendá-n nàcuáa dacàa-n vehe-í dàtná cáá sã ní dánèhé ñáhà-í xii-n xití yucu”, duha ní xáhaⁿ-gã xii ndíi. ⁶ Dico vitna chi Xítoho Jesucristú cúu-gã dútú cùnùu, te ïo-gã càhnu nduu chiuⁿ quide-gã dàcúúxí cuè dútú cue ñáyiu isràél. Te ñu Xítoho Jesucristú cúu-gã Yaá quidé tnàhá tnúhu-o ndíhi Yá Ndiöxí, te ducaⁿ chi Yá Ndiöxí ïo-gã váha ndùu tnúhu ní cáháⁿ-gã xito cùu uú dàcúúxí tnúhu ní cáháⁿ-gã ndéé díhna, te ducaⁿ ïo váha ndùu tnúhu ní cáháⁿ-gã xito cùu uú chi ní cachí-gã sã ñngá núú sã ïo-gã váha cada ñaha-gã xii-o vitna.

⁷ Te núu nàcuáa ní cachí Yá Ndiöxí cada ñaha-gã xii-o ndéé díhna ní quide-xi nchaa nacuaa tàú-xi cunduu nàcuáa nduu táhú-ó cundecu váha-o núu-gã ñá, te ñá túú xini ñuhu-xi cáháⁿ tucu-gã sã cádá-gã ñngá núú sã váha sã cúu-xí-ó vitna ni cuu. ⁸ Te Yá Ndiöxí ñá túú ní cùu váha iní-gã núú ñáyiu isràél núu xiáⁿ ní cáháⁿ-gã cuendá-yu, te duha ní cachí-gã:

Yúhú cúu-í Dútú Ndiöxí, te duha ndùu tnúhu na cáháⁿ-í: Sãá nduu te cada-í ñngá núú sã váha sã cúu-xí cuè ñani tnàhá ñáyiu isràél, ndíhi cue ñani tnàhá ndíi Jüdá ñu-ni ñáyiu isràél.

⁹ Te tnúhu sã cáháⁿ-í-a ñá túú ñⁿ-ni cuu-xi ndíhi tnúhu sã ní xáhaⁿ-í xii cue ñáyiu ní cuu ñani tnàhá-yu ní xíndecu ndéé sanaha càda-í-yu,

te ñu-ni dàvá-áⁿ ní quide yica-í ní ndeñuhu-í-yu nacióⁿ Ègiptú,

te ñá túú ní cuini-yu tníⁿ-yu tnúhu ní xáhaⁿ-í xii-yu cuendá ducaⁿ càda váha-í-yu,

te xiáⁿ núu ní dáñá ñihnu-í-yu ñá túú-gã ní quide cuendá-í-yu.

¹⁰ Te na sãá nduu te duha ndùu tucu ñngá núú sã váha cada-í cue ñáyiu isràél.

Te yúhú cada-í nàcuáa cutnùni váha iní-yu nàcuáa cuini-í cadá-yu,

te ducaⁿ ní yuhu ni iní-yu cadá-yu.

Te yúhú Yá Ndiöxí quindaha-í-yu,

te mèe-yu cuú-yu ñáyiu cùu cuendá-í.

¹¹ Te dàvá-áⁿ chi ni ñáyiu cùu ndí meé-yu, te ni cuè dava-gã ñáyiu vá cùtnúhu tnàhá-yu sã nátùha ñahá-yu xii-í,

chi dàvá-áⁿ nchaa ñáyiu cundecu ndíhi ñahá-yu xii-í,

cuèi ñáyiu cùnùu te cuèi ñáyiu ñá túú cùnùu.

¹² Te dàvá-áⁿ cada càhnu iní-í nchaa sã cuèhé sã dúhá quidé-yu,

te vá ñⁿ ndùu-gã ndacu iní-í nchaa sã quidé-yu.

Duha ní cachí Yá Ndiöxí cuendá ñáyiu isràél. ¹³ Te sã dúcáⁿ ní cáháⁿ Yá Ndiöxí sã cádá-gã ñngá núú sã váha sã cúu-xí ñáyiu xiáⁿ cutnùni sã tnúhu sã ní cáháⁿ-gã díhna ñá túú-gã xini ñuhu-xi. Te cada iní-ó sã tnúhu-áⁿ cúu-xí ñⁿ sã ní cunaha ndècu te ñá túú-gã nándíhi-xi te cuíta-ná-xi, ducaⁿ sãtnahá-xi cùu tnúhu sã ní cáháⁿ-gã ndéé díhna.

9

Cuendá vehe Yá Ndiöxí

¹ Te tnúhu sã ní cáháⁿ Yá Ndiöxí ndéé díhna cùu-xi cuendá nàcuáa cada ñáyiu isràél chiñuhu ñahá-yu xii-gã, ndíhi cuendá vehe-gã caa ñuyú-a. ² Te ñáyiu isràél ní dácáa-yu vehe Yá Ndiöxí, te vehe-áⁿ ní

cuu-xi vehe dóó te ní xúhuⁿ nehu xití-xi. Te cuartú díhna ní xínani-xi cuartú ní cuu íí, te xiáⁿ ní xíndecu ñⁿ sã ndéé dité-xi sã ní cándodó ñⁿ caa candíl núú dité-xi, te ní xínutnii ñⁿ mèsá ní xóo códó pãá ní xóo nduu táhú Yá Ndiöxí. ³ Te cuartú cúu ùú ní xínani-xi cuartú ní cuu íí víhi-gã. ⁴ Te xití cuartú-áⁿ ní xínutnii ñⁿ sã ní cuáha mee-ni díhúⁿ cuáaⁿ te núu xiáⁿ ní xóo cahmi-güedé dúsa sã sãháⁿ tnámí. Te ñu-ni xiáⁿ ní xíndecu tucu ñⁿ càjá ní cuu mee-ni díhúⁿ cuáaⁿ te xití càjá-áⁿ ní xúhuⁿ ñⁿ lítu ní cuáha

mee-ni díhúⁿ cuáaⁿ, te xití lítu-áⁿ ní xúhuⁿ mànáá sã ní xóo caxí-yu dàvá-áⁿ. Te ñu-ni

xití càjá-áⁿ ní xúhuⁿ tnudii ndíi Àrón sã ní saa itá-xi, ndíhi yúú sã ní xíndéé tnúhu ní cáháⁿ Yá Ndiöxí nàcuáa cada ñáyiu. Te duha

ní xínani càjá-áⁿ: Càjá sã ñúhú tnúhu ní cáháⁿ Yá Ndiöxí sã cúu-xí ñáyiu, duha ní xínani-xi. ⁵ Te núu càjá-áⁿ ní cándodó ùú

tnàhá sã ní cadúha-yu, te xiáⁿ cáá-xí dàtná cáá espíritú xínú cuèchi núú Yá Ndiöxí. Te

cuendá úú xiáⁿ ní cutnùni iní-yu sã ïo càhnu cuu Yá Ndiöxí, te sã ní cadúha-yu-áⁿ ndéé

ndíxíⁿ-xi, te ndíxíⁿ-xi-áⁿ ñáhu-xi xio xio núú quidé càhnu iní Yá Ndiöxí nchaa yícá cuèchi

ñáyiu, dico vá cúu-gã cáháⁿ-í cuendá nchaa

dava-gã xiáⁿ vitna.

6 Te nchaa xiǎn ní xíndecu xití vehe Yá Ndiöxí, te cue dútú ní xóo quihu-güedé ññ nduu ññ nduu xití cuàrtú díhna ní xóo cada-güedé nàcuáa tàú-güedé cada-güedé sá cúú-xí Yá Ndiöxí. 7 Te cuàrtú cúú úú-án chi mee-ni dütú cúnùu ní xóo quihu-dé ññ xito-ni ndi tnahá cuíá. Te ndi tnahá òré ducañ ní xóo quihu dütú cúnùu-án te ní xóo canehe-dé níñi ní xóo quihu ní xóo nduu táhú Yá Ndiöxí. Te ducañ ní xóo cada dütú-án cuèndá sá Yá Ndiöxí cada càhnu iní-gá nchaa yíca cuèchi mee-dé, ndihi nchaa yíca cuèchi ñáyi. 8 Te sá dúcáñ mèe-ni dütú cúnùu ní xóo quihu-dé xití cuàrtú ní cuu íí-gǎ-án, xiǎn Espiritú Yá Ndiöxí quidé-xí cùtnuní iní-ó sǎ ñini ducañ ní xíndecu vehe-án ní xóo cada-yu nàcuáa ní xóo cúñaha Yá Ndiöxí cada-yu. Te xiǎn cùtnuní sá vǎtá sǎa-gá nduu cáhán ndihí-yu Yá Ndiöxí nàcuáa tàú-xi cunduu. 9 Te sá dúcáñ ní xíndecu vehe-án, ndihi sá dúcáñ ní xóo cada nchaa cue dütú-án, xiǎn cùtnuní iní-ó nàcuáa quide Yá Ndiöxí vitna, chi nchaa quití ní xóo cahni cue dütú-án ní xóo nduu táhú Yá Ndiöxí, ndihi nchaa dava-gá sá ní xóo nduu táhú-gǎ ñá túú ní quide-xi nàcuáa nduu ndoo nduu nine iní cue ñáyi nàcuáa cutnùn iní-yu sá ñà túú-gǎ cuèchi-yu ndècu núú Yá Ndiöxí. 10 Te sá dúcáñ ní xóo cada nchaa dütú-án ní níhí tñáhá-xí ndihi nchaa tñúhu sá dánèhé ñáhá xí ñáyi ná cúú sǎ cáxi-yu ndihi ná cúú sǎ cúú còhó-yu ndihi nàcuáa ndáhá-yu. Te tñúhu-án ní cuu-xi mee-ni sǎ ní sanu ichi ñaha xí-yu nàcuáa cundecú-yu ñuyíú-a. Te tñúhu-án ní nándíhi-xi ndéé ní sǎa nduu ní nadama Yá Ndiöxí tñúhu-án cuèndá sá vǎ dúcáñ-gǎ cada-yu cundecú-yu.

11 Te Xítohó Jesucristú ní quixi-gǎ ñuyíú-a, te diu-gǎ cúú-gǎ Yaá cúú dütú cúnùu, te xiǎn nùu quide-gǎ nchaa sá vǎha sá cúú-xí-ó. Te vitna ní nucúndecu-gǎ núú ío víi ío vǎha càa, te núú ndécú-gǎ-án ñà túú cùu-xi ññ vehe sá ní dácáa cuè téé ñuyíú-a. 12 Te cada iní-ó sǎ Xítohó Jesucristú cuánguihu-gǎ xití cuàrtú núú ní cuu íí víhí dàtná ní xóo cada dütú cúnùu ní xíndecu ndéé sanaha, chi ní nucúndecu-gǎ núú ndécú Yá Ndiöxí. Dico ñá túú ní quide-gǎ dàtná ní xóo cada dütú cúnùu ní xíndecu ndéé sanaha, chi dütú-án òré ní xóo

quihu-dé xití cuàrtú ní cuu íí-gǎ-án, te ní xóo canehe-dé níñi chivá ndihi níñi chèhlu ní xóo quihu. Dico Xítohó Jesucristú chi níñi mée-gǎ ní sati ní xíhí-gǎ núú cùrúxí, te xiǎn duuñ duuñ cuáhán-gǎ ní nucúndecu-gǎ núú ndécú Yá Ndiöxí. Te sá dúcáñ ní quide-gǎ xiǎn ní naníhí tàhú-ó. 13 Te nchaa ñáyi ní xóo cada nàcuáa vǎ cúú-gǎ-yu ñáyi ní cuu íí, ñáyi-án ní xóo códó ñáhá cuè dütú níñi ndicutu, ndihi níñi chivá, ndihi yáa cùñú chèhlu quití sàhni-güedé cuèndá nduu íí tucú-yu. 14 ¡Dico níñi Xítohó Jesucristú chi ío-gǎ nándíhi-xi sá cúú-xí nchò ñáyi xíndecu vitna! Te cuèndá níñi-gǎ-án, chi Espiritú Yá Ndiöxí sá ndécú nchaa nduu nchaa quiú ní cuu ññnuu-xi ndihi Xítohó Jesucristú sá cúú cùú-gǎ cuèndá cuu-gǎ dàtná ññ táhú sǎ cúú-xí Yá Ndiöxí cuèi cùu-gǎ Yaá ñá túú tñáhí cuèchi-xi, te ní sati níñi-gǎ te ní xíhí-gǎ. Te cuèndá xiǎn ní cutnùn iní-ó sǎ Yá Ndiöxí ní quide càhnu iní-gǎ nchaa sá ñà túú vǎha ní quide-o, te ní nduu ndoo ní nduu nine iní-ó. Te ducañ ní nduu ndoo ní nduu nine iní-ó cuèndá sá ndácú-ó cùnu cuèchi-o núú Yá Ndiöxí Yaá ndécú nchaa nduu nchaa quiú.

15 Te Xítohó Jesucristú ní quide ndáa-gǎ núú Yá Ndiöxí cuèndá cue ñáyi ndècu ñuyíú-a. Te cuèndá xiǎn Yá Ndiöxí cada-gǎ ingá núú sǎ vǎha sá cúú-xí-yu dàtná ní cachí-gǎ, te ducañ càda-gǎ sá cuèndá nchaa ñáyi ní cáhán-gǎ cundecu ndihí-gǎ, chi ñáyi-án nduu táhú-yu cundecu ndihi vǎha ñáhá-yu xii-gǎ ní caa ní quihíñ chi ducañ ní cachí-gǎ, te ducañ chi Xítohó Jesucristú ní xíhí-gǎ núú cùrúxí cuèndá sá Yá Ndiöxí cada càhnu iní-gǎ nchaa yíca cuèchi-yu, nchaa cuèchi sá ní quide-yu cùtnáhá ní cunuu tñúhu sá ní cáhán-gǎ díhna. 16 Te nchoo xini-ó sǎ nùu ññ téé na càdúha ññ tutú nàcuáa cada ñáyi dàcáhñu-yu nchaa sá ndécú ndihí-dé, te tutú-án xini ññhu-xi ndéé ná yǎha nduu cùú-dé. 17 Te ñá túú tàú-xi cada ñáyi nàcuáa cáhán-xi núú tütú-án ní ndècu téé ní cadúha, dico sátá ná yǎha cuú-dé te cada-yu nàcuáa cáhán-xi. 18 Te cuèi tñúhu ní cáhán Yá Ndiöxí ndéé díhna nàcuáa cada vǎha-gǎ ñáyi, te diu-ni ndihi níñi ní cundáa-xi chi ní sàhni-güedé quití

te ní sati níñí-güedi. ¹⁹ Te ndí Moisés ní cáháⁿ ndodo ndí núu ncháa ñáyi nàcuáa ní cachí Yá Ndióxi cada-yu, te nàcuáa-ni nduu tnúhu ní chídó tnùní ndí núu tütú ndí ní cáháⁿ ndí, te ní dácá ndí ndute níñí chëhlu ndíhi níñí chívá lïhli, te ní queheⁿ ndí ñⁿ dité yutnu nàni hisópó ndíhi luha idi ticuèhé, te ní chindóyo ndí níñí-áⁿ. Te ní sódo ndí núu tütú ndéé tnúhu Yá Ndióxi sá ní chídó tnùní ndí-áⁿ, te tnáhá cue ñáyi xíndecu-áⁿ ní chúcú ndí. ²⁰ Te ní xáhaⁿ ndí Moisés xii-yu: “Cuèndá níñí-a ní cundáá sá Yá Ndióxi cada ñaha-gã xii-ndo sã vâha chi ducaⁿ ní cachí-gã cada-gã sã cúu-xí-ndó”, duha ní xáhaⁿ ndí xii-yu. ²¹ Te ñu-ni ducaⁿ ní quide tucu ndí ní chúcú ndí níñí vehe-gã ndíhi ncháa sá nándíhi-güedé òré chíñùhu-güedé Yá Ndióxi ndécú xití vehe-gã-áⁿ. ²² Te tnúhu ní chídó tnùní ndí Moisés càchí-xi sá méé-ní níñí chucu-güedé ncháa sá cãnehe chiùⁿ-güedé òré chíñùhu-güedé Yá Ndióxi, te sacú-nã te ndíhi ndoo ncháa xiãⁿ chucu-güedé níñí ni cùu. Te dacuítí ní xini ñuhu-xi sã cáti níñí cuèndá ducaⁿ càda cahnu iní Yá Ndióxi ncháa yicá cuèchi ñáyi.

Xítoho Jesucristú ní xihí-gã núu cùrúxi cuèndá sã vã cùndècu-gã cuèchi-o nùu Yá Ndióxi

²³ Te sã cuèndá sã ní xihí Xítoho Jesucristú núu cùrúxi, xiãⁿ ñã túu-gã cuèchi-o ndècu nùu Yá Ndióxi. Te cuèndá ncháa sã ní xihí xití vehe-gã sã ní dácáá ñáyi isràél xiãⁿ cùtnùní iní-ó nàcuáa quide-xi núu ndécú-gã. Te dacuítí ní xini ñuhu-xi sã cáhni-güedé cue quití ní cachí Yá Ndióxi cuèndá nduu íi ncháa sã ní xihí xití vehe-gã-áⁿ. Te cuèi ducaⁿ ní sahani-güedé cue quití-áⁿ dico ñã túu ní quide-xi nàcuáa ngúndecu váha-o nùu Yá Ndióxi. Dico Xítoho Jesucristú ní xihí-gã, te sã ní xihí-gã xiãⁿ ní quide-gã nàcuáa ngúndecu váha-o nùu Yá Ndióxi. ²⁴ Te Xítoho Jesucristú cuándaa-gã andíu nùu ndécú Yá Ndióxi cáháⁿ ndàhú-gã cuèndá-ó, te Xítoho Jesucristú chi ñã díu ñⁿ vehe ní dácáá cuè téé ñuyú-a cuánguihu-gã. Te vehe Yá Ndióxi sã ní dácáá cuè ñáyi isràél ñuyú-a ndéé sanaha, ndíhi ncháa

nàcuáa ní xóo cada-güedé xití vehe-gã-áⁿ xiãⁿ cùtnùní iní-ó nàcuáa quide-xi núu ndécú-gã. ²⁵ Te dútú cùnùu nùu ñáyi isràél ní xóo quíhu-dé nùu cuiá nùu cuiá xití cuàrtú ní cuu íi víhí-gã-áⁿ, te ní xóo canehe-dé níñí ñⁿ xóo quíhu xití cuàrtú-áⁿ dico ñã díu níñí méé-dé. Dico Xítoho Jesucristú chi ñã túu ducaⁿ ni quide-gã chi ñⁿ xito-ni ní sati níñí-gã te ní xihí-gã. ²⁶ Chi nùu ní xihí-gã nuu nùu te ndéé cùtnàhá ní ngáva ñuyú ducaⁿ ngüita-gã cada-gã ní cùu, te vitna ta ndíhi nduu cuáhã ní quixi-gã ñuyú-a ní xihí-gã ñⁿ xito-ni cuèndá cuu-gã dàtná ñⁿ táhú sã cúu-xí Yá Ndióxi, te ducaⁿ ní quide-gã cuèndá sã vã cùndècu-gã cuèchi ñáyi nùu Yá Ndióxi. ²⁷ Te nchoo cuè ñáyi ñuyú-a chi ñⁿ xito-ni cuú-ó te dàtnùní ducaⁿ te cada ndáá Yá Ndióxi cuèchi-o. ²⁸ Te ducaⁿ sãtnahã-xi cùu Xítoho Jesucristú chi ñⁿ xito-ni ní xihí-gã cuèndá sã vã cùndècu-gã cuèchi ñáyi nùu Yá Ndióxi, te ducaⁿ ní cuu ní xihí-gã chi mee-gã ducaⁿ ní cachí-gã cunduu. Te quixi tucu Xítoho Jesucristú ñuyú-a dico ñã díu-gã sã cáda-gã cuèndá sã vã cùndècu-gã cuèchi ñáyi nùu Yá Ndióxi, chi quixi-gã nacuaca-gã ncháa ñáyi ndètu ñaha xii-gã cuèndá cundécú-yu ndíhi-gã ní caa ni quíhíⁿ.

10

¹ Te ncháa tnúhu ní xáhaⁿ ndí Moisés xii ñáyi isràél cada-yu, ncháa tnúhu-áⁿ ní quide-xi ní cùtnùní luha iní-yu nàcuáa cada Yá Ndióxi cada váha ñaha-gã xii-o vitna. Dico ñã díu mèi nàcuáa ní xáhaⁿ ndí Moisés xii ñáyi quide Yá Ndióxi vitna chi ñã quide-gã. Te ncháa tnúhu ní cáháⁿ ndí Moisés ñã túu ní ndàcu-xi cada-xi nàcuáa cundáá ncháa ñáyi túha ñaha xii Yá Ndióxi cuèi ní xóo cahni-güedé quití ní xóo nduu táhú-gã nùu cuiá nùu cuiá. ² Te nùu dicó sã ní xóo cahni-güedé quití ní xóo nduu táhú Yá Ndióxi ní quide-xi nàcuáa nduu ndoo nduu nine iní cue ñáyi, te vá cáhni-gã-güedé cue quití-áⁿ nduu táhú-gã ní cùu, te ducaⁿ te cùtnùní iní-yu sã ñã túu-gã cuèchi-yu ndècu nùu Yá Ndióxi ní cùu. ³ Te sã dúcãⁿ ní xóo cahni-güedé quití ní xóo nduu táhú Yá Ndióxi nùu cuiá nùu cuiá, xiãⁿ ní xóo ndacu iní cue ñáyi ncháa sã

cuèhé sá dúhá nǐ xóo cada-yu. ⁴Te ducaⁿ chi níñí ndicutu-áⁿ ndihí níñí chivá-áⁿ ñà túú ní xóo ndacu-xi cada-xi nàcuáa vá cündècu cuèchi-yu núú Yá Ndiöxí.

⁵Te xiáⁿ núu cútnàhá ní quexìo Xítóhó Jesucristú ñuyíú-a ní xáhaⁿ-gǎ xii Yá Ndiöxí: Yòhó Tǎtà-í, ñà túú ndùu vétú váha iní-n sǎ sǎhni-güedé quití ndùu táhú-n, te ni ñà túú ndùu vétú váha tucu iní-n cuendá nchaa dava-gǎ sá táxi-güedé ndúú táhú-n,

núu xiáⁿ ní quide túha-n yìqui cuñú-í cuendá yúhú cuú-í te nduu táhú ñáhá-n xii-í.

⁶Te ni ñà túú ndùu vétú váha iní-n cuendá quití sǎhmi-güedé ndúú táhú-n te ni ñà túú ndùu vétú váha iní-n cuendá nchaa dava-gǎ sá táxi-güedé ndúú táhú-n cuendá sá vǎ cündècu-gǎ cuèchi ñáyíu núú-n.

⁷Núu xiáⁿ yúhú ní cachí-í xii yòhó Tǎtà-í Dútú Ndiöxí sá yúhú véxi-í ñuyíú-a cada-í nchaa sá cuiní-n cada-í dàtná yódó tnùnì cuendá-í núú tütú-n.

Duha ní xáhaⁿ Xítóhó Jesucristú xii Tǎtà-gǎ Dútú Ndiöxí. ⁸Te Xítóhó Jesucristú díhna-gǎ ní xii-gǎ Yá Ndiöxí Yaá cúú Tǎtà-gǎ: “Yòhó Tǎtà-í ñà túú ndùu vétú váha iní-n cuendá quití sǎhni-güedé ndúú táhú-n, ndihí cuendá quití sǎhmi-güedé ndúú táhú tucu-n cuendá sá vǎ cündècu-gǎ cuèchi ñáyíu núú-n, ndihí cuendá nchaa dava-gǎ táhú sǎ táxi-güedé xii-n ñà túú ndùu vétú váha iní-n cuendá nchaa xiáⁿ”, duha ní xáhaⁿ Xítóhó Jesucristú xii Tǎtà-gǎ Dútú Ndiöxí. Te ducaⁿ nǐ xáhaⁿ-gǎ cuèi núú tütú ndíi Moisés yódó tnùnì sá dúcáⁿ cada-güedé.

⁹Te sátá dúcáⁿ te ní xáhaⁿ tùcu-gǎ xii Tǎtà-gǎ Dútú Ndiöxí: “Yòhó Tǎtà-í Dútú Ndiöxí, mee-í véxi-í ñuyíú-a cuendá cada-í nchaa nàcuáa cuiní-n”, duha ní xáhaⁿ-gǎ xii Tǎtà-gǎ. Te sátá dúcáⁿ nì cáháⁿ Xítóhó Jesucristú xiáⁿ ní cutnùnì sá ñà túú-gǎ xíní ñùhu-xi ducaⁿ cada-güedé cahni-güedé nchaa quití-áⁿ, te ducaⁿ chi mee Xítóhó Jesucristú ní xihí-gǎ ní cuu-gǎ dàtná ñⁿ táhú sǎ cúú-xí Yá Ndiöxí, te ducaⁿ nǐ cuu chi ducaⁿ tnàhí ní cachí Yá Ndiöxí cunduu.

¹⁰Te Xítóhó Jesucristú ní quide-gǎ nàcuáa ní cuiní Yá Ndiöxí cada-gǎ, chi ní xihí-gǎ núú cùrúxí chi ducaⁿ nǐ cuiní méé-gǎ cunduu, te ñⁿ xito-ni ní xihí-gǎ sá cuendá nchaa ñáyíu,

te cuendá xiáⁿ núu ndècu yiñuhu-o núú-gǎ vitna.

¹¹Te cue dútú ñáyíu israél chi ñⁿ nduu ñⁿ nduu ní xóo cahni-güedé quití ní xóo nduu táhú-gǎ, te ñà túú ní dàma-güedé nàcuáa ní xóo cada-güedé. Te nchaa sá nǐ xóo cada-güedé-áⁿ ñà túú ní quide-xi nàcuáa vá cündècu-gǎ cuèchi ñáyíu núú Yá Ndiöxí.

¹²Dico Xítóhó Jesucristú ní cachí-gǎ sá cúú cùú-gǎ, te ní xihí-gǎ núú cùrúxí cuendá nchaa yícá cuèchi nchaa nchoo ñáyíu ndècu ñuyíú-a. Te sátá dúcáⁿ te dàtnùnì ní ngóo-gǎ xio cùha Dútú Ndiöxí táxi tnùnì-gǎ, te vá ñⁿ nduu ñⁿ quiú-gǎ te cuú-gǎ. ¹³Te ñⁿ ni xiáⁿ cundecu-gǎ cundetu-gǎ ndéé sáá nduu cànehe nchaa sá cúú ùhú iní ñáhá xii-gǎ sá yiñuhu núú-gǎ. ¹⁴Te cuendá sá nǐ xihí Xítóhó Jesucristú ñⁿ xito-ni xiáⁿ ní cuu-gǎ dàtná ñⁿ táhú sǎ cúú-xí Yá Ndiöxí, xiáⁿ ní quide-xi sá ncháá ñáyíu cùu cuendá-gǎ ñà túú-gǎ ná cumánì-yu núú-gǎ ni caa ni quihíⁿ.

¹⁵Te mee Espiritú Yá Ndiöxí cáháⁿ ndáá-xi nàcuáa ní cáháⁿ-gǎ cuendá-ó, te duha ní cáháⁿ-gǎ:

¹⁶Sáá nduu te cada-í nchaa ñáyíu nàcuáa na cáháⁿ-í-a,

te cada-í nàcuáa cutnùnì iní-yu tnúhu sá dánèhé-í-yu tnúhu sá cánúichi ñaha xii-yu nàcuáa cada-yu cundecú-yu,

te cada tucu-í sá tní-yu nchaa tnúhu-áⁿ.

Duha ní cachí-gǎ. ¹⁷Te ní cachí tucu-gǎ:

Te vá ñⁿ nduu ñⁿ quiú-gǎ ndacu iní-í sá quidé sáá iní-yu tnúhu-í,

te ni vǎ ñⁿ nduu ñⁿ quiú-gǎ te ndacu iní-í nchaa sá cuèhé sá dúhá quidé-yu.

Duha ní cáháⁿ Yá Ndiöxí cáhí Espiritú-gǎ.

¹⁸Te sátá dúcáⁿ quide cahnu iní Yá Ndiöxí nchaa cuèchi-o, núu xiáⁿ ñà túú-gǎ xíní ñùhu-xi cuú quití nduu táhú-gǎ cuendá nchaa sá cuèhé sá dúhá quide-o.

Tàú-ó sǎ tnàhá tnúhu-o ndihí Yá Ndiöxí

¹⁹Te cue dútú nǐ xóo cunuu núu ñáyíu israél cue téé-áⁿ nǐ xóo quihu-güedé xití cuártú ní cuu íí víhí-gǎ. Dico nchoo cuè ñáyíu ndècu ichi Xítóhó Jesucristú vitna tàú-ó sǎ nì yuhu ni iní-ó tnàhá tnúhu-o ndihí Yá Ndiöxí. Te cuu tnàhá tnúhu-o ndihí-gǎ chi Xítóhó Jesucristú ní sati níñí-gǎ te ní xihí-gǎ núú cùrúxí. ²⁰Te cada iní-ó sǎ

dóo sã ní xíndedí nàcuáa ní xóo quíhu-güedé xítí cuártú ní cuu íí víhí-gã-áⁿ ní xócuñí, te ducaⁿ càda iní-ó chi Xítohó Jesucristú ní xíhí-gá cuendá nchoo ñhí-ó nàcuáa cada-o ngündecu váha-o sã cúu-xí-gã. ²¹ Te ñu-gã cúu-gã Yaá cúu ñtú-ó, te ñu-gã cúu-gã Dútú cúnúu ndecu-gá núu ndécú Yã Ndiöxí. ²² Núu xíãⁿ xíní ññhu-xi sá ño tnahá tñuhu-o ññhi Yã Ndiöxí, te vá cání ññⁿ caní úu iní-ó, te ío váha quindáa iní-ó-gã chi ñu-gã ní ndada ndoo ní ndada nine-gá iní-ó cuendá nchoo cùnñuní iní-ó sã ñã túu-gã cuéchi-o ndècu núu-gã. Te ní sandute-o cuendá sá dúcáⁿ ní nduu ndoo ní nduu nine iní-ó. ²³ Te nchoo càháⁿ ndáá-ó sã ndécú ññhi-o tñuhu ndee ññí sá ndúú tãhú-ó cündecu ññhi-o Yã Ndiöxí, te xíni ññhu-xi sá vã dáñá ndèé-ó càncicúⁿ ññhu-o tñuhu ndee ññí-ánⁿ chi Yã Ndiöxí cada-gã nàcuáa ní cachí-gá sá cúu-xí-ó. ²⁴ Te xíni ññhu-xi cuhuⁿ iní tñáhá-ó te chindee tñaha-o nacuáa ducaⁿ cùu iní tñáhá-gã-ó, te cada-o mée-ni sá váha. ²⁵ Te nchoo vã dáñá ndèé-ó nàtacá-ó núu dácuàha-o tñuhu Yã Ndiöxí, te vá cáda-ó dàtná xíquide davá-yu ñã túu-gã cuíni-yu quixí-yu núu dácuàha-o tñuhu-gã. Chi xíni ññhu-xi sá cuàha tñaha-o tñuhu ndee ññí canchicúⁿ ññhu-o ñchi-gã, te uuⁿ-gã ducaⁿ tàu-xi cada-o vitna ta cuyatni nduu quixi tucu Xítohó Jesucristú ñuyíu-a.

²⁶ Te cue ñáyiu sa ní tecú tñuní nàcuáa càháⁿ tñuhu Yã Ndiöxí te núu na ngüita-yu ññucúuⁿ cadá-yu nándi sá cuèhé sá dúhá, te àuⁿ ñã cuu ní xíhí Xítohó Jesucristú cuendá-yu, te ni vã yõo ññ-gã cuú cuendá sá vã cündecu-gã cuéchi-yu núu Yã Ndiöxí. ²⁷ Te núu ducaⁿ na càda-yu nándi sá cuèhé sá dúhá, te ío quiyùhú iní-yu nàcuáa cada ñaha Yã Ndiöxí xii-yu. Chi nchaa ñáyiu cùu úhú iní ñáhá xii-gã daquihíⁿ ñáhá-gã xii-yu núu ññhú núu càyú núu ño ndohó-yu. ²⁸ Te nchaa ñáyiu ní xóo daquèe tihú tñuhu ní cáháⁿ ndíi Moisés, te núu ndècu úu àdi úní ñáyiu càháⁿ ndáá sá dúcáⁿ ní dáquée tihú-yu tñuhu ní cáháⁿ ndíi, te vá yõo ní xóo cundàhú iní ñáhá xii nchaa ñáyiu ducaⁿ ní xóo cada chi ní xóo cahni ñaha-güedé. ²⁹ Te núu ducaⁿ ní ndoho cue ñáyiu ducaⁿ ní dáquée tihú tñuhu ní cáháⁿ ndíi Moisés-ánⁿ, te uuⁿ-gã ndoho cue ñáyiu dàquee tihú ñáhá xii Xítohó Jesucristú Yaá cúu Dèhe Yã

Ndiöxí ñu-ni ñáyiu càchí sá ñã túu nándihi ññí-gã. Te ññí-gã-ánⁿ ní sati, te ní xíhí-gá, te ducaⁿ ní cuu cuendá cada Yã Ndiöxí ingá núu sã váha sá cúu-xí nchòo ñáyiu ndècu ñuyíu-a dàtná ní cachí-gá cada-gã. Te ñu-ni cuendá ññí-gã-ánⁿ ní nduu ndoo ní nduu nine iní cue ñáyiu-ánⁿ ní cùu, te ñu-ni ñáyiu-ánⁿ càháⁿ úhú-yu Espiritú Yã Ndiöxí sá chindèe chitúu ñaha xii-o. ³⁰ Te nchoo sã naha-o sá Yã Ndiöxí càchí-gã ññⁿ xichi núu tütú-gã: “Yúhú cada-í te nacháhu ñáyiu nchaa sá quidè-yu, te duha càháⁿ-í chi nachinaa-í cuendá nchaa sá quidè-yu-ánⁿ”, duha càchí-gã. Te sa ñaha tucu-o nacuáa càháⁿ-xi núu tütú-gã núu càchí-xi: “Yã Ndiöxí cada ndáá-gã cuendá nchaa sá quidè ñáyiu cùu cuendá-gã”, duha càchí-xi núu tütú-gã. ³¹ Te ío ndàhú ndoho cue ñáyiu na dàndoho ñaha Yã Ndiöxí, te ñu-gã cúu-gã Yaá cúnúu nchaa nduu nchaa quíu!

³² Te chí dándacu iní nàcuáa ní quide-ndo cùnñahá vitna cuu saa ní tecú tñuní-ndó tñuhu Yã Ndiöxí, chi dàvá-ánⁿ ní quide càhnu iní-ndó cuèi nándi sá ní yáha-ndo cuendá-gã. ³³ Te dava-ndo ní quide úhú ñáhá ñáyiu xii-ndo núu chítú núu tàcá, te nándi tñuhu cuèhé tñuhu duha ní xáhãⁿ-yu xii-ndo. Te dava-ndo ní cuyñ-ni-ndo ní xíndecu ññhi tñaha-ndo cuèi nándi ní ndoho dava-gã-ndó. ³⁴ Te ní cundàhú iní-ndó cuè ñáyiu yíhi vecaá, te cuèi ní quendeé ñáyiu sá ndécú ññhi-ndo dico ñã túu ní ndíhú iní-ndó chi ní cudíi-ni iní-ndó. Te ducaⁿ ní quide-ndo chi sa ñaha-ndo sá ndúú tãhú-ndó sã ño-gã váha, te xíãⁿ cundecu ññhi-ndo ní caa ni quíhíⁿ. ³⁵ Te xíãⁿ vá dáñá ndèé-ndó quindáa iní-ndó nàcuáa ní cachí Yã Ndiöxí cada ñaha-gã xii-ndo, chi sáa nduu te ío váha cada ñaha-gã xii-ndo. ³⁶ Te nchòhó xíní ññhu-xi ío cada ndee ññí-ndó càda-ndo nchaa nacuáa càháⁿ Yã Ndiöxí, te ducaⁿ te nduu tãhú-ndó sã ní cachí-gã nduu tãhú-ndó cündecu ññhi-ndo ní caa ni quíhíⁿ. ³⁷ Te Yã Ndiöxí càchí-gã núu tütú-gã:

Ta cuyatni víi-ñã nduu quixi Yaá quixi ñuyíu-a, te vá cùyàa-gã.

³⁸ Te nchaa ñáyiu cundáa núu-í ñã túu dàña ndeé-yu sàndáa iní ñáhã-yu xii-í, te cuendá xíãⁿ cundecu-ní-yu ñchi-í,

dico núu na dàñá-yu ichi-í te vá cúu vâha iní-í núu-yu.

Duha càchí Yă Ndiöxí núu tùtú-gá.

³⁹ Dico nchoo chi ñá túu cùu-o ñáyiu ducaⁿ xĩquide dàñá-ó ichi Yă Ndiöxí, chi cùu-o ñáyiu nchìcúⁿ nihnu-ni sàndáá iní-ó-gă, te sá dúcáⁿ te nduu táhú-ó cùndecu-o ndihí-gá ni caa ni quíhíⁿ, te ñá túu cùu-o ñáyiu dàña nihnu ichi-gá te xĩta nihnú-yu.

11

Ñáyiu sàndáá iní ñáhá xii Yă Ndiöxí

¹ Te núu sàndáá ndisa iní-ó Yă Ndiöxí te ducaⁿ cùtnuní ndáá iní-ó sá nihí-ó sá cuení-ó núu-gă. Te núu sàndáá iní-ó-gă te ducaⁿ cùtnuní ndáá tucu iní-ó sá càháⁿ ndáá-gá cuendá nchaa sá ñà túu xini-ó. ² Te ducaⁿ nĩ quide ñáyiu ní xindecu ndéé sanaha ío ní sàndáá iní-yu Yă Ndiöxí te xíáⁿ núu ío váha ní cuu iní ñáhá-gă xii-yu.

³ Te núu nchoo sàndáá ndisa iní-ó Yă Ndiöxí te cùtnuní ndáá iní-ó sá sá cuendá tnúhu ní cáháⁿ-gá ní cuáha andiü ndihí ñuyíú-a. Te cùtnuní iní-ó sá ñà díú sá cuendá ïⁿ sá tũu ndèhe-o ío ñuyíú-a ní cuáha andiü ndihí ñuyíú-a.

⁴ Te ndíi Àbél ío ní sàndáá iní ndíi Yă Ndiöxí núu xíáⁿ ío-gá ní cuu iní-gá sá ní sáñaha ndíi ní nduu táhú-gă dàcúúxí sá ní sáñaha ndíi Càin xii-gá ní nduu táhú-gă. Te ndíi Àbél-áⁿ nĩ cutnùní iní ndíi sá ní cudíu ndíi núu Yă Ndiöxí cuendá sá ní queheⁿ cuendá-gá sá ní sáñaha ndíi ní nduu táhú-gă. Te cuéi ñá túu-gă ndíi ndècu ñuyíú-a dico yòdo tnuní sá ní sàndáá iní ndíi Yă Ndiöxí cuendá ducaⁿ càda-o canchicúⁿ nihnu-o.

⁵ Te té Ènóc téé ní xindecu ndéé sanaha ñà túu ní xihí-dé chi ní nacuaca ñaha túu Yă Ndiöxí xii-dé cuendá sá ní sàndáá iní ñáhá-dé xii-gá. Te vá yòo ni nanihí ñáhá xii-dé chi mee-gă ní nacuaca ñaha-gă xii-dé. Te núu tùtú Yă Ndiöxí càchí-xi sá cùtnàhá vátá nàcuàca ñaha-gá xii té Ènóc, te ní quide-dé mee-ni nàcuáa ní cuu váha iní ñáhá-gă xii-dé. ⁶ Te nchaa ñáyiu ñá túu sàndáá iní ñáhá xii Yă Ndiöxí ñá ndácũ-yu cadá-yu nàcuáa cudíu-yu núu-gă, chi nchaa ñáyiu cuení tuha ñaha xii-gá xini ñuhu-xi sá quindáá iní-yu sá ndécú-gă, te quindáá

iní-yu sá núu na nànducu nihnu ñahá-yu xii-gá te cuáñaha-gă xii-yu sá ndúú tãhũ-yu.

⁷ Te Yă Ndiöxí ní dátũha-gá ndíi Nöé nchaa nàcuáa cada-gá. Te ní quide ndíi nchaa nàcuáa ní xáhaⁿ Yă Ndiöxí cada ndíi, te ní cadúha ndíi ïⁿ bàrcú cuendá xití bàrcú-áⁿ quée ndíi ndihí nchaa ñáyiu vehe ndíi cuendá cácu nihnú-yu. Te ducaⁿ nĩ quide ndíi chi ní sàndáá iní ndíi Yă Ndiöxí. Te sá dúcáⁿ nĩ sàndáá iní ndíi-áⁿ Yă Ndiöxí xíáⁿ ní cutnùní sá ncháá ñáyiu ío ndècu cuéchi-yu, chi ñá túu ní cãchicúⁿ nihnú-yu cadá-yu nàcuáa ní quide ndíi. Te sá dúcáⁿ nĩ quide ndíi ní sàndáá iní ndíi Yă Ndiöxí xíáⁿ ío ní cundáá ndíi núu-gă.

⁸ Te Yă Ndiöxí ní xáhaⁿ-gă xii ndíi Àbrahám sá quée ndíi ñuu núu ndécú ndíi quíhíⁿ ndíi ìngá xichi cundecu ndíi. Te ní quide ndíi nàcuáa ní xáhaⁿ Yă Ndiöxí chi ní quee ndíi cuáháⁿ ndíi núu cuáñaha Yă Ndiöxí cundecu ndíi. Te òré ní quee ndíi núu ndécú ndíi te ñá túu ní cùtnuní iní ndíi ndéé cúu núu cuáháⁿ ndíi cundecu ndíi. Te ducaⁿ nĩ quide ndíi chi ní sàndáá iní ndíi Yă Ndiöxí. ⁹ Te sá dúcáⁿ nĩ sàndáá iní ndíi Yă Ndiöxí núu xíáⁿ ní xindecu ndíi núu nĩ sáñaha-gă cundecu ndíi, te cuéi ducaⁿ dico ñá túu ní quide ñuu ndíi xíáⁿ. Te ní xóo cundecu ndíi vehe cùtexínu vehe dóó. Te diu-ni ducaⁿ nĩ quide ndíi Isàác ndihí ndíi Jàcób chi tnàhá cue ndíi-áⁿ nĩ cachí Yă Ndiöxí sá ndúú tãhú cue ndíi xíáⁿ cundecu cue ndíi. ¹⁰ Te ducaⁿ nĩ quide ndíi Àbrahám chi ní xindetu ndíi ndéé ní sáá nduu ndúu táhú ndíi cundecu ndíi núu ndécú Yă Ndiöxí. Te núu ndécú-gă-áⁿ cúu-xi ñuu ní cadúha mee-gă, te ñuu-áⁿ cudíi-xi ni caa ni quíhíⁿ.

¹¹ Te ndíi Sàrá, sa ní xidó cuá ndíi sá cóo dèhe ndíi chi sa ní sahnu vihi ndíi, dico Yă Ndiöxí ní quide-gá te ní xóo ïⁿ déhe ndíi. Te ducaⁿ chi ní sàndáá iní ndíi Yă Ndiöxí te ní cutnùní ndáá iní ndíi sá cadá-gă nàcuáa ní xáhaⁿ-gă xii ndíi. ¹² Te cuéi ío ní sahnu ndíi Àbrahám ndihí ñadihí ndíi, ndíi Sàrá dico dacuitíi nĩ nduu táhũ-yu ní xóo ïⁿ déhe-yu. Te xíáⁿ núu ío cuéhé ndíquíⁿ yává ndíi Àbrahám ní cáyá dàtná cuéhé chòdíní ndéé andiü, ndihí dàtná cuéhé ñuhu cúchí làmár, chi ni vã yòo ïⁿ ndacu cahu ñaha xii-yu sá cuéhẽ-yu.

¹³ Te cue ndíi-áⁿ ducaⁿ-ni ní sàndáá iní cue ndíi Yă Ndiöxí ndéé ní sáá nduu nĩ xihí

cue ndíi. Te cue ndíi-án ñà túú ní ndùu táhú cue ndíi quini cue ndíi nchaá nàcuáa ní cachí Yá Ndiöxí cada-gá, dico ní cutnùni ndáá iní cue ndíi-án nàcuáa cada-gá núu cuaháⁿ núu vëxi. Te ío ní cudíí iní cue ndíi, te ní cachí cue ndíi sá dícó-ni ichi yáha cue ndíi ñuyíú-a, chi ñá díú ñuyíú-a cundecu ducaⁿ cue ndíi. ¹⁴ Te sá dúcáⁿ ndùu tnúhu ní cáháⁿ cue ndíi-án, xiáⁿ ní cutnùni sá cuini cue ndíi ingá xichi núu cundècu cue ndíi. ¹⁵ Te ni ñà díú ñúú núu ní quee cue ndíi ni cuini cue ndíi núhú cue ndíi. Chi núu ducaⁿ ni sàni iní cue ndíi te núhú cue ndíi ni cùu. ¹⁶ Dico ñáhá chi cuini cue ndíi quíhíⁿ cue ndíi ñⁿ xichi núu vâha-gá cáá cundecu cue ndíi. Te núu dúcáⁿ ño-gá váha càa-án cúu-xí ñúú núu ndécú Yá Ndiöxí, te sá dúcáⁿ ñi sani iní cue ndíi xiáⁿ ñúu ío váha cùu iní Yá Ndiöxí càchí-gá sá ñà túú cùcahaⁿ núu-gã cúu-gã Ndiöxí cue ndíi-án, te cùtnuní iní-ó sã ndáá sá dúcáⁿ càháⁿ-gá chi ní quide túha-gá ñⁿ xichi núu cundècu cue ndíi-án.

¹⁷ Te ndíi Àbrahám ní xíndecu ñⁿdii-ni déhe ndíi ndíhi ñadihí ndíi, te cùtnahá ní xito ndéé ñáhá Yá Ndiöxí xii ndíi ní xicáⁿ-gá déhe ndíi, ndíi Isàác cuendá nduu táhú ñáhá-gã xii ndíi. Te ní xáhaⁿ ndíi sá cúu ndùu táhú-gã déhe ndíi, te ducaⁿ ñi quide ndíi chi ní sándáá iní ñáhá ndíi xii-gá. Te sa ndècu túha ndíi sá cuãñaha ndíi déhe ndíi xii-gá cuèi mee Yá Ndiöxí ní xáhaⁿ ndáá-gá xii ndíi ¹⁸ sá sã cuendá ndíi Isàác te ngúndecu cue ñani tnáhá ndíi. ¹⁹ Te ducaⁿ ñi quide ndíi Àbrahám, chi ní cutnùni ndáá iní ndíi sá Yá Ndiöxí ndácú-gã dándoto-gá cuèi ñáyiu sa ní xíhí. Te sá dúcáⁿ ñi xáhaⁿ ndíi xii Yá Ndiöxí sá cúu ndùu táhú-gã déhe ndíi, te xiáⁿ cada iní-ó sã sà ní xíhí ndíi Isàác te ní ndoto tucu ndíi ní nucúndecu ndíi ndíhi tãtã ndíi, ndíi Àbrahám.

²⁰ Te ndíi Isàác ní xicáⁿ táhú ndíi núu Yá Ndiöxí cuendá sá cáda vâha-gá cue déhe ndíi, ndíi Jácób ndíhi ndíi Esàú núu cuaháⁿ núu vëxi. Te ducaⁿ ñi quide ndíi chi ní sándáá iní ndíi Yá Ndiöxí. ²¹ Te sa ta cùyatni-ná nduu cùu ndíi Jácób, te ní xicáⁿ táhú ndíi núu Yá Ndiöxí cuendá cue déhe ñani ndíi déhe ndíi Chèé. Te yituu-ná ndíi tatnu ndíi ní chiñuhu ndíi Yá Ndiöxí. Te ducaⁿ ñi quide ndíi chi ní sándáá iní ñáhá ndíi xii-gá. ²² Te cùtnahá sa ta cùyatni

vií-nã nduu cùu ndíi Chèé, te ní cachí ndíi sá cue ñáyiu isràél sáá nduu quèé-yu núu xíndecú-yu-án. Te ní cáháⁿ tucu ndíi nàcuáa cada-yu yiqui cùñú ndíi na sáá nduu quèé-yu núu ndécú-yu-án. Te ducaⁿ ñi quide ndíi chi ní sándáá iní ndíi Yá Ndiöxí.

²³ Te cùtnahá ní cacu ndíi Moisés te ní chiváha ñaha ñaná ndíi ndíhi tãtã ndíi úní yóó. Te ducaⁿ ñi quide cue ndíi-án chi ní sándáá iní cue ndíi Yá Ndiöxí. Te ní quide cuendá cue ndíi-án sã ío váha càa ndíi Moisés déhe cue ndíi, te ñà túú ní yuhú cue ndíi nàcuáa ní cáháⁿ téè cùu Faraón sá cáhni-dé cue landú. ²⁴ Te sáta ñi sañu ndíi Moisés te duuⁿ duuⁿ ní cachí ndíi sá vã càháⁿ ñáyiu sá déhe yoco téè cùu Faraón cúu ñaná ndíi. Te ducaⁿ ñi quide ndíi chi ní sándáá iní ndíi Yá Ndiöxí. ²⁵ Te ducaⁿ ñi quide tucu ndíi chi ní tnahá-gá iní ndíi ndoho ndíi ndíhi nchaá ñáyiu cùu cuendá Yá Ndiöxí dàcúúxí sã cudíí iní ndíi cundecu tnaa ndíi ichi cuèhé ichi duha. ²⁶ Chi ní sani iní ndíi sá vâha-gá ndoho ndíi cúcuèhé ñáhá cuè ñáyiu xii ndíi sá cuendá Yaá quixi ñuyíú-a dàcúúxí sã cundècu ndíhi ndíi nchaá sá ío Ègiptú. Te ducaⁿ ñi quide ndíi chi ní xúhuⁿ iní ndíi sá Yá Ndiöxí cuãñaha-gã sá ndúú táhú ndíi. ²⁷ Te ndíi Moisés ní quee ndíi nacióⁿ Ègiptú te ñà túú ní quide cuendá ndíi sá ío cùdééⁿ téè cùu Faraón núu ndíi. Te ducaⁿ ñi quide ndíi chi ní sándáá iní ndíi Yá Ndiöxí. Te ní quide càhnu iní ndíi cuendá nchaá sá ñi yáha ndíi, te ní quide iní ndíi sá Yá Ndiöxí ndécú ndíhi ñaha túu-gá xii ndíi cuèi ñà túú ní xini núu ñáhá ndíi xii-gá. Te ducaⁿ ñi sani iní ndíi chi Yá Ndiöxí ndécú ndíhi ñaha-gá xii ndíi.

²⁸ Te ndíi Moisés cúu ndíi téè ní tausaha ñi quide vico pascuá ndíhi cue ñáyiu isràél, te dàvá-án ñi táuchíúⁿ ndíi ní sañi-yu mbéé te ñíhí quiti-án ñi dácánúu-yu yuyèhé-yu. Te ducaⁿ ñi quide ndíi chi ní sándáá iní ndíi Yá Ndiöxí. Te ducaⁿ ñi quide tucu ndíi cuendá sá espíritú sá ñi tendaha Yá Ndiöxí cahni-xi mee-ni déhe téè déhe díhna cue ñáyiu Ègiptú, te vá cáhni-xí ñi ñⁿ déhe cue ñáyiu isràél. ²⁹ Te ndute lámár sá nání Mâr Tícuèhé ní quèé dava-xi ní natúu ñuhu yìhí ní ñíhí ñi yáha cue ñáyiu isràél. Te ducaⁿ ñi cuu chi ní sándáá iní-yu Yá Ndiöxí. Te cue téè

Ègíptú tnàhá-güedé nchìcúⁿ-güedé cuáháⁿ dico ñá túú ní ndàcu-güedé yáha-güedé chi ní ndihì-güedé ní cáhá.

³⁰ Te cue ñáyiú isràél ní dúcúⁿ ndèe-yu úsá nduu ñúú Jericó te ní ngoyo nchaa sá ñúdòco. Te ducaⁿ ñí cuu chi ní sándáá iní-yu Yá Ndiöxí. ³¹ Te ñⁿ ñaha ní xíndecu ichi díí iní ní xínani-aⁿ Ràháb, ñaha-áⁿ ñà túú ní xihí-aⁿ dàtná ní xihí nchaa ñáyiú ío ní cuu sáá iní-xi núú Yá Ndiöxí, chi ní cuu váha iní-aⁿ núú cuè téé ní tendaha cuè ñáyiú isràél ní sángoto dayuhu ñúú-aⁿ. Te ducaⁿ ñí quide-aⁿ chi ní sándáá iní-aⁿ Yá Ndiöxí.

³² Te núú dicó sá cúú te cáháⁿ-í cuendá ndíi Gedèón, ndihì cuendá ndíi Bàrác, ndihì cuendá ndíi Sànsón, ndihì cuendá ndíi Jéfté, ndihì cuendá ndíi Dàvíí, ndihì cuendá ndíi Sàmuel, ndihì cuendá nchaa cue téé ní xóo cáháⁿ tnúhu Yá Ndiöxí ndéé sanaha, te nchaa cuendá cue téé-áⁿ cáháⁿ-í te núú dicó cùyáchí-í dico ñá túú cùyáchí-í. ³³ Te nchaa cue ndíi-áⁿ ní sándáá iní cue ndíi Yá Ndiöxí núu xiáⁿ ní xóo ndacu cue ndíi ní xóo nàá cue ndíi ndihì nchaa ñáyiú dava-gá ñúú. Te nchaa ñáyiú-áⁿ ñà túú ní xóo ndacú-yu nàá-yu ndihì cue ndíi, te ní xóo cada cue ndíi nchaa nàcuáa tàú-xi cunduu, te ní quide váha ñaha Yá Ndiöxí xii cue ndíi dàtná ní cachí-gá cada ñaha-gá xii cue ndíi. Te cuèi nchaa cue quiti dééⁿ ñà túú ní ndàcu-güedé ná cada ñaha-güedé xii cue ndíi. ³⁴ Te ní xóo ndacu cue ndíi ní xóo ndahvá cue ndíi ñuhú sá vǎ yǎo tnàhí ndàcu ndahvá, te ní cácu cue ndíi vá yǎo ní ndàcu cahni ñaha xii cue ndíi. Te cue ndíi-áⁿ ñà túú ñihí ndéé cuè ndíi ní cùu, dico ní ñihí ndéé cuè ndíi chi Yá Ndiöxí ní chindee ñaha-gá xii cue ndíi, te nchaa ndíi-áⁿ ío ní ñihí ndéé cuè ndíi ní nàá cue ndíi ndihì nchaa ñáyiú ní cuu úhú iní ñáhá xii cue ndíi, te nchaa ñáyiú ducaⁿ ñí xóo nàá ndihì cue ndíi-áⁿ ñà túú ní xóo ndacú-yu nàá ndihì ñàhá-yu xii cue ndíi chi ní xóo cunú-yu. Te ducaⁿ ñí cuu chi ní sándáá iní cue ndíi Yá Ndiöxí. ³⁵ Te dava ñáyiú dñí ní nduu táhǎ-yu ní ndoto cue ñáyiú ní xíndecu ndihì-yu ní nucúndecu ndihì ñaha tùcú-yu.

Te dava ñáyiú ío ní dándóhó ñaha tnaha ñáyiú-yu te ní xihí-yu, dico ñá túú ní dàñá-yu ichi váha nàcuáa cácu nihnú-yu núú tnàha ñáyiú-yu, te ducaⁿ chi ní cuiní-yu sá ndótǎ-yu ndéé cuèé-gá nàcuáa ngúndecu

váha-yu núú ndécú Yá Ndiöxí. ³⁶ Te dava cue ndíi ío ní ndoho cue ndíi chi ío ní cudíquí ndeé ñáhá ñáyiú xii cue ndíi, te ní canihá-yu xii cue ndíi, te dava cue ndíi ní dácútú ñàhá-yu, te ní chihì ñàhá-yu xii cue ndíi vecaá. ³⁷ Te dava cue ndíi ní sahani ñàhá-yu ndihì yúú. Te dava cue ndíi ní chidava ndáá ñáhǎ-yu ní xehndé ñáhǎ-yu ndihì sierrá. Te dava cue ndíi ní xito ndéé ñáhǎ-yu te núu ndisa sá sándáá iní cue ndíi Yá Ndiöxí, te dava cue ndíi ní sahani ñàhá-yu ndihì machítí. Te mee-ni ñíi mbéé ndihì ñíi chivá, ní xóo cuu dóo cue ndíi. Te mee-ni ñíi cue quiti-áⁿ ní xóo cuu dóo cue ndíi cuèi ndèni ní cuu ní xóo caca cuu cue ndíi. Te mee-ni cuè téé ndàhú ní cuu cue ndíi. Te ío ní xóo dandihú-yu iní cue ndíi, te nándi sá ñí xóo cada ñàhá-yu xii cue ndíi ní xóo dandòho ñàhá-yu. ³⁸ Te cue ndíi-áⁿ ío-gá ní xínduu váha iní cue ndíi dàcúxí nchaa dava-gá ñáyiú. Te nchaa cue ndíi-áⁿ ñí xica cuu cue ndíi cuèi nchaa núú ñà túú vǎ yǎo tnàhí ndècu, te cuèi xití yucu ní xica cuu cue ndíi. Te ní xóo cada vehe cue ndíi nchaa yaú cava. Te ndèni ní cuu nchii yaú ní xóo cundecu cue ndíi. ³⁹ Te ío ní cudíu cue ndíi núú Yá Ndiöxí cuendá sá ní sándáá iní ñáhá cuè ndíi xii-gá. Te cuèi ducaⁿ ñí quide cue ndíi dico ñá túú ní xini cue ndíi nchaa sá ní cachí Yá Ndiöxí cada-gá. ⁴⁰ Te ducaⁿ ñí cuu chi ñí sá ío-gá váha ní cachí Yá Ndiöxí cada-gá. Te sá dúcáⁿ ío-gá váha ní cachí-gá cada-gá cúú-xi cuendá nchoo ndihì cuendá cue ndíi-áⁿ cuendá sá ñà díú mèe-ni cue ndíi-áⁿ cundáá cue ndíi núú-gǎ, chi tnàhá nchoo cundáá-ó nǎú-gǎ.

12

Ío cuhuⁿ iní-ó Xítohó Jesucristú

¹ Te cue ñáyiú ní xíndecu ndéé sanaha ñí quidé-yu nàcuáa ní cutnùnì sá ñí sándáá iní-yu Yá Ndiöxí. Te cada iní-ó sá ncháá ñáyiú-áⁿ xíndéhé ñàhá-yu xii-o vitna. Núu xiáⁿ xini ñúhu-xi sá vǎ cádá-ó ñí ñí sá cuèhé sá dúhá chi díu nchaa xiáⁿ quidé-xi ñà túú cundáá-ó nǎú Yá Ndiöxí. Te vá cádá cuendá-ó nchaa sá quidé tñèñu iní-ó nàcuáa ndacu-o càda-o nchaa nàcuáa càháⁿ-gá. Te ío càhnu cunduu iní-ó cànchicúⁿ nihnu-o càda-o nchaa nàcuáa ní cachí-gá cada-o cundecu-o ñuyú-a. ² Te ío cuhuⁿ iní-ó Xítohó

Jesucristú, chi diu-gá ní quide ní sándáá iní-ó Yá Ndiöxí, te diu-ni ducaⁿ quide-gá cuëi vitna te cuëi ndéé núú cuháⁿ núú vëxi diu-ni ducaⁿ càda-gá sá quíndáá iní-ó Yá Ndiöxí. Te Xítohó Jesucristú ío ní quide ndee iní-gá ní ndoho-gá te ní xíhí-gá núú cùrúxí, te ñá túú ní quide cuendá-gá cuëi #ⁿ sácáⁿ núú cúu-xí sá dúcáⁿ ní ndoho-gá. Te ducaⁿ ní quide-gá chi sa naha-gá sá ná yáha sá dúcáⁿ ndòho-gá te ío cudí iní-gá. Te vitna núcòo-gá xio cùha núú núcòo Yá Ndiöxí te tàxi tnuní-gá.

³ Te xini ñuhu-xi sá ío cada cuendá-ndó nàcuáa ní quide Xítohó Jesucristú chi Yaá-án ío ní quide càhnu iní-gá nchaa sá ní ndoho-gá ní quide ñaha nchaa ñáyiu ndècu ichi cuehé ichi duha xii-gá. Te ducaⁿ càda cuendá-ndó nàcuáa ní quide-gá cuendá sá vã tũu dusaⁿ-ndo, te ni vã nátũhú iní-ndó càda-ndo nchaa nacuáa càháⁿ-gá. ⁴ Te nchòhó dáquèe tihú-ndó nchaa sá cuèhé sá dúhá dico vátá cáhni ñaha-gá-yu xii-ndo sá dúcáⁿ quide-ndo. ⁵ Te ndacu iní-ndó nàcuáa càháⁿ Tãtá-ó Dütú Ndiöxí dásàhú ñáhá-gã xii nchoo cuè ñáyiu cùu dèhe-gá. Te duha càchí-gá núú tütú-gá:

Nchòhó cue dèhe mee-í, vã cání iní-ndó sá àuⁿ nã cuu dándoho ñaha-í xii-ndo,

te ni vã nátũhú iní-ndó òré càháⁿ-í dóho-ndo nàcuáa cada-ndo cùndecu-ndo

⁶ Chi mee-í dándòho-í nchaa ñáyiu cùu iní-í cuendá sá cùndáá-yu núu-í,

te quide úhú-í-yu, te diu-ní-yu cùu-yu ñáyiu càchí-í cúu dèhe-í.

Duha càchí-gá núú tütú-gá. ⁷ Te ío cada ndee iní-ndó sá dúcáⁿ dándoho ñaha Yá Ndiöxí xii-ndo, chi quide-gá sá cúu-gã Tãtá-ó. Te ñá túú ní #ⁿ tée cùu tãtá te cachí-ó sã ñá túú sànu ichi-dé cue dèhe-dé nàcuáa tàú-xi cunduu. ⁸ Te núu Yá Ndiöxí ñá túú dándoho ñaha-gá xii-ndo dàtná dándòho-gá cue ñáyiu càchí-gá cúu dèhe-gá, te ñá díu dèhe mee-gã cúu-ndó te núu ducaⁿ, chi cùu-ndo datná cue ñáyiu ñá túú cùtnuní yoo cùu tãtá-xi. ⁹ Te nchoo sã naha-o sá cùtnàhá ní cuu landú-ó ní sanu ichi ñaha tãtá-ó nàcuáa tàú-xi cunduu, te ducaⁿ ní xóo canehe-o sã yíñuhu núu-güedë te diu-ni ducaⁿ nèhe-o sá yíñuhu núu-güedë vitna. Te núu ducaⁿ ní sándáá iní-ó tãtá-ó, te ío-gá xini ñuhu-xi quíndáá iní-ó Tãtá-ó

Dütú Ndiöxí cuendá ducaⁿ ndùu táhú-ó cùndecu-o ndihí-gá ní caa ní quihíⁿ, chi diu-gá cúu-gã Yaá ní chihí iní-ó. ¹⁰ Te cùtnàhá ní cuu landú-ó, ñá túú tìtní nduu ní càniha tãtá-ó ní sanu ichi ñaha-güedë xii-o nàcuáa ní cuu iní mée-güedë. Te Yá Ndiöxí ducaⁿ dándoho ñaha-gá xii-o sànu ichi ñaha-gá cuendá cúu-xí sã vãha sá cúu-xí-ó, te ducaⁿ quide-gá cuendá nchoo càda ndáá-ó dàtná quidé mée-gá. ¹¹ Te òré yéxi #ⁿ tnúndòho sá cúu-xí-ó te ñá túú cùdí iní-ó chi dándihú iní ñáhá-xí xii-o. Te nchaa ñáyiu ngúnu ichi sá cuendá nchaa tnúndòho-án te ngüita-yu quide ndáá-yu, te ío vãha cùu iní-yu ndècú-yu.

Vá dáquèe tihú-ó tñuhu Yá Ndiöxí

¹² Te núu xíⁿ ío chí ndúcú ndèe-gá canchicúⁿ nihnu-ndo ichi Xítohó Jesucristú, te vã dicó yica cùu iní-ndó càncicúⁿ nihnu-ndo ichi-gá. ¹³ Te cada vãha-ndo cùndecu-ndo ichi-gá cuendá nchaa ñáyiu sàni #ⁿ sani úú iní-xi níhí ndéë-yu cundecú-yu ichi-gá te vã ná tũhú iní-yu canchicúⁿ nihnú-yu.

¹⁴ Te nducu-ndo nàcuáa cada-ndo cùndecu vãha-ndo ndihí cue tnaha ñáyiu-ndo, te ío cada vãha-ndo cùndecu-ndo nacuáa cundáá-ndó núú Yá Ndiöxí chi núu vã dúcáⁿ càda-ndo te vã ndúú táhú-ndó cùndecu-ndo ndihí-gá. ¹⁵ Te ío vãha cada cuendá-ndó nàcuáa cada-ndo cùndecu-ndo, chi núu ñáhá te vã chindèe ñaha-gá Yá Ndiöxí xii-ndo. Te ío vãha cada cuendá tucu-ndo nàcuáa cundecu-ndo vã cání cuehé iní-ndó cuendá Yá Ndiöxí, chi núu ducaⁿ na càda-ndo te dava-gá ñáyiu ndècu ndihí-ndo ichi-gá tnàhá-yu ngüita-yu ducaⁿ càdá-yu, te vã cùndècu vãha-gá-ndó ndihí-yu ichi-gá. ¹⁶ Te cada cuendá tucu-ndo sã vã cùndècu-ndo ichi díí iní, te ni vã dáquèe tihú-ndó ní #ⁿ sá cúu cuendá Yá Ndiöxí dàtná ní quide ndíi Esàú, chi sá cuãñaha tãtá ndíi-án nduu táhú ndíi ní cùu ní dama ndíi #ⁿ cóhó comidá. ¹⁷ Te nchòhó sa naha-ndo sá cùtnàhá ní cuini ndíi Esàú cácaⁿ táhú tãtá ndíi núú Yá Ndiöxí cuendá nchaa sá ndúú táhú ndíi ní cùu, te ñá túú ní xicáⁿ táhú tãtá ndíi núú Yá Ndiöxí nàcuáa cuini mée ndíi ní cùu. Te ní ndáhyú víhí ndíi, te cuëi ducaⁿ ní quide ndíi dico ñá túú ní ndacu-gá ndíi nánihí ndíi táhú sã ní dama ndíi comidá.

18 Te cue ñáyiú israhél ní sátuhá-yu ñ̃ yucu núú càyú ñuhú, te nchòhó ñá túú ndéé ducaⁿ sàháⁿ tuha-ndo ñ̃ yucu núú càyú ñuhú dàtná ní quide cue ñáyiú-áⁿ. Te cútnàhá ducaⁿ ñ̃ sátuhá-yu yucu-áⁿ te ní cunee vìhi nihií yucu-áⁿ, te ní quene táchí ñ̃hi. 19 Te ní tecú dóho-yu ní cáháⁿ ñ̃ cútú, te ní tecú tucu dóho-yu ní cáháⁿ Yă Ndiôxí ní cáháⁿ ndihí ñaha-gă xii-yu. Te nchaa ñáyiú ní tecú dóho-xi ní cáháⁿ-gá te ní cuini-yu sá vă cãháⁿ-gá. 20 Te ducaⁿ ñ̃ quidé-yu chi ñá túú ní cùndee iní-yu nàcuáa ní cáháⁿ-gá, te duha ní cachí-gá: “Te cuèi ñ̃ quiti nà yáha xití yucu-a, te cahni-ndo-di ndihí yúú àdi ndihí ñ̃ yutnu puyá”, duha ní cachí-gá. 21 Te sá dúcáⁿ ñ̃ quide-xi ní xiní-yu xiãⁿ ío ní dáyuhú ñáhá-xi xii-yu. Te tnàhá té Moisés ní yùhú-dé, te ní cachí-dé: “Quidi ñaha-xi xii-í sá yùhú-í”, duha ní cachí-dé.

22 Te nchòhó, ñá túú quide-ndo datná ní quide cue ñáyiú-áⁿ ñ̃ sáháⁿ tuhá-yu yucu-áⁿ, dico cada iní-ndó sã sà ní tuha-ndo yùcu Siôn sá ndécú núú ndécú Yă Ndiôxí, ndihí ñuu-gă ñuu Jerusálén sá cáa àndiu te diu-gá cúú-gă Yaá ndécú nchaa nduu nchaa quíú. Te diu-ni xiãⁿ xindecu cuéhé víhí cuè espíritú xinú cuèchi núú-gă 23 chíñùhu ñaha-xi xii-gá. Te nchòhó cúú-ndó cuè ñáyiú cùu cuendá Yă Ndiôxí, te ní tnahá tnúhu-ndo ndihí nchaa dava-gă ñáyiú cùu cuendá-gá, ñáyiú yòdo tnuní núú tütú-gă ndécú àndiu, te diu-ni ñáyiú-áⁿ cuãñaha-gă xii-yu sá ndúú tãhũ-yu. Te nchòhó ní tuha-ndo Yă Ndiôxí Yaá cada ndáá yícá cuèchi nchaa ñáyiú. Te cada iní-ndó sã ñ̃ tnahá tnúhu-ndo ndihí cue ñáyiú ní quide ndáá ní xindecu ichi Yă Ndiôxí ñuyíú-a. Te ñáyiú-áⁿ ñà túú tnàhí-gá ná cúmãñi-yu vitna ndécú-yu núú-gă. 24 Te ní tnahá tnúhu-ndo ndihí Xítóhó Jesucristú Yaá ní quide nàcuáa cada Yă Ndiôxí ingá núú sã vãha sá cúú-xi nchaa nchoo ñáyiú ndècu ñuyíú-a, chi ní sati níñi-gă te ní xihí-gá núú cùrúxi. Te níñi Xítóhó Jesucristú ñá túú ñ̃-ni cuu-xi ndihí níñi ndií Àbél, chi diu cuendá níñi-gă-áⁿ ñ̃ quide cãhnu iní Yă Ndiôxí nchaa cuèchi-o.

25 Núú xiãⁿ ío cada cuendá-ndó vă dáquèe tihú-ndó tnũhu cãháⁿ Yă Ndiôxí, chi nchaa

ñáyiú ní xindecu ndéé sanaha dùcaⁿ ní quidé-yu ní dáquèe tihũ-yu tnũhu ní cáháⁿ-gá ñuyíú-a sá cúú-xi-yu. Te ñá túú ní cãcu-yu chi ní nacháhu-yu sá dúcáⁿ ñ̃ quidé-yu. Te uuⁿ-gá tucu nchoo chi vă cãcu-o te núú ducaⁿ na dàquee tihú-ó tnũhu cãháⁿ Yă Ndiôxí ndéé andiu sã cúú-xi-ó. 26 Te cútnàhá ní cáháⁿ Yă Ndiôxí ndéé sanaha te ní quidi-xi ñuyíú. Te vitna cãchí-gá: “Yúhú quidi tucu-í ingá xito ñuyíú, te ñá díú mèe-ni ñuyíú ducaⁿ quidi-í chi tnàhá andiu quidi-í”, cãchí-gá. 27 Te sá dúcáⁿ cãháⁿ-gá sá ingá xito tucu ducaⁿ càda-gá xiãⁿ cútnuní sá ncháándi túhú sá tũu ndèhe-o danaa-gá. Te nchaa sã ñà túú ndéé tũu quini-ó ñuyíú-a xiãⁿ vă quidi-xi te ni vă náá-xi. 28 Te núú ñ̃ cachí Yă Ndiôxí nduu táhú-ó cùndecu-o chi mee-gă táxi tnuní-gá xiãⁿ, te ni vă quidi-xi te ni vă náá-xi. Te xiãⁿ ío xini ñuhú-xi ndacáⁿ táhú-ó núú-gă, te yĩñùhu yĩñùhu cunu cuechi-o núú-gă nàcuáa cuu vãha iní-gá, te ducaⁿ cùhuⁿ iní-ó sã ño cãhnu cuu-gá. 29 Te Tãtá-ó Dütú Ndiôxí cúú-gă dàtná ñ̃ ñuhú chi danàa-gá nchaa sã ñà túú quide nàcuáa cuu vãha iní-gá.

13

Nàcuáa tàú-xi cada-o cuendá cuu vãha iní Yă Ndiôxí

1 Te nchaa nchòhó ñáyiú ndècu ichi Xítóhó Jesucristú, vă dáñá ndéé-ndó cùu iní tnàhá-ndó nàcuáa ndècu-ndo ichi-gá. 2 Te cunaha-ndo sã núu ío ñáyiú ñũhu ichi ní quexió-yu vehe-ndo te cuãñaha-ndo vèhe ndetatú-yu, te cuãñaha-ndo sã cáxi-yu. Chi davá-yu ndéé espíritú xinú cuèchi núú Yă Ndiôxí ní sáháⁿ vehé-yu ní queheⁿ cuendá-yu te ñá túú ní cùtnuní iní-yu sá díú espíritú xinú cuèchi núú-gă cúú-xi.

3 Te ndacu tucu iní-ndó cuè ñáyiú xixihí vecaá, te cada iní-ndó sã tnàhá-ndó yihí-ndo vecaá ndihí-yu. Te ndacu tucu iní-ndó nchaa ñáyiú ío ndòho, te cada iní-ndó sã tnàhá-ndó ndòho-ndo ndihí-yu.

4 Te nchaa ñáyiú na cãchí-yu sá ñ̃ sã vãha cùu-xi sá ñ̃ tée ndihí ñ̃ ñadihí ná nihí tnàhá-yu candeca tnàhá-yu. Te nchòhó cue tée vă cání iní-ndó cãháⁿ ndihí-ndo ñàdihí te núú ñá díú ñàdihí-ndó cùu-yu. Te ducaⁿ-ni

nchòhó cue ñáyiú ñíhi tucu vá cání ñí-ndó cǎháⁿ ñíhi-ndo tēe te núu ñá díú yí-ndo cuu-güedé, chí Yá Ndiöxí dandòho-gá nchaa ñáyiú ndècu ichi díí ñí.

⁵ Te vá cúhúⁿ ñí-ndó mèe-ni díhúⁿ. Te núu nándi cùu nchaa sá ndécú ñíhi-ndo te díu-ni nchaa xiáⁿ sa nduu vétú ñí-ndó, chí Yá Ndiöxí ní cachí-gá: “Ni ñíⁿ nduu vá dáñá ñíhnu ñaha-í xii-ndo, chí nchaa-ni nduu chindee ñaha-í”, duha ní cachí-gá. ⁶ Te xiáⁿ núu nchoo ñí yuhu ñí ñí-ó cǎháⁿ-ó ñíⁿ ñíⁿ-o, te cachí-ó:

Yá Ndiöxí cúu-gǎ Yaá chindèe ñaha xii-í, núu xiáⁿ ñá túú yùhú-í cuéi nándi cǎháⁿ ñáyiú cada ñahá-yu xii-í.

Duha cachí-ó.

⁷ Chí ndácú ñí cue tēe ní sanu ichi ñaha xii-ndo ichi Xítohó Jesucristú cue tēe ní cǎháⁿ tnúhu Yá Ndiöxí núu-ndó, te ío váha chí nácuaha cuendá nácuáa ní quide nchaa cue tēe-áⁿ ñí xíndecu-güedé ndéé ní sáa nduu ñí xíhí-güedé. Te ío quindáa ñí-ndó Yá Ndiöxí dátá ní xóo cada cue tēe-áⁿ.

⁸ Te dátá-ni ní quide Xítohó Jesucristú ndéé sanaha díu-ni ducaⁿ quide-gá vitna, te díu-ni ducaⁿ cada-gá ndéé núu cuaháⁿ núu vèxi. ⁹ Te vá dáñá-ndó mèe-ndo dandahú ñahá ñáyiú dacáháⁿ ñahá xii-ndo natuha-ndo ingá ichi, ñáyiú dānehé tnaha ñáyiú-xi nándi sá ñí cutúha-yu, te nchaa xiáⁿ ñá túú ñíⁿ-ni cǎháⁿ-xi ñíhi tnúhu sá ndécú ñíhi-ndo. Te Yá Ndiöxí chindèe ñaha-gá xii-o nácuáa níhi ndéé-ó cūndecu-o ichi-gá, te ducaⁿ te cuu-xi sá váha sá cúu-xí-ó, te ñá díú cuendá ñíⁿ sá xéxí-ó ñíhi ndéé-ó ndècu-o ichi-gá. Te dava ñáyiú cǎchí-yu sá dává núu comidá cuu caxi-o te dava ñahá nácuáa níhi ndéé-ó cūndecu-o ichi-gá, dico ñá ndáa sá sǎ dúcáⁿ vá cǎxí-ó nchaa núu comidá níhi ndéé-ó cūndecu-o ichi-gá.

¹⁰ Chí Xítohó Jesucristú ní xíhí-gá cuendá-ó núu cùrúxí, te nchaa ñáyiú nchícúⁿ ñíhnu-ni quide nchaa nacuáa ní quide nchaa dútú ñí xinu cuechi núu Yá Ndiöxí ndéé sanaha, ñáyiú-áⁿ vá cúu tnahá tnúhu-yu ñíhi Xítohó Jesucristú Yaá ní xíhí núu cùrúxí sá dúcáⁿ quide-yu. ¹¹ Chí dútú cúnú-gá ní xíndecu ñíhi cue ñáyiú israhél, tēe-áⁿ ñí xóo canehe-dé níhi nchaa quiti ní xóo cǎhni-dé ní xóo quíhu ndéé xití cuartú ní cuu íi-gǎ. Te ducaⁿ ñí xóo cada dútú-áⁿ

cuendá cada cǎhnu ñí Yá Ndiöxí nchaa yíca cuéchi ñáyiú, te cuñú nchaa quiti-áⁿ ñí xóo cǎhmi-güedé ñíⁿ xio yuhu ñíú. ¹² Te ducaⁿ ñí yáha Xítohó Jesucristú chí ndéé ñíⁿ xio yuhu ñíú ní sahani ñaha-güedé xii-gá. Te cuendá níhi-gǎ sá ñí sati núu cùrúxí núu ñí xíhí-gá, ní nduu ndoo ní nduu nine ñí cue ñáyiú sándáa ñí ñahá xii-gá. ¹³ Te vitna chí ná túha-o Xítohó Jesucristú te cada ndee ñí-ó ndòho-o dátá ní ndòho-gá. ¹⁴ Te ñuyú-a ñí ñíⁿ xichi ñá túú ndéé cáa ñíⁿ ñíú cudí ñí caa ñí quíhíⁿ cuendá cundecu-o, dico ducaⁿ-ni ñíhu ñí-ó ñíⁿ xichi núu ndúú táhú-ó cūndecu-o ñí caa ñí quíhíⁿ.

¹⁵ Te núu xiáⁿ xíni ñíhu-xi sá vá dáñá ndéé-ó chíñuhu-o Dútú Ndiöxí chí Xítohó Jesucristú ní quide-gá nácuáa ndacu-o tnahá tnúhu-o ñíhi Yá Ndiöxí, te òré cǎháⁿ ñíhi-o-gǎ te nuu núu ndacáⁿ táhú-ó núu-gǎ. Te nchaa tnúhu cǎháⁿ-ó òré cǎháⁿ ñíhi-o-gǎ cúu-xi dátá ñíⁿ táhú sǎ cúu-xí-gǎ. ¹⁶ Te vá dáñá ndéé-ndó cada-ndo mee-ni sá váha cundecu-ndo, te ducaⁿ chindee tnaha-ndo ñíⁿ ñíⁿ-ndo ñíhi sá ndécú ñíhi-ndo. Te núu ducaⁿ na cada-ndo te caní ñí-ndó sǎ cúu-xi dátá ñíⁿ táhú sǎ ío váha cùu ñí Yá Ndiöxí.

¹⁷ Te quindáa ñí-ndó cada-ndo nchaa nacuáa cǎháⁿ cue tēe yíndaha ñaha xii-ndo nacuáa ndècu-ndo ichi Xítohó Jesucristú, chí díu cue tēe-áⁿ quide cuendá ñahá-güedé xii-ndo nácuáa cundecu váha-ndo núu-gǎ. Te sáa nduu nácani tnúhu-güedé núu-gǎ núu ní quide váha-güedé àdi ñá túú ní quide váha-güedé ní xíndecu ñíhi ñaha-güedé xii-ndo. Te núu ducaⁿ na cada-ndo quindáa ñí-ndó-güedé te cudí ñí-ndó-güedé cundecu ñíhi ñaha-güedé xii-ndo, te vá ñíhú ñí-ndó-güedé. Te núu vá dúcáⁿ cada-ndo te vá cúu-xi sǎ váha xii-ndo nchaa sá quide-güedé sá cúu-xí-ndó.

¹⁸ Te cǎháⁿ ndahú-í núu-ndó sǎ cǎháⁿ ñíhi-ndo Yá Ndiöxí cuendá-ndí. Te nchúhú cùtnúni ndáa ñí-ndí sá ñá túú ná cùmání-ndí núu Yá Ndiöxí, te ducaⁿ chí nducu-ndí nácuáa quide-ndí cundáa-ndí núu-gǎ. ¹⁹ Te cǎháⁿ ndahú tucu-í núu-ndó sǎ ío cǎcáⁿ táhú-ndó núu Yá Ndiöxí cuendá sá méé-gǎ ná cáda te ío ñíhi quixi coto ñaha túcu-í xii-ndo.

Tnúhu ndéé núú nǐ ndihí-ná

²⁰ Te Yá Ndiǒxí Yaa quidé cùu váha iní-ó ndècu-o, Yaa-áⁿ nǐ dándótó-gǎ Xítóhó Jesucristú. Te Xítóhó Jesucristú-áⁿ cúu-gǎ dàtná ìⁿ toli ío-gǎ quéné cǎva xító mbéé. Te ducaⁿ sǎtnahá-xi cùu-gǎ cuendá sá nǐ sati níñí-gǎ te ní xíhí-gǎ, te ducaⁿ nǐ cuu cuendá sá nǐ quide ndáá-gǎ ndihí Yá Ndiǒxí sá cáda-gǎ ingá núú sǎ váha sá cúu-xí nchòo cue ñáyiú ndècu ñuyíú-a. Te nàcuáa ní quide ndáá-gǎ ndihí Yá Ndiǒxí te ðiu-ni ducaⁿ càda-xi núú cuàháⁿ núú vèxi. ²¹ Te xicáⁿ táhù-í núú Yá Ndiǒxí sá méé-gǎ ná chindee ñaha-gǎ xii-ndo cuendá cada-ndo mèe-ni sá váha nàcuáa cuiní méé-gǎ, te mee-gǎ ná cáda ñaha-gǎ xii-o nchàa sá váha sá sání iní-gǎ. Te ðiu-ni ducaⁿ na tàuchiuⁿ-gǎ cada Xítóhó Jesucristú sá cúu-xí-ó, duha xicáⁿ táhù-í núú-gǎ. Te vitna nchaa-o chí ná càchí-ó sǎ ìo càhnu cuu Xítóhó Jesucristú ni caa ni quíhíⁿ. Te ducaⁿ na cùnduu.

²² Te càháⁿ ndàhù-í núú nchòhó ñáyiú ndècu ndihí-í ichi Xítóhó Jesucristú sá cáda càhnu iní-ndó nàcuáa ndùu nchaa tnúhu càháⁿ-í dásàhú ñàhà-í xii-ndo, chi ñá túú vǎi tnúhu chido tnuní-í núú tütú-a sá cúu-xí-ndó.

²³ Te càchí tnúhu-í xii-ndo sǎ tǎ Timùteú téé ndècu ndihí-o ichi Xítóhó Jesucristú ní cácu-dé ñá túú-gǎ yíhí-dě vecaá. Te núu na quèxio ndihí-dé núú ndécù-í te quixi-í ndihí-dé núú ndécú-ndó quixi coto ñaha-ndí.

²⁴ Te cúñaha-ndo sǎ ìo na càda ndee iní nchaa cue téé yìndaha ñaha xii-ndo nàcuáa ndècu-ndo ichi Yá Ndiǒxí. Te ducaⁿ cùñaha tùcu-ndo xii nchaa dava-gǎ ñáyiú cùu cuendá-gǎ sá ìo na càda ndee iní-yu. Te cue ñáyiú nàcióⁿ Itàliá ñáyiú ndècu ndihí-o ichi-gǎ càchí-yu sá ìo cada ndee iní-ndó.

²⁵ Te Yá Ndiǒxí ío na chindee chitúu ñaha-gǎ xii-ndo nchàa-ndo. Te ducaⁿ na cùnduu. Te ìo chí cáda ndèe iní-nǎ vitna.

TUTÚ NÍ CADÚHA TÉ SÀNTIAÚ

Té Sàntiaú cadúha-dé tutú quíhíⁿ ndaha ñáyiú isràél nchíté nuu nihì ñuyíú

¹ Yúhú té Sàntiaú xínú cuèchi-í núú Yá Ndiöxí ndihí núú Xítohó Jesucristú, te tée-í tnúhu-a quide ndee iní ñáhà-í xii nchòhó ñáyiú isràél nchíté nuu nihì ñuyíú-a.

Yá Ndiöxí táxi-gá sá xini tnùnì-ó

² Te nchòhó ñáyiú ndècu ndihí-í ichi Xítohó Jesucristú, ío cudíí ìní-ndó cundecu-ndo cuéi náí cùu sá ùhú véxi cuèndá-ndó, ³ chi ducaⁿ te cutnùnì iní-ndó sá sàndáá ndisa iní-ndó-gá, te cunduu càhnu iní-ndó cuéi náí ná yáha-ndo. ⁴ Te cunduu càhnu-ni iní-ndó te ducaⁿ te cuu-ndo ñáyiú váha, te cundáá-ndó núú Yá Ndiöxí, te ducaⁿ te ñá túú-gá ná cumánì-ndó núú-gá.

⁵ Te núu cùmánì sá xini tnùnì-ó, te cacadá-ó núú Yá Ndiöxí te mee-gá taxi-gá, chi ío váha iní-gá, te ñá túú cùnini iní-gá núú-ó. ⁶ Te ni yùhu ni iní-ó cacadá-ó núú-gá, te quindáá ndisa iní-ó sá táxi-gá sá cùmánì quini tnùnì-ó, te vá cánì ñⁿ canì úú iní-ó. Chi nchaa ñáyiú sàni ñⁿ sàni úú iní-xi cùú-yu dàtná ndute làmár cuáháⁿ-xi duha cuáháⁿ-xi dàcáⁿ nàa-xi òré quéné tächí. ⁷ Te nchaa ñáyiú ducaⁿ sàni iní-xi, te vá cánì iní-yu sá nihí-yu sá xicáⁿ-yu núú-gá. ⁸ Chi nchaa ñáyiú sàni ñⁿ sàni úú iní-xi ñá cutnùnì iní-yu ndédacàa sá sání iní-yu cadá-yu.

⁹ Te nchaa ñáyiú ndàhú ñáyiú ndècu ichi-gá, xini ñuhu-xi ñá túú-gá ná canì iní-yu, mee-ná cudíí ìní-yu, chi Yá Ndiöxí chindèe ñaha-gá xií-yu. ¹⁰ Te nchaa ñáyiú cuica xini ñuhu-xi cundecu váha iní-yu núú Yá Ndiöxí cuéi náí ná yáha-yu. Chi ñáyiú-án cùú-yu dàtná itá nchaa cùhú sá ñá túú cùdíí naha. ¹¹ Chi òré ní cuu níhi càhni nchícanhii, te ní dádì-ni-xi nchaa cùhú cuíí-áⁿ te ní cóyo-ni nchaa itá-xi, te ñá túú-gá cáá vì. Te ducaⁿ sàtnahá-xi cùu ñáyiú cuica chi núú chíúⁿ-ní-yu xihí-yu.

Nchaa ñáyiú quide cahnu iní-xi nchaa sá yáha-yu

¹² Te váha táhú nchaa ñáyiú quide cahnu-ni iní-xi cuéi nándì sá yáha-yu ndécú-yu ichi Yá Ndiöxí, chi òré ná ndihí nchaa xíáⁿ yáha-yu, te cuáñaha Yá Ndiöxí ñⁿ coróná váha vìhi cundecu ndihí-yu, te ndáá chi ducaⁿ càháⁿ Yá Ndiöxí sá táxi-gá xii nchaa nchoo ñáyiú ñùhu iní ñáhá xii-gá. ¹³ Te nchaa ñáyiú sàni iní-xi cada nándì sá cuèhé sá dúhá, te vá cánì iní-yu sá Yá Ndiöxí táuchiuⁿ-gá ducaⁿ cadá-yu, chi Yá Ndiöxí ñá quíú te canì iní-gá cada-gá ñⁿ sá cuèhé sá dúhá, te ni ñà túú tàuchiuⁿ-gá sá dúcáⁿ cadá-yu. ¹⁴ Te cuinì-yu cadá-yu nchaa sá cuèhé sá dúhá chi ducaⁿ véxi iní-yu. ¹⁵ Te nchaa ñáyiú ío ñùhu iní nchaa sá cuèhé sá dúhá te quidé-yu, te núu na càda-ni-yu te cuíta nihnú-yu.

¹⁶ Te nchòhó ñáyiú ío cùu iní-í ndécú ndihí-í ichi Xítohó Jesucristú, vá dáñá-ndó mèe-ndo dandahú ñáhá ñáyiú xii-ndo. ¹⁷ Chi nchaa sá váha véxi-xi núú Yá Ndiöxí Yaá ndécú àndiu, chi ñⁿ mee-gá ní cadúha-gá àndiu ndihí nchaa chódinì, ndihí yóó, ndihí nchícanhii. Te Yá Ndiöxí ñá túú ndì queheⁿ ndì queheⁿ-gá sá cánì iní-gá, te ni ñà túú cùu-gá dàtná ñⁿ cuándáhú cuáháⁿ-xi duha cuáháⁿ-xi dàcáⁿ, chi ñⁿ-ni sá sání iní-gá. ¹⁸ Te Yá Ndiöxí ní cuinì-gá sá cùú-ó dèhe-gá, te ndáá sá cùú-ó dèhe-gá chi sàndáá iní-ó tnùhu-gá. Te nchoo ñáyiú sàndáá iní-xi tnùhu-gá cùnùu-gá-ó chi ní nduu-o dèhe-gá.

Ichi ndáá cuíi

¹⁹ Te nchòhó ñáyiú ío cùu iní-í ndécú ndihí-í ichi Xítohó Jesucristú, cund-edóho-ndo ñⁿ tnùhu na càháⁿ-í-a. Te cuinì-í sá cundecu túha-ndo cundédóho-ndo tnùhu Yá Ndiöxí, te canì váha iní-ndó nàcuáa càháⁿ-ndó, te cunduu càhnu iní-ndó te vá cùdèéⁿ-ndó. ²⁰ Chi núu na cùdèéⁿ-ó te ñá túú quide váha-o núú Yá Ndiöxí. ²¹ Te daña-ndo nchaa sá cuèhé sá dúhá ío ñuyíú-a. Te quindáá iní-ndó tnùhu Yá Ndiöxí ndécú ndihí-ndo, te vá cùndùu sáá iní-ndó, te ducaⁿ te naníhí tàhú-ndó.

²² Te quindáá iní-ndó tnùhu-gá te vá cuèndá-ni cundédóho-ndo, chi núu na cundédóho-ndo te vá tníí-ndó ñá, te dícó-ni dandahú-ndó mèe-ndo te vá naníhí tàhú-ndó. ²³ Chi nchaa ñáyiú dícó-ni

sàcúndedóho tnúhu-gá te ñá túú sàndáá iní-yu, ñáyiú-áⁿ cúú-yu dàtná ìⁿ ñáyiú sàcúndéhé-ní nùú-xi núú yùtátá. ²⁴ Chi nini ndèhé-yu ní xiní-yu núú-yu, te ní xócání-yu te ní nacuanaa-ní-yu nàcuáa càa núú-yu. Te ducaⁿ sàtnahá-xi cùu ñáyiú sàcúndedóho tnúhu Yá Ndiöxí, te ñá túú tñí-yu. ²⁵ Te nchaa ñáyiú dàcuaha ndisa tnúhu ní dándõ Yá Ndiöxí ñihnu-ní-yu ichi-gá, chi ñá díú ìⁿ sá vèe cùu-xi. Te ñáyiú-áⁿ ñà túú dícó-ni sàcúndedóho-yu chi quide ndáá-yu núú-gã, te cùdí iní-yu xíndecú-yu.

²⁶ Te nchaa ñáyiú càchí sá ndécú ìchi ndáá te cùtèxínu-ní càháⁿ-yu, te xíáⁿ dícó-ni dándahú-yu mèe-yu sá ndécú-yu ichi ndáá. ²⁷ Te núu ndècu-o ichi ndáá cuiti ichi Dútú Ndiöxí, te chindee-o nchaa ñáyiú ní ndóo ndàhú, ndìhi ñáyiú quèe ndécú ndìhi tnúndòho tnúhu ndàhú, te vá cádá-ó nãndi sá cuèhé sá dúhá ió ñuyú-a.

2

Ìⁿnuu-ni cùu iní-ó nchaa tnahá ñáyiú-o

¹ Te nchòhó ñáyiú ndècu ndìhi-í ichi Xítohó Jesucristú Yaá cùnùu, ìⁿnuu-ni càháⁿ ndìhi váha-ndo nchaa tnahá ñáyiú-ndo. ² Te núu núú nátàcá-ndó chihnuhu-ndo Yá Ndiöxí ní sáá ìⁿ téé ío váha càa dóó ñihnú-dè, te ní sáá tucu ìⁿ téé ñihnu dóó ndàhú, ³ te núu téé ñihnu dóó vâha-ni-áⁿ néhé-ndó sã yíñùhu núú-dè, te taxinucóo-ndo-dè ìⁿ núú xilè váha, te téé ndàhú-áⁿ daxòcòo-ndo-dè ìⁿ xio àdi canucóo-ndo-dè núú ñùhú, ⁴ te núu ducaⁿ na càda-ndo te ñá túú quide váha-ndo. Chi ìⁿ-ni-dé cúú ìní-ndó, te ìⁿ-dé ñá túú cùu iní-ndó.

⁵ Te nchòhó ñáyiú ío cùu iní-í ndécú ndìhi-í ichi Xítohó Jesucristú, chí cùndedóho tucu tnúhu na càháⁿ-í-a. Yá Ndiöxí càháⁿ-gá vâi ñáyiú ndàhú cuendá tnahá tnúhu ndìhi ñàhá-yu xii-gá, te ndècu váha-gá-yu dàcúxí ñáyiú cuica ñáyiú ñá túú sàndáá iní tnúhu-gá, chí ní cachí-gá sá ncháá ñáyiú na cùu iní ñàhá xii-gá nduu táhù-yu cundecú-yu ndìhi-gá ni caa ni quíhíⁿ.

⁶ Te nchòhó, ñá túú nèhe-ndo sá yíñùhu núú ñáyiú ndàhú, chí núú ñáyiú cuica-ni nèhe-ndo sá yíñùhu. ¿Te náa ñá cùtnùní iní-ndó sã ñáyiú cuica dándohó ñaha-gá-yu xii-ndo, te càndeca ñàhá-yu sàháⁿ núú cuè

tée cùchiuⁿ-áⁿ? ⁷ Te diu-ní-yu ío càháⁿ cuèhé-yu cuendá Xítohó Jesucristú, te nchòhó sa ní nduu-ndo dèhe-gá.

⁸ Te ìⁿ ndudú cùnùu-gá ní càháⁿ Yá Ndiöxí ní ngódó tnùnì núú tütú-gá càchí-xi sá cúú ìní-ó tñàha ñáyiú-o dàtná cúú ìní-ó mèe-o. Te núu ducaⁿ na càda-o te quide váha-o. ⁹ Dico núu ñá túú cùu iní ìⁿnuu-o cuè tnahá ñáyiú-o, te cuu cuèchi xii-o chí ñá túú quide-o nacuaá càháⁿ Yá Ndiöxí. ¹⁰ Te núu ìⁿ ñáyiú ndàunihnu ìⁿ sá càháⁿ Yá Ndiöxí, te dava-ni quide-yu ña, te ñáyiú-áⁿ ñà túú quide-yu nàcuáa càháⁿ ndudú Yá Ndiöxí. ¹¹ Te Yá Ndiöxí ní cachí-gá sá tée ndècu ñadihí-xi vá càháⁿ ndìhi-dé ìngá ñadihí. Te diu-ni-gá ní cachí-gá sá vã cáhni-ó tñàha ñáyiú-o. Te cuèi ñá túú càháⁿ ndìhi-o ìngá ñadihí, te núu sàhni-o tnahá ñáyiú-o te ñá túú quide-o nacuaá càháⁿ ndudú Yá Ndiöxí. ¹² Te nchoo xini ñuhú-xi càháⁿ-ó tñuhú váha te cada ndáá-ó, chí ñá díú ìⁿ sá vèe cùu-xi sá ní cachí Yá Ndiöxí cada-o. Te mee-gã ní cachí-gá sá cádá ndáá-gá cuèchi-o na sáá nduu. ¹³ Te nchaa ñáyiú ñá túú cùndahú iní tñàha ñáyiú-xi, te vá cùndahú iní ñàhá-gã xii-yu na sáá nduu càda ndáá-gá cuèchi-yu. Te nchaa ñáyiú cùndahú iní tñàha ñáyiú-xi te Yá Ndiöxí cùndahú iní ñàhá-gã xii-yu na sáá nduu-ãⁿ.

Quindáá iní-ó Yá Ndiöxí te cada váha-o

¹⁴ Te nchòhó ñáyiú ndècu ndìhi-í ichi Xítohó Jesucristú, te núu càchí-ó sã sàndáá iní-ó Yá Ndiöxí te ñá túú quide-o sá vâha, te ñá túú ndèe nándìhi-xi, chí vá nánihí tàhú-ó te núu ducaⁿ na càda-o. ¹⁵ Te núu ndèhe-o ìⁿ tnahá ñáyiú-o ñà túú dõ-yu àdi ñá túú sã cùnchitò-yu, ¹⁶ te xãhaⁿ-o: “Núhú-n te nducu-n dõ cuihnu-n te nducu-n sã cáxí-n”, xãhaⁿ-o, te ñá túú nã sãñaha-o, te sá dúcáⁿ quide-o te ñá túú quide váha-o. ¹⁷ Te núu càchí-ó sã sàndáá iní-ó Yá Ndiöxí te ñá túú quide váha-o ndècu-o, te vèdana nándìhi-xi.

¹⁸ Te ío ñáyiú càchí-yu sá sàndáá iní-yu Yá Ndiöxí, te ío ñáyiú càchí-yu sá mèe-ní sã vâha quide-yu. Te yúhú càchí-í sá nùu ñá túú quide-o sá vâha, te ñá túú sàndáá iní-ó Yá Ndiöxí. Te nchoo quide-o sá vâha núu xíáⁿ cùtnùní iní-ó sã sàndáá iní-ó-gã. ¹⁹ Te ío ñáyiú càchí sá ìⁿdii-ni Yá Ndiöxí ndécú,

te váha-ni càháⁿ-yu. Te tnàhá yucu ñávàha ndihì nchaa espíritú cùndihì-xi xiní-xi sá ndécú ñⁿndii-ni Yá Ndiöxí, te yùhú-xi dico ñá túú tnì-xi tnúhu-gá. ²⁰ Te ío ñì ñíquí-ó te núu na càchí-ó sã sãndáá iní-ó Yá Ndiöxí, te vá cádá-ó sã vãha. ²¹ Te ñãní tnàhá-ó ndíi Àbrahám téé ní xíndecu ndéé sanaha ñí ngúndecu váha ndíi núú Yá Ndiöxí, chi ní xito ndéé ñáhá-gã xii ndíi núu ndisa sá cáhni ndíi déhe ndíi té Isàác nduu táhú-gã ní cùu, te dàvá-áⁿ ñí cutnùnì iní-gá sá ío sãndáá iní ñáhá ndíi xii-gá, núu ñá ní dàña-gá cahni ndíi déhe ndíi. ²² Te nàha-o sá ndíi Àbrahám ñá díú-ní sã mée-ní sã ní sãndáá iní ñáhá ndíi xii-gá, chi ní tnì ndíi tnúhu-gá. ²³ Te ducaⁿ ñí quee ndáá-xi nàcuáa càháⁿ-xi núú tùtú Yá Ndiöxí núú càchí-xi: “Ndíi Àbrahám ní sãndáá iní ndíi ní quide ndíi nchaa nàcuáa ní xáhaⁿ Yá Ndiöxí, te ní ngúndecu váha ndíi núú-gã, te ní cachí-gá sá cúú ndíi ñⁿ téé ío váha tnàhá tnúhu ndihì-gá”, duha càchí-xi núú tùtú-gá.

²⁴ Te xíãⁿ cùtnùnì iní-ó sã ñá díú mée-ni sá quíndáá iní-ó Yá Ndiöxí, chi núu na càda-o nàcuáa cuu váha iní-gá te ngúndecu váha-o núú-gã. ²⁵ dàtná ní quide-gá tá Ràháb ñⁿ ñãdihí ní xíndecu ndéé sanaha, chi xíchí-ãⁿ ñí xíndecu-xi ichi díí iní, dico ní tuha-xi ichi Yá Ndiöxí te ní ngúndecu váha-xi núú-gã, chi ní chindee-xi cuè téé israhél cue téé ní xica chiuⁿ-gã, te ní sanu ichi ñaha-xi xii-güedé ñⁿ ichi núú vã nánihí ñáhá cuè téé cùu úhú iní ñáhá xii-güedé. ²⁶ Te nchaa ñáiyu càchí sá sãndáá iní Yá Ndiöxí, te ñá túú quidé-yu nàcuáa càháⁿ-gá ñáiyu-áⁿ cúú-yu dàtná ñⁿ ñáiyu ní xíhí. Chi ñá túú-gã ndíxí tũu iní-yu nchaa sá cuèhé sá dúhá quidé-yu. Duha sãtnahá-xi cùu nchaa ñáiyu ñá túú cuínì tnì tnúhu càháⁿ Yá Ndiöxí.

3

Nàcuáa quide yaa-o

¹ Te nchòhó ñáiyu ndècu ndihì-í ichi Xítohó Jesucristú, vá ncháá-ndó càni iní-ndó cùu-ndo mestrú dacuàha-ndo ñáiyu tnúhu Yá Ndiöxí chi íí cáá-xí. Chi na quítnahá nduu nàcuáha-o cuèndá núú-gã, te núu ñá túú ní quide ndáá-ó ñá, te vá cúú vãha iní-gá núú-ó. ² Te nchaa-o ío cuèhé sã ñá túú vãha quide-o. Te nchaa

ñáiyu ñá túú càháⁿ tnúhu cuèhé tnúhu duha cùu-yu ñáiyu ñá túú ñá cùmãní chi ío ndáá quidé-yu. Te xiní-yu cotnì-yu mée-yu, te quide váha-yu núú Yá Ndiöxí. ³ Te dàtná cuínì-ndó cùu ñⁿ quiti te núu na chihì-o frenú yuhu-di, te cotnì-o-di te ngúnu ichi-di, te ducaⁿ sãtnahá-xi cùu ñáiyu sãcòtnì mee-xi, chi ñá túú càháⁿ-yu tnúhu cuèhé tnúhu duha. ⁴ Te dàtná cuínì-ndó cùu barcú cuèi nãhnu vihi-xi, dico òré quéné ñihì táchí te tũndaha-xi ñⁿ xio, dico téé dàcaca ndacu-dé dáquihíⁿ-dé-xi ndihì ñⁿ yutnu sá dánani-güedé tímú ndàa núú càchí iní-dé quihíⁿ-xi. ⁵ Te ducaⁿ cùu tucu yaa-o chi ío ñihì-xi dico ío cuèhé tnúhu càháⁿ-ó ndihì-xi. Te ducaⁿ-ni sãtnahá-xi cùu tucu sá lúhá ñùhú chi sãhmi-xi ñⁿ yucu. ⁶ Te ñíu-ni ducaⁿ sãtnahá-xi cùu yaa-o chi ío cuèhé tnúhu cuèhé tnúhu duha càháⁿ-ó ndihì-xi, te dàcuíta nihnu ñaha-xi xii-o. Te ío cuèhé cuèchi quide-o ndihì-xi cuendá sá ñùyíú-a ñùhu tnahá ñùhú tnì yucu ñávàha dàticá nihnu ñaha-xi. ⁷ Te ndacu-o càda masú-ó nchàa núú quiti ío ñùyíú cuèi quiti dééⁿ quiti xica núú ñùhú, te cuèi quiti ñùhu xití ndute làmár, chi ducaⁿ quide dava cue téé ñùyíú-a. ⁸ Dico yàa-o chi vá yõ ñⁿ ndàcu cada masú ñáhá xii-xi nàcuáa càháⁿ-ó mée-ni tnúhu váha ndihì-xi, chi mee-ni tnúhu cuèhé tnúhu duha cùnuu-gá càháⁿ-ó ndihì-xi. Te cùu-xi datná ñⁿ venènú chi dàti-u-xi iní-ó. ⁹ Te ñíu-ni ndihì yàa-o quide cahnu-o Dútú Ndiöxí Yá cúú Tãtá-ó, te ñíu-ni ndihì yàa-o càháⁿ úhú-ó cuè tnahá ñáiyu-o. Te xiní ñùhu-xi vá dúcãⁿ càda-o, chi mee-gã ní chihì-gá sá xiní tnùnì-ó ndihì iní-ó, dàtná cáá mée-gã ñùhú iní-gá. ¹⁰ Te ñíu-ni yuhu-o quèe tnúhu váha càháⁿ-ó, te ñíu-ni yuhu-o quèe tnúhu cuèhé tnúhu duha. Te nchòhó ñáiyu ndècu ndihì-í ichi Xítohó Jesucristú cunaha-ndo sã ñá túú ndùu váha-xi ducaⁿ càda-o. ¹¹ Te ñá túú xiní-ndó sã ñⁿ núú quèé ñihni ndute, te quèe ndute váha te quèe ndute úá-ãⁿ. ¹² Te nchòhó ñáiyu ndècu ndihì-í ichi Xítohó Jesucristú, te ñá túú xiní-ndó sã ñⁿ yutnu ngúxí, te cùuⁿ aceitúná, àdi xiní-ndó sã ñⁿ yoho yaha stilé te cùuⁿ ngúxí. Te ducaⁿ cuèi ñⁿ núú quèé ñihni ndute, vá cúú quèe ndute váha te quee

ndute úhá. Te ducaⁿ sãtnahá-xi cùu yuhu-o chi vá cúú càháⁿ-ó tnũhu váha te cáháⁿ-ó tnũhu cuèhé tnũhu duha.

Nchaa sá vãha xini tnùnì-ó tàxi Yá Ndiõxí

¹³ Te núu ndècu ñáyiu túha tnuú-ndó ñáyiu cùtnuní iní-xi, te xini ñuhu-xi mee-ni sá vãha cadá-yu, ducaⁿ te cutnùnì iní-ó sã túha ndisá-yu, te vá cadá càhnú-yu mèé-yu. ¹⁴ Te núu nchoo cuèdú iní-ó te cuiní-ó cùnũu-o núú tnàha ñáyiu-o, te vá càchí-ó sã túha-o, chi ñá túú quide ndáá-ó te núu ducaⁿ na càda-o. ¹⁵ Chi ñá díú xiãⁿ ní dànehé ñáhá Yá Ndiõxí, chi ñuyíú iha ní cacu ni-hnu-xi cuendá sá yucu ñávãha dàcahu iní ñáhá-xí. ¹⁶ Te núu ndécú ñáyiu cuèdú iní ñáyiu cuiní cunu, te yacáⁿ mee-ni ndáhú nãá xĩndecú-yu, te ñá túú quide váha-yu, chi mee-ni nchãa sá cuèhé sá dúhá quidé-yu. ¹⁷ Te núu ní taxi Yá Ndiõxí sá xini tnùnì-ó, te cada váha-o, te cáháⁿ ndihí váha-o nchãa tnaha ñáyiu-o, te tnĩ-o tnũhu váha càháⁿ-yu, te cundàhú iní-ó-güë-yu te chindee-õ-yu, te vá caní ñⁿ cani úú iní-ó, te ío cunduu ndáá iní-ó. ¹⁸ Te núu cuiní-ó ñá túú nã cuu cundecu-o ñuyíú-a, te cada váha-o sã cúú-xí tnàha ñáyiu-o cuendá sá ñá túú nã cuu cundecu-o ndihí-yu. Te ducaⁿ te nguínchicúⁿ dava-gá tnàha ñáyiu-o càda váha-yu.

4

Vá cúú cundecu-o ichi Yá Ndiõxí te cada-o nãndí sá cuèhé sá dúhá

¹ ¿Te xini-ndó nã cuendá nãá ñáyiu te xĩsahni tnàhá-yu-ãⁿ? Te nãá-yu sá tnũhu cuèdú iní, chi ñu-ni xiãⁿ ñúhú iní-yu, te ñá túú ndècu váha iní-yu. ² Chi cuiní-yu cundecu ndihí-yu ñⁿ sá ñá túú ndècu ndihí-yu, te ñá túú nihí-yu núu xiãⁿ xĩcuu cuèdú iní tnáhã-yu, te xĩcuèhé tnáhã-yu, te caní tnahá-yu, te xĩsahni tnàhá-yu. Te ñá túú nihí-yu sá cuiní-yu chi ñá túú xicáⁿ-yu núú Yá Ndiõxí. ³ Te cuèi xicáⁿ-yu ñⁿ sá cuiní-yu núú-gã te ñá túú sãñaha-gã, chi ñá túú xicáⁿ-yu ñⁿ sá cúú xĩ-yu sá vãha, chi ñⁿ sá ná ndihí-yu núú cadã-yu nchaa sá cuèhé sá dúhá xicáⁿ-yu, núu xiãⁿ ñá nihí-yu. ⁴ Te nchaa ñáyiu ducaⁿ xĩquide ío cùu sáá iní-yu núú Yá Ndiõxí. Te

nàha-ndo sá nchãá ñáyiu cùdí iní-xi cundecu ichi cuèhé ichi duha cùu úhú iní-yu Yá Ndiõxí, chi vá cúú cundecu-o ichi cuèhé ichi duha, te cundecu-o ichi-gã. ⁵ Te ñá túú díó ducaⁿ càháⁿ-xi núú tütú Yá Ndiõxí núú càchí-xi: “Yá Ndiõxí ní taxi-gã Espiritú-gã ndécú ndihí-o. Te Espiritú-gã-áⁿ cuiní-xi sá méé-ní-gã cuhuⁿ iní-ó”, duha càchí-xi núú tütú-gã. ⁶ Te Yá Ndiõxí ío chindee ñaha-gã cuendá cada ndáá-ó núú-gã dàtná càchí tucu-xi núú tütú-gã núú càchí-xi: “Yá Ndiõxí ñá túú cùu váha iní-gã núú nchãa ñáyiu quide cahnu mee-xi, dico chindee-gã cue ñáyiu ndàhú iní-xi”, duha càháⁿ-xi núú tütú-gã. ⁷ Te cada-ndo nãcuãa càháⁿ Yá Ndiõxí. Te vá cadá-ndó nãcuãa cuiní yucu ñávãha, ducaⁿ te xóo cóo ndéé ñáhá-xí xì-ndo. ⁸ Te tnĩ-ndo tnũhu càháⁿ Yá Ndiõxí te cundecu ndihí ñaha-gã xii-ndo. Te nchaa nchòhó ñáyiu ndècu ichi cuèhé ichi duha dañã-ndo ìchi-áⁿ te cada váha-ndo. Te nchaa nchòhó ñáyiu sàni iní cunu cuechi núú Yá Ndiõxí te quide-ni-ndo nchaa sá cuèhé sá dúhá, te ñá túú quide váha-ndo núu ducaⁿ, chi xini ñuhu-xi sá càcãⁿ-ndó núú Yá Ndiõxí sá ná ndádá ndòo ndada nine-gã iní-ndó. ⁹ Te ndixi cuèchi iní-ndó nchãa sá quidé-ndó ndéé ndáhyú ndisa-ndo sã ndihú iní-ndó, te ñá díú dà cudí iní-ndó. ¹⁰ Te náhmã-ndó núú Yá Ndiõxí nchaa sá ñí quide-ndo, te ngũndecu váha-ndo núú-gã.

Vá càháⁿ-ó nchãa sá quidé tnàha ñáyiu-o

¹¹ Te nchòhó ñáyiu ndècu ndihí-í ichi Xítóhó Jesucristú, vá cuátnũhu tnaha-ndo, chi nchaa ñáyiu sãtnũhu tnaha dìcò-ni ndàa nuú-yu ndèhe tnahá-yu, te ñá túú càháⁿ váha-yu cuendá tnũhu Yá Ndiõxí sá sánú ìchi ñaha xií-yu nãcuãa cundecú-yu, chi dàquee tíhũ-yu tnũhu-áⁿ. Te núu càchí-ndó sã ñá túú càháⁿ váha tnũhu Yá Ndiõxí, te xiãⁿ quée-xí sã ñá túú sãndáá iní-ndó tnũhu càháⁿ-gã, te cuiní-ndó cùnũu tnũhu-ndo núú tnũhu-gã. ¹² Te mee Yá Ndiõxí ní cachí-gã nãcuãa cada-o, te ñu-ni mee-gã càháⁿ-gã te núu ní quide váha-o, àdi ñá túú ní quide váha-o. Te ñu-ni mee-gã dàcãcu nihnu ñaha-gã xii-o núú úhú núú ndàhú, te ñu-ni-gã daquihíⁿ ñáhã-gã xii-o núú úhú núú ndàhú-áⁿ te núu vá cadá vãha-o. Te

nchoo ñà túú ñă cúú-ó, te núu mee-ni nchàa sá quidé tnàha ñáyiu-o cùndehe-o.

Ñá túú cùtnuní iní-ó ñăsa túndaá-ó ìngá nduu

¹³ Te dava nchòhó càchí-ndó sã vítna àdi tneé quíhíⁿ-ndó ìⁿ ñúú, te yàcáⁿ cundecu-ndo ìⁿ cuíá cada-ndo ìⁿ ndáhú te níhí-ndó díhúⁿ. ¹⁴ Te ñi ñă xìní-ndó ñă cúú sã yàha-ndo vítna àdi tneé. Te nchoo cùu-o datná ìⁿ vícò núhú, chi vícò-ãⁿ tnàvíí ndéhé-ó te tna tnaa-gá sa ní ndóñhú-xí. Ducaⁿ sãtnahá-xi cùu nchoo chi ìⁿ úú nduu duha vèxi-o ñúyíú-a te ndoñuhu-o. ¹⁵ Te núu sàndaá iní-ó Yá Ndiöxí te duha cáháⁿ-ó: “Te núu Ndiöxí ñă càchí-gá sá cùndècu tnaa-o ñúyíú-a te cada chiⁿ-o”, duha cachí-ó. ¹⁶ Dico mee-ndo chi ío ñí iní-ndó cuíní-ndó cùnuu tnúhu-ndo núú Yá Ndiöxí, te ñá túú nduu váha-xi sá dúcáⁿ quide-ndo. ¹⁷ Te núu xìní-ó càda-o sá váha te ñá túú quide-o, te cùu-xi ìⁿ cuéchi núú-gã.

5

Tnúhu sá dátũha ñaha xii nchaa ñáyiu cuica ñà túú sàndaá iní tnúhu Yá Ndiöxí

¹ Te nchòhó ñáyiu cuica ñáyiu cuihna iní-xi cundedóho-ndo tnúhu na càháⁿ-í-a. Vítna ngúíta-ndo ndíhú iní-ndó, te ndáhyú víhí-ndó, chi quixi ìⁿ tnúndòho cuendá-ndó te ndoho víhi-ndo. ² Te nchaa sá ndécú ndíhi-ndo ndíhi cuita tíu quíhíⁿ, te quee tíquidi dóó-ndó, ³ te díhúⁿ-ndó caxi cudi ñúhu. Te xiáⁿ cuita naquiní ndeé-ndó tnúndòho sá ñà túú quide váha-ndo. Te ndíhi-ndo ndíhi díhúⁿ-ndó sã ñi taxúha-ndo, chi vítna sa ta cùyatni sáá nduu ndíhi ñúyíú-a. ⁴ Te nchaa cue téé ní quide chiⁿ núú chíúⁿ-ndó ñi ndatnúhu-ndo ndíhi-güedé nàcuáa cháhu-ndo-güedé ní cùu, te ñá túú ní chãhu-ndo-güedé nàcuáa ní xáhaⁿ-ndo xii-güedé, núu xiáⁿ ío ndècuéchi-ndo. Te Yá Ndiöxí Yaá ndécú àndíu ní tecú dóho-gá nàcuáa càháⁿ-güedé sá ñi dándàhú-ndó-güedé. ⁵ Te nchòhó ñáyiu cuica, sá ndécú váha-ni-ndo cùndee iní-ndó, núu quide-ni-ndo nchaa sá vèxi iní-ndó. Te cùu-ndo datná ìⁿ quiti nùcuíhnu mee-ni xèxi-di, te sáá nduu sàhni-güedé-di. Te ducaⁿ sãtnahá-xi cùu nchòhó chi ndècu váha-ndo vítna, te sáá ìⁿ nduu nàcháhu-ndo nchàa sá quidé-ndó núú Yá Ndiöxí te núu vá

quíndaá iní-ndó-gã. ⁶ Te quide úhú iní-ndó sàhni-ndo cue ñáyiu quide ndáá núú Yá Ndiöxí, te ñá túú ñă quidé-yu.

Cunduu càhnu iní-ó te cáháⁿ ndíhi-o Yá Ndiöxí

⁷ Te nchòhó ñáyiu ndècu ndíhi-í ichi Xítóhó Jesucristú, cada ndee-ni iní-ndó cùndetu-ndo ndéé ná quixi tucu-gá ñúyíú-a, te cada-ndo dàtná quidé nchàa ñáyiu chihi tatá chi sàcùndetú-yu ndéé cúúⁿ dáú te chíhí-yu. Te cùndee-ni iní-yu sàcùndetú-yu ndéé cúúⁿ-gã dáú te cùu itú-yu, te ndúdí iní-yu. ⁸ Te ducaⁿ càda nchòhó tucu cada ndee iní-ndó cùndetu-ndo, chi sa ta cùyatni nduu quixi tucu Xítóhó Jesucristú. ⁹ Te duha nduu tnúhu càháⁿ-í núú nchòhó ñáyiu ndècu ndíhi-í ichi Xítóhó Jesucristú, vá ndàcáⁿ cuéchi núú tnáhá-ndó te núu nása cùu ndecu-ndo, chi ñá cuéhé-gá nduu cùmání te quixi Cristú nacuaca ñaha-gã xii-o cùndecu-o núú Yá Ndiöxí, te mee-gã cada ndáá-gá cuéchi-o. ¹⁰ Te nchòhó ñáyiu ndècu ndíhi-í ichi Xítóhó Jesucristú, ndacu iní-ndó nàcuáa ní quide nchaa cue téé ní xóo cáháⁿ tnúhu Yá Ndiöxí ndéé sanaha sá ío càhnu ní xínduu iní-güedé cuéi nándi ní ndoho-güedé. ¹¹ Te cùtnuní iní-ó sã cúú-ó ñáyiu ío váha táhú-xi te núu na càda cahnu iní-ó nchàa sá ná yàha-o cuendá Yá Ndiöxí. Te nàha-ndo sá ndíi Jób ducaⁿ ñi quide ndíi, chi nándi sá ñi yáha ndíi te ní quide càhnu iní ndíi. Te sátá ñi yáha ní ndoho ndíi, te ío cuéhé sã ñi sáñaha Yá Ndiöxí xii ndíi. Chi ío váha iní-gá te ío cùndahú iní-gá nchaa ñáyiu ío càhnu iní-xi.

¹² Te nchòhó ñáyiu ndècu ndíhi-í ichi Xítóhó Jesucristú, chí cùndédóho tucu tnúhu na càháⁿ-í-a, chi ío xini ñuhu-xi. Vá cácu nèhe-ndo Yá Ndiöxí òré cuíní-ndó sã cùtnuní iní ñáyiu sá ndáá cada-ndo ìⁿ sá càháⁿ-ndó. Te ñi vá cácu nèhe-ndo sá càchí-yu cùu ndíoxí cadũha cue téé ñúyíú-a. Te núu ìⁿ sá xicáⁿ tnàha ñáyiu-ndo núú-ndó te cúñaha-ni-ndo te núu cuu àdi sá vã cúú. Te vá cácu nèhe-ndo Yá Ndiöxí, ducaⁿ te vá dándòho ñaha-gã xii-ndo.

¹³ Te núu ndòho-ndo te cáháⁿ ndíhi-ndo Yá Ndiöxí, àdi te núu ndècu váha-ndo te cudíi iní-ndó te chiñuhu-ndo-gã, ¹⁴ àdi núu cùhú-ndó te cana-ndo cuè téé yíndaha ñaha xii-ndo nacuáa ndècu-ndo ichi Yá Ndiöxí

cuëndá tee-güedé acítí díquí-ndó, te cácaⁿ táhú-güedě núú-gă cuëndá-ndó dàtná ní cachí méé-gă cunduu. ¹⁵ Te núu quíndáá ndisa iní-ndó sá ndúha-ndo, te ndúha-ndo chi Yá Ndiöxí cada tátna ñaha-gă xii-ndo, àdi núu ní quide-ndo ìⁿ sá ñà túú tàú-ndó càda-ndo núú-gă te cada càhnu iní-gá cuéchi-ndo. ¹⁶ Te xìni ñuhu-xi cùtnùhu tnàha-ndo oré ñá túú cùndáá-ndó núú Yá Ndiöxí cuëndá chindee tnùhu tnàha-ndo cáháⁿ ndìhi-ndo-gă te xocàni-gá cuéhé-ndó, te cada càhnu iní-gá nchaa sá ñà túú vâha ní quide-ndo te núu cundecu váha iní-ndó. Te nchaa ñáyiu ndècu váha iní-xi núú Yá Ndiöxí na cácaⁿ-yu ìⁿ sá cuìní-yu núú-gă te nihí-yu, chi sàá tnùhu-yu núú-gă. ¹⁷ Te té Èliás, téé ní xíndecu ndéé sanaha ñí cáa-dé dàtná cáá nchò. Te ní cáháⁿ ndìhi-dé Yá Ndiöxí ñi yùhu ñi iní-dé ní xáhaⁿ-dě xii-gá sá vâ dácùⁿ-gá dáú, te ní tniⁿ-gá tnùhu ní cáháⁿ-dé, te ñá ní dàcuuⁿ-gá dáú ùní cuíá dava. ¹⁸ Te dătnùní ducaⁿ te ní cáháⁿ ndìhi tucu té Èliás-áⁿ Yá Ndiöxí sá dácùⁿ-gá dáú te ní cuuⁿ, te ní cuu tucu nchaa sá ñi xitu-güedé.

¹⁹ Te nchòhó ñáyiu ndècu ndìhi-í ichi Xítohó Jesucrístú, te núu dava-ndo sà ndecu-ndo ichi Yá Ndiöxí ní cùu te ní dǎhá-ndó, te ndècu tucu dava-ndo nadaxìnu iní tnáhá-ndó nùcúndecu tucu-ndo ìchi-gá, ²⁰ te núu ducaⁿ na càda-ndo te dàcácu nihnu tnàha-ndo núú ùhú núú ndàhú, te mee Yá Ndiöxí cada càhnu iní ñáhá-gă xii-ndo cuèi ío cuéhé cuéchi ní quide-ndo.

TUTÚ DÍHNA NUU NĪ CADÚHA TÉ PÈLÚ

Té Pèlú cadúha-dé tutú sá cúú-xí cuè ñáyiu sàndáá iní ñáhá xii Yá Ndiöxí

¹ Yúhú té Pèlú ní tendaha ñaha Xítoho Jesucristú xíca cùu-í cãháⁿ-í tnúhu-gá, te cadúha-í tutú-a sá cúú-xí nchòhó ñáyiu xínchíté nuu ndècu distritú Pòntó, ndihì distritú Gàlaciá, ndihì distritú Capadociá, ndihì distritú Àsiá, ndihì distritú Bitiniá. ² Chi Dútú Ndiöxí ní cachí-gá sá cúú-ndó dèhe-gá ndéé cùtnàhá vátá ngãva-gá ñuyíú, te Espiritú-gá ní quide-xi ndècu yíñuhu-ndo núú-gã vitna. Te ní cachí-gá sá cúú-ndó dèhe-gá cuendá tñi-ndo nchaa tnúhu cãháⁿ Xítoho Jesucristú, ndihì cuendá nduu ndoo nduu nine iní-ndó, chi ñi cuendá-áⁿ nĩ xíhí Xítoho Jesucristú. Te xícaⁿ tãhù-í núú Yá Ndiöxí sá ïo na chindee chitúu ñaha-gã xii-ndo cuèi vitna te cuèi núú cuaháⁿ núú vèxi, te ñi-gã ná cáda te ío váha cuu iní-ndó cùndecu-ndo.

Tnúhu ndee iní sá ndécú ndihì ñáyiu sàndáá iní ñáhá xii Yá Ndiöxí

³ Te vitna chí ná cãhí-ó sã ïo cãhnu cuu Yá Ndiöxí Yaá cúú Tãtá Xítoho Jesucristú, chi ñi-gã ío ní cundàhú iní ñáhá-gã xii-o núu xíáⁿ ní quide-gá sá nchóó nĩ nduu-o dàtná ñⁿ ñáyiu saa vitna. Te ducaⁿ nĩ quide ñaha-gã xii-o cuendá sá Xítoho Jesucristú ní xíhí-gã te ní ndoto-gã. Te cuendá sá nĩ nduu-o dàtná ñⁿ ñáyiu saa, xíáⁿ ní ngúndecu ndihì-o tnúhu ndee iní ⁴ sá cùndecu ndihì-o-gã nĩ caa nĩ quíhíⁿ, chi ducaⁿ nĩ cachí-gã cunduu. Te yacáⁿ vá quini-gã-ó nĩ ñⁿ sá cuèhé sá dúhá, te ío cudíí iní-ó cùndecu-o ndihì-gã nĩ caa nĩ quíhíⁿ. ⁵ Te sá sàndáá iní-ó Yá Ndiöxí, núu xíáⁿ coto ñaha-gã xii-o ndèé ná sãá nduu nàqueheⁿ cuendá ñáhá-gã chi ío cãhnu cuu-gã.

⁶ Te xíáⁿ ío cudíí iní-ndó ndècu-ndo, te cuèi nãndi ndòho-ndo ndecu-ndo dico sacú-ni nduu ducaⁿ ndòho-ndo. ⁷ Te òré ná cáda cãhnu iní-ndó yãha-ndo nchaa sá ná cáda ñaha ñáyiu xii-ndo, te ducaⁿ te cutnùní sàndáá ndisa iní-ndó Yá Ndiöxí, te sá dúcáⁿ sàndáá iní-ndó Yá Ndiöxí ío-gã

váha dàcúxí dñhúⁿ cuàáⁿ chi xíáⁿ ñá túú cùdí-xi. Te cuèi ducaⁿ dico xito ndèé nãhí-ni-güedé núu ndisa cùu-xi dñhúⁿ cuàáⁿ. Te ducaⁿ sãtnahá-xi cùu nchohó cuendá nchaa sá ndóhó-ndó, te na sãá nduu quixi tucu Xítoho Jesucristú te cùñaha-gã xii-ndo: “Ío váha ní quide-ndo, te vitna ío cãhnu cuu-ndo, te tãú-ndó nùcùndecu váha-ndo”, duha cùñaha-gã xii-ndo.

⁸ Te vitna ío cùu iní-ndó Xítoho Jesucristú cuèi vátá quini-gã-ndó-gã, te ducaⁿ ïo sàndáá iní-ndó-gã, te ío cudíí iní-ndó te súúní nĩ ñá cùtnùní iní-ndó nãsa cunduu tnúhu cãháⁿ-ndó sá dúcáⁿ ïo cudíí iní-ndó ⁹ cuendá sá nĩ naníhí tãhù-ndó, chi ní sàndáá iní-ndó-gã.

¹⁰ Te cue téé ní xóo cãháⁿ tnúhu Yá Ndiöxí ndéé sanaha ní cachí-güedé nãcuáa cada-gã cundàhú iní ñáhá-gã xii-o vitna. Te cue téé-áⁿ ïo váha ní dácuahá-güedé nãcuáa cada Yá Ndiöxí dàcácu nihnu ñaha-gã xii-o vitna.

¹¹ Te Espiritú Xítoho Jesucristú ní ngúndecu ndihì cue téé-áⁿ nĩ xãháⁿ-xi xii-güedé nãcuáa ndoho-gã, te ní xãháⁿ tucu-xi xii-güedé sá sãtá ná yãha ndoho-gã te ío cunuu-gã ndihì Yá Ndiöxí. Te ío ní sani iní-güedé núu ná nduu sãá ducaⁿ càda-xi, ndihì nchaa nãndi-gã cúú sã cáda-xi. ¹² Te Yá Ndiöxí ní xãháⁿ-gã xii-güedé sá nchãá tnúhu váha cãháⁿ-güedé vá cúú-xi cuendá méé-güedé, chi cuendá nchoo cuè ñáyiu ndècu ñuyíú-a vitna cùu-xi. Te ñi-ni tnúhu-áⁿ cúú tnúhu cãháⁿ nchúhú cue téé cãháⁿ tnúhu Yá Ndiöxí núú-ndó. Te Espiritú sá nĩ taxi Yá Ndiöxí ndécú ndihì-o chindee ñaha-xi xii-ndí cãháⁿ-ndí tnúhu-gã. Te cue espíritú xínú cuèchi núú Yá Ndiöxí ío cuini-xi quini ndáá-xi nchaa nãcuáa cuaháⁿ tnúhu-áⁿ.

Yá Ndiöxí cãhí-gã sá cáda-ó mèn-ni sã vãha

¹³ Te sá dúcáⁿ ïo váha ní quide ñaha Yá Ndiöxí xii-ndo xíáⁿ xíní ññhu-xi ío váha cuáha-ndo cuendá nãcuáa cundecu-ndo te vá cãní iní-ndó càda-ndo nĩ ñⁿ sá cuèhé sá dúhá, te ío quindáá iní-ndó sá Yá Ndiöxí cada váha ñaha-gã nduu na quixi tucu Xítoho Jesucristú. ¹⁴ Te ío tñi-ndo nchaa tnúhu cãháⁿ Yá Ndiöxí, te vá cùhúⁿ-gã iní-ndó nãndi sá cuèhé sá dúhá sã nĩ xúhuⁿ iní-ndó cùtnàhá vátá cùndecu-gã-ndó ichi-gã te nĩ vã cáda-ndó. ¹⁵ Te cada-ndo

mèe-ni sá vǎha cundecu-ndo dàtná quidé mèe Yá Ndiöxí Yaá ní cáháⁿ ñáhá xì-o cundecu-o ndìhi-gá. ¹⁶ Te cǎchí-gá núú tütú-gá: “Cada-ndo mèe-ni sá vǎha cundecu-ndo, chi ducaⁿ quíde yúhú”, duha cǎchí-gá núú tütú-gá.

¹⁷ Te Yá Ndiöxí cada ndáá-gá cuéchi nchaa ñáyiú, te vá cádá cuèndá-gá cuéi náí ñáyiú cùú-yu, te nchòhó cǎchí-ndó sǎ díú Tǎtá-ndó cùu-gá te ndáá, núu xǎⁿ xíní ñùhu-xi canehe-ndo sá yǎñùhu núú-gǎ ndi nchàa nduu cundecu-ndo ñuyíú-a. ¹⁸ Te ñu-gá ní dǎcǎcu nihnu ñaha-gǎ xii-ndo ñⁿ ichi sá ñà túú nàndìhi ní sanu ichi ñaha cué ñaní tnáhá-ndó ní xindecu ndéé sanaha ní cùu, te nchòhó sa nàha-ndo sá sǎ dúcáⁿ nǐ quíde ñaha Yá Ndiöxí ní dǎcǎcu nihnu ñaha-gǎ xii-ndo ìchi-áⁿ ñà túú ní chǎhu-gá ní ñⁿ díhúⁿ cuàáⁿ, te ní ñⁿ díhúⁿ cuixíⁿ sá ndìhí nihnu ñuyíú-a cuèndá-ndó. ¹⁹ Chi Xítóhó Jesucristú ní quixi-gá ní sati níñí-gǎ, te ní xíhí-gá núú cùrúxí cuèndá sá nchóó nàníhí tàhú-ó, te cùu-gá dàtná ñⁿ mbéé quítì ío váha iní-xi, quítì cǎndoo canine. ²⁰ Te ducaⁿ nǐ ndoho Xítóhó Jesucristú, chi ducaⁿ tnàhí ndéé tnuní ndoho-gá ndéé cùtnáhá vátá ngǎva-gá ñuyíú. Te ducaⁿ nǐ yáha-gá cùtnáhá ní quixi-gá òré vitna cùmání sǎá nduu nàa ñuyíú-a cuèndá nchoo cùu-xi sá vǎha xii-o vitna. ²¹ Te nchòhó sa níhí-ndó tnùhu nàcuáa ní yáha Xítóhó Jesucristú cùtnáhá ní quixi-gá ñuyíú-a, núu xǎⁿ sàndáá iní-ndó Yá Ndiöxí. Te Yá Ndiöxí ní dándótó-gǎ Xítóhó Jesucristú, te sǎtá ní dándótó ñàha-gá te ní cachí-gá sá ío cǎhnu cuu Xítóhó Jesucristú. Te sá dúcáⁿ nǐ cuu, xǎⁿ ío sàndáá iní-ndó Yá Ndiöxí, te ní taxi-gá tnúhu ndee ìní ndécú ndìhi-ndo sá sǎá nduu cùndecu-ndo ndìhi-gá ní caa ní quíhíⁿ.

²² Te Espíritú Yá Ndiöxí ní quíde-xi te ní sàndáá iní-ndó tnùhu-gá, te xǎⁿ ní nduu ndoo ní nduu nine iní-ndó, te cùu iní tnáhá ndisa-ndo nacuáa ndècu-ndo ichi Yá Ndiöxí, te xìni ñuhu ndisa-xi sá ío ní yùhu ní iní-ndó cùu iní tnáhá-ndó ñⁿ ñⁿ-ndo. ²³ Te nchòhó ní nduu-ndo dàtná ñⁿ ñáyiú saa sá cuèndá tnúhu Yá Ndiöxí, te tnúhu-áⁿ candeca-xi iní-ndó ní caa ní quíhíⁿ, te vá ñⁿ ndùu ndìhi nihnu-xi, te ñà díú cuèndá ñáyiú ñuyíú-a ní

ndùu-ndo ñⁿ ñáyiú saa chi cuèndá tnúhu-gá.

²⁴ Chi núú tütú Yá Ndiöxí cǎchí-xi:

Nchaa ñáyiú ndècu ñuyíú-a cùú-yu dàtná cùhú, chi cùhú-ǎⁿ tnaa-ni cùdíi-xi te xíhí-xi, ducaⁿ sǎtnahá-xi cùú-yu.

Te nchaa sá ndécú ndìhí-yu cùu-xi datná ñⁿ itá cùhú-ǎⁿ, chi itá-áⁿ tnaa-ni tucu cùdíi-xi te ndàhvá-xi, ducaⁿ sǎtnahá-xi cùu nchaa sá ndécú ndìhí-yu.

²⁵ Dico tnúhu Yá Ndiöxí chi vá náá tnàhí-xi, chi duha-ni ndècu-xi, te ñu-ni duha cundecu-xi ní caa ní quíhíⁿ.

Duha cǎchí-xi núú tütú-gá. Te ñu tnúhu-áⁿ ní dǎnèhé ñáhá nchùhú cue téé cǎháⁿ tnúhu Yá Ndiöxí xii-ndo.

2

¹ Te xǎⁿ xíní ñùhu-xi dañà-ndo nchaa núú sǎ cuèhé sá dúhá, te dañà-ndo ìchi tnúhu ndehnde, te dañà-ndo vǎ dándàhú-gá-ndó mèe-ndo sá quidé vǎha-ndo, te dañà-ndo ìchi cuedú ínì, te dañà-ndo nchàa tnúhu yítì. ² Te cada-ndo cuèndá sá cùú-ndó dàtná cue landú yíquíⁿ vitna sadi camá, chi landú-áⁿ mee-ni sǎdi-güexi te sǎhnu-güexi. Te cada iní-ndó sǎ dúcáⁿ càda-ndo chi xìni ñuhu-xi sá ío cuhuⁿ iní-ndó dǎcuaha-ndo tnúhu Yá Ndiöxí, chi xǎⁿ cùú-xi mèe-ni tnúhu vǎha, te ducaⁿ te cuita cuehnu nihnu-ndo ìchi-gá quíhíⁿ ndéé ná sǎá nduu cùndecu-ndo núú ndécú-gǎ. ³ Te ducaⁿ xìni ñuhu-xi cada-ndo, chi nchòhó sa ní cutnùnì ndisa iní-ndó sǎ Yá Ndiöxí ío váha iní-gá.

Xítóhó Jesucristú cùú-gǎ dàtná ñⁿ yúú

⁴ Te ío nanducu nihnu-ni-ndo Xítóhó Jesucristú Yaá quíde nàcuáa naníhí tàhú-ó. Te ñu-gá ní cuu-gá dàtná ñⁿ yúú sǎ ñà túú nàndìhi sá cùú-xi ñáyiú ñuyíú-a, chi ní dáquée tíhú ñáhǎ-yu xii-gá. Dico Yá Ndiöxí ní cachí-gá sá Xítóhó Jesucristú cùú-gǎ dàtná ñⁿ yúú sǎ ío-gá váha, chi ío cùnuu-gá. ⁵ Te nchòhó sa ní naníhí tàhú-ndó, te ío-gá chí nándücu nihnu Yá Ndiöxí cuèndá cuu ñⁿnuu-ndo cùndecu-ndo ndìhi Espíritú-gá. Te núu ducaⁿ na càda-ndo te cuu-ndo dàtná yúú vǎha dàcaa-güedé dava vehe, te cuu tucu-ndo dàtná cue dútú ní xinu cuechi núú Yá Ndiöxí ndéé sanaha, nàcuáa ñà túú nǎ cumání-ndó nùú-gǎ, chi nchaa cue téé-áⁿ nǐ xóo cuáha ñaha-güedé

sá nǐ xóo nduu táhú-gǎ. Te nchòhó vitna tàú-ndó càda-ndo nchaa nacuaá càháⁿ-gá, te nduu vétú iní-gá. Te ducaⁿ càda-ndo chi ndècu-ndo ndihí Xítóhó Jesucristú. ⁶ Te Yá Ndiòxí càchí-gá núú tütú-gá:

Yúhú taxi ndecu-í ìⁿ Yaá ñuú Sìón,
te cuu-gá dàtná ìⁿ yúú vǎha sá sánútnǐ-güedé
xíquí cimièntú ìⁿ vehe, chi yúhú ní
cachí-í sá Yáá-áⁿ ïo cunuu-gǎ.

Te nchaa ñáyiu quindáá iní ñáhá xii-gá vǎ
ìⁿ ndùu ndixi cuèchi iní-yu sá dúcáⁿ
sàndáá iní ñáhǎ-yu xii-gá.

Duha càchí-gá núú tütú-gá. ⁷ Te nchòhó ñáyiu sàndáá iní ñáhá xii Xítóhó Jesucristú ïo cùu iní-ndó-gǎ, te nchaa ñáyiu ñá túú sàndáá iní ñáhá xii-gá quidè-yu dàtná càháⁿ-xi núú tütú Yá Ndiòxí núú càchí-xi:

Yúú sǎ nǐ dáquéé tǐhú cue téè dàcaa vehe,
xíǎⁿ cúú-xí yúú sǎ ïo-gá nándǐhi
vitna.

Duha càchí-xi núú tütú-gá. Te yúú-ǎⁿ cada iní-ó sǎ cúú-xí Xítóhó Jesucristú, chi ní dáquéé tǐhú ñáhá-güedé xii-gá. ⁸ Te càchí tucu-xi ìngá xichi núú tütú Yá Ndiòxí:

Yúú-ǎⁿ nguñenu ñáyiu te nduá-yu.

Duha càchí-xi núú tütú-gá. Te tnúhu-áⁿ quée-xí sǎ ïo quide sáá iní ñáyiu núú-gǎ, chi ñá túú cuení-yu tnǐ-yu tnúhu càháⁿ-gá, te ducaⁿ tnàhí ndéè tnuní sá ncháá ñáyiu ñá túú cuení tnǐ tnúhu càháⁿ-gá, te ïo cùu sáá iní-yu núú-gǎ.

Ñáyiu ndècu ndihí Yá Ndiòxí

⁹ Te nchoo cùu-o ñáyiu sa ní dáquéé dǐⁿ ñaha Yá Ndiòxí xii-o cuendá cundecu-o ndihí-gá, te cùu-o dütú xínú cuèchi-o núú-gǎ, te mee-gǎ cúú-gǎ Yaá ïo cunuu, te cùu-o ñáyiu quide ndáá xǐndecu ichi-gá te cùu tucu-o ñáyiu yǐndaha-gá. Te ducaⁿ nǐ quide ñaha-gǎ xii-o cuendá sá cǔñaha-o xii nchaa ñáyiu sá ïo càhnu cuu-gá, te ïo vǎi núú sǎ vǎha quide-gá, te dǐu-gá ní quide ní dáñá-ó nchàa ichi cuèhé ichi duha ndècu-o ní cuu, te ní sanu ichi ñaha-gǎ xii-o ìⁿ ichi váha, te vitna cùtnuní iní-ó sǎ ïo càhnu cuu-gá. ¹⁰ Te nchoo cùu-o ñáyiu ñá túú ndècu ndihí Yá Ndiòxí ní cùu, dico vitna ní ngúndecu ndihí-o-gǎ, te dàvá-áⁿ vǎtá sáá-gá nduu càda váha ñaha-gǎ xii-o, dico vitna sa

ní sáá nduu quide váha ñaha-gǎ xii-o, chi ïo cùndahú iní ñáhá-gǎ.

Cada váha-o cùndecu-o cunu cuechi-o núú Yá Ndiòxí

¹¹ Te nchòhó ïo cùu iní ñáhà-í xii-ndo, te càchí tnúhu-í xii-ndo sǎ nchóó cùu-o datná cue ñáyiu ndècu tñaduha ìⁿ ñuú, te ducaⁿ sǎtnahá-xi cùu-o chi tnaa-ni ndècu-o ñuyúú-a, te sáá nduu nduu táhú-ó cùndecu-o núú ndécú Yá Ndiòxí táxí tnùní-gá, te xǐǎⁿ càháⁿ ndàhú-í núú-ndó sǎ vǎ càdá-ndó nǐ ìⁿ sá cuèhé sá dúhá sàni iní-ndó, chi nchaa xǐǎⁿ ñá túú cùu-xi sǎ váha sá cúú-xi-ndó. ¹² Te cada váha-ndo cùndecu-ndo núú nchàa ñáyiu ñá túú ndècu ichi Yá Ndiòxí, te cuèi na càháⁿ ñáyiu sá nchòhó nchicúⁿ nihnu-ndo ichi cuèhé ichi duha, dico quini-yu nchaa sá váha quide-ndo, dico na sáá nduu dǎndixi túu Yá Ndiòxí iní-yu sá ñá túú quide váha-yu ndécú-yu, te dàvá-áⁿ cachí-yu sá quidè vǎha-ndo ndècu-ndo, te cada càhnú-yu Yá Ndiòxí.

¹³ Te Xítóhó Jesucristú cuení-gá sá nchòhó ïo quindáá iní-ndó nchàa cue téè cùchiuⁿ taxi tnuní ñáhá xii-ndo, te ducaⁿ-ni quindáá iní-ndó cuèi mee téè cunuu vihi-gá yǐndàha ñaha xii ñáyiu. ¹⁴ Te ducaⁿ-ni quindáá iní-ndó nchàa dava-gá cue téè cunuu, chi Yá Ndiòxí ducaⁿ nǐ cachí-gá cunduu sá cuè téè-áⁿ cada ndáá-güedé nchaa cuèchi ñáyiu quide cuèhé quidè dùha ndecu, te càháⁿ váha-güedé cuendá nchaa ñáyiu xǐquide váha ndècu. ¹⁵ Te Yá Ndiòxí cuení-gá sá càdá vǎha-ndo cùndecu-ndo cuendá nchaa ñáyiu ïo nǐ dǐquí-xi càháⁿ cuèhé cuendá-ndó sǎ ndécú-ndó ichi Yá Ndiòxí vá ñihí-gá-yu tnúhu càháⁿ-yu.

¹⁶ Te nchòhó, Yá Ndiòxí ní quide-gá sá cúú-ndó ñáyiu cuu cada nàcuáa véxi iní méé-xí, dico ñá díú sǎ dúcáⁿ nǐ quide ñaha-gǎ xii-ndo, te ngóo-ndo càni iní-ndó càda-ndo nándi sá cuèhé sá dúhá, chi cada-ndo sǎ cúú-ndó ñáyiu xǐnu cuechi núú Yá Ndiòxí. ¹⁷ Te canehe-ndo sǎ yǐñùhu núú nchàa ñáyiu, ndihí núú téè cunuu vihi yǐndaha ñaha xii-yu, te cuu iní tnáhá ndǐ mee-ndo nacuaá ndècu-ndo ichi Yá Ndiòxí, te ïo canehe-ndo sǎ yǐñùhu núú-gǎ.

Nchaa nàcuáa ndoho-o cùndecu-o ichi Xítóhó Jesucristú

18 Te nchaa nchòhó ñáyiú xínu cuechi canehe-ndo sã yíñuhu núú cuè patrón-ndó, te quindáá iní-ndó càda-ndo nchaa chiu tahu-güedé. Te ñni càda-ndo núú cuè téé váha iní-xi, ndihi núú cuè téé ío cuihna iní-xi. 19 Te núú nchòhó ná càda ndee iní-ndó ndòho-ndo nchaa sã ñà túú tàú-ndó ndòho-ndo cuendá sã cuiní-ndó cundáá-ndó núú Yá Ndióxi ñá, te ío nduu vétú iní-gá. 20 Te núú nchòhó ní quide-ndo ñni cuéchi, te sàhni iní-ndó dandòho ñaha ñáyiú xii-ndo, ¿te ná sã váha cùu xiá-i? Dico núú nchòhó ná cáda ndèe iní-ndó ndòho-ndo nchaa sã cáda ñaha ñáyiú xii-ndo sã cuendá sã quidé-ndó sã váha ña, te núú duca na càda-ndo te cùu-xi ñni sã váha núú Yá Ndióxi. 21 Te Yá Ndióxi ní cachí-gá sã cáda ndèe iní-ó ndòho-o nándi ndòho-o sã cuendá sã quidé-ó sã váha, chi ío ní ndòho Xítóhó Jesucristú cuendá-ó, te duca tàú-ó cànchicú nihnu-o càda ndee iní-ó ndòho-o nándi ndòho-o, chi duca ní quide-gá. 22 Te mee-gá ñà túú quide-gá ni ñni sã cuèhé sã dúhá, te ni ñni tnúhu ndehnde ñà túú càhá-gá. 23 Te òré ní xóo cúcuèhé ñáhá-güedé xii-gá, te ñà túú ní xóo danchòcáva-gá tnúhu cuèhé, te òré ní xóo dandòho ñaha-güedé xii-gá, te ñà túú ní xáha-gá xii-güedé sã ío ná cada ñaha-gá, chi núú ndáhá Yá Ndióxi ní xóo nachihi-gá méé-gá, ndihi nchaa sã sání iní-güedé cada ñaha-güedé xii-gá. Te Yá Ndióxi cúu-gá Yaá ío váha cada ndáá cuéchi nchaa ñáyiú na sàá nduu. 24 Te Xítóhó Jesucristú cúu-gá Yaá ní xíhí núú cùrúxí cuendá nchaa cuéchi nchoo ñáyiú ndècu ñuyíú-a. Te duca ní xíhí-gá cuendá nchoo dùu duu dañá-o nchaa ichi cuehé ichi duha, te cada ndáá-ó cundecu-o ichi-gá. Te ní dánicuèhé ñáhá-güedé xii-gá, te sã dúcá ní ndòho-gá xiá ní ngúndecu váha nchoo vitna. 25 Te nchoo cùu-o datná cue mbéé cue quiti ní xíta ní cùu, dico vitna ní tuha-o Xítóhó Jesucristú, te Yaá-án cúu-gá datná ñni toli xító ñaha-gá xii-o vitna cuendá sã vã cuíta nihnu-o.

3

Nàcuáa tàú ñáyiú tnándaha cadá-yu cundecú-yu

1 Te nchaa nchòhó ñáyiú ñni ní tnandaha ío quindáá iní-ndó yñ-ndo cuendá sã núu

ñà túú sàndáá iní-güedé tnúhu Yá Ndióxi te quindáá iní-güedé cuendá sã ndéhe-güedé quidé ndáá-ndó ndècu-ndo, te ni ñà túú xini ñuhu-xi cáhá-ndó tnúhu-gá núú-güedé. 2 Chi ndèhe mee-güedé sã nchòhó quidé ndáá-ndó ndècu-ndo, te nèhe-ndo sã yíñuhu núú Yá Ndióxi. 3 Te vá cáni iní-ndó mèe-ni cunduu vii-ndo, te ndada-ndo díqui-ndó nàcuáa tàú-xi cunduu, te vá cáni iní-ndó nándi canehe-ndo, te ni vá cáni iní-ndó cuihnu-ndo mee-ni dóó váha sã ío vii ndáa. 4 Chi iní-ndó xini ñuhu-xi cunduu vii cunduu váha-xi núú Yá Ndióxi cuèi vitna te cuèi núú cuáhá núú véxi, te cuu-ndo ñáyiú ío càhnu iní-xi, te núú duca na càda-ndo te ío cuu váha iní Yá Ndióxi. 5 Te duca ío vii ío váha ní xínduu iní nchaa ñáyiú ñni ní xíndecu ndéé sanaha, te ñáyiú-án ío ní sàndáá iní-yu Yá Ndióxi te ní cudíu-yu núú-gá, te ní tní-yu nchaa tnúhu ní cáhá yñ-yu. 6 Te duca ní xóo cada ndíi Sárá ní xóo quindáá iní ndíi yñ ndíi, ndíi Àbrahám, te ní canehe ndíi ñni-án sã yíñuhu núú yñ ndíi. Te núú nchòhó quidé váha-ndo ndècu-ndo te ñà túú yuhú-ndó ñà cada ñaha tnàha ñáyiú-ndo xii-ndo, te núú duca quide váha-ndo ndècu-ndo te quide-ndo datná ní quide ndíi Sárá.

7 Te nchòhó cue téé ndècu ñadihí-xi ío váha cuáha-ndo cuendá nàcuáa cundecu váha-ndo ndíhí-yu, te ío vii cáhá ñni-ndó-yu, chi ñáyiú-án íi-gá-yu dàcúxí nchòo cue téé, te duca càda-ndo chi ndí ndíu-ndó ndíu táhú-ndó cundecu-ndo ndíhí Yá Ndióxi, te núú duca na càda-ndo te òré cáhá ñni-ndo Yá Ndióxi te tedóho ñaha-gá xii-ndo.

Ñáyiú quide sã váha ndòhó-yu

8 Te càhí tnúhu tucu-í xii-ndo sã ío cuu ñni-ndo cundecu-ndo, te cundáhú iní tnáhá-ndó ñni ñni-ndo, te cuu iní tnáhá tucu-ndo nàcuáa ndècu-ndo ichi Yá Ndióxi, te cuu-ndo ñáyiú ndáhú iní-xi. 9 Te núú ñni sã ñà túú váha quide ñaha ñáyiú xii-ndo, te ñà díu-ní dùca nanchocáva-ndo càda-ndó-yu, àdi xícuèhé ñáhá-yu xii-ndo, te vá ná danchocáva-ndo ñni-ndó tnúhu cuèhé, chi cáhá táhú-ndó núú Yá Ndióxi cuendá sã ná cáda váha ñaha-gá xii-yu, te duca càda-ndo chi Yá Ndióxi ní cáhá ñáhá-gá xii-ndo cuendá sã cáda váha ñaha-gá xii-ndo

tnàhá-ndó. ¹⁰ Te núú tùtú Yă Ndiöxí cächí-xi:

Nchaa ñáyiú cuìní cundecu váha ndi nchàa nduu nini cundecú-yu ñuyíú-a, xini ñuhu-xi sá vă cãháⁿ-yu tnúhu cùtexínu, te ni vă dácuañdehndé-yu.

¹¹ Te xini ñuhu-xi duuⁿ duuⁿ dañá-yu nchaa ichi cuèhé ichi duha, te cadá-yu mee-ni sã vãha, te ío nducú-yu nàcuáa cadá-yu cundecu váha-yu ndihi tnàha ñáyiú-yu te ñiu-ni ducaⁿ cànchicúⁿ nihnú-yu cadá-yu.

¹² Te Yá Ndiöxí xító-gã nchaa ñáyiú quide ndáá núú-gã te tedóho-gã nchaa tnúhu cãháⁿ-yu, dico nchaa ñáyiú ñá túú cuìní cada ndáá, ñáyiú-áⁿ ñà túú cùu váha iní-gã núú-yu.

Duha cächí-xi núú tùtú-gã.

¹³ Te vá yõ níhí ndéé cada ñaha xii-o ñⁿ sá ñà túú vãha te núu mee-ni sã vãha na càda-o cundecu-o. ¹⁴ Àdi núu ná cúú sã ná cáda ñaha ñáyiú xii-o sã cuendá sá quidé vãha-o ndècu-o ña, te sá dúcáⁿ ná cáda ñahá-yu xii-o cùu-xi ñⁿ sá vãha sá cúú-xí-ó núú Yă Ndiöxí. Te na cächí tnúhu-í xii-ndo sã vă yùhú-ndó-yu, te ni vă cùndiyí-ndó cuendá nchaa sá ná càda ñahá-yu xii-ndo. ¹⁵ Te nèhe-ndo sá yíñuhu núú Xítóhó Jesucristú. Te ío cundecu túha-ndo dānehé-ndó ñáyiú véxi ndècu tnúhu núú-ndó nàcuáa nduu tnúhu ndee iní ní taxi Xítóhó Jesucristú ndécú ndihi-ndo, te cuu vii cuu váha iní-ndó cãháⁿ ndihi-ndó-yu, te cãháⁿ-ndó núú-yu mee-ni tnúhu yíñuhu nacúáa cùu váha iní Yă Ndiöxí. ¹⁶ Te ío cada váha-ndo cundecu-ndo cuendá sá vă cùndiyí-ndó, te núu ducaⁿ na càda-ndo, te nchaa ñáyiú xicuèhé ñahá xii-ndo cuendá sá quidé vãha-ndo ndècu-ndo ichi Xítóhó Jesucristú quendóo canúú-yu ndihi nchaa tnúhu cãháⁿ-yu, chi nchòhó quidé vãha-ndo ndècu-ndo. ¹⁷ Te váha-gã sá ndóhó-ó cuendá sá quidé-ó sã vãha te núu mee Yă Ndiöxí ducaⁿ cuìní-gã cunduu, te ñá díú sã ndóhó-ó cuendá sá ñà túú quide-o sã vãha.

¹⁸ Te Xítóhó Jesucristú ní xihí-gã sá cuendá nchaa cuéchi nchaa nchoo ñáyiú ndècu ñuyíú-a, te ñⁿ xito-ni ducaⁿ ní xihí-gã te ducaⁿ te vá cùú tnàhí-gã, te mee-gã

cúú-gã Yaá ñá túú tnàhí cuéchi-xi, te ducaⁿ ní ndoho-gã cuendá nchaa cuéchi ñáyiú ndècu ñuyíú-a ñáyiú ñá túú cuìní cada ndáá núú Yă Ndiöxí, te ducaⁿ ní cuu cuendá sá núcundecu váha-yu núú Yă Ndiöxí te núu na quindáá iní ñáhã-yu xii-gã. Te mee-gã ní xihí-gã dico Espiritú-gã chi ní xindecu-ni-xi, ¹⁹ te Espiritú-gã ní sáhãⁿ-xi ní cãháⁿ-xi tnúhu Yă Ndiöxí núú nchaa espíritú ñáyiú ndècu núú ùhú núú ndàhú. ²⁰ Te ñáyiú-áⁿ cúú ñáyiú ní xindecu ndéé sanaha cùtnàhá ní xindecu ndí Nöé, chi ñáyiú-áⁿ ío ní quide sàá iní-yu núú Yă Ndiöxí. Te Yă Ndiöxí ío váha iní-gã, chi ní dácacá-gã nduu ní xindecu ndí Nöé ní cadúha ndí bàrcú cuendá ndétú-gã ndixi cuéchi iní-yu sá ñà túú quide váha-yu ndècú-yu ni cùu. Te dàvá-áⁿ ní ndaa ndute ñuyíú te ní cácu úná duha ná tnàhá ñáyiú, chi ní quée-yu xití bàrcú-áⁿ, te ñá túú ní cãhá-yu. ²¹ Te sá dúcáⁿ ní cácu ñáyiú úná-áⁿ ñà túú ní cãhá-yu ndute ní ndaa ñuyíú dàvá-áⁿ. Te xiãⁿ quée-xí sã cuándute ñáyiú vitna, te naníhí tàhú-yu te núu na quindáá iní-yu tnúhu ndáá tnúhu Yă Ndiöxí. Te ñá díú sã cuándute-o te nduu ndoo nduu nine yiqui cùñú-ó te naníhí tàhú-ó, chi xini ñuhu-xi náhmá-ó núú Yă Ndiöxí nchaa yíca cuéchi-o, te nduu ndoo nduu nine iní-ó, te ducaⁿ te naníhí tàhú-ó, chi Xítóhó Jesucristú ní xihí-gã cuendá-ó te ní ndoto-gã. ²² Te Yaá-áⁿ cuãndaa-gã andiu, te ní ngóo-gã xio cùha Yă Ndiöxí, te tàxi tnuní-gã nchaa espíritú cùnùu ndihi nchaa dava-gã cue espíritú xínú cuéchi.

4

Cada-o nàcuáa cuìní mée Yă Ndiöxí

¹ Te Xítóhó Jesucristú ní ndoho-gã cùtnàhá ní xindecu-gã ñuyíú-a, te vitna nchòhó cundecu túha-ndo ndòho-ndo cuendá-gã, chi nchaa ñáyiú ndòho nándi sá ndóhó cuendá-gã dañá-yu nchaa sá cuèhé sá dúhá. ² Te ducaⁿ ñà túú-gã ndécú-yu ichi cuèhé ichi duha, chi mee-nã nàcuáa cãháⁿ Yă Ndiöxí quidè-yu ndècú-yu ñuyíú-a. ³ Te nchòhó sa nàha-ndo sá ío cuèhé núú sã cuèhé sá dúhá ní xóo cada-o cùtnàhá vátá cùndecu-gã-ó ichi Yă Ndiöxí, chi ní xóo cada-o nchaa sá cuèhé sá dúhá cùdí iní nchaa ñáyiú ñá túú sàndáá iní tnúhu-gã,

te dàvá-áⁿ nǐ xóo cada-o nchàa núú sǎ cuèhé sá dúhá, te ní xóo caní cuèhé ní xóo caní duha iní-ó, te ní cuu-o cuè ñáyiú quihu, te ní xóo cundecu-o víco núú nǐ xóo cada-o nchàa sá ñà túú vǎha, te ní xóo níhí tnáhá-ó ndìhí nchaa tnaha quihu-o, te ní xóo chiñuhu-o nchàa sá càchí-yu cùu ndióxí te ñá ndáá sá ndiöxí cúú nchàa xǎⁿ, te nándi-gá nchaa sá cuèhé sá dúhá nǐ xóo cada-o dàvá-áⁿ. ⁴ Te ñáyiú-áⁿ cúñuhu-yu vitna sá ñà túú-gǎ nìhí tnáhá-ó ndìhí-yu cada-o nchàa sá cuèhé sá dúhá quidé-yu, te xǎⁿ càháⁿ cuèhé-yu cuèndá-ó vitna. ⁵ Dico sáá nduu te ñáyiú-áⁿ nǎhmá-yu nchaa sá quidé-yu núú Xítohó Jesucristú, chi ñu-gá sa ndècu túha-gá sá cáda ndáá-gá cuéchi nchaa ñáyiú sa ní xíhí, ndìhí cuéchi nchaa ñáyiú xǐndecu vǐvú. ⁶ Te cue ñáyiú sa ní xíhí ní xǐndedóho tnúhu Xítohó Jesucristú, te cuèi ní xíhí-yu dàtná xíhí dava-gá ñáyiú, dico espíritú-yu chi ní nduu táhú-xi ndècu váha-xi dàtná ndécú Yá Ndiöxí.

⁷ Te vitna ta cùyatni danaa Yá Ndiöxí ñuyíú-a núú xǎⁿ ío váha cuáha-ndo cuèndá nàcuáa cundecu-ndo, te càháⁿ ndìhí-ndo-gǎ. ⁸ Te xìni ñuhu-xi sá ío cuu iní tnáhá-ndó ñⁿ ñⁿ-ndo, chi núú ducaⁿ na cùu iní tnáhá-ndó ñⁿ ñⁿ-ndo, te vá cáni-gǎ iní-ndó càda cuèndá-ndó nchàa sá ñà túú vǎha quide ñaha ñáyiú xii-ndo, ⁹ te nchòhó ñáyiú xǐndecu vehe-xi cuáha nùu-ndo vehe xii cue ñáyiú ñuhu ichi na ndetatú-yu, te ío váha cuu iní-ndó dùcaⁿ cada-ndo. ¹⁰ Te Yá Ndiöxí ní taxi-gá ndí díⁿ núú táhú ndécú ndìhí-ndo ñⁿ ñⁿ-ndo, te nàcuáa ndùu táhú nǐ nduu táhú-ndó ñⁿ ñⁿ-ndo te ducaⁿ chindee tnaha-ndo, te vá dáñá ndéè-ndó càda-ndo nchaa nacuáa tàuchiuⁿ Yá Ndiöxí cada-ndo, te chindee ñaha-gá xii-ndo. ¹¹ Te dava nchòhó ñáyiú càháⁿ tnúhu Yá Ndiöxí núú ñáyiú, xìni ñuhu-xi càháⁿ-ndó nàcuáa ndùu tnúhu-gá núú-yu, te dava nchòhó ñáyiú quide nchaa núú chiuⁿ chindee tnaha ñáyiú-xi, xìni ñuhu-xi cada-ndo sá Yá Ndiöxí chindèe ñaha-gá xii-ndo, te ducaⁿ càda-ndo nchaa núú sá vǎha, chi Xítohó Jesucristú tnáhá-gá chindèe ñaha-gá xii-ndo, te ducaⁿ ío cuu càhnu Yá Ndiöxí. Te vitna tàú-ó càháⁿ-ó sá ío càhnu cuu Xítohó Jesucristú, chi ñu-gá cùnùu-gá nchaa nduu nchaa quíú, te ducaⁿ na cùnduu.

Ndoho tnahá-ó cùndecu-o ichi Xítohó Jesucristú

¹² Te nchòhó ñáyiú ío cùu iní-í, vá cúñuhu-ndo sǎ ío ndòho-ndo ndecu-ndo ichi Xítohó Jesucristú, chi sá dúcáⁿ ndòho-ndo-áⁿ cútnùní ndisa sá sàndáá iní-ndó-gǎ, te vá cáni iní-ndó nǎ cuèndá ducaⁿ ndòho-ndo. ¹³ Chi da cudíⁿ iní-ndó te núu ndòho-ndo datná ní ndoho Xítohó Jesucristú, te ducaⁿ sùúni cùdíⁿ iní-ndó òré ná quixi tucu-gá ñuyíú-a te dàvá-áⁿ quini-ndó sǎ ío càhnu cuu-gá. ¹⁴ Te núu xǐcuèhé ñáhá ñáyiú ndècu ichi cuehé ichi duha xii-ndo cuèndá sá ndécú-ndó ichi Xítohó Jesucristú, te xǎⁿ cúú-xí ñⁿ sá vǎha sá cúú-xí-ndó núú-gǎ, te ducaⁿ chi Espíritú Yá Ndiöxí sá ío cùnùu ndecu ndìhí ñaha-xi xii-ndo, te nchaa ñáyiú ndècu ichi cuehé ichi duha-áⁿ càháⁿ cuèhé-yu cuèndá Xítohó Jesucristú, dico nchòhó càchí-ndó sǎ ío càhnu cuu-gá. ¹⁵⁻¹⁶ Te núu nchòhó dándòho ñaha ñáyiú xii-ndo sǎ cuèndá sá ndécú-ndó ichi Xítohó Jesucristú ñá, te vá cúú càháⁿ núú-ndó, chi ndacáⁿ táhú-ndó núú Yá Ndiöxí cuèndá sá ndécú-ndó ichi-gá. Te cuèi ndòho-ndo ndecu-ndo, dico ñá túú cùu-ndo ñáyiú sàhni ndíyí te ni ñà túú cùu-ndo ñáyiú dùhu, te ni ñà túú cùu-ndo ñáyiú quide cuehé quidé dùha, te ni ñà túú cùu-ndo ñáyiú chindee tnúhu tnàha ñáyiú-xi ñⁿ sá ñà túú tàú-ndó càda-ndo.

¹⁷ Te vitna sa quèsaha Yá Ndiöxí cada ndáá-gá nchaa sá quidé nchòo ñáyiú ndècu ndìhí-gá, te núu ducaⁿ te ndéè-gá cada-gá nchaa ñáyiú ñá túú sàndáá iní ñáhá xii-gá òré ná sáá nduu dùcaⁿ cada ñaha-gá xii-yu. ¹⁸ Te nchòhó xini-ndó sǎ ñáyiú quide váha ndècu ichi Xítohó Jesucristú ndòho tnahá-yu ndécú-yu, dico sáá nduu te nduu táhú-yu cundecú-yu ndìhí-gá. Te núu ducaⁿ ndòho nchaa ñáyiú quide váha ña, ¿te nása-gá yáha nchaa ñáyiú ndècu ichi cuehé ichi duha na sáá nduu càda ndáá Yá Ndiöxí cuéchi-yu-i? ¹⁹ Te nchaa nchòhó ñáyiú ndòho nacuáa cuíni Yá Ndiöxí xini ñuhu-xi sá vǎ dáñá ndéè-ndó càda váha-ndo cùndecu-ndo, te ío quindáá iní-ndó sǎ xító ñaha-gá xii-ndo. Te ñu-gá cúú-gǎ Yaá ní cadúha ñaha xii-o, te quide-gá ñⁿ sá càháⁿ-gá.

Nàcuáa tàú-xi cada ñáyiú ndècu ichi Xítóhó Jesucristú

¹ Te yúhú càháⁿ-í dóho nchaa nchòhó cue téé yíndaha nchaa dava-gá ñáyiú ndècu ichi Xítóhó Jesucristú, chi tnàhá yúhú yíndàha-í ñáyiú ndècu ichi-gá, te sàndáá iní-í tnúhu-gá, te ní xiní-í nchaa nàcuáa ní ndoho-gá, te sáá nduu te tnàhá-í cunuu-í ndíhi-gá. ² Te ío canehe cuèndá-ndó nchàa ñáyiú ndècu ichi Yá Ndiöxí yíndàha-ndo te cada-ndo dàtná quidé cuè toli, chi cue téé-áⁿ ò váha xító-güedé mbéé-güedé. Te canehe cuèndá-ndó-yu sá cúú iní méé-ndó te ñá díú sá ío ñá ñáyiú cada yica ñàha xii-ndo, te ni ñà díú sá cuíní-ndó cùhuⁿ yáhu-ndo, chi ni yùhu ni iní-ndó còto-ndó-yu, chi ducaⁿ cuíní Yá Ndiöxí cunduu. ³ Te vá cáda-ndó sá ò cùnuu-ndo núú-yu, chi cada-ndo mée-ni sá váha cuèndá ducaⁿ càncicúⁿ nihnú-yu cada-yu tnàhá-yu. ⁴ Te òré ná quíxí tucu Xítóhó Jesucristú Yáa néhé cuèndá ñàhá xii-o nchaa-o ñuyíú-a, te taxi-gá sá ò váha nduu táhú-ó, te cunuu-o ndíhi-gá ni caa ni quíhíⁿ.

⁵ Te nchòhó ñáyiú ndècu ichi Xítóhó Jesucristú càháⁿ-í dóho-ndo sá ò quíndáá iní-ndó cuè téé yíndaha ñàha xii-ndo nacuáa ndècu-ndo ichi-gá, te nchaa-ndo tàú-ndó quíndáá iní tnàhá-ndó ñá ñá-ndo, chi núú tütú Yá Ndiöxí càchí-xi ñá xichí:

Nchaa ñáyiú quíde cahnu mee-xi ñá túú cùu váha iní Yá Ndiöxí núú-yu, dico nchaa ñáyiú ndàhú iní-xi te chindee ñàha-gá xii-yu.

Duha càchí-xi núú tütú-gá. ⁶ Te dañà-ndo mée-ndo núú ndàhá Yá Ndiöxí, chi mee-gá ío cùnuu-gá. Te núú ducaⁿ na càda-ndo, te sáá nduu te cada nínu ñàha-gá xii-ndo.

⁷ Te nchaa sá yàha-ndo ndècu-ndo te nachihi-ndo ndàha Yá Ndiöxí, chi mee-gá xító ñàha-gá xii-ndo.

⁸ Te ío váha cuáha-ndo cuèndá cundecu-ndo, te quíhi iní-ndó chi sàcuíhná xicá cùu-xi cuíní-xi dacuíta nihnu ñàha-xi xii-o, chi ío cùu úhú iní ñàhá-xí, te cùu-xi datná ñá quíti dééⁿ xicá ndùcu sá cáxí-xí. ⁹ Te ío quíndáá iní-ndó Xítóhó Jesucristú, te vá dáñá-ndó mée-ndo dandahú ñàhá sàcuíhná xii-ndo càda-ndo nacuáa cuíní-xi, chi ñàha-ndo sá ncháá ñáyiú ndècu ichi Xítóhó

Jesucristú xíndecu nihí ñuyíú ndóhó-yu dàtná ndóhó nchòo ndecu-o ichi-gá. ¹⁰ Dico sacú-ni nduu duha cundoho-o te dàtnúni ñá túú-gá ná cumáni-ó cundecu-o núú Yá Ndiöxí, te dàvá-áⁿ vǎ cání ñá cani úú iní-ó cundecu-o ichi-gá. Te ío-gá ngúndecu ndíhi-o tnúhu ndee iní cada-o nchàa nacuáa càháⁿ-gá, te ducaⁿ càda-o chi mee Yá Ndiöxí ío chindee ñàha-gá xii-o, te díu-ni Yáa-áⁿ ò cùu iní ñàhá-gá xii-o, chi ní cáháⁿ ñàhá-gá xii-o cundecu-o núú ò váha càa ndecu-gá cundecu-o ni caa ni quíhíⁿ, te ducaⁿ ni quíde-gá chi ní sàndáá iní-ó Xítóhó Jesucristú. ¹¹ Te ío ndacáⁿ táhú-ó núú Yá Ndiöxí chi ío càhnu cuu-gá, te cùnuu-gá nchaa nduu nchaa quíú. Te ducaⁿ na cunduu.

Tnúhu ndéé núú ní ndíhi-ná

¹² Te té Silvanú xiní-í sá cúú-dé ñá téé quíde ndáá ndécú ichi Xítóhó Jesucristú, te díu-dé ní cáháⁿ ndàhú-í núú-dé ní tee-dé ñá úú tnúhu sá ni xàháⁿ-í xii-dé núú tütú-a cuèndá daquixi-í ndaha-ndo, te núú tütú-a càchí tnúhu ndáá-í xii-ndo sá Yá Ndiöxí ío cùu iní ñàhá-gá, te chindee ñàha-gá xii-ndo ndècu-ndo, te càchí tnúhu tucu-í xii-ndo sá ò quíndáá iní-ndó sá ndáá ducaⁿ quíde ñàha-gá xii-ndo.

¹³ Te cue ñáyiú ndècu ñúú Babiloniá, ñáyiú ndècu ichi Yá Ndiöxí, díu-ni ñáyiú ní cachí Yá Ndiöxí sá nánihí tàhú dàtná cúú nchòhó, ío quíde ndee iní ñàhá-yu xii-ndo, te tnàhá té Mácú téé cùu datná ñá déhe-í quíde ndee iní ñàhá-dé xii-ndo. ¹⁴ Te ndíhi tnúhu yíñùhu cada ndee iní tnàhá-ndó ñá ñá-ndo, te xicáⁿ táhú-í núú Yá Ndiöxí sá ò na cundecu nahí nchaa nchòhó ñáyiú ndècu ndíhi Xítóhó Jesucristú. Te ducaⁿ na cunduu. Te ío chí cáda ndèe iní-ñá vitna.

TUTÚ CÚÚ ÒÚ NÍ CADÚHA TÉ PÈLÚ

Té Pèlú cadúha-dé tutú quíhíⁿ ndaha ñáyiú sàndáá iní tnúhu Yá Ndióxi

¹ Yúhú té Xímú, àdi Pelú chi úú òú-í, xínú cuèchi núú Xítohó Jesucristú, chi mee-gá ní tendaha ñàha-gá xii-í xicá cùu-í càháⁿ-í tnúhu-gá. Te cadúha-í tutú-a sá cúú-xí nchàa nchohó ñáyiú sàndáá iní ñáhá xii-gá dàtná sàndáá iní-ndí-gá, te ducaⁿ chi Tátá-ó Dútú Ndióxi ní dácàháⁿ-gá iní-ó ní sàndáá iní-ó-gá, chi cùu-gá Yáá ío váha quide ndáá ndíhi Xítohó Jesucristú Yáá dácàcu nihnu ñaha xii-o núú ùhú núú ndàhú. ² Te xicáⁿ táhù-í núú Yá Ndióxi sá ùuⁿ-gá uuⁿ-gá ná cuita chindee chitúu ñaha-gá xii-ndo quíhíⁿ, te ducaⁿ ío váha cuu iní-ndó cùndecu-ndo, te ducaⁿ càda-gá chi ta cùtnuní-gá iní-ndó nàcuáa ndùu cuendá-gá, te ducaⁿ ta cùtnuní tucu iní-ndó nchàa nàcuáa ndùu cuendá Xítohó Jesucristú Yáá cúú Xítohó-ó.

Nàcuáa quide ñáyiú ndècu ichi Xítohó Jesucristú

³ Te Yá Ndióxi ío càhnu cuu-gá chi chindee ñaha-gá xii-o quide ndáá-ó ndècu-o datná cuení méé-gá, te ducaⁿ chi cùtnuní iní-ó nàcuáa sàni iní Xítohó Jesucristú Yáá ní cáháⁿ ñáhá xii-o. Te òré ní cáháⁿ ñáhá-gá xii-o te ní cutnùní iní-ó sá ío càhnu cuu-gá te ío váha quide-gá. ⁴ Te ducaⁿ ní cutnùní tucu iní-ó nàcuáa ní cáháⁿ-gá cada ñaha-gá xii-o, te tnúhu ní cáháⁿ-gá-áⁿ ío càhnu cuu-xi te ío váha, te nchoo ní sàndáá iní-ó tnúhu-áⁿ núu xíáⁿ ñá túú-gá ndécú-ó ichi cuehé ichi duha te ni ñà túú-gá sání iní-ó càda-o nándi sá cuèhé sá dúhá, te ní cuu vii ní cuu váha iní-ó vitna. ⁵ Te sá dúcáⁿ quide-gá te xíáⁿ ío nducu ndèe-ndo cada-ndo nchaa nàcuáa càháⁿ-í-a, te nchòhó sàndáá iní-ndó-gá dico ñá díú mèe-ni xíáⁿ chi tnàhá xíní ñuhu-xi cada ndáá-ndó cùndecu-ndo. Te núu quide ndáá-ndó ndècu-ndo te xíní ñuhu-xi tecú tnùní-ndó tnúhu-gá. ⁶ Te núu tècú tnùní-ndó te cùu-ndo ñáyiú xíní cotnì mee-xi, te núu cùu-ndo ñáyiú sàcòo tñì mee-xi te xíní ñuhu-xi cunduu cahnu iní-ndó cuèi nándi sá ná yàha-ndo

cùndecu-ndo, te núu càhnu iní-ndó te xíní ñuhu-xi cada ndáá-ndó cùndecu-ndo datná cuení méé Yá Ndióxi cada-ndo. ⁷ Te núu quide ndáá-ndó ndècu-ndo, te xíní ñuhu-xi ío cuu iní tnàhá ndí mee-ndo nàcuáa ndècu-ndo ichi-gá, te núu cùu iní tnàhá ndí mee-ndo te xíní ñuhu-xi cuu iní-ndó nchàa dava-gá tnàha ñáyiú-ndo.

⁸ Te núu sa ducaⁿ quide-ndo ndecu-ndo te uuⁿ-gá cuita ducaⁿ càda-ndo quíhíⁿ núú cuaháⁿ núú vèxi, te núu ducaⁿ quide-ndo te cùu-ndo cue ñáyiú ñá túú dàna iní-xi xíndecu, te cuita cutnùní-gá iní-ndó nchàa nàcuáa sàni iní Xítohó Jesucristú quíhíⁿ. ⁹ Te nchaa ñáyiú ñá túú cuení ducaⁿ càda cuú-yu ñáyiú ñá túú tnàhí ndíxi túu iní-xi sá Yá Ndióxi sa ní ndada ndoo ní ndada nine-gá iní-yu cuendá nchaa sá cuèhé sá dúhá ní xóo cada-yu, te ñáyiú-áⁿ cúu-yu dàtná ñì ñáyiú cuàá àdi datná ñì ñáyiú ñá túú cùtnuní váha núú-xi, te ducaⁿ sàtnahá-xi cùu-yu cuendá sá dúcáⁿ quidé-yu. ¹⁰ Te xíáⁿ núu yúhú càháⁿ-í dóho nchaa nchòhó ñáyiú ndècu ichi Xítohó Jesucristú, te ío nducu ndèe-ndo cada váha-ndo cùndecu-ndo cuendá cutnùní ndáá iní-ndó sá Yá Ndióxi ní cáháⁿ ñáhá-gá xii-ndo, te ducaⁿ ní quide-gá chi ducaⁿ ní cachí-gá cada-gá. Te vá ñìⁿ ndùu cani iní-ndó dàña-ndo ichi-gá, te núu vá dáñá ndèe-ndó càda-ndo nchaa nàcuáa càháⁿ-í-a. ¹¹ Te núu ducaⁿ na càda-ndo cundecu-ndo, te ío vii ío váha cada Yá Ndióxi queheⁿ cuendá ñáhá-gá xii-ndo òré ná sàá-ndó núú ndécú Xítohó Jesucristú táxi tnùní-gá nchaa nduu nchaa quíú, te òú-ni Yáá-áⁿ cúú Xítohó-ó te ní dácàcu nihnu ñaha-gá xii-o núú ùhú núú ndàhú.

¹² Te ducaⁿ-ni quíhí-í dandàcu iní ñáhà-í xii-ndo nchàa tnúhu càháⁿ-í-a cuèi sa xíní-ndó tnúhu-áⁿ, te cuèi sàndáá váha iní-ndó nchàa tnúhu ndáá dácàha-ndo. ¹³ Te yúhú quidé cuendá-í sá ío tàú-xi cáháⁿ-í dóho-ndo nìni ndecu-í ñuyíú-a cuendá sá vā nàcuànaa-ndo nàcuáa cada-ndo cùndecu-ndo. ¹⁴ Chi Xítohó Jesucristú ní cachí-gá sá ñà túú-gá vāi nduu cundecu-í ñuyíú-a te cuú-í. ¹⁵ Te ío nducu ndèe-í nducu-í nàcuáa cada-í cuendá quendóo ndíhi-ndo nchàa tnúhu càháⁿ-í-a, te cuèi na yàha cuú-í dico vā nàcuànaa-ndo cada-ndo nchaa nàcuáa càháⁿ tnúhu sá dánhèhé ñáhà-í xii-ndo vitna.

Cue téé ní xini núú sǎ ǎ cǎhnu cuu Xítóhó Jesucristú

16 Te sa ní dánèhé ñáhá-ndǎ xii-ndo sǎ ǎ cǎhnu cuu Xítóhó Jesucristú. Te ní cachí tnúhu tucu-ndǎ nǎcuáa cada-gá òré quixi tucu-gá, te tnúhu-án cúu-xí tnúhu ndáa cuiti te ñá díú tnúhu sǎ ní sani iní cue ñáyiú ñuyíú-a cùu-xí, chi nchúhú ní xini núú-ndǎ nǎcuáa ní quide-xi cútnàhá ní cutnùní iní-ndǎ sǎ ǎ cǎhnu cuu Xítóhó Jesucristú. 17 Chi dàvá-án ǎ váha ní quide Tǎtá-ó Dútú Ndióxi ní quide cǎhnu-gǎ Xítóhó Jesucristú, te diu-ni dàvá-án ní cǎháⁿ Dútú Ndióxi ndéé andiú ní xáhaⁿ-gǎ xii Xítóhó Jesucristú: “Yòhó cúu-n Dèhe-í téé ío cùu iní-í, te ío cùdí iní ñáhà-í xii-n”, duha ní xáhaⁿ Yá Ndióxi xii Xítóhó Jesucristú. 18 Te nchúhú ní tecú dóho-ndǎ ní cǎháⁿ Yá Ndióxi ndéé andiú cútnàhá ducaⁿ ní xáhaⁿ-gǎ xii Xítóhó Jesucristú, chi tnàhá-ndǎ ndécú-ndǎ ndíhi-gǎ yucu núú dúcáⁿ ní quide cǎhnu ñaha Yá Ndióxi xii-gǎ.

19 Te ndècu ndíhi-o nchaa tnúhu ní cǎháⁿ cue téé ní xóo cǎháⁿ tnúhu Yá Ndióxi ndéé sanaha te nchaa tnúhu-án cǎháⁿ-xi nchaa nǎcuáa cada-xi vitna, te cutnùní iní-ó sǎ tnúhu ndáa cúu-xí, te xini ñuhu-xi cada cuendá váha-ndo nchaa nǎcuáa cǎháⁿ tnúhu-án, chi tnúhu-án cúu-xí dátá ñⁿ ñuhú dáyèhé-xi ndéé òré véxi túndaá quéné chòdíní cǎhnú dáyehé-dí. Te ducaⁿ sǎtnahá-xi cùu tnúhu-án chi quide-xi nǎcuáa cutnùní iní-ó cuendá Xítóhó Jesucristú. 20 Te xini ñuhu-xi sǎ ǎ-ó gǎ cada cuendá-ndó sǎ ñà túú ñáyiú tecú tnùní ní ñⁿ tnúhu sǎ ní chídó tnùní cue téé ní cǎháⁿ tnúhu Yá Ndióxi ndéé sanaha, te núu Yá Ndióxi vá cáda-gǎ nǎcuáa cutnùní iní-yu nǎcuáa cǎháⁿ nchaa tnúhu-án. 21 Te cue téé-án ǎ ní xíndecu yíñuhu-güedé núú Yá Ndióxi, te nchaa tnúhu sǎ ní cǎháⁿ-güedé-án ñà túú cùu-xi tnúhu sǎ ní cahu iní méé-güedé, chi Espiritú Yá Ndióxi ní dácáhu iní ñáhá-xí xii-güedé nǎcuáa cunduu tnúhu cǎháⁿ-güedé.

2

Cue téé cǎchí sǎ cǎháⁿ tnúhu Yá Ndióxi te ñà ndàá

1 Te ndéé sanduu chi ní xíndecu cue téé ní xóo dandáhú ñáhá xii ñáyiú isráel cǎchí sǎ cǎháⁿ tnúhu Yá Ndióxi te ñà

ndàá sǎ cǎháⁿ-güedé tnúhu-gǎ, te diu-ni ducaⁿ tucu cundecu cue téé dandáhú ñáhá xii-ndo vitna, chi cachí-güedé sǎ cǎháⁿ-güedé tnúhu Yá Ndióxi te ñà ndàá. Te cue téé-án ǎ yídáhu cǎháⁿ-güedé, te nchaa tnúhu cǎháⁿ-güedé-án daciita nihnu ñaha-xi xii-ndo te núu na tédóho-ndo, chi cue téé-án vǎ ñunu-güedé sǎ Xítóhó Jesucristú ní xíhí-gǎ cuendá-güedé. Te sǎ dúcáⁿ cáda-güedé ío-gǎ ndíhi daciita nihnu-güedé méé-güedé. 2 Te vǎi ñáyiú xínu iní-yu cáda-yu nǎndí sǎ cuèhé sǎ dúhá cuendá sǎ dúcáⁿ cáda cue téé-án, te cuendá xǎⁿ ngóo ñáyiú cǎháⁿ úhú-yu cuendá ichi Yá Ndióxi. 3 Te mee-ni tnúhu sǎ ní cahu iní cue ñáyiú ñuyíú-a danèhé ñáhá-güedé xii-ndo, te quesaha-güedé sǎ cúu-xí tnúhu ndáa te ñà ndàá cuendá-ni sǎ cuǎñaha-ndo díhúⁿ xii-güedé, chi diu-ni xǎⁿ tnàhí cuhuⁿ iní-güedé, dico Yá Ndióxi sa ní cunaha ndècu túha-gǎ cuendá cada ndáa-gǎ cuèchi-güedé, te na sǎa nduu te cuíta nihnu duuⁿ-güedé, chi Yá Ndióxi vá nǎcuànaa-gǎ ñⁿ sǎ ní cachí-gǎ cada-gǎ.

4 Te Yá Ndióxi ñà túú ní quide cǎhnu iní-gǎ sǎ ní quide cue espíritú ñà túú ní cuíní cada ndáa xínu cuèchi núu-gǎ ní cùu, chi ní dáquihíⁿ ñáhá-gǎ xii-xi ñⁿ xichi núú ǎ ndòho-xi ndecu-xi, te xǎⁿ cundedí nihnu-xi ndéé sǎa nduu cuíta nihnu duuⁿ-ná-xi. 5 Te Yá Ndióxi ñà túú ní quide cǎhnu tucu iní-gǎ nchaa sǎ ní quide ñáyiú ñuyíú díhna, chi dàvá-án ní dándáa-gǎ ndute ñuyíú ní cǎháⁿ nchaa ñáyiú ndècu ichi cuèhé ichi duha te ñⁿ díj-ni té Nòé ndíhi úsá-gǎ tucu cue ñáyiú cùu ndí mee-dé ní dácácu nihnu-gǎ. Te té Nòé-án cúu-dé téé ní cǎháⁿ dóho-yu nǎcuáa cada váha-yu cundecú-yu ní cùu te ñà túú ní cuíní-yu. 6 Te Yá Ndióxi ní dǎngává-gǎ ñuhú ní dánáa-gǎ ñáyiú ñuú Sòdomá ndíhi ñáyiú ñuú Gómorrá te mee-nǎ yáa ní nduu ñuú-án. Te sǎ dúcáⁿ ní cuu xǎⁿ cútnùní iní-ó nǎcuáa cada ñaha Yá Ndióxi xii nchaa ñáyiú ñà túú quide váha. 7 Dico té Lót téé ní quide ndáa ní xíndecu ñⁿ ñuú-án dàvá-án chi ní dácácu nihnu ñaha-gǎ xii-dé. Te nchaa ñáyiú ñuú núú ní xíndecu-dé-án ǎ ní xínduu cuihna iní-yu, te mee-ni ichi díí iní ní xíndecú-yu, te sǎ dúcáⁿ ní xóo cáda-yu xǎⁿ ío ní ndíhú iní té Lót. 8 Te

ɨ̃ⁿ nduu ɨ̃ⁿ nduu ní xóo cada ndàhú-xi iní té Lõt-áⁿ cuendá nchaa tnúhu cuèhé tnúhu duha ní xóo cáháⁿ-yu ní xóo cundedóho-dé, ndìhi cuendá nchaa sá cuèhé sá dúhá ñí xóo cadá-yu ní xóo quini-dé, te mee-dé ní cuu-dé ɨ̃ⁿ téé ní xínduu vii ní xínduu váha iní-xi núú Yá Ndiõxí. ⁹ Te sá dúcáⁿ ñí yáha té Nõé ndìhi té Lõt, xíáⁿ cútnùní iní-ó sá Yá Ndiõxí ío chindee-gá cue ñáyiú quide ndáá ndécú ìchi-gá cuendá sá vǎ cadá-yu nándi sá cuèhé sá dúhá cuèi nándi na ndòhó-yu cundecú-yu. Te Yá Ndiõxí càchí-gá sá ncháá ñáyiú ndècu ìchi cuehé ìchi duha sa ndècu túha-yu sá quíhíⁿ-yu núú ùhú núú ndàhú nduu ná yáha cundáá cuèchi-yu.

¹⁰ Te uuⁿ-gá cada ñaha Yá Ndiõxí xii nchaa cue téé ndècu ìchi díí iní, te dàquee tíhú-güedě nchaa tnúhu sá sánú ìchi ñaha xii-o nacuaá cada-o cùndecu-o, te cùu-güedé cue téé ñí iní-xi, te yí iní-güedé, te ñá túú yùhú-güedé cáháⁿ úhú-güedé cuendá nchaa espíritú cúnú. ¹¹ Te cue espíritú xínú cuèchi núú Yá Ndiõxí ío cùnúu-xi dacúxí cuè téé-áⁿ, dico ñá túú cùyí-xi cáháⁿ-xi dàtná cáháⁿ cue téé-áⁿ òré ndácáⁿ cuèchi-xi núú Yá Ndiõxí cuendá nchaa sá quidé cuè espíritú cùndìhi yucu ñáváha.

¹² Te nchaa cue téé dandàhú ñáhá xii-ndo-áⁿ cúu-güedě dàtná cue quiti, chi cue quiti-áⁿ ñá túú ndècu sá xìní tnùnì-güedì, chi cue quiti-áⁿ ñí cacu-güedì sá tní-ó-güedì te cahni-o-güedì. Te ducaⁿ sǎtnahá-xi cùu nchaa cue téé-áⁿ, chi cáháⁿ cuèhé-güedé cuendá ndédani càa espíritú cuèi ñá túú xìnì-güedé ná espíritú cúu-xí, te ñi-ni mee-güedě dácuíta nihnu-güedé méé-güedě sá dúcáⁿ quide-güedé, ¹³ te sáá nduu te nacháhu-güedé nchaa sá quidé-güedě-áⁿ, te cuèi nduu cuèi niú cúdí iní-güedé quidé-güedě nchaa núú sá cuèhé sá dúhá sàni iní-güedé. Te òré nàtacá-ndó càda-ndo ɨ̃ⁿ vico chiñuhu-ndo Yá Ndiõxí te chitnahá ñáhá-güedě xii-ndo, te cada dusaⁿ-güedě sá cúdí iní-güedé sá dandàhú ñáhá-güedě xii-ndo, te dícó sácáⁿ-núú cuáha ñaha-güedě xii-ndo dùcaⁿ na cada-güedé.

¹⁴ Te nchaa cue téé-áⁿ òré xìnì-güedé ɨ̃ⁿ ñáyiú dìhí te ndìhi-ni sàni iní-güedé cáháⁿ ndìhi ñaha-güedě xii-yu, te ñá túú ndùu vétú iní-güedé cuendá nchaa sá cuèhé sá

dúhá quide-güedé chi uuⁿ-gá uuⁿ-gá sání iní-güedé cada-güedé. Te cuáháⁿ-güedé dandàhú-güedé nchaa ñáyiú ñá túú ñihí ndéé càda ndáá cuendá canchicúⁿ nihnú-yu nchaa tnúhu cáháⁿ-güedé. Te mee-ni ncháa sá ndécú ndìhi tnaha ñáyiú-güedé cúu iní-güedé, te cue téé-áⁿ cúu-güedé cue téé duuⁿ duuⁿ sa ní xíta nihnu núú Yá Ndiõxí. ¹⁵ Chi cùu-güedé cue téé vǎ cáni-gá iní-xi cada ndáá, te nchìcúⁿ nihnu-ná-güedé quidé-güedě nàcuáa ní xóo cada ndíi Bàlaám déhe ndíi Bèór, chi ndíi Bàlaám-áⁿ ñí xóo tnahá iní ndíi cada ndíi chiúⁿ cuehé nàcuáa ní xóo ñihí ndíi díhúⁿ. ¹⁶ Te Yá Ndiõxí ní quide-gá ní cáháⁿ búrru ndíi ní tenáá ñáhá-dí xii ndíi cuendá sá vǎ cadá ndíi ɨ̃ⁿ cuèchi sàni iní ndíi cada ndíi ni cùu. Te sá dúcáⁿ ñí cuu xíáⁿ ní nguítuu ndíi ñá túú ní quide ndíi ɨ̃ⁿ sá ñá túú nàndìhi sàni iní ndíi ni cùu.

¹⁷ Te nchaa cue téé ducaⁿ xíquide cùu-güedé dàtná ɨ̃ⁿ doco yìchí, te cùu tucu-güedé dàtná ɨ̃ⁿ vícò sá xídó tàchí te ñá túú dàu nchídó-xí, te sa ndècu túha ɨ̃ⁿ xichi núú ìo nee quíhíⁿ-güedé cundecu-güedé ni caa ni quíhíⁿ. ¹⁸ Te cue téé-áⁿ cáháⁿ-güedé dàtná cáháⁿ ɨ̃ⁿ téé ío cùu cahnu dico ñá túú vèdana nàndìhi nchaa tnúhu cáháⁿ-güedé, te cue téé-áⁿ dandàhú-güedé nchaa ñáyiú íchí ñí dáñá ìchi cuehé ìchi duha, te xáhaⁿ-güedě xii-yu sá cúu-ní cadá-yu nchaa sá cuèhé sá dúhá quide nchaa ñáyiú ndècu ìchi díí iní, ¹⁹ te xáhaⁿ tucu-güedé sá cúu-ní cadá-yu nání véxi iní-yu cuèi sá vǎha te cuèi sá cuèhé, dico mee-güedě chi mee-ni sá cuèhé sá dúhá cùnúu quide-güedé. Te nchaa ñáyiú ñá ndácú dàña nándi sá cuèhé sá dúhá cúu-yu dàtná ɨ̃ⁿ ñáyiú xínu cuechi ñá túú tnàhí dàñá quee núú chíúⁿ pàtróóⁿ-xi. Te ducaⁿ sǎtnahá-xi cùu-yu chi ñá ndácú-yu dàñá-yu nándi sá cuèhé sá dúhá quidé-yu. ²⁰ Te núu ñáyiú sa ní dáñá ncháa ìchi cuehé ìchi duha cuendá sá ñí cùtnùní iní-yu nàcuáa ndùu tnúhu Xitohó Jesucristú, Yaá ní dácácu nihnu ñaha xii-o núú ùhú núú ndàhú ná nànchocáva iní-yu cundecu tucu-yu ìchi cuèhé ìchi duha, te mee-nǎ sá cuèhé sá dúhá tàxi tnuní ñáhá-xí xii-yu, te núu ducaⁿ te vǎa-gá tucu cadá-yu dacúxí dàtná ní xóo cadá-yu cútnàhá vátá cútnùní-gá iní-yu nàcuáa ndùu tnúhu-gá.

21 Te váha-gá sá vă ngũnu ichi-yu ichi ndáá ní cùu te ñá díú sã sà ní ngũnu ichi-yu te ní dáñã-yu nchaa tnúhu-gá sá sà ní níhĩ-yu ndècu ndihĩ-yu sànu ichi ñaha-xi nacuáa cundecú-yu ní cùu. 22 Te ñáyiú ducaⁿ xĩquide quèe ndáá-xi nàcuáa cuáháⁿ ñⁿ cuèndú sá cãchĩ-xi: “Iná ní nacaxi-di sá ñ ndusaⁿ-di, te cùchĩ quiti ichi ní xichi ndute cãndoo cuáháⁿ-ni tucu-di cuchi ñuhu-di núú ndèhýú”, duha cuáháⁿ cuèndú-áⁿ.

3

Xítohó Jesucristú quixi tucu-gá

1 Te nchaa nchòhó ñáyiú ío cùu iní-í cùtnuní iní-í sá ío váha sàni iní-ndó, te xéhe cúú-xí tütú cúú ùú cãdũha-í sá cúú-xí-ndó, te ñⁿ-ni cãháⁿ-í dándàcu iní ñáhà-í xii-ndo nchàa tnúhu sá sà ní xíndedóho-ndo. 2 Chi cuìní-í sá vă nàcuànaa-ndo nchaa tnúhu ní cãháⁿ nchaa cue téé ní xóo cãháⁿ tnúhu Yá Ndiõxí ndéé sanaha, te ní vă nàcuànaa-ndo nchaa tnúhu ní cãháⁿ cue téé ní cãháⁿ tnúhu Xítohó Jesucristú Yáa ní dácãcu nihnu ñaha xii-o núú ùhú núú ndáhú, chi ñu nchaa tnúhu-áⁿ sánú ichi ñaha-xi xii-o nacuáa cada-o cundecu-o.

3 Te ío-gá xíní ñuhu-xi cùtnuní iní-ndó nàcuáa cada-xi òré vátá sàá-gá nduu quixi tucu Xítohó Jesucristú ñuyíú-a, te cãchĩ tnúhu-í xii-ndo sã cùndècu ñáyiú cuhuⁿ iní mee-ni nchàa sá cuèhé sá dúhá te mee-ni xĩãⁿ cadá-yu, te cãháⁿ cuèhé cãháⁿ duhá-yu cuèndá tnúhu Yá Ndiõxí. 4 Te cachí-yu: “Ñá ndáá sá quixí Xítohó Jesucristú ñuyíú-a, chi núu quixi-gá te sá ndéé ama-gá sa ní quexìo-gá ní cùu. Te dàtná-ni quide-xi vitna ñu-ni duha ní quesaha-xi quide-xi ndéé cùtnàhá ní ngáva ñuyíú, te ñu-ni duha quide-xi ndéé cùtnàhá ní xíndecu cue ñani tnáhá-ó ndéé sanaha, te ñu-ni duha quide-xi ndéé ní sáá nduu ní xihĩ-güedé, te ñu-ni duha quide-xi ndéé vitna”, duha cãháⁿ-yu. 5 Te ñucùuⁿ cadá-yu vá cadá cuèndá-yu sá Yá Ndiõxí ní cãháⁿ-gá te ní ngúndecu andiú ndihĩ ñuyíú-a, te ñu-gá ní quide ní quene ñuhu yìchĩ xitĩ ndute ní ngúndecu-xi ñⁿ xio. 6 Te ñⁿ xito ní dándáá Yá Ndiõxí ndute ñuyíú-a ní dánáá-gã nchaa sá ío. 7 Te Yá Ndiõxí ní cachí-gá sá cùndècu-ni ñuyíú-a ndihĩ andiú ndéé ná sáá nduu cada-gá nchaa nàcuáa ní cãháⁿ-gá sá cúú-xí

nchàa ñáyiú ndècu ichi cuèhé ichi duha, te dàvá-áⁿ danàa-gá nchaa ñáyiú-áⁿ chi cáyú andiú ndihĩ ñuyíú-a.

8 Te nchaa nchòhó ñáyiú ío cùu iní-í, ío cuhuⁿ iní-ndó tnúhu na cãháⁿ-í-a, chi Yá Ndiõxí ñá túú sàni iní-gá dàtná sání iní méé-ó, te ñⁿ nduu cùu-xi datná úxi cièndú cuíá, te úxi cièndú cuíá-ãⁿ cúú-xí dàtná ñⁿ nduu sá cúú-xí-gã. 9 Te Yá Ndiõxí ñá túú dàna ndodo iní-gá vá cadá-gã ñⁿ sá cãháⁿ-gá dàtná cãchĩ cue ñáyiú sá dáná ndòdo iní-gá cada-gá ñⁿ sá cãháⁿ-gá, chi ñucùuⁿ tnahí dácaca-gá nduu cuèndá sá ío cùndahú iní ñáhá-gã xii-o, te cuìní-gá sá ncháá ñáyiú ndixi túu iní-yu sá ñá túú quide váha-yu ndècú-yu te tuhá-yu ichi-gá, te ducaⁿ quide-gá chi cuìní-gá sá vă cuíta nihnu ni ñⁿ-yu.

10 Te dàtná quidé cuè ñadúhú quĩhu-güedé ñⁿ vehe dùhu-güedé òré ñá túú yìhĩ iní xítohó vehe-áⁿ, te ducaⁿ càda Xítohó Jesucristú chi nduu ñá túú yìhĩ iní ñáyiú ñuyíú-a quixi tucu-gá, te dàvá-áⁿ cada-xi andiú dàtná quidé-xi òré níhĩ vìhĩ cãháⁿ ñuhu, te ñu-ni òré-áⁿ ndoñuhu àndiú, te cáyú nchaa chódíní, te cáyú tucu tnáhá ñuyíú-a ndihĩ nchaa sá ío.

11 Te vitna nchòhó sa xíní-ndó sã náá ñuyíú-a te xĩãⁿ ío xìni ñuhu-xi cada váha-ndo cùndecu-ndo, te cada-ndo nàcuáa cuìní méé Yá Ndiõxí cunduu. 12 Te ío nducu ndèe-ndo ducaⁿ cada-ndo cuèndá ducaⁿ ndihĩ-ni sáá nduu càda-gá nchaa nàcuáa cãháⁿ-gá, te ducaⁿ nchòhó cundecu túha-ndo sáá nduu-ãⁿ. Te ñu-ni nduu-ãⁿ ndoñuhu àndiú chi cáyú-xi, te ñu-ni ducaⁿ ndoñuhu tucu nchaa chódíní chi ndihĩ-di cáyú. 13 Te nchoo ndètu-o sáá nduu cùndecu-o ñⁿ ñuyíú sáá, te quini-ó ñⁿ andiú saa datná ní cachí Yá Ndiõxí, te yacáⁿ chi mee-nã cue ñáyiú quide váha cundecu.

14 Te nchòhó ñáyiú ío cùu iní-í, ñini ndètu-ndo sáá nduu dùcaⁿ cada-xi ío nducu ndèe-ndo cada-ndo mee-ni sá váha cundecu-ndo ichi Yá Ndiõxí, te cundecu nahi-ndo, te cada-ndo nchàa nacuáa vá cùndècu cuéchi-ndo nũú-gã. 15 Te ío cada cuèndá-ndó sã dácaca-gá nduu dùcaⁿ cada-gá chi cuìní-gá sá ncháá ñáyiú nanihĩ tãhú-yu. Te té Pãblú téé ío cùu iní-ó ndècu ndihĩ-o ichi Xítohó Jesucristú ñu-ni nàcuáa

càháⁿ-í-a ðiu-ni ducaⁿ ñi tee-dé ìⁿ núú tütú ní dáquíxí-dě ndaha-ndo, te ní tee-dé nàcuáa ní dácáhu iní ñáhá Yá Ndiõxí xii-dé. ¹⁶ Te ðiu-ni ducaⁿ càháⁿ-dé nchaa dava-gá núú tütú cádũha-dé, te dava tnúhu càháⁿ-dé ío úhú tecú tnùní-ó, núú xíãⁿ ñáyiu ñá túú cùtnuní váha iní-xi, ñáyiu ío yáchí sàndáá iní-xi ìⁿ tnúhu, ñáyiu-áⁿ tècú tnùní dátñi-yu nchaa tnúhu ní chídó tnùní-dé, ndihí nchaa dava-gá tnúhu yòdo tnuní núú tütú Yá Ndiõxí, te sá dúcáⁿ quidé-yu te dacuïta nihnú-yu mèé-yu.

¹⁷ Te nchòhó ñáyiu ío cùu iní-í, sa cùtnuní iní-ndó nàcuáa quide dava ñáyiu, núú xíãⁿ ío xini ñuhu-xi quihí iní-ndó cùndecu-ndo cuendá ducaⁿ cùndecu-ni-ndo ichi-gá, te vá dáñá-ndó mèe-ndo dandahú ñáhá nchàa cue tée ndècu ichi cuehé ichi duha, chí cue tée-áⁿ ñà túú sàni váha iní-güedé cuendá tnúhu Yá Ndiõxí. Te núu na dàña-ndo mee-ndo dandahú ñáhá-güedè xii-ndo te vá cùndècu váha-gá-ndó ìchi-gá dàtná ndécú-ndó vitna. ¹⁸ Te nchòhó uuⁿ-gá uuⁿ-gá cuita cutnùní-gá iní-ndó quíhíⁿ nchaa nàcuáa ta chindee ñaha Xítohó Jesucristú xii-ndo cuáháⁿ. Te ducaⁿ ío-gá cuita cutnùní iní-ndó nchàa nacuáa sàni iní-gá, te ðiu-gá cúú-gá Yaá ní dácácu nihnu ñaha xì-o núú ùhú núú ndàhú. Te chí ná càchí-ó sã ío càhnu cuu-gá cuèi vitna té cuèi ndéé núú cuáháⁿ núú vèxi. Te ducaⁿ na cùnduu. Te ío chí cádá ndèe iní-ñã vitna.

TUTÚ DÍHNA NÍ CADÚHA TÉ JUÀÁ

Tnúhu sá cãháⁿ nãcuáa naníhí tãhú-ó

¹ Te yúhú té Juàá cãchí tnúhu-í xii-ndo cuendá Crístú Yáá cãháⁿ nãcuáa cundecu ndihí-o Yã Ndiöxí. Te Crístú-áⁿ sa ndècu-gá ndéé cútñahá ní ngáva ñuyíú. Te yúhú ní xiní núù-í ndihí cue téé ní xica cuu ndihí-í nãcuáa càa nacuáa ndùu-gá. Te ní xíndedóho-ndí tnúhu ní cãháⁿ-gá, te ní tendaha-ndí-gá te ní cutnùní ndáá iní-ndí sá ñⁿ yiqui cuñú cúu-gã. ² Te ní quixi túu-gá ñuyíú-a, te ní xiní-ndí-gá, te xiãⁿ cãchí tnúhu ndáá-ndí xii-ndo. Te cãchí tnúhu tucu-ndí sá ndécú-gá ndihí Tãtá-gã Dútú Ndiöxí ní cùu, te ní quixi-gá ñuyíú-a ní xíndecu-ndí ndihí-gá. Te ní cachí tnúhu-gá xii-ndí sá ndúú tãhú-ó cundecu ndihí-o Yã Ndiöxí ní caa ní quíhíⁿ te núu na quíndáá iní-ó-gã. ³ Te xiãⁿ dátúu-ndí núu-ndó nchàa sá ní xiní-ndí, ndihí nchaa sá ní xíndedóho-ndí cuendá cuu ñⁿnuu-o nchàa-o datná nchúhú cúu ñⁿnuu-ndí ndihí Tãtá-ó Dútú Ndiöxí, ndihí Déhe-gá Xítohó Jesucrístú. ⁴ Te xiãⁿ núu tè-í nchaa tnúhu-a cuendá cudí iní-ó nchàa-o.

Yá Ndiöxí cúu-gã datná ñⁿ ñuhú

⁵ Te nchaa tnúhu ní dánèhé ñáhá Xítohó Jesucrístú xii-ndí, xiãⁿ dánèhé ñáhà-í xii-ndo. Te ní cachí-gá sá Yã Ndiöxí cúu-gã datná ñⁿ ñuhú dáyèhé-gá iní-ó, te ducaⁿ sãtnahá-xi cùu-gá chi ío váha quide-gá, te ñá túú quide-gá ní ñⁿ sá cuèhé sá dúhá. ⁶ Te núu cãchí-ó sã ndécú-ó ìchi Yã Ndiöxí, te quide-ni-o nchaa sá cuèhé sá dúhá, te dàcuandehnde-o te ñá túú quide ndáá-ó núu-gã. ⁷ Te núu na càda váha-o datná quidé mèe-gá, te cuu ñⁿnuu-o nchàa-o. Te ndada ndoo ndada nine-gá iní-ó, chi cada cãhnu iní-gá nchaa sá cuèhé sá dúhá quide-o, chi ñⁿ cuendá-áⁿ ní xíhí Déhe-gá Xítohó Jesucrístú núu cùrúxí.

⁸ Te núu cãchí-ó sã ñà túú quide-o ní ñⁿ sá cuèhé sá dúhá, te dàndahú-ó mèe-o, te ñá túú quide ndáá-ó núu Yã Ndiöxí.

⁹ Te núu na nãhmá-ó nchàa yíca cuèchi-o

núu-gã, te mee-gã cada cãhnu iní-gá, te ndada ndoo-gá iní-ó, cuendá cada ndáá-ó cundecu-o ìchi-gá, chi mee-gã ío váha quide-gá te ío ndáá quidé-gã, ducaⁿ ní cãháⁿ-gá te ducaⁿ quide-gá. ¹⁰ Te núu na cãchí-ó sã ñà túú quide-o ní ñⁿ sá cuèhé sá dúhá, te quide-o Yã Ndiöxí ñⁿ ñándéhné, dico ñá túú ndèhnde-gá. Te ñá túú ndècu tnúhu-gá iní-ó te núu ducaⁿ na càda-o.

2

Xítohó Jesucrístú cãháⁿ ndàhú-gá cuendá-ó

¹ Te nchòhó ñáyíu cùu datná déhe-í, chido tnuní-í nchaa tnúhu-a cuendá sá vã cáda-ndó ní ñⁿ sá cuèhé sá dúhá. Dico núu ñⁿ-ndo quide-ni-ndo nãndí sá cuèhé sá dúhá, te ndècu ñⁿ Yáá cãháⁿ ndàhú cuendá-ó núu Yã Ndiöxí. Te Yáá-áⁿ cúu-gã Xítohó Jesucrístú Yáá quidé ndáá. ² Te ní xíhí-gá sá cuendá nchaa yíca cuèchi-o cuendá ngúndecu váha-o núu-gã te núu na quíndáá iní-ó-gã. Te ñá díú-ní sã cuendá yíca cuèchi nchoo ní xíhí-gá, chi tnàhá cuendá nchaa yíca cuèchi ñáyíu ní càa xico ñuyíú.

³ Te núu cada-o nchàa nacuáa cãháⁿ Yã Ndiöxí, te cutnùní iní-ó sã ndécú-ó ìchi-gá. ⁴ Te núu cãchí-ó sã ndécú-ó ìchi-gá te ñá túú quide-o nacuáa cãháⁿ-gá, te dàcuandehnde-o, te ñá túú quide ndáá-ó núu-gã. ⁵ Te núu sãndáá ndisa iní-ó tnúhu-gá, te quide-o nchaa nacuáa cãháⁿ-gá, te ducaⁿ te cùu iní ndisa-o-gã, te cutnùní ndáá iní-ó sã ndécú-ó ìchi-gá. ⁶ Te núu cãchí-ó sã ndécú-ó ìchi Yã Ndiöxí, te xini ñuhú-xi cada ndáá-ó cundecu-o ñuyíú-a datná ní quide ndáá Xítohó Jesucrístú cútñahá ní xíndecu-gá ñuyíú-a.

Ndudú sáá

⁷ Te nchòhó ñáyíu ndècu ndihí-í ìchi Xítohó Jesucrístú, ñá túú chido tnuní-í ñⁿ tnúhu saa sã cúu-xí-ndó, chi ñⁿ ni tnúhu sá ní ngúndecu ndihí-ndo ndéé díhna, tnúhu ní xíndedóho-ndo ndéé cútñahá ní sãndáá iní-ndó-gã, xiãⁿ chídó tnuní-í. ⁸ Te tnúhu-a cùu-xi datná ñⁿ tnúhu saa tè-í dándacu iní ñáhà-í xii-ndo nãcuáa ní quide Xítohó Jesucrístú cútñahá ní quixi-gá ñuyíú-a ní quide váha-gá, te tnàhá nchòhó ní tnúu-ndo tnúhu-gá te quide váha-ndo tnàhá-ndó. Te

vitna ñⁿ nduu ñⁿ nduu ta cùu vai ñáyiu ta dàña nchaa sá cuèhé sá dúhá cuáháⁿ, chi Xítohó Jesucristú tá dándixi túu-gá iní-yu cuèndá cutnùní iní-yu nàcuáa ndùu cuendá Yă Ndiöxí.

⁹ Te núu cächí-ó sã quidé vâha-o, te cùu úhú iní-ó tnàha ñáyiu-o, te xíãⁿ ñá túú quide ndáá-ó, chi ndècu-ni-o ichi cuehé ichi duha sá dúcáⁿ quide-o. ¹⁰ Te núu na cùu iní-ó tnàha ñáyiu-o datná cúu ìní ñáhá mèe Yă Ndiöxí xii-o ña, te quide ndáá-ó nũú-gã, te vá cánúichi-o tnaaha ñáyiu-o ñⁿ ichi cuehé ichi duha. ¹¹ Te núu cùu úhú iní-ó tnàha ñáyiu-o, te ñá túú quide vâha-o nũú Yă Ndiöxí, chi ndècu-ni-o ichi cuehé ichi duha, te ñá túú cùnuni iní-ó sã quidé-ó. Chi cùu-o datná ñⁿ tée ndècu núú néé chi ñá cùnuni núú-dě ndèe ichi quíhíⁿ-dé. Ducaⁿ sãtnahá-xi cùu nchoo chi ñá cùnuni iní-ó ndèe ichi quíhíⁿ-ó te núu ducaⁿ na càda-o cuu úhú iní-ó tnàha ñáyiu-o.

¹² Te nchòhó ñáyiu cùu datná déhe-í, yúhú chídó tnùní-í tnúhu-a ñⁿ núú tütú cächí tnúhu-í xii-ndo sã ñⁿ quide càhnu iní Yă Ndiöxí nchaa cuèchi-ndo, chi ñⁿ cuèndá-áⁿ ñⁿ xíhí Xítohó Jesucristú. ¹³ Te nchòhó ñáyiu sacuéhé, yúhú tée-í tnúhu-a sá cúu-xi-ndó chi càháⁿ ndihí-ndo Jèsús, te Yaá-áⁿ sa ndècu-gá ndéé cùnàhá ní ngáva ñuyúú. Te nchòhó ñáyiu nchícúⁿ-gá téé tucu-í tnúhu-a sá cúu-xi-ndó chi ñá túú sàndáá iní-ndó tnúhu càháⁿ yucu ñävâha.

Te nchaa nchòhó ñáyiu cùu datná déhe-í, tée tucu-í tnúhu-a sá cúu-xi-ndó, chi sa càháⁿ ndihí-ndo Tãtá-ó Dütú Ndiöxí. ¹⁴ Te nchòhó ñáyiu ni sãhnu, yúhú chídó tnùní-í tnúhu-a ñⁿ núú tütú chi càháⁿ ndihí-ndo Jèsús, te Yaá-áⁿ sa ndècu-gá ndéé cùnàhá ní ngáva ñuyúú. Te nchòhó ñáyiu nchícúⁿ-gá, yúhú chídó tnùní-í tnúhu-a chi ío ñihí ndéé-ndó ndècu-ndo, chi tnè-ndo tnúhu càháⁿ Yă Ndiöxí. Te ñá túú sàndáá iní-ndó tnúhu càháⁿ yucu ñävâha.

¹⁵ Te vá cùhúⁿ ìní-ndó ñⁿ sã cuèhé sá dúhá ío ñuyúú-a, te ñⁿ và cání ìní-ndó càda-ndo. Chi núu na cùhuⁿ iní-ó nchàa sã cuèhé sá dúhá ío ñuyúú-a ña, te ñá túú Tãtá-ó Dütú Ndiöxí ñúhú ìní-ó te núu ducaⁿ na càni iní-ó. ¹⁶ Te nchaa ñáyiu ñuyúú-a quidé-yu nchaa sã cuèhé sá dúhá, chi ñⁿ nchaa xíãⁿ cúdñⁿ iní-yu cadá-yu. Te nchaa sã cuèhé sá dúhá sàni iní-yu, ndihí nchaa

sá xíní-yu quidé-yu. Te xíquide nínu-yu mèe-yu cuèndá nchaa sã ndécú ndihí-yu. Te nchaa sã ñá túú vâha ní cacu nihnu-xi ñuyúú-a. ¹⁷ Te nchaa sã ñá túú vâha ío ñuyúú-a, ndihí nchaa sã sání cuèhé sání dùha iní-yu cuita ndihí nihnu-xi quíhíⁿ. Te nchaa ñáyiu tnè-ndo tnúhu càháⁿ Yă Ndiöxí cundecú-yu ndihí-gá ni caa ni quíhíⁿ.

Tnúhu ndáá tnúhu Yă Ndiöxí ndihí tnúhu ndehnde

¹⁸ Te nchòhó ñáyiu cùu datná déhe-í, sa ñihí-ndó tnúhu sá quíxí ñⁿ tée cunuu-gã-dé cuu úhú iní-dé Crístú. Te sa xíndecu-gá ñáyiu cùu úhú iní ñáhá xii-gá, núu xíãⁿ cùnuni iní-ó sã sã ta cuyatni nduu naa ñuyúú-a. ¹⁹ Te ñáyiu-áⁿ ñⁿ xíndecu ndihí ñáhá-yu xii-o, te ní queé-yu cuáháⁿ-yu chi ñá túú ní cùu ñⁿnuu-o ndihí-yu. Chi núu dícó ní cùu ñⁿnuu-o ndihí-yu te cundecu ndihí ñáhá-yu xii-o ni cùu. Te duha ní cuu cuèndá cutnùní ndáá iní-ó nchàa-o sã ñá túú cùu ñⁿnuu-o ndihí-yu, chi ñá túú sàndáá iní-yu Yă Ndiöxí.

²⁰ Te Xítohó Jesucristú ní taxi-gá Espíritú Yă Ndiöxí ndécú ndihí-o, núu xíãⁿ təcú tnùní-ó tnúhu-gá. ²¹ Te cuèndá sá xíní-ndó tnúhu ndáá tnúhu Yă Ndiöxí nũu xíãⁿ tée-í tnúhu-a, te ñá dñⁿ ñⁿ sã ñá cùnuni iní-ndó cùu-xi. Te sa nàha-ndo sã ñⁿ tnúhu ndehnde ñá túú ñùtnahá-xi núú tnúhu Yă Ndiöxí, chi mee ñⁿne-ni tnúhu ndáá cúu-xi.

²² Te nchaa ñáyiu cächí sã ñá dñⁿ Jèsús cúu Crístú Yaá ní tendaha Yă Ndiöxí ní quixi ñuyúú-a dàcuandehndé-yu, te cùu úhú iní-yu Jèsús. Te ñⁿ ní-yu cächí-yu sã ñá dñⁿ Dèhe Yă Ndiöxí cúu Jèsús, te sã dúcáⁿ quidé-yu te cùu úhú iní-yu Yă Ndiöxí ndihí Déhe-gá Jèsús. ²³ Te nchaa ñáyiu ñá túú sàndáá iní sã Déhe Yă Ndiöxí cúu Jèsús, ñáyiu-áⁿ ñá túú ndécú-yu ichi Tãtá-ó Dütú Ndiöxí. Te nchaa ñáyiu càháⁿ sã Déhe Yă Ndiöxí cúu Jèsús, ñáyiu-áⁿ ndécú-yu ichi Tãtá-ó Dütú Ndiöxí.

²⁴ Te nchaa tnúhu Yă Ndiöxí ní tecú dóho-ndo ndèe díhna, tnúhu-áⁿ cùhuⁿ iní-ndó. Te núu nchaa tnúhu-áⁿ ná cùhuⁿ-ni iní-ndó, te cundecu ndihí-ndo Yă Ndiöxí ndihí Déhe-gá cuèi vá cundècu túu-ndo ndihí-gá ñuyúú-a. ²⁵ Te Jèsús ní cachí-gá sã ndúú tãhú-ó cundecu ndihí-o-gá ni caa ni quíhíⁿ andñⁿ.

26 Te cuendá nchaa ñáyiú dándahú ñáhá xii-ndo ní chídó tnùn-í tnúhu-a, 27 dico nchòhó chi ndècu ndihí-ndo Espíritú Yá Ndiöxí sá ñí taxi Xítohó Jesucristú. Núu xiáⁿ ñá túú xini ñuhu-ndo ñáyiú danèhé ñáhá xii-ndo, chi mee Espíritú-gá dánèhé ñáhá-xí nchaa sá vaha. Te nchaa sá dánèhé ñáhá-xí xii-ndo cuu-xi sá ndáá, te ñá díú ñⁿ tnúhu ndehnde. Te vitna chí cánchezúⁿ nihnu-ni ichi Yá Ndiöxí dàtná ní sanu ichi ñaha mée Espíritú-gá xii-ndo.

28 Te nchòhó ñáyiú cùu datná déhe-í, chí cánchezúⁿ nihnu-ni ichi Xítohó Jesucristú, chi cuendá òré ná quixí tucu-gá ñuyíú-a te vá yuhú-ndó te ñí vá cúu cáhaⁿ núu-ndó núu-gá. 29 Te nchòhó sa ñaha-ndo sá mée-gá quidé ndáá-gá, te sa xini-ndó sá ncháá ñáyiú quide ndáá cúu-yu déhe Yá Ndiöxí.

3

Ñáyiú cùu déhe Yá Ndiöxí

1 Te chí cuáha cuendá sá ño cùu iní ñáhá Tātá-ó Dütú Ndiöxí xii-o cuendá sá cúu-ó déhe-gá, chí ducaⁿ ñí cachí-gá, te déhe ndisa-gá cúu-ó. Te núu xiáⁿ ñáyiú ndècu ichi cuehé ichi duha ñá cúu quini ñáhá-yu xii-o, chí ñá túú xini-yu nacuáa ndùu cuendá Yá Ndiöxí. 2 Te nchòhó ñáyiú ío cùu iní-í, vitna cùu-o déhe Yá Ndiöxí, te vátá cùtnuní váha-gá iní-ó ñasa cunduu-o ndèé núu cuáháⁿ núu vèxi. Dico sa cùtnuní iní-ó sá òré ná quixi tucu Xítohó Jesucristú te nduu-o dàtná cáá mée-gá, chí quini-ó-gá nacuáa-ni caa nacuáa-ni ndùu-gá. 3 Te nchaa ñáyiú sa ndètu ñaha xii-gá sa ta ngündecu túha-yu cuáháⁿ, chí ta ndùu ndoo nduu nine iní-yu cuáháⁿ dàtná cáá ndòo caa nine mee-gá.

4 Te nchaa ñáyiú quide nándi sá cuehé sá dúhá ñá túú quide váha-yu núu Yá Ndiöxí, chí ní cachí-gá sá vā dúcáⁿ càda-o. 5 Te sa ñaha-ndo sá ñí quixi túu Xítohó Jesucristú ñuyíú-a cuendá cada càhnu iní-gá nchaa sá cuehé sá dúhá quide-o, chí mee-gá ñá túú quide-gá ñí ñⁿ sá cuehé sá dúhá. 6 Te nchaa ñáyiú ndècu ichi Yá Ndiöxí ñá túú ñùhú-yu ichi cuehé ichi duha. Te nchaa ñáyiú ñùhu ichi cuehé ichi duha ñá túú xini-yu nacuáa ndùu cuendá Xítohó Jesucristú te ñí ñá túú xini-yu nása caa-gá. 7 Te nchòhó ñáyiú cùu datná déhe-í, vá dáñá-ndó mée-ndo

dándahú ñáhá ñáyiú ndècu ichi cuehé ichi duha, chí cachí-yu sá cúu cùndecu-o ichi Yá Ndiöxí te cada-o nándi sá cuehé sá dúhá dico ñá ndáá. Te nchaa ñáyiú quide váha quide ndáá-yu dàtná quidé mée Jesús. 8 Te nchaa ñáyiú ndècu ichi cuehé ichi duha ndècu ndihí-yu yucu ñávaha, chí ducaⁿ quide mee-xi ndéé cùtnahá vátá ngáva-gá ñuyíú. Te xiáⁿ ní quixi Jesús Déhe Yá Ndiöxí ní dáquéé tñhú-gá nchaa sá quidé yucu ñávaha.

9 Te nchaa ñáyiú ní natuha ichi Yá Ndiöxí ní nduú-yu déhe-gá, te ñá túú-gá quidè-yu nándi sá cuehé sá dúhá chí ní ndada ndoo ní ndada nine-gá iní-yu. Núu xiáⁿ ñá túú-gá quidè-yu nándi sá cuehé sá dúhá, chí ní ngündecu ndihí ñaha-gá xii-yu. 10 Te cùtnuní iní-ó nándi cùu ñáyiú cùu déhe Yá Ndiöxí, te cùtnuní iní-ó nándi cùu ñáyiú cùu déhe yucu ñávaha. Te nchaa ñáyiú ñá túú quide ndáá, te cùu úhú iní-yu tñaha ñáyiú-yu, te ñáyiú-áⁿ ñá díú déhe Yá Ndiöxí cúu-yu.

Cuu iní tnáhá-ó ñⁿ ñⁿ-o

11 Te ndéé òré ní natuha-o ichi Yá Ndiöxí ní tecú dóho-o sá cúu iní-ó tñaha ñáyiú-o.

12 Te vá cùnduu úhú iní-ó dàtná ní quide ndíi Càin, chí ndíi-áⁿ ñí xindecu ndíi ndihí yucu ñávaha núu xiáⁿ ní sahani ndíi ñaní ndíi. Te ducaⁿ ñí quide ndíi chí ní xindecu ndíi ichi cuehé ichi duha, te ñaní ndíi ní xindecu-dé ichi váha.

13 Te nchòhó ñáyiú ndècu ndihí-í ichi Xítohó Jesucristú, vá cáda cuendá-ndó sá cúu úhú iní ñáhá nchaa ñáyiú ndècu ichi cuehé ichi duha xii-ndo. 14 Te cunaha-ndo na cachí tnúhu-í xii-ndo sá ñùu na cùu iní-ó tñaha ñáyiú-o, te cùtnuní iní-ó sá sá ní dáñá-ó ichi sá tá dàcuíta nihnu ñaha xii-o cuáháⁿ ní cùu, te vitna ní tñi-o ichi váha. Te nchaa ñáyiú ñá túú cùu iní tñaha ñáyiú-xi ñùhu-ni-yu ichi cuáháⁿ-yu núu úhú núu ndahú. 15 Te nchaa ñáyiú ñá cúu quini ndéé tñaha ñáyiú-xi cùu-yu dàtná ñⁿ ñáyiú sahani ndíyi. Te nchòhó sa ñaha-ndo sá ñí ñⁿ ñáyiú sahani ndíyi ñá túú ndècu ndihí-yu tnúhu ndee iní sá nánihí tñhú-yu. 16 Te Xítohó Jesucristú ní xihí-gá cuendá nchaa yíca cuèchi-o, núu xiáⁿ cùtnuní iní-ó sá ño cùu iní ñáhá-gá xii-o. Te xiáⁿ cùtnuní iní-ó nacuáa cada-o cùu iní-ó tñaha ñáyiú-o,

te cuèi na cùú-ó cuendá sá cúú-xí ñⁿ-yu, cuendá-nã sá ná dàcácu nihnu-ò-yu núú tnũndòho ndecú-yu. ¹⁷ Te núú ndècu ndihì-o sá cóhó sã cáxí-ó ndihì nchaa sá nándihì-o, te ndècu ñáyiu ndàhú ñá túú vèdana ná ndécú ndihì, te ñá túú chindee-ó-yu, te ñá túú cùu iní-ó Yã Ndiõxí te núú ducaⁿ na càda-o. ¹⁸ Te nchòhó ñáyiu cùu datná déhe-í vá cuendá-ni cùnàha càháⁿ-ndó sã cúú iní tnáhá-ndó, chi cuu iní tnáhá ndisa-ndo te coto tnàha-ndo.

Vá yùhú-ó nũú Yã Ndiõxí

¹⁹ Te núú ducaⁿ na càda-o, te cutnùnì iní-ó sã ndécú-ó ìchi ndáá ichi Yá Ndiõxí, te ñá túú-gã ná quihì iní-ó nũú-gã. ²⁰ Te núú ndihú iní-ó cuendá ñⁿ sá ñi quide-o, te sa nàha Yá Ndiõxí te núú ní quide váha-o àdi ní quide cuèhé-ó, chi sa nàha ndáá-gã nàcuáa càa iní-ó. ²¹ Te nchòhó ñáyiu ío cùu iní-í, na càchí tnúhu-í xii-ndo, te núú ñá túú nã sání iní-ó te ñá túú nã quidé-ó, te vá yùhú-ó nũú Yã Ndiõxí. ²² Te nchaa sá vãha na càcáⁿ-ó nũú Yã Ndiõxí, te mee-gã taxi-gá chi tnè-o tnúhu càháⁿ-gã, te quide-o nchaa nacuáa cùu iní-gã. ²³ Te ní cachí Yã Ndiõxí sá quindáá iní-ó Dèhe-gá Xítohó Jesucrìstú, te cuu iní-ó tnàha ñáyiu-o dàtná ní cachí-gã. ²⁴ Te nchaa ñáyiu tnè tnúhu-gã ndécú-yu ichi-gã, te ndècu ndihì ñaha-gã xii-yu. Te cùtnunì iní-ó sã ndécú-ó ndihì-gã chi ní taxi-gã Espíritú-gã ndécú ndihì-o.

4

Ñáyiu ndècu ndihì Espíritú Yã Ndiõxí ndihì ñáyiu cùu úhú iní ñáhá xii Xítohó Jesucrìstú

¹ Te nchòhó ñáyiu ío cùu iní-í, vá cùtexínu quindáá iní-ndó tnúhu càháⁿ nchaa ñáyiu càchí sá ndécú ndihì Espíritú Yã Ndiõxí. Chi díhna-gã cada cuendá váha-ndo te núú càháⁿ ndáá-yu nàcuáa càháⁿ tnúhu Yá Ndiõxí, chi ío vãi ñáyiu ñuyú-a cachí-yu sá càháⁿ-yu tnúhu-gã dico ñá ndáá. ² Te duha cutnùnì iní-ó nãndi cùu ñáyiu ndècu ndihì Espíritú Yã Ndiõxí. Nchaa ñáyiu càháⁿ ndáá sá Xítohó Jesucrìstú ní quixi-gã ñuyú-a te ní cuu-gã ñⁿ yiqui cùñú, ñáyiu-áⁿ cúú-yu ñáyiu cùu cuendá Yã Ndiõxí. ³ Te nchaa ñáyiu ñá túú càháⁿ nàcuáa càa Jesús cútnáhá ní quixi-gã ñuyú-a ñáyiu-áⁿ

dándahú ñáhã-yu, chi ñá túú cùu-yu ñáyiu cùu cuendá Yã Ndiõxí. Te diu-ní-yu cùu úhú iní-yu Jèsús. Te nchòhó sa nàha-ndo sá cùndècu ñáyiu cuu úhú iní ñáhá xii-gã, dico yúhú càchí tnúhu-í xii-ndo sã sã ndecú-yu.

⁴ Te nchòhó ñáyiu cùu datná déhe-í, ndècu ndihì-ndo Yá Ndiõxí, te ñá dáñá-ndó dándahú ñáhã nchaa ñáyiu càchí sá càháⁿ tnúhu-gã te ñá ndáá. Te ñá túú sàndáá iní-ndó chi Yá Ndiõxí Yaá ndécú ndihì-ndo taxi tnunì víhí-gã dàcúxí yùcu ñávãha ndècu ndihì nchaa ñáyiu ñuhu ichi cuehé ichi duha. ⁵ Te nchaa ñáyiu dándahú ñáhã sã càháⁿ tnúhu Yá Ndiõxí ndécú-yu ichi cuehé ichi duha, te mee-ni cuendá nchaa sá ío ñuyú-a càháⁿ-yu. Te tédóho ñaha nchaa dava-gã ñáyiu ndècu diu-ni ichi cuehé ichi duha. ⁶ Te nchoo cùu-o ñáyiu cùu cuendá Yã Ndiõxí. Te nchaa ñáyiu xĩndecu ichi-gã tnè-yu tnúhu càháⁿ-ó, te nchaa ñáyiu ñá túú ndècu ichi-gã ñá túú tnè-yu tnúhu càháⁿ-ó. Te duha te cùtnunì iní-ó nãndi cùu ñáyiu càháⁿ ndáá, te cùtnunì tucu iní-ó nãndi cùu ñáyiu dándahú ñáhã.

Cuu iní-ó tnàha ñáyiu-o dàtná cúú iní ñáhá mèe Yá Ndiõxí xii-o

⁷ Te nchòhó ñáyiu ío cùu iní-í, xini ñuhu-xi cuu iní tnáhã-ó dàtná cúú iní ñáhã mèe Yá Ndiõxí xii-o, chi mee-gã táxi-gã sá xini tnùnì-ó cuendá cuu iní-ó tnàha ñáyiu-o. Te nchaa ñáyiu cùu iní tnàha ñáyiu-xi cùu-yu déhe Yá Ndiõxí, te cùtnunì ndáá iní-yu sá ndécú ndihì ñaha-gã xii-yu. ⁸ Te nchaa ñáyiu ñá túú cùu iní tnàha ñáyiu-xi ñá túú ndècu ndihì-yu Yá Ndiõxí. Te nchaa ñáyiu ndècu ndihì Yá Ndiõxí, ñáyiu-áⁿ sãñaha-gã sá xini tnùnì-yu cuendá cuu iní-yu tnàha ñáyiu-yu. ⁹ Te cùtnunì iní-ó sã cúú iní ñáhã Yã Ndiõxí xii-o nchaa-o, chi ní tendaha-gã ñⁿdii díi-ni Déhe-gá Xítohó Jesucrìstú ní quixi-gã ñuyú-a cuendá sá díú-gã cada te naníhí tàhú-ó, te núú na quindáá iní-ó tnúhu-gã. ¹⁰ Te ío cùu iní ñáhã Yã Ndiõxí xii-o nchaa-o. Te ñá díú sã méé-ó cùu iní-ó-gã, chi díhna-gã méé-gã sa cùu iní ñáhã tnáhí-gã xii-o, núú xiãⁿ ní tendaha-gã Déhe-gá ní quixi-gã ñuyú-a ní xihí-gã sá cuendá nchaa yicá cuèchi-o.

11 Te nchòhó ñáyiú ío cùu iní-í, xìnì ñuhu-xi cuu iní tnáhá-ó, chi mee Yá Ndiöxí ío cùu iní ñáhá-gã xii-o. 12 Te ni ñⁿ nchoo ñáyiú ndècu ñuyíú-a ñá túú xìní-ó nàcuáa càa Yá Ndiöxí, dico nchoo ñáyiú ní tuha ichi-gá chi cùtnuní iní-ó sã ndécú ndìhi ñaha-gá xii-o. Núu xiãⁿ cúú ìní tnáhá-ó ñⁿ ñⁿ-o, te cùtnuní iní-ó sã cúú ìní ndisa-o-gã. 13 Te cùtnuní iní-ó sã ndécú-ó ìchi-gá, te ndècu ndìhi ñaha-gá xii-o, chi ní taxi-gá Espiritú-gá ndécú ndìhi-o. 14 Te yúhú ndìhi dava-gá cue téé ní xica cuu ndìhi-gá càháⁿ-ndí sá ñí xìní-ndí Jèsús Déhe Yá Ndiöxí ní quixi-gá ñuyíú-a, chi Tátá-ó Dütú Ndiöxí ní tendaha ñaha xii-gá ní quixi-gá cuendá dàcácu nihnu-gá nchaa nchoo ñáyiú ndècu ñuyíú-a núú ùhú núú ndàhú. 15 Te nchaa ñáyiú càháⁿ ni yùhu ni iní-xi sá Dèhe Yá Ndiöxí cúú Jèsús, ñáyiú-áⁿ ndécú-yu ichi-gá te ndècu ndìhi ñaha-gá xií-yu.

16 Te sàndáá iní-ó ñí yuhu ni iní-ó sã Yá Ndiöxí cúú ìní ñáhá-gã xii-o, chi ducaⁿ iní-gá. Te nchaa ñáyiú cùu iní ñáhá xii Yá Ndiöxí ndécú ndìhi ñaha-gá xií-yu. 17 Te núu ndisa cùu iní-ó Yá Ndiöxí te vá yùhú-ó òré ná sáá nduu tàud^ñ ñaha-gá xii-o tnùú nchaa ñáyiú ndècu ichi cuehé ichi duha, chi quide ndáá-ó ndècu-o núú-gã ñuyíú-a dàtná ní quide mee Jèsús. 18 Chi nchaa ñáyiú cùu iní ñáhá xii Yá Ndiöxí ñá túú-gã yùhú-yu, te núu cùu iní ndisá-yu-gã. Te núu yùhú-yu te xiãⁿ sa ndòhó-yu, chi ñùhú-yu ichi cuáháⁿ-yu núú ùhú núú ndàhú, chi nchaa ñáyiú yùhú ñá túú cùu iní ndisá-yu Yá Ndiöxí.

19 Te cuu iní-ó Yá Ndiöxí, chi mee-gã ndéé cútnáhá vátá quindáá-gá iní-ó tnùhu-gá sa cùu iní ñáhá-gã xii-o. 20 Te nchaa ñáyiú càchí sá cúú ìní-yu Yá Ndiöxí, te cùu ùhú iní-yu tnàha ñáyiú-yu, ñáyiú-áⁿ dácuàndehndé-yu. Te núu ñá túú cùu iní-yu tnàha ñáyiú-yu ndècu ñuyíú-a ña, te uuⁿ-gã quidè-yu Yá Ndiöxí Yaá ñá túú xìní núú-yu. 21 Te càchí-gá núú tnùhu-gá sá ñáyiú na cùu iní ñáhá xii Yá Ndiöxí, te ducaⁿ-ni cùu iní-yu tnàha ñáyiú-yu.

5

Nchaa ñáyiú ní ndacu ní dáñá ìchi cuehé

ichi duha

1 Te nchaa ñáyiú sàndáá iní sá Jèsús cúú-gã Crístú Yaá ní quixi ñuyíú-a, ñáyiú-áⁿ cúú-yu déhe Yá Ndiöxí. Te cùu iní-yu Tátá-ó Dütú Ndiöxí, te cùu iní-yu Déhe-gá. 2 Te núu cùu iní-ó Yá Ndiöxí te quide-o nacuáa càháⁿ-gá, te cùtnuní iní-ó sã cúú ìní tnáhá ndisa-o nacuáa ndècu-o ichi-gá. 3 Te núu cùu iní-ó Yá Ndiöxí te tnè-o tnùhu càháⁿ-gá, chi cùtnuní iní-ó sã ñà díú ñⁿ sá ùhú cúú-xí dàtná càchí ñáyiú. 4 Te nchaa nchoo ñáyiú cùu déhe-gá sa ní dáñá-ó ìchi cuehé ichi duha, chi ní sàndáá iní-ó Jèsús núu xiãⁿ ní ndacu-o ñí dáñá-ó ìchi-áⁿ. 5 Te nchaa ñáyiú sàndáá iní sá Dèhe Yá Ndiöxí cúú Jèsús ní ndacú-yu ní queé-yu ichi cuehé ichi duha.

Nàcuáa ní càháⁿ Yá Ndiöxí cuendá Jèsús

6 Te Xítohó Jesucristú ní quixi-gá ñuyíú-a, te ní sandute-gá. Te ñá díú-ní xiãⁿ, chi ní xíhí-gá sá cuendá nchaa yíca cuèchi-o. Te Espiritú Yá Ndiöxí càháⁿ-xi mee-ni sã ndáá, chi càháⁿ Espiritú-gá-áⁿ sã Jèsús cúú-gã Crístú Yaá ní quixi ñuyíú-a. 7 Te úní testiú ndécú àndiú, Tátá-ó Dütú Ndiöxí, ndìhi Déhe-gá Xítohó Jesucristú, ndìhi Espiritú-gá. Te ñⁿ-ni tnùhu càháⁿ ndi nùnì testiú-áⁿ. 8 Te ducaⁿ cùu-xi ñuyíú-a tucu, chi càháⁿ Espiritú Yá Ndiöxí sá Jèsús cúú-gã Crístú. Te ní sandute-gá, te ní xíhí-gá sá cuendá nchaa yíca cuèchi-o. Te xiãⁿ cútnùnì ndáá iní-ó sã díú Jèsús cúú-gã Crístú. 9 Te núu tnè-o tnùhu váha càháⁿ ñáyiú, te váha-gã tnè-o tnùhu càháⁿ Yá Ndiöxí, chi càháⁿ ndáá-gá sá Dèhe-gá cúú Jèsús. 10 Te nchaa ñáyiú sàndáá iní sá Jèsús cúú-gã Déhe Yá Ndiöxí, ñáyiú-áⁿ cútnùnì iní-yu sá cúú-xí ñⁿ sá ndáá. Te nchaa ñáyiú ñá túú sàndáá iní tnùhu càháⁿ Yá Ndiöxí quidè-yu-gá ñⁿ ñándéhdé, dico ñá túú ndèhdé-gá, chi mèé-yu ñá túú sàndáá iní-yu sá Dèhe-gá cúú Jèsús dàtná càchí mèé-gã. 11 Te Yá Ndiöxí càchí tnùhu ndáá-gá sá cùndècu-o ndìhi-gá ni caa ni quíhíⁿ. Te duha càháⁿ-gá chi sàndáá iní-ó Dèhe-gá. 12 Te nchaa ñáyiú na quindáá iní ñáhá xii Déhe-gá cundécú-yu ndìhi-gá ni caa ni quíhíⁿ. Te nchaa ñáyiú ñá túú sàndáá iní ñáhá xii Déhe-gá vá cùndécú-yu ndìhí-gá.

Sáhu ndèé núú nǐ ndìhi-ná

¹³ Te cuèndá sá sàndáá iní-ndó Dèhe Yá Ndiǒxí núu xǎⁿ chídó tñuní-í tñúhu-a cuèndá cutnùní iní-ndó sá cùndècu ndìhi-o-gá nǐ caa nǐ quíhíⁿ.

¹⁴ Te ñá túú tñúhu yùhú cáháⁿ ndìhi-o Yá Ndiǒxí, chi tedóho ñaha-gǎ xii-o núu ñⁿ-ná sá ná càcáⁿ-ó núú-gǎ dàtná cuìní méé-gǎ.

¹⁵ Te cùtnuní iní-ó sǎ táxí-gǎ sá xìcáⁿ-ó núú-gǎ, chi nàha-o sá tedóho ñaha-gǎ xii-o núu na càcáⁿ-ó nàcuáa cùu iní-gá.

¹⁶ Te núu xìní-ó ñǎyiu ndècu ichi Yá Ndiǒxí te quidé-yu sá ñà túú vǎha núú-gǎ, te ndèhe-o sá ñà túú ní xíta nihnu duúⁿ-yu, te cáháⁿ ndìhi-o Yá Ndiǒxí cuèndá-yu, te dàcácu nihnu ñaha-gǎ xií-yu te núu na nùcúnu ichi váha-yu. Chi íó ñáyiu xídó quidé nǎndí sá ñà túú vǎha te xíta nihnu duúⁿ-yu, te vá càháⁿ ndìhi-gá-ó Yá Ndiǒxí cuèndá-yu. ¹⁷ Te nchaa sá cuèhé sá dúhá cùu-xi yíca cuèchi, dico ñá ncháá-xí cùu-xi sá dácuíta nihnu ñaha dùuⁿ.

¹⁸ Te nàha-o sá nchóó ñáyiu cùu déhe Yá Ndiǒxí ñá túú-gǎ sání iní-ó càda-o nǎndí sá cuèhé sá dúhá. Te ducaⁿ chi mee Jèsús déhe Yá Ndiǒxí xító ñaha-gá xii-o, núu xǎⁿ ñá ndácú-gǎ yucu ñǎvǎha dàxínu iní ñáhá-xí xii-o cada-o sá ñà túú vǎha.

¹⁹ Te nchoo nàha-o sá ndécú ndìhi-o Yá Ndiǒxí. Te nchaa ñáyiu ndècu ichi cuehé ichi duha tàxi tñuní ñáhá-nǎ yucu ñǎvǎha xii-yu.

²⁰ Te nàha tucu-o sá ñùyíú-a ní quixi Jèsús Déhe Yá Ndiǒxí ní taxi-gá sá xìní tñuní-ó cuèndá cutnùní iní-ó sá méé-gǎ cúú-gǎ Ndiǒxí-ó. Te ndècu ndìhi-o mee-gá ndìhi Déhe-gá Jèsús, te ñⁿdì díí-ni mee-gá cúú-gǎ Yá Ndiǒxí, te ndècu dava-gá sá nácuáca ñaha-gá xii-o cùndècu-o ndìhi-gá nǐ caa nǐ quíhíⁿ. ²¹ Te nchòhó ñáyiu cùu datná déhe-í, vá quèndáá iní-ndó nchàa sá càchí-yu cùu ndiǒxí, chi dìcò ndaha cue téé ñuyíú-a ní cuáha nchaa xǎⁿ. Te ducaⁿ na cùnduu. Te ío chí cádá ndèe iní-nǎ vitna.

TUTÚ CÚÚ ÛÚ NÍ CADÚHA TÉ JUÁÁ

Tnúhu Yá Ndiõxí ndihí nàcuáa cuu iní tnáhá-ó

¹ Te yúhú té Juáá té yìndaha ñaha xii ñáyiú sàndáá iní tnúhu Jèsús, tèe-í tnúhu-a ìⁿ núú tütú daquìxi-í ndaha yòhó ñaha ní cáháⁿ ñáhá Yá Ndiõxí, te nchaa tnúhu-a cùu-xi tnahá cuèndá cue déhe-n, chi ío cùu iní ñáhà-í xii-ndo, chi ndècu-ndo ichi Yá Ndiõxí. Te ñá díú-ní mèe-í cúú iní ñáhà-í xii-ndo, chi nchaa-ndí nàcuáa sàndáá iní-ndí tnúhu-gá cúú iní ñáhá-ndí xii-ndo.

² Te cùu iní ñáhá-ndí xii-ndo chi ndècu ndihí-ndo tnúhu ndáá tnúhu Yá Ndiõxí, te ducaⁿ-ní cùndecu-o ndihí tnúhu-áⁿ ní caa ní quíhíⁿ. ³ Te xicáⁿ táhù-í núú Tátá-ó Dütú Ndiõxí, ndihí núú Déhe-gá Xítóhó Jesucristú sá ná chíndèe ñaha-gá xii-ndo, te coto ñaha-gá te ío váha cuu iní-ndó cùndecu-ndo. Te duha xicáⁿ táhù-í núú-gá chi ndècu ndihí-o tnúhu ndáá tnúhu Yá Ndiõxí, te cùu iní-ó-gá.

⁴ Te ío cùdíí iní-í, chi ní naníhí-í ìⁿ ùú déhe-n, te quidé-yu nàcuáa sànu ichi ñaha tnúhu ndáá dàtná ní táúchíúⁿ mèe Tátá-ó Dütú Ndiõxí. ⁵ Te vitna yòhó ñaha ní cáháⁿ ñáhá Yá Ndiõxí, cächí tnúhu-í xii-n sã xíní ñùhu-xi cuu iní-ó tnàha ñáyiú-o. Te ñá díú ìⁿ tnúhu saa cùu-xi, chi díu-ni tnúhu sá ñí ngúndecu ndihí-o ndèe cútnàhá ní tuha-o ìchi Yá Ndiõxí. ⁶ Te núu cùu iní-ó Yá Ndiõxí, te cùu iní-ó tnàha ñáyiú-o dàtná ní cachí méé-gá, te tñi-o nchaa tnúhu càháⁿ-gá. Te ní cachí-gá sá cúú iní-ó-gá, te cuu iní-ó tnàha ñáyiú-o. Te tnúhu-a ní tecú dóho-o ndèe cútnàhá ní tuha-o ìchi-gá.

Cue téé dándahú tnàha ñáyiú-xi

⁷ Te ío vai ñáyiú dándahú ñáhá xica cuú-yu ñuyíú-a, te cächí-yu sá ñã ndáá sá Xítóhó Jesucristú ní cuu-gá ìⁿ ñáyiú ndisa. Te nchaa ñáyiú duha càháⁿ dácuàndehndé-yu, te cùu úhú iní-yu Jèsús. ⁸ Te quíhí iní-ndó sã vã dándahú ñáhá ñáyiú-áⁿ xii-ndo cuèndá sá vã cuíta chiúⁿ Yá Ndiõxí ní quide-o. Te òré

ná quíxí tùcu Jesús ñuyíú-a te taxi-gá nchaa sá váha cùu iní méé-gá cùndecu ndihí-o.

⁹ Te nchaa ñáyiú dàña tnúhu Xítóhó Jesucristú, te nàtníⁿ-yu ingá ichi, ñáyiú-áⁿ ñã túú ndècu ndihí-yu Yá Ndiõxí. Te nchaa ñáyiú ñã túú dàña tnúhu Xítóhó Jesucristú ndècu ndihí-yu Yá Ndiõxí ndihí Déhe-gá Xítóhó Jesucristú. ¹⁰ Te núu véxi ñáyiú núú ndécú-ndó cächí-yu sá càháⁿ-yu tnúhu Yá Ndiõxí te ñã ndáá, te vá cuãha-ndo tnúhu danèhé ñáhã-yu xii-ndo, te ni vã cuãha-ndó-yu tnúhu ndee iní cuèndá chiúⁿ quidé-yu. ¹¹ Chi núu na càháⁿ ndihí váha-ndó-yu, te dàtná tnúhu sá chíndèe-ndó-yu quidé-yu nchaa sá cuèhé sá dúhá.

Tnúhu ndéé núú ñí ndihí-ná

¹² Te ío vai-gá tnúhu cuíní-í cachí tnúhu-í xii-ndo, dico vá téé-gá-í chi cuíní-í quixi-í núú ndécú-ndó ndàtnúhu-o cuèndá cudíí víhí iní-ó nchaa-o.

¹³ Te nchaa cue déhe cúhú-n, ñáyiú ní cáháⁿ ñáhá Yá Ndiõxí quidé ndèe iní ñáhã-yu xii-n.

TUTÚ CÚÚ ÌNÍ NÍ CADÚHA TÉ JUÁÁ

Càháⁿ váha-yu cuèndá té Gǎyú

¹ Te yúhú té Juáá téé yìndaha ñaha xii ñáyiú sàndáá iní tnúhu Jèsús, chido tñuní-í tnúhu-a ìⁿ núú tutú sá cúú-xí yòhó té Gǎyú téé ío cùu iní-í, chi ndècu ndìhi-n tnúhu ndáá tnúhu Yá Ndiòxí.

² Te yòhó téé ío cùu iní-í, xicáⁿ táhù-í núú Yá Ndiòxí sá cùndècu váha-n ñà túú nǎ cumání xii-n, te vá cùhù-n, chi sa nàha-í sá ndécú váha-n núú Yá Ndiòxí. ³ Te ío ní cudíí ìní-í òré ní sáá ñáyiú ndècu ichi Yá Ndiòxí, te ní cachí tnúhu-yu sá sàndáá ndisa iní-n tñuhu ndáá ñu-ni tnúhu-gá te tñi-n nchaa nacúáa càháⁿ tnúhu-áⁿ. ⁴ Te ío cùdíí ìní-í ní ñìhí-í tnúhu sá ncháá-ní ñáyiú ní sanu ichi-í ichi Yá Ndiòxí ndécú-ñi-yu ichi-gá, te quide-ní-yu nchaa nacúáa càháⁿ-gá.

⁵ Te yòhó téé ío cùu iní-í, ío váha quide-n núú Yá Ndiòxí, chi chindee-n nchaa ñáyiú véxi dava-gá ñúú xicá, ñáyiú sàndáá iní tnúhu Yá Ndiòxí. ⁶ Te nchaa ñáyiú-áⁿ càháⁿ-yu núú tàcá ñáyiú càháⁿ ndìhi Yá Ndiòxí iha sá ío cùu iní-n nchaa tñaha ñáyiú-n dàtná càháⁿ Yá Ndiòxí. Te yúhú càháⁿ ndàhù-í núú-n sǎ cádá ndè-ni iní-n chindee-n nchaa ñáyiú-áⁿ nchaa sá xíní ñùhù-yu ichi. Te núu ducaⁿ na càda-n te quide-n nacúáa cùu iní Yá Ndiòxí, te xínu cuechi-n tñahá-n núú-gǎ. ⁷ Chi nchaa ñáyiú-áⁿ ñi tñi-yu ichi cuáháⁿ-yu càháⁿ-yu tnúhu Jèsús. Te ñá túú tñi-yu ní ìⁿ sá sǎñaha ñáyiú ñá túú ndècu ichi Yá Ndiòxí. ⁸ Te núu xǎⁿ nchoo xìni ñuhu-xi chindee-o nchaa ñáyiú xínu cuechi núú-gǎ ñáyiú càháⁿ tnúhu-gá, te ducaⁿ te cutnùní iní-ó sǎ tñahá-ó xínu cuechi-o ndìhí-yu núú-gǎ.

Ñá túú quide váha té Diótrefés

⁹ Te yúhú ní tendaha-í tutú cuáháⁿ núú tàcá ñáyiú chìñuhù-yu Yá Ndiòxí, dico ìⁿ téé ndècu-áⁿ nání-dě Diótrefés, te ñá sàndáá iní-dé nchaa tnúhu càháⁿ-í, chi cuìní-dé cunuu-dě núú-yu. ¹⁰ Te òré quixi-í te cada ndáá-ó nchaa tnúhu cuèhé tnúhu duha càháⁿ-dé cuèndá-í. Te ñá díú-ní xǎⁿ

quidé-dě, chi nchaa ñáyiú véxi ingá ñúú càháⁿ tnúhu Yá Ndiòxí ñá túú càháⁿ ñáhá-dě vehe-dé, te ní ñǎ dáñá-dě càháⁿ ndìhi ñaha dàva-gá ñáyiú xii-yu. Te nchaa ñáyiú cuìní càháⁿ ndìhi ñaha xii-yu, te quèñuhu ñaha duuⁿ-ni-dé ñá dáñá-gǎ-dé níhí tñáhá-yu ndìhi nchaa ñáyiú tàcá dácúaha tnúhu Yá Ndiòxí.

¹¹ Te yòhó téé ío cùu iní-í, vá cùndècu-n ichi cuehé ichi duha dàtná quidé nchaa dava-gá ñáyiú, cada-n mèe-ni sá váha. Chi nchaa ñáyiú quide váha ndécú-yu ichi Yá Ndiòxí. Te nchaa ñáyiú quide nchaa sá cuèhé sá dúhá ñà túú ndécú-yu ichi Yá Ndiòxí.

Nchaa ñáyiú càháⁿ váha-yu cuèndá té Demètriú

¹² Te nchaa ñáyiú càháⁿ váha-yu cuèndá té Demètriú, chi quide ndáá-dé dàtná càháⁿ Yá Ndiòxí. Te tñahá yúhú càháⁿ-í cuèndá-dé sá ío váha quide-dé, te nchòhó sa nàha-ndo sá yùhú càháⁿ ndáá-í.

Tnúhu ndéé núú ñi ndìhi-ná

¹³ Te vǎi-gá tnúhu cuìní-í cachí tnúhu-í xii-n ní cùu, dico ñá ní tèe-gá-í, ¹⁴ chi cuìní-í quixi ndìhi-í, te càháⁿ-ó núú núú-ó.

¹⁵ Te ío cada ndee ìní, te xicáⁿ táhù-í núú Yá Ndiòxí sá ná cùndècu váha-n ñà túú nǎ cuu cundècu-n. Te nchaa cue ñáyiú xíní tñahá ndìhi-o ndècu iha quide ndee iní ñáhá-yu xii-n. Te yòhó cúñaha-n nchaa ñáyiú xíní tñahá ndìhi-í ndécú xǎⁿ ná càda ndee iní-yu. Te ío cada ndee ìní-nǎ vitna.

TUTÚ NÍ CADÚHA TÉ JUDÁS

Té Jùdás càdúha-dé tutú quíhíⁿ ndaha ñáyiú ní cachí Yá Ndiöxí nduu cuèndá-gá

¹ Yúhú té Jùdás ñaní té Jàcobó xínú cuèchi-í nùú Xítóhó Jesucristú, te càdúha-í tutú-a sá cúú-xí nchòhó ñáyiú ní cachí Yá Ndiöxí Yaá cúú Tàtá-ó ndùu cuendá-gá, ñáyiú ío cùu iní-gá. Te dàtná-ni xító ñaha-gá xii-ndo vitna ñu-ni ducaⁿ còto ñaha-gá xii-ndo ndèé ná sàá nduu quixi tucu Xítóhó Jesucristú ñuyíú-a. ² Te xicáⁿ táhù-í nùú Yá Ndiöxí sá ïo-gá ná chindee chitúu ñaha-gá xii-ndo, te na cùtnuní-gá iní-ndó sá ïo cùu iní ñáhá-gá xii-ndo, te ducaⁿ ïo váha cuu iní-ndó cùndecu-ndo.

Ñáyiú ñá túú càháⁿ tnúhu ndáá tnúhu Yá Ndiöxí
(2 Pedro 2:1-17)

³ Te nchòhó ñáyiú ío cùu iní-í, ducaⁿ-ni ïo sàni iní-í cadúha-í ñⁿ tutú sá cúú-xí-ndó cuèndá danèhé ñáhà-í xii-ndo nàcuáa ní cuu ní naníhí tàhù-ó dico ñá túú càdúha-í, dico vitna quide cuendá-í sá xíní ñùhu-gá-xi cáháⁿ-í nùú tütú-í sá nchòhó ío cundehe-ndo tnúhu cáháⁿ-ndó ndíhí ñáyiú, te cáháⁿ-ndó nàcuáa ndùu tnúhu sàndáá iní mée-ndó, chi ñu-ni tnúhu-áⁿ ní cáháⁿ Yá Ndiöxí sá cúú-xí nchàa ñáyiú ndècu ichi-gá. Te vitna ñá túú-gá ná tnúhu càháⁿ-gá sá cúú-xí-yu, chi sa ní cáháⁿ duuⁿ-gá. ⁴ Te duha càháⁿ-í nùú tütú-a sá cúú-xí-ndó, chi ñíhí-í tnúhu sá xicá cùu ñáyiú chitnahá ñáhá xii-ndo, te ni ñà túú xíní-ndó ñá ñáyiú cùú-yu, te ñáyiú-áⁿ cùú-yu ñáyiú cùu úhú iní ñáhá xii Yá Ndiöxí. Te ñⁿ xichi nùú tütú Yá Ndiöxí càchí-xi sá ñáyiú-áⁿ quíhíⁿ-yu nùú ùhú nùú ndàhú, te ñu-ni ñáyiú-áⁿ càchí-yu sá ïo váha iní Yá Ndiöxí ñùu xíáⁿ cuu-ni cadá-yu nchaa sá cuèhé sá dúhá. Te dàquee tíhù-yu Yá Ndiöxí Yaá ío cùnuu, ndíhí Xítóhó Jesucristú.

⁵ Te nchòhó sa xíní váha-ndo nàcuáa ní quide Yá Ndiöxí ndéé sanaha dico dàndacu iní ñáhà-í xii-ndo, chi dàvá-áⁿ ní queñuhu-gá ñáyiú israél nàcióⁿ Ègíptú, te dàva ñáyiú-áⁿ ñà túú ní sàndáá iní ñáhá-yu

xii-gá te ní dánáá ñàha-gá xii-yu. ⁶ Te nchaa espíritú ñá túú ní cuení cada ndáa cunu cuechi nùú Yá Ndiöxí ní quee-xi nùú ndécú-xí, te mee-gá ní sadí nihnu ñaha-gá xii-xi ñⁿ xichi nùú néé te vá cãcu-xi, chi sáá nduu te nayáha-xi cundecu-xi nùú ùhú nùú ndàhú ni caa ni quíhíⁿ. ⁷ Te dàndacu iní ñáhá tucu-í xii-ndo nàcuáa ní yáha ñáyiú ñuú Sòdomá, ndíhí ñáyiú ñuú Gòmorrá, ndíhí nchaa ñáyiú ñuú ní cáa yatni xíáⁿ, chi tnàhá-yu ñá túú ní quide váha-yu dàtná ní quide nchaa cue espíritú-áⁿ. Chi cue téé ní xóo cáháⁿ ndíhí tnàha ndí mee-güedé, te ñu-ni ducaⁿ ní xóo cada cue ñáyiú díhí tucu. Te sá dúcáⁿ ní quidé-yu nùu ní dányóyó Yá Ndiöxí ñuhú ñuú-yu ní dánáá ñàha-gá xii-yu. Te xíáⁿ cùtnuní iní-ó sá nchàa ñáyiú ñá túú cuení cada váha nùú-gá quíhíⁿ-yu nùú ùhú nùú ndàhú ni caa ni quíhíⁿ.

⁸ Te ñu-ni ducaⁿ quide ñáyiú chitnahá ñáhá xii-ndo cuení-yu dàndàhú ñáhá-yu, chi càchí-yu sá dácòto ñaha saní-yu nàcuáa cadá-yu, nùu xíáⁿ nándí nchaa sá cuèhé sá dúhá quidé-yu sá cúú-xí yíqui cuñú-yu, te dàquee tíhù-yu nchaa nàcuáa càháⁿ Yá Ndiöxí cada-o, te càháⁿ úhú-yu cuèndá nchaa espíritú cùnùu. ⁹ Te mee espíritú cùnùu-gá xínú cuèchi nùú Yá Ndiöxí nání Mìguél ní nàá-xi ndíhí sácúíhná cuèndá yíqui cùñú ndí Moisés. Te espíritú-áⁿ ñà túú ní cùyí-xi cáháⁿ úhú-xi sácúíhná-áⁿ, chi ní xáhaⁿ-ni-xi: “Mee Yá Ndiöxí náhá-gá te nùu nása cada ñaha-gá xii-n”, duha ní xáhaⁿ-xi. ¹⁰ Te nchaa ñáyiú ducaⁿ dàndàhú ñáhá xii-ndo-áⁿ càháⁿ cuèhé-yu cuèndá nchaa sá vátá cùtnuní-gá iní-yu nása ndùu, te quidé-yu dàtná quidé cuè quíti chi cue quíti-áⁿ quidé-güedí nání véxi iní-güedí, te ni ñà túú cùtnuní iní-güedí nchaa sá quidé-güedí. Te ducaⁿ sà tnàhá-xi cùú-yu, chi nchaa sá cuèhé sá dúhá véxi iní-yu quidé-yu, te sá dúcáⁿ quidé-yu xíáⁿ tá xíta nihnú-yu cuáháⁿ.

¹¹ ;Te ndàhú ní cuú-yu chi ío ndohó-yu!, chi quidé-yu dàtná ní quide ndí Cáin. Te nándí sá quidé-yu cuèndá sá cuení-yu díhúⁿ dàtná ní xóo cada ndí Bàlaám. Te ío cùu sáá iní-yu nùú Yá Ndiöxí dàtná ní xóo cada ndí Còré, nùu xíáⁿ tá xíta nihnú-yu cuáháⁿ. ¹² Te

dìcò sácáⁿnúú sǎha ñàhá-yu xii-ndo òrè nàtàcá-ndó quìde-ndo vico chiñuhu-ndo Yá Ndiòxí. Te òré xéxí ndìhi ñàhá-yu xii-ndo te mee-ni sǎ cúú-xí mèé-yu quìde cuendá-yu, te ñá túú nèhé-yu sǎ yíñuhu núú Yǎ Ndiòxí. Te cùú-yu dàtná ìⁿ vícò sǎ cuàháⁿ-xi duha cuáháⁿ-xi dàcáⁿ te ñá túú dǎú nchídó-xí, ducaⁿ sǎ tnahá-xi cùú-yu. Te cùu tucú-yu dàtná ìⁿ yutnu vídí sǎ ñà túú tnahí cùuⁿ sávídí-xi, te nchaa yutnu ducaⁿ ñà túú cùuⁿ sávídí-xi te tñuhu-güedé ndéé yóho-xi te xihí duuⁿ-xi. Te ducaⁿ sǎtnahá-xi cùú-yu, chi ñá túú quìde váha-yu. ¹³ Te cùu tucú-yu dàtná ndute làmár, chi ndute-áⁿ òré càndá-xi te quecòo tíñú-xi ìⁿ xio. Te cùu tucú-yu dàtná ìⁿ chódíní cuáháⁿ-di duha cuáháⁿ-di dàcáⁿ. Te ducaⁿ sǎtnahá-xi cùú-yu, chi ñá túú cuíní-yu cada váha-yu. Te ñáyíu-áⁿ daquìhíⁿ ñáhá Yǎ Ndiòxí xií-yu ìⁿ xichi núú néé núú sǎ ndecu túha cundecú-yu ni caa ni quíhíⁿ.

¹⁴ Te ndíquíⁿ yǎvá ndíi Àdán téé cùu usá ní xínani Ènóc ní dácáhú ìní ñáhá Yǎ Ndiòxí xii-dé ní cáháⁿ-dé ñu-ni cuendá nchaa ñáyíu-áⁿ. Te ní cachí-dé: “Na càchí tñuhu-í xii-ndo sǎ Yǎ Ndiòxí quixi-gá ndìhi cuèhé víhí espíritú xínú cuèchi núú-gǎ. ¹⁵ Te dàvá-áⁿ cada ndáá-gǎ cuèchi nchaa ñáyíu te daquìhíⁿ-gǎ nchaa ñáyíu ndècu ichi cuehé ichi duha núú ùhú núú ndàhú, te ducaⁿ càda ñaha-gǎ xií-yu, chi mee-ni sǎ cuèhé sǎ dúhá quidé-yu, te càháⁿ úhú ñáhǎ-yu xii-gǎ”, duha ní cachí te Ènóc. ¹⁶ Te ñáyíu-áⁿ ò yica ìní-yu chi ñá túú ndùu vétú ìní-yu nàcuáa ndécú-yu ñuyíú-a, te sàtnuhú-yu tñaha ñáyíú-yu te mee-ni sǎ cuèhé sǎ dúhá sàni ìní-yu quidé-yu, te quìde cahnú-yu mèé-yu, te mee-ni càháⁿ váha-yu núú tñaha ñáyíú-yu cuendá cuíní-yu sǎ cáda vǎha ñaha ñáyíu-áⁿ xií-yu.

Té Judás càháⁿ-dé dóho ñáyíu ndècu ichi Yá Ndiòxí

¹⁷ Te nchòhó ñáyíu ò cùu ìní-í, càháⁿ ndàhú-í núú-ndó sǎ ò cuhuⁿ ìní-ndó tñuhu sǎ sǎ ní dǎnehé ñáhá cuè téé ní tendaha Xítohó Jesucristú càháⁿ tñuhu-gǎ núú ñáyíu. ¹⁸ Te sa ñaha-ndo sǎ ní cachí-güedé sǎ cùmání-gǎ quixi tucu Xítohó Jesucristú ñuyíú-a, te coo ñáyíu cáháⁿ cuèhé cáháⁿ duha cuendá tñuhu-gǎ. Te ñáyíu-áⁿ cada-yu mee-ni sǎ cuèhé sǎ dúhá vèxi ìní mèé-yu.

¹⁹ Te ñáyíu-áⁿ cúú-yu ñáyíu càháⁿ nándi tñuhu sǎ ñà túú nándìhi cuendá sǎ vǎ cúú ìⁿnuu-ndo cundecu-ndo, te mee-ni sǎ cuèhé sǎ dúhá ñuhu ìní-yu, te ñá túú ndècu ndìhí-yu Espíritú Yǎ Ndiòxí.

²⁰ Te nchòhó ñáyíu ò cùu ìní-í, ò dacuàha-ndo tñuhu Yá Ndiòxí sǎ ní sándáá ìní-ndó cuendá ducaⁿ cuita cuehnu nihnu-ndo ichi-gǎ quíhíⁿ, te cáháⁿ ndìhi-ndo Yǎ Ndiòxí nàcuáa dàcahu ìní ñáhá Espíritú-gǎ xii-ndo. ²¹ Te ò coto-ndo mèe-ndo cundecu-ndo cuendá cuu váha ìní ñáhá Yǎ Ndiòxí xii-ndo, te cundetu-ndo sǎá nduu quixi Xítohó Jesucristú ñuyíú-a nacuaca ñaha-gǎ xii-ndo cundecu-ndo ndìhi-gǎ ni caa ni quíhíⁿ, chi Yaá-áⁿ ò cùndahú ìní ñáhá-gǎ xii-o.

²² Te ñáyíu sàni ìⁿ sani úú ìní-xi cúñaha-ndo xií-yu nàcuáa cada-yu cundecú-yu ichi Yá Ndiòxí. ²³ Te nchaa ñáyíu ta xíta nihnu ñuhu ichi cuáháⁿ núú ùhú núú ndàhú, ò cundìhí ìní-ndó cùñaha-ndo xií-yu tñuhu Yá Ndiòxí cuendá sǎ ná cǎcu nihnú-yu, te cundàhú ìní-ndó-yu, te quíhi ìní-ndó vǎ cáda-ndó tñaha-ndó nàcuáa quidé-yu, chi daquèe tíhú-ndó nchaa sǎ cuèhé sǎ dúhá quidé-yu-áⁿ.

Nàcuáa ndacáⁿ táhú-ó núú Yǎ Ndiòxí

²⁴ Te Yá Ndiòxí chindee ñaha-gǎ xii-ndo cuendá sǎ vǎ cùndècu-ndo ichi cuehé ichi duha, te cunduu ndoo cunduu ñine ìní-ndó càndeca ñaha-gǎ xii-ndo quíhíⁿ cundecu-ndo núú ò váha càa ndecu-gǎ, te ò cudíí ìní-ndó. ²⁵ Te Yá Ndiòxí ò ndècu ndìhi-gǎ nchaa sǎ xíní tñùní-gǎ te ñu-gǎ ní dácácu nihnu ñaha-gǎ xii-o núú ùhú núú ndàhú, te ducaⁿ ní quidè ñaha-gǎ xii-o chi ndècu ndìhi-o Xítohó Jesucristú. Te ò ndacáⁿ táhú-ó núú Yǎ Ndiòxí, chi ò càhnu cuu-gǎ ndécú-gǎ táxi tñùní-gǎ, te súúní vǎha ìní-gǎ, te ndàcu-gǎ quidè-gǎ nchaa sǎ vǎha, te ducaⁿ-ni ò càhnu cuu-gǎ ndéé cùtñahá vátá ngǎva-gǎ ñuyíú, te ducaⁿ-ni ò càhnu cuu-gǎ ndéé vitna, te ñu-ni ducaⁿ ò càhnu cuu-gǎ ni caa ni quíhíⁿ, duha xíní ñuhu-xi ndacáⁿ táhú-ó núú-gǎ. Te ducaⁿ na cùnduu. Te ò chí cáda ndèe ìní-ñǎ vitna.

NCHAA SÁ NĪ XINÍ TĒ JUÀÁ NDIĪHI NCHAA SÁ NĪ TECÚ DÓHO-DÉ

Xítohó Jesucristú xáhaⁿ-gã xii té Juàá nchaa nàcuáa cada-xi ñuyíú

¹ Te Yá Ndiöxí ní xáhaⁿ-gã xii Xítohó Jesucristú nchaa sá tá cùyatni vií-nã cada-xi ñuyíú-a cuendá sá cũñaha-gã xii cue tée xínu cuechi núú-gã, te Xítohó Jesucristú ní tendaha-gã ñⁿ espíritú xínu cuèchi núú-gã ní quixi-xi ní cachí tñúhu-xi nchaa tñúhu-án xii yúhú té Juàá té xínu cuechi núú-gã, te nchaa tñúhu-án ndéé núú tütú-a. ² Te yúhú cächí tñúhu ndáá-í xii-ndo nàcuáa ní cáhán Yá Ndiöxí, te cãháⁿ ndáá tucu-í cuendá Xítohó Jesucristú, ndihi cuendá nchaa sá nĪ xini-í.

³ Te váha táhú ñáyiú dàcuaha nchaa tñúhu ndéé núú tütú-a, te váha tucu táhú ñáyiú ndédóho, te váha tucu táhú nchaa ñáyiú tñi nacuáa cãháⁿ-xi, chi sa ta cùyatni vií-nã nduu càda-xi nchaa nacuáa cãháⁿ-xi.

Té Juàá cãdũha-dé tutú quíhíⁿ ndaha ndi ùsá xichi cue ñáyiú ndècu ichi Yá Ndiöxí

⁴ Te yúhú té Juàá cãdũha-í tutú daquixi-í ndi ùsá xichi núú ndécú nchòhó ñáyiú ndècu ichi Yá Ndiöxí ndécú distritú Àsiá. Te mee-gã ná chindee chitúu ñaha-gã xii-ndo, te ío váha cuu iní-ndó cùndecu-ndo. Te cuèi ndéé sanaha ñⁿ ni-gã ndécú, te ñⁿ ni-gã ndécú cuèi vitna, te ducaⁿ-ni cùndecu-gã cuèi ndéé núú cuahán núú vëxi, te ñⁿ ni ducaⁿ ío na chindee chitúu ñaha ndi ùsá cue espíritú ndécú núú-gã xii-ndo, te ío váha cuu iní-ndó cùndecu-ndo. ⁵ Te ñⁿ ni ducaⁿ na càda tucu Xítohó Jesucristú, te ñⁿ ni-gã cúú-gã Yaá cãháⁿ ndáá, te ñⁿ ni-gã ní xihí-gã te díhna-gã ní ndoto, te dàtnùní ndéé cuèé-gã te ndoto cue ñáyiú ní xihí, te ñⁿ ni-gã táxi tñùní-gã nchaa cue té yìndaha ñaha xii ñáyiú ndècu ñuyíú-a. Te ío cùu iní ñáhã-gã xii-o, te mee-gã ní sati níñi-gã te ní xihí-gã núú cùrúxí sá cuendá nchaa sá cuèhé sá dúhá quide-o, te ní ndada ndoo ní ndada nine-gã iní-ó, ⁶ te vitna ní quide ñaha-gã xii-o dàtná cue té yìndaha

ñáyiú, te ní quide ñaha tucu-gã xii-o dàtná cue dútú xínu cuèchi-o núú Tãtã-gã Dútú Ndiöxí. Te vitna nchaa-o chí ná cächí-ó sã ío càhnu cuu Xítohó Jesucristú, te ío cùnuu-gã, te ducaⁿ-ni na cùnuu-gã ñi caa ñi quíhíⁿ. Te ducaⁿ na cùnduu.

⁷ Te cundehe-ndo àndiú! Chi ichi xití vícò quixi Xítohó Jesucristú, te nchaa ñáyiú ndècu ñuyíú-a quini ñáhã-yu xii-gã, te tñáhã nchaa ñáyiú ñⁿ-ni cùu ndihi ñáyiú ní dánicuèhé ñáhã xii-gã quini ñáhã-yu, te nchaa ñáyiú xìndecu ñiñi ñuyíú, ñáyiú ñá tütú cùu váha iní ñáhã xii-gã ndiñú iní-yu òré quini ñáhã-yu xii-gã, te ndáá sá dúcáⁿ càda-xi.

⁸ Te Yá Ndiöxí cächí-gã: “Yúhú ío cùnuu-í chi ñⁿ ni sa ndècu ndéé cùtnáhã ní ngáva ñuyíú, te ñⁿ ni-í cundecu ndéé ná sàá nduu nàa-xi ndihi nchaa sá ío, chi yúhú cundecu-í ñi caa ñi quíhíⁿ”, duha cächí Yá Ndiöxí Yaá ndácú quide nchaandi tühú sá váha. Chi ñⁿ ni-gã sa ndècu ndéé cùtnáhã ní ngáva ñuyíú, te ñⁿ ni-gã ndécú-gã vitna, te ducaⁿ-ni cùndecu-gã ñi caa ñi quíhíⁿ.

Té Juàá ní xini-dé Xítohó Jesucristú Yaá ío cùnuu

⁹ Te yúhú té Juàá té ndècu ndihi-ndo ichi Xítohó Jesucristú, tñáhã-í ndòhò-í cuendá-gã dàtná ndòhò-ndó, te tñáhã-í nduu táhù-í cundecu ndihi ñaha-í xii-ndo núú ndécú Yá Ndiöxí táxi tñùní-gã. Te ío quide cahnu iní-ó cuèi nándi yáha-o ndècu-o sá cuendá Xítohó Jesucristú. Te yúhú ní ngava-í vecaa ñⁿ ñuu nání Pãtmós, te ñuu-án cáá xití ndute làmár. Te ducaⁿ ñi cuu cuendá sá cãháⁿ-í tñúhu Yá Ndiöxí, te cãháⁿ váha-í cuendá Xítohó Jesucristú. ¹⁰ Te ñⁿ nduu ndumìngú nduu nàtacá-ó chihñuhu-o Yá Ndiöxí ní quide ñaha Espíritú-gã xii-í nàcuáa cächí iní-xi, te ní tecú dóho-í níhi ní cáhãⁿ ñⁿ sá ñi cáhãⁿ ndàa sàtã-í te dàtná níhi cáhãⁿ ñⁿ cútú ducaⁿ níhi ní cáhãⁿ-xi. ¹¹ Te cächí sá cãháⁿ-án:

—Yúhú sa ndècu-í ndéé cùtnáhã ní ngáva ñuyíú, te ñⁿ ni-í cundecu-í ndéé ná sàá nduu nàa-xi ndihi nchaa sá ío, te chido tñùní-n ñⁿ núú tütú sá ná dànehé núú ñáhã-í xii-n, te daquihíⁿ-n tütú-án ndi ùsá xichi núú xìndecu cue ñáyiú ndècu ichi Yá Ndiöxí xìndecu distritú Àsiá, ndaha

ñáyiú ñuú Éfesú, ndaha ñáyiú ñuú Èsmirná, ndaha ñáyiú ñuú Përgamú, ndaha ñáyiú ñuú Tiàtirá, ndaha ñáyiú ñuú Sárdís, ndaha ñáyiú ñuú Filàdelfiá, ndaha ñáyiú ñuú Laodiceá, nchaa ñáyiú ñuú-án daquihíⁿ-n tütú-án ndahá-yu —càchí sá càháⁿ-án.

¹² Te ní nchócuñhu-í ndéhè-í nñu ná cúú sá càháⁿ-án, te ní xiní-í xñnutñi úsá tñahá sá nñi cuáha mee-ni dñhúⁿ cuàáⁿ sá ndéé dité-xi, te núú dité-xi-án yíndòdo ñⁿ caa candíl. ¹³ Te cuádava tnuú nchaa xiáⁿ ní xiní-í nùtnñi Yaá cáá dàtná cáá nchàa nchoo ñáyiú ndècu ñuyíú-a, te ñihnu-gá ñⁿ dóó cání càa-xi ndéé núú sàhá-gá, te yídúcúⁿnuu ñⁿ sìrchú ní cuáha mee-ni dñhúⁿ cuàáⁿ pèchú-gá. ¹⁴ Te idi díquí-gá cuixíⁿ quiyí dàtná cuixíⁿ idi dava mbéé, àdi yúhá sá quée óré quidé vñxiⁿ-xi, te tinùu-gá quidé-xí dàtná quidé-xí óré sàá itá ñuhú. ¹⁵ Te sàhá-gá súúni dàtásaⁿ-xi dàtná dàtásaⁿ sá nání bròncé óré càyú-xi ducaⁿ dàtásaⁿ-xi sàhá-gá, te dòndaha tñuhu càháⁿ-gá quidé-xí dàtná quidé-xí dòndaha tñi víhí yùte. ¹⁶ Te xio ndaha cùha-gá núndàha-gá úsá tñahá chódíní, te mei yùhu-gá quéné ñⁿ yuchí cahnú ndèé úú xio núú-xi, te núú-gá quidé-xí dàtná quidé-xí nñu nchìcanchii óré súúni ngòyo cahni.

¹⁷ Te sá dúcáⁿ càa Yaá-án nñi xiní-í nñu xiáⁿ ní yùhú-í ní nduá-í núú-gá, te ní cuu-í dàtná ñⁿ téé ní xihí sá dúcáⁿ ño ní yùhú-í, dico mee-gá ní sacáⁿ ndodo-gá ndaha cùha-gá núú yiqui cùñú-í, te ní cachí-gá:

—Vá yùhú-n, chi ñi-ni yùhú sa ndècu-í ndéé cùtnahá ní ngáva ñuyíú, te ñi-ni yùhú cundecu-í ndéé ná sàá nduu nàa-xi ndihí nchaa sá ío. ¹⁸ Te yùhú cù-í Yaá ní xihí te ní ndoto-í, te vitna ndècu vívù-í, te ducaⁿ-ni cùndecu-í ñi caa ñi quihíⁿ. Te yùhú cùnùu-í núú nchàa ñáyiú ní xihí te ñi-ni-í cùnùu-í núú ndécü-yu. ¹⁹ Te chido tñuní-n nchàa sá ñi xiní-n-án ñⁿ núú tütú, ndihí nchaa nàcuáa cùu vitna, ndihí nchaa sá cáda-xi ndéé núú cuàháⁿ núú vñxi-gá.

²⁰ Te na càchí tñuhu-í xii-n nàcuáa quèe-xi ndi usá chódíní ñi xiní-n yòtni-í xio ndaha cùha-í, ndihí nàcuáa quèe-xi ndi usá sá ñi cuáha mee-ni dñhúⁿ cuàáⁿ, sá ndéé dité-xi te yíndodo ñⁿ caa candíl núú dité-xi-án. Te ndi usá chódíní-án, xiáⁿ cúú-xí sá cùtnuní iní-ó

sá ndécú úsá cue téé xinu cuechi núú Yá Ndiöxí, te ndi usá cue téé-án ndécú-güedé ndi usá xichi núú ndécú ñáyiú ndècu ichi Yá Ndiöxí. Te cuèndá ndi usá sá ndéé dité-xi-án, xiáⁿ cúú-xí sá cùtnuní iní-ó sá ndécú úsá xichi ñáyiú ndècu ichi Yá Ndiöxí —duha càchí Yaá càháⁿ-án.

2

Tñuhu sá cúú-xí ñáyiú xñndecu ichi Yá Ndiöxí ndécú ñuú Éfesú

¹ Te ní cachí tucu Yaá càháⁿ-án xii-í sá chídó tñuní-í nchaa tñuhu sá vítñá càháⁿ-gá ñⁿ núú tütú, te tendaha-í quihíⁿ ndaha téé xinu cuechi núú Yá Ndiöxí ndécú ñuú Éfesú sá cúú-xí cue ñáyiú xñndecu ichi-gá ndécú ñuú-án, te duha ní cachí-gá: “Yúhú cù-í Yaá núndàha úsá chódíní xio ndaha cùha-í, te xica cuu-í núú ndécú ndi usá sá ñi cuáha mee-ni dñhúⁿ cuàáⁿ, sá ndéé dité-xi te yíndodo ñⁿ caa candíl núú dité-xi. ² Te yùhú xiní-í nchaa nàcuáa quide nchohó ñáyiú xñndecu ichi Yá Ndiöxí ndécú ñuú Éfesú, te xiní-í sá ño ndècu ndee-ndo quide chiuⁿ-ndo cuendá-gá, te ío quide cahnu iní-ndó ndècu-ndo quide-ndo chiuⁿ-gá. Te xiní-í sá ñà túú tñahí tñahá iní-ndó nàcuáa quide nchaa ñáyiú ndècu ichi cuehé ichi duha. Te xiní tucu-í sá xitó ndéé-ndó cue téé càchí sá ñi tendaha-í vñxi càháⁿ tñuhu-í te ñà ndàá sá càháⁿ-güedé tñuhu-í, te ducaⁿ te cùtnuní iní-ndó sá ñà ndàá sá càháⁿ-güedé tñuhu-í. ³ Te xiní tucu-í sá ño ndòho-ndo quide-ndo chiuⁿ cuendá-í, te ducaⁿ ño quide cahnu iní-ndó cuèi nándi yàha-ndo, te ñà túú cùu dusaⁿ-ndo quide-ndo chiuⁿ-án. ⁴ Dico ñà túú cùu váha iní-í chi nchòhó ñà túú-gá quidé-ndó dàtná ní xóo cada-ndo cùtnahá vitna cùu vii-ñi ní sándáá iní ñáhá-ndó xii-í, chi vitna ñà túú-gá cúú iní ñáhá vñhi-ndo datná ní xóo cada-ndo dàvá-án. ⁵ Te chí dándacu iní nàcuáa ní xóo cada-ndo cùtnahá vitna cùu saa ní sándáá iní ñáhá-ndó xii-í, te ndixi cuèchi iní-ndó sá ñà túú-gá quidé vñha-ndo ndècu-ndo vitna, te nucuíta saa tucu-ndo cada-ndo datná ní xóo cada-ndo ndéé díhna. Te nchòhó cada iní-ndó sá ndécú ndihí-ndo ñⁿ sá ñi cuáha mee-ni dñhúⁿ cuàáⁿ, sá ndéé dité-xi te yíndodo ñⁿ caa candíl núú dité-xi. Te núu vá ndíxí cuèchi iní-ndó nàcuáa quide-ndo ndècu-ndo ña,

te quixi-í xocàni-í xiáⁿ, te ducaⁿ sãtnahá-xi cada ñaha-í xii-ndo te núu vá ndíxi cuèchi iní-ndó nãcuáa quide-ndo ndecu-ndo, te ducaⁿ te vá yõo-gá nãtacá chiñuhu ñaha xii-í ñuú-ndó. ⁶ Dico quide váha-ndo ñⁿ xichi chi dàquee tihú-ndó nchàa sá quidé cuè ñáyiú cùu nicolaitás, te yúhú tnàhá-í dáquèe tihú-í nchaa sá quidé ñáyiú-áⁿ. ⁷ Te nchòhó cada cuendá váha-ndo nãcuáa xãhaⁿ-í xii Espiritú Yá Ndiõxí xãhaⁿ-xi xii cue ñáyiú ndècu ichi-gá xĩndecu nchaa xichi. Te duha ndùu tnúhu xãhaⁿ-í xii Espiritú-gá xãhaⁿ-xi xii-yu: Cúñaha-n xii nchaa ñáyiú sá nõu na càda ndee iní-yu yáha-yu nándi sá ná yãha-yu sá cuendá-í, te yúhú cada-í te nduu táhú-yu cundecu váha-yu núu ndécú Yá Ndiõxí, duha xãhaⁿ-í xii Espiritú-gá cúu-xi ñáyiú”, duha càchí Yaá càháⁿ-áⁿ. Te nchaa tnúhu-áⁿ ñi chidó tnùn-í sá cúu-xi ñáyiú xĩndecu ichi Yá Ndiõxí ndécú ñuú Éfesú.

Tnúhu sá cúu-xi ñáyiú xĩndecu ichi Yá Ndiõxí ndécú ñuú Èsmirná

⁸ Te ní cachí tucu Yaá càháⁿ-áⁿ xii-í sá chidó tnùn-í nchaa tnúhu sá vítná càháⁿ-gá ñⁿ núu tütú, te tendaha-í quíhíⁿ ndaha tée xĩnu cuechi núu Yá Ndiõxí ndécú ñuú Èsmirná sá cúu-xi cuè ñáyiú xĩndecu ichi-gá ndécú ñuú-áⁿ, te duha càchí-gá: “Yúhú ndécú-í ndéé cútñahá ní ngáva ñuyúú, te ñi-ni-í cundecu-í ndéé ná sáa nduu nãa-xi ndihí nchaa sá ìó, te ñi-ni-í ní xihí te ní ndoto-í ndécú-í vitna. ⁹ Te yúhú xìn-í nchaa nãcuáa quide nchohó ñáyiú ndècu ichi Yá Ndiõxí ndécú ñuú Èsmirná. Te xìn-í sá ìo ndòho-ndo ndecu-ndo sá cuendá-í, te xìn-í tucu-í sá ìo ndàhú-ndó dico cùu-ndo ñáyiú xĩndecu váha núu Yá Ndiõxí. Te xìn-í tucu-í sá ìo càháⁿ cuèhé ñáyiú isràél cuendá-ndó, dico ñá túú quidé-yu nãcuáa tàú-yu cadá-yu sá cúu-yu ñáyiú isràél, chi cùu-yu ñáyiú xĩnu cuechi mee-ni núu sãcuíhná. ¹⁰ Dico nchòhó vá yúhú-ndó cuèi nándi cùu nchaa sá ná ndòho-ndo cuendá-í, chi sãcuíhná cada-xi te ngava dava-ndo vècaá, te ducaⁿ càda-xi chi cuín-í coto ndéé ñáhá-xi xii-ndo núu ndisa sá vã ná túhú iní-ndó sã nchicúⁿ nihnu-ndo ìchi Yá Ndiõxí. Te ndòho-ndo úxi nduu dico vá dáñá ndéé-ndó càncicúⁿ nihnu-ni-ndo ìchi-gá cuèi na cùu-ndó sã cuendá-gá, te yúhú cada-í te nduu táhú-ndó cundecu-ndo

ndihí-gá ni caa ni quíhíⁿ. ¹¹ Te nchaa nchòhó cada cuendá váha-ndo nãcuáa xãhaⁿ-í xii Espiritú Yá Ndiõxí xãhaⁿ-xi xii cue ñáyiú ndècu ichi-gá xĩndecu nchaa xichi, te duha ndùu tnúhu xãhaⁿ-í xii Espiritú-gá xãhaⁿ-xi xii-yu: Cúñaha-n xii nchaa ñáyiú sá nõu na cundee iní-yu yáha-yu nándi sá ná yãha-yu sá cuendá-í te vá cuíta nihnú-yu na sáa nduu cuíta nihnu nchaa dava-gá ñáyiú, duha xãhaⁿ-í xii Espiritú-gá cúu-xi ñáyiú”, duha ní cachí Yaá càháⁿ-áⁿ. Te nchaa tnúhu-áⁿ ñi chidó tnùn-í sá cúu-xi ñáyiú xĩndecu ichi Yá Ndiõxí ndécú ñuú Èsmirná.

Tnúhu sá cúu-xi ñáyiú xĩndecu ichi Yá Ndiõxí ndécú ñuú Pèrgamú

¹² Te ní cachí tucu Yaá càháⁿ-áⁿ xii-í sá chidó tnùn-í nchaa tnúhu sá vítná càháⁿ-gá ñⁿ núu tütú, te tendaha-í quíhíⁿ ndaha tée xĩnu cuechi núu Yá Ndiõxí ndécú ñuú Pèrgamú sá cúu-xi cuè ñáyiú xĩndecu ichi-gá ndécú ñuú-áⁿ, te duha càchí-gá: “Yúhú cúu-í Yaá néhé ñⁿ yuchí cáni te ndéé úu xio núu-xi. ¹³ Te yúhú xìn-í nchaa nãcuáa quide nchohó cue ñáyiú xĩndecu ichi Yá Ndiõxí ndécú ñuú Pèrgamú, te xìn-í tucu-í sá ndécú-ndó nõu ìo cunuu yucu ñávãha, te ñá túú dàña ndéé-ndó nchicúⁿ nihnu-ndo ìchi-í, te ducaⁿ ìo sãndáá iní ñáhá-ni-ndó xii-í, te ñi-ni ducaⁿ ñi quide-ndo cútñahá ní sahní-güedé té Àntipás núu ndécú-ndó ñi-ni núu dúcáⁿ ìo cunuu yucu ñávãha. Te ndí-áⁿ ñi quide ndáá ndíi ní xĩndecu ndíi ichi-í chi ní càháⁿ váha ndíi cuendá-í. ¹⁴ Dico ñá túú cùu váha iní-í cuendá ñⁿ úú sá quidé-ndó, chi ndècu ndihí-ndo ñáyiú nchicúⁿ nihnu-ni nchaa nãcuáa ní càháⁿ ndíi Balaám. Chi ndí-áⁿ ñá túú ní quide váha ndíi chi ní dácáhu ñi ndíi ñngá tée ní xĩnani Bálac nãcuáa cada-dé canu ichi-dé cue ñáyiú isràél ñngá ichi sá ñá túú váha, chi ní xãhaⁿ tã Bálac-áⁿ xii-yu sá cáxi-yu nchaa sá ndúú táhú nchaa sá ñi cadúha cue tée ñuyúú-a ñanani ñáyiú ndiõxí te ñá ndáá sá ndiõxí cúu-xi, te ní dácáhu ñi ñáhá-dẽ xii-yu sá cundécú-yu ichi ñi ñi. ¹⁵ Te ndècu ndihí tucu-ndo ñáyiú nchicúⁿ nihnu sá dácuàha cue ñáyiú cùu nicolaitás. Te nchaa sá dácuàha ñáyiú-áⁿ dáquèe tihú-í, ¹⁶ te nchòhó chí dándixi cuèchi iní sá ñá túú quide váha-ndo ndècu-ndo, chi núu ñáhá te

quixi-í nàá-í ndihí cue ñáyiú-áⁿ ndihí yuchí cání sã quéné yùhu-í. ¹⁷ Te nchaa nchòhó cada cuendá váha-ndo nàcuáa xãhaⁿ-í xii Espiritú Yá Ndiòxí xãhaⁿ-xi xii cue ñáyiú ndècu ichi-gá xĩndecu nchaa xichi. Te duha ndùu tnúhu xãhaⁿ-í xii Espiritú-gá xãhaⁿ-xi xii-yu: Cúñaha-n xii nchaa ñáyiú sã núu na càda ndee iní-yu yáha-yu nándi sã ná yãha-yu sã cuendá-í, te yúhú cuãñaha-í sã ndúú yùhu xii-yu caxí-yu ìⁿ sã vátá quini-gá-yu caxí-yu. Te xíáⁿ cúú-xí mànáá sã ní xóo caxí cue ñáyiú ní xĩndecu ndéé sanaha, te cuãñaha tucu-í ìⁿ caa yúú cuixíⁿ xii-yu, te núú yúú-ãⁿ cundeé ìⁿ diu saa. Te diu-áⁿ vã yõo tnàhí xini chi ìⁿdií-ni ñáyiú na quèheⁿ cuendá diu-áⁿ quini-yu, duha xãhaⁿ-í xii Espiritú-gá cúu-xi ñáyiú”, duha càchí Yáá càháⁿ-áⁿ. Te nchaa tnúhu-áⁿ ní chídó tnùní-í sã cúú-xí ñáyiú xĩndecu ichi Yá Ndiòxí ndécú ñùú Pèrgamú.

Tnúhu sã cúú-xí cuè ñáyiú xĩndecu ichi Yá Ndiòxí ndécú ñùú Tiàtirá

¹⁸ Te ní cachí tucu Yáá càháⁿ-áⁿ xii-í sã chídó tnùní-í nchaa tnúhu sã vítná càháⁿ-gá ìⁿ núú tütú, te tendaha-í quihíⁿ ndaha tõe xinu cuechi núú Yá Ndiòxí ndécú ñùú Tiàtirá sã cúú-xí cuè ñáyiú xĩndecu ichi-gá ndécú ñùú-áⁿ, te duha càchí-gá: “Yúhú cúu-í Déhe Yá Ndiòxí, te càa tinuu-í dàtná cáá itá ñuhú, te sáhà-í cáá dàtná cáá sã nání bròncé òré ñuhú-xi núú ñuhú càyú-xi. ¹⁹ Te yúhú xini-í nchaa nàcuáa quide nchòhó ñáyiú xĩndecu ichi Yá Ndiòxí ndécú ñùú Tiàtirá. Te xini tucu-í sã ìo cùu iní-ndó Yá Ndiòxí te sàndáá iní-ndó-gã. Te xini tucu-í nàcuáa ndùu chiuⁿ quide-ndo sã cúú-xí-gã. Te xini tucu-í sã ìo quide cahnu iní-ndó cuèi nándi cùu sã yãha-ndo ndècu-ndo. Te xini tucu-í sã ìo-gá ndúcú ndèe-ndo quide váha-ndo vitna dacúxí cùtnahá vitna cùu saa ní sàndáá iní-ndó Yá Ndiòxí. ²⁰ Dico ñá túú cùu váha iní-í cuendá ìⁿ sã quidé-ndó, chi ñá túú tnàhí ná sání iní-ndó ndècu ndihí-ni-ndo ñáyiú nchicúⁿ nihnu nchaa nàcuáa dànehé ñáhá ñaha nani Jezabél. Te ñaha-áⁿ càchí-aⁿ sã càháⁿ-aⁿ tnúhu Yá Ndiòxí dico ñá ndáá sã càháⁿ-aⁿ tnúhu-gá, te cuáháⁿ-aⁿ dàndahú-aⁿ nchaa ñáyiú xinu cuechi núú-í ndihí nchaa sã dánèhé ñáhá-áⁿ cuendá cundecú-yu ichi díí iní, te caxí-yu nchaa sã ndúú táhú

nchaa sã ní cadúha cue tée ñuyúú-a dànani ñáyiú ndiòxí te ñá ndáá sã ndiòxí cúú nchaa xíáⁿ. ²¹ Te ní cuu vai nduu ta dacaca-í ndécú-áⁿ cuendá ndixi cuéchi iní-aⁿ sã ñá túú quide váha-aⁿ ndècu-aⁿ, te cuèi ducaⁿ quide-í dico ñá túú cuini-aⁿ dañá-aⁿ ni ìⁿ sã cuèhé sã dúhá quide-aⁿ. ²² Te vitna yúhú ìo dandòho-í-aⁿ chi tni ñaha cuèhé xii-aⁿ, te diu-ni ducaⁿ ìo dandòho-í nchaa ñáyiú quide datná quidé-áⁿ te núu vá ndixi cuèchi iní-yu sã ñá túú quide váha-yu ndécú-yu, te dañá-yu nchaa sã cuèhé sã dúhá quidé-yu. ²³ Te nchaa ñáyiú cùndihí ñaha xii ñaha-áⁿ cahni-í-yu, te ducaⁿ te nchòhó ndihí dava-gá nchaa ñáyiú xĩndecu ichi Yá Ndiòxí ndécú nchaa xichi cutnuni iní-ndó ndihí-yu sã yúhú cúu-í Yáá xini ndáá nchaa nàcuáa sání iní ñáyiú, ndihí nchaa nàcuáa quide-xi iní-yu. Te nchòhó nàcuáa ndùu sã quidé-ndó ìⁿ ìⁿ-ndo te ducaⁿ cùnduu sã táxi-í nduu táhú-ndó. ²⁴ Te dava nchòhó ñáyiú ndècu ñùú Tiàtirá, ñáyiú ñá túú nchicúⁿ nihnu nàcuáa dànehé ñáhá ñaha nani Jezabél-áⁿ ñá túú xini-ndó ná cúú sã càchí ñáyiú ndùu yuhu dacahu iní ñáhá yùcu ñávãha. Te nchòhó, ñá túú nãgá cachí tnúhu-í xii-ndo càda-ndo ²⁵ diu-ná sã ìo nducu ndèe-ndo cada-ndo nchaa nàcuáa càháⁿ tnúhu sã ndécú ndihí-ndo, te ducaⁿ-ni càda-ndo ndéé òré quixi tucu-í. ²⁶ Te nchaa nchòhó ñáyiú na càda ndee iní yáha nándi sã ná yãha sã cuendá-í, te núu na càda-ni-ndo nchaa nàcuáa cuini-í cada-ndo ndéé nduu vã cùndecu-gá-ndó ñuyúú-a, te yúhú taxi-í tnúhu ndee iní xii-ndo sã táxi tnùní-ndó nchaa ñáyiú ñuyúú ²⁷ dàtná ní quide mee Tãtà-í Dútú Ndiòxí ní taxi-gá tnúhu ndee iní ndécú ndihí-í, te ducaⁿ càda ñaha-í xii-ndo tàxi-í tnúhu ndee iní xii-ndo cuendá ìo taxi tnùní-ndó, te cada iní-ndó sã cáda-ndó cuè ñáyiú dàtná quidé-xi ìⁿ quidi òré tàhú-xi càchi duuⁿ-xi, te ducaⁿ chi nchòhó cada-ndo sã ncháá ñáyiú ñá túú quide váha cuíta nihnú-yu. ²⁸ Te cada iní-ndó sã dàtná dáyèhé chódini quiti quèné oré sa ta tũndaá-nã cuáháⁿ ducaⁿ càda-xi oré ná sãá nduu ngũta-xi cada váha-xi, te ducaⁿ chi yúhú cada-í nàcuáa nduu táhú-ndó cùndecu ndihí ñaha-ndo xii-í núú ìo váha càa ndecu-í. ²⁹ Te nchaa nchòhó cada cuendá váha-ndo nàcuáa xãhaⁿ-í xii Espiritú Yá Ndiòxí xãhaⁿ-xi xii cue ñáyiú

ndècu ichi-gá xĩndecu nchaa xichi”, duha càchí Yaa càháⁿ-áⁿ. Te nchaa tnúhu-áⁿ nĩ chídó tnùn-í sá cúú-xí ñáyiú xĩndecu ichi Yá Ndiõxí ndécú ñúú Tiàtirá.

3

Tnúhu sá cúú-xí ñáyiú xĩndecu ichi Yá Ndiõxí ndécú ñúú Sãrdís

¹ Te ní cachí tucu Yaa càháⁿ-áⁿ xii-í sá chídó tnùn-í nchaa tnúhu sá vítná càháⁿ-gá ñⁿ núú tütú, te tendaha-ĩ quíhíⁿ ndaha téé xĩnu cuechi núú Yá Ndiõxí ndécú ñúú Sãrdís sá cúú-xí cuè ñáyiú xĩndecu ichi-gá ndécú ñúú-áⁿ te duha càchí-gá: “Yúhú cúú-í Yaa ndécú ndíhi ndí usá espíritú cúú cuendá Yá Ndiõxí, te diu-ni-í cúú-í Yaa ndécú ndíhi ndí usá chódíní. Te yúhú xìn-í nchaa nàcuáa quide nchohó ñáyiú xĩndecu ichi Yá Ndiõxí ndécú ñúú Sãrdís, te xìn-í sá cúú-ndó dàtná ñáyiú ní xíhí cuèi càchí ñáyiú sá ñáhá. ² Te chí cuáha cuendá nàcuáa quide-ndo ndecu-ndo vitna, te nducu ndèe-ndo cada-ndo ñⁿ úú-gá nchaa sá vãha nchícúⁿ nihnu-ndo vitna, chí sa ndètu víi-nã dañá-ndo nchaa-ndí túhú sá vãha quide-ndo ní cuu, te quide cuendá-í sá ñà túú quide-ndo nchaa nacuáa cuíní Yá Ndiõxí cada-ndo. ³ Te chí dándàcu iní nàcuáa càháⁿ tnúhu sá nĩ xĩndedóho-ndo cutnãhá ní tuha-ndo ichi Yá Ndiõxí, te canchícúⁿ nihnu-ndo càda-ndo nacuáa càháⁿ tnúhu-áⁿ, te ndixi cuèchi iní-ndó sã ñà túú quide váha-ndo ndècu-ndo, te núu vá nacuáha-ndo cuendá nàcuáa quide-ndo ndecu-ndo ña, te cada-í dàtná quidé ñadúhú, chí òré ñà túú nã yíhí iní-ndó quèxio-í núú ndécú-ndó. ⁴ Dico ndècu ndíhi-ndo ñⁿ úú ñáyiú càndoo caa nine iní-xi, chí ñáyiú-áⁿ nĩ nduu táhũ-yu cuihnú-yu dóó cuixíⁿ cuendá cundecu ndíhi-í-yu, te ducaⁿ chí cùdiú-yu núú-í. ⁵ Te nchaa ñáyiú na càda ndee iní-xi yãha nándí sá ná yãha sá cuendá-í, te ñáyiú-áⁿ nduu táhũ-yu cuihnú-yu dóó cuixíⁿ, te vá náquète-í diú-yu núú tütú núú yódó tnùn-í cue ñáyiú ní nduu táhú cundecu ndíhi-í ní caa ní quíhíⁿ, te cúñaha-ĩ xii Tãtà-í Dútú Ndiõxí ndíhi cue espíritú xĩnú cuèchi núú-í sá ñáyiú-áⁿ cúú-yu ñáyiú cùu cuendá-í. ⁶ Te nchaa nchòhó cada cuendá váha-ndo nàcuáa xãha-ĩ xii Espíritú Yá

Ndiõxí xãhaⁿ-xi xii cue ñáyiú ndècu ichi-gá xĩndecu nchaa xichi”, duha càchí Yaa càháⁿ-áⁿ. Te nchaa tnúhu-áⁿ nĩ chídó tnùn-í sá cúú-xí ñáyiú xĩndecu ichi Yá Ndiõxí ndécú ñúú Sãrdís.

Tnúhu sá cúú-xí cuè ñáyiú xĩndecu ichi Yá Ndiõxí ndécú ñúú Filãdelfiá

⁷ Te ní cachí tucu Yaa càháⁿ-áⁿ xii-í sá chídó tnùn-í nchaa tnúhu sá vítná càháⁿ-gá ñⁿ núú tütú, te tendaha-ĩ quíhíⁿ ndaha téé xĩnu cuechi núú Yá Ndiõxí ndécú ñúú Filãdelfiá sá cúú-xí cuè ñáyiú xĩndecu ichi-gá ndécú ñúú-áⁿ, te duha càchí-gá: “Yúhú cúú-í Yaa ío váha quide ndáá te ñà túú tnãhí cuèchi-í. Te díhna-gá ndíi Dávíí ní taxi tnùn-í ndíi ñáyiú, te vitna yúhú táxí tnùn-í-yu, te yúhú càháⁿ-í te núu ndëndida càa ñáyiú ndíhu ndaha-ĩ te ndëndida càa ñáyiú vá ndíhu ndaha-ĩ. ⁸ Te yúhú xìn-í nchaa nàcuáa quide nchohó ñáyiú xĩndecu ichi Yá Ndiõxí ndécú ñúú Filãdelfiá, te yúhú ní quide-í nàcuáa ní níhí-ndó ñⁿ ichi cahnu quide-ndo chiuⁿ-í, te vá yõo ñⁿ cada nàcuáa vá níhí-gá-ndó nàcuáa cada-ndo chiuⁿ-í. Te cuèi ñà túú ío níhí ndéé-ndó cundecu-ndo ichi Yá Ndiõxí dico tní-ndo nchaa tnúhu càháⁿ-í, te ní ñⁿ xito ñà túú càháⁿ-ndó sã ñà túú ndècu ndíhi ñaha-ndo xii-í. ⁹ Te nchaa ñáyiú quide nchaa nacuáa cuíní yucu ñãvãha, ñáyiú-áⁿ cúú-yu ñáyiú isrãél, te cuèi cúú-yu ñáyiú isrãél dico ñà túú quidé-yu nàcuáa tàú-yu cadá-yu, te yúhú cada-í sá ncháá ñáyiú-áⁿ canehé-yu sá yíñùhu núú-ndó, te cutnùn-í iní-yu sá yúhú ío cùu iní ñáhà-í xii-ndo. ¹⁰ Te ío quide ndee-ni iní-ndó nchícúⁿ nihnu-ndo quide-ndo nchaa nacuáa ní càháⁿ-í, te xíãⁿ coto ñaha-ĩ xii-ndo ñà túú nã tnahá-ndó ndúu na quixi nchaa tnúndòho tnúhu ndàhú ñuyíú-a. Te òré quexio nchaa tnúndòho-áⁿ ñuyíú-a te dàvá-áⁿ cutnùn-í nàcuáa ndúu sá quidé ñⁿ ñⁿ ñáyiú. ¹¹ Te ío ndíhi quixi tucu-í. Te vá dáñá ndéé-ndó càda-ndo nchaa sá vãha nchícúⁿ nihnu-ndo quide-ndo cuendá sá vã cuíta sá ní cachí Yá Ndiõxí nduu táhú-ndó. ¹² Te nchaa nchòhó ñáyiú na càda ndee iní yãha nándí sá ná yãha sá cuendá-í, te yúhú cada-í sá nchòhó ío cuu càhnu-ndo cundecu-ndo núú ndécú Tãtà-í Dútú Ndiõxí, te vá ñⁿ ndúu-gá

xocuñí-ndó nũú ndécú-gă. Te cada iní-ndó sã dâtná sá chídó tnùnî-í ðiù Tătà-í Dútú Ndiõxí ññ-ndo chi ducaⁿ-ni cundecu-ndo ndihî-gă, te cada tucu iní-ndó sã dâtná sá chídó tnùnî-í nâcuáa nâni ñuú-gă ññ-ndo, chi ðiù ñuú-gă-án cundecu-ndo, te ñuú-án nâni-xí Jêrusalén Sáá, duha nâni ñuú-gă. Te ñuú-án quee-xi andiù nũú ndécú Yã Ndiõxí Yaá cúú Tătà-í quée-xi ñuyiú. Te cada tucu iní-ndó sã dâtná sá chídó tnùnî-í ðiù mee-í ññ-ndo, te xiãⁿ cúú-xí ññ ðiù saa, te ducaⁿ càda iní-ndó chi cundecu ndihî ñaha-ndo xii-í. ¹³ Te nchaa nchòhó cada cuendá váha-ndo nâcuáa xãhaⁿ-í xii Espiritú Yã Ndiõxí xãhaⁿ-xi xii cue ñáyiu ndècu ichi-gă xĩndecu nchaa xichi”, duha càchí Yaá càháⁿ-án. Te nchaa tnúhu-án ni chídó tnùnî-í sá cúú-xí ñáyiu xĩndecu ichi Yã Ndiõxí ndécú ñuú Filadelfiá.

Tnúhu sá cúú-xí ñáyiu xĩndecu ichi Yã Ndiõxí ndécú ñuú Laodiceá

¹⁴ Te càchí tucu Yaá càháⁿ-án xii-í sá chídó tnùnî-í nchaa tnúhu sá vítná càháⁿ-gă ññ núú tùtú, te tendaha-í quihîⁿ ndaha téé xĩnu cuechi núú Yã Ndiõxí ndécú ñuú Laodiceá sá cúú-xí cuè ñáyiu xĩndecu ichi-gă ndécú ñuú-án, te duha càchí-gă: “Yúhú cúú-í Yaá quidé nũú Yã Ndiõxí, te cúú-í Yaá quidé ndáá chi càháⁿ ndáá cuiti-í nâcuáa càháⁿ Yã Ndiõxí. Te yúhú cúú-í Yaá ní quide ní ngúndecu nchaa sá ñí cadúha Yã Ndiõxí. ¹⁵ Te yúhú xiní-í nchaa nâcuáa quide nchòhó ñáyiu xĩndecu ichi Yã Ndiõxí ndécú ñuú Laodiceá, te xiní-í sá ñà túú cuiní-ndó càncicúⁿ nihnu-ndo nchàa nacuáa càháⁿ-í, te ni ñà túú cuiní-ndó dañá duuⁿ-ndo. Te váha-gă sá dúúⁿ dùuⁿ cada-ndo nchaa nacuáa càháⁿ-í àdi núú ñáhá te duuⁿ duuⁿ dañá-ndo. ¹⁶ Te sá dúcáⁿ quide-ndo ñá túú cuiní-ndó dùuⁿ duuⁿ-ni cada-ndo nâcuáa càháⁿ-í, te ni ñà túú cuiní-ndó dùuⁿ duuⁿ-ni dañá-ndo te sáá nduu vã cundèe-gă iní-í cuendá nchaa sá quidé-ndó-ãⁿ, te daqueè tíhú ñáhà-í xii-ndo. ¹⁷ Te càchí-ndó sã cuicá-ndó, te ío váha ta yãha-ndo nchàa nduu cuáháⁿ, te ñá túú tnàhí ná cúmãní xii-ndo, te ñá túú cùtnuní iní-ndó sá cúú-ndó dâtná cue ñáyiu ío ndàhú yãha, te cúu-ndo datná ñáyiu ndàhú, ñáyiu ío cundahú iní ñáhá tnàha ñáyiu-xi, te cúu-ndo datná cue ñáyiu cuáá, te cúu tucu-ndo datná cue ñáyiu ndàhú ñá túú tnàhí dóo-xi.

¹⁸ Te na càchí tnúhu-í xii-ndo sã cãdá-ndó dâtná xĩquide cue ñáyiu sàaⁿ ññ sá ñí cuáha mee-ni díhúⁿ cuááⁿ sá ío váha càa, te ducaⁿ quidé-yu te ío-gă cúú cuicá-yu. Te cada tucu-ndo dâtná xĩquide cue ñáyiu sàaⁿ dóo cuixíⁿ sácuihnu-yu cuendá sá vã cúu-yu dâtná ñáyiu ndàhú ñá túú dóo-xi, te cada tucu-ndo dâtná quidé cuè ñáyiu sàaⁿ yúcu quée núú-xi nâcuáa cutnùnî váha núu-yu, te duha càháⁿ-í xãhaⁿ-í xii-ndo chi cuiní-í sá nâtuha ñaha-ndo xii-í, te ío váha cundecu-ndo sã cúú-xí Yã Ndiõxí. ¹⁹ Te càháⁿ-í dóho nchaa ñáyiu cúu iní-í òré ñá túú quide ndáá-yu, te dândoho-í-yu, núu xiãⁿ cuiní-í sá nchòhó ndixi cuéchi iní-ndó sã ñà túú quide váha-ndo ndècu-ndo. ²⁰ Te na càchí tnúhu-í xii-ndo sã yúhú cúú-í dâtná ññ téé nùtnñ yuyèhe ndaa quehé te càháⁿ-í ñáyiu yihî xití vehe, te núu na càda cuendá-yu sá càháⁿ-í te nacaáⁿ-yu yuyèhe te quíhu-í xití vehe cudini-í ndihî-yu, te duha càháⁿ-í chi cuiní-í cundecu ndihî ñaha-í xii-ndo. ²¹ Te nchaa nchòhó ñáyiu na càda ndee iní-xi yãha nândi sá ná yãha sá cuendá-í, te yúhú taxi-í xii-ndo ññ xichi núú ndécú-í cundecu-ndo te cunuu-ndo tnàhá-ndó dâtná cùnùu-í, chi yúhú ducaⁿ ñí quide ndee iní-í ní yãha-í nândi sá ñí yãha-í te vitna ní nduu táhù-í ndécú-í núú ndécú Tătà-í Dútú Ndiõxí cùnùu-í. ²² Te nchaa nchòhó cada cuendá váha-ndo nâcuáa càháⁿ Espiritú Yã Ndiõxí xãhaⁿ-xi xii cue ñáyiu ndècu ichi-gă xĩndecu nchaa xichi”, duha càchí Yaá càháⁿ-án. Te nchaa tnúhu-án ñí chídó tnùnî-í sá cúú-xí ñáyiu xĩndecu ichi Yã Ndiõxí ndécú ñuú Laodiceá.

4

Nâcuáa chiñuhu ñáyiu Yã Ndiõxí andiù

¹ Te sátá ñí yãha ducaⁿ ñí cuu te ní xiní-í nchí andiù, te ní càháⁿ tucu Yaá ní càháⁿ ndihî ñaha xii-í díhna, te Yaá-án ñí càháⁿ níhi-gă dâtná càháⁿ níhi ññ cútú, te ní cachí-gă xii-í:

—Taquène iha te na dânehé ñáhà-í xii-n nchàa nacuáa cada-xi ndéé núú cuáháⁿ núú vèxi—càchí-gă.

² Te òré-ni-án ñí quide ñaha tucu Espiritú Yã Ndiõxí xii-í nâcuáa càchí iní-xi, te ðiù-ni òré-án ñí xiní-í nùtnñ ññ xilè váha andiù te càa datná cáá xilè sácõo nchihî cue ñáyiu ío cunuu, te núú xilè váha-án núcõo Yãá

táxí tnùní. ³ Te Yaá-án cáá-gǎ dàtná cáá yúú chàhnchí yúú vǎha sá nání jǎspé, te càa tucu-gá dàtná cáá yúú vǎha sá nání còrnálná, te ñuhu doco ñaha ñⁿ cóó yáhnchí xii-gá, te tǎsaⁿ-di dàtná tǎsaⁿ ñⁿ yúú vǎha sá nání èsmeraldá. ⁴ Te ní xiní tucu-í nútn^ñ ócó cúmí xilé vǎha ñi càndéé núú núcõo-gá, te núú xilé-án xñucóo ócó cúmí cue téé cùu sacuéhé te xixihnu-güedé mee-ni dõó cuixíⁿ, te ñⁿ caa coróná sá ñi cuáha mee-ni dǐhúⁿ cuàáⁿ xixúhuⁿ díquí-güedé. ⁵ Te núú núcõo Yaá táxí tnùní-án sàà nduté, te càháⁿ ñuhu te xica chíhi-xi dónaha, te càyú úsá iti núú núcõo-gá, te sá úsá iti-án xǎⁿ cútnùní sá ndécú úsá espíritú cúú cuendá-gá. ⁶ Te ndècu ñⁿ sá ndécú ndàa núú-gǎ te xǎⁿ cáá dàtná cáá làmár, te dàtná cáá vǐdriú cáá ñihí.

Te ñi càndéé dǐñi Yaá núcõo-án xñutn^ñ cúmí quiti te titní víhí tinnu-güedi ndéé ndàa sátá-güedi ndihí ndàa núú-güedi. ⁷ Te quiti díhna nuu càa-di datná cáá ndìcaha, te quiti cùu uú cáá-dí dàtná cáá ndìcutu, te quiti cùu uní néhé-dí núú tée, te quiti cùu cúmí cáá-dí dàtná cáá yàcolo oré cuáháⁿ-di núú tàchí. ⁸ Te ndi cùmí quiti-án ndéé ínù ndíxíⁿ-güedi ñⁿ ñⁿ-güedi, te ñihí xití ndíxíⁿ-güedi ndihí ndàa sátá ndíxíⁿ-güedi ndéé tinùu-güedi, te nduu niú chíñuhu-güedi Yá Ndiõxí, te xǎhaⁿ-güedi xii-gá:

Yòhó Dútú Ndiõxí ducaⁿ-ni ta quide ndáá-n vèxi, te ducaⁿ-ni quide ndáá-n cuéi vitna, te diu-ni ducaⁿ càda ndáá-n núú cuáháⁿ núú vèxi,

te cùu-n Yaá quidé nchàa-ndi túhú sá vǎha, te diu-ni-n sà ndecu-n ndéé cútnáhá ní cuáha ñuyúú,

te diu-ni-n ndècu-n cuéi vitna, te diu-ni-n cùndecu-n cuéi ndéé núú cuáháⁿ núú vèxi.

Duha xǎhaⁿ cué quiti-án xii Yaá núcõo núú xilé vǎha-án chíñuhu ñaha-güedi.

⁹ Te cue quiti-án ño ndàcáⁿ táhú-güedi núú Yáá núcõo núú xilé vǎha-án cuendá nchaa sá quidé-gá. Te Yaá-án cúú-gǎ Yaá ndécú nchàa nduu nchaa quiú. Te cue quiti-án càchí-güedi sá ño càhnu cuu-gá te nèhe-güedi sá yíñuhu núú-gǎ. Te ndi tnahá òré ducaⁿ càháⁿ-güedi, ¹⁰ te ndi òcó cúmí cue

tée cùu sacuéhé xñucóo-án ngüñí xití-güedé núú Yáá núcõo-án, chi diu-gá cúú-gǎ Yaá ndécú nchàa nduu nchaa quiú te chíñuhu ñaha-güedé xii-gá, te tàva-güedé coróná ñuhu díquí-güedé te tàxi ndecu-güedé núú-gǎ, te xǎhaⁿ-güedé xii-gá:

¹¹ Yòhó cúú-n Dútú Ndiõxí Yaá cúú cuendá ñáhá xii-ndí, te ño càhnu cuu-n, te ño vǎha quide-n, te nèhe-ndí sá yíñuhu núú-n, chi ducaⁿ tàú-xi cada-ndí, chi yòhó cúú-n Yáá ní cadúha nchaandi túhú sá ño, te ducaⁿ ñi ngúndecu nchaa xǎⁿ chi mee-n dùcaⁿ ní sani iní-n càda-n.

5

Cuendá Yaá cáá dàtná cáá ñⁿ mbéé quiti ní dán'cuèhé-güedé ndihí cuendá ñⁿ tutú

¹ Te ní xiní tucu-í sá Yáá núcõo núú xilé vǎha-án nundàha-gá ñⁿ tutú ní nacaúnuu xio ndaha cùha-gá, te ndéè lètrá ndàa sátá-xi ndihí ndàa xití-xi, te úsá tnáhá tutú líhli ñuhu seyú ndéé sátá tütú-án cuendá sá vǎ dáñá-xi nacaá. ² Te ní xiní-í ñⁿ espíritú xínú cuèchi núú Yá Ndiõxí, te ndee vǐhi-xi te ñihí càháⁿ-xi, te càchí-xi:

—¿Yoo tàú-xi xocàni nchaa tutú líhli ñuhu seyú ndéé sátá tütú-a te nadacàa-xi? — càchí espíritú-án.

³ Dico ñi àndi, te ñi núú ñuyúú-a, te ñi ndàa xití ñuhu ñá túú ñⁿ ñáyiu tàú-xi nadacàa tutú-án te cundèhé-yu. ⁴ Te yúhú ní ngüíta-í ndàhyú víhí-í cuendá sá ñà túú ñi ñⁿ ñáyiu tàú-xi nadacàa tutú-án cundèhé-yu. ⁵ Te ñⁿ cue téé cùu sacuéhé xñucóo xǎⁿ ñi cachí-güedé xii-í:

—Vá ndàhyú-gá-n, te cada cuendá-n chi Yaá ño cùnuu cuu ndi mee cue ñáyiu cùu ñani tnáhá ndí Jùdá, diu-ni Yaá cúú ñani tnáhá ndí Dàvíí, Yaá-án cúú-gǎ Yaá ní ndacu ní yáha nchaa nándi sá ñi yáha, núu xǎⁿ diu-gá tàú-gá xocàni-gá nchaa tutú líhli ñuhu seyú ndéé sátá tütú-án te nadacàa-gá —duha càchí téé cùu sacuéhé-án.

⁶ Te tnuú ndi òcó cúmí cue téé cùu sacuéhé xñucóo-án, ndihí tnuú ndi cùmí quiti xñutn^ñ-án, ndihí núú núcõo Yaá táxí tnùní-án ñi xiní-í nútn^ñ ñⁿ Yaá cáá dàtná cáá ñⁿ mbéé quiti ní dán'cuèhé-güedé te ní

xíhí-di ni cùu te ní ndoto-di, te ndèè úsá ndiqui-di, te ndèè úsá tinùu-di, te sá úsá tinùu-di-án cùtnùní sá ndécú úsá espíritú cúu cuèndá Yá Ndiöxí, ducaⁿ caa Yaá-án nǐ xiní-í. Te cue espíritú-án nǐ tendaha-gǎ xícá cùu-xi nǐ caa xico ñuyúú. ⁷ Te Yaá cáá dàtná cáá ñⁿ mbéé quitì ní dánìcuèhé-güedé-án nǐ sáhán-gá núú Yàá núcõo núú xilé váha-án. ⁸ Te òré ní queheⁿ-gá tutú-án te ndì cùmí quitì xǐnutnǐ xíaⁿ nǐ ngüíñí xítí-güèdi núú-gǎ, te ducaⁿ nǐ ngüíñí xítí tucu ndì ócò cùmí cue téé cùu sacuéhé xǐnucóo-án, te ndì dííⁿ núú-güedě xǐnehe-güedé yaá sá nání àrpá, te xǐnehe tucu-güedé ndì dííⁿ núú-güedě ñⁿ caa tǐcùú ní cuáha mee-ni díhúⁿ cuáán, te chitu dǔsa sá sáhán tnámí. Te ñúhmá dǔsa sá sáhán tnámí-án cúu-xí dàtná nchaa tnúhu càháⁿ nchaa ñáyiu ndècu ichi Yá Ndiöxí òré càháⁿ ndihì ñàhá-yu xii-gá. ⁹ Te xíta-güedé ñⁿ ndudú sáá ndihì cue quitì-án chíñùhu ñaha-güedé xii-gá, te càchí-güedé ndihì cue quitì-án:

Yòhó tàu-n queheⁿ-n tutú-a te xocàni-n nchaa tutú líhli ñùhu seyú ndèè sátá-xi,

chi yòhó ní satì níñí-n te ní xíhí-n, te cuèndá xǐáⁿ ní nduu cuèndá Yá Ndiöxí cue ñáyiu ñⁿ ñⁿ nàcióⁿ, ndihì ñáyiu xǐndecu ñⁿ ñⁿ ñuú, ndihì ñáyiu càháⁿ ndì dííⁿ ndì dííⁿ núú tnúhu, ndihì ñáyiu xǐndecu ñⁿ ñⁿ xichi.

¹⁰ Te ní quidé-n-yu dàtná cue téé yǐndaha ñáyiu, te ní quide tucú-n-yu dàtná cue dútú sá cúu-xí Yá Ndiöxí.

Te sáá nduu te taxi tnùnì-yu ñuyúú-a. Duha càháⁿ cue téé-án ndihì cue quitì-án chíñùhu-güedé ndihì-güedi Yaá-án.

¹¹ Te sátá dúcáⁿ te ní tecú dóho-í ní cáháⁿ cuéhé víhí espíritú xínú cuèchi nǐ candéé núú núcõo Yaá táxí tnùnì-án, ndihì núú xǐnutnǐ ndì cùmí cue quitì-án, ndihì núú xǐnucóo cue téé cùu sacuéhé-án, te ní xiní-í sá sùúnì cuéhé víhí espíritú-án xǐndecu xíaⁿ,

¹² te níhi ní cáháⁿ cue espíritú-án, te càchí-xi: Yòhó Yaá cáá dàtná cáá ñⁿ mbéé quitì ní dánìcuèhé-güedé te ní xíhí ní cùu te ní ndoto,

te yòhó ío càhnu cuu-n, te ndècu ndihì-n nchaandi túhú, te ío ndècu ndihì-n sá xìnì tnùnì-n,

te ndàcu-n quide-n nchaa sá cuìnì-n, te nèhe-ndì sá yǐñùhu núu-n, te ío váha quide-n,

te chíñùhu ñaha-ndì xii-n, chi ducaⁿ tàú-ndì cada-ndì chi ío càhnu cuu-n.

Duha càchí nchaa cue espíritú-án xǎhaⁿ-xi xii-gá chíñùhu ñaha-xi.

¹³ Te ní tecú dóho-í ní cáháⁿ nchaandi túhú sá nǐ cadúha Yá Ndiöxí ndécú àndiu, ndihì nchaa sá ndécú ñuyúú, ndihì nchaa sá ndécú xítí ñuhu, ndihì nchaa sá ñúhú xítí ndute làmár, te xǐcachí-xi:

Yòhó Yaá núcõo núú xilé váha, ndihì yòhó Yaá cáá dàtná cáá ñⁿ mbéé quitì ní dánìcuèhé-güedé táxí tnùnì-ndó, te nèhe-ndì sá yǐñùhu núu-ndó,

te ducaⁿ ío ndàcáⁿ táhú-ndì núu-ndó, chi ío váha quide-ndo te ío cùnuu-ndo,

te diu-ni duha cáháⁿ váha-ndì cuèndá-ndó nǐ caa nǐ quíhíⁿ.

Duha càchí nchaa sá nǐ cadúha Yá Ndiöxí.

¹⁴ Te ndì cùmí cue quitì xǐnutnǐ-án càchí-güedi:

—¡Ducaⁿ na cùnduu! —cachí-güedi.

Te ndì ócò cùmí cue téé cùu sacuéhé xǐndecu-án nǐ ngüíñí xítí-güedě chíñùhu-güedé Yaá ndécú nchaa nduu nchaa quíú.

6

Cuèndá úsá tutú líhli ñùhu seyú

¹ Te sátá dúcáⁿ te ní xiní-í sá Yàá cáá dàtná cáá ñⁿ mbéé quitì ní dánìcuèhé-güedé-án nǐ xócánì-gǎ ñⁿ tutú líhli ñùhu seyú ndèè sátá tütú sá nǐ nadúcúⁿ nuu-án, te ní tecú dóho-í ní cáháⁿ ñⁿ quitì cùmí xǐnutnǐ-án, te níhi ní cáháⁿ-di dàtná càháⁿ ñúhu, te càchí-di:

—¡Taqùxi cundehe-n! —cachí-di.

² Te òré-ni-án nǐ xiní-í ñⁿ cuáyú cuixíⁿ yódó ñàha ñⁿ sá yódó ñàha xii-di, te sá yódó ñàha xii-di-án néhé-xí ñⁿ arcú sá cúu tnùxií-xi, te ní nduu táhú-xi ñⁿ coróná, te ní ndacu-xi ní cunuu-xi te ducaⁿ-ni ta cùnuu-xi cuáháⁿ.

³ Te òré ní xócánì-gǎ tutú líhli cùu uú ñúhú sèyú ndèè sátá tütú sá nǐ nadúcúⁿ nuu-án, te ní tecú dóho-í ní cáháⁿ tucu ñngá quitì cùu uú xǐnutnǐ-án, te càchí-di:

—¡Taqùxi cundehe-n! —cachí-di.

⁴ Te òré-ni-án nǐ xiní tucu-í ñⁿ cuáyú tícuèhé ní quee-di cuáháⁿ-di, te yòdo ñaha ñⁿ

sá yódó ñàha xii-di, te sá yódó ñàha xii-di-án ñí níhí-xi tnúhu ndee ìní sá dátìcánuu-xi ñáyíu vá cùndècu ndìhi tnaha váha-gá-yu, te ngüíta ñáyíu cahni tnàhá-yu, te ní nduu táhú-xi ñí yuchí cáhnú vîhi.

⁵ Te òré ní xócání tùcu Yaá-án ingá tutú lìhli cùu uní ñúhú sèyú ndèé sátá tùtú sá ñí nadúcúⁿ nuu-án, te ní tecú dóho-í ní cáháⁿ quítì cùu uní xñutnñí xíáⁿ, te cächí-di:

—¡Taquìxi cundehe-n! —cachí-di.

Te òré-ni-án ñí xiní tucu-í ñí cuàyú tnúú te yòdo ñaha tucu ñí sá yódó ñàha xii-di, te sá yódó ñàha-án nùndàha-xi úú yaxiⁿ libre. ⁶ Te ní tecú dóho-í ní cáháⁿ ñí sá ñí cáháⁿ tnuú cue quítì xñutnñí-án, te cächí-xi:

—Ñí cuàrtú-nă tríu níhí-ndó sã ñí dîhúⁿ denàriú, te úní cuàrtú-nă cebadá níhí-ndó sã ñí tùcu dîhúⁿ denàriú, dico acítì ndìhi ndudí ndéhé yoho yàha stilé chi vá ndíhí ñìhnu —duha cächí sá càháⁿ-án.

⁷ Te òré ní xócání tùcu Yaá-án tutú lìhli cùu cumí ñúhú sèyú ndèé sátá tùtú sá ñí nadúcúⁿ nuu-án, te ní tecú tucu dóho-í ní cáháⁿ tucu ingá quítì cùu cumí xñutnñí-án, te cächí-di:

—¡Taquìxi cundehe-n! —cachí-di.

⁸ Te òré-ni-án ñí xiní tucu-í ñí cuàyú yàhà, te yòdo ñaha tucu ñí sá yódó ñàha xii-di, te sá yódó ñàha xii-di-án nání-xí Sã xihí, te xíáⁿ sáhní-xí ñáyíu, te sátá xíáⁿ nchìcúⁿ sá nèhé núú ndécú ñáyíu ní xihí. Te cúmí xichí cùu ñuyíú, te sá sáhní ñàha xii ñáyíu-án ñí níhí-xi tnúhu ndee ìní danàa-xi ñáyíu ñí xichí ñuyíú, te davá-yu cahni ñaha-xi ndìhi yuchí, te cada-xi sá cóo tnámá te cuú-yu, te cada tucu-xi sá cóo cuèhé cahni-xi ñáyíu, te ñíu-ni tucu-xi cada sá ncháá quítì dééⁿ cahni-di ñáyíu.

⁹ Te òré ní xócání tùcu Yaá-án tutú lìhli cùu uhúⁿ ñúhú sèyú ndèé sátá tùtú sá ñí nadúcúⁿ nuu-án, te òré-án ñí xiní-í nùtnñí ñí núú sácódó sã ndúú táhú Yã Ndiöxí, te ndàa caha xíáⁿ ní xiní-í xñdecu nchaa àlmá ñáyíu ní sahní-güedé núú ñuyíú sã cuendá tnúhu Yá Ndiöxí, ndìhi sá cuendá sá ñí cáháⁿ váha-yu cuendá-gá. ¹⁰ Te nchaa àlmá-án ñíhi xí cáháⁿ-xi, te xàhàⁿ-xi xii Yá Ndiöxí:

—Yòhó Dútú Ndiöxí cúu-n Yàá ñá túú tnàhí cuéchi-xi, te ñá túú tnàhí quée cáva-n quíde-n ñí sá càháⁿ-n. ¿Te ná ndéé ama dandòho-n ñáyíu ndècu ñuyíú nachinaa-n

cuendá sá ñí quíde ñàhá-yu xii-ndí-i? — cächí cue àlmá-án xàhàⁿ-xi xii-gá.

¹¹ Te sátá dúcáⁿ te nchaa cue àlmá ñáyíu-án ñí níhí-xi dóó cuixíⁿ ní quée cuíhnu-xi, te ní xítñúhu ñaha xii-xi sá ná ndètatú-xi te cundetu tnaa-xi ndéé ná xñnu cava cuú ñáyíu nàcuáa ndéé tnuní dàtná ní xihí cue ñáyíu dii àlmá-xi cùu-xi. Te ñáyíu sa ní xihí-án ñí-ni cùú-yu ndìhi ñáyíu vitna cuú-án chi mee-ni chiuⁿ Xítóhó Jesucristú quídè-yu, te ñíu-ni ichi-gá ndécú-yu.

¹² Te òré ní xócání tùcu Yaá-án tutú lìhli cùu ñúhú sèyú ndèé sátá tùtú sá ñí nadúcúⁿ nuu-án, te ní xiní-í súúni ñíhi ní quídè-xi ñuyíú, te ní cutnuu ñíhi núú nchìcanchii dàtná ñí dóó tnúú, te ní cuu tìcuèhé ñíhi ñíhi núú yóó. ¹³ Te ní xiní-í ní ngoyo chódini ñuyíú-a dàtná ngóyó ngüxí yíhí òré quéné tächí ñíhi. ¹⁴ Te ní xiní-í ní nadúcúⁿ nuu andíu dàtná nádúcúⁿ nuu ñí tutú te ní ndóñúhú-xí, te nchaa tñdúú ñí xica ndehe-xi núú ndécú-xí, te ducaⁿ ñí xica ndehe tucu nchaa tñdúú yìchí ndécú xítì ndute làmár. ¹⁵ Te nchaa cue téé yindaha ñáyíu ní nguívàha-güedé, ndìhi nchaa dava-gá cue téé ío tàxi tnuní, ndìhi nchaa ñáyíu cuica, ndìhi nchaa cue téé tàxi tnuní sandàdú, ndìhi cue sandàdú cue téé ío váha sàá díquí-xi nàcuáa cada-güedé nàa-güedé, ndìhi nchaa ñáyíu ñá túú tnàhí dàñá quée núú chíuⁿ pàtróóⁿ-xi, ndìhi nchaa ñáyíu dàñá quée núú chíuⁿ pàtróóⁿ-xi. Te dava ñáyíu-án ñí nguívàha-yu xítì yáú, te davá-yu ní nguívàha-yu nchaa tnuú cava. ¹⁶ Te xàhàⁿ-yu nchaa tñdúú ndìhi nchaa cava:

—Chí tácuⁿ chiváha ñaha-ndo xii-ndí cuendá sá vá quíni ñàhá Yàá ío tàxi tnuní núcòo núú xilé váha, ndìhi cuendá sá vá dandòho ñaha Yàá cáá dàtná cáá ñí mbéé quítì ní dancuèhé-güedé, chi Yaá-án ío cùdééⁿ-gã núú-ndí —duha cächí nchaa ñáyíu-án xàhàⁿ-yu xii nchaa tñdúú-án ndìhi nchaa cava-án.

¹⁷ Te vitna ní sáa nduu ío cùu cahnu nduu tñúndòho tnúhu ndàhú, te vá yóo ñí cundee ìní-xi yàha nchaa tñúndòho-a.

7

Ñáyíu isràél ñáyíu naníhí tàhú

1 Te sátá xǎⁿ te ní xiní-í cúmí tnàhá espíritú xínú cuèchi núú Yǎ Ndiǒxí xǐnutnǐ-xi ndi cúmí xio ñuyíú, te cue espíritú-áⁿ ñi ngani-xi táchi cuèndá sá vǎ cuícó-gǎ-xi ni làmár, te ni dǐquí yutnu, te ni ñⁿ xichi ñuyíú vǎ cuícó-gǎ-xi. 2 Te cue espíritú-áⁿ ndécú ndihí-xi tnúhu ndee iní danàa-xi sá ió làmár ndihí sá ió ñuhu yìchí, te ní xiní tucu-í ingá espíritú xínú cuèchi núú Yǎ Ndiǒxí ní quee nchita-xi ndàa nacuáa quène nchíanchii, te nùndaha-xi seyú Yǎ Ndiǒxí Yaá ndécú nchàa nduu nchaa quiú, te níhi ní cáháⁿ-xi xǎhaⁿ-xi xii ndi cúmí cue espíritú-áⁿ:

3 —Vá dánàa-ndo sá ió làmár, te ni vǎ dánàa-ndo yutnu, te ni ñⁿ sá ió ñuyíú vǎ dánàa-ndo, chi cundet-ndo ndéé ná tàxi ndecu-ndí ñⁿ sèñá tneé nchaa ñáyiú xínu cuechi núú Tǎtá-ó Dǔtú Ndiǒxí — duha càchí espíritú-áⁿ xǎhaⁿ-xi xii ndi cúmí espíritú xǐnutnǐ ndi cúmí xichi ñuyíú.

4 Te ní tecú dóho-í ní cáháⁿ ñⁿ sá ñi cáháⁿ, te ní cachí-xi sá núú ndi úxúú xichi cue ñáyiú isràél te ní xínu ñⁿ cièndú údico cúmí mǐl-yu ní ngúndecu sèñá tneé-yu. 5 Te núú ñⁿ cièndú údico cúmí mǐl ñáyiú-áⁿ, te ní xínu úxúú mǐl cue ñani tnàhá ndíi Jùdá ní ngúndecu sèñá tneé-yu, te úxúú mǐl cue ñani tnàhá ndíi Rùbén, te úxúú mǐl cue ñani tnàhá ndíi Gǎd, 6 te úxúú mǐl cue ñani tnàhá ndíi Àsér, te úxúú mǐl cue ñani tnàhá ndíi Neftalí, te úxúú mǐl cue ñani tnàhá ndíi Manàsés, 7 te úxúú mǐl cue ñani tnàhá ndíi Mió, te úxúú mǐl cue ñani tnàhá ndíi Lèví, te úxúú mǐl cue ñani tnàhá ndíi Isàcár, 8 te úxúú mǐl cue ñani tnàhá ndíi Zabulón, te úxúú mǐl cue ñani tnàhá ndíi Chèé, te úxúú mǐl cue ñani tnàhá ndíi Benjamín, nchaandi túhú ñáyiú-áⁿ ñi ngúndecu sèñá tneé-yu.

Cuéhé víhí ñáyiú ñihnu dóó cuixíⁿ

9 Te sátá xǎⁿ te ní xiní-í cuéhé víhí ñáyiú, ñáyiú ñⁿ ñⁿ nàcióⁿ, ndihí ñáyiú ñⁿ ñⁿ ñúú, ndihí ñáyiú càháⁿ ndi dǐíⁿ ndi dǐíⁿ núú tnúhu, ndihí ñáyiú ní xíndecu ñⁿ ñⁿ xichi, te nchaa ñáyiú-áⁿ xǐnutnǐ-yu ndàa núú Yàá táxi tnùní núú xilé váha, ndihí núú Yàá cáá dàtná cáá ñⁿ mbéé quiti ní dánícuèhé-güedé, te vá yǒo ñⁿ ndàcu cahu ñaha xii-yu chi cuéhé víhí-yu, te

ncháa-yu xǐxǐhnu-yu mee-ni dóó cuixíⁿ, te nùndahá-yu ncháa-yu ñⁿ caa ndàha yutnu ñúú. 10 Te ncháa-yu níhi xícáháⁿ-yu, te càchí-yu:

Yaá táxi tnùní núú xilé váha cùu-gá Ndiǒxí-ó,

te diu-gá ndihí Yaá cáá dàtná cáá ñⁿ mbéé quiti ní dánícuèhé-güedé ní dácacu ñihnu ñaha-gǎ xii-o núú ùhú núú ndàhú.

Duha càchí nchaa ñáyiú-áⁿ. 11 Te nchaa espíritú xínú cuèchi núú Yǎ Ndiǒxí ní nadúcúⁿndéé-xi xǐnutnǐ-xi ni càndéé núú núú Yàá núú xilé váha, ndihí núú xǐnucóo cue téé cùu sacuéhé, ndihí cue ndi cúmí quiti xǐnutnǐ-áⁿ, te nchaa-xi ní ngúíñí xítí-xí te ní ngúnu ndeyí-xi núú Yàá núú xilé váha-áⁿ, te nchaa-xi ní ngúíta-xi chihnu ñaha-xi xii-gá, 12 te càchí-xi:

Na càháⁿ ndáá-ndí núú yòhó Tǎtá-ndí Dǔtú Ndiǒxí sá ió càhnu cuu-n, te ndàcu-n guide-n nchaa sá váha cuíní-n, te ió váha guide-n, te ndècu ndihí-n nchaa sá xini tnùní-n,

te chihnu ñaha-ndí xii-n, te ducaⁿ ndàcáⁿ táhú-ndí núú-n cuèndá nchaa sá quidé-n, te nèhe-ndí sá yíñuhu núú-n,

te tnúhu càháⁿ-ndí-a cùu-xi tnúhu ndáá, te diu-ni duha cáháⁿ-ndí ndéé núú cuàháⁿ núú vèxi.

Duha càchí nchaa cue espíritú-áⁿ xǎhaⁿ-xi xii Yaá núú xilé váha-áⁿ.

13 Te ñⁿ cue téé cùu sacuéhé xǐndecu-áⁿ ñi xícáⁿ tnúhú-dé núú-í, te càchí-dé:

—¿Yóndi cùu ñáyiú dàcáⁿ xǐxǐhnu dóó cuixíⁿ-áⁿ, te ndéé véxi-yu núu dàcáⁿ xǐndáá-yu-i? —càchí-dé.

14 Te yúhú ní xáhaⁿ-í:

—Tǎtá, ñá túú xiní-í, dico mee-n xiní-n — duha ní xáhaⁿ-í xii-dé.

Te dàtnùní ní cachí tnúhu-dé xii-í ná cúú ñáyiú-áⁿ, te càchí-dé:

—Nchaa ñáyiú-a cùu-yu ñáyiú ní quee núú ió víhí tnúhu ndòho tnúhu ndàhú sá vǎ cùndéé iní-ó te véxi-yu iha, te cùu-yu ñáyiú sa ní nduu ndoo ní nduu nine iní-xi cuèndá sá ñi sati níñí Yàá cáá dàtná cáá ñⁿ mbéé quiti ní dánícuèhé-güedé, cuèndá xǎⁿ vitna ní ndihí-yu ní nduu cuixíⁿ dóó xǐxǐhnu-yu. 15 Te núu xǎⁿ vitna

ní nduu táhũ-yu ndécú-yu núú ndécú Yá Ndiõxí Yaá táxí tñùnì núcõo núú xilé váha, te cuèi nduu cuèi niú xínú cuèchí-yu núú-gã vitna, te diu-gá xító ñaha-gã xii-yu. ¹⁶ Te vitna ní sáá-yu núú-gã cundécú-yu te vá ndóhó-gã-yu docó, te ní vã quìní-gá-yu ndohó-yu yíchí-yu ndute, te ní vã quìní-gá-yu ndohó-yu cahni nchíanchii, te ñá túú-gã ná cahni ndohó-yu. ¹⁷ Te ducaⁿ chi Yaá cáá dàtná cáá ìⁿ mbéé quiti ní dánícuèhé-güedé ndécú-gã núú nútñi xilé váha núcóo Yá Ndiõxí Yaá táxí tñùnì, Yaá-án coto ñaha-gã xii-yu dàtná quidé ìⁿ toli oré xító-dě mbéé-dě, te candeca ñaha-gã xii-yu quíhíⁿ núú tõo ndute, te ndute-án cúú-xí ndute candeca iní-yu, te Yá Ndiõxí cada-gá sá vã quìní-gá-yu tñúhu ndàhyú —duha ní cachí tñúhu téè cùu sacuéhé-ãⁿ xii-í.

8

Cuendá tìcùú sá ñí cuáha mee-ni dǐhúⁿ cuááⁿ

¹ Te sátá dúcáⁿ te Yaá cáá dàtná cáá ìⁿ mbéé quiti ní dánícuèhé-güedé ní xócání-gã tutú líhli cùu usá ñúhú sèyú ndèé sátá tütú sá ñí nadúcúⁿnuu-án, te òré-án ñí cunahi sùúnì nàvii-ñá ní cuu andiu dàtná cuádava òré. ² Te ní xiní-í usá tñàhá espíritú xínú cuèchi núú Yá Ndiõxí xĩnutñi-xi núú núcõo-gá, te ní níhí-xi ìⁿ caa cütú xĩnehe-xi. ³ Te dàtnùnì ní xiní tucu-í ingá espíritú xínú cuèchi núú-gã ní quexio-xi nehe-xi ìⁿ tìcùú ní cuáha mee-ni dǐhúⁿ cuááⁿ te ñúhu vai dúsa sá sàháⁿ tñámí, te ní ngúnutñi espíritú-án nùú ndécú sã ñí cuáha mee-ni dǐhúⁿ cuááⁿ núú sácõdó sã ndúú tǎhú Yá Ndiõxí, te xíãⁿ nútñi-xi ndàa núú-gã, te dúsa sá sàháⁿ tñámí-án cahmi espíritú-án nùú sácõdó sã ndúú tǎhú-gã-án cuendá ñúhmá dǔsa-án cundihí-xi nchaa tñúhu càháⁿ ñáyiu càháⁿ ndihí ñaha xii-gá, nchaa ñáyiu cùu cuendá-gá. ⁴ Te nùndaha espíritú-án tìcùú ñúhú dǔsa sá sàháⁿ tñámí càyú, te quène ñúhmá nútñi-xi núú Yá Ndiõxí, te ñúhmá-ãⁿ cundihí-xi nchaa tñúhu càháⁿ ñáyiu càháⁿ ndihí ñaha xii-gá, nchaa ñáyiu cùu cuendá-gá. ⁵ Te ní queheⁿ espíritú-án tìcùú te ní dáchítú-xi ñúhú yódó nùú sácõdó sã ndúú tǎhú Yá Ndiõxí, te ní xiténuu-xi ñuyú, te òré ducaⁿ ñí quide-xi te ní cáháⁿ

víhí ñúhu, te ío dusaⁿ ñí quide-xi ñuyú, te ní sáá ndúté, te níhi víhi ní tñáa.

Ndi usá espíritú ní tiú-xi ìⁿ caa cütú xĩnehe-xi

⁶ Te ndi usá cue espíritú xĩnehe ìⁿ caa cütú-ãⁿ ñí ngúndecu túha-xi cuendá tiú-xi.

⁷ Te espíritú díhna nuu ñí tiú-xi cütú néhé-xí, te ñuyú-a ní ngoyo ñiñi dàcánuu-xi ndihí ñuhú ndihí níñi, te luha-ná te cuu dava ñuyú ní cáyú, te luha-ná te cuu dava tucu nchaa yutnu ío ñuyú ní cáyú, te luha-ná te cuu dava tucu nchaa cùhú ío ñuyú ní cáyú.

⁸ Te espíritú cúú ùú ní tiú-xi cütú néhé-xí, te dàtná cáá ìⁿ tñdúú cáá ìⁿ sá ñí ngava xití làmár te nchícúⁿ ñuhú, te luha-ná te cuu dava ndute làmár-án ñí nduu-xi níñi. ⁹ Te luha-ná te cuu dava nchaa quiti xixúhuⁿ xití làmár-án ñí xihí-güedi, te luha-ná te cuu dava nchaa bàrcú ní quée naa-xi xití ndute.

¹⁰ Te espíritú cúú ùní ní tiú-xi cütú néhé-xí, te ní ngava ìⁿ chódíní cáhnú ndèé andiu ñuyú te nchícúⁿ ñuhú-di, te ñuhú-án cáá dàtná cáá ñuhú iti. Te luha-ná te cuu dava nchaa yúte ní ngava chódíní-ãⁿ, te luha-ná te cuu dava tucu nchaa núú quèñihni ndute ní ngava-di. ¹¹ Te chódíní-ãⁿ nání-dí: Yúcú Ùá. Te ndute xica nchaa yúte-án ndihí nchaa ndute quèñihni-án ñí cuu úa-xi dàtná yúcú úa, te ío cuéhé ñáyiu ní xihí sá dúcáⁿ ñí cuu úa ndute-án.

¹² Te espíritú cúú cùmí ní dácàháⁿ-xi cütú néhé-xí, te luha-ná te cuu dava nchíanchii ñá túú ní dàyehé-xi, te ducaⁿ lùha-ná tucu cuu dava yóo ñà túú ní dàyehé-di, te ducaⁿ lùha-ná te cuu dava tucu nchaa chódíní ñà túú ní dàyehé-güedi, te luha-ná te cuu dava nduu ñà túú ní dàyehé nchíanchii, te ducaⁿ lùha-ná te cuu dava niú ñá túú ní dàyehé yóo ndihí nchaa chódíní.

¹³ Te sátá dúcáⁿ te ní xiní-í xícó ìⁿ espíritú xínú cuèchi núú Yá Ndiõxí núú tàchí, te ní tecú dóho-í níhi càháⁿ-xi, te càchí-xi:

—Ío ndàhú ndoho nchaa ñáyiu xĩndecu ñuyú òré ná dàcaháⁿ úní-gá cue espíritú cùmáñi cütú xĩnehe-xi, chí sa xĩndecu túha-ná-xi sá dácàháⁿ-xi!— duha càchí espíritú-án.

9

1 Te espíritú cúú ùhúⁿ ní tiú-xi cútú néhé-xí, te òré-áⁿ ní xiní-í ní quee ìⁿ espíritú andiu te càa-xi datná cáá ìⁿ chódíní, te ní ngava-xi ñuyíú, te ní níhí-xi ìⁿ ndacaá néhé-xí cuèndá nacaáⁿ-xi yuyèhe yaú cùnú víhí. 2 Te ní nacaáⁿ-xi yaú-áⁿ te ní ngúíta-xi ní quene ñúhmá dàtná quéné ñúhmá ìⁿ xítnú cáhnú vîhi, te ní quene táchí ní xítenuu-xi ñúhmá-áⁿ te ní sadí-xi núú nchícanhii, te ní cunee ñuyíú. 3 Te xítí ñúhmá-áⁿ ní quene tíca làngóstá, te ní xítenuu-di ñuyíú, te dééⁿ-güedi dàtná dééⁿ nchacua. 4 Te ní ngúndecu ndîhi-güedi tnúhu ndee ìní cuèndá sá dándòho-güedi mee-ni ñáyiu ñá túú ndéè seña Yă Ndiöxí tneé-xi, te ñá túú nă cada-di nchaa yutnu ndîhi nchaa cúhú. 5 Te ñá túú tnúhu ndee ìní ndécú ndîhi-güedi sá cáhni-güedi ñáyiu, chi mee-ni sá dándòho ñaha-güedi xií-yu úhúⁿ yóó. Te òré ní ngúíta-güedi dándòho ñaha-güedi xií-yu te tãhú tnúhú núú dáquëe-güedi ìñu-güedi dàtná quidé-xi núú dáquëe nchacua ìñu-güedi. 6 Te ñáyiu-áⁿ xicáⁿ tãhú-yu sá ndîhi cuú-yu cuèndá sá ìo ndòhó-yu dàquëe ñaha nchaa quití-áⁿ ìñu-di xií-yu te ñá cuìní-xi cuú-yu, te ìⁿ nduu ìⁿ nduu sàni ìní-yu cuú-yu te ñá túú cuìní-xi cuú-yu chi ñá túú tnúhu xihí sá cúú-xí-yu.

7 Te nchaa tíca làngóstá-áⁿ xindáa-güedi dàtná ndáa nchaa cuàyú cue téé cuáháⁿ nàá, te díquí-güedi ñúhu ìⁿ sá cáá dàtná cáá còroná ní cuáha mee-ni dîhúⁿ cuááⁿ, te núú-güedi càa datná cáá núú cuè téé. 8 Te idi díquí-güedi càa datná cáá ìdi díquí ñáyiu dîhí, te núhu-güedi càa datná cáá núhu ndicaha. 9 Te yídúcúⁿnuu-güedi ìⁿ sá cáá dàtná cáá càá, te ndíxíⁿ-güedi quide-xi datná quidé-xi núú vëxi cuéhé víhí càrretá sá tãñuhu cuayú cuáháⁿ-güedé ndîhi-güedi núú nàa-güedé. 10 Te ndéè ìñu núú lùhmá-güedi dàtná ndéè ìñu núú lùhmá nchacua, te ìñu núú lùhmá-güedi-áⁿ dáquëe-güedi ñáyiu dándòho ñaha-güedi xií-yu, te ducaⁿ-ni càda-güedi dándòho ñaha-güedi xií-yu ndéè xínu úhúⁿ yóó. 11 Te nchaa tíca làngóstá-áⁿ táxí tnùní ñáhá espíritú sá táxí tnùní yaú cùnú víhí, te

espíritú-áⁿ nání-xí Àbadón tnúhu hèbreú, te tnúhu griégú nání-xí Àpolión, te ndi ndúú tnúhu-áⁿ quée-xí: Sá dánàa ñáyiu.

12 Te tnúndòho-a cuu-xi tnúndòho díhna nuu, te vitna cùmání ùú-gá.

13 Te espíritú cúú ìñú ní tiú-xi cútú néhé-xí. Te núú Yă Ndiöxí nútnî ìⁿ sá ní cuáha mee-ni dîhúⁿ cuááⁿ núú sácódó sá ndúú tãhú-gă, te ndi cùmí xiquí-xi xîndecu ìⁿ caa ndiquí, te ní tecú dóho-í ní cáháⁿ ìⁿ sá ní cáháⁿ nihnu ndi cùmí ndiquí-áⁿ. 14 Te sá cáháⁿ nihnu ndiquí-áⁿ xãháⁿ-xi xîi espíritú cúú ìñú sá ní tiú cútú-áⁿ:

—Cuáháⁿ nandaxi-n ndi cumí espíritú ndútú ndècu yúte càhnu nani Eúfratés — càchí sá cáháⁿ-áⁿ xãháⁿ-xi xîi espíritú-áⁿ.

15 Te sátá dúcáⁿ te ní nandáxí ndi cùmí cue espíritú-áⁿ cuèndá cahni-xi cuéhé víhí ñáyiu, te sa yatni dàtná cuádava ñáyiu xîndecu ñuyíú cahni-xi, te ducaⁿ chi sa ndècu túha tnàhí cue espíritú-áⁿ ndétú-xí sáá òré, àdi nduu, àdi yóó, àdi cuíá ducaⁿ càda-xi cahni-xi ñáyiu. 16 Te ní xiní-í nchaa cue sandàdú cündîhi-xi xixódó-güedé cuàyú, te ní níhí-í tnúhu sá xínu úú cièndú millón-güedé.

17 Te duha xîndáa cue cuàyú-áⁿ ndîhi cue téé yòdo ñaha-áⁿ ní xiní-í: Te cue téé-áⁿ yídúcúⁿ nuu ìⁿ sá yídúcúⁿnuu pèchú-güedé, te luha ticuèhé te luha cuìi datná cuìi andiu, te luha cuááⁿ, te nchaa cuàyú-áⁿ cáá díquí-güedi dàtná cáá díquí ndicaha, te yuhu-güedi quène ñuhú ndîhi ñúhmá, ndîhi àzufré nchícúⁿ ñuhú. 18 Te ìo cuéhé ñáyiu ñuyíú ní xihí chi luha-ná te cudavá-yu ní xihí sá cuèndá ñuhú-áⁿ ndîhi ñúhmá-áⁿ ndîhi àzufre-áⁿ. 19 Te ndîhi núú lùhmá-güedi ndîhi yuhu-güedi dándòho-güedi ñáyiu, te núú lùhmá-güedi nèhe-xi díquí cõó, te diu-ni dàtná cáá cõó cáá ñihí lùhmá-güedi.

20 Te nchaa dava-gá ñáyiu ní cácu ñá túú ní xihí núú nchaa tnúndòho-áⁿ ñá túú ní cuìní-yu dàñá-yu ichi cuéhé ichi duha ndécú-yu, chi quide cahnu-ní-yu nchaa espíritú cündîhi yucu ñávãha, ndîhi nchaa sá càchí-yu cùu ndióxí ní cadúha cue téé ñuyíú-a, te dava xíáⁿ ní cuáha mee-ni dîhúⁿ cuááⁿ, te dava ní cuáha mee-ni dîhúⁿ cuixíⁿ, te dava ní cuáha sá nání bròncé, te dava ní cuáha mee-ni yúú, te dava ní cuáha mee-ni

yùtnu, te nchaa xíàⁿ ñá túú cùtnuní núú-xi, te ni ñá túú tècú dóho-xi, te ni ñá ndácú-xí càca-xi. ²¹ Te ni sã sáhní tnahá-yu, te ni sã sáhní ndùu tnahá-yu, te ni sã ndécú-yu ichi díí ìní, te ni sà dúhú ndàchiuⁿ tnahá-yu ñá túú ní cuìní-yu dàñá-yu.

10

Ìⁿ espíritú xínú cuèchi núú Yă Ndiöxí néhé-xí ìⁿ librú

¹ Te sátá dúcáⁿ te ní xiní tucu-í ìⁿ espíritú cùnùu xinu cuechi núú Yă Ndiöxí ní quee-xi andi^u, te yìhi-xi xití vícò cuãnguee-xi ñuyíú te ndàa díquí-xi ndècu ìⁿ cóó yáhnchí, te núú-xi súúní chàhnchí dàtná chàhnchí núú nchìcanchii, te ndi ndúú díhíⁿ-xi càa datná cáá itá ñuhú. ² Te nùndaha-xi ìⁿ librú lĩhli ní nandicá, te sáhá cùha-xi ní sani-xi núú ndute làmár, te sáhá dàtni-xi ní sani-xi núú ñuhu yìchí. ³ Te espíritú-áⁿ ñìhi vìhi ní cáháⁿ-xi, te ní quide-xi dàtná quidé ìⁿ ndicaha oré cánásàa-di, te òré ducaⁿ ñìhi vìhi ní cáháⁿ-xi te úsá xito ní cáháⁿ ñuhú. ⁴ Te sátá ñí yáha ní cáháⁿ ñuhú-áⁿ úsá xito, te chido tnùní-í ìⁿ núú tùtú nàcuáa ní cáháⁿ-xi ní cùu, te mei òré-áⁿ ñí tecú dóho-í ní cáháⁿ ìⁿ sá ñí cáháⁿ andi^u te càchí-xi:

—Vá chidó tnùní-n nàcuáa ní cáháⁿ ñuhú-áⁿ, ìní méé-ní-n ná cùhuⁿ —duha càchí sá ñí cáháⁿ-áⁿ.

⁵ Te espíritú sá nútn^ñ ìⁿ xio sáhá-xi núú ndute làmár-áⁿ ndìhi ìngá xio sáhá-xi núú ñuhu yìchí-áⁿ ñí xiní-í ní ndonehe-xi ndaha cùha-xi, ⁶ te càchí-xi:

—Yă Ndiöxí Yaá ndécú nchàa nduu nchaa quíú Yaá ní cadúha ñuyíú, ndìhi andi^u, ndìhi làmár, ndìhi nchaa sá ìó, Yaá-áⁿ náhá ndää-gá sá yùhú càháⁿ ndää-í, te vá cùyàa vìhi ⁷ te cada-xi nchaa nàcuáa ndùu tnúhu ndùu yuhu ní cáháⁿ-gá, tnúhu ní xáhaⁿ-gã xii cue téé ní xinu cuechi núú-gã, cue téé ní xóo cáháⁿ tnúhu-gá ndéé sanaha, chi òré ná tìu espíritú cúú ùsá cútú néhé-xí, te òré-áⁿ cada-xi nchaa nàcuáa ndùu tnúhu ndùu yuhu sá ñí xáhaⁿ-gã xii nchaa cue téé-áⁿ —duha càchí espíritú-áⁿ.

⁸ Te sátá dúcáⁿ te ní tecú tucu dóho-í ní cáháⁿ tucu sá ñí cáháⁿ andi^u-áⁿ, te càchí-xi xii-í:

—Cuaháⁿ te queheⁿ-n librú lĩhli sá ñí nandicá nùndàha espíritú-áⁿ, espíritú sá

nútn^ñ ìⁿ xio sáhá-xi núú ndute làmár, te ìⁿ xio sáhá-xi núú ñuhu yìchí —duha càchí sá ñí cáháⁿ-áⁿ.

⁹ Te yúhú ní sáháⁿ-í núú ndécú espíritú-áⁿ xicáⁿ-í librú lĩhli nèhe-xi-áⁿ, te ní cachí-xi:

—Iha te caxi-n, te cuvídí yuhu-n dàtná cuvídí òré xíhí-n ndùdí ñúñú, dico xití-n chi cada úá-xi —càchí-xi.

¹⁰ Te ní queheⁿ-í librú lĩhli nùndaha espíritú-áⁿ ñí xexi-í, te yuhu-í ní quide vídí-xi dàtná vídí ndudí ñúñú, dico sátá ñí ngava-xi xití-í te ní quide úá-xi. ¹¹ Te ní cachí tucu espíritú-áⁿ xii-í:

—Dacuití cáháⁿ tucu-n nàcuáa càchí Yă Ndiöxí cuèndá ñáyíu titní víhí nàcióⁿ, ndìhi cuèndá ñáyíu titní víhí ñúú, ndìhi cuèndá ñáyíu càháⁿ ndí dííⁿ ndí dííⁿ núú tnúhu, ndìhi cuèndá cue téé yìndaha ñáyíu.

11

Cuèndá úú cue téé càháⁿ nàcuáa càchí Yă Ndiöxí

¹ Te ní níhí-í ìⁿ tnuyoo nàcuáa chicùhá-í ìⁿ sá chicùhá-í, te ní cáháⁿ ìⁿ sá ñí cáháⁿ, te càchí-xi:

—Ndacuíñí te chicùhá-n vèhe Yă Ndiöxí, te chicùhá tucu-n núú sácódó sã ndúú tãhú-gã, te cahu-n nã daha tnahá ñáyíu chĩñuhu ñaha xii-gá xĩndecu. ² Dico vá chicùhá-n ndàa quehé vehe-gá, chi xiáⁿ ñí nduu cuèndá cue ñáyíu ñá túú cùu ñáyíu isràél, te ñáyíu-áⁿ nduu nuu-nã-yu núú ñí cuu ñúú-gá, te cadá-yu dàtná càchí ìní méé-yu, te údico úú yóó ducaⁿ cadá-yu. ³ Te yúhú tendaha-í úú tnahá cue téé cáháⁿ yuhu-í nàcuáa càchí Yă Ndiöxí, te úxúú cièndú únídico nduu ducaⁿ cáháⁿ-güedé yuhu-í cada-güedé núú-í, te cuihnu-güedé dóó tnúú sã sácúhnu cue ñáyíu ndìhú ìní-xi —duha càchí sá càháⁿ-áⁿ.

⁴ Te ndi ndùú cue téé-áⁿ cúú-güedé dàtná úú yutnu òlívú sá xĩnutn^ñ núú Yă Ndiöxí, ndìhi dàtná úú sá ndéé dité-xi, sá yìndòdo ìⁿ caa candíl núú dité-xi ndècu tucu núú-gã, te di^u-gá cúú-gã Yaá yìndàha ñuyíú. ⁵ Te ñáyíu na càni ìní-xi ná cada ñaha xì-güedé te yuhu-güedé quene ñuhú cahmi ñaha-xi xì-yu, te ducaⁿ cada-güedé cahni-güedé nchaa ñáyíu na cùu úhú ìní ñáhá xì-güedé.

⁶ Te ndi ndùú-güedé ndécú ndìhi-güedé

tnúhu ndee iní cada-güedé sá vǎ cúúⁿ dǎú, te ducaⁿ càda-güedé nini cǎháⁿ-güedé nàcuáa cǎchí Yǎ Ndiǒxí, te ndacu-güedé nadatiu-güedé ndute nduu-xi níñí, te ndacu-güedé dandòho-güedé nchaa ñáyiú titní núú tnúhu ndòho, te ducaⁿ càda-güedé ná daha xito cǎchí iní méé-güedé. ⁷ Te nà yáha sá cǎháⁿ-güedé nàcuáa ní cachí Yǎ Ndiǒxí, te dàvǎ-áⁿ quene ñⁿ quiti dééⁿ yàú cùnú víhí sǎ ïo néhé cáá, te quiti-áⁿ ngüíta-di nàá-di ndihí ndi ndúú cue téé-áⁿ te cahni ñaha-di xii-güedé. ⁸ Te yiqui cùñú cue téé-áⁿ cautùu-xi ñⁿ tnuú ñúú cǎhnú ñúú ní sahani-güedé Xítoho Jesucristú núú cùrúxí, te diu Yaá-áⁿ cúú Xítoho-ó ndihí-güedé, te cǎchí ñáyiú sá ñúú-áⁿ cúú-xí dàtná ñúú Sòdomá ndihí nàcióⁿ Ègiptú. ⁹ Te úní nduu dava cautùu yiqui cuñú-güedé xián, te ñáyiú nchaa nàcióⁿ, ndihí ñáyiú nchaa ñúú, ndihí ñáyiú cǎháⁿ ndí dǎíⁿ ndí dǎíⁿ núú tnúhu, ndihí ñáyiú xíndecu nchaa xichi quiní-yu yiqui cùñú-güedé, te vǎ dáñǎ-yu nguíndúxi. ¹⁰ Te nchaa ñáyiú-áⁿ nduu vétú iní-yu sá dúcáⁿ cùú cue téé cǎháⁿ nàcuáa cǎchí Yǎ Ndiǒxí-áⁿ, te ío cudǎí iní-yu, te nándi sá cuǎha táhú tnáhǎ-yu sá cúdí iní-yu sá dúcáⁿ ní xihí-güedé, te ducaⁿ chí diu-güedé ní quide ío ní ndohó-yu. ¹¹ Te sátá ná yǎhá úní nduu dava sá dúcáⁿ cùú-güedé te Yá Ndiǒxí dandòto ñaha-gá xii-güedé, te ndacóo-güedé, te nchaa ñáyiú na quiní sá ndótó-güedé te yùhú víhí-yu. ¹² Te ndi ndúú cue téé-áⁿ tecú dóho-güedé cǎháⁿ ñⁿ sá cǎháⁿ ndéé andiu, te cùñaha-xi xii-güedé:

—Chí táquene iha —duha cùñaha sǎ cǎháⁿ-áⁿ xii-güedé.

Te cue téé-áⁿ quǎhu-güedé ñⁿ xití vícò caa-güedé andiu, te nchaa ñáyiú cùu úhú iní ñáhǎ xii-güedé quiní ñáhǎ-yu xii-güedé caa-güedé andiu. ¹³ Te òré-áⁿ níhi víhi tnáa ñuyíú, te úxí xichi cùu-xi ñúú núú cùndècu-güedé-áⁿ te ñⁿ xichi ñúú-áⁿ naa, te cuú úsá mǐl ñáyiú, te nchaa dava-gá ñáyiú cácu vǎ cùú yùhú víhí-yu, te cachí-yu sǎ ïo cǎhnu cuu Yá Ndiǒxí Yaá ndécú andiu.

¹⁴ Te tnúndòho-a cuu-xi tnúndòho cuu úú yáha, te vitna sa ndètu víi-ñǎ tucu sǎá tnúndòho cuu uní.

Espiritú cúú ùsá tǎú-xi cútú néhé-xi

¹⁵ Te espíritu cúú ùsá ní tǎú-xi cútú néhé-xi, te òré-áⁿ ní tecú níhi ní cǎháⁿ titní sá ní cǎháⁿ andiu, te cǎchí-xi:

Nchaa sá cúú cuendá nchaa ñáyiú ñuyíú táxí tnùní-yu ní cùu ní nduu cuendá Tǎtá-ó Dútú Ndiǒxí táxí tnùní-gá, Te tnàhá Yaá ní tendaha-gǎ ní sáhǎⁿ ñuyíú táxí tnùní-gá nchaa xiǎⁿ,

te diu-gá taxi tnùní-gá ní caa ní quíhíⁿ.

Duha ní cǎháⁿ nchaa sá ní cǎháⁿ-áⁿ. ¹⁶ Te ndi òcò cúmí cue téé sacuéhé xínucóo núú xilé váha ní ngüíñí xiti-güedé núú Yǎ Ndiǒxí, te ní nuu núú-güedé ndàa núú ñúhú te ní ngüíta-güedé chíñúhu ñaha-güedé xii-gá, ¹⁷ te cǎchí-güedé:

Ío ndàcáⁿ táhú-ndí núú yòhó Dútú Ndiǒxí, Yaá ndácú quide nchaandi túhú sá vǎha, te diu-ni-n ndècu-n ndéé cùtnàhá ní ngáva ñuyíú, te diu-ni-n ndècu-n vitna, te diu-ni-n cùndecu-n ndéé núú cuáhǎⁿ núú véxi, te ío cǎhnu cuu-n te ní ngüíta-n ïo-gá táxí tnùní-n.

¹⁸ Te nchaa ñáyiú xíndecu ñuyíú xícudéⁿ-yu núú-n,

te vitna ní sǎá nduu dándohó-n-yu chí ñǎ túú cùu váha iní-n núú-yu,

te cada ndáá-n cuèchi nchaa ñáyiú sa ní xihí,

te ní sǎá tucu nduu cuǎñaha-n sǎ ndúú tǎhú nchaa ñáyiú ní xinu cuechi núú-n ní cǎháⁿ-yu tnúhu-n, ndihí nchaa dava-gá ñáyiú cùu cuendá-n, chí ñáyiú-áⁿ néhé-yu sá yíñúhu núú-n,

te cuèi ñáyiú cùnunu ndihí ñáyiú ñǎ túú cùnunu cuǎñaha-n sǎ ndúú tǎhú-yu,

te ní sǎá tucu nduu dànaa-n nchaa ñáyiú sahani tnaha ñáyiú-xi.

Duha cǎchí ndi òcò cúmí cue téé sacuéhé-áⁿ xǎhaⁿ-güedé xii Yá Ndiǒxí.

¹⁹ Te ní xiní-í ní nacaáⁿ yuyèhe vehe Yá Ndiǒxí andiu, te xití vehe-gá-áⁿ ní xiní-í ndécú cǎjá ñúhú sǎ yódó tnùní nàcuáa ní cundáá cada-gá sá cúú-xí ñáyiú, te òré-áⁿ ní xiní-í ní sǎá ndúté, te ní cǎháⁿ ñúhu te ío dusaⁿ ní quide-xi, te níhi víhi ní tnáa, te súuní cǎhnu dáú ñíñí ní cuuⁿ.

12

Cuendá ñⁿ ñadǎhí ndihí cuendá ñⁿ quiti dééⁿ nání dragón

1 Te ío vihi ní quide-xi ñ̃ sá ñ̃ quide-xi andïu, te ní xiní-í ñ̃ ñadìhí te dóó níhnú-áñ quide-xi datná quidé-xí nũú nchĩcanchii, te ndàa núú sàhá-aⁿ quide-xi datná quidé-xí nũú yóó, te ñ̃hu ñ̃ coroná díquí-aⁿ te ndèé úxúú chódíní. 2 Te ñ̃hu déhe-aⁿ te càna saa-aⁿ sá quidé ùhú ñ̃há-xí xì-aⁿ chí sa ndètu vií-nã cacu déhe-aⁿ. 3 Te dātñuní ní quide tucu-xi sá ñ̃ quide-xi andïu, te ní xiní-í ñ̃ quiti càhnu quiti ticuehé, quiti dééⁿ nání dràgón, te ndèé úsá díquí-di ndihì úxí ndiqui-di, te ñ̃ caa coroná ñ̃hú ñ̃ caa díquí-di-áñ. 4 Te quiti-áñ luha-ná te cuu dava nchaa chódíní dāngòyo-di ñ̃uyú ndihì lúhmá-di, te quiti-áñ ñ̃ ngúnu tñi-di núú ñ̃aha ndètu vií-nã cacu déhe-xi-áñ cuendá caxi-di déhe-aⁿ òré cacu ni cùu. 5 Te ñ̃aha-áñ ñ̃ cacu déhe-aⁿ te té cùu-dé, te té lihli-áñ ío cunuu-dé taxi tñuní-dé nchaa ñ̃ayiu ñ̃uyú, te mee Yã Ndiòxí ní nacuaca ñ̃aha-gã xii té lihli-áñ cuendá cundecu ndihì ñ̃aha-dé xii-gã núú ndécú-gã táxi tñuní-gã. 6 Te ñ̃adìhí-áñ ñ̃ xinu-aⁿ cuáhá-aⁿ xití yucu núú ñ̃ quide túha Yá Ndiòxí cundecu-aⁿ cuendá xíaⁿ ñ̃hí-aⁿ caxi-aⁿ, te ducaⁿ ñ̃hí-aⁿ sá caxí-áñ ùxúú ciendú únídico nduu chí ducaⁿ nduu cundecu-aⁿ xíaⁿ.

7 Te sátá dúcáⁿ te andïu ñ̃ xiní-í espíritú cúnúu xinu cuechi núú Yã Ndiòxí nání Mìguél, ndihì nchaa dava-gá espíritú cundihì-xi, te nchaa espíritú-áñ nã-xi ndihì quiti dééⁿ nání dràgón ndihì nchaa espíritú cundihì-di. 8 Te quiti-áñ ñ̃a túú ní ndàcu-di ndihì nchaa espíritú cundihì-di, te ñ̃a túú ní ñ̃hí-gã-di núú cundècu-di andïu ndihì nchaa espíritú cundihì-di-áñ. 9 Te cue espíritú xinú cuèchi núú Yã Ndiòxí-áñ ñ̃ dāngává-xí quiti dééⁿ nání dràgón-áñ ndihì nchaa espíritú cundihì-di ñ̃uyú, te quiti-áñ cúu-dí mèi sàcuíhná àdi sá càchí-ó cùu yucu ñ̃ávãha, te ñ̃u xíaⁿ ní dāndàhú-xi ñ̃ayiu ñ̃hí ñ̃uyú, te ñ̃u-ñi xíaⁿ ní nduu-xi cóo ñ̃ dāndàhú-xi ñ̃ayiu ndéé sanaha.

10 Te ní tecú dóho-í níhi ní cáháⁿ tucu ñ̃ sá ñ̃ cáháⁿ andïu, te càchí-xi:

—Vitna te Yá Ndiòxí ní quide-gá ní ngúndecu ñ̃ayiu ndihì-gá, te ío càhnu cuu-gá, te ío tàxi tñuní-gá, te tñahá Crístú Yá ní tendaha Yã Ndiòxí ní quixi ñ̃uyú-a ío tàxi tñuní-gá, te ducaⁿ chí sa ní xócuíñí sàcuíhná

sã sũúní nũnúu sacáⁿ cuèchi núú Tātá-ó Dütú Ndiòxí cuendá nchaa ñ̃ayiu ndècu ndihì-o ichi-gá, te nduu niú ducaⁿ sàcáⁿ cuèchi-xi núú-gã cuendá-yu ni cùu. 11 Dico ní ndacú-yu ní cunúu-yu núú sàcuíhná sã dúcáⁿ sàcáⁿ cuèchi cuendá-yu-áñ ní cùu, te ducaⁿ ñ̃ cunúu-yu sá cuendá Yá cáá dàtná cáá ñ̃ mbéé quiti ní dāncuèhé-güedé, chí Yá-áñ ñ̃ sati ñ̃hí-gã te ní xihí-gá sá cuendá-yu, te ducaⁿ ñ̃ cunuu tucú-yu sá cuendá sá sàndáá iní ñ̃hã-yu xii Yá-áñ, te ñ̃a túú ní yuhú-yu cuú-yu sá cuendá-gã.

12 Te vitna ío chí cúdí ñ̃ iní nchaa nchòhó espíritú xinú cuèchi núú Yã Ndiòxí, ndihì nchaa nchòhó ñ̃ayiu ndècu andïu, dico ñ̃ndàhú ní cuu nchaa ñ̃ayiu xĩndecu ñ̃hí ñ̃uyú! Chí sũúní cùdééⁿ sàcuíhná ñ̃ ngava-xi te nándi cada ñ̃aha-xi xii-yu, te ducaⁿ chí cùnuní iní-xi sá sàcú duha-ná nduu cúdí-xi cundecu-xi —duha càchí sá ñ̃ cáháⁿ andïu.

13 Te sátá ñ̃ quee quiti dééⁿ nání dràgón-áñ andïu ñ̃ ngava-di ñ̃uyú quiti cùu mei sàcuíhná-áñ, te quiti-áñ ñ̃ chinchícu-di ñ̃adìhí ñ̃aha ní cacu déhe té-xi-áñ. 14 Te ñ̃adìhí-áñ ñ̃ nduu táhú-aⁿ ní quene úú ndíxí-aⁿ, te càa datná cáá ndíxí ñ̃ yacòlo cahnu vihi cuendá ndava-aⁿ núhú-aⁿ yucu núú ñ̃ cachí Yã Ndiòxí cundecu-aⁿ, te yacáⁿ cundecu-aⁿ úní cuíaⁿ dava cuendá sá vã ñ̃hí ñ̃há quiti dééⁿ quiti nání dragón-áñ te xíaⁿ ñ̃hí-aⁿ sá caxí-áñ, te quiti-áñ cúu tucu-di datná ñ̃ cóo dééⁿ. 15 Te quiti-áñ ñ̃ quene cuéhé ndute yuhu-di, te ndute ní quene yuhu-di-áñ ñ̃ cuu-xi ñ̃ yúte, te ducaⁿ ñ̃ quide-di cuendá ndute-áñ cuido-xi ñ̃adìhí-áñ ní cùu. 16 Te ñ̃hu yìchí ní chindee-xi ñ̃adìhí-áñ, chí ní ndátá te ní quée naa-ni ndute ní quene yuhu quiti-áñ. 17 Te sátá dúcáⁿ ñ̃ quide-xi xíaⁿ ní cudééⁿ víhí quiti-áñ nũú ñ̃adìhí-áñ, te ní xica-di cuáhá-di núú xĩndecu nchaa dava-gá cue déhe ñ̃adìhí-áñ cuendá nã ndihì ñ̃aha-di, te ñ̃ayiu-áñ cúu-yu ñ̃ayiu tñi nchaa tñuhu càháⁿ Yã Ndiòxí, te nchícúⁿ ñ̃hnú-yu nchaa tñuhu sá càháⁿ váha cuendá Xítóhó Jesucrístú.

13

Cuendá úu quiti

1 Te yúhú ní ngúnu tñí-í yuhu làmár, te ní xiní-í ní quene ìⁿ quitì te ndèé úsá díquí-dì te úxí ndìqui-dì, te núú ìⁿ ìⁿ ndìqui-dì-án ndécú ìⁿ caa coroná. Te ìⁿ ìⁿ díquí-dì-án ndèé tñúhu sá càháⁿ úhú-xi cuendá Yá Ndiòxí. 2 Te quitì-án cáá-dí datná cáá cuiñí, te sáhá-dì càa datná cáá sáhá òso, te yuhu-dì càa datná cáá yùhu ndicaha. Te quitì dééⁿ nání dràgón ní sáñaha-dì tñúhu ndee ìní xii quitì-án cuendá taxi tñúni víhí-dí, te dràgón-án ñ sáñaha-dì núú ndécú-dí tàxi tñuní-dì xii quitì ní quene xití làmár-án, te ducaⁿ ñ quide-dì cuendá sá nihí ndéé quitì-án cunuu-dì. 3 Te ìⁿ díquí quitì ní quene xití làmár-án càhú víhí càa ní nícuèhé, te sa ndètu víí-nǎ cuú-dì sànuu dico ní ndúha-dì, te nihí ñuyú ñ níhí ñáyiu tñúhu sá dúcáⁿ ñ cuu, te ío ní cuñúhu-yu te ní tuhá-yu quitì-án. 4 Te nchaa ñáyiu-án ñ cachí-yu sá ìo càhnu cuu quitì dééⁿ quitì nàni dragón-án cuendá sá ñ sáñaha-dì tñúhu ndee ìní sá táxi tñuní quitì ní quene xití làmár-án, te ní ngúita-yu ní chiñuhú-yu quitì ní quene xití làmár-án, te càchí-yu:

—Vá yõo ìⁿ nǔtnahá ñáhá xii quitì-a, te ñi vǎ yõo ìⁿ ndacu nàá ndihí ñaha xii-dì — cachí-yu.

5 Te ní níhí-dì tñúhu ndee ìní sá càháⁿ úhú-dì Yá Ndiòxí, te cada càhnu-dì mee-dì, te údico úú yóo ducaⁿ ñ níhí-dì tñúhu ndee ìní-án cunuu-dì. 6 Te ducaⁿ ñ quide-dì ní càháⁿ úhú-dì Yá Ndiòxí ndihí cuendá nchaa sá quidé-gǎ, te ðiu-ni ducaⁿ ñ càháⁿ úhú-dì núú ndécú-gǎ, te ní càháⁿ úhú tucu-dì nchaa ñáyiu ndècu ndihí-gá andiu. 7 Te ducaⁿ ñ níhí-dì tñúhu ndee ìní sá nàá-dì ndihí nchaa ñáyiu cùu cuendá Yá Ndiòxí, te ducaⁿ nàá ndihí ñaha-dì xii-yu ndéé òré vá ndácú-gǎ-yu nàá ndihí ñàhá-yu xii-dì, te tñàhá ní ngúndecu ndihí-dì tñúhu ndee ìní sá táxi tñuní-dì ñáyiu nchaa nàción, ndihí ñáyiu nchaa ñuú, ndihí nchaa ñáyiu càháⁿ ndí dííⁿ ndí dííⁿ núú tñúhu, ndihí ñáyiu xíndecu nchaa xichi. 8 Te cue ñáyiu nihí ñuyú ñ cachí-yu sá ìo càhnu cuu quitì-án, te ñáyiu-án cúú-yu ñáyiu ñá túú yòdo tñuní núú tütú Yá cáá datná cáá ìⁿ mbéé quitì ní dánicuèhé-güedé Yá ní xihí ní cùu te ní ndoto. Te ndéé cútnàhá ní ngáva ñuyú sa

yòdo tñuní ñáyiu naníhí tàhú, dico ñáyiu càchí sá ìo càhnu cuu quitì-án ñá túú yòdo tñuní-yu núú tütú-gá.

9 Te nchaa nchòhó ñáyiu xíndedóho chí cündedóho váha nchaa nàcuáa cuáháⁿ tñúhu-án. 10 Te nchaa ñáyiu na chihí tñaha ñáyiu-xi vecaá te sáá nduu te quihíⁿ-yu tñàhá-yu vecaá, te nchaa ñáyiu sàhni tñaha ñáyiu-xi ndihí yuchí te ðiu-ni ndihí yuchí cuú-yu tñàhá-yu, te xíáⁿ núu ío xini ñuhu-xi sá ncháá ñáyiu cùu cuendá Yá Ndiòxí cunduu càhnu ìní-yu, te quíndáá ìní ñáhá-yu xii-gá.

11 Te ní xiní tucu-í ingá quitì ní quene-dì núú ñuhu yìchí, te ndéé úú ndìqui-dì te càa datná cáá ndìqui canerú, te càháⁿ-dì datná càháⁿ quitì dééⁿ nání dràgón. 12 Te datná ndécú ndihí quitì ní quene xití làmár-án tñúhu ndee ìní sá táxi tñuní-dì ducaⁿ ndècu ndihí quitì ní quene ñuhu yìchí-án tñúhu ndee ìní taxi tñuní-dì cada-dì núú quitì ní quene xití làmár-án, te quitì ní quene ñuhu yìchí-án ñ quide yica-dì sá ncháá ñáyiu xíndecu nihí ñuyú chiñuhú-yu quitì ní quene xití làmár-án, quitì càhú víhí ñ tñahá ní nícuèhé te ní ndúha-dì. 13 Te quitì ní quene xití ñuhu yìchí-án ñ quide-dì titní núú sǎ vǎ yõo tñàhí ndàcu cada, te nchaa ñáyiu ní xiní-yu sá ndéé andiu ñ dǎngóyó-dí ñùhú ñuyú. 14 Te sá dúcáⁿ ñ ngúndecu ndihí-dì tñúhu ndee ìní ní quide-dì nchaa xíáⁿ ní quide-dì núú quitì ní quene xití làmár-án, te sá dúcáⁿ ñ quide-dì te xíáⁿ ní dándàhú-dì nchaa ñáyiu xíndecu nihí ñuyú, te ní xáhaⁿ-dì xii-yu sá ndúcú-yu ìⁿ sá cadúha-yu nàcuáa-ni càa nacuáa-ni ndùu quitì ní quene xití làmár-án, quitì càhú víhí ñ tñahá ní nícuèhé díquí-xi-án ñ quée machití te ñá túú ní xihí-dì chí ní xíndecu-ni-dì. 15 Te quitì ní quene xití ñuhu yìchí ní ngúndecu ndihí tucu-dì tñúhu ndee ìní sá chíhí-dí ìní sá ñ cadúha-yu-án, sá ñ natavá-yu datná cáá quitì ní quene xití làmár-án, te ducaⁿ ñ quide quitì-án cuendá càháⁿ sá ñ cadúha-yu-án, te xíáⁿ cada-xi cuú nchaa ñáyiu ñá túú ní cuíni chiñuhu ñaha xii-dì. 16 Te quitì ní quene xití ñuhu-án quidé-dí sǎ ncháá ñáyiu ngúndéé ìⁿ tñuní ndaha

cuhá-yu àdi tneé-yu, te ducaⁿ ñí quide-di cuèi ñáiyu cùnūu te cuèi ñáiyu ñá túú cùnūu, te cuèi ñáiyu cuica te cuèi ñáiyu ndàhú, te cuèi ñáiyu ñá túú dàñá quee núú chíúⁿ pàtróóⁿ-xi, te cuèi nchaa ñáiyu dàñá quée núú chíúⁿ pàtróóⁿ-xi nchaaⁿ-yu ducaⁿ ñí ngúndeé tnuní ñíⁿ-yu. ¹⁷ Te ní quide-di sá ncháá ñáiyu ñá túú ndèe tnuní ñíⁿ-xi vá cúú cuááⁿ-yu sá càchí iní-yu te ni vǎ cúú dícó-yu ñíⁿ sá cuìní-yu dícó-yu, te tnuní-áⁿ cúú-xí diu quití ní quene xití làmár-áⁿ àdi númerú-di. ¹⁸ Te xìni ñuhu-xi sá ncháá ñáiyu ío váha cùtnuní iní-xi ío váha cuáha-yu cuendá nàcuáa quèe-xi númerú quití-áⁿ, te númerú-áⁿ cúú-xí ñíⁿ ciendú únídico ñíⁿ, te cùu-xi cuendá ñíⁿ ñáiyu ñuyíú.

14

Cuendá ñíⁿ ciendú údico cúmí mǐl ñáiyu

¹ Te sátá dúcáⁿ te ní xiní-í Yáa cáá dàtná cáá ñíⁿ mbéé quití ní dánícuèhé-güedé nùtníⁿ-gá ñíⁿ yucu ñuú nání Sión ndécú àndiū, te nutníⁿ-gá ndihí ñíⁿ ciendú údico cúmí mǐl ñáiyu, te tneé-yu ndèe diu-gá ndihí diu tátá-gǎ Dútú Ndióxi. ² Te ní tecú dóho-í ní quide-xi andiū dàtná quidé-xi núú xíca cuèhé víhí ndüte, te quide tucu-xi datná quidé-xi òré níhi víhi caháⁿ ñúhu, te quide tucu-xi datná quidé-xi òré cuéhé víhí ñáiyu càní-yu àrpá. ³ Te ní tecú dóho-í xíxita yuhu sǎ xítá yùhu núú Yáa núcõo núú xilé váha, ndihí núú ndí cùmí cue quití xínutníⁿ-áⁿ, ndihí núú nchaa cue tée cùu sacuéhé xínucóo-áⁿ, te xíxita-xi ñíⁿ ndudú sáa. Te mee-ni cuè ñáiyu ñíⁿ ciendú údico cúmí mǐl-áⁿ quée díquí-yu ndudú-áⁿ, te ñáiyu-áⁿ cúú-yu ñáiyu ní dácãcu nihnu ñaha Yáa cáá dàtná cáá ñíⁿ mbéé quití ní dánícuèhé-güedé núú ñáiyu ndècu ichi cuehé ichi duha xíndecu ñuyíú, te vá yõo ñíⁿ-gá quée díquí-xi ndudú sáa-áⁿ chi mee-ni ñáiyu ní cácu nihnu-áⁿ quée díquí-yu. ⁴ Te ñáiyu ní cácu nihnu-áⁿ cúú-yu ñáiyu ñá túú ní xíndecu ichi díí iní, te cùú-yu ñáiyu càndoo canine iní-xi, te ndèni ní cuu cuáháⁿ Yáa cáá dàtná cáá ñíⁿ mbéé quití ní nícuèhé-áⁿ, te ducaⁿ-ni ndèndaha ñàhá-yu xii-gá cuáháⁿ, te ñáiyu-áⁿ ñí cácu nihnú-yu núú nchaa ñáiyu ñuyíú, ñáiyu ndècu ichi

cuehé ichi duha, te ñáiyu ní cácu nihnu-áⁿ cúú-yu ñáiyu díhna nuu ñí nduu táhú Yá Ndióxi cuu cuendá-gá ndihí Yáa cáá dàtná cáá ñíⁿ mbéé quití ní dánícuèhé-güedé. ⁵ Te cùú-yu ñáiyu ñá túú càháⁿ ní ñíⁿ tnúhu ndehnde, te càndoo canine iní-yu ndècú-yu núú núcõo Yá Ndióxi táxi tnuní-gá.

Cuendá úní cue espíritú xínú cuèchi núú Yá Ndióxi

⁶ Te sátá dúcáⁿ te ní xiní-í ñíⁿ espíritú xínú cuèchi núú Yá Ndióxi xícó-xi cuádava andiū, te ndècu ndihí-xi tnúhu sá càháⁿ nàcuáa naníhí tàhú-ó, tnúhu sá ñá túú tnàhí ndihí nihnu te tnúhu-áⁿ danèhé espíritú-aⁿ nchaa ñáiyu ndècu ñuyíú, ñáiyu nchaa nacióⁿ, ndihí ñáiyu nchaa ñuú, ndihí nchaa ñáiyu càháⁿ ndí dííⁿ ndí dííⁿ núú tnúhu, ndihí ñáiyu xíndecu nchaa xichi. ⁷ Te níhi ní cáháⁿ-xi te càchí-xi:

—Nchaa nchòhó ñáiyu ndècu ñuyíú canehe-ndo sǎ yíñùhu núú Yá Ndióxi, te cachí-ndó sǎ ío càhnu cuu-gá chi sa ní sáa nduu càda ndáa-gá nchaa cuèchi-ndo, te chiñuhu-ndo-gǎ chi diu-gá ní cadúha-gá andiū, ndihí ñuhu yíchí, ndihí làmár, ndihí nchaa ndóhoyo —duha càchí espíritú-áⁿ.

⁸ Te nchícúⁿ tucu ñngá espíritú xínú cuèchi núú Yá Ndióxi, te càchí-xi:

—Vitna ní naa ñuú Babiloniá ñuú ío cùnūu, te ducaⁿ ñí naa chi cue ñáiyu ñuú-áⁿ ñí quidé-yu ní xíta nihnu nchaa ñáiyu nihí ñuyíú, chi ní sanu ichi ñàhá-yu ichi cuèhé ichi duha —duha càchí espíritú-áⁿ.

⁹ Te nchícúⁿ tucu ñngá espíritú xínú cuèchi núú Yá Ndióxi te níhi càháⁿ-xi, te càchí-xi:

—Nchaa ñáiyu chiñuhu ñaha xii quití ní quene xití làmár, ndihí sá ñí natava ñàhá-yu nàcuáa càa-di-áⁿ, ñáiyu ní dàñá mèe-xi ní ngúndeé tnuní ndahá-yu àdi tneé-yu, ¹⁰ ñáiyu-áⁿ sùúní dándoho ñaha Yá Ndióxi xii-yu chi ío cùdéeⁿ-gǎ, te ducaⁿ ío dándoho ñaha-gá xii-yu chi daquihíⁿ ñàhá-gǎ xii-yu núú ñúhú núú ñúhú àzufre càyú-xi, te núú cuè espíritú xínú cuèchi núú-gǎ ducaⁿ dándoho ñaha-gá xii-yu, ndihí núú Yáa cáá dàtná cáá ñíⁿ mbéé quití ní dánícuèhé-güedé.

¹¹ Te ní caa ní quihíⁿ quene ñúhmá núú dúcáⁿ cùndecú-yu ndohó-yu-áⁿ, te cuèi nduu cuèi niú ducaⁿ ndòhó-yu. Te ducaⁿ

ndòho nchaa ñáyi chihuhu ñaha xii quitì ní quene xití làmár, ndihì sá ñí natava ñàhá-yu nàcuáa càa-di-áⁿ, te diu-ni ñáyi-áⁿ cúu-yu ñáyi ní ngúndéé tñuní ndaha-xi àdi tneé-xi —duha càchí espíritú-áⁿ.

12 Te xíáⁿ xíní ñuhu-xi sá ncháá ñáyi cùu cuendá Yă Ndiôxí cunduu càhnu iní-yu, chi diu-ni-yu cúu-yu ñáyi tñi nchaa tñuhu càháⁿ-gá, te ni yùhu ni iní-yu sàndáá iní-yu Xítóhó Jesucristú.

13 Te sáta dúcáⁿ te ní tecú dóho-í ní cáháⁿ ñⁿ sá ñí cáháⁿ andiù, te càchí-xi:

—Chido tñuní-n ñⁿ núú tütú nàcuáa na càháⁿ-í-a. “Není vitna ío váha táhú nchaa ñáyi sàndáá iní tñuhu Xítóhó Jesucristú te xihí-yu” —duha càchí sá ñí cáháⁿ-áⁿ.

Te Espíritú Yă Ndiôxí ní cáháⁿ-xi, te càchí-xi:

—Ndáá, chi ndetatú-yu chi ñá túú-gă nágá chiùⁿ ndohó-yu cadá-yu, te Yă Ndiôxí sa nàha-gá nchaa nàcuáa ndùu chiuⁿ ní quidé-yu —duha càchí Espíritú-gá.

Nchaa sá cúu nùú ñuhú

14 Te sáta dúcáⁿ te dàtnùnì ní xíní-í ñⁿ vícò cuixíⁿ, te núú vícò-áⁿ ñí xíní-í núcò ñⁿ Yaá, te càa-gá dàtná cáá ñⁿ téé ñuyíú, te díquí-gă ñuhú ñⁿ coroná ní cuáha mee-ni dǐhúⁿ cuááⁿ, te nùndaha-gá ñⁿ yuchí ndíquí te súní dǐéⁿ. 15 Te ní xíní-í ñⁿ espíritú xínú cuèchi núú Yă Ndiôxí ní quee-xi xití vehe-gá, te níhi ní cáháⁿ-xi xăhaⁿ-xi xii Yaá núcò núú vícò-áⁿ:

—Sa ní cuu nàquehndé-n nchaa sá ñí cuu ñuyíú ndihì yuchí ndíquí-n, chi sa ní cuu núcò tñaha-xi —duha càchí espíritú-áⁿ xăhaⁿ-xi xii Yaá-áⁿ.

16 Te Yaá núcò núú vícò-áⁿ ñí dáyăha ndodo-gá yuchí ndíquí-gă núú ñuyíú ñí nataxi tñaha-gá nchaa sá ñí cuu.

17 Te ní xíní tucu-í ingá espíritú xínú cuèchi núú Yă Ndiôxí ní quee-xi xití vehe-gá sá cáá àndiù, te nùndaha-xi tñahá-xi ñⁿ yuchí ndíquí dǐéⁿ. 18 Te ní xíní tucu-í ní quee tucu ingá espíritú xínú cuèchi núú Yă Ndiôxí núú nùtníⁿ núú sácòdó să ndúú táhú-gă, te ndècu ndihì-xi tñuhu ndee ìní táxi tñuní-xi ñuhú, te espíritú-áⁿ níhi ní cáháⁿ-xi xăhaⁿ-xi xii espíritú néhé yùchí ndíquí dǐéⁿ-áⁿ:

—Ngúta naquehndé-n ndihì yuchí ndíquí-n ndéhé yoho yàha stilé sá ío ñuyíú chi sa ní cuu nàtehndé —duha càchí espíritú-áⁿ xăhaⁿ-xi xii espíritú néhé yùchí ndíquí-áⁿ.

19 Te espíritú néhé yùchí ndíquí-áⁿ ñí dáyăha ndodo-xi yuchí ndíquí-xi nùú ñuyíú ñí nàquehndé-xi nchaa ndéhé yoho yàha stilé, te ní chihi-xi ñⁿ xichi núú ñí chihi-xi cuendá xíáⁿ quihni-xi quee ndudí-xi, te sá dúcáⁿ ñí quide-xi xíáⁿ cútnùnì iní-ó să ío cùdéeⁿ Yă Ndiôxí núú ñáyi ñuyíú. 20 Te ndéhé yoho yàha stilé-áⁿ ñí quihni-xi ñⁿ xio yuhu ñúú, te ndudí ndéhé yoho yàha stilé-áⁿ ñí nduu-xi níñí te ní quee-xi núú quíhni ñihnu espíritú-áⁿ. Te únì cièndú mǐl mǐtrú ní xica níñí-áⁿ, te dàtná ñⁿ mǐtrú dava ní sáá cuehnu níñí-áⁿ ñí xica-xi.

15

Úsá tñúndòho

1 Te ío vǐhi ní quide-xi ñⁿ sá ñí quide-xi andiù te ní cuñuhu vǐhi-í, te ní xíní-í úsá tñahá espíritú xínú cuèchi núú Yă Ndiôxí, te ñⁿ ñⁿ cue espíritú-áⁿ ndécú ndihì-xi tñuhu ndee ìní dandòho-xi ñáyi ñuyíú, te nà yàha nchaa tñúndòho-áⁿ, te vá cùdéeⁿ-gă Yă Ndiôxí núú-yu dandòho ñaha-gá xii-yu.

2 Te ní xíní-í ñⁿ làmár te ndute làmár-áⁿ cáá dàtná cáá vǐdriú, te dàcánuu-xi ndihì ñuhú, te yuhu làmár-áⁿ xǐnutñí nchaa ñáyi ní ndacu ní dáquéé tǐhú ñàhá xii quitì ní quene xití làmár-áⁿ, te ducaⁿ ñí ndacú-yu ní dáquéé tǐhú-yu sá ñí natava ñàhá-yu nàcuáa càa-di-áⁿ, te ducaⁿ ñí ndacu tucú-yu ní dáquéé tǐhú tucú-yu númerú-di sá cúú dàtná diù-di, te nchaa ñáyi-áⁿ ñí nduu táhú-yu núú Yă Ndiôxí àrpá xǐnehé-yu cuendá caní-yu. 3 Te xǐxitá-yu ndudú sá ñí xita ndí Moisés ndí ní xinu cuechi núú Yă Ndiôxí ndéé sanaha, te xita tucú-yu ndudú Yaá cáá dàtná cáá ñⁿ mbéé quitì ní dánicuéhé-güedé, te càchí-yu:

Yòhó Dútú Ndiôxí ío càhnu cuu-n, chi quide-n nchaa sá vǎ yò tñahí ndacu cada, te cùu-n Yaá ndacú quide nchaandi túhú sá vǎha,

te ío ndáá quidé-n te ío ndáá càháⁿ-n, te yíndaha-n nchaa ñáyiú ñihí ñuyú.

⁴ Te nchaa ñáyiú nèhé-yu sá yíñuhu núú-n, te ncháá-yu càchí-yu sá ío càhnu cuu-n, chi ñⁿdì díí-ni yòhó cúú-n Yáá ío váha quíde ndáá, te nchaa ñáyiú ñihí ñuyú nataká-yu chiñuhu ñàhá-yu xii-n, te ducaⁿ càdá-yu chi ndèhé-yu nchaa sá váha quíde-n.

Duha càchí ñáyiú-áⁿ xítá-yu.

⁵ Te sáta dúcáⁿ te ní xiní-í ní nacaáⁿ yuyèhe vehe Yá Ndiöxí andíu, te xítí vehe-gá-áⁿ ndécú sá ndèé tnúhu-gá. ⁶ Te xítí vehe-gá-áⁿ ñí quee úsá tnàhá espíritú xínú cuèchi núú-gá, te ñⁿ ñⁿ-xi ndècu ndíhi-xi tnúhu ndee ínì dandòho-xi ñáyiú, te xíxíhnu-xi mee-ni dóó váha, te súúní váha càndoo, te chàhchí, te yídúcúⁿnuu cínchú ní cuáha mee-ni díhúⁿ cuááⁿ pèchú ndí úsá cue espíritú-áⁿ. ⁷ Te ñⁿ quítí cúmí xínutñí núú núnñí xilé váha ní sáñaha-dí ñⁿ caa sá nàhá tícuú ní cuáha mee-ni díhúⁿ cuááⁿ xii ñⁿ ñⁿ espíritú-áⁿ, te xítí nchaa tícuú-áⁿ ñúhú ñⁿ sá ñúhú te xíáⁿ cútnúní sá Yá Ndiöxí dandòho-gá ñáyiú ñuyú, te díu-gá cúú-gá Yáá ndécú nchàa nduu nchaa quíú. ⁸ Te xítí vehe-gá-áⁿ ñí chítú ñúhmá, te ducaⁿ ñí quíde-gá cuendá cutnúní ínì ñáyiú sá ío càhnu cuu-gá táxí tnúní-gá, te vá yòo ñⁿ cuu quíhu xítí vehe-gá-áⁿ ndèé ndíhi ndí úsá tnúndòho cada ndí usá cue espíritú-áⁿ ñuyú.

16

Tnúndòho cada-xi ñuyú

¹ Te sáta dúcáⁿ te ní tecú dóho-í níhi ní cáháⁿ ñⁿ sá ñí cáháⁿ xítí vehe Yá Ndiöxí, te xáhaⁿ-xi xii ndí usá cue espíritú-áⁿ:

—Chí cuáháⁿ coyo-ndo sá ñúhú xítí nchaa tícuú néhé-ndó-áⁿ núú ñuyú, chi sá ñúhú-áⁿ cúú-xí tnúndòho tendaha Yá Ndiöxí sá cúú-xí nchàa ñáyiú ñuyú —duha càchí sá càháⁿ-áⁿ.

² Te espíritú díhna ní sáháⁿ-xi ní coyo-xi sá ñúhú xítí tícuú néhé-xí-áⁿ ñuyú, te nchaa ñáyiú ñuhu tnuní quítí ní quene xítí làmár ñáyiú ní chiñuhu sá ñí natava ñàhá-yu

xii-dí, nchaa ñáyiú-áⁿ ñí quené-yu ndíhyi tèhyú te súúní dandòho ñaha-xi xii-yu.

³ Te espíritú cúú ùú ní coyo-xi sá ñúhú xítí tícuú néhé-xí núú làmár, te ndute làmár-áⁿ ñí nduu-xi níñí te càa-xi datná cáá níñí ñáyiú sa ní xíhí, te nchaa quítí ñuhu xítí làmár-áⁿ ñí xíhí-güedi.

⁴ Te espíritú cúú ùní ní coyo-xi sá ñúhú xítí tícuú néhé-xí nchàa yúte ndíhi nchaa núú queníhni ndute, te ndute nchaa yúte-áⁿ ndíhi nchaa ndute queníhni-áⁿ ñí nduu-xi níñí. ⁵ Te sáta dúcáⁿ te ní tecú dóho-í ní cáháⁿ ñⁿ espíritú xínú cuèchi núú Yá Ndiöxí, espíritú yíndaha ndute, te xáhaⁿ-xi xii Yá Ndiöxí:

—Yòhó Dútú Ndiöxí cúú-n Yáá quíde ndáá cuítí núu duha quíde-n tendaha-n tnúndòho-a, te díu-ni-n cùu-n Yáá ndécú ndèé cútnàhá ní ngáva ñuyú, te díu-ni-n cùu-n Yáá ndécú vitna te ñá túú tnàhí cuèchi-n. ⁶ Chi cue ñáyiú ñuyú ñí dácácá-yu níñí nchaa ñáyiú ní cáháⁿ tnúhu-n ndíhi nchaa dava-gá ñáyiú cùu cuendá-n, te ní sahní-yu nchaa ñáyiú-áⁿ, te vitna ní dátíú-n ndute ní nduu-xi níñí te ducaⁿ-ni càa ndute-áⁿ xíhí-yu, te ducaⁿ tàú-xi ndohó-yu cuendá sá ñí sahní-yu cue ñáyiú cùu cuendá-n —duha càchí espíritú-áⁿ xáhaⁿ-xi xii-gá.

⁷ Te ní tecú tucu dóho-í ní cáháⁿ ñⁿ sá ñí cáháⁿ núú núnñí núú sácódó sá ndúú táhú Yá Ndiöxí, te xáhaⁿ-xi xii-gá:

—Ndáá sá yòhó Dútú Ndiöxí Yáá ndácú quíde nchaandi túhú sá váha dandòho-n ñáyiú nàcuáa tàú-xi cunduu —duha càchí sá càháⁿ-áⁿ xáhaⁿ-xi xii-gá.

⁸ Te espíritú cúú cúmí ní coyo-xi sá ñúhú xítí tícuú néhé-xí núú nchíanchii cuendá nchíanchii-áⁿ cahmi-xi nchaa ñáyiú ñuyú.

⁹ Te ncháá-yu ní ndoho víhí-yu ní cáyú-yu, te cuèi ducaⁿ ñí ndohó-yu dico ñá túú ní cuíní-yu ndixi cuèchi ínì-yu cuendá nchaa sá ñà túú váha quíde-yu, te ní ñà túú ní càchí-yu sá ío càhnu cuu Yá Ndiöxí chí da ní cáháⁿ úhú-yu cuendá-gá, te díu-gá cúú-gá Yáá ducaⁿ ñí tendaha tnúndòho-áⁿ sá cúú-xí-yu.

¹⁰ Te espíritú cúú ùhú ní coyo-xi sá ñúhú xítí tícuú néhé-xí núú ndécú quítí ní quene xítí làmár-áⁿ táxí tnúní-dí, te nchaa núú

táxi tnùnì-di ní cuu nee, te nchaa ñáyíu ñuyíú ndéé yàá-ná-yu nàcaxi nihnú-yu sá ndóhō-yu. ¹¹ Dico ni òucaⁿ ñá túú ní cuiní-yu dàñá-yu ni ìⁿ sá cuèhé sá dúhá quidé-yu, chi da ní cáháⁿ úhú-yu cuendá Yá Ndiòxí Yaá ndécú àndiú sá cuendá sá dándòho ñaha ndíhyi tēhyú ndéé-yu-áⁿ ndihi nchaa dava-gá sá yáha-yu.

¹² Te espíritú cúú ìñú ní coyo-xi sá ñúhú xití tícúú néhé-xí xití yúte càhnu nani Eúfratés, te ndute yúte-áⁿ ñí yíchí cuendá yáha cue téé yíndaha ñáyíu xíndecu ndàa xio nacuaa quène nchícanhii.

¹³ Te ní xiní-í ní quee ìⁿ espíritú cündìhi yucu ñávãha yuhu quiti dééⁿ nání drágón, te ní xiní tucu-í ní quee tucu ingá espíritú cündìhi yucu ñávãha yuhu quiti ní quee xití làmár, te ní xiní tucu-í ní quee tucu ingá espíritú cündìhi yucu ñávãha yuhu téé dándahú ñáyíu càchí sá cáháⁿ tnúhu Yá Ndiòxí te ñá ndàá, te ndi nùnì espíritú-áⁿ xíndáa-xi dàtná cáá làhvá. ¹⁴ Te ndi nùnì espíritú-áⁿ quidé-xí sá vã yõo tnáhi ndàcu cada, te xica datacá-xi nchaa cue téé yíndaha ñaha xii ñáyíu xíndecu nihí ñuyíú cuendá nàá-güedé mei ndüu cachí Yá Ndiòxí coo tnúndòho cahnu vihi-gá, te diu mee Yá Ndiòxí cúú-gã Yaá ío càhnu cuu. ¹⁵ Te Yaá cúú Xítohó-ó ñí cachí-gá: “Cunaha-ndo chi nduu ñà túú yìhi iní-ndó quixi-í núú ndécú-ndó, te cada-í dàtná quidé ñadúhú. Te váha táhú nchaa nchòhó ñáyíu xíndecu túha, chi cùu-ndo datná cue ñáyíu xíndecu túha xíxíhnu-ni dóó-xi cuendá sá vã cúcàhaⁿ núú-yu dàtná cúcàhaⁿ núú cue ñáyíu ñá túú nihnu dóó-xi, te duha cáháⁿ-í cuendá sá nchòhó cundecu túha-ndo òré quexì-í”, duha càchí-gá. ¹⁶ Te ndi nùnì cue espíritú cündìhi yucu ñávãha-áⁿ ñí dátàcá-xi nchaa cue téé yíndaha ñaha xii ñáyíu, te ní taxi ndecu ñaha-xi ìⁿ xichi núú nání Armagedón, duha nani xíáⁿ tnúhu hèbreú.

¹⁷ Te espíritú cúú úsá ní coyo-xi sá ñúhú xití tícúú néhé-xí núú tàchí, te ní tecú dóho-í níhi ní cáháⁿ Yaá núcòo núú xilé váha xití vehe-gá, te càchí-gá:

—Xéhé-ñá cúmãní te xínu cava nchaa tnúndòho tnúhu ndàhú —duha càchí-gá.

¹⁸ Te sátá dúcáⁿ te ní sáá nduté te ní cáháⁿ ñúhu, te súúni òusaⁿ ní quide-xi, te níhi vihi ní tnáa ñuyíú, te ndéé cútñahá ní ngúndecu ñáyíu ñuyíú te vátá ìⁿ xito-gá níhi tnáa dàtná ní quide-xi. ¹⁹ Te ñúú cáhnu ío cùnuu nani Babiloniá ní quee dava-xi ní cuu-xi únì xichi, te nchaa ñúú cáá níhi ñuyíú ñí ngoyo nchaa vehe, chi Yá Ndiòxí ní ndacu iní-gá nchaa sá cuèhé sá dúhá quide nchaa ñáyíu ñúú Babiloniá-áⁿ, te ducaⁿ ñí quide ñaha-gã xii-yu chi ío cùdééⁿ-gã núú-yu. ²⁰ Te nchaa tìndúú ñí ndóñúhú-xí cuéi nchaa tìndúú ñuhu yíchí ndécú xití làmár. ²¹ Te ní xiní-í ní cuuⁿ ñíñi nàhnu vihi ní ngaundodo-xi cue ñáyíu ñuyíú, te nchaa ñíñi-áⁿ vëe-xi dàtná údico kílu, te cue ñáyíu ñuyíú ñí cáháⁿ úhú-yu cuendá Yá Ndiòxí sá dúcáⁿ ñí dácúúⁿ-gã ñíñi nàhnu vihi-áⁿ, chi ní cuu-xi ìⁿ tnúndòho cahnu vihi sá cúú-xi-yu.

17

Ñadìhí ndécú ìchi dí ìní

¹ Te núú úsá espíritú néhé tícúú-áⁿ, te ìⁿ-xi ní quixi-xi núú ndécú-í, te càchí-xi xii-í:

—Néhé ná quíhíⁿ-ó dànehé ñáhà-í xii-n nchaa tnúndòho sá ndóhó ñadìhí ñaha ndècu ìchi dí ìní, te ñaha-áⁿ cùnùu-aⁿ nucóo-aⁿ núú ñúhú vihi ndute. ² Te ñaha-áⁿ ndécú dí ìní-aⁿ ndìhi nchaa cue téé yíndaha ñaha xii ñáyíu xíndecu nihí ñuyíú, te nchaa dava-gá ñáyíu ñuyíú ío iní-yu nchícúⁿ nihnú-yu quidé-yu nchaa nàcuáa quide ñaha-áⁿ —duha càchí espíritú-áⁿ.

³ Te òré ducaⁿ quide ñaha Espíritú Yá Ndiòxí xii-í nàcuáa càchí iní-xi, te ìⁿ espíritú xínú cuèchi núú-gã ndécá ñaha-xi xii-í cuháⁿ ìⁿ xití yucu, te xití yucu-áⁿ ñí xiní-í ìⁿ ñadìhí yódó-áⁿ ìⁿ quiti ticuehé, te ndéé úsá díquí-di te úxí ndiqui-di, te nihí-di ndéé tnùnì-di mee-ni tnúhu sá cáháⁿ úhú cuendá Yá Ndiòxí. ⁴ Te ñadìhí-áⁿ níhnú-áⁿ dóó muradú ndìhi dóó tícuehé, te mee-ni sá ñí cuáha díhúⁿ cuááⁿ, ndìhi yúú vãha sá nání pèrlá, ndìhi nchaa dava-gá núú yúú vãha, mee-ni nchaa xíáⁿ ní cuáha sá yíhí lõho-aⁿ, ndìhi sá ñúhú dúcúⁿ-aⁿ, ndìhi sá ñúhú dúcúⁿ ndáhá-áⁿ, te nùndaha-aⁿ ìⁿ tícúú ní cuáha mee-ni díhúⁿ cuááⁿ te ñuhu

mee-ni sá cuèhé sá dúhá, te xíáⁿ cútnùní iní-ó sá cúú-áⁿ ìⁿ ñadìhí ñaha ndècu ichi cuehé ichi duha. ⁵ Te tneé-aⁿ ndèé tnuní ìⁿ tnúhu, te càchí-xi: “Ñuú Babiloniá ñuú ío cùnunu, cada iní-ndó sá cúú-xí mèi ñadìhí-a, te ñuú ñadìhí-a cùu-aⁿ ñaha sanu ichi ñaha xii nchaa ñáyiu ñáyiu ndècu ichi ñáyiu ñáyiu, te nándi-gá nchaa sá cuèhé sá dúhá sànu ichi-aⁿ nchaa ñáyiu cadá-yu”, duha càháⁿ tnúhu ndèé tnuní tneé ñadìhí-áⁿ. Te vá yóo tècú tnuní ná cuèndá ducaⁿ càháⁿ tnúhu-áⁿ. ⁶ Te ní cutnùní iní-í sá díú ñaha-áⁿ ñí dácáca-áⁿ ñíñí ñáyiu cùu cuendá Yá Ndióxi ní sahani ñaha-aⁿ xii-yu, te ñáyiu ní xihí-áⁿ cúú-yu ñáyiu ní cáháⁿ váha cuèndá Xítoho Jesucristú, te sá dúcáⁿ ñí quide-aⁿ te ní nduu-aⁿ dàtná ìⁿ ñáyiu quihu. Te ío ní cuñúhu-í sá dúcáⁿ ñí cuu ní xiní-í. ⁷ Te sáta dúcáⁿ te espíritú xínú cuèchi núú Yá Ndióxi-áⁿ càchí tucu-xi xii-í:

—Vá ndèé dúcáⁿ cuñúhu-n, chi vitna na càchí tnúhu-í xii-n nàcuáa quèe-xi cuendá quití ndèé úsá díquí-xi ndihí úxí ndiqui-xi-áⁿ, ndihí nàcuáa quèe-xi cuendá ñadìhí ñaha yòdo ñaha xii-di-áⁿ. ⁸ Te quití ní xiní-n-áⁿ cúú-dí ìⁿ quití sa ní xíndecu te vitna ñá túú-gã-di ndècu, te sáá nduu te quene-di yaú cùnú víhí sá ío nèhé cáá, te dàtnùní sáá nduu te quíhíⁿ-di núú ùhú núú ndàhú ñi caa ñi quíhíⁿ, te cue ñáyiu xíndecu ñuyú cuñúhu víhí-yu quití-áⁿ chi cùu-di ìⁿ quití sa ní xíndecu ñí cùu te sáá nduu cùndecu tucu-di, te ñáyiu ducaⁿ cuñúhu ñaha xii-di-áⁿ ñá túú yòdo tnuní-yu núú tütú núú yódó tnuní cue ñáyiu naníhí tàhú, chi ndèé cútnàhá vátá ngáva-gá ñuyú ducaⁿ sa yòdo tnuní cue ñáyiu naníhí tàhú.

⁹ Te nchaa ñáyiu tècú tnuní xini ñuhu-xi caní váha iní-yu cuèndá tnúhu-a. Te ndi úsá díquí quití-áⁿ cada iní-ó sá cúú-xí úsá tìndúú núú núcõo ñadìhí-áⁿ. ¹⁰ Te ndi úsá díquí quití-áⁿ cada iní-ó sá cúú-xí úsá tnàhá cue téé yíndaha ñaha xii ñáyiu, te úhúⁿ cue téé-áⁿ ñá túú-gã cùnùu-güedé vitna, te ìⁿ téé-áⁿ cùnùu-dé vitna te ingá-dé vátá sáá-gá nduu cùnùu-dé, te na sáá nduu dùcaⁿ cunuu-dé te sacú-ñi nduu cunuu-dé. ¹¹ Te quití ní xíndecu ñí cùu te ñá túú-gã-di ndècu vitna, cùu-di datná téé cùu uná yíndaha

ñaha xii ñáyiu, te ìⁿ-ni cùu-di ndihí cue téé úsá yíndaha ñáyiu-áⁿ, te quití-áⁿ sáá nduu cuíta nihnu-di quíhíⁿ-di núú ùhú núú ndàhú ñi caa ñi quíhíⁿ.

¹² Te ndi úxí ndiqui quití-áⁿ cada iní-n sá cúú-xí úxí tnàhá cue téé quíndaha ñaha xii ñáyiu, dico vátá sáá-gá nduu cùnùu-güedé quíndaha ñaha-güedé xii-yu. Te cue téé-áⁿ ñíhí-güedé tnúhu ndee ñí taxi tnuní-güedé ndihí quití-áⁿ, dico tnaa-ñi taxi tnuní-güedé ndihí quití-áⁿ. ¹³ Te ndi úxí cue téé-áⁿ cuu ìⁿnuu-güedé taxi tnuní-güedé, te chindee-güedé quití-áⁿ cuèndá cuu ìⁿnuu-güedé ndihí-di cuèndá taxi tnuní-gá-di. ¹⁴ Te cue téé-áⁿ nàá-güedé ndihí Yaá cáá dàtná cáá ìⁿ mbéé quití ní dánícuèhé-güedé dico vá ndácú-güedé nàá-güedé ndihí-gá chi cuíta-güedé. Te ñuú-gá cúú-gã Yaá ío cùnunu taxi tnuní cuèi nchaa téé yíndaha ñaha xii ñáyiu, te ducaⁿ-ni tàxi tnuní-gá cuèi nchaa dava-gá-yu. Te mee Yá Ndióxi ní cachí-gá nándi cùu nchaa ñáyiu cundecu ndihí Yaá cáá dàtná cáá ìⁿ mbéé quití ní dánícuèhé-güedé-áⁿ, te ñuú-ñi ñáyiu-áⁿ cúú-yu ñáyiu ní cáháⁿ-gá te cùu-yu ñáyiu quide ndáá ndécú ichi-gá —duha càchí espíritú xínú cuèchi núú-gã.

¹⁵ Te ní cachí tucu espíritú-áⁿ xii-í:

—Ndute ñuhu núú núcõo ñadìhí ñaha ndècu ichi díí iní-áⁿ, ndute-áⁿ cada iní-n sá cúú-xí ñáyiu nchaa nacióⁿ, ndihí ñáyiu nchaa ñuú, ndihí ñáyiu xíndecu nchaa xichi, ndihí ñáyiu càháⁿ ndí dííⁿ ndí dííⁿ núú tnúhu. ¹⁶ Te dàtná ní cachí-í sá ndi úxí ndiqui quití ní xiní-n-áⁿ cúú-xí úxí tnàhá cue téé quíndaha ñaha xii ñáyiu, te cue téé-áⁿ cuu úhú iní-güedé ñadìhí ñaha ndècu ichi díí iní-áⁿ, te ñí vã cáda cuèndá ñáhá-gã-güedé xii-aⁿ, te ndada ndàhú ñáhá-güedé, te dacàchi ñaha-güedé xii-aⁿ, te cahmi ñaha-güedé. ¹⁷ Te mee Yá Ndióxi ducaⁿ dàcaháⁿ-gá iní cue téé-áⁿ cuèndá cada-güedé nàcuáa cuíni méé-gã, te xíáⁿ núu cuu ìⁿnuu-güedé cuèndá cuñaha-güedé xii quití-áⁿ cada-di núú-güedé taxi tnuní-di, te ducaⁿ-ni càda-di núú-güedé taxi tnuní-di ndèé ná sáá nduu càda Yá Ndióxi nàcuáa ní cachí-gá. ¹⁸ Te ñadìhí ñaha ní xiní-n-áⁿ

cada iní-n sǎ cúú-áⁿ ñùú cáhnú ñùú ío cùnuu, te ñuú-áⁿ ndécú tée ío-gá cùnuu taxi tnuní nchaa cue tée yíndaha ñaha xii ñáyíu xíndecu ñuyíú —duha ní cachí espíritú xínú cuèchi núú Yǎ Ndiǒxí xii-í.

18

Ní naa ñuú Babiloniá

¹ Te ducaⁿ te dàtnúní ní xíní tucu-í ingá espíritú xínú cuèchi núú Yǎ Ndiǒxí, te ndéé andíu nì dátǎsaⁿ-xi te ní dáyyèhé-xi ñuyíú, te espíritú-áⁿ ío cùnuu-xi. ² Te níhi ní cáháⁿ-xi, te cǎchí-xi:

—Ní sǎá nduu nàa ñuú cáhnú ñùú cùnuu nani Babiloniá, te xíaⁿ-nǎ nataká nchaa núú espíritú cùndíhi yucu ñávǎha cundecu-xi, te vá quée-gǎ-xi xíaⁿ, te ðíu-ni xíaⁿ nataká nchaa quití ndàva núú tàchí nchaa quití ndehe quíde, quití ñá túú tnàhá iní ñáyíu te xíaⁿ-nǎ cundecu-güedi. ³ Te ducaⁿ chi ñáyíu ñuú-áⁿ sánú ìchí-yu nchaa ñáyíu ñíhí ñuyíú ichi cuèhé ichi duha, te ducaⁿ-ni xínchícúⁿ nihnu nchaa ñáyíu ñuyíú xíquidé-yu, te nchaa cue tée cùnuu yíndaha ñaha xii ñáyíu, cue tée-áⁿ cúú ñnuu-güedé ndíhi nchaa ñáyíu ñuú-áⁿ quíde-güedé ndíhi-yu nándi sǎ cuèhé sǎ dúhá. Te nchaa ñáyíu ðico nándi sǎ dícó quèheⁿ ñáyíu ñuú-áⁿ ío cùu cuicá-yu, te ducaⁿ quèheⁿ nchaa ñáyíu ñuú Babiloniá-áⁿ nchaa sǎ dícó ñáyíu-áⁿ cuendá xíǎⁿ cǎnehé-yu ndécú-yu ichi cuèhé ichi duha —duha cǎchí espíritú-áⁿ.

⁴ Te sǎtá dúcáⁿ te ní tecú dóho-í ní cáháⁿ ñⁿ sǎ ní cáháⁿ andíu, te cǎchí-xi:

—Nchaa nchòhó ñáyíu cùu cuendá-í quee-ndo ñùú Babiloniá cuendá sǎ vǎ cùndècu-ndo tnahá-ndó ìchí cuehé ichi duha dàtná ndécú ñáyíu ñuú-áⁿ, te ducaⁿ te vá quíní-ndó tnúndòho tnúhu ndàhú sǎ quíxí cùu xii ñáyíu-áⁿ. ⁵ Chi ío cuèhé cuèchi-yu ní cuu ndècu núú Yǎ Ndiǒxí, te mee-gǎ nǎhá-gǎ nàcuáa ndùu nchaa sǎ quíde-yu. ⁶ Te nchòhó ñáyíu cùu cuendá-í, chí nánchòcáva dandòho-ndo ñáyíu-áⁿ dàtná quíde mèe-yu dándohó-yu cue ñáyíu, te úú xito nanchòcáva-ndo dándohó-ndó-yu, te ducaⁿ càda-ndo cuendá ío-gá ndohó-yu. ⁷ Te ío quíde cahnú-yu mèe-yu, te ío cùdí iní-yu quíde-yu nchaa núú sǎ cuèhé sǎ dúhá, te sǎ dúcáⁿ xidó-yu

quíde-yu nchaa sǎ cuèhé sǎ dúhá ñùu xíǎⁿ nchòhó ío dandòho-ndó-yu, te ducaⁿ chi ñáyíu ñuú-áⁿ sání iní-yu, te cǎchí-yu: “Nchúhú cúú-ndí dàtná ñⁿ ñadíhí ñá túú quée, ñaha ío cùnuu yíndaha ñaha xii ñáyíu. Te ducaⁿ sǎtnahá-xi cùu-ndí chi nchaa-ni nduu ío váha cùu iní-ndí ndécú-ndí, te ní vǎ sǎá ñⁿ nduu te ndíhú iní-ndí”, duha cǎchí ñáyíu ñuú-áⁿ. ⁸ Te sǎ cuendá nchaa sǎ quíde-yu-áⁿ ñùu xíǎⁿ ñⁿ-ni ndùu sǎá tnúndòho sǎ cúú-xí-yu, te ío ndohó-yu chi ñuú-yu coo tnamá, te coo cuèhé cahni ñaha-xi xii-yu, te ío ndíhú iní-yu, te cǎyú ñuú-yu, te ducaⁿ ndòhó-yu chi Dútú Ndiǒxí ío cùnuu-gá, te ðíu-gá ducaⁿ dándohó ñaha-gá xii-yu —duha cǎchí sǎ ní cáháⁿ àndíu-áⁿ.

⁹ Te nchaa cue tée cùnuu yíndaha ñaha xii ñáyíu ío ndáhyú-güedé sǎ ndíhú iní-güedé òré ná quíní-güedé quene ñúhmá cǎyú ñuú cue ñáyíu Babiloniá, chi ðíu cue tée-áⁿ cúú-güedé cue tée cùu ñⁿnuu ndíhí-yu quíde-güedé nchaa núú sǎ cuèhé sǎ dúhá ndíhí-yu, te ducaⁿ chi ío tnàhá iní-güedé cundecu-güedé ndíhí-yu ichi díí iní. ¹⁰ Te cue tée-áⁿ xica-nǎ cundecu-güedé cundehe-güedé nàcuáa ndohó nchaa ñáyíu ñuú-áⁿ sǎ yùhú-güedé nchaa tnúndòho-áⁿ, te cǎchí-güedé:

—¡Ndàhú nchòhó ñáyíu ñuú cáhnú ñùú cùnuu nani Babiloniá! Chi uuⁿni ní sǎá nchaa tnúndòho tnúhu ndàhú sǎ cúú-xí-ndó —duha cǎchí-güedé.

¹¹ Te nchaa ñáyíu ðico nchaa sǎ nándíhi ñáyíu ñuú Babiloniá tnàhá-yu ío ndáhyú-yu sǎ ndíhú iní-yu chi vá yòo-gá cuaaⁿ nchaa sǎ dícó-yu. ¹² Te ðicó-yu nchaa sǎ ní cuáha mee-ni díhúⁿ cuàáⁿ, ndíhi nchaa sǎ ní cuáha mee-ni díhúⁿ cuixíⁿ, te ðico tucú-yu sǎ ní cuáha mee-ni yùú vǎha yúú nání pèrlá, ndíhi nchaa dava-gá sǎ ní cuáha dava-gá yúú vǎha, te ðicó-yu tnàhá dóó sèdá, ndíhi ingá núú dóó vǎha sǎ nání línú, ndíhi dóó muràdú, ndíhi dóó tícuèhé te mee-ni dóó vǎha cùu-xi, te ðico tucú-yu tnàhá yutnu sǎ sàháⁿ tnámí, te ðico tucú-yu sǎ ní cuáha sǎ nání màrfíl, te ðico tucú-yu sǎ ní cuáha mee-ni yùtnu váha sǎ ío ndèyáhu, te ðico tucú-yu sǎ ní cuáha mee-ni càá, ndíhi sǎ ní cuáha mee-ni sǎ nání bròncé, ndíhi sǎ ní

cuáha mee-ni yúú vâha yúú nání mǎrmól.
 13 Te dìco tucú-yu canelá, ndihí yúú sǎ sàháⁿ tnámí, ndihí dúsa sá sàháⁿ tnámí, ndihí yúú sǎ nání mirrá, te dìco tucú-yu ingá núú dúsa sá sàháⁿ tnámí nàni olivánú, te dìco tucú-yu ndudí ndéhé yoho yàha stilé, ndihí acítí yutnu nàni olívú, ndihí yuchi triú váha, te dìco tucú-yu nchaa dava-gá núú triú, te dicó-yu tnàhá mbéé, ndihí cuàyú, ndihí nchaa dava-gá quití tatá, te dìco tucú-yu tnàhá carrétá, te dìco tucú-yu tnàhá ñáyiú xínu cuechi, ñáyiú ñá túú tnàhí dàñá quee núú chíúⁿ pàtróóⁿ-xi. 14 Te nchaa ñáyiú dìco-áⁿ cǔñàhá-yu xii ñáyiú ñuú Babiloniá:

—¡Nchaa sá ïo cùdíí ìní-ndó cùndecu ndihí-ndo ni cuu vá ndácú-gǎ-ndó ñihí-ndó vitna, te nchaa sá sání ìní-ndó sǎ ïo váha càa ndecu ndihí-ndo ndihí nchaa dava-gá sá ndécú ndihí-ndo ní ndihí nihnu-xi vitna, te ni ìⁿ nduu-gá vá ñihí-ndó ni ìⁿ xíǎⁿ cundecu ndihí-ndo! —duha cúñaha ñáyiú-áⁿ xii-yu.

15 Te nchaa ñáyiú ní cuu cuica ñí xóo dico nándi nchaa sá ñí xóo dico ñí queheⁿ cue ñáyiú ñuú Babiloniá, nchaa ñáyiú-áⁿ xica-nǎ cundecú-yu cundéhé-yu sá yùhú-yu cuèndá nchaa tnúndòho sá yàha cue ñáyiú ñuú-áⁿ, te ïo ndáhyú-yu sá ndihú ìní-yu sá dúcáⁿ ndòho ñáyiú-áⁿ. 16 Te cúñaha tucú-yu:

—¡Ndàhú nchòhó ñáyiú xǐndecu ñuú cáhnú ñuú nání Babiloniá! Chi nchòhó cúú-ndó dàtná ìⁿ ñadìhí ñaha nihnu dóo vâha dóo murádú, ndihí dóo tícuèhé, te mee-ni sǎ ñí cuáha díhúⁿ cuàáⁿ, ndihí mee-ni sǎ ñí cuáha yúú vâha yúú nání pèrlá, ndihí sá ñí cuáha dava-gá yúú vâha sá ïo vii ndǎa mee-ni nchaa xíǎⁿ ní cuáha sá yíhí lõho-aⁿ, ndihí sá ñúhú dúcúⁿ-aⁿ, ndihí sá ñúhú dúcúⁿ ndáhá-áⁿ. 17 ¡Te uuⁿni ní ndihí nihnu nchaandi túhú sá ndécú ndihí ñadìhí-áⁿ, te ducaⁿ sǎtnahá-xi cùu nchòhó ní cùu! —duha cúñaha-yu xii cue ñáyiú ñuú Babiloniá.

Te nchaa cue téé dàcaca barcú ndihí nchaa cue téé tàxi tnuní bàrcú-áⁿ, ndihí nchaa ñáyiú ñuhu xití bàrcú-áⁿ, ndihí nchaa dava-gá cue téé nándi chìuⁿ quide ndecu lamár, nchaa ñáyiú-áⁿ xica cùndecú-yu 18 te quiní-yu òré queene ñúhmá cǎyú ñuú

cue ñáyiú Babiloniá, te níhi cáháⁿ-yu, te cachí-yu:

—Ni ìⁿ ñuú ñá túú nǔtnahá-xi ñuú Babiloniá —duha cáháⁿ-yu.

19 Te nchaa ñáyiú-áⁿ chidó-yu ñuhu díquí-yu, te ngüíta-yu ndáhí-yu sá ndihú ìní-yu, te níhi cáháⁿ-yu, te cachí tucú-yu:

—¡Ndàhú nchòhó ñáyiú xǐndecu ñuú cáhnú ñuú nání Babiloniá! Chi ïo cuica-ndo ni cùu, te diu-ndo ñí quide ní cuu cuica nchaa ñáyiú ndècu ndihí barcú, te vitna uuⁿni ní naa-ndo ndihí ñuú-ndó —duha cachí-yu.

20 Te nchaa nchòhó ñáyiú ndècu andiú ïo chí cùdíí ìní sá dúcáⁿ dàndoho Yá Ndiòxí nchaa ñáyiú ñuú Babiloniá-áⁿ, te diu-ni ducaⁿ chí cùdíí ìní nchaa nchòhó cue téé ní cachí Xítóhó Jesucristú cáháⁿ tnúhu-gá, te diu-ni ducaⁿ chí cùdíí ìní nchaa nchòhó cue téé cáháⁿ tnúhu Yá Ndiòxí nàcuáa dàcahu ìní ñáhá-gǎ xii-ndo, te diu-ni ducaⁿ chí cùdíí ìní nchaa dava-gá nchòhó ñáyiú cùu cuendá-gá cuendá sá dúcáⁿ dàndoho-gá nchaa ñáyiú ñuú-áⁿ. Te ducaⁿ càda ñaha-gá xii cue ñáyiú-áⁿ cuèndá nchaa sá quidé ñàhá-yu xii-ndo.

21 Te sáta dúcáⁿ te ní xiní-í ìⁿ espíritú xínú cuèchi núú Yá Ndiòxí, te espíritú-áⁿ ïo ndee-xi te ní queheⁿ-xi ìⁿ yúú cáhnú dàtná càhnu yódó te ní dáquèe-xi xití ndute lamár, te càchí-xi:

—Dàtná ní quide-í ní dáquèe-í yúú xití ndute ducaⁿ càda-xi ñuú cáhnú ñuú Babiloniá, chí ñáyiú ñuú-áⁿ ïo ndihí naá-yu ndihí ñuú-yu, te vá ìⁿ ndùu ìⁿ quíú-gǎ quiní ñáhá ñáyiú xii-yu. 22 Te ni ìⁿ-gá ñáyiú càni arpá, te ni ìⁿ-gá ñáyiú tiú vilu, te ni ìⁿ-gá ñáyiú tiú cútú, te ni ìⁿ-gá yaá vá cóo ñuú-áⁿ, te ni ìⁿ-gá cue ñáyiú xíní cada ìⁿ núú chìuⁿ vá cóo-gǎ, te ni vá yòo-gá canehe chìuⁿ yúú cúú yódó mulínú. 23 Te ni ìⁿ-gá ñuhú vá cùndècu ñuú-áⁿ, te ni ìⁿ nduu-gá vá cóo víco tnándaha, te ñáyiú ñuú-áⁿ ñáyiú quide ndáhú cúú-yu ñáyiú ïo-gá cuicá-yu dàcúxí ñáyiú quide ndáhú xǐndecu ñihí ñuyíú, dico ncháá-yu naá-yu chí quide nduú-yu te ïo dàndahú-yu cue ñáyiú ñuyíú sǎ dúcáⁿ quidé-yu.

24 Te diu-ni ñuú-áⁿ ñí dácáçá-yu ñíí cue téé ní cáháⁿ tnúhu Yá Ndiòxí, te diu-ni ducaⁿ

nǐ quidé-yu nchaa dava-gá cue ñáyiú cùu cuendá-gá, te ñu-ní-yu quide xísahni tnàha ñáyiú ñuyíú —duha càchí espíritú-án.

19

¹ Te sátá dúcáⁿ te ní tecú dóho-í níhi ní cáháⁿ cuéhé víhí ñáyiú andiú, te càchí-yu:

¡Ío càhnu cuu Yá Ndiöxí!, chi ñu-gá cúú-gã Yaá ní dácäcu nihnu ñaha xì-o núú ùhú núú ndàhú, te ío cùnuu-gá, te mee-ni sã vãha quide-gá,

² te mee-gã ío váha ndáá quidé-gã quidé ndáá-gá cuéchi nchaa ñáyiú,

chi ñu-gá ní dáquihíⁿ-gá ñadihí ñaha ndècu ichi díí iní núú ùhú núú ndàhú, chi ñu-aⁿ ní sanu ichi-aⁿ ñáyiú ñuyíú ichi cuéhé ichi duha,

te ducaⁿ nǐ dáquihíⁿ ñáhá-gã xii-aⁿ núú ùhú núú ndàhú chi nàchinaa-gá sá nǐ sahani-aⁿ cue ñáyiú ní xinu cuechi núú-gã.

Duha càchí-yu.

³ Te càchí tucú-yu:

—¡Ío càhnu cuu Yá Ndiöxí!, chi nchaa nduu nchaa quíú ducaⁿ-ni quène ñúhmá núú ñúhú ñaha-án càyú-aⁿ —duha càchí-yu.

⁴ Te ndi òcò cúmí cue téé cùu sacuéhé xĩndecu-án nǐ ngüñí xítí-güedé núú Yá Ndiöxí núú núcòo-gá táxí tnùnigá, te tnàhá cue quiti cúmí xĩnutnǐ-án nǐ ngüñí xítí-güedé núú-gã, te cue téé-án càchí-güedé ndihí cue quiti-án:

—Sá ndáá sá ío càhnu cuu Yá Ndiöxí — duha càchí-güedé ndihí cue quiti-án.

⁵ Te sátá dúcáⁿ te ní tecú dóho-í ní cáháⁿ ñⁿ sá nǐ cáháⁿ mei núú núnñi xilé váha núcóo Yá Ndiöxí, te càchí sá càháⁿ-án:

Nchaa nchòhó ñáyiú xinu cuechi núú Yá Ndiöxí, ñu-ni nchòhó ñáyiú nèhe sá yĩñuhu núú-gã,

cáháⁿ-ndó sã ío càhnu cuu-gá cuéi cùnuu-ndo àdi ñá túú cùnuu-ndo.

Duha càchí sá càháⁿ-án.

Íⁿ vico cùu datná vico tnãndaha

⁶ Te sátá dúcáⁿ te ní tecú dóho-í ní cáháⁿ cuéhé víhí ñáyiú andiú, te òré ducaⁿ nǐ cáháⁿ-yu te ní quide-xi dàtná quidé-xi núú xícá cuéhé víhí ndüte, te ní quide tucu-xi dàtná quidé-xi òré càháⁿ níhi vñi ñúhu, te càchí-yu:

¡Ío càhnu cuu Dútú Ndiöxí Yaá cúú Tãtã-ó! Te ío cùnuu-gá táxí tnùnigá, te quide-gá nchaandi túhú sã vãha.

⁷ Te ío chí ná cùdíí iní-ó, te chí ná càchí-ó sã ío càhnu cuu Yá Ndiöxí,

chi vitna ní sáá nduu càda Yaá cáá dàtná cáá ñⁿ mbéé quiti ní dánicuéhé-güedé ñⁿ vico, te cùu-xi datná vico tnãndaha.

Te nchaa ñáyiú cùu cuendá-gá sa ní ndihí-yu sa ndècu túha-yu cundecú-yu vico-án, te cada iní-ó sã ñáyiú-án cúú-yu dàtná ñⁿ ñadihí xíchí tnãndaha ndihí-gá,

⁸ te ñáyiú-án nǐ nduu táhú-yu cuihnú-yu dóó vãha dóó chàhchí sá ío váha càndoo.

Duha càchí-yu.

Te sá dúcáⁿ nǐ nduu táhú ñáyiú cùu cuendá Yá Ndiöxí dóó vãha ñihnú-yu, xĩⁿ cútnùnigá iní-ó sã cúú-yu ñáyiú quide ndáá núú-gã.

⁹ Te ñⁿ espíritú xínú cuéchi núú Yá Ndiöxí ní cachí tnúhu-xi xii-í, te càchí-xi:

—Chido tnùnigá ñⁿ núú tütú nàcuáa na càháⁿ-í-a: “Vãha táhú nchaa ñáyiú ní cáháⁿ ñáhá Yá cáá dàtná cáá ñⁿ mbéé quiti ní dánicuéhé-güedé cundecú-yu vico, te vico-án cúú-xi dàtná vico tnãndaha cada-gá”, te duha chido tnùnigá chi tnúhu-a cùu-xi tnúhu ndáá tnúhu Yá Ndiöxí —duha càchí espíritú-án.

¹⁰ Te ní ngüñí xítí-í núú espíritú-án cuendá chiñuhu-í-xi ni cùu, te ní cachí-xi:

—Vá dúcáⁿ càda-n, chi tnàhá-í dícò xínú cuéchi-í núú Yá Ndiöxí dàtná quidé-n xinu cuechi-n núú-gã ndihí nchaa dava-gá ñáyiú ndècu ndihí-n ichi-gá, ñáyiú nchicúⁿ nihnu quide ni yuhu ni iní nchaa nàcuáa càháⁿ Xítóhó Jesucristú, te núu xĩⁿ càchí-í sá vã dúcáⁿ càda-n, chi mee Yá Ndiöxí chiñuhu-n —duha càchí espíritú-án.

Te nchaa cue téé càháⁿ tnúhu Yá Ndiöxí càháⁿ-güedé nàcuáa nduu tnúhu càháⁿ Xítóhó Jesucristú.

Cuendá Yaá yódó ñⁿ cuayú cuixíⁿ

¹¹ Te ní xiní-í nchii andiú, te ní xiní-í ní quee ñⁿ Yaá yódó-gã ñⁿ cuayú cuixíⁿ. Te Yaá-án nánigã Yaá quidé ndáá cuiti, duha nani-gá. Te quide-gá nchaa sá càháⁿ-gá, te ío váha quide ndáá-gá cuéchi nchaa ñáyiú, te nchaa ñáyiú nàá ndihí ñaha xì-gá ío váha

xiní-gá nàcuáa cada ñaha-gã xii-yu chi ío ndáá quidé-gã. ¹² Te tinúu-gá dáyèhé-xi dàtná dáyèhé ñuhú, te titní coróná ñuhú dǐquí-gã, te nèhe-gá ìⁿ sá ndèè diu-gá, te vá yǒo ìⁿ cùtnuní iní-xi nása cuáháⁿ tnúhu-áⁿ, chi ìⁿdìi díi-ni mee-gã náhá-gã nàcuáa càháⁿ-xi. ¹³ Te Yaá-áⁿ níhnú-gã ìⁿ dóo nǐ cuu mee-ni nǐñí, te Yaá-áⁿ càchí tnúhu-gá nchaa nàcuáa sàni iní Yã Ndiòxí, núu xiáⁿ nání-gã Tnúhu Yá Ndiòxí. ¹⁴ Te sátá-gã nchìcúⁿ nchaa espíritú xínú cuèchi núú Yã Ndiòxí, te cue espíritú-áⁿ cúu-xí dàtná sandadú, te xǐxǐhnu-xi dóo cuìxíⁿ dóo vǎha sá càndòo, te xǐxódó-xi cuàyú cuìxíⁿ. ¹⁵ Te yuhu Yaá yódónùu-áⁿ quéné ìⁿ yuchí càhnú, te ndihì yuchí-áⁿ dànicuèhé-gã nchaa ñáyíu xǐndecu ñuyíú, te ío dandòho ñaha-gã xii-yu, te dàtná quidé tée quìhni ndéhé yoho yàha stilé ducaⁿ sǎtnahá-xi cada ñaha-gã xii-yu, chi ío dandòho ñaha-gã xii-yu cuèndá sá ío cùdééⁿ-gã. Te mee-gã ío cùnùu-gá táxí tnùnì-gá, te quíde-gã nchaandi túhú sá vǎha. ¹⁶ Te sátá dóo níhnú Yáá-áⁿ ndihì núú tìcácaⁿ-gã yódó tnùnì nàcuáa nàni-gá, te duha càháⁿ-xi: “Tée ío cùnùu taxi tnunì ñáhá xii nchaa cue tée yǐndaha ñaha xii ñáyíu ndihì nchaa dava-gã ñáyíu”, duha ndèè tnunì sátá dǒó-gã-áⁿ ndihì tìcácaⁿ-gã-áⁿ.

¹⁷ Te dàtnùnì ní xiní-í ìⁿ espíritú xínú cuèchi núú Yã Ndiòxí nùtnǐ-xi núú nchìcanchii, te níhi ní càháⁿ-xi, te xǎhaⁿ-xi xii nchaa quiti ndava núú tàchí:

—Nchaa nchòhó quiti ndàva, chí táquixi chí caxi-ndo nchàa sá nǐ quíde túha Yá Ndiòxí, ¹⁸ chí caxi-ndo cùñú nchaa cue tée yǐndaha ñaha xii ñáyíu, ndihì cuñú nchaa cue tée tàxi tnunì ñáhá xii cue sandadú, ndihì cuñú nchaa cue tée ío ñí xǐndáa, ndihì cuñú nchaa cuàyú, ndihì cuñú nchaa cue tée ní xódó ñaha xii-güedi, ndihì cuñú nchaa dava-gã ñáyíu, ñáyíu ñá túú tnàhí ni dàñá quee núú chíúⁿ pàtróóⁿ-xi, ndihì cuñú nchaa ñáyíu ní dàñá nǐ quee núú chíúⁿ pàtróóⁿ-xi, ndihì cuñú nchaa ñáyíu cùnùu, ndihì cuñú nchaa ñáyíu ñá túú cùnùu, te nchaa cuñú-áⁿ caxi-ndo —càchí espíritú-áⁿ xǎhaⁿ-xi xii nchaa quiti-áⁿ.

¹⁹ Te sátá dúcáⁿ te ní xiní tucu-í quiti

ní quene xití làmár, ndihì nchaa cue tée yǐndaha ñaha xii ñáyíu, ndihì nchaa cue tée cùu sandadú-güedé ní naníhí tnáhá-güedé ndihì quiti-áⁿ cuèndá cuu ìⁿnuu-güedé ndihì-di nàá-güedé ndihì Yaá yódó cuàyú-áⁿ, ndihì nchaa cue espíritú cúu sàndadú ndihì-gá. ²⁰ Te cue espíritú cúu sàndadú ndihì Yaá-áⁿ nǐ tnǐ-xi quiti-áⁿ, ndihì tée ío dandahú ñáhá xii ñáyíu càchí sá càháⁿ tnúhu Yá Ndiòxí te ñá ndáa sá càháⁿ-dé tnúhu-gá, te diu-ni tée-áⁿ nǐ quíde-dé titní núú sá vǎ yǒo tnàhí ndàcu cada núú quiti-áⁿ. Te sá dúcáⁿ nǐ quíde tée-áⁿ xiáⁿ ní dándahú-dé ñáyíu ní sàndáa iní-yu ní quée-yu tnunì quiti-áⁿ, te ní chiñùhú-yu sá nǐ dándacú ñáhá-yu xii-di, te cue espíritú-áⁿ nǐ dáquée-xi quiti-áⁿ núú ñuhú núú ñuhú àzúfré càyú-xi, ndihì tée ducaⁿ dandahú ñáhá xii ñáyíu-áⁿ, te xiáⁿ cuhuⁿ tée-áⁿ ndihì quiti-áⁿ, te ío ndoho-dé ndihì-di. ²¹ Te ndihì yuchí càhnú sǎ quéné yùhu Yaá yódó cuàyú-áⁿ nǐ sahani-gã nchaa dava-gã cue tée cùndihì quiti-áⁿ, te nchaa cue quiti ndàva ní chítú xití-güedi ní xexi-güedi cuñú nchaa cue tée-áⁿ.

20

Úxí cièndú cuíá

¹ Te sátá dúcáⁿ te ní xiní-í ìⁿ espíritú xínú cuèchi núú Yã Ndiòxí ní quee-xi andíu, te nùndaha-xi ndacaá nacaáⁿ-xi yèhe ìⁿ yaú cùnú víhí núú cùndècu sácuíhná, te nùndaha tucu-xi ìⁿ cadená càhnú. ² Te espíritú-áⁿ nǐ tnǐ-xi quiti dééⁿ nání dragón, te diu-ni quiti-áⁿ cúu-dí mèi yucu ñávǎha sá nání sácuíhná, te diu xiáⁿ ní nduu-xi cóo ndèé sanaha. Te espíritú-áⁿ nǐ dácútú ñaha-xi xii-di, te ducaⁿ-ni cùndutu-di ndéé xínu úxí cièndú cuíá. ³ Te sátá nǐ dácútú ñaha espíritú-áⁿ xii-di te ní dáquée ñaha-xi xii-di yaú-áⁿ chí diu yaú-áⁿ tàú-di quée-di cundecu-di. Te ní nacadí-xi yuyèhe yaú-áⁿ, te ní tee-xi sèyú yuyèhe-áⁿ cuèndá sá vǎ quéné-gã-di dandahú-di cue ñáyíu ñuyíú, te xiáⁿ cundedí nihnu-di ndéé xínu úxí cièndú cuíá. Te sátá ná yǎha úxí cièndú cuíá-áⁿ te nandaxí-di te quene-di yaú núú ñuhú-dí-áⁿ caca cuu tnaa-di ìⁿ úú nduu.

⁴ Te dàtnùnì ní xiní-í xǐnutnǐ titní xilé vǎha, te xiáⁿ xǐnucóo nchaa ñáyíu ní

ngúndecu ndihi tnúhu ndee ìní cada ndáá cuéchi nchaa ñáyiú, te ní xiní-í xíndecu tnàhá cue ñáyiú ní xehndé-güedé dúcú-xi cuendá sá ñí cáháⁿ-yu tnúhu Yá Ndiöxí, ndihi cuendá sá ñí cáháⁿ váha-yu cuendá Xítohó Jesucristú. Te diu-ni ñáyiú-áⁿ cúú-yu ñáyiú ñá túú ní chihñuhú-yu quiti ní quene xití làmár-áⁿ, te ni ñà túú ní chihñuhú-yu sá ñí dándácú ñáyiú ní natava ñàhá-yu xii-di, te ni ñà túú ní dañá-yu mèe-yu quée-yu tnuní quiti-áⁿ chi ni tnée-yu te ni ndàhá-yu ñá túú ní dañá-yu quée tnuní-di. Te ní xiní-í ní ndoto cue ñáyiú-áⁿ cuendá tnàhá-yu cunúú-yu taxi tnùní-yu ndihi Xítohó Jesucristú úxí ciendú cuía. ⁵ Te dava ñáyiú ní xihí ñá túú ní ndòtó-yu, chi ndée yáha úxí ciendú cuía te dàtnùní ndotó-yu. Te ñáyiú ní xiní-í ní ndoto-áⁿ cúú-yu ñáyiú ní ndoto díhna nuu. ⁶ Te ío váha ní tnahá nchaa ñáyiú ní nduu tãhú ñí ndoto díhna nuu!, chi cue ñáyiú-áⁿ ío cùdiú-yu núú Yá Ndiöxí, te nchaa ñáyiú-áⁿ vã quihíⁿ-yu núú ùhú núú ndàhú, te ñáyiú-áⁿ cúú-yu dútú ndécú-yu núú Yá Ndiöxí ndihi núú Xítohó Jesucristú, te ñáyiú-áⁿ cúnúú-yu dàtná cúnúú Xítohó Jesucristú, te cunuu ndihi ñàhá-yu xii-gá úxí ciendú cuía.

⁷ Te sátá ná yãha úxí ciendú cuía-ãⁿ te sácúíhná quee-xi núú yíndedí nihnu-xi-áⁿ, ⁸ te ngúíta tucu-xi dandàhú-xi nchaa ñáyiú xíndecu nihí ñuyúú, te cuèi ñáyiú ñuú Gög, te cuèi ñáyiú ñuú Màgóg ducaⁿ quihíⁿ-xi dandàhú ñàhá-xí xii-yu, te datàcá-xi nchaa ñáyiú cuendá nàá-yu, te cuéhé víhí-yu dàtná cuéhé ñuhu cúchí làmár. ⁹ Te nchaa ñáyiú-áⁿ tñí-yu ichi quihíⁿ-yu ñí ichi sá cuàháⁿ núú cáá ñí yodo cahnu vihi, te sáá-yu núú xíndecu ñáyiú cùu cuendá Yá Ndiöxí, te ñáyiú-áⁿ chidòcò-yu cue ñáyiú cùu cuendá-gá-áⁿ ndihi ñuú-yu, te ñuú-áⁿ ío cùu iní-gá, dico mee Yá Ndiöxí dangòyo-gá ñuhú cahmi-gá nchaa ñáyiú ducaⁿ chidoco ñaha xii ñáyiú cùu cuendá-gá-áⁿ, te nchaa ñáyiú-áⁿ cuú. ¹⁰ Te sácúíhná sã dúcáⁿ dandahú ñàhá xii ñáyiú chidoco ñaha xii ñáyiú cùu cuendá Yá Ndiöxí-áⁿ dàquée ñaha-gã xii-xi núú ñuhú núú ñuhú àzufré càyú-xi, te diu-ni xíáⁿ sa ñuhu quiti ní quene xití làmár, ndihi téé ní dandàhú ñáyiú ní

xáhaⁿ-dẽ xii-yu sá càháⁿ-dé tnúhu Yá Ndiöxí te ñà ndáá sá càháⁿ-dé tnúhu-gá, te xíáⁿ cuhuⁿ-xi ndoho-xi ñí caa ñí quihíⁿ ndihi quiti ní quene xití làmár, ndihi téé càchí sá càháⁿ tnúhu Yá Ndiöxí te ñà ndáá sá càháⁿ-dé tnúhu-gá.

Cùndáá cuéchi ñáyiú

¹¹ Te ní xiní-í nútñí ñí xilé váha xilé cuixíⁿ, te núú xilé-áⁿ núcò ñí Yaá. Te ndèhe Yaá-áⁿ ñí ndóñuhú àndiu ndihi ñuyúú-a, te ducaⁿ ñí ndóñuhú-xí chi vá cùndecu-gá-xi. ¹² Te sátá dúcáⁿ te ní xiní-í nchaa ñáyiú ní xihí ní cùu, ñáyiú cùnuu ndihi ñáyiú ñá túú cùnuu xínutñí-yu núú Yáá núcò núú xilé váha-áⁿ, te Yaá-áⁿ cúú-gã Yá Ndiöxí, te òré-áⁿ ñí nandíca nchaa tutú núú yódó tnùní nchaa nàcuáa nduu sá ñí quide ñí ñáyiú-áⁿ, te ní nandíca tucu ñngá tutú núú yódó tnùní nchaa ñáyiú ní naníhí tãhú, te nchaa ñáyiú ní xihí ní cùu xínutñí-yu núú Yá Ndiöxí cundáá cuéchi-yu, te nchaa nàcuáa nduu nchaa cuéchi-yu yòdo tnuní núú nchaa tutú-áⁿ ducaⁿ cùndáá. ¹³ Te nchaa ñáyiú ní xihí xití ndute làmár, ndihi nchaa ñáyiú ní xihí núú ñuhu yìchí nchaa ñáyiú-áⁿ cundáá cuéchi-yu nàcuáa ní quidé-yu ñí ñí-yu. ¹⁴ Te vitna te vá cùú-gá ñáyiú chi ñá túú-gã tnúhu xihí, te nchaa ñáyiú ñuhu núú ñuhú núú càyú ñáyiú-áⁿ cúú-yu ñáyiú ní xíta nihnu ñí caa ñí quihíⁿ. ¹⁵ Te ducaⁿ chi nchaa ñáyiú ñá túú yòdo tnuní núú tütú núú yódó tnùní nchaa ñáyiú naníhí tãhú ní dáquée ñaha Yá Ndiöxí xii-yu núú ñuhú núú càyú.

21

Andiu sàa ndihi ñuyúú sáá

¹ Te sátá dúcáⁿ te ní xiní-í andiu sàa ndihi ñuyúú sáá, te andiu sã ndécú díhna ndihi ñuyúú sã ndécú díhna ní ndóñuhú-xí, te tnàhá làmár ní ndóñuhú-xí. ² Te yuhú té Juáá ní xiní-í ñuú Jerusalén sáá ñí quee-xi núú ndécú Yá Ndiöxí, te ñuú-áⁿ cúú-xí ñuú mée-gã, te ío vii càa chi càa datná cáá ñí ñadíhí xíchí tñãndaha. ³ Te ní tecú dóho-í níhí ní cáháⁿ ñí sá ñí cáháⁿ andiu, te càchí-xi:

—Chí cùndedóho ñí tnúhu na càháⁿ-í-a: Yá Ndiöxí ndécú ndihi-gá cue ñáyiú vitna, te ducaⁿ-nã cundecu ndihi ñaha-gã xii-yu, te diú-yu cùú-yu ñáyiú cùu cuendá-gá, te

vá ííⁿ ndùu ìíⁿ quíú-gǎ te dañá ñàha-gá xií-yu. ⁴Te mee Yǎ Ndiǒxí cada-gá sá ñà túú tñàhí-gá ná cani iní-yu cundecú-yu, te ni vǎ quíní-gá-yu tnúhu xihí, te ni vǎ quíní-gá-yu tnúhu ndàhyú, te ni vǎ quíní-gá-yu tnúhu ndìhú iní-xi, te ni vǎ quíní-gá-yu tnúhu cùhú, chi nchaa sá ñí xíní-yu ñuyúú dǐhna vá quíní-gá-yu vitna —duha cǎchí sá ñí cáhá^{n-á}.

⁵Te Yaá núcǒo núú xilé váha-áⁿ ñí cachí tnúhu-gá xii-í, te cǎchí-gá:

—Yúhú quídè-í nàcuáa nduu saa nchàa sá cùndècu vitna. Te vitna chido tñùní-n ìíⁿ núú tütú nchaa tnúhu sá ñí cáhá^{n-í-a}, chi nchaa tnúhu-a cùu-xi tnúhu ndáá cuíti —duha cǎchí-gá.

⁶Te dàtnùní ní cachí tnúhu tucu-gá xii-í:

—Sa ní xínu cava nchaa chùuⁿ ní sani iní-í cada-í, te ñíu-ni yúhú cùú-í Yaá sa ndècu ndéé cùtñàhá ní ngáva ñuyúú, te ñíu-ni-í cundecu-í ñí caa ñí quíhíⁿ. Te nchaa ñáyíu cùní tuha ñàha xii-í te cada iní-yu sá dàtná ndute cùu-xi sá cuǎñaha tǎhù-í xií-yu candeca-xi iní-yu ñí caa ñí quíhíⁿ. ⁷Te nchaa ñáyíu na cùndee iní yáha nándi sá ná yáha-yu sá cuendá-í, te ñáyíu-áⁿ nduu táhù-yu cundecu váha-yu, te yúhú cuu-í Ndiǒxí-yu, te ducaⁿ mée-yu cuú-yu déhe-í. ⁸Te nchaa ñáyíu na yùhú ndoho cuendá-í quíhíⁿ-yu núú ñùhú núú càyú ndìhí ñáyíu ñá túú sàndáá iní ñáhá xii-í, ndìhí ñáyíu quide nándi nchaa sá cuèhé sá dúhá, ndìhí ñáyíu sàhni tñaha, ndìhí ñáyíu ndècu ichi dǐí iní, ndìhí ñáyíu quide nduu, ndìhí ñáyíu chìñuhu nchaa sá cǎchí-yu cùu ndiǒxí ní cadúha cue téé ñuyúú-a, ndìhí ñáyíu dàcuandehnde, nchaa ñáyíu ducaⁿ xǐquide-áⁿ cuíta nihnú-yu chi quíhíⁿ-yu núú ñùhú núú ñùhú àzufré càyú-xi —duha ní cáháⁿ Yǎ Ndiǒxí ní cachí tnúhu-gá xii-í.

Ñúú Jerusàlén sáá

⁹Te núú ùsá espíritú xǐnehe tícùú ñùhú tñùhu ndòho, te ìíⁿ-xi ní quixi-xi te cǎchí-xi:

—Taquixi, te na dànehé ñáhà-í xii-n nchàa ñáyíu cùu cuendá Yaá cáá dàtná cáá ìíⁿ mbéé quíti ní dánícuèhé-güedé, ñáyíu-áⁿ cada iní-n sǎ cùú-yu dàtná ìíⁿ xíchí cuéché vitna tñándaha, te ducaⁿ càda iní-n sǎ cùú-yu

chi cundecú-yu ndìhí-gá —duha ní cachí tnúhu espíritú-áⁿ xii-í.

¹⁰Te òré quídé ñàha espíritú Yǎ Ndiǒxí xii-í nàcuáa cǎchí iní-xi, te espíritú néhé tícùú-áⁿ ndéca ñàha-xi xii-í cuáaá ìíⁿ tǐndúú dùcúⁿ, te xiáⁿ ñí dánèhé núú ñáhá-xi xii-í ñúú Jerusàlén te ñúú-áⁿ ñí quee-xi núú ndécú Yǎ Ndiǒxí, te ñúú-áⁿ cùú-xi ñúú mée-gǎ. ¹¹Te ñúú-áⁿ ìo cǎhnu cuu-xi chi ducaⁿ ìo cǎhnu cuu mee-gá, te dàtásaⁿ-xi dàtná dàtásaⁿ yúú váha sá nání jǎspé yúú cáá dàtná cáá vǐdriú sá túu ñngá xio ndàa sátá-xi. ¹²Te ñí cǎndéé yuhu ñúú-áⁿ sùúní dùcúⁿ nchaa sá ñùhú dòco, te nchíi úxúú yuyèhe-xi, te ndí tñahá ìíⁿ ìíⁿ yuyèhe-áⁿ xǐndecu ìíⁿ caa espíritú xínú cuèchi núú Yǎ Ndiǒxí. Te ndí tñahá ìíⁿ ìíⁿ yuyèhe-áⁿ yódó tñùní ñíu ìíⁿ caa xichí cue ñáyíu isràél. ¹³Te úní yuyèhe-xi nchíi ndàa xio nacuáa quène nchíanchii, te úní tucu yuyèhe-xi nchíi ndàa nacuáa quée nchíanchii, te úní tucu yuyèhe-xi nchíi ndàa xio cuha nacuáa quène nchíanchii, te úní tucu yuyèhe-xi nchíi ndàa xio datni nacuáa quène tucu nchíanchii. ¹⁴Te sá ñùhú dòco-áⁿ chi úxúú tñahá yúú cùú cimientú-xi, te ndí tñahá ìíⁿ ìíⁿ yúú-áⁿ ndéé ìíⁿ caa ñíu cue téé ní cáháⁿ tnúhu Yaá cáá dàtná cáá ìíⁿ mbéé quíti ní dánícuèhé-güedé, te ñíu mee-gǎ ní táuchíúⁿ-gǎ ní cáháⁿ-güedé tnúhu-gá.

¹⁵Te espíritú sá cǎháⁿ ndìhí ñàha xii-í-áⁿ néhé-xi ìíⁿ sá cání ñí cuáha mee-ni dǐhúⁿ cuááⁿ, te ndìhí xiáⁿ chícùhá-xi ñúú-áⁿ, ndìhí sá ñùhú dòco ñúú-áⁿ, ndìhí nchaa yuyèhe-xi. ¹⁶Te ñúú-áⁿ ìíⁿ-ni nèhe-xi cuendá quèhéⁿ-xi ndìhí cuendá cǎni-xi, te espíritú-áⁿ ní chícùhá-xi ndìhí sá néhé-xi-áⁿ ñúú-áⁿ, te nèhe-xi ócò úú cièndú mǐl mètrú sá cání te ñíu-ni ducaⁿ nèhe-xi cuendá quèhéⁿ-xi, te ñíu-ni ducaⁿ nèhe-xi sá dùcúⁿ nchaa vehe càa ñúú-áⁿ. ¹⁷Te dàtnùní ní chícùhá-xi sá ñùhú dòco ñúú-áⁿ, te xiáⁿ néhé-xi únídico cùmí mètrú sá dùcúⁿ, te ní chícùhá-xi dàtná chícùhá cue ñáyíu ñuyúú-a.

¹⁸Te sá ñùhú dòco-áⁿ ñí cuáha mee-ni yúú váha yúú sá nání jǎspé, te ñíhí ñúú-áⁿ cùú-xi mée-ni dǐhúⁿ cuááⁿ, te càa datná cáá vǐdriú sá ìo váha cǎndoo te túu ndàa ñngá xio. ¹⁹Te ndí úxúú yúú cùú cimientú sá ñùhú dòco-áⁿ ndéé ndí dǐíⁿ núú yúú vii càa sátá-xi, te yúú dǐhna ndéé mee-ni

yúú vâha sá nání jâspé sâtá-xi, te yúú cúú úú ndèé tucu ingá núú yúú vâha sá nání zâfirú sâtá-xi, te yúú cúú ùní ndèé tucu ingá núú yúú vâha sá nání âgatá sâtá-xi, te yúú cúú cùmí ndèé ingá núú yúú vâha sá nání èsmeraldá sâtá-xi. ²⁰ Te yúú cúú ùhúⁿ ndèé tucu ingá núú yúú vâha sá nání ònícé sâtá-xi, te yúú cúú ìnú ndèé tucu ingá núú yúú vâha sá nání còrnalíná sâtá-xi, te yúú cúú ùsá ndèé tucu ingá núú yúú vâha sá nání crìsólítú sâtá-xi, te yúú cúú ùná ndèé tucu ingá núú yúú vâha sá nání bèrilú sâtá-xi, te yúú cúú ìⁿ ndèé tucu ingá núú yúú vâha sá nání tòpacíú sâtá-xi, te yúú cúú ùxí ndèé tucu ingá núú yúú vâha sá nání crìsopásá sâtá-xi, te yúú cúú ùxí ìⁿ ndèé tucu ingá núú yúú vâha sá nání jâcintú sâtá-xi, te yúú cúú ùxúú ndèé tucu ingá núú yúú vâha sá nání âmatístá sâtá-xi. ²¹ Te ndi ùxúú yuyèhe sá ñúhú dòco-áⁿ cúú-xí mèe-ni yúú vâha sá nání pèrlá, te ndùu ni yúú cúú ìⁿ ìⁿ yuyèhe-áⁿ. Te tnuú cáhnú ndècu xití ñúú-áⁿ cúú-xí mèe-ni díhúⁿ cuàáⁿ, te càa-xi datná cáá vîdriú sá tûu ndàa ingá xio.

²² Te ní xíní-í sá ñà túú vèhe núú chíñùhu ñáyíu Dútú Ndiòxí cáá ñúú-áⁿ, chí mee-ná Dútú Ndiòxí Yáa quidé nchàa-ndi túhú sá vâha ndècu ñúú-áⁿ, ndihí Yáa cáá datná cáá ìⁿ mbéé quití ní dánícuehé-güedé. ²³ Te ñúú-áⁿ ñà túú-gá xíní ñùhu-xi nchíanchii dayèhé-xi, te ni yóó ñà túú-gá xíní ñùhu-xi, chí mee-ná Yá Ndiòxí dáyéhé-gá ñúú-áⁿ ndihí Yáa cáá datná cáá ìⁿ mbéé quití ní dánícuehé-güedé. ²⁴ Te cue ñáyíu nchaa ñúú cáá ñúyíú, ñáyíu ní naníhí tãhú xíndecu ñúú-áⁿ dáyéhé-gá núú-yu, te nchaa cue téé yíndaha ñaha xii-yu nèhe-güedé sá yíñùhu sá cúú-xí ñúú-áⁿ, te quíde cahnu ñaha-güedé xii-gá. ²⁵ Te yuyèhe ñúú-áⁿ ñà túú tñahí nàndedí, te ñúú-áⁿ ñà túú tñahí cùndiquíⁿ. ²⁶ Te nchaa ñáyíu nèhé-yu sá yíñùhu sá cúú-xí ñúú-áⁿ te quíde cahnú-yu Yá Ndiòxí. ²⁷ Te ñúú-áⁿ vâ cúú cùndecu ni ìⁿ ñáyíu ndècu ichi cuehé ichi duha, te ni ìⁿ ñáyíu ndehnde, te ni ìⁿ ñáyíu quíde sá ñà túú cùu vâha iní Yá Ndiòxí vá cúú cùndecú-yu ñúú-áⁿ, chí mee-ni ñáyíu naníhí tãhú ñáyíu yòdo tñuní núú tütú Yáa cáá datná cáá ìⁿ mbéé quití ní dánícuehé-güedé,

mee-ni ñáyíu-áⁿ cundecú-yu ñúú-áⁿ.

22

¹ Te sâtá dúcáⁿ te diu-ni espíritú-áⁿ ní dánèhé núú ñáhá-xí xii-í yúte núú ñúhú ndute candoo canine, te ndute-áⁿ candeca-xi iní ñáyíu ni caa ni quíhíⁿ, te ndute-áⁿ quée-xí mèi núú núcõo Yá Ndiòxí ndihí Yáa cáá datná cáá ìⁿ mbéé quití ní dánícuehé-güedé. ² Te cuádava tnuú cáhnú yâha xití ñúú-áⁿ cáá yúte-áⁿ, te xio xio yuhu yúte-áⁿ níhnú yùtnu cuuⁿ sávidí-xi, te sávidí nchaa yutnu-áⁿ cúú tucu-xi sá cándeca iní ñáyíu ni caa ni quíhíⁿ, te nchaa yutnu-áⁿ cúúⁿ sávidí-xi úxúú xito ìⁿ cuíá chí ndi tñahá yóó cúúⁿ sávidí-xi, te nchaa ndaha-xi cùu-xi tátna sá cúú-xí nchàa ñáyíu. ³ Te vá yõo ìⁿ-gá cada ìⁿ sá ñà túú cùu vâha iní Yá Ndiòxí ñúú-áⁿ. Chí ñúú-áⁿ núcõo mee Yá Ndiòxí ndihí Yáa cáá datná cáá ìⁿ mbéé quití ní dánícuehé-güedé xítaxi tñuní-gá, te nchaa ñáyíu xínu cuechi núú-gá cada càhnu ñahá-yu xii-gá. ⁴ Te nchaa ñáyíu-áⁿ cundehe núú-yu Dútú Ndiòxí, te tneé-yu cundeé diu-gá. ⁵ Te ñúú-áⁿ vâ quíní-gá-yu niú, te ni vâ cánèhe chiuⁿ-gá-yu ñúhú cutnùní núú-yu, te ni nchíanchii ñà túú-gá xíní ñùhu-xi dayèhé ñúú-áⁿ chí mee Dútú Ndiòxí dáyéhé-gá, te ni caa ni quíhíⁿ cunúú-yu cundecú-yu ñúú-áⁿ.

Sa ta cùyatni nduu quixi tucu Xítóhó Jesucristú

⁶ Te sâtá dúcáⁿ te ní cachí tñúhu espíritú xínú cuèchi núú Yá Ndiòxí-áⁿ xii-í:

—Nchaandi túhú tñúhu-a cùu-xi mee-ni tñúhu ndáá cuítí. Te Yá Ndiòxí Yáa dácàhu iní nchaa cue téé càháⁿ tñúhu-gá nàcuáa cáháⁿ-güedé ní tendaha-gá ìⁿ espíritú xínú cuèchi núú-gá ní quixi-xi ní dánèhé-xi nchaa ñáyíu xínu cuechi núú-gá nchaa nàcuáa cada-gá, te vá cùyaa-gá ducaⁿ cada-gá —duha càchí espíritú-áⁿ.

⁷ Te ní càháⁿ Xítóhó Jesucristú, te càchí-gá:

—Ío ndihí quixi tucu-í!

’;Te ío vâha tñahá nchaa ñáyíu tñi nchaa tñúhu càháⁿ Yá Ndiòxí yódó tñuní núú tütú-a! —duha càchí-gá.

⁸ Te yúhú té Juáá ní tecú dóho-í nchaa nàcuáa ní ngódó tñuní núú tütú-a, te ní xíní núú-í nchaa nàcuáa cada-xi ndéé cuèé-gá.

Te sátá dúcáⁿ ñi cuu te ní ngüíñi xítí-í núú espíritú sá ñi dánèhé núú ñáhá ncháa xiáⁿ cuendá chiñuhu-í-xi ni cùu. ⁹ Te ní cachí-xi: —Vá dúcáⁿ càda-n, chi yúhú dicó xínú cuèchi-í núú Yá Ndióxi dàtná cúú yòhó ndihí ncháa dava-gá ñáyiú ndècu ndihí-n ichi-gá càháⁿ-ndó tñuhu-gá, ndihí ncháa ñáyiú tñi ncháa tñuhu ndèé núú tütú-a, te xiáⁿ càchí-í sá vǎ dúcáⁿ càda-n, chi mee Yá Ndióxi ducaⁿ chiñuhu-n-gá —càchí espíritú-áⁿ xii-í.

¹⁰ Te ní cachí tñuhu tucu-xi xii-í, te càchí-xi:

—Vá chidáhu-n ñi ñiⁿ tñuhu Yá Ndióxi ndèé núú tütú-a, chi sa ní cuyatni cada-xi ncháa nàcuáa ndèé tñuní. ¹¹ Te dañá sǎ ncháa ñáyiú ndècu ichi cuehé ichi duha na cùndecu-ní-yu ichi-áⁿ, te ducaⁿ-ni dàña-n ncháa ñáyiú quide nándi-gá ncháa sá cuèhé sá dúhá ná càda nahi-ní-yu ncháa sá cuèhé sá dúhá sàni iní-yu, te ncháa ñáyiú quide váha te ducaⁿ-ni na càda váha-yu cundecú-yu, te ncháa ñáyiú quide ncháa nacuáa cùu váha iní Yá Ndióxi te diu-ni ducaⁿ na càdá-yu cundecú-yu —duha càchí espíritú-áⁿ.

¹² Te ní cachí Xítoho Jesucristú:

—Cundedóho-n tñuhu na càháⁿ-í-a. Ío ndihí quixi tucu-í, te canehe-í ncháa sá ndúú tǎhú ñáyiú quixi, te nàcuáa ndùu chiunⁿ ní quidé-yu ñi ñiⁿ-yu te ducaⁿ cùnduu sá cuñaha-í nduu tǎhú-yu. ¹³ Te yúhú cúu-í Yaá sa ndècu ndèé cùtnáhá ní ngáva ñuyúí, te diu-ni-í cundecu-í ñi caa ñi quíhíⁿ —duha càchí-gá.

¹⁴ Te váha tǎhú ncháa ñáyiú sa ní nduu ndoo ní nduu nine iní-xi, chi ñáyiú-áⁿ ñi nduu tǎhú-yu quíhu-yu xítí ñuú-áⁿ, te caxí-yu sávidí yutnu nùtní-áⁿ te xiáⁿ candeca-xi iní-yu ñi caa ñi quíhíⁿ. ¹⁵ Te ñuú-áⁿ vǎ cúú quíhu ñi ñiⁿ ñáyiú ndècu ichi cuehé ichi duha, ñi cuè ñáyiú quide nduu, te ñi cuè ñáyiú ndècu ichi díí iní, te ñi cuè ñáyiú sàhni tñaha ñáyiú-xi, te ñi cuè ñáyiú chiñuhu ncháa sá ñi cadúha cue téé ñuyúí-a càchí-yu cùu ndióxi, te ñi cuè ñáyiú tñáhá iní dacuàndehnde, te ñi ñiⁿ ñáyiú ducaⁿ xíquide vá ndúú tǎhú-yu quíhu-yu xítí ñuú-áⁿ.

¹⁶ Te ní càháⁿ tucu Xítoho Jesucristú, te càchí-gá:

—Yúhú Xítoho Jesucristú ní tendaha-í espíritú xínú cuèchi núu-í cuendá cachí tñuhu-xi xii-n nàcuáa ndùu tñuhu cúñaha-n xii ncháa ñáyiú ndècu ndihí-n ichi-í dácuàha tñuhu-í ñiⁿ ñiⁿ ñuú. Te yúhú cúu-í mei ñàni tñáhá ndíi Dávíí, te cada iní-n sǎ cúu-í dàtná ñiⁿ chódíní quiti quène datneé —duha càchí-gá.

¹⁷ Te ncháa ñáyiú cùu cuendá Xítoho Jesucristú Yaá cáá dàtná cáá ñiⁿ mbéé quiti ní dánicuèhé-güedé, diu-ni ñáyiú-áⁿ cúu-yu ñáyiú cada iní-ó sǎ cúu-yu ñiⁿ ñadíhí xíchí tñandaha ndihí ñaha xii-gá, te ñáyiú-áⁿ ñiⁿ-ni càháⁿ-yu ndihí Espíritú Yá Ndióxi, te xǎháⁿ-yu ndihí Espíritú-gá xii ncháa dava-gá ñáyiú:

—Chí táquixi —cachí-yu xǎháⁿ-yu ndihí Espíritú Yá Ndióxi.

Te ncháa ñáyiú ducaⁿ ndèdóho tñuhu-áⁿ vitna, te xini ñuhu-xi ducaⁿ càháⁿ-yu tñáhá-yu cúñáhá-yu xii ncháa dava-gá ñáyiú-áⁿ, te ncháa ñáyiú cuini tuha ichi-gá te na quixí-yu, te dicó ducaⁿ cùu tǎhú-yu sá cándeca iní-yu ñi caa ñi quíhíⁿ.

¹⁸ Te ncháa nchòhó ñáyiú ndèdóho ncháa nàcuáa càháⁿ tñuhu Yá Ndióxi ndèé núú tütú-a càháⁿ-í dóho-ndo. Te núu ñiⁿ ñáyiú na còdo-gá tñuhu chido tñuní-yu núú tütú-a, te Yá Ndióxi ío dandòho ñaha-gá xií-yu chi yáha-yu ncháa tñundòho yodo tñuní núú tütú-a te núu ducaⁿ na càdá-yu. ¹⁹ Te núu ñiⁿ ñáyiú na chidáhu dava tñuhu Yá Ndióxi ndèé núú tütú-a te ñáyiú-áⁿ vǎ ndúú tǎhú-yu cundecú-yu ñuú-gá, te ñi vǎ ndúú tǎhú-yu sá cándeca iní-yu ñi caa ñi quíhíⁿ dàtná yódó tñuní núú tütú-a.

²⁰ Te Xítoho Jesucristú Yaá càháⁿ sá ncháa tñuhu-a cùu-xi tñuhu ndáá ní càháⁿ-gá ní tecú dóho-í, te càchí-gá:

—Ndáá sá ío ndihí quixi tucu-í —duha càchí-gá.

Te yúhú ní xáhaⁿ-í xii-gá:

—Ducaⁿ na cùnduu, taquixi yohó Xítoho Jesucristú —duha ní xáhaⁿ-í xii-gá.

²¹ Te Xítoho Jesucristú ío na chindee chítúu ñaha-gǎ xii-ndo ncháa-ndo. Te ducaⁿ na cùnduu. Te ío chí cadá ndèé iní-nǎ vitna.